


Dios
pejumelivaisibaxuto
pejanalivaisibaxuto



New Testament in Guahibo

Dios pejumelivaisibaxuto pejanalivaisibaxuto New Testament in Guahibo

copyright © 2011 Wycliffe Bible Translators, Inc.

Language: Guahibo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guahibo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2014-08-06

Contents

SAN MATEO	1
SAN MARCOS	94
SAN LUCAS	149
SAN JUAN	244
HECHOS	307
ROMANOS	391
1 CORINTIOS	429
2 CORINTIOS	469
GÁLATAS	494
EFESIOS	510
FILIPENSES	523
COLOSENSES	532
1 TESALONICENSES	541
2 TESALONICENSES	548
1 TIMOTEO	552
2 TIMOTEO	562
TITO	569
FILEMÓN	574
HEBREOS	576
SANTIAGO	606
1 SAN PEDRO	616
2 SAN PEDRO	627
1 SAN JUAN	634
2 SAN JUAN	643
3 SAN JUAN	644
JUDAS	646
APOCALIPSIS	650

Pexanialivaisi Jesucristo pelivaisi, San Mateo peyaquinaelivaisi

Jesucristo pijasalinaivimi yabara pelivaisi (Lc 3.23-38)

¹ Mapalivaisije Jesucristo pijasalinaivimi pelivaisi. Jesucristo rabaja Davidpijinē pemomoxiyajuvēnēnē. Davidpijinē pijinia Abrahampijinē pemomoxiyajuvēnēnē.

² Copiaya Abrahampijinēmi xaina pexēnato. Pevēnē Isaac. Isaacpijinē juya pexēnato xaina. Pevēnē Jacob. Jacobpijinē juya pexi xaina. Pexiyajuvēnēnē pevēnē Judá. Judápijinē pematapijinēbeje, pejuyapijivi ata, xaina. ³ Judápijinē juya pexēnatobeje xaina. Itsanē pevēnē Fares. Itsanē Zara. Bajaraponēmibeje penapijiva pevēnē Tamar. Farespijinē juya pexēnato xaina. Pevēnē Esrom. Esrompijinē juya pexēnato xaina. Pevēnē Aram. ⁴ Arampijinē juya pexēnato xaina. Pevēnē Aminadab. Aminadabpijinē juya pexēnato xaina. Pevēnē Naasón. Naasónpijinē juya pexēnato xaina. Pevēnē Salmón. ⁵ Salmónpijinē juya pexēnato xaina. Pevēnē Booz. Boozpijinē penapijiva pevēnē Rahab. Boozpijinē juya pexēnato xaina. Pevēnē Obed. Obedpijinē penapijiva pevēnē Rut. Obedpijinē juya pexēnato xaina. Pevēnē Isaí. ⁶ Isaípijinē juya pexēnato xaina. Pevēnē David. Bajaraponēmi nacuaevecsīnēmi. Davidpijinē yacajērēta Uríaspijinē pijavami. Nexata bajarapajivibeje juya pexēnato xainabeje. Pevēnē Salomón. ⁷ Salomónpijinē juya pexēnato xaina. Pevēnē Roboam. Roboampijinē juya pexēnato xaina. Pevēnē Abías. Abíaspijinē juya pexēnato xaina. Pevēnē Asa. ⁸ Asapijinē juya pexēnato xaina. Pevēnē Josafat. Josafatpijinē juya pexēnato xaina. Pevēnē Joram. Jorampijinē juya pexēnato xaina. Pevēnē Uzías. ⁹ Uzíaspijinē juya pexēnato xaina. Pevēnē Jotam. Jotampijinē juya pexēnato xaina. Pevēnē Acáz. Acázpijinē juya pexēnato xaina. Pevēnē Ezequías. ¹⁰ Ezequíaspijinē juya pexēnato xaina. Pevēnē Manasés. Manaséspijinē juya pexēnato xaina. Pevēnē Amón. Amónpijinē juya pexēnato xaina. Pevēnē Josías. ¹¹ Josíaspijinē juya pexi xaina. Pexiyajuvēnēnē pevēnē Jeconías. Jeconías pematapijinē, pejuyapijivi ata, xaina. Pamatacabi Israel nacuapijivi cobecēbiaya caponatsi Babilonia nacuyabelia, bajarapamatacabi naexana Jeconíaspijinē.

¹² Bajaraxuacujinae Jeconíaspijinē juya pexēnato xaina. Pevēnē Salatiel. Salatielpijinē juya pexēnato xaina. Pevēnē Zorobabel. ¹³ Zorobabelpijinē juya pexēnato xaina. Pevēnē Abiud. Abiudpijinē juya pexēnato xaina. Pevēnē Eliaquim. Eliaquimpijinē juya pexēnato xaina. Pevēnē Azor. ¹⁴ Azorpijinē juya pexēnato xaina. Pevēnē Sadoc. Sadocpijinē juya pexēnato xaina. Pevēnē Aquim. Aquimpijinē juya pexēnato xaina. Pevēnē Eliud. ¹⁵ Eliudpijinē juya pexēnato xaina. Pevēnē Eleazar. Eleazarpijinē juya pexēnato xaina. Pevēnē Matán. Matánpijinē juya pexēnato xaina. Pevēnē Jacob. ¹⁶ Jacobpijinē juya pexēnato xaina. Pevēnē José. Bajaraponēmi María pamona. Bajarapovami Jesús pena, ponē yabara: “Cristo, ponē Dioso athēbēvecsica itorobatsi jivi pecapanepaenexa,” jaitsi.

¹⁷ Nexata Abrahampijinēmita petaxuxuabicujinae jivi penaexanaponaejava, trecenēta naexana Davidpijinē. Bajaraxuacujinae icatsia Davidpijinēmita petaxuxuabicujinae jivi penaexanaponaejava, trecenēta icatsia naexana Jeconíaspijinē. Pamatacabi Israel nacuapijivi cobecēbiaya caponatsi Babilonia nacuyabelia, naexana Jeconíaspijinē. Bajaraxuacujinae icatsia Jeconíaspijinēmita petaxuxuabicujinae jivi penaexanaponaejava, trecenē pijavata naexana Jesucristo jane baja, ponē Dioso athēbēvecsica itoroba jivi pecapanepaenexa.

Pacuenia Jesús naexana yabara pelivaisi (Lc 2.1-7)

¹⁸ Jesucristo itsa naexana mapanacuataje, naexana mapacueniaje. Copiata Josébeje Maríabeje najumejaitabeje penapitsinexabeje. Nexata baja María jejai Josébeje penapitsinexabeje. Bajaraxuacujinae penapitsivajënaeyabeje, María nayapëtane penacoxitsijava Espíritu Santo pejamatabëcueneta. ¹⁹ José, María jane baja pamonanexa, bitso penajamatabëcuenereviabinë. Bajaraxuata José apo jitsipae daxitajivi pitabarata pevajunupaebijava María penacoxitsijava. Nexata picani José bëpënëa jamatabëjumai tsaponapona:

—Itsanëjavabelia María nacoxita. Nexata ajumejibia copatsianajë. Apo pitsinë baja tsane María tajavanexa, jamatabëjai picani bëpënëa tsaponapona José.

²⁰ Pamatacabi abaxë José bajarapacuenia najamatabëxainapona, majitsinaebota José tsitanaitajëtatsi Dioso pitorobinëtsica, ángel. Nexata ángel jumaiti Joséjavabelia:

—José, xamë raja Davidpijinë pemomomë. Pëtsa cujunavame nepitsijava María nijavanexa. Tsipaji raja panacueto María yacotaponapona, Espíritu Santo saya pejamatabëcueneta nacoxita. ²¹ Bajarapova exanaena penacuetonëyo. Vënërubianame bajarapanacuetonëyo Jesús. Tsipaji raja bajaraponë capanepaena daxita pijajivi pibisiacue ne pexanaeconimivecua. ²² Bajarapacuenia María penacuetonëyo exanaena pecopiapatsinexa pacuenia baja cajena bajayata Diosojumepaebinëmi profetanëmi Dioso pejamatabëcueneta tajëvelia vajunupaeba. Profetanëmi bajayata tajëvelia bajarapanacuetonëyo yabara jumaiti mapacueniaje:

²³ Petiriva apo naperabëquenatsinejeva pebijavabelia, nacoxitsiana. Exanaena penacuetonëyo. Vënërubianatsi Emanuel. “Emanuel,” pejaijume: “Dioso nacayajava,” pejaijume,

jai bajayata tajëvelia profetanëmi Dioso pejamatabëcueneta, jai ángel majitsinaebota Joséjavabelia.

²⁴ Nexata José piamajitsinaecujinae naëcota. José jumecovënëta pacuenia itorobatsi ángel. Nexata baja José pijaboyaberena María barëpata pijavanexa. ²⁵ Itsiata abaxë José apo imoxoyobi pijava penamataxainaenacuetonëyo pevecuanaexanaevajënaeyatsi. Bajarapanacuetonëyo jane baja José vënëruba JESUS.

2

Pacuenia tulupu perubenaejava pecanaëcobivi najetarubena petaenexa Jesúsneyo yabara pelivaisi

¹ Jesús naexana Belén tomarata, Judea nacuata peecaetomarata. Bajarapamatacabi nacuaevetsinë Herodes Judeanacua eveta. Nexata Jesús penaexanaecujinae, pebijivi, tulupu perubenaejava pecanaëcobivi, pata tajënacua javavetsina. Pata Jerusalén tomara javabetsina. ² Tulupu perubenaejava pecanaëcobivi yanijobapona jivijavabelia:

—¿Detsa jota barëecatsi panacuetonëyo naexana judíovi pepo pevetsinënexa? Payapëtaniji bajaraponëyo penaexanaejava. Tsipaji baja cajena pataniji bajaraponëyo penaexanaejavata penaitajëtsituluputo. Bajarapatuluputo pataniji patajanacuatareca. Bajaraxuata paponainajë mabetsinaje patataenexa bajaraponëyo, bajaraponëyo pitabarata yaiyataeya patamatabacabëta patatonubenaenexa, jai tsaponae jivijavabelia tulupu perubenaejava pecanaëcobivi.

³ Nexata Herodes, Judeanacua pevetsinë, vënëlivaisitane tulupu perubenaejava pecanaëcobivi bajarapacuenia pejumaitisaponaejava jivijavabelia Jesúsneyo yabara. Nexata Herodes bitso najamatabëxaina. Daxita Jerusalén tomarata pejinavanapaevi ata bitso najamatabëxaina. ⁴ Nexata Herodes junata daxita sacerdotevi penamatacaitorobivi, judíovi pecujarubivi yajava, penacaetuatsinexa Herodes pijabota. Nexata Herodes jumaiti penacaetuatsivijavabelia:

—Bajayata profetanë tajëvelia itsa vajunupaeba Cristo penaexanaejavanexa, ¿detsa jota yabara: “Bajarajota Cristo naexanaena,” jai? jai Herodes.

⁵ Nexata penacaetuatsivi jumaitsi Herodesjavabelia:

—Belén tomarata raja naexanaeyapaeba, Judea nacuata peecaetomarata. Bajayata baja cajena Diosojumepaebinëmi profetanëmi tajëvelia vajunupaeba bajaraponë penaexanaejavanexa Belén tomarata. Bajayata Diosojumepaebinëmi profetanëmi peyaquinaelivaisita bajaraponë penaexanaejavanexa yabara tajëvelia jumaitsi mapacueniaje:

⁶ Belén tomarata naexanaena jivi pepo pevetsinënexa. Bajaraponë jane baja evetsiana Dioso pijajivi, Israel nacupijivi. Bajaraxuata Judea nacuata penaetomaraxi, daxita tomaraxivecua, Be léntomara cajena bitso peyaiyataetomaratsi tsane, jai baja cajena mapacueniaje bajayata tajëvelia Diosojumepaebinëmi profetanëmi peyaquinaelivaisita, jai penacaetuatsivi Herodesjavabelia.

⁷ Bajaraxuacujinae Herodes muetsia junata tajënacuvetsina pepatsivi, tulupu perubenaejava pecanaëcobivi. Nexata Herodes jumaitsi tulupu perubenaejava pecanaëcobivijavabelia:

—¿Detsa baja pajuametobeje xaina bajarapatuluputo penaitajëtsicujinae? jai.

⁸ Nexata petsipaebicujinaetsi Herodes itorobalia bajarapamonae Belén tomarabelia. Herodes jumaitsi tulupu perubenaejava pecanaëcobivijavabelia:

—Paponaremelia Belén tomarabelia. Xaniavaetsia pajaitsianame bajaraponëyo. Itsa pacaxitajarabianame, panevajunucaponaeremena. Nexata xanë ata nalianë tsane. Yaiyataeya tamatabacabëta tonanucaejitsianë bajaraponëyo pitabarata, jai Herodes tulupu perubenaejava pecanaëcobivijavabelia.

⁹ Nexata jane baja tulupu perubenaejava pecanaëcobivi ponalia Belén tomarabelia. Nexata bajarapamonae namutualia penajetarubenaejavata, jemata icatsia napebeta tuluputo, patuluputo bajarapamonae tane pijanacuatareca. Nexata bajarapatuluputo bajarapamonae matacanajetarucatsi. Matapania itsajota Jesúsnyëyo pena barëecatsi pematatsënëatsia, bajarapatuluputo rucojopa. ¹⁰ Tulupu perubenaejava pecanaëcobivi ita tane bajarapatuluputo, bitso barëya. ¹¹ Nexata bajarapamonae boyalia ita joneya, tane Jesúsnyëyo, pena yajava. Nexata tulupu perubenaejava pecanaëcobivi yaiyataeya pematabacabëta tonubenajunua Jesúsnyëyo pitabarata. Bajaraxuacujinae pecapatsicajonixi matapana, penamatamotsijavanë pejebicajonixi. Nexata Jesúsnyëyo rajuta orojanë. Rajutanua petuxujuvijavabeje. Itsajava inciensovënëjava. Itsajava mirravënëjava. ¹² Bajaraxuacujinae tulupu perubenaejava pecanaëcobivi meravi majitsinaebota Dioso itavetatsi penaviabiyaniya nacuaevetsinë Herodesjavabelia. Nexata tulupu perubenaejava pecanaëcobivi saicaya namutua baja naviaba pijanacuayabereca.

Pacuenia José barënajetabajirava Jesúsnyëyo Egipto nacuyabelia yabara pelivaisi

¹³ Tulupu perubenaejava pecanaëcobivi penaviabicujinae, Dioso pijaáangel meravi José majitsinaebota tsitanaitajëtatsi. Nexata ángel jumaitsi Joséjavabelia:

—José, nonotapunare baja. Barëponare baja penacuetonëyo, pena yajava. Barënajetabajiravare Egipto nacuyabelia. Bajarajotalia barëponaponaename. Matapania icatsia ita catsipaebianatsi, barënaviatsiaremena. Tsipaji raja nacuaevetsinë Herodes tsiquirinëyo tsimaxërenajitsiatsi pebeyaxuabinexatsi, jai ángel Joséjavabelia.

¹⁴ Nexata José nonotapuna. Piamajitsinaemeravi baja José barëpona Jesúsnyëyo, pena yajava. Barënajetabajirava Egipto nacuyabelia. ¹⁵ Bajarajotalia José barëponapona bajayajebi. Matapania baja Herodes ita tëpa, José barëpatsijitsiarena Israel nacuyaberena. Bajarapacuenia tocopiapatatsi tsipaji baja cajena bajayata Diosojumepaebinëmi profetanëmi Dioso pejamatabëcueneta tajëvelia jumaitsi Jesús yabara mapacueniaje: “Taxënato icatsia junatsiarenejë penaviatsinexa Egipto nacuverena,” jai ra Dioso, jai baja cajena bajayata tajëvelia profetanëmi Jesús yabara.

Pacuenia nacuaeavetsinē Herodes pijajivi itoroba pebinacuetoxi pebeponaenexa yabara pelivaisi

¹⁶ Nacuaeavetsinē Herodes picani jumaitsi tulupu perubenaejava pecanaëcobivijavabelia: “Itsa pacaxitajarabianame bajarapanacuetonēyo, paneva-junucaponaeremena,” jai picani Herodes Jesúsñeyo yabara. Itsiata tulupu perubenaejava pecanaëcobivi caxitajarabi ata Jesúsñeyo, apo vajunucapona Herodesjavabelia. Nexata Herodes ita yapētane tulupu perubenaejava pecanaëcobivi apo pevajunucaponaejavatsirena, caxitajarabi ata Jesúsñeyo, Herodes bitso anaepana. Nexata Herodes pijajivi itoroba. Jumaitsi:

—Pabeponaename daxita pebinacuetoxi Belén tomarata, Belén tomarajumavelia penaebonējava ata. Daxita papebinacuetoxi abaxē apo xinae acueyabi pavaibeje, pabeponaename. Pejananaexanaenacuetoxi ata pabeponaenane, jai Herodes pijajivijavabelia.

Bajarapacuenia Herodes pijajivi itoroba pebinacuetoxi pebeponaenexa, Jesúsñeyo picani peyjavabeyaxuabinexatsi. Tsipaji tulupu perubenaejava pecanaëcobivi Herodesjavabelia tsipaeba paepatota taxuxuaba petaejava tuluputo. ¹⁷ Itsa bajarapacuenia pebinacuetoxi beponatsi Belén tomarata, copiapata jane baja pacuenia baja cajena Diosojumepaebinēmi profeta Jeramíaspijinē bajayata tajēvelia yaquina pebinacuetoxi pebejavanexatsi yabara. Bajayata baja cajena profeta Jeramíaspijinē peyaquinaelivaisita tajēvelia jumaitsi mapacueniaje:

¹⁸ Belén tomarajumaverena, Ramá tomarata, ayaicuenia matanueyabiana. Raquelpijiva pemomoxi pexi matanueyabiana. Itavetsi atatsi tsane, itsiata apo copatsi tsane bitso penajamatabëxainaejava. Tsipaji pexi totëpaenatsi, jai bajayata tajēvelia profeta Jeramíaspijinē peyaquinaelivaisita pecoxibeponaejavanexatsi yabara bajarapatomarata.

¹⁹ Nacuaeavetsinē baja Herodes pepuatëpae, Dioso icatsia pijaánel itoroba Joséjavabelia. Nexata ánel meravi majitsinaebota José tsitanaitajētatsi Egipto nacuata.

²⁰ Nexata ánel jumaitsi Joséjavabelia:

—José, nonotapunare. Barëponaename baja tsiquirinēyo, pena yajava. Barënaviaremelia baja icatsia Israel nacuyabelia. Tëpa rabaja ponē picani jamatabëbeyaxuabatsi tsiquirinēyo, jai ánel majitsinaebota Joséjavabelia.

²¹ Nexata baja José nonotapuna. Barëpona tsiquirinēyo, pena yajava. José icatsia barënaviata Israel nacuyabelia. ²² Nacuaeavetsinēmi Herodespijinē pexënato pevënë Arquelao. Nexata Arquelao eveta Judeanacua paxa pevënamuto. Nexata José ita vënëlivaisitane nacuaeavetsinēmi Herodespijinē pexënato pevetsijava Judeanacua, José cujunava Jesúsñeyo pebarëponaejava Judea nacuyabelia. Majitsinaebota José Dioso itavetatsi Jesúsñeyo pebarëponaeyaniva Judea nacuyabelia. Nexata José barëpona Jesúsñeyo Galilea nacuyabelia. ²³ José ita barëpata Jesúsñeyo Galilea nacuyabelia, Nazaret tomarata barëpatajopa pebarëcaenexa Nazaret tomarata. Bajarapacuenia José Nazaret tomarata ita barëca Jesúsñeyo, copiapata jane baja pacuenia baja cajena bajayata Diosojumepaebivimi profetavi tajēvelia jumaitsi. Diosojumepaebivimi profetavi bajayata baja cajena tajēvelia jumaitsi Jesús yabara mapacueniaje: “Ponē Dioso itorobijitsiatsica jivi pecapanepaenexa, bajaraponē yabara jivi jumai tsane: ‘Mara ponēje Nazaret tomarapijinēje,’ jai tsane,” jai baja cajena bajayata tajēvelia profetavimi Jesús yabara.

3

Pacuenia Juan jivibautisabinē Dioso pitorobilivaisi jivi tsipaeba petusato nacuata yabara pelivaisi

(Mr 1.1-8; Lc 3.1-9, 15-17; Jn 1.19-28)

¹ Jesús itsa baja xaina bejamatabëcuene treinta pavaibeje, Juan jivibautisabinë najetaruca Judea nacuatustaruca. ² Juan jivibautisabinë Dioso pitorobilivaisi jivi tsipae-banajetaruca. Jumai tsanajetaruca mapacueniaje:

—Dioso rabaja pijajivi pevetsimatacabinexa, imoxoyo baja pevajënae pecopia-patsinexa. Nexata baja pacopabare pibisiacuene paneexanabiabijava. Panajamatabëcuenepënyorore Diosojavabelia, jai tsanajetaruca Juan jivijavabelia.

³ Bajarapacuenia Juan Dioso pitorobilivaisi jivi itsa tsipae-banajetaruca, copiapata jane baja pacuenia Diosojumepaebinëmi profeta, Isaíaspijinë, bajayata tajëvelia yaquina Juan pelivaisi. Juan jivibautisabinë Dioso pitorobilivaisi jivi petsipae-banajetaruca-javanexa yabara, yaquina. Profeta Isaíaspijinë peyaquinaelivaisita tajëvelia jumaiti mapacueniaje:

Tanejumelivaisipaebinë vavajai tsane petusato nacuata. Jumaiti tsane jivijavabelia: “Jivi baxaneba panamutoverena najetarucaejitsia petuxanenë. Batoroviaexananua namuto. Bajara pijinia pacuenia paxamë ata panajamatabëcuenexaniavaere pepo petuxanenë pepatsivajënaeyarena,” jai tsane tanejumelivaisipaebinë,

jai profeta Isaíaspijinë bajayata peyaquinaelivaisita Dioso pitorobilivaisi Juan jivi petsipae-banajetaruca-javanexa yabara.

⁴ Juan naxatata camellonata pexanaejava. Naepacëta cuerobocoto. Pexaejava ëbosesë, jabëra yajava. ⁵ Juan petsipaebilivaisi pejumetaenexatsi, muxunapatabiabatsi Jerusalén tomarapijivi, Judea nacuapijivi ata, Jordánmene imoxoyopijivi ata. ⁶ Nexata bajarapamonae pibisiacuene pexanaejavami, roviaalia Diosojavabelia navecuapae-bapona. Nexata bajarapamonae Juan bautisabapona Jordán meneta.

⁷ Jivibitsaëtoxaeneto pata Juanjavaberena pebautisabinexa picani Juan. Bajarapamonae apo jumecovënëtsi ata Dioso pitorobilivaisi, jamatabëcuenenavëxaniabiaya jamatabëjumaiti:

—Juan itsa nacabautisabiana, Dioso nacacapanepaena, jamatabëjai.

Nexata Juan itsa tane ayaibitsaëtoxaeneto fariseovi, saduceovi ata, pepatsijavarena Juan picani pebautisabinexa, nexata Juan jumaiti bajarapamonaejavabelia:

—¡Panajamatabëcuenenavëxaniabivi! Pacuenia jomo rëcëpa itsa tane isoto petajuena-jetarucaejava, bajara saya paitsimë. Dioso rabaja papecananeconitsia exanaematacabinexa, pacaimoxoyotapona. Itsiata acuenebi tsane panevecuapanepaenexa Dioso papecananeconitsia exanaematacabinexa. ⁸ Itsa pajitsipame Dioso papecacapanepaejava, pacopabare pibisiacuene paneexanabiabijava. Dioso pajumecovënëtavanapare. Nexata daxitajivi pacayapëtaena pepacuene baja panecopabijava pibisiacuene paneexanabiabijavami. Pacayapëtaenanua panenajamatabëcuene pënyorotsijava Diosojavabelia. ⁹ Jamatabëcuenenavëxaniabiaya pëtsa panajumaitisimë: “Vaxaitsi cajena Abrahampijinë pemomoxitsi. Nexata Dioso nacacapanepaena,” panajamë pëtsa. Abrahampijinë picani papemomoxi atamë, itsiata pibisiacuene itsa paexanavapaname, nexata bajarapacuenë apo pacatonamatamotsi tsipae Diosojavabelia papecacapanepaenexa. Dioso baja cajena cajëpatsi jivi pexanaenexa mapaibotonëmi ataje, Abrahampijinë bepemomoxi Dioso petaenexa. Nexata bajarapamonae ata Dioso itsa apo jumecovënëtsi, Dioso apo capanepae tsipae. Nexata pacopabare pibisiacuene paneexanabiabijava papecacapanepaenexa Dioso. ¹⁰ Peubinaenë pexainaenë itsa apo tonacuaitsitsi pexaniacuai, nicata sipalita daxita ponaenë apo tonacuaitsitsi pexaniacuai. Nexata baja penicatsicujinae itsa niona bajaraponaenë, caetuata. Xuaba isotojavabelia. Nexata bajaraponaenëmi tajuatsi. Bajara pijinia pacuenia paxamë

ata Dioso pacaxuabiana infiernojavabelia papecatajuenexa, Dioso apo panejume-covënëtsivi. ¹¹ Xanë raja saya jivi bautisabaponajë merata. Tsipaji baja bajarapamonae copaba pibisiacuene pexanabiabijava. Najamatabëcuenepënëyorotanea Dioso-javabelia. Itsiata baitsi jane ponë tacovëverena najetarucaena, tabautisabivi Espíritu Santo tsijamatabëjoneyaexanaenatsi, pitarunutsicotia yajava. Xanë raja saya bevelijamatabëcuenenënë bajaraponëvecua. Nexata bajaraponë vecuaauranë pijazapato ata tatocaponaenexa bepijajivitonëcuenianë. ¹² Arrozxainaenë baja itsa vereta arroz pesiricaejava, jëaba arroz pejëabijavata pepitsinexa ëpexu. Nexata pijaarroz pejëabijavata, saicaya tsatapona ëpexu pesivecua. Nexata ëpexu xaniavaeteta peetsibojavabelia. Pesi pijinia penetapona vayafuabelia petajuitsinexa. Bajara pijinia pacuenia paxamë ata Dioso pejumecovënëtsivivecua Dioso pacatsatsiana papecaxuabinexa infiernojavabelia panenaxuabinexa baja daxitamatacabijavabelianexa. Pamonaë pijinia Dioso pejumecovënëtsivi, Dioso capanepaenatsi pijanacuayabetsia. Pamonaë pijinia Dioso apo jumecovënëtsi, Dioso naneconitsiaexanaenatsi daxitamatacabijavabelianexa apo peverevereaeisotojavabelia, jai Juan daxita bajarapamonaejavabelia.

Pacuenia Juan bautisaba Jesús yabara pelivaisi
(Mr 1.9-11; Lc 3.21-22)

¹³ Jesús naropota Galilea nacujavaverena. Nexata pata Jordán menejavaberena. Jordán menejavata Juan ponapona. Nexata Jesús pata Juanjavaberena pebautisabinexatsi Juan. ¹⁴ Juan picani apo jitsipae pebautisabijava Jesús. Juan nexata jumaitsi Jesúsjavabelia:

—¿Detsa xuajitsia patame tacabautisabinexa? Xamë rajane biji xanë benebautisabame, jai Juan Jesúsjavabelia.

¹⁵ Itsiata Jesús jumaitsi Juanjavabelia:

—Aeconoxae itsiata pacuenia baja cavajëtatsi, netoexanaename. Xanepana vajaexanaenexa daxita Dioso vajanacaitorobicuenia, jai Jesús Juanjavabelia.

Nexata baja Juan jejai pebautisabinexa Jesús. ¹⁶ Nexata jane baja Juan bautisaba Jesús. Jesús pebautisabicujinaetsi nonotajuna menevetsina. Bajarapaepatota Jesús tane athëbëtatsia itaboxo penapatsijava. Nexata Jesús tane Espíritu Santo perunaejavatsica beucucuto. Tsimatarunaicatsi. ¹⁷ Nexata Juan jumetane athëbëvetsica Dioso pejumaitsi-java: “Mara ponë taxënato tasivanëje. Sivajamatabëcuenearëyanë bitso,” pejaijava.

4

Pacuenia Jesús jamatabëcueneëjëbatsi dovathi yabara pelivaisi
(Mr 1.12-13; Lc 4.1-13)

¹ Jesús pebautisabicujinaetsi, Espíritu Santo ponaeyaexanatsi petusato nacuyabelia. Bajarabelia ponaeyaexanatsi pejamatabëcueneëjëbinexatsi dovathi.

² Nexata petusato nacuata Jesús ponapona cuarenta pamatacabibeje, cuarenta pameravibeje yajava. Bajara pijinia pamatacabibeje Jesús apo xae pexaejava. Nexata Jesús bitso piajani. ³ Nexata dovathi Jesús imoxoyotatsi pejamatabëcueneëjëbinexatsi Jesús picani pibisiacuene pexanaenexa. Dovathi jumaitsi Jesúsjavabelia:

—Itsa pepacuene Dioso pexënatomë, itorobare mapaibotonëje penaexanaenexa pan, jai dovathi.

⁴ Jesús nexata jumaitsi dovathijavabelia:

—Jume raja. Dioso raja pejumelivaisibaxutota jumaitsi mapacueniaje: “Jivi raja apo namatavenonae ëpexaejava pexaenexa. Jivi raja namatavenona daxita Dioso pejumelivaisi ata pejumecovënëtsinexa pexainaenexa matacabi apo peverevereaejava,” jai raja Dioso pejumelivaisibaxutota, jai Jesús dovathijavabelia.

⁵ Bajaraxuacujinae icatsia Jesús barëliatsi dovathi Jerusalén tomarabelia. Barëjunayatsi templobo matatuyabetsia. ⁶ Nexata templobo matatutatsia dovathi icatsia jumaitsi Jesúsjavabelia:

—Itsa pepacuene Dioso pexënatomë, jirevaremeca irabereca. Bajarapacuenia jirevaremeca irabereca tsipaji xamë nitsacueneyaniva pecaevecsina Dioso pejumelivaisibaxutota jumaitsi mapacueniaje:

Dioso itorobianica pijaángelevi pecaevecsina. Nexata ángelevi pecobeta cayotsiana pecataxutsaquiyaniva ibotonëjavabelia, jai Dioso pejumelivaisibaxutota xamë pecaevecsina ángelevi, jai dovathi Jesúsjavabelia.

⁷ Jesús nexata icatsia jumaitsi dovathijavabelia:

—Jume raja. Dioso raja pijinia pejumelivaisibaxutota jumaitsi mapacueniaje: “It-sajivi ata jamatabëcuenenavëxaniabiaya pijacuata apo bejamatabëjumaitsi: ‘Xanë Dioso jamatabëcuenejëtsianajë. Nexata exanaenajë pacuene bitso netsiayai tatëpaenexa. It-siata Dioso neyavenonaena tavecuapanepaenexa bajaraxua. Nexata bajarapacuenia yapëtaenajë Dioso taneyavenonaejava,’ apo bejamatabëjai,” jai Dioso pejumelivaisibaxutota, jai Jesús dovathijavabelia.

⁸ Jesús icatsia barëliatsi dovathi pinijitsutoxanetojavabelia. Barëjunayatsi bajarapatsutojumabetsia. Nexata bajarapatsutojumavetsica dovathi Jesús tsitajëtatsi daxitanacuanë. Daxita bajarapanacuanëta daxitacuene pexainaejava yajavatsitajëtatsi.

⁹ Nexata icatsia dovathi jumaitsi Jesúsjavabelia:

—Ayaijamatabëcuenenënë netaeya taitabarata nematabacabëta ita netonucajunuame, nexata daxita mapanacuanëtaje, daxitacuene xua xaina, cayajavarajutsianatsi, jai dovathi Jesúsjavabelia.

¹⁰ Nexata Jesús jumaitsi dovathijavabelia:

—Dovathi, nevecuanatixire. Dioso raja pejumelivaisibaxutota jumaitsi mapacueniaje: “Daxitajivi vajëcae pematabacabëta caenë pepo petuxanenë Diosojavabelia. Tonacuenebinua bajaraëponënexa,” jai raja Dioso pejumelivaisibaxutota, jai Jesús dovathijavabelia.

¹¹ Nexata baja dovathi Jesús vecuaponatsi. Bajaraxuacujinae ángelevi patsica Jesús peyavenonaenexatsi.

Pacuenia Jesús Galilea nacuata taxuxuaba Dioso pitorobilivaisi jivi petsipaebijava yabara pelivaisi

(Mr 1.14-15; Lc 4.14-15)

¹² Jesús vënëlivaisitane Juan peetsijavatsi penaneconitsivi pejebabiabibota. Nexata Jesús pona Galilea nacuyabelia. ¹³ Itsiata Jesús apo ponaponae Nazaret tomarata. Ponapona Capernaum tomarata. Capernaum tomara eca Zabolónvënë nacubeje Neftalivënë nacubejeyavata. Capernaumtomara eca pucaxanetoitapata. ¹⁴ Bajarapacuenia Jesús ita patajopa Capernaum tomarata Dioso pitorobilivaisi jivi petsipaebinexa, copiapata jane baja pacuenia bajayata Diosojumepaebinë profeta, Isaíaspijinë, tajëvelia yaquina Jesús pelivaisi. Dioso pitorobilivaisi Jesús Capernaum tomarata jivi petsipaebijavanexa yabara, Isaíaspijinë peyaquinaelivaisita tajëvelia jumaitsi mapacueniaje:

¹⁵⁻¹⁶ Zabolón nacupijivi, Neftali nacupijivi ata, Jordánmene itsapanaverenapijivi ata, bitso apo yapëtae Dioso pitorobilivaisi. Galilea nacuata pejinavanapaevi ata, itsaxuayo jinavanapa ayaibitsaëttoxanetonë apo judíovi, bitso apo yapëtae Dioso pitorobilivaisi. Daxita bajarapanacuanëpijivi pexaniajailivaisi, Dioso pitorobilivaisi, apo peyapëtaexae, bepitaquirinacuanëjava jinavanapa. Nexata pacuenia pinijicotiaxaneto itayotsipatsi petaenexa xaniavaetsia, bajara pijinia pacuenia bajarapamonae jamatabëcueneitayotsianatsi ita tsipaebianatsi Diosojavabelia pecapanepaelivaisinexatsi,

jai tajëvelia Isaíaspijinë peyaquinaelivaisita Dioso pitorobilivaisi Jesús petsipaebijavanexa yabara bajarapanacuanëpijivijavabelia.

¹⁷ Nexata Capernaum tomarata Jesús taxuxuaba Dioso pitorobilivaisi jivi petsipaebijava. Dioso pitorobilivaisi Jesús itsa tsipaeba, jivijavabelia jumai tsaponae mapacueniaje:

—Dioso rabaja papecaevetsimatacabinexa, imoxoyo baja pevajënae pecopiapatsinexa. Nexata baja pacopabare pibisiacuene paneexanabiabijava. Panajamatabëcuenepënyorore Diosojavabelia, jai tsaponae Jesús jivijavabelia.

Pacuenia Jesús junata cuatro ponëbeje dujuai peyamatajucabiabivi yabara pelivaisi (Mr 1.16-20; Lc 5.1-11)

¹⁸ Jesús najetaruca Galilea pucaxaneto itapaya. Nexata Galilea pucaitapata Jesús taenuta anijanëbeje nacaebananëbeje, Simónbeje Andrésbeje. Simón itsavënë Pedro. Bajaraponëbeje daxitamatacabi canacujitsia dujuai yamatajucabiababeje. Dujuai peyamatajucabiabijavatabeje, yamatajucaponaponabeje. ¹⁹ Nexata Jesús jumaiti Simónbeje Andrésbejevabelia:

—Naxanitsia. Panepënaponarebeje. Nexata pacacujarubianatsibeje jivi panejucaenexabeje. Pacuenia dujuai payamatajucabiabamebeje, bajarapacuenia jivi pajucaename Dioso pijajivinexa, jai Jesús.

²⁰ Nexata Simónbeje Andrésbeje dujuai peyamatajucabiabijavamibeje, bajarajota puenetabuatabeje. Nexata baja naponabeje Jesús pepëta.

²¹ Bajaraxuacujinae icatsia bebeliayo pevajënaeyabelia Jesús barëpona. Icatsia taenuta anijanëbeje nacaebananëbeje, Zebedeo pexënatobeje. Bajaraponëbeje Santiagobeje Juanbeje. Pijajeraënëta paxa yajava xanebaponaponabeje dujuai peyamatajucaejavanexabeje. Nexata icatsia Jesús junata Santiagobeje Juanbeje. ²² Nexata bajarajota paxa puenetanutabeje jera yajava. Santiagobeje Juanbeje naponabeje baja Jesús pepëta.

Pacuenia Jesús livaisi tsipaeba jivi ayaibitsaëtoxanetojavabelia yabara pelivaisi (Lc 6.17-19)

²³ Jesús jane baja najetaruca daxita Galilea nacujajava. Dioso pitorobilivaisi tsi-paebapona judíovi penacaetuatabibonëjaya. Jesús tsipaebapona jivijavabelia pexanialivaisi. Tsipaebapona Dioso pijajivi pevetsijavanexa. Jamatejemayaexanaponanua daxitaviriavitane pexainaevimi. ²⁴ Nexata daxita Siria nacujajava pejinavanapaevi ata vënëlivaisitanetsi Jesús. Jesús tocapatatsi daxitaviriavitane pexainaevi. Tocapatatsinua dovathi peyajavajinavanapaevi. Tocapatatsinua pedevacaibivitsi. Tocapatatsinua petabusipacuenabivitsi. Jesús nexata jamatejemayaexanapona daxita bajarapamonae. ²⁵ Nexata Jesús pënaponatsi jivi ayaibitsaëtoxaneto Galilea nacujajivi, Decápolis nacujajivi ata, Jerusalén tomarapijivi ata, Judea nacujajivi ata, Jordánmene itsapanaverenapijivi ata.

5

Pacuenia Jesús jivi livaisi tsipaeba petsutoyenepanajavata yabara pelivaisi (Lc 6.20-23)

¹ Jesús itsa tane jivibitsaëtoxaneto, nexata junaya petsutotsia. Bajarapatsutoyenepanata epatota ecaya. Nexata bajarajota Jesús pijajivi matatoyorotsia nacaetuatsi. ² Nexata Jesús taxuxuaba livaisi petsipaebijava. ³ Jesús jumaiti pijajivijavabelia mapacueniaje:

—Jamatabëcuenebarëya tsavanapae tsane pamona pican mapanacuata yajamatabëcuenebëjai tsavanapae pibisiacuene pexanabiabijava. Bajarapamonae jonena Dioso pijanacuayabetsia.

⁴ 'Jamatabëcuenebarëya tsavanapae tsane pamonaē picani mapanacuata bejamatabëjiobi tsavanapae itsamonae pibisiacuene petoexanaexaetsi. Bajarapamonae Dioso jamatabëcueneavenonaenatsi.

⁵ 'Jamatabëcuenebarëya tsavanapae tsane pamonaē apo jamatabëbëjai tsabiabi mapanacuata, itsacueniababiabi atatsi itsamonae. Apo cuenecanaviatabiabinua. Bajarapamonae jinavanapaena Dioso pijanacuatatsia pacuenia Dioso najumecapanepaeya jumaitsi bajarapamonae yabara.

⁶ 'Jamatabëcuenebarëya tsavanapae tsane pamonaē mapanacuata bitso daxitacuene matatoxenetsia jitsipabiaba pexanaenexa Dioso pitorobicueniatsi. Dioso baja cajena yavenonabianatsi pexanaenexa bajarapacuene.

⁷ 'Jamatabëcuenebarëya tsavanapae tsane pamonaē mapanacuata itsamonae ata itaxutotsoniataeyabiaba. Dioso nexata juya itaxutotsoniataeyabianatsi bajarapamonae.

⁸ 'Jamatabëcuenebarëya tsavanapae tsane pamonaē mapanacuata ëpexaniacuene pexanaenexa najamatabëxainabiaba. Bajarapamonae taena Dioso.

⁹ 'Jamatabëcuenebarëya tsavanapae tsane pamonaē mapanacuata penaitoyavimi ata, nabarajamatabëcuene xanepanaeyaexanapona. Bajarapamonae yabara: "Taxi," jai tsane Dioso.

¹⁰ 'Jamatabëcuenebarëya tsavanapae tsane pamonaē mapanacuata bejiobiaexanabibatsi Dioso pitorobicueniatsi pexanabibijava yabara. Bajarapamonae jonena Dioso pijanacuayabetsia.

¹¹ 'Patajajivixamë, itsamonae pibisiacuenia itsa pacabaracuaicuaijai, itsiata pajamatabëcuenebarëyamë tsavanapae tsane. Bajarapamonae pacabejiobiaexanaē ata tsane, najumetsënëtsiaya pacabaracuaicuaijai atanua tsane, itsiata pajamatabëcuenebarëyamë tsavanapae tsane. ¹² Bajara tsipaji pacuenia panevajënaeyapijivimi ata, Diosojumepaebivimi profetavi, bajayata bejiobiaexanatsi. Nexata pasivajamatabëcuenebarëyamë tsavanapae tsane paxamë ata bajarapacuenia itsa pacaexanaena. Tsipaji raja athëbëtatsia itsamatacabi Dioso pacarajutsiana bitso pexaniacuene, jai Jesús pijajivijavabelia.

Pacuenia Dioso pejumecovënëtsivi mapanacuata pejamatabëcuene beyajo, bepecotianua, yabara pelivaisi
(Mr 9.50; Lc 14.34-35)

¹³ Icatsia Jesús jumaitsi petsutoyenepanajavata pijajivi ayaibitsaëttoxanetojavabelia:

—Yajobeno xanepana vajaexabinexa pevi piabejeyaniva. Paxamë rabaja pijinia bepajomë tsavanapae mapanacuapijivijavabeliaje, mapanacuapijivi bitso piabejeyaniva pibisiacuene pexanaeneconi yabara. Paxamë xaniavaetsia panetsipaebavanapaexae Dioso pejumelivaisi, bajarapamonae bitso pibisiacuene apo exanae. Itsiata yajo pexaicaejavami itsa ajibi tsipae, ¿detsa nexata pacuenia icatsia naxaicaeyaexanaejitsipa? Acuenebi. Itsacuenejavayonexa ata baja apo xanepanae tsipae. Saya pexuabinexa, jivi petaxunanonobinexa, xanepanaejitsipa. Bajara pijinia paxamë ata paitsimë tsipae itsa pacopatsipame Dioso panejumecovënëtsijava. Pajamatabëcuenesaëjibimë tsipae. Nexata itsacuenejavayonexa ata, apo paxanepanaemë tsipae.

¹⁴ 'Pacuenia piatayotsicotia itayota piataquirijavata, bajara pijinia pacuenia paxamë ata Dioso panejumecovënëtsivi pajamatabëcueneitayotsianame pijamatabëcueneitaquirivimi. Bajarapacuenia pajamatabëcueneitayotsianame itsa patsitajinavanapanaē xaniavaetsia daxitajivi pitabarata. Petsutojumata peecaetomara acuenebi penacaranatecaejava tsipae. ¹⁵ Itsajivi ata lámparabë pitanojotsicujinae, apo etsi cajoniënëalia. Biji rajane athëbëyo etsia daxitaboënë pitayotecaenexa. ¹⁶ Bajara pijinia pacuenia paxamë ata paitsimëre. Xaniavaetsia patsitajinavanapare daxitajivi pitabarata. Nexata bajarapamonae pacacuenetaena

pexaniacuene paneexanavanapaejava. Nexata bajarapamonae itsa pacacuenetaena pexaniacuene paneexanavanapaejava, jumai tsane paxamë yabara paneaxa Diosojavabelia: “Diosomë, bitso ayaijamatabëcuenenëmë. Yavenonabiabame nijajivi,” jai tsane bajarapamonae paneaxa, athëbëtatsia peecaenëjavabelia, jai Jesús pijajivijavabelia.

Pacuenia Jesús tsipaeba pijajivi bajayata Dioso Moiséspijinëta penajumecopatsilivaisi yabara pelivaisi

¹⁷ Icatsia Jesús jumaitsi petsutoyenepanajavata pijajivi ayaibitsaëttoxanetojavabelia:

—Pëtsa panesivajamatabëjumaitsimë: “Maponë patajopaje piajibiaexanaenexa Dioso Moiséspijinëta penajumecopatsilivaisi. Palivaisi ata Diosojumepaebivimi profetavi bajayata tsipaebapona piajibiaexanaenexa,” panesivajamatabëjamë pëtsa. Apo patajopaenë tajibiaexanaenexa bajarapalivaisibeje. Biji rajane patajopajë taexanaenexa jane baja daxita pacuenia tajëvelia nevajunupaeba bajarapalivaisitabeje.

¹⁸ Xaniajanë pacuenia pacatsipaebijitsiatsi. Dioso Moiséspijinëta penajumecopatsilivaisi epatua itsalivaisicuenia, caeitonetoyo ata, Dioso apo itothianae tsane. Pacuenia baja Dioso najumecapanepaeya jumaitsi, bajarapacuenia tsitecaena. Nexata copiapatsiana daxita xua Dioso tajëvelia najumecapanepaeya jumaitsi bajarapalivaisitabeje.

¹⁹ Nexata pajivi jumecovënëtsi ata Dioso Moiséspijinëta penajumecopatsilivaisi, itsiata itsa apo jumecovënëtsi caelivaisiyo bajarapayajuvënëlivaisiyo, naneconitsiana Diosojavabelia. Bajarapajivi itsa itavetsiananua itsamonae ata pejumecovënëtsiyaniva bajarapalivaisiyo, nexata bajarapaneconi yabara bajarapajivi beveliajamatabëcuenejivi taenatsi daxitajivivecua Dioso pijanacuatatsia. Pajivi jumecovënëta daxita bajarapalivaisi, itsa tsipaebanua itsamonae ata pejumecovënëtsinexa bajarapalivaisi, nexata bajarapajivi ayaijamatabëcuenejivi taenatsi Dioso pijanacuatatsia. ²⁰ Xaniajanë pacuenia pacatsipaebijitsiatsi. Paxamë xaniavaetsia Dioso pajumecovënëre. Xaniavaetsia Dioso pajumecovënëre judíovi pecujarubivi Dioso pejumecovënëtsijava matatoxenetsia. Xaniavaetsia Dioso pajumecovënëre fariseovi ata Dioso pejumecovënëtsijava matatoxenetsia. Paxamë xaniavaetsia Dioso itsa apo pajumecovënëtsimë tsane, nexata pacuenia bajarapamonae apo jone tsane Dioso pijanacuayabetsia, bajara paxamë ata paitsimë tsane. Apo panajonemë tsane Dioso pijanacuayabetsia, jai Jesús pijajivijavabelia.

Pacuenia Jesús muxujioba pijajivi pecopatsinexa penabaraanaepanabiabijava yabara pelivaisi

(Lc 12.57-59)

²¹ Icatsia Jesús jumaitsi petsutoyenepanajavata pijajivi ayaibitsaëttoxanetojavabelia:

—Paxamë rabaja payapëtaneme pacuenia bajayata Moiséspijinë jumaitsi panijasalinaivimijavabelia. Moiséspijinë bajayata panijasalinaivimijavabelia jumaitsi mapacueniaje: “Pëtsa pabeyaxuabame jivitonë. Pajivi beyaxuaba jivitonë, bajarapajivi pananeconitsiaexanaename,” jai Moiséspijinë panijasalinaivimijavabelia. ²² Itsiata baitsi jane xanë pacatsipaebatsi mapacueniaje. Pajivi baraanaepana itsajivijavabelia, bajarapajivi naneconita Diosojavabelia. Nutsianatsi Dioso pitabarata penaneconitsiayaexanaenexatsi. Pajivi itsajivi bijatane pibisiacuenia, bajarapajivi naneconita Diosojavabelia. Bajarapaneconi yabara nutsianatsi itsajota nacaetuatabiaba tomara pevetsivi. Nexata naneconitsiayaexanaenatsi. Pajivi itsajivi pitoyaxae, anaeya jumaitsi: “Xamë saya bitso pecamatajemabinë,” jai, bitso tsiayaitsi. Bajarapaneconi yabara bajarapajivi Dioso naneconitsiayaexanaenatsi inferno isotojavabelia.

²³ Itsa paponame altarvënëjavajavabelia panerajutsinexa ofrenda Diosojavabelia, nexata bajarapaepatota itsa panajamatabënapitame itsajivijavabelia itsacuene paneexanaejava, nexata mapacuenia paexanaenameje. ²⁴ Altarvënëjava pitabarata abaxë

papuenere ofrenda panerajutsijavanexa Diosojavabelia. Paponare caecuenia pajivijavabelia pananeconitame panenabarajamatabëcuene xanepanaenexabeje icatsia. Bajaraxuacujinae icatsia panaviatsiaremena altarvënëjavajavaberena panerajutsinexa jane baja ofrenda Diosojavabelia.

²⁵ 'Itsa pananeconitame itsajivijavabelia, nexata itsa pacacapona bajarapajivi jueznëjavabelia papecaneconitsinexa, namutua xaniavaetsia panabarëcuaicuaiajamërebeje panenasivajamatabë xanepanaenexabeje xua yabara picani pacaneconitsijitsia. Bajarapacuenia xaniavaetsia panabarëcuaicuaiajamërebeje papecanutsiyaniva jueznë pitabarata. Tsipaji raja jueznë itorobijitsipa policíavi panijaneconi yabara papecacaponanexa penaneconitsivi pejebabiabiboyabelia. Nexata policíavi pacananeconitsiaexanetsipa penaneconitsivi pejebabiabibota. ²⁶ Xaniajanë pacuenia pacatsipaebijitsiatsi. Nexata penaneconitsivi pejebabiabibota itsa pacananeconitsiaexanetsipa, bajaraverena bepíjia apo papitsapaemë tsipae. Matapania pamatamotsipame daxita xua yabara pacananeconitsiaexaneta, papitsapaejitsipame, jai Jesús pijajivijavabelia.

Pacuenia Jesús pijajivi muxujioba penacojobinë itsava pejaitsiyaniva pijavavecua yabara pelivaisi

²⁷ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopatsilivaisi jumaitsi. Dioso Moiséspijinëta penajumecopatsilivaisi jumaitsi mapacueniaje: “Pëtsa jaitame itsava nijavavecua,” jai. ²⁸ Itsiata baitsi jane xanë mapacuenia pacatsipaebatsije. Ponë petiriva itsa taenuta, nexata itsa jamatabëjumaitsi: “Jema xania tavitota pibisiacuene apo caexanaetsi mapovajavabeliaje,” itsa jamatabëjai, bajaraponë naneconita Diosojavabelia. Nexata najëpaeya naneconitabeje Diosojavabelia ponëbeje pepacueene itsavajavabelia pibisiacuene pevitota exana pijavavecua.

²⁹ 'Panecujuaitaxutota panetaejava yabara pibisiacuene itsa paexaname, panaitaxutocajure. Tajë baja paxuare. Xanepana panenavecuaxuabinexa bajarapaitaxuto, padaxitaperabëtojivimë Dioso papecaxuabiyana infiernojavabelia.

³⁰ Panecujuacobeta pibisiacuene itsa paexaname, panacobecaucure. Tajë baja paxuare. Xanepana panenavecuaxuabinexa, bajarapacobe padaxitaperabëtojivimë Dioso papecaxuabiyana infiernojavabelia, jai Jesús pijajivijavabelia.

Pacuenia Jesús pijajivi muxujioba penacojobinë pijava pexuabiyana yabara pelivaisi (Mt 19.9; Mr 10.11-12; Lc 16.18)

³¹ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Bajayata Dioso Moiséspijinëta penajumecopatsilivaisi jumaitsi mapacueniaje: “Ponë jamatabëxuaba pijava, copiaya toyaquinae cuyalatobaxuto pijavajavabelia. Toyaquinae pijava pitavetsilivaisi. Nexata xuacujinae xuabi pijava,” jai bajayata Dioso Moiséspijinëta penajumecopatsilivaisi. ³² Itsiata baitsi jane xanë mapacuenia pacatsipaebatsije. Ponë pijava xuaba, itsanëjavabelia bajarapova pevitota pibisiacuene apo vecuaexanae atatsi, bajaraponë naneconita Diosojavabelia pijava pexuabixae. Petiriva pamona pexuabixae, nacojobijitsipa itsanëjavabelia. Nexata jane baja bajaraponë pijava pibisiacuene vecuaexanaejitsipatsi itsanëjavabelia. Tsipaji abaxë bajaraponë pijavacuenia Dioso totanetsi. Nexata pijinia ponë pita bajaraponë pexuabicovëvami, bajaraponë ata pibisiacuene exana pevitota. Tsipaji abaxë bajaraponë pijavacuenia Dioso totanetsi, jai Jesús pijajivijavabelia.

Pacuenia Jesús pijajivi muxujioba, Jesús pijajivi itsa navajunupaeba xua exanaejitsia, itsajumeyo ata yajava pejumaitsiyaniva jivi pejumexaniataenexatsi yabara pelivaisi

³³ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Paxamë rabaja payapëtaneme pacuenia bajayata Moiséspijinë jumaitsi panijasalinaivimijavabelia. Panijasalinaivimi penajumetsënëtsiyaniva, bajayata Moiséspijinë panijasalinaivimijavabelia jumaitsi mapacueniaje: “Itsa baja pepacuene najumecapanepaeya panavajunupaebame xua paexanaejitsiamë, itsamonae papecajumexaniataenexa itsa pajumaitsimë: ‘Xaniajanë raja. Cajumaitaitsi mapacueniaje Dioso pitabarata,’ itsa pajamë, pëtsa epatua panajamatabëcopatame bajaraxua paexanaenejevamë,” jai bajayata Moiséspijinë panijasalinaivimijavabelia. ³⁴ Itsiata baitsi jane xanë mapacuenia pacaitorobatsije. Najumecapanepaeya itsa panavajunupaebame xua paexanaejitsiamë, roviaia panavajunupaebare. Pëtsa pematatsënëa itsajumeyo ata yajava pajumaitsimë jivi papecajumexaniataenexa. Papecajumexaniataenexa itsajivi pëtsa pajumaitsimë mapacueniaje: “Xaniajanë raja. Cajumaitaitsi mapacueniaje Dioso pitabarata,” pajamë pëtsa. Pëtsa pajumaitsimënuu: “Xaniajanë raja. Cajumaitaitsi mapacueniaje athëbënacua pevënëta,” pajamë pëtsa. Tsipaji bajarajotatsia Dioso eca pijatronovënëjavata, itsajota ecabiaba pitorobinexa pijajivi. ³⁵ Pëtsa pajumaitsimënuu: “Xaniajanë raja. Cajumaitaitsi mapacueniaje mapairaje pevënëta,” pajamë pëtsa. Tsipaji raja Dioso pijaira. Pëtsa bajarapacuenia pajumaitsimë Jerusaléntomara ata pevënëta. Tsipaji Jerusaléntomara Dioso pepo nacuaevetsinë pijatomara. ³⁶ Pëtsa pajumaitsimënuu: “Xaniajanë cajena. Itsa apo xaniajanë tsane, nexata nacaevetsianajë tanematathinaxuabineexamë tatëpaenexa,” pajamë pëtsa. Tsipaji panematabocoto ata Dioso eveta. Nexata paxamë apo pacacaëjëpae caematanatoyo ata panenamatananiojaiyaexanaenexa, panenamatanatsaejaiyaexanaenexa ata. ³⁷ Itsa pepacuene paexanaejitsiamë, “Jājā, exanaenajë,” pajamë roviaia. Itsa apo pajamatabëexanaemë, “Jume, apo exanaenë tsane,” pajamë roviaia. Pematatsënëa pëtsa pajumaitsimë itsajumeyo ata jivi papecajumexaniataenexa. Tsipaji bajarapajume dovathi pejamatabëcueneta pajumaitsimë tsipae, jai Jesús pijajivijavabelia.

Pacuenia Jesús pijajivi muxujioba pecuenecanaviatsiyaniva itsajivi itsacueniabi atatsi yabara pelivaisi

(Lc 6.29-30)

³⁸ Icatsia Jesús jumaitsi petsutoyenepanajavata pijajivi ayaibitsaëttoxanetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopatsilivaisi jumaitsi. Bajayata Dioso Moiséspijinëta penajumecopatsilivaisi jumaitsi mapacueniaje: “Pajivi itsanë itaxutobijianatsi, juya bajarapajivi namatamoitaxutobijiana. Pajivi ata itsanë vonotanabiabatsi, juya bajarapajivi namatamovonotanabiabi,” jai bajayata Dioso Moiséspijinëta penajumecopatsilivaisi. ³⁹ Itsiata baitsi jane xanë mapacuenia pacaitorobatsije. Itsanë itsa jamatabëpacabia, pëtsa panayajivibime. Itsanë itsa pacaitabarapacabiaxuaba anaeya, nexata icatsia itsanenia ata papecaitarapacataxuabinexa, panaitabaracaevere. ⁴⁰ Itsajivi itsa pacaneconitsijitsia jueznëjavabelia paneamoneyabijamatabëcuene papecavecuapitsinexa panijacamisa, nexata patocopare panijacamisajumavelia panenaxatatsijava ata papecavecuapitsinexa. ⁴¹ Vajabitsaë itsa pacacaponaeaxana pijajava anijakilómetrobecuenia, nexata patocaponare pematatsënëa ata. Cuatro pakilómetrobecuenia ata patocaponare. ⁴² Bitso bepejiobijivi itsa pacavajëta itsacuenëjavayo, parajure. Itsa pacacovaeta, patsicopare. “Jume,” pajamë pëtsa, jai Jesús pijajivijavabelia.

Pacuenia Jesús pijajivi muxujioba piasivanexa pitoyavi atatsi yabara pelivaisi

(Lc 6.27-28, 32-36)

⁴³ Icatsia Jesús jumaitsi petsutoyenepanajavata pijajivi ayaibitsaëttoxanetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopatsilivaisi jumaitsi mapacueniaje: “Pasivamëre papecayapëtaenë bitso. Paitoyamëre papecaitoiyavi,” jai bajayata Dioso Moiséspijinëta penajumecopatsilivaisi. ⁴⁴ Itsiata

baitsi jane xanë mapacuenia pacaitorobatsije. Pasivamëre papecaitoiyavi ata. Pamonaë ata pibisiacuenia pacabaracuaicuaijai, bajarapamonaë paxamë xaniavaetsia pabaracuaicuaijamëre. Pamonaë ata pacaitoia, bajarapamonaë pexaniacuene patoexanare. Pamonaë ata pibisiacuenia pacabijatane, pibisiacuene pacaexanaë ata, patovajëre Diosojavabelia peyavenonaenexatsi. ⁴⁵ Bajarapacuenia nexata paneaxa, athëbëtatsia peecaenë, papeximëcuenia patsitajinavanapaename. Bajaraponë, paneaxa, yavenonabiaba daxitajivi. Nexata pexaniajamatabëcuenevi, pibisiajamatabëcuenevi ata, najëpaeya pijapabianë petonaxaniabinexatsi icotia copata. Bajarapacuenia pijinia ema ata copata. ⁴⁶ Itsa pasivamë tsipae ëpapecaasivavi, nexata pexaniacuene apo paxainaemë tsipae Diosojavabelia. Pataneme rabaja. Gobierno pejamatabëcueneta impuestom-atamo peyanijobabiabivi bitso pibisiacuene exana. Itsiata bajarapamonaë ata asiva piasivavitsi. ⁴⁷ Xaniavaetsia itsa pacopiapitsipame ëpaneyapëtaevi, nexata pexaniacuene apo paexanaemë tsipae pamonaë Dioso apo pejumecovënëtsivivecua. Tsipaji Dioso apo pejumecovënëtsivi ata xaniavaetsia copiapitabiaba peyapëtaevitsi. ⁴⁸ Pacuenia jamatabëcueneitsi pejamatabëcuenexanepanaenë, paneaxa, athëbëtatsia peecaenë, bajara paxamë ata pajamatabëcueneitsimëre, jai Jesús pijajivijavabelia.

6

Pacuenia Jesús pijajivi muxujioba pexaniacuene pexanaenexa yabara pelivaisi

¹ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—¡Xania baja tsane! Pëtsa pexaniacuene paexaname saya jivi papecacuenetaenexa, “Maponë bitso pexaniajamatabëcuenenëje,” papecasivajamatabëjainexa saya paneexanaejava yabara. Bajarapacuenia itsa paexanaejitsipame, nexata paneaxa, athëbëtatsia peecaenëjavabelia, apo paxainaemë tsipae itsacuenejavayo ata, pexaniacuenejavayo, papecarajutsinexa athëbëtatsia. ² Bajaraxuata itsa payavenoname bepejiobivi, pëtsa panavajunupaebame daxitajivijavabelia paneyavenonaejava bepejiobivi. Itsamonae xua exana, navajunupaebabiaba daxitajivi pitabarata judíovi penacaetuatabiabi-bonëjava, callejava ata. Bajarapamonaë navajunupaebabiaba bepejiobivi peyavenonaejava, bepexaniajamatabëcuenevi saya petaenexatsi jivi. Xaniajanë pacuenia pacatsipaebijitsiatsi. Pamonaë bajarapacuenia navajunupaebabiaba, bajarapacuenia penavajunupaebabiabixae, Diosojavabelia apo xinae tsane athëbëtatsia perajutsijavanexatsi. ³ Itsa payavenoname bepejiobivi, pëtsa panavajunupaebame itsajivijavabelia ata, bitso papecayapëtaevijavabelia ata. ⁴ Muetsia payavenonare bepejiobivi. Nexata paneaxa, papecataenë muetsia paneexanaejava ata, pacarajutsiana bepejiobivi muetsia paneyavenonaematamo, jai Jesús pijajivijavabelia.

Pacuenia Jesús pijajivi tsipaeba pacuenia Diosojavabelia vajëcaejitsia yabara pelivaisi (Lc 11.2-4)

⁵ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Itsa pavajëcame Diosojavabelia, pëtsa pavajëcame pacuenia itsamonae vajëcabiaba. Bajarapamonaë saya jema vajëcabiaba Diosojavabelia jivi petaenexatsi Dioso bepejumecovënëtsivi. Bajarapamonaë jitsipabiaba nucaeya pevajëtsinexa Diosojavabelia daxitajivi pitabarata judíovi penacaetuatabiabi-bonëjava, calle penaepacaxitarabijava ata. Bajarapacuenia vajëcabiaba Diosojavabelia Dioso bepejumecovënëtsivi petaenexatsi jivi. Xaniajanë pacuenia pacatsipaebijitsiatsi. Pamonaë bajarapacuenia exanabiaba, bajarapacuenia pexanaexae, Diosojavabelia apo xinae tsane athëbëtatsia perajutsijavanexatsi. ⁶ Nexata paxamë Diosojavabelia itsa pavajëcame, pacaenëmë canacujitsia, pajonemeya panijaboyalia. Pabaupaxatare. Bajaraxuacujinae pavajëcare paneaxajavabelia. Nexata paneaxa pacayajava tsane bajarajota. Nexata paneaxa, papecataenë muetsia paneexanaejava ata, pacarajutsiana bajaraxua paneexanaematamo.

⁷ 'Itsa pavajëcame Diosojavabelia, pëtsa napëna pavajëcame saya piapianexa panevajëcaejava pacuenia Dioso apo peyapëtaevi vajëcabiaba. Dioso apo peyapëtaevi jamatabëcuenenavëxaniabiaya jamatabëjumai tsabiabi: “Itsa bitso apia vajavajëcaejava Diosojavabelia, nexata matapania Dioso nacajumetaena vajavajëcaejava,” jamatabëjai tsabiabi Dioso apo peyapëtaevi. ⁸ Pëtsa bajarapacuenia paxamë pajamatabëcueneitsimë. Panevajëcaevajënaeya ata raja paneaxa, Dioso, yapëtane xua panamatavenoname. ⁹ Bajaraxuata itsa pavajëcame Diosojavabelia, pavajëre mapacueniaje:

Taxamë, athëbëtatsia neecaenë, jitsipajë pecayaiyataejava daxitajivi. ¹⁰ Jitsipajë naxanitsiayo pecopiapatsijava daxita nijajivi nevetsijava mapanacuataje. Jitsipajë daxitajivi mapanacuata nejitsipaecuenia pecatoexanabiabinexa, pacuenia baja athëbëtatsia nijajivi nejitsipaecuenia catoexanabiaba, bajarapacuenia pecatoexanavanapaenexa mapanacuapijivi ataje. ¹¹ Ajena, pamatacabinexa, panerajure pataxaejavanexa pacuenia panamatavenonajë. ¹² Panevecuaajibiaexanare pibisiacuene pataexanaeconimi. Pacuenia paxanë pajamatabëcuenecaevajë, pabarajamatabëcuenexanepanana, itsamonae paxanëjavaberena pibisiacuene patanexanaejava, bajara pijinia pacuenia xamë ata nitabarata pibisiacuene pataexanaejava jamatabëcuenecaevare. Panebarajamatabëcuene xanepanarena. ¹³ Panevecuatsare dovathi patanejamatabëcuenejëbivaniva. Panecapanepare jane pibisiacuenevecua. Pamatacabi xamë taxuxuabianame daxita nijajivi nevetsijava mapanacuataje, nejamatabëcuenesaëta evetsianame. Nexata nijajivi jumai tsane xamë yabara: “Dioso cajena bitso ayaijamatabëcuenenë,” jai tsane. Bajarapacuenia nijajivi evetsianame daxitamatacabijavabelianexa, pajamë tsane mapacueniaje itsa pavajëcame Diosojavabelia, jai Jesús pijajivijavabelia.

¹⁴ Jesús icatsia jumaitsi pijajivijavabelia:

—Nexata paxamë itsamonae pibisiacuene pacaexanae ata, pajamatabëcuenecaevare. Pabarajamatabëcuenexanepanarena. Nexata paxamë itsamonae pibisiacuene papecaexanaejava, itsa pajamatabëcuenecaevianame, itsa pabarajamatabëcuenexanepanaenamenua, nexata paneaxa, athëbëtatsia peecaenë, pitabarata pibisiacuene paneexanaejava jamatabëcuenecaeviana. Pacabarajamatabëcuenexanepanaenana. ¹⁵ Paxamë itsa apo pajamatabëcuenecaevimë tsane itsamonae pibisiacuene papecaexanaejava, itsa apo pabarajamatabëcuenexanepanaemënu tsane, nexata paneaxa ata apo jamatabëcuenecaevi tsane. Apo pacabarajamatabëcuenexanepanaenua tsane, pitabarata pibisiacuene paneexanaejava, jai Jesús pijajivijavabelia.

Pacuenia Jesús pijajivi tsipaeba pacuenia Jesús pijajivi exanaejitsia pamatacabibeje Diosojavabelia vajëtaçona pexaejava xaenejeva yabara pelivaisi

¹⁶ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Itsa apo paxaemë panexaejava pamatacabibeje pavajëcame Diosojavabelia, pëtsa pajinavanapame panaitabaraquiatsinejevamë, panamatatiatsinejevamënu. Itsamonae Diosojavabelia itsa vajëcabiaba pexaejava xaenejeva, pamatacabibeje vajëcabiaba Diosojavabelia, apo naitabaraquiatabiabi, apo namatatiatabiabinua. Bajarapacuenia jinavanapabiaba pamatacabibeje vajëcabiaba Diosojavabelia tsipaji saya bajarapamonae jitsipa petaevitsi pesivajamatabëjumaitsinexatsi: “Mapamonaeje Dioso bitso pejumecovënëtsivi. Diosojavabelia bitso pevajëcaevi pexaejava xaenejeva. Nayapëtane Diosojavabelia bitso pevajëcaejava. Tsipaji naitabaraquiatsinejeva, namatatiatsinejevanua, jinavanapa,” pesivajamatabëjainexatsi petaevitsi. Xaniajanë pacuenia pacat-sipaebijitsiatsi. Bajarapamonae pexaejava xaenejeva vajëcabiabi ata Diosojavabelia, itsiata bajaraxua apo tonamatamotsitsi Diosojavabelia. Tsipaji saya jivi petaenexatsi Dioso bepejumecovënëtsivi, bajarapacuenia vajëcabiaba. ¹⁷ Paxamë itsa apo paxaemë

panexaejava pamatacabibeje pavajëcame Diosojavabelia, itsiata panaitabaraquiare. Panamatatiarenuua xaniavaetsia. ¹⁸ Bajarapacuenia paexanaename jivi peyapëtaeyaniva Diosojavabelia panevajëcaponaejava panexaejava paxaenejevamë. Caenë paneaxa, papecayajavanë, yapëtaena. Nexata bajaraponë itsamatacabi pacarajutsiana panijamatamo, jai Jesús pijajivijavabelia.

Pacuenia Jesús pijajivi tsipaeba xaniavaetsia Dioso petonacuenebavanapaenexa itsamatacabi ayajava pexainaenexa athëbëtatsia yabara pelivaisi
(Lc 12.33-34)

¹⁹ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:
—Pëtsa pacaetuataponame ayajava panexinaejavanexa mapanacuataje. Tsi-paji pacatobijianaejitsipa piucubaxaevi. Pacatotasibijitsipatsinua. Pacatonacobe-toxotsipanua penacobetoxotsivi. ²⁰ Dioso jane xaniavaetsia patonacuenebavana-pare. Nexata Diosojavabelia ayajava pexaniacuene paxainaename athëbëtatsia. Nex-ata bajarajotatsia apo pacatobijiana tsane piucubaxaevi. Apo pacatotasibitsinua tsane. Penacobetoxotsivi ata apo pacatonacobetoxotsi tsane. ²¹ Panacuatatsia paca-toxaniavaeta panexinaejavanexa, bajarapanacua panejamatabëethëtovetsina paja-matabënjinavanapaenename, jai Jesús pijajivijavabelia.

Pacuenia vajaitaxuto belámparabë yabara pelivaisi
(Lc 11.34-36)

²²⁻²³ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:
—Lámparabë bo ënëtuatuajëta itayoteca xaniavaetsia vajataenexa. Bajara pijinia itsi paneitaxuto ata. Paneitaxutoxanepanaexae xaniavaetsia panatsivajënaetaneme. Itsa paitaxutobejemë tsipae, nexata xaniavaetsia apo panatsivajënaetaemë tsipae. Pacatsi-taaitaquiri saya tsipae. Bajara pijinia itsi panejamatabëcuene ata. Dioso itsa pacaja-matabëcueneitayota, pajitsipaenename paneexanabiabinexa pacuenia Dioso pacaitoroba. Nexata xaniavaetsia pajinavanapaenename. Itsa panajamatabëxinaejitsipame bitso panexinaejava ëpaxamënexa, nexata bitso pajamatabëcueneitaquirimë tsipae, jai Jesús pijajivijavabelia.

Pacuenia Jesús pijajivi muxujioba bitso pejitsipaeyaniva palata yabara pelivaisi
(Lc 16.13)

²⁴ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:
—Itsajivi ata acuenebi caecuenia petonacuenebijava anijanëbeje pijatuxa-nenëbejevabelia. Caenëjavabelia, ponë jitsipa petonacuenebinexa, tonacuenebijitsipa. Ponëjavabelia apo jitsipae petonacuenebijava, apo tonacuenebi tsipae. Bajara pijinia itsi pajivi bitso jitsipa Dioso. Pajivi bitso jitsipa Dioso, nexata itsa tonacueneba Dioso, acuenebi bitso pejitsipaejava palata, jai Jesús pijajivijavabelia.

Pacuenia Dioso pijajivi eveta mapanacuataje yabara pelivaisi
(Lc 12.22-31)

²⁵ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:
—Xaniajanë pacuenia pacatsipaebijitsiatsi. Pëtsa pasivanajamatabëxainame ëpanexaejava, ëpaneapaejava ata, panevënjinavanapaenexa. Pëtsa pasivanaja-matabëxainamenua ëpanenaxatabijavanexa ata. Apo jinavanapaetsi cajena ëvajaxaejavanexa. Apo jinavanapaetsinua ëvajanaperabëxatabinexa. ²⁶ Pataema baratsuimonae pepunaevi. Apo ubi pexaejavanexa. Apo notsinua penaveretaponaejava peetsinexa bota. Itsiata Dioso, paneaxa, athëbëtatsia peecaenë, rajutabiaba pexaejavanexa. ¡Paxamë rabiji bitsoyo Dioso pacaasiva baratsuimonae matatoxenetsia papecarajutsinexa daxita xua panamatavenoname! Bajaraxuata pëtsa bitso pasivanajamatabëxainame ëpanexaejavanexa. ²⁷ ¿Detsa jane ponë paxamëyajuvënënë caëjëpatsi pijacujiruta medio

metrocuena matavějĕa penavitsabiaexanaenexa? Ajibi. Bitso jamatabĕbĕjai ata tsipae pevitsabinexa, itsiata apo navitsabiaexanae tsipae pijacujiruta.

²⁸ 'Bjaraxuata pĕtsa bitso pasivanajamatabĕxainame ĕpanenaxatabijavanexa. Pacanaĕjĕre pacuena vitsabapona pematono vayafjava. Bjarapamatono apo natsijumanacuenebi. Penaxatatsijavanexa ata apo natsijumaexanae. ²⁹ Bajayata nacuaevetsinĕmi Salomŏnpijinĕ, bitso pexainaenĕmi. Naitabĕtsiaya naxatababiaba bitso pexaniaviriajavanĕ. Itsiata baitsi jane Salomŏnpijinĕ penaitabĕtsijava matatoxenetsia bitso aitaĕ mapamatonotoxije. ³⁰ Paxamĕ bevelia panejumecovĕnĕtsivi Dioso, asaĕya bepajumecovĕnĕtame Dioso papecaevetsijava. Ajena pitsijavata vayafota tanetsi pexaniaponamatonotoxi. Bjaraxuacujinae, caematacabibejecujinae, tajuatŕi baja bjarapaponamatonotoximi. Pacuena Dioso aitaĕyaexana ponamatonotoxi, bajara pijinia pacuena paxamĕ ata Dioso pacaxatabiana piaitaĕbĕjava itsa pajumecovĕnĕtame Dioso. ³¹ Bjaraxuata pĕtsa jamatabĕbĕjaiya pajamatabĕjumaitŕimĕ: "ĕDe tsaeta xua xaenatsi? ĕDe tsaeta xua matavějĕa apaenatsi? ĕDe tsaeta xua naxatabianatsi?" pajamatabĕjamĕ pĕtsa. ³² Pamonaĕ Dioso apo pejumecovĕnĕtsivi, bjarapacuenia bitso sivanajamatabĕxainabiaba ĕpexaejavanexa, ĕpenaxabijavanexa ata. Itsiata baitsi jane paneaxa paxainame, athĕbĕtatsia peecaenĕ. Bjaraponĕ yapĕtane daxita xua panamatavenoname. ³³ Bjaraxuata, daxita xua panamatavenoname, matatoxenetsia, Dioso pijacuene bitso pasivanajamatabĕxainabiabianame panetoexanavanapaenexa pacuena Dioso pacaitoroba. Nexata Dioso pacarajutsiana daxita xua panamatavenoname. ³⁴ Itsa baja pajamatabĕcuenebĕjamĕ ajena pitsijavata itsacuenejavayo yabara, pĕtsa caecuena payajavajamatabĕcuenebĕjamĕ xua yabara meravia pitsijavata pacatocopiapatsijitsia. Tsipaji xua caematacabi canacujitsia nacatocopiapatabiaba vajajamatabĕcuenebĕjainexa, ayaijava baja tsabiabi. Bjaraxuata ajena pitsijavata apo besivajamatabĕcuenebĕjaitsi xua meravia pitsijavata nacatocopiapatsijitsia, jai Jesŭs pijajivijavabelia.

7

Pacuenia Jesŭs pijajivi muxujioba pitaxutotsoniataenexa itsamonae ata, pacuenia bjarapamonae ata Dioso itaxutotsoniatanetsi, yabara pelivaisi
(Lc 6.37-38, 41-42)

¹ Icatsia Jesŭs jumaitŕi petsutoyenepanajavata pijajivi ayaibitsaĕtoxanetojavabelia:

—Pĕtsa panataneme pepacuene bepeneaneconijibivi. Nexata itsamonae pibisiacuene pexanaejava xaniavaetsia payapĕtaenejevamĕ, pĕtsa pabaracuaicuajamĕ mapacueniaje: "Bjarapitsipibisiacuene pexanaevi, Dioso bitso ayaicuenia naneconitsiaexanaenatsi," pajamĕ pĕtsa. Tsipaji paxamĕ ata pijinia bjarapitsineconi itsa paxainame, Dioso bitso ayaicuenia pacananeconitsiaexanaejitsipa. ² Itsamonae pexanaejava xaniavaetsia payapĕtaenejevamĕ, pĕtsa pabaracuaicuajamĕ mapacueniaje: "Bjarapitsicuene pexanaevi Dioso naneconitsiaexanaenatsi," pajamĕ pĕtsa. Tsipaji paxamĕ ata bjarapitsicuene itsa paexaname, itsamonae pijinia bjarapacuenia pacabaracuaicuajai tsipae. ³ Bjaraxuata paxamĕ pepacuene bepeneaneconijibivi nataeya pĕtsa pamuxujiobame itsajivi pijaneconi yabara. Tsipaji raja apo payapĕtaemĕ paxamĕ ata pijinia paneconivajĕto paxainame. ⁴ Nexata paxamĕ ata ayaineconixaneto itsa paxainame, nexata itsajivijavabelia apo bepajumaitŕimĕ: "Papistiacuene exaname, copare baja," apo bepajamĕ. ⁵ Yamaxĕitojorobiaya saya bepexaniajamatabĕcuenevi nataeya pacuaicuajamĕ tsabiabi. Itsamonae pijaneconi yabara pabaracuaicuajamĕ tsabiabi. Itsiata pijinia paxamĕ ata paneconivajĕto paxainame, apo payapĕtaemĕ. Paxamĕ copiaya pacopabare pibisiacuene paneexanabiabijava. Bajara jane xuacujinae paitavetsianame itsamonae ata pibisiacuene pexanaejava pecopabinexa, jai Jesŭs pijajivijavabelia.

⁶ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pëtsa matavëjêa patsipaebaponame Dioso pejumelivaisi, pamona patsipaebi atamë, apo yaiyatae bajarapalivaisi. Tsipaji saya capocaponabiaba bajarapalivaisi. Vaxaitsi itsanë pijaaviri pexaejavanexa rajutsi atatsi tsipae, saya nacaitoya tsipae. Nacasinijitsipanua. Bajara pijinia jamatabëcueneitsi pamona apo yaiyatae Dioso pejumelivaisi, patsipaebi atamë. Pacuenia marrano ata itsa rajutsipatsi perlavënëjava, bitso penamatamotsijava, saya taxunanonobijitsipa, bajara saya jamatabëcueneitsi bajarapamona, jai Jesús pijajivijavabelia.

Pacuenia Jesús pijajivi tsipaeba pacuenia Diosojavabelia vajëta pona ejitsia yabara pelivaisi

(Lc 11.9-13; 6.31)

⁷ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pavajëta pona Diosojavabelia bajayajebi ata pacuenia bajayajebi ata pajaitsipame panecaxitajarabinexa itsa pacatonaxuaba itsacuenejavayo. Pavajëta pona Diosojavabelia asaëyata pacuenia asaëyata padocodocotsipame baupa papecatobaupatsinexa itsa baupa xatatanuta. ⁸ Bajarapacuenia asaëyata pavajëta pona Diosojavabelia tsipaji pajivi vajëtabiaba, rajutabiabatsi. Pajivi ata jaitabiaba, caxitajarabiaba. Pajivi ata baupa docodocotabiaba, tobaupatabiabatsi.

⁹ Paxamë papebijivimë panexi panexinaevi. Panexënatonëyo itsa pacavajëta panbë, apo panacoxirajutsimë tsipae iboto. ¹⁰ Itsa pacavajëta dujuainëyo, apo panacoxirajutsimë tsipae jomo. ¹¹ Paxamë panejamatabëcuenebejevi ata, payapëtaneme panenacoxirajutsinexa pexaniajava. Paneaxa, athëbëtsia peecaenë, bitso biji cajena pexaniajamatabëcuenenë paxamë matatoxenetsia. Bajaraponë pacarajutsiana pexaniacuene itsa pavajëta me.

¹² Xua pexaniacuene, paxamë pajitsipame itsamona papecatoexanaenexa, copiaya paxamë bajarapapexaniacuene patoexanare bajarapamonaejavabelia. Bajarapajamatabëcuene jëpa Dioso Moisés pijinëta penajumecopatsilivaisi. Diosojumepaebivimi profetavi peyaquinaelivaisianë ata jëpa bajarapajamatabëcuene, jai Jesús pijajivijavabelia.

Tsiquiribaupayo epatajërëtsialia yabara pelivaisi

(Lc 13.24)

¹³ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pajonemeya tsiquiribaupayovalia panepatsinexa Dioso pijanacuayabelia. Tsipaji pinijibaupa, pinijinamutonua, pata infiernojavabelia. Nexata jivi ayaibitsaëtoxanetonë bajaraxuayo jonepona. ¹⁴ Pabaupa tsiquiribaupayo, tsiquirinamutoyona, bajarapanamuto pata matacabi apo pevereverecejava pexinaevi pijanacuayabelia. Nexata saya caejiviyobeje bajaraxuayo jonepona, jai Jesús pijajivijavabelia petsutoyenepanajavata.

Pacuenia peubinaënë itsa nacuita, nayapëtanë pavirianaecuene yabara pelivaisi

(Lc 6.43-44)

¹⁵ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Xania panayajivitaema. Pamona saicayacuenia Dioso pejumelivaisivecua jivi tsi-paebapona, bajarapamona najumetsënëtsiaya pacajumai tsabiabi: “Paxanë raja Dioso patanitorobicuenia livaisi jivi patsipaebaponajë,” pacajai tsabiabi. Bajarapamona Dioso pejumecovënëtsivi cuenecataeya najonena paxamëjavaberena. Itsiata baitsi jane pacuenia nevëthë pianaepanaevi jamatabëcueneitsi, bajara jamatabëcueneitsi. Jamatabëpacacopatsiaexana Dioso panejumecovënëtsijavami. ¹⁶ Vaxaitsi rabaja yapëtanetsi mapacueneje. Peubinaenë itsa nacuita, yapëtanetsi ponaecuai xanepana vajaxaenexa.

Nexata bajaraponae cuaixanetsi. Ponaе pijinia pibisiacuai nacuaita, yapētanetsi piabejecuene. Nexata bajaraponae apo cuaixaetsi. Nexata pacuenia peubinaēnē itsa nacuaita, nayapētane ponaecuai xanepana vajacuaixaenexa, bajara pijinia pacuenia paxamē payapētaename pacuenia jamatabēcueneitsi bajarapamonae itsa pacuenetaename xua exanavanapa. Uvaru apo paucutsimē cucunanaeta. Higovēncuaito ata apo paucutsimē jomovaēnaeta. ¹⁷ Nexata ponaе pexanianaе, pexaniacuai pijinia nacuaita vajaxaenexa. Ponaе pijinia pibisianaе, ēpiabejecuai nacuaita. ¹⁸ Pexanianaе pexaniacuai nacuaita. Apo nacuaitsi piabejecuai. Pibisianaе pijinia apo nacuaitsi pexaniacuai. ¹⁹ Daxita ponaenē nacuaita pibisiacuai, apo vajaxaecuai, yapētanetsi. Nexata daxita bajaraponaenēmi nicatatsi. Nexata tajuitatsi isotota. ²⁰ Bajara pijinia pacuenia paxamē ata payapētaename itsa pacuenetaename xua exanavanapa pamonaе saicayacuenia Dioso pejumelivaisivecua jivi tsipaebapona, jai Jesús pijajivijavabelia.

Pacuenia daxitajivi apo jone tsane Dioso pijanacuayabetsia yabara pelivaisi
(Lc 13.25-27)

²¹ Icatsia Jesús jumaitsi petsutoyenepanajavata pijajivi ayaibitsaētoخانetojavabelia:

—Daxita pamonaе: “Tajatuxanenē,” tanejaivi ata, itsa apo jumecovēnētsi tsane taxa Dioso, athēbētatsia peecaenē, nexata apo jone tsane taxa Dioso pijanacuayabetsia. Itsiata pamonaе exanavanapa taxa, athēbētatsia peecaenē, pejitsipaecuenia, ēbajarapamonae jonena taxa pijanacuayabetsia. ²² Pamatacabi copiapatsiana pijaneconi pexainaеvi Dioso penaneconitsiaexanaematacabinexa, bajarapamatacabi jivi ayaibitsaētoخانetonē nejumaitsi tsane: “Patajatuxanenē, xamē baja cajena nejamatabēcueneta jivi patsipaebabiabajē Dioso pejumelivaisi. Nevēnētanua dovathi jivivecua pacapitsapaponajē. Nevēnētanua pinijicuene pataexanaejavanē, Dioso pesaēta paexanaponajē,” nejai tsane jivi ayaibitsaētoخانetonē. ²³ Itsiata baitsi jane xanē jumaitsinē tsane bajarapamonaejavabelia: “Apo pacayapētaetsi cajena paxamē. Panevecuaponare pibisiacuene paneexanabiabivi,” janē tsane bajarapamonaejavabelia, jai Jesús pijajivijavabelia.

Pacuenia Jesús livaisi tsipaeba anijanēbeje bo pexanaenēbeje pelivaisicuenia yabara pelivaisi
(Mr 1.22; Lc 6.47-49)

²⁴ Jesús icatsia jumaitsi petsutoyenepanajavata pijajivi ayaibitsaētoخانetojavabelia:

—Pajivi nejumecovēnētsiana patacatsipaebilivaisi, nexata itsa exanaena taitorobicuenia, apo nacueratsi tsane. Bajarapajivi piatajairata pijabo bepexanetsinē tsane. Tsipaji ponē pijabo exanaejitsia, peyapētaexae itsajota pijabo exanetsijitsia pebubutsijavanexa, nexata baja bajarajota apo exanetsi pijabo. Nexata pijabo exaneta bitso piatajairata. Nexata bajaraponē bo pexanaejava apo nacueratsi. ²⁵ Bo peveretetsicujinaе ayaiemaxaneto jopa. Menianē avajubua tsaponae. Ira bubuta. Ayaijovibo bitso bubujai pijabojavaberena. Itsiata pijabo apo toxuabitsitsia. Tsipaji pijabo exaneta piatajairata. ²⁶ Pajivi nejumetae ata patacatsipaebilivaisi, apo nejumecovēnētsi tsane, nexata itsa apo exanae tsane taitorobicuenia, bajarapajivi nacueratsiana. Pacuenia tajetabota bo pexanetsinē nacuerata bo pexanaejava, bajara itsi tsane. Ponē tajetabota pijabo exaneta, yapētae ata emarapae pecopiapatsijavanexa, bajaraponē nacuerata bo pexanaejava. ²⁷ Tsipaji bo peveretetsicujinaе ayaiemaxaneto jopa. Menianē avajubua tsaponae. Ira bubuta. Ayaijovibo bitso bubujai pijabojavaberena. Pijabo nexata toxuabayatsi. Pepacuene baja nexata bomi abeje, jai Jesús mapacueniaje pijajivijavabelia.

²⁸ Itsa baja Jesús najumevereta petsutoyenepanajavata bajarapalivaisi petsipaebijava, pejumetaevitsi bitso jamatabēcuenenabenajaca. ²⁹ Jesús pejumetaevitsi bitso jamatabēcuenenabenajaca tsipaji Jesús livaisi tsipaeba pinijijamatabēcuene pexainaenēcuenia. Apo tsipaebi pacuenia judíovi pecujarubivi tsipaebabiaba.

8

*Pacuenia Jesús jamatejemayaexana bajayajebi bitso peperabëtsabanaenë yabara peliv-
aisi*

(Mr 1.40-45; Lc 5.12-16)

¹ Itsa baja Jesús runaica petsutojumavetsica, jivi ayaibitsaëtoxaneto pënaponatsi.
² Nexata imoxoyotatsi bajayajebi bitso peperabëtsabanaenë. Pitabarata pematatabacabëta tonucatsi. Bitso peperabëtsabanaenë jumaitsi Jesúsjavabelia:

—Jesús, cacaëjêpa raja tanejamatejemayaexanaenexamë. Itsa jitsipame, nejamatejemayaexanare mapavitanevecuaje, jai bitso peperabëtsabanaenë.

³ Nexata Jesús pecobeta perabëjajalia bitso peperabëtsabanaenë. Jesús jumaitsi bajara-ponëjavabelia:

—Jãjã, jitsipajë cajena. Jamatejemamë rabaja, jai Jesús bajayajebi bitso peperabëtsabanaenëjavabelia.

Bajarapacuenia Jesús pejumaitsijavata peperabëtsabanaenëmi baja perabëxanepananajereca. ⁴ Nexata icatsia Jesús jumaitsi bajaraponëjavabelia:

—Nejumetaema. Pëtsa tsipaebame itsajivijavabelia ata tacajamatejemayaexanaejava. Naitajëtsiaremelia jane sacerdotenëjavabelia, templobota penacuenebinëjavabelia. Nexata jivi yapëtaena pepacuenë baja pecavecuajibijava niavitanejavami. Diosonëxarajuremelia ofrenda sacerdotenëjavabelia pecavecuajibiaexanaexae niavitanejavami. Bajara tsipaji pacuenia bajayata vajasalinainëmi Moiséspijinë nacaitoroba. Nexata sacerdotenë cataena pecavecuajibijava baja niavitanejavami, jai Jesús bajaraponëjavabelia.

Pacuenia vajabitsaë pijacapitán pijabota petonacuenebaponaponaenëtsi, Jesús tojamatejemayaexana yabara pelivaisi

(Lc 7.1-10)

⁵ Itsa baja Jesús pata Capernaum tomarabelia, Romano nacuapijivajabitsaëvi pijacapitán Jesús imoxoyorenatsi pevajëtsinexatsi. ⁶ Vajabitsaëvi pijacapitán bitso ayaicuenia vajëta Jesúsjavabelia. Jumaitsi:

—Petuxanenë, tajajivitonë raja tajabota camata boboca. Bitso cuenabatsi. Pinijicuenia navixaetaeyabiaba, jai.

⁷ Nexata Jesús jumaitsi capitánjavabelia:

—Xanë ponaenajë nijaboyabelia. Nexata catojamatejemayaexanaenatsi nijajivitonë, jai Jesús.

⁸ Nexata capitán jumaitsi Jesúsjavabelia:

—Petuxanenë, xanë raja bitso beveliajamatabëcuenenënë xamëvecua. Nexata apo xanepanae tsipae nejonejava tajaboyabelia. Nexata saya maveliaje ënijume itorobare. Nexata tajajivitonë netojamatejema tsane. ⁹ Xanë ata xainajë taneitorobabiabivi taneitorobicuenia tajumecovënëtabiabinëxa. Xanë ata juya xainajë vajabitsaëvi tajajivi taitorobicuenia tanetoexanabiabinëxa. Nexata itsa itorobajë caenë vajabitsaënë peponaenëxa, bajaraponë ponabiaba. Itsa junarenajë itsanë vajabitsaënë pepatsinëxa xanëjavaberena, bajaraponë patabiabarëna. Itsa itorobajë tajajivitonë tanetoexanaenëxa itsacuenejavayo, nexata netoexanabiaba. Bajara pijinia pacuenia xamë ata nexanaenëxa cacaëjêpa. Nexata saya maveliaje ënijume itorobare saya ënijumeta tajajivitonë tanetojamatejemayaexanaenexamë, jai capitán Jesúsjavabelia.

¹⁰ Jesús itsa jumetane bajarapacuenia capitán pejumaitsijavatsi, nexata Jesús jamatabëcuenenabenajaca. Nexata Jesús jumaitsi pepënaponaevitsijavabelia:

—Xaniajanë pacuenia pacatsipaebijitsiatsi. Israel nacuapijivi nejumecovënëtsi ata, itsiata caeto ata apo caxitajarabaxuabinë xanëjavaberena bitso tanesivanajamatabëcuenecopatsinë pacuenia mapacapitán nesivajamatabëcuenecopatsiaya jumaitsije.

¹¹ Nexata pacatsipaebatsi paneyapëtaenëxa. Apo judíovi ata raja, ayaibitsaëtoxanetonë

daxitanacuanëpijivi, Dioso jumecovënëtsiana. Nexata apo judíovi ata capanepaenatsi Dioso pijanacuayabetsia. Nexata bajarapamonae Dioso pijanacuatatsia, Abrahampijinë yajava, nabaniana. Isaacpijinë ata, Jacobpijinë ata yajava, nabaniana. ¹² Itsiata baitsi jane judíovi, pamona picani Dioso athëbëtatsia toxaniavaetatsi peyajavajinavanapaenexatsi, bajarapamonae caranata apo jumecovënëtsi Dioso. Nexata bajarapamonae infernojavabelia Dioso xuabianatsi. Bajarajota nuena. Navonosiniana bitso penavixaetaexae, jai Jesús mapacueniaje pepënaponaevitsijavabelia.

¹³ Nexata icatsia Jesús jumaitsi capitánjavabelia:

—Ponare baja nijaboyabelia. Catoexanatsi rabaja pacuenia xanëjavaberena nesivana-jamatabëcopatsiaya jumaitsimë tacatoexanaenexa, jai Jesús capitánjavabelia.

Nexata bajarapaepatota capitán pijabotalia pijajivitonë baja tojamatejematsi.

Pacuenia Simón Pedro pijava pena Jesús tojamatejemayaexana yabara pelivaisi
(Mr 1.29-31; Lc 4.38-39)

¹⁴ Jesús pona Pedro pijaboyabelia. Nexata Pedro pijabota Jesús taeyabuata Pedro pijava pena peromaebanucavejavatsi camata. ¹⁵ Nexata Jesús cobejayata peromaebanucavevatsi. Jesús pecobejayatsijavata, bajarapova vecuajibitsireca baja domae. Nexata baja bajarapova jamatejema. Jesús bana pexaejava bajarapova toexanatsi.

Pacuenia ayaibitsaëto jivi, piavitanevi, Jesús jamatejemayaexana yabara pelivaisi
(Mr 1.32-34; Lc 4.40-41)

¹⁶ Itsa baja ajena meravitsia, Jesúsjavaberena tocapatatsi ayaibitsaëto dovathi peyajavajinavanapaevi. Caejumeta saya Jesús caecuenia dovathi vecuacapitsapa bajarapamonae. Bajarajota jamatejemayaexananua daxita piavitanevi. ¹⁷ Bajarapacuenia Jesús itsa exana, copiapata jane baja pacuenia Jesús yabara bajayata Diosojumepaebinëmi profeta Isaíaspijinë tajëvelia vajunupaeba. Profeta Isaíaspijinë bajayata tajëvelia jumaitsi mapacueniaje: “Bajaraponë nacavecuajibiaexanaena vajaavitanejavami,” jai bajayata tajëvelia Isaíaspijinë Jesús yabara.

Pacuenia picani Jesús jamatabëpënaponatsi itsamonae yabara pelivaisi
(Lc 9.57-62)

¹⁸ Nexata Jesús itsa tane jivi ayaibitsaëto pematatoyoronaejavatsi, pijajivi junata pepënuabinexatsi pucaxaneto itsapanabelia. ¹⁹ Nexata bajarapaepatota judíovi pecujarubinë Jesús imoxoyorenatsi. Judíovi pecujarubinë jumaitsi Jesúsjavabelia:

—Petuxanenë, itsabelia poname, capënaponaeatsi cajena, jai.

²⁰ Nexata Jesús jumaitsi judíovi pecujarubinëjavabelia:

—Itsa nepënaponaejitsipame, apo napatabiabimë tsipae tajabota nenacueraevetabiabinexa. Tsipaji tajabo apo xainaenë. Namu pijamëthëanë xaina pepatabiabinexa pemajitabiabinexa. Baratsui ata pematapenanë xaina. Itsiata baitsi jane xanë, Daxitajivi Pematapijinënë, itsajavabelia ata apo xainaenë itsajota nacueraevetabiabijitsianë, jai Jesús judíovi pecujarubinëjavabelia.

²¹ Nexata Jesús pijajiviyajuvënënenë jumaitsi Jesúsjavabelia:

—Tajatuxanenë, caepatoyo abaxë necopare tamëthëtsinexa taxa petëpaenë, jai.

²² Jesús nexata jumaitsi pijajivitonëjavabelia:

—Naxanitsia. Nepënaponare. Copare matakabi apo pevereverecaejava apo pexainaevinexa pemëthëcaenexatsi nijamonaemi itsa tëpa, jai Jesús pijajivitonëjavabelia.

Pacuenia Jesús itaveta joviboxaneto, malataca yajava, piyajavami yabara pelivaisi
(Mr 4.35-41; Lc 8.22-25)

²³ Jesús, pijajivi yajava, runa jera ënëabereca. Nexata Jesús pijajivi jerata yajavanajetaruca pucajava. ²⁴ Nexata jemata pinijijoviboxaneto najetaruca. Malatacaxanetonë bitso ayai. Nexata malataca jera ënëaberena mera epabajarapona. Itsiata Jesús

jamatejema majitanuca. ²⁵ Nexata Jesús pijajivi yaitavabatsi pemajitanucaenë. Jesús pijajivi jumaitsi:

—¡Patajatuxanenë, panecapanepare! ¡Vaxaitsimi rabaja yaothopaenatsi! jai Jesús pijajivi.

²⁶ Nexata Jesús jumaitsi pijajivijavabelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevetsi-
java? jai Jesús pijajivijavabelia.

Nexata Jesús namatacotapuna. Pinijijumeta itavetaxuaba jovibo, malataca yajava. Nexata baja daxita puca vainae ecaxuaba. ²⁷ Nexata Jesús pijajivi itsa tane bajaraxua, jamatabëcuenenabenajaca. Nexata Jesús pijajivi najumaitsi:

—¿De meta tsipaji maponëje? ¡Itaveta jovibo, malataca yajava! ¡Jumecovënëtatsi baja rovia maponëje! ¡Nexata baja jovibo, malataca yajava, ajibi tsaxuabi! najai Jesús pijajivi.

Pacuenia Gadara tomarapijinëbeje, dovathivi peyajavaponaponaenëbeje, Jesús vecuacapitsapa Gerasa nacuata yabara pelivaisi
(Mr 5.1-20; Lc 8.26-39)

²⁸ Jesús pijajivi barëpata pucaxaneto itsapanabelia, Gerasa nacuayabelia. Jesús itsa pata Gerasa nacuata, Gadara tomarapijinëmibeje pitsaparenabeje jivimëthëanëjavaverena. Imoxoyorenatsibeje Jesús. Bajaraponëbeje dovathivi peyajavaponaponaenëbeje. Bitso anaepanabiababeje. Nexata itsajivi ata apo ponabiabi bajaraxuayo perucaenamutojava. ²⁹ Nexata dovathivi peyajavaponaponaenëbeje vavajaiibeje.

—Jesús, Dioso pexënatomë, ¿detsa xua namatavenoname paxanëbejejavaberena? ¿Dioso tsaja daxitajivi penaneconitsia exanaematacabinexavajënaeya patame patanenaneconitsiaexanaenexamëbeje? jaibeje Jesúsjavabelia dovathivi peyajavaponaponaenëbeje.

³⁰ Nexata bajarajota, imoxoyo petsutojavata, marranobitsaëtoxaneto xaevanapa.

³¹ Nexata dovathivi bitso vajëca Jesúsjavabelia. Jumaitsi:

—Itsa panexuabijitsiamë maponëbejevecuaje, panetocopare patajonenexa marranobitsaëtoxanetojavabelia, jai.

³² Nexata Jesús jumaitsi dovathivijavabelia:

—Paponare baja panejonenexa marranobitsaëtoxanetojavabelia, jai.

Nexata bajaraponëbeje dovathivi vecuapitsapatsibeje. Nexata baja marranobitsaëtoxanetojavabelia junua dovathivi. Nexata daxita bajara pamarranobitsaëtoxanetomi cujinaeyeca. Pucaxaneto itapajanituareca othopareca. Bajarajota daxita marranobitsaëtoxanetomi meneta bubuna.

³³ Bajara pamarranobitsaëtoxanetomi pevetavanapaevi, rëcëpeca. Itsa bajarapamonae Gadara tomarabelia pata, tsipaeba pacuenia tane. Tsipaebanua pacuenia Jesús dovathivi vecuacapitsapa dovathivi peyajavaponaponaenëbeje. ³⁴ Nexata daxita bajarapatomarapijivi ponarena Jesúsjavaberena. Nexata itsa tanetsi Jesús, daxita bajarapamonae jumaitsi Jesúsjavabelia:

—Pexaniacuene pacavajëtatsi. Ponare baja patajanacuavecua, jai bajarapamonae Jesúsjavabelia tsipaji cujunavatsi.

9

Pacuenia Jesús jamatejemayaexana petabusipacuenabinëtsi yabara pelivaisi
(Mr 2.1-12; Lc 5.17-26)

¹ Jesús runareca jera ënëabereca. Nicabilia puca itsapanabelia. Pata nexata pijatomarabelia. ² Bajarajota Jesús tocpatatsi petabusipacuenabinëtsi. Pacamayota bocabiaba, yavëtarapatatsi. Jesús jamatabëcueneyapëtane pacuenia sivanajamatabëxainatsi petocapatsivitsi. “Nacatojamatejemayaexanaenatsi

cajena,” pesivajamatabëjajjavatsi Jesús jamatabëcuenyapëtane. Bajaraxuata petabusipacuenebinëtsijavabelia Jesús jumaitsi mapacueniaje:

—Tajabananë, jamatabëcuenebarëyamëre. Pibisiacuene rabaja nexanaeneconimi cavecuaajibiaexanatsi, jai Jesús petabusipacuenabinëtsijavabelia.

³ Nexata judíovi pecujarubivi ita jumetaeyena bajarapacuenia Jesús pejumaitsijava, najamatabëxainena.

—Maponë Jesúsje Dioso apo pejitsipaecuenia cuaicuaijai, jamatabëjai tsenae judíovi pecujarubivi Jesús yabara.

⁴ Jesús jamatabëcuenyapëtane judíovi pecujarubivi bajarapacuenia pesivanajamatabëxainaejavatsi. Nexata Jesús jumaitsi judíovi pecujarubivijavabelia:

—Panesivanajamatabëxainame xanëjavaberena pibisiajamatabëcuene. ⁵ Paxamë apo pacacaëjêpae ata itsajivi pibisiacuene pexanaeneconí panevecuaajibiaexanaenexa, pacacaëjêpa picani saya jema panejumaitsinexa petabusipacuenebinëtsijavabelia mapacueniaje: “Cavecuaajibiaexanatsi rabaja pibisiacuene nexanaeneconimi,” panejainexa. Tsipaji itsajivi ata apo yapëtae tsipae saya jema panejumaitsijava. Itsiata baitsi jane ita apo pacacaëjêpae panejamatejemayaexanaenexa petabusipacuenebinëtsi, acuenebi panejumaitsinexa bajaraponëjavabelia mapacueniaje: “Nonotapunare. Nijacamayo pire. Ponare baja,” panejainexa. Tsipaji bajarapacuenia pajumaitsimë ata, ita apo jamatejema tsipae bajaraponë, nexata daxitajivi pacayapëtaejitsipa apo papecacaëjêpaeacuene panejamatejemayaexanaenexa, jai nexata Jesús judíovi pecujarubivijavabelia.

⁶ Icatsia Jesús jumaitsi judíovi pecujarubivijavabelia:

—Xanë Daxitajivi Pematapijinënë, mapanacuata necaëjêpa tavecuaajibiaexanaenexa itsajivi pibisiacuene pexanaeneconimi ata pacuenia baja exanajë maponëjavabeliaje. Nexata patanecueneyapëtaenexamë tanecaëjêpaeacuene tavecuaajibiaexanaenexa itsajivi pibisiacuene pexanaeneconimi ata, pataema pacuenia jamatejemayaexanaejitsianë maponëje, jai Jesús judíovi pecujarubivijavabelia.

Nexata icatsia Jesús jumaitsi petabusipacuenabinëtsijavabelia:

—Nonotapunare baja. Nijacamayo pire. Nijaboyabelia baja ponare, jai Jesús.

⁷ Nexata bajarapacuenia Jesús pejumaitsijavata, petabusipacuenabinëmitsi nonotapuna. Pijaboyabelia baja pona. ⁸ Nexata jivi ita tane bajaraxua, junava cajena bitso. Nexata bajarapamonae jumaitsi Diosojavabelia:

—Diosomë, bitso ayaijamatabëcuenenëmë. Tsipaji jivi caëjêpaeayaexaname pinijicuene pexanaenexa, jai.

*Pacuenia Jesús pijajivitonënexa junata Mateo yabara pelivaisi
(Mr 2.13-17; Lc 5.27-32)*

⁹ Jesús baja vecuapona itsajota jamatejemayaexana petabusipacuenabinëtsi. Nexata Jesús penajetarucaejavata taeyeta Mateo. Mateo gobierno pejamatabëcuene impuestomatamo pematamoyanijobabiabinë. Pabota jivijavabelia Mateo impuestomatamo matamoyanijobabiaba, bajarapabota eca Mateo. Nexata Jesús jumaitsi Mateojavabelia:

—Mateo, nepënaponare, jai.

Jejai Mateo. Nexata nonotapuna. Mateo baja napona Jesús pepëta.

¹⁰ Nexata Mateo junata Jesús pebarënanabinexa pijabota. Nexata Mateo pijabota Jesús pexaejava naxane. Mateo pijabota naena ayaibitsaëto gobierno pejamatabëcuene jivijavabelia impuestomatamo petomatamoyanijobivi. Itsamonae ata nanabane, pijaamatabëcuenebejevi. Jesús pijajivi nayajavaeca bajarapamesajavata. ¹¹ Nexata fariseovi ita tane bajarapacuenia, jamatabëcuenenavëxaniabiaya jumaitsi Jesús pijajivijavabelia:

—Papecacujarubinē rabaja Jesús naneconita Diosojavabelia. Tsipaji gobierno pejamatabēcueneta impuestomatamo pematamoyanijobabiavijavata, piajamatabēcuenebejevijavatanua, naxaeyeca pexaejava, jai fariseovi Jesús pijajivijavabelia.

¹² Jesús nexata jumetaeyeca bajarapacuenia fariseovi pejumaitisijava. Nexata Jesús jumaitsi fariseovijavabelia:

—Pevaëbinē raja apo vaëbi pejamatabëjemavi. Pevaëbinē raja piavitanevi vaëba. Bajara pijinia xanē ata itsinē. Sivapatajopajë tajunatsinexa pibisiajamatabēcuenevi peca-panepaenexatsi Diosojavabelia. ¹³ Paponare. Palebianame Dioso pejumelivaisibaxuto. Nexata payapëtaename pajamatabēcueni yabara jumaitsi Dioso pejumelivaisibaxutota mapacueniaje: “Jitsipajë paneitaxutotsoniataejava itsamonae. Apo jitsipaenē saya patanetobeyabiavijavamē dajubicuene ofrendacuenia patanerajutabiabinexamē,” jai Dioso pejumelivaisibaxutota. Xanē raja apo sivapatajopaenē tajunatsinexa pamonaē baja aneconijibi tsavanapae. Biji rajane sivapatajopajë tajunatsinexa pijaneconi pexainaevi. Junataponajë bajarapamonae pecopabinexa pibisiacuene pexanaejava penajamatabēcuenepënëyorotsinexa Diosojavabelia, jai Jesús fariseovijavabelia.

Pacuenia Jesús yanijobatsi pamatacabibeje jivi vajëtaona Diosojavabelia pexaejava apo pexaeyabiabixae yabara pelivaisi (Mr 2.18-22; Lc 5.33-39)

¹⁴ Juan pijajivi Jesús imoxoyorenatsi. Nexata Juan pijajivi jumaitsi Jesúsjavabelia mapacueniaje:

—Petuxanenē, paxanē pataxaejava apo paxaeyabiabinē pamatacabibeje pavajëtaonajë Diosojavabelia. Bajara pijinia itsi fariseovi ata pamatacabibeje vajëtaona Diosojavabelia. Pexaejava apo xaeabiabi. ¿Detsa xuajitsia xamē nijajivi pamatacabibeje vajëtaona Diosojavabelia pexaejava xaeabiaba? jai Juan pijajivi Jesúsjavabelia.

¹⁵ Nexata Jesús jumaitsi Juan pijajivijavabelia:

—Pamonae junatatsi penacasabifiestajavabelia penanabaninexa, apo atsobi pexaejava itsa abaxë yajavaecatsi pejananacasabinē. Itsiata baitsi jane pejananacasabinē itsa tsimaxëpatsipatsi pevecuacaponanexatsi itsajavabelia, nexata bajarapamonae pexaejava apo xae tsipae. Tsipaji bitso najamatabëxainaejitsipa pevecuacaponaeaxatsi. Bajara pijinia itsi tajajivi ata. Tayajavaponaponaeepato abaxë apo atsobabiabi pexaejava pamatacabibeje Diosojavabelia vajëtaona. Itsiata pamatacabi xanē necaponae baja jarapamonaevecua, nexata jane baja bajarapamatacabi pexaejava apo xae tsane bitso tanesivanajamatabëxainaeaxae, jai Jesús Juan pijajivijavabelia.

¹⁶ Nexata Juan pijajivi perujujamatabēcueni baja penavecuacopatsinexa, Jesús livaisi tsipaeba comparacióncuenia, Juan pijajivi pejumecovënëtsinexa ëpejanalivaisi, Jesús petsipaebilivaisi. Juan pijajivi anijajamatabēcueni baja pexainaeayaniva, perujujamatabēcueni baja pecopabinexa, Jesús livaisi tsipaeba comparacióncuenia. Perujujamatabēcueni yabara Jesús jumaitsi Juan pijajivijavabelia mapacueniaje:

—Itsajivi ata raja apo catsatarutsi pejanapana perujunaxatatsiesetojavabelia. Itsa catsatarutsipa pejanapanata perujunaxatatsiesetojavabelia, nexata pejanapana yanarobotsipa perujuesetojavaverena. Nexata biji bitso pinijivojoto titinaejitsipa. ¹⁷ Itsajivi ata pijinia apo epacae pejanavinoranē perujubocodoruanëjavabelia bajayajebi peyajebinexa. Pejanavinoranē itsa epacaejitsipa perujubocodoruanëjavabelia, nexata pejanavinoranē yatititibia tsipae. Tsipaji perujubocodoruanē apo yanayeretsi tsipae. Tsipaji pejanavinoranē pejumalitsëxë abaxë xaina. Nexata itsa yatititibia tsipae, naxuabijitsipa vinoranëmi. Bajaraxuata bepaca pejanavinoranē pejanabocodoruanëjavabelia. Nexata vinoranē peyaxanepanaenexa bajayajebi ata pejanabocodoronëta, jai Jesús Juan pijajivijavabelia.

Bजारपacuena Jesús jumaitsi Juan pijajivi pejumecovënëtsinexa ëpejanalivaisi, Jesús petsipaebilivaisi, perujujamatabëcuene baja pecopabinexa.

Pacuenia Jesús copiaya namutoepatota jamatejemayaexana piavitaneva, pacuenia icatsia cotocaevi toasaëyaexana Jairo pexënatovayo, petëpaevayomi, yabara pelivaisi
(Mr 5.21-43; Lc 8.40-56)

¹⁸ Jesús livaisi petsipaebanucaejavata Juan pijajivijavabelia, judíovi penacaetuatabi-abibo pevetsinë parena Jesúsjavaberena. Nexata bajaraponë Jesús pitabarata yaiyataeya pematabacabëta nucajunua. Jumaitsi Jesúsjavabelia:

—Taxënatovayo rabaja aeconoxae netotëpa. Itsiata baitsi jane itsa poname tajaboyabelia, nexata itsa netoperabëjayatsianame necobeta, icatsia netoasaë tsane, jai bajaraponë Jesúsjavabelia.

¹⁹ Nexata Jesús nonotapuna. Judíovi penacaetuatabiabibo pevetsinë pepëta Jesús, pijajivi yajava, napona. ²⁰ Nexata Jesús namutua penajetarucaejavata, pepënëverena imoxoyotatsi petiriva, piavitaneva. Bजारapova pijanacuene pecapunaecujinaetsi doce baja pavaibeje xaina. Nexata bajarapova Jesús pepënëvelia ponataba, jivibit-saëtoxaneto tuatujëjavalia. Nexata bajarapova tojayataba Jesús penaxatatsijavacopia. ²¹ Bजारपacuena tojayataba Jesús penaxatatsijavacopia tsipaji bajarapova jamatabëjumaitsi mapacueniaje:

—Itsa tojayatabianajë Jesús penaxatatsijavacopia, nexata tavitanejavami nevecuaajibi tsane, jamatabëjai bajarapova.

²² Nexata Jesús napënëyorotaxuaba. Taenuta bajarapova. Nexata Jesús jumaitsi bajarapovajavabelia:

—Jamatabëcuenebarëyamëre. Xamë nesivajamatabëjumaitsimë: “Itsa tojayatabianajë Jesús penaxatatsijava, nexata tavitanejavami nevecuaajibi tsane,” nesivajamatabëjamë. Bजारaxuata jamatejemamë baja, jai Jesús bajarapovajavabelia.

Bजारपacuena Jesús pejumaitsijavata bajarapova jamatejema baja. ²³ Bजारaxuacujinae Jesús jane baja pata judíovi penacaetuatabiabibo pevetsinë pijaboyabelia. Nexata Jesús itsa pata, tane pevajënae pepatsivi, flauta piobivinexa itsabelia caponaejitsia petëpaevayo pemëthëtsinexa piobinexa. Tanenua jivi bitso pinijicuenia pemataneuyabavanapaejava petëpaevayo.

²⁴ Nexata Jesús jumaitsi bajarapamonaejavabelia:

—Papitsapare mapabovecuaje. Pejanava raja apo tëpae. Saya raja majita, jai Jesús tsipaji yapëtane Jesús piasaëyaexanaejavanexa bajarapovayo.

Nexata saya bajarapamonae Jesús jumecapocaponatsi bajarapacuena pejumaitsijava. ²⁵ Jesús nexata bajarapamonae bovecua pitsapaeyaexana. Nexata itsaxuayolia petëpaevayo boca, Jesús joneya. Cobepita petëpaevayo. Bजारapovayo baja namatacota. ²⁶ Nexata daxita bajarapanacuapijivi Jesús vënëlivaisitanetsi piasaëyaexanaejava petëpaevayomi.

Pacuenia Jesús itaxutoxaniavaeta bitso pitaxutotsëcënaenëmibeje yabara pelivaisi

²⁷ Itsa baja Jesús pona judíovi penacaetuatabiabibo pevetsinë pijabovecua, anijanëbeje bitso pitaxutotsëcënaenëbeje Jesús pënaponatsi. Bजारaponëbeje vavajaiya jumai tsaponaebeje Jesúsjavabelia:

—¡Jesús, Davidpijinë pemomo, paneitaxutotsoniataemabeje! jaibeje tsaponae Jesúsjavabelia.

²⁸ Itsa baja Jesús joneya pabojavabelia pona, nexata bajaraponëbeje pënajoneyatsibeje. Nexata Jesús bajarajota jumaitsi bajaraponëbejejavabelia:

—¿Payapëtanemebeje tsaja tanecaëjëpaecuene patacaitaxutoxanepanaeya exanaejavanexabeje? jai Jesús bitso pitaxutotsëcënaenëbejejavabelia.

Nexata bitso pitaxutotsëcënaenëbeje jumaitsiibeje Jesúsjavabelia:

—Jājā, payapētaniijibeje cajena, jaibeje.

²⁹ Nexata Jesús itaxutojayata bitso pitaxutotsēcēnaenēbeje. Jesús jumaitsi bitso pitaxutotsēcēnaenēbejejavabelia:

—Pacuenia baja xanējavaberena nesivanajamatabēcuenecopatsiaya panesivanajamatabēxainamebeje patacaitaxutoxaniavaetsinexabeje, bajarapacuenia pacatoexanatsibeje, jai Jesús.

³⁰ Nexata bitso pitaxutotsēcēnaenēmibeje itaxutoxanepanabeje baja. Bajaraxuacujinae Jesús asaēya jumeitaveta bajaraponēbeje. Jumaitsi:

—Pētsa panavajunupaebamebeje itsamonaejavabelia patacaitaxutoxaniavaetsijavabeje, jai Jesús.

³¹ Itsiata saya ajena bajarapabovecua pitsapaliabeje, navajunupaebaponabeje. Pacuenia Jesús itaxutoxaniavaetatsibeje, navajunupaebaponabeje daxita bajarapanacuajava.

Pacuenia Jesús natsipaebiaexana apo pecuaicuaijainēmi yabara pelivaisi

³² Itsa baja bovecua pitsapabeje ponēbeje Jesús itaxutoxanepanaeyaexana, bitso pitaxutotsēcēnaenēmibeje, nexata icatsia itsamonae Jesús tocaparenatsi apo pecuaicuaijainē. Bajaraponē dovathi peyajavaponaponaenē. ³³ Nexata apo pecuaicuaijainē Jesús dovathi itsa vecuacapitsapa, cuaicuaijai baja xaniavaetsia. Nexata petaevitsi bitso jamatabēcuenenabenajaca. Najumaitsi bajarapamonae:

—Caeto ata cajena Israel nacuata itsajivi ata apo tae mapitsicueneje, najai bajarapamonae.

³⁴ Itsiata baitsi jane fariseovi jamatabēcuenenavēxaniabiaya jumaitsi Jesús yabara:

—Mara ponēje dovathi jivivecua capitsapabiaba dovathivi pepo penamatacaitorobinē pesaēta, jai fariseovi Jesús yabara.

Pacuenia Jesús itaxutotsoniatane jivi yabara pelivaisi

³⁵ Jesús najetaruca daxita tomaranējava, tsiquiritomaraxijava ata. Nexata bajarapatomaranējava judíovi penacaetuatabibonējava pexanialivaisi Jesús jivi tsipaebanajetaruca. Tsipaebanajetaruca daxita Dioso pijajivi pevetsijavanexa. Piavitanevi ata Jesús jamatejemayaexanapona, daxitaviriavitane pexainaevimi. ³⁶ Jesús jivi itsa tane, itaxutobejobiatane. Tsipaji jivi bitso baja cajena cuerana. Apo caējēpaetsinua jivi penatoexanaenexa itsacuenejavayo ata. Jesús jivi sivajamatabējumaitsi mapacueniaje:

—Pacuenia itsi ovejabitsaētoxfaneto itsa toajibitsi pevetsinētsi, bajara itsi mapamonaeje, sivajamatabējai Jesús.

³⁷ Nexata Jesús jumaitsi pijajivijavabelia:

—Xaniajanē pacuenia pacatsipaebijitsiatsi. Pabita peubijava penaveretsijava abaxē bitso ayajava sajina penotsinexa. Tsipaji saya caejiviyobeje penotsivi. Bajara pijinia itsi jivi ata Diosojavabelia penajamatabēcopabivinexa. Abaxē sajina ayaibitsaētoxfaneto. Itsiata baitsi jane Dioso panetonacuenebivi pacaejiviyomēbeje saya. ³⁸ Bajaraxuata Diosojavabelia pavajēcabiabare icatsia itsamonae Dioso pijajivi pitorobinexa papecayavenonaenexa, jai Jesús pijajivijavabelia.

10

Pacuenia Jesús pijajivi ayaibitsaētoxfanetoyajuvēnēvi itapeta saya doce ponēbeje apóstolevinexa yabara pelivaisi

(Mr 3.13-19; Lc 6.12-16)

¹ Jesús pijajivi ayaibitsaētoxfanetoyajuvēnēvi junata saya doce ponēbeje Jesús pebarēnacaetuatsinexa. Jesús pijajivi pecaējēpaejamatabēcuenetsi jamatabēcuenecaējēpaeyaexana dovathi peyajavajinavanapaevi pevecuacapitsapaponaeenexa, pejamatejemayaexanaponaenexanua daxitaviriavitane pecapunaevitsi.

² Mara doce ponëbeje Jesús pijajivi, apóstolevi, pevënëanëje. Itsanë pevënë Simón. Itsavënë bajaraponë Pedro. Itsanë pevënë Andrés, Simón pejuyapijinë. Itsanëbeje pijinia Santiagobeje Juanbeje nacaebananëbeje, Zebedeo pexënatobeje. ³ Itsanë pevënë Felipe. Itsanë Bartolomé. Itsanë Tomás. Itsanë Mateo, impuestomatamo gobierno pejamatabëcuene jivijavabelia petomatamoyanijobinëmi. Itsanë pevënë Santiago, Alfeo pexënato. Itsanë pevënë Lebeo. Bajaraponë itsavënë Tadeo. ⁴ Itsanë Simón, celotenë. Itsanë pevënë Judas Iscariote. Bajaraponë bexëjavabelia canajetsijitsiatsi Jesús pijava-jabitsaë pecobeyabelia pebeyaxuabinexatsi.

Pacuenia Jesús pijajivi itoroba Dioso pitorobilivaisi jivi petsipaebanajetarubenaenexa yabara pelivaisi

(Mr 6.7-13; Lc 9.1-6)

⁵ Jesús pijajivi pitorobivajënaeya jumaitsi pijajivijavabelia mapacueniaje:

—Pëtsa paponame apo judíovi pijanacuayabelia. Pëtsa paponame Samaria nacuata penaetomaranëjavabelia ata. ⁶ Paponare jane Israel nacuapijivijavabelia. Pacuenia ovejabitsaëttoxaneto pevetsinëtsi vecuanaxuabavanapa, bajara pijinia pacuenia Israel nacuapijivi Diosovecua naxuabavanapa. ⁷ Patsipaebanajetarubenaename bajarapamonae imoxoyo baja pevajënae pecopiapatsijavanexa Dioso pijajivi pevetsimatacabinexa. ⁸ Pajamatejemayaexanaponaename piavitanevi. Pasaëyaexanaponaenamenua petëpaevimi ata. Pajamatejemayaexanaponaenamenua bajayajebi bitso peperabëtsabanaevi. Pavecuacapitsapaponaenamenua dovathi peyajavajinavanapaevi. Amoneya raja pacacajëpaeyaexanatsi bajarapacuenia paneexanaponaenexa. Bajaraxuata amoneya jivi pajamatejemayaexanaponaename. Pëtsa pamatamoyanijobame panejamatejemaya exanaejamatabëcuene, jai Jesús pijajivijavabelia pitorobivajënaeya.

⁹ Jesús icatsia jumaitsi pijajivijavabelia pitorobivajënaeya:

—Panijanamutonexa pëtsa pacaponame palata. ¹⁰ Pëtsa pacaponame panijadoro ata. Saya pajumaponaename caenaxatatsi. Panenataxuxatatsijava ata, pataxunaponaename caejava. Naeyo ata pëtsa pacaponame. Pamonaejavabelia livaisi patsipaebianame, pacarajutsiana panexaejava. Bajarapacuenia pacarajutsiana tsipaji pajivi xaniavaetsia itsanëjavabelia tonacueneba, bajarapajivi juya pexaejava barajutatsi.

¹¹ 'Itsa papatabiabianame pinijitomarata, tsiquiritomarayojavata ata, bajarajota pajaitabiabianame ponë peyaiyataenëtsi. Nexata bajaraponë pijabota pamajitabiabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa paponaname, bajarapabovecua papitsapaename. ¹² Itsa pabota papatsijitsiamë, ajena pajonejitsiamëlia, pajumaitsimë tsabiabi tsane: “Diosojavabelia raja pacatovajëtsijitsiatsi xaniavaetsia panejinavanapaenexa,” pajamë tsabiabi tsane. ¹³ Itsa bajarapabopijivi pacacopiapitsiana xaniavaetsia, nexata pacuenia Diosojavabelia patovajëtame, yavenonaenatsi Dioso. Itsiata baitsi jane itsa apo pacacopiapitsi tsane xaniavaetsia, nexata pëtsa patovajëtame Diosojavabelia peyavenonaenexatsi. ¹⁴ Itsa apo pacacopiapitsi tsane, itsa apo jitsipaenua tsane papecanamuxunaevetsinexa panetsipaebilivaisi, bajarapabo pavecuaponaename. Bajarapatomara ata baja pavecuaponaename. Nexata baja itsa paponaejitsiamë bajarapatomaravecua, paneponaevajënae, bajarapatomarata panataxuatsapërëvarëbianame. Bajara-pacuenia itsa panataxuatsapërëvarëbianame, bajarapatomarapijivi yapëtaena Diosojavabelia penaneconitsicuene apo papecacopiapitsixae papecanamuxunaevetsinexa panetsipaebilivaisi. ¹⁵ Xaniajanë pacuenia pacatsipaebijitsiatsi. Pamatacabi Dioso

naneconitsiaexanaena daxita pijaneconi pexainaevi, bajarapamatacabi Dioso ayaicuenia naneconitsiaexanaenatsi patomarapijivi apo pacacopiapitsi tsane. Paneconivajëtota bajayata Dioso naneconitsiaexana Sodoma tomarapijivimi, Gomorra tomara-pijivimi ata, bajarapaneconivajëto matatoxenetsia itsamatacabi Dioso naneconitsiaexanaena patomarapijivi apo pacacopiapitsi tsane, jai Jesús pijajivijavabelia pitorobivajënaeya.

Pacuenia Jesús pijajivi bejiobiaexanaejitsiatsi yabara pelivaisi

¹⁶ Icatsia Jesús jumaitsi pijajivijavabelia:

—¡Xania panayajivitaename! Pacaitorobianatsi raja bitso pibisiacuene pexanabi-abivijavabelia. Pacuenia ovejaxi tsiayaitsi itsa jinavanapa pianaepanaevi nevëthë tuatuajëata, bajarapaitsimë tsane. Nexata pacuenia unupijivi nayajivitaeyajinavanapa pitsacueniabiyantivatsi, bajara paitsimë tsane. Pacuenia ata ucucu aneconijibia jinavanapa, bajara paitsimë tsavanapae tsane. ¹⁷ Xania baja tsane. Patajajivixaemë raja jivi pacaneconitsiana papecananeconitsiaexanaenexa. Nexata itsajota nacae-tuatabiaba tomara pevetsivi, bajarabelia pacacaponae. Judíovi penacaetuatabi-abibonëjava pacajumatitibabeyabiabiana penaneconitsivi pejumaconitabiabimacata. ¹⁸ Patajajivixaemë pacanubiananua nacuaeavetsivi pitabarata, presidentevi pitabarata ata. Bajarajota nexata xanë talivaisi patsipaebianame bajarapamonaejavabelia, apo judíovi ata pitabarata. ¹⁹ Itsiata baitsi jane itsa pacanubiana nacuaeavetsivi pitabarata, pëtsa pajamatabëbëjamë panenayajivicuaicuaijainexa bajarapamonaejavabelia. Tspaji raja paepatota panayajivicuaicuaijamëjitsia, bajarapaepatota Dioso pejamatabëcueneta pacacuaicuaijaiyaexanaena. ²⁰ Itsa panayajivicuaicuaijamë tsane, paxamë panijacuata apo pacuaicuaijamë tsane. Espíritu Santo raja pacacuaicuaijaiyaexanaena.

²¹ 'Itsamonae pematapijivi, pejuyapijivi ata, canajetsiana nacuaeavetsivijavabelia pebeyaxuabinexatsi. Itsamonae nacoxicanajetsiana nacuaeavetsivijavabelia pebeyaxuabinexatsi. Itsamonae canajetsiana paxa, pena ata, nacuaeavetsivijavabelia pebeyaxuabinexatsi. ²² Daxita nacupijivi pacaitoya tsane patajajivixaemë. Pajivi bejiobiaexanae atatsi tsane, itsiata itsa casaë tsaponaponae tsane tanejumecovënëtsijava, bajarapajivi capanepaenatsi Dioso pijanacuayabetsia. ²³ Itsa patomarata pacabejiobiaexanaena, bajarapatomaravecua parëcëpecaename itsatomarabelia. Xaniajanë pacuenia pacatsipaebijitsiatsi. Daxita Israel nacuata penaetomaranëjava abaxë patsipaebiveretsinejevamë pexanialivaisi, xanë, Daxitajivi Pematapijinënë, itacarajeta icatsia patsianicajë.

²⁴ 'Itsajivi ata apo jamatabëcuenematatoxenetsi pecujarubinëtsi. Itsajivi ata pijinia itsanë itsa pijajivitonë, apo jamatabëcuenematatoxenetsi pijatuxanenë. ²⁵ Pacuenia pecujarubinë itsamonae copiaya bejiobiaexanatsi, bajarapacuenia icatsia bajaraponë pecujarubivi ata bejiobiaexanaenatsi. Pacuenia petuxanenë copiaya bejiobiaexanatsi, bajarapacuenia icatsia pijajivitonë ata cotocaevi bejiobiaexanaenatsi. Xanë panijatuxanenënë: “Beelzebú, daxita dovathivi pijatuxanenë,” nejai tsabiabi itsamonae. Nexata pijinia patajajivixaemë bitso pibisiavënëta paxamë ata cotocaevi pacajunatabiabiana, jai Jesús pijajivijavabelia.

Pacuenia Jesús pijajivi tsipaeba pecujunaviyaniva pebeyaxuabijavatsi yabara pelivaisi (Lc 12.2-7)

²⁶ Icatsia Jesús jumaitsi pijajivijavabelia:

—Pëtsa pacujunavame jivi, pacaatiobi ata. Daxita xua jivi muetsia pibisiacuene exana, bexëajavabelia cueneyapëtaeponaenatsi daxitajivi. ²⁷ Palivaisianë muetsia va-jaepatojavata pacatsipaebaponatsi, bajarapalivaisianë paxamë pinijijumeta patsipaebaponaename jivi penacaeuatabiabiavata. ²⁸ Pëtsa pacujunavame jivivevi ata. Bajarapamonae pacabeyaxuabi ata tsipae, acuenebi matavëjëa papecaitsacueniabinexa pepo panejamatabëcuenejavabelia. Biji rajane pacujunavare Dioso, ponë caëjêpatsi papecaxuabinexa infernojavabelia papecabeyaxuabicujinae.

²⁹ 'Anijanëbeje baratsuito beje namatamota saya caepalatanëyo. Itsiata baitsi jane caenë ata baratsuito Dioso pepëya jemata muetsia apo jopaetsica petëpaenë. Tsipaji paneaxa, Dioso, asiva baratsui ata. ³⁰ Dioso cajena bitso pacaasiva baratsui matatoxenetsia. Nexata panematanatoxi ata, caematanatoyo canacujitsia, Dioso namataëjëta. ³¹ Bajaraxuata pëtsa pacujunavame itsacuenejavayo ata. Tsipaji paxamë Dioso bitso pacaasiva baratsuitoxi matatoxenetsia, jai Jesús pijajivijavabelia.

Pacuenia Jesús pijajivi apo benayavajunuaxainae Jesús pijajivicuene yabara pelivaisi (Lc 12.8-9)

³² Icatsia Jesús jumaitsi pijajivijavabelia:

—Daxita pamonaë tajajivi, jivi pitabarata itsa navajunupaebiana tajajivicuene, xanë ata vajunupaebianajë bajarapamonae tajajivicuene taxa, athëbëtatsia peecaenëjavabelia.

³³ Pamonaë jumai tsane itsamonaëjavabelia: “Xanë cajena Jesús apo pijajivitonënë,” jai tsane, nexata pijinia bajarapamonae yabara xanë jumaitsinë tsane taxa Diosojavabelia: “Mara pamonaë apo tajajivije,” janë tsane, jai Jesús pijajivijavabelia.

Pacuenia Jesús apo penajuajumecovënëtsixae, nacaemonae ata apo najamatabëcuenejêpae tsane yabara pelivaisi (Lc 12.51-53; 14.26-27)

³⁴ Icatsia Jesús jumaitsi pijajivijavabelia:

—Pëtsa panesivajamatabëjumaitsimë mapacueniaje: “Jesús rabaja patsica mapanacuayabetsicaje daxitajivi mapanacuataje najamatabëcuenejêpae pejinavanapaeyaexanaenexa,” panesivajamatabëjamë pëtsa. Bajaraxuanexa apo patsinëtsica. Biji rajane xanë tapatsixaetsica mapanacuayabetsicaje, jivi itsa nejumecovënëtsiana, apo najamatabëcuenejêpae tsane pamonaëjavabelia apo nejumecovënëtsi, nacaemonae ata. Napijavajabitsaë tsane namataenetsia. ³⁵ Xanë apo tanenajuajumecovënëtsixaebeje, pebibeje paxabeje apo najamatabëcuenejêpaebeje tsane. Petirivabeje ata, pexënatoyobeje xanë apo tanenajuajumecovënëtsixae penabeje apo najamatabëcuenejêpaebeje tsane. Pamebeje ata pecopenabeje apo najamatabëcuenejêpaebeje tsane. ³⁶ Nexata xanë apo tanenajuajumecovënëtsixae, caejivi canacujitsia bepjavajabitsaëjivi taenatsi pijamonaëjivi ata.

³⁷ 'Pajivi nejumecovënëtsi ata, apo niasiva tsane paxa, pena ata, piasivajava matatoxenetsia, bajarapajivi apo tajajivi tsane. Pajivi nejumecovënëtsi ata, apo niasiva tsane pexënato, pexënatoyo ata, piasivajava matatoxenetsia, bajarapajivi apo tajajivi tsane.

³⁸ Pajivi nejumecovënëtsi ata, pecajunavi apo nepënaponaë tsane pebeyaxuabixaejitsi-atsi xanë tajumelivaisi yabara, bajarapajivi apo tajajivi tsane. ³⁹ Pajivi nayavajunuaxaina tajajivicuene pebejioaexanaeyanivatsi, pebeyaxuabiyanivatsinua, bajarapajivi naxuabiana daxitamatacabijavabelianexa. Itsiata baitsi jane pajivi beyaxuabatsi tajajivixae, bajarapajivi daxitamatacabijavabelianexa Dioso capanepaenatsi, jai Jesús pijajivijavabelia.

Pacuenia Dioso matamotsijitsiatsi pamonaë xaniavaetsia copiapita Jesús pijajivi yabara pelivaisi (Mr 9.41)

⁴⁰ Icatsia Jesús jumaitsi pijajivijavabelia:

—Pajivi pacacopiapitsiana patajajivixaemë, bajaraxua xanë taniji tanecopiapitsijava. Pajivi necopiapitsiana, bajaraxua taxa Dioso tane pecopiapitsijavatsi. ⁴¹ Diosojumepaebinë Dioso matamotsianatsi petonacuenebimatamo. Nexata pajivi xaniavaetsia copiapita Diosojumepaebinë, bajarapajivi ata Dioso matamotsianatsi. Nexata xuavajëto Diosojumepaebinë Dioso matamotsianatsi, bajara pijinia xuavajëto Dioso matamotsianatsi pajivi copiapita Diosojumepaebinë. Pajivi ata exanabiaba Dioso pitorobicueniatsi, bajarapajivi ata Dioso matamotsianatsi. Nexata pajivi xaniavaetsia copiapita pajivi exanaponapona Dioso pitorobicueniatsi, bajarapajivi ata Dioso matamotsianatsi. Nexata xuavajëto Dioso matamotsianatsi pajivi exanaponapona Dioso pitorobicueniatsi, bajara pijinia xuavajëto bajarapajivi Dioso matamotsianatsi.

⁴² Pajivi yavenonaena tajajivi, tsiquirijavayo ata mera rajutsiana piapaenexa, bajarapajivi pepacuene matamotsianatsi Dioso, jai Jesús pijajivijavabelia.

11

Pacuenia Juan jivibautisabinë itoroba pijajiviyajuvënëvi Jesúsjavabelia yabara pelivaisi (Lc 7.18-35)

¹ Jesús baja najumevereta pijajivi doce ponëbejejavabelia livaisi petsipaebijava. Nexata baja Jesús pona livaisi petsipaebinexa bajarapanacuata penaetomaranëjava.

² Bajarapamatacabi Juan jivibautisabinë naneconitsiaponapona penaneconitsivi pejebabiabibota. Nexata Juan vënëlivaisitane Dioso pesaëta Jesús pinijicuene pexanaponaejava. Bajaraxuata Juan itoroba pijajiviyajuvënëvi Jesúsjavabelia. ³ Juan itoroba pijajivi peyanijobinexa Jesúsjavabelia. Nexata Juan pijajivi jumaiti Jesúsjavabelia:

—¿Xamë tsabaja Cristomë? ¿Xamë tsabaja tajëvelia cavajunupaebapona nepatsijavanexatsica daxitajivi necapanepaenexa? Itsa apo Cristomë, ¿abaxë tsaja pacopiaeve-tavanapaenajë itsanë pepatsinexatsica? jai Juan pijajivi Jesúsjavabelia.

⁴ Nexata Jesús jumaiti Juan pijajivijavabelia:

—Paponare baja. Patsipaebianame Juan pacuenia baja pataneme taexanaponaejava. Patsipaebianamenua pacuenia baja pajumetaneme tatsipaebilivaisi jivijavabelia.

⁵ Apo petaevimi ata itaxutoxaniavaetaponajë xaniavaetsia petaenexa. Petabusipacuenabivitsinua daxita jinavanapaeyaexanaponajë. Bajayajebi bitso peperabëtsabanaevinua vecuaajibiaexanaponajë. Bitso pemuxusipanaevinua jumetaeyaexanaponajë baja xaniavaetsia pejumetaenexa. Petëpaevimi ata icatsia asaëyaexanaponajë. Pexanialivaisinua pecapanepaelivaisinexatsi pibisiacuene pexanaeconomievecua tsipaebaponajë bepejiobivijavabelia. Daxita bajaraxua taexanaponaejava patanetaejavamë, patsipaebianame Juanjavabelia. ⁶ Pajumaitisimënu tsane Juanjavabelia: “Jesús raja jumaiti: ‘Jamatabëcuenebarëya pajivi tsiteca jumecovënëta xanë Dioso pexënatocuenenë,’ jai raja Jesús,” pajamë tsane Juanjavabelia, jai Jesús Juan pijajivijavabelia.

⁷ Itsa baja Juan pijajivi naviabalia, nexata bajarapamonae pecovëta Jesús taxuxuaba jivijavabelia petsipaebijava Juan pelivaisi. Jesús jumaiti jivijavabelia mapacueniaje:

—Itsa paponame petusato nacuyabelia, pamatacabi Juan ponapona petusato nacuata, ¿detsa pitsicuene pajamatabënaponaremelia panetaenexa bajarajotalia? ¿Paponaremelia tsaja saya panetaenexa musuli penajëabijava jovibota? ⁸ Itsa apo papon-aemëlia panetaenexa musuli penajëabijava jovibota, ¿detsa nexata pitsicuene panetaenexa paponaremelia? ¿Paponaremelia tsaja saya panetaenexa naitabëtsiaya pexaniajava penaxatatsinë? Paxamë rabaja payapëtaneme mapacuenije. Pamonae naitabëtsiaya pexaniajava naxatababiaba, bajarapamonae jinavanapa nacuanë pevet-sivi pijabonëjava. ⁹ ¿Detsa nexata xua pajamatabënaponaremelia panetaenexa petusato nacuyabelia? Paponaremelia raja panetaenexa Diosojumepaebinë profetanë. Xaniajanë pacuenia pacatsipaebijitsiatsi. Juan itsa pataneme, pepacuene jane baja pepo profetanë, Diosojumepaebinë, pataneme. Nexata saya bevelia profetanë apo pataemë.

¹⁰ Juan pexanaejavanexa, bajayata tajëvelia Dioso pejumelivaisibaxutota vajunupaeba. Dioso tanejumaitsijava ata xanëjavaberena Juan yabara, Dioso pejumelivaisibaxutota jumaiti mapacueniaje:

Itorobianajë nevajënaeyabelia tanejumelivaisipaebinënexa, jivi pecatsivajënae najamatabëcuenexaniavaetsinexa, jai bajayata Dioso pejumelivaisibaxutota tapatsivajënaeya Juan tanelivaisi paebanajetarucaejavanexa yabara.

¹¹ Xaniajanë pacuenia pacatsipaebijitsiatsi. Juan ayaijamatabëcuenenë mapanacuataje. Nexata bajayata Juan pevajënaeya paprofetavi jinavanapa, itsanë ata Juan apo jamatabëcuenematatoxenetsitsi. Itsiata baitsi jane pajivi beveliajamatabëcuenejivi ata, itsa nejumecovënëta tacapanepaejavanexa, bajarapajivi ayaijamatabëcuenejivi Dioso exanaenatsi Juan matatoxenetsia.

¹² Juan jivibautisabinë petaxuxuabijavaveliacujinae, Dioso pitorobilivaisi jivi pet-sipaebanajetarucaejava mapamatacabijavaberena ataje, ayaibitsaëttoxaneto picani jivi jitsipa Dioso pitorobilivaisi pejumecovënëtsinexa. Itsiata itsamonae pesaëta caranat-aponae bajarapamonae pejumecovënëtsiyaniva Dioso pitorobilivaisi. ¹³ Juan penaexanaevajënaeya, daxita Diosojumepaebivimi profetavi tajëvelia vajunupaeba pona it-samatacabi Dioso pijajivi pevetsijavanexa. Dioso Moiséspijinëta penajumecopat-silivaisi ata, tajëvelia vajunupaeba Dioso pijajivi pevetsijavanexa. ¹⁴ Itsa baja jamatabëpajumecovënëtae, pajumecovënëre xua aeconoxae pacatsipaebijitsiatsi. Dioso pejumelivaisibaxutota tajëvelia jumaiti mapacueniaje: “Elíaspijinë icatsia patsiana,” jai. Bajarapacuenia tajëvelia itsa jumaiti, Juan jivibautisabinë yabara jumaiti. Tsipaji pacuenia jamatabëcueneitsi profeta Elíaspijinë, bajara jamatabëcueneitsi Juan ata. Nexata Juan pepatsivajënaeya, tajëvelia yapëtanetsi pacuenia Juan exanaejitsia. ¹⁵ Pajivi jamatabënejumeyapëtanë patacatsipaebilivaisi, nenamuxunaevetsi xaniavaetsia, jai Jesús jivijavabelia.

¹⁶ Jesús icatsia jumaiti jivijavabelia:

—¿Detsa meta pacuenia yapëtaeyaexanaenajë itsamonaejavabelia bajarapamonae xaniavaetsia papecayapëtaenexa pacuenia paxamë pajamatabëcueneitsimë tsavana-pae? Jumaitinë meta tsane paxamë yabara mapacueniaje: “Bajarapamonae abaxë saya bepejevaxijivixi, pajivixi tomara tuatuajëjava banamuxusitenavanapa. Pejevaxijivixi itsa namuxusitenavanapa, bavavajai tsenae penajua namuxusitenaevijavabelia. ¹⁷ Pevavajaijavata bajumaiti: ‘Pacatoobecatsi picani flauta. Itsiata apo payavajibimë. Pacatonaxëanecatsi picani penemuxunanuevajinexa ata. Itsiata apo panuemë,’ bajai tsenae pejevaxi penajua namuxusitenaevijavabelia. Bajara saya jamatabëcueneitsi pamonaee aeconoxae jinavanapa mapanacuataje,” janë meta tsane paxamë yabara. ¹⁸ Juan jivibautisabinë Dioso pitorobilivaisi jivi tsipaebanajetaruca. Pexaejava itsajavata apo xaeyabiabi, pamatacabibeje Diosojavabelia vajëta pona. Vinora ata apo apaeyabiabi. Nexata bajaraponë yabara jamatabëcuenenavëxaniabiaya pajumaitimë tsabiabi: “¡Juan raja dovathi yajavaponapona!” pajamë tsabiabi jamatabëcuenenavëxaniabiaya. ¹⁹ Bajaraxuacujinae icatsia xanë, Daxitajivi Pematapijinënë, najetarucajë. Itaxutojema xaniji. Matavëjëa apaeyabiabajënu. Nexata xanë yabara icatsia jamatabëcuenenavëxaniabiaya pajumaitimë tsabiabi: “¡Pataema maponëje! Ayaijava xaeyabiaba. Ayaira matavëjëa apaeyabiabanua piaitajibinexa. Barënajamatabëcuenejëpanua gobierno pejamatabëcuene impuestomatamo pematamoy-anijobabiabivi. Pamonaee ata piagamatabëcuenebejevi, barënajamatabëcuenejëpa,” pajamë tsabiabi xanë yabara. Itsiata baitsi jane xuanë paxanëbeje Juanbeje paexanaponajëbeje, bajaraxuanë Dioso pejamatabëcueneta pataexanaejavabeje itsamonae xaniavaetsia yapëtaena. Nexata daxita bajarapamonae yapëtaena pacuenia Dioso

paneyapëtaeyaexanabeje pepacuene pepo pexaniajaijamatabëcuene, jai Jesús mapacueniaje jivijavabelia.

Pacuenia Jesús jumaitsi patomarapijivijavabelia apo jumecovënëtsitsi yabara pelivaisi (Lc 10.13-15)

²⁰ Itsatomaranëjava Dioso pesaëta Jesús pinijicuene pexanaejavanë navitsia exanapona. Itsiata bajarapatomaranëpijivi apo copabi pibisiacuene pexanabiabijava. Apo najamatabëcuenepënëyorotsi Diosojavabelia. Nexata Jesús ajumesaëya jumaitsi bajara patomaranëpijivijavabelia:

²¹ ¡Bitso bepajibimë tsane paCorazín tomarapijivimë! ¡Bitso bepajibimë tsane paBetsaida tomarapijivimë ata! Pinijicuene Dioso pesaëta taexanaejavanë patae atamë, itsiata apo panejumecovënëtsimë. Apo pacopabimë pibisiacuene paneexanabiabijava. Apo panajamatabëcuenepënëyorotsimë Diosojavabelia. Bajayata Tiro tomarapijivimi, Sidón tomarapijivimi ata, petuatuajëta bajarapitsipinijicuene itsa tsitaexanaejitsipajë, nexata bajarapamonaemi copabijitsipa pibisiacuene pexanaejava. Najamatabëcuenepënëyorotsipa Diosojavabelia. Bajarapamonaemi nexata pibisiacuene pexanabiabineconi bitso yajamatabëcuenebëjai tsipae. Nexata Diosojavabelia petsitanajamatabëcueneitajëtsinexa peyajamatabëcuenebëjaijava pibisiacuene pexanabiabineconi, naxatabijitsipa piayopapaëbërëjavanë. Enaejitsipa irata. Ipumana ata natsimataothocaejitsipa bitso peyajamatabëcuenebëjaixae pibisiacuene pexanabiabineconi. ²² Xaniajanë pacuenia pacatsipaebijitsiatsi. PaCorazín tomarapijivimë, paBetsaida tomarapijivimë ata, patae atamë pinijicuene Dioso pesaëta taexanaejavanë, apo panejumecovënëtsimë. Nexata pamatacabi Dioso naneconitsiaexanaena daxita pijaneconi pexainaevi, bajarapamatacabi bitso ayaicuenia Dioso pacananeconitsiaexanaena. Paneconivajëtota bajayata Dioso naneconitsiaexana Tiro tomarapijivimi, Sidón tomarapijivimi ata, bajarapaneconivajëto matatoxenetsia Dioso bitso ayaicuenia pacananeconitsiaexanaena. ²³ Paxamë paCapernaum tomarapijivimë, jamatabëcuenenavëxaniabiaya pajamatabëjumaitsimë tsabiabi: “Vaxaitsi cajena ayaijamatabëcuenevitsi. Nexata Dioso nacacapanepaena athëbëabetsia,” pajamatabëjamë tsabiabi. Itsiata baitsi jane athëbëabetsia Dioso apo pacacapanepae tsane. Dioso raja pacaxuabiana infernojavabelia apo patanejumecovënëtsixaemë. Bajayata Sodoma tomarapijivimijavata itsa exanaejitsipajë Dioso pesaëta pinijicuene taexanaejava, pacuenia paxamëjavata exanaponajë, nexata Sodoma tomarapijivimi copabijitsipa pibisiacuene pexanaejava. Najamatabëcuenepënëyorotsipa Diosojavabelia. Nexata bajarapamonae Dioso apo verebiabi tsipaetsi pibisiacuene pexanaeneconi yabara. Nexata abaxë mapamatacabi ataje jivi jinavanapaejitsipa bajarapatomarata. ²⁴ Xaniajanë pacuenia pacatsipaebijitsiatsi. Pamatacabi Dioso naneconitsiaexanaena pijaneconi pexainaevi, ayaicuenia Dioso pacananeconitsiaexanaena. Tsipaji Dioso pesaëta navitsia pinijicuene taexanaponaejava patae atamë, apo panejumecovënëtsimë. Nexata Sodoma tomarapijivimi matatoxenetsia Dioso bitso ayaicuenia pacananeconitsiaexanaena, jai Jesús patomarapijivijavabelia apo jumecovënëtsitsi.

Pacuenia Jesús pijajivi junata pejamatabëcueneasaëyaexanaenexa pejamatabëcuenecueranaejavavecua yabara pelivaisi (Lc 10.21-22)

²⁵ Jesús pevajëtsijavata paxa Diosojavabelia jumaitsi:

—Axa, nevetsinë athëbëtatsia. Nevetsinë mapanacuajava ataje. “Ayaijamatabëcuenenëmë bitso,” cajiatsi. Tsipaji pamona bitso apo penacujarubivi ata, yapëtaeyaexanaename nevetsijavanexa daxita nijajivi mapanacuataje. Bajarapamonae yapëtaeyaexanaename pexanialivaisi, xanë talivaisi, palivaisi vecuamatayatame bitso peyapëtaevi mapanacuapijilivaisije. Bajarapalivaisi vecuamatayatame bitso

penacujarubivi ata mapanacuapijicuene yabaraje. ²⁶ Bajarapacuenia exaname tsipaji baja exaname nejitsipaecuenia, jai Jesús paxa Diosojavabelia pevajëtsijavata.

²⁷ Icatsia Jesús jumaitsi pijajivijavabelia:

—Taxa Dioso baja cajena netocopata tayapëtaenexa daxitacuene. Itsajivi ata apo nejamatabëcueneyapëtae pacuenia xanë jamatabëcueneitsinë, Dioso pexënatonë. Caenë taxa Dioso nejamatabëcueneyapëtane. Itsajivi ata apo jamatabëcueneyapëtae pacuenia taxa Dioso jamatabëcueneitsi. Caenënë xanë, pexënatonë, jamatabëcueneyapëtaniji. Pamona tojitsipajë tayapëtaeyaexanaenexa pacuenia taxa Dioso jamatabëcueneitsi, bajarapamonae ata yapëtaeyaexanaponaenajë. ²⁸ Pabita penacuenebabiabinë, piarevejava pejotabiabinë, bitso bavemaxëcuerana. Bajara pijinia pacuenia paxamë ata bitso itsa pajamatabëcuene cueraname pibisiacuene paneexanabiabijava yabara, xanëjavaberena paponare paneajamatabëcuenesaënexa icatsia. ²⁹ Bueyubeje banavësijumacaevetaebeje petsivësijumabuatsinexatsibeje yugovënëjava penacuenebinexabeje. Bajara pijinia pacuenia paxamë ata panajamatabëcuene caevere patacatsijamatabëcuenebuatsinexa patacatsipaebilivaisi. Panejumecovënëtsianame pacuenia pacaitorobatsi patanetonacuenebinexamë. Nexata panevajënaeyabelia panejamatabëcueneyapëtaeponaenexa. Tsipaji xanë xaniavaetsia pacatsipaebaponaenatsi. Xanë beayaijamatabëcuenenë apo nataenë. Nexata bajarajota panajamatabëcueneevetsianame paneajamatabëcuenesaënexa icatsia. ³⁰ Pacuenia bueyu tsivësijumabuatsi yugovënëjava petoyapëxanepanaenexatsi penacuenebijava, bajara pijinia pacuenia paxamë ata pacatoyapëxanepanaeyaexanaenatsi paneexanaenexa xua pacaitorobijitsiatsi, jai Jesús pijajivijavabelia.

12

Pacuenia Jesús pijajivi trigoxu namutua siricanajetarubena penacueraevetsimatacabita yabara pelivaisi

(Mr 2.23-28; Lc 6.1-5)

¹ Judíovi penacueraevetsimatacabita Jesús, pijajivi yajava, najetaruca trigo pabi-anëjava. Jesús pijajivi bitso piajani. Nexata trigoxu siricanajetarubena. Xuxaeyabuatapona. ² Nexata fariseovi tane Jesús pijajivi pesiricanajetarubena ejava trigoxu. Nexata fariseovi jumaitsi Jesúsjavabelia:

—Taema mapamona eje. Dioso Moiséspijinëta penajumecopatsilivaisi vajanacaitavetsicuene nijajivi exana. Apo nacaitavetsi ata trigoxu vajaxaejava, itsiata ajena penacueraevetsimatacabixae, nijajivi apo bexanae mapacueneje, jai fariseovi Jesúsjavabelia.

³ Nexata Jesús jumaitsi fariseovijavabelia:

—Ajena, penacueraevetsimatacabita, tajajivi bajarapacuenia exanae ata, itsiata apo pibisiacuene. Tsipaji bitso piajani. ¿Apo palebimë tsipaji Dioso pejumelivaisibaxuto paneyapëtaenexa pacuenia vajasalinainë Davidpijinë, pebarëponaevi yajava, exana pamatacabi bitso piajani? ⁴ Davidpijinë joneya Dioso pijatemploboyalia. Nexata Dioso pijatemplobenëta, mesajumata, bobena Diosonexa ofrendacuena petojebipambëanë. Bajarapapanbëanë apo tocopatsitsi picani Davidpijinë, pijajivi ata, pexaenexa penaneconitsiyani Diosojavabelia. Èsacerdotevi picani tocopatatsi pexaenexa. Davidpijinë apo sacerdotenë ata, pijajivi barëxae ata bajarapapanbëanë, itsiata apo vënananeconitsi Diosojavabelia. ⁵ ¿Apo palebimë tsipaji Dioso Moiséspijinëta penajumecopatsilivaisi paneyapëtaenexa pacuenia jumaitsi sacerdotevi yabara? Sacerdotevi templobota penacuenebivi, penacueraevetsimatacabita ata apo nacueraevetabiabi. Penacueraevetsimatacabita sacerdotevi nacuenebabiabi ata templobota, itsiata apo naneconitsi Diosojavabelia. ⁶ Xanë cajena ayaijamatabëcuenenënë. Nexata Dioso netojitsipa jivi taneyaiyataenexa templobo matatoxenetsia. ⁷ Dioso pejumelivaisibaxutota jumaitsi mapacueniaje: “Jitsipajë paneitaxutotsoniataenexa itsamonae ata. Apo

jitsipaenë cajena saya patanetobeyabiabinexamë dajubicuene ofrendacuena pataner-ajutabiabinexamë,” jai Dioso pejumelivaisibaxutota. Xua yabara jumaiti bajarapacuenia, apo pajumeyapëtaemë baja cajena. Tsipaji ita pajumeyapëtaejitsipame xua yabara jumaiti, nexata tajajivi ata paitaxutotsoniataejitsipame. Nexata tajajivi trigoxu pexaejava yabara apo panejumaitimë tsipae: “Dioso Moiséspijinëta penajumecopatsilivaisi vajanacaitavetsicuene nijajivi exanapona,” apo panejamë tsipae. Tsipaji tajajivi apo naneconitsi Diosojavabelia. Tsipaji tajajivi bitso piajanixae, trigoxu xane. ⁸ Nexata xanë, Daxitajivi Pematapijinënë, netoxanepana cajena tatsipaebinexa xua xanepana jivi pexanaenexa penacueraevetsimatacabita ata, jai Jesús mapacueniaje fariseovijavabelia trigo pabianëjavata.

Pacuenia Jesús jamatejemayaexana pebi pecobetsaquenaenë yabara pelivaisi (Mr 3.1-6; Lc 6.6-11)

⁹ Trigo pabianëjavata Jesús livaisi petsipaebicujinae fariseovijavabelia, Jesús baja vecuapona pabianë. Nexata Jesús joneya judíovi penacaetuatabiabiaboyalia. ¹⁰ Nexata bajarajota pebi naeca, pecobetsaquenaenë. Itsamonae fariseovi bajarajota jamatabëneconitatsi Jesús. Nexata Jesús naitaxutocaevetatsi xua yabara neconitsijitsiatsi. Nexata fariseovi Jesús jamatabëcuenejëbiaya yanijobatsi mapacueniaje.

—¿Vajanacueraevetsimatacabita ata tsaja xanepana piavitanevi vajajamatejemayaexanaenexa? jai fariseovi Jesúsjavabelia.

¹¹ Jesús nexata jumaiti fariseovijavabelia:

—Paxamëyajuvënëvi pijaoveja ita tojopaejitsiparecatsi meramëthëareca, penacueraevetsimatacabita ata ponaejitsipa. Nexata jutsipaina pijaoveja. ¿Baja tsabaiti jane? ¹² ¡Biji ra jivitonë bitso namatamota oveja matatoxenetsia! Bajaraxuata itsiata naca-toxanepana vajaexanaenexa pexaniacuene vajanacueraevetsimatacabita ata, jai Jesús fariseovijavabelia.

¹³ Nexata Jesús jumaiti pecobetsaquenaenëjavabelia:

—Namaxërovire, jai Jesús.

Ita bajaraponë namaxërovita, pacuenia itsanenia cobeitsi, bajara cobeitsi. Cobexanepanareca baja. Pecobetsaquenaejavami baja ajibi. ¹⁴ Nexata fariseovi ita tane Jesús pecobexanepanaeyaexanaejava pecobetsaquenaenë, fariseovi anaepana. Nexata pitsaparena judíovi penacaetuatabiabiabovecua. Nexata jane baja fariseovi najumejaita Jesús pebeyaxuabinexatsi.

Pacuenia Diosojumepaebinë profetanë bajayatami tajëvelia vajunupaebatsi Jesús yabara pelivaisi

¹⁵ Jesús jamatabëcuenyapëthane pacuenia fariseovi sivanajamatabëxainatsi. Jesús picani fariseovi jamatabëbeyaxuabatsi. Nexata baja Jesús bajarapamonae vecuapona itsajavabelia. Jivi ayaibitsaëttoxaneto Jesús pënaponatsi. Jesús nexata jamatejemayaexana daxita piavitanevi. ¹⁶ Jesús jumeitaveta bajarapamonae petsipaebiyaniava itsamonaejavabelia Jesús Dioso pexënatocuene. ¹⁷ Bajarapacuenia Jesús pejamatejemayaexanaevi ita jumeitaveta petsipaebiyaniava itsamonaejavabelia, copiapata jane baja pacuenia bajayata Diosojumepaebinëmi profeta Isaíaspijinë tajëvelia jumaiti. Dioso pejumaiti-java Jesús yabara profeta Isaíaspijinë bajayata tajëvelia jumaiti mapacueniaje:

¹⁸ Maponë taitapetsinë, taitorobicuenia exanabiaba. Bajaraponë tasivanë. Siva-jamatabëcuenebarëyanë. Espíritu Santo runaeyaexanaenicajë bajaraponë pematatsënëatsica. Bajaraponë apo judíovijavabelia tsipaebiana tananeconitsiaexanaejavanexa daxita pibisiacuene pexanaevi. ¹⁹ Bajaraponë itsajivijavabelia

ata apo jumeanaenotsi tsane. Livaisi itsa tsipaebapona, pinijijumeta apo vava-jai tsane. ²⁰ Pamonaē xanē tajumelivaisi pejumecovēnētsijava abaxē apo ajamatabēcuenesaē ata, itsiata bajaraponē bajarapamonae apo xuabi tsane. Capanepaena. Pamatacabi tocopiapatsianatsi bajaraponē pijajivi pevetsimatacab-inexa, xaniavaetsia bajaraponē evetsiana daxita pijajivi. ²¹ Nexata daxitajivi, apo judíovi ata, sivanajamatabēcuenecopatsianatsi bajaraponē pecapanepaenexa, jai bajayata tajēvelia profeta Isaíaspijinē Dioso pejumaitsijava Jesús yabara. Bajarpacuenia bajayata tajēvelia jumaitsi Isaíaspijinē peyaquinaebaxutota.

Pacuenia itsamonae Jesús yabara jamatabēcuenenavēxaniabiaya jumaitsi: “Beelzebú raja pesaēta Jesús dovathi jivivecua capitsapapona,” jai yabara pelivaisi

(Mr 3.20-30; Lc 11.14-23; 12.10)

²² Jesús tocapatatsi bitso pitaxutotsēcēnaenē, apo penatsipaebinē. Bajaraponē dovathi jajavaponapona. Bajaraponē Jesús jamatejemayaexana. Xaniavaetsia baja nexata tane. Natsipaebanua baja. ²³ Jivi itsa tane Jesús pejamatejemayaexanaejava bajaraponē, jamatabēcuenenabenajaca. Nexata jivi najumaitsi Jesús yabara:

—¿Matsaeta ponē Davidpijinē pemomoje, Dioso pitorobinētsicaje? najai bajarapamonae Jesús yabara.

²⁴ Nexata fariseovi itsa jumetane bajarapacuenia jivi pejumaitsijava, fariseovi jumaitsi jivijavabelia:

—Mara ponē Jesúsje, dovathi jivivecua capitsapabiaba Beelzebú pesaēta. Beelzebú raja daxita dovathivi pitorobinē, jai fariseovi jivijavabelia jamatabēcuenenavēxaniabiaya Jesús yabara.

²⁵ Jesús jamatabēcueneyapētane pacuenia fariseovi sivanajamatabēxainatsi. Nexata Jesús jumaitsi fariseovijavabelia:

—Nacaenacuapijivi ata itsa navecuanatsanaejitsipa penasivanavajabitsaētsinexa, namataenetsia naverebiabijitsipa nacaenacuapijivi ata. Bajara pijinia itsipae nacaetomarapijivi ata. Itsa navecuanatsanaejitsipa penasivanavajabitsaētsinexa, nexata namataenetsia naverebiabijitsipa nacaetomarapijivi ata. Bajara pijinia itsipae nacaemonae ata. Itsa navecuanatsanaejitsipa penasivanavajabitsaētsinexa, nexata namataenetsia naverebiabijitsipa nacaemonae ata. ²⁶ Bajara pijinia itsipae dovathi ata. Dovathi jivivecua itsa capitsapaponaejitsipa pijajivi, dovathivi, nexata bepijavajabitsaēnē taejitsipatsitsi pijajivi. Itsajamatabēcuenē vecuaxinaejitsipa pijajivi. Pesaē ata apo xainaponaē tsipae. ²⁷ Paxamē ata panijajivi dovathi jivivecua capitsapabiaba. Nexata xanē Beelzebú pesaēta dovathi jivivecua itsa capitsapabiabajē, ¿detsa nexata ponē pesaēta panijajivi ata dovathi jivivecua capitsapabiaba? Caenē rabaja Dioso pesaēta. Nexata panijajivi ata pacayapētane bajarapacuenia jamatabēcuenenavēxaniabiaya panejumaitsijava xanē yabara. ²⁸ Espíritu Santo raja pesaēta xanē dovathi jivivecua capitsapabiabajē. Nexata baja picani jivi beyapētane Dioso baja petaxuxuabijava pijajivi pevetsijava paxamē tuatujēta, jai Jesús fariseovijavabelia.

²⁹ Fariseovi pecanaējētsinexa Jesús bitso piasaēnēcuenē dovathi matatoxenetsia, Jesús icatsia jumaitsi fariseovijavabelia mapacueniaje:

—Itsajivi ata apo caējēpaetsi pejonenexa bitso piasaēnē pijaboyalia peyacajērētsinexa xua xaina pijabota. Itsiata itsa patsipa bajaraponē matatoxenetsia bitso piasaēnē, nexata cobecētabuatsipatsi. Taxucētabuatsipatsi yajava. Matapania bajarapacuenia yacajērētsipatsi daxita xua xaina pijabota.

³⁰ Pajivi apo neyavenonaeyacaetuatsi jivi Diosojavabelia, bajarapajivi betajavajabitsaējivi. Tsipaji apo taneyavenonaeyacaetuatsixae, jivi nevecuanacayajata Dioso picani pejumecovēnētsiviminexa.

³¹ Bajaraxuata pacatsipaebijitsiatsi, Dioso caējēpatsi daxitajivi pibisiacuene pexanaeconimi pevecuaajibiaexanaenexa. Pibisiacuenia jivi Dioso baracuaicuaijai ata,

bajarapaneconi ata Dioso caējēpatsi pevecuaajibiaexanaenexa. Itsiata baitsi jane pajivi pibisiacuenia baracuaicuaijai Espírítu Santo, pacuenia paxamē pajumaitsimē, Dioso apo vecuaajibiaexanae tsane bajarapaneconi. ³² Pajivi pibisiacuenia nebaracuaicuaijai ata, xanē, Daxitajivi Pematapijinēnē, bajarapaneconi ata itsiata Dioso vecuaajibiaexanaenatsi itsa vajēta Diosojavabelia. Itsiata baitsi jane pajivi pibisiacuenia baracuaicuaijai Espírítu Santo, bajarapaneconi Dioso apo vecuaajibiaexanae tsanetsi. Daxitamatacabijavabelianexa apo vecuaajibiaexanae tsanetsi bajarapaneconi, jai Jesús fariseovijavabelia.

Pacuenia peubinaenē itsa nacuita, nayapētane pavirianaecuene yabara pelivaisi (Lc 6.43-45)

³³ Icatsia Jesús jumaitsi fariseovijavabelia:

—Pexaniavirianaenē itsa ubatsi, nacuita pijinia pexaniacuai. Ponae pijinia pibisianaē, nacuita pibisiacuai. Caevirianaē canacujitsia yapētanetsi itsa nacuita. ³⁴ Bajara pijinia pacuenia paxamē ata dovathi papijajivimē, panayapētaneme paneajamatabēcuenebejejava. Nexata apo pacacaējēpae panecuaicuaijainexa pexaniacuene yabara. Pajamatabēcuene bēpēnēa panejamatabēēthētota panajamatabēxainame, panecuibovojotuatcina pitsapa panecuaicuaijainexa. ³⁵ Itsamonae pijinia majamatabēcueneitsije. Pacuenia vajaubinae, pexaniae, pexaniacuai pijinia nacuita, bajara pijinia jamatabēcueneitsi itsamonae. Ponē pexaniajamatabēcuenenē, pexaniacuene yabara cuaicuaijai. Tsipaji pexaniajamatabēcuene xaina pejamatabēēthētota. Ponē pijinia pibisiajamatabēcuenenē pibisiacuene yabara cuaicuaijai. Tsipaji pibisiajamatabēcuene najamatabēxaina pejamatabēēthētota. ³⁶ Xaniajanē pacuenia pacatsipaebijitsiatsi. Pamatacabi Dioso naneconitsiaexanaena daxita pijaneconi pexinaevi, caejivi canacujitsia, naneconitsiaexanaponaena caejumeyo canacujitsia pibisiacuenia pecuaicuaijaijava yabara. ³⁷ Pibisiacuenia panecuaicuaijaijava yabara Dioso pacananeconitsiaexanaena. Pexanialivaisi itsa pacuaicuaijamē tsabiabi tsane, nexata paneconijibimē tsane Diosojavabelia, jai Jesús fariseovijavabelia.

Pacuenia pibisiajamatabēcuenevi Jesús picani itorobatsi Dioso pesaēta pinijicuene pexanaejava petsitaexanaenexa yabara pelivaisi (Mr 8.12; Lc 11.29-32)

³⁸ Fariseovi, judíovi pecujarubivi ata, jumaitsi Jesúsjavabelia:

—Jesús, pajitsipajē patataenexa Dioso pesaēta pinijicuene nexanaejava, patacayapētaenexa pepacuene Dioso athēbēvetsica pecaitorobinēcuenetsica, jai bajarapamonae.

³⁹ Jesús nexata jumaitsi bajarapamonaejavabelia:

—Bitso pibisiacuene paneexanaevi, Dioso panejumecovēnētsijavami panecopabivi. Paneitorobame picani Dioso pesaēta pinijicuene taexanaejava patacatsitaexanaenexa pataneyapētaexamē Dioso pepacuene athēbēvetsica taneitorobinēcuenetsica. Itsiata baitsi jane Dioso pesaēta pinijicuene taexanaejava apo pacatsitaexanae tsanetsi. Bajayata pacuenia Diosojumepaebinēmi profeta Jonáspijinē exanatsi, bajara ēpitsicuene taneexanaejava pacatsitajētsianatsi. ⁴⁰ Bajayata Jonáspijinē boca ayainē dujuainē pēnēta acueyabi pamatacabibeje, acueyabi pameravibeje yajava. Bajara pijinia pacuenia xanē ata, Daxitajivi Pematapijinēnē, bocaenajē mēthēta acueyabi pamatacabibeje, acueyabi pameravibeje yajava. ⁴¹ Bajayata Nínive tomarapijivimi itsa jumetane Dioso

pitorobilivaisi, Jonáspijinē petsipaebilivaisi, copaba pibisiacuene pexanaejava. Naja-matabēcuenepēnyorota Diosojavabelia. Copiapatsiana rabaja Dioso papecananeconitsia exanaematacabinexa daxita panijaneconi panexainaevi. Panijaneconi panexainaevi pacanubiana Dioso pitabarata. Nexata bajarapamatacabi Nínive tomara-pijivimi nonobapunaena Diosojavabelia papecaneconitsinexa Dioso apo panejumecovēnētsivi. Xanē majotaje ponaponajē, bitso ayaijamatabēcuenenēnē Jonáspijinēmi matatoxenetsia. Nexata pacatsipaebi atatsi Dioso pejumelivaisi, itsiata apo panejumecovēnētsimē. Apo panajamatabēcuenē pēnyorotsimēnua pibisiacuene paneexanaejavavecua. Bajaraxuata ayaineconi paxainame Diosojavabelia. ⁴² Pamatacabi Dioso naneconitsiaexanaena pijaneconi pexainaevi, bajayata peponaponaevami, Saba nacuapijivi pevetsivami, nonotapunaena Diosojavabelia papecaconitsinexa Dioso apo panejumecovēnētsivi. Bjarapova pacaneconitsiana. Tsipaji bajayata bajarapovami tajē nacuatabuverena ata muxunarena pejumetaenexa Salomónpijinē, bitso daxitalivaisi peyapētaenēmi, petsipaebilivaisi. Xanē majotaje ponaponajē, bitso ayaijamatabēcuenenēnē Salomónpijinēmi matatoxenetsia. Nexata pacatsipaebi atatsi Dioso pejumelivaisi, itsiata apo panejumecovēnētsimē. Apo panenamuxunaevetsimēnua. Bajaraxuata Dioso pacananeconitsiaexanaena, jai Jesús tajēvelia fariseovijavabelia, judíovi pecujarubivijavabelia ata.

Pacuenia dovathi jivitonē pevejamatabēpitsapaecujinaetsi, icatsia naviarena pecovēyaberena petsijamatabēcaenexatsi icatsia yabara pelivaisi
(Lc 11.24-26)

⁴³ Jesús jumaitsi fariseovijavabelia, judíovi pecujarubivijavabelia ata:

—Dovathi itsa vejamatabēpitsapa jivitonē, nexata dovathi jinaruta petseviiranējava. Jaitapona itsanējavabelia petsijamatabējonenexa penacueraevetsinexa bajaraponējavata. Itsa apo caxitajarabi ponējavabelia tsijamatabējonejitsia, nexata dovathi jamatabējumaitsi: ⁴⁴ “Naviatsianajē meta icatsia tajabomijavabelia, paboverena pitsapajē,” jamatabējai dovathi, ponējavaverena pitsapa icatsia petsijamatabējonenexatsi. Dovathi baja caevēa itsa naviarena, caxitajaraba peyjavaponaponaenēmitsi. Nexata peyjavaponaponaenēmitsi pejamatabēēthēto, dovathi tane bepēnēsajinecaebo, bepēnēxaniavaetetsibo, bepiracajuetetsibo. ⁴⁵ Nexata dovathi icatsia sivapona peyjavapatsinexarena itsadovathivi, siete ponēbeje. Bjarapadovathivi bitso piacujirubejevi copiaya padovathi matatoxenetsia. Daxita bajarapadovathivi pebi tsijamatabējunuatsi peyjavaponaponaenexa. Belia jane baja pebi dovathivi bitso bejiobiaexanatsi. Copiaya abaxē caenē itsa tsijamatabēcatsi pacuenia bejiobiaexanabiabatsi, matatoxenetsia bejiobiaexanatsi. Bajara pijinia pacuenia tocopiapatsianatsi pamonaē aeconoxae jinavanapa, piacujirubejevi, jai Jesús fariseovijavabelia, judíovi pecujarubivijavabelia ata.

Pacuenia Jesús pejuyapijivi, pena yajava, nubena bojumavelia yabara pelivaisi
(Mr 3.31-35; Lc 8.19-21)

⁴⁶ Jesús abaxē jivi livaisi itsa tsipaeba bo ēnētuatuajēalia, pata Jesús pejuyapijivi, pena yajava. Nexata bojumavelia nubena bajarapamonae. Jamatabēbarēcuaicuaijaitsi picani Jesús. ⁴⁷ Nexata itsajivi Jesús tsipaebatsi.

—Patajatuxanenē, ena raja, nejuyapijivi yajava, nuca bojumaverena. Bjarapamonae pina jitsipa pecabarēcuaicuaijajava, jaitsi Jesús.

⁴⁸ Nexata Jesús jumaitsi petsipaebijivitsijavabelia:

—¿Detsa pitsijamatabēcuenēmi taena, tajuyapijivinua? jai Jesús.

⁴⁹ Nexata Jesús pecobeta itaropita pijajivi. Jumaitsi petsipaebijivitsijavabelia:

—Mara jane pamonaē taenajivije, tajuyapijivinua. ⁵⁰ Tsipaji raja pajivi exana taxa, athēbētatsia peecaenē, pitorobicueniatsi, bajarapajivi cajena tajuyapijinē, tajuyapijiva, taenanua, jai Jesús petsipaebijivitsijavabelia.

13

*Pacuenia Jesús jivi livaisi tsipaeba pabi peubinë pelivaisicuenia yabara pelivaisi
(Mr 4.1-9; Lc 8.4-8)*

¹ Jesús baja itsa najumevereta jivijavabelia livaisi petsipaebijava, pitsapa baja bajara-pabovecua. Pona baja itsajavabelia. Nexata Jesús ecojopa pucaxaneto itapata. ² Nexata pucaitapata jivi ayaibitsaëtoxaneto Jesús itaxutuanacaetuatatsi. Nexata Jesús runareca jera ënëabereca. Ecareca jera ënëtareca. Daxita jivibitsaëtoxaneto nubena tajetabovelialia. ³ Nexata Jesús daxitacuene livaisianë tsipaeba jivijavabelialia. Jesús jumai tsaponae bajarapamonaejavabelialia mapacueniajaje:

—Peubinë pona pabiabelialia peubinexa. ⁴ Nexata itsa pata pabita, peubixu pexucayabajabarabicuenialia ubanajetaruca. Pexucayabajabarabijavata itsaxu othopa pabi tuatuajëjava penajetarucaenamutojumata. Nexata bajarajota pata baratsui. Xane bajarapaxumi juvinejeva. ⁵ Itsaxu pijinia othopa ibopananëjumata, itsajota bitso ira apo aitayaë. Nexata bajarapaxu bepimia juva. Tsipaji bitso ira apo aitayaë. ⁶ Nexata icotia bitso itsa ataju, nexata bajarapaxu juvi ata, tsaquenapona. Tsipaji irabereca bitso apo atabunepepiareca. ⁷ Itsaxu pijinia othopa xanëebacabomijavata. Nexata peubixu xanëebotonë caecuenialia itsa yajavajuva, bitso xanëebotonë matakënënsatsi peubijavami. ⁸ Itsaxu pijinia othopa pexaniairata. Bajarapaxu itsa juva, vitsaba. Xaniavaetsialia nacuaita. Itsabotonë capitsapa cien paxutoyobeje tsaponae. Itsabotonë capitsapa sesenta paxutoyobeje tsaponae. Itsabotonë capitsapa treinta paxutoyobeje tsaponae. ⁹ Pajivi jamatabënejumeyapëtane patacatsipaebilivaisi, nenamuxunaevetsi xaniavaetsialia, jai Jesús bajarapalivaisi petsipaebivijavabelialia.

*Pacuenia yabara Jesús jivijavabelialia livaisi tsipaeba ëcomparacióncuenialia yabara pelivaisi
(Mr 4.10-12; Lc 8.9-10)*

¹⁰ Jesús pijajivi imoxoyotatsi. Nexata Jesús pijajivi jumaitsi Jesúsjavabelialia:

—Patajatuxanenë, jivijavabelialia livaisi itsa tsipaebame, ¿detsa xuajitsialia tsipaebame ëcomparacióncuenialia? jai Jesús pijajivi.

¹¹ Nexata Jesús jumaitsi pijajivijavabelialia:

—Paxamë rabaja xaniavaetsialia Dioso pacayapëtaeyaexana Dioso papijajivimë papecaevetsijava. Itsiata itsamonae apo yapëtae bajarapacuenia. ¹² Pajivi xaniavaetsialia nejumeyapëtane tatsipaebilivaisi, bajarapajivi icatsialia itsalivaisi pematatsënëa Dioso yapëtaeyaexanaenatsi. Itsiata pajivi apo jitsipae pematatsënëa pejumeyapëtaeponaenaxa tatsipaebilivaisi, bajarapajivi xuayovajëto jumeyapëtane picani, nacofënëtsialia. ¹³ Bajaraxuata livaisi itsa tsipaebajë bajarapamonae, ëcomparacióncuenialia tsipaebajë. Nexata bajarapamonae tae ata Dioso pesaëta pinijicuene taexanaejava, itsiata apo yapëtae pajamatabëcuene yabara exanajë pinijicuene taexanaejava. Namuxunaevetsi ata tatsipaebilivaisi, itsiata apo jumeyapëtae pajamatabëcuene xaina tatsipaebilivaisi. ¹⁴ Bajarapacuenialia apo jumeyapëtae tsipaji jane baja tocopiapatatsi pacuenialia bajayata tajëvelialia Diosojumepaebinëmi profeta Isaíaspijinë yaquina. Dioso pejumaitsiyava apo tanejumeyapëtaevinexa yabara, bajayata profeta Isaíaspijinë peyaquinaelivaisita jumaitsi mapacueniajaje:

Bajarapamonae picani jumetaena. Itsiata apo jumeyapëtae tsane xua yabara tsipaebianatsi. Bajarapamonae taena picani. Itsiata apo yapëtae tsane pajamatabëcuene xaina petaejava. ¹⁵ Bajarapamonae ajamatabëcuenetajaja tsane. Bajaraxuata benamuxuacabiaya pejinavanapaevi tsane. Benaitaxutotsaquebiaya pejinavanapaevi tsane. Itsa bajarapacuenialia apo itsipae, nexata yapëtaejitsipa pajamatabëcuene xaina xua taena. Jumeyapëtaejitsipana palivaisi jumetaena. Pejamatabëëthëtojavavetsina jumeyapëtaejitsipa. Nexata

xanējavaberena najamatabēcuenepēnēyorotsipa perujujamatābēcuenēvecua. Nexata xanē jamatabēcuenē xanēpanaeyaexanaejitsipajē, jai bajayata tajēvelia Isaíaspijinē peyaquinaelivaisita xua yabara tsipaebajē bajarapamonae apo tanejumeypētaejavanexa yabara.

¹⁶ 'Itsiata baitsi jane paxamē baja pajamatabēcuenēbarēyamē. Tsipaji payapētaneme pajamatabēcuenē xaina xua pataneme. Pajumeypētanemenua pajamatabēcuenē xaina palivaisi pajumetaneme. ¹⁷ Xaniajanē pacuenia pacatsipaebijitsiatsi. Bajayatami ayaibitsaēto profetavimi necopiaevetavanapa tanetaenexa picani tapatsijavatsica. It-samonae ata aneconijibia pejinavanapaevi Dioso pitabarata, necopiaevetavanapa picani tanetaenexa tapatsijavatsica. Itsiata apo netaenejeva, daxita bajarapamonae tēpa baja. Jamatabējumetaeyabiabanua picani palivaisianē baja aeconoxae paxamē pacatsipaebaponatsi. Itsiata apo jumetaenejeva bajarapalivaisianē, bajarapamonae tēpa baja, jai Jesús pijajivijavabelia.

Pacuenia Jesús yapētaeyaexana pijajivi pajamatabēcuenē xaina palivaisi tsipaeba peubinē pelivaisicuenia yabara pelivaisi

(Mr 4.13-20; Lc 8.11-15)

¹⁸ Icatsia Jesús jumaitsi pijajivijavabelia:

—Xaniavaetsia panenamuxunaevere panejumeyapētaenexa pajamatabēcuenē xaina palivaisi pacatsipaebatsi pabita peubinē pelivaisicuenia. ¹⁹ Pamonaē jumetaē ata Dioso pejumelivaisi, itsiata itsa apo jumeyapētaē pejamatabēēthētota, bajarapamonae bepiothopaexu pabi tuatuaējējava penajetarucaenamutojumata. Nexata najetaruca dovathi. Nexata bajarapamonae tsijamatabējuvinejevatsi, dovathi vecuapitatsi bajarapalivaisimi, petsijamatabēubilivaisimtsi. ²⁰ Pacuenia pijinia itsi paxu othopa ibopananējumata, itsajota bitso ira apo aitayaē, bajara tsijamatabēcuenēitsitsi itsamonae Dioso pitorobilivaisi. Bajarapamonae jumetane Dioso pitorobilivaisi. Nexata picani bajarapalivaisi barēyaya jumecovēnēta. ²¹ Itsiata baitsi jane pacuenia irabereca apo atabunepepiareca paxu othopa ibopananējumata, nexata nabijiana, bajara tsijamatabēcuenēitsitsi bajarapamonae Dioso pitorobilivaisi. Tsipaji pepacuene pejamatabēēthētovetsina apo jumecovēnētsi bajarapalivaisi. Nexata apo ajamatabēcuenesaē tsavanapae bajayajebi pejumecovēnētsinexa bajarapalivaisi. Nexata itsa tocopiapatatsi daxita petoayapēbejecuenetsi, itsa yalivaisibatsinua Dioso pitorobilivaisi yabara, nexata pejumecovēnētsijava bajarapalivaisi bepījia copaba. Pevajēnaeyabelia apo jumecovēnētavanapae. ²² Pacuenia pijinia paxu othopa xanēebacabomijavata, itsa juva, bitso matacēnēnatsi xanēebotonē, bajara tsijamatabēcuenēitsitsi itsamonae Dioso pitorobilivaisi. Jumetane picani bajarapamonae Dioso pitorobilivaisi. Itsiata baitsi jane bitso jamatabēcuenēenatsi mapanacuapijicuene yabaraje. Tsipaji najamatabēxaina ayaijava palata pexainaenexa. Nexata pijacuata najamatabēcueneyamaxēitojoroba. Bajaraxuata Dioso pitorobilivaisi apo tovitsabitsi pejamatabēēthētota. Nexata pacuenia itsi pabita piacuaijibibotonē, bajara itsi bajarapamonae. Tsipaji Dioso xaniavaetsia apo tojinavanapae. ²³ Pacuenia pijinia itsi paxu othopa pexaniairata, bajara tsijamatabēcuenēitsitsi itsamonae Dioso pitorobilivaisi. Bajarapamonae jumetane Dioso pitorobilivaisi. Jumeyapētanenua. Nexata pevajēnaeyabelia tsijamatabēcuenēitsabaponatsi Dioso pitorobilivaisi. Nexata pacuenia peubijava capitsapa itsabotonē cien paxutoyobeje tsaponae, itsabotonē sesenta paxutoyobeje tsaponae, itsabotonē treinta paxutoyobeje tsaponae, bajara tsijamatabēcuenēitsitsi bajarapamonae Dioso pitorobilivaisi, jai Jesús pijajivijavabelia.

Pacuenia peubijava tuatuajēa piabejējava juva yabara pelivaisi

²⁴ Dioso apo pejumecovēnētsivi, pamonaē najinavanapa Dioso pejumecovēnētsivijavata, itsamatacabi Dioso naneconitsiaexanaena. Nexata jivi peyapētaenexa

bजारपामोनाे डोसो पेनानेकोनित्साेखानाेजवानेखा, जेसूस कोपारकोनकुेना लीवािसी त्सीपाेबा जीवी अयाीबित्साेठोखानेठोजावलेली. जेसूस जुमात्सी मापाकुेनाीजे:

—मारा पाकुेने जेपाे डोसो पीजाजीवी पेवत्सीजावाे. पाबी पेखानाेने, ऐपेखानाीवरीत्रिगोखु उबा पीजापाबीता. ²⁵ इत्सीता बात्सी जाने दाखीतजीवी पेमाजित्सीजावता मेरावी, पाबी पेखानाेने पीजावाजबित्साेने तोजुनुात्सी पीजापाबीता. नेखाता तूबत्सी त्रिगो तूतूाजैजावा पीबिसीवरीाजावा, बेत्रिगोबोतूने पेकाताेजावा. बाजारखुाकुेजिनाे वेमाखेपोना बाजा. ²⁶ नेखाता त्रिगोखु जुवा. वीत्साबा. इत्सा बाजा त्रिगोबोतूने नामातूनोता, नेखाता मातापानाी बाजारजोता नायापेताने पीबिसीवरीाजावा याजावा पेनामातूनोत्सीजावा. ²⁷ नेखाता पाबी पेखानाेने पीजाजीवी पाता पेत्सीपाेबिनेखात्सी. पाबीखानाेने पीजाजीवी जुमात्सी: “नीजापाबीता उबामे ऐपेखानाीवरीात्रिगोखु. ¿डे त्साेता पाकुेना पीत्सापा पीबिसीवरीाखु पीबिसीाजावा पेयाजावाजुवीनेखा त्रिगोजावा?” जाी पाबीखानाेने पीजाजीवी. ²⁸ नेखाता पाबीखानाेने जुमात्सी पीजाजीवीजावलेली: “ताजावाजबित्साेने राेता बाजारखुा उबा,” जाी. नेखाता पाबीखानाेने पीजाजीवी जुमात्सी: “¿जित्सीपामे त्साजा बाजारखुा पाताखुनाेजावा?” जाी. ²⁹ इत्सीता बात्सी जाने पाबीखानाेने जुमात्सी पीजाजीवीजावलेली: “जुमे. त्सीपाजी पानेखुनाेजावता पायाजावाखुनाेजित्सीपामे त्रिगोबोतूने. ³⁰ कोपात्सीानात्सी अबखे पेनाकुाीत्सीनेखा. नेखाता पेनोत्सीमाताकाबी इतूरोबानाजे तानेनोत्सीवी कोपीया पेकातूत्सीनेखा पीाबेजेजावा. पेपाकुनुाने खानाेना. बाजारखुाकुेजिनाे बाजारखुा ताजूत्सीाना. बाजारखुाकुेजिनाे ऐत्रिगोखु नेनोत्सीाना ताेताबीाबीबोता तानेनोत्सीनेखा,” जाी पाबीखानाेने पीजाजीवीजावलेली, जाी जेसूस जीवी अयाीबित्साेठोखानेठोजावलेली.

Pacuenia mostazaxutoyo pejuvicujinae, mostazanae bepíjia vitsaba yabara pelivaisi (Mr 4.30-32; Lc 13.18-19)

³¹ जेसूस लीवािसी त्सीपाेबा कोपारकोनकुेना जीवी अयाीबित्साेठोखानेठोजावलेली. जुमात्सी मापाकुेनाीजे:

—डोसो राजा पीजाजीवी पेवत्सीजावा मात्सीजे. पाकुेनाी मोस्तजाखुतोयो पेजुवीकुेजिनाे, बेपीजा वीत्साबा मोस्तजानाे, बाजारा पीजिनाी इत्साने डोसो पीजाजीवी अता. बेपीजा डोसो पीजाजीवी अयाीबित्साेठोखानेठो नाेखानाेना. पाबी पेखानाेने मोस्तजाखु उबा पीजापाबीता. ³² मोस्तजाखु राजा बीत्सो त्सीकुीरिखुतोखी दाखीता पेुबिखुवेकुा. इत्सीता बात्सी जाने मोस्तजानाे इत्सा जुवा, बेपीजा वीत्साबा. काेवाता पीनीजिनाे नाेखानाीत्सापेुबिनाेने माताखेनेत्सी. नेखाता बारत्सूी अता पाता बाजारापोनाेता. पेमातापेनाने खाना बाजारापोनाेमाखेरानाेजावा. बाजारा पीजिनाी इत्साने जीवी अता. बेपीजा अयाीबित्साेठो डोसो पीजाजीवी नाेखानाेना, जाी जेसूस जीवी अयाीबित्साेठोखानेठोजावलेली.

Pacuenia pan pexanaematabēnexa, levaduravēnējava fufunaeyaexana yabara pelivaisi (Lc 13.20-21)

³³ जेसूस लीवािसी त्सीपाेबा कोपारकोनकुेना जीवी अयाीबित्साेठोखानेठोजावलेली. जुमात्सी मापाकुेनाीजे:

—डोसो राजा पीजाजीवी पेवत्सीजावा मात्सीजे. पाकुेनाी पान पेखानाेमाताबेनेखा, लेवादुरावेनेजावा याकाेजेपा दाखीता पानमाताबेजावा, बाजारा पीजिनाी इत्सी डोसो पीजाजीवी पेवत्सीजावा. याकाेजेपाेना दाखीतानाकुानेजावा. पेतीरिवा पान पेखानाेनेखा, अकुेयाबी पातारूखानेतोबेजे त्रिगोबेनोने माताजेरेबा लेवादुरावेनेजावता. नेखाता पान पेखानाेमाताबेनेखा, अयाीमाताबे अता, लेवादुरावेनेजावा पीजिनाी त्सीकुीरिजावायो अता, इत्सीता लेवादुरावेनेजावा याकाेजेपा दाखीतामाताबेजावा. नेखाता लेवादुरावेनेजावा फुफुनाेयाेखाना दाखीता पानमाताबेनेखा. बाजारा पीजिनाी इत्सी डोसो पीजाजीवी पेवत्सीजावा. याकाेजेपा दाखीतानाकुानेजावा डोसो पीजाजीवी पेवत्सीकुेने, जाी जेसूस जीवी अयाीबित्साेठोखानेठोजावलेली.

Pacuenia Jesús jivi livaisi tsipaebabiaba comparacióncuenia yabara pelivaisi (Mr 4.33-34)

³⁴ जेसूस इत्सा त्सीपाेबा जीवीजावलेली डोसो पीजाजीवी पेवत्सीजावानेखा, लीवािसीाने त्सीपाेबापोना ऐकोपारकोनकुेना. ³⁵ बाजारपाकुेनाी जेसूस जीवी लीवािसीाने इत्सा त्सीपाेबापोना ऐकोपारकोनकुेना, तोकोपीापातात्सी जाने बाजा पाकुेनाी डोसोजुमेपाेबिने प्रोफेताेने

bajayata tajëvelia yaquina Jesús petsipaebaponaejavanexa yabara. Jesús comparacióncuenia jivi livaisi petsipaebaponaejavanexa yabara, profetanë peyaquinaebaxutota jumaitsi mapacueniaje:

Jivi itsa tsipaebajë, livaisi tsipaebianajë comparacióncuenia. Tsipaebianajë pitsicuenia

Dioso nacua pexanaejavaveliacujinae itsajivi ata abaxë apo yapëtae, jai tajëvelia bajayata profetanë peyaquinaebaxutota Jesús jivi livaisi comparacióncuenia petsipaebaponaejavanexa yabara.

Pacuenia Jesús pijajivi yapëtaeyaexana pajamatabëcuene xaina palivaisi tsipaeba trigobotonë tuatujëa pejuvijava pelivaisicuenia yabara pelivaisi

³⁶ Jesús naviabiaexana jivi ayaibitsaëtöxaneto. Bajaraxuacujinae Jesús boya joneya. Bajarapabota Jesús pijajivi imoxorenatsi. Nexata Jesús pijajivi jumaitsi:

—Patajatuxanenë, panetsipaebare pajamatabëcuene xaina palivaisi tsipaebame jivi ayaibitsaëtöxanetojavabelia. Baitsi palivaisi tsipaebame trigobotonë tuatujëa pejuvijava pelivaisicuenia, jai Jesús pijajivi.

³⁷ Nexata Jesús jumaitsi pijajivijavabelia:

—“Ponë uba pexaniaviriatrigoxu,” itsa janë, xanë rabaja, Daxitajivi Pematapijinënë, yabara nayabarajumaitsinë. ³⁸ “Pijapabi,” itsa janë, mapanacua yabaraje jumaitsinë. “Pexaniaviriatrigoxu,” itsa janë, Dioso pijanacuayabetsia pejonevinexa yabara jumaitsinë. “Pibisiaviriajava pejuvijava,” itsa janë, dovathi pijajivinexa yabara jumaitsinë. ³⁹ “Pijavajabitsaënë, ponë pabi pexainaenë toubatsi pibisiaviriajava pejuvinexa,” itsa janë, dovathi yabara jumaitsinë. “Penotsimatacabi,” itsa janë, mapanacua pevereverecaejavanexa yabara jumaitsinë. “Tanetonotsivi itorobianajë,” itsa janë, ángelevi yabara jumaitsinë. ⁴⁰ Nexata pacuenia piabejjava caetuata pexuabinexa isotojavabelia, bajara pijinia pacuenia tocopiapatsianatsi dovathi pijajivi pexuabinexatsi isotojavabelia mapanacuaje pevereverecaematacabi. ⁴¹ Bajarapamatacabi xanë, Daxitajivi Pematapijinënë, itorobianajë tajaángelevi taevetsinacua tanetovecua-jutsinexa daxita pamona pibisiacuene pexanabiabivi. Pamona ata itsamonaejavabelia pibisiacuene exanaeyaexana, bajarapamona ata taevetsinacua netovecua-jutsiana tajaángelevi. ⁴² Bajarapamona xuabianatsi infiernojavabelia. Bajarajota nuna. Navonosiniana bitso penavixaetaexae. ⁴³ Pamona jumecovënëtsiajinavanapa Dioso pitorobicueniatsi, bajarapamona perabëñaitayotsiana taxa Dioso pijanacuatatsia. Pacuenia matacabipijjuameto naitayota, bajarapacuenia perabëñaitayotsiana. Pajivi jamatabënejumeyapëtane, patacatsipaebilivaisi nenamuxunaevetsi xaniavaetsia, jai Jesús pijajivijavabelia.

Pacuenia pebi caxitajaraba bitso penamatamotsijavanë, itsanë irata pemëthëtetsijavami, yabara pelivaisi

⁴⁴ Icatsia Jesús comparacióncuenia jumaitsi pijajivijavabelia:

—Pebi irata mëthëteta bitso penamatamotsijavanë. Bajaraxuanë bitso xanepana. Nexata juya itsanë bexëjavabelia bajaraxuanë caxitajarabeta irata. Nexata abaxë bajaraponë apo jutsi bajaraxua. Abaxë saya matacateta bajarajota. Nexata jamatabëcuenebarëyaya pona pijaboyabelia. Nexata xuacujinae bajaraponë canajeta daxita pexinaejavaximi. Nexata bajaraponë yacomuata bajarapaira. Tsipaji xua bajaraponë caxitajarabeta irata, bitso xanepana. Bitso namatamota. Nexata pacuenia bitso xanepana, bitso namatamotanea, xuanë bajaraponë bajarapaira yacomuata, bajara pijinia itsi Dioso pijajivi pevetsijava. Bitso xanepana. Bitso namatamotanea, jai Jesús pijajivijavabelia.

Perlavënëjava bitso penamatamotsijava yabara pelivaisi

⁴⁵ Icatsia Jesús jumaitsi pijajivijavabelia:

—Pacuenia itsi bitso pexaniaviriajava perlavënëjava, bajara pijinia itsi Dioso pijajivi pevetsijava, bitso pexaniacuene. Perlavënëjavanë pecanajetarutsinë jaitapona pexaniaviriajavanë juya pecanajetaponaenexa. ⁴⁶ Nexata itsa caxitajarabaxuaba pexaniaviriaperlajava, bitso penamatamotsijava, pona pijaboyabelia pecanajetsinexa daxita pexainaejavami. Nexata comuata bajarapaperlajava, jai Jesús pijajivijavabelia.

Dujuai peyamatajucaejava yabara pelivaisi

⁴⁷ Icatsia Jesús comparacióncuenia jumaitsi pijajivijavabelia:

—Dujuai peyamatajucaejavata, pibisiaviriadujuai itsa yamatajuta, havecuatsatapona. Bajara pijinia itsi Dioso pijajivi pevetsijava.

Dioso pijajivi vecuatsatapona apo pejumecovënëtsivitsi pexuabinexa infiernojavabelia. Dujuai peyamatajucaejava manuameneta copareca. Nexata daxitaviriadujuai yamatajuta. ⁴⁸ Itsa vënëca bajaraxua, nexata juta tajetabojavabelia. Bajarajota itapetapona pexaniaviriadujuai. Pexaniaviriadujuai jebapona bemapirejavabelia. Pibisiaviriadujuai pijinia xuabapona. ⁴⁹ Bajara pijinia itsane nacua pevereverecae-matacabi. Angelevi ponaena. Nexata pibisiacuene pexanaevi saicaya tsatsianatsi pexuabinexatsi. Dioso pijinia pitorobicueniatsi pejinavanapaevi saicaya tsatsianatsi pecapanepaenexatsi. ⁵⁰ Nexata pibisiacuene pexanaevi xuabianatsi infiernojavabelia. Bajarajota nuena. Navonosiniana bitso penavixaetaexae, jai Jesús pijajivijavabelia.

Bitso penamatamotsijavanë, pejanajavanë, perujujavanë ata, yabara pelivaisi

⁵¹ Jesús yanijoba pijajivijavabelia.

—¿Panejumeyapëtaneme tsabaja daxita xua yabara pacatsipaebatsi? jai Jesús.

Nexata Jesús pijajivi jumaitsi:

—Jājā, pacajumeyapëtanetsi rabaja, jai.

⁵² Nexata Jesús jumaitsi pijajivijavabelia:

—Ponë judíovi pecujarubinë ata, itsa nejumecovënëta, bajaraponë ata tajajivitonë tsane. Nexata pacuenia bo pexainaenë pijabovecua jutapona bitso penamatamotsijavanë, pejanajavanë, perujujavanë ata, bajara pijinia jamatabëcueneitsi tsane ponë nejumecovënëtsiana, judíovi pecujarubinë ata. Tsipaji bajaraponë yapëtaena pexanialivaisianë jivijavabelia petsipaebinexa. Bajaraponë yapëtaena xanë talivaisianë, pejanalivaisianë, perujulivaisianë ata, jai Jesús pijajivijavabelia.

Pacuenia Jesús naviata pijanacuayabelia, Nazaret tomarabelia, yabara pelivaisi
(Mr 6.1-6; Lc 4.16-30)

⁵³ Jesús baja penajumeveretsicujinae jivijavabelia livaisianë petsipaebijava comparacióncuenia, pona baja icatsia itsajavabelia. ⁵⁴ Jesús baja naviata pevitsabinacuayabelia. Nexata Jesús pevitsabinacuata taxuxuaba livaisi petsipaebijava judíovi penacaetutabiabibota. Nexata pejumetaevitsi sivajamatabëcuenenabenajacatsi. Nexata bajarapamonae Jesús jamatabëcueneaebiatanetsi. Bajarapamonae Jesús yabara najumaitsi mapacueniaje:

—¿De tsaeta jota maponë nacujaruba peyapëtaenexa mapalivaisije? ¿De tsaeta pacuenia caējëpatsi mapacuenia Dioso pesaëta pinijicuene pexanaenexaje? ⁵⁵ Maponëje vaxaitsiyajuvënënenë, carpinteronëmi pexënato. Maponëje María pexënato. Bajaraponë pejuyapijivi, Santiago, José, Simón, Judas. ⁵⁶ Papetiriavi ata vajatamarata jinavanapa, maponëje pejuyapijivi. ¿Detsa verena nexata capitsapa palivaisianë nacatsipaebapona maponëje? najai bajarapamonae Jesús yabara.

⁵⁷ Nacaetomarapijivixae, bajarapamonae Jesús apo jumexaniataetsi. Nexata Jesús jumaitsi bajarapamonaejavabelia:

—Bajara maitsabiabije. Diosojumepaebivi profetavi itsanacuapijivi yaiyataeyabiabatsi. Itsiata pijanacuapijivi, pijamonae ata, apo yaiyataeyabiabitsi, jai Jesús pijatomarapijivijavabelia.

⁵⁸ Jesús pevitsabitomarata pejinavanapaevi apo jumecovënëtsitsi. Bajaraxuata Jesús Dioso pesaëta pinijicuene pexanaejava bajarapatomarata bitso apo tsitaexanae.

14

Pacuenia Juanpijinë jivibautisabinëmi beyaxuabatsi yabara pelivaisi
(Mr 6.14-29; Lc 9.7-9)

¹ Herodes, Galileanacua pevetsinë. Nexata Herodes Jesús vënëlivaisitanetsi Dioso pesaëta pinijicuene pexanaponaejava. ² Nexata Herodes pijajivijavabelia jamatabëcuenenavëxaniabiaya jumaitsi Jesús yabara:

—Juanpijinëmi raeta jivibautisabinëmi icatsia asaë petëpaecujinae. Bajaraxuata caëjëpatsi Dioso pesaëta pinijicuene pexanaenexa, jai Herodes Jesús yabara.

³ Bajarapacuenia Herodes jumaitsi tsipaji abaxë Juanpijinë itsa asaë, Herodes pijajivi, vajabitsaëvi, itoroba Juanpijinë pevaetabinexatsi. Nexata vajabitsaëvi Juanpijinë cobecëtsiaya caponatsi penaneconitsivi pejebabiabiboyabelia. Bajarapacuenia Herodes pijajivi itoroba Herodes pijava, Herodíasva, pejamatabëcueneta. Herodíasva picani copiata pita Felipe, Herodes peyuyapijinë. Nexata Herodes peyuyapijinë pijava yacajërëta. ⁴ Nexata Herodes peyuyapijinë pijava peyacajërëtsixae, Juanpijinë abaxë itsa apo vaetabitsi, Herodes muxujioba. Juanpijinë jumaitsi Herodesjavabelia:

—Acuenebi raja neyuyapijinë pijava nepitsijava, jai Juanpijinë Herodesjavabelia.

⁵ Bajarapacuenia Juanpijinë Herodes pemuxujiobixae, Herodes picani jamatabëbeyaxuabatsi Juanpijinë. Itsiata baitsi jane abaxë apo beyaxuabitsi. Tsipaji Herodes cjunava jivi. Daxitajivi Juanpijinë yapëtanetsi Diosojumepaëbinëcuene.

⁶ Nexata Herodes itsa najamatabënapita penaexanaematacabi, fiesta exana. Herodes junata jivi ayaibitsaëto. Nexata bajarapafiestamatacabi pejionëyo, pijava pexënatoyo, pijacujirucuenia caevayo yavajiba daxita Herodes pejunatsivi pitabarata. Nexata Herodes bitso barëitajitsipa peyavajibijava pejionëyo. ⁷ Nexata Herodes najumecapanepaeya pexaniajaijumeta jumaitsi pejionëyojavabelia:

—Xua jitsipame nevajëtsianame. Nexata itsa nevajëtsianame, itsacuenejava ata carajutsianatsi, jai Herodes najumecapanepaeya pejionëyojavabelia.

⁸ Nexata bajarapovayo pena pitorobicueniatsi jumaitsi mapacueniaje Herodesjavabelia:

—Nerajure platota Juan jivibautisabinë pematabocoto, jai bajarapovayo Herodesjavabelia.

⁹ Bajarapacuenia Herodes pejionëyo itsa jumaitssitsi, Herodes bejamatabëjiobi tsanajetsireca. Herodes nexata acuenebi: “Jume,” pejaijava. Tsipaji baja najumecapanepaeya jumaitsi pejionëyojavabelia pexaniajaijumeta daxita Herodes pejunatsivi pitabarata. Nexata Herodes jejai. ¹⁰ Nexata Herodes pijajivi, vajabitsaëvi, itoroba penaneconitsivi pejebabiabiboyabelia pevësiucutaxuabinexatsi Juanpijinë. ¹¹ Bajaraxuacujinae vajabitsaëvi Juanpijinë pematabocoto tocaparenatsi platota. Nexata Herodes rajutsiaexana pejionëyojavabelia. Bajarapova juya pena rajuta. Nexata baja Herodíasva yapëthane capanepaeya baja Juanpijinë pebeyaxuabijavatsi.

¹² Nexata Juanpijinë pijajivi parena itsajota Juanpijinë boca petëpaenë. Pitatsi petëpaenë. Nexata Juanpijinë pijajivi mëthëtatsi. Bajaraxuacujinae bajarapamonae pona Jesúsjavabelia petsipaëbinexa Juanpijinë pebeyaxuabijavatsi.

Pacuenia Jesús pexaejava rajuta cinco mil ponëbeje yabara pelivaisi
(Mr 6.30-44; Lc 9.10-17; Jn 6.1-14)

¹³ Jesús vënëlivaisitane Juanpijinë pebeyaxuabijavatsi. Nexata Jesús ëpijajivi jerata barëpona itsabelia ajibi jivi. Itsiata baitsi jane jivi ayaibitsaëtoxfaneto yapëthane itsabelia Jesús pona. Nexata pijatomaranë vecuapona. Matatsënëa najetarubena pepëjaitssivitsi

Jesús. ¹⁴ Itsa Jesús nonotajuna jeravecua, tane jivibitsaëtoxaneto. Nexata Jesús itaxuto-bejiobiatane bajarapamonae. Tocapatatsi piavitanevi. Nexata Jesús tojamatejemayaex-ana piavitanevi. ¹⁵ Itsa baja caniviyo tsaponae, Jesús pijajivi cujibarenatsi. Nexata Jesús pijajivi jumaitsi:

—Caniviyo rabaja bitso. Majotaje ajibi pexaejava. Tsipaji itsajivi ata pijabo apo xainae. Itorobare baja jivi peponaenexa tomaraxijavabelia pecomuacaenexa pexaejava, jai Jesús pijajivi.

¹⁶ Nexata Jesús jumaitsi pijajivijavabelia:

—Apo beponae raja abaxë. Paxamë parajure pexaejava, jai Jesús pijajivijavabelia.

¹⁷ Nexata Jesús pijajivi jumaitsi:

—Paxainajë saya cinco papanbëbeje, anijanëyobeje dujuainëyobeje yajava, jai.

¹⁸ Nexata Jesús jumaitsi pijajivijavabelia:

—Panetocarenamëre pan maberena, dujuainëyobeje yajava, jai Jesús.

¹⁹ Nexata Jesús itoroba daxitajivi penaenexa ponajavata. Nexata Jesús pita cinco papanbëbeje, anijanëyobeje dujuainëyobeje yajava. Athëbëa benaëcotsia. Jumaitsi Diosojavabelia:

—Pexaniacuene panetoexaname. Panerajutame pataxaejava, jai Jesús Diosojavabelia.

Bajaraxuacujinae Jesús pan epatsicacaponae. Pijajivijavabelia rajuta bajarapan. Nexata juya Jesús pijajivi tsicobetsana jivijavabelia. ²⁰ Daxita xaniavaetsia nabane. Bajaraxuacujinae Jesús pijajivi caetuata pan, dujuai yajava, jivi peyajuvenëcopabejebijavanë. Nexata vënëba doce xuabeje bemapirecuenia pexanaejavanë.

²¹ Pamonae pexaejava xane, ayaibitsaëtoxaneto. Cinco mil ponëbeje namatajëtatsi xaniavaetsia. Petiriavi, pejevaxi ata, apo namatajëtsitsi.

*Pacuenia Jesús mene itaboxoya najetaruca yabara pelivaisi
(Mr 6.45-52; Jn 6.16-21)*

²² Jesús jivi ayaibitsaëtoxaneto pexaejava perajutsicujinae, Jesús pijajivi bepijia runaeyaexanareca jera ënëabereca. Jesús pijajivi copiata itoroba penicabinexa puca itsapanabelia, Betsaida tomarabelia. Nexata Jesús abaxë caenë nacopatanuca bajarajota. ²³ Itsa baja jivi napëvereta penaviabijava, Jesús junaya petsutojumabetsia caenë pevajëtsinexa Diosojavabelia. Nexata Jesús yameravibatsi bajarapatsutojumatsia. ²⁴ Bajarapaepatota Jesús pijajivi jerata epatua nabuatapona pepatsinexa puca itsapanabelia. Nexata Jesús pijajivi pevajënaeverena joviboxaneto najetaruca, malataca bitso ayai. Nexata malataca mene epabajarabapona jera ënëaberena. Nexata mera vënëcapona jera ënëaberena. ²⁵ Bajaraxuacujinae bajayacunua, ajena matabijitsia, Jesús pijajivi pecovëvelia imoxoyotanajetaruca. Jesús najetaruca mene itaboxoya. ²⁶ Jesús pijajivi itsa tanetsi mene itaboxoya penajetarucajava, nabenajaca. Vavajai pecajunavi.

—¡Petëpaenë raeta pejumape najetaruca! jai Jesús pijajivi.

²⁷ Nexata Jesús jumaitsi pijajivijavabelia:

—Xanë raja. Pëtsa panecujunavame. Pajamatejemamëre saya, jai Jesús pijajivijavabelia.

²⁸ Nexata Pedro jumaitsi Jesúsjavabelia:

—Tajatuxanenë, itsa pepacuene xamë, nexata nejunaremelia talianexa mene itaboxoyalia, xamëjavabelia, jai Pedro.

²⁹ Nexata Jesús jumaitsi Pedrojavabelia:

—Renamëre baitsi baja, jai Jesús.

Pedro nexata jeravecua runareca meniabereca. Lia mene itaboxoyalia pepatsinexa Jesúsjavabelia. ³⁰ Itsiata baitsi jane Pedro itsa tane jovibo piasaëjava, bitso cujunavataba. Nexata bubunanajereca. Pedro ajena bubunanajereca, vavajai.

—¡Tajatuxanenë, nevaetabare! jai Pedro.

³¹ Bepijia Jesús cobepitajaraba. Jumaitsi Pedrojavabelia:

—Tsiquirijavayo saya nejumecovënëtamé tacaevetsijava. ¿Detsa xuajitsia nejumeeabiataneme? jai Jesús.

³² Nexata baja Jesúsbeje Pedrobeje jera ënëabelia itsa nonoliabeje, joviboxanetomi baja ajibi tsaxuabi. ³³ Nexata daxita jerata peponaevi pematatabacabëta tonubena Jesús pitabarata. Jumaitsi bajarapamonae:

—Xaniajai rabaja. Xamë Dioso pexënatomë, jai bajarapamonae Jesúsjavabelia.

Pacuenia Jesús jamatejemayaexana piavitanevi Genesaret nacuata yabara pelivaisi (Mr 6.53-56)

³⁴ Jesús, pijajivi yajava, pata puca itsapanabelia. Pata Genesaret nacuata. ³⁵ Genesaret nacuapijivi itsa yapëtanetsi Jesúscuene, nexata daxita bajarapanacuajava vajunupaebatsi pepatsijava. Nexata tocapatatsi daxita piavitanevi Jesúsjavaberena. ³⁶ Piavitanevi pecapatsivi pinijicuenia jumai tsabiabi Jesúsjavabelia:

—Pexaniacuene bitso netoexanare. Tocopatsianame maponëje pecatojayatsinexa nenaxatatsijavacopia, jai tsabiabi.

Nexata daxita pamonaev Jesús penaxatatsijavacopia tojayataponatsi, jamatejema tsaponae piavitanejavavecua.

15

Pacuenia Jesús tsipaeba xua jivi jamatabëcuenebijianatsi yabara pelivaisi (Mr 7.1-23)

¹ Fariseovi, judíovi pecujarubivi yajava, pata Jerusalén tomaraverena. Bajarapamonae Jesús imoxoyorenatsi. Nexata bajarapamonae jumaitsi Jesúsjavabelia:

² —Jesús, nijajivi naneconita Diosojavabelia. Tsipaji nijajivi apo jumecovënëtsiajinavanapae vajasalinaivi pijacuene. Nijajivi itsa xane pexaejava, xane anijatonë napëna nacobequiatsinejeva, jai bajarapamonae Jesúsjavabelia.

³ Nexata Jesús jumaitsi fariseovijavabelia, judíovi pecujarubivijavabelia ata:

—Paxamë apo pajumecovënëtsimë Dioso pitorobilivaisi saicaya vajasalinaivi pijacuene panecatsitecaenexa. ⁴ Dioso Moiséspijinëta penajumecopatsilivaisi jumaitsi mapacueniaje: “Axa yaiyataema. Ena ata yaiyataema. Pajivi pibisiacuenia bijatane paxa, pena ata, bajarapajivi pabeyaxuare,” jai Dioso Moiséspijinëta penajumecopatsilivaisi.

⁵ Itsiata bailsi jane paxamë jivi pamuxubijiapeneta biabame peyaiyataeyaniva paxajivi, penajivi ata. Paxamë jivijavabelia pajumatsimë tsabiabi mapacueniaje: “Axa, ena ata, itsa cavajëta neyavenonaenexa, nexata itsa apo jitsipaemë neyavenonaevajava, jumatsimë tsane mapacueniaje: ‘Daxita xua pacarajutsipatsibeje picani patacayavenonaenexabeje, daxita bajaraxua tsipaebajë baja tarajutsinexa Diosojavabelia. Nexata acuenebi patacarajutsinexabeje,’ jamë tsane neyavenonaeyaniva,” pajamë tsabiabi jivijavabelia. ⁶ Nexata caranata Dioso pejumatsijume: “Axa yaiyataema. Ena ata yaiyataema,” pejaijume jivi pejumecovënëtsijavami paxamë pacopatsiaexanaponame. Tsipaji paxamë patsipaebaponame saicaya vajasalinaivi pijalivaisi. ⁷ ¡Paxamë saya jivi paneyamaxëitojorobivi! Diosojumepaebinëmi profeta Isaíaspijinë baja cajena bajayata tajëvelia xaniavaetsia pacavajunupaeba. Bajayata Dioso tajëvelia pejumatsijava paxamë yabara, profeta Isaíaspijinë peyaquinaelivaisita jumaitsi mapacueniaje:

⁸ Bajarapamonae nejitsipaena saya pijumeta. Itsiata pepo tanejitsipaejamatabëcuene nevecuatajë tsane. ⁹ Saya bailsi bajarapamonae pijajumatsisita tsane: “Pacajitsipatsi,” nejai tsane itajara. Itsiata apo xaniajai tsane. Bajarapamonae saya jivi tsipaebaponaena pejamatabëcuenepijilivaisi. Pepo taitorobilivaisi apo tsipaebi tsane,

jai tajëvelia Isaíaspijinë

peyaquinaelivaisita Dioso pejumaitsijava paxamë yabara, jai Jesús fariseovijavabelia, judíovi pecujarubivijavabelia ata.

¹⁰ Nexata icatsia Jesús junata jivi. Jumaitsi jivijavabelia:

—Panenamuxunaevere xaniavaetsia patanejumeypätaenexamë patacatsipaebilivaisi. ¹¹ Xua jivi xane pecuibovojotota, pexaevajënaeya napëna anijatonë apo nacobequiatsi ata, apo jamatabëcuenebijniansi. Apo vënananeconitsi Diosojavabelia. Baitsi rajane xua jivi pecuibota pibisiacuenia cuaicuaijai, bajara jane xua jivi bajamatabëcuenebijniansi, jai Jesús bajarapamonaejavabelia.

¹² Nexata Jesús pijajivi imoxoyorenatsi. Jesús pijajivi jumaitsi:

—Patajatuxanenë, ¿yapëtaneme tsabaja fariseovi pecabaraanaepanaejava itsa camumetane bajarapacuenia nejumaitsijava? jai Jesús pijajivi.

¹³⁻¹⁴ Nexata fariseovi yabara Jesús jumaitsi pijajivijavabelia:

—Panamuxujemare saya bajarapamona. Bajarapamona saya apo yapëtae. Bajarapamona bepitatsëcënaevi. Nexata bepematacaponaevi pitatsëcënaevi pijinia. Pitatsëcënaenë itsa matacaponaejitsipa itsanë pijinia pitatsëcënaenë, nexata najuajopaejitsiparecabeje mëthëxanetojavareca. Pabita piabejjava itsa juva, nexata yatabutopaya jonatsi vajaveretsinexa. Bajara pijinia pacuenia taxa, athëbëtatsia peecaenë, verebiabianatsi daxita bajarapamona, jai Jesús pijajivijavabelia fariseovi yabara.

¹⁵ Pedro nexata jumaitsi Jesúsjavabelia:

—Patajatuxanenë, paneyapëtaeyaexanare pajamatabëcuene xaina palivaisi tsipabame jivijavabelia. Palivaisi baitsi jumaitsimë: “Xua jivi xane pecuibota, apo jamatabëcuenebijniansi,” jamë, jai Pedro Jesúsjavabelia.

¹⁶ Nexata Jesús jumaitsi:

—¿Paxamë ata tsarovia abaxë apo panejumeyapëtaemë? ¹⁷ Daxitacuene xua jivi xane pecuibovojotota, junua pecotsorotubareca. Bajaraxuacujinae vecuapitsapatsi.

¹⁸ Baitsi rajane xua jivi pecuibuatsina pitsapa pecuaicuaijainexa pacuenia najamatabëxaina pejamatabëëthëtovetsina, bajara jane xua jivi jamatabëcuenebijniansi.

¹⁹ Tsipaji rabaja jivi pejamatabëëthëtovavetsina pitsapa pibisiacuenia penajamatabëxainaenexa. Pitsapa jivi pebeyaxuabijamatabëcuenenexa. Pitsapa pebi pijava pevecuanamatayajitsi jamatabëcuenenexa. Pitsapa petiriavijavabelia pebi penaperabëquenetsiatae jamatabëcuenenexa. Pitsapa penacobetoxotsijamatabëcuenenexa. Pitsapa itsamonae pexanaejava yabara najumetsënëtsiaya pepaebijamatabëcuenenexa. Pitsapa itsamonae yabara najumetsënëtsiaya pebaracuaicuaijai jamatabëcuenenexa. Daxita bajarapajamatabëcuene pitsapa jivi pejamatabëëthëtovavetsina. ²⁰ Daxita bajarapajamatabëcuene jivi jamatabëcuenebijniansi. Jivi raja pexaejava xae ata, anijatonë napëna nacobequiatsinejeva, apo jamatabëcuenebijniansi, jai Jesús pijajivijavabelia.

Pacuenia Jesús itsanacuapijiva pexënatoyo tojamatejemayaexana yabara pelivaisi (Mr 7.24-30)

²¹ Jesús baja Genesaret nacuavecua pona. Naropota itsanacuayabelia, itsabelia eca anijatomarabeje, Tiro tomarabeje Sidón tomarabeje. Jesús baja pata bajarapanacuayabelia. ²² Nexata bajarapanacuata ponapona cananeaviriava. Bajarapova apo judíova. Bajarapova Jesúsjavaberena pata. Pinijijumeta bajarapova jumaitsi Jesúsjavabelia:

—¿Petuxanenë, Davidpijinë pemomomë, nitaxutotsoniataema! Taxënatovayo dovathi yajavaponapona. Bitso bejiobiayaexanabiabatsi, jai bajarapova Jesúsjavabelia.

²³ Itsiata Jesús apo jumepitsi. Nexata Jesús pijajivi imoxoyorenatsi. Jesús pijajivi jumaitsi Jesúsjavabelia:

—Patajatuxanenë, ponaeyaexanare baja mapovaje. Bitso raxua nacapëvabanajetaruca, jai Jesús pijajivi.

²⁴ Nexata Jesús jumaitsi bajarapovajavabelia:

—Dioso baja cajena nitoroba tayavenonaenexa ëjudíovi, Israel nacuapijivi, pamonaë Dioso tane beoveja. Tsipaji bajarapamonaë Dioso vecua naxuabavanapa, jai Jesús bajarapovajavabelia.

²⁵ Itsiata bajarapova imoxoyorenatsi Jesús. Bajarapova Jesús yaiyataeya pematabacabëta nucajunua Jesús pitabarata. Nexata bajarapova jumaitsi Jesúsjavabelia:

—¡Petuxanenë, neyavenonare! jai.

²⁶ Nexata Jesús jumaitsi bajarapovajavabelia:

—Apo xanepanaë copiaya xamë itsanacuapijivamë tacayavenonaenexa. Abaxë copiaya veyavenonajë tajanacuapijivi, judíovi. Xamë copiaya itsa cayavenonaëjitsipatsi, nexata pacuenia pejevaxi pexaejavaminexa yacajërëtsipajë tarajutsinexa avirixijavabelia, bajara itsinë tsipae, jai Jesús bajarapovajavabelia.

²⁷ Itsiata baitsi jane bajarapova ajumesaë tsaponae. Icatsia jumaitsi Jesúsjavabelia:

—Xaniajamë rabaja picani. Itsiata neyavenonare. Tsipaji avirixi ata baxane pexainaenëtsi pexaeyecaemesa bëxëpanareca piothopaepërë. Bajara pijinia pacuenia itsiata itsanacuapijiva atanë, neyavenonare, jai bajarapova Jesúsjavabelia.

²⁸ Nexata icatsia Jesús jumaitsi bajarapovajavabelia:

—¡Petiriva, bitso najamatabëcuenecopatame Diosojavabelia pecayavenonaenexa! Nexata pacuenia jumaitsimë, bajarapacuenia Dioso baja cajena catoexanaena, jai Jesús.

Bajarapaepatota bajarapova pexënatovayo Jesús pejamatabëcueneta tojamatejematsi baja pijabotalia.

Pacuenia Jesús jamatejemayaexana ayaibitsaëtoخانeto piavitanevi yabara pelivaisi

²⁹ Itsa panacuata eca Tiro tomarabeje Sidón tomarabeje, Jesús baja vecuapona. Nexata Jesús najetaruca Galilea pucaxaneto muxubërëa. Nexata Jesús petsutojumabetsia junaya. Nexata petsutojumatsia Jesús ecojopa. ³⁰ Nexata jivi ayaibitsaëtoخانeto pata Jesúsjavaberena. Tocapatatsi pejayujayunaevi. Tocapatatsinua bitso pitaxutotsëcënaevi. Tocapatatsinua apo pecuaicuaijaivi. Tocapatatsinua penabejenaevi. Tocapatatsinua ayaibitsaëtoخانeto piavitanevi. Bajarapamonaë tojebatsi Jesús pitabarata. Nexata Jesús jamatejemayaexana daxita bajarapamonaë. ³¹ Nexata jivi jamatabëcuenenabenajaca itsa tane pecuaicuaijajava apo pecuaicuaijivimi. Jesús xanepanaeyaexana penabejenaevimi ata. Xanepanaeyaexana pejayujayunaevimi ata. Itaxutoxanepanaeyaexana bitso pitaxutotsëcënaevimi ata. Nexata jivi itsa tane bajarapacuenë, jumaitsi Diosojavabelia: “Diosomë, bitso ayaijamatabëcuenenëmë, paIsrael nacuapijivinë patajaDiosomë,” jai bajarapamonaë.

Pacuenia Jesús rajuta pexaejava bejamatabëcuene cuatro mil pajivibeje yabara pelivaisi (Mr 8.1-10)

³² Jesús jivi ayaibitsaëtoخانeto pënajinavanapatsi. Nexata Jesús junata pijajivi. Jumaitsi pijajivijavabelia mapacueniaje:

—Netsitabejiobi baja rovia mapamonaëje. Tsipaji baja ajena acueyabi pamatabibeje xaina xanëjavata pejinavanapaecujinaë. Pamarue baja tovereverecatsi. Pexaejava xaenejeva, apo jitsipaenë taitorobijava peponaenexa pijabonëjavabelia. Namuto epatua meta cuenabijitsipatsi piajani, jai Jesús pijajivijavabelia.

³³ Nexata Jesús pijajivi jumaitsi:

—¿Detsa jane pacuenia pexaejava tocaxitajarabianatsi mapajivibitsaëtoخانetoje? Majotaje ajibi pexaejava. Tsipaji itsajivi ata pijabo apo xinaë majotaje, jai Jesús pijajivi.

³⁴ Nexata Jesús yanijoba pijajivijavabelia.

—¿Detsa papanbëbeje paxainame? jai.

Nexata Jesús pijajivi jumaitsi:

—Siete papanbëbeje paxainajë, dujuainëxi yajava, jai.

³⁵ Nexata Jesús itoroba daxitajivi penaenexa irata. ³⁶ Nexata Jesús pita siete panbëbeje, dujuainëxi yajava. Nexata Jesús jumaitsi Diosojavabelia:

—Pexaniacuene panetoexaname. Panerajutame pataxaejava, jai.

Bjaraxuacujinae Jesús epatsicacaponae pan, dujuainëxi yajava. Nexata Jesús pepatsicacaepan rajuta pijajivijavabelia. Nexata juya Jesús pijajivi tsicobetsana bajarapajivi bitsaëtoxanetojavabelia. ³⁷ Daxita bajarapamonae nabane xaniavaetsia. Nexata peyajuvënëcopabijavanë Jesús pijajivi caetuata. Vënëba siete xuabeje bemapirecuenia pexanaejavanë. ³⁸ Pamonae pexaejava xane, ayaibitsaëtoxaneto. Cuatro mil ponëbeje namataëjëtatsi xaniavaetsia. Petiriavi, pejevaxi ata, apo namataëjëtsitsi. ³⁹ Pexaecujinae pexaejava, Jesús baja naviabiayaexana jivi. Nexata Jesús runareca jera ënëabereca. Pona baja Magdala nacuyabelia.

16

Pacuenia fariseovibeje saduceovibeje Jesús itorobatsi Dioso pesaëta pinijicuene pexanaejava petsitaexanaenexa picani yabara pelivaisi

(Mr 8.11-13; Lc 12.54-56)

¹ Fariseovibeje saduceovibeje pata Jesúsjavaberena. Nexata bajarapamonae Jesús jamatabëcuenejëbiaya itorobatsi picani pinijicuene pexanaejava Dioso pesaëta Jesús petsitaexanaenexa. Bjarapacuenia picani Jesús itorobatsi peyapëtaenexatsi Dioso pepacuene athëbëvetsica pitorobinëcuenetsitsica.

² Nexata Jesús jumaitsi bajarapamonaejavabelia:

—Pamatacabi caniviyo itaboxo tsofia, paxamë pajumaitsimë tsabiabi: “Meravia pexaniamatacabi tsane. Tsipaji itaboxo tsofia,” pajamë tsabiabi. ³ Pamatacabi bajayacunua nacuaiboxo itacaënanuca, pajumaitsimë tsabiabi: “Ajena anacuayaijitsia daxita matacabi. Tsipaji nacuaiboxo itacaënanuca,” pajamë tsabiabi. Payapëtaneme picani xaniavaetsia pacuenia matacabi itsijitsia. Tsipaji itarërëbo pepitsapaexae, payapëtaeyabiabame. Itsiata baitsi jane patae atamë Juan jivibautisabinëmi pexanaponaejava, xanë ata taexanaponaejava patae atamë, itsiata apo payapëtaemë Dioso athëbëvetsica taneitorobinëcuenetsica. ⁴ Bitso pibisiajamatabëcuene xaina pamonae copaba Dioso pejumecovënëtsijavami. Bjarapamonae picani nitoroba Dioso pesaëta pinijicuene taexanaejava tatsitaexanaenexa taneyapëtaenexa pepacuene Dioso athëbëvetsica taneitorobinëcuenetsica. Itsiata baitsi jane Dioso pesaëta pinijicuene taexanaejava, apo tsitaexanaenë tsane. Pacuenia bajayata Diosojumepaebinë profeta Jonáspijinë exanatsi, bajara ëpitsicuene taneexanaejava, tsitajëtsianajë, jai Jesús petëpaecujinae icatsia Dioso piasaëyaexanaejavanexatsi yabara.

Jesús baja nexata bajarapamonae vecuapona.

Pacuenia Jesús pijajivi muxujioba fariseovi petsipaebilivaisi pejumecovënëtsiyaniva yabara pelivaisi

(Mr 8.14-21)

⁵ Jesús pijajivi nicabilia puca itsapanabelia. Nexata nacofënëta pamarue. Apo caponae pan. ⁶ Nexata Jesús pijajivi muxujioba pejumecovënëtsiyaniva fariseovi, saduceovi ata, itsa tsipaebatsi saicayacuenia Dioso pejumelivaisivecua. Jesús jumaitsi pijajivijavabelia mapacueniaje:

—Panejumetaema. Xania panayajivitaema fariseovi pijalevadura. Panayajivitaema saduceovi ata pijalevadura, jai Jesús pijajivijavabelia.

Bjarapacuenia Jesús jumaitsi fariseovi petsipaebaponaelivaisi, saduceovi ata petsipaebaponaelivaisi, Jesús pijajivi pejumecovënëtsiyaniva. ⁷ Itsiata Jesús pijajivi apo jumeyapëtaetsi. Bjaraxuata Jesús pijajivi nabarëcuaicuaijai bajarapacuenia Jesús pejumaitsiyume yabara. Jesús pijajivi jamatabëcuenenavëxaniabiaya najumaitsi:

—Jesús nacajumaitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” nacajai. Baja raeta pacuenia Jesús nacajumaitsi pan apo vajacaponaxae, najai Jesús pijajivi jamatabëcuenenavëxaniabiaya.

⁸ Jesús pijajivi jamatabëcueneyapëtane bajarapacuenia jamatabëcuenenavëxaniabiaya pejumaitsijava levadura yabara. Nexata Jesús jumaitsi pijajivijavabelia:

—¿Detsa xuajitsia panajumaitsimë: “Baja raeta pacuenia Jesús nacajumaitsi pan apo vajacaponaxae,” panajamë? ¡Apo payapëtaemë tsipaji tanecaëjëpaejava taexanaenexa pan itsa namatavenonatsi! ⁹ Paxamë abaxë apo panejumeyapëtaemë. ¿Apo panajamatabënapitsimë tsipaji pacuenia exanajë pamatacabi pan namatavenonatsi? Tsicobetsanajë cinco papanbëmibeje cinco mil ponëbeje pexaenexa. ¿Detsa xuabeje pavënëbame peyajuvënënacopabijavanë bemapirecuenia pexanaejavanë? ¹⁰ ¿Apo panajamatabënapitsimënuu tsipaji pacuenia tsicobetsanajë siete papanbëmibeje cuatro mil pajivibeje pexaenexa? ¿Detsa xuabeje bajarapamatacabi pavënëbame peyajuvënënacopabijavanë bemapirecuenia pexanaejavanë? ¹¹ Itsa pacajumaitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” itsa pacajaitsi, pan yabara apo pacajumaitsi, jai Jesús pijajivijavabelia.

¹² Nexata jane baja Jesús pijajivi xaniavaetsia jumeyapëtanetsi. Nexata Jesús pijajivi najumaitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” nacajai tsaena Jesús, fariseovi, saduceovi ata, itsa nacat-sipaeba saicayacuenia Dioso pejumelivaisivecua vajajumecovënëtsiyaniva, najai Jesús pijajivi.

Pacuenia Pedro jumaitsi Jesúsjavabelia: “¡Xamë raja Cristomë!” jai yabara pelivaisi (Mr 8.27-30; Lc 9.18-21)

¹³ Jesús, pijajivi yajava, najetaruca Cesarea de Filipovënë tomaramuxunenia. Nexata Jesús pijajivijavabelia jumaitsi mapacueniaje:

—Xanë, Daxitajivi Pematapijinënë. ¿Detsa jivi jumai tsabiabi xanë yabara? ¿De tsaeta xanë ponënë? jai Jesús pijajivijavabelia.

¹⁴ Nexata Jesús pijajivi jumaitsi:

—Itsamonae xamë yabara jumai tsabiabi: “Juanpijinëmi raeta jivibautisabinëmi icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta, profeta Elíaspijinë, ponëmi bajayata ponapona, icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta profeta Jeremíaspijinë, ponëmi bajayata ponapona, icatsia asaë. Itsa jume, nexata meta bajayata Diosojumepaebivimi profetavimiyajuvënëne icatsia asaë,” jai tsabiabi itsamonae xamë yabara, jai Jesús pijajivi.

¹⁵ Nexata Jesús jumaitsi pijajivijavabelia:

—¿Detsa nexata paxamë pajamatabëitsimë xanë yabara? ¿Detsa xanë ponënë? jai Jesús pijajivijavabelia.

¹⁶ Nexata Simón Pedro jumaitsi Jesúsjavabelia:

—Xamë cajena Cristomë, athëbëvetsica Dioso pecaitorobinëtsica jivi necapanepaenexa. Xamë Dioso piasaëtsaponaponaenë pexënatomë, jai Pedro Jesúsjavabelia.

¹⁷ Jesús nexata jumaitsi Pedrojavabelia:

—Simón, Juan pexënatomë, xamë jamatabëcuenenavëxaniabiaya. Tsipaji itsajivi ata apo cayapëtaeyaexanae xanë taneyapëtaenexamë Cristocuenenë. Biji rajane taxa, athëbëtatsia peecaenë, cayapëtaeyaexana. ¹⁸ Nexata catsipaebianatsi mapacueniaje. Xamë rabaja Pedromë, beibotomë. Pacuenia ibopanaxanetojumata pexanetsibo bajayajebi ajamatabësaë tsecae, bajara pijinia itsane tajajivi tanejumecovënëtsivi Cristocuenenë. Nexata dovathi apo jamatabëcuenematatoxenetsitsi tsane. ¹⁹ Pacuenia baupaevetsinë evetsiaexanatsi llavianë, bajara pijinia pacuenia caevetsiaexanaenatsi athëbënacupijilivaisianë. Xua itavetsianame mapanacuataje, bajaraxua Dioso ata

athëbënacuatatsia itaveta. Xua tocopatsianame pexanaenexa mapanacuataje, bajaraxua Dioso ata athëbënacuatatsia tocopata pexanaenexa, jai Jesús Pedrojavabelia.

²⁰ Nexata Jesús pijajivi jumeitaveta petsipaebiyaniwa itsajivijavabelia ata: “Mara ponë Cristoje, Dioso athëbëvetsica pitorobinëtsica jivi pecapanepaenexa,” pejaiyaniva.

Pacuenia Jesús tajëvelia navajunupaeba pebeyaxuabijavanexatsi yabara pelivaisi
(Mr 8.31–9.1; Lc 9.22–27)

²¹ Jesús pebeyaxuabijavanexatsi, tajëvelia navajunupaeba pijajivijavabelia. Jumaitsi mapacueniaje:

—Ponaejitsianë Jerusalén tomarabelia. Nexata bajarajotalia nebejiobiaexanaena judíovi pijaancianovi, sacerdotevi penamatacaitorobivi ata, judíovi pecujarubivi ata. Bajaraxuacujinae nebeyaxuabiana. Itsiata baitsi jane tatëpaecujinae, acueyabi matacabita, icatsia asaënë tsane, jai Jesús tajëvelia pijajivijavabelia.

²² Nexata Pedro junata Jesús pebarëponatabinexa pesaicaeyojavabelia. Nexata Pedro pesaicaeyojavatalia jumaitsi Jesúsjavabelia:

—¡Tajatuxanenë, Dioso caitaxutotsoniataena bajarapamonae pecaexanaeyaniva daxita pacuenia tajëvelia navajunupaebame! jai Pedro Jesúsjavabelia.

²³ Nexata Jesús Pedrovecua napënëyorotaxuaba. Taenuca pijajivi penaevjavabelia. Nexata Jesús napënëyorotsia jumai tsanucac Pedrojavabelia:

—¡Dovathi, nevecuanatixire! Nejamatabëcueneëjëbijitsipame. Necopare Dioso taneitorobicuenia taexanaenexa. Xamë apo jitsipaemë pacuenia Dioso jitsipa taexanaenexa. Saya jitsipame pacuenia jivi jitsipa taexanaenexa, jai Jesús.

²⁴ Nexata Jesús jumaitsi pijajivijavabelia:

—Pajivi jitsipa tanepënaponaejava, bajarapajivi copatsi pejitsipaecuenia penajamatabëxainabiabijavami. Exanaponaponae taitorobicuenia. Najamatabëcueneveretsinua, bejiobiaexanaejitsia atatsi, beyaxuabijitsia atatsinua, Dioso pejumelivaisi yabara pijamatabëcuenesaë tsaponaponaejava. Nexata jane baja xuacujinae nepënaponaejava.

²⁵ Pajivi exanaponaponae penatojitsipaecuenia, apo xainae tsane matacabi apo peverevereaejava. Pajivi xanë tajamatabëcueneta copata penatojitsipaecuenia pexanaevjavami, bajarapajivi xainaena matacabi apo peverevereaejava. ²⁶ Pajivi exanaponaponae penatojitsipaecuenia, bajarapajivi Diosovecua naxuabiana. Nexata bajarapajivi daxitacuene xainae ata, mapanacuapijicueneneje, itsiata nacuerata. Tsipaji pexainaecueni apo capanepae tsanetsi Diosojavabelia. Tsipaji acuenebi tsane itsajivi ata pematamotsinexa penaxuabiyaniwa Diosovecua. ²⁷ Xanë, Daxitajivi Pematapijinënë, yajavapatsianicajë taxa Dioso pijapenivenivenaecotia. Yajavapatsianicajënuatajaängelevi. Nexata matamotaponaejavami caejivi canacujitsia, tanetonacuenebivi. Naneconitsiaexanaevjavami pijinia pijaneconi pexainaevi. ²⁸ Xaniajanë pacuenia pacatsipaebijitsiatsi. Daxita paxamë patëpaenejevamë, xanë, Daxitajivi Pematapijinënë, tajajivi ayaibitsaëttoxaneto naexanaena. Nexata paxamëyajuvënëvi pepuatae tsane xanë tajajivi ayaibitsaëttoxaneto taevetsijava, tēpaena, jai Jesús pijajivijavabelia.

17

Pacuenia Jesús caeepatoyo perabënenivenenataba yabara pelivaisi
(Mr 9.2–13; Lc 9.28–36)

¹ Jesús petëpaejavaneva tajëvelia penavajunupaebicujinae, seis pamatacabibejecujinae, Jesús pijajivi, acueyabi ponëbeje, barëjunaya pinijitsutoxanetojumabetsia. Jesús barëjunaya mapamatabëxëyoje: Pedro, Santiago, Juan. Bajarapamatabëxëyo Jesús barëjunaya pinijitsutoxanetojumabetsia. Santiago raja pejuyapijinë Juan. ² Nexata petsutojumatsia Jesús perabënenivenenareca bajarapamonae pitabarata. Pacuenia matacabipijijuameto banaitayota, bajarapacuenia Jesús itabaranaitayota. Penaxatatsijavareca, daxita nivenivenaeya niojai. ³ Nexata bajarajota Jesús pijajivi tane bajayata

petëpaenëmibeje, Moiséspijinëbeje Elíaspijinëbeje. Jesús barëcuaicuaijaiti bajaraponëbeje.
⁴Nexata Pedro jumaiti Jesúsjavabelia mapacueniaje:

—¡Patajatuxanenë, pijacuaxae panebarëponame! Itsa jitsipame, pacatoexanaenatsi acueyabi pabobërëtoheje. Itsabobërëto xamënexa tsane. Itsabobërëto Moisésnexa tsane. Itsabobërëto Elíasnexa tsane, jai Pedro Jesúsjavabelia.

⁵ Itsa abaxë Pedro cuaicuaijai tsanuca, penaitayotsiitarërëbo mataacataxu-abatsi daxita bajarapamonae. Nexata bajarapamonae jumetane bajara-paitarërëbojavavetsica Díoso pejumaitisijava: “Mara ponë taxënato, tasivanëje. Bitso sivajamatabëcuenebarëyanë. Pajumetaema bajaraponë,” pejaijavatsica bajarapamonae jumetane.

⁶ Jesús pijajivi ita jumetane bajarapacuenia Díoso pejumaitisijavatsica, irataeya othopa irata. Jesús pijajivi bitso najunaviaca. ⁷Nexata Jesús imoxoyolia pijajivi. Jayalia. Jumaiti pijajivijavabelia:

—Panonobapunare. Pëtsa pajunavame, jai Jesús pijajivijavabelia.

⁸Nexata Jesús pijajivi ita naëcobarëcëpalia Jesúsjavabelia, ajibi baja Moisésbeje Elíasbeje. Caenë baja Jesús nuca.

⁹Nexata Jesús pijajivi ita barërunanucaponai ca petsutojumavetsica, jumeitaveta pijajivi. Jumaiti pijajivijavabelia:

—Pëtsa patsipaebame itsajivi ata pacuene pataneme. Matapania xanë, Daxitajivi Pematapijinënë, icatsia asaënë tsane tatëpaecujinae, nexata jane baja matapania patsipaebianame, jai Jesús pijajivijavabelia.

¹⁰Nexata Jesús pijajivi yanijoba Jesúsjavabelia. Jumaiti:

—Patajatuxanenë, çdetsa xuajitsia judíovi pecujarubivi jumai tsabiabi: “Bajayata ponëmi ponapona, Elíaspijinë, petëpaecujinae icatsia asaë tsane. Bajaraponë copiata patsiana. Bajaraxuacujinae patsiana Cristo, pepo vajanacacapanepaenënexa jane baja,” jai tsabiabi? jai Jesús pijajivi.

¹¹Nexata Jesús jumaiti pijajivijavabelia:

—“Copiata Elíaspijinë patsiana. Nexata bajaraponë jamatabëcuenexanetsiana daxitajivi,” ita jai, Juanpijinëmi jivibautisabinëmi yabara jumaiti. Xaniajai rabaja pacuenia judíovi pecujarubivi jumaiti. ¹²Xaniajanë pacuenia pacatsipaebijitsiatsi. Elíaspijinë rabaja patajopa. Itsiata jivi apo yapëtaetsi ponëcuene. Nexata pacuenia jivi jitsipa pexanaenexa bajaraponëjavabelia, exana baja. Beyaxuabatsi. Bajara pijinia pacuenia xanë ata, Daxitajivi Pematapijinënë, nebejiobiaexanaena bajarapamonae, jai Jesús pijajivijavabelia.

¹³Nexata Jesús pijajivi jumeyapëtanetsi. Nexata Jesús pijajivi jamatabëjumaiti:

—“Elíaspijinë rabaja patajopa,” ita jai Jesús, Juanpijinëmi jivibautisabinëmi yabara jumaiti, jamatabëjai Jesús pijajivi.

Pacuenia Jesús jamatejemayaexana pejevaxinë, dovathi peyajavaponaponaenë, yabara pelivaisi

(Mr 9.14-29; Lc 9.37-43)

¹⁴ Jesús pijajivi, acueyabi ponëbeje, barënaviata petsutojumavetsica. Nexata bajara-patsutoxanetotabuta vajënaeetatsi jivi ayaibitsaëtoxaneto. Nexata pebi Jesús imoxoyorenatsi. Bajaraponë Jesús yaiyataeya pematabacabëta nucajunua Jesús pitabarata. Bajaraponë jumaiti Jesúsjavabelia:

¹⁵ —Jesús, netoitaxutotsoniataema taxënatonëyo. Netodevacaibabiabatsi raja. Bitso bejiobi tsabiabi. Anijatonë isotuabelia natajuitabiaba. Itsajavata menialia jopabi-abalia. ¹⁶Nijajivijavaberena picani capatajë tanetojamatejemayaexanaenexa. Itsiata baitsi jane apo caëjëpaetsi tanetojamatejemayaexanaenexa, jai bajaraponë Jesúsjavabelia.

¹⁷Nexata Jesús jumaiti pijajivijavabelia:

—¡Paxamë baja rovia apo pajumecovënëtsimë Dioso papecayavenonaejavanexa! Bajaraxuata apo pacajamatabëcuenecaëjêpae pejevaxinë panevecuacapitsapaenexa dovathi. ¡Paneajamatabëcuenetajavi baja rovia! Pexaniajailivaisivecua saicayacuenia panajamatabëxainame. ¿Detsa paepatojebi abaxë paxamëjavata ponaponaenajê? ¿Detsa paepatojebi abaxë paxamëjavabelia ajamatabëcuenesaënë tsaponapona tsane patanejume covënëtsinexamë? Panetocarenamëre pejevaxinë, jai Jesús pijajivijavabelia.

¹⁸ Nexata Jesús itaveta dovathi pejevaxinë pevecuacapitsapaenexatsi. Nexata baja pejevaxinë dovathi vecuacapitsapatsi. Pejevaxinë baja jamatejema.

¹⁹ Bajaraxuacujinae Jesús pijajivi barëcuaicuaijaisi pijaepatojavata. Jesús pijajivi jumaisi:

—Patajatuxanenë, ¿detsa xuajitsia meta paxanë apo panecaëjêpae patavecuacapitsapaenexa dovathi? jai Jesús pijajivi.

²⁰ Nexata Jesús jumaisi pijajivijavabelia:

—Apo pacacaëjêpae pejevaxinë panevecuacapitsapaenexa dovathi. Tsipaji xaniavaetsia apo pajumecovënëtsimë Dioso papecayavenonaejavanexa. Xaniajanë pacuenia pacatsipaebijitsiatsi. Paxamë tsiquirijavayo ata itsa pajumecovënëtsipame Dioso papecayavenonaejavanexa, nexata pacacaëjêpaejitsipa Dioso pesaëta pinijicuenepaneexanaenexa. Nexata itsa pajumaisimë tsipae mapatsutoxanetojavabeliaje: “Vecuanatixire majotaje. Itsajavabelia ecaename,” itsa pajamë, pacajumecovënëtsipa. Nexata natixitsipa. Nexata paxamë paneexanaenexa itsacuenejavayo ata, apo pacatsitaayapêbeje tsipae itsa pepacuene xaniavaetsia pajumecovënëtsipame Dioso papecayavenonaejavanexa. ²¹ Mara paviriadovathije apo jitsipae pepitsapaejava. Matapania panexaejava apo paxaemë tsipae pamatacabibeje asaëyata Diosojavabelia pavajëtaponame dovathi pepitsapaenexa, pitsapaejitsipa, jai Jesús pijajivijavabelia.

Pacuenia icatsia Jesús tajëvelia navajunupaeba pebeyaxuabijavanexatsi yabara pelivaisi

(Mr 9.30-32; Lc 9.43-45)

²² Jesús abaxë pijajivi itsa barëponapona Galilea nacuata, pijajivijavabelia tajëvelia navajunupaebapona pebeyaxuabijavanexatsi. Jesús pijajivijavabelia jumai tsaponae mapacueniaje:

—Xanë, Daxitajivi Pematapijinënë, necanajetsiana itsamonae pecobeyabelia.

²³ Bajarapamonae nebeyaxuabiana. Itsiata baitsi jane tanebeyaxuabicujinae, acueyabi matacabita, icatsia asaënë tsane,” jai tsaponae Jesús pijajivijavabelia.

Nexata Jesús pijajivi itsa jumetanetsi bajarapacuenia Jesús penavajunupaebaponaeva petêpaejavanexa, Jesús pijajivi bitso najamatabëxaina.

Pacuenia Jesús matamota impuestomatamo yabara pelivaisi

²⁴ Jesús, pijajivi yajava, pata Capernaum tomarata. Nexata Capernaum tomarata impuestomatamo pematamoyanijobabiabivi pona Pedrojavabelia. Nexata bajarapamonae yanijobatsi Pedro.

—Pedro, ¿xaniajai tsaja? ¿Panijatuxanenë impuestomatamo apo matamotabiabi, paimpuestomatamo judíovi matamobabiaba templobo pevetsivijavabelia? jaitsi.

²⁵ Pedro nexata jumaisi:

—Jājā. Matamotabiaba cajena, jai.

Nexata Pedro joneya Jesús peecaeboyalialia. Nexata Pedro pejonejavatalialia Jesús peecaeboyalialia, Jesús jumaisi Pedrojavabelia:

—Pedro, ¿detsa xamë jamatabëcueneitsimë? Nacuae vetsivi palata pepitsinexa, pijajivi itoroba impuestomatamo petoyanijobinexatsi. ¿Detsa nexata pamonaevajavabelia nacuae vetsivi pijajivi yanijobabiaba impuestomatamo? ¿Nacuae vetsivi tsaja pijamonaejavabelia? Itsa jume, ¿saicayavijavabelia tsaja, nacuae vetsivi pevetsinacuata pejinavanapaevijavabelia? jai Jesús Pedrojavabelia.

²⁶ Pedro nexata jumaitsi Jesúsjavabelia:

—Nacuaevetsivi raja pijajivi impuestomatamo yanijobabiaba saicayavijavabelia, nacuaevetsivi pevetsinacuata pejinavanapaevijavabelia. Apo yanijobabiabi nacuaevetsivi pijamonaejavabelia, jai Pedro Jesúsjavabelia.

Jesús nexata jumaitsi Pedrojavabelia:

—Pacuenia nacuaevetsivi pijamonae apo matamotsitsi impuestomatamo, bajara pijinia pacuenia xanë ata apo jitsipaenë picani tamatamotsinexa impuestomatamo templobo pevetsivijavabelia taxa Dioso pijatemploboxae. ²⁷ Itsiata baitsi jane xamë matamotsianame itsajivi ata vajanacabaraanaepanaeyanivabeje. Liamëre pucaxanetojavabelia. Ejëbianame culupabota. Padujuainëyo copiaya catoxaena, jutsianame. Pecuibota caxitajarabianame palatanëyo. Bajarapapalatanëyota caëjëpaena vajamata-motsinexabeje impuestomatamo xanë tamatamotsinexa, xamë ata nematamotsinexa. Nexata bajarapapalatanëyo caponaename impuestomatamo nematamotsinexa templobo pevetsivijavabelia, jai Jesús Pedrojavabelia.

18

Pacuenia Jesús pijajivi jumaitsi: “¿Detsa ponë paxanëyajuvënënë panevecuaayaijamatabëcuenenë?” jai Jesúsjavabelia yabara pelivaisi

(Mr 9.33-37; Lc 9.46-48)

¹ Jesús baja itsa najumevereta Pedrojavabelia pecuaicuaijajava impuesto yabara, daxita Jesús pijajivi imoxoyorenatsi. Nexata Jesús pijajivi jumaitsi Jesúsjavabelia:

—Patajatuxanenë, ¿detsa ponë paxanëyajuvënënë bitso ayaijamatabëcuenenë tsane daxitavecua Dioso pijanacuatatsia? jai.

² Nexata Jesús junata pejevaxinëyo. Pijajivi tuatuajëta nuteta pejevaxinëyo. ³ Jesús nexata jumaitsi pijajivijavabelia:

—Xaniajanë pacuenia pacatsipaebijitsiatsi. Mapapejevaxinëyoje beveliajamatabëcuenenëyo nataeya najamatabëcuenecopata Diosojavabelia Dioso pevetsinexatsi. Nexata paxamë itsa apo panajamatabëcuenepënëyorotsimë tsane perujujamatabëcuenecua beveliajamatabëcuenevi panenataenexa pacuenia mapapejevaxinëyo itsije, nexata apo pajonemë tsane Dioso pijanacuayabetsia. ⁴ Nexata ponë jitsipa Dioso pijanacuatatsia ayaijamatabëcuenenë penaexanaenexa daxitavecua, bajaraponë beveliajamatabëcuenenë natae, pacuenia mapapejevaxinëyo jamatabëcuenetsije. ⁵ Pajivi copiapita tanejumeconvënëtsijiviyo, mapitsijamatabëcueneljiviyoje, bajaraxua xanë taniji tanecopiapitsijava, jai Jesús pijajivijavabelia.

Pacuenia Jesús pijajivi muxujioba itsajivi ata pibisiacuene pexanaeyaexanaeyaniva yabara pelivaisi

(Mr 9.42-48; Lc 17.1-2)

⁶ Jesús jumaitsi pijajivijavabelia:

—Pajivi pibisiacuene exanaeyaexanaejitsipa mapitsipejevaxijivixi ataje, tanejumeconvënëtsiyajuvënëjiviyo, bajarapajivi Diosojavabelia bitso naneconitsipa. Nexata Dioso ayaicuenia bajarapajivi naneconitsiaexanaejitsipatsi. Nexata pajivi najamatabëxaina pibisiacuene pexanaeyaexanaenexa tanejumeconvënëtsivijavabelia, abaxë pibisiacuene exanaeyaexanaenejeva, bevësicëtatsi ibotoxanetojavabelia. Nexata bajarapajivi yamaëya, ibotoxaneto yajava, bexuarecatsi pucaxaneto tuatuajëareca. Bajarapajivi bexuarecatsi bitso penaneconitsiyaniva Diosojavabelia pibisiacuene itsa exanaeyaexana tanejumeconvënëtsiviyajuvënëvi. ⁷ ¡Dioso bitso naneconitsiaexanaenatsi mapanacuapijivi pibisiacuene pexanaevi! Pibisiacuene vajanacaexanaeyaexanae jamatabëcuenenexa, navita mapanacuataje. Bajarapajamatabëcueneta tsitecaponaena pevajënaeyabelia. Nexata pajivi pejamatabëcueneta itsamonae pibisiacuene exanaeyaexana, bajarapajivi bitso Dioso naneconitsiaexanaenatsi.

⁸ Bjaraxuata panecobeta, panetaxuta ata, pibisiacuene itsa paexaname, panacobe-caucure. Panataxucaucure. Tajë panavecuaxuare. Itsiata xanepana panejonenexa cobemataxucaeya, taxumataxucaeya ata, apo pevereverecaenacuajavabelia. Biji rajane apo xanepanae tsipae anijacobebeje, anijataxubeje ata yajava, panejonenexa apo peverevereaeisotojavabelia. ⁹ Paneitaxutota panetaejava yabara ata pibisiacuene itsa paexaname, panaitaxutocajure. Itsiata xanepana panejonenexa pacaetitaxutojivimë apo pevereverecaenacuajavabelia. Biji rajane apo xanepanae tsipae anijaitaxutobeje yajava panejonenexa infernojavabelia, jai Jesús pijajivijavabelia.

Pacuenia Jesús pijajivi livaisi tsipaeba oveja penaxuabinë pelivaisicuenia yabara pelivaisi

(Lc 15.3-7)

¹⁰ Jesús jumaitsi pijajivijavabelia:

—Itsamonae mapanacuata bijiaya taeyabiaba mapitsipejevaxijivixi ataje, tanejumecovënëtsijivixi. Saya beveliajamatabëcuenevi taeyabiaba. Pëtsa bajarapacuenia paxamë ata bijiaya pataneme tanejumecovënëtsivi. Bijiaya pëtsa pataneme mapitsipejevaxinëyo ataje, tanejumecovënëtsijiviyo. Tsipaji bajarapamonae ángelevi yajavajinavanapa peyavenonabiabinexatsi. Bajarapaángelevi taxa Dioso, athëbëtatsia peecaenë, pitabarata jinavanapa. ¹¹ Xanë, Daxitajivi Pematapijinënë, patajopajë taca-panepaenexa daxita Diosovecua naxuabiaya pejinavanapaevimi, jai Jesús pijajivijavabelia.

¹² Jesús icatsia jumaitsi pijajivijavabelia:

—Pacanaëjère mapacuenije. Pebi xainaejitsipa cien ponëbeje oveja. Nexata itsa toyajuvënënaxuabijitsipatsi caenë, oveja pexainaenë puenetsipa noventa y nueve ponëbeje oveja. Bjaraxuacujinae jaitsipa petonaxuabinëtsi. ¹³ Xaniajanë pacuenia pacatsipaebijitsiatsi. Bjaraponë itsa caxitajarabijitsipa pijaoveja, petonaxuabinëmitsi, bitso barëyataejitsipa. Nexata noventa y nueve ponëbeje, apo petonaxuabivitsi, pesivajamatabëcuenebarëyajava, matatoxenetsia bitso sivajamatabëcuenebarëya tsipae petonaxuabinëmitsi. ¹⁴ Bajara pijinia pacuenia paneaxa ata, athëbëtatsia peecaenë, apo jitsipae pevecuanaxuabinexatsi caejivi ata mapitsipejevaxijivixi ataje, tanejumecovënëtsivi, jai Jesús pijajivibelia.

Pacuenia Dioso pejumecovënëtsijivi bebarajamatabëcuenexanepana, itsacueniabi atatsi itsajivi, yabara pelivaisi

(Lc 17.3)

¹⁵ Icatsia Jesús jumaitsi pijajivijavabelia:

—Itsanë Dioso pejumecovënëtsinë pibisiacuene papecatoexanaejava, itsa pavënëlivaisitaename, xaniavaetsia payanijobianame caenëjavata. Nexata xaniavaetsia itsa panabarëcuaicuajamëbeje, panabarajamatabëcuene xanepanaenamebeje. ¹⁶ Xaniavaetsia itsa apo pacabarëcuaicuajai tsane, nexata Dioso pejumecovënëtsinë pajunatsianame caenë, anijanëbeje ata, paneyajavaponaenexa pibisiacuene papecatoexanaenëjavabelia pemuxujiobinexatsi. Nexata bajaraponëbeje pacajumetaena xaniavaetsia panebarëcuaicuajajava pibisiacuene papecatoexanaenëjavabelia. Bjarapacuenia itsa paexanaename, nexata pacuenia Dioso pejumelivaisibaxutota jumaitsi, paexanaename. ¹⁷ Ponë pibisiacuene pacatoexana, itsa apo namuxunaevetsi tsane paneyajavaponaenëbeje ata pemuxujiobijava, nexata daxita Dioso pejumecovënëtsivi penacaetuatsijavata, payanijobianame papibisiacuene pacatoexana. Nexata ponë pibisiacuene pacatoexanaena, daxita Dioso pejumecovënëtsivi muxujiobianatsi. Bjaraponë itsa apo namuxunaevetsi tsane, muxujiobi atatsi Dioso pejumecovënëtsivi, nexata bajaraponë pataename Dioso apo pejumecovënëtsinëcuenia. Panavecuaitavetsianame pepatsiyaniva panenacaetuatsijavata, jai Jesús pijajivijavabelia.

¹⁸ Icatsia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Xua jivi paitavetsianame pexanaeyaniva mapanacuataje, bajaraxua Dioso athëbënacuatsia ata itaveta. Xua jivi patocopat-sianame pexanaenexa mapanacuataje, bajaraxua Dioso ata athëbënacuatsia tocopata pexanaenexa, jai Jesús pijajivijavabelia.

¹⁹ Icatsia Jesús jumaitsi pijajivijavabelia:

—Pacatsipaebijitsiatsinua mapacueniaje. Mapanacuata paanijanëmëbeje itsa panajamatabëcuenejëpamebeje xua pavajëtsijitsiamëbeje Diosojavabelia, nexata taxa, athëbëtatsia peecaenë, pacajumecovënëtsianabeje xua pavajëtamebeje. ²⁰ Tsipaji itsajota anijajivibeje, acueyabi ata, nacaetuata, tanejumecovënëtsivi, bajarajota xanë bajarapamonae yajavaecaenajë, jai Jesús pijajivijavabelia.

²¹ Nexata Pedro imoxoyolia Jesús. Pedro jumaitsi Jesúsjavabelia:

—Tajatuxanenë, panetsipaebame rabaja. Panejumaitsimë mapacueniaje: “Itsajivi Dioso pejumecovënëtsijivi pibisiacuene itsa pacaexanaena, pajamatabëcaevianame. Barajamatabëcuenexanepanaeya pataename. Itsa pavënëlivaisitaename pibisiacuene papecatoexanaejava, xaniavaetsia payanijobianame caenëjavata. Nexata xaniavaetsia itsa panabarëcuaicuajiamëbeje, panabarajamatabëcuene xanepanaenamebeje,” panejamë. ¿Detsa xuabeje pibisiacuene nexanae ata, pibisiacuene netoexanae atanua, jamatabëcaevianajë barajamatabëcuenexanepanaeya tataenexa bajarapajivi? ¿Siete tsaja xuabeje ata? jai Pedro Jesúsjavabelia.

²² Jesús nexata jumaitsi Pedrojavabelia:

—Siete xuabejenexa yabara apo jumaitsinë. Biji rajane siete pasetentabeje pibisiacuene pacaexanae ata, pibisiacuene pacatoexanae atanua, pajamatabëcaevare barajamatabëcuenexanepanaeya panetaenexa, baitsi cuatrocientos noventa xuabeje ata, jai Jesús Pedrojavabelia.

Ponë apo jitsipae pebarajamatabëcuenexanepanaenexa itsanëjavabelia yabara pelivaisi

²³ Jesús livaisi tsipaeba comparacióncuenia pijajivijavabelia. Jumaitsi mapacueniaje:

—Dioso pijanacuatsia pijajivijavabelia exanaena pacuenia nacuaevetsinë pijajivijavabelia baexana. Nacuaevetsinë jitsipa piamoneyabivitsi pematamotsinexatsi xua amoneyabatsi. ²⁴ Nexata itoroba pijajivi petotsipaebaponaenexatsi daxita pamona amoneyabatsi. Nexata pijajivi tobarëparenatsi ponë bitso ayaijava amoneyabatsi, baitsi millones de pesos piamoneyabinëtsi. ²⁵ Nexata bajaraponë apo xinae pematamotsijavanexatsi. Nexata nacuaevetsinë itoroba pijajivi. Jumaitsi: “Mara ponë bitso ayaijava niamoneyabaje. Nexata pacanajetaxuabianame dajubicuenia itsamonaejavabelia amoneya petonacuenebaponaenexa daxitamatacabijavabelianexa. Daxita pexi, pijava ata, pecobecovë ata yajava, pacanajetaxuabianame. Bajarapacuenia pitsianajë tsiquirijavayo ata taneamoneyabijavamatamo,” jai nacuaevetsinë pijajivijavabelia. ²⁶ Nexata ponë amoneyaba, nacuaevetsinë pitabarata pematatabacabëta nucajunua. Pinijicuenia vajëta nacuaevetsinëjavabelia. Jumaitsi: “Nejamatabëcueneevere abaxë. Camatamotsianatsi rabaja daxita xua camoneyabatsi,” jai. ²⁷ Nexata nacuaevetsinë itaxutotsoniatane piamoneyabinëtsi. Nexata nacuaevetsinë jumaitsi piamoneyabinëtsijavabelia: “Daxita rabaja taneamoneyabijavamë, iquinajë. Nexata baja apo nematamotsimë tsane,” jai nacuaevetsinë piamoneyabinëtsijavabelia. Bajaraxuacujinae copata baja penaviatsinexa. ²⁸ Nexata bajaraponë penaviatsinexa, ajena pitsapalia nacuaevetsinë pijabovëcua, caxitajarabaxuaba itsanë penajuanacuenebabiabinëbeje nacuaevetsinë pijajava. Bajaraponë nexata jamatabëjumaitsi: “Maponë tsiquirijavayovajëto niamoneyabi ataje, yanijobianajë tanematamotsinexa,” jamatabëjai. Nexata cuibocamisavaetaba. Cuibocuetsaca asaëyata. Jumaitsi bajaraponëjavabelia: “Nematamore taneamoneyabijavamë,” jai. ²⁹ Nexata piamoneyabinëtsi bajaraponë pitabarata pematatabacabëta nucajunua. Pinijicuenia vajëta. Jumaitsi: “Nejamatabëcueneevere abaxë.

Camatamotsianatsi raja itsiata daxita xua camoneyabatsi,” jai. ³⁰ Itsiata baitsi jane bajaraponë piamoneyabinëtsi apo itaxutotsoniatae. Barëpona baja penaneconitsivi pejebabiabibojavabelia penaneconitsiaexanaenexa. Bajarapacuenia pematamotsinexatsi daxita piamoneyabijavatsi. ³¹ Nexata nacuaevetsinë pijajivi itsa tane bajarapacuenia pexanaejava penajua nacuenebabiabinëbejejavabelia, bajarapamonae bitso najamatabëxaina. Nexata nacuaevetsinë pijajivi ponalia petsipaebinxaxua bajaraxua pijatuxanenëjavabelia. ³² Nexata nacuaevetsinë pijajivi itsa tsipaebatsi, itoroba icatsia pijajivi petojunatsinexatsi bajaraponë. Nexata itsa tocapatatsi, nacuaevetsinë jumaitsi bajaraponëjavabelia: “Niajamatabëcuenebejenë baja rovia. Catoiquinatsi rabaja picani taneamoneyabijavamë. Tsipaji pinijicuenia nevajëtame. ³³ Pacuenia caitaxutotsoniatanetsi, bajara pijinia pacuenia itaxutotsoniataejitsipame pecaamoneyabinë,” jai nacuaevetsinë. ³⁴ Nexata nacuaevetsinë bitso baraanaepana millones de pesos piamoneyabinëtsijavabelia. Nexata nacuaevetsinë jumaitsi pijajivijavabelia: “Bajaraponë pacaponaeremelia penaneconitsivi pejebabiabibojavabelia penaneconitsiaexanaenexatsi. Bajarajota naneconitsiaponaponaena ëpematamoveretsijavabelianexa daxita taneamoneyabijava,” jai nacuaevetsinë, jai Jesús pijajivijavabelia.

³⁵ Jesús icatsia jumaitsi pijajivijavabelia:

—Bajara pijinia pacuenia paxamë ata taxa, athëbëtatsia peecaenë, pacaexanaena, itsa apo pajamatabëcaevimë tsane panebarajamatabëcuene xanepanaenexa pamonaepacaitsacueniaba, jai Jesús pijajivijavabelia.

19

Pacuenia Jesús jivi livaisi tsipaeba penacojobinë pijava pexuabiyanima yabara pelivaisi (Mr 10.1-12; Lc 16.18)

¹ Jesús pijajivi pemuxujobicujinae pebarajamatabëcuene xanepanaenexa itsamonae itsacueniabi atatsi, Jesús baja pona Galilea nacuavecua. Jesús nexata pata Judea nacuayabelia, Jordánmene itsapanabelia. ² Jivi ayaibitsaëttoxaneto pënaponatsi. Bajarajotalia Jesús jamatejemayaexana piavitanevi.

³ Nexata fariseovi Jesús imoxoyorenatsi. Jamatabëcuenejëbiaya yanijobatsi. Jesús bijiaya itsa jumecanaviata, peneconitsinexatsi picani. Nexata fariseovi jumaitsi Jesúsjavabelia:

—¿Xanepana tsaja penacojobinë pijava pexuabinexa itsacuenëjavayo ata yabara? jai fariseovi.

⁴ Jesús nexata jumaitsi fariseovijavabelia:

—¿Apo palebimë tsipaji paneyapëtaenexa pacuenia Dioso pejumelivaisibaxutota jumaitsi? Pamatacabi Dioso taxuxuaba nacua pexanaejava, bajarapamatacabi Dioso exana pebi, pijava yajava. ⁵ Nexata Dioso pejumelivaisibaxutota jumaitsi mapacueni-aje: “Pebi itsa nacojoba pijavajavabelia, banatsata paxavecua, pena atavecua. Nexata Dioso tane anijajivimibeje becaejivi,” jai Dioso pejumelivaisibaxutota. ⁶ Nexata Dioso apo tae beanijajivibeje. Becaejivi saya tane Dioso. Bajaraxuata itsanë ata apo bexuabi pijava. Tsipaji Dioso pejamatabëcueneta napitsiaexanatsibeje, jai Jesús fariseovijavabelia.

⁷ Nexata icatsia fariseovi jumaitsi Jesúsjavabelia:

—¿Detsa xuajitsia bajayata Moiséspijinë copata penacojobinë petoyaquinaenexa cuyalatobaxuto pijava pitavetsilivaisi pexuabinexa bajarapacuenia? jai fariseovi.

⁸ Jesús nexata jumaitsi fariseovijavabelia:

—Paneajamatabëcuenetajaxae, Moiséspijinë pacatocopata bajarapacuenia paneexanaenexa panexuabinexa panijavajivi. Itsiata baitsi jane Dioso pexanaejivibejejavaveliacujinae, apo tocopatsi picani bajarapacuenia pexanaenexa. ⁹ Nexata mapacuenia pacatsipaebianatsije. Ponë pijava xuaba, itsanëjavabelia bajarapova pevitota

pibisiacuene apo vecuaexanae atatsi, bajaraponë naneconita Diosojavabelia pijava pexuabixae. Nexata pijava pexuabinë ita nacojioba icatsia itsavajavabelia, bajaraponë pibisiacuene exana pevitota. Tsipaji pepo pijavavecua jaita itsava. Dioso cajena abaxë bajaraponë pexuabiva pijavacuenia totanetsi. Ponë ata itsanë pexuabiva pita, bajaraponë ata pibisiacuene exana pevitota. Tsipaji itsanë pijavami pita, pova abaxë Dioso totanetsi itsanë pijavacuenia, jai Jesús fariseovijavabelia.

¹⁰ Nexata Jesús pijajivi jumaitsi Jesúsjavabelia:

—Ita bajarapacuenia pebi apo tocopatsitsi itaxutojema pijava pexuabinexa, nexata meta baja apo benacojiobi, jai Jesús pijajivi.

¹¹ Jesús nexata jumaitsi pijajivijavabelia:

—Daxitajivi apo nejumeyapëtae tsane xua yabara jumaitsinë. Itsiata nejumeyapëtaena pamona Dioso jamatabëcueneyavenonatsi. ¹² Apo caejamatabëcuene raja xua yabara pebijivi apo nacojiobi. Itsamonae penabejenaenë naexana. Nexata apo caëjëpaetsi penacojiobijava. Itsamonae jivi pejamatabëcueneta bepenabejenaenëcuenia exanatsi. Nexata apo caëjëpaetsi penacojiobijava. Itsamonae ëDioso pijacuene petonacuenebinexa, apo nacojiobi. Nexata ponë jamatabëcuenecaëjëpatsi nacojiobinejeva peponaponaenexa ëDioso pijacuene petonacuenebinexa, bajaraponë nejumecovënëtsi, jai Jesús pijajivijavabelia.

Pacuenia Jesús jumaitsi pejevaxijivijavabelia yabara pelivaisi
(Mr 10.13-16; Lc 18.15-17)

¹³ Jesúsjavaberena itsamonae pejevaxijivixi tocapataponatsi Jesús pecobeta pejayataponaenexa. Petovajëtsinexatsinua Diosojavabelia, tocapataponatsi. Nexata Jesús pijajivi itaveta pexi pecapatsivi. Jesús pijajivi jumaitsi pexi pecapatsivijavabelia:

—Pëtsa patocapataponame panexi Jesúsjavaberena, jai.

¹⁴ Nexata Jesús jumaitsi pijajivijavabelia:

—Pëtsa paitavetame. Pacopare pejevaxijivixi pepatsinexa xanëjavaberena. Mapit-sipejevaxijivixije jumeabinejeva, xaniavaetsia bajumecovënëta palivaisi tsipaebatsi. Nexata pamona jitsipa pejonejava Dioso pijanacuayabetsia, bajara pijinia pacuenia jumeabinejeva, xaniavaetsia bejumecovënëta Dioso pejumelivaisi, jai Jesús pijajivijavabelia.

¹⁵ Jesús nexata pecobeta jayatapona pejevaxijivixi, caejiviyo canacujitsia. Bajaraxuacujinae Jesús baja pona bajarapanacuavecua.

Pacuenia pevëjëato, bitso pexainaenë, cuaicuaijai Jesúsjavabelia yabara pelivaisi
(Mr 10.17-31; Lc 18.18-30)

¹⁶ Pevëjëato pata Jesúsjavaberena. Nexata pevëjëato jumaitsi Jesúsjavabelia:

—Petuxanenë, pexaniajamatabëcuenenëmë. ¿Detsa pitsicuene, pexaniacuene, exanaenajë taxainaenexa matabi apo pevereverecejave? jai pevëjëato.

¹⁷ Jesús nexata jumaitsi pevëjëatojavabelia:

—¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë. Itsiata ita jitsipame nexainaenexa matabi apo pevereverecejave, jumecovënëre pacuenia Dioso pejumelivaisita itoroba jivi pejumecovënëtsinexa, jai Jesús pevëjëatojavabelia.

¹⁸ Nexata pevëjëato jumaitsi Jesúsjavabelia:

—¿Detsa palivaisi nexata jumecovënëtsianajë? jai.

Nexata Jesús jumaitsi pevëjëatojavabelia:

—Dioso pejumelivaisibaxutota jumaitsi mapacueniaje: “Pëtsa beyaxuabame jivitonë. Pëtsa jaitame itsava nijavavecua. Pëtsa nacobetoxotame. Pëtsa itsamonae pexanaejava yabara najumetsënëtsiaya paebame. ¹⁹ Axa yaiyataema. Ena ata yaiyataema. Asivamëre itsajivi ata pacuenia xamë nijacuata nasivamë,” jai Dioso pejumelivaisibaxutota, jai Jesús pevëjëatojavabelia.

²⁰ Pevějěato nexata jumaitsi Jesúsjavabelia:

—Daxita rabaja bajarapalivaisianě jumecověnětajě. ¿Detsa xua netosaica abaxě taex-naenexa? jai pevějěato.

²¹ Nexata Jesús jumaitsi pevějěatojavabelia:

—Itsa jitsipame pepacuene nejamataběcuenexanepanaejava, nejamataběcuenevitsabijavanua, nexata ponare. Canajetsianame daxita xua xainame. Bajarapamatamomi tsicobetsanaename bepejiobivi. Nexata bajarapacuenia xainaename bitso nexainaejava Dioso pijanacuatatsia. Bajaraxuacujinae nepěnaponaename, jai Jesús pevějěatojavabelia.

²² Nexata pevějěato ita jumetane bajarapacuenia Jesús pejumaitsijava, najamataběxainaeya baja vecuapona Jesús. Tsipaji pevějěato daxitacuene bitso pexainaeně. Nexata pevějěato apo jamatabějumecověnětsi palivaisi Jesús tsipaeba.

²³ Nexata pevějěato pecověta Jesús jumaitsi pijajivijavabelia:

—Xaniajaně pacuenia pacatsipaebijitsiatsi. Poně bitso daxitacuene pexainaeně, tsiayapěbejetsi bitso penajamataběcuenecopatsinexa Diosojavabelia pecapanepaenexatsi Dioso pijanacuayabetsia. ²⁴ Icatsia matavějěa pacajumaitsiatsi. Pacuenia camello acuenebi pejonejava palutaetoitaxutovojotualia, bajara pijinia pacuenia bitso pexainaeně acuenebi tsane pejonejava Dioso pijatomarabetsia, jai Jesús pijajivijavabelia.

²⁵ Jesús pijajivi ita jumetane bajarapacuenia Jesús pejumaitsijava, bitso jamataběcuenenabenajaca. Jesús pijajivi jumaitsi Jesúsjavabelia:

—¿Detsa nexata pitsivi panepaena Diosojavabelia bitso pexainaevi ata ita apo panepae tsane Diosojavabelia? jai.

²⁶ Jesús asaěya naěcota pijajivijavabelia. Jumaitsi pijajivijavabelia:

—Jivi raja apo caějěpaetsi pijacuata penacapanepaenexa Diosojavabelia. Caeně Dioso caějěpatsi. Dioso raja caějěpatsi daxitacuene pexanaenexa, jai Jesús pijajivijavabelia.

²⁷ Nexata Pedro jumaitsi Jesúsjavabelia:

—Patajatuxaneně, paxaně rabaja pacopatajě daxitacuene pataxainaejavami. Nexata baja pacapěnajinavanapatsi. ¿Detsa xua meta panerajutsiana? jai Pedro Jesúsjavabelia.

²⁸ Nexata Jesús jumaitsi pijajivijavabelia:

—Xaniajaně pacuenia pacatsipaebijitsiatsi. Pamatacabi daxitacuene pejanajava icatsia naexanaena, xaně, Daxitajivi Pematapijiněně, ecaenajě tronověnějavata taevetsinexa daxitajivi. Bajarapamatacabi paxamě ata, doce paponěměbeje patanepěnajinavanapaevimě, paenaename, pacaeněmě canacujitsia, panijatronota vajanajuaevetsinexa xua evetsianajě. Nexata paxamě paenaename juezněcuenia pananeconitsiaexanaenexa pijaneconi pexainaevi. Pananeconitsiaexanaename Israelpijiněmi pexi, doce poněmibeje, pemomoxi. ²⁹ Daxita pamonaе tajarataběcueneta pueneta pijabomi, pematapijivi ata, pejuyapijivi ata, paxa ata, pena ata, pijava ata, pexi ata, pijairaně ata, Dioso nexata bajarapamonae rajutsianatsi ayaijava bitso pepuenetsijavaněmi matatoxenetsia. Caejavayomijamataběcuene tsaponae, rajutsianatsi cien xuabeje tsaponae pevajěnaeyabelia. Rajutsianatsinua matacabi apo pevereveceajava. ³⁰ Pamonaе aeconoxae mapamatacabitaje ayaijamataběcuenevi tanetsi, bajarapamonae itsamatacabi Dioso beveliajamataběcuenevi exanaenatsi. Pamonaе pijinia mapamatacabitaje beveliajamataběcuenevi tanetsi, bajarapamonae itsamatacabi Dioso ayaijamataběcuenevi exanaenatsi, jai Jesús pijajivijavabelia.

20

Pacuenia Jesús livaisi tsipaeba pabi pexainaeně petonacuenebivitsi najěpaeya pemata-motsijava pelivaisicuenia yabara pelivaisi

¹ Icatsia Jesús jumaitsi pijajivijavabelia:

—Aeconoxae Dioso pejumelivaisi comparacióncuenia pacatsipaebianatsi patanejumeyapëtaenexamë. Dioso pijajivi pematamotsijava pijanacuatatsia, jëpa mapalivaisije. Pabixaneto pexainaenë ponapona. Ajena matacabi tsarucaponae, naropota jivi pejaitsinë petonacuenebinexatsi uvavënëjava peubipabita. ² Caxitajarabaxuaba baja nexata jivi. Junata petonacuenebinexatsi. Caematacabi matamotsiapaeba caedenario. Jejai nexata bajarapamonae. Nexata itoroba pijapabiabelia petonacuenebinexatsi. ³ Bajaraxuacujinae juameto baja tajë itsa rucaina, a las nueve, naropota icatsia. Taenuba tomara tuatuajëta pebijivi, saya jema pejinavanapaevi. ⁴ Nexata jumaitsi bajarapamonaejavabelia: “Paxamë ata paponaremelia tajapabiabelia. Panetonacuenebianame. Pacamatamotsianatsi raja xaniavaetsia,” jai pabixainaenë. ⁵ Nexata bajarapamonae ata ponalia petonacuenebinexatsi. Bajaraxuacujinae, matonejeepatota, junata icatsia itsamonae. Bajarapamonae ata ponalia petonacuenebinexatsi. Bajaraxuacujinae, bejamatabëcuene a las tres, junata icatsia itsamonae. Bajarapamonae ata ponalia petonacuenebinexatsi. ⁶ Bajaraxuacujinae, caniviyo, bejamatabëcuene a las cinco, pabixainaenë icatsia pona tomara tuatuajëareca. Caxitajarabaxuaba icatsia pebijivi, saya jema pejinavanapaevi. Nexata pabixainaenë jumaitsi bajarapamonaejavabelia: “¿Detsa xuajitsia saya daxitamatacabi pajinavana-pame panacuenebinejevamë?” jai. ⁷ Nexata bajarapamonae jumaitsi: “Tsipaji itsajivi ata apo panejunatsi patatonacuenebinexa,” jai. Nexata pabixainaenë jumaitsi: “Paxamë ata paponaremelia tajapabiabelia patanetonacuenebinexamë. Pacamatamotsianatsi raja xaniavaetsia,” jai pabixainaenë. Nexata bajarapamonae jejai. Ponalia petonacuenebinexatsi. ⁸ Nexata baja juameto itsa tabujuniya, pabixainaenë jumaitsi pijajivitonëjavabelia: “Junare baja tanetonacuenebivi. Matamobare baja. Copiaya matamobare pamonaepapacotocaevi pejonevi. Pamonaepapacopiaya pejonevi cotocaevi matamobianame,” jai pabixainaenë pijajivitonëjavabelia. ⁹ Nexata pamonaepapacotocaevi junua a las cinco penacuenebinexa, parena pematamobinexatsi. Nexata caenë canacujitsia matamobatsi caedenario. ¹⁰ Nexata daxita pamonaebajayacunua pepacopiaya junua penacuenebinexa, pepacotocaevi juya parena pematamobinexatsi. Nexata bajarapamonae jamatabëjumaitsi: “Caedenario meta pematatsënëa vaxaitsi nacamatamobiana. Tsipaji copiaya vaxaitsi junuatsi vajanacuenebinexa,” jamatabëjai bajarapamonae. Itsiata baitsi jane bajarapamonae ata, caenë canacujitsia, matamobatsi caedenario tsaponae. ¹¹ Nexata bajarapamonae penacuenebimatamo baja itsa nota, baraanaepana pabixainaenëjavabelia. ¹² Jumaitsi bajarapamonae: “Mapamonae cotocaevi pepatsivi, nacueneba saya caehora. Paxanë baja rovia ayaicuenia panacuenebajë. Icotia daxitamatacabi panetsajava. Itsiata mapamonae matamobame pacuenia panematamobame,” jai bajarapamonae. ¹³ Itsiata baitsi jane pabixainaenë jumaitsi bajara pamonaeyajuvënëjavabelia: “Itsacujavavayo ata pibisiacuene apo pacaexanaetsi. Patacajunatsijavata patanetonacuenebinexamë, caedenario pacatsipaebatsi patacamatamotsinexa patanetonacuenebimatamomë. Nexata baja bajarapacuenia pacarajutatsi. ¹⁴ Panijamatamo baja papitame. Paponare baja panijabonëjavabelia. Pamonaecotocaevi junua tanetonacuenebinexa, bajarapamonae ata matamobajë pacuenia pacamatamobatsi. Bajarapacuenia matamobajë pacuenia xanë jitsipajë. ¹⁵ Tajapalataxae, netoxanepana pacuenia jitsipajë tarajutsinexa. ¿Pacobecaëbame tsaja bajarapamonae ayaijava tarajutsixae? jai pabixainaenë petonacuenebivitsi yajuvënëjavabelia. ¹⁶ Bajara pijinia pacuenia Dioso ata, pacuenia jitsipa, exanaena pijajivijavabelia. Pamonaemapanacuata ayaijamatabëcuenevi tanetsi, bajarapamonae itsamatacabi Dioso beveliajamatabëcuenevi exanaenatsi. Pamonaepijinia mapanacuata beveliajamatabëcuenevi tanetsi, bajarapamonae itsamatacabi Dioso ayaijamatabëcuenevi exanaenatsi. Bajarapacuenia Dioso exanaena tsipaji picani jivi ayaibitsaëttoxaneto Dioso junata. Itsiata bajarapamonae yajuvënëvi, caejiviyobeje saya,

Dioso jumecovënëta, jai Jesús pijajivijavabelia.

Pacuenia icatsia Jesús tajëvelia navajunupaeba pebeyaxuabijavanexatsi yabara pelivaisi

(Mr 10.32-34; Lc 18.31-34)

¹⁷ Jesús pona Jerusalén tomarabelia. Nexata Jesús, pijajivi ayaibitsaëto yajava, najetaruca namutua, itsamonae yajava. Nexata bajarapamonaevécua ëpijajivi, doce ponëbeje, Jesús junata pimoxoyotsinexatsi. Nexata Jesús pebeyaxuabijavanexatsi, tajëvelia navajunupaeba pijajivijavabelia. Jesús jumaitsi mapacueniaje:

¹⁸—Panejumetaema. Mara Jerusalén tomarabelia ponatsije. Bajarajotalia xanë, Daxitajivi Pematapijinënë, tanevaetabinexa necanajetsiana sacerdotevi penamatacaitorobivi pecobeyabelia. Necanajetsiana judíovi pecujarubivi pecobeyabelia ata. Nexata xanë neneconitsiana tanebeyaxuabinexa. ¹⁹ Bajaraxuacujinae icatsia necanajetsiana itsanacuaverena pepatsivi pecobeyabelia. Bajarapamonaecanecaponaena. Nejumaitibabena penaneconitsivi pejumaconitabiabimacata. Bajaraxuacujinae cruzajavabelia necobematabiabarutsiana tatëpaenexa. Itsiata baitsi jane tanebeyaxuabicujinae, acueyabi matababita, icatsia asaënë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

Pacuenia Santiagobeje Juanbeje pena vajëta Jesúsjavabelia pexaniacuene petoexanaenexatsi yabara pelivaisi

(Mr 10.35-45)

²⁰ Santiagobeje Juanbeje paxa pevënë Zebedeo. Nexata bajaraponëbeje pena barëliatsibeje Jesúsjavabelia. Bajarapova pematatabacabëta nucajunua Jesús pitabarata. Vajëta pexaniacuene petoexanaenexatsi. ²¹ Nexata Jesús jumaitsi bajarapovajavabelia:

—¿Detsa pitsicuene jitsipame tacatoexanaenexa? jai Jesús.

Nexata bajarapova jumaitsi Jesúsjavabelia:

—Pamatacabi daxitacuene evetsianame, tocopatsianame taxënatobeje nemuxuneneta penaecaenexabeje panenajuaevetsinexa. Itsanë tocopatsianame necujanenia peecaenexa. Itsanë tocopatsianame netsavenonenia peecaenexa, jai bajarapova Jesúsjavabelia.

²² Nexata Jesús jumaitsi Santiagobeje Juanbejejavabelia:

—Paxamëbeje apo payapëtaemëbeje xua pavajëcaeyaexanamebeje ena xanëjavaberena. ¿Pacacajëpabeje tsaja panenacaevetsinexabeje papecabebiobiaexanaenexabeje pacuenia xanë nacaevetsianajë tanebejiobiaexanaenexa? ¿Pacacajëpabejenua tsaja panenacaevetsinexabeje papecabeyaxuabinexabeje pacuenia xanë nacaevetsianajë tanebeyaxuabinexa? jai Jesús Santiagobeje Juanbejejavabelia.

Nexata Santiagobeje Juanbeje jumaitsibeje:

—Jājā, panecajëpabeje cajena, jaiibeje.

²³ Nexata icatsia Jesús jumaitsi Santiagobeje Juanbejejavabelia:

—Paxaniajamëbeje rabaja. Paxamëbeje pacabebiobiaexanaenabeje pacuenia xanë nebejiobiaexanaena. Pacabeyaxuabianabejenua pacuenia xanë nebeyaxuabiana. Itsiata baitsi jane xua panevajëtamebeje panenacaenexabeje, itsanë tacujanenia, itsanë tatsavenonenia, bajaraxua Dioso apo netocopatsi patacatocopatsinexabeje. Tsipaji raja taxa Dioso ëpitapetsivinexa abaxë bajaraxua toxaniavaeta, jai Jesús Santiagobeje Juanbejejavabelia.

²⁴ Nexata diez ponëbeje Jesús pijajivi vënëtane pepëya bajaraxua Santiagobeje Juanbeje Jesúsjavabelia pevajëcaejavabeje. Nexata bajarapamonaecanecaponaena Santiagobeje Juanbejejavabelia. ²⁵ Nexata Jesús daxita pijajivi junata. Jesús jumaitsi pijajivijavabelia:

—Payapëtaneme rabaja pacuenia nacuaevetsivi exana. Eveta caenacua canacujitsia. Nexata nacuaevetsivi pijajivicuenia eveta pamonaë jinavanapa pevetsinacuanëjava. Nexata bajarapanacuanë pevetsivi ayaijamatabëcuenevi nataeyabiaba. Xua jamatabëitoroba pevetsinacuanëjava pejinavanapaevi petoexanaenexatsi, ajumesaëya itorobabiaba petoexanaenexatsi. ²⁶ Pëtsa paxamë bajarapamonaë cuenejëpaeya bajarapacuenia paexaname itsamonaëjavabelia. Biji rajane ponë paxamëyajuvënënë jitsipa ayaijamatabëcuenenë penaexanaenexa daxita paxamëvecua, bajaraponë daxita paxamë bepanijajivitonëcuenia bepacayavenonabiaba. ²⁷ Ponë paxamëyajuvënënë jitsipa penaexanaenexa papecanamatacaitorobinënexa, bajaraponë daxita paxamë bepanijajivitonëcuenia bepacayavenonabiaba. ²⁸ Tsipaji rabaja xanë ata, Daxitajivi Pematapijinë atanë, apo patajopaenë jivi taneyavenonaenexa. Biji rajane xanë patajopajë tayavenonaenexa daxitajivi. Patajopajë tasivatëpaenexa jivi ayaibitsaëtöxaneto pibisiacuene pexanaeneconimi taneconimatamotsinexa, jai Jesús pijajivijavabelia.

Pacuenia Jesús itaxutoxanepanaëyaexana bitso pitaxutotsëcënaenëbeje, apo petaenëbeje, yabara pelivaisi

(Mr 10.46-52; Lc 18.35-43)

²⁹ Jesús, pijajivi yajava, pitsapa Jericó tomaravecua. Nexata jivi ayaibitsaëtö pënaponatsi. ³⁰ Panamutojava Jesús najetaruca, bajarapanamutojavata ecabeje bitso pitaxutotsëcënaenëbeje, apo petaenëbeje. Nexata bajaraponëbeje itsa jumetanebeje bajarapanamutua imoxoyo Jesús penajetarucaëjava, vavajaiibeje tsecae.

—Jesús, Davidpijinë pemomomë, paneitaxutotsoniataemabeje! jaiibeje tsecae pitaxutotsëcënaenëbeje.

³¹ Jivi picani jumeitavetatsibeje pemoyanexabeje tsecae. Itsiata biji bitsoyo orijibia vavajaiibeje tsecae.

—Jesús, Davidpijinë pemomomë, paneitaxutotsoniataemabeje! jaiibeje tsecae Jesúsjavabelia.

³² Nexata Jesús muxunanucojopa. Junata pitaxutotsëcënaenëbeje. Jesús jumaitsi bajaraponëbejjavabelia:

—¿Detsa xua pajitsipamebeje patacaexanaenexabeje? jai.

³³ Nexata bajaraponëbeje jumaitsidebeje Jesúsjavabelia:

—Jesús, pajitsipajëbeje pataitaxutoxanepanaëjavabeje, jaiibeje tsecae.

³⁴ Nexata Jesús itaxutotsoniatane bajaraponëbeje. Jesús itaxutojayata bajaraponëbeje. Bajarajota caecuenia bajaraponëbeje itaxutoxanepanabeje baja. Nexata bajaraponëbeje Jesús pepëta naponabeje.

21

Pacuenia Jesús pata Jerusalén tomarata yabara pelivaisi

(Mr 11.1-11; Lc 19.28-40; Jn 12.12-19)

¹ Jesús baja pijajivi barëimoxoyotanajetaruca Jerusaléntomara. Barëpata baja Betfagé tomarata. Patsutojumata nubena olivonaenë, bajarapatsutoyenepanata eca Betfagétomara. Nexata Betfagé tomarata Jesús jumaitsi pijajivitonëbejjavabelia mapacueniaje:

² —Paponarebeje mapatomarayo ecaliajjavabelia. Bajarajotalia, ajena papatsiaremeliabeje, pataenutsianamebeje burro pecëtanutsinëtsi, pexënatonëyo yajava. Paisinaenamebeje bajarapaburrobeje. Payamaëyacarenamëbeje tsane. ³ “¿Detsa xuajitsia burrobeje paisinamebeje?” itsa pacajaiibeje tsane itsajivi, nexata pajumaitsimëbeje tsane: “Vajatuxanenë raja namatavenona. Aeconoxae raja icatsia canaviatsiarena,” pajamëbeje tsane, jai Jesús pijajivitonëbejjavabelia.

⁴ Bajarapacuenia Jesús itsa jumaitsi, tocopiapatatsi jane baja pacuenia Diosojumepaebinēmi profetanē bajayata tajēvelia yaquina Jesús pepatsijavanexa yabara Jerusalén tomarata. Jerusalén tomarata Jesús pepatsijavanexa yabara, profetanēmi bajayata peyaquinaelivaisita jumaitsi mapacueniaje:

⁵ Pajumaitsimē tsane Jerusalén tomarapijivijavabelia: “Pataename pepo paneevetsinē paxamējavaberena penajetarucajava. Beveliajamatabēcuenenēcuenia najetarucaena. Pejanaburroyota yapatanajetarucaena,” pajamē tsane Jerusalén tomarapijivijavabelia, jai bajayata tajēvelia profetanēmi peyaquinaelivaisita Jerusalén tomarata Jesús pepatsijavanexa yabara.

⁶ Nexata Jesús pijajivitonēbeje liabeje. Jumecovēnētabeje pacuenia Jesús itorobatsibeje. ⁷ Yamaēya carenabeje burro, pexēnatonēyo yajava. Nexata bajarapaburrobeje Jesús pijajivi tsijumajeba pijacama,” pajamē tsane Jerusalén tomarapijivijavabelia, jai bajayata tajēvelia profetanēmi peyaisajumavelia penaxatabijavanē. Jesús yanajetaruca burrota. ⁸ Panamutuarena Jesús najetaruca, bajarapanamutuarena jivi ayaibitsaētoخانeto, pijacamisajumavelia penaxatabijavanē, Jesús pevajēnaeya namutua yerequejebapona. Itsamonae naemaxērananē, pebaxu yajava, ucubaba. Nexata namutua Jesús tsivajēnaeitabētsiaya jebaponatsi yaiyataeya pecopiapitsinexatsi. ⁹ Jesús penajetarucajavata jivi ayaibitsaētoخانeto Jesús pevajēnaeya namataxainaeya najetarubena. Itsabitsaētoخانeto Jesús pecovēya cotocaevanajetarubena. Daxita bajarapamonae vavajai tsanajetarubena. Jumaitsi tsanajetarubena:

—¡Dioso yavenonaenatsi maponēje, pepo nacuaevetsinēmi Davidpijinē pemomo! ¡Dioso yavenonaenatsi maponē najetarucaje nacua pevetsinēnexa Dioso pejamatabēcueneta! Nexata vaxaitsi pexaniajamatabēcuenē rajutatsi Diosojavabelia, jai tsanajetarubena bajarapamonae.

¹⁰ Nexata Jesús itsa pata Jerusalén tomarata, daxita Jerusalén tomarapijivi jamatabēcuenenabenajaca. Nexata nayanijoba.

—¿Detsa meta maponē najetarucaje? najai bajarapamonae.

¹¹ Nexata jivi jumaitsi:

—Jesús ra manajetarucaje, Diosojumepaebinē profetanē. Galilea nacuata pecaetomara, Nazaret tomarapijinē, jai bajarapamonae.

Pacuenia Jesús Jerusalén tomarata templobovecua pitsapaeyaexana pecanajetabiabivi, pecomuacabiabivinua, yabara pelivaisi

(Mr 11.15-19; Lc 19.45-48; Jn 2.13-22)

¹² Jesús itsa pata Jerusalén tomarata, joneya temploboyalia. Nexata templobota Jesús tane pecanajetabiabivi, pecomuacaevinua. Nexata daxitaitsi:

—Jesús ra manajetarucaje, Diosojumepaebinē profetanē. Galilea nacuata pecaetomara, Nazaret tom bajarapamonae Jesús pitsapaeyaexana templobovecua. Palata pecambiabibiabivi ata pijamesanēmi Jesús topēnēyorobajaraba. Ucucu pecanajetabiabivi ata penabiabijavanēminua topēnēyorobajaraba.

¹³ Jesús jumaitsi bajarapamonaejavabelia:

—Dioso baja cajena pejumelivaisibaxutota mapatemplobo yabara tajēvelia jumaitsi mapacueniaje: “Tajabo raja jivi xanējavaberena penavajēcaebo tsane,” jai Dioso pejumaitsijava Dioso pejumelivaisibaxutota. Itsiata baitsi jane paxamē yamaxēitojorobiaya panenacobetoxotsinexa panacaetuatabiabame mapabotaje, jai Jesús templobota pecanajetabiabivijavabelia.

¹⁴ Bajarajota templobota Jesús imoxoyorenatsi pitaxutotsēcēnaevi, pejayujayunaevinua. Nexata Jesús bajarapamonae xanepanaeyaexana. ¹⁵ Templobota nubena sacerdotevi. Nubena judíovi pecujarubivinua. Bajarapamonae taenubena Jesús pitaxutoxanepanaeyaexanaejava pitaxutotsēcēnaevi. Taenubenanua Jesús

pexanepanaeyaexanaejava pejayujayunaevi. Jumetaenubenanua pejevaxi templobota pevavajaijavata pejumaitsijava Jesús yabara: “¡Dioso yavenonaenatsi maponėje, pepo nacuaevetsinēmi Davidpijinē pemomo!” pejaijava Jesús yabara. Bajaraxuata sacerdotevi baraanaepanatsi Jesús. Judíovi pecujarubivi ata baraanaepanatsi Jesús.

¹⁶ Nexata bajarapamonae jumaiti Jesúsjavabelia:

—¿Tsipaji apo jumetaemē mapapejevaxi xamē yabara pejumaitsaponaejavaje? ¿Apo necajumeitavetsi? jai.

Nexata Jesús jumaiti bajarapamonaejavabelia:

—Jājā. Jumetaniji picani. Itsiata apo jumeitavetsinē. ¿Paxamē tsipaji Dioso pejumelivaisibaxuto apo palebimē paneyapētaenexa pacuenia tajēvelia jumaiti xanē yabara bajarapapejevaxi pevavajaijavanexa? Dioso pejumaitsijava xanējavaberena, tajēvelia Dioso pejumelivaisibaxutota jumaiti mapacueniaje:

Pejevaxi, mitoapaenacuetoxi ata, naxēanaeyaexanaename penaxēanaejavata xamējavaberena pecajumaitsinexa: “Ayaijamatabēcuenenēmē bitso,” pecajainexa, jai Dioso pejumelivaisibaxutota xanējavaberena Dioso pejumaitsijava. Bajaraxuata mapapejevaxije jumaiti bajarapacuenia, jai Jesús sacerdotevijavabelia, judíovi pecujarubivijavabelia ata.

¹⁷ Nexata baja Jesús bajarapamonaevecua pona. Jerusalén tomaravecua pitsapa. Navialia Betania tomarayojavabelia. Nexata Jesús Betania tomarayota majita.

Pacuenia Jesús bijataenuta higueranae piacuaijibixae yabara pelivaisi
(Mr 11.12-14, 20-26)

¹⁸ Jesús pijajivi Betania tomarata pebarēmajitsicujinae, meravia pitsijavata, bajayacunua, Jesús pijajivi barēlia icatsia Jerusalén tomarabelia. Jesús nexata namutua penajetarucavejavata, piajani. ¹⁹ Jesús nexata taenuta higueranae namuto muxuneneta. Nexata Jesús imoxoyolia higueranae, pecuai itsa xaina, pexaenexa. Pecuai itsiata apo xinae higueranae. Ēpebaxu saya tsanuca. Bajaraxuata nexata Jesús jumaiti higueranaejavabelia:

—¡Xamē baja apo nacuaitsimē tsane! jai Jesús.

Bajarapacuenia Jesús pejumaitsijavata, bepiglia higueranae tēpanajereca yatabutopaya. ²⁰ Nexata Jesús pijajivi itsa tane bajaraxua, jamatabēcuenenabenajaca. Nexata Jesús pijajivi nayanijoba.

—¿Detsa pacuenia maponae bepiglia tēpanajerecaje? najai.

²¹ Nexata Jesús jumaiti pijajivijavabelia:

—Xaniajanē pacuenia pacatsipaebijitsiatsi. Itsa pajamatabējumaitisimē tsipae Dioso yabara: “Dioso nejumecovēnētsiana xua vajētsianajē Diosojavabelia,” itsa pajamatabējamē tsipae, nexata paxamē ata pacacajēpaejitsipa paneexanaenexa pacuenia exanajē mapahigueranaejavabeliaje. Itsiata ebajarapacuenē paneexanaenexa, apo pacacajēpae tsipae. Pematatsēnēa itsacuenējavanēnua paneexanaenexa, pacacajēpaejitsipa. Nexata itsa pajumaitisimē tsipae mapatsutojavabelia ataje: “Natixire majotavecuaje. Pucaxanetojavabelia jopare,” itsa pajamē tsipae, pacajumecovēnētsipa. Nexata mapatsuto ataje paneitorobicuenia pacajumecovēnētsipa. ²² Nexata daxitacuene xua pavajētsianame Diosojavabelia, pasivajamatabējumaitisimē tsane mapacueniaje: “Xua vajētajē Diosojavabelia, pepacuenē Dioso nejumecovēnētsiana,” pasivajamatabējamē tsane. Nexata xua pavajētsianame Diosojavabelia, Dioso pacajumecovēnētsiana, jai Jesús pijajivijavabelia.

Pacuenia Jesús caējēpatsi daxitacuene pexanaenexa yabara pelivaisi
(Mr 11.27-33; Lc 20.1-8)

²³ Jesús junua temploboyalia. Nexata templobota Jesús jivi livaisi tsipaeba. Nexata templobota Jesús imoxoyorenatsi sacerdotevi, judíovi pijaancianovi yajava. Nexata bajarapamonae jumaiti Jesúsjavabelia:

—¿Jipatsa pejamatabëcueneta pecanajetabiabivi, pecomuacaevinua, capitsapame matemplobopanabovecuaje? jai bajarapamonae Jesúsjavabelia.

²⁴ Nexata Jesús jumaiti bajarapamonaejavabelia:

—Xanë copiaya caejumeyo pacayanijobianatsi. Itsa paxamë panejumecanaviatsianame, nexata xanë juya pacatsipaebianatsi ponë nitoroba taexanaenexa bajarpacueno. ²⁵ ¿Jipatsa jane pejamatabëcueneta Juanpijinë jivi bautisabaponapona? ¿Dioso tsaja pejamatabëcueneta? Itsa jume, ¿jivi tsaja pejamatabëcueneta? jai Jesús bajarapamonaejavabelia.

Nexata epamonae nabarëcuaicuaijai. Najumaiti:

—¿De meta pacuenia jumecanaviatsianatsi? Vaxaiti itsa jumai tsipaetsi: “Dioso raja pejamatabëcueneta,” itsa jai tsipaetsi, nexata Jesús nacajumai tsipae: “¿Detsa nexata xuajitsia apo pajumecovënëtsimë Juanpijinë pepaebilivaisi?” nacajai tsipae. ²⁶ “Jivi raja saya pejamatabëcueneta Juanpijinë jivi bautisabaponapona,” itsa jai tsipaetsi, nexata jivi belia nacabeyejebijitsipa. Bajarapacuenia nacabeyejebijitsipa tsipaji raja Juanpijinë yabara daxitajivi sivajamatabëjumaiti: “Juanpijinë raja pepacueno Dioso jumepaebinëmi,” sivajamatabëjai, najai sacerdotevi, judíovi pijaancianovi yajava.

²⁷ Nexata saya bajarapamonae jumaiti Jesúsjavabelia:

—Apo payapëtaenë ponë Juanpijinë itorobatsi jivi pebautisabaponaenexa, jai.

Nexata Jesús jumaiti bajarapamonaejavabelia:

—Nexata xanë ata apo pacatsipaebi tsanetsi ponë nitoroba taexanaenexa bajarpacueno, jai Jesús.

Pacuenia Jesús jivi livaisi tsipaeba anijanëbeje pexënatobeje pexainaenë pelivaisicuenia yabara pelivaisi

²⁸ Jesús icatsia jumaiti sacerdotevijavabelia, judíovi pijaancianovijavabelia ata:

—Panejumecanaëjësianame palivaisi aeconoxae pacatsipaebijitsiatsi. Pebi xaina anijanëbeje pexënatobeje. Nexata pexënatojavabelia jumaiti: “Taxë nato, ajena netonacuenebianame tajauvacabota,” jai pexënatojavabelia. ²⁹ Nexata bajaraponë paxajavabelia jumaiti: “¡Jume! ¡Apo jitsipaenë tanacuenebijava! jai. Itsiata xuacujinae bajaraponë icatsia najamatabëxaina. Nexata jamatabëjumaiti: “Xanë baja rovia pibisi-ajamatabëcuene najamatabëxainajë. Nexata baja ponajë taxa tatonacuenebinexa,” jamatabëjai. Naropota baja penacuenebinë. ³⁰ Bajaraxuacujinae pexënatobeje pexainaenë pona icatsia itsanë pexënatojavabelia. Bajaraponëjavabelia ata jumaiti: “Taxë nato, ajena netonacuenebianame tajauvacabota,” jai pexënatojavabelia. Nexata jejai itajara pexë nato. Itsiata apo pona. ³¹ ¿Detsa ponë bajaraponëbejeyajuvënënë paxa jumecovënëta? jai Jesús bajarapamonaejavabelia.

Nexata bajarapamonae jumaiti Jesúsjavabelia:

—Copiata ponë paxa itorobatsi, apo jejai ata, itsiata paxa tonacueneba, bajaraponë paxa jumecovënëta, jai.

Nexata Jesús jumaiti bajarapamonaejavabelia:

—Xaniajanë pacuenia pacatsipaebijitsiatsi. Bajara pijinia itsane pamona co-pabiana pibisiacuene pexanabiabijavami, pamona najamatabëcuenepënëyorotsiana Diosojavabelia. Impuestomatamo gobierno pejamatabëcuene petomatamoyanijobabiabivimi ata jonena Dioso pijanacuayabetsia itsa najamatabëcuenepënëyorota Diosojavabelia. Petiriavi palata pepitsinexa pevitota pibisiacuene pexanabiabivimi ata jonena Dioso pijanacuayabetsia itsa najamatabëcuenepënëyorota Diosojavabelia pibisiacuene pexanabiabijavamivecua. Itsiata baitsi jane paxamë apo pajonemë tsane.

³² Juanpijinē jivibautisabinē patajopa Dioso pejumelivaisi papecatsipaebinexa panenajamatabēcuene pēnēyorotsinexa pibisiacuene paneexanabiabijavavecua. Itsiata paxamē apo pajumecovēnētsimē bajarapalivaisi. Itsiata bajarapalivaisi jumecovēnēta impuestomatamo gobierno pejamatabēcuene pematamoyanijobabiabivi. Petiriavi palata pepitsinexa pevitota pibisiacuene pexanabiabivimi ata jumecovēnēta bajarapalivaisi. Paxamē patae atamē bajarapamonae pejumecovēnētsijava, itsiata apo panajamatabēcuenepēnēyorotsimē panejumecovēnētsinexa Dioso, jai Jesús bajarapamonaejavabelia.

Pacuenia exana piamatabēcuenebejevi, itsanē pijauvabacabo petoevetsivi, yabara pelivaisi

(Mr 12.1-12; Lc 20.9-19)

³³ Icatsia Jesús jumaitsi sacerdotevijavabelia, judíovi pijaancianovijavabelia ata:

—Xaniavaetsia panemuxunaevere mapalivaisije. Pijaira pexainaenē pijairata uba ayaibacaboxaneto uvavēnējava. Bajaraxuacujinae pijaira matatoyorotsia, ibopanaxanetonē mataropotsia pefaratsijavata, yacaranata. Bajarapayacaranatsijava athēbēabetsia apia jivitonē matatoxenetsia. Bajaraxuacujinae irata mēthē cueyeta. Nexata pecueyetsimēthējavata exana uvacuaibarēmene pecayujucabiabijavanexa. Bajaraxuacujinae pijauvabacabo tuatuajēta exananuta piapiabotsia, penacuaitsimatacabi itsa tonaveretatsi, athēbēyo pevetabiabecaenexa pijauvabacabo.

’Nexata bajaraponē itsamonae evetsiaexana pijauvabacabo. Uvabacabo pexainaenē jumaitsi petoevetsivitsijavabelia: “Pamatacabi cuainaveretsiana, natsicobetsatsianatsi. Pamatacabi raja cuainaveretsiana, tajajivitonē itorobiarenajē xua panetotsatsianame tanetopitsinexa,” jai uvabacabo pexainaenē petoevetsivitsijavabelia. Nexata uvabacabo pexainaenē tajē nacuyabelia pona. ³⁴ Itsa baja uvabacabo pexainaenē yapētane pecopiapatsijava uvacuai penaveretsimatacabi penotsinexa, nexata uvabacabo pexainaenē itoroba pijajivi. Itoroba petoevetsivitsijavabelia petsicobetsatsinexatsi. ³⁵ Nexata uvabacabo pexainaenē pijajivi uvabacabo petoevetsivitsi totaicatsi. Caenē bajarapamonaeajuvēnēnē toconibabiatsi. Itsanē pepacuene tobeyaxuabatsi. Itsanē ibotonēta totseconatsi. ³⁶ Nexata uvabacabo pexainaenē icatsia itsabitsaēto pijajivi itorobalia. Bajara icatsia pacuenia exana uvabacabo pevetsivi.

³⁷ Nexata uvabacabo pexainaenē itoroba icatsia pexēnato jane baja. Uvabacabo pexainaenē jamatabējumaitsi: “Netoyaiyataena meta taxēnato,” jamatabējai. ³⁸ Itsiata baitsi jane uvabacabo petoevetsivitsi uvabacabo pexainaenē pexēnato ata apo toyaiyataetsi. Itsa tane uvabacabo pexainaenē pexēnato, bajarapamonae najumaitsi: “Mara ponēje paxa pevēnamuto paxa pijauvabacabo pitsipaje. Naxanitsia. Beyaxuabatsi. Nexata raja vaxaitsi vajauvabacabo tsane,” najai uvabacabo petoevetsivitsi. ³⁹ Nexata icatsia uvabacabo pexainaenē pexēnato ata tovaetabatsi. Caponaliatsi bajarapauvabacabo pēnēyabelia. Nexata uvabacabo pexainaenē pexēnato ata bajarapacuenia icatsia tobeyaxuabatsi, jai Jesús.

⁴⁰ Nexata bajarapalivaisi yabara Jesús yanijoba sacerdotevijavabelia, judíovi pijaancianovijavabelia ata. Jesús jumaitsi:

—Uvabacabo pexainaenē itsa patsiarena, ¿de tsaeta xua exanaena uvabacabo petoevetsivitsijavabelia? jai Jesús bajarapamonaejavabelia.

⁴¹ Nexata bajarapamonae jumaitsi Jesúsjavabelia:

—Pijauvabacabo raeta pexainaenē apo itaxutotsoniatae tsane. Nexata verebiabiana bajarapamonae pibisiacuene pexanaevi. Nexata icatsia itsamonae evetsiaexanaena bajarapauvabacabo. Nexata uvacuai penaveretsimatacabi bajarapamonae itsa nota, tsicobetsatsianatsi pacuenia baja tocaējētatsi uvabacabo pexainaenē perajutsinexatsi, jai bajarapamonae.

⁴² Nexata Jesús jumaitsi bajarapamonaejavabelia:

—Payapëtaneme rabaja pacuenia Dioso pejumelivaisibaxutota tajëvelia jumaitsi xanë yabara. Iboto pelivaisicuenia Dioso pejumelivaisibaxutota jumaitsi xanë yabara mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia nayaëtsiana botabu daxita itsaibo matatoxenetsia. Vajatuxanenë Dioso raja exanaena bajara-pacuene. Nexata bitso nacatsita pexaniacuene tsane bajarapacuene, jai tajëvelia Dioso pejumelivaisibaxutota xanë yabara.

’Bajarapacuenia tajëvelia Dioso pejumelivaisibaxutota itsa jumaitsi, paxamë apo patanejumecovënëtsijavanexamë yabara jumaitsi. Dioso taneitapetsijava daxitajivi tacapanepaenexa yabara ata jumaitsi. ⁴³ Nexata pacuenia uvabacabo pexainaenë icatsia itsamonae evetsiaexanaena, bajara pijinia pacuenia Dioso exanaena paxamëjavabelia. Xua picani Dioso pacaevetsiaexana, copiarucaena. Nexata juya itsamonae Dioso evetsiaexanaena bajaraxua, pamona xaniavaetsia jumecovënëta Dioso pitorobicueniatsi. ⁴⁴ Pamona apo nejumecovënëtsi Dioso pexënatocuenenë, bajarapamona bitso bejamatabëjivi tsane apo tanejumecovënëtsixae. Pacuenia ibotojumata pefirapecaejivi, itsa tsapatecatsi, pevixae bitso yanabejibita, bajara itsane. Pamona naneconitsiaexanaenajë, bajarapamona pepacuene naxuabiana daxitamatacabijavabelianexa. Pacuenia iboto pematacënëbinëtsi apo asaë, bajara itsane, jai Jesús bajarapamonaejavabelia.

⁴⁵ Sacerdotevi penamatacaitorobivi, fariseovi yajava, itsa jumetane bajarapacuenia Jesús pejumaitsiyava, bajarapamona jamatabëjumai tsenae: “Vaxaitsi yabara raeta jumaitsi,” jamatabëjai tsenae bajarapamona. ⁴⁶ Nexata picani bajarapamona Jesús jamatabëvaetabatsi. Itsiata bajarapamona jamatabëjumaitsi: “Bajaraponë jivi tanetsi Diosojumepaebinëcuene. Nexata nacaitsacueniabijitsipa vaxaitsi itsa vaetabijitsipatsi maponëje,” jamatabëjai tsenae bajarapamona. Bajaraxuata Jesús apo vaetabitsi.

22

Pacuenia Jesús jivi livaisi tsipaeba penacasabifiesta pexanaenë pelivaisicuenia yabara pelivaisi

(Lc 14.15-24)

¹⁻² Jesús icatsia livaisi tsipaeba sacerdotevijavabelia, judíovi pijaancianovijavabelia ata. Bajarapacuenia Jesús tsipaeba bajarapamona peyapëtaenexa pacuenia itsamatacabi itsijitsia, pamatacabi Dioso pijajivi evetsiana. Jesús jumaitsi mapacueniaje:

—Pepo nacuaevetsinë fiesta exana pexë nato petonacasabifiestanexatsi. ³ Nexata nacuaevetsinë jumaitsi pijajivijavabelia: “Pamona baja tajëvelia junatajë, patsipaebare baja tanetopatsinexarena fiestanexa jane baja,” jai nacuaevetsinë pijajivijavabelia. Pijajivi baja nexata pona petsipaebinexa. Itsiata pejunatsivi apo jitsipae peponaejava. Nexata nacuaevetsinë pijajivi naviabarena petsipaebinexa pijatuxanenëjavabelia. ⁴ Nexata nacuaevetsinë itsamonae icatsia pijajivi itorobalia pesivapon-aenexalia. Nacuaevetsinë jumaitsi pijajivijavabelia: “Pajumaitsimë tsane tajunatsivijavabelia: ‘Veretejeba rabaja panexaejavanexa. Beyaexana rabaja baca penasitsivi, becerro yajava. Daxita rabaja veretejeba panenabaninexa. Naxanitsia. Daxita pina paponaeremelia,’ pajamë tsane tajunatsivijavabelia,” jai nacuaevetsinë pijajivijavabelia. ⁵ Itsiata baitsi jane bajarapamona icatsia sivapona atalia, nacuaevetsinë pejunatsivi apo jejai. Pejunatsiviyajuvënënë itsanë pona pijapabianëjavabelia. Itsanë pijinia pona penavijatsinexa. ⁶ Itsamonae nacuaevetsinë pijajivi taicatsi. Bejiobiaexanatsi pibisiacuenia. Beyejebatsi baja belia. ⁷ Bajaraxuata nexata nacuaevetsinë bitso baraanaepana pejunatsivimijavabelia. Nexata nacuaevetsinë itorobalia vajabitsaëvi

pebenexa pamonaē tobeyejebatsi pijajivi. Itorobanua pijatomaranēmi ata petotajuitsinexa. ⁸ Bajaraxuacujinae nacuaevetsinē icatsia pijajivijavabelia jumaitsi: “Daxitacuene baja picani veretejebiaexanajē taxēnato penacasabifiestanexa. Itsiata baitsi jane tajunatsivimi apo netopatsirena. ⁹ Paponaremelia pinijcallexanetonējavabelia. Nexata daxita pamonaē pacaxitajarabaponaename bajarapacallexanetonējava, pajunataponaename taxēnato penacasabifiestajavaberena pepatsinexa,” jai nacuaevetsinē pijajivijavabelia. ¹⁰ Nexata nacuaevetsinē pijajivi ponalia. Najetarubena callexanetonējava. Junataponā daxita pamonaē caxitajarabapona. Junataponā piajamatabēcuenebejevi, pejamatabēcuenexanepanaevi ata. Nexata bajarapamonaē barēpona fiesta pexanaēbojavabelia. Nexata pabota fiesta exana, vēnēca jivi.

¹¹ Nexata nacuaevetsinē jonena bajarapaboyarena petaenexa petopatsivitsi. Daxita pamonaē topatatsi, jumapata xua banaxataba itsa pona penacasabifiestajavabelia. Nexata nacuaevetsinē taenuta bajarajota itsanē, saicayaviriajava penaxatatsinē. Apo naxatatsi xua naxataba daxita. ¹² Nexata nacuaevetsinē jumaitsi bajaraponējavabelia: “¿Detsa xuajitsia najunuame apo nenaxatatsinē pacuenia daxita naxataba penacasabifiestajavaberena penajonevi?” jai nacuaevetsinē. Nexata bajaraponē moya nuca. ¹³ Nexata nacuaevetsinē jumaitsi mesa pevetsivijavabelia: “Maponē pataxucēreje. Pacobecēre yajava. Paxuaremelia bopēnēyabelia, pitaquirijavabelia. Bajarajotalia nuena. Navonosiniana bitso penavixaetaexae,” jai nacuaevetsinē. ¹⁴ Pacuenia fiesta pexanaenē ayaibitsaētoxaneto junatsi ata, caejiviyobeje saya topatatsi, bajara pijinia itsi Dioso pejunatsivi ata. Dioso picani ayaibitsaētoxaneto junata pijajivinexa. Itsiata saya caejiviyobeje jumecovēnētatsi, jai Jesús sacerdotevijavabelia, judíovi pijaancianovijavabelia ata.

Pacuenia Jesús jamatabēcueneējēbiaya yanijobatsi impuestomatamo pematamotsijava yabara pelivaisi

(Mr 12.13-17; Lc 20.20-26)

¹⁵ Fariseovi nacaetuata penabarēcuaicuaijainexa. Bajarapamonaē najamatabēcuenejēpa Jesúsjavabelia jamatabēcueneējēbiaya peyanijobinexa. Nexata Jesús bijiaya itsa jumecanaviata, Jesús picani peneconitsinexatsi nacuaevetsinējavabelia. ¹⁶ Nexata fariseovi itoroba pijajivi, Herodes pijajivi yajava, Jesúsjavabelia jamatacueneējēbiaya livaisi peyanijobinexa. Nexata fariseovi pijajivi, Herodes pijajivi yajava, Jesúsjavabelia jamatabēcueneējēbiaya jumaitsi:

—Jesús, payapētāniji cajena nexaniajaicuene, xua yabara tsipaebabiabame livaisianē. Pexaniajaicuene tsipaebabiabame pacuenia Dioso jitsipa jivi petojinavanapaenexatsi. Petuxanevi ata xamē apo cjunavimē. Apo auramē livaisi netsipaebabiabijava. Nexata daxitajivi najēpaeya livaisi tsipaebabiabame. ¹⁷ Panetsipaebare pacuenia najamatabēxainame mapacuene yabaraje. ¿Xanepana tsaja vajamatamotsinexa impuestomatamo Romanonacua pepo pevetsinējavabelia? Itsa jume, ¿apo xanepanae tsaja vajamatamotsinexa? jai bajarapamonaē jamatabēcueneējēbiaya Jesúsjavabelia.

¹⁸ Itsiata baitsi jane Jesús jamatabēcueneyapētane bajarapamonaē jamatabēcueneējēbiaya peyanijobijavatsi peneconitsinexatsi picani. Nexata Jesús jumaitsi bajarapamonaējavabelia:

—Paneyamaxēitojorobivi, ¿detsa xuajitsia jamatabēcueneējēbiaya paneyanijobame?

¹⁹ Panetsitajēre pitsipalatanēyota pamatamotabiabame impuestomatamo, jai Jesús bajarapamonaējavabelia.

Nexata bajarapamonaē Jesús tocaponarenatsi palatanēyo. ²⁰ Jesús itsa tane bajarapalatanēyo, nexata jumaitsi bajarapamonaējavabelia:

—¿Jipatsa mapitabaraje, pevēnēnua, ruca mapapalatanēyoyumataje? jai Jesús.

²¹ Nexata bajarapamonaē jumaitsi Jesúsjavabelia:

—Romanonacua raja pepo pevetsinē pitabara, pevēnēnua, jai.

Nexata Jesús jumaitsi bajarapamonaejavabelia:

—Nexata parajutabiabianame Romanonacua pepo pevetsinē pijajava. Parajutabiabianame pijinia saicaya Diosojavabelia Dioso pijajava, jai Jesús.

²² Nexata Jesús xaniavaetsia itsa jumecanaviata, bajarapamonae jamatabëcuenenabenajaca bajarapacuenia Jesús pejumaitsijavata. Nexata baja copatatsi Jesús jamatabëcueneējëbiaya peyanijobijavatsi. Naviaba baja bajarapamonae.

Pacuenia Jesús tsipaeba jivi petëpaecujinae icatsia piasaëjavanexa yabara pelivaisi (Mr 12.18-27; Lc 20.27-40)

²³ Saduceovi saicaya itsalivaisi xaina. Bajarapamonae jamatabëcuenenavëxaniabiaya jumai tsabiabi: “Petëpaevi rabaja petëpaecujinae, icatsia apo asaë tsane,” jai tsabiabi. Nexata saduceovi imoxoyorenatsi Jesús. Saduceovi Jesúsjavabelia jumaitsi mapacueniaje:

²⁴ —Jesús, Moiséspijinē bajayata vajanacatoyaquinaelivaisi, jumaitsi mapacueniaje: “Ponë pematapijinē pepua penacojiobinē baja, totëpatsi pexi xainaenejeva, nexata juyapijinē bepita pematapijinēmi pijavami. Bajarapacuenia juyapijinē bepita pematapijinēmi pijavami pexi pexainaenexa bajarapovajavabelia. Nexata pexi itsa xainabeje, bematapijinēmi pexi petaenexa daxitajivi,” jai Moiséspijinē bajayata vajanacatoyaquinaelivaisi. ²⁵ Nexata jinavanapa ënacaemonae siete ponëbeje paxanëjavata. Pepo matapijinē copiaya nacojioba. Nexata bajaraponë pijava vecuatëpa pexi xainaenejeva. Nexata pematapijinēmi pepënarucaenë pita pematapijinēmi pijavami. ²⁶ Nexata icatsia bajaraponë ata tëpa pexi xainaenejeva bajarapovajavabelia. Nexata icatsia itsanë tuatuajëmatapijinē pita bajarapova. Bajara icatsia ponë ata tëpa pexi xainaenejeva bajarapovajavabelia. Bajarapacuenia tëpa daxita siete ponëmibeje nacaemonaemi, bajarapova pepitaponaevi. Itsiata itsanë ata pexi apo xinae bajarapovajavabelia. ²⁷ Bajaraxuacujinae bajarapova ata tëpa baja. ²⁸ “Jivi raja petëpaecujinae, Dioso icatsia asaëyaexanaenatsi,” jamë. ¿Detsa nexata ponë bajarapamonae yajuvënënë pijava tsane bajarapova bajarapamatacabi? Daxita pamonaë siete ponëmibeje nacaemonae pitapona picani bajarapovami, jai saduceovi Jesúsjavabelia.

²⁹ Nexata Jesús jumaitsi saduceovijavabelia:

—Paxamë saya pajamatëbëcuenenavëxaniabame. Paxamë raja apo payapëtaemë pacuenia Dioso pejumelivaisibaxutota jumaitsi. Apo payapëtaemënu pacuenia Dioso cajëpatsi daxitacuene pexanaenexa. Bajaraxuata jamatabëcuenenavëxaniabiaya paneyanijobame: “¿Detsa ponë pitsiana bajarapova?” panejamë. ³⁰ Pamatacabi raja petëpaevimi Dioso icatsia asaëyaexanaenatsi, apo nacojiobi baja tsane. Bajarapamatacabita itsajivi ata pexënatoyo apo canajetsi tsane pebijavabelia petonacojiobinexatsi. Bajarapamonae nacojiobinejeva, jinavanapaena athëbëtatsia pacuenia ángelevi jinavanapa. ³¹ Itsa pepacuene paxamë xaniavaetsia paneyanijobame paneyapëtaenexa Dioso icatsia piasaëyaexanaejavanexatsi petëpaevimi, nexata pacatsipaebianatsi. Paxamë rabaja payapëtaneme pacuenia bajayata Dioso jumaitsi. Abraham baja pepuatëpae, Isaac ata baja pepuatëpae, Santiago ata baja pepuatëpae, bajarapamonae yabara bajayata Dioso jumaitsi Moiséspijinëjavabelia mapacueniaje: ³² “Xanë rabaja abaxë Abraham pijaDiosonë. Isaac ata pijaDiosonë. Jacob ata pijaDiosonë,” jai baja cajena Dioso bajayata petëpaevimi yabara. Bajarapacuenia Dioso pejumaitsixae, nayapëtane bajarapamonae bajayata tëpae ata, Diosovecua apo penaxuabijava. Aeconoxae ata bajarapamonae Dioso yajavajinavanapa athëbëtatsia, jai Jesús saduceovijavabelia.

³³ Jivi ayaibitsaëtozaneto itsa jumetane bajarapacuenia Jesús pejumaitsijava saduceovijavabelia, jivi bitso jamatabëcuenenabenajaca Jesús petsipaebilivaisi yabara.

Palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia yabara pelivaisi

(Mr 12.28-34)

³⁴ Saduceovi Jesús peyanijobijumetsi, xaniavaetsia Jesús jumecanaviata. Nexata baja moya saduceovi. Nexata fariseovi ita vënëtane saduceovijavabelia Jesús xaniavaetsia pejumecanaviatsijava, nexata fariseovi nacaetuata penabarëcuaicuaijainexa. Nexata fariseovi najumejaita pacuenia yanijobijitsia Jesúsjavabelia. ³⁵ Nexata fariseoviya-juvënënë, judíovi pecujarubinë, Jesúsjavabelia jamatabëcueneëjëbiaya yanijoba. Jumaitsi Jesúsjavabelia mapacueniaje:

³⁶ —Jesús, ¿detsa palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia? jai.

³⁷⁻³⁸ Jesús nexata jumaitsi judíovi pecujarubinëjavabelia:

—Palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia, jumaitsi mapacueniaje: “Pasivamëre panijatuxanenë panijaDioso daxita panejamatabëëthëtojavavetsina, daxita panejamatabëcueneta ata, daxita panenajamatabëxainaesaëta ata,” jai. Bajarapalivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia. ³⁹ Bajaraxuacujinae pecotocaevilivaisi, palivaisi bitso jivi bejumecovënëta, jumaitsi icatsia mapacueniaje: “Pasivamëre itsajivi ata pacuenia paxamë panijacuata panasivamë,” jai. Bajarapalivaisi ata jivi bitso bejumecovënëta. ⁴⁰ Pajivi jumecovënëta bajarapalivaisibeje, Dioso baja tanetsi pejumecovënëtsijivicuene daxita Dioso pitorobilivaisianë. Nexata palivaisi ata bajayata Dioso Moiséspijinëta najumecopata, bajarapalivaisi ata pejumecovënëtsijivicuene Dioso tanetsi. Diosojumepaebivimi profetavi ata palivaisianë bajayata tsipaeba, bajarapalivaisi ata pejumecovënëtsijivicuene Dioso tanetsi, jai Jesús judíovi pecujarubinëjavabelia.

Pacuenia Jesucristo yabara Davidpijinë bajayata tajëvelia: “Tajatuxanenë,” jai, yabara pelivaisi

(Mr 12.35-37; Lc 20.41-44)

⁴¹ Fariseovi penacaetuatsijavata, fariseovijavabelia Jesús pijacuata nayabarajumaitsi mapacueniaje:

⁴² —¿Detsa pacuenia pasivanajamatabëxainaename Cristo ita patsianica? ¿Jipatsa pexënato tsane? nayabarajai Jesús pijacuata fariseovijavabelia.

Nexata fariseovi jumaitsi Jesúsjavabelia:

—Davidpijinë pemomo tsane, jai.

⁴³ Nexata Jesús jumaitsi fariseovijavabelia:

—Pajamatabëcuenenavëxaniabame raja. Cristo raja Dioso pexënato. Bajayata Dioso pejumaitzijava Cristo yabara, Davidpijinë Espíritu Santo pejamatabëcueneta tajëvelia jumaitsi mapacueniaje:

⁴⁴ Dioso jumaitsi tajatuxanenëjavabelia:

“Ecare abaxë tacujuanenia. Vecatsivajënae jumecovënëtsiaexanaenatsi abaxë copiaya nijavajabitsaë nitorobicuenianexa,” jai Dioso tajatuxanenëjavabelia, jai bajayata tajëvelia Davidpijinë mapacueniaje Cristo yabara.

⁴⁵ Nexata Davidpijinë bajayata Cristo yabara: “Tajatuxanenë,” ita jai, nexata Cristo, Davidpijinë apo pemomo. Tsipaji baja cajena saicaya Cristo Dioso pexënato, nayabarajai Jesús pijacuata fariseovijavabelia fariseovi pecanaëjëtsinexa Cristo Dioso pexënatocuene.

⁴⁶ Nexata itsanë ata fariseoviyajuvënënë Jesús apo jumepitsitsi caejumeyo ata. Bajaraxuacujinae fariseovi, saduceovi ata, cjunava Jesúsjavabelia baja jamatabëcueneëjëbiaya livaisi peyanijobijava.

23

Pacuenia Jesús tsipaeba fariseovijavabelia, judíovi pecujarubivijavabelia ata, bajarapamonae penaneconitsijava Diosojavabelia yabara pelivaisi
(Mr 12.38-40; Lc 11.37-54; 20.45-47)

¹ Jesús jumaitsi jivi ayaibitsaëtojavabelia, pijajivijavabelia ata:

² —Judíovi pecujarubivi, fariseovi ata, Dioso tocopatatsi jivi xaniavaetsia peyapëtaeyaexanaponaenexa pajamatabëcuenelivaisi xaina Dioso Moiséspijinëta penajumecopatsilivaisimi. ³ Nexata pajumecovënëtsianame daxita pacuenia bajarapamonae pacatsipaebapona. Itsiata baitsi jane pëtsa paexaname pacuenia bajarapamonae exanavanapa. Tsipaji xua bajarapamonae pacaitaveta paxamë paneexanaeyaniva, bajaraxua itsiata bajarapamonae exanabiaba. ⁴ Palivaisianë ayapëbeje itsajivi ata pejumecovënëtsinexa, bajarapalivaisianë pacatsipaebabiaba panejumecovënëtsinexa. Pamonae bajarapacuenia pacatsipaeba, itsanë ata bajarapamonae yajuvënënë apo jamatabënajinae pexanaenexa bajarapacuenia. ⁵ Daxita xua bajarapamonae exana, exanabiaba saya jivi petaenexatsi. Bajarapamonae jamatabëjumai tsabiabi: “Bajaraxua itsa exanaenatsi, jivi nacayaiyataena,” jamatabëjai tsabiabi. Bajarapamonae pitapata, pecofiata ata, becajonixicuenia pexanaejavaxita yacajonia cëbarubejebabiaba Diosojumelivaisi peyaquinaebaxutoxi. Bajarapamonae itsamonae matatoxenetsia pijumanavaitabënexa, piapiafleco pijanavatabuyalia cëbarubabiaba. Bajarapacuenia bitso jitsipabiaba pexanabiabinexa. ⁶ Bajarapamonae itsa najunatatsi fiestajavabelia penanabaninexa, nexata jitsipabiaba penaenexa pexaniavirijavanëta. Nexata natsiitapetabiaba penaenexa peyayataevitsi penaenexa petsinubijavanëta. Bajarapamonae itsa najoneyabiaba judíovi penacaetuatabiabibota, jitsipabiaba penaenexa peyayataevitsi penaenexa petsinubijavanëta. ⁷ Bajarapamonae bitso jitsipabiaba jivi pebajacobinexatsi yayiyataeya callejava ata. “Patanecujarubinë,” pejaijavatsi ata, bitso jitsipabiaba, jai Jesús mapacueniaje fariseovi yabara, judíovi pecujarubivi ata yabara.

⁸ Icatsia Jesús jumaitsi jivi ayaibitsaëtojanetojavabelia, pijajivijavabelia ata:

—Pëtsa paxamë pajitsipame jivi papecajumaitsinexa paxamëjavabelia: “Patanecujarubinë,” papecajainexa. Tsipaji daxita paxamë bepanacaemonaemë Dioso panejumecovënëtsivixae. Xanë, caenënë Cristonë, athëbëvetsica Dioso taneitorobinëtsica jivi tacapanepaenexa, panexainame patacacularubinënexa. ⁹ Itsanë itsa pacacujaruba, “Axa,” pajamë pëtsa bajaraponëjavabelia. Tsipaji caenë paneaxa paxainame, ponë eca athëbëtatsia. ¹⁰ Pëtsa pajitsipame itsamonae papecajumaitsinexa: “Jivi pevetsinë,” papecajainexa. Tsipaji xanë, caenënë Cristonë, patacaevecsina. ¹¹ Ponë paxamë yajuvënënë pacavecuayajamatabëcuenenë, bajaraponë pacayavenonabiaba padaxitamë. ¹² Pajivi daxitajivi matatoxenetsia pijacuata ayajamatabëcuenejivi natane, bajarapajivi itsamat-acabi daxitajivivecua beveliajamatabëcuenejivi Dioso exanaenatsi. Pajivi pijinia daxitajivivecua pijacuata beveliajamatabëcuenejivi natane, bajarapajivi itsamatacabi daxitajivi matatoxenetsia ayajamatabëcuenejivi Dioso exanaenatsi, jai Jesús jivi ayaibitsaëtojanetojavabelia, pijajivijavabelia ata.

¹³ Jesús icatsia jumaitsi fariseovijavabelia, judíovi pecujarubivijavabelia ata:

—¡Paxamë saya jivi paneyamaxëitojorobivi! ¡Paxamë judíovi panecujarubivi, pafariseovimënuua, ayaineconi panatsixainame Diosojavabelia! Pacuenia bo babaupaxatata jivi pejonayaniva, bajara bepacuenia paxamë paexaname. Itsamonae jitsipae ata pejonenexa Dioso pijanacuayabetsia, apo pacopatsimë pejonenexa saicayalivaisi panecujarubixae. Paxamë ata apo pajitsipaemë panejonenexa Dioso pijanacuayabet-sia.

14 '¡Paxamë saya jivi paneyamaxëitojorobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! Yamaxëitojorobiaya pavecuanotabiabame pamonajivi pevecuatëpaevanëtsi pecobecovëjavaximi. Bajaraxuacujinae pinijicuenia itajara Diosojavabelia pavajëcabiabame. Itsiata pepo panexaniajajimatabëcueneta apo pavajëcabiabimë Diosojavabelia. Bajarapacuenia pavajëcabiabame saya jivi papecataenexa Dioso itajara bitso bepanejumecovënëtsivi. Bajaraxuata bitso ayaicuenia Dioso pacananeconitsiaexanaena pamatacabi Dioso naneconitsiaexanaena daxita pamona Dioso apo pejumecovënëtsivi.

15 '¡Paxamë saya jivi paneyamaxëitojorobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! Palivaisi pacajinavana-pame, caejivi ata panejumecovënëtsiaexanaenexa, papecacuenejëpaenexanua, ayaicuenia daxitajava jivi patsipaebarutame. Nexata pajivi pacajumecovënëta, bajarapajivi pevajënaeyabelia bitso naneconitapona Diosojavabelia. Nexata paxamë panejamatabëcueneta bajarapajivi paxamë matatoxenetsia bitso Dioso naneconitsiaexanaenatsi pexuabinexatsi infiernojavabelia.

16 '¡Paxamë apo payapëtae atamë, Dioso pejumelivaisi jamatabëcuenenavëxaniabiaya pacujarubabiabame itsamona! Nexata paxamë panecujarubijamatabëcueneta bajarapamona pananeconitsiaexaname Diosojavabelia. ¡Bajaraxuata ayaineconi panatsixainame Diosojavabelia! Paxamë jivijavabelia jamatabëcuenenavëxaniabiaya pajumait-simë tsabiabi: "Pajivi itsanëjavabelia najumecapanepaeya jumaitsi pejumexaniataenexatsi: 'Catoexanaenatsi pepacuene. Cajumaitsitsi cajena templobo pevënëta,' jai, apo itsacuene. Bajarapajivi pejumaitscovëya apo exanae ata, itsiata apo naneconitsi Diosojavabelia," pajamë tsabiabi. "Pajivi rajane itsanëjavabelia jumaitsi pejumexaniataenexatsi: 'Catoexanaenatsi pepacuene. Cajumaitsitsi cajena templobopijiorojavanë pevënëta,' jai, bajara jane xua abeje. Nexata bajarapajivi exanae pejumaitscovëya penaneconitsiyaniva Diosojavabelia," pajamë tsabiabi jivijavabelia.

17 Pajamatabëcuenenavëxaniabame raja saya bajarapacuenia itsa pajumaitsimë. Biji rajane templobo beyaiyatanetsi bajarapatemplobopijiorojavanë matatoxenetsia. Bajarapaorojavanë ata yaiyatanetsi. Tsipaji bajarapaorojavanë templobopijiorojavanë.

18 Jamatabëcuenenavëxaniabiaya pajumaitsimë tsabiabinua: "Pajivi itsanëjavabelia najumecapanepaeya jumaitsi pejumexaniataenexatsi: 'Catoexanaenatsi pepacuene. Cajumaitsitsi altarvënëjava pevënëta,' jai, apo itsacuene. Bajarapajivi pejumaitscovëya apo exanae ata, itsiata apo naneconitsi Diosojavabelia," pajamë tsabiabi. "Pajivi rajane pejumexaniataenexatsi itsanëjavabelia jumaitsi: 'Catoexanaenatsi pepacuene. Cajumaitsitsi altarvënëjavajumata pebuatsiofrenda pevënëta,' jai, bajara jane xua abeje. Nexata bajarapajivi pepacuene exanae pejumaitscovëya penaneconitsiyaniva Diosojavabelia," pajamë tsabiabinua jivijavabelia. 19 Paneamatabocotajavi, bepaneitatsëcënavanapaevinua panejamatabëëthëtota. Biji rajane beyaiyatanetsi altarvënëjava, bajarapaaltarvënëjavajumata pebuatsiofrenda matatoxenetsia. Bajarapaofrenda ata yaiyatanetsi. Tsipaji altarvënëjavajumata boca. 20 Pajivi jumaitsi: "Cajumaitsitsi altarvënëjava pevënëta," jai, caecuenia yajavavënëjona bajarapaaltarvënëjavajumata pebo-caeofrenda. 21 Pajivi pijinia najumecapanepaeya jumaitsi pejumexaniataenexatsi: "Cajumaitsitsi templobo pevënëta," jai, caecuenia yajavavënëjona bajarapatemplobota peponaponaenë Dioso. 22 Pajivi pijinia najumecapanepaeya jumaitsi pejumexaniataenexatsi: "Cajumaitsitsi athëbëtatsia panacua pevënëta," jai, caecuenia yajavavënëjona Dioso pijatrono. Caecuenia yajavavënëjonanua Dioso, ponë ecabiaba bajarapatronota pitorobabiabinexa pijajivi.

23 '¡Paxamë jivi paneyamaxëitojorobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! Panenacanabijava diez xuabejeyajuvënëjava, caejavayo, parajutabiabame ofrendacuenia Diosojavabelia.

Daxitaviria paneubijavaxi ata, diez xuabejeyajuvënëjava, caejavayo, parajutabiabame ofrendacuenia Diosojavabelia. Bajarapacuenia parajutabiabi atamë, apo pajumecovënëtsimë itsalivaisianë, Dioso papecatonajumecopatsilivaisianë, palivaisianë picani bitso Dioso pacatojitsipa panejumecovënëtsinexa. Bajarapalivaisianë picani pacaitoroba itsamonaevajavelia pexaniacuene panetoexanabiabinexa. Pacaitorobanua picani paneitaxutotsoniataeyabiabinexa itsamonaevajavelia. Pacaitorobanua picani xaniavaetsia panenajamatabëcuenecopatsinexa Diosojavabelia. Bajarapacuenia picani bepaexanavanapame pacopatsinejevamë bajaraxua, ofrendacuenia panerajutabiabijava Diosojavabelia. ²⁴ ¡Paxamë apo payapëtae atamë Dioso pejumelivaisi, jamatabëcuenenavëxaniabiaya pacujarubabiabame itsamonaevajavelia! Palivaisianë Dioso najumecopata panejumecovënëtsinexa, bajarapalivaisianë yajuvënëlivaisixi, saya bevelijamatabëcuenelivaisixi, pacaasaëmë tsavanapae. Palivaisianë picani Dioso bitso pacatojitsipa panejumecovënëtsinexa, caranata panamuxujematame. Nexata panecujarubivi panecujarubicuenia pexanavanapaexae, panecujarubivi ata naneconita Diosojavabelia pacuenia paxamë pananeconitame Diosojavabelia.

²⁵ ¡Paxamë jivi paneyamaxëitojorobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! “Najamatabëcuenebijianaevajavelia,” panejamatabëjaitisabiabixae, panecaxaevajënaevajavelia panecaxaenë, taza ata, naniavelia paquiatabiabame xaniavaetsia panijasalinaicuenia. Tsipaji jamatabëcuenenavëxaniabiaya pajamatabëjumaitsimë tsabiabi: “Itsa caxaevajavelia xaniavaetsia quiatsinejevanë, Diosojavabelia naneconitsipajë,” pajamatabëjamë tsabiabi. Itsiata baitsi jane panejamatabëëthëtota bëpënë panajamatabëxainabiabame pibisiacuene. Panajamatabëxainabiabame itsanë pecobecovë paneyacajërëtsinexa. Panajamatabëxainabiabamenu panexainaenexa ayajava ëpaxamënu. ²⁶ Paxamë pafariseovimë, bepaneitaxutotsëcënaevi panejamatabëëthëtota. Pajivi quiata pecaxaenë, taza yajava, piaxuirajibinexa, copiaya xaniavaetsia quiata pënëvelia. Bajaraxuacujinaevajavelia xaniavaetsia quiata pejumavelia. Bajara pijinia pacuenia paxamë ata copiaya Dioso pacajamatabëcuenequiatsi panejamatabëcuenexuirajibinexa. Nexata bajaraxuacujinaevajavelia pacajamatabëcuenecaëjëpaena paneexanaenexa ëpexaniacuene pacuenia Dioso pacaitoroba.

²⁷ ¡Paxamë saya jivi paneyamaxëitojorobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! Itsajota jivimëthëanë bobena, jivimëthëanëjumavereca itsamonaevajavelia caiquina peniojairata bajarapacuenia pitabëtsinexa. Itsiata baitsi jane bëpënëareca petëpaevimi petsabanaevajavelia, pesi yajava, abeje. Bajaraxua apo jitsipaetsi vajajayatsinexa. Bajara pijinia paxamë ata Dioso patsitajamatabëcuenëitsimë. ²⁸ Itsamonaevajavelia naniavelia itsa pacatane, pacatane bepexaniajamatabëcuenëvimë itajara. Itsiata baitsi jane panejamatabëëthëtota bëpënë panajamatabëxainabiabame jivi paneyamaxëitojorobinexa. Itsajava ata pematatsënë pibisiacuene paneexanaenexa, panajamatabëxainabiabame.

²⁹ ¡Paxamë saya jivi paneyamaxëitojorobivi! ¡Paxamë judíovi panecujarubivi, paxamë ata pijinia pafariseovimë, ayaineconi panatsixainame Diosojavabelia! Bajayata panijasalinaivi Diosojumepaevivimi profetavi beyejeba. Nexata mëthëca. Nexata mapamatacabitaje bajarapapofetavimi pemëthëanëjumavereca bo paexanabiabame itabëtsiaya, jivi itsa tane, panajamatabënapitabiabinexa bajarapapofetavimi. Pamonaevajavelia ata bajayata tãpa, pamonaevajavelia aneconijibia pejinavanapaevimi Dioso pitabarata, pemëthëanëjumavereca aeconoxae mapamatacabitaje itabëtsiaya parubabiabame it-sacuenëjavaxi. ³⁰ Bajarapacuenia itabëtsiaya paneexanaecujinaevajavelia, jivijavabelia pajumaitsimë tsabiabi mapacueniaevajavelia: “Vajasalinaivimi bajayata pibisiacuene exana. Beyaxuababiaba profetavimi. Paxanë bajarapamatacabivi pajinavanapae atanë tsi-

pae, apo payavenonaenē tsipae bajarapamonaemi pebeyabiabijava profetavimi,” pajamē tsabiabi. ³¹ “Vajasalinaivimi beyaxuababiaba profetavimi,” panejaixae, panavajunupaebame papemomoxicuenemē bajayata pamonaemi beyaxuababiaba profetavimi. Bजारapamonaemi papemomoxixaemē, pacuenia bajarapamonaemi jamatabēcueneitsi, bajara paxamē ata pajamatabēcueneitsimē. ³² Paxamē ata papibisi-ajamatabēcuenevixaemē, xanē ata jamatabēpanebeyaxuabame. ¡Panebeyaxuare paneveretsinexa xua panijasalinaivimi taxuxuaba!

³³ ¡Paxamē bitso pibisiacuene paneexanaevi! Pacuenia jomo rēcēpeca itsa tane petajunenajetarucājava isoto, bajara paitsimē. Itsiata apo papanepaemē tsane infiernovecua panijaneconi yabara. ³⁴ Paxamē picani pacatoitorobianatsi Diosojumepaebivi profetavi. Pacatoitorobianatsinua picani bitso Dioso pijacuene peyapētaeyaexanaevitsi. Pacatoitorobianatsinua picani xanē talivaisi papecatsipae-bivinexa. Itsiata baitsi jane bajarapamonaeyajuvēnēvi itsamonae pabeyaxuabapon-aename. Itsamonae cruzajavabelia pacobematabiaxuababiabianame. Itsamonae pajumatitibabeyabiabianame penaneconitsivi panejumaconitabiabimacata judíovi penacaetuatabiabibonējava. Itsamonae pabaraponabiabianame itsa tomaranējavabelia ata panebejiobiaexanaenexa. ³⁵ Bजारapacuenia nexata paxamē ayaineconi panatsixainaename Diosojavabelia. Daxita pamonae aneconijibia pejinavanapaevimi Dioso pitabarata, bajayata panijasalinaivimi beyaxuababiaba. Nexata bajarapaneconimi yajava paxamē pacatsijumajopaena. Dioso pitabarata aneconijibia pejinavanapaevimi, panijasalinaivimi pebeyaxuabaponaejava, taxuxuaba Abelpijinēta. Bजारaxuacujinae icatsia pevajēnaeyabelia beyaxuabapona itsamonae ata, Dioso pitabarata aneconijibia pejinavanapaevimi. Nexata bexējavaberena ata Berequíaspijinē pexēnatomi, Zacaríaspijinē, panijasalinaivi beyaxuaba. Zacaríaspijinēmi panijasalinaivimi beyaxuaba templobopanabota, templobobeje altarvēnējavabeje tuatujēta. ³⁶ Xaniajanē pacuenia pacatsipaebi-jitsiatsi. Daxita pamonaemi Dioso pitabarata aneconijibia pejinavanapaevimi, panijasalinaivimi beyaxuababiaba. Bजारapaneconimi yajava, paxamē aeconoxae panejinavanapaevi, pacatsijumajopaena Dioso papecananeconitsiaexanaenexa, jai Jesús judíovi pecujarubivijavabelia, fariseovijavabelianua.

Pacuenia Jesús najamatabēxainaeya sivanua Jerusalén tomarapijivi yabara pelivaisi (Lc 13.34-35)

³⁷ Jesús najamatabēxainaeya sivanua Jerusalén tomarapijivi. Jumaitsi pesivanuejavata mapacueniaje:

—¡PaJerusalén tomarapijivimē, pabeyabiabame Diosojumepaebivimi profetavi! ¡Ibotonēta ata patseconabiabame bajarapacuenia panebeyaxuababiabinexa Diosojumelivaisi pecaponaevi paxamējavaberena! ¡Pacuenia vacara banacoxicaetuata pecorofetobēxēpanaberena, bajara pijinia pacuenia xanē ata picani bitso jitsipabiabajē patacaetuatsinexa, patacacapanepaenexa picani panijaneconivecua! ¡Itsiata baitsi jane paxamē apo pajejamē cajena! ³⁸ Panejumetaema. Dioso rabaja pacacopata papecaevetabiabijavami. Nexata baja panijatemplobota Dioso apo ponaponae. ³⁹ Xaniajanē pacuenia pacatsipaebijitsiatsi. Paxamē rabaja apo panetaemē tsane matavējēa. Matapania itsa panejumecovēnēsianame Cristonēcuenenē, Dioso taneitorobinētsica, icatsia panetaename. Itsa panesivajamatabējumaitsimēnua tsane: “Dioso, bitso yavenonare maponē najetarucāje, nejamatabēcueneta penajetarucāenē,” itsa panesivajamatabējamē tsane xanē yabara, nexata jane baja icatsia panetaename itsa patsianicajē, jai Jesús mapacueniaje najamatabēxainaeya pesivanuejavata Jerusalén tomarapijivi.

24

Pacuenia Jesús pijajivi tajëvelia tsipaeba itsamatacabi itsanacuapijivi templobo pexu-abijavanexatsica yabara pelivaisi

(Mr 13.1-2; Lc 21.5-6)

¹ Jesús pitsaparena temploboverena. Itsa baja Jesús vecuaponaejitsia templobo, pijajivi imoxorenatsi. Nexata Jesús pijajivi jumaitsi:

—Patajatuxanenë, templobo nataema pemuxuneneta penaeboxanetonë ata, jai.

² Nexata Jesús tajëvelia vajunupaeba itsamatacabi itsanacuapijivi bajarapaboxanetonëmi pepenetsijavanexatsica. Jesús jumaitsi pijajivijavabelia mapacueniaje:

—Xaniajanë pacuenia pacatsipaebijitsiatsi. Daxita raja paboxanetonë pataneme, bajarapaboxanetonëmi itsamatacabi itsanacuapijivi penetsianica irabetsica. Nexata paibotonë catsanaruba mapaboxanetonëtaje, itsaiboto ata pejumavereca apo bocae tsane, jai Jesús tajëvelia pijajivijavabelia.

Pacuenia itsijitsia Jerusalén tomarata, daxitanacuanëjava ata, mapanacua pecopiaru-caevajënaeje yabara pelivaisi

(Mr 13.3-23; Lc 21.7-24; Lc 17.22-24)

³ Jesús eca petsutojumata, patsutojumata olivonaenë apaaxayo. Jesús itsa eca petsutojumata, nexata pijajivi pijaepatojavata imoxoyorenatsi peyanijobinexatsi. Nexata Jesús pijajivi jumaitsi:

—Patajatuxanenë, pajitsipajë patanetsipaebinxamë patayapëtaenexa paepatota copiapatsijitsia xua vajunupaebame. ¿Detsa peneta pitsicuene pataenajë icatsia itsa patsijitsiamëtsica? ¿Detsa peneta pitsicuene pataenajë mapanacua ata itsa vereverecaejitsiaje? jai Jesús pijajivi.

⁴ Nexata Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Xania panayajivitaename. Pëtsa panacopatame itsajivi ata papecaya-maxëitojorobinexa. ⁵ Tsipaji raja peyamaxëitojorobinexa, ayaibitsaëto patsiana bexanë itajara tsane. Bajarapamonae najumetsënëtsiaya jumai tsane: “Xanë raja Cristonë, athëbëvetsica Dioso taneitorobinëtsica jivi tacapanepaenexa,” jai tsane.

Bajarapamonae jivi ayaibitsaëto yamaxëitojorobiana. ⁶ Vajabitsaë pexanaejava imoxoyonacuanëjava, tajënacuanëjava ata, pavënëlivaisitaename. Itsiata pëtsa pajunavame. Bajara peneta itsane mapanacua pevereverecaevajënaeje. Itsiata baitsi jane bepijia bajarapamatacabi mapanacuaje abaxë apo vereverecajuni tsane. ⁷ Mapanacuaje pevereverecaevajënaeje peneta copiaya itsaviriavi nabena itsaviriavijavabelia. Itsanacuanëpijivi pijinia nabena itsanacuanëpijivijavabelia. Ayaijaniboxaneto najetarucaena itsanacuanëjava. Vitane cuene ata najetarucaena itsanacuanëjava. Ira najëabiana ayaicuenia itsanacuanëjava. ⁸ Daxita bajarapacuenia itsa pataename, saya abaxë taxuxuabaponaena piayaicuenia, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

⁹ Icatsia Jesús taxëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Nexata paxamë pacacoponaena nacuaevetsivijavabelia papecabejiobiaex-anaenexa. Nexata pacabeyejebiana. Daxitanacuanëpijivi pacaitoya tsabiabi tsane patajajivixamë. ¹⁰ Nexata bajarapamatacabita jivi ayaibitsaëto navecuacopabiana tanejumecovënëtsijava. Namataenetsia naitoya tsane. Namataenetsia nacanajetsiana nacuaevetsivi pecobeyabelia. ¹¹ Nexata ayaibitsaëto najetarubenaena jivi pitsipaebaponaevinexa saicayalivaisi Dioso pejumelivaisivecua. BeDiosojumelivaisipaebivicuenia tsipaebaponaena. Bajarapamonae yamaxëitojorobiana jivi ayaibitsaëto xaneto. ¹² Jivi pibisiacuene pexanavanapaevi, pevajënaeyabelia ayaibitsaëto xaneto tsaponae tsane. Nexata ayaibitsaëto Dioso pejumecovënëtsivi, namataenetsia

penaasivajava vereverecaponaena. ¹³ Itsiata pajivi ajamatabëcuenesaë tsane Dioso pejumecovënëtsijava petëpaejavabelianexa, bajarapajivi Dioso capanepaenatsi. ¹⁴ Itsamonae daxita nacuanëjjava tsipaebiana jivi peyapëtaenexa imoxoyo baja pevajënae Dioso pijajivi pecapanepaejavanexa. Bajaraxuacujinae jane baja mapanacua vereverecaenaje, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

¹⁵⁻¹⁶ Icatsia Jesús tajëvelia vajunupaeba papiayaicuene itsamatacabi copiapatsijitsia Jerusalén tomarata. Jesús jumaitsi pijajivijavabelia mapacueniaje:

—Diosojumepaebinëmi profeta Danielpijinë piayaicuene tajëvelia pevajunupaebilivaisi bajayata yaquina. Xua panijatamaranëmi vereverecaeyaexanaejitsiatsi, bajaraxua pelivaisi yaquina. (Pajivi lebianana mapalivaisije, yapëtaena papiayaicuene vajunupaeba mapalivaisitaje.) Nexata paxamë itsa pataename bajarapapiayaicuene penucaejava templobota, nexata Judea nacuata pejinavanapaevi pëtsa nubena. Naxanitsiayo rëcëpecaena petsutonëjavabelia. ¹⁷ Pajivi pijabojumata athëbëyo ecaya, itsa vënëlivaisitaena bajarapapiayaicuene penucaejava templobota, bajarapajivi perunaecujinaetsica, bepijia najetabajiraviana. Pëtsa joneya pijaboyalia pejutsinexa pecobecovë. ¹⁸ Pajivi pijinia nacuenebaponapona pijapabita, itsa vënëlivaisitaena bajarapiayaicuene penucaejava templobota, bepijia najetabajiraviana. Pëtsa naviatana pijaboyabelia pejutsinexa penaxatabijava. ¹⁹ ¡Papetiriavi penacueto yacotajinavanapa, bitso bejiobi tsane bajarapamatacabi! ¡Bitso nabejobitsiaya jinavanapaena! ¡Papetiriavi ata mitoapaenacuetoxi isajinavanapa, bitso bejiobi tsane bajarapamatacabi! ²⁰ Bajaraxuata tajëvelia Diosojavabelia pavajëcare piayapëbejematacabita papecatocopiapatsiyaniva bajarapapiayaicuene. Nexata pamatacabi parëcëpecaename, pexaniamatacabi Dioso pacatocopatsiana bitso nabejobitsiaya paneponaeyaniva. Pavajëcarenuva penacueraevetsimatacabita bajarapapiayaicuene papecatocopiapatsiyaniva, nexata papecatoayapëbejeyaniva. ²¹ Tsipaji raja bajarapamatacabi bitso jivi bejiobi tsane. Pabejobicuene abaxë jivi caeto ata apo tae Dioso nacua pexanaecujinae, bajarapabejobicuene taena. Bajaraxuacujinae icatsia itsamonae bejiobiaexanae atatsi tsane, itsiata bajarapacuenia bitso apo bejiobiaexanaetsi tsane. ²² Dioso epatua yatuucutsiana jivi bitso nabejobitsiaya pejinavanapaematacabianëminexa bitso jivi nabejobitsia pejinavanapaeyaniva. Dioso epatua itsa apo yatuucutsi tsipae bitso jivi nabejobitsiaya pejinavanapaematacabianëminexa, caejivi ata apo asaë tsipae. Itsiata baitsi jane Dioso piasivaxae pijajivi, pitapetsivi, Dioso epatua yatuucutsiana bitso jivi nabejobitsiaya pejinavanapaematacabianëminexa, jai Jesús pijajivijavabelia tajëvelia pevajunupaebijavata papiayaicuene itsamatacabi copiapatsijitsia mapanacuataje.

²³ Icatsia Jesús tajëvelia navajunupaeba icatsia pepatsijavanexatsica. Jesús jumaitsi pijajivijavabelia mapacueniaje:

—Nexata itsajivi yamaxëitojorobiaya itsa pacajumaitsi tsane: “Pataema. Mara Cristo nucaje,” itsa pacajai tsane, pëtsa pajumecovënëtame. Itsa pacajumaitsinua tsane: “Bajarajota nuca Cristo,” itsa pacajai tsane, pëtsa pajumecovënëtame. ²⁴ Itsamonae jumai tsane: “Xanë raja Cristonë,” jai tsane. Itsiata jemajai tsane. Itsamonae jumai tsane: “Diosojumepaebinëne raja, profetanëne,” jai tsane. Itsiata jemajai tsane. Bajarapamonae itajara exanaena pinijicuene pexanaejavanë peyamaxëitojorobinexa saya jivi. Nexata bajarapacuenia itsamonae yamaxëitojorobaponaenatsi. Itsiata pamonaepacuene Dioso pijajivi, Dioso pitapetsivitsi, bajarapamonae apo yamaxëitojorobitsanetsi. ²⁵ Tajëvelia rabaja maje pacatsipaebatsije. ²⁶ Nexata itsamonae itsa pacajumai tsane: “Cristo raja ponapona petusato nacuatatia. Naxanitsia. Panataename,” itsa pacajai tsane, pëtsa paponaremelia. Itsa pacajumaitsinua tsane: “Cristo raja ponapona mapaënëyatuucutsibotaje. Naxanitsia. Panataename,” itsa pacajai tsane, pëtsa pajumecovënëtame. ²⁷ Payapëtaneme rabaja mapacueneje. Yamaxë itsa nivejai tsajuni

athëbëvetsica, caecuenia jivi bacotiatane daxitajava. Bajara pijinia peneta pacuenia daxitanacuanëpijivi caecuenia netaena pamatacabi patsianicajë xanë, Daxitajivi Pematapijinënë. ²⁸ Payapëtaneme rabaja mapacuene ataje. Quequeremonae bepijia bayapëtanë itsajota petuxutsaëbinë boca. Nexata bajarajota bepijia banacaetuana. Bajara pijinia pacuenia daxitanacuanëpijivi tajajivi bepijia yapëtaena tapatsijavatsica. Nexata bepijia nacaetuanaena xanëjavaberena, jai Jesús pijajivijavabelia tajëvelia penavajunupaëbijavata icatsia pepatsijavanexatsica.

Pacuenia Jesús tajëvelia navajunupaëba icatsia pepatsijavanexatsica petëpacujinae yabara pelivaisi

(Mr 13.24-37; Lc 21.25-33; 17.26-30, 34-36)

²⁹ Jesús tajëvelia navajunupaëba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Xanë tapatsivajënaetsica jivi taena pecujunavicuene. Jivi nabejobitsiaya jinavanapaena. Nexata jivi nabejobitsiaya pejinavanapaematacabicujinae, matacabipijijuameto aitaquiri tsane. Meravipijijuameto ata aitaquiri tsane. Tulupu ata othopaenica irabetsica. Daxitacuene, xua rubena athëbëtatsia, najëabiana. Xaniavaetsia apo rubenae tsane. ³⁰ Bajaraxuacujinae jane baja xanë athëbëvetsica najetarucaenajë, Daxitajivi Pematapijinënë. Nexata daxitaviriavi mapanacuapijivi natsinuena pecajunavi pijaneconi yabara. Nexata bajarapaepatota, xanë, Daxitajivi Pematapijinënë, jivi netaena athëbëvetsica itarërëbota tanajetarucaejava. Patsianicajë daxitacuene taevetsinexa. Tanivenivenaëcotia yajavapatsianicajë. ³¹ Bajaraxuacujinae trompeta itsa najumetsiana ayajumeta, itorobianajë tajaängelevi. Angelevi daxitanacuanëjavaverena xanëjavaberena netocaetuatsiana tajajivi, pamonaë Dioso pitapetsivitsi, jai Jesús pijajivijavabelia tajëvelia penavajunupaëbijavata itsamatacabi icatsia pepatsijavanexatsica.

³² Jesús icatsia tajëvelia vajunupaëba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Pacanaëjere pacuenia itsi higueranae. Itsa maxëranajuva, nexata pejanabaxu pitsapa. Nexata bajarapacuenia payapëtaneme vai baja imoxoyo pevajënae pejonenexa. ³³ Bajara pijinia pacuenia peneta itsa pataename pecopiapatsijava xua tajëvelia vajunupaëbajë, nexata payapëtaename imoxoyo baja tavajënae tsane tapatsijavanexatsica. ³⁴ Xaniajanë pacuenia pacatsipaëbijitsiatsi. Pitsijamatabëcuenevi aeconoxae mapamatacabitaje jinavanapa, bajarapitsijamatabëcuenevi abaxë, bexëjavabelia ata, apo vereverecae tsane. Matapania xua tajëvelia vajunupaëbajë itsa baja copiapatsiana, bajarapamonae jane baja vereverecaena. ³⁵ “Itaboxo, ira yajava, tsitecaena daxitamatacabijavabelianexa,” jamatabëjai ata tsane itsamonae, itsiata jamatabëcuenenavëxaniabiana. Tsipaji jemata itaboxo, ira yajava, vereverecaena. Nexata palivaisi pacatsipaëbatsi, apo najumetsënëtsinë tsane. Nexata xua tajëvelia vajunupaëbajë, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia.

³⁶ Icatsia Jesús jumaitsi pijajivijavabelia:

—Itsajivi ata apo yapëtae pamatacabita, paepatota ata, copiapatsijitsia daxita xua tajëvelia vajunupaëbajë. Athëbëpijivi ata, angelevi, apo yapëtae. Xanë, Dioso pexënato atanë, apo yapëtaenë. Caenë taxa Dioso yapëtanë, jai Jesús pijajivijavabelia tajëvelia pevajunupaëbijavata pacuenia itsamatacabi itsijitsia mapanacuataje.

³⁷ Jesús icatsia tajëvelia navajunupaëba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Pacuenia bajayata jemata itsi pamatacabi Noëpijinë ponapona, bajara icatsia jemata itsane pamatacabi xanë, Daxitajivi Pematapijinënë, patsianicajë. ³⁸ Pamatacabi

Noépijiné ponapona ira pebubutsivajënaeya, jivi picani xaniavaetsia jamatejema pexaejava xaevanapa. Apaevanapanua. Nacojiobapona itsamonae. Itsamonae pexënatoyonë pebijavabelia canajetapona petonacojiobinexatsi. Bajarapamonae jamatejema saya jinavanapa. Nexata bajarapamatacabi Noépijiné ëpijamonae pinijibarcoxanetojavabelia barëjunua. ³⁹ Daxitajivi abaxë itsiata apo yapëtae paepatota tocopiapatsijitsiatsi peyabubutsijavanexatsi. Nexata itsajivi ata yapëtaenejeva jemata ayaiemaxaneto itsa jopa ira pebubutsinexa, yapëtane jane baja. Bajarapamatacabi bubuna daxitajivi. Bajara pijinia pacuenia itsajivi ata yapëtaenejeva xanë, Daxitajivi Pematapijinënë, tapatsijavanexatsica, jemata patsianicajë. ⁴⁰ Nexata bajarapamatacabita anijanëbeje najuanacuenebanucaenabeje pabita. Itsanë tanejumecovënëtsinë tsane. Itsanë apo tanejumecovënëtsinë tsane. Nexata tanejumecovënëtsinë pitsianatsi ángelnë. Apo tanejumecovënëtsinë copatanutsianatsi. ⁴¹ Bajara pijinia itsane petirivabeje ata. Najacuabanucaenabeje caejavata. Nexata tanejumecovënëtsiva pitsianatsi ángelnë. Apo tanejumecovënëtsiva copatanutsianatsi.

⁴² Nexata nejamatabëcueneevetsiaya panecopiaevetavanapaename. Tsipaji raja apo panevajënaeyapëtaemë tsane paepatota xanë panijatuxanenënë icatsia patsijitsianëtsica. ⁴³ Pacanaëjère mapacueneje. Bo pexainaenë itsa yapëtaejitsipa paepatota meravi pijaboyaberena patsijitsia pecobcovë petonacobetoxotsinënexatsi, nexata naëcotsiaya vajënaeevetsipa. Apo copatsi tsipae pijaboyaberena petojoneyanivatsi penacobetoxotsinënexa. ⁴⁴ Bajara pijinia pacuenia paxamë ata najamatabëcuenexaniavaetsiaya panecopiaevetavanapaename. Tsipaji xanë, Daxitajivi Pematapijinënë, paepatota apo panejamatabënajinaemë tapatsijavanexatsica, jemata icatsia patsianicajë, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

*Pacuenia Jesús pijajivijavabelia livaisi tsipaeba petuxanenë pijajivitonëbeje pelivaisicuenia yabara pelivaisi
(Lc 12.41-48)*

⁴⁵ Jesús livaisi tsipaeba pijajivijavabelia petuxanenë pijajivitonëbeje pelivaisicuenia. Bajarapacuenia pijajivijavabelia tsipaeba copiaevetsiaya petonacuenebavanapaenexatsi icatsia pepatsimatacabitsicajavabelianexa. Jesús jumaitsi mapacueniaje:

—Petuxanenë pijajivitonë, ponë xaniavaetsia pijatuxanenë pecovëta tonacuenebaponaponaena, majamatabëcueneitsi tsaneje. Bajaraponë itsajamatabëcuene xainaenejeva, copiaevetaponaponaena pijatuxanenë pepatsijavabelianexa. Bajaraponë pijatuxanenë pijajivi pecovëta tovetaponaponaena piabatabiabinexa pexaejava caematacabi canacujitsia pacuenia pijatuxanenë itorobatsi. ⁴⁶ Bajaraponë bitso barëya tsane pamatacabi pijatuxanenë patsiana, xaniavaetsia pijajivi petoetaponaponaexae pecovëta. ⁴⁷ Xaniajanë pacuenia pacatsipaebijitsiatsi. Ponë xaniavaetsia tonacuenebiana pijatuxanenë pecovëta, bajaraponë evetsiaexanaenatsi daxita xua xaina pijatuxanenë. ⁴⁸ Itsa bajaraponë piagamatabëcuenebejenë tsipae, nexata pijatuxanenë pecovëta jamatabëjumaitsi tsipae: “Tajatuxanenë ajibi tsarucae tsane bajayajebi,” jamatabëjai tsipae. ⁴⁹ Nexata toconibabeyabiabijitsipa pijatuxanenë pijajivi. Ayaijava xaeyabiabijitsipa. Naapaeyabiabijitsipanua piaitajibivita. ⁵⁰ Nexata itsajota apo jamatabënajinae tsipae pijatuxanenë pepatsijavanexa, patsipa pijatuxanenë. ⁵¹ Nexata bajaraponë ayaicuenia naneconitsiaexanaejitsipatsi pijatuxanenë. Pacuenia jivi peyamaxëitojorobabiabivi, Dioso ayaicuenia naneconitsiaexanaenatsi, bajarapacuenia pijatuxanenë naneconitsiaexanaejitsipatsi. Nexata natsinuejitsipa. Navonosinijitsipanua bitso penavixaetaexae, jai Jesús pijajivijavabelia petuxanenë pijajivitonëbeje pelivaisicuenia petsipaebijavata.

Bजारपacuena Jesús tsipaeba pijajivi xaniavaetsia pecopiaevetavanapaenexatsi Jesús icatsia pepatsimatacabitsicajavabelianexa.

25

Pacuenia Jesús pijajivi livaisi tsipaeba diez papejanavabeje pijalámparabëxi pecaponaevi pelivaisicuenia yabara pelivaisi

¹ Jesús icatsia jumaitsi pijajivijavabelia:

—Pamatacabi icatsia patsianicajë, tajajivi peyapëtaexae tapatsijavanexatsica, jamatabëcueneaitavaya necopiaevetavanapaena. Itsamonae tajajivi yapëtae ata tapatsijavanexatsica, itsiata jamatabëcueneaitavaya apo necopiaevetavanapae tsane. Bजारपacuene yabara pacatsipaebianatsi mapalivaisije. Diez papejanavabeje yapëtane itsava pejanava penacasabijavanexa. Nexata diez papejanavabeje pijalámparabëxi, caeva canacujitsia, xaniavaeta penaponaenexa. Nexata capona pijalámparabëxi pabojavabelia eca penacasabivanexa. Bजारajota vajënaeevetsijitsia pepatsijava penacasabinënexa. Nexata itsa ponabeje penacasabijivibejenexa, bajarapapejanavi penaponaenexa bajarapajivibeje pepëta penacasabifiestajavabelia. ²⁻⁴ Bजारapamonaeyajuvënëvi, cinco povabeje, yapëtae ata picani petsicaponaejavanexa aceiteranë pijalámparabëxinexa, itsiata apo tsicaponae itsa tovereverecatsi aceitera peepatsinexa icatsia pijalámparabëxijavabelia. Cinco pijinia povabeje peyapëtaexae petsicaponaejavanexa aceiteranë pijalámparabëxinexa, tsicapona. ⁵ Nexata bajarapapetiriavi itayotena pijalámparabëxita. Bajayajebi picani vajënaeevetena penacasabinënexa pepatsijava. Nexata pijalámparabëxita paaceiteranë capona, tovereverecaponatsi baja. Tsipaji penacasabinënexa abaxë cuenenajemata pepatsinexa. Nexata baja daxita bajarapapetiriavi belia itamajitsipana. Nexata baja majita. ⁶ Bजारaxuacujinae ayaimeravi tuatujëta jumetane pevavajijava. “¡Najetaruca rajane baja penacasabinënexa! ¡Papitsaparemena jane baja panecopiapitsinexa!” pejaijava jumetane. ⁷ Nexata daxita bajarapapetiriavi nonobapuna pecopiapitsinexa jane baja. Papetiriavi aceiteranë tsicapona, epaca pijalámparabëxijavabelia. Caeva canacujitsia pijalámparabëxi ayaicotia exana. ⁸ Nexata papetiriavi apo tsicaponae aceiteranë, jumaitsi aceiteranë petsicaponaevijavabelia mapacueniaje: “Panenarajure tsiquirijavaxi aceiteraxi. Tsipaji patajalámparabëxi panetoitacaëcaënazona,” jai bajarapamona. ⁹ Itsiata aceiteranë petsicaponaevi jumaitsi: “Jume. Apo caëjëpae. Paxanë ata meta apo panetocaëjëpae tsipae. Paponaremelia. Panijacuata pacomuare itsajotalia canajetabiaba aceiteranë,” jai aceiteranë petsicaponaevi pijalámparabëxinexa. ¹⁰ Nexata papetiriavi aceiteranë apo tsicaponae pijalámparabëxinexa, ponalia aceiteranë pecomuacaenexa. Nexata pecovëta penacasabinënexa patanajetaruca. Nexata papetiriavi aceiteranë tsicapona pijalámparabëxinexa, nazona baja penacasabifiestanexa pexanaebojavabelia. Pejonecujinaelia baupaxatata. ¹¹ Bजारaxuacujinae aceiteranë pijalámparabëxi petsicomuacaevi pata. Nexata bajarapapetiriavi jumaitsi penacasabinënexajavabelia: “¡Panetobaupare! ¡Panetobaupare! jai tsanubenae bojumavelia. ¹² Nexata penacasabinënexa jumaitsi: “Xaniajanë pacuenia pacatsipaebijitsiatsi. Apo pacayapëtaetsi cajena paxamë,” jai bajarapapetiriavijavabelia, jai Jesús mapalivaisije pijajivijavabelia.

¹³ Jesús icatsia jumaitsi pijajivijavabelia:

—Pacuenia cinco povabeje peyapëtaexae, aceiteranë tsicapona pijalámparabëxinexa, bajara pijinia pacuenia paxamë ata paneyapëtaexae, jamatabëcueneaitavaya panecopi-aevetavanapaename. Tsipaji apo payapëtaemë tsane pamatacabita, paepatota ata, xanë, Daxitajivi Pematapijinënë, icatsia patsijitsianëtsica, jai Jesús pijajivijavabelia.

*Pacuenia Jesús pijajivi livaisi tsipaeba pijapalata pijajivi pevetsiaexanaenë peliv-
aisicuenia yabara pelivaisi*

(Lc 19.11-27)

¹⁴ Jesús icatsia jumaitsi pijajivijavabelia:

—Tacovëta patajajivimë, itsamonae ata, pamonaë tajajivi, panetonacuenebianame. Nexata pamatacabí icatsia patsianicajë, pacuenia pacasivanajamatabëxainaejitsiatsi, aeconoxae pacatsipaebianatsi. Pacatsipaebianatsi comparacióncuenia mapacueniaje. Petuxanenë itsa ponaejitsia tajënacuyabelia, junata pijajivi. Evetsiaexana pijapalata petoevetsinexatsi pecovëta.

¹⁵ Caenë canacujitsia evetsiaexanapona petocanacuenebinexatsi pecovëta pacuenia bajarapamonae caëjëpatsi. Nexata petuxanenë pijinia evetsiaexana cinco mil ponëbeje pepovi, bitso penamatamotsivi. Itsanë pijinia evetsiaexana dos mil ponëbeje. Itsanë pijinia evetsiaexana mil ponëbeje. Bajaraxuacujinae petuxanenë pona tajënacuyabelia.

¹⁶ Nexata jane baja ponë evetsiaexana cinco mil ponëbeje, canacueneba jane baja pecovëta bajarapapalata. Nexata pematatsënëa topitsapatsi icatsia itsacinco mil ponëbeje. Nexata baja daxitata diez mil ponëbeje caejavata. ¹⁷ Bajara pijinia pacuenia itsanë canacueneba dos mil ponëbeje. Nexata pematatsënëa topitsapatsi icatsia itsados mil ponëbeje. ¹⁸ Itsiata baitsi jane ponë toeveta mil ponëbeje, pona pematayatsinexa pijatuxanenë pijapalata. Matayatsia mëthëteta irata.

¹⁹ Bexëa nexata najetaruca petuxanenë. Junata pijajivi peyapëtaenexa pacuenia toevetatsi pecovëta pijapalata. ²⁰ Copiaya pata ponë cinco mil ponëbeje evetsiaexanatsi. Nexata bajaraponë tocanaviata pijatuxanenëjavabelia diez mil ponëbeje. Jumaitsi bajaraponë pijatuxanenëjavabelia: “Nevetsiaexaname cinco mil ponëbeje tacatoevetsinexa. Bajara macatocanaviatatsi bajarapapalataje. Catocanaviatatsi yajava icatsia itsacinco mil ponëbeje, xua nacanabajë bajarapapalatata,” jai bajaraponë pijatuxanenëjavabelia. ²¹ Nexata petuxanenë jumaitsi: “Xanepana rabaja. Xaniavaetsia netoebetaponaponame. Itsajamatabëcuene apo najamatabëxainaemë. Tsiquirijavayo ata xaniavaetsia netoebetame. Nexata aeconoxae caevetsiaexanaenatsi pematatsënëa ayaijava. Jonemena xanëjavaberena barëyaya neponaponaenexa xanëjavata,” jai petuxanenë pijajivitonëjavabelia. ²² Bajaraxuacujinae pata ponë dos mil ponëbeje evetsiaexanatsi. Nexata bajaraponë jumaitsi pijatuxanenëjavabelia: “Nevetsiaexaname dos mil ponëbeje tacatoevetsinexa. Bajara macatocanaviatatsi bajarapapalataje. Cato-canaviatatsi yajava icatsia itsados mil ponëbeje, xua nacanabajë bajarapapalatata,” jai bajaraponë pijatuxanenëjavabelia. ²³ Nexata petuxanenë jumaitsi: “Xanepana rabaja. Xaniavaetsia netoebetaponaponame. Itsajamatabëcuene apo najamatabëxainaemë. Tsiquirijavayo ata xaniavaetsia netoebetame. Nexata aeconoxae caevetsiaexanaenatsi pematatsënëa ayaijava. Jonemena xanëjavaberena barëyaya neponaponaenexa xanëjavata,” jai petuxanenë pijajivitonëjavabelia. ²⁴ Icatsia pata ponë evetsiaexana mil ponëbeje. Bajaraponë jumaitsi pijatuxanenëjavabelia: “Cacueneyapëtanetsi. Xamë nijajivi apo itaxutobejiobiataeyabiabimë. Xamë nijajivi ubiaexanabiabame neubi-aexanabiabijava nexata bajarapamonae pejamatabëcueneta ayaijava palata pecatopit-sapaenexa. Bajara pijinia pacuenia xanë ata nevecuapitsipame xua nacanabijitsipajë nijapalatata itsa canacuenebijitsipajë. ²⁵ Bajaraxuata junavajë. Ponajë irata tamatayatsiamëthëtetsinexa nijapalata. Bajara manijapalata catocanaviatatsije,” jai bajaraponë pijatuxanenëjavabelia. ²⁶ Nexata petuxanenë jumaitsi: “Tajajivitonë atamë, itsiata ajamatabëcuenebejemë. Afaetabimënu. Xamë baja cajena yapëtaneme tajajivi taubiaexanabiabijava, taubiaexanabiabijava nexata bajarapamonae pejamatabëcueneta ayaijava palata tanetopitsapaenexa. ²⁷ Bajaraxuata xanepanaejitsipa itsa netocanacuenebiaexanaejitsipame tajapalata banco pevetsivijavabelia. Nexata aeconoxae banco pevetsivi

tajapalata pecacovaetsijamatabëcuene netocanaviatsipa tajapalata pematatsënëa,” jai petuxanenë pijajivitonëjavabelia.

²⁸ Nexata petuxanenë jumaitsi bajarajota penubenaevijavabelia: “Pavecuapire bajarapamil ponëbeje. Nexata juya parajure ponëjavabelia xaina diez mil ponëbeje. Tsipaji bajaraponë cajëpatsi tanetoevetsinexa pematatsënëa. ²⁹ Tsipaji pajivi ayaijava baja xaina, pematatsënëa icatsia itsajava rajutsianatsi. Nexata xainaena ayaijava. Itsiata pajivi tsiquirijavayo xaina, bajarapajivi pijatsiquirijavayomi vecuapitsianatsi. ³⁰ Maponë tajajivitonëje, itsacuenejavayonexa ata, apo netoxanepanae. Paxuabaremelia pitaquirijavabelia. Bajarajota natsinuena. Navonosiniananua bitso penavixaetaexae,” jai petuxanenë, jai Jesús comparacióncuena pijajivijavabelia.

Bajarapacuenia Jesús jumaitsi pamonaе pijaneconi pexainaеvi Jesús penaneconitsiaexanaenexa pamatacabi icatsia patsianica.

Pacuenia Dioso naneconitsiaexanaena pijaneconi pexainaеvi yabara pelivaisi

³¹ Jesús tajëvelia navajunupaeba pacuenia itsamatacabi exanaejitsia mapanacuataje. Jesús jumaitsi pijajivijavabelia mapacueniaje:

—Xanë, Daxitajivi Pematapijinë, icatsia itsa najetarucaenajë daxitanacua taevetsinexa, ángelevi nematatoyoronaeya yajavanajetarucaenajë. Nexata ecaenajë tajapenivenivenaetronovënëjavata. ³²⁻³³ Nexata daxitanacuanëpijivi caetuatsianatsi taitabarata. Tsataponaenajë bajarapamonaе. Oveja pevetsinë ovejavecua chivo saicaya tsatapona. Nexata oveja pevetsinë petsavenonenia chivo nubenaeyaexana. Pecujuanenia pijinia oveja nubenaeyaexana. Bajara pijinia pacuenia xanë tsataponaenajë Dioso apo pejumecovënëtsivi, Dioso pejumecovënëtsivivecua. Dioso apo pejumecovënëtsivi tatsavenonenia nubenaeyaexanaenajë. Dioso pijinia pejumecovënëtsivi tacujuanenia nubenaeyaexanaenajë. ³⁴ Nexata jumaitsinë tsane tacujuanenia penubenaevijavabelia, Dioso pejumecovënëtsivi: “Naxanitsia. Paxamë taxa papecaitaxutotsoniataеvi. Payajavajinavanapaename taxa pijanacuatatsia, itsajotatsia pacatoxaniavaeta tajëvelia. Dioso pacatoxaniavaeta nacua pexanaejavaveliacujinae. ³⁵ Itsa tajani, paxamë taxaejava panerajutame. Itsa mera jitsipajë, panerajutame mera. Itsanacuaverena itsa patajë, pancopiapitame xaniavaetsia. ³⁶ Itsa ajibi bitso tanaxatatsijava, panerajutame tanaxatatsijavanexa. Itsa avitanenë, papatame patanevetsinexamë. Itsa neeta penaneconitsivi pejebabiabibota, papatame patanetaenexamë,” janë tsane tacujuanenia penubenaevijavabelia. ³⁷ Nexata bajarapamonaе nejumai tsane: “Tajatuxanenë, ¿detsa pacujinae niajanijavata patajacarajutsi nexaejava?” nejai tsane. ¿Detsa pacujinae mera nejitsipaejavata patajacarajutsi mera? nejai tsane. ³⁸ Itsa jume, nejumai tsane: “¿Detsa pacujinae itsanacuaverena nepatsinë patajacacopiapitsi xaniavaetsia?” nejai tsane. Itsa jume, nejumai tsane: “¿Detsa pacujinae piajibijavata bitso nenaxatatsijava patajacarajutsi nenaxatatsijavanexa?” nejai tsane. ³⁹ Itsa jume, nejumai tsane: “¿Detsa pacujinae niavitanejavata patajaponae patacaevetsinexa?” nejai tsane. Itsa jume, nejumai tsane: “¿Detsa pacujinae pecaetsijavata penaneconitsivi pejebabiabibota patajaponae patacataenexa?” nejai tsane. ⁴⁰ Nexata xanë jumaitsinë tsane bajarapamonaеjavabelia: “Xaniajanë pacuenia pacatsipaebijitsiatsi. Daxita xua patoexaname paneyavenonaenexa tajajiviyajuvënëjivi, beveliajamatabëcuenevi petaevitsijavabelia, bajaraxua xanë taniji xanëjavaberena bepatanetoexanaejavamë,” janë tsane.

⁴¹ Nexata tatsavenonenia penubenaеvi, Dioso apo pejumecovënëtsivijavabelia, jumaitsinë tsane: “Panevecuanatsare panijaneconi paneyajavajinavanapaеvi. Paponaremelia apo peverevereaeisotojavabelia. Bajarapaisoto Dioso tajëvelia toxaniavaeta dovathinexa, dovathi pijajivinexa ata. ⁴² Xanë itsa tajani, paxamë apo panerajutsimë taxaejava. Itsa mera jitsipajë, apo panerajutsimë mera. ⁴³ Itsanacuaverena

itsa patajē, apo panecopiapitsimē xaniavaetsia. Itsa ajibi bitso tanaxatatsijava, apo panerajutsimē tanaxatatsijavanexa. Itsa avitanenē, apo papatsimē patanevetsinexamē. Itsa neeta penaneconitsivi pejebabiabibota, apo papatsimē patanetaenexamē,” janē tsane tatsavenonenia penubenaevijavabelia. ⁴⁴Nexata bajarapamonae pijaneconi peyajavajinavanapaevi nejumai tsane: “Tajatuxanenē, ¿detsa pacujinae niajanijavata apo pacarajutsitsi nexaejava?” nejai tsane. Itsa jume, nejumai tsane: “¿Detsa pacujinae mera nejitsipaejavata mera apo pacarajutsitsi?” nejai tsane. Itsa jume, nejumai tsane: “¿Detsa pacujinae itsanacuaverena nepatsinē, apo pacacopiapitsitsi xaniavaetsia?” nejai tsane. Itsa jume, nejumai tsane: “¿Detsa pacujinae bitso pecatoajibijavata nenaxatatsijava, apo pacarajutsitsi nenaxatatsijavanexa?” nejai tsane. Itsa jume, nejumai tsane: “¿Detsa pacujinae niavitanejavata, apo papon-aenē patacaevetsinexa?” nejai tsane. Itsa jume, nejumai tsane: “¿Detsa pacujinae penaneconitsivi pejebabiabibota pecaetsijavata, apo papon-aenē patacataenexa?” nejai tsane bajarapamonae. ⁴⁵Nexata xanē jumaitsinē tsane bajarapamonaejavabelia: “Xaniajanē pacuenia pacatsipaebijitsiatsi. Bajarapacuenia itsa apo patoex-anaemē paneyavenonaenexa tajajiviyajuvēnējivijavabelia, nexata bajaraxua xanē taniji xanējavaberena apo patanetoexanaejavamē,” janē tsane pijaneconi peyajavajinavana-paevijavabelia. ⁴⁶Bajaraxuacujinae bajarapamonae ponaena penaneconitsiajinavana-paenexa daxitamatacabijavabelianexa. Pamonae Dioso pejumecovēnētsivi, bajarapamonae Dioso rajutsianatsi matacabi apo peverevereaejava, jai Jesús pijajivijavabelia tajēvelia penavajunupaebijavata itsamatacabi penaneconitsiaexanaejavanexa pijaneconi pexainaevi, pamatacabi icatsia patsianica.

26

Pacuenia picani Jesús pijavajabitsaē jamatabēvaetabatsi yabara pelivaisi (Mr 14.1-2; Lc 22.1-2; Jn 11.45-53)

¹ Itsa baja Jesús najumevereta pijajivijavabelia livaisi petsipaebijava, Jesús icatsia tajēvelia navajunupaeba itsamonae cruzajavabelia pecobematabiabarutsijavanexatsi. Jesús jumaitsi pijajivijavabelia mapacueniaje:

² —Payapētaneme rabaja anijamatacabibeje pesajinaejava pejonenexa baja pas-cuavēnēfiesta. Nexata xanē, Daxitajivi Pematapijinēnē, necanajetsiana itsamonae pecobeyabelia tanecobematabiabarutsinexa cruzajavabelia, jai Jesús pijajivijavabelia tajēvelia penavajunupaebijavata cruzajavabelia pecobematabiabarutsijavanexatsi.

³ Nexata bajarapaepatota nacaetuata sacerdotevi penamatacaitorobivi. Nacaetuata judíovi pecujarubivinu. Nacaetuata judíovi pijaancianovinua. Daxita bajarapamonae nacaetuata Caifásvēnēnē pijaboxanetota. Bajaraponē Caifás, sacerdotevi pepo penamatacaitorobinē. ⁴ Bajarajota daxita bajarapamonae najumejaita. Penajumetsēnēsilivaisita picani Jesús jamatabēvaetabatsi pebeyaxuabinexatsi. ⁵ Itsiata bajarapamonae najumaitsi:

—Fiestajavata meta abaxē apo vaetabi tsanetsi jivi vajanacaitsacueniabiyana, najai daxita bajarapamonae.

Pacuenia Jesús petiriva tsimataepanatsi petuxujuviaceitera yabara pelivaisi (Mr 14.3-9; Jn 12.1-8)

⁶ Jesús ponapona Betania tomarata, Simón pijabota. Simón bajayajebi bitso peper-abētsabanaenēmi. ⁷ Nexata Jesús petiriva cobenaimoxoyorenatsi petuxujuviaceitera, alabastrobotellabēta pejeaceitera. Bajarapora bitso penamatamotsira. Nexata Jesús penabanecaejavata mesata, bajarapova tsimataepanaicatsi bajarapaaceitera. ⁸ Nexata Jesús pijajivi itsa taeyena Jesús petsimataepanaejavatsitsica bajarapaaceitera, Jesús pijajivi jamatabēcueneanaepanareca. Nexata epamonae najumai tsenae:

—¿Detsa xuajitsia saya xuaba bajarapacuenia maporaje? ⁹ Canajetsipa rajane. Nexata matamopitsipa ayaimatamo. Bajarapapalata rajutsipa bepejiobivi bajarapacuenia peyavenonaenexa, najai tsenae Jesús pijajivi.

¹⁰ Nexata Jesús jumetane bajarapacuenia pijajivi pejumaitsijava. Nexata Jesús jumaiti pijajivijavabelia:

—¿Detsa xuajitsia bajarapacuenia pajumaitsimë bajarapova pexanaejava yabara? Mara povaje pexaniacuene nexanaje. ¹¹ Daxitamatacabi raja bepejiobivi jinavanapa itsaxuayo pajinavanapame. Itsiata baitsi jane xanë daxitamatacabi apo ponapon-aenë tsane paxamëjavata. ¹² Itsamonae petëpaejivi batsiperabëepana petuxujuviaceitera peperabëxaniavaetsinexa pemëthëtsivajënae. Bajara pijinia pacuenia mapovaje netsimataepana petuxujuviaceitera, abaxë apo tëpae atanë. Nexata baja bajarapova neperabëxaniavaeta itsamonae tanemëthëtsivajënae. ¹³ Xaniajanë pacuenia pacatsipae-bijitsiatsi. Daxitanacuanëjava tajajivi itsa paebanajetarubenaena pexanialivaisi jivi tacapanepaelivaisinexa, vajunupaebabiabiananua pacuenia exana xanëjavaberena mapapetirivaje, jai Jesús pijajivijavabelia tajëvelia penavajunupaebijavata pebeyaxuabijavanexatsi.

Pacuenia Judas Jesús yajumejailia pijavajabitsaë pecobeyabelia pecanajetsinexa yabara pelivaisi

(Mr 14.10-11; Lc 22.3-6)

¹⁴ Jesús pijajivi, doce ponëbejeyajuvënënë, pevënë Judas Iscariote. Nexata Judas pona sacerdotevi penamatacaitorobivijavabelia. Jesús jane baja yajumejailiatsi pecanajetsinexatsi. ¹⁵ Nexata Judas jumaiti sacerdotevi penamatacaitorobivijavabelia:

—¿Detsa pacuenia panerajutsipame panecobeyabelia itsa canajetsipajë Jesús? jai Judas.

Nexata bajarapamonae Judas matamotatsi treinta ponëbeje pepo palatanëanë, bitso penamatamotsinëanë. ¹⁶ Nexata bajaraxuacujinae Judas Jesús naitaxutocaevetsia ponapona. Nexata paepatota Judas toyapëxanepanatsi, perajutsinexa jane baja Jesús bajarapamonae pecobeyabelia.

Pacuenia Jesús barë nabane pijajivi pecopiarutsinabani baja pebeyaxuabivajënaetsi yabara pelivaisi

(Mr 14.12-25; Lc 22.7-23; Jn 13.21-30; 1 Co 11.23-26)

¹⁷ Junua jane baja fiesta, pafiestajava judíovi baxane levadurata matajërëabinejeva pexanaepan. Nexata Jesús pijajivi imoxoyorenatsi. Yanijobatsi pijajivi.

—¿Detsa belia paponanajë patacamitsaexanaenexa, xua jivi baxane pascua fiestamatacabi, nexaenexa? jai Jesús pijajivi.

¹⁸ Nexata Jesús jumaiti pijajivijavabelia:

—Paponare tomarabelia. Pacatsipaebianatsi ponë pijabota papatsijitsiamë. Pajumaitsimë tsane bo pexainaenëjavabelia mapacueniaje: “Vajanacacujarubinë raja jumaiti: ‘Imoxoyo rabaja tavajënae tanebeyaxuabinexa. Nexata bajaraponë pijabo netsicopatsiana patacabarëxaenexa xua jivi baxane pascua fiestamatacabi,’ jai raja vajanacacujarubinë,” pajamë tsane bo pexainaenëjavabelia, jai Jesús pijajivijavabelia.

¹⁹ Nexata baja Jesús pijajivi pona pacuenia Jesús jumaiti. Nexata xua jivi baxane pascua fiestamatacabi daxita Jesús pijajivi pebarëxaenexa, Jesús pijajivi exana jane baja.

²⁰ Nexata baja ajena meraviyotsia, Jesús pijajivi, doce ponëbeje, barëeca mesa muxuneneta. ²¹ Nexata pexaeyenaejavata Jesús jumaiti pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënënë necanajetsiana tajavajabitsaë pecobeyabelia, jai Jesús pijajivijavabelia Judas yabara.

²² Nexata Jesús pijajivi bejamatabëjiobireca. Nexata Jesús pijajivi, caenë canacujitsia, Jesúsjavabelia yanijobapona.

—Tajatuxanenë, ¿xanë tsaja tsane? jai tsaponae Jesús pijajivi.

²³ Nexata Jesús jumaitsi pijajivijavabelia:

—Ponëbeje peneta caecuenia panajuacajabutsianajëbeje panbë platojavabelia, bajaraponë necanajetsiana tajavajabitsaë pecobeyabelia. ²⁴ Xanë, Daxitajivi Pematapijinënë, tēpaenajë pacuenia baja cajena xanë yabara Dioso pejumelivaisibaxutota tajëvelia jumaitsi. Itsiata ponë tajavajabitsaë pecobeyabelia necanajetsiana, bajaraponë bitso bejiobi tsane pinijicuenia. Itsa meta bajaraponë apo naexanae tsipae, bajarapacuenia apo necanajetsi tsipae. Nexata xanepanaejitsipa bajaraponë itsa apo naexanae tsipae. Tsipaji apo naneconitsi tsipae Diosojavabelia, jai Jesús pijajivijavabelia Judas yabara.

²⁵ Nexata Judas, ponë jane baja canajetsijitsiatsi Jesús pijavajabitsaë pecobeyabelia, jumaitsi:

—Petuxanenë, ¿xanë tsaja tsane? jai.

Nexata Jesús jumaitsi:

—Jājā, xamë rabaja tsane, jai.

²⁶ Pexaeyenaevavata Jesús pita panbë. Jesús jumaitsi Diosojavabelia:

—Pexaniacuene panetoexaname. Panerajutame pan, jai.

Bajaraxuacujinae Jesús epatsënëquejeba bajarapapanbë. Rajuta pijajivi. Jesús jumaitsi pijajivijavabelia:

—Paxaema. Mara tavitoje, jai.

²⁷ Bajaraxuacujinae icatsia Jesús copavënëjavata yapita piapaeranexa. Diosojavabelia jumaitsi:

—Pexaniacuene panetoexaname. Panerajutame maporaje, jai.

Bajaraxuacujinae pijajivi bajarapora rajuta. Jumaitsi pijajivijavabelia:

—Papaema padaxitamë maporaje. ²⁸ Tsipaji tajana othopaena jivi ayaibitsaëtöxaneto pibisiacuene pexanaeneconi pevecuaajibiaexanaenexatsi. Nexata tatëpaejava pejamatabëcueneta, jivi yapëtaena pepacuenia xaniajai Dioso jivi pecapanepaejavanexa, pacuenia baja cajena tajëvelia Dioso najumecapanepaeya jumaitsi. ²⁹ Xaniajanë pacuenia pacatsipaebijitsiatsi. Xanë rabaja mapanacuataje matavëjëa apo apaenë tsane uvacuaira, matapania icatsia pejanauvacuaira pacayajavaapaenatsi taxa pijanacuatatsia, jai Jesús pijajivijavabelia penavajunupaebijavata pebeyaxuabijavanexatsi.

Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaname tajajivitonëcuenemë,” jai yabara pelivaisi

(Mr 14.26-31; Lc 22.31-34; Jn 13.36-38)

³⁰ Jesús pijajivi barënaexëana Diosojumevajianë. Bajaraxuacujinae Jesús pijajivi barëpona petsutojumabelia. Patsutojumata olivonaenë apaaxayo, bajarapatsutojumabelia barëpona. ³¹ Nexata bajarapatsutojumata Jesús jumaitsi pijajivijavabelia:

—Daxita raja paxamë ajena, pameravi, panexuabarëcëpecaename. Tsipaji rabaja patanexuabarëcëpecaejavanexamë yabara, Dioso pejumelivaisibaxutota tajëvelia jumaitsi mapacueniaje: “Beyaxuabianatsi raja oveja pevetsinë. Nexata pijaovejabit-saëto nacayajatsia rëcëpecaena,” jai Dioso pejumelivaisibaxutota paxamë patanexuabarëcëpecaejavanexamë yabara. Nexata ajena, pameravi, tajavajabitsaë itsa nevaetabiana tanebeyaxuabinexa, daxita paxamë panexuabarëcëpecaename. ³² Itsiata baitsi jane tatëpaecujinae, icatsia asaenë tsane. Nexata paxamë panevajënaeyabelia, copiata ponaenajë Galilea nacuyabelia, jai Jesús pijajivijavabelia.

³³ Nexata Pedro jumaitsi Jesúsjavabelia:

—Daxita mapamonaeye caxuabarëcëpecae ata tsane, xanë cajena apo caxuabatabajiravi tsanetsi, jai Pedro.

³⁴ Nexata Jesús jumaitsi Pedrojavabelia:

—Xaniajanë pacuenia catsipaebijitsiatsi. Ajena rabaja, pameravi, nanianaevëpata, vacara peflabivajënaeya, nayavajunuaxainaename tajajivitonëcuenemë. “Apo yapëtaenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

³⁵ Itsiata Pedro jumaitsi Jesúsjavabelia:

—Nebeyaxuabijitsia ata tsane xamë yajava, itsiata cajena apo nayavajunuaxainaenë tsane nijajivitonëcuenenë, jai Pedro Jesúsjavabelia.

Daxita Jesús pijajivi bajarapacuenia jumaitsi.

*Pacuenia Jesús vajëta Diosojavabelia Getsemanívenëjavata yabara pelivaisi
(Mr 14.32-42; Lc 22.39-46)*

³⁶ Jesús pijajivi pecunameravita yajavapata Getsemanívenëjavata. Bajarajota Jesús jumaitsi pijajivijavabelia:

—Paneevetenare abaxë majotaje. Abaxë raja imoxoyo majotaliaje vajëtsijitsianë Diosojavabelia, jai Jesús pijajivijavabelia.

³⁷ Nexata Jesús barëpona acueyabi ponëbeje pijajivi. Jesús pijajivi barëpona pesaicaeyojavabelia mapamatabëxëyoje. Pedro, Santiago, Juan, bajarapamatabëxëyo. Santiagobeje Juanbeje Zebedeo pexënatobeje. Bajaraxuacujinae Jesús bitso najamatabëxaina. Nexata bejamatabëjibireca.

³⁸ Nexata Jesús jumaitsi pijajivi acueyabi ponëbejejavabelia:

—Xanë bitso pinijicuenia najamatabëxainajë. Nexata bitso tanajamatabëxainaejava, jamatabëyatëpajë. Paxamë abaxë majotaje panacopabare. Paitavamë tsane. Pëtsa abaxë pamajitame, jai Jesús pijajivi acueyabi ponëbejejavabelia.

³⁹ Nexata Jesús caenë pevajënaeyabelia icatsia tsiquirijavayo ponataba. Nexata Jesús irataeya bocajunua pevajëtsinexa Diosojavabelia. Jumaitsi Diosojavabelia:

—Taxa Diosomë, netocopatame picani tanebeyaxuabinexa betajibicueneta. Daxitacuenë raja cacaëjëpa nexanaenexa. Nexata necapanepare bajarapabejibicueneneve-cua. Itsiata xanë apo tajitsipaecuene ata, pacuenia xamë jitsipame, netocopatsianame, jai Jesús Diosojavabelia pevajëtsijavata pebeyaxuabijavanexatsi.

⁴⁰ Bajaraxuacujinae Jesús naviarena acueyabi ponëbeje pijajivijavaberena. Caxitararaba Jesús pijajivi pemajitanubenaevi. Nexata Jesús jumaitsi Pedrojavabelia:

—¿Apo pacacaëjëpae tsabaja rovia caepatoyo ata paneaitavatsenaenexa? ⁴¹ Pëtsa pamajitame. Paitavamëre. Pavajëre Diosojavabelia papecayavenonaenexa pibisiacuene paneexanaeyaniva. Tsipaji raja dovathi pacajamatabëcueneëjëbiana. Paxamë picani panejamatabëcueneta pexaniacuene jamatabëpaexanabiabame. Itsiata baitsi jane apo pajamatabëcuensaëmë pexaniacuene paneexanaenexa, jai Jesús Pedrojavabelia.

⁴² Nexata icatsia Jesús pona pecovëyabelia pevajëtsinexa icatsia Diosojavabelia. Vajëta Diosojavabelia mapacueniaje.

—Axa, itsa apo jitsipaemë tanevecuatsatsinexamë betajibicueneta tatëpaejavanexa, nexata pacuenia jitsipame, netocopatsianame, jai Jesús Diosojavabelia.

⁴³ Bajaraxuacujinae Jesús icatsia naviarena pijajivijavaberena. Caxitararaba icatsia Jesús pijajivi pemajitanubenaevi. Tsipaji baja Jesús pijajivi bitso itamajitsipana. ⁴⁴ Nexata abaxë bajarapamonae pemajitanubenaevavata, Jesús icatsia pona pecovëyabelia pevajëtsinexa icatsia Diosojavabelia. Nexata icatsia vajëta Diosojavabelia pacuenia vajëta copiaya xuabeje vajëta. ⁴⁵ Bajaraxuacujinae icatsia Jesús naviarena pijajivijavaberena. Jumaitsi Jesús pijajivijavabelia:

—¿Abaxë tsarovia tsiteca pamajitanubename? Copiapata rabaja paepatota xanë, Daxitajivi Pematapijinënë, necanajetsijitsia pibisiacuene pexanaevi pecobeyabelia.

⁴⁶ Panonobapunare baja. Ponaenatsi baja. Imoxoyo rabaja najetaruca tajavajabitsaë pecobeyabelia tanecanajetsinënexa, jai Jesús pijajivijavabelia Judas yabara.

*Pacuenia Jesús vaetabatsi pijavajabitsaë yabara pelivaisi
(Mr 14.43-50; Lc 22.47-53; Jn 18.2-11)*

⁴⁷ Jesús pijavajabitsaë pevaetabijavatanevatsi, cuaicuajai tsanucæ pijajivijavabelia. Nexata bajarapaepatota patanajetaruca Judas, Jesús pijajivi doce ponëbejeyajuvënënëmi. Judas pënanajetarubenatsi jivi ayaibitsaëttoxaneto. Bajarapamonaeyajuvënëvi itsamonæ canajetarubena espadanë. Itsamonæ canajetarubena naebonë yajava. Bajarapamonaë itorobatsi sacerdotevi penamatacaitorobivi, judíovi pijaancianovinua. ⁴⁸ Judas pebarërenavajënaë bajarapamonaë, copiaya baja cajena Judas tsipaeba pacuenia bajarapamonaë yapëtaejitsia Jesúscuene. Judas jumaitsi mapacueniaje:

—Ponë raja peneta bajacobiaya itabaratsutsunexuabianajë, bajaraponë Jesús tsane. Bajaraponë pavaetabianame. Pacobecëtsiana xaniavaetsia, jai baja cajena Judas pemat-
acanajetarucaevijavabelia pebarërenavajënaë.

⁴⁹ Nexata jane baja Judas itsa patanajetaruca, exana pacuenia jumaitsi pematacana-
jetarucaevijavabelia. Judas Jesús itabaratsutsuniaya bajacobatsi Judas jane baja pemat-
acanajetarucaevi peyapëtaenexa Jesúscuene. ⁵⁰ Jesús nexata jumaitsi Judasjavabelia:

—Judas, ¿detsa xua yabara patame? jai.

Nexata jane baja Jesús petsimaxëponaevitsi, cujibarëcëpaliatsi. Vaetabatsi. Cobecëtatsi
xaniavaetsia pecaponaenexatsi.

⁵¹ Bajarajota Jesús pijajiviyajuvënënë pijaespada navemarajonotaxuabina. Muxuy-
oropaebiaxuaba sacerdotevi pepo penamatacaitorobinë pijajivitonë. ⁵² Nexata Jesús
jumaitsi pijajivitonëjavabelia:

—Nijaespada baja xataremeca pevënojojavareca. Tsipaji pamonaë namaxëvanita espa-
data, daxita bajarapamonaë juya espadata babiatsi, jai Jesús.

⁵³ Icatsia Jesús jumaitsi:

—Itsa vajëtsipajë taxa Diosojavabelia taneyavenonaevinexa tanetoitorobinexatsica,
nexata tavajëtsiepatota netoitorobijitsipaica bitso ayaibitsaëttoxanetonë ángelevi. ⁵⁴ Itsa
vajëtsipajë taxa Diosojavabelia tanetoitorobinexatsica taneyavenonaevinexa, nexata
baja apo netocopiapatsi tsipae pacuenia Dioso pejumelivaisibaxutota tajëvelia neva-
junupaeba pacuenia nevaetabijitsia tanebeyaxuabinexa, jai Jesús pijajivitonëjavabelia.

⁵⁵ Nexata Jesús bajarajota jumaitsi petsimaxëponaevitsijavabelia:

—Paxamë meta panetaneme betanacobetoxotsinë. Bajaraxuata pacaponame es-
padanë, naebonë yajava, patanevaetabexamë pacuenia pavaetababiabame penaco-
betoxotsinë. Xanë caematacabi canacujitsia Dioso pejumelivaisi paxamëjavabelia pacat-
sipaebabiabatsi templobota. Itsiata bajarapamatacabi apo panevaetabimë. ⁵⁶ Mara
pacuenia panevaetabameje tanetocopiapatsixae baja pacuenia Dioso pejumelivaisi-
baxutota bajayata tajëvelia nevajunupaeba, jai Jesús pevaetabivitsijavabelia.

Nexata jane baja Jesús pijavajabitsaë pevaetabijavatatsi, daxita Jesús pijajivi xu-
abarëcëpecatsi pacuenia baja cajena Jesús tajëvelia jumaitsi pijajivijavabelia.

*Pacuenia Jesús nutatsi judíovi penamatacaitorobivi pitabarata yabara pelivaisi
(Mr 14.53-65; Lc 22.54-55, 63-71; Jn 18.12-14, 19-24)*

⁵⁷ Jesús pevaetabivitsi caponaliatsi Caifás pijaboyabelia. Bajaraponë Caifás sacer-
dotevi pepo penamatacaitorobinë. Nexata Caifás pijabota nacaetuana judíovi pecu-
jarubivi, judíovi pijaancianovi yajava. ⁵⁸ Itsa baja Jesús caponaliatsi, nexata Pedro
bajarapamonaë pecovëya tajiyo najetaruca. Sacerdotevi pepo penamatacaitorobinë pi-
jabo matatoyorotsia yacaranata ibopanaxanetonë mataropotsia pefaratsijavaxanetota.
Nexata bajarapayacaranatsijavaxaneto baupa, Pedro najoneya bopanabojavabelia,
itsabelia Jesús cajunuatsi. Nexata sacerdotevi pepo penamatacaitorobinë pijabopanab-
ota, Pedro naeca templobopijipolicíavita. Bajarajota Pedro naeca petaenexa pacuenia
Jesús pijavajabitsaë exanatsi.

⁵⁹ Nexata bajarapabo ënëtuatujëta sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nabarëcuaicuajai. Bajarapamonae nayanijoba.

—¿Jipatsa yapëtane Jesús pibisiacuene pexanaejava, paneconi yabara beyaxuabijitsiatsi? najai tsaponae.

Itsiata bajarapamonae apo caxitajarabi itsaneconi ata, Jesús pijaneconi. Najumetsënëtsiaya picani peneconitsilivaisinexa, jaita penajumetsënëtsilivaisita picani Jesús pebeyaxuabinexatsi. ⁶⁰ Ayaibitsaëto pata penajumetsënëtsilivaisi pepaebinexa Jesús yabara. Itsiata caelivaisi ata najumejëpaeya apo paebi bajarapamonae. Nexata bajarapamonae apo caxitajarabi paneconi yabara Jesús naneconitsiaexanaejitsiatsi pebeyaxuabiaexanaenexatsi. Bajaraxuacujinae belia anijanëbeje caelivaisi najumejëpaeya neconitatsibeje.

⁶¹ Jumaitsibeje bajaraponëbeje Jesús yabara:

—Maponë jumaitsije: “Xanë necaëjëpa taxuabinexatsica Dioso pijatemplobo. Necaëjëpanua acueyabi matababita icatsia taveretetsinexa itsabo,” jai maponëje, jaiibeje bajaraponëbeje Jesús yabara.

⁶² Nexata jane baja sacerdotevi pepo penamatacaitorobinë nonotapuna bajarapamonae pitabarata. Nexata jumaitsi Jesúsjavabelia:

—¿Apo yapëtaemë tsaja itsalivaisiyo ata nejumecanaviatsinexa? ¿Xaniajai tsabaja pacuenia maponëbeje caneconitsiajumaitsibeje? jai sacerdotevi pepo penamatacaitorobinë.

⁶³ Jesús itsiata moya. Nexata bajaraponë icatsia jumaitsi Jesúsjavabelia:

—Caitorobatsi caecuenia tanenavajunupaebinexamë nexaniajajumeta. Itsajume, Diosojavabelia naneconitsianame. Panenavajunupaebare xaniavetsia itsa xamë Cristomë, athëbëvetsica Dioso pecaitorobinëtsica jivi necapanepaenexa. ¿Xamë tsaja Dioso pexënatomë? jai.

⁶⁴ Nexata Jesús jumaitsi:

—Jājā, xanë rabaja pacuenia nejumaitsimë. Nexata icatsia pacajumaitsitsi. Paxamë raja panetaename xanë, Daxitajivi Pematapijinënë, taecaejava Dioso pecujanenia, daxitajamatabëcuene pecaëjëpaenëtsi. Panetaenamenua tanajetarucaejava athëbëvetsica itarërëbota, jai Jesús.

⁶⁵ Bajarapacuenia Jesús pejumaitsijava itsa jumetane, sacerdotevi pepo penamatacaitorobinë penaxatatsijava anaeya titinaxuaba. Bajarapacuenia titinaxuaba pianaepanaexae Jesús pejumaitsijava yabara. Nexata sacerdotevi pepo penamatacaitorobinë jumaitsi daxita penacaetuatsivijavabelia:

—Mara ponë Dioso apo pejitsipaecuenia cuaicuajaije. Dioso bepexënato nataeya cuaicuajai. Pijacuata rabaja naneconita bajarapacuenia pecuaicuajaijae. Pematatsënëa baja apo namatavenonaetsi itsamonae vajanacatsipaebinexa paneconi yabara maponëje naneconitsiaexanaejitsiatsi. Paxamë rabaja pajumetaneme maponëje Dioso apo pejitsipaecuenia pecuaicuajaijava. ⁶⁶ ¿Detsa nexata paxamë pajamatabëitsimë? jai sacerdotevi pepo penamatacaitorobinë daxita penacaetuatsivijavabelia.

Nexata daxita penacaetuatsivi jumaitsi:

—Naneconita rabaja Diosojavabelia. Nexata baja beyaxuabianatsi, jai bajarapamonae Jesús yabara.

⁶⁷ Nexata bajarapamonae Jesús itabarasuabatsi. Bajaraxuacujinae papaëbërëpanata itaxutocëtatsi. Pitaxutocëtsicujinaetsi itabaratsaquibabeponatsi pecobethaitonëta. Itsamonae itabarapacabiaxuababiabatsi. ⁶⁸ Nexata bajarapamonae jumai tsaponae Jesúsjavabelia:

—¡Xamë raja itsa Cristomë, athëbëvetsica Dioso itsa pecaitorobinëtsica jivi necapanepaenexa, nexata vënëjonare ponë caitabarapacabiauxuaba! jai tsaponae bajarapamonae.

Pacuenia Pedro nayavajunuaxaina Jesús pijajivitonëcuene yabara pelivaisi
(Mr 14.66-72; Lc 22.56-62; Jn 18.15-18, 25-27)

⁶⁹Itsa abaxë Jesús sacerdotevi pepo penamatacaitorobinë pijabo ënëtuatuajëalia yanijobaponatsi xua yabara naneconitsiaexanaejitsiatsi, Pedro naitaxutocaevetsiaya naeca bopanabota. Nexata bajarapabota penacuenebiva Pedro kujirenatsi. Bajarapova jumaitsi Pedrojavabelia:

—Xamë ata rabaja naponaponame Jesústa, Galilea nacuapijinëta, jai.

⁷⁰Nexata Pedro itsiata nayavajunuaxaina Jesús pijajivitonëcuene. Daxita bajarajota penubenaevi pitabarata Pedro jumaitsi:

—Xanë cajena apo yapëtaenë pacuene yabara nejumaitsimë, jai.

⁷¹Sacerdotevi pepo penamatacaitorobinë pijabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupajavabelia Pedro natixilia. Nuca bajarapabaupa muxuneneta. Bajarajota icatsia itsava, bajarapabota penacuenebiva, Pedro taenutatsi. Nexata bajarapova ata Pedro yabara icatsia jumaitsi bajarajota penubenaevijavabelia:

—Mara ponë ata naponapona Jesústaje, Nazaret tomarapijinëta, jai bajarapova.

⁷²Nexata icatsia Pedro nayavajunuaxaina Jesús pijajivitonëcuene. Pedro jumaitsi:

—Xaniajanë. Dioso pitabarata cajumaitsi. Apo yapëtaenë cajena bajaraponë, jai.

⁷³Bajaraxuacujinae icatsia, caepatoyocujinae, bajarajota penubenaevi kujibarëcëpaliatsi Pedro. Jumaitsi bajarapamonae:

—Xaniajai raeta baja cajena. Xamë Jesús pijajiviyajuvënënenëmë. Tsipaji rabaja Galilea nacuapijivi penatsipaebicuenia natsipaebame, jai bajarapamonae Pedrojavabelia.

⁷⁴Nexata Pedro jumaitsi:

—Itsa apo xaniajanë tsipae paxamëjavabelia, nexata Diosojavabelia naneconitsipajë. Apo yapëtaenë cajena bajaraponë, jai Pedro.

Itsa baja Pedro najumevereta bajarapacuenia pejumaitsijava, vacara fiaba. ⁷⁵Nexata bajarajota Pedro najamatabënapitajaraba Pedrojavabelia Jesús pejumaitsijava mapacueniaje: “Ajena rabaja, pameravi, vacara pefiabivajënaeya, nayavajunuaxainaename tajajivitonëcuenemë. ‘Xanë cajena apo yapëtaenë bajaraponë,’ jamë tsane xanë yabara acueyabi xuabeje,” pejaijava Jesús Pedrojavabelia, Pedro najamatabënapitajaraba. Nexata baja Pedro pitsapalia bo matatoyorotsia peyacaranatsijava pënëyabelia. Pinijicuenia Pedro nua.

27

Pacuenia Jesús caponaliatsi Pilatojavabelia yabara pelivaisi
(Mr 15.1; Lc 23.1-2; Jn 18.28-32)

¹Ajena baja matabacabi tsarucaponae, sacerdotevi penamatacaitorobivi, judíovi pijaancianovi yajava, najamatabëjëpa pacuenia exanaejitsia Jesús pebeyaxuabiaexanaenexatsi. ²Nexata Jesús cobecëtsiaya caponaliatsi nacuaevetsinë Poncio Pilatojavabelia.

Pacuenia Judas nabeyaxuaba yabara pelivaisi

³Judas canajetaxuabatsi Jesús pijavajabitsaë pecobeyabelia. Bajaraponë itsa tane Jesús penaneconitsijava pebeyaxuabinexatsi, nexata bitso najamatabëxaina. Nexata pona petocanaviatsinexa perajutsipalatamitsi, treinta ponëbeje pepo palatanëanë, bitso penamatamotsinëanë. Tocanaviatsijitsia sacerdotevi penamatacaitorobivijavabelia, judíovi pijaancianovijavabelia ata. ⁴Judas jumaitsi bajarapamonaejavabelia:

—Pibisiacuene baja rovia exanajë. Bajaraponë itsacuenejavayo ata apo exanaenejeva, panecobeyabelia baja canajetaxuabajë, jai Judas.

Nexata bajarapamonae jumaitsi Judasjavabelia:

—¿Paxanë raja patajamatabëcueneta apo naneconitsimë tsane! ¿Xamë raja nijacuata naneconitame! jai bajarapamonae Judasjavabelia.

⁵ Nexata Judas templobota othotajarabeta perajutsipalatanëanëmitsi. Bajaraxuacujinae pitsapalia. Pona baja. Nexata pijacuata nabeyaxuaba. Pepuanavësicëtsi athëbëvetsica perucaemaëtoxanetota, athëbëvetsica jirevica irabetsica penacuibosi catarërëtarabaxuabinexa. Bajarapacuenia pijacuata Judas nabeyaxuaba.

⁶ Nexata sacerdotevi penamatacaitorobivi caetuata Judas piothotajarabetsipalatanëanë. Najumaitsi bajarapamonae:

—Acuenebi mapapalataje vajabuatsinexa ofrenda vajajebabiabicajónita. Tsipaji bajarapapalata pejamatabëcueneta jivitonë beyaxuabijitsiatsi, najai bajarapamonae.

⁷ Nexata bajarapamonae najamatabëjëpa bajarapapalatanëanëta pecomuatsinexa ira. Nexata bajarapamonae bajarapapalatanëanëta comuata canalitonë pefaratabiabinë pijairami. Bajarapamonae comuata bajarapaira, itsanacuaverena pepatsivi itsa tëpa Jerusalén tomarata, bajarapairata pemëthëtabiabinexa. ⁸ Bajaraxuata mapamatacabijavaberena ataje vënëruba bajarapaira mapejumaitshivënëje: “Papalata pejamatabëcueneta jivitonë beyaxuabatsi, bajarapapalatata pecomuatsiira,” pejaivënë vënëruba. ⁹ Bajarapacuenia itsa comuata bajarapaira, copiapata jane baja pacuenia Diosojumepaebinëmi profeta Jeremíaspjinë bajayata tajëvelia vajunupaeba bajarapalata. Profeta Jeremíaspjinë baja cajena bajarapapalata yabara tajëvelia jumaitsi mapacueniaje: “Israelnacula pevetsivi rajutsiana jivitonë pecanajetsinëjavabelia treinta ponëbeje, pepo platananitota pexanaenëanë. Bajarapapalatanëanë icatsia bajarapamonae pitsiana. ¹⁰ Nexata bajarapapalatanëanëta bajarapamonae comuatsiana canalitonë pefaratabiabinë pijairami, pacuenia Dioso tajëvelia nejumaitsi,” jai bajayata profeta Jeremíaspjinë tajëvelia pevajunupaebijavata Jesús pematamopitsipalatanexatsi.

Pacuenia Jesús nutatsi Pilato pitabarata yabara pelivaisi
(Mr 15.2-5; Lc 23.3-5; Jn 18.33-38)

¹¹ Jesús nutatsi nacuaevevetsinë Pilato pitabarata. Nexata Pilato jumaitsi Jesúsjavabelia: —¿Xamë tsaja judíovi pepo nevetsinë? jai Pilato.

Nexata Jesús jumaitsi Pilatojavabelia:

—Jājā, xanë rabaja pacuenia nejumaitsimë, jai Jesús Pilatojavabelia.

¹² Sacerdotevi penamatacaitorobivi, judíovi pijaancianovi yajava, Jesús neconitaponae atatsi, apo jumepitsi. ¹³ Nexata Pilato jumaitsi Jesúsjavabelia:

—¿Apo jumetaemë tsaja pacuenia mapamonae caneconitaponaje? jai.

¹⁴ Jesús neconitsi atatsi, itsiata apo jumepitsi. Bajaraxuata Pilato jamatabëcuenenabenajaca. Apo yapëtae pacuenia Pilato exanaejitsia Jesúsjavabelia.

Pacuenia baja Pilato tocopata Jesús pebeyaxuabinexatsi yabara pelivaisi
(Mr 15.6-20; Lc 23.13-25; Jn 18.38-19.16)

¹⁵ Nacuaevevetsinë Pilato xaina pijacujirucue. Caevai canacujitsia, pascua fiestamatacabi, Pilato copatabiaba caenë penaneconitsinë pepitsapaenexa penaneconitsivi pejebabiabibovecua. Pajivi yabara jivi vajëtabiaba Pilatojavabelia, bajarapajivi Pilato copatabiaba pascua fiestamatacabi. Bajarapacuenia Pilato caenë copatabiaba jivi pesivajamatabëcuene xanepanaenexatsi. ¹⁶ Pamatacabi Jesús naneconitsiaexanatsi, bajarapamatacabi penaneconitsivi pejebabiabibota naneconitsiaponapona jivibenë, Barrabásvënë. Bajaraponë bitso piacujirubejenëcuene yapëtanetsi daxitajivi.

¹⁷ Nexata daxita Jerusalén tomarapijivi penacaetuatsijavata Pilato jumaitsi:

—¿Detsa ponë pajitsipame patacatocapitsapaenexa penaneconitsivi pejebabiabi-bovecua pepitsapaenexa? ¿Barrabás tsaja? Itsa jume, ¿Jesús tsaja, ponë yabara jivi jumaitsi: “Cristo raja athëbëvetsica Dioso pitorobinëtsitsica jivi pecapanepaenexa,” jaitsi? jai Pilato bajarapamonaejavabelia.

¹⁸ Pilato jamatabëjumaitsi:

—Xua Jesús exanaponapona, sacerdotevi penamatacaitorobivi cueneitoyatsi. Bajaraxuata netocaparena, jamatabëjai.

¹⁹ Pilato abaxë eca itsajota ecabiaba penaneconitsivi penaneconitsiaexanaenexa. Nexata Pilato pijava tonajumeitorobarenatsi. Pilato pijava Jesús yabara jumaitsiarena mapacueniaje: “Copare bajaraponë, ponë itsacueneneconiyo ata apo penaneconitsinë. Ajena raja, meravi, amajitsinaebejenë bajaraponë yabara,” jaitsirena Pilato pijava. Nexata picani Pilato jamatabëcopata Jesús.

²⁰ Itsiata baitsi jane bajarapaepatota sacerdotevi penamatacaitorobivi, judíovi pijaancianovi yajava, jivijavabelia muxubijiapenetsia jumai tsaponae:

—Pavajëtsianame Barrabás pecapitsapaenexatsi. Pavajëtsianame Jesús pebeyaxu-abinexatsi, jai tsaponae bajarapamonae.

²¹ Nexata nacuaevevetsinë Pilato icatsia yanijoba jivijavabelia:

—¿Detsa ponë nexata pajitsipame patacatocapitsapaenexa? jai Pilato.

Nexata bajarapamonae jumaitsi:

—Panetocapitsapare Barrabás, jai.

²² Pilato nexata jumaitsi bajarapamonaejavabelia:

—¿Detsa nexata xua exanaenajë Jesúsjavabelia, ponë yabara: “Cristo, ponë Dioso athëbëvetsica itorobatsi jivi pecapanepaenexa,” jaitsi? jai Pilato bajarapamonaejavabelia.

Nexata daxita bajarapamonae jumaitsi Pilatojavabelia:

—¡Cruzajavabelia cobematabiabarutsiaexanare! jai bajarapamonae.

²³ Nexata Pilato jumaitsi bajarapamonaejavabelia:

—¿Detsa pitsineconi yabara cobematabiabarutsiaexanaejitsipajë cruzajavabelia? jai Pilato Jesús yabara.

Itsiata bajarapamonae icatsia pinijijumeta vavajai.

—¡Cruzajavabelia cobematabiabarutsiaexanare! jai tsaponae.

²⁴ Pilato tane piajumesaëjava bajarapamonae. Muxujiobi ata, apo jumecovënëtsitsi. Bitsoyo biji caranata bajarapamonae jamatabënanaecajematapona bajarapatomarata. Nexata Pilato penacobequiatsinexa, pijajivi itoroba petocarenanexatsi mera. Pilato nacobequiata daxitajivi pitabarata bajarapamonae peyapëtaenexa Jesús apo penaneconitsiaexanaecuene. Pilato jumaitsi bajarapamonaejavabelia:

—Xanë raja tajamatabëcueneta apo beyaxuabiaexanaenë tsane maponëje, pianeconijibinë. Paxamë panejamatabëcueneta pabeyaxuabiaexanaename, jai Pilato.

²⁵ Nexata daxita bajarapamonae jumaitsi:

—¡Itsa bajaraponë pianeconijibinë Diosojavabelia, nexata bajaraponë patabeyaxu-abineconi jema panetsijumajopaena, pataxi yajava! jai bajarapamonae Pilatojavabelia.

²⁶ Nexata baja Pilato tocopata Barrabás pepitsapaenexa penaneconitsivi pejebabiabibovecua. Itorobanua vajabitsaëvi ayaicuenia Jesús pejumatitibabenexatsi penaneconitsivi pejumaconitabiabimacata. Bajaraxuacujinae Pilato tocopata baja Jesús vajabitsaëvi pecobematabiabarutsinexatsi cruzajavabelia.

²⁷ Nexata baja Pilato pijajivi, vajabitsaëvi, Jesús caponaliatsi nacuaevevetsinë Pilato pijaboxanetojavabelia. Nexata bajarajota Jesús matatoyorotsia nacaetuatatsi daxita vajabitsaëvi. ²⁸ Jesús penaxatatsijava vajabitsaëvi vejumajonotatsi saicayajava pexatatsinexatsi. Nexata jane baja vajabitsaëvi Jesús quenetsiataeya xatatatsi petsobiajava

benacuaeavetsinëcuenia petaenexatsi. ²⁹ Becoronacuenia pemataxatatsinexatsi, peejuvitoyoroto tsimataexanatsi. Bajarapatoyoroto Jesús mataxatatatsi. Tsiocerutatsinua naebo pecujanenia benacuaeavetsinëcuenia petaenexatsi. Nexata bepeyaiyataecueniatsi bajarapamonae pematabacabëta tonubenatsi Jesús pitabarata. Quenetsiataeya jumai tsaponaetsi:

—¡Bajaco, judíovi pepo pevetsinë! jai tsaponaetsi bajarapamonae.

³⁰ Suabaponatsi. Vecuapitatsi naebo. Bajarapanaebota mataconitajarababiabatsi.

³¹ Bajarapacuenia quenetsiataeya pecapocaponaeujinaetsi, vejumajonotatsi baja pexatatsijavatsi. Jesús baja icatsia xatatatsi penaxatatsijava. Caponaliatsi jane baja pecobematabiabarutsinexatsi cruzajavabelia.

Pacuenia jane baja Jesús cruzajavabelia cobematabiabarutatsi yabara pelivaisi
(Mr 15.21-32; Lc 23.26-43; Jn 19.17-27)

³² Vajabitsaëvi Jesús ita caponaliatsi tomaravecua, namutota caxitajaraba Simónvënë, Cirene tomarapijinë. Nexata vajabitsaëvi Simón itorobatsi, pacruzajavabelia Jesús cobematabiabarutsijitsiatsi, peyavenonaeyacaponaeenexa.

³³ Jesús caponaliatsi Gólgotavënë tsutojavabelia, bajarapatsutojumata pecobematabiabarutsinexatsi cruzajavabelia. “Gólgota,” ita jai hebreojumeta, mapajumetaje pejumaitsijume: “Jivimatasipatsuto,” pejajjume. ³⁴ Bajarajota picani Jesús rajutatsi vinora, pematajërëabira piatsaxarata. Jesús picani rajutatsi bitso penavixaetaeyaniva pecobematabiabarutsijavatatsi cruzajavabelia. Jesús pajane bajarapora. Itsiata apo apae.

³⁵ Nexata jane baja Jesús vajabitsaëvi cobematabiabarutatsi cruzajavabelia. Bajaraxuacujinae vajabitsaëvi bajarajota canamuxusita beibotoxi. Bajarapacuenia canamuxusita peyapëtaenexa ponë pitaponaejitsia caejava canacujitsia Jesús penaxatatsijavami, xua jumaponapona. Bajarapacuenia vajabitsaëvi natsicobetsana Jesús penaxatatsijavami. Bajarapacuenia vajabitsaë ita natsicobetsana Jesús penaxatatsijavami, tocopiapatatsi jane baja pacuenia Diosojumepaebinëmi profetanë bajayata tajëvelia vajunupaeba Jesús penaxatatsijava. Jesús penaxatatsijava yabara, profetanëmi bajayata tajëvelia jumaiti mapacueniaje: “Natsicobetsanaena penaxatatsijava. Canamuxusitsiana beibotoxi peyapëtaenexa ponë pitaponaejitsia,” jai profetanëmi. ³⁶ Bajaraxuacujinae vajabitsaëvi bajarajota evetena penaitaxutocaevetsinexatsi Jesús. ³⁷ Bajarajota Jesús pematabocoto matatsënëyo cruzajavata, yaquinaruta tablapayota itsamonae ata peyapëtaenexa pajamatabëcuene yabara naneconitsiaexanatsi Jesús. Jumai tsarutsi peyaquinaeitane cruzajavata mapacueniaje: “Mara ponë Jesúsje, judíovi pepo pevetsinë,” jai tsarutsi Jesús yabara.

³⁸ Anijanëbeje penacobetoxotsinëbeje Jesús yajavacobematabiabarutatsi. Caenë canacujitsia pijacruzata rubatsi. Bajaraponëbeje Jesús pemuxuneneta rutatsibeje. Itsanë Jesús pecujanenia rutatsi. Itsanë Jesús petsavenononia rutatsi. ³⁹ Jesús pecobematabiabarutsijavatatsi cruzajavabelia, bajaraxuayo penajetarubenaevi Jesús itaropitsiaya bijataeyabiabatsi. ⁴⁰ Jumai tsabiabi bajarapamonae:

—Xamë raja imata jumaitsimë: “Xuabianicajë templobo. Acueyabi matabita icatsia veretetsianajë itsabo,” jamë. Nacapanepare jane baja nijacuata. Itsa xaniajai Dioso pexënatomë, nexata cruzajavavetsica runaimica, jai tsabiabi Jesúsjavabelia bajaraxuayo penajetarubenaevi.

⁴¹ Bajara pijinia pacuenia sacerdotevi penamatacaitorobivi capocaponatsi Jesús. Judíovi pecujarubivi ata capocaponatsi. Fariseovi ata capocaponatsi. Judíovi pijaancianovi ata capocaponatsi Jesús. Èpamonae najumaitsi:

⁴² —Maponëje itsamonae yabara jumai tsabiabi: “Capanepaenajë jivi,” jai tsabiabi. Caranata pijacuata penacapanepaenexa apo cajëjpaetsi. Itsa xaniajai Israel nacuapijivi pepo pevetsinë, nexata aeconoxae cruzajavavetsica runaenica vajataenexa. Nexata

jane baja jumecovënëtsianatsi Cristonëcuene. ⁴³ Bajaraponë pina najamatabëcuenecopata Diosojavabelia peyavenonaenexatsi. “Xanë raja Dioso pexënatonë,” jai tsabiabinua. Nexata taenatsi aeconoxae Dioso pecapanepaejavatsi, najai bajarapamonae capocponaeya Jesús yabara.

⁴⁴ Ponëbeje penacobetoxotsinëbeje Jesús yajavacobematabiabarutatsi, bajaraponëbeje ata Jesús bijataerucatsibeje bajarapacuenia.

Pacuenia baja Jesús tēpa yabara pelivaisi
(Mr 15.33-41; Lc 23.44-49; Jn 19.28-30)

⁴⁵ Jesús baja itsa tēpaejitsia, ajena matonejejitsia, daxita nacuanëjava aitaquiri tsajuni. Matapania caniviyojavabelia, bejamatabëcuene a las tres, nacua napebeta icatsia.

⁴⁶ Nexata paepatotata icatsia nacua napebeta, bajarapaepatotata pinijicuenia Jesús aëjai. Jumaitsi:

—Eli, Eli, ¿lama sabactani? jai Jesús.

Bajarapacuenia Jesús itsa jumaitsi pijajumeta, mapajumetaje pejumaitsijume: “Taja-Dioso, tajaDioso, ¿detsa xuajitsia baja tajaepato necopatame?” pejaijume.

⁴⁷ Nexata itsamonae bajarajota penubenaevi bijiaya jumetane bajarapacuenia Jesús pejumaitsijava. Nexata saya jamatabëcuenenavëxaniabiaya jumaitsi bajarapamonae:

—Mara ponë junata profeta Elíaspijinëmi, Diosojumepaebinëmi, jai bajarapamonae.

⁴⁸ Nexata bajarapamonae yajuvënënë bepimia cujinaelia pecarenanexa esponjavënëjava. Nexata esponjavënëjava jabutaba piajatuvonorayalia. Bajaraxuacujinae esponjavënëjava naeboupita cëtaruta. Toyotsiatsi Jesús petsutsuninexa picani bajaraxua. ⁴⁹ Itsiata itsamonae jumaitsi:

—Copare abaxë. Taenatsi Elíaspijinë itsa najetaruca pecapanepaenexatsi, jai bajarapamonae capocponaeya.

⁵⁰ Icatsia Jesús pinijicuenia aëjai. Bajaraxuacujinae jane baja Jesús tēpanajereca.

⁵¹ Paepatotata Jesús tēpanajereca, bajarapaepatotata templobo ënëtuatuajëalia peyatuu-cutarutsipana, ayaipapaëbërëpanaxaneto, tititica tuatuajëareca, athëbëvetsicacujinae irabereca. Ira najëaba. Ibotoxanetonë ata sarapajunujunua. ⁵²⁻⁵³ Ayaibitsaëto Dioso pepua pejumecovënëtsivi petëpaevimi pemëthëanë ata napananubena. Nexata Jesús acueyabi matabita icatsia itsa asaë petëpaeacujinae, pamona pemëthëanë napananubena, bajarapamonae ata cotocaevi asaë. Nexata pitsapa mëthëvetsina. Nexata bajarapamonae pona Jerusalén tomarabelia. Bajarajotalia naitajëbapona jivi ayaibitsaëtojavabelia.

⁵⁴ Jesús cruzata petëpaejavata vajabitsaëvi pijacapitán, pijajivi yajava, nuca. Taenubena Jesús petëpaejava. Jesús petëpaejavata ira najëaba. Nexata bajarapamonae itsa tane ira penajëabijava, itsajavanë ata itsa taepona, bajarapamonae bitso junava. Jumaitsi:

—Matsaena ponë tēpaje, pepacuenie baja rovia Dioso pexënato, jai bajarapamonae.

⁵⁵ Bajarajota petiriavibitsaëtozaneto tajiyoverena taenubena Jesús petëpaejava. Bajarapapetiriavi Jesús pepëta napona Galilea nacuaverena, Jesús peyavenonaevimitsi.

⁵⁶ Bajara papetiriavibitsaëtozaneto tuatuajëta nanubena mapamatabëxëyoje. Itsava Maríavënëva, Magdala tomarapijiva. Itsava icatsia Maríavënëva. Bajarapova Santiagobeje Josébeje pena. Itsava pijinia Salomévenëva. Bajarapova pijinia Santiagobeje Juanbeje pena. Bajarapova Salomévenëva, Zebedeo pijava.

Pacuenia Jesús petëpaenë mëthëtatsi yabara pelivaisi
(Mr 15.42-47; Lc 23.50-56; Jn 19.38-42)

⁵⁷ Itsa baja canivyotsia, José, Arimatea tomarapijinë, pona nacuaevetsinë Pilatojavabelia. Bajaraponë José bitso pexainanë pexainaejava. José jumecovënëtaponapona

Jesús Cristocuene. ⁵⁸ Nexata José ita pata nacuaevetsinë Pilatojavabelia, vajëta petocopsinexatsi pemëthëtsinexa Jesús petëpaenë. Nexata Pilato itoroba pijajivi petocopsinexatsi. ⁵⁹ Nexata José cruzajavavetsica pitsica Jesús petëpaenë. Mataquion-
aeya daxitanëreca matacacëba pexaniaviria piapiasábanapanata, piaxuirajibipanata. ⁶⁰ Bajaraponë José, pamatacabi tēpa pemëthëtsinexatsi picani, iboitapajanitojavata pinijiibovaju toexanabuatatsi cajena. Nexata bajarapaibovajulia José buata Jesús petëpaenë. Nexata bajaraxuacujinae pinijiibopanaxaneto José tixirena. Yavajuvëpaacatabuata. Nexata baja José naviata pijaboyabelia. ⁶¹ Bajarajota ibovaju itapajavata eecabeje anijavabeje ëMaríavënëvabeje. Itsava María, Magdala tomarapijiva.

Pacuenia vajabitsaëvi Jesús pemëthë evetavanapa yabara pelivaisi

⁶² Pascuafiesta pejonematacabinexa pevajënaeya pamatacabi, judíovi baja banacuen-evereta penacuenebijava. Nexata baja pamatacabi judíovi banacuenevereta penacuenebijava, bitso baja ita caniviyotsia, sacerdotevi penamatacaitorobivi, fariseovi ata, ponalia Pilatojavabelia. ⁶³ Nexata bajarapamonae jumaitsi Pilatojavabelia Jesús yabara:

—Pamatacabi abaxë bajaraponë asaë tsaponaponae bitso najumetsënëtabiaba. Jumai tsabiabi: “Tatëpaecujinae, acueyabi matacabita, icatsia asaënë tsane,” jai tsabiabi. Bajarapejumaitisijava paxanë apo panacofënëtsinë. ⁶⁴ Nexata nijajivi itorobare bajaraponë pemëthë xaniavaetsia pevetsinexa. Nexata nijajivi bajaraponë pemëthë xaniavaetsia evetsiana acueyabi matacabijavabelia, bajaraponë pecapaebimatcabijavabelia. Nexata acuenebi tsane pijajivi meravi pejutsinexatsi mëthëvecua. “Namatacota rabaja Jesús,” pejajava ata jivijavabelia, acuenebi tsane. Itsa bajarapacuenia pijajivi jumai tsipae, nexata najumetsënëtsipa copiaya Jesús penajumetsënëtsijava matatoxenetsia. Nexata bajarapacuenia yamaxëitorobijitsipa jivi ayaibitsaëtoxaneto, jai bajarapamonae Pilatojavabelia.

⁶⁵ Pilato nexata jumaitsi bajarapamonaejavabelia:

—Mapamonae tajajivi, vajabitsaëvije, payajavaponare. Nexata paitorobare bajarapamonae Jesús pemëthë pevetsinexa xaniavaetsia, jai.

⁶⁶ Nexata bajarapamonae vajabitsaëvi barëponalia Jesús pemëthëjavabelia. Bajarapamonae pemaëtoupi catsataruta Jesús pebuatsiibovajutsi pevëpaacatsiibopanajumata. Itsaupi pijinia catsata iboitapajanitojavabelia. Bajarapacuenia exana peyapëtaenexa petixitsijava muetsia Jesús peyavajuvëpa acatabuatsiibopanatsi. Bajaraxuacujinae itoroba vajabitsaëvi Jesús pemëthëvëpa pevetavanapaenexa.

28

Pacuenia Jesús petëpaecujinae icatsia asaë yabara pelivaisi (Mr 16.1-8; Lc 24.1-12; Jn 20.1-10)

¹ Judíovi baja penacueraevetsimatacabi ita verevereca, meravia pitsijavata, bajayacunua, ajena matacabi tsarucaponae, María, Magdala tomarapijiva, itsaMaría yajava, taeyojopaliabeje Jesús pebuatsiibovajutsijavabelia. ² Jemata ira najëaba. Tsipaji Dioso pijaángel runaica athëbëvetsica. Ángel ita pata Jesús pebuatsiibovajutsijavata, tixita Jesús peyavajuvëpa acatsiibopanaxanetomi. Bajaraxuacujinae ángel eca bajarapabopanajumata. ³ Bajaraponë ángel naitayota. Pacuenia yamaxëcotia itsi, bajara cotiaitsi ángel. Penaxatatsijava niojai daxita peniojaijava matatoxenetsia. ⁴ Vajabitsaë, pamonae evetanubena Jesús pebuatsiibovajutsivëpa, ita tane ángel, neconecojai pecajunavi. Bobenajunua bepetëpaevi. ⁵ Nexata ángel jumaitsi petirivabejejavabelia:

—Pëtsa pajunavamebeje. Yapëtaniji xua yabara paponamebeje. Jesús pecobematabiabarutsinëmitsi cruzajavabelia, pajaitamebeje. ⁶ Ajibi raja tsarucae majotaje. Asaë

rabaja icatsia pacuenia baja cajena tajëvelia jumaitsi. Parenamërebeje panetaenexabeje itsajota picani buatatsi. ⁷ Bajaraxuacujinae paliamëbeje tsane bepijia. Pijajivijavabelia patsipaebianamebeje mapacueniaje: “Petëpaenëmi rabaja icatsia asaë. Panevajënaeyabelia pina pona Galilea nacuayabelia. Baja pina jotalia pacaxitajarabianame,” pajamëbeje tsane pijajivijavabelia. Bajarapalivaisiyo xainajë patacatsipaebinexabeje, jai ángel bajarapovabejejavabelia.

⁸ Nexata bajarapovabeje naviatabajiravabeje Jesús pebuatsiibovajutsivecua. Junavabeje picani. Itsiata barëyabeje bitso. Cujinaetabajiravabeje petsipaebinxabeje Jesús pijajivijavabelia. ⁹ Bajarapovabeje namutualia pecujinaejinaenajetarucaejavatabeje, Jesús jemata tsitanaitajëtatsibeje. Nexata bajarapovabeje kujitabaliabeje Jesúsjavabelia. Bajacobatsibeje. Nexata pematatabacabëta nucajunuabeje. Sitaicaliabeje yaiyataeya Jesús pecopiapitsinexabeje bajarapacuenia. ¹⁰ Jesús nexata jumaitsi bajarapovabejejavabelia:

—Pëtsa pajunavamebeje. Paliamërebeje tajajivijavabelia. Pajumaitsimëbeje tsane tajajivijavabelia: “Jesús raja jumaitsi. Paponeremelia pina Galilea nacuayabelia. Baja pina jotalia pacacaxitajarabiana Jesús,” pajamëbeje tsane tajajivijavabelia, jai Jesús.

Pacuenia vajabitsaëvi navajunupaeba yabara pelivaisi

¹¹ Paepatota ëMaríavënëvabeje naviatabeje Jesús pebuatsiibovajutsijavavelia, vajabitsaëvi, Jesús pemëthë pevetsiviyajuvënëvi, pona tomarabelia. Bajarapamonae tsipaeba sacerdotevi penamatacaitorobivijavabelia pacuenia tane bajarapamonae. ¹² Nexata sacerdotevi penamatacaitorobivi pona judíovi pijaancianovijavabelia penabarëcuaicuajainexa penajamatabëjëpaenexa pacuenia exanaejitsia. Nexata jane baja bajarapamonae najamatabëcuenejëpa. Nexata bajarapamonae rajuta ayaijava palata vajabitsaëvijavabelia. ¹³ Bajarapamonae jumaitsi vajabitsaëvijavabelia:

—Jivijavabelia pajumaitsimë tsane: “Meravi pataitamajitsita, Jesús pijajivi pata. Nexata bajarapamonae juta Jesús petëpaenë,” pajamë tsane. ¹⁴ Nexata nacuaevetsinë Pilato itsa jumetaena mapajumeje, paxanë itsiata pacayavenonaenatsi itsacuene papecaexanaeyaniva, jai bajarapamonae vajabitsaëvijavabelia.

¹⁵ Nexata vajabitsaëvi jejai. Nota bajarapapalata. Nexata jane baja vajabitsaëvi pona najumetsënëtsiaya jivijavabelia pejumaitsinexa pacuenia itorobatsi. Nexata vajabitsaëvi najumetsënëtsiaya jumai tsaponae jivijavabelia:

—Meravi pataitamajitsita, Jesús pijajivi pata. Nexata Jesús pijajivi petëpaenë jutatsi, jai tsaponae jivijavabelia.

Bajarapacuenia vajabitsaëvi pepaebixae, judíovi juya bajarapacuenia natsipaebapona. Nexata mapamatacabijavaberena ataje judíovi jumai tsabiabi:

—Jesús pijajivi petëpaenë jutatsi, jai tsabiabi.

Pacuenia Jesús petëpaecujinae icatsia itsa asaë, pijajivi itoroba pejumelivaisi jivi petotsipaebanajetarubenaenexatsi daxitanacuanëjava yabara pelivaisi

(Mr 16.14-18; Lc 24.36-49; Jn 20.19-23)

¹⁶ Jesús pijajivi once ponëbeje pona Galilea nacuayabelia. Jesús pijajivi pona petutojumabelia, patsutojumatalia Jesús caxitajarabiapaebatsi. ¹⁷ Nexata bajarapat-sutojumata Jesús pijajivi itsa taenuta Jesús, yaiyataeya pitabarata pematatabacabëta tonubena. Itsiata itsamonae Jesús pijajiviyajuvënëvi jamatabëcuenenavëxaniabiaya jamatabëjumaitsi:

—Apo Jesús meta, jamatabëjai.

¹⁸ Nexata Jesús pijajivi kujirena. Jumaitsi pijajivijavabelia:

—Dioso baja cajena nevetsiaexana daxitacuene athëbëtatsia, daxita mapanacuajava ataje, taevetsinexa. ¹⁹ Nexata pacaitorobatsi. Paponare daxitanacuanëjava

daxitanacuanëpijivi tajumelivaisi patanetotsipaebinexamë tanejumecovënëtsinexa. Bajarapamonae pabautisabaponaename taxa pevënëta, xanë ata pexënatonë tavënëta, Espíritu Santo ata pevënëta. ²⁰ Bajarapamonae patsipaebaponaename pejumecovënëtavanapaenexa daxita pacuenia pacaitorobatsi. Pëtsa panacofënëtame daxitamatacabi patacayajavaponaponaejava. Nacua pevereverecaejavabelianexa ata pacayajavaponaponaenatsi, jai Jesús pijajivijavabelia.

Pexanialivaisi Jesucristo pelivaisi, San Marcos peyaquinaelivaisi

Pacuenia Juan jivibautisabinë jivi livaisi tsipaeba petusato nacuata yabara pelivaisi (Mt 3.1-12; Lc 3.1-9, 15-17; Jn 1.19-25)

¹ Mara pacuenia taxuxuaba pexanialivaisi, Jesucristo Dioso pexënato pelivaisije.

² Bajayata Diosojumepaebinëmi, profeta Isaíaspijinë, tajëvelia yaquina Dioso pejumait-sijava pexënatojavabelia. Dioso jumaitsi pexënatojavabelia mapacueniaje:

Itorobianajë nevajënaeyabelia tanejumelivaisipaebinënexa. Catsivajënaexanebijitsia ni-janamuto. ³ Nexata tanejumelivaisipaebinë vavajai tsane petusato nacuata.

Jumaitsi tsane jivijavabelia: “Jivi baxaneba panamutoverena najetarucaejit-sia petuxanenë. Batoroviaexananua namuto. Bajara pijinia pacuenia pax-amë ata panajamatabëcuenexaniavaere pepo petuxanenë pepatsivajënaeya pax-amëjavaberena,” jai tsane tanejumelivaisipaebinë xamë yabara,

jai bajayata tajëvelia Dioso pexënatojavabelia pejumait-sijava Juan jivibautisabinë jivijavabelia Dioso pejumelivaisi petsipaebanajetarucaejavanexa yabara.

⁴ Bajaraxuata nexata Juan jivibautisabinë Dioso pejumelivaisipaebinë najetaruca petusato nacujava Jesús pevajënaeya. Juan jivijavabelia jumai tsaponae mapacueniaje:

—Pacopabare pibisiacuene paneexanabiabijava. Panajamatabëcuenepënyorore Diosojavabelia. Bajaraxuacujinae pacabautisabianatsi. Nexata Dioso pacavecuaajibi-aexanaena panijaneconimi, jai tsaponae Juan jivijavabelia.

⁵ Nexata ayaibitsaëtöxaneto Judea nacuapijivi, Jerusalén tomarapijivinua, muxu- naponabiabatsi Juan petsipaebilivaisi penamuxunaevetabiabinexatsi. Nexata bajara-pamonae pibisiacuene pexanaejavami, roviaia Diosojavabelia navecuapaebapona. Bajaraxuacujinae Juan bautisabapona bajarapamonae Jordán meneta.

⁶ Juan naxatata camellonata pexanaejava. Naepacëta cuerobocoto. Pexaejava ëbosesë, jabëra yajava. ⁷ Juan Jesús pelivaisi jivi tsipaebapona. Jumai tsaponae tajëvelia Jesús yabara:

—Tacovëverena patsiana itsanë. Bajaraponë daxitacuene pexanaenexa pecaëjëpaenëtsi tsane. Xanë raja saya beveliajamatabëcuenenënë bajaraponëvecua. Nexata vecuaauranë bajaraponë bepijajivitonënë tanataenexa. Nexata auranë pijazapato ata tataxujonotsinexa. ⁸ Xanë raja saya pacabautisabatsi merata. Ponë rajane xanëcujinae patsiana, bajaraponë pacatsijamatabëjoneyaexanaponaena Espíritu Santo, jai tsaponae Juan jivijavabelia Jesús yabara tajëvelia pevajunupaebijavata Jesús penajetarucaejavanexa.

Pacuenia Juan bautisaba Jesús yabara pelivaisi (Mt 3.13-17; Lc 3.21-22)

⁹ Jesús najetaruca Nazaret tomaraverena, Galilea nacuata pecaetomaraverena. Nexata Juan bautisaba Jesús Jordán meneta. ¹⁰ Jesús pebautisabicujinaetsi menevetsina penonotajunaejavata, tane itaboxo penapatsijava. Bajarajota Jesús tane Espíritu Santo ata perunaejavatsica pematatsënëatsica beucucuto. ¹¹ Jesús jumetanenua athëbëvetsica Dioso pejumait-sijavatsi: “Xamë raja taxënatomë, bitso tacaasivanë. Bitso casivajamatabëcuenëbarëyatsi,” pejaijavatsi.

Pacuenia Jesús jamatabëcuenëjëbatsi dovathi yabara pelivaisi (Mt 4.1-11; Lc 4.1-13)

¹² Jesús Juan pebautisabicujinaetsi, bepijiayo Espíritu Santo ponaeyaexanatsi petusato nacujavabelia. ¹³ Bajarajotalia daxitacuenëviria unupijivi jinavanapa. Nexata

bajarajota Jesús ponapona, caenë, cuarenta pamatacabibeje. Bajarapamatacabianëta dovathi picani Jesús jamatabëcueneëjébatsi pibisiacuene pexanaenexa. Bajaraxuacujinae ángelevi runaica Jesús peyavenonaenexatsi.

Pacuenia Jesús Galilea nacuata taxuxuaba Dioso pitorobilivaisi jivi petsipaebijava yabara pelivaisi

(Mt 12.12-17; Lc 4.14-15)

¹⁴ Juan penaneconitsiaexanaenexatsi vajabitsaë vaetabatsi. Nexata penaneconitsivi pejebabiabibota Juan naneconitsiaponapona. Nexata abaxë Juan penaneconitsivi pejebabiabibota itsa ponapona, Jesús najetaruca Galilea nacuajavaberena. Jesús jivi tsipaebaponarena pexanialivaisi. Tsipaebaponarena daxita Dioso pijajivi pevetsijavanexa. ¹⁵ Jesús jumai tsaponae jivijavabelia mapacueniaje:

—Imoxoyo rabaja pevajënae pecopiapatsinexa Dioso papecaevetsimatacabinexa. Nexata pacopabare pibisiacuene paneexanabiabijava. Panajamatabëcuene pënëyorore Diosojavabelia. Pajumecovënëre mapapexanialivaisije papecacapanepaelivaisinexa, jai tsaponae Jesús jivijavabelia.

Pacuenia Jesús junata cuatro ponëbeje dujuai peyamatajucabiabivi yabara pelivaisi

(Mt 4.18-22; Lc 5.1-11)

¹⁶ Jesús najetaruca Galilea pucaxaneto itapaya. Nexata Galileapuca itapata Jesús taenuta anijanëbeje nacaebananëbeje, Simónbeje Andrésbeje. Bajaraponëbeje daxitamatacabi canacujitsia dujuai yamatajucabiabibeje. ¹⁷ Nexata Jesús jumaiti bajaraponëbejejavabelia:

—Naxanitsia. Panepënaponarebeje. Nexata pacacujarubianatsibeje jivi panejucaenexabeje. Pacuenia dujuai payamatajucabiabimebeje, bajarapacuenia jivi pajucaenamebeje Dioso pijajivinexa, jai Jesús bajaraponëbejejavabelia.

¹⁸ Nexata bajaraponëbeje dujuai peyamatajucabiabijavamibeje bajarajota puenetabuatabeje. Nexata baja naponabeje Jesús pepëta.

¹⁹ Nexata icatsia bebeliayo pevajënaeyabelia Jesús barëpona. Icatsia Jesús taenuta anijanëbeje Santiagobeje Juanbeje, Zebedeo pexënatobeje. Bajaraponëbeje pijajeraënëta xanebanucabeje dujuai peyamatajucaejavabeje. ²⁰ Nexata icatsia Jesús junata bajaraponëbeje ata. Nexata bajaraponëbeje bajarajota jerata puenetanutabeje paxa Zebedeo jane baja. Nexata Zebedeo, pijajivi yajava, nacopatanuca bajarajota. Nexata baja Santiagobeje Juanbeje naponabeje Jesús pepëta.

Pacuenia pebi dovathi peyajavaponaponaenë Jesús jamatejemayaexana yabara pelivaisi

(Lc 4.31-37)

²¹ Nexata Jesús, pijajivi yajava, pata Capernaum tomarabelia. Judíovi penacueraevetsimatacabita Jesús joneya judíovi penacaetuatabiabiboyalia. Nexata bajarajota Jesús jivi livaisi tsipaeba. ²² Nexata Jesús pejumetaevitsi jamatabëcuenenabenajaca Jesús petsipaebilivaisi yabara. Bajarapamonae jamatabëcuenenabenajaca tsipaji xaniavaetsia Jesús tsipaeba Dioso pitorobinëtsicuenia. Apo tsipaebi pacuenia judíovi pecujarubivi tsipaebabiaba. ²³ Bajarajota pebi dovathi peyajavaponaponaenë naeca. Nexata bajaraponë Jesúsjavabelia vavajai tsaxuabi. Jumaiti:

²⁴ —¡Jesús, Nazaret tomarapijinëmë, panevecuaponare baja! ¿Detsa xua paneexanaejitsiamë? ¿Najetarucame tsaja pataneveretsinexamë? Xanë cajena cayapëtanetsi. Xamë raja Dioso pexënatomë, pepo pexaniajamatabëcuenenëmë, jai dovathi peyajavaponaponaenë Jesúsjavabelia.

²⁵ Jesús nexata jumeitaveta dovathi. Jumaiti:

—¡Moyamëre! ¡Vecuapitsapare baja maponëje! jai Jesús.

²⁶ Nexata dovathi pebi pinijicuenia devacaibiaexanatsi. Dovathi vavajai pinijicuenia. Nexata baja dovathi pitsatabijirava jivitonēvecua. ²⁷ Nexata daxitajivi bajarapacuenen ita tane, bitso jamatabēcuenenabenajaca. Najumaitsi bajarapamonae:

—¿Detsa mapitsicuenije? ¿Detsa mapitsipejanacujarubicuenije? ¡Maponēje Jesús, beDioso pitorobinētsitsica! ¡Dovathi ata jumecovēnētatsi! ¡Nexata Jesús pitavetsixae dovathi, pebi baja vecuapitsapatsi! najai bajarapamonae.

²⁸ Nexata daxita Galilea nacuapijivi bepíjia Jesús vēnēlivaisitanetsi Dioso pesaēta pini-jicuenen pexanaponaejava.

Pacuenia Simón Pedro pijava pena Jesús tojamatejemayaexana yabara pelivaisi
(Mt 8.14-15; Lc 4.38-39)

²⁹ Jesús baja pitsapa judíovi penacaetuatabiabibovecua. Nexata Santiagobeje Juan-beje Jesús yajavapona. Jesús bana napona Simónbeje Andrésbeje pijaboyabelia. ³⁰ Nexata Simón pijabota Simón pijava pena Jesús bana pevajēnae romaebanucatsi camata. Nexata itsamonae bepíjia Jesús tsipaebarecēpatsi bajarapova peromaebanucaejavatsi. ³¹ Nexata Jesús imoxoyotabilia peromaebanucaevatsi. Cobeyotsiaya maticota. Nexata bajarajota peromaebanucaevatsi vecuaajibi tsanajetsitsireca baja domae. Nexata bajarapova Jesús bana pexaejava toexanatsi.

Pacuenia ayaibitsaēto jivi piavitanevi Jesús jamatejemayaexana yabara pelivaisi
(Mt 8.16-17; Lc 4.40-41)

³² Itsa baja ajena meravitsia, Jesús javaberena tocapatatsi daxita piavitanevi. Tocapatatsinua dovathi peyjavajinavanapaevinua. ³³ Daxita tomarapijivi Jesús pepatsibota baupjavaberena nacaetuata. ³⁴ Nexata Jesús jamatejemayaexana ayaibitsaēto daxitacuenen vitane pexainaevimi. Vecuacapitsapanua dovathi peyjavajinavanapaevi. Jesús apo tocopatsi dovathi pecuaicuajinaxa jivijavabelia pevajunupaebiyantivatsi. Tsipaji dovathi xaniavaetsia Jesús yapētanetsi Dioso pexēnatocuene.

Pacuenia Dioso pitorobilivaisi Jesús jivi tsipaeba Galilea nacuata yabara pelivaisi
(Lc 4.42-44)

³⁵ Pepo bajayacunua, abaxē ita apo napebetsi maticabi, Jesús naēcota. Nexata pitsapalia bovecua. Pesaicaeyojavabelia pona pevajētsinaxa Diosojavabelia. Jesús nexata pecovēta maticabi baja. ³⁶ Itsa baja maticabi, Simón bana Jesús pējaitaponalia.

³⁷ Itsa baja bajarapamonae Jesús caxitajaraba, jumaiti bajarapamonae:

—Daxita raja cajaitaruta pecataenexa, jai bajarapamonae Jesúsjavabelia.

³⁸ Nexata Jesús jumaiti:

—Ponatsi baja imoxoyo penaetomaraxijavabelia bajarajotalia tatsipaebinxaxa Dioso pitorobilivaisi. Bajaraxuanexa bovecua pitsaparenajē, jai Jesús.

³⁹ Nexata daxita Galilea nacujava Jesús jivi tsipaebapona Dioso pitorobilivaisi judíovi penacaetuatabiabibonējava. Jesús jivi dovathi vecuacapitsapapanua.

Pacuenia Jesús jamatejemayaexana bajayajebi bitso peperabētsabanaenē yabara pelivaisi
(Mt 8.1-4; Lc 5.12-16)

⁴⁰ Jesús imoxoyorenatsi bajayajebi bitso peperabētsabanaenē. Nexata bajaraponē pe-matabacabēta nucajunua Jesús pitabarata. Bajaraponē pinijicuenia vajēta Jesúsjavabelia. Jumaiti:

—Cacaējēpa tanejamatejemayaexanaenexamē. Itsa jitsipame, nejamatejemayaexanare mapavitanevecuaje, jai peperabētsabanaenē Jesúsjavabelia.

⁴¹ Nexata Jesús bajaraponē itaxutobejiobiatane. Pecobeta perabējayalia. Jumaiti:

—Jājā, jitsipajē cajena. Jamatejemamē rabaja, jai Jesús peperabētsabanaenējavabelia.

⁴² Bajarapacuenia Jesús pejumaitisjavata peperabētsabanaenēmi baja perabēxanepananajereca. Jamatejema baja. Peperabētsabanaejavami baja ajibi. ⁴³ Nexata

baja Jesús naviatsiaexana bajaraponë. Pinijicuenia Jesús muxujioba bajaraponë penaviatsivajënaeya. Jesús jumaitsi:

⁴⁴—Nejumetaema. Pëtsa itsajivijavabelia tsipaebame tacajamatejemayaexanaejava. Naitajëremelia jane sacerdotenëjavabelia templobota penacuenebinëjavabelia. Nexata sacerdotenë cataena pecavecuaajibijava baja niavitanejavami. Diosonexa rajuremelia ofrenda sacerdotenëjavabelia pecavecuaajibiaexanaexae niavitanejavami. Bajara tsipaji pacuenia bajayata vajasalinainëmi Moiséspijinë nacaitoroba. Nexata jivi yapëtaena pepacuene baja pecavecuaajibijava niavitanejavami, jai picani Jesús bajayajebi bitso peperabëtsabanaenëmijavabelia.

⁴⁵ Nexata bajaraponë lia. Itsiata tsipaebanajetaruca daxitajivijavabelia Jesús pejamatejemayaexanaejavatsi. Bajaraxuata Jesús apo jitsipae naitajëtsiaya pejonejava itsatomarabelia ata, jivi ayaibitsaëtoxaneto pematatoyoronaeyanivatsi. Jesús saya ponapona tomaranë piajibijava. Itsiata cajena daxita nacuanëjavaverena jivi muxunapatabi-abatsi Jesús.

2

Pacuenia Jesús jamatejemayaexana petabusipacuenabinëtsi yabara pelivaisi

(Mt 9.1-8; Lc 5.17-26)

¹ Itsamatacabi icatsia Jesús naviarena Capernaum tomaraberena. Nexata jivi yapëtane pabota Jesús patajopa. ² Nexata jivibitsaëtoxaneto nacaetuata Jesús pepat-sibota. Bo baupa ata cajena bitso jivi vënëca. Nexata bajarapamonaejavabelia Jesús tsipaeba Dioso pitorobilivaisi. ³ Nexata cuatro ponëbeje parena, camayota peyavëtaranajetarubenaevi petabusipacuenebinëtsi. ⁴ Nexata petabusipacuenabinëtsi acuenebi bajarapamona pecapatsijava Jesús pitabarayabelia. Tsipaji bo ënëtuatuajë bitso jivi yavënëca. Nexata petabusipacuenabinëtsi pecapatsivi, bomatatu-javavetsica vojoexana Jesús pecanacujitsiatsica. Nexata bajarapavojotuat-sica camayota yacopatsica petabusipacuenebinëtsi. ⁵ Jesús jamatabëcueneyapëtane pacuenia bajarapamona sivanajamatabëxainatsi. “Nacatojamatejemayaexanaenatsi cajena,” pesivajamatabëjaijavatsi Jesús jamatabëcueneyapëtane. Bajaraxuata petabusipacuenebinëtsijavabelia Jesús jumaitsi mapacueniaje:

—Tajabananë, pibisiacuene rabaja nexanaeneconimi cavecuaajibiaexanatsi, jai Jesús.

⁶ Bajarajota judíovi pecujarubiviyajuvënëvi naena. Bajarapamonae itsa jumetaeyena bajarapacuenia Jesús pejumait-sijava, nexata jamatabëcuenenavëxaniabiaya bëpënëa jamatabëjumai tsenae mapacueniaje:

⁷—Maponëje Jesús Dioso apo pejitsipacuenia cuaicuaijai. Itsanë ata cajena apo caëjëpaetsi itsajivi pibisiacuene pexanaeneconi pevecuaajibiaexanaenexa. Caenë Dioso caëjëpatsi pevecuaajibiaexanaenexa bajarapacueni, jamatabëjai tsenae bajarapamona.

⁸ Jesús jamatabëcueneyapëtane bajarapamona jamatabëcuenenavëxaniabiaya bajarapacuenia pesivanajamatabëxainaejavatsi. Nexata Jesús jumaitsi bajarapamonaejavabelia:

—Pëtsa bajarapacuenia panesivanajamatabëxainame. Tsipaji cajena xanë necaëjëpa jivi pibisiacuene pexanaeneconimi tavecuaajibiaexanaenexa. ⁹ Paxamë apo pacacaëjëpae ata itsajivi pibisiacuene pexanaeneconi panevecuaajibiaexanaenexa, pacacaëjëpa picani saya jema panejumait-sinexa petabusipacuenebinëtsijavabelia mapacueniaje: “Cavecuaajibiaexanatsi rabaja pibisiacuene nexanaeneconimi,” panejainexa. Tsipaji itsajivi ata apo yapëtae tsipae saya jema panejumait-sijava. Itsiata bait-si jane itsa apo pacacaëjëpae panejamatejemayaexanaenexa petabusipacuenebinëtsi, acuenebi panejumait-sinexa bajaraponëjavabelia mapacueniaje: “Nonotapunare. Nijacamayo

pire. Ponare baja,” panejainexa. Tsipaji bajarapacuenia pajumaitsimë ata, itsa apo jamatejema tsipae bajaraponë, nexata daxitajivi pacayapëtaejitsipa apo papeca-caëjëpacuene panejamatejemayaexanaenexa, jai nexata Jesús judíovi pecujarubivijavabelia.

¹⁰ Icatsia Jesús jumaiti bajarapamonaejavabelia:

—Xanë, Daxitajivi Pematapijinënë, mapanacuata necaëjëpa tavecuajibiaexanaenexa itsajivi pibisiacuene pexanaeconimi ata pacuenia baja exanajë maponëjavabeliaje. Nexata patanecueneyapëtaexamë tanecaëjëpacuene tavecuajibiaexanaenexa itsajivi pibisiacuene pexanaeconimi ata, pataema pacuenia jamatejemayaexanaejitsianë maponëjë, jai Jesús judíovi pecujarubivijavabelia.

Nexata icatsia Jesús jumaiti petabusipacuenebinëtsijavabelia:

¹¹ —Xamë cajumaitsitsi. Nonotapunare. Nijacamayo pire. Nijaboyabelia baja ponare, jai Jesús.

¹² Nexata bajarapacuenia Jesús pejumaitisjavata petabusipacuenebinëmitsi nonotapuna. Pebocaecamayo baja pita. Pitsapalia baja daxitajivi pitabarata. Nexata daxitajivi itsa tane bajarapacuenia, jamatabëcuenenabenajaquena. Bajarapamonae jumai tsenae mapacueniaje:

—Dioso cajena bitso ayaijamatabëcuenenë. Caeto ata abaxë mapitsicuene pexanaejava apo taetsije, jai tsenae bajarapamonae.

*Pacuenia Jesús pijajivitonënexa junata Levívënë yabara pelivaisi
(Mt 9.9-13; Lc 5.27-32)*

¹³ Jesús pona pucaxaneto itapajavabelia. Nexata jivi ayaibitsaëtoxaneto pënapatatsi bajarabelia. Nexata Dioso pejumelivaisi Jesús tsipaeba bajarapamonaejavabelia.

¹⁴ Bajaraxuacujinae penajetarucaejavata Jesús taeyeta Levívënë, Alfeo pexënato. Leví eca pabota gobierno pejamatabëcuene jivijavabelia matamoyanijobabiaba impuestomatamo. Nexata Jesús jumaiti Levíjavabelia:

—Leví, naxanitsia. Nepënaponare, jai Jesús.

Jejai Leví. Nexata nonotapuna. Leví baja napona Jesús pepëta.

¹⁵ Nexata Leví junata Jesús pebarënananinexa pijabota. Nexata Leví pijabota Jesús pexaejava naxane. Leví pijabota ayaibitsaëto naena gobierno pejamatabëcuene jivijavabelia impuestomatamo pematamoyanijobabivivi. Itsamonae ata nanabane pijamatabëcuenebejevi. Nexata Jesús pijajivi nabarëca bajarapamonaejavata. ¹⁶ Nexata fariseovi, judíovi pecujarubivina, Jesús taeyetatsi daxita bajarapamonaejavata pijajivi penabarënananecaejava. Nexata bajarapamonae jamatabëcuenenavëxaniabiaya jumaiti Jesús pijajivijavabelia:

—Papecacujarubinë Jesús naneconita Diosojavabelia. Tsipaji gobierno pejamatabëcueneta impuestomatamo pematamoyanijobabivivijavata, pijamatabëcuenebejevijavatanua, naxaeyeca pexaejava, jai bajarapamonae Jesús pijajivijavabelia.

¹⁷ Itsa Jesús jumetane mapajumeje, nexata jumaiti bajarapamonaejavabelia:

—Pevaëbinë raja apo vaëbi pejamatejemavi. Pevaëbinë raja piavitanevi vaëba. Bajara pijinia xanë ata itsinë. Apo sivapatajopaenë tajunatsinexa pamonae baja aneconijibi tsavanapae. Sivapatajopajë raja tajunatsinexa pijaneconi pexainaevi. Bajarapamonae junataponajë pecopabinexa pibisiacuene pexanaejava penajamatabëcuenepënyorotsinexa Diosojavabelia, jai Jesús bajarapamonaejavabelia.

*Pacuenia Jesús yanijobatsi pamatacabibeje jivi vajëtapona Diosojavabelia pexaejava
apo pexaeyabiabixae yabara pelivaisi
(Mt 9.14-17; Lc 5.33-39)*

¹⁸ Itsamatacabi Juan pijajivi, fariseovi pijajivinua, pexaejava apo xaevanapae pamatacabibeje Diosojavabelia vajëcapona. Nexata itsamonae Jesúsjavaberena pata. Yanijobatsi pexaejava piatsobicuene yabara. Jumaiti mapacueniaje:

—Juan pijajivi, fariseovi pijajivinua, pexaejava apo xaeyabiabi pamatacabibeje Diosojavabelia vajëtafona. ¿Detsa xuajitsia itsiata xamë nijajivi pexaejava xaeyabiaba pamatacabibeje Diosojavabelia vajëtafona? jai Jesús peyanijobivitsi.

¹⁹ Nexata Jesús jumaiti bajarapamonaejavabelia:

—Pamonae junatatsi penacasabifistajavabelia penanabaninexa, apo atsobi pexaejava itsa abaxë yajavaecatsi pejananacasabinë. Itsa abaxë pejananacasabinë yajavaponaponatsi, acuenebi pexaejava piatsobinexa bajarapamonae. ²⁰ Itsiata baitsi jane itsa pejananacasabinë tsimaxëpatsipatsi pevecuacaponanexatsi itsajavabelia, nexata bajarapamonae pexaejava apo xae tsipae. Tsipaji bitso najamatabëxainaejitsipa pevecuacaponaxaetsi. Bajara pijinia itsi tajajivi ata. Tayajavaponaponaeepato abaxë apo atsobabiabi pexaejava pamatacabibeje Diosojavabelia vajëtafona. Itsiata pamatacabi xanë necaponaena bajarapamonaevecua, nexata jane baja bajarapamatacabi pexaejava apo xae tsane bitso tanesivanajamatabëxainaxae, jai Jesús peyanijobivitsijavabelia.

²¹ Nexata bajarapamonae perujujamatabëcuene baja pecopabinexa, Jesús livaisi tsipaeba comparacióncuenia bajarapamonae pejumecovënëtsinexa ëpejanalivaisi, Jesús petsipaebilivaisi. Bajarapamonae anijajamatabëcuenebeje pexainaejaniva perujujamatabëcuene baja pecopabinexa, Jesús livaisi tsipaeba comparacióncuenia. Perujujamatabëcuene yabara Jesús jumaiti bajarapamonaejavabelia mapacueniaje:

—Itsajivi ata raja apo catsatarutsi pejanapana perujunaxatatsiesetojavabelia. Itsa catsatarutsipa pejanapanata perujunaxatatsiesetojavabelia, nexata pejanapana yanarobotsipa perujuesetojavaverena. Nexata biji bitso pinijivojoto titinaejitsipa. ²² Itsajivi ata pijinia apo epacae pejanavinoranë perujubocodoruanëjavabelia bajayajebi peyajebinexa. Pejanavinoranë itsa epacaejitsipa perujubocodoruanëjavabelia, nexata pejanavinoranë yatititibia tsipae. Tsipaji perujubocodoruanë apo yanayeretsi tsipae. Tsipaji pejanavinoranë pejumalitsëxë abaxë xaina. Nexata itsa yatititibia tsipae, mene naxuabijitsipa, vinoranëmi. Bajaraxuata bepaca pejanavinoranë pejanabocodoruanëjavabelia, jai Jesús peyanijobivitsijavabelia bajarapamonae pejumecovënëtsinexa ëpejanalivaisi, Jesús petsipaebilivaisi, perujujamatabëcuene baja penacopabinexa.

Pacuenia Jesús pijajivi namutua siricanajetarubena trigoxu penacueraevetsimatacabita yabara pelivaisi

(Mt 12.1-8; Lc 6.1-5)

²³ Judíovi penacueraevetsimatacabita Jesús, pijajivi yajava, najetaruca namutua trigo pabianëjava. Nexata Jesús pijajivi piajanixae, trigoxu siricanajetarubena. Xuxaeyabuatafona. ²⁴ Nexata fariseovi jumaiti Jesúsjavabelia:

—¡Taema mapacuenieje! Dioso Moiséspijinëta penajumecopatsilivaisita vajanacaitavetsicuene, nijajivi exana. Apo nacaitavetsi ata trigoxu vajaxaejava, itsiata ajena penacueraevetsimatacabixae, nijajivi apo bexanae mapacuenieje, jai fariseovi Jesúsjavabelia.

²⁵ Nexata Jesús jumaiti fariseovijavabelia:

—Ajena, penacueraevetsimatacabita, tajajivi bajarapacuenia exanae ata, itsiata apo pibisiacuene. Tsipaji bitso piajani. ¿Apo palebimë tsipaji Dioso pejumelivaisibaxuto paneyapëtaenexa pacuenia vajasalinainëmi Davidpijinë, pebarëponaponaevi yajava,

exana pamatacabi bitso piajani? ²⁶ Davidpijinë joneya Dioso pijatemploboyalia pamatacabi Abiatarpijinë daxita sacerdotevi penamatacaitorobinë tsaponaponae. Nexata Dioso pijatemploboënëta, mesajumata, bobena Diosonexa ofrendacuenia petojebipanbëanë. Bajarapapanbëanë itsajivi ata apo tocopatsitsi pexaenexa penaneconitsiyaniva Diosojavabelia. Ësacerdotevi picani tocopatatsi pexaenexa. Davidpijinë apo sacerdotenë ata, xae ata bajarapapanbëanë pijajivi barë, itsiata apo vënananeconitsi Diosojavabelia, jai Jesús fariseovijavabelia.

²⁷ Icatsia Jesús jumaitsi fariseovijavabelia:

—Dioso raja tocopata caematacabi jivi penacueraevetsinexa. Tsipaji Dioso yapëtane pacuenia jivi namatavenona penacueraevetsinexa. Dioso apo exanae jivi saya jema peyaiyataenexa penacueraevetsimatacabianë. ²⁸ Nexata xanë, Daxitajivi Pematapijinënë, netoxanepana cajena tatsipaebinexa pacuene xanepana jivi pexanaenexa penacueraevetsimatacabita ata, jai Jesús fariseovijavabelia.

3

Pacuenia Jesús jamatejemayaexana pebi pecobetsaquenaenë yabara pelivaisi (Mt 12.9-14; Lc 6.6-11)

¹ Penacueraevetsimatacabita Jesús joneya judíovi penacaetuatabiboyalia. Nexata bajarajota pebi naeca pecobetsaquenaenë. ² Nexata Jesús naitaxutocaevetatsi fariseovi petaenexatsi pecobetsaquenaenë pejamatejemayaexanaejava penacueraevetsimatacabita. Nexata Jesús pecobetsaquenaenë itsa jamatejemayaexana penacueraevetsimatacabita, “Jesús raja naneconita Diosojavabelia. Tsipaji penacueraevetsimatacabita nacueneba,” pejainexa bajarapamonae. ³ Nexata Jesús jumaitsi pecobetsaquenaenëjavabelia:

—Nonotapunare. Nucare mapamonae pitabarataje, jai.

⁴ Nexata Jesús jumaitsi fariseovijavabelia:

—Penacueraevetsimatacabita ata xanepana vajaexanaenexa pexaniacuene. Xanepana vajajamatejemayaexanaenexa piavitanevi, jai Jesús fariseovijavabelia.

Nexata fariseovi Jesús apo jumepitsitsi. ⁵ Nexata Jesús anaeya naëcota bajarapamonae. Bajaraxuacujinae Jesús bejamatabëjireca. Tsipaji yapëtane piajamatäcuenetajajava fariseovi. Nexata Jesús jumaitsi pecobetsaquenaenëjavabelia:

—Namaxërovire, jai.

Nexata pecobetsaquenaenë namaxërovita. Bajarajota cobexanepananajereca baja. Pecobetsaquenaejavami ajibi. ⁶ Nexata fariseovi itsa tane Jesús pecobexanepanaeyaexanaejava pecobetsaquenaenë, fariseovi anaepana. Nexata bajarapabovecua pitsapa. Pona penabarëcuaicuaijainexa nacuaeavetsinë Herodes pijajivijavabelia. Bajarapamonae najumejaita Jesús pebeyaxuabinexatsi.

Pacuenia jivi nacaetuata Galilea pucaxaneto itapata yabara pelivaisi

⁷ Jesús, pijajivi yajava, pona Galilea pucaxaneto itapayabelia. Nexata Jesús pënaponaliatsi ayaibitsaëttoxaneto Galilea nacuapijivi. ⁸ Nexata Jesús pënaponaliatsi Judea nacuapijivinua, Jerusalén tomarapijivinua, Idumea nacuapijivinua, Jordánmene itsapanaverenapijivinua, imoxoyo Tiro tomaravecua pejinavanapaevinua, imoxoyo Sidón tomaravecua pejinavanapaevinua. Daxita bajarapamonae Jesús pënaponaliatsi tsipaji Jesús vënëlivaisitanetsi Dioso pesaëta pinijicuene pexanaponaejava. ⁹ Nexata Jesús pijajivi itoroba jera petoxaniavaetarutsinexatsi menetareca. Itsa bajarapajivibitsaëttoxaneto Jesús bitso matacënënaponatsi, nexata bajarapamo ënëabereca Jesús perunaenexareca. ¹⁰ Jesús baja ayaibitsaëto piavitanevi jamatejemayaexana. Bajaraxuata itsamonae, piavitanevi, Jesúsjavabelia natorotaponabiaba pejayatsinexatsi.

¹¹ Dovathi peyajavajinavanapaevi Jesús ita taeyabiabatsi, bajarapamonae irata othopabiaba Jesús pitabarata. Bajarapamonae aëjai tsabiabi.

—Xamë tsaena Dioso pexënatomë, jai tsabiabi dovathi peyajavajinavanapaevi.

¹² Nexata Jesús jumeitaveta bajarapamonae. Jumaitsi:

—“Dioso raja pexënato,” pajamë pëtsa xanë yabara itsajivijavabelia, jai Jesús bajarapamonaejavabelia.

Pacuenia Jesús pijajivi ayaibitsaëttoxanetoyajuvënëvi itapeta saya doce ponëbeje apóstolevinexa yabara pelivaisi

(Mt 10.1-4; Lc 6.12-16)

¹³ Jesús pijajivi ayaibitsaëttoxanetoyajuvënëvi, doce saya ponëbeje, itapeta apóstolevinexa. Jesús pitapetsivajënae apóstolevinexa, junaya petsutojumabetsia. Bajaravetsica Jesús junatanuca ponëbeje jamatabëitapeta apóstolevinexa. Nexata pamonaev Jesús itapeta apóstolevinexa, junaya petsutojumabetsia, Jesúsjavabetsia. ¹⁴ Nexata Jesús caetuata caebitsaëttoyo, doce ponëbeje pijajivi, pepënjajinavanapaevinexatsi. Jesús itorobijitsianua bajarapamonae daxitanacuanëjava jivi petsipaebanajetarubenaenexa Dioso pitorobilivaisi. ¹⁵ Jesús pijajivi jamatabëcuenecaëjëpaeyaexana Dioso pesaëta pejamatejemayaexanaponaenexa piavitanevi. Jamatabëcuenecaëjëpaeyaxananua Dioso pesaëta dovathi jivi pevecuacapitsaponaenexa. ¹⁶ Jesús pijaapóstolevi, doce ponëbeje, mapevënëanëje. Copiaya ponë pevënë Simón. Bajaraponë Jesús vënëruba itsavënë, Pedro. ¹⁷ Itsanë Santiago. Itsanë Juan. Santiagobeje Juanbeje nacaebananëbeje, Zebedeo pexënatobeje. Bajaraponëbeje Jesús vënëruba Boanerges. “Boanerges,” ita jai, bajarapamonae pija-jumeta mapajumetaje pejumaitisijume: “Yamaxë pexënatobeje,” pejaijume. ¹⁸ Itsanë pevënë Andrés. Itsanë Felipe. Itsanë Bartolomé. Itsanë Mateo. Itsanë Tomás. Itsanë Santiago, Alfeo pexënato. Itsanë Tadeo. Itsanë Simón, celotenë. ¹⁹ Itsanë Judas Iscariote. Bajaraponë bexëjavabelia Jesús canajetsijitsiatsi pijavajabitsaë pecobeyabelia pebeyaxuabinexatsi.

Pacuenia itsamonae Jesús yabara jamatabëcuenenavëxaniabiaya jumaitsi: “Beelzebú raja pesaëta, Jesús dovathi jivivecua capitsapapona,” jai yabara pelivaisi

(Mt 12.22-32; Lc 11.14-23; 12.10)

²⁰ Jesús boya joneya pijajivi yajava. Icatsia jivibitsaëttoxaneto nacaetuata. Nexata acuenebi Jesús pijajivi pebarënananijava. ²¹ Itsamonae Jesús yabara jumaitsi: “Jesús raja matajemabatsi,” jai. Nexata bajarapacuenia itsamonae Jesús yabara pejumaitisijava, Jesús pijamonae vënëlivaisitanetsi. Nexata Jesús pijamonae ponarena Jesúsjavaberena pebarëponaenexatsilia picani.

²² Judíovi pecujarubivi, Jerusalén tomaraverena peponaevi, jamatabëcuenenavëxaniabiaya Jesús yabara jumaitsi:

—Mara ponë Jesúsje, Beelzebú yajavaponapona. Beelzebú raja daxita dovathivi pevetsinë. Bajaraxuata Jesús Beelzebú pesaëta dovathi jivivecua capitsapapona, jai judíovi pecujarubivi jamatabëcuenenavëxaniabiaya Jesús yabara.

²³ Nexata Jesús junata bajarapamonae jamatabëcuenenavëxaniabiaya pejumaitisijava pecanaëjëtsinexa. Nexata bajarapamonaejavabelia Jesús jumaitsi mapacueniaje:

—Beelzebú raja dovathivi jivivecua apo capitsapaponaev tsipae. Tsipaji Beelzebú dovathi jivivecua ita capitsapaponaevjitsipa, nexata Beelzebú bepijavajabitsaë taejitsipa pijajivi. ²⁴ Pacanaëjëre mapacuenieje. Nacaenacuapijivi ata ita navecuanatsanaevjitsipa penasivanavajabitsaëtsinexa, namataenetsia naverebiabijitsipa nacaenacuapijivi ata. ²⁵ Bajara pijinia nacaemonae ata itsipae. Itsa navecuanatsanaevjitsipa penasivanavajabitsaëtsinexa, namataenetsia naverebiabijitsipa nacaemonae ata. ²⁶ Bajara pijinia itsipae dovathi ata. Dovathi jivivecua ita capitsapaponaevjitsipa pijajivi dovathivi, nexata bepijavajabitsaëne taejitsipatsi pijajivi. Nexata apo sivaajamatabëcuenesaë

tsipae pexanaponaejavanexa. Nacopiarucaeyaexanaejitsipa dovathi, jai Jesús judíovi pecujarubivijavabelia.

²⁷ Bajarapamona pecanaējētsinexa Jesús bitso piasaēnēcuene dovathi matatoxenetsia, Jesús icatsia jumaitsi bajarapamonaejavabelia mapacueniaje:

—Itsajivi ata apo caējēpaetsi pejonenexa bitso piasaēnē pijaboyalia peyacajērētsinexa xua xaina pijabota. Itsiata itsa patsipa bajaraponē matatoxenetsia bitso piasaēnē, nexata cobecētabuatsipatsi. Taxucētabuatsipatsi yajava. Matapania bajarapacuenia yacajērētsipatsi daxita xua xaina pijabota. Bajara pijinia pacuenia xanē ata bitso tasaēnē dovathi matatoxenetsia. Bajaraxuata necaējēpa jivivecua tacapitsapaenexa dovathivi.

²⁸ Xaniajanē pacuenia pacatsipaebatsi. Dioso cajena caējēpatsi daxitajivi pibisiacuene pexanaeneconi pevecuaajibiaexanaenexa. Pibisiacuena jivi Dioso baracuaicuaijai ata, bajarapaneconi ata Dioso caējēpatsi pevecuaajibiaexanaenexa. ²⁹ Itsiata baitsi jane pajivi pibisiacuena baracuaicuaijai Espíritu Santo, bajarapajivi Dioso apo vecuaajibiaexanae tsane bajarapaneconi. Bajarapajivi naneconitsiana daxita matabijavabelianexa, jai Jesús bajarapamonaejavabelia.

³⁰ Bajarapacuenia Jesús jumaitsi tsipaji Jesús Espíritu Santo yjavaponapona atatsi, judíovi pecujarubivi jumaitsi Jesús yabara: “Jesús raja Beelzebú yjavaponapona,” jai. Nexata bajaraxuata bajarapamona naneconita Espíritu Santojavabelia.

Pacuenia Jesús pejuyapijivi, pena yajava, nubena bojumavelia yabara pelivaisi
(Mt 12.46-50; Lc 8.19-21)

³¹ Jesús pejuyapijivi, pena yajava, pata Jesúsjavaberena. Itsiata bajarapamona boyalia apo jonelia Jesús penucaeboyalia. Nexata bajarapamona junatsiaexana Jesús pejumetaeyenaevitsijavabelia. ³² Nexata pamona Jesús petsipaebilivaisi matatoyorotsia jumetaeyenatsi, Jesúsjavabelia jumaitsi:

—Patajatuxanē, ena raja, nejuyapijivi yajava, nuca patapēnēverena. Cajaita raja xamē, jai bajarapamona Jesúsjavabelia.

³³ Nexata Jesús jumaitsi bajarapamonaejavabelia:

—¿Detsa pitsijamatabēcuenevi taena, tajuyapijivinua? jai Jesús.

³⁴ Bajaraxuacujinae Jesús naēcota pematatoyorotsiaenaevitsi. Jumaitsi bajarapamonaejavabelia:

—Mara jota pamona xanējavata penaevije, bajarapamona jane taenajivi, tajuyapijivinua. ³⁵ Tsipaji raja pamona exana pacuenia Dioso itorobatsi, bajarapamona jane baja tajuyapijivi, taenajivinua, jai Jesús bajarapamonaejavabelia.

4

Pacuenia Jesús jivi livaisi tsipaeba peubinē pelivaisicuenia yabara pelivaisi
(Mt 13.1-9; Lc 8.4-8)

¹ Icatsia Jesús taxuxuaba livaisi petsipaebijava Galilea pucaxaneto itapajavata. Nexata jivi ayaibitsaētohaneto nacaetuata itsajota Jesús livaisi tsipaebanuca. Nexata Jesús runareca jera ēnēabereca. Ecareca jera ēnētareca. Daxita jivibitsaētohaneto tajetabovelia nubena. ² Nexata Jesús daxitacuene livaisianē tsipaeba jivijavabelia. Jesús jumai tsaponae bajarapamonaejavabelia mapacueniaje:

³—Panenamuxunaevere mapalivaisije. Peubinē pona pabiabelia peubinexa. Nexata itsa pata pabita, peubixu pexucayabajabarabicuenia ubanajetaruca. ⁴ Nexata pexucayabajabarabijavata itsaxu othopa pabi tuatujajava, penajetarucaenamutojumata. Nexata bajarajota pata baratsui. Xane bajarapaxumi juvinejeva. ⁵ Itsaxu pijinia othopa ibopananējumata, itsajota bitso ira apo aitayaē. ⁶ Nexata icotia bitso itsa ataju, nexata bajarapaxu juvi ata, tsaquenapona. Tsipaji irabereca bitso apo atabunepiarcia. ⁷ Itsaxu pijinia othopa xanēebacabomijavata. Nexata peubixu xanēebotonē caecuenia itsa yjavajuva, bitso xanēebotonē matabcēnēnatsi peubijavami. Nexata peubijava apo xainae

pecuai. ⁸ Itsaxu pijinia othopa pexaniairata. Nexata juva. Xaniavaetsia vitsabaponanua. Xainanua pecuai. Itsabotonë capitsapa treinta paxutobeje tsaponae. Itsabotonë capitsapa sesenta paxutobeje tsaponae. Itsabotonë capitsapa cien paxutobeje tsaponae, jai Jesús bajarapalivaisi petsipaebivijavabelia.

⁹ Nexata icatsia Jesús jumaitsi jivibitsaëtoxanetojavabelia:

—Pajivi jamatabënejumeyapëtane patacatsipaebilivaisi, nenamuxunaevetsi xaniavaetsia, jai Jesús.

Pacuenia yabara Jesús jivijavabelia livaisi tsipaeba ëcomparacióncuenia yabara pelivaisi (Mt 13.10-17; Lc 8.9-10)

¹⁰ Jesús livaisi petsipaebicujinae, jivibitsaëtoxaneto baja Jesús vecuanaviabatsi. Nexata Jesús pijaepato barënacopata doce ponëbeje pijajivi, itsamonae itsiata yajava. Nexata bajarapamonae Jesús yanijobatsi. Bajarapamonae jumaitsi Jesúsjavabelia:

—Palivaisi jivijavabelia tsipaebame peubinë pelivaisicuenia, pajamatabëcuene xaina, patayapëtaenexa panetsipaebare, jai bajarapamonae Jesúsjavabelia.

¹¹ Nexata Jesús jumaitsi bajarapamonaejavabelia:

—Paxamë rabaja xaniavaetsia Dioso pacayapëtaeyaexana Dioso papijajivimë papecaevetsijava. Bajarapacuenie abaxë daxisajivi apo yapëtae. Baitsi ra saicaya pamonae apo tajajivi, tsipaebajë livaisianë ëcomparacióncuenia. ¹² Bajaraxuata nexata bajarapamonae tae ata Dioso pesaëta pinijicuenie taexanaejava, itsiata apo yapëtae pajamatabëcuene yabara exanajë pinijicuenie taexanaejava. Nenamuxunaevetsi ata tatsipaebilivaisi, itsiata apo jumeyapëtae pajamatabëcuene xaina tatsipaebilivaisi. Bajarapacuenia apo jumeyapëtae penajamatabëcuenecopatsiyaniwa Diosojavabelia pibisicuenie pexanaeneconimi Dioso pevecuaajibiaexanaeyanivatsi, jai Jesús.

Pacuenia Jesús yapëtaeyaexana pijajivi, itsamonae yajava, pajamatabëcuene xaina palivaisi tsipaeba peubinë pelivaisicuenia yabara pelivaisi (Mt 13.18-23; Lc 8.11-15)

¹³ Jesús icatsia jumaitsi pijajivijavabelia:

—Itsa apo pajumeyapëtaemë pajamatabëcuene xaina palivaisi pacatsipaebatsi peubinë pelivaisicuenia, ¿detsa nexata pacuenia pajumeyapëtaename daxita palivaisianë pacatsipaebijitsiatsi comparacióncuenia? jai Jesús pijajivijavabelia.

¹⁴ Nexata icatsia Jesús jumaitsi pijajivijavabelia pijajivi peyapëtaenexa pajamatabëcuene xaina palivaisi tsipaeba peubinë pelivaisicuenia:

—Pajivi raja peubixu uba, bajarapajivi bepepaebinë Dioso pitorobilivaisi.

¹⁵ Pacuenia itsi pabita peubixu, paxu othopa pabi tuatujëjava penajetarucaenamutojumata, bajara tsijamatabëcueneitsitsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, jumetane picani. Tsijamatabëubatsi jane baja picani Dioso pitorobilivaisi. Itsiata baitsi jane pejumetaecujinae bajarapalivaisi, bepijia dovathi najetaruca bajarapamonaejavaberena. Nexata bajarapamonae tsijamatabëjuvinejevatsi, dovathi vecuapitatsi bajarapalivaisimi, petsijamatabëubilivaisimitsi. ¹⁶ Pacuenia pijinia itsi paxu othopa ibopananëjumata, itsajota bitso ira apo aitayaë, bajara tsijamatabëcueneitsitsi itsamonae Dioso pitorobilivaisi. Bajarapamonae jumetane Dioso pitorobilivaisi. Nexata picani bajarapalivaisi barëyaya jumecovënëta. ¹⁷ Itsiata baitsi jane pacuenia irabereca apo atabunepiarea paxu othopa ibopananëjumata, nexata nabijiana, bajara tsijamatabëcueneitsitsi bajarapamonae Dioso pitorobilivaisi. Tsipaji pepacuenie pejamatabëëthëtovetsina apo jumecovënëtsi bajarapalivaisi. Nexata apo ajamatabëcuenesaë tsavanapae bajayajebi pejumecovënëtsinexa bajarapalivaisi. Nexata itsa tocopiapatatsi daxita petoayapëbejecuenetsi, itsa yalivaisibatsinua Dioso pitorobilivaisi yabara, nexata pejumecovënëtsijavami bajarapalivaisi bepijia copaba. Pevajënaeyabelia apo

jumecovënētavanapae. ¹⁸ Pacuenia pijinia paxu othopa xanëebacabomijavata, itsa juva, bitso matacënënatsi xanëebotonë, bajara tsijamatabëcueneitsitsi itsamonae Dioso pitorobilivaisi. Jumetane picani bajarapamonae Dioso pitorobilivaisi. ¹⁹ Itsiata baitsi jane bitso jamatabëcueneenatsi mapanacuapijicuene yabaraje. Tsipaji najamatabëxaina ayaijava palata pexainaenexa. Nexata pijacuata najamatabëcueneyamaxëitojoroba. Daxitacuene mapanacuapijicuene bitso jitsipa pexainaenexa. Bajaraxuata Dioso pitorobilivaisi apo tovitsabitsi pejamatabëëthëtota. Nexata pacuenia itsi pabita piacuaijibibotonë, bajara itsi bajarapamonae. Tsipaji Dioso xaniavaetsia apo tojinavanapae. ²⁰ Pacuenia pijinia itsi paxu othopa pexaniairata, bajara tsijamatabëcueneitsitsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, tsijamatabëjunuatsi. Nexata tsijamatabëcuenevitsabaponatsi Dioso pitorobilivaisi. Nexata pacuenia peubijava capitsapa itsabotonë treinta paxutobeje tsaponae, itsabotonë sesenta paxutobeje tsaponae, itsabotonë cien paxutobeje tsaponae, bajara tsijamatabëcueneitsitsi bajarapamonae Dioso pitorobilivaisi, jai Jesús pijajivijavabelia.

Pacuenia Jesús pijajivi livaisi tsipaeba lámparabë pelivaisicuenia yabara pelivaisi (Lc 8.16-18)

²¹ Jesús icatsia jumaitsi doce ponëbeje pijajivijavabelia, itsamonaejavabelia ata:

—Itsajivi ata lámparabë pitanojotsicujinae apo etsi cajoniënëalia. Apo etsi cama bëxëpanalia ata. Jume baja cajena. Biji rajane athëbëyo etsia daxitaboënë pitayote-caenexa. ²² Bajara pijinia itsi palivaisianë tsipaebaponajë comparacióncuenia daxitajivi picani peyapëtaenexa. Najumematayatsia apo tsipaebaponaenë. Itsamonae nejumetae ata, aeconoxae abaxë apo nejumeyapëtae pajamatabëcuene xaina tatsipaebilivaisianë. Itsiata itsamatacabi, bexëjavabelia, daxitajivi nejumeyapëtaena pajamatabëcuene xaina palivaisianë comparacióncuenia tsipaebaponajë. ²³ Pajivi jamatabënejumeyapëtane patacatsipaebilivaisi, xaniavaetsia nenamuxunaevetsi, jai Jesús pijajivijavabelia.

²⁴ Icatsia Jesús jumaitsi bajarapamonaejavabelia:

—Panejumecanaëjère patacatsipaebilivaisi. Itsamonae ata itsa pacatsipaebiana, bajarapamonae ata pajumecanaëjëtsianame papecatsipaebilivaisi. Palivaisivajëto panejumecanaëjëtsianame, nexata bajarapalivaisivajëto pajumeyapëtaename. Itsiata icatsia pematatsënëa bajarapitsilivaisivajëto Dioso pacayapëtaeyaexanaena. ²⁵ Pajivi xaniavaetsia nejumeyapëtane patacatsipaebilivaisi, bajarapajivi icatsia itsalivaisi pematatsënëa Dioso jumeyapëtaeyaexanaenatsi. Itsiata pajivi apo jitsipae pematatsënëa pejumeyapëtaeponaenexa, bajarapajivi palivaisiyovajëto picani jumeyapëtane, nacofënëtsiana, jai Jesús.

Pacuenia peubixu pejuvicujinae, Dioso pesaëta vitsaba yabara pelivaisi

²⁶ Jesús icatsia jivi comparacióncuenia livaisi tsipaeba Dioso pijajivi pevetsicuenie yabara. Jumaitsi mapacueniaje:

—Pacuenia peubixu pejuvicujinae, Dioso pesaëta vitsaba, bajara pijinia pacuenia Dioso pijajivi ata Dioso pesaëta jinavanapa. Peubinë pabita peubixu xucayajabajarabanajetaruca. ²⁷ Peubinë peubicujinae vemaxëmajitabiaba meravi canacujitsia. Naëcotabiaba matcabita. Bajarapacuenia panepapona matcabianë. Nexata pijinia peubixu pabita juva. Vitsabapona. Itsiata baitsi jane peubinë apo yapëtae pacuenia peubixu pijacuata juva. ²⁸ Ira raja pejamatabëcueneta naxaniaba peubijava. Copiata pepaboto vitsabaya. Xuacujinae namatonota. Xuacujinae cuainavereta. ²⁹ Itsa baja yaniona peubijava, penotsivi pona penotsinexa. Tsipaji baja penotsimatacabinexa tocopiapatatsi, jai Jesús jivijavabelia.

Pacuenia mostazaxutoyo pejuvicujinae, mostazanae bepimia vitsaba yabara pelivaisi (Mt 13.31-32; Lc 13.18-19)

30-31 Jesús icatsia jumaitsi doce ponëbeje pijajivijavabelia, itsamonaejavabelia ata:

—¿De meta xua pelivaisi jëpa Dioso pijajivi bepíjia ayaibitsaëtoxaneto penaexanaejavanexa? Jivi meta peyapëtaenexa ayaibitsaëtoxaneto bepíjia Dioso pijajivi penaexanaejavanexa, mostazaxutoyo meta pelivaisicuenia tsipaebianajë. Jumaitsinë meta tsane: “Pacuenia mostazaxutoyo pejuvicujinae, bepíjia vitsaba mostazanae, bajara pijinia itsane Dioso pijajivi ata. Bepíjia Dioso pijajivi ayaibitsaëtoxaneto naexanaena. Mostazaxu raja bitso tsiquirixutoxi daxita peubixuvecua. ³²Itsiata baitsi jane mostazanae itsa juva, bepíjia vitsaba. Caevaita pinijinae naexana itsapeubinaenë matatoxenetsia. Nexata baratsui ata pematapenanë exana mostazanaemaxërananëjavata. Bajara pijinia itsane jivi ata. Bepíjia ayaibitsaëto Dioso pijajivi naexanaena,” janë meta tsane mapacueniaje, jai Jesús pijajivijavabelia, itsamonaejavabelia ata.

Pacuenia Jesús jivi livaisi tsipaebabiaba ëcomparacióncuenia yabara pelivaisi (Mt 13.34-35)

³³ Dioso pitorobilivaisi Jesús tsipaebabiaba jivijavabelia. Dioso pitorobilivaisi Jesús jivi tsipaebabiaba ëcomparacióncuenia. Pacuenia baja jivi caëjëpatsi pejumeyapëtaenexa, bajarapacuenia Jesús tsipaebabiaba. ³⁴ Jesús ëcomparacióncuenia livaisi tsipaebabiaba bajarapamonaejavabelia. Itsiata saicaya Jesús ëpijajivijavabelia xaniavaetsia yapëtaeyaexanabiaba pajamatabëcuene xaina daxita bajarapalivaisianë.

Pacuenia Jesús itaveta joviboxaneto, malataca yajava, piyaijavami yabara pelivaisi (Mt 8.23-27; Lc 8.22-25)

³⁵ Dioso pitorobilivaisi Jesús tsipaeba jivijavabelia. Bajarapamatacabi Jesús petsipaebicujinae itsa baja caniviyotsia, Jesús jumaitsi pijajivijavabelia:

—Nicabaliatsi mapapucaxaneto itsapanabeliaje, jai Jesús.

³⁶ Nexata baja Jesús, pijajivi yajava, vecuapona jivi. Pajerata Jesús ecareca, pijajivi yajava pona. Itsiata itsamonae pënaponatsi itsajeranëta. ³⁷ Nexata pinijijoviboxaneto jemata najetaruca. Nexata malataca jera ënëaberena mera epabajarabapona. Nexata baja jera ënëaberena mera vënëcapona. ³⁸ Jesús itsiata majitanuca jamatejema jeratabufejavavetsina. Namatabëxëyaëtanuca penamatabëxëyaëtabijavata. Nexata Jesús pijajivi yaitavabatsi. Jesús pijajivi jumaitsi:

—¡Patajatuxanenë, vaxaitsimi rabaja yaothopaenatsi! ¿Apo jamatabëcuenebëjamë tsaja? jai Jesús pijajivi.

³⁹ Nexata Jesús pemajitanucaenëmi naëcotapuna. Pinijijumeta itavetaxuaba jovibo. Jesús jumaitsi pucajavabelia, jovibojavabelia ata:

—¡Vainae ecare baja! jai.

Bajarapacuenia Jesús pejumaitsijavata jovibo baja ajibi tsaxuabi. Daxitapuca baja nexata vainae ecaxuaba. ⁴⁰ Nexata Jesús jumaitsi pijajivijavabelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevetsijava? jai Jesús.

⁴¹ Nexata Jesús pijajivi najunaviaca bajarapacuenie petaexae. Ëpamonae najumaitsi:

—¿De meta tsipaji maponëje? ¡Itaveta jovibo, malataca ata! ¡Jumecovënëtatsi baja rovia maponëje! ¡Nexata baja jovibo, malataca yajava, ajibi tsaxuabi! najai Jesús pijajivi.

5

Pacuenia pebi, dovathivi peyajavaponaponanë, Jesús vecuacapitsapa Gerasa nacuata yabara pelivaisi

(Mt 8.28-34; Lc 8.26-39)

¹ Jesús pijajivi barëpata pucaxaneto itsapanabelia, Gerasa nacuayabelia.

² Nexata Jesús jerajavavetsina nonotajuna. Pebi dovathivi peyajavaponaponanë, kujitabarenatsi jivimëthëanëjavaverena. ³ Bajaraponë ponaponabiaba

jivimëthëanëjavata. Itsajivi ata apo caëjëpaetsi pecëtsinexa bajaraponë cadenamaëtota ata. ⁴Cadenamaëtonëta picani taxucëtabiabatsi anijatonë. Cobecëtabiabatsi picani yajava. Itsiata cajena pecobecëtsicadenamaëtotsi ucutajarababiaba pesaëta. Bajaraxuacujinae petaxucëtsicadenamaëtotsi pecobeta tsaquibiaxuababiaba. Nexata cadenamaëtomi tsiquirijavaxi exanapenetabiaba. Itsajivi ata cajena apo caëjëpaetsi pecëtsinexa bajaraponë. Tsipaji bitso asaë. ⁵Bajaraponë petsutonëjava, jivi petëpaevi pemëthëcaejava, matabijebi, meravijebi yajava, ponaponabiaba. Vavajai tsabiabaponapona. Ibotonëjavabelia natsaquibajarababiabaponapona. ⁶Bajaraponë itsa taetaba Jesús penajetarucæjava, nexata tajëverena kujinaeponarena Jesúsjavaberena. Jesús pitabarata pematabacabëta nucajunua. ⁷Bajaraponë aëjai pinijijumeta Jesús pitabarata.

—Jesús, pepo Dioso, athëbëtatsia peecaenë, pexënatomë. ¿Detsa xua jaitame xanëjavaberena? Pexaniacuene bitso cavajëtatsi Dioso pitabarata. Nejamatabëcuenebejibitsipame, jai dovathivi peyajavaponaponaenë Jesúsjavabelia.

⁸Bajarapacuenia jumaitsi dovathivi peyajavaponaponaenë tsipaji Jesús jerajavavetsina penonotajunaejavata, dovathivi peyajavaponaponaenë pemataene-naejavatatsi, Jesús itaveta dovathivi. Jesús jumaitsi dovathivijavabelia mapacueniaje:

—¡Dovathivi, bajaraponë baja pavecuapitsapare! jai Jesús.

⁹Nexata Jesús jumaitsi bajaraponëjavabelia:

—¿Detsa pavënëmë? jai.

Nexata dovathivi peyajavaponaponaenë navënëpaeba.

—Tavënë raja Legión. Tsipaji raja bitso paayaibitsaëttoxanetonë, jai dovathivi peyajavaponaponaenë.

¹⁰Nexata dovathivi pinijicuenia vajëta Jesúsjavabelia itsairabelia pejutsiyanivatsi bajarapairavecua. ¹¹Nexata bajarajota, imoxoyo petsutojavata, marranobitsaëttoxaneto xaevanapa. ¹²Dovathivi bitso vajëca Jesúsjavabelia.

—Paneitorobare marranobitsaëttoxanetojavabelia. Panetocopare patajonexa bajara pamarranobitsaëttoxanetojavabelia, jai dovathivi.

¹³Nexata Jesús tocopata pacuenia dovathivi vajëcatsi. Dovathivi baja pebi vecuapitsapcatsi. Nexata baja marranobitsaëttoxanetojavabelia dovathivi junua. Bajara pamarranobitsaëttoxaneto jinavanapa anijamilbeje ponëbeje. Nexata daxita marranobitsaëttoxanetomi kujinaeyeca. Pucaxaneto itapajanituareca othopareca. Nexata daxita marranobitsaëttoxanetomi meneta bubuna.

¹⁴Bajara pamarranobitsaëttoxanetomi pevetavanapaevi rëcëpeca. Pona, pacuene tane, petsipaebinexa tomarapijivijavabelia, petsipaebinexa vayafotusatöjava penaevijavabelia ata. Nexata jivi ponarena petaenexa bajarapacuenë. ¹⁵Nexata dovathivi peyajavaponaponaenëmi bajarapamonae taeyeta Jesús pemuxuneneta. Bajaraponë penaxatatsijava baja naxatateca. Jamatejema baja. Xaniavaetsia eca. Nexata bajarapamonae kujunavatsi Jesús. ¹⁶Pamonae cuenetanetsi Jesús pejamatejemayaexanaejava dovathivi peyajavaponaponaenëmi, bajarapamonae paeba pepatsivijavabelia daxita pacuene tane. Paeba pacuene ata Jesús exana marranobitsaëttoxanetojavabelia. ¹⁷Nexata Gerasa nacuapijivi jumaitsi Jesúsjavabelia:

—Pexaniacuene pacavajëtatsi. Ponare baja patajanacuavecua, jai Gerasa nacuapijivi Jesúsjavabelia tsipaji kujunavatsi.

¹⁸Jesús baja itsa runareca jera ënëabereca, ponë dovathivi peyajavaponaponaenëmi, bitso picani navajëca Jesús pepëta penaponaenexa. ¹⁹Itsiata Jesús apo jejai. Jumaitsi bajaraponëjavabelia:

—Ponare nijaboyabelia. Nijamonae tsipaebare papinijicuene Dioso caexana. Tsipaebare pacuenia ata caitaxutotsoniatane Dioso, jai Jesús dovathivi peyajavaponaponaenëmijavabelia.

²⁰ Nexata baja dovathivi peyajavaponaponaenëmi pona. Taxuxuaba penavajunupaebijava papinijicuene Jesús exanatsi. Bajaraponë navajunupaebapona Decápolisvënë nacuajava. Decápolisvënë nacuata eca diez patomarabeje. Daxitajivi jamatabëcuenenabenajaca itsa jumetanetsi bajaraponë penavajunupaebaponaajava.

Pacuenia Jesús copiaya namutoepatota jamatejemayaexana piavitaneva, pacuenia icatsia cotocaevi toasaëyaexana Jairo pexënatovayo, petëpaevayomi, yabara pelivaisi (Mt 9.18-26; Lc 8.40-56)

²¹ Jesús icatsia pecovëyaberena jerata naviarena pucaxaneto itsapanaverena. Nexata tajetabojavatarena jivibitsaëtoxfaneto Jesús matatoyoronatsi. ²² Nexata bajarajota napatajopa Jairovënënë. Bajaraponë judíovi penacaetuatabiabibo pevetsiviyajuvënënë. Jairo itsa taetaba Jesús, nexata Jairo pematatabacabëta yaiyataeya Jesús pitabarata nucajunua. ²³ Pinijicuenia Jairo vajëta Jesúsjavabelia. Jumaitsi:

—Taxënatoyo raja netobitso. Najumalipeneta rabaja petëpaenexa. Pexaniacuene netoexanare. Naxanitsia. Netoperabëjayatsianame necobeta petëpaeyaniva, jai Jairo.

²⁴ Jejai Jesús. Jesús nexata napona Jairo pepëta. Nexata jivibitsaëtoxfaneto Jesús pepënaponaevitsi matatoyorotsia cënënanajetarubenatsi. ²⁵ Bajarapajivibitsaëtoxfaneto tuatujëta itsava, pijanacuene pecapunaevatsi, nanajetaruca. Bajarapova pijanacuene pecapunaecujinaetsi doce baja pavaibeje xaina. ²⁶ Bitso nexata bajarapova bejiobi pexainaecuene yabara pevaëbivitsi pejamatabëcueneta. Tsipaji belia daxita pexainaejavaximi navecuavereta pematamobaponaeta pevaëbivitsi. Itsiata apo caevi piavitaneuene. Biji caranata pevajënaeyabelia capunaponatsi piavitaneuene. ²⁷ Nexata bajarapova jumetane itsamonae pecuaicuaijajava Jesús piavitanevi pejamatejemayaexanaponaajava yabara. Nexata bajarapova ponataba Jesús pepënëvelia, jivibitsaëtoxfaneto tuatujëalia. Nexata bajarapova tojayataba Jesús penaxatatsijava. ²⁸ Tsipaji cajena bajarapova jamatabëjumaisi: “Itsa Jesús penaxatatsijava tojayatabianajë, tavitanjavami nevecuaajibi tsane,” jamatabëjai. ²⁹ Nexata bajarapova itsa tojayataba Jesús penaxatatsijava, bajarajota pijanacuenemi vecuaajibitsi baja. Nexata bajarapova pijanacuenemi pecaevijavareca, nayapëtane. ³⁰ Jesús ata nayapëtane pesaëta pejamatejemayaexanaajava pepënëyabelia. Nexata pejayatabijavatatsi Jesús napënëyorotaxuaba. Naëcobaruta. Yanijoba jivijavabelia.

—¿Jipatsa tanaxatatsijava netojayataba? jai.

³¹ Nexata Jesús pijajivi jumaitsitsi:

—Taneme rabaja jivibitsaëtoxfaneto pecacënënanajetarubenaajava. ¿Detsa xuajitsia: “¿Jipatsa tanaxatatsijava netojayataba?” jamë? jaitsi Jesús pijajivi.

³² Jesús naëcobaruta daxitajivijava petaenexa pajivi tojayatabatsi penaxatatsijava.

³³ Nexata bajarapova neconecojai tsanucæ pecajunavi penayapëtaexæ Jesús pejamatejemayaexanaajavatsi. Nexata bajarapova najetabarena Jesús pitabarayaberena. Pematatabacabëta nucajunua. Nexata daxita pacuene exana, bajarapova tsipaeba Jesúsjavabelia. ³⁴ Nexata Jesús jumaitsi bajarapovajavabelia:

—Xamë nesivajamatabëjumaisimë: “Jesús penaxatatsijava itsa tojayatabianajë, tavitanjavami nevecuaajibi tsane,” nesivajamatabëjamë. Bajaraxuata jamatejemamë baja. Ponare baja jamatejema. Niavitanejavami rabaja ajibi, jai Jesús bajarapovajavabelia.

³⁵ Bajarapacuenia Jesús pejumaitsanucæjavata namutoepatota, Jairo pijaboverena peponaevi mataenenatsi. Bajarapamonæ jumaitsi Jairojavabelia:

—Jairo, nexënatoyo rabaja tëpa. Pëtsa baja matavëjëa jamatabëitonotaponame Jesús, jai bajarapamonæ Jairojavabelia.

³⁶ Jesús jumetae ata bajarapajume, itsiata jumaitsi Jairojavabelia:

—Jairo, pëtsa najamatabëxainame. Najamatabëcuenecopare saya ëxanëjavaberena nexënatovayo pecatoasaënexa, jai Jesús Jairojavabelia.

³⁷ Nexata Jesús, pajivibitsaëtoxfaneto pënanajetarubenatsi, pueneta bajarajota. Jesús pona Jairo pijaboyabelia. Jesús saya yajavalia mapamatabëxëyoje: Pedro, Juan, Santiago, Jairo jane baja. Juanbeje Santiagobeje nacaebananëbeje. ³⁸ Itsa baja Jesús palia Jairo pijaboyabelia, tane jivibitsaëto pinijijumeta pemataneuyabijava petëpaevayo.

³⁹ Jesús itsa joneya boyalia, jumaitsi bajarapamonaejavabelia:

—Pëtsa bitso pemataneuyabame. Pejanava raja apo tëpae. Saya raja majitanuca, jai Jesús tsipaji yapëtane Jesús piasaëyaexanaejavanexa bajarapovayo.

⁴⁰ Bajarapacuenia Jesús pejumaitsijava, bajarapamonae saya jumecapocaponatsi. Nexata daxita Jesús bovecua pitsapaeyaexana. Itsaxuayolia petëpaevayo boca, Jesús barëjoneya caejiviyobeje saya. Jesús saya barëjoneya mapamatabëxëyoje: petëpaevayo paxa, pena, Jesús pijajivi, acueyabi ponëbeje. Bajarapamatabëxëyo saya Jesús barëjoneya.

⁴¹ Nexata Jesús petëpaevayo cobepita. Jesús pijajumeta jumaitsi:

—Talita cumi, jai, mapajumetaje pejumaitsijume: “Pejanava, nonotapunare,” pejaijume.

⁴² Bajarapacuenia Jesús pejumaitsijavata, pejanavayo nonotabapuna. Ponapona baja. Bajarapovayo doce pavaibeje xaina. Nexata Jesús peyajavajonevilia pinijicuenia jamatabëcuenenabenajaca bajarapacuenene itsa tane. ⁴³ Nexata Jesús pinijicuenia jumaitsi:

—Pëtsa itsajivi ata patsipaebame mapacueneneje, jai Jesús.

Bajaraxuacujinae Jesús jumaitsi pejanavayo penajavabelia:

—Nexënatovayo pexaejava rajure, jai.

6

Pacuenia Jesús naviata pijanacuayabelia, Nazaret tomarabelia, yabara pelivaisi (Mt 13.53-58; Lc 4.16-30)

¹ Jesús baja, pijajivi yajava, pona Capernaum tomaravecua. Naviata pijanacuayabelia, pevitsabitomarabelia. ² Judíovi penacueraevetsimatacabita Jesús taxuxuaba jivi livaisi petsipaebijava judíovi penacaetuatabiabibota. Ayaibitsaëtoxfaneto pejumetaevitsi sivajamatabëcuenenabenajacatsi. Nexata bajarapamonae Jesús jamatabëcueneabiatsi. Bajarapamonae Jesús yabara najumaitsi mapacueniaje:

—¿Detsa meta verena maponë capitsapa mapajamatabëcuenelivaisije? ¿Detsa pacuenia meta yapëtane daxita mapacueneneje? ¡Pitsipinijicuenene maponë exanaje, vaxaitsi abaxë caeto ata apo taetsi! ¡Matapania matanetsije! ³ Maponëje vaxaitsiyajuvënënë. Carpinteronë. María pexënato. Bajaraponë pejuyapijivi Santiago, José, Judas, Simón. Papetirivi ata vajatomarata jinavanapa, bajaraponë pejuyapijivi, najai bajarapamonae Jesús yabara.

Nacaetomarapijivixae, bajarapamonae Jesús apo jumexaniataetsi. ⁴ Nexata Jesús jumaitsi bajarapamonaejavabelia:

—Bajara maitsabiabije. Diosojumepaebivi profetavi itsanacuapijivi yaiyataeyabiabatsi. Itsiata pijanacuapijivi, pijaviriavi, pijamonae ata, apo yaiyataeyabiabitsi, jai Jesús.

⁵ Nexata Jesús bajarajota jivi ayaibitsaëtojavabelia pinijicuenene pexanaejava apo tsi-taexanae. Tsipaji apo jumecovënëtsitsi. Saya caejiviyobeje piavitanevi pecobeta jayata. Jamatejemaya exana. ⁶ Nexata Jesús bitso najamatabëxaina. Tsipaji jivi apo jumecovënëtsitsi. Bajaraxuacujinae Jesús tsiquiritomaraxijava Dioso pitorobilivaisi jivi tsipaebanajetaruca.

Pacuenia Jesús pijajivi itoroba Dioso pitorobilivaisi jivi petsipaebanajetarubenaenexa yabara pelivaisi

(Mt 10.5-15; Lc 9.1-6)

⁷ Jesús junata pijajivi doce ponëbeje penacaetuatsinexa. Nexata Jesús pijajivi itoroba anijanëbeje tsaponae. Jesús pijajivi pecaëjëpajamatabëcuenetsi

jamatabëcuenecaëjēpaeyaexana dovathi peyajavajinavanapaevi pevecuacapitsapapon-aenexa. ⁸ Jesús jane baja pijajivi penaropobivajēnae, Jesús jumaiti pijajivijavabelia mapacueniaje:

—Pëtsa itsacuenejala ata pacaponame panijanamutonexa. Pëtsa pacaponame panemarue ata, doru ata, palata ata. Ènaeboyu saya pacaponare. ⁹ Itsiata pataxunaponare panenataxuxatabijava. Caejava panenaxatatsijava pajumaponare. Pëtsa anijacamisabeje pacaponame. ¹⁰ Itsajota papatabiabianame, caebota pamajitabiabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa paponanename, bajarapabovecua papitsapaenename. ¹¹ Patomarata apo pacacopiapitsi tsane, itsa apo jitsipaenua tsane papecanamuxunaevetsinexa panetsipaebilivaisi, nexata paponanename bajarapatomaravecua. Paneponaevajēnae bajarapatomarata panataxuatsapërēvarēbianame. Bajarapacuenia itsa panataxuatsapërēvarēbianame, bajarapatomarapijivi yapētaena Diosojavabelia penaneconitsicuene apo papecacopiapitsixae papecanamuxunaevetsinexa panetsipaebilivaisi. Xaniajanē pacuenia pacatsipaebijitsiatsi. Pamatacabi Dioso jivi naneconitsiaexanaena, bajarapamatacabi Dioso bitso naneconitsiaexanaenatsi patomarapijivi apo pacacopiapitsi tsane. Paneconivajētota bajayata Dioso naneconitsiaexana Sodoma tomarapijivimi, Gomorra tomara-pijivimi ata, bajarapaneconivajēto matatoxenetsia Dioso naneconitsiaexanaenatsi patomarapijivi apo pacacopiapitsi tsane, jai Jesús pijajivijavabelia.

¹² Nexata jane baja Jesús pijajivi naropoba Dioso pitorobilivaisi jivi petsipaebanajetarubenaenexa. Jesús pijajivi naropoba anijanēbeje tsaponae. Nexata Jesús pijajivi jumai tsaponae jivijavabelia:

—Pacopabare baja pibisiacuene paneexanabiabijava. Panajamatabëcuenepēnēyorore Diosojavabelia, jai tsaponae.

¹³ Jesús pijajivi dovathi peyajavajinavanapaevi vecuacapitsapapona. Piavitanevi ata mataexabapona aceiteranēta. Bajarapacuenia Jesús pijajivi jamatejemayaexanapona piavitanevi.

Pacuenia bajayata Juanpijinē jivibautisabinēmi beyaxuabatsi yabara pelivaisi (Mt 14.1-12; Lc 9.7-9)

¹⁴ Herodes, Galileanacua pevetsinē. Nexata Herodes jumetane itsamonae jamatabëcuenenavēxaniabiaya pejumaitisijava Jesús yabara: “Juanpijinē raeta jivibautisabinēmi icatsia asaē petēpaecujinae. Bajaraxuata caējēpatsi Dioso pesaēta pinijicuene pexanaenexa,” pejajava itsamonae jamatabëcuenenavēxaniabiaya Jesús yabara, Herodes jumetane.

¹⁵ Itsamonae pijinia jumai tsaponae Jesús yabara:

—Bajayata raeta ponēmi ponapona, profeta Elíaspijinēmi, baja raeta ponē, jai tsaponae itsamonae.

Itsamonae pijinia jumai tsaponae Jesús yabara:

—Diosojumepaebinē profeta raja. Tshipaji rabaja pacuenia bajayata profetavi jinavanapa, bajara icatsia maponē itsije, jai tsaponae itsamonae.

¹⁶ Bajarapacuenia itsamonae jamatabëcuenenavēxaniabiaya pejumaitsaponaejala Jesús yabara, Herodes itsa jumetane, Herodes ata jamatabëcuenenavēxaniabiaya jumaiti Jesús yabara:

—Maraeta Juanpijinēmije, ponēmi bajayata xanē tajajivi vēsiucutaxuabiaexanajē. Icatsia raeta asaē petēpaecujinae, jai Herodes jamatabëcuenenavēxaniabiaya Jesús yabara.

¹⁷ Bajarapacuenia Herodes jumaiti tshipaji abaxē Juanpijinē itsa asaē, Herodes pijajivi, vajabitsaēvi, itoroba Juanpijinē pevaetabinexatsi. Nexata vajabitsaēvi Juanpijinē cobecētsiaya caponatsi penaneconitsivi pejebabiabiboyalia. Bajarapacuenia Herodes pijajivi itoroba Herodes pijava, Herodíasva, pejamatabëcueneta. Herodíasva picani

copiata pita Felipe, Herodes pejuyapijinë. Nexata Herodes pejuyapijinë pijava yacajërëta. ¹⁸ Nexata Herodes pejuyapijinë pijava peyacajërëtsixae, Juanpijinë abaxë itsa apo vaetabitsi, muxujioba Herodes. Juanpijinë jumaitsi Herodesjavabelia:

—Acuenebi raja nejuyapijinë pijava nepitsijava,” jai Juanpijinë Herodesjavabelia.

¹⁹ Nexata bajarapacuenia Juanpijinë pejumaitsixae, itoyatsi Herodíasva. Nexata abaxë Juanpijinë itsa ponapona penaneconitsivi pejebabiabibota, bajarapova picani Juanpijinë jamatabëbeyaxuabiaexanatsi. Itsiata apo caëjëpaetsi. ²⁰ Tsipaji Herodes yapëtane Juanpijinë bitso pejamatabëxanepanaenëcuene. Nexata Herodes yaiyatane Juanpijinë. Bajaraxuata Herodes apo tocopatsi pijava pejamatabëcueneta pebeyaxuabinoxatsi Juanpijinë. Juanpijinë itsa cuaicuajai tsabiabi Herodesjavabelia, nexata picani Herodes jamatabëbëjai tsabiabi pijaneconi yabara. Itsiata Herodes xaniavaetsia namuxunaevetabiaba. ²¹ Nexata pamatacabi Herodes najamatabënapita penaexanaematacabi, najamatabëxaina pexaniafiesta pexanaenexa. Bajarapafiestajava Herodes junata pijaboyaberena jivi ayaibitsaëtoxaneto penabaninexa. Junata Herodes pijajivi, pamonaë toevetatsi pijairanë. Junata vajabitsaëvi pevetsivinua. Junata petuxanevinua, Galilea nacuata pejinavanapaevi. Nexata bajarapafiestajavata Herodíasva toyapëxanepanatsi Juanpijinë pebeyaxuabiaexanaenexatsi. ²² Herodíasva toyapëxanepanatsi tsipaji pexënatoyo joneya Herodes pejunatsivi pebarënanabaneceajavalia pijacujirucuenia caevayo peyavajibinexa. Nexata Herodes pejunatsivi bitso barëitajitsipa pejonëyo peyavajibijava. Nexata Herodes najumecapanepaeya pexaniaajijumeta jumaitsi pejonëyojavabelia:

—Nevajëre xua jitsipame. Carajutsianatsi raja. ²³ Pacuenejava nevajëtsianame, carajutsianatsi. Itsa nevajëtsianame taneevetsiaexanaenacua ata, tuatuajëjava carajutsianatsi, jai Herodes najumecapanepaeya pejonëyojavabelia.

²⁴ Nexata bajarapovayo pitsatabalia. Jumaitsi penajavabelia:

—¿Detsamë ra xua vajëtsianajë? jai penajavabelia.

Nexata Herodíasva pexënatoyojavabelia jumaitsi:

—Juan jivibautisabinë pematabocoto vajëre, jai.

²⁵ Nexata bepimia bajarapovayo jopajoneya Herodes peceajavabelia. Jumaitsi Herodesjavabelia:

—Jitsipajë cajena tanerajutsinexamë platota Juan jivibautisabinë pematabocoto, jai bajarapovayo Herodesjavabelia.

²⁶ Nexata Herodes pinijicuenia bejamatabëjiobi tsanajetsireca. Herodes nexata acuenebi: “Jume,” pejaijava. Tsipaji baja Herodes najumecapanepaeya jumaitsi pejonëyojavabelia pexaniaajijumeta daxita pejunatsivi pitabarata. ²⁷ Nexata Herodes bepimia itoroba vajabitsaënë petocarenanexatsi Juan pematabocoto. ²⁸ Vajabitsaënë nexata pona penaneconitsivi pejebabiabiboyabelia. Juanpijinëmi vësiucutaxuabatsi. Juanpijinëmi pematabocoto vajabitsaënë carena platota. Nexata pejanava rajutatsi. Nexata bajarapovayo juya pena rajuta. Nexata baja Herodíasva yapëtane capanepaeya baja Juanpijinë pebeyaxuabijavatsi.

²⁹ Nexata Juanpijinë pijajivi itsa vënëtanetsi pebeyaxuabijavatsi, bajarapamonae ponarena Juanpijinë pebocejavaberena. Pitatsi petëpaenë. Pepitsicujinaetsi Juanpijinë pijajivi mëthëtatsi.

*Pacuenia Jesús pexaejava rajuta cinco mil ponëbeje yabara pelivaisi
(Mt 14.13-21; Lc 9.10-17; Jn 6.1-14)*

³⁰ Jesús pitorobivi, apóstolevi, naviabanajetarubena Jesúsjavaberena. Nexata bajarapamonae Jesúsjavabelia navajunupaeba daxita pacuene exanavanapa, pacuenia ata jivi livaisi tsipaebavanapa. ³¹ Nexata Jesús jumaitsi bajarapamonaejavabelia:

—Naxanitsia. Ponatsi pesajinaejavabelia. Nacueraevetsianatsi caeepatoyo, jai Jesús.

Bजारapacuenia Jesús jumaitsi pijajivijavabelia tsipaji jivibitsaëtoxanetonë topatabiabatsi. Itsamonae naviabaponabiaba. Itsamonae juya patabiaba. Nexata Jesús pijajivi pebarënanabinexa, apo cuenecaëjëpabiabitsi. ³² Nexata Jesús ëpijajivi jerata yajavapona itsabelia jivi ajibi. ³³ Itsiata jivi ayaibitsaëtoxaneto pëtanetsi Jesús peponaejava. Nexata itsabelia Jesús pona, matatsënëa pënacujinaerubenatsi daxita tomaranëpijivi. Caranata Jesús pevajënaeyabelia pata bajarapamonae. ³⁴ Itsa baja Jesús bana nonobajunaya jeravecua, Jesús tane jivibitsaëtoxaneto. Nexata Jesús bajarapamonae itaxutobejibiatane. Nexata Jesús bajarapamonae sivajamatabëjumaitsi mapacueniaje:

—Pacuenia baitsi ovejabitsaëtoxaneto itsa toajibitsi pevetsinëtsi, bajara itsi mapamonaeje, sivajamatabëjai Jesús.

Nexata Jesús ayaicuenia livaisi tsipaeba bajarapamonaejavabelia. ³⁵ Itsa baja bitso caniviyotsia, Jesús pijajivi cujibarenatsi. Jumaitsi:

—Caniviyo rabaja bitso. Majota ajibi pexaejava. Tsipaji itsajivi ata pijabo apo xainae. ³⁶ Itorobare baja jivi peponaenexa imoxoyo penaetomaranëjavabelia pecomuacaenexa pexaejava, jaitsi Jesús pijajivi.

³⁷ Jesús nexata jumaitsi pijajivijavabelia:

—Paxamë parajure pexaejava, jai.

Nexata Jesús pijajivi jumaitsi:

—¿Paponaeajë tsaja tomarabelia patacomuatsinexa pan doscientos denariota bajarapamonae pexaenexa? jai Jesús pijajivi.

³⁸ Jesús icatsia jumaitsi pijajivijavabelia:

—¿Detsa papanbëbeje paxainame paxamë? Pataema copiata, jai Jesús.

Jesús pijajivi petaecujinae tsipaeba Jesúsjavabelia. Jumaitsi:

—Paxainajë saya cinco papanbëbeje, anijanëyobeje dujuainëyobeje yajava, jai Jesús pijajivi.

³⁹ Nexata Jesús itoroba daxitajivi penaenexa ponajavata. ⁴⁰ Nexata bajarapamonae pepobitsaëtonë natsanaeya ena. Caebitsaëtota enapona cien pajivibeje. Itsabitsaëtota enapona cincuenta pajivibeje. Bजारapacuenia caebitsaëto canacujitsia enapona. ⁴¹ Nexata Jesús pita cinco papanbëbeje, anijanëyobeje dujuainëyobeje yajava. Athëbëa benaëcotsia. Jumaitsi Diosojavabelia:

—Pexaniacuene panetoexaname. Panerajutame pataxaejava, jai Jesús.

Bजारaxuacujinae Jesús pan epatsicacaponae. Pijajivijavabelia rajutapona pepatsicacaejava. Nexata juya Jesús pijajivi pan tsicobetsana jivijavabelia. Dujuaijavaxi ata tsicobetsana jivijavabelia. ⁴² Daxita xaniavaetsia nabane. ⁴³ Bजारaxuacujinae Jesús pijajivi caetuata pan, dujuai yajava, jivi peyajuvënëcopabejebijavanë. Nexata vënëba doce xuabeje bemapirecuenia pexanaejavanë. ⁴⁴ Pamonae pexaejava xane, ayaibitsaëtoxaneto. Itsiata ëpebijivi namataëjëtatsi cinco mil ponëbeje.

*Pacuenia Jesús mene itaboxoya najetaruca yabara pelivaisi
(Mt 14.22-27; Jn 6.16-21)*

⁴⁵ Jesús jivi ayaibitsaëtoxaneto pexaejava perajutsicujinae, Jesús pijajivi bepijia runaeyaexanareca jera ënëabereca. Jesús pijajivi copiata itoroba penicabinexa puca itsapanabelia, Betsaida tomarabelia. Jesús baja jivi naviabiaexana. Bजारaxuata abaxë caenë nacopatanuca bajarajota. ⁴⁶ Itsa baja jivi napëvereta penaviabijava, Jesús junaya petsutojumabetsia pevajëtsinexa Diosojavabelia. ⁴⁷ Itsa baja bitso meravi, Jesús pijajivi pucaxaneto itapavecua tajë baja yanajetarubenalia. Jesús abaxë bajarapaepatotata caenë nacopatanucarena pucaxanetoitapatarena. ⁴⁸ Nexata Jesús tane pijajivi

petoayapëbejejavatsi pevaetsijava. Tsipaji bitso joviboxaneto ayai pevajënaeverena. Bajaraxuacujinae bajayacunua, ajena matabijitsia, Jesús pijajivi pecovëvelia imoxoyotanajetaruca. Jesús najetaruca mene itaboxoya. Rovia picani xenetsijitsia. ⁴⁹ Jesús pijajivi ita tanetsi mene itaboxoya penajetarucaejava, Jesús pijajivi jamatabëjumaitsi:

—¡Petëpaenëmi raeta pejumape najetaruca! jamatabëjai.

Nexata Jesús pijajivi vavajai tsaxuabi ayaijumeta. ⁵⁰ Tsipaji daxita Jesús pijajivi tane bajarapacuenia penajetarucaejava. Nexata Jesús pijajivi jamatabëcuenenajunaviaca. Nexata Jesús bepijiayo jumaitsi pijajivijavabelia:

—Xanë raja. Pëtsa panecujunavame. Pajamatejemamëre saya, jai Jesús pijajivijavabelia.

⁵¹ Nexata baja Jesús nonolia bajarapajera ënëabelia. Ajibi baja tsaxuabi jovibo. Nexata Jesús pijajivi pinijicuenia jamatabëcuenenajunaviaca. Tsipaji tane jovibo, malataca yajava, Jesús piajibiaexanaejava. ⁵² Jesús baja picani pijajivi copiaya tane, pan tsiquirijavayomi ata, jivibitsaëttoxanetojavabelia Jesús perajutsijava. Itsiata Jesús pijajivi apo jamatabëcueneyapëtae Jesús pecaëjëpaenëcuenetsi pinijicuenene pexanaenexa. Abaxë bajarapamonae ajamatabëcuenetaja.

Pacuenia Jesús jamatejemayaexana piavitanevi Genesaret nacuata yabara pelivaisi (Mt 14.34-36)

⁵³ Jesús pijajivi jerata yajavapata puca itsapanabelia. Pata Genesaret nacuyabelia. Peyapatsijera bajarajota puca itapata querataruta. ⁵⁴ Nexata Jesús, pijajivi yajava, nonotajunaya jeravecua. Bajarajota bepijia jivi yapëtanetsi Jesús cuene. ⁵⁵ Nexata Jesús pepatsijava penatsipaebinxexa, navajunucacujinaejinaruta daxita bonëjava. Nexata piavitanevi pijacamaxita yavëtarapatatsi itsajota jivi jumetane Jesús pepatsijava. ⁵⁶ Jesús pata tsiquiritoraxijava, pinijitomaranëjava ata, tomarapënëya penaebonëjava ata. Daxitajava, ita patomarata Jesús patabiaba, bajarapatomaranëjava callejavata, jivi tojebabiabatsi piavitanevi. Piavitanevi pecapatsivi pinijicuenia jumai tsabiabi Jesúsjavabelia:

—Pexaniacuene bitso netoexanare. Tocopatsianame maponëje pecatojayatsinexa nenaxatatsijavacopia, jai tsabiabi.

Nexata daxita pamona Jesús penaxatatsijavacopia tojayataponatsi, jamatejema baja tsaponae piavitanejavamivecua.

7

Pacuenia Jesús tsipaeba xua jivi jamatabëcuenebijianatsi yabara pelivaisi (Mt 15.1-20)

¹⁻⁴ Daxita judíovi catsiteca pijasalinaivimi pijacuene. Judíoviyajuvënëvi, pamona fariseovi naexana, bajarapamonae bitso catsiteca pijasalinaivimi pijacuene daxita judíovi matatoxenetsia. Jamatabëcuenenavëxaniabiaya jamatabëjumai tsabiabi:

—Itsa catsitecajë tajasalinaivimi pijacuene, nexata Dioso aneconijibia netaena, jamatabëjai tsabiabi.

Nexata bajarapamonae pijasalinaicuenia anijatonë xaniavaetsia ita apo napënanacobequiatsi, pexaejava apo xaeyabiabi. Itsajota pexaejavacuene canajetabiaba, bajaraverena ita naviaba pecomuacaecujinae, bajarapamonae pijasalinaicuenia xaniavaetsia ita apo napënanacobequiatsi, pexaejava apo xaeyabiabi. Bajarapamonae pematatsënëa navitsia itsacujiruxi ata, pijasalinaivimi pijacujiru, catsiteca. Bajarapamonae tazaxi, mera peyajebinëanë ata, pecasetsinëanë ata, camanë ata, pijasalinaivimi pijacuenia xaniavaetsia quiatabiaba. Nexata judíovi pecujarubivi Jerusalén tomaraverena pata. Nexata judíovi pecujarubivi, fariseovi yajava, kujibarenatsi Jesús. Nexata bajarapamonae tane Jesús pijajivi judíovi pijasalinaicuenia

anijatonë napënanacobequiatsinejeva penabanijava. Bajaraxuata bajarapamonae jumaitsi Jesúsjavabelia:

—Jesús, nijajivi naneconita Diosojavabelia. ⁵ Tsipaji nijajivi apo jume-covënëtsiajinavanapae vajasalinaivi pijacuene. Nijajivi itsa xane pexaejava, anijatonë napëna apo nacobequiatabiabi, jai bajarapamonae Jesúsjavabelia.

⁶ Jesús nexata jumaitsi bajarapamonaejavabelia:

—¡Paxamë saya jivi paneyamaxëitojorobivi! Diosojumelivaisipaebinëmi profeta Isaíaspijinë baja cajena bajayata tajëvelia xaniavaetsia pacavajunupaeba. Bajayata Dioso tajëvelia pejumaitsijava paxamë yabara profeta Isaíaspijinë peyaquinaelivaisita jumaitsi mapacueniaje:

Bajarapamonae nejitsipaena saya pijumeta. Itsiata pepo tanejitsipaejamatabëcuene nevecuatajë tsane. ⁷ Saya baitsi bajarapamonae pijajumaitsita tsane: “Pacajit-sipatsi,” nejai itajara tsane. Itsiata apo xaniajai tsane. Bajarapamonae saya jivi tsipaebaponaena pejamatabëcuenepijilivaisi. Pepo taitorobilivaisi apo tsipaebi tsane,

jai tajëvelia Dioso pejumaitsijava paxamë yabara Isaíaspijinë peyaquinaelivaisita, jai Jesús bajarapamonaejavabelia.

⁸ Jesús icatsia jumaitsi fariseovijavabelia, judíovi pecujarubivijavabelia ata:

—Paxamë Dioso papecaitorobicuenia apo paexanaemë. Caranata ëvajasalinaivi pijacuene pacatsitecame. Nexata vajasalinaivi pijacuenia xaniavaetsia paquiatabiabame mera peyajebinëanë. Xaniavaetsia paquiatabiabame tazaxi ata. Pematatsënëa navitsia itsacujiru ata pacatsitecame. ⁹ Apo pajumecovënëtsimë Dioso pitorobilivaisi vajasalinaivi pijacuene panecatsitecaenexa. Apo pajumecovënëtsi atamë Dioso pitorobilivaisi, jamatabëcuenenavëxaniabiaya pajamatabëjumaitsimë tsabiabi: “Pexaniacuene raja exanajë,” pajamatabëjamë tsabiabi. ¹⁰ Bajayata Dioso najumecopata Moiséspijinëta. Bajarapalivaisi jumaitsi: “Axa yaiyataema. Ena ata yaiyataema. Pajivi pibisiacuenia bijatane paxa, pena ata, bajarapajivi pabeyaxuare,” jai Dioso Moiséspijinëta pena-jumecopatsilivaisi. ¹¹⁻¹² Itsiata baitsi jane paxamë jivi pamuxubijiapenatabiabame peyaiyataeyaniva paxajivi, penajivi ata. Paxamë pajumaitsimë tsabiabi mapacueniaje: “Axa, ena ata, itsa cavajëta neyavenonaenexa, nexata itsa apo jitsipaemë neyavenona-aejava, jumaitsimë tsane mapacueniaje: ‘Daxita xua pacarajutsipatsibeje picani pata-cayavenonaenexabeje, daxita bajaraxua tsipaebajë baja tarajutsinexa Diosojavabelia. Nexata baja acuenebi patacarajutsinexabeje,’ jamë tsane neyavenonaeyaniva,” pajamë tsabiabi jivijavabelia. ¹³ Nexata caranata Dioso pejumaitsijume: “Axa yaiyataema. Ena ata yaiyataema,” pejaijume, paxamë jivi pacopabiaexanaponame. Tsipaji paxamë patsipaebaponame saicaya vajasalinaivimi pijalivaisi. Itsalivaisianë ata pematatsënëa saicayacuenia patsipaebaponame Dioso pitorobilivaisivecua, jai Jesús judíovi pecujarubivijavabelia, fariseovijavabelia ata.

¹⁴ Nexata icatsia Jesús junata jivi. Jumaitsi jivijavabelia:

—Daxita paxamë panenamuxunaevere xaniavaetsia patanejumeyapëtaenexamë. ¹⁵ Xua jivi pecuibota xane, pexaevajënae napëna anijatonë apo nacobequiatsi ata, apo jamatabëcuenebijianaetsi. Apo vënananeconitsi Diosojavabelia. Baitsi rajane xua jivi najamatabëxaina pejamatabëëthëtovetsina, xua ata pibisiacuenia cuaicuaijai, bajara baitsi jane xua jivi bajamatabëcuenebijianatsi. ¹⁶ Pajivi jamatabënejumeyapëtane patacat-sipaebilivaisi, nenamuxunaevetsi xaniavaetsia, jai Jesús.

¹⁷ Itsa baja Jesús jivivecua natixita, boya joneya. Nexata boyalia pijajivi yanijobatsi bajarapalivaisi. ¹⁸ Nexata Jesús jumaitsi pijajivijavabelia:

—¿Paxamë ata tsarovia abaxë apo panejumeyapëtaemë? Daxitacuene raja pexaejava jivi xae ata, apo jamatabëcuenebijianaetsi. Diosojavabelia apo vënananeconitsi. ¹⁹ Tsipaji

raja jivi pexaejava apo tsijamatabëëthëjonetsi. Saya pënëareca joneca. Bajaraxuacujinae icatsia vecuapitsapatsi, jai Jesús.

Bajarapacuenia Jesús jumaitsi Jesús pijajivi peyapëtaeyaexanaenexa pacuenia daxitacuene jivi pexaejava xae ata, apo pibisiacuene.

²⁰ Icatsia Jesús jumaitsi:

—Baitsi rajane jivi pejamatabëëthëtojavavetsina, papibisiajamatabëcuene pitsapa, bajara baitsi jane xua jivi jamatabëcuenebijianatsi. ²¹ Tsipaji rabaja jivi pejamatabëëthëtojavavetsina pitsapa pibisiacuene penajamatabëxainaenexa. Pitsapa pebi pijava pevecuanamatayajitsi jamatabëcueneenexa. Pitsapa petiriavijavabelia pebi penaperabëquenetsiatae jamatabëcueneenexa. Pitsapa jivitonë pebeyaxu-abijamatabëcueneenexa. ²² Pitsapa penacobetoxotsijamatabëcueneenexa. Pitsapa itsamonae pecobecovë penaxainaeyabijamatabëcueneenexa. Pitsapa piacujirubejema-matabëcueneenexa. Pitsapa itsamonaejavabelia peyamaxëitojorobijamatabëcueneenexa. Pitsapa itsamonae pexainaecuene pecobecaëbijamatabëcueneenexa. Pitsapa itsajivi pibisiacuena pebaracuaicuaijai jamatabëcueneenexa. Pitsapa ayaijamatabëcuenejivi penataejamatabëcueneenexa. Pitsapa saya jema peponaponaejamatabëcueneenexa. ²³ Daxita bajarapajamatabëcuene jivi pejamatabëëthëtojavavetsina pitsapa. Nexata bajarapacuenia jivi jamatabëcuenebijianatsi, jai Jesús pijajivijavabelia.

Pacuenia Jesús itsanacuapijiva pexënatoyo tojamatejemayaexana yabara pelivaisi (Mt 15.21-28)

²⁴ Jesús baja Genesaret nacuavecua pona. Naropota itsanacuayabelia, itsabelia eca anijatamarabeje, Tiro tomarabeje Sidón tomarabeje. Nexata Jesús bajarapanacuatalia bota patajopa. Muetsia picani Jesús patsijitsia. Itsiata acuenebi muetsia pepatsijava. ²⁵ Nexata bepijia petiriva vënëlivaisitaetabatsi Jesús pepatsijava. Nexata petiriva pata Jesúsjavaberena. Nexata bajarapova yayataeya Jesús pitabarata pematabacabëta nucajunua. Bajarapova pexënatoyo dovathi yajavaponapona. ²⁶ Bajarapova sirofeniciavirirava, apo judíova. Nexata Jesúsjavabelia jumaitsi:

—Pexaniacuene bitso netoexanare. Taxënatovayo netovecuacapitsapare dovathi, jai bajarapova.

²⁷ Nexata Jesús jumaitsi bajarapovajavabelia:

—Copiaya abaxë veyavenonajë tajanacuapijivi, judíovi. Tsipaji apo xanepanae xamë itsanacuapijivamë copiaya tacayavenonaenexa. Xamë copiaya itsa cayavenonaejitsipatsi, nexata pacuenia pejevaxi pexaejavaminexa yacajërëtsipajë tarajutsinexa avirixijavabelia, bajara itsinë tsipae, jai Jesús bajarapovajavabelia.

²⁸ Itsiata baitsi jane bajarapova ajumesaë tsaponae. Icatsia jumaitsi Jesúsjavabelia:

—Xaniajamë rabaja picani. Itsiata neyavenonare. Tsipaji avirixi ata mesa bëxëpanata itsa nubena, nexata pejevaxi pexaepanpërë itsa othopareca mesa bëxëpanareca, banaxane avirixi ata. Bajara pijinia pacuenia itsiata itsanacuapijiva atanë, neyavenonare, jai bajarapova Jesúsjavabelia.

²⁹ Nexata icatsia Jesús jumaitsi bajarapovajavabelia:

—Xaniavaetsia nejumecanaviatame. Naviare baja nijaboyabelia. Dovathi rabaja catovecuapitsapatsi nexënatovayo, jai Jesús.

³⁰ Itsa baja bajarapova pijaboyabelia pata, pexënatovayo taeyabuata jamatejema baja pebocaejava camata. Nexata yapëtane pexënatovayo baja petovecuapitsapaejavatsi dovathi.

Pacuenia Jesús jamatejemayaexana bitso siyanë, apo pejumetaenë, piajumecëcënë, yabara pelivaisi

³¹ Jesús baja naropota Tiro nacuavecua. Najetaruca Sidón nacujava. Bajaraxuacujinae najetaruca Decápolis nacujava. Bajaraxuacujinae patajopa Galilea pucaxanetojavabelia. ³² Bajarajota jivi tocapatatsi siyanë, bitso apo pejumetaenë, pialumecëcënë. Nexata bajarapamonae jumaitsitsi Jesúsjavabelia:

—Jesús, pexaniacuene panetoexanare. Panetojayare maponëje pejumetaenexa, pecuaicuaijainexanua, jai bajarapamonae.

³³ Nexata Jesús jivivecua bajaraponë barëpona pesaicaeyojavabelia. Nexata Jesús pecobesitota namataenetsia muxuvojobëta. Bajaraxuacujinae nacobesioniata. Ebarëtojayata. ³⁴ Nexata Jesús athëbëa benaëcotsia. Jesús athëbë venajumalixuabica. Nexata Jesús pijajumeta jumaitsi bajaraponëjavabelia:

—¡Efata! jai.

“Efata,” pejaijume Jesús pijajumeta, mapajumetaje pejumaitsijume: “¡Muxuvojorucaremelia!” pejaijume.

³⁵ Bajarapacuenia Jesús pejumaitsijavata, bajaraponë muxuvojorucalia baja. Jumetane jane baja. Peebarëto ata jane baja xanepana. Natsipaeba baja xaniavaetsia.

³⁶ Nexata Jesús jumaitsi bajaraponë petocapatsivitsijavabelia:

—Pëtsa papaebame itsamonaejavabelia pacuene exanajë maponëjavabeliaje, jai picani Jesús asaëyata.

Itsiata bajarapamonae jumeitavetsi atatsi, bitso tsipaebapona jivijavabelia. ³⁷ Nexata pamonaë jumetane bajarapalivaisi, pinijicuenia jamatabëcuenenabenajaca. Bajarapamonae jumaitsi:

—Bajaraponë, Jesús, daxitacuenevitane pexainaevi ata xaniavaetapona. Siyavi ata, bitso apo pejumetaevimi ata, jumetaeyaexanapona. Apo pecaëjëpaevitsi ata pecuaicuaijaijava, cuaicuaijaiyaexanapona xaniavaetsia, jai bajarapamonae Jesús yabara.

8

Pacuenia Jesús rajuta pexaejava bejamatabëcuene cuatro mil pajivibeje yabara pelivaisi (Mt 15.32-39)

¹ Itsamatacabi Jesús jivibitsaëtoخانeto muxunanacaetuatatsi. Nexata bajarapamonae penabaninexa, bajarajota pexaejava apo xinae. Nexata Jesús junata pijajivi. Jesús jumaitsi pijajivijavabelia mapacueniaje:

² —Netsitabejiobi baja rovia mapamonaeje. Tsipaji baja ajena acueyabi pamatacabibeje xaina xanëjavata pejinavanapaecujinae. Pemarue baja tovereverecatsi. ³ Itsa meta itorobijitsipajë pijabonëjavabelia peponaenexa pexaejava xaenejeva, apo asaë meta tsipae namutua peponaejava. Tsipaji raja itsamonae pata tajëverena, jai Jesús pijajivijavabelia.

⁴ Nexata Jesús pijajivi jumaitsi:

—¿Detsa jane pacuenia pexaejava berajutatsi? Majotaje ajibi pexaejava. Tsipaji itsajivi ata pijabo apo xinae, jai Jesús pijajivi.

⁵ Nexata Jesús yanijoba pijajivijavabelia.

—¿Detsa papanbëbeje paxainame? jai.

Nexata Jesús pijajivi jumaitsi:

—Siete papanbëbeje paxainajë, jai.

⁶ Nexata Jesús itoroba daxitajivi penaenexa irata. Nexata Jesús pita siete papanbëbeje. Nexata Diosojavabelia Jesús jumaitsi:

—Pexaniacuene panetoexaname. Panerajutame pataxaejava, jai.

Bajaraxuacujinae Jesús epatsicacapona pan. Nexata Jesús pepatsicacaepan rajutapona pijajivijavabelia. Nexata juya Jesús pijajivi bajarapapan tsicobetsana daxitajivi pexaenexa. ⁷ Dujuinëxinua xaina. Icatsia Jesús jumaitsi Diosojavabelia dujuainëxi yabara:

—Pexaniacuene panetoexaname. Panerajutame dujuainëxi, jai.

Nexata icatsia pijajivi itoroba petsicobetsanaenexa daxitajivi bajarapadujuainëxi. ⁸ Daxitajivibitsaëtoxaneto nabane xaniavaetsia. Nexata peyajuvënëcopabijavanë Jesús pijajivi caetuata. Vënëba siete xuabeje bemapirecuenia pexanaejavanë. ⁹ Pexaejava nabane bejamatabëcuene cuatro mil pajivibeje. Nexata jane baja pexaejava pexaecujinae, Jesús jivi naviabiaexana pijabonëjavabelia. ¹⁰ Bajaraxuacujinae Jesús, pijajivi yajava, runareca jera ënëabereca. Jesús pijajivi barëpona Dalmanuta nacuyabelia.

Pacuenia fariseovi Jesús itorobatsi Dioso pesaëta pinijicuene pexanaejava petsitaexanaenexa picani yabara pelivaisi

(Mt 16.1-4; Lc 12.54-56)

¹¹ Fariseovi Jesúsjavaberena pata. Bajarapamonae jamatabëcuenejëbiaya jumenotaponatsi. Nexata bajarapamonae jumaitsi Jesúsjavabelia:

—Jesús, Dioso pesaëta pinijicuene exanare. Nexata pacacueneyapëtaenatsi Dioso pepacuene athëbëvetsica pecaitorobinëcuenetsica, jai.

¹² Nexata bajarapamonae yabara Jesús bitso jamatabëcuenebëjai. Nexata Jesús athëbë venajumalixuabica. Jumaitsi:

—¿Detsa xuajitsia panevajëcame pinijicuene patacatsitaexanaenexa pataneyapëtaenamë pepacuene Dioso athëbëvetsica taneitorobinëcuenetsica. Xaniajanë pacuenia pacatsipaebijitsiatsi. Itsiata apo pacatsitaexanaetsi tsane pinijicuene taexanaejava, jai Jesús.

¹³ Nexata baja Jesús bajarapamonae vecuapona. Icatsia runareca jera ënëabereca. Pucaxaneto itsapanabelia baja Jesús pona.

Pacuenia Jesús pijajivi muxujioba fariseovi petsipaebilivaisi pejumecovënëtsiyaniva yabara pelivaisi

(Mt 16.5-12)

¹⁴ Jesús pijajivi nacofënëta pamarue. Nexata saya caepanbëyo capona jerata. ¹⁵ Nexata Jesús pijajivi muxujioba pejumecovënëtsiyaniva fariseovi itsa tsipaebatsi saicayacuenia Dioso pejumelivaisivecua. Jesús jumaitsi pijajivijavabelia mapacueniaje:

—Panejumetaema. Xania panayajivitaema fariseovi pijalevadura, jai Jesús pijajivijavabelia.

Bajarapacuenia Jesús jumaitsi fariseovi petsipaebilivaisi, nacuaevetsinë ata, Herodes, petsipaebilivaisi, Jesús pijajivi pejumecovënëtsiyaniva.

¹⁶ Itsiata Jesús pijajivi apo jumeyapëtaetsi. Bajaraxuata Jesús pijajivi nabarëcuaicuaijai bajarapacuenia Jesús pejumaitsiyume yabara. Jesús pijajivi najumaitsi:

—Jesús nacajumaitsi: “Xania panayajivitaema fariseovi pijalevadura,” nacajai. Baja raeta pacuenia Jesús nacajumaitsi pan apo vajacaponaexae, najai Jesús pijajivi.

¹⁷ Jesús pijajivi jamatabëcueneyapëtane bajarapacuenia jamatabëcuenenavëxaniabiaya penajumaitsiyava levadura yabara. Nexata Jesús jumaitsi pijajivijavabelia:

—¿Detsa xuajitsia panajumaitsimë: “Baja raeta pacuenia Jesús nacajumaitsi pan apo vajacaponaexae,” panajamë? Paxamë abaxë apo panejumeyapëtaemë xua yabara pacajumaitsi. Pajamatabëcuenetajamë bitso. ¹⁸ Pan yabara raja apo pacajumaitsi. Pan itsa namatavenonaejitsipatsi, necaëjëpa taexanaenexa. ¿Apo panajamatabënapitsimë tsipaji pacuenia exanajë pamatacabi pan namatavenonatsi? ¹⁹ Pacujinae epatsicacajë cinco papanbëmibeje panetsicobetsanaenexa cinco mil ponëbejejavabelia, bajarapacujinae peyajuvënëcopabijavanë, ¿detsa xuabeje pavënëtame bemapirecuenia pexanaejavanë? jai Jesús pijajivijavabelia.

Nexata Jesús pijajivi jumaitsi:

—Doce xuabeje pavënëtajë, jai.

²⁰ Jesús icatsia jumaitsi:

—Pacujinae epatsicacajë siete papanëmibeje panetsicobetsanaenexa cuatro mil pajivibejejavabelia, bajarapacujinae peyajuvënëcopabijavanë, ¿detsa xuabeje pavënëtame bemapirecuenia pexanaejavanë? jai Jesús.

Nexata Jesús pijajivi jumaitsi:

—Siete xuabeje pavënëtajë, jai.

²¹ Nexata Jesús jumaitsi pijajivijavabelia:

—¿Panejumeyapëtaneme tsabaja pan yabara apo patacajumaitsijava? Xanë pacajumaitsi: “Xania panayajivitaema fariseovi pijalevadura,” pacajaitsi. Bajarapacuenia pacajumaitsi panejumecovënëtsiyaniva fariseovi petsipaebilivaisi, panejumecovënëtsiyaniva nacuaevetsinë ata Herodes. Tsipaji bajarapamonae pacatsipaebiana saicayacuenia Dioso pejumelivaisivecua, jai Jesús pijajivijavabelia.

Pacuenia Jesús itaxutoxaniavaeta bitso pitaxutotsëcënaenë, apo petaenë tsiquirijavayo ata, yabara pelivaisi

²² Jesús, pijajivi yajava, patajopa Betsaida tomarata. Nexata Jesús tocanajetarubenatsi bitso pitaxutotsëcënaenë, apo petaenë. Pinijicuenia vajëcatsi Jesús pitaxutojayatsinexa bajaraponë pitaxutoxanepanaenexa. ²³ Nexata Jesús cobepita. Barëpona pesaicaeyojavabelia, tomarapënëyabelia. Nexata bajarajotalia Jesús peionitota itaxutoexaba. Itaxutojayata. Bajaraxuacujinae Jesús yanijoba.

—¿Cacaëjëpa tsabaja netaejava? jai Jesús.

²⁴ Nexata bajaraponë naëcota. Jumaitsi:

—Taniji pebijivi pejinavanapaejava. Itsiata saya benetsita naejavanë, jai bajaraponë.

²⁵ Nexata icatsia Jesús itaxutojayata. Bajara jane xaniavaetsia naitaxutobabatsiaya naëcota. Itaxutoxanepana jane baja. Xaniavaetsia baja tane. ²⁶ Nexata Jesús jumaitsi bajaraponëjavabelia:

—Naviare nijaboyabelia. Pëtsa abaxë poname tomarabelia. Pëtsa paebame itsajivijavabelia ata pacuene caexanatsi, jai Jesús.

Pacuenia Pedro jumaitsi Jesúsjavabelia: “¡Xamë raja Cristomë! jai yabara pelivaisi (Mt 16.13-20; Lc 9.18-21)

²⁷ Jesús, pijajivi yajava, najetaruca. Pona pepatsinexa Cesarea de Filipovënë tomara-jumaverena penaetomaraxijavabelia. Namutua abaxë penajetarubenaejavata Jesús jumaitsi pijajivijavabelia:

—¿Detsa jivi jumai tsabiabi xanë yabara? ¿De tsaeta xanë ponënë? jai Jesús pijajivijavabelia.

²⁸ Nexata Jesús pijajivi jumaitsi:

—Itsamonae xamë yabara jumai tsabiabi: “Juanpijinëmi raeta jivibautisabinëmi icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta, profeta Elíaspijinë, ponëmi bajayata ponapona, icatsia asaë,” jai tsabiabi. Itsamonae pijinia jumai tsabiabi: “Bajayata raeta Diosojumepaebivimi profetavimiyajuvënënë icatsia asaë,” jai tsabiabi xamë yabara, jai Jesús pijajivi.

²⁹ Nexata icatsia Jesús jumaitsi pijajivijavabelia.

—¿Detsa nexata paxamë pajamatabëitsimë xanë yabara? ¿Detsa xanë ponënë? jai Jesús pijajivijavabelia.

Nexata Pedro jumaitsi Jesúsjavabelia:

—Xamë cajena Cristomë, athëbëvetsica Dioso pecaitorobinëtsica jivi necapanepaenexa, jai Pedro Jesúsjavabelia.

³⁰ Nexata Jesús pijajivijavabelia jumaitsi:

—Pëtsa bajarapacuenia itsajivijavabelia papaebame. “Cristo raja,” pajamë pëtsa xanë yabara, jai Jesús.

*Pacuenia Jesús tajëvelia navajunupaeba pebeyaxuabijavanexatsi yabara pelivaisi
(Mt 16.21-28; Lc 9.22-27)*

³¹ Jesús pebeyaxuabijavanexatsi, tajëvelia navajunupaeba pijajivijavabelia. Jumaitsi mapacueniaje:

—Xanë, Daxitajivi Pematapijinënë, pinijicuenia bejiobinë tsane. Judíovi pijaancianovi, sacerdotevi penamatacaitorobivinia, judíovi pecujarubivinia, apo nejumecovënëtsi tsane Cristonëcuenenë. Nexata bitso nebejioviaexanaena. Bajaraxuacujinae nebeyaxuabiana. Itsiata baitsi jane tatëpacujinae, acueyabi matacabita, icatsia asaënë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

³² Jesús jumenapebetsiaya pijajivi xaniavaetsia tsipaeba mapajumeje. Nexata Pedro junata Jesús pebarëponatabinexa pesaicaeyojavabelia. Nexata Pedro pesaicaeyojavatalia jumaitsi Jesúsjavabelia:

—Pëtsa bajarapacuenia cuaicuajiamë netëpaejavanexa yabara, jai Pedro Jesúsjavabelia.

³³ Nexata Jesús Pedrovecua napënëyorotaxuaba. Taenuca pijajivi penaejavabelia. Nexata Jesús napënëyorotsia jumai tsanucuae Pedrojavabelia:

—¡Dovathi, nevecuanatixire! Tsipaji xamë apo jitsipaemë pacuenia Dioso jitsipa taexanaenexa. Saya ëjivi pacuenia jitsipa taexanaenexa, jitsipame, jai Jesús.

³⁴ Nexata Jesús junata pijajivi, daxita jivibitsaëto yajava. Jumaitsi bajarapamonaejavabelia:

—Pajivi jitsipa tanepënaponaejava, bajarapajivi copatsi pejitsipaecuenia pexanaenexa penajamatabëxainabiabijavami. Exanaponaponae taitorobicuenia. Najamatabëcueneveretsinua bejiobiaexanaejitsia atatsi, beyaxuabijitsia atatsinua, Dioso pejumelivaisi yabara piamatabëcuenesaë tsaponaponanexa. Nexata jane baja xuacujinae nepënaponaena.

³⁵ Pajivi exanaponapona penatojitsipaecuenia, apo xainae tsane matacabi apo pevereverecaejava. Pajivi xanë tajamatabëcueneta copata penatojitsipaecuenia pexanabiabijavami, jivi tacapanepaelivaisitanexa pejamatabëcuenetanua, bajarapajivi xainaena matacabi apo pevereverecaejava.

³⁶ Pajivi exanaponapona penatojitsipaecuenia, bajarapajivi Diosovecua naxuabiana. Nexata bajarapajivi daxitacuene xainae ata mapanacuapijicueneneje, itsiata nacuerata. Tsipaji pexainacuene apo capanepae tsanetsi Diosojavabelia. ³⁷ Tsipaji acuenebi tsane itsajivi ata pematamotsinexa penaxuabiyaniva Diosovecua. ³⁸ Pajivi tajajivitonë ata, Dioso apo pejumecovënëtsivi tuatuajëta, pibisiacuene pexanaevi tuatuajëta ata, navënëlivaisicaura tsane xanë tajajivitonëcuene, tanejumecovënëtsijava ata yabara, nexata juya xanë bajarapajivi, tajajivitonë ata, tajajivitonëcuene vënëlivaisicauranë tsane taxa Diosojavabelia. Bajarapajivi vënëlivaisicauranë tsane pamatacabita icatsia patsianicajë. Baitsi pamatacabita xanë, Daxitajivi Pematapijinënë, ángelevi yajava, patsianicajë, pamatacabita yajavapatsianicajënuu taxa Dioso pijapenivenivenaectia, jai Jesús pijajivijavabelia.

9

¹ Icatsia Jesús jumaitsi jivijavabelia:

—Xaniajanë pacuenia pacatsipaebijitsiatsi. Daxita paxamë patëpaenejevamë, Dioso taxuxuabiana pijajivi pevetsijava mapanacuataje. Nexata paxamëyajuvënëvi pepuatae tsane Dioso petaxuxuabijava pijajivi pevetsijava mapanacuataje, tëpaena. Dioso raja pijajivi evetsiana pinijijamatabëcuenesaëta, jai Jesús jivijavabelia.

*Pacuenia Jesús caeepatoyo perabënivenivenataba yabara pelivaisi
(Mt 17.1-13; Lc 9.28-36)*

² Jesús petëpaejavanexa tajëvelia penavajunupaebicujinae, seis pamatacabibejecujinae, Jesús pijajivi, acueyabi ponëbeje, barëpona pinijitsutoxanetojumabetsia. Jesús

barëjunaya mapamatabëxëyoje: Pedro, Santiago, Juan. Bajarapamatabëxëyo Jesús barëjunaya pinijitsutoxanetojumabetsia. Nexata petsutojumatatsia Jesús perabënivenivena bajarapamonae pitabarata. ³ Jesús penaxatatsijava bitso nivenivena. Bitso niojai. Mapanacuataje pexaniaquiatsiva ata apo caëjëpaetsi bajarapacuenia peniojaiyaexanaenexa. ⁴ Jesús pijajivi bajarajota tane jemata penaitajëtsijava bajayata petëpaenëmibeje, Elíaspijinëbeje Moiséspijinëbeje. Jesús barëcuaicuaijaitsi bajaraponëbeje. ⁵ Nexata Pedro jumaitsi Jesúsjavabelia mapacueniaje:

—¡Patajatuxanenë, pijacuaxae panebarëponamel! Pacatoexanaenatsi acueyabi pabobërëto beje. Itsabobërëto xamënexa tsane. Itsabobërëto Moisésnexa tsane. Itsabobërëto Elíasnexa tsane, jai Pedro Jesúsjavabelia.

⁶ Bajarapacuenia Pedro jumaitsi Jesúsjavabelia canaëjëtsinejeva. Tsipaji bitso bajarapamonae najunaviaca. Nexata apo yapëtae pacuenia jumaitsijsitsia. ⁷ Nexata daxita bajarapamonae pematatsënëvetsica itarërëbo mataacataxuabatsi. Nexata bajarapamonae jumetane bajarapaitarërëbojavavetsica Dioso pejumaitsijsijava.

—Mara ponë taxënato, tasivanëje. Panamuxunaevere bajaraponë, jaitsica Dioso Jesús pijajivijavabelia.

⁸ Bajarajota bajarapamonae itsa naëcobarëcëpalia Jesúsjavabelia, ajibi baja bajaraponëbeje. Caenë baja Jesús nuca.

⁹ Nexata Jesús pijajivi itsa barërunanucaponaica petsutojumavetsica, jumeitaveta pijajivi. Jumaitsi pijajivijavabelia:

—Pëtsa patsipaebame itsajivi ata pacuene pataneme. Matapania xanë, Daxitajivi Pematapijinënë, icatsia asaënë tsane tatëpaecujinae, nexata jane baja matapania patsipaebianame, jai Jesús pijajivijavabelia.

¹⁰ Bajarapamonae, acueyabi ponëbeje, jumecovënëta pejumaitsicueniatsi. Itsiata ëpamonae nayanijobabiaba.

—Jesús jumai tsabiabi: “Tatëpaecujinae icatsia asaënë tsane,” jai tsabiabi. ¿De tsamëra pajamatabëcuene xaina bajarapalivaisi? najai tsabiabi bajarapamonae.

¹¹ Nexata Jesús pijajivi yanijoba Jesúsjavabelia. Jesús pijajivi jumaitsi:

—Patajatuxanenë, ¿detsa xuajitsia judíovi pecujarubivi jumai tsabiabi: “Bajayata ponëmi ponapona, Elíaspijinë, petëpaecujinae icatsia asaë tsane. Bajaraponë copiata patsiana. Bajaraxuacujinae patsiana Cristo, ponë Dioso athëbëvetsica itorobijitsiatsica pepo vajanacacapanepaenënexa jane baja,” jai tsabiabi? jai Jesús pijajivi Jesúsjavabelia.

¹² Nexata Jesús jumaitsi pijajivijavabelia:

—“Copiata Elíaspijinë patsiana. Nexata bajaraponë jamatabëcuenexanetsiana daxitajivi,” itsa jai, Juanpijinëmi jivibautisabinëmi yabara jumaitsi. Nexata baja xaniajai pacuenia judíovi pecujarubivi jumaitsi. Tsipaji baja Juanpijinë tavajënaeya jivi jamatabëcuenexanetanajetaruca. Xanë, Daxitajivi Pematapijinënë, athëbëvetsica Dioso nitoroba jivi tacapanepaenexa. Nexata xanë yabara tajëvelia Dioso pejumelivaisibaxutota jumaitsi mapacueniaje: “Bejiobi tsane pinijicuenia. Apo jitsipaetsi tsane. Naitaxutojematsianatsi,” jai xanë yabara tajëvelia Dioso pejumelivaisibaxutota, jai Jesús pijajivijavabelia.

¹³ Jesús icatsia jumaitsi pijajivijavabelia Juanpijinëmi yabara:

—Xaniajanë pacuenia pacatsipaebijitsiatsi. Elíaspijinë rabaja patajopa. Pepatsicujinae baja exanatsi daxita pacuenia jamatabëexanatsi. Nexata exanatsi pacuenia baja cajena Dioso pejumelivaisibaxutota tajëvelia jumaitsi bajaraponëmi yabara, jai Jesús pijajivijavabelia Juanpijinëmi yabara.

Pacuenia Jesús jamatejemayaexana pejevaxinë, dovathi peyajavaponaponaenë, yabara pelivaisi

(Mt 17.14-21; Lc 9.37-43)

14 Jesús pijajivi, acueyabi ponëbeje, petsutojumabetsia pebarëponaecujinae, icatsia barënaviatsica. Itsamonae Jesús pijajivi pepuenetsivijavabetsica, barënaviatsica. Nexata Jesús tane pijajivi jivibitsaëtoخانeto pevajënae pematatoyoronaejavatsi. Jesús tanenua judíovi pecujarubivi anaeya pejumenotsijavatsi Jesús pijajivi. 15 Nexata bajarapamonae itsa taerëcëpa Jesús, daxita jamatabëcuenebarëyaya cujinaeyeca Jesúsjavabelia pebajacobinexatsi Jesús. 16 Nexata Jesús jumaitsi bajarapamonaejavabelia:

—¿Detsa xua yabara panajumeanaenotame pinijicuenia? jai Jesús.

17 Caenë bajarapajivi bitsaëtoخانetoyajuvënënë jumaitsi Jesúsjavabelia:

—Jesús, mara picani taxënatonëyo, dovathi peyjavavaponaponaeñëyo, catocanajetarucatsije. Maponëyoje dovathi apo netonatsipaebiaexanaetsi. 18 Itsa raja dovathi vaetababiabatsi, irata xuababiabatsi. Nexata bajarajota pecuibothamu tsabiabi. Vonoquiraquirajainua tsabiabi. Daxitanëyo aperabëbaba tsatababiabireca. Picani raja nijajivijavabelia jumaitsinë: “Panetovecuacapitsapare dovathi,” janë. Itsiata bajarapamonae apo caëjëpaetsi tanetovecuacapitsapaenexa, jai bajaraponë Jesúsjavabelia.

19 Jesús nexata jumaitsi pijajivijavabelia:

—¡Paxamë baja rovia apo pajumecovënëtsimë Dioso papecayavenonaejavanexa! Bajaraxuata apo pacajamatabëcuenecaëjëpae pejevaxinë panevecuacapitsapaenexa dovathi. ¿Detsa paepatojebi abaxë paxamëjavata ponaponaeñëyo? ¿Detsa paepatojebi abaxë paxamëjavabelia ajamatabëcuenesaënë tsaponaponae tsane patanejumecovënëtsinexamë? Panetocarenamëre pejevaxinë, jai Jesús pijajivijavabelia.

20 Nexata tocarenatsi Jesús pejevaxinë. Dovathi itsa tanetsi Jesús, nexata icatsia bajarajota dovathi pejevaxinë tëpajoneyaexanatsi. Irata xuabatsi pejevaxinë. Nexata pejevaxinë natorenaba irata. Pethamu pitsapa pecuibuatsina. 21 Nexata Jesús yanijoba pejevaxinë paxajavabelia.

—¿Detsa pamatacabibeje xaina petaxuxuabicujinaetsi mapacueneje? jai Jesús.

Nexata pejevaxinë paxa jumaitsi:

—Penacutojavaveliacujinae cajena taxuxuabatsi. 22 Bajayajebi picani isotojavalia dovathi netoxuababiabaliatsi. Menialia ata netoxuababiabaliatsi. Beyaxuabijitsiatsi bajarapacuenia. Xamë itsa cacaëjëpa itsacuenia ata taneyavenonaeñexamë, ¡nitaxutotsoniataema! ¡Neyavenonare! jai pejevaxinë paxa Jesúsjavabelia.

23 Nexata Jesús jumaitsi pejevaxinë paxajavabelia:

—Pajivi jumecovënëta Dioso peyavenonaejavanexatsi, bajarapajivi Dioso yavenonatsi daxita xua namatavenona, jai Jesús.

24 Nexata pejevaxinë paxa aëjai. Jumaitsi:

—¡Jumecovënëtajë baja cajena! ¡Neyavenonare bitso orijibia tajumecovënëtsinexa! jai bajaraponë Jesúsjavabelia.

25 Nexata Jesús itsa tane jivibitsaëtoخانeto penacaetuataponaejava Jesúsjavaberena, nexata Jesús itaveta dovathi. Jumaitsi:

—Dovathi, xamë pejevaxinë apo nenatsipaebiaexanaenë. Apo nejumetaeyaexanaenënu. Xanë caitavetatsi. Pitsapare mapapejevaxinëvecuaje. Pëtsa baja icatsia junuame matavëjëa maponëyojavaberena, jai Jesús dovathijavabelia.

26 Nexata dovathi pejevaxinë icatsia aëjaiyaexanatsi. Tëpajoneyaexanatsi. Vecuapitsapatsi jane baja. Puenetabuatatsi bepetëpaenëyo. Nexata itsamonae bajarajota jumaitsi:

—Pejevaxinë rabaja tëpa, jai bajarapamonae.

27 Nexata Jesús cobepita pejevaxinë. Cobeveatabiaya yotsina. Nexata pejevaxinë nonotabapuna.

28 Nexata xuacujinae Jesús boya itsa joneya, Jesús pijajivi jumaitsi:

—¿Detsa xuajitsia meta paxanë apo panecaëjëpae patavecuacapitsapaenexa dovathi? jai Jesús pijajivi.

29 Nexata Jesús jumaitsi pijajivijavabelia:

—Mara paviria dovathije apo jitsipae pepitsapaejavaje. Matapania panexaejava apo paxaemē tsipae panevajētsinexa asaēyata Diosojavabelia panecapitsapaenexa dovathi, pitsapaejitsipa, jai Jesús pijajivijavabelia.

Pacuenia icatsia Jesús tajēvelia navajunupaeba pebeyaxuabijavanexatsi yabara pelivaisi

(Mt 17.22-23; Lc 9.43-45)

³⁰ Jesús pejevaxinē dovathi pevecuacapitsapaecujinae, Jesús baja, pijajivi yajava, pona. Nexata Jesús, pijajivi yajava, najetaruca Galilea nacujajava. Jesús jitsipa pijajivi pebarēnajarucaenexa bajaraxuayo itsajivi ata yapētaenejevatsi. ³¹ Tsipaji Jesús pebeyaxuabijavanexatsi, tajēvelia navajunupaebapona pijajivijavabelia. Jumai tsaponae Jesús pijajivijavabelia mapacueniaje:

—Xanē, Daxitajivi Pematapijinēnē, necanajetsiana itsamonae pecobeyabelia. Bajarapamonae nebeyaxuabiana. Itsiata baitsi jane tanebeyaxuabicujinae, acueyabi maticabita, icatsia asaēnē tsane, jai tsaponae Jesús pijajivijavabelia.

³² Itsiata pijajivi apo jumeyapētaetsi. Bajarapamonae ajumeura Jesúsjavabelia peyanijobinexa bajarapalivaisi yabara.

Pacuenia Jesús pijajivi: “¿Detsa ponē vaxaitsiyajuvēnēnē nacavecuaayaijamatabēcuenenē bitso?” najai tsanajetarubenaē yabara pelivaisi

(Mt 18.1-5; Lc 9.46-48)

³³ Jesús pijajivi barēpata Capernaum tomarata. Jesús pijajivi pebarēpatsicujinae, boyalia itsa barējoneya Jesús, yanijoba pijajivijavabelia.

—¿Detsa pitsicuene yabara namutua bitso panajumenotanajetarubename? jai Jesús.

³⁴ Nexata Jesús pijajivi moya. Tsipaji Jesús pijajivi namutua najumaitsi tsanajetarubenaē:

—¿Detsa ponē vaxaitsiyajuvēnēnē nacavecuaayaijamatabēcuenenē bitso? najai tsanajetarubenaē Jesús pijajivi.

³⁵ Nexata Jesús eca. Junata pijajivi, doce ponēbeje. Jumaitsi pijajivijavabelia:

—Pajivi jitsipa ayaijamatabēcuenējivi penaexanaenexa daxitajivi matatoxenetsia, bajarapajivi beveliajamatabēcuenējivi natae peyavenonaenexa daxitajivi, jai Jesús pijajivijavabelia.

³⁶ Bajaraxuacujinae Jesús cobepita pejevaxinēyo. Pijajivi pitabarata nuteta. Bajaraxuacujinae Jesús isapita. Jumaitsi pijajivijavabelia:

³⁷ —Pajivi copiapita tanejumecovēnētsijiviyo, mapitsipejevaxinēyo ataje, xanē taniji tanecopiapitsijava. Pajivi necopiapita, ēxanē apo necopiapitsi. Ponē nitoroba, neyjavacopiapita, jai Jesús pijajivijavabelia.

Pacuenia Jesús jumaitsi pijajivijavabelia itsa vēnēlivaisitane itsanē dovathi jivivecua pecapitsapaejava Jesús pevēnēta yabara pelivaisi

(Mt 10.42; Lc 9.49-50)

³⁸ Jesús pijajivitonē, Juan, jumaitsi Jesúsjavabelia:

—Tajatuxanenē, pataniji itsanē nevēnēta dovathi jivivecua pecapitsapaejava. Itsiata bajaraponē apo paxanēyajuvēnēnē. Nexata paitavetajē bajaraponē dovathi jivivecua pecapitsapaponaējava, jai Juan.

³⁹ Nexata Jesús jumaitsi Juanjavabelia:

—Pētsa paitavetame bajaraponē. Tsipaji raja pajivi pinijicuene pexanaejava exana tavēnēta, bajaraxuacujinae acuenēbi bajarapajivi tanebaranatsipaebinexa pibisiacuēnia. ⁴⁰ Tsipaji raja pajivi pibisiacuene apo najamatabēxainae vaxaitsijavaberena, bajarapajivi nacajamatabēcueneyavenona. Bajarapajivi bevaxaitsijamatabēcuenējivi.

⁴¹ Xaniajanē pacuenia pacatsipaebijitsiatsi. Pajivi tsiquirijavayo ata mera pacarajutsiana paneapaenexa patajajivixae, bajarapajivi pepacuene Dioso matamotsianatsi mera papecarajutsimatamo, jai Jesús Juanjavabelia.

Pacuenia Jesús pijajivi muxujioba itsajivi ata pibisiacuene pexanaeyaexanaeyaniva yabara pelivaisi

(Mt 18.6-9; Lc 17.1-2)

⁴² Icatsia Jesús jumaitsi pijajivijavabelia:

—Pajivi pibisiacuene exanaeyaexanaejitsipa mapitsipejevaxijivixi ataje, tanejume-covënëtsiyajuvënëjiviyo, bajarapajivi Diosojavabelia bitso naneconitsipa. Nexata Dioso ayaicuenia naneconitsiaexanaejitsipatsi. Nexata pajivi najamatabëxaina pibisiacuene pexanaeyaexanaenexa tanejumecovënëtsivijavabelia, abaxë pibisiacuene exanaeyaexanaenejeva, bajarapajivi bevësicëtatsi ibotoxanetojavabelia. Nexata bajarapajivi yamaëya, ibotoxaneto yajava, bexuarecatsi pucaxaneto tuatuajëareca. Bajarapajivi bexuarecatsi bitso penaneconitsiyaniva Diosojavabelia pibisiacuene itsa exanaeyaexana tanejumecovënëtsiviyajuvënëvi. ⁴³ Bajaraxuata panecobeta pibisiacuene itsa paexaname, panacobercaucure. Itsiata xanepana panejonenexa cobemataxucaeya apo pevereverecaenacuajavabelia. Biji rajane apo xanepanae tsipae panejonenexa infiernojavabelia anijacobebeje yajava, itsajota isotocotia apo itaxupae caeto ata. ⁴⁴ Bajarajota apo tãpae oro, jivivixaevi. Isotocotia ata apo itaxupae caeto ata. ⁴⁵ Itsa panetaxuta ata pibisiacuene paexaname, panataxucaucure. Itsiata xanepana panejonenexa taxumataxucaeya apo pevereverecaenacuajavabelia. Biji apo xanepanae tsipae panejonenexa infiernojavabelia anijataxubeje yajava. ⁴⁶ Bajarajota apo tãpae oro, jivivixaevi. Isotocotia ata apo itaxupae caeto ata. ⁴⁷ Paneitaxutota ata panetaejava yabara pibisiacuene itsa paexaname, panaitaxutocajure. Itsiata xanepana panejonenexa pacaetaxutojivimë apo pevereverecaenacuajavabelia, Dioso pijanacuayabelia. Biji rabiji apo xanepanae tsipae panejonenexa anijaitaxutobeje yajava infiernojavabelia. ⁴⁸ Bajarajota apo tãpae oro, jivivixaevi. Isotocotia ata apo itaxupae caeto ata.

⁴⁹ Dajubinë jivi itsa beyaxuaba Diosojavabelia ofrendacuenia pevi perajutsinexa, viexaba yajota pevixanepanaenexa. Bajara pijinia pacuenia pejamatabëcuenexanepanaenexa, daxita Dioso pijajivi ata jamatabëcueneëjëbianatsi mapanacuataje. ⁵⁰ Yajo raja xanepana. Itsiata yajo pexaicaejavami itsa ajibi tsipae, apo xanepanae tsipae itsacueniejavayonexa ata. Bajara pijinia pacuenia paxamë ata pajamatabëcueneitsimë tsipae Diosojavabelia, itsa apo pavecuapanepaemë tsipae papecajamatabëcuene ëjëtaaponaejava. Nexata pajamatabëcuenesaëmëre panejamatabëcuenexanepanaenexa Diosojavabelia. Pajinavanapare xaniavaetsia itsamonaejavabelia ata, jai Jesús pijajivijavabelia itsajivi ata Jesús pijajivi pibisiacuene pexanaeyaexanaeyaniva.

10

Pacuenia Jesús jivi livaisi tsipaeba penacojobinë pijava pexuabiyaniya yabara pelivaisi
(Mt 19.1-12; Lc 16.18)

¹ Jesús baja pona Capernaum tomaravecua. Pona Judea nacuyabelia. Bajaraxuacujinae Jordánmene itsapanabelia, paira, Jesús pona. Bajarajotalia icatsia jivibitsaëtotoxaneto pata Jesúsjavaberena. Nexata icatsia Jesús livaisi tsipaeba bajarapamonae. Tsipaji baja cajena Jesús livaisi petsipaebanajetarucaenë. ² Nexata fariseovi Jesús cujibarenatsi petsipaebilivaisi yabara jamatabëcueneëjëbiaya peyanijobinexatsi. Nexata Jesús bijiaya itsa jumecanaviata, neconitsijitsiatsi. Nexata fariseovi jumaitsi Jesúsjavabelia:

—¿Xanepana tsaja penacojobinë pijava pexuabinexa? jai.

³ Jesús nexata jumaitsi fariseovijavabelia:

—¿Detsa pacuenia bajayata Moiséspijinë pacaitoroba panijavajivi panexuabiyaniya? jai Jesús.

⁴ Nexata fariseovi jumaitsi Jesúsjavabelia:

—Moiséspijinē tocopata, ponē pijava jamatabēxuaba, pexuabinexa. Itsiata baitsi jane Moiséspijinē tocopata, ponē pijava xuabijitsia, copiaya petoyaquinaenexa cuyalatobaxuto pijavajavabelia. Nexata ponē pijava xuabijitsia, copiaya pijava toyaquinabiaba pitavetsilivaisi pexuabinexa jane baja pijava. Bajarapacuenia pexanaenexa, ponē pijava jamatabēxuaba, Moiséspijinē tocopata, jai fariseovi Jesúsjavabelia.

⁵ Nexata Jesús jumaitsi fariseovijavabelia:

—Moiséspijinē raja bajarapacuenia pacatocopata paneajamatabēcuenelivaisitajaxae. ⁶ Pamatacabi Dioso taxuxuaba nacua pexanaejava, bajarapamatacabita Dioso exana pebi, pijava yajava. ⁷ Bajaraxuata pebi itsa nacojioba pijavajavabelia, banatsata paxavecua, pena atavecua. ⁸ Nexata Dioso tane anijajivimibeje becaejivi. Nexata Dioso apo tae beanijajivibeje. Becaejivi saya tane Dioso. ⁹ Bajaraxuata itsanē ata apo bexuabi pijava. Tsipaji Dioso pejamatabēcueneta napitsiaexanatsibeje, jai Jesús fariseovijavabelia.

¹⁰ Bajaraxuacujinae Jesús pijajivi pijaepato itsa barēnacopata bota, nexata Jesús pijajivi yanijobatsi bajarapacuenia yabara. ¹¹ Nexata Jesús jumaitsi pijajivijavabelia:

—Ponē pijava pexuabicujinae, itsava icatsia itsa pita, bajaraponē pibisiacuene exana pevitota. Nexata naneconita Diosojavabelia. Tsipaji itsava jaita pepo pijavavecua. Dioso cajena abaxē bajaraponē pexuabiva pepo pijavacuenia totanetsi. ¹² Bajara pijinia itsi petiriva ata pamona pevecuanaviatsicujinae, itsanē icatsia itsa pitatsi. Bajarapova pibisiacuene exana pevitota. Nexata naneconita Diosojavabelia. Tsipaji itsanē jaita pepo pamonavecua, ponē abaxē Dioso totanetsi pamonacuenia, jai Jesús pijajivijavabelia.

Pacuenia Jesús jumaitsi pejevaxijivixijavabelia yabara pelivaisi
(Mt 19.13-15; Lc 18.15-17)

¹³ Jesúsjavaberena itsamonae pejevaxijivixi tocapataponatsi Jesús pejayataponanexa pecobeta. Nexata Jesús pijajivi itaveta pexi pecapatsivi. Jesús pijajivi jumaitsi pexi pecapatsivijavabelia:

—Pētsa patocapataponame panexi Jesúsjavaberena, jai.

¹⁴ Nexata Jesús itsa tane bajarapacuenia pijajivi pejumaitsijava, Jesús jamatabēcuenianaepanaxuareca. Jumaitsi pijajivijavabelia:

—Pētsa paitavetame. Pacopare pejevaxijivixi pepatsinexa xanējavaberena. Mapitsipejevaxijivixije jumeaebinejeva, xaniavaetsia bajumecovēnēta palivaisi tsipaebatsi. Nexata pamonaē jitsipa pejonejava Dioso pijanacuayabetsia, bajara pijinia pacuenia jumeaebinejeva xaniavaetsia bejumecovēnēta Dioso pejumelivaisi. ¹⁵ Xaniajanē pacuenia pacatsipaebijitsiatsi. Mapitsipejevaxijivixije itsa jumecovēnēta palivaisi tsipaebatsi, bajumecovēnēta xaniavaetsia jumeaebinejeva. Bajara pijinia pacuenia jumeaebinejeva, xaniavaetsia bejumecovēnēta Dioso pejumelivaisi pamonaē jitsipa pejonejava Dioso pijanacuayabetsia, jai Jesús pijajivijavabelia.

¹⁶ Nexata Jesús isapitapona pejevaxijivixi, caejiviyo canacujitsia. Pecobeta jayatapona. Jesús pejevaxijivixijavabelia jumai tsaponae:

—Dioso xaniavaetsia caevetsiana, jai tsaponae.

Pacuenia pevējēato, bitso pexainaenē, cuaicuaijai Jesúsjavabelia yabara pelivaisi
(Mt 19.16-30; Lc 18.18-30)

¹⁷ Pabota Jesús pejevaxijivixi isapitapona, bajarapabovecua itsajavabelia baja icatsia Jesús ponaējitsia. Nexata baja Jesús itsa naropotsijitsia, pevējēato cujinaerucarena Jesúsjavaberena. Jesús pitabarata pematatabacabēta nucajunua. Jumaitsi pevējēato Jesúsjavabelia:

—Petuxanenē, pexaniajamatabēcuenenēmē. ¿Detsa pitsicuene bexanajē taxainaenexa matacabi apo pevereverecaejava? jai pevējēato.

¹⁸ Nexata Jesús jumaitsi pevējēatojavabelia:

—¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë. ¹⁹ Xamë baja yapëtaneme pacuenia Dioso pejumelivaisita itoroba jivi pejumecovënëtsinexa. Jumaitsi mapacueniaje: “Pëtsa jaitame itsava nijavavecua. Pëtsa beyaxuabame jivitonë. Pëtsa nacobetoxotame. Pëtsa itsamonae pexanaejava yabara najumetsënëtsiaya paebame. Pëtsa yamaxëitojorobiaya vecuapitame itsajivi pexainaejava. Axa yaiyataema. Ena ata yaiyataema,” jai Dioso pejumelivaisita. Xamë baja yapëtaneme bajarapalivaisi, jai Jesús pevëjëatojavabelia.

²⁰ Nexata pevëjëato jumaitsi Jesúsjavabelia:

—Petuxanenë, daxita rabaja bajarapalivaisianë jumecovënëtajë pejevaxinëjavaveliacujinaenë, jai pevëjëato.

²¹ Nexata Jesús asivaya tane pevëjëato. Jumaitsi:

—Caejava raja catosaica nexanaenexa. Ponare necanajetsinexa daxita nexainaecuenemi. Bajarapamatamomi tsicobetsanaename bepejiobivi. Nexata bajarapacuenia xainaname bitso nexainaecuene Dioso pijanacuatatsia. Nexata najamatabëcueneverere, cabejiohiaexanae ata, cabeyaxuabijitsia atanua tajumelivaisi yabara, niamatabëcuenesaë tsaponaponaenexa. Nexata jane baja xuacujinae nepënaponaename, jai Jesús pevëjëatojavabelia.

²² Nexata pevëjëato itsa jumetane bajarapacuenia Jesús pejumaitsijava, najamatabëxainaejava baja vecuapona Jesús. Tsipaji pevëjëato daxitacuene bitso pexainanenë. Nexata pevëjëato apo jamatabëjumecovënëtsi palivaisi Jesús tsipaeba.

²³ Nexata pevëjëato pecovëta Jesús pijajivi matatoyorotsia naëcota. Jumaitsi:

—¡Pamonae bitso daxitacuene pexainaevi, tsiayapëbejetsi penajamatabëcuenecopatsinexa Diosojavabelia pecapanepaenexatsi Dioso pijanacuayabetsia! jai Jesús pijajivijavabelia.

²⁴ Nexata Jesús pijajivi jamatabëcuenenabenajaca itsa jumetane bajarapacuenia Jesús pejumaitsijava. Nexata icatsia Jesús jumaitsi pijajivijavabelia:

—Tajamonae, pamonae bitso ëpexainaejavanexa najamatabëxaina, bajarapamonae bitso tsiayapëbejetsi tsane pejonenexa taxa Dioso pijanacuayabetsia. ²⁵ Pacuenia camello ayainëxae, acuenebi pejonejava palutaetoitaxutovojotualia, bajara pijinia pacuenia bitso pexainanenë acuenebi tsane pejonejava Dioso pijatomarabetsia. Tsipaji najamatabëxaina bitso ayaijava pexainanenexa, jai Jesús pijajivijavabelia.

²⁶ Jesús pijajivi itsa jumetane bajarapacuenia Jesús pejumaitsijava, bitso jamatabëcuenenabenajaca. Nexata bajarapamonae jumaitsi Jesúsjavabelia:

—¿Detsa nexata pitsivi panepaena Diosojavabelia bitso pexainaevi ata itsa apo panepae tsane Diosojavabelia? jai.

²⁷ Nexata Jesús asaëya naëcota pijajivijavabelia. Jumaitsi pijajivijavabelia:

—Jivi raja apo caëjëpaetsi pijacuata penacapanepaenexa Diosojavabelia. Caenë Dioso caëjëpatsi jivi pecapanepaenexa. Dioso raja caëjëpatsi daxitacuene pexanaenexa, jai Jesús pijajivijavabelia.

²⁸ Nexata Pedro jumaitsi Jesúsjavabelia:

—Patajatuxanenë, paxanë rabaja pacopatajë daxitacuene pataxainaejavami. Nexata baja pacapënajinapanatsi, jai Pedro.

²⁹ Nexata Jesús jumaitsi:

—Xaniajanë pacuenia pacatsipaebijitsiatsi. Pajivi xanë tajamatabëcueneta, jivi tacapanepaelivaisitanexa pejamatabëcuenetanua, pueneta pijabomi, pematapijivi ata, pejuyapijivi ata, paxa ata, pena ata, pijava ata, pexi ata, pijapabianë ata, nexata bajarapajivi bitso ayaijava Dioso rajutsianatsi pepuenetsijavanëmi matatoxenetsia.

³⁰ Caejavayomijamatabëcuene tsaponae, rajutsianatsi mapanacuataje cien xuabeje

tsaponae pevajënaeyabelia. Bajarapajivi icatsia xainaena bonë, pematapijivi ata, pejuyapijivi ata, pena ata, pexi ata, pabianë ata. Itsiata bajarapajivi itoya tsanetsi mapanacuapijivije. Bejiobiaexanabiabianatsinua. Itsiata baitsi jane bexëajavabelia xainaena matabi apo pevereveceajava. ³¹ Pamonaeeaeconoxae mapamatacabitaje ayaijamatabëcuenevi tanetsi, bajarapamonae Dioso beveliajamatabëcuenevi exanaenatsi. Pamonaee pijinia mapamatacabitaje beveliajamatabëcuenevi tanetsi, bajarapamonae Dioso ayaijamatabëcuenevi exanaenatsi, jai Jesús pijajivijavabelia.

Pacuenia icatsia Jesús tajëvelia navajunupaeba pebeyaxuabijavanexatsi yabara pelivaisi

(Mt 20.17-19; Lc 18.31-34)

³² Jesús, pijajivi yajava, najetaruca namutua. Pona Jerusalén tomarabelia. Jesús pijajivi, pepënaponaevitsi, jamatabëcuenenabenajaca. Tsipaji Jesús apo junavi bajarabelia peponaejava, yapëtae ata, pacuenia exanaejitsiatsi Jerusalén tomarata. Nexata Jesús icatsia junata pijajivi, doce ponëbeje, pesaicaeyojavabelia. Navajunupaeba tajëvelia pacuenia exanaejitsiatsi Jerusalén tomarata. ³³ Jumaitsi Jesús tajëvelia pijajivijavabelia:

—Panejumetaema. Mara Jerusalén tomarabelia ponatsije. Bajarajotalia xanë, Daxitajivi Pematapijinënë, sacerdotevi penamatacaitorobivi, judíovi pecujarubivina, pecobeyabelia necanajetsiana tanevaetabinexa. Nexata xanë neneconitsiana tanebeyaxuabinexa. Bajaraxuacujinae icatsia necanajetsiana itsanacuaverena pepatsivi pecobeyabelia. ³⁴ Bajarapamonae necanecaponaena. Nesuabiana. Nejumatitibabena penaneconitsivi pejumaconitabiabimacata. Bajaraxuacujinae nebeyaxuabiana jane baja. Itsiata baitsi jane tanebeyaxuabicujinae, acueyabi matabita, icatsia asaënë tsane, jai tajëvelia pijajivijavabelia Jesús penavajunupaebijavata pebeyaxuabijavanexatsi.

Pacuenia Santiagobeje Juanbeje vajëtabeje Jesúsjavabelia pexaniacuene petoexanaenexatsibeje yabara pelivaisi

(Mt 20.20-28)

³⁵ Zebedeo pexënatobeje, Santiagobeje Juanbeje, imoxoyoliabeje Jesús. Jumaitsibeje Jesúsjavabelia:

—Patajatuxanenë, pacuenia pacavajëtsijitsiatsibeje, bajarapacuenia pajitsipajëbeje patanetoexanaenexamëbeje, jaiibeje Santiagobeje Juanbeje Jesúsjavabelia.

³⁶ Nexata Jesús jumaitsi:

—¿Detsa pitsicuene pajitsipamebeje patacatoexanaenexabeje? jai.

³⁷ Nexata Santiagobeje Juanbeje jumaitsibeje:

—Pamatacabi daxitacuene evetsianame, panetocopatsianamebeje patanaecaenexabeje nemuxuneneta vajanajuaevetsinexa. Itsanë naecaena necujuanenia. Itsanë naecaena netsavenonena, jaiibeje.

³⁸ Nexata Jesús jumaitsi:

—Paxamëbeje apo payapëtaemëbeje xua panevajëtamëbeje. ¿Pacacajëpabeje tsaja panenacaevetsinexabeje papecabebiobiaexanaenexabeje pacuenia xanë nacaevetsianajë tanebejiobiaexanaenexa? ¿Pacacajëpabeje tsaja panenacaevetsinexabeje papecabeyaxuabinexabeje pacuenia xanë nacaevetsianajë tanebeyaxuabinexa? jai Jesús pijajivitonëbejjavabelia.

³⁹ Nexata Santiagobeje Juanbeje jumaitsibeje:

—Jājā, panecajëpabeje cajena, jaiibeje.

Nexata icatsia Jesús jumaitsi Santiagobeje Juanbejjavabelia:

—Paxamëbeje pacabebiobiaexanaenabeje pacuenia xanë nebejiobiaexanaena. Pacabeyaxuabianabejenua pacuenia xanë nebeyaxuabiana. ⁴⁰ Itsiata baitsi jane xua panevajëtamëbeje panenacaenexabeje, itsanë tacujuanenia, itsanë tatsavenonena,

bजारaxua Dioso apo netocopatsi patacatocopatsinexabeje. Tsipaji raja taxa Dioso ĕpitapetsivinexa abaxĕ bajaraxua toxaniavaeta, jai Jess Santiagobeje Juanbejejavabelia.

⁴¹ Diez ponĕbeje, Jess pijajivi, itsa vĕnĕtane pepĕya bajaraxua Santiagobeje Juanbeje Jessjavabelia pevajĕcaejavabeje, nexata bajarapamonae jamatabĕcuenebaraanaepana Santiagobeje Juanbejejavabelia. ⁴² Nexata Jess daxita pijajivi junata. Jess jumaitsi pijajivijavabelia:

—Payapĕtaneme rabaja pacuenia nacuaevetsivi exana. Eveta caenacua canacujitsia. Nexata nacuaevetsivi pijajivicuenia eveta pamonaē jinavanapa pevetsinacuanĕjava. Nexata bajarapanacuanĕ pevetsivi ayaijamatabĕcuenevi nataeyabiaba. Xua jamatabĕitoroba pevetsinacuanĕjava pejinavanapaevi petoexanaenexatsi, ajumesaĕya itorobabiaba petoexanaenexatsi. ⁴³ Pĕtsa paxamĕ bajarapamonae cuenejĕpaeya bajarapacuenia paexaname itsamonaējavabelia. Biji rajane ponĕ paxamĕyajuvĕnĕnĕ jitsipa ayaijamatabĕcuenenĕ penaexanaenexa daxita paxamĕvecua, bajaraponĕ daxita paxamĕ bepanijajivitonĕcuenia bepacayavenonabiaba. ⁴⁴ Ponĕ paxamĕyajuvĕnĕnĕ jitsipa penaexanaenexa papecanamatacaitorobinĕnĕxa, bajaraponĕ daxita paxamĕ bepanijajivitonĕcuenia bepacayavenonabiaba. ⁴⁵ Tsipaji rabaja xanĕ ata, Daxitajivi Pematapijinĕ atanĕ, apo patajopaenĕ jivi taneyavenonaenexa. Biji rajane xanĕ patajopajĕ tayavenonaenexa daxitajivi. Patajopajĕ tasivatĕpaenexa jivi ayaibitsaĕtoخانeto pĕbisiaacuene pexanaeneconimi taneconimatamotsinexa, jai Jess pijajivijavabelia.

Pacuenia Jess itaxutoxanepanaeyaexana Bartimeo, bitso pitaxutotsĕcĕnaenĕ, apo petaenĕ, yabara pelivaisi
(Mt 20.29-34; Lc 18.35-43)

⁴⁶ Jess, pijajivi yajava, pata Jeric tomarabelia. Jess icatsia, pijajivi yajava, itsamon-aenua ayaibitsaĕtoخانeto yajava, pitsapa Jeric tomaravecua. Nexata Bartimeovĕnĕnĕ, Timeo pexĕnato, eca namuto muxuneneta. Bartimeo, bitso pitaxutotsĕcĕnaenĕ, apo petaenĕ. Jivijavabelia amoneya palata pevajĕcabiabinĕ. ⁴⁷ Nexata Bartimeo itsa jumetane Nazaret tomarapijinĕ Jess imoxoyo penajetarucaejava, vavajai tsecae.

—ĭJess, Davidpijinĕ pemomomĕ, nitaxutotsoniataema! jai tsecae Bartimeo.

⁴⁸ Nexata picani itsamonae jumeitavetatsi Bartimeo pemoyanexa. Itsiata bitsoy orijibia vavajai tsecae.

—ĭDavidpijinĕ pemomomĕ, nitaxutotsoniataema! jai tsecae Jessjavabelia.

⁴⁹ Nexata Jess muxunanucojopa. Jumaitsi jivijavabelia:

—Pajunaremena bajaraponĕ, jai.

Nexata bajarapamonae junarena Bartimeo. Pejunatsivirena jumaitsi Bartimeojavabelia:

—Najamatabĕsaĕtaxuare. Nonotapunare. Jess raja cajunarena, jai bajarapamonae.

⁵⁰ Nexata Bartimeo penajumaxuabipana xuabapuna. Bepijia najetabarena Jessjavabarena. ⁵¹ Nexata Jess yanijoba Bartimeojavabelia.

—ĭDetsa xua jitsipame tacaexanaenexa? jai Jess.

Nexata Bartimeo bitso pitaxutotsĕcĕnaenĕ, jumaitsi Jessjavabelia:

—Jess, jitsipajĕ taitaxutoxanepanaejava, jai.

⁵² Nexata Jess jumaitsi:

—Ponare baja. Nesivajamatabĕjumaitsimĕ: “Jess nitaxutoxanepanaeyaexanaena,” nesivajamatabĕjamĕ. Bazaraxuata itaxutoxanepaname baja, jai Jess Bartimeojavabelia.

Bजारapacuenia Jess pejumaitsijavata, Bartimeo baja xaniavaetsia tane. Nexata baja bajaraponĕ Jess pepĕta napona.

11

Pacuenia Jesús pata Jerusalén tomarata yabara pelivaisi (Mt 21.1-11; Lc 19.28-40; Jn 12.12-19)

¹ Jesús baja pijajivi barëimoxoyotanajetaruca Jerusaléntomara. Barëpata baja Betfagé tomarayobeje Betania tomarayobeje muxuneneta. Itsajota petsutojumata nubena olivonaenë, bajarajota Jesús barëpata. Bajarajota pebarëpatsicujinae Jesús itoroba anijanëbeje pijajivitonëbeje. ² Jesús jumaitsi pijajivitonëbejejavabelia mapacueniaje:

—Paponarebeje mapatomarayo ecaliajejavabelia. Ajena papatsiaremeliabeje, pataenutsianamebeje burro, pecëtanutsinëtsi. Bajarapaburro itsajivi ata abaxë apo jumaponae. Paisinaenamebeje. Payamaëcarenamëbeje tsane. ³ “¿Detsa xuajitsia paisinamebeje burro?” itsa pacajaibeje tsane itsajivi, nexata pajumaitsimëbeje tsane: “Vajatuxanenë raja namatavenona. Aeconoxae raja icatsia canaviatsiarena,” pajamëbeje tsane, jai Jesús pijajivitonëbejejavabelia.

⁴ Nexata Jesús pijajivitonëbeje liabeje. Caxitajarabanutabeje burro baupa muxuneneta. Cëtanutatsi burro namuto muxuneneta. Nexata bajaraponëbeje burro isinabeje.

⁵ Nexata bajarajota pejinavanapaevi yanijobatsibeje.

—¿Detsa xuajitsia paisinamebeje burro? jaitsibeje.

⁶ Nexata bajaraponëbeje jumaitsibeje pacuenia baja Jesús itorobatsibeje. Nexata tocopatatsibeje pecaponaenexabeje. ⁷ Nexata jane baja burro capatabeje Jesúsjavaberena. Nexata Jesús pijajivi pijacamisajumavelia penaxatabijavanë burro tsijumajeba. Bajara-pajumata Jesús ecaya. ⁸ Jesús penajetarucaenamutojavarena jivi ayaibitsaëtoxaneto pijacamisajumavelia penaxatabijavanë namutua tsivajënaeyerequejebaponatsi. Itsamonae naemaxërananë, pebaxu yajava, ucubaba. Nexata namutua Jesús tsivajënaeitabëtsiaya jebaponatsi yaiyataeya Jesús pecopiapitsinexatsi. ⁹ Jesús penajetarucæjavata jivi ayaibitsaëtoxaneto Jesús pevajënaeya namataxainaeya najetarubena. Itsabitsaëtoxaneto Jesús pecovëya cotocaevanajetarubena. Daxita bajarapamonae vavajai tsanajetarubena. Jumai tsanajetarubena:

—¡Dioso yavenonaenatsi maponë najetarucaje! ¡Vajatuxanenë pejamatabëcueneta najetaruca! ¹⁰ ¡Dioso yavenonaenatsi maponë najetarucaje nacua pevetsinënexa! ¡Pacuenia bajayata vajasalinainëmi Davidpijinëmi nacua eveta, bajarapacuenia evetsijitsia! ¡Nexata vaxaitsi pexaniajamatabëcuene rajutatsi Diosojavabelia! jai tsanajetarubena bajarapamonae.

¹¹ Nexata jane baja Jesús patajopa Jerusalén tomarata. Templobojavalialia joneya. Nexata Jesús templobota naitaxutocaeveta, pacuene jivi exana templobota, petaenexa. Nexata baja Jesús pepuatae pacuene jivi exana templobota, Jesús baja icatsia pona. Naviata abaxë Betania tomarabelia pijajivi, doce ponëbeje, yajava. Tsipaji baja caniviyotsia.

Pacuenia Jesús bijataenuta higueranae piacuaijibixae yabara pelivaisi (Mt 21.18-19)

¹² Jesús pijajivi barëmajita Betania tomarata. Nexata bajayacunua Jesús icatsia pijajivi barëlia Jerusalén tomarabelia. Nexata Jesús namutua penajetarucæjavata, piajani. ¹³ Jesús namutovecua tajiyotalia higueranae yabaxua taenuta. Nexata Jesús taeyojopalia bajaraponae pecuai perubenaejava. Itsa Jesús pata bajaraponaejavabelia, ëpebaxu saya tsanuca. Tsipaji cajena abaxë apo penacuaitsimatacabi. ¹⁴ Nexata Jesús jumaitsi higueranaejavabelia:

—Itsajivi ata apo cacuaixae tsane matavëjëa, jai Jesús.

Nexata pijajivi jumetanetsi bajarapacuenia Jesús pejumaitsijava higueranaejavabelia.

*Pacuenia Jesús Jerusalén tomarata templovecua pitsapaeyaexana pecanajetabi-
abivi, pecomuacabiabivina, yabara pelivaisi*
(Mt 21.12-17; Lc 19.45-48; Jn 2.13-22)

¹⁵ Jesús, pijajivi yajava, pata Jerusalén tomarata. Nexata Jesús joneya temployalia. Nexata templobota Jesús tane pecanajetabiabivi, pecomuacaevinua. Nexata daxita bajarapamonae Jesús pitsapaeyaexana templovecua. Palata pecambiababiabivi ata pijamesanēmi Jesús topēnēyorobajaraba. Ucucu pecanajetabiabivi ata penabiabijavanēminua topēnēyorobajaraba. ¹⁶ Jesús apo tocopatsi itsajivi ata itsacuenejava pecapon-aenexa templojova. ¹⁷ Jesús livaisi tsipaeba. Jumaiti bajarajota pepatsivijavabelia:

—Dioso baja cajena pejumelivaisibaxutota mapatemplobo yabara tajēvelia jumaiti mapacueniaje: “Tajabo raja daxitanacuanēpijivi xanējavaberena penavajēcaebo tsane,” jai Dioso pejumaitisjava Dioso pejumelivaisibaxutota. Itsiata baitsi jane paxamē yamaxēitojorobiaya panenacobetoxotsinexa panacaetuatabiabame mapabotaje, jai Jesús templobota pecanajetabiabivijavabelia.

¹⁸ Sacerdotevi penamatacaitorobivi, judíovi pecujarubivina, jumetane daxita pacuenia Jesús exana jivijavabelia templobota. Nexata bajarapamonae najumejaita pacuenia Jesús beyaxuabijitsiatsi. Bajarapamonae cjunavatsi Jesús. Tsipaji daxitajivi jamatabēcuenenabenajaca Jesús petsipaebilivaisi yabara. ¹⁹ Ajena baja meravitsia, Jesús yajavapona pijajivi Jerusalén tomaravecua.

Pacuenia higeranae tēpanuca yabara pelivaisi
(Mt 21.20-22)

²⁰ Jesús pijajivi barēmajita Betania tomarata. Nexata bajayacunua Jesús icatsia, pijajivi yajava, najetaruca pecovēnamutua. Bajarapamonae taenuta higeranae baja petēpanucajava daxita yatabutopaya. ²¹ Nexata Pedro najamatabēnapita higeranae Jesús pebijataenutsijava. Nexata Pedro jumaiti Jesúsjavabelia:

—Tajatuxanenē, jica, taema. Ponae higeranae bijataenutame, tēpanuca baja. ¿Detsa meta pacuenia tēpa baja? jai Pedro.

²² Nexata Jesús jumaiti pijajivijavabelia:

—Paxamē bitso pajumecovēnēre Dioso papecatoexanaenexa pacuenia pavajētame. ²³ Xaniajanē pacuenia pacatsipaebijitsiatsi. Itsa pajamatabējumaitsimē tsipae Dioso yabara: “Dioso nejumecovēnētsiana xua vajētsianajē Diosojavabelia,” itsa pajamatabējamē tsipae, pacajumecovēnētsipa mapatsuto ataje. Nexata itsa pajumaitsimē tsipae mapatsutojavabeliaje: “Natixire majotavecuaaje. Pucaxanetojavabelia jopare,” itsa pajamē tsipae, pacajumecovēnētsipa. Nexata mapatsuto ataje paneitorobicuenia, pacajumecovēnētsipa. Itsa pajumecovēnētsianame Dioso papecatoexanaejavanexa, itsa panajamatabēxainamenua Dioso ēpapecajumecovēnētsijavanexa, xua pavajētsianame Diosojavabelia, Dioso pacajumecovēnētsiana. ²⁴ Bajaraxuata pacajumaitsi. Daxita xua pavajētsianame Diosojavabelia, pasivajamatabējumaitsimē tsane: “Xua vajētajē Diosojavabelia, pepacune Dioso nejumecovēnētsiana,” pasivajamatabējamēre. Nexata xua pavajētsianame Diosojavabelia, Dioso pacajumecovēnētsiana. ²⁵ Itsajivi pibisiacune papecaexanaejava, pajamatabēcuenecaevare panevajētsijavata Diosojavabelia. Nexata pabarajamatabēcuenexanepanare bajarapajivi. Nexata pijinia paneaxa, athēbētatsia peecaenē, jamatabēcuenecaeviana paxamē ata pitabarata pibisiacune paneexanaejava. ²⁶ Paxamē itsa apo pajamatabēcuenecaevimē tsane itsanē pibisiacune papecaexanaejava, itsa apo pabarajamatabēcuenexanepanaemēnua tsane, nexata pijinia paneaxa, athēbētatsia peecaenē, apo jamatabēcuenecaevi tsane paxamē pitabarata pibisiacune paneexanaejava. Apo pacabarajamatabēcuenexanepanaenua tsane, jai Jesús pijajivijavabelia.

Pacuenia Jesús caējēpatsi daxitacuene pexanaenexa yabara pelivaisi
(Mt 21.23-27; Lc 20.1-8)

²⁷ Jesús, pijajivi yajava, pata Jerusalén tomarata. Jesús ita ponapona templobota, nexata sacerdotevi penamatacaitorobivi, judíovi pecujarubivinu, judíovi pijaancianovinu, parena Jesúsjavaberen. ²⁸ Nexata bajarapamonae jumaiti Jesúsjavabelia:

—¿Jipatsa pejamatabēcueneta pecanajetabiabivi, pecomuacaevinua, capitsapame mapatemplobovecuaje? jai bajarapamonae Jesúsjavabelia.

²⁹ Nexata Jesús jumaiti bajarapamonaejavabelia:

—Xanē copiaya caejumeyo pacayanijobianatsi. Itsa paxamē panejumecaviatsianame, nexata xanē juya pacatsipaebianatsi ponē nitoroba taexanaenexa bajarapacuen. ³⁰ ¿Jipatsa jane pejamatabēcueneta Juanpijinē jivi bautisabaponapona? ¿Dioso tsaja pejamatabēcueneta? Itsa jume, ¿jivi tsaja pejamatabēcueneta? Panejumecanaviare baitsi jane, jai Jesús bajarapamonaejavabelia.

³¹ Nexata epamonae nabarēcuaicuaijai. Najumaiti:

—¿De meta pacuenia jumecanaviatsianatsi? Vaxaiti ita jumai tsipaetsi: “Dioso raja pejamatabēcueneta,” ita jai tsipaetsi, nexata Jesús nacajumai tsipae: “¿Detsa nexata xuajitsia apo pajumecovēnētsimē Juanpijinē pepaebilivaisi?” nacajai tsipae. ³² “Jivi raja saya pejamatabēcueneta Juanpijinē jivi bautisabaponapona,” acuenebi vajajaijava. Tsipaji mapatomarapijivije ayaibitsaētōxaneto Juanpijinē yabara sivajamatabējumaiti: “Juanpijinē raja pepacuen Diosojumepaebinēmi,” sivajamatabējai. Nexata bajarapamonae nacabeyejebijitsipa, najai Jesús peyanijobivitsi.

³³ Nexata saya bajarapamonae jumaiti Jesúsjavabelia:

—Apo payapētaenē ponē Juanpijinē itorobatsi jivi pebautisabaponaenexa, jai.

Nexata Jesús jumaiti bajarapamonaejavabelia:

—Nexata xanē ata apo pacatsipaebi tsanetsi ponē nitoroba taexanaenexa bajarapacuen, jai Jesús.

12

Pacuenia exana pijamatabēcuenebejevi, itsanē pijauvacabo petoevetsivi, yabara pelivaisi

(Mt 21.33-46; Lc 20.9-19)

¹ Jesús livaisi tsipaeba sacerdotevi penamatacaitorobivijavabelia, judíovi pecujarubivijavabelia ata, judíovi pijaancianovijavabelia ata. Jumaiti mapacueniaje:

—Pijaira pexainaenē pijairata uba ayaibacaboxaneto uvavēnējava. Bajaraxuacujinae pijaira matatoyorotsia ibopanaxanetonē mataropotsia pefaratsijavata yacaranata. Bajarapayacaranatsijava athēbēabetsia apia jivitonē matatoxenetsia. Bajaraxuacujinae irata mēthē cueyeta. Nexata pecueyetsimēthējavata exana uvacuaibarēmene pecayujucabiabijavanexa. Bajaraxuacujinae pijauvacabo tuatujēta exananuta piapiabotsia, penacuaitsimatacabi ita tonaveretatsi, athēbēyo pevetabiabeaenexa pijauvacabo. Nexata bajaraponē itsamonae evetsiaexana pijauvacabo. Uvacabo pexainaenē jumaiti petoevetsivitsijavabelia: “Pamatacabi cuainaveretsiana, natsicobetsatsianatsi. Pamatacabi raja cuainaveretsiana, tajajivitonē itorobiarenajē xua panetotsatsianame tanetopitsinexa,” jai uvacabo pexainaenē petoevetsivitsijavabelia. Nexata uvacabo pexainaenē tajē nacuyabelia pona. ² Itsa baja uvacabo pexainaenē yapētane pecopiapatsijava uvacuai penaveretsimatacabi penotsinexa, nexata uvacabo pexainaenē itoroba pijajivitonē. Itoroba petoevetsivitsijavabelia petsicobetsatsinexatsi.

³ Nexata uvacabo pexainaenē pijajivitonē tovaetabatsi. Toconibabiatsi. Petoconibabecujinaetsi cobesa naviatsiaexanaliatsi. ⁴ Itsiata uvacabo pexainaenē icatsia itoroba itsanē pijajivitonē petsicobetsatsinexatsi. Bajaraponē ata icatsia tomatajorobi-axuabatsi. Pibisiacuenia tobijatanetsi. ⁵ Itsiata icatsia uvacabo pexainaenē itoroba

itsanë pijajivitonë. Bajaraponë jane baja tobeyaxuabatsi. Bajaraxuacujinae abaxë icatsia uvabacabo pexainaenë itoroba itsamonae. Bajarapamonaeyajuvënëvi itsamonae totsaquibabiatsi. Itsamonae tobeyejebatsi.

⁶ Abaxë uvabacabo pexainaenë icatsia pitorobinexa, caenë tonacopatatsi. Pexënato bitso piasivanë. Nexata jane baja uvabacabo pexainaenë pexënato icatsia itoroba. Uvabacabo pexainaenë jamatabëjumaitsi: “Tajauvabacabo tanetoevetsivi tajajivi apo netoyaiyatae ata, itsiata meta taxënato netoyaiyataena,” jamatabëjai uvabacabo pexainaenë. ⁷ Itsiata uvabacabo petoevetsivitsi uvabacabo pexainaenë pexënato ata, apo toyaiyataetsi. Itsa tane uvabacabo pexainaenë pexënato, bajarapamonaenajumaitsi: “Mara ponëje paxa pevënamuto paxa pijauvabacabo pitsipaje. Naxanitsia. Beyaxuabatsi. Nexata raja vaxaitsi vajauvabacabo tsane,” najai uvabacabo petoevetsivitsi. ⁸ Nexata icatsia uvabacabo pexainaenë pexënato ata tovaetabatsi. Icatsia pexënato ata tobeyaxuabatsi. Petëpaenë xuabatsi bajarapauvabacabo pënëyabelia, jai Jesús sacerdotevi penamatacaitorobivijavabelia, judíovi pecujarubivijavabelia ata, judíovi pijaancianovijavabelia ata.

⁹ Icatsia Jesús jumaitsi bajarapamonaeyavabelia:

—¿De meta nexata xua exanaena uvabacabo pexainaenë pijauvabacabo petoevetsivitsijavabelia? Uvabacabo raja pexainaenë patsiarena. Verebiabiana daxita bajarapamonaemi. Nexata icatsia itsamonae evetsiaexanaena bajarapauvabacabo, jai Jesús bajarapamonaeyavabelia.

¹⁰ Icatsia Jesús jumaitsi:

—Payapëtaneme rabaja pacuenia Dioso pejumelivaisibaxutota tajëvelia jumaitsi xanë yabara. Iboto pelivaisicuenia Dioso pejumelivaisibaxutota jumaitsi xanë yabara mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia nayaëtsiana botabu daxita itsaibo matatoxenetsia. ¹¹ Vajatuxanenë Dioso raja exanaena bajarapacuenia. Nexata nacatsita pexaniacuene bitso tsane bajarapacuenia, jai tajëvelia Dioso pejumelivaisibaxutota xanë yabara.

Bajarapacuenia tajëvelia Dioso pejumelivaisibaxutota itsa jumaitsi, paxamë apo patanejumecovënëtsijavanexamë yabara jumaitsi. Dioso taneitapetsijava daxitajivi tacapanepaenexa yabara ata jumaitsi, jai Jesús bajarapamonaeyavabelia.

¹² Bajarapamonaenajumaitsi Jesús jamatabëvaetabatsi. Tsipaji bajarapamonaenajumeyapëtanetsi Jesús pejumaitsijava bajarapamonaenajumaitsi yabara. Itsiata abaxë apo vaetabatsi. Tsipaji cujunava jivi. Nexata baja Jesús bajarapamonaenajumaitsi vecuapona.

Pacuenia Jesús jamatabëcuenejëbiaya yanijobatsi impuestomatamo pematamotsijava yabara pelivaisi

(Mt 22.15-22; Lc 20.20-26)

¹³ Fariseoviyajuvënëvi, Herodes pijajiviyajuvënëvinua, najetarubena Jesúsjavaberena. Bajarapamonaenajumaitsi itorobatsi livaisi peyanijobinexatsi Jesús. Nexata Jesús bajarapamonaenajumaitsi bijiaya itsa jumecanaviata, peneconitsinexatsi picani nacuaevetsinëjavabelia. ¹⁴ Nexata bajarapamonaenajumaitsi pata Jesúsjavaberena. Bajarapamonaenajumaitsi jamatabëcuenejëbiaya jumaitsi Jesúsjavabelia:

—Jesús, payapëtaniji cajena nexaniajaicuene, xua yabara tsipaebabiabame livaisianë. Petuxanevi ata xamë apo cujunavimë. Apo auramë livaisi netsipaebabiabijava. Nexata daxitajivi najëpaeya livaisi tsipaebabiabame. Pexaniajailivaisi tsipaebabiabame pacuenia Dioso jitsipa jivi pejinavanapaenexa. ¿Xanepana tsaja vajamatamotsinexa impuestomatamo Romanonacua pepo pevetsinëjavabelia? Itsa jume, ¿apo xanepana tsaja vajamatamotsinexa? jai bajarapamonaenajumaitsi jamatabëcuenejëbiaya Jesúsjavabelia.

¹⁵ Itsiata baitsi jane Jesús jamatabëcuenyapëtane bajarapamonae jamatabëcuenejëbiaya peyanijobijavatsi peneconitsinexatsi picani. Nexata Jesús jumaitsi bajarapamonaejavabelia:

—¿Detsa xuajitsia jamatabëcuenejëbiaya paneyanijobame? Panetocarenamëre palatanëyo. Taejitsianë, jai Jesús.

¹⁶ Nexata bajarapamonae Jesús tocaponarenatsi palatanëyo. Nexata Jesús jumaitsi bajarapamonaejavabelia:

—¿Jipatsa mapitabaraje, pevënënu, ruca mapapalatanëyotaje? jai Jesús.

Nexata bajarapamonae jumaitsi Jesúsjavabelia:

—Romanonacua raja pepo pevetsinë pitabara, pevënënu, jai.

¹⁷ Nexata Jesús jumaitsi bajarapamonaejavabelia:

—Nexata parajutabiabianame Romanonacua pepo pevetsinë pijajava. Parajutabiabianame pijinia saicaya Diosojavabelia Dioso pijajava, jai Jesús.

Nexata Jesús itsa jumecanaviata bajarapacuenia, bajarapamonae jamatabëcuenenabenajaca bajarapacuenia Jesús pejumaitsijavata. Nexata bajarapamonae jamatabëjumaitsi:

—¡Xaniavaetsia baja rovia Jesús panejumecanaviata! jamatabëjai.

Pacuenia Jesús tsipaeba jivi petëpaecujinae icatsia piasaëjavanexa yabara pelivaisi
(Mt 22.23-33; Lc 20.27-40)

¹⁸ Saduceovi saicaya itsalivaisi xaina. Bajarapamonae jamatabëcuenenavëxaniabiaya jumai tsabiabi: “Petëpaevi rabaja petëpaecujinae, icatsia apo asaë tsane,” jai tsabiabi. Nexata saduceovi imoxoyorenatsi Jesús. Saduceovi jumaitsi Jesúsjavabelia mapacueniaje:

¹⁹ —Jesús, Moiséspijinë bajayata vajanacatoyaquinaelivaisi, jumaitsi mapacueniaje: “Ponë pematapijinë pepua penacojiobinë baja, totëpatsi pexi xainaenejeva, nexata juyapijinë bepita pematapijinëmi pijavami. Bajarapacuenia juyapijinë bepita pematapijinëmi pijavami pexi pexainaenexa bajarapovajavabelia. Nexata pexi itsa xainabeje, bematapijinëmi pexi petaenexa daxitajivi,” jai Moiséspijinë bajayata vajanacatoyaquinaelivaisi. ²⁰ Nexata jinavanapa ënacaemonae siete ponëbeje. Pepo matapijinë copiaya nacojioba. Nexata bajaraponë pijava vecuatëpa pexi xainaenejeva.

²¹ Nexata pematapijinëmi pepënarucaenë pita pematapijinëmi pijavami. Nexata icatsia bajaraponë ata tëpa pexi xainaenejeva bajarapovajavabelia. Nexata icatsia itsanë tuatuajëmatapijinë pita bajarapova. Bajaraponë ata icatsia tëpa pexi xainaenejeva bajarapovajavabelia. ²² Bajarapacuenia tëpa daxita siete ponëmibeje nacaemonae, bajarapova pepitaponaevi. Itsiata itsanë ata pexi apo xinae bajarapovajavabelia. Bajaraxuacujinae belia bajarapova ata tëpa baja. ²³ “Jivi raja petëpaecujinae, Dioso icatsia asaëyaexanaenatsi,” jamë. ¿Detsa nexata ponë, bajarapamonae yajuvënë, pijava tsane bajarapova bajarapamatacabi? Daxita pamona siete ponëmibeje, nacaemonae, pitapona picani bajarapovami, jai saduceovi Jesúsjavabelia.

²⁴ Nexata Jesús jumaitsi saduceovijavabelia:

—Paxamë saya pajamatabëcuenenavëxaniabame. Paxamë raja apo payapëtaemë pacuenia Dioso pejumelivaisibaxutota jumaitsi. Apo payapëtaemënu pacuenia Dioso cajëpatsi daxitacuene pexanaenexa. Bajaraxuata jamatabëcuenenavëxaniabiaya paneyanijobame: “¿Detsa ponë pitsiana bajarapova?” panejamë. ²⁵ Pamatacabi raja petëpaevimi Dioso icatsia asaëyaexanaenatsi, apo nacojiobi baja tsane. Bajaramatacabita itsajivi ata pexënatoyo apo canajetsi tsane pebijavabelia petonacojiobinexatsi. Bajarapamonae nacojibinejeva, jinavanapaena athëbëtatsia pacuenia angelevi jinavanapa. ²⁶ Itsa pepacuene paxamë paneyanijobame Dioso icatsia piasaëyaexanaejavanexatsi petëpaevimi, nexata pacatsipaebianatsi. Paxamë rabaja

payapëtaneme pacuenia bajayata Moiséspijinë peyaquinaebaxutota jumaitsi. Bajara-pabaxutota jumaitsi pacuenia Moiséspijinë Dioso barëcuaicuaijaitsi tsiquirinaemëyo petajueyecaecotiajavaverena. Abraham baja peputatëpae, Isaac ata baja peputatëpae, Jacob ata baja peputatëpae, bajarapamonae yabara bajayata Dioso jumaitsi Moiséspijinëjavabelia mapacueniaje: “Xanë rabaja abaxë Abraham pijaDiosonë, Isaac ata pijaDiosonë, Jacob ata pijaDiosonë,” jai Dioso Moiséspijinëjavabelia bajayata petëpaevimi yabara. ²⁷ Bajarapacuenia Dioso pejumaitsixae, nayapëtane bajarapamonae bajayata tēpae ata, Diosovecua apo penaxuabijava. Aeconoxae ata bajarapamonae Dioso yajavajinavanapa athëbëtatsia. Nexata paxamë itsa pajumaitsimë: “Petëpaevi rabaja petëpaecujinae, icatsia apo asaë tsane,” itsa pajamë, pinijicuenia pajamatabëcuenenavëxaniabame, jai Jesús saduceovijavabelia.

Palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia yabara pelivaisi

(Mt 22.34-40)

²⁸ Judíovi pecujarubinë pata Jesúsjavaberena. Nexata bajaraponë Jesús jumetanetsi xaniavaetsia pejumecanaviataponaejava saduceovijavabelia. Nexata judíovi pecujarubinë jumaitsi Jesúsjavabelia:

—¿Detsa palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia? jai.

²⁹ Jesús nexata jumaitsi judíovi pecujarubinëjavabelia:

—Palivaisi bitso jivi bejumecovënëta, daxita Dioso pitorobilivaisianë pejumecovënëtsijava matatoxenetsia jumaitsi mapacueniaje: “Paxamë, Israelpijinë papemomoximë, pajumetaema. Vajatuxanenë rabaja caenë Dioso. ³⁰ Bajaraponë panijatuxanenë, panijaDioso, daxita panejamatabëëthëtojavavetsina pasivamëre. Pasivamëre daxita panejamatabëcueneta ata, daxita panenajamatabëxainaesaëta ata, daxita pane-saëta ata,” pejailivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia. ³¹ Bajaraxuacujinae pecotocaevilivaisi, palivaisi bitso jivi bejumecovënëta, jumaitsi icatsia mapacueniaje: “Pasivamëre itsajivi ata pacuenia paxamë panijacuata panaasivamë,” jai. Bajarapalivaisi ata jivi bitso bejumecovënëta. Ajibi rabaja itsalivaisi pematatsënëa, Dioso pitorobilivaisi, palivaisi bitso jivi bejumecovënëta,” jai Jesús judíovi pecujarubinëjavabelia.

³² Nexata icatsia judíovi pecujarubinë jumaitsi Jesúsjavabelia:

—Jesús, xaniajamë rabaja pacuenia jumaitsimë. Caenë tsaena Dioso ponapona. Ajibi tsaena pematatsënëa itsanë Dioso. ³³ Bejumecovënëtatsi Dioso daxita vajajamatabëëthëtojavavetsina, daxita vajanajamatabëxainaesaëta ata, daxita vajasaëta ata. Biasivatsi itsajivi ata pacuenia vaxaitsi vajacuata nasivatsi. Daxita bajaraxua itsa jumecovënëtatsi, bitso nacatonamatamota Diosojavabelia. Bajaraxua bitso nacatonamatamota ofrenda Diosojavabelia vajarajutabiabijava matatoxenetsia. Baitsi xua Diosonexa ofrendacuenia totajuitabiabatsi, dajubicuene itsa tobeyabiabatsi, bajaraxua matatoxenetsia bitso nacatonamatamota, jai judíovi pecujarubinë Jesúsjavabelia.

³⁴ Jesús itsa jumetane judíovi pecujarubinë xaniavaetsia pejumecanaviatsijavatsi, nexata Jesús jumaitsi judíovi pecujarubinëjavabelia:

—Tsiquirijavayo catosaica Diosojavabelia nenajamatabëcuenecopatsinexa nijatuxanenë Dioso nexanaenexa, jai Jesús judíovi pecujarubinëjavabelia.

Bajaraxuacujinae daxitajivi baja Jesús cjunavatsi. Nexata baja Jesús jivi jamatabëcuenejëbiaya livaisi apo yanijobitsi.

Pacuenia Jesucristo yabara Davidpijinë bajayata tajëvelia: “Tajatuxanenë,” jai, yabara pelivaisi

(Mt 22.41-46; Lc 20.41-44)

³⁵ Jesús livaisi tsipaeba templobota. Jesús pijacuata nayabarajumaitsi:

—¿Detsa xuajitsia judíovi pecujarubivi apo jumecovënëtsi Cristo Dioso pexënatocuene, ponë athëbëvetsica Dioso itorobijitsiatsica jivi pecapanepaenexa? Bajarapamonae saya jamatabëcuenenavëxaniabiaya jumai tsabiabi Cristo yabara: “Cristo raja itsa patsiana, Davidpijinë pemomo tsane,” jai tsabiabi. ³⁶ Davidpijinë bajayata Espíritu Santo pejamatabëcueneta tajëvelia jumaitsi Cristo yabara mapacueniaje:

Dioso jumaitsi tajatuxanenëjavabelia: “Ecare abaxë tacujuanenia. Vecatsivajënae jumecovënëtsiaexanaenatsi abaxë copiaya nijavajabitsaë nitorobicuenianexa,” jai Dioso tajatuxanenëjavabelia,

jai bajayata tajëvelia Davidpijinë mapacueniaje Cristo yabara.

³⁷ Nexata Davidpijinë bajayata Cristo yabara: “Tajatuxanenë,” itsa jai, nexata Cristo Davidpijinë apo pemomo. Tsipaji baja cajena Cristo saicaya Dioso pexënato, nayabarajai Jesús judíovi pecujarubivi pecanaëjëtsinexa Cristo Dioso pexënatocuene.

Nexata jivibitsaëtoxaneto Jesús pejumetaevitsi jumebarëyatanetsi.

Pacuenia Jesús jumaitsi jivijavabelia: “Judíovi pecujarubivi bitso pinijicuenia Dioso naneconitsiaexanaenatsi,” jai yabara pelivaisi

(Mt 23.1-36; Lc 11.37-54; 20.45-47)

³⁸ Jesús jivi ayaibitsaëtoxanetojavabelia, pijajivijavabelia ata, livaisi tsipaeba. Nexata Jesús livaisi petsipaebijavata jumaitsi mapacueniaje:

—Xania, panayajivitaema, palivaisi judíovi pecujarubivi tsipaeba, panejumecovënëtsiyaniva. Bajarapamonae jitsipabiaba tomara tuatuajëjava piapiajavanë penaxatabiabavanapaenexa jivi peyaiyataenexatsi. Jitsipabiabanua bitso yayiataeya pebajacobinexatsi callejava. ³⁹ Bajarapamonae itsa najoneyabiaba judíovi penacaetuatabiabibonëjava, jitsipabiaba penaenexa pexaniaviriajavanëta. Nexata natsiitapetabiaba penaenexa peyaiyataevitsi penaenexa petsinubijavanëta. Bajarapamonae itsa napatabiaba fiestajava ata, jitsipabiaba penaenexa peyaiyataevitsi penaenexa petsinubijavanëta. ⁴⁰ Bajarapamonae yamaxëitojorobiaya vecuanotabiabanua pamonajivi pevecuatëpaevanëtsi pecobecovëjavaxi. Bajarapamonae itajara pinijicuenia vajëcabiaba Diosojavabelia. Itsiata pepo pexaniajajamatabëcueneta apo vajëcabiabi. Bajarapacuenia vajëcabiaba saya jivi petaenexatsi Dioso itajara bitso bepejumecovënëtsivi. Nexata bajarapamonae bitso pinijicuenia Dioso naneconitsiaexanaenatsi pamatacabi Dioso naneconitsiaexanaena daxita pamona Dioso apo pejumecovënëtsivi, jai Jesús judíovi pecujarubivi yabara.

Pacuenia ofrenda rajuta Diosojavabelia pamona pevecuatëpaevatsi yabara pelivaisi
(Lc 21.1-4)

⁴¹ Itsamatacabi Jesús eca templobota. Pacajonita jivi palata jeyabiaba ofrendacuenia perajutsijava Diosojavabelia, bajarapacajoni pecanacujitsita Jesús eca. Nexata Jesús cobetaeyeca jivi palata pejeponajava bajarapacajonita. Ayaijava palata pexainaevi, caejivi canacujitsia, ayaijava palata jepona. ⁴² Bajarajota napata pamona pevecuatëpaevatsi, bepejiobiva. Nexata bajarapova najia anijapalatanëyobeje piamatamobinëyobeje. ⁴³ Nexata Jesús junata pijajivi. Jumaitsi pijajivijavabelia:

—Xaniajanë pacuenia pacatsipaebijitsiatsi. Mapovaje pamona pevecuatëpaevatsi bejiobi bitso. Xuayo jia cajonita ofrendacuenia perajutsinexa Diosojavabelia, bajaraxuayo bitso Dioso sivajamatabëcuenenavëxaniabiaya jumai tsabiabi Cristo yabara: “Cristo raja itsa patsiana, Davidpijinë pemomo tsane,” jai tsabiabi. ³⁶ Davidpijinë bajayata Espíritu Santo pejamatabëcueneta tajëvelia jumaitsi Cristo yabara mapacueniaje: Dioso jumaitsi tajatuxanenëjavabelia: “Ecare abaxë tacujuanenia. Vecatsivajënae jumecovënëtsiaexanaenatsi abaxë copiaya nijavajabitsaë nitorobicuenianexa,” jai Dioso tajatuxanenëjavabelia, jai bajayata tajëvelia Davidpijinë mapacueniaje Cristo yabara. ³⁷ Nexata Davidpijinë bajayata Cristo yabara: “Tajatuxanenë,” itsa jai, nexata Cristo Davidpijinë apo pemomo. Tsipaji baja cajena Cristo saicaya Dioso pexënato, nayabarajai Jesús judíovi pecujarubivi pecanaëjëtsinexa Cristo Dioso pexënatocuene. Nexata jivibitsaëtoxaneto Jesús pejumetaevitsi jumebarëyatanetsi. *Pacuenia Jesús jumaitsi jivijavabelia: “Judíovi pecujarubivi bitso pinijicuenia Dioso naneconitsiaexanaenatsi,” jai yabara pelivaisi (Mt 23.1-36; Lc 11.37-54; 20.45-47)* ³⁸ Jesús jivi ayaibitsaëtoxanetojavabelia, pijajivijavabelia ata, livaisi tsipaeba. Nexata Jesús livaisi petsipaebijavata jumaitsi mapacueniaje: —Xania, panayajivitaema, palivaisi judíovi pecujarubivi tsipaeba, panejumecovënëtsiyaniva. Bajarapamonae jitsipabiaba tomara tuatuajëjava piapiajavanë penaxatabiabavanapaenexa jivi peyaiyataenexatsi. Jitsipabiabanua bitso yayiataeya pebajacobinexatsi callejava. ³⁹ Bajarapamonae itsa najoneyabiaba judíovi penacaetuatabiabibonëjava, jitsipabiaba penaenexa pexaniaviriajavanëta. Nexata natsiitapetabiaba penaenexa peyaiyataevitsi penaenexa petsinubijavanëta. Bajarapamonae itsa napatabiaba fiestajava ata, jitsipabiaba penaenexa peyaiyataevitsi penaenexa petsinubijavanëta. ⁴⁰ Bajarapamonae yamaxëitojorobiaya vecuanotabiabanua pamonajivi pevecuatëpaevanëtsi pecobecovëjavaxi. Bajarapamonae itajara pinijicuenia vajëcabiaba Diosojavabelia. Itsiata pepo pexaniajajamatabëcueneta apo vajëcabiabi. Bajarapacuenia vajëcabiaba saya jivi petaenexatsi Dioso itajara bitso bepejumecovënëtsivi. Nexata bajarapamonae bitso pinijicuenia Dioso naneconitsiaexanaenatsi pamatacabi Dioso naneconitsiaexanaena daxita pamona Dioso apo pejumecovënëtsivi, jai Jesús judíovi pecujarubivi yabara. *Pacuenia ofrenda rajuta Diosojavabelia pamona pevecuatëpaevatsi yabara pelivaisi (Lc 21.1-4)* ⁴¹ Itsamatacabi Jesús eca templobota. Pacajonita jivi palata jeyabiaba ofrendacuenia perajutsijava Diosojavabelia, bajarapacajoni pecanacujitsita Jesús eca. Nexata Jesús cobetaeyeca jivi palata pejeponajava bajarapacajonita. Ayaijava palata pexainaevi, caejivi canacujitsia, ayaijava palata jepona. ⁴² Bajarajota napata pamona pevecuatëpaevatsi, bepejiobiva. Nexata bajarapova najia anijapalatanëyobeje piamatamobinëyobeje. ⁴³ Nexata Jesús junata pijajivi. Jumaitsi pijajivijavabelia: —Xaniajanë pacuenia pacatsipaebijitsiatsi. Mapovaje pamona pevecuatëpaevatsi bejiobi bitso. Xuayo jia cajonita ofrendacuenia perajutsinexa Diosojavabelia, bajaraxuayo bitso Dioso sivajamatabëcuenenavëxaniabiaya jumai tsabiabi Cristo yabara: “Cristo raja itsa patsiana, Davidpijinë pemomo tsane,” jai tsabiabi. ³⁶ Davidpijinë bajayata Espíritu Santo pejamatabëcueneta tajëvelia jumaitsi Cristo yabara mapacueniaje: Dioso jumaitsi tajatuxanenëjavabelia: “Ecare abaxë tacujuanenia. Vecatsivajënae jumecovënëtsiaexanaenatsi abaxë copiaya nijavajabitsaë nitorobicuenianexa,” jai Dioso tajatuxanenëjavabelia, jai bajayata tajëvelia Davidpijinë mapacueniaje Cristo yabara. ³⁷ Nexata Davidpijinë bajayata Cristo yabara: “Tajatuxanenë,” itsa jai, nexata Cristo Davidpijinë apo pemomo. Tsipaji baja cajena Cristo saicaya Dioso pexënato, nayabarajai Jesús judíovi pecujarubivi pecanaëjëtsinexa Cristo Dioso pexënatocuene. Nexata jivibitsaëtoxaneto Jesús pejumetaevitsi jumebarëyatanetsi.

13

Pacuenia Jesús pijajivitonëjavabelia tajëvelia tsipaeba itsamatacabi itsanacuapijivi templo pexuabijavanexatsica yabara pelivaisi

(Mt 24.1-2; Lc 21.5-6)

¹ Itsa baja Jesús, pijajivi yajava, pitsaparena templovecua, Jesús pijajivitonë jumaitsi Jesúsjavabelia:

—¡Tajatuxanenë, jica, nataema mapaibotoxanetonëje, mapaboxanetonë ataje! jai Jesús pijajivitonë.

² Nexata Jesús tajëvelia jumaitsi pijajivitonëjavabelia:

—Daxita raja mapaboxanetonë tanemeje, bajarapaboxanetonëmi itsamatacabi itsanacuapijivi penetsianica irabetsica. Nexata mapaibotoxanetonëmije itsaiboto ata pejumavereca apo boca tsane, jai Jesús tajëvelia pijajivitonëjavabelia.

Pacuenia itsijitsia Jerusalén tomarata, daxitanacuanëjava ata, mapanacua pecopiaru-caevajënaeje yabara pelivaisi

(Mt 24.3-28; Lc 21.7-24; 17.22-24)

³ Jesús eca petsutojumata. Patsutojumata olivonaenë apaaxayo templobo canacujitsijavalia, bajarapatsutojumata Jesús eca. Nexata Pedro, Santiago, Juan, Andrés, bajarapamatabëxëyo pijaepatojavata Jesúsjavabelia jumaitsi:

⁴ —Patajatuxanenë, pajitsipajë patanetsipaebinexamë patayapëtaenexa paepatota copiapatsijitsia xua vajunupaebame. ¿Detsa peneta pitsicuene pataenajë itsa copiapatsijitsia xua jumaitsimë templobo yabara? jai bajarapamonae Jesúsjavabelia.

⁵ Jesús nexata tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Xania panayajivitaename. Pëtsa panacopatame itsajivi ata papecaya-maxëitojorobinexa. ⁶ Tsipaji raja peyamaxëitojorobinexa ayaibitsaëto patsiana bexanë itajara tsane. Bajarapamonae najumetsënëtsiaya jumai tsane: “Xanë raja Cristonë, Dioso athëbëvetsica taneitorobinëtsica jivi tacapanepaenexa,” jai tsane. Bajarapamonae jivi, ayaibitsaëto yamaxëitojorobiana.

⁷ 'Vajabitsaë pexanaejava imoxoyonacuanëjava, tajënacuanëjava ata, pavënëlivaisitaename. Itsiata pëtsa pajunavame. Bajara peneta itsane mapanacua pevereverecaevajënaeje. Itsiata baitsi jane bepijia bajarapamatacabi mapanacuaje abaxë apo vereverecajuni tsane. ⁸ Mapanacuaje pevereverecaevajënae peneta copiaya itsaviriavi nabena itsaviriavijavabelia. Itsanacuanëpijivi pijinia nabena itsanacuanëpijivijavabelia. Ira najëbiana ayaicuenia nacuanëjava. Ayaijaniboxaneto najetarucaena nacuanëjava. Ayaicuenia bitso jivi bejiobi tsane nacuanëjava. Daxita bajarapacuene itsa pataename, saya abaxë taxuxuabaponaena piayaicueni, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuata.

⁹ Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Nexata paxamë xania panayajivitaename. Tsipaji raja xanë patajajivixaemë, tomara pevetsivijavabelia pacacaponabiabiana. Bajarapamonae pacajumaconibabeyabiabiana judíovi penacaetuatabibonëta. Paxamë patajajivixaemë pacanubiana nacuaevetsivi pitabarata, presidentevi ata pitabarata. Nexata bajarajota bajarapamonaejavabelia patsipaebianame xanë talivaisi. ¹⁰ Nexata daxitanacuanëpijivijava patsipaebanajetarubenaename pecapanepaelivaisinexatsi.

¹¹ Itsa pacataicaena papecaneconitsinexa nacuaevetsivijavabelia, pëtsa pajamatabëcuenebëjamë panenayajivicuaicuaijainexa bajarapamonaejavabelia. Palivaisi panejamatabëcuenevetsina pacatonaitajëtsiana, patsipaebianame bajarapamonaejavabelia. Tsipaji raja bajarapaepatota Espíritu Santo pacacuaicuaijaiyaexanaena.

Paxamë baitsi panejamatabëcueneta apo pacuaicuaijamë tsane. ¹² Bajarapamatacabi patajajivixaemë, panacaemonae atamë, itsajivi panijamonaejivi ata pacacanajetsiana nacuaevetsivijavabelia papecabeyaxuabinexa. Paneaxa ata, paneena ata, pacacanajetsiana nacuaevetsivijavabelia papecabeyaxuabinexa. Panexi ata pacacanajetsiana nacuaevetsivijavabelia papecabeyaxuabinexa. ¹³ Daxitajivi pacaitoya tsane patajajivixaemë. Itsiata pajivi ajamatabëcuenesaë tsane Dioso pejumecovënëtsijava nacua pecopiarucaejavabelianexa, bajarapajivi Dioso capanepaenatsi, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

¹⁴ Icatsia Jesús tajëvelia vajunupaeba papiayaicuene itsamatacabi copiapatsijitsia Jerusalén tomarata. Jesús jumaitsi pijajivijavabelia mapacueniaje:

—Diosojumepaebinëmi, profeta Danielpijinë, tajëvelia Dioso pitorobicueniatsi piayaicuene pevajunupaebilivaisi bajayata yaquina. Xua panijatomaranëmi vereverecaeyaexanaejitsiatsi, bajaraxua pelivaisi yaquina. (Pajivi lebiana mapalivaisije, yapëtaena papiayaicuene vajunupaeba mapalivaisitaje.) Nexata paxamë pataename bajarapapiayaicuene penucaejava templobota, itsajota picani apo benucae. Nexata Judea nacuata pejinavanapaevi itsa vënëlivaisitaena bajarapapiayaicuene penucaejava templobota, pëtsa nubena. Naxanitsiayo bajarapamonae rëcëpecaena ibotsutonëjavabelia. ¹⁵ Pajivi pijabojumata athëbëyo ecaya, itsa vënëlivaisitaena bajarapapiayaicuene penucaejava templobota, bajarapajivi perunaecujinaetsica bepijia najetabajiraviana. Pëtsa joneya pijaboyalia pejutsinexa pecobecovë. ¹⁶ Pajivi pijinia nacuenebaponapona pijapabita, itsa vënëlivaisitaena bajarapapiayaicuene penucaejava templobota, bepijia najetabajiraviana. Pëtsa naviata pijaboyabelia pejutsinexa penaxatabijava. ¹⁷ ¡Papetiriavi penacueto yacotajinavanapa, bitso bejiobi tsane bajarapamatacabi! ¡Bitso nabejiobitsiaya jinavanapaena! ¡Papetiriavi ata mitoapaenacuetoxi isajinavanapa, bitso bejiobi tsane bajarapamatacabi! ¹⁸ Bajaraxuata tajëvelia Diosojavabelia pavajëcare piayapëbejematacabita papecatocopiapatsiyaniva bajarapapiayaicuene. Nexata pamatacabi parëcëpecaename, pexaniamatacabi Dioso pacatocopatsiana bitso nabejiobitsiaya paneponaeyaniva. ¹⁹ Tsipaji raja bajarapamatacabi bitso jivi bejiobi tsane. Pabejiobicuene abaxë jivi caeto ata apo tae Dioso nacua pexanaecujinae, bajarapabejiobicuene taena. Bajaraxuacujinae icatsia itsamonae bejiobiaexanae atatsi tsane, itsiata bajarapacuenia bitso apo bejiobiaexanaetsi tsane. Tsipaji Dioso epatua yatuucutsiana jivi bitso nabejiobitsiaya pejinavanapaematacabianëminexa, bitso jivi nabejiobitsiaya pejinavanapaeyaniva. ²⁰ Dioso epatua itsa apo yatuucutsi tsipae bitso jivi nabejiobitsiaya pejinavanapaematacabianëminexa, caejivi ata apo asaë tsipae. Itsiata baitsi jane Dioso piasivaxae pijajivi, pitapetsivi, Dioso epatua yatuucutsiana bitso jivi nabejiobitsiaya pejinavanapaematacabianëminexa, jai Jesús pijajivijavabelia tajëvelia pevajunupaebijavata papiayaicuene itsamatacabi copiapatsijitsia Jerusalén tomarata.

²¹ Icatsia Jesús tajëvelia vajunupaeba pacuenia itsamatacabi mapanacuataje patsijitsia peyamaxëitorobivi Dioso pejumecovënëtsivi peyamaxëitorobinexatsi. Jesús jumaitsi pijajivijavabelia mapacueniaje:

—Nexata itsajivi yamaxëitorobiaya itsa pacajumaitsi tsane: “Pataema. Mara Cristo nucaje,” itsa pacajai tsane, pëtsa pajumecovënëtame. Itsa pacajumaitsi tsane: “Bajarajota nuca Cristo,” itsa pacajai tsane, pëtsa pajumecovënëtame. ²² Itsamonae jumai tsane: “Xanë raja Cristonë,” jai tsane. Itsiata jemajai tsane. Itsamonae jumai tsane: “Diosojumepaebinëne raja, profetanënë,” jai tsane. Itsiata jemajai tsane. Bajarapamonae itajara exanaena pinijicuene pexanaejavanë peyamaxëitorobinexa saya jivi. Nexata bajarapacuenia itsamonae yamaxëitorobaponaenatsi. Itsiata pamonaepacuene Dioso pijajivi, Dioso pitapetsivitsi, bajarapamonae apo yamaxëitorobi tsanetsi. ²³ ¡Xania baja

tsane! Xanë rabaja pacatsipaebatsi tajëvelia daxitacuene panenayajivitaenexa, jai Jesús pijajivijavabelia tajëvelia pevajunupaebijavata pacuenia itsamatacabi mapanacuataje patsijitsia peyamaxëitojorobivi Dioso pejumecovënëtsivi peyamaxëitojorobinexatsi.

Pacuenia Jesús tajëvelia navajunupaeba icatsia pepatsijavanexatsica petëpaecujinae yabara pelivaisi

(Mt 24.29-35, 42, 44; Lc 21.25-36)

²⁴ Jesús tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Xanë tapatsivajënaetsica, jivi taena pecujunavicuene. Jivi nabejobitsiaya jinanapaena. Nexata jivi nabejobitsiaya pejinavanapaematacabicujinae matacabipijjuameto aitaquiri tsane. Meravipijjuameto ata aitaquiri tsane. ²⁵ Tulupu ata othopaenica irabetsica. Daxitacuene, xua rubena athëbëtatsia, najëabiana. Xaniavaetsia apo rubenae tsane. ²⁶ Nexata bajarapaepatota xanë, Daxitajivi Pematapijinënë, jivi netaena athëbëvetsica itarërëbota tanajetarucaejava. Patsianicajë daxitacuene taevetsinexa. Tanivenivenaecotia yajavapatsianicajë. ²⁷ Bajaraxuacujinae ángelevi itorobianajë, pamona tajajivi, Dioso pitapetsivitsi, daxitanacuanëjavaverena tanetocaetuatsinexa xanëjavaberena, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

²⁸ Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Pacanaëjere pacuenia itsi higeranae. Itsa maxëranajuva, nexata pejanabaxu pitsapa. Nexata bajarapacuenia payapëtaneme vai baja imoxoyo pevajënae pejonejavanexa. ²⁹ Bajara pijinia pacuenia peneta ita pataename pecopiapatsijava, xua yabara pacatsipaebatsi, nexata payapëtaename imoxoyo baja tavajënae tsane tapatsijavanexatsica. ³⁰ Xaniajanë pacuenia pacatsipaebijitsiatsi. Pitsijamatabëcuenevi aeconoxae mapamatacabitaje jinavanapa, bajarapitsijamatabëcuenevi abaxë, bexëjavabelia ata, apo vereverecae tsane. Matapania xua yabara pacatsipaebatsi, ita baja copiapatsiana, bajarapamona jane baja vereverecaena. ³¹ “Itaboxo, ira yajava, tsitecaena daxitamatacabijavabelianexa,” jamatabëjai ata tsane itsamona, itsiata jamatabëcuenenavëxaniabiana. Tsipaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua yabara pacatsipaebatsi, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

³² Jesús icatsia jumaitsi pijajivijavabelia:

—Itsajivi ata apo yapëtae pamatacabita, paepatota ata, copiapatsijitsia daxita xua yabara tajëvelia pacatsipaebatsi. Athëbëpijivi ata, ángelevi, apo yapëtae. Xanë, Dioso pexënato atanë, apo yapëtaenë. Caenë taxa Dioso yapëtane, jai Jesús pijajivijavabelia.

³³ Icatsia Jesús jumaitsi pijajivijavabelia:

—Xania baja tsane. Daxitamatacabi saya panecopiaevetavanapaename. Tsipaji raja apo payapëtaemë tsane paepatota patsijitsianëtsica. ³⁴ Nexata pacuenia bo pexainaenë, pijabo evetsiaexana pijajivi, bajara xanë itsinë tsane. Bo pexainaenë ita ponaejitsia tajënacuyabelia, pijajivi evetsiaexana pijabo. Nexata pijajivi, caejivi canacujitsia, rajutapona petonacuenebavanapaevanexatsi pecovëta. Nexata pijajiviyajuvënë itoroba baupa pevetsinënexa petoetabiabinexatsi pijabobaupa. Bo pexainaenë jumaitsi bajaraponëjavabelia: “Xaniavaetsia netoetabiabianame baupa matapania tapatsimatacabijavabelianexa,” jai bo pexainaenë. ³⁵ Nexata paxamë ata bajarapacuenia panecopiaevetavanapaename matapania tapatsimatacabitsicajavabelianexa. Tsipaji raja apo payapëtaemë tsane pamatacabita patsijitsianëtsica. Ajena meravi, caecanivia, patsipajë. Meravi tuatujëta ata patsipajë. Matacabivëpata ata patsipajë. Bajayacunua

ata patsipajë. ³⁶ Bajaraxuata xania baja tsane. Daxitamatacabi saya panecopiaeve-tavanapaename. Jemata itsa patsipajë, paepatota apo panecopiaevetsimë, pacacaxi-tajarabijitsipatsi panemajitsijavata. ³⁷ Palivaisi pacatsipaebatsi paxamëjavabelia, dax-itajivinexa jumaitsinë. ¡Daxitamatacabi saya panecopiaevetavanapaename! jai Jesús pijajivijavabelia.

14

Pacuenia picani Jesús pijavajabitsaë jamatabëvaetabatsi yabara pelivaisi
(Mt 26.1-5; Lc 22.1-2; Jn 11.45-53)

¹ Anijamatacabibeje abaxë ajibi pejonenexa pascuafiesta, itsafiestanua, pafiestajava judíovi baxane levadurata matajërëbinejeva pexanaepan. Nexata bajarapafiestabeje-vajënaeya, sacerdotevi penamatacaitorobivi, judíovi pecujarubivinua, najumejaita picani bajarapafiestajava pevaetabinexatsi Jesús. Penajumetsënëtsilivaisita picani jamatabëvaetabatsi Jesús pebeyaxuabinexatsi. ² Itsiata bajarapamonae najumaitsi:

—Fiestajava meta abaxë apo vaetabi tsanetsi jivi vajanacaitsacueniabiyana, najai bajarapamonae.

Pacuenia Jesús petiriva tsimataepanatsi petuxujuviaceitera yabara pelivaisi
(Mt 26.6-13; Jn 12.1-8)

³ Jesús ponapona Betania tomarata, Simón pijabota. Simón bajayajebi bitso peper-abëtsabanaenëmi. Nexata Jesús pexaeyecaejavata mesata, petiriva cobenaimoxoyorenatsi petuxujuviaceitera, nardovënëra, alabastrobotellabëta pejeaceitera. Bajarapora bitso penamatamotsira. Nexata bajarapova yavëtoxobiaxuaba bajarapora, petuxujuviaceitera. Bajaraxuacujinae Jesús tsimataepanaicatsi bajarapaaceitera. ⁴ Bajarajota itsamonae penaenaevi itsa taeyena Jesús petsimataepanaejavatsitsica, bajarapamonae jamatabëanaepanareca. Nexata ëpamonae najumai tsenae:

—¿Detsa xuajitsia saya xuaba bajarapacuenia maporaje? ⁵ Canajetsipa rajane. Nexata matamopitsipa trescientos padenariobeje matatoxenetsia. Bajarapapalata rajutsipa bepejiobivi bajarapacuenia peyavenonaenexa, najai tsenae ëpamonae.

Bajarapamonae anaepana bajarapovajavabelia.

⁶ Nexata Jesús jumaitsi bajarapamonaejavabelia:

—¿Detsa xuajitsia bajarapacuenia pajumaitsimë bajarapova pexanaejava yabara? Mara povaje pexaniacuene nexanaje. ⁷ Daxitamatacabi raja bepejiobivi jinavanapa itsaxuayo pajinavanapame. Pamatacabi pajitsipame pexaniacuene panetoexanaenexa bepejiobivijavabelia, nexata patoexanaename. Itsiata baitsi jane xanë daxitamatacabi apo ponaponaenë tsane paxamëjavata. ⁸ Mara papetirivaje pexaniacuene netoexana pacuenia baja cuenecaëjëpatsi. Itsamonae petëpaejivi batsiperabëepana petuxujuviaceitera peperabëxaniavaetsinexa pemëthëtsivajënae. Bajara pijinia pacuenia mapovaje netsimataepana petuxujuviaceitera, abaxë apo tēpae atanë. Nexata baja bajarapova neperabëxaniavaeta itsamonae tanemëthëtsivajënae. ⁹ Xaniajanë pacuenia pacatsipaebijitsiatsi. Daxitanacuanëjava tajajivi itsa paebanajetarubenaena pexanialivaisi jivi tacapanepaelivaisinexa, vajunupaebabiabiananua pacuenia exana xanëjavaberena mapetirivaje, jai Jesús pijajivijavabelia.

Pacuenia Judas pona Jesús pijavajabitsaë pecobeyabelia pecanajetsinexatsi yabara pelivaisi

(Mt 26.14-16; Lc 22.3-6)

¹⁰ Jesús pijajivi doce ponëbejeyajuvënënë pevënë Judas. Itsavënë Iscariote. Nexata Judas pona sacerdotevi penamatacaitorobivijavabelia. Jesús jane baja yajumejailiatsi

pecanajetsinexatsi. Nexata jane baja Judas Jesús canajetatsi sacerdotevi penamatacaitorobivi pecobeyabelia. ¹¹Nexata sacerdotevi penamatacaitorobivi itsa tane bajarpacuenene, barëya. Jumaitsi bajarapamonae Judasjavabelia:

—Palata pacarajutsianatsi, jai.

Nexata jane baja xuacujinae Judas Jesús naitaxutocaevetaponaponatsi. Nexata paepatota Judas toyapëxanepanatsi, perajutsinexa jane baja bajarapamonae pecobeyabelia.

Pacuenia Jesús barë nabane pijajivi pecopiarutsinabani baja pebeyaxuabivajënaetsi yabara pelivaisi

(Mt 26.17-29; Lc 22.7-23; Jn 13.21-30; 1 Co 11.23-26)

¹²Junua jane baja fiesta, pafiestajava judíovi baxane levadurata matajërëabinejeva pexanaepan. Bajarapamatacabi ovejaxi babia pexaenexa pascua fiestamatacabi. Nexata Jesús yanijobatsi pijajivi.

—¿Detsa belia paponanajë patacamitsaexanaenexa pascua fiestamatacabi pexajava nexaenexa? jai Jesús pijajivi.

¹³Nexata Jesús itoroba anijanëbeje pijajivitonëbeje. Jumaitsi:

—Tomarabelia paponarebeje. Bajarajotalia pacaxitarabianamebeje mera canalito pecanajetarucaenë. Bajaraponë papënanajetarucaenamebeje. ¹⁴Pabota bajaraponë joneyojopaena, bajarapabo pexainaenëjavabelia pajumaitsimëbeje tsane: “Vajanacacujarubinë raja jumaitsi: ‘¿Detsa jota pënëyatuucutsibo eca, pabota tajajivi barëxaejitsianë xua jivi baxane pascua fiestamatacabi?’ jai raja vajanacacujarubinë,” pajamëbeje tsane bajarapabo pexainaenëjavabelia. ¹⁵Nexata athëbëabetsia anijairabeje pënëyatuucutsibojavata, pacatsitajëtsianabeje. Bajarapaboënëta athëbëyotsia paira ayaiënëtuatuajë tsane. Daxitacuenene bajarajota xainaena. Nexata vajaxaejavanexa bajarajotatsia paexanaenamebeje, jai Jesús pijajivitonëbejavabelia.

¹⁶Nexata jane baja ponabeje Jesús pijajivitonëbeje. Patabeje baja tomarabelia. Caxitarababeje daxita pacuenia Jesús jumaitsitsibeje. Nexata xua jivi baxane pascua fiestamatacabi daxita Jesús pijajivi pebarëxaenexa, bajaraponëbeje exanabeje jane baja.

¹⁷Itsa baja meravitsia, Jesús patajopa bajarajota pijajivi, doce ponëbeje, yajava.

¹⁸Daxita mesata pexaeyenaevavata, Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënënë, xanëjavata pexaeyecaenë, necanajetsiana tajavajabitsaë pecobeyabelia, jai Jesús.

¹⁹Nexata Jesús pijajivi bejamatabëjibireca. Nexata Jesús pijajivi, caenë canacujitsia, Jesúsjavabelia yanijobapona.

—¿Xanë tsaja tsane? jai tsaponae Jesús pijajivi.

²⁰Nexata Jesús jumaitsi pijajivijavabelia:

—Doce paponëmëbejeyajuvënënë raja. Ponëbeje peneta caecuenia panajuacajabut-sianajëbeje panbë platojavabelia, bajaraponë tsane. ²¹Nexata xanë, Daxitajivi Pematapijinënë, tēpaenajë pacuenia baja cajena xanë yabara Dioso pejumelivaisibaxutota tajëvelia jumaitsi. Itsiata ponë tajavajabitsaë pecobeyabelia necanajetsiana, bajaraponë bitso bejiobi tsane pinijicuenia. Itsa meta bajaraponë apo naexanae tsipae, bajarapacuenia apo necanajetsi tsipae. Nexata xanepanaejitsipatsi bajaraponë itsa apo naexanae tsipae. Tsipaji apo naneconitsi tsipae Diosojavabelia, jai Jesús pijajivijavabelia.

²²Nexata pexaeyenaevavata Jesús pita panbë. Jesús jumaitsi Diosojavabelia:

—Pexaniacuenene panetoexaname. Panerajutame pan, jai.

Bajaraxuacujinae epatsënëquejeba bajarapapanbë. Rajuta pijajivi. Jesús jumaitsi pijajivijavabelia:

—Paxaema. Mara tavitoje, jai.

²³Bajaraxuacujinae icatsia Jesús copavënëjavata yapita pijajivi pebarëapaeranexa. Diosojavabelia jumaitsi:

—Pexaniacuene panetoexaname. Panerajutame maporaje, jai.

Bjaraxuacujinae pijajivi bajarapora rajuta. Daxita Jesús pijajivi bajarapora apa.

²⁴ Jesús pijajivijavabelia jumaitsi:

—Tajana raja othopaena jivi ayaibitsaëtoxaneto pecapanepaenexatsi. Nexata tatëpaejava pejamatabëcueneta, jivi yapëtaena pepacuenen xaniajai Dioso jivi pecapanepaejavanexa, pacuenia baja cajena tajëvelia Dioso najumecapanepaeya jumaitsi.

²⁵ Xaniajanë pacuenia pacatsipaebijitsiatsi. Xanë rabaja matavëjëa apo apaenë tsane uvacuaira mapanacuataje, matapania icatsia apaenajë Dioso pijanacuatatsia pejanauvacuaira, jai Jesús pijajivijavabelia.

Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaename tajajivitonëcuenemë,” jai, yabara pelivaisi

(Mt 26.30-35; Lc 22.31-34; Jn 13.36-38)

²⁶ Jesús pijajivi barënaaxëana Diosojumevajianë. Bjaraxuacujinae Jesús pijajivi barëpona petsutojumabelia. Patsutojumata olivonaenë apaaxayo, bajarapatsutojumabelia barëpona. ²⁷ Nexata bajarapatsutojumata Jesús jumaitsi pijajivijavabelia:

—Daxita raja paxamë ajena, pameravi, panexuabarëcëpecaename. Tsipaji rabaja patanexuabarëcëpecaejavanexamë yabara, Dioso pejumelivaisibaxutota tajëvelia jumaitsi mapacueniaje: “Beyaxuabianatsi raja oveja pevetsinë. Nexata pijaovejabitsaëto nacayajatsia rëcëpecaena,” jai Dioso pejumelivaisibaxutota paxamë patanexuabarëcëpecaejavanexamë yabara. Nexata ajena, pameravi, tajavajabitsaë itsa nevaetabiana tanebeyaxuabinexa, daxita paxamë panexuabarëcëpecaename. ²⁸ Itsiata baitsi jane tatëpaejinae icatsia asaenë tsane. Nexata paxamë panevajënaeyabelia copiata ponaenajë Galilea nacuyabelia, jai Jesús pijajivijavabelia.

²⁹ Nexata Pedro jumaitsi Jesúsjavabelia:

—Daxita mapamonaaje caxuabarëcëpecae ata tsane, xanë cajena apo caxuabatabajiravi tsanetsi, jai Pedro.

³⁰ Nexata Jesús jumaitsi Pedrojavabelia:

—Xaniajanë pacuenia catsipaebijitsiatsi. Ajena rabaja, pameravi, nanianaevëpata, anijajumebeje vacara pefiabivajënaeya, nayavajunuaxainaename tajajivitonëcuenemë. “Apo yapëtaenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

³¹ Itsiata Pedro ajumesaëya jumaitsi Jesúsjavabelia:

—Nebeyaxuabijitsia ata tsane xamë yajava, itsiata cajena apo nayavajunuaxainaenë tsane nijajivitonëcuenenë, jai Pedro Jesúsjavabelia.

Daxita Jesús pijajivi bajarapacuenia jumaitsi.

Pacuenia Jesús vajëta Diosojavabelia Getsemanívënëjavata yabara pelivaisi

(Mt 26.36-46; Lc 22.39-46)

³² Jesús, pijajivi yajava, pata Getsemanívënëjavata. Bjarajota Jesús jumaitsi pijajivijavabelia:

—Paneevetenare abaxë majotaje tavajëtsiepatoyo Diosojavabelia, jai.

³³ Nexata Pedro, Santiago, Juan, bajara saya pamatabëxëyo, Jesús barëpona pesaicaeyojavabelia. Bjaraxuacujinae Jesús bitso najamatabëxaina. Nexata bejamatabëjiobireca.

³⁴ Nexata Jesús jumaitsi pijajivi acueyabi ponëbejejavabelia:

—Xanë bitso pinijicuenia najamatabëxainajë. Nexata tanajamatabëxainaejava yatëpaejitsianë. Paxamë abaxë majotaje panacopabare. Paitavamë tsane. Pëtsa pamajitame, jai Jesús pijajivi acueyabi ponëbejejavabelia.

³⁵ Nexata Jesús, caenë, pevajënaeyabelia icatsia tsiquirijavayo ponataba. Tsipaji Jesús tajëvelia yapëtane pacuenia Dioso tocopatatsi bitso ayaicuenia pebejiobiaexanaenexatsi paepatota pijavajabitsaë beyaxuabijitsiatsi. Nexata Jesús irataeya bocajunua

pevajëtsinexa Diosojavabelia. Vajëta picani Diosojavabelia bitso bejiobitsiaya pebeyaxu-abiyaniavatsi. ³⁶ Nexata Jesús pevajëtsijavata Diosojavabelia, jumaitsi:

—Taxa Diosomë, netocopatame picani tanebeyaxuabinexa betajiobicueneta. Daxitacuenene raja cacaëjêpa nexanaenexa. Nexata necapanepare bajarapabejiobicueneve-cua. Itsiata xanë apo tajitsipaecuene ata, pacuenia xamë jitsipame, netocopatsianame, jai Jesús pevajëtsijavata Diosojavabelia.

³⁷ Bajaraxuacujinae Jesús naviarena acueyabi ponëbeje pijajivijavaberena. Caxitararaba Jesús pijajivi pemajitanubenaevi. Nexata Jesús jumaitsi Pedrojavabelia:

—Simón, ¿pamajitanubename tsaja? ¿Apo pacacaëjêpae tsabaja rovia caeepatoyo ata paneaitavatsenaenexa? ³⁸ Pëtsa pamajitame. Paitavamëre. Pavajëre Diosojavabelia pibisiacuene paneexanaeyaniva. Tsipaji raja dovathi pacajamatabëcueneëjêbiana. Paxamë picani panejamatabëcueneta pexaniacuene jamatabëpaexanabiabame. Itsiata baitsi jane apo pajamatabëcuenesaëmë pexaniacuene paneexanaenexa, jai Jesús Pedrojavabelia.

³⁹ Nexata icatsia Jesús pona pecovëyabelia pevajëtsinexa icatsia Diosojavabelia. Bajara icatsia pacuenia Jesús vajëta Diosojavabelia pacuenia vajëta copiata. ⁴⁰ Icatsia Jesús naviarena pijajivijavaberena. Caxitararaba icatsia Jesús pijajivi pemajitanubenaevi. Tsipaji baja Jesús pijajivi bitso itamajitsipana. Nexata Jesús pijajivi apo yapëtae pacuenia jumecanaviatsijitsia Jesúsjavabelia. ⁴¹ Icatsia abaxë Jesús naviata pecovëyabelia pevajëtsinexa icatsia Diosojavabelia. Bajaraxuacujinae, acueyabi baja xuabeje pevajëtsicujinae, Jesús icatsia rena pijajivijavaberena. Jumaitsi Jesús pijajivijavabelia:

—¿Abaxë tsarovia tsiteca pamajitanubename? Ajibi rabaja. Copiapata rabaja paepatota xanë, Daxitajivi Pematapijinënë, necanajetsijitsia pibisiacuene pexanaevi pecobeyabelia. ⁴² Panonobapunare baja. Ponaenatsi baja. Imoxoyo rabaja najetaruca tajavajabitsaë pecobeyabelia tanecanajetsinënexa, jai Jesús pijajivijavabelia Judas yabara.

Pacuenia Jesús vaetabatsi pijavajabitsaë yabara pelivaisi
(Mt 26.47-56; Lc 22.47-53; Jn 18.2-11)

⁴³ Jesús pijavajabitsaë pevaetabijavatanexatsi, cuaicuajai tsanucæe pijajivijavabelia. Nexata bajarapaepatota patanajetaruca Judas, Jesús pijajivi doce ponëbejeyajuvënënëmi. Judas pënanajetarubenatsi jivi ayaibitsaëttoxaneto. Bajarapamonaeajuvënëvi itsamonae canajetarubena espadanë. Itsamonae canajetarubena naebonë yajava. Bajarapamonae itorobatsi sacerdotevi penamatacaitorobivi, judíovi pecujarubivi ata, judíovi pijaancianovi ata. ⁴⁴ Judas pebarërenavajënae bajarapamonae, copiaya baja cajena Judas tsipaeba pacuenia bajarapamonae yapëtaejitsia Jesúscuene. Judas jumaitsi mapacueniaje:

—Ponë raja peneta bajacobiaya itabaratsutsunexuabianajë, bajaraponë Jesús tsane. Bajaraponë pavaetabianame. Pacobecëtsianame xaniavaetsia. Nexata panecobecëtsinë pacaponaeremena, jai baja cajena Judas pematacanajetarucaevijavabelia pebarërenavajënae.

⁴⁵ Nexata jane baja Judas itsa patanajetaruca, exana pacuenia baja cajena jumaitsi pematacanajetarucaevijavabelia. Judas Jesús itabaratsutsuniaya bajacobatsi, Judas jane baja pematacanajetarucaevi peyapëtaenexa Jesúscuene. ⁴⁶ Nexata jane baja Jesús pijavajabitsaë vaetabatsi. Cobecëtatsi xaniavaetsia.

⁴⁷ Bajarajota Jesús pijajiviyajuvënënë pijaespada navemarajonotaxuabina. Muxuyoropaebiaxuaba sacerdotevi pepo penamatacaitorobinë pijajivitonë. ⁴⁸ Nexata Jesús jumaitsi pevaetabivitsijavabelia:

—Paxamë meta panetaneme betanacobetoxotsinë. Bajaraxuata pacaponame espadanë, naebonë yajava, patanevaetabinexamë pacuenia pavaetababiabame penacobetoxotsinë. ⁴⁹ Xanë caematacabi canacujitsia Dioso pejumelivaisi paxamëjavabelia

pacatsipaebabiabatsi templobota. Itsiata bajarapamatacabi apo panevaetabimë. Mara pacuenia panevaetabameje tanetocopiapatsixae baja pacuenia Dioso pejumelivaisi-baxutota bajayata tajëvelia jumaitsi xanë yabara, jai Jesús pevaetabivitsijavabelia.

⁵⁰ Nexata jane baja Jesús pijavajabitsaë pevaetabijavatatsi, daxita Jesús pijajivi xubarëcëpecatsi pacuenia baja cajena Jesús jumaitsi tajëvelia pijajivijavabelia.

Pacuenia pevejëato najetabajirava yabara pelivaisi

⁵¹ Pevëjëato pënanajetaruca Jesús pecaponaevitsi. Sábanata namataquinanajetaruca. Nexata pevejëato bajarapamonae yasábanavaetabatsi. ⁵² Nexata pevejëato sávana naisi-naxuaba. Najetabajirava jumasanë.

Pacuenia Jesús nutatsi judíovi penamatacaitorobivi pitabarata yabara pelivaisi
(Mt 26.57-68; Lc 22.54-55, 63-71; Jn 18.12-14, 19-24)

⁵³ Jesús caponaliatsi sacerdotevi pepo penamatacaitorobinë pijaboyabelia. Nacae-tuata bajarajota daxita sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava. ⁵⁴ Itsa baja Jesús caponaliatsi, nexata Pedro bajarapamonae pecovëya tajiyo najetaruca. Sacerdotevi pepo penamatacaitorobinë pijabo matatoyorotsia yacaranata ibopanaxanetonë, mataropotsia pefaratsijavaxane-tota. Nexata bajarapayacaranatsijavaxaneto baupa, Pedro najoneya bopanabojav-abelia, itsabelia Jesús cajunuatsi. Nexata sacerdotevi pepo penamatacaitorobinë pi-jabopanabota, Pedro nanonopeca isoto muxuneneta templobopijipolicíavita.

⁵⁵ Nexata bajarapabo ënëtuatuajëta sacerdotevi penamatacaitorobivi, judíovi pijaan-cianovi ata yajava, judíovi pecujarubivi ata yajava, nabarëcuaicuajai. Bajarapamonae nayanijoba.

—¿Jipatsa yapëtane Jesús pibisiacuene pexanaejava, paneconi yabara beyaxuabijitsi-atsi? najai tsaponae.

Itsiata bajarapamonae apo caxitajarabi itsaneconi ata Jesús pijaneconi. ⁵⁶ Itsamonae saya penajumetsënësilivaisi paeba Jesús yabara. Itsiata caelivaisi najuapaebi ata, najumejëpaeya apo paebi bajarapamonae. ⁵⁷ Itsamonae nonobapuna. Penajumetsënësilivaisi paeba Jesús yabara. Penonobapunaeviyajuvënënë jumaitsi mapacueniaje:

⁵⁸ —Paxanë raja, pamatabëxëyo panubenajë majotaje, pajumetaniiji Jesús pejumaitsi-java. Bajaraponë jumaitsi: “Xanë raja xuabianicajë mapatemploboje, jivi pexanaebo. Acueyabi matacabita icatsia itsabo veretetsianajë. Jivi apo pexanaebo tsane,” jai maponë Jesúsje, jai penonobapunaeviyajuvënënë.

⁵⁹ Itsiata daxita bajarapamonae najumejëpaeya apo paebi.

⁶⁰ Nexata jane baja sacerdotevi pepo penamatacaitorobinë nonotapuna bajarapa-monae pitabarata. Nexata jumaitsi Jesúsjavabelia:

—¿Apo yapëtaemë tsaja itsalivaisiyo ata nejumecanaviatsinexa? ¿Xaniajai tsabaja pacuenia mapamonae caneconitsiajumaitsiye? jai Jesúsjavabelia sacerdotevi pepo penamatacaitorobinë.

⁶¹ Jesús itsiata moya. Apo jumepitsi cajena. Nexata icatsia sacerdotevi pepo penamat-acaitorobinë jumaitsi Jesúsjavabelia:

—¿Xamë tsabaja pepacuene Cristomë, athëbëvetsica Dioso pecaitorobinëtsica jivi neca-panepaenexa? ¿Xamë tsaja, Dioso pexënatomë? jai.

⁶² Nexata Jesús jumaitsi bajaraponëjavabelia:

—Jājā, xanë rabaja. Paxamë raja panetaename, Daxitajivi Pematapijinënë, taecaejava Dioso pecujanenia, daxitajamatabëcuene pecajëpaenëtsi. Panetaenamenua tanaje-tarucaejava athëbëvetsica itarërëbota, jai Jesús.

⁶³ Bajarapacuenia Jesús pejumaitsijava itsa jumetane, sacerdotevi pepo penamatacaitorobinē penaxatatsijava anaeya titinaxuaba. Bajarapacuenia titinaxuaba pi-anaepanaexae Jesús pejumaitsijava yabara. Nexata sacerdotevi pepo penamatacaitorobinē jumaitsi daxita penacaetuatsivijavabelia:

—Pijacuata rabaja pejumaitsijumeta naneconita. Pematatsēnēa apo namatavenon-aetsi itsamonae vajanacatsipaebinxana paneconi yabara maponēje naneconitsiaex-anaejitsiatsi. ⁶⁴ Paxamē rabaja pajumetaneme maponēje Dioso apo pejitsipaecuenia pecuaicuaijajava. Tsipaji Dioso bepexēnato nataeya cuaicuaijai. ¿Detsa nexata paxamē pajamatabēitsimē? jai sacerdotevi pepo penamatacaitorobinē daxita penacaetuatsivijavabelia.

Nexata daxita penacaetuatsivi jumaitsi:

—Naneconita rabaja Diosojavabelia. Nexata baja beyaxuabianatsi, jai bajarapamonae Jesús yabara.

⁶⁵ Nexata bajarapamonaeyajuvēnēvi Jesús itabarasuabatsi. Bajaraxuacujinae pa-paēbērēpanata itaxutocētatsi. Pitaxutocētsicujinaetsi itabaratsaquibabeponatsi pecobethaitonēta. Nexata bajarapamona jumi tsaponae Jesúsjavabelia:

—jVēnējonare ponē caitabaratsaquibabepona! jai tsaponae bajarapamona.

Bajaraxuacujinae templobopijipolicíavi itabarapacabixuabatsi Jesús.

Pacuenia jane baja Pedro nayavajunuaxaina Jesús pijajivitonēcuene yabara pelivaisi (Mt 26.69-75; Lc 22.56-62; Jn 18.15-18, 25-29)

⁶⁶ Itsa abaxē Jesús sacerdotevi pepo penamatacaitorobinē pijabo ēnētuaajēalia yanijobaponatsi xua yabara naneconitsiaexanaejitsiatsi, Pedro naitaxutocaevetsiaya naeca bopanabota. Nexata bajarajota taeyetatsi petiriva, sacerdotevi pepo penamatacaitorobinē pijabota penacuenebiva. ⁶⁷ Bajarapova Pedro taeyetatsi penanonopecaejavata. Nexata bajarapova naitaxutobabatsia asaēya taenucatsi Pedro. Jumaitsi:

—Xamē ata rabaja naponaponame Jesússta, Nazaret tomarapijinēta, jaitsi.

⁶⁸ Nexata Pedro itsiata nayavajunuaxaina Jesús pijajivitonēcuene. Nexata Pedro jumaitsi bajarapovajavabelia:

—Jume raja. Apo yapētaenē cajena bajaraponē. Apo yapētaenē pacuene yabara nejumaitsimē, jai Pedro.

Bajaraxuacujinae Pedro pejonebaupajavaverenajavabelia natixilia. Nexata vacara fiaba. ⁶⁹ Icatsia bajarapova Pedro tanetsi. Nexata pamonae bajarajota nubena, bajarapamonaejavabelia bajarapova jumaitsi:

—Mara ponēje Jesús pijajiviyajuvēnēnēje, jai bajarapova Pedro yabara.

⁷⁰ Icatsia nexata Pedro jumaitsi:

—Jume raja. Apo yapētaenē cajena bajaraponē, jai.

Bajaraxuacujinae, icatsia caeapatoyocujinae, bajarajota penubenaevi Pedro jumaitsi:

—Xaniajai raeta baja cajena. Xamē Jesús pijajiviyajuvēnēnēmē. Tsipaji rabaja Galilea nacuapijinēmē. Galilea nacuapijivi pecuaicuaijaicuenia cuaicuaijamē, jaitsi.

⁷¹ Nexata Pedro pejumexaniataenexatsi, ajumesaēya jumaitsi:

—Itsa apo xaniajanē tsipae paxamējavabelia, nexata Diosojavabelia naneconitsipajē. Apo yapētaenē cajena ponē yabara panejumaitsimē, jai Pedro.

⁷² Itsa baja Pedro najumevereta bajarapacuenia pejumaitsijava, vacara icatsia fiaba. Nexata bajarajota Pedro najamatabēnapitajaraba pacuenia Jesús jumaitsi: “Anija-jumebeje vacara pefiabivajēnaeya, nayavajunuaxainaename tajajivitonēcuenēmē. ‘Xanē cajena apo yapētaenē bajaraponē,’ jamē tsane xanē yabara acueyabi xuabeje,” pejajavatsi Jesús, Pedro najaaraba. Nexata bajarajota Pedro bitso najamatabēxaina Jesús pejumaitsiyumetsi yabara. Pedro nexata nua.

15

Pacuenia Jesús nutatsi Pilato pitabarata yabara pelivaisi
(Mt 27.1-2, 11-14; Lc 23.1-5; Jn 18.28-38)

¹ Ajena baja matakabi tsarucaponae, sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nacaetuata. Icatsia pematatsënä itsamonae bajarapitsijamatabëcuenevi yajavanacaetuata penabarëcuaicuajainexa. Bajaraxuacujinae bajarapamonae Jesús cobecëtsiaya caponaliatsi nacuaevetsinë Pilatojavabelia. ² Nexata Pilato yanijobatsi Jesús.

—¿Xamë tsaja judíovi pepo nevetsinë? jaitsi.

Nexata Jesús jumaitsi Pilatojavabelia:

—Jājā, xanë rabaja pacuenia nejumaitsimë, jai Jesús Pilatojavabelia.

³ Sacerdotevi penama itsamonae bajarapitsijamatabëcuenevi yajtacaitorobivi jumaitsi Pilatojavabelia:

—Jesús raja bitso pibisiacuene exanabiaba, jai.

⁴ Nexata icatsia Pilato yanijobatsi Jesús.

—¿Itsalivaisiyo ata tsaja apo yapëtaemë nejumecanaviatsinexa? ¿Apo jumetaemë mapacuenia pecaneconitsijavaje? jaitsi.

⁵ Itsiata Jesús matavëjëa apo jumepitsi Pilatojavabelia. Bajaraxuata Pilato apo yapëtae pacuenia exanaejitsia Jesúsjavabelia.

Pacuenia baja Pilato tocopata Jesús pebeyaxuabinexatsi yabara pelivaisi
(Mt 27.15-31; Lc 23.13-25; Jn 18.38-19.16)

⁶ Nacuaevetsinë Pilato xaina pijacujirucue. Caevai canacujitsia, pascua fiestamatakabi, Pilato copatabiaba caenë penaneconitsinë pepitsapaenexa penaneconitsivi pejebabiabibovecua. Pajivi yabara jivi Pilatojavabelia vajëcabiaba, Pilato nexata copatabiaba bajarapajivi pascua fiestamatakabi. Bajarapacuenia Pilato caenë copatabiaba jivi pesivajamatabëcuene xanepanaenexatsi. ⁷ Pamatakabi Jesús naneconitsiaexanatsi, bajarapamatakabi Barrabásvënënë jivi pebarëbevi barënanecanaviatsinexa penaneconitsivi pejebabiabibota. Barrabás, itsamonae yajava, barënabia picani gobierno pijajivi-javabelia. Nexata taicatsi. Naneconitsiaexanejebatsi penaneconitsivi pejebabiabibota.

⁸ Nexata jivi pona Pilatojavabelia. Jumaitsi bajarapamonae Pilatojavabelia:

—Pacuenia pascua fiestamatakabi copatabiabame caenë pepitsapaenexa penaneconitsivi pejebabiabibovecua, bajarapacuenia panetocopare caenë pepitsapaenexa penaneconitsivi pejebabiabibovecua, jai bajarapamonae Pilatojavabelia.

⁹ Nexata Pilato jumaitsi bajarapamonaejavabelia:

—¿Pajitsipame tsaja patacatocopatsijava pepitsapaenexa Jesús, pajudíovimë pepo papecaevetsinë? jai Pilato.

¹⁰ Bajarapacuenia Pilato jumaitsi tsipaji yapëtane pajamatabëcuene yabara sacerdotevi penamatacaitorobivi tocaponarenatsi Jesús. Pilato jamatabëcueneyapëtane sacerdotevi penamatacaitorobivi Jesús pecueneitoyaxaetsi petocaponaejavatsirena.

¹¹ Nexata bajarapamonae asaëya vajëca Barrabás pecapitsapaenexatsi. Tsipaji baja cajena sacerdotevi penamatacaitorobivi muxubijiapenetsia jumaitsi jivijavabelia:

—Asaëya pavajëcaename Barrabás pecopatsinexatsi. Nexata Barrabás copatsianatsi pepitsapaenexa penaneconitsivi pejebabiabibovecua. Pëtsa pavajëcame Jesús pecopatsinexatsi, jai baja cajena sacerdotevi penamatacaitorobivi jivijavabelia.

¹² Nexata icatsia Pilato yanijoba jivijavabelia:

—¿Detsa nexata xua pajitsipame taexanaenexa maponëjavabeliaje: “Judíovitsi pepo vajanacaevetsinë,” paneyabarajainëjavabelia? jai Pilato judíovijavabelia Jesús yabara.

¹³ Nexata bajarapamonae vavajai pinijumeta.

—¡Cruzajavabelia cobematabiabarutsiaexanare! jai Pilatojavabelia.

¹⁴ Nexata Pilato jumaitsi bajarapamonaejavabelia:

—¿Detsa pitsineconi yabara nexata cobematabiabarutsiaexanaejitsipajë? jai Pilato Jesús yabara.

Itsiata bajarapamonae icatsia pinijjumeta vavajai.

—¡Cruzajavabelia cobematabiabarutsiaexanare! jai tsaponae.

¹⁵ Nexata baja Pilato tocopata Barrabás pepitsapaenexa penaneconitsivi pejebabi-abibovecua jivi barajamatabëcuenexanepanaeya petaenexatsi. Nexata Pilato pijajivi, vajabitsaëvi, itoroba copiaya Jesús ayaicuenia pejumatitibabenexatsi penaneconitsivi pejumaconitabiabimacata. Bajaraxuacujinae Pilato tocopata baja Jesús vajabitsaëvi pecobematabiabarutsinexatsi cruzajavabelia.

¹⁶ Nexata baja vajabitsaëvi Jesús caponaliatsi nacuaevetsinë Pilato pijaboxanetojavabelia. Nexata bajarajota nacaetuata daxita vajabitsaëvi. ¹⁷ Bajaraxuacujinae Jesús quenetsiataeya xatatatsi peraënaetsautsaucaejava. Xua nacuaevetsinë banaxatata, bajaraxua xatatatsi benacuaevetsinëcuenia petaenexatsi. Coronacuenia pematax-atatsinexatsi, peejuvitoyoroto tsimataexanatsi. Bajarapatoyoroto Jesús mataxatatatsi.

¹⁸ Bajaraxuacujinae quenetsiataeya bajacobaponatsi.

—¡Bajaco, judíovi pepo pevetsinë! jai tsaponae bajarapamonae Jesúsjavabelia.

¹⁹ Bajarapamonae caenë canacujitsia mataconibiaxuabaponatsi naebota. Suabaponatsinua. Beyaiyataeya itajara pematabacabëta tonubenajoneyabiabatsi Jesús pitabarata. ²⁰ Jesús quenetsiataeya pecapocaponaecujinaetsi, vejumajonotatsi baja xua xatatatsi, peraënaetsautsaucaejava. Jesús baja icatsia xatatatsi penaxatatsijava. Caponaliatsi jane baja pecobematabiabarutsinexatsi cruzajavabelia.

Pacuenia jane baja Jesús cruzajavabelia cobematabiabarutatsi yabara pelivaisi
(Mt 27.32-44; Lc 23.26-43; Jn 19.17-27)

²¹ Alejandrobeje Rufobeje paxa, Simónvënënë, Cirene tomarapijinë. Nexata Simón najetaruca vayafotusatojavaverena. Nexata vajabitsaëvi Simón junatatsi, pacruzajavabelia Jesús cobematabiabarutsijitsiatsi, peyavenonaeyacaponaenexa.

²² Caponaliatsi Jesús Gólgotavënë tsutojavabelia. “Gólgota,” itsa jai hebreojumeta, mapajumetaje pejumaitsiyume: “Jivimatasipatsuto,” pejaiyume. ²³ Bajarajota picani Jesús rajutatsi vinora piapaenexa, pematajërëabira mirravënëjavata, bitso penavixae-taeyaniva pecobematabiabiavatatatsi cruzajavabelia. Itsiata Jesús apo apae. ²⁴ Nexata jane baja Jesús vajabitsaëvi cobematabiabarutatsi cruzajavabelia. Bajaraxuacujinae vajabitsaëvi bajarajota canamuxusita beibotoxi. Bajarapacuenia canamuxusita peyapëtaenexa ponë pitaponaejitsia caejava canacujitsia Jesús penaxatatsijavami, xua jumaponapona. Bajarapacuenia vajabitsaëvi natsicobetsana Jesús penaxatatsijavami.

²⁵ Bajayacunuaepatota, a las nueve, Jesús cobematabiabarutatsi cruzajavabelia.

²⁶ Bajarajota Jesús pematabocoto matatsënëyo yaquinaruta tablapayota itsamonae ata peyapëtaenexa pajamatabëcuene yabara Jesús cobematabiabarutatsi cruzajavabelia. Jumai tsarutsi peyaquinarutsiitane cruzajavata mapacueniaje: “Mara ponëje judíovi pepo pevetsinëje,” jai tsarutsi Jesús yabara. ²⁷ Anijanëbeje penacobetoxotsinëbeje, Jesús yajavacobematabiabarutatsi. Caenë canacujitsia pijacruzata rubatsi. Bajara-ponëbeje Jesús pemuxuneneta rutatsibeje. Itsanë Jesús pecujuanenia rutatsi. Itsanë Jesús petsavenonenia rutatsi. ²⁸ Bajarapacuenia Jesús itsa yajavacobematabiabarutatsi penacobetoxotsinëbeje, nexata Jesús tocopiapatatsi pacuenia baja cajena Dioso pejumelivaisibaxutota tajëvelia jumaitsi Jesús yabara. Dioso pejumelivaisibaxutota tajëvelia jumaitsi Jesús yabara mapacueniaje: “Naneconitsiaexanaenatsi bepibisiacuene pex-anaenëcuenia,” jai baja cajena tajëvelia Dioso pejumelivaisibaxutota Jesús yabara.

²⁹ Jesús pecobematabiabarutsijavatatsi cruzajavabelia, bajaraxuayo penajetarubenaevi Jesús itaropitsiaya bijataeyabiabatsi. Jumai tsabiabi bajarapamonae:

—Yiara jane maitsimëje. Xamë raja imata jumaitsimë: “Xuabianicajë templobo. Acueyabi matabita icatsia veretetsianajë itsabo,” jamë. ³⁰ Nacapanepare jane baja nijacuata. Cruzajavavetsica runaimica, jai tsabiabi Jesúsjavabelia bajaraxuayo penajetarubenaevi.

³¹ Bajara pijinia pacuenia sacerdotevi penamatacaitorobivi, judíovi pecujarubivi ata, capocaponatsi Jesús. Ëpamonae najumaitsi:

—Maponëje itsamonae yabara jumai tsabiabi: “Capanepaenajë jivi,” jai tsabiabi. Caranata pijacuata penacapanepaenexa, apo cajëpaetsi. ³² Itsa xaniajai pepacuene Cristo, athëbëvetsica Dioso pitorobinëtsica jivi pecapanepaenexa, Israel nacuapijivi pepo pevetsinënexanua, aeconoxae runaenica cruzajavavetsica vajataenexa. Nexata jane baja jumecovënëtsianatsi Cristonëcuene, najai bajarapamonae capocaponaeya Jesús yabara.

Ponëbeje ata Jesús yajavacobematabiabarutatsi, bajaraponëbeje ata, Jesús bijataerucatsibeje.

Pacuenia baja Jesús tēpa yabara pelivaisi
(Mt 27.45-56; Lc 23.44-49; Jn 19.28-30)

³³ Jesús baja itsa tēpaejitsia, ajena matonejejitsia, daxita nacujava aitaquiri tsajuni. Matapania caniviojavabelia, bejamatabëcuene a las tres, nacua napebeta icatsia.

³⁴ Nexata icatsia paepatota nacua napebeta, bajarapaepatota pinijicuenia Jesús aëjai. Jumaitsi:

—Eloi, Eloi, ¿lama sabactani? jai Jesús.

Bajarapacuenia Jesús itsa jumaitsi pijajumeta, mapajumetaje pejumaitsiyume: “Taja Dioso, tajaDioso, ¿detsa xuajitsia baja tajaepato necopatame?” pejaiyume.

³⁵ Nexata itsamonae bajarajota penubenaevi bijiaya jumetane bajarapacuenia Jesús pejumaitsiyava. Nexata saya jamatabëcuenenavëxaniabiaya jumaitsi bajarapamonae:

—Jica, pajumetaema. Mara ponë junata profeta Elíaspijinëmije, Diosojumepaebinëmi, jai bajarapamonae.

³⁶ Nexata bajarapamonaeajuvënënë piajatuvinorayalia bepijia jabutaxuaba esponjavënëjava. Bajaraxuacujinae esponjavënëjava naeboupita cëtaruta. Toyotsiatsi picani Jesús petsutsuninexa bajaraxua. Ponë picani Jesús toyotsiatsi bajaraxua petsutsuninexa, bajaraponë jumaitsi penajuanubenaevijavabelia:

—Bajarapacuenia abaxë copatarutatsi Jesús. Taenatsi Elíaspijinë itsa najetaruca cruzavecua penutsinexatsitsica Jesús, jai bajaraponë capocaponaeya.

³⁷ Jesús icatsia pinijicuenia aëjai. Bajaraxuacujinae jane baja Jesús tēpanajereca.

³⁸ Paepatota Jesús tēpanajereca, bajarapaepatota templobo ënëtuatujëalia peyatucutarutsipana, ayaipapaëbërëpanaxaneto, tititica tuatujëareca, athëbëvetsicacujinae irabereca. ³⁹ Nexata paepatota Jesús tēpanajereca, vajabitsaëvi pijacapitán Jesús pitabara canacujitsialia nuca. Nexata bajaraponë taenuca Jesús pinijicuenia peaëjaiyava. Taenucanua Jesús petëpanajetsijavareca. Nexata vajabitsaëvi pijacapitán jumaitsi:

—Matsaena ponë tēpaje, pepacuene baja rovia Dioso pexënato, jai.

⁴⁰ Bajarajota petiriavibitsaëtoxaneto tajiyoverena taenubena Jesús petëpaejava. Bajarapapetiriavi tuatujëta nanubena mapamatabëxëyoje. Itsava Mariävënëva, Magdala tomarapijiva. Itsava Salomévenëva. Itsava icatsia Mariävënëva. Bajarapova Santiagobeje Josébeje pena. Bajaraponë Santiago, pevëjëato abaxë itsanë Santiagovënëvecua. ⁴¹ Pamatacabi abaxë Jesús ponapona Galilea nacuata, bajarapapetiriavi Jesús pënanjavanapatsi peyavenonaenexatsi. Papetiriavibitsaëtojavata Mariabana nanubena, bajarapapetiriavi ata Mariabana Jesús najuapënaponarena Galilea nacuaverena Jerusalén tomarabereca.

*Pacuenia Jesús petëpaenë mëthëtatsi yabara pelivaisi
(Mt 27.57-61; Lc 23.50-56; Jn 19.38-42)*

⁴²⁻⁴³ José Arimatea tomarapijinë, judíovi pevetsinë, peyaiyataenëtsi. Bajaraponë José copiaevetaponapona pecopiapatsijava pamatacabi caenë Dioso evetsijitsia daxita pijajivi mapanacuataje. Judíovi baja penacueraevetsimatacabinexa pevajënaeya pamatacabi, caniviyotsia baja. Bajarapamatacabi judíovi banacuenevereta baja penacuenebijava. Nexata bajarapaepatota José acueneura ata, najamatabësaëta. Nexata lia nacuaevetsinë Pilatojavabelia. Nexata José vajëta Pilatojavabelia petocopatsinexatsi Jesús petëpaenë pemëthëtsinexa. ⁴⁴ Nexata Pilato jamatabëjumaitsi:

—Xaniajai tsamë rabaja Jesús tëpa, jamatabëjai tsipaji abaxë bajayajebi Jesús apo rucae cruzajavabelia pecobematabiabarutsicujinaetsi.

Nexata Pilato junata vajabitsaëvi pijacapitán. Nexata Pilato yanijoba vajabitsaëvi pijacapitánjavabelia, Jesús petëpaecuene Pilato peyapëtaenexa. ⁴⁵ Nexata vajabitsaëvi pijacapitán tsipaeba Pilatojavabelia.

—Jesús rabaja capanepaeya tëpa, jai.

Nexata jane baja Pilato José tocopatatsi cruzajavavetsica pepitsinexa Jesús petëpaenë. ⁴⁶ Nexata José comuata pexaniaviriasábana. Bajaraxuacujinae José jane baja cruza-javavetsica pitsica Jesús petëpaenë. Daxitanëreca mataquionaeya matacacëba pexaniaviria piapiasábanapanata. Bajaraxuacujinae itsajota cajena José iboitapajanitojavata pinijiibovaju exanaeyaexanabuata petëpaevi pebuataponaenexa, bajarapaibovajualia José buata Jesús petëpaenë. Bajaraxuacujinae pinijiibopanaxaneto José tixirena. Yavajuvëpaacatabuata. ⁴⁷ María Magdala tomarapijiva, itsava pijinia María, José pena, bajarpovabeje tanebeje itsajota Jesús buatatsi petëpaenë.

16

*Pacuenia Jesús petëpaecujinae icatsia asaë yabara pelivaisi
(Mt 28.1-10; Lc 24.1-12; Jn 20.1-10)*

¹ Judíovi baja penacueraevetsimatacabi itsa verevereca, acueyabi povamaxëto comuata petuxujuvira. Itsava Mariávënëva, Magdala tomarapijiva. Itsava Salomévenëva. Itsava icatsia Mariávënëva. Bajarapova Santiago pena. Bajarapamonae petuxujuvira comuata peperabëexabinexa picani Jesús petëpaenë. ² Nexata baja judíovi penacueraevetsimatacabi itsa verevereca, meravia pitsijavata, ajena baja matacabi tsarucaponae, bajarapamonae ponalia Jesús pebuatsiibovajutsijavabelia. ³ Nexata bajarapamonae namutualia najumaitsi tsanajetarubena:

—¿Jipatsa meta nacatotixitsiana Jesús peyavajuvëpa acatabuatsiibopanaxanetotsi? najai tsanajetarubena bajarapamonae.

⁴ Nexata bajarapamonae itsa imoxoyotabuatapona, naëcobarëcëpalia ibovajujavabelia. Nexata taeyabuata ibopanaxanetomi petixitabuatsijavalia ibovajuvëpavecua. Bajarapaibopana bitso pinijiibopanaxaneto. ⁵ Nexata petiriavi itsa joneya Jesús pebuatsiibovajutsijavalia, taeyeta pecujanenia pevëjëato. Bajaraponë naxatateca piapiajava penioponaeyava. Nexata petiriavi najunaviaca. ⁶ Nexata pevëjëato jumaitsi petiriavijavabelia:

—Pëtsa panajunaviacame. Paxamë picani pajaitame Jesús, Nazaret tomarapijinë, ponë cobematabiabarutatsi cruzajavabelia. Asaë rabaja icatsia bajaraponë petëpaecujinae. Ajibi rabaja tsarucacae majotaje. Pataema jane itsajota picani buatatsi.

⁷ Paponare baja. Patsipaebianame pijajivijavabelia, Pedrojavabelia ata. Pajumaitsimë tsane bajarapamonaejavabelia: “Jesús pina panevajënaeyabelia pona Galilea nacuyabelia. Baja pina jotalia pacaxitajarabianame Jesús pacuenia baja pacajumaitsi,” pajamë tsane pijajivijavabelia, jai pevëjëato petiriavijavabelia.

⁸ Nexata saya bajarapapetiriavi rēcēpeca Jesús pebuatsiibovajutsivecua. Neconecojai saya pecajunavi. Nexata namutoepatua apo tsipaebi itsajivijavabelia ata. Tsipaji bitso junava.

Pacuenia Jesús petēpaecujinae, icatsia itsa asaē, tsitanaitajēta María Magdala tomarapijivajavabelia yabara pelivaisi
(Jn 20.11-18)

⁹ Judíovi baja penacueraevetsimatacabi itsa verevereca, meravia pitsijavata, ajena baja matacabi tsarucaponae, Jesús icatsia asaē petēpaecujinae. Bajarapamatacabi copiata Jesús tsitanaitajēta María, Magdala tomarapijivajavabelia. Bajarapova cajena copiaya Jesús vecuacapitsapa siete padovathibeje itsa abaxē Jesús apo beyaxuabitsi.

¹⁰ Nexata María, Magdala tomarapijiva, Jesús petsitanaitajētsicujinaetsi, pona Jesús pijajivijavabelia. Nexata María pevajēnae Jesús pijajivi abaxē vēnueyena Jesús. Nexata María itsa pata Jesús pijajivijavabelia, tsipaeba pacuenia María tane Jesús. ¹¹ María jumaitsi Jesús pijajivijavabelia:

—Jesús rabaja icatsia asaē petēpaecujinae. Taniji rabaja tajacuata, jai. Itsiata Jesús pijajivi apo jumexaniataetsi María.

Pacuenia Jesús petēpaecujinae icatsia itsa asaē, tsitanaitajēta pijajivitonēbejejavabelia yabara pelivaisi
(Lc 24.13-35)

¹² Jesús pijajivitonēbeje najetarucabeje namutua. Nexata Jesús pijajivitonēbeje namutua najetarucabejavatabeje, Jesús tsitanaitajēta beitsanēcuenia pijajivitonēbejejavabelia.

¹³ Nexata Jesús pijajivitonēbeje itsa tanebeje Jesús, naviatecabeje. Nexata pacuenia tanebeje Jesús, tsipaebabeje itsamonae Jesús pijajivijavabelia. Itsiata bajarapamonae apo jumexaniataetsibeje.

Pacuenia Jesús petēpaecujinae, icatsia itsa asaē, pijajivi itoroba pexanialivaisi jivi petsipaebanajetarubenaenexa daxitanacuanējava yabara pelivaisi
(Mt 28.16-20; Lc 24.36-49; Jn 20.19-23)

¹⁴ Bexējavabelia icatsia Jesús tsitanaitajēta pijajivi once ponēbejejavabelia penabanenaejavata mesata. Nexata Jesús pinijicuenia muxujioba pijajivi piagamatabēcuenetajaxae. Muxujiobanua apo pejumecovēnētsixae petsipaebijavatsi pamonaē tane Jesús icatsia piasaējava petēpaecujinae. ¹⁵ Nexata Jesús jumaitsi pijajivijavabelia:

—Paponare daxitanacuanējava daxitajivi panetsipaebanajetarubenaenexa pexanialivaisi pecapanepaelivaisinexatsi. ¹⁶ Pajivi jumecovēnētsiana bajarapalivaisi, nexata pabautisabianame. Bajarapajivi Diosojavabelia capanepaenatsi. Pajivi apo jumecovēnētsi tsane bajarapalivaisi, daxitamatacabijavabelianexa naneconitsiana Diosojavabelia. ¹⁷ Pamonaē peneta jumecovēnētsiana bajarapalivaisi, mapacuenia exanavanapaenaje. Tavēnēta jivivecua capitsapaponaena dovathi. Itsaviriajumetanua, apo penatsipaebijumemi ata, jemata natsipaebiana. ¹⁸ Bajarapamonae jomo pecobeta pitsi ata tsane, apae atanua tsane jivi petēpaeyaexanaera, itsiata apo tēpae tsane. Bajarapamonae itsa nacobebuatsiana piavitanejivi pematatsēnēvereca, pejayatsijivi jamatejema tsane piavitanejavavecua, jai Jesús pijajivijavabelia.

Pacuenia Jesús petēpaecujinae, icatsia itsa asaē, naviata baja athēbēabetsia yabara pelivaisi
(Lc 24.50-53)

¹⁹ Vajatuxanenē Jesús livaisi petsipaebicujinae pijajivijavabelia, Dioso baja pesaēta catsiatsi athēbēabetsia. Nexata athēbētatsia Jesús eca Dioso pecujanenia penajuaevetsinexabeje daxitacuene. ²⁰ Nexata jane baja Jesús pijajivi daxitanacuanējava jivi

tsipaebanajetarubena bajarapapexanialivaisi. Nexata daxita pamonae jumetaeyabi-abatsi, jumecovënëtabiabatsi pexaniajailivaisi petsipaebicuene. Tsipaji Jesús pijajivi jamatabëcueneyavenonabiaba Jesús pijajivi pinijicuene pexanaenexa jivijavabelia livaisi petsipaebabiabjavata.

Pexanialivaisi Jesucristo pelivaisi, San Lucas peyaquinaelivaisi

Pacuenia Lucas taxuxuaba mapabaxutotaje Jesucristo pelivaisi, petoyaquinaejava Teófilovēnējavabelia, yabara pelivaisi

¹⁻² Pamatacabi abaxē Jesús ponapona mapanacuataje, jivi ayaibitsaētozaneto tanetsi peponaponaejava. Bajarapamonae tanetsi Jesús petaxuxuabijavaveliacujinae jivi livaisi petsipaebaponaejava. Nexata bajarapamonae paebanajetarubena tomaranējava Jesús pelivaisi, pexanialivaisi. Nexata tomaranējava Jesús pelivaisi pejumetaevi, ayaibitsaēto, baja cajena yaquina juya mataropotsia petsipaebinexa itsamonaejavabelia. Pacuenia Jesús petaevitsi vajunupaebatsi, bajarapamonae yaquina baja cajena Jesucristo pelivaisi. ³ Nexata xanē ata mapamatacabitaje yanijobaponajē bajarapalivaisi daxita peyapētaevijavabelia. Yanijobaponajē xaniavaetsia tayapētaenexa pacuenia Jesús exanapona petaxuxuabijavaveliacujinae mapanacuataje. Teófilo, catoyaquinatsi. Catoyaquinatsi mapabaxutotaje xamē ata xaniavaetsia neyapētaenexa daxita bajarapalivaisi, Jesucristo pelivaisi. Netsitaxanepana tacatoyaquinaenexa daxita bajarapalivaisi neyapētaenexa pacuenia jumai tsaponae caelivaisi canacujitsia Jesús pexanaponaejavanē yabara, caejava canacujitsia. ⁴ Copiaya baja picani itsamonae catsipaeba bajarapalivaisi. Itsiata icatsia xanē catoyaquinatsi neyapētaenexa jane baja xaniavaetsia bajarapalivaisi pexaniajailivaisicuene.

Pacuenia ángel tajēvelia jumaitsi Zacaríasjavabelia: “Nexēnatonēyo raja xainaename,” jai yabara pelivaisi

⁵ Pamatacabi abaxē Herodes eveta Judeanacua, bajarapamatacabi ponapona sacerdotenē Zacarías. Bajaraponē sacerdotevi Abíasvēnēvijajuvēnēnē. Zacarías pijava pevēnē Elisabet. Bajarapova sacerdotenēmi Aarónpijinē pemomoxiyajuvēnēva. ⁶ Bajarapajivibeje xaniavaetsia aneconijibia Dioso pitabarata toponaponaabeje. Dioso jumecovēnētsiaya ponaponaabeje pacuenia Dioso itorobatsi judíovi xaniavaetsia pejinavanaponaenexa. ⁷ Itsiata bajarapajivibeje pexi apo xainaabeje. Tspaji Elisabet mavecova. Nexata bajarapajivibeje bitso baja perujujiviyobeje.

⁸ Nexata itsamatacabi Zacarías templobota nanacuenebijitsia sacerdotevi penacuenebicuene Dioso pitabarata. Pasemanata daxita sacerdotevi, Abíasvēnēvi, nacobenaevetsijitsia templobo, bajarapasemana Zacarías daxisemana nanacuenebijitsia templobota. ⁹ Nexata abaxē sacerdotevi petaxuxuabivajēnaeya penacuenebijava, pijacujirucuenia exana penayapētaeponaenexa xua caenē canacujitsia nacuenebijitsia templobota. Nexata sacerdotevi pijacujirucuenia pexanaecujinae, itsa baja yapētane xua caenē canacujitsia nacuenebijitsia templobota, nexata Zacarías tocopatatsi temploboenēalia petajuitsinexa inciensovēnējava, petuxujuvijava. Bajaraxuata Zacarías joneya temploboyalia petajuitsinexa jane baja inciensovēnējava temploboenēalia. ¹⁰ Paepatota Zacarías tajuitanuca inciensovēnējava temploboenēalia, jivi ayaibitsaētozaneto templobojumavelia vajēcanubena Diosojavabelia. ¹¹ Nexata Zacarías temploboenēalia, altarvēnējava muxuneneta, tsitanaitajētatsi ángel. Paaltarvēnējavajumata incienso tajuitabiaba Diosonexa, bajarapaaltarvēnējava pecujuanenia pamuxunenejavata, Zacarías taenuta ángel. ¹² Nexata Zacarías itsa taenuta ángel, apo yapētae pacuenia exanaejitsia Zacarías. Bitso jamatabēcuenenajunaviaca. ¹³ Nexata ángel jumaitsi Zacaríasjavabelia:

—Zacarías, pētsa junavame. Dioso baja cajena cajumetane nevajētsijava. Nexata nijava Elisabet catonacoxitsiana. Nexēnatonēyo baja xainaename. Vēnērubianame

bajaraponëyo Juan. ¹⁴ Pinijicuenia, jivi ayaibitsaëto yajava, barëyamë tsane bajaraponëyo itsa catonaexanaena. ¹⁵ Tsipaji bajaraponëyo ayaijamatabëcuenenë tsane Dioso pitabarata. Apo apae tsane piataneranë. Vinora ata apo apae tsane. Penaexanaejavaveliacujinae tsijamatabëvënëcaenatsi Espiritu Santo. Nexata Espiritu Santo pitorobicueniatsi, exanabiabiana. ¹⁶ Bajaraponë, Juan, Israel nacuapijivi najamatabëcuenecopatsiaexanaena Diosojavabelia. ¹⁷ Bajayata Diosojumepaebinëmi, profeta Elíaspijinë, ayaijamatabëcuenenëmi, Dioso pesaë yajavaponapona. Espiritu Santo ata pitorobicueniatsi, exanaponapona. Bajara icatsia itsane Juan ata. Bajaraponë pejamatabëcueneta, penacoxiitoyavimi ata, icatsia nacoxiasiva tsane. Bajaraponë pejamatabëcueneta, itsamonae pijinia pibisiajamatabëcuene pexainaevi ata, jamatabëcuene xanepanaeyaexanaena pexaniajamatabëcuene pexainanexa. Bajarapacuenia bajaraponë jivi jamatabëcuene xanepanaeyaexanaena pepo petuxanenë penajetarucaevajënaeya. Nexata bajarapamonae xaniavaetsia copiapitsiana pepo petuxanenë pamatacabi najetarucaena, jai ángel Zacaríasjavabelia.

¹⁸ Zacarías nexata yanijoba ángeljavabelia. Jumaitsi:

—Itsa taxënato xainaejitsianë, ¿detsa peneta pitsicuene taenajë tayapëtaenexa? Tsipaji rabaja xanë perujunënë. Tajava ata baja perujuva, jai Zacarías.

¹⁹ Nexata ángel jumaitsi Zacaríasjavabelia:

—Xanë raja Gabrielnë, Dioso pijajivitonënë. Dioso baja cajena nitoroba tacatsipaebinexa mapapexanialivaisije. ²⁰ Xamë saya nejumeaebame, xaniavaetsia catsipaebi atatsi xua pepacuene catocopiajopaejitsia. Nexata baja aeconoxae apo cacaëjêpae tsane necuaicuaijajava. Matapania jane baja pamatacabi catocopiajopaena xua yabara najumecapanepaeya catsipaebatsi, natsipaebianame icatsia, jai ángel Zacaríasjavabelia.

²¹ Bajarapaepatota jivi templobo jumavelia evetanubenatsi Zacarías pepitsapaejavarena. Najumaitsi bajarapamonae:

—¿De meta xuajitsia Zacarías bepíjia apo pitsapaerena templobovecua? najai bajarapamonae.

²² Itsa jane baja Zacarías pitsaparena templobovecua, apo caëjêpaetsi pecuaicuaijajava. Nexata pamonaevetanubenatsi templobo jumavelia, najumaitsi:

—Zacarías raeta bemajitsinaebota temploboënëlia itsacuene tane, najai.

Nexata Zacarías apo pecaëjêpaexaetsi pecuaicuaijajava, pecobeta tsipaeba besiyänëcuenia jivi peyapëtaeyaexanaenexa.

²³ Itsa baja Zacarías vereta penacuenebijava templobota pamatacabibeje itorobatsi penacuenebinexa, naviata baja pijaboyabelia. ²⁴ Bajaraxuacujinae Zacarías pijajava, Elisabet, nacoxita jane baja. Nexata bajarapova penacoxitsijava itsa yapëtane, cinco pajuametobejecuenia itsajavabelia pijabovecua apo ponaponae. ²⁵ Elisabet jamatabëjumaitsi:

—Dioso raja taneitaxutotsoniataexae, neyavenona tanacoxitsinexa mapacueniaje. Nexata baja apo auranë tsane tacoxibijava yabara, jamatabëjai Elisabet.

Pacuenia ángel tajëvelia jumaitsi Maríajavabelia yabara pelivaisi

²⁶ Elisabet baja seis pajuametobeje pepuaxinae penacoxitsicujinae, Dioso icatsia itoroba pijaángel Gabriel. Pijaángel itoroba Nazaret tomarabelia, Galilea nacuata peecaetomarabelia. ²⁷ Dioso itoroba ángel petsipaebbinexa Maríajavabelia. María abaxë pebi apo pequenetsiataevatsi. Angel pepatsivajënaeya Maríajavabelia, Maríabeje baja cajena Josébeje nabarëcuaicuaijaibeje penapitsinexabeje. Nacuaevetsinëmi Davidpijinë pemomoxiyajuvënënë José. ²⁸ Angel nexata joneya María peponaponaebota. Angel jumaitsi Maríajavabelia:

—María, cabajacabatsi. Pexaniajamatabëcuenia Dioso pecataeva. Dioso cayajavaponaponaena. Bitso cayavenonaena xamë daxita nevëna petiriavi matatoxenetsia, jai ángel.

²⁹ Nexata María itsa jumetane bajarapacuenia ángel pejumaitsijavatsi, María jamatabëjumaitsi:

—¿Detsa meta pitsijamatabëcuene yabara nejumaitsi ángel mapacueniaje? jamatabëjai María.

³⁰ Icatsia ángel tajëvelia jumaitsi Maríajavabelia:

—María, pëtsa junavame. Tsipaji raja Dioso pexaniajamatabëcuena catane. ³¹ Xamë raja nacoxitsianame. Cavecuanaexanaena raja pebinëyo. Bajaraponëyo vënërubianame Jesús. ³² Bajaraponëyo ayaijamatabëcuenenë tsane. “PinijiDioso, athëbëtatsia peecaenë, mapexënatoje,” jaitsi tsane jivi. Nexata vajatuxanenë Dioso nacuaevetsinë exanaenatsi. Pacuenia pijasalinainëmi Davidpijinë bajayata nacuaevetsinëmi, bajara icatsia itsane. ³³ Bajaraponë evetsiana Israel nacuapijivi daxita matabicabijavabelianexa, jai ángel tajëvelia Maríajavabelia.

³⁴ Nexata María jumaitsi ángeljavabelia:

—¿Detsa pacuenia nacoxitsipajë? Xanë raja tamona apo xainaenë, jai María ángeljavabelia.

³⁵ Ángel nexata tajëvelia jumaitsi Maríajavabelia:

—Espíritu Santo raja patsianica xamëjavabetsica. Nexata Espíritu Santo Dioso pesaëta caevetsiana. Bajaraxuata panacuetonëyo cavecuanaexanaena, tsatsianatsi Diosonexa. “Dioso ra mapexënatoje,” jaitsi tsane jivi. ³⁶ Nijamonaeva ata Elisabet, perujuva ata, exanaena penacuetonëyo. “Mavecova raja,” jai atatsi jivi, itsiata baja penacoxitsicujinae xaina baja seis pajuametobeje. ³⁷ Dioso raja caëjëpatsi daxitacuene pexanaenexa, jai ángel tajëvelia Maríajavabelia.

³⁸ Nexata María jumaitsi ángeljavabelia:

—Xanë raja Dioso pijajivitovanë. Pacuenia nejumaitsimë, bajarapacuenia Dioso xanëjavaberena exanaena, jai María.

Nexata baja María vecuaponatsi ángel.

Pacuenia María sivaxaina Elisabetjavabelia yabara pelivaisi

³⁹ María penacoxitsijavanexa petsipaebicujinaetsi ángel, caematacabibejecujinae, María pona petsutonënacuada peecaetomarabelia. Bajarapatomara eca Judea nacuada.

⁴⁰ Nexata María joneya Zacarías pijaboyalia. Bajacobanuta pijamonaeva Elisabet.

⁴¹ María itsa bajacobanuta Elisabet, nexata Elisabet peyacotajinaenacuetoyo tsicotonayucutarabatsi. Nexata jane baja Elisabet tsijamatabëvënëcatsi Espíritu Santo.

⁴² Nexata Elisabet Espíritu Santo itorobatsi pinijijumeta Maríajavabelia pejumaitsinexa mapacueniaje:

—Dioso cajena bitso cayavenona daxita petiriavi matatoxenetsia. Panacuetonëyo ata exanaename, bajarapanacuetonëyo Dioso bitso peyavenonabiabinëtsi tsane. ⁴³ Xamë tajatuxanenë penamë tsane. ¿Detsa xuajitsia beveliajamatabëcueneva atanë, nesivaxainamerë? ⁴⁴ Itsa nebajacobanutame, tayacotajinaenacuetoyo nayucutarababa pebarëyaxae. ⁴⁵ Barëyamë Dioso pecajumaitsicuenia nejumecovënëtsiva. Tsipaji pepacuene catocopiapatsiana daxita pacuenia vajatuxanenë Dioso pitorobinëtsica ángel tajëvelia catsipaeba, jai Elisabet Maríajavabelia.

⁴⁶ Nexata María jumaitsi Elisabetjavabelia:

Tajamatabëëthëtojavavetsina jumaitsinë Diosojavabelia: “Ayaijamatabëcuenenëmë bitso,” janë. ⁴⁷ Sivajamatabëcuenebarëyanë Dioso tanecapanepaenënexa.

⁴⁸ Sivajamatabëcuenebarëyanë. Tsipaji pijajivitovanë, beveliajamatabëcueneva atanë, Dioso nitapeta. Tatëpaecujinae ata tsane, tavënamuto, pevajënaeyabelia daxitajivi xanë yabara jumai tsabiabi tsane: “Dioso bitso peyavenonaevamitsi,” jai tsabiabi tsane. ⁴⁹ Bajarapacuenia daxitajivi jumai tsabiabi tsane xanë yabara. Tsipaji ayaijamatabëcuenenë Dioso netoexanabiabiana ayaicuene pexanaejavanë. Dioso raja apo pejitsipaenë jivi pibisiacuene

pexanaejava. ⁵⁰ Daxita pamonaē Dioso yaiyataena, bajarapamonae juya Dioso itaxutotsoniataeyabiabiana. ⁵¹ Dioso raja pecaējēpaenētsi pinijicuene ata pexanaenexa pecobeta. Pamonaē jamatabējumaitsi tsavanapae: “Vaxaitsi cajena ayaijamatabēcuenevitsi,” jamatabējai tsavanapae, bajarapamonae Dioso nacayajatsiaexana baja. ⁵² Pinijinacuanē pevetsivimi ata, bajarapanacuanē pevetsijavami Dioso vecuapitsapaeyaexana. Nexata bajaraxuacujinae Dioso juya evetsiaexana bajarapanacuanē beveliajamatabēcuenevimi ata. ⁵³ Pamonaē pijinia bitso piajani, bajarapamonae Dioso rajuta pexanianabanijava. Pamonaē pijinia bitso pexainaevi mapanacuapijicuene, bajarapamonae Dioso apo pe-jumecovēnētsixae, bajarapamonae Dioso apo rajutsi. ⁵⁴ Dioso yavenona pijajivi, Israel nacuapijivi. Apo nacofēnētsi cajena. Dioso itaxutotsoniataeyabiaba Israel nacuapijivi. ⁵⁵ Bajarapacuenia Dioso pijajivi itaxutotsoniataeyabiaba daxitamatacabijavabelianexa. Tsipaji baja cajena bajarapacuenia Dioso najumecapanepaeya jumaitsi vajasalinainēmi Abrahampijinējavabelia, daxita pemomoxijavabelianexa ata pitaxutotsoniataeyabiabijavanexa yabara, jai María Elisabetjavabelia.

⁵⁶ Nexata María acueyabi pajuametobeje naponapona Elisabet pijabota. Bajaraxuacujinae María baja naviata pijaboyabelia.

Pacuenia Juan naexana jivibautisabinēnexa yabara pelivaisi

⁵⁷ Juameto baja ecaica, pajuametota Elisabet penacuetto vecuanaexanaejitsiatsi. Penacuetonēyo jane baja vecuanaexanatsi. ⁵⁸ Itsa Elisabet yapētane Dioso pitaxutotsoniataecuenetsi, bitso Elisabet jamatabēcuenebarēya. Daxita pamonaē ata ena imoxoyo, pijabo muxuneneta, bajarapova pijamonaeyajuvēnēvi ata, sivajamatabēcuenebarēyatsi. ⁵⁹ Itsa baja penacuetonēyo caesemana xaineca penaexanaecujinae, Elisabetbeje Zacaríasbeje pexēnatonēyo perabēcaucutsiaexanabeje judíoivicuenia. Baitsi boupiperabēcaucutsiaexanabeje. Nexata daxita bajarapamonae pata Elisabetbeje Zacaríasbejejavaberena. Bajarajota picani penacuetonēyo tovēnērubijsiatsibeje paxa pevēnēcuenia paxa picani pevēnēxainanexa. ⁶⁰ Itsiata Elisabet jumaitsi pamonaējavabelia picani tovēnērubijsiatsibeje:

—Jume. Pevēnē raja tsane Juan, jai Elisabet bajarapamonaejavabelia.

⁶¹ Nexata bajarapamonae jumaitsi:

—¿Detsa xuajitsia jitsipame bajarapavēnē? Itsanē ata cajena nijamonaeyajuvēnēnē apo xainae bajarapavēnē, jai bajarapamonae Elisabetjavabelia.

⁶² Nexata bajarapamonae penacuetonēyo jane baja paxa junata. Pecobeta yani-joba pavēnē Zacarías jitsipa petovēnērubinexatsi. ⁶³ Nexata Zacarías vajēta tablapayo peyaquinaenexa. Nexata yaquinaruta: “Juan rabaja pevēnē,” pejaitane. Nexata daxita bajarapamonae jamatabēcuenenabenajaca. ⁶⁴ Bajarajota jemata icatsia Zacarías cuaicuaijai baja. Nexata jivi pitabarata Zacarías jumai tsaponae Diosojavabelia:

—Diosomē, ayaijamatabēcuenenēmē bitso, jai tsaponae.

⁶⁵ Daxita pamonaē bajarapatomarata imoxoyo penaevi, itsa jumetane pacuenia Zacarías Dioso yavenonaponatsi, pinijicuenia jamatabēcuenenabenajaca. Itsamonae bajarapanacuata petsutonējava penaevi ata, daxita bajarapamonae ata, vēnēlivaisitane bajarapacuenē yabara. ⁶⁶ Daxita pamonaē jumetane bajarapacuenē yabara, apo nacofēnētsi. Jamatabēnajanavanapabiaba bajarapacuenē. Nexata bajarapamonae nayani-jobabiaba.

—¿De meta jamatabēcueneitsi tsane bajarapanacuetonēyo itsa vitsabiana? najai tsabiabi bajarapamonae.

Bajarapacuenia nayanijobabiaba tsipaji bitso Dioso yavenonaponatsi bajarapanacuetonēyo.

Pacuenia Zacarías tajëvelia jumaitsi yabara pelivaisi

⁶⁷ Zacarías, Juan jivibautisabinënexa paxa, tsijamatabëvënëcatsi Espiritu Santo. Nexata Zacarías Espiritu Santo itorobatsi jivijavabelia pejumaitsinexa mapacueniaje:

⁶⁸ Pexaniajamatabëcuene rajutatsi vaxaitsi pepo vajatuxanenëjavabelia, Israel nacuapijivitsi vajaDiosojavabelia. Tsipaji pijajivitsi nacatoitorobianica vajanacacapanepaenënexa vajaneconivecua. ⁶⁹ Dioso cajena nacatoitorobianica pinijicuene pexanaejava pecaëjëpaenëtsi vajanacacapanepaenexa. Bajaraponë Dioso pijajivitonëmi Davidpijinë pemomoxiyajuvënënë tsane. ⁷⁰ Bajayata Diosojumepaebivimi profetavi, Dioso pitorobicueniatsi pejinavanapaevi, tajëvelia najumecapanepaeya jumaitsi bajaraponë vajanacacapanepaejavanexa yabara. ⁷¹ Tajëvelia profetavimi najumecapanepaeya jumaitsi bajaraponë vajanacacapanepaejavanexa vajavajabitsaëvivecua, daxita vajanacaitoyavi atavecua. ⁷² Dioso nacaitaxutotsoniataena pacuenia tajëvelia najumecapanepaeya jumaitsi vajasalinaivimijavabelia. Dioso cajena apo nacofënëtsi pacuenia najumecapanepaeya jumaitsi vajasalinaivimijavabelia. ⁷³ Bajayata copiaya bajarapacueni yabara Dioso najumecapanepaeya jumaitsi vajasalinainëmi Abrahampijinëjavabelia. ⁷⁴ Dioso baja najumecapanepaeya jumaitsi vajanacacapanepaenexa vajavajabitsaëvecua. Bajarapacuenia Dioso nacacapanepaena ajunavijibia vajatonacuenebavanapaenexa. ⁷⁵ Nexata bajarapacuenia Dioso itsa tonacuenebavanapaenatsi, jinavanapaenatsi pibisiacuene exanaenejevatsi Dioso pitabarata vajaasaëtsavanapaepato abaxë mapanacuataje,

jai Zacarías jivijavabelia tajëvelia pevajunupaebijavata Jesús Dioso pitorobijavanexatsitsica vajanacacapanepaenexa.

⁷⁶ Icatsia Zacarías jumaitsi pexënatonëyojavabelia mapacueniaje:

Taxënatonëyo, xamë yabara itsamonae jumai tsabiabi tsane: “Mara ponëje pinijiDioso, athëbëtatsia peecaenë, pijaprofetanëje,” jai tsabiabi tsane. Xamë raja itsaxuayo pepo petuxanenë najetarucaejitsia, pevajënaeya jivi tsipaebanajetarucaename pesivanajamatabëcuene copatsinexa bajaraponëjavabelia pamatacabi bajaraponë najetarucaena. ⁷⁷ Tsipaebanajetarucaename jivijavabelia pacuenia Dioso bajarapamonae capanepaejitsiatsi. Tsipaji bajarapamonae pibisiacuene pexanaeneconimi Dioso vecuaajibiaexanaenatsi. ⁷⁸ Dioso vajanacaitaxutotsoniataexae, nexata nacayapëtaeyaexanaena vajanacacapanepaenënexa athëbëvetsica pepatsijavanexatsica. ⁷⁹ Nexata bajaraponë jivijavabelia itsa tsipaebanajetarucaena pexaniajailivaisi, jamatabëcueneitayotsiana daxita pijamatabëcueneitaquirivimi. Baitsi pamonaë picani cjunava petëpaejava, bajaraponë petsipaebilivaisi pejamatabëcueneta, bajarapamonae yapëtaena jamatabëcuene xanepanaeya pejinavanapaenexa,

jai Zacarías pexënatonëyojavabelia tajëvelia pevajunupaebijavata Jesús jivijavabelia Dioso pejumelivaisi petsipaebanajetarucaejavanexa.

⁸⁰ Nexata jane baja xuacujinae Juan jivibautisabinënexa vitsabanajetaruca. Yajavaa-jamatabëcuenesaë baja cajena tsanajetaruca Dioso pejumelivaisi yabara. Nexata baja Juan itsa penaveretsinë, ponapona petusato nacuata. Matapania itsa taxuxuabijitsia jivi petsipaebinexa Jesús pelivaisi, naitajëta jivijavabelia pevënëlivaisitaenexatsi daxita Israel nacuapijivi.

2

Pacuenia Jesús naexana yabara pelivaisi
(Mt 1.18-25)

¹ Imoxoyo baja pevajënae Jesús penaexanaejavanexa. Nexata bajarapamatacabijava Romanonacua pepo pevetsinë, Augusto, taxuxuaba pijajivi pitorobijava jivi petonamataëjësinesatsi. Jumaitsi pijajivijavabelia:

—Daxitajivi, pamona taevetsinacuanëjava jinavanapa, panetonamataëjësianame, jai.

² Bajarapamatacabipiinia nacuaevetsinë Cireniovënënë saicaya itsanacua eveta, Siriavënënacua. ³ Nexata nacuaevetsinë Augusto pevetsinacuanëjava penaetomaranëta pejinavanapaevi, apo jinavanapae ëpijatomaranëjava. Itsamonae najinavanapa itsatomaranëjava. Bajaraxuata pamonaenajinavanapa itsatomaranëjava, caejivi canacujitsia, pijasalinaivimi pijatomaranëjavabelia pona. Bajarapamonaenapona penamataëjësinesatsi pijasalinaivimi pijatomaranëjava.

⁴ Bajaraxuata José ata barëpona Belén tomarabelia. José barënaropota Nazaret tomarata, Galilea nacuata peecaetomarata. José barëpona Belén tomarabelia, Judea nacuata peecaetomarabelia. Tsipaji baja cajena José pijasalinainëmi, Davidpijinë, bajayata Belén tomarata ponapona. ⁵ José barëpona María, pova pita pijavanexa. Bajarapova yacotapona itsa baja imoxoyo pevajënae penacueto pevecuanaexanaenexatsi. ⁶⁻⁷ Nexata baja itsa patabeje Belén tomarata, ponaponabeje dajubi pevetaabibota. Tsipaji baja pabota jivi patabiaba, pevajënaebeje baja jivi yavënëca. Nexata apo naya-caëjëpaetsibeje bajarapabota penaecaenexabeje. Bajaraxuata patabeje dajubi pevetaabibota. Nexata dajubi pevetaabibota María jane baja vecuanaexanatsi penacuetonëyo, copiaya penacoxitsinacueto. Barëca dajubi pevetaabibota. Jumaquioneta papaëbërëpanaxita. Buateta dajubi pexaejavanexa pemitsaothocabiabimoënëta.

Pacuenia ángelevi patsica Jesús penaexanaelivaisi petsipaebinexa oveja pevetsivijavabelia yabara pelivaisi

⁸ Belén tomarajumaverena imoxoyovayafota, oveja pevetsivi evetavanapa. Bajarapamonaenameravi nacobenaevetaabibaba pijaovejabitsaëtonë. ⁹ Jemata oveja pevetsivi tsitanaitajëtatsi Dioso pijaáangel. Nexata Dioso pijapenivenivenaenacotia oveja pevetsivi matatoyorotsia itayotatsi. Najunaviaca bajarapamonaenapiniucuenia. ¹⁰ Nexata ángel jumaitsi oveja pevetsivijavabelia:

—Pëtsa panajunaviacame. Pexanialivaisi raja pacatocanajetarucatsi pesivabarëyanexa daxitajivi. ¹¹ Ajena rabaja, mapameravitaje, naexana baja daxitajivi pecapanepaenënexa. Naexana Belén tomarata, patomarata bajayata nacuaevetsinëmi Davidpijinëmi ponapona. Ponë naexana, bajaraponë pepo petuxanenë Cristo, Dioso athëbëvetsica pitorobinëtsitsica jivi pecapanepaenexa. ¹² Paneyapëtaenexa pacuenia pacatsipaebatsi, penacuetonëyo pataeyabuatetsianame mapacueniaje. Penacuetonëyo pataeyabuatetsianame papaëbërëpanaxita pejumaquionaenacuetonëyotsi. Boquecaena dajubi pexaejava pemitsaothocabiabimoënëta, jai ángel oveja pevetsivijavabelia.

¹³ Bajara saya jota jemata oveja pevetsivi tsitanaitajëtatsi ayaibitsaëtoxaneto ángelevi, copiaya petsipaebiángelnëtsijavata. Bajarapamonaenángellevi pexaniajamatabëcuene rajuta Diosojavabelia. Penaxëanaejavata ángelevi jumaitsi mapacueniaje:

¹⁴ ¡Dioso, athëbëtatsia peecaenë, pinijicuene rabaja exana! PamonaenDioso jumecovënëta, Dioso sivajamatabëcuenebarëyatsi. Daxita bajarapamonaenajamatabëcueneanaxanaenajinavanapaeyaexanaena Dioso, jai ángelevi penaxëanaejavata.

¹⁵ Itsa baja ángelevi naviaba athëbëabetsia, oveja pevetsivi ángelevi pecovëta najumaitsi: —Ponaliatsi Belén tomarabelia. Taenatsi pecopiapatsijava pacuene yabara vajatuxanenë Dioso pitorobiángelnëtsica nacatsipaeba, najai oveja pevetsivi ángelevi pecovëta.

¹⁶ Nexata bajarapamonaenapijiyayo ponalia Belén tomarabelia. Pata itsajota Maríabeje Josébeje barëcabeje penacuetonëyo. Penacuetonëyo boqueca dajubi pexaejava pemitsaothocabiabimoënëta. ¹⁷ Oveja pevetsivi itsa taeyabuateta penacuetonëyo

pacuenia baja cajena ángelnë tsipaebatsi, nexata pona petsipaebaponaenexa daxitajivi-
java pacuenia bajarapanacuetonëyo taeyabuateta. ¹⁸ Nexata daxita pamonaë jumetane
oveja pevetsivi pepaebilivaisi, jamatabëcuenenabenajaca. ¹⁹ María baja cajena peja-
matabëëthëtota yapëtaeponapona daxita bajarapacuenë yabara. ²⁰ Oveja baja pevetsivi
naviabaponalia. Oveja pevetsivi namutualia jumai tsanajetarubenaë Diosojavabelia:

—Diosomë, bitso ayaijamatabëcuenenëmë. Pexaniajamatabëcuene pacarajutatsi
patanetoexanaexaemë pexaniacuene, jai tsaponaëlia oveja pevetsivi.

Bajarapacuenia jumaitsi tsipaji baja tane daxita pacuenia ángelnë tsipaebatsi.

Pacuenia Jesúsnyëo caponaliatsi temploboyabelia yabara pelivaisi

²¹ Jesúsnyëa penaexanaecujinaë, ocho matacabita, perabëcaucutatsi judíovicuenia.
Baitsi boupiperabëcaucutatsi. Vënërubatsinua jane baja pevënë pexainaenexa. Vënërubatsi
“Jesús,” pejaivënëta. Tsipaji baja cajena abaxë María nacoxitsinejeva Jesúsnyëa, tajëvelia
ángel jumaitsi Maríajavabelia: “Bajaraponëyo vënërubianame Jesús,” jai.

²² Nexata jane baja tocopiajopatsibeje Josébeje Maríabeje pexanaenexabeje pacue-
nia bajayata Dioso Moiséspijinëta penajumecopatsilivaisi itorobatsi daxita judíovi pex-
anaenexa penacuetonëyo ita tonaexanatsi. Nexata Jerusalén tomarabelia barëponabeje
penacuetonëyo. Nexata Jerusalén tomarata, templobota, María ofrenda rajuta Diosoj-
javabelia penajamatabëcuene xaniavaetsinexa Diosojavabelia. Rajutabejenua pe-
nacuetonëyo Diosojavabelia pijajivitonënëxä petonacuenebinexa ita penaveretsinë.
²³ Bajarapacuenia Josébeje Maríabeje exanabeje tsipaji Dioso Moiséspijinëta penajumeco-
patsilivaisi jumaitsi: “Penacasabijivibeje pexi ita xainabeje, nexata copiaya panacue-
tonëyo xainabeje, totsatsibeje Dioso pijajivitonënëxä,” jai. ²⁴ Josébeje Maríabeje ra-
jutabeje ofrenda Diosojavabelia pacuenia Dioso Moiséspijinëta penajumecopatsilivaisi
itorobatsibeje. Rajutabeje tsiquiriviria ucucutoyobeje. Itsa jume, rajutabeje meta
pinijiyoviria ucucutoyobeje.

²⁵ Bajarapamatacabi ponapona Jerusalén tomarata Simeónvënënë. Bajaraponë
jumecovënëtsiaponapona pacuenia Dioso pejumelivaisibaxutota jumaitsi. Nexata ba-
jarapamatacabi Israelnacua eveta Romano nacuaverena ëpëpatsivi. Nexata Romano
nacuaverena pepatsivi pevetsixae Israelnacua, bejiobiaexanabiabatsi Israel nacuapi-
jivi. Bajaraxuata Simeón copiaevetapona Dioso pejamatabëcuenëta petovecua-
jutsinexatsi Israelnacua pevetsivi. Nexata baja Romano nacuaverena pepatsivi, peve-
cuapitsapaenexa Israelnacua pevetsicuene. Espíritu Santo yajavaponaponatsi Simeón.

²⁶ Nexata Espíritu Santo pejamatabëcuenëta Simeón tajëvelia yapëtaeyaexanatsi pacuenia
Simeón petëpaevajënaë taejitsia Cristo, ponë Dioso athëbëvetsica itorobiapaebica jivi
pecapanepaenexa. ²⁷ Nexata Espíritu Santo pejamatabëcuenëta Simeón joneyaexanatsi
temploboyabelia. Bajaraxuata Simeón tane Maríabeje Josébeje pebarëjonejavatabeje
Jesúsnyëo temploboyarena pexanaenexabeje pacuenia Dioso Moiséspijinëta penajume-
copatsilivaisi itorobatsibeje. ²⁸ Nexata Simeón isapita Jesúsnyëo. Pexaniajamatabëcuene
rajuta Diosojavabelia. Pexaniajamatabëcuene Simeón perajutsijavata Diosojavabelia,
Simeón jumaitsi mapacueniaje:

²⁹ Tajatuxanenë, baja rajane netocopatsianame nijajivitonënë ja-
matabëcuenëxanepanaëya tatëpaenexa. Tsipaji baja netaëyaexaname pacuenia
baja cajena tajëvelia najumecapanepaëya nejumaitsimë. ³⁰ Taitaxutota rabaja
taniji maponëje, ponë itorobimica jivi pecapanepaenënëxä xamëjavabelia.
³¹ Ponë itorobimica jivi pecapanepaenënëxä, daxitajivi taenatsi. ³² Maponëje
petsipaebilivaisita, pamonaë apo judíovi ata, jamatabëcueneitayotsiana.
Yapëtaëyaëxanaëna pacuenia jamatabëcueneitsimë. Nexata maponëje
pejamatabëcuenëta apo judíovi yayiyataëna nijajivi judíovi,

jai Simeón templobota Diosojavabelia pexaniajamatabëcuene perajutsijavata Jesúsnyö yabara.

³³ Nexata Josébeje Mariábeje itsa jumetanebeje bajarapacuenia Simeón pejumaitsijava Jesúsnyö yabara, jamatabëcuenenabenajacabeje. ³⁴⁻³⁵ Bajaraxuacujinae Simeón tovajëta Diosojavabelia peyavenonaenexatsibeje Josébeje Mariábeje, Jesúsnyö yajava. Bajaraxuacujinae Simeón jumaitsi Mariájavabelia:

—Mapanacuetonëyoje, Dioso itapetatsi. Maponëje petsipaebilivaisi jivi ayaibitsaëtoخانeto apo jumecovënëtsi tsanetsi. Nexata jivi ayaibitsaëtoخانeto naxuabiana, Israel nacuapijivi. Ayaibitsaëtoخانeto pijinia jumecovënëtsianatsi. Nexata pijinia ayaibitsaëtoخانeto capanepaena. Maponëje Dioso pesaëta pinijicuene pexanaejava, tsitaexanaena jivi peyapëtaenexa Dioso pitorobinëtsitsica. Maponëje itajëtsiana pacuenia jivi ayaibitsaëtoخانeto, caejivi canacujitsia, bëpënëa pibisiajamatabëcuene najamatabëxainabiaba. Jivi ayaibitsaëtoخانeto apo jumecovënëtsi tsanetsi. Pibisiacuenia saya baranatsipaebianatsi. María, xamë nexata pepo nejamatabëëthëtojavavetsina bitso sivajamatabëcuenebëjamë tsane itsa yapëtaename pacuenia exanaejitsiatsi, jai Simeón Mariájavabelia Jesús yabara tajëvelia pevajunupaebijavata pacuenia Jesús exanaejitsiatsi.

³⁶⁻³⁷ Bajara pijinia pamatacabi templobota ponapona Diosojumepaebiva profetava, Anavënëva. Bajarapova Fanuelpijinë pexënatoyo, Aserpijinë pemomoxiyajuvënëva. Bajarapova bitso baja perujuva. Ochenta y cuatro baja pavaibeje xaina. Nacasaba picani abaxë itsa pejanava. Penacasabicujinae siete pavaibeje pepuaxainae pamonajavabelia, vecuatëpatsi pamona. Itsajavabelia apo vecuaponabiabi templobo. Matacabijebi, meravijebi yajava, Dioso tonacuenebabiaba templobota. Itsajavata pexaejava apo xaeyabiabi pamatacabibeje vajëcabiaba Diosojavabelia. ³⁸ Nexata bajarapova ata pata itsajota Josébeje Mariábeje nucabeje templobota. Simeón pisanucaejavata Jesúsnyö, isataenuta bajarapova. Nexata bajarapova pexaniajamatabëcuene rajuta Diosojavabelia Jesúsnyö yabara. Romano nacuaverena pepatsivi Israelnacua pevetsixae, Israel nacuapijivi copiaevetavanapa Dioso pejamatabëcueneta petovecuajutsinexatsi, nexata baja Romano nacuaverena pepatsivi pevecuapitsapaenexa Israelnacua pevetsicuene. Nexata daxita pamona copiaevetavanapa Dioso pejamatabëcueneta petovecuajutsinexatsi Israelnacua pevetsivi, daxita bajarapamonaejavabelia, bajarapova tsipaebabiaba Jesúsnyö pelivaisi.

Pacuenia Jesús ponapona Nazaret tomarata pebarënaviatsicujinaetsi templobojavaverena yabara pelivaisi

³⁹ Josébeje Mariábeje Jerusalén tomarata templobota exanaeveretabeje baja daxita pacuenia Dioso Moiséspijinëta penajumecopatsilivaisi itorobatsibeje. Nexata baja pijatomarabelia Jesúsnyö barënaviatabeje, Nazaret tomarabelia, Galilea nacuata peecaetomarabelia. ⁴⁰ Nexata jane baja Jesúsnyö vitsaba Nazaret tomarata. Ajamatabëcuenesaë tsaponae Dioso pijacuene yabara. Jamatabëcuenevitsabaponanua. Dioso yavenonaponatsi ayaicuenia.

Pacuenia Jesúsnyö templobota barëcuaiuaijai judíovi pecujarubivijavabelia yabara pelivaisi

⁴¹ Caevai canacujitsia Josébeje Mariábeje ponabiababeje Jerusalén tomarabelia. Ponabiababeje pascuavënëfiesta penataeyabiabinexabeje. ⁴² Nexata baja Jesúsnyö doce pavaibeje itsa xaina, barëponabeje icatsia Jerusalén tomarabelia pascuafiesta penataenexa. ⁴³ Itsa baja copiaruca pascuafiesta, daxita baja penataevi bajarapafiesta, naviaba baja pijabonëjavabelia. Nexata Jesúsnyö nacopatanucalia Jerusalén tomaratalia. Mariábeje Josébeje abaxë apo yapëtaebeje Jesúsnyö pevecuanacopatsijavatsiliabeje. ⁴⁴ Jamatabëjumaitsidebeje saya:

—Jesúsnyö raeta nanajetaruca vajanajuaponaevita, jamatabëjaibeje.

Bajaraxuata caematacabi baja pepuaponaebeje namutua, itaxanabeje Jesúsñeyo. Nexata yanijobabeje pijamonaejavabelia, peyapëtaevitsibejejavabelia ata. ⁴⁵ Itsiata apo caxitajarabibeje. Nexata naviatecabeje Jerusalén tomarabelia pejaitxinexabeje Jesúsñeyo.

⁴⁶ Acueyabi matacabita caxitajarababeje templobota. Jesúsñeyo naeca judíovi pecujarubivi tuatujëta. Jumetaeyeca bajarapamonaë penabarëcuaicuaijailivaisi. Nexata Jesúsñeyo yanijobapona bajarapamonaë penabarëcuaicuaijailivaisi yabara.

⁴⁷ Nexata daxita Jesúsñeyo pejumetaeyenaevitsi, taeyena Jesúsñeyo xaniavaetsia pejumeyapëtaejava judíovi pecujarubivi penabarëcuaicuaijailivaisi. Taeyenanua xaniavaetsia pejumecanaviataponaejava, abaxë tsiquirinëyovajëto ata. Bajaraxuata jamatabëcuenenabenajaquena bajarapamonaë. ⁴⁸ Josébeje Maríabeje itsa tanebeje bajarajota Jesúsñeyo penaecaejava, nexata jamatabëcuenenabenajacabeje. María nexata jumaitsi:

—Taxënato, ¿detsa xuajitsia panevëpënacoparemenabeje? Paxanëbeje patacajaitarutsijavatabeje, bitso pacaitaxanatsibeje, jai María.

⁴⁹ Nexata Jesúsñeyo jumaitsi penajavabelia:

—¿Detsa xuajitsia bajarapacuenia panejaitarutamebeje? Panejaitsipamebeje raja mapabotaje. Tsipaji raja xanë taxa Dioso pijacuene taexanaenexa mapabotaje, nejamatabëcuenenabiaba, jai Jesúsñeyo.

⁵⁰ Itsiata bajarapajivibeje apo jumeyapëtaebeje pajamatabëcuene yabara jumaitsi Jesúsñeyo.

⁵¹ María baja cajena pejamatabëëthëtota yapëtaeponapona daxita bajarapacuenia yabara. Nexata baja bajarapajivibeje pepëta Jesúsñeyo napona baja Nazaret tomara-belia. Nazaret tomarata Jesúsñeyo xaniavaetsia jumecovënëtsiaponapona pacuenia Josébeje Maríabeje itorobabiababeje. ⁵² Jesús abaxë vitsabanajetaruca. Jamatabëcuene vitsabanajetarucanua. Nexata Dioso pexaniajamatabëcuenia tanetsi. Daxita pamonaë Jesúsñeyo yapëtanetsi, pexaniajamatabëcuenia tanetsi.

3

Pacuenia Juan jivibautisabinë jivi livaisi tsipaeba petusato nacuata yabara pelivaisi (Mt 3.1-12; Mr 1.1-8; Jn 1.19-28)

¹ Pamatacabi pepo nacuaevetsinë Tiberiovënënë xaina quince pavaibeje pevetsicujinaë Romanonacua, bajara pijinia pamatacabi itsanacuanë eveta itsamonae. Bajaramatacabi nacuaevetsinë Poncio Pilato eveta Judeanacua. Bajara pijinia pamatacabi nacuaevetsinë Herodes eveta Galileanacua. Bajara pijinia pamatacabi Herodes pejuyapijinë, nacuaevetsinë Felipe, eveta Itureanacua, Traconitenacua yajava. Bajara pijinia pamatacabi nacuaevetsinë Lisantias eveta Abilinianacua. ² Bajara pijinia pamatacabi Anásbeje Caifásbeje Israel nacuata sacerdotevi pepo penamatacaitorobinëbeje tsaponaponaë. Bajara pijinia pamatacabi Juan, Zacarías pexënato, petusato nacuata ponapona. Nexata Dioso itorobatsi jivi petsipaebanajetarucaenexa Dioso pitorobilivaisi. ³ Nexata Juan jivi tsipaebanajetaruca Dioso pitorobilivaisi daxita Jordánmene imoxoyo penaenacuanëta pejinavanapaevijava. Juan jumai tsanajetarucaë jivijavabelia:

—Panajamatabëcuenepënyorore Diosojavabelia. Pacopabare pibisiacuene paneexanabiabijava. Nexata pacabautisabianatsi Dioso papecavecuaajibiaexanaenexa pibisiacuene paneexanaeneconimi, jai tsanajetarucaë Juan jivijavabelia.

⁴ Bajarapacuenia Juan jivi itsa tsipaebanajetaruca, copiajopa jane baja pacuenia Diosojumepaëbinëmi profeta Isaíaspijinë bajayata tajëvelia yaquina Juan yabara. Juan jivibautisabinë Dioso pitorobilivaisi jivijavabelia petsipaebanajetarucaëjavanexa

yabara, yaquina. Profeta Isaíaspijinë peyaquinaelivaisita tajëvelia jumaitsi mapacueni-aje:

Tanejumulivaisipaebinë vavajai tsane petusato nacuata. Jumai tsane jivijavabelia: “Jivi baxaneba panamutoverena najetarucaejsia petuxanenë. Batoroviaexananua namuto. ⁵ Daxita namutua pafotonë rubena, atsa baothoca penamatajëpaeyaexanaenexa namuto. Daxita petsutonëmi, pinijiibotsutoxanetonëmi ata, banamatajëpaeyaexana. Baroviayaexananua penatoxorotsinamutomi ata. Banamatajëpayaexananua namutua pebobenaemëthëanëmi ata. Bajara pijinia pacuenia paxamë ata panajamatabëcuenexaniavaere pepo petuxanenë pepatsivajënaeya paxamëjavaberena. ⁶ Nexata daxitanacuanëpijivi yapëtaena Dioso peca-panepaejavanexatsi pijaneconivecua,”

jai baja cajena profeta Isaíaspijinë bajayata peyaquinaelivaisita, Dioso pitorobilivaisi, Juan jivi petsipaebanajetarucaejavanea yabara.

⁷ Jivi ayaibitsaëtoxaneto pata Juanjavaberena Juan picani pebautisabinexa bajarapamonae. Bajarapamonae apo jumecovënëtsi ata Dioso pitorobilivaisi, jamatabëcuenenavëxaniabiaya jamatabëjumaitsi:

—Juan itsa nacabautisabiana, Dioso nacacapanepaena, jamatabëjai.

Nexata Juan jumaitsi bajarapamonaejavabelia:

—¡Panejamatabëcuenenavëxaniabivi! Pacuenia jomo rëcëpeca itsa tane isoto petajue-najetarucaejava, bajara saya paitsimë. Dioso rabaja papecananeconitsia exanaematacabinexa pacaimoxoyotapona. Itsiata acuenebi tsane panevecuapanepaenexa Dioso papecananeconitsia exanaematacabinexavecua. ⁸ Itsa pajitsipame Dioso papecacapanepaejava, pacopabare pibisiacuene paneexanabiabijava. Dioso pajumecovënëtsiajinavanapare. Nexata daxitajivi pacayapëtaena pepacuene baja panecopabijava pibisiacuene paneexanabiabijavami. Pacayapëtaenanua panenajamatabëcuene pënëyorotsijava Diosojavabelia. Jamatabëcuenenavëxaniabiaya pëtsa panajumaitsimë: “Vaxaitsi cajena Abrahampijinë pemomoxitsi. Nexata Dioso nacacapanepaena,” panajamë pëtsa. Abrahampijinë picani papemomoxi atamë, itsiata pibisiacuene itsa paexanavanapame, nexata bajarapacuene apo pacatonamatamotsi tsipae papecacapanepaenexa Diosojavabelia. Dioso baja cajena caëjëpatsi jivi pexanaenexa mapai-botonëmi ataje, Abrahampijinë bepemomoxi Dioso petaenexa. Nexata bajarapamonae ata Dioso itsa apo jumecovënëtsi, Dioso apo capanepae tsipae. Nexata pacopabare pibisiacuene paneexanabiabijavami papecacapanepaenexa Dioso. ⁹ Peubinaenë pexainaenë itsa apo tonacuaitsitsi pexaniacuai, nicata sipalita daxita ponaenë apo tonacuaitsitsi pexaniacuai. Nexata baja penicatsicujinae, itsa niona bajaraponaenë, caetuata. Xuaba isotojavabelia. Nexata bajaraponaenëmi tajuatsi. Bajara pijinia pacuenia paxamë ata Dioso pacaxuabiana infiernojavabelia papecatajuenexa, Dioso apo panejumecovënëtsivi, jai Juan bajarapamonaejavabelia.

¹⁰ Nexata bajarapamonae jumaitsi Juanjavabelia:

—¿Detsa nexata pacuene paexanaenajë daxitajivi pataneyapëtaenexa pepacuene patacopabijava pibisiacuene pataexanabiabijavami? jai bajarapamonae.

¹¹ Nexata Juan jumaitsi bajarapamonaejavabelia:

—Pajivi anijacamisabeje xaina, rajutsi pajiviyo apo xinae camisa. Pajivi pexaejava xaina, tsicobetsatsi pajiviyojavabelia apo xinae pexaejava, jai Juan.

¹² Gobierno pejamatabëcuene impuestomatamo pematamoyanijobabiabivi ata, pata Juanjavaberena Juan picani pebautisabinexa bajarapamonae. Nexata bajarapamonae ata jumaitsi Juanjavabelia:

—Juan, ¿detsa pacuene paexanaenajë daxitajivi pataneyapëtaenexa pepacuene patacopabijava pibisiacuene pataexanabiabijavami? jai bajarapamonae.

¹³ Nexata Juan jumaitsi bajarapamonaejavabelia:

—Itsa pamatamoyanijobabiabame impuestomatamo, pamatamoyanijobabiabare pamatamota papecaitorobivi pacatocopata paneyanijobabiabinexa. Pëtsa matatoxenetsia bajarapamatamovecua yamaxëitojorobiaya payanijobabiabame paxamë saya panepitsinexa bajarapapalata, jai Juan bajarapamonaejavabelia.

¹⁴ Nexata icatsia vajabitsaë ata jumaitsi Juanjavabelia:

—Juan, ¿jica paxanë tsane? ¿Detsa pacuene paexanaenajë daxitajivi pataneyapëtaenexa pepacuene patacopabijava pibisiacuene pataexanabiabijavami? jai vajabitsaë.

Nexata Juan jumaitsi vajabitsaëjavabelia:

—Pëtsa panejumesaëta itsajivi ata palata payacajërëtime. Pëtsa najumetsënëtsiaya itsajivi ata pananeconitsiaexaname saya palata papecarajutsinexa pecajunavi. Saya pasivabarëyamëre pacueneta pacamatamotapona papecaitorobivi, jai Juan vajabitsaëjavabelia.

¹⁵ Jivi itatsacajinaeya copiaevetavanapa Cristo, ponë Dioso athëbëvetsica itorobijitsia pepatsijavatsica jivi pecapanepaenexa. Nexata bajarapamonae Juan itsa tanetsi, bajarapamonae jamatabëcuenenavëxaniabiaya jamatabëjumaitsi Juan yabara:

—Baja raeta jane maCristoje, daxitajivi pecapanepaenënexa, jamatabëjai bajarapamonae Juan yabara.

¹⁶ Nexata Juan jumaitsi daxita bajarapamonaejavabelia:

—Xanë raja saya pacabautisabatsi merata. Itsiata baitsi jane itsanë tacovëverena najetarucaena. Bajara jane ponë pacatsijamatabëjoneyaexanaena Espíritu Santo, pitarunut-sicotia yajava. Xanë raja saya beveliajamatabëcuenenë bajaronëvecua. Nexata bajaraponë vecuaauranë pijazapato ata tataxujonotsinexa beprijavitonëcuenianë.

¹⁷ Arrozzainanë baja itsa vereta arroz penotsijava, jëaba arroz pejëabijavata ëpexu pepitsinexa. Nexata pijaarroz pejëabijavata, tsatapona saicaya ëpexu pesivecua. Nexata ëpexu xaniavaeteta peetsibojavabelia. Pesi pijinia penetapona vayafuabelia petajuitsinexa. Bajara pijinia pacuenia paxamë ata, Dioso pejumecovënëtsivivecua Dioso pacatsatsiana papecaxuabinexa infernojavabelia pananaxuabinexa baja daxitamatacabijavabelianexa. Pamonaë pijinia Dioso pejumecovënëtsivi, Dioso capanepaenatsi pijanacuayabetsia. Pamonaë pijinia Dioso apo jumecovënëtsi, Dioso naneconitsiaexanaenatsi daxitamatacabijavabelianexa apo peverevereacaisotojavabelia, jai Juan daxita bajarapamonaejavabelia.

¹⁸ Bajarapacuenia ayailivaisianëta Juan muxujiobapona jivi. Tsipaëbanajetaruca pexanialivaisi pecapanepaelivaisinexatsi Diosojavabelia. ¹⁹ Bajaraxuacujinaë icatsia Juan itaveta nacuaevetsinë Herodes. Tsipaji Herodes pejuyapijinë pijava yacajërëta, Herodíasvënëva. Daxita Herodes pibisiacuene pexanaejavanë ata, itaveta Juan. ²⁰ Itsiata baitsi jane Juan Herodes apo jumecovënëtsitsi. Caranata biji orijibia icatsia Herodes pibisiacuene exana. Herodes itoroba pijajivi Juan pevaetabinexatsi, penaneconitsivi pejebabiabibota peetsinexatsi.

Pacuenia Juan bautisaba Jesús yabara pelivaisi

(Mt 3.13-17; Mr 1.9-11)

²¹ Juan pevaetabivajënaetsi penaneconitsivi pejebabiabibota peetsinexatsi, jivi bautisabaponapona. Bajarapamatacabijavi Juan bautisaba Jesús ata. Jesús pebautisabicujinaetsi itsa vajëta Diosojavabelia, athëbëtatsia itaboxo napatsia. ²² Athëbëvetsica Espíritu Santo naitajëtsiaya Jesús tsmatarunaicatsi beucucuto. Nexata Jesús jumetane athëbëvetsica Dioso pejumaitsijavatsi: “Xamë raja taxënatomë, bitso tacaasivanë. Bitso casivajamatabëcuenëbarëyatsi,” pejaijavatsi.

Jesucristo pijasalinaivimi pevënëanë yabara pelivaisi

(Mt 1.1-17)

²³ Itsa baja Jesús xaina bejamatabëcuene treinta pavaibeje, taxuxuaba jane baja jivi Dioso pitorobilivaisi petsipaebijava. Jivi tanetsi Jesús beJosé pexënato. José paxapijinë pevenë Elí. ²⁴ Elí paxapijinë pevenë Matat. Matat paxapijinë pevenë Leví. Leví paxapijinë pevenë Melqui. Melqui paxapijinë pevenë Jana. Jana paxapijinë pevenë José. ²⁵ José paxapijinë pevenë Matatías. Matatías paxapijinë pevenë Amós. Amós paxapijinë pevenë Nahum. Nahum paxapijinë pevenë Esli. Esli paxapijinë pevenë Nagai. ²⁶ Nagai paxapijinë pevenë Maat. Maat paxapijinë pevenë Matatías. Matatías paxapijinë pevenë Semei. Semei paxapijinë pevenë Josec. Josec paxapijinë pevenë Judá. ²⁷ Judá paxapijinë pevenë Joanán. Joanán paxapijinë pevenë Resa. Resa paxapijinë pevenë Zorobabel. Zorobabel paxapijinë pevenë Salatiel. Salatiel paxapijinë pevenë Neri. ²⁸ Neri paxapijinë pevenë Melqui. Melqui paxapijinë pevenë Adi. Adi paxapijinë pevenë Cosam. Cosam paxapijinë pevenë Elmadam. Elmadam paxapijinë pevenë Er. ²⁹ Er paxapijinë pevenë Josué. Josué paxapijinë pevenë Eliezer. Eliezer paxapijinë pevenë Jorim. Jorim paxapijinë pevenë Matat. ³⁰ Matat paxapijinë pevenë Leví. Leví paxapijinë pevenë Simeón. Simeón paxapijinë pevenë Judá. Judá paxapijinë pevenë José. José paxapijinë pevenë Jonam. Jonam paxapijinë pevenë Eliaquim. ³¹ Eliaquim paxapijinë pevenë Melea. Melea paxapijinë pevenë Mena. Mena paxapijinë pevenë Matata. Matata paxapijinë pevenë Natán. ³² Natán paxapijinë pevenë David. David paxapijinë pevenë Isaí. Isaí paxapijinë pevenë Obed. Obed paxapijinë pevenë Booz. Booz paxapijinë pevenë Sala. Sala paxapijinë pevenë Naasón. ³³ Naasón paxapijinë pevenë Aminadab. Aminadab paxapijinë pevenë Admin. Admin paxapijinë pevenë Arni. Arni paxapijinë pevenë Esrom. Esrom paxapijinë pevenë Fares. Fares paxapijinë pevenë Judá. ³⁴ Judá paxapijinë pevenë Jacob. Jacob paxapijinë pevenë Isaac. Isaac paxapijinë pevenë Abraham. Abraham paxapijinë pevenë Taré. Taré paxapijinë pevenë Nacor. ³⁵ Nacor paxapijinë pevenë Serug. Serug paxapijinë pevenë Ragau. Ragau paxapijinë pevenë Peleg. Peleg paxapijinë pevenë Heber. Heber paxapijinë pevenë Sala. ³⁶ Sala paxapijinë pevenë Cainán. Cainán paxapijinë pevenë Arfaxad. Arfaxad paxapijinë pevenë Sem. Sem paxapijinë pevenë Noé. Noé paxapijinë pevenë Lamec. ³⁷ Lamec paxapijinë pevenë Musalén. Musalén paxapijinë pevenë Enoc. Enoc paxapijinë pevenë Jared. Jared paxapijinë pevenë Mahalaleel. Mahalaleel paxapijinë pevenë Cainán. ³⁸ Cainán paxapijinë pevenë Enós. Enós paxapijinë pevenë Set. Set paxapijinë pevenë Adán. Adánpijinë Dioso pexanaenëtsi.

4

Pacuenia picani Jesús jamatabëcuenejëbatsi dovathi yabara pelivaisi (Mt 4.1-11; Mr 1.12-13)

¹ Jesús baja naviarena Jordán meneverena Juan pebautisabicujinaetsi. Tsijamatabëvënëcatsi bitso Espíritu Santo. Nexata Espíritu Santo ponaeyaexanatsi petusato nacuayabelia. ² Bajarajotalia Jesús ponapona cuarenta pamatacabibeje. Bajara pijinia pamatacabibeje Jesús pexaejava apo xae. Jesús nexata bitso piajani. Dovathi nexata jamatabëcuenejëbatsi pibisiacuene picani pexanaenexa. ³ Dovathi jumaitsi Jesúsjavabelia: —Itsa pepacuene Dioso pexënatomë, itorobare mapaibotoyoje penaexanaenexa panbë, jai dovathi Jesúsjavabelia.

⁴ Jesús nexata jumaitsi dovathijavabelia:

—Jume raja. Dioso raja pejumelivaisibaxutota jumaitsi mapacueniaje: “Jivi raja apo namatavenonae epexaejava pexaenexa. Jivi raja namatavenona daxita Dioso pejumelivaisi ata pejumecovënëtsinexa pexainaenexa matacabi apo peverevereaejava,” jai raja Dioso pejumelivaisibaxutota, jai Jesús dovathijavabelia.

⁵ Bajaraxuacujinae icatsia Jesús barëliatsi dovathi pinijitsutoxanetojavabelia. Barëjunayatsi bajarapatsutojumabetsia. Nexata bajarapatsutojumavetsica dovathi Jesús tsitajëtatsi bepijia daxitanacuanë. ⁶ Nexata icatsia dovathi jumaiti Jesúsjavabelia:

—Xanë raja carajutsianatsi daxita mapanacuanëje nevetsinexa. Daxita bajara-panacuanëta paitabëcuene taneme, cayajavarajutsianatsi. Nexata bitso nexainaenë tsane nexainaexa. Daxita tanerajutsijavanëmi, necaëjëpa juya tarajutsinexa pajivijavabelia jamatabërajutajë. ⁷ Ayaijamatabëcuenenënë netaeya taitabarata nematabacabëta itsa netonucajunuame, nexata daxita mapanacuanëje nijanacuanë tsane, jai dovathi Jesúsjavabelia.

⁸ Nexata Jesús jumaiti dovathijavabelia:

—Dovathi, nevecuanatixire. Dioso raja pejumelivaisibaxutota jumaiti mapacueniaje: “Daxitajivi vajëcae pematabacabëta caenë, pepo petuxanenë Diosojavabelia. Tonacuenebinua bajaraëponënexa,” jai raja Dioso pejumelivaisibaxutota, jai Jesús dovathijavabelia.

⁹ Bajaraxuacujinae abaxë icatsia Jesús barëliatsi dovathi Jerusalén tomarabelia. Jerusalén tomarata barëjunayatsi temploboxaneto matatuyabetsia. Nexata templobo matatutatsia dovathi icatsia jumaiti Jesúsjavabelia:

—Itsa pepacuene Dioso pexënatomë, jirevaremecairabereca. ¹⁰ Bajarapacuenia jirevaremecairabereca. Tsipaji xamë peitsacueneyaniva pecaevecsineca, Dioso pejumelivaisibaxutota jumaiti mapacueniaje:

Dioso itorobianica pijaängelevi pecaevecsineca. ¹¹ Nexata Ángelevi pecobeta cayotsiana pecataxutsaquitsiyaniva ibotonëjavabelia, jai Dioso pejumelivaisibaxutota xamë pecaevecsineca Ángelevi, jai dovathi Jesúsjavabelia.

¹² Jesús nexata icatsia jumaiti dovathijavabelia:

—Jume raja. Dioso raja pijinia pejumelivaisibaxutota jumaiti mapacueniaje: “It-sajivi ata jamatabëcuenenavëxaniabiaya pijacuata apo bejamatabëjumaiti: ‘Xanë Dioso jamatabëcueneëjëttsianajë. Nexata natoexanaenajë pacuene bitso netsiayai tatëpaenexa. Itsiata Dioso neyavenonaena tavecuapanepaenexa bajaraxua. Nexata bajarapacuenia yapëtaenajë Dioso taneyavenonaexa,’ apo bejamatabëjai,” jai Dioso pejumelivaisibaxutota, jai Jesús dovathijavabelia.

¹³ Bajaraxuacujinae itsa baja dovathi daxitacuene Jesús jamatabëcueneëjëbiveretatsi pibisiacuene picani Jesús pexanaenexa, nexata abaxë yatucopatatsi itsamatacabijavabelia icatsia pejamatabëcueneëjëttsinexatsi.

Pacuenia Jesús Galilea nacuata taxuxuaba Dioso pitorobilivaisi jivi petsipaebijava yabara pelivaisi

(Mt 4.12-17; Mr 1.14-15)

¹⁴ Jesús baja itsa naviata petusato nacuaverena, Galilea nacuyaberena, Espiritu Santo pesaë yajavaponapona. Nexata daxita Galilea nacuapijivi vënëlivaisitanetsi Jesús. ¹⁵ Judíovi penacaetuatabibonëjava Jesús jivi livaisi tsipaebanajetaruca. Daxitajivi nexata Jesús yabara jumai tsabiabi: “Maponëje bitso ayaijamatabëcuenenë,” jai tsabiabi.

Pacuenia Jesús naviata pijatomarabelia, Nazaret tomarabelia, yabara pelivaisi

(Mt 13.53-58; Mr 6.1-6)

¹⁶ Nexata Jesús naviata pevitsabitomarabelia, Nazaret tomarabelia. Nexata pepat-sicujinae Nazaret tomarata, judíovi penacueraevetsimatacabita Jesús najoneya judíovi penacaetuatabiboyalia. Tsipaji baja cajena Jesús bajarapacuenia exanabiaba. Nexata judíovi penacaetuatabibota Jesús nonotapuna Dioso pejumelivaisibaxuto

petsimuxulebinexa daxita bajarajota penaevi pejumetaenexa. ¹⁷ Nexata Jesús tsi-coberutatsi profeta Isaíaspijinē bajayata peyaquinaebaxuto. Nexata Jesús bajarapabaxuto baxupata. Nexata jane baja daxita bajarajota penaevi pejumetaenexa, Jesús tsimuxuleba itsajota bajarapabaxutota tajēvelia Jesús yabara jumaitsi mapacueniaje:

¹⁸ Dioso pijaEspíritu Santo netsijamatabēeca. Tsipaji Dioso nitapeta tatsipaebinexa pex-anialivaisi pibisiacuene pexanabiabijava bepeyajamatabēcuenejobivijavabelia. Nitorobanua tajamatabēcuenexaniavaetsinexa bajarapamonae pibisiacuene pex-anabiabineconi yabara bepeyajamatabēcuenejobijavavecua. Nitorobanua tajamatabēcuenexaniavaetsinexa pamonaē piamatabēcueneitaquirivi, pamonaē abaxē apo yapētae pexaniajailivaisi. Nitorobanua tacapanepaenexa pamonaē jamatabēcuenebejobitabiabatsi pijavajabitsaē. ¹⁹ Nitorobanua tatsipaebinexa pacuenia baja Dioso najamatabēcuenevereta pecapanepaenexa pijajivi, pejaiitanejavata tajēvelia Jesús yabara Isaíaspijinē peyaquinaebaxutota Jesús tsimuxulebanuca daxita bajarajota penaevi pejumetaenexa.

²⁰ Bajaraxuacujinae Jesús baja bajarapabaxuto baxuacata. Tocanaviata baja judíovi penacaetuatabiabibota penacuenebinējavabelia. Bajaraxuacujinae Jesús baja icatsia ecareca. Daxita pamonaē judíovi penacaetuatabiabibota ena, Jesús asaēyata taeyenatsi.

²¹ Nexata icatsia Jesús jumaitsi bajarapamonaejavabelia:

—Aeconoxae Dioso pejumelivaisibaxuto pacatsimuxulebiveretatsi. Xua yabara bajarapabaxutota jumaitsi, bajaraxua baja aeconoxae mapamatacabitaje copiapata baja, jai Jesús bajarapamonaejavabelia.

²² Nexata daxitajivi pexaniajamatabēcuenia Jesús yabara cuaicuaijai. Jamatabēcuenenabenajaca pexanialivaisi Jesús petsipaebixae. Nexata bajarapamonae Jesús jamatabēcueneaebiatanetsi. Nexata bajarapamonae nayanijobena. Najumaitsi:

—¿Matsa baja ponē Josépijinē apo pexēnatoje? najai tsenae bajarapamonae Jesús yabara.

Tsipaji saya bajarapamonae jamatabējumai tsenae:

—Josépijinē raja pexēnato, jamatabējai tsenae.

²³ Nexata Jesús jamatabēcuenyapētane pacuenia sivanajamatabēxainatsi bajarapamonae. Nexata Jesús jumaitsi bajarapamonaejavabelia:

—Xaniajanē cajena pacuenia pacatsipaebijitsiatsi. Pacuenia pajumaitsimē tsabiabi pajiviyojavabelia pajamatabēcueneaebiataneme, bajara pijinia pacuenia xanējavaberena ata panejumaitsimē tsane patanejamatabēcueneaebiataexaemē. Panejumaitsimē tsane mapacueniaje: “Pacuenia pacavēnēlivaisitanetsi Dioso pesaēta pinijicuene nexanaejava Capernaum tomarata, bajara icatsia pitsicuene exanare majotaje nevitsabitomarata,” panejamē tsane, jai Jesús judíovi penacaetuatabiabibota penaevijavabelia.

²⁴ Icatsia Jesús jumaitsi bajarapamonaejavabelia:

—Xaniajanē cajena pacuenia pacatsipaebijitsiatsi. Itsanē ata Diosojumepaebinēmi profetanē pijanacuapijivi apo jumecovēnētsitsi petsipaebilivaisi. Jamatabēcuene aebi-ataeyabiabatsi pijanacuapijivi. ²⁵ Bajayata profetanēmibeje pinijicuene exanae atabeje, pinijicuene apo exanaebeje pijanacuata. Bajara pijinia pacuenia xanē ata pinijicuene apo exanaenē tsane tavitsabitomarata. Bajayata, abaxē pamatacabiprofeta Elíaspijinē ponapona Israel nacuata, bajarapamatacabiprofeta Elíaspijinē ponapona Israel nacuata, emarapae ata, ema apo jopae. Nexata acueyabi pavaibeje epatua ajibi ema. Nexata daxita nacuanējava bitso janibo. Bajarapamatacabiprofeta Elíaspijinē ponapona Israel nacuata. Bitso bejobi tsavanapae. ²⁶ Itsiata Elíaspijinē Dioso apo itorobitsi peyavenonaenexa bajarapamonaejavavēnēva. Elíaspijinē Dioso itorobatsi peponaenexa Sarepta tomarapijivijavabelia, Sarepta tomarata pamona pevecuatēpaevatsi Elíaspijinē peyavenonaenexa. Sareptatomara eca Sidón nacuata. ²⁷ Bajayata, Elíaspijinē pevēnamuto, profeta Eliseopijjinē ponapona Israel nacuata. Bajayajebi bitso

peperabëtsabanaevi, ayaibitsaëto picani jinavanapa Israel nacuata. Itsiata bajaramatacabi profeta Eliseopijinë caenë ata pijanacuapijinë, bajayajebi bitso peperabëtsabanaeviyajuvënënë, apo jamatejemayaexanae. Caenë bajayajebi bitso peperabëtsabanaenë Naamán, Siria nacuaverena pepatsinë, jamatejemayaexana, jai Jesús judíovi penacaetuatabiabibota penaevijavabelia.

²⁸ Nexata bajarapamonae itsa jumetane bajarapacuenia Jesús pejumaitsijava, bitso Jesús baraanaepanatsi bajarapamonae. ²⁹ Bajarapamonae nonobapuna. Vaetabatsi Jesús. Caponaliatsi tomarajumabelia. Patsutoyenepanata eca Nazarettomara, bajara-patsutojumabetsia Jesús caponayatsi pexuabinexatsireca picani bajarapatsuto itapajanitojavareca. ³⁰ Itsiata baitsi jane Jesús bajarapamonae tuatuajëta najetarucae ata, pëtaenejevatsi vecuapona baja Capernaum tomarabelia. Nexata baja Jesús vecuapanepa bajarapamonae.

Pacuenia pebi, dovathi peyajavaponaponanë, Jesús jamatejemayaexana yabara pelivaisi

(Mr 1.21-28)

³¹ Jesús pata Capernaum tomarata. Capernaum tomara eca Galilea nacuata. Nexata Capernaum tomarata Jesús jivi livaisi tsipaeba judíovi penacueraevetsimatacabita. ³² Itsa bajarapamonae jumetane palivaisi Jesús tsipaeba, jamatabëcuenenabenajaca. Tsi-paji xaniavaetsia tsipaeba Dioso pitorobinëtsicuenia.

³³ Bajarajota judíovi penacaetuatabiabibota pebi, dovathi peyajavaponaponanë, naeca. Nexata bajaraponë Jesúsjavabelia vavajai tsaxuabi. Jumaitsi:

³⁴ —¡Jesús, Nazaret tomarapijinëmë, panevecuaponare baja! ¿Detsa xua paneexanae-jitsiamë? ¿Najetarucame tsaja pataneveretsinexamë? Xanë cajena cayapëtanetsi. Xamë raja Dioso pexënatomë, pepo pexaniajamatabëcuenenëmë, jai dovathi peyajavaponaponanë Jesúsjavabelia.

³⁵ Jesús nexata jumeitaveta dovathi. Jumaitsi:

—¡Moyamëre! ¡Vecuapitsapare baja maponëje! jai Jesús.

Nexata dovathi pebi xuabatsi irata daxita bajarapamonae pitabarata. Dovathi baja pebi vecuapitsapatsi itsiata itsacuenene exanaenejevatsi. ³⁶ Nexata daxitajivi bajarapacuenene itsa tane, bitso jamatabëcuenenabenajaca. Najumaitsi bajarapamonae:

—¿De meta pacuenia maponë cajëpatsi pijumeta pexanaenexa mapacueniaje? ¡Maponëje Jesús, beDioso pitorobinëtsitsica! ¡Itaveta dovathi pepitsapaenexa jivivecua! ¡Nexata baja dovathi pitsapa jivivecua! najai bajarapamonae.

³⁷ Nexata Jesús vënëlivaisitanetsi daxita bajarapanacuapijivi.

Pacuenia Simón Pedro pijava pena Jesús tojamatejemayaexana yabara pelivaisi

(Mt 8.14-15; Mr 1.29-31)

³⁸ Judíovi penacaetuatabiabibo pevecuapitsapaecujinae, Jesús joneya Simón Pedro pijaboyalia. Nexata bajarajota Jesús pevajënae, Simón pijava pena bitso romaebanucatsi. Nexata bajarajota itsamonae Jesús tsipaebarecëpatsi bajarapova peromaebanucavejavatsi. ³⁹ Jesús nexata cujilia peromaebanucavevatsi. Vecuaitaveta peromaebijavatsi. Nexata bajarajota peromaebanucavevatsi domae baja vecuajibi tsanajetsitsireca. Bajarapova baja jamatejema. Nexata bajarapova Jesúsvana pexaejavanexa toexanatsi.

Pacuenia ayaibitsaëto jivi, piavitanevi, Jesús jamatejemayaexana yabara pelivaisi

(Mt 8.16-17; Mr 1.32-34)

⁴⁰ Itsa baja ajena meravitsia, jivi piavitanevi, daxitaviriavitane pexainaevi, tocapatatsi Jesúsjavaberena. Jesús nexata perabëjayatapona caejivi canacujitsia, piavitanevi. Bajarapacuenia Jesús jamatejemayaexana daxita piavitanevi. ⁴¹ Itsamonae ayaibitsaëto, dovathi peyajavajinavanapaevi, Jesús vecuacapitsapapona. Nexata dovathi itsa pitsapa, vavajai tsabiabi Jesúsjavabelia.

—Xamë raja Dioso pexënatomë, jai tsabiabi.

Nexata Jesús jumeitavetabiaba dovathi. Apo tocopatabiabi pecuaicuaijainexa petsipaebiyaniwa itsamonaejavabelia. Tsipaji dovathi xaniavaetsia yapëtanetsi Cristo athëbëvetsica Dioso pitorobijavatsi jivi pecapanepaenexa.

Pacuenia Dioso pitorobilivaisi Jesús jivi tsipaeba Galilea nacuata yabara pelivaisi (Mr 1.35-39)

⁴² Bajayacunua, ajena baja matabi tsarucaponae, Jesús pitsapa tomaravecua. Pona pesaicaeyojavabelia. Nexata jivi pëjaitatsi. Yapënapatatsi itsajota Jesús eca. Asivatsi bajarapamonae Jesús pevecuaponae yaniva itsajavabelia. ⁴³ Nexata Jesús jumaitsi bajarapamonaejavabelia:

—Itsatomaranëjava ata raja tsipaebijitsianë pexanialivaisi pacuenia Dioso evetsijitsia pijajivi mapanacuataje. Bajarapalivaisi tatsipaebineja jivi, Dioso baja cajena nitoroba, jai Jesús bajarapamonaejavabelia.

⁴⁴ Bajarapacuenia Jesús Judea nacujava livaisi jivi tsipaebanajetaruca judíovi penacaetutabibonëjava.

5

Pacuenia dujuai bitso ayaijavaxaneto juta peyamatajucaejavata yabara pelivaisi (Mt 4.18-22; Mr 1.16-20)

¹ Itsamatabi Jesús nuca Genesaret pucaxaneto itapata. Nexata jivi ayaibitsaëtöxaneto cënënaponatsi imoxoyo pejumetaenexatsi Jesús petsipaebilivaisi, Dioso pitorobilivaisi. ² Nexata Jesús anijajerabeje taeruta bajarajota pucaitapata. Bajarapamobeje dujuai peyamatajucae vi Simónbana vecuanonobajunarëcëpa. Nexata bajarajota imoxoyo Simónbana quiatanubena dujuai peyamatajucaejava. ³ Nexata Jesús runareca jera ënëabereca, Simón pijajera ënëabereca. Jesús itoroba Simón jera peyatorotsinexatsilia tsiquirijavayo puca tuatuajëyojavabelia. Jesús eca jeraënëta. Nexata Jesús jera ënëjavaverena livaisi tsipaebeca bajarapajivi bitsaëtöxanetojavabelia. ⁴ Itsa baja Jesús copata jivi livaisi petsipaebijava, nexata jumaitsi Simónjavabelia:

—Pavaeremelia jera piavajubujavabelia. Pacoparemeca dujuai paneyamatajucaejava. Payamatajutsianame dujuai, jai Jesús Simónjavabelia.

⁵ Nexata Simón jumaitsi Jesúsjavabelia:

—Jesús, payamatajucajë rabaja picani meravijebi. Itsiata apo payamatajutsinë caenëyo ata. Itsiata pacuenia paneitorobame, pacopatsiarecajë dujuai patayamatajucaejava, jai Simón Jesúsjavabelia.

⁶ Nexata copareca pitorobicueniatsi. Itsa jutsina dujuai peyamatajucaejava, ayaijavaxaneto bitso dujuai yajutsina. Nexata dujuai peyamatajucaejava imoxo peyamaëucuucucae. ⁷ Nexata itacovaebarena penajuayamatajucae vi peponaenexarena itsamota peyavenonaenexatsi. Bajarapamonae nubenalia puca itapatalia. Nexata bajarapamonae ponarena. Vënëta bajarapamobeje dujuai. Imoxo dujuai peyabubunae bajarapamobeje. ⁸ Nexata Simón Pedro itsa tane bajarapacueni, pematabacabëta tonuca Jesús pitabarata. Jumaitsi Jesúsjavabelia:

—Tajatuxanenë, nevecuanatixire. Tsipaji xanë pibisiacuene taexanaenë, jai Simón Jesúsjavabelia.

⁹ Bajarapasamota peyavenonaenexatsi. Bajarapamonae nubenalia puca itapatalia. Nexata bajarapamonae ponarena. Vëncuenia Simón jumaitsi tsipaji penajuayamatajucae vi yajava bitso jamatabëcuenenabenajaca, bitso ayaijavaxaneto dujuai peyamatajutsixae. ¹⁰ Ponëbeje Simón yanatatsi, Santiagobeje Juanbeje. Bajaraponëbeje Zebedeo pexënatobeje. Bajaraponëbeje ata jamatabëcuenenabenajacabeje. Nexata Jesús jumaitsi Simónjavabelia:

—Pëtsa najunaviacame. Cacujarubianatsi jivi nejucaenexa. Nexata pacuenia dujuai jucabiabame, bajarapacuenia jivi jucaename Dioso pijajivinexa, jai Jesús Simónjavabelia.

¹¹ Nexata bajarapamonae robobocalia jerabeje tajetabojavabelia. Bajaraxuacujinae bajarapamonae pecajinavanapaejavaximi rajuta itsamonaejavabelia. Bajaraxuacujinae pënäpona baja Jesús.

Pacuenia Jesús jamatejemayaexana bajayajebi bitso peperabëtsabanaenë yabara pelivaisi

(Mt 8.1-4; Mr 1.40-45)

¹² Jesús itsa ponäpona tomarata, nexata bajarajota patajopa pebi, bajayajebi bitso peperabëtsabanaenë. Itsa bajaraponë tane Jesús, pematabacabëta irataeya bocajunua Jesús pitabarata. Vajëta pinijicuenia Jesúsjavabelia. Jumaitsi:

—Tajatuxanenë, cacäjëpa raja tanejamatejemayaexanaenexamë mapavitanevecuaje. Itsa jitsipame, nejamatejemayaexanare mapavitanevecuaje, jai bitso peperabëtsabanaenë Jesúsjavabelia.

¹³ Nexata Jesús pecobeta perabëjayalia bitso peperabëtsabanaenë. Jumaitsi bajaraponëjavabelia:

—Jājā, jitsipajë cajena. Jamatejemamë rabaja, jai Jesús peperabëtsabanaenëjavabelia.

Bajarapacuenia Jesús pejumaitsijavata peperabëtsabanaenëmi baja perabëxanepananajereca. ¹⁴ Nexata Jesús jumeitaveta bajayajebi bitso peperabëtsabanaenëmi petsipaebiyaniiva itsajiviyojavabelia ata pacuenia Jesús jamatejemayaexana bajaraponë. Jesús jumaitsi:

—Naitajëremelia jane sacerdotenëjavabelia, templobota penacuenebinëjavabelia. Nexata sacerdotenë cataena pecavecuajibijava baja niavitanejavami. Diosonexa rajuremelia ofrenda sacerdotenëjavabelia pecavecuajibixae niavitanejavami. Bajara tsipaji pacuenia bajayata vajasalinainëmi Moiséspijinë nacaitoroba. Nexata jivi yapëtaena pepacueña baja pecavecuajibijava niavitanejavami, jai picani Jesús bajayajebi bitso peperabëtsabanaenëmijavabelia jivi ayaibitsaëto pevënëlivaisitaeyanivatsi.

¹⁵ Itsiata Jesús vënëlivaisitanetsi daxita bajarapanacuapijivi. Nexata Jesús jivi itsa vënëlivaistanetsi, ayaibitsaëtoxaneto patäpona Jesúsjavaberena penamuxunaevetsinexatsi petsipaebilivaisi. Bajarapamonae pata Jesús pejamatejemayaexanaenexanua piavitanejavavecuä. ¹⁶ Itsiata Jesús itsajavata jivivecuä natixitabiaba pesaicaeyojavabelia. Bajarajota vajëtabiaba Diosojavabelia.

Pacuenia Jesús jamatejemayaexana petabusipacuenabinëtsi yabara pelivaisi

(Mt 9.1-8; Mr 2.1-12)

¹⁷ Itsamatacabi Jesús jivi livaisi tsipaeba. Bajarajota naena fariseovi. Naenanua judíovi pecujarubivi ata. Bajarapamonae pata Galilea nacuata penaetomaranëjavaverena, Judea nacuata penaetomaranëjavaverena ata, Jerusalén tomaraverena ata. Nexata bajarapamatacabi Jesús Dioso pesaëta caëjëpaeyaexanatsi jivi pejamatejemayaexanaenexa piavitanejavavecuä. ¹⁸ Nexata bajarajota Jesúsjavaberena pebijivi camayota yavëtaraparena petabusipacuenabinëtsi. Bajarapamonae picani bajaraponë boyalia yavëtarajonejitsialia peyabuatsinexa Jesús pitabarata. ¹⁹ Itsiata acuenebi boyalia pecajonejava. Tsipaji bitso jivi bajarapabo yavënëca. Nexata bajarapamonae petabusipacuenabinëtsi bojumabetsia cajunaya. Bomatatu javavetsica vojoexana. Nexata bajarapavojotuatsica petabusipacuenabinëtsi camayota yacopatsicatsi jivi tuatuajëatsica Jesús pitabarayatsica. ²⁰ Jesús jamatabëcueneyapëthane pacuenia bajarapamonae sivanajamatabëxainatsi. “Nacatojamatejemayaexanaenatsi cajena,” pesivajamatabëjaijavatsi Jesús jamatabëcueneyapëthane. Bajaraxuata petabusipacuenabinëtsijavabelia Jesús jumaitsi mapacueniaje:

—Pibisiacueña rabaja nexanaeconimi cavecuajibiaexanatsi, jai Jesús bajaraponëjavabelia.

²¹ Nexata judíovi pecujarubivi, fariseovinua, itsa jumetaeyena Jesús pejumaitsijava bajarapacuenia, najamatabëxainena bēpēnēa mapacueniaje:

—¿De meta maponēje? Maponēje Dioso apo pejitsipaecuenia cuaicuaijai. Itsanē ata cajena apo caējēpaetsi itsajivi pibisiacuene pexanaeneconimi pevecuaajibiaexanaenexa. Caenē Dioso caējēpatsi itsajivi pibisiacuene pexanaeneconimi pevecuaajibiaexanaenexa, jamatabējai tsenae bajarapamonae bēpēnēa Jesús yabara.

²² Nexata Jesús jamatabëcueneyapētane bajarapamonae bēpēnēa pesivanajamatabëxainenaejava bajarapacuenia. Nexata Jesús jumaiti bajarapamonaejavabelia:

—Pētsa bajarapacuenia panesivanajamatabëxainame. Tsipaji cajena xanē necaējēpa jivi pibisiacuene pexanaeneconi tavecuaajibiaexanaenexa. ²³ Paxamē apo pacacaējēpae ata itsajivi pibisiacuene pexanaeneconi panevecuaajibiaexanaenexa, pacacaējēpa picani saya jema panejumaitsinexa pejamatejemavijavabelia mapacueniaje: “Cavecuaajibiaexanatsi rabaja pibisiacuene nexanaeneconimi,” panejainexa. Tsipaji itsajivi ata apo yapētae tsipae saya jema panejumaitsijava. Itsiata baitsi jane itsa pepacuene apo pacacaējēpae panejamatejemayaexanaenexa petabusipacuenabinētsi, nexata acuenebi panejumaitsinexa bajaraponējavabelia mapacueniaje: “Nonotapunare. Ponare baja,” panejainexa. Tsipaji bajarapacuenia pajumaitsimē ata, itsa apo jamatejema tsipae bajaraponē, nexata daxitajivi pacayapētaejitsipa apo papecacaējēpaecuenepanejamatejemayaexanaenexa bajaraponē, jai nexata Jesús bajarapamonaejavabelia.

²⁴ Icatsia Jesús jumaiti bajarapamonaejavabelia:

—Xanē, Daxitajivi Pematapijinēnē, mapanacuata necaējēpa tavecuaajibiaexanaenexa itsajivi pibisiacuene pexanaeneconimi ata pacuenia baja exanajē maponējavabeliaje. Nexata patanecueneyapētaenexamē tanecaējēpaejava tavecuaajibiaexanaenexa itsajivi pibisiacuene pexanaeneconimi ata, pataema pacuenia jamatejemayaexanaejitsianē maponēje, jai Jesús bajarapamonaejavabelia.

Nexata icatsia Jesús jumaiti petabusipacuenebinētsijavabelia:

—Xamē cajumaitsi. Nonotapunare. Nijacamayo pire. Nijaboyabelia baja ponare, jai Jesús.

²⁵ Nexata bajarapacuenia Jesús pejumaitsijavata, petabusipacuenebinēmitsi nonotabapuna baja daxitajivi pitabarata. Pebocaecamayo pita. Pona baja pijaboyabelia. Penajetarucaejavata namutua, Diosojavabelia jumai tsanajetarucae: “Diosomē, pexaniacuene netoexaname,” jai tsanajetarucae bajaraponē. ²⁶ Nexata daxita pamonaē tane petabusipacuenabinēmitsi baja pejamatejemajava, pinijicuenia jamatabëcuenenabenajaca. Nexata bajarapamonae jumaiti Diosojavabelia:

—Diosomē, pexaniacuene bitso nexanaenē, jai Diosojavabelia.

Daxitajivi itsa tane bajaraponē pejamatejemajava, pejamatabëcueneta bēpēnēa bitso junava. Nexata bajarapamonae najumaitsi:

—Ajena, mapamatacabitaje, tanetsi Dioso pinijicuenepexanaejava, najai bajarapamonae.

*Pacuenia Jesús pijajivitonēnexa junata Levívēnēnē yabara pelivaisi
(Mt 9.9-13; Mr 2.13-17)*

²⁷ Jesús baja vecuapona pabota jamatejemayaexana petabusipacuenabinētsi. Nexata Jesús penajetarucaejavata taeyeta Levívēnēnē. Bajaraponē pematamoyanijobinē impuestomatamo gobierno pejamatabëcuenepabota jivijavabelia matamoyanijobabiaba impuestomatamo, bajarapabota eca Leví. Nexata Jesús jumaiti Levíjavabelia:

—Leví, nepēnaponare, jai Jesús.

²⁸ Jejai Leví. Nexata nonotapuna. Copata baja daxita pacuene bajarajota nacuenebabiaba. Pēnapona Jesús.

²⁹ Bajaraxuacujinae Leví pijabota napata Jesús. Nexata Leví pinijifiesta toexana Jesús nexa. Tsipaji Leví jamatabëcuenebarëya Jesús pejunatsixaetsi pijajivitonënexa. Nexata Leví pijabota naena ayaibitsaëto jivijavabelia impuestomatamo pematamoyanijobivi gobierno pejamatabëcuene. Itsamonae ata Leví pijabota naena mesa muxuneneta. ³⁰ Nexata fariseovi, judíovi pecujarubavinua, Leví pijabo jumapënëvelia penubenaevi, jamatabëcuenenavëxaniabiaya baracuaicuaijatsi Jesús pijajivijavabelia. Bajarapamonae Jesús yabara jumaitsi:

—Jesús rabaja naneconita Diosojavabelia. Tsipaji gobierno pejamatabëcuene impuestomatamo pematamoyanijobivijavata, piagamatabëcuenebejevijavatanua, naxaeyeca pexaejava, jai bajarapamonae jamatabëcuenenavëxaniabiaya Jesús pijajivijavabelia.

³¹ Jesús ita jumetane fariseovi, judíovi pecujarubivinua, pebaracuaicuaijajavatsi, nexata Jesús jumaitsi bajarapamonaejavabelia mapacueniaje:

—Pevaëbinë raja apo vaëbi pejamatejemavi. Pevaëbinë raja piavitanevi vaëba. ³² Bajara pijinia xanë ata itsinë. Apo sivapatajopaenë tajunatsinexa pamonae baja aneconijibi tsavanapae. Sivapatajopajë raja tajunatsinexa pijaneconi pexainaevi. Bajarapamonae junataponajë pecopabinexa pibisiacuene pexanaejava, pena-jamatabëcuenepënëyorotsinexa Diosojavabelia, jai Jesús bajarapamonaejavabelia.

Pacuenia Jesús yanijobatsi pamatacabibeje jivi vajëtaona Diosojavabelia pexaejava apo pexaeyabiabixae yabara pelivaisi (Mt 9.14-17; Mr 2.18-22)

³³ Fariseovi, judíovi pecujarubivinua, jumaitsi Jesúsjavabelia:

—Juan pijajivi, fariseovi pijajivinua, pexaejava apo xaeyabiabi pamatacabibeje Diosojavabelia vajëcapona. ¿Detsa xuajitsia xamë nijajivi pexaejava xaeyabiaba Diosojavabelia pevajëcaematacabianë ata? jai bajarapamonae.

³⁴ Jesús nexata comparacióncuenia jumaitsi bajarapamonaejavabelia:

—Pamonae junatatsi penacasabifiestajavabelia penanabaninexa, apo atsobi pexaejava ita abaxë yajavaecatsi pejananacasabinë. ³⁵ Itsiata baitsi jane ita pejananacasabinë tsimaxëpatsipatsi pijavajabitsaë pevecuacaponanexatsi itsajavabelia, nexata pecovëta bajarapamonae apo xae tsipae pexaejava. Tsipaji bitso najamatabëxainaejitsipa. Bajara pijinia itsi tajajivi ata. Tayajavaponaponaeepato abaxë apo atsobabiabi pexaejava pamatacabibeje Diosojavabelia vajëtaona. Itsiata pamatacabibi xanë necaponaena bajarapamonaevecua, nexata jane baja bajarapamatacabipi pexaejava apo xae tsane bitso tanesivanajamatabëxainaxae, jai Jesús peyanijobivitsijavabelia.

³⁶ Nexata bajarapamonae perujujamatabëcuene baja penavecuacopatsinexa, Jesús livaisi tsipaeba comparacióncuenia, bajarapamonae pejumecovënëtsinexa ëpejanalivaisi, Jesús petsipaebilivaisi. Bajarapamonae anijajamatabëcuenebeje pexainaeyaniva, perujujamatabëcuene baja penavecuacopabinexa, Jesús livaisi tsipaeba comparacióncuenia. Perujujamatabëcuene yabara Jesús jumaitsi bajarapamonaejavabelia mapacueniaje:

—Itsajivi ata apo caucutsi pejananaxatatsijava pejanapana pecatsatarutsinexa perujunaxatatsiesetojavabelia. Itsa caucutsipa pecatsatarutsinexa pejanapana perujunaxatatsiesetojavabelia, nexata bijianaejitsipa pejananaxatatsijava. Apo itajitsipaenua tsipae pejanapana perucaejava perujunaxatatsiesetojavabelia. ³⁷ Itsajivi ata pijinia apo epacae pejanavinoranë perujubocodoruanëjavabelia bajayajebi peyajebinexa. Pejanavinoranë ita epacaejitsipa perujubocodoruanëjavabelia, nexata pejanavinoranë yatititibia tsipae. Tsipaji perujubocodoruanë apo yanayeretsi tsipae xaniavaetsia. Tsipaji pejanavinoranë pejumalitsëxë abaxë xaina. Nexata ita yatititibia tsipae,

naxuabijitsipa vinoranëmi. ³⁸ Bajaraxuata bepaca pejanavinoranë pejanabocodoru-anëjavabelia. ³⁹ Itsajivi perujuvinora piapaecujinae, apo jitsipae piapaenexa pejanavinora. Tshipaji jamatabëjumaitsi: “Perujuvinora bitso xanepana pejanavinora matatoxenetsia,” jamatabëjai, jai Jesús bajarapamonaevavelia comparacióncuenia. Bajarpacuenia Jesús jumaitsi comparacióncuenia tshipaji bajarapamonaecatiteca perujujamatabëcuene. Nexata Jesús jitsipa bajarapamonaepelumecovënëtsinexa ëpejanalivaisi, palivaisi Jesús tsipaeba.

6

Pacuenia Jesús pijajivi namutua siricanajetarubena trigoxu judíovi penacueraevetsimatacabita yabara pelivaisi

(Mt 12.1-8; Mr 2.23-28)

¹ Judíovi penacueraevetsimatacabita Jesús, pijajivi yajava, najetaruca namutua trigopabianëjava. Nexata Jesús pijajivi piajanixae, trigoruanë siricanajetarubena. Xunacobenacaquiatanajetarubena. Xuxaeyabuatapona. ² Nexata fariseoviyajuvënëvi jumaitsi Jesús pijajivijavabelia:

—Paxamë raja paexaname Dioso Moiséspijinëta penajumecopatsilivaisi vajanacaitavetsicuene. Apo nacaitavetsi ata trigoxu vajaxaeyaniva, itsiata ajena penacueraevetsimatacabixae, apo bepaexanaemë mapacueniaje, jai fariseovi Jesús pijajivijavabelia.

³ Jesús nexata jumaitsi fariseovijavabelia:

—Ajena, penacueraevetsimatacabita, tajajivi bajarapacuenia exanae ata, itsiata apo pibisiacuene. Tshipaji bitso piajani. ¿Apo palebimë tshipaji Dioso pejumelivaisibaxuto paneyapëtaenexa pacuenia vajasalinainëmi Davidpijinë, pebarëponaponaevi yajava, exana pamatacabi bitso piajani? ⁴ Bajaraponë Davidpijinë joneya Dioso pijatemploboyalia. Nexata Dioso pijatemplobëne, mesajumata bobena Diosonexa ofrendacuenia petojebipanbëanë. Bajarapapanbëanë itsajivi ata apo tocopatsitsi pexaenexa penaneconitsiyaniva Diosojavabelia. Ësacerdotevi picani pexaenexa tocopatatsi. Davidpijinë apo sacerdotenë ata, pijajivi barëxae ata bajarapapanbëanë, itsiata apo vënananeconitsi Diosojavabelia, jai Jesús fariseovijavabelia.

⁵ Icatsia pematatsënëa Jesús jumaitsi fariseovijavabelia:

—Xanë, Daxitajivi Pematapijinënë, netoxanepana cajena tatsipaebinxaxanepana jivi pexanaenexa penacueraevetsimatacabita ata, jai Jesús.

Pacuenia Jesús jamatejemayaexana pebi pecobetsaquenaenë yabara pelivaisi

(Mt 12.9-14; Mr 3.1-6)

⁶ Itsamatacabi Jesús joneya judíovi penacaetuatabiabayalia judíovi penacueraevetsimatacabita. Nexata bajarajota Jesús jivi livaisi tsipaeba. Bajarajota pebi pecujanenia pecobetsaquenaenë, naeca. ⁷ Nexata Jesús naitaxutocaevetenatsi judíovi pecujarubivi, fariseovinua, petaenexatsi Jesús pejamatejemayaexanaejava pecobetsaquenaenë judíovi penacueraevetsimatacabita. Nexata Jesús pecobetsaquenaenë itsa jamatejemayaexana penacueraevetsimatacabita, “Jesús raja pibisiacuene exana,” pejainexa bajarapamonaep. ⁸ Nexata Jesús yapëtane pacuenia bajarapamonaep sivanajamatabëxainatsi. Nexata Jesús jumaitsi pecobetsaquenaenëjavabelia:

—Nonotapunare. Nuca majotaje mapamonaep pitabarataje, jai Jesús.

Nexata pecobetsaquenaenë nonotapuna. Nuca bajarapamonaep pitabarata. ⁹ Nexata Jesús jumaitsi penaitaxutocaevetenaevitsijavabelia:

—Penacueraevetsimatacabita ata xanepana vajaexanaenexa pexaniacuene. Xanepana vajajamatejemayaexanaenexa piavitanevi, jai Jesús penaitaxutocaevetenaevitsijavabelia.

¹⁰ Jesús matatoyorotsia naëcoba daxita pamonaenaja bajarajota. Jesús jumaitsi pecobetsaquenaenëjavabelia bajarapamonaenaja pitabënejeva:

—Namaxërovire, jai Jesús.

Nexata baja pecobetsaquenaenë namaxërovita. Bajarajota cobexanepananajereca baja. Pecobetsaquenaenëjavami ajibi. ¹¹ Nexata judíovi pecujarubivi, fariseovina, ita tane Jesús pecobexanepanaeyaexanaenaja pecobetsaquenaenë, bitso anaepana. Nexata jane baja najumejaita pacuenia Jesús beyaxuabijitsiatsi.

Pacuenia Jesús pijajivi ayaibitsaëtoxanetoyajuvënëvi itapeta saya doce ponëbeje apóstolevinexa yabara pelivaisi

(Mt 10.1-4; Mr 3.13-19)

¹² Jesús pijajivi ayaibitsaëtoxanetoyajuvënëvi, doce saya ponëbeje, itapeta apóstolevinexa. Jesús pitapetsivajënaeya apóstolevinexa, junaya petsutojumabetsia pevajëtsinexa Diosojavabelia. Nexata Jesús meravijebi bajarapatsutojumatsia vajëtapona Diosojavabelia. ¹³ Bajayacunua, ajena baja matabi tsarucapona, Jesús junata daxita pijajivibitsaëtoxaneto bajaraponëjavabelia. Nexata bajarajota itapeta pijajivibitsaëtoxanetoyajuvënëvi, doce saya ponëbeje. Bajarapamonaenaja Jesús vënërubia apóstolevi. ¹⁴ Pamonaenaja Jesús itapeta apóstolevinexa mapevënëanëje. Copiaya ponë, pevënë Simón. Bajaraponë Jesús vënërubia itsavënë, Pedro. Itsanë Andrés, Simón Pedro jane baja peyuyapijinë. Itsanë Santiago. Itsanë Juan. Itsanë Felipe. Itsanë Bartolomé. ¹⁵ Itsanë Mateo. Itsanë Tomás. Itsanë Santiago, Alfeo pexë nato. Itsanë Simón, celotenë. ¹⁶ Itsanë Judas, Santiago peyuyapijinë. Itsanë Judas Iscariote. Bajaraponë bexëjavabelia Jesús canajetsijitsiatsi pijavajabitsaë pecobeyabelia pebeyaxuabinexatsi.

Pacuenia Jesús jivi ayaibitsaëtoxaneto livaisi tsipaeba yabara pelivaisi

(Mt 4.23-25)

¹⁷ Jesús baja, pijajivi ayaibitsaëtoxaneto yajava, runaica petsutojumavetsica. Nexata epatua petsutoyenepanajavata, itsajota ira namatajëpa, Jesús yajavanuca pijajivi ayaibitsaëtoxaneto. Bajarajota nexata jivi nacaetuata ayaibitsaëtoxaneto. Bajarapamonaenaja Judea nacuapijivi, itsamonaja Jerusalén tomarapijivi, itsamonaja Tiro tomarapijivi, itsamonaja Sidón tomarapijivi. Tiro tomarabeje Sidón tomarabeje, man-uameneitapata ecabeje. Daxita bajarapatomaranëpijivi nacaetuata pejumetaenexa Jesús petsipaebilivaisi. Bajarapamonaenaja patanua Jesús pejamatejemayaexanaenexa piavitanejavavecua. ¹⁸ Bajarapamonaenajuvënëvi itsajamatabëcuene tsabiabi dovathi pejamatabëcueneta. Bajarapamonaenaja Jesús jamatejemayaexana. ¹⁹ Daxita pamonaenaja bajarajota nacaetuata, Jesús picani jamatabëjayabatsi. Tsipaji Jesús daxitajivi piavitanejavavecua jamatejemayaexanapona pecaëjëpajamatabëcuenetatsi.

Pacuenia Jesús pijajivi tsipaeba Jesús pijajivi pejamatabëcuenebarëyajavanexa, apo pejamatabëcuenebarëyajavanexana, yabara pelivaisi

(Mt 5.1-12)

²⁰ Jesús pijajivi naëcota asaëya. Jumaitsi bajarapamonaenajavabelia:

—Panajamatabëcuenecopabame baja Diosojavabelia paneponaenexa Dioso pijatomarabetsia. Bajaraxuata paxamë bepanejamatabëcuenejiovivimi panijaneconi yabara, aeconoxaenaja pajamatabëcuenebarëyamë Diosojavabelia.

²¹ 'Pajitsipame Dioso pijacuene. Pajamatabëcuenebarëyamë baja. Tsipaji Dioso athëbëtatsia pacarajutsiana daxitacuene xua panamatavenoname.

'Paneyanuevimi pibisiacuene paneexanaeneci yabara, pacavecuajibiaexana baja bajarapaneconi. Bajaraxuata itsamatabi pajamatabëcuenebarëyamë tsane.

²² 'Xanë, Daxitajivi Pematapijinënë, patajajivixamë, ita pacaitoya tsane jivi, itsiata pasivajamatabëcuenebarëyamë tsane. Bajarapamonaenaja pacanavecuaitavetsi ata tsane,

itsiata pasivajamatabëcuenebarëyamë tsane. Pibisiacuenia pacabijatae ata tsane, pibisiacuenia pacabaracuaicuaijai ata tsane, itsiata pasivajamatabëcuenebarëyamë tsane. ²³ Bajarapacuenia pacaexanae ata tsane, itsiata pasivajamatabëcuenebarëyamë tsane. Tsipaji raja Dioso athëbëtatsia pacarajutsiana bitso pexaniacuene jivi papecaitojajamatabëcuene. Pamona pacaitoya tsane, bajarapamona pijasalinaivimi bajayata itoya Diosojumepaebivimi profetavi. Nexata bajarapamona pijasalinaivimi bajayata bejio-biaexanapona Diosojumepaebivimi profetavi. Bajarapamona aeconoxae ata pijasalinaivimi cuenejëpavanapa. Bajaraxuata paxamë ata icatsia bajarapamona pacaitoya tsane pijasalinaivimi pecuenejëpavanapaexae.

²⁴ 'Daxitacuene mapanacuata panexainaevi, Dioso bitso ayaicuenia pacabejiobiaexanaena. Tsipaji pacabarëyamë tsavanapae ëpanexainajava mapanacuataje.

²⁵ 'Bitso bepajamatabëcuenejobimë tsane daxitacuene mapanacuata panenatojitsipaecuene panexainaevi. Pasivajamatabëcuenebarëyamë picani tsavanapae panexainajava. Itsiata baitsi jane itsamatacabi itsa patëpaename, panetëpaecujinae panajamatabëxainaename ayaicuenia.

'Bepajamatabëcuenejobimë tsane panejëajëajaitsabiabivi sivabarëyaya mapanacuapijicueje. Paneasaëtsavanapaeepato abaxë mapanacuataje panesivajamatabëcuenebarëya tsabiabixae bajarapacue, panetëpaecujinae bitso payanuename pibisiacuene paneexanaeneconi.

²⁶ 'Mapanacuapijivi pexaniacuenia pacabaracuaicuaijai tsabiabi saicayacuenia Dioso pejumelivaisivecua panetsipaebabiabixae. Itsiata baitsi jane pamatacabi Dioso pacananeconitsiaexanaena, bitso bepajamatabëcuenejobimë tsane. Tsipaji pacuenejëpame bajayata pamonaemi jinavanapa. Bajarapamonaemi bajayata jivi tsipaebabiaba saicayacuenia Dioso pejumelivaisivecua. Nexata bajarapamonaemi pexaniacuenia baracuaicuaijaitsi tsabiabi mapanacuapijivije, jai Jesús pijajivi ayaibitsaëtoxanetojavabelia.

Pacuenia Jesús pijajivi muxujioba piasivanexa pitoyavi atatsi yabara pelivaisi (Mt 5.38-48; 7.12)

²⁷ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pacatsipaebijitsiatsi icatsia patanenamuxunaevetsivimë. Pasivamëre papecaitojavi ata. Pexaniacuene patoexanare pamona pacaitoya. ²⁸ Payavenonare pamona pacabijatane pibisiacuenia. Pamona pacabaracuaicuaijai pibisiacuenia, patovajëre Diosojavabelia peyavenonaenexatsi. ²⁹ Itsajivi itsa pacaitabarapacabiauxuaba anaeya, nexata icatsia itsanenia ata patonaitabaracaevere papecaitarapacabiauxuabinexa. Itsajivi itsa pacayacajërëta panijacamisajumavelia panenaxatatsijava, nexata patocopare panijacamisa ata papeyacajërëtsinexa. ³⁰ Pajivi itsacuenejavayo amoneya pacavajëta, parajure. Itsajivi itsa pacayacajërëta itsacuenejavayo, pëtsa payanijobame papecatocanaviatsinexa. ³¹ Xua pexaniacuene, paxamë pajitsipame itsamona papecatoxanaenexa, copiaya paxamë bajarapapexaniacuene patoexanare bajarapamona javabelia, jai Jesús pijajivi ayaibitsaëtoxanetojavabelia.

³² Icatsia Jesús jumaitsi pijajivijavabelia:

—Itsa pasivamë tsipae ëpapecaasivavi, nexata pexaniacuene apo paxainaemë tsipae Diosojavabelia. Tsipaji pajamatabëcuenebejevi ata, pamona asivatsi, banamataenetsianasiva. ³³ Pexaniacuene itsa patoexanaejitsipame pexaniacuene ëpapecatoexanaevijavabelia, nexata apo paxainaemë tsipae pexaniacuene Diosojavabelia. Tsipaji pajamatabëcuenebejevi ata, pexaniacuene batoexana penajamatabëcuenejëpaevijavabelia. ³⁴ Itsa patsicopatsipame ëpanejamatabëcuene yapëtaevijavabelia baja, papecatocanaviatsinexa pacuenia patsicopatame, nexata apo paxainaemë tsipae pexaniacuene Diosojavabelia. Tsipaji pajamatabëcuenebejevi ata, batsicopata penajamatabëcuenejëpaevijavabelia, pamona jamatabëcuene yapëtane

baja petocanaviatsinexatsi. ³⁵ Nexata pasivamëre panijavajabitsaë ata. Bajarapamonaejavabelia pexaniacuene patoexanare. Bajarapamona patsicopare panajamatabëxainaenejevamë papecatocanaviatsinexa panetsicopatsicuenia. Bajarapacuenia bitso paxainaename pexaniacuene Diosojavabelia papecarajutsinexa athëbëtatsia. Bajarapacuenia itsa paexanavanapaename, Dioso, athëbëtatsia peecaenë, pexicuenia pacaexanaena. Tsipaji Dioso pitaxutotsoniataenë piamatabëcuenebejevi ata. Itsamonae Dioso yavenonae atatsi, itsiata apo canaëjëtsi Dioso peyavenonaejavatsi. Bajarapamona apo canaëjëtsi ata Dioso peyavenonaejavatsi, itsiata tsiteca Dioso itaxutotsoniataeyabiaba. ³⁶ Pacuenia Dioso daxitajivi itaxutotsoniataeyabiaba, bajarapacuenia paxamë ata itsamonae ata paitaxutotsoniataename, jai Jesús pijajivi ayaibitsaëtoxanetojavabelia.

Pacuenia Jesús pijajivi muxujioba pitaxutotsoniataenexa itsamonae ata, pacuenia bajarapamonae ata Dioso itaxutotsoniatanetsi, yabara pelivaisi

(Mt 7.1-5)

³⁷ Icatsia Jesús jumaitsi pijajivi ayaibitsaëtoxanetojavabelia petsutoyenepanajavata:

—Pëtsa panataneme pepacuene bepaneaneconijibivi. Nexata itsamonae pibisiacuene pexanaejava xaniavaetsia payapëtaenejevamë, pëtsa pabaracuaicuaijamë mapacueniaje: “Bajarapitsipibisiacuene pexanaevi, Dioso bitso ayaicuenia naneconitsiaexanaenatsi,” pajamë pëtsa. Nexata paxamë ata juya bajarapacuenia itsamonae apo pacabaracuaicuaijai tsane pibisiacuene paneexanaejava yabara. Itsamonae pibisiacuene pacaexanae ata, pajamatabëcueneceavare. Pabarajamatabëcuenexanepanarena. Nexata pijinia Dioso pitabarata pibisiacuene paneexanaejava Dioso jamatabëcueneceaviana. Pacabarajamatabëcuenexanepanaenanua. ³⁸ Parajutaponare itsamonaejavabelia penamatavenonaejavaxi. Nexata juya paxamë Dioso pacarajutaponaena pacuenia jitsipa papecarajutsinexa. Pacarajutsiana xuavajëto itsamonae parajutame matatoxenetsia, jai Jesús daxitajivijavabelia petsutoyenepanajavata.

³⁹ Jesús icatsia comparacióncuenia tsipaeba bajarapamonaejavabelia mapalivaisije:

—Ponë bitso itaxutotsécëna, apo caëjëpaetsi pematacaponaenexa itsanë, ponë pijinia bitso itaxutotsécëna. Itsa matacaponaejitsipa, nexata najuajopaejitsiparecabeje bajara-ponëbeje caemëthëxanetojavareca. ⁴⁰ Itsajivi pijinia itsa nacujaruba, yapëtae ata baja penacujarubijava, apo jamatabëcuenematatoxenetsi pecujarubinëtsi. Itsa baja penacujarubijivi vereta xaniavaetsia penacujarubijava, nexata saya najamatabëcuenejëpabeje pecujarubinëtsibeje, jai Jesús pijajivijavabelia.

⁴¹ Jesús pijajiviyajuvënëvi pepacuene bepianeconijibivi natane. Nexata itsa cujirutanane itsamonae itsacuenejavayo pexanaejava, jumai tsabiabi: “Mapitsicue pexanaevi Dioso bitso ayaicuenia naneconitsiaexanaenatsi,” jai tsabiabi. Nexata bajara-pacuenia pejumaitsiabiabixae, Jesús pijajivi piurabinexa jumaitsi mapacueniaje:

—Pëtsa paxamë pepacuene bepaneaneconijibivi nataeya pamuxujiobame itsajivi pijaneconi yabara. Tsipaji raja apo payapëtaemë paxamë ata pijinia paneconivajëto paxainame. ⁴² Nexata paxamë ata ayaineconixaneto itsa paxainame, nexata itsanëjavabelia apo bepajumaitsimë: “Tajabanenë, papibisiacuene exaname, copare,” apo bepajamë. Yamaxëitojorobiaya saya bepexaniajamatabëcuenevi nataeya pacuaicuaijamë tsabiabi. Itsamonae pijaneconi yabara pabaracuaicuaijamë tsabiabi. Itsiata pijinia paxamë ata paneconivajëto paxainame, apo payapëtaemë. Paxamë copiaya pacopabare pibisiacuene paneexanabiabijava. Bajara jane xuacujinae paitavetsianame itsamonae ata pibisiacuene pexanaejava penavecuacopatsinexa, jai Jesús pijajivijavabelia.

Pacuenia peubinaenë itsa nacuita, nayapëtane pavirianaecuene yabara pelivaisi

(Mt 7.17-20; 12.34-35)

⁴³ Icatsia Jesús jumaitsi pijajivi ayaibitsaëtoxanetojavabelia petsutoyenepanajavata:

—Pexaniavirianaenē itsa ubatsi, nacuaita pijinia pexaniacuai. Apo nacuaitsi pibisiacuai. Ponae pijinia pibisianaē, apo nacuaitsi pexaniacuai. ⁴⁴ Caevirianaē canacujitsia yapētanetsi itsa nacuaita. Higovēnecuaito apo paucutsimē cucunanaeta. Uvaru pijinia apo paucutsimē saya pejuviēnēbotota. ⁴⁵ Bajara pijinia itsi jivi ata. Pexaniajamatabēcuenenē pexaniacuene yabara cuaicuaijai. Tsipaji pexaniajamatabēcuenē xaina pejamatabēēthētota. Pibisiajamatabēcuenenē pijinia pibisiacuene yabara cuaicuaijai. Tsipaji pibisiajamatabēcuenē najamatabēxaina pejamatabēēthētota. Nexata pacuene yabara pebi pecuaibovojotota cuaicuaijai, bajarapacuene pitsapa pejamatabēēthētojavavetsina, jai Jesús pijajivijavabelia.

Pacuenia Jesús livaisi tsipaeba anijanēbeje bo pexanaenēbeje pelivaisicuenia yabara pelivaisi

(Mt 7.24-27)

⁴⁶ Icatsia Jesús jumaitsi pijajivi ayaibitsaētoخانetojavabelia petsutoyenepanajavata:

—¿Detsa xuajitsia: “Tajatuxanenē,” panejamē tsabiabi ata, itsiata apo panejumecovēnētsimē patacaitorobicuenia? ⁴⁷⁻⁴⁸ Pajivi xanējavaberena pata tanenamuxunaevetsinexa, tanejumecovēnētsinexanua, bajarapajivi apo nacueratsi tsane. Bajarapajivi piatajairata bo bepexanaenē tsane. Bajarapajivi yabara pacatsipaebianatsi. Bo pexanaenēnexa, peyapētaexae itsajota pijabo exanaejitsia pebubutsijavanexa, nexata naesituru atajaya xaniavaetsia mēthēca piatajairata. Nexata pijabo toyabubutsi ata, petojopaeyanivatsi. Bajaraxuacujinae bo baja vereteta. Itsa baja mene avajubuatsica, pijabo toyabubutatsi. Mera asaētsica bojavabetsica. Itsiata pijabo apo tonanequet-sitsi. Tsipaji naesituru xaniavaetsia mēthēca piatajairata. Nexata bajaraponē apo nacueratsi bo pexanaejava. ⁴⁹ Pajivi nejumetae ata tsane tatsipaebilivaisi, itsiata itsa apo nejumecovēnētsi tsane tatsipaebilivaisi, nacueratsiana. Bajarapajivi tajetabota bo bepexanaenē tsane. Ponē tajetabota pijabo exaneta, yapētae ata emarapae pecopiapat-sijavanexa, bajaraponē nacuerata bo pexanaejava. Tsipaji bo peveretetsicujinae, mene avajubuatsica. Nexata pijabo toyabubutatsi. Bo nexata jopaica. Pepacuene baja nexata abeje, jai Jesús pijajivijavabelia.

7

Pacuenia vajabitsaē pijacapitán pijabota petonacuenebaponaponaenētsi, Jesús tojamatejemayaexana yabara pelivaisi

(Mt 8.5-13)

¹ Jesús baja itsa najumevereta pijajivi ayaibitsaētoخانeto livaisi petsipaebijava petsutoyenepanajavata, pona baja Jesús Capernaum tomarabelia. ² Capernaum tomarata ponapona Romano nacupijinē, vajabitsaē pijacapitán. Bajaraponē pijajivitonē, bitso piasivanē, toavitanetsi. Totēpaejitsiatsi baja. ³ Bajaraponē capitán vēnēlivaisitanetsi Jesús pejamatejemayaexanaponaejava piavitanevi. Nexata capitán jumaitsi judíovi pijaancianovijavabelia:

—Panetojunaremelia Jesús. Pabarēpatsiaremēna tajaboyaberena tanetojamatejemayaexanaenexa tajajivitonē, jai capitán judíovi pijaancianovijavabelia.

⁴ Nexata bajarapamonae pona Jesúsjavabelia. Itsa pata Jesúsjavabelia, pinijicuenia junata. Jumaitsi Jesúsjavabelia:

—Bajaraponē capitán bitso pexaniajamatabēcuenenē. Nexata tojamatejemayaexanaename pijajivitonē. ⁵ Tsipaji raja bajaraponē nacaasiva vaxaitsi judíovitsi. Mata-mota cajena pijapalatata vajanacatoexanetsinexa vajanacaetuatabibonexa, jai judíovi pijaancianovi Jesúsjavabelia.

⁶ Nexata Jesús nalia bajarapamonae pepēta. Itsa baja imoxoyotanajetarubena capitán pijabo, nexata capitán icatsia peyapētaevitsi itoroba Jesús pemataenenaenexatsi. Capitán peyapētaevitsi itoroba Jesúsjavabelia pejumaitsinexa mapacueniaje:

—Petuxanenë, pëtsa paremena tajaboyaberena. Apo caquenetsiataejitsipaetsi. Beveliamatabëcuenenënë raja saya xanë xamëvecua. Nexata apo xanepanae tsi-pae nenajonejava tajaboyaberena. ⁷ Apo nejamatabëcuenecaējēpaenua taponaejava xamējavabelia ata. Saya bajaraverena itorobare ënijume. Nexata tajajivitonë neto-jamatejema tsane. ⁸ Xanë ata xainajë taneitorobabiabivi taneitorobicuenia tajume-covënëtabiabinexa. Xanë ata juya xainajë vajabitsaë, tajajivi, taitorobicuenia tanetoex-anabiabinexa. Nexata ita itorobajë caenë vajabitsaënë peponaenexa, bajaraponë ponabiaba. Itsa junarenajë itsanë vajabitsaënë pepatsinexa maberena, bajaraponë patabiabarëna. Itsa itorobajë tajajivitonë tanetoexanaenexa itsacuenejavayo, nexata netoexanabiaba. Bajara pijinia pacuenia xamë ata nexanaenexa, cacaējēpa. Nexata saya bajaraverena ënijume itorobare saya ënijumeta tajajivitonë tanetojamatejemayaex-anaenexamë, jai capitán mapacueniaje petonajumeitorobijume Jesúsjavabelia.

⁹ Jesús ita jumetane bajarapacuenia capitán petonajumeitorobijumetsi, jamatabëcuenenabenajaca capitán petonajumeitorobijumetsi yabara. Nexata napënëyorotaxuaba Jesús. Jumaitsi pepënanajetarubenaevitsijavabelia:

—Xaniajanë pacuenia pacatsipaebijitsiatsi. Caeto ata cajena Israel nacuapijinë apo caxitajarabaxuabinë xanējavaberena bitso tanesivanajamatabëcuenecopatsinë pacue-nia mapacapitán nesivajamatabëcuenecopatsiaya jumaitsi, jai Jesús capitán yabara. ¹⁰ Nexata baja pamona capitán itorobalia Jesús petsipaebinexatsi capitán pena-jumeitorobilivaisi, naviabarëna baja capitán pijaboyaberena. Itsa baja pata boyaber-ena, caxitajaraba baja capitán pijajivitonë pejamatejemanë.

Pacuenia pamona pevecuatëpaevatsi pexënato Jesús toasaëyaexana, petëpaenëmi, yabara pelivaisi

¹¹ Jesús pona Naín tomarabelia. Nexata yanatatsi pijajivi, itsamonae yajava, ayaibit-saëttoxaneto. ¹² Itsa baja Jesús patanajetaruca Naín tomara imoxoyojavata, nexata camataenenatsi petëpaenë pecanajetarubenaevi. Bajarapamonae petëpaenë tomar-avelia capitsapa pemëthëtsinexa tomarapënëyabelia. Ponë tēpa, bajaraponëmi pamona pevecuatëpaevatsi pexënato, pepo cainë. Nexata pamona pevecuatëpaevatsi pexënato, petëpaenë, ita caponaliatsi pemëthëtsinexatsi, tomaraverena jivi ayaibitsaëttoxaneto pënaponatsi. ¹³ Nexata Jesús ita tane bajarapova, tsitabejibitsi bitso. Nexata Jesús jumaitsi bajarapovajavabelia:

—Matanueyabijitsipame, jai Jesús.

¹⁴ Nexata Jesús cujitalabalia petëpaenë peyacajoniacanajetarubenaevi. Pecobeta jayata cajoni. Nexata petëpaenë peyacajoniacanajetarubenaevi, nubenaothopa. Nexata Jesús jumaitsi petëpaenëjavabelia:

—Pevëjëato, xanë raja cajumaitsi. Namatacore, jai Jesús.

¹⁵ Nexata baja petëpaenëmi namatacota. Cuaicuaijai. Jesús baja tocanaviata piasaënë penajavabelia. ¹⁶ Nexata daxita petaevitsi jamatabëcuenenabenajaca. Najumaitsi bajarapamonae:

—Dioso bitso ayaijamatabëcuenenë. Pinijijamatabëcuene pexainaenë, profeta, nacat-sitanajamatabëcueneitajëta. Dioso pinijicuene pexanaejava ata nacatsitajëta va-jataenexa, najai bajarapamonae Jesús yabara.

¹⁷ Daxita Judea nacuapijivi, imoxoyo nacuanëjava ata pejinavanapaevi, Jesús vënëlivaisitanetsi xua exana.

Pacuenia Juan jivibautisabinë itoroba pijajivitonëbeje Jesúsjavabelia yabara pelivaisi (Mt 11.2-19)

¹⁸ Juan jivibautisabinë naneconitsia ponapona penaneconitsivi pejebabiabibota. Nexata pijajivi tsipaebatsi daxita Jesús pexanaponaejava yabara. Nexata Juan junata anijanëbeje pijajivitonëbeje pitorobinexa Jesúsjavabelia. ¹⁹ Juan pitorobivajënae pijajivi-tonëbeje, jumaitsi bajaraponëbejavabelia:

—Pajumaitsimëbeje tsane Jesúsjavabelia: “¿Xamë tsabaja Cristomë? ¿Xamë tsabaja tajëvelia cavajunupaebapona nepatsijavanexatsica daxitajivi necapanepaenexa? Itsa apo Cristomë, ¿abaxë tsaja pacopiaevetavanapaenajë itsanë athëbëvetsica Dioso pitorobinexatsicatsi jivi pecapanepaenexa?” jai raja Juan,” pajamëbeje tsane Jesúsjavabelia, jai Juan pijajivitonëbejejavabelia.

²⁰ Nexata Juan pijajivitonëbeje itsa patabeje Jesúsjavabelia, Juan pijajivitonëbeje jumait-sibeje Jesúsjavabelia:

—Juan raja jivibautisabinë paneitorobabeje patacayanijobinexabeje. “¿Xamë tsabaja Cristomë? ¿Xamë tsabaja tajëvelia cavajunupaebapona nepatsijavanexatsica daxitajivi necapanepaenexa? Itsa apo Cristomë, ¿abaxë tsaja pacopiaevetavanapaenajë itsanë pepatsijavanexatsica?” jai raja Juan, jai beje jane baja Jesúsjavabelia.

²¹ Nexata bajaraponëbeje pitabëta Jesús jamatejemayaexanapona ayaibitsaëtoxaneto piavitanevi. Dovathi peyajavajinavanapaevi ata vecuacapitsapa dovathi. Itaxutox-anepanaeyaexananua pamona bitso itaxutotsëcëna. ²² Nexata Jesús jumaitsi Juan pijajivitonëbejejavabelia:

—Paponarebeje baja. Patsipaebianamebeje Juanjavabelia pacuenia baja patanemebeje taexanaponaejava. Patsipaebianamebejenua pacuenia baja pajumetanemebeje tatsipaebilivaisi jivijavabelia. Apo petaevimi ata itaxutoxaniavaetaponajë xaniavaetsia petaenexa. Petabusipacuenabivitsinua daxita jinavanapaeyaexanaponajë. Bajayajebi bitso peperabëtsabanaevinua vecuajibiaexanaponajë baja. Bitso pemuxusipanaevinua jumetaeyaexanaponajë baja xaniavaetsia pejumetaenexa. Petëpaevimi ata icatsia asaëyaexanaponajë. Pexanialivaisinua pecapanepaelivaisinexatsi pibisiacuene pexanaeneconimivecua, tsipaebaponajë bepejiobivijavabelia. Daxita bajaraxua taexanaponaejava patanetaejavamëbeje, patsipaebianamebeje Juanjavabelia. ²³ Pajumaitsimëbejenua tsane Juanjavabelia: “Jesús raja jumaitsi: ‘Jamatabëcuenebarëya pajivi tsiteca nejumecovënëta xanë Dioso pexënatocuenenë,’ jai raja Jesús,” pajamëbeje tsane Juanjavabelia, jai Jesús Juan pijajivitonëbejejavabelia.

²⁴ Itsa baja Juan pijajivitonëbeje naviatabeje, nexata bajaraponëbeje pecovëta Jesús taxuxuaba jivijavabelia petsipaebijava Juan pelivaisi. Jesús jumaitsi jivijavabelia:

—Itsa paponame petusato nacuyabelia pamatacabi Juan ponapona petusato nacuata, ¿detsa pitsicuene pajamatabënaponaremelia panetaenexa bajarajotalia? ¿Paponaremelia tsaja saya panetaenexa musuli penajëabijava jovibota? ²⁵ Itsa apo papon-aemëlia panetaenexa musuli penajëabijava jovibota, ¿detsa nexata pitsicuene panetaenexa paponaremelia? ¿Paponaremelia tsaja saya panetaenexa naitabëtsiaya pexaniajava penaxatatsinë? Paxamë rabaja payapëtaneme mapacueneye. Pamona naitabëtsiaya pexaniajava naxatababiaba, pamona ata nabanebiaba pexanianaban-ijavanë, bajarapamona jinavanapa nacuanë pevetsivi pijabonëjava. ²⁶ ¿Detsa nexata xua pajamatabënaponaremelia panetaenexa petusato nacuyabelia? Paponaremelia raja panetaenexa Diosojumepaebinë profetanë. Xaniajanë pacuenia pacatsipaebijit-siatsi. Juan itsa pataneme, pepacueneye jane baja pepo profetanë, Diosojumepaebinë, pataneme. Nexata saya bevelia profetanë apo pataemë. ²⁷ Juan pexanaejavanexa, bajayata tajëvelia Dioso pejumelivaisibaxutota vajunupaeba. Dioso tanejumaitsijava ata xanëjavaberena, Dioso pejumelivaisibaxutota jumaitsi mapacueniaje: Itorobianajë nevajënaeyabelia tanejumelivaisipaebinënexa jivi pecatsivajënae najamatabëcuenexaniavaetsinexa, jai bajayata Dioso pejumelivaisibaxutota athëbëvetsica tapatsivajënaeyatsica Juan tanelivaisi paebanajetaruaejavanexa yabara.

²⁸ Juan ayaijamatabëcuenenë mapanacuataje. Nexata bajayata Juan pevajënaeya paprofetavimi jinavanapa, itsanë ata Juan apo jamatabëcuenematatoxenetsitsi. Itsiata baitsi jane pajivi beveliajamatabëcuenejivi ata, itsa najamatabëcopata baja Diosojavabelia

pijatuxanenë pexanaenexa, bajarapajivi juya Dioso ayaijamatabëcuenejivi exanaenatsi Juan matatoxenetsia, jai Jesús Juan jivibautisabinë yabara.

²⁹ Juan vënëlivaisitanetsi daxitajivi. Impuestomatamo pematamoyanijobivi ata go-bierno pejamatabëcuene, vënëlivaisitanetsi. Bajarapamonae jumecovënëta palivaisi Dioso najumecopata Juanjavabelia. Nexata Juan bautisaba bajarapamonae. ³⁰ Itsiata fariseovi, judíovi pecujarubivinu, namuxujemata bajarapalivaisi. Nexata picani pacuenia Dioso tojitsipatsi bajarapamonae pexanaenexa, apo exanae. Nexata Juan apo bautisabi bajarapamonae.

³¹ Jesús icatsia jumaitsi jivijavabelia:

—¿Detsa meta pacuenia yapëtaeyaexanaenajë itsamonaejavabelia bajarapamonae xaniavaetsia papecayapëtaenexa pacuenia paxamë pajamatabëcueneitsimë tsavanapae? Jumaitsinë meta tsane paxamë yabara mapacueniaje: ³² “Bajarapamonae abaxë saya bepejevaxijivixi, pajivixi tomara tuatuajëjava banamuxusitenavanapa. Pejevaxijivixi itsa namuxusitenavanapa, bavavajai tsenae penajua namuxusitenaevijavabelia. Pevavajaijavata bajumaitsi: ‘Pacatoobecatsi picani flauta. Itsiata apo payavajibimë. Pacatonaxëanecatsi picani panemuxunanuevajinexa ata. Itsiata apo panuemë,’ bajai tsenae pejevaxi penajua namuxusitenaevijivixijavabelia. Bajara saya jamatabëcueneitsi pamonaе aeconoxae jinavanapa mapanacuataje,” janë meta tsane paxamë yabara. ³³ Juan jivibautisabinë Dioso pitorobilivaisi jivi tsipaebanajetaruca. Pexaejava itsajavata apo xaeyabiabi pamatacabibeje Diosojavabelia vajëtapona. Vinora ata apo apaeyabiabi. Nexata bajaraponë yabara jamatabëcuenenavëxaniabiaya pajumaitsimë tsabiabi: “¡Juan raja dovathi yajavaponapona!” pajamë tsabiabi jamatabëcuenenavëxaniabiaya. ³⁴ Bajaraxuacujinae icatsia xanë, Daxitajivi Pematapijinënë, najetarucajë. Itaxutojema xaniji. Matavëjëa apaeyabiabajënu. Nexata xanë yabara icatsia jamatabëcuenenavëxaniabiaya pajumaitsimë tsabiabi: “¡Pataema maponëje! Ayaijava xaeyabiaba. Ayaira matavëjëa apaeyabiabanua piaitajibinexa. Barënajamatabëcuenejëpanua gobierno pejamatabëcuene impuestomatamo pematamoyanijobabiabivi. Pamonaе ata piamatabëcuenebejevi, barënajamatabëcuenejëpa,” pajamë tsabiabi xanë yabara. ³⁵ Itsiata baitsi jane itsamonae xaniavaetsia yapëtaena paxanëbeje Juanbeje Dioso pejamatabëcueneta bitso pataneyapëtaeyaexanaejavabeje. Nexata daxita bajarapamonae yapëtaena pacuenia Dioso paneyapëtaeyaexanabeje pepacuene pepo pexaniajaijamatabëcuene, jai Jesús mapacueniaje jivijavabelia.

Pacuenia Jesús exanatsi Simón pijabota yabara pelivaisi

³⁶ Fariseonë, Simónvënënë, pijabota Jesús penanabaninexa, junatatsi. Nexata Jesús napona Simón pijaboyabelia. Jesús naeca mesa muxuneneta penanabaninexa.

³⁷ Bajarapatomarata ponapona petiriva, pibisiacuene pexanabiabiva pevitota palata pepitsinexa. Bajarapova itsa jumetane penanabanijavanexa Jesús Simón pijabota, nexata bajarapova capata alabastrovënë ibotota pexanaebotellabë. Pevënëcaebë pexania-petuxujuviaceitera. Bajarapova capata bajarapaaceitera Jesús petsitaxuepacaenexa.

³⁸ Nexata bajarapova Jesús petaxusalibënenia, pematatabacabëta nucajunua petsitaxuepacaenexa jane baja bajarapaaceitera. Nexata saya bajarajota itacarajeta bajarapova nua. Tsipaji pibisiacuene pexanabiabineconi bitso yanajamatabëxaina. Nexata bajarapova pitaxutobarëmene othopa Jesús petaxujavabereca. Nexata bajarapova pematadata taxuiquica. Bajaraxuacujinae yaiyataeya taxutsutsune. Tsitaxuepaca jane baja petuxujuviaceitera. ³⁹ Nexata Simón, ponë Jesús junatatsi, itsa tane pacuenia petiriva exana Jesúsjavabelia, nexata Simón jamatabëjumaitsi mapacueniaje:

—Itsa peneta pepacuene maponë Jesús, pepo profetanë tsipaeje, nexata yapëtaejitsipa pitsijamatabëcueneva taxujayabatsi. Yapëtaejitsipa bajarapova pibisiacuene pexanabiabivacuene. Nexata apo tocopatsi tsipae petaxujayabinexatsi, jamatabëjai Simón Jesús yabara.

⁴⁰ Nexata Jesús jumaitsi Simónjavabelia:

—Simón, xainajë livaisiyo tacatsipaebinexa, jai Jesús.

Simón nexata jumaitsi:

—Jesús, netsipaebare, jai.

⁴¹ Nexata Jesús jumaitsi Simónjavabelia comparacióncuenia:

—Palata petsicopababiabinë amoneyabatsi anijanëbeje. Caenë amoneyabatsi quinientos padenariobeje. Itsanë amoneyabatsi saya cincuenta padenariobeje.

⁴² Nexata bajaraponëbeje apo xainaebeje juya petocanaviatsinexabeje petsicopat-simatamotsibeje. Nexata palata petsicopatsinë jumaitsi bajaraponëbejejavabelia: “Iquinajë baja bajaraxuami pataniamoneyabijavamëbeje. Naxuabi baja jema,” jai. ¿Detsa nexata ponë bitso sivajamatabëcuenebarëya palata petsicopatsinëtsibejejavabelia? jai Jesús Simónjavabelia.

⁴³ Simón nexata jumaitsi Jesúsjavabelia:

—Ponë meta picani ayaijava amoneyaba, sivajamatabëcuenebarëya palata petsicopatsinëtsijavabelia, jai Simón.

Nexata Jesús jumaitsi:

—Xaniajamë rabaja, jai Jesús Simónjavabelia.

⁴⁴ Jesús napënëyorota petirivajavabelia. Nexata jumaitsi Simónjavabelia:

—Simón, ¿taneme tsabaja pacuenia exana xanëjavaberena mapovaje? Xanë junuajë nijaboyaberena. Itsiata yaiyataeya xaniavaetsia apo necopiapitsimë. Apo nerajut-simë mera ata tanataxuquiatsinexa. Mapovaje netaxuquiata baja pitaxutobarëmeneta. Netaxuiquicanua pematadata. ⁴⁵ Xamë nijabota patsi atanë, apo nitabaratsutsunimë tanecopiapitsinexamë xaniavaetsia. Mapovaje tapatsicujinae apo copatsi cajena yaiyataeya tanetaxutsutsuneponaejava. ⁴⁶ Xamë xaniavaetsia tanecopiapitsinexamë, apo netsimataepanaemë aceitera. Mapovaje netsitaxuepaca pexaniapetuxujuvia-ceitera. ⁴⁷ Nexata catsipaebatsi neyapëtaenexa mapacueneye. Mapovaje pinijicuenia nesivajamatabëcuenebarëya. Tsipaji ayaineconi ata pibisiacuene pexanaeneconimi, vecuaajibiaexanjë. Pajivi saya tsiquirineconiyo vecuaajibiaexanjë, pibisiacuene pexanaeneconi, nayapëtane. Tsipaji saya bajarapajivi tsiquirijavayo nesivajamatabëcuenebarëya, jai Jesús Simónjavabelia.

⁴⁸ Nexata Jesús jumaitsi petirivajavabelia:

—Pibisiacuene rabaja nexanaeneconimi cavecuaajibiaexanatsi, jai Jesús.

⁴⁹ Itsamonae ata, pamonae Simón junata penanabaninexa Simón pijabota, naena mesa muxuneneta. Nexata bajarapamonae najumai tsenae Jesús yabara:

—¿Detsa meta maponëje? Jamatabëcuenenavëxaniabiaya natane bepejamatabëcuenecaëjëpaenëtsi jivi pibisiacuene pexanaeneconi pevecuaajibiaexanaenexa, najai tsenae bajarapamonae.

⁵⁰ Nexata Jesús jumaitsi petirivajavabelia:

—Dioso pecacapanepaeva tsane pibisiacuene nexanaeneconimivecua. Tsipaji nesivanajamatabëcuenecopatame xanëjavaberena. Jamatejema baja ponare. Cavecuaajibiaexanatsi rabaja pibisiacuene nexanaeneconimi, jai Jesús petirivajavabelia.

8

Pacuenia Jesús, pijajivi, pebijivi, petiriavinua, yajavanajetaruca yabara pelivaisi

¹ Simón pijabota Jesús penanabanicujinae, najetaruca pinijitomaranëjava, tsiquiritomaraxijava ata. Tsipaebanajetaruca pacuenia Dioso pijajivi evetsijitsia. Jesús, pijajivi doce ponëbeje, apóstolevi, yajavanajetaruca. ² Jesús yajavanajetaruca petiriavinua, papetiriavi dovathi vecuacapitsapa yajuvënëvi. Papetiriavi ata piavitanejavavecua Jesús jamatejemaya exana yajuvënëvi, Jesús yajavanajetaruca. Bajarapapetiriaviyajuvënëva, caeva pevënë María, Magdala tomarapijiva. Bajarapova Jesús

vecuacapitsapa siete ponëbeje dovathivi. Bajarapadovathivi Jesús pevecuacapitsapae-cujinae, María pënaponatsi. ³ Itsava pevënë Juana, Cuzavënëne pijava. Bajaraponë Cuzavënëne, nacuaevetsinë Herodes pijajivitonë. Itsava pevënë Susana. Bajarapa-petiriavi pematatsënë, itsapetiriavi, ayaibitsaëto, yajavanajetaruca Jesús. Bajarapa-petiriavi pexainaepalatayajuvënëjava, rajuta Jesúsjavabelia. Nexata xuaxi Jesús pijajivi barënamatavenona pebarëcomuatsinexa bajarapapalatata.

Pacuenia Jesús jivi livaisi tsipaeba peubinë pelivaisicuenia yabara pelivaisi
(Mt 13.1-9; Mr 4.1-9)

⁴ Jivi naropoba tomaranëjavaverena. Pata Jesúsjavaberena petaenexatsi. Itsa baja ayaibitsaëtoxaneto nacaetuata Jesúsjavaberena, nexata Jesús livaisi tsipaeba peubinë pelivaisicuenia. Jesús jumaitsi mapacueniaje:

⁵ —Peubinë pona pabiabelia peubinexa. Nexata itsa pata pabita, peubixu pexucayabajarabicuenia ubanajetaruca. Nexata itsaxu othopa pabi tuatujëjava penajetarucaenamutojumata. Bajarapaxu jivi taxunanonoba. Nexata bajarapaxumi juvinejeva barsui xane. ⁶ Itsaxu pijinia othopa ibopananëjumata, itsajota bitso ira apo aitayaë. Nexata bajarapaxu juvi ata, tsaquenapona. Tsipaji ira tseva. ⁷ Itsaxu pijinia othopa xanëebacabomijavata. Nexata peubixu xanëebotonë caecuenia itsa yajavajuva, bitso xanëebotonë maticënëatsi peubijavami. ⁸ Itsaxu pijinia othopa pexaniairata. Bajarapaxu itsa juva, vitsaba. Nexata xaniavaetsia nacuaita. Itsabotonë capitsapa cien paxutoyobeje ata, jai Jesús jivi ayaibitsaëtoxanetojavabelia.

Itsa Jesús tsipaeba bajarapalivaisi, pinijijumeta jumaitsi:

—Pajivi jamatabëjumeyapëtane patacatsipaebilivaisi, nenamuxunaevetsi xaniavaetsia, jai Jesús bajarapalivaisi petsipaebivijavabelia.

Pacuenia yabara Jesús jivijavabelia livaisi tsipaeba ëcomparacióncuenia yabara pelivaisi
(Mt 13.10-17; Mr 4.10-12)

⁹ Nexata Jesús pijajivi yanijobatsi. Jesús pijajivi jumaitsi Jesúsjavabelia:

—Palivaisi jivijavabelia tsipaebame peubinë pelivaisicuenia, pajamatabëcuene xaina, patayapëtaenexa panetsipaebare, jai Jesús pijajivi Jesúsjavabelia.

¹⁰ Jesús nexata jumaitsi pijajivijavabelia:

—Paxamë rabaja xaniavaetsia Dioso pacayapëtaeyaexana Dioso papijajivimë papecaevetsijava. Bajarapacuenia abaxë daxitajivi apo yapëtae. Bajaraxuata bajaramonae itsa tsipaebajë livaisi, ëcomparacióncuenia tsipaebaponajë. Nexata bajaramonae tae ata Dioso pesaëta pinijicuene taexanaejava, itsiata apo yapëtae pajamatabëcuene yabara exanajë pinijicuene taexanaejava. Namuxunaevetsi ata tatsipaebilivaisi, itsiata apo jumeyapëtae pajamatabëcuene xaina tatsipaebilivaisi, jai Jesús pijajivijavabelia.

Pacuenia Jesús yapëtaeyaexana pijajivi pajamatabëcuene xaina palivaisi tsipaeba peubinë pelivaisicuenia yabara pelivaisi
(Mt 13.18-23; Mr 4.13-20)

¹¹ Icatsia Jesús jumaitsi pijajivijavabelia:

—Mara pajamatabëcuenelivaisi xainaje, palivaisi pacatsipaebatsi pabita peubinë pelivaisicuenia. Pacuenia itsi pabita peubixu, bajara pijinia itsi Dioso pitorobilivaisi jivi pejamatabëëthëtota. Dioso pitorobilivaisi jivi itsa tsipaebatsi, tsijamatabëubatsi Dioso pitorobilivaisi. ¹² Nexata pacuenia itsi pabita peubixu, paxu othopa pabi tuatujëjava penajetarucaenamutojumata, bajara tsijamatabëcueneitsitsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, jumetane picani. Tsijamatabëubatsi jane baja picani Dioso pitorobilivaisi. Itsiata baitsi jane pejumetae-cujinae bajarapalivaisi, bepijia dovathi najetaruca bajarapamonaejavaberena. Nexata

bajrapamonaē tsijamatabējuvinejevatsi, petsijamatabēubilivaisitsi dovathi baja vecuapitatsi bajarapalivaisimi. Vecuapitatsi pevajēnaeyabelia Dioso pejumecovēnētsiyaniva, Dioso pecapanepaeyanivatsi pibisiacuene pexanaeneconivecua. ¹³ Pacuenia pijinia itsi paxu othopa ibopananējumata, itsajota bitso ira apo aitayaē, bajara tsijamatabēcueneitsitsi itsamonaē Dioso pitorobilivaisi. Bajrapamonaē Dioso pitorobilivaisi jumetane. Nexata picani bajarapalivaisi barēyaya jumecovēnēta. Itsiata baitsi jane pacuenia irabereca apo atabunepepiareca paxu othopa ibopananējumata, nexata nabijiana, bajara tsijamatabēcueneitsitsi bajarapamonaē Dioso pitorobilivaisi. Tsi-paji saya caepatoyo jumecovēnēta bajarapalivaisi. Nexata paepatota dovathi jamatabēcuenejētatsi, copaba baja bajarapalivaisi pejumecovēnētsijavami. ¹⁴ Pacuenia pijinia paxu othopa xanēebacabomijavata, itsa juva, bitso matacēnēnatsi xanēebotonē, bajara tsijamatabēcueneitsitsi itsamonaē Dioso pitorobilivaisi. Jumetane picani bajarapamonaē Dioso pitorobilivaisi. Itsiata baitsi jane bitso jamatabēcueneenatsi mapanacuapijicuene yabaraje. Tsi-paji najamatabēxaina ayaijava palata pexainaenexa. Najamatabēxainanua pexainaenexa pacuene mapanacuapijivi exana saya jema pe-barēyanexa. Bajaraxuata Dioso pitorobilivaisi apo tovitsabitsi pejamatabēēthētota. Nexata pacuenia itsi pabita piacuaijibibotonē, bajara itsi bajarapamonaē. Tsi-paji Dioso xaniavaetsia apo tojinavanapae. ¹⁵ Pacuenia pijinia itsi paxu othopa pexanairata, bajara tsijamatabēcueneitsitsi itsamonaē Dioso pitorobilivaisi. Bajrapamonaē ajamatabēcuenexuirajibi. Ēpexaniajamatabēcuene najamatabēxaina. Casaē tsavanapae pevajēnaeyabelia Dioso pejumelivaisi pejumecovēnētsijava. Nexata Dioso pejumelivaisi tsijamatabēcuenevitsabaponatsi pevajēnaeyabelia. Tsi-paji exanavanapa Dioso pitorobicueniatsi, jai Jesús pijajivijavabelia itsa tsipaeba peyapētaeyaexanaenexa palivaisi jivijavabelia tsipaeba pabita peubinē pelivaisicuenia.

Pacuenia Jesús pijajivijavabelia livaisi tsipaeba lámparabē pelivaisicuenia yabara pelivaisi
(Mr 4.21-25)

¹⁶ Icatsia Jesús jumaitsi pijajivijavabelia:

—Itsajivi ata lámparabē pitanojotsicujinae, apo mataacatetsi itsacuenejavata. Cama bēxēpanalia ata apo etsi. Biji rajane athēbēyo etsia jivi boyaberena pejonevi pet-sivajēnaeitayotecaenexa. ¹⁷ Bajara pijinia itsi palivaisianē tsipaebaponajē comparacióncuenia daxitajivi picani peyapētaenexa. Najumematayatsia apo tsipaebaponaenē. Itsamonaē nejumetae ata, aeconoxae abaxē apo nejumeyapētae pajamatabēcuene xaina tatsipaebilivaisianē. Itsiata itsamatacabi, bexēajavabelia, daxitajivi nejumeyapētaena pajamatabēcuene xaina palivaisianē comparacióncuenia tsipaebaponajē, jai Jesús pijajivijavabelia.

¹⁸ Icatsia Jesús jumaitsi pijajivijavabelia:

—Panejumecanaējēre patacatsipaebilivaisi. Itsamonaē ata itsa pacatsipaebiana, bajarapamonaē ata pajumecanaējētsianame papecatsipaebilivaisi. Palivaisivajēto panejumecanaējētsianame, nexata bajarapalivaisivajēto panejumeyapētaename. Itsiata icatsia pematatsēnēa bajarapitsilivaisivajēto Dioso pacayapētaeyaexanaena. Pajivi xaniavaetsia nejumeyapētane patacatsipaebilivaisi, bajarapajivi icatsia itsalivaisi pematatsēnēa Dioso jumeyapētaeyaexanaenatsi. Itsiata pajivi apo jitsipae pematatsēnēa pejumeyapētaeponaenexa, bajarapajivi palivaisiyovajēto picani jumeyapētane, nacofēnētsiana, jai Jesús pijajivijavabelia.

Pacuenia Jesús pejuyapijivi, pena yajava, nubena bojumavelia yabara pelivaisi
(Mt 12.46-50; Mr 3.31-35)

¹⁹ Jesús pejuyapijivi, pena yajava, pata Jesúsjavaberena. Itsiata acuenebi bajarapamonaē pimoxoyotsijava Jesús. Tsi-paji bitso jivi ayaibitsaēto Jesús matatoyorotsia

vënëcatsi. ²⁰ Nexata pamonaē Jesús petsipaebilivaisi matatoyorotsia jumetaeyenatsi, jumaitsi Jesúsjavabelia:

—Patajatuxanenē, ena raja, nejuyapijivi yajava, nuca patapēnēverena. Bajarapamonaē pina jitsipa pecataejava, jai Jesúsjavabelia.

²¹ Nexata Jesús jumaitsi daxita bajarapamonaējavabelia:

—Pamonaē jumetane Dioso pejumelivaisi, jumecovēnētānua pacuenia Dioso itorbatsi, bajarapamonaē jane baja tajuyapijivi, taenajivinua, jai Jesús bajarapamonaējavabelia.

Pacuenia Jesús itaveta joviboxaneto, malataca yajava, piyaijavami yabara pelivaisi (Mt 8.23-27; Mr 4.35-41)

²² Itsamatacabi Galilea nacuata Jesús, pijajivi yajava, runareca jera ēnēabereca. Jumaitsi pijajivijavabelia:

—Nicabaliatsi mapapucaxaneto itsapanabeliaje, jai Jesús.

²³ Itsa baja naropobalia, Jesús majitanuca. Nexata pinijijoviboxaneto jemata najetaruca. Malataca nexata bitso ayai. Nexata malataca jera ēnēaberena mera epabajarabapona. Mera nexata vënëcapona jera ēnēaberena. Bubunaejitsia baja bajarapamo.

²⁴ Nexata Jesús pemajitanucaenē pijajivi yaitavabatsi. Jesús pijajivi jumaitsi:

—¡Patajatuxanenē, vaxaitsimi rabaja yaothopaenatsi! jai Jesús pijajivi.

Nexata Jesús pemajitanucaenēmi naēcotapuna. Pinijijumeta itavetaxuaba jovibo, malataca yajava. Jovibo baja nexata ajibi tsaxuabi. Mene ata baja nexata vainae ecaxuaba. ²⁵ Nexata Jesús jumaitsi pijajivijavabelia:

—¿Detsa xuajitsia bitso pajunavame? ¿Tsipaji apo payapētaemē Dioso papecaevetsijava? jai Jesús pijajivijavabelia.

Nexata Jesús pijajivi ita tane Jesús pitavetsijava jovibo, malataca yajava, Jesús pijajivi jamatabēcuenenajunaviaca bēpēnēa. Nexata Jesús pijajivi najumaitsi:

—¿De meta tsipaji maponēje? ¡Itaveta jovibo, malataca yajava! ¡Nexata jumecovēnētatsi! ¡Nexata baja jovibo, malataca yajava, ajibi tsaxuabi! najai Jesús pijajivi.

Pacuenia pebi, dovathivi peyajavaponaponaenē, Jesús vecuacapitsapa Gerasa nacuata yabara pelivaisi

(Mt 8.28-34; Mr 5.1-20)

²⁶ Jesús pijajivi barēyaēta pucaxaneto itsapanabelia, Gerasa nacuyabelia. Gerasanacua boca puca itsapanaverena, Galileanacua pecanacujitsialia. ²⁷ Itsa Jesús jeravecua nonotajunaya, mataenenarenatsi bajarapanacuapijinē, dovathivi peyajavaponaponaenē. Bajaraponē bajayajebi baja jumasa ponaponabiaba. Pijabota apo ponaponaē. Jivimēthēanējavata saya ponaponabiaba. ²⁸ Nexata bajaraponē ita pata Jesúsjavaberena, pematabacabēta nucajunua Jesús pitabarata. Pinijijumeta aējai.

—Jesús, Dioso athēbētatsia peecaenē pexēnatomē. ¿Detsa xua jaitame xanējavaberena? Pexaniacuene bitso cavajētatsi. Nejamatabēcuenēbejibitsipame, jai dovathivi peyajavaponaponaenē Jesúsjavabelia.

²⁹ Bajarapacuenia jumaitsi dovathivi peyajavaponaponaenē tsipaji Jesús jerajavavetsina penotajunaejavata, dovathivi peyajavaponaponaenē pemataenenaejavatatsi, Jesús itaveta dovathivi. Jesús jumaitsi dovathivijavabelia mapacueniaje: “¡Dovathivi, bajaraponē baja pavecuapitsapare!” jai. Bajaraponē anijatonē dovathivi vaetababiabatsi. Jivi picani bajaraponē cadenamaētonēta cobecētabiabatsi. Yajavataxucētabiabatsi cadenamaētonēta xaniavaetsia picani peecaenexa. Itsiata baitsi dovathivi peyajavaponaponaenē ucubabiaba cadenamaētonēmi. Dovathivi pejamatabēcueneta najetabajiravabiaba petusatuabelia. ³⁰ Nexata Jesús jumaitsi bajaraponējavabelia:

—¿Detsa pavēnēmē? jai Jesús.

Nexata bajaraponē navēnēpaeba.

—Tavēnē raja Legión, jai.

Bajarapacuenia navënëpaeba tsipaji dovathivi ayaibitsaëtoxfaneto tsijamatabëjnavanapatsi. ³¹ Bajarapadovathivi vajëta Jesúsjavabelia infiernojavabelia Jesús pitorobianiva. ³² Nexata bajarajota, imoxoyo petsutojavata, marranobitsaëtoxfaneto xaevanapa. Dovathivi bitso vajëta Jesúsjavabelia.

—Panetocopare patajonenexa marranobitsaëtoxfanetojavabelia, jai dovathivi.

Jesús nexata pevajëtsicueniatsi tocopata. ³³ Nexata dovathivi pebi vecuapitsapecatsi. Nexata marranobitsaëtoxfanetojavabelia baja junua dovathivi. Nexata daxita bajarapamarranobitsaëtoxfanetomi kujinaeyeca. Pucaxaneto itapajanituareca othopareca. Bajarajota daxita marranobitsaëtoxfanetomi meneta bubuna.

³⁴ Marrano pevetsivi itsa tane bajarapacueni, rëcëpeca. Pona, pacuene tane, petsipaebinexa tomarapijivijavabelia, petsipaebinexa vayafotusatojava penaevijavabelia ata. ³⁵ Nexata jivi ponarena petaenexa bajarapacueni. Jivi itsa parena Jesúsjavaberena, taeyeta dovathivi peyajavaponaponanëmi peecaejava Jesús pemuxuneneta. Penaxatatsijava baja bajaraponë naxatateca. Jamatejema baja. Xaniavaetsia eca. Nexata bajarapamonae kujunavatsi Jesús. ³⁶ Pamona cuenetanetsi Jesús pejamatejemayaexanaejava dovathivi peyajavaponaponanëmi, bajarapamonae paeba pepatsivijavabelia daxita pacuenia tane. ³⁷ Bajarapamonae bitso kujunavatsi Jesús. Nexata daxita Gerasa nacuapijivi jumaitsi Jesúsjavabelia:

—Pexaniacuene pacavajëtatsi. Ponare baja patajanacuavecua, jai Gerasa nacuapijivi Jesúsjavabelia tsipaji kujunavatsi.

Nexata baja Jesús runareca jera ënëabereca. Ponaejitsia baja. ³⁸ Nexata dovathivi peyajavaponaponanëmi bitso picani navajëca Jesúsjavabelia penaponanexa picani Jesús pepëta.

—Petuxanenë, netocopare tanaponanexa nepëta, jai picani Jesúsjavabelia.

Itsiata Jesús apo jejai. Jumaitsi bajaraponëjavabelia:

³⁹ —Ponare nijamonaejavabelia. Tsipaebianame pacuenia ayaicuene nijatuxanenë Dioso catoexana, jai Jesús.

Nexata baja bajaraponë pona. Tsipaebapona daxita pijatomarapijivijavabelia pacuenia Jesús jamatejemayaexanatsi.

Pacuenia Jesús copiaya namutoepatota jamatejemayaexana piavitaneva, pacuenia icatsia cotocaevi toasaëyaexana Jairo pexënatovayo, petëpaevayomi, yabara pelivaisi (Mt 9.18-26; Mr 5.21-43)

⁴⁰ Jesús icatsia pecovëyaberena naviarena jerata pucaxaneto itsapanaverena. Nexata jivi ayaibitsaëtoxfaneto copiapitatsi barëyaya. Tsipaji baja cajena copiaevetavanapatsi pepatsijavarena. ⁴¹ Nexata bajarajota napatajopa Jairovënë. Bajaraponë judíovi penacatuatabiabibo pevetsinë. Jairo pematabacabëta yayataeya Jesús pitabarata nucajunua. Pinijcuenia junata. Jumaitsi Jesúsjavabelia:

—Tapëta ponare tajaboyabelia, jai.

⁴² Bajarapacuenia Jairo jumaitsi Jesúsjavabelia tsipaji caevayo pexënatovayo totëpaejitsiatsi. Bajarapovayo xaina doce pavaibeje. Itsa Jesús napona Jairo pepëta, jivibitsaëtoxfaneto Jesús pepënaponaevitsi matatoyorotsia cënënanajetarubenatsi.

⁴³ Bajarapajivibitsaëtoxfaneto tuatujëta, itsava pijanacuene pecapunaevatsi nanajetaruca. Bajarapova pijanacuene pecapunaecujinaetsi, doce baja pavaibeje xaina. Beyajio tsabiabi bajarapajana. Daxita pexainaejavaximi navecuavereta pematamobita pevaëbivitsi. Itsiata baitsi jane itsanë ata pevaëbivitsi apo jamatejemayaexanaetsi bajarapavitanevecua. ⁴⁴ Nexata bajarapova ponataba Jesús pepënëvelia, jivibitsaëtoxfaneto tuatujëalia. Nexata bajarapova tojayataba Jesús penaxatatsijavacopia. Nexata bajarapapatota pijanacuenemi vecuajibitsi baja.

⁴⁵ Jesús nexata jumaitsi:

—¿Jipatsa tanaxatatsijava netojayataba? jai Jesús.

Daxitajivi jumaitsi Jesúsjavabelia:

—Xanë cajena apo cajayatabitsi, jai.

Nexata Pedrohana jumaitsi:

—Patajatuxanenë, jivibitsaëtoxaneto raja camatatoyorotsia cënënanajetarubena. Apo becaajayatsijibi. ¿Detsa xuajitsia: “¿Jipatsa tanaxatatsijava netojayataba?” jamë? Itsajiviyo raeta baja cajayataba, jai Pedrohana.

⁴⁶ Nexata Jesús jumaitsi:

—Itsajiviyo baja cajena tanaxatatsijava netojayataba. Yapëtaniji bajarapajiviyo taja-matejemayaexanaejava tasaëta, jai Jesús.

⁴⁷ Nexata petiriva jamatabëjumaitsi:

—Jesús baja yapëtane tanejamatejemayaexanaejava, jamatabëjai.

Nexata bajarapova najetabarena Jesús pitabarayaberena. Neconecojai pecajunavi. Pematabacabëta tonucajunua Jesús pitabarata. Bajarapova nexata navajunupaeba daxitajivi tuatujëta pacuene yabara tojayataba Jesús penaxatatsijava. Navajunupaebanua pacuena jamatejemayaexanatsi pejayatabijavata. ⁴⁸ Nexata Jesús jumaitsi bajarapovajavabelia:

—Xamë nesivajamatabëjumaitsimë: “Jesús penaxatatsijava itsa tojayatabianajë, tavi-tanejavami nevecuaajibi tsane,” nesivajamatabëjamë. Bajaraxuata jamatejemamë baja. Ponare baja jamatejema, jai Jesús bajarapovajavabelia.

⁴⁹ Bajarapacuenia Jesús pejumaitsanucaejavata namutoepatota, pataba jivitonë Jairo pijaboverena. Bajaraponë jumaitsi Jairojavabelia:

—Jairo, nexënatoyo rabaja tëpa. Pëtsa baja matavëjëa jamatabëitonotaponame Jesús, jai bajaraponë Jairojavabelia.

⁵⁰ Jesús jumetae ata bajarapajume, itsiata jumaitsi Jairojavabelia:

—Jairo, pëtsa najamatabëxainame. Najamatabëcuenecopare saya ëxanëjavaberena. Nexënatovayo raja jamatejema tsane, jai Jesús Jairojavabelia.

⁵¹ Itsa Jesús pata Jairo pijabota, apo tocopatsi ayaibitsaëto penajonenexa Jesús pepëta petëpaevayo pebocaejavabelia. Tocopata saya penajonenexa mapamatabëxëyoje. Pedro, Santiago, Juan, petëpaevayo paxa, pena, bajara saya pamatabëxëyo tocopata penajonenexa Jesús pepëta. Pamonaë Jesús pevajënaë ena Jairo pijabota, bajarapamonae Jesús pitsapaeyaexana. ⁵² Daxitajivi pinijicuenia matanueyaba petëpanucaevayo. Nexata Jesús jumaitsi:

—Pëtsa pamatanueyabame. Pejanava raja apo tëpae. Saya raja majitanuca, jai Jesús bajarapamonaejavabelia tsipaji yapëtane Jesús piasaëyaexanaejavanexa bajarapovayo.

⁵³ Bajarapacuenia Jesús pejumaitsijava, bajarapamonae saya Jesús jumecapocaponatsi. Tsipaji bajarapamonae yapëtane bajarapovayo baja picani pepacuene petëpaejava. ⁵⁴ Nexata Jesús petëpaevayo cobepita. Jumaitsi pinijijumeta:

—Pejanavayo, nonotabapunare, jai Jesús.

⁵⁵ Nexata bajarapacuenia Jesús pejumaitsijavata, petëpanucaevayomi nonotabapuna. Asaë baja icatsia petëpaevayomi. Nexata Jesús jumaitsi pejanavayo penajavabelia:

—Nexënatovayo pexaejava rajure, jai Jesús.

⁵⁶ Nexata pejanavayo paxa, pena ata, bitso jamatabëcuenenabenajacabeje. Nexata Jesús jumaitsi bajarapajivibejejavabelia:

—Pëtsa papaebamebeje itsajivijavabelia ata pacuene pacatoexanatsibeje, jai Jesús.

9

Pacuenia Jesús pijajivi itoroba Dioso pitorobilivaisi jivi petsipaebanajetarubenaenexa yabara pelivaisi

(Mt 10.5-15; Mr 6.7-13)

¹ Jesús junata pijajivi, doce ponëbeje, penacaetuatsinexa. Nexata Jesús jumaitsi bajarapamonaejavabelia mapacueniaje:

—Pacajamatabëcuene caējëpaeyaexanatsi rabaja papecacaējëpaejamatabëcuene dovathi peyajavajinavanapaevi ata panevecuacapitsapaponaenexa. Pacajamatabëcuene caējëpaeyaexanatsinua piavitanevi ata panejatejemayaexanaponaenexa.

² Patsipaebanajetarubenaename daxitajivijava pacuenia Dioso pijajivi evetsijitsia. Piavitanevi ata pajamatejemayaexanaponaename, jai Jesús pijajivijavabelia.

³ Jesús jane baja pijajivi penaropobivajënae, Jesús jumaitsi pijajivijavabelia mapacueniaje:

—Pëtsa itsacuenejava ata pacaponame panijanamutonexa. Pëtsa pacaponame naebo, doro ata, panemarue ata, palata ata. Caejava saya panenaxatatsijava pajumaponare. Pëtsa anijacamisabeje pacaponame. ⁴ Itsa papatabiabianame tomarata, caebota pamajitabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa paponaname, bajarapabovecua papitsapae-name. ⁵ Patomarata apo pacacopiapitsi tsane pexanialivaisi panetsipaebinexa, nexata pavecuaponaename bajarapatomara. Panevecuaponaevajënae bajarapatomara, bajarapatomarata panataxuatsapërëvarëbianame. Bajarapacuenia itsa panataxuatsapërëvarëbianame, yapëtaena bajarapatomarapijivi Diosojavabelia penaneconitsicue-ne apo papecacopiapitsixae papecanamuxunaevetsinexa panetsipaebilivaisi, jai Jesús pijajivijavabelia.

⁶ Bajaraxuacujinae Jesús pijajivi naropoba jane baja. Najetarubena daxitatomaraxijava. Tsipaebanajetarubena jane baja pexanialivaisi jivi pecapanepaelivaisinexatsi pibisiacuene pexanaeneconimivecua. Jamatejemayaexanaponaenua piavitanevi daxitajava.

Pacuenia Juanpijinë jivibautisabinëmi beyaxuabatsi yabara pelivaisi
(Mt 14.1-12; Mr 6.14-29)

⁷ Herodes, Galileanacua pevetsinë, vënëlivaisitanetsi daxita Jesús pinijicuene pexanaponaejava. Nexata Herodes najamatabëcueneepatajërërëcaeya najamatabëxaina Jesús yabara. Tsipaji itsamonae jamatabëcuenenavëxaniabiaya Jesús yabara jumai tsaponae: “Juanpijinë raeta jivibautisabinëmi petëpaecujinae icatsia asaë,” jai tsaponae Jesús yabara. Nexata bajarapacuenia itsamonae pejumaitsaponaejava Herodes pejumetaexae, najamatabëcueneepatajërërëcaeya najamatabëxaina Jesús yabara.

⁸ Itsamonae pijinia jumai tsaponae Jesús yabara:

—Bajayata raeta ponëmi ponapona, profeta Elíaspijinëmi, icatsia asaë, jai tsaponae itsamonae.

Itsamonae pijinia jumai tsaponae Jesús yabara:

—Bajayata raeta pamonaemi jinavanapa, profetavimiyajuvënënenë, icatsia asaë, jai tsaponae itsamonae Jesús yabara.

Bajarapacuenia itsamonae jamatabëcuenenavëxaniabiaya pejumaitsaponaejava Jesús yabara, Herodes jumetane.

⁹ Nexata Herodes jamatabëjumaitsi:

—Xanë bajayata tajajivi itorobajë Juanpijinë jivibautisabinëmi pebeyaxuabinexa. Nexata baja tajajivi Juanpijinëmi vësiucutaxuaba. Beyaxuaba baja. ¿De tsaeta nexata ponë pinijicuene pexanaponaejava, vënëlivaisitaeyabiabajë? jamatabëjai Herodes Jesús yabara.

Bajaraxuata Herodes bitso jamatabëtane Jesús.

Pacuenia Jesús pexaejava rajuta cinco mil ponëbeje yabara pelivaisi
(Mt 14.13-21; Mr 6.30-44; Jn 6.1-14)

¹⁰ Jesús pitorobivi, apóstolevi, jivi pexanialivaisi petsipaebanajetarubenaecujinae, naviabanajetarubena baja Jesúsjavaberena. Nexata bajarapamonae pepatsicujinae

Jesúsjavaberena, navajunupaeba Jesúsjavabelia daxita pacuenia exanavanapa. Nexata Jesús barëpona pijajivi pesajinaejavabelia, Betsaidatomara imoxoyojavabelia. ¹¹ Itsiata baitsi jane jivi ayalbitsaëtoخانeto pëtanetsi. Nexata bajarapamonae Jesús pecovëvelia pëjaitatsi. Nexata bajarapamonae itsa pata Jesúsjavata, Jesús copiapita xaniavaetsia. Nexata Jesús tsipaeba bajarapamonaejavabelia pacuenia Dioso eveta pijajivi mapanacuataje. Jesús jamatejemayaexananua piavitanevi.

¹² Itsa baja caniviyo tsaponae, Jesús pijajivi doce ponëbeje cujibarenatsi. Jumaitsitsi:

—Itorobaremelia baja jivi peponaenexa imoxoyo penaetomaraxijavabelia, imoxoyo penaebonëjavabelia ata. Bajarabelia bajarapamonae namajitsiana. Pexaejavanua namitsavajëtsiana. Majotaje ajibi pexaejava. Tsipaji itsajivi ata pijabo apo xinae majotaje, jai Jesús pijajivi.

¹³ Nexata Jesús jumaitsi pijajivijavabelia:

—Paxamë parajure pexaejava, jai Jesús.

Nexata Jesús pijajivi jumaitsi:

—Paxainajë saya cinco papanbëbeje, anijanëyobeje dujuainëyobeje yajava. ¿Jitsipame tsaja patacomuacaenexa pexaejava daxita mapamonae penaxaenexaje? jai Jesús pijajivi.

¹⁴ Bajarapajivibitsaëtoخانeto bejamatabëcuene cinco mil ponëbeje. Nexata Jesús jumaitsi pijajivijavabelia:

—Paenaeyaexanare pepobitsaëtonë, bejamatabëcuene cincuenta ponëbeje tsaponae caebitsaëtota, jai Jesús pijajivijavabelia.

¹⁵ Nexata Jesús pijajivi bajarapacuenia exana. Enaeyaexana jane baja daxita jivibitsaëtoخانeto. ¹⁶ Nexata Jesús pita cinco papanbëbeje, anijanëyobeje dujuainëyobeje yajava. Athëbëa benaëcotsia. Jumaitsi Diosojavabelia:

—Pexaniacuene panetoexaname. Panerajutame pataxaejava, jai Jesús.

Bajaraxuacujinae Jesús pan epatsicacapona, dujuainëyobeje yajava. Pepatsicacaejava pijajivijavabelia rajutapona petsicobetsanaenexa daxitajivi. ¹⁷ Daxita xaniavaetsia nabane. Bajaraxuacujinae jivi peyajuvënëcopabejebijavanë, Jesús pijajivi vënëba doce xuabeje bemapirecuenia pexanaejavanë.

Pacuenia Pedro jumaitsi Jesúsjavabelia: “¡Xamë raja Cristomë!” jai yabara pelivaisi (Mt 16.13-19; Mr 8.27-29)

¹⁸ Itsamatacabi Jesús caenë vajëta Diosojavabelia pijajivi pitabëta. Nexata xuacujinae Jesús jumaitsi pijajivijavabelia:

—¿Detsa jivi jumai tsabiabi xanë yabara? ¿De tsaeta xanë ponënë? jai Jesús pijajivijavabelia.

¹⁹ Nexata Jesús pijajivi jumaitsi:

—Itsamonae xamë yabara jumai tsabiabi: “Juanpijinë raeta jivibautisabinëmi icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta. Profeta Elíaspijinë, ponëmi bajayata ponapona, icatsia asaë,” jai tsabiabi. Itsamonae pijinia jumai tsabiabi: “Bajayata raeta Diosojumepaebivimi profetavimiyajuvënëne icatsia asaë,” jai tsabiabi xamë yabara, jai Jesús pijajivi.

²⁰ Nexata icatsia Jesús jumaitsi pijajivijavabelia:

—¿Detsa nexata paxamë pajamatabëitsimë xanë yabara? ¿Detsa xanë ponënë? jai Jesús pijajivijavabelia.

Nexata Pedro jumaitsi Jesúsjavabelia:

—Xamë raja cajena Cristomë, athëbëvetsica Dioso pecaitorobinëtsica jivi necapanapenexa. Xamë cajena Dioso pexënatomë, jai Pedro Jesúsjavabelia.

Pacuenia Jesús tajëvelia navajunupaeba pebeyaxuabijavanexatsi yabara pelivaisi (Mt 16.20-28; Mr 8.30-9.1)

²¹ Jesús jumeitaveta pijajivi. Jumaitsi mapacueniaje:

—Pëtsa pajumaitsimë jivijavabelia: “Jesús raja Dioso pexënato,” pajamë pëtsa, jai Jesús.

²² Nexata Jesús pebeyaxuabijavanexatsi, tajëvelia navajunupaeba. Jumaitsi pijajivijavabelia mapacueniaje:

—Xanë, Daxitajivi Pematapijinënë, pinijicuenia bejiobinë tsane. Judíovi pijaancianovi, sacerdotevi penamatacaitorobivina, judíovi pecujarubivina, apo nejumecovënëtsi tsane xanë Cristonëcuenenë. Nexata bitso nebejiobiaexanaena. Bajaraxuacujinae nebeyaxuabiana. Itsiata baitsi jane tatëpaecujinae, acueyabi matababita, icatsia asaënë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

²³ Bajaraxuacujinae Jesús jumaitsi daxitajivijavabelia:

—Pajivi jitsipa tanepënaponaejava, bajarapajivi copatsi penatojitsipaecuenia pexanaenexa penajamatabëxainabiabijavami. Exanaponapona taitorobicuenia. Bajarapajivi caematacabi canacujitsia najamatabëcueneveretsinua, bejiobiaexanaejitsia atatsi, beyaxuabijitsia atatsinua, Dioso pejumelivaisi yabara piamatabëcuenesaë tsaponaponaenexa. Nexata jane baja xuacujinae nepënaponaena. ²⁴ Pajivi exanaponapona penatojitsipaecuenia, apo xainae tsane matababi apo peverevereaejave. Pajivi xanë tajamatabëcueneta copata penatojitsipaecuenia pexanaejavami, bajarapajivi xainaena matababi apo peverevereaejave. ²⁵ Pajivi exanaponapona penatojitsipaecuenia, bajarapajivi Diosovecua naxuabiana. Nexata bajarapajivi daxitacuene xainae ata mapanacuapijicueneje, itsiata nacuerata. Tsipaji pexainaecuene apo capanepae tsanetsi Diosojavabelia. ²⁶ Pajivi tajajivitonë ata, navënëlivaisicaura tsane jivijavabelia xanë tajajivitonëcuene, tanejumecovënëtsijava ata yabara, nexata juya xanë, Daxitajivi Pematapijinënë, bajarapajivi tajajivitonë ata, tajajivitonëcuene vënëlivaisicauranë tsane taxa Diosojavabelia. Bajarapajivi vënëlivaisicauranë tsane pamatacabi icatsia patsianicajë taxa Dioso pijapenivenivenaecotia yajava, tananeconitsiaexanaenexa daxita pijaneconi pexainaevi. Yajavapatsianicajënu Dioso pijaängelevi. ²⁷ Xaniajanë pacuenia pacatsipaebijitsiatsi. Daxita paxamë patëpaenejevamë, Dioso taxuxuabiana daxita pijajivi pevetsicuene mapanacuataje. Nexata paxamëyajuvënëvi pepuatae tsane Dioso petaxuxuabijava daxita pijajivi pevetsicuene mapanacuataje, tēpaena, jai Jesús bajarapamonaejavabelia.

Pacuenia Jesús caepatoyo perabënivenivenataba yabara pelivaisi
(Mt 17.1-8; Mr 9.2-8)

²⁸ Jesús petëpaejavanexa tajëvelia penayajunupaebicujinae, bejamatabëcuene ocho pamatabibejecujinae, Jesús pijajivi, acueyabi ponëbeje, barëjunaya petsutojumabetsia. Barëjunaya mapamatabëxëyoje: Pedro, Santiago, Juan. Bajarapamatabëxëyo Jesús barëjunaya petsutojumabetsia pevajëtsinexa Diosojavabelia. ²⁹ Diosojavabelia pevajëtsijavata, Jesús itabaranivenivena. Penaxatatsijava ata bitso nivenivenaeya niojai. ³⁰ Bajarajota jemata naitajëta anijanëbeje, ponëmibeje bajayata tēpa. Bajaraponëbeje Jesús barëcuaicuajitsi. Bajaraponëbeje tsaena Moiséspijinëbeje Elíaspijinëbeje. ³¹ Bajaraponëbeje matatoyorotsia nivenivenabeje. Jesúsbana nabarëcuaicuajijai Jesús petëpaejavanexa yabara. Pacuenia Jesús bejiobiaexanaejitsiatsi Jerusalén tomarata, bajarapacuene yabara nabarëcuaicuajijai. ³² Pedrohana penajuajinavanapaevi bitso itamajitsipanae ata, itsiata naëcotavanapa. Nexata bajarapamonae tane Jesús matatoyorotsia penivenivenaejava. Tanenua Moisésbeje Elíasbeje pebarëcuaicuajjavatsi Jesús. ³³ Itsa baja Moisésbeje Elíasbeje Jesúsvecua ponaejitsiatsibeje, nexata bajarapaepatota Pedro jumai tsaxuabi Jesúsjavabelia:

—¡Patajatuxanenë, pijacuaxae panebarëponame! Pacatoexanaenatsi acueyabi pabobërëtoje. Itsabobërëto xamënexa tsane. Itsabobërëto Moisésnexa tsane. Itsabobërëto Elíasnexa tsane, jai Pedro.

Pedro xaniavaetsia najamatabëxainaenejeva, bajarapacuenia jumaitsi. ³⁴ Pedro abaxë itsa cuaicuajai tsanucæ, itarërëbo mataacataxuabatsi daxita bajarapamonæ. Jesús pijajivi najunaviaca itsa mataacataxuabatsi itarërëbo. ³⁵ Nexata bajara-paitarërëbojavavetsica Dioso jumaitsitsica:

—Mara ponë taxënato, tasivanëje. Bajaraponë panamuxunaevere, jaitsica Dioso itarërëbojavavetsica Jesús pijajivijavabelia.

³⁶ Itsa baja Dioso najumevereta bajarapacuenia pejumaitsijavatsica, Jesús pijajivi tane caenë baja Jesús penucæjava bajarajota. Jesús pijajivi tae ata bajarapacuenæ, moya saya jinavanapa. Bajarapamonæ abaxë apo tsipaebi itsamonæjavabelia, tae ata bajarapacuenæ.

Pacuenia Jesús jamatejemayaexana pejevaxinë, dovathi peyajavaponaponæ, yabara pelivaisi

(Mt 17.14-21; Mr 9.14-29)

³⁷ Jesús pebarëcuaicuajicujinae Moisésbeje Elíasbeje, pijajivi acueyabi ponëbeje yajava, naviatsica petsutojumavetsica. Nexata mataenenatsi jivi ayaibitsaëttoxaneto. ³⁸ Nexata caenë bajarapajivi bitsaëttoxanetoyajuvënënë pinijijumeta jumaitsi Jesúsjavabelia:

—Jesús, nitaxutotsoniataema. Netotaema taxënatonëyo. Caenëyo rabaja tsipaji xainajë. ³⁹ Dovathi vaetababiabatsi. Nexata jemata aëjai tsabiabi. Tëpajoneyaexanabiabatsi. Daxitanë neconecojaiya aperabëbaba tsatababiabireca. Nexata bajarajota pecuibothamu tsabiabi. Bitso bejibiaexanabiabatsi. Dovathi abaxë apo jamatabëcopatsitsi. ⁴⁰ Picani raja nijajivijavabelia jumaitsinë: “Panetovecuacapitsapare dovathi,” janë. Itsiata apo caëjëpaetsi tanetovecuacapitsapaenexa, jai bajaraponë Jesúsjavabelia.

⁴¹ Nexata Jesús jumaitsi daxita pijajivijavabelia:

—¡Paxamë baja rovia apo pajumecovënëtsimë Dioso papecayavenonæjavanexa! Bajaraxuata apo pacajamatabëcuenecaëjëpæ pejevaxinë panevecuacapitsapaenexa dovathi. ¡Paneajamatabëcuenetajavi baja rovia! ¿Detsa paepatojebi abaxë paxamëjavabelia ajamatabëcuenesaënë tsaponaponæ tsane patanejumecovënëtsinexamë? jai Jesús daxita pijajivijavabelia.

Nexata Jesús jumaitsi pejevaxinë paxajavabelia:

—Barërenamëre nexënatonëyo, jai Jesús.

⁴² Ajena pejevaxinë imoxoyotabarena Jesúsjavabarena, dovathi icatsia irata xuabatsi pejevaxinë. Daxitanë aperabëbaba tsatabireca. Nexata Jesús itaveta dovathi pejevaxinë pevecuapitsapaenexatsi. Nexata baja Jesús jamatejemayaexana pejevaxinë. Tocanavi-ata baja pejamatejemanë paxajavabelia. ⁴³ Daxitajivi bitso jamatabëcuenenabenajaca Dioso pesaëta Jesús pevecuacapitsapaexæ dovathi bajaraponëyo.

Pacuenia icatsia Jesús tajëvelia navajunupaeba pebeyaxuabijavanexatsi yabara pelivaisi

(Mt 17.22-23; Mr 9.30-32)

Jivibitsaëttoxaneto Jesús jamatabëcuenëbarëyaya tanetsi daxita Jesús pexanaejava yabara. Nexata Jesús pebeyaxuabijavanexatsi, tajëvelia navajunupaeba pijajivijavabelia. Jesús jumaitsi mapacueniaje:

⁴⁴ —Xaniavaetsia panenamuxunaevere. Pëtsa panacofënëtame. Xanë, Daxitajivi Pematapijinënë, necanajetsiana itsamonæ pecobeyabelia, jai Jesús pijajivijavabelia tajëvelia penavajunupaebijavata pebeyaxuabijavanexatsi.

⁴⁵ Itsiata baitsi jane Jesús pijajivi apo jumeyapëtae xua yabara Jesús jumaitsi. Baitsi bajarapamonæ Dioso apo tocopatsitsi pejumeyapëtaeyaniva xua yabara Jesús jumaitsi. Bajarapamonæ ajumeura Jesúsjavabelia peyanijobijava xua yabara Jesús jumaitsi.

Pacuenia Jesús pijajivi: “¿Detsa ponë vaxaitsiyajuvënënë nacavecuaayaijamatabëcuenenë bitso?” najai tsanajetarubena namutua yabara pelivaisi (Mt 18.1-5; Mr 9.33-37)

⁴⁶ Jesús pijajivi anaeya namutua najumenotsiaya nalivaisitanajetarubena. Najumaitsi tsanajetarubena bajarapamonae:

—¿Detsa ponë vaxaitsiyajuvënënë nacavecuaayaijamatabëcuenenë bitso? najai tsanajetarubena Jesús pijajivi.

⁴⁷ Nexata Jesús pijajivi jamatabëcueneyapëtane pacuenia najamatabëxaina. Nexata Jesús cobepita pejevaxinëyo. Pemuxuneneta nuteta. ⁴⁸ Jumaitsi pijajivijavabelia:

—Pajivi copiapita tanejumecovënëtsijiviyo, mapitsipejevaxinëyo ataje, xanë taniji tanecopiapitsijava. Pajivi necopiapita, ëxanë apo necopiapitsi. Ponë nitoroba, neyjavacopiapita. Nexata pëtsa bepaayaijamatabëcuenëvimë panataneme. Tsipaji ponë paxamëyajuvënënë beveliajamatabëcuenenë natane paxamëvecua, bajaraponë bitso ayaijamatabëcuenenë taenatsi Dioso daxita paxamë matatoxenetsia, jai Jesús pijajivijavabelia.

Pacuenia Jesús jumaitsi pijajivijavabelia itsa vënëlivaisitane itsanë dovathi jivivecua pecapitsapaejava Jesús pevënëta yabara pelivaisi (Mr 9.38-40)

⁴⁹ Jesús pijajivitonë, Juan, jumaitsi Jesúsjavabelia:

—Tajatuxanenë, pataniji itsanë nevënëta dovathi jivivecua pecapitsapaejava. Itsiata bajaraponë apo paxanëyajuvënënë. Nexata paitavetajë bajaraponë dovathi jivivecua pecapitsapaponaejava, jai Juan.

⁵⁰ Nexata Jesús jumaitsi Juanjavabelia:

—Pajivi pibisiajamatabëcuene apo najamatabëxainae vaxaitsijavaberena, bajarapajivi nacajamatabëcueneyavenona. Bajarapajivi bevaxaitsijamatabëcuenëjivi. Bajaraxuata pëtsa baja paitavetame bajaraponë xanë tavënëta jivivecua dovathi itsa capitsapapona, jai Jesús Juanjavabelia.

Pacuenia Jesús jumeitaveta Santiagobeje Juanbeje yabara pelivaisi

⁵¹ Itsa baja imoxoyo pevajënae pamatacabi Jesús athëbëabetsia Dioso caponaejitsi, ajamatabëcuenesaë baja peponaenexa Jerusalén tomarabelia. ⁵² Jesús nexata pevajënaeyabelia pijajivitonëbeje natsivajënaeitoroba, Santiagobeje Juanbeje. Bajaraponëbeje ponabeje Samaria nacuata peecaetomarajavabelia petocovaetsinexabeje pabota picani Jesús patsijitsia. ⁵³ Itsiata baitsi jane Samaria nacuapijivi apo jamatabëcopiapitsitsi Jesús. Tsipaji baja bajarapamonae yapëtane Jesús peponaejavanexa Jerusalén tomarabelia. ⁵⁴ Nexata Jesús pijajivitonëbeje itsa yapëtanebeje Samaria nacuapijivi Jesús apo pecopiapitsijavanexatsi, nexata jumaitsibeje Jesúsjavabelia:

—Patajatuxanenë, bajayata profeta Elíaspijinë vajëta Diosojavabelia Dioso pitorobinexatsica isotocotia peverebiabinexa piamatabëcuenebejevi. ¿Baja tsaja pitsicuene jitsipame patavajëtsinexa Diosojavabelia peveriapaenexatsi pamona apo jitsipae pecacopiapitsijava? jaiabeje Jesús pijajivitonëbeje.

⁵⁵ Nexata Jesús naëcota pijajivitonëbejejavabelia. Jumeitaveta pijajivitonëbeje. Jesús jumaitsi:

—Paxamëbeje apo pajamatabëcueneyapëtaemëbeje Espiritu Santo, ponë pacayajavaponaponabeje. ⁵⁶ Xanë, Daxitajivi Pematapijinënë, apo patsinëtsica taverebiabinexa jivi. Biji rajane patsicajë tacapanepaenexa jivi pibisiacuene pexanaeconivecua, jai Jesús pijajivitonëbejejavabelia.

Nexata baja Jesús, pijajivi yajava, pona itsatomarabelia.

Pacuenia picani itsamonae Jesús jamatabëpënaponatsi yabara pelivaisi (Mt 8.19-22)

⁵⁷ Jesús pijajivi namutua peyajavanajetarucæjavata, judíovi pecujarubinë jumaitsi Jesúsjavabelia:

—Jesús, itsabelia poname, capënaponaenatsi cajena, jai judíovi pecujarubinë.

⁵⁸ Nexata Jesús jumaitsi bajaraponëjavabelia:

—Itsa nepënaponaejitsipame, apo napatabiabimë tsipae tajabota nenacueraevetabibinexa. Tsipaji tajabo apo xainaenë. Namó pijamëthëanë xaina pepatabiabinxaxa. Baratsui ata pematapenanë xaina. Itsiata baitsi jane xanë, Daxitajivi Pematapijinënë, itsajavabelia ata apo xainaenë, itsajota nacueraevetabibijitsianë, jai Jesús.

⁵⁹ Bajaraxuacujinae Jesús jumaitsi icatsia itsanëjavabelia:

—Nepënaponare, jai Jesús.

Nexata bajaraponë jumaitsi:

—Tajatuxanenë, caepatoyo abaxë necopare tamëthëtsinexa taxa petëpaenë, jai bajaraponë Jesúsjavabelia.

⁶⁰ Jesús nexata jumaitsi bajaraponëjavabelia:

—Copare matakabi apo pevereverecæjava apo pexainævinexa pemëthëcaenexatsi nijamonaemi itsa tëpa. Xamë saicaya nepënaponare jivi netsipaebinxaxa pacuenia Dioso evetsijitsia daxita pijajivi mapanacuataje, jai Jesús bajaraponëjavabelia.

⁶¹ Bajaraxuacujinae icatsia itsanë jumaitsi Jesúsjavabelia:

—Tajatuxanenë, jitsipajë tacapënaponaæjava. Itsiata abaxë caepatoyo necopare tanapëjibinxaxa tajabota pejinavanapaevijavabelia, jai bajaraponë.

⁶² Nexata Jesús jumaitsi bajaraponëjavabelia:

—Pajivi Dioso tonacuenebi ata, itsiata jamatabënajinabiaba pijaperujamatabëcuene, xua exanabiaba, bajarapajivi apo caëjëpaetsi xaniavaetsia Dioso petonacuenebinxaxa pitorobicueniatsi. Tsipaji najamatabëcueneepatajërëcaeya nacueneba, jai Jesús bajaraponëjavabelia.

10

Pacuenia Jesús pijajivi itoroba, setenta ponëbeje, Dioso pejumelivaisi jivi petsipaebanajetarubenaenexa yabara pelivaisi

¹ Jesús icatsia itsamonæ itapeta pijajivinexa, setenta ponëbeje. Bajarapamonæ Jesús itoroba anijanëbeje tsaponæ Jesús pevajënaeya Dioso pejumelivaisi jivi petsipaebanajetarubenaenexa. Itoroba petsipaebanajetarubenaenexa daxita tomananëjava, tsiquiritomaraxijava ata, itsaxuayo Jesús najetarucæjitsia. ² Jesús pijajivi penaropobivajënae, Jesús jumaitsi pijajivijavabelia mapacueniaje:

—Xaniajanë pacuenia pacatsipaebijitsiatsi. Ayaipabi pexainaenë caecuenia uba ayajava peubijava. Nexata baja itsa tonaveretatsi peubijava, caejiviyobeje tonotatsi. Nexata notsi ata, abaxë bitso ayajava tosajinatsi penotsinexa. Bajara pijinia itsi jivi ata Diosojavabelia penajamatabëcuenecopabivinexa. Abaxë sajina ayaibitsaëtöxaneto. Itsiata baitsi jane paxamë Dioso panetonacuenebivi pacaeviyomëbeje saya. Bajaraxuata Diosojavabelia pavajëre icatsia Dioso pijajivi pematatsënëa itsamonæ pitorobinxaxa papeyavenonaenexa. ³ Paponare baja Dioso pejumelivaisi jivi panetsipaebanajetarubenaenexa. Panayajivitaeyajinavanapaename. Pacaitorobianatsi raja bitso pibisiacuenë pexanabiabivijavabelia. Pacuenia ovejaxi tsiayaitsi itsa jinavanapa pianæpanævi nevëthë tuatuajëata, bajarapaitsimë tsane. ⁴ Pëtsa pacaponame itsacuenëjava ata, doró ata, palata ata, zapato ata. Itsa pabajacobianame itsajivi namutoepatota, pëtsa bajayajebi pabarëcuaiçuaiçiamë tsanunubenaë panenajematsiyaniva.

⁵ Itsa pajonejitsiamë itsamonæ pijaboyalia, panejonevajënaelia copiaya pajumaitsimë tsane Diosojavabelia: “Dioso, yavenonare mapabopijivije jamatabëcuenexanepanaeya pejinavanapaenexa,” pajamë tsane copiaya Diosojavabelia. ⁶ Bajarapabo pexainaenë

itsa jitsipaena pejamatabëcuene xanepanaeyaexanaenexatsi Dioso, nexata bajaraponë jamatabëcuene xanepanaeyaexanaenatsi Dioso. Itsa apo muxujitsipae tsane bajarapacuenia panejumaitisijava, nexata Dioso apo jamatabëcuene xanepanaeyaexanae tsanetsi bajaraponë. ⁷ Itsajota papatabiabianame, caebota pamajitabiabianame. Pëtsa panatixitaponame itsaboxijavabelia. Aurajibia paxaeyabiabianamenua xua pacaabata bajarapabota. Pëtsa pauramë panexaejava papecarajutsijava yabara. Tsipaji panetsipaebixae patacaitorobilivaisi, pacarajutsiana panexaejava. Tsipaji itsajivi itsa tonacueneba itsanëjavabelia, barajutatsi pexaejava. ⁸ Itsa papatabiabianame tomarata, itsa pabota bajarapatomarapijivi xaniavaetsia pacacopiapita, nexata panaxaename xua pacaabata. ⁹ Bajarapatomarata pajamatejemayaexanaename piavitanevi. Pajumaitsimë tsane bajarapatomarapijivijavabelia: “Dioso daxita pijajivi pevetsimatacabinexa, imoxoyo baja pevajënae pecopiapatsinexa,” pajamë tsane. ¹⁰ Itsiata baitsi jane patomarata panepatsicujinae apo pacacopiapitsi tsane, bajarapatomarapijicallejavata panubenaename. Pajumaitsimë tsane bajarapatomarapijivijavabelia mapacueniaje: ¹¹ “Panijatomarapijiatapërë patataxuta rubena. Nexata panavetaxuvarëbajë. Bajarapacuenia panavetaxuvarëbajë panenayapëtaenexa Diosojavabelia panenaneconitsijava. Pananeconitame Diosojavabelia. Tsipaji apo panecopiapitsimë patanenamuxunaevetsinexamë palivaisi picani pacatsipaebijitsiatsi. Itsiata panenamuxunaevere paneyapëtaenexa mapalivaisije. Dioso daxita pijajivi pevetsimatacabinexa, imoxoyo baja pevajënae pecopiapatsinexa,” pajamë tsane. ¹² Xaniajanë pacuenia pacatsipaebijitsiatsi. Pamatacabi Dioso naneconitsiaexanaena daxita pijaneconi pexainaevi, bajarapamatacabi bitso ayaicuenia Dioso naneconitsiaexanaena patomarapijivi apo pacacopiapitsi tsane. Paneconivajëtota bajayata Dioso naneconitsiaexana Sodoma tomara-pijivimi, bajarapaneconivajëto matatoxenetsia Dioso naneconitsiaexanaena patomara-pijivi apo pacacopiapitsi tsane, jai Jesús pijajivijavabelia, setenta ponëbejejavabelia.

Pacuenia Jesús jumaitsi patomarabejepijivi Dioso xuabijitsia infiernojavabelia apo pejumecovënëtsixaetsi yabara pelivaisi

(Mt 11.20-24)

¹³ Icatsia Jesús jumaitsi pijajivijavabelia, setenta ponëbejejavabelia:

—¡Bitso bejiobi tsane Corazín tomarapijivi! ¡Bitso bejiobi tsane Betsaida tomarapijivi ata! Pinijicuene Dioso pesaëta taexanaejavanë, xua itsajivi ata apo caëjëpaetsi pexanaenexa, bajarapatomarabejepijivi tae ata, itsiata apo nejumecovënëtsi. Apo copabi pibisiacuene pexanabiabijava. Apo najamatabëcuenepënëyorotsi Diosojavabelia. Bajayata Tiro tomarapijivimi, Sidón tomarapijivimi ata, petuatuajëta bajarapitsipinijicuene itsa tsitaexanaejitsipajë, nexata bajarapamonaemi copabijitsipa pibisiacuene pexanaejava. Najamatabëcuenepënëyorotsipa Diosojavabelia. Bajarapamonaemi nexata pibisiacuene pexanaebiabineconi bitso yajamatabëcuenebëjai tsipae. Nexata Diosojavabelia petsitanajamatabëcueneitajëtsinexa peyajamatabëcuenebëjaijava pibisiacuene pexanabiabineconi, naxatabijitsipa piayopapaëbërëjavanë. Enaejitsipa irata. Ipumana ata natsimataothocaejitsipa bitso peyajamatabëcuenebëjaixae pibisiacuene pexanabiabineconi. ¹⁴ Itsiata baitsi jane Corazín tomarapijivi, Betsaida tomarapijivi ata, tae ata pinijicuene Dioso pesaëta taexanaejavanë, apo nejumecovënëtsi. Nexata pamatacabi Dioso naneconitsiaexanaena daxita pijaneconi pexainaevi, bajarapamatacabi bitso ayaicuenia Dioso naneconitsiaexanaenatsi. Paneconivajëtota bajayata Dioso naneconitsiaexana Tiro tomarapijivimi, Sidón tomarapijivimi ata, bajarapaneconivajëto matatoxenetsia Dioso bitso ayaicuenia naneconitsiaexanaena Corazín tomara-pijivi, Betsaida tomarapijivi ata. ¹⁵ Capernaum tomarapijivi picani najamatabëxaina Dioso pecaponaejavatsi athëbëabetsia. Itsiata baitsi jane bajarapamona apo tanejumecovënëtsixae, Dioso xuabianatsi infiernojavabelia, jai Jesús Corazín tomarabeje Betsaida tomarabejepijivi yabara.

¹⁶ Icatsia Jesús jumaitsi pijajivijavabelia, setenta ponëbejejavabelia:

—Pajivi pacanamuxunaevetsiana, bajarapajivi taenajë xanë tanenamuxunaevetsijava. Pajivi pacanayajiviitavetsiana, bajarapajivi taenajë xanë tanenayajiviitavetsijava. Bajarapajivi Dioso ata taenatsi Dioso penayajiviitavetsijava. Bajarapacuenia Dioso ata taenatsi penayajiviitavetsijava tsipaji xanë Dioso nitoroba, jai Jesús pijajivijavabelia Jesús pijajivi setenta ponëbeje pitorobivajënaeya.

Nexata jane baja Jesús pijajivi naropoba. Dioso pejumelivaisi jivi tsipaebanajetarubena daxita tomaranëjava. Saicaya navecuanajetarubena anijanëbeje tsaponae.

Pacuenia Jesús pijajivi, setenta ponëbeje, naviabanajetarubena, Dioso pejumelivaisi jivi daxitanacuanëjava petsipaebanajetarubenaecujinae, yabara pelivaisi

¹⁷ Jesús pijajivi, setenta ponëbeje, Dioso pejumelivaisi jivi daxitanacuanëjava petsipaebanajetarubenaecujinae, barëyaya naviabanajetarubena Jesúsjavaberena. Nexata pepatsicujinae bajarapamonae jumaitsi Jesúsjavabelia:

—Tajatuxanenë, dovathivi baja cajena ita paitavetaponajë nevënëta, panejumecovënëtabiaba, jai bajarapamonae Jesúsjavabelia.

¹⁸ Jesús nexata jumaitsi pijajivijavabelia:

—Xanë baja cajena taniji dovathi athëbëvetsica pejopaejavatsica pacuenia yamaxë bajopaica. ¹⁹ Xanë baja cajena pacajamatabëcuene cajëpaeayaexanatsi papecajëpaejamatabëcuene panejamatabëcuene matatoxenetsinexa vajavajabitsaënë dovathi. Nexata jomo pacuetsacuetsanae atamë tsane, aqueto ata pacuetsacuetsanae atamë tsane, apo pacaitsacueniabi tsane. ²⁰ Itsiata pëtsa bitso pasivajamatabëcuenebarëyamë dovathi ita paitavetame papecajumecovënëtsijava. Bitso jane pasivajamatabëcuenebarëyamëre tsavanapae Dioso papijajivixaemë Dioso papecavënëyaquinarubijava athëbëtatsia, jai Jesús pijajivijavabelia, setenta ponëbejejavabelia.

Pacuenia Jesús jamatabëcuenebarëya yabara pelivaisi (Mt 11.25-27; 13.16-17)

²¹ Jesús bitso jamatabëcuenebarëyayaexanatsi Espiritu Santo. Nexata Jesús jumaitsi paxa Diosojavabelia:

—Axa, nevetsinë athëbëtatsia. Nevetsinë mapanacuajava ataje. “Ayaijamatabëcuenenëmë bitso,” cajaitsi. Tsipaji pamonae bitso apo penacujarubivi ata, yapëtaeyaexaname pacuenia itsamatacabi daxita nijajivi evetsijitsiamë mapanacuataje. Bajarapamonae yapëtaeyaexaname pexanialivaisi, xanë talivaisi, palivaisi vecuamatayatame bitso peyapëtaevi mapanacuapijilivaisije. Bajarapalivaisi vecuamatayatame bitso penacujarubivi ata mapanacuapijicuene yabaraje. Bajarapacuenia exaname tsipaji baja exaname nejitsipaecuenia, jai Jesús paxa Diosojavabelia pevajëtsijavata.

²² Icatsia Jesús jumaitsi pijajivijavabelia, jivijavabelia ata:

—Taxa Dioso baja cajena netocopata tayapëtaenexa daxitacuene. Itsajivi ata apo nejamatabëcueneyapëtae pacuenia xanë jamatabëcueneitsinë, Dioso pexënatonë. Caenë, taxa Dioso, nejamatabëcueneyapëtane. Itsajivi ata apo jamatabëcueneyapëtae pacuenia taxa Dioso jamatabëcueneitsi. Caenënë, xanë pexënatonë, jamatabëcueneyapëtaniji pacuenia taxa Dioso jamatabëcueneitsi. Pamonae tojitsipajë tayapëtaeyaexanaenexa pacuenia taxa Dioso jamatabëcueneitsi, bajarapamonae ata yapëtaeyaexanaenajë, jai Jesús pijajivijavabelia, jivijavabelia ata.

²³ Nexata Jesús napënëyorota. Èpijajivijavabelia jumaitsi:

—Paxamë baja pajamatabëcuenebarëyamë panetaexae pacuene baja pataeponame. ²⁴ Xaniajanë pacuenia pacatsipaebijitsiatsi. Bajayata ayaibitsaëto profetavimi necopievetavanapa picani tanetaenexa tapatsijavatsica. Nacuaevetsivimi ata necopiaeve-tavanapa picani tanetaenexa tapatsijavatsica. Itsiata netaenejeva tapatsijavatsica,

bajrapamonaemi tēpa baja. Jamatabējumetaeyabiabanua picani palivaisianē baja ae-conoxae paxamē pacatsipaebaponatsi. Itsiata apo jumetaenejeva bajrapalivaisinē, bajrapamonaemi tēpa baja, jai Jesús pijajivijavabelia.

Pacuenia pexaniajamatabēcuenenē, Samaria nacuapijinē, yavenona itsanē yabara pelivaisi

²⁵ Itsamatacabi Jesús livaisi tsipaebanuca pijajivijavabelia. Nexata bajarajota judíovi pecujarubinē nonotapuna. Bajraponē Jesúsjavabelia jamatabēcuenējēbiaya jumaitsi:

—Jesús, ¿detsa xua exanaenajē Dioso tanerajutsinexa matacabi apo pevereverecaejava? jai judíovi pecujarubinē.

²⁶ Nexata Jesús jumaitsi judíovi pecujarubinējavabelia:

—¿Detsa jane jumaitsi bajarapacuenē yabara bajayata Dioso Moiséspijinēta penajumecopatsilivaisi jivi pejumecovēnētsinexa? jai Jesús.

²⁷ Nexata judíovi pecujarubinē jumaitsi Jesúsjavabelia:

—Bajayata Dioso Moiséspijinēta penajumecopatsilivaisi jumaitsi mapacueniaje: “Daxita panejamatabēēthētojavavetsina, daxita panejamatabēcueneta ata, daxita panesaēta ata, daxita panenajamatabēxainaesaēta ata, pasivamēre panijatuxanenē panijaDioso. Pasivamēre itsajivi ata pacuenia paxamē panijacuata panasivamē,” jai bajayata Dioso Moiséspijinēta penajumecopatsilivaisi, jai judíovi pecujarubinē Jesúsjavabelia.

²⁸ Nexata icatsia Jesús jumaitsi judíovi pecujarubinējavabelia:

—Xaniavaetsia nejumecanaviatame. Bajrapacuenia exanaponaponare. Nexata pepacuenē xainaename matacabi apo pevereverecaejava, jai Jesús.

²⁹ Itsiata baitsi jane judíovi pecujarubinē bijiaya jumecovēnēta bajarapalivaisi. Asivaya apo tae itsamonae ata. Bajrapaxuata judíovi pecujarubinē matavējēa jumaitsi Jesúsjavabelia:

—¿Detsa nexata pitsijivi asivanē tsane? jai judíovi pecujarubinē.

³⁰ Nexata icatsia Jesús jumaitsi judíovi pecujarubinējavabelia mapacueniaje:

—Pebi namutua najetaruca Jerusalén tomaraverena. Naropota pepatsinexa Jericó tomaraberena. Nexata jivi pecaponaejava peyacajērēbabiabivi, bajaraponē epatua vaetabatsi. Daxita pecobcovē yacajērētatsi. Penaxatabijavanēmi ata yacajērētatsi. Nexata pinijicuenia conibabiatsi. Puenetabuatatsi picani petēpanucaenexa bajarajota. ³¹ Nexata bajarapanamutua sacerdotenē najetaruca, templobota penacuenēbabiabinē. Nexata sacerdotenē bajaraponē itsa taeyabuata, matavaquetanucapona. Pona baja rovia. ³² Bajrapaxuacujinae icatsia bajarapanamutua itsanē, templobota penacuenēbabiabinē, najetaruca. Bajraponē taenucajopa. Bajrapaxuacujinae matavaquetanucapona. Pona baja icatsia rovia bajaraponē ata. ³³ Bajrapaxuacujinae icatsia bajarapanamutua Samaria nacuapijinē najetaruca. Nexata bajaraponē itsa taeyabuata, tsitabejiobitsi bitso. ³⁴ Nexata bajaraponē cujilia. Vajēnēvaēba aceiterata, vinorata yajava. Vajēnēcēba papaēbērēpanaxita. Bajrapaxuacujinae Samaria nacuapijinē pijaburojumata buatsia. Nexata bajaraponē capona jivi pepatabiabiboyabelia. Bajrapajota Samaria nacuapijinē eveta xaniavaetsia. ³⁵ Meravia pitsijavata Samaria nacuapijinē itsa baja ponaejitsia itsabelia najetaruca, juta anijapalatanēbeje, bitso penamatomotsinēbeje. Matamota bajarapabo pexainaenē. Jumaitsi bajaraponējavabelia: “Netoetsianame maponēje. Itsa matamovereverecaena, pematatsēnēa nevetsimatamo, bajarapapalata icatsia caevēarena camatamotsianatsi,” jai Samaria nacuapijinē bo pexainaenējavabelia, jai Jesús mapacueniaje judíovi pecujarubinējavabelia.

³⁶ Bajrapaxuacujinae judíovi pecujarubinējavabelia Jesús yanijoba bajarapalivaisi yabara. Jumaitsi mapacueniaje:

—Pamonae, acueyabi ponēmaxēto, taeyabuata pecobcovē peyacajērētsinētsi. ¿Detsa ponē bajarapamonaeyajuvēnēnē asivaya tane bajaraponē? jai Jesús.

³⁷ Nexata judíovi pecujarubinē jumaitsi Jesúsjavabelia:

—Ponē pitaxutotsoniataexae yavenona, bajaraponē asivaya tane, jai judíovi pecujarubinē Jesúsjavabelia.

Nexata Jesús jumaitsi judíovi pecujarubinējavabelia:

—Ponare baja. Xamē ata bajarapacuenia asivaya itaxutotsoniataeyabianame itsamonae ata, jai Jesús judíovi pecujarubinējavabelia.

Pacuenia Jesús jumaitsi Martabeje Maríabeje pijabota yabara pelivaisi

³⁸ Jesús, pijajivi yajava, najetaruca pevajēnaeyabelia. Nexata tomarayota pata. Bajarapatomarayota Jesús xaniavaetsia copiapitatsi petiriva, Martavēnēva. Nexata Marta pijabota Jesús napata. ³⁹ Marta pejuyapijiva xaina, Maríavēnēva. Nexata María eca Jesús pitabarata penamuxunaevetecaenexa Jesús petsipaebilivaisi. ⁴⁰ Nexata Marta bitso jamatabēcueneenatsi penacuenabijava, Jesús pexaejavanexa ata pemitsexanaenexa. Nexata Marta cujilia Jesús. Jumaitsi:

—Tajatuxanenē, tajuyapijiva netocopata caevanē taexanaenexa daxita xua exanaejitsianē. Itorobare taneyavenonaenexa, jai Marta Jesúsjavabelia.

⁴¹ Nexata Jesús jumaitsi Martajavabelia:

—Marta, xamē bitso cajamatabēcueneena nexanaenexa daxita xuanē jamatabēexaname. ⁴² Caejava bitso xanepana nexanaenexa, tanenamuxunaevetsinexamē. María baja cajena tanenamuxunaevetecaexae tatsipaebilivaisi, catsuitapeta pexaniacuene daxitacuene matatoxenetsia. Nexata acuenebi itsajivi ata peyacajērētsijavatsi tatsipaebilivaisi pejumetaejava, jai Jesús Martajavabelia.

11

Pacuenia Jesús pijajivi tsipaeba pacuenia Diosojavabelia vajēcaejitsia yabara pelivaisi (Mt 6.9-15; 7.7-11)

¹ Jesús vajētabiaba Diosojavabelia. Nexata itsamatacabi, itsa baja Jesús najumevereta pevajētsijava Diosojavabelia, Jesús pijajiviyajuvēnēnē jumaitsi Jesúsjavabelia:

—Patajatuxanenē, panejumecujarubare pacuenia pavajētabiabijitsianē Diosojavabelia. Pacuenia Juanpijinē jivibautisabinēmi jumecujarubabiaba pijajivi pacuenia vajētabiabijitsia Diosojavabelia, bajara pijinia pacuenia xamē ata panejumecujarubare pavajētabiabijitsianē Diosojavabelia, jai Jesús pijajiviyajuvēnēnē.

² Jesús nexata jumaitsi pijajivijavabelia mapacueniaje:

—Itsa pavajētabiabianame Diosojavabelia, pajumaitsimē tsabiabi tsane: Taxamē, athēbētatsia neecaenē, jitsipajē pecayiyataejava daxitajivi. Jitsipajē naxanitsiayo pecopiapatsijava daxita nijajivi nevetsijava mapanacuataje. Jitsipajē daxitajivi mapanacuata nejitsipaecuenia pecatoexanabijava, pacuenia baja athēbētatsia nijajivi nejitsipaecuenia catoexanabiaba, bajarapacuenia pecatoexanavanapaenexa mapanacuapijivi ataje. ³ Caematacabi canacujitsia panerajure pataxaejavanexa pacuenia panamatavenonajē. ⁴ Panebarajamatabēcuene xanepanarena nitabarata pibisiacuene pataexanaejava. Nexata panevecuaajibiaexanare pibisiacuene pataexanaeneconi. Tsipaji paxanē ata itsamonae paxanējavaberena pibisiacuene patanexanaejava pajamatabēcueneceavajē. Nexata pabarajamatabēcuenevanepanajē. Panevecuatsare dovathi patanejamatabēcueneējēbiyaniva. Panecapanepare jane pibisiacuenevecua, pajamē tsane mapacueniaje itsa pavajētabiabianame Diosojavabelia, jai Jesús pijajivijavabelia.

⁵ Icatsia Jesús pijajivijavabelia jumaitsi comparacióncuenia Jesús pijajivi peyapētaenexa pacuenia vajēcabiabijitsia Diosojavabelia:

—Paxamēyajuvēnēnē meravi tuatuajēta ponaejitsipa bitso peyapētaenētsi pijaboyabelia. Nexata jumai tsipae: “Cacovaetatsi acueyabi papanbēyobeje. ⁶ Itsanē raja,

taneyapëtaenë, tajëverena peponaenë, aeconoxae tajabota netopata. Nexata bitso piajani. Itsiata xanë apo xainaenë itsacuenejavayo ata pexaejava tarajutsinexa,” jai tsipae paxamëyajuvënënë meravi tuatujëta peyapëtaenëtsijavabelia. ⁷ Nexata bo ënëverena bajaraponë jumepitsipatsi. Jumaitsi tsipae: “Nejamatabëitonotsipame. Baupa rabaja xaniavaetsia xatatanutajë. Taxi raja barëmajitanucajë caecamata. Nexata acuenebi tanonotapunaejava tacarajutsinexa xua nevajëtame. Itsa nonotapunaejitsipajë, yaitavabijitsipajë taxi,” jai tsipae peyapëtaenëtsi. Itsiata baitsi jane bajaraponë perajutsinexatsi ajumesaëya vajëcaponaejitsipa. ⁸ Xaniajanë pacuenia pacatsipaebijitsiatsi. Bajaraponë apo jamatabënonotapunaee ata, itsiata nonotapunaejitsipa perajutsinexa pecovaebijavatsi. Itsiata peyapëtaenëxaetsi, bajarapacuenia apo rajutsi tsipae. Biji rajane rajutsipa daxita pacuenia namatavenona ajumesaëya pevajëcaponaexaetsi. ⁹ Xaniajanë pacuenia pacatsipaebijitsiatsi. Itsacuenejavayo itsa pacatonaxuabijitsipa, nexata bajayajebi ata pajaitsipame matapania panecaxitajarabijavabelianexa. Bajara pijinia pacuenia bajayajebi ata pavajëtabiabianame Diosojavabelia papecajumecovënëtsinexa. Bo ata itsa baupa xatatanuta, nexata asaëyata pabaupadocodocotsipame matapania papecatobaupatsijavabelianexa. Bajara pijinia pacuenia asaëyata pavajëtabiabianame Diosojavabelia papecajumecovënëtsinexa. ¹⁰ Bajarapacuenia asaëyata pavajëtabiabianame Diosojavabelia. Tsipaji pajivi vajëtabiaba, rajutabiabatsi. Pajivi ata jaitabiaba, caxitajarababiaba. Pajivi ata baupa docodocotabiaba, tobaupatabiabatsi, jai Jesús pijajivijavabelia comparacióncuenia.

¹¹⁻¹² Icatsia Jesús jumaitsi pijajivijavabelia:

—Paxamë papebijivimë, panexi panexainaevi. Panexënatonëyo itsa pacavajëta panbë, apo panacoxirajutsimë tsipae iboto. Itsa pacavajëta dujuainëyo, apo panacoxirajutsimë tsipae jomo. Itsa pacavajëta vacaratobëto, apo panacoxirajutsimë tsipae aqueto. ¹³ Paxamë paneajamatabëcuenebejevi ata, payapëtaneme panenacoxirajutsinexa pexaniajava. Paneaxa, athëbëtatsia peecaenë, bitso biji cajena pexaniajamatabëcuenenë paxamë matatoxenetsia. Bajaraponë pacarajutsiana pexaniacuene itsa pavajëtame. Bajaraponë rajutsiana Espíritu Santo daxita pamonaevajëtatsi, jai Jesús pijajivijavabelia.

Pacuenia itsamonae Jesús yabara jamatabëcuenenavëxaniabiaya jumaitsi: “Beelzebú raja pesaëta Jesús dovathi jivivecua capitsapapona,” jai yabara pelivaisi (Mt 12.22-30; Mr 3.20-27)

¹⁴ Pebi ponapona, dovathi pejamatabëcueneta apo penatsipaebinë. Nexata bajaraponë Jesús dovathi vecuacapitsapa. Pebi baja dovathi Jesús itsa vecuacapitsapa, natsipaeba baja. Jivibitsaëtoxaneto petaevi bajarapacuenene, bitso jamatabëcuenenabenajaca. ¹⁵ Itsiata baitsi jane itsamonae fariseovi Jesús baracuaicuaijatsi pibisiacuena.

—Maponë Jesúsje, dovathi jivivecua capitsapabiaba Beelzebú pesaëta. Beelzebú raja daxita dovathivi pepo penamatacaitorobinë, jai fariseovi jamatabëcuenenavëxaniabiaya Jesús yabara.

¹⁶ Itsamonae icatsia fariseovi Jesús picani jamatabëcueneëjëbiaya itorobatsi pinijicuene Dioso pesaëta pexanaejava Jesús petsitaexanaenexa. Bajarapacuenia picani itorobatsi fariseovi peyapëtaenexa pepacuene Jesús Dioso pitorobinëcuenetsitsica. ¹⁷ Itsiata Jesús jamatabëcueneyapëtane pacuenia fariseovi sivanajamatabëxainatsi. Nexata fariseovijavabelia Jesús jumaitsi mapacueniaje:

—Nacaenacuapijivi ata itsa navecuanatsanaejitsipa penasivanavajabitsaëtsinexa, nexata namataenetsia naverebiabijitsipa daxita bajarapamonae. Bajara pijinia pacuenia nacaemonae ata itsipae. Itsa navecuanatsanaejitsipa penasivanavajabitsaëtsinexa, nexata namataenetsia naverebiabijitsipa nacaemonae ata. ¹⁸ Bajara pijinia itsipae dovathi ata. Dovathi jivivecua itsa capitsapaponaejitsipa pijajivi, dovathivi, nexata bepijavajabitsaëtaejitsipa pijajivi. Itsajamatabëcuene vecuaxinaejitsipa pijajivi. Pesaëta ata apo xainaponaevajëtatsi. Mapacuenia pacatsipaebatsije tsipaji paxamë xanë

yabara apo pacanaëjëtsinejevamë jamatabëcuenenavëxaniabiaya pajumaitsimë: “Jesús raja dovathi jivivecua capitsapabiaba Beelzebú pesaëta,” pajamë xanë yabara. ¹⁹ Paxamë ata panijajivi dovathi jivivecua capitsapabiaba. Nexata xanë Beelzebú pesaëta dovathi jivivecua ita capitsapabiabajë, ¿detsa nexata ponë pesaëta panijajivi ata dovathi jivivecua capitsapabiaba? Caenë rabaja Dioso pesaëta. Nexata panijajivi ata pacayapëtane bajarapacuenia jamatabëcuenenavëxaniabiaya panejumaitzijava xanë yabara. ²⁰ Espíritu Santo pesaëta xanë dovathi jivivecua capitsapabiabajë. Nexata baja picani jivi beyapëtane Dioso baja petaxuxuabijava pijajivi pevetsijava paxamë tuatujëta, jai Jesús fariseovijavabelia.

²¹ Fariseovi pecanaëjëtsinexa Jesús bitso piasaënëcuene dovathi matatoxenetsia, Jesús icatsia comparacióncuenia jumaitsi fariseovijavabelia mapacueniaje:

—Ponë bitso piasaënë, aitatsacaya pijanae cobenaevetabiabijitsipa pijabo, itsamonae peyacarëjëtsiyanivatsi pecobcovë. Nexata daxita pecobcovë xaniavaetsia tobobenaejitsipatsi, jai Jesús dovathi pijajivi pevetsijava yabara.

²² Icatsia Jesús pijacuata nayabarajumaitsi mapacueniaje:

—Itsiata baitsi jane ita najetarucaejitsipa itsanë bitso piasaënë boxainaenë matatoxenetsia, nexata cueneamoneyabijitsipatsi. Aitatsacaya pijanae cobenaevetabiabi ata tsipae, itsiata vecuapitsipatsi pijanae, daxita pecobcovëjavaxi yajava, nayabarajai Jesús pijacuata comparacióncuenia dovathi pejamatabëcueneamoneyabijava yabara.

²³ Icatsia Jesús jumaitsi fariseovijavabelia:

—Pajivi apo neyavenonaeyacaetuatsi jivi Dioso pijajivinexa, bajarapajivi betajavajabitsaëjivi. Tsipaji apo taneyavenonaeyacaetuatsixae, jivi nevecuanacayajata Dioso picani pejumecovënëtsiviminexa, jai Jesús fariseovijavabelia.

Pacuenia dovathi jivitonë pevejamatabëpitsapaecujinaetsi, icatsia naviarena pecovëyaberena petsijamatabëcaenexatsi icatsia yabara pelivaisi (Mt 12.43-45)

²⁴ Icatsia Jesús jumaitsi fariseovijavabelia:

—Dovathi ita vejamatabëpitsapa jivitonë, nexata dovathi jinaruta petseviiranëjiva. Jaitapona itsanëjavabelia petsijamatabëjonenexa dovathi penacueraevetsinexa bajara-ponëjavata. Itsa apo caxitajarabi, ponëjavabelia tsijamatabëjonejitsia, nexata dovathi jamatabëjumaitsi: “Naviatsianajë meta icatsia tajabomijavabelia, paboverena pitsapajë,” jamatabëjai dovathi, ponëjavaverena pitsapa icatsia petsijamatabëjonenexatsi. ²⁵ Dovathi baja caevëa ita naviarena, caxitajaraba peyajavaponaponaenëmitsi. Nexata peyajavaponaponaenëmitsi pejamatabëëthëto, dovathi tane bepënësajinecaebo, bepënëxaniavaetetsibo, bepiracajuetetsibo. ²⁶ Nexata dovathi icatsia sivapona peyajavapatsinexarena itsadovathivi, siete ponëbeje. Bajarapadovathivi bitso piacujirubejevi copiaya padovathi matatoxenetsia. Daxita bajarapadovathivi pebi tsijamatabëjunuatsi peyajavaponaponaenexa. Belia jane baja pebi dovathivi bitso bejiobiaexanatsi. Copi-aya abaxë caenë ita tsijamatabëcatsi pacuenia bejiobiaexanabiabatsi, matatoxenetsia bejiobiaexanatsi, jai Jesús fariseovijavabelia.

Pacuenia Jesús tsipaeba xua yabara jivi jamatabëcuenebarëya yabara pelivaisi

²⁷ Itsa abaxë Jesús livaisi tsipaeba fariseovijavabelia, petiriva bajarapajivi bit-saëtoxanetoyajuvënëva pinijijumeta vavajai tsaxuabi. Jumaitsi Jesúsjavabelia:

—Jamatabëcuenebarëya baja cajena ena, pecanavitaniabiva, pecavitsatsiva! jai petiriva Jesúsjavabelia.

²⁸ Nexata Jesús jumaitsi bajarapovajavabelia:

—Xaniajamë rabaja. Itsiata baitsi jane pamonae jumetane Dioso pejumelivaisi, nexata ita jumecovënëta bajarapalivaisi, bajarapamonae jane bitso jamatabëcuenebarëya tsavanapae taena matatoxenetsia, jai Jesús petirivajavabelia.

Pacuenia pibisiajamatabëcuenevi Jesús picani itorobatsi Dioso pesaëta pinijicuene pexanaejava petsitaexanaenexa yabara pelivaisi

(Mt 12.38-42; Mr 8.12)

²⁹ Jivi ayaibitsaëtoxaneto Jesús itsa matatoyorotsia nacaetuatatsi, nexata Jesús jumaitsi:

—Pamonae aeconoxae jinavanapa, bitso pibisiajamatabëcuenevi. Bajarapamonae picani nitoroba Dioso pesaëta pinijicuene taexanaejava tatsitaexanaenexa, taneyapëtaenexa Dioso pepacuene athëbëvetsica taneitorobinëcuenetsica. Itsiata baitsi jane Dioso pesaëta pinijicuene taexanaejava, apo tsitaexanaenë tsane. Bajayata pacuenia Diosojumepaebinëmi profeta Jonáspijinë exanatsi, bajara ëpitsicuene taneexanaejava, tsitajëtsianajë. ³⁰ Bajayata daxita Nínive tomarapijivi yapëtane profeta Jonáspijinë Dioso pitorobinëcuenetsi. Tsipaji ayaicuene exanatsi Dioso. Bajara pijinia pacuenia xanë ata, Daxitajivi Pematapijinënë, pinijicuene Dioso nexanaena. Nexata daxita pamonae aeconoxae jinavanapa, neyapëtaena pepacuene Dioso athëbëvetsica taneitorobinëcuenetsica. ³¹ Itsamatacabi copiapatsiana Dioso penaneconitsiaexanaematacabinexa daxita pijaneconi pexainaevi. Bajarapamonae nubianatsi Dioso pitabarata. Nexata bajarapamatacabi bajayata povami ponapona, Saba nacuapijivimi pevetsivami, nonotapunaena. Nexata bajarapova Diosojavabelia neconitsiana pamonae aeconoxae jinavanapa, Dioso apo pejumecovënëtsivi. Bajarapova neconitsiana tsipaji bajayata bajarapovami tajë nacuatabuverena ata muxunanajetaruca pejumetaenexa Salomónpijinë, bitso daxitalivaisi peyapëtaenëmi, petsipaebilivaisi. Xanë raja majotaje ponaponajë, bitso ayaijamatabëcuenenënë Salómopijjinëmi matatoxenetsia. Itsiata baitsi jane pamonae aeconoxae jinavanapa mapanacuataje, apo nenamuxunaevetsi. Bajaraxuata ayaineconi xaina Diosojavabelia, jai Jesús.

³² Icatsia Jesús jumaitsi jivi ayaibitsaëtoxanetojavabelia:

—Bajayata Nínive tomarapijivi itsa jumetane Dioso pitorobilivaisi, Jonáspijinë petsipaebilivaisi, copaba pibisiacuene pexanaejava. Najamatabëcuenepënëyorota Diosojavabelia. Pamatacabi copiapatsiana Dioso penaneconitsiaexanaematacabinexa daxita pijaneconi pexainaevi, bajarapamatacabi Nínive tomarapijivimi ata nonobapunaena Diosojavabelia peneconitsinexa pamonae aeconoxae jinavanapa, Dioso apo pejumecovënëtsivi. Tsipaji xanë majota ponaponajë bitso ayaijamatabëcuenenënë Jonáspijinëmi matatoxenetsia. Itsiata baitsi jane pamonae aeconoxae jinavanapa mapanacuataje, tsipaebi atanë Dioso pejumelivaisi, apo najamatabëcuenepënëyorotsi pibisiacuene pexanaejavavecua. Bajaraxuata Dioso naneconitsiaexanaenatsi bajarapamonae, jai Jesús jivi ayaibitsaëtoxanetojavabelia tajëvelia pevajunupaebijavata itsamatacabi Dioso jivi penaneconitsiaexanaejavanexa.

Pacuenia vajaitaxuto belámparabë yabara pelivaisi

(Mt 5.15; 6.22-23)

³³ Icatsia Jesús jumaitsi jivibitsaëtoxanetojavabelia:

—Itsajivi ata lámparabë pitanojotsicujinae, apo mataacatetsi itsacuenejavata. Cajiönëalia ata apo etsi lámparabë. Biji rajane athëbëyo etsia. Jivi boyaberena pejonevi tsivajënaeitayotecaejitsia. ³⁴ Lámparabë boënëta itayoteca xaniavaetsia vajataenexa. Bajara pijinia itsi paneitaxuto ata. Paneitaxutoxanepanaexae, xaniavaetsia panatsivajënaetaneme. Itsa paitaxutobejemë tsipae, nexata xaniavaetsia apo panatsivajënaetaemë tsipae. Pacatsitaaitaquiri saya tsipae. Bajara pijinia itsi panejamatabëcuene ata. Dioso itsa pacajamatabëcueneitayota, pajitsipaename paneexanabiabinexa pacuenia Dioso pacaitoroba. Nexata xaniavaetsia pajinavanapaename. Itsa panajamatabëxainaejitsipame bitso panexainaejava ëpaxamënexa, nexata bitso panajamatabëcueneitaquirimë tsipae. ³⁵ Panayajivitaema xua panajamatabëxainabiabame,

papecajamatabëcuene aitaquiriyaexanaeyaniva. ³⁶ Itsa paexanavanapaename pacuenia Dioso pacaitoroba, nexata pacajamatabëcueneitayotsiana Dioso. Tsiquirijavayo ata apo aitaquiri tsane panejamatabëcuene. Nexata pacuenia lámparabë daxita boënë xaniavaetsia itayoteca pecotiata, bajara pijinia pacuenia paxamë ata pacajamatabëcueneitayotsiana Dioso, jai Jesús jivi ayaibitsaëttoxanetojavabelia.

Pacuenia Jesús tsipaeba fariseovijavabelia, judíovi pecujarubivijavabelia ata, pacuenia bajarapamonae naneconita Diosojavabelia yabara pelivaisi

(Mt 23.1-36; Mr 12.38-40; Lc 20.45-47)

³⁷ Itsa baja Jesús najumevereta livaisi petsipaebijava, nexata fariseonë junatatsi Jesús penanabaninexa fariseonë pijabota. Jesús nexata najoneya fariseonë pijaboyalia. Naeca mesa muxuneneta penanabaninexa. ³⁸ Fariseonë itsa tane Jesús penabanijava anijatonë nacobequiatsinejeva, fariseonë jamatabëcuenenabenajaca. Pacuenia daxita judíovi pijacuenia anijatonë nacobequiatabiaba penabanivajënae, apo itsi Jesús. ³⁹ Nexata Jesús jumaitsi fariseovijavabelia:

—Paxamë pafariseovimë panecaxaevajënae plato, taza ata, naniavelia bapaquiatame xaniavaetsia panijacuenia. Tsipaji jamatabëcuenenavëxaniabiaya pajamatabëjumaitsimë tsabiabi: “Itsa caxaejitsipajë xaniavaetsia quiatsinejevanë, Diosojavabelia naneconitsipajë,” pajamatabëjamë tsabiabi. Bajarapacuenia paquiatabiabi atamë xaniavaetsia panecaxaevajanënexa papecajamatabëcuene bijianaeyaniva picani, itsiata pananeconitaponame Diosojavabelia. Tsipaji bajarapacuenia paquiatabiabi atamë, caranata panejamatabëëthëtota panajamatabëxainabiabame pibisiacuene. Panajamatabëxainabiabame itsanë pecobecovë paneyacajërëtsinexa. Panajamatabëxainabiabamenua paneexanaenexa pibisiacuene ata. ⁴⁰ ¡Apo paneyapëtaevi baja rovia! Dioso cajena pexanaenë daxitacuene. Dioso baja cajena pacaperabëexana. Pacajamatabëëthëexananua. ⁴¹ Pejanajamatabëcuene itsa paxinaejitsipame, nexata pexaniacuene patoexanabiabijitsipame itsamonaejavabelia. Daxita xua ata papecajamatabëcuene bijianaeyaniva, pajanijunavame panexaeyaniva, xua ata pacobejunavame panejayatsiyaniva, apo pacatsitapibisiacuene tsipae, jai Jesús fariseovijavabelia.

⁴² Icatsia Jesús jumaitsi fariseovijavabelia:

—¡Paxamë pafariseovimë ayaineconi panatsixainame Diosojavabelia! Panenacanabijava diez xuabejeyajuvënëjava, caejavayo, parajutabiabame ofrendacuenia Diosojavabelia. Daxitaviria paneubijavaxi ata diez xuabejeyajuvënëjava, caejavayo, parajutabiabame ofrendacuenia Diosojavabelia. Xanepana baja picani bajarapacuenia panerajutabiabijava Diosojavabelia. Itsiata bajarapacuenia parajutabiabi atamë, pepacuene apo pajitsipaemë Dioso. Bajaraxuata pananeconitame Diosojavabelia. Pananeconitamenua Diosojavabelia tsipaji pacuene ata picani xanepana panetoexanabiabinexa itsamonaejavabelia, apo pasivanajamatabëxainaemë. Bajaraxua picani paxamë bepanajamatabëxainame panetoexanabiabinexa itsamonaejavabelia, jai Jesús fariseovijavabelia.

⁴³ Icatsia Jesús jumaitsi fariseovijavabelia:

—¡Paxamë pafariseovimë ayaineconi panatsixainame Diosojavabelia! ¡Tsipaji bepaayaijamatabëcuenevimë panataeyabiabame! Judíovi penacaetuatabiabinonëjava itsa panajoneyabiabame, pajitsipabiabame paneenaenexa peyayataevitsi penaenexa petsinubijavanëta. Pajitsipabiabamenua jivi papecabajacobinexa callejava bitso yayataeya, jai Jesús fariseovijavabelia.

⁴⁴ Icatsia Jesús jumaitsi judíovi pecujarubivijavabelia, fariseovijavabelia ata:

—¡Paxamë judíovi panecujarubivi, paxamë ata pijinia pafariseovimë, ayaineconi panatsixainame Diosojavabelia! Paxamë itajara jivi bepatsita pexaniajamatabëcuenevimë tsabiabi pibisijamatabëcuene panexainaevi ata. Pacuenia itsamonae pona jivi pemëthëanë matatsënëa apo peyapëtaexae xua xaina bëpënëareca, bajara

pijinia itsi pamonaē pacayaiyatane apo peyapētaexae pacuenia pajamatabēcuenebejemē bēpēnēa. Bajarapamonaē pacayaiyatane tsipaji apo yapētaē bajarapamonaē bēpēnēa paneajamatabēcuenebejējava, jai Jesús judíovi pecujarubivijavabelia, fariseovijavabelia ata.

⁴⁵ Nexata bajarapacuenia Jesús pejumaitisjavata, judíovi pecujarubiviyajuvēnēnē jumaitsi Jesúsjavabelia:

—Jesús, itsa mapacuenia jumaitsimēje, paxanē yabara ata pibisiacuenia jumaitsimē, jai Jesúsjavabelia judíovi pecujarubiviyajuvēnēnē.

⁴⁶ Jesús nexata jumaitsi judíovi pecujarubinējavabelia:

—¡Paxamē ata, judíovi panecujarubivi, ayaineconi panatsixainame Diosojavabelia! Palivaisianē ayapēbeje itsajivi ata pejumecovēnētsinexa, bajarapalivaisianē jivi patsipaebabiabame pejumecovēnētsinexa. Bajarapalivaisianē patsipaebabiabi atamē itsamonaē pejumecovēnētsinexa, paxamē itsiata apo panajamatabēxainaemē paneexanaenexa bajarapacuenia, jai Jesús judíovi pecujarubinējavabelia.

⁴⁷ Icatsia Jesús jumaitsi judíovi pecujarubivijavabelia:

—¡Paxamē judíovi panecujarubivi, ayaineconi panatsixainame Diosojavabelia! Bajayata pamatacabi jinavanapa panijasalinaivimi, beyaxuababiaba Diosojumepaebivimi profetavi. Nexata juya paxamē bajarapaprofetavimi pemēthēanējumavereca bonē paexanajebame, jivi itsa tane bajarapabonē, penajamatabēnapitabiabinexa bajarapaprofetavimi. ⁴⁸ Bajarapacuenia paneexanaexae, pacuenejēpame bajayata panijasalinaivimi pexanaecuene. Panijasalinaivi bajayata beyaxuababiaba profetavimi. Nexata juya paxamē bonē paexanajebame bajarapaprofetavimi pemēthēanējumavereca, jai Jesús judíovi pecujarubivijavabelia.

⁴⁹ Icatsia Jesús jumaitsi judíovi pecujarubivijavabelia:

—Bajarapacuenia paneexanaejavanexa yabara, daxitacuene Dioso peyapētaenēxae, bajayata tajēvelia jumaitsi paxamē yabara mapacueniaje: “Bajarapamonaējavabelia toitorobianajē profetavi. Toitorobianajēnua apóstolevi ata. Bajarapamonaē itsiata beyaxuababiabiana tatoitorobiviyajuvēnēvi. Bejiobiaexanabiabiananua tatoitorobiviyajuvēnēvi,” jai baja cajena bajayata tajēvelia Dioso bajarapacuenia paxamē paneexanaejavanexa yabara. ⁵⁰ Dioso baja cajena nacua pexanaejavaveliacujinae, panijasalinaivimi beyaxuabapona profetavimi. Nexata bajarapaneconi yajava paxamē pananeconitame Diosojavabelia. Nexata bajarapaneconi yajava Dioso pacananeconitsiaexanaena, paxamē aeconoxae mapamatacabitaje panejinavanapaevi. ⁵¹ Panijasalinaivimi profetavimi pebeyaxuabaponaējava, taxuxuaba Abelpijinēta. Bajaraxuacujinae icatsia pevajēnaeyabelia beyaxuabapona itsaprofetavimi ata. Nexata bexējavaberena ata icatsia panijasalinaivimi beyaxuaba Zacaríaspijinēmi. Zacaríaspijinēmi panijasalinaivimi beyaxuaba templobopanabota, baitsi templobobeje altarvēnējavabeje petuatuajēta. Xaniajanē pacuenia pacatsipaebijitsiatsi. Nexata bajarapaneconi yajava Dioso pacananeconitsiaexanaena paxamē, aeconoxae mapamatacabitaje panejinavanapaevi, jai Jesús judíovi pecujarubivijavabelia.

⁵² Icatsia Jesús jumaitsi judíovi pecujarubivijavabelia:

—¡Paxamē judíovi panecujarubivi, ayaineconi panatsixainame Diosojavabelia! “Vaxaitsi xaniavaetsia Dioso pejumelivaisi yapētanetsi,” pajamatabējamē tsabiabi picani. Itsiata baitsi jane apo payapētaemē. Saicayalivaisi Dioso pejumelivaisivecua jivi patsipaebabiabame. Pacuenia bo baupaxatata jivi pejoneyaniva, bajara saya pacuenia paxamē paexaname jivijavabelia. Nexata itsamonaē jitsipae ata pejonejava picani Dioso pijanacuayabetsia, paxamē saicayalivaisi panetsipaebabiabixae, apo pacopat-simē pejonenexa Dioso pijanacuayabetsia. Paxamē ata apo pajitsipaemē panejonenexa Dioso pijanacuayabetsia, jai Jesús judíovi pecujarubivijavabelia.

⁵³⁻⁵⁴ Bajarapacuenia Jesús pejumaitsicujinae, pitsapa baja bovecua. Bajaraxuacujinae judíovi pecujarubivi, fariseovi yajava, Jesús itoyatsi. Nexata jamatabëitonotabiabatsi. Jamatabëcuenejëbiaya livaisi yanijobabiabatsi. Nexata Jesús bijiaya ita jumecanaviata, bajarapalivaisi yabara peneconitsinexatsi picani nacuaeavetsinëjavabelia.

12

Pacuenia Jesús tsipaeba jivi pejumecovënëtsiyaniva fariseovi petsipaebilivaisitsi yabara pelivaisi

¹ Penacaetuataponaejavata jivi pepo ayaibitsaëtoxaneto cajena tsaponae, baitsi miles pajivibeje. Nexata jivi nataxucuetabataxuabapona. Nexata Jesús pijajivijavabelia copiaya tsipaeba livaisi, pejumecovënëtsiyaniva fariseovi ita tsipaebatsi saicayalivaisi Dioso pejumelivaisivecua. Jesús pijajivijavabelia jumaitsi mapacueniaje:

—Xania panayajivitaema fariseovi pijalevadurayaniva. “Levadura,” ita janë, peyamaxëitojorobilivaisi yabara pacajumaitsi. Fariseovi raja bepacatsita pexania-jamatabëcuenevi itajara tsane, pibisiagamatabëcuene pexainaevi ata. ² Daxita abaxë palivaisianë jivi aeconoxae apo yapëtae, bajarapalivaisianë itsamatacabi daxitajivi yapëtaeponaena xaniavaetsia. Pibisiacuene muetsia itsajivi pexanaejava ata, itsamat-acabi xaniavaetsia yapëtaena daxitajivi. ³ Xua ata muetsia pavajunupaebame meravi, bajaraxua ata, itsamatacabi itsajivi vajunupaebiana matacabita daxitajivijavata. Xua ata pënëyatuucutsiboënëta baupa xatatsiaya muetsia vëpaxapaxajaiya pavajunupaebame, bajaraxua ata itsamatacabi itsajivi pinijijumeta vajunupaebiana jivi penacaetuatsijavata, jai Jesús pijajivijavabelia.

Pacuenia Jesús tsipaeba pijajivi pecujunaviyaniva jivivevi yabara pelivaisi (Mt 10.26-31)

⁴ Icatsia Jesús jumaitsi pijajivijavabelia:

—Tajamonae, pacatsipaebijitsiatsi. Pëtsa pacujunavame jivivevi ata. Bajarapamonae pacabeyaxuabi ata tsipae, acuenebi matavëjëa papecaitsacueniabinxä. ⁵ Biji rajane pacatsipaebijitsiatsi panecujunavinexa Dioso. Tsipaji Dioso caëjëpatsi papecaxuabinexa infiernojavabelia papecabeyaxuabicujinae, jai Jesús pijajivijavabelia.

⁶ Icatsia Jesús jumaitsi pijajivijavabelia:

—Cinco ponëbeje baratsui saya namatamota anijapalatanëyobeje. Tsipaji amatamobi. Bajarapacuenia amatamobi ata, itsiata caenëyo ata Dioso apo nacofënëtsi bajara-pabaratsuiyajuvënëne. ⁷ Paxamë rabiji bitso Dioso pacaasiva baratsui matatoxenetsia. Tsipaji panamatamotame baratsui matatoxenetsia. Dioso bitso papecaasivaxae, panematanatoxi ata, caematanatoyo canacujitsia, Dioso baja cajena namatajëta. Bajaraxuata pëtsa pacujunavame itsacuenejava ata, jai Jesús pijajivijavabelia.

Pacuenia Jesús pijajivi apo benayavajunuaxainae Jesús pijajivicuene yabara pelivaisi (Mt 10.32-33; 12.32; 10.19-20)

⁸ Icatsia Jesús jumaitsi pijajivijavabelia:

—Pacatsipaebijitsiatsi raja. Daxita pamonaë tajajivi, jivi pitabarata navajunupaebiana tajajivicuene. Bajarapamonae juya xanë, Daxitajivi Pematapijinënë, vajunupaebianajë tajajivicuene Dioso pijaängelevi pitabarata. ⁹ Pamonaë jumai tsane itsamonaejavabelia: “Xanë cajena Jesús apo pijajivitonënë,” jai tsane, bajarapamonae yabara juya xanë, jumaitsinë tsane: “Mara pamonaë cajena apo tajajivije,” janë tsane Dioso pijaängelevi pitabarata, jai Jesús pijajivijavabelia.

¹⁰ Icatsia Jesús jumaitsi pijajivijavabelia:

—Pajivi pibisiacuenia nebaracuaicuaijai ata, xanë, Daxitajivi Pematapijinënë, bajarapaneconi yabara ita navajëta Diosojavabelia, itsiata vecuaajibiaexanaenatsi Dioso.

Itsiata baitsi jane pajivi pibisiacuena baracuaicuajai Espíritu Santo, bajarapajivi bajarapaneconi Dioso apo vecuaajibiaexanaetsi tsane, jai Jesús pijajivijavabelia.

¹¹ Icatsia Jesús jumaitsi pijajivijavabelia:

—Itsa pacacaponaelia tomaraevetsivijavabelia, judíovi penacaetuatabiabibojavabelia ata, papecayanijobinexa, pëtsa pajamatabëcuenebëjamë panenayajivicuaicuajaijavanexa yabara. ¹² Tsipaji raja bajarapaepatota, Espíritu Santo pacacuaicuajaiyaexanaena pacuena panayajivicuaicuajamëjitsia, jai Jesús pijajivijavabelia.

Pacuenia Jesús jivi livaisi tsipaeba bitso pesivanajamatabëxainayaniva ayaijava pexainaejava pexainanenexa yabara pelivaisi

¹³ Jivi ayaibitsaëtoxanetoyajuvënënë jumaitsi Jesúsjavabelia:

—Jesús, taxapijinë picani petëpaevajënae netocopata pevënamuto tapitsinexa pecobecovëyajuvënëjavanë. Nexata tamatapijinë pita bajaraxuanë. Nexata itorobare tamatapijinë tanerajutsinexa taxapijinë tanerajutsiapaebijavanë, jai bajaraponë Jesúsjavabelia.

¹⁴ Jesús nexata jumaitsi bajaraponëjavabelia:

—Itsajivi ata cajena apo nitorobi jueznënexanë, tananeconitsiaexanaenexa ponë naneconita. Itsajivi ata cajena apo nitorobi axapijinë pecobecovë patacatsicobet-satsinexabeje, jai Jesús.

¹⁵ Nexata icatsia Jesús jumaitsi daxitajivijavabelia:

—Xania pataema. Pëtsa bitso panajamatabëxainame ëpaxamënexa ayaijava panexainanenexa. Tsipaji jivi pexainaejava ayaijava xainae ata tsipae, bajarapamonae pexainaejava yabara jamatabëcuenexanepanaeya apo jinavanapae tsipae, jai Jesús.

¹⁶ Nexata Jesús tsipaeba livaisi bajarapamonaejavabelia mapacueniaje:

—Ponapona bitso riconë. Pijapabianë tocapitsapabiabatsi ayaijava pexainaecuene.

¹⁷ Riconë nexata jamatabëjumaitsi: “¿De meta pacuena exanaenajë? Netoajibi baja rovia taetaponaejavabelianexa taubijava,” jamatabëjai riconë. ¹⁸ Riconë nexata icatsia jamatabëjumaitsi: “Yapëtaniji rajane baja pacuena exanaejitsianë. Paboxita jebabiabajë taubijava, penetsianicajë taexanaenexa icatsia ayaiboxanetonë bajarapacovëta. Bajarapaboxanetonëta jane baja jebianajë daxita taubijava, daxita tacobecovë yajava.

¹⁹ Nexata baja xainanajë bajayajebinexa daxitacuene xua namatavenonajë. Nexata jane baja xuacujinae nacueraevetsianajë. Pexaniacuene nabanebiabianajë. Pexaniaviriaranënu matavëjëa apaeyabiabianajë taitajibinexa. Nexata barëyanë tsabiabi tsane,” jamatabëjai riconë. ²⁰ Nexata bajarapaepatota Dioso jumaitsi riconëjavabelia: “Apo neyapëtaenë baja rovia xamë. Ajena baja, mapameravitaje, tëpaename. ¿Jipatsa nexata nevënamuto pitsiana daxita nexaniavaetejebijavanëmi?” jai Dioso riconëjavabelia, jai Jesús mapalivaisije daxitajivijavabelia.

²¹ Icatsia Jesús jumaitsi bajarapamonaejavabelia:

—Bajara pijinia pacuena paxamëyajuvënëvi ata tocopiapatsianatsi pamonae ayaijava natocaetuatapona ëpamonae pexainanenexa. Bajarapamonae itsiata pepacuene bepejiobivi tsane Diosojavabelia, jai Jesús bajarapamonaejavabelia.

Pacuenia Dioso pijajivi eveta mapanacuataje yabara pelivaisi

(Mt 6.25-34)

²² Jesús nexata jumaitsi pijajivijavabelia:

—Xaniajanë pacuena pacatsipaebijitsiatsi. Pëtsa pasivanajamatabëxainame ëpanexaejava panevënajinavanapænexa. Pëtsa pasivanajamatabëxainamenua ëpanenaxatabijavanexa ata. ²³ Apo jinavanapaetsi cajena ëvajaxaejavanexa. Apo jinavanapaetsinua ëvajanaperabëxatabinexa. ²⁴ Pacanaëjere pacuena baratsui apo ubi pexaejavanexa. Apo notsinua penaveretaponaejava. Apo xainanua penaveretaponaejava peetsibonexa. Itsiata Dioso rajutabiabatsi pexaejavanexa. ¡Paxamë rabiji bitsoyo Dioso pacaasiva baratsuimonae matatoxenetsia papecarajutsinexa daxita xua

panamatavenoname! Bajaraxuata pëtsa pasivanajamatabëxainame ëpanexaejavanexa, ëpanenaxatabijavanexa ata. ²⁵ ¿Detsa jane ponë paxamëyajuvënënë cajëpatsi pijacujiruta medio metrocuenia matavëjëa penavitsabiaexanaenexa? Ajibi. Bitso jamatabëbëjai ata tsipae pevitsabinexa, itsiata apo navitsabiaexanae tsipae pijacujiruta. Nexata saya najamatabëcuenecueratsipa pejamatabëcuenebëjaijava penavitsabiaexanaejavanexa. Tsipaji apo tonamatamotsitsi bajaraxua. ²⁶ Bajara pijinia pacatoitsi paxamë ata daxita xua pasivajamatabëcuenebëjamë. Apo pacatonamatamotsi. Bajaraxuata apo bepajamatabëcuenebëjamë itsacuenejavayo ata yabara, jai Jesús pijajivijavabelia.

²⁷ Icatsia Jesús jumaitsi pijajivijavabelia:

—Pacanaëjere pacuenia bitso pexaniamatono pitsapa, mapamatonoje. Bajarapamatonono apo natsijumanacuenebi. Penaxatatsijavanexa ata apo natoexanae. Bajayata nacuaeavetsinë Salomónpijinë bitso pexainaenëmi. Naitabëtsiaya naxatababiaba bitso pexaniaviriajavanë. Itsiata baitsi jane Salomónpijinë penaitabëtsijava matatoxenetsia bitso aitaabë mapamatonotoxije. ²⁸ Paxamë, bevelia Dioso panejumecovënëtsivi, asaëya bepajumecovënëtame Dioso papecaevetsijava. Ajena pitsijavata vayafota tanetsi pexaniaponamatantoxi. Bajaraxuacujinae, caematacabibejecujinae, tajuaitsi baja bajarapaponamatantoximi. Pacuenia Dioso aitaabëyaexana ponamatantoxi, bajara pijinia pacuenia paxamë ata itsamatacabi Dioso pacaxatabiana piitaabëjava. ²⁹ Bajaraxuata pëtsa pasivanajamatabëxainavanapame ëpanexaejavanexa, ëpanematavëjëaapaejavanexa ata. Biji rajane pajumecovënëtavanapare Dioso. ³⁰ Pamona Dioso apo pejumecovënëtsivi, bitso sivanajamatabëxainabiaba ëpexaejavanexa, ëpenaxatabijavanexa ata. Itsiata baitsi jane paneaxa Dioso paxainame. Bajaraponë yapëtane daxita xua panamatavenoname. ³¹ Bajaraxuata, daxita xua panamatavenoname, matatoxenetsia Dioso pijacuene bitso pasivanajamatabëxainabiabianame Dioso pijacuene panetoexanavanapaenexa. Nexata Dioso pacarajutsiana daxita xua panamatavenoname, jai Jesús pijajivijavabelia.

Pacuenia Jesús tsipaeba pijajivi xaniavaetsia Dioso petonacuenebavanapaenexa it-samatacabi ayaijava pexainaenexa athëbëtatsia yabara pelivaisi

(Mt 6.19-21)

³² Icatsia Jesús jumaitsi pijajivijavabelia:

—Tajamonae, paxamë patajajivimë pacaevijiyomëbeje ata, pëtsa pajunavame. Tsipaji paneaxa pacaitapeta panecobenaevetsinexa pamatacabi bajaraponë evetsiana daxitacuene. ³³ Pacanajere panexainaeyajuvënëjava, bitso paneasivajava ata. Nexata bajarapapalata parajutsianame bitso bepejibivijavabelia. Nexata juya Dioso athëbëtatsia pacarajutsiana bitso penamatamotsijava, apo pevereverecejava. Bajarajotatsia acuenebi pejonejava penacobetoxotsivi papecayacajërëtsinexa. Itsanë ata ajibi papecatoucubaxaenënexa. ³⁴ Panacuatatsia pacatoxaniavaeta panexinaejavanexa, bajarapanacua panejamatabëëthëtovetsina pajamatabënjavanapaenename, jai Jesús pijajivijavabelia.

Pacuenia Jesús pijajivi tsipaeba pacujinae icatsia patsijitsiatsica najamatabëcuenexaniavaetsiaya pevajënae pijajivi pecopiaevetavanapaenexatsi yabara pelivaisi

³⁵ Jesús icatsia pepatsijavanexatsica tajëvelia navajunupaeba. Jesús jumaitsi pijajivijavabelia mapacueniaje:

—Icatsia raja jemata patsianicajë. Nexata najamatabëcuenexaniavaetsiaya panecopiaevetavanapaenename. ³⁶ Payapëtaneme rabaja mapacueneje. Petuxanenë itsa pona penacasabifiestajavabelia, pijajivi tonajumecopata meravijebi ata pecopiaevetavanapaenexatsi pepatsijavarena. Nexata petuxanenë pijajivi meravi ata copiaevetavanapatsi. Nexata petuxanenë jemata meravi najetarucae ata, baupa itsa docodocota, nexata bajarapamonae bepijia tobaupata pijatuxanenë. ³⁷ Bajarapamonae barëya

pijatuxanenē naēcotsiaya pecopiaevetavanapaejavata pepatsixae. Xaniajanē pacuenia pacatsipaebijitsiatsi. Nexata petuxanenē pijajivi caecuenia petobaupatsixaetsi, petuxanenē pijajivi sivajamatabēcuenebarēya. Nexata petuxanenē pepatsicujinae xaniaavaeta mesa. Enaeyaexanaena pijajivi. Nexata caranata petuxanenē bajarapamonae bepijajivitonē nataeya rajuta pexaejava pijajivi. ³⁸ Meravi tuatuajēta petuxanenē patsi ata, itsa jume, matacabivēpata patsi ata, nexata petuxanenē pijajivi naēcotsiaya pecopiaevetavanapaejavata pijatuxanenē pecaxitajarabixaetsi, petuxanenē pijajivi barēya. ³⁹ Pacanaējēre mapacueneje. Bo pexainaenē itsa yapētaejitsipa paepatota meravi pijabojavaberena patsijitsia pecobecovē petonacobetoxotsinēnexatsi, nexata apo majitsi tsipae. Vajēnaeevetecaejitsipa meravijebi. Apo copatsi tsipae pijaboyaberena petojoneyanivatsi penacobetoxotsinēnexa. ⁴⁰ Bajara pijinia pacuenia paxamē ata najamatabēcuenexaniavaetsiaya panecopiaevetavanapaename tapatsijavatsica. Tsipaji xanē, Daxitajivi Pematapijinēnē, paepatota apo panejamatabēnajinaemē tapatsijavanexatsica, jemata icatsia patsianicajē, jai Jesús pijajivijavabelia tajēvelia penavajunupaebijavata icatsia pepatsijavanexatsica.

Pacuenia Jesús pijajivijavabelia livaisi tsipaeba, petuxanenē pijajivitonēbeje pelivaisicuenia, yabara pelivaisi

(Mt 24.45-51)

⁴¹ Pedro jumaitsi Jesúsjavabelia:

—Tajatuxanenē, ¿palivaisi aeconoxae panetsipaebame, baja tsaja palivaisi ēpaxanē panijajivinexanē? Itsa jume, ¿itsamonaenexa ata tsaja yajava? jai Pedro.

⁴² Jesús nexata jumaitsi Pedrojavabelia:

—Mara pejamatabēcueneitsivinexa yabara pacatsipaebatsije. Petuxanenē pijajivitonē, ponē xaniavaetsia pijatuxanenē pecovēta tonacuenebaponapona pijacuene, maitsije. Petuxanenē pijajivitonē itsajamatabēcuene xainaenejeva, copiaevetaponapona pijatuxanenē pepatsimatacabijavabelianexa. Bajaraponē pijatuxanenē pijajivi pecovēta toevetaponapona xaniavaetsia. Toabataponapona pexaejava caematacabi canacujitsia pacuenia itorobatsi pijatuxanenē. ⁴³ Bajaraponē bitso barēya pamatacabi pijatuxanenē pata xaniavaetsia pijajivi pecovēta petoetaponaponaexae. ⁴⁴ Xaniajanē pacuenia pacatsipaebijitsiatsi. Ponē bajarapacuenia xaniavaetsia tonacueneba pijatuxanenē pecovēta, bajaraponē icatsia evetsiaexanatsi daxita xua xaina pijatuxanenē. ⁴⁵ Petuxanenē pijajivitonē itsa piagamatabēcuenebejenē tsipae, nexata bajaraponē pijatuxanenē pecovēta jamatabējumai tsipae: “Tajatuxanenē ajibi tsarucae tsane bajayajebi,” jamatabējai tsipae. Nexata pijatuxanenē pijajivi, pamonae evetsiaexanatsi xaniavaetsia picani petoevetsinexa, toconibabeyabiabijitsipa. Conibabeyabiabijitsipa pebijivi, petiriavi ata. Bajaraponē ayaijava pexaejava xaeyabiabijitsipa. Aitajibinua tsabiabi tsipae. ⁴⁶ Nexata itsajota apo jamatabēnajinae tsipae pijatuxanenē pepatsijavanexa, bajarapaepatota jemata patsipa pijatuxanenē. Nexata bajaraponē pijatuxanenē pinijicuenia naneconitsiaexanaejitsipatsi. Bajara pijinia pacuenia Dioso ata itsamatacabi pinijicuenia naneconitsiaexanaena pamonae Dioso apo pejumecovēnētsivi, jai Jesús Pedrojavabelia.

⁴⁷ Icatsia Jesús jumaitsi pijajivijavabelia:

—Ponē itsanē pijajivitonē, yapētae ata picani pacuenia itorobatsi pijatuxanenē petoexanaenexa, itsiata itsa apo toexanae pijatuxanenē pitorobicueniatsi, bajaraponē pinijicuenia jumaconibabejitsipatsi ayaicuerobocotota. ⁴⁸ Ponē ata pijinia itsanē pijajivitonē, itsa apo jumeyapētae xaniavaetsia petoexanaenexa pacuenia pijatuxanenē itorobatsi, nexata pijatuxanenē pitorobicueniatsi saicayacuenia itsa toexana, bajaraponē ata jumaconibabejitsipatsi. Itsiata pinijicuenia apo jumaconibabe tsipaetsi. Pajivi pijinia ayaijava rajutatsi, bajarapajivi yabara vaxaitsi basivajamatabējumaitsi: “Juya meta mapajivije ayaijava rajutabiabiana itsamonaejavabelia,”

basivajamatabējaitsi. Pajivi pijinia evetsiaexanatsi ayaijava, bajarapajivi pevetsiaexanaenētsi sivajamatabējumaitsi: “Itsa netocanacuenebianana taevetsiaexanaejava, ayaijava netopitsapaena,” sivajamatabējaitsi pevetsiaexanaenētsi, jai Jesús pijajivijavabelia.

Pacuenia Jesús apo penajuajumecovēnētsixae, nacaemonae ata apo najamatabēcuenejēpae tsane yabara pelivaisi

(Mt 10.34-36)

⁴⁹ Icatsia Jesús jumaitsi pijajivijavabelia:

—Xanē raja patajopajē daxitanacuapijivi pibisiacuene pexanaeneconi yabara tasivatēpaenexa. Nexata bajarapamonaeyajuvēnēvi itsamonae nejumecovēnētsiana. Nexata nacaemonae ata apo najamatabēcuenejēpae tsane. Itsa baja capanepaeya cruzata daxitajivi sivatēpaejitsipajē, jamatabēcuenebarēyanē baja tsipae. ⁵⁰ Itsiata baitsi jane abaxē netosajina bajaraxua yabara tanejamatabēcuenejētsinexa tanebeyaxuabijavata. ¡Bitso baja rovia najamatabēxainajē! ¡Matapania nebeyaxuabiana, jamatabēcuenecaevianajē! ⁵¹ Pētsa panesivajamatabējumaitsimē mapacueniaje: “Jesús rabaja patsica mapanacuayabetsicaje daxitajivi mapanacuataje najamatabēcuenejēpaeya pejinavanapaeyaexanaenexa,” panesivajamatabējamē pētsa. Bajaraxuanexa apo patsinētsica. Biji rajane xanē tapatsixaetsica mapanacuayabetsicaje, jivi itsa nejumecovēnētsiana, apo najamatabēcuenejēpae tsane pamonaejavabelia apo nejumecovēnētsi, nacaemonae ata. Itsamonae napijavajabitsaē tsane. Nexata apo najamatabēcuenejēpae tsane. ⁵² Ajena mapamatacabijavaveliacujinaeje jivi apo najamatabēcuenejēpae tsane. Cinco pajivibeje, nacaemonae ata, caebota pejinavanapaevi ata, apo najamatabēcuenejēpae tsane xanē apo tanenajuajumecovēnētsixaebeje. Pamonaec cinco pajivibeje nacaemonae, bajarapamonaeyajuvēnēvi, acueyabi pajivibeje, nejumecovēnētsiana. Anijajivibeje apo nejumecovēnētsi tsane. Itsa jume, anijajivibeje nejumecovēnētsiana. Acueyabi pajivibeje apo nejumecovēnētsi tsane. ⁵³ Bajarapabopijivi, paxabeje pexēnatobeje, apo najamatabēcuenejēpaebeje tsane xanē apo tanenajuajumecovēnētsixaebeje. Petirivabeje pijinia, penabeje pexēnatoyobeje ata, apo najamatabēcuenejēpaebeje tsane xanē apo tanenajuajumecovēnētsixaebeje. Pamebeje pecopenabeje ata apo najamatabēcuenejēpaebeje tsane xanē apo tanenajuajumecovēnētsixaebeje, jai Jesús pijajivijavabelia.

Pacuenia Jesús asaēya jivi muxujioba apo pecanaējētsixae Jesús Dioso pexēnatocuene yabara pelivaisi

(Mt 16.1-4; Mr 8.11-13)

⁵⁴ Jesús icatsia jumaitsi jivi ayaibitsaētoxanetojavabelia:

—Itsa pataneme vaēvetsica itarērēbo pepitsapaejava, nexata pajumaitsimē tsabiabi: “Ajena raja emajitsia,” pajamē tsabiabi. Nexata bajarapamatacabi ema jopabiaba. ⁵⁵ Itsa pataneme jovibo pepitsapaejava epatajērētsiarena la surverena, pajumaitsimē tsabiabi: “Ajena raja icotia ataju tsane,” pajamē tsabiabi. Nexata bajarapamatacabi icotia ataju tsabiabi. ⁵⁶ Nexata itsamonae pacatane bepatsita pexaniajamatabēcuenevimē itajara, papibisiajamatabēcuenevi atamē. Payapētaeyabiabame pacuenia matacabi itsijitsia itarērēbo pepitsapaejava panetaeyabiabixae. Bajarapacuenia picani payapētaeyabiabame. Itsiata baitsi jane patae atamē daxita xua Juanpijinēmi jivibautisabinēmi exanapona, patae atamēnua daxita xua xanē ata exanaponajē, caranata xanē apo paneyapētaemē Dioso athēbēvetsica taneitorobinēcuenetsica, jai Jesús jivi ayaibitsaētoxanetojavabelia.

Pacuenia penaneconitsijivi xaniavaetsia bebarēcuaicuaijai pajivijavabelia naneconita penasivajamatabēxanepanaenexabeje, peneconitsiyanivatsi jueznējavabelia, yabara pelivaisi
(Mt 5.25-26)

⁵⁷ Jesús icatsia jumaitsi jivi ayaibitsaëtoخانetojavabelia:

—Pacanaëjère panijacuata paneexanaenexa pacuene xanepana. ⁵⁸ Itsa pananeconitame itsajivijavabelia, nexata itsa pacacapona bajarapajivi jueznëjavabelia papecaneconitsinexa, namutua xaniavaetsia panabarëcuaicuajamërebeje panenasi-vajamatabë xanepanaenexabeje xua yabara pacaneconitsijitsia. Bajarapacuenia xaniavaetsia panabarëcuaicuajamërebeje papecanutsiyaniva jueznë pitabarata. Tsipaji raja jueznë itorobijitsipa policíavi panijaneconi yabara papecacaponanexa penaneconitsivi pejebabiabiboyabelia. Nexata policíavi pacananeconitsiaexanetsipa penaneconitsivi pejebabiabibota. ⁵⁹ Xaniajanë pacuenia pacatsipaebijitsiatsi. Nexata penaneconitsivi pejebabiabibota itsa pacananeconitsiaexanetsipa, bajaraverena bepíjia apo papitsapaemë tsipae. Matapania pamatamotsipame daxita xua yabara pacananeconitsiaexaneta, papitsapaejitsipame, jai Jesús jivi ayaibitsaëtoخانetojavabelia.

13

Pacuenia jivi benajamatabëcuenepënëyorota pibisiacuene pexanabiabijavavecua yabara pelivaisi

¹ Itsamonae jumaitsi Jesúsjavabelia:

—Galilea nacuverena pepatsivi, baca beyaxuaba Jerusalén tomarata templobota. Bajarapamonae baca beyaxuaba ofrendacuenia pevi perajutsinexa Diosojavabelia. Nexata bajarapaepatota nacuaevecsine Pilato pibisiacuene exana. Itoroba vajabitsaë Galilea nacupijivimi pebeyejebinxatsi templobota. Itsajota Galilea nacupijivimi baca beyaxuababuata, bajarapacovëta icatsia beyejebatsi bajarapamonaemi. Nexata bajarapamonaemi pijana namatajërëata bacajana yajava, jai itsamonae Jesúsjavabelia.

² Jesús nexata jumaitsi bajarapamonaejavabelia:

—“Pamonaemi bajarapacuenia beyejebatsi, bitso meta pibisiacuene pexanaevimi daxita pijanacuapijivi matatoxenetsia. Bajaraxuata beyejebatsi penaxuabinexa Diosovecua,” ¿pajamatabëjamë tsaja? ³ Jume baja cajena. Bajarapamonaemi ata picani bitso pibisiacuene apo exanae pijanacuapijivi matatoxenetsia. Itsiata Dioso tocopatatsi bajarapamonaemi pebeyejebinxatsi, penacopabivi pecanaëjëtsinexa Diosojavabelia penaneconitsijava. Paxamë ata itsa apo pacopabimë tsane pibisiacuene peneexanabi-abijava, itsa apo panajamatabëcuenepënëyorotsimë tsane Diosojavabelia, nexata bajarapacuenia paxamë ata panaxuabianame Diosovecua itsa patëpaename. ⁴ Pamatacabi ata jemata Jerusalén tomarata jopanucaya athëbëabetsia piapiabotsia, Torre de Siloëvënëbo, dieciocho pajivibeje matacënëbatsi. Nexata baja tēpa bajarapamonaemi. “Pamon-aemi matacënëbatsi, pibisiacuene meta bitso pexanaevimi daxita Jerusalén tomara-pijivi matatoxenetsia. Bajaraxuata matacënëbatsi penaxuabinexa Diosovecua,” ¿paja-matabëjamë tsaja? ⁵ Jume baja cajena. Bajarapamonaemi ata picani bitso pibisiacuene apo exanae pijatomarapijivi matatoxenetsia. Paxamë ata itsa apo pacopabinë tsane pibisiacuene paneexanaejava, itsa apo panajamatabëcuenepënëyorotsimë tsane Diosojavabelia, nexata daxita paxamë ata bajarapacuenia panaxuabianame Diosovecua itsa patëpaename, jai Jesús bajarapamonaejavabelia.

Pacuenia Jesús jivi livaisi tsipaeba piacuajibihigueranae pelivaisicuenia yabara pelivaisi

⁶ Jesús jivi livaisi tsipaeba piacuajibihigueranae pelivaisicuenia. Jesús jivi piacuajibihigueranae pelivaisicuenia petsipaebijavata, pijaperujamatabëcuene apo penave-cuacopatsivi yabara Jesús jumaitsi mapacueniaje:

—Pebi pijapabi tuatujëta caenae peubinae xainanuta, higueravënënae. Nexata picani taeyojopalia bajaraponae penacuaitsijava. Itsiata baitsi jane apo nacuaitsi. ⁷ Nexata jumaitsi pijapabi petoevetsinëtsijavabelia: “Taema maponaeye. Acueyabi picani pavaibeje taeyopajë tacuainotabiabinexa maponaecuaije. Itsiata acuajibi tsabiabi.

Nexata baja netonicataxuare. Apo becopatanutsitsi bajaraponae. Ira caranatanuca saya,” jai pijapabi pexainaenë. ⁸ Itsiata baitsi jane pijapabi petoevetsinëtsi jumaitsi: “Copatanutsianatsibeje abaxë mapavaije. Nexata bacatuirabianajë bacatasitoxita. ⁹ Baja raeta xuacujinae xanepanaena. Nexata aeconoxae pavai nacuaitsiana. Nexata aeconoxae pavai ata itsa apo nacuaitsi tsane, nexata jane baja catonicataxuabianatsi,” jai pijapabi petoevetsinëtsi, jai Jesús.

Bajarapacuenia Jesús jumaitsi tsipaji Dioso xuabijitsia pamonaë pijaperujujamatabëcuene apo pecopatsivi.

Pacuenia Jesús jamatejemayaexana judíovi penacueraevetsimatacabita penajumafurutsivami yabara pelivaisi

¹⁰ Itsamatacabita judíovi penacueraevetsimatacabita, Jesús jivi livaisi tsipaeba judíovi penacaetuatabiabibota. ¹¹ Bajarajota naeca petiriva. Dovathi pejamatabëcueneta bajarapova dieciocho pavaibeje xaina penajumafurutsicujinae. Nexata apo caëjëpaetsi tsiquirijavayo ata penaepasirovitsijava. ¹² Itsa Jesús taeyeta bajarapova, nexata junarena. Jesús jumaitsi bajarapovajavabelia:

—Niatanejavami rabaja cavecuaajibi, jai Jesús bajarapovajavabelia.

¹³ Jesús tsimatanacobeuata bajarapova. Nexata bajarajota petiriva naepasirovitsixanepana baja. Nexata bajarapova jumai tsaponae Diosojavabelia:

—¡Diosomë, bitso pexaniacuene netoexaname ayaijamatabëcuenenëxaemë! jai tsaponae bajarapova Diosojavabelia.

¹⁴ Itsiata baitsi jane judíovi penacaetuatabiabibo pevetsinë Jesús baraanaepanatsi judíovi penacueraevetsimatacabita Jesús pejamatejemayaexanaexae penajumafurutsiva. Tsipaji judíovi apo jitsipae itsajivi ata itsacuenejavayo pexanaenexa penacueraevetsimatacabita. Nexata judíovi penacaetuatabiabibo pevetsinë jamatabëjumaitsi:

—Jesús nacueneba penacueraevetsimatacabita. Jesús apo jumecovënëtsi patajasalinaivi patanitavetsicuene, jamatabëjai.

Nexata judíovi penacaetuatabiabibo pevetsinë najumejematsiaya jumaitsi jivijavabelia:

—Caesemana canacujitsia xainaponatsi seis pamatacabibeje vajanacuenebinexa. Bajarapamatacabijava bepatatsi vajanacajamatejemayaexanaenexa. Nexata abaxë penacueraevetsimatacabita apo bepatsitsi vajanacajamatejemayaexanaenexa, jai judíovi penacaetuatabiabibo pevetsinë najumejematsiaya jivijavabelia.

¹⁵ Nexata Jesús jumaitsi judíovi penacaetuatabiabibo pevetsinëjavabelia:

—Paxamë saya jivi paneyamaxëitojorobivi. Bepatsita pexaniajamatabëcuenevimë itajara itsamonae, papibisiajamatabëcuenevi atamë. Paxamë ata panacuenebabibame penacueraevetsimatacabita ata. Paxamë penacueraevetsimatacabita ata panijabaca, burro ata, paisinabiabame panecaponaenexa merajavabelia mera piapaenexa.

¹⁶ Mapovaje Abrahampijinë pemomoxiyajuvënëva jamatejemayaexanaejë. Tsipaji bajarapova namatamota Dioso pitabarata dajubinë matatoxenetsia. Dovathi pejamatabëcueneta penajumafurutsicujinae, xaina baja dieciocho pavaibeje. Bajaraxuata penacueraevetsimatacabita ata jamatejemayaexanaejë pitanecuenevecua, jai Jesús judíovi penacaetuatabiabibo pevetsinëjavabelia.

¹⁷ Bajarapacuenia Jesús itsa jumaitsi, nexata daxita pecueneitoyavitsi moya ena. Aura tsenae bajarapamonae. Itsamonae pijinia Jesús sivajamatabëcuenebarëyatsi pinijicuene Dioso pesaëta pexanaponaejavanë yabara.

Pacuenia mostazaxutoyo pejuvicujinae, mostazanae bepimia vitsaba yabara pelivaisi (Mt 13.31-32; Mr 4.30-32)

¹⁸ Jesús jumaitsi jivijavabelia:

—¿De meta xua pelivaisi jëpa Dioso pijajivi bepíjia ayaibitsaëtoxaneto penaexanaejavanexa? Jivi meta peyapëtaenexa ayaibitsaëtoxaneto bepíjia Dioso pijajivi penaexanaejavanexa, mostazaxutoyo meta pelivaisicuenia tsipaebianajë. ¹⁹ Pebi capona mostazaxutoyo peubinexa pijapabita. Nexata baja mostazaxutoyo pebi itsa uba pijapabita, bajarajota mostazanae bepíjia vitsaba. Bepíjia baja mostazanae pinijinae naexana. Baratsui ata exana pematapenanë bajaraponaemaxëranaxijava. Bajara pijinia pacuenia Dioso pijajivi ata itsane. Bepíjia ayaibitsaëtoxaneto naexanaena Dioso pijajivi, jai Jesús jivijavabelia.

Pacuenia pan pexanaematabënexa, levaduravënëjava fufunaeyaexana yabara pelivaisi (Mt 13.33)

²⁰ Icatsia Jesús jumaitsi jivijavabelia:

—¿De meta palivaisi jëpa pecacaëjëpaejava Dioso pijajivi pevetsicue ne daxitanacuanëjava? ¿De meta pacuenia jivi livaisi tsipaebianajë peyapëtaenexa Dioso pijajivi pevetsicue ne peyacaëjëpaejava daxitanacuanëjava? ²¹ Levaduravënëjava meta pelivaisicuenia tsipaebianajë. Petiriva pan pexanaenexa, acueyabi patarrobeje trigobenonë matajërëaba levaduravënëjavata. Nexata pan pexanaematabënexa, ayaimatabë.

Tsiquiribaupayo epatajërëtsialia yabara pelivaisi (Mt 7.13-14, 21-23)

²² Jesús jivi livaisi tsipaebanajetaruca pinijitomaranëjava, tsiquiritomaraxijava ata, pepatsinexa Jerusalén tomarabelia. ²³ Nexata Jesús jivi livaisi petsipaebijavata, itsanë yanijobatsi Jesús. Bajaraponë jumaitsi Jesúsjavabelia:

—Jesús, ¿Dioso tsaja capanepaena caebitsaëtoyo saya? jai.

Nexata Jesús jumaitsi daxita jivijavabelia:

²⁴ —Xaniajanë pacuenia pacatsipaebijitsiatsi. Pajamatabëcuenesaëmëre bitso panevajënaeyabelia itsamatacabi athëbëtatsia panejonenexa tsiquiribaupayojavalia. Jivi picani itsamatacabi athëbëtatsia ayaibitsaëtoxaneto jamatabëjonena tsiquiribaupayojavalia. Itsiata apo caëjëpaetsi tsane pejonenexa. ²⁵ Bo pexainaenë itsa nonotapunaena baupa pexatatsinexa, paxamë bo jumapënëvelia panubenaename. Nexata picani panejonenexa pabaupadocodocotsianame. Pajumaitsimë tsane: “Tajatuxanenë, panetobaupare,” pajamë tsane. Itsiata bajaraponë pacajumaitsi tsane: “Apo pacayapëtaetsi cajena paxamë. Itsaverena ata papatame, apo yapëtaenë,” pacajai tsane. ²⁶ Nexata paxamë pajumaitsimë tsane: “Xamë baja cajena panebarënanabame. Panebarëmatavëjëapamenua. Patajatamaranëjava ata baja cajena jivi livaisi tsipaebabiabame,” pajamë tsane. ²⁷ Itsiata bajaraponë pacajumaitsi tsane: “Apo pacayapëtaetsi cajena paxamë. Itsaverena ata papatame, apo yapëtaenë. Pibisiacuene paneexanabiabivi, panevecuaponare baja,” pacajai tsane. ²⁸ Dioso pijanacuatatsia pataename Abrahampijinë, Isaacpijinë ata, Jacobpijinë ata, daxita Diosojumepaebivimi profetavi ata. Daxita bajarapamonae penajuajinavanapaejava Dioso pijanacuatatsia pataename. Nexata paxamë bajarajota pinijicuenia panatsinuename. Panavonosinianamenua bitso paneanaepanaexae. Tsiipaji paxamë Dioso pijanacuavecua panenaxuabinexa pacaxuabiana infiernojavabelia. ²⁹ Itsavirijamevi patsiana daxitanacuanëjavaverena. Nexata daxita bajarapamonae naenaena penabaninexa Dioso pijanacuatatsia. ³⁰ Pamonaeeconoxae mapamatacabitaje ayaijamatabëcuenevi tanetsi, bajarapamonaeyajuvënëvi, ayaibitsaëtoxaneto, itsamatacabi Dioso beveliajamatabëcuenevi exanaenatsi. Pamonaepijinia mapamatacabitaje beveliajamatabëcuenevi tanetsi, bajarapamonaeyajuvënëvi, ayaibitsaëtoxaneto, itsamatacabi Dioso ayaijamatabëcuenevi exanaenatsi, jai Jesús daxitajivijavabelia.

Pacuenia Jesús najamatabëxainaea sivanua Jerusalén tomarapijivi yabara pelivaisi (Mt 23.37-39)

³¹ Itsa baja Jesús najumevereta jivi livaisi petsipaebijava, fariseovi pata Jesúsjavaberenä. Nexata fariseovi jumaitsi Jesúsjavabelia:

—Jesús, mapatomara baja vecuaponareje. Nacuaeavetsinë raja Herodes cabeyaxuabi-paeba, jai fariseovi.

³² Jesús nexata jumaitsi fariseovijavabelia:

—Paponaremelia. Bajaraponë Herodes, jivi peyamaxëitojorobabiabinëjavabelia, pajumaitsimë tsane mapacueniaje: “Jesús raja jumaitsi: ‘Ajena raja abaxë, meravia ata icatsia, vecuacapitsapaponaenajë dovathi peyajavajinavanapaevi. Piavitanevi ata jamatejemayaexanaponaenajë. Nexata abaxë pameravia bajarapacuenia taexanaejava copatsianajë,’ jai raja Jesús,” pajamë tsane Herodesjavabelia. ³³ Diosojumepaebivimi profetavimi beyejebabiabatsi Jerusalén tomarata. Tsipaji profetavi acuenebi saicayatamarata petëpaejava Jerusalén tomaravecua. Bajaraxuata xanë ata ponaenajë tavajënaeyabelia Jerusalén tomarabelia. Nexata ponaenajë ajena. Itsa jume, meravia, pameravia ata, tanebeyaxuabinexa Jerusalén tomarata, jai Jesús fariseovijavabelia.

³⁴ Nexata Jesús najamatabëxainaea sivanua Jerusalén tomarapijivi. Jerusalén tomara-pijivi Jesús najamatabëxainaea pesivanuejavata, jumaitsi mapacueniaje:

—¡Pajerusalén tomarapijivimë, pabeyajebabiabame Diosojumepaebivimi profetavi! ¡Ibotonëta ata patseconabiabame bajarapacuenia panebeyaxuababiabinexa Diosojumelivaisi pecaponaevi paxamëjavaberenä! ¡Pacuenia vacara banacoxicaetuata pecorofetobëxëpanaberenä, bajara pijinia pacuenia xanë ata picani bitso jitsipabiabajë patacaetuatsinexa, patacacapanepaenexa picani panijaneconivecua! ¡Itsiata baitsi jane paxamë apo pajejamë cajena! ³⁵ Panejumetaema. Dioso rabaja pacacopata papecaevetabiabijavami. Nexata baja panijatemplobota Dioso apo ponapona. Xaniajanë pacuenia pacatsipaebijitsiatsi. Paxamë baja apo panetaemë tsane matavëjëa. Matapania itsa panejumecovënëtame Cristonëcuenenë, Dioso taneitorobinëtsica, icatsia panetaename. Itsa panesivajamatabëjumaitsimënuä tsane: “Dioso, bitso yavenonare maponë najetarucaje. Bajaraponë nejamatabëcueneta najetaruca,” itsa panesivajamatabëjamë tsane, nexata jane baja icatsia panetaename itsa patsianicajë, jai Jesús mapacueniaje najamatabëxainaea pesivanuejavata Jerusalén tomarapijivi.

14

Pacuenia Jesús jamatejemayaexana pebi, bitso daxitanë peyajinaenë, yabara pelivaisi

¹ Itsamatacabi, judíovi penacueraevetsimatacabita, Jesús pona fariseovi penamata-caitorobinë pijaboyabelia penanabaninexa. Nexata bajarapabota itsamonae fariseovi Jesús naitaxutocaevetatsi. ² Nexata Jesús pitabarata eca pebi, daxitanë peyajinaenë.

³ Jesús nexata jumaitsi judíovi pecujarubivijavabelia, fariseovijavabelia ata:

—¿Penacueraevetsimatacabita ata tsaja piavitanevi vajajamatejemayaexanaenexa, Dioso nacatocopata? Jume. ¿Apo nacatocopatsi tsaja? jai Jesús judíovi pecujarubivijavabelia, fariseovijavabelia ata.

⁴ Itsiata bajarapamonae moya ena. Nexata Jesús cobepita peyajinaenë. Jamatejemayaexana baja. Itoroba baja peponaenexa bajarapabovecua. ⁵ Jesús nexata jumaitsi judíovi pecujarubivijavabelia, fariseovijavabelia ata:

—Itsa panijaburro, panijabaca ata, pacatojopaejitsipareca meramëthëareca, nexata penacueraevetsimatacabita ata, bepijia pajutarëcëpaejitsipame. ¿Baja tsabaitsi jane? jai Jesús judíovi pecujarubivijavabelia, fariseovijavabelia ata.

⁶ Nexata bajarapamonae acuenebi pejumecanaviatsijava Jesúsjavabelia.

Pacuenia Jesús jivi muxujioba peyaiyataevitsi penaenexa petsinubijavanëta penaenexa penatsiitapetsiyaniva yabara pelivaisi

⁷ Fariseonë pijabota Jesús tane fariseonë pejunatsivi. Bajarapamonae natsiitapeta peyaiyataevitsi penaenexa petsinubijavanëta penaenexa mesa muxuneneta. Nexata Jesús muxujioba bajarapamonae beveliajamatabëcuenevi penataenexa. Jesús jumaitsi daxitajivijavabelia mapacueniaje:

⁸ —Itsa pacajunata panenanabaninexa penacasabifiestajavabelia, pëtsa panatsi-itapetame paneenaenexa peyaiyataevitsi penaenexa petsinubijavanëta. Tsipaji itsanë ayaijamatabëcuenenë paxamë matatoxenetsia itsa najunatatasi, napatsipa. ⁹ Nexata papecajunatsinë pacacujitsiparena. Nexata pacajumai tsipae: “Tocopare bajaraxua maponë peecaenexaje,” pacajai tsipae. Nexata paxamë pauramë tsipae itsa pacanatixitsiaexana paneecaenexa beveliajamatabëcuenevi penaenexa petsinubijavanëta. ¹⁰ Itsa pacajunata, paenaename beveliajamatabëcuenevi penaenexa petsinubijavanëta. Matapania papecajunatsinë itsa pacajumai tsane: “Natixiremena. Peyaiyataevitsi penaenexa tatsinubijavanëta ecare,” itsa pacajai tsane, paenaename bajaraxuanëta. Nexata bajarapacuenia daxita mesa muxuneneta panenajuaenaevi pacataena papecaiyataejava papecajunatsinë. ¹¹ Pajivi ayaijamatabëcuenejivi natane, bajarapajivi beveliajamatabëcuenejivi taenatsi Dioso. Pajivi pijinia beveliajamatabëcuenejivi natane, bajarapajivi ayaijamatabëcuenejivi taenatsi Dioso, jai Jesús judíovi pecujarubivijavabelia, fariseovijavabelia ata.

¹² Nexata Jesús icatsia jumaitsi pejunatsifariseonëtsijavabelia:

—Itsa junatame itsamonae nebarënanabaninexa nijabota matonejepijijava, itsa jume, caniviyopijijava ata, pëtsa junatame ëneyapëtaevi. Pëtsa junatame nebarënanabaninexa ënijamonae. Pëtsa junatame ënijamonaeviriavi ata. Pëtsa junatame ëricovi, pamonaevi nijabo muxuneneta jinavanapa. Tsipaji bajarapamonae juya canamatamojunatsipa pijabota pecabarënanabaninexa. Nexata bajarapacuenia canamatamotsipa bajarapamonae. ¹³ Itsa junatame itsamonae fiesta nebarëxanaenexa, junatsianame bepejiobivi, penabejenaevi ata, pejayujayunaevi ata, bitso pitaxutotsëcënaevi ata. ¹⁴ Nexata bajarapacuenia pepacuene jamatabëcuenebarëyamë tsane. Tsipaji bajarapitsivi acuenebi juya pecamatamojunatsijava tsane. Nexata nijamatamo xainaename pamatacabi icatsia Dioso asaëyaexanaena pamonaevi tëpa, pexaniajamatabëcuenevimi, jai Jesús pejunatsifariseonëtsijavabelia.

Pacuenia Jesús jivi livaisi tsipaeba pinijifiesta pexanaenë pelivaisicuenia yabara pelivaisi

(Mt 22.1-10)

¹⁵ Daxita mesa muxuneneta penaevi jumetane Jesús petsipaebilivaisi. Nexata fariseoviyajuvënëne jumaitsi Jesúsjavabelia:

—Jamatabëcuenebarëya tsane pajivi nanabaniana Dioso pijanacuatatsia, jai fariseoviyajuvënëne.

¹⁶ Nexata fariseovi peyapëtaenexa itsamonae Dioso apo pejumecovënëtsijava, junatsi atatsi, Jesús jumaitsi comparacióncuenia mapacueniaje:

—Fiesta pexanaenë pijajivi itoroba ayaijava pexaejava pexanaenexa. Nexata tajëvelia junatsiaexana jivi ayalbitsaëttoxaneto petopatsinexatsi. ¹⁷ Bajaraxuacujinae pexaejava baja itsa vereta, fiesta pexanaenë itoroba pijajivitonë peponaenexa pejunatsivijavabelia: “Naxanitsia baja. Pexaejava rabaja vereta,” pejainexa. ¹⁸ Itsiata baitsi jane daxita pejunatsivi apo topatsitsirena. Itsanë saya peponaeyaniva, pijajivitonëta tonajumeitorobarenatsi pejumaitsilivaisi mapacueniaje: “Xanë aeconoxaeta comuatabajë ira. Nexata ponaejitsianë bajarabelia tataenexa bajarapaira. Pexaniacuene netoexanaename. Pëtsa jamatabëcueneanaepaname xanëjavaberena,” pejailivaisi tonajumeitorobarenatsi pijajivitonëta. ¹⁹ Itsanë pijinia saya peponaeyaniva, pijajivitonëta tonajumeitorobarenatsi pejumaitsilivaisi mapacueniaje: “Xanë comuatajë diez ponëbeje bueyu tanetoroborobocaevinexa. Nexata ponaejitsianë taëjëtsinexa bajarapabueyu.

Pexaniacuene netoexanaename. Pëtsa jamatabëcueneanaepaname xanëjavaberena,” pe-jailivaisi tonajumeitorobarenatsi pijajivitonëta. ²⁰ Itsanë pijinia saya peponaeyaniva, pijajivitonëta tonajumeitorobarenatsi pejumaitsilivaisi mapacueniaje: “Xanë raja ae-conoxaeta nacasabajë. Bajaraxuata acuenebi taponaejava,” pejailivaisi tonajumeitorobarenatsi pijajivitonëta. Bjarapacuenia daxita pamonaë picani fiesta pexanaenë junata, peponaeyaniva saya tonajumeitorobarenatsi pijajivitonëta. ²¹ Nexata fiesta pexanaenë pijajivitonë naviarena pijatuxanenëjavaberena. Tsipaeba pijatuxanenëjavabelia daxita pacuenia najumerubatsi. Nexata fiesta pexanaenë anaepana. Jumaitsi pijajivitonëjavabelia: “Naxanitsiayo liamëre tomarabelia. Junatanajetarucaename jivi pini-jicallexanetonëjava, tsiquiricallexijava ata. Junatsianame bepejiovivi, penabejenaevi ata, pejayuyayunaevi ata, bitso pitaxutotsëcënaevi ata, penanabaninexa tajabota,” jai fiesta pexanaenë pijajivitonëjavabelia. Nexata baja pijajivitonë pona pejunatsinexa jivi. ²² Jivi pebarëpatsicujinaerena, jumaitsi pijatuxanenëjavabelia: “Tajatuxanenë, ex-anajë rabaja taneitorobicueniamë. Itsiata abaxë sajinanubena itsamesanë itsamon-aenexa,” jai bajaraponë pijatuxanenëjavabelia. ²³ Nexata petuxanenë icatsia jumaitsi pijajivitonëjavabelia: “Liamëre icatsia carreteranëjavabelia, namutonëjavabelia ata. Junatanajetarucaename asaëyata carreterajava peponaevi, namutojava ata peponaevi, penanabaninexa tajabota pevënëcaenexa tajabo. ²⁴ Pamonaë picani copiata junatajë penanabaninexa, caenë ata bajarapamonaeyajuvënënenë, apo naxae tsane bajarapapex-aejava,” jai petuxanenë pijajivitonëjavabelia, jai Jesús fariseoviyajuvënënenëjavabelia jivi peyapëtaenexa itsamonae Dioso apo pejumecovënënsijava, junatsi atatsi.

Pacuenia Jesús tsipaeba jivijavabelia, pajivi Jesús jamatabëpënaponatsi, copiaya penajamatabëcueneveretsinexa Jesús pepënaponaejavajënaeyatsi yabara pelivaisi (Mt 10.37-38)

²⁵ Jivibitsaëtöxaneto Jesús pënjajinavanapatsi. Nexata Jesús napënëyorota bajarapamonaejavabelia. Jesús jumaitsi mapacueniaje:

²⁶ —Ponë xanëjavaberena patsi ata, itsiata itsa apo niasiva tsane daxita pijamonae matatoxenetsia, nexata bajaraponë apo tajajivitonë tsane. Bajaraponë itsa apo niasiva tsane paxa, pena ata, pematapijivi ata, pejuyapijivi ata, piasivajava matatoxenetsia, nexata apo tajajivitonë tsane. Bajaraponë itsa apo niasiva tsane pijava, pexi ata, pijacuata penaasivajava ata, matatoxenetsia, nexata bajaraponë apo tajajivitonë tsane. ²⁷ Ponë xanë yabara itsamonae jamatabëpebeyaxuabixaetsi, jamatabëpebejibiaexanaexaetsinua, nexata pecajunavi itsa apo nepënaponae tsane, bajaraponë apo tajajivitonë tsane. ²⁸ Paxamëyajuvënënenë itsa jamatabëexana bo, athëbëabetsia piapiaboxanetotsia, nexata copiaya najamatabëcueneveretsipa pacuenia exanaejitsia. “¿Netocaëjëpa tsamëra baja tajapalatata taveretsinexa tajabo?” jamatabëjai tsipae copiaya. ²⁹ Itsa apo najamatabëcueneveretsi tsipae copiaya, nexata bo pexanaejava taxuxuabi ata, apo veretsi tsipae itsa apo tocaëjëpaetsi pijapalata. Nexata pijabo petotae-vitsi, capocaponaejitsipatsi. ³⁰ Baracuaicuajitsi tsipae: “Bajaraponë picani taxuxuaba pijabo pexanaejava. Itsiata apo tocaëjëpaetsi pijapalata peveretsinexa pijabo,” jaitsi tsipae capocaponaeya petotaevitsi. ³¹ Nacuaevetsinë pijinia, itsanacuaverena itsa sivanavajabitsaëtsijitsiatsi, nexata copiaya najamatabëxainaejitsipa. Jamatabëjumaitsi tsipae mapacueniaje: “Tajajivi saya diez mil ponëbeje. Tanebarëtsimaxëponaevinexa, veinte mil ponëbeje. ¿Baja tsamëra tajajivi nebarëcuenecaëjëpaena tabarëbenexa tajavajabitsaënë pijajivi, veinte mil ponëbejejavabelia?” jamatabëjai tsipae copiaya. ³² Nexata bajarapacuenia penajamatabëxainaecujinae, bajaraponë yapëtaejitsipa apo pebarëcuenecaëjëpaejavatsi pebarëbenexa pijavajabitsaënë pijajivijavabelia. Itsa abaxë tajë pevajënae pepatsijavarena pijavajabitsaënë, nexata najumexuabijitsipalia pijajivita penabarajamatabëcuene xanepanaenexabeje vajabitsaëcuene pexanaeyanivabeje. ³³ Bajara pijinia pacuenia paxamëyajuvënëvi ata itsa apo najamatabëcueneveretsi

copiaya penajamatabëcuenepënëyorotsinexa daxita pexainaejavavecua, nexata acuenebi tajajivi taexanaenexa, jai Jesús jivi ayaibitsaëtoxanetojavabelia.

Pacuenia Jesús jivi livaisi tsipaeba comparacióncuenia pacuenia jamatabëcueneitsi tsipae Jesús pijajivitonë ita copatsipa Jesús pejumecovënëtsijavami yabara pelivaisi (Mt 5.13; Mr 9.50)

³⁴ Jesús icatsia comparacióncuenia jumaitsi jivi ayaibitsaëtoxanetojavabelia mapacueni-aje:

—Yajo abaxë ita xaica, xanepana. Itsiata yajo pexaicaejavami ita ajibi tsipae, ¿detsa pacuenia icatsia naxaicaeyaexanaejitsipa? Acuenebi. ³⁵ Itsacuenejavayonexa ata baja apo xanepanae tsipae. Nexata peubijava petsibacathocaenexa ata, apo xanepanae tsipae. Tsipaji pacuenia peubijava petsibacathocaebeno, ita tsibacathoca, peubi-ava naxaniabiaexana, bajara apo itsi tsipae bajarapayajomi. Pacuenia bacatasi ata ita tsibacathoca, peubijava naxaniabiaexana, bajara apo itsi tsipae bajarapayajomi. Nexata saya jema xuabijitsipa bajarapayajomi. Pajivi jamatabënejumeyapëtane patacat-sipaebilivaisi, nenamuxunaevetsi xaniavaetsia, jai Jesús comparacióncuenia bajarapamonaejavabelia.

Bजारapacuenia Jesús jumaitsi comparacióncuenia jivi peyapëtaenexa pacuenia jamatabëcueneitsipae Jesús pijajivitonë ita copatsipa Jesús pejumecovënëtsijavami. Nexata Diosovecua naxuabijitsipa.

15

Pacuenia Jesús jivi livaisi tsipaeba oveja penaxuabinë pelivaisicuenia yabara pelivaisi (Mt 18.10-14)

¹ Gobierno pejamatabëcuene impuestomatamo pematamoyanijobabiabivi, pata Jesúsjavaberena. Yajavaparenanua piajamatabëcuenebejevi. Bजारapamonae pata penamuxunaevetsinexa Jesús petsipaebilivaisi. ² Nexata fariseovibeje judíovi pecujarubivibeje ita tane gobierno pejamatabëcuene impuestomatamo pematamoyanijobabiabivi pepatsijava Jesúsjavaberena, ita tanenua piajamatabëcuenebejevi ata pepatsijava Jesúsjavaberena, nexata fariseovibeje judíovi pecujarubivibeje Jesús baracuaicuaijaitsi. Bजारapamonae najumaitsi mapacueniaje:

—Mara ponëje naneconita Diosojavabelia. Tsipaji copiapitabiaba piajamatabëcuenebejevi ata. Naxaeyabiabanua pexaejava bajarapamonaeta, najai fariseovibeje judíovi pecujarubivibeje Jesús yabara jamatabëcuenenavëxaniabiaya.

³ Nexata Jesús pebaracuaicuaijaixaetsi, Jesús bajarapamonaejavabelia livaisi tsipaeba mapacueniaje:

⁴ —Paxamëyajuvënënë xainaejitsipa cien ponëbeje oveja. Nexata ita toyajuvënëxaxuabijitsipatsi caenë, oveja pexainaenë petusatota puenetsipa noventa y nueve ponëbeje. Nexata jaitsipa petonaxuabinëtsi matapania pecaxitajarabijavabelianexa. ⁵ Nexata oveja pexainaenë ita baja caxitajarabijitsipa petonaxuabinëmitsi, barëyataejitsipa. Boyaberena vëtarapatsipa petonaxuabinëmitsi. ⁶ Nexata oveja pexainaenë petonaxuabinëmitsi ita capatsipa boyaberena, junatsipa peyapëtaevitsi. Junatsipa pijabo muxuneneta imoxoyo penaevi ata. Nexata oveja pexainaenë jumai tsipae bajarapamonaejavabelia: “Panecobenabarëyamëre. Tsipaji tajaovejayo, tanetonaxuabinëyomi picani, caxitajarabajë baja,” jai tsipae oveja pexainaenë bajarapamonaejavabelia. ⁷ Xaniajanë pacuenia pacatsipaebijitsiatsi. Mapanacuataje Dioso pitabarata pijaneconi pexainaejivi ata, ita copatsiana pibisiacuene pexanabiabijava, ita najamatabëcuenepënëyorota Diosojavabelia, bajara pijinia pacuenia sivabarëyatsi tsane athëbëtatsia pejinavanapaevi. Bजारapajivi, athëbëtatsia pejinavanapaevi, sivabarëyatsi tsane noventa y nueve pajivibeje Dioso pitabarata

pianeconijibitsavanapaevi pesivabarëyatsabiabijava matatoxenetsia, jai Jesús fariseovijavabelia, judíovi pecujarubivijavabelia ata.

Pacuenia Jesús livaisi tsipaeba penaxuabipalatanëyo pelivaisicuenia yabara pelivaisi

⁸ Icatsia Jesús jumaiti fariseovijavabelia, judíovi pecujarubivijavabelia ata:

—Petiriva xinaejitsipa diez ponëbeje palatanëanë, bitso penamatamotsinëanë. Nexata itsa toyajuvënëanaxuabijitsipatsi caenë, itanojotsipa lámpara. Bo ira cajuetsipa xaniavaetsia pejaitsinexa. Matapania itsa pitabuatsipa petonaxuabipalatanëtsi, copatsipa pejaitsijava. ⁹ Itsa baja caxitajarabijitsipa petonaxuabipalatanëmitsi, nexata junatsipa peyapëtaevitsi. Junatsipa pijabo muxuneneta imoxoyo penaevi ata. Bajarpova nexata jumai tsipae bajarapamonaejavabelia: “Panecobenabarëyamëre. Tsipaji tajapalatanëyo, tanetonaxuabinëyomi picani, caxitajarabajë baja,” jai tsipae petiriva bajarapamonaejavabelia. ¹⁰ Xaniajanë pacuenia pacatsipaebijitsiatsi. Pajivi copatsiana pibisiacuene pexanabiabijavami, itsa najamatabëcuenepënëyorotsiananua Diosojavabelia, bajara pijinia pacuenia athëbëtatsia ángelevi sivabarëyatsi tsane, jai Jesús fariseovijavabelia, judíovi pecujarubivijavabelia ata.

Pacuenia picani juyapijinë paxavecua naxuabaponapona yabara pelivaisi

¹¹ Icatsia Jesús livaisi tsipaeba fariseovijavabelia, judíovi pecujarubivijavabelia ata. Jesús jumaiti mapacueniaje:

—Pebi xaina anijanëbeje pexënatobeje. ¹² Nexata juyapijinë jumaiti paxajavabelia: “Axa, xuanë picani netocopatame tapitsinexa nevënamuto, bajaraxuanë abaxë apo tēpae atamë, nerajure baja tajajavanexa,” jai juyapijinë. Nexata pexënatobeje pexainaenë pexënatobejejavabelia rajuta daxita pexainaevanëmi. ¹³ Nexata paxa perajutsicujinaetsibeje, caematacabibejecujinae, juyapijinë canajeta daxita pexainaevanëmi pecaetuatsinexa palata. Bajaraxuacujinae jane baja pona tajënacuyabelia. Bajarajotalia pibisiacuene exanaponapona. Nexata vereta daxita paxa perajutsijavanëmitsi. ¹⁴ Nexata daxita bajarapanacuapijivi janibocuene tsipatsi. Bajaraponë peveretsicujinae daxita pijapalatami, bitso namatavenona pexaejava. ¹⁵ Nexata jaita penacuenebinexa bajarapanacuata peecaenëjavabelia. Bajaraponë itorobatsi pijairanëjava petoetaponaponaenexa pijamarrano. ¹⁶ Nexata bajaraponë bitso pijanixae, pepenenexa picani ayaijava jamatabëxayabiaba bopocuai, marrano pexayabiabijava. Bajarajota itsajivi ata apo rajutsitsi pexaejavanexa. ¹⁷ Nexata belia bajaraponë xaniavaetsia najamatabëxaina. Jamatabëjumaiti mapacueniaje: “Taxa pijabota pexaejava ayaijava xaina pijajivi ayaibitsaëto piabatsinexa. Tonacopatabiabatsi ayaijava pexaejava. Itsiata xanë majotaje tēpaejitsianë baja tajani. ¹⁸ Nexata taxajavabelia naviatsianajë. Jumaitsinë meta tsane taxajavabelia: ‘Axa, pibisiacuene exanajë Diosojavabelia, xamëjavabelia ata. ¹⁹ Abejenë raja. Auranë baja rovia xamëjavabelia: “Taxë nato,” tanejamëjava. Nexata saya nijajivitonëne nexanare,’ janë meta tsane taxajavabelia,” jamatabëjai juyapijinë. ²⁰ Nexata baja naviata paxajavabelia.

’Itsa abaxë tajëverena najetaruca, pexë nato pexainaenë copiatane. Nexata bajaraponë pexë nato itaxutobejiobiatane. Mataenetsia cujinaejinalia pexë nato. Nacoxivaetabarucapona. Copiapitsiaya itabaratsutsunexuaba pexë nato. ²¹ Nexata bajaraponë jumaiti paxajavabelia: “Axa, pibisiacuene raja exanajë Diosojavabelia, xamëjavabelia ata. Abejenë raja. Nexata baja rovia auranë xamëjavabelia: ‘Taxë nato,’ tanejamëjava,” jai paxajavabelia. ²² Itsiata baitsi jane pexë nato pexainaenë bajarajota jumaiti pijajivijavabelia: “Naxanitsia. Bepijiayo taxë nato patocaponaremena daxita matatoxenetsia pexaniapana, penajumaxuabipana. Pajumaacare bajarapapanata. Anillonua pacobesixatare. Zapatonua pataxuxatare. ²³ Penasitsinë becero papiremela. Pabeyaxuabianame vajaxaenexa. ¡Fiesta exanaenatsi vajabarëyanexa! ²⁴ Tsipaji raja maponë

taxënatoje: ‘Tëpa meta baja,’ sivajamatabëjanë picani. Itsiata tsaena ponapona. ‘Naxu-aba meta baja,’ sivajamatabëjanë picani. Itsiata baja icatsia patajopa,” jai pexënato pexainaenë pijajivijavabelia. Nexata taxuxuaba fiesta pexanaejava.

²⁵ ‘Bajarapamatacabi matapijinë pabiabelia nacuenebaponapona. Nexata penavi-atsinë bo itsa imoxoyotanajetaruca, jumetane música. Jumetanenua peyavajibijava. ²⁶ Nexata bajaraponë junata paxa pijajiviyajuvënënë. Jumaiti: “¿Detsa pitsicuene yabara fiesta paexaname?” jai matapijinë. ²⁷ Nexata paxa pijajivitonë jumaiti: “Nejuyapijinë baitsi patajopa. Axa nexata paneitoroba patabeyaxuabinexa becerro, penasitsinë. Jamatejema tsaena ponapona nejuyapijinë,” jai bajaraponë matapijinëjavabelia. ²⁸ Nexata matapijinë bitso anaepana. Apo jitsipae boyabelia pejonejava. Nexata paxa sivapitsaparenatsi. Jumaiti pexënatojavabelia: “Naxanitsia. Najonemeya,” jai pexënatojavabelia. ²⁹ Nexata matapijinë jumaiti paxajavabelia: “Jume. Bajayajebi baja rovia catonacuenebaponaponatsi xanë. Caeto ata cajena apo cajumeapajeaitsi. Itsiata baitsi jane caeto ata apo nerajutsimë chivoyo ata fiesta tabarëexanaenexa tayapëtaevi. ³⁰ Itsiata aeconoxae patajopa baja nexënato, ponë vereta nijapalatami petirivijavabelia. Nexata tobeyaxuabame becerro, penasitsinë,” jai matapijinë paxajavabelia. ³¹ Nexata bajaraponë jumaiti pexënatojavabelia: “Taxënato, xamë cajena xanëjavata ponaponame daxitamatacabi. Nexata daxita xua taxainaejava nijajava baja cajena. ³² Itsiata aeconoxae namatavenonatsi vajabarëyanexa. Tsipaji nejuyapijinë: ‘Tëpa meta baja,’ tasivajamatabëjainëmi, itsiata tsaena asaë. Penaxuabaponaponaenëmi icatsia baja patajopa,” jai bajaraponë pexënatojavabelia, jai Jesús mapalivaisije fariseovijavabelia, judíovi pecujarubivijavabelia ata.

16

Pacuenia pijatuxanenë pecobcovë petoevetsinë toveretapona pevetsiaexanaejavanëtsi yabara pelivaisi

¹ Jesús pijajivijavabelia livaisi tsipaeba. Jumaiti mapacueniaje:

—Petuxanenë, bitso pexainaenë, ponapona. Bajaraponë xaina pijajivitonë petoevetsinexatsi pecobcovë. Itsiata pepëya pijajivitonë pecobcovë toveretaponatsi. Nexata itsamonae tsipaebatsi pepëya pijajivitonë pecobcovë petoveretaponaejavatsi. ² Nexata petuxanenë pijajivitonë junata. Jumaiti pijajivitonëjavabelia: “Xamë pina tapëya netoveretaponame tacaevetsiaexanaejava. Pabaxutojavabelia matamoy-aquinarubame xuanë canajetaponame tacobcovë, xuanënu netocomuataponame, bajarapabaxuto netocanaviatsianame. Nexata baja itsa netocanaviatsianame bajarapabaxuto, matavëjëa apo netoevetsimë tsane tacobcovë,” jai petuxanenë pijajivitonëjavabelia. ³ Nexata pijajivitonë sivapona bajarapabaxuto petocanaviatsinexa pijatuxanenë. Nexata bajarapabaxuto petocanaviatsivajënae jamatabëjumaiti: “¿De tsaeta xua exanaenajë? Tajatuxanenë baja necapitsapaejitsia pecobcovë tatoevetaponaponaejavavecua. Apo necaëjëpae tsane tanacuenebinexa pabi tajacuata tanaevetsinexa. Bitso auranënu tsipae itsamonaejavabelia amoneya tavajëtaponaenexa palata tanamitsacomuatabiabinexa taxaejava. ⁴ Taneamoneyabivi meta abaxë, xua niamoneyaba, bevelia tovënëjonaponaenajë. Nexata tajatuxanenë tanecapitsapaecujinae, bajarapamonae pijaboyabelia itsa ponaenajë, xaniavaetsia necopiapitsiana. Nexata bajarapamonaejavata naponaponaenajë,” jamatabëjai bajaraponë. ⁵ Nexata bajaraponë junata daxita pamona abaxë amoneyabatsi. Nexata pamona amoneyabatsi, bajarapamonae, caenë canacujitsia, patapona bajaraponëjavaberena. Nexata bajaraponë copiaya petopatsinëtsijavabelia jumaiti: “¿Detsa pacuenia niamoneyabame abaxë, xua tajatuxanenë pijajava catsicopatatsi? jai bajaraponë. ⁶ Nexata ponë amoneyabatsi, jumaiti: “Camoneyabatsi abaxë tacarajutsinexa aceiteranë ochocientos pagalónbeje,” jai. Nexata bajaraponë jumaiti piamoneyabinëtsijavabelia: “Bevelia

saya catocopatsianatsi. Mara picani pacuenia niamoneyabameje, tanetoitanerubibaxutotamėje. Pire cajena. Icatsia itsabaxutojavabelia saya cuatrocientos pagalónbejenexa bepíjia yaquinarure. Nexata saya bajarapacuenia tajatuxanenē rajutsianame,” jai bajaraponē piamoneyabinētsijavabelia. ⁷ Bajaraxuacujinae icatsia itsanē topatatsi. Nexata icatsia jumaitsi bajaraponējavabelia: “¿Jica xamē? ¿Detsa pacuenia niamoneyabame?” jai. Nexata bajaraponē jumaitsi: “Camoneyabatsi abaxē tacarajutsinexa cien pabultobeje trigoxubultonē,” jai. Nexata bajaraponē jumaitsi piamoneyabinētsijavabelia: “Mara picani pacuenia niamoneyabameje, tanetoitanerubibaxutotamėje. Pire cajena. Icatsia itsabaxutojavabelia saya ochenta pabultobejenexa yaquinarure. Nexata saya bajarapacuenia tajatuxanenē rajutsianame,” jai bajaraponē piamoneyabinētsijavabelia. Bajarapacuenia exanapona daxita piamoneyabivitsijavabelia pesivajamatabēcuene xanepanaenexatsi, xaniavaetsia pecopiapitsinexatsi pijabota penaponaponaenexa, pijatuxanenē itsa navecuacapitsapatsi. Nexata jane baja daxita piamoneyabivitsi tocanaviabatsi. Bevelia matamota petoyaitanetuarutaponae baxutonētsi. ⁸ Bajaraxuacujinae pijatuxanenējavabelia pona perajutsinexa jane baja bajarapabaxutonē. Nexata pijatuxanenē jumaitsi: “Xamē baja rovia pibisiacuene exaname. Itsiata baitsi jane naitatsacaxae, exaname pacuenia catoxanepanaejitsia nevajēnaeyabelia,” jaitsi pijatuxanenē. Nexata pacuenia pijatuxanenē pepēya pecobecovē petocanajetabiabinē ajamatabēcueneitatsaca, bajara pijinia pacuenia Dioso apo pejumecovēnētsivi ajamatabēcueneitatsaca Dioso pejumecovēnētsivi matatoxenetsia mapanacuapijicuene yabaraje, jai Jesús pijajivijavabelia.

⁹ Icatsia Jesús jumaitsi pijajivijavabelia:

—Pacamuxujiobatsi xaniavaetsia. Mapanacuapijipalatata payavenonare itsamonae. Nexata pacuenia pijatuxanenē pecobecovē petoevetsinē, pesivajamatabēcuene xanepanaevitsi xaina, xaniavaetsia pecopiapitsinexatsi pijabota penaponaponaenexa pijatuxanenē pecapitsapaecujinaetsi, bajara pijinia pacuenia paxamē ata athēbētatsia paxainaename papecasivajamatabēcuene xanepaenaevi. Nexata pamatacabi patēpame, itsajota apo panamatavenonaemē palata, Dioso pacacopiapitsiana apo peveverecaebonējavatatsia, jai Jesús pijajivijavabelia.

¹⁰ Icatsia Jesús jumaitsi pijajivijavabelia:

—Pajivi xaniavaetsia toeveta tsiquirijavayo ata itsanē pecobecovē, bajarapajivi xaniavaetsia toevetsipa ayaijava ata. Pajivi bijiaya toeveta tsiquirijavayo ata itsanē pecobecovē, bajarapajivi bijiaya toevetsipa ayaijava ata. ¹¹ Itsanē pecobecovē, mapanacuapijicueneje, palata ata, xaniavaetsia itsa apo patoevetsimē tsipae, nexata itsajivi ata apo pacaevetsiaexanae tsipae Dioso pijacuene, xua bitso namatamota mapanacuapijicuene matatoxenetsiaje. ¹² Itsa xaniavaetsia apo patoevetsimē tsipae itsanē pecobecovē, nexata pitsijava picani pacaevetsiaexana, bajarapitsijava itsajivi ata apo pacarajutsi tsipae pepo panijajavanexa, jai Jesús pijajivijavabelia.

¹³ Icatsia Jesús jumaitsi pijajivijavabelia:

—Itsajivi ata acuenebi caecuenia petonacuenebijava anijanēbeje pijatuxanenēbeje. Caenējavabelia jitsipaejitsipa petonacuenebijava. Itsanējavabelia apo jitsipae tsipae petonacuenebijava. Bajara pijinia itsi pajivi bitso jitsipa Dioso. Pajivi bitso jitsipa Dioso, nexata itsa tonacueneba Dioso, acuenebi bitso pejitsipaejava palata, jai Jesús pijajivijavabelia.

¹⁴ Fariseovi, bitso palata pejitsipaevi, jumetaeyena Jesús petsipaebilivaisi pijajivijavabelia. Nexata fariseovi jumecapocaponatsi Jesús. ¹⁵ Jesús nexata jumaitsi fariseovijavabelia:

—Paxamē pajitsipabiabame jivi pejumaitsinexa paxamē yabara: “Fariseovi raja pexaniajamatabēcuenevi,” pejainexa. Itsiata baitsi jane Dioso pacajamatabēcuenyapētane

pexaniajamatabëcuene apo panexainaevicuene. Pacuene bitso jivi tsitapexaniacuenetsi, bajarapacuene Dioso apo tsitapexaniacuenetsi, jai Jesús fariseovijavabelia.

Pacuenia Jesús tsipaeba fariseovijavabelia bajayata Dioso Moiséspijinëta penajumecopatsilivaisi, pacuenia ata Dioso pijajivi evetsijitsia, yabara pelivaisi

¹⁶ Icatsia Jesús jumaitsi fariseovijavabelia:

—Juanpijinë jivibautisabinëmi pepatsivajënaeya, jivi xaina Dioso Moiséspijinëta penajumecopatsilivaisi pejumecovënëtsinexa. Bajayata Diosojumepaebivi profetavi ata petsipaebilivaisianë ata, xaina jivi pejumecovënëtsinexa. Itsiata Juanpijinë pepatsicujinae, pexanialivaisi tsipaebaponajë. Tsipaebaponajë Dioso pijajivi pevetsijavanexa. Nexata daxitajivi bitso jitsipa penajonenexa Dioso pijanacuayabetsia, jai Jesús fariseovijavabelia.

¹⁷ Icatsia Jesús jumaitsi fariseovijavabelia:

—Mapanacuaje, itaboxo yajava, jemata vereverecaena. Itsiata baitsi jane palivaisi Dioso Moiséspijinëta najumecopata, bajarapacuenia apo vereverecae tsane. Nexata daxita pacuene yabara tajëvelia vajunupaeba bajarapalivaisita, pepacuene xaniajai tsane, jai Jesús fariseovijavabelia.

Pacuenia Jesús livaisi tsipaeba penacojobinë pijava pexuabiyaniva yabara pelivaisi (Mt 19.1-12; Mr 10.1-12)

¹⁸ Icatsia Jesús jumaitsi fariseovijavabelia:

—Ponë pijava xuaba, nexata icatsia itsava itsa pita, bajaraponë pibisiacuene exana pevitota. Nexata naneconita Diosojavabelia. Tsipaji pepo pijavavecua jaita itsava. Dioso cajena abaxë bajaraponë pexuabiva pepo pijavacuenia totanetsi. Ponë ata itsanë pexuabiva pita, bajaraponë ata pibisiacuene exana pevitota. Nexata naneconita Diosojavabelia. Tsipaji itsanë pijava yacajërëta, pova abaxë Dioso tanetsi itsanë pepo pijavacuenia, jai Jesús fariseovijavabelia.

Bitso riconë Lázaro beje yabara pelivaisi

¹⁹ Icatsia Jesús livaisi tsipaeba fariseovijavabelia. Jesús jumaitsi mapacueniaje:

—Bitso pexainaenë, riconë, ponapona. Daxitamatacabi naxatababiaba bitso pexaniaviriajavanë. Pexaejava, pexaniaviriajava, xaeyabiaba. ²⁰ Riconë pijabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapacaranatsijavaxaneto jumavelia baupa muxuneneta, bepejobinë, Lázarovënënë, boquecabiaba. Lázaro daxitanë perabëtsabana. ²¹ Lázaro picani jamatabëxaeyabiaba riconë pexaeyabiabijavata piothopaepërë mesa bëxëpanareca. Avirixi ata patabiaba itsajota Lázaro bocabiaba. Petsabanaejava raebabiabatsi. ²² Nexata baja belia Lázaro tēpa. Petēpaecujinae Lázaro ángelevi caponayatsi Dioso pijanacuayabetsia, itsabetsia Abrahampijinë petēpaecujinae ponapona. Bajaraxuacujinae riconë ata tēpa. Mëthëtatsi. ²³ Riconëmi petēpaecujinae pata petēpaevi pepatabiabinacuayabelia. Nexata bajarapanacuata riconëmi bitso navixaetaeya bejiobi tsaponapona. Nexata riconëmi athëbëa benaëcotsia. Tajëtatsia taenuta Abraham penucaejava. Lázaro nucaya Abraham pemuxunenetatsia. ²⁴ Nexata riconëmi vavajai. Jumaitsi Abrahamjavabelia: “Amo Abraham, nitaxutotsoniataema. Netoitorobimica Lázaro. Nacobeupijabutsi merata neebarëtocainejebiaexanaejitsia. Bitso jamatabëfaenajë mapatajutaje,” jai riconëmi. ²⁵ Nexata Abraham jumaitsi riconëmijavabelia: “Tamomo, najamatabënapire. Pamat-acabi pinaena abaxë asaëmë tsaponapona nenaexanaeirata, epexaniacuene picani xainame. Lázaro pijinia pamatacabi abaxë asaë tsaponapona, bitso picani bejiobi. Itsiata juya mapamatacabije pexaniacuenia majotaje catsuponapona. Xamë biji navixaetaeya ponaponame. ²⁶ Itsajivi jamatabëponae ata bajarabereca, acuenebi itsiata pepanepaenexa bajarabereca. Tsipaji bitso ayaiitapajanitoxanetoreca. Bajaraxuata paxamë ata apo pacacajëpae panepanepaenexa mabetsinaje,” jai Abraham. ²⁷ Nexata

icatsia riconëmi jumaitsi Abrahamjavabelia: “Amo Abraham, pexaniacuene cavajëtatsi. Tonajumeitorobianame Lázarota taxa pijaboyabelia. ²⁸ Bajarajotalia xainajë cinco ponëbeje tajuyapijivi. Xaniavaetsia Lázaro tsipaebiana. Muxujobiana bajarapamonae ata peponaeyaniva mapanavixaetaeyabiabinacuaya berenaje,” jai riconëmi Abrahamjavabelia. ²⁹ Nexata icatsia Abraham jumaitsi riconëmijavabelia: “Bajarapamonae baja xaina Moiséspijinë peyaquinaelivaisianë. Diosojumepaebivimi profetavi ata peyaquinaelivaisianë ata, xaina baja. Nexata nejuyapijivi ita apo jitsipae tsane peponaenexa bajarapanacuayabelia, nexata nejuyapijivi jumecovënëtsiana bajarapamonae peyaquinaelivaisianë,” jai Abraham riconëmijavabelia. ³⁰ Riconëmi icatsia jumaitsi Abrahamjavabelia: “Jume raja. Apo jumecovënëtsi tsane cajena bajarapalivaisianë. Itsiata itsajivi ita asaë tsane petëpaecujinae penaviatsinexa pecovëyabelia, tsipaebiana tajuyapijivijavabelia. Nexata tajuyapijivi copabiana pibisiacuene pexanabiabijava. Najamatabëcuenepënëyorotsiana Diosojavabelia,” jai riconëmi Abrahamjavabelia. ³¹ Nexata icatsia Abraham jumaitsi riconëmijavabelia: “Nejuyapijivi ita apo jumecovënëtsi Moiséspijinë peyaquinaelivaisianë, Diosojumepaebivimi profetavi peyaquinaelivaisi ata, nexata pajivi asaë petëpaecujinae, mavelia ponae ata tsipaeje petsipaebinexa nejuyapijivijavabelia, itsiata nejuyapijivi apo jumecovënëtsi tsipae bajarapajivi ata,” jai Abraham riconëmijavabelia, jai Jesús fariseovijavabelia.

17

Pacuenia Dioso pijajivixae, itsamonae jamatabëcueneëjëbijitsiatsi pibisiacuene pexanaenexa yabara pelivaisi

(Mt 18.6-7, 21-22; Mr 9.42)

¹ Jesús jumaitsi pijajivijavabelia:

—Xanë tajajivixae, itsamonae jamatabëcueneëjëbabiabianatsi pibisiacuene pexanaenexa. Nexata itsamonae pejamatabëcueneta tajajivi pibisiacuene exanaena. Nexata pajivi pejamatabëcueneta tajajivi pibisiacuene exanaena, bajarapajivi Diosojavabelia bitso naneconitsiana. Nexata bajarapajivi pinijicuenia Dioso naneconitsiaexanaenatsi. ² Itsamonae Dioso pejumecovënëtsivi, abaxë bepejevaxijamatabëcuene xaina Dioso pejumecovënëtsijava yabara. Nexata apo ajamatabëcuenesaë. Nexata pajivi tajajivijavabelia pibisiacuene jamatabëexanaeyaexana, abaxë tajajivijavabelia pibisiacuene exanaeyaexanaenejeva, bajarapajivi bevësicëtatsi ibotoxanetojavabelia. Nexata bajarapajivi yamaëya, ibotoxaneto yajava, bexuarecatsi pucaxaneto tuatuajëareca. Bajarapacuenia bexuarecatsi, tajajivijavabelia pibisiacuene ita exanaeyaexana bitso penaneconitsianiva Diosojavabelia. ³ Nexata xania. Panayajivitaema pibisiacuene, jai Jesús pijajivijavabelia.

Icatsia Jesús jumaitsi pijajivijavabelia:

—Itsanë Dioso panenajuajumecovënëtsivi pibisiacuene ita pacaexanaena paxamëjavaberena, bajaraponë xaniavaetsia paitavetsianame. Nexata baja ita aura tsane pibisiacuene papecaexanaejava yabara, nexata pexaniajaijumeta ita pacanavajunupaebiana pecopatsijavanexa bajarapacueni, pajamatabëcuenecaevianame pibisiacuene papecaexanaejava. Pabarajamatabëcuenexanepanaenename bajaraponë. ⁴ Caematacabita siete xuabeje pibisiacuene pacaexanae ata tsane, itsiata siete xuabeje ita aura tsane pibisiacuene papecaexanaejava yabara, nexata pexaniajaijumeta ita pacanavajunupaebiana pecopatsijavanexa bajarapacueni, itsiata pajamatabëcuenecaevianame. Pabarajamatabëcuenexanepanaenename bajaraponë, jai Jesús pijajivijavabelia.

Pacuenia Jesús jumaitsi pijaapóstolevijavabelia yabara pelivaisi

⁵ Jesús pijaapóstolevi jumaitsi Jesúsjavabelia:

—Patajatuxanenë, paneyavenonare: “Xanë cajena necaējēpa daxitacuene taexanaenexa,” nejaitsabiabijava orijibia patacajumecovēnētsinexa, jai Jesús pijaapóstolevi.

⁶ Nexata Jesús jumaitsi pijaapóstolevijavabelia:

—Tsiquirijavayo ata xanë yabara itsa pajamatabējumaitsimē tsipae: “Xaniajai cajena. Jesús caējēpatsi daxitacuene pexanaenexa,” itsa pajamatabējamē tsipae, nexata paxamē ata pacacaējēpaejitsipa ayaicuene paneexanaenexa. Nexata itsa pajumaitsimē tsipae mapanaejavaxanetojavabeliaje: “Yatabutopaya natixire. Nucaename pucaxaneto tuat-uajētalia,” itsa pajamē tsipae, nexata naejava ata pacajumecovēnētsipa cajena, jai Jesús pijaapóstolevijavabelia.

Pacuenia itsajivi pijatuxanenë pitorobicueniatsi toexanabiaba yabara pelivaisi

⁷ Jesús icatsia jumaitsi pijaapóstolevijavabelia:

—Paxamējajuvēnēnē xainaejitsipa pijajivitonē. Nexata itorobijitsipa petonacuenebaponaponaeenexatsi. Nexata bajaraponē pijatuxanenë ira petocueponaponaeucujinae, patsipa pijatuxanenë pijaboyaberena. Itsa jume, baca petoevetaponaponaeucujinae patsipa. Nexata paxamējajuvēnēnē petuxanenēxae, pijajivitonējavabelia apo jumai tsipae: “Jonemena baja. Ecare nexaejava tacarajutsinexa,” apo jai tsipae pijajivitonējavabelia. ⁸ Jume baja cajena. Biji rajane jumai tsipae pijajivitonējavabelia: “Netoexanare taxaejavanexa. Nexata abaxē nevetanucaename tanabanijavata. Bajaraxuacujinae xamē nabanianame,” jai tsipae pijajivitonējavabelia. ⁹ “Xanepana rabaja. Pexaniacuene bitso netoexaname,” apo jai tsabiabinua pijajivitonējavabelia petonacuenebabiabijavatsi yabara. Bajarapacuenia apo jumai tsabiabi tsipae tsipajī saya pijajivitonē tsaponaponae. Nexata pacuenia pijatuxanenë itorobatsi, bajaraponē exanabiabijitsipa. ¹⁰ Bajarapacuenia paxamē ata patoexanare Dioso papecaitorobicuenia. Itsa patoveretsianame Dioso papecaitorobicuenia panetoexanavanapaejava, nexata saya namataenetsia panajumaitsimē tsane: “Vaxaitsi saya vajatuxanenë pijajivitsi. Nexata vajanacaitorobicuenia toexanavanapatsi,” panajamē tsane. Pētsa panajumaitsimē: “Itsajivi meta nacajumai tsane: ‘Xanepana rabaja. Xaniavaetsia Dioso patonacuenebame,’ nacajai meta tsane,” panajamē pētsa, jai Jesús pijaapóstolevijavabelia.

Pacuenia Jesús jamatejemaya exana diez ponēbeje, bajayajebi bitso peperabētsabanaevi, yabara pelivaisi

¹¹ Jesús pona Jerusalén tomarabelia. Itsajota Samaria nacuabeje Galilea nacuabeje namuxunenecaxitarababeje, bajaraxuayo Jesús najetaruca. ¹² Itsa baja Jesús pat-sijitsia tsiquiritomarayojavabelia, mataenenatsi diez ponēbeje bajayajebi bitso peperabētsabanaevi. Itsiata tajiyo bajarapamonae vecuanubenaothopatsi. ¹³ Bajarapamonae ayaijumeta jumaitsi Jesúsjavabelia:

—¡Jesús, paneitaxutotsoniataema! jai.

¹⁴ Nexata Jesús itsa tane bajarapamonae, Jesús jumaitsi bajarapamonaejavabelia:

—Panaitajētsianame sacerdotevijavabelia papecaperabētaenexa, jai Jesús bajarapamonaejavabelia.

Nexata bajarapamonae pona sacerdotevijavabelia. Nexata bajarapamonae namutua penajetarubenaevavata pepatsinexa sacerdotevijavabelia, namutua baja perabēxanepananajetarubena. ¹⁵ Daxita bajarapamonae peperabēxanepanaejava itsa tane, nexata caenē saya bajarapamonaejajuvēnēnē naviateca Jesúsjavabelia. Bajaraponē namutua ayaijumeta Diosojavabelia jumai tsanajetaruca: “¡Diosomē, bitso ayaijamatabēcuenenēmē! ¡Tavitanejavami baja vecua, nejamatejemayaexaname!” jai tsanajetaruca bajaraponē Diosojavabelia.

¹⁶ Bajaraponē itsa pata Jesúsjavabelia, pematabacabēta irataeya bocajunua Jesús pitabarata.

—Pexaniacuene netoexaname. Nejamatejemayaexaname baja tavitanejavamivecua, jai Jesúsjavabelia.

Bajaraponë Samaria nacuapijinë. ¹⁷ Nexata Jesús jumaitsi bajarajota penubenaevijavabelia:

—Diez ponëbeje bitso peperabëtsabanaevi jamatejemayaexanajë. ¿Detsa meta xujitsia daxita apo najuapatsi? ¹⁸ Maponëje caenë saicaya nacuapijinë, apo judionë ata, naviateca Diosojavabelia pejumaitsinexa: “¡Diosomë, bitso ayaijamatabëcuenenëmë! ¡Tavitanejavami baja vecua, nejamatejemayaexaname!” pejainexa Diosojavabelia, jai Jesús bajarajota penubenaevijavabelia Samaria nacuapijinë yabara.

¹⁹ Nexata Samaria nacuapijinëjavabelia Jesús jumaitsi:

—Nonotapunare. Ponare baja. Jamatejemamë rabaja tanejumecovënëtsixaemë tacajamatejemayaexanaevanexa, jai Jesús.

Pacuenia Jesús tsipaeba pijajivijavabelia, fariseovijavabelia ata, pecopiapatsijava baja Dioso pijajivi pevetsijava mapanacuataje yabara pelivaisi (Mt 24.23-28, 36-41)

²⁰ Fariseovi jumaitsi Jesúsjavabelia:

—¿Detsa paepatota copiapatsiana Dioso pijajivi pevetsijava pijajivi mapanacuataje? jai fariseovi.

Nexata Jesús jumaitsi fariseovijavabelia:

—Dioso taxuxuabi ata pijajivi pevetsijava mapanacuataje, apo taetsi vajaitaxutota. ²¹ Nexata jivi apo jumai tsane: “Copiapata rabaja majotaje Dioso pijajivi pevetsijava mapanacuataje,” apo jai tsane. “Copiapata rabaja majotaliaje Dioso pijajivi pevetsijava mapanacuataje,” apo jainua tsane. Dioso rabaja capanepaeya aeconoxae evetapona pijajivi paxamë tuatuajëta, jai Jesús fariseovijavabelia.

²² Nexata Jesús itsamatacabi mapanacuaje pevetsijavanexa, tajëvelia navajunupaeba pijajivijavabelia. Jesús jumaitsi mapacueniaje:

—Itsamatacabi xanë, Daxitajivi Pematapijinënë, mapanacuaje taevetsinë tsane. Nexata paxamë picani bitso pajitsipaenename patanetaenexamë mapanacuaje taevetsicuene. Itsiata baitsi jane apo pataemë tsane mapanacuaje taevetsicuene. ²³ Nexata itsamonae pacajumai tsane: “Bajarajotalia eca mapanacua pepo pevetsinëje,” pacajai tsane xanë yabara. Itsa jume, pacajumai tsane: “Majota ecaje, mapanacua pepo pevetsinëje,” pacajai tsane xanë yabara. Itsiata pëtsa paponame. Pëtsa pamuxunaponamenua bajarapamonae pepëta. ²⁴ Pacuenia yamaxë itsa nivejai tsajuni athëbëvetsica, caecuenia jivi cotiatane daxitajava, bajara pijinia pacuenia daxitanacuanëpijivi caecuenia netaena pamatacabi patsianicajë xanë, Daxitajivi Pematapijinënë. ²⁵ Itsiata copiaya ayaicuenia navixaetaeya bejiobinë tsane. Mapanacuataje pejinavanapaevi apo nejumecovënëtsinua tsane Dioso athëbëvetsica taneitorobinëcuenetsica. ²⁶ Pacuenia bajayata jemata itsi pamatacabi Noépijinë ponapona, bajara icatsia jemata itsane pamatacabi xanë, Daxitajivi Pematapijinënë, jemata icatsia patsianicajë. ²⁷ Bajayata pamatacabi Noépijinë ponapona, jivi picani xaniavaetsia jamatejema pexaejava xaevanapa. Apaevanapanua. Nacojiobapona itsamonae. Itsamonae pexënatoyonë pebijavabelia canajetapona petonacojiobinexatsi. Bajarapamonae jamatejema saya jinavanapa. Nexata bajarapamatacabi Noépijinë ëpijamonae pinijibarcojavabelia barëjunua. Nexata daxitajivi merata bubuna jemata ira itsa bubuta. ²⁸ Bajara pijinia itsi bajayata pamatacabi Lotpijinë ponapona. Jivi saya jamatejema jinavanapa. Pexaejava xaevanapa. Apaevanapanua. Comuacapona. Canajetapona. Ubapona pijapabianë. Pijabonë ata exanapona. ²⁹ Itsiata baitsi jane pamatacabi Lotpijinë Sodomatomara vecuapitsapa, jemata athëbëvetsica pinijicuenia isotonë othopaica. Othopaica pitarutsiibotonënu. Nexata daxita Sodoma tomarapijivimi tajuatzi. Nexata baja verebiabatsi. ³⁰ Bajara pijinia pacuenia icatsia jemata itsane pamatacabi xanë, Daxitajivi Pematapijinënë,

jemata icatsia patsianicajë, jai Jesús pijajivijavabelia tajëvelia penavajunupaebijavata icatsia pepatsijavanexatsica.

³¹ Icatsia Jesús jumaitsi pijajivijavabelia:

—Pamatacabi xanë jemata patsianicajë, itsajivi ata pëtsa sivanajamatabëxaina mapanacuapijicueneje. Nexata pajivi athëbëyo bojumatatsia ecaya, perunaecujinaetsica, pëtsa sivanajamatabëxaina pijaboënëalia pebobenaevananë pejutsinexa. Pajivi pijinia pijapabita nacuenebaponapona, pëtsa najamatabëxaina penaviatsinexa pijaboyabelia.

³² Panajamatabënapire pacuenia bajayata Lotpijinë pijavami exanatsi. Lotpijinë pijavami pesivanajamatabëxainaexae mapanacuapijicuene, napijivitaeyojopa. Nexata baja tēpa. ³³ Pajivi exanaponapona penatojitsipaecuenia, apo xainae tsane matacabi apo peverevereaejava. Itsiata baitsi jane pajivi xanë tajamatabëcueneta copatsiana penatojitsipaecuenia pexanabiabijavami, bajarapajivi xainaena matacabi apo peverevereaejava, jai Jesús pijajivijavabelia.

³⁴ Icatsia Jesús jumaitsi tajëvelia pijajivijavabelia:

—Xaniajanë pacuenia pacatsipaebijitsiatsi. Pamatacabi patsianicajë, bajarapameravi anijanëbeje majitanucaenabeje caecamata. Itsanë tanejumecovënëtsinë tsane. Itsanë apo tanejumecovënëtsinë tsane. Nexata tanejumecovënëtsinë pitsianatsi ángelnë. Apo tanejumecovënëtsinë copatabuatsianatsi. ³⁵ Anijavabeje pijinia najuacuabanucaenabeje caejavata. Nexata tanejumecovënëtsiva pitsianatsi. Apo tanejumecovënëtsiva copatanutsianatsi. ³⁶ Anijanëbeje pijinia najuanacuenebanucaenabeje pabita. Nexata tanejumecovënëtsinë pitsianatsi. Apo tanejumecovënëtsinë copatanutsianatsi, jai Jesús tajëvelia pijajivijavabelia.

³⁷ Jesús nexata pijajivi ita jumetane bajarapacuenia Jesús pejumaitsijava, bajarapamonae jumaitsi Jesúsjavabelia:

—Patajatuxanenë, ¿detsa jota bajarapacuenia yajuvënëpitsianatsi? jai Jesús pijajivi.

Nexata Jesús jumaitsi tajëvelia pijajivijavabelia:

—Pacuenia quequeremonae bepimia yapëtane itsajota petuxutsaebinë boca bajarajota penacaetuatsinexa, bajara pijinia pacuenia daxita tajajivi bepimia yapëtaena tapatsijavatsica penacaetuatsinexa xanëjavaberena, jai Jesús pijajivijavabelia.

18

Pacuenia Jesús pijajivijavabelia livaisi tsipaeba jueznë pelivaisicuenia yabara pelivaisi

¹ Jesús pijajivi livaisi tsipaeba mapacueniaje Jesús pijajivi jamatabëcuenecueranaenejeva pevajëtabiabinexa Diosojavabelia. ² Nexata Jesús jumaitsi pijajivijavabelia:

—Tomarata ponapona jueznë. Bajaraponë pevetsinë jivi penaneconitsiaexanaecue. Bajaraponë Dioso apo cjunavi. Jivi ata apo cjunavi. ³ Bajarapatomarata ponapona pamona pevecuatëpaevatsi. Bajarapova ponabiaba jueznëjavabelia pejumaitsiabinexa: “Naneconitsiaexanare ponë xanëjavaberena naneconita. Naneconitsiaexanare pacuenia caitoroba nijatuxanenë bajarapitsivi nenaneconitsiaexanaenexa,” pejaitsiabinexa, bajarapova ponabiaba jueznëjavabelia. ⁴ Itsiata abaxë bajayajebi jueznë apo jamatabëcueneyavenonae bajarapova. Belia baja bexëa jueznë jejai. Nexata jueznë jamatabëjumaitsi: “Dioso picani apo cjunavinë. Jivi ata picani apo cjunavinë. ⁵ Itsiata mapovaje tanejamatatabëitonotabiabixae, yavenonaenajë pacuenia nitorobabiaba. Nexata baja bajarapova matavëjëa apo patabiabirena tsane xanëjavaberena tanecueranaeyaexanaenexa,” jamatabëjai jueznë, jai Jesús pijajivijavabelia.

⁶ Jesús icatsia jumaitsi pijajivijavabelia:

—Bajara jamatabëcueneitsi jueznë, pibisiajamatabëcuenenë ata. Yavenona bajarapova asaëya pevajëcabiabixaetsi. ⁷ Bajara pijinia pacuenia Dioso ata pijajivi yavenonaena itsamonae pibisiacuene ita exanatsi. Bajarapacuenia Dioso pijajivi yavenonaena

bajrapamonae itša vajëtabiabiana Diosojavabelia matababijebi, meravi yajava. Dioso cajena apo cuenenajematsi tsane itša yavenonaena pijajivi. ⁸ Xaniajanë pacuenia pacatsipaebijitsiatsi. Dioso apo cuenenajematsi tsane itša yavenonaena pijajivi itšamonae pibisiacuene pexanaeyanivatsi. Pamatacabi xanë, Daxitajivi Pematapijinënë, icatsia patsianicajë, ¿caxitajarabianajë tsaja abaxë tanecopiaevetavanapaevi? jai Jesús pijajivijavabelia.

Pacuenia itsanë fariseonë, itsanë impuestomatamo gobierno pejamatabëcuene pematamoyanijobinë, vajëtabeje Diosojavabelia yabara pelivaisi

⁹ Itsajota Jesús pijajivijavabelia livaisi tsipaeba, bajarajota nubena itsamonae. Bajrapamonae jamatabëjumai tsabiabi: “Vaxaitsi cajena pexaniajamatabëcuenevitsi itšamonaevecua. Itsamonae bitso nacavecuapibisiajamatabëcuenevi,” jamatabëjai tsabiabi. Nexata bajarapamonaejavabelia Jesús livaisi tsipaeba. Jumaitsi mapacueniaje:

¹⁰ —Anijanëbeje tsiabeje templobojavabetsia pevajëtsinexabeje Diosojavabelia. Caenë fariseonë. Itsanë gobierno pejamatabëcuene impuestomatamo pematamoyanijobabiabinë. ¹¹ Nexata fariseonë nuca. Fariseonë pevajëtsijavata Diosojavabelia, bitso bepexaniajamatabëcuenenë nataeya jumaitsi mapacueniaje: “Diosomë, pexaniajamatabëcuene carajutatsi. Tsipaji pacuenia itsamonae jamatabëcueneitsi tsenae, bajara xanë apo jamatabëcueneitsinë. Yamaxëitojorobiaya jivi apo tavecuanacobetoxotsinë. Apo tacujirubejenë cajena. Apo tajaitsinë itsava tajavavecua. Pacuenia maponëje gobierno pejamatabëcuene impuestomatamo pematamoyanijobabiabinë jamatabëcueneitsije, bajara xanë apo tajaamatabëcueneitsinë. ¹² Caesemana canacujitsia, anijamatacabibeje, najamatabëcuenexaniavaetsiaya ponaponabiabajë xaenejevanë taxaejava tacavajëtsinexa xamëjavabelia. Daxita pacuene nacanabajë, diez xubejeyajuvënëjava, caejava, xamëjavabelia carajutabiabatsi ofrendacuena,” jai mapacueniaje fariseonë templobota pevajëtsijavata Diosojavabelia. ¹³ Nexata ponë gobierno pejamatabëcuene impuestomatamo pematamoyanijobabiabinë, pevajëtsijavata Diosojavabelia tajiyo nucalia piauraxae. Athëbëabetsia ata penavëyotsijava cujunava. Namëpabëbenuca pecobeta pejamatabëbëjaixae pibisiacuene pexanaeneconi yabara. Nexata bajaraponë Diosojavabelia pevajëtsijavata jumaitsi mapacueniaje: “¡Diosomë, nitaxutotsoniataema! ¡Pibisiacuene cajena bitso xanë exanabiabajë!” jai bajaraponë templobota pevajëtsijavata Diosojavabelia, jai Jesús mapacueniaje bepexaniajamatabëcuenevi penataevijavabelia.

¹⁴ Icatsia Jesús jumaitsi bajarapamonaejavabelia:

—Xaniajanë pacuenia pacatsipaebijitsiatsi. Ponë gobierno pejamatabëcuene impuestomatamo pematamoyanijobabiabinë, bajarapacuenia pevajëtsixae Diosojavabelia, Dioso baja vecuaajibiaexanatsi pibisiacuene pexanaeneconimi. Nexata baja bajaraponë naviata pijaboyabelia planeconijibinë. Ponë fariseonë, navajëtsi ata Diosojavabelia, itsiata pijaneconi yajava naviata pijaboyabelia. Tsipaji beayaijamatabëcuenenë natane pevajëtsijavata Diosojavabelia. Bajaraxuata pajivi beayaijamatabëcuenejivi natane itsamonaavecua, bajarapajivi beveliajamatabëcuenejivi exanaenatsi Dioso. Pajivi saya beveliajamatabëcuenejivi natane itsamonaavecua, bajarapajivi ayaijamatabëcuenejivi exanaenatsi Dioso, jai Jesús bepexaniajamatabëcuenevi penataevijavabelia.

Pacuenia Jesús jumaitsi pejevaxijivixijavabelia yabara pelivaisi (Mt 19.13-15; Mr 10.13-16)

¹⁵ Itsamonae pejevaxijivixi tocapataponatsi Jesús pecobeta pejayataponenaxa. Nexata Jesús pijajivi itša tane bajarapacuenia, Jesús pijajivi itaveta pexi pecapatsivi. Jesús pijajivi jumaitsi pexi pecapatsivijavabelia:

—Pëtsa patocapataponame panexi Jesúsjavabelia, jai.

¹⁶ Nexata Jesús jumaitsi pijajivijavabelia:

—Pëtsa paitavetame. Pacopare pejevaxijivixi pepatsinexa xanëjavaberena. Mapitsipejevaxijivixije jumeabinejeva xaniavaetsia bajumecovënëta palivaisi tsipaebatsi. Nexata pamonaе jitsipa pejonejava Dioso pijanacuayabetsia, bajara pijinia pacuenia jumeabinejeva xaniavaetsia bejumecovënëta Dioso pejumelivaisi. ¹⁷ Xaniajanë pacuenia pacatsipaebijitsiatsi. Mapitsipejevaxijivixije itsa jumecovënëta palivaisi tsipaebatsi, bajumecovënëta xaniavaetsia jumeabinejeva. Nexata pamonaе jitsipa pejonejava Dioso pijanacuayabetsia, bajara pijinia pacuenia jumeabinejeva xaniavaetsia bejumecovënëta Dioso pejumelivaisi. Nexata pamonaе jumeabinejeva xaniavaetsia jumecovënëtsiana Dioso pejumelivaisi, bajarapamonaе jonena Dioso pijanacuayabetsia. Itsiata baitsi jane pamonaе Dioso pejumelivaisi jumeabinejeva xaniavaetsia apo jumecovënëtsi tsane, apo jone tsane Dioso pijanacuayabetsia, jai Jesús pijajivijavabelia.

Pacuenia pevëjëato, bitso pexainaenë, cuaicuaijai Jesúsjavabelia yabara pelivaisi (Mt 19.16-30; Mr 10.17-31)

¹⁸ Pevëjëato, judiövi pevetsinë, yanijoba Jesúsjavabelia. Pevëjëato jumaitsi mapacueniaje:

—Petuxanenë, pexaniajamatabëcuenenëmë, ¿detsa pitsicuene exanaenajë taxainaenexa matababi apo pevereverecejave? jai pevëjëato.

¹⁹ Nexata Jesús jumaitsi pevëjëatojavabelia:

—¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë. ²⁰ Xamë baja yapëtaneme pacuenia Dioso pejumelivaisita itoroba jivi pejumecovënëtsinexa. Jumaitsi mapacueniaje: “Pëtsa jaitame itsapetiriva nijavavecua. Pëtsa beyaxuabame jivitonë. Pëtsa nacobetoxotame. Pëtsa itsamonaе pexanaejave yabara najumetsënëtsiaya pae-bame. Axa yaiyataema. Ena ata yaiyataema,” jai Dioso pejumelivaisita. Xamë baja yapëtaneme bajarapalivaisi, jai Jesús pevëjëatojavabelia.

²¹ Nexata pevëjëato jumaitsi Jesúsjavabelia:

—Daxita rabaja bajarapalivaisianë jumecovënëtajë pejevaxinënëjavaveliacujinae, jai pevëjëato.

²² Itsa Jesús jumetane bajarapacuenia pejumecanaviatsijavatsi, nexata icatsia jumaitsi pevëjëatojavabelia:

—Abaxë raja catosaica caejave nexanaenexa. Canajere daxita nexanaejavami. Bajarapamatamomi tsicobetsanaename bepejiobivi. Bajaraxuacujinae nepënaponaename. Nexata bajarapacuenia xainaename bitso nexainaecuene Dioso pijanacuatatsia, jai Jesús pevëjëatojavabelia.

²³ Bajarapacuenia Jesús itsa jumaitsi pevëjëatojavabelia, nexata pevëjëato bitso bejamatabëjiobi tsanajetsireca. Tsipaji pevëjëato daxitacuene bitso pexainaenë. Nexata pevëjëato apo jamatabëjumecovënëtsi palivaisi Jesús tsipaeba. ²⁴ Itsa Jesús tane pevëjëato bepejamatabëjiobi tsanajetsijavareca, nexata pevëjëato pecovëta jumaitsi pijajivijavabelia:

—¡Pamonaе bitso daxitacuene pexainaevi, tsiayapëbejetsi bitso penajamatabëcuenecopatsinexa Diosojavabelia pecapanepaenexatsi Dioso pijanacuayabetsia!

²⁵ Pacuenia camello acuenebi pejonejava palutaetoitaxutovojotualia, bajara pijinia pacuenia bitso pexainaenë acuenebi tsane pejonejava Dioso pijatomarabetsia, jai Jesús pijajivijavabelia.

²⁶ Nexata Jesús pijajivi jumaitsi Jesúsjavabelia:

—¿Detsa nexata pitsivi panepaena Diosojavabelia, bitso pexainaevi ata, itsa apo panepae tsane Diosojavabelia? jai Jesús pijajivi.

²⁷ Jesús nexata jumaitsi pijajivijavabelia:

—Pacuenē jivi apo caējēpaetsi pexanaenēxa, bajarapacuenē Dioso caējēpatsi pexanaenēxa, jai Jesús pijajivijavabelia.

²⁸ Nexata Pedro jumaitsi Jesúsjavabelia:

—Patajatuxanenē, paxanē rabaja pacopatajē daxitacuene pataxinaejavami. Nexata baja pacapēnainavanapatsi, jai Pedro.

²⁹⁻³⁰ Jesús nexata jumaitsi:

—Xaniajanē pacuenia pacatsipaebijitsiatsi. Pajivi Dioso pijacuene petonacuenēbinēxa pueneta pijabomi, paxa ata, pena ata, pematapijivi ata, pejuyapijivi ata, pijava ata, pexi ata, nexata bajarapajivi mapanacuataje pepuenetsijavami matatoxenetsia Dioso rajutsianatsi. Nexata bajarapajivi bexējavabelia petēpacucujinae ata Dioso rajutsianatsi matabi apo peverevereceaeva, jai Jesús pijajivijavabelia.

Pacuenia icatsia Jesús tajēvelia navajunupaeba pebeyaxuabijavanexatsi yabara pelivaisi

(Mt 20.17-19; Mr 10.32-34)

³¹ Jesús itsamonaēvecua ēpijajivi, doce ponēbeje, junata pimoxoyotsinēxatsi. Nexata Jesús pebeyaxuabijavanexatsi, tajēvelia navajunupaeba pijajivijavabelia. Jesús jumaitsi mapacueniaje:

—Panejumetaema. Mara Jerusalén tomarabelia ponatsije. Bajayata Diosojumepaebivimi profetavi, xanē, Daxitajivi Pematapijinēnē, talivaisi tajēvelia yaquina. Pacuenia nexanaejitsia, daxita bajarapalivaisi bajayata profetavimi tajēvelia yaquina. Nexata daxita pacuenia xanē talivaisi bajayata tajēvelia profetavimi yaquina, daxita jane baja bajarapacuenē Jerusalén tomaratalia netocopiapatsiana. ³² Itsanacuaverena pepatsivi pecobeyabelia necanajetsiana tanebeyaxuabinēxa. Bajarapamonae necanecapon-aena. Nebijataena pibisiacuenia. Nesuabiana. ³³ Nejumatitibabena penaneconitsivi pejumaconitabiabimacata. Bajaraxuacujinae nebeyaxuabiana. Itsiata baitsi jane tanebeyaxuabicujinae, acueyabi matabita, icatsia asaēnē tsane, jai Jesús pijajivijavabelia tajēvelia penavajunupaebijavata pebeyaxuabijavanexatsi.

³⁴ Itsiata Jesús pijajivi apo jumeyapētae pajamatabēcuene yabara Jesús jumaitsi.

Pacuenia Jesús itaxutoxanēpanaēyaexana bitso pitaxutotsēcēnaenē, Jericó tomarapijinē, yabara pelivaisi

(Mt 20.29-34; Mr 10.46-52)

³⁵ Jesús imoxoyotanajetaruca Jericótomara. Nexata namuto muxuneneta eca bitso pitaxutotsēcēnaenē, apo petaenē. Bajaraponē amoneya palata vajēcabiabeca jivijavabelia. ³⁶ Nexata bitso pitaxutotsēcēnaenē itsa jumetane jivibitsaētoxoneto pecuaicuaijai tsanajetarubenaējava namutua, bajaraponē epajunateca.

—¿Detsa xua pajaitame? jai tsecae bajaraponē.

³⁷ Nexata jivi jumaitsi bajaraponējavabelia:

—Jesús raja, Nazaret tomarapijinē, maxuayo najetarucaje, jai jivi.

³⁸ Nexata pitaxutotsēcēnaenē vavajai tsecae.

—¡Jesús, Davidpijinē pemomomē, nitaxutotsoniataema! jai tsecae bajaraponē.

³⁹ Nexata picani itsamonaē, Jesús pevajēnaēya penajetarubenaēvi, jumeitaveta bajaraponē pemoyanēxa. Itsiata biji bitsoyo orijibia vavajai tsecae.

—¡Davidpijinē pemomomē, nitaxutotsoniataema! jai tsecae pitaxutotsēcēnaenē.

⁴⁰ Nexata Jesús muxunanucojopa. Jumaitsi pijajivijavabelia:

—Panetocomacaponaremena pitaxutotsēcēnaenē, jai Jesús.

Itsa baja imoxoyo tocanajetarubenatsi, Jesús jumaitsi pitaxutotsēcēnaenējavabelia:

⁴¹ —¿Detsa xua jitsipame tacaexanaenēxa? jai Jesús.

Nexata bitso pitaxutotsēcēnaenē jumaitsi Jesúsjavabelia:

—Jesús, jitsipajē taitaxutoxanēpanaējava, jai pitaxutotsēcēnaenē.

⁴² Jesús nexata jumaitsi pitaxutotsēcēnaenējavabelia:

—Itaxutoxanepaname rabaja. Tsipaji nesivajamatabējumaitsimē mapacueniaje: “Jesús nitaxutoxanepanaeyaexanaena,” nesivajamatabējamē, jai Jesús pitaxutotsēcēnaenējavabelia.

⁴³ Bajarapacuenia Jesús pejumaitisjavata, bitso pitaxutotsēcēnaenēmi xaniavaetsia baja tane. Nexata bajaraponē napona baja Jesús pepēta. Bajaraponē namutua jumai tsanajetaruca Diosojavabelia:

—¡Diosomē, bitso pexaniacuene netoexaname! jai tsanajetaruca bajaraponē.

Pamonae ata tane bajaraponē pitaxutoxanepanaejava baja, daxita bajarapamonae ata Diosojavabelia jumai tsanajetarubena:

—¡Diosomē, bitso ayaijamatabēcuenenēmē! jai tsanajetarubena Diosojavabelia.

19

Pacuenia nabarēcuaicuaijabeje Jesúsbeje Zaqueobeje yabara pelivaisi

¹ Jesús najetaruca Jericó tomarajava. ² Jericó tomarata ponapona Zaqueovēnēnē. Bajaraponē gobierno pejamatabēcuenē impuestomatamo pematamoyanijobabiabivi penamatacaitorobinē. Zaqueo bitso pexainaenē pexinaejava. ³ Nexata Zaqueo jamatabētane Jesús. Itsiata apo caējēpaetsi petaejava. Tsipaji Zaqueo petoyaecaenēyo. Jivibitsaētoxfaneto matatoyorotsia nubenatsi Jesús Zaqueo pevajēnae. ⁴ Nexata Zaqueo kujinaeponalia jivibitsaētoxfaneto pevajēnaeyabelia Jesús peponaenamutuabelianexa. Junaya naejavatsia athēbēvetsica petaenucaenexa Jesús penajetarucaejava. ⁵ Nexata Jesús namutua itsa imoxoyotanajetaruca, itsa ponaeta Zaqueo athēbēyo nucaya, bajaraponaejavatsia Jesús naēcotsia. Nexata Jesús taenutsia Zaqueo. Jesús nexata jumaitsi Zaqueojavabelia:

—Zaqueo, naxanitsiayo runaimica. Nijaboyabelia raja patsijitsianē, jai Jesús.

⁶ Nexata Zaqueo naxanitsiayo runajopaica. Barēyaya copiapita pijaboyabelia pebarēponaenexa Jesús. ⁷ Daxita pamonae Jesús matatoyorotsia najetarubenatsi, itsa tane bajarapacuenē, Jesús baracuaicuaijaitsi tsanajetarubena. Ēpamonae najumaitsi tsanajetarubena Jesús yabara:

—Jesús raja naponaponaejitsia Zaqueo pijabota, caranata pibisiacuene pexanaenē pijabota, najai tsanajetarubena bajarapamonae Jesús yabara.

⁸ Nexata Zaqueo pijabota Jesús eca mesa muxuneneta. Bajarajota Jesús pitabarata Zaqueo nonotapuna. Jumaitsi Jesúsjavabelia:

—Tajatuxanenē nejumetaema. Tsatsianejē namatajēpaeya taxainaijava tarajutsinexa bepejiobivijavabelia. Pamonae yamaxēitorobiaya vecuanotajē tamatamoyanijobijavata impuestomatamo, bajarapamonae tocanaviabianajē. Nexata tayamaxēitorobijamatabēcuenē bajarapamonae rajutsianajē juya cuatro xuabeje tsaponai caijavayomijamatabēcuenē, jai Zaqueo Jesúsjavabelia.; ⁹ Nexata Jesús jumaitsi Zaqueojavabelia:

—Zaqueo, ajena rabaja pamatacabi, caxitajarabame, nijamonae yajava, nijaneconivecua pecacapanepaejavanexa Diosojavabelia. Tsipaji baja nijamonae barējumecovēnētame Dioso. Zaqueo, xamē Abrahampijinē pemomo atamē, abaxē picani Dioso apo catae Abrahampijinē pemomomēcuenia. Itsiata baitsi jane ajena baja Diosojavabelia nenajamatabēcuenecopatsixae, Dioso jane baja catane pepacuenē Abrahampijinē pemomomēcuenia. ¹⁰ Xanē, Daxitajivi Pematapijinēnē, sivapatajopajē tajaitsinexa Diosovecua penaxuabivi tacapanepaenexa pijaneconivecua, jai Jesús Zaqueojavabelia.

Oro palatanēanē, diez ponēbeje, yabara pelivaisi
(Mt 25.14-30)

¹¹ Zaqueo pijabota itsamonae namuxunaevetena Jesús petsipaebilivaisi Zaqueojavabelia. Pamonaē namuxunaevetena, jamatabēcuenenavēxaniabiaya jamatabējumai tse-nae: “Imoxoyo rabaja ecalia Jerusaléntomara. Nexata Jesús itsa patsialia Jerusalén tomarabelia, copiajopaena jane baja daxita Dioso pijajivi pevetsijava,” jamatabējai tse-nae bajarapamonae. Bajarapacuenia jamatabējumai tse-nae tsipaji baja Jerusaléntomara imoxoyo ecalia Jesús pepatsinexa. ¹² Bajaraxuata Jesús livaisi tsipaeba bajarapamonaejavabelia. Jesús jumaimatabēcuenenavēxaniabiaya jamatabējumai tse-nae: “Imoxoyo rabaja ecaliatsi mapacueniaje:

—Petuxanenē ponapona pijanacuata. Nexata pepo nacuaevetsinē tonajumeitorobarenatsi tajēnacuaeverena. Petonajumeitorobijumetsirena jumaitisirena mapacueniaje: “Ponaename maberena je nacua nevetšinēnexa tacaexanaenexa nijanacua nevetšinexa. Bajaraxuacujinae naviatsiaremelia nijanacua jane baja nevetšinexa,” jaitsirena petonajumeitorobijumetsirena. ¹³ Nexata petuxanenē peponaevajēnae, junata pijajivi, diez ponēbeje. Nexata petuxanenē pijajivi evetsiaexana pijapalatanēanē, oronēanē, bitso penamatamotsinēanē. Caenē canacujitsia caepalatanē evetsiaexanapona. Nexata petuxanenē pijajivi jumaiti pijajivijavabelia: “Bajarapapalatata pacomuataponaename. Xua pacomuataponaename, icatsia pacanajetaponaename. Nexata bajarapacuenia netoyajava tsaponae tsane tajapalata,” jai petuxanenē pijajivijavabelia. Bajaraxuacujinae pona jane baja. ¹⁴ Itsiata baitsi jane pevetsinacuatanea pejinavanapaevi, bitso itoyatsi petuxanenē. Nexata bajarapamonae petuxanenē pecovēvelia itsamonae itorobalia, itsajotalia petuxanenē nacua pevetsinēnexa exanaejitsiatsi, bajarajotalia pejumaitsinexa: “Apo pajitsipaenē bajaraponē patanevetšinēnexa patajanacuata,” pejinexa petuxanenē yabara. ¹⁵ Itsiata baitsi jane petuxanenē pijanacua baja pevetsinēnexa exanatsi. Nexata baja naviarena pijanacuayaberena pevetsinexa jane baja pijanacua. Nexata baja parena. Nexata petuxanenē pepatsicujinaerena, junata icatsia pijajivi peyapētaenexa jane baja pacuenia caenē canacujitsia pijapalatanēanē pijajivi tocanacuenebatsi pecovēta. ¹⁶ Copiaya pepatsinē jumaiti pijatuxanenējavabelia: “Tajatuxanenē, nijapalatanē, taneevetsiaexanaenēmē, catopitsapa baja diez ponēbeje. Nexata baja daxitata once ponēbeje,” jai. ¹⁷ Nacuaevetsinē nexata jumaiti pijajivitonējavabelia: “Xanepana rabaja. Xaniavaetsia netoebetaponaponaename. Tsiquirijavayo ata xaniavaetsia netoebetame. Nexata icatsia diez patomarabeje netoebetaponaponaename,” jai nacuaevetsinē pijajivitonējavabelia. ¹⁸ Icatsia itsanē pijatuxanenē pijapalatanē petoevetsinē pata. Nexata bajaraponē jumaiti: “Tajatuxanenē, nijapalatanē, taneevetsiaexanaenēmē, catopitsapa baja cinco ponēbeje pematatsēnēa,” jai. ¹⁹ Nacuaevetsinē nexata jumaiti pijajivitonējavabelia: “Xamē icatsia cinco patomarabeje netoebetaponaponaename,” jai nacuaevetsinē pijajivitonējavabelia. ²⁰ Nexata icatsia itsanē pijatuxanenē pijapalatanē petoevetsinē pata. Jumaiti pijatuxanenējavabelia: “Tajatuxanenē, mara nijapalatanēje, taneevetsiaexanaenēmē. Pañuelopanayota yamatacētsiaya catoevetatsi. ²¹ Bajarapacuenia catoevetatsi tsipaji cacujunavatsi. Niajamatabēcuenesaēnē. Xamē apo itaxutobejiobiataeyabiabimē nijajivi, pamonaē catoeveta nijajava. Itorobabiabame nijajivi pecatopitsinexa apo nijajava ata. Itorobabiabamenua pecatonotsinexa apo neubiaexanaejava ata,” jai pijatuxanenē pijapalatanē petoevetsinē. ²² Nexata nacuaevetsinē jumaiti pijajivitonējavabelia: “¡Acujirubejemē xamē! Bijiaya netoebetame. Naneconitame bajarapacuenia tanejumaitisijavamē yabara. Xamē baja cajena yapētaneme tajamatabēcuenesaēnējava tajajava yabara. Pacuenia itorobabiabajē tajajivi tanetopitsinexa apo tajajava ata, yapētaneme baja. Pacuenia ata itorobabiabajē tanetonotsinexa apo taubiaexanaejava ata, yapētaneme baja. ²³ Xanepanaejitsipa xamē banco pevetsivi itsa netocanacuenebiaexanaejitsipame tajapalatanē. Nexata banco pevetsivi aeconoxae tajapalatanē netocanaviatsipa. Nexata pecacovaetsijamatabēcuenē itsajava palata netoyajavacanavi-

atsipa,” jai nacuaevetsinē pijajivitonējavabelia. ²⁴ Nexata nacuaevetsinē jumaitsi pijajivijavabelia: “Tajapalatanē panetovecuapire maponēje. Nexata juya parajure ponē xaniavaetsia netoeveta tajapalatanē. Bajaraponē xaniavaetsia netocanacueneba. Nexata baja pematatsēnēa diez papalatanēbeje netopitsapaeyaexana. Nexata taevetsiaexanaenēta once ponēbeje,” jai nacuaevetsinē. ²⁵ Nexata nacuaevetsinē pijajivi jumaitsi pijatuxanenējavabelia: “Patajatuxanenē, bajaraponē xaina baja ayaijava. ¿Detsa xuajitsia rajutsijitsiamē pematatsēnēa?” jai pijajivi. ²⁶ Nexata nacuaevetsinē jumaitsi pijajivijavabelia: “Pacatsipaebatsi rabaja. Pajivi baja ayaijava xaina, pematatsēnēa icatsia itsajava rajutsianatsi. Itsiata pajivi tsiquirijavayo xaina, bajarapajivi pijatsiquirijavayomi vecuapitsianatsi. ²⁷ Tajavajabitsaē, pamonaē picani apo jitsipae mapanacua taevetsijavaje, bajarapamonaē pacaponaremena maberenaje patanevecuaverebiabinexamē taitabēta,” jai nacuaevetsinē pijajivijavabelia, jai Jesús livaisi petsipaebijavata Zaqueo pijabota.

*Pacuenia Jesús pata Jerusalén tomarata yabara pelivaisi
(Mt 21.1-11; Mr 11.1-11; Jn 12.12-19)*

²⁸ Jesús baja itsa najumevereta livaisi petsipaebijava Zaqueo pijabota, pona baja Jerusalén tomarabelia. ²⁹ Jerusalén tomaravecua imoxoyo eca petsuto. Bajarapatsutojumata nubena olivonaenē. Bajarapatsuto canacujitsita anijatomarayobeje ecabeje, Betfagé tomarayobeje Betania tomarayobeje. Jesús itsa imoxoyotanajetaruca bajarapatomarayobeje, nexata itoroba pijajivitonēbeje bajarapatomarayobejejavabelia. ³⁰ Jesús jumaitsi pijajivitonēbejejavabelia:

—Paponarebeje mapatomarayo ecaliajejavabelia. Itsa rabaja papatsiaremeliabeje, pataenutsianamebeje burro pecētanutsinētsi. Bajarapaburro itsajivi ata abaxē apo jumaponaē. Paisinaenamebeje. Payamaēcarenamēbeje tsane. ³¹ “¿Detsa xuajitsia paisinamebeje burro?” itsa pacajaiabeje tsane itsajivi, nexata pajumaitsimēbeje tsane: “Vajatuxanenē raja namatavenona,” pajamēbeje tsane, jai Jesús pijajivitonēbejejavabelia.

³² Nexata Jesús pijajivitonēbeje liabeje. Pacuenia Jesús jumaitsi, bajarapacuenia caxitajarabanucabeje burro. ³³ Nexata itsa isinabeje, burro pexainaēvi jumaitssibeje: —¿Detsa xuajitsia paisinamebeje burro? jaitsibeje.

³⁴ Nexata Jesús pijajivitonēbeje jumaitssibeje burro pexainaēvijavabelia:

—Vajatuxanenē raja namatavenona. Bajaraxuata paisinajēbeje, jaibeje.

³⁵ Nexata jane baja burro capatabeje Jesúsjavabereña. Nexata Jesús pijajivi burro tsijumajeba pijacamisajumavelia penaxatabijavanē. Jesús baja bajarapaburrojumata ecaya. ³⁶ Jesús itsa yanajetaruca burrota, panamutovelialia Jesús patsijitsia Jerusalén tomarabelia, bajarapanamutua jivi pijacamisajumavelia penaxatabijavanē namutua tsivajēnaeyerequejebaponatsi yaiyataeya pecopiapitsinexatsi. ³⁷ Patsutojumata olivonaenē nubena, bajarapatsutojavatsica namuto namatononocarucaica. Nexata bajarapanamutuatsica Jesús imoxoyotanajetaruca pepatsinexa Jerusalén tomarata. Nexata jivi ayaiBITSaētoXaneto, Jesús pijajivi yajava, vavajai tsanajetarubenaē. Sivabarēyaya vavajai Diosojavabelia:

—¡Diosomē, bitso ayaijamatabēcuenenēmē! jai tsanajetarubenaē bajarapamonaē.

Bajarapacuenia vavajai tsanajetarubenaē tsipaji bajarapamonaē cujirutaeyabiaba Jesús Dioso pesaēta ayaicuene pexanaponaējavanē. ³⁸ Bajarapamonaē jumai tsanajetarubenaē Jesús yabara:

—¡Maponē najetarucaje, bitso ayaijamatabēcuenenē Dioso pejamatabēcueneta najetaruca jivi pevetsinēnexa! ¡Jamatabēcuenexanepanaēya jinavanapa daxita pamonaē athēbētatsia jinavanapa! ¡Pinijicuene rabaja exana Dioso! jai tsanajetarubenaē namutua daxita Jesús pijajivi.

³⁹ Nexata fariseovi najetarubena bajarapajivibitsaētoXaneto tuatuaēta. Nexata fariseovi jumaitsi Jesúsjavabelia:

—Jesús, jumeitavere baja nijajivi bajarapacuenia pejumaitsiyaniva xamë yabara, jai fariseovi.

⁴⁰ Nexata Jesús jumaitsi fariseovijavabelia:

—Xaniajanë pacuenia pacatsipaebijitsiatsi. Mapamonaaje moya itsa najetarubenaajitsipa, nexata juya ibotonë vavajai tsenae tsipae, jai Jesús fariseovijavabelia.

⁴¹ Itsa baja Jesús imoxoyo taeyeta Jerusaléntomara, nexata Jesús sivanua Jerusalén tomarapijivi. ⁴² Jesús pesivanuejavata Jerusalén tomarapijivi, Jesús jumaitsi Jerusalén tomarapijivi yabara mapacueniaje:

—¡Bitso picani jitsipajë Jerusalén tomarapijivi mapamatacabitaje peyapëtaenexa pacuenia Dioso pepacuene jamatabëcuene xanepanaeyaexanaejitsipatsi, itsa nejumecovënëtsipa! Abaxë raja aeconoxae Dioso apo tocopatsitsi peyapëtaeyaniva bajarapacuenia. ⁴³ Nexata tocopiapatsianatsi pibisiamatacabi. Pijavajabitsaë tsi-maxëpatsianatsi. Nexata pijatomara matatoyorotsia foto yacaranatsia cuerutsianatsi petsimaxënukenaexatsi bajarapafotota. Pijatomara matatoyorotsia peyacaranatsiibopanaxanetopënëya, pijavajabitsaë foto matatoyorotsia cuenatsi. Bajarapacuenia yacaranatsianatsi pijavajabitsaë. ⁴⁴ Nexata irabetsica topenetsianatsi pijabonëmi. Nexata daxita Jerusalén tomarapijivi benatsi. Pijatomara matatoyorotsia peyacaranatsiibopanaxanetomi ata tosarababenatsi. Nexata itsaibopana ata apo bocae tsane itsaibopana jumavereca. Bajarapacuenia itsane tsipaji xanë apo neyapëtae Dioso athëbëvetsica taneitorobinëtsica, Daxitajivi Pematapijinënë, jai Jesús pesivanuejavata Jerusalén tomarapijivi.

Pacuenia Jesús Jerusalén tomarata templobovecua pitsapaeyaexana pecanajetabiabivi, pecomuacabiabivina, yabara pelivaisi

(Mt 21.12-17; Mr 11.15-19; Jn 2.13-22)

⁴⁵ Jesús pepatsicujinae Jerusalén tomarata, joneya temploboyalia. Nexata templobota Jesús tane pecanajetabiabivi, pecomuacabiabivina. Nexata daxita bajarapamona Jesús pitsapaeyaexana templobovecua. ⁴⁶ Jesús jumaitsi bajarapamonaejavabelia:

—Dioso baja cajena pejumelivaisibaxutota mapatemplobo yabara tajëvelia jumaitsi mapacueniaje: “Tajabo raja jivi xanëjavaberena penavajëcaebo tsane,” jai Dioso pejumelivaisibaxutota. Itsiata baitsi jane paxamë yamaxëitorobiaya panenacobetoxotsinexa, panacaetuatabiabame mapabotaje, jai Jesús templobota pecanajetabiabivijavabelia.

⁴⁷ Bajaraxuacujinae caematacabi canacujitsia Jesús jivi livaisi tsipaebabiaba bajarapatemplobota. Nexata sacerdotevi penamatacaitorobivi, judíovi pecujarubivina, tomaraevetsivina, najumejaita picani Jesús pebeyaxuabinexatsi. ⁴⁸ Itsiata acuenebi Jesús pebeyaxuabijavatsi. Tsipaji Jesús itsacueneneconi ata apo xainae. Daxitajivi yaiyatanetsi. Jesús jivi petsipaebilivaisianë xaniavaetsia namuxunaevetabiabatsi.

20

Pacuenia Jesús caëjëpatsi daxitacuene pexanaenexa yabara pelivaisi

(Mt 21.23-27; Mr 11.27-33)

¹ Itsamatacabi Jesús templobota jivi livaisi tsipaeba. Tsipaeba pexanialivaisi jivi pecapanepaelivaisinexatsi pibisiacuene pexanaeneconivecua. Nexata bajarajota pata sacerdotevi penamatacaitorobivi, judíovi pecujarubivina, judíovi pijaancianovinua.

² Nexata bajarapamona jumaitsi Jesúsjavabelia:

—Panetsipaebare cajena. ¿Jipatsa pejamatabëcueneta pecanajetabiabivi, pecomuacabiabivina, capitsapame mapatemplobovecuaaje? jai.

³ Jesús nexata jumaitsi bajarapamonaejavabelia:

—Xanë copiaya caejumeyo pacayanijobianatsi patanejumecanaviatsinexamë.

⁴ ¿Jipatsa jane pejamatabëcueneta Juanpijinë jivi bautisabaponapona? ¿Dioso

tsaja pejamatabëcueneta? Itsa jume, ¿jivi tsaja pejamatabëcueneta? jai Jesús bajarapamonaejavabelia.

⁵ Nexata ëpamonae nabarëcuaicuaijai. Najumaitsi:

—¿De meta pacuenia jumecanaviatsianatsi? Vaxaitsi itsa jumai tsipaetsi: “Dioso raja pejamatabëcueneta,” itsa jai tsipaetsi, nexata Jesús nacajumai tsipae: “¿Detsa nexata xuajitsia apo pajumecovënëtsimë Juanpijinë pepaebilivaisianë?” nacajai tsipae. ⁶ “Jivi raja saya pejamatabëcueneta Juanpijinë jivi bautisabaponona,” itsa jai tsipaetsi, nexata daxitajivi anaeya ibotonëta nacatseconaejitsipa vajanacabeyejebinexa. Bajara-pacuenia nacabeyejebijitsipa tsipaji daxitajivi Juanpijinë yabara sivajamatabëjumaitsi: “Juanpijinë raja pepacuenë Diosojumepaebinëmi,” sivajamatabëjai, najai sacerdotevi penamatacaitorobivi, judíovi pecujarubivinuua, judíovi pijaancianovinua.

⁷ Nexata saya bajarapamonae jumaitsi Jesúsjavabelia:

—Apo payapëtaenë ponë Juanpijinë itorobatsi jivi pebautisabaponaenexa, jai.

⁸ Nexata Jesús jumaitsi bajarapamonaejavabelia:

—Nexata xanë ata apo pacatsipaebi tsanetsi ponë nitoroba tacapitsapaenexa bajarapamonae templobovecua, jai Jesús.

Pacuenia exana pijamatabëcuenebejevi, itsanë pijauvabacabo petoevetsivi yabara pelivaisi

(Mt 21.33-44; Mr 12.1-11)

⁹ Jesús taxuxuaba livaisi petsipaebijava jivijavabelia. Jumaitsi mapacueniaje:

—Pijaira pexainaenë pijairata uba ayaibacaboxaneto uvavënëjava. Bajaraxuacujinae itsamonae evetsiaexana pijauvabacabo. Jumaitsi bajarapamonaejavabelia: “Pamatacabi cuainaveretsiana, natsicobetsanaenatsi. Pamatacabi raja cuainaveretsiana, tajajivitonë itorobianajë xua panetotsatsianame tanetopitsinexa,” jai uvabacabo pexainaenë petoevetsivitsijavabelia. Nexata uvabacabo pexainaenë tajënacuyabelia pona bajayajebi pijabitsarucaenexa. ¹⁰ Itsa baja uvabacabo pexainaenë yapëtane pecopiapatsijava uvacuui penaveretsimatacabi penotsinexa, nexata uvabacabo pexainaenë itoroba pijajivitonë. Itoroba petoevetsivitsijavabelia petsicobetsatsinexatsi. Nexata uvabacabo pexainaenë pijajivitonë tovaetabatsi. Toconibabiatsi. Petoconibabecujinaetsi cobesa naviatsiaexanaliatsi. ¹¹ Itsiata uvabacabo pexainaenë icatsia itoroba itsanë pijajivitonë petsicobetsatsinexatsi. Bajaraponë ata icatsia pibisiacuenia tobijatanetsi. Toconibabiatsi. Peconibabecujinaetsi cobesa naviatsiaexanaliatsi. ¹² Itsiata uvabacabo pexainaenë icatsia itoroba itsanë pijajivitonë. Icatsia bajaraponë ata tomatajorobabiatsi. Uvabacabopënëyabelia xuabatsi.

¹³ Nexata uvabacabo pexainaenë jamatabëjumaitsi: “¿Detsa nexata xua exanaenajë? Itorobianajë cajena taxënato, tasivanë. Itsa raeta itorobianajë taxënato, bajarapamonae netoyaiyataena,” jamatabëjai uvabacabo pexainaenë. ¹⁴ Itsiata baitsi jane uvabacabo petoevetsivitsi, uvabacabo pexainaenë pexënato ata apo toyaiyataetsi. Itsa tane uvabacabo pexainaenë pexënato, bajarapamonae najumaitsi: “Mara ponëje itsamatacabi paxa pevënamuto paxa pijauvabacabo pitsipaje. Naxanitsia. Beyaxuabatsi. Nexata raja vaxaitsi vajauvabacabo tsane,” najai uvabacabo petoevetsivitsi. ¹⁵ Nexata uvabacabo pexainaenë pexënato ata tovaetabatsi. Caponaliatsi bajarapauvabacabo pepënëyabelia. Bajarapacuenia icatsia tobeyaxuabatsi, jai Jesús.

Nexata Jesús yanijoba bajarapalivaisi petsipaebivijavabelia. Jumaitsi:

—¿De meta nexata xua exanaena uvabacabo pexainaenë pijauvabacabo petoevetsivitsijavabelia? ¹⁶ Uvabacabo raja pexainaenë, patsiarena. Verebiabiana daxita bajarapamonaemi. Nexata icatsia itsamonae evetsiaexanaena bajarapauvabacabo, jai Jesús bajarapamonaejavabelia.

Jesús penamuxunaevetsivitsi itsa jumetane bajarapacuenia Jesús pejumaitsijava, bajarapamonae jumaitsi:

—¡Dioso pëtsa copata bajarapacuenia pexanaenexa paxanëjavaberena! jai bajarapamonae.

¹⁷ Nexata Jesús asaëyata naëcota bajarapamonaejavabelia. Jumaitsi bajarapamonaejavabelia:

—Payapëtaneme rabaja pacuenia Dioso pejumelivaisibaxutota tajëvelia jumaitsi xanë yabara. Iboto pelivaisicuenia Dioso pejumelivaisibaxutota jumaitsi xanë yabara mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia nayaëtsiana botabu daxita itsaibo matatoxenetsia, jai tajëvelia Dioso pejumelivaisibaxutota xanë yabara.

’Bajarapacuenia tajëvelia Dioso pejumelivaisibaxutota itsa jumaitsi, judíovi penamatacaitorobivi apo tanejumecovënëtsijavanexa yabara jumaitsi. Dioso taneitapetsijava daxitajivi tacapanepaenënexa yabara ata jumaitsi, jai Jesús.

¹⁸ Icatsia Jesús jumaitsi mapacueniaje:

—Pamonae apo nejumecovënëtsi Dioso pexënatocuenenë, bajarapamonae bitso bejamatabëjiobi tsane apo tanejumecovënëtsixae. Pacuenia ibotojumata pefirapecaejivi, itsa tsapatecatsi, pevixae bitso yanabejiobita, bajara itsane. Pamonae naneconitsiaexanaenajë, bajarapamonae pepacuene naxuabiana daxitamatacabijavabelianexa. Pacuenia iboto pematacënëbinëtsi apo asaë, bajara itsane, jai Jesús bajarapamonaejavabelia.

Pacuenia Jesús jamatabëcueneëjëbiaya yanijobatsi impuestomatamo pematamotsijava yabara pelivaisi

(Mt 22.15-22; Mr 12.13-17)

¹⁹ Palivaisi Jesús tsipaeba templobota, bajarapalivaisi sacerdotevi penamatacaitorobivi, judíovi pecujarubivi ata, jumeypëtane. Nexata bajarapamonae najumaitsi:

—Vaxaitsi raja Jesús nacajai, najai.

Nexata picani bajarajota bajarapamonae Jesús jamatabëvaetabatsi. Itsiata bajarapamonae abaxë apo vaetabitsi. Tsipaji cujunava jivi. ²⁰ Nexata itsamat-acabi bajarapamonae itorobarena pijajivi yaenebiaya petonamuxunaevetsinexatsi Jesús. Nexata bajarapamonae pijajivi bepexaniajamatabëcuenevi itajara jinavanapa Jesúsjavata. Bajarapamonae namuxunaevetena Jesús jivi livaisi petsipaebijavata. Bi-jiaya Jesús jivi livaisi itsa tsipaeba, bajarapalivaisi yabara picani Jesús pecapon-aenexatsi nacuaevetsinëjavabelia peneconitsinexatsi. ²¹ Nexata bajarapamonae jamatabëcueneëjëbiaya jumaitsi Jesúsjavabelia mapacueniaje:

—Jesús, pacayapëtanetsi jivi pepacuene pexaniajailivaisi netsipaebijava. Daxitajivi, ricovi ata, bepejiobivi ata, najëpaeya yaiyataeya pexaniajailivaisi tsipaebabiabame bajarapamonae pejinavanapaenexa pacuenia Dioso jitsipa. ²² Panetsipaebare. ¿Xanepana tsaja vajamatamotsinexa impuestomatamo Romanonacua pepo pevetsinëjavabelia? Itsa jume, ¿apo xanepanae tsaja vajamatamotsinexa? jai bajarapamonae jamatabëcueneëjëbiaya Jesúsjavabelia.

²³ Itsiata baitsi jane Jesús jamatabëcuenyapëtane bajarapamonae jamatabëcueneëjëbiaya peyanijobijavatsi peneconitsinexatsi picani. Nexata Jesús jumaitsi bajarapamonaejavabelia:

—¿Detsa xuajitsia panejamatabëcueneëjëbame? ²⁴ Panetsitajëre palatanëyo, jai Jesús.

Nexata bajarapamonae tsitajëtatsi palatanëyo. Nexata Jesús jumaitsi bajarapamonaejavabelia:

—¿Jipatsa mapitabaraje, pevënënu, ruca mapapalatanëyojumataje? jai Jesús.

Nexata bajarapamonae jumaitsi Jesúsjavabelia:

—Romanonacua raja pepo pevetsinë pitabara, pevënënu, jai.

²⁵ Nexata Jesús jumaitsi bajarapamonaejavabelia:

—Nexata parajutabianame Romanonacua pepo pevetsinë pijajava. Parajutabianame pijinia saicaya Diosojavabelia Dioso pijajava, jai Jesús.

²⁶ Nexata bajarapamonae ajibi Jesús peyabaravaetabijavatsi jivijavabelia livaisi petsipaebijava yabara. Tsipaji xaniavaetsia Jesús jumecanaviata bajarapamonae jamatabëcueneëjëbiaya peyanijobijavatsi. Caranata bajarapamonae jamatabëcuenenabenajaca xaniavaetsia Jesús pejumecanaviatsixae bajarapamonaejavabelia. Moya baja nexata ena bajarapamonae.

Pacuenia Jesús tsipaeba jivi petëpaecujinae icatsia piasaëjavanexa yabara pelivaisi (Mt 22.23-33; Mr 12.18-27)

²⁷ Saduceovi saicaya itsalivaisi xaina. Bajarapamonae jamatabëcuenenavëxaniabiaya jumai tsabiabi: “Petëpaevi rabaja petëpaecujinae, apo asaë icatsia tsane,” jai tsabiabi. Nexata saduceovi imoxoyobatsi Jesús. Saduceovi jumaiti Jesúsjavabelia mapacueniaje:

²⁸ —Jesús, Moiséspijinë bajayata vajanacatoyaquinaelivaisi, jumaiti mapacueniaje: “Ponë pematapijinë pepua penacojobinë baja, ita tēpa pexi xainaenejeva, nexata juyapijinë bepita pematapijinëmi pijavami. Bajarapacuenia juyapijinë bepita pematapijinëmi pijavami pexi pexainaenexa bajarapovajavabelia. Nexata pexi ita xainabeje, bematapijinëmi pexi petaenexa daxitajivi,” jai Moiséspijinë bajayata vajanacatoyaquinaelivaisi. ²⁹ Nexata jinavanapa ënacaemonae, siete ponëbeje. Pepo matapijinë copiatanacojoba. Nexata bajaraponë pijava vecuatēpa pexi xainaenejeva. ³⁰ Nexata pematapijinëmi pepënarucaenë pita pematapijinëmi pijavami. Nexata icatsia bajaraponë ata tēpa pexi xainaenejeva bajarapovajavabelia. ³¹ Nexata icatsia itsanë tuatuajëmatapijinë pita bajarapova. Bajara icatsia ponë ata tēpa pexi xainaenejeva bajarapovajavabelia. Bajarapacuenia daxita baja siete ponëbeje, nacaemonaemi, pitaponae ata bajarapova, itsiata itsanë ata pexi apo xinae bajarapovajavabelia. Bajarapacuenia daxita siete ponëmibeje tēpa. Verevereca baja. ³² Belia baja bajarapova ata tēpa. ³³ “Jivi raja petëpaecujinae, Dioso icatsia asaëyaexanaenatsi,” jamë. ¿Detsa nexata ponë, bajarapamonae yajuvënënë, pijava tsane bajarapova bajarapamatacabi? Daxita pamonaemi siete ponëmibeje, nacaemonaemi, pitapona picani bajarapovami, jai saduceovi Jesúsjavabelia.

³⁴ Nexata Jesús jumaiti saduceovijavabelia:

—Aeconoxae mapanacuataje pebijivi, petiriavi ata, nacojobapona. Itsamonae pexënatoyonë pexinaevi pebijavabelia canajetapona petonacojobinexatsi. ³⁵ Itsiata baiti jane pamonaemi Dioso itapetatsi, apo pevereverecaenacuataatsia jinavanapaena. Bajarapamonae petëpaecujinae, Dioso icatsia asaëyaexanaenatsi. Bajarapamonae bajarapanacuataatsia apo nacojobi baja tsane. Bajarajotatsia itsajivi ata pexënatoyo apo canajetsi tsane pebijavabelia petonacojobinexatsi. ³⁶ Bajarapamonae acuenebi tsane petëpaejava. Tsipaji bajarapamonae jinavanapaena athëbëtatsia pacuenia angelevi jinavanapa. Bajarapamonae baja Dioso pexi tsane. Tsipaji baja petëpaecujinae Dioso icatsia asaëyaexanaenatsi. ³⁷ Moiséspijinë bajayata yaquina pacuenia Dioso tsipaebatsi tsiquirinaemëyo petajueyecaecotijavaverena. Nexata Moiséspijinë peyaquinaelivaisita, jumaiti pacuenia Dioso icatsia asaëyaexanaejitsia petëpaevimi. Nexata Moiséspijinë nacayapëtaeyaxana Dioso icatsia piasaëyaexanaejavanexa petëpaevimi. Tsipaji baja Abraham peputēpae, Isaac ata baja peputēpae, Jacob ata baja peputēpae, bajarapamonae yabara bajayata Moiséspijinë peyaquinaelivaisita jumaiti mapacueniaje: “Xanë rabaja Abraham pijaDiosonë, Isaac ata pijaDiosonë, Jacob ata pijaDiosonë,” jai baja cajena Dioso bajayata Moiséspijinëjavabelia. ³⁸ Bajarapacuenia Dioso pejumaitisixae, nayapëtane bajarapamonae bajayata tēpae ata, Diosovecua apo penaxuabijava. Aeconoxae ata bajarapamonae Dioso yajavajinavanapa athëbëtatsia. Daxita petëpaevi Dioso cajena apo tsitatēpaetsi, jai Jesús saduceovijavabelia.

³⁹ Nexata judíovi pecujarubivi jumaiti Jesúsjavabelia:

—Jesús, saduceovi xaniavaetsia jumecanaviatame, jai judíovi pecujarubivi.

⁴⁰ Bajaraxuacujinae saduceovi cujunava baja icatsia peyanijobijava Jesúsjavabelia.

Pacuenia Jesucristo yabara Davidpijinë bajayata tajëvelia: “Tajatuxanenë,” jai yabara pelivaisi

(Mt 22.41-46; Mr 12.35-37)

⁴¹ Jesús pijacuata nayabarajumaitsi judíovi pecujarubivijavabelia mapacueniaje:

—¿Detsa xuajitsia jivi apo canaëjétsi Cristo Dioso pexënatocuene? Jivi saya jamatabëcuenenavëxaniabiaya jumai tsabiabi Cristo yabara: “Cristo raja itsa patsiana, saya Davidpijinë pemomo tsane,” jai tsabiabi. ⁴² Davidpijinë bajayata tajëvelia pejumaitsijava Cristo yabara Salmosvënëbaxutota, jumaitsi mapacueniaje:

Dioso jumaitsi tajatuxanenëjavabelia: “Ecare abaxë tacujuanenia. ⁴³ Vecatsivajënae jumecovënëtsiaexanatsi abaxë copiaya nijavajabitsaë nitorobicuenianexa,” jai Dioso tajatuxanenëjavabelia,

jai Salmosvënëbaxutota Davidpijinë bajayata pejumaitsijava Cristo yabara.

⁴⁴ Nexata Davidpijinë bajayata Cristo yabara: “Tajatuxanenë,” itsa jai, nexata Cristo Davidpijinë apo pemomo. Tsipaji baja cajena Cristo saicaya Dioso pexënato, nayabarajai Jesús judíovi pecujarubivijavabelia, judíovi pecujarubivi pecanaëjétsinexa Cristo Dioso pexënatocuene.

Pacuenia Jesús tsipaeba pijajivijavabelia judíovi pecujarubivi penaneconitsijava Diosojavabelia yabara pelivaisi

(Mt 23.1-36; Mr 12.38-40; Lc 11.37-54)

⁴⁵ Itsa abaxë daxitajivi namuxunaevetatsi Jesús petsipaebilivaisi, Jesús jumaitsi pijajivijavabelia:

⁴⁶ —Xania, panayajivitaema palivaisi judíovi pecujarubivi tsipaebapona panejumecovënëtsianiva. Bajarapamonae jitsipabiaba tomara tuatujëjava piapiajavanë penaxatabiabavanapaenexa jivi peyaiyataenexatsi. Jitsipabiabanua bitso yaiyataeya pebajacobinexatsi callejava. Bajarapamonae itsa najoneyabiaba judíovi penacaetutatabiabibonëjava, jitsipabiaba penaenexa pexaniaviriajavanëta. Nexata natsiitapetabiaba penaenexa peyaiyataevitsi penaenexa petsinubijavanëta. Bajarapamonae itsa napatabiaba fiestajava ata, jitsipabiaba penaenexa peyaiyataevitsi penaenexa petsinubijavanëta. ⁴⁷ Bajarapamonae yamaxëitojorobiaya vecuanotabiabanua pamonajivi pevecuatëpaevanëtsi pecobecovëjavaxi. Bajarapamonae itajara pinijicuenia vajëcabiaba Diosojavabelia. Itsiata pepo pexaniajajamatabëcueneta apo vajëcabiabi. Bajarapacuenia vajëcabiaba saya jivi petaenexatsi Dioso itajara bitso bepejumecovënëtsivi. Nexata bajarapamonae bitso pinijicuenia Dioso naneconitsiaexanaenatsi pamatacabi Dioso naneconitsiaexanaena daxita pamona Dioso apo pejumecovënëtsivi, jai Jesús pijajivijavabelia judíovi pecujarubivi yabara.

21

Pacuenia ofrenda rajuta Diosojavabelia pamona pevecuatëpaevatsi yabara pelivaisi
(Mr 12.41-44)

¹ Templobota Jesús cobetane bitso pexainaevi ayaijava palata pejeponaejava cajonijavabelia. Bajarajota jivi palata jeyabiaba ofrendacuenia perajutsijava Diosojavabelia.

² Bajarajota Jesús cobetanenua pamona pevecuatëpaevatsi, bepejiobiva, penajejava anijapalatanëyobeje. Bajarapova najia anijapalatanëyobeje piamatamobinëyobeje. ³ Jesús nexata jumaitsi pijajivijavabelia:

—Xaniajanë pacuenia pacatsipaebijitsiatsi. Mapovaje pamona pevecuatëpaevatsi bejiobi bitso. Xuayo jia cajonita ofrendacuenia perajutsinexa Diosojavabelia, bajaraxuayo bitso Dioso sivajamatabëcuenenarëya daxita xua itsamonae jia bajarapacajonita

matatoxenetsia. ⁴ Tsipaji rabaja xua bajarapamonae apo namatavenonae, jia bajarapacajonita ofrendacuenia perajutsinexa Diosojavabelia. Itsiata mapovaje, bepejiobiva, daxitajavayo penaevetsijavayotaminexa jia bajarapacajonita ofrendacuenia perajutsinexa Diosojavabelia, jai Jesús pijajivijavabelia.

Pacuenia Jesús tajëvelia tsipaeba pijajivi itsamatacabi itsanacuapijivi pexuabijavanexatsica templobo yabara pelivaisi

(Mt 24.1-2; Mr 13.1-2)

⁵ Jerusalén tomarata templobo itabëtsiaya exaneta pexaniaviriaibotonëta. Jivi Diosojavabelia ofrendacuenia perajutsijavanë ata, templobota itabëtsiaya ruba templobo pitaitabëtsecaenexa. Nexata Jesús pijajiviyajuvënëvi nabarëcuaicuaijai tsaponae templobo pitabëtetsijava yabara. Nexata Jesús tajëvelia vajunupaeba pacuenia itsamatacabi itsanacuapijivi xuabijitsiatsica templobo, daxita bajarapaaitabëcuene yajava. Jesús jumaitsi pijajivijavabelia mapacueniaje:

⁶ —Itsamatacabi itsanacuapijivi xuabianica mapatemplobomije. Nexata daxita xua pataneme, pitabëcuene yajava, penetsianica. Nexata templobopijiibotonë caiboto ata pejumavereca apo boca tsane, jai Jesús pijajivijavabelia.

Pacuenia itsijitsia Jerusalén tomarata, daxitanacuanëjava ata, mapanacua pecopiarucaejavënëje yabara pelivaisi

(Mt 24.3-28; Mr 13.3-23)

⁷ Jesús pijajivi jumaitsi:

—Patajatuxanënë, pajitsipajë patanetsipaebijavamë patayapëtaenexa paepatota copiapatsijitsia xua vajunupaebame. ¿Detsa pitsicuene peneta pataenajë itsa copiapatsijitsia xua jumaitsimë templobo yabara? jai Jesús pijajivi.

⁸ Jesús nexata tajëvelia vajunupaeba pacuenia itsamatacabi itsijitsia mapanacuataje. Jesús pijajivijavabelia jumaitsi mapacueniaje:

—Xania panayajivitaeneme. Pëtsa panacopatame itsajivi ata papecaya-maxëitojorobinexa. Tsipaji raja peyamaxëitojorobinexa, ayaibitsaëto patsiana bexanë itajara tsane. Bajarapamonae najumetsënëtsiaya jumai tsane: “Xanë raja Cristonë, athëbëvetsica Dioso taneitorobinëtsica jivi tacapanepaenexa,” jai tsane. “Imoxoyo rabaja pevajënae nacua pevereverecaenexa,” jai tsane itsamonae. Itsiata pëtsa pajumecovënëtame bajarapamonae. Pëtsa papënaponamenua. ⁹ Vajabitsaë pexanaejava imoxoyonacuanëjava, tajënacuanëjava ata, pavënëlivaisitaeneme. Itsiata pëtsa pajunavame. Peneta bajara itsane mapanacua pevereverecaevajënëje. Itsiata baitsi jane bepijia bajarapamatacabi mapanacuaje abaxë apo vereverecajuni tsane, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuata.

¹⁰ Jesús icatsia tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Mapanacuaje pevereverecaevajënë, peneta copiaya itsaviriavi nabena itsaviriavijavabelia. Itsanacuanëpijivi pijinia nabena itsanacuanëpijivijavabelia. ¹¹ Ira najëabiana ayaicuenia nacuanëjava. Nacuanëjava ayaijaniboxaneto najetarucaena, piavitane cuene yajava. Itaboxotatsia pitsapaena piayaijunavicuene, pinijicuene pexanae javanë yajava, jai Jesús pijajivijavabelia.

¹² Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Bajarapacuenie pecopiajopaevajënëaya patajajivixaemë, pacataicaena. Pacabejiobiaexanaena. Pacacaponae judíovi penacaetatabiabibonëjavabelia papecaneconitsinexa. Penaneconitsivi pejebabiabibota pacajebiana. Patajajivixaemë, pacanubiana presidentevi pitabarata, nacuae vetsivi pitabarata ata. ¹³ Nexata bajarajota xanë talivaisi, pexanialivaisi, patsipaebianame xaniavaetsia. ¹⁴ Nexata

peṭsa tajēvelia panatsinajamatabēxainame pacuenia panayajivicuaicuajiamējitsia bajarapamonaejavabelia. ¹⁵ Tsipaji paepatota panayajivicuaicuajiamējitsia, bitso peyapētaevicuenia pacacuaicuajiaexanaenatsi. Nexata caenē ata panijavajabitsaenē apo caējēpaetsi tsane papecajumecanaviatsinexa. ¹⁶ Bajarapamatacabi patajajivixaemē, panacaemonae atamē, itsajivi panijamonaejivi ata pacacanajetsiana nacuaevetsivijavabelia papecabeyaxuabinexa. Paneaxa ata, paneena ata, panijabanajivi ata, bitso papecayapētaejivi ata, bajarapamonae caranata pacacana-jetsiana. Nexata pacayajuvēnēbeyaxuabiana. ¹⁷ Daxitajivi pacaitoya tsabiabi tsane patajajivixaemē. ¹⁸ Itsiata baitsi jane pepo panejamatabēcuenelivaisi bajarapamonae apo itsacueniabi tsane. ¹⁹ Itsa pajamatabēcuenesaemē tsavanapae tsane, nexata matacabi apo peverevereceajava paxainaename, jai Jesús pijajivijavabelia tajēvelia pevajunupaebijavata pacuenia itsamatacabi itsijitsia mapanacuataje.

²⁰ Icatsia Jesús tajēvelia vajunupaeba papiayaicuene itsamatacabi copiapatsijitsia Jerusalén tomarata, Jesús jumaitsi pijajivijavabelia mapacueniaje:

—Itsa pataename vajabitsaē, itsanacuaverena pepatsivi, Jerusaléntomara matatoyorotsia peyacaranatsijavatsi, nexata pajamatabēitsimē tsane: “Imoxoyo rabaja pevajēnae Jerusaléntomara peverevereceaenexa,” pajamatabējamē tsane. ²¹ Nexata bajarapamatacabi Judea nacuata pejinavanapaevi, itsa tane bajarapacuenē, berēcēpeca cajena ibotsutonējavabelia. Jerusalén tomarapijivi ata berēcēpeca pijatomaravecuā. Itsamonae pijinia, Jerusalén tomarapijivi, bajarapamatacabi Jerusalén tomarapēnēyabelia itsa jinavanapa, apo benaviabirena pijaboyaberena. ²² Bajarapacuenia Jerusalén tomarapijivi itsa tocopiajopaenatsi, tocopiajopaenatsi jane baja Dioso penaneconitsiaexanaematacabitsi. Nexata jane baja tocopiajopaenatsi daxita pacuenia baja cajena pepo bajayatami tajēvelia vajunupaeba Diosojumelivaisibaxutota. ²³ Bajarapavajabitsaēmatacabi bitso ayaicuenia bejiobi tsane mapanacuapijivije. ¡Papetiriavi penacueto yacotajinavanapa, bitso bejiobi tsane bajarapamatacabi bitso nabejibitsiaya peponaexae tsane! ¡Papetiriavi ata mitoapaenacuetoxi isajinavanapa, bitso bejiobi tsane bajarapamatacabi! Bajarapacuenia daxita mapanacuapijivije pinijicuenia Dioso naneconitsiaexanaenatsi. ²⁴ Bajarapavajabitsaēmatacabi itsanacuaverena Jerusalén tomarapijivi vajabitsaē tsimaxēpatsianatsi. Nexata itsabitsaētomi, Jerusalén tomarapijivimi, beyejebianatsi. Itsabitsaētomi pijinia, Jerusalén tomarapijivimi, caponaenatsi itsanacuanējavabelia. Nexata bajaraxuacujinae itsanacuanēpijivi patsiana Jerusalén tomarata. Nexata juya bajarapamonae jinavanapaena Jerusalén tomarata. Nexata itsanacuaverena pepatsivi evetsiana Jerusaléntomara. Matapania daxita itsanacuaverena pepatsivi vecuapitsapaena Jerusaléntomara, copatsiana baja bajarapamonae pevetsijava Jerusaléntomara, jai Jesús pijajivijavabelia tajēvelia pevajunupaebijavata papiayaicuene itsamatacabi copiapatsijitsia Jerusalén tomarata.

Pacuenia Jesús tajēvelia navajunupaeba icatsia pepatsijavanexatsica petēpaecujinae yabara pelivaisi

(Mt 24.29-35, 42-44; Mr 13.24-37)

²⁵ Jesús tajēvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Xanē tapatsivajēnaetsica, jivi taena pecujunavicuene. Matacabipijijuametotatsia, xua naitajētsiana, meravipijijuametotatsia ata, xua naitajētsiana, tulupujavatatsia ata, xua naitajētsiana, bajaraxuanē jivi bitso cujunaviana. Daxita nacuanēpijivi bitso najunaviacaena itsa jumetaena manuameneta pinijimalataca bitso penajumetsijava. ²⁶ Daxitanacuanējava bitso jivi najamatabēxainaena itsa taena piayaicuene petocopiajopaejavatsi. Nexata daxita nacuanējava jivi tēpajoneyabiabiana pecajunavi. Daxita xua athēbētatsia rubena, najēabiana. Xaniavaetsia apo rubenae

tsane. ²⁷ Nexata bajarapaepatota jivi netaena, Daxitajivi Pematapijinënë, athëbëvetsica itarërëbota tanajetarucaejava. Patsianicajë daxitacuene taevetsinexa. Tanivenivenae-cotia yajavapatsianicajë. ²⁸ Itsa pataename pecopiapopaejava bajarapacuene, nexata panajamatabëcuenesaëtsianame. Tshipaji rabaja imoxoyo pevajënae tsane papecaca-panepaenexa jivi papecabejiochia exanaebiabijavamivecua, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

²⁹ Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Pacanaëjere pacuenia itsi higeranae, itsavirianaenë ata. ³⁰ Itsa baja imoxoyo pevajënae tsaponae vai pejonejavanexa, bajaraponaenë pejanabaxu juva. Nexata bajarapacuena payapëtaneme vai baja imoxoyo pevajënae pejonejavanexa. ³¹ Bajara pijinia pacuenia peneta itsa pataename pecopiapatsijava xua yabara pacatsipaebatsi, nexata payapëtaename imoxoyo baja pevajënae pecopiapatsijavanexa tsane pamatacabi daxita Dioso pijajivi evetsijitsia mapanacuataje, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

³² Icatsia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pitsijamatabëcuenevi aeconoxae mapamatacabitaje jinavanapa, bajarapitsijamatabëcuenevi abaxë, bexëajavabelia ata, apo vereverecae tsane. Matapania xua yabara pacatsipaebatsi itsa baja copiapatsiana, bajarapamonae jane baja vereverecaena. ³³ “Itaboxo, ira yajava, tsitecaena daxitamatacabijavabelianexa,” jamatabëjai ata tsane itsamonae, itsiata jamatabëcuenenavëxaniabiana. Tshipaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua yabara pacatsipaebatsi, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia.

³⁴ Icatsia Jesús jumaitsi pijajivijavabelia:

—Nayajivitaeya pajinavanapaename. Pëtsa panajamatabëxainame pibisiacuene paneexanaenexa, paneaitajibinexa ata. Pëtsa pasivanajamatabëxainame maëpanacuapijijamatabëcueneje. Belia bajarapacuena paneexanavanapaejavata, jemata copiapatsipa tapatsimatacabinexatsica. ³⁵ Pacuenia dujai peyamatajucaejava, meniareca jemata jivi xuareca dujai peyamatajutsinexa, bajara pijinia pacuenia xanë tapatsimatacabinexatsica, jemata daxitanacuanëjava copiapatsiana. ³⁶ Bajaraxuata nayajivitaeya pajinavanapaename. Daxitamatacabi canacujitsia panayajivivajëcabiabianame Diosojavabelia paneajamatabëcuenesaë tsaponaeenexa, panevecuapanepaponaenexa daxita papibisiacuene pacatocopiapataponae. Daxita bajarapapibisiacuene panevecuapanepaecujinae ata, pavajëcabiabianame Diosojavabelia. Nexata pamatacabi xanë, Daxitajivi Pematapijinënë, patsianicajë, papecacaëjëpaenexa panenubenaejava taitabarata, jai Jesús pijajivijavabelia.

³⁷ Caematacabi canacujitsia Jesús livaisi tsipaebabiaba templobota. Nexata icatsia caemeravi canacujitsia Jesús tomaravecua pitsapabiaba pemajitabiabinexa petsutojumabelia. Nexata patsutojumata olivonaenë nubena, bajarapatsutojumata Jesús majitabiaba. ³⁸ Daxita bajayacunua canacujitsia jivi patabiaba templobota penamux-unaevetabiabinexatsi Jesús petsipaebilivaisi.

22

Pacuenia Judas pona Jesús pijavajabitsaë pecobeyabelia pecanajetsinexatsi yabara pelivaisi

(Mt 26.1-5, 14-16; Mr 14.1-2, 10-11; Jn 11.45-53)

¹ Imoxoyo baja pevajënae pejonenexa pascuavënëfiesta. Bajarapafiestamatacabi jivi baxane levadurata matajërëabinejeva pexanaepan. ² Sacerdotevi penamatacaitorobivi,

judíovi pecujarubivinu, najumejaita pacuenia picani bajarapamonae Jesús beyaxuabijitsiatsi. Itsiata abaxë bajarapamonae Jesús apo beyaxuabitsi. Tsipaji bajarapamonae jivi cujunava.

³ Nexata dovathi tsijamatabëjunuatsi Judas. Judas, ponë vënërubatsi itsavënë, Iscariote. Bajaraponë Jesús pijajivi, doce ponëbejeyajuvënë. ⁴ Judas yapëtane itsajota nacaetuata sacerdotevi penamatacaitorobivi, templobopijipolicíavi penamatacaitorobivi yajava. Nexata bajarabelia Judas pona pebarëcuaicuaijainexa bajarapamonae. Nexata Judas tsipaeba pacuenia rajutsijitsia Jesús bajarapamonae pecobeyabelia. ⁵ Nexata bajarapamonae barëya. Rajutsipaebatsi palata. ⁶ Jejai Judas. Nexata Judas Jesús naitaxuto-caevetsia ponapona. Paepatota Judas toyapëxanepanatsi, perajutsinexa jane baja Jesús bajarapamonae pecobeyabelia. Bajarapacuenia Judas najamatabëxaina pexanaenexa itsajota bitso jivi apo navitsi.

Pacuenia Jesús barë nabane pijajivi pecopiarutsinabani baja pebeyaxuabivajënaetsi yabara pelivaisi

(Mt 26.17-29; Mr 14.12-25; Jn 13.21-30; 1 Co 11.23-26)

⁷ Junua jane baja pascuavënëfiesta, pafiestamatacabi jivi baxane levadurata matajërëabinejeva pexanaepan. Bajarapamatacabi ovejaxi babia pexaenexa pascuafiestamatacabi. ⁸ Nexata Jesús itoroba pijajivitonëbeje, Pedrobeje Juanbeje. Jesús jumaitsi pijajivitonëbejejavabelia:

—Paponarebeje paneexanaenexabeje vajaxaejavanexa. Xua jivi baxane pascuafiestamatacabi, bajaraxua vajaxaenexa paexanaenamebeje, jai Jesús pijajivitonëbejejavabelia.

⁹ Nexata Pedrobeje Juanbeje jumaitsidebeje Jesúsjavabelia:

—¿Detsa jota jitsipame bajaraxua pataexanaenexabeje? ¿Detsajota bajaraxua xae-natsi? jai beje.

¹⁰ Jesús nexata jumaitsi pijajivitonëbejejavabelia:

—Tomarabelia itsa papatsianamebeje, pacaxitajarabianamebeje mera canalito pecanajetarucaenë. Bajaraponë papënanajetarucaenamebeje. Pabota bajaraponë joneyojopaena, bajarapabota panapatsianamebeje. ¹¹ Nexata pajumaitsimëbeje tsane bajarapabo pexainaenëjavabelia: “Vajanacacujarubinë raja Jesús jumaitsi: ‘¿Detsa jota pënëyatuucutsibo eca, pabota tajajivi barëxaejitsianë xua jivi baxane pascuafiestamatacabi?’ jai raja Jesús,” pajamëbeje tsane bajarapabo pexainaenëjavabelia. ¹² Nexata athëbëabetsia anijairabeje pexinaebojavata, pacatsitajëtsianabeje. Bajarapaboënëta, athëbëyotsia paira, ayaiënëtuatuajë tsane. Daxitacuene bajarajota xainaena. Nexata xua jivi baxane pascuafiestamatacabi, bajarajota paexanaenamebeje vajaxaenexa, jai Jesús pijajivitonëbejejavabelia.

¹³ Nexata jane baja bajaraponëbeje ponabeje. Caxitajarababeje daxita pacuenia Jesús jumaitsi. Nexata xua jivibaxane pascuafiestamatacabi, daxita Jesús pijajivi pebarëxaenexa, bajaraponëbeje exanabeje jane baja.

¹⁴ Itsa baja copiajopa pexaeapatotanexa, Jesús, pijajivi doce ponëbeje, apóstolevi, yajava, eca mesa muxuneneta. ¹⁵ Nexata Jesús jumaitsi pijajivijavabelia:

—Tatëpaevajënae bitso jitsipajë patacayajavaxaejava mapapascuafiestamatacabi pexaejavaje. ¹⁶ Xaniajanë pacuenia pacatsipaebijitsiatsi. Matavëjëa rabaja mapanacuataje apo xanë tsane pascuafiestamatacabi pexaejava. Matapania daxita patajajivimë Dioso itsa pacacapanepaena panijaneconivecua, bajara jane icatsia matapania taxa Dioso pijanacuatatsia xanajë pascuafiestamatacabi pexaejava, jai Jesús pijajivijavabelia.

¹⁷ Nexata Jesús copavënëjavata yapita pijajivi pebarëapaeranexa. Jesús jumaitsi Diosojavabelia:

—Pexaniacuene panetoexaname. Panerajutame maporaje, jai Jesús.

Bajaraxuacujinae pijajivijavabelia jumaitsi:

—Maporaje payapire. Papaema padaxitamë mapacopataje. ¹⁸ Xaniajanë pacuenia pacatsipaebijitsiatsi. Matavëjêa rabaja mapanacuataje apo apaenë tsane uvacuaira. Matapania itsa copiajopaena daxita Dioso pijajivi pevetsimatacabi, apaenajë icatsia, jai Jesús pijajivijavabelia.

¹⁹ Bajaraxuacujinae Jesús pita panbë. Jesús jumaitsi Diosojavabelia:

—Pexaniacuene panetoexaname. Panerajutame pan, jai Jesús.

Bajaraxuacujinae epatsënëquejeba bajarapapanbë. Rajuta pijajivi. Jesús jumaitsi pijajivijavabelia:

—Paxaema. Mara tavitoje, patacasivatëpaejava paxamënexa. Tatëpaecujinae mapacuenia paexanabiabianameje patanenajamatabënapitabiabinexamë, jai Jesús pijajivijavabelia.

²⁰ Nexata jane baja daxita Jesús pijajivi barë nabane. Penabanicujinae Jesús icatsia yapita pijajivi pebarëapaeranexa. Jesús jumaitsi pijajivijavabelia:

—Dioso baja cajena najumecapanepaeya jumaitsi pejanalivaisi papecapanepaenexa bajaraponëjavabelia. Bajarapacuenia pacacapanepaena tajana pejamatabëcueneta. Tajana raja runaena papecacomuatsinexa pibisiacuene paneexanaeconimivecua. Mapacapaejavataje padaxitamë papaema panenajamatabënapitabiabinexa pacuenia Dioso bajarapapejanalivaisita najumecapanepaeya jumaitsi papecapanepaenexa bajaraponëjavabelia, jai Jesús pijajivijavabelia.

²¹ Icatsia Jesús jumaitsi pijajivijavabelia:

Panejumetaema. Ponë necanajetsijitsia tajavajabitsaë pecobeyabelia, bajaraponë naeca mapamesa muxunenetaje. ²² Xanë, Daxitajivi Pematapijinënë, tēpaenajë pacuenia tajëvelia Dioso netocopata. Itsiata baitsi jane ponë necanajetsiana tajavajabitsaë pecobeyabelia, bitso bejiobi tsane, jai Jesús.

²³ Nexata Jesús pijajivi najumai tsenae:

—¿De meta ponë vaxaitsiyajuvënënë, canajetsiana Jesús pijavajabitsaë pecobeyabelia? najai tsenae Jesús pijajivi.

Pacuenia Jesús pijajivi: “¿Detsa ponë vaxaitsiyajuvënënë nacavecuaayaijamatabëcuenenë bitso?” najai yabara pelivaisi

²⁴ Jesús pijajivi anaeya najumenotsiaya nalivaisita. Najumaitsi:

—¿Detsa ponë vaxaitsiyajuvënënë nacavecuaayaijamatabëcuenenë? najai Jesús pijajivi.

²⁵ Nexata Jesús jumaitsi pijajivijavabelia:

—Nacuaevevetsivi pacuenia jamatabëpacaitoroba panetoexanaenexa, ajumesaëya pacaitorobabiaba papijajivimë, bajarapamonae pevetsinacuanëjava panejinavana-paevi. Itsiata baitsi jane bajarapacuenia pacabejiobiaexanabiabi ata, bajarapamonae jitsipabiaba paxamë bajarapamonae yabara panejumaitsinexa: “Bajaraponë vanacayanacuaevevetsinë, bitso pexaniacuene nacatoexanabiaba,” panejainexa. ²⁶ Pëtsa paxamë bajarapamonae cuenejëpaeya bepaayaijamatabëcuenevimë panataneme. Ponë raja peneta paxamëyajuvënënë daxita paxamë pacavecuaayaijamatabëcuenenë, bajaraponë peneta daxitajivi bepijajivitonëcuenia yavenonaena. ²⁷ Mapanacuata petuxanenë itsa xaeyeca mesata, petuxanenë jamatabëcuenevetatsi pijajivitonë. Tsiipaji petuxanenë ayaijamatabëcuenenë pijajivitonë matatoxenetsia. Itsiata xanë bajarapitsijamatabëcuene apo xainaenë. Ponaponajë paxamëjavata daxita paxamë bepanijajivitonëncuenia patacayavenonaenexa, jai Jesús.

²⁸ Icatsia Jesús jumaitsi pijajivijavabelia:

—Pacuenia jivi nitoya, nebejiobiaexananua, bajarapacuenia paxamë ata patajajivix-aemë, pacaexana. Bajarapacuenia pacaexanae ata tsane, itsiata apo panenavecuacopabimë tsane. Tsitecaeya paneyajavajinavanapame. ²⁹ Bajaraxuata nexata pacuenia

taxa Dioso nitoroba jivi taevetsinexa, bajara pijinia pacuenia juya xanë ata paxamë pacaitorobatsi jivi paneevetsivinexa. ³⁰ Nexata paxamë pacajamatabëcuenecaëjèpaena taevetsinacuatatsia tajamesata panenanabaninexa, panenamataavèjèaapaenexanua. Pae-naename jueznëcuenia panenaneconitsiaexanaenexa pijaneconi pexainaeivi. Nex-ata pananeconitsiaexanaename Israelpijinëmi pexi, doce ponëmibeje, pemomoxiya-juvënëvi, jai Jesús pijajivijavabelia.

Pacuenia Jesús tajëvelia jumaitsi Pedrojavabelia: “Pedro, xamë raja nayavajunuax-ainaename tajajivitonëcuenemë,” jai yabara pelivaisi
(Mt 26.31-35; Mr 14.27-31; Jn 13.36-38)

³¹ Jesús jumaitsi Pedrojavabelia:

—Simón, dovathi baja cajena jamatabëcapita xanëvecua. Bitso caja-matabëcuenejèbiana tanenavecuacopatsinexamë. Pacuenia arrozxainanë arrozxu jëaba pesi pevecuaxuabinexa, bajara pijinia pacuenia pecaxuabinexa xanëvecua cajamatabëcuenejèbiana dovathi. ³² Itsiata baitsi jane catovajëtatsi Diosojavabelia necopatsiyaniava tanejumecovënëtsijavamë. Itsa navecuapaebianame nenaneconitsijava Diosojavabelia, nexata jane baja bajaraxuacujinae jamatabëcuene babataponaponaename Dioso pejumecovënëtsivi, jai Jesús Pedrojavabelia.

³³ Pedro nexata jumaitsi Jesúsjavabelia:

—Tajatuxanenë, najamatabëcueneveretajë baja. Penaneconitsivi pejebabiabibota caetsi ata, tanaponaponaenexa xamëta. Najamatabëcueneveretajë baja tacayajav-
vatëpaenexanua, jai Pedro Jesúsjavabelia.

³⁴ Nexata icatsia Jesús jumaitsi:

—Pedro, xaniajanë pacuenia catsipaebijitsiatsi. Ajena, mapameravitaje, vacara pefiabivajënaeya nayavajunuaxainaname tajajivitonëcuenemë. “Xanë cajena apo yapëtaenë bajaraponë,” jamë tsane acueyabi xuabeje xanë yabara, jai Jesús Pedrojav-
abelia.

*Pacuenia baja itsa imoxoyo pevajënae Jesús pebeyaxuabinexatsi, tsipaeba pijajivijav-
abelia yabara pelivaisi*

³⁵ Jesús yanijoba pijajivijavabelia. Jesús jumaitsi mapacueniaje:

—Imata panamuto itsa pacaitorobatsi Dioso pejumelivaisi jivi daxitanacuanëjava panetsipaebanajetarubenaenexa, pacaitavetatsi panecaponaeyaniva doru, palata ata, zapato ata. ¿Bजारapamatacabi panamatavenoname tsaja itsacuenejava? jai Jesús pijajivi-
javabelia.

Nexata Jesús pijajivi jumaitsi:

—Jume. Apo panamatavenonaenë cajena itsacuenejava ata bajarapamatacabi, jai.

³⁶ Jesús nexata jumaitsi:

—Baja rajane aeconoxae panamuto, pajivi doru xaina, bajarapajivi caponae pijadoro. Palata ata caponae. Pajivi espada apo xainae, bajarapajivi penajumaxuabipana cana-jetsi. Comuatsi espada. ³⁷ Xaniajanë pacuenia pacatsipaebijitsiatsi. Pacuenia xanë yabara Diosojumelivaisibaxutota tajëvelia jumaitsi, bajarapacuenia netocopiapatsiana. Dioso pejumelivaisibaxutota tajëvelia xanë yabara jumaitsi mapacueniaje: “Naneconit-
siaexanaenatsi bepibisiacuene pexanaenëcuenia,” jai tajëvelia xanë yabara Diosojume-
livaisibaxutota. Nexata bajarapacuenie imoxoyo baja pevajënae tanetocopiapatsinexa,
jai Jesús pijajivijavabelia.

³⁸ Nexata Jesús pijajivi jumaitsi:

—Tajatuxanenë, mara anijaespadabejeje, jai Jesús pijajivi.

Nexata Jesús jumaitsi pijajivijavabelia:

—Xanepana rabaja, jai Jesús.

Pacuenia Jesús vajëta Diosojavabelia Getsemanívenëjavata yabara pelivaisi
(Mt 26.36-46; Mr 14.32-42)

³⁹ Jesús pitsapa bovecua. Pacuenia ponabiaba, bajarapacuenia icatsia pona petsutojumabelia. Patsutojumata olivonaenë apaaxayo, bajarapatsutojumabelia pona. Nexata Jesús pijajivi pënaponatsi. ⁴⁰ Jesús pijajivi ita barëpata bajarapatsutojumabelia, Jesús jumaitsi pijajivijavabelia:

—Pacajamatabëcuenejëbiana raja dovathi pejamatabëcueneta. Pavajëtaponare aeconoxae Diosojavabelia paneajamatabëcuenesaënexa panecopabiyanaiva patanejume-covënëtsijavamë, jai Jesús.

⁴¹ Nexata Jesús pijajivi vecuanatixilia bejamatabëcuene treinta metro. Jesús nucajunua pematabacabëta pevajëtaponaenexa Diosojavabelia. ⁴² Jesús pevajëtsijavata jumai tsaponae Diosojavabelia:

—Taxa Diosomë, netocopatame picani tanebeyaxuabinexa betajibicueneta. Itsa jitsipame, necapanepare bajarapabejibicuenenevecua. Itsiata xanë apo tajitsipaecueneta, pacuenia xamë jitsipame, netocopatsianame, jai Jesús pevajëtsijavata Diosojavabelia.

⁴³ Nexata Jesús athëbëpijiängel tsitanaitajëtatsi pejamatabëcuene asaëyaexanaenexatsi.

⁴⁴ Jesús pebeyaxuabijavanexatsi yabara, bitso natsinajamatabëxaina. Nexata Jesús bitso orijibia asaëyata vajëtapona Diosojavabelia. Jesús bitso janetatsi. Pacuenia itsi pijana, bajara itsi Jesús pejanetsibarëmenetsi. Topitopijai irabereca.

⁴⁵ Jesús pevajëtsicujinae ita nonotapuna, lia pijajivijavabelia. Nexata Jesús pijajivi caxitajaraba pemajitanubenaevi. Tsipaji Jesús pijajivi bitso penajamatabëxainaejava, cuerana. ⁴⁶ Nexata Jesús jumaitsi pijajivijavabelia:

—¿Detsa xuajitsia pamajitanubename? Panonobapunare. Pavajëtaponare Diosojavabelia, dovathi pejamatabëcueneta pacajamatabëcuenejëbi ata paneajamatabëcuenesaënexa, jai Jesús pijajivijavabelia.

Pacuenia Jesús vaetabatsi pijavajabitsaë yabara pelivaisi
(Mt 26.47-56; Mr 14.43-50; Jn 18.2-11)

⁴⁷ Jesús pijavajabitsaë pevaetabijavatanexatsi, cuaicuaijai tsanucæ pijajivijavabelia. Nexata bajarapaepatota jivi ayaibitsaëtoxaneto, Jesús petsimaxëponaevitsi, najetarubena. Ponë vënërubatsi Judas, Jesús pijajivi doce ponëbejeyajuvënënëmi, maticana-jetaruca bajarapamonae. Nexata Judas najetabalia Jesúsjavabelia. Itabaratsutsuniaya bajacobatsi. ⁴⁸ Nexata Jesús bajarajota jumaitsi Judasjavabelia.

—Judas, ¿matsa pacuenia nitabaratsutsuniaya nebajacobame xanë, Daxitajivi Pematapijinënë, tanecanajetsinexamë tajavajabitsaë pecobeyabeliaje? jai Jesús.

⁴⁹ Jesús pijajivi ita tane pacuenia Jesús exanaejitsiatsi, nexata bajarapamonae jumaitsi Jesúsjavabelia:

—Tajatuxanenë, ¿namaxëvanitsianatsi tsaja espadata? jai Jesús pijajivi.

⁵⁰ Nexata caenë Jesús pijajiviyajuvënënë namaxëvanita. Sacerdotevi pepo penamatacaitorobinë pijajivitonë muxuyoropaebiaxuaba pecujuanenia pamuxuyoroto.

⁵¹ Nexata Jesús jumaitsi pijajivitonëjavabelia:

—Copabare baja, jai Jesús.

Nexata Jesús bajaraponë muxuyororoyataba. Jesús baja muxuyororuta icatsia bajaraponë. ⁵² Pamonae Jesús tsimaxëpatatsi, itsamonae sacerdotevi penamatacaitorobivi, itsamonae templobopijipolicíavi penamatacaitorobivi, itsamonae judíovi pijaancianovi. Bajarapamonae caponaejitsiatsilia Jesús. Nexata Jesús jumaitsi bajarapamonaejavabelia:

—Paxamë meta panetaneme betanacobetoxotsinë. Bajaraxuata pacaponame espadanë, naebonë yajava, patanevaetabinexamë pacuenia pavaetababiabame penacobetoxotsinë. ⁵³ Xanë caematacabi canacujitsia Dioso pejumelivaisi paxamëjavabelia

pacatsipaebabiabatsi templobota. Itsiata bajarapamatacabi apo panevaetabimë. Nexata mapaepatotaje panetsimaxëpatame dovathi, jivi piajamatabëcuene itaquiriyaex-naenë, papecaitorobixae, jai Jesús petsimaxëpatsivitsijavabelia.

Pacuenia jane baja Pedro nayavajunuaxaina Jesús pijajivitonëcuene yabara pelivaisi (Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Jesús pevaetabicujinaetsi, caponaliatsi sacerdotevi pepo penamatacaitorobinë pi-jaboyabelia. Nexata Pedro bajarapamonae pecovëvelia tajiyo pënanajetaruca. ⁵⁵ Nexata pabota Jesús capatatsi, bajarajota, panabo tuatujëta, vajabitsaë isoto itajuruteta. Bajarapamonae isoto matatoyorotsia ena. Pedro nexata naitaxutocaevetsiaya naeca bajarapamonaejavata. ⁵⁶ Nexata bajarapabota penacuenebiva, Pedro itsa taeyetatsi penanonopecaejavata isoto muxuneneta, naitaxutobabatsia asaëya taenucatsi. Nexata itsamonaejavabelia bajarapova jumaitsi Pedro yabara:

—Mara ponë ata Jesús pijajivitonëje, jai bajarapova.

⁵⁷ Nexata Pedro jumaitsi bajarapovajavabelia:

—Jume raja. Xanë cajena apo yapëtaenë bajaraponë, jai Pedro bajarapovajavabelia Jesús yabara.

⁵⁸ Bajaraxuacujinae icatsia itsajivi Pedro taeyetatsi. Bajarapajivi ata icatsia jumaitsi Pedrojavabelia:

—Xamë ata rabaja cajena Jesús pijajiviyajuvënënëmë, jai.

Nexata Pedro jumaitsi bajarapajivijavabelia:

—Jume raja. Xanë raja cajena apo Jesús pijajiviyajuvënënënë, jai Pedro.

⁵⁹ Bejamatabëcuene caehoracujinae, icatsia itsanë jumaitsi:

—Xaniajai rabaja cajena. Maponëje Jesússta naponaponaje. Tsipaji rabaja bajaraponë ata Galilea nacuapijinë, jai bajaraponë Pedro yabara.

⁶⁰ Nexata Pedro nayajumetane. Pedro nexata jumaitsi bajaraponëjavabelia:

—Apo yapëtaenë cajena pacuene yabara jumaitsimë, jai Pedro.

Bajarapacuenia Pedro pejumaitsijavata, vacara baja fiaba. ⁶¹ Nexata Jesús boverena namuxufeta Pedrojavaberena. Taeyerenatsi Pedro. Nexata bajarapaepatota Pedro najamatabënapitajaraba Jesús pejumaitsijavatsi: “Pedro, ajena, mapameravitaje, vacara pefiabivajënaeya nayavajunuaxainaename tajajivitonëcuenemë. ‘Xanë cajena apo yapëtaenë bajaraponë,’ jamë tsane xanë yabara acueyabi xuabeje,” pejaijavatsi Jesús, najamatabënapitajaraba Pedro. ⁶² Nexata baja Pedro pitsapalia bopanabovécua. Pinijicuenia nua.

Pacuenia Jesús pijavajabitsaë capocaponatsi yabara pelivaisi (Mt 26.67-68; Mr 14.65)

⁶³ Pamonae Jesús vaetabatsi, capocaponatsi. Itabaratsaquibabeponatsi pecobethaitonëta. ⁶⁴ Papaëbërëpanata itaxutocëtatsi. Pitaxutocëtsicujinaetsi icatsia itabaratsaquibabeponatsi pecobethaitonëta. Nexata bajarapamonae jumai tsaponae Jesúsjavabelia:

—¡Vënëjonare ponë caitabaratsaquibaba! jai tsaponae.

⁶⁵ Pibisiacuenianua bajarapamonae jumai tsaponae Jesúsjavabelia.

Pacuenia Jesús nutatsi judíovi penamatacaitorobivi pitabarata yabara pelivaisi (Mt 26.59-66; Mr 14.55-64; Jn 18.19-24)

⁶⁶ Ajena baja matacabi tsarucaponae, nacaetuata judíovi pijaancianovi, sacerdotevi penamatacaitorobivi yajava, judíovi pecujarubivi yajava. Nexata Jesús caponare-natsi bajarapamonae penacaetuatsijavaberena. Bajarajota bajarapamonae jumaitsi Jesúsjavabelia:

⁶⁷ —Panetsipaebare. ¿Xamë tsabaja rovia Cristomë, athëbëvetsica Dioso pecaitorobinëtsica jivi necapanepaenënexa? jai bajarapamonae.

Nexata Jesús jumaitsi bajarapamonaejavabelia:

—“Xanë rabaja Cristonë, athëbëvetsica Dioso taneitorobinëtsica jivi taca-panepaenexa,” pacajai atatsi tsipae, itsiata apo panejumecovënëtsimë tsipae. ⁶⁸ Itsalivaisiyo pacayanijobi atatsi tsipae, itsiata apo panejumecanaviatsimë tsipae. Apo panecopatsimënuua tsipae. ⁶⁹ Itsiata baitsi jane tavajënaeyabelia xanë, Daxitajivi Pematapijinënë, ecaenajë taxa Dioso pecujanenia patanajuaevetsinexabeje daxitacuene. Bajaraponë pecaëjëpaenëtsi daxitajamatabëcuene, jai Jesús bajarapamonaejavabelia.

⁷⁰ Nexata daxita bajarapamonae jumaitsi Jesúsjavabelia:

—¿Xamë tsabaja Dioso pexënatomë? jai bajarapamonae.

Nexata Jesús jumaitsi bajarapamonaejavabelia:

—Jājā, xanë rabaja pacuenia panejumaitsimë. Bajaraponënë, jai Jesús.

⁷¹ Nexata bajarapamonae najumaitsi:

—Ajibi rabaja abaxë vajaevetaponaejava jivi neconitsiaya vajanacatsipaebapon-aenexa pacuene yabara naneconitsiaexanaejitsiatsi maponëje. Vaxaitsi rabaja vajacu-ata jumetanetsi pacuenia maponëje cuaicuajai Dioso apo pejitsipaecuenia. Tsipaji beDioso pexë nato natane, najai bajarapamonae.

23

Pacuenia Jesús nutatsi Pilato pitabarata yabara pelivaisi

(Mt 27.1-2, 11-14; Mr 15.1-5; Jn 18.28-38)

¹ Daxita judíovi pijaancianovi nonobapuna. Sacerdotevi penamatacaitorobivi ata nonobapuna. Judíovi pecujarubivi ata nonobapuna. Nexata bajarapamonae Jesús caponaliatsi itsaboyabelia, Judeanacua pevetsinë Pilato pijaboyabelia. ² Bajarajota Pilato pitabarata bajarapamonae neconitsiaya jumaitsi Jesús yabara:

—Mara ponëje naneconita. Tsipaji muxubijiapenetapona jivi pianaepanaenexa nacuaevetsivijavabelia. Paneitavetaponanua patamatamotsiyaniva Romanonacua pepo pevetsinë pejamatabëcueneta impuestomatamo pataneyanijobijava. Jumai tsaponaenua: “Xanë raja Cristonë, nacua taevetsinë,” jai tsapona maponëje, jai bajarapamonae Jesús yabara neconitsiaya Pilatojavabelia.

³ Nexata Pilato jumaitsi Jesúsjavabelia:

—¿Xamë tsaja judíovi pepo nevetsinë? jai.

Nexata Jesús jumaitsi Pilatojavabelia:

—Jājā, xanë rabaja pacuenia nejumaitsimë, jai Jesús Pilatojavabelia.

⁴ Pilato nexata jumaitsi sacerdotevi penamatacaitorobivijavabelia, jivi ayaibit-saëtoxanetojavabelia ata:

—Apo caxitajarabinë cajena itsacujiruneconi ata pexainaejava maponëje, paneconi yabara naneconitsijitsia, jai Pilato.

⁵ Itsiata bajarapamonae ajumesaë. Orijiibia neconitsia jumaitsi Jesús yabara:

—Bajaraponë daxita Judea nacuapijivi muxubijiapenetapona bajarapamonae pianaepanaenexa Judeanacua pevetsivijavabelia. Taxuxuaba cajena bajaraponë bajara-pacuene pexanaejava Galilea nacuata. Nexata maberena ataje bajarapacuenia icatsia exanapona, jai bajarapamonae Jesús yabara Pilatojavabelia.

Pacuenia Jesús nutatsi Herodes pitabarata yabara pelivaisi

⁶ Pilato itsa jumetane bajarapamonae peneconitsijavatsi Jesús, nexata Pilato jumaitsi bajarapamonaejavabelia:

—¿Matsa ponëje Jesús, Galilea nacuapijinëje? jai Pilato.

⁷ Nexata bajarapamonae tsipaeba Pilatojavabelia Jesús Galilea nacuapijinëcuene. Nexata Pilato itoroba pijajivi Jesús pecaponaenexatsilia Herodesjavabelia. Tsipaji Herodes Galileanacua pevetsinë. Bajarapamatacabi Herodes ponapona Jerusalén

tomarata. ⁸ Nexata Herodes itsa tane Jesús, barëya. Tsipaji Herodes vënëlivaisitaeyabiaba Dioso pesaëta Jesús pinijicuene pexanaponaejavanë. Nexata Jesús pinijicuene pexanaejava Dioso pesaëta jamatabëtane Herodes. ⁹ Nexata Herodes ayaicuenia yanijobapona Jesúsjavabelia. Itsiata Jesús apo jumepitsi caejumeyo ata. ¹⁰ Bajarajota nubena sacerdotevi penamatacaitorobivi, judíovi pecujarubivi yajava. Bajarapamonae ayaijumeta neconitaponatsi Jesús Herodesjavabelia. ¹¹ Nexata Herodes, pijajivi yajava, Jesús capocaponatsi. Bitso pexaniajava, xua nacuaevetsinë banaxatata, bajaraxua Jesús quenetsiataeya xatatatsi. Bajarapacuenia Jesús quenetsiataeya xatatatsi pepo nacuaevetsinëcuenia petaenexatsi. Bajaraxuacujinae icatsia canaviabarenatsi Pilatojavaberena. ¹² Pilatobeje Herodesbeje naitoyabeje picani. Itsiata bajarapamatacabi nabarajamatabëcuenexanepanabeje. Naxaniababeje baja.

*Pacuenia baja Pilato tocopata Jesús pebexuabinexatsi yabara pelivaisi
(Mt 27.15-26; Mr 15.6-15; Jn 18.39-19.16)*

¹³ Pilato junata penacaetuatsinexa sacerdotevi penamatacaitorobivi. Junata penacaetuatsinexa judíovi pevetsivi ata. Junata penacaetuatsinexa bajarapatomarata pejinavanapaevi ata. ¹⁴ Nexata Pilato jumaitsi bajarapamonaejavabelia Jesús yabara:

—Paxamë panetocapatame maponëje. “Mara ponëje naneconita. Tsipaji muxubijiapenetapona jivi pianaepanaenexa nacuaevetsivijavabelia,” panejamë. Itsiata baitsi jane xanë picani tajacuata yanijobajë xaniavaetsia paneitabëta. Nexata xua yabara paneconitame, ajibi picani. Maponëje itsacujiruneconi ata apo xinae, paneconi yabara naneconitsijitsia. ¹⁵ Herodes ata apo naneconitsiaexanaetsi. Saya icatsia nacatocanaviarena. Pataneme rabaja. Itsacujiruneconi ata apo xinae maponëje, paneconi yabara beyaxuabijitsiatsi. ¹⁶ Nexata tajajivi itorobianajë bajaraponë saya tajajivi pejumaconibabenexa penaneconitsivi pejumaconibabeyabiabimacata. Bajaraxuacujinae copatsianajë, jai Pilato bajarapamonaejavabelia.

¹⁷ Caevai canacujitsia, pascuavënë fiestamatacabi, Pilato copatabiaba caenë penaneconitsinë pepitsapaenexa penaneconitsivi pejebabiabibovecua. Pilato copatabiaba ponë jivi vajëtatsi pecopatsinexa. Nexata bajarapacuenia copatabiaba jivi pesivajamatabëcuene xanepanaenexatsi. ¹⁸ Nexata bajarapamonae itsa jumetane Pilato picani Jesús pecopatsiapaebijava, nexata daxita bajarapamonae caecuenia vavajai Jesús yabara. Bajarapamonae pevavajaijavata, Jesús yabara jumaitsi Pilatojavabelia mapacueniaje:

—¡Majane ponë beyaxuareje! ¡Barrabás jane panetocapitsapare! jai bajarapamonae.

¹⁹ Bajaraponë Barrabás Jesús pevajënaeya bajarapatomarata barënabia gobierno pijajivijavabelia. Nexata Barrabás jivitonë beyaxuaba. Bajaraxuata naneconitsiaponapona penaneconitsivi pejebabiabibota. ²⁰ Pilato picani jamatabëcopata Jesús. Bajaraxuata picani icatsia Pilato tsipaebijitsia jivijavabelia Jesús baja pecopatsinexa. ²¹ Itsiata baitsi jane bajarapamonae orijibia vavajai.

—¡Cruzajavabelia cobematabiabarutsiaexanare! ¡Cruzajavabelia cobematabiabarutsiaexanare! jai tsaponae bajarapamonae Pilatojavabelia.

²² Icatsia Pilato jumaitsi bajarapamonaejavabelia:

—¿Detsa xuajitsia? ¿Detsa papibisiacuene exana maponëje? Apo caxitajarabinë cajena itsacujiruneconi ata, paneconi yabara beyaxuabijitsiatsi. Nexata tajajivi itorobianajë bajaraponë saya tajajivi pejumaconibabenexa penaneconitsivi pejumaconibabeyabiabimacata. Bajaraxuacujinae copatsianajë peponaenexa baja, jai Pilato.

²³ Itsiata bajarapamonae ajumesaë. Vavajai tsaponae.

—¡Cruzajavabelia cobematabiabarutsiaexanare! jai tsaponae bajarapamonae Pilatojavabelia.

Nexata bajarapamonae, sacerdotevi penamatacaitorobivi yajava, bitso pevavajait-saponaexae, belia baja Pilato jejai. ²⁴ Nexata baja Pilato tocopata pacuenia bajarapamonae vajētatsi. ²⁵ Nexata Pilato itoroba pijajivi Barrabás, ponē jivitonē beyaxuaba, pecapitsapaenexatsi pepitsapaenexa baja penaneconitsivi pejebabiabibovecua. Caranata Jesús, planeconijibinē, pebeyaxuabinexatsi Pilato itoroba pijajivi.

*Pacuenia jane baja Jesús cruzajavabelia cobematabiabarutatsi yabara pelivaisi
(Mt 27.32-44; Mr 15.21-32; Jn 19.17-27)*

²⁶ Vajabitsaē ita caponaliatsi Jesús cruzajavabelia pecobematabiabarutatsinexatsi, Simón pijinia najetaruca vayafoverena. Nexata vajabitsaē vaetabatsi Simón. Simón Cirene tomarapijinē. Nexata Simón vajabitsaē itorobatsi, pacruzajavabelia Jesús cobematabiabarutatsijitsiatsi, petocaponaenexa. Nexata bajarapacruza Simón tovētacaranajetaruca Jesús pecovēya.

²⁷ Jesús pēnanajetarubenatsi, jivi ayaibitsaētoxaneto. Bajarapamonaeyajuvēnēvi, petiriavi ayaibitsaēto, Jesús bitso pēnueyababataponatsi ayaijumeta. ²⁸ Nexata Jesús napēnēyorota. Jumaitsi bajarapapetiriavijavabelia:

—Paxamē petiriavi, paJerusalén tomarapijivimē, pētsa panepēnueyabame xanē. Paxamē jane panatsinuema. Panexi ata patsinuema. ²⁹ Itsa copiajopaena piayaimatacabi, jivi bitso bejiobi tsane. Nexata jivi jumai tsane: “Mavecovi itsiata bevelia nacatsunabejiobitane pexi apo pexainaexae,” jai tsane jivi bajarapamatacabi mavecovi yabara. ³⁰ Nexata bajarapamatacabi jivi bitso ita nabejiobitaena, belia jitsipaena petēpaejava. Nexata jivi najumai tsane: “Vajatēpaenexa, nacatoxanepanaejitsipa pinijiibotsutonē ita nacamatacēnēbajarabijitsipa,” najai tsane jivi. ³¹ Xanē itsacujiruneconi apo xinae atanē, nebejiobiaexanaena ita necobematabiabarutatsiana cruzajavabelia. Nexata pamonaē pibisiacuene pexanaevi bitso xanē matatoxenetsia, bejiobiaexanaenaenatsi ita tocopi-
apatsianatsi piayaimatacabi, jai Jesús bajarapapetiriavijavabelia.

³² Itsabelia vajabitsaē Jesús caponatsi, bajarabelia anijanēbeje penaneconitsinēbeje, Jesús yajava, caponatsi. Bajaraponēbeje piagamatabēcuenebejenēbeje vajabitsaē caponatsibeje Jesús peyjavabeyaxuabinexatsibeje. ³³ Itsa baja capaliatsi Jivimatasipavēnē tsutojavabelia, nexata cruzajavabelia Jesús yajavacobematabiabarutatsi bajaraponēbeje. Itsanē rutatsi itsacruzata Jesús pecujanenia. Itsanē rutatsi itsacruzata Jesús pet-savenonenia. ³⁴ Jesús baja cruzajavabelia pepuacobematabiabarutatsi, jumaitsi paxa Diosojavabelia:

—Axa, mapamonaēje itaxutotsoniataema. Vecuaxuare paneconi xaina pibisiacuene taneexanaexae mapacueniaje. Tsipaji raja apo yapētae. Bajaraxuata mapacuenia nexanaje, jai Jesús paxa Diosojavabelia.

Nexata vajabitsaē, pamonaē Jesús cobematabiabarutatsi cruzajavabelia, bajarajota namuxusita. Penamuxusitsijavaxi irata natsipenepeneta. Bajarapacuenia vajabitsaē penamuxusitsijavaxi canamuxusita peyapētaenexa ponē pitaponaējitsia caejava canacujitsia Jesús penaxatatsijavami, xua jumaponapona. ³⁵ Bajarajota daxitajivi taenubena. Judíovi pevetsivi Jesús capocaponatsi. Bajarapamonae capocaponaeya jumaitsi Jesús yabara:

—Ēitsamonae yabara jumai tsabiabi: “Capanepaenajē jivi,” jai tsabiabi. Baja rajane pijacuata nacapanepae ita xaniajai pepacuene Cristo, Dioso athēbēvetsica pitorobinētsitsica jivi pecapanepaenexa, jai judíovi pevetsivi Jesús yabara.

³⁶ Vajabitsaē ata Jesús capocaponatsi. Nexata capocaponaeya cujibarenatsi. Rajutsijitsiatsi piajatuvinora piapaenexa Jesús. ³⁷ Nexata vajabitsaē jumaitsi Jesúsjavabelia:

—Itsa xamē judíovi pepo nevetsinē, nexata nacapanepare nijacuata, jai vajabitsaē Jesúsjavabelia.

³⁸ Bajarajota Jesús pematabocoto matatsënëyo tablapajumata, Pilato pijajivi yaquinaruta acueyabi paviriavibeje pijajumeta. Itsaitane yaquinaruta griegojumeta. Itsaitane yaquinaruta latínjumeta. Itsaitane yaquinaruta hebreojumeta. Peyaquinarubiitane jumai tsarubi mapacueniaje: “Mara ponëje judíovi pepo pevetsinëje,” jai tsarubi Jesús yabara. ³⁹ Itsanë piajamatabëcuenebejenë cruzajavabelia pecobematabiabarutsinëtsi, Jesús anaeya bijataerucatsi.

—Itsa xamë Cristomë, athëbëvetsica Dioso pecaitorobinëtsica jivi necapanepaenexa, nijacuata nacapanepare. Paxanëbeje ata panecapaneparebeje, jai tsarucae Jesúsjavabelia.

⁴⁰ Itsanë pijinia itsacruzajavabelia pecobematabiabarutsinëtsi, jumeitavetaruca. Jumai tsarucae penajuananeconitsinëbejejavabelia:

—¿Dioso tsaja apo cujunavimë netëpaenexa, cacobematabiabi ata nijaneconi yabara mapacueniaje? ⁴¹ Vaxaibeje rabiji vajaneconi xainatsibeje vajatëpaenexabeje. Nacarutabeje mapacueniaje pibisiacuene vajaexanaexaibeje. Mabiji ponëje caeto ata pibisiacuene apo exanae, jai tsarucae bajaraponë jumeitavetsiaya penajuananeconitsinëbejejavabelia.

⁴² Icatsia xuacujinae bajaraponë jumaitsi Jesúsjavabelia:

—Jesús, xanë nenajamatabënapitsianame pamatacabi xamë evetsianame mapanacuaje, jai bajaraponë Jesúsjavabelia.

⁴³ Nexata Jesús jumaitsi bajaraponëjavabelia:

—Xaniajanë pacuenia catsipaebijitsiatsi. Ajena, pamatacabi, neyjavaponaponae-name paraísojavatatsia, jai Jesús bajaraponëjavabelia.

Pacuenia baja Jesús tēpa yabara pelivaisi
(Mt 27.45-56; Mr 15.33-41; Jn 19.28-30)

⁴⁴ Jesús baja itsa tēpaejitsia, matonejeepatota, daxita nacuanëjava aitaquiri tsajuni. Matapania acueyabi pahorabejecujinae, caniviyojavabelia, nacua napebeta icatsia. ⁴⁵ Paepatota Jesús tēpanajereca, bajarapaepatota templobo ënëtuatuajëalia pënëyatuucutarutsipana, ayaipapaëbërëpana, tuatuajëatsica titititicaica. ⁴⁶ Nexata Jesús ayaijumeta jumaitsi Diosojavabelia:

—Axa, xamëjavabelia daxita tajamatabëcuene carajutatsi, jai Jesús.

Itsa baja Jesús najumevereta bajarapajume, tēpanajereca jane baja.

⁴⁷ Nexata Romano nacuapijinë, vajabitsaë pijacapitán, itsa tane daxita bajarpacuenene, bajaraponë Diosojavabelia jumaitsi:

—Diosomë, bitso ayaijamatabëcuenenëmë. Xaniajai tsaena baja. Maponë tēpaje, pianeconijibinë, jai vajabitsaë pijacapitán.

⁴⁸ Daxita pajivibitsaëtoxaneto taenubena pacuenia Jesús jumaliverevereca, bajarapamonae bitso najamatabëxainaeya naviaba pijabonëjavabelia. ⁴⁹ Daxita pamonaë Jesús peyapëtaevitsi, pebijivi, petiriavi ata, pamonaë Galilea nacuaverena pënaponatsi, tajiyojavaverena taenubena, petaenexa Jesús pebeyaxuabijavatsi.

Pacuenia Jesús petëpaenë buatatsi ibovajualia yabara pelivaisi
(Mt 27.57-61; Mr 15.42-47; Jn 19.38-42)

⁵⁰ Jerusalén tomarata ponapona José, Arimatea tomarapijinë. Bajaraponë pexaniajamatabëcuenenë, xaniavaetsia peponaponaenë Dioso pitabarata. Bajaraponë judíovi pevetsinë. ⁵¹ José copiaevetaponapona pecopiajopaejava pamatacabi caenë Dioso evetsijitsia daxita pijajivi mapanacuataje. Nexata José apo jamatabëcuenejëpae pacuenia judíovi exana Jesúsjavabelia. ⁵² José nexata lia nacuaevevetsinë Pilatojavabelia. Vajëta petocopsinexatsi pemëthëtsinexa petëpaenë Jesús. ⁵³ Bajaraxuacujinae José cruzajavavetsica pitsica Jesús petëpaenë. Daxitanëreca mataquionaeya matacacëba pexaniaviria

piapiasábanapanata. Nexata cajena itsajota José iboitapajanitovavata pinijiibovaju toexanabuatatsi petēpaevi pebuataponaenexa, bajarapaibovajualia buata Jesús petēpaenē. Bajarapavajualia abaxē itsajiviyo ata petēpaejiviyo José apo buatsi. ⁵⁴ Pamatacabi José bajarapacuenia vajēta Pilatojavabelia Jesús petēpaenē pemēthētsinexa, bajarapamatacabi judíovi penacuenebija banacuenevereta baja pecopiajonevajēnaeya penacuer-aevetsimatacabinexa. Nexata paepatota José ibovajualia buata Jesús petēpaenē, bajara-paepatota José baja tocopiapataponatsi penacueraevetsimatacabinexa.

⁵⁵ Papetiriavi Jesús pēnaponatsi Galilea nacuaverena, bajarapapetiriavi tajiyo José pecovēya najetarubena. Nexata bajarapapetiriavi tane Jesús petēpaenē José pebuat-sijava bajarapaibovajualia. ⁵⁶ Bajaraxuacujinae bajarapapetiriavi naviaba baja pi-jaboyabelia. Nexata pepatsicujinae pijaboyabelia, bajarapapetiriavi xaniavaeta pexa-niapetuxujuvira, pexaniapetuxujuvitsapato yajava, Jesús petēpaenē peperabēexabinexa. Nexata abaxē bajarapapetiriavi nacueraeveta judíovi penacueraevetsimatacabita pacuenia itorobatsi Dioso Moiséspijinēta bajayata penajumecopatsilivaisi.

24

Pacuenia Jesús petēpaecujinae icatsia asaē yabara pelivaisi
(Mt 28.1-10; Mr 16.1-8; Jn 20.1-10)

¹ Judíovi baja penacueraevetsimatacabi verevereca. Nexata meravia pitsijavata, ajena juameto pitsapaina, papetiriavi xaniavaeta pexaniapetuxujuvijava, icatsia pon-alia Jesús petēpaenē pebuatsiibovajutsijavabelia. Patuxujuvijava xaniavaeta Jesús petēpaenē peperabēexabinexa, caponalia Jesús petēpaenē peperabēexabinexa jane baja picani. Itsapetiriavi yajava ponalia peyanabinexatsi. ² Itsa baja palia, nexata ba-jarapapetiriavi tane Jesús petēpaenē pebuatsiibovajutsi peyavēpaacatsiibopanaxanetomi petixitanutsijavalia. ³ Bajarapamonae joneya picani Jesús pebuatsiibovajutsijavalia. Itsiata baitsi jane apo caxitajarababuatsi petēpaenē, pepo petuxanenē Jesús. ⁴ Nexata bajarapapetiriavi bitso jamatabēcuenenajunaviaca. Apo yapētae pacuenia exanaejitsia. Bajarajota nexata bajarapapetiriavi taenuta anijanēbeje ángelnēbeje. Bajaraponēbeje penaxatatsijavabeje nivenivena bitso. ⁵ Bajarapapetiriavi bitso cujunava bajara-paángelnēbeje. Nexata pecajunavi pematabacabēta irataeya bobena. Nexata bajara-paángelnēbeje jumaitsi petiriavijavabelia:

—¿Detsa xuajitsia petēpaenē pebuatsijavatatsi, pajaitame? Bajaraponē asaē baja icatsia. ⁶ Bajaraponē majotaje ajibi baja tsarucae. Dioso rabaja icatsia asaēyaexanatsi. Panajamatabēnapire pacuenia pacatsipaeba Galilea nacuata pamatacabi abaxē asaē tsaponapona. ⁷ Bajaraponē baja cajena tajēvelia pacajumaitsi: “Xanē, Daxitajivi Pematapijinēnē, necanajetsiana pibisiajamatabēcuenevi pecobeyabelia. Nexata ba-jarapamonae cruzajavabelia necobematabiabarutsiana tanebeyaxuabinexa. Itsiata baitsi jane tanebeyaxuabicujinae, acueyabi matacabita, icatsia asaēnē tsane,” pacajai baja cajena tajēvelia Jesús ita abaxē pamatacabi pacayajavaponapona, jai ángelnēbeje petiriavijavabelia.

⁸ Nexata bajarapapetiriavi najamatabēnapita pacuenia Jesús tajēvelia jumaitsi. ⁹ Nexata baja bajarapapetiriavi naviabarena Jesús petēpaenē pebuatsiibovajutsijavav-erena. Nexata bajarapapetiriavi tsipaeba daxita bajarapacuenia yabara once ponēbeje, Jesús pijaapóstolevijavabelia. Tsipaebanua daxita itsamonae Jesús pijajivijavabelia ata. ¹⁰ Bajarapapetiriavijavavēnēvi itsava Mariávēnēva. Bajarapova Magdala tomarapijiva. Itsava pijinia Juanavēnēva. Itsava pijinia icatsia Mariávēnēva. Bajarapova Santiago pena. Itsapetiriavi yajava tsipaeba bajarapacuenia yabara apóstolevijavabelia. ¹¹ Bajarapapetiriavi apóstolevijavabelia tsipaebi ata bajarapacuenia yabara, itsiata apóstolevi apo jumexaniataetsi. Apóstolevi saya bajarapalivaisi yabara jamatabējumaitsi: “Saya meta bajarapapetiriavi pijacuata exana bajarapalivaisi,” jamatabējai apóstolevi.

¹² Itsiata baitsi jane Pedro pitsapalia bovecua. Nexata cujinaejinalia Jesús petëpaenë pebuatsiibovajutsijavabelia. Nexata Pedro bajarapaibovajualia itsa naëcolia, taeyejeba pebobenaeyava bajarajota daxitanëreca Jesús mataquionaeya pematacacëbipanamitsireca. Nexata baja Pedro naviata boyaberena. Najamatabëxaina bajarapacue ne yabara.

Pacuenia Jesús petëpaecujinae icatsia itsa asaë, pijajivitonëbeje pëcaxitajarabaxuaba, Emaús tomarabelia peponaenëbeje, yabara pelivaisi

(Mr 16.12-13)

¹³ Pamatacabi bajarapapetiriavi tane ángelnëbeje, bajarapamatacabi Jesús pijajivitonëbeje Jerusalén tomaravelia naropotabeje. Ponabeje Emaús tomarabelia. Bajarapatomara eca once pakilómetrobeje Jerusalén tomaravecua. ¹⁴ Bajaraponëbeje baracuaicuajaiabeje tsanajetarucæ daxita pacuene copiapata. ¹⁵ Itsa abaxë bajarapalivaisi cuaicuajai tsanucaponaëbeje, Jesús pëcaxitajarabalia. Nexata Jesús muxuneni-anajetaruca bajaraponëbeje. ¹⁶ Bajaraponëbeje tae atabeje Jesús, itsiata apo yapëtaebeje Jesús cuene. ¹⁷ Nexata Jesús yanijoba bajaraponëbejejavabelia. Jesús jumaitsi:

—¿Detsa pitsicuene pabaracuaicuajamëbeje tsanucaponaë namutua? ¿Detsa xuajitsia bepajamatabëcuenejibimëbeje? jai Jesús bajaraponëbejejavabelia.

¹⁸ Bajaraponëbeje itsanë pevënë Cleofas. Nexata Cleofas jumaitsi Jesúsjavabelia:

—Daxitajivi baja cajena yapëtane pacuene copiapata Jerusalén tomarata mapamatacabitaje. ¿Xamë tsaja caenëmë apo nijanayapëtae bajarapacue ne, naponaponaë atamë bajarapatomarata? jai Cleofas caranata Jesúsjavabelia.

¹⁹ Nexata Jesús jumaitsi bajaraponëbejejavabelia:

—¿Detsa pitsicuene copiapata? jai.

Nexata icatsia bajaraponëbeje jumaitsi Jesúsjavabelia:

—Jesúspijinë raja, Nazaret tomarapijinëmi, profetanëmi. Pinijicuene exanapona Dioso pesaëta. Bitso xaniavaetsia jivi pexanialivaisi tsipaebapona. Nexata daxitajivi sivajamatabëcuenebarëya bajaraponëmi. Dioso ata sivajamatabëcuenebarëyatsi. ²⁰ Nexata sacerdotevi penamatacaitorobivi, vajanacæevetsivi yajava, canajetatsi Jesús pijinëmi. Canajetaxuabatsi Jesús pijinë cruzajavabelia pecobematabiabarutsinexatsi pebeyaxuabinexatsi. ²¹ Paxanë picani bajaraponëmi yabara pajamatabëjumaitsinë: “Bajaraponë nacavecuacapitsapaena itsanacuaverena pepatsivi, pamonaë apo judíovi, vajanacayanacæevetsijavavecua pepitsapaenexa,” pajamatabëjanë tsavanapae picani Jesús pijinë yabara. Nexata Jesús pijinë pebeyaxuabicujinaetsi, ajena baja xaina acueyabi pamatacabibeje. ²² Paxanëyajuvënëvi, petiriavi, ajena, bajayacunua, panenabenajacaeyaxana. Bajarapamonæ bajayacunua, ajena juameto pitsapaina, ponalia Jesús petëpaenë pebuatsiibovajutsijavabelia. ²³ Itsiata apo caxitajarababuatsi bajarajota Jesús petëpaenë. Nexata bajarapapetiriavi naviabarena. Bajarapamonæ panetsipaëba pacuenia bemajitsinaëbota tane ángelnëbeje. Angelnëbeje pina nexata jumaitsidebeje petiriavijavabelia: “Jesús rabaja asaë tsaponaponaë icatsia,” jai pina. ²⁴ Nexata itsamonæ paxanëjувënëvi pona Jesús petëpaenë pebuatsiibovajutsijavabelia. Nexata tane pacuenia baja petiriavi panetsipaëba. Jesús itsiata petëpaenë apo taeyabuatsi, jaiabeje Jesúsjavabelia Emaús tomarabelia peponaenëbeje.

²⁵ Nexata Jesús jumaitsi bajaraponëbejejavabelia:

—¡Paxamëbeje saya paneajamatabëcuenetajanëbeje! Apo pajumecovënëtsimëbeje daxita profetavi peyaquinaelivaisianë. ²⁶ Nexata apo payapëtaemëbeje pacuenia Cristo, Dioso athëbëvetsica pitorobinëtsitsica jivi pecapanepaenexa, copiaya bitso bejiobiaexanaejitsiatsi peponaevajënaeya paxa Diosojavabetsia athëbëtatsia paxa pemuxuneneta pecaenexa, nayabarajai Jesús bajaraponëbejejavabelia.

²⁷ Nexata Jesús xaniavaetsia navajunupaëba bajaraponëbejejavabelia daxita pacuenia Dioso pejumelivaisibaxutota tajëvelia jumaitsi Jesús yabara. Taxuxuaba jane baja

penavajunupaebijava pacuenia Moiséspijinë peyaquinaebaxutota tajëvelia jumaitsi Jesús yabara. Bajaraxuacujinae icatsia navajunupaeba pacuenia daxita itsaprofetavi peyaquinaebaxutonëta ata jumaitsi Jesús yabara.

²⁸ Itsa baja imoxoyotanajetarubena patomarata bajaraponëbeje patsijitsiabeje, Jesús itajara rovia bepeponaejitsia bajaraponëbejevecua. ²⁹ Nexata bajaraponëbeje bitso asivabeje Jesús penajuamajitsinexa bajarapatomarata. Jumaitsiabeje bajaraponëbeje Jesúsjavabelia:

—Namajire abaxë mapatomarataje. Caniviyo rabaja bitso. Meravijitsia rabaja, jaiabeje bajaraponëbeje Jesúsjavabelia.

Nexata baja Jesús najoneya pabota bajaraponëbeje patabeje. ³⁰ Itsa bajaraponëbeje yajavaecabeje mesa muxuneneta, Jesús pita panbë. Jumaitsi paxa Diosojavabelia:

—Pexaniacuenepanetoexaname. Panerajutame pan, jai Jesús.

Bajaraxuacujinae epatsënëquejeba panbë. Rajutatsi bajaraponëbeje. ³¹ Bajarajota matapania bajaraponëbeje yapëtanebeje Jesús cuene. Itsiata baitsi jane bajarajota vecua-caevatsibeje Jesús. Apo taebeje baja matavëjëa.

³² Nexata bajaraponëbeje najumaitsiabeje:

—Namtua vajanacanavajunu pabanucaponaejavatabeje pacuenia jumaitsi Diosojumelivaisibaxutota, bitso muxunajamatabëcuenebarëyatsibeje, najaiabeje bajaraponëbeje.

³³ Nexata bajarajota bepijia naropotabeje Emaús tomaravecua. Naviatabeje baja Jerusalén tomarabelia. Nexata Jerusalén tomarabelia itsa patabeje, caxitajarababeje penacatuatsijavata once ponëbeje apóstolevi, itsamonae yajava Jesús pijajivi. ³⁴ Nexata penacatuatsivi jumaitsi bajaraponëbejejavabelia:

—Xaniajai baja cajena. Vajatuxanënë icatsia asaë tsaponaponae. Simón baja tsitanaitajëtatsi, jai bajarapamonae.

³⁵ Nexata ponëbeje Emaús tomaraverena patabeje, tsipaebabeje bajarapamonaejavabelia pacuenia namutoepatualia pëcaxinatsibeje Jesús. Tsipaebabejenua pacuenia matapania yapëtanebeje Jesús cuene, pitabëta itsa epatsënëquejeba panbë.

Pacuenia Jesús petëpaecujinae tsitanaitajëta pijajivijavabelia yabara pelivaisi (Mt 28.16-20; Mr 16.14-18; Jn 20.19-23)

³⁶ Ponëbeje Emaús tomaraverena patabeje, tsipaebabeje Jesús pijajivijavabelia pacuenia tanebeje Jesús Emaús tomaratalia. Nexata bajarapaepatota Jesús tsitanaitajëta pijajivijavabelia. Jesús jemata nuca pijajivi tuatujëta. Jesús bajacoba pijajivi.

³⁷ Nexata Jesús pijajivi bitso nabenajaca.

—Petëpaenëmi raeta pejumape maje, jamatabëjai bajarapamonae Jesús yabara.

³⁸ Nexata Jesús jumaitsi pijajivijavabelia:

—¿Detsa xuajitsia pajunavame? ¿Detsa xuajitsia panejamatabëëthëtota pajumeabame icatsia tasaëjava? ³⁹ Panecobetaema. Tataxubeje ata pataema. Xanë rabaja maje. Panejayabare. Paneyorobarenu xaniavaetsia. Petëpaenëmi raja peneta pejumape avijibi. Asijibinua. Apo perabëitsi cajena pacuenia xanë perabëitsinë, jai Jesús pijajivijavabelia.

⁴⁰ Jesús itsa jumaitsi mapacueniaje, nacobeitajëta pijajivijavabelia. Nataxuitajëta yajava. ⁴¹ Jesús pijajivi bitso tsitapexaniacuenetsi. Itsiata baitsi jane Jesús pijajivi abaxë apo jumexaniatae xaniavaetsia Jesús cuene. Jesús nexata jumaitsi pijajivijavabelia:

—¿Paxainame tsabaja itsacuenjavayo patanerajutsinexamë taxaenexa? jai Jesús.

⁴² Nexata Jesús pijajivi rajutatsi pesebidujuaijavayo, jabëperiyo yajava. ⁴³ Pita baja Jesús. Nexata Jesús pijajivi pitabarata xane. ⁴⁴ Nexata Jesús jumaitsi pijajivijavabelia:

—Mapacuenepaneexanaejavanexa yabaraje, pacatsipaebabiabatsi baja cajena tajëvelia pamatacababi abaxë pacayajavaponaponatsi. “Pacuenia bajayata tajëvelia xanë

yabara jumaitsi Moiséspijinë peyaquinaebaxutota, Diosojumepaebivimi profetavi peyaquinaebaxutota ata, Salmosvënëbaxutota ata, bajarapacuenia netocopiapatsiana,” pacajaitsi tsabiabi baja cajena pamatacabi abaxë pacayajavaponaponatsi. Daxita rabaja bajarapacuenia netocopiapata jane baja, jai Jesús pijajivijavabelia.

⁴⁵ Nexata Jesús pijajivi jamatabëcuenecaëjëpaeyaexana Jesús pijajivi xaniavaetsia pejumeyapëtaenexa pacuenia Dioso pejumelivaisibaxutota tajëvelia jumaitsi Jesús yabara.

⁴⁶ Jesús jumaitsi pijajivijavabelia mapacueniaje:

—Dioso pejumelivaisibaxutota tajëvelia jumaitsi pacuenia xanë, Cristonë, athëbëvetsica Dioso taneitorobinëtsica jivi tacapanepaenexa, nebejobitsiaya nebeyaxuabijitsia. Jumaitsinua pacuenia tatëpaecujinae, acueyabi matacabita, icatsia Dioso niasaëyaexanaejitsia tatëpaejavavecua. ⁴⁷ Jumaitsinua pacuenia patajajivimë tajumelivaisi patsipaebaponaejitsiamë daxitajivijavabelia. Nexata tajumelivaisi patsipaebaponaename daxitajivi penajamatabëcuenepënëyorotsinexa Diosojavabelia, pibisiacuene pexanaeneconimi pevecuaajibiaexanaenexatsi Dioso. Copiaya Jerusalén tomarata pataxuxuabianame panetsipaebijava. Bajaraxuacujinae patsipaebanajetarubenaename daxitanacuanëjava. ⁴⁸ Paxamë rabaja pataneme daxita pacuene netocopiapata. Nexata jivi patsipaebaponaename daxita bajarapacuenia yabara. ⁴⁹ Espiritu Santo, ponë taxa Dioso najumecapanepaeya pacarajutsiapaeba, pacatoitorobianicatsi papecatsijamatabëjonenexa. Abaxë pajinavanapaename majotaje Jerusalén tomarata. Matapania Dioso athëbëvetsica pacajamatabëcuene caëjëpaeyaexanaena pinijicuene paneexanaponaenexa, paponaname jane baja tajumelivaisi jivi panetsipaebanajetarubenaenexa daxitanacuanëjava, jai Jesús pijajivijavabelia.

Pacuenia Jesús petëpaecujinae icatsia itsa asaë, tsia baja athëbëabetsia yabara pelivaisi (Mr 16.19-20)

⁵⁰ Jesús pijajivi matalalia Betania tomarabelia. Jesús nacobeyotsiaya pijajivi to-vajëcanuca Diosojavabelia Jesús pijajivi peyavenonaenexatsi Dioso. ⁵¹ Nexata saya bajarajota Jesús pijajivi athëbëabetsia baja vecuapona. Jesús baja Dioso caponatsi athëbëabetsia.

⁵² Jesús pijajivi jamatabëjumaitsi:

—¡Vajatuxanenë bitso ayaijamatabëcuenenë! jamatabëjai.

Bajaraxuacujinae Jesús pijajivi barëyaya naviaba Jerusalén tomarabelia.

⁵³ Templobojavabelia Jesús pijajivi joneyabiaba pevajëcabiabinexa Diosojavabelia. Jesús pijajivi pexaniajamatabëcuene rajutabiaba Diosojavabelia.

Pexanialivaisi Jesucristo pelivaisi, San Juan peyaquinaelivaisi

Pacuenia vaxaitsi banaexanatsi mapanacuataje, bajarapacuenia Cristo penaexanaejava mapanacuataje paxa Dioso pejamatabëcuenelivaisi itajëtsinexa yabara pelivaisi

¹ Itsa abaxë ajibi itsacueneyavayo ata mapanacuataje, Cristo baja cajena ponapona athëbëtatsia. Cristo raja paxa Dioso pejamatabëcuenelivaisi itajëtsinë jivijavabelia. Cristobeje paxa Diosobeje najuaponaponabeje. Cristo ata rabaja Dioso baja cajena. ² Daxitacuene baja cajena pexanaejava petaxuxuabivajënaeya ata, Cristobeje paxa Diosobeje najuaponaponabeje. ³ Cristo baja cajena daxitacuene mapanacuapijicueneje exana. Exana athëbëpijicuene ata. Bajarapacuenia exanaeyaexanatsi paxa Dioso. Bajaraxuata itsacueneyavayo ata apo vecuaexanaetsi itsanë ata. ⁴ Cristo baja cajena rajuta piasaëjumali daxitacueneviria mapanacuataje. Cristo baja cajena bepecotia picani. Nexata jivi jamatabëcueneitayota pexaniajailivaisita. ⁵ Pacuenia pecotia itayota piaitaquirijavata, bajarapacuenia Cristo petsipaebilivaisita jivi jamatabëcueneitayota. Nexata dovathi, jivi piajamatabëcuene itaquiriyaexanaenë, apo caëjëpaetsi pevereverecaeyaexanaenexa bajarapalivaisi.

⁶ Nexata Dioso itoroba caenë pebi. Bajaraponë pevënë Juan. ⁷ Nexata Juan pona petsipaebinexa jivijavabelia Cristo pelivaisi. Nexata Juan tsipaeba daxitajivi pejumetaenexa Cristo pelivaisi, pejumecovënëtsinexanua. ⁸ Juan raja jivi apo pejamatabëcueneitayotsinë. Juan raja pona saya jivi petsipaebanajetarucaenexa xaniavaetsia Cristo pelivaisi. ⁹ Bajaraponë Cristo jamatabëcueneitayotsiana daxitajivi. Bajaraponë xaniajai jivi pejamatabëcueneitayotsinë. Bajaraponë Cristo patsica baja mapanacuayabetsicaje.

¹⁰ Cristo, ponë paxa Dioso jamatabëcuenelivaisi itajëta jivijavabelia, ponapona baja mapanacuataje. Itsiata baitsi jane mapanacuapijivi apo yapëtae bajaraponë mapanacua pexanaenëcueneje. ¹¹ Cristo patsica pexanaenacuayabetsica. Itsiata baitsi jane mapanacuapijivi apo jumecovënëtsi Dioso pexënatocuene. ¹² Itsiata itsamonae jumecovënëtatsi. Nexata Cristo tocopata bajarapamonae paxa Dioso pexi pexanaenexatsi. ¹³ Bajarapamonae penaexanaematacabi, abaxë Dioso pexicuenia apo taetsi. Pebi petiriva pepitsicujinae, pexi itsa jamatabëxainabeje, pexi xainabeje. Itsiata bajarapamonae itsa naexana, abaxë Dioso apo pexi. Matapania pacuenia Dioso tojitsipatsi, bajarapamonae itsa jumecovënëta Cristo Dioso pexënatocuene, Dioso pexi exanatsi.

¹⁴ Cristo, paxa Dioso pejamatabëcuenelivaisi itajëtsinënexa jivijavabelia, itsa patsica mapanacuayabetsicaje, naexana pacuenia vaxaitsi baexanatsi mapanacuataje. Nexata bajarapacuenia Cristo ponapona vaxaitsi tuatuajëta. Bajaraponë vënërubatsi Jesús. Paxanë payapëtaniji Cristo ayaijamatabëcuenenëcuene. Tsipaji pataniji pinijicuene pexanaejavanë. Bajaraponë Cristo, pepo caenë Dioso pexënato. Pinijicuenia asiva mapanacuapijivije. Cuaicuaijai ëpexaniajailivaisi. ¹⁵ Bajaraxuata Juan, Jesús itsa vajunupaebanajetaruca jivijavabelia, jumai tsanajetarucæ mapacueniaje:

—Baja rajane maponë yabara pacajumaitsitsije: “Ponë tacovëverena patsiana, bajaraponë bitso xanë nevecuaayaijamatabëcuenenë. Tsipaji baja cajena tanaexanaevajënaeya ata bajaraponë ponapona,” jai tsanajetarucæ Juan jivijavabelia Jesús yabara.

¹⁶ Bajaraponë Jesús cajena pepo pexaniajamatabëcuenenë. Pexaniacuene nacatoexanabiaba. Nacayavenonabiaba. ¹⁷ Bajayatami baja cajena picani Dioso Moiséspijinëta najumecopata jivi pejumecovënëtsinexa. Itsiata baitsi jane mapamatacabita Jesucristo patajopaica mapanacuayabetsicaje vajanacatsipaebinexa paxa Dioso vajanacaasivajava, vajanacatsipaebinexanua pexaniajailivaisi. ¹⁸ Itsajivi ata vaxaitsiyajuvënëjivi

Dioso apo tae. Bajaraxuata apo yapëtaetsi pacuenia Dioso jamatabëcuenelivaisiitsi. Itsiata caenë Dioso pexënato, ponëbeje najuaponaponabeje, bajaraponë nacayapëtaeyaexanaica pacuenia jamatabëcuenelivaisiitsi paxa Dioso.

Pacuenia Juan jivibautisabinë Jesucristo pelivaisi xaniavaetsia tsipaebanajetaruca jivijavabelia yabara pelivaisi

(Mt 3.11-12; Mr 1.7-8; Lc 3.15-17)

¹⁹ Judíovi, Jerusalén tomarapijivi, Juanjavabelia itoroba sacerdotevi, itsamonae templo pevetsivi yajava, bajarapamonae peyanijobinexa Juanjavabelia. Nexata bajarapamonae itsa pata Juanjavabelia, yanijoba Juanjavabelia. Jumaitsi:

—¿Jipatsamë xamë? ¿Xamë tsaja Dioso pecaitapetsinë? jai bajarapamonae Juanjavabelia.

²⁰ Juan nexata bajarapamonaejavabelia xaniavaetsia roviaia navajunupaeba. Jumaitsi:

—Xanë ra apo Cristonë, ponë Dioso athëbëvetsica itorobijitsiatsica jivi pecapanepaenexa, jai Juan.

²¹ Nexata icatsia matavëjëa yanijobatsi.

—¿Detsa nexata ponëmë? ¿Xamë tsaja profeta Elíaspijinëmë, ponëmi bajayata ponapona? jai bajarapamonae Juanjavabelia.

Nexata Juan jumaitsi:

—Jume raja. Xanë raja bajara apo ponënë, jai Juan.

Nexata icatsia yanijobatsi matavëjëa.

—¿Xamë tsabaja nexata profetanëmë? ¿Xamë tsabaja pacacopiaevetavanapatsi nepatsijavanexatsica? jai bajarapamonae Juanjavabelia.

Nexata icatsia Juan jumaitsi:

—Jume raja. Xanë raja apo bajaraponënë, jai.

²² Nexata bajarapamonae jumaitsi:

—¿Detsa nexata ponëmë? Pajitsipajë patanenavajunupaebinexamë xaniavaetsia patayapëtaenexa ponëcuenemë patatsipaebinexa patanitorobivijavabelia. ¿Detsa nexata pacuenia navajunupaebianame? jai bajarapamonae Juanjavabelia.

²³ Juan nexata jumaitsi bajarapamonaejavabelia:

—Xanë raja saya petusato nacuata itsa jumelivaisipaebajë, tavavajainë: “Panajamatabëcuenexaniavaere pepo petuxanenë pepatsivajënaeyarena,” tajainë. Bajarapacuenia tajumaitsijavanexa, bajayatami tajëvelia yaquina profeta Isaíaspijinë, jai Juan.

²⁴ Nexata fariseovi pitorobivitsi icatsia yanijobatsi Juan.

²⁵ —Itsa xamë apo Cristomë, apo Elíaspijinëmënu, apo profetanëmënu, ponë pacopiaevetavanapajë pepatsijavanexatsica, ¿detsa nexata xuajitsia xamë jivi bautisabaponame? jaitsi bajarapamonae.

²⁶ Juan nexata jumaitsi:

—Xanë saya bautisabaponajë ëmerata. Itsiata paxamë tuatujëta ponapona ponë apo payapëtaemë. ²⁷ Bajaraponë tacovëverena jane baja pata. Itsiata xanë bajaraponëvecua beveliajamatabëcuenenënë. Nexata acobeuranë tatoisinaenexa ata pijazapatomaëto tataxujonotsinexa pijazapato, jai Juan bajarapamonaejavabelia Jesús yabara.

²⁸ Bajarapacuenia Juan yanijobatsi Jordánmene itsapanatalia, Betaniavënë tomarajavata, Juan jivi itsa bautisabaponapona.

Pacuenia Jesús beovejayo tanetsi yabara pelivaisi

²⁹ Fariseovi pijajivi Juan peyanijobicujinaetsi peyapëtaenexatsi ponëcuene, meravia pitsijavata, Juan taetaba Jesús penajetarucajava Juanjavaberena. Nexata Juan jumaitsi jivijavabelia:

—Pataema, mara ponëje, Dioso athëbëvetsica pitorobinëtsitsicaje. Bajaraponë Dioso bepijaovejajo tsane. Pacuenia jivi ovejajo babeyaxuaba pevi ofrendacuenia perajutsinexa Diosojavabelia, bajara itsanetsi maponëje. Nacaevetsiana pebeyaxuabinexatsi. Nexata bajarapacuenia matamotsiana daxita nacuanëpijivi pibisiacuene pexanaeconimi. ³⁰ Baja rajane maponë yabara itsa pacatsipaebatsi, pacajumaitsitsi tsabiabi mapacueniaje: “Tacovëverena patsiana itsanë. Bajaraponë nevecuaayaijamatabëcuenenë bitso. Tsipaji baja cajena tanaexanaevajënaeya ata, bajaraponë ponapona,” pacajaitsi tsabiabi. ³¹ Apo yapëtaenë picani bajaraponë. Itsiata apo yapëtae atanë, pacabautisabanajetarucatsi merata paIsrael nacuapijivimë. Ponë yabara pacatsipaebatsi, bajara jane maponë najetarucaje, jai Juan jivijavabelia Jesús penajetarucajavata.

³² Icatsia Juan jumaitsi jivijavabelia Jesús yabara:

—Xanë taniji Espíritu Santo perunaejavatsica athëbëvetsica beucucuto. Nexata tsi-matanacopatsicatsi bajaraponë. ³³ Xanë abaxë itsiata apo yapëtaenë bajaraponë Cristocuene. Itsiata Dioso, taneitorobinë merata jivi tabautisabaponaenexa, nejumaitsi baja cajena copiata: “Papebi pematatsënëatsica taename Espíritu Santo perunaejavatsitsica petsijamatabëcaenexatsi, bajaraponë jane baja jivi tsijamatabëjoneyaexanaena Espíritu Santo,” nejai baja cajena copiata Dioso. ³⁴ Pacuenia baja cajena taniji, pacatsipaebatsi. Bajaraponë baja cajena Dioso pexënato, jai Juan jivijavabelia Jesús yabara.

Pamonae copiaya Jesús yajavaponapona yabara pelivaisi

³⁵ Juan jivijavabelia petsipaebicujinae Jesús Dioso pexënatocuene, meravia pitsijavata, Juan yajavaponapona anijanëbeje pijajivitonëbeje. ³⁶ Itsa Juan tane Jesús pexenetanajetarucajavatsi, nexata Juan jumaitsi pijajivitonëbejejavabelia:

—Pataemabeje. Mara ponë najetarucaje, Dioso bepijaovejajo tsane, jai Juan pijajivitonëbejejavabelia Jesús pebeyaxuabijavanexatsi yabara, tsipaji Jesús tocopiapatsijitsiatsi pacuenia Dioso tocopatatsi.

³⁷ Nexata Juan pijajivitonëbeje itsa jumetanebeje bajarapacuenia Juan pejumaitsi-
java, Juan pijajivitonëmibeje pënaponabeje Jesús. ³⁸ Jesús napënëyorotojopa. Taenucajopa. Yanijoba bajaraponëbejejavabelia.

—¿Detsa xua pajaitamebeje? jai Jesús.

Nexata bajaraponëbeje jumaitsibeje:

—Petuxanenë, ¿detsa jota ecame? jai beje Jesúsjavabelia.

³⁹ Jesús nexata jumaitsi bajaraponëbejejavabelia:

—Naxanitsia. Panataenamebeje itsajota ponaponajë, jai Jesús.

Nexata bajaraponëbeje naponabeje baja Jesús pepëta caniviyopatota. Nexata baja tanebeje itsajota ponapona Jesús. Nexata bajarapamatacabi nayacaniviyobeje tsaponapona Jesúsjavata.

⁴⁰ Bajaraponëbejeyajuvënënë itsanë pevënë Andrés. Andrés raja Simón Pedro pejuyapijinë. ⁴¹ Andrés nexata bepíjia pona pematapijinë Simón pejaitsinexa. Itsa baja Andrés pematapijinë caxitajaraba, jumaitsi pematapijinëjavabelia:

—Pacaxitajarabajë rabaja Mesías, jai Andrés pematapijinëjavabelia.

Bajarapamonae pijajumeta: “Mesías,” itsa jai, mapajumetaje pejumaitsijume: “Cristo, ponë athëbëvetsica Dioso itorobijitsiatsica jivi pecapanepaenexa,” pejaijume.

⁴² Nexata Andrés barëlia pematapijinë Simón Jesúsjavabelia. Itsa Jesús tane Simón, nexata Jesús jumaitsi Simónjavabelia:

—Simón, xamë raja Jonás pexënatomë. Cavënërubianatsi Cefas, jai Jesús Simónjavabelia.

“Cefas,” itsa jai, bajarapamonae pijajumeta mapajumetaje pejumaitsijume: “Pedro,” pejaijume.

Pacuenia Jesús junata Felipebeje Natanaelbeje Jesús pijajivitonëbejenexa yabara pelivaisi

⁴³ Jesús baja ponaejitsia Galilea nacuayabelia. Jesús nexata peponaevajënae, caxitarabaxuaba Felipe. Nexata Jesús jumaitsi Felipejavabelia:

—Nepënaponaename, jai Jesús.

⁴⁴ Bajaraponë Felipe Betsaida tomarapijinë. Andrésbeje Pedrobeje ata Betsaida tomarapijinëbeje. ⁴⁵ Felipe nexata pona pejaitsinexa Natanael. Itsa baja Felipe caxitarabaxuaba, jumaitsi Natanaeljavabelia:

—Pacaxitarabaxujë rabaja ponë pelivaisi bajayatami tajëvelia Moiséspijinë yaquina. Dioso penajumecopatsilivaisi jivi pejumecovënëtsinexa bajayata Moiséspijinë itsa yaquina, yaquinanua bajaraponë ata pelivaisi. Bajaraponë pelivaisi bajayata profetavi ata tajëvelia yaquina. Bajaraponë Jesús Nazaret tomarapijinë, Josépijinë pexënato, jai Felipe Natanaeljavabelia.

⁴⁶ Nexata Natanael jumaitsi:

—Itsanë ata cajena pexaniajamatabëcuenenë Nazaret tomarata apo ponaponae, jai Natanael.

Felipe nexata jumaitsi Natanaeljavabelia:

—Naxanitsia. Nataename jane, jai Felipe.

⁴⁷ Jesús itsa tane Natanael pecujitanajetarucaejavatsi, nexata Jesús Natanael yabara jumaitsi pijajivijavabelia:

—Mara ponë najetarucaje, Israelpijinë pemomo, Dioso pitabarata xaniavaetsia peponaponae. Apo peyamaxëitojorobinë itsajivi ata, jai Jesús pijajivijavabelia Natanael yabara.

⁴⁸ Nexata Natanael jumaitsi Jesúsjavabelia:

—¿Detsa pacuenia nejamatabëcueneyapëtaneme? jai Natanael.

Nexata Jesús jumaitsi Natanaeljavabelia:

—Felipe cajena pecajunatsivajënaeya, catanetsi neecaejava higueranae bëxëpanata. Nexata cajamatabëcueneyapëtanetsi, jai Jesús.

⁴⁹ Natanael nexata jumaitsi Jesúsjavabelia:

—Petuxanenë, xamë rabaja Dioso pexënatomë. Israelnacula pepo nevetsinë, jai Natanael Jesúsjavabelia.

⁵⁰ Jesús nexata jumaitsi:

—“Catanetsi cajena neecaejava higueranae bëxëpanata,” tacajaixae, jamatabëjumaitsimë xanë yabara: “Maponëje Dioso cajena pexënato,” jamatabëjamë. Xamë taename bajarapacuenë matatoxenetsia Dioso pesaëta pinijicuenë taexanaejavanë, jivi apo pexanaecapanepaejavanë. Nexata bajaraxuanë taexanaejava itsa taename, pepacuenë jane baja neyapëtaename Dioso pexënatocuenenë, jai Jesús Natanaeljavabelia.

⁵¹ Icatsia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pataename itaboxo penapatsijava. Pataenamenua Dioso pijaángelevi pejunaejavatsia athëbëabetsia. Pataenamenua perunaejavatsica ata xanëjavabetsica, Daxitajivi Pematapijinënëjavabetsica, jai Jesús pijajivijavabelia.

2

Pacuenia Jesús exana Caná tomarata pamatacabi Caná tomarapijinë nacasaba yabara pelivaisi

¹ Jesús pebarëcuaicuaiaicujinae Natanael, acueyabi pamatacabibejecujinae, Caná tomarapijinë exana penacasabifiestanexa. Galilea nacuata eca Canátomara. Jesús pena

naponapona fiesta pexanaejavata. ² Nexata Jesús pijajivi nabarëjunatatsi penacasabifiestajavabelia. Jesús nexata pijajivi nabarëpata penacasabifiestajavabelia. ³ Fiesta pexanaenë ita baja tovereverecatsi vinora, Jesús pena jumaitsi:

—Vinora rabaja tovereverecatsi, jai pexënatojavabelia.

⁴ Jesús nexata jumaitsi penajavabelia:

—Ena, ¿detsa xuajitsia netsipaebame bajarapacuene? Abaxë raja apo netocopiapatsi paepatota exanaejitsianë bajaraxua, jai Jesús penajavabelia.

⁵ Nexata Jesús pena jumaitsi mesa pevetsivijavabelia:

—Daxita pacuenia taxënato aeconoxae pacaitorobiana, paexanaename, jai.

⁶ Nexata bajarajota nubena seis pacanalitobeje, ibocanalitonë. Caecanalitota mera caëjëpapona bejamatabëcuene quince pagalónbeje. Nexata bajarapacanalitonëta peyaenaemeranëta, judíovi pijacuenia anijatonë xaniavaetsia nacobequiatabiaba penabani-vajënae. ⁷ Jesús nexata jumaitsi mesa pevetsivijavabelia:

—Pavënëbare mera mapacanalitonë nubenaje, jai Jesús.

Nexata mesa pevetsivi xaniavaetsia mera vënëba bajarapacanalitonë. Piupiyorotoxijava copabapona.

⁸ Nexata Jesús jumaitsi bajarapamonaejavabelia:

—Papuare tsiquirirayo. Patocaponaremelia fiesta pevetsinë pepajaninexa, jai Jesús.

Nexata baja mesa pevetsivi tocaponalia. ⁹ Nexata jane baja fiesta pevetsinë pajane bajarapora, merami pexanaevinora. Bajaraponë abaxë apo yapëtae itsaverena capitsapa bajarapavinora. Itsiata mesa pevetsivi yapëtane mera pevënëbixae bajarapacanalitonëta. Pepajanicujinae vinora, fiesta pevetsinë junata fiesta pexanaenë, ponë pejananacasabinë. ¹⁰ Nexata fiesta pevetsinë jumaitsi pejananacasabinëjavabelia:

—Mapavinoraje bitso xanepana. Daxita pamonaie fiesta pexanaevi, copiaya batsanaeyaexana pexaniavinora. Nexata baja fiesta pexanaenë pejunatsivi ita apa ayaijava, cotocaevi batsanaeyaexana bevelia penamatamotsivinoranë. Tsipaji baja ayaijava piapaexae, cotocaevi apae ata beveliara, apo yapëtae beveliaracuene. Itsiata baitsi jane xamë bajarapacuenia apo exanaemë. Evetame abaxë cotocaevi patanera-jutsinexamë pexaniavinora, jai fiesta pevetsinë pejananacasabinëjavabelia.

¹¹ Bajarapapinjicuene Dioso pesaëta Jesús exana Caná tomarata. Canátomara eca Galilea nacuata. Caná tomarata Jesús jane baja taxuxuaba Dioso pesaëta pini-jicuene pexanaponaejava. Bajarajota jane baja Jesús najamatabëcueneitajëta Dioso pesaëta ayaicuenie pexanaejava pecaëjëpaenëcuenetsi. Nexata pijajivi orijibia sivanajamatabëcuenecopabaponatsi. Jesús pijajivi jamatabëjumaitsi:

—Xaniajai rabaja. Pepacuene Cristo, ponë copiaevetavanapatsi pepatsijavatsica vajanacacapanepaenexa, jamatabëjai.

¹² Bajaraxuacujinae Jesús baja pona Capernaum tomarabelia. Yajavapona pena, pejuyapijivinua, pijajivinua. Capernaum tomarata caematacabibeje jinavanapa.

Pacuenia Jesús Jerusalén tomarata templobovecua pitsapaeyaexana pecanajetsivi, pecomuacaevinua, yabara pelivaisi

(Mt 21.12-13; Mr 11.15-18; Lc 19.45-46)

¹³ Judíovi baja pijafiesta pexanaenexa, toimoxoyotsi pascuavënëfiesta. Bajaraxuata Jesús pona Jerusalén tomarabelia. ¹⁴ Nexata Jerusalén tomarata, templobota, Jesús caxitajarabaxuaba pecanajetanubenaevi baca, oveja ata, ucucu ata. Tane palata pecambi-abenaevinua. ¹⁵ Jesús ita tane bajarapacuene, nexata quiobatata peyorotsimacanexa. Nexata Jesús daxitajivibitsaëto capitsaparena temploboënëverena. Bajarapamonae pi-jaoveja yajava, pijabaca yajava, Jesús capitsaparena. Nexata palata pecambiabenaevi pijapalata irabelia tocayajabajaraba. Pijamesaxi ata topënëyorobajaraba. ¹⁶ Nexata ucucu pecanajetanubenaevijavabelia Jesús jumaitsi:

—Mapaucucuje pacapitsaparemelia. ¡Pëtsa pacanajetame mapaboënëtaje, taxajavabelia jivi penavajëcaebota! jai Jesús.

¹⁷ Nexata Jesús pijajivi ita jumentane bajarapacuenia Jesús pejumaitsijava, jumenajamatabënapita pacuenia Dioso pejumelivaisibaxutota jumaiti. Bajarapacuenia Jesús pexanaponaejavanexa yabara, tajëvelia Dioso pejumelivaisibaxutota jumaiti mapacueniaje: “Neyabarabeyaxuabijitsia ata tsane, jitsipajë Dioso pijabo petoyaiyataejavatsi,” jai Dioso pejumelivaisibaxutota.

¹⁸ Nexata judíovi ita tane Jesús jivi pecapitsapaejava temploboënëverena, judíovi jumaiti Jesúsjavabelia:

—¿Dioso tsaja caitoroba nejutsinexa bajarapamonae temploboënëvecua? Itsa caitoroba Dioso bajarapacuenia nexanaenexa, nexata pinijicuene ata exanare Dioso pesaëta patacayapëtaenexa Dioso pecaitorobinëcuene, jai judíovi Jesúsjavabelia.

¹⁹ Nexata Jesús jumaiti judíovijavabelia:

—Itsa paxuabimica mapatemploboje, nexata icatsia veretetsianajë acueyabi mat-acabita, nayabarajai Jesús judíovijavabelia petëpaecujinae icatsia Jesús piasaëjavanexa yabara.

²⁰ Nexata judíovi apo jumeyapëtae xua yabara Jesús jumaiti. Bajaraxuata judíovi jumaiti mapacueniaje:

—Xamë acueyabi matabita apo matabotsimë tsipae. Itsamonae baja cajena mapatemploboxanetoje peveretsinexa, nacueneba cuarenta y seis pavaibeje, jai judíovi.

²¹ Itsiata baitsi jane Jesús peperabëto yabara: “Mapatemploboje,” jai saya. ²² Bajaraxuata icatsia Jesús ita asaë petëpaecujinae, Jesús pijajivi jumenajamatabënapitatsi. Jesús pijajivi jumenajamatabënapitatsi tajëvelia Jesús penavajunupaebijava mapacueniaje: “Itsiata baitsi jane tatëpaecujinae, acueyabi matabita, icatsia asaënë tsane,” pejaijava, Jesús pijajivi jumenajamatabënapitatsi. Nexata Jesús pijajivi jumecovënëta pacuenia Dioso pejumelivaisibaxutota jumaiti. Jesús ata pacuenia jumaiti, jumecovënëta.

Pacuenia Jesús jamatabëcueneyapëtane daxitajivi yabara pelivaisi

²³ Pamatacabi pascuafiesta exana, Jesús ponapona Jerusalén tomarata. Nexata Jerusalén tomarata jivi ayaibitsaëtojaneto jumecovënëta Cristocuene. Tsipaji bajarapamonae Jesús cuenetanetsi Dioso pesaëta pinijicuene pexanaejavanë, jivi apo pexanaecapanepaejavanë. Itsiata baitsi jane bajarapamonae pepacuene xaniavaetsia apo jumecovënëtsi. ²⁴ Bajaraxuata Jesús apo yajavaponapona bajarapamonae. Tsipaji Jesús jamatabëcueneyapëtane bajarapamonae xaniavaetsia apo pejumecovënëtsijavatsi. ²⁵ Jesús apo namatavenonae itsajivi petsipaebinxatsi peyapëtaenexa pacuenia jamatabëcueneitsi jivi. Tsipaji Jesús pejamatabëcueneyapëtaenë pacuenia daxitajivi jamatabëcueneitsi.

3

Pacuenia Jesús barëcuaijai Nicodemo yabara pelivaisi

¹ Nicodemo fariseonë. Nexata catsitecaponapona fariseovi pijacuene. Nicodemo judíovi pevetsiviyajuvënënë. ² Nexata Nicodemo meravivi pona Jesúsjavabelia. Nexata ita pata, Jesúsjavabelia Nicodemo jumaiti:

—Petuxanenë, pacayapëtanetsi baja cajena athëbëvetsica Dioso pecaitorobinëcuentsica patanetsipaebaponaenexamë Dioso pejumelivaisi. Itsa Dioso apo cayajavaponapona tsipae, nexata apo exanaemë tsipae pinijicuene nexanaejavanë, xuanë baja exanapona, jai Nicodemo Jesúsjavabelia.

³ Nexata Jesús jumaiti Nicodemojavabelia:

—Xaniajanë pacuenia catsipaebijitsiatsi. Pajivi Dioso pejamatabëcueneta apo naexanae tsane icatsia bepejananaexanaejiviyo, bajarapajivi Dioso apo pijajivitonë tsane, jai.

⁴ Nexata Nicodemo jumaitsi Jesúsjavabelia:

—¿Detsa jane pacuenia penaveretsijivi baja icatsia naexanaejitsipa bepejananaexanaejiviyo? ¡Apo caējēpaetsi rabaja icatsia pejonenexa pena pecototualia penaexanaenexa icatsia bepejananaexanaejiviyo! jai Nicodemo Jesúsjavabelia.

⁵⁻⁶ Jesús nexata jumaitsi Nicodemojavabelia:

—Xaniajanë pacuenia catsipaebijitsiatsi. Pajivi pena pecototoverena naexana, yaperabëanaexana baja cajena. Pajivi pijinia Espíritu Santo pejamatabëcueneta naexana bepejananaexanaejiviyo, bajarapajivi Diosojavabelia ajamatabëcuenesaëyaexanatsi, Espíritu Santo petsijamatabëcaexaetsi. Pajivi Dioso pejamatabëcueneta jamatabënaexana icatsia bepejananaexanaejiviyo, bajarapajivi xanepana pebautisabinexatsi merata. Nexata bajarapajivi Espíritu Santo rajutsianatsi pejanajamatabëcuene. Nexata bajarapajivi Dioso pijajivitonëcuenia evetsianatsi. ⁷ “Xamë ata baja cajena icatsia benaexaname bepejananaexanaejiviyocuenia,” tacajaijava yabara, pëtsa jamatabëcuenenabenajacame. ⁸ Jovibo banajetaruca itsabelia jamatabënajetaruca. Jumetaneme saya ëpijume. Itsiata apo yapëtaemë itsaverena pona, itsabelia ata pona. Bajara pijinia pacuenia apo yapëtaemë pacuenia jivi Espíritu Santo pejamatabëcueneta naexanaeyaexanatsi bepejanaexanaejivicuenia, jai Jesús Nicodemojavabelia.

⁹ Nexata icatsia Nicodemo jumaitsi Jesúsjavabelia:

—¿Detsa pacuenia itsipae bajaraxua? jai Nicodemo.

¹⁰ Jesús nexata jumaitsi:

—Xamë picani Israel nacuapijivi necujarubinë. ¿Itsiata tsaja apo jumeyapëtaemë palivaisi catsipaebatsi? ¹¹ Xaniajanë pacuenia catsipaebijitsiatsi. Juan jivibautisabinë. Bajaraponëbeje patayapëtaelivaisibeje, jivi patsipaebaponajëbeje. Xua pepacuenepataniijibeje, bajaraxua ata jivijavabelia patsipaebaponajëbeje. Itsiata bailsi jane patatsipaebilivaisianëbeje, apo panejumecovënëtsimë. ¹² Catsipaebi atatsi xua Dioso exanapona mapanacuataje, itsiata apo nejumecovënëtsimë. ¿Detsa nexata pacuenia nejumecovënëtsianame itsa catsipaebianatsi xua Dioso exanapona athëbëtatsia? jai Jesús.

¹³ Icatsia Jesús pijacuata nayabarajumaitsi Nicodemojavabelia:

—Itsajivi ata cajena apo ponae Dioso pijanacuayabetsia icatsia pepatsinexatsica mapanacuayabetsicaje petsipaebinexa jivijavabelia pacuenia itsi athëbëtatsia. Caenë, Daxitajivi Pematapijinë, caējēpatsi jivi petsipaebinexa pacuenia itsi athëbëtatsia. Tsipaji baja cajena bajaraponë athëbëvetsica pepatsinë. Tsipaji baja cajena athëbëtatsia peponaponaenë. ¹⁴ Bajayata petusato nacuata jivi ayaibitsaëto yatëpaponajomo pesinijavatsi. Nexata bajarapaepatota Moiséspijinë jomo jumapecataeya pexanaenë, naejavata athëbëyo ruta. Nexata jomo pesinivitsi peyatëpaeviminexa, itsa taepona bajaraponë, asaë tsaponae. Bajara pijinia pacuenia, Daxitajivi Pematapijinë ata, athëbëyo rutsianatsi cruzajavabelia. Bajarapacuenia rutsianatsi cruzata petëpaenexa. ¹⁵ Nexata pajivi bajaraponëjavabelia sivanajamatabëcopata, apo naxuabi tsane. Bajarapajivi xainaena matabi apo peverevereaejava, nayabarajai Jesús pijacuata Nicodemojavabelia.

Pacuenia Dioso exana piasivaxae mapanacuapijivije yabara pelivaisi

¹⁶ Icatsia Jesús pijacuata nayabarajumaitsi Nicodemojavabelia:

—Pinijicuenia Dioso asiva mapanacuapijivije. Bajaraxuata itorobica pepo caenë pexënato mapanacuayabetsicaje mapanacuapijivije Diosovecua penaxuabiyani. Pamonae sivanajamatabëcopata Dioso pexënatojavabelia, apo naxuabi tsane. Bajarapamonae matabi apo peverevereaejava, Dioso rajutsianatsi. ¹⁷ Dioso apo itorobitsica

pexênato mapanacuayabetsicaje mapanacuapijivije pijaneconi yabara penaneconitsiaexanaenexa. Biji rajane Dioso itorobica pexênato, pejamatabëcueneta Dioso pecapanepaenexa mapanacuapijivije pibisiacuene pexanaeneconimivecua, nayabarajai Jesús pijacuata Nicodemojavabelia.

¹⁸ Icatsia Jesús pijacuata nayabarajumaitsi Nicodemojavabelia:

—Pajivi sivanajamatabëcopata Daxitajivi Pematapijinëjavabelia, bajarapajivi Dioso apo naneconitsiaexanaetsi tsane pibisiacuene pexanaeneconimi yabara. Pajivi apo sivanajamatabëcopatsi Daxitajivi Pematapijinëjavabelia, bajarapajivi baja naneconita Diosojavabelia. Nexata Dioso naneconitsiaexanaenatsi. Tsipaji apo sivanajamatabëcopatsi pepo caenë Dioso pexênatojavabelia. ¹⁹ Ponë Daxitajivi Pematapijinë, bepecotia picani. Tsipaji jivi tsipaebapona pexaniajailivaisi jivi pejamatabëcuenitayotsinexa. Itsiata mapanacuapijivi apo jitsipae pejamatabëcuenitayotsinexatsi. Jitsipa saya piaitaquirijamatabëcuene. Tsipaji bajarapamonae pibisiacuene exanavanapa. Bajaraxuata bajarapamonae naneconitsiaexanaenatsi Dioso. ²⁰ Daxita pamona pibisiacuene pexanavanapaevi, apo jitsipae Daxitajivi Pematapijinë pejamatabëcuenitayotsinexatsi. Bajaraxuata Daxitajivi Pematapijinëjavabelia apo patsi. Tsipaji cujunava peyapëtaeyaexanaeyanivatsi penaneconitsijava Diosojavabelia pibisiacuene pexanaeneconi yabara. ²¹ Pamona jumeconvënëta Dioso pexaniajailivaisi, bajarapamonae apo cujunavi. Bajarapamonae pata Daxitajivi Pematapijinëjavabelia pejamatabëcuenitayotsinexatsi. Bajarapamonae jitsipa daxitajivi peyapëtaenexatsi Dioso peyavenonaponaejavatsi xua exanavanapa, nayabarajai Jesús pijacuata Nicodemojavabelia.

Pacuenia Juan jivibautisabinë vajunupaeba Jesús yabara pelivaisi

²² Jesúsbeje Nicodemobeje pecuaicuaijajucujinaebeje, Jesús baja, pijajivi yajava, pona Judea nacuyabelia. Nexata Judea nacuata bajayajebi Jesús pijajivi barëponapona. Bajarapamonae bautisabapona jivi. ²³ Juan pijinia itsamonae bautisabaponapona Enón tomarata. Enóntomara eca Salimtomara imoxoyojavata. Bajarajota Juan jivi bautisabaponapona tsipaji ayaimera. Juan jivi topataponatsi pebautisabinexa. Nexata pepataponaevi, Juan bautisabapona. ²⁴ Bajarapacuenia Juan jivi bautisabaponapona abaxë itsa apo etsitsi penaneconitsivi pejebabiabibota.

²⁵ Nexata Juan pijajiviyajuvënëvi anaeya najumenotsiaya cuaicuaijai judíonëjavabelia. Juan pijajivi jumaitsi:

—¿De meta ponë itsa nacabautisaba, nacajamatabëcuenexaniavaetsiana Dioso vanacabarajamatabëcuene xanepanaenexa? jai Juan pijajivi judíonëjavabelia.

²⁶ Nexata Juan pijajivi pona Juanjavabelia. Nexata bajarapamonae Juanjavabelia jumaitsi Jesús yabara:

—Ponë caxitajarabame Jordánmene itsapanatalia, ponë vajunupaebame paxanëjavaberena, bajaraponë ata aeconoxae jivi bautisabapona. Nexata daxitajivi bajaraponëjavabelia pona, jai Juan pijajivi.

²⁷ Nexata Juan jumaitsi pijajivijavabelia:

—Xuavajëto xaina caejivi canacujitsia, Dioso perajutsixaetsi xaina. ²⁸ Pamatacabi jumaitsinë tsabiabi jivijavabelia: “Xanë raja apo Cristonë, ponë Dioso athëbëvetsica itorobijitsiatsica jivi pecapanepaenexa. Saya raja taneitorobinë Cristo pevajënaeya, talivaisipaebanajetarucaenënexa,” itsa janë, paxamë ata panejumetaeyabiabame. ²⁹ Ponë pita petiriva pijavanexa, nacasaba. Nexata pejananacasabinë peyapëtaenëtsi, namuxunaevetanuca imoxoyo. Bajaraponë ata nabarëya itsa jumetane pejananacasabinë pebarëyajava. Bajara pijinia pacuenia xanë ata aeconoxae bitso jamatabëcuenebarëyanë, itsa vënëlivaisitaniji jivi peponaejava Jesúsjavabelia. ³⁰ Pevajënaeyabelia jivi ayaibit-saëtoxaneto Jesús pënaponaeenatsi. Xanë nexata tanepënaponaevi bevelia tsaponae tsane, jai Juan pijajivijavabelia.

Pacuenia Juan tsipaeba pijajivijavabelia Jesús athëbëvetsica pepatsijava yabara pelivaisi

³¹ Icatsia Juan jumaitsi pijajivijavabelia:

—Athëbëvetsica pepatsinë, bitso cajena ayaijamatabëcuenenë daxitajivi matatoxenetsia. Pamona naexana mapanacuataje, bajarapamona saya mapanacuapijivije. Nexata saya cuaicuajai ëmapanacuapijicuene yabaraje. Itsiata baitsi jane ponë athëbëvetsica pepatsinë, bajaraponë daxitajivi matatoxenetsia bitso ayaijamatabëcuenenë. ³² Bajaraponë picani tsipaeba jivijavabelia pacuene tane athëbëtatsia. Tsipaebanua picani palivaisi ata jumetane athëbëtatsia. Itsiata baitsi jane daxitajivi jumeaebatsi petsipaebilivaisianë. ³³ Pajivi jumecovënëta athëbëvetsica pepatsinë pepaebilivaisi, bajarapajivi Dioso ata yabara jamatabëjumaitsi: “Dioso cajena pexaniajailivaisi pepaebinë,” jamatabëjai. ³⁴ Ponë Dioso itorobatsi, bajaraponë tsipaeba jivijavabelia Dioso pitorobilivaisi. Tsipaji Dioso rajutatsi Espíritu Santo. Yajavaponaponaeyaexanatsinua Espíritu Santo ayaicuenia. ³⁵ Dioso bitso asiva pexënato. Tocopata daxitacuene pevetsinexa, pitorobinexanua. ³⁶ Pajivi najamatabëcopata Dioso pexënatojavabelia, xainaena matacabi apo pevereverecaejava. Pajivi apo najamatabëcopatsi Dioso pexënatojavabelia, matacabi apo pevereverecaejava apo xinae tsane. Bajarapajivi Dioso nanekonitsiaexanaenatsi daxita matacabijavabelianexa, jai Juan pijajivijavabelia.

4

Pacuenia Jesús barëcuaicuajai Samaria nacuapijiva yabara pelivaisi

¹ Fariseovi jumetane jivi pejumaitsijava: “Jesús baja pijajivi ayaibitsaëttoxaneto xainaponapona. Bautisabaponanua jivi ayaibitsaëto Juan matatoxenetsia,” pejajava. ² Itsiata Jesús pecobeta apo bautisabi caejivi ata. Jesús rajane pijajivi bautisabapona jivi. ³ Nexata Jesús itsa yapëtane fariseovi pevënëlvaisitaevatsi pacuenia jivi baracuaicuajitsi, nexata naviata Judea nacuaverena. Pona Galilea nacuayabelia.

⁴ Nexata Galilea nacuayabelia peponaenë, Jesús, pijajivi yajava, patanajetaruca Samaria nacujava. Tsipaji bajaraxuayo namuto najetaruca. ⁵ Nexata Jesús ecojopa Samaria nacuata peecaetomarata, Sicarvënë tomarata. Sicar tomaravecua imoxoyo boca pairayo Jacobpijinë bajayata rajuta pexënato Josépijinë. ⁶ Bajarapairayota eca meramëthë, pamëthë Jacobpijinë bajayata cueyeta. Jesús sicuerana peponaejava namuto. Nexata Jesús ecojopa meramëthë muxuneneta. Matonejeepatota Jesús ecojopa. ⁷⁻⁸ Jesús caenë eca meramëthëjavata. Tsipaji Jesús pijajivi tomarabelia pona pecomuacaenexa pexaejava. Nexata bajaraberena Samaria nacuapijiva rena pepuatsinexa mera bajara-pamëthëta. Nexata Jesús jumaitsi Samaria nacuapijivajavabelia:

—Mera nerajure, jai Jesús.

⁹ Nexata Samaria nacuapijiva jumaitsi:

—¿Detsa xuajitsia mera nevajëtame niapaenexa? Xamë judíonëmë. Xanë saicaya Samaria nacuapijivanë, jai bajarapova Samaria nacuapijiva Jesúsjavabelia.

Bajarapacuenia Samaria nacuapijiva jumaitsi Jesúsjavabelia tsipaji judíovibeje Samaria nacuapijivibeje naitajitsibiaya nanaëcotabiaba. ¹⁰ Nexata Jesús jumaitsi Samaria nacuapijivajavabelia:

—Pajamatabëcuene Dioso jitsipa pecarajutsinexa, apo yapëtaemë. Xanë ata mera tacavajëtsinë apo nejamatabëcueneyapëtaemë. Itsa nejamatabëcueneyapëtaejitsipame, nexata xanëjavaberena copiaya mera nevajëtsipame tacarajutsinexa. Nexata carajutsipatsi piaitavamera, jivi pejamatabëcueneasaëyaexanaamera daxitamatacabijavabelianexa, jai Jesús Samaria nacuapijivajavabelia.

¹¹ Nexata Samaria nacuapijiva jumaitsi Jesúsjavabelia:

—Xamë apo caponaemë nijavaxiyo mera nepuatsinexa. Meramëthë raja tajëreca bitso. ¿Detsa jota pitsipame nexata piaitavamera tanerajutsinexamë? ¹² Vajasalinainëmi

Jacobpijinë ayaijamatabëcuenenëmi. Bajayata nacatocopata mapameramëthëje. Bajaraponëmi, pexi ata, pijadajubi ata, mera apa mapamëthëtaje. ¿Xamë tsaja nexata Jacobpijinëmi matatoxenetsia bitso ayaijamatabëcuenenëmë? jai Samaria nacuapijiva Jesúsjavabelia.

¹³ Jesús nexata jumaitsi:

—Jivi apaeyabiabi ata mapamëthëpijimeraje, itsiata mera pejitsipaejava apo tovereverecabiabitsi. ¹⁴ Pajivi apaena xanë tarajutsimera, bajarapajivi xainaena matababi apo peverevereaejava. Nexata pacuenia meramëthë eca daxitamatabijavabelianexa, bajara itsi tsane bajarapajivi, jai Jesús.

¹⁵ Nexata Samaria nacuapijiva jumaitsi Jesúsjavabelia:

—Bajarapamera nerajure icatsia mera tanamatavenonaponaejaniva. Nexata baja mera apo puanabiabinë tsane mapamëthëberenaje, jai Samaria nacuapijiva.

¹⁶ Jesús nexata jumaitsi Samaria nacuapijivajavabelia:

—Amona junaremelia. Yjavarenamë tsane, jai Jesús.

¹⁷ Nexata Samaria nacuapijiva jumaitsi:

—Apo xainaenë raja tamona, jai.

Nexata Jesús jumaitsi:

—“Apo xainaenë raja tamona,” itsa jamë, apo najumetsënëtsimë cajena. ¹⁸ Xainame picani amonajivi cinco ponëbeje. Ponë aeconoxae xainame, apo amona cajena. Tsipaji saya nijajara. Bajaraxuata xaniavaetsia netsipaebame, jai Jesús Samaria nacuapijivajavabelia.

¹⁹ Nexata Samaria nacuapijiva itsa jumetane bajarapacuenia Jesús pejumaitsijava, nexata Samaria nacuapijiva jumaitsi Jesúsjavabelia:

—¿Xamë tsabaja Diosojumepaebinëmë profetanëmë? ²⁰ Patajasalinaivimi baja cajena navajëcabiaba Diosojavabelia mapatsutojumataliaje. Itsiata baitsi jane pajudíovimë pajumaitsimë tsabiabi: “Jivi itsa navajëca Diosojavabelia, benavajëcabiaba Jerusalén tomarata Diosojumecovënëtsinexatsi,” pajamë tsabiabi, jai Samaria nacuapijiva.

²¹ Jesús nexata jumaitsi:

—Nejumecovënëtsianame pacuenia catsipaebijitsiatsi. Imoxoyo rabaja pevajënae papecatocopiapatsinexa Diosojavabelia panevajëcabiabinexa, paponaejevamë mapatsutojavabeliaje, paponaejevamë Jerusalén tomarabelia ata. ²² PaSamaria nacuapijivimë, pavajëcabiabi atamë Diosojavabelia, xaniavaetsia apo payapëtaemë Diosojumecovënëtsinexa. Paxanë rajane pajudíovinë xaniavaetsia payapëtaniji Diosojumecovënëtsinexa, ponëjavabelia pavajëcabiabajë. Tsipaji xanë daxitajivi tacapanepaenë tsane, judíoviyajuvënënë. ²³ Ajena mapamatabijavaveliacujinaeje, pevajënaeyabelia ata tsaponae, daxita pamonaе jamatabëvajëta Diosojavabelia, bajarapamonae xaniavaetsia vajëtsiana daxita pejamatabëthëtojavavetsina. Pepo pexaniajaijamatabëcueneta vajëtsiana Diosojavabelia. Bajarapitsivi Diosojumecovënëtsinexa jitsipa pevajëtsijavatsi. ²⁴ Diosojumecovënëtsinexa cajena apo vajataenë. Pamonaе vajëta Diosojavabelia, xaniavaetsia pexaniajaijamatabëcueneta bevajëta, pepo pejamatabëthëtojavavetsina, jai Jesús Samaria nacuapijivajavabelia.

²⁵ Nexata Samaria nacuapijiva jumaitsi:

—Yapëtaniji rabaja pepatsijavanexatsica Mesías, ponë Cristo, baitsi ponë athëbëvetsica Diosojumecovënëtsinexa itorobijitsiatsica jivi pecapanepaenexa. Itsa bajaraponë patsianica, nacatsipae-biana daxitacuenelivaisianë, jai Samaria nacuapijiva Jesúsjavabelia.

²⁶ Jesús nexata jumaitsi Samaria nacuapijivajavabelia:

—Xanë rabaja Cristonë, jai.

²⁷ Nexata bajarapaepatota tomaraverena parena Jesús pijajivi. Bajarapamonae jamatabëcuenenabenajaca Jesús pecuaicuaijaitsanucaexae Samaria nacuapijivajavabelia. Itsiata itsanë ata: “¿Detsa xua jitsipame?” apo jai Samaria nacuapijivajavabelia. Jesúsjavabelia ata apo yanijobi: “¿Detsa xuajitsia bajarapova barëcuaicuaijamë?” apo jai

itsanë ata. ²⁸ Nexata bajarajota Samaria nacuapijiva pueneteta pijacanalito. Navialia pijatomarabelia. Tsipaebalia jivi. Nexata jumaitsi Jesús yabara:

²⁹ —Panataemelia ponë netsipaeba daxita pacuenia exanajë. ¿Baja tsamëra jane apo Cristo, ponë athëbëvetsica Dioso itorobijitsiatsica jivi pecapanepaenexa? jai Samaria nacuapijiva.

³⁰ Nexata bajarapamonae pijatomaravelia ponalia. Taeothopalia Jesús. ³¹ Itsa abaxë bajarapamonae apo patsilia Jesúsjavabelia, Jesús pijajivi jumaitsi:

—Patajatuxanenë, naxaema itsajavayo, jai.

³² Nexata Jesús jumaitsi pijajivijavabelia:

—Xainajë raja saicaya taxaejavanexa paxamë apo paneyapëtaejava, jai Jesús.

³³ Nexata Jesús pijajivi, ëpamonae, nayanijoba.

—¿Itsanë tsamëra tsipaji vajacovëta Jesús pexaejava tocapatatsi penabaninexa? najai Jesús pijajivi.

³⁴ Nexata Jesús jumaitsi:

—Pacuenia taneitorobinëtsica nitoroba, jitsipajë taexanaenexa. Jitsipajë baja tanacueneveretsinexa xua nitoroba. Bajara jane xua betaxaejava taniji. ³⁵ Paxamë pajumaitsimë tsabiabi peubijava yabara: “Saica raja abaxë cuatro pajuametobeje peubijava penaveretsinexa,” pajamë tsabiabi. Itsiata xanë pacatsipaebianatsi jivi yabara. Pataema mapamonae najetarubenaje. Pacuenia baja peubijava navereta penotsinexatsi, bajara itsi mapamonaeje. Mapamonaeje jumecovënëtsiana itsa tsipaebianatsi Dioso pejumelivaisi. ³⁶ Pajivi tsipaebiana tajumelivaisi jivi pejumecovënëtsiaexanaenexa, matabi apo pevereveceajava jivi pexainaenexa, bajarapajivi sivajamatabëcuenebarëya tsane ayaibitsaëto itsa jumecovënëtsianatsi. Itsamonae baja picani namataxainaeya tsipaeba bajarapamonaejavabelia Dioso pejumelivaisi. Itsiata baitsi jane apo jumecovënëtsitsi. Nexata bajarapamonae ata itsa vënëlivaisitaena pejumecovënëtsijava tajumelivaisi, bajarapamonae ata sivajamatabëcuenebarëya tsane.

³⁷ Jivi bajumaitsi peubijava yabara mapacueniaje: “Copiaya itsanë uba. Itsa baja navereta peubijava, saicaya icatsia itsanë nota,” bajai. ³⁸ Nexata baja itsaxuayo itsamonae copiaya Dioso pejumelivaisi asaëyata tsipaebapona, bajara icatsia xuayo paxamë ata talivaisi panetsipaebinexa, pacaïtorobatsi. Nexata pamonae copiaya Dioso pejumelivaisi tsijamatabëubatsi, ayaibitsaëto bajarapamonae najamatabëcuenececopaba baja Diosojavabelia panetsipaebixae talivaisi, jai Jesús pijajivijavabelia.

³⁹ Samaria nacuapijiva, pova Jesús barëcuaicuaijai mera mëthëjavata, pijatomarapijivijavabelia tsipaeba ayaibitsaëtoxanetojavabelia Jesús yabara. Nexata Samaria nacuata pejinavanapaevi, Sicar tomarapijivi, ayaibitsaëtoxaneto jumecovënëta Cristocuene. Jumecovënëta Cristocuene penavajunupaebixae bajarapova bajarapatomarapijivijavabelia: “Daxita pacuene exanajë, Jesús netsipaeba,” pejaixae. ⁴⁰ Nexata Samaria nacuapijivi itsa parena Jesúsjavaberena, bajarapamonae Jesús asivatsi penaponapon-aenexa bajarapamonaejavata. Nexata Jesús bajarapamonaejavata naponapona anijamatabibeje. ⁴¹ Itsa bajarapamonae pijacuata jumetane Jesús petsipaebilivaisi, nexata icatsia ayaibitsaëtoxaneto jumecovënëta Cristocuene. ⁴² Nexata bajarapamonae jumaitsi penavajunupaebivajavabelia:

—Pajumecovënëtajë apo ëpatanetsipaebijumemë yabara. Biji rajane pajumecovënëtajë tsipaji baja patajacuata ata pajumetaniji Jesús vajanacatsipaebilivaisi. Payapëtaniji baja cajena bajaraponë pexaniajaijava Cristocuene. Payapëtaniji bajaraponë mapanacuapijivije pecapanepaejavanexa, pibisiacuene pexanaeconimivecua, jai bajarapamonae penavajunupaebivajavabelia.

Pacuenia Jesús tojamatejemayaexana gobierno pijajivitonë pexënatonëyo yabara pelivaisi

⁴³ Samaria nacuata anijamatacabibeje Jesús peponaponaecujinae, vecuapona baja Samarianacua. Nexata jane baja pona Galilea nacuyabelia. ⁴⁴ Jesús jumai tsabiabi pijajivijavabelia:

—Pajivi Dioso jumepaebabiaba, bajarapajivi apo yaiyataetsi pijanacuapijivi, jai tsabiabi Jesús.

⁴⁵ Itsa baja Jesús palia Galilea nacuyabelia, bajarapanacuapijivi xaniavaetsia copiapitatsi. Tsipaji baja cajena bajarapamonae ata Jerusalén tomarata pascua fiestamatacabi Jesús tanetsi. Nexata Jesús ayaicuene Dioso pesaëta pexanaejava bajarapamonae cujirutanetsi fiestamatacabi.

⁴⁶ Nexata icatsia Jesús naviata Caná tomaraberena. Canátomara eca Galilea nacuata. Bajarapatomarata Jesús copiaya merami exana vinora. Caná tomarata ponapona gobierno pijajivitonë, ayaijamatabëcuenenë. Bajaraponë pexënatonëyo toavitane tsanucaetsi Capernaum tomaratalia. ⁴⁷ Nexata gobierno pijajivitonë vënëlivaisitanetsi Jesús Judea nacujavaverena pepatsijava, Galilea nacuyaberena. Nexata bajaraponë lia Jesúsjavabelia. Pinijicuenia junata pijaboyabelia pebarëponaenexa Jesús petojamatejemayaexanaenexatsi pexënatonëyo. Tsipaji baja gobierno pijajivitonë pexënatonëyo totëpaejitsiatsi. ⁴⁸ Nexata Jesús jumaiti bajaraponëjavabelia:

—Paxamë cajena apo panejumecovënësimë. Matapania itsa pataneme ayaicuene Dioso pesaëta taexanaejava, jivi apo pexanaecapanepaejava, panejumecovënëtsianame, jai Jesús.

⁴⁹ Nexata gobierno pijajivitonë jumaiti:

—Jesús, naxanitsiayo tapëta ponare taxënatonëyo abaxë petëpaevajënaeya, jai.

⁵⁰ Jesús nexata jumaiti bajaraponëjavabelia:

—Naviaremelia nexënatonëyojavabelia. Nexënatonëyo rabaja icatsia catojamatejema, jai Jesús.

Bajaraponë jumecovënëta pacuenia Jesús jumaiti. Nexata baja lia pijaboyabelia.

⁵¹ Itsa bajaraponë patanajetarucalia, nexata pijajivi mataenenarenatsi. Nexata pijajivi jumaititsi:

—Nexënatonëyo rabaja icatsia jamatejema tsecae, jaitsi.

⁵² Nexata bajaraponë yanijoba pijajivijavabelia.

—¿Detsa xuayota juameto itsa ruca, jamatejema baja? jai tsapatsi bajaraponë.

Nexata pijajivi jumaiti:

—Canivi, matonejeepatota, vecuaajibitsi baja peromaebijavatsi, jai pijajivi.

⁵³ Nexata bajaraponë jamatabëjumaiti:

—Bajarapaepatota canivi Jesús nejumaiti: “Nexënatonëyo rabaja icatsia catojamatejema,” nejai, jamatabëjai.

Bajaraxuata bajaraponë, pijamonae yajava, jumecovënëta Jesús Cristonëcuene.

⁵⁴ Jesús penaviatsicujinae Judea nacujavaverena, Galilea nacujavaberena, coto-caevi bajarapapinjicuenene Dioso pesaëta exana Galilea nacuata.

5

Pacuenia Betzatavënë pucayojavata Jesús jamatejemayaexana petabusipacuenabinëtsi yabara pelivaisi

¹ Judíovi fiesta exana Jerusalén tomarata. Nexata Jesús nalia. ² Jerusalén tomarata, ovejaxi pecajoneyabiabibaupa imoxoyojavata, pecueyetsipucayo eca. Bajarapapucayo hebreojumeta pevënë Betzata. Bajarapapucayo matatoyorotsia cinco pabobërëtoebeje eca. ³ Bajarapabobërëtonëjavata piavitanevi ayaibitsaëtozaneto bobena. Itsamonae bitso pitaxutotsëcënaevi. Itsamonae pejayujayunaevi. Itsamonae peperabëcuenabivitsi. Daxita bajarapamonae evetanubena pucayo pemenenacujirubijava. ⁴ Athëbëvetsica ángel jemata runabiabica pucayojavabetsica. Nexata pucayo menenacujirubabiaba.

Pemenenacujirubijavata, pajivi copiaya runareca pucayojavabereca, bajarapajivi pavitane cuene capunatsi, vecuaajibiaexanabiabatsi. ⁵ Bajarajota naboca treinta y ocho pavaibeje piavitanetsanucaenë, petabusipacuenabinëtsi. ⁶ Itsa Jesús taeyabuata bajaraponë, nexata yapëtaeyabuata bajayajebi piavitanenëcuene. Nexata Jesús jumaitsi bajaraponëjavabelia:

—¿Jitsipame tsaja nejamatejemajava? jai Jesús.

⁷ Nexata bajaraponë jumaitsi:

—Itsajivi ata apo xainaenë tanecopatsinexareca pucayojavabereca itsa mene nacujiruba. Ajena narunabiabijitsianëreca, bajarapaepatota itsajivi netsurunabiabareca copiaya, jai piavitanetsanucaenë.

⁸ Jesús nexata jumaitsi piavitanetsanucaenëjavabelia:

—Namatacore. Pire nijapanayo. Ponare baja, jai Jesús.

⁹ Bajarapacuenia Jesús pejumaitsijavata, jamatejema baja piavitanetsanucaenëmi. Pita baja pijapanayo. Ponaexanepana baja. Bajarapacuenia petabusipacuenabinëtsi Jesús jamatejemayaexana judíovi penacueraevetsimatacabita. ¹⁰ Nexata judíovi jamatabëcuenenavëxaniabiaya jumaitsi petabusipacuenabinëmitsijavabelia:

—Ajena raja vajanacueraevetsimatacabi. Nexata apo xanepanae necaponaponenexa nijapanayo, jai judíovi, tsipaji bajarapamonae apo jitsipae itsajivi ata pexanaenexa itsacuenejavayo ata penacueraevetsimatacabita.

¹¹ Nexata petabusipacuenebinëmitsi jumaitsi judíovijavabelia:

—Tanejamatejemayaexanaenë raja nejumaitsi: “Nijapanayo pire. Ponare baja,” nejai, jai petabusipacuenabinëmitsi judíovijavabelia.

¹² Nexata icatsia judíovi jumaitsi:

—¿Jipatsa nexata cajumaitsi: “Nijapanayo pire. Ponare baja,” cajai? jai.

¹³ Itsiata baitsi jane bajaraponë apo vënëyapëtae pavënënë jamatejemayaexanatsi. Apo vënëyapëtae Jesús. Tsipaji bitso jivi ayaibitsaëtoxaneto bajarajota jinavanapa. Jesús baja cajena pepuaponae itsajavabelia, yanijobatsi. ¹⁴ Bajaraxuacujinae icatsia Jesús caxitajarabaxuaba bajaraponë templobota. Nexata Jesús jumaitsi bajaraponëjavabelia:

—Taema. Aeconoxae baja jamatejemamë. Icatsia pëtsa baja matavëjëa exaname pibisiacuene. Icatsia raja itsa exaname, bitsomë tsipae, jai Jesús bajaraponëjavabelia.

¹⁵ Nexata bajaraponë pona baja. Tsipaeba judíovijavabelia.

—Jesús tsaena raja nejamatejemayaexana, jai judíovijavabelia.

¹⁶ Bajaraxuata nexata judíovi Jesús jamatabëitonotatsi. Jamatabëbeyaxuabatsinua. Tsipaji jamatejemayaexana piavitanevi judíovi penacueraevetsimatacabita. ¹⁷ Nexata Jesús jumaitsi judíovijavabelia:

—Taxa Dioso raja piavitanevi jamatejemayaexanabiaba daxitamatacabi. Bajaraxuata xanë ata piavitanevi jamatejemayaexanajë daxitamatacabi, jai Jesús judíovijavabelia.

¹⁸ Bajarapacuenia Jesús penalivaisipaebixae judíovijavabelia, itoyatsi bitso. Bajarapamonae jamatabëbeyaxuabatsi. Tsipaji Jesús jamatejemayaexana piavitanevi judíovi penacueraevetsimatacabita. Orijibia Jesús jumaitsi: “Taxa raja Dioso,” jai. Bajarapacuenia Jesús pejumaitsixae, nexata judíovi bitso jamatabëbeyaxuabatsi.

Pacuenia Dioso pexënato jamatabëcuenecaëjëpatsi daxitacuene pexanaenexa yabara pëlivaisi

¹⁹ Jesús jumaitsi judíovijavabelia:

—Xaniajanë pacuenia pacatsipaebijitsiatsi. Xanë, Dioso pexënatonë, itsacuenejavayo ata apo exanaenë ëxanë tajamatabëcueneta. Pacuenia taniji taxa pexanaejava, bajarapacuenia xanë ata exanajë. ²⁰ Taxa niasiva. Nexata neyapëtaeyaexana daxita pacuene taxa yapëtane. Tavajënaeyabelia neyapëtaeyaexanaponaena bajarapacuenia matatoxenetsia ayaicuene taexanaponaenexa. Nexata exanaenajë ayaicuene taexanaejavanë. Paxamë itsa pataename ayaicuene taexanaejavanë, pajamatabëcuenenabenajacaename.

²¹ Taxa petëpaevimi ata icatsia asaëyaexana. Xanë ata necaëjëpa tasaëyaexanaenexa petëpaejivi ata, pajivi jamatabëasaëyaexanajë. ²² Taxa raja apo naneconitsiaexanae tsane itsajivi ata. Xanë raja, pexënatonë, nitoroba tananeconitsiaexanaenexa pibisiacuene pexanaevi. ²³ Bajarapacuenia nitoroba tananeconitsiaexanaenexa taneyaiyataenexa daxitajivi pacuenia bajarapamonae yaiyatane taxa. Pajivi apo neyaiyatae, Dioso pexënatonë, bajarapajivi taxa ata apo yaiyatae, jai Jesús judíovijavabelia.

²⁴ Icatsia Jesús jumaitsi judíovijavabelia:

—Xaniajanë pacuenia pacatsipaebijitsiatsi. Pajivi nenamuxunaeveta tapaebilivaisi, itsa jumecovënëtanua Dioso athëbëvetsica taneitorobinëcuenetsica, nexata bajarapajivi xainaena matacabi apo peverevereaejava. Nexata bajarapajivi apo naneconitsiaexanaenë tsane pibisiacuene pexanaeneconi yabara. Bajarapajivi tēpae ata tsane, capanepaenatsi Diosojavabelia. ²⁵ Xaniajanë pacuenia pacatsipaebijitsiatsi. Pamonae apo xinae matacabi apo peverevereaejava, pijamatacabi baja tocopiapatatsi tanejumetaenexa, xanë Dioso pexënatonë, tatsipaebilivaisi. Nexata pajivi nesivanajamatabëcopata, xainaena matacabi apo peverevereaejava. ²⁶ Taxa raja caëjëpatsi jivijavabelia perajutsinexa matacabi apo peverevereaejava. Nexata xanë ata taxa necaëjëpaëyaexana jivi tarajutsinexa matacabi apo peverevereaejava. ²⁷ Nitorobanua tananeconitsiaexanaenexa pibisiacuene pexanaevi. Tsipaji xanë, Daxitajivi Pematapijinënë. ²⁸ Pëtsa pajamatabëcuenenabenajacame patacatsipaebilivaisi yabara. Itsamatacabi nejumetaena daxita petëpaevimi ata tatsipaebilivaisi. ²⁹ Nexata bajarapamonae pemëthëanëmi vecuapitsapaena. Pamonae pexaniacuene pexanaevimi, Dioso icatsia asaëyaexanaenatsi. Nexata bajarapamonae xainaena matacabi apo peverevereaejava. Pamonae pibisiacuene pexanaevimi, icatsia Dioso asaëyaexanae atatsi tsane, bajarapamonae naneconitsiaya jinavanapaena daxitamatacabijavabelianexa, jai Jesús judíovijavabelia.

Pacuenia Jesús jivi tsitanajamatabëcuenetitajëta pecaëjëpaenëcuenetsi daxitacuene pexanaenexa yabara pelivaisi

³⁰ Icatsia Jesús jumaitsi judíovijavabelia:

—Xanë tajamatabëcueneta apo exanaenë tsane itsacuenejavayo ata. Taneitorobinëtsica taneitorobicuenia, pijaneconi pexinaevi naneconitsiaya jinavanapaëyaexanaenajë. Nexata saya itaxutojema apo naneconitsiaexanaenë tsane. Itsa naneconitsiaexanaenajë jivi, paneconivajëto xaina caejivi canacujitsia, bajarapaneconivajëtota caejivi canacujitsia naneconitsiaexanaenajë. Apo exanaenë tsane pacuenia jamatabëexanajë tajacuata. Pacuenia jitsipa taxa taneitorobinëtsica, bajarapacuenia exanaenajë. ³¹ Itsa navënëlivaisipaebijitsipajë, “Xanë rabaja ayaijamatabëcuenenënë,” itsa janë tsipae, itsiata itsamonae saya nejumeebijitsipa. ³² Itsiata baja Juanpijinë jivibautisabinëmi nevajunupaeba xaniavaetsia. Yapëtaniji bajaraponë tanevajunupaebijava pexaniajaijamatabëcueneta. ³³ Paxamë itsamonae paitorobame tanevënëlivaisiyanijobinexa Juan jivibautisabinëmijavabelia. Nexata Juanpijinë xanë talivaisi, pexaniajailivaisi, tsipaeba paneitorobivijavabelia. ³⁴⁻³⁶ Pacanajamatabënapitsiaexanatsi pacuenia Juanpijinë nevënëlivaisipaeba panejumecovënëtsinexa patacapanepaejavanexa taxa Diosojavabelia. Juanpijinë abaxë itsa ponapona mapanacuataje, belámparabë picani. Pacajamatabëcuenetitayota. Caepatoyo picani pasivajamatabëcuenëbarëyamë papecatsipaebilivaisi. Juanpijinë itsa nevënëlivaisipaeba, pacayapëtaëyaexana baja cajena pexaniajailivaisi tapaëbinëcuene. Itsiata baitsi jane Juanpijinë bajarapacuenia apo pacatsipaebi ata tsipae, xanë xainajë itsanë tanevënëlivaisipaëbinënexa. Bajaraponë bitso ayaijamatabëcuenenë Juanpijinëmi matatoxenetsia. Bajaraponë taxa. Taxa netocopata pinijicuene taexanaenexa. Nexata pinijicuene exanajë daxitajivi tanesivajamatabëjumaitsinexa: “Xaniajai tsaena. Maponëje pepacuene Dioso athëbëvetsica pitorobinëtsitsicaje.”

tanesivajamatabějainexa. ³⁷ Taxa, ponë nitorobica, tajëvelia baja cajena nevënëlivaisi yaquinaeyaexana pejumelivaisibaxutota. Caeto ata taxa livaisi papecatsipaebijava, apo pajumetaemë. Apo pataemënu. ³⁸ Nexata pejumelivaisi apo pacatsijamatabějone. Tsipaji apo panejumecovënëtsimë taxa athëbëvetsica taneitorobinëtsica. ³⁹ Paxamë picani xaniavaetsia palebabiabame Dioso pejumelivaisibaxuto. Bajarapacuenia palebabiabame tsipaji jamatabëcuenenavëxaniabiaya pajamatabějumaitsimë tsabiabi: “Xaniavaetsia itsa lebajë Dioso pejumelivaisi, nexata Dioso nerajutsiana matababi apo peverevereaejava,” pajamatabějame tsabiabi. Itsa palebabiabame Dioso pejumelivaisibaxuto, ponë yabara palebabiabame, xanë rabaja cajena. ⁴⁰ Paxamë itsiata apo panejumecovënëtsimë panexainaenexa matababi apo peverevereaejava, jai Jesús judíovijavabelia.

⁴¹ Icatsia Jesús jumaiti judíovijavabelia:

—Apo exanaenë ayaicuene taexanaejava saya jivi tanesivajamatabějumaitsinexa: “Jesús raja ayaijamatabëcuenenë,” tanesivajamatabějainexa. ⁴² Pacajamatabëcueneyapëtanetsi. Yapëtaniji cajena apo panejitsipaejava Dioso. ⁴³ Xanë athëbëvetsica patsicajë mapanacuayabetsicaje taxa Dioso taneitorobixaetsica. Itsiata apo panejumecovënëtsimë. Itsanë itsa pacatopatsiana saya bajaraponë pejamatabëcuenepijilivaisi papecatsipaebinexa, nexata pajumecovënëtsianame. ⁴⁴ Paxamë pajitsipame mapanacuata ëjivi papecasivabarëyanexa, papecayaiyataenexanua. Apo panajamatabëxainaemë cajena Dioso papecasivabarëyanexa. Bajaraxuata apo pacacaëjèpae panejumecovënëtsinexa Dioso pejumelivaisi. ⁴⁵ “Mara ponëje nacaneconitsijitsia Diosojavabelia,” panesivajamatabějame pëtsa. Xanë raja apo pacaneconitsi tsanetsi. Paxamë jamatabëcuenenavëxaniabiaya pajamatabějumaitsimë tsabiabi: “Bajayata Dioso Moiséspijinëta najumecopata jivi pejumecovënëtsinexa. Bajarapalivaisi baja jumecovënëtsiajinavanapatsi. Bajaraxuata nacacapanepaena Dioso,” pajamatabějame tsabiabi jamatabëcuenenavëxaniabiaya. Itsiata bajarapalivaisivecua saya pajinavanapame. Nexata bajarapalivaisi pacaneconitsiana Diosojavabelia. ⁴⁶ Itsa pepacuene pajumecovënëtsipame Dioso Moiséspijinëta penajumecopatsilivaisi, nexata xanë ata panejumecovënëtsipame. Tsipaji cajena bajayatami tajëvelia nevajunupaeba Moiséspijinë peyaquinaebaxutota. ⁴⁷ Apo pajumecovënëtsimë Moiséspijinë peyaquinaelivaisi. Bajaraxuata nexata apo panejumecovënëtsimë xanë patacatsipaebilivaisi, jai Jesús judíovijavabelia.

6

Pacuenia Jesús pexaejava rajuta cinco mil ponëbeje yabara pelivaisi
(Mt 14.13-21; Mr 6.30-44; Lc 9.10-17)

¹⁻⁴ Bitso baja imoxoyo pevajënae pejonenexa judíovi pijafieta, pascuavënëfieta. Bajarapamatababi Jesús pona Galilea pucaxaneto itsapanabelia. Bajarapapuca itsavënë Tiberiaspuca. Nexata jivi ayaibitsaëtohaneto Jesús pënaponatsi. Tsipaji Dioso pesaëta Jesús ayaicuene exanapona. Piavitanevi jamatejemayaexana pona. Nexata Jesús junaya petsutojumabetsia. Jesús, pijajivi yajava, ecaya petsutojumatsia. ⁵ Itsa Jesús tane jivibitsaëtohaneto pecujibijavatsirena, Jesús jumaiti Felipejavabelia:

—¿Detsa belia comuatsianatsi pexaejava pexaenexa mapabitsaëtohanetoje? jai Jesús.

⁶ Bajarapacuenia Jesús jumaiti tsipaji jamatabëyapëtanë pacuenia Felipe jumecanaviatsijitsiatsi. Jesús baja cajena picani yapëtanë pacuenia pexaejava mitsaexanaejitsia bajarapajivibitsaëtohaneto. ⁷ Nexata Felipe jumaiti Jesúsjavabelia:

—Doscientos denariocuenia comuatsi atatsi tsipae pan, apo yacaëjèpaetsi tsipae pexaenexa daxita mapajivibitsaëtohanetoje, jai Felipe.

⁸ Itsanë Jesús pijajivitonë Andrés, Simón Pedro pejuyapijinë, jumaiti Jesúsjavabelia:

⁹—Majotaje napatajopa pejevaxinëyo. Xaina bajaraponëyo cinco papanbëbeje, cebadavënëbenota pexanaepanbëanë. Xaina anijanëyobeje dujuainëyobeje yajava. Bajaraxu-axi apo caëjëpae tsipae cajena vajarajutsinexa mapajivibitsaëtoxanetoje, jai Andrés.

¹⁰ Nexata Jesús jumaitsi pijajivijavabelia:

—Daxita bajarapamonae paenaeyaexanare, jai Jesús.

Nexata Jesús pijajivi itoroba jivi penaenexa ponajumavereca. Bajarapajivibitsaëtoxaneto bejamatabëcuene cinco mil meta ponëbeje. ¹¹ Nexata Jesús pita panbëxi. Bajaraxuacujinae pexaenexa vajëta Diosojavabelia.

—Pexaniacuene panetoexaname. Panerajutame pataxaejavanexa, jai Jesús Diosojavabelia.

Bajaraxuacujinae Jesús pan rajuta pijajivijavabelia. Nexata juya Jesús pijajivi tsicobetsana daxita penaëjivibitsaëtoxanetojavabelia. Bajara icatsia pacuenia Jesús vajëta Diosojavabelia dujuainëyobeje pexaenexa.

—Pexaniacuene panetoexaname. Panerajutame pataxaejavanexa, jai Jesús Diosojavabelia.

Bajaraxuacujinae icatsia dujuaijavaxi tsicobetsana daxita penaëjivibitsaëtoxanetojavabelia. Daxita bajarapamonae xaniavaetsia nabane. ¹² Itsa baja bajarapamonae penia, Jesús jumaitsi pijajivijavabelia:

—Pacaetuae baja peyajuvënënacopabenaëjavanë penaxuabenaëyaniva, jai Jesús pijajivijavabelia.

¹³ Nexata Jesús pijajivi caetuata peyajuvënënacopabenaëjavanë. Vënëba doce xuabeje bemapirecuenia pexanaëjavanë. Cinco papanbëmibeje picani cebadavënëbenota pexanaepanbëanë. ¹⁴ Nexata bajarapajivibitsaëtoxaneto itsa tane Jesús ayaicuene Dioso pesaëta pexanaëjava, najumaitsi Jesús yabara:

—Diosojumepaëbinë profeta, ponë vaxaitsi copiaevetavanapatsi pepatsijavanexat-sica, bajara jane maponëje. ¹⁵ Vaetabianatsi maponëje. Vajanacayanacuaevetsinë exanaenatsi bajaraponë, najai picani bajarapamonae.

Nexata Jesús jamatabëcueneyapëtane bajarapacuenia pesivanajamatabëxainajavatsi. Bajaraxuata Jesús baja vecuapona. Najetaruca pinijitsutonëjava caenë.

Pacuenia Jesús mene itaboxoya najetaruca yabara pelivaisi
(Mt 14.22-27; Mr 6.45-52)

¹⁶ Itsa baja meravi, Jesús pijajivi puca itapayabereca pona. ¹⁷ Jesús abaxë patsinejeva pijajivijavata, aitaquiri baja. Nexata pijajivi runareca jera ënëabereca. Nicabijitsia Capernaum tomarabelia. ¹⁸ Jesús baja pijajivi pepuaponae jerata, taxuxuaba jovibo pebubujaijava. Nexata malataca bitso ayai. ¹⁹ Pavëpata Jesús pijajivi naropoba, bajarapavëpa baja bejamatabëcuene cinco pakilómetrobeje, seis pakilómetrobeje ata, pepuavecuanajetarubenaëlia, Jesús pijajivi cujitanajetaruca. Jesús najetaruca mene itaboxoya. Nexata Jesús pijajivi tanetsi. Jesús pijajivi cujunavatsi. ²⁰ Nexata Jesús jumaitsi pijajivijavabelia:

—¡Xanë raja najetarucajè! ¡Pëtsa panecujunavame! jai Jesús pijajivijavabelia.

²¹ Nexata Jesús pijajivi jamatabëcuenebarëya. Jesús baja nexata nonorena jera ënëaberena. Nexata bajarapaepatota Jesús baja, pijajivi yajava, pata Capernaum tomarabelia.

Pacuenia Jesús pëjaitatsi jivi yabara pelivaisi

²² Pamonaë Jesús pexaëjava rajuta, abaxë nacopabalia puca itsapanatalia. Nexata meravia pitsijavata bajarapamonae najumaitsi:

—Canivi caejera perucaëjava, tanetsi majotaje. ËJesús pijajivi runareca penicabinexalia. Nexata Jesús nacopatenuca majotaje, najai bajarapamonae.

²³ Bajara saya paepatota itsamonae jeranë yaparena Tiberias tomaraverena. Itsajota Jesús pevajëtsicujinae Diosojavabelia pexaëjava rajuta jivi ayaibitsaëtoxaneto, bajarajota

vecuaimoxoyo yaëba. ²⁴ Nexata pamonaë Jesús pexaejava rajuta, bajarapamonaë tane Jesús pijajivi pebarëajibitsarucejava bajarajota. Nexata bajarapamonaë runareca jera ënëabereca penicabinexalia Capernaum tomarabelia. Bajarapatomarabelia pona pepëjaitxinexatsi Jesús.

Pacuenia Jesús bepitavapan yabara pelivaisi

²⁵ Jesús pepëjaitxivitsi itsa pata Capernaum tomarabelia, caxitajarabatsi Jesús. Nexata bajarapamonaë jumaitsi Jesúsjavabelia:

—Jesús, ¿detsa pacujinaë patame baja maberenaë? jai.

²⁶ Jesús nexata jumaitsi bajarapamonaëjavabelia:

—Xaniajanë pacuenia pacatsipaëbijitsiatsi. Paxamë panejaitame tsipaji xaniavaetsia panabaneme xanëjavata. Apo panejaitximë panejumecovënëtsinexamë Cristocuenenë, Dioso taneitorobinëtsica. Pataë atamë ayaicuene Dioso pesaëta taexanaëjava, apo panejumecovënëtsimë. ²⁷ Pëtsa pacajamatabëcueneena ëpeverevereaejava yabara. Pacuenia panexaejava baverevereca, bajarapitsijava. Biji rajane pacajamatabëcueneenaë apo peverevereaejava yabara. Nexata xanë, Daxitajivi Pematapijinënë, pacarajutsianatsi matababi apo peverevereaejava. Taxa Dioso baja cajena nitoroba patacarajutsinexa matababi apo peverevereaejava, jai Jesús bajarapamonaëjavabelia.

²⁸ Nexata bajarapamonaë jumaitsi Jesúsjavabelia:

—¿Detsa nexata xua bepaexanaë Dioso pejitsipaëcuene? jai bajarapamonaë.

²⁹ Nexata Jesús jumaitsi bajarapamonaëjavabelia:

—Mara pacuene Dioso jitsipa paneexanaenexaë. Panejumecovënëre xanë Dioso taneitorobicuenetsica, jai Jesús.

³⁰ Nexata icatsia bajarapamonaë jumaitsi Jesúsjavabelia:

—¿Detsa nexata xua pinijicuene Dioso pesaëta nexanaëjava panetsitaexanaename patacajumecovënëtsinexa Dioso pecaitorobicuenetsica? ³¹ Vajasalinaivimi pina bajayata baxaëvanapa manávënëjava petusato nacuata pacuenia baja Dioso pejumelivaisibaxutota jumaitsi. Dioso baja cajena pejumelivaisibaxutota jumaitsi mapacueniaë: “Bajarapamonaë rajutabiabatsi pexaejava athëbëpijijava,” jai Dioso pejumelivaisibaxutota vajasalinaivimi yabara, jai bajarapamonaë Jesúsjavabelia.

³² Jesús nexata bajarapamonaëjavabelia jumaitsi:

—Xaniajanë pacuenia pacatsipaëbijitsiatsi. Moiséspijinë petusato nacuata vajasalinaivimi pexaejava apo rajutsi athëbëpijijava. Taxa Dioso raja rajutabiaba bajarapamonaë pexaejava. Nexata pijinia aeconoxaë paxamë ata Dioso pacarajutsiana athëbëpijipan, pepacuene pexaniajaipan. ³³ Ponë athëbëvetsica pepatsinë, Dioso rabaja pijapan. Bajaraponë mapanacuapijivijavabeliaë rajutsiana matababi apo peverevereaejava, nayabarajai Jesús pijacuata bajarapamonaëjavabelia.

³⁴ Nexata bajarapamonaë jumaitsi:

—Jesús, bajarapapan panerajutaponaename daxitamatababi canacujitsia, jai.

³⁵ Nexata Jesús jumaitsi bajarapamonaëjavabelia:

—Papan jivi rajutsianatsi matababi apo peverevereaejava, xanë rabaja bajarapannë. Pajivi xanëjavaberena pata, apo piäjani cajena tsane pejamatabëëthëtota. Pajivi nesivanajamatabëcopata xanëjavaberena, apo jitsipae tsane icatsia mera. ³⁶ Paxamë apo panejumecovënëtsimë, pataë atamë Dioso pesaëta pinijicuene taexanaëjava. ³⁷ Daxita pamonaë taxa tanerajutsivi, patsiana xanëjavaberena. Pajivi patsiana xanëjavaberena, apo navecuaitavetsinë tsane. ³⁸ Xanë apo patsinëtsica athëbëvetsica taexanaenexa ëtajamatabëcujirupijijava. Biji rajane patsicajë taexanaenexa pacuenia nitoroba taneitorobinëtsica. ³⁹ Mara pacuene taxa Dioso jitsipa tatoexanaenexaë. Apo jitsipae cajena tatoxabijava caëjivi ata tanerajutsiviyajuvënëvi. Pamatababi icatsia patsianicajë, daxita bajarapamonaë toasaëyaexanaenajë icatsia petëpaejavamivecua. ⁴⁰ Mara

pacuene taxa Dioso jitsipaje. Daxita pamonaē tanetaēvi Dioso pexēnatonē, nexata itša nesivanajamatabēcopata, bajarapamonae xainaena matababi apo peverevereaejava. Bajarapamonae icatsia asaēyaexanaenajē petēpaejavamivecua pamatababi icatsia patsianicajē, jai Jesús bajarapamonaejavabelia.

⁴¹ “Xanē rabaja athēbēvetsica tapatsipan,” penayabaraajaijava Jesús jivijavabelia, judíovi baracuaicuajaitši pepēnēvelia. ⁴² Nexata judíovi najumaitši:

—Mara ponē Jesús, Josépijinē pexēnatoje. Vaxaitši baja cajena yapētanetsi paxapijinē, pena ata. Nexata bajaraponē acuenebi pejumaitšijava: “Athēbēvetsica tapatsinē,” pejaijava, najai judíovi Jesús yabara.

⁴³ Nexata Jesús jumaitši bajarapamonaejavabelia:

—Jamatabēcuenenavēxaniabiaya pētsa panebaracuaicuajiamē tapēnēverena. ⁴⁴ Itsajivi ata raja apo caējēpaetsi pijacuata xanējavaberena tanesivanajamatabēcopatsinexa. Matapania taxa Dioso, taneitorobinētsica, itša caējēpaēyaexanaenatsi, nesivanajamatabēcopatsiana. Pajivi nesivanajamatabēcopatsiana, asaēyaexanaenajē petēpaejavamivecua pamatababi icatsia patsianicajē. ⁴⁵ Bajayata Diosojumepaebivimi peyaquinaelivaisi jumaitši mapacueniaje: “Dioso cajena yapētaēyaexanaena daxitajivi pexaniajailivaisi,” jai. Nexata pajivi jumecovēnēta taxa peyapētaēyaexanaelivaisi, bajarapajivi xanē ata nesivanajamatabēcuenecopatsiana, jai Jesús judíovijavabelia.

⁴⁶ Icatsia Jesús jumaitši judíovijavabelia:

—Itsajivi ata cajena taxa apo tae. Xanē raja caenēnē taxa Dioso taniji. Tsipaji bajaravetsica tapatsinē. ⁴⁷ Xaniajanē pacuenia pacatsipaebijitsiatsi. Pajivi nesivanajamatabēcopatsiana, xainaena matababi apo peverevereaejava. ⁴⁸ Xanē rabaja pitavapannēnē. Nexata jivi rajutsianajē matababi apo peverevereaejava. ⁴⁹ Bajayata panijasalinaivimi xaevanapa picani manávēnējava petusato nacuata. Itsiata baitši jane bajarapamonae bajayajebi bajaraxua xaevanapae ata, tēpa itsiata. ⁵⁰ Xanē raja pacanavajunupaebatsi athēbēvetsica tapatsinē. Pajivi nesivanajamatabēcuenecopatsiana, pepacuene apo tēpae tsane. ⁵¹ Xanē rabaja cajena pitavapannēnē, athēbēvetsica tapatsinē. Pajivi jumecovēnētsiana tasivatēpaejava pijaneconi yabara, jamatabēcuenēaitava tsaponaponae tsane daxitamatabacijavabelianexa. Papan rajutsianajē tanejumecovēnētsivi, tavito rabaja tsane. Navirajutsianajē daxitanacuapijivi pexainaenexa matababi apo peverevereaejava, nayabarajai Jesús judíovijavabelia.

⁵² Nexata judíovi najumeanaenota ēpamonae bajarapacuenia Jesús pejumaitšijava yabara. Najumaitši bajarapamonae:

—¿Detsa pacuenia maponē nacanavirajutsipa vajavixaenexaje? Acuenebi raja vanacanavirajutsijava vajavixaenexa, najai judíovi.

⁵³ Jesús nexata jumaitši judíovijavabelia:

—Xaniajanē pacuenia pacatsipaebijitsiatsi. Xanē, Daxitajivi Pematapijinēnē. Itša paxamē apo panevixaemē tsane, apo panejanaapaemēnua tsane, nexata matababi apo peverevereaejava, apo paxainaemē tsane. ⁵⁴ Pajivi nevixaena, nejanaapaenanua, xainaena matababi peverevereaejava. Pamatababi icatsia patsianicajē, bajarapajivi icatsia asaēyaexanaenajē petēpaejavamivecua. ⁵⁵ Tavito rabaja cajena pepo pexaniajaijava jivi pexaenexa. Tajana rabaja pijinia pepo pexaniajaijava jivi piapaenexa. ⁵⁶ Pajivi nevixaena, nejanaapaenanua, bajarapajivi yajavaponaponaenajē. Bajarapajivi ata pijinia neyjavaponaponaena. ⁵⁷ Taxa, ponē nitorobica, bajaraponē daxitamatabacijavabelianexa piasaētsaponaponaenē. Bajaraponē pejamatabēcueneta xanē ata daxitamatabacijavabelianexa asaēnē tsaponaponae. Nexata pajivi nevixaena, bajarapajivi pijinia tajamatabēcueneta asaē tsaponaponae tsane daxitamatabacijavabelianexa. ⁵⁸ Athēbēvetsica pepatsipan, xua yabara baja pacatsipaebatsi, bajarapapan apo jēpae papan bajayata panijasalinaivimi xaevanapa. Bajarapapanmi bajayajebi xaevanapae

ata, bajarapamonaemi itsiata tēpa baja cajena. Biji rajane pajivi xanē nevixaena, ponaponaena daxitamatacabijavabelianexa, jai Jesús judíovijavabelia.

⁵⁹ Bajarapacuenia Jesús jumaitsi judíovijavabelia livaisi petsipaebijavata Capernaum tomarata, judíovi penacaetuatabibota.

Matacabi apo pevereverecaejava yabara pelivaisi

⁶⁰ Ayaibitsaēto, pamonaē Jesús pepēta najinavanapa, itsa jumetane Jesús petsipaebilivaisi, apo jumexaniatae. Najumaitsi ēpamonaē:

—Penajumetsēnētsilivaisi saya nacatsipaeba. ¿Jipatsa jumecovēnētsiana? Ajibi cajena, najai ēpamonaē.

⁶¹ Nexata Jesús jamatabēcueneyapētane pacuenia pepēnēvelia baracuaicuajaitsi. Nexata Jesús yanijoba pepēnaponaevitsijavabelia. Jumaitsi:

—¿Apo bepexaniajailivaisi tsaja pajumetaneme patacatsipaebilivaisi? ⁶² Xanē Daxitajivi Pematapijinēnē. ¿Detsa paitsimē tsipae itsa pataejitsipame tatsiajava athēbēabetsia taponaponaenacuamijavabetsia? ⁶³ Espíritu Santo baja cajena pejamatabēcueneta jivi xaina matacabi apo pevereverecaejava. Ējivi raja pejamatabēcueneta apo caējēpaetsi pexainaenexa matacabi apo pevereverecaejava. Patacatsipaebilivaisi baja cajena papecatsijamatabējonenexa picani, panexainaenexa matacabi apo pevereverecaejava.

⁶⁴ Itsiata baitsi jane paxamēyajuvēnēvi abaxē apo nejumecovēnētsi, jai Jesús.

Jesús bajarapalivaisi petsipaebivajēnae ata, jamatabēcueneyapētane pamonaē apo jumecovēnētsijitsiatsi. Jamatabēcueneyapētanenua tajēvelia ponē canajetsijitsiatsi pijavajabitsaē pecobeyabelia. ⁶⁵ Nexata Jesús icatsia jumaitsi pepēnaponaevitsijavabelia:

—Bajaraxuata cajena pacajumaitsi: “Itsajivi ata raja apo caējēpaetsi pijacuata xanējavaberena tanesivanajamatabēcopatsinexa. Matapania taxa Dioso, taneitorobinētsica, itsa caējēpaeyaexanaenatsi, nesivanajamatabēcopatsiana,” pacajaitsi, jai Jesús pepēnaponaevitsijavabelia.

⁶⁶ Bajara nexata jota ayaibitsaēto Jesús pepēnaponaevitsi vepēnaviabatsi baja. Nexata bajarapamonaē pematatsēnēa baja apo pēnaponaetsi Jesús. ⁶⁷ Nexata Jesús yanijoba doce ponēbeje pijajivijavabelia. Jumaitsi:

—¿Paxamē ata tsabaja pajamatabēnaviabame? jai Jesús.

⁶⁸ Nexata Simón Pedro jumaitsi Jesúsjavabelia:

—Tajatuxanenē, itsa panaviabajē, ¿jipatsa nexata papēnaponaejitsipajē xamēvecua? Xamē rabaja caenēmē panetsipaebame matacabi apo pevereverecaejava pataxainaenexa. ⁶⁹ Paxanē rabaja pacajumecovēnētatsi patanetsipaebilivaisimē. Pacayapētanetsinua baja cajena Cristocuenemē, Dioso piasaētsaponaponaenē daxitamatacabijavabelianexa pexēnatomē, jai Simón Pedro Jesúsjavabelia.

⁷⁰ Jesús nexata jumaitsi pijajivijavabelia:

—Xanē rabaja pacaitapetatsi doce paponēmēbeje. Itsiata baitsi jane paxamēyajuvēnēnē, itsanē, dovathi pijajivitonē tsaponaponaē, jai Jesús.

⁷¹ Bajarapacuenia Jesús itsa jumaitsi, Judas Iscariote, Simón pexēnato, yabara jumaitsi. Judas Jesús canajetsijitsiatsi pijavajabitsaē pecobeyabelia. Judas rabaja picani Jesús pijajivitonē, doce ponēbejeyajuvēnēnē.

7

Pacuenia Jesús pejuyapijivi apo jumecovēnētsitsi yabara pelivaisi

¹ Jesús ponapona Galilea nacuajava. Apo jitsipae peponaponaējava Judea nacuajava. Tsipaji bajarajota judíovi jamatabēbeyaxuabatsi. ² Imoxoyo baja pevajēnae pejonenexa fiesta, pafiestamatacabi judíovi bobērētonē exanabiaba. Nexata judíovi bajarapabobērētonēta jinavanapabiaba bajarapafiestamatacabi. ³ Nexata Jesús pejuyapijivi junatatsi penaponaenexa bajarapafiestajavabelia. Jesús pejuyapijivi jumaitsi:

—Pëtsa nacopatame majotaje. Judea nacujavabelia liamëre. Bajarajotalia pijinia Dioso pesaëta pinijicuene nexanaponaejava nijajivi tsitaexanaename. ⁴Pajivi pexanaejava yabara jitsipa pevënëlivaisitaenexatsi daxitanacuapijivi, bajarapajivi pexanaejava muetsia apo exanae. Nexata pepacuene Dioso pesaëta pinijicuene itsa exanaponame, nexata icatsia pinijicuene tsitaexanaename fiestajavata daxitanacuapijivi pitabarata. Nexata daxitajivi cayapëtaena, jaitsi Jesús peyuyapijivi.

⁵Jesús peyuyapijivi ata apo jamatabëjumecovënëtsi Cristocuene. Bajaraxuata bajarpacuenia peyuyapijivi ata jumaitsi. ⁶Nexata Jesús jumaitsi peyuyapijivijavabelia:

—Abaxë raja tajamatacabi apo netocopiapatsi tanaitajëtsinexa daxitajivijavabelia. Itsiata paxamë apo paitsimë. Paepatota jamatabëpaponame, pacatoxanepana paneponaenexa. ⁷Mapanacuapijivi cajena acuenebi paxamë papecaitojajava. Itsiata baitsi jane xanë nitoya. Tsipaji itavetaponajë pibisiacuene pexanavanapaejava. ⁸Paxamë baja paponare fiestajavabelia. Xanë ra abaxë apo ponaenë. Tsipaji abaxë apo netocopiapatsi paepatota ponaejitsianë, jai Jesús peyuyapijivijavabelia.

⁹Bajarapacuenia Jesús pejumaitsicujinae, abaxë Jesús nacopatanuca Galilea nacuata pecotocaevinexa.

Pacuenia Jesús napona fiestajavabelia yabara pelivaisi

¹⁰Jesús peyuyapijivi fiestajavabelia pepuaponae, Jesús ata cotocaevi napona fiestajavabelia. Jesús nexata jivibitsaëto tuatuajëta apo naponae muetsia pepatsinexa. ¹¹Jesús picani jaitatsi judíovi pevetsivi fiestajava. Najumaitsi judíovi pevetsivi:

—¿Detsa xania jota ponapona bajaraponë? najai judíovi pevetsivi Jesús yabara.

¹²Ayaibitsaëto jivi vëpaxapaxajaiya baracuaicuajitsi Jesús. Itsamonae jumaitsi Jesús yabara:

—Pexaniajamatabëcuenenë raja, jai itsamonae.

Itsamonae pijinia jumaitsi:

—Apo pexaniajamatabëcuenenë raja Jesús. Peyamaxëitojorobinë ra saya jivi, jai Jesús yabara.

¹³Itsajivi ata apo cuaicuajai ayaijumeta Jesús yabara. Tsipaji jumejunava judíovi pevetsivi pejumetaeyanivatsi.

¹⁴Itsa baja fiesta epatua tsaponae pevereverecaenexa, nexata Jesús joneya tem-ploboyalía. Taxuxuaba jane baja livaisi petsipaebijava. ¹⁵Judíovi pevetsivi jamatabëcuenenabenajaca itsa jumetane Jesús pepaebilivaisi. Nexata judíovi pevetsivi najumaitsi:

—Maponëje bitso livaisi yapëtane. Picani livaisi apo nacujarubi pacuenia vaxaitsi nacujarubatsi, najai tsanubenaë judíovi pevetsivi Jesús yabara.

¹⁶Jesús nexata jumaitsi judíovi pevetsivijavabelia:

—Tatsipaebilivaisi raja apo tajamatabëcuenepijilivaisi. Dioso raja, ponë nitorobica, bajaraponë pejumelivaisi tsipaebaponajë. ¹⁷Pajivi jamatabëexana Dioso pejitsipaecuenia, bajarapajivi yapëtaena pepacuene Dioso pejumelivaisi tatsipaebijava. Nexata yapëtaenanua tajamatabëcuenepijilivaisi itsa tsipaebajë. ¹⁸Pajivi tsipaeba ëpejamatabëcuenepijilivaisi, tsipaeba saya jivi peyayataenexatsi. Itsiata baitsi jane pajivi tsipaeba jivi peyayataenexa Dioso, bajarapajivi cajena tsipaeba pexaniajailivaisi. Bajarapajivi apo yamaxëitojorobi jivi. Tsipaji pacuenia Dioso itorobatsi, tsipaeba, jai Jesús judíovi pevetsivijavabelia.

¹⁹Jesús icatsia jumaitsi judíovijavabelia:

—Moiséspijinë baja cajena bajayata yaquina Dioso penajumecopatsilivaisi jivi jume-covënëtsinexa. Itsiata baitsi jane paxamëyajuvënëjivi, caejivi ata, apo jumecovënëtsi bajarapalivaisi. Bajarapalivaisi pacaitavetsi ata jivi panebeyaxuabiyaniva, ¿detsa xua-jitsia itsiata xanë jamatabëpanebeyaxuabame? jai Jesús judíovijavabelia.

²⁰ Nexata judíovi jumaitsi Jesúsjavabelia:

—Dovathi baja cajena yajavaponaponame. Itsajivi ata raja apo jamatabëcabeyaxuabi, jai judíovi.

²¹ Jesús nexata jumaitsi bajarapamonaejavabelia:

—Caejavayo Dioso pesaëta pinijicuene taexanaejava exanajë penacueraevetsimatacabita. Nexata itsa pataneme bajarapacuene, daxita paxamë pajamatabëcuenenabenajacame penacueraevetsimatacabita taexanaexae bajarapacuene.

²² Paxamë ata penacueraevetsimatacabita ata panacuenebabiabame. Tsipaji penacuetonëyo paperabëcaucutabiabame penacueraevetsimatacabita ata ocho pamatacabibeje itsa xaina penaexanaecujinae. Baitsi paboupiperabëcaucutabiabame, Moiséspijinë baja cajena papecaitorobicuene. (Itsiata Moiséspijinë apo taxuxuabi bajarapacuene. Bajaraponëmi cajena pevajënaeya ata, panijasalinaivimi taxuxuaba bajarapacuene.)

²³ Bajarapacuenia penacuetonëyo paperabëcaucutabiabame penacueraevetsimatacabita ata, panejumecovënëtsinexa Moiséspijinë pitorobicuenia. ¿Detsa nexata xuajitsia xanë panebaraanaepaname penacueraevetsimatacabita pebi tajamatejemayaexanaejava yabara? ²⁴ Xaniavaetsia abaxë payapëtaenejevamë itsajivi pibisiacuene pexanaejava, pëtsa abaxë pananeconitsiaexaname. Matapania xaniavaetsia payapëtaename, payanijobianamenua, itsa baja xaniajai naneconita, baja rajane pananeconitsiaexanaename, jai Jesús judíovijavabelia.

Pacuenia Jesús navajunupaeba itsaverena pata yabara pelivaisi

²⁵ Itsamonae Jerusalén tomarata pejinavanapaevi najumaitsi Jesús yabara:

—¿Matsa ponë apo jaitarutsitsi pebeyaxuabinexatsije? ²⁶ ¡Pataema! Bajaraponë cuaicuajai tsanucae daxitajivi pitabarata. Itsiata itsajivi ata apo jumeitavetsi. Vajanacaevetsivi ata meta jumecovënëta bajaraponë pepacuene Dioso athëbëvetsica pitorobijavatsitsica jivi pecapanepaenexa. Bajaraxuata bajarapamonae apo jumeitavetsi. ²⁷ Vaxaitsi cajena yapëtanetsi itsaverena pata maponëje. Nexata acuenebi pijacuata: “Cristonë raja,” pejajava. Tsipaji Cristo yabara tajëvelia jumaitsi mapacueniaje: “Itsajivi ata apo yapëtae tsane itsaverena patsijitsia Cristo,” jai, najai Jerusalén tomarapijivi Jesús yabara.

²⁸ Nexata Jesús livaisi petsipaebijavata templobota, jumetane bajarapamonae pebaracuaicuajaijavatsi. Nexata Jesús ayaijumeta jumaitsi bajarapamonaejavabelia:

—Xanë yabara pajumaitsimë: “Yapëtanetsi bajaraponë. Yapëtanetsinua itsaverena pata bajaraponë,” pajamë. Itsiata baitsi jane apo patsinë tajamatabëcueneta. Biji rajane taneitorobinëtsica ponapona athëbëtatsia. Paxamë cajena apo payapëtaemë bajaraponë.

²⁹ Xanë yapëtaniji bajaraponë. Tsipaji athëbëvetsica tapatsinë. Bajaraponë baja cajena nitorobica mapanacuayabetsicaje, jai Jesús bajarapamonaejavabelia.

³⁰ Nexata picani Jesús bajarapamonae jamatabëvaetabatsi penaneconitsiaexanaenexatsi. Itsiata abaxë itsajivi ata apo vaetabitsi. Tsipaji abaxë Jesús apo tocopiapatsitsi pijamatacabipevaetabinexatsi. ³¹ Itsiata baitsi jane bajarapamonaeayajuvënëvi ayabitsaëto jumecovënëta Cristocuene. Nexata bajarapamonae najumaitsi:

—Itsa pina Cristo patsianica, Dioso pesaëta pinijicuene pexanaejava exanaena. Bajara maponë pepacuene Cristoje, ponë Dioso athëbëvetsica itorobijitsiatsica jivi pecapanepaenexa. Tsipaji nacatsitajëta pesaë. Pinijicuene pexanaejava exana Dioso pesaëta. Tsipaji cajena itsanë ata mapanacuata apo caëjëpaetsi bajarapitsipinijicuene pexanaenexa, najai bajarapamonae Jesús yabara.

Pacuenia fariseovi itoroba policíavi Jesús pevaetabinexatsi yabara pelivaisi

³² Fariseovi jumetane jivi pejumaitsijava: “Pepacuene rabaja maponë Cristoje,” pejajava Jesús yabara. Nexata fariseovibeje judíovi penamatacaitorobivibeje najamatabëcuenejëpabeje pitorobinexa policíavi. Nexata policíavi pona templobojavabelia

pevaetabinexatsi picani Jesús. Itsiata abaxë Jesús apo vaetabitsi. ³³ Jesús nexata templobota jumaitsi judíovijavabelia:

—Abaxë raja bajayayo itsiata pacayajavaponaponaenatsi. Bajaraxuacujinae jane baja naviatsianiajê taneitorobinëtsicajavabetsia. ³⁴ Paxamë picani panejaitsianame. Itsiata apo panecaxitajarabimë tsane. Tsipaji apo pacacaëjêpae tsane paneponaenexa itsabetsia ponaejitsianë, jai Jesús judíovijavabelia.

³⁵ Nexata judíovi nayanijoba ëpamonae.

—¿De tsaeta belia maponë pijaponaejitsiaje peponaenexa, itsajota vaxaitsi apo caxitajarabijitsiatsi? Ponaejitsia raeta griegovi pijatomaranëjavabelia, itsabelia judíovi jinavanapa. Griegovi raeta livaisi tsipaebijitsia Jesús. ³⁶ Jesús nacajumaitsi: “Paxamë picani panejaitsianame. Itsiata apo panecaxitajarabimë tsane. Tsipaji apo pacacaëjêpae tsane paneponaenexa itsabetsia ponaejitsianë,” nacajai. ¿De tsaeta pitsijamatabëcuene yabara bajarapacuenia Jesús nacajumaitsi? najai judíovi.

Apo pevereverecaemera yabara pelivaisi

³⁷ Pafiestamatacabi judíovi bobërëtonë exanabiaba, pecopiarucaematacabi, jivi bitso najamatabëcueneriviabiaya bajinavanapa. Nexata bajarapamatacabi jivi ayaibitsaëto pitabarata Jesús nonotabapuna. Ayaijumeta Jesús jumai tsanucae:

—Pajivi mera jitsipa, xanëjavaberena ponaë piapaenexa. ³⁸ Dioso pejumelivaisibaxutota jumaitsi mapacueniaje: “Pajivi nesivanajamatabëcuene copatsiana, bajarapajivi pejamatabëëthëtota xainaena daxitamatacabi pepitsaparucaemera. Baitsi bajarapajivi asivaya taeyabiabiana itsamonae ata. Nexata jamatabëcuene yavenonabiabiana itsamonae ata tanesivanajamatabëcuene copatsinexa, bajarapamonae ata pexainaenexa matacabi apo peverevere caejava,” jai Jesús judíovijavabelia.

³⁹ “Pajivi nesivanajamatabëcuene copatsiana, bajarapajivi pejamatabëëthëtota xainaena daxitamatacabi pepitsaparucaemera,” itsa jai Jesús, jumaitsi Espíritu Santo yabara. Baitsi pajivi jumecovënëta Jesús petsipaebilivaisi, tsijamatabëcaenatsi Espíritu Santo. Itsiata baitsi jane abaxë Espíritu Santo apo patsitsica. Tsipaji abaxë Jesús apo ponaë athëbëabetsia.

Pacuenia daxitajivi Jesús yabara apo najamatabëcuenejêpae yabara pelivaisi

⁴⁰ “Pajivi nesivanajamatabëcopatsiana, bajarapajivi pejamatabëëthëtota xainaena daxitamatacabi pepitsaparucaemera,” pejaijava Jesús, jivi itsa jumetane, itsamonae jumaitsi:

—Xaniajai rabaja. Maponë Dioso jumepaebinë profetanëje, ponë copiaevetavanapatsi pepatsijavanexatsica, jai bajarapamonae.

⁴¹ Itsamonae pijinia jumaitsi:

—Jume raja. Bajara maponë Cristoje, ponë Dioso athëbëvetsica itorobijitsiatsica jivi pecapanepaenexa, jai itsamonae.

Itsiata itsamonae jumaitsi:

—¡Apo Cristo raja! Tsipaji Cristo Galilea nacuverena apo patsi tsipae. ⁴² Dioso baja cajena pejumelivaisibaxutota jumaitsi pacuenia Davidpijinë pemomoxiyajuvënëne naexanaejitsia Cristo. Bajaraponë peneta naexanaena Belén tomarata, patomarata Davidpijinë bajayata ponapona, jai bajarapamonae.

⁴³ Bajarapacuenia nexata jivi ayaibitsaëto apo najamatabëcuenejêpae Jesús yabara.

⁴⁴ Itsamonae picani Jesús jamatabëvaetabatsi penaneconitsiaexanaenexatsi. Itsiata itsajivi ata apo vaetabitsi.

Pacuenia Jesús yabara judíovi pevetsivi apo jumecovënëtsi Cristonëcuene yabara pelivaisi

⁴⁵ Papolicíavi picani fariseovibeje judíovi penamatacaitorobivibeje itorobalia Jesús pevaetabinexatsi, itsiata apo vaetabitsi. Naviabalia baja cobesa. Nexata fariseovibeje judíovi penamatacaitorobivibeje jumaitsi policíavijavabelia Jesús yabara:

—¿Detsa xuajitsia apo pacaponaemërena bajaraponë? jai fariseovibeje judíovi penamatacaitorobivibeje.

⁴⁶ Nexata policíavi jumaitsi:

—Bajaraponë Dioso pitorobicueniatsi, xaniavaetsia jivi livaisi tsipaeba, itsajivi ata apo pepaebicuenia. Bajaraxuata apo pavaetabinë patacaponaenexarena, jai policíavi.

⁴⁷ Nexata fariseovi jumaitsi:

—¿Paxamë ata tsabaja pacayamaxëitojoroba bajaraponë? ⁴⁸ Caenë ata vajanacaevet-siviyajuvënënë, fariseoviyajuvënënë ata, apo jumecovënëtsi baja cajena bajaraponë Cristonëcuene. ⁴⁹ Pamonaë jumecovënëta bajaraponë Cristonëcuene, apo yapëtae pacuenia bajayata Dioso Moiséspijinëta penajumecopatsilivaisi jumaitsi jivi pejumecovënëtsinexa. Nexata bajarapamonae apo peyapëtaexae bajarapalivaisi, naneconita Diosojavabelia. Nexata Dioso naneconitsiaexanaenatsi, jai fariseovi policíavijavabelia Jesús Cristonëcuene pejumecovënëtsivi yabara.

⁵⁰ Nicodemo, ponë copiaya Jesús taeyojopalia meravi, bajaraponë naeca bajara-jota. Bajaraponë Nicodemo fariseoviyajuvënënë. Nicodemo nexata jumaitsi pevëna fariseovijavabelia:

⁵¹ —Vajalivaisi cajena nacaitaveta itsajivi ata vajananeconitsiaexanaeyaniva, abaxë copiaya xaniavaetsia navajunupaebinejeva paneconi xaina bajarapajivi, jai Nicodemo.

⁵² Nexata bajarapamonae jumaitsi Nicodemojavabelia:

—¿Xamë ata tsabaja Galilea nacuapijinëmë necajumecovënëtsi bajaraponë Cristonëcuene? Lebare Dioso pejumelivaisibaxuto. Yapëtaename pacuenia jumaitsi. Caenë ata cajena Diosojumepaebinë profeta apo patsi Galilea nacuajavaverena, jai bajarapamonae.

Petiriva pibisiacuene pexanaeva pamona pepëya yabara pelivaisi

⁵³ Fariseovibeje judíovi penamatacaitorobivibeje pebijataecujinae policíavi, fariseovi baja caenë canacujitsia naviaba pijabonëjavabelia.

8

¹ Jesús pona Olivovënë tsutojavabelia. ² Nexata meravia pitsijavata, bajayacunua, Jesús icatsia naviarena temploboyaberena. Nexata daxitajivi itaxutuanacae-tuanatsi. Nexata Jesús ecojopa templobota. Livaisi tsipaeba bajarapamonaejavabelia. ³ Nexata temploboyaberena judíovi pecujarubivi, fariseovi yajava, caparena petiriva Jesúsjavaberena. Bajarapamonae petiriva vaetaba pamona pepëya itsanëjavabelia pevitota pibisiacuene pexanaponaponaejavata. Nexata petiriva nutatsi daxitajivi pitabarata. ⁴ Nexata judíovi pecujarubivi, fariseovi yajava, jumaitsi Jesúsjavabelia:

—Jesús, mara povaje pavaetabajë pamona pepëya itsanëjavabelia pibisiacuene pexanaponaponaejavata. ⁵ Dioso Moiséspijinëta penajumecopatsilivaisi nacaitoroba baja cajena vajatseconaenexa ibotonëta bajarapitsiva vajabeyaxuabinexa bajarapacuenia. ¿Detsa paitsinë tsane mapovaje? jai bajarapamonae Jesúsjavabelia.

⁶ Bajarapamonae jumaitsi bajarapacuenia Jesús saya pejamatabëcuenejëtsinexatsi. Nexata Dioso Moiséspijinëta penajumecopatsilivaisivecua, saicayacuenia, Jesús itsa jumecanaviata, bajarapamonae neconitsijitsiatsi picani. Itsiata Jesús jamatabëcueneyapëtanë pacuenia bajarapamonae sivanajamatabëxainatsi. Nexata Jesús ira taeyecaxuaba. Pecobesitota ira yaquineca. ⁷ Bajarapamonae bitso yanijobapona Jesúsjavabelia. Nexata jane baja Jesús nonotapuna. Jumaitsi bajarapamonaejavabelia:

—Ponë paxamëyajuvënënë pibisiacuene apo pexanaenë, bajaraponë copiata iboto bixanae bajarapovajavabelia, jai Jesús.

⁸ Nexata icatsia Jesús ecareca. Ira taeyeca icatsia. Ira yaquineca icatsia. ⁹ Nexata bajarapamonae itsa jumetane bajarapacuenia Jesús pejumaitsijava, bajarapamonae

najamatabënapita, caenë canacujitsia, pibisiacuene pexanavanapaejava. Nexata bajarapamonae, caenë canacujitsia, templobovecua pitsapapona. Copiaya perujuvi pitsapa. Bajaraxuacujinae pevëjëavi pitsapa. Itsa baja daxita pitsapa, caenë Jesús templobota nacopateca petiriva yajava. Bजारapova abaxë nuca bajarajota. ¹⁰ Nexata Jesús itsa nonotapuna, caeva taenuta. Nexata Jesús jumaitsi petirivajavabelia:

—¿Detsa belia pona pamonaе caneconita picani? ¿Itsanë ata tsaja apo cabixanae ibotota nijaneconi yabara pecananeconitsiaexanaenexa? jai Jesús petirivajavabelia.

¹¹ Nexata bajarapova jumaitsi:

—Jume raja. Caenë ata apo nebixanae ibotota, jai bajarapova.

Nexata Jesús jumaitsi:

—Xanë ata apo cananeconitsiaexanaetsi. Ponare baja. Pëtsa baja icatsia pibisiacuene exaname, jai Jesús bajarapovajavabelia.

Jesús mapanacuapijivije pexaniajailivaisita pejamatabëcueneitayotsinë yabara pelivaisi

¹² Jesús icatsia templobota jumaitsi jivijavabelia:

—Xanë raja pexaniajailivaisita daxitanacuapijivi jamatabëcueneitayotsianajë. Pajivi nepënaponaena, bajarapajivi jamatabëcueneitayotsianajë. Nexata xainaena matababi apo peverevereaejava. Bजारapajivi itsamatabijavabelia ata apo ajamatabëcueneitaquiri tsane, jai Jesús jivijavabelia.

¹³ Nexata fariseovi jumaitsi Jesúsjavabelia:

—Xamë saya nijacuata najamatabëcuenelivaisipaebame. Nexata apo payapëtaenë nexaniajaicuene. Bajaraxuata apo pacajumecovënëtsitsi, jai fariseovi.

¹⁴ Jesús nexata jumaitsi fariseovijavabelia:

—Najamatabëcuenelivaisipaebi atanë tajacuata, itsiata cajena xaniajanë. Tsipaji xanë yapëtaniji itsaverena patajë. Itsabelia ata ponaejitsianë, yapëtaniji. Itsiata paxamë apo payapëtaemë itsaverena patajë. Itsabelia ata ponaejitsianë, apo payapëtaemë. ¹⁵ Paxamë paexanabiabame pacuenia baexana mapanacuapijivije. Itaxutojema jivi pananeconitsiaexanabiabame payapëtaenejevamë pepacuene paneconivajëto xaina. Xanë abaxë apo naneconitsiaexanaenë itsajivi ata. ¹⁶ Itsiata itsamatababi, itsa naneconitsiaexanaenajë Diosojavabelia pijaneconi pexainaeви, naneconitsiaexanaenajë paneconivajëtota xaina. Tsipaji caenëapo apo naneconitsiaexanaenë tsane. Taxa Dioso, ponë nitorobica, bajaraponë neyajava tsane jivi tananeconitsiaexanaematababi. ¹⁷ Dioso Moiséspijinëta penajumecopatsilivaisi peyaquinaebaxutota jumaitsi mapacueniaje: “Palivaisi anijajivibeje najumejëpaeya paebabeje, bajarapalivaisi bepajumecovënëtame,” jai. ¹⁸ Xanë baja cajena najamatabëcuenelivaisipaebajë. Taxa ata, ponë nitorobica, nevajunupaeba. Nexata baja panijanënëbeje najumejëpaeya pacatsipaebatsibeje xanë talivaisi, jai Jesús fariseovijavabelia.

¹⁹ Nexata fariseovi jumaitsi:

—¿Detsa jota nexata ponapona axa? jai.

Nexata Jesús jumaitsi fariseovijavabelia:

—Paxamë ra cajena apo paneyapëtaemë. Taxa ata apo payapëtaemë. Itsa paneyapëtaejitsipame, nexata taxa ata payapëtaejitsipame, jai Jesús fariseovijavabelia.

²⁰ Bजारapacuenia Jesús jumaitsi livaisi petsipaebijavata templobota. Itsajota ofrendacuenia palata pejebabiabicajonianë bobena, bajarajota Jesús livaisi tsipaebanuca. Itsiata abaxë itsajivi ata Jesús apo vaetabitsi penaneconitsiaexanaenexatsi. Tsipaji abaxë pijamatababi apo tocopiapatsitsi pevaetabinexatsi.

Pacuenia Jesús tajëvelia jumaitsi: “Paxamë apo pacacaëjëpae tsane paneponaenexa itsabelia ponaejitsianë,” jai yabara pelivaisi

²¹ Jesús icatsia templobota tajëvelia jumaitsi fariseovijavabelia:

—Xanë pacavecuaponaenatsi. Nexata paxamë panejaitsonianame. Paxamë pibisiacuene paneexanaeneconi, Dioso apo pacavecuajibiaexanae tsane. Nexata panijaneconi payajavatëpaename. Bajaraxuata paxamë apo pacacaëjêpae tsane paneponaenexa itsabelia ponaejitsianë, jai Jesús fariseovijavabelia.

²² Nexata judíovi jamatabëcuenenavëxaniabiaya najumaitsi Jesús yabara:

—Covë nabeyaxuabijitsia. Bajaraxuata nacajumaitsi: “Apo pacacaëjêpae tsane paxamë paneponaenexa itsabelia ponaejitsianë,” nacajai, najai judíovi.

²³ Nexata Jesús jumaitsi judíovijavabelia:

—Paxamë baja cajena mapanacuapijivimêje. Xanë saicaya athëbëvetsica tapatsinë. Paxamë mapanacuata panejinavanapaevije. Xanë raja maapo panacuapijinênêje.

²⁴ Bajaraxuata pacajumaitsi: “Paxamë pibisiacuene paneexanaeneconi, Dioso apo pacavecuajibiaexanae tsane. Nexata panijaneconi payajavatëpaename,” pacajaitsi. Nexata paxamë panijaneconi payajavatëpaename itsa apo panejumecovënëtsimë patacavecuajibiaexanaejavanexa pibisiacuene paneexanaeneconi, jai Jesús fariseovijavabelia.

²⁵ Nexata fariseovi jumaitsi Jesúsjavabelia:

—¿Detsa xamë ponëmê? jai.

Jesús nexata jumaitsi:

—Pacanavajunupaebatsi rabaja. Tataxuxuabijavaveliacujinae livaisi patacatsipaebijava, pacanavajunupaebaponatsi baja cajena. ²⁶ Paxamë bitso pibisiacuene paexanabiabame. Nexata ayailivaisi xainajë itsamonaejavabelia patacavajunupaebinaexa pibisiacuene paneexanaejava. Nexata pibisiacuene paneexanaeneconi yabara, necaëjêpa picani patacananeconitsiaexanaenexa. Itsiata baitsi jane ponë nitorobica, petsipaebinë pexaniajailivaisi. Pacuenia bajaraponë netsipaeba xanëjavaberena, bajarapacuenia juya xanë tsipaebajë mapanacuapijivijavabeliaje, jai Jesús fariseovijavabelia.

²⁷ Itsiata baitsi jane fariseovi apo jumeyapëtae bajarapacuenia Jesús petsipaebijava paxa Dioso yabara. ²⁸ Bajaraxuata Jesús jumaitsi bajarapamonaejavabelia:

—Itsa xanë, Daxitajivi Pematapijinênë, paneyotarutsiaexanaename cruzajavabelia patanebeyaxuabiaexanaenexamë, nexata matapania bajarapamatacabi paneyapëtaename ponëcuenenë. Nexata bajarapamatacabi payapëtaenamenua patacatsipaebijava apo tajamatabëcuenepijilivaisi. Biji rajane pacuenia taxa copiata netsipaeba, bajarapacuenia juya pacatsipaebatsi paxamëjavabelia. ²⁹ Taxa, ponë nitorobica, neyjavaponapona baja cajena. Tajaepato apo neponaponaeyaexanae. Tsipaji exanabiabajë pacuene yabara taxa nesivajamatabëcuenebarëyajitsia, jai Jesús bajarapamonaejavabelia.

³⁰ Itsa Jesús jumaitsi bajarapacuenia, ayaibitsaëtoxaneto judíovi jumecovënëtatsi Cristonëcuene: “Xaniajai cajena. Maponêje Dioso itorobicatsi,” jamatabëjai judíovi Jesús yabara.

Dioso pexi yabara pelivaisi, dovathi ata pexi yabara pelivaisi

³¹ Pajudíovi jumecovënëta Cristonëcuene, bajarapajudíovijavabelia Jesús jumaitsi:

—Itsa paxamë tsiteca pajumecovënëtavanapaename patacatsipaebilivaisi, nexata baja pepacuene patajajivimê tsane. ³² Nexata palivaisi pacatsipaebatsi, payapëtaename baja pexaniajailivaisicuene. Nexata baja itsa payapëtaename bajarapapexaniajailivaisi, pacopabianame baja itsanë papecaitorobicuenia panetoexanabiabijavami, jai Jesús bajarapajudíovijavabelia.

³³ Nexata pajudíovi apo jumecovënëtsi Cristonëcuene, jumaitsi Jesúsjavabelia:

—Paxanë rabaja cajena Abrahampijinë papemomoxinë. Paxanë dajubicuenia apo panecanajetsi itsanëjavabelia amoneya patatonacuenebabiabinexa. “Pacopabianame baja itsanë papecaitorobicuenia panetoexanabiabijavami,” itsa panejamë,

¿detsa pitsilivaisi yabara panejumaitsimë? jai Jesúsjavabelia pajudíovi apo jumecovënëtsi Cristonëcuene.

³⁴ Jesús nexata jumaitsi bajarapajudíovijavabelia:

—Xaniajanë pacuenia pacatsipaebijitsiatsi. Daxita pamonaepibisiacuene pexanaevi, jamatabëcueneitorobabiabatsi dovathi pejamatabëcueneta. ³⁵ Ponë itsanë pijajivitonë naexana, bajaraponë itsiata pijatuxanenë apo pexiyajuvënënë. Ponë petuxanenë pexiyajuvënënë, daxitamatacabijavabelianexa petuxanenë pexënato tsaponaponae.

³⁶ Nexata pijinia xanë, Dioso pexënatonë, itsa copiarucaeyaexanaenajë dovathi papecaitorobabiabijavami, copiarucaeyaexanaenajë daxitamatacabijavabelianexa. Nexata baja dovathi apo pacaitorobabiabi tsane matavëjëa pibisiacuene paneexanaenexa.

³⁷ Yapëtaniji cajena Abrahampijinë papemomoxicuenemë. Itsiata baitsi jane jamatabëpanebeyaxuabame. Tsipaji apo panejumecovënëtsimë patacatsipaebilivaisi. ³⁸ Xanë rabaja pacuenia taxa netsitajëta, jivi tsipaebabiabajë. Paxamë ata paexanabiabame pacuenia paneaxajivi pacaitoroba, jai Jesús judíovijavabelia.

³⁹ Nexata judíovi jumaitsi:

—Pataxajivi baja cajena pexaniajamatabëcuenevi. Abrahampijinë rabaja cajena patamopijinëmi, patajasalinainëmi, jai judíovi.

Jesús nexata jumaitsi bajarapamonaejavabelia:

—Itsa pepacuene paxamë Abrahampijinë papemomoximë tsipae, paexanaejitsipame peneta pacuenia exanabiaba Abrahampijinëmi. ⁴⁰ Pacatsipaebi atatsi pexaniajailivaisi, pacuenia taxa Dioso netsipaeba, itsiata paxamë jamatabëpanebeyaxuabame. ¡Abrahampijinë cajena caeto ata apo exanae bajarapitsicuene! ⁴¹ Paxamë paexanabiabame pacuenia itsanë paneaxa pacaitorobabiaba, jai Jesús judíovijavabelia dovathi yabara.

Nexata judíovi jumaitsi:

—Paxanë cajena mapanacuataje pataenajivi apo panenacoxitsi itsanëjavabelia pataxajivivecua pibisiacuene pexanaecujinae. Paxainajë caenë pataxa, athëbëpijinë. Pataxa rabaja Dioso, jai bajarapamonae.

⁴² Nexata Jesús jumaitsi bajarapamonaejavabelia:

—Itsa pepacuene Dioso paneaxa tsipae, nexata paxamë asivaya panetaejitsipame. Tsipaji Diosojavavetsica tapatsinë. Majotaje ponaponajë. Xanë raja saya taja-matabëcueneta apo patsinëtsica. Dioso raja nitorobica. ⁴³ ¿Detsa xuajitsia paxamë apo panejumeyapëtaemë patacatsipaebilivaisi? Apo pajitsipaemë patanenamuxunaevetsinexamë bajarapalivaisi. ⁴⁴ Paxamë rabaja cajena paneaxa dovathi. Papijajivimë. Pejitsipaecuenia jamatabëpatoexanabiabame. Dovathi rabaja cajena jivibenë Dioso nacua pexanaejava petaxuxuabijavaveliacujinae. Pexaniajailivaisi apo najamatabëxainae. Caeto ata cajena pexaniajailivaisi apo paebi. Itsa najumetsënëta, bajaraponë pijacujiru baja cajena. Tsipaji penajumetsënëtsinë. Jivi ata najumetsënëtsiaexanabiaba. ⁴⁵ Xanë baja cajena pexaniajailivaisi pacatsipaebatsi. Itsiata apo panejumecovënëtsimë. ⁴⁶ ¿Jipatsa paxamëyajuvënënë netane pibisiacuene taexanaejava? Ajibi cajena. Itsacuenejavayo ata, xua pibisiacuene, apo exanaenë. Pexaniajailivaisi pacatsipaebabiabi atatsi, ¿detsa xuajitsia itsiata apo panejumecovënëtsimë?

⁴⁷ Pajivi Dioso pijajivitonë, bajarapajivi namuxunaeveta Dioso pejumelivaisi. Itsiata baitsi jane paxamë Dioso apo papijajivimë. Bajaraxuata apo pajitsipaemë patanenamuxunaevetsinexamë Dioso pejumelivaisi, jai Jesús judíovijavabelia.

Pacuenia Cristo, ponë Dioso itorobica, ponapona baja cajena Abrahampijinë pevajënaeya ata yabara pelivaisi

⁴⁸ Judíovi jumaitsi Jesúsjavabelia:

—Paxanë itsa pacajumaitsi: “Xamë raja Samaria nacuapijinëmë, dovathi neyajavaponaponaenë,” itsa pacajaitsi, paxaniajanë cajena, jai judíovi Jesúsjavabelia.

⁴⁹ Jesús nexata jumaitsi judíovijavabelia:

—Xanë cajena dovathi apo yajavaponaponaenë. Xanë taxa Dioso yaiyataeya ponaponajë. Itsiata paxamë apo paneyaiyataemë. ⁵⁰ Xanë raja xua exanaponajë, apo exanaenë jivi saya taneyaiyataenexa. Itsiata baitsi jane taxa netojitsipa jivi taneyaiyataenexa. Bajaraponë naneconitsiaexanaena pamonaë apo neyaiyatae. ⁵¹ Xaniajanë pacuenia pacatsipaebijitsiatsi. Pajivi jumecovënëtsiana tatsipaebilivaisi, bajarapajivi tēpae ata tsane, pepacujiru apo tēpae tsane daxitamatacabijavabelianexa. Nexata xainaena matacabi apo peverevereaejava, jai Jesús judíovijavabelia.

⁵² Nexata judíovi jumaitsi:

—Aeconoxae pepacuenë dovathi pecayajavaponaponaëjava, payapētaniji. Tsipaji Abrahampijinëmi tēpa. Daxita Diosojumepaebivimi profetavi ata, tēpa. Itsiata xamë jumaitsimë tsaponae: “Pajivi jumecovënëtsiana tatsipaebilivaisi, bajarapajivi tēpae ata tsane, pepacujiru apo tēpae tsane daxitamatacabijavabelianexa,” jamë tsaponae. ⁵³ Vamopijinëmi Abrahampijinë, ayaijamatabëcuenenëmi ata, bajayata tēpa. Daxita Diosojumepaebivimi profetavi ata tēpa. ¿Xamë tsaja Abrahampijinëmi matatoxenetsia beayaijamatabëcuenenëmë nataneme? ¿Detsa beponëmë nataneme? jai judíovi.

⁵⁴ Jesús nexata jumaitsi judíovijavabelia:

—Itsa xanë tajacuata najumaitsinë tsipae: “Xanë bitso ayaijamatabëcuenenënë,” itsa janë tsipae, nexata ajumematamobinë tsipae. Itsiata baitsi jane taxa Dioso, ponë yabara paxamë ata: “PatajaDioso raja,” pajamë, bajaraponë neyaiyatane. ⁵⁵ Itsiata paxamë apo payapētaemë bajaraponë. Xanë cajena yapētaniji. Nexata xanë Dioso yapētae atanë, itsa yavajunuaxainaejitsipajë, “Apo yapētaenë cajena bajaraponë,” itsa janë tsipae Dioso yabara, najumetsënëtsipajë pacuenia paxamë panajumetsënëtabiabame. Itsiata xanë pepacuenë Dioso yapētaniji. Jumecovënëtajēnua pacuenia Dioso nitorobabiaba. ⁵⁶ Bajayata Abrahampijinë panijasalinainëmi jamatabëcuenebarëya. Tsipaji tajëvelia yapētane mapanacuayabetsicaje tapatsijavanexatsica. Nexata Abrahampijinëmi nesi-vajamatabëcuenebarëya baja cajena, jai Jesús judíovijavabelia.

⁵⁷ Nexata judíovi jumaitsi Jesúsjavabelia:

—Abaxë raja xamë apo xainaemë cincuenta pavaibeje ata. ¿Detsa pacuenia nexata taejitsipame Abrahampijinë? Abrahampijinë baja cajena pepo bajayatami tēpa, jai judíovi Jesúsjavabelia jumeaebiaya.

⁵⁸ Jesús nexata jumaitsi judíovijavabelia:

—Xaniajanë pacuenia pacatsipaebijitsiatsi. Xanë raja cajena ponaponajë Abrahampijinë pevajēnaeya ata, jai Jesús judíovijavabelia.

⁵⁹ Nexata bajarapacuenia Jesús itsa jumaitsi judíovijavabelia, judíovi nota ibotonë. Tseconaejitsiatsi picani Jesús ibotonëta. Itsiata baitsi jane Jesús namatayatsia pitsapa templobovecua bajarapamonae petuatuajëalia. Jesús baja nexata judíovi itsajavabelia vecuapona.

9

Pacuenia Jesús itaxutoxanepanaeyaexana ecënaenë yabara pelivaisi

¹ Jesús najetaruca namutua. Nexata tane penaexanaejavaveliacujinae bitso pitaxutotsëcënaenë. ² Nexata Jesús pijajivi jumaitsi Jesúsjavabelia:

—Patajatuxanenë, ¿detsa meta xuajitsia maponë naexana bitso pitaxutotsëcënaenëje? ¿Paxa tsaeta pibisiacuene pexanaejamatabëcuene? Itsa jume, ¿pena tsaeta pibisiacuene pexanaejamatabëcuene maponë itaxutotsëcënaeje? Itsa jume, ¿baja tsaeta ponë pijacuata pibisiacuene natoexana? jai Jesús pijajivi.

³ Jesús nexata jumaitsi pijajivijavabelia:

—Jume raja. Mara ponėje paxa, pena ata, pibisiacuene pexanaejamatabëcuene, apo itaxutotsëcënaeje. Naexana bitso pitaxutotsëcënaenë saya daxitajivi petaenexatsi Dioso icatsia pitaxutoxanepanaeyaexanaejavatsi. ⁴ Payapëtaneme rabaja mapacueneje. Maticabita xanepana vajanacuenebinexa. Itsa baja meravi, acuenebi vajanacuenebinexa. Bajara pijinia itsinë xanë ata. Taponaponaematacabi xanepana tatonacuenebinexa ponë nitorobica. Itsa pamatacabi nebeyaxuabiana, acuenebi tsane tatonacuenebinexa. ⁵ Abaxë paepatojebi ponaponaenajë mapanacuataje, daxitajivi jamatabëcueneitayotsianajë pexaniajailivaisita, jai Jesús pijajivijavabelia.

⁶ Bajarapacuenia Jesús pejumaitsicujinae irabelia suabaxuaba. Peionitota tsorobojavayo exana. Nexata itaxutoexaba bitso pitaxutotsëcënaenë. ⁷ Nexata Jesús jumaitsi bitso pitaxutotsëcënaenëjavabelia:

—Ponare baja. Naitaxutoquiaremelia pecueyetsipucayojavabelia, Siloévënë pucayojavabelia, jai Jesús.

“Siloé,” itsa jai bajarapamonae pijajumeta, mapajumeta pejumaitsijume: “Pitorobinëtsitsica,” pejaijume.

Nexata bitso pitaxutotsëcënaenë lia baja. Naitaxutoquiatojopalia. Naviarena baja pitaxutoxanepanaenë. ⁸ Nexata itsajota ponapona bitso pitaxutotsëcënaenëmi, imoxoyo penaevi, pamonaeta taeyabiabatsi, daxita bajarapamonae nayanijoba.

—¿Matsa ponë palata amoneya pevajëcabiabecaenëmije? najai bajarapamonae.

⁹ Nexata itsamonae jumaitsi:

—Jājā, bajara covë ponë, jai.

Itsiata itsamonae jumaitsi:

—Apo ponë raja. Bajara saya itsiata beponë, jai.

Nexata pitaxutotsëcënaenëmi pijacuata jumaitsi:

—Jājā, xanë rabaja, jai bajaraponë.

¹⁰ Nexata bajarapamonae jumaitsi pitaxutotsëcënaenëmijavabelia:

—¿Detsa nexata pacuenia taneme baja? jai.

¹¹ Nexata pitaxutotsëcënaenëmi jumaitsi:

—Ponë raja Jesúsvenënë, exana tsorobojavayo. Nitaxutoexaba. Nexata nejumaitsi: “Liamëre pecueyetsipucayojavabelia, Siloévënë pucayojavabelia. Naitaxutoquiaremelia,” nejai Jesús. Nexata baja lianë. Itsa naitaxutoquiatajë bajarapapucayota, taniji baja, jai pitaxutotsëcënaenëmi.

¹² Nexata bajarapamonae jumaitsi:

—¿Detsa jota bajaraponë ponapona? jai.

Nexata icatsia pitaxutotsëcënaenëmi jumaitsi:

—Apo yapëtaenë itsajota ponapona, jai.

Pacuenia bitso pitaxutotsëcënaenëmi caponaliatsi fariseovijavabelia peyanijobinexatsi yabara pelivaisi

¹³ Pitaxutotsëcënaenëmi pitaxutoxanepanaejava jivi itsa tane, yanijobatsi peyapëtaenexa pacuenia itaxutoxanepana. Pamonaeta yanijobaponatsi, bajarapamonae pitaxutotsëcënaenëmi caponaliatsi fariseovijavabelia. ¹⁴ Pamatacabi Jesús exana tsorobojavayo pitaxutoxanepanaeyaexanaenexa bitso pitaxutotsëcënaenëmi, bajarapamatacabi judíovi penacueraevetsimatacabi. ¹⁵ Nexata jane baja fariseovi yanijoba pitaxutotsëcënaenëmijavabelia.

—¿Detsa pacuenia nexata itaxutoxanepaname? jai fariseovi.

Nexata pitaxutotsëcënaenëmi jumaitsi:

—Nitaxutoexaba raja tsorobojavayota. Bajaraxuacujinae naitaxutoquiatajë. Nexata aeconoxae taniji baja, jai pitaxutotsëcënaenëmi fariseovijavabelia.

¹⁶ Nexata fariseovi najumaitsi:

—Ponë bajarapacuene exana, Dioso apo pitorobinëtsi cajena. Tsipaji apo yaiyatae penacueraevetsimatacabi, najai fariseovi.

Itsiata bajarapamonaeyajuvënëvi itsamonae najumaitsi:

—Itsa pibisiacuene pexanaenë tsipae, apo cajëpae tsipaetsi bajarapitsipinijicuene pexanaenexa, najai itsamonae.

Nexata daxita fariseovi apo najamatabëcuenejëpae. ¹⁷ Nexata icatsia fariseovi yanijoba pitaxutotsëcënaenëmijavabelia.

—¿Detsa jane xamë bejamatabëitsimë ponë caitaxutoxanepanaeyaexana yabara? jai fariseovi.

Nexata pitaxutotsëcënaenëmi jumaitsi:

—Bajaraponë cajena Diosojumepaebinë profeta, jai.

¹⁸ Judíovi apo jumexaniatae pitaxutoxanepanaeyaexanaejavatsi yabara. Nexata bajarapamonaenë junata pitaxutotsëcënaenëmi paxa, pena yajava. ¹⁹ Judíovi jane baja yanijoba pitaxutotsëcënaenëmi paxabeje penabejejavabelia. Jumaitsi:

—¿Baja tsa maponë panexënatobejeje, ponë penaexanaejavaveliacujinae pitaxutotsëcënaenëmije? ¿Detsa pacuenia aeconoxae baja tane? jai judíovi.

²⁰ Nexata pitaxutotsëcënaenëmi paxabeje penabeje jumaitsibeje:

—Maponëje pataxënatobeje payapëtanijibeje cajena. Payapëtanijibejenua penaexanaejavaveliacujinae pitaxutotsëcënaejava. ²¹ Itsiata baitsi jane aeconoxae apo payapëtaenëbeje pacuenia baja itaxutoxanepana. Apo payapëtaenëbejenua ponë itaxutoxanepanaeyaexanatsi. Bajaraponë taxënatopayanijobare. Penaveretsinë rabaja. Pijacuata pacatsipaebiana, jai pitaxutotsëcënaenëmi paxabeje penabeje judíovijavabelia.

²² Judíovi baja cajena najamatabëcuenejëpa pevajënaeitavetsinexa penajoneyaniva judíovi penacaetuatabibojavaberena pajivi jumaitsi: “Jesús rabaja cajena Cristo, ponë Dioso athëbëvetsica itorobijitsiatsica jivi pecapanepaenexa,” pejaijivi. Bajaraxuata pitaxutotsëcënaenëmi paxabeje penabeje bajarapacuenia jumecanaviatabeje pecujunavixaebeje judíovi. ²³ Bajaraxuata bajarapajivibeje jumaitsibeje: “Taxënatojavabelia payanijobare. Penaveretsinë rabaja,” jaiibeje.

²⁴ Nexata judíovi icatsia junata pitaxutotsëcënaenëmi. Jumaitsi bajaraponëjavabelia:

—Panetsipaebare xaniavaetsia Dioso pitabarata. Paxanë baja cajena payapëtaniji bajaraponë pibisiacuene pexanaenëcuene, jai judíovi Jesús yabara.

²⁵ Nexata pitaxutotsëcënaenëmi jumaitsi:

—Pibisiacuene meta pexanaenë. Xanë apo yapëtaenë. Itsiata baitsi jane nitaxutoxanepanaeyaexana taitaxutotsëcënaenëmi, jai pitaxutotsëcënaenëmi.

²⁶ Nexata icatsia judíovi jumaitsi:

—¿Detsa pacuenia catoexana netaenexa? jai judíovi.

²⁷ Nexata pitaxutotsëcënaenëmi jumaitsi judíovijavabelia:

—Pacatsipaebatsi rabaja picani xaniavaetsia. Itsiata apo panejumecovënëtsimë. ¿Detsa xuajitsia pajitsipame patacatsipaebaponaenexa icatsia? ¿Paxamë ata tsaja pajitsipame panejumecovënëtsinexa bajaraponë papijajivinexamë? jai pitaxutotsëcënaenëmi judíovijavabelia.

²⁸ Nexata judíovi bijatanetsi pitaxutotsëcënaenëmi. Jumaitsi:

—Xamë raeta baja cajena bajaraponë pijajivitonëmë. Paxanë raja saicaya Moiséspijinë petsipaebilivaisi pajumecovënëtavanapajë. ²⁹ Paxanë baja cajena payapëtaniji pepacuene Dioso pebarëcuaiquaijajavatsi Moiséspijinë. Itsiata baitsi jane ponë cabarëcuaiquaijai, apo payapëtaenë itsaverena pata, jai judíovi.

³⁰ Nexata pitaxutotsëcënaenëmi jumaitsi judíovijavabelia:

—¿Detsa xuajitsia nitaxutoxanepanaeyaexanae ata, apo payapëtaemë itsaverena pata bajaraponë? ³¹ Yapëtanetsi baja cajena mapacueneje. Diosojavabelia vajëtsi ata pamonaenë pibisiacuene pexanaevi, Dioso baja cajena apo namuxunaevetsi. Dioso

baja cajena banamuxunaeveta itsa vajētatsi pejitsipaecuenia yaiyataeya petojinavana-paevitsi. ³² Caeto ata mapanacuapijivi apo vënēlivaisitaetsi ponē caējēpatsi pitaxutoxanepanaeyaexanaenexa penaexanaejavaveliacujinae bitso pitaxutotsēcēnaenē. ³³ Peneta bajaraponē itsa apo patsi tsipae Diosojavavetsica, nexata apo caējēpaetsi tsipae pexanaenexa Dioso pesaēta pinijicuene pexanaejava, jai pitaxutotsēcēnaenēmi judíovijavabelia.

³⁴ Nexata judíovi jumaitsi:

—Xamē cajena pibisiacuene exaname nenaexanaejavaveliacujinae. ¿Itsiata tsaja caranata pibisiacuene nexanaenē jamatabēpanemuxujiobame? jai judíovi pitaxutotsēcēnaenēmijavabelia.

Nexata torotajarabaxuabatsi judíovi penacaetuatabiabibo pevecuapitsapaenexa.

*Pacuenia Dioso apo pejumecovënētsivi jamatabēcueneaitaquiri tsavanapae yabara peliv-
aisi*

³⁵ Jesús vënēlivaisitane pitaxutoxanepanaeyaexanaenē judíovi petorobajarabijavatsi judíovi penacaetuatabiabibo pevecuapitsapaenexa. Nexata Jesús itsa caxitajaraba pitaxutoxanepanaeyaexanaenē, Jesús jumaitsi pitaxutoxanepanaeya exanaenējavabelia:

—¿Najamatabēcopatame tsabaja Dioso pexēnatojavabelia? nayabarajai Jesús.

³⁶ Nexata ponē Jesús itaxutoxanepanaeyaexana, jumaitsi:

—¿Detsa ponē Dioso pexēnato tanajamatabēcopatsinexa bajaraponējavabelia? jai.

³⁷ Jesús nexata pijacuata nayabarajumaitsi:

—Ponē rabaja cabarēcuaicuaijai, Dioso rabaja pexēnato, nayabarajai Jesús.

³⁸ Nexata ponē Jesús itaxutoxanepanaeyaexana, pematabacabēta nuca Jesús pitabarata. Jumaitsi Jesúsjavabelia:

—Tajatuxanenē, casivanajamatabēcopatatsi baja cajena, jai.

³⁹ Nexata Jesús jumaitsi pitaxutoxanepanaeya exanaenējavabelia:

—Xanē patajē mapanacuayabetsicaje jivi penayapētaenexa pijaneconi pexainaejava. Nexata pamonaē pexaniajailivaisi tatsipaebijavata najamatabēcueneitayapētaena pija-matabēcueneitacquirijava, bajarapamonaē jamatabēcueneitayotsianajē pexaniajailivaisita. Pamonaē jemajai. Apo yapētae ata pexaniajailivaisi, jamatabējumaitsi: “Vaxaitsi rabaja yapētanetsi pexaniajailivaisi,” jamatabējai, bajarapamonaē apo jamatabēcueneitayotsinē tsane, jai Jesús.

⁴⁰ Nexata fariseovi, bajarajota penubenaevi, jumetane bajarapacuenia Jesús pejumaitsiyava. Nexata fariseovi jumaitsi Jesúsjavabelia.

—¿Paxanē ata tsabaja pajamatabēcueneitacquirinē tsavanapae? jai.

⁴¹ Jesús nexata jumaitsi fariseovijavabelia:

—Jājā, bitso pajamatabēcueneitacquirimē tsavanapae. Tsipaji jamatabēcuenenavēxaniabiaya pajamatabējumaitsimē tsabiabi: “Vaxaitsi rabaja jumecovënētatsi Dioso,” pajamatabējamē tsabiabi. Nexata Dioso pejumelivaisi payapētae atamē, itsiata pibisiacuene paexanabiabame. Nexata bitso pananeconitame Diosojavabelia. Paxamē Dioso pejumelivaisi apo paneyapētaexae, itsa pajamatabēcueneitacquirimē tsipae, nexata bitso apo pananeconitsimē tsipae Diosojavabelia, jai Jesús fariseovijavabelia.

10

Oveja pecajoneyabiabicorral yabara pelivaisi

¹ Jesús jumaitsi fariseovijavabelia:

—Xaniajanē pacuenia pacatsipaebijitsiatsi. Oveja pecajoneyabiabicorral enēabelia saicayanē pejonenexa, apo jone corral baupajava. Junaya saya peyenepanatsia pejonenexalia. Bajaraponē penacobetoxotsinēnexa oveja. ² Ponē peneta joneya corral

baupayalia, bajaraponë cajena oveja pevetsinë. ³ Nexata corral baupa pevetsinë tobaupatatsi pijaoveja pecapitsapaenexa. Itsa baja pijaoveja capitsapa corralvecua, pijaoveja jumeyapëtanetsi. Tsipaji junataponä pijaoveja caenë canacujitsia pevënëta. ⁴ Pecapitsapaecujinae daxita pijaoveja, bajaraponë oveja pevajënaeya namataxainana-jetaruca. Nexata pijaoveja pënaponatsi. Tsipaji jumeyapëtanetsi pijaoveja. ⁵ Oveja apo pënaponae tsipae saicayanë. Tsipaji apo jumeyapëtae. Vecuarëcëpecaejitsipa saya, nayabarajai Jesús fariseovijavabelia.

⁶ Bajarapacuenia Jesús oveja pevetsinëcuenia nataeya comparacióncuenia nalivaisipaeba fariseovijavabelia. Itsiata fariseovi apo jumeyapëtaetsi Jesús comparacióncuenia penalivaisipaebijava.

Pacuenia Jesús xaniavaetsia eveta pijajivi yabara pelivaisi

⁷ Jesús jumaitsi fariseovijavabelia:

—Xaniajanë pacuenia pacatsipaebijitsiatsi. Pacuenia oveja junua corral baupajava, pepanepaenexa corral ënëaberena, bajara xanë itsinë jivi pejonenexa xanëjava, pepanepaenexa Dioso pijatomarabetsia. ⁸ Itsamonae xanë tavajënaeya penajumetsënëtsilivaisi jivi tsipaebapona. Bajarapamonae oveja bepenacobetoxotsivi. Jamatabëneyacajërëta tajajivi. Itsiata baitsi jane tajajivi apo jumecovënëtsi bajarapamonae. ⁹ Xanë rabaja cajena baupanë. Pajivi nesivanajamatabëcopatsiana, jonena xanëjava pepatsinexa Dioso pijatomarabetsia. Bajarapajivi capanepaenatsi Diosojavabelia. Pijaoveja xaniavaetsia pevetsinë, caebajayacunua canacujitsia capitsapa corralvecua oveja pexaejava pejaitsinexa. Icatsia caecaniviyo canacujitsia cajunua corraljavaberena. Bajara pijinia pacuenia xanë ata xaniavaetsia evetsianajë pajivi nesivanajamatabëcopatsiana, jai Jesús fariseovijavabelia.

¹⁰ Icatsia Jesús jumaitsi fariseovijavabelia:

—Penacobetoxotsinë bapata oveja penacobetoxotsinexa, pebeyaxuababi-abinexanua. Bajarapacuenia oveja peveretaponaenexa bapata. Bajara pijinia jamatabëcueneitsi pamonaë pata penajumetsënëtsilivaisi jivi petsipaebaponaenexa. Itsiata baitsi jane xanë patajopaicajë mapanacuayabetsicaje xanë tajamatabëcueneta jivi pexainaenexa matababi apo pevereverecaejava, bitso jamatabëcuenebarëyaya pejinavanapaenexanua. ¹¹ Pacuenia itsi xaniavaetsia pevetsinë pijaoveja, bajara pijinia xanë itsinë taevetsinexa tajajivi. Xaniavaetsia pevetsinë pijaoveja jamatabëjumaitsi: “Itsanë netobeyaxuabijitsia ata tsane tajaoveja, apo copatsinë tsane tanetoyajuvënëbeyaxuabiyana tajaoveja. Nexata xanë tajaoveja yapijivinacaevetsianajë tanebeyaxuabinexa,” jamatabëjai. Bajara pijinia xanë ata jamatabëitsinë tajajivi yabara. ¹² Itsiata ponë saya toevetsipa itsanë pijaoveja, bajaraponë apo xainae tsipae bajarapaovejabitsaëto. Saya tovetaponaponaejitsipa pematamotsinexatsi. Nexata nevëthë oveja itsa tsimaxënajetarucaejitsipa, bajaraponë xuabatabajiravijitsipa ovejabitsaëtomi. Nexata oveja nevëthë itsa yajuvënëvaetabijitsipatsi, nacayajatecaejitsipa ovejabitsaëtomi. ¹³ Oveja pevetsinë najetabajiravijitsipa. Tsipaji saya pematamotsinexatsi nacuenebaponaponaejitsipa. Nexata apo jamatabëbëjai tsipae oveja yabara, jai Jesús fariseovijavabelia.

¹⁴⁻¹⁵ Icatsia Jesús jumaitsi:

—Pacuenia itsi xaniavaetsia pevetsinë pijaoveja, bajara pijinia itsinë xanë ata taevetsinexa tajajivi, pamonaë taniji beovejacuenia. Pacuenia taxa neyapëtanë, bajara pijinia pacuenia xanë ata yapëtaniji taxa. Pacuenia pijinia xaniavaetsia yapëtaniji tajajivi, bajara pijinia pacuenia tajajivi ata neyapëtanë. Xanë sivatëpaenajë tajajivi. ¹⁶ Xainajë baja itsabitsaëto tajajivi. Itsiata abaxë bajarapamonae apo yajavajinavapae mapabitsaëtojavataje. Itsiata itsamatababi capatsianajë bajarapamonae mapabitsaëtojavaberena. Nexata daxita bajarapamonae nejumecovënëtsiana taitorobicuenia.

Caebitsaëto xaneto jane baja tajajivi netonaexanaena. Bajarapamonae xanë caenënë evetsianajë, jai Jesús.

¹⁷ Icatsia Jesús jumaitsi:

—Taxa niasiva. Tsipaji tajajivi yabara nacaevetsianajë tanebeyaxuabinexa. Itsiata icatsia tatëpaecujinae asaënë tsane. ¹⁸ Itsa apo nacaevetsinë tsipae tanebeyaxuabinexa, itsajivi ata apo caëjëpaetsi tsipae tanebeyaxuabinexa. Itsiata tajacuata nacaevetsianajë tanebeyaxuabinexa. Necaëjëpa tatëpaenexa. Necaëjëpanua icatsia tasaënexa tatëpaecujinae. Bajarapacuenia taxa netocopata, jai Jesús.

¹⁹ Judíovi itsa jumetane bajarapacuenia Jesús pejumaitsijava, judíovi apo najamatabëcuenejëpae. ²⁰ Judíovi ayaibitsaëto najumaitsi Jesús yabara:

—Dovathi raja bajaraponë yajavaponaponatsi. Matajemabatsi ra saya. ¿Detsa xuajitsia bajaraponë panamuxunaevetame? najai bajarapamonae.

²¹ Itsiata bajarapamonae yajuvënëvi itsamonae najumaitsi:

—Ponë dovathi yajavaponaponatsi, apo caëjëpaetsi tsipae cajena pecuaicuaijainexa mapacueniaje. Apo caëjëpaetsinua tsipae pitaxutoxanepanaeyaexanaenexa bitso pitaxutotsëcënaenëmi, najai bajarapamonae yajuvënëvi Jesús yabara.

Pacuenia Jesús judíovi navecuaitavetatsi yabara pelivaisi

²² Emarapaeta Jerusalén tomarata fiesta exana. Bajarapafiesta exana judíovi penajamatabënapitsinexa bajayata judíovi pijasalinaivi templobo pexanebetsijava. ²³ Nexata pamatacabi fiesta exana, Jesús ponapona bajarapatemplobojavata, Portal de Salomónvënëjavata. ²⁴ Nexata Jesús judíovi matatoyorotsia nacaetuatatsi. Judíovi jumaitsi Jesúsjavabelia:

—Apo payapëtaenë pacuenia panajamatabëxainaejitsianë xamë yabara. ¿Detsa pacujinae paneyapëtaeyaexanaename patacayapëtaenexa pepacuene ponëmë? Itsa pepacuene Cristomë, Dioso athëbëvetsica pecaitorobinëtsica jivi necapanepaenexa, panetsipaebare cajena roviaia, jai judíovi.

²⁵ Jesús nexata jumaitsi judíovijavabelia:

—Pacatsipaebatsi rabaja picani roviaia. Itsiata apo panejumecovënëtsimë. Taxa Dioso pesaëta pinijicuene exanajë. Bajara papinijicuene exanajë taxa taneitorobicuenia. Nexata itsa exanajë bajarapapinijicuene, pacatsitaexanatsi picani taxa taneitorobicuene. ²⁶ Itsiata baitsi jane apo panejumecovënëtsimë Cristonëcuenenë. Tsipaji paxamë apo patajajivimë. ²⁷ Tajajivi, pamona taniji beovejacuena, bajarapamonae nejumeyapëtane. Bajarapamonae pijinia yapëtaniji. Nexata nepënapona. ²⁸ Bajarapamonae rajutsianajë matacabi apo peverevere caejava. Bajarapamonae taxa Diosovecua apo naxuabi tsane. Itsajivi ata apo neyacajërëtsi tsane tajajivi. ²⁹ Taxa baja cajena ayaijamatabëcuenenë daxitajivi matatoxenetsia. Bajaraponë nerajuta bajarapamonae. Nexata itsajivi ata apo caëjëpaetsi tsane taxa pecobevecua pepitsinexa bajarapamonae. ³⁰ Taxa, xanë, caenë rabaja panaexanajëbeje, jai Jesús judíovijavabelia.

³¹ Nexata picani bajarajota judíovi jamatabëbeyaxuabatsi Jesús. Judíovi nota ibotonë Jesús picani petseconaenexatsi ibotonëta. ³² Jesús nexata jumaitsi judíovijavabelia:

—Ayaijava pexaniacuene taxa Dioso pesaëta exanaponajë paxamë paneitabarata. ¿Detsa nexata pitsineconi yabara panetseconaejitsiamë ibotonëta? jai Jesús judíovijavabelia.

³³ Judíovi nexata jumaitsi:

—Pexaniacuene raja nexanaejava yabara apo pacatseconaejitsiatsi. Pacatseconaejitsiatsi raja nenaneconitsixae Diosojavabelia. Tsipaji pibisiacuena, Dioso apo pejitsipaecuenia, cuaicuaijamë. Xamë saya jivitonë atamë, beDiosonëmë nataneme, jai judíovi Jesúsjavabelia.

³⁴ Jesús nexata jumaitsi judíovijavabelia:

—Dioso pejumaitsijava, Dioso pejumelivaisibaxutota jumaiti mapacueniaje: “Paxamë ata rabaja padiosovimë,” jai Dioso pejumelivaisibaxutota Dioso pejumecovënëtsivi yabara. ³⁵ Nexata Dioso pejumelivaisibaxutota bajarapacuenia ita jumaiti Dioso pejumecovënëtsivi yabara, acuenebi bajarapamonae yabara vajajumaitinexa: “Bajarapamonae apo diosovi,” vajajainexa. ³⁶ Dioso cajena nitapeta. Nexata nitorobica mapanacuayabetsicaje. ¿Detsa nexata xuajitsia panejumaitisimë: “Xamë raja naneconitame Diosojavabelia. Pibisiacuenia cuaicuaijamë Dioso apo pejitsipaecuenia. Tsipaji jumaitisimë: ‘Xanë raja Dioso pexënatonë,’ jamë,” panejamë. ³⁷ Itsa apo exanaenë tsipae pacuenia taxa nitoroba, nexata acuenebi tsipae patanesivanajamatabëcopatsinexamë. ³⁸ Itsiata baiti jane exanaponajë pacuenia taxa nitoroba. Nexata apo panesivanajamatabëcopatsi atamë, itsiata bepajumecovënëtame Dioso pesaëta taexanaejava, pacuene baja exanaponajë. Itsa pajumecovënëtsianame bajarapacuenia Dioso pesaëta taexanaponaejava, nexata payapëtaename taxa Dioso taneyajavaponaponaejava. Payapëtaenamenua xanë ata pijinia taxa Dioso tayajavaponaponaejava, jai Jesús judíovijavabelia.

³⁹ Bajarapacuenia Jesús jumaiti ata, itsiata judíovi jamatabëvaetabatsi penaneconitsiaexanaenexatsi. Itsiata Jesús vecuapanepa.

⁴⁰ Nexata Jesús navialia Jordánmene itsapanabelia, panacuatalia copiaya Juanpijinë jivi bautisababiaba. Bajarajotalia Jesús ponapona. ⁴¹ Jivi ayaibitsaëttoxaneto ponalia petaenexatsi Jesús. Nexata bajarapamonae jumaiti:

—Juanpijinë Dioso pesaëta pinijicuene apo exanaponae ata, itsiata daxita pacuenia tajëvelia vajunupaeba maponë yabaraje, xaniajai cajena, jai bajarapamonae Jesús yabara.

⁴² Nexata jane baja bajarajota jivi ayaibitsaëttoxaneto jumecovënëta Jesús Dioso athëbëvetsica pitorobinëcuenetsi.

11

Pacuenia baja Lázaro tēpa yabara pelivaisi

¹ Lázaro, Betania tomarapijinë, avitane tsanucaea Betania tomarata. Bajarapatomarata ponaponabeje pematapijivabeje, Maríabeje Martabeje. ² Bajarapova María itsamatacabi Jesús tsitaxuepanaena petuxujuvira. Daxitarayomi tsitaxuepanaena. Bajaraxuacujinae bajarapova pematadata taxuiquicaenanua. ³ Nexata pamatacabi Lázaro avitane tsanucaea, Maríabeje Martabeje tonajumeitorobaliabeje Jesús. Jumaitisibeje:

—Tajatuxanenë, niasivanë raja Lázaro catoavitane, jaibeje.

⁴ Jesús ita jumetane bajarapovabeje petonajumeitorobijumetsi, nexata Jesús jumaiti pijajivijavabelia:

—Mapavitanetaje Lázaro apo tēpae tsane daxitamatacabijavabelianexa. Biji rajane bajarapavitane pejamatabëcueneta jivi yapëtaena Dioso pinijicuene pexanaenexa pecaëjëpaenëcuenetsi. Yapëtaenanua xanë ata, Dioso pexënatonë, pinijicuene taexanaenexa tanecaëjëpaenëcuene, jai Jesús pijajivijavabelia.

⁵ Jesús bitso asivaya taeyabiaba Martabana, Maríabana, Lázarobana. ⁶ Jesús vënëlivaisitae ata Lázaro bitso piavitanejava, itsiata abaxë apo ponae Betania tomarabelia. Anijamatacabibeje abaxë ponapona Jordánmene itsapanatalia.

⁷ Bajaraxuacujinae Jesús jumaiti pijajivijavabelia:

—Ponaliatsi icatsia Judea nacuyabelia, jai Jesús.

⁸ Jesús nexata pijajivi jumaiti:

—Patajatuxanenë, canivita saya judíovi bajarajotalia jamatabëcatsecona picani ibotonëta. ¿Itsiata tsabaja icatsia ponaeliatsi bajarabelia? jai pijajivi.

⁹ Jesús nexata jumaiti pijajivijavabelia:

—Matacabi raja xaina doce pahorabeje. Nexata pajivi matacabita ponapona, apo firapectae. Tsipaji icotiata napebeta xaniavaetsia. ¹⁰ Itsiata pajivi meravi ponapona, firapecta. Tsipaji meravi apo napebetsi xaniavaetsia. Bajara pijinia xanë ata itsinë. Ponae ata tsanetsi Betania tomarabelia, itsiata apo nitsacueniabi tsane. Tsipaji abaxë tajamatacabi apo netocopiapatsi, jai Jesús pijajivijavabelia petëpaejavanexa yabara.

¹¹ Bajaraxuacujinae Jesús peponaevajënae jumaitsi pijajivijavabelia:

—Vajayapëtaenë rabaja Lázaro majitanuca. Nexata baja ponajë. Itavabijitsianë Lázaro, jai Jesús.

¹² Nexata pijajivi jumaitsi:

—Patajatuxanenë, itsa raeta saya Lázaro majitanuca, itsiata jamatejema tsane, jai Jesús pijajivi.

¹³ “Vajayapëtaenë rabaja Lázaro majitanuca,” itsa jai Jesús, Jesús picani pejumaitsi-jume, “Lázaro rabaja tēpa,” pejaijume. Itsiata Jesús pijajivi apo jumeyapëtaetsi. Bajara-pamonae Jesús pijajivi jamatabëcuenenavëxaniabiaya jamatabëjumaitsi: “Lázaro meta saya majitanuca pacuenia majitanucabiaba meravi,” jamatabëjai. ¹⁴ Bajaraxuata nexata Jesús roviaia jumaitsi pijajivijavabelia:

—Lázaro rabaja tēpa. ¹⁵ Paepatota Lázaro tēpa, bajarajotalia apo ponaponaenë. Bajaraxuata barëyanë paxamë yabara. Barëyanë tsipaji Lázaro petëpaexae, xaniavaetsia panejumecovënëtsianame. Baja nexata ponatsi, jai Jesús pijajivijavabelia.

¹⁶ Jesús pijajiviyajuvënënë, Tomás, ponë icatsia itsavënë vënërubatsi Sapalanë. Bajara-ponë jumaitsi penajuaponaevijavabelia:

—Naponatsi Jesús pepëta. Ibotonëta itsa tseconatsi, vajayajavatëpaenexa bajaraponë, jai Tomás.

Pacuenia Jesús caëjëpatsi petëpaevi ata icatsia piasaëyaexanaenexa yabara pelivaisi

¹⁷ Pepuaxainae baja cuatro pamatacabibeje Lázaropijinë pemëthëtsicujinaetsi, Jesús matapania patajopa Betania tomarata. ¹⁸ Betaniatomara eca imoxoyo Jerusalén tomaravecua. Bejamatabëcuene anijakilómetrobeje epatua navecuaecabeje bajarapatomarabeje. ¹⁹ Jesús pepatsivajënaeya Betania tomarata, ayaibitsaëtoxaneto judíovi pata Martabeje Mariabejjavaberena Lázaro petëpaexae. Bajarapamonae jumaitsi bajarapovabejjavabelia:

—Paxanë itsiata pacayanabatsi. Panajamatabëxainajë paxanë ata papecavecutëpaexaebeje panejuyapijinëbeje, Lázaro, jai bajarapamonae.

²⁰ Itsa Marta vënëlivaisitane Jesús penajetarucejava, pitsapa pijabovecua pemataenenaenexa Jesús. María itsiata bota nacopateca. ²¹ Nexata Marta itsa mataenenatsi Jesús, Marta jumaitsi Jesúsjavabelia:

—Tajatuxanenë, itsa majota ponaponaejitsipameje, apo tēpae tsipae tajuyapijinë. ²² Itsiata yapëtaniji aeconoxae ata Dioso carajutsiana daxita pacuene vajëtame Diosojavabelia, jai Marta.

²³ Nexata Jesús jumaitsi Martajavabelia:

—Nejuyapijinë raja itsiata icatsia asaë tsaponapona tsane, jai Jesús.

²⁴ Nexata Marta apo jumeyapëtae Jesús piasaëyaexanaejavanexa Lázaro. Bajaraxuata Marta jumaitsi Jesúsjavabelia mapacueniaje:

—Yapëtaniji rabaja pacuenia icatsia Lázaro Dioso asaëyaexanaejitsiatsi pamatacabita icatsia asaëyaexanaenatsi daxita petëpaevimi, jai Marta.

²⁵ Nexata Jesús jumaitsi Martajavabelia:

—Xanë rabaja petëpaevi ata icatsia tasaëyaexanaenë, tarajutsinë matacabi apo peverevereaejava. Pajivi nejumecovënëtsiana Cristonëcuenenë, bajarapajivi tēpae ata, itsiata icatsia asaë tsane. ²⁶ Pajivi abaxë pamatacabi asaë tsaponapona mapanacuataje, itsa nejumecovënëtsiana Cristonëcuenenë, bajarapajivi tēpae ata, xainaena matacabi

apo peverevereaejava. ¿Xamë tsabaja bajarapalivaisi jumecovënètame? jai Jesús Martajavabelia.

²⁷ Marta nexata jumaitsi:

—Tajatuxanenë, jumecovënètajë rabaja. Xamë rabaja cajena Cristomë, Dioso pexënatomë, ponë pacopiaevetavanapajë athëbëvetsica pepatsijavanexatsica mapanacuayabetsicaje jivi pecapanepaenexa, jai Marta.

Pacuenia Jesús vënuia Lázaro pemëthëjavata yabara pelivaisi

²⁸ Itsa baja Marta najumelivaisivereta bajarapalivaisi, naviaata pijaboyabelia pejunatsinexa pejuyapijiva María. Nexata Marta muetsia jumaitsi Maríajavabelia:

—Vajanacacujarubinë rabaja pata. Cajunalia raja bajaraponë, jai Marta.

²⁹ Caejumetae María Jesús pejunatsijavatsilia, nonotabapuna. Pona Jesúsjavabelia petaenexa. ³⁰ Jesús abaxë apo patsi Betania tomaraberena. Ecojopa abaxë itsajotalia Marta mataenenatsi. ³¹ Pajudíovi bajarapovabeje pijabota pata peyanabinexatsibeje Lázaro petëpaexae, bajarapamonae tane María penonotabapunaejava bepíjia pepitsatabijavalia bovecua. Nexata bajarapamonae María pënaponatsi. Tsipaji bajarapamonae jamatabëjumaitsi:

—María raeta pejuyapijinëmi pemëthëjavabelia pona pematantueyabinexa, jamatabëjai:

³² Itsa María palia, itsajotalia Jesús ecojopa, nexata María pematabacabëta nucajunua Jesús pitabarata. Jumaitsi:

—Tajatuxanenë, itsa majota ponaponaejitsipameje, apo tēpae tsipae tajuyapijinë Lázaro, jai María Jesúsjavabelia.

³³ Jesús itsa tane María penueyaxuabijava, judíovi ata María peyajavapatsivi penuejava itsa tane, Jesús nexata bitso najamatabëxainaxuaba. ³⁴ Nexata Jesús jumaitsi bajarapamonaejavabelia:

—¿Detsa jota pamëthëtame Lázaro? jai Jesús.

Nexata bajarapamonae jumaitsi Jesúsjavabelia:

—Naxanitsia. Taename itsajota pamëthëtajë Lázaro, jai.

³⁵ Jesús nexata vënuia Lázaro. ³⁶ Nexata judíovi najumaitsi:

—Pataema Jesús penuejava. Jesús picani bitso asiva petëpaenëmi, najai judíovi.

³⁷ Itsamonae judíovi najumaitsi Jesús yabara:

—Mara ponëje itaxutoxaniavaeta bitso pitaxutotsëcënaenëmi ataje xaniavaetsia petaenexa. ¿Apo caëjëpaetsi tsamëra tsipae Lázaropijinë pejamatejemayaexanaenexa petëpaeyaniva? najai bajarapamonae.

Pacuenia Lázaro petëpaecujinae Jesús icatsia asaëyaexana yabara pelivaisi

³⁸ Jesús bitso sivanajamatabëxaina Lázaropijinë. Nexata Jesús cujillia Lázaropijinë pemëthëtsiibovajutsijavabelia. Ibopanaxanetota Lázaro yamëthëvëpa acatabuatatsi.

³⁹ Jesús nexata jumaitsi bajarajota penapatsivijavabelia:

—Pavecuatixiremelia mapaibopanaxanetoje, jai Jesús.

Nexata Marta, petëpaenë pematapijiva, jumaitsi:

—Tajatuxanenë, tuxutsaeba raeta baja bitso Lázaro. Tsipaji rabaja petëpaecujinae, ajena baja cuatro pamatacabibeje xaina, jai Marta Jesúsjavabelia.

⁴⁰ Jesús nexata jumaitsi Martajavabelia:

—Catsipaebatsi rabaja pacuenia taejitsiamë Dioso ayai cuene pexanaejava itsa jumecovënètame Dioso, jai Jesús.

⁴¹ Nexata bajarapamonae Lázaropijinë pemëthëvëpavecua tixilia ibopanaxaneto. Jesús itaboxo naëcotsiaya jumaitsi:

—Taxa, pexaniajamatabëcuene carajutatsi tanejumetaexaemë. ⁴² Yapëtaniji cajena tanenamuxunaevetabiabijavamë. Itsiata icatsia cavajëtatsi mapamonaaje ayaibitsaëttoxaneto pejumecovënëtsinexa taneitorobinëcuenemëtsica, jai Jesús Diosojavabelia.

⁴³ Bajarapacuenia Jesús pejumaitsicujinae, ayaijumeta jumaitsi Lázaro pebuatsiibovajutsijavabelia:

—¡Lázaro, bajara jane mëthëvecua pitsaparemena! jai Jesús.

⁴⁴ Nexata baja Lázaro petëpaenëmi pitsaparena mëthëvecua. Piapiasábanata daxitanëreca mataquionaeya pematacacëbicujinaetsireca abaxë, pitsaparena. Pitabaraacatsipapaëbërëpanatsi abaxë tsiteca itabaraacatatsi. Jesús nexata jumaitsi bajarapamonaejavabelia:

—Pavecuaisinare bajarapapana. Pacopare peponaenexa pijaboyabelia, jai Jesús.

Pacuenia picani Jesús pijavajabitsaë jamatabëvaetabatsi yabara pelivaisi

(Mt 26.1-5; Mr 14.1-2; Lc 22.1-2)

⁴⁵ Judíovi, pamona María yanabatsi, tane Lázaro petëpaenëmi Jesús piasaëyaexanaejava. Nexata bajarapamonaeyajuvënëvi ayaibitsaëto jumecovënëta Jesús Dioso pexënatocuene. ⁴⁶ Itsiata itsamona bajarapamonaeyajuvënëvi pona fariseovijavabelia. Nexata tsipaeba pacuenia Jesús Lázaro petëpaenëmi asaëyaexana. ⁴⁷ Nexata fariseovi, sacerdotevi penamatacaitorobivi yajava, nacaetuata. Nexata bajarapamona junata penacaetuatsinexa judíovi pijaancianovi, judíovi pecujarubivi ata yajava. Nexata bajarapamona najumaitsi:

—¿Detsa meta vaxaitsi itsanetsi? Bajaraponë Dioso pesaëta pinijicuene pexanaejava exanapona. ⁴⁸ Itsa vaxaitsi cuenecopatsipatsi bajarapacueni pexanaponaejava, daxitajivi jumecovënëtaponaejitsipa bajaraponë. Apo jumecovënëtsi tsipae Romanonacua pevetsivi. Nexata Romanonacua pevetsivi anaepanaejitsipa. Itorobijitsiparena pijajivi, vajabitsaë. Nexata vajabitsaë itsa patsiparena, vajatemplobo nacatouxabijitsipaica. Nacaverebiabijitsipanua, najai bajarapamona.

⁴⁹ Bajarapamonaeyajuvënëne pevënë Caifás. Bajarapamatacabi bajaraponë Caifás, sacerdotevi pepo penamatacaitorobinë tsaponapona. Nexata Caifás jumaitsi penajua-nacaetuatsivijavabelia:

—Paxamë raja apo payapëtaemë. ⁵⁰ Nexata Romanonacua pevetsivi vajabitsaë itsa itorobarena, vajanacaverebiabiyaniva, bepanajamatabëxainame mapacueniaje. Bajaraponë caenë itsa beyaxuabiaexanaenatsi, bajaraponë pejamatabëcueneta daxita judíovitsi vajavajabitsaë apo nacaverebiabi tsane, jai Caifás Jesús yabara.

⁵¹ Itsiata baitsi jane Caifás apo jumaitsi bajarapacuenia pijacuata penajamatabëxainacuena. Biji rajane bajarapamatacabi Caifás daxita sacerdotevi pepo penamatacaitorobinëxae, Dioso bajarapacuenia jumaitsiayaexanatsi. Bajarapacuenia Caifás tajëvelia jumaitsi tsipaji Jesús sivatëpaejitsia daxita judíovi. ⁵² Itsiata Jesús apo sivatëpae tsane ëjudíovi. Daxitanacuanëjava, pamona nacayajataruta Dioso pexi, bajarapamona ata pecaetuatsinexa, sivatëpaena Jesús. ⁵³ Bajarapacuenia bajara pamatacabijavaveliacujinae cajena judíovi pevetsivi najamatabëveretapona pacuenia bajarapamona Jesús beyaxuabijitsiatsi.

⁵⁴ Bajaraxuata Jesús apo ponabiabi baja itsabelia judíovi nacaetuatabiaba. Nexata Judea nacuavecua pitsapa. Jesús baja nexata pona petusatonaacua imoxoyojavabelia, Efraívnë tomarajavabelia. Nexata bajarapatomarata Jesús ponapona pijajivi yajava.

⁵⁵ Imoxoyo baja pevajënae judíovi pijafiesta pejonematacabinexa, pascuavënëfiesta. Nexata jivi ayaibitsaëttoxaneto pona Jerusalén tomarabelia. Pona pexanaenexa pacuenia exanabiaba fiestavajënaeya penajamatabëcuene xaniavaetsinexa Diosojavabelia. Bajarapamona naropoba tsiquiritomaraxijavaverena. ⁵⁶ Nexata bajarapamona jaitarutatsi Jesús. Itsa bajarapamona nacaetuata templobota, nayanijoba. Najumaitsi:

—¿Detsa xamë jamatabëitsimë? ¿Jesús tsamëra patsiana mapafiestajavaje? Jume. Apo patsi tsamëra tsane, najai ëpamonae.

⁵⁷ Nexata fariseovibeje sacerdotevi penamatacaitorobivibeje najumecopata jivijavabelia petonaitaxutocaevetsinexatsi Jesús. Nexata pajivi yapëtane itsajota Jesús ponapona, petsipaebinexa bajarapamonaejavabelia. Nexata fariseovibeje sacerdotevi penamatacaitorobivibeje itsa yapëtane itsajota Jesús ponapona, pevaetabinexatsi Jesús penaneconitsiaexanaenexatsi.

12

Pacuenia Jesús petiriva tsitaxuepanatsi petuxujuviaceitera yabara pelivaisi (Mt 26.6-13; Mr 14.3-9)

¹ Pejonenexa baja pascuavënëfiesta, saica seis pamatacabibeje. Nexata bajarapamat-acabi Jesús baja pona Betania tomarabelia. Bajarapatomarata ponapona Lázaro, ponë Jesús asaëyaexana petëpaenëmi. ² Bajarajota Jesús pexaejava toexanatsi caniviyopijijava. Bajarajota Marta pexaejava tsanaponapona. Lázaro nanabaneca pamesata Jesús nanabaneca. ³ Nexata María carena epatuabotellabëyota petuxujuviaceitera, nardovënëra. Bajarapora bitso penamatamotsira. Nexata bajarapaaceitera María tsitaxuepana Jesús. Bajaraxuacujinae icatsia pematánata taxuiquica. Daxita bo tuatuajë tuxudereecaruta. ⁴ Nexata Jesús pijajiviyajuvënënë, Judas Iscariote, Simón pexënato, ponë itsamatacabi Jesús canajetsijitsiatsi pijavajabitsaë pecobeyabelia, jumaitsi:

⁵ —¿Detsa xuajitsia apo canajetsi bajarapatuxujuvira. Matamopitsipa trescientos denario. Bajarapapalata rajutsipa bepejiobivi bajarapacuenia peyavenonaenexa, jai Judas Iscariote.

⁶ Itsiata bajarapacuenia Judas apo jumaitsi pesivanajamatabëxainaexae bepejiobivi. Judas raja penacobetoxotsinë. Jesús bana pijapalatadoro pevetsiaexanaenëxaetsi, Judas nacobetoxotabiaba bajarapapalatayajuvënëjava. ⁷ Nexata Jesús jumaitsi Judasjavabelia petiriva yabara:

—Copare bajarapova xanëjavaberena pexanaenexa bajarapacuenia. Itsamonae petëpaejivi batsiperabëëpana petuxujuviaceitera peperabëxaniavaetsinexa pemëthëtsivajënae. Bajara pijinia pacuenia mapovaje xaniavaeta bajarapora tanetsiperabëëpanaenexa, apo tēpae atanë, taneperabëxaniavaetsinexa itsamonae tanemëthëtsivajënae. Tsipaji baja imoxoyo tavajënae tanemëthëtsinexa. ⁸ Daxitamatacabi raja bepejiobivi jinavanapa itsaxuayo pajinavanapame paneyavenonaenexa. Itsiata baitsi jane xanë daxitamatacabi apo ponaponaenë tsane paxamëjavata, jai Jesús Judasjavabelia.

Pacuenia judíovi najamatabëxaina pebeyaxuabinexatsi Lázaro yabara pelivaisi

⁹ Ayaibitsaëtoxfaneto judíovi vënëlivaisitanetsi Jesús pepatsijava Betania tomarata. Judíovi nexata ponalia Betania tomarabelia petaenexatsi Jesús. Itsiata bajarapamonae apo ponaelia petaenexa ëJesús. Ponalia petaenexanua Lázaro, ponë Jesús asaëyaexana, petëpaenëmi. ¹⁰ Nexata sacerdotevi penamatacaitorobivi daxita baja sivanajamatabëjëpa pebeyaxuabinexatsi Lázaro, Jesús yajava. ¹¹ Bajarapamonae najamatabëjëpa pebeyaxuabinexatsi Lázaro. Tsipaji judíovi ayaibitsaëto natsanapona sacerdotevivecua petaexae Lázaro piasaëtsaponaponaevajava petëpaecujinae. Nexata bajarapajudíovi jumecovënëtapona Jesús Dioso pexënato cuene.

Pacuenia Jesús pata Jerusalén tomarata yabara pelivaisi (Mt 21.1-11; Mr 11.1-11; Lc 19.28-40)

¹² Jivi ayaibitsaëtoxfaneto pata Jerusalén tomarata pascuafiesta petaenexa. Nexata bajarapamonae Jesús vënëlivaisitanetsi pepatsijavanexa Jerusalén tomarata. Jesús

naropota Betania tomaraverena. ¹³ Nexata bajarapamonae Jesús pevajënae baxuucubaba benaxarebobaxutonë. Bajarapamonae pona baja pecopiapitsinexa Jesús. Itsa panamutoverena Jesús najetaruca, bajarapanamutuabelia bajarapamonae pona. Itsa baja bajarapamonae Jesús copiapita, bajarapamonae vavajai tsabuataponae.

—¡Dioso yavenonaenatsi! ¡Maponë najetarucaje, vajatuxanenë pejamatabëcueneta najetaruca Israel nacuapijivi pepo pevetsinënexa! jai tsanajetarubena bajarapamonae Jesús yabara.

¹⁴ Nexata Jesús caxitajarabaxuaba burro. Bajarapaburro Jesús jumaponatsi pepatsinexa Jerusalén tomarata. Jesús burrojumata pepatanajetarucaejavanexa Jerusalén tomarata, Dioso pejumelivaisibaxutota tajëvelia jumaitsi mapacueniaje:

¹⁵ PaJerusalén tomarapijivimë, pëtsa pajunavame. Pataename pepo papecaevetsinënexa penajetarucaejava. Pejanaburroyota yapatanajetarucaena, jai tajëvelia Dioso pejumelivaisibaxuto Jesús burrojumata pepatanajetarucaejavanexa Jerusalén tomarata.

¹⁶ Itsa bajarapacuenia Jesús pata Jerusalén tomarata, copiapata jane baja pacuenia Dioso pejumelivaisibaxutota tajëvelia jumaitsi Jesús yabara. Bajarapamatacabi Jesús pijajivi tae ata bajarapacueni, itsiata abaxë apo yapëtae pecopiapatsijava bajarapacueni. Matapania baja Jesús pepuaponae athëbëabetsia, Jesús pijajivi yapëtane pecopiapatsijava baja pacuenia Dioso pejumelivaisibaxutota tajëvelia jumaitsi Jesús yabara.

¹⁷⁻¹⁸ Pamona tane pamatacabi Jesús Lázaro asaëyaexana petëpaenëmi, bajarapamonae tsipaeba Jerusalén tomarapijivijavabelia. Tsipaeba pacuenia bajarapamonae tane Jesús Lázaro piasaëyaexanaejavata petëpaenëmi. Bajaraxuata jivi ayaibitsaëto pitsapa tomaravelia pecopiapitsinexatsi Jesús. ¹⁹ Nexata fariseovi ita tane bajarapacueni, najumaitsi:

—Pataema. Daxitajivi pënaponatsi Jesús. Vaxaitsi baja nexata acuenebi vajaexanaejava Jesús jivi pepënaponaejavatsi yabara, najai fariseovi.

Pacuenia Grecia nacuapijivi Jesús jamatabëtanetsi yabara pelivaisi

²⁰ Ayaibitsaëto jivi pata Jerusalén tomarata Diosojavabelia pevajëtsinexa pascuavënë fiestamatacabita. Bajarapamonaeyajuvënëvi itsamonae Grecia nacuapijivi. ²¹ Nexata Grecia nacuapijivi cujibaliatsi Felipe. Felipe Betsaida tomarapijinë. Betsaidatomara eca Galilea nacuata. Nexata Grecia nacuapijivi jumaitsi Felipejavabelia:

—Felipe, pajamatabëtaniji raja Jesús, jai.

²² Felipe nexata pona Andrésjavabelia petsipaebinexa pacuenia Grecia nacuapijivi jumaitsi. Nexata Felipebeje Andrésbeje ponabeje petsipaebinexabeje Jesúsjavabelia.

²³ Nexata Jesús jumaitsi bajaraponëbejejavabelia:

—Xanë, Daxitajivi Pematapijinënë, tajamatacabi baja netocopiapata tanaviatsinexa baja athëbëabetsia ayaijamatabëcuenenënë Dioso taneexanaenexa. ²⁴ Xaniajanë pacuenia pacatsipaebijitsiatsi. Trigoxuto ita apo ubitsi irabelia, saya tsitecanuca caexutoyo. Itsiata ita ubatsi, pejuvicujinae xutsabana vajaubixutoyomi penacopatsinexa pejanaboto. Nexata ita nacuita bajarapaboto, ayaijava pexu capitsapa. ²⁵ Bajara pijinia itsi jivi ata. Pajivi jamatabëjumaitsi ata tsane petëpaeyaniva: “Xanë nayajivitaeyaponaponaenajë tanebejiobiaexanaeyaniva, tanebeyaxuabiyoniva ata,” jamatabëjai ata tsane, itsiata tëpaena. Nexata Diosovecua naxuabiana. Biji rajane pajivi nesivanajamatabëcopatsiaya jamatabëjumaitsi tsane: “Jema nebejiobiaexanaena. Jema nebeyaxuabiananua Jesús pijajivitonëxaenë,” jamatabëjai tsane, bajarapajivi xainaena matacabi apo pevereverecejava. ²⁶ Pajivi jamatabënetonacueneba, bajarapajivi nepënaponaena. Nexata pajivi netonacuenebiana, neyjavaponaponaena itsajota ponaponaenajë. Pajivi netonacuenebiana, bajarapajivi yabara taxa Dioso jumaitsi tsane: “Bajarapajivi sivajamatabëcuenëbarëyanë,” jai tsane, jai Jesús Felipebeje Andrésbejejavabelia.

Pacuenia Jesús tajëvelia navajunupaeba pacuenia beyaxuabijitsiatsi yabara pelivaisi

²⁷ Jesús bēpēnēa jamatabējumaitsi:

—Aeconoxae bitso najamatabēxainajē. ¿Detsa meta jumaitsinē tsane taxajavabelia? Jumaitsinē meta tsane: “Taxa, betajobicuenia tanebeyaxuabijavaminexa, vecuanecapanepaename,” janē meta tsane taxajavabelia. Jume raja. Bajarapacuenia meta apo vajētsinē tsane. Tsipaji betajobicuenia tanebeyaxuabinexa, patajē mapanacuayabetsicaje, jamatabējai Jesús.

²⁸ Nexata Jesús Diosojavabelia jumaitsi:

—Taxa, pacuenia jitsipame nexanaenexa jivi pecayaiyataenexa, exanare, jai Jesús.

Nexata bajarajota Jesús jumetane athēbēvetsica ayaijume. Jumaitסיםica mapacueni-
aje:

—Jivi rabaja cajena neyaiyatane. Itsiata matavējēa neyaiyataena, jaitsica.

²⁹ Jivibitsaēto bajarajota penubenaevi jumetane bajarapajume. Nexata bajarapamonae jumaitsi:

—Yamaxē raeta najumeta, jai.

Itsamonae pijinia jumaitsi:

—Angel raeta barēcuaicuaijaitsi Jesús, jai.

³⁰ Nexata Jesús jumaitsi bajarapamonaejavabelia:

—Xanē raja tajumetaenexa bajarapajume apo jumaitסיםica. Paxamē raja panejumetaenexa jumaitסיםica. ³¹ Aeconoxae rabaja copiapatsiana Dioso penaneconitsiaexanaematacabinexa daxita pijaneconi pexainaevi. Vecuaxuabiananua dovathi, ponē mapanacuata jivi itorobabiaba pibisiacuene pexanaenexa. ³² Itsa neyotarutsiana cruzajavabelia tanebeyaxuabinexa, nexata daxitajivi jitsipaeyaexanaenajē xanē tane-sivanajamatabēcuene copatsinexa, jai Jesús.

³³ Bajarapacuenia Jesús tajëvelia jumaitsi jivijavabelia jivi peyapētaenexa pacuenia Jesús tēpaejitsia. ³⁴ Nexata bajarapamonae jumaitsi Jesúsjavabelia:

—Dioso Moiséspijinēta penajumecopatsilivaisi tajëvelia jumaitsi mapacueniaje: “Cristo, ponē athēbēvetsica Dioso itorobijitsiatsica jivi pecapanepaenexa, asaē tsaponaponae tsane daxitamatacabijavabelianexa pevetsinexa mapanacuaje,” jai. Itsiata xamē Cristo atamē, jumaitsimē: “Xanē, Daxitajivi Pematapijinēnē, neyotarutsiana cruzajavabelia tanebeyaxuabinexa,” jamē. ¿Detsa nexata ponē Cristo daxita matacabijavabelianexa asaē tsaponaponae tsane? jai bajarapamonae Jesúsjavabelia.

³⁵ Nexata Jesús jumaitsi bajarapamonaejavabelia:

—Imoxoyo rabaja pevajēnae taponamatacabinexa. Abaxē raja itsiata taponaponamatacabibeje, pacatsipaebianatsi pexaniajailivaisi patacajamatabēcueneitayotsinexa. Nexata itsa pacatsipaebianatsi pexaniajailivaisi, panejumecovēnētsianame paneajamatabēcueneitaquiriyaniva. Pajivi ajamatabēcueneitaquiri, apo xainae tsane matacabi apo peverevereaejava. ³⁶ Xanē rabaja pexaniajailivaisita pacajamatabēcueneitayotsianatsi. Taponaponamatacabibeje abaxē mapanacuataje, panesivanajamatabēcopatsianame. Bajarapacuenia nexata jamatabēcuenenaitayotsiaya pajinavanapaename, jai Jesús bajarapamonaejavabelia.

Bajarapacuenia pejumaitsicujinae, Jesús baja pona pevecuanamatayabinexa bajarapamonae.

Pacuenia judíovi jamatabējumaitsi Jesús yabara: “Maponēje apo Cristo, ponē copiaevetavanapatsi vajanacacapanepaenexa,” jamatabējai yabara pelivaisi

³⁷ Jesús ayaicuene pexanaejava Dioso pesaēta judíovi pitabarata exanapona. Judíovi tae ata bajarapacuene, itsiata apo jumecovēnētsi Cristocuene. ³⁸ Nexata judíovi itsa apo jumecovēnētsi Cristocuene, copiapata jane baja pacuenia bajayata tajëvelia

yaquina Diosojumepaebinëmi, profeta Isaíaspijinë. Judíovi Cristocuene apo pejumecovënëtsijavanexa yabara, bajayata Isaíaspijinë peyaquinaelivaisita tajëvelia jumaitsi mapacueniaje:

Dioso, patatsipaebilivaisi cajena jivi apo panejumecovënëtsi tsane. Bajarapamonae apo panejumecovënëtsi tsane,

tae ata nesaëta pinijicuene pataexanaejava, jai bajayata tajëvelia Isaíaspijinë peyaquinaelivaisita judíovi Cristocuene apo pejumecovënëtsijavanexa yabara.

³⁹ Bajaraxuata Cristo patsi ata, judíovi apn jumecovënëtsi Cristocuene. Isaíaspijinë peyaquinaelivaisita, judíovi yabara icatsia tajëvelia jumaitsi mapacueniaje:

⁴⁰ Bajarapamonae Dioso itaxutotsëcënaeyaexanaena. Ajamatabëcuenetajaya exanaenana. Bajarapacuenia Dioso exanaena bajarapamonaejavabelia. Nexata bajarapamonae tae ata tsane pinijicuene Dioso pesaëta pexanaejava, itsiata bajarapamonae apo yapëtae tsane pajamatabëcuenelivaisi xaina petaejava. Nexata bajarapamonae Diosojavabelia apo najamatabëcuenepënëyorotsi tsane perujujamatabëcuenevecua. Nexata apo jamatabëcuenexaniavaetsinë tsane,

jai bajayata tajëvelia Isaíaspijinë peyaquinaelivaisita judíovi Cristocuene apo pejumecovënëtsijavanexa yabara.

⁴¹ Bajarapacuenia Isaíaspijinë yaquina tsipaji bajayata Isaíaspijinë bemajitsinaebota tane Jesús ayaijamatabëcuene pexainaenëcuene. Bajaraxuata bajayata Isaíaspijinë bajarapacuenia Jesús vajunupaeba baja cajena.

⁴² Itsiata judíoviyajuvënëvi ayaibitsaëto jumecovënëta Cristocuene. Judíovi pevet-sivi ata jumecovënëta Cristocuene. Bajarapamonae judíovi pevet-sivixae, apo navajunupaebi pejumecovënëtsijava Cristocuene. Tsipaji cununava fariseovi. Bajarapamonae bëpënëa jamatabëjumaitsi:

—Apo navajunupaebinë tsane tajumecovënëtsijava Cristocuene tanecapit-sapaeyaniva fariseovi judíovi penacaetuatabibibovecua, jamatabëjai bëpënëa bajarapamonae.

⁴³ Tsipaji bajarapamonae jitsipa penajuaevetsivi pesivabarëyajavatsi Dioso pesivabarëyajavatsi matatoxenetsia.

Pacuenia jivi naneconitsijitsia Diosojavabelia itsa apo jumecovënëtsi Jesús petsipaebilivaisi yabara pelivaisi

⁴⁴ Jesús jumaitsi ayaijumeta jivijavabelia:

—Pajivi jumecovënëtsiana Cristocuenenë, bajarapajivi ëxanë yabara apo jumecovënëtsi tsane. Taxa, ponë nitorobica, bajaraponë yabara ata jumecovënëtsiana.

⁴⁵ Pajivi necueneypëtaena, bajarapajivi taneitorobinëtsica ata cueneypëtaena. ⁴⁶ Xanë rabaja pexaniajailivaisita jamatabëcueneitayotsianajë mapanacuapijivije. Nexata pajivi jumecovënëtsiana Cristocuenenë, apo ajamatabëcueneitaquiri tsane. ⁴⁷ Pajivi jumeyapëtae ata tsane tatsipaebilivaisi, itsiata itsa apo jumecovënëtsi tsane bajarapalivaisi, bajarapajivi naneconitsiana Diosojavabelia. Itsiata xanë bajarapajivi apo naneconitsiaexanaenë tsane. Tsipaji xanë apo patsinëtsica tananeconitsiaexanaenexa mapanacuapijivije. Biji rajane xanë patsicajë tacapanepaenexa mapanacuapijivije.

⁴⁸ Pajivi nenayajiviitavetsiana, apo nejumecovënëtsinua tsane tatsipaebilivaisi ata, bajarapajivi taxa Dioso naneconitsiaexanaenatsi. Bajarapajivi taxa Dioso naneconitsiaexanaena pamatacabi naneconitsiaexanaena daxita pijaneconi pexainaevi tatsipaebilivaisi apo pejumecovënëtsixae. ⁴⁹ Tsipaji xanë tajamatabëcueneta apo paebinë bajarapalivaisi. Taxa raja, ponë nitorobica, nitoroba bajarapalivaisi jivi tatsipaebinexa.

⁵⁰ Yapëtaniji baja cajena jivi pexainaejavanexa matakabi apo pevereverecaejava itsa jumecovënëta taxa pitorobilivaisi. Nexata bajarapalivaisi itsa tsipaebaponajë jivijavabelia, tsipaebaponajë pacuenia taxa Dioso nitoroba tatsipaebinexa, jai Jesús jivijavabelia.

13

Pacuenia Jesús beveliajamatabëcuenenë nataeya taxuquiatapona pijajivi, caenë canacujitsia, yabara pelivaisi

¹ Caematacabi baja saica pejonenexa pascuavënëfiesta. Jesús nexata yapëtane pamatacabita pijavajabitsaë beyaxuabijitsiatsi. Yapëtanenua peponaejavanexa paxa Diosojavabetsia. Jesús bitso asiva pijajivi, mapanacuapijivije. Jesús nexata bajarapamatacabi pijajivi tsitanajamatabëcuenetitajëta piasivacuene.

² Jesús pijajivi barë nabane caniviyopijijava. Nexata Judas Iscariote, Simón pexënato, dovathi pejamatabëcueneta najamatabëxainae yaexanatsi. Nexata Judas najamatabëxaina Jesús pecanajetsinexa pijavajabitsaë pecobeyabelia. ³ Jesús yapëtane paxa Dioso perajutsijavatsi daxitacuene pevetsinexa. Yapëtanenua paxa Diosojavavetsica pepatsijava. Icatsia pacuenia ata naviatsijitsia paxa Diosojavabetsia, yapëtane. ⁴ Nexata Jesús pijajivi pebarë nabanijavata, Jesús nonotapuna mesajavata. Najumajonota penaxatatsijava. Nexata toalla naepacëta. ⁵ Jesús mera epata penacobequiatsinëjavabelia petaxuquiatsinexa pijajivi. Jesús nexata beveliajamatabëcuenenë nataeya taxuquiatapona pijajivi, caenë canacujitsia. Taxuquicapona icatsia pijatoallata penaepacëtsipanata.

⁶ Itsa Jesús taxuquiatsijitsia Simón Pedro, nexata Simón Pedro jumaitsi:

—Tajatuxanenë, apo jitsipaenë tanetaxuquiatsijavamë. Tshipaji ayaijamatabëcuenenëmë, jai Simón Pedro Jesúsjavabelia.

⁷ Jesús nexata jumaitsi:

—Aeconoxae abaxë apo yapëtaemë pajamatabëcuene yabara cataxuquiatsijitsiatsi. Itsiata baitsi jane bexëjavabelia yapëtaename, jai Jesús.

⁸ Nexata Pedro jumaitsi:

—Apo catonataxucopatsi tsanetsi tanetaxuquiatsinexamë, jai Pedro.

Jesús nexata jumaitsi:

—Itsa apo cataxuquiatsi tsanetsi, nexata apo tajajivitonëmë tsane, jai Jesús Pedrojavabelia.

⁹ Simón Pedro nexata jumaitsi:

—Tajatuxanenë, ëtaxu nexata apo netoquiatsimë tsane. Tacobe ata, tamatabocoto ata, netoquiatsianame, jai Pedro.

¹⁰ Jesús nexata jumaitsi Pedrojavabelia:

—Pajivi baja navane, apo namatavenonae baja pequiatsinexatsi daxitanë. Saya namatavenona ëpetaxuquiatsinexatsi. Tshipaji baja daxitanë axuirajibi. Paxamë rabaja pajamatabëcuenexuirajibimë. Itsiata baitsi jane apo padaxitamë, jai Jesús Pedrojavabelia.

¹¹ “Pajamatabëcuenexuirajibimë. Itsiata baitsi jane apo padaxitamë,” jai Jesús. Tshipaji yapëtane tajëvelia ponë canajetsijitsiatsi pijavajabitsaë pecobeyabelia.

¹² Petaxuquiatsicujinae pijajivi, Jesús baja icatsia penaxatatsijava naxatata. Eca icatsia mesa muxuneneta. Jumaitsi pijajivijavabelia:

—¿Payapëtaneme tsabaja paxamë pajamatabëcuene yabara pacataxuquiatatsi?

¹³ “Vajanacacujarubinë,” pajamë tsabiabi itsa panabarëcuaicuaijamë xanë yabara. Itsajavata: “Vajatuxanenë,” pajamë tsabiabi. Paxaniajamë rabaja cajena. Bajara tshipaji taitsinë. ¹⁴ Xanë, patacacujarubinë ata, panijatuxanenë atanënuua, beveliajamatabëcuenenënë nataeya pacataxuquiatatsi bepanijajivitonënëcuenia. Nexata bajara pacuenia paxamë ata beveliajamatabëcuenevi nataeya panataxuquiatatabianame namataenetsia. ¹⁵ Pacatsitaexanatsi bajarapacuene paxamë ata bajarapacuenia namataenetsia panenatoexanaenexa. ¹⁶ Xaniajanë pacuenia pacatsipaebijitsiatsi. Paxamë cajena apo panejamatabëcuene matatoxenetsimë. Tshipaji itsanë ata apo jamatabëcuenematatoxenetsi pitorobinëtsi. ¹⁷ Payapëtaneme rabaja pajamatabëcuene yabara panijatuxanenë atanë, beveliajamatabëcuenenënë nataeya pacataxuquiatatsi. Nexata pijinia paxamë ata bajarapacuenia beveliajamatabëcuenevi nataeya

namataenetsia nasivaya ita panayavenonabiabianame, pajamatabëcuenebarëyamë tsavanapae tsane, jai Jesús pijajivijavabelia.

¹⁸ Icatsia Jesús jumaiti pijajivijavabelia:

—Daxita raja itsiata apo pajamatabëcuenebarëyamë tsavanapae tsane. Tsipaji caenë paxamëyajuvënënë, ponë naxaena xanëta, bajaraponë necanajetsiana tajavajabitsaë pecobeyabelia pacuenia tajëvelia jumaiti Dioso pejumelivaisibaxutota. Yapëtaniji ponë necanajetsijitsia. Tsipaji xanë patacaitapetsivi patajajivinexamë, pacajamatabëcuenyapëtanetsi pacaenëmë canacujitsia. Nexata pacuenia tajëvelia Dioso pejumelivaisibaxutota jumaiti xanë yabara, bajarapacuenia netocopiapatsiana.

¹⁹ Pacatsipaebatsi bajarapacuenia taneexanaevajënaeya. Nexata ita nebeyaxuabiana, panejumecovënëtsianame xanë Cristocuenenë pacuenia baja cajena pacatsipaebatsi.

²⁰ Xaniajanë pacuenia pacatsipaebijitsiatsi. Pajivi copiapitsiana taitorobinë, xanë neyjavacopiapitsiana. Pajivi necopiapitsiana, bajarapajivi neyjavacopiapitsiana taxa Dioso, ponë nitorobica, jai Jesús pijajivijavabelia.

Pacuenia Jesús navajunupaeba Judas pecanajetsijavanexatsi pijavajabitsaë pecobeyabelia yabara pelivaisi

(Mt 26.20-25; Mr 14.17-21; Lc 22.21-23)

²¹ Jesús pejamatabëëthëtota bëpënëa bitso natsinajamatabëxaina. Nexata roviafia Jesús jumaiti pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënënë necanajetsiana tajavajabitsaë pecobeyabelia, jai Jesús pijajivijavabelia.

²² Nexata Jesús pijajivi nataeyena. Tsipaji apo yapëtae ponë yabara Jesús jumaiti.

²³ Jesús pijajiviyajuvënënë, caenë bitso asivaya tane. Bajaraponëbeje Jesúsbeje namuxunenixaeyecabeje. ²⁴ Nexata bajaraponë Jesúsjavabelia petoyanijobinexatsi, Simón Pedro pecobeta itorobeca.

—Yanijobare ponë yabara Jesús jumaiti, jai tsecae Simón Pedro pecobeta.

²⁵ Nexata bajaraponë natixireca. Eca bitso Jesús pemuxuneneta peyanijobinexa Jesúsjavabelia.

—Tajatuxanenë, ¿jipatsa yabara jumaitisimë? jai bajaraponë Jesúsjavabelia.

²⁶ Nexata Jesús jumaiti pijajivitonëjavabelia, bitso piasivanëjavabelia:

—Ponë ra peneta panjavayo tocajabutsianajë, bajaraponë tsane, jai Jesús pijajivitonëjavabelia, bitso piasivanëjavabelia.

Nexata Jesús panjavayo pita. Cajabuta. Nexata jane baja rajuteta Judas Iscariote, Simón pexënatöjavabelia. ²⁷ Judas ita pita pan, nexata bajarajota Judas dovathi tsijamatabëjunuatsi. Nexata Jesús jumaiti Judasjavabelia:

—Xua baja exanaejitsiamë, naxanitsiayo baja exanare, jai Jesús.

²⁸ Itsiata baitsi jane pamonaë najuaxaeyena bajarapamesata, apo jumeyapëtae xua yabara Jesús jumaiti Judasjavabelia. ²⁹ Judas tovetabiaba bajarapamonae pijapalata-doro. Bajaraxuata Judas yabara Jesús pijajivi jamatabëjumaiti:

—Jesús raeta itoroba Judas pecomuatsinexa vajaxaejavanexa fiestajavata. Itsa jume, itoroba meta perajutsinexa itsacuenëjavaxi bepejiobivijavabelia, jamatabëjai Jesús pijajivi.

³⁰ Itsa baja Judas pan pita, bovecua pitsapalia vayafuabelia, meravi baja.

Pacuenia Jesús pijajivi itoroba namataenetsia penaasivatsavanapaenexa yabara pelivaisi

³¹ Pabota Jesús pijajivi barënacaetuata, bajarapabovecua Judas pitsapalia. Nexata Judas pepitsapaecujinaelia Jesús jumaiti pijajivijavabelia:

—Aeconoxae rabaja xanë, Daxitajivi Pematapijinënë, najamatabëcueneitajëtsianajë ayaijamatabëcuene taxainaejava. Taxa Dioso ata bajarajota yajavajamatabëcueneitajëtsianajë ayaijamatabëcuene pexainaejava. ³² Nexata taxa Dioso juya nejamatabëcueneitajëtsiana ayaijamatabëcuene taxainaejava. Bajarapacuenen baja naxanitsiayo taxa Dioso exanaena. ³³ Bepataximë patacataevi. Bajara maapo pacayajavaponaponaetsi tsane bajayajebije. Paxamë panejaitisianame. Pacuenia jumaitsinë itsamonae judiöovijavabelia, bajarapacuenia paxamëjavabelia ata pacajumaitsiijitsiatsi. Apo pacacaëjêpae tsane paneponaenexa itsabelia ponaejitsianë. ³⁴ Pacatsipaebijitsiatsi icatsia pejanalivaisi. Paexanavanapaename mapacueniaje. Pasivamë tsavanapae tsane itsamonae ata. Pacuenia xanë pacaasivatsi, bajarapacuenia namataenetsia panaasivamë tsavanapae tsane. ³⁵ Namataenetsia itsa panaasivamë tsavanapae tsane, nexata daxitanacuanëpijivi pacayapëtaena patajajivicuenemë, jai Jesús pijajivijavabelia.

Pacuenia Jesús tajëvelia jumaitsi Pedrojavabelia: “Pedro, xamë nayavajunuaxainae-name tajajivitonëcuenemë,” jai yabara pelivaisi

(Mt 26.31-35; Mr 14.27-31; Lc 22.31-34)

³⁶ Simón Pedro yanijoba Jesúsjavabelia.

—Tajatuxanenë, ¿detsa belia ponaejitsiamë? jai Pedro.

Nexata Jesús jumaitsi Pedrojavabelia:

—Itsa belia ponaejitsianë, aeconoxae apo cacaëjêpae tanepënaponaenexamë. Itsiata baitsi jane itsamatacabi nepënaponaename, jai Jesús Pedrojavabelia.

³⁷ Nexata Pedro jumaitsi Jesúsjavabelia:

—Tajatuxanenë, ¿detsa xuajitsia apo necaëjêpae aeconoxae tacapënaponaenexa? Daxita pacuenia nitorobame, catoexanaejitsipatsi. Nebeyaxuabijitsia ata tsipae xamë yabara, apo cacopatsi tsipaetsi, jai Pedro Jesúsjavabelia.

³⁸ Jesús nexata jumaitsi Pedrojavabelia:

—¿Xaniajamë tsaja? ¿Nacaevetsipame pecabeyaxuabinexa taneasivaxaemë? Xaniajanë pacuenia catsipaebijitsiatsi. Vacara raja pefiabivajënaeya, nayavajunuaxainae-name tajajivitonëcuenemë. “Apo yapëtaenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

14

Pacuenia Jesús benamuto paxa Diosojavabetsia yabara pelivaisi

¹ Jesús jumaitsi pijajivijavabelia:

—Pëtsa bitso panajamatabëxainame patacavecuaponaejavanexa yabara. Panajamatabëcuenecopare Diosojavabelia, xanëjavaberena ata. ² Taxajavatatsia pexaniabobitsaëtonë xaina panejinavanapaenexa. Itsa bajara apo itsipae, apo pacatsipaebi tsipaetsi. Nexata bajarabetsia ponaejitsianë patacatsivajënaexaniavaetsinexa itsajota papatsijitsiamë. ³ Xanë taponaecujinae mavetsiaje, itsa baja veretsianajë patacatsivajënaexaniavaetsijava itsajota papatsijitsiamë, icatsia patsianicajë patacacaponaenexatsia jane baja. Nexata bajarajotatsia pacayajavaecaenatsi, itsajota ecaenajë. ⁴ Paxamë baja payapëtaneme itsabelia ponaejitsianë. Payapëtanemenua baja panepatsinexa itsajotatsia ecaeijitsianë, jai Jesús pijajivijavabelia.

⁵ Nexata Tomás, Jesús pijajivitonë, jumaitsi:

—Tajatuxanenë, apo payapëtaenë cajena itsabelia ponaejitsiamë. ¿Detsa nexata pacuenia payapëtaenajë namuto pataponaenexa itsabelia ponaejitsiamë? jai Tomás Jesúsjavabelia.

⁶ Jesús nexata jumaitsi:

—Xanë rabaja benamutonë. Tsipaji xanë tajamatabëcueneta jivi panepaena athëbëbetsia. Xanë rabaja pepo pexaniajailivaisi jivi tatsipaebaponaenë.

Xanë rabaja xainajë matabi apo peverevereaejava tarajutsinexa pamonae nesivanajamatabëcopata. Itsajivi ata apo patsicapanepae tsane taxajavabetsia xanë itsa apo nejumecovënëtsi. ⁷ Paxamë picani bajayata apo paneyapëtaemë. Nexata picani taxa ata apo payapëtaemë. Aeconoxae rabaja paneyapëtaneme. Nexata baja taxa ata payapëtaneme. Patanemenua baja, jai Jesús.

⁸ Nexata Felipe jumaitsi Jesúsjavabelia:

—Tajatuxanenë, panetsitajëre axa. Pajitsipajë baja cajena bitso axa patataenexa, jai Felipe Jesúsjavabelia.

⁹ Jesús nexata jumaitsi:

—Felipe, bajayajebi rabaja pacayjavaponaponatsi. ¿Itsia tsaja abaxë xaniavaetsia apo paneyapëtaemë? Pajivi netane, bajarapajivi taxa ata tane. ¿Detsa xuajitsia nexata nevajëcame taxa netaenexa? ¹⁰ Taxa baja cajena neyjavaponapona. Xanë ata taxa yjavapononajë. ¿Abaxë tsaja apo jumecovënëtsimë? Palivaisi pacatsipaebatsi, tajamatabëcueneta baja cajena bajarapalivaisi apo pacatsipaebitsi. Taxa raja, ponë neyjavaponapona, bajaraponë pejamatabëcueneta bajarapalivaisi neyapëtaeyaexana. Nexata bajarapalivaisi pacatsipaebatsi. ¹¹ Panejumecovënëre taxa tayjavapononaejava. Panejumecovënërenua taxa ata tanyjavapononaejava. Patacatsipaebilivaisianë apo panejumecovënëtsi atamë, itsia ayaicue Dioso pesaëta taexanaexae, panejumecovënëre taxa tayjavapononaejava. ¹² Xaniajanë pacuenia pacatsipaebijitsiatsi. Pajivi nejumecovënëtsiana, bajarapajivi exanaena pacuenia xanë exanjë. Ayaicue taexanaejava matatoxenetsia bajarapajivi exanaena. Tsipaji xanë naviat-sianiajë taxajavabetsia. ¹³⁻¹⁴ Daxita xua xanë tavënëta pavajëtsianame taxajavabelia, pacatoexanaenatsi cajena. Xanë, Dioso pexënatonë, bajarapacuenia pacatoexanaenatsi taxajavabelia panejamatabëcuenëbarëyanexa, jai Jesús pijajivijavabelia.

Pacuenia Jesús najumecapanepaeya jumaitsi pitorobinexatsica Espíritu Santo jivijavabetsica yabara pelivaisi

¹⁵ Icatsia Jesús jumaitsi pijajivijavabelia:

—Itsa paneasivamë, paexanabiabianame pacuenia pacaitorobatsi. ¹⁶ Vajëtsianajë taxajavabelia itsanë juya papecatoitorobinexatsica papecayavenonaenënexa daxitamatabijavabelianexa. Bajaraponë Espíritu Santo. ¹⁷ Espíritu Santo cajena pepo pexaniajailivaisi jivi peyapëtaeyaexanaenë. Bajaraponë mapanacuapijivi abaxë apo tsijamatabëcaetsi. Tsipaji bajarapamonae apo nejumecovënëtsi. Nexata apo yapëtae ponë Espíritu Santo. Apo yapëtaenua cajena Espíritu pepononaejava ata. Itsiata baitsi jane paxamë Espíritu Santo payapëtaneme baja. Tsipaji baja bajaraponë pacayjavaponapona. Espíritu Santo cajena pacatsijamatabëcaena dexitamatabijavabelianexa. ¹⁸ Ponae atanë tsane taxajavabetsia, itsia apo pacaxuabi tsanetsi. Icatsia raja patsianicajë patacayjavapononaejava. ¹⁹ Caematabibejecujinae baja jivi apo netae tsane. Itsia icatsia paxamë panetaename. Paxamë paxainaname matabi apo peverevereaejava. Tsipaji tatëpaecujinae icatsia asaënë tsapononae tsane. ²⁰ Pamatabi Espíritu Santo patsianica paxamëjavabetsica, bajarapamatabi payapëtaename taxa tayjavapononaejavanexa. Payapëtaenamenua pataneyajavajinapanapaejavanexamë. Payapëtaenamenua xanë ata patacayjavapononaejavanexa. ²¹ Pajivi yapëtanë, taitorobicuenia nejumecovënëtanua, bajarapajivi niasiva. Pajivi niasiva, bajarapajivi taxa juya asivatsi. Xanë ata bajarapajivi asivanë. Tsitanaitajëtsianajë bajarapajivijavabelia, jai Jesús pijajivijavabelia.

²² Itsanë Judasvënënë, itsia apo Judas Iscariote, jumaitsi Jesúsjavabelia:

—Tajatuxanenë, ¿detsa xuajitsia epaxanë panetsitanaitajëtsianame? ¿Detsa xuajitsia apo tsitanaitajëtsimë tsane itsamonaejavabelia? jai Judas Jesúsjavabelia.

²³ Jesús nexata jumaitsi Judasjavabelia:

—Pajivi niasiva tsane, nejumecovënëtsiananua tatsipaebilivaisi, bajarapajivi juya taxa asiva tsanetsi. Nexata paxanëbeje, taxabeje, bajarapajivi payajavaponaenajëbeje. ²⁴ Pajivi apo niasiva tsane, bajarapajivi apo nejumecovënëtsinua tsane tatsipaebilivaisi. Xanë palivaisi pacatsipaebaponatsi, xanë raja apo tajumelivaisi. Taxa raja, ponë nitorobica, pejumelivaisi, jai Jesús Judasjavabelia.

²⁵ Icatsia Jesús jumaitsi pijajivijavabelia:

—Abaxë patacayajavaponaepato pacatsipaebijitsiatsi mapacueniaje. ²⁶ Taxa tajamatabëcueneta, Espíritu Santo pacatoitorobianica papecayavenonabiabinexa. Nexata Espíritu Santo pacayapëtaeyaexanaena daxitacuene. Pacanajamatabënapitsiaexanaenanua daxita palivaisi pacatsipaebaponatsi, jai Jesús.

²⁷ Icatsia Jesús jumaitsi pijajivijavabelia:

—Pacanapëjiobatsi jamatabëcuenexanepanaeya. Pacajamatabëcuene barëyayaexanaenatsi. Bajarapajamatabëcuenebarëyajava, apo jëpae mapanacuatata pebarëyajava. Nexata bepíjia apo vereverecae tsane paxamë panejamatabëcuenebarëyajava. Pëtsa pajamatabëcuenebëjamë. Pëtsa pacujunavamenua itsacuene ata. ²⁸ Panejumetaneme rabaja patacajumaitsijava mapacueniaje: “Xanë baja ponaenajë taxajavabetsia. Itsiata baitsi jane icatsia pacasivapatsianicatsi,” patacajaijava. Itsa bitso panejitsipaejitsipame, nexata pasivajamatabëcuenebarëyamë tsipae taponaejavanexa taxajavabetsia. Tsipaji taxa nevecuaayaijamatabëcuenenë. ²⁹ Bajarapacuenia pacajumaitsi taponaejavajënaeya. Nexata itsa copiapatsiana patacajumaitsicovëya, panejumecovënëtsianame Dioso pexënatocuenenë, jai Jesús pijajivijavabelia.

³⁰ Icatsia Jesús jumaitsi pijajivijavabelia:

—Apo necuenecaëjëpae rabaja pematatsënëa livaisi patacatsipaebaponaenexa. Tsipaji rabaja imoxoyo dovathi najetaruca, ponë mapanacuapijivi pijatuxanenë. Itsiata baitsi jane bajaraponë apo caëjëpaetsi xanë taneitorobinexa tatoexanaenexa pacuenia picani bajaraponë jitsipa. Apo caëjëpaetsinua taneitsacueniabinexa. ³¹ Biji rajane pacuenia taxa nitoroba tatoexanaenexa, bajarapacuenia exanaenajë. Nexata daxita mapanacuapijivije yapëtaena taxa tasivajava. Panonobapunare. Ponatsi baja mapacovëvecuaje, jai Jesús pijajivijavabelia.

15

Pacuenia Jesús bepeubinae yabara pelivaisi

¹⁻² Jesús jumaitsi comparacióncuenia pijajivijavabelia:

—Xanë rabaja bepexaniaviriauvanaenë. Nexata paxamë patajajivimë, bepatamaxëranamë. Pacuenia peubijava pevetsinë xaniavaetsia eveta, bajara pijinia pacuenia taxa nacaeveta. Nexata pacuenia peubijava pevetsinë vecuacaucuba pibisia-maxëranaxi, penacopatsinexa epexaniamaxëranë, bajara itsi taxa. Nexata pacuene taxa apo pacatojitsipae, pacavecuajibiaexanaponaena. Nexata pacuenia taxa Dioso pacatojitsipa, panejavajënaeyabelia paexanavanapaename. ³ Paxamë rabaja panejumecovënëtame patacatsipaebilivaisi. Bajaraxuata taxa baja pacavecuaxuaba pibisiajamatabëcuenemi. ⁴ Paxamë paneyajavajinavanapaename. Nexata xanë ata pacayajavaponaenatsi. Pamaxërana apo tabunucae tsipae pepo naejavabelia, apo nacuaitsi tsipae. Bajara pijinia pacuenia paxamë ata paitsimë tsipae itsa apo paneyajavajinavanapaemë tsipae. Xaniavaetsia apo pajinavanapaemë tsipae, jai Jesús pijajivijavabelia.

⁵ Icatsia Jesús jumaitsi pijajivijavabelia:

—Xanë rabaja beuvanaenë. Paxamë nexata bepatamaxërananëmë. Nexata pajivi neyjavaponaponaena, xanë ata pijinia bajarapajivi yjavaponaponaenajë. Bajarapajivi exanabiabiana bitso Dioso pejitsipaecuenia. Itsa apo paneyajavajinavanapaemë tsipae, nexata apo pacacajëpae tsipae panijacuata pexaniacuene paneexanaenexa. ⁶ Peubijava pevetsinë, piabejemaxëranaxi caucuba penacopatsinexa epexaniamaxërananë. Bjaraxuacujinae bajarapamaxëranaxi xuaba. Nexata baja itsa niona bajarapamaxëranaxi, caetuata pexuabinexa isotojavabelia. Bajara pijinia pacuenia taxa Dioso exanaenatsi pamonaë apo neyjavajinavanapae tsane, jai Jesús pijajivijavabelia.

⁷ Icatsia Jesús jumaitsi:

—Itsa paxamë tsitecaeya panejumecovënëtanapaename, nexata apo panacofënëtsimë tsane patacatsipaebilivaisi. Nexata panevajëtabiabianame xua pajitsipame. Nexata pacarajutsianatsi xua panevajëtame. ⁸ Itsa paxamë jivi patsitaexanavanapaename taxa Dioso pejitsipaecuenia, jivi yaiyataenatsi taxa. Nexata daxitajivi paxamë yabara jumai tsane: “Xaniajai rabaja. Bajarapamonae pepacuene Jesús pijajivi,” jai tsane. ⁹ Pacuenia taxa niasiva, bajara pijinia pacuenia xanë ata pacaasivatsi. Tsiteca paexanavanapaename xua pacaitorobatsi. Tsipaji bitso pacaasivatsi. ¹⁰ Taxa niasiva. Tsipaji baja jumecovënëtajë taneitorobicuenia. Nexata yapëtaniji taxa taneasivajava. Bajara pijinia pacuenia paxamë ata itsa panejumecovënëtanapaename pacuenia pacaitorobatsi, nexata payapëtaename patacasivajava, jai Jesús pijajivijavabelia.

¹¹ Icatsia Jesús jumaitsi pijajivijavabelia:

—Xanë bitso jamatabëcuenebarëyanë. Nexata pacatsipaebatsi paxamë ata panejamatabëcuenebarëyanexa pacuenia xanë jamatabëcuenebarëyanë. Pacatojitsipatsi bitso panejamatabëcuenebarëya tsavanapaxana. ¹² Mapacuenia paexanavanapaenameje. Pacuenia xanë pacaasivatsi, bajara pijinia pacuenia paxamë ata namataenetsia panaasivamë tsavanapae tsane pacaenëmë canacujitsia. ¹³ Pajivi peyapëtaejivitsi bitso asiva, jamatabëcuene yavenonabiabijitsipa daxitacuene yabara. Peyapëtaejivitsi pijaneconi yabara ata, yapijivinabeyaxuabiaexanaejitsipa. Nexata bajarapacuenia daxitajivi yapëtaejitsipa pepacujiru bajarapajivi bitso piasivajava peyapëtaejivitsi. Bajarapacuenia yapijivinabeyaxuabia exanaejitsipa bitso piasivaxae peyapëtaejivitsi. Nexata baja pematatsënëa itsajivi ata apo cajëpaetsi bajarapacuenia pexanaejivi matatoxenetsia piasivanexa peyapëtaejivitsi. ¹⁴ Itsa paexanavanapaename patacatorobicuenia, nexata baja patajamonamë tsane. ¹⁵ Aeconoxae baja cajena saya bepatajajivicueniamë apo pacataetsi. Bepatajamonamë baja bitso pacatanetsi. Tsipaji baja pacayapëtaeyaexanatsi daxita pacuenia taxa nitoroba taexanaenexa. Tsipaji mapanacuata petuxanenë pijajivi apo yapëtaeyaexanae daxita pacuenia petuxanenë exanaejitsia. ¹⁶ Paxamë raja apo panejunatsimë. Biji rajane xanë pacajunatsi patanepënaponaenexamë. Nexata xanë pacaitorobatsi paneexanavanapaenexa Dioso pejitsipaecuenia. Nexata xua paexanavanapaename, apo pevereverecaejavanexa tsane. Daxita pacuene tavënëta pavajëtsianame taxa Diosojavabelia, pacarajutsiana cajena. ¹⁷ Mara pacuene paneexanaenexa pacaitorobatsije. Namataenetsia panaasivamë tsavanapae tsane pacaenëmë canacujitsia, jai Jesús pijajivijavabelia.

Pacuenia Jesús pijajivi mapanacuapijivi itoyajitsiatsi yabara pelivaisi

¹⁸ Jesús icatsia tajëvelia jumaitsi pijajivijavabelia:

—Mapanacuapijivi, Dioso apo pejumecovënëtsivi, itsa pacaitoya tsane, panajamatabënapitsianame xanë copiaya taneitoyajava bajarapamonae. ¹⁹ Mapanacuapijivi, pamonaë Dioso apo pejumecovënëtsivi, namataenetsia nasiva tsavanapae. Paxamë ata bajarapamonae itsa pajamatabëcuenejëpa vanapaejitsipame, nexata paxamë ata

bajrapamonae pacaasiva tsipae. Itsiata baitsi jane xanë baja pacajunatatsi bajrapamonaevēcua. Nexata baja paxamē apo pajamatabēcuenejēpaemē bajrapamonae. Bajrapaxuata pacaitoya tsane bajrapamonae. ²⁰ Panajamatabēnapitabiabianame najumecapanepaeya patacajumaitisijava: “Itsanē ata apo jamatabēcuenematatoxenetsi pijatuxanenē,” patacajaijava. Nebejiobiaexana itsamonae. Nexata paxamē ata itsamonae pacabejiobiaexanaena. Itsamonae nejumecovēnēta tatsipaebilivaisi. Nexata pijinia paxamē ata itsamonae pacajumecovēnētsiana panetsipaebilivaisi. ²¹ Bajrapacuenia pacaexanaena mapanacuapijivije xanē patajajivixaemē. Tsipaji bajrapamonae apo yapētae Dioso, ponē nitorobica, jai Jesús tajēvelia pijajivijavabelia.

²² Icatsia Jesús jumaitisijava pijajivijavabelia:

—Xanē itsa apo patsinētsica tsipae mapanacuayabetsicaje, mapanacuapijivi apo naneconitsi tsipae Diosojavabelia. Tsipaji bajrapamonae Dioso apo peyapētaexae, pibisiacuene exanaejitsipa. Nexata xanē tapatsixaetsica mapanacuayabetsicaje, bajrapamonae yapētane baja Dioso. Nexata bajrapamonae yapētae ata Dioso, pibisiacuene pexanaexae, nexata naneconita Diosojavabelia. Nexata acuenebi bajrapamonae pejumaitisijava pibisiacuene pexanaejava yabara: “Apo tayapētaexae Dioso, pibisiacuene exanajē,” pejaijava. ²³ Nexata pamonaenitoya, bajrapamonae taxa ata itoya. ²⁴ Bajrapamonaejavata Dioso pesaēta pinijicuene taexanaejava exanabiabajē. Bajrapaxua itsajivi ata apo exanae mapanacuata. Bajrapamonaejavata pinijicuene taexanaejava itsa apo exanaenē tsipae, apo naneconitsi tsipae Diosojavabelia. Tsipaji bajrapamonae apo yapētae tsipae Dioso. Bajrapamonae tae ata Dioso pesaēta pinijicuene taexanaejava, itsiata apo nejumecovēnētsi. Bajrapamonae nitoya. Taxa ata itoya. Nexata naneconita Diosojavabelia. ²⁵ Bajrapacuenia nitoya tsipaji baja cajena bajayata tajēvelia bajrapamonae taneitoyajavanexa yabara, Dioso pejumelivaisibaxutota jumaitisijava mapacueniaje: “Nitoya tsane bajrapamonae, ajibi taneyabaraitoyajava ata,” jai tajēvelia Dioso pejumelivaisibaxutota xanē yabara, jai Jesús pijajivijavabelia.

²⁶ Icatsia Jesús jumaitisijava pijajivijavabelia:

—Vajētsianajē taxajavabelia pitorobinexatsica Espiritu Santo, pexaniajailivaisi pepabinēnexa. Itsa patsianica Espiritu Santo taxajavavetsica, nexata pacayavenonaena. Pacajamatabēcuene asaēyaexanaenanua. Espiritu Santo xanē nevajunupaebiana xaniavaetsia. ²⁷ Paxamē baja cajena tataxuxuabijavaveliacujinae jivi livaisi tatsipaebijava, paneyajavajinavanapame. Bajrapaxuata paxamē ata xaniavaetsia panevajunupaebianame, jai Jesús pijajivijavabelia.

16

¹ Icatsia Jesús jumaitisijava pijajivijavabelia:

—Bajrapacuenia pacatsipaebatsi panecopabiyaniva patanejumecovēnētsilivaisimē. ² Paxamē papecaitoavi, pacacapitsapabiabiana judiōvi penacaetuatabiabibovecua. Belia jane baja itsamatacabijavabelia pacabeyejebiana. Nexata pamonaenitoya pacabeyejebiana, jamatabēcuenenavēxaniabiaya jumaitisijava tsane: “Dioso pejitsipaecuenia tobeyejebajē mapamonaeje,” jai tsane. ³ Bajrapamonae xanē apo neyapētae. Apo yapētae cajena taxa ata. Bajrapaxuata bajrapacuenia pacaexanaena. ⁴ Bajrapacuenia tajēvelia pacatsipaebatsi baja cajena. Nexata jane baja pamatacabi pacatsipatsiana bajrapacuenia, panajamatabēnapitsianame pacuenia baja cajena tajēvelia pacatsipaebatsi, jai Jesús pijajivijavabelia.

Pacuenia Espiritu Santo exanaejitsia jivijavabelia yabara pelivaisi

Icatsia Jesús jumaitisijava pijajivijavabelia:

—Tataxuxuabijavaveliacujinae jivi livaisi tatsipaebijava, abaxë apo pacatsipaebitsi mapacuene yabaraje. Bajarapacuenia apo pacatsipaebitsi tsipaji abaxë pacaya-javaponaponatsi. ⁵ Itsiata baitsi jane aeconoxae baja payapëtae atamë tanaviatsijavanexa taneitorobinëjavabetsia, itsanë ata paxamëyajuvënënë apo neyanijobi. “¿Detsa belia ponaejitsiamë?” apo nejai. ⁶ Pacanavajunupaebatsi baja cajena tanaviatsijavanexa. Bajaraxuata bitso panajamatabëxainame. ⁷ Palivaisi aeconoxae pacatsipaebijitsiatsi, pexaniajailivaisi cajena. Pacatoxanepanaena itsa baja pacavecuapon-aenatsi. Itsa apo pacavecuaponae tsipaetsi, apo pacatopatsitsica tsipae Espiritu Santo papecayajavaponaponaenexa. Espiritu Santo pacayavenonabiabiana. Pacajamatabëcuene asaëyaexanaenana. Itsa ponaenajë taxajavabetsia, nexata Espiritu Santo pacatoitorobianicatsi. ⁸ Nexata Espiritu Santo patsianica. Nexata Espiritu Santo pejamatabëcuenetjailivaisi cajena. Pacatoxanepanaena itsa baja pacavecuapon-aenatsi. Itsa apo pacavecuaponae tsipaetsi, apo pa, pamona Dioso apo pejumecovënëtsivi, nacueneyapëtaena pibisiacuene pexanaejava. Yapëtaenanua pacuene xanepana pexanavanapaenexa Dioso pitabarata. Yapëtaenanua pacuenia Dioso naneconitsiaexanaejitsiatsi bajarapamonae pibisiacuene pexanaeneconi yabara. ⁹ Espiritu Santo pejamatabëcueneta, bajarapamonae nacueneyapëtaena pibisiacuene pexanaevicuene. Tsipaji xanë bajarapamonae apo nejumecovënëtsi pibisiacuene pexanaeneconi tavecuaajibiaexanaejavanexa. ¹⁰ Nexata Espiritu Santo pejamatabëcueneta, bajarapamonae yapëtaena pacuene xanepana pexanavanapaenexa Dioso pitabarata. Tsipaji baja xanë naviatsianajë taxajavabetsia. Nexata baja bajarapamonae pematatsënëa apo netae tsane. ¹¹ Bajarapamonae Espiritu Santo pejamatabëcueneta, yapëtaena pacuenia Dioso naneconitsiaexanaejitsia daxita pamona pibisiacuene pexanaevi dovathi pejamatabëcueneta. Tsipaji Dioso naneconitsiaexanaena dovathi, ponë mapanacuapijivi itorobabiaba pibisiacuene pexanaenexa, jai Jesús pijajivijavabelia.

¹² Icatsia Jesús jumaitsi pijajivijavabelia:

—Ayailivaisi picani abaxë xainajë patacatsipaebinexa. Itsiata baitsi jane abaxë apo pacajamatabëcuenecaëjêpae bajarapalivaisi panejumeyapëtaenexa. ¹³ Matapania pamatacabi patsianica Espiritu Santo, ponë pexaniajailivaisi pepaebinë, bajaraponë pacayapëtaeyaexanaena daxita pexaniajailivaisi. Espiritu Santo raja apo pacayapëtaeyaexanae tsane saicaya pejamatabëcuenepijilivaisi. Daxita raja pacuenia taxa Dioso jumaitsi, juya Espiritu Santo pacayapëtaeyaexanaena. Nexata tajëvelia Espiritu Santo pacayapëtaeyaexanaena pacuene pevajënaeyabelia copiapataponaejitsia. ¹⁴ Espiritu Santo pejamatabëcueneta jivi neyaiyataena. Tsipaji xanë talivaisi, pexaniajailivaisi, Espiritu Santo pacayapëtaeyaexanaena. ¹⁵ Daxita taxa pexinaejava, xanë ata rabaja tajajava. Bajaraxuata pacajumaitsi: “Xanë talivaisi, pexaniajailivaisi, Espiritu Santo pacayapëtaeyaexanaena,” pacajaitsi, jai Jesús pijajivijavabelia.

Pacuenia bepejamatabëcuenelijobivimi jamatabëcuenebarëyajitsia yabara pelivaisi

¹⁶ Icatsia Jesús jumaitsi pijajivijavabelia:

—Caematacabibejecujinae rabaja apo panetaemë tsane. Itsiata icatsia itsamatacabibejecujinae panetaename. Bajara jane xuacujinae ponaenajë baja taxajavabetsia, jai Jesús.

¹⁷ Nexata pijajiviyajuvënëvi nayanijoba ëpamonae.

—¿Detsa majumaitsi pajumeje? Jesús nacajumaitsi: “Caematacabibejecujinae rabaja apo panetaemë tsane. Itsiata icatsia itsamatacabibejecujinae panetaename. Bajara jane xuacujinae ponaenajë baja taxajavabetsia,” nacajai. ¹⁸ ¿De tsaeta pejumaitsi jume: “Caematacabibejecujinae rabaja apo panetaemë tsane. Itsiata icatsia itsamatacabibejecujinae panetaename,” nacajai? Apo jumeyapëtaetsi cajena xua yabara nacajumaitsi, najai Jesús pijajivi.

¹⁹ Jesús jamatabëcueneyapëtane pacuenia picani pijajivi jamatabëyanijobatsi. Nexata Jesús tajëvelia jumaitsi pijajivijavabelia:

—Pacajumaitsi mapacueniaje: “Caematacabibejecujinae rabaja apo panetaemë tsane. Itsiata icatsia itsamatacabibejecujinae panetaename,” pacajaitsi. ¿Baja tsa pajume yabara panayanijobame? ²⁰ Xaniajanë pacuenia pacatsipaebijitsiatsi. Xanë itsa tēpaenajë, paxamë panuename. Bitso xanëjitsia panajamatabëxainaename. Itsiata baitsi jane pamonae apo nejumecovënëtsi, barëya tsane tatēpaejava yabara. Itsiata baitsi jane xuacujinae paxamë icatsia bitso panesivajamatabëcuenenarëyamë tsane itsa panetaename icatsia. ²¹ Pamatacabi petiriva vixaenotatsi penacueto pevecuanaexanaenexatsi, bitso bayanajamatabëxaina. Itsiata penacueto pevecuanaexanaecujinaetsi, pevixae apo najamatabënapitsi. Panacueto baja vecuanaexanatsi, sivajamatabëcuenenarëya. ²² Bajara pijinia pacuenia paxamë ata bitso panajamatabëxainaename itsa tēpaenajë. Itsiata icatsia itsa panetaename, bitso panesivajamatabëcuenenarëyamë tsane. Nexata itsajivi ata apo caëjēpaetsi tsane papecavecuajibi-aexanaenexa panejamatabëcuenenarëyajava, jai Jesús pijajivijavabelia.

²³ Icatsia Jesús jumaitsi pijajivijavabelia:

—Pamatacabi icatsia panetaename, apo paneyanijobimë baja tsane itsacuenejavayo ata. Tshipaji baja Espiritu Santo pacayapëtaeyaexanaena dexitacuene. Xaniajanë pacuenia patsipaebijitsiatsi. Taxa pacarajutsiana daxita xua tavënëta pavajëtabiabianame taxajavabelia. ²⁴ Abaxë tavënëta taxajavabelia apo pavajëtsimë itsacuenejavayo ata. Aeconoxae rajane baja tavënëta taxajavabelia pavajëtabiabianame. Nexata taxa itsa pacarajutsiana xua pavajëtsianame, bitso pajamatabëcuenenarëyamë tsane taxajavabelia, jai Jesús pijajivijavabelia.

Pacuenia Jesús jamatabëcueneamoneyaba dovathi, ponë itorobabiaba mapanacuapijivije pibisiacuene pexanaenexa, yabara pelivaisi

²⁵ Icatsia Jesús jumaitsi pijajivijavabelia:

—Palivaisi baja pacatsipaebabiabatsi, najumematayatsiaya pacatsipaebabiabatsi. Itsiata itsamatacabi livaisi apo pacatsipaebi tsanetsi najumematayatsiaya. Biji rajane pacatsipaebianatsi jumenapebetsiaya taxa pelivaisi. ²⁶ Bajarapamatacabi paxamë baja taxajavabelia pavajëtabiabianame tavënëta. Nexata baja xanë apo patacatovajëtabiabi tsanetsi taxajavabelia. ²⁷ Paxamë paneasivamë. Panejumecovënëtamenua taxa taneitorobinëcuenetsica. Bajaraxuata paxamë taxa pacaasiva. Nexata panijacuata taxajavabelia itsa pavajëtabiabianame, taxa pacajumetaena. ²⁸ Xanë baja cajena ponaponajë taxajavatatsia. Nexata taxajavavetsica ponajë tapatsinexa mapanacuayabetsicaje. Nexata icatsia ponaenajë mapanacuavecuaje. Naviatsianiajë baja taxajavabetsia, jai Jesús pijajivijavabelia.

²⁹ Nexata Jesús pijajivi jumaitsi:

—Baja rajane jumenapebetsiaya panetsipaebame. Najumematayatsia baja apo panetsipaebimë. ³⁰ Nexata baja pacajamatabëcueneyapëtanetsi dexitacuene neyapëtaenëcuene. Xamë panejamatabëcueneyapëtaneme palivaisi picani jamatabëpacayanijobatsi. Bajaraxuata pacajumecovënëtatsi baja Dioso athëbëvetsica pecaitorobinëcuenetsica, jai Jesús pijajivi.

³¹ Jesús nexata jumaitsi pijajivijavabelia:

—¿Nexata tsabaja aeconoxae panejumecovënëtame taxa Dioso athëbëvetsica taneitorobinëcuenetsica? ³² Imoxoyo rabaja pevajënae panenacayatsinexa panenaviabinexa panijabonëjavabelia. Paxamë panexuabanutsianame caenënë. Itsiata baitsi jane apo caenënë tsane. Tshipaji taxa yajavaponaponajë. ³³ Bajarapacuene tajëvelia paneyapëtaenexa, pacatsipaebabiabatsi baja cajena. Nexata xanëjavaberena panenajamatabëcuenecopatsixae, ajunavijibia pajinavanapaename. Mapanacuata panejinavanapaepato mapanacuapijivije pacabejiobiaexanabiabiana. Itsiata

pajamatabëcuenesaëmë tsavanapae tsane. Xanë rabaja jamatabëcueneamoneyabajë dovathi, ponë itorobabiaba mapanacuapijivije pibisiacuene pexanaenexa, jai Jesús pijajivijavabelia.

17

Pacuenia Jesús pijajivi tovajëta paxa Diosojavabelia yabara pelivaisi

¹ Jesús dovathi pejamatabëcueneamoneyabajava pijajivijavabelia petsipaebicujinae, Jesús athëbëa benaëcotsia. Nexata jumaitsi paxa Diosojavabelia:

—Taxa, netocopiapata rajane baja daxita pacuenia netocopatame. Tsitajëre jivi pacuenia xanë nexënatoxaenë, bitso ayaijamatabëcuenenënë. Bajarapacuenia itsa tsitajëtsianame, nexata jivi yapëtaena pacuenia xamë Diosomë bitso ayaijamatabëcuenenëmë. ² Xamë rabaja netocopatame daxitajivi taevetsinexa. Nexata necajëpa tarajutsinexa matababi apo peverevereceajava daxita pamonaerajutame. ³ Matababi apo peverevereceajava pexainaevinexa, cayapëtane baja caenëmë pepo Diosonëcuemë. Bajarapamonaerajutane ayapëtanenua baja Jesucristonë athëbëvetsica taneitorobinëmëtsica, jai Jesús paxa Diosojavabelia.

⁴ Icatsia Jesús jumaitsi paxa Diosojavabelia:

—Xanë rabaja mapanacuapijivijavabeliaje, apo pecajumecovënëtsivijavabelia, cajamatabëcueneitajëtatsi bitso ayaijamatabëcuene nexainaejava. Veretajënuabaja daxita xua nitorobame tacatoexanaenexa. ⁵ Taxa, pamatababi abaxë ajibi mapanacuaje, itsa cayajavaponaponatsi, necotia yajavaponaponajë ayaijamatabëcuenenëxaenë. Bajarapacuenia icatsia aeconoxae ata netocopatsianame vajanaevetaponaponaeenexabeje daxitacuene, jai Jesús paxa Diosojavabelia.

⁶ Icatsia Jesús jumaitsi paxa Diosojavabelia:

—Xamë itapetame itsamonaerajutane mapanacuataje tanesivanajamatabëcopatsinexa. Xanë nexata yapëtaeyaxanajë bajarapamonaerajutane pacuenia jamatabëcueneitsimë. Bajarapamonaerajutane nijajivi nerajutame. Xaniavaetsia cajumecovënëta nijumelivaisi. ⁷ Aeconoxae baja bajarapamonaerajutane yapëtane xamë nejamatabëcueneta taexanaponaejava daxita xuanë exanaponajë. ⁸ Daxita palivaisi netsipaebame, xanë juya bajarapalivaisi tsipaebajë bajarapamonaerajutane. Nexata nejumecovënëta. Nexata yapëtane bajarapamonaerajutane pepacuene tapatsijava xamëjavavetsica. Nejumecovënëta xamë athëbëvetsica taneitorobinëcuemëtsica, jai Jesús paxa Diosojavabelia.

⁹ Icatsia Jesús jumaitsi paxa Diosojavabelia:

—Cavajëtatsi bajarapamonaenexa. Apo cavajëtsitsi raja apo pecajumecovënëtsivinexa. Cavajëtatsi raja tanerajutsivimënexa. ¹⁰ Daxita pamonaerajutane nijajivi, bajarapamonaerajutane xanë ata tajajivi. Daxita pamonaerajutane tajajivi, bajarapamonaerajutane xamë ata nijajivi. Daxitajivi neyapëtane ayaijamatabëcuene taxainaejava. Tsipaji tajajivi xaniavaetsia netojinavanapa, jai Jesús paxa Diosojavabelia.

¹¹ Icatsia Jesús jumaitsi paxa Diosojavabelia:

—Xanë baja apo ponaponaeenë tsane mapanacuataje. Tsipaji baja ponaejitsianë xamëjavabetsia. Itsiata baitsi jane tajajivi jinavanapaena abaxë mapanacuataje. Taxamë, bitso nianeconijibinë. Tanerajutsivimë nesaëta evetsianame pibisiacuenevecua. Vaxaitsibeje caejamatabëcuene xainatsibeje. Nexata bajarapamonaerajutane ata tojitsipajë caejamatabëcuene pexainaeenexa. Pacuenia vaxaitsibeje jamatabëcueneitsibeje, bajara pejamatabëcueneitsinexa. ¹² Itsa abaxë yajavaponaponajë bajarapamonaerajutane mapanacuataje, nesaëta evetaponaponajë. Nexata apo nevecuanaxuabi daxita. Caenë saya nevecuanaxuabiana. Bajaraponë nevecuanaxuabiana tsipaji tocopiapatsianatsi pacuenia baja cajana tajëvelia jumaitsi nijumelivaisibaxutota bajaraponë yabara, jai Jesús paxa Diosojavabelia Judas yabara.

¹³ Icatsia Jesús jumaitsi paxa Diosojavabelia mapacueniaje:

—Aeconoxae baja ponaenajë xamëjavabetsia. Itsiata abaxë taponaponatabiepa-toyo mapanacuataje, cavajëtatsi. Bajarapacuenia cavajëtatsi tajajivi bitso pejamatabëcuenebarëyanexa pacuenia xanë bitso jamatabëcuenebarëyanë. ¹⁴ Xanë baja tajajivi tsipaebajë nijumelivaisi. Pacuenia mapanacuapijivije, apo pecajumecovënëtsivi, jamatabëcueneitsi, xanë apo jamatabëcueneitsinë. Bjaraxuata tajajivi ata itoyatsi mapanacuapijivije. Tsipaji apo jamatabëcuenejëpae. ¹⁵ Apo cavajëtsitsi raja nejutsinexa tajajivi mapanacuapijivivecuaje. Cavajëtatsi raja nevetabiabinexa tajajivi dovathivecua. ¹⁶ Pacuenia xanë apo jamatabëcuenejëpaenë mapanacuapijivije, bajara pijinia pacuenia tajajivi ata apo jamatabëcuenejëpae mapanacuapijivije. ¹⁷ Nijumelivaisi cajena pexaniajailivaisi. Bjaraxuata tanejumecovënëtsivi baja yavenonaename penatsatsinexa dovathi pejamatabëcuenevecua. Nexata bajarapamonae exanavanapaena xamë netojitsipaecuenia nijumelivaisi baja petsijamatabëcaexaetsi. ¹⁸ Pacuenia xamë nitorobame pexaniajailivaisi tatsipaebinexa mapanacuapijivijavabeliaje, bajara pijinia pacuenia juya xanë ata itorobajë tajajivi pexaniajailivaisi petsipaebinexa mapanacuapijivijavabeliaje. ¹⁹ Pacuenia xamë netojitsipame, tajajivi yapijivinacaevetsianajë xanë tanebeyaxuabinexa. Nexata bajarapamonae pacuenia xamë tojitsipame, catonexanavanapaena. Tsipaji baja bajarapamonae yapëtane nijumelivaisi pexaniajailivaisicuene, jai Jesús paxa Diosojavabelia.

²⁰ Icatsia Jesús jumaitsi paxa Diosojavabelia mapacueniaje:

—Itsiata apo cavajëtsitsi ëtajajivinexa. Cavajëtatsi raja bexëjavabelia tanejumecovënëtsivinexa ata. Tajajivi itsamatacabi bajarapamonaejavabelia itsa tsipaebaponaena tajumelivaisi, nexata bexëjavabelia bajarapamonae nejumecovënëtsiana. ²¹ Nexata cavajëtatsi daxita bajarapamonae penajamatabëcuenejëpaenexa. Xamë neyjavaponaponame. Xanë ata pijinia cayjavaponaponatsi. Bajara pijinia pacuenia tojitsipajë daxita bajarapamonae ata vajanacayjavajinavanapaenexabeje. Tojitsipajë bajarapamonae penajamatabëcuenejëpaenexa. Nexata bajarapamonae najamatabëcuenejëpaeya pejinavanapaejava, itsa tane daxita mapanacuapijivije, pejumecovënëtsinexa xamë athëbëvetsica taneitorobinëcuenemëtsica. ²² Pacuenia xamë yapëtaeyaexaname tajajivijavabelia xanë bitso ayaijamatabëcuene taxinaejava, bajara pijinia pacuenia xanë ata bajarapamonaejavabelia yapëtaeyaexanajë baja bajarapamonae ata ayaijamatabëcuenevi baja penaexanaejava tanejumecovënëtsixae. Nexata bajarapamonae tanejumecovënëtsixae, najamatabëcuenejëpa baja pacuenia vaxaitsibeje najamatabëcuenejëpatsibeje. ²³ Tajajivi yajavaponaponajë. Xamë pijinia neyjavaponaponame. Nexata tajajivi caejamatabëcuene xainaena. Nexata daxita mapanacuapijivije itsa taena tajajivi najamatabëcuenejëpaeya pejinavanapaejava, yapëtaena xamë athëbëvetsica taneitorobinëcuenemëtsica. Yapëtaenanua bajarapamonae niasivajava pacuenia xanë ata niasivamë, jai Jesús paxa Diosojavabelia.

²⁴ Icatsia Jesús jumaitsi paxa Diosojavabelia:

—Taxa, bajarapamonae xamë nerajutame. Nexata jitsipajë bajarapamonae ata penajinavanapaenexa itsabelia ponaejitsianë. Jitsipajë bajarapamonae taneyajavajinavanapaenexa, taneyapëtaenexa bitso ayaijamatabëcuene taxinaejava. Tsipaji nacua nexanaevajënaeya ata, xamë niasivamë. Bjaraxuata ayaijamatabëcuenenënë nexaname. ²⁵ Taxa, itsaneconi ata apo nexainaenë. Mapanacuapijivi, pamona apo cajumecovënëtsi, apo cayapëtae. Itsiata xanë cayapëtanetsi. Mapamonaeje, tajajivi, yapëtane baja xamë athëbëvetsica taneitorobijavamëtsica. ²⁶ Xanë tajajivi yapëtaeyaexanajë pecayapëtaenexa. Abaxë itsiata pevajënaeyabelia pecayapëtaeponaenexa, yapëtaeyaexanaponaenajë. Pacuenia xanë niasivamë, bajara pijinia pacuenia bajarapamonae ata namataenetsia penaasivanexa, yapëtaeyaexanaponaenajë. Xanë bajarapamonae yajavaponaponaenajë, jai Jesús paxa Diosojavabelia.

18

Pacuenia Jesús pijavajabitsaë vaetabatsi pebeyaxuabinexatsi jane baja yabara pelivaisi

(Mt 26.47-56; Mr 14.43-50; Lc 22.47-53)

¹ Jesús pevajëtsicujinae paxa Diosojavabelia, pijajivi barëpona Cedrónvënënajato itsapanabelia. Nexata bajarajotalia peubinaenë bacabobëxëpanata, Jesús pijajivi barëpata. ² Bajarajota cajena Jesús pijajivi barënacaetuatabiaba. Bajaraxuata Judas, Jesús pijajivitonë ata, ponë canajetsijitsiatsi pijavajabitsaë pecobeyabelia, yapëtane itsajota Jesús pijajivi barënacaetuatabiaba. ³ Nexata Judas peyapëtaexae, bajarajota barëpata vajabitsaë. Barëpatanua templobopijipolicíavi. Bajarapamonae itorobatsi sacerdotevi penamatacaitorobivibeje fariseovibeje. Judas pematacaponaevi capona espadanë, naebonë yajava. Lámparabëanënuua capona. Beisotabuqueranënuua capona penatsivajënaeitayotsinexa. ⁴ Nexata baja Jesús yapëtane daxita pacuenia exanaejitsiatsi bajarapamonae. Nexata Jesús najetabalia. Jumaitsi bajarapamonaejavabelia:

—¿Jipatsa pajaitame? jai Jesús.

⁵ Nexata bajarapamonae jumaitsi:

—Jesús raja, Nazaret tomarapijinë, pajaitajë, jai bajarapamonae.

Jesús nexata jumaitsi:

—Xanë rabaja maje, jai.

Judas, ponë Jesús pijavajabitsaë pecobeyabelia canajetatsi, nanuca bajarapamonaejavata. ⁶ “Xanë rabaja maje,” pejaijavata Jesús, bajarapamonae pematabëxëpa toquequenaponalia. Othopa irata. ⁷ Nexata icatsia Jesús jumaitsi:

—¿Jipatsa nexata pajaitame? jai.

Nexata icatsia bajarapamonae jumaitsi:

—Jesús raja, Nazaret tomarapijinë, pajaitajë, jai bajarapamonae.

⁸ Nexata Jesús jumaitsi bajarapamonaejavabelia:

—“Xanë rabaja maje,” pacajaitsi rabaja. Xanë itsa panejaitame, pacopatsianame mapamonaeje peponaenexa, jai Jesús pijajivi yabara.

⁹ Bajarapacuenia Jesús itsa jumaitsi, copiajopa jane baja pacuenia tajëvelia jumaitsi Jesús. Jesús baja cajena pijajivi yabara tajëvelia jumaitsi mapacueniaje: “Pamonae taxa nerajuta, itsanë ata apo nevecuanaxuabi tsane,” jai cajena Jesús tajëvelia pijajivi yabara. Bajarapacuenie jane baja copiajopa. ¹⁰ Nexata Jesús pijajivitonë, Simón Pedro, namaracëtaponapona espada. Nexata Simón Pedro espada navemarajonotaxuabina. Pecujuanenia pamuxuyorotomi, muxuyoropaebiaxuaba sacerdotevi pepo penamatacaitorobinë pijajivitonë. Ponë Simón Pedro muxuyoropaebiaxuaba, pevënë Malco.

¹¹ Nexata Jesús jumaitsi Pedrojavabelia:

—Nijaespada baja pevënojojavareca xataremeca. Taxa baja cajena netocopata tanebejiobiaexanaenexa. Bajaraxuata nacaevetsianajë tanebejiobiaexanaenexa, jai Jesús Pedrojavabelia.

Pacuenia Jesús nutatsi sacerdot. Pecujuanenia pamuxuyorotomi, muxuyoropaebiaxuaba sacerdotevi pepo penamatacaitorobinë pitabarata yabara pelivaisi
(Mt 26.57-58; Mr 14.53-54; Lc 22.54)

¹² Vajabitsaëvi pijacapitán, pijajivi yajava, judíovi pijapolicíavinua, nacobe-navaetabatsi Jesús. Nexata cobecëtatsi. ¹³ Caponatsi baja Anásvënënë pijaboyabelia. Anás paxuyo Caifás. Bajarapamatacabi Caifás sacerdotevi pepo penamatacaitorobinë tsaponapona. ¹⁴ Bajaraponë Caifás jumaitsi baja cajena copiaya judíovijavabelia Jesús yabara: “Bajaraponë caenë itsa beyaxuabiaexanaenatsi, bajaraponë pejamatabëcueneta daxita judíovitsi vajavajabitsaë apo nacaverebiabi tsane,” jai.

Pacuenia jane baja Pedro nayavajunuaxaina Jesús pijajivitonëcuene yabara pelivaisi
(Mt 26.69-70; Mr 14.66-68; Lc 22.55-57)

¹⁵ Itsa baja Jesús caponaliatsi sacerdotevi pepo penamatacaitorobinë pijaboyabelia, Simón Pedrobeje, itsanëbeje, Jesús pijajivitonëbeje, tajiyo pënanajetarucabeje. Ponë Simón Pedro yanatatsi, bajaraponë yapëtanetsi sacerdotevi pepo penamatacaitorobinë. Sacerdotevi pepo penamatacaitorobinë pijabo matatoyorotsia yacaranata ibopanaxanetonë, mataropotsia pefaratsijavaxanetota. Nexata ponë Pedro yanatatsi, bajarapayacaranatsijavaxaneto baupa najoneya. Nexata panepa bopanabojavabelia, itsabelia Jesús cajunuatsi. ¹⁶ Nexata Pedro nucojopa sacerdotevi pepo penamatacaitorobinë pijabo matatoyorotsia peyacaranatsijavaxaneto baupa jumavelia. Nexata ponë Pedro yanatatsi, caevëa pitsaparena. Nexata bajaraponë cuaicuaijai baupa pevetsivajavabelia Pedro ata penajonenexalia. Nexata baja Pedro ata tocopatatsi bopanabojavabelia penajonenexalia. Nexata baja Pedro ata najoneya bopanabojavabelia. ¹⁷ Nexata baupa pevetsiva jumaitsi Pedrojavabelia:

—¿Xamë ata tsabaja Jesús apo pijajivitonëmë? jai.

Pedro nexata jumaitsi:

—Jume raja. Xanë raja Jesús apo pijajivitonënë, jai Pedro.

¹⁸ Bajarapaepatota bitso bajarapameravi cainejeba. Nexata bajarapabota penacuenebivi, policíavi yajava, isoto itajuruteta bopanabota. Bajarapamonae nonopanubena. Nexata Pedro nanuca bajarapamonaejavata. Nanonopanuca.

Pacuenia sacerdotevi pepo penamatacaitorobinë Jesús yanijobatsi yabara pelivaisi
(Mt 26.59-66; Mr 14.55-64; Lc 22.66-71)

¹⁹ Anás jane baja sacerdotevi pepo penamatacaitorobinë jumaitsi Jesúsjavabelia:

—¿Detsa pamatabëxëyo nijajivi? ¿Detsa palivaisi tsipaebabiabame nijajivi? jai.

²⁰ Jesús nexata jumaitsi Anásjavabelia:

—Xanë daxitajivi pexanialivaisi tsipaebabiabajë itsajota nacaetuatabiaba. Tsipaebabiabajë penacaetuatsibonëjava, templobota ata. Muetsia cajena itsamatacabi ata apo tsipaebinë. ²¹ ¿Detsa xuajitsia nexata neyanijobame? Yanijobare pamonaejavabelia tsipaebabiabajë. Nexata bajarapamonae catsipaebiana pacuenia nejumetaeyabiaba. Bajarapamonae yapëtane xua yabara pexanialivaisi tsipaebabiabajë, jai Jesús sacerdotevi pepo penamatacaitorobinëjavabelia.

²² Itsa bajarapacuenia Jesús jumaitsi, nexata bajarajota penucaenë templobopi-jipolicíanë itabarapacataxuabatsi. Policíanë jumaitsi Jesúsjavabelia:

—Pëtsa bajarapacuenia cuaicuaijamë sacerdotevi pepo penamatacaitorobinëjavabelia, jai.

²³ Jesús nexata jumaitsi policíanëjavabelia:

—Itsa pibisiacuena cuaicuaijanë, netsipaebare papibisiacuene yabara cuaicuaijanë. ¿Detsa xuajitsia saya xaniavaetsia tajumaitsijava yabara, nebiame? jai Jesús.

²⁴ Nexata Anás itoroba Jesús cobecëtsiaya tsiteca pecaponaenexatsi Caifásjavabelia, ponë sacerdotevi pepo penamatacaitorobinëjavabelia.

Pacuenia icatsia Pedro nayavajunuaxaina Jesús pijajivitonëcuene yabara pelivaisi
(Mt 26.71-75; Mr 14.69-72; Lc 22.58-62)

²⁵ Pedro abaxë nanonopanuca isotojavata. Nexata bajarajota penubenaevi jumait-sitsi:

—¿Xamë ata tsabaja Jesús apo pijajivitonëmë? jaitsi.

Pedro nexata nayavajunuaxainaeya jumaitsi:

—Jume raja. Xanë raja Jesús apo pijajivitonënë, jai Pedro.

²⁶ Nexata icatsia bajarajota sacerdotevi pepo penamatacaitorobinë pijajivitonë, ponë Pedro muxuyoropaebiaxuaba pijamonaenë, jumaitsi:

—Xamë cajena covë catanetsi Jesúsjavata, peubinaenë bacabojavata, jai.

²⁷ Pedro icatsia nayavajunuaxainaeya jumaitsi:

—Jume raja. Xanë cajena apo yapëtaenë Jesús, jai Pedro.

Itsa baja Pedro najumeveretaba bajarapacuenia pejumaitsijava, vacara baja fiaba.

Pacuenia Jesús nutatsi Pilato pitabarata yabara pelivaisi

(Mt 27.1-2, 11-14; Mr 15.1-5; Lc 23.1-5)

²⁸ Itsa baja ajena matabi tsina, Jesús capitsapatsi Caifás pijabovecua. Nexata Jesús caponaliatsi nacuaevetsinë Pilato pijaboyabelia. Judíovi, pamonaenajetarubena Jesús peneconitsinexatsi, apo najonelia nacuaevetsinë Pilato pijaboyalia. Tsipaji Pilato apo judíonë. Judíovi apo joneyabiabi apo judíonë pijaboyalia. Bajarapamonae itsa jonejitsipa Pilato pijaboyalia, bajarapamonae judíovixae, jamatabëjumai tsipae: “Najamatabëcuenebijnajë Dioso pitabarata apo judíonë pijaboyalia tanajonexae. Nexata tavëna judíovi apo netocopatsi tsane tanaxaenexa pascua fiestamatabi pexaejava,” jamatabëjai tsipae bajarapamonae. ²⁹ Nexata Pilato pitsaparena. Jumaitsi judíovijavabelia:

—¿Detsa pitsineconi yabara pacapatame maponëje? jai Pilato judíovijavabelia.

³⁰ Nexata judíovi jumaitsi:

—Itsa raja pibisiacuene apo pexanaenë tsipae, apo pacatocapatsi tsipaetsi maberenaje, jai judíovi.

³¹ Nexata icatsia Pilato jumaitsi:

—Paca ponaremelia caevëalia. Pananeconitsiaexanaename panijacuata pacuenia panijalivaisi pacaitoroba paneexanaenexa, jai Pilato judíovijavabelia.

Nexata judíovi icatsia jumaitsi:

—Paxamë baitsi jane apo panetocopatsimë patabeyaxuabinexa itsanë ata pijaneconi yabara, jai judíovi.

³² Bajarapacuenia Jesús tocopiapatatsi pacuenia baja cajena tajëvelia pijajivijavabelia navajunupaebapona pebeyaxuabijavanexatsi. ³³ Nexata Pilato icatsia joneya pijaboyalia. Jumaitsi Jesúsjavabelia:

—¿Xamë tsaja judíovi pepo nevetsinë? jai.

³⁴ Jesús nexata jumaitsi Pilatojavabelia:

—¿Xamë tsaja nejamatabëcueneta neyanijobame? Jume. ¿Catsipaeba tsaja itsamonae xanë judíovi pepo taevetsinëcuene? jai Jesús.

³⁵ Pilato nexata jumaitsi:

—Xanë raja apo judíonë. Bajarapacuenia apo tacasivanajamatabëxainaeta. Judíovi raja, caranata nijanacuapijivi, sacerdotevi penamatacaitorobivi yajava, cacapata maberenaje pecaneconitsinexa xanëjavaberena. ¿Detsa jane xua exaname? jai Pilato Jesúsjavabelia.

³⁶ Nexata Jesús jumaitsi Pilatojavabelia:

—Mara panacua xanë apo taevetsinëje. Itsa ra peneta mapanacua taevetsinë tsipaeje, nexata paepatota judíovi nevaetaba, daxita tajajivi neyapijivinamaxëvanitsipa tapanepaenexa. Xanë raja mapanacua apo taevetsinëje, jai Jesús Pilatojavabelia.

³⁷ Nexata Pilato jumaitsi:

—¿Xamë tsaja nexata jivi nevetsinë? jai.

Jesús nexata jumaitsi:

—Jājā, xanë raja jivi taevetsinë pacuenia nejumaitsimë. Bajaraxuata patajë mapanacuayabetsicaje tatsipaebinexa jivi pexaniajailivaisi. Daxita pamonaenajitsipa pexaniajailivaisi, nenamuxunaevetabiaba bajarapalivaisi, jai Jesús Pilatojavabelia.

³⁸ Nexata Pilato jumaitsi Jesúsjavabelia:

—¿Detsa pacuenia nayapëtane pexaniajailivaisicuene? jai.

Pacuenia baja Pilato tocopata Jesús pebeyaxuabinexatsi yabara pelivaisi

(Mt 27.15-31; Mr 15.6-20; Lc 23.13-25)

Pilato peyanijobicujinae Jesúsjavabelia, Pilato icatsia pitsapalia. Nexata Pilato jumaitsi judíovijavabelia:

—Apo caxitajarabinë cajena itsacujiruneconi ata pexanaejava, paneconi yabara bajaraponë naneconitsijitsia. ³⁹ Penaneconitsivi pejebabiabibota naneconitsia peponaponaenë pepitsapaenexa itsa panevajëtame, nexata pascua fiestamatacabi caenë patacapitsapabiabatsi. ¿Pajitsipame tsaja patacatocapitsapaenexa penaneconitsivi pejebabiabibovecua pepitsapaenexa pajudíovimë papecaevetsinë? jai Pilato judíovijavabelia Jesús yabara.

⁴⁰ Nexata bajarajota daxitajudíovi vavajai.

—¡Pëtsa abaxë copatame bajaraponë! ¡Panetocapitsapaename jane Barrabás! jai judíovi. Bajaraponë Barrabás bitso penacobetoxotsinë. Bajaraxuata penaneconitsivi pejebabiabibota, naneconitsiaponapona.

19

¹ Pilato pijajivi itoroba Jesús pejumatatitibabenexatsi penaneconitsivi pejumaconitabiabimacata. ² Nexata pejumatatitibabecujinaetsi vajabitsaë Jesús becoronacuenia tsi-mataexanatsi peejuvitoyoroto. Mataxatatatsi bajarapaejuvitoyoroto. Bajaraxuacujinae quenetsiataeya benacuaeavetsinëcuenia xatatatsi peraënaeyatsautsaucaejava. ³ Nexata vajabitsaë imoxoyoliatsi Jesús. Vajabitsaë capocaponaeya jumaitsi tsabuataponae Jesúsjavabelia:

—¡Bajaco, judíovi pepo pevetsinë! jai tsabuataponae.

Vajabitsaë pecobeta Jesús itabarapacababeyabuataponatsi.

⁴ Pilato nexata icatsia pitsapalia. Jumaitsi judíovijavabelia:

—Pacatocanaviarenatsi icatsia maberenaje paneyapëtaenexa. Apo caxitajarabinë itsacujiruneconi ata pexanaejava, paneconi yabara naneconitsijitsia maponëje, jai Pilato Jesús yabara.

⁵ Nexata peejuvitoyoroto Jesús namataxatatsiaya pitsaparena. Naxatata peraënaeyatsautsaucaejava. Nexata Pilato jumaitsi judíovijavabelia:

—¡Baja rajane nuca maponëje! jai Pilato.

⁶ Nexata sacerdotevi penamatacaitorobivi, policíavi yajava, itsa tanetsi Jesús, nexata bajarapamonae vavajai.

—¡Cruzajavabelia cobematabiabarutsiaexanare! ¡Cruzajavabelia cobematabiabarutsiaexanare! jai bajarapamonae Jesús yabara.

Pilato nexata jumaitsi bajarapamonaejavabelia:

—Paxamë pacaponaremelia. Cruzajavabelia pacobematabiabarutsianame. Tsi-paji raja xanë apo caxitajarabinë itsacujiruneconi ata pexanaejava, jai Pilato.

⁷ Nexata judíovi jumaitsi Pilatojavabelia:

—Mara ponë Dioso apo pejitsipaecuenia jumaitsi-je: “Xanë raja Dioso pexënatonë,” jai. Paxanë pajudíovinë patajalivaisita itaveta bajarapacuenia pejumaitsiyaniva itsajivi ata. Bajaraxuata bajaraponë baja bebeyaxuabatsi, jai judíovi Jesús yabara.

⁸ Pilato itsa jumetane bajarapamonae pejumaitsi-je: “Mara ponë Dioso apo pejitsipaecuenia jumaitsi-je: ‘Xanë raja Dioso pexënatonë,’ jai,” pejaijava Jesús yabara, nexata bitso Pilato junava. ⁹ Nexata icatsia Pilato pijaboyalia barëjoneya Jesús. Yanijoba icatsia Jesúsjavabelia.

—¿Detsa nexata verena neponaenë? jai Pilato.

Itsiata Jesús apo jumepitsi.

¹⁰ Nexata Pilato jumaitsi:

—¿Detsa xuajitsia apo nejumepitsimë? ¿Apo yapëtaemë tsi-paji mapanacua taevetsinëcueneje? Nejamatabëcuenecaëjëpa raja taitorobinexa tajajivi cruzajavabelia

pecacobematabiabarutsinexa. Nejamatabëcaëjêpanua taitorobinexa pecacopsinexa ata, jai Pilato.

¹¹ Jesús nexata jumaitsi:

—Itsa Dioso apo catocopatsi tsipae mapanacua nevetsinexaje, nexata xanëjavaberena ata apo cacaëjêpae tsipae taneitsacueniabinxamë. Itsiata baitsi jane ponë necanajeta xamë necobeyabelia, bitso naneconita Diosojavabelia xamë matatoxenetsia, jai Jesús Pilatojavabelia.

¹² Itsa bajarapacuenia Jesús jumaitsi, nexata picani Pilato jamatabëcopatatsi Jesús.

Itsiata baitsi jane judíovi vavajai Jesús pecopatsiyanivatsi. Jumaitsi:

—¡Itsamonaë raja paxanëyajuvënëvi jitsipa maponëje pevetsinënexatsi! ¡Nexata itsa copatsianame maponëje, naneconitsianame nijatuxanenëjavabelia, Romanonacua pepo pevetsinëjavabelia, pepo vajanacayanacuaevetsinëjavabelia jane baja! ¡Nexata maponëbejeje nijatuxanenëbeje naitoyabeje tsane! jai judíovi Pilatojavabelia.

¹³ Nexata Pilato itsa jumetane bajarapacuenia judíovi pejumaitsijava, Pilato eca tribunalvënëjavata, xuata Pilato ecabiaba jivi itsa naneconitsiaexanaejitsia. Xuata Pilato ecabiaba jivi itsa naneconitsiaexanaejitsia, hebreojumeta pevënë Gabata. Bajara-jota pirafaratsiira. Nexata Pilato itorobeca pijajivi pecapitsapaenexatsi Jesús Pilato pijabovëcua. ¹⁴ Pascuavënëfiesta pejonematacabinexa pevajënaeya pamatacabi, matoneje, bajarapacuenia Jesús exanatsi. Nexata Pilato jumai tsecae judíovijavabelia:

—¡Mara jota nucaje papecaevetsinëje! jai Pilato Jesús yabara.

¹⁵ Itsiata saya bajarapamonae vavajai.

—¡Beyaxuabiaexanare! ¡Jema têpae! ¡Cruzajavabelia cobematabiabarutsiaexanare! jai judíovi.

Pilato nexata jumaitsi:

—¿Pajitsipame tsaja cruzajavabelia tacobematabiabarutsiaexanaejava papecaevetsinëmi? jai Pilato.

Nexata sacerdotevi penamatacaitorobivi jumaitsi Pilatojavabelia:

—Caenë raja Romanonacua pevetsinë paxainajë pepo patanevetsinë. Paxanë raja apo paxainaenë itsanë pematatsënëa pepo patanevetsinë, jai sacerdotevi penamatacaitorobivi.

¹⁶ Nexata baja Pilato rajuta judíovi pecobeyabelia Jesús pecobematabiabarutsinexatsi cruzajavabelia. Itsiata Pilato pijajivi itoroba Jesús pecaponaenexatsilia petsutojumabelia.

Pacuenia jane baja Jesús cruzajavabelia cobematabiabarutatsi yabara pelivaisi

(Mt 27.32-44; Mr 15.21-32; Lc 23.26-43)

¹⁷ Jesús nexata vajabitsaë itsa caponaliatsi, caponaeyaexanatsi cruza, pacruzajavabelia Jesús cobematabiabarutsijitsiatsi. Caponaliatsi Jivimatasipavënë tsutojavabelia. Hebreojumeta bajarapatsuto pevënë Gólgota. ¹⁸ Bajarapatsutojumata Jesús cruzajavabelia cobematabiabarutatsi. Anijanëbeje yajavacobematabiabarutatsi. Caenë canacujitsia pijacruzata rubatsi. Itsanë Jesús pecujanenia ruca. Itsanë Jesús petsavenonënia ruca. ¹⁹ Pilato pijajivi itoroba petoyaquinaenexatsi tablapayojumata. Nexata Pilato pijajivi itoroba bajarapatablapayo petomatabiabarutsinexatsi Jesús perucaecruzaupita. Jumai tsarucae bajarapaitane mapacueniaje: “Mara ponëje Jesús, Nazaret tomara-pijinëje, judíovi pepo pevetsinë,” jai tsarucae bajarapaitane. ²⁰ Pajumatsutota Jesús cobematabiabarutatsi cruzajavabelia, bajarapajumatsuto eca tomaravëcua imoxoyo. Bajaraxuata judíovi ayaibitsaëtóxaneto tomarapijivi leba bajarapaitane. Bajarapaitane yaquinaruta acueyabi paviriavibeje pijajumeta. Yaquinaruta hebreojumeta, griegojumetanua, latínjumetanua. ²¹ Nexata sacerdotevi penamatacaitorobivi jumaitsi Pilatojavabelia:

—Apo xanepanae raja neyaquinarutsiaexanaenexa mapejumaitsiitaneje, “Mara ponëje, judíovi pepo pevetsinëje,” pejaiitane. Biji rajane icatsia yaquinarutsiaexanare pejumaitsiitane mapacueniaje: “Mara ponë jumaitsije: ‘Xanë raja judíovi pepo taevetsinë,’ jai,” pejaiitane icatsia yaquinarutsiaexanare, jai sacerdotevi penamatacaitorobivi Pilatojavabelia.

²² Nexata Pilato jumaiti sacerdotevi penamatacaitorobivijavabelia:

—Pacuenia baja yaquinarutsiaexanjë, bajarapacuenia jema rucae, jai Pilato sacerdotevi penamatacaitorobivijavabelia.

²³ Vajabitsaë Jesús pecobematabiabarutsicujinaetsi cruzajavabelia, Jesús penaxatatsijavami, xua jumaponapona, vajabitsaë nota. Cuatro xuabeje tsanaeya jëba. Caenë canacujitsia natsicobetsanaejitsia. Saicaya tsatabuata itsajava, xua Jesús naxatatabiaba piapiajavareca. Bajaraxua apo xainae pecaucutsiajoronaejava. Pecuejava saya caepanacujinae. ²⁴ Nexata vajabitsaë najumaiti:

—Apo titicae tsanetsi bajaraxua. Canamuxusitsianatsi beibotoxi vajayapëtaenexa ponë pitsijitsia bajaraxua, najai vajabitsaë.

Bजारapacuenia vajabitsaë itsa exana, Jesús jane baja tocopiapatatsi pacuenia baja cajena Dioso pejumelivaisibaxutota, tajëvelia jumaiti Jesús penaxatatsijava yabara. Dioso baja cajena pejumelivaisibaxutota, tajëvelia jumaiti Jesús penaxatatsijava yabara mapacueniaje: “Natsicobetsanaena tanaxatatsijava. Canamuxusitsiana beibotoxi peyapëtaenexa ponë pitsijitsia,” jai baja cajena tajëvelia Dioso pejumelivaisibaxutota Jesús penaxatatsijava yabara. Nexata vajabitsaë canamuxusita beibotoxi peyapëtaenexa ponë pitsijitsia piapiajavareca, Jesús penaxatatsijavami.

²⁵ Pacujinae abaxë Jesús athëbëyo ruca cruzata, cruza bëxëpanata nubena acueyabi povamaxëto ëMaríavënëvanë. Itsava Jesús pena. Itsava Jesús penava, Cleofas pijava. Itsava María, Magdala tomarapijiva. ²⁶ Nexata Jesús itsa taerucaica, taenutsica pena, pijajivitonë bitso piasivanë yajava. Jesús pena pemuxuneneta nuca bajaraponë. Jesús nexata jumaiti penajavabelia:

—Ena, maponë nuca nemuxunenetaje, benexënatocuenia taename, jai Jesús penajavabelia.

²⁷ Bajaraxuacujinae icatsia Jesús jumaiti pijajivitonëjavabelia:

—Mapovaje beenacuenia taename, jai Jesús.

Bajaraxuacujinae Jesús pijajivitonë pijaboyabelia barëpona Jesús pena, Jesús pena penaecaenexa bajaraponë pijabota.

Pacuenia baja Jesús tēpa yabara pelivaisi

(Mt 27.45-56; Mr 15.33-41; Lc 23.44-49)

²⁸ Jesús baja yapëtane petocopiarucaejavatsi daxita pacuenia tajëvelia vajunupaebatsi Dioso pejumelivaisibaxutota. Nexata jane baja Jesús pecopiarutsinexa daxita abaxë xua tosaicatsi, Jesús jumaiti:

—Mera bitso jitsipajë, jai Jesús.

²⁹ Nexata bajarajota vaxi eca. Vënëqueca piajatuvinora. Nexata vajabitsaënë esponjavënëjava jabuta bajaraporayalia. Bajaraxuacujinae naeboupita ruta bajarapaesponjavënëjava. Toyotsiatsi Jesús. Tsicuiborutatsi Jesús petsutsuninexa. ³⁰ Jesús nexata tsutsune bajaraxua. Bajaraxuacujinae Jesús jumaiti:

—Daxita rajane baja taexanaejava, veretajë, jai Jesús.

Nexata irataeya tēpanajereca.

Pacuenia Jesús becuere rebota yenecacuatatsi yabara pelivaisi

³¹ Pascuavënë fiesta junua. Nexata abaxë caematacabi sajina pejonenexa judíovi penacueraevetsimatacabinexa. Bajaraxuata judíovi apo jitsipae Jesús bana baja matavëjëa

perubenaejava cruzata. Tsipaji pascuavënë fiestamatacabi itsa junua judíovi penacuer-aevetsimatacabinexa, judíovi bitso banajamatabëcuenereviaba daxita penacueraevetsimatacabanë matatoxenetsia. Bajaraxuata judíovi vajëta Pilatojavabelia Pilato vajabitsaë pitorobinexa pethaëepatsicababenexatsi Jesúsbana, cruzata perubenaevi, bepíjia bajarapamonae petëpaenexa. Itsa baja bajarapamonae tēparubena, penotsinexatsitsica cruzavecua pecaponaenexatsi itsajavabelia. ³² Nexata vajabitsaë itsa ponalia, Jesús peyajava cobematabiabarutsinëtsibeje asaëbeje abaxë tsarucae. Bajaraxuata copiaya itsanë thaëepatsicabiabatsi. Bajaraxuacujinae icatsia itsanë thaëepatsicabiabatsi. ³³ Nexata Jesús vajabitsaë itsa cujibaliatsi, taerutatsi baja Jesús petëpaenë. Bajaraxuata Jesús apo thaëepatsicabiabitsi.

³⁴ Itsiata baitsi jane vajabitsaëviyajuvënënenë becuererebota Jesús yenecacuatatsi. Bajarapavajënëyarena pitsapa pijana, mera yajava. ³⁵ Xanë raja, Juannë, pacatoyaquinatsi mapalivaisije. Tataenë bajarapacuene. Nexata xanë yapëtaniji bajarapacuene pexaniajaicuene. Nexata bajarapalivaisi pacatoyaquinatsi panejumecovënëtsinexa paxamë ata. ³⁶ Bajarapacuenia Jesús apo thaëepatsicabiabitsi petocopiapatsixaetsi pacuenia baja cajena Dioso pejumelivaisibaxutota tajëvelia jumaitsi Jesús yabara. Dioso baja cajena pejumelivaisibaxutota Jesús yabara tajëvelia jumaitsi mapacueniaje: “Apo siepatsicabiabi tsanetsi itsiata caesitoyo ata,” jai baja cajena tajëvelia Dioso pejumelivaisibaxutota Jesús yabara. ³⁷ Itsabaxutota pijinia tajëvelia jumaitsi Jesús yabara mapacueniaje: “Bajarapamonae taena pecacuatsivajënëtsi,” jai baja cajena itsabaxutota Jesús peyenecacuatsijavanexatsi yabara.

Pacuenia Jesús petëpaenë mëthëtatsi yabara pelivaisi
(Mt 27.57-61; Mr 15.42-47; Lc 23.50-56)

³⁸ José, Arimatea tomarapijinë. Bajaraponë judíovi pevetsiviyajuvënënenë. Nexata José jumecovënëtaponapona Jesús Cristocuene. Itsiata apo najamatabëcueneitajëtsi pejumecovënëtsijava Jesús Cristocuene. Tsipaji cjunava penajuaevetsivi judíovi. Nexata baja Jesús itsa tēpa, José itsiata najamatabëcueneitajëta. José vajëta Pilatojavabelia Jesús petëpaenë pepitsinexatsica cruzajavavetsica pemëthëtsinexa. Nexata baja tocopatatsi. Nexata José lia Jesús perucaejavabelia pecaponaenexa Jesús petëpaenë. ³⁹ Nicodemo, ponë meravi pona pebarëcuaiicujainexa Jesús, bajaraponë ata judíovi pevetsiviyajuvënënenë. Nexata Nicodemo Joséta nalia. Caponabeje treinta pakilobeje petuxujuvibenonë, pematajërëabibenonë petuxujuvijavata. ⁴⁰ Nexata Josébeje Nicodemobeje cruzajavavetsica pitsicabeje Jesús petëpaenë. Petsiothocaecujinaebeje petuxujuvibenonë, pexaniaviria piapiasábanapanata mataquionaeya daxitanëreca matacacëbabeje. Bajarapacuenia exanabeje tsipaji judíovi baxaniavaeta petëpaejiviyo pemëthëtsinexa bajarapacuenia. ⁴¹ Itsajota Jesús cruzajavabelia cobematabiabarutatsi, bajarajota imoxoyo peubinaenë ayaibacaboxaneto eca. Bajarapabacabojavata Jesús petëpaevajënaeya, José cajena exanaeyaexanabuata iboitapajanitojavata pinijiibovaju. José pijamonaejivi itsa totëpatsi, pebuatsinexa bajarapaibovajulia. José ata itsa tēpa, pebuatsinexatsi bajarapaibovajualia. Nexata bajarapaibovajualia abaxë itsajiviyo ata petëpaejiviyo apo buatsitsi. ⁴² Nexata bajarapaibovajualia Josébeje Nicodemobeje Jesús petëpaenë buatabeje. Tsipaji bajarapaibovaju boca imoxoyo. Judíovi ata baja penacueraevetsimatacabinexa, bitso baja imoxoyo pejonenexa. Bajaraxuata bajarapaibovajualia Jesús petëpaenë buatatsi.

20

Pacuenia Jesús petëpaecujinae icatsia asaë yabara pelivaisi
(Mt 28.1-10; Mr 16.1-8; Lc 24.1-12)

¹ Judíovi baja penacueraevetsimatacabi verevereca. Nexata meravia pitsijavata, bajayacunua, ajena matacabi tsarucaponae, itsiata abaxë itsa aitaquiri, María Magdala tomarapijiva pona Jesús petëpaenë pebuatsiibovajutsijavabelia. Nexata María tane ibopanaxanetomi petixitanutsijavalia ibovajuvëpavecua. ² Nexata María cujinaejinarena itsaberena Simón Pedro ponapona. Bajarajota Simón Pedro yajavaponapona itsanë Jesús pijajivitonë, ponë bitso asiva Jesús. Nexata María jumaitsi bajaraponëbejejavabelia:

—Vajatuxanenëmi ra covë jutatsi pebuatsiibovajutsivecua. Apo payapëtaenë raja itsabelia icatsia buatatsi, jai María.

³ Nexata Pedrobeje Jesús pijajivitonëbeje ponabeje Jesús pebuatsiibovajutsijavabelia. ⁴ Najuacujinaejinaliabeje. Itsiata itsanë Jesús pijajivitonë bitsojinaeya cujinaejina Pedro matatoxenetsia. Bajaraponë copiaya palia Jesús pebuatsiibovajutsijavabelia. ⁵ Itsa bajaraponë nabëxëtsutsiaya naëcolia ibovaju bëxëpanalia, nexata taeyabualia Jesús daxitanë pematacacëbipanamitsireca pebocaejava bajarapaibovajualia. Bajaraponë itsiata abaxë apo jonelia. ⁶ Bajaraxuacujinae Simón Pedro cotocaevi pata. Nexata ibovajualia Pedro joneya. Pedro ata tane Jesús pematacacëbipanamitsireca pebocaejava bajarajota. ⁷ Papanata Jesús saicaya matacëtatsi, apo yajavabocae bajarajota. Saicayjavata xaniavaetsia quionabuata. ⁸ Nexata ponë copiaya pata Jesús pebuatsiibovajutsijavata, najoneya jane baja. Tane pacuenia Jesús vecuapitsapa bajarapaibovaju. Nexata jane baja bajaraponë jumecovënëta xaniavaetsia Jesús icatsia piasaëjava petëpaecujinae. ⁹ Abaxë picani bajaraponë apo jumeyapëtae pacuenia Dioso pejumelivaisibaxutota jumaitsi Jesús petëpaecujinae icatsia piasaëjavanexa yabara. ¹⁰ Bajaraxuacujinae Jesús pijajivitonëbeje naviatabeje baja pijaboyabelia.

Pacuenia Jesús petëpaecujinae tsitanaitajëta María Magdala tomarapijivajavabelia yabara pelivaisi

(Mr 16.9-11)

¹¹ María nuenuca Jesús petëpaenë pebuatsiibovajutsijumavelia. Nexata María yaitaxutonueya nabëxëtsutsiaya naëcolia ibovaju bëxëpanalia. ¹² Nexata María taeyelia anjanëbeje ángelnëbeje, penioponaejava penaxatatsinëbeje. Ecabeje itsajota picani Jesús petëpaenë buatatsi. Itsanë eca Jesús pematabocotomijavavereca. Itsanë eca Jesús petaxumijavatsina. ¹³ Nexata ángelnëbeje jumaitsidebeje Maríajavabelia:

—¿Detsa xuajitsia nuame? jaiibeje.

María nexata jumaitsi:

—Tsipaji covë itsamonae jutatsi tajatuxanenëmi. Nexata apo yapëtaenë itsabelia icatsia buatatsi, jai María ángelnëbejejavabelia.

¹⁴ María ajena najumeveretanajelia bajarapacuenia pejumaitsijava, napënëyorotsiaya naëcolia. Taenuta Jesús penucaejava bajarajota. Itsiata abaxë María apo yapëtae Jesús cuene. ¹⁵ Nexata Jesús jumaitsi Maríajavabelia:

—¿Detsa xuajitsia nuame? ¿Jipatsa jaitame? jai Jesús.

María nexata Jesús yabara saya jamatabëjumaitsi:

—Matsamëra ponë mapaunubacabo pevetsinëje, jamatabëjai María.

Bajaraxuata María caranata Jesúsjavabelia jumaitsi mapacueniaje:

—Xamë itsa jutame Jesús petëpaenë, netsipaebare itsajota buatame. Pitsijitsianë tacaponaenexa, jai María.

¹⁶ Jesús nexata junataxuaba María pevënëta.

—¡María! jai Jesús.

María nexata napënëyorolia Jesúsjavabelia. Judíovi pijajumeta María jumaitsi Jesúsjavabelia:

—¡Rabuni! jai. “Rabuni,” itsa jai hebreojumeta, mapajumetaje pejumaitsi jume: “Xamë tanecujarubinëmë,” pejaijume.

¹⁷ Jesús nexata icatsia jumaitsi Maríajavabelia:

—Pëtsa nejayaremena. Tsipaji raja abaxë apo ponaenë taxa peecaejavabetsia. Ponare jane tajajivijavabelia. Tsipaebianame tajajivijavabelia taponaejavanexa taxajavabetsia. Taxa rabaja, paxamë ata paneaxa. Ponë tajaDioso, bajaraponë paxamë ata panijaDioso, jai Jesús Maríajavabelia.

¹⁸ Nexata María Magdala tomarapijiva pona baja petsipaebinexa Jesús pijajivijavabelia. Pona baja petsipaebinexa pacuenia tane pepo petuxanenë Jesús. Nexata María Jesús pijajivijavabelia tsipaebanua daxita pacuenia Jesús jumaitsi.

Pacuenia Jesús petëpaecujinae tsitanaitajëta pijajivijavabelia yabara pelivaisi (Mt 28.16-20; Mr 16.14-18; Lc 24.36-49)

¹⁹ Pamatacabi María tane Jesús, icatsia itsa asaë petëpaecujinae, bajarapameravi nacaetuata daxita Jesús pijajivi. Daxita baupanë xaniavaetsia nayabaupaxataba. Tsipaji Jesús pijajivi judíovi cjunava. Jesús itsiata joneya. Jemata nuca pijajivi tuatujëta. Jesús jumaitsi pijajivijavabelia:

—¡Paxamë saya pajamatabëjemamëre! ¡Pëtsa pajunavame! jai Jesús.

²⁰ Bajarapacuenia Jesús pejumaitsicujinae, pijajivijavabelia tsitajëta pecobevajënëbeje. Nayenevajënëitajëtanua pijajivijavabelia. Bajarajota Jesús pijajivi bitso barëya icatsia petaexae pijatuxanenë. ²¹ Nexata Jesús icatsia jumaitsi:

—¡Paxamë saya pajamatabëjemamëre! ¡Pëtsa pajunavame! Pacuenia taxa nitoroba, bajarapacuenia juya pacaitorobatsi jivijavabelia pexanialivaisi panetsipaebaponaenexa, jai Jesús pijajivijavabelia.

²² Nexata Jesús uxunelia asaëyata pijajivi pematatsënëalia. Jumaitsi pijajivijavabelia:

—Espíritu Santo pacopiapire panejamatabëëthëtota papecatsijamatabëecaenexa.

²³ Nexata itsamonae pibisiacuene pexanaeconi itsa pavecuajibiaexanaename, nexata baja pibisiacuene pexanaeconimi pepacuene vecuajibitsi tsane. Itsa apo pavecuajibiaexanaemë tsane itsamonae pibisiacuene pexanaeconi, nexata pibisiacuene pexanaeconi apo vecuajibitsi tsane, jai Jesús pijajivijavabelia.

Pacuenia Tomás Jesús tane Dioso piasaëyaexanaecujinaetsi petëpaecujinae yabara pelivaisi

²⁴ Jesús pijajiviyajuvënënë, pevënë Tomás, ponë vënërubatsi itsavënë, Sapalanë. Bajaraponë piajibitsarucaejavata, Jesús pijajivijavabelia tsitanaitajëta. ²⁵ Nexata Tomás itsa pata, Jesús pijajivi jumaitsi Tomásjavabelia:

—Pacatsutanetsi rabaja necovëta vajatuxanenë, jai Jesús pijajivi.

Nexata Tomás jumeaebiaya jumaitsi:

—Itsa pepacuene taenajë cruzajavabelia clavota pecobematabiabarutsivajënëtsibeje, nacobesibëtsianajë pecobevajënëyalia. Nacobesibëtsianajë peyenevajënëyalia ata. Nexata jane baja matapania jumecovënëtsianajë Jesús icatsia piasaëjava petëpaecujinae, jai Tomás Jesús yabara.

²⁶ Bajaraxuacujinae, ocho pamatacabibejecujinae, Jesús pijajivi icatsia bota nacaetuata. Tomás ata jane baja naponapona. Nexata daxita baupanë icatsia xaniavaetsia nayabaupaxataba. Jesús itsiata joneya. Jemata nuca pijajivi tuatujëta. Jesús jumaitsi pijajivijavabelia:

—¡Paxamë saya pajamatabëjemamëre! ¡Pëtsa pajunavame! jai Jesús.

²⁷ Bajaraxuacujinae Jesús jumaitsi Tomásjavabelia:

—Tomás, taema rajane baja tacobevajënëbeje. Nacobesibëtsiaremelia jane baja tacobevajënëyalia. Nacobesirovire jane baja tayenevajënëyalia nebëtsinexa. Pëtsa baja xuacujinae jumeaebame. Jumecovënëre jane baja icatsia tasaëjava tatëpaecujinae, jai Jesús Tomásjavabelia.

²⁸ Nexata Tomás jumaitsi Jesúsjavabelia:

—¡Tajatuxanenë, tajaDioso! jai Tomás.

²⁹ Jesús nexata icatsia jumaitsi:

—Tomás, aeconoxae rajane baja jumecovënètame icatsia tasaëjava tatëpaecujinae. Tsi-paji baja nijacuata netaneme. Xamë matatoxenetsia bitso nesivajamatabëcuenebarëya tsane pamona apo netae ata, itsiata jumecovënëta icatsia tasaëjava tatëpaecujinae, jai Jesús Tomásjavabelia.

Pajamatabëcuene yabara yaquina mapacuyalatoje yabara pelivaisi

³⁰ Jesús pijajivi pitabëta exanapona orijibia itsajavanë pinijicuene Dioso pesaëta pex-anaejavanë. Itsiata bajaraxuanë pelivaisi apo yajavayaquinaenë mapacuyalatoje. ³¹ Itsiata mapalivaisi pacatoyaquinatsije panejumecovënëtsinexa Jesús athëbëvetsica Dioso pitorobijavatsica vajanacacapanepaenexa, panejumecovënëtsinexanua Jesús Dioso pexënatocuene. Nexata itsa pajumecovënëtsianame mapalivaisije, paxainaename matabi apo peverevereaejava Jesús pejamatabëcueneta.

21

Pacuenia Jesús petëpaecujinae icatsia itsa asaë, tsitanaitajëta pijajivijavabelia, siete ponëbejevabelia, yabara pelivaisi

¹ Jesús petëpaecujinae icatsia itsa asaë, tsitanaitajëta pijajivijavabelia Tiberiasvënë pucaxanetoitapata. Jesús icatsia pijajivi itsa tsitanaitajëta, maitsije. ² Caejavata Jesús pijajivi najuajinavanapa mapamatabëxëyoje. Najuaponaponabeje Simón Pedrobeje Tomásbeje, ponë vënërubatsi itsavënë, Sapalanë. Najuaponaponabeje pijinia anijanëbeje, Zebedeo ëpexënatobeje. Najuaponaponabeje pijinia itsanëbeje icatsia pematatsënëa. Natanael ata naponapona bajarajota. Canávënë tomarapijinë Natanael. Canátomara eca Galilea nacuata. ³ Nexata Simón Pedro jumaitsi penajuajinavanapaevijavabelia:

—Djuuai raja yamatajucaejsianë, jai Pedro.

Nexata penajuajinavanapaevi jumaitsi:

—Paxanë ata panaponaenajë xamëta, jai.

Nexata pucaxanetojavabelia pona. Bajarajotalia jerata naropoba. Itsiata bajarapam-eravi caenë ata dujuainë bajarapamonae apo yamatajutsi. ⁴ Ajena baja matabi tsina, Jesús pijajivi tsitanaitajëta Tiberiaspuca itapata. Itsiata Jesús pijajivi apo yapëtaetsi Jesús cuene. ⁵ Nexata Jesús jumaitsi pijajivijavabelia:

—¿Jica? ¿Djuuainë apo payamatajutsimë caenë ata? jai Jesús.

Nexata Jesús pijajivi jumaitsi:

—Ajibi cajena, jai.

⁶ Nexata icatsia Jesús jumaitsi pijajivijavabelia:

—Djuuai paneyamatajucaejava, panecujanenia pamuxunene, pacoparemeca jer-ayenepanareca. Bajarapacuenia payamatajutsianame dujuai, jai Jesús pijajivijav-abelia.

Nexata Jesús pijajivi dujuai peyamatajucaejava bajarapacuenia copareca. Bajarax-uacujinae pejutsinexatsina menevecua apo caëjëpaetsi. Tsi-paji bitso ayaijava dujuai tojunuatsi. ⁷ Nexata Jesús pijajivitonë, ponë Jesús bitso asiva, bajaraponë jumaitsi Pedrojavabelia:

—¡Vajatuxanenë tsaena rabaja maje! jai Pedrojavabelia.

Nexata Simón Pedro caejumetaetabi bajarapacuenia pejumaitsijava Jesús yabara, ju-masa penucaenë, naxatataxuaba penaxatatsijava. Jopanucalia menialia naxanitsiayo pepatabinexa Jesúsjavabelia. ⁸ Jesús pijajivi meneitapavecua tajë apo yarubena. Cien metrocuenia saya yarubena. Nexata itsamonae Pedrobana penajuajinavanapaevi jerata pata tajetabuabelia. Robobocabuatapona dujuai peyamatajucaejava. Tovënëcatsi cajena dujuai. ⁹ Bajarapamonae itsa nonobajunalia tajetabuabelia, taeyeta isotoitaire. Bajara paisotoitairejumavereca taeyabuata dujuainë, panbëanë yajava. ¹⁰ Nexata Jesús jumaitsi pijajivijavabelia:

—Aeconoxae dujuai itsa payajutsiaremena, pacaponaenimina panexaniavaetsinexa, jai Jesús pijajivijavabelia.

¹¹ Pedro nexata jeraënëa berunareca tajetabuaberena peyarobobocaenexarena dujuai peyamatajucaejava. Nexata bajaraxua dujuai vënëca pinijidujuainëanë. Ciento cincuenta y tres ponëbeje. Itsiata dujuai peyamatajucaejava, dujuai ayaijava ata, apo yaucuucucae. ¹² Nexata Jesús jumaitsi pijajivijavabelia:

—Naxanitsia. Vepanabanianame, jai Jesús pijajivijavabelia.

Itsanë ata Jesús pijajivitonë apo yanijobi Jesúsjavabelia. “¿Jipatsamë?” apo jai. Tsi-paji baja bajarapamonae yapëtanë pijatuxanenë Jesús cuene. ¹³ Jesús nexata cujilia bajarapaisoto. Pita baja panbëanë. Tsicobetsana pijajivi. Bajarapacuenia icatsia Jesús dujuaijavanë ata tsicobetsana pijajivi.

¹⁴ Bajarapacuenia Jesús pijajivijavabelia acueyabijava tsitanaitajëta, petëpaecujinae icatsia itsa asaë.

Pacuenia Jesús petëpaecujinae itsa naitajëta cuaicuaijai Simón Pedrojavabelia yabara pelivaisi

¹⁵ Penabaniveretsicujinae Jesús jumaitsi Simón Pedrojavabelia:

—Simón, Jonás pexënatomë, ¿xamë tsaja bitso niasivamë mapamonae taneasivajava matatoxenetsiaje? jai Jesús.

Pedro nexata jumaitsi:

—Jājā. Xamë rabaja nejamatabëcueneyapëtaneme tacaasivajava, jai Pedro Jesúsjavabelia.

Jesús nexata jumaitsi Pedrojavabelia:

—Nexata pacuenia pijaoveja pevetsinë xaniavaetsia baeveta pijaoveja, bajara pijinia pacuenia xamë xaniavaetsia netoebetabiabianame tajajivi, pamona tanepejanajumecovënëtsivi. Bajarapamonae taniji betajaovejacuenia, jai Jesús.

¹⁶ Nexata icatsia Jesús jumaitsi Pedrojavabelia:

—Simón, Jonás pexënatomë, ¿xamë tsaja niasivamë? jai.

Pedro nexata icatsia jumaitsi:

—Jājā. Xamë rabaja nejamatabëcueneyapëtaneme tacaasivajava, jai Pedro Jesúsjavabelia.

Jesús nexata icatsia jumaitsi:

—Nexata xamë netoevetsianame tajajivi, pamona nesivanajamatabëcopata xanëjavaberena. Bajarapamonae taniji betajaovejacuenia, jai Jesús.

¹⁷ Icatsia matavëjëa Jesús jumaitsi Pedrojavabelia:

—Simón, Jonás pexënatomë, ¿xamë tsaja niasivamë? jai icatsia.

Pedro nexata bejamatabëjibireca matavëjëa peyanijobaponaexaetsi Jesús piasivajava yabara. Nexata Pedro jumaitsi Jesúsjavabelia:

—Xamë baja cajena yapëtaneme daxitacuene. Nexata baja nejamatabëcueneyapëtaneme bitso tacaasivajava, jai Pedro.

Jesús nexata tajëvelia jumaitsi Pedrojavabelia:

—Nexata xamë netoevetsianame tajajivi, pamona taniji betajaovejacuenia. ¹⁸ Xaniajanë pacuenia catsipaebijitsiatsi. Itsa abaxë pamatacabi pevëjëatomë, naxatatabiabame nenaxatatsijava nijacuata. Nexata nejitsipaejavabelia ponabiabame. Itsa pamatacabi perujunëmë tsane, pacuenia bitso perujunëyo banamaxëcaeveta itsajivi pijacamisa pexatatsinexatsi, bajarapacuenia namaxëcaevetsianame itsamonae pecacobecëtsinexa pecaponaenexa itsabelia picani apo jitsipaemë tsane neponaejava, j Xaniajanë pacuenia catsipaebijitsiatsi. Itsa abaxë pamatacabi pevëjëatomë, naxatai Jesús tajëvelia Pedrojavabelia.

¹⁹ Bajarapacuenia Jesús jumaitsi Pedrojavabelia Pedro tajëvelia peyapëtaenexa pacuenia beyaxuabijitsiatsi Dioso pejumelivaisi pejumecovënëtsixae. Itsa baja Jesús najumev-ereta bajarapacuenia pejumaitsijava, Jesús jumaitsi Pedrojavabelia:

—Pedro, naxanitsia. Nepënaponare, jai Jesús.

Nexata baja Pedrobeje Jesúsbeje ponatababeje pesaicaeyojavabelia.

Jesús pijajivitonë, ponë bitso Jesús asiva, penavajunupaebijava yabara pelivaisi

²⁰ Xanë Juannë, Jesús pijajivitonënë, bitso taneasivanë. Pamatacabi caniviyopijijava panabaniji Jesús pebeyaxuabivajënaetsi, xanë Jesús pemuxuneneta ecajë. Nexata bajarajota yanijobecajë. “Tajatuxanenë, çjipatsa cacanajetsiana nijavajabitsaë pecobeyabelia?” janë Jesúsjavabelia. Nexata Jesús pebeyaxuabicujinaetsi, icatsia itsa asaë, panetsitanaitajëta. Nexata bajarapamatacabi Jesúsbeje Pedrobeje pesaicaeyojavabelia ponatababeje. Nexata xanë pecovëvelia cotocaevajë. Nexata Pedro Jesús pecovëya najetaruca. Pedro itsa napënëyorotaba caevëarena, netaetaba bajaraponëbeje pecovëya tanajetarucaejava. ²¹ Nexata Pedro itsa netane, xanë tatëpaejavanexa yabara, yanijoba Jesúsjavabelia.

—Tajatuxanenë, çdetsa pacuenia tēpaena maponëje? jai Pedro Jesúsjavabelia.

²² Jesús nexata jumaitsi Pedrojavabelia xanë yabara:

—Itsa xanë tojitsipaejitsipajë bajaraponë piasaëtsaponaponaenexa, asaë tsaponaponaes tipae matapania icatsia tapatsimatacabitsicajavabelianexa. Pëtsa bajaraponë tatorcopatsijava yabara, najamatabëxainame. Tsipaji xua bajaraponë tocopatsipajë, apo xamënexa tsipae. Nexata xamë saicaya caasaëmë tsaponaponaes tsane nexanaejava, pacuene caitorobatsi, jai Jesús Pedrojavabelia.

²³ Bajaraxuata patanajuajinavanapaevi, Jesús pijajivi, xanë yabara jamatabëcuenenavëxaniabiaya najumai tsabiabi: “Juan raeta apo tēpae tsane,” najai tsabiabi. Itsiata bairi jane Jesús apo jumaitsi: “Juan raja apo tēpae tsane.” apo jai. Jumaitsi rajane mapacueniaje: “Itsa xanë tojitsipaejitsipajë bajaraponë piasaëtsaponaponaenexa, asaë tsaponaponaes tipae matapania icatsia tapatsimatacabitsicajavabelianexa. Pëtsa bajaraponë tatorcopatsijava yabara, najamatabëxainame. Tsipaji xua bajaraponë tocopatsipajë, apo xamënexa tsipae,” jai Jesús xanë yabara Pedrojavabelia.

²⁴ Xanë Jesús pijajivitonënë. Patanajuajinavanapaevi xanë yabara jamatabëcuenenavëxaniabiaya najumai tsabiabi: “Juan raeta apo tēpae tsane,” najai tsabiabi. Bajarapacuenia tanesivajamatabëjumaitsinë, Juannë, yaquinajë daxita mapalivaisije. Yapëtanetsi baja cajena palivaisianë Jesús nacatsipaeba, pexaniajailivaisianë.

²⁵ Jesús pinijicuene pexanaejavanë Dioso pesaëta, ayaijava exana mapanacuataje. Itsajavanë ata exana pematatsënëa. Nexata bajaraxuanë, caejavayo canacujitsia pelivaisi, itsamonae itsa yaquinaejitsipa, bajaraxuanë pelivaisibaxutonë bitso ayaijava tsipae. Nexata meta bajarapalivaisibaxutonë vënëcaejitsipa mapanacuataje.

Pacuenia exanavanapa Jesús pitorobivi, apóstolevi

Pacuenia Jesús tajëvelia vajunupaeba Espíritu Santo pepatsijavanexatsica mapanacuayabetsicaje yabara pelivaisi

¹ Teófilo, xanë Lucasnë, catoyaquinatsi mapabaxutoje. Copiaya baja cajena catoy-aquinatsi itsabaxutota daxita Jesús pexanaejavanë pelivaisi. Nexata copiayapijibaxu-tota catoyaquinatsi xuamaxëto Jesús exana petaxuxuabijavaveliacujinae pexanaejava. Daxita bajaraxuanë pelivaisi, catoyaquinatsi. Pacuenia ata Jesús pexanialivaisi jivi tsipaebaponapona, abaxë itsa ponapona mapanacuataje, bajarapalivaisi ata catoy-aquinatsi. ² Matapania pamatacabi Jesús athëbëabetsia Dioso caponatsi, bajarajota Jesús baja copiaruta pexanaejava. Nexata baja itsajota Jesús copiaruta pexanaejava, bajarajota pijinia copiarutajë copiayapijibaxutota tacatoyaquinaejava, Jesús pexanaejavanë pelivaisi. Athëbëabetsia Jesús Dioso pecaponaevajënaetsi, Jesús itapeta pijajiviya-juvënëvi apóstolevinexa. Nexata Jesús itoroba pijajivi, apóstolevi, jivi pexanialivaisi petsipaebanajetarubenaenexa daxitanacuanëjava. Espíritu Santo pejamatabëcueneta Jesús yapëtaeyaexanatsi pacuenia itorobijitsia pijajivi, apóstolevi. ³ Bajaraxuacujinae Jesús pijavajabitsaë beyaxuabatsi. Jesús petëpaecujinae icatsia itsa asaë, anijatonë tsitanaitajëtabiaba pijajivijavabelia. Cuarenta baja pamatacabibeje itsa panepa Jesús icatsia piasaëcujinae, pona jane baja athëbëabetsia. Bajarapacuenia anijatonë Jesús pija-jivi petsitanaitajëtsixae petëpaecujinae, nexata pijajivi yapëtanetsi Jesús icatsia piasaëjava petëpaecujinae. Jesús pijajivi itsa tsitanaitajëtabiaba, Jesús pijajivi tsipaebabiaba Dioso pijajivi pevetsijavanexa.

⁴ Nexata Jesús pijajivi itsa tsitanaitajëta Jerusalén tomarata, Jesús jumaitsi pijajivijavabelia mapacueniaje:

—Pëtsa abaxë paponame mapatomaravecuaje. Pacopiaevetavanapaename abaxë Espíritu Santo. Bajaraponë yabara taxa Dioso najumecapanepaeya jumaitsi papeca-toitorobinexatsica. Xanë ata bajaraponë yabara pacatsipaebatsi baja cajena panecopi-aevetavanapaenexa. ⁵ Juanpijinë raja jivi bautisabanajetaruca ëmerata. Itsiata baitsi jane caematacabibejecujinae paxamë Dioso pacatsijamatabëjoneyaexanaena Espíritu Santo, jai Jesús pijajivijavabelia.

Pacuenia Jesús petëpaecujinae icatsia itsa asaë, athëbëabetsia baja pona yabara pelivaisi

⁶ Jesús petëpaecujinae icatsia itsa asaë, tsitanaitajëta pijajivijavabelia. Nexata Jesús pijajivi penacaetuatsijavata, Jesús pijajivi yanijobatsi. Jesús pijajivi jumaitsi mapacue-niaje:

—Patajatuxanenë, ¿xaniajai tsabaja? ¿Itsanacuapijivi pevetsijava mapanacuaje peco-patsinexa, xamë vecuapitsapaeyaexanaename mapamatacabitaje? ¿Nexata tsaja va-javiriavi judíovi juya evetsiaexanaename vajanacayanacuaevetsinexa? jai Jesús pija-jivi.

⁷ Nexata Jesús jumaitsi pijajivijavabelia:

—Xua yabara paneyanijobame, paneyapëtaenexa, taxa Dioso apo pacatocopatsi. Apo pacatocopatsi paneyapëtaenexa pamatacabita, paepatota ata, taxa Dioso pexanaejava, copiapatsijitsia. Caenë taxa Dioso yapëtane pamatacabi bajaraxua copiapatsijitsia.

⁸ Itsiata baitsi jane paxamë ajumejunavijibia papaebianame xanë talivaisi Espíritu Santo itsa pacatsijamatabëpatsianica paxamëjavabetsica. Nexata panelivaisipaebanaje-tarubenaename Jerusalén tomarajava, Judea nacujava ata, Samaria nacujava ata, tajënacuatubujava ata, jai Jesús pijajivijavabelia.

⁹ Bajarapacuenia Jesús pejumaitsicujinae pijajivijavabelia, Jesús baja pijajivi pitabēnejeva, athēbēabetsia Dioso caponatsi. Itarērēbo baja Jesús pēcaevaya. Nexata baja Jesús pijajivi acuenebi matavējēa petaejava. ¹⁰ Nexata Jesús pijajivi pētaenubena athēbēabetsia Jesús pepēcaevijavatsia. Nexata ángelnēbeje, penioponaejava penaxatatsinēbeje, Jesús pijajivi jemata bajarajota tsitanaitajētatsi. ¹¹ Nexata ángelnēbeje jumaitsibeje Jesús pijajivijavabelia:

—PaGalilea nacuapijivimē, ¿detsa xuajitsia athēbēabetsia pataenubename? Bajaronē Jesús paxamējavavetsia Dioso pacavecuacaponatsi athēbēabetsia. Bajaronē icatsia itsamatacabi patsianica. Pacuenia pataneme petsiajava, bajara icatsia pacuenia patsianica, jai ángelnēbeje Jesús pijajivijavabelia.

Pacuenia Jesús pijajivi natsicueyaitapeta Matíasvēnēnē apóstolenēnaxa yabara pelivaisi

¹² Jesús baja peponaecujinae athēbēabetsia, Jesús pijajivi, apóstolevi, naviaba Jerusalén tomaraberena. Naviaba olivonaenē penubenaetsutojavaverena. Bajarapatsuto eca caekilómetrocuenia Jerusalén tomaravecua. ¹³ Nexata Jesús pijajivi pata Jerusalén tomarata. Nexata pabota Jesús pijajivi najinavanapa, athēbēyo pexanaeirajavabetsia junaya. Tsipaji baja cajena tsicopatatsi bajarapairatatsia pejinavanapaenexa. Pamona Jesús pijajivi apóstolevi, mapevēnēanēje. Itsanē pevēnē Pedro. Itsanē Santiago. Itsanē Juan. Itsanē Andrés. Itsanē Felipe. Itsanē Bartolomé. Itsanē Mateo. Itsanē Santiago, Alfeo pexēnato. Itsanē Simón. Bajaronē celotenē. Itsanē pevēnē Judas, Santiago pejuyapijinē. ¹⁴⁻¹⁵ Pabota Jesús pijajivi apóstolevi najinavanapa, athēbēyo pexanaeirajavatatsia, nacaetuatabiaba caejavata pevajētabiabinexa Diosojavabelia. Jesús pena María, Jesús pejuyapijivi ata, itsapetiriavi ata yajava, nacaetuatabiaba pevajētabiabinexa Diosojavabelia. Bajarapajivibitsaēto ciento veinte pajivibeje. Nexata penacaetuatsijavata bajarapamonae tuatujēta Pedro nonotapuna. Pedro nexata jumaiti penacaetuatsivijavabelia:

¹⁶ —Tajamonae, copiapata rajane baja pacuenia baja cajena tajēvelia jumaiti Dioso pejumelivaisibaxutota. Pacuenia bajayata Davidpijinē Espíritu Santo pejamatabēcueneta tajēvelia vajunupaebiaexanatsi Judaspijinē pexanaejavanexa, copiapata jane baja. Tsipaji Judaspijinē itsa matabacaponae Jesús vaetabijitsiatsi, Judaspijinē tocopiapatatsi baja pacuenia Davidpijinē tajēvelia jumaiti. ¹⁷ Judaspijinē picani paxanēyajuvēnēnēmi. Jesús picani bajaraponēmi itapeta penanacuenebinexa paxanēta. ¹⁸ Judaspijinē ira comuata pibisiacuene pexanaematamopalatata. Bajaronēmi pijacuata nabeyaxuaba. Nexata penabeyaxuabicujinae, pematono ira bejopaica. Nexata cototititicajunua. Daxita pēnēmi pitsatajarabarena. ¹⁹ Daxita Jerusalén tomarapijivi vēnēlivaisitanetsi daxita xua tocopiapatatsi Judaspijinēmi. Nexata Judaspijinēmi pecomuatsiira, Jerusalén tomarapijivi vēnēruba Acéldama. “Acéldama,” itsa jai bajarapamonae pijajumeta, mapajumetaje pejumaitisijume: “Papalata pejamatabēcueneta jivitonē beyaxuabatsi, bajarapapalatata pecomuatsiira,” pejaijume, jai Pedro penacaetuatsivijavabelia.

²⁰ Icatsia Pedro jumaiti penacaetuatsivijavabelia:

—Salmosvēnēbaxutota tajēvelia Judaspijinē yabara comparacióncuenia jumaiti mapacueniaje:

Pijabo jivinebo xuabetsiana. Itsajivi ata apo ponaponae tsane bajarapabota, jai tajēvelia Salmosvēnēbaxutota Judaspijinē apóstolenē penaexanaejavavecua pepit-sapaejavanexa yabara.

Itsajavata Salmosvēnēbaxutota icatsia tajēvelia jumaiti Judaspijinē yabara mapacueniaje:

Bajaronēmi penacuenebijavami, itsanē pitsiana, jai itsajavata Salmosvēnēbaxutota itsanē icatsia apóstolenē penaexanaejavanexa yabara Judaspijinē pepitsapaejamatabēcuenē, jai Pedro penacaetuatsivijavabelia.

²¹ Icatsia Pedro jumaitsi:

—Caenë panetsicueyaajibi doce paponëbejenexanë Jesús petëpaecujinae Dioso icatsia piasaëyaexanaejavatsi patataejava patanajuapaebinea. Bajaraxuata bitapetatsi itsanë pataneyanabinexa. Paxamë tuatuajëta ena patanajuapënjajinavanapaevi vajatuxanenë Jesús pamatacabi abaxë ponapona mapanacuataje. ²² Juanpijinë raja bautisaba Jesús. Bajara pamatacabijavaveliacujinae, panajuapënjajinavanapajë Jesús, matapania athëbëabetsia Dioso patanevecua caponaematacabitsijavabelia. Nexata bajarapitsinë bitapetatsi Jesús petëpaecujinae Dioso icatsia piasaëyaexanaejavatsi patataejava patanajuapaebinea, jai Pedro penacaetuatsivijavabelia.

²³ Nexata pamona nacaetuata, Dioso pejumecovënëtsivi, anijanëbeje itapeta, Pedrohana jane baja Jesús penajuapënjajinavanapaevi. Bajaraponëbejeyajuvënënë caenë acueyabi pavënëbeje xaina. Itsavënë José. Itsavënë Barsabás. Itsavënë Justo. Itsanë caevënë xaina. Bajaraponë pevënë Matías. ²⁴ Bajaraxuacujinae bajarapamonaenajumaitsi:

—Vajëtsianatsi Diosojavabelia vajanacayapëtaeyaexanaenexa, najai.

Nexata jane baja bajarapamonaenapeyapëtaenexa, ponë Dioso itapetsijitsiatsi apóstolenënexa, vajëta Diosojavabelia. Bajarapamonaenapevajëtsijavata Diosojavabelia, jumaitsi mapacueniaje:

—Patajatuxanenë, daxitajivi nejamatabëcueneyapëtaenë. Maponëbejeyajuvënënëje, ponë itapetame apóstolenënexa, panetsitajëre. ²⁵ Nexata ponë itapetame, pitsiana xua Judaspijinë vecuapitsapa. Bajaraxua Judaspijinë vecuapitsapa peponaexae infiernojavabelia, jai bajarapamonaenapevajëtsijavata Diosojavabelia.

²⁶ Bajaraxuacujinae bajarapamonaenapijacuenecujirua exana peyapëtaenexa jane baja ponë apóstolenënexa. Nexata bajarapamonaenayapëthane Matías apóstolenënexa. Nexata baja Matías najunua once ponëbeje Jesús pijajivi apóstolevijavabelia. Nexata baja apóstolevi doce ponëbeje.

2

Pacuenia jane baja athëbëvetsica Espíritu Santo patsica Jesús pijajivi petsijamatabëjonexatsi yabara pelivaisi

¹ Itsa baja panepa cincuenta pamatacabibeje pascuavënëfiesta pevereverecaecujinae, icatsia junua Pentecostésvënëfiesta. Nexata bajarapamatacabi daxita Jesús pijajivi nacaetuata caejavata. ² Nexata bajarapamatacabi athëbëvetsica jemata najumeta bepinijijoviboxaneto. Nexata pabota Pedrohana nacaetuata, daxitabo najumeteca. ³ Bajarapamonaenatane athëbëvetsica perunaejavatsica bepitarunutsicotia. Nexata bajarapamonaenacaejivi canacujitsia bajarapacotia tsimatanatsanaeyarunaicatsi. ⁴ Nexata daxita bajarapamonaenatsijamatabëvënëcatsi Espíritu Santo. Nexata bajarapamonaenajemata taxuxuaba penatsipaebijava itsaviriajumenëta, apo penatsipaebijumemi picani. Espíritu Santo saya pejamatabëcueneta bajarapacuenia itsaviriajumenëta natsipaebi-aexanatsi.

⁵ Bajarapamatacabita Jerusalén tomarata jinavanapa ayaibitsaëtojaneto judíovi. Bajarapamonaenasaicaya daxitanacuanëjava penaexanaevi. Bajarapamonaenasa napata Jerusalén tomarata penataenexa Pentecostésvënëfiesta. Bajarapamonaenabitso pejumecovënëtsivi Dioso. ⁶ Nexata bajarapamonaenaitsa jumetane bepinijijoviboxaneto athëbëvetsica penajumetsijava, nexata pabota Jesús pijajivi nacaetuata, bajarapabota muxunanacaetuana ayaibitsaëtojaneto bajarapamonaenapaviriajumenëta Jesús pijajivi Espíritu Santo pejamatabëcueneta natsipaebiaexanatsi, bajarapamonaenapijajumenë. Nexata bajarapamonaenaxaniavaetsia jumetane xua yabara Jesús pijajivi tsipaebapona. Bajaraxuata bajarapamonaenabitso jamatabëcuenenabenajaca. Tsipaji bajarapamonaenacaenacuapijivi canacujitsia xaniavaetsia jumetaepona pepo pijajumeta Jesús pijajivi

petsipaebilivaisianë. ⁷ Athëbëvetsica bepinijjoviboxaneto penajumetsijava pemuxunanacaetuaanaevi, pinijicuena najamatabëxainaeja jamatabëcuenenabenajaca. Nexata bajarapamonae najumaitsi:

—Daxita mapamonae nacatsipaebanubenaje, Galilea nacuapijivi. Apo penatsipae-bivi picani vajajumenë. ⁸ Vaxaitsi itsaverena patatsi, caenacuapijivitsi canacujitsia saicaya xainatsi vajajumenë, apo penatsipaebijumenë mapamonaeje. ¿Detsa pacuenia itsiata vaxaitsi, caenacuapijivitsi canacujitsia, vajanaexanaejavaveliacujinae vajanatsipaebijumenëta caëjëpatsi penatsipaebinexa mapamonaeje? ⁹ Vaxaitsiyajuvënëvi raja itsamonae Partia nacuapijivi. Itsamonae Media nacuapijivi. Itsamonae Elam nacuapijivi. Itsamonae Mesopotamia nacuapijivi. Itsamonae Judea nacuapijivi. Itsamonae Capadocia nacuapijivi. Itsamonae Ponto nacuapijivi. Itsamonae Asiavënë nacuapijivi. ¹⁰ Itsamonae Frigia nacuapijivi. Itsamonae Panfilia nacuapijivi. Itsamonae Egipto nacuapijivi. Itsamonae Africa nacuapijivi, Cirene tomarapënëverenapijivi. Itsamonae vaxaitsiyajuvënëvi judíovi, Roma tomarapijivi. Itsamonae apo judíovi, Roma tomara-pijivi. Bajarapamonae apo judíovi ata, Dioso jumecovënëtavanapa pacuenia vaxaitsi judíovitsi jumecovënëtavanapatsi Dioso. ¹¹ Itsamonae vaxaitsiyajuvënëvi Creta nacuapijivi. Itsamonae Arabia nacuapijivi. Itsiata daxitatsi jumetanetsi xaniavaetsia Jesús pijajivi vajanacatsipaebilivaisianë vajajumenëta. Caejivi canacujitsia bajarapamonae Dioso pinijicuene pexanaejava yabara nacatsipaebapona, najai athëbëvetsica bepinijjoviboxaneto penajumetsijava pemuxunanacaetuaanaevi.

¹² Nexata daxita bajarapamonae jamatabëcuenenajunaviacanubena. Nexata bajarapamonae najumaitsi:

—¿Detsa meta mapitsijamatabëcuene yabara itsije? najai.

¹³ Itsamonae saya jumecaponaeya jumaitsi Jesús pijajivi yabara:

—Aitajibi ra saya mapamonaeje, jai.

Pacuenia Pedro tsipaeba athëbëvetsica bepinijjoviboxaneto penajumetsijava pemuxunanacaetuaanaevijavabelia yabara pelivaisi

¹⁴ Apóstolenë Pedro nonotapuna once ponëbeje apóstolevi yajava. Nexata Pedro pinijumeta jumaitsi athëbëvetsica bepinijjoviboxaneto penajumetsijava pemuxunanacaetuaanaevijavabelia:

—Tajamonae judíovi, Jerusalén tomarata panenapatsivi, panenamuxunaevere. Paxamë ata Jerusalén tomarata paneenaevi, xaniavaetsia panenamuxunaevere paneyapëtaenexa xua yabara pacatsipaebijitsiatsi. ¹⁵ Paxamë mapamonae yabaraje pajumaitsimë: “Aitajibi ra saya mapamonaeje,” pajamë. Mara pamonaevi apo aitajibije. Bajayacunuaepato raja abaxë maje. Bajarapaepatota jivi apo aitajibi tsabiabi. ¹⁶ Mara pamonaevi paxamë panijajumenëta Espíritu Santo pejamatabëcueneta natsipaebiaexanatsije pecopiapatsixae baja xua bajayata tajëvelia Joelpijinë Diosojumepaebinëmi vajunupaeba. Bajaraxua yabara Dioso pejumaitsijava Joelpijinë bajayata tajëvelia jumaitsi mapacueniaje:

Dioso jumaitsi: ¹⁷ “Itsa baja imoxoyo pevajënae tsane mapanacua pevereverecaenexaje, itorobianicajë Espíritu Santo daxitanacuapijivi, pamonaevi tajajivi petsijamatabëjononexatsi. Daxita panexi, pebijivi, petiriavi, paebiana palivaisi Espíritu Santo paebiaexanaenatsi, xanë talivaisi. Pevëjëavi pebijivi taena xua tsitajëtsianajë bemajitsinaebocuenia. Perujuvi pebijivi piamajitsinaejavata tsipaebianajë. ¹⁸ Nexata daxita pamonaevi tanetonacuenebivi, pebijivi, petiriavi ata, bajarapamatacabi Espíritu Santo toitorobianicajë petsijamatabëjononexatsi. Nexata bajarapamonae paebiana xanë talivaisi. ¹⁹ Tsitajëtsianajë itaboxotatsia pinijicuene taexanaejava. Daxita mapanacuajava ata pinijicuene taexanaejava tsitajëtsianajë. Ayai tsane pijana. Ayai tsane isotocotia. Ayai tsane petsëxë mapanacuataje. ²⁰ Nexata matacabipijijuameto aitaquiri tsane. Meravipijijuameto

bepijana itatsobia tsane. Bajara itsane mapanacuataje itsa baja peneta imoxoyo pevajënae tsane icatsia pepatsimatacabinexatsica pepo petuxanenë. Bajarapamatacabi bajaraponë pinijicuene pexanaejava pecaëjëpaenëcuenetsi, tsitajëtsiana daxitajivijavabelia. ²¹ Nexata pajivi navajëtsiana pepo petuxanenëjavabelia, bajarapajivi capanepaenatsi,” jai Dioso, jai bajayata tajëvelia Joelpijinë Diosojumepaebinëmi Dioso pejumait-sijava bajaraxua yabara, jai Pedro athëbëvetsica bepinijijoviboxaneto penajumetsijava pemuxunanacaetuaevijavabelia.

²² Icatsia Pedro jumait-si bajarapamonaejavabelia:

—Tajamonae judíovi, panenamuxunaevere paneyapëtaenexa xua yabara pacatsipae-bijitsiatsi. Jesús, Nazaret tomarapijinë, Dioso pesaëta pinijicuene pexanaejava exanapona paxamë tuatuajëta. Nexata Jesús pacayapëtaeyaexana Dioso ayaicuene pexanaejava pecaëjëpaenëcuenetsi. Bajarapacuenia paxamë baja payapëtaneme Jesús Dioso pitorobinëcuenetsi. Xaniavaetsia rabaja payapëtaneme paxamëjavata Jesús pexanaejava bajarapapinijicuene. ²³ Bajaraponë Jesús paxamë panecobeyabelia canajetatsi. Nexata paxamë pabeyaxuabame. Tsipaji patocopatame piamatabëcuenebejevi Jesús cruza-javabelia pecobematabiabarutsinexatsi. Bajarapacuenia Jesús pabeyaxuabame tsipaji baja cajena Dioso tajëvelia najamatabëxaina bajarapacuenia Jesús panebeyaxuabinexa. ²⁴ Itsiata bait-si jane Jesús petëpaecujinae Dioso icatsia asaëyaexanatsi. Dioso capanepatsi petëpaejavavecu. Tsipaji Jesús Dioso pexënatoxae, acuenebi pematatoxenetsijavatsi petëpaejava. ²⁵ Bajayata Davidpijinë tajëvelia yaquina Dioso pejumelivaisibaxutota Jesús icatsia piasaëjavanexa petëpaecujinae. Davidpijinë itsa yaquina Jesús pejumait-sijava Diosojavabelia icatsia piasaëjavanexa petëpaecujinae, yaquina mapejumait-siitaneje:

Yapëtaniji Dioso taneyajavaponaponaejava. Tamuxuneneta ponapona, tacujuane-nia. Bajaraxuata apo junavinë tsane. ²⁶ Bajaraxuata jamatabëcuenebarëyanë tsane. Nexata jivijavabelia tsipaebianajë tajamatabëcuenebarëyajava. Bajaraxuata yapëtaniji tatëpaecujinae icatsia tasaëjavanexa. ²⁷ Xamë, Diosomë, apo necopat-simë tsane petëpaevi peponaenacuayabelia. Apo necopatsimënu tsane taper-abëtsabanaenexa nexënatonë. ²⁸ Netsitajëtamë baja cajena taponamenamutonexa taxainaenexa matacabi apo pevereverecejava. Nejamatabëcuenebarëyaexaname itsa neyajavaponaponame,

pejaiitane bajayata Davidpijinë yaquina Dioso pejumelivaisibaxutota Jesús pejumait-sijava Diosojavabelia, jai Pedro athëbëvetsica bepinijijoviboxaneto penajumetsijava pemuxunanacaetuaevijavabelia.

²⁹ Icatsia Pedro jumait-si bajarapamonaejavabelia:

—Tajamonae, jumenapebetsiaya pacatsipaebianatsi vajasalinainëmi Davidpijinë yabara. Bajayata baja tëpa Davidpijinëmi. Nexata mëthëtatsi. Yapëtanetsi itsajota mëthëtatsi. ³⁰ Davidpijinëmi raja Diosojumepaebinëmi profetanëmi. Davidpijinëmi baja cajena yapëtanë pacuenia Dioso pexaniajaijumeta najumecapanepaeya jumait-si. Davidpijinëmijavabelia Dioso najumecapanepaeya jumait-si mapacueniaje: “Pacuenia xamë evetame Israelnacua, bajara icatsia pacuenia bexëjavabelia caenë nemomoxiya-juvënënë evetsiana nevetsinacuami, Israelnacua,” jai Dioso najumecapanepaeya mapacueniaje Davidpijinëmijavabelia Jesús yabara. ³¹ Davidpijinë baja cajena tajëvelia yapëtanë Jesús athëbëvetsica Dioso pitorobijavanexatsi jivi pecapanepaenexa. Tajëvelia yapëtanënu Jesús petëpaecujinae Dioso icatsia piasaëyaexanaejavanexatsi. Bajaraxuata bajayata Davidpijinë tajëvelia cajena vajunupaeba Jesús petëpaecujinae Dioso icatsia piasaëyaexanaejavanexatsi. Davidpijinëmi peyaquinaebaxutota tajëvelia Jesús yabara jumait-si mapacueniaje: “Nexata apo copatsi tsanetsi petëpaevi peponaenacuaya-belia. Apo copatsi tsanetsinua peperabëtsabanaenexa,” jai baja cajena Davidpijinë peyaquinaebaxutota Jesús yabara. ³² Bajaraxuata Jesús baja icatsia Dioso asaëyaexanatsi

petëpaecujinae. Jesús Dioso piasaëyaexanaejavatsi, daxita baja paxanë pataniji. Bajaraxuata pacatsipaebatsi. ³³ Jesús caponatsi athëbëabetsia Dioso pecujuanenia peecaenexa. Nexata baja paxa Dioso rajutatsi Espíritu Santo pacuenia baja cajena najumecapanepaeya Dioso jumaitsi. Nexata bajaraxuacujinae Jesús juya itorobica Espíritu Santo paxanëjavabetsica. Nexata xua pinijicuene pexanaejava, aeconoxae pataenubename, pajumetanemenua, palivaisianë mapamonaë panijajumenëta pacatsipaebaje, bajaraxua Espíritu Santo pejamatabëcueneta exana. ³⁴ Itsiata baitsi jane ponë athëbëabetsia Dioso caponatsi, apo Davidpijinë. Davidpijinë bajayata tajëvelia Jesús yabara jumaitsi mapacueniaje:

Dioso jumaitsi tajatuxanenëjavabelia: “Evetecare abaxë tacujuanenia. ³⁵ Vecatsivajënae jumecovënëtsiaexanaenatsi abaxë copiaya nijavajabitsaë nitorobicuenianexa,” jai

Dioso tajatuxanenëjavabelia,

jai bajayata tajëvelia Davidpijinë Jesús yabara.

³⁶ Bajaraxuata daxita Israel nacuapijivi xaniavaetsia beyapëtane Jesús pelivaisi, ponë paxamë pacobematabiabarutame cruzajavabelia. Bajaraponë Jesús, Dioso exanatsi pepo petuxanenë. Bajaraponë Jesús, Cristo cajena, ponë Dioso itorobica vajanacacapanepaenexa, jai Pedro athëbëvetsica bepinijijoviboxaneto penajumetsijava pemuxunanacaetuaanaevijavabelia.

³⁷ Itsa bajarapamonaë jumetane Pedro bajarapacuenia pejumaitsijava, nexata bajarapamonaë bejamatabëjibireca pinijicuenia. Nexata bajarapamonaë yanijoba Pedrojavabelia, itsamonaë Jesús pijajivi apóstolevijavabelia ata.

—Tajamonaë, ¿detsa nexata pitsicuene paexanaenajë patajaneconi yabara? jai nexata bajarapamonaë Pedrobanajavabelia.

³⁸ Pedro nexata jumaitsi bajarapamonaëjavabelia:

—Daxita paxamë pibisiacuene paneexanaejava pacopabare. Panajamatabëcuenepënëyorore Diosojavabelia. Nexata pacabautisabiana Jesucristo pejamatabëcueneta papecavecuaajibiaexanaenexa daxita pibisiacuene paneexanaeneconi. Bajara jane xuacujinae Dioso pacarajutsiana Espíritu Santo papecatsijamatabëjionenexa.

³⁹ Dioso raja cajena jitsipa papecarajutsinexa Espíritu Santo. Dioso raja jitsipa panexijavabelia ata perajutsinexa Espíritu Santo. Dioso raja jitsipa itsanacuanëpijivi, tajënacuanëjava pejinavanapaevi ata, perajutsinexa Espíritu Santo. Daxita pamonaë Dioso junatsiana pijajivinexa, tsijamatabëjionenatsi Espíritu Santo, jai Pedro bajarapamonaëjavabelia.

⁴⁰ Bajarapacuenia Pedro itsa tsipaeba, itsalivaisi pematatsënëa tsipaeba bajarapamonaëjavabelia. Pedro pinijicuenia muxujioba bajarapamonaë. Pedro jumaitsi mapacueniaje:

—Pamonaë Jesús beyaxuaba, pibisiacuene pexanaevi, bajarapamonaë naxuabi-ana. Nexata paxamë ata bajarapamonaë paneyajavanaxuabiyaniava, pavecuanajamatabëcuenepënëyorore Diosojavabelia, jai Pedro.

⁴¹ Nexata Pedro petsipaebilivaisi bajarapamatacabi jumecovënëtatsi tres mil pajivimaxëto. Nexata daxita bajarapamonaë Jesús pijajivi bautisaba. Nexata bajarapamonaë najunua baja Jesús pijajivijavabelia. ⁴² Nexata bajarapamonaë jumecovënëta palivaisi Jesús pijajivi apóstolevi tsipaebapona. Daxita bajarapamonaë Jesús pijajivi yajava, apóstolevinua yajava, najamatabëcuenejëpaeya jinavanapa. Daxita nacaetuatabiaba pevajëcabiabinexa Diosojavabelia. Nacaetuatabiabanua caejavata pexaenexa, penajamatabënapitabiabinexa xua yabara Jesús sivatëpatsi.

Pacuenia jinavanapa pamonaë copiaya Jesús pelivaisi jumecovënëta yabara pelivaisi

⁴³ Daxitajivi cujunava Dioso. Tsipaji Dioso yavenonabiaba apóstolevi. Nexata apóstolevi Dioso pesaëta pinijicuene pexanaejava, exanabiaba. ⁴⁴ Daxita pamonaë jumecovënëta Jesús pelivaisi, nacaetuatabiaba najamatabecuenëjëpaeya.

Bajarapamonae daxita pexinaejava nacobenaxainaeya evetabiaba. ⁴⁵ Paepatota itsajivi bitso namatavenona, peyavenonaenexa bajarapamonaeyajuvënëvi pexinaejava canajetapona. Pijairanë ata canajetapona. Pijabonë ata canajetapona. Pacuenejavaxi xaina, canajetapona. Nexata bajaraxuamatamopalata, daxita bajarapamatamo, natsicobetsanabiaba pacuenia caejivi canacujitsia namatavenona. ⁴⁶ Bajarapamonae caematacabi canacujitsia nacaetuatabiaba templobota. Daxita bajarapamonae pijabonëjava jamatabëcuenebarëyaya xaeyabiaba pexaejava najamatabëcuenejëpaeya. ⁴⁷ Nexata bajarapamonae jumai tsabiabi Diosojavabelia: “Diosomë, bitso ayaijamatabëcuenenëmë. Paneyavenonabiabame,” jai tsabiabi. Nexata daxita Jerusalén tomarapijivi, bajarapamonae pexaniacuenia yaiyataeyabiabatsi. Nexata itsamonae ata, caematacabi canacujitsia Jesús pelivaisi jumecovënëtapona pecapanepaenexatsi pibisiacuene pexanaeneconivecua. Bajarapamonae najonepona Jesús pelivaisi pejumecovënëtsivijavabelia.

3

Pacuenia apóstolenëbeje Jesús pejamatabëcueneta xanepanaeyaexanabeje apo pecaëjëpaenëtsi peponaponaejava yabara pelivaisi

¹ Judíovi caniviyoepatota, bejamatabëcuene a las tres, templobota vajëcabiaba Diosojavabelia. Nexata itsamatacabi, bajarapaepatota, Pedrobeje Juanbeje naponabeje templobojavabelia. ² Ponë apo pecaëjëpaenëtsi peponaponaejava penaexanaejavabeliacujinae, capatabiabatsi pijamonae peetabiabinexatsi templobobaupa muxuneneta. Bajarapabaupa pevënë Pexaniabaupa. Caematacabi canacujitsia bajarapabaupa muxuneneta bajaraponë etabiabatsi pijamonae. Nexata bajaraponë amoneya palata vajëcabiabeca bajarapabaupajava pejoneponaevita templobojavaberena. ³ Nexata itsa bajaraponë taeyeca Pedrobeje Juanbeje pejonenajetaruaejavabeje templobojavaberena, vajëqueca palata. ⁴ Nexata Pedrobeje Juanbeje naëcotabeje bajaraponëjavabelia. Nexata Pedro jumaitsi bajaraponëjavabelia:

—Panetaemabeje, jai Pedro.

⁵ Nexata bajaraponë naitaxutocaevetsiaya jamatabëjumai tsecae:

—Nerajutsianabeje tsamë raja itsacuenejavayo, jamatabëjai tsecae bajaraponë.

⁶ Pedro nexata jumaitsi bajaraponëjavabelia:

—Palata raja apo xainaenë. Itsiata baitsi jane xua xainajë, carajutsianatsi. Jesucristo, Nazaret tomarapijinë, pecaxanepanaeyaexanaexae baja, nonotapunare. Ponaponare baja, jai Pedro.

⁷ Nexata bajaraponë pecujanenia pacobe, Pedro cobevaetabiayotsia. Bajarajota bajaraponë daxitaneniabeje asisaëreca baja. ⁸ Nexata bajaraponë jirevajunua. Petaxuta nuca. Ponapona baja. Nexata bajaraponë templobo ënëabelia najoneya Pedrobeje Juanbeje pepëta. Bajaraponë jirevanajetaruca. Jumai tsanajetaruca Diosojavabelia:

—Diosomë, ¡bitso ayaijamatabëcuenenëmë! ¡Tsipaji baja nexanepanaeyaexaname! jai tsanajetaruca Diosojavabelia.

⁹ Nexata daxitajivi tanetsi peponaponaejava. Jumetanetsinua pexaniajamatabëcuene perajutsijava Diosojavabelia. ¹⁰ Bajarapamonae itsa tanetsi, yapëtanetsi palata pevajëcabiabecaenëmi templobobaupa muxuneneta, Pexaniabaupavënë muxuneneta. Nexata daxita bajarapamonae itsa tane bajaraponë baja pexanepanaejava, bitso jamatabëcuenenajunaviaca.

Pacuenia Jesús pelivaisi Pedro jivi tsipaeba templobo ënëtuatuajëta, Portal de Salomónvënëjavata, yabara pelivaisi

¹¹ Ponë penaexanaejavaveliacujinae apo peponaponaenëmi, Pedro pexanepanaeyaexanaecujinae, Pedrobeje Juanbeje apo copatsitsibeje. Nexata templobo

ënētuatuajëta, Portal de Salomónvënëjavata, ponë Pedro xanepanaeyaexana, Pedrobeje Juanbeje najuamaxëvaetabanucatsibeje. Nexata jivi ayaibitsaëto itaxutuaothopatsi. Jamatabëcuenenabenajaca bajarapamonae. ¹² Nexata Pedro itsa tane bajarapamonae pejamatabëcuenenabenajacaejava, nexata Pedro jumaitsi bajarapamonaejavabelia:

—Tajamonae judíovi, ¿detsa xuajitsia pajamatabëcuenenabenajacame maponë yabaraje? ¿Detsa xuajitsia bitso panenaëcobamebeje mapacueniaje? Paxanëbeje yabara meta pajamatabëjumaitsimë mapacueniaje: “Maponëbeje xanepanaeyaexanabeje apo pecajëpaenëmitsi peponaponaejava. Tsipaji baja cajëpatsibeje bajarapacuenene pexanaenexabeje. Bajarapacuenene cajëpatsibeje tsipaji meta Dioso pitabarata aneconijibia ponaponabeje,” pajamatabëjamë meta paxanëbeje yabara. Paxanëbeje raja patajamatabëcuenetabeje apo paexanaenëbeje bajarapacuenene. Jesús raja exana bajarapacuenene. ¹³ Vajasalinaivi baja cajena Abrahampijinë, Isaacpjinë, Jacobpjinë. Bajarapamonae pijaDioso pexënato Jesús. Nexata Dioso jivi yapëtaeyaexana Jesús bitso ayaijamatabëcuene pexainaenëcuene. Bajaraponë Jesús paxamë parajutame vajanacayanacuaevetsivi pecobeyabelia. Vajanacayanacuaevetsinë Pilato copatsijitsia ata Jesús, itsiata paxamë pajumesaëmë. Apo pajitsipaemë Pilato pecopatsijava Jesús. ¹⁴ Apo pavajëcaemë Pilatojavabelia pecopatsinexatsi Jesús, itsacueneneconiyi apo pexainaenë, pepo pianeconijibinë. Caranata biji pibisiacuene pexanaenë, jivibenë, pecopatsinexatsi, pajumesaëmë. Pavajëcame Pilatojavabelia jivibenë pepitsapaenexa penaneconitsivi pejebabiabibovecua. ¹⁵ Ponë Dioso itorobica vajanacarajutsinexa matabi apo peverevereaejava, bajaraponë caranata pabeyaxuabame. Itsiata baitsi jane Jesús petëpaecujinae, Dioso icatsia asaëyaexanatsi. Bajarapacuenene patataexae, pacatsipaebatsi. ¹⁶ Bajaraponë Jesús pejamatabëcueneta xanepanaeyaexanatsi baja maponëje, apo pecajëpaenëmitsi peponaponaejava. Maponëje najamatabëcuenecopata Jesúsjavabelia. Bajaraxuata maponëje Jesús baja xanepanaeyaexanatsi paneitabarata, panetaeyabiabinë, paneyapëtaenë, jai Pedro bajarapamonaejavabelia Portal de Salomónvënëjavata.

¹⁷ Icatsia Pedro jumaitsi bajarapamonaejavabelia:

—Tajamonae, yapëtaniji pacuene pacabarëexana itsamonae, papecaevetsivi yajava. Tsipaji apo payapëtaemë xaniavaetsia. Bajaraxuata pabeyaxuabame Jesús. ¹⁸ Bajayata Diosojumepaebivimi profetavi tajëvelia vajunupaeba Jesús athëbëvetsica Dioso pitorobijavanexatsi jivi pecapanepaenexa. Profetavimi tajëvelia vajunupaebanua Jesús bitso pebejiobiaexanaejavanexatsi daxitajivi pijaneconi yabara. Bajarapacuenene Jesús baja tocopiapatatsi itsa pabeyaxuabame. Tsipaji baja Dioso bajarapacuenia tocopatatsi. ¹⁹ Nexata baja aeconoxae paneyapëtaexae Jesús petëpaejava daxitajivi pijaneconi yabara, pacopabare baja panijaperujujamatabëcuenemi. Panajamatabëcuenepënëyorore baja Diosojavabelia. Nexata pibisiacuene paneexanaeneconimi, Dioso pacavecuaajibi-aexanaena. Nexata pacajamatabëcuene asaëyaexanaena Dioso. ²⁰ Tsipaji raja icatsia itsamatabi Dioso athëbëvetsica itorobianica Jesús, ponë bajayata Dioso itapeta papecayavenonaenexa. ²¹ Jesús raja abaxë ecaya athëbëtatsia. Matapania pamatabi Dioso xanebijitsia daxitacuene, icatsia patsianica Jesús. Bajarapacuenia Jesús pepatsijavanexatsica, Diosojumepaebivimi profetavi bajayata tajëvelia vajunupaeba. ²² Vajasalinaivimijavabelia baja cajena bajayata tajëvelia profeta Moiséspjinë Jesús yabara jumaitsi mapacueniaje: “Pacuenia nitoroba xanë profetanënexanë, bajarapacuenia icatsia vajatuxanenë Dioso itorobiana itsanë profetanë, paxamë panemomoxiyajuvënënë tsane. Nexata pacuene yabara bajaraponë profeta pacatsipaebiana, pajumecovënëtsianame xaniavaetsia. ²³ Tsipaji daxita pamona apo jumecovënëtsi tsane bajaraponë profeta petsipaebilivaisi, pepacuene Dioso pijajivivecua tsatsiana. Nexata bajarapamonae Dioso verebabena,” jai baja cajena bajayata tajëvelia Moiséspjinë va-

jasalinaivimijavabelia Jesús pepatsijavanexatsica yabara, jai Pedro bajarapamonaejavabelia Portal de Salomónvënëjavata.

²⁴ Icatsia Pedro jumaitsi bajarapamonaejavabelia:

—Xua baja aeconoxae mapamatacabitaje copiapatapona, bajayata tajëvelia profeta Samuelpijinë copiaya vajunupaeba. Bajara icatsia xuacujinae cotocaevi paprofe-tavimi ata bajarapacuenia tajëvelia vajunupaebapona bajaraxua. ²⁵ Paxamë rabaja profetavimi papemomoximë. Nexata xua Dioso najumecapanepaeya jumaitsi per-ajutsinexa panijasalinaivimijavabelia, bajaraxua paxamë Dioso pacarajutsiana. Ba-jayata tajëvelia Dioso jumaitsi vajasalinainëmi Abrahampijinëjavabelia Jesús yabara: “Caenë nemomoxiyajuvënënë itorobianajë jivi peyavenonaenexa. Nexata nemo-moxiyajuvënënë yavenonaena caenacuapijivi canacujitsia, mapanacuata pejinavana-paevi,” jai Dioso tajëvelia Abrahampijinëmijavabelia Jesús yabara. ²⁶ Nexata baja copiaya paxamëjavabetsica Dioso pexënato pacatoitorobica. Bajarapacuenia Dioso pexënato pacatoitorobica paxamë pacaevivimë canacujitsia papecayavenonaenexa panenaja-matabëcuene pënëyorotsinexa pibisiacuene paneexanaejavavecua, jai Pedro bajarapa-monaejavabelia Portal de Salomónvënëjavata.

4

Pacuenia Pedrobeje Juanbeje Jesús pelivaisi tsipaebabeje tomaraevetsivijavabelia yabara pelivaisi

¹ Pedrobeje Juanbeje abaxë Jesús pelivaisi tsipaebabeje bajarapamonaejavabelia Por-tal de Salomónvënëjavata. Nexata bajaraberena jemata patanajetarubena sacerdotevi. Patanajetarubena saduceovinua. Pematatsënëa patanajetaruca itsanë capitán. Bajara-ponë capitán templobopijipolicíavi pevetsinë. ² Daxita bajarapamonaë baraanaepanat-sibeje Pedrobeje Juanbeje. Tsipaji Pedrobeje Juanbeje Jesús pelivaisi petsipaebija-vatabeje, jumai tsaponaebeje:

—Jivi tēpae ata tsane, icatsia asaë tsane petēpaecujinae. Bajarapalivaisi cajena pexani-ajailivaisi. Tsipaji baja icatsia Jesús asaëyaexanatsi petēpaecujinae, jai beje tsaponaë.

³ Nexata bajarapamonaë vaetabatsibeje. Caponaliatsibeje peetsinexatsibeje penaneconitsivi pejebabiabibota. Meravia pitsijavata jutsijitsiatsibeje. Tsipaji baja bitso caniviyo. ⁴ Itsiata baitsi jane baja jivibitsaëttoxanetonë capanepaeya jumecovënëtatsibeje pevaetabivajënaeyatsibeje. Nexata daxita pamonaë jumecovënëta Jesús pelivaisi, ëpebijivi namataëjëtatsi cinco mil ponëbeje.

⁵ Nexata meravia pitsijavata nacaetuata judíovi pevetsivi. Nacaetuata judíovi pijaan-cianovinua. Nacaetuata judíovi pecujarubivinua. Daxita bajarapamonaë nacaetuata Jerusalén tomarata. ⁶ Nexata bajarajota napata sacerdotenë Anás. Bajaraponë Anás sacerdotevi pepo penamatacaitorobinëmi. Napata Caifás ata. Napata Juan ata. Napata Alejandro ata. Napata itsamonae ata, Anás pijamonae. ⁷ Nexata Pedrobeje Juanbeje nu-tatsibeje daxita bajarapamonaë pitabarata. Nexata bajarapamonaë jumaitsi Pedrobeje Juanbejejavabelia:

—¿Jipatsa pejamatabëcueneta paxanepanaeyaexanamebeje apo pecaëjëpaenëmitsi pe-ponaponaëjava? jai bajarapamonaë Pedrobeje Juanbejejavabelia.

⁸⁻⁹ Nexata Pedro Espíritu Santo bitso jamatabëcueneyavenonatsi. Nexata Pedro jumaitsi bajarapamonaëjavabelia:

—Paxamë judíovi paneevetsivi, paxamë ata pijinia paancianovimë, paneyani-jobamebeje paneyapëtaenexa ponë pejamatabëcueneta paxanepanaeyaexanajëbeje apo pecaëjëpaenëmitsi peponaponaëjava. Paneyanijobamebejenua paneyapëtaenexa pacue-nia paxanepanaeyaexanajëbeje bajaraponë. ¹⁰ Nexata pacatsipaebianatsi daxita pax-amë paneyapëtaenexa daxita Israel nacuapijivi ata peyapëtaenexa. Jesús, Nazaret

tomarapijinë, ponë paxamë pacobematabiabarutame cruzajavabelia, bajaraponë icatsia Dioso asaëyaexanatsi petëpaecujinae. Bajaraponë Jesús pejamatabëcueneta maponë paneitabarata nucaje, xanepanaeyaexanatsi, jai Pedro.

¹¹ Icatsia Pedro jumaiti bajarapamonaejavabelia:

—Bajaraponë Jesús yabara Dioso pejumelivaisibaxutota bajayata tajëvelia jumaiti comparacióncuenia mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia yaëtsiana botabu daxita itsaibo matatoxenetsia, jai tajëvelia Dioso pejumelivaisibaxutota.

Bajarapacuenia Dioso pejumelivaisibaxutota comparacióncuenia ita jumaiti Jesús yabara, judíovi penamatacaitorobivi Jesús apo pejumecovënëtsijavanexa yabara, jumaiti. Dioso pitapetsijavatsi Jesús daxitajivi pecapanepaenexa yabara ata jumaiti. ¹² Caenë Jesús caëjëpatsi vajanacacapanepaenexa pibisiacuene vajaexanaeiconivecua. Bjaraxuata Dioso itorobica Jesús. Tsipaji baja ajibi pematatsënëa mapanacuataje itsanë ata pejamatabëcueneta vajanacacapanepaenexa Diosojavabelia, jai Pedro bajarapamonaejavabelia.

¹³ Bajarapamonaë yapëtane Pedrobeje Juanbeje ajumejunavijibia Jesús pelivaisi petsipaebijavabeje bajarapamonaejavabelia. Bajarapamonaë yapëtanenua bajaraponëbeje bajayajebi apo penacujarubinëbeje peyaquinaejava. Itsiata bitso yapëtanebeje pexanialivaisi. Saya bajaraponëbeje penacuenebinëbeje. Nexata judíovi pevetsivi jamatabëcuenenabenajaca. Bajarapamonaë nexata jamatabëjumaiti Pedrobeje Juanbeje yabara:

—Bajaraponëbeje cajena penaponaponaenëbeje Jesússta. Bjaraxuata bitso baja yapëtanebeje bajarapalivaisi, jamatabëjai.

¹⁴ Bajarapamonaë tane apo pecaëjëpaenëmitsi peponaponaëjava penanucaëjava Pedrobeje Juanbejejavata. Nexata bajarapamonaë acuenebi pejumaitisijava: “Jume raja. Jesús raja pejamatabëcueneta apo xanepanaë maponëje,” acuenebi pejaijava. Tsipaji apo pecaëjëpaenëmitsi peponaponaëjava Jesús pejamatabëcueneta ponapona baja.

¹⁵ Nexata bajarapamonaë Pedrobeje Juanbeje caepatoyo navecuacapitsapatsibeje pecovëta ëpamonaë penabarëcuaijainexa.

¹⁶ Nexata Pedrobeje Juanbeje pecovëta caepatoyo penavecuacapitsapaejavatatsibeje, bajarapamonaë najumaiti:

—¿Detsamë raja pacuene exanaenatsi bajaraponëbejejavabelia? Daxita Jerusalén tomarapijivi xaniavaetsia yapëtane bajaraponëbeje pexanepanaeyaexanaejavabeje apo pecaëjëpaenëmitsi peponaponaëjava. Nexata acuenebi jivijavabelia vajajumaitisijava: “Apo xanepanaeyaexanaebeje raja bajaraponëbeje,” vajajaijava. ¹⁷ Pinijicuenia vaxaitsi bajaraponëbeje itavetsianatsi petsipaebiyavabeje matavëjëa Jesús pelivaisi itsajiviyojavabelia ata. Nexata bajarapacuenia apo tsipaebibeje baja tsane itsamonaejavabelia Jesús pelivaisi, najai bajarapamonaë Pedrobeje Juanbeje pecovëta caepatoyo penavecuacapitsapaejavatatsibeje.

¹⁸ Nexata icatsia Pedrobeje Juanbeje caevëalia pejonenexaliabeje, junaliatsibeje. Nexata jane baja bajarapamonaë jumaiti Pedrobeje Juanbejejavabelia:

—Pëtsa baja icatsia matavëjëa jivi patsipaebaponaëbeje Jesús pelivaisi. Pacoparebeje baja jivi panetsipaebaponaëjavabeje Jesús pelivaisi, jai bajarapamonaë.

¹⁹ Nexata Pedrobeje Juanbeje jumaitisibeje bajarapamonaëjavabelia:

—Paxamë panijacuata panajamatabëxainare pacuene xanepana pataexanaponaenexabeje Dioso pitabarata. Itsa pacajumecovënëtsipatsibeje paxamë patanitavetsijavamëbeje, nexata apo pajumecovënëtsinëbeje tsipae Dioso patanitorobijavabeje. ²⁰ Acuenebi cajena patacopatsijavabeje jivi patatsipaebaponaëjavabeje

xua patanijibeje, palivaisi ata pajumetaniijibeje, jaibeje Pedrobeje Juanbeje bajarapamonaejavabelia.

²¹ Icatsia judíovi pevetsivi orijibia itavetatsibeje jivi petsipaebaponaeyanivabeje Jesús pelivaisi. Bajaraxuacujinae copatatsibeje baja peponaenexabeje. Ajibi peyabarananeconitsia exanaejavanexatsibeje. Tsipaji daxitajivi jumai tsaponae Diosojavabelia:

—Diosomë, bitso ayaijamatabëcuenenëmë, jai tsaponae.

Bajarapacuenia daxitajivi pexaniajamatabëcuene rajuta Diosojavabelia Pedrobeje Juanbeje pexanepanaeyaexanaexabeje apo pecaëjëpaenëmitsi peponaponaejava. ²² Ponë xanepanaeyaexanatsi Dioso pesaëta pinijicuene pexanaejavata, bajaraponë penaexanaecujinae xaina baja cuarenta pavaibeje pematatsënëa.

Pacuenia Dioso pejumecovënëtsivi vajëca Diosojavabelia pecaëjëpaeyaexanaenexatsi Jesús pelivaisi ajumejunavijibia jivi pepaebaponaenexa yabara pelivaisi

²³ Itsa baja Pedrobeje Juanbeje judíovi pevetsivi copatatsibeje peponaenexabeje, navialiabeje baja itsabelia jinavanapa Dioso pejumecovënëtsivi. Nexata Pedrobeje Juanbeje Jesús pelivaisi jivi petsipaebaponaeyanivabeje sacerdotevi penamatacaitorobivi pitavetsijavatsibeje, navajunupaebabeje Dioso pejumecovënëtsivijavabelia. Navajunupaebabejenua judíovi pijaancianovi ata pitavetsijavatsibeje. ²⁴ Nexata Dioso pejumecovënëtsivi itsa jumetane Pedrobeje Juanbeje penavajunupaebijavabeje, nexata daxita Dioso pejumecovënëtsivi Pedrobana najamatabëcuenejëpaeya vajëca Diosojavabelia. Daxita bajarapamonae pevajëcaejavata Diosojavabelia, jumaitsi mapacueniaje:

—Xamë pinijiDiosomë, nexanaenë cajena itaboxo. Nexanaenë daxita itaboxopijicuene ata. Nexanaenë ira ata. Nexanaenë daxita irapijicuene ata. Nexanaenë manuamene ata. Nexanaenë daxita manuamenepijicuene ata. ²⁵ Xamë Diosomë, bajayata Espíritu Santo pejamatabëcueneta tajëvelia yapëtaeyaexaname patajasalinainëmi Davidpijinë. Nexata nijajivitonë Davidpijinë tajëvelia nexënato Jesús yabara jumaitsi mapacueniaje:

Itsanacuanëpijivi, pamona apo judíovi, bitso anaepanabiabiana. Saya jema najamatabëxainabiabiana pexanaenexa picani xua apo caëjëpaetsi pexanaenexa.

²⁶ Pinijinacuanë pevetsivi nacaetuatsiana. Tomaranë pevetsivi ata nacaetuatsiana. Bajarapamonae najamatabëxainaena, xamë Diosomë, nijacuene pecatobijianaenexa. Najamatabëxainaenanua pebejiobiaexanaenexa Cristo, ponë itorobianimica jivi pecapanepaenexa,

jai bajayata tajëvelia Davidpijinë Espíritu Santo pejamatabëcueneta, Jesús pebejiobiaexanaejavanexatsi yabara, jai Pedrobana pevajëcaejavata Diosojavabelia.

²⁷ Icatsia Pedrobana jumaitsi pevajëcaejavata Diosojavabelia:

—Mapatomarataje Herodesbeje, Poncio Pilatobeje, barënacaeuatabeje itsanacuanëpijivi. Barënacaeuatabeje apo judíovi. Barënacaeuatabeje judíovi ata yajava. Bajarapamonae nacaetuata penajumejatsinexa pacuenia beyaxuabijitsiatsi nexënato Jesús, ponë athëbëvetsica itorobimica. Bajarapacuenia ita barënacaeuatabeje, copiapata jane baja xua bajayata tajëvelia Davidpijinë vajunupaeba. ²⁸ Bajarapamonae nacaetuata pexanaenexatsi daxita pacuenia baja cajena bajayata nexënato tocopatame pexanaenexatsi. ²⁹ Patajatuxanenë, yapëtaneme judíovi pevetsivi patanitavetsijava jivi patatsipaebaponaeyaniva nexënato pelivaisi. Paxanë panijajivinë. Nexata panerajutsianame patanecaëjëpaejamatabëcuene ajumejunavijibia jivi patatsipaebaponaenexa nexënato pelivaisi. ³⁰ Itsa patomarata patsipaebianajë nexënato pelivaisi, jamatejemayaexanaename piavitanevi. Pinijicuene nexanaejava exanaename jivi peyapëtaenexa bitso ayaijamatabëcuene nexainaenëcuene. Bajarapapinijicuene exanaename nexënato Jesús pejamatabëcueneta, jai Pedrobana pevajëcaejavata Diosojavabelia.

³¹ Itsa baja bajarapamonae vereta pevajëcaejava Diosojavabelia, bajarajota ira nanequetajaraba. Daxita bajarapamonae Espíritu Santo tsijamatabëvënëcatsi. Nexata bajarapamonae Espíritu Santo petsijamatabëvënëcaexaetsi, ajumejunavijibia jane baja jivi tsipaebapona Jesús pelivaisi.

Pacuenia Dioso pejumecovënëtsivi, xua xaina, daxita nacobenaxainaeyaeveta yabara pelivaisi

³² Ayaibitsaëttoxaneto Dioso pejumecovënëtsivi najamatabëjëpaeya jinavanapa. Bajaramonae xua xaina, apo najamatabëxainae caejivi pexainaenexa. Nexata daxita bajarapamonae xua xaina, nacobenaxaina daxita. ³³ Nexata apóstolevi asaëya tsipaebabiaba jivijavabelia Jesús pelivaisi. Tsipaebabiaba pacuenia icatsia Dioso asaëyaexanatsi vajatuxanenë Jesús petëpaecujinae. Dioso bitso yavenonabiabatsi daxita bajarapamonae. ³⁴ Nexata bajarapamonae Dioso pejumecovënëtsivi caenë ata apo yajuvënëbejiobi pexainaejava yabara. Tsipaji pamonae bitso xaina iranë, bonë ata, canajetabiaba. Nexata bajarapamonae xua canajeta, bajarapamatamopalata capatabiaba. ³⁵ Nexata bajarapapalata rajutabiaba apóstolevijavabelia. Nexata juya apóstolevi tsicobetsanabiaba penajuajinavanapaevijavabelia pacuenia baja caejivi canacujitsia namatavenonapona. ³⁶ Bajarapamonaeyajuvënënë itsanë pevënë José, Chiprevënë tunaetota penaexanaenë. Bajaraponë Levípijinë pemomoxiyajuvënënë. Bajaraponë apóstolevi vënërubatsi itsavënë, Bernabé. Bajarapavënë hebreojumeta pejumaitsijume: “Jivi pejamatabëcuenebarëyaexanaenë,” pejaijume. ³⁷ Nexata José ata pijaira canajeta. Bajaraxuacujinae José capata pijairamatamopalata. Nexata bajarapapalata rajuta apóstolevijavabelia.

5

Pacuenia tēpabeje Ananíasbeje pijava Safirabeje, penajumetsënëtsixabeje apóstolenë Pedro pitabarata yabara pelivaisi

¹ José pijaira pecanajetsicujinae, Ananías ata pijava Safirabeje yajuvënëcanajetabeje pijaira. ² Nexata Ananíasbeje pijavabeje pijairamatamoyajuvënëpalata muetsia copatabeje. Bajaraxuacujinae Ananías peyajuvënëcopatsipalata calia apóstolevijavabelia. Nexata Ananías jumaitsi apóstolevijavabelia:

—Tajaira yajuvënëcanajetajë. Nexata pacarajutatsi daxita bajarapairamatamopalata panetsicobetsanaenexa vajanajuajinavanapaevijavabelia, jai.

³ Nexata Pedro jumaitsi Ananíasjavabelia:

—Ananías, ¿detsa xuajitsia jumecovënëtame dovathi pecayamaxëitojorobijava nenajumetsënëtsinexa Espíritu Santojavabelia? Xamë baja rovia nijairamatamopalata yajuvënëcopatame. ⁴ Nijairami necanajetsivajënaeya, nijaira baja cajena picani saicaya. Nijaira necanajetsicujinae ata, xua nijairamatamo pitame, nijajava baja cajena picani saicaya. ¿Detsa xuajitsia nexata mapacuenia neyamaxëitojorobijava najamatabëxainameje? Ëpaxanëjavaberena baja cajena apo najumetsënëtsimë. Najumetsënëtame baja cajena Diosojavabelia ata, jai Pedro.

⁵ Ananías itsa jumetane bajarapacuenia Pedro pejumaitsijava, Ananías petëpaenë irata jopa. Nexata daxita pamonae vënëlivaisitane bajarapacuenia Ananías petëpaejava, pinijicuenia jamatabëcuenenajunaviaca. ⁶ Nexata pabota Ananías petëpaenë boca, bajarapaboyarena pevëjëavi jonena. Mataquiona petëpaenë. Bajaraxuacujinae capitsapalia pemëthëtsinexa.

⁷ Bajaraxuacujinae bexëa, acueyabi pahorabejecujinae, Ananíaspijinë pijava jonena. Bajarapova abaxë apo yapëtae pamona pevecuatëpaejavatsi. ⁸ Pedro icatsia yanijoba bajarapovajavabelia. Jumaitsi:

—Netsipaebare. ¿Xaniajai tsabaja? ¿Mapamatamotaje pacanajetamebeje panijairamibeje? jai Pedro.

Nexata bajarapova jumaitsi:

—Xaniajai rabaja. Bजारapacuenia pacanajetajēbeje, jai bajarapova.

⁹ Nexata Pedro jumaitsi bajarapovajavabelia:

—¿Detsa xuajitsia amonabeje panajamatabēcuenejēpamebeje panena-jumetsēnētsinexabeje Espíritu Santojavabelia? Namuxunaevere. Jumia naviabana-jetarubena rabaja amonami pemēthēcaevilia. Bजारapamonae icatsia xamē ata cacaponaelia pecamēthētsinexa, jai Pedro.

¹⁰ Nexata bajarajota Pedro pitabarata bajarapova ata icatsia petēpaeva irata jopa. Itsa jonena pevējēavi penaviabanajetarubenaevi, Ananíaspijinē pemēthēcaevilia, caxitajarababuata petēpanucaeva. Nexata icatsia bajarapamonae capitsapalia bajarapova pemēthētsinexa pamonami pemēthē muxuneneta. ¹¹ Nexata daxita Dioso pejumecovēnētsivi, itsamonae ata, pamonae bajarapajivibeje petēpaejava vēnēlivaisitanetsi, bitso junava.

Pacuenia apóstolevi pinijicuene pexanaejavanē exanapona Dioso pesaēta yabara pelivaisi

¹² Apóstolevi Dioso pesaēta exanapona pinijicuene pexanaejavanē Jerusalén tomarapijivi pitabarata. Daxita Dioso pejumecovēnētsivi nacaetuatabiaba templobo ēnētuatuajēta, Portal de Salomónvēnējavata. ¹³ Itsamonae, pamonae Dioso apo pejumecovēnētsivi, junava penanacaetuatsijava bajarapomonaeta. Itsiata daxita Jerusalén tomarapijivi pexaniacuenia yaiyataeyabiaba Dioso pejumecovēnētsivijavabelia. ¹⁴ Pevajēnaeyabelia jivibitsaētoxfaneto jumecovēnēta pona Jesús pelivaisi, pebijivi, petiriavi ata. Nexata daxita bajarapamonae nanacaetuatabiaba Dioso pejumecovēnētsivijavabelia. ¹⁵ Apóstolevi Dioso pesaēta pinijicuene pexanaponaexae, itsamonae tocapatabiabatsi piavitanevi callejavaberena. Nexata piavitanevi tojebabiabatsi callejavata camata. Itsamonae tulimanēta tojebabiabatsi. Nexata Pedro itsa najetaruca callejava, piavitanevi jitsipabiaba Pedro pitacaēnae ata petsijopaejavatsi pejamatejemanexa bajarapamonae piavitanejavavecua. ¹⁶ Nexata jivibitsaētoxfanetonē patabiaba Jerusalén tomaraberena imoxoyo penaetomaraxijavaverena penaropobivi. Bजारapamonae Pedro tocapatabiabatsi piavitanevi. Tocapatabiabatsinua bitso dovathi peyajavajinavanapaevi. Nexata Pedro daxita bajarapamonae jamatejemayaexanabiaba.

Pacuenia apóstolevi taicatsi penaneconitsiaexanaenexatsi yabara pelivaisi

¹⁷ Sacerdotevi pepo penamatacaitorobinē yajavaponapona saduceovi. Nexata daxita bajarapamonae pinijicuenia anaepana apóstolevijavabelia. Tsipaji cuenecaēbatsi. ¹⁸ Bजारaxuata taicatsi apóstolevi. Jebatsi penaneconitsivi pejebabiabibota. ¹⁹ Itsiata baitsi jane bajarapameravi Dioso pijaángel apóstolevi tobaupanatsi penaneconitsivi pejebabiabibo baupanē. Nexata ángel apóstolevi matacapitsapaliatsi. Angel jumaitsi apóstolevijavabelia:

²⁰ —Paponare templobojavabelia. Patsipaebianame jivijavabelia mapapejanalivaisi, Dioso vajanacayajavaponaponaeva, jai ángel apóstolevijavabelia.

²¹ Apóstolevi itsa jumetane bajarapacuenia ángel pejumaitisijava, nexata ajena mat-acabi tsina, apóstolevi ponalia templobojavabelia. Nexata apóstolevi templobota Jesús pelivaisi jivi tsipaebanubena.

Nexata pijinia bajarapaepatota sacerdotevi pepo penamatacaitorobinē peyajavaponaponaevi barēnacaetuata itsabota. Nexata junata penacaetuatsinexa judíovi pijaancianovi. Junatanua penacaetuatsinexa judíovi pecujarubivi. Nexata bajarapamonae jumaitsi templobopijipolicíavijavabelia:

—Panetosivaponaremelia apóstolevi penaneconitsivi pejebabiabibojavabelia. Nexata panetobarëpatsiaremena maberenaje, jai.

²² Nexata templobopijipolicíavi ita ponalia, apo caxitajarabi apóstolevi penaneconitsivi pejebabiabibota. Nexata apo pecaxitajarabixae, naviabarena cobesa petsipaebinexa penacaetuatsivijavabelia. ²³ Nexata templobopijipolicíavi jumaitsi bajarapamonaejavabelia:

—Itsa papaliajë penaneconitsivi pejebabiabibojavabelia, daxitabaupanë xaniavaetsia nabaupaxatabanubena. Bajarajota nubena picani pevetanubenaevi baupanë. Itsiata baitsi jane ita pabaupatajë, caenë ata apo ecae bajarapabo ënëtuatuajëalia, jai policíavi.

²⁴ Nexata templobopijipolicíavi pijacapitán, sacerdotevi penamatacaitorobivina, ita jumetane bajarapacuenia policíavi pejumaitsijava, bajarapamonae jamatabëjumaitsi:

—¿Detsamëra nexata itsi apóstolevi? jamatabëjai bajarapamonae.

²⁵ Nexata bajarapaepatota itsanë pebi parena, templobojavaverena peponaenë. Jumaitsi bajaraponë bajarapamonaejavabelia:

—¡Panejumetaema! Pamonae pacajunuame penaneconitsivi pejebabiabibota, bajarapamonae cajena nubena templobotalia. Jivijavabelia tsipaebanubena Jesús pelivaisi, jai bajaraponë.

²⁶ Nexata templobopijipolicíavi pijacapitán barëlia pijajivi. Nexata policíavi apóstolevi xaniavaetsia saya caponarenatsi. Tsipaji jamatabëjumaitsi:

—Anaeya ita taicaejitsipatsi apóstolevi, nexata jivi nacabaraanaepanaejitsipa. Nexata nacatseconaejitsipa ibotonëta, jamatabëjai policíavi.

²⁷ Itsa baja apóstolevi caparenatsi, nexata nubatsi sacerdotevi penamatacaitorobivi pitabarata, judíovi pijaancianovinua pitabarata, judíovi pecujarubivinua pitabarata. Nexata bajarajota sacerdotevi pepo penamatacaitorobinë jumaitsi apóstolevijavabelia:

²⁸ —Paxanë baja cajena pacajumaitsi: “Pëtsa baja matavëjëa jivi patsipaebame Jesús pelivaisi,” pacajaitsi. ¿Itsiata tsabaja rovia apo panejumecovënëtsimë? Pataema jane pacuenia Jerusalén tomarata yacajëpaponä panetsipaebilivaisi. Paxamë jamatabëpaneconitame Jesús pebeyaxuabijavatsi yabara, jai sacerdotevi pepo penamatacaitorobinë apóstolevijavabelia.

²⁹ Nexata sacerdotevi pepo penamatacaitorobinë bajarapacuenia pejumaitsixae, Pedro, itaapóstolevi yajava, jumaitsi bajarapamonaejavabelia:

—Namatavenonatsi vajajumecovënëtsinexa xua vajaDioso nacaitoroba. Nexata Dioso vajanacaitorobicuenia, saicayacuenia jivi ita nacaitoroba, apo bejumecovënëtsitsi.

³⁰ Paxamë Jesús pabeyaxuabame pamatacabita pacobematabiabarutame cruzajavabelia. Vajasalinaivimi pijaDioso Jesús icatsia asaëyaexanatsi petëpaecujinae.

³¹ Nexata Dioso jumaitsi Jesúsjavabelia: “Ecare tacujuanenia. Xamë rabaja ayaijamatabëcuenenëmë. Jivi nevetinë tsane. Necapanepaenënuä tsane,” jai Dioso Jesúsjavabelia. Bajarapacuenia Dioso jumaitsi Jesúsjavabelia vaxaitsi judíovitsi pibisiacuene vajaexanabiabijava vajacopabijavanexa yabara jumaitsi. Vajanajamatabëcuene pënëyorotsijavanexa ata Diosojavabelia yabara jumaitsi. Tsipaji Dioso jitsipa Jesús pejamatabëcueneta daxitajivi aneconijibia petaenexa. ³² Nexata bajarapacuenia yabara jivijavabelia ita patsipaebaponajë, Espiritu Santo paneyajava tsabiabi. Dioso cajena rajutapona Espiritu Santo pamonae jumecovënëta Dioso, jai Pedro, itaapóstolevi yajava, daxita bajarapamonaejavabelia.

³³ Nexata daxita bajarapamonae ita jumetane bajarapacuenia Pedrobana pejumaitsijava, nexata bitso anaepana. Jamatabëbeyejebatsi picani apóstolevi. ³⁴ Itsiata apo beyejebitsi. Tsipaji bajarapamonaeajuvënënë judíovi pecujarubinë, Gamalielvënënë, nonotapuna daxita penajuavi pitabarata. Bajaraponë fariseonë, Dioso Moisésjijnëta

penajumecopatsilivaisi pecujarubinë. Daxitajivi peyaiyataenëtsi. Nexata Gamaliel itoroba apóstolevi caeepatoyo pepitsapaenexalia. ³⁵ Nexata apóstolevi caeepatoyo pepit-sapaejavatalia, pecovëta, Gamaliel jumaitsi penajuavijavabelia:

—Tajamonae judíovi, panajamatabëxainare xaniavaetsia. Pëtsa paexaname pacuenia panajamatabëxainame mapamonaejavabeliaje. ³⁶ Panajamatabënapire pacuenia Teudasvënënëmi bajayata exanatsi. Bajaraponëmi picani nacua pevetsinënexa, ayaijamatabëcuenenë bitso jamatabënaexana. Nexata picani pijajivinexa pënajinavanapatsi cuatrocientos ponëbeje. Itsiata Teudaspijinëmi beyaxuabatsi. Bajaraponëmi pepënajinavanapaevitsi, pamonaë pijajivinexa picani, daxita nacayajateca. Nexata copiaruca baja bajarapacuenemi. ³⁷ Bajaraxuacujinae icatsia pamatacabi gobierno pejamatabëcueneta daxitajivi namataëjëtsi, Judasvënënëmi, Galilea nacuapijinëmi, bajarapacuenia pijinia jivi ayaibitsaëtoخانeto pënajinavanapatsi. Bajaraponëmi ata beyaxuabatsi. Nexata daxita pepënajinavanapaevitsi nacayajateca. Nexata baja copiaruca bajarapacuenemi. ³⁸ Bajaraxuata nexata mapamonaeje apóstolevi yabara pacatsipaebijitsiatsi. Pëtsa paitsacueniabame bajarapamonae. Itsa bajarapamonae saya mapanacuapijivi pejamatabëcueneta tsipaebavanapaje, bepijia peneta bajarapamonae petsipaebilivaisi vereverecaena. ³⁹ Itsa jume, Dioso pejamatabëcueneta bajarapamonae bajarapalivaisi jivi itsa tsipaebavanapa, nexata acuenebi tsipae paxamë bajarapacuenene panevereverecaeyaexanaejava. Belia ayaineconi panatsiexanaejitsipame Diosojavabelia, jai Gamaliel daxita penajuavijavabelia.

⁴⁰ Nexata daxita bajarapamonae jumecovënëtatsi Gamaliel. Apóstolevi icatsia caevëlia pejonenexalia junaliatsi. Bajaraxuacujinae apóstolevi, caenë canacujitsia, ayaicuenia jumattibabeponatsi penaneconitsivi pejumaconitabiabimacata. Itavetatsi icatsia matavëjëa jivi petsipaebiyaniwa Jesús pelivaisi. Bajaraxuacujinae copabatsi jane baja peponaenexa. ⁴¹ Apóstolevi nexata pitsaparena bajarapabovecua. Barëyaya ponalia apóstolevi. Tsipaji Dioso tocopatatsi bajarapacuenia bepejiobiaexanaponaenexatsi Jesús pijajivixae. ⁴² Nexata caematacabi canacujitsia templobota, bonëjava ata, apóstolevi asaëya Jesús pelivaisi tsipaebapona jivijavabelia. Apóstolevi jivijavabelia tsipaebapona pexanialivaisi, Jesucristo, ponë Dioso itorobica jivi pecapanepaenexa, pelivaisi.

6

Pacuenia itapetatsi siete ponëbeje díaconovinexa yabara pelivaisi

¹ Jesús pelivaisi pejumecovënëtaaponaevi, pevajënaeyabelia ayaibitsaëtoخانetonë tsaponae. Bajarapamatacabi Jesús pelivaisi jumecovënëtaaponae griegovi, judíovi ata. Nexata pamonajivi pevecuatëpaevanëtsi, pamonaë bitso bejiobi, bajarapamonaejavabelia apóstolevi rajutabiaba penamatavenonaëjavanë. Nexata Jesús pelivaisi penajuajumecovënëtsivi, pamonaë griegovi, jumaitsi judíovijavabelia:

—Caematacabi canacujitsia apóstolevi pamonajivi pevecuatëpaevanëtsijavabelia, tsicobetsanabiaba pexaejavanexa. Nexata xuavajëtonë panijaviriavijavabelia rajutabiaba, bajaraxuavajëtonë patajaviriavijavabelia apo rajutabiabi, jai griegovi judíovijavabelia.

² Doce ponëbeje, apóstolevi, najamatabëcuenejëpa pacuenia exanaejitsia judíovibeje griegovibeje penacobecaëbabiabixae. Nexata apóstolevi junata penacaetuatsinexa daxita pamonaë Jesús pelivaisi pejumecovënëtsivi. Nexata baja itsa nacaetuata daxita bajarapamonae, apóstolevi jumaitsi bajarapamonaejavabelia:

—Tajamonae, paxanë itsa patsicobetsanabiabijitsipajë pexaejava bitso penamatavenonaëvijavabelia, nexata apo panecuenecaëjëpabiabi tsipae jivi patatsipaebinxae Dioso pitorobilivaisi. ³ Nexata paitapetsianame siete ponëbeje, paxamëyajuvënëvi. Paitapetsianame papebijivi caejamatabëcuene pexanaevi,

bitso petsijamatabëvënëcaevitsi Espíritu Santo, bitso peyapëtaeyaexanaevitsi Espíritu Santo pejamatabëcuene. Bajarapamonae paitorobianame bepejiobivijavabelia petsicobetsanabiabinexa penamatavenonaecuene. ⁴ Nexata paxanë saicaya patsitecavanapaenajë patavajëcabiabijava Diosojavabelia. Patsipaebabiabianajënuua Dioso pitorobilivaisi jivijavabelia, jai apóstolevi penacaetuatsijavata daxita Jesús pelivaisi pejumecovënëtsivijavabelia.

⁵ Nexata daxita pamonaenacaetuata, ita jumetane bajarapacuenia apóstolevi pejumatsijava, tsitaxanepanatsi. Nexata bajarapamonae itapeta mapamatabëxëyoje. Itapeta Estebanvënënë, ponë bitso Dioso pejumecovënëtsinë, Espíritu Santo petsijamatabëvënëcaenëtsi. Itapeta Felipevënënë. Itapeta Prócorovënënë. Itapeta Nicanorvënënë. Itapeta Timónvënënë. Itapeta Parmenasvënënë. Itapeta Nicolásvënënë. Nicolás itsanacuapijinë, Antioquía tomarapijinë. Bajaraponë apo judíonë. Itsiata judíovicuenia Dioso najumecovënëtaaponapona. ⁶ Daxita bajarapamatabëxëyo pitapetsicujinaetsi, nubatsi apóstolevi pitabarata. Nexata pamonaenacaetuata, caenë canacujitsia pematabocotojumavereca apóstolevi nacobebuatanubena Diosojavabelia petovajëtsijavata.

⁷ Nexata jane baja apóstolevi, itsamonae yajava, Dioso pitorobilivaisi jivi tsipaebapona Jerusalén tomarata. Nexata Jerusalén tomarata ayaibitsaëtoxaneto tsaponae Jesús pelivaisi pejumecovënëtsivi. Sacerdotevi ata ayaibitsaëto jumecovënëtaaponae Jesús pelivaisi.

Pacuenia Esteban vaetabatsi penaneconitsiaexanaenexatsi yabara pelivaisi

⁸ Dioso bitso yavenonabiabatsi Esteban. Nexata Esteban Dioso pesaëta pinijicuene pexanaejava, exanabiaba. Daxitajivi pitabarata Dioso pesaëta pinijicuene pexanaejava, Esteban exanapona. ⁹ Nexata itsamonae Esteban anaeya jumenotatsi. Bajarapamonae nacaetuatabiaba judíovi penacaetuatabiabibota. Bajarapabo pevënë Esclavos Libertos. Bajarapamonae caenacuaverena apo pepatsivi. Itsamonae Cirene nacuaverena pepatsivi. Itsamonae Alejandría tomaraverena pepatsivi. Itsamonae Cilicia nacuaverena pepatsivi. Itsamonae Asiavënë nacuaverena pepatsivi. Bajarapamonaeyajunëvë Esteban anaeya jumenotatsi. ¹⁰ Nexata bajarapamonaeyajuvënëvë Esteban anaeya ita jumenotatsi, Espíritu Santo yavenonatsi pejumecanaviatsijavata bajarapamonaejavabelia. Bajaraxuata nexata daxita bajarapamonae Esteban apo jumecanaviatsicapanepaetsi juya. ¹¹ Nexata pamonaenacaetuata Esteban anaeya jumenotatsi, matamota itsamonae Esteban peneconitsinexatsi jivijavabelia. Nexata pamonaenacaetuata Esteban penajumetsënëtsinexa Esteban yabara, najumetsënëtsia jane baja jumatsi jivijavabelia:

—Pajumetaniji pibisiacuenia Esteban pebaracuaicuaijaitisabiabijava Moiséspijinë. Pajumetanijinua pibisiacuenia pebaracuaicuaijaitisabiabijava Dioso ata, jai bajarapamonae Esteban yabara.

¹² Bajarapacuenia bajarapamonae pejumatsixae, nexata daxitajivi anaepana. Judíovi pijaancianovi ata anaepana. Judíovi pecujarubivi ata anaepana Estebanjavabelia. Nexata daxita bajarapamonae Esteban cujibarenatsi. Vaetabatsi. Caponaliatsi penutsinexatsi sacerdotevi penamatacaitorobivi pitabarata, judíovi pijaancianovi ata pitabarata, judíovi pecujarubivi ata pitabarata. ¹³ Nexata icatsia bajarapamonae junata pamonaenacaetuata jane baja matamota najumetsënëtsiaya peneconitsinexatsi Esteban. Nexata bajarapamonae ita pata, jumatsi Esteban yabara:

—Mara ponëje Esteban apo cueranae Dioso apo pejitsipaecuenia pebaracuaicuaijaitisabiabijava templo. Apo cueranaenua Dioso Moiséspijinëta penajumecopatsilivaisi ata pebaracuaicuaijaitisabiabijava. ¹⁴ Pajumetaniji maponëje pejumatsijava: “Jesús, Nazaret tomarapijinë, xuabianica mapatemploje. Dioso Moiséspijinëta penajumecopatsilivaisi ata vajajumecovënëtsijava, nacacopabiaexanaena Jesús,” jai maponëje, jai najumetsënëtsiaya Esteban yabara pamonaenacaetuata matamotatsi.

¹⁵ Nexata sacerdotevi penamatacaitorobivi, judíovi pijaancianovi ata, judíovi pecujarubivi ata, naëcobarëcëpatsi Esteban. Nexata bajarapamonae Esteban pitabaranaëcobarëcëpaejavatatsi, betsita ángelnëitabara tsarucae Esteban.

7

Pacuenia Esteban jumecanaviata sacerdotevi pepo penamatacaitorobinë yabara peli-vaissi

¹ Sacerdotevi pepo penamatacaitorobinë jumaitsi Estebanjavabelia:

—¿Xaniajai tsabaja? ¿Jumaitsimë tsabiabi pacuenia mapamonae caneconitsiajumait-sije? jai sacerdotevi pepo penamatacaitorobinë.

² Nexata sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata, Esteban jumaitsi mapacueniaje:

—Tajamonae, patanevetsivimë, panenamuxunaevere. VajaDioso bitso ayaijamatabëcuenenë. Tsitanaitajëta baja cajena bajayata vajasalinainë Abrahampijinëjavabelia. VajaDioso tsitanaitajëta Abrahampijinëjavabelia abaxë Abrahampijinë ita ponapona Mesopotamia nacuata. Bajarapanacuata Abrahampijinë ponapona pevarapaevajënaeya Harán nacuyabelia. ³ Dioso jumaitsi Abrahampijinëjavabelia: “Nijairavecua ponare. Daxita nijamonae ata vecuaponare. Ponare pairajavabelia catsitajëtsianatsi,” jai Dioso Abrahampijinëjavabelia. ⁴ Bajaraxuata Abrahampijinë Caldea nacujavaverena pona. Nexata pata Harán nacuyaberena. Bajarapanacuata Abrahampijinë ita ponapona, nexata paxapijinëmi Harán nacuata vecuatëpatsi. Paxapijinëmi pevecuatëpaecujinaetsi, Dioso icatsia Abrahampijinë varapaeyaexanatsi mapairajavaberena, itsajota vaxaitsi aeconoxae jinavanapatsi. ⁵ Itsiata Abrahampijinë Dioso apo rajutsitsi itsairayo ata pepo pijairanexa. Jume cajena. Tsiquiriirayo ata apo rajutsitsi. Itsiata tajëvelia Dioso najumecapanepaeya jumaitsi Abrahampijinëjavabelia: “Carajutsianatsi nijairanexa daxita mapaira tanemeje. Nevënamuto nexi bajarapaira xainaena,” jai Dioso. Abaxë Abrahampijinë pexi ita apo xinae, bajarapacuenia Dioso najumecapanepaeya jumaitsi Abrahampijinëjavabelia. ⁶ Icatsia Dioso tajëvelia jumaitsi Abrahampijinëjavabelia: “Itsamatacabi nemomoxi mapairaje vecuaponaena. Nexata najinavanapaena itsanacuapijivi pijanacuata. Bajarapanacuata nemomoxi itsanacuaverena pepatsivixae tsane, bajarapanacuapijivi pijajivi exanaenatsi. Bepejiobicuenia nacuenibiaexanabianatsi. Cuatrocientos pavaibeje nemomoxi bepejiobicuenia jinavanapaena bajarapanacuatalia. ⁷ Xanë nexata naneconitsiaexanaenajë panacuapijivi nemomoxi pijajivi exanaenatsi. Bajaraxuacujinae nemomoxi bajarapanacuavecua pitsapaena. Nexata icatsia mapanacuayaberena patsiana. Nexata mapanacuataje xanëjavaverena najamatabëcuenecopatsiaya navajëcabiabiana,” jai baja cajena tajëvelia Dioso Abrahampijinëjavabelia. ⁸ Nexata Abrahampijinë Dioso itorobatsi peperabëcaucutaponaenexa daxita papebinacuetoxi naexana Abrahampijinë pijabota, baitsi peboupiperabëcaucutaponaenexa. Bajarapacuenia Abrahampijinë pexanaenexa Dioso itorobatsi Abrahampijinë penajamatabënapitabibinexa Dioso peyavenonaeyapaebijavatsi. Nexata Abrahampijinë pijava vecuanaexanatsi pebinëyo. Bajaraponëyo pevënë Isaac. Nexata baja penacuetonëyo penaexanaecujinae, ocho pamatacabibeje ita xaina, Abrahampijinë boupiperabëcaucuta pexënatonëyo pacuenia Dioso itorobatsi. Bajaraxuacujinae icatsia juya Isaacpijinë pexënato xaina. Isaacpijinë pexënato pevënë Jacob. Bajara icatsia pacuenia Isaacpijinë ata boupiperabëcaucuta pexënatonëyo. Bajaraxuacujinae icatsia Jacobpijinë pexi xaina doce ponëbeje. Bajara icatsia pacuenia Jacobpijinë ata boupiperabëcaucuba pexi. Bajarapadoce ponëbejevaverena penaexanaponaevi doce pabitsaëtobeje naexana, jai Esteban

sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

⁹ Icatsia Esteban jumaitsi bajarapamonaejavabelia:

—Nexata Jacobpijinē pexi, ponēbeje nacaemonaemi, vaxaitsi vajasalinaivi. Bajarapamonaemi pejuyapijinē Josépijinē. Nexata Josépijinē cuenecaēbatsi pematapijivi. Bajaraxuata Josépijinē pecaponaenexatsi Egipto nacuyabelia, canajetaxuabatsi pematapijivi. Itsiata Josépijinē Dioso yajavaponaponatsi. ¹⁰ Nexata Josépijinē bepejio-biaexanaejavaminexatsi Egipto nacuata, vecuapanepaponapona. Dioso daxitacuene Josépijinē Egipto nacuata yapētaeyaexanaponatsi. Bajaraxuata Egiptonacua pevetsinēmi, Josépijinē pexaniajamatabēcuenia tanetsi. Nexata Egiptonacua pevetsinēmi tocopatatsi Josépijinē pecobenaevetsinexa Egiptonacua. Egiptonacua pevetsinēmi pijabo ata peto-evetsinexa, Josépijinē tocopatatsi, jai Esteban bajarapamonaejavabelia.

¹¹ Icatsia Esteban jumaitsi bajarapamonaejavabelia:

—Nexata pinijianiboxaneto pata daxita Egipto nacujava, Canaán nacujava ata. Nexata bitso bejiobi jivi. Canaán nacuata vajasalinaivi jane baja apo xainae pexaejava. ¹² Itsiata Egipto nacuata janibovajēnaeya, Josépijinē pecomuaquejebijava ayaijava xani-avaetejeba trigoxu. Nexata Jacobpijinē vënētane Egipto nacuata pexaejava pexainaejava trigoxu. Nexata Jacobpijinē pexi itoroba Egipto nacujavabelia pesivaponaenexalia pexaejava. Bajarapanamuto ponalia, copiaya jane baja pexaejava pesivaponaenamutolia Jacobpijinē pexi, pamonaē jane baja vajasalinaivi. Itsiata Jacobpijinē pexi pejuyapijinējavata comuacae ata, apo yapētae pejuyapijinēcuene. ¹³ Bajaraxuacujinae vajasalinaivi icatsia cotocaevi panamuto itsa sivaponalia pexaejava, nexata Josépijinē jumaitsi pematapijivijavabelia: “Xanē raja Josépijinē panejuyapijinēnē,” jai Josépijinē. Bajaraxuata nexata Egipto nacuaevetsinēmi yapētane bajarapamonaē Josépijinē pijamonaeuene. ¹⁴⁻¹⁵ Nexata Josépijinē tonajumexuaba paxa Jacobpijinē penavarapaenexa Egipto nacuyabelia. Nexata Jacobpijinē daxita pexi, pemomoxi yajava, varapa Egipto nacuyabelia. Nexata Jacobpijinē, daxita pexi, pemomoxi yajava, itsa pata Egipto nacuata pejinavanapaenexa, nanamataējēta setenta y cinco pajivibeje. Bajaraxuacujinae Egipto nacuata Jacobpijinē tēpa. Pexi ata vajasalinaivimi jane baja bajarapanacuata icatsia tēpa. ¹⁶ Bexējavabelia vajasalinaivimi jane baja petēpaevimi pesijebinxatsi ibovajuta, Siquem tomarata, sicaponatsi Siquem tomarabelia. Bajarapaibovajuta cajena jivi petēpaevi, jebabiaba. Abrahampijinē abaxē itsa asaē vajasalinaivimi pevajēnaeya, comuata bajarapaibovaju. Hamorpijinē pexita comuata bajarapaibovaju, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

¹⁷ Icatsia Esteban jumaitsi bajarapamonaejavabelia:

—Nexata baja itsa panepapona bejamatabēcuene trescientos veinte pavaibeje vajasalinaivimi pejinavanapaecujinae Egipto nacuata, nexata Abrahampijinē pemomoxi, vajasalinaivimi jane baja, ayabitsaētofaneto tsaponae Egipto nacuata. Nexata jane baja pijinia imoxoyo pevajēnae tsaponae pecopiapatsinexa pacuenia Dioso pexaniajaijumeta najumecapanepaeya jumaitsi Abrahampijinējavabelia, baitsi jane baja Dioso pejamatabēcueneta vajasalinaivimi pejutsinexatsi Egipto nacuverena pejinavanapaenexa Canaán nacuata. ¹⁸ Nexata bajarapamatacabi itsanē junua pevetsinexa Egiptonacua. Ponē Egiptonacua pejanaevetsinē, bajaraponē apo yapētae Josépijinē Egiptonacua pevetsinēmicuene. Tsipaji baja bajayata, bajaraponē pevajēnaeya, tēpa baja Josépijinē. ¹⁹ Nexata Egiptonacua pejanaevetsinē, vajasalinaivimi apo itaxutotsoniataetsi. Ayaicuenia nacuenibiaexanabiabatsi. Bejiobiaexanabiabatsinua. Vajasalinaivi pexi pebinēyo itsa tonaexanatsi, nacuaevetsinē pejamatabēcueneta penetsiaexanabiabatsi bajarapacuenia petēpaenexa pebinacuetoxi. ²⁰ Bajarapamatacabi naexana Moiséspijinē. Moiséspijinē bitso pexanianacuetonēyo. Dioso barēya tanetsi.

Nexata Moiséspijinē penaexanaecujinae, paxabeje penabeje muetsia evetatsi bota acueyabi pajuametobeje. ²¹ Bajaraxuacujinae Moiséspijinē paxabeje penabeje xu-abatsi baja. Nexata nacuaevetsinē pexēnatoyo Moiséspijinē pitatsi nacoxyabijitsi-atsi. Nexata nacuaevetsinē pexēnatoyo Moiséspijinē vitsatatsi pexēnatonēyocuenia. ²² Nexata Moiséspijinē cujarubatsi daxitacuene, xua Egipto nacuapijivi yapētane. Nexata Moiséspijinē bitso yapētane livaisi petsipaebinexa jivijavabelia. Pexanaejava ata pecobeta bitso yapētane, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

²³ Icatsia Esteban jumaitsi bajarapamonaejavabelia:

—Itsa baja Moiséspijinē cuarenta pavaibeje xaina penaexanaecujinae, sivanajamatabēxaina petaenexa pijamonaesajota jinavanapa. ²⁴ Nexata baja Moiséspijinē pona petaenexa pijamonaes. Nexata baja Moiséspijinē itsa ponapona panacuata pijamonaes jinavanapa, Moiséspijinē pitabēta Egipto nacuapijinē tobejiobiaexanatsi pijamonaenē. Nexata Moiséspijinē bajarajota pijamonaenē yamatamobeyaxuaba Egipto nacuapijinē. ²⁵ Moiséspijinē nexata jamatabējumaitsi: “Daxita tajamonaes, Israelpijinē pemomoxi, nesivajamatabējumaitsi tsane: ‘Moisés cajena nacayavenonaena vajavecuapit-sapaenexa Egiptonacua,’ nesivajamatabējai tsane,” jamatabējai picani Moiséspijinē. Itsiata baitsi jane Moiséspijinē pijamonaes bajarapacuenia apo sivajamatabējumaitsi. ²⁶ Moiséspijinē pebeyaxuabicujinae Egipto nacuapijinē, icatsia meravia pitsijavata, Moiséspijinē caxitajaraba anijanēbeje penabejavatabeje. Bajaraponēbeje Moiséspijinē epijamonaenēbeje, Israelpijinē pemomobeje. Nexata Moiséspijinē xaniavaetsia itaveta penabeyanivabeje matavējēa. Jumaitsi: “¡Panabejitsipamebeje! Panapijamonaenēmēbeje raja. ¿Detsa xuajitsia panabiamebeje?” jai Moiséspijinē. ²⁷ Nexata ponē matapita penabejavabeje, torotajarabatsi Moiséspijinē. Bajaraponē jumaitsi Moiséspijinējavabelia: “¿Jipatsa catocopata patanevetsinēnexamē? ¿Jipatsa catocopata, pibisiacuene itsa paexanajē, pataneconitsiaexanabiabinexamēnua? ²⁸ ¿Nebeyaxuabijitsiamē tsaja icatsia xanē ata pacuenia canivi beyaxuabame Egipto nacuapijinē?” jaitsi Moiséspijinē pijamonaenē. ²⁹ Nexata Moiséspijinē itsa jumetane bajarapacuenia pejumaitsijavatsi pijamonaenē, nexata Moiséspijinē najetabajirava Madián nacuayabelia. Bajarapanacuatalia ponapona. Nexata bajarapanacuatalia Moiséspijinē nacojioba. Xaina anijanēbeje pexēnatobeje, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

³⁰ Icatsia Esteban jumaitsi bajarapamonaejavabelia:

—Bajaraxuacujinae icatsia cuarenta baja pavaibeje itsa panepa Moiséspijinē peponaponaecujinae Madián nacuata, Dioso tsitanaitajētatsi beángelnēcuenia. Bajarapacuenia tsitanaitajētatsi petusato nacuata, Sinaivēnētsuto canacujitsita. Tsiquirinaemēyo petajueyecaecotia tuatuajēta, tsitanaitajētsitsi Dioso Moiséspijinē. Itsiata tsiquirinaemēyo apo veriajavitsi. ³¹ Moiséspijinē itsa tane, jamatabēcuenenabenajaca. Nexata cujitalia xaniavaetsia imoxoyo petaenexa tsiquirinaemēyo petajueyecaecotia. Nexata bajarapacotiajavaverena Dioso jumaitsi Moiséspijinējavabelia: ³² “Xanē raja nijasalinaivimi pijaDiosonē. Abrahampijinē, Isaacpijinē ata, Jacobpijinē ata, pijaDiosonē,” jai Dioso. Nexata bajarajota Moiséspijinē neconecojai pecajunavi. Apo naēcotsilia baja icatsia matavējēa. ³³ Nexata icatsia bajarapacotiajavaverena Dioso jumaitsi Moiséspijinējavabelia: “Nataxujonore nijazapato. Tsipaji raja taitabarata nucame. ³⁴ Taniji rabaja tajajivi nijamonaes Egipto nacuata bitso bepejiobicuenia pejinavanapaejava. Jumetaniji bajarapamonaes penatsinueyabiabijava. Nexata runaicajē bajarapamonaes tajutsinexa Egipto nacuaverena. Naxanitsia. Caitorobijitsiatsi Egipto nacuayabelia,” jai Dioso Moiséspijinējavabelia tsiquirinaemēyo petajueyecaecotiajavaverena, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

³⁵ Icatsia Esteban jumaitsi bajarapamonaejavabelia:

—Nexata Moiséspijinë Dioso itorobatsi peponaenexa Egipto nacuyabelia, vajasalinaivimi Egipto nacuata pebejiohiaexanabiabijavatsivecua pejutsinexa Egipto nacuverena. Moiséspijinë peponaevajënaeya Egipto nacuyabelia, pamatacabi abaxë Moiséspijinë ponapona panacuata vajasalinaivimi jinavanapa, bajarapamatacabi vajasalinaivimi Moiséspijinë navecuaitavetatsi. Vajasalinaivimi jumaitsi Moiséspijinëjavabelia: “¿Jipatsa catocopata patanevetsinëexamë? ¿Jipatsa catocopata, pibisiacuene itsa paexanjë, pataneconitsiaexanabiabinexamënuu?” jai vajasalinaivimi. Bajarapacuenia vajasalinaivimi navecuaitavetsi ata, itsiata Dioso itorobatsi Moiséspijinë peponaenexa vajasalinaivimijavabelia. ³⁶ Moiséspijinë nexata pona Egipto nacuyabelia. Nexata Egipto nacuata Moiséspijinë Dioso pesaëta pinijicuene pexanaejava, exanapona. Bajaraxuacujinae Moiséspijinë Egipto nacuverena vajasalinaivimi jane baja matacanajetaruca. Nexata Moiséspijinë epatuarena Rojovënë manuamene maxëranajavata, Dioso pesaëta pinijicuene pexanaejava exana. Bajaraxuacujinae cuarenta pavaibeje itsa jinavanapa petusato nacuata, itsajavanë icatsia Dioso pesaëta pinijicuene pexanaejavanë, Moiséspijinë exanapona. ³⁷ Bajarapamatacabi cajena Moiséspijinë jumaitsi vajasalinaivimijavabelia: “Pacuenia xanë Dioso nitoroba Diosojumelivaisi jivi tatsipaebinënexa profetanënexanë, bajarapacuenia Dioso pacatoitorobianica itsanë profetanë Diosojumelivaisi papecatsipaebinënexa. Bajaraponë paxamëyajuvënë tsane. Bajaraponë pajumecovënëtsianame,” jai cajena Moiséspijinë bajayata tajëvelia vajasalinaivimijavabelia Jesús yabara. ³⁸ Moiséspijinë barënacaetuata vajasalinaivimi petusato nacuata, Sinaivënë tsutomuxuneneta. Nexata Sinaivënë tsutojumabetsia caenë Moiséspijinë junaya. Nexata Sinaivënë tsutojumatatsia Moiséspijinë ángeljavabelia tocaicuajai vajasalinaivimi. Nexata Moiséspijinëta Dioso penajumecopatsilivaisi jivi pejumecovënëtsinexa, Sinaivënë tsutojumatatsia tonajumecopatatsi. Bajarapalivaisi Dioso najumecopata Moiséspijinëta vaxaitsi ata bajarapalivaisi vajaxainaenexa mapamatacabijavaberenaje, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

³⁹ Icatsia Esteban jumaitsi bajarapamonaejavabelia:

—Vajasalinaivimi apo jamatabëjumecovënëtsi Moiséspijinë. Apo jitsipae cajena matavëjëa penamatacaitorobinënexatsi. Vajasalinaivimi picani najamatabëxaina epatua Moiséspijinë pepepënaviabinexatsi Egipto nacuyabelia. ⁴⁰ Moiséspijinë bajayajebi ponaponaya Sinaivënë tsutojumatatsia. Nexata Moiséspijinë pecovëta vajasalinaivimi jumaitsi Aarónpijinëjavabelia: “Exanare diosovi vajanacamatacaponaenexa. Apo yapëtaetsi rabaja pacuenia exanatsi Moisés vajanacamatacaponaenë Egipto nacuverena,” jai. ⁴¹ Nexata vajasalinaivimi becerro jumapecataeya exana oronë. Nexata bajarapajumapenëjavabelia pevi perajutsinexa, ofrendacuenia tobia dajubi. Bajaraxuacujinae vajasalinaivimi jamatabëcuenebarëyaya fiesta exana pecobeta pexanaexae oronë. Tsipaji bajarapajumapenë vajasalinaivimi bepijadosonë tane. ⁴² Bajaraxuata Dioso baja copata peyavenonaejava vajasalinaivimi. Nexata baja Dioso tocopata vajasalinaivimi najamatabëcuenecopatsiaya penavajëcabiabinexa itaboxopijitulupujavabelia. Diosojumepaebinë profeta peyaquinaebaxutota, Dioso pejumaitsijava vajasalinaivimi yabara jumaitsi mapacueniaje:

Israelpijinë papemomoximë, pamatacabi abaxë pajinavanapame cuarenta pavaibeje petusato nacuatalla, pabeyabiabi atamë baca, oveja yajava, bajarapavi xanë apo panerajutabiabimë ofrendacuenia. ⁴³ Bajarapavi parajutabiabame ofrendacuenia panenatoexanaediosovijavabelia. Tsipaji bajarapamatacabi pacajinavanapame carpabo bepanijadosonë panetaenë Molocvënëdiosonë

pijabonexa. Pacajinavanapamenua tuluputo, jumapecataeya panenatoex-
anaetuluputo, Renfánvënētuluputo. Nexata bajarapatuluputo pataneme
bepanijadioso. Panecobeta saya paneexanaediosovi, pacajinavanapame
najamatabëcuenecopatsiaya bajarapadiosovijavabelia panenavajëcabiabinexa.
Bajaraxuata panijanacuavecua pacacaponaeayaexanaenatsi Babilonianacua
pënëyabelia pairajavabelia,

jai Dioso pejumaitsijava mapacueniaje profetanë peyaquinaebaxutota vajasalinaivimi
yabara, jai Esteban sacerdotevi penamatacaitorobivijavabelia, judíovi pijaancianovi-
javabelia ata, judíovi pecujarubivijavabelia ata.

⁴⁴ Icatsia Esteban jumaitsi bajarapamonaejavabelia:

—Bajayata vajasalinaivimi ita jinavanapa petusato nacuata, cajinavanapa
Dioso pijacarpaboxaneto, bajarapabota Diosojavabelia pevajëtabiabinexa. Nexata
Dioso Moiséspijinëta penajumecopatsilivaisi, Dioso peyaquinaeibopanayobeje,
vajasalinaivimi xaniavaetabuatabiaba bajarapacarpabo ënëtuatujëta. Copiaya
Moiséspijinë jumapecataeya Dioso tsitajëtatsi pacuenia bajarapacarpabo exanetsijitsia.
Nexata juya Moiséspijinë itoroba vajasalinaivijavabelia. Nexata vajasalinaivimi
exaneta bajarapacarpabo pacuenia Dioso cuenecataeya tsitajëtatsi Moiséspijinë.

⁴⁵ Bajaraxuacujinae bajarapacarpabo rajutatsi vajasalinaivimi pecajinavanapaenexa.
Nexata vajasalinaivimi itsabelia varapa, caponabiaba bajarapacarpabo. Moiséspijinë
baja ita tëpa, Josuépijinë juya matacaponae vajasalinaivimi. Josuépijinë nexata
pamatacabi vajasalinaivimi matacanajetaruca, caparena bajarapacarpabo
mapanacuayaberena. Nexata vajasalinaivimi vajabitsaë exana mapanacuataje
pejinavanapaevimijavabelia. Nexata vajasalinaivimi mapairaje yacajërëta.
Pamatacabi Josuépijinë vajasalinaivimi matacanajetaruca mapanacuayaberena,
Dioso rëcëpecaeyaexanatsi mapanacuapijivimije Josuébana pevajënaetarena. Nexata
bexëjavaberena ata, pamatacabi Davidpijinë mapanacua evetaje, vajasalinaivimi
abaxë cajinavanapa bajarapacarpabo. ⁴⁶ Nexata Dioso pexaniajamatabëcuenia
tanetsi Davidpijinë, mapanacuaje pevetsinëmi. Nexata picani Davidpijinë bitso
jitsipa Dioso pijabonexa templobo pexanaeyaexanaenexa. Baitsi paDioso bajayata
Jacobpijinë jumecovënëta, Davidpijinë jane baja pamopiinëmi. ⁴⁷ Itsiata baitsi jane
Davidpijinë Dioso apo tocopatsitsi templobo pexanaeyaexanaenexa. Davidpijinë
pexënato, Salomónpijinë, Dioso pijabonexa templobo exanaeyaexana, Davidpijinë baja
pepuatëpae. ⁴⁸ Pepo Dioso athëbëtatsia peecaenë, bajaraponë apo ponaponae bota, jivi
pexanaebota. Diosojumepaebinë profetanë bajayata jumaitsi mapacueniaje Dioso
pejumaitsijava:

⁴⁹ Athëbëtatsia daxitacuene taevetsinë. Mapanacuajava ata taevetsinë. ¿Detsa nexata
xuajitsia bo panetoexanetsipame? Apo namatavenonaenë cajena bo tanacuer-
aevetsinexa. ⁵⁰ Xanë daxitacuene taexanaenë,
jai profeta bajayata Dioso pejumaitsijava, jai Esteban sacerdotevi penamatacaitorobivi-
javabelia, judíovi pijaancianovijavabelia ata, judíovi pecujarubivijavabelia ata.

⁵¹ Icatsia Esteban jumaitsi bajarapamonaejavabelia:

—Paneajamatabëcuenetajavi. Paneamatabocotajavinua. Apo pajumecovënëtsimë
Dioso pejumelivaisi. Apo pacopatsimë Espíritu Santo papecatsijamatabëjonexa.
Pacuenia panijasalinaivimi bajayata itsi, bajara saya icatsia paxamë paitsimë.

⁵² Diosojumepaebivi profetavi tajëvelia vajunupaebapona Cristo, pepo pianeconijibinë
pepatsijavanexatsica. Nexata panijasalinaivimi daxita bajarapaprofetavimi
bejiobiaexanabiaba. Beyejebabiabanua. Nexata jane baja Cristo ita patsica, paxamë
pijavajabitsaë pecobeyabelia pacanajetaxuabame. Bajarapacuenia Cristo pabeyaxu-
abame. ⁵³ Angelevi pacarajutsi ata Dioso Moiséspijinëta penajumecopatsilivaisi jivi
pejumecovënëtsinexa, itsiata paxamë apo pajumecovënëtsimë bajarapalivaisi, jai

Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

Pacuenia Esteban beyaxuabatsi yabara pelivaisi

⁵⁴ Sacerdotevi penamatacaitorobivi, judíovi pijaancianovi ata, judíovi pecujarubivi ata, ita jümetane Esteban petsipaebilivaisi, anaepana bitso Estebanjavabelia. Nexata bajarapamonae pecaanae, navonoquiarabaxane. ⁵⁵ Itsiata Esteban bitso jamatabëcuenevënëca Espíritu Santo. Esteban athëbëa benaëcotsia. Nexata tane Dioso pijapenivenivenaectotia. Taenutsianua Jesús penucaejava paxa Dioso pemuxuneneta, pecujuanenia. ⁵⁶ Nexata Esteban jumaitsi daxita bajarapamonaejavabelia:

—¡Panataema! Taniji itaboxo penapatsijavatsia. Daxitajivi Pematapijinë, ponë naexana mapanacuataje, pacuenia vaxaitsi banaexanatsi, nucaya paxa Dioso pemuxuneneta, pecujuanenia, jai Esteban.

⁵⁷ Nexata sacerdotevi penamatacaitorobivi, judíovi pijaancianovi ata, judíovi pecujarubivi ata, pecobenëta namuxuvojoacaba. Bajarapamonae vavajai pinijicuenia. Daxita caecuenia kujibarenatsi Esteban pevaetabinexatsi. ⁵⁸ Bajarapamonae Esteban caponaliatsi tomarapënëyabelia. Nexata tomarapënëtalía Esteban tseconatsi ibotonëta. Nexata daxita pamona jümetane Esteban petsipaebilivaisi, najumajonejeba pijacamisajumavelia penaxatabijavanë. Nexata Esteban petseconaevajënaetsi ibotonëta, bajarapamonae penajumajonejebijavanë pevëjëato Saulovënënë evetsiaexanatsi. ⁵⁹ Petseconanubenaevavatatsi ibotonëta, Esteban vajëta Diosojavabelia. Jumaitsi:

—Tajatuxanenë Jesús, daxita pepo tajamatabëcuene pire, jai Esteban.

⁶⁰ Bajaraxuacujinae Esteban pematabacabëta nuca. Aëjai pinijijumeta.

—Tajatuxanenë, itaxutobejiobiataema mapamonaeje. Vecuaajibiaexanare paneconinatsiexana xamëjavabelia tanebejiobiaexanaexae mapacueniaje, jai Esteban.

Bajaraxuacujinae Esteban tēpanajereca baja.

8

Pacuenia Saulo jaita Jesús pelivaisi pejumecovënëtsivi penaneconitsiaexanaenexa yabara pelivaisi

¹⁻³ Sacerdotevi penamatacaitorobivi, judíovi pijaancianovi ata, judíovi pecujarubivi ata, Estebanpijinë baja ita beyaxuabatsi, Saulo tsitaxanepanatsi. Nexata pebijivi, pamona Dioso bitso jumecovënëta, bajarapamonae Estebanpijinë mëthëtatsi. Matanueyabatsi bitso.

Bajarapamatacabi jane baja sacerdotevi penamatacaitorobivi, judíovi pijaancianovi ata, judíovi pecujarubivi ata, taxuxuaba pebejiobiaexanaponaejava Jesús pelivaisi pejumecovënëtsivi Jerusalén tomarata. Saulo jane baja jaitaruta Jesús pelivaisi pejumecovënëtsivi Jerusalén tomarata. Caebo canacujitsia jonepona. Nexata taicapona pebejivi, petiriavi ata, pamona Jesús pelivaisi pejumecovënëtsivi. Penaneconitsivi pejebabiabiboyabelia Saulo cajonepona bajarapamonae. Nexata ayaibitsaëtoxaneto Jesús pelivaisi pejumecovënëtsivi, Jerusalén tomarapijivi, rëcëpeca itsatomaranëjavabelia. Itsamonae rëcëpeca Samaria nacuyabelia. Itsiata apóstolevi nacopaba Jerusalén tomarata.

Pacuenia pexanialivaisi, Jesús pelivaisi, pejumecovënëtsivi, tsipaebaupon Samaria nacujava yabara pelivaisi

⁴ Pamona Jesús pelivaisi pejumecovënëtsivi, rëcëpeca Jerusalén tomaravecuca. Nexata itsaxuayo bajarapamonae najetarubena, jivi tsipaebanajetarubena pexanialivaisi, Jesucristo pelivaisi. ⁵ Pamona rëcëpeca yajuvënënë, pevënë Felipe. Bajaraponë lia Samaria nacuata pecaetomarajavabelia. Bajarapatomarapijivijavabelia Felipe tsipaeba Jesús pelivaisi. Jumaitsi:

—Jesús raja Cristo, ponë Dioso itorobica jivi pecapanepaenexa, jai tsaponae Felipe Samaria nacuata peecaetomarapijivijavabelia.

⁶ Itsa patomarata Felipe Jesús pelivaisi tsipaebabiaba, jivi ayaibitsaëtoxaneto nacaetuatabiaba. Daxita bajarapamonae xaniavaetsia namuxunaevetabiaba Felipe itsa tsipaebabiaba Jesús pelivaisi. Bajarapamonae tane Felipe Dioso pesaëta pinijicuene pexanaejavanë. ⁷ Pamonaë dovathi peyajavajinavanapaevi, Felipe vecuacapitsapabiaba. Dovathi pinijijumeta aëjai tsabiabi itsa vecuacapitsapabiaba Felipe. Nexata dovathi peyajavajinavanapaevimi, jamatejema baja tsabiabi. Pamonaë ata petabusipacuenabivitsi, pejayujayunaevi ata, jamatejemayaexanapona Felipe. ⁸ Bajaraxuata daxita bajarapatomarapijivi jamatabëcuenebarëya.

⁹ Bajarapatomarata Simónvënënë ponapona. Bajaraponë jivi pejorobabiabinë. Bajayajebi daxita Samaria nacuapijivi yamaxëitojorobapona. Simón jumai tsabiabi bajarapatomarapijivijavabelia:

—Xanë bitso jivi taxaniavaetsinë, jai tsabiabi.

¹⁰ Daxitajivi, petuxanevi ata, Simón pejumaitsijava namuxunaevetabiabatsi. Bajarapamonae nexata Simón yabara jumai tsabiabi:

—Maponëje Simón pinijicuene pexanaejava caëjëpatsi. Dioso raeta yavenonatsi, jai tsabiabi bajarapamonae Simón yabara.

¹¹ Bajarapacuenia Samaria nacuapijivi xaniavaetsia jumecovënëtabiaba tsipaji Simón pejorobicueneta bajayajebi jivi yamaxëitojorobabiaba. ¹² Nexata Felipe Samaria nacuapijivijavabelia tsipaeba Dioso pijajivi pevetsijavanexa. Jesucristo pelivaisi ata tsipaeba. Nexata Samaria nacuapijivi jumecovënëta Felipe petsipaebilivaisi. Bajarapamonae pebijivi, petiriavi ata, Felipe bautisaba.

¹³ Nexata jane baja Simón jivi pejorobabiabinë ata jumecovënëta Felipe petsipaebilivaisi. Nexata baja Simón ata Felipe bautisaba. Bajaraxuacujinae Felipe pepëta naponapona Simón. Nexata Simón jamatabëcuenenabenajacabiaba itsa taeyabiaba Dioso pesaëta Felipe pinijicuene pexanaponaejavanë.

¹⁴ Nexata apóstolevi Jerusalén tomarata pejinavanapaevi, vënëlivaisitane Samaria nacuapijivi Dioso pitorobilivaisi pejumecovënëtsijava. Nexata apóstolevi jumaitsi peyajuvënënëbejavabelia:

—Pedro, paxamëbeje Juanbeje, pataemeliabeje Samaria nacuapijivi, pejumecovënëtsivi Dioso pitorobilivaisi, jai apóstolevi.

Nexata Pedrobeje Juanbeje ponabeje. ¹⁵ Itsa bajaraponëbeje patabeje Samaria nacuayabelia, tovajëtabeje Diosojavabelia Espíritu Santo petsijamatabëpatsinexatsitsica Samaria nacuapijivi, Dioso pitorobilivaisi pejumecovënëtsivi. ¹⁶ Bajarapacuenia tovajëtabeje tsipaji abaxë Samaria nacuapijivi Espíritu Santo apo tsijamatabëpatsitsitsica. Abaxë saya bautisabatsi bajarapamonae Jesús pevënëta. ¹⁷ Nexata Pedrobeje Juanbeje petovajëtsijavatabeje Diosojavabelia, tsiatanacobebuatabeje Samaria nacuapijivi. Nexata jane baja Samaria nacuapijivi Espíritu Santo tsijamatabëpatsicatsi.

¹⁸ Nexata Simón itsa tane Samaria nacuapijivi Espíritu Santo petsimatarunaejavatsitsica apóstolenëbeje Samaria nacuapijivi tsiatanacobebuatsiaya petovajëtsijavatabeje Diosojavabelia, nexata Simón palata tsipaeba apóstolenëbejavabelia. ¹⁹ Simón jumaitsi:

—Panerajurebeje mapacaëjëpaejamatabëcueneje. Pajivi tsiatanacobebuatajë tavajëtsijavata Diosojavabelia, bajarapajivi petsimatarunaenexatsitsica Espíritu Santo, jai Simón apóstolenëbejavabelia.

²⁰ Nexata Pedro jumaitsi Simónjavabelia:

—Xamë cajena Dioso caxuabiana infiernojavabelia. Nexata vereverecaename nijapalata yajava. Tsipaji najamatabëxainame necomuatsinexa ëpalatata Dioso amoneya jivi perajutsijavatsica. ²¹ Tsipaji pepacuene apo najamatabëcuenecopatsimë xaniavaetsia Diosojavabelia. Nexata Dioso patajumecovënëtsivita, apo nanacuenëbimë

tsane. ²² Copare baja papibisiacuene najamatabëxainame. Najamatabëcuenepënëyorore Diosojavabelia. Vajëre Diosojavabelia pecavecuaajibiaexanaenexa papibisiacuene najamatabëxainame. ²³ Xanë cajena yapëtaniji necueneëbijava Jesús pelivaisi pejume-covënëtsivi. Yapëtanijinua pecajamatabëcuenecënënaejava pibisiacuene nexanaeneconi, jai Pedro.

²⁴ Nexata Simón jumaitsi:

—Panetovajërebeje Diosojavabelia tanevecuaajibiaexanaenexa paneconi xainajë Dioso tanexuabiyaniwa infiernojavabelia pacuenia panejumaitsimëbeje, jai Simón.

²⁵ Bajaraxuacujinae Pedrobeje Juanbeje bajarapatomarapijivijavabelia tsipaebabeje pacuenia tanebeje Dioso pexanaejava. Tsipaebabejenua Dioso pitorobilivaisi. Bajaraxuacujinae Pedrobeje Juanbeje itsa navialiabeje Jerusalén tomarabelia, Samaria nacuata penaetomaranëjava tsipaebanajetarucabeje pexanialivaisi, Jesús pelivaisi.

Pacuenia Felipe bautisaba Etiopía nacuapijinë yabara pelivaisi

²⁶ Dioso pijaáγγελ jumaitsi Felipejavabelia:

—Nonotapunare. Maxuayolia roviafia liamëreje. Panamuto Jerusalén tomaraverena naropota pepatsinexa Gaza tomarabelia, bajarapanamutualia liamëre, jai áγγελ Felipejavabelia.

Bajarapanamuto petusato nacujava rucalia pepatsinexa Gaza tomarabelia. ²⁷ Nexata Felipe xaniavaeta pijjavaxi peponaenexa baja. Bajaraxuacujinae naropolia jane baja. Nexata bajarapanamutualia Felipe caxitajaraba Etiopía nacuapijinë. Bajaraponë palata pevetsinë. Etiopíanacua pevetsiva pijapalata tovetabiaba. Bajaraponë, Etiopía nacuapijinë, Jerusalén tomarajavabelia pona najamatabëcuenecopatsiaya pevajëtsinexa Diosojavabelia templobota. ²⁸ Nexata baja Etiopía nacuapijinë Jerusalén tomaraverena naviatanajetaruca. Navialia baja pijanacuayabelia. Pijamoyota, carrozavënëmoyota, yanajetaruca. Nexata lebanajetaruca Diosojumelivaisipaebinë profeta Isaíaspijinë bajayata peyaquinaebaxuto. ²⁹ Nexata Espíritu Santo jumaitsi Felipejavabelia:

—Bitsojinaremelia. Pëcaxinaeremelia mapamoje. Imoxoyo pemuxunenia nucaponae-name, jai Espíritu Santo.

³⁰ Felipe nexata cujinaejinalia. Nexata baja Felipe pëcaxinalia Etiopía nacuapijinë. Nexata Felipe jumetane Etiopía nacuapijinë pelebanajetarucæjava profeta Isaíaspijinë peyaquinaebaxuto. Nexata Felipe jumaitsi Etiopía nacuapijinëjavabelia:

—¿Xamë tsaja pepacuene jumeyapëtaneme palivaisi lebanajetarucame? jai Felipe.

³¹ Nexata Etiopía nacuapijinë jumaitsi:

—¿Detsa pacuenia jumeyapëtaejitsipajë itsa apo netsipaebi xaniavaetsia itsanë ata? jai. Nexata Etiopía nacuapijinë junatatsi Felipe carrozavënëmoyo ënëabetsia Felipe penajunaenexatsia penamuxuneniaecaenexabeje.

³² Profeta Isaíaspijinë peyaquinaebaxutota, palivaisi Etiopía nacuapijinë lebanajetaruca, tajëvelia Jesús yabara jumaitsi mapacueniaje:

Pacuenia oveja moya, caponae atatsilia pebeyaxuabinexatsi, bajara pijinia pacuenia bajaraponë ata moya tsane, caponae atatsilia pebeyaxuabinexatsi. Pacuenia ovejaya naxunae atatsi, moya, bajara pijinia pacuenia bajaraponë ata moya tsane, yapëtae ata pebejiohiaexanaejavanexatsi. ³³ Bejiobiaexanaenatsi. Pibisiacuene apo exanae ata, naneconitsiaexanatsi. Itsajivi ata bajaraponë yabara apo jumaitsi tsane: “Mara pamonaaje bajaraponëmi pemomoxije,” apo jai tsane. Tsipaji beyaxuabianatsi,

jai tajëvelia mapacueniaje Isaíaspijinë peyaquinaebaxutota Jesús yabara, palivaisi Etiopía nacuapijinë lebanajetaruca.

³⁴ Nexata Etiopía nacuapijinë jumaitsi Felipejavabelia:

—Pexaniacuene netoexanare. Netsipaebare ponë yabara yaquina profeta Isaíaspijinë mapacueniaje. ¿Baja tsa ponë pijacuata nayabarajumaitsi? Itsa jume, ¿itsanë yabara tsaja jumaitsi? jai Etiopía nacuapijinë Felipejavabelia.

³⁵ Nexata palivaisi Etiopía nacuapijinë lebanajetaruca, bajarapalivaisi Jesús yabara pejumaitsijava copiaya Felipe yapëtaeyaexana. Bajaraxuacujinae icatsia tsipaeba pex-anialivaisi, Jesús pelivaisi. ³⁶ Penajetarucaejavatabeje bajarapanamutua, patabeje itsajota merayo eca. Nexata Etiopía nacuapijinë jumaitsi Felipejavabelia:

—Mara jota meraje. Jitsipajë picani xanë tanebautisabinexamë. Itsiata baitsi jane yapëtaneme xua yabara apo xanepanae tanebautisabinexamë, jai Etiopía nacuapijinë Felipejavabelia.

³⁷ Nexata Felipe jumaitsi:

—Itsa jumecovënëtame xaniavaetsia daxita nejamatabëëthëtojavaverena, nexata necaëjëpa tacabautisabinexa, jai Felipe.

Nexata bajaraponë jumaitsi:

—Jumecovënëtajë rabaja. Jesucristo raja xaniajai Dioso pexënato, jai Etiopía nacuapijinë Felipejavabelia.

³⁸ Nexata bajaraponë pijamo nucojopaeyaexana. Bajaraponëbeje Felipebeje runarecabeje merajavabereca. Felipe bautisaba Etiopía nacuapijinë. ³⁹ Nexata penonotaju-naecujinaetsinabeje, Espíritu Santo pitatsi Felipe Etiopía nacuapijinë pitabarata. Itsiata Etiopía nacuapijinë apo tae pacuenia Felipe pitatsi Espíritu Santo. Bajaraxuacujinae Etiopía nacuapijinë apo taetsi baja Felipe matavëjëa. Itsiata Etiopía nacuapijinë pona baja barëyaya pijanacuayabelia. ⁴⁰ Felipe Espíritu Santo caliatsi Azoto tomarabelia. Felipe nexata daxita tomaranëjava tsipaebanajetaruca pexanialivaisi, Jesús pelivaisi. Matapania Felipe itsa patajopa Cesarea tomarata, caejavata ponapona.

9

Pacuenia Saulo jumecovënëta Jesús yabara pelivaisi (Hch 22.6-16; 26.12-18)

¹ Saulo cajena Jerusalén tomarata apo copatsi petaicaponaejava daxita pamona Jesús pelivaisi jumecovënëta pebeyejebiaexanaenexa. Bajaraxuata Saulo pona daxita sacerdotevi pepo penamatacaitorobinëjavabelia. ² Nexata Saulo sacerdotevi pepo penamatacaitorobinëjavabelia jumaitsi:

—Netsicobeyaquinare cuyalatobaxutonë tacaponaenexa Damasco tomarabelia. Damasco tomaratalia judíovi penacaetuatabiabibonë pevetsivi tarajutsinexa. Nexata bajarapamona itsa tane neyaquinaebaxutonë, tanetocopatsinexa daxita Jesús pelivaisi pejumecovënëtsivi tataicaenexa. Nexata itsa taicajë pebijivi, petiriavi ata, tacapatsinexa mapatomaraberenaje penaneconitsivi pejebabiabibota tajebinexa, jai Saulo.

Nexata sacerdotevi pepo penamatacaitorobinë jejai. Nexata cuyalatobaxutonë tsi-cobeyaquinatsi Saulo pecaponaenexa Damasco tomarabelia. ³ Bajaraxuacujinae Saulo jane baja pona Damasco tomarabelia. Nexata ajena Saulo imoxoyotanajetaruca Damascotomara, jemata Saulo penajetarucaejavata namutua matatoyorotsia naitayotatsi athëbëvetsica. ⁴ Nexata Saulo irataeya bocajunua irata. Jumetaenuca athëbëvetsica pejumaitsijava Jesús. Jumaitsi mapacueniaje:

—Saulo, Saulo, ¿detsa xuajitsia tajajivi netobejiobiaexanaponame? jai Jesús.

⁵ Nexata Saulo jumaitsi:

—Tajatuxanenë, ¿detsa ponëmë? jai.

Nexata icatsia athëbëvetsica Jesús jumaitsi Saulojavabelia:

—Xanë raja Jesúsne. Tajajivi netobejiobiaexanaponame. ¿Detsa xuajitsia apo tajit-sipaecuenia exanaponame? Xamë nijacuata najamatabëcuenebijanaponame, jai Jesús athëbëvetsica.

⁶ Saulo nexata neconecojai pecajunavi. Nexata jumaitsi:

—Tajatuxanenë, ¿detsa xua nexata jitsipame taexanaenexa? jai.

Nexata Jesús jumaitsi:

—Nonotapunare baja. Ponaename baja Damasco tomarabelia. Bajarajotalia catsipaebiana pacuenia exanaejitsiamë, jai Jesús.

⁷ Nexata papebijivi Saulo yajavanajetaruca, najunaviacanubena. Nexata moya nubena. Tsipaji jumetane pajume athëbëvetsica jumaitsi Saulojavabelia. Bajarapajume jumetae ata, itsiata bajarapamonae apo tae jivitonë. ⁸ Nexata Saulo, irata pebocaenëmi, nonotapuna. Naëcobaruta picani. Itsiata apo naëcotsixanepanae. Tsipaji itaxutomeravibatsi. Nexata papebijivi Saulo yajavanajetaruca, bajarapapebijivi saya Saulo comacaponaliatsi Damasco tomarabelia. ⁹ Nexata Saulo natsivajënaetaenejeva, Damasco tomarata ponapona acueyabi pamatacabibeje. Apo xae pexaejava. Apo apaenua mera.

¹⁰ Damasco tomarata ponapona Ananías, Dioso pejumecovënëtsinë. Nexata Jesús bemajitsinaebocuenia tsitanaitajëta Ananíasjavabelia. Nexata Jesús junataxuaba.

—¡Ananías! jai.

Nexata Ananías jumaitsi Jesúsjavabelia:

—Tajatuxanenë, canamuxunaevetatsi rabaja, jai Ananías.

¹¹ Nexata Jesús bajarajota jumaitsi Ananíasjavabelia:

—Nonotapunare. Ponaename pacallejavabelia jivi vënëruba Peroviacalle. Bajarajotalia Judas pijabota vënëyanijobianame Saulovënëne, Tarso tomarapijinë. Bajaraponë Saulo maparucaeje xanëjavaberena navajëqueca. ¹² Bajaraponë Saulo bemajitsinaebocuenia tsitajëtajë pacuenia exanaejitsiamë bajaraponëjavabelia. Nexata Saulo bemajitsinaebota catane pacuenia nejonecujinaelia bajaraponë tsmatanacobebuatsijitsiamë petaenexa icatsia xaniavaetsia, jai Jesús Ananíasjavabelia.

¹³ Nexata Ananías itsa jumetane bajarapacuenia Jesús pejumaitsijava, nexata Ananías jumaitsi Jesúsjavabelia:

—Tajatuxanenë, anijatonë vënëlivaisitaniji pacuenia bajaraponë Saulo exanaponapona. Vënëlivaisitaniji bajaraponë pebejiobiaexanaponaejava Jerusalén tomarata daxita pecajumecovënëtsivi. ¹⁴ Maberena ataje icatsia itorobatsi sacerdotevi penamat-acaitorobinë petotaicaenexa daxita pamonaecajumecovënëtsivi jinavanapa mapatomarataje, jai Ananías Jesúsjavabelia.

¹⁵ Nexata Jesús jumaitsi Ananíasjavabelia:

—Ponare baja. Tsipaji bajaraponë Saulo itapetajë baja tanelivaisipaebinexa it-sanacuanëpijivijavabelia, tanelivaisipaebinexanua bajarapanacuanë pevetsivijavabelia ata, tanelivaisipaebinexanua Israel nacuapijivijavabelia. ¹⁶ Xanë Saulo tsitajëtsianajë pacuenia itsamatacabi Saulo itsamonae bejiobiaexanaejitsiatsi. Bajaraponë bitso bejiobiaexanaenatsi talivaisi yabara, jai Jesús Ananíasjavabelia bemajitsinaebocuenia petsitanaitajëtsijavata.

¹⁷ Bajaraxuacujinae Ananías jane baja lia. Joneya pabota Saulo ponapona. Ananías nexata nacobebuata Saulo pematabocotojumavereca. Ananías jumaitsi Saulojavabelia:

—Tajabananë Saulo, pepo petuxanenë raja Jesús, ponë catsitanaitajëta namutua nenajetarucaejavata, bajaraponë nitoroba. Bajaraponë nitoroba tacatsimatanacobe-buatsinexa pecavecuajibinexa baja pecaitaxutomeravibijava icatsia baja netaenexa xaniavaetsia. Nitorobanua tacatsimatanacobebuatsinexa pecatsijamatabëvënëcaenexa Espiritu Santo, jai Ananías Saulojavabelia.

¹⁸ Bajarapacuenia Ananías pejumaitsijavata Saulojavabelia, Saulo veitaxutoothopatsi xua itaxutocaranatatsi, bedujuaitseboco. Nexata jane baja icatsia Saulo

xaniavaetsia tane. Saulo nexata nonotapuna. Bajaraxuacujinae bautisabatsi baja. ¹⁹ Bajaraxuacujinae pexaejava baja xane. Nexata baja icatsia Saulo aperabësaëreca. Saulo nexata Damasco tomarata caematacabibeje naponapona Dioso pejumecovënëtsivita.

Pacuenia Saulo paeba Jesús pelivaisi Damasco tomarata yabara pelivaisi

²⁰ Saulo pejumecovënëtsicujinae Jesús Dioso pexënatocuene, bepijiayo Saulo taxuxuaba jivi petsipaebijava Jesús pelivaisi judíovi penacaetuatabibonëjava. Saulo jivi itsa tsipaebapona Jesús pelivaisi, jumai tsaponae.

—Pepacuene raja Dioso pexënato Jesús, jai tsaponae Saulo.

²¹ Nexata daxita pamonaе jumetane Saulo petsipaebilivaisi, jamatabëcuenenabenajaca. Najumaitsi bajarapamonae Saulo yabara:

—Mara ponëje bejiobiaexanapona Jerusalén tomaratalia daxita pamonaе jumecovënëta Jesús pelivaisi. Icatsia picani pata mapatomaraberenaje petaicaenexa daxita pamonaе jumecovënëta Jesús pelivaisi. Nexata itsa taica, pecaponaenexa picani Jerusalén tomarabelia, sacerdotevi penamatacaitorobivijavabelia, najai bajarapamonae Saulo yabara.

²² Itsiata Saulo ajumejunavijibia bitso asaëyata tsipaebapona Jesús pelivaisi. Nexata Saulo xaniavaetsia jivi yapëtaeyaexana xaniajai Jesús Dioso pitorobinëtsitsica jivi pecapanepaenexa. Nexata judíovi Damasco tomarata penaevi moya. Apo yapëtae pacuenia jumecanaviatsijitsiatsi Saulo.

Pacuenia Saulo vecuapanepa judíovi yabara pelivaisi

²³ Saulo Damasco tomarata petaxuxuabicujinae Jesús pelivaisi jivi petsipaebaponaejava, bexëjavabelia judíovi sivanajamatabëcueneyanabatsi pebeyaxuabinexatsi Saulo. ²⁴ Nexata caematacabi canacujitsia, caemeravi canacujitsia ata, Saulo judíovi vajënaeevetabiabatsi pebeyaxuabinexatsi picani. Pabaupaxanetojavalia jivi pitsapabiaba Damasco tomaravelia penaropobivi, bajarapabaupaxaneto muxuneneta Saulo judíovi vajënaeevetabiabatsi pebeyaxuabinexatsi picani. Itsiata Saulo nayalivaisiajumetane judíovi pebeyaxuabiapaebijavatsi. Bajaraxuata Saulo bajarapabaupaxanetojavalia apo pitsapaelia. ²⁵ Damascotomara matatoyorotsia yacaranata piatayaëibopanaxanetota. Bajarapayacaranatsijavaxaneto athëbëabetsia apia, pacuenia pinijinaejavaxaneto apia. Bajarapayacaranatsijavaxaneto ibopananë mataropotsia catsanaeya farata. Nexata Dioso pejumecovënëtsivi, Saulo pepënaponaevitsi, itsa baja meravi, Saulo ecaeyaexanatsi bemapirecuenia pexanaejavaxanetoënëta. Nexata Damasco tomara matatoyorotsia peyacaranatsiibopanaxaneto yenepanata athëbëyo perucaeventanavojojualia, Saulo yacoparecatsi irabereca Damasco tomarapënyabelia. Bajarapacuenia Saulo Damasco tomarata judíovivecua panepa pebeyaxuabiyativatsi.

Pacuenia Saulo Jerusalén tomarata copiapitatsi yabara pelivaisi

²⁶ Saulo itsa patajopa Jerusalén tomarata, Saulo picani jitsipa penaponaponaеjava Jesús pelivaisi pejumecovënëtsivijavata. Itsiata daxita bajarapamonae Saulo cunavatsi. Tsipaji apo jumexaniataetsi Saulo pejumecovënëtsijava Jesús pelivaisi.

²⁷ Itsiata Bernabé barëlia apóstolevijavabelia apóstolevi peyapëtaenexatsi Saulo. Nexata Bernabé tsipaeba apóstolevijavabelia pacuenia Saulo namutua penajetaruaejavata tane Jesús bemajitsinaebota. Pacuenia ata Saulo Jesús barëcuaicuaijatsi, Bernabé tsipaeba apóstolevijavabelia. Pacuenia ata Saulo ajumejunavijibia tsipaebapona Damasco tomarata Jesús pelivaisi, Bernabé tsipaeba apóstolevijavabelia. ²⁸ Nexata baja Saulo ponapona Jerusalén tomarata. Naponapona apóstolevijavata. ²⁹ Saulo tsipaebapona ajumejunavijibia Jesús pelivaisi. Saulo barëcuaicuaijai tsabiabi judíovi, griegojume

penatsipaebivi. Barënajumenotabiaba bajarapamonae. Itsiata baitsi jane bajarapamonae najamatabëxaina pacuenia beyaxuabijitsiatsi Saulo. ³⁰ Jesús pelivaisi pejumecovënëtsivi, jumetane Saulo pebeyaxuabiapaebijavatsi. Nexata Jesús pelivaisi pejumecovënëtsivi, Saulo pënaxuabatsi Cesarea tomarabelia. Bajarajotacujinae Saulo itorobatsi pevajënaeyabelia penajetarucaenexa pepatsinexa Tarso tomarabelia.

³¹ Bajaraxuacujinae nexata daxitajava, itsaxuayo Jesús pelivaisi pejumecovënëtsivi jinavanapa, xaniavaetsia baja jinavanapa. Copabatsi baja pebejiobiaexanabiabijavatsi. Nexata Judea nacuata, Galilea nacuata ata, Samaria nacuata ata, Jesús pelivaisi pejumecovënëtsivi caebitsaëto canacujitsia xaniavaetsia jinavanapa. Nexata daxita jamatabëcuenevitsabapona Jesús pelivaisi pejumecovënëtsijava. Bajarapamonae xaniavaetsia jumecovënëtavanapa Jesús pelivaisi pibisiacuene pexanaeyaniva. Espiritu Santo yavenonaponatsi. Nexata itsamonae ata Jesús pelivaisi apo pejumecovënëtsivimi, ayaibitsaëtoxaneto jumecovënëtapona Jesús pelivaisi.

Pacuenia Jesucristo pejamatabëcueneta Pedro jamatejemayaexana Eneasvënënë yabara pelivaisi

³² Pedro najetaruca daxitatomaranëjava pesivaxainaenexa Dioso pejumecovënëtsivi. Nexata najetaruca Lida tomarajava ata pesivaxainaenexa Lida tomarata pejinavanapaevi, Dioso pejumecovënëtsivi. ³³ Nexata Pedro Lida tomarata taeyabuata Eneasvënënë. Bajaraponë ocho pavaibeje xaina camata pebocaecujinae. Tsipaji tabusipacuenabatsi. ³⁴ Pedro nexata jumaitsi bajaraponëjavabelia:

—Eneas, cajamatejemayaexana rabaja Jesucristo. Nonotapunare. Xanebare nija-cama, jai Pedro.

Nexata Eneas bajarajota nonotapuna. ³⁵ Nexata daxita Lida tomarapijivi, Sarón nacuapijivi ata, tanetsi Eneas pejamatejemajava. Bajarapamonae nexata pijaperujujamatatabëcuene pecatsitecaejavami, copaba baja. Najamatabëcuenecopaba baja Jesucristojavabelia.

Pacuenia Pedro Dorcasvënëva petëpaecujinae icatsia asaëyaexana yabara pelivaisi

³⁶ Jope tomarata ponapona Dioso pejumecovënëtsiva, Tabitavënëva. Bajarapova pevënë griegojumeta Dorcas. Dorcas daxita matababi canacujitsia pexaniacuene toexanabiaba itsamonaejavabelia. Bepejiobivijavabelia rajutabiaba penamatavenonaejavaxi bajarapacuenia peyavenonaenexa. ³⁷ Pamatababi Pedro ponapona Lida tomarata, Dorcas avitane Jope tomarata. Nexata baja Dorcas tēpa Jope tomarata. Peperabëquiatsicujinaetsi petëpaeva buatatsi anijairabeje pexainaebo ënëtuatuajëta. Athëbëyo pairatsia, bajarapaënëtuatuajëtatsia buatatsi. ³⁸ Jopetomara eca imoxoyo Lida tomarave-cua. Dioso pejumecovënëtsivi vënëlivaisitanetsi Pedro peponaponaejava Lida tomarata. Nexata Dioso pejumecovënëtsivi itoroba anijanëbeje pejumaitsinexabeje Pedrojavabelia: “Pedro, naxanitsia. Liamëre Jope tomarabelia,” pejainexabeje Pedrojavabelia. Nexata bajaraponëbeje Lida tomarabelia sivaliabeje Pedro.

³⁹ Nexata Pedro narena bajaraponëbeje pepëta. Pedro itsa napata pabota petëpaeva boca, tsitajëtatsi itsajota petëpaeva boca. Nexata pamonajivi pevecuatëpaevanëtsi, Dorcapijiva pevënuvitsi, Pedro matatoyorotsia itaxutuanuenubenatsi. Bajarapamonae Pedro tsitajëbatsi Dorcapijiva pejorocaejevanë, penaxatabijavanë, penajumaacabipananë ata, xuanë Dorcapijiva rajuta bajarapamonaejavabelia pamatababi abaxë asaë tsaponapona. ⁴⁰ Nexata paënëtuatuajëta petëpaeva boca, bajarapaënëtuatuajëvecua Pedro daxita bajarapamonae pitsapaeyaexana. Bajarapamonae itsa pitsapalia, Pedro pematabacabëta nuca pevajëtsinexa Diosojavabelia. Nexata Pedro pevajëtsicujinae Diosojavabelia, napënëyorota petëpaevajavabelia. Pedro jumaitsi petëpaevajavabelia:

—Tabita, nonotapunare, jai Pedro.

Nexata petëpaevami naëcota. Itsa tanetsi Pedro, bajarapova namatacota. ⁴¹ Pedro nexata bajarapova cobevaetabiaya nonotapunaeyaexana. Nexata Pedro junarena daxita Dioso pejumecovënëtsivi, pamonajivi pevecuatëpaevanëtsi ata. Nexata tsitajëta bajarapamonaejavabelia petëpaevami icatsia piasaëjava. ⁴² Nexata Dioso pesaëta bajarapapinjicuene Pedro pexanaejava, daxita Jope tomarapijivi yapëtane. Nexata jivibitsaëttoxaneto jumecovënëta Jesús Dioso pexënatocuene. ⁴³ Nexata Pedro bajayajebi ponapona Jope tomarata. Simón bacabocotonë peyacueyacuecaeyaexanaenë, pijabota Pedro naponapona.

10

Pacuenia Pedro barëcuaicuaijai Corneliovënënë yabara pelivaisi

¹ Cesarea tomarata ponapona Corneliovënënë. Apo judíonë. Bajaraponë Italia nacuaverena pepatsivi vajabitsaëvi pijacapitán. ² Cornelio pijabopijivi barëjumecovënëtaaponapona Dioso. Dioso bitso yaiyataeya Cornelio ponapona. Cornelio palata ayaijava rajutabiaba judíovijavabelia peyavenonaenexa judíovi bepejiobivi. Cornelio vajëtabiaba Diosojavabelia. ³ Itsamatacabi caniviyoepatota, bejamatabëcuene a las tres, Cornelio bemajitsinaebota tane Dioso pijaángel pejonejavarena pijaboyarena. Nexata junataxuabatsi.

—¡Cornelio! jaitsi.

⁴ Cornelio nexata naëcota ángeljavabelia. Bitso cujanava. Nexata Cornelio jumaitsi ángeljavabelia:

—¿Detsa xua jitsipame? jai.

Nexata ángel jumaitsi:

—Nevajëtabiabijava Diosojavabelia, nerajutabiabijava ata penamatavenonaecue ne bepejiobivijavabelia, daxita bajaraxua Dioso tsitaxanepanatsi. Dioso nexata apo nacofënëtsi bajaraxua. ⁵ Itorobare nijajivi Jope tomarabelia pecatojunatsinexa Simón, ponë itsavënë vënërubatsi, Pedro. ⁶ Bajaraponë Simón naponapona Jope tomarata, itsanë Simón, bacabocotonë peyacueyacuecaeyaexanaenë, pijabota. Bajaraponë Simón pijabo eca manuamene itapata. Nexata Simón, ponë itsavënë vënërubatsi, Pedro, itsa patsiarena, catsipaebiana pacuenia exanaejitsiamë, jai ángel Corneliojavabelia bema-jitsinaebota.

⁷ Bajarapacuenia ángel bemajitsinaebota pejumaitsicujinae Corneliojavabelia, ángel baja pona. Nexata Cornelio junata anijanëbeje pijabota petonacuenebaponaponaenëtsibeje. Pematatsënëa junata caenë vajabitsaënë. Bajaraponë vajabitsaënë Dioso peyaiyataenë. Bajaraponë Cornelio yavenonabiabatsi. ⁸ Nexata Cornelio copiata tsipaeba bajarapamonaejavabelia daxita pacuenia tsipaebatsi ángel. Bajaraxuacujinae Cornelio itoroba bajarapamona peponaenexa jane baja Jope tomarabelia, Simón pesivaponaenexa. Nexata baja bajarapamona naropoba.

⁹ Meravia pitsijavata, matonejeepatota, bajarapamona Jope tomara imoxoyotanajetarubena. Bajara pijinia paepatota Pedro pabota naponapona, bajarapabo jumabetsia junaya. Bajarapabo pejumanamatajëpaebo. Pedro junaya bajarapabojumatatsia pevajëtsinexa Diosojavabelia. ¹⁰ Pedro bitso pijaani. Jamatabënabane picani. Itsiata pexaejava pexanaevi abaxë apo veretsi pexaejava. Nexata Pedro bemajitsinaebota tane. ¹¹ Pedro tane itaboxo penapatsijava. Nexata athëbëvetsica runaica irabetsica ayaipanaxaneto, besábanapanaxaneto. Bajarapapanaxaneto cuatro pamaëtotabeje namataenetsia upicëta. Bajarapacuenia yamaëya copatsica. ¹² Bajarapapanaxaneto tuatujëta nubena daxitacueneviria. Nubena daxitaviria cuatro pataxutabeje pejinavanapaevi. Bobena daxitaviria pecotobëxëta pejinavanapaevi. Nubena daxitaviria pepunaevi. ¹³ Nexata Pedro jumetane athëbëvetsica pejumaitsijava: “Pedro, nonotapunarë. Beyaxuare daxita mapamonaeye nexaenexa,” pejaijava athëbëvetsica, Pedro jumetane.

¹⁴ Nexata Pedro jumaitsi:

—Jume raja. Caeto ata raja xanë apo xanë bajarapavirianëxi tanejamatabëcuenebijianaeyaniva. Tsipaji Dioso Moiséspijinëta patanetonajumecopatsilivaisi, paneitaveta bajarapavirianëxi pataxaeyaniva, jai Pedro.

¹⁵ Icatsia athëbëvetsica jumaitsi Pedrojavabelia:

—Pavirianëxi caitorobatsi nexaenexa, xaema. Pëtsa jumaitsimë: “Apo xanë raja bajarapavirianëxi tanejamatabëcuenebijianaeyaniva,” jamë pëtsa, jai athëbëvetsica.

¹⁶ Acueyabi xuabeje bajarapacuenia athëbëvetsica napëna jumaitsi Pedrojavabelia. Bajaraxuacujinae bajarapapanaxaneto athëbëabetsia baja icatsia yapëcaevaya. ¹⁷ Pedro nexata najamatabëxainaea jamatabëjumaitsi tsecae:

—¿Detsa meta pitsijamatabëcuene yabara netsitajëta bajaraxua? jamatabëjai tsecae Pedro.

Pedro abaxë ita najamatabëxaineca bajarapacuenia, Cornelio pijajivi pata. Pabota Pedro naponapona, bajarapabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupa muxuneneta nubena bajarapamonae. Bajarapamonae namutuarena yanijobanajetarubena jivijavabelia peyapëtaenexa itsajota eca Simón, bacabocotonë peyacueyacaeyaexanaenë, pijabo. ¹⁸ Nexata bajarapamonae pepatarëcëpaecujinae, baupa pënëvelia ayaijumeta yanijoba. Jumaitsi:

—¿Baja tsa mapabota Simón naponaponaje, ponë vënërubatsi itsavënë, Pedro? jai bajarapamonae.

¹⁹ Pedro abaxë bojumatatsia athëbëyo najamatabëxainecaya bemajitsinaebota petaejava yabara. Nexata Espiritu Santo jumaitsi Pedrojavabelia:

—Taema. Acueyabi ponëbeje casivaparena. ²⁰ Nexata nonotapunare. Runaremeca baja nenaponaenexa bajarapamonae pepëta. Jamatejema saya ajamatabëcuene covëbia naponaname. Tsipaji raja xanë itorobarenajë bajarapamonae, jai Espiritu Santo Pedrojavabelia.

²¹ Nexata baja Pedro runareca Cornelio pijajivijavabereca. Pedro jumaitsi bajarapamonaejavabelia:

—Ponë pajaitame, xanë rabaja maje. ¿Detsa xuajitsia panesivaparemena? jai Pedro.

²² Nexata Cornelio pijajivi jumaitsi Pedrojavabelia:

—Vajabitsaëvi raja pijacapitán Cornelio pejamatabëcuene panajetarubenajë. Bajaronë pexaniajamatabëcuenenë. Dioso bitso pejumecovënëtsinë. Nexata bajaraponë Diosojavabelia vajëcabiaba. Daxita judíovi yaiyatanetsi. Nexata judíovi jumai tsabiabi bajaraponë yabara: “Pexaniajamatabëcuenenë raja Cornelio,” jai tsabiabi. Dioso raja pijangel itorobatsi Cornelio pecajunatsinexa. Bajaraxuata paxanë pacasivaponarenatsi Cornelio pijaboyabelia nenaponaenexa. Cornelio cajumetaejitsia palivaisi tsipaebijitsiamë bajaraponëjavabelia, jai Cornelio pijajivi Pedrojavabelia.

²³ Nexata Pedro copiapita boyaberenapejonenexa bajarapamonae. Bajarapamonae abaxë namajita bajarapabota. Bajayacunua jane baja Pedro napona bajarapamonae pepëta. Pedro pëyanatatsi itsamonae Joje tomarapijivi, Dioso pejumecovënëtsivi. Itsiata abaxë bajarapamatacabi apo patsilia. Epatua abaxë majitaothopa.

²⁴ Nexata meravia pitsijavata Pedrovana jane baja palia Cesarea tomarabelia. Cornelio nexata pijabota yajavanuca pejunatsivi, pijamonaevirivi. Yajavanucanua itsamonae, pamonae bitso Cornelio peyapëtaevitsi. Pedro jane baja barëvajënaeevetanucatsi.

²⁵ Pedro ita patanajetaruca Cornelio pijabopanabota, Cornelio copiapitatsi. Nexata Cornelio pematabacabëta nucajunua Pedro pitabarata. Tsipaji bitso yaiyataeya copiapitsijitsia picani. ²⁶ Nexata Pedro apo jitsipae bajarapacuenia bitso yaiyataeya pecopiapitsijavatsi. Nexata Pedro maxëvaetaba. Nonotapunaeyaexana. Nexata Pedro jumaitsi Corneliojavabelia:

—Nonotapunare. Tsipaji saya pacuenia xamë jamatabëcueneitsimë, bajara saya xanë ata jamatabëcueneitsinë, jai Pedro.

²⁷ Nexata Pedro Cornelio barëcuaijai tsanucaponae panabojavarena. Pedro itsa najoneya Cornelio pijaboyaliala, tane jivibitsaëttoxaneto Cornelio pijabota penacaetuatsivi. ²⁸ Nexata Pedro jumaitsi Cornelio pijabota penacaetuatsivijavabeliala:

—Paxamë baja cajena xaniavaetsia payapëtaneme mapacueneje. Paxanë pajudíovinë patajasalinaivimi apo panetocopatsi patayajavajinavanapaenexa apo judíovi. Biji-aya pataeyabiabajë apo judíovi. Apo panetocopatsinua patajonenexa apo judíovi pijaboyaliala. Itsiata baitsi jane aeconoxaeta baja Dioso nitaveta tacopatsinexa baja bajarapajamatabëcuene. Nexata Dioso netocopata tayajavaponaponenexa apo judíovi ata. Netocopatanua tanajonenexa apo judíovi ata pijaboyaliala. ²⁹ Bajaraxuata itsa nejunata taponenexa maberenaje, narenanë bepíjia ajamatabëcuene covëbia. Nexata jamatabëyapëtaniji xua yabara panejunatame, jai Pedro Cornelio pijabota penacaetuatsivijavabeliala.

³⁰ Nexata bajarajota Cornelio jumaitsi Pedrojavabeliala:

—Xanë imata, caniviyoepatota, bejamatabëcuene a las tres, vajëtajë Diosojavabeliala. Nexata bajarapaepatota jemata taitabarata netsitanaitajëta ángel. Ajena baja cuatro pamatacabibeje xaina bajarapacuene tataecujinae. Ángel penaxatatsijava nivenivena.

³¹ Nexata ángel nejumaitsi: “Cornelio, Dioso rabaja cajumetane nevajëtsijava. Yapëtanë baja nerajutabiabijava bepejiobivijavabeliala penamatavenonaecuene. ³² Nexata nijajivi itorobare Jope tomarajavabeliala pecatojunatsinexa Simón, ponë vënërubatsi itsavënë, Pedro. Bajaraponë naponapona itsanë Simón, bacabocotonë peyacueyacuëcaeyaexanaenë, pijabota. Bajaraponë Simón pijabo eca manuamene itapata. Nexata Simón, ponë itsavënë vënërubatsi, Pedro, itsa patsiarena, catsipaebiana pacuenia exanaejitsiamë,” nejai ángel. ³³ Bajaraxuata bepíjiayo casivaponaeyaexanatsi. Xamë baja nexata pexaniajamatabëcuena netopatame. Bajaraxuata nevajënae daxita paxanë panacaetuatajë Dioso pitabarata. Pacaevetatsi patacajumetaenexa daxita palivaisi Dioso caitoroba patanetsipaebinexamë, jai Cornelio Pedrojavabeliala.

Pacuenia Pedro livaisi tsipaeba Cornelio pijabota yabara pelivaisi

³⁴ Pedro jane baja taxuxuaba livaisi petsipaebijava. Jumaitsi:

—Matapania rajane baja yapëtaniji. Najëpaeya tsaena Dioso nacajitsipa daxitaviriavitsi. ³⁵ Caenacuapijivi canacujitsia, pamona Dioso yaiyataeyajinavanapa, jumecovënëtsiajinavanapanua pacuenia Dioso itorobatsi, bajarapamonae Dioso jitsipa.

³⁶ Dioso cajena pexanialivaisi, Jesucristo pelivaisi, tonajumecopata Israel nacuapijivijavabeliala. Nexata bajarapalivaisi tsipaebatsi Israel nacuapijivi pibisiacuene pexanae neconivecua Jesucristo pejamatabëcueneta pecapanepaenexatsi Dioso. Jesucristo raja daxitajivi pijatuxanenë. ³⁷ Payapëtaneme rabaja mapacueneje. Juanpijinë jivibautisabinëmi jivi livaisi petsipaebanajetarucaecujinae, pebautisabaponaecujinaenua, Jesús cotocaevi tsipaebanajetaruca Galilea nacujava, Judea nacujava ata. ³⁸ Payapëtaneme rabaja mapacueneje. Jesús, Nazaret tomarapijinë, Dioso rajuta Espíritu Santo. Nexata Espíritu Santo pejamatabëcueneta Jesús caëjëpatsi daxitacuene pexanaenexa. Nexata Jesús jamatejemayaexanapona daxita pamona dovathi pejamatabëcueneta avitane. Bajarapacuena Jesús exanapona tsipaji Dioso yajavaponaponatsi. ³⁹ Paxanë baja cajena pataniji daxita xua Jesús exanapona Judea nacuata, Jerusalén tomarata ata. Itsamonae beyaxuabatsi Jesús. Cobematabiabarutatsi cruzajavabeliala. ⁴⁰ Itsiata baitsi jane Jesús pemëthëtsicujinaetsi, acueyabi matakabita, Dioso icatsia asaëyaexanatsi. Dioso Jesús caëjëpaeyaexanatsi patanetsitanaitajëtabiabinexa paxanëjavaberena. ⁴¹ Itsiata Jesús apo tsitanaitajëtsi daxitajivijavabeliala. Èpaxanëjavaberena saya panetsitanaitajëtabiaba. Tajëveliala baja cajena Dioso paneitapeta patataevinexa Jesús petëpaecujinae icatsia itsa

asaë. Bajaraxuata Jesús petëpaecujinae icatsia itsa asaë, panetsitanaitajëtabiaba. Nexata panebarë nabane. Panebarë matavëjëaapanua. ⁴² Nexata Jesús paneitoroba patatsipae baponaenexa daxitajivijavabelia pexanialivaisi, Jesús pelivaisi. Paneitorobanua patatsipae baponaenexa Dioso pejamatabëcueneta itsamatacabi Jesús penaneconitsiaexanae javanexa daxita pijaneconi pexainaevi. Itsamatacabi Jesús naneconitsiaexanaena piasaëvi, petëpaevimi ata. ⁴³ Athëbëvetsica Jesús pepatsivajënaetsica, bajayata jinavanapa Diosojumepaebivimi profetavi. Nexata profetavimi tajëvelia vajunupaebapona Jesús pejamatabëcueneta Dioso pevecuaajibiaexanaejavanexa pibisiacuene pexanaeneconi, pajiviyo jumecovënëta Jesús pelivaisi, jai Pedro Cornelio pijabota penacaetuatsivijavabelia.

Pacuenia Espiritu Santo tsijamatabëjunuatsi apo judíovi ata yabara pelivaisi

⁴⁴ Pedro abaxë livaisi petsipaebanucaejavata Corneliobanajavabelia, Espiritu Santo tsijamatabëjunuatsi daxita pamonaë jumetaeyena Pedro petsipaebilivaisi. ⁴⁵ Nexata judíovi Dioso pejumecovënëtsivi, Pedro peyajavapatsivi, itsa tane bajarapacue, jamatabëcuenenabenajacanubena. Jamatabëcuenenabenajaca tsipaji apo judíovi ata Espiritu Santo tsijamatabëjunuatsi. ⁴⁶ Nexata Pedro peyajavapatsivi yapëtane Espiritu Santo petsijamatabëjonejavatsi Corneliobana. Tsipaji Corneliobana cuaicuaijai itsaviriajumenëta, apo penatsipaebijumenëmi. Corneliobana jumai tsaponae Diosojavabelia:

—Diosomë, bitso ayaijamatabëcuenenëmë, jai tsaponae.

⁴⁷ Bajaraxuata Pedro jumaitsi peyajavapatsivijavabelia:

—Pacuenia vaxaitsi Dioso nacarajuta Espiritu Santo, bajara pijinia pacuenia mapamonaë ataje Dioso rajutatsi Espiritu Santo. Bajaraxuata itsajivi ata acuenebi pejumaitsi java bajarapamonaë yabara: “Pëtsa mapamonaëje pabautisabame merata,” pejaijava, jai Pedro.

⁴⁸ Nexata Jesucristo pevënëta Pedro bautisaba Corneliobana. Pedro pebautisabicujinae Corneliobana, asivatsi abaxë Pedro penaponaponaenexa bajarajota caematacabibeje.

11

Pacuenia Pedro navajunupaeba Dioso pejumecovënëtsivijavabelia Jerusalén tomarata yabara pelivaisi

¹ Apóstolevi vënëlivaisitane apo judíovi ata Corneliobana pejumecovënëtsijava Jesús pelivaisi. Judea nacuata pejinavanapaevi ata, pamonaë jumecovënëta Jesús pelivaisi, vënëlivaisitane apo judíovi ata Corneliobana pejumecovënëtsijava Jesús pelivaisi. ² Nexata pamatacabi Pedro pata Jerusalén tomarata, judíovi, pamonaë jumecovënëta Jesús pelivaisi, jumaitsi Pedrojavabelia:

³ —¿Detsa xuajitsia Cesarea tomarata naponaponame apo judíovi pijabota? ¿Detsa xuajitsia nanabaneme apo judíovita? jai judíovi Pedrojavabelia.

⁴ Nexata Pedro tsipaeba judíovijavabelia pacuenia taxuxuaba bajarapacue yabara. Pedro jumaitsi judíovijavabelia:

⁵ —Pamatacabi naponaponajë Jope tomarata Simón, bacabocotonë peyacueyacuëcaeyaexanaenë, pijabota, vajëtajë Diosojavabelia. Nexata Diosojavabelia tavajëtsijavata bemajitsinaebota taniji athëbëvetsica perunaejavatsica ayaipanaxaneto, besábanapanaxaneto. Bajarapapanaxaneto cuatro pamaëtotabeje namataenetsia upicëta. Nexata bajarapapanaxaneto xanëjavabetsica yamaëya copatsica. ⁶ Itsa naitaxutobabatsia naëcotajë xaniavaetsia tataenexa xua yajavanajetaruca bajarapapanaxaneto tuatuajëta, nexata taniji cuatro pataxutabeje pejinavanapaevi. Taniji unupijivinua, pianaepanaevi. Taniji pecotobëxëta pejinavanapaevinua. Taniji pepunaevinua. ⁷ Nexata jumetaniji athëbëvetsica tanejumaitsijava: “Pedro,

nonotapunare. Beyaxuare daxita mapamonaeje nexaenexa,” nejai. ⁸ Nexata jumaitsinë: “Jume raja. Caeto ata raja xanë apo xaenë bajarapavirianëxi tanejamatabëcuenebijianaeyaniva. Tspiji Dioso Moiséspijinëta patanetonajumecopatsilivaisi, paneitaveta bajarapavirianëxi pataxaeyaniva,” janë. ⁹ Nexata athëbëvetsica icatsia nejumaitsi: “Pavirianëxi caitorobatsi nexaenexa, xaema. Pëtsa jumaitsimë: ‘Apo xaenë raja bajarapavirianëxi tanejamatabëcuenebijianaeyaniva,’ jamë pëtsa,” nejai athëbëvetsica. ¹⁰ Acueyabi xuabeje bajarapacuenia athëbëvetsica napëna nejumaitsi. Bajaraxuacujinae bajarapapanaxaneto daxita bajarapamonae athëbëabetsia baja icatsia yapëcaevaya. ¹¹ Bajarapaepatota jane baja acueyabi ponëbeje nesivapata pabota naponaponajë. Bajarapamonae itorobatsi Cesarea tomaraverena. ¹² Nexata Espíritu Santo nitoroba bajarapamonae pepëta ajamatabëcueneconvëbia tanaponae nexa Cesarea tomarabelia. Mapamonaeje vajamonae, seis ponëbeje Dioso pejumecovënëtsivi, nepëyanata Cesarea tomarabelia. Nexata panajoneyajë Cornelio, vajabitsaëvi pijacapitán, pijaboyalía. ¹³ Nexata Cornelio panetsipaeba pijabota petsitanaitajëtsijavatsi ángel. Ángel pina jumaitsi Corneliojavabelia: “Itorobare nijajivi Jope tomarabelia pecatojunatsinexa Simón, ponë vënërubatsi itsavënë, Pedro. ¹⁴ Bajaraponë itsa patsiarena, catsipaebiana pacuenia exanaejitsiamë Dioso pecavecuajibiaexanaenexa daxita pibisiacuene nexanaeconimi, daxita nijabopijivi yajava,” jai pina ángel Corneliojavabelia. ¹⁵ Nexata jane baja itsa taxuxuabajë livaisi tatsipaebijava Corneliojavabelia, Espíritu Santo tsijamatabëpatsicatsi Corneliojavabelia. Pacuenia vaxaitsi copiaya nacatsijamatabëpatsica Espíritu Santo, bajara pijinia pacuenia bajarapamonae ata tsijamatabëpatsicatsi Espíritu Santo. ¹⁶ Nexata najamatabënapitajë Jesús patanejumaitsi sija mapacueniaje: “Juanpijinë raja jivi bautisabanajetaruca ëmerata. Itsiata baitsi jane caematacabibejecujinae paxamë Dioso pacatsijamatabëjoneyaexanaena Espíritu Santo,” patanejai sija Jesús, najamatabënapitajë. ¹⁷ Xaniajai baja cajena. Dioso rajutapona Espíritu Santo apo judíovi ata pacuenia vaxaitsi nacarajuta Espíritu Santo vajajumecovënëtsixae vajatuxanenë Jesucristo. Nexata acuenebi tacaranatsijava Dioso perajutsijava Espíritu Santo apo judíovi ata, jai Pedro judíovijavabelia, Jesús pelivaisi pejumecovënëtsivijavabelia.

¹⁸ Nexata judíovi itsa jumetane bajarapacuenia Pedro pejumaitsi sija, moya baja. Nexata judíovi jamatabëcuenebarëya Diosojavabelia. Nexata Dioso yabara jumaitsi:

—Xaniajai rabaja. Dioso bajarapacuenia exana apo judíovi ata matacabi apo pevereveceajava pexainaenexa, itsa copaba pibisiacuene pexanabiabijava penajamatabëcuenepeñëyorotsinexa Diosojavabelia, jai judíovi.

Pacuenia Dioso pejumecovënëtsivi Antioquía tomarata jinavanapa yabara pelivaisi

¹⁹ Pamatacabi Estebanpijinë beyaxuabatsi, Dioso pejumecovënëtanapaevi Jerusalén tomarata rëcëpeca daxitanacuanëjava. Bajarapacuenia rëcëpeca tspiji bitso bejiobiaexanaponatsi. Jesús pelivaisi pejumecovënëtsixae, itoyatsi. Itsamonae tajëbelia rëcëpeca Fenicia tomarabelia. Itsamonae rëcëpeca Chipre tunaetota peecaetomarabelia. Itsamonae rëcëpeca Antioquía tomarajavabelia. Nexata bajarapamonae Jesús pelivaisi tsipaebapona bajarapatamaranëjava ëjudíovijavabelia. Itsaviriavijavabelia apo tsipaebapona. ²⁰ Itsamonae Jesús pelivaisi pejumecovënëtsivi, Chipre tunaetota peecaetomarapijivi, Cirene tomarapijivi ata, pona Antioquía tomarabelia. Bajarapamonae pijinia Antioquía tomarata apo judíovijavabelia tsipaebapona pexanialivaisi, Jesús pelivaisi. ²¹ Pamona apo judíovijavabelia tsipaeba Jesús pelivaisi, Dioso yavenonatsi. Nexata apo judíovi ayaibitsaëtoxaneto jumecovënëta Jesús pelivaisi. Najamatabëcuenepeñëyorota Diosojavabelia pibisiacuene pexanabiabijavavecu.

²² Jerusalén tomarata pejinavanapaevi, Jesús pelivaisi pejumecovënëtsivi, vënëlivaisitane apo judíovi ata Antioquía tomarapijivi Jesús pelivaisi pejumecovënëtsijava. Nexata bajarapamonae Bernabé itorobaliatsi Antioquía tomarabelia petaenexa

apo judíovi ata Jesús pelivaisi pejumecovënëtsijava. ²³ Nexata Bernabé ita pata Antioquía tomarabelia, tane apo judíovi ata Dioso peyavenonaejavatsi. Nexata Bernabé sivajamatabëcuenebarëya apo judíovi ata. Nexata Bernabé muxujioba apo judíovi ata daxita bajarapamonae pejamatabëëthëtovetsina ajamatabëcuenesaëya peyajavajinavanapaenexa Dioso. ²⁴ Bernabé bitso pexaniajamatabëcuenenë. Jamatabëcuenevënëca Espíritu Santo. Nexata exanabiaba Espíritu Santo pitorobicueniatsi. Dioso bitso pejumecovënëtsinë Bernabé. Bajaraxuata nexata jivibitsaëtoxaneto jumecovënëta Dioso.

²⁵ Bajaraxuacujinae Bernabé baja pona Tarso tomarabelia pejaitsinexa Saulo. Nexata baja Bernabé ita caxitajaraba Saulo, barërena Saulo Antioquía tomaraberena.

²⁶ Nexata Antioquía tomarata caevai naponaponabeje Dioso pejumecovënëtsivijavata. Jivi ayaiBITSaëtoxaneto livaisi tsipaebabiababeje. Antioquía tomarata daxita pamona Jesús pelivaisi jumecovënëtavanapa, bajarapamonae pijatomarapijivi pepo copiaya jane baja vënërubatsi Cristianovi.

²⁷ Pamatacabi abaxë Bernabébeje Saulobeje ponaponabeje Antioquía tomarata, Diosojumepaebivi profetavi, Jerusalén tomaraverena penaropobivi, pata Antioquía tomarata. ²⁸ Bajarapaprofetavijuvënënë pevënë Agabo. Nexata Agabo nonotapuna Dioso pejumecovënëtsivi penacaetuatsijavata. Nexata Agabo tajëvelia vajunupaeba ayaijaniboxaneto pecopiapatsijavanexa tajëvelia Espíritu Santo peyapëtaeyaexanaeatsi. Agabo jumaitsi mapacueniaje:

—Ayaijaniboxaneto raja copiapatsiana daxitanacuanëjjava, jai tajëvelia Agabo.

Bajarapajaniboxaneto bexëa copiapata Agabo pejumaitsicuenia pamatacabi nacuaevetsinë Claudio evetaponapona Romanonacua. ²⁹ Bajaraxuata cajena janibovajënaeya, Antioquía tomarapijivi daxita Dioso pejumecovënëtsivi najamatabëcuenejëpa peyavenonaenexa Judea nacuapijivi Dioso pejumecovënëtsivi. Nexata Antioquía tomarapijivi, caenë canacujitsia, najamatabëcuenevereta Judea nacuapijivijavabelia perajutsinexa palata pacuenia cuenecaëjëpatsi. ³⁰ Nexata baja Antioquía tomarapijivi ita tocaetuatsivereta, bajarapamonae itorobatsibeje Bernabébeje Saulobeje petocaponaenexabeje bajarapapalata Judea nacuapijivijavabelia, Dioso pejumecovënëtsivi pijaancianovijavabelia. Nexata ancianovi petsicobetsanaenexa bepejiobivijavabelia.

12

Pacuenia Pedro etatsi penaneconitsivi pejebabiabibota yabara pelivaisi

¹ Nacuaevetsinë Herodes bejiobiaexanapona Jesús pelivaisi pejumecovënëtsivi. ² Herodes pijajivi itoroba espadata pebeyaxuabinexatsi Santiago, Juan pematapijinëmi. ³ Herodes ita tane judíovi petsitaxanepanaejavatsi Santiago pebeyaxuabijavatsi, nexata icatsia Herodes itoroba pijajivi Pedro pevaetabinexatsi. Bajarapacuenia Herodes exana fiestamatacabi, pafiestamatacabi judíovi baxane levadurata matajërëabinejeva pexanaepan. ⁴ Pedro pevaetabicujinaetsi, penaneconitsivi pejebabiabibota etatsi. Bajarapabota cuatro pabitsaëtobeje vajabitsaëvi Pedro nacobenaevetabiabatsi. Itsabitsaëto ita pitsapa, juya itsabitsaëto evetabiabatsi. Caebitsaëtota jinavanapa vajabitsaëvi cuatro ponëbeje tsaponae. Nexata picani Herodes najamatabëxaina Pedro penutsinexatsi daxita judíovi pitabarata pascuavënëfiesta pevereverecaecujinae. ⁵ Nexata Pedro eca penaneconitsivi pejebabiabibota. Vajabitsaë xaniavaetsia Pedro yabaupaevetabiabatsi bajarapabovecua Pedro pepitsapaeyaniva. Itsiata baitsi jane daxita Dioso pejumecovënëtsivi, asaëyata Diosojavabelia tovajëtaponatsi Pedro.

Pacuenia Dioso pejamatabëcueneta Pedro capanepatsi penaneconitsivi pejebabiabibovecua yabara pelivaisi

⁶ Pamatacabi picani Herodes Pedro nutsijitsiatsi daxita judíovi pitabarata, bajarapamatacabivajënaeya pameravi, penaneconitsivi pejebabiabibo ënëtuatuajëta Pedro majitanuca anijanëbeje vajabitsaënëbeje, pevetsinëtsibeje, petuatuajëta. Vajabitsaënëbeje Pedro yamaëcabocatsibeje anijacadenamaëtotabeje. Itsanëbeje pijinia yabaupaevetatsi.

⁷ Jemata Dioso pijaángel naitajëta Pedrojavata. Nexata penaneconitsivi pejebabiabibo ënëtuatuajëta naitayota. Pedro pemajitanucaenë ángel yenejayatabatsi Pedro penaëcotsinexa. Ángel jumaitsi Pedrojavabelia:

—Naxanitsiayo nonotapunare, jai ángel.

Nexata Pedro pecobecëtsicadenamaëtotsibeje vecobejoparecatsi baja. ⁸ Nexata icatsia ángel jumaitsi Pedrojavabelia:

—Nijacorrea xaniavaetsia naepacatarërëre. Nataxuxatare baja nijazapato, jai ángel.

Pedro nexata xaniavaetsia naepacatarërëtaxuaba pijacorrea. Nataxuxatataxuaba pijazapato. Nexata icatsia ángel jumaitsi:

—Naxatare nijacamisajumavelia nenaxatatabiabijava. Nepënaponare, jai ángel Pedrojavabelia.

⁹ Pedro nexata naponá ángel pepëta. Itsiata Pedro xaniavaetsia apo najamatabëcueneyapëtae. Nexata Pedro xaniavaetsia apo yapëtae pepacuene ángel pebarëponaejavatsi. Nexata saya Pedro jamatabëjumaitsi:

—Amajitsinaenë meta, jamatabëjai.

¹⁰ Itsiata baitsi jane xenetsiabeje penamataxainae ënëtuatuajëtareca peyabaupaevete-caevajabitsaënëtsi. Icatsia xenetabeje pecotocaevi ënëtuatuajëtatsina peyabaupaevete-caevajabitsaënëtsi. Bajaraxuacujinae pepitsapaenexabeje callejavabelia, nucojopabeje pepo baupaxanetojavata jane baja. Bajarapabaupaxaneto hierrobaupaxaneto. Nexata bajarapabaupaxaneto tonabaupatsibeje pijacuata. Pitsatabaliabeje jane baja callejavabelia. Nexata callejavareca penajetarucaejavatabeje, ángel jemata ajibi tsojopae. ¹¹ Pedro jane baja xaniavaetsia najamatabëcueneyapëtane. Nexata Pedro jamatabëjumaitsi:

—Baja rajane matapania aeconoxae xaniavaetsia najamatabëcueneyapëtaniji. Dioso tsaena itorobica pijaángel tanecapanepaenexa Herodes pecobevecua. Nexata baja judíovi apo netae tsane Herodes pijajivi tanebeyaxuabijava, jamatabëjai Pedro.

¹² Pedro najamatabëxaina pacuenia exanaejitsia. Nexata lia María pijaboyabelia. Bajarapova María, Juan pena, ponë vënërubatsi itsavënë, Marcos. María pijabota ayaibitsaëttoxaneto Dioso pejumecovënëtsivi nacaetuata Diosojavabelia petovajëcaenexatsi Pedro. ¹³ María pijabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupa, Pedro docodocota petobaupatsinexatsi. Nexata bajarapabota penacuenebivayo, Rode, pitsaparena petaenexa ponë baupa docodocotanunuca. ¹⁴ Nexata Rode itsa jumeyapëtane Pedrocuene, nexata abaxë apo tobaupatsi. Rode cujinaelia boyabelia pejamatabëcuenebarëyatsajonexae. Nexata Rode tsipaeba María pijabota penacaetuatsivijavabelia. Jumaitsi:

—¡Pedro rajane baja nucalia baupa pënëverena! jai Rode.

¹⁵ Nexata bajarapamonae jumaitsi:

—¡Camatajemaba raja saya! jai.

Itsiata icatsia Rode jumaitsi:

—¡Xaniajanë raja pepacuene! Pedro raja nucalia baupa pënëverena, jai Rode.

Bajarapamonae nexata jumaitsi:

—Apo Pedro raeta. Pevetsiángeltsi raeta, jai bajarapamonae.

¹⁶ Nexata bajarapamonae pecuaicuaijajavata, Pedro tsiteca baupa docodocotanunuca. Nexata jane baja bajarapamonae tobaupata Pedro pejonenexarena. Bajarapamonae itsa tanetsi Pedro, bajarapamonae jamatabëcuenenajunaviaca. ¹⁷ Nexata

Pedro nacobeyota bajarapamonae pemoyanexa. Pedro tsipaeba pacuenia Dioso pejamatabëcueneta capanepatsi penaneconitsivi pejebabiabibovecua. Pedro jumaitsi:

—Patsipaebianame mapalivaisije Santiagojavabelia. Patsipaebianame itsamonaejavabelia ata, Dioso pejumecovënëtsivijavabelia, jai Pedro.

Bajaraxuacujinae Pedro pitsapalia. Itsajavabelia icatsia pona.

¹⁸ Itsa baja matabi tsina, vajabitsaëvi, pamonaevetabiabatsi pananeconitsivi pejebabiabibota, bitso jamatabëcuenebëjai. Tsipaji bajarapamonae apo yapëtae itsabelia Pedro pona. ¹⁹ Nexata Herodes itoroba bajarapamonae pejaitsinexatsi Pedro. Itsiata bajarapamonae Pedro apo caxitajarabitsi. Nexata picani Herodes xaniavaetsia yanijoba pamonaevetabiabatsi penaneconitsivi pejebabiabibota. Nexata baja bajarapamonae Pedro pevecuapanepaexae, Herodes anaepana. Nexata Herodes itsamonae vajabitsaëvi itoroba bajarapamonae pebeyejebinxatsi Pedro bajarapamonae pevecuapanepaexae. Nexata baja beyejebatsi. Bajaraxuacujinae nacuaevetsinë Herodes Judea nacuaavecua pona. Pona Cesarea tomarabelia peponaponaenexa Cesarea tomarata.

Pacuenia tēpa nacuaevetsinë Herodes yabara pelivaisi

²⁰ Nacuaevetsinë Herodes itsa ponapona Cesarea tomarata, baraanaepana bitso Tiro tomarapijivijavabelia, Sidón tomarapijivijavabelia ata. Nexata Herodes pebaraanaepanaexae, bajara patomarabejepijivijavabelia copatsiaexana pexaejava petocaponabiabijava bajara patomarabejepijivijavabelia. Nexata bajarapatomarabejepijivi sivanajamatabëcueneyanaba xaniavaetsia pebarëcuaicuaijainexa nacuaevetsinë Herodesjavabelia. Tsipaji bajarapatomarabejepijivi jitsipa icatsia pexaejava petocapatabiabinexatsi pijatomarabejjavaberena Herodes pevetsinacuajavaverena. Nacuaevetsinë Herodes pijabo petoevetsinëtsi pevënë Blasto. Nexata Tiro tomarapijivibeje Sidón tomarapijivibeje copiaya cuaicuaijai Blastojavabelia Blasto pexaniajamatabëcuene petoxainaenexa petocuaicuaijainexa Herodesjavabelia. Nexata Blasto jejai. Tocuaicuaijai Herodesjavabelia Herodes icatsia pebarajamatabëxanepanaenexa bajara patomarabejepijivijavabelia. ²¹ Nexata Herodes tocaëjēta pamatacabi patsijitsia bajarapatomarabejepijivi Herodes pijaboyabelia. Nexata pamatacabi Herodes tocaëjēta bajarapamonae pepatsinexa, Herodes naitabëtsia naxatata nacuaevetsinë penaxatatsicuenia. Nexata jane baja bajarapatomarabejepijivi pata pebarëcuaicuaijainexa Herodes. Nexata daxita bajarapamonae pitabarata nacuaevetsinë peecaejavata, Herodes eca. Nexata Herodes xaniavaetsia barëcuaicuaijai bajara patomarabejepijivijavabelia. ²² Nexata bajarapatomarabejepijivi Herodes yabara pinijijumeta yamaxëitojorobiaya jumai tsaponae pebarajamatabëxanepanaenexatsi:

—¡Maponëje nacabarëcuaicuaijaije, apo jivitonë! ¡Diosonë tsaena! jai tsaponae bajarapatomarabejepijivi Herodes yabara.

²³ Bajarapacuenia pejumaitsijava bajarapatomarabejepijivi Herodes apo pejumeitavetsixae, Dioso pijaángel naneconitsiaexanatsi Herodes. Avitaniayaexanatsi. Herodes nexata oro ënëverenetsi. Herodes nexata oro pënëverenijavatsi yatēpa.

²⁴ Nexata Dioso pejumecovënëtsivi, daxitanacuanëjava tsipaebapona Dioso pitorobilivaisi. Nexata Dioso pitorobilivaisi pejumecovënëtsivi ayaibitsaëtoxaneto tsaponae.

²⁵ Itsa baja Bernabébeje Saulobeje palata petocaponaevijavabelia livaisi petsipaebijavabeje najumeveretabeje, naviatabeje baja Jerusalén tomaraverena. Navialiabeje baja Antioquía tomarabelia. Barëliabeje Juan, ponë vënërubatsi itsavënë, Marcos.

13

Pacuenia Bernabébeje Saulobeje junatatsibeje Dioso pitorobilivaisi jivi petsipaebaponaenexabeje daxitanacuanëjava yabara pelivaisi

¹ Antioquía tomarata Dioso pejumecovënëtsivijavata, jinavanapa mapamatabëxëyoje. Itsanë Bernabé. Itsanë Simón, ponë vënërubatsi itsavënë, Negro. Itsanë Lucio. Bajaraponë Cirene tomarapijinë. Itsanë Saulo. Itsanë Manaén. Bajarapamonae cajena profetavi, Dioso pejumecovënëtsivijavabelia livaisi petsipaebabiabivinu. Herodes Galileanacua pevetsinë. Herodesbeje Manaénbeje penajuavitsabinëbeje. ² Itsamatacabi daxita bajarapaprofetavi, Dioso pejumecovënëtsivi yajava, culto pexanaevajënaeya, pexaejava apo xae japasa Diosojavabelia pevajëcaenexa. Nexata bajarajota Espiritu Santo jumaitsi daxita bajarapamonaejavabelia:

—Panetotsare saicaya Bernabébeje Saulobeje. Xua yabara junatajëbeje, bajaraxua jane baja tanetonacuenebinxabeje, jai Espiritu Santo.

³ Nexata jane baja daxita bajarapamonae japasa vajëca Diosojavabelia. Bajaraxuacujinae Bernabébeje Saulobeje bajarapamonae tsimatanacobebuatatsibeje. Tovajëtsibeje Diosojavabelia. Nexata jane baja copatatsibeje peponaenexabeje jivi daxitanacuanëjava petsipaebaponaenexabeje Dioso pitorobilivaisi.

Pacuenia apóstolenëbeje Dioso pitorobilivaisi jivi tsipaebabeje Chipre tunaetoxanetota penaetomaranëjava yabara pelivaisi

⁴ Bernabébeje Saulobeje Espiritu Santo pejamatabëcueneta itorobatsibeje. Nexata baja ponabeje Seleucia tomarabelia. Nexata Seleucia tomarata naropotabeje. Naponabeje velapanata peponaebarcota. Nanicababeje Chipre tunaetoxanetojavabelia. ⁵ Nexata napaliabeje Salamina tomarata. Bajarapatomarata tsipaebaponabeje Dioso pitorobilivaisi judíovi penacaetuatabiabinëjava. Juan napon Bernabébeje Saulobeje pepëta peyavenonabiabinexa. ⁶ Nexata bajarapamonae Chipre tunaetoxaneto matatuverelia. Nexata pata Pafos tomarata. Bajarapatomarata bajarapamonae caxitajaraba judiónë, Barjesúsvënënë. Bajaraponë jivi pejorobinë. Bajaraponë jivi yamaxëitojorobiaya jumai tsabiabi: “Xanë raja tsipaebabiabajë Dioso taneitorobicuenia,” jai tsabiabi. ⁷ Nexata Barjesúsbeje najuaponaponabiababeje Sergio Paulobeje. Sergio Paulo Chipre tunaetoxaneto pevetsinë. Sergio Paulo cajena bitso bepíjia peyapëtaenë palivaisi tsipaebatsi. Nexata Sergio Paulo pijajivi itoroba petojunatsinexatsi Bernabébeje Saulobeje. Tsipaji Sergio Paulo bitso jamatabëjumetane Dioso pitorobilivaisi. ⁸ Itsiata baitsi jane Barjesús, jivi pejorobinë, ponë vënërubatsi itsavënë, Elimas, najamatabëcuene epatajërërëcaeyaexana Sergio Paulo Bernabébeje Saulobeje petsipaebaponaelivaisibeje yabara. Bajarapacuenia Barjesús najamatabëcuene epatajërërëcaeyaexana Sergio Paulo pejumecovënëtsiyaniva Dioso pitorobilivaisi. ⁹ Nexata Saulo, ponë vënërubatsi itsavënë, Pablo, tsijamatabëvënëcatsi Espiritu Santo. Nexata Pablo naëcota asaëyata Barjesúsjavabelia. ¹⁰ Pablo jumaitsi Barjesúsjavabelia:

—¡Xamë jivi neyamaxëitojorobinë, pibisiacuene nexanaenë, dovathi pijajivitonëmë, pexaniajamatabëcuene pexanaejava nitoyanë! Apo jamatabëcopatsimë nenajumetsënëtsijava pejumecovënëtsiyaniva pamona picani jamatabëjumecovënëta Dioso pijapexaniajailivaisi. ¹¹ Dioso raja aeconoxae cananeconitsiaexanaena. Nexata apo natsivajënaetaemë tsane. Matapania anijajuametonë panepaena, icatsia natsivajënaetaename, jai Pablo Barjesúsjavabelia.

Nexata bajarajota Barjesús itaxutomeravibajunuatsi. Bitso itaxutoaitaquiri. Nexata saya Barjesús nacobenajayabaruta itsanë pecobeveatabinexatsi pecomacaponanexatsi pijaboyabelia. ¹² Sergio Paulo itsa tane bajarapacuenë, nexata jumecovënëta Jesús pelivaisi. Sergio Paulo bitso jamatabëcuenenajunaviaca itsa jumetane Jesús pelivaisi Bernabébeje Pablobeje petsipaebijavatabeje.

Pacuenia Pablobeje Bernabébeje ponaponabeje Antioquía tomarata, Pisidia nacuata peecaetomarata, yabara pelivaisi

¹³ Pabloana Chipre tunaetota Jesús pelivaisi petsipaebavanapaecujinae, Pafos tomarata nanaropoba velapanata peponaebarcoxanetota. Nicaba Panfilia nacuayabelia. Nexata Panfilia nacuatalia pata Perge tomarata. Juan baja Perge tomarata itsajamatabëcuene najamatabëxaina. Nexata baja naviateca Jerusalén tomarabelia. ¹⁴ Nexata Pablobeje Bernabébeje icatsia nanaropotabeje Perge tomarata. Nexata icatsia patabeje Antioquía tomarabelia, Pisidia nacuata peecaetomarabelia. Judíovi penacueraevetsimatacabita Pablobeje Bernabébeje najunuabeje judíovi penacaetuatabi-abibota. Bajarajota naecabeje. ¹⁵ Nexata daxita bajarapabota pejonevi, namuxunaeveta Dioso Moiséspijinëta penajumecopatsilivaisi. Namuxunaevetanua Diosojumepaebivimi profetavi bajayata peyaquinaelivaisi ata. Bajaraxuacujinae judíovi penacaetuatabi-abiboto pevetsivi, pijajivitonë itoroba. Nexata bajaraponë jumaitsi Pablobeje Bernabébejejavabelia:

—Tajabananëbeje, itsa payapëtanemebeje itsalivaisiyo panetsipaebinxabeje, aeconoxae patsipaebianamebeje jivi piagamatabëcuenesaënexa Diosojavabelia, jai bajaraponë Pablobeje Bernabébejejavabelia.

¹⁶ Nexata jane baja Pablo nonotapuna. Nacobeyota jivi pemoyanexa. Pablo nexata jumaitsi:

—Tajamonae judíovi, panenamuxunaevere. Tajamonae, paxamë ata apo pa-judíovimë, Dioso panejitsipaevi, abaxë panenamuxunaevere pacuenia jumaitsinëjitsia. ¹⁷ PaDioso aeconoxae judíovitsi vajaDioso, bajarapaDioso bajayata baja cajena itapetatsi vajasalinaivimi pijajivinexa. Nexata Dioso pejamatabëcueneta vajasalinaivimi pexi ayaibitsaëttoxaneto xainapona. Nexata vajasalinaivimi ayaibitsaëttoxaneto tsaponae pamatacabibi jinavanapa Egipto nacuata. Nexata Dioso pesaëta vajasalinaivimi matacaponatsi Egipto nacuaverena. ¹⁸ Vajasalinaivimi Dioso pejitsipaecuenia apo exanabiabi ata, itsiata Dioso cuarenta pavaibeje xaniavaetsia evetatsi petusato nacuata. ¹⁹ Dioso cajena verebiaba siete panacuabejepijivi, Canaánvënë nacuata pejinavanapaevimi. Nexata baja Dioso vajasalinaivimi totsatsi bajarapanacuanëjava juya pejinavanapaenexa. ²⁰ Bajaraxuacujinae Dioso itoroba vajasalinaiviyajuvënënevijuezmanae penaexanaponaenexa, vajasalinaivimi pevetsivinexatsi. Juezmanae nexata penaexanaponaevi, vajasalinaivimi evetavanapatsi cuatrocientos cincuenta pavaibeje. Matapania profeta Samuelpijinë evetatsi vajasalinaivimi, copata baja juezmanae pevetsijavatsi. Tsipaji baja profeta Samuelpijinë pecotocaevijueznë. ²¹ Nexata vajasalinaivimi jumaitsi profeta Samuelpijinëjavabelia: “Pajitsipajë nitorobijava vajajuvënënevijuezmanae penaexanaenexa vajanacayanacuaevetsinënexa,” jai. Nexata profeta Samuelpijinë Dioso pejamatabëcueneta itoroba Saúlpijinë vajasalinaivimi cuarenta pavaibeje peyanacuaevetaponaponaenexatsi. Bajaraponëmi Saúlpijinë, Cispijinë pexënato, vajasalinainëmi Benjamínpijinë pemomoxiyajunënënevijuezmanae. ²² Bajaraxuacujinae Saúlpijinë Dioso copatsiaexanatsi pecopatsinexa baja vajasalinaivimi peyanacuaevetsijavatsi. Nexata juya Dioso itoroba Davidpijinë vajasalinaivimi peyanacuaevetsinexatsi. Dioso jumaitsi Davidpijinë yabara mapacueniaje: “Isaí pexënato, David, jamatabëcueneyapëtaniji. Bajarapitsinë jitsipajë. Bajaraponë David daxita pacuenia jitsipajë, netoexanaena,” jai Dioso Davidpijinë yabara. ²³ Davidpijinë raja pemomoyota naexana Jesús. Dioso cajena itorobica Jesús Israel nacuapijivitsi vajanacapanepaenexa pacuenia Dioso tajëvelia najumecapanepaeya jumaitsi vajasalinaivimijavabelia. ²⁴ Jesús petaxuxuabivajënaeya jivi livaisi petsipaebaponaenexa, copiaya Juanpijinë jivibautisabinëmi tsipaebanajetaruca daxita Israel nacuapijivijava. Jumai tsanajetaruca Juanpijinë: “Pacopabare baja daxita pibisiacuene paneexanabiabijava. Panajamatabëcuenepënëyorore Diosojavabelia. Bajaraxuacujinae pacabautisabianatsi,” jai tsanajetaruca Juanpijinë. ²⁵ Juanpijinë abaxë itsa apo beyaxuabitsi, jumai tsaponae jivijavabelia: “Ponë pacopiaevetavanapame, xanë raja apo bajaraponënë. Xanëcujinae

rajane bajaraponë najetarucaena. Xanë raja saya beveliajamatabëcuenenënë bajaraponëvecua. Nexata bajaraponë beprijavitonënëcuenia ata tataxujonotsinexa pijazapato, vecuaauranë,” jai tsaponae Juanpijinë Jesús yabara, jai Pablo judíovijavabelia judíovi penacaetuatabiabibota.

²⁶ Icatsia Pablo jumaitsi judíovijavabelia judíovi penacaetuatabiabibota:

—Tajamonae Abrahampijinë papemomoximë, Dioso paneyaiyataevi. Dioso raja nacatoitoroba mapalivaisije vajanacacapanepaenexa Diosojavabelia. ²⁷ Itsiata Jerusalén tomarapijivi apo yapëtae Jesús pecapanepaejavanexatsi. Jerusaléntomara pevetsivi ata apo yapëtae Jesús pecapanepaejavanexatsi. Bajarapamonae apo jumeyapëtaenua pacuenia jumaitsi Jesús yabara bajayata profetavi peyaquinaebaxutota. Penacueraevetsimatacabianë canacujitsia lebabibi ata bajarapabaxuto judíovi penacaetuatabiabibota, itsiata bajarapamonae apo jumeyapëtae. Bajarapamonae itsa neconita Jesús pebeyaxuabinexatsi, nexata judíovi exana pacuenia baja cajena Diosojumepaebivi profetavi tajëvelia vajunupaeba Jesús pexanaejavanexatsi. ²⁸ Judíovi apo caxitajarabi ata Jesús itsacueneneconi pexinaejava, itsiata bajarapamonae vajëta nacuaevetsinë Pilatojavabelia Jesús pebeyaxuabinexatsi. ²⁹ Nexata jane baja Jesús itsa beyaxuabatsi, copiapata jane baja daxita pacuenia Jesús yabara tajëvelia jumaitsi Dioso pejumelivaisibaxutota. Bajaraxuacujinae Jesús petëpaenë pitsicatsi cruzajavavetsica. Bajaraxuacujinae mëthëtatsi. ³⁰ Itsiata baitsi jane Dioso icatsia asaëyaexanatsi Jesús petëpaecujinae. ³¹ Jesús petëpaecujinae Dioso icatsia itsa asaëyaexanatsi, bajayajebi anijatonë tsitanaitajëtabiaba pijajivijavabelia, pamonae yanatatsi pamatacabi Jesús pona Galilea nacujavaverena Jerusalén tomaraberena. Bajarapamonae nexata maparucæje tsipaebapona jivijavabelia Jesús pelivaisi, jai Pablo bajarapamonaejavabelia judíovi penacaetuatabiabibota.

³² Icatsia Pablo jumaitsi bajarapamonaejavabelia judíovi penacaetuatabiabibota:

—Nexata pacatsipaebianatsi pexanialivaisi. Dioso cajena vajasalinaivimijavabelia tajëvelia najumecapanepaeya jumaitsi pacuenia Dioso toexanaejitsia vajasalinaivijavabelia. ³³ Vaxaitsi rabaja cajena bajarapamonaemi pemomoxitsi. Nexata pacuenia Dioso tajëvelia najumecapanepaeya jumaitsi vajasalinaivimijavabelia, nacatocopiapata jane baja. Tsipaji baja Jesús Dioso icatsia asaëyaexanatsi petëpaecujinae pacuenia baja cajena jumaitsi Salmosbaxutota. Dioso pejumaitsijava Jesúsjavabelia, Salmosbaxutota jumaitsi mapacueniaje: “Ajena raja, pamatacabi, canutatsi daxitajivi pitabarata pecayapëtaenexa xanë taxënatocuenemë,” jai cajena Salmosbaxutota Dioso pejumaitsijava Jesúsjavabelia. ³⁴ Dioso baja asaëyaexanatsi Jesús petëpaejavavecua. Jesús baja nexata icatsia apo tēpae tsane itsamatacabijavabelia ata. Bajarapacuenie yabara baja cajena vaxaitsi yapëtanetsi. Tsipaji Dioso pejumelivaisibaxutota tajëvelia jumaitsi mapacueniaje: “Caexanaenatsi pacuenia baja cajena najumecapanepaeya jumaitsinë Davidpijinëjavabelia,” jai Dioso pejumelivaisibaxutota bajayata Dioso pejumaitsijava Jesúsjavabelia. ³⁵ Bajaraxua yabara Jesús pejumaitsijava Diosojavabelia Salmosbaxutota icatsia jumaitsi mapacueniaje: “Nexënatonë apo necopatsimë tsane taperabëtsabanaejavabelia,” jai Salmosbaxutota. ³⁶ Davidpijinë abaxë itsa asaë tsaponaponae, jumecovënëtsiaponapona pacuenia Dioso itorobatsi. Bajaraxuacujinae Davidpijinë tēpa baja. Nexata Davidpijinë mëthëtatsi pamojivimi pemëthëanë muxuneneta. Nexata Davidpijinë mëthëabelia perabëtsabana baja. ³⁷ Itsiata baitsi jane Jesús, ponë Dioso icatsia asaëyaexanatsi, petëpaecujinae bajaraponë apo perabëtsabanae cajena mëthëabelia. ³⁸ Tajamonae, bepayapëtaneme ponë yabara pacatsipaebatsi. Jesús raja pejamatabëcueneta Dioso baja pacavecuaajibiaexana pibisiacuene paneexanaeneconimi. ³⁹ Pajivi Jesús jumecovënëtsiana, bajarapajivi daxita pibisiacuene pexanaeneconi Dioso vecuaajibiaexanaenatsi Jesús pejamatabëcueneta. Pajivi apo jumecovënëtsicanepae ata Dioso Moiséspijinëta penajumecopatsilivaisi, jamatabëjumaitsi:

“Xanë baja jumecovënëtajë Dioso Moiséspijinëta penajumecopatsilivaisi. Nexata pibisiacuene taexanaeneconi Dioso nevecuaajibiaexanaena,” jamatabëjai, itsiata bajarapajivi pibisiacuene pexanaeneconi Dioso apo vecuaajibiaexanaetsi tsane. Tsipaji Dioso Moiséspijinëta penajumecopatsilivaisi itsajivi ata apo jumecovënëtsicapanepe. ⁴⁰ Xania baja tsane. Xaniavaetsia pajinavanapaename papecatocopiapatsiyaniva pacuenia Diosojumepaebivi profetavi peyaquinaebaxutota tajëvelia jumaitsi. Tsipaji raja profetavi peyaquinaebaxutota, tajëvelia jumaitsi mapacueniaje:

⁴¹ Panecapocaponaevi, ¡xania baja pataename! Panajunaviacaename raja. Tsipaji raja panevecuanaxuabianame. Panejinavanapaeepatota xanë, Diosonë, exanaenajë ayaicuene taexanaejavanë. Nexata taexanaejavanë pelivaisi, itsamonae xaniavaetsia pacatsipaebi ata tsane, itsiata apo pajumecovënëtsimë tsane, jai Diosojumepaebivi profetavi peyaquinaebaxutota Dioso penaneconitsiaexanaejavanexa yabara pamona Dioso apo pejumecovënëtsivi, jai Pablo bajarapamonaejavabelia judíovi penacaetuatabiabiabibota.

⁴² Pablobeje baja Bernabébeje pitsapaejitsiabeje judíovi penacaetuatabiabiabibovecua. Nexata bajarajota pamona apo judíovi, junatatsibeje icatsia itsamatacabi judíovi penacueraevetsimatacabita petsipaebinexabeje bajarapalivaisi. ⁴³ Penacaetuatsivi baja naviaba judíovi penacaetuatabiabiabibovecua. Nexata Pablobeje Bernabébeje judíovi penacaetuatabiabiabibovecua itsa pitsapabeje, jivi ayaibitsaëto pënaponatsibeje. Bajaramonaeyajuvënëvi itsamonae judíovi, itsamonae apo judíovi. Pamona apo judíovi, bajarapamona catsiteca judíovicuenia Dioso pejumecovënëtsijava. Nexata Pablobeje Bernabébeje muxujobabeje bajarapamona pevajënaeyabelia ajamatabëcuenesaëya pejumecovënëttavanapaenexa Dioso pitaxutotsoniatæjavatsi.

⁴⁴ Bajara jane xuacujinae icatsia judíovi penacueraevetsimatacabita, bajarapatomarapijivi muxunanacaetuatsibeje ayaibitsaëtoxanetonë Dioso pitorobilivaisi penamuxunaevetsinexatsibeje. ⁴⁵ Nexata judíovi itsa tane bajarapajivibitsaëtoxanetonë Pablobeje Bernabébeje pemuxunanacaetuatsijavatsibeje, judíovi bitso cuenecaëbatsi. Nexata judíovi jumaitsi jivijavabelia pejumecovënëtsiyaniva bajarapalivaisi:

—Pacuenia Pablo pacatsipaeba, apo xaniajai cajena, jai judíovi Pablo petsipaebilivaisi yabara.

Judíovi bitso pibisiacuenia baracuaicuajitsi Pablo. ⁴⁶ Itsiata Pablobeje Bernabébeje ajumejunavijibia tsipaebaponabeje Dioso pitorobilivaisi. Jumaitsideje tsaponae mapacueniaje:

—Copiaya baja picani pacatsipaebatsibeje Dioso pitorobilivaisi paxamë pajudíovimëjavabelia. Itsiata apo pajitsipaemë bajarapalivaisi panejumecovënëtsinexa. Tsipaji apo pajitsipaemë panexainaenexa matacabi apo peverevereaejava. Paxanëbeje baja nexata pacavecuaponatsibeje patatsipaebinexabeje bajarapalivaisi apo judíovijavabelia. ⁴⁷ Bajarapacuenia pacavecuaponatsibeje tsipaji baja pepo petuxanenë bajarapacuenia paneitorobabeje. Dioso cajena pejumelivaisibaxutota tajëvelia jumaitsi mapacueniaje:

Caitorobianatsi nejamatabëcueneitayotsinexa pamona apo judíovi. Baitsi jane tsipaebanajetarucaename tajumelivaisi daxitanacuanëjava, nacuatabujava ata pejinavanapaevi, pecapanepaenexatsi pibisiacuene pexanaeneconivecua, jai Dioso pejumelivaisibaxutota, jai Pablo judíovijavabelia.

⁴⁸ Apo judíovi itsa jumetane bajarapacuenia Pablo pejumaitsijava, nexata apo judíovi jamatabëcuenebarëya. Nexata apo judíovi jumaitsi:

—Dioso cajena pitorobilivaisi pexanialivaisi bitso, jai.

Nexata jane baja apo judíovi ata jumecovënëta Dioso, pamona baja cajena tajëvelia Dioso itapeta matacabi apo peverevereaejava pexainaenexa. ⁴⁹ Nexata jane baja daxita bajarapanacuata pejinavanapaevi jumetane Dioso pitorobilivaisi. ⁵⁰ Itsiata

baitsi jane pajudíovi Pablobeje Bernabébeje cueneitoyatsibeje, muxubijiapenetsiaya barëcuaicuaijai tomaraevetsivijavabelia, petuxanevi pijavajivijavabelia ata. Nexata bajarapamonae anaepana Pablobeje Bernabébejejavabelia. Nexata baja Pablobeje Bernabébeje capitsapatsibeje bajarapanacuavecua. ⁵¹ Nexata Pablobeje Bernabébeje bajarapatomarata nataxuatsapërëvarëbabeje. Bajarapacuenia nataxuatsapërëvarëbabeje bajarapatomarapijivi peyapëtaenexa penaneconitsijava Diosojavabelia, apo pejume-covënëtsixae Dioso pitorobilivaisi. Bajaraxuacujinae Pablobeje Bernabébeje Iconio tomarabelia baja ponabeje. ⁵² Itsiata daxita pamona Dioso pejumecovënëtsivi, Antioquia tomarata pejinavanapaevi, jamatabëcuenebarëya. Espiritu Santonua jamatabëcuenevënëcavanapa. Nexata exanabiaba pacuenia Espiritu Santo itorobatsi.

14

Pacuenia Pablobeje Bernabébeje ponaponabeje Iconio tomarata yabara pelivaisi

¹ Iconio tomarata Pablobeje Bernabébeje judíovi penacaetuatabiabibota najoneyabeje. Bajarajota xaniavaetsia tsipaebabeje Jesús pelivaisi. Nexata jivibitsaëttoxaneto judíovi, apo judíovi ata, jumecovënëta Jesús pelivaisi. ² Itsiata baitsi jane itsamonae judíovi, Dioso apo pejumecovënëtsivi, itoroba apo judíovi pianaepanaenexa Jesús pelivaisi pejumecovënëtsivijavabelia. ³ Bajarapacuenie peyapëtaexaabeje, Pablobeje Bernabébeje bajayajebi ponaponabeje bajarajota. Tsipaebabiababeje ajumejunavijibia Jesús pelivaisi. Tsipaji yapëtanebeje Dioso peyjavaponaponaejavatsibeje. Nexata daxitajivi yapëtaeyaexanaponabeje Dioso pitaxutotsoniatæjavatsi bajarapamonae. Nexata daxita bajarapamonae yapëtane Jesús pelivaisi pexaniajailivaisicuene. Tsipaji bajaraponëbeje ayai cuene pexanaejava Dioso pesaëta exanaponabeje. ⁴ Itsiata bajarapatomarapijivi apo najamatabëcuenejêpae. Itsamonae jitsipa pejumecovënëtsinexa judíovi petsipaebilivaisi. Itsamonae jitsipa pejumecovënëtsinexa apóstolenëbeje petsipaebilivaisi. ⁵ Nexata judíovi, apo judíovinua, tomara pevetsivinua, jamatabëbijatanetsibeje Pablobeje Bernabébeje. Jamatabëtseconatsibejenua ibotonëta. ⁶ Nexata Pablobeje Bernabébeje nayajumetanebeje pacuenia exanaejitsiatsibeje. Nexata vecuanajetabajiravabeje Lистра tomarabelia, Derbe tomarabelia ata. Bajarapatomarabeje ecabeje Licaonia nacuata. Bajarapatomarabeje pepënëya penaetomaraxijava ata najetarucabeje. ⁷ Daxita bajaraxuayo tsipaebanajetarucabeje pexanialivaisi, Jesús pelivaisi.

Pacuenia Pablo ibotonëta tseconatsi Lистра tomarata yabara pelivaisi

⁸ Lистра tomarata naeca petaxucuenabinëtsi. Penaexanaejavaveliacujinae apo ponaponae caeto ata. ⁹ Bajaraponë najumetaeyeca Pablo petsipaebilivaisi. Nexata Pablo naitaxutobabatsiaya naëcota bajaraponëjavabelia. Nexata Pablo jamatabëcuene yapëtane petaxucuenabinëtsi pejamatabëjumaitsijava: “Dioso pepacuene caëjêpatsi tanetaxuxanepanaeyaexanaenexa,” pejamatabëjaijava. ¹⁰ Nexata Pablo pinijijumeta jumaitsi petaxucuenabinëtsijavabelia:

—Nonotapunare. Ponaponare baja, jai Pablo.

Nexata bajaraponë jirevapuna. Ponapona baja. ¹¹ Jivibitsaëttoxanetonë itsa tane Pablo petaxuxanepanaeyaexanaejava petaxucuenabinëmitsi, nexata bajarapamonae pijajumeta, Licaoniajumeta, pinijijumeta jumaitsi mapacueniaje:

—¡Diosonëbeje cajena! ¡Bevaxaitsi jivitonëbejecuenia patsica vaxaitsijavabetsica! jai bajarapamonae.

¹² Bajarapanacuapijivi xaina pijadiosovi. Itsiata apo pepo diosovi. Nexata Bernabé tanetsi beZeusvënëdiosonë. Pablo pijinia tanetsi beHermesvënëdiosonë. Tsipaji Pablo penamatacanajetarucaenë. Nexata jivi barëcuaicuaijai tsabiabi. ¹³ Zeusvënëdiosonë

pijatemplobo eca Listratomara jumaverena, Lистра tomarabelia pejonebaupa imoxoyovecua. Nexata sacerdotenë, Zeusvënëdiosonë pijatemplobota penacuenebabiabinë, capata torobitsaëto Lистра tomarabelia pejonebaupajavaberena. Bajarapatorobitsaëto matabocoitabëtsiaya tsmataruba pematono. Nexata sacerdotenë, Lистра tomarapijivi yajava, tobejitsiatsibeje picani bajarapatorobitsaëto Pablobeje Bernabébeje ofrendacuenia bajarapavi petotajuitsinexatsibeje. Bajarapacuenia picani totajuitsijitsiatsibeje tsipaji bediosonëbeje tanetsibeje. ¹⁴ Nexata Bernabébeje Pablobeje itsa jumetanebeje bajarapacueni petoexanaejavanexatsibeje, apo jitsipaebeje. Nexata penaxatatsijavabeje mëpabëtitinaxuabarecabeje. Tsipaji Dioso apo pejitsipacuenia bajarapamonae toexanaejitsiatsibeje. Nexata cujinaejinaliabeje jivibitsaëtoxanetonë penacaetuanajavabelia. Nexata bajarapajivibitsaëtoxanetonë tuatuajëta nucabeje. Pinijijumeta Pablo jumaitsi:

¹⁵ —¿Detsa xuajitsia bajarapacueni panetoexanaejitsiamë? Paxanëbeje ata raja saya pajivitonënëbeje. Pacuenia paxamë pajamatabëcueneitsimë, bajara saya paxanëbeje ata patajamatabëcueneitsinëbeje. Papatajopajëbeje patacatsipaebinxabeje pexanialivaisi. Panajamatabëcueneipënëyorore bajarapacuenia paneexanabiabijavavecua panejumecovënëtsinexa pepo Dioso apo peyamatacabiavereverecaenë. Dioso raja daxitacuene pexanaenë. Exana mapanacuaje, mapanacuapijicuene yajava. Exana itaboxo ata, itaboxopijicuene yajava. Exana manuamene ata, manuamenepijicuene yajava. ¹⁶ Dioso copata vajavajënaeya daxitanacuapijivi pejinavanapaenexa pijacuata penatotsipacuenia. ¹⁷ Nexata Dioso daxitacuene pexanaejava, nacobecovëtaeyaexanabiaba daxitajivijavabelia. Nexata picani bajarapamonae becanajëta Dioso peponaponaejava. Tsipaji Dioso pexaniacuene toexanabiaba bajarapamonaemijavabelia. Bajara icatsia pacuenia vaxaitsijavaberena ata pexaniacuene Dioso nacatoexana. Ema nactorunaeyaexanabiabica. Nexata vjaubijava nacatonaxaniabiaexanabiaba. Nexata bajarapacuenia vajaxaejava nacarajutabiaba. Nacajamatabëcuenebarëyayaexananua, jai Pablo pamonaejavabelia picani torobitsaëto tobejitsiatsibeje.

¹⁸ Bajarapacuenia Pablo jumaitsi ata, itsiata picani bajarapamonae jamatabëtobiatsibeje torobitsaëto petotajuitsinexatsibeje bajarapavi ofrendacuenia Pablobeje Bernabébejenexa. Itsiata baja belia copatsiaexanabeje.

¹⁹ Nexata judíovi, Dioso apo pejumecovënëtsivi, parena Antioquía tomaraverena, Iconio tomaraverena ata. Bajarapajudíovi Lистра tomarapijivijavabelia najumetsënëtsiaya neconitatsibeje Pablobeje Bernabébeje pebaraanaepanaenexatsibeje. Nexata Lистра tomarapijivi ibotonëta tseconatsi Pablo. Bajaraxuacujinae tomarapënëyabelia robobocaliatsi. Tsipaji baja bepetëpaenë taeyabuatsi. ²⁰ Itsiata baitsi jane Dioso pejumecovënëtsivi Pablo matatoyorotsia itsa taenubenatsi pexuababuatsijavatatsi, nexata Pablo nonotapuna icatsia. Icatsia Pablo caevëa jonena Lистра tomaraberena. Meravia pitsijavata Pablobeje Bernabébeje ponabeje baja Derbe tomarabelia.

²¹ Nexata Derbe tomarata tsipaebaponaponabeje pexanialivaisi, Jesús pelivaisi. Nexata jumecovënëtsibeje jivibitsaëtoxaneto. Bajaraxuacujinae icatsia naviatanajetarucabeje Lистра tomarajava, Iconio tomarajava ata, Antioquía tomarajava ata. ²² Bajarapatomaranëjava Jesús pelivaisi tsipaebanajetarucabeje pejamatabëcuene asaëyaexanaponaebeje Dioso pejumecovënëtsivi. Muxujibaponabeje bajarapamonae pevajënaeyabelia ajamatabëcuensaëya pecatsitecaenexa Dioso pejumecovënëtsijava. Pablobeje Bernabébeje jumai tsaponaebeje Dioso pejumecovënëtsivijavabelia:

—Dovathi pejamatabëcueneta, pinijicuenia nacajamatabëcuenejëtaponaena daxita vajajonevinexa Dioso pijanacuayabetsia, jaiabeje tsaponae Dioso pejumecovënëtsivijavabelia.

²³ Caebitsaëto canacujitsia, Dioso pejumecovënëtsivijava, toitapetaponabejenua ancianovinexa, Dioso pejumecovënëtsivi pevetsivinexa. Nexata itsa pabitsaëtojavata toitapetsijitsiabeje, penacaetuatsivajënaeya apo xaeyabiabibeje pexaejava. Nexata penacaetuatsijavata itsa toitapetabeje, japasa tovajëtabiabeje Diosojavabelia bajarapamonae peyavenonaenexatsi Dioso. Jumai tsabiabibeje Diosojavabelia:

—Diosomë, xaniavaetsia yavenonaename mapaancianovije xaniavaetsia pecatovetsinexa nijajivi, jaiabeje tsabiabi Diosojavabelia.

Pacuenia Pablobeje Bernabébeje naviatabeje Antioquía tomarabelia, Siria nacuata peecaetomarabelia, yabara pelivaisi

²⁴ Pablobeje Bernabébeje Pisidianacua pexenetsicujinaeabeje, patabeje Panfilia nacuayabelia. ²⁵ Nexata Panfilia nacuata, Perge tomarata, Dioso pitorobilivaisi jivi tsipaebabeje. Bajaraxuacujinae icatsia patabeje Atalia tomarata. ²⁶ Nexata Atalia tomarata naropotabeje barcota. Menia jane baja ponabeje. Naviatabeje jane baja Antioquía tomarabelia. Tsipaji baja cajena pamatacabi taxuxuabijitsiabeje Dioso pitorobilivaisi jivi petsipaebanajetarucaenexabeje, naropotabeje Antioquía tomarata. Nexata pamatacabi naropotabeje Antioquía tomarata, penaropotsivajënaeyabeje, Dioso pejumecovënëtsivi tsiatanacobebuatatsibeje Dioso peyavenonaponaeenexatsibeje jivi petsipaebanajetarucaejavatabeje Dioso pitorobilivaisi. Pablobeje Bernabébeje Antioquía tomarata patabeje. Tsipaji baja toveretabeje daxita pacuenia Dioso itorobatsibeje. ²⁷ Itsa baja Antioquía tomarata patabeje, junatabeje penacaetuatsinexa daxita Dioso pejumecovënëtsivi. Nexata bajarapamonaejavabelia tsipaebabeje daxita Dioso peyavenonaponaejavatsibeje. Tsipaebabejenua apo judíovi ata pejumecovënëtsijava Dioso pitorobilivaisi. Tsipaji baja cajena Dioso tocopata apo judíovi ata pejumecovënëtsinexa bajarapalivaisi. ²⁸ Pablobeje Bernabébeje Antioquía tomarata bajayajebi naponaponabeje Dioso pejumecovënëtsivijavata.

15

Pacuenia apóstolevi, ancianovi yajava, nacaetuata Jerusalén tomarata yabara pelivaisi

¹ Pamatacabi Pablobeje Bernabébeje ponaponabeje Antioquía tomarata, judíovi, Judea nacuaverena peponaevi, pata Antioquía tomarata. Nexata bajarapamonae Dioso pejumecovënëtsivijavabelia livaisi tsipaeba. Petsipaebijavata bajarapamonae jamatabëcuenenavëxaniabiaya jumaitsi mapacueniaje:

—Panamatavenoname paxamë ata papecaperabëcaucubinexa pacuenia Dioso Moiséspijinëta najumecopata. Itsa jume, nexata acuenebi tsane papecacapanepaejava Diosojavabelia, jai tsaponae judíovi, pepatsivi Judea nacuaverena.

² Bajarapacuenia pejumaitsaponaexae, nexata Pablobeje Bernabébeje pinijicuenia namataenetsia barënajumenotabeje pajudíovi pata Judea nacuaverena. Nexata Antioquía tomarapijivi Dioso pejumecovënëtsivi, Pablobeje Bernabébeje itapetatsibeje pitorobinexatsibeje Jerusalén tomarabelia. Nexata Pablobeje Bernabébeje yajavaponabeje Dioso pejumecovënëtsiviyajuvënëvi. Itorobatsibeje peyanijobinexabeje peperabëcaucubicuene yabara apóstolevijavabelia, ancianovijavabelia ata, Jerusalén tomarata pejinavanapaevijavabelia.

³ Itorobatsibeje Dioso pejumecovënëtsivi. Nexata Pablobana itsa pona, najetarubena Fenicia nacuajava, Samaria nacuajava ata. Bajaraxuayo Dioso pejumecovënëtsivijavabelia tsipaebapona apo judíovi ata pijaperujujamatabëcuene pecopabijava, pejumecovënëtsinexa Dioso. Nexata daxita Dioso pejumecovënëtsivi jamatabëcuenebarëya itsa jumetane bajarapalivaisi.

⁴ Pablobana itsa pata Jerusalén tomarabelia, Dioso pejumecovënëtsivi, apóstolevinua, ancianovinua, xaniavaetsia copiapitatsi. Nexata Pablobeje Bernabébeje bajarapamonaejavabelia tsipaebabeje daxita Dioso peyavenonaponaejavatsibeje pamatacabi Dioso

pitorobilivaisi jivi tsipaebanajetarucabeje. ⁵ Nexata fariseovi, Dioso pejumecovënëtsivi, nonobapuna. Fariseovi jumaiti mapacueniaje:

—Dioso pejumecovënëtsivi apo judíovi ata, namatavenona peperabëcaucubinexatsi. Namatavenonana bajarapamonae pejumecovënëtsinexa Dioso Moiséspijinëta penajumecopatsilivaisi, jai fariseovi Dioso pejumecovënëtsivi.

⁶ Nexata nacaetuata apóstolevi, ancianovi yajava, apo judíovi ata peperabëcaucubijavatsi yabara penabarëcuaicuaijainexa. ⁷ Bajayajebi baja namataenetsia penabarëcuaicuaijaicujinae, nexata Pedro nonotapuna. Jumaiti:

—Tajamonae, payapëtaneme rabaja mapacuenieje. Xanë baja cajena bajaya Dioso nitapeta, paxamëyajuvënënë, apo judíovijavabelia tatsipaebinexa pexanialivaisi, Jesús pelivaisi. Nexata apo judíovi ata Dioso pecapanepaenexatsi Jesús pelivaisi ita jumecovënëta. ⁸ Dioso cajena daxitajivi pejamatabëcueneyapëtaenë. Yapëtanetsi Dioso aneconijibia petaejava apo judíovi ata. Yapëtanetsi bajarapacuenie tsipaji apo judíovi ata Dioso rajuta Espíritu Santo. Pacuenia vaxaitsi judíovitsi Dioso nacarajuta Espíritu Santo, bajara pijinia pacuenia Dioso rajuta Espíritu Santo apo judíovi ata. ⁹ Pacuenia vaxaitsi judíovitsi Dioso nacajitsipa, bajara pijinia pacuenia Dioso jitsipa apo judíovi ata. Bajaraxuata apo judíovi ata pibisiacuene pexanaeconimi Dioso vecuaajibiaexanatsi Jesús pelivaisi pejumecovënëtsixae. ¹⁰ Pëtsa pajumeaebame Dioso aneconijibia petaejava apo judíovi ata. Pëtsa bajarapamonae paitorobame pejumecovënëtsinexa piayapëbejelivaisi, Dioso Moiséspijinëta penajumecopatsilivaisi. Tsipaji bajarapalivaisi vaxaitsi ata apo nacacajëpae vajajumecovënëtsinexa. Vajasalinaivimi ata apo caëjëpaetsi pejumecovënëtsinexa bajarapalivaisi. ¹¹ Vaxaitsi baja jumecovënëtatsi Jesús pelivaisi. Nexata vajatuxanenë Jesucristo pejamatabëcueneta Dioso vajanacaitaxutotsoniataexae, nacapanepaena pibisiacuene vajaexanaeconivecua. Bajara pijinia pacuenia apo judíovi ata Jesucristo pejamatabëcueneta Dioso capanepaenatsi pibisiacuene pexanaeconivecua, jai Pedro apóstolevijavabelia, ancianovijavabelia ata.

¹² Dioso pitorobilivaisi Bernabébeje Pablobeje apo judíovijava ita tsipaebanajetarucabeje, Dioso pesaëta pinijicuene pexanaejavanë exanaponabeje. Nexata bajaraxua Bernabébeje Pablobeje ita navajunupaebabeje, daxita apóstolevi, ancianovi ata, moya ena. Xaniavaetsia namuxunaevetena. ¹³ Itsa baja Pablobeje Bernabébeje najumeveretabeje petsipaebijavabeje, nexata Santiago jumaiti apóstolevijavabelia, ancianovijavabelia ata:

—Tajamonae, panenamuxunaevere. ¹⁴ Simón Pedro raja nacatsipaeba Dioso aneconijibia petaejava apo judíovi ata pecapanepaenexa pibisiacuene pexanaeconivecua Jesús pelivaisi ita jumecovënëta. ¹⁵ Bajarapacuenia apo judíovi ata aneconijibia Dioso petaejavanexa yabara, bajayata tajëvelia Diosojumepaebivi profetavi peyaquinaelivaisita vajunupaeba baja cajena. Dioso pejumaitisijava apo judíovi yabara Dioso pejumelivaisibaxutota jumaiti mapacueniaje:

¹⁶ “Bajayata abaxë pamatacabi Davidpijinë evetaponapona Israelnacu, xaniavaetsia jivi nejumecovënëtavanapa. Bajara icatsia pacuenia jivi xaniavaetsia tanejumecovënëtavanapaenexa, yavenonaenajë. ¹⁷ Nexata apo judíovi ata, daxita pamonaenajë junatsianajë tajajivinexa, bajarapamonae ata jitsipaena tanejumecovënëtsinexa,” jai bajayata Dioso mapacueniaje. ¹⁸ Dioso baja cajena tajëvelia yapëtaeyaexana daxita mapacuenie yabaraje,

jai profetavi peyaquinaelivaisita, jai Santiago apóstolevijavabelia, ancianovijavabelia ata.

¹⁹ Icatsia Santiago jumaiti apóstolevijavabelia, ancianovijavabelia ata:

—Nexata xanë jamatabëitsinë mapacueniaje. Apo jamatabëitonotsi tsanetsi baja matavëjëa apo judíovi, pamonaenajë baja najamatabëcuenepënëyorota Diosojavabelia. ²⁰ Itsiata baitsi jane caelivaisiyobeje toyaquinaenatsi cuyalatobaxutota vajayapëtaeyaexanaenexa bajarapamonae. Itsamonae xaina pecobeta saya jumapecataeya

pexanaenēanē bepijadiosovi petaenexa. Nexata bajaraxuanējavabelia ofrendacuenia pevi perajutsinexa, tobeyabiaba baca, oveja ata. Toyaquinaenatsi bajarapayajuvēnēvi pexaeyaniva. Toyaquinaenatsinua daxita pebijivi peyapētaenexa, daxita petiriavi ata peyapētaenexa. Papebijivi baja nacojioba, pematayajibiyanivatsi itsavajavabelia pijavavecua. Papebijivi pijinia abaxē apo nacojiobi, pematayajibiyanivatsi petirivajavabelia. Bajara pijinia pacuenia petiriavi ata. Papetiriavi baja nacojioba, pematayajibiyanivatsi itsanējavabelia pamonavecua. Papetiriavi pijinia abaxē apo nacojiobi pematayajibiyanivatsi pebijavabelia. Toyaquinaenatsinua bajarapamonae pexaeyaniva cuibocuetsacaeya pebeyaxuabinē pevi, pexaeyaniva peja ata. Bajarapacuenia toyaquinaenatsi apo judíovi ata Dioso pejumecovēnētsivi peyapētaenexa xua vaxaitsi judíovitsi cjunavatsi. Nexata itsamatacabijavabelia ata apo judíovi pejamatabēcuenebijianaeyaniva judíovijavabelia. ²¹ Tsipaji bajarapalivaisi Dioso Moiséspijinēta penajumecopatsijavaveliacujinae, vajasalinaivimi caetomara canacujitsia itavetabiabatsi bajarapacuenia. Itavetabiabatsi bajarapacuenia penacueraevetsimatacabianē canacujitsia penacaetuatabiabibonējava, jai Santiago apóstolevijavabelia, ancianovijavabelia ata.

²² Nexata daxita apóstolevi, ancianovinua, daxita Dioso pejumecovēnētsivinua, najamatabējēpa penaitapetsinexa bajarapamonaeajuvēnēvi pitorobinexa Antioquía tomarabelia Pablobeje Bernabébeje pepēta. Nexata itapetatsibeje Silasbeje Judasbeje. Judas vērērubatsi itsavēnē, Barsabás. Bajaraponēbeje Dioso pejumecovēnētsivi penamat-acaitorobivi yajuvēnēnēbeje. ²³ Pacuyalatobaxuto bajaraponēbeje tocaponaejitsiabeje Antioquía tomarapijivijavabelia, Siria nacuapijivijavabelia ata, Cilicia nacuapijivijavabelia ata, jumaitsi mapacueniaje:

—Tajamonae, paxanē paapóstolevinē, pacajamatabēnajinaliatsi. Vajamonae ancianovi ata pacajamatabēnajinalia. Pacajamatabēnajinaliatsi daxita apo pajudíovimē, Antioquía tomarata panejinavanapaevi. Paxamē ata Siria nacuata panejinavanapaevi, pacajamatabēnajinaliatsi. Paxamē ata Cilicia nacuata panejinavanapaevi, pacajamatabēnajinaliatsi. ²⁴ Pavēnēlivaisitaniji pacuenia pacajumaitsi paxanēyajuvēnēvi papecasivaxainavilia. Bajarapamonae pina nexata pacanajamatabēcuene epatajērērēcaeyaexanapona. Tsipaji pina bajarapamonae pacajumaitsi: “Panamatavenoname paxamē ata papecaperabēcaucubinexa. Panamatavenonamenua panejumecovēnētsinexa Dioso Moiséspijinēta penajumecopatsilivaisi,” pacajai pina. Pamona pacajumaitsi bajarapacuenia, paxanē cajena apo paitorobinē paxamējavabelia. ²⁵ Nexata paxanē patanacaetuatsijavata, panajamatabēcuenejēpajē pataitapetsinexa ponēbeje paitorobijitsianē paxamējavabelia pecaponaenexabeje patacatoyaquinaelivaisi. Bajaraponēbeje naliabeje Bernabébeje Pablobeje pepēta. ²⁶ Vajabananēbeje, Bernabébeje Pablobeje, bitso vaxaitsi asivatsi. Bajaraponēbeje vajatuxanenē Jesucristo pejumelivaisi yabara itsamonae jamatabēbeyaxuababiabi atatsibeje, itsiata ajamatabēcuenesaēbeje tsaponapona. ²⁷ Nexata bajaraponēbeje pepēta pacatoitorobatsi Judasbeje Silasbeje. Nexata Judasbeje Silasbeje xaniavaetsia pacatsipaebiana pacuene yabara pacatoyaquinatsi cuyalatobaxutota. ²⁸ Itsa panacaetuatajē Espíritu Santo paneyavenona patayapētaenexa peyapēxanepanelivaisi patacatoitorobinexa panejumecovēnētsinexa. Nexata baja apo panamatavenonaemē panejumecovēnētsinexa piayapēbejelivaisi, palivaisi daxita pajudíovinē pajumecovēnētajē. Pacaitorobatsi palivaisi bitso panamatavenoname panejumecovēnētsinexa. ²⁹ Pecobeta saya jumapecataeya pexanaenēanējavabelia ofrendacuenia pevi perajutsinexa itsamonae itsa tobía baca, oveja ata, pētsa paxaneme bajarapayajuvēnēvi. Pētsa paxaneme peja. Pētsa paxaneme cuibocuetsacaeya pebeyaxuabinē pevi. Papebijivi baja nacojioba, pētsa matayajibatsi itsavajavabelia pijavavecua. Papebijivi pijinia abaxē apo nacojiobi, pētsa matayajibatsi

petirivajavabelia. Bajara pijinia pacuenia petiriavi ata. Papetiriavi baja nacojioba, pëtsa matayajibatsi itsanëjavabelia pamonavecua. Papetiriavi pijinia abaxë apo nacojiobi, pëtsa matayajibatsi pebijavabelia. Itsa pajumecovënëtame bajarapalivaisi, nexata xaniavaetsia pajinavanapaename. Bajara saya palivaisiyo pacatoyaquinatsi, jai apóstolevi, ancianovi yajava, apo judíovijavabelia petoyaquinaebaxutota Jerusalén tomaravelia.

³⁰ Nexata jane baja bajarapacuyalatobaxuto petocaponaenexabeje apo judíovijavabelia, Judasbeje Silasbeje itorobatsibeje penaponaenexabeje Pablobeje Bernabébeje pepëta. Nexata baja naponabeje. Bajarapamonae pata Antioquía tomaravelia. Nexata Antioquía tomarapijivi junata daxita Dioso pejumecovënëtsivi penacaetuatsinexa. Nexata penacaetuatsijavata rajutabeje bajarapacuyalatobaxuto.

³¹ Antioquía tomarapijivi itsa leba bajarapacuyalatobaxuto, bajarapamonae bitso jamatabëcuenebarëya. ³² Judasbeje Silasbeje Diosojumepaebinëbeje profetanëbeje. Nexata ayailivaisi tsipaebabeje Antioquía tomarapijivijavabelia. Nexata baja bajarapamonae ajamatabëcuenesaë Diosojavabelia pejumetaexae palivaisi tsipaebabeje Judasbeje Silasbeje bajarapamonaejavabelia. ³³ Bajayajebi baja Antioquía tomarata Judasbeje Silasbeje naponaponabeje. Bajaraxuacujinae Dioso pejumecovënëtsivijavabelia xaniavaetsia napëjiobabeje penaviatsinexabeje baja pitorobivitsijavabelia. ³⁴ Pepuanapëjiobibeje baja, Silasbeje abaxë itsiata icatsia nacopatabeje bajarajota. ³⁵ Pablobeje Bernabébeje ata abaxë ponaponabeje Antioquía tomarata. Dioso pitorobilivaisi tsipaebaponaponabeje. Itsamonae Dioso pejumecovënëtsivi yajavaponaponabeje Dioso pitorobilivaisi penajuatsipaebabiabinexa.

Pacuenia icatsia Pablo cotocaevi panamuto pona jivi icatsia petsipaebinexa Dioso pitorobilivaisi yabara pelivaisi

³⁶ Antioquía tomarata Pablobeje Bernabébeje bajayajebi ponaponabeje. Pablo jumaitsi Bernabéjavabelia:

—Ponatsibeje icatsia vajataenexabeje vajamonae Dioso pejumecovënëtsivi. Daxita tomaranëjava, itsaxuayo baja imata tsipaebanajetarucatsibeje Dioso pitorobilivaisi, bajaraxuayo icatsia najetarucaenatsibeje. Taenajetarucaenatsibeje pacuenia jinavanapa bajarapamonae, jai Pablo Bernabéjavabelia.

³⁷ Bernabé nexata bitso jitsipa pebarëponaenexabeje icatsia Juan, ponë vënërubatsi itsavënë, Marcos. ³⁸ Itsiata baitsi jane Pablo apo jitsipae baja icatsia Marcos pebarëponaenexabeje. Tsipaji imata copiaya panamuto barëponabeje picani, Marcos epatua naviateca Panfilia nacuata. Nexata Marcos xaniavaetsia apo yavenonaeyaveretsi Dioso pitorobilivaisi jivi petsipaebaponaejava. ³⁹ Nexata Pablobeje Bernabébeje apo najamatabëcuenejëpabeje Marcos pebarëponaejavabejenexa yabara. Nexata baja Pablobeje Bernabébeje navecuanatsatabeje. Bernabé jane baja nexata Marcos barëpona. Velapanata peponaebarcota Bernabébeje Marcosbeje naponabeje. Nexata nicababeje Chipretunaeto nacuyavelia. ⁴⁰ Nexata pijinia Pablo itapeta Silas peyanatsinexatsi. Dioso pejumecovënëtsivi tovajëtatsibeje Diosojavabelia peyavenonaponaenexatsibeje penajetarucavejavabeje. ⁴¹ Nexata Pablobeje Silasbeje Siria nacujava, Cilicia nacujava ata, Dioso pitorobilivaisi jivi tsipaebanajetarucabeje. Nexata bajarapanacuanëpijivi Dioso pejumecovënëtsivi, caebitsaëto canacujitsia, Diosojavabelia ajamatabëcuenesaë tsaponae.

16

Pacuenia Timoteo Listra tomarata nanaropota Pablobeje Silasbeje pepëta yabara pelivaisi

¹ Pablobeje Silasbeje patabeje Derbe tomarata. Patabeje Listra tomarata ata. Listra tomarata caxitajarababeje Dioso pejumecovënëtsinë, Timoteo. Timoteo pena judíova,

Dioso pejumecovënëtsiva. Itsiata baitsi jane Timoteo paxapijinë griegonë. ²Daxita Dioso pejumecovënëtsivi, Lистра tomarapijivi, Iconio tomarapijivi ata, Timoteo yabara jumai tsabiabi:

—Timoteo raja xaniavaetsia Dioso jumecovënëtapona, jai tsabiabi.

³Pablo jitsipa Timoteo pebarëponaejava. Nexata Pablo Timoteo pebarëponaevajënae, judíovi pijacuenia perabëcaucutsiaexana. Baitsi boupiperabëcaucutsiaexana. Bajara-pacuenia Pablo perabëcaucutsiaexana pebaraanaepanaeyanivatsi pevëna judíovi. Tsi-paji itsaxuayo barënajetarucæjitsia, judíovi penaperabëcaucubivi jinavanapa. Nex-ata judíovi apo jitsipae peyajavajinavanapaejava apo peperabëcaucutsinëtsi. Nexata Pablo Timoteo perabëcaucutsiaexanaenejeva itsa barënajetarucæjitsipa bajarapamonae-
java, yapëtaejitsipatsi Timoteo, apo peperabëcaucutsijavatsi. Tsi-paji Timoteo paxapijinë griegonë, apo peperabëcaucutsinëtsi. ⁴Pabloana tomaranëjava itsa najetarubena, caetomarapijivi canacujitsia, tsipaebapona Dioso pejumecovënëtsivijavabelia palivaisi toyaquinatsi Jerusalén tomaraverena. Tsipaebanajetarubena caetomarapijivi canacu-jitsia pejumecovënëtsinexa pacuenia apóstolevi, ancianovi ata, itorobatsi Jerusalén tomaraverena. ⁵Bajaraxuata Dioso pejumecovënëtsivi, caebitsaëto canacujitsia, bitso ajamatabëcuenesaë tsaponae Diosojavabelia. Caematacabi canacujitsia Dioso pitorobili-vaisi ayaibitsaëto jumecovënëtapona.

Pacuenia Pablo bemajitsinaebota tane Macedonia nacuapijinë yabara pelivaisi

⁶Espíritu Santo apo tocopatsitsi Pabloana petsipaebinexa Dioso pitorobilivaisi Asiavënë nacuata. Bajaraxuata Pabloana najetarubena Frigia nacuajava, Galacia nacuajava ata. ⁷Pabloana itsa najetarubena Misianacua muxubërëa, jamatabëpata picani Bitinia nacuajava. Itsiata baitsi jane Espíritu Santo apo tocopatsitsi pepatsinexa Bitinia nacuajava. ⁸Nexata Misianacua canacujitsialia roviaalia ponalia. Pata Troas tomarabelia. ⁹Nexata Troas tomarata meravi Pablo bemajitsinaebota taenuta Macedo-nia nacuapijinë. Macedonia nacuapijinë asaëyata jumaitsi Pablojavabelia:

—Naxanitsia. Macedonia nacuayabelia ponare. Paneyavenonaename, jai Macedo-nia nacuapijinë.

¹⁰Pablo bemajitsinaebota petaenutsicujinae Macedonia nacuapijinë, bepíjia paxa-niavaetajë patajavaxi patanicabinexalia Macedonia nacuayabelia. Nexata panaju-maitsinë:

—Xaniajai cajena. Dioso nacaitoroba Macedonia nacuapijivijavabelia vajatsipae-binexa pexanialivaisi, Jesús pelivaisi, panajanë.

Pacuenia Pablobeje Silasbeje ponaponabeje Filipos tomarata yabara pelivaisi

¹¹Troas tomarata panaropobajë. Panaponajë barcota. Roviaalia panayanicabaliajë patapatsinexa Samotratiatunaeto nacuayabelia. Troas tomarata patanaropobicujinae, meravia pitsijavata, panapatajë Neápolis tomarabelia. ¹²Bajaraxuacujinae matatsënëa paponajë Filipos tomarabelia. Filipostomara Macedonia nacuata eca. Filipostom-ara daxita tomaranëvecua ayaitomaraxaneto. Filipos tomarata najinavanapa ayaibit-saëtoxaneto Roma tomaraverena pepatsivi. Bajarapatomarata panajinavanapajë cae-matacabimaxëto. ¹³Nexata abaxë itsa panajinavanapajë Filipos tomarata, judíovi pe-nacueraevetsimatacabita papitsapajë tomarapënëyabelia. Paponajë mene itapayavelia patajaitsinexa itsajota nacaetuatabiaba judíovi pevajëcabiabinexa Diosojavabelia. Nex-ata mene itapaya itsa pajaitanajetarubenajë, petiriavi penacaetuatenaevi mene itapata, patayejebajë. Nexata pajamatabëjumaitsinë:

—Bajara macovë jotaje judíovi nacaetuatabiaba pevajëcabiabinexa Diosojavabelia, pajamatabëjanë.

Nexata bajarajota panaenajë. Nexata bajarajota Dioso pitorobilivaisi patsipaebajë petiriavijavabelia. ¹⁴Bajarapapetiriaviyajuvënëva pevënë Lidia. Bajarapova Tiatira tomarapijiva, penamatamotsipapaëbërë, perajejaipapaëbërë, pecanajetabiabiva. Dioso

bitso pejumecovënëtsiva. Bajarapova panenamuxunaeveta xaniavaetsia. Dioso jamatabëcueneyavenonatsi. Nexata bajarapova jumecovënëta Pablo petsipaebilivaisi. ¹⁵ Bajaraxuacujinae bajarapova, pijabopijivi yajava, itsa bautisabatsi baja, bajarapova panejumaitsi:

—Itsa paxamë panetaneme pepacuene Dioso tajumecovënëtsivacuene, nexata tajabota abaxë panajinavanapaename, panejai bajarapova.

Bitso bajarapova asaëyata panejunata patanajinavanapaenexa pijabota. Nexata panaponajë bajarapova pijaboyabelia bajarapova pijabota patanajinavanapaenexa.

¹⁶ Paponabiabajë mene itapayabelia Dioso pitorobilivaisi patatsipaebabiabinexa itsajota judíovi nacaetuanabiaba. Belia itsanamutota panemataenena petiriva, dovathi peyajavaponaponaeva. Bajarapadovathi pejamatabëcueneta tajëvelia petiriva yapëtaeyabiaba itsacuenejavaxi yabara. Bajarapova pijamonae pecanajetsivatsi pijatuxanevi amoneya petonacuenebabiabinexa. Nexata bajarapova pijumata pijatuxanevi ayajava palata pitabiaba. Tsipaji itsajivi itsa yanijoba bajarapovajavabelia itsacuenejavayo yabara, bajarapova tajëvelia xaniavaetsia tsipaebabiaba. Nexata pacuenia bajarapova tajëvelia jumai tsabiabi itsajivijavabelia, xaniajai tsabiabi. Nexata papalata matamotabiabatsi petsipaebabiabijamatabëcuene, pijatuxanevi pitabiaba. ¹⁷ Bajarapova nexata panepënanajetarucabiaba. Bajarapova pinijijumeta jumai tsanajetarucabiabi paxanë yabara:

—Mapapebijivije, athëbëtatsia peecaenë Dioso pijajivi. Pacatsipaebapona papecaca-panepaelivaisinexa pibisiacuene paneexanaeconivecua, jai tsanajetarucabiabi petiriva paxanë yabara.

¹⁸ Bajarapacuenia najuamatacabianë jumai tsanajetarucabiabi itsa panepënanajetarucabiaba. Nexata bitso Pablo pejamatabëitonotabiabixaetsi, belia napënyorotaxuaba bajarapovajavabelia. Jumaitsi:

—Dovathi, caitavetatsi Jesucristo pevënëta. Vecuapitsapare baja mapovaje, jai Pablo. Bajarapacuenia Pablo pejumaitsijavata dovathi baja petiriva vecuapitsapatsi.

¹⁹ Nexata bajarapova pijatuxanevi yapëtane baja pecopiarucaejava bajarapova pijumata palata penotabiabijava. Nexata bajarapova pijatuxanevi vaetabatsibeje Pablobeje Silasbeje. Robobocaponaliatsibeje tomara tuatuajëabelia. Caponatsibeje tomara pevetsivijavabelia. ²⁰ Jivi penaneconitsiaexanabiabivi, juezmonae, pitabarata nutatsibeje. Pamona Pablobeje Silasbeje vaetabatsibeje, najumetsënëtsiaya jumaitsi juezmonaejavabelia Pablobeje Silasbeje yabara:

—Mara papebibeje judíonëbeje. Anaepanaeyaexanaponabeje vajatomarapijivi. ²¹ Tsipaebaponabeje vajanacuapijivi pejumecovënëtsinexa palivaisi vaxaitsi Romano nacuapijivitsi apo nacatocopatsi vajajumecovënëtsinexa, jai najumetsënëtsiaya bajarapona Pablobeje Silasbeje yabara.

²² Nexata jivi ayaibitsaëtoxaneto baranaepanatsibeje Pablobeje Silasbeje. Nexata juezmonae itoroba vajabitsaë Pablobeje Silasbeje penaxatatsijavabeje pevejuma-jonotsinexatsibeje. Bajaraxuacujinae itoroba ayaicuenia pejumaconibabenexatsibeje naebota. ²³ Ayaicuenia pejumaconibabecujinaetsibeje, juezmonae icatsia itoroba vajabitsaë Pablobeje Silasbeje penaneconitsivi pejebabiabibota peetsinexatsibeje. Bajaraxuacujinae icatsia juezmonae itoroba penaneconitsivi pejebabiabibo pevetsinë Pablobeje Silasbeje xaniavaetsia pevetsinexatsibeje penaneconitsivi pejebabiabibo ënëtuatuajëta. ²⁴ Penaneconitsivi pejebabiabibo pevetsinë juezmonae pitorobixaetsi xaniavaetsia pevetsinexa, nexata penaneconitsivi pejebabiabibo pënëyatuucubijavanë, pecopiarucaejavatareca, Pablobeje Silasbeje etatsibeje. Peponaponaeyanivabeje penaitabarataeyaexanaetablapebeje tusatalia sixataliatsibeje. Bajaraxuacujinae xaniavaetsia yasicatarërëtsibeje cepovënëjavata.

²⁵ Nexata meravituatuajëta Pablobeje Silasbeje vajëtabeje Diosojavabelia. Diosojumevajianë naxëanecabeje Diosojavabelia. Itsamonae pijinia penaneconitenaevi bajarapabota, jumetanetsibeje penaxëanecaejavabeje. ²⁶ Nexata jemata bajarapaepatota ira najëabapeneta pinijicuenia. Penaneconitsivi pejebabiabibo, daxitabo, nanequebeca. Caecuenia daxita baupanë nabaupana pijacuata. Daxita penaneconitsivi pacadenamaëtonëta cobecëbejebatsi, vecobeothopatsi. ²⁷ Penaneconitsivi pejebabiabibo pevetsinë naëcotapuna pemajitecaenëmi. Nexata itsa tane daxita baupanë penabaupanaejava, navemarajonotaxuabina pijaespada penabeyaxuabinexa picani. Tsipaji jamatabëjumaitsi:

—Daxita meta baja penaneconitsivi rëcëpeca. Nexata bajarapajamatabëcuene yabara nenaneconitsiaexanaena tomara pevetsivi, jamatabëjai.

²⁸ Nexata bajarajota itacarajeta Pablo pinijijumeta jumai tsaxuabi:

—Pëtsa nabeyaxuabame. Daxita raja patananeconitsivi panubenajë, jai Pablo.

²⁹ Nexata penaneconitsivi pejebabiabibo pevetsinë itoroba pijajivitonë petocarenanexatsi pitayotabiabijava. Nexata bepijia tocarenatsi. Penaneconitsivi pejebabiabibo pevetsinë bitso neconecojai pecajunavi. Nexata bajaraponë pematabacabëta nucasjunua Pablobeje Silasbeje pitabarata. ³⁰ Bajaraxuacujinae penaneconitsivi pejebabiabibo pevetsinë barëpitsapaliatsibeje Pablobeje Silasbeje. Penaneconitsivi pejebabiabibo pevetsinë jumaitsi:

—¿Detsa xua exanaenajë tanecapanepaenexa Diosojavabelia? jai Pablobeje Silasbejevavabelia.

³¹ Nexata Pablobeje Silasbeje jumaitsideje:

—Najamatabëcuenecopare pepo petuxanenë Jesucristojavabelia pecacapanepaenexa Diosojavabelia. Xamë nijabota pejinavanapaevi ata Jesucristojavabelia najamatabëcuenecopatsi pecapanepaenexatsi Diosojavabelia, jaiabeje.

³² Nexata Pablobeje Silasbeje tsipaebabeje Dioso pitorobilivaisi bajaraponëjavabelia, daxita pijabota pejinavanapaevijavabelia ata. ³³ Penaneconitsivi pejebabiabibo pevetsinë bajarapaepatota, meravi, Pablobeje Silasbeje jumavajënëquiatatsibeje. Nexata bajaraponë, pijabopijivi yajava, bautisababeje Pablobeje Silasbeje. ³⁴ Bajaraxuacujinae penaneconitsivi pejebabiabibo pevetsinë pijaboyabelia Pablobeje Silasbeje barëliatsibeje. Nexata pexaejava rajutatsibeje. Bajaraponë, pijabopijivi yajava, pinijicuenia jamatabëcuenebarëya Dioso pejumecovënëtsixae.

³⁵ Nexata pepo bajayacunua juezmonae itorobalia vajabitsaë penaneconitsivi pejebabiabibo pevetsinëjavabelia pejumaitsinexa: “Capitsapaename pina baja Pablobeje Silasbeje,” pejainexa. ³⁶ Nexata penaneconitsivi pejebabiabibo pevetsinë jumaitsi Pablojavabelia:

—Juezmonae rabaja netonajumeitorobarena patacacapitsapaenexabeje. Paponarebeje baja xaniavaetsia, jai penaneconitsivi pejebabiabibo pevetsinë.

³⁷ Itsiata baitsi jane Pablo jumaitsi juezmonae pitorobivajabitsaëvijavabelia:

—Juezmonae naneconita pijatuxanevijavabelia, paxanëbejevavaberenata. Tsipaji abaxë copiata xaniavaetsia yapëtaenejeva paneconi paxainajëbeje, paxanëbeje paRomano nacuapijinë atanëbeje, juezmonae itoroba paxamëyajuvënëvi patanejumaconibabenexabeje daxita tomarapijivi pitabarata. Bajaraxuacujinae paneetabeje mapabotaje. Nexata aeconoxae juezmonae saya paxamë pacaitorobarena pepëya patanecapitsanaenexamëbeje. Juezmonae ponaerena pijacuata patanecapitsapaenexabeje, jai Pablo juezmonae pitorobivajabitsaëvijavabelia.

³⁸ Nexata vajabitsaë tsipaeba juezmonaejavabelia pacuenia Pablo jumaitsi. Nexata juezmonae itsa jumetane Pablobeje Silasbeje Romano nacuapijinëbejecuene, bitso jamatabëcuenenajunaviaca. ³⁹ Nexata juezmonae parena. Jumaitsi Pablobeje Silasbejevavabelia:

—Pauranë paxamëbejejavabelia vajabitsaë pataitorobixae pibisiacuene papecaex-anaenexabeje, jai juezmonae.

Nexata juezmonae pijacuata Pablobeje Silasbeje penaneconitsivi pejebabiabibovecua capitsapatsibeje. Juezmonae barajamatabëcuenexanepanaeya Pablobeje Silasbeje itorobatsibeje peponaenexabeje baja tomaravecua. ⁴⁰ Pablobeje Silasbeje pecapitsapaecujinaetsibeje, ponabeje baja Lidia pijaboyabelia. Nexata Lidia pijabota ita tanebeje Dioso pejumecovënëtsivi, muxujiobabeje bajarapamonae pija-matabëcuenesaënexa Diosojavabelia. Bajaraxuacujinae ponabeje baja bajarapatomar-avecua.

17

Pacuenia Pablobeje Silasbeje Tesalónica tomarata jaitatsibeje pevaetabinexatsibeje yabara pelivaisi

¹ Pablobeje Silasbeje najetarucabeje Anfípolis tomarajava, Apolonia tomarajava ata. Bajaraxuacujinae patabeje Tesalónica tomarabelia. Nexata Pablobeje Silasbeje Tesalónica tomarata naponaponabeje acueyabi pasemanabeje. Tesalónica tomarata eca judíovi penacaetuatabiabibo. ² Nexata Pablo pijacujirucuenia judíovi penacueraevet-simatacabianë canacujitsia najoneyabiaba bajarapabota. Dioso pitorobilivaisi Pablo tsipaebabiaba bajarapabota penacaetuatabiavijavabelia. Tsipaebabiaba pacuenia Dioso pejumelivaisibaxutota jumaitsi. ³ Pablo jumai tsabiabi judíovi penacaetuatabi-abibota:

—Dioso baja cajena pejumelivaisibaxutota tajëvelia vajunupaebatsi Cristo, ponë baja Dioso itorobica jivi pecapanepaenexa. Tajëvelia baja cajena Dioso pejumelivaisibax-utota Cristo vajunupaebatsi pijavajabitsaë ayaicuenia pebejiobiaexanaejavanexatsi. Vajunupaebatsinua baja cajena Cristo petëpaecujinae icatsia piasaëjavanexa. Bajaraponë raja Jesús, ponë pelivaisi pacatsipaebatsi. Bajaraponë raja Cristo, ponë Dioso itorobica jivi pecapanepaenexa, jai tsabiabi Pablo ita tsipaebabiaba Dioso pitorobilivaisi judíovi penacaetuatabiabibota.

⁴ Nexata judíoviyajuvënëvi jumecovënëta Pablo petsipaebabiabilivaisi. Ayaibitsaëto griegovi ata, Dioso pejitsipaevi, jumecovënëta Pablo petsipaebabiabilivaisi. Ayaibit-saëto petiriavi ata, petuxanevi pijavajivi, jumecovënëta Pablo petsipaebilivaisi. Nexata daxita bajarapamonae nacaetuatabiaba Pablobeje Silasbejejavata. ⁵ Nexata judíovi, pamona apo jumecovënëtsi Pablo petsipaebabiabilivaisi, Pablo cuenecaëbatsi. Tsipaji Pablojavabelia jivi ayaibitsaëto jonepona. Nexata bajarapajudíovi junata jivi ayaibit-saëtoxaneto pibisijamatabëcuenevi, saya jema pejinavanapaevi tomarapijicallejava. Nexata pejunatsicujinae bajarapajudíovi pejunatsivi jane baja barënacaetuata. Nexata daxita bajarapajudíovi, pejunatsivi jane baja yajava, barënamatabëcueneyanaba. Nex-ata itoroba bajarapatomarapijivi pianaepanaenexa Dioso pejumecovënëtsivijavabelia. Pablobeje Silasbeje naponaponabeje Jasónvënënë pijabota. Nexata daxita pamona anaepana bajarapatomarata, Pablobeje Silasbeje jemata tsimaxëpatatsibeje Jasón pijab-ota. Vaetabijitsiatsibeje picani penutsinexatsibeje tomara pevetsivi pitabarata. ⁶ Jasón pijabota Pablobeje Silasbeje apo pecaxitajarabixaetsibeje, nexata pamona anaepana, vaetabatsi Jasón, itsamonae yajava, pamona Dioso pejumecovënëtsivi. Robobocapon-aliatsi Jasónbana tomara pevetsivijavabelia. Nexata pamona anaepana, tomara pevetsivi pitabarata najumetsënëtsiaya pinijijumeta jumaitsi Pablobeje Silasbeje yabara:

—Pablobeje raja Silasbeje daxitanacuanëjava pejinavanapaevi itorobaponabeje pi-anaepanaenexa. Nexata jane baja aeconoxae vajatomarajavaberena ata patabeje. ⁷ Nexata Jasón, maponë nucaje, tocopata pijabota penaponaponaenexabeje Pablobeje Silasbeje. Daxita pamona Jasón mayajavanucaje, Pablobana ata, daxita bajara-pamona, apo jumecovënëtsi cajena Romanonacua pepo pevetsinë pitorobilivaisi. Daxita bajarapamonae jumai tsabiabi: “Romanonacua pepo pevetsinë rabaja apo

nacayanacuaevevetsi. Itsanë rabaja nacayanacuaeaveta. Bajaraponë pevënë Jesús,” jai tsabiabi daxita bajarapamonae, jai najumetsënëtsiaya tomara pevetsivijavabelia pamona anaepana.

⁸ Nexata bajarapacuenia pejumaitisijava itsa jumetane, daxita tomarapijivi tomara pevetsivinua bitso anaepana. ⁹ Nexata Jasón, Dioso pejumecovënëtsivi yajava, palata matamotsiaexanatsi tomara pevetsivijavabelia, Pablöbeje Silasbeje pevecuapit-sapaenexabeje bajarapatomara. Tomara pevetsivi jumaitisi:

—Itsa rabaja ponaenabeje bajaraponëbeje mapatomaravecuaje, pacatocanaviabi-anatsi panijapalata, jai tomara pevetsivi Jasónbanajavabelia.

Bajaraxuacujinae copabatsi baja Jasónbana penaviabinexa pijabonëjavabelia.

Pacuenia Pablöbeje Silasbeje ponaponabeje Berea tomarata yabara pelivaisi

¹⁰ Jasónbana tomara pevetsivi pecopabicujinaetsi, bajarapameravi, Dioso pejumecovënëtsivi bepíjia itorobatsi Pablöbeje Silasbeje peponaenexabeje, Berea tomarabelia. Pablöbeje Silasbeje pepatsicujinaeliabeje Berea tomarata najunuabeje judíovi penacaetuatabiabiobjavabelia. ¹¹ Ajamatabëcuenetaja pajudíovi jinavanapa Tesalónica tomarata. Nexata apo jumecovënëtsi Dioso pitorobilivaisi. Pajudíovi jinavanapa Berea tomarata, bajarapacuenia apo ajamatabëcuenetaja. Bajarapajudíovi bitso jitsipa pejumetaenexa Dioso pitorobilivaisi. Nexata Pablo caematacabi canacujitsia judíovi penacaetuatabi-abibota Dioso pitorobilivaisi tsipaebabiaba bajarapajudíovijavabelia. Nexata Pablo itsa copata petsipaebabiabijava, bajarapajudíovi pijacuata Dioso pejumelivaisibaxutota xaniavaetsia nacujarubabiaba peyapëtaenexa xaniajai bajarapacuenia itsa jumaitisi Pablo petsipaebabiabilivaisi. ¹² Berea tomarapijivi judíovi ayaibitsaëto jumecovënëta Pablo petsipaebabiabilivaisi. Ayaibitsaëto pijinia griegovi ata jumecovënëta. Jumecovënëta pebijivi. Jumecovënëta petiriavi ata. Bajarapapetiriavi petuxanenëanë pijavajivi. ¹³ Pajudíovi jinavanapa Tesalónica tomarata, Pablo vënëlivaisitanetsi Dioso pitorobilivaisi petsipaebabiabijava Berea tomarata. Nexata bajarapajudíovi ponalia Berea tomarabelia. Nexata bajarapajudíovi itoroba Berea tomarapijivi ayaibitsaëto pianaepanaenexa Pablojavabelia. ¹⁴ Nexata Berea tomarapijivi, pamona jumecovënëta Pablo petsipaebabiabilivaisi, bajarapamonae Pablo bepíjia itorobatsi peponaenexa manumene itapata pecaetomarabelia. Silasbeje abaxë Timoteobeje nacopatabeje Berea tomarata. ¹⁵ Pamona Pablo yanataponaliatsi, pënaxuabatsi Atenas tomarabelia. Nexata Atenas tomaraverena bajarapamonaeta Pablo tonajumexuaba Silasbeje Timoteobeje. Jumaitisi:

—Itsa cuenecaëjëpaenatsibeje, bepíjia renabeje tsane tanecaxitajarabinexabeje Atenas tomarata, jai Pablo bajarapamonaejavabelia.

Bajaraxuacujinae pamona Pablo pënaxuabatsi, naviaba baja Berea tomarabelia.

Pacuenia Pablo ponapona Atenas tomarata yabara pelivaisi

¹⁶ Pablo abaxë Atenas tomarata evetaponapona Silasbeje Timoteobeje pepatsijavabeje Atenas tomarabereana. Nexata Pablo itsa ponapona Atenas tomarata, tane pecobeta jumapecataeya pexanaenëanë piapaxayojava daxita Atenas tomara tuatuajëjava. Nexata Atenas tomarapijivi pematabacabëta nubenabiaba pevajëcabiabinexa bajarapajumapecataevijavabelia. Nexata Pablo itsa tane bajarapacuenia, bejamatabëjiobi bitso. ¹⁷ Nexata judíovi penacaetuatabiabiabota Pablo Dioso pitorobilivaisi yabara barënajumenotabiaba pevëna judíovi. Barënajumenotabiabanua apo judíovi ata, pamona Dioso pejitsipaevi. Caematacabi canacujitsia barënajumenotabiabanua pamona Pablo caxitajarabatsi tomara tuatuajëta. ¹⁸ Nexata Pablo caxitajaraba pebijivi, epicúreomonae pecujarubilivaisi pejumecovënëtavanapaevi. Caxitajarabanua itsapebijivi, estoicosmonae pecujarubilivaisi pejumecovënëtavanapaevi. Bajarapamonae ata

Pablo barēnajumenota. Nexata Pablo pebarēnajumenotsijavata, bajarapamonaeyajuvēnēvi Pablo yabara muetsia najumaitsi:

—¿Detsa meta pitsilivaisi maponēje namatatsapatsia nacabarēcuaicuajijaje? najai bajarapamonaee Pablo yabara.

Itsamonaee pijinia Pablo yabara najumaitsi:

—Itsanacuapijivi racovē pijadiosoivi pelivaisipaebinē, najai bajarapamonaee.

Bajarapacuenia najumaitsi tsipaji Pablo tsipaebapona pexanialivaisi, Jesús pelivaisi. Tsipaebaponanua petēpaevimi icatsia itsamatacabi piasaējavanexa petēpaecujinae. ¹⁹ Nexata bajarapamonaee Pablo barēponaliatsi Areópagovēnē tsutojavabelia, patsutojavabelia tomara pevetsivi nacaetuatabiaba penabarēcuaicuajainexa. Itsa baja palia bajarabelia, bajarapamonaee jumaiitsi Pablojavabelia:

—Panetsipaebare patayapētaenexa papejanalivaisi tsipaebaponame.

²⁰ Panetsimuxuaitothia abaxē palivaisi tsipaebaponame. Nexata pajitsipajē patayapētaenexa pajamatabēcuenelivaisi xaina palivaisi tsipaebaponame, jai Atenas tomarapijivi Pablojavabelia.

²¹ Atenas tomarapijivi, itsanacuaverena pepatsivinua, pamonaee bajarapatomarata najinavanapa, daxita bajarapamonaee jamatabēcuenenabiabatsi pejanalivaisi pejumetaeyabiabinexa. Jamatabēcuenenabiabatsinua petsipaebabiabinexa itsamonaeejavabelia ata.

²² Nexata Pablo nonotapuna bajarapamonaee tuatuajēta Areópagovēnē tsutojavata. Jumaiitsi:

—PaAtenas tomarapijivimē, pacatanetsi rabaja panijadiosoivi bitso papecajamatabēcuenenabiabijava. ²³ Tanajetarucabiabijavata panijatomaracallejava, taeyabiabajē itsaxuayo pavajēcabiabame panijadiosovijavabelia. Nexata caxitajarabajē altarvēnējava, itsajota jivi vajēcabiaba abaxē apo yapētae ata padiosojavabelia vajēcabiaba. Bajarapaaltarvēnējavata peyaquinarutsiitane jumai tsarucae mapacueniaje: “Padioso abaxē apo yapētaetsi, bajarapadiosojavabelia vajēcabiabianatsi mapaaltarjavataje,” jai tsarucae peyaquinarutsiitane. PaDioso yabara yaquinaruta bajarapaaltarvēnējavata, nexata bajarapaDiosojavabelia paxamē baja najamatabēcuenecopatsiaya panavajēcabiabame, abaxē apo payapētae atamē bajarapaDioso, bajarapaDioso yabara jane baja aeconoxae pacatsipaebijitsiatsi, jai Pablo Atenas tomarapijivijavabelia.

²⁴ Icatsia Pablo jumaiitsi Atenas tomarapijivijavabelia:

—PaDioso yabara pacatsipaebijitsiatsi, mapanacua exanaje. Exana daxita mapanacuapijicuene yajava. BajarapaDioso pepo pevetsinē jane baja daxita mapanacuaje. Pevetsinē itaboxo ata. BajarapaDioso cajena apo ponaponae jivi pexanaetemplota. ²⁵ BajarapaDioso apo namatavenonaee jivi peyavenonaenexatsi. Tsipaji apo namatavenonaee itsacuenējavayo ata. Biji rajane bajaraponē nacarajuta caeepatoyo vajaasaētsavanapaejumaliyonexa. Nacarajutanua daxita xua namatavenonatsi, jai Pablo pepo Dioso, athēbētatsia peecaenē, yabara.

²⁶ Icatsia Pablo jumaiitsi Atenas tomarapijivijavabelia:

—BajarapaDioso abaxē copiaya caenē pebi exana. Bajaraxuacujinae bajarapapebijavaverena naexanapona daxitaviriajumevi pijasalinaivimi. Nexata bajarapapebijavaverena penaexanaponaeevi yacaējēpa pejinavanapaejava daxitanacuanējava. Nexata Dioso caeviriajumevi canacujitsia tocopatapona pamatacabibeje asaē tsavanapaejitsia. Tocopataponanua panacuanējava jinavanapaejitsia. ²⁷ Bajarapacuenia Dioso tocopata mapanacuataje daxita bajarapamonaee Dioso pejitsipaenexa penajamatabēcuenecopatsinexa Diosojavabelia. Dioso cajena tajē apo nacavecuaponaponae. ²⁸ Dioso raja pejamatabēcueneta asaē tsavanapaetsi. Bajarapacuenia Dioso pejamatabēcueneta asaē tsavanapaetsi tsipaji baja cajena paxamēyajuvēnēvi bajayata

peyaquinaelivaisita jumaitsi: “Vaxaitsi ata rabaja Dioso pexitsi,” jai. ²⁹ Nexata Dioso itsa pexitsi, Dioso yabara jamatabëcuenenavëxaniabiaya apo bejamatabëjumaitssitsi mapacueniaje: “Dioso raja oronanitota, platananitota ata, ibotota ata pexanaenëtsi. Nexata pacuenia bitso pecujanivitsi pecobeta pexanaenëanë pexaniacuenia exana, bajara pitsinë Dioso,” apo bejamatabëjaitsi jamatabëcuenenavëxaniabiaya Dioso yabara. ³⁰ Jivi abaxë bajayata apo yapëtae Dioso peponaponaejava. Nexata bajayata jivi pibisiacuene exanabiabi ata, Dioso abaxë najamatabëcuenecataita. Nexata abaxë Dioso apo naneconitsiaexanae bajarapamonae pibisiacuene pexanabiabijava yabara. Itsiata baitsi jane maparucaeje Dioso itoroba daxitajivi daxitanacuanëjava pejinavanapaevi pibisiacuene pexanabiabijava pecopabinexa baja, penajamatabëcuenepënëyorotsinexa Diosojavabelia. ³¹ Bajarapacuenia Dioso itoroba tsipaji baja Dioso jivi penaneconitsiaexanaematacabinexa tocaëjëtaruta. Pamatacabi Dioso tocaëjëtaruta, itsa copiapatsiana, naneconitsiaexanaena daxitanacuanëpivivi. Nexata Dioso jivi itsa naneconitsiaexanaena, caejivi canacujitsia paneconivajëto xainapona, bajarapaneconivajëtota naneconitsiaexanaponaena. Ponë jivi naneconitsiaexanaejitsia, Dioso baja cajena itapeta. Daxitajivi beyapëtane ponë Dioso itapeta. Tsipaji baja bajaraponë Dioso icatsia asaëyaexana petëpaecujinae, jai Pablo Atenas tomarapijivijavabelia Jesús yabara.

³² Nexata Atenas tomarapijivi itsa jumetane bajarapacuenia Pablo pejumaitsjava Jesús petëpaecujinae Dioso icatsia piasaëyaexanaejavatsi yabara, Atenas tomarapijivi Pablo jumecaponatsi. Itsamonae pijinia itsiata jumaitsi Pablojavabelia:

—Icatsia itsamatacabijavabelia pacanamuxunaevetsianatsi bajarapalivaisi, jai itsamonae.

³³ Nexata baja Pablo bajarapamonae vecuapona. ³⁴ Itsamonae itsiata pënaponatsi. Bajarapamonae jumecovënëta Pablo petsipaebilivaisi. Pamonaе jumecovënëta Pablo petsipaebilivaisi yajuvënënë, pevënë Dionisio. Bajaraponë Dionisio, Areópagovënë tsutojavata penacaetuatabiabivi pevetsiviyajuvënënë. Petiriva ata, Dámarisvënëva, jumecovënëta Pablo petsipaebilivaisi. Itsamonae yajava jumecovënëta.

18

Pacuenia Pablo ponapona Corinto tomarata yabara pelivaisi

¹ Atenas tomarata Pablo jivi petsipaebaponaponaecujinae Dioso pitorobilivaisi, pona baja. Nexata pata Corinto tomarabelia. ² Nexata Corinto tomarata Pablo caxitaraba judíonë, Aquilavënënë, Ponto nacuapijinë. Bajaraponë Aquila caematacabibeje abaxë xaina Corinto tomarata pepatsicujinae Italia nacuaverena. Yajavapata pijava Priscilavënëva. Bajarapajivibeje Italia nacuaverena patabeje. Bajaraverena patabeje tsipaji Romanonacua pepo pevetsinë, Claudiovënënë, capitsapapona daxita judíovi pepitsapaenexa Roma tomaravecu. Romatomara eca Italia nacuata. Nexata Pablo pona Aquila pijaboyabelia. ³ Nexata Aquila pijabota Pablo naponapona. Nexata carpaponë Pablo nayavenonaeya jorocabiaba Aquila. Pablo nanacueneba tsipaji Pablo ata yapëtane pejorocaejava carpaponë. ⁴ Judíovi penacaetuatabiabibota, penacuer-aevetsimatacabianë canacujitsia, Pablo judíovi tsipaebabiaba Dioso pitorobilivaisi. Pablo tsipaebabiaba judíovijavabelia, apo judíovijavabelia ata, bajarapamonae pejumecovënëtsinexa palivaisi Pablo tsipaebabiaba.

⁵ Silasbeje Timoteobeje Corinto tomarata itsa patabeje Macedonia nacuaverena, Pablo baja copata Aquila peyavenonaeyajorocabiabijava carpaponë. Nexata Pablo caematacabi canacujitsia Jesús yabara jumai tsaponae judíovijavabelia:

—Jesús raja pepacuene Cristo, ponë copiaevetavanapatsi pepatsijavatsica vajanacapanepaenexa, jai tsaponae Pablo Jesús yabara.

⁶ Nexata bajarapacuenia Pablo pejumaitsaponaejava Jesús yabara, judíovi baraanaepanatsi. Pablo pibisiacuenia bijatanetsi. Nexata Pablo penaxatatsijava

najumajonotaxuaba. Nënëbabilia bajarapamonae peyapëtaenexa penaneconitsijava Diosojavabelia. Tsipaji apo jumecovënëtsitsi, Pablo tsipaebi ata Jesús yabara. Pablo nexata jumaitsi judíovijavabelia:

—Paxamë saya panejamatabëcueneta panaxuabianame Diosovecua. Xanë taja-matabëcueneta apo panaxuabimë tsane. Panijacuata panaxuabianame. Tsipaji cajena pacatsipaebi atatsi Jesús yabara, apo panejumecovënëtsimë. Aeconoxae rabaja copatajê patacatsipaebabiabijava paxamëjavabelia bajarapalivaisi. Tavajënaeyabelia baja ponae-najê tatsipaebaponaenexa bajarapalivaisi apo judíovijava, jai Pablo judíovijavabelia.

⁷ Nexata Pablo judíovi penacaetuatabiabibovecua pitsapa. Nexata pona Justovënënë pijaboyabelia. Nexata Justo pijabota Pablo naponapona. Bajaraponë Justo penavajëcabiabinë Diosojavabelia. Pijabo eca judíovi penacaetuatabiabibo muxuneneta.

⁸ Nexata Crispovënënë, judíovi penacaetuatabiabibo pevetsinë, daxita pijabopijivi barëjumecovënëta Jesús pelivaisi. Ayaibitsaëto Corinto tomarapijivi, pamonaе jumetane Pablo petsipaebabiabilivaisi, jumecovënëta. Nexata bajarapamonae nabautisaba.

⁹ Nexata meravi bemajitsinaebota Dioso jumaitsi Pablojavabelia:

—Pëtsa junavame. Pëtsa copatame netsipaebaponaеjava tajumelivaisi. ¹⁰ Xanë raja cayajavatsi. Nexata itsajivi ata apo caitsacueniabi tsane. Tsipaebaponaename tajumelivaisi. Tsipaji rabaja tajajivi ayaibitsaëto tsaponae mapatomarataje, jai Dioso.

¹¹ Nexata Pablo ponapona Corinto tomarata dieciocho pajuametobeje. Tsipaebapona-pona Dioso pitorobilivaisi Corinto tomarapijivijavabelia.

¹² Pamatacabi Galiónvënënë Acayanacua evetaponapona, judíovi najamatabëcuenejëpaeya tsimaxënacaetuatsi Pablo pevaetabinexatsi. Nexata itsa vaetabatsi, Pablo caponaliatsi penutsinexatsi nacuaevetsinë Galión pitabarata.

¹³ Nexata judíovi jumaitsi nacuaevetsinë Galiónjavabelia:

—Mara ponëje jivi livaisi tsipaebaponaе pejumecovënëtsinexa Dioso. Itsiata baitsi jane saicayacuenia Dioso pejumelivaisivecua tsipaebapona. Paxanë cajena bajara-pacuenia apo panetonajumecopatsi Dioso Moiséspijinëta penajumecopatsilivaisi, jai judíovi nacuaevetsinë Galiónjavabelia Pablo yabara.

¹⁴ Ajena picani Pablo jumepitsijitsia judíovi, itacarajeta nacuaevetsinë Galión jumaitsi judíovijavabelia:

—Paxamë pajudíovimë, bepayapëtaneme mapacueneje. Itsa maponëje nacobetoxot-sipa, jivitonë ata itsa beyaxuabijitsipa, pacajumexaniataejitsipatsi. Nexata naneconit-siaexanaejitsipajê. ¹⁵ Paxamë saya pabarënajumenotame maponëje papecatsipaebapona-aelivaisi yabara. Pabarënajumenotamenua panijasalinaivi pijalivaisi yabara ata. Nexata saya paxamë panijacuata bajaraxua yabara pabarëcuaicuaijamëre pacuenia pajitsipame. Xanë raja apo evetsinë bajarapalivaisi, jai nacuaevetsinë Galión judíovijavabelia.

¹⁶ Nexata baja nacuaevetsinë Galión navecuapitsapaeyaexana judíovi.

¹⁷ Nacuaevetsinë Galión judíovi navecuapitsapaeyaexanae ata, caecuenia abaxë judíovi apo ponae pijabonëjavabelia. Nexata griegovi, bajarajota penubenaevi, nacobenavaetaba judíoviyajuvënënë, Sóstenesvënënë. Bajaraponë Sóstenes judíovi penacaetuatabiabibo pevetsinë. Nexata griegovi Sóstenes conibabia nacuaevetsinë Galión pitabarata, ajibi ata peyabaraconibabejava. Nexata nacuaevetsinë Galión tae ata bajarapacueni, apo itavetsi.

Pacuenia Pablo pepatsicujinae Antioquía tomarata, icatsia naropota acueyabinamutonexa jivi petsipaebaponaenexa Dioso pitorobilivaisi yabara pelivaisi

¹⁸ Pablo abaxë bajayajebi ponapona Corinto tomarata. Bajaraxuacujinae Dioso pejumecovënëtsivita napëjioba. Napona barcota Siria nacuyabelia. Pablo yajavapona Priscilabeje Aquilabeje. Nexata epatua Cencrea tomarata, Pablo mataxunatsi. Daxitamatanami matacasibatsi jivi peyapëtaenexatsi petoveretsijava Dioso petonacuenebijava pacuenia baja cajena Diosojavabelia Pablo najumecapanepaeya jumaitsi. ¹⁹ Pablobana

Aquilabana Priscilabana itsa pata Efeso tomarata, Pablo baja vecuanatsata Priscilabeje Aquilabeje. Nexata Pablo Efeso tomarata joneya judíovi penacaetutabiabiboyalía. Nexata bajarajota barēnalivaisita judíovi. ²⁰ Nexata picani Efeso tomarata Pablo judíovi asivatsi abaxē penaponaponaenexa anijamatacabianē. Itsiata Pablo apo jejai. ²¹ Nexata Pablo itsa napējioba, bajarapamonaejavabelia jumaitsi:

—Naxanetajē tapatsinexa Jerusalén tomarabelia tataenexa pafiesta baja imoxoyo pevajēnae pejonenexa. Itsiata icatsia najetarucaenajē paxamējavaberena itsa Dioso jitsipa, jai Pablo judíovijavabelia.

Nexata Pablo Efeso tomarata barcota nanaropota. ²² Itsa baja Pablo pata Cesarea tomarabelia, pona icatsia Jerusalén tomarabelia pebajacobinexa daxita Dioso pejume-covēnētsivi. Bajaraxuacujinae icatsia naviata Antioquía tomarabelia. ²³ Antioquía tomarata bajayajebi ponapona. Bajaraxuacujinae icatsia naropota. Najetaruca daxita tomaranējava. Najetaruca Galacia nacuata penaetomaranējava, Frigia nacuata penae-tomaranējava ata. Bajarapatomaranējava pejinavanapaevi Dioso pijalivaisita Pablo jamatabēcuene asaēyaexananajetaruca daxita Dioso pejumecovēnētsivi.

Pacuenia Apolos Dioso pitorobilivaisi tsipaeba Efeso tomarapijivijavabelia yabara pelivaisi

²⁴ Judíonē Apolosvēnēnē pata Efeso tomarata, Alejandría tomarapijinē. Bajaraponē xaniavaetsia Dioso pitorobilivaisi jivi tsipaebabiaba. Jumeyapētane bitso pacuenia Dioso pejumelivaisibaxutota jumaitsi. ²⁵ Apolos itsamonae epatua tsipaebatsi Jesús pelivaisi. Itsiata baitsi jane xaniavaetsia daxitalivaisi apo tsipaebitsi. Palivaisi Juanpijinē jivijavabelia tsipaebapona, bajarapalivaisi Apolos xaniavaetsia tsipaebatsi. Juanpijinē jivi pebautisabaponaenexa ata Apolos xaniavaetsia tsipaebatsi. Apolos xaniavaetsia Jesús pelivaisi apo tsipaebi atatsi, itsiata ajamatabēcuenesaēya xaniavaetsia tsipaebanajetaruca Jesús pelivaisi. ²⁶ Apolos ajumejunavijibia Dioso pitorobilivaisi jivi tsipaeba judíovi penacaetutabiabibota. Nexata Priscilabeje Aquilabeje itsa jumetanebeje Apolos petsipaebilivaisi, nexata bajarapajivibeje junatabeje Apolos. Nexata Apolos napona Priscilabeje Aquilabeje pijaboyabelia. Nexata bajarapajivibeje daxitalivaisi jane baja, Jesús pelivaisi, xaniavaetsia tsipaebabeje Apolosjavabelia xaniavaetsia Apolos peyapētaenexa Jesús pelivaisi. ²⁷ Itsa baja Apolos naropotsijitsia Efeso tomaravecua peponaenexa Acaya nacuayabelia, Dioso pejumecovēnētsivi, Efeso tomarapijivi, yavenonatsi peponaenexa. Tsicobeyaquinatsi cuyalatobaxuto pecapon-aenexa, Dioso pejumecovēnētsivijavabelia perajutsinexa Acaya nacuata. Bajarapacuenia tsicobeyaquinatsi Acaya nacuapijivi, Dioso pejumecovēnētsivi, xaniavaetsia Apolos pecopiapitsinexatsi. Apolos baja itsa pata Acaya nacuayabelia, Apolos bitso yavenona Acaya nacuapijivi Dioso pejumecovēnētsivi. ²⁸ Daxitajivijavabelia Apolos tsipaebapona Jesús pelivaisi. Nexata pacuenia Dioso pejumelivaisibaxutota jumaitsi Jesús yabara, Apolos tsipaebapona daxitajivijavabelia. Nexata Apolos daxitajivi yapētaeyaexanapona Jesús pepacuene Dioso athēbēvetsica pitorobijavatsitsica jivi pecapanepaenexa. Nexata baja judíovi moya ena. Tsiapaji acuenebi judíovi: “Jume raja,” pejajjava Apolos petsipaebilivaisi yabara.

19

Pacuenia Pablo ponapona Efeso tomarata yabara pelivaisi

¹ Pamatacabi abaxē Apolos ponapona Corinto tomarata, bajarapamatacabi pijinia Pablo ibotsutonē nacuajavaverena najetaruca pepatsinexa Efeso tomaraberena. Efeso tomarata Pablo itsa pata, caxitajaraba caejivibeje Jesús pelivaisi pejumecovēnētsivi. ² Nexata Pablo yanijoba bajarapamonaejavabelia.

—¿Espíritu Santo tsabaja pacatsijamatabëjunua pamatacabi ajena pajumecovënètame Jesús pelivaisi? jai Pablo.

Nexata bajarapamonae jumaitsi:

—Jume. Apo payapëtaenë patanetsijamatabëjonejava Espíritu Santo. Apo pavënëtaenë cajena Espíritu Santo ata, jai bajarapamonae Pablojavabelia.

³ Nexata Pablo jumaitsi:

—¿Detsa pitsijamatabëcuene yabara pacabautisaba? jai Pablo bajarapamonaejavabelia.

Nexata bajarapamonae jumaitsi:

—Pajamatabëcuene yabara raja Juanpijinë panetsipaeba, bajarapajamatabëcuene yabara panebautisaba, jai bajarapamonae.

⁴ Pablo nexata jumaitsi bajarapamonaejavabelia:

—Juanpijinë raja bautisabapona pamona baja copaba pibisiacuene pexanaejava, pamona baja najamatabëcuene pënëyorota Diosojavabelia. Itsiata baitsi jane Juanpijinë jumai tsaponae jivijavabelia: “Panamatavenoname panejumecovënëtsinexa ponë xanë tacovëverena patsiana, baitsi Jesús. Bajaraponë Cristo, ponë Dioso itorobica,” jai tsaponae Juanpijinë jivijavabelia, jai Pablo bajarapamonaejavabelia.

⁵ Bajarapamonae itsa jumecovënëta Jesús pelivaisi, nexata Pablo bautisaba bajarapamonae petuxanenë Jesús pevënëta. ⁶ Nexata Pablo pevajëtsijavata Diosojavabelia, tsimatanacobebuata bajarapamonae. Nexata bajarapamonae Espíritu Santo tsijamatabëjunuatsi. Nexata bajarapamonae itsa cuaicuaijai, ajumeitothia pecuaicuaijajava. Tsipaji itsaviriajumenëta, apo penatsipaebijumenëmi, cuaicuaijai. Bajaraxuacujinae jane baja bajarapamonae Dioso pitorobilivaisi tsipaebapona jivijavabelia. ⁷ Daxita meta bajarapamonae bejamatabëcuene doce ponëbeje.

⁸ Efeso tomarata Pablo acueyabi pajuametobeje ponapona. Nexata Pablo Efeso tomarata, judíovi penacaetuatabiabibota, judíovijavabelia ajumejunavijibia tsipaebabiaba Dioso pitorobilivaisi. Pablo judíovi barënajumenotabiaba Dioso pijajivi pevetsijavanexa yabara. Bajarapacuenia Pablo barënajumenotabiaba judíovi pejumecovënëtsinexa Dioso pijajivi pevetsijavanexa. ⁹ Itsamonae itsiata amatabocotaja. Apo jitsipae pejumecovënëtsijava bajarapalivaisi. Bajarapamonae dexitajivi pitabarata pibisiacuena baracuaicuaijai pexanialivaisi, Jesús pelivaisi. Nexata baja Pablo vecuanatsata bajarapamonae apo pejumecovënëtsixae Jesús pelivaisi. Pablo nexata, Jesús pelivaisi pejumecovënëtsivi yajava, pona Tirannovënënë pijaescuelabojavabelia, bajarapabota penacaetuatabiabinxaxa. Bajarapabota nexata Pablo caematacabi canacujitsia pexanialivaisi, Jesús pelivaisi, jivi tsipaebabiaba. ¹⁰ Bajarapacuenia Pablo tsipaebaponapona anijavai beje. Nexata daxita Asiavënë nacuapijivi, judíovi, apo judíovi ata, jumetane petuxanenë Jesús pelivaisi. ¹¹ Dioso yavenonatsi Pablo Dioso pesaëta pinijicuene pexanaejavanë pexanaponaenexa. ¹² Nexata pamona toavitanetsi, pijamonae Pablo penaxatabijavanë, pijapañueloxi ata, daxita xuaxi Pablo naperabëcajayaba, tocaponabiaba piavitanevi peperabëcajayabinexa. Nexata piavitanevi bajaraxua itsa tsiperabëbuatatsi, jamatejema baja tsabiabi. Dovathivi peyajavajinavanapaevi ata vecuapitsapabiabatsi.

¹³⁻¹⁴ Itsamonae judíovi tomaranëjava najetarubena. Bajarapamonae Jesús pelivaisi apo jumecovënëtsi ata, itsiata dovathi jivivecua capitsapapona. Pajudíovi bajarapacuenia dovathi jivivecua capitsapapona, siete ponëbeje tsavanapae. Bajarapamonae Escavavënënë, sacerdotevi penamatacaitorobinë, ëpexi tsavanapae. Nexata bajarapamonae vënëtane Jesús. Nexata bajarapamonae najumaitsi:

—Dovathi jivivecua capitsapaenatsi petuxanenë Jesús pevënëta, najai.

Nexata jane baja itsa tane dovathi peyajavaponaponaenë, bajarapamonae jumaitsi:

—Dovathi, pacaitavetatsi, ponë Pablo vajunupaebapona, petuxanenë Jesús pevënëta. Vecuapitsapare baja maponëje, jai Escevavënënë pexi dovathi peyajavaponapon-aenëjavabelia.

¹⁵ Nexata Esceva pexi itsa itaveta dovathi, dovathi jumaiti mapacueniaje:

—Yapëtaniji raja Jesús. Yapëtaniji Pablo ata. Itsiata paxamë apo pacayapëtaetsi. ¿Detsa jane paxamë papamonaemë? jai dovathi.

¹⁶ Nexata bajarajota dovathi peyajavaponaponaenë, tsimaxëjirevarenatsi bajarapamonae. Pinijisaëta dovathi peyajavaponaponaenë biatsi. Nexata amoneyabatsi. Pinijicuenia tsaquibabiatsi. Vejumatiticatsi penaxatabijavanëmi. Nexata bajaraponë pijabovecua bajarapamonae yarëcëpeca pebejavatsi. Jumasa nexata rëcëpeca. ¹⁷ Nexata daxita Efeso tomarapijivi, judíovi, apo judíovi ata, vënëlivaisitane pacuenia dovathi peyajavaponaponaenë exanatsi Esceva pexi. Nexata Efeso tomarapijivi bitso jamatabëcuenenajunaviaca. Nexata daxita bajarapamonae yaiyatane Jesús pevënë.

¹⁸ Nexata ayaibitsaëttoxaneto Dioso pejumecovënëtsivi, patapona Pabloanajavaberenena. Nexata bajarapamonae daxitajivi pitabarata navecuapaebapona pibisiacuene pexanabiabijava. ¹⁹ Nexata ayaibitsaëto penajorobicuene peyapëtaevi, capata pijacuyalatobaxutonë, penajorobicuene yabara pecajinavanapaebaxutonë. Pamatacabi bajarapamonae comuaca bajarapabaxutonë, ayaimatamota comuaca. Nexata daxita bajarapamonae bajarapacuyalatobaxutonëmi tajuita isotota daxitajivi pitabarata. Petajuitsicujinae itsa namataëjëta petajuitsibaxutonëmi pematamo, xuaba pina cincuenta mil ponëbeje palatanëanë. Bajarapapalatanëanë bitso penamatamotsinëanë. ²⁰ Nexata bajarapacuenia Dioso pitorobilivaisi yacaëjëpaponae baja daxitanacuanëjava. Nexata ayaibitsaëto tsaponae Dioso pejumecovënëtsivi.

²¹ Bajaraxuacujinae Pablo najamatabëxaina peponaenexa Macedonia nacujava, Acaya nacujava ata, petaenajetarucaenexa Dioso pejumecovënëtsivi. Bajaraxuacujinae ponaejitsia Jerusalén tomarabelia. Pablo nexata jumaiti:

—Tapatsicujinae Jerusalén tomarabelia, ponaenajë icatsia Roma tomarabelia ata, jai Pablo.

²² Nexata Pablo itoroba Macedonia nacuyabelia anijanëbeje pijajivitonëbeje, Timoteobeje Erastobeje. Pablo abaxë bajayajebi ponapona Asiavënë nacuata.

Pacuenia picani Pablo Efeso tomarata jamatabëbeyaxuabatsi yabara pelivaisi

²³ Pablo itsa ponapona Asiavënë nacuata, Efeso tomarapijivi bitso anaepana Jesús pelivaisi pejumecovënëtsivijavabelia. ²⁴ Efeso tomarapijivi anaepana Pabloanajavabelia Demetrio pejamatabëcueneta. Demetrio platananita templobo jumapecataeya exanabiaba, tsiquiriboxi. Saya pecobeta jumapecataeya pexanaediosova, Artemisavënë diosova, pijatemplobo jumapecataeya Demetrio exanabiaba bajarapaboxi. Demetrio templobo jumapecataeya itsa exanabiaba, bajarapaboxi pebarënacuenebivi bitso ayaicuenia palata barëpitabiaba bajarapaboximatamo. ²⁵ Nexata Demetrio junata pebarënacaetuatsinexa daxita pebarënacuenebibivi bajarapaboxi. Junatanua itsamonae ata, pamonaë pijinia jumapecataeya pexanaëjavanë nacuenebabiaba. Nexata Demetrio jumaiti bajarapamonaejavabelia:

—Paxamë rabaja payapëtaneme mapacuenieje. Jumapecataeya vajaexanabiabijavanë vajacanajetabiabixae, ayajava palata xainaponatsi. ²⁶ Pataneme rabaja. Pajumetanemenua baja Pablo pejumaitisaponaejava mapacueniaje: “Jivi raja pecobeta jumapecataeya pexanaenëanë, apo diosovi cajena,” pejaitisaponaejava. Nexata jivi ayaibitsaëttoxaneto mapatomarapijivije jumecovënëtapona Pablo bajarapacuenia petsipaebaponaëjava. Itsiata apo ëmapatomarapijivije. Daxita Asiavënë nacupijivi ata jumecovënëtapona. ²⁷ Bajarapacuenia jivi ayaibitsaëto pejumecovënëtaponaëjava apo nacatoxanepanae. Tsipaji jivi apo nacacomuatsi tsipae Artemisavënë diosova pijacuene vajanacuenebijava. Pinijijamatabëcuene pexainaediosova Artemisa pijatemplobo ata,

apo yaiyatae tsipae. Baitsi padiosova daxita Asiavënë nacuapijivi, daxitanacuanëpijivi ata, pematabacabëta tonubenabiaba pevajëcabiabinexa bajarapovajavabelia, vereverecaejitsipa. Nexata baja bajarapovajavabelia jivi apo vajëcabiabi tsipae, jai Demetrio templobo jumapecataeya tsiquiriboxi pexanabiabivijavabelia.

²⁸ Nexata bajarapamonae itsa jumetane bajarapacuenia Demetrio pejumaitsijava, nexata bitso bajarapamonae anaepana. Pinijijumeta vavajai tsaponae. Jumaitsi:

—¡Pinijijamatabëcuene raja pexainaediosova Artemisa, Efeso tomarapijivitsi vajadiosova! jai tsaponae bajarapamonae.

²⁹ Nexata daxita Efeso tomarapijivi itsa jumetane, bitso anaepana Pablobanajavabelia. Nexata ponëbeje Pablo yanatatsi, Gayobeje Aristarcobeje, Efeso tomarapijivi vaetabatsibeje. Bajaraponëbeje Macedonia nacuapijinëbeje. Daxitajivi vaetabiaya nacobenacaponatsibeje pinijiboxanetojavabelia, itsabelia baja cajena daxita tomarapijivi nacaetuatabiaba. ³⁰ Pablo picani jumaitsi Dioso pejumecovënëtsivijavabelia:

—Xanë najonejitsianë mapaboyaliaje taneyanatsinëbeje tayajivicuaicuaijainexa penacaetuatsivijavabelia, jai.

Itsiata Dioso pejumecovënëtsivi apo tocopatsitsi Pablo penajonenexalia. ³¹ Asiavënë nacuapijivi pevetsivi, Pablo yapëtanetsi. Nexata bajarapamonae asaëya Pablo tonajumeitorobarenatsi penajoneyaniva bajarapaboyabelia pebeyaxuabiyanivatsi.

³² Efeso tomarapijivi penacaetuatsijavata, nalivaisijëpaeya apo cuaicuaijai. Nexata pevavajaijavata itsamonae itsalivaisicuenia vavajaiya jumai tsaponae. Itsamonae pijinia itsalivaisicuenia vavajai tsaponae. Tsipaji jivi ayaibitsaëtoxaneto apo yapëtae palivaisi yabara nacaetuata. ³³ Nexata Efeso tomarapijivi penacaetuatsijavata, caejiviyobeje judíovi nanacaetuata. Bajarapajudíovi yapëtane palivaisi yabara jivi ayaibitsaëto nacaetuata. Nexata bajarapajudíovi tsipaeba Alejandrovënënjavabelia Alejandro peyapëtaenexa xua yabara jivi ayaibitsaëto nacaetuata. Tsipaji Alejandro ata judiónë.

Nexata Alejandro pevëna judíovi pënatorobajarabiaya itorobatsi daxitajivi pitabarata penucaenexa. Nexata Alejandro nacobeyota jivi pemoyanexa petsipaebinexa Efeso tomarapijivi pianaepanaeyaniva daxita judíovijavabelia. ³⁴ Itsiata baitsi jane Efeso tomarajivi apo tocopatsi Alejandro pecuaicuaijainexa. Itsa daxitajivi yapëtane Alejandro judiónëcuene, nexata daxita vavajaiya jumai tsaponae anijahorabejecuenia mapacueniaje:

—¡Pinijijamatabëcuene raja pexainaediosova Artemisa, Efeso nacuapijivitsi vajadiosova! jai tsaponae bajarapamonae.

³⁵ Bajaraxuacujinae nexata tomara jane baja pevetsinë daxitajivi moyaxana. Nexata jumeitavetsiaya jumaitsi:

—PaEfeso tomarapijivimë, daxitanacuanëpijivi baja cajena yapëtane vajanacatocopatsijava vajavetsinexa mapatomarataje peceaëbo, pinijijamatabëcuene pexainaediosova Artemisa pijatemplobo. Daxitanacuanëpijivi baja cajena yapëtane dioso jumapeibotova, Artemisa, athëbëvetsica pejopaejava mapatomarataje. ³⁶ Nexata bajarapadiosojumapeibotova athëbëvetsica pejopaejava yabara, acuenebi itsajivi ata: “Jume,” pejajava. Nexata pajamatejemamëre. Pëtsa abaxë itsacuene paexaname copiaya panajamatabëxainaenejevamë xaniavaetsia. ³⁷ Mapapebibeje paxamë pacapatameje, apo penacobetoxotsinëbeje templobopijijava. Pibisiacuenia apo baracuaicuaijibejenua vajadiosova Artemisa, jai Efeso tomara pevetsinë Efeso tomarata penacaetuatsivijavabelia.

³⁸ Icatsia tomara pevetsinë jumaitsi bajarapamonaejavabelia:

—Demetriobana itsa jamatabëneconita itsajivi, nexata neconitsi juezmonae pitabarata, jivi peneconitabiabibota. Bajara saya xua juezmonae evetavanapa. ³⁹ Itsa apo paneconitsijitsiamë jivi, saya itsa panacaetuata me itsacuenelivaisiyo yabara, nexata saya roviaia papaebare xaniavaetsia daxitajivi penacaetuatsijavata, pacuenia

gobierno nacaitoroba. ⁴⁰ Xaniajanë pacuenia pacatsipaebijitsiatsi. Ajena, mapamat-acabitaje, mapacuenia itsa exanaponaejitsipatsije, nacananeconitsiaexanaejitsipa gobierno. Bajarapacuenia nacananeconitsiaexanaejitsipa tsipaji itsacueneneconi itsajivi xainaenejeva, mapacuenia anaeya nacaetuatatsije, jai Efeso tomara pevetsinë penacaetuatsivijavabelia.

⁴¹ Itsa baja Efeso tomara pevetsinë najumevereta bajarapacuenia petsipaebijava, itoroba baja daxitajivi penaviabinexa pijabonëjavabelia.

20

Pacuenia Pablo najetaruca Macedonia nacujava, Grecia nacujava ata, yabara pelivaisi

¹ Itsa baja Efeso tomarapijivi jamatabëcaeva pianaepanaejava, nexata Pablo junata penacaetuatsinexa daxita Dioso pejumecovënëtsivi. Nexata Pablo muxujioba Dioso pejumecovënëtsivi pevajënaeyabelia piäjamatatabëcuenesaë tsavanapaenexa Dioso pejumecovënëtsijava. Pablo nexata pexaniacuenia napëjioba bajarapamonae. Bajaraxuacujinae Pablo baja pona Macedonia nacujavabelia. ² Nexata Pablo itsa pata Macedonia nacujavabelia, pexanialivaisi tsipaebanajetaruca Macedonia nacujavabelia. ³ Nexata Grecia nacujavabelia, pexanialivaisi tsipaebanajetaruca Macedonia nacujavabelia. ⁴ Nexata Grecia nacujavabelia, pexanialivaisi tsipaebanajetaruca Macedonia nacujavabelia. ⁵ Nexata Grecia nacujavabelia, pexanialivaisi tsipaebanajetaruca Macedonia nacujavabelia. ⁶ Nexata Grecia nacujavabelia, pexanialivaisi tsipaebanajetaruca Macedonia nacujavabelia. ⁷ Nexata Grecia nacujavabelia, pexanialivaisi tsipaebanajetaruca Macedonia nacujavabelia. ⁸ Nexata Grecia nacujavabelia, pexanialivaisi tsipaebanajetaruca Macedonia nacujavabelia. ⁹ Nexata Grecia nacujavabelia, pexanialivaisi tsipaebanajetaruca Macedonia nacujavabelia. ¹⁰ Nexata Grecia nacujavabelia, pexanialivaisi tsipaebanajetaruca Macedonia nacujavabelia.

Pacuenia Pablo ponapona Troas tomarata yabara pelivaisi

⁷ Troas tomarata domingomatacabi panacaetuatajë daxita Dioso pejumecovënëtsivi yajava, patanajamatatabënapitsinexa xua yabara Cristo sivatëpa. Pablo nexata livaisi tsipaeba. Meravia baja pitsijavata Pablo Mileto tomarabelia naropotsijitsia. Bajaraxuata Pablo livaisi tsipaeba meravijebi. ⁸ Panacaetuatajë athëbëabetsia pënëyatuucubibota. Nexata athëbëyo paira paenayajë, itsajotatsia pitayotsijavanë ayaijava rubena xaniavaetsia pitayotsinexa. ⁹ Nexata pevëjëato ventanajavata eca, Euticovënënë. Pablo nexata bajayajebi livaisi tsipaeba. Nexata belia pevëjëato bitso itamajitsipaneca. Nexata baja majiteca. Pemajitecaenë nexata pevëjëato jopareca acueyabi pairabejavavereca. Nexata pevëjëato itsa sivarunarecatsi, petëpaenë baja pitatsi. ¹⁰ Nexata Pablo sivarunareca. Pematabacabëta ecaeya isapita petëpaenë. Nexata Pablo jumaitsi Dioso pejumecovënëtsivijavabelia:

—Pëtsa panajamatatabëxainame. Asaë rabaja icatsia pevëjëato, jai Pablo.

Nexata pevëjëato icatsia asaë. ¹¹ Nexata Pablo icatsia caevëa junaya. Pejunaecujinaet-sia epatsënëca jane baja pan. Tsicobetsana jane baja daxita Dioso pejumecovënëtsivi pexaenexa. Pexaecujinae abaxë icatsia Pablo bajayajebi cuaicuaijai. Pecuaicuaijainë belia yamatacabibecatsi. Bajaraxuacujinae Pablo jane baja pona Mileto tomarabelia. ¹² Nexata baja pevëjëato piasaënë barënaviabatsi pijaboyabelia. Barëya bitso bajarapamonae piasaëxae pevëjëato petëpaecujinae.

Pacuenia Pablobana naropoba Troas tomarata pepatsinexa Mileto tomarabelia yabara pelivaisi

¹³ Paxanë Pablo paneitoroba barcota menia namataxainaeya patanaponaenexa Asón tomarabelia. Bajarapacuenia Pablo paneitoroba tsipaji Pablo matatsënëa najetarucaejitsia pepatsinexa Asón tomarabelia. Nexata Pablo itsa pata Asón tomarata, bajarapatomarata patayapitsinexa. ¹⁴ Nexata jane baja Pablo itsa pata Asón tomarata, Pablo baja nanonorena barco ënëaberenä. Nexata baja panaponajë Mitilene tomarabelia. ¹⁵ Bajaraxuacujinae icatsia Mitilene tomarata pananaropobajë. Nexata meravia pitsijavata panapatajë Quíotomara canacujitsialia peecaetomarabelia. Bajarapatomarata icatsia patananaropobicujinae, meravia icatsia pitsijavata, panapatajë Samos tunaetota peecaetomarabelia. Bajarapatomarata icatsia patananaropobicujinae, panapatajë icatsia Trogilio tomarabelia. Nexata abaxë Trogilio tomarata panacueraevetajë. Nexata icatsia Trogilio tomarata patananaropobicujinae, caematacabicujinae, icatsia panapatajë jane baja Mileto tomarabelia. ¹⁶ Pablo rovia jamatabëxeneta Efesotomara, Asiavënë nacuata peecaetomara. Tsipaji apo jamatabëponaponae bajayajebi Asiavënë nacuata. Pablo bepíjia jamatabëpata Jerusalén tomarabelia Pentecostésvënë fiestavajënaeya.

Pacuenia Pablo Mileto tomarata livaisi tsipaeba Efeso tomaraverena pepatsivi, ancianovijavabelia, yabara pelivaisi

¹⁷ Mileto tomaravelia Pablo tonajumeitoroba Efeso tomarapíjivi ancianovi pepatsinexarena Mileto tomaraberenä. ¹⁸ Nexata baja ancianovi itsa parena Pablojavaberenä, Pablo jumaitsi bajarapaancianovijavabelia:

—Paxamë baja cajena payapëtaneme mapacueneje. Asiavënë nacuata tapatsimatacabijavaveliacujinae, Dioso pitorobilivaisi tsipaebaponaponajë Asiavënë nacuata. Daxitamatacabi tonacuenebajë Dioso pijacuene. ¹⁹ Dioso pijacuene itsa tonacuenebaponaponajë, apo jamatabëjumaitsinë: “Xanë bitso ayaijamatabëcuenenënë,” apo jamatabëjanë. Itsa taeyabiabajë itsamonae pecopabijava Dioso pejumecovënëtsijavami, bitso sivanueyabiabajë. Bitso bejiobinëna tsabiabi tsipaji judíovi jamatabënebexuababiaba. ²⁰ Daxita Dioso pitorobilivaisi pacatsipaebabiabatsi papecajamatabëcueneyavenonaenexa. Caelivaisi ata apo pacavecuacopatsitsi. Pacatsipaebabiabatsi baja cajena daxitajivi pitabarata. Pacatsipaebabiabatsinua baja cajena panijabonëjava ata. ²¹ Asaëya tsipaebabiabajë judíovi, apo judíovi ata, daxita bajarapamonae pecopabinexa pibisiacuene pexanabiabijava penajamatabëcuenepënëyorotsinexa Diosojavabelia. Bajaraxuacujinae jane baja pejumecovënëtsinexa vajatuxanenë Jesucristo pelivaisi. ²² Mara jotacujinaeje ponaenajë Jerusalén tomarabelia Espíritu Santo taneitorobixae bajarabelia taponanexa. Itsiata xaniavaetsia apo yapëtaenë pacuenia nexanaejitsia Jerusalén tomarapíjivi. ²³ Itsiata caejavayo yapëtaníjia. Caetomara canacujitsia Dioso pitorobilivaisi tatsipaebanajetarucaejavata Espíritu Santo nejumai tsabiabi: “Caetsiana raja penaneconitsivi pejebabiabibota. Xamë bitso benejiobicuene taename,” nejai tsabiabi Espíritu Santo. ²⁴ Itsiata baitsi jane cajena apo junavinë bajarapacuene yabara. “Belia nebexuabijitsipa,” apo jamatabëjanë cajena. Jamatabëveretajë pacuene vajatuxanenë Jesús nitoroba tatonacuenebinexa daxitajivi tatsipaebanajetarucaenexa pexanialivaisi, Dioso vajanacaitaxutotsoniataejava, jai Pablo ancianovijavabelia.

²⁵ Icatsia Pablo jumaitsi ancianovijavabelia:

—Paxamëjava naponaponajë patacatsipaebinxexa Dioso pevetsijavanexa daxita pijajivi. Tajëvelia baja cajena yapëtaniji. Apo panetaemë rabaja tsane matavëjëa. ²⁶ Bajaraxuata ajena baja pacatsipaebatsi. Itsajivi paxamëyajuvënëjivi itsa naxuabiana Diosovecua, apo naxuabi tsane xanë tajamatabëcueneta. ²⁷ Apo naxuabi tsane xanë tajamatabëcueneta tsipaji baja daxita Dioso pitorobilivaisi xaniavaetsia baja cajena pacatsipaebatsi. Caelivaisiyo ata apo pacavecuacopatsitsi, jai Pablo ancianovijavabelia.

²⁸ Icatsia Pablo jumaitsi ancianovijavabelia:

—Xaniavaetsia nayajivitaeya pajinavanapare pibisiacuene paneexanaeyaniva. Pacuenia oveja pexainaevi xaniavaetsia evetavanapa pijaoveja, bajara pijinia pacuenia xaniavaetsia paevetavanapaename daxita pamonaë Dioso pejumecovënëtsivi. Espiritu Santo raja pacaitoroba panetoevetsinexa vajatuxanenë Jesús pijajivi, pamonaë comuata pijanata. ²⁹ Tajëvelia baja cajena yapëtaniji tacovëya penajetarubenaëjavanexa saicayacuenia Dioso pejumelivaisivecua petsipaebivi. Bajarapamonaë najetarubenaëna jivi Dioso pejumecovënëtsijava pevereverecaëyaexanaenexa. Pacuenia nevëthë pianaepanaevi verene oveja, bajara jamatabëcueneitsane bajarapamonaë pevereverecaëyaexanaenexa jivi Dioso pejumecovënëtsijavami. ³⁰ Paxamëyajuvënëvi ata saicayacuenia Dioso pejumelivaisivecua tsipaebaponaëna peyamaxëitojorobinxexa Dioso pejumecovënëtsivi. Nexata Dioso pejumecovënëtsivi navecuanatsanaëna pepënaponaenexa bajarapamonaë. ³¹ Bajaraxuata xaniavaetsia paevetavanapare Dioso pejumecovënëtsivi. Panajamatabënapire mapacueneye. Xanë baja cajena acueyabi pavaibeje, caematacabi canacujitsia, meravivi yajava, caeto ata apo copatsinë patacamuxujiobijava bitso patacaasivaxae. Itsajavata tanuejavata ata pacamuxujiobiabatsi, jai Pablo Efeso tomarapijiancianovijavabelia.

³² Icatsia Pablo jumaitsi bajarapamonaëjavabelia:

—Tajamonae, nexata baja pacacopatatsi Dioso pecobeyabelia Dioso papecaevetsinexa. Dioso pejumelivaisi nacatsipaeba Dioso vajanacaasivajava. Nexata bajarapalivaisi pacajamatabëcueneyavenonaëna. Bajarapalivaisi caëjëpatsi papecajamatabëcuene asaëyaexanaenexa Diosojavabelia. Dioso pacacapanepaëna pacuenia Dioso capanepaëna daxita pamonaë Dioso aneconijibia tane. ³³ Xanë itsa naponaponajë paxamëjavata, apo najamatabëxainanë tanaxainaeabinexa itsanë pijapalata, penaxatabijava ata. ³⁴ Payapëtaneme baja cajena mapacueneye. Tacobeta nacuenebajë tanamatavenonaëjavaxi tacomuataponaëna, tayajavaponaponaëvi ata tatocomuatsinexa. ³⁵ Pacatsitanacueneitajëtatsi baja cajena pacuenia paxamë ata bepanacuenebame. Bepayavenonamenua itsamonae bitso bepejiobivi. Tsipaji baja cajena vajatuxanenë Jesús jumaitsi mapacueniaje: “Xanepana bitso itsamonaejavabelia vajarajutabiabijava vaxaitsi itsamonae vajanacarajutabiabijava matatoxenetsia. Tsipaji bitso jamatabëcuenebarëyatsi itsa rajutatsi itsamonaejavabelia vajanacarajutsijava matatoxenetsia,” jai raja Jesús, jai Pablo ancianovijavabelia.

³⁶ Itsa baja Pablo najumevereta bajarapacuenia petsipaebijava, Pablo daxita ancianovi pematabacabëta barënuca pebarënavajëtsinexa Diosojavabelia. ³⁷ Bajaraxuacujinaë Pablo baja pona. Nexata ancianovi pënuëyabatsi. Nexata Pablo itsa napëjioba ancianovi, yaitaxutonueya vaetabiaya itabaratsutsuneponatsi. ³⁸ Bitso ancianovi najamatabëxaina. Tsipaji Pablo jumaitsi:

—Apo panetaemë rabaja tsane matavëjëa, jai.

Bajaraxuacujinaë Pablo barcojavabelia peponaëjavata, bajarapamonaë pënuaxubaliatsi barcojavabelia.

21

Pacuenia Pablo pona Jerusalén tomarabelia yabara pelivaisi

¹ Itsa baja panapëjioberetajë ancianovi, panarunarecajë baja barco ënëabereca. Pananicabaliajë roviaia patapatsinexalia Cos tomarabelia. Bajaraxuacujinae, meravia pitsijavata, panapatajë abaxë eputua Rodas tomarata. Bajaraxuacujinae abaxë icatsia panapatajë Pátara tomarabelia. ² Nexata Pátara tomarata icatsia pacaxitajarabajë itsabarco. Bajarapabarco ponaejitsia Fenicia nacuyabelia. Nexata icatsia bajara-pabarcota patanaponaenexa, panarunarecajë bajarapamo ënëabereca. Panaponajë jane baja. ³ Nexata barcota patanajetarubenaevavata, pataeyetajë patatsavenonena Chipretunaeto. Paxenetanajetarubenaevavata rovia. Paponajë Siria nacuyabelia. Nexata baja papatajë Siria nacuyabelia Tiro tomarata. Nexata Tiro tomarata juteta barcoënëta pecaponaevava. ⁴ Nexata Tiro tomarata pacaxitajarabajë Dioso pejumecovënëtsivi. Bajarapamonaejavata pajinavanapajë siete pamatacabibeje. Bajarapamonae tajëvelia Espiritu Santo pejamatabëcueneta yapëtaeyaxanatsi Pablo pebejiobiaexanaevavanexatsi Jerusalén tomarata. Nexata bajarapamonae jumaitsi Pablojavabelia:

—Pëtsa poname Jerusalén tomarabelia, jai picani bajarapamonae.

⁵ Itsiata baja icatsia siete pamatacabibejecujinae panaropobajë. Nexata Tiro tomara-pijivi, daxita Dioso pejumecovënëtsivi, pijavajivi yajava, pexi yajava, patapëta naponalia mene itapayabelia patanepëtaenexa pataponaevava. Nexata mene itapatalia, tajetabota, daxita bajarapamonae yajava, panubenaevavata patamatabacabëta patavajëtsinexa Diosojavabelia. ⁶ Bajaraxuacujinae panapëjioberetajë baja daxita Dioso pejumecovënëtsivi. Icatsia baja panarunarecajë barco ënëaberena. Bajarapamonae baja naviabalia pijabonëjavabelia.

⁷ Tiro tomarata patananaropobicujinae, panapatajë Tolemaida tomarabelia. Bajarapatomarata pabajacobajë Dioso pejumecovënëtsivi. Bajarapamonaejavata panajinavanapajë caematacabi. ⁸ Meravia icatsia pitsijavata pananaropobajë. Panapatajë icatsia Cesarea tomarabelia. Cesarea tomarata patapatsicujinae, panaponajë Felipe pijaboyabelia. Felipe, Dioso pitorobilivaisi jivi petsipaebinë, siete ponëbeje diaconoviyajuvënënë. Bajaraponë pijabota panajinavanapajë. ⁹ Felipe xaina cuatro povabeje pexi. Bajarapapetiriavi abaxë apo nacojiobi. Bajarapamonae tsipaebabiaba jivijavabelia Dioso pitorobilivaisi, palivaisi Espiritu Santo pejamatabëcueneta yapëtaeyaxanatsi. ¹⁰ Itsa baja paxainajë anijamatacabianë Felipe pijabota patanapatsicujinae, Judea nacuverena pata Diosojumepaebinë profeta, Agabovënënë. ¹¹ Bajaraponë pata paxanëjavaberena Felipe pijabota. Nexata Agabo Pablo pijacorreabocoto veepajonotatsi. Bajarapabocotota Agabo nacobecëtabeje. Nataxucëtabeje yajava. Nexata Agabo jumaitsi:

—Espiritu Santo raja nejumaitsi tajëvelia mapacueniaje: “Jerusalén tomarata pejinavanapaevi, judíovi, mapacuenia cëtsianatsi mapacorreabocoto pexainaenëje. Bajaraxuacujinae canajetsianatsi itsanacuapijivi pecobeyabelia, apo judíovijavabelia,” jai raja tajëvelia Espiritu Santo, jai Agabo Pablo yabara.

¹² Nexata itsa pajumetaniji bajarapacuenia Agabo patanetsipaebijava, nexata paxanë, Cesarea tomarapijivi yajava, panacobenaasivanë picani Pablo peponaevaniva Jerusalén tomarabelia. ¹³ Nexata Pablo panejumaitsi:

—¿Detsa xuajitsia panuame? ¿Panenajamatabëxainaeya exanaevavatsiamë tsaja? Xanë raja evetajë tanecëtsinexa. Evetajë tanebeyaxuabijava ata Jerusalén tomarata vajatuxanenë Jesús pelivaisi yabara, panejai Pablo.

¹⁴ Pasiva atanë tsabiabi, Pablo itsiata apo najamatabëcopatsi peponaevava Jerusalén tomarabelia. Nexata baja belia pacopatajë pataasivatsabiabijava. Pajumaitsinë nexata:

—Pacuenia Dioso tojitsipatsi pexanaevavatsi, beexanaevavatsi baja, pajanë.

¹⁵ Caematacabibejecujinae paxaniavaetajë patacobecovëjavaxi. Nexata jane baja panaropobajë Jerusalén tomarabelia. ¹⁶ Itsamonae Dioso pejumecovënëtsivi, Cesarea tomarapijivi, paneyanalia. Bajarapamonae panebarëpona Mnasónvënënë, Chipretunaeto nacuapijinë, pijaboyabelia. Nexata bajaraponë pijabota panajinavanapajë. Bajaraponë copiaya Dioso pejumecovënëtsiviyajuvënënë.

Pacuenia Pablo Jerusalén tomarata Santiago barëcuaicuaijai yabara pelivaisi

¹⁷ Itsa papatajë Jerusalén tomarabelia, Dioso pejumecovënëtsivi panecopiapita jamatabëcuenebarëyaya. ¹⁸ Nexata meravia pitsijavata Pablo panebarësivaxaina Santiagojavabelia. Nexata Santiago pijabota naena ancianovi. ¹⁹ Nexata Pablo bajarapamonae bajacoba. Pebajacobicujinae Pablo bajarapamonaejavabelia navajunupaeba daxita pacuene Pablo exanapona apo judíovijava ata Dioso peyavenonaexaetsi. ²⁰ Itsa jumetane bajarapacuenia Pablo penavajunupaebijava, nexata Santiago, ancianovi yajava, jamatabëcuenebarëya. Nexata daxita bajarapamonae pejumetaexae bajarapacueni, pexaniajamatabëcuene rajuta Diosojavabelia. Nexata Santiagobana jumaitsi Pablojavabelia: —Patajabananë, yapëtaneme baja cajena mapacueneje. Judíovi bitso ayaibit-saëtoxaneto, miles pajivibeje Dioso pejumecovënëtsivi. Yapëtanemenua baja mapacueneje. Daxita bajarapajudíovi jumecovënëtsi ata Jesús pelivaisi, itsiata abaxë tsiteca jumecovënëtavanapa Dioso Moiséspijinëta penajumecopatsilivaisi. ²¹ Pajudíovi apo jumecovënëtsi Jesús pelivaisi, xamë netsipaebaponaelivaisi cayabaranajumetsënëtabiaba. Nexata bajarapajudíovi najumetsënëtsiaya jumai tsabiabi Jesús pelivaisi pejumecovënëtsijudíovijavabelia: “Itsa raja Pablo livaisi tsipaebapona judíovijava, itsanacuanëjava pejinavanapaevi, Pablo itavetabiaba judíovi pecopatsinexa Dioso Moiséspijinëta penajumecopatsilivaisi pejumecovënëtsijavami. Itavetabiabanua bajarapamonae pecopabinexa peperabëcaucubijava pexi. Pablo itavetabiabanua bajarapamonae pecatsitecaeyaniva vajasalinaivi pijacuene,” jai tsabiabi bajarapamonae najumetsënëtsiaya xamë yabara Jesús pelivaisi pejumecovënëtsijudíovijavabelia, jai Santiagobana Pablojavabelia.

²² Icatsia Santiagobana jumaitsi Pablojavabelia:

—¿Detsa nexata vaxaitsi itsanetsi? Itsa raeta judíovi Jesús pelivaisi pejumecovënëtsivi, cavënëlivaisitane nepatsijava, nacaetuatsiana penabarëcuaicuaijainexa xamë yabara. ²³ Nexata daxitajivi pecayapëtaenexa nejumecovënëtsijava Dioso Moiséspijinëta penajumecopatsilivaisi, exanaename pacuenia pacaitorobijitsiatsi. Majotaje cuatro ponëbeje paxanëyajuvënëvi vereta baja pexanaejava pacuenia baja najumecapanepaeya jumaitsi Diosojavabelia. Nexata bajarapamonae ponaejitsia temploboyabelia ofrenda perajutsinexa Diosojavabelia. ²⁴ Nexata naponaname bajarapamonaeta temploboyabelia. Nexata templobota nanajamatabëcuenexaniavaetsianame niajamatabëcuenesaënexa Diosojavabelia. Pacuenia bajarapamonae najamatabëcuenexaniavaetsijitsia pijamatabëcuenesaënexa Diosojavabelia, bajarapacuenia nanajamatabëcuenexaniavaetsianame. Nexata daxita xua bajarapamonae notsiana templobota ofrenda perajutsinexa Diosojavabelia, ponëjavabelia notsiana, bajaraxua xamë daxita cobecovëmatamotsianame. Bajaraxuacujinae bajarapamonae daxitamatanami matacasibianatsi. Bajarapacuenia itsa exanaename, daxita judíovi cayapëtaena nejumecovënëtsijava Dioso Moiséspijinëta penajumecopatsilivaisi. Nexata daxita judíovi yapëtaena najumetsënëtsiaya pecabaracuaicuaijai tsabiabijava pajudíovi apo jumecovënëtsi Jesús pelivaisi. ²⁵ Pamona apo judíovi, pijasalinaivi apo itavetsitsi daxita pacuene vaxaitsi judíovitsi vajasalinaivi nacaitaveta. Nexata pamona apo judíovi ata, Dioso pejumecovënëtsivi, pataitavetsinexa, caelivaisiyobeje patoyaquinajë cuyalatota. Itsa patoyaquinajë, pajumaitsinë mapacueniaje: “Pecobeta saya pexanaenënejavabelia pevi perajutsinexa ofrendacuenia itsa tobia baca oveja ata, pëtsa paxaneme bajarapayajuvënëvi. Pëtsa paxaneme peja. Pëtsa paxaneme

cuibocuetsacaeya pebeyaxuabinë pevi. Papebijivi baja nacojioba, pëtsa matayajibatsi itsavajavabelia pijavavecua. Papebijivi pijinia abaxë apo nacojiobi, pëtsa matayajibatsi petirivajavabelia. Bajara pijinia pacuenia petiriavi ata. Papetiriavi baja nacojioba, pëtsa matayajibatsi itsanëjavabelia pamonavecua. Papetiriavi pijinia abaxë apo nacojiobi, pëtsa matayajibatsi pebijavabelia,” pajanë itsa patoyaquinajë apo judíovijavabelia, jai Santiagobana Pablojavabelia.

Pacuenia Pablo templobota vaetabatsi penaneconitsivi pejebabiabibota peetsinexatsi yabara pelivaisi

²⁶ Santiagobana Pablo pitorobicujinaetsi, meravia pitsijavata, Pablo napona pebijivi cuatro ponëbeje pepëta pacuenia Santiagobana itorobatsi. Pablo nexata najamatabëcuenexaniavaetapona pijamatabëcuenesaënexa Diosojavabelia cuatro ponëbeje yajava. Bjaraxuacujinae Pablo temploboyalia joneya sacerdotevijavabelia, petsipaebinexa pamatacabi copiarucaejitsia Pablobana penajamatabëcuene xaniavaetsijava Diosojavabelia. Bjarapamatacabi cuatro ponëbeje Diosojavabelia ofrenda perajutsijavanënexa templobota notsijitsia. Nexata picani daxita bjaraxua Pablo cobe-covëmatamotsijitsia bjaraxua pecanajetsivijavabelia.

²⁷ Nexata siete pamatacabibejecujinae, pamatacabi jane baja Pablo, cuatro ponëbeje yajava, Diosojavabelia ofrenda rajutsijitsia, Pablo templobota tanetsi judíovi, Asiavënë nacuaverena pepatsivi. Nexata bjarapajudíovi itoroba daxita Jerusalén tomarapijivi pianaepanaenexa Pablojavabelia. Nexata Jerusalén tomarapijivi, Asiavënë nacuaverena pepatsivi yajava, nacobenavaetabatsi Pablo. ²⁸ Nexata bjarapamonae vavajai pinijijumeta. Najumetsënëtsiaya jumaitsi:

—¡Tajamonae judíovi, naxanitsia! ¡Paneyavenonare! Maponëje daxitanacuanëjava livaisi tsipaebanajetaruca daxitanacuanëpijivi vajanacaitoyanexa vaxaitsi manacuapijivitsije. Itavetaponanua Dioso Moiséspijinëta penajumecopatsilivaisi jivi pejumecovënëtsiyaniva. Itavetaponanua mapatemplobo ataje jivi peyaiyataeyaniva. Apo judíovi ata Pablo barëjoneyabiaba matemploboyarenaje. Nexata baja Dioso tsitaabejetsi mapatemploboje, Dioso pijatemplobo. Nexata baja Pablo naneconita Diosojavabelia, jai najumetsënëtsiaya judíovi Pablo yabara Asiavënë nacuaverena pepatsivi.

²⁹ Bjarapacuenia vavajaiya jumaitsi tsipaji baja copiaya bjarapajudíovi Pablo tanetsi pebarëponaponaejava Jerusalén tomarata apo judionë, Trófimovënë, Efeso tomarapijinë. Nexata jamatabëcuenenavëxaniabiaya bjarapamonae jamatabëjumaitsi:

—Pablo raeta apo judionë barëjunua mapatemploboyarenaje, jamatabëjai Trófimo yabara.

Pablo cajena Trófimo apo barëjone temploboyalia.

³⁰ Nexata Asiavënë nacuaverena pepatsivi, Pablo yabara penajumetsënëtsilivaisi, daxita Jerusalén tomarapijivi jumetane. Nexata bitso anaepana. Nexata daxita bjarapamonae kujinaejinarena templobojavaberena. Bjarapamonae vaetabatsi Pablo. Robocatsi vayafuabelia temploboënëvecua. Nexata templobobaupaxanetonë bepíjia vecuabaupaxatabatsi. ³¹ Bjarapamonae picani Pablo jamatabëbeyaxuabatsi. Nexata bjarapaepatota itsamonae tsipaeba vajabitsaë pepo pevetsinë, comandantejavabelia. Tsipaeba pacuenia daxita Jerusalén tomarapijivi bitso anaepanavanapa. ³² Nexata comandante bepíjia barëlia pijajivi vajabitsaëvi, vajabitsaëvi pijacapítánvi yajava. Cujinaejina jivi penacaetuatsijavabelia. Nexata judíovi itsa tane comandante vajabitsaëvi pebarëpatsijava, nexata judíovi copaba pebejavatsi Pablo. ³³ Nexata comandante Pablo kujirenatsi. Vaetabiaexanatsi pijajivi. Comandante itoroba pijajivi Pablo pecëtsinexatsi anijacadenamaëtotabeje. Bjaraxuacujinae yanijoba judíovijavabelia.

—¿Detsa maponëje? ¿Detsa xua exana maponëje? jai comandante.

³⁴ Nexata bjarapajivi bitsaëtoxanetonëyajuvënëvi comandantejavabelia najuatsipae-banubena pinijijumeta. Nexata comandante apo jumetae xaniavaetsia bitso jivi

pevavajaixae. Nexata comandante itoroba vajabitsaë Pablo pecaponaenexatsi vajabitsaë pijaboyabelia. ³⁵ Pablo capatatsi vajabitsaë pijaboitapata. Vajabitsaë pijabo pepënëvelia xaina beescaleracuenia pexanaejava. Nexata bajarajota Pablo vajabitsaë nacobenayotsiaya cajunayatsi vajabitsaë pijaboyalia pecajonenexatsi. Tsipaji icatsia bajarajota Pablo jivi bejitsiatsi bitso pianaepanaexae. ³⁶ Jivibitsaëtoxonetonë Pablo barabocabuataponatsi. Vavajai tsabuataponae bajarapamonaë.

—¡Pabeyaxuare! jai tsabuataponae Pablo yabara.

Pacuenia Pablo navajunupaeba jivibitsaëtoxonetonëjavabelia yabara pelivaisi

³⁷ Itsa baja Pablo vajabitsaëvi pijaboyalia cajonejitsiatsi, nexata Pablo griegojumeta jumaitsi comandantejavabelia:

—Netocopare tacatsipaebinexa caejumeyo, jai Pablo.

Nexata comandante jumaitsi:

—¿Xamë tsaja natsipaebame griegojume? ³⁸ ¿Xamë tsaja apo Egipto nacuapijinëmë? ¿Xamë tsaja imata jivi apo itorobimë pianaepanaenexa gobiernojavabelia? ¿Xamë tsaja imata penamaxëvanitsivi cuatro mil ponëmoxëto apo barënajetabajiravimë petusato nacuayabelia? jai comandante Pablojavabelia.

³⁹ Nexata Pablo jumaitsi:

—Jume raja. Xanë raja saicaya judíonënë, Tarso tomarapijinënë. Tarsotomara cajena pinijitomara daxita Cilicia nacuata penaetomaranëvecua. Pexaniacuene netoexanare. Netocopare livaisi tatsipaebinexa mapamonaëjavabeliaje, jai Pablo.

⁴⁰ Nexata comandante tocopatatsi livaisi petsipaebinexa. Pablo nuca vajabitsaë pijabo pepënëvelia beescaleracuenia pexanaejavajumata. Pablo nacobeyota jivi pemoyanexa. Nexata baja jivi itsa moya, Pablo navajunupaeba bajarapamonaëjavabelia hebreojumeta.

Pablo jumaitsi:

22

¹—Tajamonae, panenamuxunaevere. Paxamë ata vajanacua paneevetsivi, panenamuxunaevere. Vepacanavajunupaebatsi daxita xua exanajë, jai Pablo hebreojumeta judíovijavabelia.

² Bajarapajudíovi itsa jumetane palivaisi Pablo tsipaeba hebreojumeta, nexata bitso ajumejibia namuxunaevetena. Nexata Pablo icatsia jumaitsi:

³—Xanë raja judíonënë. Naexanajë Tarso tomarata, Cilicia nacuata peecaetomarata. Itsiata vitsabajë mapatomarataje, Jerusalén tomarata. Pecujarubinë Gamaliel necujaruba. Nexata xaniavaetsia necujaruba daxita vajasalinaivi pijacuene. Nexata picani jamatabëjumaitsinë tsabiabi: “Daxita tajamatabëcueneta Dioso pejitsipaecuenia tonacuenebianajë,” jamatabëjanë tsabiabi. Bajarapacuenia aeconoxae daxita paxamë ata pajamatabëitsimë tsavanapae, jai Pablo.

⁴ Pablo icatsia jumaitsi:

—Xanë abaxë picani bajayata barajinabiabajë pamonaë jumecovënëta pexanialivaisi, Jesucristo pelivaisi. Pamonaë jumecovënëta Jesús pelivaisi, taicaponajë pebijivi. Taicaponajë petiriavi ata. Jebaponajë bajarapamonaë penaneconitsivi pejebabiabibota. Jitsipajë picani pebeyejebinexatsi daxita bajarapamonaë. ⁵ Sacerdotevi pepo penamatacaitorobinë, daxita judíovitsi vajaanianovi ata, pacatsipaëhijitsipa bajarapacuenia, pacuenia baja xaniavaetsia pacanavajunupaebatsi. Tsipaji bajarapamonaëjavabelia vajëtajë tanetsicobeyaquinaenexa cuyalato tatocaponaenexa pamonaë judíovi jinavanapa Damasco tomaratalia. Nexata bajarapajudíovi itsa yoroba bajarapabaxuto, tanetocopatsinexa picani Jesús pelivaisi pejumecovënëtsivi tataicaenexa. Nexata jane baja picani lianë tataicaenexa daxita pexanialivaisi, Jesús pelivaisi, pejumecovënëtsivi,

tacapatsinexa picani maberena je Jerusalén tomaraberena penaneconitsiaexanaenexatsi, jai tsanucae Pablo judíovijavabelia.

Pacuenia Pablo navajunupaeba pacuenia taxuxuaba Jesús pelivaisi pejumecovënëtsijava yabara pelivaisi
(Hch 9.1-19; 26.12-18)

⁶ Pablo icatsia jumaitsi hebreojumeta judíovijavabelia:

—Nexata jane baja ponajë Damasco tomarabelia. Itsa baja imoxoyotanajetarucajë Damasco tomara, jemata matonejeepatota pinijicotia nematatoyorotsia naitayota athëbëvetsica. ⁷ Nexata bajarajota irataeya bocajunuajë irata. Jumetaenucajë athëbëvetsica tanejumaitisijava: “Saulo, Saulo, ¿detsa xuajitsia xanë tajajivi netobejiobiaexanaponame?” tanejaijava. ⁸ Nexata xanë jumaitsinë: “Tajatuxanenë, ¿detsa ponëmë?” janë. Nexata icatsia nejumaitsi: “Xanë raja Jesúsne, Nazaret tomarapijinënë. Xanë raja tajajivi netobejiobiaexanaponame,” nejai. ⁹ Papebijivi yajavanajetarucajë, tane baja cajena athëbëvetsica penaitayotsicotia. Itsiata baitsi jane apo jumetae xua yabara nebarëcuaijai athëbëvetsica. ¹⁰ Nexata xanë jumaitsinë: “Tajatuxanenë, ¿detsa xua nexata exanaenajë?” janë. Nexata pepo petuxanenë nejumaitsi: “Nonotapunare baja. Ponaename baja Damasco tomarabelia. Bajarajotalia catsipaebiana pacuenia exanaejitsiamë,” nejai. ¹¹ Nexata bajarapacotia tataecujinae bitso nitaxutomeraviba. Apo necajëpae tataejava. Nexata saya tayajavaponaevi necomacaponalia Damasco tomarabelia, jai Pablo judíovijavabelia:

¹² Icatsia Pablo jumaitsi judíovijavabelia:

—Bajarajota Damasco tomarata ponapona Ananíasvënënë, bitso pejumecovënëtsinë Dioso Moiséspijinëta penajumecopatsilivaisi. Bajaraponë Ananías yabara daxita judíovi, Damasco tomarapijivi, jumai tsabiabi: “Bitso raja Dioso pejumecovënëtsinë Ananías,” jai tsabiabi. ¹³ Nexata bajaraponë Ananías xanëjavaberena patajopa tanetaenexa. Nexata nejumai tsanucae: “Tajabananë Saulo, icatsia rabaja itaxutoxanepaname,” nejai. Bajarapacuenia tanejumaitisijavata icatsia baja itaxutoxanepanjë. Nexata baja taniji Ananías. ¹⁴ Nexata icatsia Ananías nejumaitsi: “Vamojivimi rabaja pijaDioso caitapeta. Caitapeta baja neyapëtaenexa pacuenia catojitsipa netoexanaenexa. Caitapetanua netaenexa Dioso pitabarata Jesús pepo planeconijibinë. Caitapetanua nejumetaenexa Jesús pecatsipaebilivaisi. ¹⁵ Nexata ponaename daxitanacuanëpijivijavabelia netsipaebanajetarucaenexa pacuenia taneme, pacuenia ata jumetaneme Jesús pelivaisi. ¹⁶ ¿Detsa nexata xuajitsia abaxë najamatabëjematsia ponaponame? Nonotapunare. Cabautisabiana. Jesúsjavabelia nenajamatabëcuenecopatsixae, daxita pibisiacue neanaeneconimi cavecuajibiaexanaena,” nejai Ananías, jai Pablo judíovijavabelia.

Pacuenia Pablo itorobatsi Dioso pitorobilivaisi petsipaebaponaenexa apo judíovijava yabara pelivaisi

¹⁷ Pablo icatsia jumaitsi hebreojumeta judíovijavabelia:

—Bajaraxuacujinae Damasco tomaraverena naviarenajë baja Jerusalén tomaraberena. Nexata itsa patajë Jerusalén tomarata, ponajë templobojavabelia tavajëtsinexa Diosojavabelia templobota. Nexata tavajëtsijavata Diosojavabelia, taniji bemajitsinaebota pepo petuxanenë Jesús. ¹⁸ Nexata Jesús nejumaitsi: “Naxanitsiayo bepijia vecuaponare Jerusaléntomara. Tsipaji raja mapatomarapijivije apo cajumecovënëtsi tsane netsipaebijava xanë talivaisi,” nejai Jesús bemajitsinaebota. ¹⁹ Nexata xanë jumaitsinë: “Tajatuxanenë, bajarapamonae judíovi xaniavaetsia baja cajena neyapëtane. Bajarapamonae neyapëtane judíovi penacaetuatabiabibonëjava tataicaponaenajava daxita pamonaenae cajumecovënëta taconibabeyabiabinexa naebota. ²⁰ Bajarapamonae neyapëtane xanë ata bajarapamonae jamatabëcuenëjépaeya tataenucaejava pamatacabi Estebanpijinë, pecalivaisipaebinëmi, beyaxuabatsi.

Bजारपामाताचि, पामोने एस्टेबानपिजेने बेयाखुअबत्सि, पेनाजुमाजेनेबिजेवाने तोवतानुआजे,” जाने पेपो पेतुखानेने जेसुसजावबेलिया. ²¹ नेखाता पेपो पेतुखानेने नेजुमात्सि: “पोनारे बाजा जेरुसालेन तोमारवेचुआ. काितोरोबिजेत्सिआत्सि राजा इतसानुआनेपिजेविजेवावबेलिया, अपो जुदीवोविजेवावबेलिया,” नेजा पेपो पेतुखानेने, जा पेब्लो जुदीवोविजेवावबेलिया.

Pacuenia Pablo exanatsi vajabitsaë pepo pevetsinë comandante yabara pelivaisi

²² जुदीवो नामुखुनाएवतत्सि पेब्लो पेनावजुनुपाेबिजेवा. नेखाता इत्सा जुमेताने जुदीवो पाकुनिया पेब्लो नावजुनुपाेबा, नेखाता इत्सिया जुदीवो ववजै त्सापोने पिजेजुमेता. जुमा त्सापोने:

—जेमाणेजे पाबेयाखुआरे! जेमारा पित्सिने अपो बेकोपत्सि पेपोनापोनेना मतावेजेजे! जा त्सापोने जुदीवो पेब्लो यबारा.

²³ बजारपामोने पिजेजुमेता ववजै त्सापोने. पिजेकामिसाजुमावेलिया पेनाखताबिजेवाने, वेबाबिया बित्सो पानाएपानाएखाे. आत्साबेनेने कायाबाजारबारेना पेब्लोजावबारेना पेबाराणाएपानाएखाेत्सि. ²⁴ नेखाता वजाबित्साे पेपो पेवत्सिने, कोमादन्ते, पिजेजेवि इतोरोबा पेब्लो पेकाजेनेनेखात्सि वजाबित्साे पिजेबोयालिया. कोमादन्ते इतोरोबा पिजेजेवि पेब्लो पिआने पेजुमात्तिबेनेनेखात्सि पेनाकोन्तिसेवि पेजुमाकोन्तिबाबिमाकाता. बजारपाकुनिया पिआने पेब्लो एखानेजेत्सिआत्सि पेब्लो पेत्सिपाेबिनेखा वजाबित्साेजेवावबेलिया खुआ यबारा जुदीवो नेकोन्तिसेया पिजेजेकुनिया ववजै त्सापोने पेब्लो यबारा. ²⁵ नेखाता जाने बाजा पेब्लो इत्सा चेततत्सि वजाबित्साे पिआने पेजुमात्तिबेनेनेखात्सि, नेखाता पेब्लो जुमात्सि बजारजेता पेनुआनेने वजाबित्साे पिजेकपितान्जेवावबेलिया:

—खाने राजा रोमनो नाकुपिजेनेने. नेखाता इत्सा पेनेजुमाकोन्तिबेजेत्सिपामे अबाखे कोपिया नेनेकोन्तिसेजेवा जेजेजुमोने पिताबारता, नेखाता पेनेवेमाखेनेनेकोन्तिसेपामे. त्सिपजे निजेतुखानेने, रोमनोनाकुआ पेपो पेवत्सिने, पाकाइतावेता बजारपाकुनिया पेनेखानाएयानिया, जा पेब्लो वजाबित्साे पिजेकपितान्जेवावबेलिया.

²⁶ कपितान इत्सा जुमेताने बजारपाकुनिया पेब्लो पेजुमात्सिजेवा, नेखाता कपितान लिया वजाबित्साे पेपो पेवत्सिने कोमादन्तेजेवावबेलिया. कपितान जुमात्सि कोमादन्तेजेवावबेलिया:

—खानिया बाजा त्साने पाकुनेने एखानेजेत्सिआमे पेब्लोजावबेलिया. जेमाणेजे पेब्लो रोमनो नाकुपिजेनेने बाजा काजेना! जा कपितान कोमादन्तेजेवावबेलिया.

²⁷ नेखाता कोमादन्ते रेना पेब्लोजावबारेना. जुमात्सि पेब्लोजावबेलिया:

—जेखानियाजै त्साबाजा? जेखामे रोमनो नाकुपिजेनेनेमे? जा कोमादन्ते.

—जेजेजे, जा पेब्लो.

²⁸ नेखाता कोमादन्ते जुमात्सि पेब्लोजावबेलिया:

—खाने आता बाजा मापारुआेजे रोमनो नाकुपिजेनेने नाखानजे. त्सिपजे बाजा मतामोतजे अयैमातामोता बेपेपो रोमनो नाकुपिजेनेने तानाखानाएनेना, जा कोमादन्ते.

बजारपाकुनिया जुमात्सि त्सिपजे कोमादन्ते साइकयानाकुआता पेनाखानाएने.

पेब्लो नेखाता जुमात्सि कोमादन्तेजेवावबेलिया:

—खाने अपो मतामोत्सिने. त्सिपजे बाजा काजेना पेपो रोमनो नाकुपिजेनेने. नाखानजे काजेना रोमनो नाकुआता, जा पेब्लो कोमादन्तेजेवावबेलिया.

²⁹ नेखाता पिआने पावाजेबित्साे पेब्लो जुमाकोन्तिबेजेत्सिआत्सि, वेकुआपोन्त्सि बाजा. वाजेबित्साेवि पेपो पेवत्सिने आता, कोमादन्ते, पेब्लो कुजुनावत्सि इत्सा यापेतानेत्सि पेब्लो रोमनो नाकुपिजेनेनेकुने. कुजुनावत्सि पेचेत्सियाखानाएखाेत्सि कादेनामाेतोनेता.

Pacuenia Pablo navajunupaeba daxita judíovi pevetsivi pitabarata yabara pelivaisi

³⁰ पेब्लो पेनावजुनुपाेबिजेकुजेनाे रोमनो नाकुपिजेनेनेकुने, मेरविया पित्सिजेवाता, वजाबित्साे पेपो पेवत्सिने, कोमादन्ते, जामाताबेयापेताने खानियावेत्सिया पेनेकोन्ति यबारा जुदीवो नेकोन्तिसेजेत्सिआत्सि पेब्लो. नेखाता कोमादन्ते पिजेजेवि इतोरोबा पेब्लो

pevecuaisinaenexatsi cadenamaëto. Nexata comandante junata sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, penacaetuatsinexa. Nexata caponarenatsi Pablo, penutsinexatsi daxita penacaetuatsivi pitabarata.

23

¹ Pablo naëcota daxita penacaetuatsivi. Nexata Pablo jumaiti bajarapamonaejavabelia:

—Tajamonae, xaniavaetsia cajena ponaponabiabajë najamatabëcuenebijianaenejevanë Dioso pitabarata mapamatacabijavaberena ataje, jai Pablo bajarapamonaejavabelia.

² Nexata Ananías, sacerdotevi pepo penamatacaitorobinë, jumaiti Pablo pimoxoyotanubenaevitsijavabelia:

—Pacuibotsaquibiaxuabare Pablo, jai Ananías, sacerdotevi pepo penamatacaitorobinë.

³ Nexata Pablo jumaiti Ananíasjavabelia:

—¡Dioso rajane juya pepacuene xamë catsaquibiaxuabiana! Xamë majotaje ecame taneneconitsinexamë. Tsipaji xamë xanë yabara jamatabëcuenenavëxaniabiaya jamatabëjumaitimë: “Maponëje Pablo naneconita Diosojavabelia,” jamatabëjamë. Nexata xamë nijacuata naneconitame nijagobiernojavabelia. Tsipaji itorobame mapamonaeje tanetsaquibiaxuabinexa taaneconijibinë, jai Pablo Ananíasjavabelia.

⁴ Bajarajota penubenaevi jumaiti Pablojavabelia:

—Xamë raja jumeitavetame Dioso pijajivitonë, sacerdotevi pepo penamatacaitorobinë, jai bajarapamonae Pablojavabelia Ananías yabara.

⁵ Nexata Pablo jumaiti:

—Tajamonae, xanë apo yapëtaenë Ananías sacerdotevi pepo penamatacaitorobinëcuene. Itsa yapëtaejitsipajë, apo jumaitinë tsipae bajarapacuenia. Tsipaji Dioso pejumelivaisibaxutota jumaiti mapacueniaje: “Pëtsa jumeitavetame pecaevetsinë,” jai Dioso pejumelivaisibaxutota, jai Pablo Ananías yabara.

⁶ Nexata Pablo jamatabëcuenyapëtane penacaetuatsivi. Tsipaji penacaetuatsivi caelivaisi apo xainae. Jamatabëcuenyapëtaneme itsamonae pecatsitecaejava saduceovi pecujarubicuene. Jamatabëcuenyapëtane itsamonae pijinia pecatsitecaejava fariseovi pecujarubicuene. Nexata Pablo pinijijumeta jumaiti:

—Tajamonae, xanë raja fariseonënë. Fariseovi pecujarubicuene jumecovënëtajë. Taxapijinë baja cajena fariseonë. Tamojivimi ata cajena fariseovi. Majotaje neneconitsijitsia. Tsipaji jivi petëpaecujinae Dioso icatsia piasaëyaexanaejavanexa, jumecovënëtajë, jai Pablo.

⁷ Bajarapamonae itsa jumetane bajarapacuenia Pablo pejumaitisijava, nexata najumeanaenota fariseovibeje saduceovibeje. Bajarapamonae nexata apo najamatabëcuenejëpae baja. Nexata anaeya bajarajota navecuanatsana baja.

⁸ Saduceovi jumeaebabiaba fariseovi pejumecovënëtsilivaisi. Nexata saduceovi jumai tsabiabi:

—Jivi petëpaecujinae, acuenebi icatsia Dioso piasaëyaexanaejava. Ajibi raja cajena ángelevi. Ajibi raja cajena petëpaevi ata pejumape, jai tsabiabi saduceovi.

Fariseovi jumecovënëta jivi petëpaecujinae Dioso icatsia piasaëyaexanaejavanexa. Jumecovënëtanua ángelevi ata pejinavanapaejava. Jumecovënëtanua petëpaevi ata pejumape pejinavanapaejava. ⁹ Apo penajamatabëcuenejëpaexae, daxita bajarapamonae bajarajota pinijijumeta vavajai tsaponae. Nexata pamona judíovi pecujarubivi, fariseoviya-juvënëvi, nonobapuna. Anaeya jumaiti saduceovijavabelia:

—Itsacuene ata cajena pibisiacuene apo exanae maponë Pabloje. Xaniajai meta cajena. Petëpaejivi pejumape tsipaebatsi. Itsa jume, ángel meta tsipaebatsi. Paxanë nexata itsacuene ata apo paexanaenë tsane Pablojavabelia Diosojavabelia patananecot-siyaniva, jai fariseovi saduceovijavabelia.

¹⁰ Nexata bajarapamonae pinijicuenia nabijataeya najumeanaenotapona. Nexata vajabitsaë pepo pevetsinë, comandante, belia jamatabëjumaitsi: “Pablo meta baja bajarapamonae beyaxuabianatsi,” jamatabëjai. Nexata comandante junata pijajivi peponaenexa. Pablo baja jutatsi bajarapamonaevewa. Comandante itoroba pijajivi Pablo pecaponaenexatsi vajabitsaë pijaboyabelia.

¹¹ Nexata bajarapameravi Jesús tsitanaitajëtatsi Pablo. Jesús nuca Pablo pemuxuneneta. Jumaitsi:

—Ajamatabëcuenesaëmëre nevajënaeyabelia. Pacuenia tsipaebame xanë talivaisi matotaje Jerusalén tomarata, bajara icatsia pacuenia tsipaebianame xanë talivaisi Roma tomarata ata, jai Jesús Pablojavabelia.

Pacuenia picani Pablo judíovi jamatabëbeyaxuabatsi yabara pelivaisi

¹² Pablo petsitanaitajëtsicujinaetsi Jesús, meravia pitsijavata, judíovi nacaetuata. Namatabëcueneyanaba jane baja picani Pablo pebeyaxuabinexatsi. Nexata picani pebeyaxuabivajënaetsi, bajarapamonae najumecapanepaeya najumaitsi:

—Vaxaitsi apo xae tsanetsi itsacuenejavayo ata. Mera ata apo apae tsanetsi. Matapania baja Pablo beyaxuabianatsi, nabanianatsi. Mera ata apaenatsi, najai bajarapamonae.

¹³ Pamona picani Pablo jamatabëbeyaxuabatsi, cuarenta ponëbeje pematatsënëa. ¹⁴ Bajaraxuacujinae bajarapamonae pona sacerdotevi penamatacaitorobivijavabelia. Pona judíovi pijaancianovijavabelia ata. Tsipaji bajarapamonae caejavata nacaetuatena. Nexata pamona cuarenta ponëbeje, pamona picani Pablo jamatabëbeyaxuabatsi, jumaitsi sacerdotevi penamatacaitorobivijavabelia, judíovi pijaancianovijavabelia ata:

—Paxanë rajane baja najumecapanepaeya panajumaitsinë: “Vaxaitsi apo xae tsanetsi itsacuenejavayo ata. Matapania baja Pablo beyaxuabianatsi, nabani-anatsi,” panajanë. ¹⁵ Nexata paxamë sacerdotevi panenamatacaitorobivi, paxamë ata judíovi papijaancianovimë, panacaetuatsianame judíovi pecujarubivi yajava panenabarëcuaijainexa. Nexata daxita paxamë patonajumeitorobianame cuyalata vajabitsaë pepo pevetsinë, comandantejavabelia. Pavajëtsianame comandantejavabelia papecatocarenanexa Pablo. Pajumaitsimë tsane yamaxëitojorobiaya comandantejavabelia: “Pajitsipajë icatsia matavëjëa patayanijobijava Pablo, pijaneconi patayapëtaenexa xaniavaetsia, paneconi xaina,” pajamë tsane. Nexata paxanë epotalia pavajënaeevetsianajë Pablo. Itsa rena, patabeyaxuabinexa patsinejeva maberenaje, jai pamona cuarenta ponëbeje, pamona picani Pablo jamatabëbeyaxuabatsi.

Nexata sacerdotevi penamatacaitorobivi, judíovi pijaancianovi ata, jejai comandantejavabelia petonajumeitorobinexa Pablo pecarenanexatsi.

¹⁶ Itsiata baitsi jane Pablo pematapijiva pexënato jumetane Pablo pevajënaeevetsiapaebijavatsi pebeyaxuabinexatsi picani. Nexata bajaraponë pona vajabitsaë pijaboyabelia. Itsa baja bajaraponë joneya vajabitsaë pijaboyalia, bajarapalivaisi tsipaeba Pablojavabelia. ¹⁷ Nexata bajaraxuacujinae Pablo junata caenë vajabitsaë pijacapitán. Pablo jumaitsi:

—Barëponare mapapevëjëatoje papecanamatacaitorobinë, comandantejavabelia. Itsalivaisiyo xaina petsipaebinexa, jai Pablo.

¹⁸ Nexata Pablo piopaxa capitán barëponatsi vajabitsaë pepo pevetsinë, comandantejavabelia. Nexata capitán jumaitsi comandantejavabelia:

—Naneconitsia raja peponaponaenë Pablo nejunata. Nexata nitoroba tabarëponaenexa mapapevëjëatoje xamëjavaberena. Tsipaji pina catsipaebijitsia itsalivaisiyo, jai capitán comandantejavabelia.

¹⁹ Nexata comandante cobepitatsi pevëjëato. Barëliatsi pesaicaeyojavabelia. Comandante nexata jumaitsi pevëjëatojavabelia:

—¿Detsa pitsilivaisi xainame tanetsipaebinexamë? jai.

²⁰ Nexata pevëjëato jumaitsi:

—Sacerdotevi penamatacaitorobivibeje, judíovi pijaancianovibeje, najamatabëcuenyanaba pecavajëtsinexa meravia netocalianexa Pablo bajarapamonaevjavabelia. Bajarapamonaev cayamaxëitojorobiaya cajumaitsiapaebi: “Pajitsipajë icatsia matavëjëa patayanijobijava Pablo, pijaneconi patayapëtaenexa xaniavaetsia, paneconi xaina,” cajaiyapaebi bajarapamonaev. ²¹ Itsiata pëtsa jumecovënëtame bajarapamonaev. Tsipaji cuarenta ponëbeje pematatsënëa namatayabiaya epatota Pablo vajënaevetsiapaebatsi pebeyaxuabinexatsi. Bajarapamonaev daxita najumecapanepaeya najumaitsi baja: “Apo xae tsanetsi itsacueneyavayo ata. Mera ata apo apae tsanetsi. Matapania baja Pablo beyaxuabianatsi, nabanianatsi. Mera ata apaenatsi,” najai baja capanepaeya bajarapamonaev. Aconoxae saya bajarapamonaev eveta Pablo necaliajava, jai pevëjëato comandantejavabelia.

²² Nexata comandante jumaitsi pevëjëatojavabelia:

—Pëtsa tsipaebame itsajivi ata tanetsipaebilivaisimë, jai comandante.

Bajaraxuacujinaev pevëjëato baja itorobatsi caevëalia.

Pacuenia Pablo itorobatsi nacuaevetsinë Félixjavabelia yabara pelivaisi

²³ Vajabitsaë pepo pevetsinë, comandante, junata anijanëbeje, vajabitsaë pija-capitánbeje. Jumaitsi:

—Panaxaniavaetsiaexanarebeje vajabitsaë petaxuta peponaevinexa doscientos ponëmaxëto, setenta pijinia ponëbeje caballojumata peponaevinexa, doscientos pijinia ponëmaxëto becuerereboxanetonë, lanzavënëjavanë, pecaponaevinexa. Panaxaniavaere paneponaenexa Cesarea tomarabelia ajena, mapameravitaje, bejamatabëcuene a las nuevejava. ²⁴ Itsacaballobeje pijinia Pablo peyaponaenexa, patoxaniavaere. Xaniavaetsia evetsiaya pacaponaename Pablo nacuaevetsinë Félixjavabelia, jai comandante capitánbejejavabelia.

²⁵ Bajaraxuacujinaev comandante tsicobeyaquina cuyalatobaxuto pitorobinexa nacuaevetsinë Félixjavabelia. Comandante peyaquinaecuyalatobaxutota jumaitsi mapacueniaje:

²⁶ “Félix, pecayaiyataenë, nacua nevetsinë. Xanë raja Claudio Lisiasvënënënë catoy-aquinatsi. Cabajacobatsi. ²⁷ Judíovi raja vaetabatsi ponë catoitorobaliatsi, Pablovënënë. Beyaxuabijitsiatsi picani. Nexata itsa vënëlivaisitaniji Pablo Romano nacuapijinëcuene, sivalianë. Tajajivi vajabitsaë taneyavenonaecueneta yacajërëtajë judíovi pecobeve-cua, ajena baja picani beyaxuabijitsiatsi. Nexata caponaeyaexanajë tajajivi vajabit-saë pijaboyabelia. ²⁸ Bajaraxuacujinaev sacerdotevi penamatacaitorobivi pitabarata, judíovi pijaancianovi ata pitabarata, judíovi pecujarubivi ata pitabarata, nutsiaex-anajë. Bajarapacuenia nutsiaexanajë bajarapamonaev pitabarata tayapëtaenexa jane baja picani paneconi yabara Pablo judíovi neconitsijitsiatsi. ²⁹ Itsiata baitsi jane Pablo itsacueneneconi ata apo xainae, paneconi yabara beyaxuabijitsiatsi, paneconi yabara ata etsijitsiatsi penaneconitsivi pejebabiabibota. Judíovi saya Pablo neconit-sijitsiatsi judíovi pijasalinaivi pijacuene yabara. ³⁰ Nexata itsajivi netsipaeba judíovi namutoepatota Pablo pevajënaevetsiapaebijavatsi pebeyaxuabinexatsi. Bajaraxuata nexata najamatabëxainajë Pablo tacatoitorobinexa xamëjavabelia. Nexata pajudíovi Pablo neconitsijitsiatsi, itorobajë peneconitsinexatsi xamë nitabarata. Bajara masaya

daxitajumeyoje,” jai mapacueniaje comandante petoyaquinaebaxutota nacuaevetsinē Félixjavabelia.

³¹ Nexata vajabitsaë exana baja pacuenia itorobatsi comandante. Bajarapameravi vajabitsaë baja Pablo caponaliatsi Antípatris tomarabelia. ³² Nexata meravia pitsijavata bajarapavajabitsaëyajuvënëvi, petaxuta peponaevi, Antípatris tomarata naviabarena baja pijaboyaberena. Pamonaë caballojumata peponaevi, pevajënaeyabelia abaxë caponaliatsi Pablo. ³³ Caponaliatsi Cesarea tomarabelia. Nexata Cesarea tomaratalia vajabitsaë rajuta petocaponaecuyalatobaxuto nacuaevetsinē Félixjavabelia. Yajavarajutanua Pablo bajaraponë pecobeyabelia. ³⁴ Nexata nacuaevetsinē Félix leba baja petocapatsicuyalatobaxutotsi. Bajaraxuacujinae nacuaevetsinē Félix jumaitsi Pablojavabelia:

—¿Detsa panacuapijinëmë? jai.

Nexata Pablo jumaitsi:

—Xanë raja Cilicia nacuapijinënë, jai.

Nexata yapëtanetsi Pablo Cilicia nacuapijinëcuene. ³⁵ Nexata icatsia nacuaevetsinē Félix jumaitsi Pablojavabelia:

—Cajumetaenatsi abaxë itsa parena judíovi pecaneconitsivinexa, jai nacuaevetsinē Félix.

Bajaraxuacujinae nacuaevetsinē Félix itoroba pijajivi xaniavaetsia pevetsinexatsi Pablo. Nexata Pablo evetatsi Herodespijinë pexanaeyaexanaebota.

24

Pacuenia Pablo navajunupaeba nacuaevetsinē Félix pitabarata yabara pelivaisi

¹ Pablo Cesarea tomarata penaneconitsiaexanaecujinaetsi, cinco pamatacabibejucujinae, Ananías, sacerdotevi pepo penamatacaitorobinë, parena Cesarea tomaraberenena. Parena judíovi pijaancianovi yajava, Tértulovënëvi yajava. Tértulo abogado, jivi peneconitsicuene peyapëtaenë. Bajaraxuata judíovi junata bajaraponë petocuaicuaijainexatsi nacuaevetsinē Félixjavabelia. Nexata judíovi, Tértulo yajava, nubena nacuaevetsinē Félix pitabarata peneconitsinexatsi jane baja Pablo. ² Itsa caparenatsi Pablo, nexata Tértulo taxuxuaba peneconitsijavatsi Pablo. Tértulo jumaitsi nacuaevetsinē Félixjavabelia mapacueniaje:

—Pecayaiyataenë nacua nevetsinë. Xaniavaetsia nevetsixae mapanacuaje, bajayajebi xaniavaetsia pajinavanapajë. Xamë nejamatabëcueneta daxita mapanacuapijicuene, xua abeje picani, xanëbiaexanaponame pevajënaeyabelia. ³ Nexata pabarëyanë patanetoexanaejavamë yabara daxita mapanacuajavaje. Bajaraxuata pexaniajamatabëcuene pacarajutatsi. ⁴ Caepatoyo saya pacajamatabëitonotatsi. Pexaniacuene panetoexanare. Panenamuxunaevere caejumeyobeje. ⁵ Payapëtaniji baja cajena maponëje Pablo bitso piacujirubejenëcuene. Daxitanacuanëjava, itsaxuayo judíovi jinavanapa, itorobapona pianaepanaenexa judíovi penavecuanatsanaenexa. Mara ponëje Nazaret tomarapijinëmi petsipaebilivaisi pejumecovënëtsivi, penamatacaitorobinëje. ⁶ Mara ponëje Dioso pijatemplobo Jerusalén tomaratalia jamatabëbijiana picani. Tsipaji apo judíovi barëjoneya temploboënëalia. Bajaraxuata pavaetabajë. Nexata pacuenia paneitoroba pajudíovinë patajalivaisi, jamatabëpabeyaxuabajë picani penaneconitsixae. ⁷ Itsiata baitsi jane itacarajeta vajabitsaë pepo pevetsinë, comandante Lisias, barëpata pijajivi. Pinijsaëta paneyacajërëta Pablo. Nexata comandante Lisias panejumaitsi: “Pajivi jamatabëneconita Pablo, ponae nacuaevetsinë Félixjavabelia bajaraponë pitabarata peneconitsinexa,” panejai. ⁸ Nexata itsa yanijobianame maponëje Pablo, yapëtaename baja daxita pacuenia xaniavaetsia pacatsipaebatsi Pablo pexanaejava yabara, jai Tértulo mapacueniaje nacuaevetsinē Félixjavabelia.

⁹ Judíovi bajarajota Tértulo pemuxuneneta penubenaevi ata neconitatsi Pablo. Bajarapajudíovi jumaitsi nacuaevetsinē Félixjavabelia:

—Xaniajai rabaja Tértulo. Daxita pacuenia Tértulo cajumaitsi, bajarapacuenia exana Pablo, jai judíovi nacuaevetsinëjavabelia.

¹⁰ Nacuaevetsinë Félix nacobeyota juya Pablo pitorobinexatsi Pablo jane baja penava-junupaebinexa nacuaevetsinë Félix pitabarata. Nexata Pablo jumaitsi nacuaevetsinë Félixjavabelia:

—Yapëtaniji baja cajena xamë bajayajebi mapanacuapijivi nenaneconitsiaexanabi-abijava. Bjaraxuata barëyanë tacatsipaebinexa xua exanajë. ¹¹ Nexata taxaniajai-jumeta catsipaebianatsi. Itsa yanijobijitsipame itsamonaejavabelia ata, nexata catsipaebijitsipa pacuenia aeconoxae catsipaebianatsi. Ajena raja abaxë saya xainajë doce pamatacabibeje tapatsicujinae Jerusalén tomarata. Patajë najamatabëcuenecopatsiaya tanavajëtsinexa Diosojavabelia templobota. ¹² Bjarapatemplobota judíovi apo netae tabarëcuaicuaijajava itsajivi ata. Apo netaenua judíovi penacaetuatabibonëjajava jivi taitorobijava pianaepanaenexa. Apo netaenua tomaranëjajava ata taitorobijava jivi pianaepanaenexa. ¹³ Nexata acuenebi itsajivi ata pejumaitsiyajava xanë yabara: “Xanë raja pepacueni taniji xua Pablo exana,” pejajava. Tsipaji itsajivi ata apo netae pibisiacueni taexanaejava. ¹⁴ Nexata pacuene yabara catsipaebijitsiatsi, xania-ajanë cajena. Patajasalinaivi pijaDioso jumecovënëtsiaponaponajë. Tonacuenebaponaponajë. Pejanajamatabëcueneta Dioso jumecovënëtsiaponaponajë. Baitsi pexanialivaisi, Jesucristo pelivaisi, jumecovënëtsiaponaponajë. Bajara palivaisi yabara judíovi jumaitsi tsabiabi: “Apo pexaniajailivaisi cajena bajarapalivaisi. Dioso baja cajena apo nacatocopatsi vajajumecovënëtsinexa bajarapalivaisi,” jai tsabiabi judíovi. Itsiata Jesucristo taneitorobicuenia jumecovënëtsi atanë, Dioso Moiséspijinëta penajumecopatsilivaisi yajava jumecovënëtaponaponajë. Bajayata Diosojumepaebivi profetavi peyaquinaelivaisianë ata jumecovënëtajë. ¹⁵ Mapajudíovi nubenaje, jumecovënëta mapacuenia pejumaitsilivaisije: “Dioso icatsia asaëyaexanaena petëpaevimi,” pejailivaisi. Xanë ata bajarapalivaisi jumecovënëtajë. Baitsi daxita pamonaë tëpa, pexaniajamatabëcuenivimi, pibisiajamatabëcuenivimi ata, itsamatacabi icatsia Dioso asaëyaexanaena. ¹⁶ Bjaraxuata bitso jitsipajë xaniavaetsia taponaponaejajava tanajamatabëcuenebijianaeyaniva Dioso pitabarata, tanajamatabëcuenebijianaeyaniva daxitajivi ata pitabarata, jai Pablo nacuaevetsinë Félixjavabelia.

¹⁷ Icatsia Pablo jumaitsi nacuaevetsinë Félixjavabelia:

—Caevaimaxëto baja cajena ajibinë tsarucae Jerusalén tomaravecua Dioso pitorobilivaisi jivi tatsipaebinexa daxitanacuanëjajava. Bjaraxuacujinae icatsia naviatajë Jerusalén tomarabelia. Tocaliajë ofrenda tarajutsinexa bepejiobivi. Patajë picani templobota ofrenda tarajutsinexa Diosojavabelia. ¹⁸ Itsa baja veretajë templobota tanajamatabëcuenexaniavaetsijajava Diosojavabelia tajamatabëcuenesaënexa, tarajutsinexa picani bajarapaofrenda Diosojavabelia, nexata bajarapaepatota judíovi, Asiavënë nacuapijivi, necaxitajaraba templobota. Nexata nevaetaba tanenaneconitsiaexanaenexa. Itsa necaxitajaraba templobota, apo yajavanucaenë ayaibitsaëto. Daxita templobopijivi yãijai. Templobopijivi ajumejibia jinavanapa. ¹⁹ Bajara baitsi jane pamonaë judíovi, Asiavënë nacuapijivi, tanetaevi templobota, bepatsirena maberanaje tanenaneconitsinexa jane baja itsa necuenetane pibisiacueni taexanaejajava. ²⁰ Itsa jume, nexata mapamonaëje, nitabarata penubenaevi, vecae taitabëta catsipaebi, itsa netae pibisiacueni taexanaejajava pamatacabi nucajë sacerdotevi penamatacaitorobivi pitabarata, judíovi pijaancianovi ata pitabarata, judíovi pecujarubivi ata pitabarata. ²¹ Saya meta caelivaisiyo bajarapamonaë catsipaebiana xanë talivaisi. Tsipaji pamatacabi nucajë judíovi pijaancianovi pitabarata, ayaijumeta jumaitsinë: “Mapamatacabitaje neneconitsiana. Tsipaji jivi petëpaecujinae Dioso icatsia piasaëyaexanaejavanexa, jumecovënëtajë,” janë. Nexata meta bajarapacuenia tajumaitsiyajava yabara bajarapamonaë jamatabëneneconita xamëjavabelia, jai Pablo nacuaevetsinë Félixjavabelia.

²² Nacuaevetsinē Félix xaniavaetsia yapētane daxitanacuanējava jivi pejume-covēnēta pona ejava Jesucristo pelivaisi. Nexata nacuaevetsinē Félix pejumetaecujinae Pablo petsipaebilivaisi, nacuaevetsinē Félix naviabiaexana baja pamonae picani Pablo neconitsijitsiatsi. Nexata nacuaevetsinē Félix jumaitsi Tértulobanajavabelia, Jerusalén tomaraverena pepatsivijavabelia:

—Itsa patsiarena vajabitsaē pepo pevetsinē, comandante Lisias, yapētaenajē pacuenia exanaejitsianē Pablojavabelia, jai.

²³ Nexata nacuaevetsinē Félix jumaitsi vajabitsaē pijacapitánjavabelia:

—Pablo barēevetsianame xaniavaetsia penajetabajiraviyaniva. Itsiata toco-patsianame peponaponaenexa bajarajota pacētsinejevamē. Tocopatsianamenua peyapētaevitsi pesivaxainaenexatsi perajutsinexatsinua penamatavenonaejavaxi, jai nacuaevetsinē Félix vajabitsaē pijacapitánjavabelia.

²⁴ Bajaraxuacujinae, caematacabibejecujinae, nacuaevetsinē Félix icatsia pata pi-
java yajava, Drusilavēnēva. Drusila judíoova. Nexata nacuaevetsinē Félix itoroba pijajivitonē petojunatsinexatsi Pablo. Nexata Pablo itsa pata, Pablo livaisi tsipaeba nacuaevetsinē Félixjavabelia. Pablo tsipaeba jivi penajamatabēcuenecopabapona ejava Jesu-
cristojavabelia. ²⁵ Pablo tsipaebanua Dioso pitorobijava jivi pejinavanapaenexa pibisi-
acuene exanaenejeva Dioso pitabarata. Pablo tsipaebanua jivi xaniavaetsia penaevetsi-
javanexa pevitota pibisiacuene pexanaeyaniva. Pablo tsipaebanua itsamatacabi Dioso
penaneconitsiaexanaejavanexa pibisiacuene pexanaevi. Nexata nacuaevetsinē Félix
itsa jumetane bajarapacuenia Pablo petsipaebilivaisi, najunaviaca. Nexata bajarajota
nacuaevetsinē Félix jumaitsi Pablojavabelia:

—Pitsapare baja abaxē. Icatsia cajunatsianatsi itsajota cuenesajinajē, jai nacuaevetsinē Félix.

²⁶ Nacuaevetsinē Félix jamatabējumaitsi Pablo yabara:

—Pablo meta nerajutsiana palata tacopatsinexa penaneconitsijavavecua, jamatabējai.

Bajaraxuata Félix anijatonē pijajivi itorobabiaba Pablo petojunatsinexatsi pe-
barēcuaicuaijainexatsi. ²⁷ Anijavaibeje bajarapacuenia Félix pijajivi itorobabiaba Pablo
petojunatabiabinexatsi. Belia baja Félix vecuapitsapa nacua pevetsicuene. Nexata juya
itsanē, Porcio Festovēnēnē, tocopatatsi bajarapanacua pevetsinexa. Félix baja pitsapae
ata, itsiata Félix pejamatabēcueneta Pablo apo tocopatsitsi pepitsapaenexa penaneconit-
sijavavecua. Bajarapacuenia Félix exana judíoovi pesivajamatabēcuene barēyanexatsi.

25

*Pacuenia Pablo navajunupaeba pejananacuaevetsinē Festo pitabarata yabara peliv-
aisi*

¹ Festo patajopa Cesarea tomarata pexanaenexatsi nacuaevetsinēnexa. Pepatsicujinae, acueyabi pamatacabibejecujinae, Festo baja pona Cesarea tomaravecua. Pona Jerusalén tomarabelia. ² Nexata Jerusalén tomaratalia sacerdotevi penamatacaitorobivi Pablo neconitatsi pepēya nacuaevetsinē Festojavabelia. Neconitatsinua judíoovi ata, pamonae petuxanevi. ³ Bajarapamonae pinijicuenia vajēta nacuaevetsinē Festojavabelia petocapatsinexatsirena Pablo Jerusalén tomaraberena. Bajarapacuenia vajēta tsipaji baja cajena bajarapamonae najamatabēcuenevereta picani Pablo pebeyaxuabi-aexanaenexatsi namutoepatota. ⁴ Nexata nacuaevetsinē Festo jumaitsi bajarapamonaejavabelia:

—Pablo raja naneconitsia ponapona Cesarea tomarata. Xanē raja caematacabibeje-
cujinae ponaejitsianē Cesarea tomarabelia. ⁵ Pablo pibisiacuene itsa exana, nexata pa-
pecanamatacaitorobivi tapēta naponae na Cesarea tomarabelia peneconitsinexa Pablo,
jai nacuaevetsinē Festo bajarapamonaejavabelia.

⁶ Bajarapacuenia nacuaevevtsinē Festo pejumaitsicujinae, nacuaevevtsinē Festo abaxē ponapona Jerusalén tomarata ocho pamatacabibeje. Itsa jume, diez meta pamatacabibeje. Bajaraxuacujinae pona jane baja Cesarea tomarabelia. Nexata meravia pitsijavata nacuaevevtsinē Festo eca itsajota nacuaevevtsinē ecabiaba jivi penaneconitsiaexanaenexa. Nexata pijajivi itoroba petocapatsinexatsi Pablo. ⁷ Pablo itsa joneya, nexata judíovi, Jerusalén tomaraverena pepatsivi, matatoyorotsia imoxoyotatsi Pablo. Najumetsēnētsiaya neconitatsi beayaineconi pexainaenēcuenia. Itsiata baitsi jane xua yabara picani Pablo neconitatsi picani, bajarapamonae apo jumenamatamotsi peneconitsijavatsi. ⁸ Nexata Pablo nayajivijumaitsi peneconitsiyanivatsi:

—Itsacuene ata pibisiacuene apo exanaenē. Nexata xanē judíovi pitorobilivaisijavabelia, templobojavabelia ata, Romanonacua pepo pevetsinējavabelia ata, apo naneconitsinē, jai Pablo nacuaevevtsinē Festojavabelia.

⁹ Nexata nacuaevevtsinē Festo yanijoba Pablojavabelia judíovi pejamatabēcuenebarēyanexa nacuaevevtsinē Festojavabelia. Nacuaevevtsinē Festo Pablojavabelia jumaitsi mapacueniaje:

—¿Jitsipame tsaja neponaejava Jerusalén tomarabelia bajarajotalia pecaneconitsinexa taitabarata mapacuene yabaraje? jai nacuaevevtsinē Festo Pablojavabelia.

¹⁰ Pablo nexata jumaitsi:

—Nucajē rabaja majotaje xamē nitabarata. Tsipaji nijatuxanenē, Romanonacua pepo pevetsinē, itoroba majotaje peneconitsinexatsi pibisiacuene pexanaevi. Bajaraxuata apo beneitorobimē itsajavabelia taneneconitsinexamē. Itsacuene ata pibisiacuene apo exanaenē judíovijavabelia. Bajarapacuenia xamē xaniavaetsia yapētaneme baja cajena. ¹¹ Itsa pepacuene naneconitsipajē, nexata itsa nebeyaxuabijitsia tajaneconi yabara, nexata apo najamatabēxainaenē tsipae tavecuapanepaenexa tatēpaejava. Itsiata baitsi jane pacuenia mapamonae neneconitsiajumaitsije, apo xaniajai cajena. Nexata acuenebi itsajivi ata tanecanajetsijava mapamonae pecobeyabeliaje saya aneconijibia tanebeyaxuabinexa. Nexata jane baja xanē cavajētatsi taneitorobinexamē nijatuxanenējavabelia, Romanonacua pepo pevetsinējavabelia, bajaraponē pitabarata taneneconitsinexa, jai Pablo nacuaevevtsinē Festojavabelia.

¹² Nexata nacuaevevtsinē Festo barēcuaicuaijai pijajivi, pejamatabēcuenyavenonaevitsi. Bajaraxuacujinae nacuaevevtsinē Festo jumaitsi Pablojavabelia:

—Xamē nevajētame tacaitorobinexa tajatuxanenējavabelia, Romanonacua pepo pevetsinējavabelia, bajaraponē pitabarata pecaneconitsinexa pibisiacuene itsa exaname. Nexata bajaraponējavabelia ponaename, jai nacuaevevtsinē Festo Pablojavabelia.

Pacuenia Pablo navajunupaeba nacuaevevtsinē Agripajavabelia yabara pelivaisi

¹³ Pablo pevajētsicujinae nacuaevevtsinē Festojavabelia pitorobinexatsi Romanonacua pepo pevetsinējavabelia, caematacabibejecujinae, nacuaevevtsinē Agripa, pijava Berenicevēnēva yajava, parena Cesarea tomaraberena. Parenabeje pebajacobinexabeje nacuaevevtsinē Festo pejanapatsinēxae nacua pevetsinēnexa. ¹⁴ Agripabeje Berenicebeje caematacabibeje ponaponabeje Cesarea tomarata. Nexata nacuaevevtsinē Festo tsipaeba nacuaevevtsinē Agripajavabelia Pablo yabara. Nacuaevevtsinē Festo jumaitsi:

—Majotaje xainajē pebi naneconitsia peponaponaenē. Félix abaxē mapanacua itsa evetaje, bajaraponē naneconitsiaexanatsi. ¹⁵ Nexata itsa ponajē Jerusalén tomarabelia, sacerdotevi penamatacaitorobivi, judíovi pijaancianovinua, neconitatsi Pablo xanējavaberena. Bajarapamonae nevajēta tananeconitsiaexanaenexa Pablo pebeyaxuabinexatsi. ¹⁶ Nexata xanē jumaitsinē bajarapamonaejavabelia: “Romanonacua raja pepo pevetsinē pejamatabēcueneta apo pacopatsinē itsajivi ata pebeyaxuabinexatsi abaxē xaniavaetsia payapētaenejevanē paneconi xaina. Itsajivi pibisiacuene itsa exana,

nexata namatavenona pecuenetaevitsi pitabarata copiaya peneconitsinexatsi. Nexata pajivi naneconita, bajarajota xanepana penayajivicuaicuaijainexa paneconi yabara neconitatsi,” janë bajarapamonaejavabelia, jai nacuaevetsinë Festo nacuaevetsinë Agripajavabelia.

¹⁷ Icatsia nacuaevetsinë Festo jumaitsi nacuaevetsinë Agripajavabelia:

—Nexata bajarapajudíovi maberena pepatsicujinaeje, meravia pitsijavata, copiaya joneyajë taecaenexa itsajota ecabiabajë jivi itsa naneconitsiaexanaejitsianë. Nexata itorobajë tajajivi tanetocapatsinexa Pablo xanëjavaberena. Tsipaji jamatabëjumaitsinë: “Pablo meta pibisiacuene pexanaexae, neconitatsi,” jamatabëjanë. ¹⁸ Itsiata baitsi jane Pablo itsa pata, peneconitsivitsi apo neconitsitsi pibisiacuene pexanaejava yabara pacuenia picani najamatabëxainajë. ¹⁹ Saya judíovi jumeanaenotatsi Pablo Dioso pe-jumecovënëtsijava yabara. Jumeanaenotatsinua Pablo petsipaebijava Jesús petëpaejava yabara ata. Jesús yabara Pablo jumaitsi: “Jesús raja apo tēpae. Petëpaeujinae baja icatsia Dioso asaëyaexanatsi,” jai Pablo bajarapajudíovijavabelia. ²⁰ Nexata xaniavaetsia apo yapëtaenë pacuenia exanaejitsianë bajarapacuene yabara. Nexata jumaitsinë Pablojavabelia: “Jitsipame tsaja neponaejava Jerusalén tomarabelia, bajarajotalia icatsia pecaneconitsinexa pamonaë caneconita,” janë picani. ²¹ Itsiata baitsi jane Pablo nevajëta taitorobinexa picani vajatuxanenëbejejavabelia, Romanonacua pepo pevetsinëjavabelia, bajaraponë pitabarata peneconitsinexatsi, pibisiacuene itsa exana Pablo. Itsiata abaxé xanë mapatomarataje Pablo naneconitsiaya ponaponaeyaex-anajë. Nexata pamatacabi necuenecaëjēpaena, itorobianajë vajatuxanenëbejejavabelia, jai nacuaevetsinë Festo nacuaevetsinë Agripajavabelia.

²² Nexata nacuaevetsinë Agripa jumaitsi nacuaevetsinë Festojavabelia:

—Xanë ata jitsipajë tajumetaejava Pablo penavajunupaebijava, jai nacuaevetsinë Agripa.

Nexata nacuaevetsinë Festo jumaitsi nacuaevetsinë Agripajavabelia:

—Meravia rabaja jumetaename Pablo penavajunupaebijava, jai nacuaevetsinë Festo.

²³ Nexata meravia pitsijavata nacuaevetsinë Agripa pijava Berenicebeje bitso naitabëtabeje. Nexata naponabeje jivi penacaetuatabiaboxanetojavabelia. Pëyanatatsibeje vajabitsaë pepo pevetsivi. Pëyanatatsibeje Cesarea tomarapijipetuxanevi ata. Penacaetuatsiboxanetojavalia barëjoneyabeje. Nexata nacuaevetsinë Festo pijajivi itoroba petocaponaenexatsirena Pablo. ²⁴ Nexata nacuaevetsinë Festo jumaitsi nacuaevetsinë Agripajavabelia, itsamonaejavabelia ata:

—Agripa, nacua nevetsinë, daxita paxamë ata majotaje vajanajuanacaetuatsivi. Pataneme rabaja mapapebi nuca paneitabarataje. Ayaibitsaëto judíovi, Jerusalén tomarapijivi, bajaraponë neconitatsi xanëjavaberena Jerusalén tomaratalia. Bajara icatsia pamonaë tapëta naponarena Cesarea tomaraberena. Bajara icatsia pacuenia neconitatsi xanëjavaberena. Bajarapamonaë vavajaiya nejumai tsabiabi: “Pajitsipajë Pablo pebexuabinexatsi,” nejai tsabiabi. ²⁵ Itsiata baitsi jane xanë apo yapëtaenë paneconi yabara beyaxuabijitsiatsi. Maponë nevajëta picani taitorobinexa tajatuxanenëjavabelia, Romanonacua pepo pevetsinëjavabelia, bajaraponë pitabarata peneconitsinexatsi itsa pibisiacuene exana. Bajaraxuata itorobijitsianë Romanonacua pepo pevetsinëjavabelia. ²⁶ Itsiata baitsi jane apo yapëtaenë pacuene yabara toy-aquinaejitsianë cuyalatobaxutota tajatuxanenëjavabelia. Bajaraxuata xamë Agripa, nacua nevetsinë, mapamonaë ataje, daxita paxamë paneitabarata Pablo penucaenexa pacatocapatatsi maberenaëje. Pacatocapatatsi paneyanijobinexa paneconi yabara naneconita. Nexata meta paneyanijobicujinae xanë yapëtaenajë paneconi yabara naneconita. Nexata bajarajota yapëtaenajë tajatuxanenëjavabelia tatoyaquinaenexa cuyalatobaxutota paneconi yabara judíovi Pablo neconitsijitsiatsi tajatuxanenëjavabelia.

²⁷ Tsipaji acuenebi taitorobijava maponėje Pablo tajatuxanenėjavabelia toyaquinaenejevanė cuyalato xaniavaetsia peyapētaenexa paneconi yabara judíovi neconitsijitsiatsi, jai nacuaevetsinē Festo nacuaevetsinē Agripajavabelia.

26

Pacuenia Pablo navajunupaeba nacuaevetsinē Agripa pitabarata yabara pelivaisi

¹ Nacuaevetsinē Agripa jumaitsi Pablojavabelia:

—Catocopatatsi rabaja nenvajunupaebinexa paneconi yabara judíovi caneconita, jai nacuaevetsinē Agripa Pablojavabelia.

Nexata Pablo yaiyataeya bajacoba nacuaevetsinē Agripa. Nexata Pablo jumaitsi nacuaevetsinē Agripajavabelia mapacueniaje:

² —Barėyanė. Tsipaji ajena pamatacabi netocopatame nitabarata tanavajunupaebinexa daxita paneconi yabara judíovi neneconitsijitsia. ³ Aeconoxaeta bitso barėyanė. Tsipaji yapētaneme xaniavaetsia daxita palivaisi paxainajė pajudíovinė. Yapētanemenua pajamatabėcuenelivaisi yabara panajumeanaenotabiabajė. Nexata cavajėtatsi ajamatabėcuenesaėya bajayaepato xaniavaetsia tanenamuxunaevetecaenexamė, jai Pablo nacuaevetsinē Agripajavabelia.

Pacuenia Pablo navajunupaeba pacuenia ponapona pamatacabi abaxė apo jumecovėnėtsi Jesucristo yabara pelivaisi

⁴ Pablo icatsia jumaitsi nacuaevetsinē Agripajavabelia:

—Daxita judíovi baja cajena neyapētane pacuenia copiaya ponaponajė bajarapamonaejavata. Bajarapamonae neyapētane pacuenia ponaponajė patajanacuata tsiquirinėyojavaveliacujinaenė. Neyapētanenua pacuenia ponaponajė Jerusalėn tomarata ata. ⁵ Judíoviyajuvėnėvi itsamonae naexana fariseovi. Nexata bajarapamonae Dioso Moiséspijinėta penajumecopatsilivaisi, bitso jumecovėnėtsiajinavanapa itsajudíovivecua. Nexata itsa yanijobijitsipame, daxita judíovi catsipaebijitsipa pacuenia picani pejevaxinėjavaveliacujinaenė catsitecaponaponajė fariseovi pecujarubicuene. ⁶ Bajarapamonae neneconitsijitsia tsipaji baja xanė jumecovėnėtajė petėpaevimi itsamatacabi Dioso icatsia piasaėyaexanaejavanexa. Tsipaji baja cajena bajarapacuenia Dioso najumecapanepaeya jumaitsi patajasalinaivimijavabelia. Nexata bajarapalivaisi jumecovėnėtajė. ⁷ Daxita raja paxanė, Israelpijinėmi pexi doce ponėmibeje papemomoxinė. Pacopiaevetavanapajė Dioso icatsia piasaėyaexanaejavanexa petėpaevimi pacuenia baja cajena tajėvelia Dioso najumecapanepaeya jumaitsi patajasalinaivimijavabelia. Bajaraxuata najamatabėcuenecopatsiaya pavajėtabiabajė Diosojavabelia. Patonacuenebavanapajėnua caematacabi canacujitsia, meravi yajava. Agripa, nacua nevetsinė, abaxė nenamuxunaevere. Dioso icatsia petėpaevimi piasaėyaexanaejavanexa, copiaevetaponaponajė. Bajaraxuata judíovi neneconitsijitsia. ⁸ Pėtsa pajamatabėjumaitsimė Dioso yabara: “Dioso raja apo caėjėpaetsi petėpaevi icatsia piasaėyaexanaenexa,” pajamatabėjamė pėtsa, jai Pablo bajarapamonaejavabelia.

Pacuenia Pablo navajunupaeba petaicaponaejava Jesús pejumecovėnėtsivi pejebinexa penaneconitsivi pejebabiabibota yabara pelivaisi

⁹ Pablo icatsia jumaitsi nacuaevetsinē Agripajavabelia:

—Xanė abaxė Jesús itsa apo jumecovėnėtsinė, jamatabėjumaitsinė tsabiabi: “Xanė bejiobiaexanaenajė daxita pamonae jumecovėnėta Jesús, Nazaret tomarapijinė, pelivaisi,” jamatabėjanė tsabiabi. ¹⁰ Nexata bajarapacuenia exanajė Jerusalėn tomarata. Sacerdotevi penamatacaitorobivi taneitorobixae, ayaibitsaėto Jesús pelivaisi pejumecovėnėtsivi jebaponajė penaneconitsivi pejebabiabibota. Itsa bajarapamonae naneconitsiaexanatsi, itsa beyejebatsinua, netsitaxanepana bajarapacuenia pebeyejebijavatsi. ¹¹ Pamonae Jesús pelivaisi jumecovėnėta,

anijatonë jumaconibabeyaexanabiabajë judíovi penacaetuatabiabibonëjava. Bajarapacuenia picani exanaponajë bajarapamonae pecopabinexa Jesús pelivaisi pejumecovënëtsijava. Xanë picani cueneitoyanë bajarapamonae. Nexata itsanacuajava penaetomaranëjava ata, jaitarutajë Jesús pelivaisi pejumecovënëtsivi tataicaenexa tajebinexa penaneconitsivi pejebabiabibota, jai Pablo nacuaevetsinë Agripajavabelia.

Pacuenia icatsia Pablo navajunupaeba pacuenia Jesús pelivaisi jumecovënëta yabara pelivaisi

(Hch 9.1-19; 22.6-16)

¹² Pablo icatsia jumaitsi nacuaevetsinë Agripajavabelia:

—Bajara picani icatsia pacuenia tataicaenexa Damasco tomarata Jesús pelivaisi pejumecovënëtsivi, ponajë picani Damasco tomarabelia. Nitoroba sacerdotevi penamatacaitorobivi. Bajarapamonae pejamatabëcueneta nitoroba tataicaenexa picani Jesús pelivaisi pejumecovënëtsivi tajebinexa penaneconitsivi pejebabiabibota. ¹³ Agripa, nacua nevetsinë, abaxë nenamuxunaevere. Nexata jane baja ponajë Damasco tomarabelia. Nexata tanajetarucaejavata namutua, taniji matonejeepatota athëbëvetsica pinijicotia tanematatoyorotsianaitayotsijava. Naitayota matabipijijuametocotia matatoxenetsia. Daxita tayajavaponaevi tayajavanajetarucaejavata, panematatoyorotsia naitayota. ¹⁴ Nexata daxita paxanë irata pabobenajunuajë. Bajarajota irata jumetaenucajë hebreojumeta athëbëvetsica tanejumaitsijava: “Saulo, Saulo, ¿detsa xuajitsia tajajivi netobejio-biaexanaponame? Xamë nijacuata najamatabëcuenebiji-anaponame,” tanejajava, jumetaenucajë irata. ¹⁵ Nexata xanë jumaitsinë: “Tajatuxanenë, ¿detsa ponëmë?” janë. Nexata icatsia nejumaitsi: “Xanë raja Jesúsne. Xanë raja tajajivi netobejio-biaexanaponame. ¹⁶ Nonotabapunare. Catsitanaitajëtatsi raja tacaitapetsinexa tajajivitonëexamë. Xamë nexata tsipaebianame itsajivijavabelia pacuenia aeconoxae netaneme. Tsipaebianamenua pacuenia icatsia catsitanaitajëtsianatsi bexëa itsamatabijavabelia. ¹⁷ Cacapanepaenatsi raja judíovi pecobevecua pecaitsacueniabiyanima. Caitorobianatsi apo judíovi pijanacuanëjavabelia. Apo judíovi ata pecobevecua cacapanepaenatsi pecaitsacueniabiyanima. ¹⁸ Caitorobatsi rabaja netsipaebinexa apo judíovijavabelia pexanialivaisi, xanë talivaisi. Nexata apo judíovi ata najamatabëcuene pënëyorotsiaexanaename Diosojavabelia. Nexata Dioso pexaniajailivaisita apo judíovi ata jamatabëcueneitayotsianatsi piitaquirijamatabëcuenevecua, dovathi pejamatabëcuene itorobabiabijavatsivecua. Nexata apo judíovi ata talivaisi jumecovënëtsiana. Nexata bajarapamonae pibisiacuene pexanaeneconimi, Dioso vecuaajibiaexanaenatsi itsa jumecovënëtsiana talivaisi. Nexata apo judíovi ata pibisiacuene pexanaeneconimi, Dioso vecuaajibiaexanaenatsi, pacuenia baja daxita tanejumecovënëtsivi Dioso vecuaajibiaexanatsi pibisiacuene pexanaeneconimi,” nejai Jesús mapacueniaje athëbëvetsica, jai Pablo nacuaevetsinë Agripajavabelia.

Pacuenia Pablo navajunupaeba pacuenia jumecovënëta Jesús pitorobicueniatsi yabara pelivaisi

¹⁹ Icatsia Pablo jumaitsi nacuaevetsinë Agripajavabelia:

—Agripa, nacua nevetsinë, abaxë nenamuxunaevere. Nexata pacuenia Jesús athëbëvetsica nejumaitsi, jumecovënëtajë baja cajena. ²⁰ Copiata Jesús pelivaisi tsipaebaponajë Damasco tomarapijivijavabelia, Jerusalén tomarapijivijavabelia ata, Judea nacuapijivijavabelia ata. Bajaraxuacujinae icatsia tsipaebaponajë apo judíovijavabelia ata. Nexata itorobajë daxita bajarapamonae pecopabinexa pibisiacuene pexanabiabijava penajamatabëcuene-pënëyorotsinexa Diosojavabelia. Nexata itorobajë xaniavaetsia pejinavanapaenexa pibisiacuene pexanaeyanima. Nexata baja bajarapacuenia itsa

jinavanapa, daxitajivi yapëtanetsi pepacuene penajamatabëcuenepënëyorotsijava Diosojavabelia. ²¹ Bajarapalivaisi tatsipaebaponaexae, nevaetaba judíovi pamatacabi ponaponajë templobota. Nevaetaba tanebeyaxuabinexa picani. ²² Itsiata baitsi jane neyavaponapona Dioso taneyavenonaenexa mapamatacabijavaberena ataje. Bajaraxuata nucajë majotaje tatsipaebinexa Jesús pelivaisi daxitajivijavabelia. Jesús pelivaisi jivi itsa tsipaebabiabajë, tsipaebabiabajë bepejiobivijavabelia, pepo petuxanevijavabelia ata. Nexata daxita bajarapamonae najëpaeya tsipaebabiabajë peyapëtaenexa xua bajayata tajëvelia Diosojumepaebivi profetavi vajunupaeba. Profeta Moiséspijinë ata bajayata tajëvelia vajunupaeba bajaraxua. Pacuenia ata bajayata tajëvelia Diosojumepaebivimi profetavi copiaya jumaitsi, tsipaebabiabajë. Bajayata baja cajena profetavimi Cristo yabara jumaitsi mapacueniaje: ²³ “Pamatacabi Cristo Dioso itorobianicatsi jivi pecapanepaenexa, beyaxuabianatsi. Itsiata baitsi jane pebeyaxuabicujinaetsi Dioso icatsia asaëyaexanaenatsi. Nexata Cristo Dioso itsa asaëyaexanaenatsi petëpaecujinae, namataxainaeya asaëyaexanaenatsi daxita petëpaevivecua,” jai bajayata tajëvelia profetavi. Nexata jane baja Cristo Dioso itsa asaëyaexanatsi petëpaecujinae, namataxainaeya jane baja asaëyaexanatsi daxita petëpaevivecua. Nexata pamona Dioso pepuajumecovënëtsi tëpa, Dioso icatsia cotocaevi asaëyaexanaenatsi petëpaecujinae. Nexata bajarapalivaisi tsipaebaponajë judíovijava, apo judíovijava ata. Daxita bajarapamonae itsa jumecovënëta bajarapalivaisi, pecapanepaenexatsi Diosojavabelia, jai Pablo nacuaevetsinë Agripajavabelia.

Pacuenia Pablo petsipaebilivaisi pejumetaevitsi, sivanajamatabëxainatsi yabara pelivaisi

²⁴ Pablo penavajunupaebijavata, nacuaevetsinë Festo jumevabaxuabatsi.

—¡Pablo, xamë raja saya camatajemaba! Camatajemaba bitso nenacujarubixae, jai nacuaevetsinë Festo.

²⁵ Pablo nexata jumaitsi:

—Festo, pecayaiyataenë, nacua nevetsinë. Apo nematajemabi raja xanë. Paliivaisi raja pacatsipaebatsi, pepo pexaniajailivaisi. ²⁶ Bajarapalivaisi ajumejunavijibia pacatsipaebatsi tsipaji maponë ecaje, nacua pevetsinë Agripa, xaniavaetsia yapëtane bajarapalivaisi. Agripa xaniavaetsia yapëtane daxita xua Jesús exana. Tsipaji abaxë pamatacabi Jesús ponapona mapanacuataje, daxita xua exana, muetsia apo exanae. ²⁷ Agripa, nacua nevetsinë, xamë baja cajena jumecovënëtame profetavi bajayata peyaquinaelivaisi. ¿Baja tsabaitsi jane? Cayapëtanetsi baja cajena nejumecovënëtsijava bajarapamonae peyaquinaelivaisi, jai Pablo nacuaevetsinë Agripajavabelia.

²⁸ Nexata nacuaevetsinë Agripa jumaitsi Pablojavabelia:

—¿Bepijia tsabaja Jesús pelivaisi jamatabënejumecovënëtsiaexaname? jai nacuaevetsinë Agripa.

²⁹ Nexata Pablo jumaitsi:

—Vajëtajë Diosojavabelia Jesús pelivaisi bepijia panejumecovënëtsinexa. Itsa jume, beaxayocuenia ata panejumecovënëtsinexa. Daxita paxamë patanejumetaeyenaevimë, jitsipajë panejumecovënëtsijava Jesús pelivaisi. Pacuenia baja xanë jamatabëcueneitsinë, Jesús pelivaisi tajumecovënëtsinë, bajara paxamë ata panejamatabëcueneitsinexa. Itsiata apo pacatojitsipaetsi papecacëbinexa mapitsicadenamaëtonëtaje pacuenia xanë necëtanuta, jai Pablo.

³⁰ Itsa baja Pablo najumevereta bajarapacuenia petsipaebijava, nacuaevetsinë Festo nonotapuna. Nacuaevetsinë Agripa ata, pijava Berenice yajava, nonotapuna. Daxita baja penajuanacaetuatsivi ata nonobapuna peponaenexa. ³¹ Pepitsapaecujinaelia bajarapamonae najumaitsi:

—Maponėje Pablo itsacuene baja cajena apo exanae. Nexata picani ajibi paneconi yabara beyaxuabijitsiatsi. Ajibinua paneconi yabara etsijitsiatsi penaneconitsivi pejebabiabibota, najai bajarapamonae Pablo yabara.

³² Nacuaeavetsinē Agripa jumaitsi nacuaeavetsinē Festojavabelia:

—Itsa apo cavajētsi tsipae nitorobinexa vajatuxanenēbejejavabelia, Romanonacua pepo pevetsinējavabelia, bajaraponē pitabarata peneconitsinexatsi, nexata baja picani copatsipatsi pepitsapaenexa penaneconitsivi pejebabiabibovecua, jai nacuaeavetsinē Agripa Pablo yabara.

27

Pacuenia Pablo caponaliatsi Roma tomarabelia yabara pelivaisi

¹ Nacuaeavetsinē Festobana najamatabēcuenevereta baja pitorobinexatsi Pablo Italia nacuyabelia, Romanonacua pepo pevetsinējavabelia. Nexata Pablo caponaejitsiatsi vajabitsaē pijacapitán, Juliovenēnē. Itsamonae naneconitsia pejinavanapaevi, Pablo yajava, caponaejitsiatsi. Ponē Romanonacua pepo pevetsinē, bajaraponē pevēnē Augusto. Nexata Augusto pijajivi vajabitsaē pijacapitánmonaeyajuvēnē Julio. ² Xanē Lucasnē, naponajē Pablota. Adramitio tomaraverena pepatsibarco ēnēabereca parunarecajē. Bajarapamo yaētanajetaruaejitsia manuamene muxubērēa penaetomaranējava, pepatsinexa Asiavēnē nacuyabelia. Payajavaponajēbeje Aristarco, Tesalónica tomarapijinē. Tesalónicatomara eca Macedonia nacuata. ³ Meravia pitsijavata epatua panapatajē Sidón tomarata. Capitán Julio yaiyatanetsi Pablo. Bajaraxuata Sidón tomarata Pablo tocopatatsi penonotajunaenexa barcoēnēvecua, penasivaxainaenexa peyapētaevitsijavabelia, perajutsinexatsinua xua namatavenona Pablo. ⁴ Bajaraxuacujinae icatsia panaropobajē Sidón tomaravecua. Nexata patavajēnaeverena jovibo najetaruca. Nexata Chipretunaeto pacujibaliajē bajarapatunaeto muxubērēa patanajetarubenaenexa. Nexata Chipretunaeto patatsavenononia paxenetanajetarubenaē. Tsipaji bajarapamuxubērēvelia jovibo beyajetayo. ⁵ Cilicia nacubeje Panfilia nacubeje canacujitsialia papaliajē. Nexata payaētajē Mira tomarata. Miratomara eca Licia nacuata.

⁶ Nexata Mira tomarata capitán Julio caxitajaraba barco, Alejandría tomaraverena pepatsimo. Bajarapamo ponaejitsia Italia nacuyabelia. Nexata baja pabarcota pananajetarubenaē, pavecuanonobajunaē. Nexata icatsia capitán Julio panerunaeyaexana Alejandría tomaraverena pepatsibarco ēnēabelia. ⁷ Anijamatacabianē bajarapabarcota pananajetarubenaē. Tsipaji beaxayo najetaruca. Pinijicuenecujinae itsiata panajetarubenaē Gnidotomara canacujitsita. Jovibo abaxē tsiteca najetaruca patavajēnaeverena. Nexata pamatavaquetajē Cretavēnētunaeto. Panajetarubenaē itsapaitapavelia eca Salmóntomara. Tsipaji bajarapaitapavelia jovibo beyajetayo. ⁸ Piayapēbejecuenia panajetarubenaē manuamene muxubērēa. Nexata papatajē Buenos Puertosvēnējavata, Laseatomara imoxoyojavata.

⁹ Pamatacabianē xanepana menia patanajetarubenaenexa, panevecuapanepapona baja. Nexata baja bitso panetsiayai menia pataponaenexa. Tsipaji bajarapajuametota bitso jovibo ayai tsabiabi. Emarapae ata baja copiajunua. Nexata picani Pablo tsipaeba barcota patanajuaponaevijavabelia. ¹⁰ Pablo picani jumaitsi mapacueniaje:

—Xanē raja yapētaniji nacatsiayai baja bitso menia vajaponaenexa vajavajēnaeyabelia. Naxuabijitsipa raeta mapamoje. Naxuabijitsipa raeta mapamoēnētaje pecaponaējava yajava. Vaxaitsi ata meta naxuabijitsipatsi. Nexata abaxē majotaje evetavanapaenatsi emarapae pepanepaejava, jai picani Pablo.

¹¹ Itsiata capitán Julio apo jumecovēnētsi Pablo petsipaebijava. Caranata pacuenia jumaitsiabeje barco pexainaenē, barco pecaponaenē ata, capitán Julio jumecovēnēta.

¹² Buenos Puertosvēnējavata ayapēbeje barco perucaejava bajayajebi. Nexata acuenebi

bajarajota pataevetavanapaenexa emarapae pepanepaejava. Nexata picani daxita bajarapamonae bitso jitsipa patavajënaeyabelia pataponaenexa. Jitsipa picani Cretatunaeto muxubërëa patanajetarubenaenexa, itsa cuencajëpatsi, pepatsinexa picani Fenice tomarata. Bajarapatomarata picani jamatabëyaëta pataevetavanapaenexa emarapae pepanepaejava. Fenicetomara eca Creta tunaetototsotota. Nexata bajarapatotsotota xanepana barco perubenaenexa. Tsipaji bajarapatotsotojava apo joneyabiabi jovibo.

Pacuenia pinijjoviboxaneto barco caponatsi Creta tunaetovecua yabara pelivaisi

¹³ Itsa pajinavanapajë Buenos Puertosvënëjavata, barco pexainaenë bitso jitsipa peponaenexa pevajënaeyabelia. Nexata bajarapaepatota patacovëverena beaxayo jovibo najetaruca. Nexata bajarapamonae itsa tane bajarapajovibo, jitsipa pevajënaeyabelia peyacaponaenexatsi bajarapamonae pejitsipaecuenia. Nexata jane baja panaropobajë. Cretatunaeto muxubërëa panajetarubenajë. ¹⁴ Nexata jemata caeepatoyocujinae pinijjoviboxaneto najetaruca Cretatunaeto epatajërëtsiarena barcojavaberena. Bajarapajovibo Nordestevënëjovibo. ¹⁵ Bajarapajovibo barco torotaponatsi Cretatunaetovecua. Apo panecajëpae barco patamuxufetsinexa jovibo pevajënaevelia. Nexata baja pacopatajë pataneyacaponaenexa jovibo. ¹⁶ Paponajë tsiquiritunaetoyo, Claudavënë tunaetoyo, pepënënenia. Bajaraxuayo bitso jovibo apo ayai. Barco petabufevetsina robotanajetaruca jera. Nexata itsajota jovibo beyajetayo, pinijicuenia payamaërobocainajë jera patajutabuatsinexa barco ënëabetsina. ¹⁷ Bajaraxuacujinae bajarapamonae barco epacëbaponaya pinijibumacaxanetonëta barco pesarasaraëcaeyaniva malatacata. Bajarapamonae junava barco patayayaëyaëcaeyaniva Sirtevënë iratsaubonëjumata. Nexata bajarapamonae isica barcopijivelapananë. Bajaraxuacujinae bajarapamonae copata baja itsabelia jovibo pona, barco pataneyacaponaenexa jovibota. ¹⁸ Meravia abaxë pitsijavata tsiteca pinijjovibo piayaijava. Nexata bajarapamonae barcoënëta pecaponaejavanë, menia yajuvënëpenereca barco pefafanaenexa. ¹⁹ Bajaraxuacujinae icatsia meravia pitsijavata bajarapamonae menia penereca barcoënëta pecanacuenebijavanë. ²⁰ Bajayajebi baja cajena apo pataenë maticabipijjuameto, tulupu ata. Tsipaji bajayajebi pinijjovibo, ema yajava, tsitecanuca. Belia pajamatabëjumaitsinë: “Apo yapanepaetsi meta baja tsane,” pajamatabëjanë.

²¹ Pamatacabibeje bajarapacuenia pataniji, bajara pijinia pamatacabibeje apo paxaenë pataxaejava. Nexata Pablo nonotapuna bajarapamonae petuatujëta. Pablo jumaitsi:

—Itsa paxamë panejumecovënëtsipame pacuenia pacatsipaebatsi, xanepanaejitsipa. Nexata maberenaje apo yaponae tsipaetsi Cretatunaetovecua. Apo bejiobitsinua tsipae. ²² Itsiata baitsi jane aeconoxae pëtsa panatsinajamatabëxainame. Itsajivi ata raja paxamëyajuvënëjivi itsiata apo tēpae tsane. Ebarco rajane baja naxuabiana. ²³ Ajena baja cajena, pameravi, netsitanaitajëta ángel, Dioso pitorobinëtsica. BajarapaDioso xanë pijajivitonënë. BajarapaDioso tonacuenebaponaponajë. ²⁴ Nexata ángel nejumaitsi: “Pablo, pëtsa junavame. Itsiata raja apo tēpaemë tsane. Tsipaji raja naitajëtsijitsiamë Romanonacua pepo pevetsinë pitabarata. Xamë raja nejamatabëcueneta Dioso capanepaenatsi petēpaeyaniva daxita pamonaë yajavanajetarucame mapabarcotaje,” nejai ángel. ²⁵ Nexata daxita paxamë panajamatabëcuenesaëre panejamatabëcuenebëjajjavavecua. Najamatabërutajë Diosojavabelia vajanacacapanepaenexa Dioso. Yapëtaniji Dioso vajanacacapanepaejavanexa pacuenia baja ángel netsipaeba. ²⁶ Itsiata baitsi jane cajena jovibo nacayacaponaena itsatunaetojavabelia, jai Pablo.

²⁷ Catorce baja pamatacabibeje itsa paxainajë patanaropobicujinae, meravi jovibo toquebiaya paneyacapona Adriavënë manuamenejava. Nexata meravi tuatujëta barcota penacuenebivi jamatabëjumaitsi:

—Pitapayabelia covë payapataponajë, jamatabëjai.

²⁸ Nexata bajarapamonae pemaëtota caëjëta pona xuavajëto mene avajubua irabereca peyapëtaenexa. Nexata treinta y seis pametrobeje xaina mene piavajubujava irabereca. Bajaraxuacujinae, caeepatoyocujinae, icatsia caëjëta. Veintisiete icatsia pametrobeje xaina mene piavajubujava irabereca. ²⁹ Nexata barcota penacuenebivi jamatabëjumaitsi:

—Barco meta payanayaëtojopaenajë ibotojumata, jamatabëjai.

Nexata bajarapamonae barco petabufevetsina, cuatro xuabeje anclavënëjavanë, yamaëya copabareca. Nexata anclavënëjavanë menebëxëpana irabelia itsa vaetaba, barco perucojopaenexa. Bajarapamonae picani bitso jitsipa bepïjia peyamatacabibijavatsi, penatsivajënae taenajetarubenaenexa. ³⁰ Nexata bajarapaepatota bajarapamonae picani bitso jitsipa ëpamonae penonobajunaenexa barcovecua pepanepaenexa. Nexata bajarapamonae penajuaponaevijavabelia yamaxëitojorobiaya jumaitsi:

—Icatsia raja pacopabijitsianëreca itsaanclajavanë barcoupitatsia, jai.

Nexata saya ëjera, pamo pajutabuatsinajë, bajarapamonae xuareca peyaponaenexa picani pitapayabelia. ³¹ Nexata Pablo itsa tane bajarapamonae jera pexuabijavareca, jumaitsi vajabitsaë pijacapitánjavabelia, capitán pijajivijavabelia ata:

—Mapamonaeje barcota penacuenebivi itsa ponaena mapajerataje, paxamë pava-jabitsaëmë panapenetsianame meneta, jai Pablo.

³² Nexata barcota penacuenebivi peponaeyaniva jerata, vajabitsaë caucutaxuaba jera pecëtarutsimaëto. Jera baja nexata pona barcovecua.

³³ Ajena baja matacabi tsina, Pablo itoroba daxita barcota peponaevi pexaejava pexaenexa. Pablo jumaitsi bajarapamonaejavabelia:

—Catorce baja cajena pamatacabibeje xaniavaetsia apo pamajitsimë. Panexaejava ata apo paxaemë. ³⁴ Bajaraxuata pacaitorobatsi panexaejava panexaenexa, panesaë panexainaenexa panepanepaenexa. Itsiata raja daxita apo paitsacuenemë tsane, jai Pablo bajarapamonaejavabelia.

³⁵ Bajarapacuenia Pablo pejumaitsijavata, panbë pita. Panbë yabara Pablo pexaniajamatabëcuene rajuta Diosojavabelia daxita bajarapamonae pitabarata. Bajaraxuacujinae Pablo epatsënëca panbë. Pablo nexata xane pexaejava. ³⁶ Daxita nexata bajarajota ajamatabëcuenesaëreca baja. Nexata bajarapamonae ata xane pexaejava. ³⁷ Doscientos setenta y seis papajivinëbeje daxitata paponajë bajarapabarcota. ³⁸ Nexata daxita xaniavaetsia penabanicujinae, menia penereca trigoxu sacuanë pefafanaenexa barco.

Pacuenia barco bubuna manuameneta yabara pelivaisi

³⁹ Itsa baja matacabi tsarucapona, barcota penacuenebivi taeyelia petunaeto. Itsiata apo yapëtae bajarapatunaeto. Nexata menetotsoto taerulia. Bajarajotalia tajetabo boca. Nexata picani bajarapamonae najamatabëxaina peyaëtsinexa barco bajarapata-jetabojavabelia. ⁴⁰ Xuanë anclavënëjavanë, yamaëya copabareca, bajaraxuanë irabelia itsa vaetaba, barco patayarucojopaenexa. Bajaraxuanëmi yamaëcaucubapenereca. Sarasaranaeyaexananua barco petabufecajëbanajetarubenaepabeje. Nexata barcoupitatsia penucaenaeta velapana upicëtarutsia. Velapana nexata jovibota nayerebajaraba. Barco jane baja imoxoyotanajetaruca tajetabo. ⁴¹ Nexata itacarajeta barco pata itsajota anijamenebeje pesaë namataenetsia patabeje. Barco baja payajumanayaëtajarabajë iratsaubojumata. Nexata bajarajota barcoupi mëthëmëthëcajunua iratsaubojavabelia. Ataja tsanucæ. Barco petabufejavavetsina malataca pesaëta tabufesarabajarabatsi. ⁴² Nexata picani vajabitsaë bajarajota beyejebijitsiatsi daxita penaneconitsivi, pevecuapanepaeyanivatsi pejuejavata. ⁴³ Itsiata vajabitsaë pijacapitán apo tocopatsi. Tsi-paji apo jitsipae Pablo yajava pebeyaxuabijavatsi. Nexata capitán itoroba daxita pamonae yapëtane pejuejava, copiaya pejuenexa pitapayabelia copiaya pepatsinexa

matatsënëabelia. ⁴⁴Bajaraxuacujinae pamonae apo yapëtae pejuejava, cotocaevi itoroba tablapanëjumata, barcopanëmijumatanua, pejuenexa. Bajarapacuenia daxita panepa matatsënëabelia.

28

Pacuenia Pablo ponapona Maltavënë tunaetjavata yabara pelivaisi

¹ Itsa baja daxita paxanë xaniavaetsia papanepajë matatsënëabelia, nexata pavënëtaniji bajarapatunaeto. Bajarapatunaeto Malta vënëtunaeto. ² Maltatunaetopijivi bitso paneyavenona. Bajarapamonae pinijiisotoxaneto itajuruteta. Tsipaji bitso ema tsanuca. Nexata bitso cainejeba. Panejunata daxita patanonopaenexa. ³ Nexata Pablo nota petseviiso. Itamataeta bajarapaisoto. Nexata jomo bitso piatanenë, bebula, pitsatabijirava isotojavaverena piatajujavavecua. Nexata Pablo cobesinetsi. Pecobesinijavatatsi tsiteca yajumaruca. ⁴ Maltatunaetopijivi itsa tane Pablo jomo pecobesinerucaejavatsi, nexata najumaitsi bajarapamonae:

—Maraeta ponë jivibenëje. Bajaraxuata manuamene vecuapanepae ata, icatsia Dioso tocopatatsi jomo pesininexatsi. Nexata jivi pebejamatabëcuene, jomo pesinijavatsi peyatëpaenexa, najai Maltatunaetopijivi Pablo yabara.

⁵ Nexata Pablo nacobenënëbiaxuaba jomo pejopaenexa isotojavabelia. Pablo itsiata apo itsacuene. ⁶ Nexata daxita Maltatunaetopijivi jamatabëjumaitsi Pablo yabara:

—Aeconoxae meta Pablo cobeyajinaena. Itsa jume, irata meta petëpaenë jopaena, jamatabëjai.

Nexata bajarapamonae bajayaepato evetanubenaeta Pablo petaenexatsi jomo pecobesinijavatsi peyaisacuenejava, itsiata Pablo apo itsacuene. Nexata icatsia bajarapamonae itsacuenia najamatabëxaina Pablo yabara. Nexata najumaitsi bajarapamonae:

—¡Maraeta papebi diosonëje! najai.

⁷ Maltatunaeto pevetsinë pevënë Publio. Nexata itsajota panubenajë, imoxoyo bobena Publio pijairanë. Nexata bajaraponë panecopiapita pexaniacuenia. Bajaronë pijabota panajinavanapajë acueyabi pamatacabibeje. ⁸ Publio paxa avitane tsanuca camata. Romaebanucatsi. Bitso suliabatsi. Nexata Pablo taeyojopalia. Vajëta Diosojavabelia. Bajaraxuacujinae piavitanenë pematocabocotojumaverera Pablo nacobebuata. Nexata baja Pablo jamatejemayaexana piavitanenëmi. ⁹ Bajarapacuenia Pablo itsa exana, nexata daxita piavitanevi Maltatunaetopijivi pata Pablojavaberenena. Daxita bajarapamonae ata jamatejemayaexana Pablo. ¹⁰ Maltatunaetopijivi pinijicuenia paneyaiyataeya paneyavenona. Itsa baja icatsia bexëjavabelia itsabarcota panaponajë, nexata Maltatunaetopijivi panerajuta daxita patanamatavenonaejavaxi pataponaejavata.

Pacuenia Pablo pata Roma tomarata yabara pelivaisi

¹¹ Malta vënëtunaetota panajinavanapajë acueyabi pajuametobeje. Bajaraxuacujinae baja icatsia panaponajë barcota. Bajarapabarco patavajënae pata Alejandria tomaraverena. Bajarapamo Maltatunaetototsotota daxita emarapae ruca. Evetaruca emarapaejuametone pepanepaejava. Bajarapabarcoupita rucabeje jivi saya pecobeta jumapecataeya pexanaenëbeje. Cástorbeje Póluxbeje jumapecataeya jivi pecobeta pexanaenëbeje bediosonëbeje petaenexa. ¹² Bajarapabarcota panaponajë. Nexata jane baja panapatajë Italia nacuyabelia. Panapatajë Siracusa tomarata. Siracusa tomarata abaxë panajinavanapajë acueyabi pamatacabibeje. ¹³ Bajaraxuacujinae icatsia panaropobajë. Paponajë manuamene muxubërëa. Nexata icatsia papatajë Regio tomarata. Nexata meravia pitsijavata patacovëverena pexaniajovibo najetaruca. Nexata bajarapajovibo paneyacapona patavajënaeyabelia. Nexata icatsia anijamatacabibejecujinae papatajë Puteoli tomarata. ¹⁴ Puteoli tomarata pacaxitajarabajë Dioso

pejumecovënëtsivi. Bजारapamonae paneasiva caesemana patanajinavanapaenexa bajarapamonaejavata. Bजारaxuacujinae jane baja matatsënëa paponajë Roma tomarabelia. ¹⁵ Roma tomarapijivi, Dioso pejumecovënëtsivi, patavajënaelia panevënëlvaisitane patanajetarubenaejava. Nexata bajarapamonae panecopiajairena. Nexata penamataxainaebitsaëto panemataenena Foro de Apiovënëjavata. Bजारaxuacujinae icatsia itsabitsaëto panemataenena Tres Tabernasvënëjavatalia. Nexata Pablo ita tane bajarapamonae, pexaniajamatabëcuene rajuta Diosojavabelia. Nexata ajamatabëcuenesaëreca Pablo bajarapamonae petaejavata. ¹⁶ Nexata jane baja papatajë Roma tomarabelia. Nexata Roma tomarata capitán Julio rajuta baja pamonaenaneconitsia capona Cesarea tomaraverena. Rajuta baja penaneconitsivi pejebabiabibo pevetsivi penamat-acaitorobinë pecobeyabelia. Itsiata Pablo tocopatatsi saicayabota peponaponaenexa. Caenë vajabitsaënë evetaponaponatsi Pablo penajetabajiraviyaniva.

Pacuenia Pablo tsipaeba Jesús pelivaisi Roma tomarata yabara pelivaisi

¹⁷ Pablo baja ita xaina acueyabi pamatacabibeje pepatsicujinae Roma tomarata, tonajumexuaba judíovi penamatacaitorobivi pepatsinexa Pablojavaberena. Itsa baja nacaetuata judíovi penamatacaitorobivi, Pablo nexata jumaiti judíovi penamatacaitorobivijavabelia:

—Tajamonae, itsacuene apo exanae atanë vajavëna judíovijavabelia, vajasalinaivi pecujarubicuene jumecovënëtsiaponapona atanë, itsiata vajavëna judíovi nevaetaba Jerusalén tomaratalia. Nexata necanajeta tananeconitsinexa Romano nacuapijivi pecobeyabelia. ¹⁸ Nexata Romano nacuapijivi, jivi penaneconitsicuene pevetsivi, neyanijoba xua yabara vajavëna judíovi neneconita. Nexata baja picani Romano nacuapijivi necopatsijitsia. Tsipaji apo caxitajarabi itsacueneneconi ata taxinaejava, paneconi yabara nebeyaxuabiaexanaejitsia. ¹⁹ Itsiata baitsi jane vajavëna judíovi, pamonaenaneconita, apo jitsipae Romano nacuapijivi tanecopatsinexa. Jitsipa picani tanebeyaxuabinexa. Nexata xanë vajëtajë taneitorobinexa maberenaje Romanonacua pepo pevetsinë pitabarata taneneconitsinexa pibisiacuene ita exanajë. Itsiata xanë apo jitsipaenë juya bajarapamonae taneconitsijava tajanacuapijivijavabelia. ²⁰ Bजारaxuata nexata pacajunatatsi patacataenexa patacabarëcuaiquaijinexanua. Ponë daxita Israel nacuapijivi copiaevetavanapa athëbëvetsica pepatsijavanexatsica, xanë baja yapëtaniji bajaraponë athëbëvetsica pepatsijavatsica. Nexata xanë vajunupae-baponajë bajaraponë athëbëvetsica pepatsijavatsica. Bजारaxuata necobecëtsiaya yamaëya ponaponajë mapacadenamaëtoje, jai Pablo Roma tomarata judíovi penamatacaitorobivijavabelia.

²¹ Nexata judíovi penamatacaitorobivi jumaiti Pablojavabelia:

—Itsalivaisi ata baja cajena xamë yabara apo panetonajumeitorobi Judea nacuaverena. Vajavëna judíovi patsi ata bajaraverena, itsiata apo panetsipaebi pibisiacuene xamë nexanaejava. ²² Itsiata baitsi jane pajitsipajë patanetsipaebinexamë pacuenia Jesús pelivaisi jumecovënëtamé. Daxitanacuanëpijivi baja cajena baracuaiquaijai tsabiabi bajara papejanapitsapaelivaisi: “Apo pexaniajailivaisi cajena bajarapalivaisi. Dioso cajena apo nacatocopatsi bajarapalivaisi vajajumecovënëtsinexa,” jai tsabiabi daxitanacuanëpijivi, jai judíovi penamatacaitorobivi Pablojavabelia.

²³ Nexata judíovi penamatacaitorobivi cajëta matacabi icatsia nacaetuatsijitsia pabota Pablo ponapona. Nexata jane baja icatsia ita nacaetuata, bajarapamonae ayaibitsaëtoxaneto parena pabota Pablo ponapona. Nexata Pablo bajayacunua petaxuxuabicujinae livaisi petsipaebijava, matapania caniviyojavabelia copata. Nexata Pablo tsipaeba bajarapamonaejavabelia Dioso pijajivi pevetsijava mapanacuataje. Pablo tsipaebanua bajarapamonaejavabelia pacuenia jumaiti Dioso Moiséspijinëta penajumecopatsilivaisi Jesús yabara. Pablo tsipaebanua pacuenia jumaiti Diosojumepaebivi profetavi bajayata peyaquinaelivaisita Jesús yabara. Bजारapacuenia Pablo tsipaeba

bajarapamonae pejumecovënëtsinexa Jesús pelivaisi. ²⁴ Itsamonae bajarapamonaeya-juvënëvi jumecovënëta baja bajarapacuenia Pablo petsipaebilivaisi. Itsiata itsamonae apo jumecovënëtsi. ²⁵⁻²⁶ Nexata daxita bajarapamonae apo najamatabëcuenejêpae. Nexata bajarapamonae penaviabivajënae Pablo icatsia jumaitsi bajarapamonaejavabelia mapacueniaje:

—Bajayata baja cajena profeta Isaíaspijinë Espíritu Santo pejamatabëcueneta tajëvelia yapëtaeyaexanatsi paxamë apo panejumecovënëtsijavanexa Jesús pelivaisi. Nexata profeta Isaíaspijinë Espíritu Santo itorobatsi petsipaebinexa vajasalinaivimijavabelia mapacueniaje:

Paxamë raja picani pajumetaeyabiabianame palivaisi pacatsipaebabiabiana. Itsiata apo pajumeyapëtaemë tsane xua yabara bajarapalivaisi pacatsipaebabiabiana. Paxamë raja picani pataeyabiabianame xua pacatsitaexanabiabiana. Itsiata apo payapëtaemë tsane pajamatabëcuene yabara bajaraxua pacatsitaexanabiabiana, jai profeta Isaíaspijinë vajasalinaivimijavabelia.

²⁷ Bajarapacuenia jumaitsi profeta Isaíaspijinë tsipaji baja cajena Dioso tajëvelia jumaitsi paxamë apo panejumecovënëtsijavanexa yabara mapacueniaje:

Bajarapamonae ajamatabëcuenetaja tsane. Nexata benamuxuacabiaya pejinavana-paevi tsane. Benaitaxutotsaquebiaya pejinavanapaevi tsane. Itsa bajarapacuenia apo itsipae, nexata yapëtaejitsipa pajamatabëcuene yabara tsitaexanatsi xua tane. Jumeyapëtaejitsipana palivaisi tsipaebatsi. Pejamatabëëthëtojavavetsina jumeyapëtaejitsipa. Nexata najamatabëcuenepënëyorotsipa perujujamatabëcuenevecua. Nexata xanë jamatabëcuene xanepanaeyaexanaejitsipajë pibisiacuenevecua,

jai baja cajena Dioso bajayata tajëvelia paxamë apo panejumecovënëtsijavanexa yabara, jai Pablo judíovijavabelia Roma tomarata.

²⁸ Pablo icatsia jumaitsi judíovijavabelia:

—Pajudíovimë, pajumeyapëtaema mapalivaisije. Ajena baja mapamatacabijavaveliacujinaeje, pevajënaeyabelia, Dioso jivi pecapanepaelivaisinexa apo judíovijavabelia ata tsipaebianatsi. Nexata apo judíovi ata xaniavaetsia namuxunaevetsiana bajarapalivaisi, jai Pablo judíovijavabelia.

²⁹ Itsa baja Pablo najumevereta bajarapacuenia petsipaebijava, nexata jane baja daxita judíovi naviaba. Nexata bajarapalivaisi yabara bajarapamonae namutua nabarëcuaicuaijai tsanajetarubena.

³⁰ Pablo penacovaetsibota anijavaibeje ponapona Roma tomarata. Pablo matamotapona bo pecovaetsijamatabëcuene. Pablo xaniavaetsia copiapitabiaba daxita pamona sivaxainabiabatsi. ³¹ Pamona Pablo sivaxainabiabatsi, tsipaebabiaba Dioso pijajivi pevetsijava mapanacuataje. Tsipaebabiabanua pepo petuxanenë Jesucristo pelivaisi. Tsipaebabiaba ajumejunavijibia. Itsajivi ata Pablo apo jumeitavetsitsi petsipaebabiabilivaisi.

Mapabaxutoje San Pablo toyaquina Roma tomarapijivjavabelia

Pacuenia Pablo toyaquina mapabaxutoje Dioso pejumecovënëtsivi, Roma tomarapijivi-javabelia, yabara pelivaisi

¹ Xanë Pablonë, Jesucristo pijajivitonënë. Dioso nejunata. Nexata nitoroba apóstolenëxanë tatsipaebaponaenexa jivi pexanialivaisi, Jesucristo pelivaisi, Dioso-javabelia pecapanepaelivaisinexatsi.

² Bajayata vajavajënaeya, Dioso bajarapalivaisi tajëvelia yapëtaeyaexana profetavijavabelia. Nexata bajayata Diosojumepaebivi profetavi itsa yaquina Dioso pejumelivaisibaxutonexa, bajarapamonae yaquina pacuenia Dioso tajëvelia yapëtaeyaexanatsi bajarapapexanialivaisi. ³ Bajarapalivaisi vajatuxanenë Jesucristo, Dioso pexënato pelivaisi. Jesucristo itsa naexana mapanacuataje, Davidpijinë pemomoxiyajuvënëvata naexana. Bajaraponë, Davidpijinë, bajayata Israelnacua pepo pevetsinëmi. ⁴ Vajatuxanenë Jesucristo petëpaecujinae, Espíritu Santo icatsia asaëyaexanatsi. Bajarapacuenia piasaëyaexanaexaetsi petëpaecujinae, jivi yapëtanetsi Dioso pexënatocuene. Yapëtanetsinua piasaënëcuene ata. ⁵ Jesucristo pejamatabëcueneta Dioso paneitoroba saicaya paapóstolevinexanë, Dioso patatonacuenebinexa. Bajarapacuenia Dioso paneitoroba Dioso pejumelivaisi patatsipaebaponaenexa pamonaë apo judíovijava, apo judíovi ata pejumecovënëtsinexa Dioso. ⁶ Nexata paxamë ata Roma tomarata panejinavanapaevi pajumecovënëtame baja Dioso. Tsipaji paxamë ata Dioso pacajunata Jesucristo papijajivinexamë.

⁷ Daxita paxamë, Roma tomarata panejinavanapaevi, pacatoyaquinatsi mapabaxutoje. Dioso pacajitsipa. Nexata pacajunata papijajivinexamë. Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexanua.

Pacuenia picani Pablo bitso jamatabëtane Roma tomarapijivi yabara pelivaisi

⁸ Namataxainaeya pacatoyaquinarutatsi pacuenia jumaitsinë tsabiabi paxamë yabara Diosojavabelia. Diosojavabelia jumaitsinë tsabiabi mapacueniaje: “Sivajamatabëcuenëbarëyanë bitso bajarapamonae Jesucristo pejumecovënëtsixae,” janë tsabiabi Diosojavabelia paxamë yabara. Bajarapacuenia Diosojavabelia jumaitsinë tsabiabi tsipaji daxitanacuanëpijivi pacavajunupaeba xaniavaetsia panejumecovënëtavanapaevajava Dioso. ⁹ Xanë daxita tajamatabëcuenesaëta Dioso pijacuene tonacuenebaponaponajë jivi itsa tsipaebabiabajë pexanialivaisi, Dioso pexënato pelivaisi. Dioso yapëtane patacatovajëtabiabijava itsa pacanajamatabënapitabiabatsi tavajëtsijavata Diosojavabelia. ¹⁰ Vajëtabiabajë Diosojavabelia taponanexa paxamëjavabelia. Nexata Dioso itsa netocopatsiana taponanexa, ponaenajë paxamëjavabelia. Bajayajebi picani bitso jamatabëponabiabajë patacataenexa. ¹¹ Nexata jitsipajë patacataenexa, patacatsipaebinxanua palivaisi Espíritu Santo neyapëtaeyaexana. Bajarapacuenia itsa pacayapëtaeyaexanaenatsi, pajamatabëcuenesaëmë tsaponae tsane orijibia Diosojavabelia. ¹² Namataenetsia najamatabëcueneyavenonaenatsi Dioso pejumelivaisi vajajumecovënëtsijava. Pacayavenonaenatsi panejamatabëcuenesaënexa Diosojavabelia. Paxamë ata juya paneyavenonaename bajarapacuenia.

¹³ Tajamonae, pacatojitsipatsi paneyapëtaenexa mapacueneye. Bajayajebi picani bajayajebi jamatabëponabiabajë patacataenexa. Itsiata apo necuenecaëjëpabiabi tapon-aenexa. Jitsipajë patacatsipaebinxexa Jesucristo pelivaisi paxamëyajuvënëvi, pamonaë abaxë apo jumecovënëtsi, pejumecovënëtsinexa Jesucristo. Pamonaë ata baja jumecovënëta, Jesucristo piamatabëcuenesaënexa pevajënaeyabelia. Pacuenia apo judíovi ata jumecovënëta pona pevajënaeyabelia itsaxuayo tsipaebanajetarucajë, bajara paneitsinexa paxamë ata. ¹⁴ Dioso nitoroba tatsipaebaponaenexa Dioso pejumelivaisi daxitajivijava. Nexata Dioso pejumelivaisi jivi tsipaebaponaë pinijitomaranëjava, sasavia penaevijava ata. Tsipaebaponaë mapanacuapijilivaisi bitso peyaëtaevijava ata, apo peyapëtaevijava ata. ¹⁵ Bajaraxuata bitso jitsipajë paxamë, Roma tomarata panejinavanapaevi ata, patacatsipaebinxexa pexanialivaisi.

Pacuenia pexanialivaisi, Jesucristo pelivaisi, pinijisaë xaina ayaicuene pexanaenexa yabara pelivaisi

¹⁶ Apo ajumeuranë tsabiabi jivi tatsipaebabiabijava pexanialivaisi, Jesucristo pelivaisi, jivi pecapanepaelivaisinexatsi Diosojavabelia. Tsipaji bajarapalivaisi pejamatabëcueneta pijaneconi vecuaajibiaexanaenatsi pajivi jumecovënëta bajarapalivaisi. Copiaya patsipaebaponaë bajarapalivaisi judíovi. Bajaraxuacujinae icatsia cotocaevi patsipaebaponaë apo judíovi. ¹⁷ Bajarapalivaisi nacayapëtaeyaexana pacuenia Dioso nacatoexana aneconihibia Dioso vajanacataenexa. Aneconihibia baja Dioso nacatane Jesucristojavabelia vajavajënaeyabelia vajanajamatabëcuene copataponaexae. Dioso ra pejumelivaisibaxutota jumaitsi mapacueniaje: “Pajivi jamatabëjumaitsi: ‘Xanë pepacuene Dioso neyavenonaena pacuenia najumecapanepaeya jumaitsi,’ jamatabëjai, bajarapajivi Dioso aneconihibia tanetsi. Bajarapajivi xainaena matababi peverevere-caejava,” jai Dioso pejumelivaisibaxutota.

Pacuenia daxitatsi mapanacuapijivitsi naneconitatsi Diosojavabelia yabara pelivaisi

¹⁸ Dioso, athëbëtatsia peecaenë, vaxaitsi jamatabëcueneyapëtanetsi. Yapëtanetsi mapacueniaje. Dioso baraanaepanapona daxita pibisiacuene pexanaevijavabelia. Bajarapamonae pevajënaeyabelia pibisiacuene pejamatabëexanaexae, apo jitsipae pejumecovënëtsinexa pexaniajailivaisi, Dioso pejumelivaisi. ¹⁹ Bajarapamonae xaniavaetsia beyapëtanë picani pacuenia Dioso jamatabëcueneitsi. Tsipaji baja picani Dioso tsitanajamatabëcueneitajëta bajarapamonaejavabelia. ²⁰ Jivi apo caëjëpaetsi pitaxutota petaenexa Dioso. Nexata jivi apo yapëtae pacuenia itsi Dioso. Itsiata baitsi jane picani caëjëpatsi peyapëtaenexa pacuenia Dioso jamatabëcueneitsi. Caëjëpatsi picani peyapëtaenexanua daxitamatabacijavabelianexa Dioso bitso piasaëtsaponaponaevijava. Bajaraxua picani jivi caëjëpatsi pijacuata peyapëtaenexa, itsa canaëjëtsipa Dioso pexanaevijavanë mapanacuataje. Nexata bajarapamonae acuenebi pejumaitsinexa: “Apo payapëtaenë cajena pacuenia Dioso jamatabëcueneitsi,” pejainexa. ²¹ Bajarapamonae yapëtae ata Dioso peponaponaevijava, itsiata apo yaiyatae. Caeto ata cajena Diosojavabelia pexaniajamatabëcuene apo rajutsi. “Pexaniacuene rabaja panetoexaname,” apo jai. Biji saya caranata ënatsiquejemajava yabara najamatabëxainabiaba. Nexata pevajënaeyabelia apo peyapëtaexae pexanialivaisi, ajamatabëcueneitaquiri tsaponae. ²² Jamatabëcuenenavëxaniabiaya bajarapamonae jamatabëjumai tsabiabi: “Vaxaitsi cajena bitso vajayapëtaevi daxitacuene,” jamatabëjai tsabiabi bajarapamonae. Itsiata baitsi jane cajena apo yapëtae. ²³ Bajarapamonae apo najamatabëcuenecopabi ayaijamatabëcuenenë Diosojavabelia, ponë apo petëpaenënexa daxitamatabacijavabelianexa. Caranata saya jivi pecobeta jumapecataeya pexanaenëanëjavabelia najamatabëcuenecopaba. Bajarapamonae navajëcabiaba itsamonae pecobeta jivi jumapecataeya pexanaenëanëjavabelia. Navajëcabiabanua itsamonae pecobeta pepunaevi jumapecataeya pexanaenëanëjavabelia

ata. Navajëcabiabanua itsamonae pecobeta jomo jumapecataeya pexanaenëanëjavabelia ata. Navajëcabiabanua itsamonae pecobeta cuatro pataxutabeje pejinavanapaevi jumapecataeya pexanaenëanëjavabelia ata.

²⁴ Bajaraxuata Dioso tocopata bajarapamonae pibisiacuene pexanavanapaenexa. Nexata pacuenia jamatabëexana, exanavanapa. Nexata bajarapamonae pevitota pibisiacuene namataenetsia natoexanabiaba. ²⁵ Bajarapacuenia Dioso tocopata pacuenia bajarapamonae jitsipa pexanavanapaenexa tsipaji bajarapamonae Dioso pejumelivaisi, pexaniajailivaisi, apo jamatabëjumecovënëtsi. Jumecovënëta saya caranata penajumetsënësilivaisi, jivi pecobeta jumapecataeya pexanaenëanë pelivaisi. Bajarapamonae apo yaiyatae pepo Dioso, ponë daxitacuene exana mapanacuataje. Caranata yaiyataeya navajëcabiaba Dioso pecobecovëjavanëjavabelia. Najamatabëcuenecopabanua ëbajaraxuanëjavabelia. Bajarapamonae nexata saya namuxujemata caranata pepo Dioso, ponëjavabelia jivi daxitamatacabijavabelianexa jumaitsijitsia: “Diosomë, bitso ayaijamatabëcuenenëmë,” jaijitsia. Bajara itsi tsane.

²⁶ Bajaraxuata Dioso tocopata bajarapamonae pibisiacuene pexanabiabinexa. Pacuenia jamatabëexana, exanavanapa. Mapanacuata picani Dioso tocopata petiriavi pebi pejitsipaenexa. Itsiata baitsi jane bajarapamonae ëpetiriavi najitsipa. Nexata ëpetiriavi namataenetsia naperabëquenetsiataeyabiaba. ²⁷ Bajara pijinia pacuenia Dioso tocopata pebijivi petiriva pejitsipaenexa. Itsiata baitsi jane bajarapamonae ëpebijivi najitsipa. Nexata ëpebijivi namataenetsia naperabëquenetsiataeyabiaba. Bajarapacuenia pibisiacuene penatsiexanaexae, Dioso ayaicuenia naneconitsiaexanaponatsi bajarapamonae.

²⁸ Bajarapamonae apo jamatabënajinae Dioso. Pacuenia picani Dioso tojitsipatsi bajarapamonae pexanaenexa, apo exanae. Bajaraxuata Dioso tocopata bajarapamonae penajamatabëxainaenexa ëpibisiacuene pexanaejava.

²⁹ Bajarapamonae exanavanapa bitso daxita pibisiacuene. Ëpibisiacuene yabara najamatabëxainabiaba penaperabëquenetsiataenexa. Daxita pibisiacuene sivanajamatabëxainabiabanua. Jamatabëxainayababiabanua itsamonae pecobecovë. Pibisiacuene jamatabëexanabiabanua itsamonaejavabelia. Cuenecaëbabiabanua itsamonae pexinaejava. Jamatabëbeyaxuababiabanua jivi. Namataenetsia nabijataeya najumeanaenotabiabanua. Bitso cajena jivi yamaxëitojorobabiabanua. Ëpamonae ata bitso naitoya tsabiabinua. ³⁰ Bajarapamonae itsamonae pepëya pibisiacuenia najumetsënëtsia baracuaicuaijai tsabiabinua. Bajarapamonae apo jitsipaenua Dioso. Nexata itoya Dioso pijacuene. Apo yaiyataeyabiabinua itsamonae ata. Naitaxutojematsia naëcotabiabanua itsamonae. Bajarapamonae jumaitsi tsabiabi: “Xanë bitso ayaijamatabëcuenenënë itsamonae matatoxenetsia,” jai tsabiabi itsamonaejavabelia. Bajarapamonae najamatabëxainabiabanua itsamonae ata pibisiacuene pexanaeyaexanaenexa. Bajarapamonae apo jumecovënëtabiabinua paxajivi, penajivi ata. ³¹ Bajarapamonae apo jamatabëjumeyapëtaeyabiabinua caelivaisiyo ata, Dioso pejumelivaisi. Bajarapamonae itsajivijavabelia najumecapanepaeya pejumaitsicuenia, apo exanabiabinua. Bajarapamonae asivaya apo taeyabiabinua itsajivi ata. Bajarapamonae itsajivi itsa itsacueniabatsi, apo jitsipabiabi pexaniabinexa icatsia. Bajarapamonae apo itaxutotsoniataeyabiabinua itsajivi ata. ³² Bajarapamonae bitso xaniavaetsia yapëthane picani pacuenia Dioso itorobatsi pexanaenexa. Yapëtanenua picani Dioso penavecuaxuabijavanexa bajarapitsipibisiacuene pexanaevi. Itsiata baitsi jane bajarapamonae tsiteca pibisiacuene exanapona. Orijibia sivabarëya tsabiabi itsamonae ata pibisiacuene itsa exana.

2

Pacuenia itsamatacabi Dioso naneconitsiaexanaejitsia pijaneconi pexinaevi yabara

pelivaisi

¹ Paxamē pajudíovimē, pacatsipaebianatsi mapacueniaje. Pajudíovimē pajumaitsimē tsabiabi itsajivi yabara: “Mara pajivi pibisiacuene exanaje. Nexata Dioso naneconitsiaexanaenatsi,” pajamē tsabiabi. Bajarapacuenia paxamē itsa pajumaitsimē tsabiabi itsajivi yabara, nexata paxamē ata Dioso pacananeconitsiaexanaena. Tsipaji paxamē ata pibisiacuene paexaname bajarapacuenia itsa pajumaitsimē tsabiabi itsajivi yabara. ² Yapētanetsi baja cajena mapacuenije. Itsamatacabi Dioso naneconitsiaexanaena pibisiacuene pexanaevi. Itsamatacabi Dioso itsa naneconitsiaexanaena pibisiacuene pexanaevi, caejivi canacujitsia, paneconivajēto xaina, bajarapaneconivajētota Dioso naneconitsiaexanaponaena. ³ Bajara pijinia pacuenia paxamē ata pibisiacuene paexanabiabi atamē, pajumaitsimē tsabiabi itsajivi yabara: “Mara pajivi pibisiacuene exanaje. Nexata Dioso naneconitsiaexanaenatsi,” pajamē tsabiabi. Bajara pijinia pacuenia paxamē ata bajarapitsipibisiacuene paneexanabiabixae, pētsa pajamatabējumaitsimē tsabiabi: “Vaxaitsi judíovitsi Dioso pijajivixaetsi, apo nacananeconitsiaexanae tsane Dioso,” pajamatabējamē pētsa. Tsipaji Dioso naneconitsiaexanaena daxita pibisiacuene pexanaevi. ⁴ Bepacanaējētame xaniavaetsia pacuenia Dioso jamatabēcueneitsi. Dioso cajena abaxē bepíjia apo naneconitsiaexanae pibisiacuene pexanaevi ata. Dioso raja abaxē jamatabēcuenevetaponapona pibisiacuene pexanaevi ata pevajētsinexatsi pevecuaajibiaexanaenexa pijaneconi. Paxamē ata Dioso pacatojitsipa panecopabinexa pibisiacuene paneexanabiabijava, panenajamatabēcuene pēnēyorotsinexa Diosojavabelia. Bajaraxuata abaxē Dioso pacaitaxutotsoniatane. ⁵ Itsiata paxamē pajamatabēcuenetajamē bitso. Apo pajamatabēcopatsimē pibisiacuene paneexanaejava. Nexata ayaineconi panatoexanaponame panevajēnaeyabelia. Nexata ayaicuenia Dioso pacananeconitsiaexanaena pamatacabi Dioso naneconitsiaexanaena daxita pijaneconi pexainaevi. ⁶ Bajarapamatacabi Dioso naneconitsiaexanaponaena caejivi canacujitsia. Paneconivajēto natoexanaponapona itsa abaxē asaē tsaponapona mapanacuataje, bajarapaneconivajētota Dioso caejivi canacujitsia naneconitsiaexanaponaena. ⁷ Itsamonae jamatabēcueneenabiabatsi ēpexaniacuene pexanabiabinexa. Bajarapamonae jitsipabiabanua pejinavanapaenexa Dioso pijapenivenivenaenacuatatsia. Jitsipabiabanua Dioso pesivajamatabēcuenebarēyanexatsi. Jitsipabiabanua pexainanexa matacabi apo pevereverecaejava. Bajarapamonae Dioso rajutsianatsi matacabi apo pevereverecaejava. ⁸ Itsamonae natojitsipa daxitacuene pexanaejava ēbajarapamonanexa. Apo jumecovēnētsinua pexaniajailivaisi. Saya exanavanapa ēpibisiacuene. Bajarapamonae Dioso anaeya ayaicuenia naneconitsiaexanaenatsi. ⁹ Daxitajivi pibisiacuene exana, judíovi, apo judíovi ata. Daxita bajarapamonae pibisiacuene pexanaexae, Dioso bejiobiaexanaenatsi. Bitso yanajamatabēxainanuanua pijaneconi. ¹⁰ Itsiata baitsi jane daxita pamona pexaniacuene pexanaevi, judíovi, apo judíovi ata, Dioso pijapenivenivenaenacuatatsia jinavanapaena. Dioso sivajamatabēcuenebarēya tsanetsi. Jinavanapanuanua jamatabēcuenexanepanaeya.

¹¹ Dioso itsa naneconitsiaexanaena daxita pijaneconi pexainaevi, najēpaeya naneconitsiaexanaena. Paneconivajēta xaina caejivi canacujitsia, bajarapaneconivajētota Dioso naneconitsiaexanaponaena caejivi canacujitsia. ¹² Pamona apo judíovi, yapētae ata xua pibisiacuene, itsiata bajarapapibisiacuene exanavanapa. Nexata bajarapapibisiacuene pexanavanapaexae, Dioso naneconitsiaexanaenatsi apo judíovi. Pamona judíovi, yapētae ata pacuenia Dioso Moiséspijinēta penajumecopatsilivaisi jumaitsi pibisiacuene pexanaeyaniva, itsiata bajarapapibisiacuene exanavanapa. Nexata bajarapapibisiacuene pexanavanapaexae, Dioso naneconitsiaexanaenatsi judíovi. ¹³ Dioso raja judíovi aneconijibia apo tae saya jema judíovi peyapētaejava yabara, palivaisi Dioso tonajumecopata Moiséspijinēta. Dioso raja judíovi aneconijibia tane matapania judíovi itsa exanavanapa pacuenia Dioso itoroba Moiséspijinēta

petonajumecopatsilivaisita. ¹⁴ Pamonaē apo judíovi, apo tsipaebitsi Dioso Moiséspijinēta penajumecopatsilivaisi. Itsiata apo judíovi ata itsajavata exana pacuenia itoroba Dioso Moiséspijinēta penajumecopatsilivaisita. Apo judíovi apo muxujiobi atatsi, yapētane pejamatabēēthētota xua pexaniacuene pexanaenexa. Yapētanenua xua ata pibisiacuene pexanaeyaniva. ¹⁵ Pamonaē pexaniacuene exanavanapa tsipaebinejevatsi Dioso Moiséspijinēta penajumecopatsilivaisi, bajarapamonaē exanavanapa pejamatabēēthētota peyapētaecuena, pacuenia itorobatsi Dioso Moiséspijinēta penajumecopatsilivaisita. Daxita apo judíovi yapētane pejamatabēēthētota pexaniacuene pexanaenexa. Yapētanenua xua pibisiacuene pexanaeyaniva. ¹⁶ Jemata raja copiapatsiana pamatacabi Dioso itorobijitsia Jesucristo penaneconitsiaexanaenexa daxitajivi. Nexata Jesucristo daxitajivi naneconitsiaexanaena muetsia daxitajivi pibisiacuene pexanavanapaeneconi yabara. Naneconitsiaexanaenenua papibisiacuene ata muetsia daxitajivi najamatabēxainavanapa yabara. Nexata bajarapamatacabi daxitajivi nayapētaena Dioso penaneconitsiaexanaejavanexatsi muetsia pexanavanapaeneconi yabara. Bajarapacuenia jivi tsipaebaponajē Dioso pitorobilivaisi itsa tsipaebaponajē.

Judíovi yabara, Dioso Moiséspijinēta penajumecopatsilivaisi ata, yabara pelivaisi

¹⁷ Pajudíovimē, pajumaitsimē tsabiabi: “Vaxaitsi raja judíovitsi. Vaxaitsi yapētanetsi Dioso Moiséspijinēta penajumecopatsilivaisi. Bajaraxuata Dioso nacacapanepaena. Dioso raja ējudíovitsi vajaDioso,” pajamē tsabiabi. ¹⁸ Payapētaneme baja cajena xua Dioso pacatojitsipa paneexanaenexa. Payapētanemenua Dioso Moiséspijinēta penajumecopatsilivaisi. Bajaraxuata payapētaneme xua pexaniacuene paneitapetsinexa paneexanavanapaenexa. ¹⁹ Pajamatabējumaitsimēnua tsabiabi: “Vaxaitsi cajena bitso yapētanetsi Dioso pejumelivaisi, vajatsipaebinexa pamonaē jumetae ata Dioso pejumelivaisi, abaxē apo pejumeyapētaevi pexaniajailivaisicuene. Vaxaitsi jamatabēcueneitayotsianatsi pamonaē piamatabēcueneitaquirivi, Dioso pejumelivaisivecua saya pejinavanapaevi,” pajamatabējamēnua tsabiabi. ²⁰ Pajamatabējumaitsimēnua tsabiabi: “Vaxaitsi cajena nacacājēpa vajayapētaeyaexanaenexa pamonaē abaxē apo yapētae pacuenia Dioso jamatabēcueneitsi. Nacacājēpanua vajayapētaeyaexanaenexa pamonaē ata pejanajumecovēnētsivi Dioso. Nacacājēpa bajarapacuenia vajayapētaeyaexanaenexa tsipaji yapētanetsi pacuenia Dioso jumaitsi Moiséspijinēta penajumecopatsilivaisita. Bajarpalivaisi pexaniajailivaisi baja cajena. Yapētaeyaexana pacuenia jivi exanaejitsia,” pajamatabējamē tsabiabi. ²¹ Bajarapacuenia paxamē patsipaebabiabi atamē itsamonaejavabelia, itsiata paxamē ata apo paexanaemē bajarapacuenia. “iPētsa panacobetoxotame,” pajamē tsabiabi itsamonaejavabelia. Itsiata paxamē panacobetoxotabiabame. ²² “Pētsa panaperabēquenetsiataneme itsavajavabelia panijavajivivecua,” pajamē tsabiabi ata itsamonaejavabelia, itsiata paxamē panaperabēquenetsiataeyabiabame itsavajavabelia panijavajivivecua. Paxamē pajumaitsimē tsabiabi: “Jumapecataya pexanaenēanējavabelia penavajēcaecuene bitso abeje. Itsa pajonejitsipame jumapecataeya pexanaenēanē penubenaebota, pacajamatabēcuene bijianaejitsipa,” pajamē tsabiabi. Itsiata paxamē pajoneyabiabame jumapecataeya pexanaenēanē penubenaebota penamatamotsijavanē, ofrendacuenia pejebijavanē, panenacobetoxotabiabinexa. ²³ Paxamē pajudíovimē jivi picani patsipaebabiabame Dioso Moiséspijinēta penajumecopatsilivaisi, bitso pexanepanelivaisi. Itsiata paxamē ata apo pajumecovēnētsimē bajarapalivaisi. Bajaraxuata jivi apo yaiyatae Dioso. ²⁴ Bajara paneitsixae, copiapata jane baja pacuenia baja cajena Dioso pejumelivaisibaxutota tajēvelia pacavajunupaeba. Dioso pejumelivaisibaxutota tajēvelia itsa pacavajunupaeba, jumaitsi paxamē yabara mapacueniaje: “Pamonaē apo judíovi, pibisiacuenia Dioso baracuaicuaijai tsane judíovi xaniavaetsia apo petsitajinavanapaexae,” jai tajēvelia Dioso pejumelivaisibaxutota paxamē Dioso apo panejumecovēnētsijavanexa yabara.

²⁵ Paxamë pajudíovimë papebijivimë, pacaperabëcaucuba itsa abaxë patsiquirinacuetoximë. Baitsi pacaboupiiperabëcaucuba. Bajarapacuenia pacaperabëcaucuba panenayapëtaenexa Dioso papijajivicuenemë. Bajarapacuenia pacatonamatamota matapania itsa pajumecovënëtavanapame Dioso Moiséspijinëta penajumecopatsilivaisi. Itsa apo pajumecovënëtsimë tsipae Dioso Moiséspijinëta penajumecopatsilivaisi, papecaperabëcaucubivi ata, itsiata Dioso apo papijajivimë tsipae. ²⁶ Pamonaë apo judíovi ata, apo peperabëcaucubivi atatsi, pejumecovënëtavanapaexae pacuenia Dioso Moiséspijinëta penajumecopatsilivaisi itorobatsi, nexata bajarapamonae ata Dioso pijajivicuenia tanetsi. ²⁷ Pamonaë apo judíovi, apo peperabëcaucubivi atatsi, itsiata pejumecovënëtavanapaexae Dioso Moiséspijinëta penajumecopatsilivaisi, bajarapamonae itsamatacabi pacaurabiana Diosojavabelia. Bajarapacuenia pacaurabiana Diosojavabelia tsipaji Dioso Moiséspijinëta penajumecopatsilivaisi payapëtae atamë, papecaperabëcaucubivi atanua, itsiata apo pajumecovënëtsimë Dioso Moiséspijinëta penajumecopatsilivaisi. ²⁸ Pajivi perabëcaucutsi atatsi penayapëtaenexa Dioso pijajivitonëcuene, saya peperabëcaucutsijavatsi yabara Dioso pijajivitonëcuenia apo taetsi. ²⁹ Pajivi pepacuene Dioso pijajivitonë, bajarapajivi peneta pejamatabëëthëtovetsina Dioso jumecovënëta. Pajivi pepacuene Dioso pijajivitonë, bajarapajivi saya naniavelia apo perabëcaucutsitsi. Biji rajane pejamatabëëjëtota pejanajamatabëcuene rajutatsi Espíritu Santo. Bajarapajivi xua exanaponapona, exanaponapona Dioso pesivabarëyanexatsi. Bajaraxua apo exanaponaponaë saya mapanacuapijivi pesivabarëyanexatsi.

3

¹ ¿Detsa xua judíovi xaina Diosojavabelia, pamonaë apo judíovivecua? ¿Detsa xua yabara toxanepanatsi Diosojavabelia ponë peperabëcaucutsinëtsi apo peperabëcaucutsinëtsivecua? ² Palivaisianë judíovi toxanepanatsi Diosojavabelia, navita. Penamataxainaelivaisi, palivaisi judíovi toxanepanatsi Diosojavabelia, maitsije. Dioso tonajumelivaisicopatatsi bajarapamonaejavabelia. ³ Itsamonae judíovi apo jumecovënëtsi pacuenia Dioso najumecapanepaeya jumaitsi petoexanaenexatsi. Pëtsa bajarapacuenia yabara pajamatabëjumaitsimë mapacueniaje: “Dioso meta itsiata apo exanaë tsane pacuenia picani najumecapanepaeya jumaitsi pexanaenexa. Tsipaji judíovi apo jumecovënëtsi,” pajamatabëjamë pëtsa Dioso yabara. ⁴ Dioso cajena apo penajumetsënëtsinë. Jivi rajane banajumetsënëta. Dioso pexaniajailivaisi jivijavabelia petsipaebabiabijava yabara, tajëvelia Dioso pejumelivaisibaxutota jumaitsi mapacueniaje: Xamë Diosomë, pexaniajailivaisi jivijavabelia tsipaebabiabame. Jivi cajumeaebi ata, itsiata daxitajivi peyapëtaenexa, xamë apo nenajumetsënëtsinë, jai Dioso pejumelivaisibaxutota.

⁵ Pibisiacuene vajaexanaejava yabara Dioso nacananeconitsiaexanaena. Nexata Dioso vajanacananeconitsiaexanaejavata, najamatabëcueneitajëtsiana daxitajivi peyapëtaenexa Dioso apo pejitsipaenëcuene pibisiacuene pexanaejava. Bajaraxuata pamonaë naneconita Diosojavabelia, Dioso naneconitsiaexanabiaba. Nexata Dioso jivi penaneconitsiaexanaejava yabara, itsa jumaitsinë tsipae: “Dioso pibisiacuene exana itsa naneconitsiaexana pijaneconi pexinaeivi,” itsa janë tsipae, nexata jamatabëcuenenavëxaniabiaya jumaitsinë tsipae. Tsipaji Dioso itsa apo naneconitsiaexanaë tsipae pijaneconi pexinaeivi, Dioso apo najamatabëcueneitajëtsi tsipae pibisiacuene pexanaejava apo pejitsipaenëcuene. Nexata pacuenia Dioso apo pejumecovënëtsivi banajamatabëxaina, bajarapacuenia najamatabëxainaejitsipajë. ⁶ Tsipaji Dioso saya jema jivi apo penaneconitsiaexanaenë. Itsa saya jema Dioso jivi naneconitsiaexanaejitsipa, apo naneconitsiaexanaë tsipae ëpijaneconi pexinaeivi. Nexata caejivi canacujitsia pibisiacuene pexanaeneconi yabara, paneconivajëto xainapona, bajarapaneconi vajëtota Dioso apo naneconitsiaexanaponaë tsipae.

⁷ Itsamonae meta jamatabëcuenenavëxaniabiaya jumaiti tsane mapacueniaje: “Daxitajivi pecanaëjëtsinexa Dioso apo penajumetsënëtsinëcuene, vaxaiti yamaxëitojorobiaya jivi livaisi tsipaebabiabianatsi. Bajarapacuenia yamaxëitojorobiaya jivi livaisi tsipaebabiabi atatsi tsane, itsiata Dioso apo nacananeconitsiaexanae tsane. Tsipaji vaxaiti yamaxëitojorobiaya jivi livaisi vajatsipaebabiabijava pejamatabëcueneta, daxitajivi canaëjëtsiana Dioso bitso pexaniajainëcuene, apo penajumetsënëtsinëcuene. Bajaraxuata Dioso apo nacananeconitsiaexanae tsane vajanajumetsënëtabiabiabijava yabara,” jai meta tsane itsamonae jamatabëcuenenavëxaniabiaya. ⁸ Bajarapacuenia itsa najamatabëxainaena bajarapamonae, nexata meta jamatabëcuenenavëxaniabiaya mataropotsia jumaiti tsane: “Pibisiacuene meta vajaexanaejava ata xanepana. Nexata pibisiacuene exanabiabianatsi. Tsipaji vaxaiti pibisiacuene vajaexanabiabijava pejamatabëcueneta, daxitajivi canaëjëtsiana Dioso pibisiacuene apo pexanaenëcuene,” jai meta tsane bajarapamonae jamatabëcuenenavëxaniabiaya. Bajarapacuenia itsa jumai tsane, nexata pexaniajailivaisi jivijavabelia apo tsipaebabiabi tsane. Itsiata baiti jane itsamonae najumetsënëtsiaya xanë yabara jumai tsabiabi: “Pablo raja itorobapona jivi bajarapacuenia pibisiacuene pexanaenexa,” jai tsabiabi xanë yabara. Bajarapacuenia pejumaitisivi xanë yabara, Dioso naneconitsiaexanaenatsi.

Pacuenia daxitajivi naneconita Diosojavabelia yabara pelivaisi

⁹ ¿Nexata tsaja ëjudíovi saicaya aneconijibia Dioso tane daxita mapanacuapijivi vecuaje? Jume raja. Jumaitinë baja cajena mapacueniaje. Daxitatsi mapanacuapijivitsije pibisiacuene ëvajaexanaevi. Judíovi, apo judíovi ata, bajara itsi. ¹⁰ Daxitatsi pibisiacuene vajaexanaejava yabara, Dioso pejumelivaisibaxutota jumaiti mapacueniaje:

Caejivi ata aneconijibia apo ponaponae Dioso pitabarata. ¹¹ Ajibi peyapëtaejivi pacuenia Dioso jamatabëcueneitsi. Ajibi pepacuene pejamatabëëthëtovetsina pejumecovënëtsijivi Dioso. ¹² Daxita Diosovecua naxuabiaya jinavanapa. Daxita ajamatabëcuenebeje. Ajibi pexaniacuene pexanabiabijivi. ¹³ Pacuenia petëpaenë pemëthë tuxutsaeba, bajara itsi bajarapamonae pecuibovojotota pecuaicuaijajava pibisialivaisi. Pijumeta jivi yamaxëitojorobabiaba. Pacuenia jomo pecuibovojotota xaina piatanejava, bajara pijinia itsi bajarapamonae pecuaicuaijajava penajumetsënëtsilivaisi. ¹⁴ Pecuibovojotota cuaicuaijai ëpibisialivaisi pianaepanaenexa. ¹⁵ Itsacuene apo exanae atatsi, bepijia jitsipa jivi pebeyaxuabinexa. ¹⁶ Itsabelia jinavanapa, bejiobiaexanabiaba itsamonae. ¹⁷ Bajarapamonae apo yapëtae xaniavaetsia peyavajinavanapaenexa jivi. ¹⁸ Bajarapamonae apo canaëjëtsi pejunavinexa Diosojavabelia, jai mapacueniaje Dioso pejumelivaisibaxutota daxitatsi mapanacuapijivitsi yabara.

¹⁹⁻²⁰ Vaxaiti baja cajena yapëtanetsi mapacuenieje. Bajayata Dioso pejumelivaisi tonajumecopata ëjudíovi picani pejumecovënëtavanapaenexa. Itsiata judíovi apo jumecovënëtsicapanepe bajarapalivaisi. Bajaraxuata judíoviyajuvënënë, caenë ata, acuenebi pejumaitsinexa: “Xanë cajena apo tonaneconitsinë Dioso,” pejainexa. Daxita mapanacuapijivi, judíovi, apo judíovi ata, beyapëtane penaneconitsijava Diosojavabelia. Tsipaji itsajivi ata apo caëjëpaetsi pejumecovënëtsinexa pacuenia itoroba Dioso penajumecopatsilivaisita. Bajarapalivaisi Dioso najumecopata pibisiacuene vajaexanavanapaejava vajasivajamatabëjumaitsinexa mapacueniaje: “Xaniajai rabaja. Xanë ata pibisiacuene taexanaenë,” vajajamatabëjainexa bajarapalivaisi pejamatabëcueneta.

Pacuenia Dioso aneconijibia tane pajivi najamatabëcuenecopata Jesucristojavabelia yabara pelivaisi

²¹ Aeconoxae baja mapamatacabitaje Dioso nacayapëtaeyaexana pacuenia nacatoexana aneconijibia vajanacataenexa. Dioso apo jamatabëjumaiti: “Pamonae jumecovënëtsicapanepe Moiséspijinëta tanajumecopatsilivaisi, bajara ëpamonae aneconijibia

taenajë,” apo jamatabëjai. Pacuenia Dioso capanepaejitsia Dioso pejumecovënëtsivi, bajayata Diosojumepaebivi profetavi tajëvelia yaquina Dioso pejumelivaisibaxutota. ²² Mara pacuenia Dioso jivi aneconijibia taneje. Pajivi jamatabëjumaitsi: “Xaniajai. Jesucristo itsa tēpa cruzata, pibisiacuene taexanaeconi yabara tēpa,” jamatabëjai, bajarapajivi Dioso aneconijibia tanetsi. Dioso aneconijibia taenatsi daxita pamona jumecovënëta Jesucristo cruzata pesivatēpaejavatsi pijaneconi yabara. Tsipaji Dioso daxitajivi najēpaeyatane. ²³ Daxitajivi baja cajena pibisiacuene exana. Bajaraxuata caejivi ata aneconijibia Dioso pejitsipaecuenia apo toponapona. Daxitajivi Diosovecua naxuabiaya jinavanapa. ²⁴ Itsiata baitsi jane Dioso pinijicuenia piasivaxae daxitajivi, aneconijibia tane daxita pamona jumecovënëta Jesucristo cruzata pesivatēpaejavatsi pijaneconi yabara. Jivi apo namatavenona pijacuata penaneconimatamotsinexa Diosojavabelia. Tsipaji baja aneconijibia tanetsi Jesucristo pecomuatsixaetsi pibisiacuene pexanaeconivecua. ²⁵ Dioso copata Jesucristo petēpaenexa cruzata vajanacaneconimatamotsinexa, pibisiacuene vajaexanaeconimi. Nexata itsa jumecovënëtatsi Jesucristo cruzata vajanacasivatēpaejava, nacavecuaajibiaexana pibisiacuene vajaexanaeconimi. Bajarapacuenia Dioso copata Jesucristo cruzata vajanacasivatēpaenexa mapanacuapijivitsi. Tsipaji Dioso apo jitsipae pibisiacuene vajaexanaejava. Bajaraxuata Dioso aneconijibia nacatane Jesucristo itsa nacaneconimatamota, pibisiacuene vajaexanaeconimi. Pepo bajayata pejinavanapaevimiyajuvënëvi ata, najamatabëcuenecopaba Diosojavabelia. Nexata bajarapamonaemi pibisiacuene exanae ata, itsiata Dioso apo naneconitsiaexanaetsi. Tsipaji Dioso tajëvelia yapētane Jesucristo pesivatēpaejavanexa bajarapamonaemi ata pibisiacuene pexanaeconi yabara. ²⁶ Ajena, mapamatacabitaje, Dioso jivi tsitanajamatabëcueneitajëta jivi pibisiacuene pexanaejava Dioso apo pejitsipaenëcuene. Tsitanajamatabëcueneitajëtanua aneconijibia petaejavanexa pamona jumecovënëta Jesucristo pesivatēpaejavatsi cruzata pijaneconi pevecuaajibiaexanaenexatsi.

²⁷ Bajarapacuenia Dioso nacatoexana aneconijibia vajanacataenexa. Dioso aneconijibia apo nacatae vajacuata vajaexanaejava yabara. Biji rajane Dioso aneconijibia nacatane vajajumecovënëtsixae Jesucristo vajanacasivatēpaejava cruzata vajaneconi yabara. Nexata ayaijamatabëcuenejivitsi vajanacataenexa, acuenebi vajajumaitsinexa itsajivijavabelia: “Xanë taexanaejava pejamatabëcueneta, Dioso aneconijibia netane,” vajainexa acuenebi. ²⁸ Vaxaitsi baja cajena yapētanetsi mapacueneneje. Dioso aneconijibia tane pajivi jumecovënëta Jesucristo pesivatēpaejavatsi cruzata pijaneconi yabara. Bajarapajivi apo jumecovënëtsi ata Dioso Moiséspijinëta penajumecopatsilivaisi, Dioso itsiata aneconijibia tanetsi pejumecovënëtsixae Jesucristo pesivatēpaejavatsi cruzata pijaneconi yabara.

²⁹ Dioso raja ējudíovi apo pijaDioso. Dioso raja apo judíovi ata pijaDioso. ³⁰ Caenë rabaja Dioso. Pematatsënëa baja itsanë Dioso ajibi. Bajaraponë Dioso judíovi aneconijibia tane, pamona jumecovënëta Jesucristo pesivatēpaejavatsi cruzata pijaneconi yabara. Bajara pijinia pacuenia Dioso aneconijibia tane pamona apo judíovi ata. ³¹ Vaxaitsi baja xaniavaetsia Jesucristo jumecovënëtatsi vajanacasivatēpaejava cruzata vajaneconi yabara. Nexata Dioso Moiséspijinëta penajumecopatsilivaisi yabara, apo bejamatabëjumaitsi: “Dioso Moiséspijinëta penajumecopatsilivaisi tajumecovënëtsijavami, copatajë baja. Tsipaji baja jumecovënëtajë Jesucristo tanesivatēpaejava cruzata tajaneconi yabara,” apo bejamatabëjaitsi. Biji rajane Jesucristo vajanacasivatēpaejava cruzata, itsa jumecovënëtatsi, Dioso Moiséspijinëta penajumecopatsilivaisi ata bajarajota yajavajumecovënëtatsi.

4

Pacuenia Abrahampijinë bajayata Dioso aneconijibia tanetsi pejumecovënëtsixae

pacuenia Dioso najumecapanepaeya jumaitsitsi yabara pelivaisi

¹ Pacatsipaebijitsiatsi pajamatabëcuenelivaisi yabara Abrahampijinë Dioso aneconijibia tanetsi. ² Abrahampijinë pijacuata ëpexaniacuene itsa exanabiabijitsipa, nexata jumaiti tsipae Diosojavabelia: “Ëpexaniacuene taexanabiabixae, nexata aneconijibia netaneme,” jai tsipae. Itsiata baitsi jane Abrahampijinë Diosojavabelia apo jumaiti bajarapacuenia. Tsipaji Abrahampijinë ëpexaniacuene pijacuata exanabiabi ata tsipae, bajaraxua yabara Dioso aneconijibia apo taetsi tsipae. ³ Biji rajane Dioso pejumelivaisibaxutota Abrahampijinë yabara jumaiti mapacueniaje: “Abrahampijinë najamatabëcopatsiaya Diosojavabelia pejamatabëjumaitsabiabixae: ‘Xaniajai. Pepacuene Dioso netoexanaena pacuenia najumecapanepaeya nejumaiti,’ pejamatabëjaitiabiabixae, nexata Dioso aneconijibia tanetsi,” jai Dioso pejumelivaisibaxutota Abrahampijinë yabara. ⁴ Pajivi itsanë pijajava tonacuenebaponapona, bajarapajivi xua rajutatsi, amoneya apo rajutsitsi. Petonacuenebixae matamotatsi. ⁵ Pajivi apo exanae ata pexaniacuene, itsiata jamatabëjumaiti: “Dioso, ponë penaneconitsivi pijaneconivecua ajibiaexanabiaba, bajaraponë pepacuene necapanepaena pacuenia najumecapanepaeya jumaiti tanecapanepaenexa,” jamatabëjai, bajarapajivi Dioso aneconijibia taenatsi pecapanepaenexatsi pijaneconivecua. ⁶ Pepo bajayata Davidpijinë vajunupaeba pejamatabëcuenenabarëyajava pamona baja Dioso aneconijibia tanetsi. Bajarapacuenia Dioso aneconijibia tanetsi bajarapamonae pejumecovënësixae Dioso najumecapanepaeya pejumaitisicueniatsi. Bajarapamonae Dioso aneconijibia apo taetsi, pijacuata ëpexaniacuene exanabiabi ata. ⁷ Davidpijinë pepo bajayata tajëvelia bajarapamonae yabara jumaiti mapacueniaje:

Jamatabëcuenenabarëya baja tsavanapae pamona picani naneconita Diosojavabelia. Barajamatabëcuenexanapanatsi baja Dioso. Tsipaji baja pibisiacuene pexanaeconimi, vecuaajibiaexanatsi. ⁸ Jamatabëcuenenabarëya baja tsaponapona pajivi pibisiacuene pexanaejivi ata, itsiata Dioso aneconijibia itsa tanetsi,

jai mapacueniaje Davidpijinë bajayata.

⁹ Bajarapacuenia Davidpijinë itsa jumaiti, pejamatabëcuenenabarëyatsavanapaevi baja, ëjudíovi, peperabëcaucubivitsi yabara, apo jumaiti. Pamona apo judíovi, apo peperabëcaucubivi atatsi, yabara jumaiti. Xaniajanë pacuenia pacatsipaebijitsiatsi. Abrahampijinë bajayata Dioso jumecovënëta najumecapanepaeya pejumaitisicueniatsi. Nexata baja Abrahampijinë Dioso aneconijibia tanetsi pibisiacuene pexanaeconimivecua. ¹⁰ ¿Abrahampijinë tsajane baja pepuaperabëcaucutsitsi, Dioso aneconijibia tanetsi? Jume raja. Abaxë apo perabëcaucutsinejeva atatsi, aneconijibia tanetsi pejumecovënësixae Dioso najumecapanepaeya pejumaitisicueniatsi. ¹¹ Dioso baja aneconijibia pepuataetsi, Abrahampijinë perabëcaucutatsi. Bajarapacuenia Abrahampijinë perabëcaucutatsi daxitajivi peyapëtaenexatsi Dioso aneconijibia petaejavatsi. Bajaraxuata daxita pamona apo peperabëcaucubivi atatsi, itsa jamatabëjumaiti: “Xaniajai. Pepacuene Dioso netoexanaena pacuenia najumecapanepaeya jumaiti,” itsa jamatabëjai, bajarapamonae Abrahampijinë bepexi Dioso tanetsi, apo peperabëcaucubivi atatsi. Abrahampijinë abaxë apo perabëcaucutsi atatsi, Dioso pejumecovënësixae, aneconijibia tanetsi. ¹² Xaniajai rabaja. Abrahampijinë bepexi Dioso tanetsi daxita pamona peperabëcaucubivitsi. Bajarapamonae Abrahampijinë bepexi Dioso tanetsi apo ëpeperabëcaucubijavatsi yabara. Biji rajane Abrahampijinë bepexi Dioso tanetsi tsipaji bajarapamonae ata abaxë apo perabëcaucubi atatsi, jumecovënëta pacuenia Dioso najumecapanepaeya jumaiti.

Pacuenia tocopiapatatsi pajivi jumecovënëta pacuenia Dioso najumecapanepaeya jumaiti petoexanaenexatsi yabara pelivaisi

¹³ Bajayata Dioso najumecapanepaeya jumaiti Abrahampijinējavabelia: “Carajutsianatsi daxita mapairaje nijairanexa. Nevēnamuto ata, nexi, nemomoxi ata, pijairanexa,” jai Dioso Abrahampijinējavabelia. Bajarapacuenia Dioso jumaiti Abrahampijinējavabelia tsipaji Dioso aneconijibia tanetsi Abrahampijinē pejumecovēnētsixae pacuenia Dioso najumecapanepaeya jumaiti. Nexata acuenebi vajajumaitsinexa: “Abrahampijinē Dioso aneconijibia tanetsi tsipaji jumecovēnēta Dioso Moiséspijinēta penajumecovēnētsilivaisi,” vajajainexa. Tsipaji baja Abrahampijinē peputēpae, bexēa Moiséspijinē ponapona. ¹⁴ Dioso najumecapanepaeya itsa jumai tsipae perajutsinexa bajarapaira ēpamonae jumecovēnēta pona Dioso Moiséspijinēta penajumecopatsilivaisi, nexata bajarapamonae, Abrahampijinē pemomoxi ata, apo rajutsitsi tsipae bajarapaira. Tsipaji itsajivi ata, bajarapamonae yajuvēnējivi, apo jumecovēnētsicapanepae Dioso Moiséspijinēta penajumecopatsilivaisi. Bajarapamonae Dioso pejumecovēnētsijava ata, nacueratsipa. Dioso najumecapanepaeya bajarapaira perajutsiapaebijavamitsi ata, toajumematamobi tsipaetsi. ¹⁵ Tsipaji daxita pamona apo jumecovēnētsi pacuenia Dioso itoroba Moiséspijinēta penajumecopatsilivaisita, bajarapamonae Dioso naneconitsiaexanaena. Itsiata baitsi jane itsa ajibi tsipae pitavetsilivaisitsi, nexata pijinia ajibi tsipae peyabarananeconitsia exanaejavanexatsi.

¹⁶ Dioso cajena najumecapanepaeya jumaiti Abrahampijinējavabelia amoneya perajutsinexa bajarapaira. Perajutsinexa Abrahampijinē pexijavabelianexa ata, pemomoxijavabelianexa ata. Bajarapaira Abrahampijinē Dioso rajutsiapaebatsi Dioso najumecapanepaeya pejumaitisjavatsi Abrahampijinē pejumecovēnētsixae. Bajarapaira Dioso najumecapanepaeya itsa rajutsiapaeba pamona jumecovēnēta Dioso Moiséspijinēta penajumecopatsilivaisi, bajara ēpamonae itsiata apo rajutsiapaebi. Biji rajane rajutsiapaeba pamona ata jumecovēnēta pacuenia Dioso najumecapanepaeya jumaiti, pacuenia bajayata Abrahampijinē jumecovēnēta Dioso najumecapanepaeya pejumaitisicueniatsi. Bajaraxuata daxitatsi, Dioso vajajumecovēnētsivi, Dioso nacatane Abrahampijinē bepexitsi. ¹⁷ Bajarapacuenia Abrahampijinē bepexitsi Dioso vajanacataejavanexa yabara, Dioso pejumaitisjava Abrahampijinējavabelia Dioso pejumelivaisibaxutota tajēvelia jumaiti mapacueniaje: “Ayaibitsaētoxfaneto jivi bepijasalinainēmē cataeyaexanaenatsi,” jai Dioso pejumelivaisibaxutota tajēvelia Dioso pejumaitisjava Abrahampijinējavabelia vaxaitsi yabara. Dioso baja cajena icatsia piasaēyaexanaenē petēpaevimi ata. Xua picani abaxē ajibi mapanacuataje, Dioso baja exana pijumeta.

¹⁸ “Abraham raeta baja pexi apo xainae tsane,” sivajamatabējai atatsi daxitajivi bajayata, itsiata Abrahampijinē Dioso apo jumeaebi. Jumecovēnēta Dioso pejumaitisicueniatsi. Evetaponapona jivi ayaibitsaētoxfaneto pamo pexanaenexatsi pacuenia Dioso najumecapanepaeya jumaitisitsi. ¹⁹ Bajarapamatacabi Abrahampijinē imoxo pexinae cien pavaibeje. Bajaraponē pijava Sara, mavecova. Perujuvayo baja pijinia. Pexi picani pexainaenexabeje, apo caējēpaetsibeje. Tsipaji baja bitso perujujivibeje. Bajaraxua Abrahampijinē nacueneyapētae ata, itsiata jumecovēnēta Dioso pacuenia najumecapanepaeya jumaitisitsi petoexanaenexatsi. ²⁰ Apo jumeaebi pacuenia Dioso najumecapanepaeya jumaitisitsi. Bitso biji pevajēnaeyabelia jamatabēcueneevetaponapona pacuenia Dioso najumecapanepaeya jumaitisitsi petocopiapatsinexatsi. Nexata Dioso yabara Abrahampijinē jumai tsabiabi: “Dioso cajena bitso ayaijamatabēcuenenē,” jai tsabiabi. ²¹ Abrahampijinē xaniavaetsia yapētane Dioso pecaējēpaenēcuenetsi petoexanaenexatsi daxita pacuenia najumecapanepaeya jumaitisitsi. ²² Abrahampijinē Dioso jumecovēnēta petoexanaenexatsi pacuenia najumecapanepaeya jumaitisitsi. Bajaraxuata Dioso aneconijibia tanetsi.

²³ Dioso pejumelivaisibaxutota jumaiti pacuenia Dioso aneconijibia tanetsi Abrahampijinē pejumecovēnētsixae Dioso najumecapanepaeya pejumaitisicueniatsi. Bajarapacuenia Dioso pejumelivaisibaxutota apo jumaiti saya vajayapētaenexa Abra-

hampijinē pelivaisi. ²⁴ Biji rajane nacatoyaquina vaxaitsi ata vajanacamuxujiobinexa. Nexata vaxaitsi ata itsa jumecovēnētatsi pacuenia Dioso najumecapanepaeya jumaitsi, aneconijibia Dioso nacatane. Bajaraponē Dioso vajatuxanenē Jesucristo icatsia asaēyaexanatsi petēpaecujinae. ²⁵ Dioso athēbēvetsica itorobica Jesús vajanacasi-
vatēpaenexa mapanacuataje. Nexata Jesús itsa nacasivatēpa, nacaneconimatamota pibisiacuene vajaexanaeneconimi. Bajaraxuacujinae Dioso icatsia asaēyaexanatsi petēpaejavavecua vajanacavecuaajibiaexanaenexa vajaneconimi. Nexata baja Dioso aneconijibia nacatane Jesús pejamatabēcueneta.

5

Pacuenia jamatabēcuenēbarēya pajivi Dioso aneconijibiatanetsi yabara pelivaisi

¹ Dioso aneconijibia nacatane vajajumecovēnētsexae pacuenia Dioso najumecapanepaeya jumaitsi. Nexata sivajamatabēcuenēbarēyatsi tsavanapae Dioso. Vajatuxanenē Jesucristo vajanacasivatēpaexae vajaneconi yabara, bajaraponē pejamatabēcueneta nacajamatabēcuenēbarēyayaexana. ² Vajajumecovēnētsexae Jesucristo vajanacasivatēpaejava, Dioso nacaitaxutotsoniataeyabiaba. Nexata Dioso sivajamatabēcuenēbarēyatsi. Tsipaji yapētanetsi itsamatacabi Dioso vajayajavajinavanapaejavanexa penivenivenaenacuatatsia. ³ Mapanacuapijivi nacabejiobiaexanabiabi ata, itsiata sivajamatabēcuenēbarēyatsi tsabiabi. Tsipaji yapētanetsi vajanacabejiobiaexanabiabicueneta, nacajamatabēcuenēasaēyaexanapona Diosojavabelia. Nexata nacajamatabēcuenēcaējēpa vajanamatabēcuenēsaētsinexa, daxita pibisiacuene nacatocopiapatsi ata. ⁴ Itsa najamatabēcuenēsaētatsi, nacatocopiapatsi ata pibisiacuene, Dioso pijinia nacasivabarēya. Nexata itsa yapētanetsi Dioso vajanacasivabarēyajava, nexata jamatabēcuenēvetatsi Dioso vajanacatoexanaenexa pacuenia najumecapanepaeya jumaitsi. ⁵ Nexata itsa jamatabēcuenēvetatsi Dioso vajanacatoexanaenexa pacuenia najumecapanepaeya jumaitsi, apo nacueratsitsi tsane. Bajarapacuenia apo nacueratsitsi tsane tsipaji baja Dioso nacarajuta Espíritu Santo vajanacatsijamatabēcuenēcaenexa. Nexata Espíritu Santo xaniavaetsia nacayapētaeyaxana Dioso vajanacaasivajava.

⁶ Vaxaitsi bitso ajamatabēcuenēsaējibitsi pibisiajamatabēcuenēvixaetsi. Acuenēbi vajacuata vajanacapanepaenexa Diosojavabelia vajaneconi yajava. Itsiata baitsi jane Dioso pecaējētsimatacabita, Cristo nacasivatēpa pibisiacuene vajaexanaeneconi yabara. ⁷ Mapanacuataje itsajivi itsa jamatabēcuenēyavenona itsanē, nexata itsa beyaxuabiapaebatsi pejamatabēcuenēyavenonaexae, pecajunavi baja apo jamatabēcuenēyavenonae tsipae. Itsajivi meta itsiata jamatabēcuenēyavenonaejitsipa, beyaxuabijitsia atatsi. Bajarapacuenia jamatabēcuenēyavenonaejitsipa itsa bitso pexaniajamatabēcuenēnē, ponējavabelia jamatabēcuenēyavenonaejitsia. ⁸ Itsiata baitsi jane vaxaitsi Dioso nacayavenona, pibisiacuene vajaexanaevi ata. Nexata Dioso nacatsitanajamatabēcuenēitajēta bitso vajanacaasivajava. Dioso pexēnato athēbēvetsica itorobica vajanacasivatēpaenexa mapanacuataje. ⁹ Jesucristo vajanacasivatēpaexae, nexata baja maparucaeje Dioso aneconijibia nacatane. Bajaraxuata yapētanetsi Jesucristo pejamatabēcueneta Dioso vajanacacapanepaejavanexa vajanacananeconitsia exanaejavanexamivecua. ¹⁰ Vaxaitsi picani Dioso pijavajabitsaēvitsi. Nexata pexēnato vajanacasivatēpaexae, Dioso baja nacabarajamatabēcuenēxanepana. Bajaraxuata maparucaeje yapētanetsi Dioso pepacuene vajanacacapanepaejavanexa vajanacananeconitsia exanaejavaminexavecua. Tsipaji pexēnato asaē tsaponaponae vajanacatocuaicuaijainēnexa paxajavabelia. ¹¹ Orijiibia vaxaitsi bitso sivajamatabēcuenēbarēyatsi Dioso vajanacaasivajava. Tsipaji vajatuxanenē Jesucristo pejamatabēcueneta Dioso baja nacabarajamatabēcuenēxanepana.

Adánpijinē Cristo ata yabara pelivaisi

¹² Copiaya caenë, Adánpijinë, pibisiacuene exana. Nexata mapanacuataje daxitajivi pibisiacuene pexanaejavanexa, taxuxuaba. Taxuxuabanua jivi petëpaejavanexa. Nexata jivi petëpaejava, yacaejëpa daxitanacuapijivijava. Tshipaji daxitanacuapijivi pibisiacuene exana. ¹³ Dioso Moiséspijinëta penajumecopatsilivaisi ata pevajënaeya, mapanacuapijivi pibisiacuene exanavanapa. Itsiata abaxë apo petonajumecopatsixaetsi Dioso pejumelivaisi, itsajivi ata acuenebi pejumaitisjavatsi: “Pananeconitame raja Diosojavabelia,” pejaijavatsi pibisiacuene pexanaejava yabara. ¹⁴ Adánpijinë peponaponaejavaveliacujinae, jivi jinavanapa. Bajarapamonaemi jinavanapa Moiséspijinë pevajënaeya. Daxita bajarapamonaemi ata pibisiacuene exana. Nexata tēpaponā. Bajarapamonaē pibisiacuene itsa exana, itsiata Adánpijinë papibisiacuene exana, cuenejëpaeya apo exanae. Cristo, ponë tajëvelia vajunupaebatsi pepatsijavanexatsica, Adánpijinëbeje, apo najamatabëcuenejëpabeje. Adánpijinë pejamatabëcueneta, daxitajivi pibisiacuene exanavanapa. Nexata daxitajivi naneconita Diosojavabelia. Cristo pijinia pejamatabëcueneta, jivi ayaibitsaëtōxaneto Dioso aneconijibia tanetsi.

¹⁵ Nexata Adánpijinë papibisiacuene exana, apo najëpabeje papexaniacuene Dioso nacatoexana Jesucristo pejamatabëcueneta. Caenë, Adánpijinë, pibisiacuene pexanaejava pejamatabëcueneta, daxitajivi tēpaponā. Biji rajane Dioso vajanacaitaxutotsoniataejava, bitso pexaniacuene. Tshipaji Dioso athëbëvetsica itorobica vajatuxanenë Jesucristo vajanacasivatēpaenexa mapanacuataje, vajanacavecuajibiaexanaenexa daxita vajaneconimi. Nexata bajarapacuenia caenë, Jesucristo, pexaniacuene exana pēcapanepaenexa jivi ayaibitsaëtōxaneto. ¹⁶ Caenë saya picani Adánpijinë. Itsiata pibisiacuene itsa exana, yacaejëpa daxitajivijava. Nexata daxitajivi pibisiacuene pexanaexae, naneconita Diosojavabelia. Itsiata baitsi jane Jesucristo xaniavaeta daxita xua Adánpijinë pejamatabëcueneta bijiana picani. Jesucristo pejamatabëcueneta Dioso aneconijibia tane daxita pamonaē jumecovënëta Jesucristo pesivatēpaejavatsi pibisiacuene pexanaeneconi yabara. ¹⁷ Caenë Adánpijinë pibisiacuene pexanaexae, daxitajivi tēpaponā bajarapamonaē ata pibisiacuene pexanaexae. Itsiata caenë Jesucristo vajanacasivatēpaexae, maparucāeje Dioso baja nacaitaxutotsoniatane. Bajaraxuata itsacuenejavayo ata Dioso apo toexanae atatsi, Dioso aneconijibia nacamane. Daxita pamonaē jumecovënëta Jesucristo pejamatabëcueneta Dioso aneconijibia petaejavatsi, bajarapamonaē ajamatabëcuenesaē tsavanapae tsane Dioso pejumecovënëtsijava Jesucristo peyavenonabiabixaetsi.

¹⁸ Daxitajivi naneconita Diosojavabelia caenë, Adánpijinë, copiaya pibisiacuene pexanaexae. Caenë pijinia, Jesucristo, pexaniacuene pexanaexae, daxita pamonaē jumecovënëta Jesucristo pesivatēpaejavatsi pibisiacuene pexanaeneconi yabara, Dioso aneconijibia tanetsi. Nexata bajarapamonaē Dioso rajutsianatsi matababi apo peverevereaejava. ¹⁹ Caenë, Adánpijinë, copiaya apo jumecovënëtsi Dioso pitorobicueniatsi. Nexata bajaraponë pejamatabëcueneta, jivi ayaibitsaëtōxaneto pibisiacuene exana. Nexata icatsia bexëa caenë, Jesucristo, xaniavaetsia jumecovënëta Dioso pitorobicueniatsi. Nexata Jesucristo pejamatabëcueneta, jivi ayaibitsaëtōxaneto Dioso aneconijibia tanetsi.

²⁰ Bajayata Dioso Moiséspijinëta najumecopata jivi pejumecovënëtsinexa. Nexata bajarapalivaisi itavetatsi pibisiacuene picani pexanaeyaniva. Itsiata baitsi jane jivi apo caejëpaetsi penajamatabëcuenesaëtsinexa. Nexata pibisiacuene exanabiaba. Nexata bajarapalivaisi pitavetsixaetsi pibisiacuene picani pexanaeyaniva, itsiata jivi pibisiacuene itsa exana, nacueneyapētane pibisiacuene pexanaejava. Nexata jivi pevajënaeyabelia pibisiacuene itsa exana, Dioso pijinia pevajënaeyabelia bitso itaxutotsoniataeponatsi. ²¹ Daxitatsi tēpaenatsi. Tshipaji daxitatsi pibisiacuene exanatsi. Bajara pijinia pacuenia daxitatsi Dioso vajanacaitaxutotsoniataexae, Dioso aneconijibia nacamane. Dioso nacarajutsiana matababi apo peverevereaejava vajatuxanenë

Jesucristo vajanacasivatëpaexae.

6

Pacuenia Dioso pejumecovënëtsivi pejanajamatabëcuene yajavajinavanapa yabara pelivaisi

¹ Itsajivi meta jamatabëcuenenavëxaniabiaya jamatabëjumaitsi tsane: “Dioso vajanacaitaxutotsoniataexae, aneconijibia nacatane. Nexata icatsia ayaicuenia Dioso vajanacaitaxutotsoniataenexa, vajavajënaeyabelia pibisiacuene exanavanapaenatsi,” jamatabëjai meta tsane jamatabëcuenenavëxaniabiaya. ² ¡Jume raja! Pëtsa baja vaxaitsi pibisiacuene exanatsi pematatsënëa. Petëpaenë baja apo najamatabëxainae pibisiacuene pexanaenexa. Bajara pijinia pacuenia vaxaitsi ata bejamatabëcueneitsitsi pibisiacuene vajaexanaeyaniva. ³ Paxamë bepayapëtaneme pajamatabëcuene yabara nabautisabatsi. Itsa nabautisabatsi, becaeperabëto nacaexana Jesucristojavabelia. Nexata vaxaitsi bejamatabëjumaitsi mapacueniaje: “Jesucristo cruzata itsa tëpa, xanë ata betaneya-javatëpae cruzata,” bejamatabëjaitsi. Bajarapajamatabëcuene yabara nabautisabatsi. ⁴ Itsa Jesucristo bevajanacayajavatëpae, nexata bevajanacayajavamëthëtsitsi. Nexata Jesucristo petëpaecujinae, Dioso pesaëta icatsia itsa asaëyaexanatsi, bevajanacayajavaasaëyaexanaetsi icatsia. Vaxaitsi pejanajamatabëcuene vajayajavajinavanapaenexa, copatatsi baja vajaperujumatabëcuenemi. Bajarapajamatabëcuene yabara nabautisabatsi.

⁵ Becaeperabëto vajanacaexanaexae Jesucristojavabelia, nexata daxitatsi Jesucristo cruzata bevajanacayajavatëpae. Nexata Jesucristo petëpaecujinae, Dioso icatsia itsa asaëyaexanatsi, bevajanacayajavaasaëyaexanaetsi. ⁶ Jesucristo itsa rutatsi cruzata pe-beyaxuabinexatsi, vajaperujumatabëcuenemi yajavarutatsi vajanacavecuaajibiaexanaenexa pibisiacuene vajanacaexanaeya exanaejamatabëcuenemi. Bajarapacuenia vajanacatoexanaexae, pematatsënëa baja apo bexanaetsi pibisiacuene. ⁷ Pacuenia baja petëpaenë pibisiacuene apo exanae, bajara pijinia vaxaitsi ata bejamatabëcueneitsitsi pibisiacuene vajaexanaeyaniva. ⁸ Jesucristo cruzata bevajanacayajavatëpaexae, nexata bejamatabëjumaitsi mapacueniaje: “Yajavajinavanapaenatsi Jesucristo daxitamatacabijavabelianexa,” bejamatabëjaitsi. ⁹ Yapëtanetsi vajatuxanenë Jesucristo Dioso icatsia piasaëyaexanaejavatsi petëpaecujinae. Nexata baja icatsia Cristo pematatsënëa apo tēpae tsane. ¹⁰ Itsa baja Cristo tēpa daxitajivi pibisiacuene pexanaeneconi yabara, caecuenia copiarutsiaya sivatëpa daxitamatacabijavabelianexa. Nexata baja Cristo icatsia pematatsënëa apo tēpae tsane. Biji rajane Dioso yajava daxitamatacabijavabelianexa asaë tsaponaponae tsane athëbëtatsia, itsajotatsia ajibi petëpaecuene. ¹¹ Nexata paxamë panejamatabëëthëtota pajamatabëjumaitsimëre tsavanapae: “Tajaperujumatabëcuenemi baja navecuatëpaeyabajë. Nexata baja pibisiacuene apo exanaenë tsane. Biji rajane asaënë baja tsaponaponae Dioso taneitorobicuenia tatoexanabinexa. Tsipaji baja tajatuxanenë Jesucristo neyjavaponaponae,” pajamatabëjamëre tsavanapae.

¹² Bajaraxuata pëtsa baja panajamatabëxainabiabame pibisiacuene paneexanaenexa panijacuata panenatojitsipaecuenia. ¹³ Pëtsa panacopatame daxita xua pibisiacuene paneexanaenexa. Tsipaji paxamë bepanetëpaecujinae, Dioso icatsia bepa-pecaasaëyaexanaevi. Nexata pajumaitsimëre tsabiabi Diosojavabelia: “Tajatuxanenë, catonucatsi majotaje. Cajamatabëcuenevetaponaponae daxitamatacabijavabelianexa pacuenia xamë jitsipame tacatoexanabinexa,” pajamëre tsabiabi Diosojavabelia. ¹⁴ Nexata pacacajëpaena panenajamatabëcuenesaëtsinexa icatsia caevëalia paneexanaeyaniva papibisiacuene panijacuata panatojitsipame. Tsipaji Dioso papecaitaxutotsoniataexae, Dioso pacayavenonabiabiana. Nexata baja apo paexanavanapaemë tsane pacuenia pacaitoroba Dioso Moisésipjinëta penajumecopatsilivaisi.

Pacuenia itsane pajivi nacopata ëpibisiacuene pexanaejavabelia yabara pelivaisi

¹⁵ Itsajivi meta jamatabëcuenenavëxaniabiaya jamatabëjumai tsane: “Dioso vajanacaitaxutotsoniataexae, aneconijibia nacatane. Nexata baja tsiteca apo exanavanapae tsanetsi pacuenia nacaitoroba Dioso Moiséspijinëta penajumecopatsilivaisi. Nexata baja itaxutojema pibisiacuene exanavanapaenatsi,” jamatabëjai meta tsane itsajivi jamatabëcuenenavëxaniabiaya. ¡Jume raja! Pibisiacuene apo hexanavanapaetsi. ¹⁶ Paxamë rabaja xaniavaetsia payapëtaneme mapacueneye. Itsa panacopatsipame itsanë papijajivinexamë, nexata pacuenia bajaraponë pacaitorobabiaba, pajumecovënëtabijitsipame. Bajara pijinia paitsimë tsipae itsa panacopatsipame pibisiacuene paneexanabiabinexa. Nexata bajarapapibisiacuene bepapijajivimëcuenia, pacuenia pacajamatabëcueneitorobabiaba, paexanavanapaejitsipame. Nexata bajarapaneconi pejamatabëcueneta papitsipame panetëpaejavanexa, Diosovecua panenaxuabinexa daxitamatacabijavabelianexa. Itsiata itsa pajumecovënëtavapanapenaxa Dioso, nexata pacuenia Dioso pacatojitsipa, patoexanavanapenaxa. ¹⁷ Bajayajebi picani panacopatame pibisiacuene paneexanavanapenaxa. Nexata pibisiacuene bepapijajivimëcuenia, pacuenia pacajamatabecuenenitorobabiaba, ëpibisiacuene paexanavanapame. Nexata itsiata maparucaeye daxita panejamatabëcueneta pajumecovënëtavapanapame baja papexaniajailivaisi itsamonae pacatsipaeba. Bajaraxuata paxamë yabara Diosojavabelia jumaitsinë tsabiabi: “Xanepana rabaja. Ayaicuenia yavenoname bajarapamonae,” janë tsabiabi. ¹⁸ Aeconoxae baja Dioso pacacopatsiaexana pibisiacuene paneexanavanapaejavami. Nexata jane baja panajamatabëxainame ëpexaniacuene paneexanavanapenaxa. ¹⁹ Peyapëxanepanaecuenia pacatoyaquinatsi mapalivaisije xaniavaetsia panejumeyapëtaenexa xua yabara pacatoyaquinatsi. Bajayajebi picani panacopatame pibisiacuene paneexanavanapenaxa. Nexata bajarapapibisiacuene bepapijajivimëcuenia pacuenia pacajamatabëcueneitorobabiaba, ëpibisiacuene picani paexanavanapame panevajënaeyabelia. Itsiata baja aeconoxae panajamatabëcuenerajure Diosojavabelia ëpexaniacuene paneexanavanapenaxa panevajënaeyabelia. Bajarapacuenia Dioso pacatojitsipa paneexanavanapenaxa. ²⁰ Pamatacabi picani abaxë ëpibisiacuene paexanavanapame, Dioso papecatojitsipaecuenia apo paexanavanapamë. Saya jamatejema pajinavanapame. ²¹ Itsiata apo pacatoxanepanae itsacuenejavayonexa ata daxita papibisiacuene picani paexanavanapame. Payaauramë tsabiabi pibisiacuene paneexanaejava. Pamonae tsiteca pibisiacuene exanavanapa, bajarapamonae Diosovecua naxuabiana daxitamatacabijavabelianexa. ²² Paxamë rabaja Dioso pacacapanepa pibisiacuene paneexanaeconeimivecua. Bajaraxuata Diosojavabelia panajamatabëcuenerajutame baja Dioso papijajivinexamë. Nexata apo panacueratsimë tsane. Dioso papecatojitsipaecuenia pajinavanapenaxa. Panetëpaejavanexa paxainaenaxa matacabi apo peverevereaejava. ²³ Pamonae pibisiacuene pexanaevi, Dioso rajutsianatsi petëpaejavanexa, Diosovecua panaxuabinexa daxitamatacabijavabelianexa. Pamonae jumecovënëta vajatuxanenë Jesucristo pesivatëpaejavatsi pijaneconi yabara, bajarapamonae itsamatacabi Dioso amoneya rajutsianatsi matacabi apo peverevereaejava.

7

Pacuenia Dioso pejumecovënëtsivi Dioso Moiséspijinëta penajumecopatsilivaisi apo bejumecovënëtsi pecapanepaenexatsi yabara pelivaisi

¹ Tajamonae, payapëtaneme rabaja Dioso Moiséspijinëta penajumecopatsilivaisi. Nexata baja pijinia payapëtaneme pacuenia jivi bajarapalivaisi bejumecovënëtavapanapae itsa abaxë asaë tsavanapae mapanacuataje. Itsiata baitsi jane itsa baja tëpa, acuenebi baja pematatsënëa bajarapalivaisi pejumecovënëtavapanapenaxa. ² Pova baja

pamona pexainaeva, acuenebi pevecuanaviatsinexa pamona, penacojobinexa icatsia itsanëjavabelia. Tshipaji Dioso Moiséspijinëta penajumecopatsilivaisi itaveta bajarapacue. Itsiata baitsi jane pova baja pamona vecuatëpatsi, nexata matapania tocopatatsi penacojobinexa icatsia itsanëjavabelia itsa jitsipa penacojobijava. ³ Pova pamona pexainaeva, itsa nacojobijitsipa itsanëjavabelia, pamona abaxë itsa asaë tsaponapona, nexata bajarapova ayaineconi natsiexanaejitsipa Diosojavabelia. Tshipaji pamonavecua itsanëjavabelia naperabëquenetsiatae ponaponaejitsipa. Itsiata baitsi jane baja pova baja pamona vecuatëpatsi, Dioso Moiséspijinëta penajumecopatsilivaisi apo itavetsitsi penacojobijava itsanëjavabelia. Nexata pova baja pamona vecuatëpatsi, nacojobi ata icatsia itsanëjavabelia, ayaineconi apo natsiexanae tsipae Diosojavabelia.

⁴ Tajamona, baja pijinia paitsimë paxamë ata. Pacuenia petiriva pamona pitorobabiabicueniatsi, jumecovënëtabiaba, baja pijinia pacuenia pajumecovënëtabiabame picani Dioso Moiséspijinëta penajumecopatsilivaisi papecaitorobicuenia. Jesucristo bepanyajavatëpaexae, nexata Dioso Moiséspijinëta penajumecopatsilivaisi bepanevecuatëpae. Nexata baja icatsia apo pajumecovënëtanapaemë bajarapalivaisi papecaitorobicuenia. Maparucaeje Cristo baja papijajivimë, ponë icatsia Dioso asaëyaexanatsi petëpaecujinae. Cristo icatsia Dioso bepapecayajavaasaëyaexanae pacuenia Dioso pacatojitsipa paneexanavanapaenexa. ⁵ Pamatacabi abaxë Cristo pelivaisi apo jumecovënëtsitsi, pibisiacuene exanavanapatsi vajacuata vajanatojitsipaecuenia. Nexata bajarapamatacabi itsa nacaitaveta Dioso Moiséspijinëta penajumecopatsilivaisi pibisiacuene vajaexanaeyaniva, caranata saya bevajanacaitorobi pibisiacuene vajaexanaenexa. Nexata bitso pibisiacuene exanavanapatsi. Bajaraxua yabara picani Diosovecua naxuabiainavanapatsi. ⁶ Itsiata baja maparucaeje palivaisi Dioso Moiséspijinëta najumecopata, bajarapalivaisi vajajumecovënëtsijavami, Dioso baja nacacopabiaexana Cristo bevajanacayajavatëpaexae. Nexata papexaniacuene aeconoxae exanavanapatsi, apo exanavanapaetsi saya vajanacaitorobixae bajayata peyaquinaelivaisimi, Dioso Moiséspijinëta penajumecopatsilivaisi. Jume baja cajena. Espiritu Santo raja pejanajamatabëcueneta vajanacaitorobixae, exanavanapatsi bajarapapexaniacuene.

Dioso Moiséspijinëta penajumecopatsilivaisi, pacuenia ata Pablo pibisiacuene pexanaenexa najamatabëxaina, penavajunupaebijava, yabara pelivaisi

⁷ Itsajivi meta jamatabëcuenenavëxaniabiaya jamatabëjumaitsi tsane: “Dioso Moiséspijinëta penajumecopatsilivaisi, itsacuenejavayonexa ata apo xanepanae,” jamatabëjai meta tsane. ¡Jume raja! Itsa ajibi tsipae bajarapalivaisi, nexata apo nacueneyapëtaenë tsipae pibisiacuene taexanaejava. Tshipaji Dioso Moiséspijinëta penajumecopatsilivaisita, itsalivaisianë yajava, jumaitsi mapacueniaje: “Pëtsa cobecaëbame itsajivi pexinaejava,” jai. Nexata itsa apo yapëtaenë tsipae bajarapalivaisi, xanë apo nacueneyapëtaenë tsipae pibisiacuene taexanaejava, itsajivi pexinaejava cobecaëbi atanë. ⁸ Dioso Moiséspijinëta penajumecopatsilivaisi, itsa nitaveta itsamonae pexinaejava tacobecaëbiyaniva, nexata caranata bitso betanitorobi tacobecaëbinexa itsamonae pexinaejava. Pamatacabi abaxë apo yapëtaenë Dioso Moiséspijinëta penajumecopatsilivaisi, apo jitsipaenë picani taexanaenexa bajarapacue. ⁹ Bajayata abaxë itsa apo yapëtaenë bajarapalivaisi, jamatejemanë saya. Itsiata pamatacabi xaniavaetsia yapëtaniji xua yabara Dioso nitaveta, nexata jitsipajë bitso pibisiacuene taexanaenexa. Bitso najamatabëxainajë. Bajarapalivaisi pejamatabëcueneta yapëtaniji pibisiacuene taexanaexae, Diosovecua naxuabiaya tatëpaejavanexa picani. ¹⁰ Bajarapalivaisi Dioso najumecopata Moiséspijinëta jivi picani jamatabëcuenenarëyaya xaniavaetsia pejinavanapaenexa. Itsiata xanë bajarapalivaisi pejamatabëcueneta apo jamatabëcuenenarëyanë. Tshipaji pibisiacuene taexanaexae, bajarapalivaisi pejamatabëcueneta yapëtaniji Diosovecua tanaxuabijavanexa picani.

Nexata bitso najamatabëxainajë. ¹¹ Papibisiajamatabëcuene xainajë tajamatabëëthëtota, pibisiacuene neexanaeyaexanabiaba. Nexata pacuenia jumaitsi bajarapalivaisi, naneconitajë picani Diosovecua tanaxuabinexa.

¹² Palivaisi Dioso Moiséspijinëta najumecopata, pexanialivaisi cajena. ¹³ Nexata bajarapapexanialivaisi pejamatabëcueneta yapëtaniji Diosovecua tanaxuabijavanexa picani. Tsipaji xanë tajamatabëëthëtota papibisiajamatabëcuene xainajë pejamatabëcueneta, exanabiabajë pibisiacuene. Bajaraxuata Diosovecua naxuabijitsianë picani. Bajarapacuenia daxitajivi bajarapalivaisi pejamatabëcueneta, nacueneyapëtaena pibisiacuene pexanaejava. Taexanaexae xua bajarapalivaisita itaveta, naneconitajë Diosojavabelia. Bajarapalivaisi itsa yapëtaniji, nexata tajamatabëëthëtota papibisiajamatabëcuene xainajë, nitorobapona bitsoyo pibisiacuene taexanaponaenexa.

¹⁴ Palivaisi Dioso Moiséspijinëta najumecopata jivi pejumecovënëtsinexa, yapëtanetsi bajarapalivaisi Dioso penajumecopatsijava. Bajarapalivaisi jivi pejumecovënëtsinexa, bexaina pejanajamatabëcuene. Itsiata baitsi jane xanë bajara apo jamatabëcueneitsinë. Tajacuata saya ëtanatojitsipacuena exanaponaponajë. Caranata saya najamatabëxainabiabajë ëpibisiacuene taexanabiabinexa, papibisiajamatabëcuene tajamatabëëthëtota xainajë taneitorobabiabicuenia. ¹⁵ Xua pexaniacuene, jamatabëexanabiabajë picani. Itsiata bajaraxua apo exanabiabinë. Biji papibisiacuene apo jitsipañë picani taexanabiabinexa, bajaraxua caranata exanabiabajë. “¿De tsaeta xuajitsia bajarapacuenia exanabiabajë?” jamatabëjanë belia. ¹⁶ Itsa exanabiabajë papibisiacuene picani apo jitsipañë taexanabiabinexa, nexata sivajamatabëbëjanë tsabiabi. Bajaraxuata yapëtaniji jane baja Dioso penajumecopatsilivaisi pexanialivaisicuene. Tsipaji Dioso penajumecopatsilivaisi itaveta pibisiacuene pexanaejava. ¹⁷ Bajarapapibisiacuene exanae atanë, itsiata apo betanatsitaexanae itajara. Papibisiajamatabëcuene abaxë xainajë tajamatabëëthëtota, nexanaeyaexanapona bajarapapibisiacuene. ¹⁸ Tajamatabëcuene cajena bitso abeje. Yapëtaniji itsacuenejavayonexa ata apo netoxanepanae daxita tajamatabëcuene. Natojitsipajë picani pexaniacuene taexanabiabinexa. Itsiata apo nejamatabëcuenecaëjëpabiabi pexaniacuene taexanabiabinexa. ¹⁹ Papexaniacuene jitsipajë taexanabiabinexa picani, itsiata apo exanabiabinë. Caranata saya exanabiabajë pibisiacuene, xua picani apo jitsipañë taexanaenexa. ²⁰ Nexata itsa exanabiabajë xua picani apo jitsipañë taexanabiabinexa, nexata bajaraxua apo betanatsitaexanae itajara. Tsipaji papibisiajamatabëcuene abaxë xainajë tajamatabëëthëtota, nexanaeyaexanapona bajarapapibisiacuene.

²¹ Nexata jane baja yapëtaniji pacuenia jamatabëcueneitsinë tsabiabi. Paepatota picani jitsipajë pexaniacuene taexanabiabinexa, itsiata apo exanabiabinë. Tsipaji papibisiajamatabëcuene xainajë, abaxë yajavaponaponajë. ²² Tajamatabëcueneta jamatabëjumaitsinë tsabiabi: “Jitsipajë tajumecovënëtsinexa Dioso pejumelivaisi,” jamatabëjanë tsabiabi picani. ²³ Itsiata baitsi jane belia najamatabëcueneyapëtaniji. Papibisiacuene exanabiabajë, bajarapapibisiacuene picani tajamatabëcueneta apo jitsipañë taexanaenexa. Tajamatabëcueneta picani jitsipajë pexaniacuene taexanaenexa, Dioso tanetojitsipacuena. Caranata exanabiabajë ëpibisiacuene. Tajaperujujamatabëcuene saya beprijavitonëncuenia toponaponajë.

²⁴ ¡Xanë bitso bejiobinë! Bajarapapibisiajamatabëcuene yabara Dioso picani naneconitsiaexanaejitsia tanaxuabinexa Diosovecua daxitamatacabijavabelianexa. “¿Jipatsa meta nevecuaajibiaexanaena bajarapapibisiajamatabëcuene?” jamatabëjanë belia. ²⁵ Nexata Diosojavabelia jumaitsinë: “Pexaniacuene rabaja netoexaname,” janë. Tsipaji vajatuxanenë Jesucristo jamatabëcuenecaëjëpatsi taneyavenonaenexa.

Bajaraxuata ëpibisiacuene jamatabëexanae atanë, jitsipajë daxita tajamatabëcuenevetsina tajumecovënëtsinexa pacuenia Dioso itoroba.

8

Pacuenia Espiritu Santo nacajamatabëcuene yavenona yabara pelivaisi

¹ Pamonaë baja Jesucristo yajavajinavanapa, bajarapamonaë Dioso baja apo naneconitsiaexanaetsi tsane. Bajarapamonaë penatojitsipaecuenia, pibisiacuene apo exanavanapae. Biji rajane exanavanapa pacuenia Espiritu Santo tojitsipatsi. ² Nexata bajarapacuenia xanë ata Jesucristo itsa yajavaponaponajë, nexata Espiritu Santo pesaëta neyavenonabiaba xaniavaetsia taponaponanexa. Nexata baja apo exanaponanë pibisiacuene. Papibisiajamatabëcuene picani nenaneconitsiaexanabiaba daxitamatacabijavabelianexa picani tananeconitsiaponaponanexa, bajarapajamatabëcuenemi Espiritu Santo baja nevecuaajibiaexana. ³ Vaxaitsi vajacuata apo nacajamatabëcuene caëjëpae vajajumecovënëtsinexa Dioso Moiséspijinëta penajumecopatsilivaisi. Bajaraxuata apo nacacaëjëpae vajacuata vajanacapanepaenexa Dioso javabelia. Itsiata Dioso caëjëpatsi vajanacapanepaenexa. Athëbëvetsica Dioso itorobica pepo caenë pexënato. Nexata mapanacuata Dioso pexënato itsa naexana, nacaperabëjëpa picani pibisiacuene vajaexanaevi. Bajaraponë vaxaitsi pibisiacuene vajaexanaeneconi yabara, nacasivatëpa. Nexata baja nacavecuajibiaexana papibisiajamatabëcuene picani xainatsi, pajamatabëcuene picani nacaexanaeyaexanabiaba pibisiacuene. ⁴ Bajarapacuenia Dioso nacatoexana vajanacajamatabëcuene caëjëpaenexa pexaniacuene vajaexanaejava pacuenia Dioso Moiséspijinëta penajumecopatsilivaisi jumaitsi. Nexata nacacaëjëpa vajaexanaenexa pexaniacuene. Tsipaji apo exanavanapaetsi pacuenia vajacuata natojitsipatsi. Biji rajane exanavanapatsi pacuenia Espiritu Santo nacatojitsipa.

⁵ Pamonaë exanavanapa pijacuata penatojitsipaecuenia, bajarapamonaë jamatabëcuene enabiabatsi ëpibisiacuene pexanaenexa. Pamonaë pijinia exanavanapa Espiritu Santo pejitsipaecuenia, bajarapamonaë jamatabëcuene enabiabatsi Espiritu Santo pejitsipaecuenia pexanavanapaenexa. ⁶ Pamonaë saya exanavanapa pijacuata penatojitsipaecuenia, bajarapamonaë bepejamatabëcuene tëpaevi Dioso pitabarata. Nexata Diosovecua naxuabiaya jinavanapa. Pamonaë pijinia exanavanapa Espiritu Santo pejitsipaecuenia, bajarapamonaë jamatabëcuene barëyaya jinavanapa Dioso pitabarata. Bajarapamonaë itsamatacabi xainaenanua matacabi apo peverevecejava. ⁷ Pamonaë saya exanavanapa pijacuata penatojitsipaecuenia, bajarapamonaë itoya Dioso. Tsipaji apo exanaë pacuenia Dioso penajumecopatsilivaisi itorobatsi. Apo jamatabëcuene caëjëpaetsi pejumecovënëtsinexa bajarapalivaisi. ⁸ Pamonaë saya exanavanapa pijacuata penatojitsipaecuenia, bajarapamonaë apo jamatabëcuene caëjëpaetsi pexanaenexa Dioso pejitsipaecuenia.

⁹ Maparucaeje paxamë apo paexanavanapamë pacuenia panijacuata panatojitsipame. Espiritu Santo, ponë Cristo itorobica, pepacuene pacatsijamatabëca. Nexata Espiritu Santo pejitsipaecuenia, paexanavanapame. Pajivi Espiritu Santo apo tsijamatabëcaetsi, bajarapajivi Cristo apo pijajivitonë. ¹⁰ Paneperabëto tëpaena pibisiacuene paneexanaejamatabëcuene. Itsiata Cristo papijajivixaemë, nexata pepo panejamatabëcuene athëbëtatsia jinavanapaena daxitamatacabijavabelianexa. Tsipaji Dioso aneconijibia pacatane. ¹¹ Dioso asaëyaexanatsi Jesús petëpaecujinae. Nexata paxamë Espiritu Santo itsa pacatsijamatabëca, pacuenia Jesús Dioso asaëyaexanatsi petëpaecujinae, bajara pijinia pacuenia paxamë ata Dioso pacaasaëyaexanaena panetëpaecujinae. Nexata panetëpaecujinae Dioso pacaperabëasaëyaexanaena Espiritu Santo papecatsijamatabëcaexae.

¹² Tajamonae, bajarapacuenia Dioso nacaexanaena. Bajaraxuata xanepana va-jaexanavanapaenexa pacuenia Dioso nacatojitsipa. Copatatsi baja vajacuata vajana-tojitsipaecuenia vajaexanabiabijavami. ¹³ Tsipaji pibisiacuene itsa paexanavana-paejitsipame panijacuata panenatojitsipaecuenia, nexata itsa patëpame, Diosovecua panaxuabijitsipame daxitamatacabijavabelianexa. Itsiata baitsi jane Espiritu Santo papecayavenonaejamatabëcueneta itsa pacopatame panijacuata panenatojitsipaecue-nia pibisiacuene paneexanabiabijavami, nexata itsamatacabi paxainaename matacabi apo peverevereaejava.

¹⁴ Pamonaexanavanapa Espiritu Santo pitorobicueniatsi, bajarapamonae Dioso pexi. ¹⁵ Itsa nacatsijamatabëjunua Espiritu Santo, Dioso pexitsi nacaexana. Saya bepija-jivicueniatsi apo nacaexanae cjunaviaya vajatonacuenebinexa. ¡Jume baja cajena! Biji rajane pepacuene Dioso pexitsi nacaexana. Nexata Espiritu Santo pejamatabëcueneta: “¡Axa!” nacajaiyaexana vajavajëtsijavata Diosojavabelia. ¹⁶ Vajajamatabëëthëtota Dioso pijaEspiritu Santo nacayapëtaeyaexana Dioso pexicuenetsi. ¹⁷ Nexata Dioso pexixaetsi, it-samatacabi Jesucristo yajava Dioso nacatsicobetsanaena daxita xua Dioso toxaina pexi petsicobetsanaenexa. Nexata Dioso pexixaetsi, pacuenia Jesucristo bejiobiaexanatsi, bajara pijinia pacuenia vaxaitsi ata itsamonae nacabejiobiaexanaena. Nexata jane baja xuacujinae Dioso yajavajinavanapaenatsi Dioso pijapenivenivenaenacuatatsia.

¹⁸ Xaniajai. Maparucaeje itsamonae nacabejiobiaexanapona mapanacuataje. It-siata bajaraxua yabara apo najamatabëxainaetsi. Tsipaji baja yapëtanetsi itsamat-acabi bitso vajajamatabëcuenebarëyajanexa Dioso pijanacuatatsia. ¹⁹ Daxita ma-panacuapijivi itatsacajinaeya vajënaeevetavanapa petocopiapatsinexatsi pamatacabi Dioso nacaitajëtsijitsia bajarapamonaejavabelia Dioso pexitsi vajanacaexanaecuenene. Bajarapamonae vajanacayapëtaenexa Dioso pexicuenetsi, Dioso nacaitajëtsijitsia ba-jarapamonaejavabelia. Vaxaitsi baja Dioso vajajumecovënëtsivi, Dioso baja nacaja-matabëcuenexaniavaeta. ²⁰ Daxitacuene Dioso pexanaejava mapanacuataje vereverecaponaena. Tsipaji bajarapacuenia Dioso copata pevereverecaponaenexa. Bajaraxua apo naneconitsi ata Diosojavabelia, itsiata vereverecaena. Tsipaji baja Dioso copata bajarapacuenia daxitacuene pevereverecaponaenexa Adánpijinë pibisiacuene pex-anaejava pejamatabëcueneta. Itsiata baitsi jane itsamatacabi Dioso copiarucaeyaex-anaena daxitacuene pevereverecaponaejava. ²¹ Dioso pexitsi nacaasaëyaexanaena va-jatëpaecujinae, pacuenia copiaya Cristo ata Dioso asaëyaexanatsi. Bajarapamatacabi, dax-itacuene Dioso pexanaejava mapanacuataje pevereverecaponaejava, Dioso copiaru-caeyaexanaena. ²² Yapëtanetsi baja cajena pacuenia itsi daxitacuene mapanacuataje. Pacuenia itsi unupijivi, pejuvijavanë ata, bejiobi abaxë. Tsipaji xaina piavitane-cuene, petëpaecuene ata. Nexata abaxë tsitecapona bajarapabejiobicuene mapamatacabijav-aberena ataje. ²³ Daxita xua tanetsi mapanacuataje, bajaraëxua bajarapacuenia apo bejiobi piavitane-cuene yabara. Vaxaitsi ata cajena bejiobitsi tsavanapae. Espiritu Santo vajanacatsijamatabëcaexae, yapëtanetsi mapacueneje. Dioso pexixaetsi itsamatacabi nacaperabëithianaena pacuenia Cristo perabëithianatsi. Nexata bitso jitsipatsi vajaja-matabëëthëtovetsina Dioso vajanacaperabëithianaenexa vajaperabëeverevereaejavavecua. ²⁴ Jumecovënëtatsi Jesucristo vajanacasivatëpaejava pibisiacuene vajaexanaeneconi yabara. Nexata yapëtanetsi Dioso vajanacaperabëithianaenexa. Bajarapacuenene nexata abaxë copiaevetavanapatsi. Itsa baja Dioso nacarajutsipa xua nacarajutsi-apaeba, nexata baja apo copiaevetavanapaetsi tsipae vajanacarajutsinexa. Tsipaji baja ajibi tsipae vajayabaracopiaevetavanapaejava itsa baja nacarajutsipa. ²⁵ Nexata abaxë evetavanapatsi xua Dioso nacarajutsiapaeba vajanacarajutsinexa. Nexata abaxë copiaevetavanapatsi bajayajebi ata itsajamatabëcuene vecuaxainaenejevatsi.

²⁶ Vajaajamatabëcuenesaëjibixae, Espiritu Santo nacayavenonabiaba mapamatacabi ataje abaxë bajaraxua vajacopiaevetavanapaenexa. Vaxaitsi apo yapëtaetsi xa-

niavaetsia vajavajëtsinexa Diosojavabelia. Nexata Espiritu Santo bëpënëa bitso nacasivanajamatabëxainae ya nacatovajëtabiaba asaëyata Diosojavabelia. Xua apo vënëjonecapanepaetsi, Espiritu Santo nacatovajëtabiaba. ²⁷ Dioso cajena vajanacajamatabëcuene yapëtaenë pacuenia najamatabëxainatsi. Nexata Dioso yapëtane xua Espiritu Santo nacatovajëtsijitsia. Tsipaji Dioso vajanacatojitsipaecuena, Espiritu Santo nacatovajëtabiaba Diosojavabelia Dioso pijajivixaetsi.

Pacuenia Dioso pejumecovënëtsijivi daxita pibisiacuene tocopiapatsi atatsi, bejamatabëcuenematatoxeneta daxita bajarapapibisiacuene Jesucristo peyavenonabiabixaetsi yabara pelivaisi

²⁸ Yapëtanetsi mapacueneye. Daxita xua apo vajajitsipaecuene, Dioso nacatocopata vajanacatocopiapatabiabinexa. Nexata bajaraxua nacatocopiapatabiaba saya vajanacajamatabëcuenejëtsinexa. Nexata bajaraxua itsa nacajamatabëcuenejëta, apo nacatsitapexaniacuene itajara. Itsiata Dioso vajajumecovënëtsivi yapëtanetsi bajaraxua vajanacajamatabëcuenejëtsijava pejamatabëcueneta vajanacajamatabëcuene asaëyaexanaejavanexa Diosojavabelia. Vaxaitsi Dioso nacajunata pexitsi vajanacaexanaenexa pacuenia nacasivanajamatabëxaina. ²⁹ Vajanaexanaevajënaeya ata, Dioso yapëtane pexitsi vajanacaexanaejavanexa. Nexata vajanaexanaevajënaeya ata, Dioso nacasivanajamatabëcuenevereta vajanacaexanaenexa pacuenia pexënato jamatabëcueneitsi. Nexata vajanaexanaevajënaeya ata, Dioso nacasivanajamatabëcuenevereta Dioso pexënato pejuyapijivitsi ayaibitsaëtotsi vajanacaexanaenexa. ³⁰ Bajarapacuenia vajanaexanaevajënaeya ata, Dioso vajanacasivanajamatabëcuene veretsixae, najamatabëxaina pexitsi vajanacaexanaenexa. Nexata jane baja mapamatacabitaje nacajunata pexitsi vajanacaexanaenexa. Dioso vajanacajunatsixae, nexata nacavecuajibiaexana pibisiacuene vajaexanae neconimi. Nexata baja aneconi jibia Dioso nacatane. Nexata itsamatacabi Dioso yajavajinavanapaenatsi Dioso pijapenivenivenaenacuataatsia.

³¹ Nexata Dioso yabara bejumaitsitsi mapacueniaje: “Dioso cajena vajanacayavenonae në. Nexata itsajivi ata apo caëjëpaetsi vajanacajamatabëcuene matatoxenetsinexa,” bejaitsi. ³² Dioso baja cajena apo nacavecuasiva pexënato. Biji rajane copata pexënato vajanacasivatëpaenexa daxita vaxaitsi vajaneconi yabara. Nexata bajarapacuenia vajanacatoexanaexae, yapëtanetsi Dioso vajanacarajutsijavanexa daxita vajanamavenonaecuene ata. ³³ Dioso baja cajena nacaitapeta. Nexata vaxaitsi yabara Dioso jumaitsi: “Bajarapamonae baja aneconi jibia taniji,” jai Dioso najumecapanepaeya. Nexata cajena itsajivi ata apo caëjëpaetsi vajanacaneconitsinexa Diosojavabelia pibisiacuene vajaexanaejava yabara. ³⁴ Itsajivi ata cajena apo caëjëpaetsi vajanacaneconitsiaexanaenexa pibisiacuene vajaexanaejava yabara. Tsipaji baja capanepaeya Jesucristo nacasivatëpa vajanacaneconimatamotsinexa. Nexata Cristo petëpaecujinae Dioso icatsia asaëyaexanatsi. Maparucæje Jesucristo eca athëbëtatsia, Dioso pemuxuneneta, pecujanenia. Cristo pijajivitsi Diosojavabelia nacayajivicuaicuaijai. ³⁵ Cristo baja cajena vajanacaasivanë. Nexata itsajivi ata apo caëjëpaetsi Cristo vajanacaasivacuene vajanavecuacopiarucaeyaexanaenexa. Nacabejiobiaexanae ata tsipae, piayapëbejecuene nacatocopiapatsi ata tsipae, itsiata vajanacaasivanë Cristo tsiteca nacaasiva tsipae. Vajanacaitoyaxae, nacabarajinae ata tsipae, vajani tsabiabi ata tsipae, itsiata vajanacaasivanë Cristo tsiteca nacaasiva tsipae. Bitso bejiobi atatsi tsipae, bitso nacatsiyai ata tsipae, nacabeyaxuabiapaebi ata tsipae, daxita bajarapitsicuene nacatocopiapatsi ata tsipae, itsiata vajanacaasivanë Cristo tsiteca nacaasiva tsipae. ³⁶ Vaxaitsi yabara mapajamatabëcuenelivaisi jëpaje. Bajayata Dioso pijajivi navajunupaeba Diosojavabelia pacuenia itsamonae bejiobiaexanaponatsi. Dioso pejumelivaisibaxutota bajarapamonaemi penavajunupaebijume itanerubena. Jumaitsi mapacueniaje:

Xamë Diosomë, panijajivixanë, daxitamatacabi itsamonae jamatabëpanebeyejebabiaba picani. Pacuenia oveja pebeyaxuabinexa capona, bajarapacuenia jamatabëpaneexanabiaba, jai Dioso pejumelivaisibaxutota.

Bajara pijinia pacuenia vaxaitsi ata aeconoxae nacaexanapona. ³⁷ Nexata daxita xua pibisiacuene, nacatocopiapatabiabiana. Nacabejiobiaexanabiabiana. Nexata itsiata vaxaitsi bajaraxua jamatabëcuene matatoxenetabianatsi. Tsipaji Cristo vajanacaasivanë, nacayavenonabiabiana. ³⁸ Nexata yapëtaniji mapacueneje. Itsacuenejavayo ata apo caëjëpaetsi Cristo vajanacaasivacuene vajanacavecuacopiarucaeya exanaenexa. Vajatëpaecuene ata, vajaasaëtsavanapaecuene ata, ángelevi ata, dovathivi penamatacaitorobivi ata, apo caëjëpaetsi Cristo vajanacaasivacuene vajanacavecuacopiarucaeya exanaenexa. Piayapëbejecuene, xua baja nacatocopiapata, xua ata abaxë nacatocopiapatsijitsia, daxita bajaraxua ata, apo caëjëpaetsi Cristo vajanacaasivacuene vajanacavecuacopiarucaeya exanaenexa. ³⁹ Athëbëabetsia vajaponaejava ata, ira bëxëpanabereca vajaponaejava ata, apo caëjëpaetsi Cristo vajanacaasivacuene vajanacavecuacopiarucaeya exanaenexa. Dioso pexanaejava, itsacuenejavayo ata, apo caëjëpaetsi Cristo vajanacaasivacuene vajanacavecuacopiarucaeya exanaenexa. Yapëtanetsi Dioso vajanacaasivajava. Tsipaji Dioso vajanacaasivaxae, vajatuxanenë Jesucristo athëbëvetsica itorobicatsi vajanacasivatëpaenexa mapanacuataje.

9

Pacuenia Dioso pijajivinexa itapeta judíovi yabara pelivaisi

¹ Najamatabëcuenecopatajë Cristojavabelia. Nexata apo najumetsënëtsinë. Pexaniajailivaisi cajena pacatoyaquinatsi. Palivaisi pacatoyaquinatsi pexaniajailivaisicuene tayapëtaenexa, Espiritu Santo tajamatabëëthëtota neyapëtaeyaexana. ² Bitso sivanajamatabëxainajë tavëna judíovi, Israel nacuapijivi. Belia betaajamatabëtane tasivanajamatabëxainaejava bajarapamonae. ³ Bajarapamonae apo pejumecovënëtsixae Cristo, bitso sivanajamatabëxainajë. Bajaraxuata bajarapamonae yabara jamatabëjumaitsinë: “Itsa xanë Dioso netocopatsipa tanaxuabinexa Cristovecua, bajarapamonae juya pecapanepaenexatsi, nexata bajarapacuenia exanaejitsipajë bajarapamonae Dioso pecapanepaenexatsi,” jamatabëjanë belia tavëna judíovi yabara. ⁴ Bajarapamonae judíovi, Israelpijinë pemomoxi. Bajarapamonae pijasalinaivimijavabelia bajayata picani Dioso ayaicuenia yavenonabiaba. Itsiata bajarapamonaemi Dioso apo jumecovënëtsi. Dioso picani itapeta bajarapamonaemi Dioso pexi pexanaenexa. Bajarapamonaemi tanenua baja picani Dioso pijapenivenivenaectia. Dioso baja picani najumecapanepaeya jumaitsinua bajarapamonaemijavabelia peyavenonabiabinexa. Dioso Moiséspijinëta penajumecopatsilivaisi ata, rajuta picani bajarapamonaemi pejumecovënëttavanapaenexa. Dioso picani itorobanua bajarapamonaemi pexanaenexa templobo, bajarapabota pevajëcabiabinexa Diosojavabelia. Dioso picani najumecapanepaeya jumaitsinua petoitorobinexatsica Cristo bajarapamonaemi picani pecapanepaenënexatsi pibisiacuene pexanaeconimivecua. ⁵ Bajarapamonaemi pijasalinaivimi, pevënëjonevimi Dioso pejumecovënëtsijava. Cristo itsa naexana mapanacuataje, judionëcuenia naexana. Cristo nexata pijamonae judíovi. Bajaraponë Cristo, Diosonë baja cajena, daxitacuene pevetsinë. Nexata bajaraponëjavabelia jivi jumai tsabiabi tsane: “Xamë Cristomë, bitso baja cajena ayaijamatabëcuenenëmë,” jai tsabiabi tsane daxitamatacabijavabelianexa. Bajara itsi tsane.

⁶ Itsiata daxita judíovi apo jumecovënëtsi pacuenia Dioso najumecapanepaeya jumaitsi. Nexata Dioso apo toexanae daxita judíovijavabelia pacuenia Dioso najumecapanepaeya jumaitsi. Nexata Dioso yabara vaxaitsi jamatabëcuenenavëxaniabiaya apo bejumaitsi mapacueniaje: “Pacuenia Dioso najumecapanepaeya jumaitsi

judíovijavabelia petoexanaenexa, bajarapacuenia itsiata Dioso apo toexanae daxita judíovijavabelia,” apo bejaitsi vaxaitsi jamatabëcuenenavëxaniabiaya Dioso yabara. Bajarapacuenia Dioso yabara vaxaitsi jamatabëcuenenavëxaniabiaya apo bejumaitsitsi. Tsipaji Dioso tajëvelia apo itapetsi daxita judíovi pijajivinexa. Bajaraxuata pacuenia Dioso tajëvelia najumecapanepaeya jumaitsi, apo toexanae daxita judíovijavabelia. ⁷ Tsipaji bajayata Abrahampijinë pemomoxi ayaibitsaëto xinae ata, daxita itsiata Dioso apo totaetsi Abrahampijinë pepo pemomoxicuenia. Dioso tajëvelia jumaitsi Abrahampijinëjavabelia mapacueniaje: “Anijanëbeje nexënatobeje xinae atamë tsane, taitapetsinëxae, caenë nexë nato, Isaac, pexi catotaenatsi pepo nemomoxicuenia,” jai Dioso. ⁸ Bajaraxuata yapëtanetsi mapacuenieje. Pajivi naexanae ata Abrahampijinë pemomoxiyajuvënëjivi, itsiata bajarapajivi Dioso apo taetsi Abrahampijinë pepo pemomojivicuenia. Matapania pajivi jumecovënëta pacuenia Dioso najumecapanepaeya jumaitsi, bajarapajivi jane baja Abrahampijinë pepo pemomojivicuenia tanetsi Dioso. ⁹ Dioso tajëvelia najumecapanepaeya jumaitsi Abrahampijinëjavabelia mapacueniaje: “Icatsia caevaicujinae patsianajë. Nexata nijava, Sara, xainaena pexënatonacueto,” jai Dioso Abrahampijinëjavabelia Isaacpijinënexa yabara.

¹⁰ Nexata jane baja xuacujinae Isaacpijinë naexana. Bajaraxuacujinae icatsia bexëa Isaacpijinë baja pepuanacojiobi, Dioso icatsia tajëvelia jumaitsi vajasalinainë Isaacpijinë pijava Rebecapijivajavabelia, Rebecapijiva baja pepuayacotaponaponae sapalanëbejenexa. ¹¹⁻¹³ Itsa abaxë bajaraponëbeje apo naexanaebeje, pexaniacuene ata abaxë itsa apo exanaebeje, pibisiacuene ata abaxë itsa apo exanaebeje, bajarapamatacabi Dioso tajëvelia jumaitsi Rebecapijivajavabelia mapacueniaje: “Panacuetonëyo copiaya cavecuanaexanaena, bajaraponëyo jamatabëcueneevetsiana pejuyapijinë pitorobabiabinexatsi pijajivitonëcuenia,” jai Dioso tajëvelia Rebecapijivajavabelia. Bajarapacuenia Dioso pejumaitsijava Rebecapijivajavabelia najumejëpabeje pacuenia jumaitsi Dioso pejumelivaisibaxutota. Rebecapijiva pexënatobeje yabara Dioso pejumelivaisibaxutota jumaitsi mapacueniaje: “Asivanë juyapijinë Jacob, matapijinë Esau matatoxenetsia,” jai Dioso pejumelivaisibaxutota Dioso pejumaitsijava. Nexata bajaraponëbeje tocopiapatatsibeje pacuenia Dioso tajëvelia jumaitsi pacuenia Dioso itapetsijitsiatsi juyapijinë. Baitsi Jacob Dioso pijajivitonënexa itapetatsi matapijinëvecua. Nexata bajarapacuenia yapëtanetsi mapacuenieje. Dioso cajena baitapeta pajivi jamatabëitapeta pijajivitonënexa. Dioso apo itapetsi bajarapajivi pexaniacuene pexanaejava yabara. Bajarapacuenia Dioso tajëvelia itapeta juyapijinë matapijinëvecua penaexanaevajënaeyabeje ata cajena.

¹⁴ Pajivi Dioso jitsipa pitapetsinexa, nexata itsa itapeta, bajaraxua yabara vaxaitsi apo bejumaitsitsi mapacueniaje: “Dioso baja pacuenia exana, apo xanepanae,” apo bejaitsi vaxaitsi. ¹⁵ Tsipaji cajena Dioso bajayata jumaitsi Moiséspijinëjavabelia: “Pajivi jamatabëitaxutotsoniataniji, itaxutotsoniatanajë,” jai Dioso. ¹⁶ Nexata pajivi Dioso jamatabëitaxutotsoniatane, itaxutotsoniatane. Nexata itsajivi apo jamatabëjumaitsi ata: “Jitsipajë xanë Dioso taneitaxutotsoniataejava,” apo jamatabëjai ata, itsiata Dioso itaxutotsoniatanetsi. Bajarapajivi itsacuenejavayo ata Dioso pejitsipaecuenia apo exanabiabi ata, itsiata Dioso itaxutotsoniatanetsi. ¹⁷ Palivaisi bajayata Dioso jumaitsi Egiptonacua pevetsinëjavabelia, bajarapalivaisi Dioso pejumelivaisibaxutota ruca. Jumai tsarucae mapacueniaje: “Xanë catocopatatsi nevetsinexa nijaira. Pinijicuene taexanaejava exanaenajë paxamë tuatuajëta. Itsiata baitsi jane apo nejumecovënëtsimë tsane. Nexata daxita nacuapijivi neyapëtaena tasaënëcuene,” jai tsarucae Dioso pejumelivaisibaxutota Egiptonacua pevetsinëjavabelia Dioso pejumaitsijava. ¹⁸ Nexata pajivi Dioso jamatabëitaxutotsoniatane, itaxutotsoniatane. Pajivi pijinia Dioso jamatabëjamatabëcuenetajayaexana pejumecovënëtsiyanivatsi, ajamatabëcuenetajayaexana.

¹⁹ Nexata meta Dioso yabara pajumaitsimë tsane: “Bajarapacuenia Dioso jivi

itsa ajamatabëcuenetajayaexana pejumecovënëtsiyanivatsi, nexata bajarapajivi Dioso apo benaneconitsia exanae. Tsipaji bajarapajivi apo jumecovënëtsi Dioso pija-matabëcuenetajaya exanaexaetsi” pajamë meta tsane Dioso yabara. ²⁰ Tajamonae, pëtsa bajarapacuenia pajumaitsimë. Dioso yabara cajena bajarapacuenia apo bepajumaitsimë. Tsipaji Dioso pacaexana. Canalito itsa cajëpaejitsipatsi pecuaicuaijainexa, itsacanalitovecua saicayacuenia faratsi atatsi, pefaratsivatsijavabelia apo jumaitsi tsipae: “¿Detsa xuajitsia itsacanalitovecua saicayacuenia nefaratame?” apo jai tsipae pefaratsivatsijavabelia. ²¹ Tsipaji atsananitota canalito pefaratsiva cajëpatsi canalito pefaratsinexa pacuenia jamatabëfarata. Nexata cajëpatsi pefaratsinexa copiaya pexaniacanalito bo tuatujëta itabëtsiaya peetsinexa. Bajaraxuacujinae bajara paatsanani-toyajuvënëjavata cajëpatsi pefaratsinexa itsacanalito, beveliacanalito, pecajayababi-abinexa saya.

²² Bajara pijinia pacuenia Dioso baja exana jivijavabelia pacuenia tsitaxanepanatsi. Ayaicuenia Dioso jamatabënanecconitsiaexana daxita pamonaë naneconita bajaraponëjavabelia. Jamatabëtsitajëtanua pesaë bajarapamonaejavabelia. Itsiata baitsi jane abaxë bajayajebi Dioso najamatabëcuenecataita peverebiabivijavabelianexa. ²³ Biji rajane pamonaë Dioso jamatabëcapanepa, bajarapamonae capanepaena. Bajarapacuenia Dioso jamatabëexana vaxaitsi vajanacaitaxutotsoniataevijavaberena, vajanacatsitanajamatabëcuene itajëtsinexa ayaijamatabëcuene pexainaejava. Tsipaji baja cajena vajanaexanaevajënaeya ata, Dioso nacaitapeta vajayajavajinavanapaenexa athëbëtatsia. ²⁴ Vaxaitsi judíoviyajuvënëvitsi. Itsamonae vaxaitsiyajuvënëvi apo judíovi. Itsiata Dioso nacajunata daxitatsi pijajivinexatsi. ²⁵ Dioso pejumelivaisibaxutota, bajayata Oseaspjinë peyaquinaebaxutota, Dioso pejumaitsijava apo judíovi yabara, tajëvelia jumaitsi mapacueniaje:

Pamonaë picani apo tajajivi, bajarapamonae yabara jumaitsinë tsane: “Tajajivi raja mapamonaeje,” janë tsane. Bajarapamonae picani apo jitsipaenë. Itsiata bajarapamonae yabara jumaitsinë tsane: “Tajajivi raja mapamonaeje, tasivavi,” janë tsane. ²⁶ Panacuapijivijavabelia picani jumaitsinë tsane: “Paxamë raja apo patajajivimë,” janë tsane picani, itsiata bajarapanacuapijivi bexëa nejumecovënëtsiana. Nexata bajarapanacuapijivi yabara itsamonae jumai tsane: “Mara pamonaëje Dioso piasaëtsaponaponaenë pexije,” jai tsane, jai Oseaspjinë bajayata peyaquinaebaxutota, pamonaë apo judíovi ata, Dioso pijajivi pexanaëjavanexatsi yabara.

²⁷ Isaíaspijinë pijinia bajayata tajëvelia judíovi yabara jumaitsi mapacueniaje: “Israelpijinë pemomoxi bitso ayaibitsaëtoxaneto tsane. Pacuenia manuamenepijitajetaboatsapërë itsi, bajara itsane. Itsiata baitsi jane bajarapamonaeajuvënëvi, caejiviyobeje saya, Dioso capanepaenatsi. ²⁸ Daxita pamonaë naneconita Diosojavabelia, bajarapamonae naxanitsiayo Dioso naneconitsiaexanaena,” jai Isaíaspijinë peyaquinaebaxutota. ²⁹ Itsabaxutota pijinia Isaíaspijinë peyaquinaebaxutota, icatsia jumaitsi mapacueniaje:

Dioso raja ángelevi ayaibitsaëtoxaneto penamatacaitorobinë. Bajaraponë Dioso itsa apo nacaitaxutotsoniatae tsipae, nexata daxitatsi vaxaitsi, Israelpijinë pemomoxitsi, nacaverebiabijitsipa. Nacaverebiabijitsipa pacuenia bajayata verebiabatsi daxita Sodoma tomarapijivimi, Gomorra tomarapijivimi ata, jai Isaíaspijinë peyaquinaebaxutota.

Pacuenia judíovi apo jumecovënëtsi pexanialivaisi jivi pecapanepaelivaisinexatsi yabara pelivaisi

³⁰ Vaxaitsi yapëtanetsi mapacuenieje. Apo judíovi picani apo jumecovënëtsi ata Dioso aneconijibia petaenexatsi, itsiata Dioso aneconijibia tanetsi, pejumecovënëtsixae Jesucristo pesivatëpaejavatsi pibisiacuene pexanaeneconi yabara. ³¹ Itsiata baitsi jane

judíovi jamatabëcuenenavëxaniabiaya jumai tsabiabi: “Itsa jumecovënëtavanapaenatsi Dioso Moiséspijinëta penajumecopatsilivaisi, nexata Dioso aneconijibia nacataena,” jai tsabiabi. Itsiata bajaraxua yabara Dioso aneconijibia apo taetsi. Tsipaji apo caëjëpaetsi pejumecovënëtsicapanepaenexa bajarapalivaisi. ³² Apo caëjëpaetsi Dioso aneconijibia petaenexatsi. Tsipaji judíovi apo jumecovënëtsi Jesucristo pesivatëpaejavatsi pibisiacuene pexanaeneconi yabara. Biji rajane jamatabëcuenenavëxaniabiaya jumai tsabiabi. “Itsa jumecovënëtavanapaenatsi Dioso Moiséspijinëta penajumecopatsilivaisi, nexata Dioso aneconijibia nacataena,” jai tsabiabi. Bajaraxuata judíovi Diosovecua naxuabijavanapa, Cristo Dioso athëbëvetsica pitorobijavatsitsica, apo pejumecovënëtsixae. Caranata saya anaepanabiaba bajarapalivaisi yabara. ³³ Dioso tajëvelia Cristo yabara pejumaitsijava, Dioso pejumelivaisibaxutota jumaiti mapacueniaje:

Puenetanutsianajë Jerusalén tomarata ponë itorobijitsianë jivi pecapanepaenexa. Bajaraponë itsamonae apo jumecovënëtsitsi tsane. Nexata bajarapamonae nevecuanaxuabiana. Itsiata baitsi jane pajivi jumecovënëtsiana bajaraponë, bajarapajivi apo nacueratsi tsane, jai tajëvelia Dioso pejumelivaisibaxutota Cristo jivi pesivatëpaejavanexa pibisiacuene pexanaeneconi yabara.

10

¹ Tajamonae, jitsipajë bitso tajamatabëëthëtovetsina judíovi Dioso pecapanepaenexatsi. Bajaraxuata tovajëtabiabajë Diosojavabelia. ² Judíovi picani Dioso ayaicuenia bitso jamatabëtonacuenebabiaba Dioso pesivabarëyanexatsi. Itsiata baitsi jane apo yapëtae pacuenia Dioso tojitsipatsi petoexanavanapaenexa. Judíovi saya jamatabëcuenenavëxaniababiaba. ³ Bajarapamonae apo yapëtae pacuenia exanaejitsia Dioso aneconijibia petaenexatsi. Jamatabëcuenenavëxaniabiaya jumai tsabiabi: “Itsa jumecovënëtavanapaenatsi Dioso Moiséspijinëta penajumecopatsilivaisi, nexata Dioso aneconijibia nacataena,” jai tsabiabi bajarapamonae. Apo jumecovënëtsi pacuenia Dioso itorobatsi pexanavanapaenexa Dioso aneconijibia petaenexatsi. ⁴ Pajivi jumecovënëta Cristo pesivatëpaejavatsi pibisiacuene pexanaeneconi yabara, bajarapajivi Dioso baja aneconijibia tanetsi. Bajaraxuata pematatsënëa baja apo benajamatabëxainae pejumecovënëtsinexa icatsia Dioso Moiséspijinëta penajumecopatsilivaisi Dioso aneconijibia petaenexatsi.

⁵ Pamonae jitsipa Dioso aneconijibia petaenexatsi pejumecovënëtsixae Dioso Moiséspijinëta penajumecopatsilivaisi, bajarapamonae yabara Moiséspijinë bajayata peyaquinaelivaisi jumaiti mapacueniaje: “Pajivi jumecovënëtsicapanepaena daxita pacuenia bajarapalivaisita itorobatsi, bajarapajivi matapania Dioso aneconijibia taenatsi,” jai Moiséspijinë bajayata peyaquinaelivaisita. ⁶ Nexata baja pamonae jumecovënëta Cristo pesivatëpaejavatsi pibisiacuene pexanaeneconi yabara, bajarapamonae pejumeitavetsinexatsi, Dioso jumaiti mapacueniaje: “Pëtsa pajamatabëjumaitisimë: ‘¿Jipatsa meta athëbëabetsia ponaena mapanacuayabetsicaje pebarëpatsinexatsica vajanacayavenonaenënexa?’ pajamatabëjamë pëtsa. ⁷ Pëtsa pajamatabëjumaitisimënu: ‘¿Jipatsa meta ponaena, itsabereca petëpaevi jinavanapa, piasaëyaexanaenexa petëpaevivecua vajanacayavenonaenënexa?’ pajamatabëjamë pëtsa, jai Dioso jivi pejumeitavetsijava. Nexata itsajivi ata apo bejamatabëjumaiti bajarapacuenia. Tsipaji baja Cristo athëbëvetsica patsica vajanacasivatëpaenexa mapanacuataje. Petëpaeucujinae ata baja icatsia Cristo asaë petëpaejavavecua vajanacacapanepaenexa. ⁸ Dioso aneconijibia vajanacataejavanexa yabara, Dioso pejumelivaisibaxutota jumaiti mapacueniaje: “Dioso rabaja pejumelivaisi panatoxainame. Bajara palivaisi yabara panabarëcuaiquamë tsabiabi. Panejamatabëëthëtota ata baja bajarapalivaisi yabara panajamatabëxainabiabame,” jai Dioso pejumelivaisibaxutota. Bajarapalivaisibeje

nalivaisijëpabeje palivaisi paxanë pacatsipaebatsi panejumecovënëtsinexa Cristo papecasivatëpaejava pibisiacuene paneexanaeconi yabara. ⁹ Itsamatacabi Diosojavabelia papecacapanepaevi tsane itsa paexanavanapaename mapacueniaje. Panavajunupaebabiabare itsamonaejavabelia panejumecovënëtsijava Jesús Dioso pexënatocuene. Pajumecovënërenua panejamatabëëthëtojavavetsina Jesús petëpaeujinae icatsia Dioso piasaëyaexanaejavatsi. ¹⁰ Tsipaji baja jivi pejamatabëëthëtota jumecovënëta Cristo pesivatëpaejavatsi pibisiacuene pexanaeconi yabara. Bajaraxuata Dioso baja aneconi jiba tanetsi. Jivi pecuibovojotota navajunupaebabiaba pejumecovënëtsijava Cristo pesivatëpaejavatsi pibisiacuene pexanaeconi yabara. Nexata bajarapacuenia nayapëtane bajarapajivi Dioso pepacuene pecapanepaejavanexatsi.

¹¹ Dioso pejumelivaisibaxutota jumaiti mapacueniaje: “Pajivi jumecovënëtsiana, bajaraponë apo nacueratsi tsane,” jai Dioso pejumelivaisibaxutota Cristo jivi pesivatëpaejavanexa pibisiacuene pexanaeconi yabara. ¹² Dioso raja jivi najëpaeya tane. Pacuenia tane judíovi, bajarapacuenia tane apo judíovi ata. Caenë, Dioso, daxita bajarapamonae pijatuxanenë. Ayaicuenia Dioso itaxutotsoniatane daxita pamonaë vajëta bajaraponëjavabelia. ¹³ Cristojavabelia jivi penavajëtsijavanexa, Dioso pejumelivaisibaxutota jumaiti mapacueniaje: “Pajivi pepo petuxanenëjavabelia navajëta pecapanepaenexatsi, bajarapajivi capanepaenatsi,” jai Dioso pejumelivaisibaxutota. ¹⁴ Itsiata acuenebi itsajivi ata penavajëtsinexa Cristojavabelia itsa abaxë apo jumecovënëtsi Cristo pesivatëpaejavatsi pibisiacuene pexanaeconi yabara. Itsajivi ata acuenebi pejumecovënëtsinexa Cristo pelivaisi itsa abaxë apo yapëtae Cristo pelivaisi. Itsajivi ata acuenebi peyapëtaenexa Cristo pelivaisi itsa abaxë apo tsipaebitsi. ¹⁵ Dioso pijajivi itsa apo itorobi tsipae daxitajivijava Cristo pelivaisi petsipaebaponaenexa, nexata itsajivi ata apo yapëtae tsipae Cristo pelivaisi. Dioso pejumelivaisi jivi petsipaebaponaevinexa yabara, Dioso pejumelivaisibaxutota jumaiti mapacueniaje: “¡Pexaniacuene bitso itsa najetarubena pexanialivaisi jivi petsipaebivinexa!” jai.

¹⁶ Pexanialivaisi tsipaebi atatsi, itsiata daxitajivi apo jitsipae pejumecovënëtsinexa pexanialivaisi pecapanepaelivaisinexatsi picani Diosojavabelia. Isaíaspijinë ata, bajayata jivi apo jumecovënëtsitsi. Nexata Isaíaspijinë Diosojavabelia jumaiti mapacueniaje: “Tajatuxanenë, daxitajivi apo nejumecovënëtsi tatsipaebilivaisi. Caejiviyobeje saya nejumecovënëta,” jai bajayata Isaíaspijinë Diosojavabelia. ¹⁷ Nexata jivi itsa tsipaebatsi Cristo pesivatëpaejavatsi pibisiacuene pexanaeconi yabara pejumetaexae, jumecovënëta baja.

¹⁸ Judíovi ata baja picani jumetane Cristo pesivatëpaejavatsi pibisiacuene pexanaeconi yabara. Itsiata judíovi apo jumecovënëtsi. Dioso pejumelivaisibaxutota jumaiti mapacueniaje: Dioso pijajivi Dioso pejumelivaisi tsipaebanajetarubena daxitanacuanëjava. Nexata baja Dioso pejumelivaisi yacaëjëpa daxitanacuanëjava, jai Dioso pejumelivaisibaxutota.

¹⁹ Judíovi baja picani jumetane Cristo pesivatëpaejavatsi pibisiacuene pexanaeconi yabara. Itsiata judíovi apo jumecovënëtsi. Moiséspijinë bajayata tajëvelia yaquina judíovi Dioso apo pejumecovënëtsijavanexa. Yaquinanua apo judíovi juya Dioso pejumecovënëtsijavanexa. Judíovijavabelia Dioso tajëvelia pejumaitisijava, bajayata Moiséspijinë yaquina mapacueniaje:

Itsanacuanëpijivi paxamë bijiaya panaëcotabiabame. Bajarapamonae tajajivi exanaenajë. Nexata bajarapamonae pacuenecaëbianame. Bajarapamonae tajumelivaisi apo jamatabëjumeyapëtae picani. Itsiata tajajivi exanaenajë. Nexata bajarapamonae pacuenecaëbiaanaepanaename, jai Moiséspijinë bajayata peyaquinaebaxutota Dioso tajëvelia pejumaitisijava judíovijavabelia.

²⁰ Isaíaspijinë ata bajayata ajumejunavijibia jumaitsi Dioso tajëvelia pejumaitsijava. Apo judíovi yabara Dioso pejumaitsijava, Isaíaspijinë jumaitsi mapacueniaje:

“Pamonae picani apo nejitsipae, apo nejumecovënëtsinua, bajarapamonae itsiata it-samatacabi nejumecovënëtsiana. Nexata baja neyapëtaena. Bajarapamonae apo nevënëlivaisiyanijobi ata, najamatabëcueneitajëtsianajë bajarapamonaejavabelia,” jai Dioso tajëvelia, jai bajayata Isaíaspijinë.

Bajaraxuata nayapëtane tajëvelia Dioso penajamatabëcueneveretsijava pecapanepaenexa apo judíovi ata. ²¹ Biji rajane judíovi yabara Dioso pejumaitsijava, Isaíaspijinë bajayata jumaitsi mapacueniaje: “Daxitamatacabi junatabiabajë pamonae apo nejumecovënëtsi. Bajarapamonae apo exanae taitorobicuenia,” jai bajayata Isaíaspijinë Dioso pejumaitsijava judíovi yabara. Nexata nayapëtane mapacuenije. Judíovi junatsi atatsi Dioso, itsiata apo jumecovënëtsi Dioso pecapanepaenexatsi.

11

Pacuenia judíovi, Israel nacuapijiviyajuvënëvi, Dioso capanepaejitsiatsi yabara pelivaisi

¹ ¿Dioso tsabaja pijajivi judíovi, Israel nacuapijivi, daxita Dioso navecuaxuaba? Jume raja. Apo navecuaxuabi. Xanë ata raja judíonënë, Israel nacuapijinënë. Tajasalinainë cajena Abrahampijinë. Benjamínpijinë ata pemomoxiyajuvënënë. ² Bajayata baja cajena vajavajënaeyami, Dioso pijajivinexa itapeta judíovi, Israel nacuapijivi. Nexata Dioso apo navecuaxuabi tsane bajarapamonae. Payapëtaneme rabaja pacuenia Dioso pejumelivaisibaxutota jumaitsi profeta Elíaspijinë yabara. Profeta Elíaspijinë pina pevajëtsijavata Diosojavabelia, neconitsiaya jumaitsi Israel nacuapijivi yabara mapacueniaje: ³ “Tajatuxanenë, mapamonaeje, Israel nacuapijivi, catobepona daxita pecajumelivaisipaebivimi profetavi. Toxobabianua altarvënëjavanë, itsajota tajuitabiaba dajubivi pecarajutsinexa ofrendacuenia. Nexata baja xanë caenënë, nijajivitonënë, nacopatajë. Xanë ata baja jamatabënebeyaxuaba,” jai pina profeta Elíaspijinë Diosojavabelia Israel nacuapijivi yabara. ⁴ Itsiata baitsi jane Dioso pina jumaitsi profeta Elíaspijinëjavabelia mapacueniaje: “Apo caenëmë raja. Xainajë baja tajajivi, siete mil ponëbeje, Israel nacuapijiviyajuvënëvi. Bajarapamonae xaniavaetia nejumecovënëtavanapa. Pematatabëta apo tonubenaen penavajëcaenexa Baalvënënë, jumapecaetaeya pexanaenëtsi, pitabarata,” jai pina Dioso bajayata profeta Elíaspijinëjavabelia. ⁵ Bajara pijinia itsi maparucae ataje. Caejiviyobeje pijinia Dioso itapetatsi pijajivinexa pitaxutotsoniataexaetsi. ⁶ Bajarapamonae Dioso pexaniacuene petoexanavanapaejava yabara, apo itapetsitsi. Bajarapamonae Dioso itsa itapetsipatsi ëpexaniacuene Dioso petoexanavanapaejava yabara, nexata saya bajarapamonae Dioso itapetsipatsi ëpexaniacuene petoexanavanapaejava yabara. Nexata bajarapamonae saya Dioso pitaxutotsoniataexaetsi, apo itapetsitsi tsipae.

⁷ Mara pacuenia itsi Israel nacuapijivije, Dioso apo pejumecovënëtsivi. Bajarapamonae apo jumecovënëtsi Dioso pecapanepaejavanexatsi. Itsiata baitsi jane bajarapamonaejavuvënëvi, caejiviyobeje, Dioso itapetatsi pijajivinexa. Bajarapamonae jumecovënëta pexaniajailivaisi, Dioso pejumelivaisi, pecapanepaelivaisinexatsi Diosojavabelia. Itsamonae apo jumecovënëtsi bajarapalivaisi. Tsipaji ajamatabëcuenetaja. Apo jumecovënëtsi Dioso pejumelivaisi, pexaniajailivaisi, pecapanepaelivaisinexatsi picani Diosojavabelia. ⁸ Israel nacuapijivi, Dioso apo pejumecovënëtsivi, yabara Dioso pejumelivaisibaxutota jumaitsi mapacueniaje: “Dioso ajamatabëcuenetajayaexanatsi. Bajaraxuata bajarapamonae lebabibi ata Dioso pejumelivaisibaxuto, apo jumecovënëtsi. Bajara itsi bajarapamonae mapamatacabijavaberena ataje,” jai Dioso pejumelivaisibaxutota

Israel nacuapijivi, Dioso apo pejumecovënëtsivi, yabara. ⁹ Israel nacuapijivi, Dioso apo pejumecovënëtsivi, yabara bajayata Davidpijinë ata jumaitsi mapacueniaje:

Israel nacuapijivi fiesta ita exanabiaba, jamatabëcuenenavëxaniabiaya jamatabëjumai tsabiabi: “Dioso cajena nacasivabarëya. Bajaraxuata ayaijava vajaxainaejava xainatsi,” jamatabëjai tsabiabi. Itsiata baitsi jane pebarëyajavata, itsamatacabi jemata tocopiapatsianatsi pijaneconi yabara Dioso jane baja penaneconitsiaexanaejavanexatsi. ¹⁰ Bajarapamonae apo yapëtae pijaneconi peyajavajinavanapaejava daxitamatacabi. Pacuenia bitso piarevejavecajaponaevi, nabëxëtsutsiaya bacajona, bajara itsi bajarapamonae pejamatabëëthëtota pijaneconi yabara. Bitso yanajamatabëxaina pijaneconi, jai bajayata Davidpijinë Israel nacuapijivi, Dioso apo pejumecovënëtsivi, yabara.

Pacuenia apo judíovi ata Dioso capanepaejitsiatsi yabara pelivaisi

¹¹ Judíovi apo jumecovënëtsi ata Cristo pesivatëpaejavatsi pecapanepaenexatsi Diosojavabelia, itsiata abaxë Dioso apo navecuaxuabi judíovi daxitamatacabijavabelianexa. Judíovi apo pejumecovënëtsixae Cristo pelivaisi, juya apo judíovi Dioso tocopatatsi pejumecovënëtsinexa Cristo pelivaisi pecapanepaenexatsi Diosojavabelia. Nexata apo judíovi ata pejumecovënëtsijava Cristo pelivaisi, judíovi ita taena, nexata judíovi ata jumecovënëtsiana Cristo pelivaisi pecapanepaenexatsi Diosojavabelia. ¹² Judíovi apo jumecovënëtsi Cristo pelivaisi pecapanepaenexatsi Diosojavabelia. Bajaraxuata juya Dioso tocopata apo judíovi ata pejumecovënëtsinexa Cristo pelivaisi pecapanepaenexatsi Diosojavabelia. Nexata apo judíovi ata bajarapacuenia caxitajaraba baja pexaniacuene, judíovi apo pejumecovënëtsixae Cristo pelivaisi. Bajarapacuenia apo judíovi ata aeconoxae baja toxanepanatsi Dioso petocopatsixaetsi pejumecovënëtsinexa Cristo pelivaisi. Itsiata baitsi jane pacuenia apo judíovi ata aeconoxae toxanepanatsi, bajaraxua matatoxenetsia bitso pexaniacuene caxitajarabiana pamatacabi judíovi ayaibitsaëto jane baja jumecovënëtsiana Cristo pelivaisi.

¹³ Aeconoxae baja palivaisi pacatsipaebatsi, bajarapalivaisi paxamë apo pajudíovinexamë. Jitsipajë paneyapëtaenexa Dioso taneitorobicuene. Dioso nitoroba paxamë apo pajudíovimëjavabelia patacatsipaebinexa Dioso pejumelivaisi. Nexata jamatabëjumaitsinë: “Dioso cajena netocopata ayaijamatabëcuene pexainaelivaisi jivi tatsipaebajonaenexa,” jamatabëjanë. ¹⁴ Bajarapacuenia Dioso pejumelivaisi pacatsipaebajonatsi tsipaji jitsipajë tajaviriavi ata, judíovi, Dioso petoexanaenexatsi pacuenia paxamë ata Dioso pacatoexana papecacapanepaenexa. Nexata meta bajarapacuenia judíoviyajuvënëvi ata jumecovënëtsiana Cristo pelivaisi pecapanepaenexatsi Diosojavabelia. ¹⁵ Judíoviyajuvënëvi Cristo navecuaitaveta. Nexata juya pamonaevi apo judíovi, Dioso barajamatabëcuenexanepanaeyatane. Pamatacabi judíovi jumecovënëtsiana Cristo pelivaisi, Dioso pitsianatsi pijajivinexa. Bajaraxua bitso pinijicuene tsane. Judíovi aeconoxae bepetëpaevi Dioso tanetsi apo pejumecovënëtsixae Cristo pelivaisi. Nexata pamatacabi judíovi jumecovënëtsiana Cristo pelivaisi, Dioso taenatsi petëpaecujinae bepiasaëyaexanaevitsi. ¹⁶ Panbë jivi ofrendacuenia ita rajuta Diosojavabelia, copiaya pexanaepanbë barajuta. Nexata bajarapapanmatabëta cotocajevi pexanaepan ata, apo rajutsi ata Diosojavabelia, Dioso pijapanacuenia tane. Naejava ata petabunepe jivi ofrendacuenia ita rajuta Diosojavabelia, nexata daxita pemaxërananë ata Dioso pijamaxërananëcuenia tane. Bajara pijinia itsi judíovi ata. Judíovi pijasalinaivimi Dioso ita itapeta pijajivinexa, nexata judíovi pemomoxi ata Dioso pijajivicuenia tane.

¹⁷ Dioso tane judíovi, beolivonaemaxërananë. Olivonaenë pexainaenë, pepo olivonaemaxërananë caucuba juya saicayaviria olivonaemaxëranaxi perubinexa bajarapacovëta. Nexata pepo olivonaevi enëtuatuajëpijimera junua bajarapamaxëranaxi enëtuatuajëjava pejuvarubenaenexa pepo olivonaemaxëranajavaberena. Bajara pijinia pacuenia Dioso

pacatoexana paxamē apo pajudíovimē. Judíovi apo pejumecovēnētsixae Cristo pelivaisi, paxamē juya, apo pajudíovimē, Dioso papijajivimē pacaexana. ¹⁸ “Judíovivecua Dioso papijajivinē paneexana. Nexata paayaijamatabēcuenevinē judíovivecua,” pajamē pētsa. Tsipaji payapētaneme mapacueneje. Naejava, petabunepe pejamatabēcueneta, xaniavaetsia nuca. Pemaxērana pejamatabēcueneta, xaniavaetsia apo nucae. Bajara pijinia paxamē ata paitsimē. Apo pacacaējēpae paneyavenonaenexa judíovijavabelia. Biji rajane judíovi bepapecayavenonae. Tsipaji judíovi apo jumecovēnētsi Cristo pelivaisi. Nexata judíovi apo pejumecovēnētsixae, Cristo pelivaisi juya paxamē Dioso pacaitaxutotsoniatane. Nexata pacatocopata Cristo pelivaisi panejumecovēnētsinexa Dioso papecacapanepaenexa panijaneconivecua.

¹⁹ Nexata meta pajumaitsimē: “Pacuenia olivonaenē pexainaenē, olivonaemaxērananē caucuba, bajarapacovēta juya perubinexa itsaviriaolivonaemaxēranaxi, bajara pijinia itsi Dioso. Dioso navecuatsata judíovi juya apo judíovitsi vajanacaitapetsinexa pijajivinexatsi,” pajamē meta. ²⁰ Pacuenia olivonaenē pexainaenē, pibisiamaxērana caucuta, bajara pijinia itsi Dioso. Dioso navecuatsata judíovi apo pejumecovēnētsixae Cristo pelivaisi. Pacuenia olivonaenē pexainaenē, pecaucutsimaxērana pecovēta juya itsaviriaolivonaemaxērana ruta, bajara pijinia pacuenia paxamē ata judíovi pejamatabēcuenemi, pacapita Dioso papijajivinexamē panejumecovēnētsixae Cristo pelivaisi. Bajaraxuata pētsa panataneme paayaijamatabēcuenevimē. Biji rajane xania. Cujunaviaya Dioso pajinavanapare panevecuajopaeyaniva Dioso panejumecovēnētsijava. ²¹ Pacuenia olivonaenē pexainaenē, pibisiamaxērana bacaucuta, bajara pijinia pacuenia Dioso judíovi navecuatsata apo pejumecovēnētsixae Cristo pelivaisi. Judíovi picani Dioso itapeta pijajivinexa. Nexata judíovi Cristo pelivaisi apo pejumecovēnētsixae, Dioso navecuatsata pitapetsivimi ata. Nexata bajarapacuenia paxamē ata Dioso pacanavecuatsatsipa panevajēnaeyabelia itsa apo pajumecovēnētavanapaemē tsipae Cristo pelivaisi. ²² Bajaraxuata pacanaējēre mapacueneje. Dioso bitso papecaitaxutotsoniataexae, pacatocopata Cristo pelivaisi panejumecovēnētsinexa. Pacanaējērenua mapacueneje. Apo pejumecovēnētsixae Cristo pelivaisi, Dioso navecuatsata pitapetsivimi ata. Xaniajai cajena. Dioso naneconitsiaexanapona daxita pamonae apo jumecovēnētsi Cristo pelivaisi. Itsiata paxamējavabelia Dioso pacaitaxutotsoniatane. Nexata panevajēnaeyabelia tsiteca Dioso pajumecovēnētavanapare. Itsa pacopabijitsipame Dioso panejumecovēnētsijava, nexata pacuenia olivonaenē pexainaenē, pibisiamaxērana bacaucuta pexuabinexa, bajara pijinia pacuenia paxamē ata Dioso pacanavecuaxuabijitsipa. ²³ Judíovi Dioso pejumeaebijava itsa copatsiana, nexata jumecovēnētsiana Cristo pesivatēpaejavatsi pecapanepaenexatsi Diosojavabelia. Nexata bajarapamonae ata Dioso pijajivi tsane. Nexata pacuenia olivonaenē pexainaenē, pecaucutsimaxēranami icatsia caevēarena pecovēta ruta, bajara pijinia pacuenia Dioso icatsia pitsianatsi judíovi Dioso pijajivinexa. ²⁴ Pacuenia saicayaviria olivonaemaxērana ruta pepo olivonaemaxēranacovēta, bajarapacovēta pejuvarucaenexa, bajara pijinia pacuenia Dioso pacapita paxamē apo pajudíovi atamē Dioso papijajivinexamē. Paxamē apo pajudíoviriavi atamē, itsiata Dioso pacapita papijajivinexamē. Judíovi biji toyapēxanepanatsi icatsia pepitsinexatsi Dioso pijajivinexa. Tsipaji bajarapamonae pijasalinaivimi ata Dioso itapeta pijajivinexa.

Pacuenia Dioso capanepaejitsia judíovi, Israel nacuapijivi, yabara pelivaisi

²⁵ Tajamonae, panejamatabējumaitsiyaniva mapacuenaie: “Vaxaitsi bitso vajayapētaevi,” panejamatabējaiyaniva, jitsipajē paneyapētaenexa mapalivaisije, Dioso muetsia pexainabuatsilivaisimi. Judíoviyajuvēnēvi baja cajena ajamatabēcuenetaja. Nexata bajarapamonae apo jumecovēnētsi Cristo pelivaisi. Nexata ayaibitsaētoxaneto apo judíovi, itsa jumecovēnētsiana Cristo pelivaisi, matapania jane baja judíovi ata

jumecovënëtsiana Cristo pelivaisi. ²⁶ Nexata daxita pamonaē judíovi, itsamatacabi Dioso capanepaenatsi pacuenia baja Dioso pejumelivaisibaxutota tajëvelia jumaitsi. Dioso pejumelivaisibaxutota tajëvelia jumaitsi mapacueniaje:

Jerusalén tomaraverena najetarucaena daxisajivi pecapanepaenënexa. Bajaraponë daxita judíovi, pamonaē Israelpijinë pemomoxi, vecuaajibiaexanaena pibisiacuene pexanaeconimi. ²⁷ Itsa bajaraponë vecuaajibiaexanaena pibisiacuene pexanaeconimi, nexata jane baja toexanaenajë pacuenia bajayata tajëvelia najumecapanepaeya jumaitsinë bajarapamonaē pijasalinaivimijavabelia, jai tajëvelia Dioso pejumelivaisibaxutota Dioso pejumaitsijava judíovi pecapanepaejavanaxa Cristo pejamatabëcueneta.

²⁸ Judíoviyajuvënëvi Dioso pijavajabitsaë naexana. Tsipaji apo jumecovënëtsi Cristo pelivaisi pecapanepaenexatsi Diosojavabelia. Itsiata abaxë tsiteca Dioso asiva judíovi. Tsipaji bajayata copiata Dioso itapeta bajarapamonaē pijasalinaivimi pijajivinexa. ²⁹ Xua Dioso rajuta judíovijavabelia, apo vecuacnaviatsi. Pamonaē pijinia Dioso junata pijajivinexa, apo navecuaxuabi tsane. Nexata itsamatacabi bajarapamonaē Dioso athëbëtatsia yajavaecaena daxisamatacabijavabelianexa. ³⁰ Paxamë apo pajudíovimë, pamatacabi abaxë Cristo pelivaisi apo pajumecovënëtsimë, Dioso picani apo papijajivimë. Judíovi apo pejumecovënëtsixae Cristo pelivaisi, nexata apo pajudíovi atamë, Dioso pacaitaxutotsoniatane. Papijajivimë baja pacaexana. ³¹ Bajara pijinia pacuenia itsane judíovi ata. Maparucaeje abaxë judíovi apo jumecovënëtsi Cristo pelivaisi. Itsiata itsamatacabijavabelia judíovi ata Dioso itaxutotsoniataenatsi pacuenia paxamë ata Dioso pacaitaxutotsoniatane. ³² Dioso tocopata daxisajivi pijacuata penatojitsipacuenia pexanavanapaenexa Dioso pitorobicueniatsi apo pejumecovënëtsixae. Nexata daxisajivi naneconita Diosojavabelia. Bajarapacuenia Dioso tocopata itsamatacabijavabelia icatsia pitaxutotsoniataenexa bajarapamonaē.

³³ ¡Dioso baja cajena pitaxutotsoniataenë daxisajivi pecapanepaenexa! ¡Dioso cajena bitso peyapëtaenë! ¡Daxitalivaisi bitso pejumeyapëtaenënu! Pacuenia Dioso najamatabëcuenevereta pexanaenexa, pacuenia ata baja exanapona, vaxaitsi bajaraxua Dioso apo jamatabëcueneyapëtaetsi. ³⁴ Dioso pejumelivaisibaxutota jumaitsi mapacueniaje. “Vaxaitsi apo jamatabëcueneyapëtaetsi xua najamatabëxaina Dioso. Apo nacacajëpaenua vajamuxujobinexa ata. ³⁵ Dioso cajena itsajivijavabelia ata apo amoneyabi. Nexata xua Dioso rajuta itsajivijavabelia, apo rajutsi piamoneyabimatamo,” jai Dioso pejumelivaisibaxutota Dioso yabara. ³⁶ Tsipaji cajena Dioso pijacuata exana daxisacuene. Evetanua daxisacuene. Daxisacuene baja cajena Dioso pijajava. Nexata Diosojavabelia vaxaitsi bejumaitsitsi tsabiabi mapacueniaje: “¡Diosomë, bitso ayajamatabëcuenenëmë!” bejaitsi tsabiabi daxisamatacabijavabelianexa. Bajara itsi tsane.

12

Pacuenia Dioso pejumecovënëtsinë benajamatabëcuenerajuta Diosojavabelia pijajivitonënexa daxisamatacabijavabelianexa yabara pelivaisi

¹ Tajamonaē, payapëtaneme rabaja Dioso ayaicuenia vajanacaitaxutotsoniataejava. Bajaraxuata pacaitorobatsi mapacueniaje. Pacuenia ofrenda barajutatsi Diosojavabelia Dioso pijajavanexa, bajara pijinia pacuenia panajamatabëcuenerajure Diosojavabelia, pacuenia Dioso pacaitorobapona paneexanabiabinexa daxisamatacabijavabelianexa. Nexata ëDioso pijacuene panetonacuenebijava, pacaasaëmëre tsavanapae papecasivabarëyanexa Dioso. Bajarapacuenia Diosojavabelia panajamatabëcuenerajure panejamatabëëthëtojavavetsina panetsitanajamatabëcueneitajëtsinexa pepacuene panejitsipaejava Dioso. ² Pëtsa paexanavanapame pacuenia exanavanapa Dioso apo pejumecovënëtsivi. Biji rajane panajamatabëcuenecompare Diosojavabelia papecarajutsinexa

pejanajamatabëcuene. Nexata bajarapacuenia payapëtaename xua Dioso pacatojitsipa paneexanabiabinexa. Xua Dioso pacatojitsipa paneexanabiabinexa, bajaraxua bitso pexaniacuene. Bajaraxua itsa paexanabiabianame, Dioso pacasivabarëya tsane.

³ Dioso raja taneitaxutotsoniataexae, nitoroba tatonacuenebinexa. Bajaraxuata mapacuenia pacajumaitsitsije. Pacuenia baja aeconoxae pajamatabëcueneitsimë tsavanapae, bajarapajamatabëcuene matatoxenetsia pëtsa panataneme paayaijamatabëcuenevimë bitso. Biji rajane pacaejivimë canacujitsia, xuavajëto Dioso pacajamatabëcuene caëjëpaeyaexanapona paneexanabiabinexa panenajamatabëcuene copatsixae Dioso javabelia, bajarapacuenia saya baja panataema. ⁴ Jivi itsa naexana, yajavanaexana peperabëto, caeperabëtoreca. Itsiata bajarapaperabëtopijivi saicaya xainapona pevënëanë. Caevito canacujitsia saicaya xaina pexanabiabijavanexa. ⁵ Bajara pijinia pacuenia vaxaitsi ata itsitsi, Jesucristojavabelia vajanajamatabëcuene copatsivi. Ayaibitsaëto atatsi, itsiata caenë Cristo beperabëtotsi. Nexata namataenetsia nayavenonabiabianatsi.

⁶ Caejivitsi canacujitsia, pacuenia Dioso nacatojitsipa, saicaya nacajamatabëcuene caëjëpaeyaexanapona vajaexanabiabinexa. Nexata Dioso betonacuenebavanapatsi pacuenia nacajamatabëcuene caëjëpaeyaexanapona. Dioso itsa nacajamatabëcuene caëjëpaeyaexana jivi vajatsipaebabiabinexa Dioso pejumelivaisi, nexata betsipaebabiabatsi xaniavaetsia pacuenia nacajamatabëcuene caëjëpaeyaexana. ⁷ Itsa pijinia Dioso nacajamatabëcuene caëjëpaeyaexana vajayavenonabiabinexa itsamonae Dioso pejumecovënëtsivi, nexata xaniavaetsia beyavenonabiabatsi Dioso pejumecovënëtsivi. Pa-jivi pijinia Dioso jamatabëcuene caëjëpaeyaexanatsi Dioso pejumelivaisi jivi petsipaebabiabinexa, xaniavaetsia betsipaebabiaba daxita pejamatabëcuenesaëta. ⁸ Pajivi pijinia Dioso jamatabëcuene caëjëpaeyaexanatsi itsamonae pemuxujiobabiabinexa pejamatabëcueneasaëyaexanaenexa Dioso pejumecovënëtsijava, bajarapajivi bemuxujiobabiaba xaniavaetsia bajarapamonaejavabelia. Pajivi pijinia rajutabiaba pexainaeyajuvënëjava bepejiobivijavabelia, berajutabiaba itsajamatabëcuene xainaenejeva. Pajivi pijinia itsacuenejava evetsiaexanatsi, bevetaponapona xaniavaetsia. Pajivi pijinia yavenonabiaba piavitanevi, pamonaëta bitso najamatabëxaina pijamonaejiviyo itsa totëpatsi, beyavenonabiaba barëyaya.

Pacuenia Jesucristo pijajivi bexanavanapa yabara pelivaisi

⁹ Xaniavaetsia namataenetsia panaasivamëre tsavanapae. Paitoyamëre pibisiacuene pexanaejava. Pacaasaëmëre tsavanapae ëpexaniacuene paneexanaejava. ¹⁰ Pacuenia nacaenapijivi bitso nasiva, bajarapacuenia panaasivamëre tsavanapae Cristo papijajivixaemë. Itsamonae Dioso pejumecovënëtsivi, patojitsipare itsamonae petaenexatsi ayaijamatabëcuenevi paxamë matatoxenetsia. Namataenetsia panayaiyataeyabiabare.

¹¹ Pacaasaëmëre tsavanapae Dioso pijacuene panetonacuenebijava. Pëtsa pafaetabimë. Daxita panejamatabëcuenesaëta patonacuenebabiabare Dioso pijacuene.

¹² Pasivabarëyamëre tsavanapae. Tsipaji rabaja payapëtaneme itsamatacabi panexainaejavanexa matacabi apo pevereverecejava. Itsamonae itsa pacabejiobiaexana Cristo papijajivixaemë, bajayajebi ata, pëtsa pacopatame. Daxitamatacabi pavajëtabiabare Dioso javabelia pacopatsinejevamë.

¹³ Itsajota Dioso pejumecovënëtsivi namatavenona, payavenonabiabare. Pamonaëta pacasivaxaina panijaboyaberena, xaniavaetsia pacopiapitabiabare.

¹⁴ Pamonaëta pibisiacuene pacaexana, patovajëtabiabare Dioso javabelia Dioso peyavenonaenexatsi. Patovajëtabiabare pexaniacuene. Pëtsa patovajëtabiabame pibisiacuene juya pibisiacuene pexanaenexatsi.

¹⁵ Pamonaëta barëya petocopiapatsixaetsi pexaniacuene, bajarapamonae paxamëata pajamatabëcuene yavenonaeya barëyamëre. Pamonaëta pijinia nua petocopiapatsixaetsi apo pejitsipaecuene, bajarapamonae paxamëata pajamatabëcuene yavenonaeyanuema.

¹⁶ Najamatabëcuenejëpaeya pajinavanapare. Pëtsa panataneme paayaijamatabëcuenevimë. Pamonaee beveliajamatabëcuenevi ata, xaniavaetsia pataema. Xaniavaetsia payajavajinavanaparena. “Xanë bitso tayapëtaenë itsamonae matatoxenetsia,” pajamatabëjamë pëtsa.

¹⁷ Itsajivi pibisiacuene itsa pacaexana, pëtsa juya pibisiacuene panamatamoexaname. Paexanabiabare ëpexaniacuene, xua jivi tsitaxanepanatsi. ¹⁸ Xua Dioso pacajamatabëcueneçajëpaeyaexana paneexanaenexa, bajaraxua paexanabiabare xaniavaetsia panejinavanapaenexa, daxitajivijavabelia itsacuene paexanaenejevamë. ¹⁹ Tajamonae bitso patacaasivavi, itsamonae pibisiacuene itsa pacaexana, pëtsa panamatamotame. Pacopare saya bajarapamonae Dioso penaneconitsiaexanaenexatsi. Tsipaji Dioso pejumaitisijava, Dioso pejumelivaisibaxutota jumaitsi mapacueniaje: “Pamonaee pibisiacuene exana itsamonaejavabelia, xanë naneconitsiaexanaenajë,” jai Dioso pejumelivaisibaxutota. ²⁰ Dioso pejumelivaisibaxutota itsabaxutota pijinia jumaitsi mapacueniaje: “Nijavajabitsaënë itsa pajani, rajure pexaejava. Mera itsa jitsipa, rajure mera piapaenexa. Bajarapacuenia itsa exaname, nexata caurataena nijavajabitsaënë ata,” jai Dioso pejumelivaisibaxutota. ²¹ Itsajivi pibisiacuene itsa pacaexana, pëtsa pibisiacuene panamatamoexaname. Tsipaji bajarapacuenia panajamatabëcuene bijianaiejitsipame. Biji rajane pajivi pibisiacuene pacaexana, pexaniacuene patoexanare. Nexata bajarapacuenia pibisiacuene papecaexanaejivi ata, pajamatabëcueneçaeviaexanaenename.

13

¹ Daxita pamonaee gobierno pijajivi, papecayanacuaevetsivi, pacuenia bajarapamonae pacaitoroba, xaniavaetsia pajumecovënëtabiabare. Tsipaji bajarapamonae, caenë canacujitsia, Dioso pejamatabëcueneta pacayanacuaeveta. Daxita pamonaee nacua pevetsivi, pacaeveta Dioso petocopatsixaetsi. ² Nexata pajivi apo jumecovënëtsi pacuenia nacuaevetsinë itorobatsi, bajarapajivi Dioso ata apo jumecovënëtsi. Pamonaee apo jumecovënëtsi, nexata bajarapamonae Dioso naneconitsiaexanaenatsi. ³ Pamonaee pexaniacuene exanavanapa, nacuaevetsivi apo cjunavi. Pamonaee pijinia pibisiacuene exanavanapa, nacuaevetsivi cjunava. Paxamë nexata pexaniacuene paexanavanapare ajunavijibia panejinavanapaenexa. Nexata pacasivabarëya tsane papecayanacuaevetsivi. ⁴ Bajarapamonae Dioso pejamatabëcueneta nacuenebavanapa. Nexata pacaevetavanapa pibisiacuenevecua. Itsiata pibisiacuene itsa paexaname, papecayanacuaevetsivi bepacujunavame. Tsipaji bajarapamonae Dioso tocopatatsi papecananeconitsiaexanaenexa. Dioso tocopatatsi bajarapamonae penaneconitsiaexanaenexa daxita pamonaee pibisiacuene pexanaevi. ⁵ Bajaraxuata bejumecovënëtatsi pamonaee vajanacayanacuaevetsivi. Apo jumecovënëtsitsi saya vajanacananeconitsiaexanaeyaniva. Jume baja cajena. Biji rajane jumecovënëtatsi tsipaji Dioso pijajivixaetsi, vajajamatabëcueneta yapëtanetsi pacuenia hexanavanapatsi. ⁶ Bajaraxuata nacuaevetsivijavabelia impuestomatamo pamatamotabiabame panematamotsipalatata penaevetsinexa. Nacuaevetsivi, Dioso pejamatabëcueneta, tocopatatsi nacua pevetsinexa. Nexata nacua ëpevetsicuene nacueneba.

⁷ Pacuenia pacaevivimë canacujitsia bepatoexaname gobierno pejamatabëcueneta penacuenebivijavabelia, bajarapacuenia patoexanabiabare. Bajarapamonaeyajuvënëvi itsa caetuata impuestomatamo, xuavajëto pamoneyabame, pamatamotabiabare. Pamonaee pijinia peyayataevitsi, payayataeyabiabare. Pamonaee peyayataevitsi, bajarapamonae pexaniacuenia pabaracuaicuajiamëre tsabiabi. ⁸ Pëtsa pamoneyabame itsajivi ata. Biji rajane pacuenia Cristo pacaasiva, bajarapacuenia paxamë ata panaasivamëre tsavanapae. Pajivi asiva itsajivi ata pacuenia nasiva pijacuata, bajarapajivi jumecovënëtsicapanepe Dioso Moiséspijinëta penajumecopatsilivaisi. ⁹ Dioso Moiséspijinëta penajumecopatsilivaisi, itaveta mapacueniaje: “Pëtsa jaitame itsava

nijavavecua. Pëtsa beyaxuabame jivitonë. Pëtsa nacobetoxotame. Pëtsa najumetsënëtsiaya baracuaicuaijamë itsajivi. Pëtsa cobecaëbame itsajivi pexainaejava,” jai Dioso Moiséspijinëta penajumecopatsilivaisi. Nexata paxamë itsa pajumecovënëtsicapanepaejitsipame daxita mapalivaisije, itsalivaisiyo ata yajava, pajumecovënëtsicapanepaejitsipame mapejumaitsilivaisiyoje: “Asivamëre itsajivi ata pacuenia xamë nijacuata nasivamë,” pejailivaisiyo. ¹⁰ Tsipaji pajivi asiva itsajivi ata, pibisiacuene apo exanae bajarapajivijavabelia. Bajaraxuata itsa asivatsi itsamonae ata, nexata jumecovënëtsicapanepatsi daxita pacuenia Dioso nacaitoroba.

¹¹ Bajarapacuenia itsamonae ata biasivatsi. Tsipaji baja yapëtanetsi bitso baja imoxoyo pevajënae icatsia Jesucristo pepatsijavanexatsica. Vajanacacapanepaenënexa, najetarucaena vajanacacapanepaenexa mapanacuavecuaeje. Pamatacabi taxuxuabatsi Jesucristo vajajumecovënëtsijava, nacatsita tajëvajënae abaxë itajara Jesucristo icatsia pepatsijavanexatsica. Aeconoxae baja bitso imoxoyo pevajënae icatsia Jesucristo pepatsijavanexatsica. ¹² Meravi abaxë aitaquiri. Itsa baja icatsia matacabi jitsia, pitaquirijavami baja ajibi tsaponae. Bajara pijinia pacuenia imoxoyo baja pevajënae pecopiarucaenexa mapanacuapijivi pibisiacuene pexanaejava yabara pajamatabëcueneitaquirijavami. Tsipaji baja imoxoyo pevajënae icatsia Jesucristo pepatsijavanexatsica. Bajaraxuata hexanavanapatsi ëpexaniacuene Dioso pejitsipacuenia. ¹³ Aeconoxae baja vajavajënaeyabelia, jinavanapaenatsi xaniavaetsia vajayapëtaexae pexaniajailivaisi. Apo ponae tsanetsi pïaitajibivijava. Apo ponae tsanetsi fiestajava ata, itsajota pibisiacuene exanavanapa. Apo exanae tsanetsi pibisiacuene vajavivota. Apo exanae tsanetsi itsacuenejava ata, xua pibisiacuene. Nabijataeya apo najumeanaenotsi tsanetsi. Itsamonae ata apo cuenecaëbi tsanetsinua. ¹⁴ Biji rajane vajëtabiabianatsi vajatuxanenë Jesucristojavabelia vajanacayavenonabiabinexa. Vajatuxanenë Jesucristo nacajamatabëcueneasaëyaexanaena vajatojinavanapaenexa vajanacatojitsipacuenia. Apo sivanajamatabëxainae tsanetsi pacuenia vajacuata natojitsipatsi pibisiacuene vajaexanaenexa.

14

Pacuenia Pablo itaveta Roma tomarapijivi Dioso penajuajumecovënëtsivi itsa janitane pexaejava jumapecataeya pexanaenëanëjavabelia peyajuvënërajutsivi, “Pibisiacuene exana mapajivije,” pejaiyaniva, yabara pelivaisi

¹ Pajivi jumecovënëtsi ata Jesucristo pesivatëpaejavatsi pijaneconi yabara, itsiata abaxë itsa apo ajamatabëcuenesaë pejumecovënëtsijava, bajarapajivi ata xaniavaetsia pacopiapire panenacaetuatsibojavaberena itsa najunua. Bajarapajivi pijaneconi yabara Jesucristo pesivatëpaejavatsi pejumecovënëtsicujinae, copata baja pexaeyabiabijavami jumapecataeya pexanaenëanëjavabelia perajutsiyajuvënëvi. Nexata baja cujunava pexaejava, bepibisiacuene pexanaejava petaexae. Pëtsa pajumeanaenotame bajarapitsijivijavabelia panexaeyaexanaenexa icatsia bajarapayajuvënëvi. ² Itsamonae Cristojavabelia penajamatabëcuenecopatsivi, jamatabëjumaitsi: “Daxitacuene xanepana vajaxaenexa,” jamatabëjai. Itsamonae pijinia abaxë jamatabëjumaitsi: “Dioso nacananeconitsiaexanaejitsipa jumapecataeya pexanaenëanëjavabelia perajutsiyajuvënëvi itsa xanetsi,” jamatabëjai. Nexata ëpeubijava xane jumapecataeya pexanaenëanëjavabelia perajutsiyajuvënëvi pexaeyaniva. ³ Nexata pajivi xane jumapecataeya pexanaenëanëjavabelia perajutsiyajuvënëvi, pëtsa bijiaya tane pajivi apo xae jumapecataeya pexanaenëanëjavabelia perajutsiyajuvënëvi. Pajivi pijinia apo xae jumapecataeya pexanaenëanëjavabelia perajutsiyajuvënëvi, pëtsa neconitsiaya jumaitsi jivijavabelia: “Pibisiacuene exana pajivi xane jumapecataeya pexanaenëanëjavabelia perajutsiyajuvënëvi,” jai pëtsa. Tsipaji Cristojavabelia penajamatabëcuenecopatsijivi daxitacuene itaxutojema xae ata, itsiata Dioso tanetsi

aneconijibia. Nexata bajarapajivi Dioso capanepaenatsi. ⁴ Dioso apo pacatocopatsi Dioso pijajivitonē neconitsiaya jivijavabelia panejumaitsinexa mapacueniaje: “Xua exana bajaraponē, pibisiacuene. Nexata Dioso naneconitsiaexanaenatsi,” panejainexa. Dioso pijajivitonē xaniavaetsia Dioso itsa tonacueneba, xaniavaetsia apo tonacuenebi atanua, caenē, Dioso, toxanepanatsi, pacuenia jamatabējumaitsi, pejumaitsinexa pijajivitonējavabelia. Dioso cajena caējēpatsi peyavenonaenexa pijajivi pejitsipaecuenia xaniavaetsia petojinavanapaenexatsi pesivabarēyanexa.

⁵ Itsamonae Dioso pejumecovēnētsivi yaiyataeyabiaba matababi. Nexata itsamat-acabianēvecua caematacabi yaiyataeyabiaba. Itsamonae pijinia najēpaeya tane daxitamatacabianē. Pamonaē yaiyataeyabiaba caematacabi itsamatacabianēvecua, bajarapamonae xaniavaetsia beyapētane pajamatabēcuenelivaisi yabara yaiyataeyabiaba caematacabi. Pamonaē ata pijinia najēpaeya tane daxitamatacabianē, xaniavaetsia beyapētane pajamatabēcuenelivaisi yabara najēpaeya tane daxitamatacabianē. ⁶ Pajivi nacueraeveta itsamatacabi, bajarapajivi nacueraeveta peyaiyataenexa Dioso. Pajivi pijinia apo nacueraevetsi bajarapamatacabi, apo nacueraevetsi tsipaji jamatabēexana pacuenia Dioso itorobatsi. Pajivi pijinia xane jumapecataeya pexanaenēanējavabelia perajutsiyajuvēnēvi, bajarapajivi xane peyaiyataenexa Dioso. Tsipaji jamatabējumaitsi: “Dioso cajena netocopata daxitacuene taxaenexa,” jamatabējai. Nexata pexaniajamatabēcuenē rajutabiaba Diosojavabelia. Pajivi pijinia apo xae jumapecataeya pexanaenēanējavabelia perajutsiyajuvēnēvi, bajarapajivi apo xae peyaiyataenexa Dioso. Tsipaji jamatabējumaitsi: “Mapavije apo xanē tananeconitsiyaniva Diosojavabelia,” jamatabējai. Nexata pexaniajamatabēcuenē rajutabiaba Diosojavabelia ēpeubijava pexaeyabiabixae.

⁷ Itsajivi ata vaxaitsiyajuvēnējivi, Dioso pejumecovēnētsijivi, apo ponaponae ēpijacuata penatojitsipaecuenia pexanaponaponanexa. Biji rajane exanaponapona pacuenia Cristo tojitsipatsi. Petēpaematacabinexa ata yabara, apo jamatabējumaitsi: “Tēpaenajē pamatacabi natojitsipajē tatēpaejava,” apo jamatabējai. ⁸ Vaxaitsi abaxē vajaasaētsavanapaepato, tojinavanapatsi pacuenia vajatuxanenē nacatojitsipa. Itsiata baitsi jane itsamatacabi, tēpaenatsi. Tsipaji Dioso nacatojitsipaena vajatēpaenexa. Aeconoxae abaxē vajaasaētsavanapaevi, vajatuxanenē pijajivitsi tsavanapae. Vajatēpaecujinae ata tsane, tsiteca vajatuxanenē pijajivitsi tsavanapae tsane. ⁹ Cristo baja cajena nacasivatēpa vajatuxanenē vajaexanaenexa. Nexata icatsia Cristo asaē tsaponaponae petēpaecujinae. Bajaraxuata Cristo daxitajivi pijatuxanenē. Piasaētsavanapaevi, petēpaevi ata, daxita pamonaē najamatabēcuenecopata bajaraponējavabelia, Cristo cajena pijatuxanenē.

¹⁰ Bajaraxuata nexata jumapecataeya pexanaenēanējavabelia perajutsiyajuvēnēvi paxamē panijabananē pexaejava yabara, baracuaicuaijaiya apo bepajumaitsimē mapacueniaje: “Maponēje pibisiacuene exana. Nexata Dioso naneconitsiaexanaenatsi,” apo bepajamē. Bijiaya ata apo bepataemē bajaraponē. Tsipaji cajena itsamatacabi daxitatsi vaxaitsi Cristo pitabarata nubenaenatsi, caejivitsi canacujitsia, vajanavajunupaebaponaenexa daxita pacuenia exanavanapatsi mapanacuataje. ¹¹ Bajaraxua yabara Dioso pejumelivaisibaxutota tajēvelia jumaitsi mapacueniaje:

Dioso tajēvelia jumaitsi: “Xanē daxitamatacabijavabelianexa tasaētsaponaponanē. Nexata tajumaitsijume xaniajanē. Itsamatacabi daxitajivi taitabarata pematatabacabēta netonubenaena taneyaiyataexae. Daxitajivi nevajunupaebiana Diosonēcuenenē,”

jai Dioso pejumelivaisibaxutota mapacueniaje Dioso tajēvelia pejumaitsijava daxitajivi yabara.

¹² Nexata vaxaitsi itsamatacabi, caejivitsi canacujitsia, navajunupaebaponaenatsi Diosojavabelia daxita pacuenia exanavanapatsi mapanacuataje.

Pacuenia Pablo itaveta Roma tomarapijivi Dioso penajuajumecovënëtsivi Diosovecua pejopaeyaexanaeyaniva petsitaexanaejava pejamatabëcueneta yabara pelivaisi

¹³ Itsamatacabi caejivitsi canacujitsia nubenaenatsi Cristo pitabarata vajanavajunupaebaponaenexa pacuenia exanavanapatsi mapanacuataje. Bajaraxuata itsanë vajabananë pexanaejava yabara, apo bebaracuaicuaijaitsi pibisiacuena. Biji rajane bejamatabëjumaitsitsi mapacueniaje: “Apo tsitaexanaenë tsane itsacuenejavayo ata, xua yabara itsajivi, Dioso pejumecovënëtsijivi, jamatabëcuenebijianaejitsipatsi,” bejamatabëjaitsi. ¹⁴ Najamatabëcuenecopatajê xaniavaetsia vajatuxanenë Jesucristojavabelia. Nexata yapëtaniji Dioso tanetocopatsijava taxaenexa xua picani cjunavajê taxaejava Jesucristojavabelia tanajamatabëcuenecopatsivajënaeya. Itsiata meta itsanë Dioso pejumecovënëtsinë bajaraxua itsa xane, jamatabëjumaitsi tsipae: “Dioso apo netocopatsi taxaenexa bajaraxua. Itsa xaejitsipajê, naneconitsipajê Diosojavabelia,” jamatabëjai tsipae. Nexata apo xae tsipae bajaraxua. ¹⁵ Panijabananë itsa apo pexanë jumapecataeya pexanaenëanëjavabelia perajutsiyajuvënëvi, pëtsa patsitaxaneme. Tsipaji paxamë itsa patsitaxaejitsipame jumapecataeya pexanaenëanëjavabelia perajutsiyajuvënëvi, panijabananë bepacasivajamatabëjiobi tsipae. Tsipaji panijabananë bepibisiacuene patsitaexanaejitsipame itsa patsitaxaejitsipame jumapecataeya pexanaenëanëjavabelia perajutsiyajuvënëvi. Nexata jumapecataeya pexanaenëanëjavabelia perajutsiyajuvënëvi, panijabananë itsa patsitaxaejitsipame, nexata panijabananë asivaya apo pataemë tsipae. Tsipaji itsa pacajanitaejitsipa panexaejava jumapecataeya pexanaenëanëjavabelia perajutsiyajuvënëvi, nexata bajaraponë ata naxaejitsipa. Nexata Diosojavabelia bepenaneconitsinë nataejitsipa penaxaexae jumapecataeya pexanaenëanëjavabelia perajutsiyajuvënëvi. Panetsitaxaejava pejamatabëcueneta Diosovecua panenaxuabiaexanaeyaniva panijabananë, pëtsa patsitaxaneme jumapecataeya pexanaenëanëjavabelia perajutsiyajuvënëvi. Tsipaji rabaja vajatuxanenë Cristo sivatëpa bajaraponë ata penaxuabiyaniva. ¹⁶ Payapëtae atamë, xua picani xanepana paneexanaenexa, itsiata panijabananë itsa cjunava bajaraxua pexanaenexa, pëtsa patsitaexaname. Tsipaji panijabananë pacataejitsipa pibisiacuene bepaneexanaevi. ¹⁷ Vaxaitsi baja najamatabëcuenecopabatsi Cristojavabelia. Nexata jumecovënëtavanapatsi Dioso. Apo nacaitorobi vajanayanijobabiabinexa ëvajaxaejava yabara, vajaapaejava ata yabara. Biji rajane nacaitoroba xaniavaetsia aneconijibia najamatabëcuenejëpaeya vajajinavanapaenexa. Nacaitorobanua jamatabëcuenebarëyaya vajajinavanapaenexa Espíritu Santo vajanacatsijamatabëcaexae. ¹⁸ Pajivi Dioso pijacuene tonacuenebaponapona, sivajamatabëcuenebarëyatsi Dioso. Jivi ata xaniavaetsia yaiyatanetsi.

¹⁹ Xua Dioso nacayavenona vajajinavanapaenexa najamatabëcuenejëpaeya, bajaraxua exanavanapaenatsi. Xua ata nacayavenona namataenetsia vajanajamatabëcuene asaëyaexanaenexa Diosojavabelia, bajaraxua ata exanavanapaenatsi. ²⁰ Pëtsa patsitaxaneme xua panijabananë tane bepitaevetsijavatsi pexaeyaniva. Nexata itsa pacajanitaejitsipa panexaejava, bajarapajivi ata naxaejitsipa. Nexata bepenaneconitsinë Diosojavabelia nataejitsipa. Panexaejava pejamatabëcueneta, bajarapajivi Diosovecua pajopaeyaexanaejitsipame. Bajaraxuayaniva pëtsa patsitaxaneme xua cjunava panijabananë. Xaniajai rabaja. Daxitacuene rabaja picani xanepana vajaxaenexa. Itsiata pibisiacuene paexanaejitsipame itsa patsitaxaejitsipame xua panijabananë taejitsipa bepibisiacuene paneexanaejava itsa paxaejitsipame. ²¹ Bajaraxuata pëtsa paxaneme jumapecataeya pexanaenëanëjavabelia perajutsiyajuvënëvi. Pëtsa papamenua pïatanera paneaitajibiyaniya. Pëtsa paexanamenua itsacuenejava ata, xua pejamatabëcueneta panijabananë pajopaeyaexanaejitsipame Diosovecua. Pëtsa patsitaexaname xua panijabananë

jamatabëcuene faefaenaeyaexanaejitsipatsi. ²² Itsa baja xaniavaetsia payapëtaneme pexanepanaecuene panexaenexa, xua picani pacujunavame panexaejava Jesucristojavabelia panenajamatabëcuene copatsivajënaeya, saya pamoyamë tsane. Tsipaji Dioso yapëthane pacuenia panajamatabëxainame bajaraxua yabara. ¡Bitso jamatabëcuenebarëya pajivi pexanabiabijava yabara jamatabëjumaitsi: “Dioso pitabarata aneconijibia toponaponajë,” jamatabëjai! ²³ Pajivi pijinia jamatabëjumaitsi ata: “Apo xanepanae tsipae taxaenexa bajaraxua,” jamatabëjai ata, itsiata itsa xaejitsipa, bajarapajivi pibisiacuene natoexanaejitsipa Diosojavabelia. Tsipaji pijacuata najamatabëcuenebijianaejitsipa. Daxita pijinia xua yabara vaxaitsi jamatabëjumaitsi: “Dioso apo jitsipae vajaexanaenexa bajaraxua,” jamatabëjai atatsi, itsiata itsa exanaejitsipatsi bajaraxua, nexata pibisiacuene natoexanaejitsipatsi Diosojavabelia.

15

Pacuenia becanaëjëtatsi vajabananë vajajamatabëcueneyavenonaenexa yabara pelivaisi

¹ Vaxaitsi ajamatabëcuenesaëtsi Dioso vajajumecovënëtsijava. Nexata beyavenonatsi pamonae abaxë jamatabëcuenefaefaena Dioso pejumecovënëtsijava. Pëtsa exanatsi vaxaitsi vajacuata vajanatojitsipaecuenia. ² Biji rajane caejivitsi canacujitsia becanaëjëtatsi vajabananë vajajamatabëcueneyavenonaenexa. Xua yabara vajabananë ajamatabëcuenesaëjitsia, bajaraxua betoexanavanapatsi vajabananë pejamatabëcuenevitsabinexa Diosojavabelia. ³ Tsipaji Cristo ata, ponë Dioso athëbëvetsica itorobica jivi pecapanepaenexa, abaxë itsa ponapona mapanacuataje, apo exanae pijacuata penatojitsipaecuenia. Biji rajane nacopata pebejiobiaexanaenexatsi pacuenia Dioso tojitsipatsi. Paxa Diosojavabelia Cristo pejumaitisijava, Dioso pejumelivaisibaxutota tajëvelia jumaitsi mapacueniaje: “Pacuenia picani jivi xamë pibisiacuena jamatabëcabaracuaicuaijai, xanë nebaracuaicuaijai tsane,” jai tajëvelia Dioso pejumelivaisibaxutota paxa Diosojavabelia Cristo pejumaitisijava. ⁴ Palivaisi bajayata yaquina Dioso pejumelivaisibaxutota, bajarapalivaisi vaxaitsi ata nacatocopata vajajumecovënëtsinexa, vajanacajamatabëcuene yavenonaenexanua. Bajaraxuata bajayajebi nacabejiobiaexanabiabi ata Dioso pijajivixaetsi, itsiata ajamatabëcuenesaëtsi tsavanapae. Tsipaji yapëtanetsi pacuenia Dioso najumecapanepaeya jumaitsi bajarapalivaisita vajanacacapanepaenexa. ⁵ Itsacuenejavaxi yabara bajayajebi itsa nacajamatabëcuenejëtapona, nexata Dioso nacajamatabëcueneyavenonapona. Nacajamatabëcueneasaëyaexanapona bajayajebinexa ata. Pacatovajëtatsi Diosojavabelia Dioso papecayavenonaenexa, najamatabëcuenejëpaeya daxita panejinavanapaenexa Jesucristo papecatojitsipaecuenia. ⁶ Nexata daxita paxamë najamatabëcuenejëpaeya vajatuxanenë Jesucristo paxa Diosojavabelia pajumaitsimë tsabiabi tsane: “Diosomë, bitso ayaijamatabëcuenenëmë,” pajamë tsabiabi tsane.

Pacuenia apo judíovi ata pexanialivaisi tsipaebatsi pecapanepaelivaisinexatsi yabara pelivaisi

⁷ Pajudíovinë, apo pajudíovi atamë, najëpaeya Cristo nacapita pijajivinexatsi. Bajara pijinia pacuenia paxamë ata najëpaeya xaniavaetsia namataenetsia panacopiapitabiabianame. Nexata bajarapacuenia itsa paexanabiabianame, daxitajivi Dioso yaiy-ataena. Nexata daxitajivi jumai tsabiabi tsane Dioso yabara: “Dioso cajena bitso ayaijamatabëcuenenë. Tsipaji pijajivi yavenona xaniavaetsia petojinavanapaenexatsi,” jai tsabiabi tsane. ⁸ Mara pacajumaitisije. Jesucristo athëbëvetsica patsica mapanacuayabetsicaje peyavenonaenexa judíovi. Bajarapacuenia Jesucristo athëbëvetsica patsica petocopiapatsixaetsi pacuenia bajayata Dioso najumecapanepaeya jumaitsi judíovi pijasalinaivijavabelia. Nexata bajarapacuenia Dioso pexaniajainëcuene najamatabëcueneitajëta judíovijavabelia. ⁹ Jesucristo athëbëvetsica patsica pecapanepaenexa

apo judíovi ata. Nexata apo judíovi ata Jesucristo pejamatabëcueneta: “Diosomë, bitso ayaijamatabëcuenenëmë,” jai tsabiabi tsane Diosojavabelia. Bajarapacuenia apo judíovi ata jumai tsabiabi tsane Diosojavabelia pitaxutotsoniataexaetsi Dioso. Nexata bajaraxua yabara Cristo paxa Diosojavabelia pejumaitisijava, Dioso pejumelivaisibaxutota jumaiti mapacueniaje:

Xanë tajamatabëcueneta, daxitanacuanëpijivi: “Diosomë, bitso ayaijamatabëcuenenëmë,” cajai tsabiabi tsane. Catonaxëanabiabiananua vajianë ata, jai Dioso pejumelivaisibaxutota paxa Diosojavabelia Cristo pejumaitisijava.

¹⁰ Apo judíovi ata Dioso pijajivi pexanaejavanexatsi yabara, itsabaxutota Dioso pejumelivaisibaxutota jumaiti mapacueniaje:

Apo pajudíovimë, pajamatabëcuenebarëyamëre Dioso pijajivi, judíovi yajava, jai Dioso pejumelivaisibaxutota apo judíovi ata Dioso pijajivi pexanaejavanexatsi yabara.

¹¹ Itsabaxutota pijinia Dioso pejumelivaisibaxutota jumaiti icatsia mapacueniaje: Paxamë apo pajudíovimë, Diosojavabelia pajumaitsimëre: “Diosomë, bitso ayaijamatabëcuenenëmë,” pajamëre. Paxamë, padaxitamë, itsamonaejavabelia pajumaitsimëre: “Caenë Dioso bitso ayaijamatabëcuenenë,” pajamëre, jai Dioso pejumelivaisibaxutota.

¹² Isaíaspijinë pijinia itsabaxutota tajëvelia yaquina Jesucristo pelivaisi. Jumaiti mapacueniajë:

Penacuetonëyo naexanaena. Nexata Isaípijinë bepemomonëyocuenia naexanaena. Itsa vitsabiana, Dioso evetsiaexanaenatsi jivi, daxitanacuanëpijivi. Pamonae apo judíovi, jumecovënëtsiana bajaraponë pesivatëpaejavatsi pecapanepaenexatsi pijaneconivecua, jai tajëvelia Isaíaspijinë peyaquinaebaxutota Jesucristo yabara.

¹³ Yapëtanetsi Dioso vajanacacapanepaejavanexa Jesucristo pejamatabëcueneta. Nexata pacatovajëtatsi Dioso papecajamatabëcuene barëyayaexanaenexa. Pacatovajëtatsinua jamatabëcuenexanepanaeya panejinavanapaenexa. Bajarapacuenia Dioso pacajamatabëcueneyavenonaena tsipaji Dioso pajumecovënëtame. Espíritu Santo ata, ponë pacatsijamatabëca, pesaëta panevajënaeyabelia pacajamatabëcuene asaëyaexanaponaena Dioso papecacapanepaejavabelianexa.

¹⁴ Tajamonae, pacayapëtanetsi paxamë papexaniajamatabëcuenevijavamë. Pacayapëtanetsinua paxamë bitso paneyapëtaejava Cristo papecasivatëpaejava pibisiacuene paneexanaeneconi yabara. Pacayapëtanetsinua paneyapëtaejava xaniavaetsia namataenetsia panenamuxujiobinexa. ¹⁵ Tajamonae, palivaisi baja payapëtaneme, bajarapayajuvënëlivaisi panenajamatabënapitsinexa, icatsia ajumeurajibia pacatoyaquinatsi mapabaxutotaje. Bajarapacuenia ajumeurajibia pacatoyaquinatsi tsipaji Dioso nitoroba. ¹⁶ Dioso taneitaxutotsoniataexae, bajarapacuenia nitoroba Jesucristo pijajivitonënexanë Jesucristo pelivaisi tatsipaebabiabinexa apo judíovijava. Nexata apo judíovi tsipaebabiabajë pexanialivaisi, Jesucristo pelivaisi, pecapanepaelivaisinexatsi Diosojavabelia. Espíritu Santo pejamatabëcueneta apo judíovi ata Cristo pijajivi exanatsi. Bajaraxuata Dioso sivabarëyatsi Dioso pepitsinexatsi bajarapamonae, apo judíovi ata.

¹⁷ Jesucristo pijajivitonëxaenë, Jesucristo neyavenonabiaba itsa tonacuenebabiabajë. Bajaraxuata barëyanë tatsipaebaponaenexa itsamonaejavabelia Jesucristo taneyavenonabiabijava tatonacuenebinexa Dioso. ¹⁸ Rovialia tsipaebabiabajë ajumeurajibia. Tsipaebabiabajë vajatuxanenë Jesucristo taneyavenonabiabijava tatonacuenebinexa Dioso. Vajatuxanenë Jesucristo neyavenonabiaba tatsipaebabiabinexa apo judíovijavabelia apo judíovi ata pejumecovënëtsinexa Dioso. Nexata apo judíovi itsa jumetane tatsipaebabiabilivaisi, itsa tanenua Dioso pesaëta

pinijicuene taexanaponaejavanë, bajarapamonae jumecovënëta baja Jesucristo pesivatëpaejavatsi pibisiacuene pexanaeneconi yabara. ¹⁹ Vajatuxanenë Dioso pesaëta nejamatabëcuenecaëjëpaeyaexana pinijicuene taexanaenexa. Espíritu Santo ata pesaëta nejamatabëcueneyavenona. Bajaraxuata apo judíovi tsipaebaponajë pexanialivaisi, Jesucristo pelivaisi, Diosojavabelia pecapanepaelivaisinexatsi. Tsipaebaponajë baja bajarapalivaisi Jerusalén tomarajava. Bajaraxuacujinae tsipaebaponajë daxitanacuanëjjava. Tajënacuajavabelia ata, Ilírico nacuajavabelia, tsipaebaponajë. ²⁰ Itsa tsipaebaponajë pexanialivaisi, Jesucristo pelivaisi, jitsipajë tatsipaebaponaenexa itsaxuayo abaxë jivi apo vënëlivaisitae Cristo. Apo jitsipaenë tatsipaebaponaejava itsaxuayo baja tavajënaeya itsamonae tsipaebapona. ²¹ Bajarapacuenia apo judíovi itsa tsipaebaponajë Jesucristo pelivaisi, copiapata jane baja pacuenia baja cajena Dioso pejumelivaisibaxutota tajëvelia jumaitsi tatsipaebaponaejavanexa yabara. Mapamatacabitaje apo judíovijava Jesucristo pelivaisi tatsipaebaponaejavanexa yabara, Dioso pejumelivaisibaxutota tajëvelia jumaitsi mapacueniaje: Pamona abaxë apo vënëlivaisitae, ponë athëbëvetsica Dioso itorobijitsiatsica jivi peca-panepaenexa, bajarapamonae bajaraponë pelivaisi tsipaebianatsi. Nexata bajarapamonae jumecovënëtsiana ponë pelivaisi tsipaebianatsi, jai tajëvelia Dioso pejumelivaisibaxutota Dioso pitorobinëtsitsica pelivaisi apo judíovijava mapamatacabitaje tatsipaebaponaejavanexa yabara.

Pacuenia picani Pablo jamatabëponabiaba Roma tomarabelia yabara pelivaisi

²² Bajayajebi picani bitso jamatabëpacataeyabiabatsi. Itsiata apo necuenecaëjëpae taponaeenexa paxamëjavabelia daxitanacuanëjjava Dioso pejumelivaisi tatsipaebanajetarucaexae. ²³ Aeconoxae baja veretajë tanacuenebijava mapanacuajavaje. Nexata jane baja ponaenajë paxamëjavabelia. Tsipaji picani bajayajebi jamatabëpacataeyabiabatsi. ²⁴ Pamatacabi ponaenajë España nacuayabelia, patsianajë copiaya paxamëjavata patacataenexa. Itsa baja nataenatsi, bitso jamatabëcuenegarëya tsavanapae tsanetsi. Bajaraxuacujinae jitsipajë pataneyavenonaenexamë tajanamutonexa taponaeenexa jane baja España nacuayabelia. ²⁵ Bajara masaya pamatacabitaje ponaenajë Jerusalén tomarabelia ofrenda tatocaponaenexa Dioso pejumecovënëtsivi. ²⁶ Dioso pejumecovënëtsivi, Macedonia nacuapijivi, Acaya nacuapijivi ata, ofrenda baja toexana. Bajarapaofrenda toexana petoitorobinexa Dioso pejumecovënëtsivi, pamona bepejiobivi, Jerusalén tomarata pejinavanapaevi. ²⁷ Macedonia nacuapijivi, Acaya nacuapijivi ata, apo judíovi. Itsiata tsitaxanepanatsi bajarapacuenia ofrenda petoexanaenexa peyavenonaenexa juya judíovijavabelia, Jerusalén tomarapijivi. Tsipaji judíovi copiaya yapëtane pexanialivaisi pecapanepaelivaisinexatsi Diosojavabelia. Nexata judíovi pejamatabëcueneta, pamona apo judíovi ata, yapëtane baja pecapanepaelivaisinexatsi Diosojavabelia. Bajaraxuata pamona apo judíovi beyavenona juya judíovijavabelia. Judíoviyajuvënëvi aeconoxae bitso namatavenona peyavenonaenexatsi mapanacuata penamatavenonaejavaxi yabara. ²⁸ Copiaya tocalianë tsane mapaofrendaje Jerusalén tomarapijivijavabelia. Nexata bajaraxuacujinae itsa ponaenajë España nacuayabelia, copiaya patsianajë paxamëjavata. ²⁹ Itsa patsianajë paxamëjavabelia, orijibia pacatsipaebianatsi pexanialivaisi, Cristo pelivaisi, bitso panejamatabëcuenegarëyanexa.

³⁰ Tajamonae, pajumecovënëtame vajatuxanenë Jesucristo. Paneasivamënu Espíritu Santo pejamatabëcueneta papecajamatabëcuenetorobixae pataniasivanexamë. Bajaraxuata pexaniacuene pacavajëtatsi. Itsa pavajëtame Diosojavabelia, xanë ata asaëyata panetovajëtsianame, pacuenia tajacuata natovajëtabiabajë. ³¹ Panetovajëtsianame Diosojavabelia taneavenonaenexa taneitsacueniabiyana Judea nacuapijivi, Dioso apo pejumecovënëtsivi. Panetovajëtsianamenua Dioso pejumecovënëtsivi, Jerusalén tomara-
pijivi, tanevecuapitsinexa xaniavaetsia paofrenda tocaponaejitsianë. Pamona apo

judíovi pejebipalataxae, belia bajarapaofrenda apo nevecuapitsi tsipae bajarapamonae judíovi. ³² Panetovajëtsianamenua, itsa Dioso jitsipa, barëyaya tapatsinexa paxamëjavabelia. Panetovajëtsianamenua tanejamatabëcuene asaëyaexanaenexa Diosojavabelia itsa ponaponajë paxamëjavata. ³³ Xanë pacatovajëtabiabatsi Diosojavabelia papecayajavaponaponaenexa Dioso. Dioso cajena nacayavenonabiaba jamatabëcuenebarëyaya vajajinavanapaenexa. Bajara itsi tsane.

16

Pacuenia Pablo jamatabënajinalia peyapëtaevitsi, Roma tomarapijivi, yabara pelivaisi

¹ Payavenonaename vajabanava Febe, pova ponaejitsia paxamëjavabelia. Bajarapova yavenonabiaba Dioso pejumecovënëtsivi, Cencrea tomarapijivi. ² Pacopiapitsianame xaniavaetsia bajarapova vajatuxanenë Jesucristo pejamatabëcueneta, pacuenia vaxaitsi copiapitabiabatsi Dioso vajanajuajumecovënëtsivi. Xua namatavenona bajarapova, payavenonaename. Tsipaji bajarapova yavenonabiaba ayaiBITSaëto Dioso pejumecovënëtsivi. Xanë ata neyavenonabiaba.

³ Nebajacobiana Prisca. Prisca pamona ata, Aquila, nebajacobiana. Bajarapajivibeje tayajavanacuenebijivibeje vajatuxanenë Jesucristo pijacuene. ⁴ Bajarapajivibeje toayai atatsibeje petëpaejavanexabeje picani, necapanepabeje tatëpaejavaminexavecua. Nexata jumaitsinë: “Pexaniacuene baja cajena bitso panetoexanamebeje,” janë bajarapajivibejejavabelia. Itsiata ëxanë bajarapacuenia apo jumaitsinë. Daxita pamona apo judíovi, Dioso pejumecovënëtsivi, bajarapamonae ata, bajarapacuenia jumaittsibeje tanecapanepaexabeje. ⁵ Pamona Dioso pejumecovënëtsivi, pamonae nacaetuatabiaba Priscabeje Aquilabeje pijabota, bajarapamonae ata nebajacobiana. Nebajacobiananua tasivanë Epeneto. Bajaraponë daxita Asiavënë nacuapijivivecua copiya najamatabëcuenecopata Jesucristojavabelia. ⁶ Nebajacobiananua María, pova bitso tonacuenebabiaba Dioso pijacuene paxamë tuatujëta. ⁷ Nebajacobiananua tajanacuapijinëbeje, Andrónicobeje Juniasvënënëbeje. Bajayata bajaraponëbeje panenajujeba penaneconitsivi pejebabiabibota. Bajaraponëbeje yayataeya baracuaicuaijaitsi-beje pevëna apóstolevi ata. Xanë ata tanajamatabëcuenecopatsivajënaeya, bajaraponëbeje najamatabëcuenecopatabeje Cristojavabelia.

⁸ Nebajacobiananua Ampliato. Bitso tasivanë. Tsipaji bajaraponë ata Cristojavabelia najamatabëcuenecopata. ⁹ Nebajacobiananua Urbano. Bajaraponë ata tonacuenebaponapona vajatuxanenë Jesucristo pijacuene pacuenia vaxaitsi tonacuenebavanapatsi. Nebajacobiananua Estaquis, bitso tasivanë. ¹⁰ Nebajacobiananua Apeles, ponë picani dovathi pejamatabëcueneta jamatabëcuenejëtatsi Cristo pelivaisi pejumecovënëtsijava yabara. Itsiata apo copatsi pejumecovënëtsijava Cristo pelivaisi. Nebajacobiananua Aristóbulo pijamonae. ¹¹ Nebajacobiananua tajanacuapijinë Herodión. Nebajacobiananua Narciso pijamonae, pamonae penajamatabëcopatsivi Cristojavabelia. ¹² Nebajacobiananua Trifenabeje Trifosabeje, povabeje tonacuenebabiaba Dioso pijacuene. Nebajacobiananua vajaasivava Pérsida, pova bitso tonacuenebabiaba Dioso pijacuene. ¹³ Nebajacobiananua Rufo, ponë bitso xaniavaetsia jumecovënëta vajatuxanenë. Bajaraponë pena ata nebajacobiana. Bajarapova bepexënatonë netaeyabiaba. ¹⁴ Nebajacobiananua Asíncrito, Flegonte ata, Hermas ata, Patrobas ata, Hermes ata, itsamonae ata, pamonae najinavanapa bajarapamonaejavata. ¹⁵ Nebajacobiananua Filólogo, Julia ata, Nereo ata, Nereo pejuyapijiva ata, Olimpás ata, daxita itsamonae ata, Dioso pejumecovënëtsivi, pamonae najinavanapa bajarapamonaejavata.

¹⁶ Paxamë ata Dioso panejumecovënëtsixae, xaniavaetsia namataenetsia bitso nasivaya panabajacobabiabare. Daxita pina Dioso pejumecovënëtsivi majotaje pejinavanapevi pacabajacobalia.

¹⁷ Tajamonae, pacatsipaebatsi itsalivaisi. Penajumetsënëtsilivaisi petsipaebaponaevi, panayajivitaeneme papecayamaxëitojorobianiva. Bajarapamonae namataenetsia pacanajumeanaenotsiaexanaena najamatabëcuenejëpaeya panejinavanapaeyaniva panenavecuansanaenexa. Palivaisi baja paxamë pajumecovënëtame, bajarapalivaisivecua saicayalivaisi bajarapamonae tsipaebapona. Panavecuatsare bajarapamonae. ¹⁸ Bajarapamonae apo jamatabëexanae pacuenia jitsipa vajatuxanenë Jesucristo. Biji rajane saya jamatabëexana bajarapamonae pijacuata penatojitsipaecuenia. Bajarapamonae jivi tsipaebapona bepexaniajailivaisi itajara. Itsiata baitsi jane bajarapamonae saya jamatabëyamaxëitojoroba pamona abaxë xaniavaetsia apo jumeyapëtae pexaniajailivaisi. ¹⁹ Daxitajivi paxamë pacavënëlivaisitane xaniavaetsia panejumecovënëtsijava Dioso. Bajaraxuata pacasivabarëyatsi. Pacatojitsipatsi paneyapëtaenexa bitso ëpexaniacuene paneexanaenexa. Pëtsa panacopatame itsajivi ata papecayamaxëitojorobinexa pibisiacuene paneexanaenexa. ²⁰ Dioso baja cajena vajanacayavenonaenë najamatabëcuenejëpaeya vajajinavanapaenexa, itsajivi ata vajanacayamaxëitojorobianiva penajumetsënëtsilivaisita. Nexata Dioso bepíjia pacayavenonaena panejamatabëcueneamoneyabinexa dovathi. Pacatovajëtabiabatsi Diosojavabelia vajatuxanenë Jesucristo papecayavenonabiabinexa.

²¹ Pabajacobianame pina Timoteo, Dioso patatonajuanacuenebinëbeje. Pabajacobianamenua pina tajanacuapijivi Lucio, Jasón ata, Sosípater ata.

²² Xanë, Tercionë, mapabaxutotaje Pablo pijume tajumeyaquinaponaenë. Xanë ata pacajamatabënajinatsi. Tsipaji Jesucristojavabelia vajanajamatabëcueneocopatsivi.

²³ Pabajacobianame pina Gayo. Naponaponajë Gayo pijabota. Gayo tocopatabiaba daxita Dioso pejumecovënëtsivi penacaetuatabiabinexa Gayo pijabota. Pabajacobianamenua pina Erasto, ponë evetabiaba palata, Corinto tomarapíjipalata. Pabajacobianamenua pina vajabanenë Cuarto.

²⁴ Pacatovajëtabiabatsi Diosojavabelia daxita paxamë vajatuxanenë Jesucristo papecayavenonabiabinexa. Bajara itsi tsane.

Pacuenia cotocaevipíjilivaisita Pablo jumaitsi yabara pelivaisi

²⁵ Vaxaitsi Dioso yabara jumaitsitsi tsabiabi: “Dioso cajena bitso ayaijamatabëcuenenë,” jaitsi tsabiabi. Dioso, daxitamatacabijavabelianexa peponaponaenë, caëjëpatsi papecajamatabëcuene asaëyaexanaenexa pejumelivaisita. Bajarapalivaisi pexanialivaisi, Jesucristo pelivaisi, jivi pecapanepaelivaisinexatsi Diosojavabelia. Bajarapalivaisi jivi tsipaebaponajë. Bajarapalivaisi bajayajebi picani Dioso muetsia xainabuata. Dioso nacia pexanaejavaveliacujinae, muetsia Dioso xainabuata Jesucristo pelivaisi. ²⁶ Bajarapalivaisi bajayata Diosojumelivaisipaebivi profetavi tajëvelia yapëtane baja cajena. Nexata bajarapalivaisi profetavi yaquina. Nexata bajarapalivaisi mapamatacabitaje Dioso jane baja nacayapëtaeyaexana. Nexata Dioso pijajivi itorobapona daxitanacuanëpijivijava petsipaebinexa Jesucristo pelivaisi. Bajarapacuenia Dioso pijajivi itorobapona daxitanacuanëpijivi ata pejumecovënëtsinexa Jesucristo pelivaisi.

²⁷ ¡Caenë rabaja Dioso daxitacuene peyapëtaenë! Bajaraxuata daxitamatacabijavabelianexa vaxaitsi vajatuxanenë Jesucristo pejamatabëcueneta Diosojavabelia jumait-sitsi tsabiabi: “¡Diosomë, bitso ayaijamatabëcuenenëmë!” jaitsi tsabiabi. Bajara itsi tsane.

Mapabaxutoje San Pablo copiaya toyaquina Corinto tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Corinto tomarapijivijavabelia, yabara pelivaisi

¹ Xanë Pablonë, Dioso tanetojitsipaexae, nitapeta Jesucristo pijaapóstolenëxanë. Nexata Jesucristo nitoroba jivi pexanialivaisi tatsipaebaponaenexa daxitanacuanëjava. Vajabananë Sóstenes neyavenona mapalivaisije patacatoyaquinaejava paxamëjavabelia. ² Mapabaxutoje pacatoyaquinatsibeje Dioso panejumecovënëtsivi, paCorinto tomarapijivimë. Dioso baja papijajivimë Jesucristo pejamatabëcueneta aneconijibia Dioso papecataexae. Dioso pacajunata papijajivinexamë xaniavaetsia panetojinavanapaenexa. Pacayajavajunata baja cajena daxita Dioso pejumecovënëtsivi, itsanacuanëjava pejinavanapaevi, pamona navajëcabiaba Jesucristojavabelia. Vajatuxanenë Jesucristo rabaja bajarapamonae ata pijatuxanenë. ³ Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

Pacuenia Corinto tomarapijivi Cristo pijajivixae, Dioso yavenonabiabatsi yabara pelivaisi

⁴ “Xanepana rabaja pacuenia yavenonabiabame bajarapamonae Jesucristo pijajivixae,” janë tsabiabi Diosojavabelia tavajëtabiabijavata paxamë yabara. ⁵ Jesucristo papijajivixaemë, daxitacueneyavenonabiaba. Pacayavenonabiabanua xaniavaetsia jivi panetsipaebinexa Dioso pejumelivaisi. Pacajumeyapëtaeyaexananua pepo pexaniajailivaisi. ⁶ Xua yabara pacatsipaebabiabatsi Cristo papecajamatabëcuene yavenonabiabinexa, baja rajane pacatocopiapata. Bajarapacuenia papecatocopiapatsixae, nexata baja pajamatabëcuenesaemë tsavanapae panejumecovënëtsijava bajarapalivaisi. ⁷ Nexata abaxë paepatojebi pacopiaevetavanapame vajatuxanenë Jesucristo icatsia pepatsijavanexatsica, Dioso pacacaëjëpaeyaexanabiaba panetoexanavanapaenexa daxita pacuene Dioso pacatojitsipa. ⁸ Dioso cajena pacayavenonaponaena paneajamatabëcuenesaënexa Dioso panejumecovënëtsijava daxitamatacabijavabelianexa. Nexata pamatacabi vajatuxanenë Jesucristo icatsia patsianica, toacuenebi tsanetsi itsajivi ata papecaneconitsinexa. ⁹ Dioso cajena bajarapacuenia pacatoexanaena. Tsipaji pacuenia Dioso najumecapanepaeya jumai tsabiabi pexanaenexa, exanabiaba. Dioso pacajunata pexënato, vajatuxanenë Jesucristo, papijajivinexamë.

Pacuenia Dioso pejumecovënëtsivi navecuanatsanapona apo penajamatabëcuenejëpaexae yabara pelivaisi

¹⁰ Tajamonae, pacaitorobatsi vajatuxanenë papijajivixaemë, najamatabëcuenejëpaeya panejinavanapaenexa. Pëtsa panavecuanatsanaeyajoneponame itsajavabelia. Biji rajane najamatabëcuenejëpaeya pajinavanapare. Najamatabëcuenejëpaeya xaniavaetsia panajamatabëxainare caelivaisi. ¹¹ Mapacuenia pacatoyaquinatsije tsipaji Cloévënëva pijajivi netsipaeba. Apo panajamatabëcuenejëpaemë pina. Daxitatsi baja cajena caenë vajatuxanenë Jesucristo pijajivitsi. Paxamë tuatujëta pina itsamonae nabijataeya namataenetsia najumeanaenotabiaba. ¹² Itsamonae pina xanë yabara jumai tsabiabi: “Xanë raja saicaya Pablo pijajivitonënë,” jai pina tsabiabi. Itsamonae pina jumai tsabiabi: “Xanë raja saicaya Apolos pijajivitonënë,” jai pina tsabiabi. Itsamonae pina jumai tsabiabi: “Xanë raja saicaya Pedro pijajivitonënë,” jai pina tsabiabi. Itsamonae pina jumai tsabiabi: “Xanë raja saicaya Cristo pijajivitonënë,” jai pina tsabiabi.

¹³ Bajarapacuenia paxamëyajuvënëvi apo bejumaitsi tsabiabi. Tsipaji bajarapalivaisi yabara nabijataeya namataenetsia penajumeanaenotabiabixae, navecuanatsanapona. Bajarapacuenia apo benavecuanatsanapona tsipaji baja cajena Cristo caenë tsaponapona. Apo navitsanae baja cajena. Nexata pamona atata Cristo pijajivi, caebitsaëto rabaja tsavanapae. Nexata apo benavecuanatsanapona. Nexata itsajivi ataxanë yabara apo bejumaitsi: “Xanë raja saicaya Pablo pijajivitonënë,” apo bejai. Tsipaji xanë itsajivi atapo sivanabeyaxuabiaexanaenë cruzata. Itsajivi atabaja cajena apo bautisabitsi tavënëta tajajivitonë penaexanaenexa. ¹⁴ Xanë baja cajena apo bautisabinë jivi ayaibitsaëto. Saya bautisabajë anijanëbeje, Cristobeje Gayobeje. Bajaraponëbeje itsa bautisabajë, bautisabajë Cristo pevënëta. Nexata jivi ayaibitsaëto apo tabautisabixae, sivabarëyanë Diosojavabelia. ¹⁵ Nexata acuenebi itsajivi atapejumaitsijava: “Xanë raja nebautisaba Pablo pevënëta. Nexata Pablo pijajivitonënë,” pejajiva. ¹⁶ Jemajanë tsaena. Bautisabajëna tsaena Estéfnas pijamonae. Pematatsënëa baja apo najamatabënapitsinë pajiviyo bautisabajë. ¹⁷ Cristo apo nitorobi bitso jivi tabautisabaponaenexa. Biji rajane Cristo nitoroba tatsipaebaponaenexa jivi pexanialivaisi pecapanepaelivaisinexatsi Diosojavabelia. Nexata pacuenia Dioso nejamatabëcuenecaëjëpaeya exanapona, bajarapacuenia pacatsipaebaponaatsi. Apo nitorobi baja cajena tatsipaebaponaenexa pematatsënëa itsalivaisicuenia. Pacuenia tsipaebabiaba pamona yapëtane saya maëpanacuapijilivaisije, bajarapacuenia tatsipaebabinexa, Cristo apo nitorobi. Nexata itsa tsipaebaponaejitsipajë pacuenia tsipaebabiaba pamona yapëtane saya maëpanacuapijilivaisije, nexata Jesucristo vajanacasivatëpaejava cruzata tsipaebi atanë tsipae jivijavabelia, ajumematamobinë tsipae.

Pacuenia Cristo jivijavabelia tsitajëta Dioso piasaënëcuene, Dioso bitso daxitacuene peyapëtaenëcuene ata, yabara pelivaisi

¹⁸ Itsamonae pijaneconi yajavatëpaena. Bajarapamonae jumetae atata Jesucristo cruzata vajanacasivatëpaejava, bajarapalivaisi apo jumecovënëtsi. Benatsiquejemalivaisi saya tane. Itsiata baitsi jane vaxaitsi Dioso vajanacacapanepaevinexa, bajarapalivaisi nacayapëtaeyaexana Dioso piasaënëcuene. ¹⁹ Dioso baja cajena pejumelivaisibaxutota tajëvelia jumaiti mapacueniaje:

Itsamonae bitso yapëtane mapanacuapijilivaisije. Bajarapamonae peyapëtaelivaisimi, itsamatacabi vecuaajibiaexanaenajë. Pamona atata bitso peyapëtaevi itajara tanetsi mapanacuapijivije, xanë itsamatacabi jamatabëcueneitajëtsianajë pacuenia jamatabëcueneitsi. Nexata bajarajota daxitajivi jamatabëcueneyapëtaenatsi bajarapamonae saya bevelia peyapëtaevicuene, jai baja cajena tajëvelia Dioso pejumelivaisibaxutota.

²⁰ Ponë yapëtane saya maëpanacuapijilivaisije, ajumematamobi cajena. Ponë atabajayajebi nacujaruba maëpanacuapijilivaisije, nexata yapëtae atata, ajumematamobi cajena. Ponë atabitso ajumelivaisisaëya cuaicuaijai, bajaraponë atata ajumematamobi cajena. Daxita bajarapitsivi ajumematamobi, itsa apo natovajëtsi Diosojavabelia peyavenonaenexatsi peyapëtaenexa jane baja xaniavaetsia. Dioso baja cajena nacayapëtaeyaexana mapanacuapijilivaisije natsiquejemalivaisicuenia. Tsipaji Dioso apo penajamatabëxainaelivaisi. ²¹ Dioso baja cajena daxitacuene bitso peyapëtaenë mapanacuapijilivaisi peyapëtaevi matatoxenetsia. Nexata Dioso apo tocopatsi pejamatabëcueneyapëtaenexatsi pamona bitso yapëtane saya mapanacuapijilivaisije. Biji rajane Dioso jamatabëcapanepa pijaneconivecua pamona jumecovënëta pexanialivaisi, palivaisi patsipaebaponaajë, Jesucristo cruzata vajanacasivatëpaelivaisi. Bajarapalivaisi itsamonae betsitansiquejemalivaisi atatsi, itsiata bajarapalivaisi pejamatabëcueneta capanepaenatsi pamona jumecovënëtavanapa bajarapalivaisi.

²² Judíovi itsa jumetaeyabiaba patatsipaebijava Diosojavabelia picani pecapanepaelivaisinexatsi, najumai tsabiabi epamonae: “Itsa taejitsipatsi Dioso pesaëta pini-jicuene pexanaejava pamona nacatsipaeba mapalivaisije, nexata matapania jume-covënëtsipatsi bajarapalivaisi pexaniajailivaisicuene,” najai tsabiabi judíovi. Griegovi ata itsa patsipaebabiabajë bajarapalivaisi, najumai tsabiabi epamonae: “Mapalivaisije itsa jumejêpaejitsipa palivaisi nacatsipaebabiaba vajayajuvënëvi, daxitalivaisi bitso peyapëtaevi, nexata matapania jumecovënëtsipatsi pexaniajailivaisicuene mapalivaisije,” najai tsabiabi griegovi. ²³ Itsiata baitsi jane paxanë itsa patsipaebaponajë bajarapalivaisi, “Cristo raja nacasivatëpa cruzata vajanacapanepaenexa vajaneconivecua,” pajanë tsabiabi. Bajarapacuenia patatsipaebijava judíovi jumetaeyabiabi ata, itsiata apo jumecovënëtsi. Anaepanabiaba saya. Apo judíovi ata itsa jumetaeyabiabi Cristo vajanacasivatëpaejava cruzata, benatsiquejemalivaisi saya jumetaeyabiabi. ²⁴ Itsiata pamona Dioso junatatsi pecapanepaenexatsi, judíovi, apo judíovi ata, bajarapamona jumeyapëtaepona bajarapalivaisi. Nexata bajarapamona yapëtaepona Dioso piasaënëcuene. Tsipaji bajarapamona Dioso capanepaejitsiatsi pijaneconivecua Cristo pesivatëpaexaetsi cruzata. Bajarapamona yapëtaeponanua Dioso bitso daxitacuene peyapëtaenëcuene. Tsipaji Dioso tajëvelia najamatabëxaina bajarapamona pibisiacuene pexanaeconivecua pecapanepaenexa Cristo pejamatabëcueneta. ²⁵ Pacuene Dioso exana jivi pecapanepaenexa pijaneconivecua, bajarapacuenie mapanacuapijivije, Dioso apo pejumecovënëtsivi, betsitanatsiquejemacuenetsi. Pacuenia baja cajena Dioso tajëvelia najamatabëxaina jivi pecapanepaenexa, exana baja. Bajaraxua bitso pexaniacuene. Bitso peyapëtaevi ata mapanacuapijilivaisije, apo cajëpaetsi bajarapacuenia penajamatabëxainaenexa. Dioso itsa copata Cristo pebeyaxuabinexatsi cruzata, bajarapaepatota Dioso saya bepiasaëjibinë tanetsi mapanacuapijivije. Itsiata baitsi jane bajarapaepatota Dioso najamatabëcueneitajëta bitso piasaënëcuene daxita mapanacuapijivije matatoxenetsia. Tsipaji bajarapaepatota Dioso pinijicuene exana vajanacapanepaenexa vajaneconivecua. ²⁶ Tajamonae, pacanaëjêre mapacuenije. Paxamëyajuvënëvi caejivibeje saya bitso peyapëtaevi mapanacuapijilivaisije. Caejiviyobeje pijinia saya ayaijamatabëcuenevi. Caejiviyobeje saya petuxanevi pexi. Paxamë paayaibitsaëttoxanetomë beveliajamatabëcuene saya panexainaevi. Bajarapacuenia beveliajamatabëcuene panexainaevi ata, itsiata Dioso pacajunata papijajivinexamë. ²⁷ Pamona bitso peyapëtaevi mapanacuapijilivaisije, jumai tsabiabi paxamë bajarapalivaisi apo paneyapëtaevi yabara: “Mara pamona bitso apo peyapëtaevije,” jai tsabiabi. Itsiata Dioso pacaitapeta papijajivinexamë, apo paneyapëtaevi ata. Bajarapacuenia Dioso pacaitapeta, pamona bitso peyapëtaevi natane, piauranexa Dioso pitabarata, pamatacabi daxita Dioso papijajivimë bitso paneyapëtaevi pacaexanaena. Dioso cajena pacaitapetanua papijajivinexamë, mapanacuapijivije bepaveliajamatabëcuenevimë pacatae ata. Bajarapacuenia Dioso pacaitapeta, pamona bitso ayaijamatabëcuenevi natane, piauranexa Dioso pitabarata, pamatacabi daxita Dioso papijajivimë paayaijamatabëcuenevimë pacaexanaena. Bajarapamona aura tsane itsa nayapëtaena jamatabëcuenenavëxaniabiaya beveliajamatabëcuenevi papecataejava Dioso papijajivimë. ²⁸ Dioso baja cajena pacaitapeta papijajivinexamë, daxitajivi papecaitoxaxae, bijiaya papecanaëcotsivi ata. Bajarapacuenia Dioso pacaitapeta, pamona bitso ayaijamatabëcuenevi itajara daxitajivi tanetsi mapanacuataje, Dioso piaurabinexa. Bajarapamona Dioso urabiana, pamatacabi daxita Dioso papijajivimë paayaijamatabëcuenevimë pacaexanaena. Bajarapamatacabi daxitajivi Dioso yapëtaeyaexanaena piajumematamobijava, pamona ayaijamatabëcuenevi itajara tanetsi mapanacuataje. ²⁹ Bajaraxuata Dioso pitabarata jamatabëcuenenavëxaniabiaya itsajivi ata apo bejumaitsi itsajivijavabelia: “Xanë bitso ayaijamatabëcuene taxainanë,” apo bejai. ³⁰ Dioso papecaitaxutotsoniataexae, pacaitapeta papijajivinexamë. Nexata Je-

sucristo payajavajinavanapame. Vaxaitsi Dioso jamatabëcueneyapëtanetsi. Tsipaji Jesucristo nacajamatabëcueneyavenona Dioso vajajamatabëcueneyapëtaenexa. Jesucristo pejamatabëcueneta Dioso aneconijibia nacatane. Pijajivitsinua Dioso nacaexana. Nacavecuaajibiaexananua pibisiacuene vajaexanaeneconimi. ³¹ Bajaraxuata jivijavabelia benavajunupaebatsi Dioso vajanacayavenonaejava. Tsipaji Dioso pejumelivaisibaxutota jumaiti mapacueniaje: “Pëtsa navajunupaebame saya nijacuata nexanaejava yabara jivi pecayiyataenexa. Biji rajane navajunupaebare Dioso pecayavenonaponaejava. Nexata jivi Dioso yaiyataena,” jai Dioso pejumelivaisibaxutota.

2

Pacuenia Jesucristo sivatëpa mapanacuapijivije yabara pelivaisi

¹ Tajamonae, pamatacabi ponajë paxamëjavabelia, pacatsipaebatsi baja cajena pexaniajailivaisi, Dioso pejumelivaisi. Nexata bajarapamatacabi apo pacatsipaebitsi pacuenia tsipaebabiaba pamonae bitso peyapëtaevi mapanacuapijilivaisije. Biji rajane pacatsipaebatsi xaniavaetsia jumenapebetsiaya panejumeyapëtaenexa patacatsipaebilivaisi. ² Itsa ponaponajë paxamëjavata, najamatabëxainajë patacatsipaebinexa ëJesucristo pelivaisi. Nexata bitso pacatsipaebabiabatsi Jesucristo vajanacasivatëpaejava cruzata. ³ Paxamëjavata itsa ponaponajë patacatsipaebinexa pexaniajailivaisi, Jesucristo pelivaisi, najamatabëcueneyapëtaniji apo tanecaëjëpaejava tajacuata patacatsipaebinexa. Nexata natsijamatabëcuenebëjanë. Jamatabëcueneneconeconajë Dioso pitabarata bajarapalivaisi patacatsipaebijavanexa yabara. ⁴ Bajarapamatacabi pexaniajailivaisi itsa pacatsipaebabiabatsi, Dioso neyavenonabiaba. Xanë ëtajamatabëcuenesaëta bajarapalivaisi apo pacajumecovënëtsiaexanaetsi. Biji rajane Espíritu Santo pacatsijamatabëcuaicuaijai. Dioso pesaëta pinijicuene taexanaejava ata, pataneme. Bajaraxuata patacatsipaebilivaisi pexaniajailivaisicuene, payapëtaneme. Nexata bajarapalivaisi pajumecovënëtame. ⁵ Bajarapacuenia pacatsipaebatsi panenajamatabëcuenecopatsinexa Diosojavabelia, Dioso pesaëta papecayavenonaponaejava. Tsipaji apo pacatojitsipaetsi paneyajavajumecovënëtsinexa pamonae mapanacuataje tanetsi bitso peyapëtaevi mapanacuapijilivaisije.

Pacuenia Dioso najamatabëcueneitajëtaona pejumecovënëtsivitsijavabelia Espíritu Santo pejamatabëcueneta yabara pelivaisi

⁶ Dioso bitso pejumecovënëtsivi tuatuajëta itsa pajinavanapajë, patsipaebavanapajë Dioso pejumelivaisi, pexaniajailivaisi. Bajarapalivaisi apo yapëtae mapanacuapijivije. Mapanacuanë pevetsivi ata apo yapëtae. Bajarapamonae saicaya itsalivaisi xaina. Bajarapamonae bajarapalivaisi yajavatëpaena. ⁷ Dioso pejumelivaisi, pexaniajailivaisi, itsa patsipaebavanapajë, patsipaebavanapajë Cristo vajanacasivatëpaejava vajanacacapanepaenexa vajaneconivecua. Bajarapalivaisi baja cajena Dioso bajayata tajëvelia muetsia xainabuata. Matapania aeconoxae mapamatacabitaje Dioso nacayapëtaeyaexana bajarapalivaisi. Dioso baja cajena nacua pexanaevajënaeya ata, najamatabëxaina pacuenia exanaejitsia vajanacarajutsinexa matacabi apo pevereverecejava. ⁸ Nexata abaxë pamatacabi Cristo ponapona mapanacuataje, itsanë ata mapanacuanë pevetsiviyajuvënënë apo jumeyapëtae bajarapalivaisi, Cristo pelivaisi. Bajarapamonae itsa jumeyapëtaejitsipa bajarapalivaisi, nexata Cristo apo beyaxuabi tsipaetsi cruzata, ponë pepo petuxanenë, Dioso pexënato. ⁹ Nexata bajarapamonae apo pejumeyapëtaexae Cristo pelivaisi, copiapata jane baja pacuenia Dioso pejumelivaisibaxutota tajëvelia jumaiti mapacueniaje:

Xua abaxë itsajivi ata apo tae, apo jumetaenua, apo sivanajamatabëxainaenua, bajaraxua Dioso baja cajena toxaniavaeta pamonae Dioso pejitsipaevinexa, jai tajëvelia Dioso pejumelivaisibaxutota Cristo vajanacasivatëpaejavanexa cruzata.

¹⁰ Nexata vaxaitsi Cristo vajanacasivatëpaejava, Dioso nacayapëtaeyaexana Espiritu Santo pejamatabëcueneta. Espiritu Santo baja cajena daxitacuene nacayapëtaeyaexana. Pacuenia Dioso najamatabëxaina vajanacacapanepaenexa, bajaraxua ata Dioso nacayapëtaeyaexana Espiritu Santo pejamatabëcueneta.

¹¹ Vaxaitsi apo nacacaëjêpae vajajamatabëcueneyapëtaenexa pacuenia bëpënëa najamatabëxaina itsajivi. Itsiata bajarapajivi pijacuata najamatabëcueneyapëtane. Bajara pijinia pacuenia vaxaitsi ata Dioso apo jamatabëcueneyapëtae tsipaetsi pacuenia Dioso najamatabëxaina Espiritu Santo itsa apo nacayapëtaeyaexanae tsipae.

¹² Tsipaji Dioso apo nacatocopatsi vajacuata vajajamatabëcueneyapëtaenexa pacuenia Dioso najamatabëxaina. Bajaraxuata Dioso nacarajuta Espiritu Santo vajanacatsi-jamatabëcaenexa. Nexata Espiritu Santo pejamatabëcueneta nacayapëtaeyaexana pacuenia Dioso nacayavenonaejitsia Jesucristo pejamatabëcueneta. ¹³ Nexata livaisi itsa tsipaebaponatsi Dioso pejumecovënëtsivijavabelia, tsipaebaponatsi pacuenia Espiritu Santo nacayapëtaeyaexanapona. Apo tsipaebaponaetsi mapanacuapijicue yabaraje, xua vajacuata banajamatabëxainatsi.

¹⁴ Pajivi Dioso apo jumecovënëtsi, bajarapajivi apo jumecovënëtsi palivaisi picani Espiritu Santo ata yapëtaeyaexanaejitsiatsi. Tsipaji saya bajarapalivaisi betsitanatsique-jemalivaisitsi. Bajarapajivi apo caëjêpaetsinua pejumeyapëtaenexa palivaisi Espiritu Santo yapëtaeyaexanatsi. Tsipaji Espiritu Santo petsijamatabëenaevitsi, caëjêpatsi pejumeyapëtaenexa palivaisi Espiritu Santo yapëtaeyaexanatsi. ¹⁵ Pajivi tsijamatabëecatsi Espiritu Santo, bajarapajivi pejamatabëcueneta yapëtaeyaexanaponatsi xua Dioso tsitapex-aniacuenetsi. Yapëtaeyaexanaponatsinua xua ata Dioso tsitapibisiacuenetsi. Nexata Dioso apo pejumecovënëtsivi apo caëjêpaetsi peneconitsinexatsi bajarapajivi Diosojavabelia.

¹⁶ Dioso pejumelivaisibaxutota bajaraxua yabara jumaisi mapacueniaje: “Itsjivi ata apo yapëtae pacuenia najamatabëxaina pepo petuxanenë Dioso. Nexata itsajivi ata apo caëjêpaetsi pemuxujibinexa Dioso,” jai Dioso pejumelivaisibaxutota. Nexata pacuenia Cristo jamatabëcueneitsi, bajara vaxaitsi ata jamatabëcueneitsitsi. Nexata itsajivi ata apo caëjêpaetsi vajanacajamatabëcueneyapëtaenexa. Apo caëjêpaetsinua vajanacamuxujibinexa.

3

Pacuenia Dioso pejumecovënëtsivi najamatabëcuenejêpaeya Dioso betonacuenebanapa yabara pelivaisi

¹ Tajamonae, palivaisi abaxë ayapëbeje jivi pejumeyapëtaenexa, bajarapalivaisi tsipaebabiabajë Espiritu Santo pitorobicueniatsi pejinavanapaevijavabelia. Nexata bajarapamonae nejumeyapëtaeyabiaba. Itsiata baitsi jane paxamë bajayajebi baja Cristo pelivaisi panejumecovënëtsivi ata, piyapëbejelivaisi apo pacatsipaebabiabitsi. Tsipaji apo panejumeyapëtaemë tsipae. Bajaraxuata abaxë pacatsipaebabiabatsi pacuenia tsipaebabiabajë pamonaë pejanajumecovënëtsivi Cristo pelivaisi. Tsitecaeya abaxë bepapejevaxijamatabëcuenemë Cristo panejumecovënëtsijava yabara. Tsipaji apo panejumeyapëtaeponaemë panevajënaeyabelia Cristo pelivaisi. ² Penacuetojiviyo abaxë ëmito barajutatsi. Apo rajutsitsi abaxë pexaenexa pevi. Bajara pijinia pacuenia paxamë ata pamatacabi ajena pajumecovënëtame Cristo pelivaisi, pacatsipae-batsi peyapëxanepanaelivaisi panejumeyapëtaenexa. Tsipaji abaxë bajarapamatacabi apo pacacaëjêpae panejumeyapëtaenexa palivaisi abaxë ayapëbeje. Itsiata baitsi jane abaxë aeconoxae ata saya patsitecavanapame. Apo pacacaëjêpae panejumeyapëtaenexa pematatsënëa. Bajaraxuata paxamë abaxë bemito paneapaejivixi Cristo pelivaisi panejumecovënëtsijava yabara. ³ Bajarapacuenia pajamatabëcueneitsimë tsipaji abaxë

mapanacuapijivije, Dioso apo pejumecovënëtsivi, jamatabëcuenejëpaeya pajinavana-pame. Paxamë abaxë panacuenecaëbabiabame. Nabijataeyanua namataenetsia panajumeanaenotabiabame. Natsanaeyanua jamatabëpanavecuajinavanapame. Nexata abaxë pacatsitecavanapame mapanacuapijivi pijacuene. ⁴ Pacuenia Dioso apo pejumecovënëtsivi najamatabëcuenejëpaeya apo jinavanapae, bajarapacuenia paxamë ata najamatabëcuenejëpaeya apo pajinavanapaemë. Tsipaji paxamëyajuvënëvi, itsamonaë, xanë yabara jumai tsabiabi: “Pablo raja Apolosvecua ayaijamatabëcuenenë. Bajaraxuata xanë saicaya Pablo pijajivitonënë,” jai tsabiabi. Itsamonaë pijinia jumai tsabiabi: “Apolos raja Pablovecua ayaijamatabëcuenenë. Bajaraxuata xanë Apolos pijajivitonënë,” jai tsabiabi.

⁵ Xanë Pablonë, apo ayaijamatabëcuenenënë. Apolos ata raja apo ayaijamatabëcuenenë. Paxanëbeje ata raja Apolosbeje saya Dioso papijajivitonënëbeje. Bajaraxuata pacatsipaebatsibeje vajatuxanenë Cristo pelivaisi. Nexata baja pajumecovënëtame vajatuxanenë Cristo pelivaisi. Paxanëbeje patonacuenebajëbeje vajatuxanenë Cristo pacuenia paneitorobabeje. ⁶ Pabixainaevi bauba pabita xua jamatabëuba. Bajaraxuacujinae pabita peubijava eveta petoayabacabejeyanivatsi. Itsiata baitsi jane xua uba pabita, Dioso pejamatabëcueneta tovitsabiaexanatsi. Bajara pijinia pacuenia xanë ubajë Dioso pejumelivaisi paxamë panejamatabëëthëtota. Bajaraxuacujinae Apolos pacaevetaponapona Dioso pejumelivaisita. Itsiata baitsi jane Dioso pejamatabëcueneta pacajamatabëcuene vitsabiaexanapona. ⁷ Nexata ponë uba, ponë ata evetaponapona, apo ayaijamatabëcuenenëbeje. Caenë baja cajena Dioso ayaijamatabëcuenenë. Tsipaji pacuenia pabita peubijava Dioso pejamatabëcueneta vitsabiaexana, bajara pijinia pacuenia Dioso pejamatabëcueneta pacatsijamatabëvitsabiaexanapona Dioso pejumelivaisi. ⁸ Pamonaë jivi tsijamatabëuba Dioso pejumelivaisi, pamonaë ata evetavanapa Dioso pijajivi, najamatabëcuenejëpa daxita. Itsanë ata apo ayaijamatabëcuenenë itsamonaëvecua. Itsiata Dioso matamotsianatsi caenë canacujitsia saicaya petonacuenebimatamo. ⁹ Paxanë raja Dioso pijacuene panebarënacueneba. Paxamë ra pijinia bepapabimë, papabita Dioso panebarëubapona pejumelivaisi. Pacuenia pabita peubijava Dioso pejamatabëcueneta vitsabiaexana, bajara pijinia pacuenia panejamatabëëthëtota Dioso pejumelivaisi vitsabiaexanapona.

Paxamë raja Dioso bepapijabomënua, paboxaneto Dioso panebarëexanapona. ¹⁰ Bo pexanaevi, pexaniabo pexanaenexa, itsaxuayo bo ënëtuatuajënexa, copiaya feratonë bamatatorotsia cueruba ibotoxanetonë pemëthëcaenexa bajarapaferatonëjava. Bajaraxuacujinae bajara paibotoxanetonëjumavereca itsaibotonë banajumacatsanejebapona. Nexata xanë, pacuenia Dioso netocopata, copiaya pacatsipaebatsi pexanialivaisi Jesucristo pelivaisi. Nexata baja pajumecovënëtame bajarapalivaisi. Bajaraxuata xanë bo ënëtuatuajënexa matatoyorotsia taferacuejava, bitso betanecujaninë. Bajarapaferatonëjava ibotoxanetonë tamëthëcaejava ata, bitso betanecujaninë. Tsipaji xanë copiaya pacatsipaebatsi Cristo pelivaisi. Nexata juya pamonaë cotocaevi pacatsipaebavanapa, pacatsipaeba panevajënaeyabelia paneajamatabëcuenesaë tsaponaenexa Cristo pelivaisi panejumecovënëtsijava. Bajarapamonaë boyenepananexa ibotonë bepecatsanaponaevi bo ënëtuatuajënexa matatoyorotsia tamëthëcaëibotoxanetonëjumavereca. Boyenepananexa pecatsanaponaevi baitapetapona ëpexaniavirijava, pavirijava tsixanepana boyenepananexa. Bajara pijinia itsi pamonaë pacaevetavanapa. Ëpexanialivaisi pacatsipaebabiaba paneajamatabëcuenesaënexa Diosojavabelia. ¹¹ Payapëtaneme rabaja mapacueneye. Itsajivi baja capanepaeya boyenepananexa, itsa tsivajënaemëthëca ibotoxanetonë, nexata baja itsajivi ata bajarapajumabereca icatsia itsaibotoxanetonë apo bemëthëcae. Bajara pijinia paitsimë paxamë ata. Capanepaeya baja pajumecovënëtame Jesucristo papecasivatëpaejava

Dioso papecavecuaajibiaexanaenexa pibisiacuene paneexanaeneconimi. Nexata baja apo bepajumecovënëtsimë saicayalivaisi. Tsipaji baja ajibi pematatsënëa itsalivaisi papecacapanepaelivaisinexa panijaneconivecua. ¹² Pamonaē bo exana, maitsije. Itsamonae exana bitso penamatamotsijavanëta. Itsamonae exana bevelia penamatamotsijavanëta. Pamonaē pacatsipaebapona pexaniajailivaisi pacuenia Dioso yapëtaeyaexanaponatsi, bajarapamonaē bo bepexanaēvi bitso penamatamotsijavanëta bajayajebi bo piamamatabësaëtsecaenexa. Bajarapamonaē bo bepexanaēvi oronanitonëta, platananitonëta ata, penamatamotsiibotonëta ata. Pamonaē pijinia saya pejamatabëcueneta peyapëtaelivaisi pacatsipaebapona, bajarapamonaē bo bepexanaēvi bevelia penamatamotsijavanëta, bajayajebi apo piamamatabësaëjavanëta. Bajarapamonaē bo bepexanaēvi saya naejavanëta, patebaxutoxita ata, bearrozbotoxita ata. ¹³ Nexata pamatacabi Cristo patsianica, bajarapamatacabi nayapëtaena caejivi canacujitsia Cristo pijajivi, pamonaē xaniavaetsia tonacuenebavanapa. Bajarapamatacabi Cristo isoto yajavapatsianica. Nexata bajarapaisotota Cristo ëjëtaponae xua pijajivi, caejivi canacujitsia, tonacuenebatsi. Nexata bajarapacuenia Cristo yapëtaena xaniavaetsia pijajivi petonacuenebijavatsi. ¹⁴ Itsanë bo tonacuenebijitsipa itsanë pijabonexa. Nexata bo petoveretetsicujinae, isoto najetarucaē ata, itsiata bo apo tajue tsipae isoto apo petajuejavanëta bo pexanetsixae. Nexata bo penacuenebinë matamotsipatsi. ¹⁵ Itsiata baitsi jane peveretetsibo itsa totajuejitsipatsi isoto petajuejavanëta, bo pexanetsixae, nexata naxuabijitsipa penacuenebijava. Bo ata naxuabijitsipa. Penacuenebimatamo ata naxuabijitsipa. Itsiata bo pexanaenë apo naxuabi tsipae. Panepaejitsipa itsiata tsiquirijavayota. Bajara pijinia itsi Cristo pelivaisi papecatsipaebivi ata. Baitsi pamonaē xaniavaetsia pacatsipaeba, capanepaenatsi Dioso. Matamotsianatsinua Dioso. Tsipaji pacuenia Dioso yapëtaeyaexanatsi, pexanialivaisi pacatsipaebapona. Pamonaē pijinia apo pacatsipaebi xaniavaetsia, apo matamotsi tsanetsi. Tsipaji saya pejamatabëcueneta peyapëtaelivaisi, pacatsipaebapona. Itsiata bajarapamonaē ata tsiquirijavayota capanepaenatsi Dioso.

¹⁶ Payapëtaneme rabaja mapacueneje. Paxamë rabaja Dioso bepapijatemplobomë. Tsipaji Espiritu Santo pacayajavaponapona. ¹⁷ Pajivi bijianaena bajarapatemplobo, Dioso pijabo, nexata juya bajarapajivi Dioso navecuaxuabianatsi. Dioso baja cajena pijatemplobo saicaya Diosonexa. Paxamë rabaja Dioso bepapijatemplobomë.

¹⁸ Pëtsa pajamatabëcuenenavëxaniabame. Itsajivi paxamëyajuvënëjivi itsa jamatabëjumaitsi: “Xanë cajena daxisajivi matatoxenetsia bitso tayapëtaenë mapanacuapijilivaisije,” itsa jamatabëjai, nexata bajarapajivi becopata bajarapajamatabëcuene. Beveliamatabëcuenejivi saya benatane. Nexata Dioso jamatabëcuenecaëjëpaeya exanaenatsi peyapëtaenexa jane baja Dioso pejumelivaisi. ¹⁹ Daxita palivaisi bitso bepexaniajailivaisitane mapanacuapijivije, itsiata daxita bajarapalivaisi Dioso tsitanatsiquejemalivaisitsi saya. Dioso pejumelivaisibaxutota jumaitsi mapacueniaje: “Dioso cajena naneconitsiaexanaena bitso peyapëtaēvi mapanacuapijilivaisije peyamaxëitojorobavanapaejavata itsamonae,” jai Dioso pejumelivaisibaxutota. ²⁰ Icatsia itsalivaisita Dioso pejumelivaisibaxutota jumaitsi mapacueniaje: “Pepo petuxanenë baja cajena yapëtane piamatamobicuene mapanacuapijilivaisije, bitso peyapëtaēvi penajamatabëxainacuene,” jai Dioso pejumelivaisibaxutota. ²¹ Bajaraxuata itsajivi ata paxamëyajuvënëjivi, Dioso pejumelivaisi patacatsipaebivi, paxanë bepatajajivitonë apo benatae. Bepaayaijamatabëcuenevinëna, apo bepanetae. “Xanë raja saicaya bajaraponë pijajivitonënë,” apo bejai paxanëyajuvënëvi yabara. Biji rajane paxanë bepanijajivinë panataniji Dioso pejumelivaisi patacatsipaebaponaexae. Tsipaji baja cajena Dioso pacatocopata daxita xua panamatavenoname. ²² Xanë Pablonë, Apolos ata, Pedro ata, bajarapamatabëxëyo

Dioso panecopata paxamë patacajamatabëcueneyavenonaenexa. Daxita mapanacuata panejinavanapaenexa ata, Dioso pacatocopata. Paneasaëtsavanapaenexa, panetëpaenexa ata, Dioso pacatocopata. Panejinavanapaenexa ajena, panevajënaeyabelia ata panejinavanapaenexa, Dioso pacatocopata. Daxita rabaja bajaraxua Dioso pacatocopata paxamënexa. ²³ Pematatsënëa rabaja Dioso pacatocopatanua paxamë Cristo papijajivinexamë. Cristo rabaja pijinia Dioso beprijajivitonë, Dioso pejitsipaecuenia petoexanaexae.

4

Pacuenia Cristo pijajivi, apóstolevi, nacuenebavanapa yabara pelivaisi

¹ Paxamë saya panetaema Cristo papijajivinëcuenia. Cristo raja panetocopata jivi patatsipaebavanapaenexa pexanialivaisi. Bajarapalivaisi Dioso pepo bajayata muetsia xainabuata. ² Pajivi itsanë pijajivitonë naexana, bajarapajivi pijatuxanenë pitorobicueniatsi, xaniavaetsia betonacuenebaponapona. ³ Bajaraxuata xanë ata exanaponajë pacuenia vajatuxanenë nitoroba. Nexata paxamë panebaracuaicuaijamë tsabiabi ata, itsamonae ata nebaracuaicuaijai tsabiabi ata jivi tatsipaebaponaelivaisi yabara, taexanaponaejava ata yabara, itsiata apo nasivajamatabëcuenebëjanë patanebaracuaicuaijaittsabiabijava yabara. Apo nacuenecanaëjëtsinënuua pacuenia tonacuenebajë vajatuxanenë. Nexata tajamatabëcueneta apo jamatabëjumaitsinë: “Xaniavaetsia meta tajatuxanenë tonacuenebaponaponajë. Itsa jume, bijiata meta tonacuenebaponaponajë,” apo jamatabëjanë. ⁴ “Jumecovënëtajë daxita pacuenia Dioso nitoroba. Nexata taneitorobicuenia xaniavaetsia tonacuenebajë. Bajaraxuata ajibi Dioso taneyabara naneconitsiaexanaejavanexa,” jamatabëjanë ata tsipae, itsiata ajumematamobinë tsipae. Bajaraxuata evetajë vajatuxanenë pijacuata tanejumaitsinexa itsa apo jumecovënëtsinë taneitorobicuenia. ⁵ Bajaraxuata pëtsa pabaracuaicuaijamë itsamonae ata Dioso petonacuenebavanapaevi. Pacopiaevetavanapare abaxë vajatuxanenë pepatsijavatsica. Bajaraponë itajëtsiana bajarapamonae muetsia pexanaejavanëmi ata. Pacuenia caejivi canacujitsia vajatuxanenë pijajivi bëpënëa najamatabëxaina petonacuenebavanapaejavata, vajatuxanenë itajëtsiananua. Bajaraxuacujinae nexata xaniavaetsia petonacuenebavanapaevi, caejivi canacujitsia, Dioso barëyataenatsi petonacuenebavanapaejava yabara.

⁶ Tajamonae, bajarapacuenia pacatoyaquinatsi Apolos yabara, xanë ata yabara, patacayapëtaeyaexanaenexa. Bajarapacuenia pacatoyaquinatsi, Dioso pejumelivaisibaxutota pejumaitsicueniavecua, bitso bepaayaijamatabëcuenenënebeje patanetaeyanivamë. Bajarapacuenia pacatoyaquinatsi itsamonae ata, pamonae Dioso petonacuenebavanapaevi, najëpaeya paneyaiyataenexa. Pëtsa itsamonaevecua beayaijamatabëcuenenë pataneme caenë ata. Bajara pijinia pacuenia beveliajamatabëcuenenë pëtsa pataneme caenë ata. ⁷ Paxamë ata pëtsa itsamonaevecua bepaayaijamatabëcuenenimë panataneme. Itsa panavajunupaebabiabame, apo panavajunupaebabiabimë Dioso papecayavenonabiabijava. Xua daxita paxainame, Dioso baja cajena pacarajuta panexainaenexa. Pamonae ata pata paxamëjavata papecatsipaebinexa Dioso pejumelivaisi, bajarapamonae ata Dioso pacatocopata. Nexata daxita bajaraxua Dioso papecatocopatsixae, bepaayaijamatabëcuenenimë pëtsa panataneme itsamonaevecua.

⁸ Paxamë jamatabëcuenenavëxaniabiaya panajamatabëxainame mapacueniaje: “Pacuenia ricovi ayaijava pecobecovë xaina, bajara vaxaitsi itsitsi Dioso pejumelivaisi vajajumecovënëtsijava. Tsipaji ayailivaisi xainatsi. Tsipaji baja itsamonae bitso nacatsipaebabiaba Dioso pejumelivaisi. Nexata baja pematatsënëa apo namatavenonaetsi itsajivi ata vajanacatsipaebaponanexa,” pajamatabëjamë tsabiabi jamatabëcuenenavëxaniabiaya. Jamatabëcuenenavëxaniabiaya Dioso pijacuene

bepaneevetsivi panataneme. Nexata meta paxanë matatoxenetsia bitso bepaayaijamatabëcuenevimë panataneme. Dioso pijacuene itsa paneevetsivi tsipae, nexata pacasivajamatabëcuenebarëyatsi tsipae. Nexata vajanajuaeavetsivi tsipae Dioso pijacuene. ⁹ Paxanë, paapóstolevinë, Dioso covë panetocopata daxitajivi patanetaenexa bijiaya. Panetocopata bepatananeconitsivicuenia patanebeyejebinexa. Bajarapacuenia Dioso panetocopata bijiaya patanetaenexa ángelevi ata, daxitajivi ata. ¹⁰ Paxanë, Cristo xaniavaetsia patajumecovënëtsivi, itsamonae panetane bepatanematajemabivi. Paxamë, Cristo xaniavaetsia apo panejumecovënëtsivi ata, Cristo pijacuene bitso bepaneyapëtaevi itajara panataneme. Caranata paxanë itsamonae bepataajamatabëcuenesaëjibivi panetane. Caranata juya paxamë bepaneajamatabëcuenesaëvi panataneme. Paxanë itsamonae apo paneyaiyatae. Paxamë panayaiyaneme. ¹¹ Cristo pelivaisi jivi itsa patsipaebaponajë mapamatacabijavaberena ataje, bitso baja cajena panabejiobitabiabajë. Patajani tsabiabi. Mera pajitsipabiabajë. Bitso pajumaesebejenë tsabiabi. Jivi panebeyabiaba pecobeta. Apo paxainabiabinë pabota panapatsijitsianë. ¹² Pacueranabiabajë bitso patanacuenebabijabiabaja patacobeta. Jivi panebijataeyabiaba pibisiacuenia. Itsiata apo pajumeanaecanaviatabiabinë. Biji caranata paxanë bajarapamonae patovajëtabiabajë Diosojavabelia Dioso peyavenonaenexatsi. Jivi panebejiobiaexanabiaba. Itsiata pajamatabëcuenemoyanë tsabiabi. ¹³ Pibisiacuenia panebaracuaicuajai tsabiabi itsamonaejavabelia. Itsiata bajarapamonae pexaniajamatabëcuenia xaniavaetsia pamuxujiobabiabajë bajayajebi. Ajena, mapamatacabijavaberena ataje, panetaeyabiaba daxitajivivecua bepaveliajamatabëcuenevinë. Bepaavirinënuapanetaeyabiaba.

¹⁴ Apo pacatoyaquinaetsi raja mapacueniaje patacaurabinexa. Biji rajane pacatoyaquinatsi saya patacamuxujiobinexa xaniavaetsia. Pacuenia muxujiobijitsipajë taxi, bajarapacuenia pacamuxujiobatsi. ¹⁵ Xanë copiaya pacatsipaebatsi pexanialivaisi, Cristo pelivaisi. Nexata baja panajamatabëcueneocopatame Jesucristojavabelia. Bajaraxuata xanë bepatacavitsatsivixae, panetaneme bepeneaxanë. Paxinae atamë tsipae diez mil ponëbeje papecatsipaebivinexa Cristo pelivaisi, itsiata xanë caenënë panetaejitsipame bepeneaxanë. ¹⁶ Bajaraxuata asaëyata pacamuxujiobatsi. Pacuenia baja pacatsitaexanaponaponatsi, bajarapacuenia necuenejëpaeya pajinavanapare.

¹⁷ Bajaraxuata Timoteo baja pacatoitorobatsi paxamëjavabelia. Bajaraponë bitso tasivanë. Betaxënatocuenia tataanë. Xaniavaetsia pejumecovënëtaponaponaenë Dioso. Bajaraponë Timoteo pacatoitorobatsi baja papecatsipaebinexa pacuenia ponaponajë. Nexata Timoteo pacatsipaebiananua pacuenia xanë Jesucristo pijajivitonëxanë, tsitaexanabiabajë daxita Dioso pejumecovënëtsijava, itsaxuayo tsipaebaponajë Cristo pelivaisi. ¹⁸ Itsamonae paxamëyajuvënëvi, taitorobicuenia apo exanae. Bajarapamonae beayaijamatabëcuenevi natane. Nexata itsa pacatoitorobatsi Timoteo, bajarapamonae xanë yabara jamatabëcuenenavëxaniabiaya jamatabëjumaitsi: “Pablo rabaja apo patsi tsane. Nacacujunava rabaja vajanacataenexa,” jamatabëjai bajarapamonae xanë yabara. ¹⁹ Itsiata baitsi jane Dioso itsa netocopatsiana patacataenexa, ponaenajë naxanitsiayo paxamëjavabelia. Nexata tajacuata taenajë pacuenia jamatabëcueneitsi tsavanapae pamona beayaijamatabëcuenevi natane. Tsipaji raeta bajarapamonae pepacuene ajamatabëcuenesaë Diosojavabelia. Itsa jume, nexata meta saya pecuibovojotota jumaitsi. ²⁰ Pamona Dioso pijajivi, bajarapamonae nayapëtane. Tsipaji peneta Dioso pesaëta ajamatabëcuenesaë tsavanapae. Èpecuibovojotota apo jumaitsi. Biji rajane bajarapamonae pejamatabëëthëtojavavetsina Dioso jumecovënëta. ²¹ ¿Detsa xua pajitsipame paxamë itsa ponaenajë paxamëjavabelia? ¿Patacabijataejava tsaja pajitsipame? Itsa jume, ¿pajitsipame tsaja pexaniajamatabëcuenia asivaya patacataejava?

5

*Pacuenia Dioso pejumecovënëtsivi tuatuajëta ponapon bitso pibisiacuene pexanapon-
ponaenë yabara pelivaisi*

¹ Paxamë tuatuajëta bitso pibisiacuene pexanaponaponaeenë pevitota, daxitajivi pina baracuaicuaijai tsabiabi. Dioso apo pejumecovënëtsivi ata, papibisiacuene apo exanae, bajaraponë pina exanaponapona. Bajaraponë paxamëyajuvënënë pita pina pijavanexa paxa pijavami. ² ¡Bajaraponë pibisiacuene pexanaejava, apo pacueneitavetsi atamë, itsiata bepaayaijamatabëcuenevimë panataneme! ¡Biji rajane bajaraponë pibisiacuene pexanaejava, bitso bepasivanajamatabëxainame! ¡Bepayapijivauramënuu bajaraponë! Bajaraponë pibisiacuene pexanaponaponaeenë, bepanavecuacapitsapame. ³ Paxamëjavata apo naponaponaenë, itsiata paxamëjavata betanaponaponaeenë, nataniji. Nexata tajëvelia bitso sivanajamatabëxainabiabajë bajaraponë Dioso penaneconitsiaexanaejavanexatsi yabara pibisiacuene pexanaponaponaexae. ⁴ Paxamë panacaetuare vajatuxanenë Jesucristo papijajivixaemë. Apo pacayajava atatsi tsane, itsiata panenacaetuatsijavata, pacajamatabënajinaenatsi. Diosojavabelia pacatovajëtsianatsinua bajarapaepatota. Vajatuxanenë Jesucristo ata pesaë, pacayajava tsane bajarajota. ⁵ Pibisiacuene pexanaponaponaeenë paxamë tuatuajëta, panavecuacapitsapare baja dovathijavabelia. Nexata daxita pibisiacuene penatojitsipaecuena pexanaejava yabara, dovathi pebejiobiaexanaenexatsi. Nexata belia icatsia Dioso jumecovënëtsiana. Bajarapajamatabëcuene jane baja capanepaenatsi pamatacabi vajatuxanenë Jesús patsianica.

⁶ Papibisiacuene bajaraponë exanaponapona, panaitaxutojematsi atamë, itsiata bepaayaijamatabëcuenevimë panataneme. Abeje raja pibisiacuene pexanaponaponaeenë panecuenenaitaxutojematsijava. Payapëtaneme rabaja mapacuenenje. Pan pexanaematabënexa, ayaimatabë ata, levadurajava pijinia tsiquirijavayo ata, itsiata pematajërëabijavata, bacaëjëpa daxitamatabëjava. Nexata levadura, tsiquirijavayo ata, bafufunaeyaexana daxitamatabë. Bajara pijinia itsi tsipae caenë itsa pacuene copatsipame pibisiacuene pexanaponaponaejava paxamë tuatuajëta. Daxitajivi belia pibisiacuene exanaponaejitsipa bajaraponë pejamatabëcueneta. ⁷ Bajaraxuata panavecuacapitsapare baja, ponë pibisiacuene exanaponapona paxamë tuatuajëta, daxitajivi pejamatabëcuenebijianaeyaniva bajaraponë pejamatabëcueneta. Pacuenia itsi perujupanmatabë, levadurata pematajërëabimatabë, bajara jamatabëcueneitsi bajaraponë, pibisiacuene pexanaponaponaexae. Bajaraxuata bajaraponë panavecuacapitsapare baja. Paxamë rabaja Jesucristo pejamatabëcueneta pejanajamatabëcuene paxainame. Nexata pacuenia itsi levadurata apo pematajërëabipanmatabë, bajarapajamatabëcueneitsimë. Tsipaji baja Dioso aneconijibia pacatane. Paxamë baja aneconijibia Dioso pacatane. Tsipaji Cristo pacasivatëpa. Cristo baja cajena beovejayo tanetsi Dioso. Tsipaji nacasivatëpa cruzata pibisiacuene vajaexanaeconimi vajanacavecuajibiaexanaenexa. ⁸ Nexata baja aeconoxae pibisiacuene apo beexanavanapaetsi. Jesucristo pijajivixaetsi, itsajamatabëcuene xainaenejevatsi, pexaniajailivaisi jumecovënëtavanapaenatsi. Bajarapacuenia itsa jumecovënëtavanapaenatsi, nexata pacuenia itsi levadurata apo pematajërëabipanmatabë, bajarajamatabëcuene itsanetsi aneconijibia vajajinavanapaexae.

⁹ Itsabaxutota baja cajena pacatoyaquinatsi pevitota pibisiacuene pexanaponaevi paneyajavajinavanapaeyaniva. ¹⁰ Dioso apo pejumecovënëtsivi, itsamonae, pibisiacuene exana pevitota. Itsamonae najamatabëxaina ëpamonaenexa ayajava pexainacuene pexainaenexa. Itsamonae nacobetoxota. Itsamonae, jumapecataeya pexanaenëanëjavabelia, navajëca. Bajarapitsicuene pexanaevi, Dioso apo pejumecovënëtsivi, panavecuatsatsinexa, patacatoyaquinaebaxutota apo pacaitorobitsi. Bajarapitsicuene pexanaevi, Dioso apo pejumecovënëtsivi, itsa panavecuatsatsipame, nexata pepacuene mapanacuavecuaje athëbëabetsia ëpaneponaenexa tsipae. Tsipaji daxita mapanacuajavaje bajarapitsicuene pexanaevi yacaëjëpa. ¹¹ Patacatoyaquinaebaxutota

raja pacaitorobatsi mapacueniaje. Pajivi jumaitsi ata: “Xanë cajena Jesucristo pelivaisi jumecovënëtajë,” jai ata, itsiata pibisiacuene itsa exana pevitota, ëpamonaenexa ata pexainaecuene itsa natojitsipa, jumapecataeya pexanaenëanëjavabelia ata itsa navajëca, itsamonae ata pibisiacuenia itsa baracuaicuaijai, itsa aitaibi tsabiabinua, itsa naco-betoxotanua, bajarapajivi pëtsa payajavajinavanapame. Pëtsa payajavaxanemenua caejavata, pacajunatsi ata. ¹²⁻¹³ Pamonaë abaxë Dioso apo pejumecovënëtsivi, bajarapamonaë yabara tajumaitsinexa Dioso apo netocopatsi: “Bajarapamonaë cajena pijaneconi xaina Diosojavabelia,” tajainexa. Dioso cajena abaxë saicaya pepacuene naneconitsiaexanaena bajarapamonaë. Itsiata baitsi jane pamonaë Dioso panenajua-jumecovënëtsivi, panenacaetuatabiabibota panenajuajoneyabiabivi, pibisiacuene itsa exana, paxamë bepacueneitavetame. Bajaraxuata nexata panavecuacapitsapare baja ponë paxamë tuatuajëta pevitota pibisiacuene exanaponapona.

6

Pacuenia Dioso pejumecovënëtsivi itavetatsi Dioso penajuajumecovënëtavanapaevi peconitsiyaniva juezmonaejavabelia yabara pelivaisi

¹ Itsanë paxamëyajuvënënë, Dioso pejumecovënëtsinë, itsa pacaitsacueniaba paxamëjavaberena, nexata jueznëjavabelia paneconitabiabame. Pëtsa bajarapacuenia paexaname. Tsipaji raja juezmonae Dioso apo pejumecovënëtsivi. Bajaraxuata Dioso panenajuajumecovënëtsivi apo bepaneconitsimë juezmonaejavabelia. Biji rajane bepayanijobame Dioso pejumecovënëtsivijavabelia papecatoxanetsinexa bajarapalivaisi. ² Payapëtaneme rabaja mapacueneje. Pamatacabi Cristo evetsiana mapanacuaje, daxita Dioso vajajumecovënëtsivi Dioso nacatocopatsiana vajananeconitsiaexanaenexa pamonaë pijaneconi pexanaevi. Daxita mapanacuapijivije, pamonaë Dioso apo pejumecovënëtsivi, vaxaitsi naneconitsiaexanaenatsi. Nexata aeconoxae ata pacacajëpa panelivaisixanetsinexa paneconi exana panetuatuajëta. Tsipaji mapanacuata jivi pevetsijamatabëcuene beveliajamatabëcuene saya. Apo ayapëbeje bitso. ³ Payapëtaneme rabaja mapacueneje. Pamatacabi Cristo patsianica, vaxaitsi naneconitsiaexanaenatsi daxitajivi. Naneconitsiaexanaenatsi ángelevi ata. Nexata abaxë aeconoxae panejinavanapaeepato mapanacuataje, pacacajëpa panelivaisixanetsinexa paneconi exana panetuatuajëta, mapanacuapijilivaisije. ⁴ Itsiata baitsi jane paxamëyajuvënëjivi itsa pacaitsacueniaba mapanacuataje, itsiata panijacuata apo palivaisixanetabiabimë pacuenia picani bepaexaname. Nexata pajivi pacaitsacueniaba, pacaponabiabame juezmonaejavabelia penaneconitsiaexanaenexatsi. ⁵ Mapacuenia pacajumaitsitsije patacaurabinexa. Paxamëyajuvënëjivi itsa pacaitsacueniaba, çajibi tsabaja caenë ata paxamëyajuvënënë pexanialivaisi peyapëtaenë pelivaisixanetsinexa bajarapalivaisi? ⁶ Dioso panejumecovënëtsivixae, juezmonaejavabelia apo bepaneconitsimë Dioso panenajuajumecovënëtsivi.

⁷ Bajarapacuenia panacaevenavi atamë paneneconitabiabixae juezmonaejavabelia, daxitajivi pacacueneyapëtane xaniavaetsia apo panejinavanapaejava Dioso pitabarata. Nexata panacaevenavimë itsa pacaitsacueniaba, itsa pacatonacobetoxotanua, Dioso panejumecovënëtsivixae, xanepanaejitsipa itsa pajamatabëcuenemoyamë tsipae. ⁸ Itsiata baitsi jane paxamë Dioso panenajuajumecovënëtsivijavabelia ata, paitsacueniababiabame. Yamaxëitojorobiaya pavecuancobetoxotabiabamenua.

⁹⁻¹⁰ Payapëtaneme rabaja mapacueneje. Pibisiacuene pexanaevi apo yajavajinavanapaetsi tsane Dioso pijanacuatatsia. Bajaraxuata pëtsa paexaname panijacuata panenatojitsipaecuenia. Dioso pijanacuatatsia apo yajavajinavanapaetsi tsane pevitota pibisiacuene pexanaevi. Apo yajavajinavanapaetsi tsane jumapecataeya pexanaenëanëjavabelia penavajëcaevi. Apo yajavajinavanapaetsi tsane pejaitsivi itsava pijavavecua. Apo yajavajinavanapaetsi tsane pejaitsivi itsanë pamonavecua. Apo

yajavajinavanapaetsi tsane penaquenetsiataevi nacaevënapebibeje. Apo yajavajinavanapaetsi tsane penacobetoxotsivi. Apo yajavajinavanapaetsi tsane ëpamonaenexa pexainaecuene penatojitsipaevi. Apo yajavajinavanapaetsi tsane piaitajibitsabiavi. Apo yajavajinavanapaetsi tsane itsamonae pibisiacuena pebaracuaicuajiaivi. Daxita bajarapitsivi apo yajavajinavanapaetsi tsane Dioso pijanacuatatsia. ¹¹ Bajara picani bajayata paxamëyajuvënëvi pacuena exanavanapa. Itsiata baitsi jane aeconoxae baja pibisiacuene paneexanaeneconimi, Dioso baja pacavecuajibiaexana. Pacatsata baja Dioso papijajivinexamë. Dioso baja aneonijibia pacatane vajatuxanenë Jesucristo pejamatabëcueneta. Espíritu Santo ata pesaëta pacayavenona panejumecovënëtsinexa vajatuxanenë papecaitorobicuena.

Pacuenia Dioso pejumecovënëtsivi xaniavaetsia bejinavanapa Dioso pitabarata yabara pelivaisi

¹² Itsamonae jumaitsi: “Mapanacuata navita vajaexanaejavanexa. Itsajivi ata apo nacaitavetsi bajarapacuene vajaexanaenexa,” jai itsamonae. Xaniajai rabaja picani. Itsiata baitsi jane daxita bajarapacuene vajaexanaenexa, apo nacatoxanepanae. Mapanacuata navitsi ata vajaexanaejavanexa, xua itsajivi ata apo nacaitavetsi, itsiata bejamatabëjumaitsitsi mapacueniaje: “Papibisiacuene taexanaenexa tajamatabëcuene nitorobabiaba, apo exanaenë tsane Cristo pijajivitonëxaenë. Tsipaji itsa exanaejitsipajë bajarapapibisiacuene, nexata tajamatabëcuene bepijajivitonënëcuenia jumecovënëtabijitsipajë,” bejamatabëjaitsi pibisiacuene vajaexanaeyaniva. ¹³ “Vajaxaejava raja vajacotsorotopijijavanexa. Vajacotsoroto raja pijinia vajaxaejava peecaenexa,” pejailivaisi, xaniajai baja cajena. Itsiata baitsi jane itsamatacabi Dioso bajarapacuenebeje vereverecaeyaexanaena. Daxita raja vajaperabëtuareca pibisiacuene apo vajaexanavanapaenexa. Vajaperabëto raja Dioso nacatocopata vajatuxanenë vajatonacuenebavanapaenexa. Vajatuxanenë rabaja pijinia vajaperabëtota vajanacayajavaponaponenexa. ¹⁴ Dioso baja cajena icatsia asaëyaexanatsi vajatuxanenë petëpaecujinae. Bajara pijinia pacuena vaxaitsi ata itsamatacabi Dioso pesaëta nacaasaëyaexanaena vajatëpaecujinae.

¹⁵ Payapëtaneme rabaja mapacueneje. Pacaenëmë canacujitsia, caenë Cristo peperabëtojavabelia becaeperabëto panaexaname papijajivixaemë. Xanë ata rabaja Cristo bepeperabëtoyajuvënënënë. Bajaraxuata pibisiacuene apo bexanaenë tavitota pibisiacuene pexanabiavajavabelia, bajarapova bepeperabëtoyajuvënëjavanë tanaexanaeyaniva. ¹⁶ Payapëtaneme rabaja mapacueneje. Pebi pibisiacuene itsa exana pevitota pibisiacuene pexanabiavajavabelia, bajarapajivibeje becaeperabëto naexanabeje. Dioso pejumelivaisibaxutota jumaitsi penapitsijivibeje yabara mapacueniaje: “Anijajivimibeje becaejivi naexanabeje,” jai. ¹⁷ Nexata pijinia pajivi najamatabëcuenecopata vajatuxanenë Jesucristojavabelia, bajarapajivi becaejivi naexana vajatuxanenë Jesucristojavabelia.

¹⁸ Pevitota pibisiacuene pexanaeyaexanaejamatabëcuene, pavecuanajetabajiravabiabare. Itsajava raja pibisiacuene pexanaejava, bitso jivi apo jamatabëcuenebijianaetsi. Pacuena pevitota pibisiacuene pexanaejava, jamatabëcuenebijianatsi, apo itsi. Ponë jaita itsava pijavavecua pibisiacuene pexanaenexa pevitota, bitso pibisiacuene exana. Petiriva ata, pova jaita itsanë pamonavecua pibisiacuene pexanaenexa pevitota, bitso pibisiacuene exana. Pajivi bajarapapibisiacuene exana, bitso najamatabëcuenebijiana. ¹⁹ Payapëtaneme rabaja mapacueneje. Paneperabëto baja cajena Espíritu Santo pijabo papecatsijamatabëcaexae. Dioso cajena pacarajuta pijaEspíritu Santo papecatsijamatabëcaenexa. Dioso baja cajena papijajivimë. Nexata paneperabëto ata paxamënexa. Apo panaperabëxainaemë panijacuata panenatojitsipaecuena paneexanavanapaenexa. ²⁰ Tsipaji Dioso ayaimatamota pacacomuata. Nexata Dioso papijajivix-aemë, xaniavaetsia panejamatabëëthëtovetsina Dioso jumecovënëtsiaya pajinavanapare.

Nexata daxitajivi Dioso yaiyataeponaena paxamë xaniavaetsia itsa patsitajinavana-pame.

7

Pemuxujiobilivaisi penapitsijivibeje yabara pelivaisi

¹ Xua yabara panetoyaquinaremena pataneyanijobinexamë, nexata aeconoxae pacajumecanaviatsijitsiatsi. Xaniajai rabaja picani. Xanepana itsa apo nacojiobi pebi. ² Itsiata baitsi jane jivi navita pevitota pibisiacuene pexanaevi. Bajaraxuayaniva caepebi canacujitsia pijava bexaina. Bajara pijinia itsi petiriavi ata. ³ Nexata pebi pijava xaniavaetsia bevetaponapona pijavaxae. Bajara pijinia itsi petiriva ata. Xaniavaetsia bevetaponapona pamonaxae. ⁴ Petiriva, penacojiobiva, pijacuata apo naperabëxainae ëbajarapovanexa. Biji rajane petiriva baja itsa nacojioba, pamona pijaperabëtocuenia xainatsi. Bajara pijinia itsi pebi ata. Peperabëto apo naperabëxainae ëbajaraponënexa. Itsa baja nacojioba, pijava pijaperabëtocuenia xainatsi. Nexata namataenetsia naperabëxainabeje. ⁵ Papetiriavimë panenacojiobivi baja, pëtsa panaperabëasivamë paneamonajivivecua. Bajara pijinia pacuenia paxamë ata papebijivimë. Pëtsa panaperabëasivamë panijavajivivecua. Matapania pamatacabimaxëto Diosojavabelia panavajëcaejitsiamëbeje, pacatocopatabeje panenavecuanaperabëasivanexabeje. Bajarapacuenia paexanaenamebeje itsa panajamatabëcuenejëpamebeje panenavajëcaenexabeje Diosojavabelia. Pamatacabimaxëto panavajëcaejitsiamëbeje Diosojavabelia, bajarapamatacabimaxëto pëtsa panaimoxoyotamebeje. Itsa baja paveretsianamebeje Diosojavabelia panenavajëcaejavabeje, pëtsa baja panavecuanaperabëasivamëbeje. Tsipaji panevajënaeyabeliabeje itsa panavecuanaperabëasivamëbeje tsaponae tsipae, nexata dovathi pacajamatabëcuene yamaxëtojobijitsipabeje. Nexata pibisiacuene paexanaejitsipamebeje, pacuene picani apo bepaexanaemëbeje.

⁶ Itsa pacamuxujibatsi panenacojiobinexa pibisiacuene paneexanaeyaniva panevittota, apo pacaitorobitsi daxita panenacojiobinexa. Pamonaejitsipa penacojiobijava, nacojiobi. ⁷ Pacuenia xanë imasia ponaponajë, bajarapacuenia picani paxamë ata imasia panejinavanapaejava, pacatojitsipatsi. Itsiata baitsi jane Dioso pacaenëmë canacujitsia papecayavenonaponaexae, pacacajëpa baja pacuenia paexanavanapaejitsiamë. Itsamonae paxamëyajuvënëvi itsacuenia Dioso jamatabëcuene cajëpaeyaexanaponatsi Dioso pejitsipaecuenia petoexanavanapaenexa. Itsamonae pijinia saicaya itsacuenia Dioso jamatabëcuene cajëpaeyaexanaponatsi.

⁸ Mapacuenia saicaya jumaitsinëje pimasiarubenaevijavabelia, pamonajivi pevecuatëpaevitsijavabelia ata. Bajarapamonae picani toxanepanatsi imasia pejinavanapaejava pacuenia xanë imasia ponaponajë. ⁹ Itsiata baitsi jane itsa apo cajëpaetsi penajamatabëcuenesaëtsijava, nexata pibisiacuene pevitota pexanaeyaniva, roviaalia benacojioba. Bajarapamonae toxanepanatsi roviaalia penacojiobijava. Tsipaji itsa apo nacojiobi tsipae, ëpibisiacuene pexanaenexa najamatabëxainaejitsipa. Nexata najamatabëcuene bijianaponaejitsipa.

¹⁰ Paxamë baja panenacojiobivi mapacuenia pacajumaitsitsije. Itsiata xanë apo tjamatabëcuene. Pacuenia vajatuxanenë jumaitsi, pacaitorobatsi. Papetiriavimë, pëtsa pavecuanaviabame paneamonajivi. ¹¹ Pacamuxujiobi atatsi, itsiata pova vecuanaviata pamona, bajarapova beponapona imasia. Apo benacojiobi baja. Itsa jume, benapitabeje icatsia pamonacovënëbeje. Bajara pijinia itsi pebi ata. Pebi apo bexuabi pijava.

¹² Paxamë tuatujëta Dioso apo pejumecovënëtavanapaevi yabara, jumaitsinë mapacueniaje. Itsiata vajatuxanenë apo pejumaitsi. Dioso pejumecovënëtsinë pijava, itsa apo pejumecovënëtsiva Dioso, itsiata bajarapova itsa jitsipa peponaponaenexa bajaraponëjavabelia, nexata bajaraponë pijava apo benavecuaïtavetsi pevecuanaviatsinexatsi. ¹³ Dioso pijinia pejumecovënëtsiva pamona, itsa apo pejumecovënëtsinë

Dioso, itsiata bajaraponë itsa jitsipa peponaponaenexa bajarapovajavabelia, nexata bajarapova pamona apo benavecuaitavetsi pevecuanaviatsinexatsi. ¹⁴ Dioso pejumecovënëtsiva pamona, apo jumecovënëtsi ata Dioso, itsiata bajaraponë Dioso copatsiaexanaenatsi mapanacuapijipibisiacuene pexanabiabijavami. Bajarapacuenia Dioso copatsiaexanaenatsi tsipaji bajaraponë pijava Dioso pejumecovënëtsiva. Bajara pijinia itsane Dioso pejumecovënëtsinë pijava. Apo jumecovënëtsi ata Dioso, bajarapova Dioso copatsiaexanaenatsi mapanacuapijipibisiacuene pexanabiabijavami. Bajarapacuenia Dioso copatsiaexanaenatsi tsipaji bajarapova pamona Dioso pejumecovënëtsinë. Bajarapacuenia Dioso itsa apo copatsiaexanae tsipae pibisiacuene pexanabiabijavami, nexata pacuenia Dioso coxitane pamonae Dioso apo pejumecovënëtsivi, bajarapacuenia coxitaejitsipatsibeje Dioso. Nexata bajarapajivibeje caejivi pejumecovënëtsixae, Dioso coxitaenatsibeje bepenajuajumecovënëtsijivibeje Dioso. ¹⁵ Itsiata Dioso pejumecovënëtsiva pamona, itsa apo pejumecovënëtsinë Dioso, itsa jamatabëvecuanaviatatsi, nexata becopata roviaalia pevecuanaviatsinexatsi. Dioso pijinia pejumecovënëtsinë pijava, itsa apo pejumecovënëtsiva Dioso, itsa jamatabëvecuanaviatatsi, nexata becopata roviaalia pevecuanaviatsinexatsi. Nexata Dioso pejumecovënëtsinë, pijava pevecuanaviatsinëtsi, bepimasiarucaenë penaexanaenexa. Pova pijinia Dioso pejumecovënëtsiva, pamona pevecuanaviatsivatsi, bepimasiarucaeva penaexanaenexa. Bajarapacuenia bexana imasia peponaponaenexa. Tsipaji Dioso nacajunata jamatabëcuenexanepanaeya vajajinavanapanaenexa. ¹⁶ Papetiriavimë, paneamonajivi Dioso itsa apo pejumecovënëtsivi, paxamë xaniavaetsia panetsitajinavanapaexae tsane paneamonajivi, paneamonajivi ata meta najamatabëcuenecopatsiana Cristojavabelia. Papebijivimë pijinia, panijavajivi Dioso itsa apo pejumecovënëtsivi, paxamë xaniavaetsia panetsitajinavanapaexae tsane panijavajivi, panijavajivi ata meta najamatabëcuenecopatsiana Cristojavabelia. Bajaraxuata jamatabëcuenexanepanaeya panacajinavanapare. Pëtsa panavecuaviabame.

¹⁷ Caenë canacujitsia tsiteca bexanapona pacuenia Dioso tocopatatsi pexanaponaenexa. Xua nacuenebapona Dioso pejunatsivajënaeyatsi Jesucristojavabelia penajamatabëcuenecopatsinexa, bajaraxua mapamatacabi ataje tsiteca benacuenebapona. Bajarapacuenia itorobaponajë daxita Dioso pejumecovënëtsivijava pexanialivaisi itsa tsipaebanajetarucajë. ¹⁸ Ponë Dioso junatatsi pepua peperabëcaucutsinëtsi baja judíovi pijacuenia, bajaraponë baja bajarapacuenia Dioso bejumecovënëtapona. Ponë pijinia Dioso junatatsi abaxë apo peperabëcaucutsinë atatsi judíovi pijacuenia, bajaraponë baja bajarapacuenia Dioso bejumecovënëtapona. Apo benaperabëcaucutsiaexanae. ¹⁹ Vajanacaperabëcaucutsijava, amatamobi Diosojavabelia. Apo vajanacaperabëcaucutsijava ata, amatamobi Diosojavabelia. Dioso rajane vajanacatorobicuenia vajajumecovënëtanapaejava, bajara jane xua, namatamota Diosojavabelia. ²⁰ Caejivi canacujitsia benacuenebapona xua nacuenebapona Dioso pejunatsivajënaeyatsi. ²¹ Itsamonae baja paxamëyajuvënëvi Jesucristojavabelia penajamatabëcuenecopatsivajënaeya, dajubicuenia canajetatsi itsamonaejavabelia amoneya petonacuenebavanapanaenexa. Nexata bajarapamonaepijatuxanevi amoneya tonacuenebabiaba. Itsiata baitsi jane bajarapamonae Dioso baja pejunatsixaetsi Jesucristojavabelia penajamatabëcuenecopatsinexa, pëtsa natsinajamatabëxaina pijatuxanevi amoneya penacuenebiaexanabiabijavatsi yabara. Jamatejema saya tonacuenebavanapae pijatuxanevi. Itsiata baitsi jane itsamatacabi itsa tocopiapatsianatsi pevecuapitsapaenexa baja bajarapamonae, nexata vecuapitsapaena amoneya petonacuenebabiabivi. ²² Ponë itsamonaejavabelia canajetatsi, nexata amoneya itsa tonacuenebapona, bajaraponë bitso pibisiacuene pexanabiabineconimi Cristo baja vecuaajibiaexanatsi. Bajarapacuenia vecuaajibiaexanatsi pamatacabi najamatabëcuenecopata Cristojavabelia. Copata baja pibisiacuene pexanabiabijavami. Nexata Dioso pitorobicueniatsi exanapon-

apona. Bajara pijinia itsi ponë ata apo canajetsitsi itsamonaejavabelia. Itsa najamatabëcuene copata Cristojavabelia, bajaraponë Cristo pijajivitonë baja naexana. Nexata bajaraponë ata exanaponapona Dioso pitorobicueniatsi. ²³ Dioso baja cajena pacacomuata ayaimatamota. Bajaraxuata pëtsa baja panacopatame itsajivi ata papecajamatabëcuenebijianaenexa Dioso panejumecovënëtavanapaejavavecua. Itsa bajarapacuenia panacopatsipame papecajamatabëcuenebijianaenexa, nexata bajarapajivi bepapijajivimë tsipae paneexanavanapaenexa papecaitorobicuenia. ²⁴ Bajaraxuata, xua baja panacuenebavanapame, tsiteca panevajënaeyabelia xaniavaetsia panacuenebavanapare Dioso pitabarata. Pacaenëmë canacujitsia panacuenebavanapare xua panacuenebavanapame pamatacabi abaxë Dioso apo pacajunatsi panejumecovënëtsinexa. Itsa apo pacaperabëcaucutsi judíovi pijacuena, nexata bajarapacuenia pajinavanapare. Itsamonaejavabelia papecacanajetsixae, nexata amoneya itsa patonacuenebavanapame, bajarapacuenia tsiteca patonacuenebavanapare.

²⁵ Itsa panetoyaquinaremena, paneyanijobame abaxë apo penacojiobavanapaevi yabara. Apo yapëtaenë pacuenia vajatuxanenë jumaitsi bajarapitsivi yabara. Itsiata baitsi jane pacatsipaebianatsi pacuenia sivanajamatabëxainajë bajarapitsivi. Dioso tajamatabëcueneta neyapëtaeyaexana taneitaxutotsoniataexae. Bajaraxuata pacatoxanepana pacuenia pacatsipaebijitsiatsi patanejumecovënëtsinexamë. ²⁶ Dioso vajajumecovënëtavanapaevi, nacatsiayai bitso aeconoxae vajajinavanapaepato abaxë mapanacuataje. Tsipaji itsamonaevajanacaitoyaxae, nacabejiobiaexanaponaena. Bajaraxuata netsitaxanepana bajarapamonae itsa apo nacojiobavanapae. ²⁷ Itsa baja capanepaeya penacojiobivi, pëtsa xuaba pijava. Itsiata baitsi jane itsa abaxë apo nacojiobi, pëtsa jaita pijavanexa. ²⁸ Ponë baja capanepaeya nacojioba, apo pibisiacuene. Petiriva ata baja itsa nacojioba, apo exanae pibisiacuene. Aeconoxae daxita Dioso vajajumecovënëtsivi bitso vajanacatsiayaixae, pamonae baja nacojioba, bajarapamonae toayapëbeje tsanetsi pevecuapanepaenexa bajarapapiayaicuene. Bajarapacuenia petoayapëbejeyanivatsi, bajarapamonae picani tojitsipajë imasia pejinavanapaenexa.

²⁹ Tajamonae, mara pacuenia jamatabëpacajumaitsitsije. Imoxoyo rabaja pevajënaevajatuxanenë icatsia pepatsijavanexatsica. Ajena, mapamatacabicujinaelia tsaneje, penacojiobivi ata bepimasiarubenaevicuenia asaëyata betonacuenebavanapa vajatuxanenë. ³⁰ Daxitajivi bejamatabëcueneenatsi ëDioso pijacuene petonacuenebavanapaenexa. Pamonaebitso najamatabëxaina peyajuvënëtëpaexae, bajarapamonae ata najamatabëxainaenejeva asaëyata betonacuenebavanapa vajatuxanenë. Apo bepenajamatabëxainaevicuenia, bejinavanapa. Pamonaebitso jamatabëcuenebarëya tsavanapae, asaëyata betonacuenebavanapa vajatuxanenë. Apo bepejamatabëcuenebarëyavicuenia betonacuenebavanapa. Pamonaebitso comuaca pexinaejavanexa, asaëyata betonacuenebavanapa vajatuxanenë. Asivaya apo betae xua natocomuaca. ³¹ Pamonaebitso, mapanacuata pexinaejava, canacuenebavanapa, bajarapamonae becanacuenebavanapa jamatabëcueneenënaenejevatsi bajarapajamatabëcuene. Tsipaji mapanacuapijicuene vajataejavami vereverecapona.

³² Apo pacatojitsipaetsi papecajamatabëcueneenaenexa mapanacuapijicueneje. Ponë abaxë imasia ponapona, jamatabëcueneenatsi ëvajatuxanenë pijacuene. Tsipaji jitsipa pesivajamatabëcuenebarëyanexatsi vajatuxanenë. ³³ Itsiata baitsi jane penacojiobinë yajavajamatabëcueneenatsi pevetsinexa pijava pesivajamatabëcuenebarëyanexatsi. ³⁴ Apo najamatabëcuenejëpaebeje pijinia penacojiobivabeje pimasiarucaevabeje. Pova apo nacojiobi, jamatabëcueneenatsi ëvajatuxanenë pijacuene. Jitsipa pexaniacuene pexanaponaponaenexa. Jitsipana pexaniacuene penajamatabëxainaponaponaenexa Dioso pesivajamatabëcuenebarëyanexatsi. Itsiata baitsi jane penacojiobiva yajavajamatabëcueneenatsi

pevetsinexa pamona pesivajamatabëcuenebarëyanexatsi.

³⁵ Bajarapacuenia ita pacajumaitsitsi, apo penacojobivi apo itavetsinë penacojobi-
java. Patacjamatabëcueneavenonaenexa raja, pacajumaitsitsi bajarapacuenia. Tsipaji
pacatojitsipatsi xaniavaetsia panejinavanapaenexa. Vajatuxanenë bepatonacueneba-
vanapame daxita panejamatabëcueneta, panajamatabëcuene epatajërërëcaenejevamë.

³⁶ Ponë pexënatoyo xaina, ita tsitaxanepanatsi pexënatoyo petonacojobinexatsi, nex-
ata betocopata penacojobinexa. Tsipaji baja penaveretsiva tsaponaponae. Bajara-
pova ata baja ita jitsipa penacojobinexa, betocopata penacojobinexa. Itsa tocopata
pexënatoyo penacojobinexa, apo pibisiacuene. ³⁷ Ponë pijinia pexënatoyo ita apo
jitsipae abaxë penacojobinexa, bajaraponë ata ita najamatabëcuenevereta apo peto-
copatsinexa pexënatoyo penacojobijava, nexata bajaraponë ata pexaniacuene exana.
³⁸ Nexata ponë apo tocopatsi pexënatoyo penacojobinexa, bajaraponë itsanëvecua bitso
pexaniacuene exana.

³⁹ Penacojobiva baja acuenebi pevecuanaviatsinexa pamona. Tsipaji pamona pi-
asaëtsaponaponaeepato, bajaraponë abaxë tsiteca pijava tsaponaponae. Tsipaji bajara-
pacuenia Dioso najumecopata. Itsiata baitsi jane pamona ita vecuatëpatsi, bajara-
pova tocopatatsi icatsia penacojobinexa. Tocopatatsi penacojobinexa ponëjavabelia
jamatabënacobioba, ita bajaraponë ata Dioso pejumecovënëtsinë. ⁴⁰ Itsiata bajara-
pova pamona pevecuatëpaecujinaetsi, imasia abaxë ita ponaponae, jamatabëcuenebarëya
tsaponaponae tsane ëDioso pijacuene pejamatabëcueneenaponaponaeaxatsi. Nexata
baja ita nacojobiana, bevelia baja jamatabëcuenebarëya tsane. Pacuenia copi-
aya jamatabëcuenebarëya tsaponaponae, apo itsi tsane baja. Bajarapacuenia naja-
matabëxainajë bajarapacuenia yabara. Bajarapacuenia ita pacajumaitsitsi, Espiritu
Santo neyjavacuacuaijai.

8

Jumapecataeya pexanaenëanëjavabelia perajutsiviyajuvënëjava yabara pelivaisi

¹ Jumapecataeya pexanaenëanë itsamonae tane bepigidiosovi. Nexata
bajarapamonae dajubi beyabiaba perajutsinexa bajarapavi jumapecataeya
pexanaenëanëjavabelia. Bajarapaviyajuvënëjava panexaejava ata yabara,
paneyanijobame ita panetoyaquinaremena. Nexata bajaraxua yabara
juya mapacatoyaquinatsije. Xaniajai rabaja cajena. Daxitatsi baja cajena
bajarapacuenia yapëtanetsi. Pavi rajuta jumapecataeya pexanaenëanëjavabelia,
bajarapaviyajuvënëjava xae atatsi tsipae, apo nacaitacueniabi tsipae. Itsiata
vajaxaecujinae bajarapaviyajuvënëjava, ita jamatabëjumaitsitsi: “Xanë bitso
yapëtaniji pamona mapavije atsobabiaba matatoxenetsia,” ita jamatabëjaitsi, abeje
rajane bajarapajamatabëcuene. Tsipaji beayaijamatabëcuenejivitsi nataejitsipatsi
bajarapamonaevecua. Biji rajane xanepana vajajamatabëjumaitsinexa mapacueniaje:
“Asivaya taniji Dioso patanajuajumecovënëtsivi, pamona atsobabiaba jumapecataeya
pexanaenëanëjavabelia perajutsivivajuvënëjava. Nexata xanë ata apo xanë tsane
bajarapaviyajuvënëjava. Nexata xaniavaetsia tsitaponaponaeajë bajarapamonae
taneitaxutua ajamatabëcuenesaënexa Diosojavabelia,” vajajamatabëjaijava xanepana.
Bajarapacuenia ita tsitaponaponatsi Dioso pejumecovënëtsivi, nexata nacaitaxutu-
aajamatabëcuenesaë tsaponae Diosojavabelia. ² Pajivi jamatabëjumaitsi: “Xanë cajena
bitso yapëtaniji daxitacuene,” jamatabëjai, bajarapajivi pejamatabëcuenenavëxaniabijivi.
Abaxë ayaijava tosaicatsi xaniavaetsia peyapëtaenexa. ³ Itsiata baitsi jane pajivi Dioso
jitsipa, bajarapajivi Dioso ata jamatabëcuene yapëtanetsi Dioso pejitsipaejava.

⁴ Nexata jitsipajë patacayapëtaeyaexanaenexa itsamonae jumapecataeya
pexanaenëanëjavabelia perajutsiviyajuvënëjava pexaejava yabara. Vaxaitsi
baja cajena yapëtanetsi jumapecataeya pexanaenëanë apo pexaniajaicuene.

Tsipaji saya jivi pecobeta pexanaejavanë. Yapëtanetsi baja cajena caenë Dioso peponaponaejava. Pematatsënëa baja cajena itsadioso ajibi. ⁵ Jivi raja apo yapëtae. Bajaraxuata saya jamatabëcuenenavëxaniabiaya jumai tsabiabi: “Diosovi raja navitsiajinavanapa athëbëtatsia. Jinavanapa mapanacuajava ataje,” jai tsabiabi jivi jamatabëcuenenavëxaniabiaya. ⁶ Itsiata vaxaitsi yapëtanetsi caenë vaxa Dioso peponaponaejava. Bajaraponë daxitacuene pexanaenë. Bajaraponënexa tojinavanapatsi. Caenë rabaja pijinia pepo vajatuxanenë Jesucristo. Bajaraponë pejamatabëcueneta exana daxitacuene. Bajaraponë pejamatabëcuenetana nacacapanepaena vajaneconivecua.

⁷ Itsiata baitsi jane itsamonae Dioso pejumecovënëtsivi ata, abaxë apo yapëtae pacuenia picani apo caëjëpaetsi jumapecataeya pexanaenëanë pejamatabëcuenebijianaenexatsi. Bajarapamonae pejevaxijavaveliacujinae jumapecataeya pexanaenëanë taeyabiaba bepiasaëtsavanapaevi. “Papexaejava itsamonae rajutabiaba jumapecataeya pexanaenëanëjavabelia, diosovijavabelia rajutabiaba bajaraxua,” sivajamatabëjai tsabiabi bajarapamonae jamatabëcuenenavëxaniabiaya. Bajaraxuata bajarapamonae aeconoxae Dioso jumecovënëtsi ata, itsa xane jumapecataeya pexanaenëanëjavabelia perajutsiviyajuvënëjava, bajarapamonae jamatabëcuenenavëxaniabiaya jamatabëjumai tsabiabi: “Pibisiacuene meta exanjë Dioso pitabarata mapavi taxaexaeje,” jamatabëjai tsabiabi. Tsipaji Dioso jumecovënëtsi ata, abaxë apo yapëtae pacuenia picani apo caëjëpaetsi jumapecataeya pexanaenëanë pejamatabëcuenebijianaenexatsi. ⁸ Yapëtanetsi rabaja vaxaitsi. Vajaxaejava yabara Dioso pexitsi apo nacaexanae. Xae atatsi, apo xae atatsinua, najëpabeje. Vajaxaejava apo nacavënananeconitsiaexanae Dioso. ⁹ Paxae atamënu, apo paxae atamënu, itsiata picani apo pacaitsacueniabi tsipae. Itsiata baitsi jane xania baja tsane. Dioso panenajuajumecovënëtsivi asivaya panetaexae, pëtsa patsitaexaname itsacuenejavayo ata, xua bepibisiacuene taejitsipa bajarapamonae. Tsipaji itsa pacacuenetaejitsipa, exanaejitsipa bajarapajivi ata. Nexata Dioso pejumecovënëtsijavavecua pajopaeyaexanaejitsipame bajarapajivi. Tsipaji abaxë jamatabëcuenefaefaena Dioso pejumecovenëtsijava. ¹⁰ Paxamë pëtsa panabaneme pabojavata jumapecataeya pexanaenëanëjavabelia perajutsiviyajuvënëjava abatabiaba. Paxamë baja payapëtaneme pacuenia apo pacaitsacueniabi picani tsipae, bajarapaviyajuvënëjava paxae atamë. Nexata itsa paxaejitsipame bajarajota, panexaejavata pacataejitsipa itsanë Dioso pejumecovënëtsinë, ponë abaxë bepibisiacuene pexanaejava tane bajarapavi itsa naxaejitsipa. Nexata itsa pacajanitane, bajaraponë ata naxaejitsipa. Nexata penaxaexae, bepenaneconitsinë Diosojavabelia nataejitsipa. ¹¹ Paxamë picani bajarapitsinë matatoxenetsia paneyapëtaexae, paxaejitsipame bajarapaviyajuvënëjava. Itsiata nexata bajarapacuenia pajamatabëcuenebijianaejitsipame, ponë Dioso pejumecovënëtsinë ata, abaxë jamatabëcuenefaefaena Dioso pejumecovënëtsijava. Bajaraponënexa ata cajena Cristo sivatëpatsi. ¹² Bajarapacuenia itsa pajamatabëcuenebijianaejitsipame Dioso pejumecovënëtsijivi, nexata pananeconitsipame Cristojavabelia. ¹³ Bajaraxuata xanë itsa yapëtaniji pacuenia itsajivi, Dioso pejumecovënëtsijivi, belia jopaejitsipa Dioso pejumecovënëtsijavavecua xanë tatsitaxaejava pejamatabëcueneta, nexata caeto ata apo tsitaxaenë tsipae bajarapaviyajuvënëjava asivaya tataexae bajarapajivi.

9

Pacuenia apóstolevi tocopatatsi, xua namatavenona, pevajëtsinexa Dioso pejumecovënëtsijavabelia yabara pelivaisi

¹ Payapëtaneme rabaja mapacueneje. Xanë apo xae atanë jumapecataeya pexanaenëanëjavabelia perajutsiviyajuvënëjava, itsiata Dioso netocopata daxitacuene taexanaenexa Jesucristojavabelia tanajamatabëcuenecopatsixae. Payapëtanemenua vajatuxanenë Jesucristo taneitapetsijava apóstolenëxanë. Taitaxutota baja cajena taniji vajatuxanenë Jesús. Paxamë ata patacatsipaebixae Jesucristo pelivaisi, nexata baja panajamatabëcuenecopatame Jesucristojavabelia. Tsipaji asaëyata tonacuenebaponaponajë vajatuxanenë. ² Itsamonae apo beapóstolenënë netae ata, itsiata paxamë apóstolenëcuenenë paneyapëtaneme. Patacatsipaebixae pexanialivaisi, paxamë baja vajatuxanenë pajumecovënëtamé. Bajaraxuata picani daxitajivi xaniavaetsia beneyapëtané apóstolenëcuenenë.

³ Itsajota pexanialivaisi jivi tsipaebaponaponajë, Dioso picani netocopata tanerajutsinexa tanamatavenonaejavaxi. Itsamonae paxamëyajuvënëvi nejumeaebabiabalivaisi tatsipaebabiabijava mapacueniaje. ⁴ Paapóstolevinë itsa panacuenebajë Dioso pijacuene, panetocopata itsajota pexanialivaisi patsipaebavanapajë patanerajutsinexa pataxaejava, pataapaejava ata. ⁵ Itsa tanacojiobinë tsipae, xanë ata pijinia Dioso netocopatsipa tabarëponaenexa tajava, Dioso pejumecovënëtsiva. Bajarapacuenia netocopatsipa tsipaji bajarapacuenia exanavanapa itsamonae apóstolevi. Vajatuxanenë pejuyapijivi ata, apóstolenë Pedro ata, pijava barëponabiaba. ⁶ Itsamonae itsa pacatsipaeba Cristo pelivaisi, pajamatabëcueneyavenonabiabame penamatavenonaejava yabara. Itsiata baitsi jane paxanëbeje Bernabébeje panacuenebabiabajëbeje patajacuatabeje patanaevetsinexabeje. Bajarapacuenia picani apo benacuenebinëbeje patajacuatabeje patanaevetsinexabeje. Nexata picani paxamë, paxanëbeje ata, bepanerajutame patanamatenonaejavaxibeje. Tsipaji paxanëbeje Cristo pelivaisi patacatsipaebabiabixaebeje, Dioso picani panetocopatabeje patanerajutsinexamë patanamatenonaejavaxibeje. ⁷ Payapëtaneme baja cajena mapacueneje. Itsanë itsa tonacueneba pijatuxanenë, barajutatsi pexaejava. Pamonaé ata pijinia vajabitsaë naexanavanapa, itsa rajutaponatsi pexaejava, apo matamotaponae pexaejavamatamo pijapalatata. Jume cajena. Tocomuatabiabatsi ponë itorobatsi. Pamonaé pijinia xaina uvabacabo, itsajivi ata apo janiitavetsitsi pexaeyaniva penotsicuaiyajuvënëjava. Pamonaé pijinia itsanë pijaoveja toeveta, itsajivi ata apo janiitavetsitsi pemiyujucaebarëmeneyajuvënëjava pijaeyaniva. Jume cajena. ⁸ “Maraeta pacuenia Pablo nacajumaitsije saya jivi petsitanepanaecueniatsi vajaexanavanapaenexa,” pajamatabëjamë pëtsa. Tsipaji rabaja Dioso pejumelivaisibaxutota ata bajarapacuenia jumaitsi. ⁹ Dioso pejumelivaisibaxutota jumaitsi pacuenia bueyu copatatsi pexaejava pexaenexa penacuenebijavata ata. Jumaitsi mapacueniaje: “Pabueyu canacuenebame trigoxu pecatotanabataxuabinexa, pëtsa pumuxatatame nepumuxatatabiabiavata. Pëtsa pumuxatatame trigoxu pexaenexa pecatotanabataxuabiavata,” jai Dioso pejumelivaisibaxutota. Bajarapacuenia Dioso pejumelivaisibaxutota itsa jumaitsi, ëbueyu yabara apo jumaitsi. ¹⁰ Biji rajane bajarapacuenia Dioso pejumelivaisibaxutota jumaitsi vajanacayapëtaeyaexanaenexa vajanamatamotsijavanexa vajanacatonacuenebinë. Ponë canacueneba iracuemo itsanë pijatrigoxu petoubinexa, penacuenebijavata jamatabëjumaitsi: “Pamatacabi naveretsiana trigoxu, bajarapaxuyajuvënëjava nerajutsiana tatonacuenebimatamo,” jamatabëjai. Nexata penaveretsimatacabi trigoxu rajutatsi. Ponë ata icatsia juya trigoxu penaveretsimatacabi totanabataxuaba, bajaraponë ata jamatabëjumaitsi: “Mapatrigoxuyajuvënëjavaje nerajutsiana tatonacuenebimatamo,” jamatabëjai. Nexata rajutatsi. Bajara pijinia pacuenia Dioso pijacuene patatonacuenebivi patanamatenonaejavaxi, paxamë bepanerajutame Cristo pelivaisi patacatsipaebijamatabëcuene. ¹¹ Paubajë baja cajena panejamatabëëthëtota Dioso pejumelivaisi. Jica, nexata juya itsa pacajamatabëcueneevetsipatsi patanerajutsinexamë patanamatenonaejavaxi, ¿pacatsitaayajava tsaja tsipae bajarapacuené? ¹² Paxamë rabaja Dioso pejumelivaisibaxutota pa-

pecaitorobicuena, parajutabiabame itsamonae penamatavenonaejavaxi papecatsipaebijamatabëcuene Cristo pelivaisi. Paxanë biji picani panetoxanepana copiaya patanerajutsinexamë itsamonaevacqua.

Dioso picani panetocopata patanerajutsinexamë patanamatavenonaejavaxi Cristo pelivaisi patacatsipaebaponaejamatabëcuene. Itsiata apo pacavajëtsitsi patanerajutsinexamë. Biji rajane piayapëbejecuena panatonacuenebaponajë patajacuata patanaevetsinexa bajarapacuenia. Apo pacavajëtsitsi caeto ata patanerajutsinexamë patanamatavenonaejavaxi. Itsa pacavajëtsipatsi, itsajamatabëcuene meta paxainaejitsipame paxanëjavaberena. Nexata meta apo pajumecovënëtsimë tsipae patacatsipaebilivaisi, pexanialivaisi, Cristo pelivaisi. ¹³ Payapëtaneme rabaja mapacueneje. Templobota Dioso petonacuenebivi, tocopatatsi bajara patemplobopijipexaejava pexaenexa. Baitsi pamona penacuenebivi altarvënëjavata, itsajota dajubi tobeyabiaba ofrendacuena perajutsinexa bajarapavi Diosojavabelia, bajarapamona ata Dioso tocopatatsi pexaenexa bajarapaviyajuvënëjava. ¹⁴ Bajara pijinia pacuenia vajatuxanenë Jesucristo itoroba Dioso pejumelivaisi petsipaebaponaevi penamatavenonaejavaxi perajutsinexatsi. Pamona jumecovënëta pona petsipaebilivaisitsi, bajarapamona juya berajutapona xua namatavenona petsipaebivitsi. ¹⁵ Itsiata baitsi jane xanë bajarapacuenia netocopatsi ata, apo pacavajëtsitsi itsacuenejavayo ata. Mapabaxutoje pacatoyaquinae atatsi, apo pacatoyaquinaetsi patanerajutaponaexamë itsacuenejavaxi. Bitso cajena jamatabëcuenebarëyanë. Tsipaji Cristo pelivaisi pacatsipaebabiabatsi, apo panerajutsi atamë itsacuenejavayo ata. Bajaraxuata baja cajena apo jitsipae patanematamotsijavamë. Itsa panematamotsijitsiamë tsipae, nexata jitsipaejitsipajë tatëpaejava patanematamotsiyanivamë. Tsipaji ita panematamotsipame, copiarucae jitsipa baja patacasivajamatabëcuenebarëya tsabiabijavami. Tsipaji amoneya patacatsipaebabiabixae Cristo pelivaisi, pacasivajamatabëcuenebarëyatsi tsabiabi.

¹⁶ Apo jamatabëjumaitsinë: “Ayaijamatabëcuenenënë tatsipaebinëxae jivi pexanialivaisi pecapanepaelivaisinexatsi Diosojavabelia,” apo jamatabëjanë. Jume baja cajena. Pexanialivaisi jivi tsipaebabiabajë. Tsipaji baja vajatuxanenë nitoroba. ¡Bitso meta naneconitsipajë Diosojavabelia jivi ita apo tsipaebinë tsipae bajarapalivaisi! ¹⁷ Dioso nitorobinejeva, saya xanë tajamatabëcueneta jivi ita tsipaebaponaejitsipajë pexanialivaisi, Jesucristo pelivaisi, nexata jamatabëcuene evetabiabijitsipajë jivi tanematamotabiabinexa pexanialivaisi tatsipaebabiabijamatabëcuene. Itsiata baitsi jane pexanialivaisi jivi tsipaebaponajë vajatuxanenë taneitorobixae. Jumecovënëta pona pona pacuenia Dioso nitorobapona. ¹⁸ Bajaraxuata apo nematamotsi ata, tsipaebaponajë pexanialivaisi jivi pecapanepaelivaisinexatsi Diosojavabelia. Dioso netocopatsi ata jivi tanematamotsinexa pexanialivaisi tatsipaebaponaejamatabëcuene, itsiata apo vajëtsinë tanerajutsinexa itsacuenejavayo ata. Jivi ita tsipaebaponajë bajarapalivaisi, bitso jamatabëcuenebarëyanë tsapona. Bajaraxuata apo jitsipae tanematamotsijava.

¹⁹ Apo tanecanajëtsinë raja dajubinëcuena itsamonaejavabelia amoneya tatonacuenebinexa. Itsiata baitsi jane daxitajivi bepijajivitonëncuena ponaponajë. Bajarapacuenia exanaponaponajë itsamona ayaibitsaëttoxaneto ata tayavenonaenexa, penajamatabëcuene copatsinexa Cristojavabelia, pecapanepaenexatsi Diosojavabelia. ²⁰ Judíovi jumecovënëtsiajinavanapa bajayata Dioso Moiséspijinëta penajumecopatsilivaisi. Xanë picani apo jitsipae taexanaponaponaenexa pacuenia itoroba Dioso Moiséspijinëta penajumecopatsilivaisi. Tsipaji baja najamatabëcuene copatajë Cristojavabelia tajaneconi tanevecuaajibiaexanaenexa. Itsiata judíovijava ita naponaponabiabajë, pacuenia Dioso Moiséspijinëta penajumecopatsilivaisi itorobatsi, judíovi ita exana, xanë ata bajarapacuenia naexanabiabajë. Bajarapacuenia naexanabiabajë bajarapamona judíovi xaniavaetsia tanenamuxunaevetsinexa Cristo pelivaisi ita tsipaebajë. Nexata judíovi ita najamatabëcuene copata Cristojavabelia,

pecapanepaenexatsi Diosojavabelia. ²¹ Bajara pijinia pacuenia apo judíovijava ata itsa naponaponabiabajë, judíonë atanë, pacuenia apo judíovi jinavanapa, cuenejëpaeya naponaponabiabajë. Bajarapacuenia apo judíovi cuenejëpaeya naponaponabiabajë bajarapamonae xaniavaetsia tanenamuxunaevetsinexa Cristo pelivaisi itsa tsipaebajë. Nexata apo judíovi ata itsa najamatabëcuenecopata Cristojavabelia, pecapanepaenexatsi Diosojavabelia. Bajarapamonae apo judíovi apo jumecovënëtsiajinavanapae bajayata Dioso Moiséspijinëta penajumecopatsilivaisi. Bajarapamonaejava naponaponabiabi atanë, itsiata apo copatsinë tajumecovënëtsijava Dioso pejumelivaisi saicaya tajitsipaecuenia taponaponaenexa. Jume baja cajena. Tsipaji jumecovënëtajë Cristo taneitorobicuenia. ²² Itsamonae abaxë ajena najamatabëcuenecopaba Cristojavabelia. Nexata abaxë apo ajamatabëcuenesaë tsavanapae Dioso pejumecovënëtsijava. Bajarapamonaejava cuenejëpaeya naponaponabiabajë. Bajarapacuenia cuenejëpaeya naponaponabiabajë tajamatabëcueneyavenonaenexa bajarapamonae pevajënaeyabelia piamatabëcuenesaë tsavanapaenexa vajatuxanenëjavabelia. Baitsi pacuenia caeviria canacujitsia jivi pijasalinaicuenia jinavanapa, bajarapacuenia xanë ata cuenejëpaeya naponaponabiabajë. Bajarapacuenia cuenejëpaeya naponaponabiabajë bajarapamonae tajamatabëcueneyavenonaenexa. Jamatabëcueneyavenonaejitsianë bajarapamonaejavuvënëvi ayaibitsaëtoxaneto ata penajamatabëcuenecopatsinexa Cristojavabelia pecapanepaenexatsi Diosojavabelia. ²³ Bajarapacuenia exanaponaponajë baja jivi pejumecovënëtsinexa pexanialivaisi pecapanepaelivaisinexatsi Diosojavabelia, bajarapamonae ata taneyajavacapanepaenexatsi Diosojavabelia.

²⁴ Payapëtaneme rabaja mapacuenije. Penayacobivi pecujinaejinaejava, bacujinaejina daxita. Itsiata baitsi jane ponë bitsojina pecujinaejinaejava daxita penayacobivi matatoxenetsia, bajaraponë caenë bapita xua tsipaebatsi pecujinaejinaematamo, premiovënëjava. Pacuenia penayacobivi pecujinaejinaejava, daxitasaëta bacujinaejina, bajara pijinia pacuenia paxamë ata daxita panesaëta panevajënaeyabelia patonacuenebavanapare Dioso. ²⁵ Daxita pamonaë penayacobivinexa pecujinaejinaejava, tajëvelia banajamatabëveretavanapa pebitsojinaenexa itsamonae matatoxenetsia. Naxaniavaetavanapanua. Daxitamatacabi canacujitsia nasisaëjëbavanapa caenë canacujitsia. Bajarapamonae najamatabëcuenesaëtavanapa, daxita xua abeje, pexanaeyaniva piamajumalisaënexa. Bajarapacuenia naxaniavaetavanapa, penayacobijavata itsamonae matatoxenetsia pebitsojinaenexa, perajutsinexatsi corona, naebaxucorona. Itsiata baitsi jane bepijia saya piabejecoronanexa. Biji rajane vaxaitsi Dioso vajajumecovënëtsivi, Dioso tonacuenebavanapatsi athëbëtatsia vajanacarajutsinexa xua nacatsipaeba, apo pevereverecejavanexa. ²⁶ Pacuenia pebitsojinaenë asaëyata cujinaejina rovia pepatsinexalia petocaëjëtsijavabeliatsi, bajara pijinia pacuenia xanë ata asaëyata tavajënaeyabelia exanaponaponajë vajatuxanenë taneitorobicuenia. Tonacuenebaponaponajë asaëyata. Apo tonacuenebinë saya jema penaxuabinexa tatonacuenebijava. ²⁷ Bajaraxuata naperabëevetsia naevetaponaponajë pibisiacuene taexanaeyaniva. Bajarapacuenia naperabëevetsia naevetaponaponajë tsipaji jitsipajë vajatuxanenë taneisivajamatabëcuenebarëya tsaponaejava itsamonae itsa tsipaebaponajë pexanialivaisi. Apo jitsipaenë tanecopatsiaexanaejava Dioso tatonacuenebijava. Itsamonae pexanialivaisi tatsipaebicujinae, bijiata itsa ponaponaejitsipajë, Dioso necopatsiaexanaejitsipa tatonacuenebijava.

10

Pemuxujiobilivaisi penavajëcaeyaniva jumapecataeya pexanaenëanëjavabelia yabara pelivaisi

¹ Tajamonae, pacatojitsipatsi icatsia panenajamatabënapitsinexa pacuenia bajayatami vajasalinaivimi Moiséspijinë barëpitsaparena Egipto nacuaverena.

Moiséspijinē Dioso tsitajētaponatsi itsaxuayo vajasalinaivimi barēnajetarucaejitsia. Vajasalinaivimi pematatsēnēatsia itarērēbo namataxainaeya najetaruca. Nexata bajarapaitarērēbo vajasalinaivimi pēnanajetarubena. Daxitabitsaēto vajasalinaivimi Moiséspijinē barēnicabarena Rojovēnē manuamenemaxērana epatuarena. ² Pacuenia pebi itsa bautisabatsi merata, naexana Dioso pijajivitonē, bajara pijinia pacuenia vajasalinaivimi Moiséspijinē pijajivi naexana itsa pēnaponarena Egipto nacuverena. Moiséspijinē pijajivi naexana vajasalinaivimi itarērēbo pebēxēpana itsa pēnanajetarubena Moiséspijinē. Rojovēnē manuamenemaxērana epatuarena ata itsa barēnicabarenatsi, Moiséspijinē pijajivi naexana vajasalinaivimi. ³ Daxita vajasalinaivimi caeviriajava pexaejava najuanabanepona itsa najetarubena bajarapatusato nacuyarena. Papexaejava Dioso rajutaponatsi, bajarapamonaemi xaepona. ⁴ Itsa najetarubena, caeviriamera najuaapaepona, Dioso perajutsiratsi. Bajarapamera Dioso tocapitsapatsi ibotoxanetojavaverena. Bajarapamatacabi vajasalinaivimi Cristo yajavaponatsi. Cristo rabaja cajena bajarapaibotoxaneto. ⁵ Itsiata baitsi jane vajasalinaivimiyajuvēnēvi, caejiviyobeje, saya jumecovēnēta pacuenia Dioso najumecapanepaeya jumaitsitsi. Nexata bajarapajiviyobeje Dioso sivajamatabēcuenebarēyatsi. Daxita itsamonae apo jumecovēnētsi Dioso. Bajaraxuata vajasalinaivimi Dioso verebiabatsi petusato nacuata.

⁶ Nexata vaxaitsi becanaējētatsi pacuenia vajasalinaivimi bajayata Dioso verebiabatsi pibisiacuene pexanaexae. Nexata vaxaitsi ata vajajamatabēēthētovetsina becanaējētatsi pibisiacuene vajaexanaeyaniva. ⁷ Bajaraxuata apo benavajēcaetsi jumapecataeya pexanaenēanējavabelia pacuenia bajayata vajasalinaivimiyajuvēnēvi navajēca jumapecataeya pexanaenēanējavabelia. Dioso pejumelivaisibaxutota jumaitsi pacuenia vajasalinaivimi pibisiacuene exanavanapa, fiesta itsa toexana jumapecataeya pexanaenēanēnexa. Dioso pejumelivaisibaxutota vajasalinaivimi yabara jumaitsi mapacueniaje: “Bajarapamonaē enabiaba penabaninexa, piapaenexanua. Bajaraxuacujinae nonobapunabiaba peyavajibinexa,” jai Dioso pejumelivaisibaxutota vajasalinaivimi yabara. ⁸ Apo bexanaetsinua vajavitota pibisiacuene pacuenia bajayata vajasalinaivimiyajuvēnēvi exana. Bajarapitsivi tēpa caematacabita veintitrés mil pajivibeje. ⁹ Apo bejamatabēcueneējētsinua vajatuxanenē pacuenia bajayata vajasalinaivimiyajuvēnēvi Dioso jamatabēcueneējēta. Papibisiacuene vajasalinaivimi pejamatabēēthētota natojitsipa pexanaenexa, Dioso jamatabēcueneējētsiaya exanavanapa, peyapētaenexa pacuenia Dioso exanaejitsia bajarapamonaejavaberena. Bajaraxuata vajasalinaivimi jomo pesinicujiruatsi vereverecapona. ¹⁰ Pētsa panaepaname Dioso pejumelivaisi papecatsipaebavanapaevijavabelia pacuenia bajayata vajasalinaivimiyajuvēnēvi anaepanabiaba Moiséspijinēbeje Aarónpijinēbejevabelia. Bajaraxuata Dioso itoroba pijaängel peverebiabinexatsi vajasalinaivimiyajuvēnēvimi.

¹¹ Bajarapacuenia exanatsi bajayata vajasalinaivimi. Dioso baja cajena nacayapētaeyaexana pacuenia bajayata vajasalinaivimi Dioso naneconitsiaexanatsi pibisiacuene pexanaexae. Bajarapalivaisi itanerubena Dioso pejumelivaisibaxutota vajanacamuxujiobinexa, vaxaitsi ata bajarapacuenia pibisiacuene vajaexanaeyaniva. Vaxaitsi rabaja nacua pevereverecaeitabarayota jinavanapatsi. ¹² Itsa pajamatabējumaitsimē: “Xanē cajena ajamatabēcuenesaēnē Dioso tajumecovēnētsijava. Nexata apo exanaenē tsane pibisiacuene pacuenia bajayata tajasalinaivimi exana,” itsa pajamatabējamē, xania baja tsane! Tsipaji paxamē ata bajarapacuenia pibisiacuene paexanaejitsipame. ¹³ Xua baja aeconoxae pataeponame, dovathi pejamatabēcueneta papecajamatabēcueneējētsijava, bajaraxua daxita Dioso pejumecovēnētsivi tocopiapataponatsi mapanacuataje. Itsiata baitsi jane Dioso pacayavenonaponaena pacuenia najumecapanepaeya jumaitsi. Dioso cajena apo pacacopatsi tsane dovathi

papecajamatabëcueneëjëtaponae nexa paneajamatabëcuenesaëjáva matatoxenetsia. Nexata dovathi itsa pacajamatabëcueneëjëta, itsiata Dioso pacayavenonaponaena paneajamatabëcuenesaë tsaponaenexa. Nexata papecajamatabëcueneëjëtsijava, pavecuapanepaponaenename pibisiacuene paexanaenejevamë.

¹⁴ Tajamonae bitso patacaasivavi, jumapecataeya pexanaenëanëjavabelia itsamonae penavajëcaecuene, nayajivitaeya pajinavanapare. ¹⁵ Pacajamatabëcueneëjëpa baja cajena panejumeyapëtaenexa patacatsipaebilivaisi. Nexata panejumecanaëjëre patcatsipaebilivaisi paneyapëtaenexa itsa pexaniajailivaisi. ¹⁶ Itsa nacaetuanatsi vajanajamatabënapitsinexa xua yabara Cristo nacasivatëpa, najuaxanetsi pan. Najumataavëjëapatsinua vajamatavëjëapaera. Nexata pan yabara, vajamatavëjëapaera ata yabara, Diosojavabelia jumaitsitsi: “Pexaniacuene bitso panetoexaname. Panerajutame pan. Panerajutame patamatavëjëapaera ata,” jaitsi. Itsa nacaetuatatsi vajanajamatabënapitsinexa xua yabara Cristo nacasivatëpa, caebitsaëto naexanatsi Cristo yajava, ponë nacasivatëpa cruzata. ¹⁷ Ayaibitsaëto xaneto atatsi, caepan itsiata najuaxanetsi. Nexata vaxaitsi Cristo vajayajavajinavanapaexae, caebitsaëtotsi Cristo pijajivitsi naexanatsi.

¹⁸ Pacanaëjëre pacuenia judíovi baexana. Itsamonae dajubi beyabiaba bajarapavi ofrendacuena perajutsinexa Diosojavabelia. Nexata pamonae naxane bajarapavi, caebitsaëto Dioso pijajivi naexana. ¹⁹ Mara pajamatabëcuene yabara jumaitsinëje. Jumapecataya pexanaenëanë, itsacuenejavayo ata pexanaenexa, apo caëjëpaetsi. Bajara pijinia itsi pavi ata jumapecataeya pexanaenëanëjavabelia rajuta. Apo caëjëpaetsi jivi xae ata pejamatabëcuenebijianaenexatsi. Tsipaji jumapecataeya pexanaenëanë, bajarapavi apo ithianae bajarapavivecua. ²⁰ Nexata abaxë pamonae Dioso apo yapëtae, dajubinë itsa tobeyaxuaba ofrendacuena pevi perajutsinexa jumapecataeya pexanaenëanëjavabelia, bajarapavi dovathinexa saya. Apo Diosonexa cajena. Bajaraxuata apo pacatojitsipaetsi panenaxaenexa bajarapamonaejavata. Itsa panaxaejitsipame bajarapamonaejavata, nexata caebitsaëto panaexanaejitsipame dovathi yajava. ²¹ Paxamë baja panenabanivi, paneapaevinua, vajatuxanenë pijamesata. Nexata baja acuenebi panenabaninexa, paneapaenexanua, itsajota Dioso apo pejumecovënëtsivi dovathi pijacuene exanavanapa. ²² Vaxaitsi Dioso vajajumecovënëtsivi, apo jitsipaetsi vajatuxanenë vajanacabaraanaepanaejava. Dioso pijacuene, dovathi pijacuene ata, anijacuenebeje itsa exanaponaejitsipatsi, nexata vajatuxanenë nacabaraanaepanaejitsipa. Vaxaitsi cajena apo vecuaasaëtsi vajatuxanenë. Nexata apo vecuapanepaetsi tsipae vajatuxanenë itsa nacananeconitsiaexana.

Pacuenia Dioso pejumecovënëtsivi bejinavanapa itsamonae pejamatabëcuenebijianaeyaniva yabara pelivaisi

²³ Xaniajai rabaja pacuenia itsamonae jumaitsi. Mapanacuata navita vajaexanaejavanexa. Itsajivi ata apo nacaitavetsi bajarapacuene vajaexanaenexa. Itsiata baitsi jane apo nacatoxanepanae daxita bajarapacuene vajaexanaenexa. Daxitacuene, xua itsajivi ata apo nacaitavetsi vajaexanaenexa, exanae atatsi tsipae, itsiata apo nacajamatabëcueneasaëyaexanae tsipae Dioso vajajumecovënëtsijava. ²⁴ Pëtsa pajamatabëjumaitsimë: “¿De tsaeta xua natoexanaenajë, xua ëxanënexa netoxanepanaejitsia?” pajamatabëjamë pëtsa. Biji rajane pajamatabëjumaitsimëre. “¿De tsaeta xua toexanaenajë, xua itsamonaenexa toxanepanaejitsiatsi?” pajamatabëjamëre.

²⁵ Dioso baja cajena pacatocopata panexaenexa itaxutojema. Nexata pacatocopata panexaenexa pavi canajeta pecanajetsibota. Nexata pëtsa payanijobame. “¿Matsa pavi jumapecataeya pexanaenëanëjavabelia peyajuvënërajutsivije?” pajamë pëtsa. Itsa payanijobijitsipame bajarapacuena: “Jājā, bajarapayajuvënëvi,” pacajai tsipae. Nexata paxamë pajamatabëjumaitsimë tsipae bajarapavi yabara: “Mapavije itsa xaejitsipajë, nexata pibisiacuene exanaejitsipajë Dioso pitabarata,” pajamatabëjamë tsipae. Saya

pacomuare payanijobinejevamë. ²⁶ Dioso baja cajena pacatocopata itaxutojema panexaenexa. Tsipaji mapanacuaje, daxita mapanacuapijicuene ataje, Dioso baja cajena pijajava.

²⁷ Dioso apo pejumecovënëtsijivi ata itsa pacajunata panenanabaninexa pijaboyabelia, panaponare panenanabaninexa itsa pajitsipame. Xua pacaabata, paxaema payanijobinejevamë. “¿Matsa pavi jumapecataeya pexanaenëanëjavabelia peyajuvënërajutsivije?” pajamë pëtsa. ²⁸ Itsamonae Dioso pejumecovënëtsivi bepibisiacuene pexanaejava taejitsipa itsa xaejitsipa bajarapayajuvënëvi. Nexata panexaevajënaeya, bajarapamonaeyajuvënëni itsa pacajumaitsi: “Mara pavije jumapecataeya pexanaenëanëjavabelia ofrendacuena peyajuvënërajutsivije,” itsa pacajai, pëtsa patsitaxaneme. Itsa apo patsitaxaemë tsane, nexata apo pajamatabëcuenebijnanaemë tsane bajaraponë. ²⁹ Itsa patsitaxaejitsipame, bajaraponë ata naxaejitsipa. Nexata bajaraponë jamatabëjumai tsipae: “Pibisiacuene baja cajena exanjë Dioso pitabarata mapavije tanaxaexae,” jamatabëjai tsipae.

Bजारapacuenia patacatsipaebijava, itsanë Dioso pejumecovënëtsinë itsa jumetaena, jamatabëcuenenavëxaniabiaya meta jumaitsi tsane mapacueniaje: “Jumapecataeya pexanaenëanëjavabelia perajutsiviyajuvënëjava taxaeyabiabinexa, Dioso netocopata. Nexata baja xaeyabiabajë. Itsiata icatsia aeconoxae nitaveta itsanë Dioso pejumecovënëtsinë itsa tsitaxaniji bajarapayajuvënëvi, bepibisiacuene petaeyaniva. ¿De meta xuajitsia xanë epatua copatsipajë bajarapayajuvënëvi taxaeyabiabijavami? ³⁰ Taxaevajënae bajarapavi, ‘Xanepana rabaja,’ janë tsabiabi Diosojavabelia tanerajutsixae taxaenexa. ¿Detsa nexata xuajitsia jivi nebaracuaicuajai tsipae bepibisiacuene taexanaenë taxaejamatabëcuene bajarapayajuvënëvi?” jai meta tsane jamatabëcuenenavëxaniabiaya itsanë Dioso pejumecovënëtsinë. ³¹ Mara pacuenia pacatsipaebatsije panecopatsinexa paneexanabiabijavami ata, itsajivi ata panejamatabëcuenebijnanaeyaniva panetsitaexanaejava pejamatabëcueneta. Itsa paxaneme, itsa papamenua, daxitacuene itsa paexanamenua, xaniavaetsia itsamonae patsitaexanavanapaename paxamë panetsitaexanaejava yabara jivi papecasivajamatabëjumaitsinexa: “Dioso cajena ayaijamatabëcuenenë. Tsipaji pijajivi yavenona xaniavaetsia petojinavanapaenexatsi,” papecasivajamatabëjainexa. ³² Bजारaxuata pëtsa patsitaexaname itsacuenejavayo ata itsajivi ata Diosovecua itsajamatabëcuene pexainaeyaniva. ³³ Pacuenia xanë tsitaexanaponaponajë itsamonae tanesivajamatabëcuenebarëyanexa, bajarapacuenia paxamë ata patsitaexanavanapare itsamonae. Apo najamatabëxainabiabinë taexanaenexa xua ëxanënexa netoxanepana. Biji rajane najamatabëxainabiabajë tatoexanaenexa xua toxanepanatsi itsamonae ata. Bजारapacuenia toexanaponajë bajarapamonae ata Dioso pejumecovënëtsinexa pecapanepaenexatsi pijaneconivecua.

11

¹ Itsamonae patsitaexanavanapare pacuenia xanë pacatsitaexanaponatsi. Xanë raja pijinia cuenejëpaeya ponaponajë Cristo.

Pacuenia petiriavi namataacatsiaya bejunua Dioso pejumecovënëtsivi penacaetuatabi-abibota yabara pelivaisi

² Tajamonae, panejamatabënjabinabiabame. Pacuenia pacaitorobatsi, bajarapacuenia paexanavanapamenua. Bजारaxuata pacasivajamatabëcuenebarëyatsi. ³ Pacatojitsipatsi paneyapëtaenexa mapacuenije. Athëbëvetsica Dioso itorobicatsi Cristo. Nexata juya mapanacuataje Cristo caepebi canacujitsia itorobapona. Bajara pijinia itsi pebi ata. Pebi juya itorobapona pijava. Pebi peyaiyataenexa Cristo, apo benamataacatsi papaëbërëpanayota jivi penacaetuatsibota. ⁴ Bजारaxuata pebi Diosojavabelia penavajëtsijavata, itsamonaejavabelia ata Dioso pejumelivaisi petsipaebijavata, itsa

namataacatsipa papaëbërëpanayota, nexata Cristo athëbëvetsica yapijiviaura tsipaetsi. ⁵ Petiriva rajane pamona pejumecovënëtabiavacuene itsamonae peyapëtaenexatsi, benamataacata papaëbërëpanayota jivi penacaetuatsibota. Bajarapacuenia benamataacata penavajëtsijavata Diosojavabelia, itsamonaejavabelia petsipaebijavata ata Dioso pejumelivaisi. Itsa apo namataacatsi tsipae, nexata pamona yapijiviaura tsipaetsi. Pacuenia petiriva amataura tsipae itsa mataxunaejitsipatsi, bajara pijinia pacuenia petiriva pamona yapijiviaura tsipaetsi, papaëbërëpanayota itsa apo namataacatsi tsipae jivi penacaetuatsibota. ⁶ Petiriva itsa apo namataacatsi tsipae papaëbërëpanayota, pacuenia pebi apo namataacatsi, nexata itsa bemataxunatsi pacuenia pebi bamataxunatsi, bajarapova namatacaura tsipae. Bajaraxuata petiriva jivi penacaetuatsibota, benamataacata papaëbërëpanayota pamona peyapijiviaurayani-vatsi. ⁷ Dioso itsa exana pebi, nacujirujëpaeyaexana. Nexata pacuenia itsi Dioso, bajara itsi pebi. Nexata pebi xaniavaetsia itsa ponapona, jivi pecanaëjëtsinexa Dioso bitso ayaijamatabëcuene pexainaenëcuene. Bajaraxuata pebi apo benamataacatsi papaëbërëpanayota penavajëtsijavata Diosojavabelia, itsamonaejavabelia Dioso pejumelivaisi petsipaebijavata ata. Itsiata baitsi jane petiriva benamataacata papaëbërëpanayota penayapëtaenexa pamonavecua beveliamatabëcuene pexainaevacuene. ⁸ Copiata Dioso pebi itsa exana, petiriva peyenyajuvënësitomita apo exanae. Biji rajane pebi peyenyajuvënësitomita cotocaevi Dioso exana petiriva. ⁹ Petiriva baja cajena Dioso exana pebinexa. ¹⁰ Bajarapajamatabëcuene yabara petiriva benamataacata papaëbërëpanayota. Petiriva namataacatsia itsa ponapona, ángelevi tanetsi pamona pejumecovënëtabiavacuene. ¹¹ Vaxaitsi Dioso vajajumecovënëtavanapaevi, xanepana namataenetsia vajanajamatabëcuene asaëyaexanaenexa. Pebi namatavenona petiriva. Petiriva pijinia namatavenona pebi. ¹² Xaniajai rabaja. Pebi peyenyajuvënësitota Dioso exana petiriva. Itsiata baitsi jane bajaraxuacujinae petiriavita naexanapona pebijivi. Tsipaji Dioso pejamatabëcueneta bajarapacuenia copata.

¹³ Panijacuata pacanaëjëre. ¿Xanepana tsaja petiriavi penavajëtsinexa Diosojavabelia papaëbërëpanayota namataacatsinejeva? Jume raja. Namataacatsiaya raja papaëbërëpanayota petiriavi benavajëta Diosojavabelia. ¹⁴ Vaxaitsi baja cajena vajamatabëëthëtota yapëtanetsi mapacuenije. Pebi itsa amatanapiareca, amataura tsipae. ¹⁵ Vajajamatabëëthëtota yapëtanetsinua mapacuenije. Petiriva pijinia itsa amatanapiareca, toxanepanatsi. Yabarëya pematana. Dioso cajena petiriva tocopatatsi piamatanapianexareca. Nexata bepemataacatsitsi pematana. ¹⁶ Itsajivi itsa jamatabëpanejumeanaenota petiriavi papaëbërëpanayota penamataacatsijava yabara, nexata bajarapajivijavabelia pajumaitsinë tsane mapacueniaje: “Paxanë bajarapacuenia panajamatabëxainajë petiriavi papaëbërëpanayota penamataacatsijava yabara. Bajarapacuenia itsamonae ata, pamonae Dioso pejumecovënëtsivi, najamatabëxaina. Tsipaji baja cajena patajacuene,” pajanë tsane pajivijavabelia jamatabëpanejumeanaenota petiriavi papaëbërëpanayota penamataacatsijava yabara.

Pacuenia itsamonae ayajava xaeyabiaba itsa nacaetuatabiaba penajamatabënapitsinexa xua yabara Cristo sivatëpatsi yabara pelivaisi

¹⁷ Pacatoyaquinatsi mapalivaisije patacamuxujiobinexa. Aeconoxae xua paexanabiabame, apo pacatoxanepanae. Panacaetuatabiabi atamë, itsiata apo pajamatabëcuenesaëmë tsaponae panevajënaeyabelia Dioso panejumecovënëtsijava. Caranata saya panevajënaeyabelia pajamatabëcuenecueranaponame. ¹⁸ Najamatabëxainajë copiaya patacujumaitsinexa mapacueniaje. Pacavënëlivaisitanetsi. Apo panajamatabëcuenejëpabiabimë pina itsa panacaetuatabiabi panenacaetuatabiabiabibota. Caebota pina panacaetuatabiabi atamë, navecuanatsanaeya pina panavecuaenabiabame pacaebitsaëtöximë canacujitsia. “Xaniajai raeta baja. Baja raeta pacuenia exanabiaba,” jamatabëjanë belia paxamë yabara.

¹⁹ Baja raeta pacuenia navecuanatsanaeya panavecuauenabiabame. Tsipaji meta pajamatabëjumaitsimë tsabiabi: “Vaxaitsi cajena Dioso pepacue ne jumecovënëtsi. Nexata vajanacaetuatsijavata, Dioso apo pejumecovënëtsivi navecuatsatsianatsi Dioso apo ëpejumecovënëtsivi saicaya penaenexa,” pajamatabëjamë meta tsabiabi. ²⁰ Xua yabara Cristo pacasivatëpa, panenajamatabënapitsinexa panacaetuatabiabi atamë, najamatabëcuenejëpaeya apo panacaetuatabibimë. Nexata Dioso pacatane saya jema bepanenacaetuatsivi. ²¹ Tsipaji copiaya panepatsivi panenabaniepatota, ayaijavanë paxaeyabiabame. Apo paevetabiabimë abaxë itsamonae pepatsijava caecuenia panenajuanabaninexa. Itsamonae paxamëyajuvënëvi ayaijava xaeyabiaba. Ayaira vinora matavëjëa apaeyabiabanua. Nexata vënaaitajibi tsabiabi. Nexata pamonaë cotocaevi pepatsivi, yavereverecabiaba. Nexata pijani tsabiabi. ²² Ëpanexaejavanexa itsa pasivanacaetuatabiabame, panijabonë paxainame panijabonëjava panenabaninexa, paneapaenexanua. Bijiaya pataeyabiabame pamonaë nacaetuatabiaba penavajëcaenexa Diosojavabelia. Paurababiabamenua pamonaë bepejiobivi, pexaejava apo penacapatsivi. Pexaniacuene cajena apo paexanabiabimë bajarapacuenia itsa paexanabiabame. Bajarapacuenia saya paneexanabiabixae, pananeconitame Diosojavabelia.

Pajamatabëcuene yabara nacaetuatabiaba Dioso pejumecovënëtsivi caejuameto canacujitsia yabara pelivaisi

(Mt 26.26-29; Mr 14.22-25; Lc 22.14-20)

²³ Imata baja cajena pacatsipaebatsi pacuenia vajatuxanenë Jesús pijajivi barëexana. Pameravi vajatuxanenë pijavajabitsaë pecobeyabelia canajetsijitsiatsi, bajarapameravi vajatuxanenë cobenanuca panbë. ²⁴ “Pexaniacuene panetoexaname. Pan panerajutame,” pejaicujinae Diosojavabelia, panbë epatsënëca. Jumaitsi pijajivijavabelia: “Mara tavije patacasivatëpaejava paxamënexa. Mapacueniaje tacovëta paexanabiabianame patanenajamatabënapitsinexamë,” jai vajatuxanenë Jesús pijajivijavabelia. ²⁵ Penabanicujinae bajara icatsia pacuenia Jesús cobenanuca pecaapaejava. Nexata icatsia jumaitsi pijajivijavabelia: “Dioso baja cajena najumecapanepaeya jumaitsi papecacapanepaenexa. Nexata pacuenia Dioso najumecapanepaeya jumaitsi, pacaapanepaena tajana pejamatabëcueneta. Tajana raja nevecuarunaena tatëpaejavata papecacomuatsinexa panijaneconivecua. Mapacaapaejavataje, itsa papaeyabiabianame, panenajamatabënapitabiabianame,” jai vajatuxanenë Jesús pijajivijavabelia. ²⁶ Nexata paxamë bajarapacuenia itsa paexanabiabame, patsitanaitajëtabiabame itsamonaejavabelia xua yabara vajatuxanenë pacasivatëpa cruzata. Bajarapacuenia paexanabiabare vajatuxanenë icatsia pepatsimatocabitsicajavabelianexa.

Pacuenia Dioso pejumecovënëtsivi benaxaniavaeta, itsa nacaetuata penajamatabënapitsinexa xua yabara Cristo sivatëpatsi, yabara pelivaisi

²⁷ Jivi itsa nacaetuata penajamatabënapitsinexa xua yabara Cristo sivatëpatsi, becanaëjëtena. Tsipaji canaëjëtsinejeva itsa naxane pan, itsa apanua vajatuxanenë pecaapaejavata, bajarapajivi naneconitsipa vajatuxanenëjavabelia, vajatuxanenë pevito, pijana ata, apo peyaiyataexae. ²⁸ Bajaraxuata caejivi canacujitsia xaniavaetsia benajamatabëcuenejëta pecaxitajarabinexa paneconi xainaponapona Dioso pitabarata. Bajarapacuenia benajamatabëcuenejëta pan penaxaevajënaeya, pematavëjëaapaera ata penaapaevajënaeya. ²⁹ Itsa naxane pan, itsa naapanua pematavëjëaapaera, becanaëjëta pajamatabëcuene yabara vajatuxanenë sivatëpatsi cruzata. Pajivi canaëjëtsinejeva naxane pan, naapanua pematavëjëaapaera, bajarapajivi pijacuata naneconitapona Diosojavabelia. ³⁰ Bajaraxuata paxamë ayaibitsaëto payajuvënëavitanemë. Nexata itsamonae payajuvënëcueraname. Itsamonae payajuvënëtpame baja. ³¹ Bajaraxuata vaxaitsi vajanaxaevajënae pan, vajanapaevajënae ata pematavëjëaapaera, benajamatabënapitsi

Jesucristo vajanacasivatëpaejava vajaneconi yabara. Benajamatabëcuenejaitatsinua paneconi xainatsi Dioso pitabarata vajanavajunupaebinexa Diosojavabelia. Bajarapacuenia ita exanaenatsi, vajatuxanenë apo nacananeconitsiaexanae tsane. ³² Itsa naneconitsianatsi, nexata vajatuxanenë nacabejiobiaexanaponaena Dioso apo pejit-sipaecuene vajaexanaejava vajacopatsinexa. Bajarapacuenia vajatuxanenë nacaexanaena Dioso apo pejumecovënëtsivi yajava Diosovecua vajanaxuabiyaniava.

³³ Bajaraxuata ita panacaetuatame panenajamatabënapitsinexa xua yabara Cristo pacasivatëpa, paevetabiabianame abaxë daxita pepatsijava caecuenia panenajuaxaenexa. ³⁴ Pajivi pijani, bajarapajivi copiaya benabane pijabota pejonevajënaeya panenacaetuatsibojavaberena. Nexata panenacaetuatsijavata, bajarapajivi apo naneconitsi tsane Diosojavabelia. Itsajamatabëcuenejavaxi pematatsënëa, xua yabara paneyanijobame, abaxë apo pacatoyaquinaetsi mapabaxutotaje. Itsa pacataenatsi, pacatsipaebianatsi bajarajotalia.

12

Pacuenia Dioso pejumecovënëtsivi Espíritu Santo pejamatabëcueneta jamatabëcuene caëjëpaeyaexanatsi pexanaenexa pacuenia Dioso itorobaponatsi yabara pelivaisi

¹ Tajamonae, jitsipajë patacatoyaquinaejava paneyapëtaenexa mapacueneje. Caejivi canacujitsia Dioso pejumecovënëtsivi Espíritu Santo pejamatabëcueneta jamatabëcuene caëjëpaeyaexanaponatsi pexanaenexa pacuenia Dioso itorobaponatsi.

² Paxamë rabaja payapëtaneme mapacueneje. Pamatacabi abaxë Dioso apo pajumecovënëtsimë, dovathi pacayamaxëitojorobabiaba. Nexata panevajëtsinexa jumapecataeya pexanaenëanëjavabelia, panematabacabëta patonubenabiabame. Jumapecataeya raja pexanaenëanë, apo caëjëpaetsi itsacuenejavayo ata pexanaenexa. ³ Bajaraxuata pacatoyaquinatsi paneyapëtaenexa mapacueneje. Pajivi jumaitsi: “Jesús raja Dioso apo pexënato,” jai, bajarapajivi Espíritu Santo apo yajavaponaponatsi. Pajivi rajane jumaitsi: “Jesucristo raja pepo petuxanenë,” jai, bajara jane pajivi Espíritu Santo yajavaponaponatsi.

⁴ Daxita xua Dioso pejumecovënëtsivi Espíritu Santo pejamatabëcueneta jamatabëcuene caëjëpaeyaexanaponatsi, apo najëpae. Caenë canacujitsia saicayacuenia jamatabëcuene caëjëpaeyaexanaponatsi. Itsiata baitsi jane caenë Espíritu Santo pejamatabëcueneta jamatabëcuene caëjëpaeyaexanaponatsi daxita bajarapamonae. ⁵ Xua jivi Dioso tonacuenebavanapa, apo caevirianacuenebijava. Navita cajena xua jivi Dioso tonacuenebavanapa. Itsiata caenë Dioso pijacuene tonacuenebavanapa. ⁶ Dioso pijacuene petonacuenebivi, apo nacuenejëpae. Itsiata rabaja caenë Dioso daxita yavenonatsi petonacuenebavanapaenexa. ⁷ Caejivi canacujitsia, Dioso pejumecovënëtsivi, Espíritu Santo pejamatabëcueneta jamatabëcuene caëjëpaeyaexanatsi xua Dioso tonacuenebavanapaejitsia. Nexata bajarapamonae, caejivi canacujitsia, caëjëpatsi peyavenonaenexa bajarapajamatabëcueneta daxita Dioso pejumecovënëtsivijavabelia.

⁸ Itsamonae Dioso pejumecovënëtsivi, Espíritu Santo pejamatabëcueneta jamatabëcuene caëjëpaeyaexanaponatsi pemuxujiobinexa xaniavaetsia itsamonaejavabelia, xaniavaetsia pejinavanapaenexa Dioso pitabarata. Itsamonae pijinia jamatabëcuene caëjëpaeyaexanaponatsi jivi xaniavaetsia peyapëtaeyaexanaenexa pexaniajailivaisi, Jesús pelivaisi. Itsiata baitsi jane caeEspíritu Santo pejamatabëcueneta bajarapacuenia jamatabëcuene caëjëpaeyaexanaponatsi bajarapamonae. ⁹ Itsamonae pijinia jamatabëcuene caëjëpaeyaexanaponatsi penajamatabëcuenerutsinexa Diosojavabelia Dioso peyavenonabiabinexatsi daxitacuene yabara. Itsamonae pijinia jamatabëcuene caëjëpaeyaexanaponatsi pejamatejemayaexanaenexa piavitanevi. CaeEspíritu Santo rabaja pejamatabëcueneta bajarapacuenia jamatabëcuene caëjëpaeyaexanaponatsi.

¹⁰ Itsamonae pijinia jamatabëcuene caējëpaeyaexanaponatsi Dioso pesaëta pinijicuene pexanaejavanë pexanaenexa. Itsamonae pijinia jamatabëcuene caējëpaeyaexanaponatsi petsipaebinxeta itsamonaejavabelia pacuenia Dioso yapëtaeyaexanatsi. Itsamonae pijinia jamatabëcuene caējëpaeyaexanaponatsi pejumeyapëtaenexa itsajivi itsa tsipaebatsi penajumetsënëtsilivaisi dovathi pejamatabëcueneta. Jamatabëcuene caējëpaeyaexanatsinua pejumeyapëtaenexa itsajivi itsa tsipaebatsi pexaniajailivaisi Espíritu Santo pejamatabëcueneta. Itsamonae pijinia jamatabëcuene caējëpaeyaexanaponatsi pecuaicuaijainexa itsajivi ata mapanacuata apo pejumetaejumeta. Itsamonae pijinia jamatabëcuene caējëpaeyaexanaponatsi pejumetaenexa bajarapajume juya pejumevajunupaebaponaenexa itsamonaejavabelia. Nexata bajarapamonae tsipaebapona pajamatabëcuenelivaisi xainapona caelivaisi canacujitsia, palivaisianë tsipaebapona pamonaë cuaicuaijai itsajivi ata mapanacuata apo pejumetaejumeta. ¹¹ Itsiata baitsi jane caeEspíritu Santo pejamatabëcueneta jamatabëcuene caējëpaeyaexanaponatsi daxita bajarapamonae. Pacuenia Espíritu Santo jitsipa pejamatabëcuenecaējëpaeya exanaponaenexa Dioso pejumecovënëtsivijavabelia, bajarapacuenia Espíritu Santo caejivi canacujitsia jamatabëcuene caējëpaeyaexanaponatsi Dioso pejumecovënëtsivi.

Pacuenia daxita Dioso pejumecovënëtsivi caenë Cristo bepeperabëto yabara pelivaisi

¹² Pavi xainatsi vajaperabëtota, caevito canacujitsia pevënë xainapona. Vajavi xainatsi navitsiaya. Caevito canacujitsia saicaya pexanaejavanexa, xainapona. Itsiata baitsi jane caeperabëtotsireca. Bajara pijinia itsitsi daxita Dioso vajajumecovënëtsivi. Caejivitsi canacujitsia saicaya vajanacuenebijavanexa, Espíritu Santo pejamatabëcueneta nacajamatabëcuene caējëpaeyaexanaponaë ata, itsiata caenë Cristo bepeperabëtotsi. ¹³ Daxitatsi rabaja Dioso vajajumecovënëtsivi, itsa nacabautisaba, caeEspíritu Santo nacatsijamatabëca caebitsaëtonexatsi, caenë Cristo bepeperabëtonexatsi. Judíovi atatsi, apo judíovi atatsi, dajubicuenia vajanacacanjetsivi ata itsamonaejavabelia amoneya vajatonacuenebinexa, apo vajanacacanjetsivi ata itsamonaejavabelia, daxitatsi, caeEspíritu Santo nacatsijamatabëca.

¹⁴ Pavi jivi peperabëtuareca xaina, caevito canacujitsia pevënë xainapona. Nexata caevënëvito jivi apo xinae peperabëtuareca. ¹⁵ Nexata jivi petaxu itsa caējëpaejitsipatsi pecuaicuaijainexa, petaxu meta jumaitsi tsipae: “Apo pecobenë raja. Bajaraxuata maapo paperabëtoyajuvënëjavanëje,” jai meta tsipae. Itsiata baitsi jane cajena jemajai tsipae. Tsitecaeya bajarapaperabëtoyajuvënëjava tsipae. Pijumeta saya apo naexanae tsipae saicayajava. ¹⁶ Jivi pemuxuyoroto ata itsa caējëpaejitsipatsi pecuaicuaijainexa, pemuxuyoroto meta jumai tsipae: “Apo pitaxutonë raja. Bajaraxuata maapo paperabëtoyajuvënëjavanëje,” jai meta tsipae. Itsiata baitsi jane cajena jemajai tsipae. Tsitecaeya bajarapaperabëtoyajuvënëjava tsipae. Pijumeta saya apo naexanae tsipae saicayajava. ¹⁷ Jivi daxitanë peperabëtuareca itsa xinaejitsipa ëpitaxutonë, ¿detsa nexata pacuenia jumetaejitsipa? Acuenebi tsipae. Daxitanë peperabëtuareca itsa xinaejitsipa ëpemuxuyorotonë, ¿detsa nexata pacuenia tuxunijitsipa? Acuenebi tsipae. ¹⁸ Bajaraxuata jivi peperabëtuareca caevënëvito Dioso apo torutsi. Saicaya pevënë pexinaevitonë, caevito canacujitsia, jivi peperabëtuareca Dioso torutapona itsajota jitsipa petorutsinexa. ¹⁹ Itsa meta jivi peperabëtuareca xinaejitsipa caevitoreca, aithia meta tsipae. Nexata apo bejivitonë perabëto tsipae. ²⁰ Itsiata baitsi jane maitsije. Jivi peperabëtuareca navitsi axinae ata saicaya caevito canacujitsia pevënë pexinaevi, itsiata rabaja caeperabëtoreca.

²¹ Nexata jivi pitaxutobeje caējëpae atatsibeje tsipae pecuaicuaijainexabeje, itsiata acuenebi tsipae pejumaitsinexabeje pecobebejevavabelia: “Apo pacanamatavenonaetsibeje cajena,” pejainexabeje. Jivi pematabocotota ata caējëpae atatsi tsipae pecuaicuaijainexa, itsiata acuenebi tsipae pejumaitsinexa petaxubejevavabelia: “Apo

pacanamatavenonaetsibeje cajena,” pejainexa. Tsi paji daxita pavi xainatsi vajaperabētota, namatavenonatsi. ²² Bajaraxuata vajaperabētota pavi xainatsi, pavi itajara apo bevajanacatsitanamatavenonae, bajarapavi bitso pepacuene namatavenonatsi. ²³ Pavi xainatsi vajaperabētota, pavi vaxaitsi natanetsi beveliavi, bajarapavi banaperabēxatatatsi naitabētsiaya. Pavi naperabēcauratsi, naperabēcaranatsiaya banaperabēxatatatsi xaniavaetsia. ²⁴ Pavi apo naperabēcauratsi, apo naperabēxatatatsi xaniavaetsia. Bajarapacuenia vajaperabētota Dioso nacavimataropobiaruba. Nexata picani pavi bevelia vajanamatavenonaevi, bajarapavi itsiata naitabētsia banaperabēxatatatsi. Nexata bajarapacuenia bajarapavi ata bevajanamatavenonaevi tanetsi. ²⁵ Nexata pavi vajaperabētota xainatsi, apo navecuanatsanae. Nexata daxita pavi xainatsi vajaperabētota, namataenetsia naeveta. ²⁶ Vajaperabētota pavi xainatsi, caevito itsa atane, nexata daxita itsavijavabelia ata baatane. Caevito ata pijinia itsa naitabētsianaxatatatsi, nexata daxitaperabētotsireca bayajavabarēyatsi.

²⁷ Daxita rabaja paxamē Dioso papijajivimē. Nexata caenē Cristo beperabēto panaexaname. Pavi Cristo peperabētota xaina, bajara bepayajuvēnēvi Dioso pacatane pacaenēmē canacujitsia. ²⁸ Vajaperabētota pavi xainatsi, caevito canacujitsia saicaya xainapona pexanaponaevajanexa. Bajara pijinia itsi Dioso pejumecovēnētsivi. Caejivi canacujitsia Dioso itapetaponatsi saicaya caejivi canacujitsia pexanaponaenexa xua Dioso tocopatatsi. Copiata Dioso itapeta apóstolevinexa. Xuacujinae icatsia cotocaevi itapeta petsipaebivinexa itsamonaejavabelia pacuenia Dioso yapētaeyaexanatsi. Xuacujinae icatsia Dioso itapeta, pacuenia Dioso pejumelivaisibaxutota jumaitsi, peyapētaeyaexanaevinexa itsamonaejavabelia. Xuacujinae icatsia Dioso itapeta Dioso pesaēta pinijicuene pexanaejava pexanaponaevinexa. Xuacujinae Dioso itapeta piavitanevi pejamatejemayaexanaevinexa. Xuacujinae icatsia Dioso itapeta bepejiovivi peyavenonaevinexa. Xuacujinae icatsia Dioso itapeta Dioso pejumecovēnētsivi penamatacaitorobivinexa. Xuacujinae icatsia Dioso itapeta pecuaicuaijainexa itsajivi ata mapanacuata apo pejumetaejumeta. ²⁹ Nexata daxita apo ēapóstolevi. Nexata pijinia daxita apo ēpetsipaebivinexa itsamonaejavabelia pacuenia Dioso yapētaeyaexanatsi. Nexata pijinia daxita apo ēpeyapētaeyaexanaponaevinexa itsamonaejavabelia pacuenia Dioso pejumelivaisibaxutota jumaitsi. Nexata pijinia daxita Dioso pesaēta pinijicuene pexanaejava, apo ēpexanaponaevinexa. ³⁰ Nexata pijinia daxita apo ēpejamatejemayaexanaevinexa piavitanevi. Nexata pijinia daxita apo ēpecuaicuaijainexa itsajivi ata mapanacuata apo pejumetaejumeta. Nexata pijinia daxita apo ēpejumetaevinexa bajarapajume, juya itsamonaejavabelia pejumevajunupae-baponaenexa pajamatabēcuenelivaisi xainapona caelivaisi canacujitsia, palivaisianē tsipaebapona pamonae cuaicuaijai itsajivi ata mapanacuata apo pejumetaejumeta. ³¹ Bajarapacuenia itsamonae pejamatabēcuenecaējēpaeya exanaejavatsi matatoxenetsia panevajēnaeyabelia bitso pajitsipare Dioso papecajamatabēcuenecaējēpaeya exanaenexa, paneyavenonaenexa daxita Dioso pejumecovēnētsivijavabelia. Daxita baja xua yabara pacatsipaebatsi, daxita bajaraxua matatoxenetsia panevajēnaeyabelia bitso pajitsipare Dioso papecajamatabēcuenecaējēpaeya exanaenexa itsamonae ata paneasivanexa.

13

Pacuenia jivi namataenetsia benaasiva yabara pelivaisi

¹ Dioso nejamatabēcuenecaējēpaeya exanaejitsipa tacuaicuaijainexa itsajivi ata mapanacuata apo pejumetaejumeta. Angelevi ata pijajumeta cuaicuaijanē tsipae. Nexata jivi netaejitsipa ayaijamatabēcuenenēnē. Bajarapacuenia Dioso nejamatabēcuenecaējēpaeyaexanae ata tsipae, itsiata itsamonae ata itsa apo asivanē tsipae, nexata saya bajaraxua netoamatamobi tsipae Dioso pitabarata. Nexata palivaisi ata tsipaebaponaejitsipajē jivi pejumetaejumeta, apo nejumecovēnētsi

tsipae. Nexata pacuenia tambor; itsa jume, plato itsajivi penajumetsiaexanaejava namuxujematatsi, bajarapacuenia nenamuxujematsipa tatsipaebilivaisi. ² Dioso nejamatabëcuenecaëjêpaeya exanaejitsipa xaniavaetsia tayapëtaenexa Dioso pejumelivaisi, asaëyata tatsipaebinxaxa itsamonaejavabelia. Yapëtaejitsipajënuaxa daxita Dioso muetsia penajamatabëxainaelivaisianë ata. Yapëtaejitsipajënuaxa daxita Dioso pijacuene ata. Bajarapacuenia xaniavaetsia yapëtae atanë tsipae, itsiata itsamonae ata itsa apo asivanë tsipae, nexata saya bajaraxua netoamatamobi tsipae Dioso pitabarata. Dioso bitso tajumecovënëtsinë tsipae. Nexata itsa jumaitsinë tsipae: “Dioso baja cajena mapatsutoxanetoje nevecuatixitsiana,” itsa janë tsipae, nexata Dioso nevecuatixitsipa. Bajarapacuenia exanae atanë tsipae, itsiata itsa apo asivanë tsipae itsamonae ata, nexata saya bajaraxua netoamatamobi tsipae Dioso pitabarata. ³ Rajutaponaejitsipajë bepejiobivijavabelia daxita taxainaejavaximi. Nacaevetsipajënuaxa tanetajuitsinexa, tanebeyaxuabinxaxa ata, Dioso pejumelivaisi yabara. Bajarapacuenia nacaevetsi atanë tsipae, itsiata itsa apo asivanë tsipae itsamonae ata, nexata saya bajaraxua netoamatamobi tsipae Dioso pitabarata.

⁴ Majamatabëcueneitsije pajivi asiva itsamonae ata. Bajarapajivi bajayajebi itsacueniabi atatsi, ajamatabëcuenesaë bajarapamonaejavabelia. Pajivi asiva itsamonae ata, itaxutotsoniatane bajarapamonae. Pajivi asiva itsamonae ata, apo cuenecaëbi bajarapamonae. Pajivi asiva itsamonae ata, “Xanë ayaijamatabëcuenenënë bajarapamonae matatoxenetsia,” apo jai itsajivijavabelia. ⁵ Pajivi asiva itsamonae ata, bajarapajivi apo ataejitsibi itsajivi ata. Apo exanae itsacuenia ata piurabinxaxa bajarapamonaejavabelia. Pajivi asiva itsamonae ata, daxita xua xanepana, ëponënexa apo natonajamatabëxainae. Pajivi asiva itsamonae ata, bepijia apo anaepanae bajarapamonaejavabelia. Pajivi asiva itsamonae ata, itsacueniabi atatsi, apo jamatabësitecae juya pecuencanaviatsinexa bajarapamonaejavabelia. ⁶ Pajivi asiva itsamonae ata, bajarapamonae itsa tocopiapatatsi pibisiacuene, bajarapajivi apo sivajamatabëcuenebarëya bajarapamonae pibisiacuene petocopiapatsijavatsi yabara. Biji rajane pajivi asiva itsamonae ata, itsa bajarapamonae Dioso pejitsipaecuenia exanavanapa, bajarapajivi sivajamatabëcuenebarëya bajarapamonae Dioso pejitsipaecuenia pexanavanapaejava yabara. ⁷ Pajivi asiva itsamonae ata, bajarapajivi piasivaviyajuvënëvi itsacueniabi atatsi, najamatabëcuenesaëta pevajënaeyabelia piasivajava bajarapamonae. Pajivi asiva itsamonae ata, bajarapajivi apo peyapëtaevi ata, sivajamatabëjumaitsi mapacueniaje: “Maraeta pamonaeta pexaniajamatabëcuenevije,” sivajamatabëjai. Pajivi asiva itsamonae ata, bajarapajivi pibisiacuene pexanaevi ata, sivajamatabëjumaitsi mapacueniaje: “Maraeta pamonaeta itsamatacabi pexaniacuene pexanaevi tsaneje,” sivajamatabëjai. Pajivi asiva itsamonae ata, bajarapajivi tsiayapëbeje atatsi daxitacuene yabara, apo copatsi piasivajava itsamonae ata.

⁸ Itsamonae Espíritu Santo pejamatabëcueneta jamatabëcuene caëjêpaeyaexanaponatsi petsipaebinxaxa itsamonaejavabelia pacuenia Dioso yapëtaeyaexanatsi. Itsamonae pijinia jamatabëcuene caëjêpaeyaexanaponatsi pecuaicuaijainexa itsajivi ata mapanacuatata apo pejumetaejumeta. Itsamonae pijinia jamatabëcuene caëjêpaeyaexanaponatsi pacuenia Dioso pejumelivaisibaxutota jumaitsi peyapëtaeyaexanaenexa itsamonaejavabelia. Daxita bajarapacuenia, xua Dioso Espíritu Santo pejamatabëcueneta Dioso pejumecovënëtsivi jamatabëcuenecaëjêpaeyaexanatsi, itsamatacabi tocopiarucaenatsi. Itsiata baitsi jane jivi namataenetsia penasivacuene, apo copiarucaeta tsane. ⁹ Dioso nacajamatabëcuene caëjêpaeyaexanaeta vajayapëtaenexa, abaxë tsiquirijavayo yapëtaeponatsi. Palivaisi ata tsipaebatsi itsamonaejavabelia Dioso pejumelivaisi, apo ayaijava. ¹⁰ Pamatacabi icatsia Cristo patsianica, Espíritu Santo pejamatabëcueneta vajanacajamatabëcuene caëjêpaeyaexanaejamatabëcuenemi, nacatocopiarucaena. Nexata jane baja bajarapamatacabi vajatuxanenë xaniavaetsia nacayapëtaeyaexanaena

daxitacuene Dioso pijacuene.

¹¹ Pamatacabi abaxë pejevaxinëyonë, cuaicuaijanë pejevaxinëyonëcuenia. Najamatabëxainajënuua pejevaxinëyonëcuenia. Jumetanijinua abaxë pejevaxinëyonëcuenia. Itsa baja tanaveretsinë, pejevaxijamatabëcuenemi baja copatajê.
¹² Bajara pijinia itsinë Dioso tajamatabëcueneyapëtaejava. Tsiquirijavayo abaxë Dioso jamatabëcueneyapëtaniji. Pacuenia pitatsëcënaetsaxuta itsa naitatanetsi, apo nacatonapebetsi, bajarajamatabëcueneitsinë Dioso tajamatabëcueneyapëtaejava. Abaxë saya tsiquirijavayo Dioso jamatabëcueneyapëtaniji. Itsiata baitsi jane itsamatacabi Dioso xaniavaetsia jamatabëcueneyapëtaenajê. Pacuenia aeconoxae Dioso xaniavaetsia nejamatabëcueneyapëtane, bajara pijinia pacuenia xanë ata itsamatacabi xaniavaetsia Dioso jamatabëcueneyapëtaenajê.
¹³ Apo vereverecae daxitamatacabi vaxaitsi vajanajamatabëcuenecopatsijava Diosojavabelia. Vaxaitsi evetavanapatsinua Dioso vajanacacapanepaenexa. Nexata vajanajamatabëcuenecopatsijava Diosojavabelia, vajevetavanapaejava ata Dioso vajanacacapanepaenexa, bajaraxuabeje matatoxenetsia bitso xanepana vajaasivajava itsamonae ata.

14

Pacuenia Espíritu Santo pejamatabëcueneta itsamonae cuaicuaijiaiyaxanatsi itsajivi ata mapanacuata apo pejumetaejumeta yabara pelivaisi

¹ Panajamatabëcueneverere panevajënaeyabelia panecasaëtsavanapaenexa itsamonae ata paneasivajava pacuenia panijacuata panaasivamë. Panatojitsiparenuua xua Dioso paca-tojitsipa papecajamatabëcuene caëjêpaeyaexanaenexa Espíritu Santo pejamatabëcueneta. Bitso jane panatojitsipare palivaisi Dioso payapëtaeyaexana panetsipaebinexa itsamonaejavabelia. Nexata patsipaebianame palivaisi Dioso pacayapëtaeyaexana.

² Itsamonae Espíritu Santo pejamatabëcueneta jamatabëcuene caëjêpaeyaexanaponatsi pecuaicuaijainexa itsajivi ata mapanacuata apo pejumetaejumeta. Nexata bajarapajivi itsajivi ata mapanacuata apo pejumetaejumeta livaisi itsa paeba, tsipaeba Diosojavabelia. Nexata Dioso jumetanetsi palivaisi paeba. Bajarapajivi apo tsipaebi jivijavabelia. Nexata bajarapajivi livaisi itsa paeba itsajivi ata mapanacuata apo pejumetaejumeta, jivi jumetae atatsi, itsiata itsajivi ata apo jumetaetsi palivaisi paeba. Tsiipaji itsajivi ata mapanacuata apo pejumetaejumeta paeba. Bajarapajivi Espíritu Santo pejamatabëcueneta livaisi paebiaexanatsi. Palivaisi Espíritu Santo bëpënëa xainaponapona, paebiaexanatsi.

³ Itsamonae pijinia Espíritu Santo pejamatabëcueneta jamatabëcuene caëjêpaeyaexanatsi jivi pejumetaejumeta petsipaebinexa palivaisi Dioso yapëtaeyaexanatsi. Nexata bajarapajivi tsipaeba jivi pejumetaejumeta pejumetaenexatsi paivaisi tsipaeba. Nexata jivi pejumetaejumeta bajarapalivaisi bajarapajivi itsa tsipaeba, itsamonae pevajënaeuabelia sivaajamatabëcuenesaë tsaponae Dioso pejumecovënëtavanapaejava. Bajarapajivi jamatabëcuenebabatanua bitso penajamatabëxainaevi.

⁴ Pajivi Espíritu Santo pejamatabëcueneta jamatabëcuene caëjêpaeyaexanatsi livaisi pepaebinexa itsajivi ata mapanacuata apo pejumetaejumeta, bajarapajivi pijacuata jamatabëcuenevitsabapona Diosojavabelia bajarapalivaisita. Itsiata baitsi jane pajivi jamatabëcuene caëjêpaeyaexanatsi jivi pejumetaejumeta petsipaebinexa palivaisi Dioso yapëtaeyaexanatsi, bajarapajivi petsipaebilivaisita Diosojavabelia jamatabëcuenevitsabiaexanapona daxita Dioso pejumecovënëtsivi.

⁵ Pacatojitsipatsi picani daxita paxamë Espíritu Santo pejamatabëcueneta papecajamatabëcuene caëjêpaeyaexanaenexa panecuaicuaijainexa itsajivi ata mapanacuata apo pejumetaejumeta. Itsiata rajane bajaraxua matatoxenetsia bitso pacatojitsipatsi papecajamatabëcuene caëjêpaeyaexanaenexa jivi pejumetaejumeta panetsipaebinexa palivaisi Dioso pacayapëtaeyaexana. Pajivi tsipaebapona jivi pejumetaejumeta palivaisi

Dioso yapëtaeyaexanatsi, bajarapajivi bitso jamatabëcueneavenona itsamonae Dioso pejumecovënëtsivi. Pajivi livaisi tsipaeba itsajivi ata mapanacuata apo pejumetaejumeta, bajarapajivi apo jumetaetsi palivaisi tsipaeba. Nexata bajarapajivi Dioso pejumecovënëtsivi apo jamatabëcuenevitsabiaexanae Diosojavabelia. Itsiata bajarapajivi itsa caëjëpatsinua jivi pejumetaejumeta penajumevajunupaebinexa pejumetaenexatsi palivaisi tsipaeba, nexata bajarapajivi Dioso pejumecovënëtsivi jamatabëcuenevitsabiaexana Diosojavabelia. ⁶ Bajaraxuata xanë ata pijinia paxamëjavata itsa patsipajë livaisi patacatsipaebinexa apo panejumetaejumeta, nexata apo panejumetaemë tsipae palivaisi pacatsipaebijitsipatsi. Nexata apo pacajamatabëcuene vitsabiaexanae tsipaetsi Diosojavabelia. Itsiata baitsi jane itsa patsipajë panejumetaejumeta patacatsipaebinexa pacuenia Dioso bemajitsinaebota netsitajëta, nexata pacajamatabëcuene vitsabiaexanaejitsipatsi Diosojavabelia. Itsa pacatsipaebijitsipatsinua pexaniajailivaisi, nexata pacajamatabëcuene vitsabiaexanaejitsipatsi Diosojavabelia. Palivaisi Dioso neyapëtaeyaexana, palivaisi ata Dioso jumaiti, pexaniajailivaisi, itsa pacatsipaebijitsipatsi, nexata pacajamatabëcuene vitsabiaexanaejitsipatsi Diosojavabelia.

⁷ Pamonae Espiritu Santo pejamatabëcueneta jamatabëcuenecaëjëpaeyaexanatsi pecuaicuaijainexa itsajivi ata mapanacuata apo pejumetaejumeta, bajarapamonae livaisi tsipaebi ata, itsajivi ata apo jumetaetsi palivaisi tsipaeba. Bajara pijinia itsi tsipae penaxëanaejavanë peracatsivi ata xaniavaetsia itsa apo racatsi tsipae. Flauta piobinë, bijiata itsa obijitsipa, arpa pijinia peracatsinë ata, bijiata itsa racatsipa, nexata itsajivi ata apo vajiypëtaetsibeje tsipae, pavaji picani naxëanaeyaexanabeje. Flauta piobijava, arpa ata peracatsijava, amatamobi tsipae.

⁸ Bajara pijinia itsi tsipae vajabitsaë trompeta piobijava ata. Vajabitsaë itsa ponaejitsia penavajabitsaëtsinexa, trompeta baoba penajunatsinexa. Nexata trompeta piobijava vajabitsaë itsa jumetane, bamuxunaothopa penacaetuatsinexa. Nexata trompeta piobinë xaniavaetsia itsa apo obi tsipae, nexata trompeta piobijava vajabitsaë jumetae ata tsipae, apo muxunaothopae tsipae penacaetuatsinexa penavajabitsaëtsinexa. ⁹ Bajara pijinia paitsimë tsipae paxamë ata. Itsajivi ata mapanacuata apo pejumetaejumeta itsa patsipaebijitsipame itsamonaejavabelia palivaisi Dioso pacayapëtaeyaexana, nexata apo pacajumetae tsipae palivaisi patsipaebame. ¡Nexata saya pajumenaxuabijitsipame bajarapalivaisi panetsipaebijava!

¹⁰ Daxitavirijamevi bitso navita mapanacuajavaje. Caevirijamevi canacujitsia yapëtaepona xaniavaetsia pijajume. ¹¹ Itsiata baitsi jane tajanacuapijinë ata itsa nebarëcuaicuaijai tsipae itsaviriavi pijajumeta, apo tajumetaejumeta, nexata besaicaya nacuapijinë taejitsipajë bajaraponë. Bajaraponë ata pijinia itsaviriavi pijumeta, apo pejumetaejumeta, itsa barëcuaicuaijanë tsipae, besaicaya nacuapijinënë netaejitsipa.

¹² Itsa pajitsipame Dioso papecajamatabëcuene caëjëpaeyaexanaenexa daxitacuene, nexata panatovajëre Diosojavabelia papecajamatabëcuene caëjëpaeyaexanaenexa. Itsiata baitsi jane bitso panatojitsipare Dioso papecajamatabëcuene caëjëpaeyaexanaenexa itsamonaejavabelia panetsipaebinexa palivaisi Dioso pacayapëtaeyaexana. Nexata Dioso pejumecovënëtsivi itsa pacajumetane palivaisi patsipaebame, ajamatabëcuenesaë tsane Dioso pejumecovënëtsijava.

¹³ Nexata pajivi Espiritu Santo pejamatabëcueneta jamatabëcuenecaëjëpaeyaexanatsi jivijavabelia livaisi petsipaebinexa itsajivi ata mapanacuata apo pejumetaejumeta, bajarapajivi bevajëta Diosojavabelia pejamatabëcuenecaëjëpaeya exanaenexatsinua jivi pejumetaejumeta penajumevajunupaebinexa bajarapalivaisi. Nexata bajarapajivi Dioso itsa jamatabëcuenecaëjëpaeyaexanatsi jivi pejumetaejumeta penajumevajunupaebinexa daxitajivijavabelia, itsa najumevajunupaebiana, yapëtaeyaexanaena palivaisi tsipaeba. ¹⁴ Xanë ata apo tajumetaejumeta vajëtsi atanë tajamatabëethëtojavavetsina, itsiata apo yapëtaenë xua vajëtajë Diosojavabelia. ¹⁵ Mara pacuenia tavajënaeyabelia

xanë exanaenajëje. Vajëtsianajë Diosojavabelia anijaviriajumetabeje. Vajëtsianajë apo tajumetaejumeta. Vajëtsianajënuu tajajumeta ata daxitajivi tanejumetaenexa. Tanaxëanaejavata ata pijinia bajarapacuenia exanaenajë. Naxëanaenajë apo tajumetaejumeta. Naxëanaenajënuu tajajumeta ata daxitajivi tanejumetaenexa. ¹⁶ Pexaniacuene Dioso papecatoexanaejava yabara itsa pavajëtsipame Diosojavabelia itsajivi ata mapanacuata apo pejumetaejumeta, nexata pajivi pacajumetaeyeca, apo pacajumetae tsipae xua yabara pavajëtsipame Diosojavabelia. Nexata bajarapajivi toacuenebitsi tsipae papecayavenonaeyavajëtsinexa Diosojavabelia. ¹⁷ Paxamë picani Dioso pexaniacuene papecatoexanaexae, Diosojavabelia pavajëtsipame xaniavaetsia. Itsiata baitsi jane itsajivi ata mapanacuata apo pejumetaejumeta panevajëtsixae Diosojavabelia, pajivi pacajumetaeyeca, ajamatabëcuene covëbi tsipae. Tsipaji apo pacajumetae tsipae xua yabara pavajëtsipame. Nexata apo pacamuxunajamatabëcuenevitsabi tsipae Diosojavabelia. ¹⁸ Dioso baja cajena xanë nejamatabëcuene caëjëpaeyaexana tacuaicuaijainexa itsajivi ata mapanacuata apo pejumetaejumeta. Bajarapacuenia cuaicuaijanë itsajivi ata mapanacuata apo pejumetaejumeta daxita paxamë matatoxenetsia. Bajarapacuenia Dioso tanejamatabëcuene caëjëpaeyaexanaexae, jumaitsinë tsabiabi Diosojavabelia: “Xanepana rabaja. Pexaniacuene bitso netoexaname,” janë tsabiabi Diosojavabelia. ¹⁹ Itsiata baitsi jane Dioso pejumecovënëtsivi penacaetuatsijavata, ayailivaisi tsipaebi atanë tsipae itsajivi ata mapanacuata apo pejumetaejumeta, bajarapamonae apo nejumetae tsipae palivaisi tsipaebajë. Bajaraxuata Dioso pejumecovënëtsivi penacaetuatsijavata, apo jitsipaenë tatsipaebinexa itsajivi ata mapanacuata apo pejumetaejumeta. Biji rajane jitsipajë bajarapamonae pejumetaejumeta tatsipaebinexa saya tsiquirilivaisiyo ata tanejumetaenexa, palivaisi tsipaebajë.

²⁰ Tajamonae, pacuenia pejevaxi bajamatabëcueneitsi, pëtsa bajara pajamatabëcueneitsimë. Xaniavaetsia panajamatabëxainaename. Pacuenia penaveretsivi bajamatabëcueneitsi, bajara pajamatabëcueneitsimë tsane. Itsiata baitsi jane pibisiacuene paneexanaeyaniva, bepapejevaxijiviximë panataename. Tsipaji pejevaxijivixi abaxë bitso apo najamatabëxainae pibisiacuene pexanaenexa. ²¹ Dioso pejumelivaisibaxutota tajëvelia jumaitsi mapacueniaje: “Itsamonae cuaicuaijaiyaexanaenajë itsajivi ata mapanacuata apo pejumetaejumeta. Nexata bajarapamonae tajumelivaisi netotsipaebiana tajajivijavabelia. Itsiata baitsi jane tajajivi apo jumecovënëtsi tsane tajumelivaisi,” jai tajëvelia Dioso pejumelivaisibaxutota judíovi Dioso apo pejumecovënëtsijavanexa yabara. ²² Nexata Dioso pejumecovënëtsivi Espíritu Santo pejamatabëcueneta jamatabëcuene caëjëpaeyaexanaponaenatsi pecuaicuaijainexa itsajivi ata mapanacuata apo pejumetaejumeta. Nexata Dioso apo pejumecovënëtsivi itsa taena bajarapacuenia, canaëjëtsiana Diosojavabelia. Canaëjëtsiananua bajarapamonae penaneconitavanapaejava Diosojavabelia. Dioso pejumecovënëtsivi jamatabëcuene caëjëpaeyaexanaenatsi petsipaebinexa itsamonaejavabelia palivaisi Dioso yapëtaeyaexanatsi. Nexata itsamonae Dioso pejumecovënëtsivi xaniavaetsia pejumetaexae palivaisi tsipaebatsi, canaëjëtsiana pepacuenia Dioso pitaxutotsoniatavatsi pecapanepaenexatsi pijaneconivecua. ²³ Nexata pijinia itsamonae Dioso apo pejumecovënëtsivi napatsipa panenacaetuatsijavata. Nexata bajarajota paxamë livaisi patsipaebijitsipame itsajivi ata mapanacuata apo pejumetaejumeta. Nexata pamonae penapatsivi apo papecajumetaexae palivaisi patsipaebame itsajivi ata mapanacuata apo pejumetaejumeta, nexata pacabarajamatabëjumai tsipae: “Mara pamonaeye saya pematajemabivitsije,” pacabarajamatabëjai tsipae. Tsipaji apo pacajumetae tsipae palivaisi patsipaebame. ²⁴ Jivi pejumetaejumeta panetsipaebijavata palivaisi Dioso pacayapëtaeyaexana, Dioso apo pejumecovënëtsijivi napatsipa. Nexata bajarapajivi papecajumetaexae palivaisi patsipaebame, najamatabëxainaeyajitsipa. Nayapëtaejitsipana bajarapajivi penaneconitsijava Diosojavabelia. Nexata pijaneconi

bitso yanajamatabëxainaejitsipa Diosojavabelia. ²⁵ Papecanamuxunaevetsijavata, bajarapajivi muetsia penajamatabëxainabiabijava najamatabëcueneyapëtaejitsipa. Nexata nayapëtaejitsipa penaneconitsijava Diosojavabelia. Nexata pematabacabëta nucaeijitsipa. Vajëtsipa Diosojavabelia. Pevajëtsijavata jumai tsipae Diosojavabelia: “Diosomë, bitso baja cajena ayaijamatabëcuenenëmë,” jai tsipae Diosojavabelia. Nexata paxamëjavaberena ata bajarapajivi pacajumaitsi tsipae: “Pepacuene majotaje paxamë Dioso pacayajavaponapona,” pacajai tsipae.

Pacuenia Dioso pejumecovënëtsivi muxujiobatsi peyapëtaenexa pacuenia exanaejitsia culto pexanaejavata yabara pelivaisi

²⁶ Tajamonae, itsa panacaetuatame Dioso pejumelivaisi yabara, mapacuenia paexanaenameje. Itsamonae naxëanaena vaji. Itsamonae najamatabëcueneveretsiana jivi pejumetaejumeta livaisi petsipaebinexa daxitajivijavabelia. Itsamonae najamatabëcueneveretsiana palivaisi Dioso yapëtaeyaexanatsi juya petsipaebinexa itsamonaejavabelia. Itsamonae najamatabëcueneveretsiana livaisi petsipaebinexa itsajivi ata mapanacuata apo pejumetaejumeta. Itsamonae pijinia najamatabëcueneveretsiana jivi pejumetaejumeta juya pejumevajunupaebaponaenexa daxitajivijavabelia, palivaisi tsipaeba itsajivi ata mapanacuata apo pejumetaejumeta pecuaicuaijivi. Bajarapacuenia paexanaename panenacaetuatsijavata daxita Dioso pejumecovënëtsivi pevajënaeyabelia pejamatabëcuenevitsabaponaenexa Dioso pejumecovënëtsijava. ²⁷ Panenacaetuatsijavata, jivijavabelia itsamonae livaisi itsa tsipaebijitsia itsajivi ata mapanacuata apo pejumetaejumeta, nexata Dioso tocopatatsi petsipaebinexa anijajivibeje, acueyabi pajivibeje ata. Baitsi pejumevajunupaebinxatsi palivaisi tsipaeba itsajivi ata mapanacuata apo pejumetaejumeta. Itsiata baitsi jane caecuenia acueyabi pajivibeje apo benajuatsipaebi. Nexata pajivi jivijavabelia livaisi tsipaebijitsia itsajivi ata mapanacuata apo pejumetaejumeta, bajarapajivi copiata betsipaeba. Nexata pijinia pajivi jumevajunupaebaponaejitsia jivi pejumetaejumeta, bajarapajivi cotocaevi bejumevajunupaebapona jivijavabelia. Bajarapacuenia itsamonae jivijavabelia livaisi itsa tsipaeba itsajivi ata mapanacuata apo pejumetaejumeta, nexata juya itsajivi jivi pejumetaejumeta bejumevajunupaebapona daxitajivijavabelia peyapëtaenexa palivaisi tsipaeba itsajivi ata mapanacuata apo pejumetaejumeta. ²⁸ Nexata itsa ajibi jivi pejumetaejumeta pejumevajunupaebijivinxatsi daxitajivi peyapëtaenexa palivaisi tsipaeba itsajivi ata mapanacuata apo pejumetaejumeta, nexata panenacaetuatsijavata livaisi apo betsipaebi itsajivi ata mapanacuata apo pejumetaejumeta. Bajarapamonae moya beena. Bëpënëa saya pejamatabëëthëtota becuaicuaijai tsenae itsajivi ata mapanacuata apo pejumetaejumeta. Diosojavabelia ata pijinia bajarapacuenia bëpënëa pejamatabëëthëtota bevajëtena. ²⁹ Bajara pijinia pacuenia Dioso tocopata itsamonae ata jivijavabelia petsipaebinexa palivaisi Dioso yapëtaeyaexanatsi. Bajarapamonae ata Dioso tocopata jivijavabelia petsipaebinexa anijajivibeje, acueyabi pajivibeje ata. Nexata petsipaebijavata, itsamonae xaniavaetsia benamuxunaevetena pejumeyapëtaenexa itsa xaniajai Dioso pejamatabëcueneta bajarapamonae tsipaebatsi bajarapalivaisi. ³⁰ Nexata bajarapamonae livaisi petsipaebaponaejavata, bajarajota penamuxunaevetecaeenë Dioso pejamatabëcueneta livaisi itsa yapëtaeyaexanatsi, nexata ponë jivijavabelia livaisi tsipaebapona, benajumecopata baja. Nexata ponë penamuxunaevetecaejavata, Dioso livaisi yapëtaeyaexanatsi, bajaraponë juya daxitajivijavabelia betsipaeba palivaisi Dioso yapëtaeyaexanatsi penamuxunaevetecaejavata. ³¹ Bajarapacuenia daxita paxamë Dioso pejumelivaisi papecayapëtaeyaexanaevi Dioso pacatocopata jivijavabelia livaisi panetsipaebinexa pacaiejivimë tsaponae. Bajarapacuenia Dioso pacatocopata daxitajivi peyapëtaenexa Dioso papecayapëtaeyaexanaelivaisi, pesivaajamatabëcuenesaë tsaponaeanaxana Dioso pejumecovënëtsijava panetsipaebilivaisita. ³² Pamonae tsipaeba daxitajivijavabelia palivaisi Dioso yapëtaeyaexanatsi, bajarapamonae yapëtane paepatota

najumecopatsijitsia. Tsipaji Espiritu Santo pejamatabëëthëtota itorobatsi paepatota najumecopatsijitsia. Nexata itsa najumecopata bajaraponë, juya itsanë petsipaebinexa daxitajivijavabelia. ³³ Dioso apo tocopatsi caecuenia anijajivibeje jivijavabelia livaisi penajuatsipaebinexa. Tsipaji caecuenia anijajivibeje livaisi itsa najuatsipaebijitsipabeje, xaniavaetsia apo jumetaetsi tsipae penajuanacaetuatsivi. Bajaraxuata Dioso tocopata jivijavabelia livaisi petsipaebinexa caejivi tsaponae.

Pacatsipaebijitsiatsi pacuenia exanabiaba daxita Dioso pejumecovënëtsivi penacaetuatsijavata. ³⁴ Petiriavi moya beena Dioso pejumecovënëtsivi penacaetuatsijavata. Tsipaji petiriavi Dioso apo tocopatsitsi Dioso pejumecovënëtsivi penacaetuatsijavata pecuaicuaijaitseenaenexa. Petiriavi pamonajivi bejumecovënëtsiajinavanapa pacuenia Dioso pejumelivaisibaxutota itorobatsi. ³⁵ Petiriva itsa jamatabëyanijoba itsalivaisiyo, nexata bota beyanijoba pamonajavabelia. Piauracuene exanaejitsipa Dioso pejumecovënëtsivi penacaetuatsijavata petiriva itsa cuaicuaijai tsecae tsipae.

³⁶ Pëtsa pacopatame Dioso pejumecovënëtsivi penacaetuatsijavata petiriva pecuaicuaijaitsecaenexa. Tsipaji itsatomaranëjava Dioso pejumecovënëtsivi bajarapacuenia apo exanae. Pëtsa bepaayaijamatabëcuenevimë panataneme bajarapacuenia paneexanavanapaenexa. ³⁷ Itsamonae paxamëyajuvënëvi natane bepetsipaebarsivivixexa daxitajivijavabelia palivaisi Dioso yapëtaeyaexanatsi. Itsamonae natane Espiritu Santo pejamatabëcueneta bepejamatabëcuene caëjëpaeyaexanaevitsi pacuenia Dioso jitsipa. Nexata bajarapamonae itsa xaniajai Espiritu Santo yajavajinavanapa, beyapëtane picani patacatoyaquinaelivaisi, mapalivaisije vajatuxanenë pitorobilivaisi jivi pejumecovënëtsinexa. ³⁸ Itsiata baitsi jane pajivi apo namuxunaevetsi pejumecovënëtsinexa mapalivaisije, pëtsa pajumecovënëtame bajarapajivi penavajunupaebijava Dioso pejamatabëcuenecaëjëpaeya exanaejavatsi.

³⁹ Bajaraxuata asaëyata panatojitsipare Dioso papecajamatabëcuene caëjëpaeyaexanaenexa panetsipaebinexa daxitajivijavabelia palivaisi Dioso pacayapëtaeyaexana. Itsiata baitsi jane pëtsa pajumeitavetame itsamonae itsa cuaicuaijai itsajivi ata mapanacuata apo pejumetaejumeta. ⁴⁰ Nexata panenacaetuatsijavata, itsa patsipaebame daxitajivijavabelia palivaisi Dioso pacayapëtaeyaexana, xaniavaetsia pacaenëmë tsaponae patsipaebabianame.

15

Jesucristo petëpaecujinae Dioso icatsia piasaëyaexanaejavatsi yabara pelivaisi

¹ Tajamonae, pacatojitsipatsi panenajamatabënapitsinexa palivaisi baja imata pacatsipaebatsi. Bajarapalivaisi, pexanialivaisi, papecacapanepelivaisinexa panijaneconivecua. Pajumecovënëtame baja bajarapalivaisi. Nexata panevajënaeyabelia asaëya pajumecovënëtavanapaenename bajarapalivaisi. ² Panevajënaeyabelia itsa pajumecovënëtavanapaenename bajarapalivaisi, nexata pibisiacuene paneexanaeneconivecua Dioso pacacapanepaena. Matacabi apo pevereverecaejava paxainaenename. Itsiata baitsi jane copiaya panejamatabëëthëtöjavavetsina itsa apo pajumecovënëtsimë tsane bajarapalivaisi, nexata Dioso apo pacacapanepae tsane.

³ Copiaya baja cajena pacatsipaebatsi palivaisi vajatuxanenë copiaya netsipaeba. Pacatsipaebatsi baja cajena Cristo vajanacasivatëpaejava pibisiacuene vajaexanaeneconi yabara. Cristo baja cajena nacasivatëpa pacuenia Dioso pejumelivaisibaxutota tajëvelia jumaitsi. ⁴ Nexata Cristo petëpaenë pemëthëtsicujinaetsi, acueyabi matacabita, icatsia Dioso asaëyaexanatsi. Bajarapacuenia Cristo Dioso icatsia asaëyaexanatsi pacuenia baja cajena tajëvelia Dioso pejumelivaisibaxutota jumaitsi Cristo yabara. ⁵ Nexata Cristo Dioso piasaëyaexanaecujinaetsi, copiaya Pedrojavabelia tsitanaitajëta. Bajaraxuacujinae Jesús pijajivi, doce ponëbeje apóstolevijavabelia, tsitanaitajëta. ⁶ Bajaraxuacujinae Jesús pijajivi quinientos pematatsënëa

pajivibejejavabelia penacaetuatsijavata, tsitanaitajëta. Bajarapamonaeyajuvënëvimi Jesús petaevitsi itsamonae baja tēpae ata, itsiata ayaibitsaëtoxaneto abaxë asaë tsavanapae. ⁷ Bajaraxuacujinae icatsia Santiagojavabelia Jesús tsitanaitajëta. Bajaraxuacujinae icatsia daxita apóstolevijavabelia Jesús tsitanaitajëta.

⁸ Xanë daxita apóstolevivecua bexëjavaberena apóstolenënë nexana. Nexata pacuenia pexi pexainaejivi cotocaevi pexainaenacueto itsi, bajarapacuenia nataniji bajarapamonaevēcua. Itsiata baitsi jane daxita Jesús pijajivijavabelia petsitanaitajëtsicujinae, xanëjavaberena ata Jesús netsitanaitajëta tataenexa. ⁹ Daxita apóstolevivecua xanë bevelijamatabëcuenenënë nataniji. Tsipaji abaxë xanë Jesús itsa apo jumecovënëtsinë, Jesús pijajivi bejibiaexanabiabajë. Bajaraxuata: “Apóstolenë,” tanejainexa ata, auranë tsabiabi. ¹⁰ Itsiata baitsi jane Dioso taneitaxutotsoniataexae, nitapeta baja apóstolenënexanë. Xanëjavaberena Dioso taneitaxutotsoniataejava, apo nacueratsi. Biji rajane xanë daxita itsaapóstolevi matatoxenetsia bitso Dioso tonacuenebaponaponajë. Itsiata xanë tajamatabëcuenesaëta apo tonacuenebaponaponaenë. Dioso raja pesaëta tonacuenebaponaponajë. Nexata Dioso pesaëta nejamatabëcueneyavenonapona asaëya tatonacuenebaponaponaenexa. ¹¹ Xanë meta bitso Dioso tonacuenebaponaponajë itsamonae apóstolevi matatoxenetsia. Itsa jume, nexata meta bajarapamona bitso Dioso tonacuenebavanapa xanë matatoxenetsia. Itsiata baitsi jane bajarapacueneyabara apo canaëjëtsinë. Bitso rajane pacatojitsipatsi paneyapëtaenexa palivaisi baja pacatsipaebatsi, pexanialivaisi, Jesucristo pelivaisi. Nexata baja bajarapalivaisi pajumecovënëtavanapame.

Pacuenia itsamatacabi Dioso icatsia asaëyaexanaejitsia petëpaevimi yabara pelivaisi

¹² Pacatsipaebatsi baja cajena Cristo petëpaeucujinae Dioso icatsia piasaëyaexanaejavatsi. Itsiata baitsi jane itsamonae paxamëyajuvënëvi jamatabëcuenenavëxaniabiaya jumai tsabiabi: “Jivi rabaja petëpaeucujinae ajibi icatsia piasaëjavanexa,” jai tsabiabi. Nexata bajarapacuenia apo bejumaitsi bajarapamona. ¹³ Tsipaji peneta itsa pepacuene ajibi tsipae petëpaevi icatsia piasaëjavanexa, nexata baja Cristo ata icatsia Dioso apo asaëyaexanaetsi tsipae petëpaeucujinae. ¹⁴ Itsa baja Cristo petëpaeucujinae icatsia Dioso apo asaëyaexanaetsi tsipae, nexata palivaisianë pacatsipaebavanapatsi, amatamobi tsipae. Paxamë ata panenajamatabëcuenecopatsijava Cristojavabelia Dioso papecacapanepaenexa panijaneconivecua, amatamobi tsipae. ¹⁵ Pematatsënëa xua Dioso exana patavajunupaebijava, panajumetsënëtsipajë. Tsipaji pajumaitsinë tsabiabi mapacueniaje: “Cristo raja petëpaeucujinae Dioso baja icatsia asaëyaexanatsi,” pajanë tsabiabi. Itsa pepacuene ajibi tsipae petëpaevi icatsia piasaëjavanexa, nexata baja Cristo Dioso icatsia apo asaëyaexanaetsi tsipae. ¹⁶ Itsa peneta pepacuene ajibi tsipae petëpaevi icatsia piasaëjavanexa, nexata Cristo ata petëpaeucujinae icatsia Dioso baja apo asaëyaexanaetsi tsipae. ¹⁷ Nexata Cristo petëpaeucujinae Dioso baja icatsia itsa apo asaëyaexanaetsi tsipae, nexata paxamë ata panenajamatabëcuenecopatsijava Cristojavabelia Dioso papecacapanepaenexa panijaneconivecua, panacueratsipame baja. Tsiteca abaxë panijaneconi paxainaejitsipame. ¹⁸ Bajarapacuenia itsa itsipae, nexata baja pamonaemi tēpa Cristo pepua pejumecovënëtsivi, bajarapamonaemi ata naxuabijitsipa baja. ¹⁹ Vaxaitsi ata pijinia Cristojavabelia vajanajamatabëcuene copatsicujinae, xua Dioso nacayavenonabiaba, saya nacayavenonaejitsipa vajajinavanapaeepatojebi mapanacuataje. Vajatëpaeucujinae, Cristo pejamatabëcueneta Dioso itsa apo nacacapanepaejitsia tsipae vajaneconivecua, vajajamatabëcuenenavëxaniabivi baja tsipae. Tsipaji vaxaitsi jamatabëjumaitstsi tsabiabi mapacueniaje: “Cristo pejamatabëcueneta Dioso nacacapanepaena,” jamatabëjaitstsi tsabiabi. Nexata ayaicuenia Dioso vajatonacuenebabiabijava ata, nacueratsipatsi. Matacabi apo pevereverecejava Dioso vajanacarajutsinexa vajeetavanapaejava ata, nacueratsipatsi. Caranata meta jitsipaejitsipatsi Dioso apo pejumecovënëtsivi vajanacaitaxutobejibiaataenexa.

²⁰ Itsiata baitsi jane mapalivaisije xaniajai cajena. Tsipaji baja Cristo petēpaecujinae, capanepaeya baja icatsia Dioso asaēyaexanatsi. Nexata pacuenia Cristo petēpaecujinae mēthēvecua pitsapa, bajara pijinia pacuenia itsamatacabi mēthēvecua pitsapaena daxita pamonaemi tēpa Dioso pepua pejumecovēnētsivi. Nexata baja Cristo petēpaecujinae, mēthēvecua itsa pitsapa, daxita petēpaevivecua Cristo baja namataxainaeya pitsapa mēthēvecua. ²¹ Caenē Adánpijinē pejamatabēcueneta taxuxuaba jivi petēpaejava mapanacuataje pibisiacuene pexanaexae. Bajara pijinia pacuenia caenē Cristo pejamatabēcueneta vajanacasivatēpaexae cruzata, taxuxuaba petēpaevimi itsamatacabi mēthēvecua pepitsapaejavanexa. ²² Daxitajivi tēpaponā Adánpijinē petaxuxuabicuenia. Bajara pijinia pacuenia daxita pamonaē Cristo pijajivi, petēpaecujinae icatsia Dioso asaēyaexanaenatsi pacuenia Cristo Dioso asaēyaexanatsi. ²³ Paepatota Dioso jitsipa petēpaevi piasaēyaexanaenexa, caejivi canacujitsia asaēyaexanaponaena. Cristo baja petēpaecujinae, Dioso itsa asaēyaexanatsi, daxita petēpaevivecua namataxainaeya baja asaēyaexanatsi. Bajaraxuacujinae icatsia pamatacabi Cristo patsianica, daxita pamonaē Cristo pijajivi, Dioso icatsia asaēyaexanaenatsi. ²⁴ Bajaraxuacujinae jane baja daxitacuene pecopiarucaeyaexanaejavanexa, copiapatsiana. Bajarapamatacabi Cristo copiarucaeyaexanaena daxita xua Cristo pijavajabitsaē evetavanapa. Nexata bajaraxua Cristo pecopiarucaeyaexanaecujinae, xua paxa Dioso tocopatatsi Cristo pevetsinexa, bajaraxua tocanaviatsiana baja paxa Diosojavabelia. ²⁵ Cristo evetaponaponaena daxitacuene. Matapania Dioso cueneamoneyabiana daxita Cristo pijavajabitsaē, Cristo copatsiana daxitacuene pevetsijava. ²⁶ Daxita Cristo pijavajabitsaē verebiabiana. Bajaraxuacujinae cotocaevi copiarucaeyaexanaena jivi petēpaecuenemi. ²⁷ Dioso pejumelivaisibaxutota tajēvelia jumaitsi mapacueniaje: “Dioso itsamatacabi pexēnato Cristo tocopatsiana daxitacueneviria petoevetsinexatsi,” jai Dioso pejumelivaisibaxutota. Itsiata baitsi jane Dioso pexēnatojavabelia apo jumaitsi: “Xanē ata nitorobianame,” apo jai Dioso. Dioso raja itorobiana pexēnato petoevetsinexatsi daxitacueneviria. ²⁸ Nexata itsamatacabi Cristo daxitacueneviria itsa evetsiana, daxitacueneviria Cristo pitorobicuenia jumecovēnētabiabanatsi. Nexata jane baja bajarapamatacabi Cristo jumecovēnētsiana paxa Dioso pitorobicueniatsi. Bajarapacuenia Cristo paxa Dioso pejumecovēnētsixae tsane, nexata bajarapamatacabi Dioso daxitanacuanējava daxitacueneviria pitorobinē tsane.

²⁹ Itsamonae pepua penabautisabivi baja, pijamonaemi totēpatsi. Pijamonaemi ata baja pepuanajamatabēcuenecopabi Cristojavabelia, totēpatsi. Itsiata baitsi jane bajarapamonaemi tēpa nabautisabinejeva. Nexata pajivi pijamonaemi totēpatsi, bajarapajivi penabautisabijivi ata baja, pijamonaē pevēnamuto icatsia nabautisaba. Bajarapacuenia anijatobeje nabautisaba pevecuatēpaejivitsi bepenabautisabijivi petotaenexatsi Dioso. Petēpaevimi peneta icatsia Dioso itsa apo asaēyaexanaetsijitsia tsipae, penabautisabijivi baja pijamonaē pevēnamuto icatsia apo nabautisabi tsipae, nabautisabinejeva pevecuatēpaejivitsi bepenabautisabijivi petotaenexatsi Dioso.

³⁰ Petēpaevimi peneta icatsia Dioso itsa apo asaēyaexanaejitsiatsi tsipae, nexata Dioso pejumelivaisi apo patsipaebavanapaenē tsipae, daxitamatacabi panetsiayai tsabiabi ata. ³¹ Tajamonaē, daxitamatacabi baja cajena netsiayai tsabiabi. Itsamonae picani jamatabēnebexuababiaba. Bajaraxua paneyapētaenexa, pacatsipaebatsi. Tsipaji pacasivajamatabēcuenēbarēyatsi vajatuxanenē Jesucristo xaniavaetsia panejumecovēnētavanapaexae. ³² Majotaje Efeso tomarapijivi ata jamatabēnebexuaba picani. Bajarapamonaē benevēthējamatabēcuenēvi. Tsiquirijavayota vecuapanepajē. Jivi petēpaecujinae icatsia Dioso itsa apo asaēyaexanaejitsiatsi tsipae, nexata xanē ata nacueratsipajē. Nacueratsipajē, netsiayai ata, jivi tatsipaebaponaējava Dioso pejumelivaisi. Vajatēpaecujinae icatsia Dioso itsa apo nacaasaēyaexanaejitsia tsipae, nexata xaniavaetsia jumecovēnētsipatsi pamonaē jamatabēcuenēnavēxaniabiaya nacatsipaeba mapacuenia

pejumaitsilivaisije: “Ayaijavanë vajaxaejava xaeyabianatsi. Aitajibitsinua tsabiabi tsane vajabarëyatsabiabinexa. Tsipaji raja bepjiia tēpaenatsi,” pejailivaisi vajanacatsipae-bivi jumecovēnētsipatsi.

³³ Itsiata baitsi jane pētsa panacopatame papecayamaxēitojorobinexa bajarapacuenia pejumaitsvi. Tsipaji raja itsamonae bajumaitsi: “Itsa yajavaponaponaejitsipame pibisiajamatabēcuenevi, cajamatabēcuenebijiianaejitsipa. Nexata pexaniajamatabēcuenenē atamē, bajarapamonae cuenejēpaeya ponaponaejitsipame,” bajai itsamonae. ³⁴ Panajamatabēxainare xaniavaetsia. Pētsa baja pematatsēnēa pibisiacuene paexaname. Itsamonae paxamēyajuvēnēvi Dioso apo yapētae. Mapacuenia pacajumaitsvi paneauranexa.

Pacuenia petēpaevimi Dioso icatsia itsa asaēyaexanatsi, perabēithianaejitsiatsi yabara pelivaisi

³⁵ Itsamonae raeta yanijobiana petēpaevimi icatsia Dioso piasaēyaexanaejavanexatsi yabara. Jumaitsi meta tsane bajarapamonae: “¿Detsa meta pacuenia petēpaevimi icatsia asaēyaexanaenatsi? ¿Detsa meta nexata pitsiperabēto icatsia xainaena bajarapamonae?” jai meta tsane bajarapamonae. ³⁶ Bajarapacuenia itsa yanijobiana, apo canaējētsinejeva jamatabēcuenenavēxaniabiaya bajarapacuenia yanijobiana. Vajaubi- java, pexuto itsa ubatsi, pejuvicujinae bajarapaxutomi batsabana pepitsapaenexa pejananae. ³⁷ Arrozxuto, itsavirixutoxi ata, pexu saya ubatsi. Apo mēthēcaetsi pepabotonē. ³⁸ Peubixu, caevirixu canacujitsia, peubicujinae capitsapapona pijaviri- abotonē, pijaviriabaxu yajava. Dioso baja cajena pecopatsicuenia caeviriaboto canacu- jitsia naexanapona. ³⁹ Mapanacuata Dioso copatsi ata daxitacueneviria pejinavana- paenexa, itsiata apo naperabējēpae. Jivi saicaya itsaviriaperabēto xaina. Unupijidujuai pijinia saicaya itsaviriaperabēto xaina. Pepunaevi pijinia saicaya itsaviriaperabēto xaina. Menepijidujuai pijinia saicaya itsaviriaperabēto xaina. ⁴⁰ Bajara pijinia itsi athēbētatsia pejinavanapaevi ata. Bajarapamonae saicaya itsaviriaperabēto xaina mapanacuapijivivecuaje. Athēbētatsia pejinavanapaevi nacavecuapexaniaperabētovi. Mapanacuata pejinavanapaevi ata, itsamonae nacatsitapexaniaperabētovi picani. Itsiata pijinia saicayacuenia. ⁴¹ Maticabipijiuameto itayota. Meravipijiuameto ata itayota. Itsiata saicayacuenia navecuaitayotabeje. Tulupu ata pijinia itayota. Itsiata caetuluputo canacujitsia saicayacuenia navecuaitayotapona. ⁴² Bajara pijinia nacavecuaitane petēpaevimi. Saicayaperabēto nacavecuaxainaena Dioso icatsia itsa asaēyaexanaenatsi. Petēpaevimi irabelia mēthētatsi. Nexata baja tsabana. Bajaraxu- acujinae Dioso icatsia itsa asaēyaexanaenatsi, apo petsabanaeperabētonexa jane baja xainaena. ⁴³ Petēpaevimi mēthētatsi vajaataejitsibiperabēto yajava. Bajaraxuacujinae Dioso icatsia itsa asaēyaexanaenatsi, pexaniapenivenivenaeperabēto jane baja xainaena. Petēpaevimi mēthētatsi pecueranaeperabētomi yajava. Bajaraxuacujinae Dioso icatsia itsa asaēyaexanaenatsi, daxita maticabijavabelianexa jane baja pesaē pexainaeperabēto xainaena. ⁴⁴ Petēpaevimi mēthētatsi mapanacuapijiperabēto yajava. Bajaraxuacujinae Dioso icatsia itsa asaēyaexanaenatsi, athēbēnacupijiperabēto xainaena. Itsaviriaperabēto abaxē aeconoxae xainatsi mapanacuata vajajinavanapaenexa. Bajara icatsia pacuenia itsamaticabi itsaviriaperabēto xainaenatsi athēbēnacuatatsia vajajinavanapaenexa.

⁴⁵ Dioso pejumelivaisibaxutota jumaitsi mapacueniaje: “Adánpijinē copiaya Dioso exanatsi mapanacuataje. Bajaraponē Dioso exanatsi pecueranaeperabēto yajava peponaponaenexa mapanacuataje,” jai Dioso pejumelivaisibaxutota. Itsiata baitsi jane Adánpijinē matatoxenetsia Cristo bitso ayaijamatabēcuenenē. Nexata Cristo petēpaecujinae icatsia Dioso itsa asaēyaexanatsi, caējēpatsi vajanacajamatabē cueneasaēyaexanaenexa Diosojavabelia. Caējēpatsinua vajanacarajutsinexa maticabi apo pevereveceaejava. ⁴⁶ Pacuenia athēbēnacupijivi perabēitsi, abaxē copiaya apo perabēitsi. Biji rajane pacuenia mapanacuapijivi perabēitsije, bajaraperabēitsi.

Itsiata baitsi jane vajatëpaecujinae Dioso icatsia itsa nacaasaëyaexanaena, pacuenia athëbënacupijivi perabëitsi, bajara vaxaitsi ata perabëitsi tsanetsi. ⁴⁷ Adánpijinë copiaya Dioso exanatsi mapanacuataje. Atsabenota exanatsi. Bajaraxuacujinae bexëjavabelia athëbëvetsica Cristo patsica, ponë vajatuxanenë. Bajaraponë saicaya athëbëvetsica pepatsinë. ⁴⁸ Daxitatsi vaxaitsi, mapanacupijivitsije, perabëjëpatsi Adánpijinë, atsabenota pexanaenëtsi. Itsiata baitsi jane itsamatacabi daxitatsi, Cristo vajajumecovënëtsivi, perabëjëpaenatsi Cristo. Nexata pacuenia athëbënacupijivi perabëitsi, bajaraperabëitsi tsanetsi Cristo vajajumecovënëtsivi. ⁴⁹ Aconoxae abaxë perabëjëpatsi Adánpijinë, ponë atsabenota pexanaenëtsi. Bajara icatsia pacuenia itsamatacabi Cristo perabëjëpaenatsi, ponë athëbëvetsica pepatsinë.

⁵⁰ Tajamonae, jitsipajë patacatsipaebinxema mapacuenije. Acuenebi caejivi ata mapanacupijivije mapanacupijiperabëto yajava pejonenexa Dioso pijanacuayabetsia. Tsipaji vajaperabëto saya pevereverecejavanexa. Bajaraxuata acuenebi vajayajavajinavanapaenexa bajarapaperabëto daxita matacabijavabelianexa. ⁵¹ Nexata panamuxunaevere mapalivaisije, Dioso bajayata muetsia pexainabuatsilivaisimi, palivaisi aeconoxae Dioso nacayapëtaeyaexanapona. Daxitatsi raja vaxaitsi Cristo icatsia pepatsimatacabinxatsica pevajënaeya, apo tēpaetsi tsane. Itsiata baitsi jane apo tēpae atatsi tsane, pamatacabi Cristo patsianica, daxitatsi nacaperabëitothianaena Dioso. ⁵² Itsa najumetsiana cotocaevi piobijava trompeta, bepijiayo tsatabi tsane, paepatoyovajëto banaitatsaquetajarabatsi, bajarapaepatoyovajëto Dioso nacaperabëitothianajonena. ⁵³ Vajaperabëto raja pevereverecejavanexa. Bajaraxuata xanepana vajanacaperabëitothianaenexa, apo pevereverecejaperabëto vajaxainaenexa. ⁵⁴ Nexata paepatota bajarapacuenia nacaperabëitothianajonena, copiajopaena jane baja pacuenia Dioso pejumelivaisibaxutota tajëvelia jumaitsi. Dioso baja cajena pejumelivaisibaxutota tajëvelia jumaitsi mapacueniaje: “Jivi petëpaecuenemi itsamatacabi copiarucaena. Pinijicuenia Dioso copiarucaeyaexanaena jivi petëpaecuenemi. ⁵⁵ Jivi petëpaeyaexanaecuenemi ajibi tsane pesaë vajanacaavitaniaexanaeyaniva. Ajibi tsane vajanacatëpaeyaexanaecuenemi,” jai tajëvelia Dioso pejumelivaisibaxutota jivi petëpaeyaexanaecuenemi Dioso pecopiarucaeyaexanaejavanexa yabara. ⁵⁶ Pibisiacuene vajaexanaeoneconì yabara tēpaenatsi. Palivaisi bajayata Dioso Moiséspijinëta najumecopata, bajarapalivaisi pejamatabëcueneta yapëtanetsi vajatëpaecujinae Diosovecua picani vajanaxuabijavanexa pibisiacuene itsa exanatsi. ⁵⁷ Itsiata baitsi jane baja vajatëpaecujinae Diosovecua apo naxuabitsi tsane. Tsipaji baja vajatuxanenë Jesucristo nacasivatëpa cruzata vajanacacapanepaenexa vajaneconivecua. Bajaraxuata vaxaitsi Diosojavabelia jumaitsitsi tsabiabi mapacueniaje: “Pexaniacuene rabaja panetoexaname,” jaitsi tsabiabi.

⁵⁸ Tajamonae, bitso patacaasivavi. Payapëtaneme rabaja mapacuenije. Dioso pane-tonacuenebijava, apo panacueratsimë tsane. Bajaraxuata panevajënaeyabelia asaëya patonacuenebavanapare Dioso. Pëtsa pacopabame Dioso panejumecovënëtsijava. Panevajënaeyabelia asaëya Dioso patonacuenebaponare.

16

Pacuenia Pablo itoroba Corinto tomarapijivi ofrenda pexanaenexa Jerusalén tomarata Dioso pejumecovënëtavanapaevi petoitorobinxema yabara pelivaisi

¹ Pacatsipaebijitsiatsi pacuenia pacaetuatsijitsiamë ofrenda panetoitorobinxema Jerusalén tomarata Dioso pejumecovënëtavanapaevijavabelia bajarapacuenia paneyavenonaenexa. Pacuenia Galacia nacuata Dioso pejumecovënëtsivi, caebitsaëto canacujitsia, itorobajë ofrenda pecaetuataponaenexa, bajara pijinia pacuenia paxamë ata pacaetuataponaenexa ofrenda. ² Pacaejivimë canacujitsia,

caesemana canacujitsia panenacanabipalatayajuvënëjava, ofrendanexa saicaya patsataponanename caedomingo canacujitsia. Pajivi tsiquirijavayo nacanaba, tsiquirijavayo pijinia saicaya tsatsiana. Pajivi ayaijava nacanaba, ayaijavayo pijinia saicaya tsatsiana. Bjarapacuenia paxaniavaetaponanename palata. Nexata pamatacabi paxamëjavabelia patsianajë, palata ofrendanexa apo pacaetuataponaemë tsane. ³ Nexata pamatacabi paxamëjavabelia patsianajë, paitapetsianame bajarapapalata pecaponaevinexa Jerusalén tomarapijivijavabelia. Pamona palata pecaponaevinexa, tsicobeyaquinaenajë cuyalato. Bjarapacuyalato bajarapamonae peyjavacaponanexa, panecaetuatsiofrenda itsa tocaponaena Jerusalén tomarata Dioso pejumecovënëtsivijavabelia. Nexata bajarapapalata pecaponaevi, Jerusalén tomarapijivi yapëtaenatsi xaniavaetsia Dioso pejumecovënëtsivicuene, peyjavacaponanexae tsane tatsicobeyaquinaebaxuto. ⁴ Xanë ata itsa jitsipaenajë taponanexa, ponaenajë Jerusalén tomarabelia. Nexata meta bajarapamonae naponanena tapëta.

Pacuenia Pablo tajëvelia navajunupaeba pacuenia exanaejitsia yabara pelivaisi

⁵ Itsa ponaenajë paxamëjavabelia, tapatsivajënaeya paxamëjavabelia, copiaya pataponanajë Macedonia nacuajava. Bjaraxuacujinae jane baja patsianajë paxamëjavabelia, Corinto tomarata. ⁶ Ponaponanajë meta paxamëjavata bajayajebi. Daxita emarapaejebi ata meta naponaponanajë paxamëjavata. Nexata bjaraxuacujinae paneyavenonanename tajanamutonexa, itsabelia jitsipajë taponanexa icatsia. ⁷ Caepatoyo saya tanaponaponatabinexa paxamëjavata, apo jitsipaenë. Biji rajane jitsipajë bajayajebi taponaponanexa paxamëjavata pacuenia vajatuxanenë netojitsipa. ⁸ Itsiata baitsi jane abaxë aeconoxae ponaponanajë majotaje Efeso tomarata. Pentecostësvënë fiestacujinae meta, matapania vecuaponanajë Efesotomara. ⁹ Majotaje aeconoxae baja bitso xanepana tatsipaebinexa Dioso pejumelivaisi. Tsipaji mapatomarapijivije bitso baja jitsipapona pejumetaenexa Dioso pejumelivaisi. Itsiata baitsi jane itsamonae ayaibitsaëto apo jitsipae. Nexata tatsipaebilivaisi pejumecovënëtsivi, jamatabëcopabiaexanaponatsi.

¹⁰ Timoteo itsa patsiana paxamëjavabelia, pacopiapitsianame xaniavaetsia jamatabëcuenabarëyaya peponaponanexa paxamëjavata. Bjarapacuenia xaniavaetsia pacopiapitsianame. Tsipaji pacuenia xanë vajatuxanenë pejamatabëcueneta tonacuenebaponaponajë, bajara pijinia pacuenia bajaraponë ata vajatuxanenë pejamatabëcueneta tonacuenebaponapona. ¹¹ Bjaraxuata pëtsa itsajivi ata pacopatame pequenetsiataenexatsi. Biji rajane payavenonanename pijanamutonexa jamatabëcuenexanepanaeya pepatsinexa xanëjavaberena. Xanë, itsamonae yajava, vajënaeevetaponaponajë Timoteo pepatsinexarena xanëjavaberena.

¹² Vajabanenë Apolos pelivaisi pacatsipaebijitsiatsi. Bjaraponë picani itorobajë itsamonae Dioso pejumecovënëtsivi pepëta penaponanexa paxamëjavabelia papecataenexa. Itsiata baitsi jane aeconoxae abaxë apo jamatabëponae. Ponaena meta itsiata itsajota cuenecaëjëpatsi.

Pacuenia Pablo jamatabënajina Corinto tomarapijivi yabara pelivaisi

¹³ Dovathi pejamatabëcueneyaniva, jamatabëcuenenaëcotsiaya pajinavanapare. Pajamatabëcuenesaëmëre tsavanapae Jesucristojavabelia panenajamatabëcuenecopatsijava. Pëtsa jamatabëcueneaitajepaebiaya pajinavanapame. Pajamatabëcueneaitatsacamëre tsavanapae pebicuenia. Itsamonae patsitaajamatabëcuenesaëmëre tsavanapae. ¹⁴ Daxita xua paexanavanapame, itsamonae ata asivaya paexanavanapare.

¹⁵ Tajamonae, payapëtaneme rabaja mapacueneye. Estéfanos pijabopijivi barëjumecovënëta Jesús pelivaisi. Bjarapamonae daxita pijanacuapijivivecua copiaya jumecovënëta Jesús pelivaisi Acaya nacuata. Nexata bajarapamonae jamatabëcueneenabiabatsi ëDioso pijacuene. Bjaraxuata bajarapamonae asaëyata

bitso yavenonabiaba itsamonae Dioso pejumecovënëtsivi. ¹⁶ Pacatojitsipatsi xaniavaetsia panejumecovënëtsinexa xua pacaitoroba bajarapitsivi. Bajara-pitsivi peyajavanacuenebivi ata, xua pacaitoroba, pajumecovënëtsianame. ¹⁷ Paxamëyajuvënëvi parena xanëjavaberena mapamatabëxëyoje. Estéfanas, Fortunato, Acaico, bajarapamatabëxëyo parena. Bajaraxuata sivajamatabëcuenebarëyanë. Bitso picani pacaitaxanabiabatsi. Itsiata baitsi jane bajarapamonae tanetopatsixaerena, neyavenonabiaba pacuenia paxamë itsa papatsiparemena, paneyavenonaejitsipame. ¹⁸ Nexata bajarapamonae itaxutuanajamatabëcuenesaëtajë. Paxamë ata bajarapa-monae pacajamatabëcueneasaëyaexanaena icatsia itsa naviabiana paxamëjavabelia. Bajarapitsivi bepayaivaneme.

¹⁹ Caebitsaëto canacujitsia Dioso pejumecovënëtsivi, Asiavënë nacuapijivi, pacabajacobalia. Aquila pijava, Prisca, pacabajacobalia. Aquila ata pacabajacobalia. Daxita Dioso pejumecovënëtsivi, pamonae nacaetutabiaba bajarapajivibeje pijabota, bajarapamonae ata, daxita pacabajacobalia vajatuxanenë pevënëta. ²⁰ Daxita Dioso pejumecovënëtsivi, majotaje pejinavanapaevi, pacabajacobalia. Paxamë ata Dioso panejumecovënëtsixae, xaniavaetsia namataenetsia bitso nasivaya panabajacobabiabare.

²¹ Xanë Pablonë, tajacuata tacobeta pacatoyaquinatsi mapacotocaevilivaisiyoje. Apo itorobinë taneyavenonabiabinë tanetoyaquinaenexa. Bitso pacabajacobatsi.

²² Pajivi apo jitsipae vajatuxanenë Jesucristo, bajarapajivi Dioso navecuaxuabianatsi. ¡Vajatuxanenë raja naxanitsiayo patsianica!

²³ Pacatovajëtabiabatsi Diosojavabelia vajatuxanenë Jesucristo papecayavenonabiabinexa. ²⁴ Daxita paxamë asivaya pacajamatabënajinatsi caenë Jesucristo pijajivixaetsi.

Mapabaxutoje San Pablo cotocaevi toyaquina Corinto tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Corinto tomarapijivijavabelia, yabara pelivaisi

¹ Xanë Pablonë, Dioso tanetojitsipaexae, nitapeta Jesucristo pijaapóstolenëxanë. Nexata Jesucristo nitoroba jivi tatsipaebinxea pexanialivaisi. Vajabananë Timoteo xanëjavata ponapona. Nexata pacatoyaquinatsibeje mapalivaisije Dioso panejume-covënëtsivi, paCorinto tomarapijivimë. Patoyaquinajëbejenua mapalivaisije Acaya nacujava pejinavanapaevi ata. ² Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejnavanapaenexa.

Pacuenia Pablo navajunupaeba itsamonae pebejiobiaexanaejavatsi yabara pelivaisi

³ “Ayaicuenia panejamatabëcueneyavenoname,” pajanë vaxa Diosojavabelia. Bajaraponë Dioso, vajatuxanenë Jesucristo paxa. Dioso, vajanacaitaxutotsoniataenë, vajanacajamatabëcuenebabatsinë bitso vajanajamatabëxainaeyaniva. ⁴ Pamatacabi panetocopiapatabiaba daxita xua bitso panenajamatabëxainaeya exanaejitsia, itsiata Dioso panejamatabëcuenebabatabiaba bajaraxuavecua. Bajara pijinia pacuenia paxanë ata panejamatabëcuenecaëjëpa itsamonae juya patajamatabëcuenebabatsinexa pamatacabi bajarapamonae ata tocopiapatatsi xua bitso najamatabëxainaeya exanaejitsiatsi. ⁵ Itsamonae bitso panebejiobiaexanabiaba Jesucristo patajume-covënëtsixae. Nexata pijinia Jesucristo pejamatabëcueneta Espiritu Santo panejamatabëcuenebabatabiaba bitso patanajamatabëxainaeyaniva. ⁶ Nexata paxanë itsamonae itsa panebejiobiaexanabiaba, Dioso panejamatabëcueneyavenonabiaba patanejamatabëcuenebabatsinexa. Nexata paxanë ata panejamatabëcuenecaëjëpaena juya itsamatacabi paxamë patacjamatabëcuenebabatsinexa itsa pacatocopiapata xua bitso pacanajamatabëxainaeya exanaejitsia. Nexata itsa pacajamatabëcuenebabatsianatsi, bajayajebi pajamatabëcuenesaëmë tsane Dioso panejume-covënëtsijava matapania Dioso papecacapanepaejavabelianexa. Paxamë ata raja itsamonae pacabejiobiaexanabiabiana. ⁷ Payapëtaniji baja cajena paxamë ata Dioso papecacapanepaejavanexa. Pacuenia paxanë itsamonae panebejiobiaexanabiaba, bajarapacuenia paxamë ata itsamonae pacabejiobiaexanabiabiana. Nexata paxamë ata itsamonae itsa pacabejiobiaexanabiabiana, Dioso pacajamatabëcuenebabatabiabiana panevajënaeyabelia panejamatabëcuenesaënexa Dioso panejume-covënëtsijava. Bajarapacuenia Dioso pacajamatabëcuenebabatabiabiana matapania Dioso papecacapanepaejavabelianexa.

⁸ Tajamonae, pajitsipajë paxamë ata paneyapëtaenexa itsamonae Asiavënë nacuata patanebejiobiaexanabiabijava. Ayaicuenia bitso panebejiobiaexanabiaba. Nexata baja picani pasaëjibinë tsaponae. Apo panecaëjëpae baja picani patavajënaeyabelia pataponaenexa. Nexata pajamatabëjumaitsinë tsabiabi: “Patëpaenajë meta baja rovia,” pajamatabëjanë tsabiabi. ⁹ “Pepacuene raeta baja panebeyejebiana,” pajamatabëjanë tsabiabi. Dioso baja cajena panetocopata bajarapacuenia itsamonae patanebejiobiaexanabiabinexa. Nexata paepatota panebejiobiaexana patajamatabëjumaitsinexa mapacueniaje: “Xanë tajacuata apo necaëjëpae tavecuapanepaenexa mapacueneje. Matapania Dioso neyavenonaena, necaëjëpaena tavecuapanepaenexa mapacueneje,” patajamatabëjainexa. Dioso caëjëpatsi pataneyavenonaenexa. Tsipaji baja cajena Dioso pematacotsinë petëpaevi ata. ¹⁰ Dioso baja panecapanepa itsamonae patanebejiobiaexanaejavata patanebeyaxuabiyaniva.

Icatsia bajarapacuenia itsamonae itsa panebejobiaexanaena, Dioso icatsia panecapanepaena. Bajaraponëjavabelia panajamatabëcuenecopatajë bajarapacuenia pataneyavenonabiabinexa. ¹¹ Paneyavenonaeyavajëtaponaename Diosojavabelia bajarapacuenia Dioso pataneyavenonabiabinexa. Paayaibitsaëtoxanetomë itsa panetovajëtaponaename Diosojavabelia, nexata Dioso paneyavenonabiabiana. Nexata pijinia jivi ayaibitsaëtoxaneto paxanë yabara jumai tsabiabi tsane Diosojavabelia: “Pexaniacuene bitso toexaname Pablobana. Ayaicuenia yavenoname pebeyejebiyativatsi,” jai tsabiabi tsane.

Pajamatabëcuene yabara Pablo apo ponae Corinto tomarabelia yabara pelivaisi

¹² Itsa pajinavanapajë daxitajivijava, paxamëjava ata, xaniavaetsia pajinavanapajë Dioso pitabarata. Itsa pajinavanapajë paxamëjava, pibisiacuene apo pacasivana-jamatabëxainaetsi. Bajaraxuata panasivajamatabëcuenebarëyanë. Paxanë raja saya mapanacuapijilivaisita apo panejamatabëcueneyavenonae xaniavaetsia patajinavana-paenexa. Dioso raja patanejamatabëcueneyavenonaexae, bajarapacuenia xaniavaetsia pajinavanapajë. ¹³ Palivaisianë baja pacatoyaquinabiabatsi, caelivaisita anijaja-matabëcuenelivaisibeje apo xainaponae. Palivaisianë pajumetaneme itsa palebame pat-acatoyaquinaelivaisianë, bajarapalivaisianë saya caejamatabëcuenelivaisi xainapona. Pematatsënëa itsajamatabëcuenelivaisi apo xainaponae. Pacatojitsipatsi xaniavaetsia panejumeyapëtaenexa palivaisianë pacatoyaquinatsi. ¹⁴ Pacatojitsipatsi xani-avaetsia patanejamatabëcueneyapëtaenamë. Tsipaji abaxë xaniavaetsia apo paneja-matabëcueneyapëtaemë pacuenia pajamatabëcueneitsinë tsavanapae. Nexata pamata-cabi vajatuxanenë Jesús icatsia patsianica, paxamë panesivajamatabëcuenebarëyamë tsane. Bajara pijinia pacuenia paxanë ata pacasivajamatabëcuenebarëyatsi tsane.

¹⁵ Nexata xanë pacasivajamatabëcuenejumaitsitsi mapacueniaje: “Corinto tomarapijivi baja cajena xaniavaetsia nejamatabëcueneyapëtane. Yapëtane pacuenia apo sivanajamatabëxainaenë itsajamatabëcuene bajarapamonaejavabelia,” pacasivajamatabëjaisi. Bajaraxuata picani jamatabëpatajë paxamëjavata patanesivaja-matabëcuene barëyanexamë itsa patajë paxamëjavata. ¹⁶ Pamatacabi ponajë Macedonia nacuyabelia, talianë picani jamatabëpacataeponatsi bajaraxuayo. Bajaraxuacujinae icatsia tanaviatsinërena jamatabëpacataeponatsi picani icatsia bajaraxuayo. “Bajarajota bajarapamonae neyavenonaena tajanamutonexa, Judea nacuyabelia taponanexa,” pacasivajamatabëjaisi picani. ¹⁷ Pacuenia najamatabëxainabiabajë taponanexa itsajavabelia, ponabiabajë baja cajena. Itsiata aeconoxae bajarapacuenia apo exanaenë taponanexa paxamëjavabelia. Mapanacuata itsamonae najamatabëxainae ata itsacuenejavayo pexanaenexa, itsiata apo exanabiabi. Bajarapacuenia itsiata xanë apo jamatabëcueneitsinë. Paxamë baja cajena panecueneyapëtaneme. ¹⁸ Dioso ata panecueneyapëtane apo patacayamaxëitojorobicuene. Dioso baja cajena pejumelivaisi pacatsipaebabiabatsi. Nexata icatsia xuacujinae bajarapalivaisi itsa pacatsipaebabiabatsi, saicayalivaisicuenia icatsia apo pacatsipaebabiabitsi. ¹⁹ Xanë Pablonë, Silvano, Timoteo, bajarapamatabëxëyo, pacatsipaebabiabatsi Jesucristo, Dioso pexënato, pelivaisi. Bajaraponë Jesucristo caejamatabëcuene xainabiaba. Nexata pacuenia jumaitsi, xaniajai tsabiabi. ²⁰ Jesús pejamatabëcueneta Dioso baja daxita nacatoexana pacuenia tajëvelia najumecapanepaeya jumaitsi vajanacatoexanaenexa. Bajaraxuata Diosojavabelia vajavajëtsijavata itsa jumaitsitsi: “Diosomë, bitso ayaija-matabëcuenenëmë,” itsa jaisi, nexata Jesucristo pejamatabëcueneta jumaitsitsi. ²¹ Dioso pacajamatabëcueneyavenonapona panevajënaeyabelia panejamatabëcuenesaënexa Cristojavabelia panenajamatabëcuenecopatsijava. Bajarapacuenia paxanë ata Dioso panejamatabëcueneyavenonapona. Dioso nacaitapeta Jesucristo pijajivinexatsi, Dioso pijacuene vajatonacuenebavanapaenexa. ²² Dioso raja Espiritu Santo

nacatsijamatabëcaeyaexana. Nexata nayapëtanetsi Dioso pexicuenetsi. Bajaraxuata yapëtanetsi pepacuene xaniajai Dioso vajanacacapanepaejavanexa.

²³ Mapacuenia pacajumaitsitsije Dioso pitabarata. Dioso baja cajena nejamatabëcueneyapëtane. Pamatacabi picani jamatabëponabiabajë paxamëjavabelia, caecuenia itsa ponaejitsipajë, nexata pacabijataejitsipatsi. Tsipaji abaxë apo paexanavanapaemë patacaitorobicuenia. Bajaraxuata abaxë apo navecuaponaenë paxamëjavabelia, itsa pacabijatanetsi, bitso panenajamatabëxainaeyaniva. ²⁴ Nexata apo jitsipaenë icatsia patacatsipaebaponaenexa paneyapëtaenexa pacuenia bepaexanavanapame. Tsipaji baja xaniavaetsia Dioso pajumecovënëtavanapame. Jamatabëpacayavenonatsi. Pacuenia baja pajamatabëcuenenarëyamë tsavanapae, matatoxenetsia icatsia panejamatabëcuenenarëyanexa Dioso pitabarata.

2

¹ Najamatabëcopatajë baja taponaejava paxamëjavabelia. Tsipaji jamatabëjumaitsinë paxamë yabara mapacueniaje: “Apo ponaenë abaxë tsane Corinto tomarapijivijavabelia tanajamatabëxainaeyaexanaeyaniva bajarapamonae,” jamatabëjanë. ² Paxamë itsa pajamatabëcuenenarëyamë, nexata xanë ata pacasivajamatabëcuenenarëyatsi tsabiabi. Itsiata itsa pacanajamatabëxainaeya exanaejitsipatsi, nexata apo pajamatabëcuenenarëyamë tsipae. Nexata xanë ata apo pacasivajamatabëcuenenarëyatsi tsipae. Tsipaji ajibi tsipae patacasivajamatabëcuenenarëyajanexa. ³ Bajaraxuata taponaejavajënaeya paxamëjavabelia copiata baja cajena pacatoitorobaliatsi itsabaxuto, patacatoyaquinaebaxuto. Bajarapacuenia pacatoyaquinatsi tsipaji abaxë apo jamatabëponaenë paxamëjavabelia patacasivanajamatabëxainaeyaniva, itsa pacatanetsi panejinavanapaejava apo patacaitorobicuenia. Jitsipajë picani paxamë patacasivajamatabëcuenenarëyanexa. Paxamë yabara jamatabëjumaitsinë mapacueniaje: “Corinto tomarapijivi baja cajena nejamatabëcueneyapëtane. Bajarapamonae itsa jamatabëcuenenarëya, xanë ata bajarapamonae sivajamatabëcuenenarëyanë tsabiabi,” jamatabëjanë. ⁴ Apo jitsipaenë picani patacatoyaquinaenexa bajarapabaxuto. Itsiata itsa pacatoyaquinatsi, nuajë paxamëjitsia. Najamatabëxainajë cajena bitso tajamatabëëthëtovetsina. Apo pacatoyaquinaetsi raja saya patacanajamatabëxainaeya exanaenexa. Ayaicuenia raja patacaasivajava patanejamatabëcueneyapëtaenexamë, pacatoyaquinatsi.

Pacuenia Pablo itoroba Corinto tomarapijivi barajamatabëcuenexanepanaeya baja petaenexa pibisiacuene pexanaponaponaenëmi yabara pelivaisi

⁵ Ponë pibisiacuene exana, caenënë xanë apo nenajamatabëxainaeyaexanae. Daxita paxamë ata bajarapacuenia pacanajamatabëxainaeyaexana. ⁶ Ponë yabara itsabaxutota pacatoyaquinatsi, paxamë baja cajena najamatabëcuenenarëyamë panavecuaitavetame bajaraponë, pibisiacuene pexanaenë, penapatsiyaniva panenacaetuatsijavata. Nexata baja bajaraponë belia copata pibisiacuene pexanaejava. Xanepana rabaja. Pëtsa baja pematatsënëa icatsia panavecuaitavetame bajarapacuenia. ⁷ Aeconoxae baja pajamatabëcuenecaevare bajaraponë pibisiacuene pexanaejava. Pabarajamatabëcuenexanepanare baja. Bajaraponë juya pajamatabëcueneyavenonaename piurayaniva. Bajarapacuenia pajamatabëcueneyavenonaename pejamatabëcuenenarëyamë matatoxenetsiyanivatsi bitso pejamatabëcuenenarëyanexa pijaneconi yabara. ⁸ Bitso pacatojitsipatsi panetsitanajamatabëcuenenarëyanexa paneasivajava bajaraponë. ⁹ Nexata pabaxuto copiaya pacatoyaquinatsi, bajarapabaxuto pacatoyaquinatsi saya patacajamatabëcuenenarëyanexa. Jitsipajë xaniavaetsia tayapëtaenexa itsa panejumecovënëtsijitsiamë daxita pacuenia pacaitorobatsi. ¹⁰ Nexata baja aeconoxae itsa pajamatabëcuenecaevame papibisiacuene bajaraponë exana paxamë tuatuajëta, xanë ata baja jamatabëcuenecaevajë bajaraponë pibisiacuene pexanaejava.

Xanë baja jamatabëcueneceavajë paneconi bajaraponë exana xanëjavaberena. Jamatabëcueneceavajë baja bajaraponë pibisiacuene pexanaejava, daxita paxamë aneconijibia jamatabëcuenebarëyaya panejinavanapaenexa Cristo pitabarata. ¹¹ Jamatabëcueneceavatsi baja papibisiacuene bajaraponë exana vaxaitsijavaberena. Tsipaji vaxaitsi itsa apo jamatabëcueneceavitsi tsipae bajarapapibisiacuene pexanaejava, vaxaitsi ata dovathi nacayamaxëitojorobijitsipa. Vaxaitsi baja dovathi cueneyapëtanetsi, xua exanabiaba vajanacacopabiaexanaenexa Dioso pejumelivaisi vajajumecovënëtsijava.

Pacuenia bitso Pablo Tito sivanajamatabëxaina yabara pelivaisi

¹² Patajopajë Troas tomarata tatsipaebinxexa Cristo pelivaisi. Troas tomarata tapatsivajënaeya, taniji Dioso tanetoxanepanaeyaexanaejava tatsipaebinxexa pejumelivaisi bajarapatomarata. Nexata Troas tomarata itsa tsipaebabiabajë Dioso pejumelivaisi, Troas tomarapijivi nenamuxunaevetabiaba xaniavaetsia. ¹³ Itsiata baitsi jane bajara-jota abaxë apo jamatabëcuenebarëyanë. Najamatabëxainajë vajabananë Tito yabara. Tsipaji abaxë Tito apo caxitajarabaxuabinë Troas tomarata. Nexata baja napëjiobajë Troas tomarapijivi taponanexa baja Macedonia nacuyabelia.

Pacuenia Cristo nacajamatabëcueneyavenona yabara pelivaisi

¹⁴ “Pexaniacuene rabaja panetoexaname,” pajanë Diosojavabelia, Cristo pejamatabëcueneta Dioso patanejamatabëcuene yavenonabiabixae. Itsajavabelia itsa paponajë, Dioso paneyajavaponabiaba. Panejamatabëcueneyavenonabiaba pacuenia Dioso jitsipa pataexanaenexa. Panejamatabëcueneyavenonabiabanua itsamonaejavabelia xaniavaetsia patatsipaebinxexa Dioso pejumelivaisi. Pamona jumecovënëta bajarapalivaisi, tsitapexanialivaisitsi bitso. ¹⁵ Dioso sivajamatabëcuenebarëyatsi pajivi itsamonaejavabelia tsipaeba Cristo pelivaisi. Paxanë ata Dioso panesivajamatabëcuenebarëya. Tsipaji patsipaebabiabajë Cristo pelivaisi daxitajivijavabelia. Itsamonae baja jumecovënëtapona Cristo pelivaisi Dioso pecapanepaevinexatsi. Itsamonae pijinia apo jumecovënëtsi Cristo pelivaisi Diosovecua penaxuabivinxexa. ¹⁶ Pamona Diosovecua naxuabiana apo pejumecovënëtsixae Cristo pelivaisi, naxuabiana. Pamonae pijinia Dioso capanepaenatsi pejumecovënëtsixae Cristo pelivaisi, capanepaenatsi. Paxanë, paapóstolevinë, Dioso paneyavenonabiaba. Nexata panejamatabëcueneceavajëpa patatsipaebabiabinxexa pexanialivaisi, Cristo pelivaisi, jivi pecapanepaelivaisinxexatsi. ¹⁷ Pacuenia itsamonae tsipaebabiaba Cristo pelivaisi epematamotsinexatsi, paxanë apo paitsinë. Biji rajane itsajamatabëcuene ata apo pasivanajamatabëxainaenë jivijavabelia itsa patsipaebabiabajë Cristo pelivaisi. Dioso baja cajena panejamatabëcueneyapëtane. Dioso paneitoroba Cristo patatonacuenebinexa.

3

Pacuenia Dioso pejanalivaisi najumecapanepaeya jumaitsi jivi pecapanepaenexa yabara pelivaisi

¹ Itsa pacanavajunupaebatsi paneyapëtaenexa Dioso patanitorobijava Cristo pelivaisi patacatsipaebinxexa, paayajamatabëcuenevinë apo panataenë. Itsamonae pata paxamëjavata penajumetsënëtsilivaisi papecatsipaebinxexa beDiosos pejumelivaisicuenia. Bajarapamonae pacatocapata cuyalato itsamonae petsicobeyaquinaebaxutotsi. Bajarapabaxutota pacatoyaquina: “Diosos raja pejumelivaisi pepaebivi,” pejailivaisi. Bajaraxuata xaniavaetsia pacopiapitame bajarapamonae. Itsiata baitsi jane paxanë itsa papatajë paxamëjavata, apo pacarajutsitsi itsamonae patanetsicobeyaquinaecuyalato. “Pablos raja apóstolenë,” pejailivaisi itsamonae

patanetsicobeyaquinaebaxuto, apo pacarajutsitsi xaniavaetsia patanecopiapitsinexamë. Apo panamatavenonaenë paxamë ata cuyalato patanetsicobeyaquinaenexamë patacaponaenexa itsamonaejavabelia bajarapamonae pataneyapëtaenexa xaniavaetsia patanecopiapitsinexa. ² Bajarapacuenia cuyalato apo panamatavenonaenë patacaponaenexa jivi pataneyapëtaenexa xaniavaetsia patanecopiapitsinexa. Tsi-paji baja jivi yapëtane xaniavaetsia Jesucristo pelivaisi patacatsipaebixae panenajamatabëcuene pënëyorotsijava Diosojavabelia pibisiacuene paneexanabiabijavamivecua. Nexata jivi bajarapamonae yapëtanenua Dioso patanitorobijava. ³ Paxamë xaniavaetsia panejumecovënètame patacatsipaebilivaisi, Jesucristo pelivaisi. Nexata itsamona, apo pataneyapëtaevi ata, itsa pacavënëlivaisitane patanejumecovënëtsijavamë, panesivajamatabëjumaitsi: “Pabloana Corinto tomarapijivi cuyalato apo tsicobeyaquinae atatsi, itsa jume, ibopanata ata apo tsicobeyaquinae atatsi vajayapëtaenexa, itsiata yapëtanetsi Dioso pitorobijavatsi pexaniajailivaisi, Jesucristo pelivaisi, jivi petsipaebavanapaenexa,” panesivajamatabëjai. Piasaëtsaponaponaenë baja cajena Espíritu Santo pacatsijamatabëeca. Nexata baja pacajamatabëcuene pënëyorota pejanajamatabëcuene panexainaenexa. Nexata itsamona xaniavaetsia itsa patsitajinavanapame, bajarapamonae ata baja pacayapëtane Cristo pelivaisi papecatsijamatabëecaejava.

⁴ Paxanë payapëtaniji Dioso patanitorobijava pepacuene Cristo pelivaisi jivi patatsipaebavanapaenexa. Tsi-paji baja Dioso paneyavenonabiaba Jesucristo pejamatabëcueneta. ⁵ Paxanë patasaëta Dioso patatonacuenebinexa, apo panejamatabëcuene caëjêpae. Nexata xua Dioso patoexanavanapajê, Dioso baja cajena paneyavenonabiaba. ⁶ Dioso panejamatabëcuene yavenonabiaba patatsipaebabiabinexa itsamonaejavabelia Dioso najumecapanepaeya pejanalivaisi pejumaitsi jiva jivi pecapanepaenexa. Bajarapamonaejavabelia apo pajumaitsinë tsabiabi: “Pajumecovënëtavanapare Dioso Moiséspijinëta penajumecopatsilivaisi. Itsa apo pajumecovënëtsimë tsane, nexata panaxuabianame,” apo pajanë tsabiabi. Biji rajane jivi patsipaebabiabajê pacuenia Espíritu Santo jamatabëcuene asaëyaexanaejitsiatsi. Palivaisi bajayata Dioso Moiséspijinëta najumecopata, itoroba pebeyaxuabinexatsi pajivi apo jumecovënëtsi bajarapalivaisi. Itsiata baitsi jane pajivi jumecovënëta papejanalivaisi jivi patsipaebabiabajê, Espíritu Santo pesaëta jamatabëcuene asaëyaexanaponatsi.

⁷ Bajayatami Dioso Moiséspijinëta najumecopata. Bajarapalivaisi Dioso yaquina ibopanabejumatata. Bajarapalivaisita Dioso itoroba pajivi apo jumecovënëtsi bajarapalivaisi pebeyaxuabaponaenexatsi. Bajarapacuenia Dioso Moiséspijinëta itsa najumecopata bajarapalivaisi, Moiséspijinë itabaranivenivena bitso. Nexata Israelpijinë pemomoxi apo itabaranaëcotsicapane paetsi. Itsiata baitsi jane bajaraxuacujinae itsamatacabianëjavabelia, itabaracotiacaevapona baja. ⁸ Palivaisi bajayata Dioso Moiséspijinëta najumecopata, xanepana baja picani caepatoyonexa saya. Bajarapalivaisimi matatoxenetsia bitso xanepana papejanalivaisi mapamatacabitaje jumecovënëtavanapatsi Dioso vajanacacapanepaenexa. Bajarapacuenia Dioso nacacapanepaena Espíritu Santo vajanacatsijamatabëecaexae dexitamatacabijavabelianexa. ⁹ Bajayata Dioso Moiséspijinëta najumecopata. Nexata bajarapalivaisi xanepana. Tsi-paji bajarapalivaisi pejamatabëcueneta, jivi yapëtane Dioso penaneconitsiaexanaejavanexatsi pibisiacuene pexanaeneconi yabara. Itsiata baitsi jane bajarapalivaisimi matatoxenetsia bitso xanepana papejanalivaisi pejamatabëcueneta Dioso nacacapanepaejitsia. Bajarapejanalivaisi pejamatabëcueneta, Dioso baja aneconijibia nacatane. ¹⁰ Palivaisi bajayata Dioso Moiséspijinëta najumecopata, xanepana baja picani. Itsiata baitsi jane palivaisi Dioso cotocaevi najumecopata, bajarapalivaisi bitso xanepana. Bajaraxuata palivaisimi copiaya Dioso najumecopata Moiséspijinëta, aeconoxae baja nacatsitajumematamobi. ¹¹ Palivaisi copiaya Dioso Moiséspijinëta najumecopata, xanepana picani caepatoyonexa saya. Biji rajane palivaisi cotocaevi Dioso najumecopata, bitso

xanepana. Tsipaji daxitamatacabijavabelianexa bajarapalivaisi tsitecaena.

¹² Payapētāniji papejanalivaisi Dioso cotocaevi najumecopata bitso pexanepanaejava. Tsipaji daxitamatacabijavabelianexa apo vereverecae tsane bajarapalivaisi. Bajaraxuata apo pajumejunavabiabinē bajarapalivaisi patatsipaebinexa jivijavabelia. Palivaisivajēto payapētāniji, patsipaebabiabajā jivijavabelia. ¹³ Bajayata Moiséspijinē yapētae ata livaisi. Itsiata xaniavaetsia apo tsipaebi pijajivijavabelia. Itsiata paxanē bajarapacuenia apo paitsinē. Bajayata Moiséspijinē itsa itabaranivenivena, naitabaraacata papaēbērēpanata. Bajarapacuenia naitabaraacata pijajivi, Israelpijinē pemomoxi, pitabarataeyanivatsi bajarapacotia pecaevaponaejava. ¹⁴ Itsiata baitsi jane bajarapamonaejavabelia Moiséspijinē tsipaebi ata, apo jumeyapētaetsi pajamatabēcuenelivaisi yabara tsipaeba. Bitso ajamatabēcuenetaja bajarapamonaemi. Nexata apo jumeyapētae palivaisi tsipaebatsi. Bajara pijinia pacuenia ajena mapamatacabijavaberena ataje, tsiteca abaxē ajamatabēcuenetaja bajarapamonaem pemomoxi ata. Bajarapamonaem penacaetuatabiabiabibota, itsa lebababiaba Dioso Moiséspijinēta penajumecopatsilivaisimi, apo jumeyapētaeyabiabi pajamatabēcuenelivaisi xaina. Bajarapamonaem itsa jumecovēnētsipa Cristo pesivatēpaejavatsi, nexata matapania jumeyapētaejitsipa pajamatabēcuenelivaisi xaina palivaisi bajayata Moiséspijinē tsipaebabiaba. ¹⁵ Ajena mapamatacabijavaberena ataje, judiōvi penacaetuatabiabiabibota itsa lebababiaba Dioso Moiséspijinēta penajumecopatsilivaisimi, apo jumeyapētaeyabiabi pajamatabēcuenelivaisi xaina. Bitso ajamatabēcuenetaja bajarapamonaem. ¹⁶ Itsiata baitsi jane pajivi najamatabēcuenecopata vajatuxanenē Jesucristojavabelia, bajarapajivi Dioso vecuaajibiaexanatsi pibisiacuene pexanaeconimi. Nexata bajarapajivi xaniavaetsia jumeyapētane pajamatabēcuenelivaisi xaina palivaisi bajayata Moiséspijinē tsipaebabiaba. ¹⁷ Vajatuxanenē Jesucristobeje, Espiritu Santobeje, najamatabēcuenējēpabeje. Jesucristo pejamatabēcueneta Espiritu Santo ponapona vajajamatabēēthētota. Nexata Espiritu Santo nacajamatabēcueneyavenonapona pibisiacuene vajaexanaeyaniva. ¹⁸ Nexata Jesucristo pejamatabēcueneta, Espiritu Santo nacayavenona. Nexata pacuenia Moiséspijinē jivi vecuanaitabaraacata pitabaracotiataeyanivatsi pitabaranivenivenaejava, bajara vaxaitsi apo itsitsi. Biji rajane tsitanacueneitajētsiaya jinavanapatsi xaniavaetsia jivi peyapētaenexa Dioso ayaijamatabēcuenē pexinaejava. Espiritu Santo nacajamatabēcueneyavenonapona vajavajēnaeyabelia pejanajamatabēcuenē vajaxainaponaenexa. Nexata pacuenia Jesucristo jamatabēcuenēitsi, bajara vaxaitsi ata vajajamatabēcuenēitsinexa.

4

¹ Dioso baja cajena patanitaxutotsoniataexae, panetocopata patatsipaebabiabinexa jivijavabelia pexanialivaisi, Jesucristo pelivaisi. Bajaraxuata itsajavata panetsiayai tsabiabi ata, itsiata apo pajamatabēcopsinē patatsipaebabiabijava Jesucristo pelivaisi. Tsipaji baja Dioso panetocopata bajarapacuenia. ² Muetsia apo paexanaenē itsacuenejava ata. Apo paexanaenē daxita xua piauracuene ata. Jivi patayamaxēitojorobinexa, itsacuenejava ata apo paexanaenē. Apo patsipaebabiabinēnua saicayalivaisi Dioso pejumelivaisivecua. Dioso baja cajena yapētane jivijavabelia ēpexaniajailivaisi patatsipaebabiabijava. Patanejumetaeyenaevi ata bajarapacuenia jumai tsipae. ³ Itsa patsipaebabiabajā jivi pecapanepaelivaisinexatsi, jumenapebetsiaya patsipaebabiabajā xaniavaetsia patanejumeyapētaenexa. Nexata patsipaebi atanē, pajivi apo jumecovēnētsi bajarapalivaisi, bajarapajivi pijacuata nanaxuabiaexanaena Diosovecua. Nexata bajarapajivi daxitamatacabijavabelianexa, Diosovecua naxuabiana. ⁴ Bajarapacuenia apo jumecovēnētsi tsipaji dovathi pejamatabēcueneta ajamatabēcuenēitaquiriayaexanatsi pejumecovēnētsiyaniva bajarapalivaisi. Bajarapapexanialivaisi, Cristo pelivaisi, bepini-jicotia jivi pejamatabēcuenēitayotsinexa itsa jumecovēnēta bajarapalivaisi. Nexata

dovathi, mapanacuapijivi pijatuxanenë, apo jitsipae bajarapalivaisi jivi pejume-covënëtsinexa pejamatabëcueneitayotsiyanivatsi. Cristo paxa Dioso jamatabëcuenejëpa. Nexata pacuenia Dioso jamatabëcueneitsi, bajara Cristo ata jamatabëcueneitsi. ⁵ Livaisi itsa pacatsipaebabiabatsi, paxanë apo panalivaisipaebabiabinë pataneyaiyataenexamë. Biji rajane vajatuxanenë Jesucristo pelivaisi pacatsipaebabiabatsi. Paxanë saya panataniji bepanijajivinë. Jesucristo bitso pajitsipajë. Bajaraxuata paxamë ata jamatabëpacayavenonatsi. ⁶ Bajayata Dioso mapanacuaje itsa exana, pitaquirijavata pitayotsinexa, itoroba juameto penaexanaenexa. Bajara pijinia pacuenia paxanë ata patajamatabëcueneaitaquirijavami, Jesucristo pelivaisi itsa pajumecovënëtajë, Dioso panejamatabëcueneitayota. Bajarapacuenia itsa panejamatabëcueneitayota, payapëtaniji Dioso bitso ayaijamatabëcuene pexainaejava. Jesucristo itsa itabaranivenivena Dioso pexënatoxae, paxa Dioso jamatabëcueneitajëta Dioso bitso ayaijamatabëcuene pexainaejava.

Pacuenia Dioso jamatabëcueneyavenona pijajivi, itsa tonacuenebavanapatsi, yabara pelivaisi

⁷ Paxanë Dioso patanejamatabëcueneitayotsivi ata, pataperabëto apo ajamatabësaë. Pacuenia atsavaxi bajayajebi apo ajamatabësaë, bajara saya itsi. Pataperabëto apo paperabësaë atanë, Dioso pataneyavenonaexae, pajamatabëcuenesaënë tsavana-pae. Nexata bajarapacuenia pataajamatabëcuenesaë tsavanapaejava patanetaevi, jamatabëjumai tsane paxanë yabara: “Mapamonaeje ajamatabëcuenesaë tsavanapae Dioso pesaëta,” jamatabëjai tsane. ⁸ Nexata panetocopiapatabiabi ata itsacuene patanetoyapëbejecuene, itsiata Dioso paneyavenonabiaba patavecuapanepaenexa bajarapacuenie. Apo payapëtaeyabiabi atanë pajamatabëcuene yabara panetocopiapata patanetoayapëbejecuene, itsiata paxanë apo pacopatsinë Dioso patajumecovënëtsijava. ⁹ Itsamonae panebejiobiaexanabiabi ata Dioso patajumecovënëtsijava yabara, itsiata Dioso apo panecopatsi patajaepato. Itsamonae irata panepenatabiabi ata patanebeyejebinexa picani, itsiata pepacuene apo panebeyaxuababiabi Dioso pataneyavenonabiabixae. ¹⁰ Pacuenia Jesús pijavajabitsaë bajayajebi picani jamatabëbeyaxuababiabatsi, bajarapacuenia paxanë ata Jesús papijajivixaenë, itsamonae jamatabëpanebejebabiaba picani. Itsiata apo panebeyejebicanepae. Bajaraxuata daxita jivi yapëtane Jesús pataneyavenonabiabijava. ¹¹ Daxitamatacabi patajinavanapaematacabianë, panetsiayai tsabiabi itsamonae patanebeyejebinexa Jesús papijajivixaenë. Bajarapacuenia panetocopiapatabiabi jivi pataneyapëtaenexa Jesús pataneyajavaponaponaejava. ¹² Panetsiayai tsabiabi itsamonae patanebeyejebinexa patacatsipaebabiabixae papecapanepaelivaisinexa Diosojavabelia. Nexata paxanë patacatsipaebilivaisi panejumecovënëtsixae, itsamatacabi athëbëtatsia Dioso pacarajutsiana matacabi apo peverevere-caejava.

¹³ Dioso pejumelivaisibaxutota jumaitsi mapacueniaje: “Jumecovënëtajë Dioso taneyavenonaejavanexa. Bajaraxuata tsipaebajë jivijavabelia Dioso taneyavenonaejavanexa,” jai. Bajara pijinia pacuenia paxanë ata pajamatabëcueneitsinë. Pajumecovënëtajë Dioso pataneyavenonaejavanexa. Bajaraxuata patsipaebabiabajë jivijavabelia Dioso pataneyavenonaejavanexa. ¹⁴ Vajatuxanenë Jesús petëpaecujinae Dioso icatsia asaëyaexanatsi. Bajaraxuata payapëtaniji baja pexaniajaicuene Dioso icatsia paxanë ata pataniasaëyaexanaejavanexa patatëpaecujinae, Dioso patayajavajinavanapaenexa pijanacuatatsia. ¹⁵ Paxanë itsamonae panebejiobiaexanabiabi ata, itsiata apo pacopatsinë patacatsipaebabiabijava pexaniajaivilivaisi. Nexata panevajënaeyabelia pajumecovënëtaponame patacatsipaebilivaisi. Nexata baja itsa paayaibitsaëtomë tsaponae Dioso panejumecovënëtsivi, paayaibitsaëtomë baja pijinia tsaponae Diosojavabelia panejumaitshivinexa: “Xanepana rabaja. Tsipaji bitso pexaniacuene panetoexaname,”

panejaivinexa Diosojavabelia. Nexata papecajumetaevi ayaibitsaëto yapëtaena Dioso bitso ayaijamatabëcuene pexainaejava.

¹⁶ Bajaraxuata itsamonae panebejiobiaexanabiabi ata, itsiata apo paja-matabëcopatsinë jivi patatsipaebabiabijava pexaniajailivaisi. Pataperabëto cueranaponae ata, itsiata patavajënaeyabelia, caematacabi canacujitsia, paja-matabëcuenesaënë tsaponae Dioso patajumecovënëtsijava. ¹⁷ Xua nacatocopiapatabiaba itsamonae vajanacabejiobiaexanabinexa, saya caeepatoyo bajarapacuenia nacabejiobiaexanabiaba mapanacuataje vajajinavanapaeepatoyo. Bajaraxuacujinae athëbëtatsia xainaenatsi daxitacuenecua pexaniajava, baitsi matacabi apo peverevereaejava. ¹⁸ Nexata apo vajënaeetavanapaetsi vajanacatocopiapatsinexa, xua nacacajëpa vajataenexa. Biji rajane jamatabënjinavanapatsi vajanacatocopiapatsinexa xua apo nacacajëpae vajataenexa. Tsipaji xua nacacajëpa vajataenexa, daxita bajaraxua, vereverecaena. Itsiata baitsi jane xua apo nacacajëpae vajataenexa, daxitamatacabijavabelianexa apo vereverecae tsane.

5

¹ Mapanacuata jivi pexanaebobërëto bepijia baabeje. Bajara pijinia itsi vajaper-abëto ata. Bepijia vereverecaena. Itsiata baitsi jane yapëtanetsi mapacueneye. Vajätëpaecujinae itsamatacabi Dioso athëbëtatsia nacarajutsiana apo peverevereaeper-abëtonexa. ² Xaniajai cajena. Itsa abaxë jinavanapatsi mapanacuataje, bitso picani jitsipabiabatsi vajanacaperabëithianaenexa athëbëpijiiperabëtonexa. Jitsipabiabatsi picani vajaponaenexa athëbëabetsia pejanaperabëto vajayajavajinavanapaenexa athëbëtatsia. ³ Athëbëtatsia raja aperabëjibia apo jinavanapae tsanetsi. Biji rajane pejanaperabëto vajavajinavanapaenatsi. ⁴ Itsa abaxë jinavanapatsi mapanacuataje, bitso picani jitsipabiabatsi vajanacaperabëithianaenexa. Apo jitsipaetsi picani vajätëpaejava. Itsi-ata baitsi jane yapëtanetsi mapacueneye. Vajätëpaecujinae itsamatacabi athëbëtatsia vajavajinavanapaenatsi pejanaperabëto, apo peverevereaeperabëtonexa jane baja. Nexata mapanacuata vajayajavajinavanapaeperabëtomu ajibi baja tsane. Xainaenatsi juya apo peverevereaeperabëtonexa. ⁵ Bajarapacuenia vajanacaperabëithianaenexa Dioso nacatoxaina. Nexata Dioso nacatocopata Espíritu Santo vajanacayajavapon-aponaeenexa. Nexata Dioso yabara bejamatabëjumaitsi mapacueniaje: “Mapacue-niaje Espíritu Santo Dioso pataneyajavaponaponaeyaexanaexae, nexata payapëtaniji xaniajai pepacueneye itsamatacabi Dioso pataneperabëithianaenexa. Xaniajai baja cajena. Pepacueneye itsamatacabi Dioso paneperabëithianaena pacuenia baja najume-capanepaeya jumaitsi,” bejamatabëjaitsi Dioso yabara.

⁶ Bajaraxuata apo jamatabëcopatsitsi vajajumecovënëtsijava Dioso. Vajavajënaeyabelia jamatabëcuenebarëyatsi. Yapëtanetsi mapacueneye. Itsa abaxë vajaperabëto vajavajinavanapatsi mapanacuataje, panacuata itsamatacabi vajatuxanenë daxitamatacabijavabelianexa vajavajinavanapaejitsiatsi, bajarapanacua abaxë tajë vecuajinavanapatsi. ⁷ Apo taetsi abaxë athëbëtatsia vajatuxanenë vajayajavajina-vanapaejavanexa. Itsiata yapëtanetsi itsamatacabi xaniajai vajatuxanenë athëbëtatsia vajayajavajinavanapaejavanexa. ⁸ Bajaraxuata jitsipatsi vajätëpaejava. Tsipaji mapanacuata vajajinavanapaejava, matatoxenetsia bitso jitsipatsi vajatuxanenë pijanacuatatsia vajayajavajinavanapaenexa. ⁹ Bajaraxuata mapanacuata vajajinavanapaeematacabibeje, asaëyata vajatuxanenë tonacuenebavanapatsi. Tsipaji jitsipatsi vajanacasivajamatabëcuene barëyajava. Vajätëpaecujinae ata, pijanacuatatsia jamatabëtojinavanapatsi pejitsipaecuenia. ¹⁰ Vajatuxanenë pejitsipaecuenia jamatabëtojinavanapatsi mapanacuata ata vajajinavanapaeepato. Tsipaji caejivitsi canacujitsia Cristo pitabarata tonaitajëtonaenatsi. Nexata bajarapamatacabi nacarajutsiana daxita pijajivitsi xua nacatoxaina vajanacarajutsinexa. Xaniavaetsia

vajatuxanenë itsa tonacuenebavanapatsi, nacarajutsiana xua nacatoxaina vajanacarajutsinexa. Pamonaexaniavaetsia apo tonacuenebavanapae, nacueratsiana.

Pacuenia Dioso nacabarajamatabëcuenexanepana vajaneconi yabara Cristo vajanacasivatëpaexae yabara pelivaisi

¹¹ Payapëtaniji baja cajena itsamatacabi vajatuxanenë pitabarata cujunaviaya patananubenaefavanexa. Bajaraxuata asaëyata jivijavabelia patsipaebabiabajë Jesucristo pesivatëpaejavatsi pejumecovënëtsinexa. Itsajamatabëcuene apo panajamatabëxainabiabinë bajarapalivaisivecua. Dioso baja cajena panejamatabëcueneyapëtane pacuenia pajamatabëcueneitsinë. Pajitsipajë paxamë ata patanejamatabëcueneyapëtaenexamë.

¹² Bajarapacuenia paxanë apo pacanavajunupaebitsi saya pataneyaiyataenexamë. Pacanavajunupaebatsi rajane pataneyapëtaenexamë vajatuxanenë papijajivicuenenë. Nexata bajarapacuenia paxamë papecajamatabëcuenecaëjëpaenexa panejumecanaviatsijava pamonaexa pibisiacuena panebaracuaicuaijai. Bajarapamonaexa panejalivaisiaexanabiaba. Beayajamatabëcuenevi nataeyabiaba. Pexaniacuene exanabiabi ata, bajaraxua exanabiaba saya jivi petaenexatsi. Itsiata baitsi jane bitso naneconita Diosojavabelia pibisiacuene pexanaeneconi yabara.

Apo canaëjëtsi pexaniajamatabëcuene pexainaenexa. ¹³ Paxanë picani xaniavaetsia Dioso jumecovënëtsiaya jivi patsipaebabiabajë Jesús pelivaisi. Itsiata Dioso apo pejumecovënëtsivi, panejumai tsabiabi: “Pematajemabivitsi raja saya,” panejai tsabiabi. Itsiata itsa pacatsipaebabiabatsi bajarapalivaisi, Jesucristo pelivaisi, pacatsipaebabiabatsi paxamë ata Dioso papecacapanepaenexa. Paxamë apo panetaemë bepatanematajemabivi.

¹⁴ Cristo raja paneasiva tsabiabi. Bajaraxuata patonacuenebavanapajë. Pajamatabëjumaitsinë tsabiabi: “Caenë Cristo nacasivatëpa daxitanexatsi. Bajaraxuata Dioso baja nacatane Cristo bevajayajavatëpaevi. Nexata baja bevajananeconimatamotsicapanepaevi Dioso nacatane,” pajamatabëjanë tsabiabi.

¹⁵ Cristo jivi sivatëpa. Petëpaecujinae Dioso icatsia asaëyaexanatsi. Nexata daxita pamonaexa jumecovënëta Cristo pesivatëpaejavatsi, matacabi apo pevereverecaexa xainaena. Nexata bajarapamonaexa apo hexanavanapae pijacuata penatojitsipaecuena. Biji rajane hexanavanapa pacuenia Cristo tojitsipatsi pesivajamatabëcuenebarëyanexatsi.

¹⁶ Bajaraxuata ajena mapamatacabijavaveliacujinaeje, patavajënaeyabelia tsaponae, Dioso pejumecovënëtsivi yabara apo bepanajamatabëxainaenë pibisiacuena, pacuenia Dioso apo pejumecovënëtsivi banajamatabëxaina. Tsipaji pamonaexa Dioso pejumecovënëtsivi pacuenia bëpënëaverena jamatabëcueneitsi, apo pajamatabëcueneyapëtaenë. Xanë ata rabaja picani Jesucristojavabelia tanajamatabëcuenecopatsivajënaeya, Jesucristo yabara najamatabëxainajë pibisiacuena, pacuenia banajamatabëxaina Dioso apo pejumecovënëtsivi. Bepenajumetsënëtsinë taniji Cristo. Itsiata baitsi jane aeconoxae baja bajarapacuenia apo najamatabëxainaenë Cristo yabara. Tsipaji baja yapëtaniji Cristo pexaniajainëcuene.

¹⁷ Pajivi najamatabëcuenecopata Jesucristojavabelia, bajarapajivi xaina pejanajamatabëcuene. Pijaperujujamatabëcuenemi baja vecuaajibiaexanatsi. Nexata bajarapajivi daxitacuene sivanajamatabëxaina pexaniajamatabëcueneta.

¹⁸ Daxitatsi Dioso pejanajamatabëcuene nacarajuta. Dioso nacabarajamatabëcuenexanepana Cristo vajanacasivatëpaexae vajaneconi yabara. Nexata Dioso panetocopata pejumelivaisi patatsipaebanajetarubenaenexa daxitajivijava, bajarapamonaexa ata itsa jumecovënëta, Dioso pebarajamatabëcuenexanepanaenexatsi.

¹⁹ Nexata Cristo cruzata itsa sivatëpa mapanacuapijivije, Cristo pesivatëpaexaetsi, Dioso barajamatabëcuenexanepanaeya tanetsi daxita pamonaexa jumecovënëta Cristo pesivatëpaejavatsi. Paneconi picani bajarapamonaexa xaina, Dioso baja vecuaajibiaexanatsi Cristo pesivatëpaejamatabëcuenetatsi. Bajarapalivaisi Dioso

panetocopata patatsipaebanajetarubenaenexa jivijavabelia. ²⁰ Nexata paxanë Cristo papijajivinë tsanajetarubena. Cristo baja cajena pejamatabëcueneta, papatajè paxamëjavata patacatsipaebinexa pexanialivaisi. Pacuenia Dioso itsa patsipa, pacamuxujobijitsipa, bajarapacuenia xanë ata pacamuxujobatsi Cristo papeca-sivatëpaexae panijaneconi yabara Dioso papecabarajamatabëcuenexanepanaenexa. ²¹ Cristo pibisiacuene apo exanae, tsiquirijavayo ata. Itsiata baitsi jane Cristo Dioso tsijumaxuabatsi daxita vaxaitsi vajaneconimi. Nexata vajaneconi yabara Cristo bepibisiacuene pexanaenëcuenia cruzata beyaxuabatsi. Bajarapacuenia Cristo cruzata vajanacasivatëpaexae, nexata Dioso aneconihibia nacatane itsa jumecovënëtatsi Cristo vajanacasivatëpaejava vajaneconi yabara.

6

¹ Dioso pataneyajavanacuenebixae, asaëyata pacamuxujobatsi. Dioso pinijicuenia papecaitaxutotsoniataejava, pacatsipaebatsi panejumeaebianiva. Itsa pajumeaebijitsipame, nexata Dioso nacueratsipa papecaitaxutotsoniataejava. ² Tsipaji Dioso jivi pitaxutotsoniataejava, tajëvelia Dioso pejumelivaisibaxutota jumaitsi mapacueniaje:

Pamatacabi jivi itaxutotsoniataenajë, cajumetaenatsi. Nexata pamatacabi jivi capanepaenajë, xamë ata cayavenonaenatsi, jai tajëvelia Dioso pejumelivaisibaxutota.

Aeconoxae rabaja nacatocopiapata Dioso vajanacaitaxutotsoniataejava vajanacacapanepaenexa jane baja.

³ Itsa patonacuenebavanapajë Dioso, pajitsipajë daxitajivi xaniavaetsia patatsitajinavanapaejava, daxitajivi Dioso pejumecovënëtsinexa. Apo paexanaenë pibisiacuene, tsiquirijavayo ata, pataexanaejava yabara jivi patanejumeaebianiva Dioso pejumelivaisi itsa patsipaebajë. ⁴ Biji rajane daxita xua paexanavanapajë, xaniavaetsia patsitaexanavanapajë jivi pataneyapëtaenexa Dioso papijajivicuene. Itsamonae panebejiobiaexanabiaba. Itsajavata bitso panamatavenonabiabajë itsacuenejavaxi. Itsajavata bitso panetsiayai tsabiabi itsamonae patanebeyejebinexa. Bajarapacuenia panetsiayai tsabiabi ata, itsiata bajayajebi pajamatabëcuenesaenë tsavanapae Dioso pejumelivaisi jivi patatsipaebavanapaejava. ⁵ Itsajavata panejumatitibabeyabiaba. Itsajavata penaneconitsivi pejebabiabibota panejebabiaba. Itsajavata Cristo pelivaisi jivi itsa patsipaebajë, itsamonae anaeya panebarajinabiaba patanebeyejebinexa picani. Itsajavata bitso panacuenebabiabajë. Itsajavata meravivi ata apo pamajitabiabinë Dioso pejitsipaecuenia pataexanaenexa. Itsajavata bitso patajani tsabiabi. Bajarapacuenia panetoayapëbeje tsabiabi ata, itsiata bajayajebi pajamatabëcuenesaenë tsavanapae Dioso pejumelivaisi jivi patatsipaebavanapaejava. Nexata jivi paneyapëtane Dioso papijajivicuene. ⁶ Dioso papijajivicuene jivi pataneyapëtaenexa, jivi patsitajinavanapajëna mapacueniaje. Pamatacabibeje pajinavanapajë, pibisiacuene apo paexanavanapaenë. Biji rajane jivi patsitajinavanapajë pexaniajailivaisi patayapëtaevicuenia. Bajayajebi itsamonae pibisiacuene paneexanabiabi ata, apo pacuenecanaviatabiabinëna. Pexaniacuene patoexanabiabajëna itsamonaejavabelia. Patsitajinavanapajëna pacuenia Espíritu Santo paneyapëtaeyaexanapona Espíritu Santo patanetsijamatabëecaexae. Patsitanajamatabëcuene itajëtavanapajëna itsamonae ata pataasivajava patajamatabëëthëtojavavetsina. Bajarapacuenia patatsitajinavanapaejava, jivi xaniavaetsia paneyapëtane Dioso papijajivicuene. ⁷ Dioso papijajivicuene jivi pataneyapëtaenexa, patsitajinavanapajëna mapacueniaje. Epexaniajailivaisi jivi patsipaebabiabajë. Patsitanacueneitajëtavanapajëna daxita xua paexanavanapajë, Dioso pataneyavenonabiabijava. Dioso baja aneconihibia patanetaexae, Espíritu Santo

paneyavenonabiaba patanayajivitaeyabiabinexa dovathi pijacuene. Paneyavenonabiabanua Espíritu Santo patacueneamoneyabinexa dovathi. Bajarapacuenia patatsitajinavanapaexae, jivi paneyapētane Dioso papijajivicuenenē. ⁸ Itsamonae paneyaiyataeyabiaba. Itsamonae pijinia apo paneyaiyataeyabiabi. Itsamonae pexaniacuenia panebaracuaicuaijai tsabiabi. Itsamonae pijinia pibisiacuenia panebaracuaicuaijai tsabiabi. Itsamonae panetaeyabiaba pexaniajailivaisi patatsipaebivicuene. Itsamonae pijinia panetaeyabiaba bepatanajumetsēnētsivi. ⁹ Itsamonae pataneyapētaevi ata, itsiata apo bepataneyapētaevi panetaeyabiaba. Itsajavata itsamonae jamatabēpanebejejababiaba picani. Itsiata tsiteca asaēya bajarapalivaisi patsipaebavanapajē. Dioso baja cajena panetocopata itsamonae ayaicuenia patanebejiobiaexanabiabinexa, itsiata apo patanebejebinexa. ¹⁰ Panajamatabēxainabiabi atanē bitso itsamonae pibisiacuene pexanaejava yabara, itsiata bēpēnēa pepacuene pajamatabēcuenebarēyanē tsavanapae daxitamatacabijavabelianexa. Patabejiobivi picani. Itsiata jivi ayaibitsaētoxanetonē ricovi paexanaponajē Dioso pejumelivaisi patatsipaebijamatabēcueneta pejumecovēnētsixae. Apo paxainanē picani mapanacuapijicuene. Itsiata baitsi jane Diosojavabelia daxitacuene paxainajē, apo pevereveceajavanexa jane baja.

¹¹ Tajamonae, paxamē paCorinto tomarapijivimē, pacanamamatabēcuene vajunupae-batsi baja cajena roviaalia. Apo pacavecuanamamatabēcuene matayatsitsi. ¹² Asivaya pacatae atatsi, paxamē itsiata bajarapacuenia asivaya apo panetaemē. ¹³ Pacuenia pexi pexainanē asaēya banacoximuxujioba, bajara pijinia pacuenia paxanē ata pacamuxujiobatsi. Paxamē ata panejamatabēcuenevetsina asivaya panetaema pacuenia baja paxanē asivaya pacatanetsi.

Pacuenia piasaētsaponaponaenē Dioso nacatane bepijatemplobotsi tsavanapae yabara pelivaisi

¹⁴ Dioso apo pacatojitsipae mapacueneje. Paxamēyajuvēnēva, Dioso pejumecovēnētsiva, pētsa pitatsi Dioso apo pejumecovēnētsinē. Paxamē ata papebijivimē, pētsa papitame Dioso apo pejumecovēnētsiva. Bajayajebinxata ata pētme Dioso apo pejumecovēnētsivi. Tsipaji apo pacajamatabēcuenejēpae tsipae. Dioso pejumecovēnētsivi apo jamatabēcuenejēpae Dioso apo pejumecovēnētsivi. Tsipaji Dioso jivi pejamatabēcuene itayotsijamatabēcuenetsi, mapanacuata pitaquirijamatabēcuenebeje, apo najamatabēcuenejēpaebeje. ¹⁵ Cristobeje dovathibeje apo najamatabēcuenejēpaebeje. Nexata pijinia pajivi Dioso pejumecovēnētsijivi, Dioso apo pejumecovēnētsijivibeje, acuenebi bajayajebi penajuanacuenebaponaponaenexabeje. Tsipaji apo najamatabēcuenejēpaebeje. ¹⁶ Bajara pijinia navecuaitsibeje Dioso pijatemplobobeje, jumapecataeya pexanaenēanē penubenaetemplobobeje. Apo najamatabēcuenejēpaebeje. Vaxaitsi baja cajena piasaētsaponaponaenē Dioso, nacatane bepijatemplobotsi tsavanapae. Bajarapacuenia nacatane tsipaji pacuenia bajayata Dioso templobota ponaponabiaba, bajara pijinia pacuenia aeconoxae Dioso nacayajavaponapona. Bajarapajamatabēcuene yabara bajayata Dioso vaxaitsi yabara tajēvelia jumaitsi mapacueniaje:

Tsijamatabēcaenajē bajarapamonae tayajavaponaponaenexa. Bajarapamonae pija-Diosonē tsane. Bajara pijinia pamonaē tajajivi tsane, jai Dioso bajayata tajēvelia vaxaitsi yabara.

¹⁷ Bajaraxuata Dioso apo pejumecovēnētsivi vajavecuapitsapaejavanexa, vajatuxanenē Dioso tajēvelia nacavajunupaeba. Vajanacavajunupaebijavata jumaitsi mapacueniaje:

Pamonae tuatuajēta pajinavanapaename, pavecuapitsapaename. Bajarapamonae navecuatsatsia pajinavanapaename. Paxamē pētsa pibisiacuene panaexanaename bajarapamonaeta papecajamatabēcuene bijianaeyaniva. Nexata xanē

pacasivabarëya tsanetsi. ¹⁸ Paneaxanë tsane. Nexata daxita paxamë pataximë tsane, jai bajayata vajatuxanenë Dioso tajëvelia vaxaitsi yabara, daxitacuene pevetsinë.

7

¹ Tajamonae bitso patacaasivavi, daxita baja pacuenia Dioso pejumelivaisibaxutota tajëvelia najumecapanepaeya jumaitsi pexicueniatsi vajanacataenexa, yapëtanetsi baja. Bajaraxuata Dioso pitabarata aneconijibia jinavanapaenatsi. Vajavitota pibisiacuene vajaexanabiabijavami, copatsianatsi baja. Vajajamatabëëthëtota pibisiajamatabëcuene vajanajamatabëxainabiabijavami ata, copatsianatsi baja. Dioso yaiyataeya jinavanapaenatsi Dioso vajanacatojitsipaecuenia.

Pacuenia Pablo sivajamatabëcuenebarëya Corinto tomarapijivi yabara pelivaisi

² Panetsitanajamatabëcueneitajëre pataniasivajavamë. Caejivi ata paxamëyajuvënëjivi apo pacayajuvënëitsacueniabitsi. Apo pacayajuvënë jamatabëcuenebijianaetsinua. Apo pacayajuvënë yamaxëitorobitsinua bajarapacuenia panijapalata patacavecuapitsinexa. ³ Itsa pacajumaitsitsi mapacueniaje, apo pacabijataetsi. Jume baja cajena. Pacuenia baja cajena copiaya pacajumaitsitsi, daxita matabijavabelianexa asivaya pacajamatabënajinabiabatsi. ⁴ Payapëtanijinua caejamatabëcuene panenajamatabëxainaejava. Bajaraxuata bitso pacasivajamatabëcuenebarëyatsi. Paepatota ata itsamonae panebejiobiaexanabiaba, apo panasivabëjanë tsabiabi. Tsipaji bajarapaepatota itsa pacavënëlivaisitaeyabiabatsi xaniavaetsia panejinavanapaeyava, pacasivanajamatabëcuene saëtabiabatsi. Nexata panebejiobiaexanabiabi ata, bitso pabarëyanë tsabiabi paxamë yabara.

⁵ Macedonia nacuata patapatsicujinae, caeto ata cajena xaniavaetsia apo panacueraevetsinë. Daxitajava, itsaxuayo panajetarubenajë, paneyalivaisiaexanabiaba. Nexata itsa panayajumetaeyabiabajë itsacuenelivaisi, patajamatabëëthëtota bëpënëa payajunaviajinavanapabiabajë. ⁶ Itsiata baitsi jane Dioso, jivi pejamatabëcueneasaëyaexanaenëxae, panejamatabëcueneasaëyaexana. Bajarapacuenia Dioso panejamatabëcueneasaëyaexana paxamëjavaverena peponaenë, Tito, itsa patajopa paxanëjavata. ⁷ Tito pepatsixae paxamëjavaverena, panejamatabëcueneasaëyaexana. Itsiata Tito ëpepatsijava, apo panejamatabëcueneasaëyaexanae. Biji rajane Tito paxamëjavabelia itsa patajopa, paxamë pina Tito pajamatabëcueneasaëyaexaname. Bajarapacuenia paneexanaejava, Tito itsa pacavajunupaeba paxanëjavaberena, pamuxunanajamatabëcuenesaëtajë. Bitso pina picani jamatabëpanetaneme. Bajarapalivaisinua Tito panetsipaeba. Panetsipaebanua bitso paneyanajamatabëxainaejava pibisiacuene paneexanaeneconi. Panetsipaebanua bitso patanesivanajamatabëxainaejavamë itsa panevënëlivaisitaneme bitso patacasivanajamatabëxainaejava. Bajarapacuenia paneexanaejava, Tito itsa pacavajunupaeba paxanëjavaberena, bitso pamuxunajamatabëcuenebarëyanë.

⁸ Pabaxutomi copiaya pacatoyaquinatsi, itsa palebame, bitso pacanajamatabëxainaeyaexana. Itsiata saya caepatoyonexa. Bajarapacuenia papecanajamatabëxainaeyaexanaexae, bajarapabaxutomi yabara jamatabëjumaitsinë mapacueniaje: “Apo betoyaquinaenë picani bajarapabaxutomi,” jamatabëjanë. Itsiata baitsi jane aeconoxae baja bajarapabaxutomi yabara bajarapacuenia apo sivanajamatabëxainaenë. ⁹ Aeconoxae baja sivabarëyanë patacatoitorobixae bajarapabaxutomi. Itsiata apo sivabarëyanë xua pacanajamatabëxainaeyaexanatsi panijaneconi yabara. Biji rajane sivabarëyanë tsipaji patacanajamatabëxainaeya exanaejava bajarapabaxutomita, pacopabame baja pibisiacuene paneexanabiabijava. Panajamatabëcuenepënëyorotame baja Diosojavabelia. Nexata pacuenia Dioso pacatojitsipa, paexanavanapame. Itsiata apo pacaitsacueniabi patacatoyaquinaebaxutomi. Biji rajane bajarapabaxutomi

pejamatabëcueneta, pacajamatabëcueneyavenonatsi. ¹⁰ Nexata pacuenia Dioso pacatojitsipa, bitso payanajamatabëxainame panijaneconi. Nexata baja pacopabame pibisiacuene paneexanaejavami. Panajamatabëcuenepënëyorotame baja Diosojavabelia. Nexata paxamë Dioso pacacapanepaena. Pamona Dioso capanepaenatsi, apo jumaitsi tsane: “Apo jitsipaenë picani Dioso tanecapanepaejava,” apo jai tsane. Itsiata baitsi jane pamona yanajamatabëxainavanapae ata pibisiacuene pexanaeneconi, itsiata itsa apo copabi tsane pibisiacuene pexanabiabijava, itsa apo najamatabëcuenepënëyorotsi Diosojavabelia, bajarapamona Dioso vecua naxuabiana daxitamatacabijavabelianexa. ¹¹ Panajamatabëcuenecanaëjère mapacueneje. Pacuenia Dioso pacatojitsipa, bitso paxamë payanajamatabëxainame panijaneconi. Nexata baja aeconoxae paneconijibimë Dioso pitabarata. Najamatabëcueneraviabiaya baja pacanaëjètame panijaneconi. Pepacuene panavajunupaebamenua Diosojavabelia pacuenia paexanavanapame. Paxamë picani bitso pabaraanaepanabiabame paxamëyajuvënë, ponë pibisiacuene exanaponapona paxamë tuatujëta. Panecujunavabiabamenua picani bajaraponë pijaneconi yabara. Itsiata bitso pajitsipame paneexanaenexa Dioso papecatojitsipaecuenia. Pasivanajamatabëcueneretamenua panenaneconitsiaexanaenexa paxamëyajuvënë, ponë pibisiacuene exanaponapona paxamë tuatujëta. Bajarapacuenia itsa pasivanajamatabëxainame pibisiacuene pexanaponaponaenë, Dioso patsitanajamatabëcueneitajëtame Diosojavabelia apo panenaneconitsijava. ¹² Itsa pacatoyaquinatsi copiaya pabaxutomi, pacatoyaquinatsi padaxitamë patacamuxujiobinexa. Apo toyaquinaenë caenë paxamëyajuvënë tamuxujiobinexa, ponë pibisiacuene exanaponapona paxamë tuatujëta. Apo toyaquinaenë nua tamuxujiobinexa ëponë ata pibisiacuene toexanatsi itsanë. Pacatoyaquinatsi bajarapabaxutomi padaxitamë patacamuxujiobinexa. Pacatoyaquinatsi bajarapabaxutomi tsipaji pajitsipajë panijacuata panenajamatabëcueneyapëtaenexa juya pataniasivajavamë. Baitsi pacuenia pajitsipame, Dioso pitabarata patanejumecovënëtsinexamë patacasivajamatabëcuenebarëyanexa. ¹³ Nexata baja panejumecovënëtame. Bajarapacuenia patanejumecovënëtsixaemë, bitso pacasivajamatabëcuenebarëyatsi.

Pibisiacuene itsa paexaname, Tito bitso pacasivanajamatabëxaina. Itsiata baja aeconoxae daxita paxamë Dioso pitabarata xaniavaetsia panejinavanapaexae, apo pacasivanajamatabëxainae baja. Bajaraxuata pacasivajamatabëcuenebarëya Tito. Nexata Tito papecasivajamatabëcuenebarëyajava yabara, paxanë ata bitso pacasivajamatabëcuenebarëyatsi. ¹⁴ Tito peponaevajënaeya paxamëjavabelia, jumaitsinë bajaraponëjavabelia: “Corinto tomarapijivi, Dioso pejumecovënëtsivi, tatoyaquinaebaxuto pejamatabëcueneta, itsiata najamatabëcuenebiane Diosojavabelia,” janë paxamë yabara Titojavabelia. Nexata bajarapacuenia paexaname baja. Bitso nexata Tito pacasivajamatabëcuenebarëya. Pacuenia xanë pacatsipaebabiabatsi pexaniajailivaisi, bajarapacuenia paxamë yabara tsipaebajë Titojavabelia. Bajarapacuenia itsa tsipaebajë, xaniajanë cajena. Tsipaji pacuenia pacatoyaquinatsi, paexanavanapame. Bajaraxuata pacasivajamatabëcuenebarëyatsi. ¹⁵ Tito najamatabënapitabiaba panejumecovënëtabiabiabijava pacuenia pacaitoroba. Najamatabënapitabiabanua yayiataeya panecopiapitsijava ata. Bajaraxuata Tito bitso pacaitaxanapona pevajënaeyabelia. ¹⁶ Pacasivajamatabëcuenebarëyatsi. Tsipaji xaniavaetsia yapëtaniji paneexanavanapaejava pacuenia Dioso pacatojitsipa.

8

Pacuenia Dioso pejumecovënëtsivi penajamatabëcuenerajutsixae Diosojavabelia, ofrenda tojeba Diosonexa yabara pelivaisi

¹ Tajamonae, pacatoyaquinatsi mapalivaisije paneyapëtaenexa pacuenia Dioso jamatabëcueneyavenonatsi Dioso pejumecovënëtsivi, Macedonia nacuapijivi. ² Macedonia nacuapijivi petoayapëbejecuenetsi tocopiapataponae atatsi ayaicuenia pejamatabëcuenejëtsinexatsi, itsiata jamatabëcuenebarëya tsavanapae. Bajarapamonae bitso bepejiobivi picani. Itsiata ofrenda itsa exana petoitorobinexa bepejiobivi Jerusalén tomarapijivijavabelia, ayaijava jebabiaba. ³ Xanë yapëtaniji bajarapamonae bepejiobivicuene. Itsiata bepejiobivi ata, ayaijava jebabiaba ofrenda itsa exanabiaba. Bajarapamonae jebabiaba bajarapacuenia, itsajivi ata apo itorobi atatsi ayaijava pejebinexa. ⁴ Bajarapamonae pinijicuenia paneitoroba patatocaponaenexa pejebiofrenda. Panejumaitsi mapacueniaje: “Pexaniacuene panetoexanaenexa. Panetocaponaenexa mapaofrendaje Jerusalén tomarajavabelia Dioso pejumecovënëtsivi panerajutsinexa. Paxanë ata bitso jamatabëpayavenonajë bajarapamonae,” panejai. ⁵ Nexata bajarapamonae bepejiobivixae, pasivajamatabëjumaitsinë picani: “Tsiquirijavaxi meta bajarapamonae jebiana,” pasivajamatabëjanë picani. Itsiata bajarapamonae ayaijava jeba. Bajarapamonae ëofrenda apo rajutsi Diosojavabelia. Biji rajane copiaya najamatabëcuenerajuta Diosojavabelia pacuenia Dioso itorobaponatsi pexanabiabinexa daxitamatacabijavabelianexa. Bajaraxuacujinae pejebiofrenda paxanëjavaberena panerajuta patatocaponaenexa bepejiobivijavabelia. Bajarapacuenia itsa exana, exana Dioso petojitsipaecueniatsi. ⁶ Paxamë, paCorinto tomarapijivimë, paofrenda paxamë ata pacaetuatame panerajutsinexa Dioso pejumecovënëtsivi, Jerusalén tomarapijivi, Tito pacajamatabëcueneyavenona panecaetuatsijava. Itsiata abaxë apo paveretsimë panecaetuatsijava. Bajaraxuata aeconoxae baja icatsia Tito paitorobajë paxamëjavabelia paneveretsinexa jane baja bajarapaofrenda panecaetuatsijava. ⁷ Paxamë itsamonaevecua xaniavaetsia Dioso patojinavanapame. Xaniavaetsia panajamatabëcueneocopatame Diosojavabelia. Payapëtanemenua xaniavaetsia Dioso pejumelivaisi. Pacacaëjëpanua xaniavaetsia Dioso pejumelivaisi panetsipaebinexa itsamona. Bitso pacajamatabëcueneenabiabanua Dioso pijacuene panetonacuenebavanapaenexa. Bitso paneasivamënu. Nexata paneyavenonaenexa bepejiobivi, Jerusalén tomarapijivi, ayaijava bepajebame ofrenda itsa paexaname.

⁸ “Macedonia nacuapijivi, bepejiobivi ata, ayaijava ofrenda jeba,” itsa janë, apo pacaitorobitsi paxamë ata ayaijava ofrenda panerajutsinexa. Biji rajane saya pacatsipaebatsi paneyapëtaenexa pacuenia Macedonia nacuapijivi bitso jamatabëcuenebarëyaya toexana ofrenda bepejiobivi peyavenonaenexa. Bajarapacuenia paxamë ata itsa paexanaenexa, itsamona patsitanajamatabëcuene itajëtsianame panexaniajaicuene Dioso paneasivajava. ⁹ Bajarapacuenia paxamë ata ofrenda parajutsianame. Tsipaji payapëtaneme pacuenia vajatuxanenë Jesucristo nacayavenona vajanacaasivaxae. Bajaraponë picani ayaijamatabëcuenenë. Daxitacuene pevetsinë. Itsiata papecaasivaxae, nabejiobiaexana papecayavenonaenexa. Bajarapacuenia papecasivanabejiobiaexanaexae, nexata paxamë ata itsamatacabi paayaijamatabëcuenevimë tsane Dioso pijanacuatatsia.

¹⁰ Pacatsipaebatsi paneyapëtaenexa pacuenia panetsitaxanepana paxamë paneexanaenexa bajarapaofrenda. Paxamë picani imata pavaimi bitso jamatabëpayavenoname Dioso pejumecovënëtsivi, Jerusalén tomarapijivi. Nexata paxamë daxitajivivajënaeya jamatabëpatoexaname ofrenda. ¹¹ Paxamë picani imata pavaimi Jerusalén tomarapijivi bitso jamatabëpayavenoname ofrendanexa. Bajarapacuenia aeconoxae ata tsiteca paexanare paneveretsinexa jane baja palata panecaetuatsijava bajarapaofrendanexa. Parajutsianame pacuenia pacacaëjëpa. ¹² Nexata itsa pepacuene parajutsianame pacuenia pacacaëjëpa, Dioso pacasivajamatabëcuenebarëya tsane. Tsipaji apo pacaitorobi xua apo paxainaemë panerajutsinexa.

¹³ Apo pacaitorobitsi raja mapacueniaje: “Itsamona paneyavenonaenexa, ofrenda

itsa paexaname, pabuare daxita panexainaepalatayomi,” apo pacajaiti. Tsipaji juya paxamë panamatavenonaejitsipame. ¹⁴ Jitsipatsi namataenetsia vajanayavenonaenexa vajanamatavenonaejavaxi yabara. Aeconoxae baja pacacajëpa paneyavenonaenexa bepejiobivi, Jerusalén tomarapijivi. Itsamatacabijavabelia, pamatacabi paxamë panamatavenonaename, cajëpaenatsi juya bajarapamonae papecayavenonaenexa. Bajarapacuenia nexata daxita paxamë panenamatenonaejavaxi, apo panamatavenonaemë tsane. ¹⁵ Bajarapajamatabëcuenelivaisi yabara Dioso pejumelivaisibaxutota jumaiti mapacueniaje: “Itsajivi bitso ayaijava xinae ata, itsiata apo toyajuvënënacopatsi. Itsajivi pijinia tsiquirijavayo xinae ata, itsiata apo namatenona,” jai Dioso pejumelivaisibaxutota. Bajaraxuata paxamë ata panexainaeyajuvënëjava, beparajutame penamatavenonaevijavabelia.

Pacuenia Tito, anijanëbeje yajava, pona Corinto tomarabelia yabara pelivaisi

¹⁶ Xanë bitso jitsipajë paxamë patacayavenonaenexa. Tito ata bajarapacuenia jitsipa papecayavenonaenexa. Bajaraxuata pexaniajamatabëcuene rajutajë Diosojavabelia. Tsipaji Espiritu Santo pejamatabëcueneta Titobeje panajamatabëcuenejëpajëbeje paxamë yabara. ¹⁷ Nexata Tito itorobajë papecataenexalia, papecayavenonaenexanua bajarapaofrenda panecaetuatsijava paneveretsinexa baja tavajënaelia. Barëyaya Tito jejai peponaenexa paxamëjavabelia. Bajaraponë ata pijacuata pejitsipaexae peponaajava paxamëjavabelia, ponaena papecayavenonaenexa.

¹⁸ Tito pepëta paitorobajë itsanë Dioso pejumecovënëtsinë. Bajaraponë Macedonia nacuata daxita Dioso pejumecovënëtsivi bitso peyapëtaenëtsi. Peyaiyataenëtsinua. Tsipaji xaniavaetsia tsipaebabiaba Dioso pejumelivaisi jivi pecapanepelivaisinexatsi. ¹⁹ Ponë, Tito yajava, ponaejitsia paxamëjavabelia, bajaraponë Macedonia nacuata itapetatsi daxita Dioso pejumecovënëtsivi. Nexata pamatacabi paponajë Jerusalén tomarajavabelia, bajaraponë payajavaponaenajë. Nexata paofrenda pacaponaejitsianë, bajaraponë paneyavenonaeyacaponana. Bajarapaofrenda pacaponajë Jerusalén tomarapijivi pesivajamatabëcuenebarëyanexa Dioso. Patsitanajamatabëcuene itajëtsianajëna patajitsipaejava patayavenonaenexa pamona bepejiobivi. Nexata bajarapamonae jamatabëjumai tsane: “Matsaena pamona jitsipa peyavenonaenexa bepejiobivije,” jamatabëjai tsane. ²⁰ Bajarapacuenia Macedonia nacuapijinë payajavaponaenajë itsajivi ata patanebaracuaicuaijaiyaniva bajarapapalataxaneto yabara. “Pabloana raeta bajarapapalata yajuvënëcopata,” patanejaiyaniva. ²¹ Dioso baja cajena paneyapëtane apo patanacobetoxotsivicuene. Itsiata pajitsipajë daxitajivi ata patanepapëtaenexa apo patanacobetoxotsivicuene.

²² Titobeje icatsia itsanë patsicueyaitorobajë Dioso pejumecovënëtsinë peyajavaponaenexabeje paxamëjavabelia. Bajaraponë anijatonë pajamatabëcuenejëtabiabajë. Xaniavaetsia bitso paneyavenonabiaba. Nexata aeconoxae paxamë bitso jamatabëpacayavenona. Tsipaji pacavënëlivaisitane paneyavenonaejavanexa Jerusalén tomarapijivi. ²³ Nexata Tito yabara itsajivi itsa pacayanijobiana: “¿Detsa pacuenia maponë peponaponaenëje?” itsa pacajai tsane, pajumaitsimë tsane: “Pablobeje raja penajuaponaponaenëbeje. Bajaraponë Tito Pablo yavenonabiaba vaxaiti juya Pablo vajanacayavenonaenexa,” pajamë tsane. Itsajivi itsa pacayanijobiana Tito peyajavaponaenëbeje yabara, pajumaitsimë tsane: “Bajaraponëbeje Dioso pejumecovënëtsivi pitorobinëtsibeje. Bajaraponëbeje xaniavaetsia Cristo petoponaponaejavabeje jivi petaxae, nexata jivi yayiatane Cristo pelivaisi,” pajamë tsane. ²⁴ Nexata bajaraponëbeje itsa patsianabeje paxamëjavata, patsitanajamatabëcuene itajëtsianame paneasivajava bajaraponëbeje. Nexata Dioso pejumecovënëtsivi, pamona itorobatsibeje bajaraponëbeje, pacavënëlivaisitana paneasivajava bajaraponëbeje. Nexata asivaya itsa pacopiapitsianame Dioso pejumecovënëtsivi pitorobinëtsibeje, nexata Dioso pejumecovënëtsivi jamatabëjumai

tsane paxamë yabara: “Pacuenia baja Pabloana nacatsipaeba, xaniajai baja cajena. Corinto tomarapijivi asivaya tane daxitajivi,” jamatabëjai tsane.

9

Ofrenda pecaetuatsijava Dioso pejumecovënëtsivijavabelia peyavenonaenexa yabara pe-livaisi

¹ Ofrenda pacaetuataponame paneyavenonaenexa bepejiobivi, Dioso pejumecovënëtsivi, Jerusalén tomarapijivi. Apo jitsipaenë picani icatsia patacatoyaquinaenexa bajaraxua yabara. ² Tsipaji baja yapëtaniji pacuenia bitso jamatabëpayavenoname bajarapamonae. Bajaraxuata pacasivajamatabëcuenebarëyatsi. Nexata paxamë yabara jumaitsinë Macedonia nacuapijivijavabelia: “Acaya nacuapijivi, Corinto tomarata penacaetuatabiabi, imata baja cajena pavaimi najamatabëcuenevereta perajutsinexa ofrenda Jerusalén tomarapijivijavabelia,” janë paxamë yabara. Nexata Macedonia nacuapijivi ita pacavënëlivaisitane paneyavenonaejavanexa Jerusalén tomarapijivi, Macedonia nacuapijivi ata ayaibitsaëtoxaneto tocaetuatapona ofrenda peyavenonaenexa Jerusalén tomarapijivi. ³ Nexata pacatoitorobatsi Titobana papeyavenonaenexa paneveretsinexa baja bajarapaofrenda penacaetuatsijava panerajutsinexa Jerusalén tomarapijivi. Tavajënaelia ita apo paveretsimë tsipae ofrenda penacaetuatsijava, paxamë yabara pexaniacuenia tajumaitisijava, najumecovëauranë tsipae Macedonia nacuapijivijavabelia. ⁴ Tsipaji itsamonae Macedonia nacuapijivi belia naponaejitsipa tapëta paxamëjavabelia. Ita bajarapamonae taejitsipa bajarapaofrenda apo paneveretsijava, nexata bitso paxamë yabara auranë tsipae. Tsipaji paxamë yabara bajaya baja jumaitsinë: “Corinto tomarapijivi jamatabëveretapona baja ofrenda pecaetuatsijava,” janë paxamë yabara. Nexata paxamë ata bitso pauramë tsipae. ⁵ Bajaraxuata jamatabëjumaitsinë: “Titobana Corinto tomarabelia tavajënaeyabelia itorobianajë,” jamatabëjanë. Nexata Titobana pacajamatabëcueneyavenonaena ofrenda penacaetuatsijava, paneveretsinexa baja pacuenia najumecapanepaeya panetocaëjëtame. Nexata baja tavajënaelia bajarapaofrenda ita paxaniavaetabuatsianame, panajamatabëcueneitajëtsianame Jerusalén tomarapijivi paneasivaxae paneyavenonaejava, apo ëpatacaitorobixae.

⁶ Pacanaëjère mapalivaisije. Tsiquirijavayo peubinë, tsiquirijavayo pijinia batopitsapatsi. Ayaijava pijinia peubinë, ayaijava batopitsapatsi. Nexata ayaijava ita parajutsianame itsamonaejavabelia, Dioso juya pacarajutsiana ayaijava. ⁷ Nexata caejivi canacujitsia berajuta pacuenia najamatabëcuenevereta perajutsinexa. Pëtsa pajamatabëjumaitsimë: “Apo jamatabërajutsi atanë picani, itsiata taneitorobixae, rajutsianajë,” pajamatabëjamë pëtsa. Tsipaji pajivi rajuta itsajivijavabelia jamatabëcuenebarëyaya, Dioso asivatsi. ⁸ Dioso baja cajena caëjëpatsi papecarajutaponaenexa pacuenia panamatavenoname matatoxenetsia. Nexata xua panamatavenoname, paxainaponaenae. Pacatonacopatsiananua panerajutsinexa bepejiobivijavabelia. ⁹ Dioso pejumelivaisibaxutota jumaitsi mapacueniaje:

Ponë rajutabiaba bepejiobivi penamatavenonaecuene, bajaraponë pexaniacuenex-
 anabiaba Dioso pitabarata. Nexata bajarapacuenexa Dioso apo nacofënëtsi daxita-
 matabijavabelianexa,
 jai Dioso pejumelivaisibaxutota.

¹⁰ Dioso rajuta jivi peubixunexa. Bajaraxuacujinae icatsia Dioso pejamatabëcueneta penaveretsixu capitsapa penotsinexa jivi pexaejavanexa. Bajara pijinia pacuenia Dioso pacarajutsiana panexainaejavanexa, panerajutsinexanua bajaraxuaya-juvënëjava bepejiobivijavabelia. Pacacaëjëpaeyaexanaenanua ëpexaniacuenexa ayaijava pa-
 neexanaenexa. ¹¹ Bajarapacuenia Dioso pacarajutsiana panexainaejavanexa ayaijava.

Nexata pacacaējēpaena bajaraxuayajuvēņjava juya panerajutsinexa bepejiobivijavabelia. Nexata paofrenda panerajutame patatocaponaenexa Dioso pejumecovēņētsivi, Jerusalén tomarapijivi, itsa parajutsianajē bajarapamonae, pexaniajamatabēcuene rajutsiana Diosojavabelia bajarapacuenia paneyavenonaexae. ¹² Bajarapacuenia Dioso pejumecovēņētsivi, bepejiobivi, itsa parajutame, payavenoname bitso penamatavenonaejavata. Bajarapamonae paneyavenonaejava itsa taena, pexaniajamatabēcuene Diosojavabelia perajutabiabijava pematatsēnēa bitso pexaniajamatabēcuene rajutsiana Diosojavabelia. ¹³ Bajarapacuenia Jerusalén tomarapijivi ofrenda itsa parajutsianame paneyavenonaenexa, bajarapamonae patsitanajamatabēcuene itajētsianame pepacuenē xaniajai panejumecovēņētsijava pexanialivaisi, Cristo pelivaisi. Nexata bajarapamonae pexaniajamatabēcuene rajutsiana Diosojavabelia Cristo pelivaisi panejumecovēņētavanapaejava yabara. Ofrenda ata panerajutsijava Jerusalén tomarapijivi, paofrenda ata parajutame itsamonaejavabelia, bajaraxua ata yabara Jerusalén tomarapijivi pexaniajamatabēcuene rajutsiana Diosojavabelia. ¹⁴ Nexata bajarapamonae bitso asivaya pacajamatabēnājinaeja pacatovajētabiabiana Diosojavabelia. Tsipaji paxamē bajarapamonae payavenoname Dioso pejamatabēcueneta papecaitorobixae. ¹⁵ Vaxaitsi pexaniajamatabēcuene rajutabiabatsi Diosojavabelia. Tsipaji Dioso pexēnato athēbēvetsica nacatoitorobica vajanacasivatēpaenexa mapanacuataje. ¡Cristo vajanacasivatēpaejava pexaniacuene bitso!

10

Pacuenia Pablo navajunupaeba Cristo pitorobijavatsi Dioso pejumelivaisi daxitanacuanējava jivi petsipaebanajetarucaenexa yabara pelivaisi

¹ Pacuenia Cristo pexaniacuēnia pacaitorobijitsipa, bajarapacuenia xanē ata pexaniacuēnia ajumesaēya pacaitorobatsi. Itsiata baitsi jane itsamonae paxamēyajuvēņēvi xanē yabara jamatabēcuenenavēxaniabiaya jumai tsabiabi: “Itsa abaxē Pablo tajē nacavecuaponapona, ajumelivaisisaēya nacatoyaquinabiabarena. Itsiata baitsi jane majotaje, vaxaitsijavata, itsa patajopaena, piaitejepaebinēcuenia patajopaena. Ajumeljibia ponaponaena piajumeuraxae,” jai tsabiabi paxamēyajuvēņēvi xanē yabara jamatabēcuenenavēxaniabiaya. Itsiata bajarapacuenia apo itsinē tsane. ² Nexata pexaniacuēne pacavajētatsi. Pētsa itsajamatabēcuene panetoexaname, itsa patsialiajē paxamējavabelia, ayaijumeta pacabijataeja patacamuxujiobiyaniva. Itsamonae paxamēyajuvēņēvi xanē yabara jamatabēcuenenavēxaniabiaya jumai tsabiabinua: “Pablo apo ponaponaē Dioso pejumecovēņētsinēcuenia. Saya ponapona Dioso apo pejumecovēņētsinēcuenia. Yajavaponapona pijaperujujamatabēcuene,” jai tsabiabi paxamēyajuvēņēvi xanē yabara. Bajarapacuenia xanē yabara pecuaicuaijaittsabiabivijavabelia ayaijumeta bijataeja cuaicuaijanē tsane. ³⁻⁴ Mapanacuapijivi, Dioso apo pejumecovēņētsivi, saicayacuenia nayajiviyapētane pijavajabitsaēvecua penaevetsinexa pitsacueniabiyānivatēsi. Vaxaitsi ata mapanacuata vajajinavanapaevi, Dioso vajajumecovēņētsivi, saicayacuenia pijinia nayajiviyapētānētsi vajanaevetsinexa dovathivecua. Dovathivecua apo naevetsitsi mapanacuapijicueneta. Pajamatabēcuenesaē Dioso nacarajuta, bajarapajamatabēcuenesaēta jamatabēcueneamoneyabaponatsi dovathi. ⁵ Nexata Dioso pejamatabēcuenesaēta, paajibiaexanaponajē jivi Dioso yabara penajumetsēņētsilivaisimi. Bajarapamonae dovathi pejamatabēcueneta itorobatsi penajumetsēņētsilivaisi petsipaebabiabinexa itsamonaejavabelia. Nexata pamonaē Dioso yabara penajumetsēņētsivi, pajumecovēņētsiaexanaponajē Cristo pelivaisi Dioso pejamatabēcuenesaēta. Itsamonae pijinia dovathi pejamatabēcueneta beayaijamatabēcuenevi natane. Pamonaē bajarapacuenia najamatabēxaina, apo yapētaē Dioso. Bajaraxuata bajarapajamatabēcuenemi paajibiaexanaponajē baja. Nexata pamonaē ata bajarapacuenia beayaijamatabēcuenevi natane, pajumecovēņētsiaexanaponajē Cristo pelivaisi Dioso

pejamatabëcuenesaëta. ⁶ Bajarapacuenia paxamëjava ata paexanaponaenajë. Paxanë panajamatabëcueneveretajë pataexanaenexa mapacueniaje. Paxamë baja xaniavaetsia Dioso itsa pajumecovënëtavanapaename, paxanë pacavecuacapitsapaenatsi pamonaë apo jitsipae patanejumecovënëtsinexa Cristo pelivaisi.

⁷ Paxamë raja saya jema pataneme daxitajivi. Nexata daxitajivi pataneme pacuenia Dioso apo pejumecovënëtsivi tane daxitajivi. Nexata apo payapëtaemë pacuenia paxanë pajamatabëcueneitsinë. Pajivi nayapëtane Cristo pijajivitonëcuene, bajarapajivi bepaneyapëtane paxanë ata Cristo papijajivicuenenë. ⁸ Paxamë meta xanë yabara pajamatabëjumaitsimë tsabiabi: “Pablo saya bitso navajunupaebabiaba Dioso pitapetsijavatsi apóstolenëxexa,” pajamatabëjamë meta tsabiabi xanë yabara. Dioso baja cajena paneitoroba patacajamatabëcuene asaëyaexanaenexa. Apo paneitorobi patacajamatabëcuene faefaenaeyaexanaenexa. Bajaraxuata apo ajumeuranë tsabiabi tanavajunupaebabiabijava apóstolenëjavanë. ⁹ “Pablo saya nacajamatabëcuenenabenajacaeya exanabiaba vajanacatoyaquinaelivaisianëta,” panejaijjava xanë yabara apo jitsipaenë. Tsipaji bajaraxua yabara apo pacatoyaquinaetsi. ¹⁰ Itsamonae xanë yabara jumai tsabiabi: “Pablo ajumelivaisisaëya nacatoyaquinabiabarena. Itsiata bajaraponë itsa patajopa majotaje, vaxaitsijavata, apo ajumesaë tsabiabi. Saya ajumelivaisixaebi tsabiabi,” jai tsabiabi itsamonae xanë yabara. ¹¹ Itsiata baitsi jane pamonaë bajarapacuenia jumai tsabiabi xanë yabara, beyapëtane pacuenia bajarapamonaejavabelia exanaejitsianë itsa papatsialiajë paxamëjavabelia. Pacuenia baja pacatoyaquinaliatsi taexanaenexa paxamëjavabelia, bajarapacuenia exanaenajë paxamëjavabelia.

¹² Palivaisi paxanë pacatsipaebabiabatsi, bajarapalivaisivecua saicayalivaisi itsamonae pacatsipaebabiaba. Bajarapamonae apo canaëjëtsi pacuenia Dioso pejumelivaisibaxutota jumaisi. Nexata bajarapamonae namataenetsia natane bepexaniajamatabëcuenevi. Nexata pamonaë apo bajarapamonaeayajuvënëvi, bepibisiajamatabëcuenevi tane. Saya xua bajarapamonae tsitaxanepanatsi, bajaraxua yabara jumai tsabiabi: “Maxuaje pexaniacuene,” jai tsabiabi. Xua pijinia apo tsitaxanepanaetsi, bajaraxua yabara jumai tsabiabi: “Maxuaje pibisiacuene,” jai tsabiabi. Bajarapamonae cajena bitso apo yapëtae. Paxanë raja bajarapacuenia apo pajamatabëcueneitsinë. ¹³ Paxanë Dioso paneitoroba Dioso pijacuene patatonacuenebinexa. Nexata panacuanëjava Dioso paneitoroba, bajarapanacuanëjava Dioso pejumelivaisi patsipaebanajetarubenajë. Dioso paneitoroba tajë ata paxamë paCorinto tomarapijivimëjavabelia ata pataponaenexa patacatsipaebbinexa pejumelivaisi. Nexata itsa panavajunupaebabiabajë Dioso patanitorobijava, xuayovajëto Dioso panetocopata patatonacuenebinexa, panavajunupaebabiabajë. Ayailivaisi apo panavajunupaebabiabinë saya itsamonae pataneyaiyataenexa patanavajunupaebijava yabara. ¹⁴ Bajaraxuata itsa papatajë paxamëjavata, pacatsipaebatsi pexanialivaisi, Cristo pelivaisi. Tsipaji bajarapanacuanëjava Dioso paneitoroba pejumelivaisi patacatsipaebbinexa. Bajarapalivaisi copiaya baja paxanë pacatsipaebatsi. ¹⁵ Itsamonae baja Cristo pelivaisi jumecovënëta itsamonae petsipaebixaetsi. Nexata Cristo pelivaisi pejumecovënëtsivi yabara najumetsënëtsiaya apo pajumaitsinë tsipae mapacueniaje: “Paxanë raja patatsipaebixae, bajarapamonae jumecovënëta Cristo pelivaisi,” apo pajanë tsipae. Pacatojitsipatsi panevajënaeyabelia panejumecovënëtavanapaenexa Dioso. Nexata pajitsipajë orijibia patacatsipaebavanapaenexa pexanialivaisi, Cristo pelivaisi. Itsiata baitsi jane ëpanacuanëjava Dioso paneitoroba patatsipaebavanapaenexa pejumelivaisi, bajaraëpanacuanëjava patsipaebavanapaenajë. ¹⁶ Nexata paxamë majotaje patacatsipaebicujinae, panepënëyabelia penaetomaranëjava ata jamatabëpatsipaebajë pexanialivaisi, Cristo pelivaisi. Apo pajitsipaenë patatsipaebbinexa bajarapalivaisi itsaxuayo baja patavajënaeya itsamonae tsipaebapona bajarapalivaisi.

¹⁷ Pajivi itsamonaejavabelia navajunupaeba pexanaejava, benavajunupaeba

Dioso peyavenonaejavatsi. Bajarapacuenia benavajunupaeba pejumetaevitsi peyaiyataenexa Dioso. Bajarapajivi apo benavajunupaebi pijacuata pexanaejava jivi saya peyaiyataenexatsi. ¹⁸ Pajivi pijacuata navajunupaebabiaba: “Xanë ra bitso pexaniacuene exanabiabajë,” jai tsabiabi, bajarapajivi ajumematamobi. Tsipaji saya pijacuata navajunupaebabiaba. Itsiata baitsi jane pajivi yabara vajatuxanenë jumaitsi: “Mara pajivije xaniavaetsia netoponapona,” jai, nexata tojumenamatamotatsi.

11

Pablo pelivaisi, penajumetsënëtsilivaisi petsipaebaponaevi ata, yabara pelivaisi

¹ Natsiquejemalivaisi pecuaicuajainë, xua exana, pijacuata banavajunupaeba itsamonaejavabelia. Bajara pijinia pacuenia xanë ata, xua exanajë, tajacuata pacanavajunupaebijitsiatsi. Bajarapacuenia tajacuata pacanavajunupaebi ata tsanetsi, itsiata jitsipajë xaniavaetsia ajamatabëcuenesaëya patanenamuxunaevetsinexamë. ² Bajarapacuenia pacanavajunupaebijitsiatsi tsipaji bitso pacaasivatsi pacuenia Dioso pacaasiva. Pacatojitsipatsi ëCristo panejitsipaenexa. Pacuenia petiriva caenë jitsipa ëpamonanexa, bajarapacuenia caenë Cristo pajitsipare. ³ Bajayata Evapijiva yamaxëitojorobatsi dovathi penajumetsënëtsicueneta. Pacacacujunavatsi paxamë ata bajarapacuenia dovathi papecayamaxëitojorobianiva. Nexata paxamë yabara jamatabëjumaitsinë mapacueniaje: “Dovathi meta jamatabëcuenebijianaenatsi Corinto tomarapijivi. Cristo meta pejitsipaejavami copabiana,” jamatabëjanë paxamë yabara. ⁴ Pacacacujunavatsi penajumetsënëtsilivaisi petsipaebaponaevi papecatsipaebianiva. Tsipaji bajarapamonae pata baja paxamëjavata. Xanë Jesús pelivaisi pacatsipaebabiabatsi. Nexata Jesús pelivaisivecua bajarapamonae saicayacuenia pacatsipaebabiabi ata, itsiata bajarapalivaisi panamuxunaevetabiabame xaniavaetsia. Espíritu Santo, ponë pacatsijamatabëeca, pelivaisi, xanë pacatsipaebabiabatsi. Nexata Espíritu Santo pelivaisivecua saicayacuenia bajarapamonae pacatsipaebabiabi ata, itsiata bajarapalivaisi ata panamuxunaevetabiabame xaniavaetsia. Xanë pacatsipaebabiabatsi pexanialivaisi papecacapanepelivaisinexa Diosojavabelia. Nexata bajarapalivaisivecua bajarapamonae saicayalivaisi pacatsipaebabiabi ata, itsiata panamuxunaevetabiabame xaniavaetsia. ⁵ Pamonae penajumetsënëtsilivaisi pacatsipaebabiaba, ayaijamatabëcuenevi nataeyabiaba. Paxanë paapóstolevinë bajarapamonae bitso panevecuaayaijamatabëcuenevi natane. Itsiata baitsi jane xanë bajarapamonaevecua beveliajamatabëcuenenënë apo nataenë. ⁶ Jivijavabelia xaniavaetsia livaisi tatsipaebinexa, apo necujani ata, itsiata xaniavaetsia yapëtaniji xua yabara tsipaebajë. Xaniavaetsia Jesús pelivaisi patayapëtaejava paneyapëtaenexa, pacatsitanajamatabëcuene itajëtabiabatsi paxamëjavata itsa pacatsipaebavanapatsi Jesús pelivaisi.

⁷ Paxamëjavata itsa pacatsipaebaponaponatsi pexanialivaisi papecacapanepelivaisinexa Diosojavabelia, itsacuenejavayo ata paxamëjavabelia apo pacavajëtsitsi. Xanë tacobeta asaëyata nacuenebabiabajë tanaevetsinexa. Bajarapacuenia betajibicuenia nacuenebabiabajë tanaevetsinexa pamatacabi pacatsipaebaponaponatsi Jesús pelivaisi. Nexata baja pajumecovënëtame Jesús pelivaisi itsamatacabi panexainaenexa matacabi apo peverevereaejava. ⁸ Itsamonae Dioso pejumecovënëtsivi itsa netoitoroba palata, itsiata pitajë paxamëjavata tanaevetaponaponaenexa bajarapapalatata. Nexata pacayavenonaponaponatsi. Bajarapacuenia paxamëjavata naevetaponaponajë. Paxamë apo panerajutsimë palata. ⁹ Nexata pamatacabi paxamëjavata ponaponajë, namatavenonae atanë, apo pacavajëtsitsi panexainaeyajuvënëjava patanerajutsinexamë. Itsiata Dioso pejumecovënëtsivi, Macedonia nacuaverena pepatsivi, netocapata daxita tanamatavenonaejava. Bajarapacuenia paxamëjavata ponaponajë itsacuenejavayo ata pacavajëtsinejevatsi patacajamatabëitonotsianiva. Apo najamatabëxainaenë

bexëajavabelia ata patacavajëtsinexa. ¹⁰ Yapëtaniji Cristo pelivaisi pepacuene pexaniajailivaisicuene. Bajaraxuata daxita Acaya nacujava Cristo pelivaisi amoneya asaëya tatsipaebaponaëjava, sivajamatabëcuenebarëyanë. ¹¹ Itsamonae xanë yabara jamatabëcuenenavëxaniabiaya pacajumaitsi: “Pablo raja apo pacaasiva. Bajaraxuata apo pacavecuapitsi palata,” pacajai. Jemajai raja bajarapamonae. Dioso raja yapëtane bitso patacaasivajava.

¹² Itsiata tavajënaeyabelia Dioso pejumelivaisi pacatsipaebaponaenatsi pacavajëtsinejevatsi itsacuenejavayo ata. Pamonaë penajumetsënëtsilivaisi pacatsipaebabiaba, bajarapamonae pacamatamoyanijobabiaba papecatsipaebimatamo. Bajarapacuenia papeccamatamoyanijobabiabixae, nexata toacuenebitsi pevajënaeyabelia papeccajumaitsaponaenexa: “Paxanë ata patonacuenebavanapajë Dioso pacuenia Pablo tonacuenebaponaëna Dioso,” papeccajainexa. ¹³ Bajarapamonae apo pepo apóstolevi. “Paxanë raja paapóstolevinë,” itsa pacajai, saya raja pacayamaxëitojoroba. Paxanë Cristo papijajivinë, paapóstolevinë, bajarapamonae saya panecueneccataeya apóstolevi naexana. ¹⁴ Paxamë apo bepasivajamatabëcuenenabenajacaemë bajarapamonae. Bajarapacuenia saya bajarapamonae exanavanapa papeccayamaxëitojorobinexa. Dovathi raja caëjëpatsi Dioso bepijaängelnë penaexanaenexa, bepexaniajailivaisi itajara petsipaebinë jivi petaenexatsi. ¹⁵ Nexata dovathi pijajivi ata pexaniacuene itajara exanavanapae ata, itsiata apo besivajamatabëcuenenabenajacaetsi. Paneconivajëto bajarapamonae xaina, bajarapaneconivajëtota itsamatacabi Dioso naneconitsiaexanaena bajarapamonae.

Pacuenia Pablo apóstolenëxae nabejibitsiaponapona yabara pelivaisi

¹⁶ Icatsia pacajumaitsi. Xua aeconoxae pacajumai tsanetsi, bajaraxua yabara pëtsa panetaneme betanematajemabinë. Bajarapacuenia panetae atamë, itsiata panenamuxunaevere palivaisi pacatsipaebijitsiatsi. Pacuenia peyamaxëitojorobiapóstolevi ajumeurajibia pacanavajunupaebabiaba paneyaiyataenexa, bajara pijinia pacuenia xanë ata ajumeurajibia pacanavajunupaebijitsiatsi pataneyaiyataenexamë. ¹⁷ Vajatuxanenë picani apo nitorobi patacanavajunupaebinexa. Itsiata pacuenia pematajemabinëtsi ajumeurajibia banavajunupaeba xua exana, bajarapacuenia xanë ata aeconoxae ajumeurajibia pacanavajunupaebijitsiatsi pataneyaiyataenexamë. ¹⁸ Pamonaë peyamaxëitojorobiapóstolevi, ayaijamatabëcuenevi nataeyabiaba. Nexata ajumeurajibia pacanajamatabëcuene vajunupaebabiaba bajarapamonae. Nexata xanë ata bajarapacuenia ajumeurajibia pacanajamatabëcuene vajunupaebijitsiatsi. ¹⁹ Paxamë bitso ayailivaisi bepaneyapëtaevi panataneme. Itsiata apo payapëtaemë. Tsipaji saya jamatabëcuenebarëyaya panamuxunaevetabiabame palivaisi pacatsipaebabiaba peyamaxëitojorobiapóstolevi. Pacuenia pematajemabinëtsi ajumeurajibia banavajunupaeba xua exana, bajarapacuenia ajumeurajibia pacanavajunupaebabiaba peyamaxëitojorobiapóstolevi. ²⁰ Bajarapamonae bepapijajivitonëmëcuena pacaitorobabiabi ata, itsiata xaniavaetsia panamuxunaevetabiabame. Panexainaejavaxi pacavecuaveretaponaë ata, itsiata xaniavaetsia panamuxunaevetabiabame. Bijiyaya pacanaëcotabiabi ata, itsiata xaniavaetsia panamuxunaevetabiabame. Pacaitabarapacababeyabiabi ata, itsiata xaniavaetsia panamuxunaevetabiabame. ²¹ Paxanë bajarapacuenia apo pacaexanaetsi pamatacabi pajinavanapajë paxamëjavata.

Xua yabara bajarapamonae ajumeurajibia pacanavajunupaebabiaba, xanë ata necaëjëpa bajarapitsicuene yabara ajumeurajibia patacanavajunupaebinexa pataneyaiyataenexamë. ²² Bajarapamonae ayaijamatabëcuenevi nataeya itsa pacanavajunupaebabiaba, pacajumai tsabiabi paneyaiyataenexa: “Paxanë raja pajudíovinë,” pacajai tsabiabi. Xanë ata raja judíonënë. Itsiata bajarapacuenia apo pacajumaitsi pataneyaiyataenexamë. Bajarapamonae pacajumai tsabiabinua:

“Paxanë raja Israelpijinë papemomoxinë,” pacajai tsabiabi. Xanë ata raja Israelpijinë pemomonë. Itsiata bajarapacuenia apo pacajumaitsitsi. Bajarapamonae pacajumai tsabiabinua: “Paxanë raja Abrahampijinë papemomoxinë,” pacajai tsabiabi. Xanë ata raja Abrahampijinë pemomonë. Itsiata bajarapacuenia apo pacajumaitsitsi. ²³ Bajarapamonae Cristo bepijajivi nataeya ajumeurajibia pacanavajunupaebabiaba. Xanë xaniavaetsia Cristo tonacuenebaponaponajë. Xanë picani apo jitsipaenë patacanavajunupaebinexa. Itsiata Cristo tatonacuenebaponaponaejava, xanë ajumeurajibia pacanavajunupaebijitsiatsi. Pacuenia pematajemabinëtsi ajumeurajibia banavajunupaeba xua exana, bajarapacuenia ajumeurajibia pacanavajunupaebijitsiatsi. Itsiata mapacuenia pacanavajunupaebijitsiatsije. Xanë bitso Cristo tonacuenebaponaponajë bajarapamonae matatoxenetsia. Bajarapamonae matatoxenetsia xanë bitso nejumaconibabeyabiaba penaneconitsivi pejumaconibabeyabiabimacata. Bajarapamonae matatoxenetsia nenaneconitsiaexanabiaba penaneconitsivi pejebabiabibota taneetsinexa. Bajarapamonae matatoxenetsia anijatonë imoxo tanebeyaxuababiabi. ²⁴ Cinco xuabeje judíovi nevaetaba tanenaneconitsiaexanaenexa. Caenevaetabi canacujitsia nejumaconibabeyabiaba penaneconitsivi pejumaconibabeyabiabimacata. Itsa nejumaconibabeyabiaba, treinta y nueve xuabeje nejumaconibabeyabiaba caenevaetabita. ²⁵ Acueyabi icatsia xuabeje apo judíovi nevaetaba tanenaneconitsiaexanaenexa. Bajaraxuanë saicaya naebota nejumaconibabia. Icatsia itsamatacabijavabelia caeto judíovi ibotonëta netsecona. Acueyabi pijinia panamutobeje menia barcota tanaponaejavata, acueyabi xuabeje nayabubunajë manuameneta. Caepayajopaetanë, caemeravi, caematacabi yajava, manuameneta juenajetarucajë. ²⁶ Xanë ayaicuenia jinarutabiabajë Cristo pelivaisi jivi tatsipaebaponaenexa. Nexata itsajavata netsiayai tsabiabi menia taponabiabijava. Itsajavata namutua itsa ponajë, netsiayai tsabiabi tanevecuanacobetoxotsinexa tacobecovëjavaxi. Itsajavata netsiayai tsabiabi tajanacuapijivi taneitsacueniabinexa. Itsajavata netsiayai tsabiabi saicayanacuapijivi taneitsacueniabinexa. Itsajavata netsiayai tsabiabi tomaranëjava, petusato nacuanëjava ata, manuamenejava ata. Itsajavata netsiayai tsabiabi pamonaejava Dioso bepejumecovënëtsivi penataevijava. ²⁷ Itsajavata bitso nacuenebabiabajë. Cueranabiabajënuu. Itsajavata apo majitabiabinë. Itsajavata bitso tajani tsabiabi. Meranua jitsipabiabajë. Itsajavata taxaejava xaenejevanë ponaponabiabajë. Itsajavata bitso aquenë tsabiabi apo taxainaexae tanaxatatsijava.

²⁸ Bajaraxua icatsia pematatsënëa mapacuenije. Caematacabi canacujitsia bitso sivanajamatabëxainabiabajë caetomarapijivi canacujitsia, Dioso pejumecovënëtsivi. ²⁹ Pajivi jamatabëcuenecuerana Dioso pejumecovënëtsijava, xanë ata sivajamatabëcuenecueranabiabajë. Pajivi itsajivi pejamatabëcueneta pibisiacuene exanaeyaexanatsi pejopaenexa Dioso pejumelivaisivecua, bajarapajivi yapijiviauranë tsabiabi Diosojavabelia. Baraanaepanabiabajënuu pajivi pejamatabëcueneta jopaeyaexanatsi. ³⁰ Itsajivi itsa nitoroba tanajamatabëcuenevajunupaebinexa, nexata najamatabëcuenevajunupaebianajë tanajamatabëcuenetitajëtsinexa taja-matabëcuenefaefaenajava. ³¹ Vajatuxanenë Jesucristo paxa Diosojavabelia pexaniajamatabëcuene berajutabiabatsi daxitamatacabijavabelianexa. Dioso baja cajena yapëtane jivi tatsipaebilivaisi pexaniajaicuene. ³² Imata ponaponajë Damasco tomarata. Nexata pepo iraevetsinë, Aretasvënënë, eveta bajarapaira. Nexata pijajivitonë eveta Damascotomara. Damascotomara matatoyorotsia yacaranata piatayaëibopanaxanetota. Bajara payacaranatsijavaxaneto ibopananë mataropotsia catsanaeya pefaratsijava. Bajaraxua apia athëbëabetsia pacuenia pinijinaejavaxaneto apia. Nexata Damascotomara pevetsinë pijajivi itoroba tanevajënaeevetsinexa pabaupajava pitsapaejitsianë picani bajarapatomaravecua.

Bajaraponë itoroba pijajivi tanevaetabinexa tanecaponaenexa picani penaneconitsivi pejebabiabiboyabelia. ³³ Itsiata baitsi jane itsamonae Dioso pejumecovënëtsivi bemapirecuenia pexanaejavaxanetoënëta neecaeyaexana. Nexata Damascotomara matatoyorotsia peyacaranatsi ibopanaxanetojumabelia neyamaëyacopareca athëbëyo perucaeventanavojojotualia. Bajarapacuenia Damasco tomarata vecuapanepajë Damascotomara pevetsinë pijajivi.

12

Pacuenia Pablo navajunupaeba bemajitsinaebota vajatuxanenë petsitanaitajëtabijavatsi yabara pelivaisi

¹ Apo netsitaxanepanae picani ajumeurajibia patacanavajunupaebinexa. Itsiata baitsi jane pamona peyamaxëitojorobiapóstolevi, ajumeurajibia pacanavajunupaebabiaba saya paneyaiyataenexa. Nexata xanë ata ajumeurajibia pacanavajunupaebatsi bemajitsinaebota vajatuxanenë Jesucristo tanetsitanaitajëtabijava. Neyapëtaeyaexananua pajamatabëcuenelivaisi xaina xuanë ata netsitajëtabiaba. ²⁻³ Catorce pavaibeje xainajë tanecapanepaecujinae athëbëabetsia Dioso pijanacuayabetsia. Apo nayapëtaenë athëbëabetsia tanecaponaejava taperabëto yajava. Itsa jume, ëtajamatabëcuene meta saya capona. Caenë Dioso yapëtane pacuenia necapona athëbëabetsia. ⁴ Itsiata necapona paraísojavabetsia. Bajarajotatsia jumetaniji Dioso muetsia pexainabuatsilivaisi. Bajarapalivaisi Dioso apo netocopatsi tatsipaebinexa itsajivi ata. ⁵ Bajarapacuenia athëbëabetsia tanecaponaejava tanavajunupaebinexa, necaëjëpa picani jivi taneyaiyataenexa. Itsiata apo navajunupaebabiabinë tsane bajaraxua. Ètasaëjibijava saya navajunupaebabiabianajë. ⁶ Ayailivaisi picani xainajë ajumeurajibia tanavajunupaebaponaenexa pacuenia taniji athëbëtatsia. Ajumeurajibia itsa navajunupaebaponaejitsipajë, apo navajunupaebaponaenë tsipae betanematajemabinëcuenia. Tsipaji ëpexaniajailivaisi navajunupaebaponaejitsipajë. Itsiata baitsi jane apo navajunupaebaponaenë tsane daxita xua yapëtaniji. Tsipaji apo jitsipaenë bajarapalivaisita jivi taneyaiyataenexa. Biji rajane jitsipajë jivi taneyaiyataenexa taexanaponaejava yabara, livaisi tatsipaebaponaejava ata yabara.

⁷ Dioso netocopata tanavixaetaeyabinexa. Bajarapacuenia Dioso netocopata tanavixaetaeyabiabinexa tajacuata tanabarajamatabëjumaitsiyaniva mapacueniaje: “Xanë baja cajena pinijicuene Dioso netsitajëtabiaba xua itsajivi ata apo tae. Bajaraxuata bitso xanë ayaijamatabëcuenenënë daxitajivi matatoxenetsia,” tanabarajamatabëjaiyaniva, Dioso netocopata tanavixaetaeyabiabinexa. Dioso netocopata dovathi pejamatabëcueneta tanevixaeitonotabiabinexa daxitamatacabi. ⁸ Diosojavabelia picani vajëtajë acueyabi xuabeje tanevecuaajibiaexanaenexa bajarapavixae. ⁹ Itsiata baitsi jane vajatuxanenë nejumaitsi mapacueniaje: “Jume. Apo cavecuaajibiaexanaetsi tsane. Bitso casivatsi. Nexata cayavenonaenatsi daxita xua namatavenoname. Pajivi apo jamatabëcuenecaëjëpae atatsi pesaëta tanetonacuenebinexa tajacuene, itsiata baja itsa caëjëpatsi tanetonacuenebinexa, nayapëtane tayavenonaecuenë,” nejai vajatuxanenë. Bajaraxuata vajatuxanenë pijacuene tatonacuenebinexa, xanë tasaëta apo tanejamatabëcuenecaëjëpaejava, nasivajamatabëcuenëbarëyanë. Tsipaji Cristo pesaëta neyavenonabiaba daxitacuene yabara. ¹⁰ Apo tanejamatabëcuenecaëjëpaexae tasaëta tatonacuenebinexa vajatuxanenë pijacuene, nasivajamatabëcuenëbarëyanë tsabiabi. Itsamonae pibisiacuenia itsa nebijataeyabiaba Cristo pijajivitonëxaenë, nasivajamatabëcuenëbarëyanë tsabiabi. Itsacuenejavaxi itsa namatavenonabiabajë, itsiata nasivajamatabëcuenëbarëyanë tsabiabi. Itsamonae itsa nebejiobiaexanabiaba Cristo pijajivitonëxaenë, itsiata nasivajamatabëcuenëbarëyanë tsabiabi. Itsa netsiyapëbeje tsabiabi tatonacuenebinexa Cristo pijacuene, itsiata nasivajamatabëcuenëbarëyanë tsabiabi.

Tsipaji paepatota apo nejamatabëcuenecaëjêpae, bajarapaepatota vajatuxanenë bitso nejamatabëcueneyavenonabiaba.

Pacuenia bitso Pablo sivanajamatabëxaina Dioso pejumecovënëtsivi, Corinto tomarapijivi, yabara pelivaisi

¹¹ Pamonae peyamaxëitojorobiapóstolevi, saya jivi peyaiyataenexatsi ajumeurajibia navajunupaebabiaba pacuenia pematajemabinëtsi banavajunupaeba ajumeurajibia. Bajarapacuenia xanë ata navajunupaebajë. Apo jitsipaenë picani tanavajunupaebinxaxa. Paxamë xaniavaetsia itsa panevajanupaebijitsipame pacuenia exanaponaponajë paxamëjavata, nexata xanë tajacuata apo navajunupaebinë tsipae. Beveliajamatabëcuenenë atanë, itsiata pamonae peyamaxëitojorobiapóstolevivecua, xanë apo beveliajamatabëcuenenë. ¹² Paxamëjavata itsa ponaponajë, netsiyapëbeje ata, bajayajebi pacatsitaexanaponaponatsi pacuenia Dioso nitoroba. Pacatsipaebaponaponatsi Jesús pelivaisi. Nexata pacatsitaexanabiabatsi pinijicue ne taexanaejava Dioso pesaëta. Nexata paneyapëtaneme Dioso taneyavenonabiabijava. ¹³ Pacuenia taniji daxita Dioso pejumecovënëtsivi, bajarapacuenia paxamë ata pacatanetsi. Nexata itsamonae Dioso pejumecovënëtsivivecua bepaveliajamatabëcuenevimë, apo pacataetsi. Itsamonae Dioso pejumecovënëtsivi, neyavenonabiaba itsajota namatavenonajë. Itsiata bajarapacuenia paxamë ata pataneyavenonaenexamë, apo pacavajëtsitsi. Pamatacabí ponaponajë paxamëjavata, apo pacavajëtsitsi itsacuenejavayo ata. Pëtsa itsiata bajaraxua pasivana-jamatabëxainame. Biji rajane pasivajamatabëcuenebarëyamëre itsacuenejavayo ata apo patacavajëtsijava.

¹⁴ Mabaja panamutotaje, acueyabi namuto taponae nexa paxamëjavabelia naxaniavaetaponaponajë baja. Itsiata apo pacamatamoyanijobi tsanetsi Dioso pejumelivaisi patacatsipaebimatamo. Tsipaji palata apo jitsipaenë. Jitsipajë rajane xaniavaetsia panejumecovënëtsinexa Dioso. Bepataximë pacatanetsi. Pacuenia pejevaxi paxajavelia apo rajutsi palata paxa penaevetsinexa, bajara pijinia pacuenia paxamë ata apo panerajutsimë palata tanaevetsinexa. ¹⁵ Xanë patacayavenonaenexa, mapacuenia exanaejitsipajëje. Daxita taxinaejavami, veretsipajë jamatabëcuenebarëyaya. Tasaëtsaponaponaeeptojebi abaxë mapanacuataje, pacayavenonabiabijitsipatsi. Bajarapacuenia pacayavenonabiabijitsipa patacajamatabëcueneyavenonaenexa, xaniavaetsia Dioso panejumecovënëtsinexa. Tavajënaeyabelia bitso pacaasiva tsaponae atatsi, itsiata covë paxamë juya bevelia saya paneasivamë tsaponae.

¹⁶ Itsamonae paxamëyajuvënëvi xanë yabara jamatabëcuenenavëxaniabiaya jumai tsabiabi: “Xaniajai. Vaxaitsi Pablo apo rajutsitsi palata, Dioso pejumelivaisi vajanacatsipaebimatamo. Itsiata Pablo piaitatsacanë. Nexata meta itsacuenia nacayamaxëitojorobiaya nacavecuapitabiaba palata,” jai tsabiabi itsamonae xanë yabara. ¹⁷ Itsanë ata cajena, paxamëjavabelia xanë taitorobiviyajuvënë, yamaxëitojorobiaya palata apo pacavecuapitsi. ¹⁸ Itorobajë baja Tito peponae nexa paxamëjavabelia papecataenexa. Itorobajëna itsanë Dioso pejumecovënëtsinë Tito peyajavaponaenexa. Nexata pamatacabí Tito ponapona paxamëjavata, ¿pacavajëta tsaja palata? Jume. Apo pacavajëtsi cajena. Paxanëbeje Titobeje panajamatabëcuenejêpajëbeje. Nexata panacuenejêpajëbeje.

¹⁹ Panesivajamatabëjumaitsimë raeta: “Bajarapacuenia Pablobana nacanajamatabëcuenelivaisipaeba saya penayajivicuaicuaijainexa vaxaitsi vajananeconitsiaexanaeyaniva,” panesivajamatabëjamë raeta. Bajarapacuenia itsa pacanavajunupaebatsi, apo pacanavajunupaebitsi patacujunavixae patanenaneconitsiaexanaejavamë. Pacatsipaebatsi raja Dioso pitabarata pacuenia Cristo panetojitsipa. Tajamonae bitso patacaasivavi, daxita palivaisi baja pacatsipaebabiabatsi, pacatsipaebabiabatsi patacajamatabëcuene yavenonaponaenexa. Nexata bajarapalivaisi panevajënaeyabelia pacatsijamatabëvitsabaponaena Dioso papijajivixaemë. ²⁰ Pamatacabí ponaenajë paxamëjavabelia, bitso meta najamatabëxainae ya patsianajë paxamëjavata.

Aeconoxae pajitsipame tapatsinexa paxamëjavata. Itsiata meta itsa patsianajë paxamëjavata, apo pajitsipaemë tsane patacananeconitsiaexanaenexa. Tsipaji meta apo pacacaxitajarabi tsanetsi pexaniacuenia panejinavanapaejavata pacuenia pacatojitsipatsi. Itsa patsianajë paxamëjavata, pacataenatsi meta panenajumeanaenotabiabijava. Pacataenatsi meta panenacaëbabiabijava ata. Pacataenatsi meta panenabaraanaepanabiabijava ata. Pacataenatsi meta apo paneyavenonaejava itsajiviyo ata. Pacataenatsi meta itsamonae pepëya pibisiacuenia najumetsënëtsia panebaracuaicuajitsabiabijava ata. Pacataenatsi meta itsamonaevecua paayaijamatabëcuenevimë panenataeyabiabijava ata. Pacataenatsi meta apo panenajamatabëcuenejëpaexae navecuanatsanaeya panejinavanapaejava ata. ²¹ Paxamëjavata icatsia itsa patsianajë, Dioso meta pitabarata pacayapijiviaura tsanetsi pibisiacuene paneexanavanapaejava yabara. Bajaraxuata bitso pacasivanajamatabëxainatsi icatsia patacataenexalia. Tsipaji itsa apo pajinavanapaemë tsane pacuenia pacaitorobatsi, patacasivajamatabëcuenebarëyjavami, nevecuaajibi meta tsane. Paxamëyajuvënëvi bajayatajavaverenacujinae pibisiacuene pexanavanapaexae, sivajamatabënuenajë. Bajarapamonae pibisiacuene pexanavanapaejava pevitota, apo sivajamatabëcuenebëjai. Apo jamatabëcopatsinua pibisiacuene pexanavanapaejava pevitota.

13

Pacuenia icatsia Pablo itaveta Corinto tomarapijivi Diosojavabelia penaneconitsiyaniva yabara pelivaisi

¹ Aeconoxae baja icatsia ponaejitsianë paxamëjavabelia acueyabi namutonexa. Pibisiacuene pexanaejivi yabara, Dioso pejumelivaisibaxutota jumaitsi mapacueniaje: “Pajivi pibisiacuene exana, xanepana pevajunupaebinxatsi anijajivibeje, acueyabi pajivibeje ata, petaevitsi. Nexata xuacujinae xanepana jane baja penaneconitsiaexanaenexatsi,” jai Dioso pejumelivaisibaxutota. Nexata paxamëjavabelia itsa patsianajë, bajarapacuenia xanë pacananeconitsiaexanaenatsi. ² Imata panamutomi pacaitavetatsi daxita paxamë pibisiacuene paneexanavanapaejava panecopatsinexa, Diosojavabelia panenaneconitsiyaniva. Bajarapacuenia itavetajë itsamonae ata pibisiacuene pexanavanapaeyaniva. Aeconoxae tajë pacavecuaponaponae atatsi, pacatoyaquinatsi icatsia patacaitavetsinexa pibisiacuene paneexanaeyaniva. Icatsia paxamëjavabelia itsa patsianajë, pacananeconitsiaexanaenatsi padaxitamë. Caejivi ata apo bejiobiataenë tsane pibisiacuene pexanaeneconi yabara. ³ Itsa pacananeconitsiaexanaenatsi, ajumesaënë tsane patacananeconitsiaexanaenexa. Nexata bajarajota xaniavaetsia paneyapëtaename tayajavacuaicuajitsabiabijava Cristo. Cristo baja cajena piamatabëcuenesaëjjava, pacatsitanajamatabëcueneitajëta itsa pacayavenonaponapona paxamëjavata. ⁴ Xaniajai rabaja. Pacuenia vaxaitsi mapanacuapijivitsi ajamatabëcuenesaëjibitsi, bajara pijinia itsi Cristo ata mapanacuata itsa naexana pacuenia vaxaitsi banaexanatsi. Nexata Cristo cruzata itsa beyaxuabatsi, Dioso pesaëta icatsia asaëyaexanatsi petëpaecujinae. Paxanë pajamatabëcuenesaëjibi atanë, itsiata aeconoxae Dioso pesaëta Cristo payajavajinavanapajë patacajamatabëcuene yavenonaenexa.

⁵ Jica jane. Panajamatabëcuene livaisiëjere itsa xaniajai pepacuene Cristo papijajivimë. Itsa pepacuene Cristo papijajivimë, nexata payapëtaename Cristo papecayajavaponaponaejava. Itsa Cristo apo papijajivimë, nexata Cristo apo pacayajavaponaponae. ⁶ Paxanë pajamatabëjumaitsinë paxamë yabara mapacueniaje: “Corinto tomarapijivi vaxaitsi itsa nacacuenecanaëjëtsiana, xaniavaetsia yapëtaena pepacuene Cristo pijajivicuenetsi,” pajamatabëjanë. ⁷ Pacatovajëta ponatsi Diosojavabelia pibisiacuene paneexanaponae yaniva. Bajarapacuenia itsa pacatovajëta ponatsi Diosojavabelia, itsajamatabëcuene apo pacasivanajamatabëxainaetsi. Nexata apo pajamatabëjumaitsinë

paxamë yabara: “Itsa bajarapamonae xaniavaetsia jinavanapaena, nexata pijinia daxitajivi nacayapëtaena pepacue ne apóstolevicuenetsi,” apo pajamatabëjanë paxamë yabara. Bajarapacuenia Diosojavabelia pacatovajëtatsi tsipaji pacatojitsipatsi ëpexaniacuene paneexanavanapaēja. Xaniavaetsia ita pajinavanapaename, nexata ita papatsianajë paxamëjavabelia, ajibi tsane patacayabarananeconitsiaexanaēja. Pacuenia Cristo panetocopata patananeconitsiaexanaenexa pijaneconi pexainaevi, bajarapacuenia apo pacaexanaetsi tsane. ⁸ Tsipaji acuenebi patananeconitsiaexanaēja pajivi baja jumecovënëta pexaniajailivaisi, Jesucristo pelivaisi. Pananeconitsiaexanaenajë ëpijaneconi pexainaevi. ⁹ Aneconijibia ita pajinavanapaename, acuenebi patacananeconitsiaexanaenexa. Itsiata pacasivajamatabëcuenebarëyatsi. Tsipaji apo paxainaemë paneconi yabara pacananeconitsiaexanaejitsiatsi. Pacatovajëtaaponatsinua Diosojavabelia panevajënaeyabelia panejamatabëcuenevitsabaponaenexa Dioso panejumecovënëtsijava. ¹⁰ Pacatoyaquinaliatsi mapabaxutoje taponavajënaeya paxamëjavabelia tavajënaelia panenajamatabëcuenexanebinexa pibisiacuene paneexanaejavavecu. Nexata ita patajopaeliajë paxamëjavabelia, apo pacabijatae tsanetsi. Apo pacananeconitsiaexanaetsinua tsane. Dioso nitoroba patacaevetsinënexa. Nexata ita patsialiajë paxamëjavabelia, apo jitsipañë tsane patacananeconitsiaexanaenexa. Biji rajane jitsipajë patacjamatabëcuene saëyaexanaēja panevajënaeyabelia panejamatabëcuenesaënexa Dioso panejumecovënëtsijava.

¹¹ Tajamonae, pajamatabëcuenebarëyamëre tsavanapae. Panevajënaeyabelia panajamatabëcuene vitsabiaexanaponare Dioso panejumecovënëtsijava. Panamuxunaevere palivaisi pacatoyaquinaliatsi. Najamatabëcuenejëpaeya pajinavanapare jamatabëcuenexanepañaeya. Dioso vajanacaasivanë. Bajaraponë jamatabëcuenexanepañaeya nacajinavanapaeyaexana. Nexata Diosojavabelia pacatovajëtabiatsi Dioso papecayajavaponaponae. ¹² Paxamë ata Dioso panejumecovënëtsixae, xaniavaetsia nasivaya namataenetsia panabajacobabiabare. ¹³ Daxita pamona Dioso pejumecovënëtsivi, majota pejinavanapaevije, pacabajacobalia.

¹⁴ Pacatovajëtabiatsi Diosojavabelia vajatuxanenë Jesucristo papecayavenonabiabinexa. Pacatovajëtabiatsinua itsamonae ata asivaya panetaenexa pacuenia paxamë ata Dioso pacaasiva. Pacatovajëtabiatsinua Espíritu Santo ata papecayajavaponaponae.

Mapabaxutoje San Pablo toyaquina Galacia nacuapijivijavabelia

Pacuenia Pablo toyaquina mapabaxutoje Dioso pejumecovënëtsivi, Galacia nacuapijivijavabelia, yabara pelivaisi

¹ Xanë Pablonë, apóstolenënë. Jivi pejamatabëcueneta apo nitorobi tatsipaebapon-aenexa Jesucristo pelivaisi. Nitorobabeje raja Jesucristobeje, paxa Diosobeje, ponë icatsia Jesucristo asaëyaexanatsi petëpaecujinae. ² Pacatoyaquinatsi mapabaxutoje paGalacia nacuapijivimë, Dioso panejumecovënëtsivi. Daxita majota Dioso pejumecovënëtsivi pacajamatabënajinalia. ³ Pacatovajëtabiabatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa. ⁴ Pacuenia vaxa Dioso itorobatsi, vajatuxanenë Jesucristo pijacuata tonacaeveta pebeyaxuabinexatsi pibisiacuene vajaexanaeneconi yabara. Nexata Jesucristo pejamatabëcueneta vaxa Dioso aneconijibia nacatane. ⁵ Bajaraxuata vaxaitsi Diosojavabelia jumaitsitsi tsabiabi: “¡Xamë Diosomë, bitso ayaijamatabëcuenenëmë!” jaitsi tsabiabi daxitamatacabijavabelianexa. Bajara itsi tsane.

Pacuenia baja Jesús pelivaisivecua pematatsënëa ajibi itsalivaisi jivi pecapanepaelivaisinexatsi yabara pelivaisi

⁶ Paxamë saya caematacabibejecujinae, pacopabame Dioso panejumecovënëtsijava. Bajaraxuata xanë bitso pacasivajamatabëcuene nabenajacatsi. Jesucristo picani pejamatabëcueneta, Dioso pacaitaxutotsoniatane itsa pacajunata papecacapanepaenexa. Itsiata baja aeconoxae jamatabëcuenenavëxaniabiaya pavecuanajamatabëcuene pënëyorotame saicayalivaisijavabelia, bepapecacapanepaelivaisinexa itajara panejumetaexae. ⁷ Itsiata baitsi jane baja pematatsënëa ajibi itsalivaisi papecacapanepaelivaisinexa. Itsamonae pata paxamëjavata livaisi papecatsipaebinexa. Bajarapamonae pata papecajamatabëcuene naepatajërëcaeyaexanaenexa. Bajarapamonae saicayalivaisi jamatabëpacatsipaebapona panecopabinexa panejumecovënëtsijava pexanialivaisi, Jesucristo pelivaisi. ⁸ Copiaya baja cajena paxanë pacatsipaebatsi pexanialivaisi, Jesucristo pelivaisi, papecacapanepaelivaisinexa Diosojavabelia. Nexata acuenebi paxanë pataithianaenexa bajarapalivaisi. Athëbëvetsica pepatsinë ata tsipae, ángelnë, acuenebi piathithianaenexa bajarapalivaisi. Jesucristo pelivaisivecua, saicayalivaisi, itsa pacatsipaebijitsipatsi, nexata Diosojavabelia pananeconitsipajë. Nexata Dioso panenaneconitsiaexanaejitsipa daxitamatacabijavabelianexa. ⁹ Copiaya baja cajena pacuenia pacatsipaebatsi, bajara icatsia pacuenia aeconoxae ata pacatsipaebatsi. Pajivi Jesucristo pelivaisivecua, saicayalivaisi pacatsipaeba bepapecacapanepaelivaisinexa itajara, nexata bajarapajivi Dioso naneconitsiaexanaenatsi daxitamatacabijavabelianexa. Tsipaji pacacopatsiaexana panejumecovënëtsijava pexanialivaisi, Jesucristo pelivaisi.

¹⁰ Payapëtaneme rabaja xua yabara bajarapacuenia pacajumaitsitsi. Bajarapacuenia itsa pacajumaitsitsi, apo pacajumaitsitsi saya jivi tanesivabarëyanexa. Jume cajena. Jivi apo nesivabarëya ata Jesucristo pelivaisi jivi tatsipaebaponaejava yabara, itsiata jitsipajë jivi tatsipaebinexa Jesucristo pelivaisi, Dioso tanesivajamatabëcuenebarëyanexa. Saya jema jivi livaisi itsa tsipaebijitsipajë saya tanesivabarëyanexa, nexata pacuenia Jesucristo nitoroba, apo tsipaebaponaenë tsipae. Nexata Jesucristo apo pijajivitonënë tsipae.

Pacuenia Pablo Dioso junatatsi apóstolenënexa yabara pelivaisi

¹¹ Tajamonae, jitsipajë patacatsipaebinea mapalivaisije. Palivaisi tsipaebaponajë jivi pecapanepaelivaisinexatsi Diosojavabelia, bajarapalivaisi itsajivi ata pejamatabëcueneta apo pexanaelivaisi. ¹² Itsajivi ata cajena bajarapalivaisi apo netsipaebi. Jesucristo raja neyapëtaeyaexana bajarapalivaisi. Nexata Jesucristo nitoroba jivi tatsipaebaponaenexa bajarapalivaisi.

¹³ Panevënëlivaisitaneme rabaja pacuenia exanaponaponajë pamatacabi abaxë jumecovënëtajë Dioso Moiséspijinëta penajumecopatsilivaisi. Bajarapalivaisi Dioso Moiséspijinëta najumecopata pajudíovinë patajumecovënëtsinexa. Panevënëlivaisitanemenua pacuenia barajinabiabajë Jesucristo pijajivi. Apo itaxutobejobiataeyabiabinë cajena tsiquirijavayo ata. Jamatabëverebiaxuababiabajë Jesucristo pijajivi. ¹⁴ Xanë abaxë itsa pevëjëatonë, jumecovënëtajë bitso Dioso Moiséspijinëta penajumecopatsilivaisi. Xanë bitso asaëyata jumecovënëtsiaponaponajë bajarapalivaisi pitorobicuenia. Daxita pamonaë pevëjëavi judíovi, Israel nacuapijivi, matatoxenetsia xanë bitso casaënë tajumecovënëtsijava bajarapalivaisi. ¹⁵ Itsiata baitsi jane tanaexanaevajënaeya ata, Dioso nitapeta Jesucristo tajumecovënëtsinexa. Dioso taneitaxutotsoniataexae, nejunata apóstolenëxanë. ¹⁶ Nexata pamatacabi ponajë Damasco tomarabelia, namutoepatota Dioso netsitajëta pexënato. Nexata Dioso neyapëtaeyaexana pexënato pelivaisi. Bajarapacuenia Dioso pexënato pelivaisi neyapëtaeyaexana tatsipaebaponaenexa apo judíovijava. Nexata Dioso taneyapëtaeyaexanaecujinae pexënato pelivaisi, apo ponaenë itsajivijavabelia ata tayanijobinexa Dioso pexënato pelivaisi. Apo ponaenë tanemuxujiobinexanua Dioso pexënato pelivaisita. ¹⁷⁻¹⁸ Pamatacabi namutoepatota Dioso netsitajëta pexënato, apo naviatecaenë Jerusalén tomarabelia tayanijobinexa pamonaëjavabelia xanëvecua copiaya exanatsi apóstolevi. Biji rajane rovia paliajë Damasco tomarabelia. Nexata Damasco tomarata tapatsicujinae, caenënë ponajë Arabia nacuayabelia, petusato nacuayabelia. Nexata petusato nacuata Dioso xaniavaetsia neyapëtaeyaexanapona pexënato pelivaisi. Bajaraxuacujinae icatsia bexëa Arabia nacuaverena naviarenajë Damasco tomaraberena. Bajaraxuacujinae tapuaxainae baja acueyabi pavaibeje tajumecovënëtsicujinae Dioso pexënato pelivaisi, ponajë jane baja Jerusalén tomarabelia apóstolenë Pedro tacaxitajarabinexa. Nexata Jerusalén tomarata, Pedrojavata, naponaponajë quince pamatacabibeje. ¹⁹ Itsiata Jerusalén tomarata pematatsënëa itsaapóstolenë apo taenë. Ësantiago saya, vajatuxanenë pejuyapijinë, taniji. ²⁰ Xaniavaetsia pacajumaitsitsi Dioso pitabarata. Palivaisi pacatoyaquinatsi, pexaniajailivaisi cajena.

²¹ Jerusalén tomarata taponaponaecujinae, ponajë icatsia Siria nacuayabelia Jesucristo pelivaisi jivi tatsipaebaponaenexa. Ponajë Cilicia nacuayabelia ata. ²² Jesucristo pelivaisi jivi itsa tsipaebanajetarucajë, Jesucristo pelivaisi pejumecovënëtsivi, Judea nacuapijivi, abaxë apo neyapëtae. Tsipaji abaxë Judea nacuata apo tsipaebaponaenë Jesucristo pelivaisi. ²³ Bajarapamonae saya nevënëlivaisitane itsamonae xanë yabara pejumaitsijava: “Ponë pina nacabarajinabiaba Jesucristo pelivaisi vajajumecovënëtsivi, aeconoxae pina baja bajaraponë ata jumecovënëta. Nexata pina itsamonae ata pejumecovënëtsinexa Jesucristo pelivaisi, bajaraponë tsipaebapona. Bajarapalivaisi yabara bajaraponë jamatabënacaverebiaxuaba picani,” pejaijava, itsamonae xanë yabara nevënëlivaisitane Judea nacuapijivi, Jesucristo pelivaisi pejumecovënëtsivi. ²⁴ Bajaraxuata Judea nacuapijivi, Jesucristo pelivaisi pejumecovënëtsivi, jumai tsabiabi Diosojavabelia: “Diosomë, bitso ayaijamatabëcuenenëmë. Tsipaji Pablo ata najamatabëcuenecopatsiaexaname nexënato Jesucristojavabelia,” jai tsabiabi xanë yabara.

2

Pacuenia Pablo pevëna apóstolevi Jerusalén tomarata xaniavaetsia copiapitatsi yabara

pelivaisi

¹ Jerusalén tomarata naropotajë Jesucristo pelivaisi jivi tatsipaebanajetarucaenexa Siria nacuajava, Cilicia nacuajava ata. Nexata Jesucristo pelivaisi jivi tatsipae-banajetarucaecujinae bajarapanacuabejejava, catorce pavaibejecujinae matapania icatsia patajë tacovëyaberena, Jerusalén tomarata. Bernabébeje Titobeje barëpatajë. ² Patajë Jerusalén tomarata tsipaji Dioso nitoroba tapatsinexa Jerusalén tomarata. Nexata Jerusalén tomarata Dioso pejumecovënëtsivi ëpenamatacaitorobivi penacaetuatsijavata, navajunupaebajë bajarapamonaejavabelia. Bajarapacuenia navajunupaebajë Dioso pejumecovënëtsivi penamatacaitorobivijavabelia, taneyapëtaenexa Jesucristo pelivaisi tatsipaebaponaejava apo judíovijava pecapanepaelivaisinexatsi Diosojavabelia. Bajarapacuenia navajunupaebajë Dioso pejumecovënëtsivi penamatacaitorobivijavabelia tsipaji jamatabëjumaitsinë: “Maraeta pamonaë apo pejitsipaecuenia, tsipaebaponajë apo judíovijavaje,” jamatabëjanë. Itsiata baitsi jane Dioso pejumecovënëtsivi penamatacaitorobivi, tsitaxanepanatsi pacuenia tsipaebaponajë apo judíovijava. ³ Bajarapacuenia tanavajunupaebixae, taneyanabinë Tito, apo judiónë ata, Dioso pejumecovënëtsivi penamatacaitorobivi pajudíovinë patajacuenia apo perabëcaucutsiaexanaetsi. Baitsi apo boupiperabëcaucutsiaexanaetsi. ⁴ Itsamonae, judíovi, Jesucristo pelivaisi apo jumecovënëtsi. Nexata bajarapamonae Jesucristo pelivaisi bepejumecovënëtsivicuenia, saya jema najunua paxanë Jesucristo pelivaisi patajumecovënëtsivijavaberena. Bajarapamonae picani jitsipa Tito peperabëcaucutsiaexanaenexatsi. Itsiata apo perabëcaucutsiaexanaetsi. Bajarapamonae saya jema najunua patanenaitaxutocaevetsinexa patanetaenexa jamatejema patavecuajinavanapaejava Dioso Moiséspijinëta penajumecopatsilivaisi, palivaisimi patajasalinaivi jumecovënëta. Bajarapalivaisi patajumecovënëtsijavami, pacopatajë baja Jesucristo pejamatabëcueneta. Nexata pamonaë panenaitaxutocaeveta, jamatabëpanejumecovënëtsiaexana picani icatsia Dioso Moiséspijinëta penajumecopatsilivaisi. ⁵ Itsiata baitsi jane tsiquirijavayo ata apo paexanaenë pacuenia bajarapamonae paneitoroba. Nexata Jesucristo pelivaisi jivi itsa patsipaebaponajë, apo payajavatsipaebaponaenë Dioso Moiséspijinëta penajumecopatsilivaisi. Dioso Moiséspijinëta penajumecopatsilivaisi, itsa pacatsipaebijitsipatsi, jamatabëcuenenavëxaniabiaya pajamatabëjumaitsimë tsipae: “Naperabëcaucutsiaexanaenajë pacuenia judíovi naperabëcaucuba. Jumecovënëtsianajënuua Dioso Moiséspijinëta penajumecopatsilivaisi. Nexata Dioso pepacuenene necapanepaena,” pajamatabëjamë tsipae jamatabëcuenenavëxaniabiaya.

⁶ Jerusalén tomarata Dioso pejumecovënëtsivi penamatacaitorobivijavabelia, navajunupaebajë Jesucristo pelivaisi tatsipaebaponaejava apo judíovijava pecapanepaelivaisinexatsi Diosojavabelia. Itsiata bajarapamatacabi Dioso pejumecovënëtsivi penamatacaitorobivi, apo netsipaebi itsalivaisiyo ata Jesucristo pelivaisi tayajavatsipaebaponaenexa apo judíovijava. Bajarapamonae yabara itsamonae jamatabëjumai tsabiabi: “Mapamonaeje Dioso pejumecovënëtsivi bitso pepo penamatacaitorobivi. Nexata bitso ayaijamatabëcuenevi,” jamatabëjai tsabiabi. Itsiata xanë apo sivanajamatabëxainaenë bajarapamonae ayaijamatabëcuenevi tataenexa. Tsipaji cajena daxita vaxaitsi, Jesucristojavabelia vajanajamatabëcuenecopatsivi, Dioso najëpaeya nacatane. ⁷ Dioso pejumecovënëtsivi penamatacaitorobivi, apo nitorobi itsalivaisiyo ata tayajavatsipaebaponaenexa apo judíovijava itsa tsipaebajë Jesucristo pelivaisi pecapanepaelivaisinexatsi Diosojavabelia. Biji rajane Dioso pejumecovënëtsivi penamatacaitorobivi, neyapëtane Dioso taneitorobinëcuene. Nexata Dioso pejumecovënëtsivi penamatacaitorobivi, jumaitsi xanë yabara: “Xaniajai. Pablo Dioso itorobatsi Jesucristo pelivaisi petsipaebaponaenexa apo judíovijava. Pacuenia copiaya Pedro Dioso itorobatsi Jesucristo pelivaisi petsipaebaponaenexa judíovijava, bajara pijinia pacuenia Pablo ata Dioso itorobatsi Jesucristo pelivaisi petsipaebaponaenexa apo judíovijava,”

jai Dioso pejumecovënëtsivi penamatacaitorobivi xanë yabara. ⁸ Apóstolenë Pedro Dioso pesaëta Jesucristo pelivaisi petsipaebaponaexae judíovijava, judíovi baja najamatabëcuenecopabapona Jesucristojavabelia. Bajara pijinia pacuenia xanë ata Dioso pesaëta Jesucristo pelivaisi tatsipaebaponaexae apo judíovijava, apo judíovi ata baja najamatabëcuenecopabapona Jesucristojavabelia.

⁹ Mara pamatabëxëyo Jerusalén tomarata Dioso pejumecovënëtsivi penamatacaitorobivije. Santiago, Pedro, Juan, bajarapamatabëxëyo. Dioso pejumecovënëtsivi penamatacaitorobivi, itsa neyapëtane Dioso taneitorobinëcuene tatsipaebaponaenexa Jesucristo pelivaisi apo judíovijava, nexata Dioso pejumecovënëtsivi penamatacaitorobivi, panebajacobabeje pexaniacuenia Bernabébeje. Bajarapacuenia Dioso pejumecovënëtsivi penamatacaitorobivi, pexaniacuenia panebajacobabeje tsipaji paneyapëtanebeje patatona-juanacuenebivicuene Dioso pijacuene. Bajaraxuata paxanëbeje Bernabébeje, Jesucristo pelivaisi patavajënaeyabeliabeje patsipaebaponañebeje apo judíovijava. Santiagobana pijinia, Pedrobana, Juanbana, tsipaebapona judíovijava. ¹⁰ Bajarapamonae caelivaisiyo panejumaisibeje Jerusalén tomarata. Paneitorobabeje patayavenonaenexabeje Dioso pejumecovënëtsivi, bitso bepejiobivi, Jerusalén tomarata pejinavanapaevi. Bajaraxuata xanë jamatabëcuenebarëyaya bajarapamonae ofrenda toexanaeyaexanaponajë it-saxuayo tatsipaebilivaisi, Jesucristo pelivaisi, jumecovënëta. ¹¹

Pacuenia Pablo muxujioba Pedro Antioquía tomarata yabara pelivaisi

¹¹ Perujulivaisimi, judíovi pijalivaisi, itavetatsi judíovi caejavata peyjavana-baniyaniva apo judíovi. Pedro itsa ponapona Antioquía tomarata, muxujiobajë daxitajivi pitabarata. Tsipaji Pedro apo pexanepanaecuenia exana. Pedro apo judíovijavata itsa naponapona, jemata apo judíovi vecuanasaicayaba. ¹² Pedro, judíonë ata, pecopatsixae baja pejumecovënëtsijava perujulivaisimi, judíovi pijalivaisi, abaxë picani Pedro jamatejema nanabanebiaba apo judíovijavata. Nexata itsa pata Santiago pijajivi Antioquía tomarata, Pedro baja vecuanasaicayaba apo judíovi. Tsipaji Pedro cununava Santiago pijajivi petaejanivatsi apo judíovijavata penanabanijava. Pedro baja nexata copata apo judíovijavata penanabanebiabijava. Santiago pijajivi perujulivaisi tsiteca jumecovënëtavanapa. Nexata Santiago pijajivi jumai tsabiabi: “Pamonae apo judíovi ata, Jesús pelivaisi itsa jumecovënëta, bajarapamonae ata benaperabëcaucubiaexana,” jai tsabiabi. Nexata Pedro cununava bajarapamonae. Nexata Pedro jamatabëjumaisi: “Itsa netaejitsipa Santiago pijajivi tananabanijava apo judíovijavata, neneconitsipa judíovijavabelia Jerusalén tomarata. Nexata judíovi ayaicuenia nebijataejitsipa,” jamatabëjai Pedro. Bajaraxuata Pedro vecuanasaicayaba baja apo judíovi. ¹³ Pedro yapëtae ata pacuenia picani apo bevecuanasaicayabi apo judíovi, itsiata vecuanasaicayaba. Nexata daxita judíovi, pamonae najamatabëcuenecopaba Jesucristojavabelia, itsa tane Pedro pevecuanasaicayabijava apo judíovi, bajarapamonae ata vecuanasaicayaba apo judíovi. Bernabé ata yapëtae ata pacuenia picani apo bevecuanasaicayabi apo judíovi, itsiata vecuanasaicayaba apo judíovi. ¹⁴ Nexata pacuenia jumaisi pexanialivaisi jivi pecapanepaelivaisinexatsi Diosojavabelia, bajarapamonae apo exanae. Nexata saya bajarapamonae vecuanasaicayaba apo judíovi. Bajaraxuata itsa tanijji bajarapamonae pevecuanasaicayabijava apo judíovi, nexata muxujiobajë. Daxita Dioso pejumecovënëtsivi pitabarata, jumaisinë Pedrojavabelia: “Xamë judíonë atamë, itsiata apo judíovijavata naponapona. Nexata pacuenia apo judíovi jinavanapa, naponaponabiabame picani. Apo ponaponabiabimë judíonëcuenia. Pacuenia baja picani naponaponabiabame apo judíovijavata, xanepana baja picani. Xamë judíonë atamë, itsa apo ponaponaemë judíonëcuenia, ¿detsa nexata xuajitsia caranata apo judíovi aeconoxae jamatabëjinavanapaeyaexaname judíovicuenia?” janë Pedrojavabelia pevecuanasaicayabixae apo judíovi.

Pacuenia judíovi ata xanepana penajamatabëcuenecopatsinexa Cristojavabelia pecapanepaenexatsi Diosojavabelia yabara pelivaisi

¹⁵ Paxanë baja cajena pajudíovinë. Patanaexanaejavaveliacujinae itsa pavitsabaponajë, payapëtaniji patajumecovënëtsinexa pexaniajailivaisi, Dioso pejumelivaisi. Nexata pacuenia apo judíovi pejevaxijavaveliacujinae apo yapëtae pejumecovënëtsinexa pexaniajailivaisi, Dioso pejumelivaisi, apo paitsinë. ¹⁶ Pexaniajailivaisi patajumecovënëtsinexa, patajamonae baja cajena paneyajavavitsata. Nexata payapëtaniji mapacuenije. Itsajivi jumecovënëtsi ata tsipae Dioso Moiséspijinëta penajumecopatsilivaisi, itsiata Dioso aneconijibia apo taetsi tsipae. Bajarapacuenie paxanë pajudíovinë payapëtaniji. Bajaraxuata paxanë pajudíovi atanë, panajamatabëcuenecopatajë Jesucristojavabelia. Nexata Dioso aneconijibia panetane patanajamatabëcuenecopatsixae Jesucristojavabelia. Dioso aneconijibia apo panetae patajumecovënëtsixae Dioso Moiséspijinëta penajumecopatsilivaisi. Tsipaji itsajivi ata apo jumecovënëtsicapaneapae bajarapalivaisi. Nexata itsamonae jumecovënëtsi ata bajarapalivaisi, itsiata Dioso aneconijibia apo taetsi.

¹⁷ Pexaniajailivaisi patacatsipaebijavata, itsajivi jamatabëcuenenavëxaniabiaya nejumaitsi tsipae: “Xamë jumaitsimë tsabiabi: ‘Dioso aneconijibia netane tajumecovënëtsixae Cristo tanesivatëpaejava tajaneconi yabara. Nexata baja apo jumecovënëtsinë Dioso Moiséspijinëta penajumecopatsilivaisi,’ jamë tsabiabi. Dioso Moiséspijinëta penajumecopatsilivaisi apo nejumecovënëtsixae, nexata Dioso catane pibisiacuene nexanaenë,” nejai tsipae itsajivi jamatabëcuenenavëxaniabiaya. Itsiata baitsi jane bajarapacuenia itsajivi nejumaitsi ata tsipae, itsiata Dioso apo netae tsipae pibisiacuene taexanaenë. ¹⁸ Diosojavabelia rajane naneconitsipajë mapacuenia itsa exanaejitsipajë. Dioso Moiséspijinëta penajumecopatsilivaisi, tajumecovënëtsijavami tacopatsicujinae, icatsia caevëalia itsa jumecovënëtsipajë, nexata Diosojavabelia naneconitsipajë. ¹⁹ Pamatacabi abaxë ajamatabëcuenesaënë tsabiabi tajumecovënëtsijava Dioso Moiséspijinëta penajumecopatsilivaisi, naneconitajë picani Diosojavabelia. Tsipaji ajamatabëcuenesaënë tsabiabi ata tajumecovënëtsijava bajarapalivaisi, itsiata apo necaëjēpae tajumecovënëtsicapaneapenexa daxita pacuenia jumaitsi bajarapalivaisi. Itsa meta abaxë tsiteca bajarapalivaisi jumecovënëtaaponaponaejitsipajë, yajavatëpaejitsipajë meta tajaneconi. Bajaraxuata aeconoxae baja icatsia bajarapalivaisi tajumecovënëtsinexa, apo sivanajamatabëxainenë. Pacuenia baja petëpaejivi itsacuenejavayo apo sivanajamatabëxainae, bajara itsinë taexanaeyaniva icatsia pacuenia bajarapalivaisi nitoroba. Biji rajane aeconoxae baja Dioso nerajuta pejanajamatabëcuene taexanaponaponenexa pacuene Dioso jitsipa. ²⁰ Cristo cruzajavabelia itsa cobematabiabarutatsi, xanë ata tajaneconi yabara nesivatëpa. Nexata xanë ata Cristo betaneyajavatëpae. Bajaraxuata perujujamatabëcuenemi, pibisiacuene taexanaenexa taneitorobabiabijamatabëcuenemi, nevecuatëpa baja cruzata. Nexata baja piasaëjamatabëcuene, pejanajamatabëcuene, xainajë. Cristo baja neyajavaponapona. Pajamatabëcuene yaasaënë tsaponaponae, Dioso pexënatojavabelia najamatabëcuenecopatsiaya ponaponajë. Dioso pexënato nejitsipa. Nesivatëpanua baja cajena. ²¹ Apo namuxujematsinë Dioso vajanacaitaxutotsoniataejava. Dioso Moiséspijinëta penajumecopatsilivaisi, jivi pejumecovënëtsixae, Dioso aneconijibia jivi itsa taejitsipa, nexata Cristo jivi apo sivatëpae tsipae pijaneconi yabara. Nexata Cristo saya jema tēpaejitsipa.

3

Pacuenia Cristo pejumecovënëtsivi, Dioso aneconijibia tanetsi pecapanepaenexatsi pijaneconivecua, itsa jumecovënëta pacuenia Abrahampijinë jumecovënëta, yabara pelivaisi

¹ ¡Paxamë paGalacianacuapijivimë, bitso cajena paneajamatabëcuenetajavi! Itsamonae raeta saicayalivaisi yamaxëitojorobiaya pacatsipaeba, pexaniajailivaisi, palivaisi baja picani pajumecovënëtime, panecopabinexa. Xanë Jesucristo pelivaisi patacatsipaebijavata, xaniavaetsia baja cajena pacatsipaebatsi, pacuenia Jesucristo cruzajavabelia cobematabiabarutatsi. Nexata baja picani panijacuata bepanetae Jesucristo papecasivatëpaejava cruzata. ² Caejumeyo pacayanijobatsi. ¿Detsa xua yabara pacatsijamatabëjunua Espíritu Santo? Apo pacatsijamatabëjone raja panejumecovënëtsixae Dioso Moiséspijinëta penajumecopatsilivaisi. Espíritu Santo raja pacatsijamatabëjunua panejumecovënëtsixae Jesucristo papecacapanepaejavanexa panijaneconivecua. ³ Paxamë bitso pajamatabëcuenetajamë. Pamatacabi pataxuxuabame panejumecovënëtsijava Jesucristo papecacapanepaejavanexa panijaneconivecua, panajamatabëxainabiabame Espíritu Santo papecayavenonabiabinexa. Aeconoxae baja icatsia caevëalia panajamatabëxainame panejumecovënëtsinexa Dioso Moiséspijinëta penajumecopatsilivaisi. Itsiata apo cajëpætsi bajarapalivaisi papecacapanepaenexa. ⁴ Itsamonae bitso pacabejiobiaexanabiaba pexanialivaisi, Jesucristo pelivaisi, panejumecovënëtsixae. Bajaraxuata apo bepacopatsimë panejumecovënëtsijava Jesucristo pelivaisi, palivaisi yabara itsamonae pacabejiobiaexanabiaba. Tsipaji itsa pacopabijitsipame panejumecovënëtsijava Jesucristo pelivaisi, saya panacueratsipame. ⁵ Payapëtaneme rabaja Dioso papecarajutsijava Espíritu Santo. Pinijicuene pexanaejavanë ata Dioso pacatsitaexana paxamë tuatujëta. Baitsi piavitanevi jamatejemaya exanapona. Petëpævimi ata asaëyaexanapona. ¿Detsa xua yabara bajarapacuene Dioso pacatsitaexana? Dioso raja apo pacatsitaexanae bajarapacuene panejumecovënëtsixae Dioso Moiséspijinëta penajumecopatsilivaisi. Dioso raja pacatsitaexana bajarapacuene panejumecovënëtsixae patacatsipaebilivaisi, Jesucristo pelivaisi.

⁶ Bajayata Abrahampijinë Diosojavabelia najamatabëcuenecopatsiaya jamatabëjumaitsi: “Xaniajai. Dioso netoexanaena pacuenia najumecapanepaeya nejumaitsi,” jamatabëjai. Bajaraxuata Dioso Abrahampijinë aneconijibia tanetsi Dioso pijanacuayabetsia pecapanepaenexatsi. ⁷ Bajaraxuata paxamë bepayapëtaneme mapacueneje. Pamonaе jumecovënëta pacuenia Dioso najumecapanepaeya jumaitsi, bajarapamonae Abrahampijinë apo pemomoxi ata, itsiata Dioso tanetsi Abrahampijinë bepepo pemomoxi. Bajarapamonae Dioso capanepaenatsi. ⁸ Dioso pejumelivaisibaxutota tajëvelia jumaitsi pacuenia apo judíovi ata Dioso capanepaejitsiatsi pijaneconivecua. Nexata apo judíovi ata Dioso itsa jumecovënëtsiana, capanepaenatsi pacuenia Dioso najumecapanepaeya jumaitsi. Dioso jivi pecapanepaejavanexa yabara, tajëvelia Abrahampijinëjavabelia Dioso jumaitsi mapacueniaje: “Tacatsipaebilivaisi tanejumecovënëtsixaemë, daxitanacuapijivi ata aneconijibia taenajë, bajarapamonae ata itsa nejumecovënëtsiana pacuenia xamë nejumecovënëtime,” jai Dioso Abrahampijinëjavabelia. Bajarapacuenia Dioso pejumelivaisibaxutota tajëvelia jumaitsi. ⁹ Nexata baja vaxaitsi xaniavaetsia yapëtanetsi mapacueneje. Pamonaе jumecovënëta Jesucristo pelivaisi, bajarapamonae Dioso aneconijibia tanetsi pecapanepaenexatsi pijaneconivecua. Tsipaji bajarapamonae ata jumecovënëta pacuenia bajayata Abrahampijinë jumecovënëta pacuenia Dioso najumecapanepaeya jumaitsi.

¹⁰ Pajivi Dioso Moiséspijinëta penajumecopatsilivaisi apo jumecovënëtsicapanepeata, jamatabëjumaitsi: “Bajayata Dioso Moiséspijinëta najumecopata jivi pejumecovënëtsinexa. Nexata baja xanë bajarapalivaisi jumecovënëtaaponaponajë Dioso tanecapanepaenexa,” jamatabëjai, itsiata bajarapajivi Dioso naneconitsiaexanaenatsi. Tsipaji Dioso pejumelivaisibaxutota jumaitsi mapacueniaje: “Pamonaе apo jumecovënëtsicapanepe tsane daxita pacuenia itorobatsi Dioso Moiséspijinëta penajumecopatsilivaisi, bajarapamonae cajena Dioso naneconitsiaexanaenatsi,” jai Dioso pe-

jumelivaisibaxutota. ¹¹ Nexata baja vaxaitsi xaniavaetsia yapētanetsi bajarapacuene. Dioso Moiséspijinēta penajumecopatsilivaisi, jivi jumecovēnētsi ata, itsiata itsajivi ata Dioso aneconijibia apo taetsi pecapanepaenexatsi Diosojavabelia. Tsipaji itsajivi ata apo jumecovēnētsicapanepae daxita pacuenia itorobatsi Dioso Moiséspijinēta penajumecopatsilivaisi. Bajarapacuene vaxaitsi yapētanetsi. Tsipaji Dioso pejumelivaisibaxutota icatsia jumaitsi mapacueniaje: “Pajivi pepacuene Dioso pejumecovēnētsixae, jamatabējumaitsi: ‘Xanē pepacuene Dioso neyavenonaena pacuenia najumecapanepaeya jumaitsi,’ jamatabėjai, Dioso aneconijibia tanetsi. Bajarapajivi xainaena matababi apo peverevereaejava,” jai Dioso pejumelivaisibaxutota. ¹² Dioso Moiséspijinēta penajumecopatsilivaisi jivi jumecovēnētsi ata, itsiata apo jumecovēnētsicapanepae daxita pacuenia itorobatsi bajarapalivaisita. Bajaraxuata Dioso Moiséspijinēta penajumecopatsilivaisi yabara, Dioso pejumelivaisibaxutota jumaitsi mapacueniaje: “Pajivi apo jumecovēnētsicapanepae ata Dioso Moiséspijinēta penajumecopatsilivaisi, itsiata itsa jamatabējumaitsi tsane: ‘Xanē pepacuene Dioso neyavenonaena pacuenia najumecapanepaeya jumaitsi,’ itsa jamatabėjai tsane, apo jumecovēnētsicapanepae ata, bajarapajivi Diosojavabelia capanepaenatsi,” apo jai. Biji rajane Dioso Moiséspijinēta penajumecopatsilivaisi yabara, Dioso pejumelivaisibaxutota jumaitsi mapacueniaje: “Pajivi matapania jumecovēnētsicapanepaena daxita pacuenia itorobatsi Dioso Moiséspijinēta penajumecopatsilivaisi, bajarapajivi capanepaenatsi Diosojavabelia. Itsa apo jumecovēnētsicapanepae tsane daxita pacuenia itorobatsi Dioso Moiséspijinēta penajumecopatsilivaisi, nexata tēpaena. Naxuabiana Diosovecua,” jai Dioso pejumelivaisibaxutota Dioso Moiséspijinēta penajumecopatsilivaisi yabara.

¹³ Vaxaitsi baja cajena naneconitatsi Diosojavabelia. Tsipaji apo jumecovēnētsicapanepaetsi Dioso Moiséspijinēta penajumecopatsilivaisi. Itsiata baitsi jane Cristo itsa tēpa cruzata, nacaneconimatamota pijanata. Dioso Moiséspijinēta penajumecopatsilivaisi apo vajajumecovēnētsicapanepaexae, naneconitatsi picani Diosojavabelia. Itsiata Cristo cruzata itsa tēpa, nacavecuaajibiaexana baja bajarapaneconimi. Nexata baja Dioso apo nacananeconitsiaexanae tsane. Cristo saya tsijumaxuabatsi vajaneconimi. Nexata Dioso tanetsi Cristo bepenaneconitsinē vajaneconi pejamatabēcueneta. Nexata vajaneconi yabara Cristo nacopata pebeyaxuabinexatsi pacuenia Dioso pejumelivaisibaxutota jumaitsi. Dioso pejumelivaisibaxutota jumaitsi mapacueniaje: “Pajivi bitso naneconita Diosojavabelia pibisiacuene pexanaeconi yabara, bajarapajivi naejavajavabelia rutatsi,” jai. ¹⁴ Nexata Cristo pibisiacuene bepexanaenē vajaneconi yabara, nacopata cruzajavabelia pecobematabiabarutsinexatsi. Bajarapacuenia Cristo itsa nacopata cruzajavabelia pecobematabiabarutsinexatsi vajaneconi yabara, copiajopa jane baja pacuenia tajēvelia Dioso najumecapanepaeya jumaitsi Abrahampijinējavabelia. Nexata apo judíovi ata Dioso capanepaenatsi Jesucristo pejamatabēcueneta. Vaxaitsi vajanajamatabēcuenecopatsixae Jesucristojavabelia vajanacacapanepaenexa Diosojavabelia, nexata pacuenia Dioso tajēvelia najumecapanepaeya jumaitsi, bajarapacuenia Dioso nacatsijamatabēcaeyaexana Espiritu Santo.

Pacuenia Abrahampijinējavabelia Dioso najumecapanepaeya jumaitsi, pacuenia ata icatsia cotocaevi Moiséspijinējavabelia najumecapanepaeya jumaitsi, yabara pelivaisi

¹⁵ Tajamonae, livaisi pacatsipaebijitsiatsi paneyapētaenexa mapacuenieje. Pepacuene raja Dioso exanaena pacuenia bajayata tajēvelia Abrahampijinējavabelia Dioso najumecapanepaeya jumaitsi. Mapanacuapijinē ata, pecobecovē pexainaenē, petēpaevajēnae bayaquina pecobecovē yabara. Nexata pecobecovē pexainaenē itsa tēpa, pevēnamuto pexi penatsicobetsanaenexa. Nexata jumenamatamota pecobecovē pexainaenē peyaquinaelivaisi. Nexata acuenebi itsajivi ata pejumaitsinexa: “Ajumematamobi mapalivaisije,” pejainexa. Mataropotsia ata itsanē peyaquinaponanexa, acuenebi.

Tsipaji pecobcovë pexainaenë peyaquinaelivaisi, jumenamatamota. ¹⁶ Bajara pijinia pacuenia Dioso jumenamatamota bajayata tajëvelia Dioso najumecapanepaeya pejumaitsijava Abrahampijinëjavabelia. Baitsi Abrahampijinë pemomo pejamatabëcueneta, jivi ayaibitsaëto Dioso aneconijibia petaejavanexa, Dioso jumenamatamota. Bajayata tajëvelia Dioso najumecapanepaeya jumaiti Abrahampijinëjavabelia ayaibitsaëto mapanacuapijivi Abrahampijinë pemomo pejamatabëcueneta Dioso aneconijibia petaenexa. Ayaibitsaëto Abrahampijinë pemomoxi pejamatabëcueneta Dioso jivi aneconijibia petaenexa, bajarapacuenia tajëvelia Dioso najumecapanepaeya apo jumaiti. Biji rajane caenë, Jesús, pejamatabëcueneta Dioso jivi aneconijibia petaenexa, tajëvelia najumecapanepaeya jumaiti. “Abrahampijinë pemomo,” itsa jai, tajëvelia jumaiti Cristo yabara. ¹⁷ Palivaisi pacatsipaebatsi, maitsije. Bajayatami copiaya Dioso tajëvelia najumecapanepaeya jumaiti Abrahampijinëjavabelia pacuenia Dioso toexanaejitsia Abrahampijinëjavabelia. Bajaraxuacujinae icatsia cotocaevi, cuatrocientos treinta pavaibejecujinae, Dioso icatsia Moiséspijinëta najumecopata jivi pejumecovënëtsinexa. Itsiata palivaisi copiaya Dioso tajëvelia najumecapanepaeya jumaiti Abrahampijinëjavabelia, bajarapalivaisi acuenebi Dioso penajumeamatamobiaexanaenexa. ¹⁸ Nexata palivaisi cotocaevi Dioso Moiséspijinëta najumecopata, bajarapalivaisi jivi pejumecovënëtsixae, Dioso aneconijibia jivi itsa taejitsipa pecapanepaenexa pijaneconivecua, nexata palivaisi copiaya Dioso tajëvelia najumecapanepaeya jumaiti Abrahampijinëjavabelia, ajumematamobi tsipae. Itsiata baitsi jane palivaisi cotocaevi Dioso Moiséspijinëta najumecopata, jivi jumecovënëtsi ata tsipae, itsiata Dioso apo capanepae tsipaetsi. Nexata yapëtanetsi pejumenamatamotsijava palivaisi copiaya Dioso tajëvelia najumecapanepaeya jumaiti Abrahampijinëjavabelia. Tsipaji pajivi jumecovënëta pecapanepaejavanexatsi pacuenia Dioso tajëvelia najumecapanepaeya jumaiti Abrahampijinëjavabelia, bajarapajivi Dioso aneconijibia tanetsi.

¹⁹ Itsa baja jumenamatamota palivaisi copiaya Dioso tajëvelia najumecapanepaeya jumaiti Abrahampijinëjavabelia, ¿detsa nexata xuajitsia icatsia Dioso Moiséspijinëta nacatonajumecopata bajarapalivaisi? Dioso raja nacatonajumecopata bajarapalivaisi saya vajanacueneyapëtaenexa pibisiacuenene vajaexanavanapaejava Dioso pitabarata. Bajarapalivaisi Dioso nacatonajumecopata vajajumecovënëtaavanapaenexa matapania Abrahampijinë pemomo, Cristo, pepatsimatacabitsicajavabelianexa. Tajëvelia Dioso najumecapanepaeya jumaiti Cristo pejamatabëcueneta ayaibitsaëtoxaneto mapanacuapijivije Dioso aneconijibia petaenexa. Palivaisi Dioso Moiséspijinëta najumecopata, pijacuata Dioso apo jumaiti Moiséspijinëjavabelia. Dioso saya itoroba ángelevi Moiséspijinë petsipaebinexatsi. Nexata juya Moiséspijinë tsipaeba jivijavabelia. Moiséspijinë jivi petocuaicuaijainë Diosojavabelia. Dioso juya Moiséspijinë itorobatsi petocuaicuaijainexa jivijavaberena. ²⁰ Pamatacabi Dioso najumecapanepaeya jumaiti Abrahampijinëjavabelia pacuenia Dioso toexanaejitsia Abrahampijinëjavabelia, Dioso pijacuata jumaiti Abrahampijinëjavabelia. Dioso apo itorobi ángelevi petotsipaebinexatsi Abrahampijinëjavabelia. Dioso pijacuata najumecapanepaeya jumaiti Abrahampijinëjavabelia pacuenia pepacuenene toexanaejitsia.

Pajamatabëcuenelivaisi yabara bajayata Dioso Moiséspijinëta najumecopata yabara pelivaisi

²¹ Dioso icatsia cotocaevi Moiséspijinëta itsalivaisi najumecopatsi ata, palivaisi copiaya Dioso najumecapanepaeya jumaiti Abrahampijinëjavabelia, itsiata apo ajumematamobiaexanae. Tsipaji Dioso Moiséspijinëta penajumecopatsilivaisi pejamatabëcueneta, jivi Dioso apo capanepaejitsiatsi. Jivi itsa caëjëpaejitsipatsi pejumecovënëtsicapanepaenexa daxita palivaisi Dioso Moiséspijinëta najumecopata, nexata Dioso jivi capanepaejitsipa pijaneconivecua Dioso Moiséspijinëta penajumecopatsilivaisi pejumecovënëtsicapanepaexae. ²² Itsiata baitsi jane itsajivi ata apo

caējēpaetsi pejumecovēnētsicapanepaenexa Dioso Moiséspijinēta penajumecopatsilivaisi. Dioso pejumelivaisibaxutota jumaitsi pacuenia daxitajivi pibisiacuene pexanaexae, Dioso naneconitsiaexanaejitsiatsi Diosovecua penaxuabinexa. Bajarapacuenia Dioso pejumelivaisibaxutota jumaitsi vajayapētaenexa. Nexata yapētanetsi vajanajamatabēcuene copatsinexa Jesucristojavabelia, vajanacacapanepaenexa pacuenia Dioso copiaya tajēvelia najumecapanepaeya jumaitsi Abrahampijinējavabelia.

²³ Cristo abaxē athēbēvetsica pepatsivajēnaeyatsica, Dioso Moiséspijinēta penajumecopatsilivaisi nacayapētaeyaexana pamatacabi Cristo patsica vajanajamatabēcuene copatsinexa Cristojavabelia. Nacayapētaeyaexananua pacuenia vajacuata vajaexanaejava pejamatabēcueneta, acuenebi Dioso vajanacacapanepaenexa. Nexata Dioso Moiséspijinēta penajumecopatsilivaisi, nacajamatabēcuenevetapona matapania Cristo athēbēvetsica pepatsimatacabitsicajavabelianexa. Nexata bajarapalivaisi vajanacajamatabēcuenevetasjavata, Cristo baja nacacaxitajaraba. ²⁴ Pacuenia pejevaxi pevetsijivi, pejevaxi baeveta, bajarapacuenia Dioso Moiséspijinēta penajumecopatsilivaisi, nacajamatabēcueneveta daxita vajajumecovēnētsivi bajarapalivaisi. Bajarapacuenia nacajamatabēcueneveta matapania Cristo athēbēvetsica pepatsimatacabitsicajavabelianexa. Nexata jane baja athēbēvetsica Cristo pepatsicujinaetsica, vajanajamatabēcuene copatsixae bajaraponējavabelia, Dioso aneconijibia nacatane. ²⁵ Aeconoxae baja najamatabēcuene copatatsi Cristojavabelia. Nexata pacuenia pejevaxi pevetsijivi, pejevaxi baeveta, bajarapacuenia baja Dioso Moiséspijinēta penajumecopatsilivaisi, apo nacajamatabēcuenevetasi.

²⁶ Paxamē rabaja Dioso papeximē panenajamatabēcuene copatsixae Jesucristojavabelia. ²⁷ Nexata baja daxita paxamē panabautisabame panetsitanaitajētsinexa jivijavabelia Cristo papijajivicuenemē. Nexata Cristo, Dioso pexēnatojavabelia, panenajamatabēcuene copatsixae, paxamē ata baja Dioso papeximē. ²⁸ Daxitatsi vaxaitsi vajanajamatabēcuene copatsivi Jesucristojavabelia, pajudíovinē, apo pajudíovi atamē, aeconoxae baja Dioso najēpaeya nacatane. Paxamē ata pijinia dajubicuenia papecanajetsivi itsamonaejavabelia amoneya panetonacuenebavanapaenexa, apo patanecanajetsivi ata itsamonaejavabelia amoneya panetonacuenebavanapaenexa, daxitatsi Dioso najēpaeya nacatane. Paxanē papebijivinē, paxamē pijinia papetiriavi atamē, bajarapacuenia daxitatsi Dioso najēpaeya nacatane. ²⁹ Cristo pijajivixaetsi, nexata Abrahampijinē bepepo pemomoxitsi Dioso nacatane. Nexata pacuenia Dioso bajayata tajēvelia najumecapanepaeya jumaitsi Abrahampijinējavabelia, bajarapacuenia Dioso nacacapanepaena.

4

¹ Mara pacuenia jitsipajē patacajumaitsinexaje. Pejevaxinēyo paxa itsa vecuatēpatsi, paxami riconē ata, abaxē apo rajutsitsi paxami pecobecovē pepitsinexa pijajavanexa. Tsipaji abaxē pejevaxinēyo. Pacuenia itorobabiabatsi pevetsijivitsi, bajarapacuenia exanabiaba. Daxitacuene pexainaenēnexa ata, bajaraponēyo jumecovēnētabiaba pevetsijivitsi pitorobicueniatsi. ² Itsa abaxē pejevaxinēyo, pevetsijivitsi evetatsi. Xua ata pijajavanexa, tovetatsi. Matapania baja itsa tocopiapatatsi paxapijinē petocaējētsimatacabitsi, tocopatatsi jane baja petoevetsijavatsi pevetsinexa baja pijacuata. Pevetsijavatsi ata baja copatatsi. ³ Bajara pijinia paitsinē pajudíovinē Jesucristo abaxē athēbēvetsica pepatsivajēnaeyatsica. Itsa abaxē apo payapētaenē pexaniajailivaisi, Jesucristo pelivaisi, pajumecovēnētabiabajē pacuenia paneitoroba Dioso Moiséspijinēta penajumecopatsilivaisi. Nexata pacuenia pejevaxinēyo jumecovēnētabiaba pevetsijivitsi pitorobicueniatsi, bajarapacuenia pajumecovēnētabiabajē Dioso Moiséspijinēta penajumecopatsilivaisi. Jamatabēcuenenavēxaniabiaya pajamatabējumaitsinē tsabiabi: “Pacuenia Dioso Moiséspijinēta najumecopata vajaexanaexae, nacacapanepaena Dioso,” pajamatabējanē tsabiabi. ⁴ Itsiata Dioso

pecajëtsimatacabi itsa copiapata, Dioso pexênato itorobica judíovata penaexanaenexa mapanacuataje. Nexata Dioso pexênato mapanacuataje judíonëcuenia ponapona. Nexata pacuenia itoroba Dioso Moiséspijinëta penajumecopatsilivaisi, bajarapacuenia Dioso pexênato exanaponapona. ⁵ Bajarapacuenia Dioso pexênato naexana mapanacuataje vajanacavecuajibiaexanaenexa pibisiacue ne vaneconimi. Nexata baja nacacopatsiaexana vajaanabiabijavami pacuenia nacaitoroba Dioso Moiséspijinëta penajumecopatsilivaisi. Bajarapacuenia Dioso nacatoexana pexicueniatsi Dioso vajanacataenexa.

⁶ Bajaraxuata paxamë Dioso papexicuenemë panenayapëtaenexa, Dioso pacatoitorobica Espíritu Santo papecatsijamatabëjonenexa. Nexata Espíritu Santo pejamatabëcueneta: “¡Taxa!” pacajaiyaexana Diosojavabelia. ⁷ Nexata Dioso papexixaemë, aeconoxae baja apo pajumecovënëtsimë pacuenia pacaitoroba Dioso Moiséspijinëta penajumecopatsilivaisi. Dioso papexixaemë, itsamatacabi pacarajutsiana xua Dioso toxaina pexi perajutsinexa.

Pacuenia Pablo sivanajamatabëxaina Galacia nacupijivi, Dioso pejume-covënëttavanapaevi, yabara pelivaisi

⁸ Pamatacabi abaxë Dioso apo payapëtaemë, panematabacabëta panubenabiabame panevajëcabiabinexa bediosovi panetaevijavabelia. Bajarapamonae baja cajena apo diosovi. Nexata saya panacueratabiabame. ⁹ Itsiata baitsi jane aeconoxae baja payapëtaneme pepo Dioso. Bajaraponë jane xaniavaetsia pacayapëtane. ¿Detsa xujitsia nexata pajitsipame panejumecovënëtsinexa Dioso Moiséspijinëta penajumecopatsilivaisi? Pamatacabi abaxë apo payapëtaemë pepo Dioso, panematabacabëta pavajëcabiabame bediosovi panetaevijavabelia. Itsiata baitsi jane bajarapamonae apo cajëpaetsi papecacapanepaenexa. Bajara pijinia itsi Dioso Moiséspijinëta penajumecopatsilivaisi. Pajumecovënëtsi atamë tsipae Dioso Moiséspijinëta penajumecopatsilivaisi, itsiata Dioso aneconijibia apo pacatae tsipae papecacapanepaenexa. ¹⁰ Judíovi nacuer-aevetabiaba penacueraevetsimatacabita. Exanabiabanua fiesta Dioso Moiséspijinëta penajumecopatsilivaisi pitorobicueniatsi. Bajara pijinia pacuenia paxamë ata paexanabiabame. Pajuametota, pavaita ata, judíovi nacueraevetabiaba, fiesta ata exanabiaba, bajara pijinia pacuenia paxamë ata paexanabiabame. Jamatabëcuenenavëxaniabiaya pajamatabëjumaitsimë tsabiabi: “Bajarapacuenia vaxaitsi ata itsa exanaenatsi, Dioso aneconijibia nacataena,” pajamatabëjamë tsabiabi. ¹¹ Bajarapacuenia paneexanabiabixae, bitso pacasivanajamatabëxainatsi. Tsipaji paxamë yabara jamatabëjumaitsinë mapacueniaje: “Ayaicuenia Jesucristo pelivaisi tatsipaebabiabijava bajarapamonaejavabelia, saya meta nacueratajê,” jamatabëjanë paxamë yabara.

¹² Tajamonae, pacaitorobatsi paxamë ata panenajamatabëcuenecopatsinexa Jesucristojavabelia pacuenia xanë najamatabëcuenecopatajê. Tanajamatabëcuenecopatsixae baja Jesucristojavabelia, judíonë atanë, copatajê baja tajumecovënëtsijavami Dioso Moiséspijinëta penajumecopatsilivaisi. Nexata pacuenia paxamë, apo pajudíovimë, apo pajumecovënëtsimë picani Dioso Moiséspijinëta penajumecopatsilivaisi, bajarapacuenia xanë ata baja apo jumecovënëtsinë Dioso Moiséspijinëta penajumecopatsilivaisi. Nexata pëtsa baja pajumecovënëttame Dioso Moiséspijinëta penajumecopatsilivaisi. Pamatacabi copiaya pacatsipaebatsi Jesucristo pelivaisi, paxamë apo paneitsacueniabimë. ¹³ Paxamë baja cajena payapëtaneme mapacuenieje. Tavitanexae, copiaya patajopajê paxamëjavata. Nexata bajarapacuenia paxamëjavata pacatsipaebatsi pexanialivaisi, Jesucristo pelivaisi, papecacapanepaelivaisinexa Diosojavabelia, palivaisi picani abaxë apo payapëtaemë. ¹⁴ Dioso baja cajena netocopata tanevaetabinexa bajarapavitane pataneyaaitajitsibinexamë picani. Itsiata baitsi jane bajarapavitane yabara bijiata apo panetaemë. Apo panenavecuaitorobimë patacavecuaponaenexa itsajavabelia. Biji rajane xaniavaetsia panecopiapitame. Pacuenia ángel xaniavaetsia pacopiapitsipame,

itsa jume, pacuenia Jesucristo xaniavaetsia pacopiapitsipame, bajarapacuenia xaniavaetsia panecopiapitame. ¹⁵ Bajarapamatacabi bitso pajamatabëcuenebarëyamë patacatsipaebixae pexanialivaisi, Jesucristo pelivaisi. ¿Detsa baja aeconoxae paitsimë panejamatabëcuenebarëyjavami? Bajarapamatacabi meta itsa pacavajëtsipatsi, paneitaxuto ata panerajutsipame tanaitaxutorutsinexa. ¹⁶ Aeconoxae meta bepanijavajabitsaënënë panetaejitsipame patacatsipaebixae pexaniajailivaisi, Jesucristo pelivaisi.

¹⁷ Pamona saicayalivaisi Jesucristo pelivaisivecua petsipaebaponaevi, pata paxamëjavata bajarapalivaisi papecatsipaebinexa. Bajarapamonaenajamatabëxainabiaba pexanaenexa xua yabara pasivabarëyamëjitsia bajarapamona. Itsiata baitsi jane bajarapamona apo najamatabëxainae papecatsipaebinexa pexaniajailivaisi papecacapanepaelivaisinexa Diosojavabelia. Bajarapamona jitsipa paxanë patanevecuanasaicayabinexamë. Jitsipa panejamatabëcuenejëpaenexa bajarapamona.

¹⁸ Xanepana picani itsamona ata panesivabarëyanexa itsa pacayavenona, itsa baitsi jane pepacuene xaniavaetsia pacasivanajamatabëxaina papecayavenonaenexa. Bepacayavenona bajarapamona daxitamatacabijavabelianexa. Nexata paxanë etapatsimatacabi paxamëjavata, apo bepacayavenona. ¹⁹ Paxamë bepataximë pacatanetsi. Petiriva itsa vixaenotatsi penacueto pevecuanaexanaenexatsi, bitso banajamatabëxaina epexanaejavabelianexa. Bajara pijinia pacuenia xanë ata bitso pacasivanajamatabëxainatsi. Tsipaji bitso patojitsipatsi, pacuenia Cristo jamatabëcueneitsi, bajara paxamë ata panejamatabëcueneitsinexa. ²⁰ Bitso picani jitsipajë aeconoxae taponaponaejava paxamëjavata bitso patacasivanajamatabëxainaexae. Nexata itsa ponaponaejitsipajë paxamëjavata, apo patacatoyaquinae tsipaetsi. Pacabarëcuaicuaijatsi tsipae pexaniacuenia. Apo patacataexae, nexata abaxë xaniavaetsia apo yapëtaenë pacuenia exanaejitsianë paxamëjavabelia.

Agarpijivabeje Sarapijivabeje yabara pelivaisi

²¹ Paxamë pajumaitsimë tsabiabi: “Jumecovënëtsianatsi Dioso Moiséspijinëta penajumecopatsilivaisi Diosojavabelia vajanacapanepaenexa,” pajamë tsabiabi. ¡Nexata panamuxunaevere xaniavaetsia paneyapëtaenexa pacuenia Dioso jumaitsi bajarapalivaisi yabara! ²² Dioso pejumelivaisibaxutota jumaitsi pacuenia bajayata Abrahampijinë xaina pexënatobeje. Abrahampijinë pexënato itsanë xaina Agarpijivata. Agarpijiva, Abrahampijinë bedajubicuenia pecomuatsiva amoneya petonacuenebaponaponaenexatsi pijabota. Nexata Agarpijiva jumecovënëtabiaba pijatuxanejivibeje pitorobicueniatsi. Bajaraxuacujinae icatsia Abrahampijinë itsanë xaina Sarapijivata, pepo pijavata jane baja. Bajarapova apo pecomuatsiva. ²³ Panacuetonëyo Abrahampijinë xaina Agarpijivata, pecomuatsivata jane baja, xaina pacuenia baxaina pexi pexainaevi. Panacuetonëyo pijinia xaina Sarapijivata, pepo pijavata jane baja, mavecova ata bitso pepua perujuvata, xaina. Bajarapanacuetonëyo xaina petocopiapatsixae aetsi pacuenia Dioso tajëvelia najumecapanepaeya jumaitsi Abrahampijinë pexënato pexainaenexa. ²⁴ Bajarapovabeje pelivaisita Dioso nacayapëtaeyaexana pacuenia Dioso jivi tane anijacueniabeje. Dioso Moiséspijinëta najumecopata Moiséspijinë pijajivi pebarëjumecovënëtsinexa bajarapalivaisi. Bajarapalivaisi Dioso najumecopata Moiséspijinëta Sinaivënë tsutojumata, Arabia nacuata. ²⁵ Itsamona abaxë mapamatacabi ataje tsiteca jumecovënëtaavanapa Dioso Moiséspijinëta penajumecopatsilivaisi. Bajarapamona abaxë tsiteca pejumecovënëtaavanapaexae Dioso Moiséspijinëta penajumecopatsilivaisi, Abrahampijinë pecomuatsivami, Agarpijivami, cuenejëpavanapa. Tsipaji pacuenia Agarpijiva daxitamatacabi jumecovënëtabiaba pijatuxaneva pitorobicueniatsi, bajara pijinia pacuenia bajarapamona jumecovënëtabiaba Dioso Moiséspijinëta penajumecopatsilivaisi pitorobicueniatsi. ²⁶ Vaxaitsi pijinia Jesucristojavabelia vajanajamatabëcuene copatsivi, Abrahampijinë pepo pijavami, Sarapijivami, cuenejëpavanapatsi. Nexata itsamatacabi Dioso pijatomarata, pejana Jerusalén tomarata,

jinavanapaenatsi. Tsipaji pacuenia Abrahampijinē pepo pijavami, Sarapijivami, itsajivi ata apo pijajivitova pitorobabiabicueniatsi pexanaenexa, bajara pijinia vaxaitsi ata itsitsi. Tsipaji Dioso Moiséspijinēta penajumecopatsilivaisi pitorobicuenia apo jumecovēntavanapaetsi. ²⁷ Nexata ayaibitsaētotsi tsaponae Jesucristojavabelia vajana-jamatabēcuenecopatsivi. Abrahampijinē pepo pijavami, Sarapijivami, yabara, Dioso pejumelivaisibaxutota tajēvelia jumaitsi mapacueniaje:

Mavecovamē, nexi apo nexainaeva. Jamatabēcuenebarēyamē tsane. Caeto ata apo nenavixaetaeva ata, itsiata jamatabēcuenebarēyaya vavajamē tsaxuabi tsane, navixaetae atamē. Tsipaji nemomoxi ayaibitsaēto xainaename. Xainaename ayaibitsaēto nemomoxi, nijajivitova pemomoxi matatoxenetsia,

jai tajēvelia Dioso pejumelivaisibaxutota ayaibitsaētotsi Jesucristojavabelia vajanajamatabēcuene copatsijavanexa yabara.

²⁸ Tajamonae, pacuenia Abrahampijinē pepo pijavata, Sarapijivata, naexana Isaacpijinē pacuenia Dioso tajēvelia najumecapanepaeya jumaitsi, bajara pijinia pacuenia vaxaitsi ata Dioso nacatane. Jesucristojavabelia vajanajamatabēcuenecopatsixae, Dioso nacatane Sarapijiva bepepo pemomoxitsi. Nexata pacuenia Dioso tajēvelia najumecapanepaeya jumaitsi vajanacacapanepaenexa, bajarapacuenia Dioso nacapanepaena. ²⁹ Bajayata Abrahampijinē pexēnato, matapijinē, ponē naexana Agarpijivata, bajaraponē jamatabēitonotabiaba pejuyapijinē, ponē naexana Sarapijivata Dioso pejamatabēcueneta Espiritu Santo peyavenonaexaetsi. Bajara pijinia pacuenia aeconoxae ata, pamonae casaē tsavanapae pejumecovēntsijava Dioso Moiséspijinēta penajumecopatsilivaisi, nacajamatabēitonotabiaba Dioso pejamatabēcueneta Espiritu Santo vajanacatsijamatabēcaevi. ³⁰ Pijuyapijinē, pejamatabēitonotabiabinē yabara, Dioso pejumaitsijava Abrahampijinējavabelia Dioso pejumelivaisibaxutota jumaitsi mapacueniaje: “Ponē nexēnato xainame necomuatsivata, apo rajutsimē tsane nexainaeyajuvēnējaya nevēnamuto pepitsinexa. Daxita rajutsianame ponē xainame pepo nijavata. Bajaraxuata nijabovecua pitsapaeyaexanaename necomuatsiva, nexēnato yajava,” jai Dioso pejumelivaisibaxutota Abrahampijinējavabelia Dioso pejumaitsijava.

³¹ Tajamonae, Dioso apo nacatae Abrahampijinē pecomuatsiva bepemomoxitsi. Biji rajane Dioso nacatane Abrahampijinē pepo pijava bepemomoxitsi. Bajaraxuata vaxaitsi baja apo jumecovēntsitsi Dioso Moiséspijinēta penajumecopatsilivaisi.

5

Pacuenia icatsia apo bejumecovēntsi Dioso Moiséspijinēta penajumecopatsilivaisi, pamonaē baja najamatabēcuenecopaba Cristojavabelia, yabara pelivaisi

¹ Cristo pejamatabēcueneta nacacopatsiaexana Dioso Moiséspijinēta penajumecopatsilivaisi vajajumecovēntsijavami. Nexata Dioso Moiséspijinēta penajumecopatsilivaisi panejumecovēntsijavami panecopatsijava, tsiteca baja pacopatavanapare. Pētsa icatsia caevēalia pajumecovēntame Dioso Moiséspijinēta penajumecopatsilivaisi, bajarapalivaisi bepapijajivimē papecaitorobabiabicuenia paneexanavanapaeyaniva.

² Xanē Pablonē, panenamuxunaevere palivaisi pacatsipaebijitsiatsi. Jamatabēcuenenavēxaniabiaya pētsa pajamatabējumaitsimē: “Xanē rabaja taneperabēcaucutsinē. Bajaraxuata tajaneconivecua Dioso necapanepaena,” pajamatabējamē pētsa. Bajarapacuenia itsa panajamatabēxainaejitsipame, nexata Cristo papecasivatēpaejava papecacapanepaenexa panijaneconivecua, saya pacasivanacueratsipa. Nexata pajumecovēnere Cristo papecasivatēpaejava papecacapanepaenexa panijaneconivecua. ³ Icatsia pacamuxujibatsi asaēyata. Pajivi jamatabēcuenenavēxaniabiaya jamatabējumaitsi: “Xanē naperabēcaucutsiaexanaenajē tajaneconivecua Dioso tanecapanepaenexa,” jamatabējai, bajarapajivi bejumecovēntsicanepa daxita pacuenia Dioso Moiséspijinēta penajumecopatsilivaisi

itorobatsi. ⁴ Jamatabëcuenenavëxaniabiaya itsa pajamatabëjumaitsimë tsipae: “Xanë jumecovënëtsianajë Dioso Moiséspijinëta penajumecopatsilivaisi. Nexata Dioso aneconijibia netaena tanecapanepaenexa,” itsa pajamatabëjamë tsipae, nexata pacopabijitsipame panejumecovënëtsijavami Cristo papecasivatëpaejava panijaneconi yabara. Dioso papecaitaxutotsoniataexae aneconijibia papecataejavami ata, pacopabijitsipame. ⁵ Vaxaitsi baja cajena yapëtanetsi Dioso vajanacacapanepaejavana. Tsipaji jumecovënëtatsi Jesucristo vajanacasivatëpaejava vaneconi yabara. Bajaraxuata Espiritu Santo pejamatabëcueneta vajanacayavenonaexae, evetavanapatsi Dioso vajanacajumaitsinexa: “Paxamë rabaja paneconijibimë,” vajanacajainexa, pamatacabi Dioso pitabarata nubenaenatsi. ⁶ Vaxaitsi baja Jesucristo pijajivitsi. Nexata nacaperabëcaucutsi ata, apo nacaperabëcaucutsi ata, itsiata bajarapacuenenamatamobi Dioso pitabarata. Namatamota rajane asivaya vajayavenonaponaejava itsamonae ata vajanajamatabëcuenecopatsixae Jesucristojavabelia.

⁷ Pajumecovënëtavanapame baja picani pexaniajailivaisi. ¿Jipatsa nexata pacacopatsiaexana bajarapalivaisi panejumecovënëtsijavami? ⁸ Dioso raja apo pacacopatsiaexanae. Biji rajane Dioso pacajunata Jesucristojavabelia panenajamatabëcuenecopatsinexa. ⁹ Pëtsa panacofënëtame mapalivaisije. Pan pexanaematabënexa ayaimatabë ata, levadurajava pijinia tsiquirijavayo ata, itsiata pematajërëabijavata, bacaëjêpa daxitamatabëjava. Nexata bafufunaeyaexana daxitamatabë. Bajara pijinia itsi penajumetsënëtsilivaisi jivi petsipaebaponaevi. Penajumetsënëtsilivaisi jivi petsipaebaponaevi, caenëbeje ata, itsiata ayaibitsaëto Jesucristojavabelia penajamatabëcuenecopatsivi, jamatabëcuenebijianapona. ¹⁰ Yapëtaniji baja cajena mapacuenenje. Paxamë baja Jesucristo papijajivimë. Nexata Dioso pacayavenonaena. Xanë yapëtaniji pacuenia paexanaejitsiamë. Tsiteca pajumecovënëtavanapanaename patacatsipaebilivaisi. Dioso cajena itsamatacabi naneconitsiaexanaenatsi ponë Jesucristo pelivaisivecua pacajamatabëcuenebijiana penajumetsënëtsilivaisita.

¹¹ Tajamonae, Jesucristo pelivaisi apo judíovi tatsipaebabiabijavata, itsa jumaitsinë tsabiabi tsipae: “Paxamë apo pajudíovimë, Jesucristojavabelia panenajamatabëcuenecopatsivi, bepanaperabëcaucubiaexaname Diosojavabelia papecapanepaenexa,” itsa janë tsabiabi tsipae, nexata judíovi apo nebejiobiaexanabiabi tsipae. Apo judíovi ata, Jesucristojavabelia penajamatacuenecopatsivi, itsa itorobaponaejitsipajë peperabëcaucubinexatsi, nexata Jesucristo cruzata petëpaelivaisi tsipaebi atanë, itsiata judíovi apo nitoya tsipae. ¹² Pamona pacajamatabëitonotabiaba panenaperabëcaucutsiaexanaenexa, bajarapamonae tojitsipajë mapacueniaje. Tojitsipajë bajarapamonae papecavecuapitsapaenexa, papecacopatsinexa baja papecajamatabëitonotabiabijava.

¹³ Tajamonae, Dioso pacajunata panecopabinexa Dioso Moiséspijinëta penajumecopatsilivaisi panejumecovënëtsijavami. Itsiata baitsi jane pëtsa pajamatabëjumaitsimë: “Dioso Moiséspijinëta penajumecopabilivaisi tajumecovënëtsijavami, tacopatsixae baja, nexata exanaenajë daxita pibisiacuene pacuenia jitsipajë,” pajamatabëjamë pëtsa. Biji rajane Dioso Moiséspijinëta penajumecopatsilivaisi panejumecovënëtsijavami, panecopabixae baja, Jesucristojavabelia penajamatabëcuenecopatsivi bepapijajivimë panataema namataenetsia panenayavenonabiabinexa. Bajarapacuenia namataenetsia panayavenonabiabianame panenasivaxae. ¹⁴ “Asivamëre itsamonae ata pacuenia nijacuata nasivamë,” pejailivaisi itsa pajumecovënëtsianame, nexata daxita palivaisi Dioso Moiséspijinëta najumecopata, pajumecovënëtsicapanaename. ¹⁵ Itsa panaitoyamë, itsa panabaracuaicuaijamënu pibisiacuena, nexata xaniavaetsia panaitavere. Tsipaji itsa panaitoyamë tsipae, itsa panabaracuaicuaijamënu tsipae pibisiacuena, nexata Jesucristojavabelia panenajamatabëcuenecopatsijava,

namataenetsia panajamatabëcuene faefaenaeyaexanaejitsipame. Pacopatsipamenua baja Dioso pejumelivaisi yabara panenacaetuatabiabiJava ata.

Pacuenia Espiritu Santo nacajamatabëcuene yavenona yabara pelivaisi

¹⁶ Mapacuenia pacajumaitsitsije. Pacuenia Espiritu Santo pacaitorobabiaba, paexanabiabare daxitamatacabi canacujitsia. Pëtsa pibisiacuene paexanabiabame paniJacuata panenajamatabëxainaeJava. ¹⁷ Xua vajacuata vajajamatabëëthëtota najamatabëxainabiabatsi pibisiacuene vajaexanabiabinexa, bajaraxua vajaexanaenexa, Espiritu Santo apo jitsipae. Xua pijinia Espiritu Santo nacaitorobabiaba pexaniacuene vajaexanabiabinexa, bajaraxua juya vajajamatabëcuene vajaexanabiabinexa apo jitsipae. Nexata vajajamatabëcuenebeje, Espiritu Santobeje apo najamatabëcuenejëpaebeje. Bajaraxuata pexaniacuene pajamatabëexanabiabi atamë, itsiata apo paexanabiabimë pexaniacuene. ¹⁸ Itsa baja paexanavanapaename pacuenia Espiritu Santo pacaitorobabiaba, nexata baja tsiteca apo paexanavanapaemë tsane pacuenia pacaitoroba Dioso Moiséspijinëta penajumecopatsilivaisi. Tshipaji baja pacuenia Espiritu Santo pacaitoroba, paexanavanapaename.

¹⁹ Xua jivi pijacuata najamatabëxaina, itsa exana, yapëxanepana vajayapëtaenexa. Tshipaji xua jivi pijacuata najamatabëxaina itsa exana, pebi itsava jaita pijavavecua. Petiriva pijinia jaita itsanë pamonavecua. Pamonaepovitota pibisiacuene exana pacuenia pijacuata najamatabëxaina, bajarapamonaepijitsippanua daxita xua pibisiacuene pexanaenexa. ²⁰ Pamonaepibisiacuene exana pacuenia pijacuata najamatabëxaina, pematatabacabëta nubenabiaba pevajëtabiabinexa jumapecataeya pexanaenëanëjavabelia. Junatabiabanua penajorobivi. Bajarapamonaeyajuvënëvi naexananua penajorobivi. Itoyanua tsabiabi itsamonaep. Jumeanaenotabiabanua itsamonaep. Cuenecaëbabiabanua itsamonaep. Anaepanabiabanua apo vajayabaraanaepanaejavayo ata. Natoexanabiabanua daxitacuene epamonaenexa. Vecuanasaicayababiabanua itsamonaep Dioso pejumecovënëtsivi. Caebitsaëto caejavata apo najuanacaetuanabiabi. ²¹ Pamonaepibisiacuene exana pacuenia pijacuata najamatabëxaina, jamatabëyacajërëtabiabanua itsamonaepexainaeJava. Jamatabëbeyaxuababiabanua jivi. Aitajibinua tsabiabi pijabonëJava. Aitajibinua tsabiabi fiestajava ata. Itsacuenenua pematatsënëa, bajara bepitsipibisiacuene, exanabiaba. Pacuenia copiata pacamuxujiobatsi, bajara icatsia pacuenia pacamuxujiobatsi. Pamonaep bajarapacuenia pibisiacuene exana, bajarapamonaep apo jinavanapae tsane Dioso pijanacuatatsia.

²² Pacuenia peubinaep, pexanianaep, pexaniacuai capitsapa, bajara pijinia pacuenia Espiritu Santo vajajamatabëëthëtovetsina capitsapa mapacuenieje. Capitsapa itsamonaep ata vajaasivajamatabëcuene. Capitsapa vajabarëyjamatabëcuene. Capitsapa Diosojavabelia, itsamonaepjavabelia ata, barajamatabëcuenexanepanaeya vajataenexa. Capitsapa, itsamonaep nacaitsacueniabi ata, vajavajënaeyabelia vajaaJamatabësaëJamatabëcuene. Capitsapa itsamonaep vajaitaxutotsoniataep jamatabëcuene. Capitsapa itsamonaep pexaniacuene vajatoexanaepjamatabëcuene. Capitsapa Dioso vajajumecovënëtsijava vajaaJamatabësaëJamatabëcuene. ²³ Espiritu Santo vajajamatabëëthëtovetsina capitsapa vajaaitejepaepbijamatabëcuene. Capitsapa vajanajamatabëcataitsi jamatabëcuene pibisiacuene vajaexanaeyaniva. Daxita bajarapajamatabëcuene, Espiritu Santo vajajamatabëëthëtovetsina pecapitsapaejamatabëcuene, xanepana. Itsalivaisi ata cajena apo itavetsi daxita bajarapacuenep. ²⁴ Pamonaep Jesucristo pijajivi, bajarapamonaep jamatabëjumaisi: “Jesucristo cruzajavabelia itsa cobematabiabarutatsi, tajaperujujamatabëcuenemi yajavatëpa,” jamatabëjai. Nexata vecuaajibiaexanatsi pajamatabëcuene itorobabiabatsi pibisiacuene pexanaenexa. ²⁵ Vaxaitsi Espiritu Santo nacayajavaponapona. Nexata betonacopatabiabatsi vajanacaitorobinexa pacuenia Espiritu Santo nacatojitsipa vajaexanabiabinexa.

²⁶ Ayaijamatabëcuenejivitsi apo benataetsi. Namataenetsia itsacuenejavayo ata pibisiacuene apo benatoexanaetsi vajanabaraanaepanaeyaniva, vajanacuenecaëbivaniva ata.

6

Pacuenia Dioso pejumecovënëtsivi itorobatsi namataenetsia penajamatabëcuenejavavenonaenexa yabara pelivaisi

¹ Tajamonaë, itsa pacaxitajarabame Dioso pejumecovënëtsijavavecua pejopaejivi, paxamë pacuenia Espiritu Santo pacaitoroba panejinavanapaevi, payavenonare bajarapajivi. Payavenonare bajarapajivi pajamatabëcuenesaënexa icatsia Dioso pejumecovënëtsijava. Itsiata baitsi jane pexaniajamatabëcuenia xaniavaetsia payavenonare. Paxamë ata pibisiacuene nayajivitaeya pajinavanapare. Belia paxamë ata Dioso panejumecovënëtsijavavecua, pajopaejitsipame dovathi itsa pacajamatabëcueneëjêta pibisiacuene paneexanaenexa. ² Namataenetsia panayavenonabiabare dovathi itsa pacajamatabëcueneëjêta, pibisiacuene paneexanaeyaniva. Namataenetsia itsa panayavenonabiabianame panenasivaxae, nexata pajumecovënëtsianame pacuenia Cristo pacaitoroba.

³ Pajivi jumaitsi itsa vënëlivaisitane itsajivi Dioso pejumecovënëtsijavavecua pejopaejava: “Xanë cajena ayaijamatabëcuenenënë bajarapajivi matatoxenetsia. Nexata Dioso tajumecovënëtsijavavecua apo jopaenë tsane,” jai, bajarapajivi najamatabëcuenecapaeba. Tsipaji bajarapajivi ata dovathi itsa jamatabëcueneëjêtatsi pibisiacuene pexanaenexa, apo ajamatabëcuenesaë tsipae Dioso pejumecovënëtsijava. ⁴ Caejivi canacujitsia benacuenecanaëjêta peyapëtaenexa xua exanaponapona Dioso pitabarata. Nexata pajivi pexaniacuene exanaponapona, bajarapajivi jamatabëcuenebarëya Dioso pitabarata. Itsiata baitsi jane bajarapajivi pexaniacuene exanaponaponaë ata, apo bejamatabëjumaitsi mapacueniaje: “Xanë itsamonaëvecua pexaniacuene Dioso toexanaponaponajë,” apo bejamatabëjai. ⁵ Caejivi canacujitsia baja cajena saicaya xaina pexanaponaejavanexa Dioso pitorobicueniatsi.

⁶ Pamonaë tsipaebatsi Dioso pejumelivaisi, bajarapamonaë pexainaeyajuvënëjjava juya berajuta Dioso pejumelivaisi petsipaebinëtsijavabelia.

⁷ Pëtsa pajamatabëcuenenavëxaniabame saicayacuenia paneexanaeyaniva Dioso pacaitorobicuenevecua. Tsipaji itsajivi ata apo caëjêpaetsi peyamaxëitojorobinexa Dioso. Xua jivi bauba pabita, pamatacabi baja navereta bajaraxua, icatsia bantota. Bajara pijinia itsane Dioso ata. Pajivi pibisiacuene exana, bajarapajivi juya pibisiacuene tocopiapatsianatsi pamatacabi Dioso naneconitsiaexanaenatsi. ⁸ Pajivi pibisiacuene exanaponapona pijacuata penatojitsipaecuenia, nexata bajarapajivi itsa tēpaena, pepacuene Diosovecua naxuabiana. Pajivi pijinia pexaniacuene exanaponapona Espiritu Santo pesivabarëyanexatsi, nexata bajarapajivi tēpae ata, xainaena matacabi apo pevereverecejjava. ⁹ Vaxaitsi itsa apo yabaracueranaetsi tsane pexaniacuene vajaexanavanapaejava, nexata Dioso pecaëjêtsimatacabita nacarajutsiana pexaniacuene. Bajaraxuata pexaniacuene vajaexanavanapaejava, apo beyabaracueranaetsi. ¹⁰ Nexata itsajota nacacuenecaëjêpa, pexaniacuene betoexanabiabatsi itsamonaëjavabelia. Pamonaë Jesucristo vajanajuajumecovënëtsivi, bajarapamonaë bitsoyo beyavenonaponatsi.

Pacuenia Pablo pemuxujobilivaisi Galacia tomarapajivi toyaquina peveretsinexa baja petoyaquinaelivaisi mapabaxutotaje yabara pelivaisi

¹¹ Pataema mapaayaiitanetonëje. Xanë raja Pablonë tajacuata pacatoyaquinatsi mapalivaisije. ¹² Itsamonaë judíovi ajumesaëya pacajumai tsabiabi: “Paxamë apo pajudíovi atamë, Jesucristo pelivaisi itsa pajumecovënëtame, bepanaperabëcaucubiaexaname papecacapanepaenexa Diosojavabelia,” pacajai tsabiabi. Pajudíovi

bajarapacuenia pacajumai tsabiabi, jamatabëcuenenavëxaniabiaya jamatabëjumai tsabiabi: “Jesucristo pelivaisi apo judíovi itsa tsipaebianatsi, yajavaitorobianatsi penaperabëcaucubiaexanaenexa. Nexata bajarapacuenia itsa exanaenatsi, vajamonae judíovi nacasivajamatabëcuenenarëya tsane. Nexata vajamonae judíovi apo nacaitacueniabi tsane, apo judíovi tsipaebi atatsi Cristo vajanacasivatëpaejava cruzata,” jamatabëjai tsabiabi bajarapajudíovi jamatabëcuenenavëxaniabiaya.

¹³ Pajudíovi bajarapacuenia pacajumai tsabiabi, pijacuata naperabëcaucubiaexanae ata, itsiata apo exanavanapae daxita pacuenia itorobatsi Dioso Moiséspijinëta penajumecopatsilivaisi. Bajarapamonae jitsipa panenaperabëcaucubiaexanaenexa, saya papecavajunupaebinexa pevëna judíovijavabelia: “Paxanë patajamatabëcueneta Galacia nacuapijivi naperabëcaucubiaexana,” pejainexa paxamë yabara. Tsipaji bajarapajudíovi jitsipa pesivajamatabëcuenenarëyajavatsi pevëna judíovi. ¹⁴ Xanë cajena bajarapacuenia apo exanaenë. Apo najamatabëxainanë, xua exanajë, tanavajunupaebinexa jivi saya tanesivabarëyanexa. Itsiata jitsipajë caelivaisiyo jamatabëcuenenarëyaya jivi tatsipaebinexa. Jitsipajë jivi tatsipaebinexa Jesucristo vajanacasivatëpaejava cruzata. Jesucristo cruzata tanesivatëpaexae, nevejamatabëcaeva baja tajitsipaejavami mapanacuapijicueneneje. Mapanacuapijivi pijinia tanejitsipaejamatabëcuenemi

ata ajibi baja. ¹⁵ Espíritu Santo vajanacaitorobicuenia itsa exanavanapatsi, nacaperabëcaucutsi ata, apo nacaperabëcaucutsi ata, najëpabeje. Tsipaji cajena amatamobi bajarapacuenia Dioso pitabarata. Vajanajamatabëcuene pënëyorotsijava rajane pejanajamatabëcuenejavabelia, namatamota vajanacacapanepaenexa Diosojavabelia. ¹⁶ Nexata pamonaen exanavanapa pacuenia pejanajamatabëcuene itorobatsi, bajarapamonae jamatabëcuenexanepanaeya jinavanapaena Dioso pitabarata. Dioso itaxutotsoniataenatsinua. Bajarapamonae daxita Dioso baja pepo pijajivi tsane.

¹⁷ Tavajënaeyabelia baja apo jitsipaenë tanejamatabëitonotaponaenexa pamonaen ne-jumeaeba Jesucristo taneitorobinëcuene. Jesucristo pelivaisi yabara tanejumaconibabeyabiabijavata, nejumtitibabeyabiaba. Bajarapavajënëcovëanë tanetsijumarubenaexae, daxitajivi neyapëtane Jesucristo pijajivitonëcuenenë.

¹⁸ Tajamonae, pacatovajëtabiabatsi Diosojavabelia vajatuxanenë Jesucristo papecayavenonabiabinexa. Bajara itsi tsane.

Mapabaxutoje San Pablo toyaquina Efeso tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Efeso tomarapijivijavabelia, yabara pelivaisi

¹ Xanë Pablonë, Dioso tanetojitsipaexae, nitapeta Jesucristo pijaapóstolenënexanë. Nexata Jesucristo nitoroba jivi pexanialivaisi tatsipaebaponaenexa. Pacatoyaquinatsi mapabaxutoje Dioso papijajivimë, Jesucristojavabelia panenajamatabëcuenecopatsivi, panejinavanapaevi Efeso tomarata. ² Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

Pacuenia Dioso jivi capanepaejitsia pijaneconivecua Jesucristo pesivatëpaexaetsi yabara pelivaisi

³ “Pexaniacuene rabaja panetoexaname,” jaitsi vaxaitsi, vajatuxanenë Jesucristo paxa, Diosojavabelia. Jesucristo baja pijajivixaetsi, daxitacuenejavabelia Dioso nacayavenonapona vajanacajamatabëcuene asaëyaexanaenexa. Nexata Dioso nacajamatabëcuenexaniavaetapona vajanaponaenexa Dioso pijanacuayabetsia. ⁴ Dioso mapanacuaje pexanaevajënaeya ata, tajëvelia nacaitapeta pijajivinexatsi. Tsipaji baja Dioso tajëvelia yapëtane Jesucristojavabelia vajanajamatabëcuene copatsijavanexa Jesucristo vajanacasivatëpaexae. Bajarapacuenia Dioso tajëvelia nacaitapeta pijajivinexatsi vajajinavanapaenexa aneonijibia Dioso pitabarata. ⁵ Dioso bitso vajanacajitsipaexae, tajëvelia najamatabëcuenevereta pexicueniatsi vajanacataenexa. Jesucristo nacasivatëpa Dioso petojitsipaecueniatsi. Bjaraxuata nexata Dioso nacatane pexicueniatsi. ⁶ Nexata Dioso pexaniacuena vajanacaitaxutotsoniataexae, daxitamatacabi canacujitsia Diosojavabelia jumaitsitsi tsabiabi. “Xanepana rabaja. Tsipaji pexaniacuene panetoexaname,” jaitsi tsabiabi Diosojavabelia. Dioso pexënato piasivanë pijajivixaetsi, Dioso nacaitaxutotsoniatane. ⁷ Pinijicuenia Dioso vajanacaitaxutotsoniataexae, nexata pexënato itorobica mapanacuayabetsicaje vajanacasivatëpaenexa. Bjarapacuenia Dioso nacavecuaajibiaexana pibisiacuene vajaexanaeneconimi. ⁸ Dioso pinijicuenia vajanacaitaxutotsoniataexae, nacayapëtaeyaexana pexaniajailivaisi. Nacayapëtaeyaexananua pacuene nacatoxanepana Dioso pejitsipaecuenia vajaexanavanapaenexa. ⁹ Xua Dioso tajëvelia najamatabëcuenevereta pexanaenexa, bajaraxua baja aeconoxae Dioso nacayapëtaeyaexana. Bjaraxua picani abaxë itsajivi ata apo yapëtae. Xua Dioso tajëvelia najamatabëcuenevereta pexanaenexa, maitsije. Dioso itorobijitsiatsica pexënato mapanacuayabetsicaje petoexanaeveretsinexatsi daxita pacuenia itoroba. ¹⁰ Pacuenia Dioso tajëvelia najamatabëcuenevereta, bajarapacuenia daxita Cristo pijajivitsi nacacaetuatsiana Dioso pecaëjëtsimatacabi itsa copiapatsiana. Dioso pecaëjëtsimatacabi itsa copiapatsiana daxitacuene mapanacuapijicuenije, athëbëpijicuenie ata, Dioso baja tocopatsiana pexënato juya pevetsinexa.

¹¹ Jesucristo pijajivinexatsi tajëvelia Dioso nacaitapeta. Bjarapacuenia Dioso tajëvelia nacaitapeta tsipaji baja cajena Dioso tajëvelia najamatabëcuenevereta bajarapacuenia pexanaenexa. Dioso daxitacuene exana pacuenia tsitaxanepanatsi. ¹² Bjarapacuenia Dioso tajëvelia nacaitapeta vajanajamatabëcuenecopatsinexa Jesucristojavabelia. Nexata vaxaitsi Dioso tojinavanapatsi Diosojavabelia vajajumaitsitsabiabinexa: “Diosomë, ayajamatabëcuenenëmë bitso,” vajajaitsabiabinexa Diosojavabelia. ¹³ Pexaniajailivaisi

papecacapanepaelivaisinexa, paxamë ata itsa pajumetaneme, nexata baja panajamatabëcuenecopatame Jesucristojavabelia papijajivinexamë. Nexata pacuenia Dioso tajëvelia najumecapanepaeya jumaitsi, pacarajuta baja Espiritu Santo papecatsijamatabëcaenexa. Nexata bajarapacuenia panayapëtaneme Dioso papijajivicuenemë. ¹⁴ Espiritu Santo vajanacatsijamatabëcaexae, yapëtanetsi pexaniajaicuene Dioso vajanacarajutsinexa matababi apo peverevereaejava. Yapëtanetsinua Dioso vajanacapanepaejavanexa pexënato vajanacasivatëpaexae. Bajaraxuata vaxaitsi bejumaitsitsi Diosojavabelia: “Diosomë, ayaijamatabëcuenenëmë bitso,” bejaitsi.

Pacuenia Pablo tovajëta Diosojavabelia Dioso pejumecovënëtsivi, Efeso tomarapijivi, yabara pelivaisi

¹⁵ Pacavënëlivaisitanetsi panenajamatabëcuenecopatsijava vajatuxanenë Jesucristojavabelia. Pacavënëlivaisitanetsinua paneasivajava daxita pamona Dioso pejumecovënëtsivi. ¹⁶ Bajaraxuata itsa vajëtajë Diosojavabelia, pacatovajëtabiabatsi. Nexata pexaniajamatabëcuene rajutabiabajë Diosojavabelia paxamë yabara. ¹⁷ Ayaijamatabëcuenenë Dioso, vajatuxanenë Jesucristo paxa. Bajaraponëjavabelia pacatovajëtabiabatsi. Pacatovajëtabiabatsi Espiritu Santo pejamatabëcueneta xaniavaetsia panevajënaeyabelia papecayapëtaeyaexanaponaenexa pacuenia Dioso jamatabëcueneitsi. Nexata Espiritu Santo pejamatabëcueneta panevajënaeyabelia pacayapëtaeyaexanaponaena pacuenia Dioso jamatabëcueneitsi. Pacayapëtaeyaexanaponaenanua pacuenia Dioso nacatsitanajamatabëcueneitajëta. ¹⁸ Pacatovajëtabiabatsinua Diosojavabelia Dioso papecajamatabëcueneitayotsinexa panevajënaeyabelia paneyapëtaeponaenexa pajamatabëcuene yabara Dioso pacajunata papijajivinexamë. Pacatovajëtabiabatsinua Diosojavabelia paneyapëtaenexa xua Dioso pacarajutsijitsia, bitso ayaijamatabëcuenejava, matababi apo peverevereaejava. Tajëvelia Dioso najumecapanepaeya jumaitsi Dioso pijajivitsi vajanacarajutsinexa matababi apo peverevereaejava. ¹⁹⁻²⁰ Pacatovajëtabiabatsinua paneyapëtaenexa Dioso bitso piasaënëcuene. Vajanacayavenonaenë vajanajamatabëcuenecopatsivi bajaraponëjavabelia. Dioso bitso piasaënëcuene jivi tsitanajamatabëcueneitajëta pamatababi Cristo asaëyaexanatsi petëpaecujinae. Nexata baja Cristo paxa Dioso athëbëtatsia pemuxuneneta ecaeyaexanatsi pecujuanenia penajuaevetsinexabeje daxitacuene. Nexata bajarapasaëta vaxaitsi ata Dioso nacayavenonapona. ²¹ Bajarapacuenia Cristo athëbëtatsia, paxa Dioso pemuxuneneta, ecaeyaexanatsi pecujuanenia Cristo pevetsinexa daxitacuene. Nexata daxitanacuanëjava pevetsivi matatoxenetsia aeconoxae jane baja daxitacuene Cristo pepo pevetsinë. Cristo baja daxitacuene eveta mapamatababitaje. Pejanamatababijavabelianexa ata evetsiana. ²² Dioso tocopatatsi Cristo daxitacuene pevetsinexa. Nexata Cristo pepo pitorobinë daxita pamona najamatabëcuenecopata bajaraponëjavabelia. ²³ Daxita baja pamona najamatabëcuenecopata Jesucristojavabelia, Dioso tanetsi Cristo pijajivi. Cristo nexata itoroba bajarapamonae. Nexata Cristo bajarapamonae yajavaponapona daxita mapanacuajavaje.

2

Pacuenia Dioso pijajivi, piasivaxae, capanepaejitsia yabara pelivaisi

¹ Dioso baja cajena pacajamatabëcueneaitavayaexana Jesucristo pejamatabëcueneta. Paxamë abaxë bajayata Dioso itsa apo pajumecovënëtsimë, naxuabiaya picani Diosovecua pajinavanapame pibisiacuene paneexanavanapaeneconi yabara. Nexata pacuenia itsi petëpaevi, bajara picani pajamatabëcueneitsimë Diosojavabelia itsa abaxë Dioso apo pajumecovënëtsimë. ² Pacuenia Dioso apo pejumecovënëtsivi, pibisiacuene exanavanapa, bajara picani pacuenia paxamë ata bajayata pibisiacuene paexanavanapame. Pajumecovënëtavanapame picani ëdovathi, ponë eveta pitaquirijamatabëcuene

mapanacuataje. Aeconoxae dovathi jamatabëcueneasaëyaexanapona pamonaë Dioso apo pejumecovënëtsivi pibisiacuene pexanaenexa. ³ Daxita picani bajayata vaxaitsi pibisiacuene exanavanapatsi. Pacuenia vajajamatabëëthëtota jitsipatsi vajaexanaenexa, exanabiabatsi. Xua najamatabëxainatsi, exanabiabatsi. Bajaraxuata pacuenia daxita itsamonae naneconita Diosojavabelia, bajara picani pacuenia vaxaitsi ata naneconitatsi Diosojavabelia vajanacananeconitsiaexanaenexa. ⁴ Itsiata baitsi jane Dioso, bitso jivi pitaxutotsoniataenë, vaxaitsi bitso nacajitsipa. ⁵ Diosovecua naxuabiaya picani vajajinavanapaevimi ata pibisiacuene vajaexanaeneconi yabara, itsiata Dioso nacajamatabëcueneaitavayaexana, Jesucristo Dioso itsa asaëyaexanatsi petëpaecujinae. Bajarapacuenia Dioso nacatoexana vajanacaitaxutotsoniataexae. Nexata Dioso nacapanepaena pibisiacuene vajaexanaeneconimivecua. ⁶ Jesucristo petëpaecujinae, Dioso icatsia asaëyaexanatsi petëpaejavavecua. Nexata vaxaitsi Jesucristojavabelia vajanajamatabëcuenecopatsixae, Dioso nacatane bevajanacayajavaasaëyaexanaevi. Dioso nacatannua Jesús athëbëtatsia bevajanacayajavaecaevi daxitacuene vajanacabarëevetsinexa. ⁷ Bajarapacuenia Dioso nacatoexana vajanacatsitanajamatabëcuene itajëtsinexa daxitamatacabijavabelianexa vajanacajitsipaecuene. Nacatsitanajamatabëcueneitajëtanua vajanacaitaxutotsoniataecuene Jesucristo vajanacasivatëpaexae. ⁸ Dioso cajena bitso pacajitsipa. Bajaraxuata Jesucristojavabelia itsa panajamatabëcuenecopatame, Dioso pacacapanepaena panijaneconivecua. Bajarapacuenia Dioso papecacapanepaejavanexa, panijacuata apo panatoexanaemë. Biji rajane Dioso pejamatabëcueneta pacacapanepaena. ⁹ Itsajivi ata Dioso petonacuenebaponaponaëjamatabëcuene, Dioso apo capanepaetsi tsane. Biji rajane Jesucristojavabelia penajamatabëcuenecopatsixae, Dioso capanepaenatsi. Bajaraxuata itsajivi ata beayajamatabëcuenejivi apo benatae Dioso pecaapanepaejavanexatsi yapëtae ata. Apo bejumaitsinua: “Xanë Dioso tatonacuenebixae, nexata necapanepaena,” apo bejai. ¹⁰ Vaxaitsi raja Dioso nacaexana. Nacaexananua Jesucristo pijajivitsi Dioso vajatoexanavanapaenexa pexaniacuene. Bajarapacuenia Dioso tajëvelia najamatabëxaina vajatoexanavanapaenexa.

Pacuenia Dioso pejumecovënëtsivi jamatabëcuenexanepanaeya jinavanapa Jesucristo pejamatabëcueneta yabara pelivaisi

¹¹ Panajamatabënapire pacuenia picani paxamë bajayata pajamatabëcueneitsimë tsvanapae itsa abaxë Dioso apo pajumecovënëtsimë. Paxamë apo pajudíovimë. Judíovi saicaya peperabëcaucubivitsi Dioso pijajivi penayapëtaenexa. Nexata judíovi jumai tsabiabi: “Vaxaitsi vajanacaperabëcaucubivi, Dioso pijajivitsi nayapëtanetsi,” jai tsabiabi. Paxamë pijinia apo pajudíovixaemë, judíovi paxamë yabara jumai tsabiabi: “Bajarapamonae apo peperabëcaucubivitsi. Nexata Dioso apo pijajivi,” jai tsabiabi judíovi paxamë yabara. ¹² Bajarapamatacabi abaxë apo pajumecovënëtsimë Cristo. Pasaicayavimë abaxë tsavanapae Diosovecua. Pasaicayavimë abaxë tsavanapae judíovi atavecua. Bajarapamatacabi abaxë apo payapëtaemë pacuenia Dioso pacayavenonaejitsia papecacapanepaenexa. Mapanacuata picani abaxë naxuabiaya Diosovecua pajinavanapame. “Pamatacabi tēpaenajë, pepacuene naxuabianajë,” pajamatabëjamë tsabiabi. ¹³ Paxamë picani Diosovecua bitso naxuabiaya pajinavanapame. Itsiata baitsi jane aeconoxae baja Cristo papijajivimë. Cristo papecasivatëpaexae, aeconoxae baja payajavajinavanapame Dioso. ¹⁴ Paxanë pajudíovinë, paxamë apo pajudíovi atamë, Jesucristo pejamatabëcueneta daxitatsi Dioso nacajamatabëcuenexanepanaeyaexana namataenetsia vajanasivatsavanapaenexa. Jesucristo pejamatabëcueneta benacaemonaetsi Dioso nacaexana. Jesucristo daxitatsi vajanacasivatëpaexae, ajibi vajanayabaraitoyacuene vajanavecyanatsanaenexa. ¹⁵ Jesucristo cruzata itsa tēpa, copiarucaeyaexana baja namataenetsia vajanaitoyacuenemi. Tsipaji baja Jesucristo itsa tēpa, copiarucaeyaexana palivaisimi bajayata Dioso Moiséspijinëta

najumecopata. Bajarapalivaisimi paxanë pajudíovinë bitso picani asaëyata pajumecovënëtavanapajë. Nexata bajarapalivaisimi Jesucristo baja copiarucaeyaexana. Dioso Moiséspijinëta penajumecopatsilivaisi ita pajumecovënëtavanapajë, paxamë apo pajudíovimë apo pacabarajamatabëcuenexanepanaetsi. Aeconoxae baja Jesucristo vajumecovënëtsixae, Jesucristo pijajivitsi nacaexana. Nexata baja Jesucristo pejamatabëcueneta nacanabarajamatabëcuene xanepanaeyaexana. ¹⁶ Jesucristo cruzata vajanacasivatëpaexae, copiarucaeyaexana baja namataenetsia vajanaitoyacuenemi. Nexata paxanë pajudíovinë, paxamë pijinia apo pajudíovi atamë, Cristo baja caebitsaëtotsi nacaexana pijajivinexatsi. Nexata baja Dioso jamatabëcuenexanepanaeya nacatane.

¹⁷ Jesucristo patajopa mapanacuayabetsicaje. Nexata capatsica pexanialivaisi vajayapëtaenexa daxitatsi Dioso jamatabëcuenexanepanaeya vajanacataejava. Paxamë apo pajudíovimë bitso picani Diosovecua naxuabiaya pajinavanapame. Bajaraxuata Dioso pacatocopata Jesucristo pelivaisi panejumecovënëtsinexa. Paxanë pajudíovinë pajumecovënëtajë picani palivaisi bajayata Dioso Moiséspijinëta najumecopata. Nexata paxanë ata Dioso panetocopata Jesucristo pelivaisi patajumecovënëtsinexa. ¹⁸ Nexata Jesucristo daxitatsi vajanacasivatëpaexae, paxanë pajudíovinë, paxamë pijinia apo pajudíovi atamë, vaxa Dioso nacetocopata vajajonenexa Dioso pijatomarabetsia. Bajarapacuenia vaxa Dioso nacetocopata vajajonenexa pijatomarabetsia Espíritu Santo vajanacayavenonaexae. ¹⁹ Bajaraxuata apo pajudíovi atamë, aeconoxae baja Dioso panejumecovënëtsixae, bepasaicayavimë baja Dioso apo pacatae. Biji rajane itsamonae, Dioso pejumecovënëtsivi yajava, paxamë baja Dioso papeximë pacaexana Dioso pijanacuatatsia panenajuajinavanapaenexa. ²⁰ Palivaisi bajayata Diosojumepaebivi profetavi tajëvelia yaquina, Jesucristo baja cajena pelivaisi, bajarapalivaisi pajumecovënëtame baja. Paxanë ata Jesucristo papijajivinë, paapóstolevinë, paneitoroba patacatsipaebaponaenexa bajarapalivaisi, Jesucristo pelivaisi. Nexata bajarapalivaisi panejumecovënëtsixae, panajamatabëcuenecopabame baja Jesucristojavabelia papecapanepaenexa. Bajaraxuata Dioso baja papeximë pacaexana. ²¹ Nexata baja itsamonae ata ayaibitsaëttoxaneto najamatabëcuenecopabapona Jesucristojavabelia. Nexata Cristo pejamatabëcueneta itorobaponatsi bajarapamonae. Daxita bajarapamonae Dioso baja pexi exanatsi. Nexata pacuenia Dioso tojitsipatsi, jinavanapa. ²² Bajara pijinia pacuenia paxamë ata, itsamonae yajava, pamonaes Jesucristojavabelia penajamatabëcuenecopabivi, caebitsaëto Dioso papeximë pacaexana. Nexata Dioso pacayajavaponapona Espíritu Santo papecatsijamatabëecaexae.

3

Pacuenia Pablo itorobatsi pexanialivaisi, Jesucristo pelivaisi, petsipaebaponaenexa apo judíovijava yabara pelivaisi

¹ Paxamë apo pajudíovi atamë, Dioso papijajivixaemë, pacatovajëtabiabatsi Diosojavabelia. Xanë Pablonë, Jesucristo pijajivitonënë. Nexata Jesucristo pelivaisi jivi tsipaebabiabajë. Nexata Jesucristo pelivaisi jivi tatsipaebabiabixae, nenaneconitsiaexaneta penaneconitsivi pejebabiabibota. Jesucristo pelivaisi jivi tatsipaebabiabijavata, jumaitsinë tsabiabi: “Pamonae apo judíovi ata, ita jumecovënëta Jesucristo pelivaisi, bajarapamonae ata Dioso pijajivi,” janë tsabiabi paxamë yabara. Bajarapacuenia Jesucristo pelivaisi jivi tatsipaebabiabixae, penaneconitsivi pejebabiabibota tavëna judíovi neeta. ² Bepayapëtaneme xanë Dioso taneitorobicuene patacatsipaebinexa apo pajudíovi atamë Dioso papecaitaxutotsoniataejava. ³ Apo pajudíovi atamë, Dioso papecaitaxutotsoniataejava tayapëtaenexa, Dioso baja cajena neyapëtaeyaexana. Dioso papecaitaxutotsoniataexae papecapanepaejavanexa ata tayapëtaenexa, Dioso baja cajena neyapëtaeyaexana. Nexata Dioso papecaitaxutotsoniataejava paneyapëtaenexa, pacatoyaquinrutetatsi caelivaisiyobeje saya. ⁴ Itsa

palebianame, payapëtaename pacuenia Dioso neyapëtaeyaexana ëpajudíovinë Dioso apo patanitaxutotsoniataejava. Payapëtaenamenua pacuenia Dioso neyapëtaeyaexana, apo pajudíovi atamë, Dioso papecaitaxutotsoniataejava. ⁵ Bajayata abaxë itsajivijavabelia ata Dioso apo yapëtaeyaexanae, apo pajudíovi atamë, Dioso papecaitaxutotsoniataejavanexa. Aeconoxae baja paxanë Dioso papijajivinë, paapóstolevinë, Dioso paneyapëtaeyaexana, apo pajudíovi atamë, Dioso papecaitaxutotsoniataejava. Profetavijavabelia ata Dioso yapëtaeyaexana, apo pajudíovi atamë, Dioso papecaitaxutotsoniataejava. Aeconoxae baja bajarapacuenie Dioso paneyapëtaeyaexana Espíritu Santo pejamatabëcueneta. ⁶ Xua picani itsajivijavabelia ata Dioso apo yapëtaeyaexanae, bajaraxua maitsije. Paxanë pajudíovinë, itsa pajumecovënëtajë pexanialivaisi, Jesucristo pelivaisi, panecapanepaena Dioso. Bajara pijinia pacuenia paxamë ata, apo pajudíovi atamë, itsa pajumecovënëtame pexanialivaisi, Jesucristo pelivaisi, pacacapanepaena Dioso. Pajudíovinë, apo pajudíovi atamë, daxitatsi benacaemonaetsi nataenatsi. Jesucristo pelivaisi vajajumecovënëtsixae, daxitatsi Dioso nacarajutsiana xua Dioso najumecapanepaeya nacarajutsiapaeba.

⁷ Piasaënë Dioso taneitaxutotsoniataexae, netocopata Jesucristo pelivaisi tatsipae-baponaenexa daxitajivijava. Dioso necaëjëpaeyaexananua xaniavaetsia jivi tatsipae-baponaenexa bajarapalivaisi. ⁸ Xanë itsiata beveliamatabëcuenenënë nataniji daxita Dioso pejumecovënëtsivivecua. Itsiata baitsi jane mapapexaniacueneje Dioso netocopata. Dioso netocopata apo pajudíovimëjava patacatsipaebaponaenexa pexanialivaisi, Jesucristo pelivaisi. Nexata pacatsipaebaponatsi ayaicuenia Jesucristo vajanacayavenonaponaejavanexa. ⁹ Dioso nitoroba patacatsipaebaponaenexa, apo pajudíovi atamë, Dioso papecacapanepaejavanexa. Dioso daxitacuene pexanaenë mapanacuataje. Dioso cajena tajëvelia najamatabëxaina paxamë ata, apo pajudíovi atamë, papecacapanepaenexa. Itsiata itsajivijavabelia ata Dioso apo yapëtaeyaexanae, apo pajudíovi atamë, Dioso papecacapanepaejavanexa. ¹⁰ Bajarapacuenia Dioso pacacapanepaena, apo pajudíovi atamë, petsitanajamatabëcuene itajëtsinexa athëbëtatsia pevetsivijavabelia. Nexata athëbëtatsia pevetsivi itsa nacataena daxitatsi Dioso vajajumecovënëtsivi, pajudíovinë, apo pajudíovi atamë, benacaemonaetsi vajanajuajinavanapaejava, athëbëtatsia pevetsivi yapëtaena bitso Dioso peyapëtaenëcuene daxitacuene pexanaenexa. ¹¹ Pacuenia Dioso tajëvelia copiaya najamatabëxaina, mapanacua pexanaevajënaeya ataje, bajarapacuenia baja Dioso exanaevereta. Tsipaji baja Dioso itorobica vajatuxanenë Jesucristo vajanacasivatëpaenexa cruzata. ¹² Vaxaitsi baja najamatabëcuenecopatatsi Jesucristojavabelia vajanacacapanepaenexa. Bajaraxuata Diosojavabelia vajëtabiabatsi ajumejunavijibia. ¹³ Bajaraxuata Diosojavabelia asaëyata pacatovajëtabiabatsi patanesivajamatabëcuene cueranaeyanivamë abaxë naneconitsia taponaponaejava penaneconitsivi pejebabiabibota. Jesucristo pelivaisi jivi tatsipae-bijavata, jumaitsinë tsabiabi: “Pamonae apo judíovi ata itsa jumecovënëta Jesucristo pelivaisi, bajarapamonae ata Dioso pijajivi,” janë tsabiabi paxamë yabara. Bajara-pacuenia Jesucristo pelivaisi jivi tatsipaebabiabixae, penaneconitsivi pejebabiabibota tavëna judíovi nenaneconitsiaexaneta. Bajaraxuata panesivajamatabëcuenebarëyamëre naneconitsia taponaponaejava penaneconitsivi pejebabiabibota.

Pacuenia Pablo Diosojavabelia tovajëta Dioso pejumecovënëtsivi yabara pelivaisi

¹⁴ Itsa najamatabënapitabiabajë, apo pajudíovi atamë, Dioso papecacapanepaejavanexa, nexata tamatabacabëta nucabiabajë asaëyata patacatovajëtsinexa vajatuxanenë Jesucristo paxa Diosojavabelia. ¹⁵ Daxita Dioso pijajivi, pamonaë athëbëtatsia jinavanapa, pamonaë ata mapanacuataje jinavanapa, daxita bajarapamonae Dioso tanetsi benacaemonaë. Caenë paxa exana Dioso. ¹⁶ Dioso baja cajena bitso piasaënë. Ayaijamatabëcuene pexainaenë. Bajaraxuata pacatovajëtabiabatsi Diosojavabelia Dioso pesaëta papecajamatabëcuene asaëyaexanaenexa Espíritu Santo peja-

matabëcueneta. ¹⁷ Pacatovajëtabiabatsinua Jesucristo papecatsijamatabëcaenexa pane-sivanajamatabëcopatsixae bajaraponëjavabelia. Pacatovajëtabiabatsinua bitso paneasi-vanexa itsamonae ata, pamonae Dioso pejumecovënëtsivi. ¹⁸ Pacatovajëtabiabatsinua daxita Dioso panejumecovënëtsivi panejamatabëcueneyapëtaenexa Jesucristo bitso papecaasivajava. ¹⁹ Pacatovajëtabiabatsinua panijacuata xaniavaetsia paneyapëtaenexa Jesucristo vajanacaasivajava. Jesucristo vajanacaasivajava, bitso pexaniacuene, apo vajayapëtaecapanepaejava xaniavaetsia vajayapëtaenexa. Nexata itsa payapëtaename Jesucristo vajanacaasivajava, paxainaename pajamatabëcuene Dioso pacatojitsipa.

²⁰ “Diosomë, bitso ayaijamatabëcuenenëmë,” jaitsi vaxaitsi Diosojavabelia. Bajara-pacuenia jumaitsitsi tsipaji bitso Dioso pecaëjëpaenëtsi vajanacayavenonaenexa. Dioso caëjëpatsi vajanacatoexanaenexa vajavajëtsicuenia. Vajanajamatabëxainaejava ata mata-toxenetsia, Dioso caëjëpatsi vajanacatoexanaenexa. Dioso pesaëta nacayavenonabi-aba. ²¹ Dioso pejumecovënëtsivi Dioso peyavenonaponaexaetsi, itsamonaejavabelia tsipaebavanapa Dioso bitso ayaijamatabëcuene pexainaenëcuene. Jesucristo ata itsa ponapona mapanacuataje, nexata Dioso tsitanajamatabëcueneitajëta jivijavabelia Dioso bitso ayaijamatabëcuene pexainaenëcuene. Bajaraxuata daxitajivi bejumai tsabiabi Diosojavabelia: “¡Diosomë, bitso ayaijamatabëcuenenëmë!” bejai tsabiabi Diosojavabelia daxitamatacabijavabelianexa. Bajara itsi tsane.

4

Pacuenia Espíritu Santo pejamatabëcueneta daxita Dioso pejumecovënëtsivi najamatabëcuenejëpaeya jinavanapaena yabara pelivaisi

¹ Naneconitsiaponaponajë majotaje, penaneconitsivi pejebabiabibota, tajumecovënëtsixae vajatuxanenë Jesucristo taneitorobicuenia. Asaëyata pacamuxujiobatsi panejinavanapaenexa pacuenia Dioso pacatojitsipa Dioso papecajunatsivi papijajivinexamë. ² Itsamonaevecua beveliajamatabëcuenevi nataeya pajinavanapare. Panajamatabëxainarenua pexaniajamatabëcuene daxitajivijavabelia. Pajamatabëcuenesaëmërenua tsavanapae bajayajebi, itsamonae pacaitsacueniababiabi ata. Namataenetsianua panayavenonabiabare namataenetsia panenasivaxae. ³ Pajamatabëcuenesaëmëre tsavanapae najamatabëcuenejëpaeya panejinavanapaenexa. Bajaraxua yabara Diosojavabelia panatovajëtabiabare papecaayavenonaenexa Espíritu Santo. Nexata nabarajamatabëcuenexanepanaeya pajinavanapaename. ⁴ Jesucristojavabelia vajanajamatabëcuenecopatsixae, vaxaitsi baja nexata caenë Jesucristo pijajivitsi. Xainatsi baja caeEspíritu Santo Dioso vajanacajunatsivi. Bajaraxuata caejamatabëcuene xainavanapatsi. Evetavanapatsi pacuenia Dioso najumecapanepaeya jumaitsi vajanacacapanepaenexa. ⁵ Caenë rabaja vajatuxanenë Jesucristo. Daxitatsi najamatabëcuenecopatatsi caenëjavabelia. Nacabautisabanua caenë Jesucristo pevënëta. ⁶ Xainatsi caenë vaxa Dioso. Caenë Dioso daxitatsi vajanacanamatacaitorobinë. Dioso pijajivitsi, daxitatsi, nacayavenona. Nacayajavaponaponanua.

⁷ Caejivitsi canacujitsia, Cristo pejitsipaecuenia nacajamatabëcuene caëjëpaeyaexanapona pecovëta vajatonacuenebavanapaenexa vajanacaitorobicuenia. ⁸ Tsipaji baja cajena Dioso pejumelivaisibaxutota tajëvelia jumaitsi Jesucristo yabara mapacueniaje:

Ayaibitsaëtöxaneto pitoyavitsi pepuajamatabëcueneamoneyabi, athëbëabetsia naviatsiania. Pijajivi pijinia pepuajamatabëcuenecaëjëpaeyaexanae pecaëjëpaejamatabëcuenetsi pecovëta petonacuenebavanapaenexatsi, naviatsiania, jai tajëvelia Dioso pejumelivaisibaxutota Jesucristo yabara.

⁹ Bajarapacuenia Dioso pejumelivaisibaxutota Jesús yabara tajëvelia jumaitsi. Tsipaji Jesús patsijitsiatsica mapanacuayabetsicaje. Bajaraxuacujinae icatsia Jesús

naviatsijitsia athëbëabetsia. Mapanacuaje bevelianacua saya Dioso pijanacuavecua. ¹⁰ Ponë yabara Dioso pejumelivaisibaxutota bajarapacuenia tajëvelia jumaitsi, patsica baja mapanacuayabetsicaje. Bajaraxuacujinae icatsia bajaraponë naviatsia baja tajënacuyabetsia. Bajaraxuacujinae Jesucristo itorobica Espiritu Santo. Nexata daxitanacuanëjava Espiritu Santo yajavaponapona daxita Dioso pejumecovënëtsivi. ¹¹ Nexata Dioso pejumecovënëtsivi, caejivi canacujitsia, Espiritu Santo jamatabëcuene caëjëpaeyaexanaponatsi saicayacuenia. Itsamonae Espiritu Santo jamatabëcuene caëjëpaeyaexanatsi apóstolevinexa Jesucristo pexanaejavanë pevajunupaebaponaenexa. Itsamonae pijinia Espiritu Santo jamatabëcuene caëjëpaeyaexanatsi peyapëtaenexa pajamatabëcuene livaisi xaina Dioso pejumelivaisi. Nexata tsipaeba itsamonaejavabelia. Itsamonae pijinia Espiritu Santo jamatabëcuene caëjëpaeyaexanatsi petsipaebaponaenexa apo peyapëtaevi abaxë pexanialivaisi, Jesucristo pelivaisi. Itsamonae pijinia Espiritu Santo jamatabëcuene caëjëpaeyaexanatsi pevetsinexa Dioso pejumecovënëtsivi. Jamatabëcuene caëjëpaeyaexanatsinua xaniavaetsia peyapëtaeyaexanaenexa Dioso pijacuene. ¹² Bajarapacuenia Espiritu Santo, daxita Dioso pejumecovënëtsivi, jamatabëcuene caëjëpaeyaexanatsi petonacuenebavanapaenexa Dioso pijacuene. Nexata daxita Dioso pejumecovënëtsivi, caejivi canacujitsia, ajamatabëcuene saë taponae pevajënaeyabelia. ¹³ Nexata belia daxitatsi bajarapacuenia najamatabëcuene jëpaeya jumecovënëtsianatsi Dioso. Jamatabëcuene yapëtaenatsinua xaniavaetsia vajatuxanenë Jesucristo, Dioso pexënato. Nexata daxitatsi Espiritu Santo nacajamatabëcuene caëjëpaeyaexanaena Dioso vajajumecovënëtsinexa. Nacajamatabëcuene caëjëpaeyaexanaenanua xaniavaetsia Dioso vajatojinavanapaenexa. Nexata pacuenia Jesucristo jamatabëcuene itsi, bajara vaxaitsi ata jamatabëcuene itsitsi tsane. Nexata jinavanapaenatsi pacuenia Dioso nacatojitsipa. ¹⁴ Nexata pacuenia pejevaxi caejamatabëcuene apo najamatabëxainae, bajara vaxaitsi apo jamatabëcuene itsitsi tsane. Itsajamatabëcuene apo vecuanajamatabëxainaetsi tsane, palivaisi baja jumecovënëtavanapatsi. Nexata itsamonae penajumetsënëtsilivaisi bepexaniajailivaisicuenia nacatsipaebi ata tsane vajanacayamaxëitojorobinexa picani, itsiata apo nacayamaxëitojorobi tsane. ¹⁵ Nexata itsamonaejavabelia itsa tsipaebaponatsi pexaniajailivaisi, bajarapamonae asivaya betanetsi. Pacuenia Cristo vajanacaitorobinë jamatabëcuene itsi, bajara vaxaitsi ata vajajamatabëcuene itsinexa, benatojitsipatsi Cristo vajajamatabëcuene jëpaenexa. ¹⁶ Daxitatsi Cristo pelivaisi vajajumecovënëtsivi, caenë Cristo pijajivitsi. Vajaperabëtota caevitoyo canacujitsia exanapona pacuenia Dioso tocopatatsi. Bajara pijinia pacuenia vaxaitsi ata, caejivitsi canacujitsia, Cristo nacatocopatapona vajatonacuenebavanapaenexa pacuenia nacatojitsipa. Nexata namataenetsia nayavenonaeya natonacuenebianatsi. Namataenetsianua nasivatsi tsavanapae tsane. Bajarapacuenia nexata jamatabëcuene vitsabaponaenatsi Dioso vajajumecovënëtsijava.

Pacuenia Cristo pijajivi pejanajamatabëcuene xaina yabara pelivaisi

¹⁷ Jesucristo taneitorobixae, mapacuenia pacajumatsijitsiatsije. Pëtsa baja pajinavanapame pacuenia jinavanapa Dioso apo peyapëtaevi. Dioso apo pejumecovënëtsivi najamatabëxainavanapa pexanaenexa piamatamobicuene Diosojavabelia. ¹⁸ Dioso apo pejumecovënëtsivi ajamatabëcuene itaquiri tsavanapae. Tsipaji apo yapëtae Dioso. Bitso saya ajamatabëcuene taja. Bajaraxuata Dioso pejitsipaecuenia apo tojinavanapae. Diosovecua naxuabiaya jinavanapa. ¹⁹ Nexata apo yapëtae piauracuene. Casaë bitso pexanaenexa daxita xua pibisiacuene. ²⁰ Itsiata baitsi jane paxamë itsa pajumecovënëtame Jesucristo pelivaisi, apo pacaitorobi pibisiacuene paneexanaenexa. ²¹ Pajumetaneme baja cajena Jesucristo pelivaisi. Jesucristo pelivaisi panejumecovënëtsixae, nexata Jesucristo pijajivi pacatsipaeba pexaniajailivaisi pacuenia copiaya

Jesucristo tsipaebatsi. ²² Nexata pacopabare panijaperujamatabëcuene. Bajarapajamatabëcuene bajayata abaxë Dioso itsa apo pajumecovënëtsimë, pacaitorobabiaba pibisiacuene paneexanaenexa. Panijaperujamatabëcuene cajena bitso abeje. Bajarapajamatabëcuene picani pacayamaxëitojorobabiaba panejitsipaecuenia pibisiacuene paneexanaenexa. ²³ Paxamë Diosojavabelia panajamatabëcuenepënëyorore. Papejanajamatabëcuenevimë panaexanare. ²⁴ Pacuenia Dioso jamatabëcueneitsi, bajara paxamë ata pajamatabëcueneitsimëre. Nexata jivi xaniavaetsia patsitajinavanapaename pacuenia Dioso pacatojitsipa.

²⁵ Bajaraxuata pëtsa baja panajumetsënëtame. Pacaenëmë canacujitsia namataenetsia panatsipaebare pexaniajailivaisi. Tshipaji daxitatsi caenë Jesucristo pijajivitsi.

²⁶ Itsa panabaraanaepaname, pëtsa pibisiacuene panaexaname panenabaraanaepanaejavata. Pëtsa panasivajamatabëcuenetsitecame itsamatacabijavabelia ata. ²⁷ Tshipaji itsa panasivajamatabëcuene tsitecaeijitsipame, nexata dovathi pacayamaxëitojorobijitsipa. Nexata pibisiacuene paexanaejitsipame.

²⁸ Pajivi penacobetoxotsijivi, copatsi baja penacobetoxotabiabijava. Nacuenebi pepitsinexa xua namatavenona, peyavenonaenexanua bepejiobivijavabelia.

²⁹ Pëtsa pacuaicuaijamë pibisialivaisi. Biji rajane pacuaicuaijamëre pexanialivaisi. Pexanialivaisi itsa pacuaicuaijamë tsane, nexata papecajumetaevi pajamatabëcueneyavenonaename. Tshipaji paepatota jamatabëcuenefaefaena, itsa pacajumetaena, pacamuxunaajamatabëcuenesaë tsane. ³⁰ Pëtsa itsacuene paexaname Espíritu Santo papecatojitsipaecuenevecua panejamatabëcuenebejiobitsiyanima Espíritu Santo. Dioso pijaEspíritu Santo papecatsijamatabëcaexae, panayapëtaneme pepacuene Dioso papijajivicuenemë. Nexata Dioso pacacapanepaena pamatacabi Dioso pijajivi capanepaena mapanacuavecuaje.

³¹ Daxita pibisiajamatabëcuene pacopabare. Pacopabarena baja, itsajivi itsa pacaitsacueniaba, bajayajebi panejamatabësitecabiabijava. Pëtsa bajayajebi pajamatabësitecame paneanaepanaejava. Bepijia pajamatabëcaevare. Pacopabarena baja paneajamatabëcuenebejjava ata. Pacopabarena baja panenabaraanaepanabiabijava ata. Pacopabarena baja itsamonae pibisiacuena panebijataeyabiabijava ata. Pacopabarena baja itsamonae pibisiacuena panebaracuaicuaijaitsabiabijava ata. ³² Biji rajane pexaniajamatabëcuene paxainare. Namataenetsia panaitaxutobejiobiataema. Pacuenia Jesucristo pejamatabëcueneta Dioso pacabarajamatabëcuenexanepana pibisiacuene paneexanaevi ata, bajara pijinia pacuenia paxamë ata panabarajamatabëcuenexanepanare, paxamëyajuvënëvi pacaitsacueniabi ata.

5

Pacuenia Dioso pexi bejinavanapa yabara pelivaisi

¹ Paxamë Dioso papeximë. Pacuenia Dioso jamatabëcueneitsi, bajara paxamë ata pajamatabëcueneitsimëre tsavanapae. ² Pacuenia bitso Cristo nacaasiva, bajara pijinia pacuenia paxamë ata bitso pasivamërë tsavanapae itsamonae ata. Bajayata judíovi Diosojavabelia pijaneconi itsa xaina, oveja pebito beyaxuababiaba. Nexata judíovi ofrendacuena ovejavi rajutabiaba Diosojavabelia pijaneconi Dioso pevecuaajibiaexanaenexatsi. Bajara pijinia pacuenia Cristo bitso vajanacaasivaxae, nacopata pebeyaxuabinexatsi vaxaitsi vaneconi vajanacavecuajibiaexanaenexa. Bajarapacuenia Cristo bitso vajanacaasivaxae, itsa nacopata vajanacasivatëpaenexa, nexata paxa Dioso bitso sivajamatabëcuenebarëyatsi.

³ Paxamë rabaja Dioso papijajivimë. Bajaraxuata pëtsa baja paexaname daxita xua pibisiacuene. Pëtsa panajamatabëxainamenua pibisiacuene paneexanaenexa panevitota. Pëtsa panajamatabëxainamenua bitso panenaxainaeyabinexa daxitacuene mapanacuapijicuneje. ⁴ Pëtsa panabarëcuaicuaijamënu pauracuene yabara ata.

Pëtsa panabarëcuaicuaijamënuua saya jema natsiquejemalivaisixi ata. Tsipaji apo pexanepanaecuene. Biji rajane Diosojavabelia pexaniajamatabëcuene parajutabiabi-
aname. ⁵ Payapëtaneme rabaja pexaniajaicuene mapalivaisije. Pajivi daxita pibisi-
acuene exana, apo jone tsane Dioso pijanacuayabetsia. Ponë jaita itsava pijavavecua,
pova pijinia jaita itsanë pamonavecua, apo jone tsane Dioso pijanacuayabetsia. Pa-
monae ata bitso jitsipa pexainaenexa daxitacuene mapanacuapijicueneje, apo jone
tsane Dioso pijanacuayabetsia. Pamonae bitso jitsipa pexainaenexa daxitacuene
mapanacuapijicueneje, jamatabëcuenejëpa pamonae vajëcabiaba jumapecataeya pex-
anaenëanëjavabelia. Bajarapamonae jamatabëcuenejëpa tsipaji bitso jitsipa saicayacuene
Diosovecua. ⁶ Pëtsa pacayamaxëitojoroba itsajivi ata paxamë ata paneexanaenexa
bajarapitsipibisiacuene. Tsipaji Dioso ayaicuenia naneconitsiaexanaena pamonae
Dioso apo pejumecovënëtsivi, bajarapitsipibisiacuene pexanaevi. ⁷ Bajaraxuata pëtsa
payajavajinavanapame pibisiacuene pexanaevi.

⁸ Paxamë picani bajayata pajamatabëcueneaitaquirimë tsavanapae itsa abaxë apo
payapëtaemë pexanialivaisi, Jesucristo pelivaisi. Itsiata baitsi jane aeconoxae baja
Jesucristojavabelia panenajamatabëcopatsixae, Dioso baja pacajamatabëcueneitayota.
Bajaraxuata pajinavanapare Dioso pejitsipaecuena, pacuenia Dioso pijajivi
jinavanapa. ⁹ Dioso baja papecajamatabëcueneitayotsixae pexanialivaisita, paex-
anavanapare ëpexaniacuene. Pacanaëjëtaponarenuua ëpexaniajaicuene paneyapëtaenexa,
xaniavaetsia panejinavanapaenexa Dioso pejitsipaecuena. ¹⁰ Panevajënaeyabelia
pacanaëjëtaponare paneyapëtaenexa xua yabara Dioso pacasivajamatabëcuene
barëyajitsia. Nexata itsa payapëtaename xua yabara Dioso pacasivajamatabëcuene
barëyajitsia, bajaraxua tsiteca asaëyata panevajënaeyabelia paexanavanapaename.
¹¹ Dioso apo pejumecovënëtsivi pibisiacuene itsa exanavanapa, pëtsa panaexaname
bajarapapibisiacuene. Biji rajane paitavetsianame bajarapamonae pibisiacuene
pexanaeyaniva Dioso pitabarata. ¹² Xua bajarapamonae exana muetsia, bajaraxua
bitso pibisiacuene. Nexata itsajivi itsa cuenetaejitsipatsi bajaraxua pexanaejava,
bajarapajivi bitso ajumeura tsipae juya petsipaebinxexa itsamonaejavabelia. Tsipaji
bitso pibisiacuene xua muetsia exana bajarapamonae. ¹³ Itsiata baitsi jane
bajarapamonae itsa paitavetsianame Dioso pejumelivaisita, nacueneyapëtaena
bajarapamonae bitso pibisiacuene pexanaejava. ¹⁴ Bajaraxuata pina bajarapamonae
yabara, itsamonae Dioso pijajivi jumaitsi mapacueniaje:

Jamatejema saya pajinavanapame, pibisiacuene paexanavanapae atamë. Bajarax-
uata Diosovecua naxuabiaya pajinavanapame. Pacopabare baja pitaquirija-
matabëcuene. Nexata Cristo pejamatabëcueneta panijaneconivecua Dioso paca-
capanepaena. Pacajamatabëcueneitayotsiana,
jai pina itsamonae Dioso pijajivi.

¹⁵ Nexata baja xania tsane. Panayajivitaema pibisiacuene xaniavaetsia
panejinavanapaenexa. Pëtsa pajinavanapame pacuenia bajinavanapa Dioso apo
peyapëtaevi. Biji rajane pajinavanapare pacuenia bajinavanapa bitso peyapëtaevi
Dioso pijacuene. ¹⁶ Dioso papecaitorobicuenia xaniavaetsia patojinavanapare
daxitamatacabijavabelianexa. Pamuxujiobabiabare itsamonae ata Cristo pelivaisi
pejumecovënëtsinexa. Tsipaji mapanacuapijivije, Dioso apo pejumecovënëtsivi,
ëpibisiacuene exanavanapa. ¹⁷ Pëtsa pajinavanapame pacuenia Dioso apo peyapëtaevi
jinavanapa. Pacaasaëmëre tsavanapae Dioso panejumecovënëtsijava, pacuenia
Dioso pacatojitsipa paneexanavanapaenexa. ¹⁸ Pëtsa paitajibimë tsabiabi. Tsipaji
bajarapacuene Diosovecua pacanaxuabiaexanaejitsipa infernojavabelia. Biji rajane
panacopatabiabare Espíritu Santo papecatsijamatabëvënëcaenexa, Espíritu Santo
papecaitorobicuenia paneexanabiabinexa. ¹⁹ Namataenetsia panatsipaebabiabare
vajatuxanenë ayajamatabëcuene pexainaecuene. Bajarapacuena namataenetsia

itsa panatsipaebabiabianame, daxita panejamatabëëthëtovetsina panaxëanabiabianame pavajianë rubena Salmosbaxutota. Panaxëanabiabianamenua himnobaxutota ata pavajianë rubena. Panaxëanabiabianamenua pavaji ata Espíritu Santo jemata pacanaxëanaeyaexanaena. ²⁰ Pajumaitsimë tsabiabi tsane Diosojavabelia: “Xanepana rabaja. Tsipaji bitso pexaniacuene panetoexaname,” pajamë tsabiabi tsane daxitacuene yabara vaxa Diosojavabelia vajatuxanenë Jesucristo pevënëta. Bajarapacuenia Diosojavabelia pajumaitsimë tsabiabi tsane pexanepanaecuene yabara, apo pexanepanaecuene ata yabara.

Pacuenia muxujibatsi penapitsijivibeje yabara pelivaisi

²¹ Padaxitamë namataenetsia panajamatabëcueneevere, xua jamatabëpanaitorobame, namataenetsia panenaitorobabiabinexa Cristo panejumecovënëtsivixae.

²² Paxamë papetiriavimë, pacuenia yaiyataeya pajumecovënëtabiabame vajatuxanenë Jesucristo papecaitorobicuenia, bajara pijinia pacuenia yaiyataeya pajumecovënëtabiabare paneamonajivi ata. ²³ Pacuenia Cristo Dioso tocopatatsi daxita vaxaitsi Dioso vajajumecovënëtsivi vajanacaitorobinexa, bajara pijinia pacuenia pebi Dioso tocopatatsi pijava pitorobinexa. Cristo nacopata pebeyaxuabinexatsi vajanacacapanepaenexa daxita vaxaitsi vajanajamatabëcueneecopatsivi Cristojavabelia. Daxitatsi caenë Cristo pijajivitsi. ²⁴ Nexata bejumecovënëtavanapatsi pacuenia nacaitorobapona Cristo. Bajara pijinia pacuenia paxamë ata, papetiriavimë, bepajumecovënëtavanapame daxita pacuenia pacaitoroba paneamonajivi.

²⁵ Paxamë pijinia papebijivimë, pasivamëre panijavajivi. Bepaasivamë panivajivi pacuenia daxitatsi Cristo nacaasiva daxita Dioso vajajumecovënëtsivi. Vajanacaasivaxae, Cristo nacopata pebeyaxuabinexatsi vajanacacapanepaenexa vajaneconivecua. ²⁶ Bajarapacuenia Cristo exana caenë Cristo pijajivitsi vajanacaexanaenexa. Nexata baja Cristo vajanacaajamatabëcuene xuirajibiaexanaejava, najamatabëcueneitajëtatsi vajanacabautisabijavata. Vajajumecovënëtavanapaexae Dioso pejumelivaisi, nacaajamatabëcuene xuirajibiaexanapona. ²⁷ Bajarapacuenia Cristo exana daxita Dioso vajajumecovënëtsivi itsamatacabi vajanubenaenexa Cristo pitabarata. Nexata itsamatacabi nubenaenatsi Cristo pitabarata vajaaneconijibivi, Dioso vajanacajamatabëcuenexaniavaetsivi. ²⁸ Nexata pebijivi bitso biasiva pijavajivi. Pacuenia pijacuata naperabëasiva, bajarapacuenia biasiva pijavajivi. Nexata ponë asiva pijava, bajara ponë asiva pijava pacuenia pijacuata naperabëasiva. ²⁹ Itsajivi ata apo naperabëitoya. Biji rajane xaniavaetsia naperabëeveta. Bajara pijinia pacuenia Cristo ata nacaeveta daxita Dioso vajajumecovënëtsivi. ³⁰ Tsipaji vaxaitsi Cristo pijajivitsi, ayaibitsaëto atatsi, becaejivitsi Dioso nacatane. ³¹ Nexata nayapëtane pexaniajaicuene mapacueneje. Pebi petiriva itsa pita pijavanexa, naexanabeje becaejivi peperabëtocuenia. Tsipaji Dioso pejumelivaisibaxutota jumaitsi mapacuenaie: “Pebi itsa nacojioba, paxavecua, pena atavecua, bavecuanatsata pijavajavabelia. Nexata anijajivimibeje becaejivicuenia naexanabeje,” jai Dioso pejumelivaisibaxutota. ³² Mapalivaisije bitso ayapëbeje vajajumeyapëtaenexa. Itsiata baitsi jane comparacióncuenia nacayapëtaeyaexana. Cristo vajanacaasivaxae, vaxaitsi Cristo pijajivitsi Dioso nacatane becaenë Cristo peperabëtotsi. ³³ Bajarapalivaisi comparacióncuenia pacayapëtaeyaexana nexata paxamë, pacaenëmë canacujitsia, paneasivanexa panijavajivi. Nexata panijavajivi pasivamëre. Pacuenia panijacuata panaperabëasivamë, bajara pijinia pacuenia panijavajivi pasivamëre. Panijavajivi ata pijinia bepacayaiyatane.

6

¹ Paxamë papeximë, Dioso panejumecovënëtsivixae, pajumecovënëtabiabare paneaxajivi, paneenajivi ata. Bajarapacuenia panijamonae pajumecovënëtabiabare. Tsipaji bajarapacuenia Dioso pacatocopata panejumecovënëtabiabinexa panijamonae. ²⁻³ Dioso

pejumelivaisibaxutota jumaitsi mapacueniaje: “Yaiyataema axa. Yaiyataema ena ata nejamatabëcuenebarëyanexa, neponaponaenexanua bajayajebi mapanacuataje,” jai Dioso pejumelivaisibaxutota. Bajarapalivaisi Dioso itsa najumecopata jivi pejumecovënëtsinexa, yajavanajumecopata pacuenia Dioso yavenonaejitsia pajivi jumecovënëta bajarapalivaisi. Itsalivaisianë copiaya Dioso najumecopatsi ata, apo yajavanajumecopatsi pacuenia yavenonaejitsia pajivi jumecovënëta bajarapalivaisianë. Nexata matapania mapalivaisitaje Dioso yajavanajumecopata pacuenia yavenonaejitsia pajivi jumecovënëta bajarapalivaisi.

⁴ Paxamë panexi panexainaevi, anaeyacuenia pëtsa panexi paitorobabiabame papecabaraanaepanaeyaniva. Biji rajane xaniavaetsia panacoxivitsare papecajumecovënëtabiabinexa paneitorobijava. Pacujarubarenuia Dioso pejumelivaisi pejumecovënëtsinexa.

⁵ Paxamë pijinia itsamonae papijajivimë, dajubicuenia papecacanajetsivi, itsamonae amoneya panetonacuenebavanapaenexa. Patoexanabiabare pacuenia panijatuxanevi pacaitoroba. Payaiyataema panijatuxanevi. Cujunaviaya panijatuxanevi patonacuenebabiabare asaëyata. Pacuenia Cristo panejitsipaexae, xaniavaetsia patonacuenebabiabame Cristo pijacuene, bajara pijinia pacuenia xaniavaetsia panijatuxanevi patonacuenebabiabare.

⁶ Xaniavaetsia panijatuxanevi patonacuenebabiabare daxitamatacabi canacujitsia pacuenia patonacuenebijitsipame Cristo. Pëtsa matapania itsajota pacanaitaxutocaeveta panijatuxanevi, asaëyata patonacuenebame papecasivabarëyanexa panetonacuenebijava yabara. Patoexanabiabare panijatuxanevi pacuenia Dioso pacatojitsipa panetoexanaenexa daxita panejamatabëëthëtovertsina. ⁷ Jamatabëcuenebarëyaya patonacuenebavanapare panijatuxanevi. Xua panijatuxanevi patonacuenebavanapame, bajaraxua yabara pasivajamatabëjumaitsimëre: “Maxuaje nacuenebajë apo ëtajatuxanenënexa. Taniji pepo tajatuxanenë, Cristo, betatonacuenebijava,” pasivajamatabëjamëre panijatuxanevi panetonacuenebijava yabara. ⁸ Payapëtaneme rabaja mapacuenije. Pajivi pexaniacuene toexana itsamonae ata, bajarapajivi matamotsianatsi Dioso. Pamonaë ata dajubicuenia canajetatsi itsamonae amoneya petonacuenebabiabinexa, bajarapamonae ata Dioso matamotsianatsi pexaniacuene itsa toexana itsamonae ata. Pamonaë ata apo pecanajetsivitsi, bajara pijinia pacuenia bajarapamonae ata Dioso matamotsianatsi pexaniacuene itsa toexana itsamonae ata.

⁹ Paxamë pijinia papijatuxanevimë, pacamuxujiobatsi mapacueniaje. Xaniavaetsia pataema panijajivi, papecatonacuenebivi. Pëtsa anaeya patiobabiabame panijajivi asaëya papecatonacuenebabiabinexa. Pacanaëjere pacuenia paxamë ata panijatuxanenë Dioso eca athëbëtatsta. Pamonaë ata apo pecanaia. Bajaraponëjavabelia pananeconitsipame. Bajaraponë panijajivi ata pijatuxanenë baja cajena. Bajaraponë saya najëpaeya nacatane daxitatsi. Nexata paneconivajëto xainatsi caejivitsi canacujitsia, bajarapaneconivajëtota nacananeconitsiaexanaponaena. Bajaraxuata panijajivi ata itorobajë xaniavaetsia papecatonacuenebabiabinexa.

Pacuenia Dioso pejumecovënëtsivi itorobatsi penayajivitaenexa dovathi yabara pelivaisi

¹⁰ Tajamonae, icatsia cotocaevi patacatoyaquinaelivaisita, pacajumaititsi mapacueniaje. Pajamatabëcuenesaëmëre tsavanapae vajatuxanenë pesaë paneyajavajinavapaexae. ¹¹ Vajabitsaënë banayajivinaxatata piatajajava pijavajabitsaënë pejorojoronaeyanivatsi. Bajara pijinia pacuenia paxamë ata panayajivinajamatabëcueneaxatare Dioso pejumelivaisita. Nexata bajarapacuenia pajamatabëcuenesaëmë tsane dovathi papecajamatabëcuene yamaxëitojorobianiva.

¹² Tsipaji Dioso vajanacatojitsipaecuenia itsa exanavanapatsi, nexata dovathi jamatabënacaitacueniaba. Nexata bëpënëa vajajamatabëcuenesaëta asaëyata vajabitsaë

bexanatsi, dovathi pijajivijavabelia, apo vajataevijavabelia. Dovathi cajena pijajivi ayaibitsaëtoxaneto. Dovathi pijajivi xaina penamatacaitorobivitsi, bitso piagamatabëcuenesaëvi. Nexata dovathi pijajivi jinavanapa athëbëtatsia. Jinavanapa mapanacuata ataje. Nexata dovathi pijajivi itoroba daxitajivi pibisiacuene pexanaeyaexanaenexatsi mapanacuataje. Bajaraxuata bëpënëa vajajamatabëcuenesaëta, asaëyata vajabitsaë bexanatsi dovathi pijajivijavabelia. ¹³ Nexata paxamë dovathi papecajamatabëcuene yamaxëitojorobianiva, panayajivinajamatabëcuenexatare Dioso pejumelivaisita. Nexata pamatacabi pibisiacuene pacatocopiapatsiana dovathi pejamatabëcueneta papecajamatabëcuenejëtsinexa, itsiata pajamatabëcuenesaëmë tsane bajarapalivaisita. Nexata pibisiacuene apo paexanaemë tsane. ¹⁴ Vajabitsaënë itsa nayajivinaxatata piatajajava, caecovëta banuca. Nexata pijavajabitsaë apo tixitsitsi pecovëvecua. Bajara pijinia pacuenia paxamë ata pajamatabëcuenesaëmëre Dioso pejumelivaisita dovathi papecajopaeyaexanaeyaniva Dioso pejumelivaisi panejumecovënëtsijavavecua. Vajabitsaënë piatajajava itsa nayajivinaxatata, bayanaepacëta penaepacëtsijavata pesarabiyanivatsi penayajivinaxatatsijava. Bajara pijinia pacuenia paxamë ata Dioso pejumelivaisita, pexaniajailivaisita, panayajivinajamatabëcuenexatare. Vajabitsaënë piatajajava banamëpabëxatata pijavajabitsaënë pejorojoronaeyanivatsi. Bajara pijinia pacuenia paxamë ata Dioso pejumelivaisita panayajivinajamatabëcuenexatare. Pajamatabënajinavanapare Dioso baja aneconijibia papecataejava. Nexata dovathi nayajivitaeya pajinavanapare papecajamatabëcuene yamaxëitojorobianiva. ¹⁵ Vajabitsaënë najamatabëcueneveretsiaya pexaniazapato banataxuxatata pijavajabitsaëjavabelia jamatejema peponaenexa. Bajara pijinia pacuenia paxamë ata panajamatabëcueneverere, jamatejema pexanialivaisi jivi panetsipaebavanapaenexa. Daxita baja pamonaë jumecovënëta bajarapalivaisi, Dioso baja barajamatabëcuenexanepanaeya tanetsi. ¹⁶ Panajamatabëcuenecopare Diosojavabelia papecayavenonabiabinexa. Vajabitsaënë banayajivicapona escudovënëjava, pijavajabitsaënë itsa bixabajarabatsi piupiitarunutsipuyaeneta, penacaranatsinexa bajarapaescudota, penayajiviitacaëbinexanua. Bajara pijinia pacuenia paxamë ata dovathivecua Dioso pacajamatabëcuenecaranatsiana, itsa panajamatabëcuenecopatsianame Diosojavabelia papecayavenonabiabinexa. ¹⁷ Vajabitsaënë banamataxatata piatajajava, cascovënëjava, pematathinaxuabiyanivatsi pijavajabitsaënë. Bajara pijinia pacuenia paxamë ata panayajivinajamatabëcuenexatare Dioso pejumelivaisita. Pajumecovënëre papecacapanepaelivaisinexa panijaneconivecua. Vajabitsaënë itsa pona pijavajabitsaëjavabelia, banayajivicapona espada. Bajara pijinia pacuenia paxamë ata panayajivicaponare Dioso pejumelivaisi, palivaisi baja pacayapëtaeyaexana Espiritu Santo. ¹⁸ Dioso pejumelivaisita najamatabëcuenexatatsiaya itsa pajinavanapaename, nexata pacuenia Espiritu Santo pacaitoroba, daxitamatacabi canacujitsia Diosojavabelia pavajëtabiabianame Dioso papecajamatabëcuene yavenonabiabinexa. Pajamatabëcueneitatsacamëre tsavanapae dovathi papecajamatabëcuene yamaxëitojorobianiva. Nexata pacopatsinejevamë Diosojavabelia panevajëtabiabijava, ajamatabëcueneitatsacaya Diosojavabelia panayajivivajëtabiabare. Asaëyata patovajëtabiabarenua daxita Dioso pejumecovënëtsivi. ¹⁹ Xanë ata panetovajëtabiabarenua Dioso taneyapëtaeyaexanaenexa paepatota bajarapalivaisi tsipaebajë itsamonaejavabelia. Panetovajëtabiabarenua ajumeurajibia tatsipaebabiabinexa apo judíovi ata Dioso pecapanepaejavanexatsi. ²⁰ Naneconitsiaponaponajë majotaje, penaneconitsivi pejebabiabibota, itsamonaejavabelia tatsipaebabiabixae bajarapapexanialivaisi, Dioso tanetocopatsilivaisi. Bajaraxuata Diosojavabelia panetovajëtabiabare, naneconitsiaponaponae atanë, ajumeurajibia jivijavabelia tatsipaebabiabinexa bajarapalivaisi pacuenia jamatabëtsipaebajë.

Pacuenia Pablo toyaquina Efeso tomarapijivi peveretsinexa baja petoyaquinaelivaisi

mapabaxutotaje yabara pelivaisi

²¹ Vajabananë Tíquico itsa patsiana paxamëjavabelia, pacatsipaebiana daxita pacuenia netane. Bajaraponë bitso vajaasivanë. Xaniavaetsia paneyavenonabiaba itsa patonacuenebabiabajë pacuene vajatuxanenë paneitoroba. ²² Bajaraxuata Tíquico pacatoitorobatsi baja paxamëjavabelia papecatsipaebinexa pacuenia pajinavanapajë. Nexata Tíquico itsa pacatsipaebiana pacuenia pajinavanapajë, pamuxunaajamatabëcuenesaëmë tsane. ²³ Pacatovajëtabiabatsi vaxa Diosojavabelia, vajatuxanenë Jesucristojavabelia ata, jamatabëcuenexanepanaeya panejinavana-paenexa. Pacatovajëtabiabatsinua namataenetsia panenasivanexa Diosojavabelia panenajamatabëcuenecopatsivixae. ²⁴ Pacatovajëtabiabatsinua Diosojavabelia daxita paxamë Dioso papecayavenonabiabinexa. Paxamë abaxë tsiteca bitso pasivamë tsavanapae vajatuxanenë Jesucristo. Bajara itsi tsane.

Mapabaxutoje San Pablo toyaquina Filipos tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Filipos tomara-pijivijavabelia, pamatacabi naneconitsia ponapona penaneconitsivi pejebabiabibota yabara pelivaisi

¹ Xanë Pablonë, Timoteobeje, Jesucristo papijajivitonënëbeje. Pacatoyaquinatsibeje mapabaxutoje padaxitamë paFilipos tomarapijivimë, Jesucristo pelivaisi panejumecovënëtavanapaevi. Paancianovimë, paxamë ata padiaconovimë, pacatoyaquinatsibeje. ² Pacatovajëtatsibeje vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

Pacuenia Pablo Diosojavabelia tovajëta Jesucristo pelivaisi pejumecovënëtsivi yabara pelivaisi

³ Itsa pacanajamatabënapitatsi Diosojavabelia tavajëtsijavata, jumaitsinë tsabiabi Diosojavabelia: “Xaniavaetsia yavenonabiabame nijajivi, Filipos tomarapijivi,” janë tsabiabi Diosojavabelia paxamë yabara. ⁴ Itsa vajëtajë Diosojavabelia, nexata pacatovajëtatabatsi jamatabëcuenebarëyaya. ⁵ Bajarapacuenia pacatovajëtatabatsi tsipaji Dioso pejumelivaisi, pexanialivaisi, panejumecovënëtsijavaveliacujinae, paneyavenonabiabame tanamatavenonaejavaxi yabara. Patsipaebabiabamenua Jesucristo pelivaisi itsamonaejavabelia. ⁶ Yapëtaniji baja cajena pacuenia Dioso pacayavenonaejitsia bitso pexaniajamatabëcuene panexainavanapaenexa. Tsipaji baja Dioso taxuxuaba papecajamatabëcuene xanepanaeyaexanaenexa. Bajaraxuata panevajënaeyabelia Dioso pacajamatabëcuene xanepanaeyaexanaponaena copatsinejeva matapania Jesucristo icatsia pepatsimatacabitsicajavabelianexa. ⁷ Bajarapacuenia paxamë patacasivanajamatabëxainaejava, netsitaxanepana. Tsipaji bitso pacaasivatsi. Pamatacabi naneconitsiaponaponajë penaneconitsivi pejebabiabibota, panejamatabëcueneyavenoname. Panejamatabëcueneyavenonamenua pamatacabi nacuaevetsivi pitabarata nenuta Jesucristo pelivaisi jivi tatsipaebaponaejava yabara. Nexata bajarapamatacabi jumaitsinë bajarapamonaejavabelia: “Mara palivaisije, Jesucristo pelivaisi, pexaniajailivaisi cajena jivi pecapanepaelivaisinexatsi Diosojavabelia,” janë nacuaevetsivijavabelia. ⁸ Dioso cajena nejamatabëcueneyapëtane pacuenia bitso paxamë pacaasivatsi. Jesucristo neyavenona bitso patacaasivanexa. ⁹ Pacatovajëtatsi Diosojavabelia itsamonae ata bitso paneasivatsavanapaenexa panevajënaeyabelia. Pacatovajëtatsinua paneyapëtaenexa Dioso. Pacatovajëtatsinua paneyapëtaenexa xua Dioso pacatojitsipa paneexanavanapaenexa. ¹⁰ Nexata payapëtaename paneitapetsinexa palivaisi bitso xanepana daxitalivaisivecua, panejumecovënëtsinexa bajarapalivaisi. Nexata bajarapacuenia pacacaëjëpaena xaniavaetsia panejinavanapaenexa aneconijibia. Matapania Jesucristo icatsia pepatsimatacabitsicajavabelianexa, bajarapacuenia panaevetavanapaename. ¹¹ Nexata ëpexaniajamatabëcuene paxainaename panejamatabëëthëtojavavetsina Jesucristo papijajivixaemë. Nexata itsamonae paxamë yabara jamatabëjumaitsi tsane Diosojavabelia: “Diosomë, ayaijamatabëcuenenëmë bitso. Pexaniacuene bitso toexaname Filipos tomarapijivi ëpexaniajamatabëcuene pexainaenexa pejamatabëëthëtota,” jamatabëjai tsane itsamonae Diosojavabelia paxamë xaniavaetsia panetsitajinavanapaexae.

Pacuenia Pablo jumecovënëtaaponapona Cristo yabara pelivaisi

¹² Tajamonae, payapëtaneme rabaja pajamatabëcuene yabara naneconitsia ponaponajë penaneconitsivi pejebabiabibota. Jitsipajë paneyapëtaenexa mapacueneje. Majotaje penaneconitsivi pejebabiabibota neeta pexanialivaisi, Jesucristo pelivaisi, jivi tatsipaebaponaexae. Xanë neetsi ata penaneconitsivi pejebabiabibota, itsiata apo yacaranatsicapanepae pexanialivaisi, Jesucristo pelivaisi, peyacaëjëpaponaenexa daxitanacuanëjava. Nexata baja aeconoxae bajarapalivaisi pevajënaeyabelia yacaëjëpapona daxitanacuanëjava daxitajivi Diosojavabelia pecapanepaenexatsi. ¹³ Nacuaevetsinë pijabopijivi, vajabitsaë, daxita itsamonae ata, neyapëtane majota naneconitsia taponaponaejava Jesucristo pijajivitonëxaenë. ¹⁴ Mapatomarataje ayaibitsaëtöxaneto Dioso pejumecovënëtsivi, itsa nevënëtane tananeconitsiaponaponaejava, najamatabëcuenesaëtavanapa. Diosojavabelia asaëyata najamatabëcuenecopaba peyavenonaenexatsi. Nexata ajumejunavijibia Dioso pejumelivaisi tsipaebapona itsamonaejavabelia.

¹⁵ Pamonaë ajumejunavijibia Dioso pejumelivaisi tsipaebapona itsamonaejavabelia, bajarapamonaeyajuvënëvi, panecuenecaëba. Nexata itsamonaejavabelia asaëya tsipaebapona Cristo pelivaisi. Bajarapamonaë xanë yabara jamatabëjumaitsi: “Pablo bitso ayaicuenia Dioso pejumelivaisi jivi nacatsutsipaebapona. Pacuenia bajaraponë tsipaebapona, matatoxenetsia vaxaitsi tsipaebaponaenatsi jivi vajanacayaiy-ataenexa,” jamatabëjai bajarapamonaë. Itsiata itsamonae, bajarapamonaeyajuvënëvi, taneyavenonaenexa, itsamonaejavabelia tsipaebapona Cristo pelivaisi bajarapamonaë ata xaniavaetsia pejumecovënëtsinexa. ¹⁶⁻¹⁷ Itsamonae tsipaebapona Cristo pelivaisi pejumetaevitsi saya peyayataenexatsi, pepënaponaenexatsinua. Bajarapamonaë pejamatabëëthëtovetsina apo jumecovënëtsi ata Cristo, saya jema Cristo pelivaisi tsipaebapona. Jamatabëjumaitsi: “Vecae Pablo naneconitsiaponaponae penaneconitsivi pejebabiabibota, pecovëta itsajamatabëcuene xainaeyaexanaenatsi Cristo pelivaisi pejumecovënëtsivi. Bajarapacuenia Pablo jamatabëcuenebëjaiyaxanaenatsi,” jamatabëjai bajarapamonaë xanë yabara. Itsiata itsamonae xaniavaetsia tsipaebapona Cristo pelivaisi pejumecovënëtsixae Cristo. Bajarapamonaë yapëtane Dioso tanetocopatsijava penaneconitsivi pejebabiabibota naneconitsia taponaponaejavata, tajumaitsi javanexa nacuaevetsivijavabelia mapacueniaje: “Jesucristo pelivaisi jivi pecapanepaelivaisinexatsi, pexaniajailivaisi cajena,” tajai javanexa nacuaevetsivijavabelia, bajarapamonaë yapëtane. ¹⁸ Majotaje nenaneconitsiaexanaë ata, apo natsinajamatabëxainaenë. Itsamonae pejamatabëëthëtovetsina Cristo pelivaisi pejumecovënëtsixae, tsipaebapona jivi pejumecovënëtsinexa bajarapalivaisi. Itsamonae pijinia pejamatabëëthëtovetsina apo jumecovënëtsi ata, itsiata Cristo pelivaisi tsipaebapona jivi pejumecovënëtsinexa bajarapalivaisi. Bajaraxuata bajarapamonaë ata jivi petsipaebaponaejava yabara, itsiata sivajamatabëcuenebarëyanë.

Bitso orijibia tavajënaeyabelia jamatabëcuenebarëyanë tsaponae tsane. ¹⁹ Tsipaji yapëtaniji pacuenia panetovajëtaponame Diosojavabelia. Espiritu Santo, ponë Jesucristo itorobica, bajaraponë neyavenonapona. Bajaraxuata yapëtaniji daxita pacuenia netoxanepanaejitsia. Nexata baja pitsapaenajë tananeconitsia ponaponaejavavecua. ²⁰ Bitso jitsipajë ëpexaniacuene taexanaenexa. Apo jitsipaenë taexanaenexa itsacuenejavayo ata, xua yabara auranë tsipae. Cristo tajumecovënëtsijavaveliacujinaë, aeconoxae ata, ajunavijibia jitsipajë taexanaenexa Cristo pejitsipaecuenia daxitamatacabijavabelianexa. Bajarapacuenia jitsipajë taexanaponaenexa ëbajaraponënexa. Bajaraponë tanetojitsipaecuenia abaxë taasaëtsaponaponaëepato mapanacuataje, tatëpaeepatotanexa ata, jitsipajë taexanaenexa xua pejamatabëcueneta daxitajivi yayataejitsia Cristo. ²¹ Tasaëtsaponaponaëepato abaxë mapanacuataje, Cristo pejitsipaecuenia toexanaponaenajë. Itsa pamatacabì tēpaenajë, netoxanepanaejitsia mapanacuata tasaëtsaponaponaejava matatoxenetsia. Tsipaji Cristo

yajavaponaponaenajë athëbëtatsia. ²² Tasaëtsaponaponaepato abaxë mapanacuataje, necajëpa tatoexanaponaenexa Cristo tanetojitsipaecuenia. Itsiata apo yapëtaenë xua pepacuene jitsipajë. ²³ Itsajavata bitso jitsipabiabajë tatëpaejava taponaponaenexa Cristo pijanacuayabetsia. Bajaraxua bitso netoxanepanaejitsipa. ²⁴ Itsiata paxamë panenamatavenoname abaxë taponaponaenexa mapanacuata, patacayavenonaponaenexa. ²⁵ Yapëtaniji baja cajena abaxë taponaponaenexa paxamënexa. Ponaponaenajë abaxë patacayavenonaenexa, panejamatabëcuenesaënexa panevajënaeyabelia, panejamatabëcuenebarëyanexanua panejumecovënëtsixae Cristo pelivaisi papecacapanepaenexa panijaneconivecua. ²⁶ Nexata pamatacabi Jesucristo neyavenonaena penaneconitsivi pejebabiabibovecua tapitsapaenexa, ponaponaenajë icatsia paxamëjavata. Nexata jamatabëcuenebarëyaya panevajunupaebianame itsamonaejavabelia pacuenia Jesucristo neyavenona tapitsapaenexa penaneconitsivi pejebabiabibovecua.

²⁷ Pajinavanapare xaniavaetsia, pacuenia pexanialivaisi, Cristo pelivaisi, pacaitoroba. Nexata itsa pacataenatsi, apo pacatae atatsinua tsane, itsiata jitsipajë patacavënëlivaisitaeponaenexa najamatabëcuenejëpaeya panecasaëtsavanapaejava Cristo pelivaisi panejumecovënëtavanapaejava. Jitsipajë patacavënëlivaisitaenexa asaëyata najamatabëjëpaeya jivi panetsipaebavanapaejava Jesucristo pelivaisi jivi papecacapanepaelivaisinexatsi. ²⁸ Pëtsa pacujunavame pamonaenexa pacaitoya. Dioso papecacayavenonaenexa, itsa apo pacujunavimë tsane itsamonaenexa pacabejiobiaenexa ata, nexata bajarapamonae jamatabëjumaisi tsane: “Pexaniajailivaisi cajena bajarapamonae tsipaebapona. Tsipaji Dioso yavenonatsi. Nexata vaxaitsi bajarapamonae vajabejiobiaenexaenexa, Dioso nacaverebiabiana,” jamatabëjai tsane. Yapëtaenanua paxamë papecacapanepaejavanaxa Dioso. ²⁹ Cristo pejamatabëcueneta pacatocopata bajaraponë panejumecovënëtsinexa. Itsiata baitsi jane apo pacatocopatsi ëbajaraponë panejumecovënëtsinexa. Pacatoyajavacopatanua baja cajena itsamonaenexa pacabejiobiaenexaenexa bajaraponë papijajivixamë. ³⁰ Pacuenia Cristo pijajivitonëxanë itsamonaenexa nebejiobiaenaxanapona, bajara pijinia pacuenia paxamë ata itsamonaenexa pacabejiobiaenaxanapona. Pacuenia baja imata panetaneme itsamonaenexa tanebejiobiaenaxanapona, bajarapacuenia abaxë tsiteca nebejiobiaenaxanapona pacuenia baja panevënëlivaisitaneme.

2

Pacuenia Dioso pejumecovënëtsivi itavetatsi beayaijamatabëcuenevi penataeyaniva yabara pelivaisi

¹ Payapëtaneme rabaja mapacueneje. Jesucristo panejavajinavanapaxae, panajamatabëcuenesaëtame panejumecovënëtsijava. Payapëtaneme rabaja. Jesucristo papecaasivaxae, pacajamatabëcuenebabata. Payapëtaneme rabaja Espiritu Santo papecat-sijamatabëcaenexa papecacayajavaponaponaenexa. Payapëtaneme rabaja Jesucristo papecaitaxutotsonia taeyabiabijava. ² Bajaraxuata nexata pacaitorobatsi mapacuenia panejinavanapaxae patacasivabarëyanexa. Najamatabëcuenejëpaeya pajinavanapare. Najamatabëcuenejëpaeya namataenetsia panaasivamëre tsavanapae. Xua paexanaejitsiamë Dioso pejamatabëcueneta, najamatabëcuenejëpaeya paexanavanapare. ³ Pëtsa panatoexaname itsacuenejavayo ata, xua ëpaxamënexa pacatoxanepana. Biji rajane paexanare xua itsamonaenexa ata toxanepanatsi. Pëtsa paexanamenua itsacuenejavayo ata saya bepaayaijamatabëcuenevimë papecataenexa itsamonaenexa. Biji rajane beveliajamatabëcuenevi panataeyabiabianame. Itsamonaenexa paxamëvecua ayaijamatabëcuenevi pataeyabiabianame. ⁴ Pëtsa panajamatabëxainabiabianame ëpaxamë panenatojitsipaecueni. Biji rajane payajavanajamatabëxainabiabianame itsamonaenexa ata penatojitsipaecueni.

⁵ Pacuenia Jesucristo jamatabëcueneitsi, bajara pijinia paxamë ata pajamatabëcueneitsimëre. ⁶ Pacuenia Dioso jamatabëcueneitsi, bajara pijinia Jesucristo ata jamatabëcueneitsi. Itsiata baitsi jane Jesucristo apo jamatabëjumaitsi: “Jitsipajë daxitajivi taneyaiyataenexa pacuenia taxa Dioso yaiyatanetsi,” apo jamatabëjai. ⁷ Bajaraponë picani ayaijamatabëcuenenë. Paxa Dioso yajavaponapona athëbëtatsia. Itsiata itsa patsica mapanacuayabetsicaje, naexana pacuenia vaxaitsi banaexanatsi mapanacuataje. Nexata paxa Dioso bepijajivitonë naexana, pacuenia Dioso itorobatsi pexanaenexa. ⁸ Bejivitonëcuena itsa naexana, beveliajamatabëcuenenëcuena ponapona. Paxa Dioso pitorobicueniatsi jumecovënëta. Pacuenia bitso pibisiacuene pexanaevi pijaneconi yabara cruzajavabelia bacobematabiabarutatsi pebeyaxuabinexatsi, bajara pijinia pacuenia Jesucristo ata nacopata cruzajavabelia pecobematabiabarutsinexatsi. ⁹ Bajaraxuata Dioso mëthëvetsina matacotatsi. Caponatsi athëbëabetsia peecaenexa paxa Diosojavatatsia, pebarëevetsinexatsi daxitacuene. ¹⁰ Nexata bajaraponë itsa vënëlivaisitaenatsi, pematabacabëta yaiyataeya tonubenaenatsi daxitajivi. Athëbëtatsia pejinavanapaevi, mapanacuapijivi ata, petëpaevimi ata, pematabacabëta yaiyataeya tonubenaenatsi. ¹¹ Nexata daxitajivi jumai tsane Jesucristo yabara: “Jesucristo rabaja cajena pepo petuxanenë,” jai tsane. Nexata daxitajivi yapëtaena pacuenia paxa Dioso bitso ayaijamatabëcuenenë.

Pacuenia Dioso pejumecovënëtsivi pexaniajailivaisi pejumecovënëtavanapaexae, bepecotia mapanacuataje yabara pelivaisi

¹² Tajamonae bitso patacaasivavi, pacuenia panejumecovënëtame pamatacabi pacatsipaebaponaponatsi Dioso pejumelivaisi, bajarapacuenia matatoxenetsia Dioso pajumecovënëtavanapare, aeconoxae xanë tajë pacavecuaponaponae atatsi. Pacaejivimë canacujitsia cujunaviaya Dioso pajumecovënëre. Nexata epexaniacuene paexanavanapaename. Tsipaji Dioso papecacapanepaevinexa. ¹³ Dioso rabaja pacajamatabëcueneyavenona panejamatabëëthëtovetsina jitsipaeya paneexanaenexa, pacuenia Dioso pacatojitsipa. Dioso pacajamatabëcuene caëjëpaeyaexananua paneexanaenexa bajarapacuene.

¹⁴ Daxitacuene paexanavanapare pajamatabëcuenenatsipaebinejevamë. Pëtsa anaeya namataenetsia najumenotsia panabijatanemenua. ¹⁵ Bajarapacuenia itsa pajinavanapaename, nexata daxita paxamë aneconijibia jivi patsitajinavanapaename Dioso papexixaemë. Nexata mapanacuapijivi pibisiacuene pexanaevi tuatuajëta pajinavanapae atamë tsane, itsajivi ata acuenebi tsane pibisiacuena papecabaracuaicuaijainexa. Pacuenia pecotia itayota pitaquirijavata, bajara pijinia pacuenia paxamë ata paitsimë tsane. Bepapecotiamë tsane pexaniajailivaisi panejumecovënëtavanapaexae bajarapamonaejavata. ¹⁶ Bepapecotiamë tsane xaniavaetsia itsa patsitajumecovënëtavanapaename bajarapamonaejavata pexaniajailivaisi, Jesucristo pelivaisi. Bajarapacuenia itsa patsitajumecovënëtavanapaename, pacasivabarëyatsi tsane pamatacabi icatsia Cristo patsianica. Bajarapacuenia pacasivabarëyatsi tsane tsipaji baja yapëtaenajë apo tanacueratsijava asaëya tanacuenebijava paxamëjavata. ¹⁷ Dioso pacasivabarëya panenajamatabëcuenerajutsixae Diosojavabelia panetojinavanapaenexa bajaraponë papecatojitsipaecuena. Itsamonae nebeyaxuabijitsia ata tsipae Cristo pelivaisi patacatsipaebixae, xanë itsiata nasivajamatabëcuenebarëyanë tsipae. Tsipaji Cristo pelivaisi bajarapacuenia patacatsipaebinexa, Dioso netocopata. Nexata daxita paxamë pacayajavajamatabëcuenebarëyatsi tsane. ¹⁸ Bajarapacuenia paxamë ata pajamatabëcuenebarëyamëre tsavanapae. Paneyajavabarëyamërenua tsavanapae.

Timoteobeje Epafroditobeje yabara pelivaisi

¹⁹ Itsa vajatuxanenë Jesús jitsipa, naxanitsiayo jamatabëitorobajë Timoteo papecataenexalia. Pepatsicujinaerena, itsa pacavënëlivaisitaenatsi pacuenia pajinavanapame, nejamatabëcuenebarëyaya exanaejitsia. ²⁰ Bajaraponë caenë nejamatabëcuenejëpa. Bajaraponë bitso pacasivanajamatabëxaina xaniavaetsia panejinavanapaenexa. ²¹ Daxita itsamonae bitso najamatabëxaina ëpenatojitsipaecuenia pexanaenexa. Apo sivanajamatabëxainae Jesucristo petonacuenebinexa. ²² Paxamë baja payapëtaneme pacuenia Timoteo pacatsitaponapona pexaniajamatabëcuenia. Pacuenia itsamonae paxa penacuenebijava bayavenona, bajara pijinia pacuenia Timoteo neyavenona jivi tatsipaebaponaejava pexanialivaisi, Jesucristo pelivaisi. ²³ Bajaraxuata jamatabëitorobajë Timoteo paxamëjavabelia papecataenexalia. Itsa yapëtaenajë pacuenia nexanaejitsia penaneconitsivi pejebabiabibota tananeconitsiaponaponaejava yabara, nexata bajaraxuacujinae pacatoitorobialitsi Timoteo papecataenexalia. ²⁴ Xanë jamatabëjumaitsinë paxamë yabara: “Itsa Dioso netojitsipaena xanë ata taponaeenexa bajarabelia, nexata neyavenonaena bepijia taponaeenexa tataenexalia Filipos tomarapijivi,” jamatabëjanë paxamë yabara.

²⁵ Panetoitorobaremena rabaja vajabananë Epafrodito pataneyavenonaenexamë bajarapacuenia tanamatavenonaeeapatota. Nexata Jesucristo patonajuanacuenebajëbeje. Asaëyata panajuanacuenXanë jamatabëjumaitsinë paxamë yabara: “Itsa Diosoebajëbeje, Dioso apo pejumecovënëtsivi paneitsacueniababiabi atabeje. Nexata icatsia netsitaxanepana bajaraponë patacatoitorobinexalia. ²⁶ Majotaje Epafrodito piavitanecujinae, jamatejema baja. Nexata aeconoxae bitso jamatabëpona paxamëjavabelia papecataenexa. Bitso jamatabëpona tsipaji yapëtane panevënëlivaisitaejava pebitsojava piavitanecuene. ²⁷ Xaniajai rabaja picani. Avitane petëpaejavabelianexa. Itsiata baitsi jane Dioso itaxutotsoniatanetsi. Xanë ata Dioso nitaxutotsoniatane. Tsipaji itsa nevecuatëpaejitsipa, xanë bitso najamatabëxainaejitsipajë. Tsipaji penaneconitsivi pejebabiabibota taneetsixae tanajamatabëxainaejavata, nevecuatëpaejitsipa. ²⁸ Bajaraxuata bitso jitsipajë bajaraponë patacatoitorobinexalia panetaenexa, nexata paxamë panejamatabëcuenebarëyanexa itsa pataneme icatsia bajaraponë. Nexata xanë ata paxamë yabara bevelia najamatabëxainaenajë. ²⁹ Pacopiapitsianame bajaraponë bitso jamatabëcuenebarëyaya Dioso pejamatabëcueneta vajabananëxae. Pamonaë jamatabëcueneitsi pacuenia bajaraponë jamatabëcueneitsi, payaiyataeneme. ³⁰ Paxamë apo papatsi atamërena maberenaje pataneyavenonaenexamë, itsiata panejamatabëcueneta bajaraponë panetoitorobaremena taneyavenonaenexa. Nexata bajaraponë neyavenonabiaba Cristo pijacuene tatonacuenebijava. Bajaraxuacujinae itsa avitane, imoxo picani petëpae.

3

Pacuenia jivi Dioso pejitsipaecuenia betojinavanapa yabara pelivaisi

¹ Tajamonae, palivaisi capanepaeya pacatoyaquinatsi baja, bajarapalivaisi pasivajamatabëcuenebarëyamëre Cristo papijajivixaemë. Xanë apo pacasivacueranaetsi patacatoyaquinaenexa icatsia bajarapalivaisi. Tsipaji xanepana icatsia panejumetaenexa bajarapalivaisi. ² Panayajivitaema piagamatabëcuenebejevi, pamonaë beaviri pianaepanaevi. Tsipaji raja bajarapamonae apo aura pexanaejava yabara. Bajarapamonae jamatabëcuenenavëxaniabiaya jumaitsi tsabiabi Jesucristo pijajivijavabelia: “Xanepana paxamë ata papecaperabëcaucubinexa judíovicuenia Dioso pepacuene papecacapanepaenexa panijaneconivecua,” jai tsabiabi. ³ Nacaperabëcaucutsi ata tsipae, vajanacaperabëcaucutsijava yabara, Dioso pexitsi apo nacaexanae tsipae. Vaxaitsi pepacuene vajanacapanepaevinexa Diosojavabelia. Tsipaji vajamatabëëthëtojavavetsina najamatabëcueneocopatatsi

Diosojavabelia vajanacapanepaenexa. Jamatabëcuenebarëyatsi Jesucristo pijajivixaetsi. Yapëtanetsinua pacuenia Dioso apo nacacapanepae tsipae vajacuata vajaexanaejava pejamatabëcueneta. ⁴ Itsajivi itsa caëjëpaejitsipatsi pijacuata penacapanepaenexa Diosojavabelia judíonëxae, Dioso petonacuenebijava yabara ata, nexata xanë ata necaëjëpaejitsipa tajacuata tanacapanepaenexa. ⁵ Xanë picani mataitsinëje. Itsa baja xainajë ocho pamatacabibeje tanaexanaecujinae, tajasalinaivicuenia neperabëcaucuta. Baitsi neboupiperabëcaucuta. Xanë raja tajasalinainëmi Israelpijinë. Benjamínpijinë pemomoxiyajuvënënënë. Taxa judíonë. Taena ata judíova. Xanë picani fariseonënë. Pacuenia fariseovi bitso jumecovënëta Dioso Moiséspijinëta penajumecopatsilivaisi, bajara pijinia pacuenia xanë ata itsinë. ⁶ Daxita tajamatabëcuenesaëta caasaënë tajumecovënëtsijava Dioso Moiséspijinëta penajumecopatsilivaisi. Jamatabëcuenenavëxaniabajë tsena bitso. Jesús pelivaisi pejumecovënëtsivi yabara, jumaitsinë tsabiabi: “Dioso Moiséspijinëta penajumecopatsilivaisivecua saicayalivaisi jumecovënëta. Nexata bajarapamonae bebeyejebatsi,” janë tsabiabi. Nexata Jesús pijajivi bejiobiaexanabiabajë. Dioso Moiséspijinëta penajumecopatsilivaisi, bitso xaniavaetsia jumecovënëtaaponaponajë. Nexata itsajivi ata acuenebi pejumaitisijava xanë yabara: “Pablo xaniavaetsia apo jumecovënëtsi Dioso Moiséspijinëta penajumecopatsilivaisi,” pejaijava. ⁷ Daxita bajarapalivaisi yabara xanë picani sivabarëyanë. “Itsa jumecovënëtsianajë bitso, netonamatamotsiana Diosojavabelia,” jamatabëjanë picani. Itsiata aeconoxae yapëtaniji daxita bajarapalivaisi piamatamobilivaisicuene. Tsipaji baja najamatabëcuenecopatajë Cristojavabelia tanevecuaajibiaexanaenexa tajaneconi. ⁸ Aeconoxae baja yapëtaniji daxita bajarapalivaisi piamatamobilivaisicuene. Daxita bajarapalivaisivecua netonamatamota tayapëtaenexa xaniavaetsia tajatuxanenë Jesucristo. Jesucristo taneyajavaponaponaexae, nexata piamatamobilivaisi tajumecovënëtsijavami, copatajë baja. ⁹ Dioso aneconijibia apo netae tajumecovënëtsixae Dioso Moiséspijinëta penajumecopatsilivaisi. Aeconoxae baja Dioso aneconijibia netane tsipaji najamatabëcuenecopatajë Jesucristojavabelia tanevecuaajibiaexanaenexa tajaneconi. ¹⁰ Tavajënaeyabelia bitso jitsipajë daxitacuenecua tayapëtaenexa pacuenia Cristo jamatabëcueneitsi. Pasaëta Dioso matacotatsi Cristo petëpaejavavecua, bajarapaasaë jitsipajë tayajavaponaponaenexa. Cristo pijajivitonëxaenë, jitsipajë xanë ata tanebejiobiaexanaenexa, tatëpaenexa ata. ¹¹ Tsipaji xanë ata copiaevetaponaponajë Dioso tanematacotsinexa tatëpaejavavecua.

Pacuenia Pablo najamatabëcuenesaëta xaniavaetsia Cristo peyajavaponaponaenexa, pepatsinexa Dioso pijanacuayabetsia, yabara pelivaisi

¹² Xanë apo jamatabëjumaitsinë: “Daxita baja Dioso pejitsipaecuenia toexanajë. Nejamatabëcuenecaëjëpa baja tajumecovënëtsinexa pacuenia Dioso netojitsipa taexanaenexa,” apo jamatabëjanë. Itsiata tavajënaeyabelia tanejamatabëcuene caëjëpaponanexa, caasaënë tsaponapona taexanaejava pacuenia Dioso netojitsipa. Jitsipajë bitso tajamatabëcuenexanepanaejava tavajënaeyabelia pacuenia Dioso netojitsipa. Tsipaji bajarapacuenie yabara Jesucristo nesivatëpa. ¹³ Tajamonae, apo jamatabëjumaitsinë: “Xanë rabaja nejamatabëcuenecaëjëpa Dioso tajumecovënëtsinexa pacuenia Dioso netojitsipa taexanaenexa,” apo jamatabëjanë. Jume baja cajena. Mapacuenia najamatabëxainajëje. “Daxita xua exanajë Jesús pelivaisi tajumecovënëtsivajënaeya, nacofënëtajë baja,” jamatabëjanë. Najamatabëcuenesaëtajë xaniavaetsia tatoponaponaenexa Dioso. Pacuenia pebitsojinaenë pecujinaejinaejava penayacobijavata, nasaëta pepatsinexa petocaëjëtsijavabeliatsi, bajara pijinia pacuenia xanë ata najamatabëcuenesaëtajë xaniavaetsia tatoponaponaenexa Dioso. Tavajënaeyabelia najamatabëcuenesaëtajë taexanaenexa pacuenia Dioso netojitsipa. Bajarapacuenia najamatabëxainaponaponajë. ¹⁴ Pacuenia pecujinaejinaenë

nasisaëta penacanabinexa perajutsinexatsi premiovënëjava, bajara pijinia pacuenia najamatabëcuenesaëtajë. Najamatabëcuenesaëtajë xaniavaetsia tatoponaponaenexa Dioso tanerajutsinexa athëbëtatsia taxainaejavanexa tayajavaponaponaexae Jesucristo.

¹⁵ Daxita pamonaë xaniavaetsia jumecovënëtavanapa Dioso, bajarapamonaë ata benajamatabëcuenesaëtavanapa xaniavaetsia petojinavanapaenexa Dioso. Itsa abaxë paxamë saicaya itsajamatabëcuene paxainame, nexata Dioso pacayapëtaeyaexanaena saicaya abaxë itsajamatabëcuene panexainaejava. ¹⁶ Nexata palivaisivajëto jumeyapëtanetsi pexaniajailivaisi, bajarapalivaisi bejumecovënëtavanapatsi. Becaasaë tsavanapaetsinua vajavajënaeyabelia orijibia vajajumeyapëtaeponaenexa.

¹⁷ Tajamonaë, pacuenia baja pacatsitaponaponatsi, bajara pijinia pacuenia paxamë ata pajinavanapare. Itsamonaë paxamëyajuvënëvi xaniavaetsia jinavanapa pacuenia pacatsitaponaponatsi. Bajarapamonaë ata panaitaxutocaevetsianame paxamë ata xaniavaetsia panejinavanapaenexa pacuenia bajarapamonaë jinavanapa.

¹⁸ Ayaibitsaëttoxaneto paxamëyajuvënëvi apo jumecovënëtsi Jesucristo cruzata pesivatëpaejavatsi pecapanepaenexatsi. Bajarapamonaë yabara pacatsipaebatsi baja anijatonë. Itsiata icatsia aeconoxae yaitaxutonueya pacatsipaebiansi. ¹⁹ Mapanacuaje pecopiarucaematacabita, bajarapamonaë Dioso verebiabiansi. Tsipaji bitso jitsipa pijacuata penatojitsipaecuenia pexanavanapaenexa. Piauracuene exanabiabi ata, jamatabëcuenenavëxaniabiaya jamatabëjumaitsi tsabiabi: “Pexaniacuene bitso vaxaitsi exanavanapatsi,” jamatabëjai tsabiabi bajarapamonaë. Ëmapanacuapijicuene saya sivanajamatabëxainabiaba. ²⁰ Vaxaitsi baja cajena jinavanapaenatsi Dioso pijanacuatatsia. Bajaraxuata copiaevetavanapatsi vajatuxanenë Jesucristo pepatsijavatsica vajanacapanepaenexa Dioso pijanacuayabetsia. ²¹ Vajaperabëto vereverecaena. Itsiata vajatuxanenë Jesús nacaperabëitothianaena. Nexata pacuenia bajaraponë perabëitsi athëbëtatsia, bajara vaxaitsi ata perabëitsitsi tsane. Nexata pasaëta Jesús caëjëpatsi pitorobinexa daxitacuene, bajarapasaëta nacaperabëitothianaena.

4

Pacuenia vaxaitsi besivabarëyatsi tsabiabi vajatuxanenë Jesucristo yabara pelivaisi

¹ Tajamonaë bitso patacaasivavi, pacaitaxanatsi. Bitso jamatabëpacatanetsi. Bitso pacasivajamatabëcuenebarëyatsi. Tsipaji xaniavaetsia pajumecovënëtavanapame Jesús pelivaisi pacuenia baja pacatsipaebatsi. Pajamatabëcuenesaëmëre tsavanapae pacopatsinejevamë panejumecovënëtsijava Jesús pelivaisi.

² Papetirivamëbeje, Evodia Síntique, paxamëbeje pacatoyaquinatsibeje patacaitavetsinexabeje mapacueniaje. Pëtsa baja icatsia pematatsënëa namataenetsia panajumeanaenotamebeje. Panajamatabëcuenejëparebeje Jesús pelivaisi panejumecovënëtsivaxaëbeje.

³ Xamë ata xaniavaetsia taneyavenonaenëmë Dioso pijacuene tanacuenebijava, catoyaquinatsi. Jitsipajë neyavenonaenexa bajarapapetirivabeje, penabarajamatabëcuenexanepanaenexabeje namataenetsia icatsia penajumeanaenotsiyanivabeje. Bajarapovabeje bitso neyavenonabeje tatsipaebijava itsamonaëjavabelia pexaniajailivaisi pecapanepaelivaisinexatsi Diosojavabelia. Bajarapacuenia Clemente ata neyavenona. Itsamonaë ata patanajuanacuenebivi, bajarapacuenia neyavenona. Daxita baja bajarapamonaë vënërubena Dioso pijabaxutota, itsa pabaxutota vënëyaquinarubatsi pamonaë pexainaevinexa matabi apo pevereverecaëjava.

⁴ Jesús pelivaisi panejumecovënëtsivixae, pajamatabëcuenebarëyamëre daxitamatacabijavabelianexa. Icatsia pematatsënëa pacajumaitsi. ¡Pajamatabëcuenebarëyamëre tsavanapae! ⁵ Jamatabëcuenexanepanaëya xaniavaetsia pajinavanapaenename daxitajivi

papecajamatabëcuene yapëtaenexa. Tsipaji rabaja vajatuxanenë imoxoyo pevajënae pepatsinexatsica.

⁶ Pëtsa pajamatabëcuenebëjamë itsacuenejavayo ata yabara. Biji rajane pavajëre Dioso javabelia daxitacuenejavane yabara. Pexaniajamatabëcuenenua parajutabiabare Dioso papecayavenonaevanë yabara. ⁷ Nexata Dioso pacajamatabëjemayaexanaena panejamatabëcuenebëjaiyaniva. Pexaniacuene bitso bajarapajamatabëcuene. Dioso itsa nacajamatejemayaexana vajajamatabëcuenebëjaiyaniva, itsiata apo yapëtaetsi pacuenia nacajamatejemayaexana vajajamatabëcuenebëjaiyaniva. Dioso itsa pacajamatejemayaexanaena panejamatabëcuenebëjaiyaniva, nexata apo pajamatabëcuenebëjamë tsane. Jesucristo itsa pajumecovënëtanapame, daxitacuene yabara panenajamatabëxainaejava atavecua Dioso pacaevetsiana.

Pacuenia benajamatabëxainabiabatsi ëpexaniacuene yabara pelivaisi

⁸ Tajamonae, pecotocaevilivaisi pacatoyaquinatsi mapacueniaje. Panajamatabëxainabiabare ëpexaniajailivaisi yabara. Panajamatabëxainabiabarenua panenayaiyataecuene ata yabara. Panajamatabëxainabiabarenua xua xanepana paneexanavanapaenexa. Panajamatabëxainabiabarenua Dioso papecajamatabëcuene barëyayaexanaenexa. Panajamatabëxainabiabarenua xua jivi baracuaicuaijijitsia pexaniacuena. Panajamatabëxainabiabarenua daxita xua pexaniacuene. Panajamatabëxainabiabarenua xua yabara Dioso pacabarëyataejitsia.

⁹ Daxita pacuenia pacatsipaebatsi, pacuenia pacatsitaponaponatsinua, bajarapacuenia paexanavanapare. Nexata Dioso, ponë pacajamatejemayaexanaejitsia panejamatabëcuenebëjaiyaniva, pacayajavaponaponana.

Pacuenia Filipos tomarapijivi ofrenda tojebabiabatsi Pablonexa yabara pelivaisi

¹⁰ Vajatuxanenë bitso nejamatabëcuenebarëyayaexana. Tsipaji baja paxamë icatsia panesivanajamatabëxainame pataneyavenonaenexamë. Nexata baja icatsia ofrenda panetoitorobaremena. Bajayajebi apo panetoitorobi atamë ofrenda, itsiata paxamë yabara apo jamatabëjumaitsinë: “Apo jitsipae raeta icatsia taneyavenonaenexa bajarapamonae,” apo jamatabëjanë. Jume cajena. Yapëtaniji pacuenia picani jamatabëpanetoitorobi atamë ofrenda pataneyavenonaenexamë, itsiata apo pacacuenecaëjëpae patanetoitorobinexamë. ¹¹ Apo pacatoyaquinaetsi mapacueniaje ofrenda patanetoitorobivajënaeyamë bitso tanamatavenonaexae itsacuenejavayo. Dioso tanejamatejemayaexanaexae tajamatabëcuenebëjaiyaniva daxitacuene yabara, sivajamatabëcuenebarëyanë saya xuayovajëto xainajë. ¹² Yapëtaniji pacuenia ponaponajë, pamatacabi tsiquirijavayo xinae atanë. Yapëtanijinua pacuenia ponaponajë pamatacabi ayajava xainajë. Yapëtanijinua pacuenia jamatabëcuenebarëyanëjitsia daxitamatacabijavabelianexa. Nexata itsa xainajë daxita tanamatavenonaevaxi, barëyanë. Apo xinae atanë itsacuenejavayo ata, itsiata barëyanë tsabiabi. ¹³ Nejamatabëcueneecaëjëpa tanajamatabëcuenesaëtsinexa daxitacuene yabara. Tsipaji Cristo pesaëta nejamatabëcueneecaëjëpaeyaexana. ¹⁴ Itsiata baitsi jane paxamë pexaniacuene bitso panetoexaname itsa panetoitorobaremena bajarapaofrenda bitso tanamatavenonaevavata.

¹⁵ Payapëtaneme rabaja mapacuenije. Pamatacabi copiaya tsipaebanajetarucajë jivi pecapanepaelivaisinexatsi Macedonia nacujava, paxamë paFilipos tomarapijivimë panijanacuavecua itsa ponajë, paxamë panerajutame ofrenda pataneyavenonaenexamë. Itsatomarapijivi, Dioso pejumecovënëtsivi ata, apo nerajutsi ofrenda bajarapacuenia taneyavenonaenexa. Ëpaxamë itsiata paneyavenoname. ¹⁶ Nexata bajaraxuacujinae, itsa abaxë ponaponajë Tesalónica tomarata, panetoitorobabiabame icatsia ofrenda

anijatonë tanamatavenonabiabijavata. ¹⁷ Sivabarëyanë tsabiabi itsa panetoitorobabi-abame bajarapacuenia. Itsiata apo sivabarëyanë tsabiabi tanetoxanepanaexae bajara-pacuenia pataneyavenonaejavamë. Jume baja cajena. Biji rajane sivabarëyanë tsabiabi bajarapacuenia pataneyavenonaejavamë. Tsipaji juya paxinaejitsiamë Diosojavabelia papecarajutsijavanexa athëbëtatsia. ¹⁸ Nexata pitajë daxita patanetoitorobijavamë Epafroditota. Xainajë baja nexata bitso ayaijava, tanamatavenonaejava matatoxenetsia. Xua panetoitorobame ofrendacuenia, tsitapexaniacuenetsi Dioso. Bajaraxua Dioso sivajamatabëcuenebarëya. ¹⁹ TajaDioso bitso pexainaenë. Nexata pacarajutsiana daxita pacuenia panamatavenoname. Bajara pijinia pacuenia ayaijava Dioso pacarajutsiana Jesucristojavabelia xaniavaetsia panenajamatabëcuenecopatsixae. ²⁰ ¡Vaxa Dioso ayaijamatabëcuenenë daxitamatacabijavabelianexa! Bajara itsi tsane.

Pacuenia Pablo tonajumeitoroba Dioso pejumecovënëtsivi pebajacobinexatsi yabara pelivaisi

²¹ Nebajacobiana paxamëjavata daxita Jesús pelivaisi pejumecovënëtsivi, pamona Dioso pijajivi. Dioso pijajivi, pamona xanëjavata jinavanapa, pacabajacobalia.

²² Daxita Dioso pijajivi, mapatomarataje pejinavanapaevi, pacabajacobalia. Romanonacua pepo pevetsinë pijabota penacuenebivi ata bitso pacabajacobalia.

²³ Pacatovajëtabiabatsi Diosojavabelia, vajatuxanenë Jesucristo papecayavenonabi-abinexa. Bajara itsi tsane.

Mapabaxutoje San Pablo toyaquina Colosas tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Colosas tomarapijivijavabelia, yabara pelivaisi

¹⁻² Xanë Pablonë, Dioso tanetojitsipaexae, nitapeta Jesucristo pijaapóstolenëxanë. Nexata Jesucristo nitoroba jivi pexanialivaisi tatsipaebaponaenexa. Pacatoyaquinatsi mapabaxutoje xaniavaetsia Jesucristo pelivaisi panejumecovënëtsivi, Colosas tomarata panejinavanapaevi. Vajabananë Timoteo ata pacajamatabënajina. Aeconoxae baja nacaemonaetsi, paxamë ata Jesús pelivaisi panejumecovënëtsixae. Pacatovajëtatsi vaxa Diosojavabelia papecaitaxutotsoniataenexa jamatabëcuenexanepanaeya panejinavana-paenexa.

Pacuenia Pablo Diosojavabelia tovajëtabiaba Colosas tomarapijivi, Jesús pelivaisi pejumecovënëtsivi, yabara pelivaisi

³ Paxanëbeje Timoteobeje pacatovajëtabiabatsibeje vajatuxanenë Jesucristo paxa Diosojavabelia. Nexata Diosojavabelia patacatovajëtsijavatabeje, paxamë yabara Diosojavabelia pajumaitsinëbeje tsabiabi mapacueniaje: “Pexaniajamatabëcuene pacarajutatsibeje. Tsipaji pexaniacuenia yavenonabiabame Colosas tomarapijivi,” pajanëbeje tsabiabi Diosojavabelia paxamë yabara. ⁴ Bajarapacuenia pajumaitsinëbeje tsabiabi tsipaji pacavënëlivaisitanetsibeje xaniavaetsia panejumecovënëtavanapaejava Jesús pelivaisi. Pacavënëlivaisitanetsibejenua paneasivatsavanapaejava daxita Jesús pelivaisi pejumecovënëtsivi. ⁵ Bajara pajamatabëcueneitsimë tsipaji baja xaniavaetsia payapëtaneme xua Dioso pacatoxaniavaeta athëbëtatsia papecarajutsinexa. Pamatacabi ajena pajumetaneme pexanialivaisi papecacapanepaelivaisinexa, bajarapamat-acabi payapëtaneme baja xua Dioso pacatoxaniavaeta athëbëtatsia papecarajutsinexa. ⁶ Bajarapapexanialivaisi pajumetaneme baja pamatacabi copiaya Epafra pacatsipaeba Dioso papecaasivajava. Bajarapalivaisi baja aeconoxae daxitanacuanëjava yacaëjëpaponä. Nexata daxitanacuanëjava, pamonaë jumecovënëtapona bajarapalivaisi, copataponä baja perujujamatabëcuenemi. Nexata baja pejanajamatabëcuene xainaponä. Bajarapamonä pejanajamatabëcuene xainaponä, pacuenia paxamë ata pejanajamatabëcuene paxainame pamatacabi ajena pajumecovënëtame bajarapalivaisi. Bajara pamatacabijavaverenacujinae paxamë baja payapëtaeponame pepacuene Dioso papecaitaxutotsoniataejava. ⁷ Dioso papecaitaxutotsoniataejava, copiaya baja cajena vajaasivanë Epafra pacatsipaeba. Bajaraponë Jesucristo xaniavaetsia petonacuenëbinë. Nexata bajaraponë panetoitorobaremena pataneyavenonaenexabeje Dioso patatonajuanacuenëbinexa majotaje. ⁸ Nexata pamatacabi Epafra pata paxanëbejjavaberena, panetsipaebabeje xaniavaetsia panejinavanapaejava. Panetsipaebabejenua Espiritu Santo papecayavenonaejava paneasivanexa itsamonä ata.

⁹ Nexata patacavënëlivaisitaecujinaebeje, pacatovajëtabiabatsi Diosojavabelia. Pacatovajëtabiabatsi xua Dioso pacatojitsipa papecayapëtaeyaexanaenexa. Nexata Dioso itsa pacayapëtaeyaexana xua Dioso pacatojitsipa, bajaraxua paneexanavanapaenexa. Bajarapacuenia pacatovajëtabiabatsi daxitacuene, Dioso pijacuene ata, Dioso papecayapëtaeyaexanaenexa. ¹⁰ Pacatovajëtabiabatsinua xaniavaetsia jivi panetsitajinavanapaenexa, Dioso papecasivabarëyanexa pexaniacuene paneexanabiabixae. Pacatovajëtabiabatsinua Diosojavabelia panevajënaeyabelia Dioso panejamatabëcueneyapëtaeponaenexa. ¹¹ Pacatovajëtabiabatsinua Dioso papecajamatabëcuene asaëyaexanaenexa pesaëta. Nexata bajayajebi itsamonä

pacaitsacueniababiabi ata, pacajamatabëcuenecaējēpaena paneajamatabëcuenesaē tsavanapaejava. ¹² Pacatovajētabiabatsinua paxamē panejumaitsabiabinexa Diosojavabelia: “Xanepana rabaja. Tshipaji bitso pexaniacuene panetoexaname,” panejaitabiabinexa Diosojavabelia. Bajarapacuenia pajumaitsimē tsabiabi tsane tshipaji bajaraponē pacavecuaajibiaexana baja panijaneconimi. Nexata baja Dioso aneconijibia pacatane. Nexata paxamē ata Dioso pacarajutsiana xua xaina pijajivi perajutsinexa pijapenivenivenaenacuatatsia. ¹³ Vaxaitsi bajayata apo yapētaetsi pexaniajailivaisi. Nexata picani bepitaquirinacuata vajajinavanapaevi. Tshipaji picani dovathi pijajivitsi tsavanapae. Pibisiacuene exanabiabatsi pacuenia dovathi nacaitoroba. Itsiata baja aeconoxae Dioso nacapita dovathivecua. Nexata baja Dioso pexēnato, piasivanē, pijajivitsi nacaexana. ¹⁴ Nacasivatēpa Cristo. Nexata baja Cristo pejamatabëcueneta Dioso nacavecuaajibiaexana vajaneconimi. Nexata baja aneconijibia jinavanapatsi.

Pacuenia Dioso nacavecuaajibiaexana pibisiacuene vajaexanaeneconimi Cristo vanacasivatēpaexae yabara pelivaisi

¹⁵ Dioso cajena caeto ata apo vajataenē. Itsiata Dioso pexēnato, Cristo, naexana mapanacuataje. Cristo paxa jēpa. Dioso daxitacuene mapanacuata pexanaevajēnaeya ata, Cristo baja cajena ponapona athëbētatsia. ¹⁶ Cristo baja cajena exana daxitacuene Dioso pejamatabëcueneta. Athëbētatsia xua apo taetsi, Cristo exana. Daxitacuene xua tanetsi mapanacuata ataje, Cristo exana. Cristo daxitacuene itsa exana, ángelevi ata exana. Angelevi penamatacaitorobivinexa ata, Cristo exana. Bajarapacuenia Cristo ángelevi ata exana pacuenia Cristo jitsipa petonacuenebavana-paenexatsi. ¹⁷ Daxitacuene Cristo pexanaevajēnaeya ata, Cristo baja cajena athëbētatsia ponapona. Daxitacuene xua Cristo exana, bajaraxua pexanaecujinae abaxē Cristo pesaēta mapamatacabita ataje tsitecanajetaruca. ¹⁸ Cristo baja cajena pevetsinē daxita Dioso pejumecovēnētsivi. Nexata daxita Dioso pejumecovēnētsivi Cristo penamatacaitorobinē. Cristo pejamatabëcueneta daxita Dioso pejumecovēnētsivi Dioso pijajivi exanatsi. Cristo taxuxuaba jivi petēpaecujinae icatsia jivi piasaējavanexa. Bajaraxuata itsamonae ata icatsia asaē tsane petēpaecujinae. Nexata Cristo daxitajivi matatoxenetsia bitso ayaijamatabëcuenenē. ¹⁹ Bajarapacuenia Cristo bitso ayaijamatabëcuenenē tshipaji Dioso pexēnato tojitsipa pejamatabëcuenējēpaenexatsi. ²⁰ Daxitajivi, pamonaē jinavanapa mapanacuataje, naneconita Diosojavabelia. Pamonaē ata jinavanapa athëbētatsia, naneconita Diosojavabelia. Nexata Dioso jitsipa daxita bajarapamonae pebarajamatabëcuenexanepanaenexa. Nexata Dioso itorobica Cristo mapanacuayabet-sicaje cruzata pesivatēpaenexa daxita bajarapamonae. Nexata daxita bajarapamonae Dioso aneconijibia tane Cristo pesivatēpejamatabëcueneta. Bajaraxuata Dioso baja barajamatabëcuenexanepana bajarapamonae.

²¹ Paxamē picani abaxē bajayata Diosovecua naxuabiaya pajinavanapame. Dioso bepapijavajabitsaēmē tsavanapae pibisiacuene paneexanavanapaexae. Itsiata baitsi jane aeconoxae baja Dioso pacabarajamatabëcuenexanepana. ²² Dioso baja aeconoxae pacabarajamatabëcuenexanepana. Tshipaji Jesucristo bepejibicuenia cruzata pacasivatēpa. Nexata baja Dioso pacavecuaajibiaexana pibisiacuene paneexanaeneconimi. Bajaraxuata aeconoxae baja Dioso papijajivimē. Dioso baja pitabarata aneconijibia pajinavanapame. ²³ Nexata panevajēnaeyabelia aneconijibia Dioso pitabarata panejinavanapaenexa, asaēyata pajumecovēnētavanapare Cristo papecasivatēpaejava panijaneconi yabara. Palivaisi baja pajumecovēnētame papecacapanepaelivaisinexa, pētsa pacopatame panejumecovēnētsijava. Bajarapalivaisi baja yacaējēpa daxitanacuanējjava petsipaebaponaējava. Xanē ata, Pablonē, tsipaebaponajē bajarapalivaisi.

Pacuenia Pablo itorobatsi peyavenonaenexa Dioso pejumecovēnētsivi yabara pelivaisi

²⁴ Xanë Pablonë, majotaje penaneconitsivi pejebabiabibota, naneconitsiaponaponajë paxamë apo pajudíovimëjava Cristo pelivaisi patacatsipaebaponaexae. Itsiata jamatabëcuenebarëyanë tsaponaponae, nebejiobiaexanabiabi ata. Pacuenia Cristo bejiobiaexanatsi pijajivi pecapanepaenexa, bajara pijinia pacuenia xanë ata itsamonae nebejiobiaexanabiaba. Bजारapacuenia Dioso netocopata tanebejiobiaexanabiabinexa tavajënaeyabelia tajamatabëcuenesaëtsaponaenexa Dioso tajumecovënëtsijava. Nexata tanesivaajamatabëcuenesaënexa daxita pamonaë jumecovënëta Cristo pelivaisi. ²⁵ Dioso netocopata tayavenonaenexa Dioso pijajivi, pamonaë Cristo pelivaisi jumecovënëta. Bजारaxuata paxamë ata pacayavenonatsi. Tsipaji Dioso nitoroba daxitajivi xaniavaetsia tatsipaebaponaenexa pexanialivaisi, Dioso pejumelivaisi. ²⁶ Dioso nitoroba jivi tatsipaebaponaenexa pacuenia Dioso tajëvelia najamatabëxaina pijajivi pecapanepaenexa. Dioso baja cajena nacua pexanaevajënaeya ata, najamatabëxaina pacuenia exanaejitsia pijajivi pecapanepaenexa. Abaxë picani itsajivi ata Dioso apo yapëtaeyaexanaë bजारapacuenia. Itsiata baitsi jane aeconoxae baja Dioso tocopata daxita Dioso pejumecovënëtsivi peyapëtaenexa pacuenia Dioso exana pijajivi pecapanepaenexa. ²⁷ Dioso tojitsipa apo judíovi ata peyapëtaenexa pexanialivaisi, palivaisi picani itsajivijavabelia ata Dioso apo yapëtaeyaexanaë. Bजारapalivaisi mapacuenia itsije. Cristo cajena pacatsijamatabëca papecayajavaponaponae. Bजारaxuata nexata payapëtaneme itsamat-acabi Cristo paneyajavajinavanapaejavanexa Dioso pijapenivenivenaenacuatsia.

²⁸ Paxanë patanecaëjëpacuenia, daxitajivi xaniavaetsia patsipaebaponajë Cristo pelivaisi. Pamuxujiobaponajëna xaniavaetsia daxita bजारapamonae pejumecovënëtsinexa Cristo pelivaisi. Bजारapacuenia pamuxujiobaponajë pevajënaeyabelia pijamatabëcuenesaëtsaponaenexa Cristo pelivaisi pejumecovënëtsijava. ²⁹ Bजारaxuata asaëyata Dioso tonacuenebaponajë daxita pasaëta Cristo nerajutapona.

2

¹ Jitsipajë paneyapëtaenexa pacuenia bitso pacasivanajamatabëxainatsi. Nexata asaëyata Diosojavabelia pacatovajëtabiabatsi. Laodicea tomarapijivi ata tovajëtabiabajë. Itsamonae ata, pamonaë abaxë apo netae, bजारapamonae ata tovajëtabiabajë. ² Asaëyata Diosojavabelia pacatovajëtabiabatsi papecajamatabëcuene asaëyaexanaenexa Cristo pelivaisi panejumecovënëtsijava. Pacatovajëtabiabatsinua najamatabëcuenejëpaeya panejinavanapaenexa namataenetsia panenasivaxae. Pacatovajëtabiabatsinua panejamatabëëthëtota ayailivaisi paneyapëtaeponaenexa xaniavaetsia itsa payapëtaneme Cristo. Bजारapacuenia pacatovajëtabiabatsi xaniavaetsia paneyapëtaenexa pexaniajailivaisi, palivaisi picani Dioso apo yapëtaeyaexanaë itsajivijavabelia ata, baitsi jane baja Cristo pelivaisi. ³ Cristo pelivaisi xaniavaetsia itsa yapëtanetsi, nexata yapëtanetsi pacuenia Cristo nacatojitsipa vajatonacuenebavanapaenexa. ⁴ Bजारapacuenia pacatsipaebatsi itsajivi ata papecayamaxëitorobianiva, penajumetsënëtsilivaisi itsa pacatsipaeba, bepexaniajailivaisi itajara panejumetaeyaniva. ⁵ Apo pacayajavaponaponae atatsi, itsiata pacajamatabënajinabiabatsi. Jamatabëcuenebarëyanë itsa pacavënëlivaisitanetsi najamatabëcuenejëpaeya panejinavanapaejava. Jamatabëcuenebarëyanëna itsa pacavënëlivaisitanetsi panevajënaeyabelia panejamatabëcuenesaë tsavanapaejava panejumecovënëtsijava Cristo pelivaisi.

⁶ Bजारaxuata pacuenia baja copiaya panajamatabëcueneocopatame vajatuxanenë Jesucristojavabelia papecacapanepaenexa Diosojavabelia, bजारapacuenia tsiteca panajamatabëcueneocopatavanapare. Panajamatabëcueneocoparenua panevajënaeyabelia Cristo papecayavenonaponae daxitacuene yabara. Nexata pajinavanapae name Cristo papecatojitsipaenexa. ⁷ Paxamë xaniavaetsia panajamatabëcueneocopare Jesucristojavabelia papecayavenonaenexa. Nexata Jesucristo pacajamatabëcueneasaëyaexanaena. Nexata papexaniajailivaisi itsamonae

pacatsipaeba, tsiteca pajumecovënētavanapaename. Pajumaitsimënu tsabiabi tsane Diosojavabelia: “Xanepana rabaja. Tsipaji bitso pexaniacuene panetoexaname,” pajamë tsabiabi tsane Diosojavabelia.

Pacuenia Cristo pijajivi pejanajamatabëcuene xainavanapa yabara pelivaisi

⁸ Xania. Nayajivitaeya pajinavanapare. Pëtsa panacopatame papecaya-maxëitorobinexa pamona tsipaebavanapa saicayalivaisi Dioso pejumelivaisivecua. Bajarapamona apo tsipaebapona Cristo pelivaisi. Saya tsipaebapona mapanacuapijivi penajamatabëxainaelivaisi, penajumetsënëtsilivaisi, saya natsiquejemalivaisi.

⁹ Pacuenia Dioso jamatabëcueneitsi, Cristo itajëta mapanacuata itsa ponapona. ¹⁰ Pacuenia Dioso jamatabëcueneitsi, bajara paxamë ata itsamatacabi pajamatabëcueneitsimë tsane. Tsipaji Cristo payajavajinavanapame. Bajaraponë bitso ayajamatabëcuenenë. Caëjëpatsi pitorobinexa daxitacuene. Caëjëpatsinua pitorobinexa daxitanacuanë pevetsivi ata. ¹¹ Itsa panajamatabëcueneocopatame Cristojavabelia, nexata baja Dioso pacavecuajibiaexana pibisiacuene paneexanaeconimi papecacapanepaenexa. Pibisiamatabëcuene ata baja pacavecuajibiaexana. Nexata pacuenia judíovi pijacuenia perabëcaucubatsi, bajarapacuenia paxamë apo pacaperabëcaucubi pibisiacuene paneexanaeconimi Dioso papecavecuajibiaexanaenexa. Jume baja cajena. Biji rajane Cristo papecasivatëpaejava panejumecovënëtsixae, Dioso pacavecuajibiaexana pibisiacuene paneexanaeconimi. ¹² Itsa pacabautisaba, merata pacabubutaxuareca. Nexata papecabautisabijavata itsa pacabubutaxuareca, Dioso pacatane Cristo bepapecayajavamëthëtsivi itsa mëthëtatsi petëpaecujinae. Nexata papecabautisabijavata, papecabubutaxuabicujinaereca icatsia itsa pacamatacotsina menevetsina, Dioso pacatane Cristo icatsia bepapecayajavaasaëvi petëpaecujinae icatsia itsa asaë. Bajarapacuenia Dioso pacatane tsipaji Cristo yabara pajamatabëjumaitsimë mapacueniaje: “Xaniajai rabaja. Dioso pesaëta Cristo asaëyaexanatsi petëpaecujinae,” pajamatabëjamë. ¹³ Paxamë picani abaxë bajayata bepanetëpaevi. Diosovecua naxuabiaya pajinavanapame pibisiacuene paneexanaeconi yabara. Bajarapacuenia picani Diosovecua naxuabiaya pajinavanapame apo pajudíovixaemë. Itsiata baitsi jane aeconoxae baja Cristo payajavajinavanapame papecacapanepaenexa. Tsipaji baja Cristo pejamatabëcueneta Dioso pacavecuajibiaexana pibisiacuene paneexanaeconimi. ¹⁴ Bitso picani pibisiacuene exanavanapatsi. Tsipaji apo exanaetsi pacuenia Dioso pejumelivaisita nacaitoroba. Itsiata baitsi jane Dioso baja nacavecuajibiaexana daxita bajarapaneconimi Cristo cruzata vajanacasivatëpaexae. ¹⁵ Bajarapacuenia Cristo cruzata vajanacasivatëpaexae, Cristo baja cueneamoneyaba dovathi. Tsipaji bajarapacuenia Cristo itsa nacasivatëpa cruzata, asaëjibiaexana dovathi, pijajivi yajava. Pacuene dovathi pijajivi barëevetaponapona pitorobinexa, bajarapacuenia Cristo cueneamoneyaba. Nexata Cristo daxitajivijavabelia tsitanacueneitajëta pecueneamoneyabijava dovathi, pijajivi yajava.

Pacuenia Pablo muxujioba Jesús pelivaisi pejumecovënëtsivi pejamatabënajinavanapaenexa Cristo pecaejava athëbëtatsia yabara pelivaisi

¹⁶ Cristo baja pecueneamoneyabixae dovathi, pëtsa panacopatame itsajivi ata papecapaniitavetsinexa panexaejava, panematavëjëapaejava ata. Itsamonae abaxë tsiteca jumecovënētavanapa perujulivaisi, Dioso Moiséspijinëta penajumecopatsilivaisi. Nexata pacuenia itorobatsi bajarapalivaisita, fiestanë exanabiaba caevai canacujitsia. Itsafiestanë exanabiaba caejumeto canacujitsia, pejanajumeto itsa ecaica. Itsafiestanë exanabiaba penacueraevetsimatacabianë canacujitsia. Pëtsa pajumecovënëtame, itsajivi pacajunatsi ata panenaponaenexa bajarapafiestanëjavabelia. ¹⁷ Bajayata picani jivi ponabiaba bajarapafiestanëjavabelia. Tsipaji palivaisi bajayata Dioso Moiséspijinëta najumecopata, itorobatsi penaponabiabinexa bajarapafiestanëjavabelia. Itsiata baja Cristo

itsa patsica mapanacuayabetsicaje, Cristo baja copiarucaeyaexana bajarapacuenemi. Nexata pacuenia Cristo nacaitoroba, bajarapacuenia exanavanapaenatsi. ¹⁸ Pëtsa pajumecovënētame itsamonae pacajumaitsi ata mapacueniaje: “Beveliajamatabëcuenevi panataema. Pavajëtabiabarenu a angelevijavabelia Diosovecua panenaxuabiyani. Bemajitsinaebota baja cajena pataniji bajarapacuenia vajaexanabiabinexa,” pacajai ata, pëtsa pajumecovënētame. Bajarapamonae beayajamatabëcuenevi nataeyabiaba pejamatabëcuenevijilivaisi saya petsipaebaponaejava yabara. ¹⁹ Bajarapamonae Cristo apo pejumecovënëtsivi. Daxita vaxaitsi Cristo vajajumecovënëtsivi, Cristo pijajivitsi. Nexata Dioso nacatane caenë Cristo bepeperabëtotsi. Caejivi canacujitsia peperabëtota vinamataropotsiarubenaponareca. Bajara pijinia pacuenia vaxaitsi ata caenë Cristo bepeperabëtotsi Dioso nacatane. Bajarapacuenia Dioso nacatane Cristo pejamatabëcueneta. Nexata Dioso nacajamatabëcueneyavenonapona. Nacajamatabëcuene vitsabiaexanaponanua pacuenia Dioso nacatojitsipa.

²⁰ Itsamonae jamatabëcuenenavëxaniabiaya jumai tsabiabi: “Vajanacacapanepaenexa Diosojavabelia, pexaniacuene toexanavanapaenatsi itsamonaejavabelia. Jumecovënëtavanapaenatsinua daxita pacuenia nacaitoroba mapanacuapijivije,” jai tsabiabi itsamonae jamatabëcuenenavëxaniabiaya. Itsiata baitsi jane paxamë baja payapëtaneme bajarapalivaisi apo pexaniajailivaisicuene. Cristo itsa tëpa, paxamë ata, Cristo bepapecayajavatëpaevi, Dioso pacatane. Nexata baja picani paxamë mapanacuapijicuene yabaraje apo bepasivanajamatabëxainamë. ¿Detsa nexata xujajitsia itsiata pajumecovënëtavanapame mapanacuapijivi jamatabëcuenenavëxaniabiaya papecatsipaebilivaisije? ²¹ Bajarapamonae jumai tsabiabi: “Dioso pitabarata panenajamatabëcuene bijianaeyaniva, pëtsa pajayatame maxuaje. Pëtsa paxaneme maxuaje. Pëtsa papitame panecobeta maxuaje,” jai tsabiabi bajarapamonae. ²² Bajarapamonae xua itaveta itsamonae pejayatsiyani, pexaeyaniva ata, pepitsiyani ata, bajarapacueni daxita vereverecaena. Bajarapacuenia pitavetsicuene saya jivi pejamatabëcuenevijilivaisita itaveta. ²³ Pamonaie bajarapacuenia pacaitavetapona, bepacsita peyapëtaevi itajara. Tsipaji bajarapamonae jamatabëpacaitoroba panevajëtabiabineca angelevijavabelia. Bajarapamonae pacaitorobanua beveliajamatabëcuenevi panenataenexa. Pacaitavetanua panijacuata panenatojitsipaecuene paneexanaeyaniva. Bajarapamonae papecaitavetsicuene pajumecovënëtaponae atamë tsipae, itsiata apo pacajamatabëcueneyavenonae tsipae papecavecuaajibiaexanaenexa papibisiajamatabëcuene paxainame panejamatabëëthëtota.

3

¹ Cristo petëpaeujinae Dioso icatsia itsa asaëyaexanatsi, paxamë ata Cristo bepapecayajavaasaëyaexanaevi, Dioso pacatane. Bajaraxuata athëbëpijicuene pajamatabënajinavanapare, Dioso pijanacuapijicuene. Athëbëtatsia Cristo eca Dioso pemuxuneneta, pecujanenia, penajuaevetsinexabeje daxitacuene. ² Pasivanajamatabëxainabiabare ëathëbëpijicuene. Pëtsa pasivanajamatabëxainabiabame mapanacuapijicueneje. ³ Cristo itsa tëpa, paxamë ata Cristo bepaneyajavatëpaevi, Dioso pacatane. Aeconoxae baja paxamë Cristo papecayajavaponaponaejava, itsamonae apo tae. Apo yapëtaenua. Pacuenia Cristo Dioso yajavaponapona, bajara pijinia pacuenia paxamë ata Dioso payajavajinavanapame. ⁴ Cristo baja cajena nacayajavaponapona. Vaxaitsi ata pijinia Cristo yajavajinavanapatsi. Pamatacabi Cristo icatsia athëbëvetsica patsianica, paxamë ata paxainaname penivenivenaecotia Cristo papijajivixaemë.

Pacuenia Dioso pejumecovënëtsivi perujujamatabëcuenemi baja copata pejanajamatabëcuene pexainanexa yabara pelivaisi

⁵ Mapacuenia pajamatabëjumaitsimëre tsavanapaeje: “Tajaperujujamatabëcuenemi baja copatajë. Nexata baja apo jitsipaenë icatsia taxainaejava perujujamatabëcuene,

mapanacuapijijamatabëcueneje. Apo jitsipaenë baja itsapetiriva tajaitsijava tajavave-cua. Apo jitsipaenë baja piauracuene ata taexanaponaejava. Apo jitsipaenë baja pibisiacuene ata tanajamatabëxainaejava. Apo jitsipaenë baja pibisiajamatabëcuene ata tajitsipaejava. Apo jitsipaenë baja ayaijava taxainaejava tanaxainaeyabinexa. Daxita baja bajarapajamatabëcuenemi copatajë. Nexata baja matavëjëa apo jitsipaenë bajara-pajamatabëcuene taxainaejava,” pajamatabëjamëre tsavanapae. Tsipaji itsa pajitsipae-jitsipame ayaijava panexainaejava panenaxainaeyabinexa, nexata pacopabijitsipame Dioso panejitsipaejavami. Tsipaji Diosovecua bitso pajitsipaejitsipame mapanacuapi-jicueneje. Nexata pajamatabëcuenejëpaejitsipame pamonaë vajëcabiaba jumapecataeya pexanaenëanëjavabelia. Tsipaji bajarapamonaë Diosovecua jitsipa jumapecataeya pexanaenëanë. ⁶ Daxita pamonaë Dioso apo pejumecovënëtsivi, bajarapitsipibisi-acuene pexanavanapaevi, Dioso ayaicuenia naneconitsiaexanaenatsi. ⁷ Paxamë ata picani daxita bajarapitsicuene paexanavanapame Dioso panejumecovënëtsivajënaeya. ⁸ Nexata baja aeconoxae pacopabare daxita mapajamatabëcueneje. Paneanaepanabi-abijava itsamonaëjavabelia, pacopabare. Pibisiacuene paneexanaenexa panenaja-matabëxainabiabijava ata, pacopabare. Pibisiacuena itsamonaë panebaracuaicuajitsabiabijava ata, pacopabare. Itsa pacuaicuajiamë, pëtsa pacuaicuajiamë pibisiali-vaishi. ⁹ Pëtsa namataenetsia panatsipaebame penajumetsënëtsilivaishi. Perujuja-matabëcuene picani bajayata panexainaexae, bajarapacuenia paexanavanapame. It-siata baja aeconoxae pacopabame bajarapaperujujamatabëcuenemi. ¹⁰ Nexata baja pejanajamatabëcuene paxainavanapame. Panevajënaeyabelia payapëtaeponame paneex-avanapaenexa pexaniacuene. Dioso, ponë pacaexana, pacuenia jamatabëcueneitsi, bajara pijinia paxamë ata pajamatabëcueneitsimëre tsavanapae. ¹¹ Daxita pamonaë Dioso pejumecovënëtsivi, pejanajamatabëcuene xaina. Nexata daxita Dioso pejume-covënëtsivi Dioso najëpaeya tane. Judíovi, apo judíovi ata, daxita bajarapamonaë Dioso najëpaeya tane. Pamonaë peperabëcaucubivitsi, pamonaë ata apo peperabëcaucubivitsi, daxita bajarapamonaë Dioso najëpaeya tane. Saicayanacuapijivi ata, pamonaë ata da-jubicuenia canajetatsi itsamonaëjavabelia amoneya petonacuenebavanapaenexa, pa-monaë ata apo canajetsitsi itsamonaëjavabelia amoneya petonacuenebavanapaenexa, daxita bajarapamonaë Dioso najëpaeya tane. Tsipaji bajarapamonaë Cristo tsija-matabëcatsi peyajavajinavanapaenexa caejivi canacujitsia. Nexata bajarapamonaë xaina baja pajamatabëcuene Dioso tane bitso penamatamotsicuene mapanacuataje.

¹² Dioso bitso pacaasiva. Pacaitapetanea papijajivinexamë. Bajaraxuata paitaxutot-soniataeyabiabianame itsamonaë ata. Nexata ëpexaniajamatabëcueneta pajinavanapaename. Beveliajamatabëcuenevi nataeya pajinavanapaename. Pajamatabëcuenesaëmë tsavanapae tsane itsamonaë, bajayajebi pacaitsacueniababiabi ata. ¹³ Namataenetsia panajamatabëcueneayavenonare bajayajebi ata. Itsa pacaitsacueniaba itsajivi, bajarapa-jivijavabelia pabarajamatabëcuenexanepanare. Pacuenia paxamë ata Cristo pacabarajamatabëcuenexanepana pibisiacuene paneexanaevi ata, bajara pijinia pacuenia paxamë ata pabarajamatabëcuenexanepanare itsamonaëjavabelia. ¹⁴ Matavëjëa mapacuenia paexanavanapareje. Namataenetsia bitso panaasivamëre tsavanapae. Bajarapacue-nia nexata najamatabëcuenejëpaeya pajinavanapaename. ¹⁵ Pavajëtabiabare Diosojavabelia papecayavenonaenexa jamatabëcuenexanepanaeya panejinavanapaenexa. Ba-jarapacuenia panejinavanapaenexa, Dioso pacajunata caebitsaëto papecaexanaenexa Cristo yajava. Nexata Dioso itsa pacayavenona jamatabëcuenexanepanaeya panejina-vanapaenexa, pajumaitsimë tsabiabi tsane Diosojavabelia. “Xanepana rabaja. Tsipaji bitso pexaniacuene panetoexaname,” pajamë tsabiabi tsane Diosojavabelia.

¹⁶ Pavajëtabiabare Diosojavabelia Cristo pelivaishi itsamonaë papecatsipaebijava pa-pecajamatabëcueneenabiabinexa. Pavajëtabiabarena Diosojavabelia xaniavaetsia Dioso panejamatabëcueneypëtaenexa. Namataenetsia panatsipaebabiabare Cristo pelivaishi.

Namataenetsia panajamatabëcuene yavenonabiabarena paneajamatabëcuenesaënexa Cristo pelivaisi panejumecovënëtsijava. Daxita panejamatabëcuenevetsina pexaniajamatabëcuene rajutsiaya Diosojavabelia panaxëanabiabare vaji. Palivaisianë ata rubena Salmosbaxutota, panaxëanabiabare. Pavajianë ata rubena vajibaxutonëta, panaxëanabiabare. Pavajianë ata Espíritu Santo pejamatabëcueneta pacanaxëanaeyaexana, panaxëanabiabare. ¹⁷ Daxita xua paexanavanapame, paexanavanapare vajatuxanenë Jesucristo pejitsipaecuenia. Palivaisianë ata pacuaicuaijamë tsabiabi, pacuaicuaijamë tsane vajatuxanenë Jesucristo pejitsipaecuenia. Pexaniajamatabëcuene itsa parajutabiabianame vajatuxanenë Jesucristo paxa Diosojavabelia, Dioso papecayavenonabiabixae, Jesucristo pevënëta pexaniajamatabëcuene parajutabiabianame.

Pacuenia Pablo Dioso pejumecovënëtsivi muxujioba yabara pelivaisi

¹⁸ Paxamë papetiriavimë, pajumecovënëtabiabare pacuenia pacaitoroba paneamonajivi. Tsipaji bajarapacuenia vajatuxanenë pacatojitsipa paneexanavanapaenexa. ¹⁹ Paxamë pijinia papebijivimë, pasivamëre panijavajivi. Pëtsa anaeyacuenia paitorobabiabame panijavajivi. ²⁰ Paxamë pijinia papeximë, daxita xua paneaxajivi, paneenajivi ata, pacaitoroba paneexanaenexa, pajumecovënëtabiabare. Tsipaji bajarapacuenie vajatuxanenë sivabarëya. ²¹ Paxamë pijinia panexi panexinaevi, pëtsa panexi anaeya paitorobabiabame papecajumecovënëtabiabineza xua paitorobame. Tsipaji saya belia panexi jamatabëcuenefaefaenaajitsipa Dioso pejumecovënëtsijava. ²² Paxamë pijinia itsamonae papijajivimë, dajubicuenia papeccanajetsivi itsamonae amoneya panetonacuenebavanapaenexa. Pacuenia panijatuxanevi pacaitoroba, bajarapacuenia patonacuenebabiabare panijatuxanevi. Pëtsa matapania itsajota pacanaitaxutocaeveta panijatuxanevi, asaëyata patonacuenebame papecasivabarëyanexa panijatuxanevi panetonacuenebijava yabara. Biji rajane daxitamatacabi asaëyata xaniavaetsia patonacuenebabiabare. Panejamatabëcuenevetsina cuenejitsipaeya panijatuxanevi patonacuenebabiabare papecasivabarëyanexa vajatuxanenë. ²³ Daxita xua panijatuxanevi patonacuenebabiabame, jamatabëcuenebarëyaya patonacuenebabiabare panijatuxanevi. Xua panijatuxanevi patonacuenebabiabame, bajaraxua yabara pajamatabëjumaitsimëre tsabiabi mapacueniaje: “Xua tajatuxanenë tonacuenebajë, bajaraxua taniji Cristonexa betatonacuenebijava. Apo ëtajatuxanenënexa,” pajamatabëjamëre tsabiabi. ²⁴ Payapëtaneme rabaja mapacuenieje. Vajatuxanenë pacarajutsiana pacuene pijajivi toxaina perajutsinexa, baitsi matacabi apo pevereverecejava. Patonacuenebavanapame baja cajena Cristonexa. Bajara jane ponë pepacuene panijatuxanenë. ²⁵ Panejumecovënëre pacuenia pacaitorobatsi. Tsipaji pajivi pibisiacuene exana, bajarapajivi itsamatacabi Dioso naneconitsiaexanaenatsi pibisiacuene pexanaeneconi yabara. Pamatacabi Dioso daxitajivi naneconitsiaexanaena, paneconivajëto caejivi canacujitsia xainapona, bajarapaneconivajëtota Dioso naneconitsiaexanaponaena caejivi canacujitsia. Nexata itsajivi ata apo vecuapanepae tsane Dioso jivi penaneconitsiaexanaecuene.

4

¹ Paxamë papetuxanevimë, xaniavaetsia paevere panijajivi, papecatonacuenebabiabivi. Panajamatabënapitabiabare paxamë ata panijatuxanenë athëbëtatsia peecaejava.

² Daxita Dioso panejumecovënëtsivi icatsia pacatoyaquinatsi mapacueniaje. Diosojavabelia pavajëtabiabare ajamatabëcueneitatsacaya pajamatabëcuenemajitsinejevamë. Itsa pavajëtabiabianame Diosojavabelia, Dioso papecayavenonabiabijava yabara, pajumaitsimë tsabiabi tsane mapacueniaje: “Xanepana rabaja. Tsipaji bitso pexaniacuene panetoexaname,” pajamë tsabiabi tsane Diosojavabelia. ³ Itsa pavajëtabiabianame Diosojavabelia, paxanë ata panetovajëtabiabianame. Panetovajëtabiabianame Diosojavabelia

Dioso pataneyavenonaenexa nacuanë pevetsivi patanitavetsiyaniva jivi patatsipae-baponaejava Cristo pelivaisi. Pajitsipajë jivi patatsipaebinexa pacuenia Jesucristo patsica mapanacuayabetsicaje vajanacasivatëpaenexa pibisiacuene vajaexanaeneconi yabara. Bajarapalivaisi jivi tatsipaeabaponaexae, nenaneconitsiaexana. Nexata abaxë naneconitsiaya ponaponajë penaneconitsivi pejebabiabibota. ⁴ Cristo pelivaisi jivi itsa tsipaebabiabajë, jitsipajë jumenapebetsiaya tatsipaeabiabinexa. Nexata pane-tovajëtabiabanamenua Cristo pelivaisi jivi jumenapebetsiaya tatsipaeabiabinexa tane-jumeyapëtaenexa xaniavaetsia.

⁵ Paepatota pacatoxanepana pexanialivaisi, Cristo pelivaisi, panetsipaebinexa it-samonaejavabelia, patsipaeabiabare. Xaniavaetsianua patsitajinavanapare pa-monae Dioso apo pejumecovënëtsivi. Tsipaji rabaja imoxoyo pevajënae Cristo icat-sia pepatsijavanexatsica. ⁶ Daxita palivaisianë pacuaicuanetsipaebilivaisi. Panaja-matabëcuenevererenua xaniavaetsia panejumecanaviatsinexa caejivi canacujitsia ba-jarapamonae itsa pacayanijobapona Dioso pejumelivaisi yabara.

Pacuenia Pablo toyaquina pecopatsinexa baja petoyaquinaelivaisi mapabaxutotaje yabara pelivaisi

⁷ Vajabananë Tíquico, bitso vajaasivanë. Bajaraponë xaniavaetsia tonacuenebabi-aba vajatuxanenë. Vajatuxanenë pijacuene patonajuanacuenebajëbeje. Bajara-ponë pacatsipaebiana daxita pacuenia xanë ponaponajë. ⁸ Bajaraxuata bajaraponë pacatoitorobaliatsi papecatsipaebinexa pacuenia pajinavanapajë. Bajaraponë nex-ata itsa pacatsipaebiana, nexata panesivaajamatabëcuenesaëmë tsane. ⁹ Bajaraponë paxamëjavabelia yajavaponaejitsia vajabananë Onésimo. Bajaraponë Onésimo pani-jatomarapijinë. Tonacuenebabiaba xaniavaetsia vajatuxanenë. Bajaraponëbeje pacatsipaebiana daxita pacuenia Dioso pejumecovënëtsivi jinavanapa majotaje Roma tomarata.

¹⁰ Aristarcobeje naneconitsia paponaponajëbeje penaneconitsivi pejebabiabibota. Aristarco ata pacabajacobalia. Marcos ata, Bernabé pejuyapijinë, pacabajacobalia. Paxamë rabaja payapëtaneme pacuenia paexanaejitsiamë. Nexata Marcos itsa patsialia paxamëjavabelia, pacopiapitsianame xaniavaetsia. ¹¹ Pacabajacobalia Jesús ata, ponë itsavënë, Justo. Judíovi picani ayaibitsaëto Jesucristo pelivaisi jumecovënëta. Itsi-ata bajarapamonaeyajuvënëvi, caenëbeje saya, neyavenona vajatuxanenë pijacuene tatonacuenebijava. Neyavenona saya mapamatabëxëyoje. Aristarco, Marcos, Jesús. Bajara saya pamatabëxëyo neyavenona. Bajarapamonae bitso neyavenona. ¹² Epafra-ata, Cristo pijajivitonë, panijatomarapijinë. Bajaraponë ata pacabajacobalia. Bajara-ponë bitso pacatovajëtabiaba Diosojavabelia. Pacatovajëtabiaba ajamatabëcuenesaëya panejumecovënëttavanapaenexa Dioso pejumelivaisi. Pacatovajëtabiabanua xaniavaet-sia paneexanabiabinexa pacuene Dioso pacatojitsipa. ¹³ Pacatsipaebatsi baja cajena pacuenia Epafra-ata pacatovajëtabiaba Diosojavabelia bitso papecajamatabënajinaexae. Bajara pijinia pacuenia bitso tovajëtabiaba Dioso pejumecovënëtsivi, pejinavanapaevi Laodicea tomarata. Bitso tovajëtabiabanua Hierápolis tomarata pejinavanapaevi ata. ¹⁴ Vajaasivanë Lucas, ponë jivi vaëbabiaba, bajaraponë ata pacabajacobalia. De-masvënëne ata pacabajacobalia.

¹⁵ Nebajacobi vajamonae, daxita Dioso pejumecovënëtsivi, Laodicea tomarata pe-jinavanapaevi. Nebajacobi Ninfas ata. Pamona-ata nacaetuatabiaba bajaraponë pijabota, nebajacobi. ¹⁶ Itsa baja paveretame panelebijava mapabaxutoje, patoitoro-bianame Laodicea tomarapijivijavabelia penalebinexa bajarapamonae ata. Bajara-pamonae ata tatoyaquinaebaxuto juya pacatoitorobiana panenalebinexa paxamë ata. ¹⁷ Arquipojavabelia pajumaitsimë tsane mapacueniaje: “Dioso pecatocopatsijava net-onacuenebinexa, verere xaniavaetsia,” pajamë tsane.

¹⁸ Xanë Pablonë, pacatoyaquinatsi baja cajena tacobeta mapalivaisiyoje patanebajacobinexamë. Pajamatabënjinanapare penaneconitsivi pejebabiabibota taponaponaejava. Pacatovajëtabiabatsi Diosojavabelia papecayavenonabiabinexa Dioso. Bajara itsi tsane.

Mapabaxutoje San Pablo copiaya toyaquina Tesalónica tomarapijivijavabelia

Pacuenia Pablobana, Silvanobana, Timoteobana toyaquina mapabaxutoje Dioso pejumeconvënëtsivijavabelia yabara pelivaisi

¹ Xanë, Pablonë, Silvano, Timoteo, mapamatabëxëyoje pacatoyaquinatsi mapabaxutoje. Pacatoyaquinatsi Dioso panejumeconvënëtsivi, paTesalónica tomarapijivimë. Panenajamatabëcuenecopatsivi baja vaxa Diosojavabelia, vajatuxanenë Jesucristojavabelia ata. Pacatovajëtatsi vaxa Diosojavabelia papecaitaxutotsoniataenexa jamatabëcuenexanepanaeya panejinavanapaenexa.

Pacuenia Tesalónica tomarapijivi Dioso pejumeconvënëtsivi xaniavaetsia Dioso jumeconvënëtsia jinavanapa yabara pelivaisi

² Itsa pavajëtabiabajë Diosojavabelia, pexaniajamatabëcuene parajutabiabajë Diosojavabelia paxamë yabara. Pacatovajëtabiabatsi Diosojavabelia daxitamatacabi canacujitsia Dioso papecayavenonabiabinexa. ³ Itsa pacatovajëtabiabatsi vaxa Diosojavabelia, panajamatabënapitabiabajë Dioso pinijicuenia panetonacuenebavanapaejava panenajamatabëcuenecopatsixae Diosojavabelia. Panajamatabënapitabiabajënuua bitso pinijicuenia panejitsipaejava Dioso. Paxamë rabaja pajamatabëcuenesaëmë tsavana-pae panecopiaevetavanapaejava vajatuxanenë Jesucristo icatsia pepatsijavanexatsica. ⁴ Tajamonae, Dioso baja cajena pacaasiva. Payapëtaniji baja cajena Dioso papecaitapetsijava papijajivinexamë. ⁵ Bajayata itsa pacatsipaebatsi mapapexanialivaisije Diosojavabelia papecacapanepaelivaisinexa, saya patacuibovojotota apo pacatsipaebitsi. Jume baja cajena. Biji ra Espiritu Santo pesaë yajava pacatsipaebabiabatsi. Nexata baja payapëtaneme palivaisi pacatsipaebatsi, pexaniajailivaisicuene. Payapëtanemenua pacuenia paxanë xaniavaetsia panajinavanapajë paxamëjavata patanitaxutua ajamatabëcuenesaënexamë.

⁶ Pacuenia paxanë pajinavanapajë, pacuenia Jesús ata ponapona, bajarapacuenia paxamë ata pajinavanapame. Barëyaya baja pajumeconvënëtavanapame patacatsipae-bilivaisi Espiritu Santo papecatsijamatabëecaexae. Bajarapacuenia barëyaya pajumeconvënëtavanapame patacatsipaebilivaisi, itsamonae bitso pacabejiohiaexanabiabi ata. ⁷ Bajarapacuenia panejinavanapaejava daxita Dioso pejumeconvënëtsivi, Macedonia nacuapijivi, Acaya nacuapijivi ata, itsa pacavënëlivaisitane, bajarapamonae ata yapëtane bajarapacuenia xaniavaetsia Dioso petojinavanapaenexa. Nexata bajarapamonae ata xaniavaetsia jinavanapa pacuenia paxamë pajinavanapame. ⁸ Itsiata ëMacedonia nacuapijivi, ëAcaya nacuapijivi ata, bajarapacuenia xaniavaetsia panejinavanapaejava, apo pacavënëlivaisitae. Tajë nacuapijivi ata pacavënëlivaisitane panenajamatabëcuenecopatsijava Diosojavabelia. Bajarapacuenia itsa pacavënëlivaisitane, bajarapamonae ata yapëtane baja Jesús pelivaisi pexaniajailivaisicuene. Bajaraxuata paxanë apo pacavajunupaebitsi daxita bajarapamonaejavabelia. Tsipaji baja yapëtane. ⁹ Biji rajane bajarapamonae pijacuata panetsipaeba paxamë xaniavaetsia patanecopiapitsijavamë pamatacabi pcanasivaxainatsi. Paxamë picani jumapecataeya pexanaenëanëjavabelia panavajëcabiabame. Itsiata baja aeconoxae pacopatame jumapecataeya pexanaenëanëjavabelia panenavajëcabiabijavami. Nexata baja pepo Diosojavabelia panajamatabëcuenecopatame. Patonacuenebavanapame pepo Dioso, ponë piasaëtsaponaponaenë daxitamatacabijavabelianexa. Bajarapacuenia paxamë yabara panetsipaeba baja cajena daxita bajarapamonae. ¹⁰ Bajarapamonae panetsipaebanua panecopiaevetavanapaejava Jesús, Dioso pexënato, athëbëvetsica

icatsia pepatsijavanexatsica. Bajaraponë, Jesús, Dioso baja cajena asaëyaexanatsi petëpaecujinae. Jesús nacacapanepaena pibisiacuene vajaexanaeneconi yabara Dioso vajanacananeconitsia exanaejavaminexavecua.

2

Pacuenia Pablo nacueneba Tesalónica tomarata yabara pelivaisi

¹ Tajamonaë, apo panacueratsinë itsa pacasivaxainatsi. Bajarapacuenë paxamë pani-jacuata payapëtaneme. ² Paxamë baja cajena payapëtaneme mapacuenëje. Paxanëbeje Silasbeje patapatsivajënaebeje paxamëjavabelia, Filipos tomarata panenaneconitsiaex-anabeje itsaneconi apo paxainae atanëbeje. Panebejiobiaexanabejenua bajarapamonae. Itsiata baitsi jane Dioso pataneyavenonaexaebeje, ajumeurajibia pacatsipaebatsi pexanialivaisi Diosojavabelia papecacapanepaelivaisinexa. Pacatsipaebatsi bajarapalivaisi, patanitoyavi picani apo panetocopatsi ata patacatsipaebinexa.

³ Palivaisi pacatsipaebatsi, pexaniajailivaisi cajena. Apo penajumetsënëtsilivaisi. Apo pacatsipaebitsi bajarapalivaisita patacayamaxëitojorobinexa. ⁴ Biji ra Dioso paneitoroba. Panetocopatanua jivi patatsipaebinexa pexanialivaisi pecapanepaelivaisinexatsi Diosojavabelia. Bajaraxuata bajarapalivaisi jivi itsa patsipaebaponajë, apo patsipaebaponaenë saya jivi patanebarëyataenexa bajarapalivaisi patatsipaebijava yabara. Biji ra bajarapalivaisi jivi patsipaebaponajë Dioso patanebarëyataenexa.

Tsipaji Dioso vajanacajamatabëcueneyapëtaenë. ⁵ Paxamë baja cajena payapëtaneme mapacuenëje. Caeto ata paxanë itsalivaisi apo pacabarëcuaicuaijaiti saya jema bajarapalivaisi yabara patanebarëyataenexamë. Yamaxëitojorobiaya livaisi apo pacatsipaebitsi palata patacavecuapitsinexa. Dioso baja cajena daxita bajarapacuenë panejamatabëcueneyapëtane.

⁶ Cristo patanitorobixae, panejamatabëcuenecaëjëpa picani patacaitorobinexa pataneyaiyataenexamë. Itsiata baitsi jane caeto ata apo pacaitorobitsi pataneyaiyataenexamë. Apo paitorobinë itsamonae ata pataneyaiyataenexa.

⁷ Biji rajane pacuenia petiriva asivaya xaniavaetsia baevetaponapona pexi, bajara pijinia pacuenia paxanë ata asivaya xaniavaetsia pacaevetavanapatsi. ⁸ Bitso pacaasivatsi. Nexata pacatsipaebatsi Dioso pejumelivaisi. Bitso patacaasivaxae, itsamonae jamatabëpanebejejebabiabi ata, itsiata apo pacopatsinë patacayavenonaponaejava.

⁹ Tajamonaë, panecuenecanaëjëre mapacuenëje. Pamatacabi paxamëjavata pajinavanapajë, pinijicuenia panacuenebabiabajë. Pinijicuenia panacuenebabiabajë patajacuata patanaevetsinexa. Pacatsipaebaponatsinua pexanialivaisi, palivaisi Dioso nacayapëtaeyaexana. Paepatota pacuenesajinajë, panatonacuenebabiabajë matababita, meravì ata. Bajarapacuenia panatonacuenebabiabajë itsanë ata paxamëyajuvënënë petoayapëbejeyanivatsi patanevetaponaejava.

¹⁰ Paxamë baja cajena paneyapëtaneme pacuenia pajinavanapajë. Dioso ata paneyapëtane. Paxamë baja cajena paneyapëtaneme paxanë pibisiacuene apo pataexanaevi. Paxamë baja cajena paneyapëtaneme paxanë bitso Dioso patajumecovënëtsivi. Paxamë baja cajena paneyapëtaneme paxanë itsacueneneconiyo ata apo paxainanë, paneconi yabara pananeconitsijitsianë paxamëjavata itsa pacatsipaebavanapatsi Dioso pejumelivaisi. ¹¹ Paxamë baja cajena paneyapëtaneme paxamë pacaenëmë canacujitsia patacamuxujiobaponaejava panejamatabëcuenesaënexa Diosojavabelia. Pacuenia pexi pexainanë nacoximuxujioba, bajara pijinia pacuenia paxanë ata pacamuxujiobatsi. ¹² Pacaitorobatsi baja cajena xaniavaetsia panetojinavanapaenexa Dioso papecabarëyataenexa. Dioso baja cajena pacajunata daxitacuene papecabarëevetsinexa pijapenivenivenaenacuatatsia.

¹³ Itsa pacatsipaebatsi Dioso pitorobilivaisi, panenamuxunaevetame. Nexata panejumecovënëtame patacatsipaebilivaisi. “Xaniajai baja cajena. Dioso pejumelivaisi nacatsipaeba,” panejamatabëjaixae, panejumecovënëtame. Apo pajumetaemë saya

bejivitonë pejamatabëcueneta pepaebilivaisi. Xaniajai cajena. Dioso pejumelivaisi pacatsipaebaponatsi. Bajarapalivaisi panejumecovënëtsixae, panevajënaeyabelia paexanavanapame pacuenia Dioso pacaitoroba. Bajaraxuata paxamë yabara pexaniajamatabëcuene parajutabiabajë Diosojavabelia. ¹⁴ Tajamonae, pacuenia Judea nacuata Dioso pejumecovënëtsivi bejiobiaexanatsi pijanacuapijivi, judíovi, bajara pijinia pacuenia pacabejiobiaexana panijanacuapijivi. ¹⁵ Pacuenia bajarapajudíovi pijasalinaivimi bajayata beyaxuabapona Diosojumepaebivimi profetavi, bajara icatsia pacuenia bajarapamonaemi pemomoxi beyaxuaba pepo petuxanenë Jesús. Nexata Jesús papijajivixaenë, paxanë ata bajarapamona panecapitsapa judíovi penacaetatabiabibovecua. Dioso apo pejitsipaecuene bajarapajudíovi exanapona. Bajarapajudíovi daxitajivi bitso itoya. ¹⁶ Paxanë pexanialivaisi ita patsipaebabiabajë apo judíovijavabelia, apo judíovi ata pecapanepaenexatsi Diosojavabelia, nexata bajarapajudíovi panejumeitavetabiaba. Bajarapacuenia patanejumeitavetabiabixae, pibisiacuene pexanaeneconi pematatsënëa ayaineconi natsixaina Diosojavabelia. Nexata baja aeconoxae bajarapamonaecopiapatatsi ayaicuenia Dioso penaneconitsiaexanaematacabinexatsi.

Pacuenia picani icatsia Pablo jamatabëtane Tesalónica tomarapijivi yabara pelivaisi

¹⁷ Tajamonae, patacavecuaponaecujinae, caematacabibeje apo pacatae atatsi, itsiata pacajamatabënjavanapatsi. Bitso picani icatsia jamatabëpaponajë paxamëjavabelia patacataenexa. ¹⁸ Jamatabëpaponajë picani paxamëjavabelia. Xanë Pablonë, jamatabëponabiabajë picani. Itsiata dovathi apo panecopatsi. ¹⁹ Vajatuxanenë Jesucristo icatsia ita patsianica, pacavajunupaebianatsi bajaraponëjavabelia xaniavaetsia Dioso panejumecovënëtsijava. Bitso pacasivajamatabëcuenebarëya tsanetsi. ²⁰ Paxamë yabara baja cajena pexaniajamatabëcuene parajutabiabajë Diosojavabelia. Pacasivajamatabëcuene barëyatsinua tsabiabi.

3

¹ Bajayajebi baja cajena apo pacataetsi. Nexata baja belia apo panajamatabëcuene saëtaponaejitsipaenë matavëjëa pataevetaponaejava patacataenexa. Nexata baja panajamatabëxainajëbeje ëTimoteo pataitorobinexabeje, peponaenexa paxamëjavabelia papacataenexa. Paxanëbeje Silvanobeje, Atenas tomarata panacopatsianajëbeje. ² Nexata baja pacatoitorobatsibeje vajabananë Timoteo. Timoteobeje baja cajena Dioso pata-tonajuanacuenebinëbeje, jivi patatsipaebaponaenexabeje pexanialivaisi, Cristo pelivaisi. Pacatoitorobatsibeje Timoteo papecayavenonaenexa, papecajamatabëcuene asaëyaexanaenexa Dioso panejumecovënëtsijava yabara. ³ Pacatoitorobatsibeje Timoteo papecayavenonaeya tsipaebabiabinexa pexanialivaisi, caenë ata paxamëyajuvënënë Dioso pejumelivaisi pejumecovënëtsijava pecopabiyanima, itsamonae ita bejiobiaexanaponatsi. Paxamë baja cajena payapëtaneme Dioso vajanacatocopatsijava itsamonae vajanacabejiobiaexanaponaenexa. ⁴ Pamatacabi abaxë pacayajavajinavanapatsi, tajëvelia baja cajena pacatsipaebabiabatsi itsamonae papecabejiobiaexanaponaejavanexa Dioso papijajivixaemë. Nexata jane baja bajarapacuene aeconoxae pacatocopiapata. ⁵ Bajaraxuata baja apo najamatabëcuene saëtaponaejitsipaenë matavëjëa taevetaponaejava patacataenexa. Nexata baja itorobajë Timoteo peponaenexa paxamëjavabelia papecataenexa pacuenia pajumecovënëtavanapame Dioso pitorobilivaisi. Xanë picani paxamë yabara jamatabëjumaitsinë: “Dovathi meta bajarapamona jamatabëcuenejëtatsi. Othopaica meta baja. Nacueratajë meta baja bajarapamonaevavata pexanialivaisi tatsipaebabiabijava,” jamatabëjanë picani paxamë yabara.

⁶ Timoteo nexata ita parena paxamëjavaverena, Tesalónica tomaraverena, panetsipaebabeje pexanialivaisi. Xaniavaetsia pina Dioso pajumecovënëtavanapame. Paxamë pina pasivamë tsavanapae itsamonae ata. Panejamatabënjavanapame

pina pexaniajamatabëcuenia. Bitso pina jamatabëpanetaneme picani pacuenia paxanë ata jamatabëpacatanetsi picani. ⁷ Tajamonae, panetocopiapata rajane baja pibisiacuenia itsamonae patanebejiobiaexanaponaenexa. Itsiata baitsi jane panajamatabëcuenesaëttavanapajë paxamë yabara. Panajamatabëcuenesaëttajë itsa pacavënëlivaisitanetsi asaëya Dioso panejumecovënëtsijava. ⁸ Itsa pacavënëlivaisitanetsi asaëya Dioso panejumecovënëtsijava, nexata pacasivanajamatabëcuenesaëttatsi. ⁹ Nexata pexaniajamatabëcuene parajutajë Diosojavabelia paxamë yabara. Pexaniajamatabëcuene parajutajë Diosojavabelia bitso patacasivajamatabëcuenebarëyaxae Dioso pitabarata. ¹⁰ Maticabita, meravi ata, daxita patajamatabëëthëtovetsina pavajëtabiabajë Diosojavabelia patanetocopatsinexa icatsia pataponaenexa paxamëjavabelia patacataenexa. Pacatovajëtabiabatsinua Dioso papecayapëtaëyaexanaenexa palivaisi abaxë pacatosaica xaniavaetsia panejumecovënëtsinexa Dioso pejumelivaisi.

¹¹ Pavajëtajë vaxa Diosojavabelia, vajatuxanenë Jesucristojavabelia ata, pataneyavenonaenexa pataponaenexa paxamëjavabelia. ¹² Pacuenia paxanë pacaasivatsi tsavanapae, bajarapacuenia paxamë ata caejivi canacujitsia panevajënaeyabelia namataenetsia panenasivanexa, pacatovajëtatsi Diosojavabelia papecayavenonaenexa. Pacatovajëtatsi Dioso papecayavenonaenexa itsamonae ata paneasivanexa. ¹³ Pacatovajëtatsi Dioso papecajamatabëcuene asaëyaexanaenexa, jamatabëcuenexanepanaëya panejinavanapaenexa. Nexata paneconijibimë tsane. Paneconijibimë tsane Dioso pitabarata panenubenaëjavata, pamatacabi vajatuxanenë Jesús, daxita pijajivi yajava, patsianica.

4

Pacuenia Dioso pitabarata xaniavaetsia bejinavanapatsi Dioso vajanacasivajamatabëcuenebarëyanexa yabara pelivaisi

¹ Tajamonae, nexata pinijicuenia pacamuxujibatsi. Vajatuxanenë Jesús pejamatabëcueneta pacaitorobatsi xaniavaetsia panejinavanapaenexa. Pacatsipaebatsi rabaja cajena pacuenia pajinavanapaejitsiamë Dioso papecasivajamatabëcuenebarëyanexa. Bajarapacuenia panevajënaeyabelia xaniavaetsia pajinavanapare daxitamatacabijavabelianexa.

² Payapëtanemenua baja cajena palivaisi vajatuxanenë Jesús pejamatabëcueneta pacaitorobatsi panejumecovënëtsinexa. ³ Dioso raja jitsipa xaniavaetsia panetoinavanapaenexa ëponënexa. Dioso raja pacatojitsipa panecopabinexa pibisiacuenepanevitota paneexanaëjava. ⁴ Dioso raja pacatojitsipa pacaenëmë canacujitsia paneypëtaenexa mapacuenëje. Petiriva itsa papitame panijavanexa, xaniavaetsia paevere. Payaiyataemanua. ⁵ Pëtsa petiriva papitame pibisiacuenesaya panevitota paneexanaenexa bajarapovajavabelia pacuenia Dioso apo pejumecovënëtsivi baexana. ⁶ Dioso cajena apo jitsipae itsanë ata pevitota pibisiacuenepexanaenexa itsanë pijavajavabelia. Vajatuxanenë cajena pinijicuenia naneconitsiaexanaena daxita pamonaexana bajarapacuenë. Bajarapacuenë yabara imata baja cajena pacatsipaebatsi pamatacabi abaxë pajinavanapajë paxamëjavata. ⁷ Dioso baja cajena nacajunata ëpexaniacuenë vajaexanavanapaenexa. Dioso apo nacajunatsi pibisiacuenë vajaexanavanapaenexa. ⁸ Itsamonae apo panejumecovënëtsi patatsipaebilivaisi. Bajarapamonae itsa apo panejumecovënëtsi paxanë, apo jumecovënëtsi Dioso, ponë nacarajuta Espiritu Santo.

⁹ Paxamë rabaja namataenetsia panaasivamë tsavanapae itsamonae Dioso panejumecovënëtsivijavabelia. Dioso baja cajena pacayapëtaëyaexana bajarapacuenia panenasivanexa. Bajaraxuata apo namatavenonaenë baja patacatoyaquinaenexa patacayapëtaëyaexanaenexa bajarapacuenë. Tsipaji baja payapëtaneme. ¹⁰ Xaniajai rabaja. Pasivamë tsavanapae daxita vajamonae, Macedonia nacujava pejinavanapaeivi. Itsiata icatsia pacaitorobatsi namataenetsia bitsoyo orijibia panenasivanexa. ¹¹ Pacuenia

baja cajena copiaya pacaitorobatsi, bajarapacuenia jamatabëcuenexanepanaeya paji-navanapare. Èpanijacuene saya paexanare panejamatabëitonotsiyaniva itsamonaevjav-abelia. Panijacuata panatonacuenebare bajarapacuenia panenaevetavanapaenexa. ¹² Bajarapacuenia nexata Dioso apo pejumecovënëtsivi pacayaiyataena. Nexata apo pacatosaïcae tsane itsacueneyavayo ata panenamatavenonaeyava.

Pacuenia pepo petuxanenë Jesús icatsia patsijitsiatsica yabara pelivaisi

¹³ Tajamonae, pacatojitsipatsi xaniavaetsia paneyapëtaenexa pacuenia itsamatacabi itsijitsia Dioso pepua pejumecovënëtsivi petëpaevi. Pacatsipaebatsi baja cajena bitso panenajamatabëxainaeyaniva itsa pacavecuatëpa itsajiviyo. Pacatsipaebatsi baja cajena bitso panenajamatabëxainaeyaniva, pacuenia bitso banajamatabëxaina Dioso apo pejumecovënëtsivi itsa vecuatëpatsi itsajiviyo. Bajarapamonae jamatabëcuenenavëxaniabiaya bajumaitsi: “Petëpaevi rabaja peponaxuabi,” bajai Dioso apo pejumecovënëtsivi. ¹⁴ Vaxaitsi baja cajena jumecovënëtatsi Jesús vajanacasivatëpaejava. Jesús vajanacasivatëpaeçujinae, Dioso icatsia asaëyaexanatsi petëpaejavavecu. Dioso icatsia itsamatacabi asaëyaexanaena daxita pamona Dioso pepua pejumecovënëtsivi petëpaevimi. Bajarapalivaisi vaxaitsi baja jumecovënëtatsi.

¹⁵ Palivaisi pepo petuxanenë Jesús netsipaeba, bajarapalivaisi pacatsipaebijitsiatsi. Vaxaitsi abaxë mapanacuata vajaasaëtsavanapaevi pamatacabi pepo petuxanenë Jesús icatsia patsianica. Vaxaitsi athëbëabetsia apo namataxainaetsitsia tsane. Petëpaevimi rajane copiaya namataxainaenia. ¹⁶ Angelevi penamatacaitorobinë vavajai tsaxuabi tsane. Dioso pijatrompeta najumetsiana. Pepo petuxanenë jane baja pijacuata patsianica athëbëvetsica. Nexata pamona Dioso pepua pejumecovënëtsivi tēpa, bajarapamonae asaëyaexanaenatsi petëpaejavamivecu. ¹⁷ Bajaraxuacujinae vaxaitsi, abaxë mapanacuata vajaasaëtsavanapaevi bajarapamatacabita, itarërëbotatsia nacacaetuatsiania petëpaevimi yajava. Caxitajarabianatsi jane baja athëbëtatsi pepo petuxanenë Jesús. Nexata jane baja daxitamatacabijavabelianexa yajavajinavanapaenatsi bajaraponë. ¹⁸ Bajaraxuata panajamatabëcuenesaëtavanapare mapalivaisitaje.

5

¹ Tajamonae, itsiata apo panamatavenonaenë patacatoyaquinaenexa patacayapëtaeyaxanaenexa pamatacabita, paepatota ata, copiapatsijitsia daxita bajarapacuenie. ² Payapëtaneme baja cajena pepo petuxanenë Jesús icatsia pepatsijavanexatsica. Paepatota apo vajënaeevetsitsi, jemata patsianica. Pacuenia penacobetoxotsinënexa meravai bapata itsajota apo jamatabënajinaetsi, bajarapacuenia jemata patsianica pepo petuxanenë Jesús. ³ Pamatacabita jivi jumai tsaponae tsane: “Daxitanacuanëjava baja cajena xanepana. Daxitajivi xaniavaetsia jinavanapa,” jai tsane, bajarapaepatota jemata tocopiapatsianatsi Dioso apo pejumecovënëtsivi peverebiabinexatsi. Nexata acuenebi tsane Dioso apo pejumecovënëtsivi pevecuarëcëpecaenexa bajarapacuenie. Pacuenia petiriva, penacoxitsiva, itsa vixanotatsi penacueto pevecuanaexanaenexatsi, acuenebi pevecuanajetabajiravijava bajarapavixae, bajara pijinia itsane pamona Dioso apo pejumecovënëtsivi. ⁴ Tajamonae, paxamë baja apo pajamatabëcueneitaquirimë. Pacuenia Dioso apo pejumecovënëtsivi ajamatabëcueneitaquiri, bajarapacuenia apo pajamatabëcueneitaquirimë. Pepo petuxanenë Jesús pepatsimatacabinexatsica pacopiaevetavanapame. Nexata pamatacabi pepo petuxanenë patsianica, apo pajamatabëcuenenabenajacemë tsane. Pacuenia penacobetoxotsinë itsa pata, basivajamatabëcuenenabenajacatsi, apo paitsimë tsane. ⁵ Tsipaji baja daxita paxamë pexanialivaisita pacajamatabëcueneitayota. Nexata baja daxita vaxaitsi pitaquirijamatabëcuene apo xainaetsi. ⁶ Bajaraxuata nexata vaxaitsi apo bejamatabëcuenemajitsitsi. Pacuenia Dioso apo pejumecovënëtsivi jamatabëcueneitsi,

bajara apo bejamatabëcueneitsitsi. Biji rajane jamatabëcueneaitavaya bejinavanapatsi. Nayajivitaeya bejinavanapatsinua pibisiacuene vajaexanaeyaniva. ⁷ Pamonae jamatabëcueneaitaquiri, jamatabëcuenemajitabiaba. Aitajibi tsabiabinua meravi. ⁸ Itsiata baitsi jane vaxaitsi baja pexanialivaisita nacajamatabëcueneitayota. Nexata nayajivitaeya jinavanapatsi pibisiacuene vajaexanaeyaniva. Najamatabëcuenecopatatsi baja ëDiosojavabelia. Asivatsi tsavanapae Dioso. Itsamonae ata asivatsi tsavanapae. Copiaevetavanapatsi Cristo vajanacacapanepaenexa Diosojavabelia. Bajarapacuenia itsa copiaevetavanapatsi Cristo vajanacacapanepaenexa Diosojavabelia, nexata dovathi pejamatabëcuenevecua nayajivinajamatabëcuenexatatatsi Dioso pejumelivaisita. Nexata pacuenia vajabitsaënë nayajivinaxatata piatajajava, namataxatatanua piatajajava pejorojoronaeyanivatsi pijavajabitsaënë, bajara vaxaitsi ata itsitsi dovathi vajanacayamaxëitojorobianiva. ⁹ Dioso apo nacaitapetsi vajanacananeconitsiaexanaenexa pibisiacuene vajaexanaeneconi yabara. Biji rajane Dioso nacaitapeta vajanacacapanepaenexa pibisiacuene vajaexanaeneconivecua pepo petuxanenë Jesucristo pejamatabëcueneta. ¹⁰ Jesucristo baja cajena nacasivatëpa vajanacayajavaponaponaenexa vajaasaëtsavanapaevi mapanacuataje. Vajatëpaecujinae ata, Dioso pijanacuatatsia Cristo nacayajavaponaponaena. ¹¹ Bajaraxuata pacuenia baja namataenetsia panajamatabëcueneasaëya exanaponame, bajarapacuenia panevajënaeyabelia tsiteca paexanavanapare.

Pacuenia Pablo Dioso pejumecovënëtsivi muxujioba yabara pelivaisi

¹² Tajamonae, pinijicuenia pacamuxujiobatsi paneyaiyataenexa pamonaë paxamë tuatuajëta Dioso tonacuenebavanapa. Bajarapamonae Dioso pitorobicueniatsi pacaevetavanapa. Pacamuxujiobabiabanua. ¹³ Payaiyataema bajarapamonae. Asivaya pataema. Tsipaji bajarapamonae xaniavaetsia Dioso tonacuenebavanapa. Jamatabëcuenexanepanaeya panajuajinavanapare.

¹⁴ Pacaitorobatsinua panemuxujiobinexa pamonaë piafaetabivi. Pamonaë pijinia jamatabëcuenecuerana itsamonae bepejiobiaexanaponaexaetsi Dioso pejumecovënëtsijava yabara, pajamatabëcueneasaëyaexanare. Payavenonare pamonaë jamatabëcuenefaefaena Dioso pejumelivaisivecua. Itsa pamuxujiobianame bajarapamonae, itsa pamuxujiobianamenua itsamonaejavabelia ata, ajamatabëcuenesaëya pamuxujiobianame bajayajebi pacopatsinejevamë.

¹⁵ Pëtsa bajarapamonaejavabelia pibisiacuene panamatamoexaname, copiaya pibisiacuene pacaexanae ata. Biji pajamatabënajinavanapare pexaniacuene namataenetsia panenatoexanaponaenexa. Pajamatabënajinavanapare daxitajivijavabelia ata pexaniacuene panetoexanaenexa.

¹⁶ Daxitamatacabi pajamatabëcuenebarëyamëre tsavanapae. ¹⁷ Daxitamatacabi Diosojavabelia pavajëtabiabarë pacopatsinejevamë. ¹⁸ Daxita pacuene apo panejitsipaecuene ata, Dioso itsa pacatocopata papecatocopiapatsinexa, nexata itsa pacatocopiapata bajarapacuenë, itsiata pexaniajamatabëcuene parajutabiabianame Diosojavabelia bajarapacuenë yabara. Bajarapacuenia paneexanavanapaenexa, Dioso pacatojitsipa Jesucristo papijajivixaemë.

¹⁹ Espíritu Santo itsa pacajamatabëcueneitoroba itsacuenejavayo paneexanaenexa, pëtsa pajamatabëjumaitsimë: “Apo exanaenë tsane bajarapacuenia,” pajamatabëjamë pëtsa. ²⁰ Pëtsa panamuxujematame Espíritu Santo peyajavacuaicuajiaivi, Dioso pejumelivaisianë pepaebivi. ²¹ Nexata pacuenia bajarapamonae pacaitoroba panejumecovënëtsinexa, copiaya pajaire Dioso pejumelivaisibaxutota paneyapëtaenexa. Nexata xaniajai bajarapacuenia Dioso pejumelivaisibaxutota itsa jumaitsi, bajarapacuenia paexanare. ²² Daxita xua pibisiacuene, panayajivitaema.

²³ Dioso baja cajena vajanacajamatabëcuenexaniavaetsinë. Bajaraponë pibisiacuene paneexanaeneconimi pacavecuaajibiaexanaena. Dioso evetsiana panejamatabëcuene,

paneperabëto ata, pibisiacuene paneexanaeyaniva. Bajarapacuenia Dioso pacaevetsiana matapania vajatuxanenë Jesucristo icatsia pepatsimatacabitsicajavabelianexa. ²⁴ Bajarapacuenia Dioso pacaevetsiana, ponë pacajunata papexinexamé. Dioso cajena pacatoexanaena daxita pacuenia najumecapanepaeya pacajumaitsi.

Pacuenia Pablo jamatabënajina Tesalónica tomarapijivi, pacuenia ata tovajëta Dioso peyavenonaenexatsi, yabara pelivaisi

²⁵ Tajamonae, Diosojavabelia panetovajëtabiabare.

²⁶ Asivaya nebajacobiana daxita bajarajotalia Dioso pejumecovënëtsivi.

²⁷ Pacaitorobatsi Dioso pejamatabëcueneta. Patsimumulebianame mapabaxutoje daxita Dioso pejumecovënëtsivi pejumetaenexa.

²⁸ Pacatovajëtabiabatsi Diosojavabelia vajatuxanenë Jesucristo papecayavenonabinexa.

Mapabaxutoje San Pablo cotocaevi toyaquina Tesalónica tomarapijivijavabelia

Pacuenia icatsia Pablobana, Silvanobana, Timoteobana, toyaquina mapabaxutoje Dioso pejumecovënëtsivijavabelia yabara pelivaisi

¹ Xanë Pablonë, Silvano, Timoteo, mapamatabëxëyoje pacatoyaquinatsi mapabaxutoje. Pacatoyaquinatsi Dioso panejumecovënëtsivi, paTesalónica tomarapijivimë. Panenajamatabëcuenecopatsivi baja vaxa Diosojavabelia, vajatuxanenë Jesucristojavabelia ata. ² Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

Pacuenia Dioso naneconitsiaexanaena pibisiacuene pexanaevi pamatacabi Cristo icatsia patsianica yabara pelivaisi

³ Tajamonae, panevajënaeyabelia bitso orijibia panajamatabëcuenecopataponame Diosojavabelia. Pacaenëmë canacujitsia namataenetsia panaasivamënuu tsavanapae. Bajaraxuata daxitamatacabi paxamë yabara pajumaitsinë tsane Diosojavabelia: “Xanëpana rabaja. Pexaniacuena yavenonaponame Tesalónica tomarapijivi,” pajanë tsane. ⁴ Diosojavabelia pajamatabëcuenesaëmë tsaponae itsamonae pinijicuenia pacabijataeyabiabi ata, pacabejiobiaexanabiabi atanua. Bajaraxuata paxanë barëyaya pacavënëlivaisipaebaponatsi itsatomaranëjava, Dioso pejumecovënëtsivijava. ⁵ Bajarapacuenia pacabejiobiaexanabiabi ata, Diosojavabelia paneajamatabëcuenesaë tsaponaexae, nayapëtane Dioso papecajamatabëcueneyavenonaëjavanexa pamatacabi naneconitsiaexanaena pijaneconi pexainaevi. Bajarapamatacabi Dioso papecasivajamatabëcuenebarëyaxae, pacatocopatsiana panejonenexa Dioso pijanacuayabetsia Dioso papecaevetsinexa.

⁶ Dioso baja cajena najamatabëcuenevereta pacuenia exanaejitsia. Nexata juya Dioso bejiobiaexanaena pamonaë pacabejiobiaexanapona maparucæje. ⁷ Paxamë abaxë pacabejiobiaexanaponaena pacuenia paxanë ata panebejiobiaexanapona. Itsiata Dioso nacayavenonaena bajarapacuenivecua. Bajarapacuenia Dioso nacayavenonaena pamatacabi pepo petuxanenë Jesús icatsia patsianica piasaëängelevi yajava, pitarunutsicotia ata yajava. ⁸ Jesús jane baja patsianica penaneconitsiaexanaenexa pamonaë apo yapëtae Dioso. Pamonaë ata apo jumecovënëtsi pepo petuxanenë Jesucristo pelivaisi, Jesús naneconitsiaexanaena. ⁹ Bajarapamonae pijaneconi yabara Jesús naneconitsiaexanaenatsi daxitamatacabijavabelianexa. Dioso pitabaravecua tajë xuabianatsi. Bajarapamonae Dioso pijapenivenivenaecotia apo tae tsane caeto ata. ¹⁰ Pamatacabi vajatuxanenë icatsia patsianica, pinijicuenia pijajivi yaiyataenatsi. Pinijicuenia sivajamatabëcuene nabenajacaenatsi daxita Jesús pejumecovënëtsivitsi. Bajarapacuenia tocopiapatsianatsi pamatacabi patsianica vajatuxanenë. Paxamë ata Jesús pijajivi payajavamë tsane patanejumecovënëtsixaemë patacatsipaebilivaisi.

¹¹ Bajaraxuata pacatovajëtabiabatsi Diosojavabelia. Pacatovajëtabiabatsi vaja Diosojavabelia papecajamatabëcuene xaniavaetsinexa. Pacuenia bejamatabëcueneitsi Dioso pijajivi, bajara panejamatabëcueneitsinexa. Pacatovajëtabiabatsinua Diosojavabelia pecaëjëpaejamatabëcuenetatsi papecajamatabëcueneyavenonaenexa, paneexanaenexa daxita pacuenia pajamatabëexanaponame. Pacatovajëtabiabatsinua Diosojavabelia papecayavenonaponaenexa daxita pacuene paexaname Jesucristo papijajivixamë. ¹² Nexata paxamë xaniavaetsia panejinavanapaejamatabëcueneta, vajatuxanenë Jesucristo daxitajivi yaiyataenatsi. Paxamë ata juya Dioso pacayaiyataeyaexanaena

daxitajivi. Bajarapacuenia pacayaiyataeyaexanaena papecaitaxutotsoniataexae vajaDioso, vajatuxanenë Jesucristo ata.

2

Pibisiacuene bitso pexanabiabinë yabara pelivaisi

¹ Tajamona, pacatsipaebatsi baja cajena paneyapëtaenexa pacuenia vajatuxanenë Jesucristo patsijitsiatsica. Pacatsipaebatsinua baja cajena pacuenia ata nacacaetuat-sijitsia bajaraponëjavabelia pamatacabi patsianica. ² Nexata pajivi najumetsënëtsiaya pacajumai tsane: “Espíritu Santo raja neyapëtaeyaexana. Jesucristo rabaja patsica,” pacajai tsane, pëtsa pajumecovënëtame. Pajivi pijinia najumetsënëtsiaya pacajumai tsane: “Pepacuene rabaja Jesucristo patsica,” pacajai tsane, pëtsa pajumecovënëtame. Pajivi pijinia najumetsënëtsiaya pacajumai tsane: “Pablobana raja nacatoyaquina: ‘Jesucristo rabaja patsica,’ jai raja vajanacatoyaquinaebaxutota,” pacajai tsane, pëtsa pajumecovënëtame. Itsamona najumetsënëtsia itsa pacatsipaeba Jesús pepatsijavatsica yabara, pëtsa panajamatabëcueneepatajërërëcame panejumecovënëtavanapae livaisive-cua. Pëtsa pajamatabëcuenenabenajacamenua. ³ Pëtsa pajumecovënëtame pematatsënëa itsalivaisicuenia itsa pacatsipaeba Jesucristo pepatsijavatsica yabara. Jesucristo raja abaxë apo patsitsica tsane. Peneta raja itsa baja imoxoyo pevajënae tsane Jesucristo pepatsinexatsica, jivi ayaibitsaëtonë Dioso pejumelivaisi pejumecovënëtsijava copabi-ana. Bajara pijinia pamatacabi patsiana ponë bitso pibisiacuene pexanabiabinënexa. Bajaraponë itsamatacabi Dioso xuabiana isotuabelia, bitso bejiobiaya peponapon-aenexa daxitamatacabijavabelianexa. ⁴ Bajaraponë cueneitoya tsane Dioso pijacuene. Pamona ata vajëcabiaba bedioso petaevijavabelia, itavetsiana pevajëcabiabiyani-va. Dioso pijatemplobota ata belia ecaena bediosonë jivi petaenexatsi. Bajaraponë jumai tsane: “Xanë rajane baja diosonënë,” jai tsane. Bajarapacuenia jivi ayaibitsaëto bajaraponë yamaxëitojorobiana.

⁵ Pamatacabi abaxë paxamëjavata naponaponajë, tajëvelia baja cajena pacatsipaebabiabatsi bajarapalivaisi. ¿Panacofënëtame tsabaja bajarapalivaisi? ⁶ Payapëtaneme baja cajena pacuenia abaxë Dioso yacaranata pibisiacuene bitso pexanabiabinënexa pepatsiyaniva. Dioso petocaëjëtsimatacabita bajaraponë patsiana. ⁷ Mapamatacabita ataje jivi pibisiacuene pexanaejava navitapona pevajënaeyabelia. Itsiata abaxë apo patsi ponë bitso pibisiacuene pexanabiabinënexa. Matapania pamatacabi Dioso copatsiana pecaranatsijava bajaraponë pepatsiyaniva, patsiana jane baja pibisiacuene bitso pexanabiabinexa. ⁸ Bajarapamatacabi bajaraponë patsiana bitso pibisiacuene pexanabiabinexa. Nexata pepo petuxanenë Jesús pijumalisaëta bajaraponëmi beyaxu-abiana. Pamatacabi Jesús patsianica, bajaraponëmi Jesús vereverecaeyaexanaena pijapenivenivenaecotiata. ⁹ Bajaraponë patsiana dovathi pejamatabëcueneta pibisiacuene bitso pexanabiabinexa. Nexata bajaraponë dovathi pesaëta pinijicuenepexanaejava exanaponaena jivi peyamaxëitojorobinexa, beayaijamatabëcuenenë petaenexatsi. ¹⁰ Bajaraponë exanaena daxita xua pibisiacuene, jivi peyamaxëitojorobinexa. Nexata bajaraponë pejamatabëcueneta Diosovecua jivi naxuabiana. Jivi Diosovecua naxuabiana tsipaji apo jitsipae pejumecovënëtsinexa pexaniajailivaisi pecapanepaelivaisinexatsi Diosojavabelia. ¹¹ Bajaraxuata Dioso tocopatsiana bajaraponë penajumetsënëtsilivaisi petsipaebinexatsi peyamaxëitojorobinexatsi. Nexata bajarapamona jumecovënëtsiana ëpenajumetsënëtsilivaisi. ¹² Bajaraxuata nexata daxita bajarapamona Dioso naneconitsiaexanaenatsi. Tsipaji apo jumecovënëtsi tsane pexaniajailivaisi. Caranata saya sivabarëya tsabiabi tsane ëpibisiacuene pexanaejava.

Pacuenia Dioso pijajivi itapeta pecapanepaenexa yabara pelivaisi

¹³ Tajamonae Dioso papecaasivavi, pepo bajayata abaxë itsa apo panaexanaemë, vajatuxanenë baja cajena tajëvelia pacaitapeta papecacapanepanexa. Dioso baja cajena pacacapanepaena. Espiritu Santo pesaëta pacajamatabëcuenexaniavaetsiana panejumeconvënëtsixae pexaniajailivaisi, Jesús pelivaisi. Bajaraxuata paxamë yabara pajumaitsinë tsabiabi Diosojavabelia: “Xanepana rabaja. Pexaniacuene exaname. Tsipaji tajëvelia itapetame Tesalónica tomarapijivi pecajumeconvënëtsinexa. Nexata baja cajumeconvënëta,” pajanë tsabiabi. ¹⁴ Dioso paneitoroba patacatsipaebinxaxa pexanialivaisi papecacapanepaelivaisinexa Diosojavabelia. Nexata baja pajumeconvënëtame bajarapalivaisi. Bajarapacuenia Dioso pacajunata panepatsinexa vajatuxanenë Jesucristojavabetsia, papecajavavaponaponaenexa.

¹⁵ Tajamonae, bajaraxuata panevajënaeyabelia pacaasaëmëre tsavanapae panejumeconvënëtsijava Dioso. Pajumeconvënëtavanapare patacatsipaebilivaisi. Palivaisi ata patacatoyaquinatsi panejumeconvënëtsinexa, pëtsa panacofënëtame. ¹⁶ Vajatuxanenë Jesucristo, vaxa Dioso ata, nacaasiva. Bajaraponëbeje nacaitaxutotsoniatane. Bajaraxuata nacajamatabëcueneasaëyaexanapona daxitamatacabijavabelianexa. Nacatocopatanua vajacopiaevetavanapaenexa pepo petuxanenë Jesucristo icatsia pepatsijavanexatsica. ¹⁷ Nexata pacatovajëtatsi vajatuxanenë Jesucristojavabelia, vaxa Diosojavabelia ata, papecajamatabëcuene asaëyaexanaenexa. Pacatovajëtatsinua jivi panetsipaebinxaxa pexanialivaisi. Pacatovajëtatsinua paneexanaenexa daxita xua pexaniacuene.

3

Pacuenia Pablo toyaquina Dioso pejumeconvënëtsivi: “Panetovajëre Diosojavabelia,” pejailivaisi yabara pelivaisi

¹ Tajamonae, pecopiarucaelivaisi rabaja maje pacatoyaquinatsije. Panetovajëre Diosojavabelia Dioso pejumelivaisi bepijia peyacaëjëpaenexa daxitanacuajava. Patovajërenua daxitajivi pejumeconvënëtsinexa Dioso pejumelivaisi pacuenia baja paxamë pajumeconvënëtame bajarapalivaisi. Patovajërenua daxitajivi peyaiyataenexa Dioso pejumelivaisi. ² Panetovajërenua Dioso patanevetsinexa pibisiajamatabëcuenevivecua. Bajarapacuenia panetovajëre tsipaji raja daxitajivi Dioso apo jumeconvënëtsi. ³ Itsiata baitsi jane vajatuxanenë nacayavenonabiaba. Bajaraponë pacajamatabëcueneasaëyaexanaena. Pacaevetsiananua dovathivecua. ⁴ Paxamë yabara baja cajena pajamatabëjumaitsinë: “Bajarapamonae vajatuxanenë yavenonaenatsi. Nexata xaniavaetsia exanavanapaena daxita pacuenia itorobatsi. Pevajënaeyabelia xaniavaetsia exanavanapaena pacuenia itorobatsi,” pajamatabëjanë baja cajena paxamë yabara. ⁵ Diosojavabelia pacatovajëtatsi xaniavaetsia paneyapëtaenexa Dioso papecaasivajava. Pacatovajëtatsinua panevajënaeyabelia paneajamatabëcuenesaë tsavanapaenexa Cristo papecajamatabëcuene yavenonabiabinexa.

Pacuenia daxitajivi benacueneba penaevetsinexa yabara pelivaisi

⁶ Tajamonae, vajatuxanenë Jesucristo pejamatabëcueneta pacaitorobatsi. Dioso pejumeconvënëtsivi ata itsa piafaetabivi, bajarapamonae panavecuatsare. Bajarapamonae apo nacuenebabiabi penaevetsinexa pacuenia picani paitorobajë. ⁷ Payapëtaneme rabaja pacuenia paxanë paexanavanapajë pamatacabi panajinavanapajë paxamëjavata. Nexata pacuenia pacatsitajinavanapatsi, bajarapacuenia bepajinavanapame. Pamatacabi abaxë panajinavanapajë paxamëjavata, apo pafaetabinë tsavanapae. ⁸ Amonya baja cajena itsajivi ata apo pavecuaxaenë itsacuenejavayo ata. Biji rajane panatonacuenebabiabajë pinijicuenia. Matacabita, meravi ata, panatonacuenebabiabajë patanaevetsinexa. Bajarapacuenia panatonacuenebabiabajë itsajivi ata paxamëjavavëni petoayapëbejeyanivatsi patanevetsijava patanajinavanapaejavata. ⁹ Paxamëjavata pexanialivaisi patacatsipaebavanapaxae, vajatuxanenë picani

panetocopata patacavajëtsinexa xua panamatavenonajë patanerajutsinexamë. Itsiata baitsi jane apo pacavajëtsitsi. Pacatsitanacuenebabiabatsi baja cajena. Bajarapacuenia paxamë ata panatonacuenebabiabare panenaevetsinexa. ¹⁰ Pamatacabi abaxë panajinavanapajë paxamëjavata, pacajumaitsitsi baja cajena: “Pajivi afaetabi, pëtsa naxane,” pacajaitsi baja cajena. ¹¹ Pavënëlivaisitaniji pacuenia itsamonae paxamëyajuvënëvi saya jinavanapa nacuenebinejeva. Bajarapamonae pina bitso jamatabëitonotabiaba itsamonae. ¹² Bajarapamonaejavabelia pajumaitsimë tsane: “Pablo raja vajatuxanenë Jesucristo pejamatabëcueneta jumaitsi: ‘Panacuenebianame pina panenaevetsinexa,’ jai raja Pablo,” pajamë tsane.

¹³ Tajamonae, pëtsa pajamatabëcuenecueraname pexaniacuene paneexanavanapaejava. ¹⁴ Pajivi apo nacuenebi tsane penaevetsinexa, apo jumecovënëtsinua tsane palivaisi pacatoyaquinatsi mapabaxutotaje, bajarapajivi panavecuatsare. Pëtsa payajavajinavanapame. Nexata aura tsane apo penacuenebijava yabara. ¹⁵ Itsiata baitsi jane bajarapajivi bepanijavajabitsaëjivi pëtsa pataneme. Dioso panenajuajumecovënëtsivixae, pexaniajamatabëcuenia pamuxujiobianame.

Pacuenia Pablo toyaquina peveretsinexa baja petoyaquinaelivaisi mapabaxutotaje yabara pelivaisi

¹⁶ Vajatuxanenë vajanacajamatabëcuene xanepanaeyaexanaenë. Pacatovajëtatsi bajaraponëjavabelia daxitamatacabi papecajamatabëcuene xanepanaeyaexanaenexa, itsamonae pacaitsacueniababiabi ata. Pacatovajëtatsi vajatuxanenë papecayajavaponaponabiabinexa.

¹⁷ Xanë Pablonë, tacobeta pacatoyaquinatsi mapalivaisiyoje patacajamatabënajinaexae. Paitanecuenia yaquinabiabajë daxita tayaquinaebaxutonëta, bajarapaitanecuenia pacatoyaquinatsi mapalivaisiyoje paneyapëtaenexa xanë patacatoitorobicuene mapabaxutoje. ¹⁸ Pacatovajëtabiabatsi Diosojavabelia daxita paxamë vajatuxanenë Jesucristo papecayavenonabiabinexa.

Mapabaxutoje San Pablo copiaya toyaquina Timoteojavabelia

Pacuenia Pablo mapabaxutoje toyaquina Timoteojavabelia yabara pelivaisi

¹ Xanë Pablonë, Jesucristo pijaapóstolenënë. Dioso, ponë nacacapanepaejitsia, bajaraponë nitoroba pijacuene tatonacuenebinexa. Vajatuxanenë Jesucristo, ponë pejamatabëcueneta Dioso nacacapanepaejitsia, bajaraponë ata nitoroba pijacuene tatonacuenebinexa. ² Timoteo, bepepo taxënatomë tacataenë, Jesucristo pelivaisi xamë ata nejumecovënëtsixae. Catoyaquinatsi mapabaxutoje. Catovajëtatsi vaxa Diosojavabelia, vajatuxanenë Jesucristojavabelia ata, pecayavenonaenexabeje pecaasivaxaebaje. Catovajëtatsinua bajaraponëbeje pecaitaxutotsoniataenexabeje pecajamatabëcuene xanepanaeyaexanaenexabejenua.

Pacuenia Pablo itoroba Timoteo pejumeitavetsinexa penajumetsënëtsilivaisi petsipae-baponaevi yabara pelivaisi

³ Pamatacabi baja ponajë Macedonia nacuyabelia, capuenetatsi neponaponaenexa Efeso tomarata. Nexata icatsia matavëjêa caitorobatsi tsiteca abaxë neponaponaenexa bajarajota. Tsipaji itsamonaë bajarajota tsipaebavanapa saicayacuenia Dioso pejumelivaisivecua. Palivaisi tsipaebavanapa bajarapamonae, apo pexaniajailivaisi cajena. Jumeitavetsianame bajarapamonae matavëjêa baja petsipaebaponaeyaniva bajarapalivaisi. ⁴ Itavetsianamenua bajarapamonae penajamatabëxainabiabiyanima saya jemalivaisixi, perujulivaisiximi. Itavetsianamenua pijasalinaivimi pevënëxi yabara ata penajamatabëxainabiabiyanima. Bajarapitsilivaisixi ajumematamobi baja cajena itsa nabarëcuaicuaijai tsaponae jivi. Bajarapalivaisixi apo nacajamatabëcueneyavenonae tsi-pae pacuenia Dioso nacaitoroba jumecovënëtsiaya vajatoexanaenexa.

⁵ Bajarapacuenia caitorobatsi nejumeitavetsinexa bajarapamonae pecopatsinexa bajarapalivaisi pecuaicuaijitsabiabijava. Nexata juya pexanaenexa pacuenia Dioso jitsipa. Dioso cajena jitsipa jivi pejamatabëëthëtovetsina jamatabëcuenexanepanaeya namataenetsia penaasivatsavanapaejava. Dioso jitsipanua jivi pejinavanapaenexa aneonijibia Dioso pitabarata. Dioso jitsipanua jivi pejamatabëëthëtovetsina xaniavaetsia pejumecovënëtanapaenexa Dioso pejumelivaisi. ⁶ Bajarapamonae pacuenia Dioso jitsipa apo pexanavanapaexae, Dioso pejitsipaejavami vecuanajamatabëcuenemuxufeta. Nexata jamatabëcuenenaxuaba natsiquejemalivaisixi pecuaicuaijitsabiabinexa. ⁷ Bajarapamonae picani jamatabënaexana jivi livaisi petsipaebabiabivonexa. Palivaisi Dioso Moiséspijinëta najumecopata, bajarapalivaisi picani jivi asaëya jamatabëtsipaebapona. Itsiata baitsi jane bajarapamonae apo jumeyapëtae pajamatabëcuenelivaisi xaina bajarapalivaisi.

⁸ Vaxaitsi baja cajena yapëtanetsi pexanepanaecuene palivaisi Dioso Moiséspijinëta najumecopata. Bajarapalivaisi Dioso nacatocopata vajatsipaebinexa jivijavabelia, jivi peyapëtaenexa penaneconitsicuene Diosojavabelia. ⁹ Pamonaë pexaniacuene exanavanapa, apo toyaquinabiabitsi pitavetsilivaisinexatsi. Biji rajane pamonaë pibisiacuene exanavanapa, toyaquinabiabatsi pitavetsilivaisinexatsi. Pamonaë ata apo yaiyatae itsacuenejavayo ata Dioso pijacuene, toyaquinabiabatsi pitavetsilivaisinexatsi. Pamonaë ata najamatabëcuenebijiana Dioso pijacuenevecua, toyaquinabiabatsi pitavetsilivaisinexatsi. Pamonaë ata jivivevi, paxa ata, pena ata, pebeyaxuabivi, toyaquinabiabatsi pitavetsilivaisinexatsi. ¹⁰ Pamonaë ata pijavajivi vecuanamatayajita itsavajavabelia, toyaquinabiabatsi pitavetsilivaisinexatsi. Pamonaë ata pevëna pebijavabelia pevitota pibisiacuene exana, toyaquinabiabatsi pitavetsilivaisinexatsi. Bajara

pijinia pacuenia petiriavi ata. Pamonaē pamonajivi vecuanamatayajita itsanējavabelia, toyaquinabiabatsi pitavetsilivaisinexatsi. Pamonaē ata pevēna petiriavijavabelia pevitota pibisiacuene exana, toyaquinabiabatsi pitavetsilivaisinexatsi. Pamonaē ata jivi nacobetoxotsiaya pita, toyaquinabiabatsi pitavetsilivaisinexatsi. Pamonaē ata najumetsēnēta, toyaquinabiabatsi pitavetsilivaisinexatsi. Pamonaē ata itsamonaē yabara najumetsēnētsiaya baracuaicuajai tsabiabi, toyaquinabiabatsi pitavetsilivaisinexatsi. Pamonaē ata apo jitsipae pexaniajailivaisi jivi petsipaebaponaenexa, toyaquinabiabatsi pitavetsilivaisinexatsi. ¹¹ Bajarapalivaisicuenia xanē ata itavetaponajē itsa tsipaebaponajē palivaisi Dioso netocopata jivi tatsipaebaponaenexa. Bajarapalivaisi itsa tsipaebaponajē, tsipaebaponajē daxitajivi peyapētaenexa pacuenia Dioso itaxutotsonitanetsi pecapanepaenexatsi.

Pacuenia Pablo pexaniajamatabēcuene rajuta Jesucristojavabelia yabara pelivaisi

¹² Pexaniajamatabēcuene rajutajē vajatuxanenē Jesucristojavabelia tanerajutsixae pesaē tatonacuenebinexa. Jesucristo nesivanajamatabēxaina xaniavaetsia tatonacuenebinexa. Bajaraxuata pexaniajamatabēcuene rajutajē. ¹³ Copiata abaxē itsa apo jumecovēnētsinē Jesucristo, pibisiacuena picani baracuaicuajianē tsabiabi Jesucristo. Pijajivi ata tobarajinabiabajē tabejiobiaexanaenexa. Pibisiacuena bijataeyabiabajē Jesucristo pijajivi. Bajarapacuenia taexanabiabinē ata, Dioso itsiata nebejiobiatane. Tsipaji jamatabēcuenenavēxaniabiaya bajarapacuenē exanabiabajē. Apo yapētaenē picani xua exanaponajē Jesucristojavabelia. Tsipaji abaxē apo jumecovēnētsinē Jesucristo Dioso pexēnatocuene. ¹⁴ Nexata baja itsiata belia vajatuxanenē Jesucristo pinijicuenia neyavenona tanajamatabēcuenecopatsinexa bajaraponējavabelia. Bajaraxuacujinae pijajivitonēxaenē, neyavenona tasivanexa itsamonaē ata.

¹⁵ Mapalivaisije pacatsipaebijitsiatsi. Bajarapalivaisi pexaniajailivaisi cajena. Nexata daxitajivi xaniavaetsia bejumecovēnēta mapalivaisije. Jesucristo baja cajena patsica mapanacuayabetsicaje pibisiacuene pexanaevimi pecapanepaenexa Diosojavabelia. Xanē ata picani bitso pibisiacuene taexanaenēmi daxitajivi matatoxenetsia. ¹⁶ Xanē itsiata bajara taitsinēmi ata, Dioso itsiata nebejiobiatane. Bajarapacuenia Dioso nebejiobiatane daxitajivi peyapētaenexa Jesucristo bajayajebi tanesivaajamatabēcuenesaējaya tajumecovēnētsinexa, pibisiacuene taexanaenēmi ata. Nexata pamonaē bexējajavabelia ata Jesucristojavabelia najamatabēcuenecopataponaena, xainaena matababi apo pevereverecejaya. Bajarapamonaē nesivaajamatabēcuenesaē tsane itsa nevēnēlivaisitaena Jesús taneitapetsijaya pijajivitonēnēxanē, pibisiacuene bitso taexanabiabinēmi ata. ¹⁷ Bajaraxuata vaxaitsi pepo Dioso, daxitacuene peyapētaenējavabelia, jumaitsi tsabiabi: “Xamē Diosomē bitso ayaijamatabēcuenenēmē. Bitso ayaicuene nexanaenē,” jaitsi tsabiabi. Bajaraponē Dioso daxitacuene peyapētaenē. Pepo pevetsinēnuā daxitacuene. Apo petēpaenēnēxanua daxitamatabacijavabelianexa. Apo petāenētsinua itsajivi ata.

¹⁸ Timoteo, betaxēnatomē tacataenē. Pacuenia caitorobatsi, exanaename. Bajayata baja cajena itsamonaē Dioso pejumecovēnētsivi Dioso pejamatabēcueneta tajēvelia cavajunupaeba pacuenia exanaejitsiamē. Bajarapacuenia Dioso asaējyata tocanacuenebaponare mapalivaisije. Nexata bajarapacuenia Dioso pitorobilivaisi daxitajivi yapētaena. Catoayapēbeje ata dovathi pecajamatabēcueneējētsixae, ajamatabēcuenesaēmēre Diosojavabelia nenajamatabēcuenecopatsijaya. Exanabiabare xua yapētaneme pexaniajaicuene nenajamatabēcuenebijianaeyaniva Diosovecua. ¹⁹ Itsamonaē baja yapētae ata pacuenia Dioso itorobatsi, itsiata pibisiacuene exana. Nexata bajarapamonaē Diosovecua naxuabiana pecopabixae Cristo pejumecovēnētsijavami. ²⁰ Bajarapamonaeyajuvēnēnēbeje Himeneobeje Alejandrobeje. Pibisiacuena Dioso baracuaicuajibeje tsabiabi. Nexata pecopatsinexabeje Dioso

pebaracuaicuajijavabeje, bajaraponëbeje copatajê dovathijavabelia. Nexata bexëa itsa najamatabëxainabeje pexanialivaisi, xaniavaetsia jane baja Dioso pejumecovënëtsinexabeje.

2

Pacuenia Dioso pejumecovënëtsivi daxitajivi betovajëta Diosojavabelia yabara pelivaisi

¹ Timoteo, copiaya caitorobatsi mapacueniaje. Caitorobatsi panetovajëtabiabineaxa daxitajivi Diosojavabelia. Daxitajivi Diosojavabelia patovajëtabiabianame pitaxutotsoniataenexatsi Dioso. Itsa baja Dioso itaxutotsoniataenatsi bajarapamonae, nexata pexaniajamatabëcuene parajutsianame Diosojavabelia bajarapamonae yabara. ² Patovajëtsianamenua Diosojavabelia presidentevei ata. Patovajëtsianamenua daxita gobierno pijalivaisi pevetsivi ata. Bajarapacuenia patovajëtsianame bajarapamonae Dioso peyavenonaenexatsi. Nexata xaniavaetsia jinavanapaenatsi avajabitsaëjibia. Nexata xaniavaetsia Dioso jumecovënëtavanapaenatsi. Nexata exanavanapaenatsi ëpexaniacuene. ³ Bajarapacuenia Diosojavabelia daxita bajarapamonae vajatovajëtsijava, xanepana Dioso, ponë nacacapanepaejitsia, vajanacasivabarëyanexa. ⁴ Bajarapacuenia daxitajivi vajatovajëtsijava Dioso jitsipa. Tsipaji Dioso jitsipa daxitajivi pecapanepaenexa bajaraponëjavabelia. Dioso tojitsipanua daxitajivi peyapëtaenexa pexaniajailivaisi, Jesucristo pelivaisi. ⁵ Nexata daxitajivi itsa yapëtaena pexaniajailivaisi, Jesucristo pelivaisi, yapëtaenanua pacuenia caenë Dioso daxitajivi capanepaejitsia. Yapëtaenanua pacuenia pijinia caenë Jesucristo daxitajivi petocuaicuajainënexa Diosojavabelia. ⁶ Jesucristo rabaja nacopata pebeyaxuabinexatsi. Nexata Jesucristo petëpaejavata, daxitajivi pijaneconimi matamota. Bajarapacuenia daxitajivi peyapëtaenexa, Dioso pecaëjëtsimatacabita pijajivi itoroba daxitanacuanëjava pexaniajailivaisi jivi petsipaebineaxa. Tsipaji baja cajena Dioso jitsipa daxitajivi pecapanepaenexa. ⁷ Bajarapalivaisi jivi tatsipaebineaxa Dioso nitoroba. Dioso nitoroba bajarapalivaisi tatsipaebineaxa pamonaepo apo judíovi ata penajamatabëcuenecopatsinexa Diosojavabelia. Nexata pexaniajailivaisi jivi tatsipaebijava, itsa canavajunupaebatsi, xaniajanë cajena. Cristo tajumecovënëtsinëxae, pexaniajailivaisi jivi tsipaebaponajë. Apo najumetsënëtsinë cajena.

⁸ Bajaraxuata daxitanacuanëjava pebijivi, pamonaepo baja Dioso pitabarata aneconijibi, itsa vajëta Diosojavabelia, jitsipajë nacobeyotsiaya pevajëtsijava Diosojavabelia. Bajarapamonae bevajëta Diosojavabelia anaepanaenejeva itsajiviyojavabelia, jumeanaenotsinejevanua itsajiviyojavabelia. ⁹ Jitsipajë pijinia petiriavi penaxatabineaxa xanepanaeya. Pëtsa bitso naitabëtsiaya naxataba. Itsa naxaniavaeta, bitso pëtsa namataitabëta pexaniacuena. Pëtsa bitso naitabëta oronanitota pexanaejavanëta. Pëtsa naitabëta penamatamotsiviriaibotoxita ata. Pëtsa naitabëtsiaya naxataba bitso penamatamotsinavanë ata. ¹⁰ Petiriavi, pamonaepo baja xaniavaetsia najamatabëcuenecopata Diosojavabelia, pëtsa naitabëta bitso. Bajarapamonae Dioso pitabarata pexaniacuene betoexanabiaba itsamonaejavabelia penajamatabëcueneitabëtsinexa bëpënëjavaverena. ¹¹ Dioso pejumecovënëtsivi itsa nacaetuata Dioso pejumelivaisi penamuxunaevetsinexa, petiriavi beveliajamatabëcuenevi nataeya ajumejibia benamuxunaevetena pejumecovënëtsinexa palivaisi tsipaebatsi. ¹² Petiriavi apo tocopatsinë pemuxujiobineaxa pebijivi. Apo tocopatsinënu petiriavi beayajamatabëcuenevi nataeya pitorobabiabineaxa pebijivi. Biji rajane petiriavi beveliajamatabëcuenevi nataeya ajumejibia benamuxunaevetena. ¹³ Bajarapacuenia itorobajë tsipaji copiaya Dioso exana pebi. Bajaraponë pevënë Adán. Bajaraxuacujinae cotocaevi Dioso exana petiriva. Bajarapova pevënë Eva. ¹⁴ Adán cajena picani dovathi apo yamaxëitojorobatsi. Biji rajane copiaya petiriva dovathi

yamaxëitojorobatsi. Nexata petiriva copiaya pibisiacuene exana. ¹⁵ Bajaraxuata daxita petiriavi Dioso tocopatatsi pevixaeitonotsinexatsi penacueto itsa vecuanaexanatsi. Itsiata baitsi jane bajarapamonae capanepaenatsi Diosojavabelia itsa casaë tsane penajamatabëcuenecopatsijava Diosojavabelia. Capanepaenatsi Diosojavabelia daxitajivi ata asivaya itsa taena, Dioso ata asivaya itsa taena. Capanepaenatsi Diosojavabelia xaniavaetsia itsa jinavanapanua pacuenia Dioso tojitsipatsi.

3

Pacuenia ancianovinexa bejamatabëcuenetsi yabara pelivaisi

¹ Pexaniajailivaisi cajena maje. Ponë jitsipa pitapetsinexatsi ancianonënexa, Dioso pejumecovënëtsivi pevetsinënexa, bajaraponë pexaniacuene, Dioso pijacuene, jamatabëtonacueneba. ² Ancianonënexa, xanepana ponë apo xainae itsacueneneconi ata, paneconi yabara itsamonae neconitsijitsiatsi. Caevayo pepitsinë. Penajamatabëcuenereviabinë. Xaniavaetsia penajamatabëxainanë. Peyaiyataenëtsi. Xaniavaetsia pecopiapitabiabinë pijaboyaberena pesivaxainaevitsi. Pecaëjëpaenëtsi xaniavaetsia jivi Dioso pejumelivaisi petsipaebinexa. ³ Ancianonënexa, xanepana ponë apo piapaenë piatajibinexa. Pevëna pebi apo pebenë. Apo pejitsipaenë itsajivi ata yamaxëitojorobiaya palata pevecuanacobetoxotsinexa. Biji rajane ancianonënexa xanepana ponë pexaniajamatabëcuenenë. Anaeya itsajivi ata apo pejumepitsinë pebarënajumeanaenotsinexa. Bitso pexainanexa ata pexainaejava, apo penajamatabëxainanë. ⁴ Ancianonënexa, xanepana ponë xaniavaetsia eveta pexi, pijava yajava. Pexi pejumecovënëtsinëtsi. Pejumeiyaiyataenëtsinua. ⁵ Ponë apo caëjëpaetsi xaniavaetsia pexi pevetsinexa, pijava yajava, nexata bajaraponë apo caëjëpae tsipaetsi pevetsinexa Dioso pejumecovënëtsivi. ⁶ Apo xanepanae tsipae ancianonënexa ponë abaxë ajena jumecovënëta Dioso. Beayajamatabëcuenenë itajara nataejitsipa bajaraponë. Nexata epatua Diosovecua jopaejitsipa. Bajarapacuenia bajayata dovathi penajamatabëxainanë, Dioso vecuajopaica. Nexata dovathi daxitamatacabijavabelianexa naneconita Diosojavabelia. ⁷ Ancianonënexa, xanepana ponë peyaiyataenëtsi pamonae Dioso apo pejumecovënëtsivi ata. Bajarapitsinë xanepana ancianonënexa ancianonë pexanaecujinaetsi jivi pequenetsiataeyanivatsi, dovathi ata peyamaxëitojorobianivatsi.

Pacuenia diáconovinexa bejamatabëcuenetsi yabara pelivaisi

⁸ Diáconovinexa pijinia, xanepana pamonae penajamatabëcuenereviabivi. Itaxutojema apo pecuaicuaijaiivi. Apo piapaevi piatajibinexa. Apo pejitsipaevi itsajivi ata yamaxëitojorobiaya palata pevecuanacobetoxotsinexa. ⁹ Diáconovinexa, xanepana pamonae xaniavaetsia najamatabëcuenecopata Cristojavabelia. Pejamatabëëthëtota peyapëtaevi pexaniajaicuene palivaisi jumecovënëta. ¹⁰ Pamonae diáconovinexa, copiaya bitorobatsi itsacuenejavayo pevetsinexa bajarapacuenia pejamatabëcuenëjëttsinexatsi. Nexata xaniavaetsia itsa eveta xua evetsiaexanatsi, diáconovi jane baja bexanatsi. Nexata jane baja bitorobatsi penacuenebinexa xua diáconovi banacueneba. ¹¹ Diáconovi pijinia pijavajivi xanepana penajamatabëcuenereviabinexa, apo bebaracuaicuaijai itsamonae. Xaniavaetsia benajamatabëxaina. Nexata xaniavaetsia bexanabiaba pacuenia itorobatsi. ¹² Diácononënexa, xanepana ponë caeva pepitsinë. Pecaëjëpaenëtsinua xaniavaetsia pevetsinexa pexi, pijava yajava. ¹³ Diáconovi xaniavaetsia itsa eveta penacuenebijava, nexata diáconovi xaniavaetsia yaiyataenatsi daxitajivi. Ajumeurajibianua jivijavabelia navajunupaebiana Jesucristojavabelia penajamatabëcuenecopatsijava.

Pacuenia Timoteo toyaquinatsi peyapëtaenexa pacuenia exanaponaponaejitsia Dioso pejumecovënëtsivi tuatujëta yabara pelivaisi

¹⁴ Timoteo, bepíjia picani jamatabëponajë xamëjavabelia tacataenexa. Itsiata tavajënaeyabelia catoyaquinatsi mapacuene yabaraje. ¹⁵ Nexata abaxë itsa cuenenajematsianajë tapatsijava xamëjavabelia, neyapëtaenexa pacuenia exanaponaponaejitsiamë Dioso pejumecovënëtsivi tuatujëta. Pamonae baja Dioso pejumecovënëtsivi, Dioso rabaja piasaënë pijajivi. Bajarapamonae Dioso pejumelivaisi, pexaniajailivaisi, xaniavaetsia baja jumecovënëtavanapa. Daxita nacuanëpijivi ata pejumecovënëtsinexa bajarapalivaisi. Bajarapamonae pexaniajailivaisi itsamonaejavabelia tsipaebapona. Bajarapamonae apo tocopatsinua itsajivi ata pexaniajailivaisivecua saicayalivaisi pejumecovënëtsiyaniva. ¹⁶ Pepo pexaniajailivaisi cajena Cristo pelivaisi. Bajaraponë baja vaxaitsi jumecovënëtavanapatsi. Itsiata baitsi jane itsamonae apo jamatabëcueneyapëtae bajaraponë. Bajaraponë Cristo ayaijamatabëcuenenë bitso:

Bajaraponë Cristo mapanacuata naexana bevaxaitsi jivitonëcuenia. Espíritu Santo pejamatabëcueneta daxitajivi yapëtaeyaexanatsi Cristo planeconijibinëcuene. Angelevi ata Cristo tanetsi. Cristo pijajivi vënëlivaisipaebaponatsi daxitanacuanëpijivijava. Nexata daxitanacuanëpijivi najamatabëcuenecopabapona Cristojavabelia. Dioso pijanacuatatsia ata Cristo copiapitatsi.

4

Dioso pejumelivaisi pejumecovënëtsijava pecopabivi yabara pelivaisi

¹ Espíritu Santo baja cajena tajëvelia nacayapëtaeyaexana pacuenia bexëjavabelia itsamonae copabijitsia Dioso pejumelivaisi pejumecovënëtsijavami. Bajarapamonae nexata jumecovënëtsiana penajumetsënëtsilivaisi petsipaebaponaevitsi. Nexata bajarapamonae asaëya jumecovënëtaponae na itsamonae dovathi pejamatabëcueneta petsipae-bilivaisitsi. ² Bajarapamonae namuxunaevetsiana penajumetsënëtsilivaisi petsipae-baponaevitsi, betsitapexaniajamatabëcuenevitsi itajara tsane, pibisiajamatabëcuenevitsi ata. Bajarapamonae tsipaebaponaena penajumetsënëtsilivaisi. Apo acueneura cajena tsane. ³ Bajarapamonae itavetsiana penacasabicuene. Bajarapamonae itavetsiananua itsacuenejavanë jivi pexaeyaniva. Dioso cajena daxitacuene pexaejava exanae ata, jivi pexaeyaniva apo itavetsi. Bajaraxuata Dioso pejumecovënëtsivi, pexaniajailivaisi peyapëtaevi, jumai tsabiabi pexaejava yabara: “Xanepana rabaja,” jai tsabiabi Diosojavabelia pexaejava pexaevajënae. ⁴ Daxitacuene, xua Dioso exana vajaxaejavanexa, pexaniacuene bitso. Nexata apo biatsobitsi itsacuenejavayo ata Dioso pexanaejava. Biji rajane itsa pitatsi Dioso pexanaejava, “Xanepana rabaja,” bejai tsabiabitsi Diosojavabelia vajanacarajutsixae vajaxaejavanexa. ⁵ Bajarapacuenia Dioso pejumelivaisibaxutota pejumaitsixae, xanepana daxitacuene vajaxaenexa. Pexaniajamatabëcuene rajutatsi Diosojavabelia vajaxaejavanexa vajanacarajutsixae. Bajaraxuata Dioso nacatoxanepanaeyaexana vajaxaejavanexa.

Pacuenia Timoteo itorobatsi xaniavaetsia peponaponaeenexa, xaniavaetsia petsipae-binexanua Dioso pejumelivaisi, yabara pelivaisi

⁶ Itsa tsipaebianame pexaniajailivaisi Dioso pejumecovënëtsivijavabelia, penajumetsënëtsilivaisi petsipaebaponaevi pejumecovënëtsiyaniva, nexata xaniavaetsia Jesucristo netonacuenebinë tsane. Niajamatabëcuenesaënexa nevajënaeyabelia, asaëya jumecovënëtaponaponare palivaisi baja jumecovënëtavanapatsi. Pexaniajailivaisi, Dioso pejumelivaisi, palivaisi itsamonae catsipaeba, tsiteca asaëya jumecovënëtaponaponare. ⁷ Itsiata baitsi jane pëtsa jumecovënëtame mapanacuapijilivaisianëje, saya natsiquejemalivaisianë. Daxita nesaëta nacujaubare xaniavaetsia neponaponaeenexa Dioso pejitsipaecuenia. ⁸ Vajajumalixanepanaenexa, xanepana picani vajaperabësaëta vajacujinaejinaejava. Itsiata baitsi jane daxitacuenevecua xanepana bitso vajajinavanapaenexa pacuenia Dioso nacatojitsipa. Bajarapacuenia nacatoxanepana

tsipaji vajatëpaecujinae ata Dioso nacajamatabëcueneyavenonaena xaniavaetsia vajajinavanapaenexa. ⁹ Bajarapalivaisi pexaniajailivaisi cajena. Nexata daxitajivi xaniavaetsia bejumecovënëta bajarapalivaisi. ¹⁰ Bajaraxuata Dioso tonacuenebaponaponatsibeje. Casaëtsibeje tsaponaponae Dioso vajatonacuenebaponaponaejavabeje, itsamonae pibisiacuenia nacabijataeyabiabi atabeje. Bajarapacuenia exanatsibeje tsipaji najamatabëcuenecopatatsibeje piasaënë Diosojavabelia. Bajaraponë Dioso daxitajivi pecapanepaenë pijaneconivecua. Dioso capanepaena daxita pamonaenajamatabëcuenecopata bajaraponëjavabelia.

¹¹ Bajarapalivaisi tsipaebaponare. Itorobaponarenuajamatabëcuenia pexanaenexa. ¹² Pëtsa nacopatame pevëjëatoxaemë itsajivi ata pecaquenetsiataenexa. Biji rajane Dioso pejumecovënëtsivijava, xaniavaetsia tsitaponaponare. Cuaicuaijamëre xaniavaetsia. Livaisi ata itsa tsipaebame, tsipaebare xaniavaetsia. Ponaponare xaniavaetsia. Asivamëre daxitajivi. Najamatabëcopena xaniavaetsia Diosojavabelia pecayavenonaenexa daxitacuene yabara. Èpexaniacuene yabara najamatabëxainare. Bajarapacuenia itsa tsi-taexanaponaponaname, nexata Dioso pejumecovënëtsivi cacuenjëpaeyajinavanapaena. ¹³ Tavajënaelia bajarapacuenia exanaponaponare. Jivi penacaetuatsijavata, Dioso pejumelivaisibaxuto tsimuxulebabiabare. Tsipaebaponarenuajamatabëcuenia jumaitsi Dioso pejumelivaisibaxutota bajarapamonae piamatabëcuenesaënexa Diosojavabelia. ¹⁴ Dioso baja cajena carajuta pecacajëpaenamatabëcuenia xaniavaetsia jivi livaisi netsipaebinexa, pecacajëpaenanuanajamatabëcuenia xaniavaetsia nevetsinexa Dioso pejumecovënëtsivi. Bajaraxua xaniavaetsia najamatabëcueneevetaponaponare. Pamatacabi ancianovi nacae-tuata, catsimatanacobebuatsiaya catovajëta Diosojavabelia. Nexata bajarajota Dioso carajuta pecacajëpaenamatabëcuenia.

¹⁵ Daxita nesaëta evetaponaponare daxita pacuenia caitorobatsi nexanaenexa. Nexata daxitajivi cayapëtaena xaniavaetsia tanejumecovënëtaponaponaejavamë pacuenia caitorobatsi. ¹⁶ Pibisiacuene nayajivitaeya ponaponare. Palivaisi ata tsipaebaponame, xaniavaetsia tsipaebaponare. Saicayacuenia pëtsa bajarapalivaisivecua tsipaebaponame. Bajarapacuenia nexanaejava casaëmëre tsaponaponae. Nexata Dioso cacapanepaena. Pamonaenajamatabëcuenia ata cajumecovënëta netsipaebilivaisi, Dioso capanepaenatsi.

5

Pacuenia Timoteo itorobatsi penaponaponamenexa Dioso pejumecovënëtsivijava yabara pelivaisi

¹ Pëtsa asaëya muxujiobame pamonaenajamatabëcuenia nevajënaeyapijivi. Biji xaniavaetsia yaiyataeya beaxacuenia muxujiobare. Necovëpijivi pijinia benejuyapijivicuenia muxujiobare. ² Petiriavi ata nevajënaeyapijivi beenacuenia muxujiobare. Necovëpijivaxi pijinia benejuyapijivaxicuenia muxujiobare. Èpexaniajamatabëcuenia taema bajarapovaxi itsajamatabëcuenia bëpënëa nejamatabëthëtota sivanajamatabëxainanejevamë.

³ Pamona pevecuatëpaevatsi, Dioso pejumecovënëtsiva, yaiyataeya yavenonare itsa bitso bejiobi. ⁴ Itsiata baitsi jane pamona pevecuatëpaevatsi, itsa xaina pexi, pemomoxi ata, bajarapamonae xanepana pevetsinexatsi. Bajarapamonae xanepana peyavenonaenexa pijamonae. Bajarapamonae juya beveta paxa, pena ata, pamo ata, pacue ata, pamonaenajamatabëcuenia vitsatatsi. Bajarapacuenia itsa exana, exana pexaniacuene. Nexata Dioso barëyataenatsi. ⁵ Pamona pevecuatëpaevatsi, Dioso pejumecovënëtsiva, itsa apo xainae itsajivi ata pevetsinexatsi, bajarapova najamatabëcuenecopataponaponae Diosojavabelia peyavenonaenexatsi. Navajëtabiabi Diosojavabelia matakabita, meravi ata. ⁶ Itsiata baitsi jane pamona pevecuatëpaevatsi pejitsipaecuenia pibisiacuene itsa exanaponaponae, Dioso tanetsi bepetëpaeva, abaxë asaë tsaponaponae ata. ⁷ Bajarapacuenia itorobare Dioso pejumecovënëtsivi pijamonae peyavenonaenexa itsa bitso bejiobi. Nexata pamonaenajamatabëcuenia apo pejumecovënëtsivi, toacuenebi tsanetsi pebaracuaicuaijajavatsi

bajaraxua yabara. ⁸ Dioso pejumecovënëtsivi, pijamonae beveta. Pajivi apo itaxu-totsoniatæ pevetsinexa pepo pijamonae ata, bajarapajivi apo exanae pacuenia Dioso itorobatsi. Nexata pijamonae ita apo evetsi, bajarapajivi bitso pibisiacuene exana Dioso apo pejumecovënëtsijivi matatoxenetsia.

⁹ Petiriva sesenta pavaibeje pexainaeva, caeto penacojiobicujinae pamona pevecuatëpaevatsi, xanepana pevënëyaquinarutsinexatsi pamona pevecuatëpaevitsi pevënëyaquinarubibaxutota. Nexata daxita Dioso pejumecovënëtsivi peyavenon-abiabinexatsi. ¹⁰ Pova pamona pevecuatëpaevatsi ita cueneyapëtanetsi pexaniacuene pexanaejava, bajarapova xanepana pevënëyaquinarutsinexatsi pamona pevecuatëpaevitsi pevënëyaquinarubibaxutota. Mabaitsi pacuene pexanaeva xanepana pevënëyaquinarutsinexatsije. Pexi xaniavaetsia pevitsatsiva. Jivi ata ita sivaxainatsi, xaniavaetsia pijabota pecopiapitsiva. Ajamatabëcuenecovëbia Dioso pejumecovënëtsivi peyavenonaeva. Peyavenonaevanua itsamonae ita bejiobiaexanatsi Dioso pejumecovënëtsijava yabara. Daxita xua pexaniacuene, pexanaeva, xanepana pevënëyaquinarutsinexatsi pamona pevecuatëpaevitsi pevënëyaquinarubibaxutota.

¹¹ Itsiata baitsi jane pova abaxë sesenta pavaibeje apo pexainaeva, pëtsa vënëyaquinarutame nevënëyaquinarubibaxutota peyavenonaenexatsi daxita Dioso pejumecovënëtsivi. Tsipaji bajarapova ita jitsipa pexanaenexa pacuenia natojitsipa, copatsipa Cristo pejumecovënëtsijavami. Nexata icatsia nacojiobijitsipa. ¹² Nexata pijaneconi xainaejitsipa Diosojavabelia. Tsipaji copatsipa Cristojavabelia penajamatabëcuenecopatsijavami: “Capanepaeya baja jumecovënëtajë Cristo,” jai ata. ¹³ Pematatsënëa bajarapova sivaxainarutsipa ita bonëjava. Afaetabinua tsipae. Pematatsënëa baracuaicuaijai tsabiabi tsipae itsamonae. Jamatabëitonotabiabijitsipa itsamonae. Xuaxi yabara ata apo becuaiicuaijaitsi, cuaiicuaijai tsabiabi tsipae. ¹⁴ Bajaraxuata pamona pevecuatëpaevatsi, pova abaxë bitso apo perujuva, jitsipajë icatsia penacojiobijava pexi pexainaenexa, pijabo ata xaniavaetsia pevetsinexa. Nexata bajarapacuenia vajanacacueneyavi ata toacuenebi tsanetsi pebaracuaicuaijaijavatsi bajarapitsiva. ¹⁵ Bajarapacuenia jumaitsinë tsipaji baja itsamonae pamonajivi pevecuatëpaevitsi copaba baja Cristo pejumecovënëtsijavami. Nexata pacuenia dovathi itorobatsi, exanavanapa.

¹⁶ Dioso pejumecovënëtsivi, pebijivi, petiriavi ata, ita pijamonae yajuvënëva pamona vecuatëpatsi, nexata bajarapamonae bitaxutotsoniatane bajarapova. Bajarapacuenia nexata apo namatavenonae tsane peyavenonaenexatsi daxita Dioso pejumecovënëtsivi. Tsipaji baja pijamonae evetatsi. Nexata Dioso pejumecovënëtsivi caëjëpaejitsiatsi peyavenonaenexa pamona bitso bepejiobivi, pamona pevecuatëpaevitsi pijamonae petoajibivitsi.

¹⁷ Ancianovi, pamona xaniavaetsia evetabiaba Dioso pejumecovënëtsivi, bajarapamonae xaniavaetsia bematamotatsi. Beyaiyatanetsinua. Ancianovi, pamona Dioso pitorobilivaisi bitso tsipaeba, bitso cujarubanua, bajarapamonae xaniavaetsia bematamotatsi. ¹⁸ Dioso pejumelivaisibaxutota jumaitsi pacuenia bueyu copatatsi pexaejava pexaenexa penacuenebijavata. Jumaitsi mapacueniaje: “Pabueyu canacuenebame trigoxu pecatotanabataxuabinexa, pëtsa pumuxatatame nepumuxatatabijavata. Pëtsa pumuxatatame trigoxu pexaenexa pecatotanabataxuabijavata,” jai Dioso pejumelivaisibaxutota. Itsalivaisita pijinia Dioso pejumelivaisibaxutota xaniavaetsia pematamotsijavanexa yabara jumaitsi mapacueniaje: “Penacuenebinë bematamotatsi,” jai Dioso pejumelivaisibaxutota. Bajaraxuata bematamotatsi ancianovi Dioso pejamatabëcueneta bitso penacuenebivi.

¹⁹ Pëtsa jumexaniataneme caejivi pepaebijava ancianonë pibisiacuene pexanaejava yabara. Matapania anijajivibeje, acueyabi pajivibeje ata, petaevitsi catsipaebiana,

jumecovënëtsianame. ²⁰ Nexata xaniajai ancianovi pibisiacuene ita exanapona, itavere daxita Dioso pejumecovënëtsivi pitabarata. Nexata pijinia itsamonae ancianovi ita cacuenetane nitavetsijava pibisiacuene pexanaevi, cujunaviana pibisiacuene pexanaejava. ²¹ Dioso pitabarata, vajatuxanenë Jesucristo ata pitabarata, Dioso pi-jaängelevi ata pitabarata, xanë jamatabëcuenereviaya caitorobatsi pacuenia caitorobatsi nexanaponaponaenexa. Daxita ancianovi, pibisiacuene pexanaevi, najëpaeya itavetsianame. Ponë ancianonë, bitso pecayapëtaenë, pibisiacuene ita exana, pëtsa sivaajumeuramë nitavetsinexa pibisiacuene pexanaejava. ²² Pëtsa itsanë ata bepijia exaname ancianonënexa. Tsipaji ponë bepijia ancianonënexa exanaejitsipame, bepijia pibisiacuene ita exana, nexata itsamonae cataejitsipa pibisiacuene pexanaevi benejamatabëcuene yavenonaenë. Daxita pibisiacuene vecua, xaniavaetsia naevetsiaya ponaponare.

²³ Xamë raja ajamatabëepatanemë tsabiabi. Nexata pëtsa apaeyabiabame ëpitaranae. Tsiquirijavayo vinorayo, pitaranae yajava, apaeyabiabianame.

²⁴ Itsamonae pibisiacuene ita exana, bananeconitsiaexanatsi daxitajivi pepuacueneyapëtaetsi. Itsamonae pijinia pibisiacuene exanae ata, bepijia apo cueneyapëtaetsi. Bexëa matapania xaniavaetsia vënëlivaisinaitajëta pibisiacuene pexanaejava. ²⁵ Bajara pijinia itsi itsamonae pexaniacuene ita exana. Pexaniacuene ita exana, daxitajivi cuenetanetsi pexaniacuene pexanaejava. Itsajavata pexaniacuene exanae ata, jivi apo cuenetaetsi. Itsiata baitsi jane bajarapajivi pexaniacuene ita exana, acuenebi navënëmatayatsia peponaponaejava. Nexata bexëajavabelia daxitajivi vënëlivaisitanetsi pexaniacuene pexanaejava.

6

¹ Pamonaë dajubicuenia canajetatsi itsamonaejavabelia amoneya petonacuenebabiabinexa, bajarapamonae Jesús pelivaisi ita pejumecovënëtsivi, yaiyataeya tonacuenebi pijatuxanenë. Bajarapacuenia tonacuenebi pijatuxanenë pesivajamatabëcuenebarëyanexatsi. Nexata pijatuxanenë Dioso pibisiacuenia apo baracuaicuajai tsane. Jesús pelivaisi ata, palivaisi vaxaitsi jivi tsipaebaponatsi, pijatuxanenë pibisiacuenia apo baracuaicuajai tsane. ² Dajubicuenia pecanajetsivitsi pijatuxanenë, Dioso ita pejumecovënëtsinë, pecanajetsivitsi pëtsa jamatabëjumaitsi pijatuxanenë yabara mapacueniaje: “Tajatuxanenë rabaja abaxë Dioso pejumecovënëtsinë. Nexata asaëyata apo tonacuenebi atanë tsane, itsiata apo nebijatae tsane,” jamatabëjai pëtsa. Biji rajane asaëya xaniavaetsia tonacuenebi pijatuxanenë. Tsipaji raja Dioso pejumecovënëtsinë yavenonaeya tonacueneba Dioso penajuaasivavitsiyajuvënë. Bajarapalivaisi tsipaebaponare. Itorobarena bajarapacuenia pexanavanapaenexa.

Pacuenia Dioso pejumecovënëtsijivi jamatabëcuenebarëya yabara pelivaisi

³ Itsamonae saicaya itsalivaisi tsipaebapona. Bajarapalivaisibeje apo najamatabëcuenejëpaebeje palivaisi vajatuxanenë Jesucristo tsipaebapona. Palivaisi vaxaitsi jumecovënëtavanapatsi, apo nalivaisijëpaebeje. ⁴ Cueneyapëtanetsi pamonaë penajumetsënëtsilivaisi tsipaebapona. Bajarapamonae beayajamatabëcuenevi itajara natane. Itsiata bajarapamonae pexaniajailivaisi apo yapëtae. Bitso bepematajemavitsi jinavanapa. Nexata bajarapamonae jitsipabiaba itsamonaejavabelia pejumeanaeyanotabiabinexa saya jema itsacuenelivaisixi peyanijobijavata. Apo barënajamatabëcuenejëpae itsajivi ata. Bajarapamonae yajuvënëvi ita xaina itsacuenejavayo, bajarapamonae nacobecaëbabiaba. Anaepanabiaba. Nabijataeyabiaba. “Itsamonae covë nitsacueniabijitsia,” jamatabëjai tsabiabi, itsamonae apo itsacueniabijitsia atatsi. ⁵ Bajarapamonae anaeya namataenetsia najumenotabiaba. Tsipaji piagamatabëcuenebejevi. Bajarapamonae pexaniajailivaisi,

Cristo pelivaisi, apo yapëtae xaniavaetsia jivi petsipaebinexa. Saya bajarapamonae jamatabëjumai tsabiabi: “Xanë raja Dioso pejumelivaisi tatsipaebaponaexae, palata nacanabianajë,” jamatabëjai tsabiabi bajarapamonae. Bajarapitsivi nayajivitsare. ⁶ Vaxaitsi Dioso vajajumecovënëtsivi, bitso cajena vajaxinaeivi Diosojavabelia, itsa sivajamatabëcuenebarëyatsi xuayovajëto Dioso nacatocopata vajaxinaenexa mapanacuataje. ⁷ Pamatacabi vaxaitsi naexanatsi mapanacuataje, itsacuenejavayo ata apo capatsitsi. Pamatacabi pijinia tēpaenatsi, apo caponae tsanetsi itsacuenejavayo ata mapanacuapijicueneje. ⁸ Bajaraxuata nexata itsa xainatsi vajaxaejava, vajanaxatabijava ata, besivajamatabëcuenebarëyatsi. ⁹ Itsiata baitsi jane pamonae najamatabëxaina ëpexinaejavanexa, bajarapamonae dovathi jamatabëcueneçëtsi. Nexata pibisiacuene exana palata pepitsinexa. Jamatabëcuenebijianatsi. Nexata bajarapamonae Diosovecua naxuabiaya jinavanapa. ¹⁰ Pamonae bitso palata jitsipa, daxita xua pibisiacuene exana palata pepitsinexa. Itsamonae bitso najamatabëxaina ëpexinaeacue pexainaenexa. Nexata baja copaba Dioso pejumecovënëtsijavami. Nexata bajarapajamatabëcuene bēpënëa bitso yajamatabëcuenebëjai.

Pacuenia Timoteo muxujiobatsi piamatabëcuenesaënexa Diosojavabelia penajamatabëcueneçopsijava yabara pelivaisi

¹¹ Timoteo, xamë Dioso pijajivitonëmë. Navecuatsare mapanacuata jivi palata pejitsipaejamatabëcuene. Biji jane ajamatabëcuenesaëmëre Dioso nejumecovënëtaponaponaejava. Dioso asivamëre. Diosojavabelia najamatabëcueneçopsiaya ponaponare. Itsamonae ata asivamëre tsaponapona. Itsamonae caitsacueniababiabi ata, bajayajebi casaëmëre tsaponapona Dioso nejumecovënëtaponaponaejava. “Xanë ayaijamatabëcuenenënë,” nejaiyaniva, beveliajamatabëcuenenë nataeya ponaponare. ¹² Catoayapëbeje ata Diosojavabelia nenajamatabëcueneçopsijava, ajamatabëcuenesaëmëre nepitsinexa xua Dioso carajutsijitsia, matacabi apo peverevereçaejava. Pamatacabi navajunupaebame nejumecovënëtsijava Jesús Dioso pexënatocuene, Dioso cajunata pecarajutsinexa matacabi apo peverevereçaejava. Ayaibitsaëtoxaneto Dioso pejumecovënëtsivi pitabarata, Dioso cajunata pecarajutsinexa matacabi apo peverevereçaejava. ¹³ Dioso baja cajena pesaëta daxita vaxaitsi asaë tsavanapaetsi. Pamatacabi Jesucristo nutatsi Poncio Pilato pitabarata, ajumejunavijibia navajunuapaeba pexaniajailivaisita. Nexata Diosobeje Jesucristobeje pitabarata caitorobatsi aeconoxae mapacueniaje. ¹⁴ Caitorobatsi xaniavaetsia nejumecovënëtaponaponaenexa daxita pacuenia jumaitsi pexanialivaisi, Cristo pelivaisi. Nexata acuenebi tsane itsajivi ata peçaitavetsinexa. Bajarapacuenia vajënaeetaponaponare vajatuxanenë Jesucristo matapania pepatsimatacabitsicajavabelianexa. ¹⁵ Pamatacabi Dioso caëjëta, itsa copiapatsiana, Cristo icatsia patsianica. Caenë Dioso bitso ayaijamatabëcuenenë daxitanacuanë pevetsivivecua. ¹⁶ Caenë Dioso apo tēpae tsane daxita matacabijavabelianexa. Dioso peyacotiyaponaponaenë. Bajaraxuata itsajivi ata acuenebi pimoxoyotsijava Dioso. Itsajivi ata cajena caeto ata apo tae Dioso. Tsipaji apo caëjëpaetsi petaejava. ¡Daxitamatacabi Dioso pijajivi yaiyatanetsi! ¡Diosu cajena ayaijamatabëcuenenë daxitamatacabijavabelianexa!

¹⁷ Pamonae bitso pexinaeivi mapanacuapijicueneje, bajarapamonae muxujiobare beayaijamatabëcuenevi penataeyaniva. Muxujiobarena pejamatabëjumaitsiyaniva: “Palata baja taxainaexae, apo namatavenonaenë itsacuenejava ata,” pejamatabëjaiyaniva. Tsipaji saya palata peverevereçaejava. Biji rajane itorobare bitso pexinaeivi penajamatabëcueneçopsinexa piasaëtsaponaponaenë Diosojavabelia. Dioso nacarajuta daxita vajaxinaejava barëyaya vajacajinavanapaenexa. ¹⁸ Itorobarena bajarapamonae pijapalata pecanacuenebinexa, itsamonaejavabelia pexaniacuene petoexanabiabinexa bajarapapalatata. Itorobarena penajamatabëcueneçopsinexa palata perajutsinexa bepejiobivijavabelia, bajarapacuenia peyavenonaenexa.

Itorobarenuua petsicobetsanaponaenexa pexainaejava bepejiobivijavabelia.
¹⁹ Bajarapacuenia itsa exanaena, nexata athëbëtatsia Dioso tobuataponaenatsi
 pepacuene penamatamotsijava pexainanexa daxitamatacabijavabelianexa.
 Xainanenana matacabi apo peverevereaejava.

*Pacuenia Pablo Timoteo pemuxujiobilivaisi toyaquina, pecopatsivajënae
 petoyaquinaelivaisi mapabaxutotaje, yabara pelivaisi*

²⁰ Timoteo, exanapononare daxita xua Dioso catocopata nexanaenexa. Pëtsa
 namuxunaevetame pamona bitso pecuaicuaijaivi saya mapanacuapijicuene yabaraje.
 Pëtsa namuxunaevetame pecuaicuaijaivi natsiquejemalivaisixi. Pëtsa namuxunaeve-
 tame pamona jivi tsipaebapona penajumetsënëtsilivaisi. Bajarapamona tsipae-
 bapona itajara pepacuene bepexaniajailivaisi. Itsiata cajena apo pexaniajailivaisi.

²¹ Itsamonae bajarapalivaisi jumecovënëta. Nexata baja copaba Dioso pejume-
 covënëtsijavami.

Catovajëtatsi Dioso pecayavenonaenexa.

Mapabaxutoje San Pablo cotocaevi toyaquina Timoteojavabelia

Pacuenia icatsia Pablo cotocaevibaxuto toyaquina Timoteojavabelia yabara pelivaisi

¹ Xanë Pablonë, Jesucristo nitoroba Dioso pejamatabëcueneta. Jesucristo nitoroba daxitanacuanëjava jivi tatsipaebinepa pacuenia Dioso najumecapanepaeya jumaitsi vajanacarajutsinexa matababi apo peverevereaejava. Dioso nacarajutsiana matababi apo peverevereaejava, Jesucristo vajajumecovënëtsivi. ² Timoteo, bitso tacaasivanë, betaxënatomëcuenia tacataenë. Catoyaquinatsi mapabaxutoje. Catovajëtatsi vaxa Dioso, vajatuxanenë Jesucristo ata, pecayavenonaenexa pecaasivaxaabeje. Catovajëtatsi pecaitaxutotsoniataenexabeje, pecajamatabëcuene xanepanaeyaexanaenexanua bajaraponëbejejavabelia.

Pacuenia Pablo Cristo vajunupaeba yabara pelivaisi

³ Pexaniajamatabëcuene rajutabiabajë Diosojavabelia. Dioso tonacuenebabiabajë pacuenia bajayata tajasalinaivimi ata Dioso tonacuenebavanapa. Pacuenia Dioso nitoroba, bajarapacuenia xaniavaetsia toponaponajë. Itsa canajamatabënapitatsi tavajëtsijavata Diosojavabelia, meravi, matababita ata, Diosojavabelia pexaniajamatabëcuene rajutabiabajë xamë yabara. ⁴ Najamatabënapitabiabajë tanepënuayabaxuabijavamë pamatababi navecuanatsatatsibeje. Bitso icatsia jamatabëcatanetsi tacasivajamatabëcuenebarëyanexa itsa catanetsi. ⁵ Najamatabënapitabiabajë pacuenia daxita nejamatabëëthëtovetsina najamatabëcuenecopatame Diosojavabelia. Copiaya acue Loidabeje, ena Eunicebeje, pejamatabëëthëtovetsina najamatabëcuenecopatabeje Diosojavabelia. Nexata yapëtaniji bajarapacuenia xamë ata nenajamatabëcuenecopatsijava Diosojavabelia.

⁶ Bajaraxuata canajamatabënapitsiaexanatsi mapacueniaje. Exanapon-aename pacuenia Dioso caitoroba pecavejamatabëcaevianiva Dioso peca-cajëpaeyaexanaejamatabëcuene. Nexata xaniavaetsia evetaponaponanename Dioso pejumecovënëtsivi. Pajamatabëcuene Dioso cacajëpaeyaexana, Dioso carajuta pamatababi catsimatanacobebuatatsi tacatovajëtsijavata Diosojavabelia. ⁷ Dioso cajena nacarajuta Espíritu Santo. Espíritu Santo nexata vajanacayajavaponaponaxae, apo cujunavitsi itsacuenejava ata. Espíritu Santo pesaëta nacacajëpaeyaexana pacuenia Dioso nacatojitsipa vaxaxanabiabinexa. Nacayavenonanua vaxaasivanexa itsamonae ata. Nacanajamatabëcuene cataitsiaexananua pibisiacuene ata vaxaxanaevianiva. ⁸ Pëtsa ajumeuramë nevajunupaebaponaejava vajatuxanenë Jesús. Pëtsa ajumeuramë xanë ata tanevajunupaebijavamë, Jesucristo pijajivitonëxaenë penaneconitsivi pejebabiabibota taneetsijava. Biji rajane xamë ata tonacopare itsamonae pecabejiobiaexanaenexa, jivi Diosojavabelia pecapanepaelivaisinexatsi yabara. Itsamonae pecabejiobiaexanaejavata, Dioso cajena cajamatabëcuenebabatsiana. ⁹ Dioso cajena nacacapanepaena pibisiacuene vaxaxanaeneconimivecua. Nacajunata vajatojinavanapaenexa xaniavaetsia. Itsacuenejavayo pexaniacuene apo exanae atatsi, Dioso itsiata nacajunata. Nacajunata tsipaji Dioso jitsipa vajanacajunatsinexa. Dioso nacaitaxutotsoniatanenua Jesucristo pejamatabëcueneta. Pepo bajayatamicujinae, pamatababi abaxë Dioso nacua ata apo exanae, Dioso baja cajena nacajitsipa. ¹⁰ Dioso cajena nacatsitanajamatabëcueneitajëta vajanacaasivajava. Dioso vajanacaasivaxae, pexënato itorobica vajanacacapanepaenexa. Nexata tēpae ata tsanetsi, apo nacatoitsacuene. Tsipaji itsa najamatabëcuenecopatatsi

Jesucristojavabelia, nacacapanepaena Diosojavabelia. Nexata xainaenatsi matacabi apo pevereveceajava.

¹¹ Dioso cajena nitapeta jivi tatsipaebaponaenexa bajarapapexanialivaisi. Nitoroba apóstolenēnexanē tatsipaebaponaenexa bajarapalivaisi apo judíovijavabelia.

¹² Bajarapalivaisi jivi tatsipaebaponaexae, itsamonae nebejiobiaexanapona mapacueniaje. Itsiata baitsi jane apo auranē tanebejiobiaexanaejava yabara. Tsipaji ponējavabelia najamatabēcuenecopatajē, jamatabēcueneyapētaniji. Jamatabēcueneyapētaniji pacuenia bajaraponē jamatabēcuenecaējēpatsi taneyavenon-aenexa. Nexata bajaraponē neyavenonabiabiana pacuene netocopata taexanapon-aenexa matapania icatsia Cristo pepatsimatacabitsicajavabelianexa.

¹³ Timoteo, casaēmēre tsaponaponae nejumecovēnētsijava pexaniajailivaisi, palivaisi baja catsipaebatsi. Pacuenia baja catsipaebatsi, bajarapacuenia juya itsamonaejavabelia tsipaebabiabianame. Bajarapalivaisi jamatabēnaponaponare. Xaniavaetsia jumecovēnētsia ponaponare. Asivaya taeyabiabare itsamonae ata Jesucristo pijajivitonēxaemē. ¹⁴ Espíritu Santo cajena nacayajavaponaponabeje. Nexata nacayavenonaponaponabeje. Bajaraxuata pexaniajailivaisi xaniavaetsia tsipaebaponaponare. Pacuenia Dioso caitoroba, exanabiabare. Saicayalivaisicuenia pētsa tsipaebaponame. Espíritu Santo cayavenonaena.

¹⁵ Xamē baja cajena yapētaneme pacuenia Asiávēnē nacuapijivi, daxita Dioso pejumecovēnētsivi, nexuabarēcēpeca. Tanexuabarēcēpecaevi yajuvēnēnēbeje Figelobeje Hermógenesbeje. ¹⁶ Onesíforo, pijamonae yajava, Dioso pitaxutotsoniataenexatsi, tovajētajē Diosojavabelia. Onesíforo nejamatabēcuenebabatabiaba. Penaneconitsivi pejebabiabibota ecae atanē, nesivaxaina anijatonē. Onesíforo cajena apo neyabaraaura, penaneconitsivi pejebabiabibota ecae atanē. ¹⁷ Biji rajane Onesíforo itsa patajopa Roma tomarata, nejaitaruta. Apo copatsi cajena tanejaitarutsijava. Matapania itsa necaxitaraba penaneconitsivi pejebabiabibota, copata baja tanejaitsijava. ¹⁸ Diosojavabelia Onesíforo tovajētajē Dioso pitaxutotsoniataenexatsi pamatacabi icatsia Cristo patsianica. Xamē baja cajena yapētaneme pacuenia Onesíforo nacayavenonabeje pamatacabi ponaponatsibeje Efeso tomarata.

2

Pacuenia Jesucristo pijajivitonē jamatabēcueneitsi, ponē xaniavaetsia jumecovēnēta, yabara pelivaisi

¹ Timoteo, xamē betaxēnatomēcuenia tacataenē. Catovajētatsi Diosojavabelia pecajamatabēcuene asaēyaexanaenexa. Nacayavenonaena Jesucristo pijajivixaetsi.

² Xamē rabaja cajena nejumetaeyabiabame palivaisi tsipaebabajē jivi ayaibitsaētōxanetonējavabelia. Bajarapalivaisi juya tsipaebare itsamonaejavabelia. Pamonaē apo piacuenējitsibivi pexanaenexa pacuenia itorobatsi, pecaējēpaevitsinua xaniavaetsia jivi livaisi petsipaebinexa, bajarapamonae itorobare juya mataropotsia bajarapalivaisi petsipaebinexa itsamonaejavabelia.

³ Dioso pejumelivaisi jivi netsipaebaponaejavata, itsa catoayapēbeje, itsamonae itsa cabejiobiaexanaejitsianua, pētsa najetabajiravame. Jesucristo pijajivitonēxaemē, jamatabēcuenevetaponaponare pacuenia caitoroba nexanaenexa. Pacuenia pexaniavajabitsaēnē itsi, bajaraitsimēre.

⁴ Vajabitsaēnē pitorobabiabinētsi jamatabēcuenevetaponapona pacuenia itorobatsi pexanaenexa. Nexata apo vecuanajamatabēcueneepatajērētsi saicayacuene pevetaponaenexa.

⁵ Bajara pijinia pacuenia pebitsojinaēvi pecujinaejinaejava, penayacobijavata, cujinaejina pacuenia itorobatsi pijatuxanevi. Penacanabinē jamatejema perajutsinexatsi itsacuenejavayo. Pajivi xaniavaetsia apo cujinaejinae pacuenia itorobatsi, bitsojinae ata pecujinaejinaejava, itsiata apo nacanabi. Nexata apo rajutsitsi

pecujinaejinaematamo. ⁶ Ponë pijinia pabi nacueneba peubinexa peubijava, bajaraponë copiaya nacueneba asaëyata. Nexata peubijava itsa tonaveretatsi, pita baja penacuenebimatamo. Bajara pijinia pacuenia xamë ata asaëya tonacuenebare vajatuxanenë. Nexata vajatuxanenë carajutsiana netonacuenebimatamo.

⁷ Najamatabëxainare tacatsipaebilivaisi. Nexata vajatuxanenë cayapëtaeyaexanaena bajarapalivaisi.

⁸ Canaëjere Jesucristo. Bajaraponë cajena Dioso asaëyaexanatsi petëpaecujinae. Bajaraponë cajena Davidpijinë pemomoxiyajuvënë. Bajaraponë pelivaisi jivi tsipaebabiabajë. Itsa jumecovënëta bajarapalivaisi, pecapanepaelivaisinexatsi Diosojavabelia. ⁹ Bajarapalivaisi tatsipaebaponaexae, penaneconitsivi pejebabiabibota neeta tavajënaeyabelia daxitanacuanëjava tatsipaebaponaeyaniva. Cadenamaëtonëta xanë necëta, pacuenia bitso pibisiacuene pexanaenë bacëtatsi. Itsiata Jesucristo pelivaisi apo cëtsicapanepae. Nexata xanë majotaje naneconitsia ponaponae atanë, aeconoxae baja Jesucristo pelivaisi yacaëjëpaponae daxitanacuanëjava. ¹⁰ Bajaraxua tayapëtaexae, tonacaevetajë itsamonae ayaicuenia tanebejiobiaexanaenexa, Dioso pitapetsivitsi pecapanepaenexatsi Jesucristo pelivaisi pejumecovënëtsixae. Nexata bajarapamonae ata Dioso capanepaenatsi pexainaenexa matababi apo peverevereceaeyava daxita matabijavabelianexa. Nexata bajarapamonae Jesucristo yajavajinavanapaena pinijicotia yajava. ¹¹ Palivaisi aeconoxae jumaitsinëjitsia, pexaniajailivaisi cajena:

Itsa xaniajai Cristo yajavatëpatsibeje, nexata icatsia Cristo yajavaasaëtsibeje tsaponaponae tsane. ¹² Itsa casaë tsaponaponaetsibeje tsane Cristo pelivaisi vajajumecovënëtsijavabeje, itsamonae nacabejiobiaexanae atabeje, nexata daxitacuene Cristo cobenaevetsianatsibeje pamatacabi daxitacuene evetsiana pijanacuatatsia. Itsa vaxaitsibeje bajaraponë pelivaisi vajajumecovënëtsijavabeje nayavajunuaxainaenatsibeje jivijavabelia, nexata juya bajaraponë pijajivitonëcuenetsibeje nacayavajunuaxainaenabeje paxa Diosojavabelia. ¹³ Vaxaitsi itsajamatabëcuene Dioso vecuanajamatabëxainae atatsi, itsiata Dioso nacatoexanaena pacuenia baja cajena najumecapanepaeya jumaitsi.

Pacuenia jamatabëcueneitsi xaniavaetsia Dioso petonacuenebinë yabara pelivaisi

¹⁴ Daxita Dioso pejumecovënëtsivi najamatabënapitsiaexanaename palivaisi catsipaebatsi. Vajatuxanenë pitabarata tsipaebare bajarapamonae. Pëtsa bajarapamonae anaeya jumenota saya itsamonae pecuaicuajijajava. Pejumeanaenotsijava itsamonae, apo jamatabëcueneavenonae tsipaetsi itsajivi ata. Saya jamatabëcuenebijinaejitsipatsi daxita pejumetaevitsi. ¹⁵ Pacuenia cacaëjëpa, Dioso pecaitorobicuenia exanapononare. Nexata pamatacabi naitajëtsianame Dioso pitabarata, cabarëyataena xaniavaetsia nejumecovënëtsixae pacuenia caitoroba. Ajibi tsane neyabaraaurajava Diosojavabelia. Tsipaji xaniavaetsia jivi tsipaebapononame Dioso pejumelivaisi, pepo pexaniajailivaisi. ¹⁶ Pëtsa namuxunaevetame pamonae tsipaebapona natsiquejemalivaisi, mapanacuapijilivaisi. Tsipaji raja bajarapamonae petsipaebaponaelivaisita, jivi Dioso pejumecovënëtsijavami copabiaexanapona pevajënaeyabelia. ¹⁷ Bitso cajena abeje bajarapalivaisi. Pacuenia ayaivajënë banaexanapona pevajënëtsabanajetaruaeyava, bajara pijinia jamatabëcueneitsi bajarapamonae petsipaebaponaelivaisi. Tsipaji pevajënaeyabelia jivi ayabitsaëto jamatabëcuenebijianaponatsi bajarapalivaisi petsipaebaponaexaetsi. Bajarapalivaisi petsipaebaponaevi yajuvënënebeje Himeneobeje Filetobeje. ¹⁸ Bajaraponëbeje copatabeje baja pexaniajailivaisi pejumecovënëtsijavamibeje. Jamatabëcuenenavëxaniababeje saya. Tsipaji jumaitsidebeje tsabiabi: “Panepa rabaja jivi petëpaecujinae icatsia Dioso piasaëyaexanaponaeyaminexa,” jaibeje tsabiabi. Nexata bajarapacuenia Dioso pejumelivaisivecua najamatabëcuene epatajërërëcaponabeje. Nexata bajaraponëbeje itsamonae ata Dioso pejumecovënëtsijavamivecua najamatabëcueneepatajërërëcaeya

exanaponabeje. ¹⁹ Pacuenia ibotoxaneto apo tixitsicapanepaetsi, bajara pijinia itsi Dioso pejumelivaisi, pexaniajailivaisi. Caelivaisi rabaja tsiteca. Nexata itsalivaisijavabelia apo tixitsicapanepaetsi. Bajarapalivaisijavata mapacuenia pejumaitsilivaisiyo rucaje: “Pepo petuxanenë cajena yapêtane pijajivi,” pejailivaisiyo ruca. Itsalivaisijavata pijinia mapacuenia pejumaitsilivaisiyo rucaje: “Pajivi jumaitsi: ‘Xanë raja Cristo pijajivitonënë,’ jai, bajarapajivi becopata pibisiacuene pexanaejava,” pejailivaisiyo ruca.

²⁰ Riconë pijaboxanetota jivi pecanabaninëanënexa, xaina daxitacuenevirianëanë. Itsanëanë penioponaeplataninitota pexanaenëanë. Itsanëanë oronanitota pexanaenëanë. Pamatacabi riconë topatatsi petuxanevi, ayaijamatabëcuenevi, pexaejava abatabiaba bajaraponëanëta. Itsanëanë bevelianëanë, naejavanëanë. Itsanëanë atsananinëanë. Bajaraponëanë xaina daxitamatacabi jivi pecanabaninëxa. ²¹ Bajara pijinia jamatabëcueneitsi Dioso pejumecovënëtsivi ata. Pajivi xaniavaetsia najamatabëcuenevetaponapona pibisiacuene pexanaeyaniva, bajarapajivi jamatabëcueneitsi pacuenia oronanitota pexanaenëanë itsi. Baitsi baja ajamatabëcuenexuirajibi. Nexata pijatuxanenë tsitaxanepana pitorobinexatsi xua pexaniacuene pijatuxanenë petonacuenebinëxa. Timoteo, bajaraxuata xaniavaetsia benaevetaponapona pibisiacuene nexanaeyaniva.

²² Pacuene pevëjëavi najamatabëxaina pibisiacuene pexanaenëxa, bajarapacuene vecuanajetabajiravaponare. Casaëmëre tsaponapona epepexaniacuene nexanaponaponaejava. Diosojavabelia najamatabëcuene copatsiyaponapona. Asivamëre tsaponapona itsamonae ata. Jamatabëcuenexanepanaeya ponapona Dioso pitabarata. Bajarapacuenia barëajamatabëcuensaëmëre tsaponapona, pamona xaniavaetsia penaevetavanapaevi pibisiacuene pexanaeyaniva, penavajëcabiabivina Diosojavabelia peyavenonaenexatsi. ²³ Namuxujemare natsiquejemalivaisixi pecuaicuaijivi. Yapêtaneme rabaja. Bajarapitsilivaisixi jivi itsa cuaicuaijai, belia najumeanaenotabiabapona. ²⁴ Jesús cajena pijajivitonë, itsamonae apo bejumeanaenotsi. Biji rajane pexaniajamatabëcuene bexaina daxitajivijavabelia. Livaisi jivi betsipaeba xaniavaetsia. Bajayajebi ata apo becopatsi livaisi petsipaebaponaejava. ²⁵ Xaniavaetsia muxujiobiaya livaisi betsipaeabapona pamona Dioso apo pejitsipaevi ata. Nexata beevetaponapona bajarapamona ata pecopabinëxa pibisiacuene pexanabiabijava penajamatabëcuene pënëyorotsinëxa Diosojavabelia. Nexata bajarapamona ata Dioso yapëtaeyaexanaenatsi Jesús pelivaisi pexaniajailivaisicuene. ²⁶ Nexata icatsia najamatabëxainaena xaniavaetsia Dioso pejumecovënëtsinëxa. ²⁵ Xaniavaetsia muxujiobiaya livaisi betsipaeabapona pamona Dioso apo pejitsipaevi ata. Nexata beevetaponapona bajarapamona ata Nexata dovathi pejamatabëcuene itorobabiabijavatsivecua najamatabëcuene pënëyorotsiana Diosojavabelia.

3

Pacuenia jivi itsane itsa baja imoxoyo pevajënae nacua pevereverecaenëxa yabara pelivaisi

¹ Timoteo, xaniavaetsia beyapêtaneme mapacueneje. Itsa baja imoxoyo pevajënae tsane nacua pevereverecaenëxa, bajarapamatacabi bitso ayapëbeje tsane daxitacuenejavabelia. ² Bajarapamatacabi cajena caejivi canacujitsia pexainaejava, natoasiva tsane ëbajarapamona ayaijava pexainaejava. Navajunupaebiana saya peyaiyataenexatsi pejumetaevitsi. Beayaijamatabëcuenevi nataena. Navajunupaebiana pexanaejava yabara peyaiyataenexatsi. Bajarapamona pibisiacuena baracuaicuaijai tsane Dioso. Apo jumecovënëtsi tsane paxajivi, penajivi ata, pitorobicueniatsi. Vitsatsi atatsi, yavenonabiabi atatsi, apo jamatabënajinae tsane pijamonae. Bajarapamona apo yaiyatae tsane itsamonae Diosojavabelia pevajëcabiabijava. ³ Bajarapamatacabita bajarapamona apo

asiva tsane pijamonae ata. Apo itaxutotsoniatae tsane itsamonaejavabelia ata. Najumetsënëtsiaya baracuaicuaijai tsabiabi tsane itsamona. Apo caëjëpaetsi tsane penajamatabëcuenecataitsinexa pibisiacuene pexanaejava. Anaepanabiabiana bitso pebejiobiaexanaenexa itsamona. Itoya tsane daxita pexaniacuene pexanaevi. ⁴ Bajarapamonae canajetsiana penajuajinavanapaevi ata pijavajabitsaë pecobeyabelia. Xaniavaetsia najamatabëxainaenejeva, exanaena daxitacuene. Bijiaya naëcotsiana itsamona. Dioso apo jamatabënajinae tsane. Jaitsiana biji pebarëyjamatabëcuene saya pebarëyanexa. ⁵ Bajarapamonae itajara najonena Dioso pejumecovënëtsivijavabelia. Itsiata baitsi jane apo jumecovënëtsi tsane Dioso pejumelivaisi, jumetae ata.

Bajarapamonae navecuatsatsianame. ⁶ Bajarapamonae navecuatsatsianame tsipaji bajarapamonaeyajuvënëvi itsamona pijabonëjavabelia joneyabiabiana. Nexata bajarapabonëpijivi, petiriavi, bajarapamonae yamaxëitojorobabiabiana. Bajarapapetiriavi jamatabëcuenefaenaena. Daxitacuene pibisiacuene jamatabëexanabiabiana. Nexata pamatacabi bajarapapetiriavi pibisiacuene jamatabëexana, patabiabiana penajumetsënëtsilivaisi petsipaebinxatsi. Nexata bajarapapetiriavi itsa tsipaebianatsi penajumetsënëtsilivaisi, beDioso itajara pejumelivaisi petsipaebivi taeyabiabiana. ⁷ Bajarapapetiriavi picani jitsipaena petsipaebabiabinexatsi Dioso pejumelivaisi. Itsiata baitsi jane apo tsijamatabëjonetsi tsane pepo pexaniajailivaisi pecapanepaelivaisinexatsi Diosojavabelia. ⁸ Bajayata penajorobinëmibeje, Janespijinëmibeje Jambrespijinëmibeje, nayajiviitavetabeje Moiséspijinë pexaniajailivaisi petsipaebiyanivatsibeje. Bajara pijinia pacuenia pamona petiriavijavabelia penajumetsënëtsilivaisi tsipaebaponaena. Bajarapamonae nayajiviitavetaponaena pepo pexaniajailivaisi petsipaebiyanivatsi. Bajarapapetiriavi apo caëjëpaetsi tsane penajamatabëxainaenexa xaniavaetsia. Bajarapamonae saya yamaxëitojorobiaya jumai tsabiabi tsane itsamonaejavabelia: “Paxanë raja Dioso patajumecovënëtsivi,” jai tsabiabi tsane. ⁹ Itsiata bajarapamonae ayaibitsaëto jivi apo pënaponaetsi tsane. Daxitajivi cueneyapëtaenatsi bajarapamonae saya jema livaisi petsipaebaponaejava. Nexata pacuenia bajayata Janespijinëmibeje Jambrespijinëmibeje daxitajivi cueneyapëtanetsibeje pibisiacuene pexanaponaejavabeje, bajara pijinia pacuenia bajarapamonae ata daxitajivi cueneyapëtaenatsi penajumetsënëtsilivaisi petsipaebaponaejava.

Pacuenia baja Pablo copatsijitsia Timoteo pemuxujibijava yabara pelivaisi

¹⁰ Timoteo, xamë baja cajena yapëtaneme palivaisi tsipaebabiabajë jivibitsaëtoxanetojavabelia. Yapëtanemenua baja cajena pacuenia xaniavaetsia ponaponajë. Yapëtanemenua pacuene yabara Dioso tonacuenebaponaponajë. Yapëtanemenua pacuenia Dioso jumecovënëtaponaponajë. Yapëtanemenua pacuenia itsamonaejavabelia livaisi tsipaebaponajë bajayajebi copatsinejevanë. Yapëtanemenua pacuenia itsamona ata asivanë. Yapëtanemenua pacuenia casaënë tsaponapona jivi livaisi tatsipaebaponaejava netoayapëbeje ata. ¹¹ Yapëtanemenua pacuenia itsamona pibisiacuena nebaracuaicuaijai tsabiabi Jesucristo tajumecovënëtsinëxae. Yapëtanemenua pacuenia nebejiobiaexanapona. Yapëtanemenua pacuenia nebejiobiaexana Antioquia tomarata, Iconia tomarata ata, Listra tomarata ata. Bajarapatomaranëpijivi bitso nebejiobiaexana. Itsiata baitsi jane Dioso necapanepa daxita bajarapacuenivecua. ¹² Xaniajai cajena. Daxita pamona najamatabëcuenecopata xaniavaetsia petojinavanapaenexa Jesucristo, bajarapamonae bejiobiaexanaponaenatsi. ¹³ Nexata pibisiajamatabëcuenevi, pamona dovathi pejamatabëcueneta jivi yamaxëitojorobapona, orijibia bitso pevajënaeyabelia pibisiacuene exanaponaena. Bajarapamonae dovathi pejamatabëcueneta jivi yamaxëitojorobaponaena. Nexata pijinia bajarapamonae ata bitsoyo dovathi yamaxëitojorobaponaenatsi.

¹⁴ Timoteo, itsiata baitsi jane xamë casaëmëre tsaponaponae pali-
vaisi baja capanepaeya jumecovënëtime. Tsipaji baja cajena xamë ja-
matabëcueneyapëtaneme pacuenia jamatabëcueneitsi pamonaecatcipaeba
bajarapalivaisi. ¹⁵ Tsiquirinëyomëjavaveliacujinae baja cajena yapëtaneme Dioso
pejumelivaisi. Bajarapalivaisi cayapëtaeyaexana pecacapanepaejavanexa
Diosojavabelia nenajamatabëcuenecopatsixae Jesucristojavabelia. ¹⁶ Dioso pijajivi
Espíritu Santo itorobatsi peyaquinaenexa Dioso pejumelivaisi. Nexata pacuenia
Espíritu Santo itorobatsi, bajarapacuenia Dioso pijajivi yaquina daxita Dioso
pejumelivaisibaxutonënexa. Nexata nacatoxanepana Dioso pejumelivaisi itsamonae
vajanacatsipaebinexa vajayapëtaenexa pexaniajailivaisicuene. Nacatoxanepanua
Dioso pejumelivaisi vajanacaitavetsinexa apo pexanepanaecuene itsa exanatsi.
Nacatoxanepanua Dioso pejumelivaisi vajanacajamatabëcueneitorobinexa ëDioso
pejitsipaecuene vajatoexanabiabinexa. Nacatoxanepanua Dioso pejumelivaisi
vajanacayapëtaeyaexanaenexa xaniavaetsia vajatojinavanapaenexa Dioso. ¹⁷ Nexata
Dioso jumecovënëtsinë itsa yapëthane Dioso pejumelivaisi, jamatabëcuenecaëjëpaenatsi
daxita xua pexaniacuene pexanaenexa.

4

¹ Pepo petuxanenë Jesucristo patsianica penaneconitsiaexanaenexa daxita pibisi-
acuene pexanaevi. Naneconitsiaexanaena piasaëtsavanapaevi, petëpaevi ata. Bajaraponë
itsa patsianica, daxitacuene pevetsinexa, patsianica. Jesucristo pitabarata, Dioso ata
pitabarata, xanë jamatabëcuenereviaya caitorobatsi mapacueniaje. ² Daxitamatacabi
jivi tsipaebare Dioso pitorobilivaisi. Ajamatabëcuenesaëya Dioso pitorobilivaisi tsipae-
baponare. Paepatota jivi jitsipa pecanamuxunaevetsinexa, tsipaebare. Paepatota
ata apo jitsipae pecanamuxunaevetsinexa, itsiata tsipaebare. Dioso pitorobilivaisi
jivi jumecovënëtsiaexanare. Itavere pibisiacuene pexanaejava. Muxujibare pija-
matabëcuenesaënexa Diosojavabelia. Tsipaebaponare xaniavaetsia Dioso pejumeliv-
aisi bajayajebi jamatabëcuenecueranaenejevamë. ³ Bajarapacuenia tsipaebaponare tsi-
paji raja itsamatacabi jivi apo namuxunaevetsi tsane pexaniajailivaisi petsipaebija-
vatsi. Biji rajane itsamatacabi jivi pijacuata natojaitsiana saicayalivaisi Dioso pe-
jumelivaisivecua ayaibitsaëto petsipaebinexatsi. Bajarapamonae pijacuata junatsiana
petsipaebinexatsi palivaisi muxujitsipa. ⁴ Nexata pexaniajailivaisi petsipaebiyani-
vatsi, navecuaitavetsiana. Jumecovënëtsiana saya ënatsiquejemalivaisixi. ⁵ Itsiata baitsi
jane xamë saicaya nayajivitaeyaponaponare. Daxita pacuenia Dioso catocopata
nexanaenexa, veretsianame. Catoayapëbeje ata, itsamonae cabejiobiaexanae ata,
casaëmëre tsaponaponae nevajënaeyabelia. Casaëmëre tsaponaponae jivi netsipaebijava
pexanialivaisi pecapanepaelivaisinexatsi Diosojavabelia.

⁶ Xanë baja netoimoxoyo tsaponae tatonacaevetsinexa tanebeyaxuabinexa.
⁷ Pacuenia pebitsojinaenë pecujinaejinaejava daxitasaëta cujinaejinaeya pata,
bajarapacuenia xanë ata xaniavaetsia daxita tasaëta tonacuenebajë tajatuxanenë.
Toveretaponajë baja tatonacuenebijava taneitorobicuenia. Apo copatsinë cajena tana-
jamatabëcuenecopatsijava Diosojavabelia. ⁸ Pacuenia penayacobijavata, pebitsojinaenë
pecujinaejinaejava, barajutatsi corona pecujinaejinaematamo, bajara pijinia pacuenia
xanë ata vajatuxanenë athëbëtatsia nerajutsiana pexaniacuene taneitorobicuenia
tatoponaponaexae. Bajarapacuene nerajutsiana pamatacabi vajatuxanenë
patsianica. Itsiata baitsi jane ëxanë apo nerajutsi tsane bajarapacuene. Daxita
pamonae ata jamatabëcuenesaëya vajënaeevetavanapa pepatsijavatsica Jesucristo,
bajarapamonae ata rajutsianatsi bajarapacuene. Vajatuxanenë itsa patsianica,
naneconitsiaexanaena daxita pamonaenaneconita bajaraponëjavabelia. Vajatuxanenë
itsa naneconitsiaexanaena daxita pamonaenaneconita bajaraponëjavabelia,

itaxutojema apo naneconitsiaexanae tsane. Paneconivajëto caejivi canacujitsia xainapona, bajarapaneconivajëtota naneconitsiaexanaponaena.

Pacuenia Pablo jumaitsi Timoteojavabelia yabara pelivaisi

⁹ Itsa cacuenecaëjëpa neponaejava, bepijiayo netaeyojopaeremena. ¹⁰ Demasvënënë rabaja nexuabatabajirava. Tsipaji Dioso pejumelivaisi matatoxenetsia jitsipa bitso mapanacuapijicueneje. Pona baja nexata Tesalónica tomarabelia. Crescentevënënë baja itorobajë Galacia nacuyabelia. Tito pijinia itorobajë Dalmacia nacuyabelia. ¹¹ Caenë Lucas xanëjavata ponapona. Jaire Marcos. Bajaraponë caëjëpatsi taneyavenonaenexa Dioso tatonacuenebjava. Nexata barërenamë tsane. ¹² Tíquico baja itorobajë Efeso tomarabelia. ¹³ Itsa renamë tsane xanëjavaberena, Troas tomarata tajacamisajumavelia tanaxatatsijava netopitaponaeremena. Carpovënënë raja pijabota puenetarutajë. Tajalibronënu, tajacuyalatobaxutoxinua, netopitaponaeremena. Bitso tajacuyalatobaxutoxi namatavenonajë.

¹⁴ Alejandro, cobrenanita daxitacuene pexanaenë, bitso baja cajena pibisiacuene nexana. Itsiata baitsi jane Dioso neyamamatamotsiana tanebejiobiaexanaematamo. ¹⁵ Nayajivitaema bajaraponë. Tsipaji raja bitso itoya patatsipaebaponaelivaisi.

¹⁶ Pamatacabi nayajivicuaicuaijanë majotaje Roma tomarata, nacua pevetsivi pitabarata, itsajivi ata apo neyavenonaeyacuacuajai. Daxita nexuabanuta. Nexata bajarapamonae tovajëtajë Diosojavabelia penaneconitsiaexanaeyanivatsi tanexuabanutsijamatabëcuene. ¹⁷ Itsiata baitsi jane bajarapaepatota vajatuxanenë neyavenona. Vajatuxanenë pesaë nerajuta daxitalivaisi tatsipaebinexa. Apo judíovi ata pejumecovënëtsinexa, bajarapalivaisi tsipaebaponajë Diosojavabelia pecapanepaelivaisinexatsi. Tanexuabanutsijavata picani netsiayai tanebeyaxuabinexa. Itsiata vajatuxanenë necapanepa tanebeyaxuabijavaminexavecua. ¹⁸ Vajatuxanenë cajena necapanepaponaena daxita pibisiacuene taneexanaeyaniva. Necaponaena athëbëabetsia bajaraponë pevetsinacuayabetsia. Vaxaitsi jumai tsabiabi tsanetsi Diosojavabelia daxitamatacabijavabelianexa: “Diosomë, pinijicuene baja cajena nexanaenë,” jai tsabiabi tsanetsi.

Pacuenia Pablo Timoteo tonajumeitoroba Efeso tomarabelia pebajacobinexatsi peyapëtaevitsi yabara pelivaisi

¹⁹ Nebajacobiana Prisca. Prisca pamona ata, Aquila, nebajacobiana. Nebajacobiana Onesíforo pijamonae ata. ²⁰ Erasto nacopatajopa Corinto tomaratalia. Trófimo pijinia puenetajë Mileto tomaratalia. Tsipaji avitane. ²¹ Itsa cacuenecaëjëpa, naxanitsiayo renamë tsane emarapae pecopiajopaevajënaeya. Cajamatabënajina pina Eubulo, Pudente ata, Lino ata, Claudia ata, daxita itsamonae Dioso pejumecovënëtsivi yajava.

²² Catovajëtatsi vajatuxanenë Jesucristo pecayajavaponaponaenexa. Daxita paxamë pacatovajëtatsi Dioso papecayavenonaenexa.

Mapabaxutoje San Pablo toyaquina Titojavabelia

Pacuenia Pablo mapabaxutoje toyaquina Titojavabelia yabara pelivaisi

¹ Xanë Pablonë, Dioso pijajivitonënë. Jesucristo ata pijaapóstolenënë. Jesucristo baja cajena nitoroba jivi tayavenonaenexa Diosojavabelia penajamatabëcuenecopatsinexa. Dioso baja cajena tajëvelia itapeta bajarapamonae penajamatabëcuenecopatsinexa Diosojavabelia. Jesucristo nexata nitoroba bajarapamonae tatsipaebinexa pexaniajailivaisi Dioso pitabarata bajarapamonae xaniavaetsia pejinavanapaenexa. ² Jesucristo nitoroba tatsipaebinexa pexaniajailivaisi bajarapamonae ata pexainaenexa matababi apo peverevereaejava. Pepo bajayatami, Dioso abaxë nacua ata itsa apo exanae, Dioso najumecapanepaeya jumaitsi vajanacarajutsinexa matababi apo peverevereaejava. Dioso baja cajena apo penajumetsënëtsinë. ³ Nexata baja Dioso pecaëjësimatecabita, bajarapalivaisi nacayapëtaeyaexana. Nexata Dioso, vajanacacapanepaenënexa, xanë nitoroba jivi tatsipaebinexa bajarapalivaisi. Nexata xanë daxitajivi tsipaebaponajë bajarapalivaisi. ⁴ Tito, betaxënatomëcuenia tacataenë. Tsipaji cayavenonatsi xamë ata nejumecovënëtsinexa Jesucristo pelivaisi. Catoyaquinatsi mapabaxutoje. Catojitsipatsi vaxa Dioso pecayavenonaenexa, Jesucristo ata, vajanacacapanepaenënexa, pecayavenonaenexa. Catojitsipatsi pecaitaxutotsoniataenexa, pecajamatabëcuene xanepanaeyaexanaenexanua.

Pacuenia Pablo Tito puenetanuta Cretatunaeto nacuata petonacuenebinexa Dioso pijacuene yabara pelivaisi

⁵ Capuenetatsi baja cajena Cretatunaeto nacujavata. Capuenetatsi nexanaponaponaenexa, xua abaxë catosajina nejamatabëcueneasaëyaexanaenexa Dioso pejumecovënëtsivi. Caitorobatsinua baja cajena caetomarapijivi canacujitsia nitapetsinexa ancianovinexa, Dioso pejumecovënëtsivi pevetsivinexa. ⁶ Nejumenajamatabënapire pacuenia caitorobatsi. Itsa itapetsijitsiamë ponë ancianonënexa, itapetsianame ponë toajibitsi jivi peyabaraneconitsijavanexatsi. Caeva pepitsinë. Pexi Dioso petojumecovënëtsinëtsi. Pexi apo petoacujirubejenëtsi. Pacuenia ata pexi itoroba, pejumecovënëtsinëtsi. ⁷ Tsipaji ponë itapetsianame ancianonënexa, Dioso pijacuene tonacuenebiana. Bajaraxuata ancianonënexa, itapetsianame ponë xaniavaetsia peponaponaenë, planeconijibinë. Beayajamatabëcuenenë apo penataenë. Bepijia apo pianaepanaenë. Apo piapaenë piaitajibinexa. Pevëna pebi apo pebenë. Apo pejitsipaenë itsajivi ata yamaxëitojorobiaya pevecuanacobetoxotsinexa palata. ⁸ Ancianonënexa, xanepana ponë xaniavaetsia copiapitabiaba pijabota pepatsivi. Pexaniacuene pexanaenë. Xaniavaetsia copiaya penajamatabëxainaenë pacuene exanaejitsia. Xaniavaetsia peponaponaenë jivi pitabarata, Dioso ata pitabarata. Pexanaponaponaenë daxita pacuenia Dioso pejumelivaisita itoroba jivi pexanaenexa. Pecaëjëpaenëtsi penajamatabëcuenecatatsinexa pibisiacuene pexanaeyaniva. ⁹ Ancianonënexa, xanepana ponë casaë tsaponapona pejumecovënëtsijava palivaisi tsipaebatsi, pexaniajailivaisi. Bajarapacuenia nexata bajaraponë caëjëpaenatsi itsamonae ata pejamatabëcuenebabatsinexa pexaniajailivaisita. Caëjëpaenatsinua xaniavaetsia pejumecanaviatsinexa pamona jamatabëcuenenavëxaniabiaya pibisiacuena baracuaicuaijai Dioso pejumelivaisi. Nexata ancianonë xaniavaetsia itsa jumecanaviatsiana pamona pibisiacuena baracuaicuaijai Dioso pejumelivaisi, bajarapamonae ata jumecovënëtsiana Dioso.

¹⁰ Bajarapitsijamatabëcuenevi itapetaponaename ancianovinexa. Tsipaji raja Cretatunaeto nacuata, Dioso pejumecovënëtsivi tuatujëta, ayaibitsaëto jinavanapa apo

pejumecovënëtsivi pacuenia itorobatsi pevetsivitsi. Bajarapamonaeyajuvënëvi ayaibit-saëto judíovi. Bajarapajudíovi jumai tsabiabi: “Pamonae apo judíovi ata Jesús pelivaisi itsa jumecovënëta, bajarapamonaeta benaperabëcaucubiaexana,” jai tsabiabi. Bajarapajudíovi natsiquejemalivaisi saya cuaicuaijai tsabiabi. Nexata yamaxëitojorobapona Dioso pejumecovënëtsivi. ¹¹ Bajarapajudíovi bejumeitavetame. Tsipaji saya penajumetsënëtsilivaisi jivi tsipaebapona Dioso apo pejitsipaecuenia. Bajarapajudíovi, caebopijivi canacujitsia, Dioso pejumecovënëtsivi, najamatabëcuene epatajërërëcaeyaexanapona Dioso pejumecovënëtsijavavecu. Bajarapajudíovi penajumetsënëtsilivaisi jivi tsipaebapona saya pematamotsinexatsi palata.

¹² Bajayata pina livaisi bitso peyapëtaenëmi ponapona Cretatunaeto nacuata. Nexata pina bajaraponëmi jumaitsi Cretatunaeto nacuapijivi yabara mapacueniaje: “Cretatunaeto nacuapijivi cajena bitso penajumetsënëtsivi. Bitso piacujirubejevi. Ayaijavanua jamatabëxaeyabiaba. Bitso afaetabinua,” jai pina cajena bajayata Cretatunaeto nacuapijinëmi. ¹³ Xaniajai baja cajena pacuenia jumaitsi bajaraponëmi. Bajara jamatabëcueneitsi Cretatunaeto nacuapijivi. Tito, nexata xamë asaëyata itorobare bajarapamonaeta xaniavaetsia penajamatabëcuene copatsinexa Diosojavabelia. ¹⁴ Itavere bajarapamonaeta penamuxunaevetsiyaniva judíovi pijasalinaivimi pijalivaisixi. Itaverenua bajarapamonaeta pejumecovënëtsiyaniva pacuenia itorobaponatsi pamonae copaba pexaniajailivaisi pejumecovënëtsijavami.

¹⁵ Pajivi jumecovënëta Jesucristo pesivatëpaejavatsi, bajarapajivi ajamatabëcuene xuirajibi. Bajarapajivi daxita xua tane, ëpexaniacuena sivanajamatabëxaina. Nexata itsacuenejavayo ata apo jamatabëcuenebijianaetsi. Pajivi pijinia apo jumecovënëtsi Jesucristo pesivatëpaejavatsi, bajarapajivi ajamatabëcuene xuirai. Nexata bajarapajivi daxita xua tane, pibisiacuena sivanajamatabëxaina. Nexata daxitacuene jamatabëcuenebijianatsi. Pibisiacuene exanabiabi ata, jamatejema saya ponapona. ¹⁶ “Xanë rabaja bitso Dioso yapëtaniji,” jai tsabiabi. Itsiata baitsi jane bajarapamonaeta pibisiacuene exanavanapa. Nexata nayapëthane Dioso apo peyapëtaejava. Bajarapamonaeta itoya Dioso. Bajarapamonaeta apo jumecovënëtsi pacuenia Dioso itorobatsi. Nexata apo caëjëpaetsi itsacuenejavayo ata pexaniacuene pexanaenexa.

2

Pacuenia Pablo Tito itoroba pexania livaisi jivi petsipaebapona enexa yabara pelivaisi

¹ Tito, xamë jivi livaisi itsa tsipaebabiabianame, tsipaebabiabianame ëpexaniajailivaisi. ² Perujupëbijivi muxujiobabiabianame penajamatabëcuenereviabinexa. Muxujiobabiabianame xaniavaetsia pejinavanapaenexa jivi peyaiyataenexatsi. Muxujiobabiabianame penajamatabëcuene cataitsinexa pibisiacuene pexanaeyaniva. Muxujiobabiabianame pexaniajailivaisi, Jesús pelivaisi, xaniavaetsia pejumecovënëtsinexa. Muxujiobabiabianame daxitajivi asivaya petaenexa. Muxujiobabiabianame, itsamonae bejiobiaexanaeta atatsi Dioso pejumelivaisi yabara, pevajënaeyabelia pecaasaënexa Dioso pejumecovënëtsijava. ³ Bajara pijinia pacuenia muxujiobabiabianame perujupetiriavi ata jamatabëcuenereviaya pejinavanapaenexa Dioso pítabarata. Bajarapamonaeta pibisiacuena itsamonae apo bebaracuaicuaijai. Apo biaitajibi tsabiabinua. Bajarapapetiriavi itsamonae pexaniacuene betsitaexanavanapa. ⁴ Nexata perujupetiriavi itsamonae pexaniacuene itsa tsitaexanavanapa, jamatabëcuene cjarubiana pecovëpijipetiriavi ata xaniavaetsia pamonajivi piasivanexa, penacoxiasivanexanua. ⁵ Perujupetiriavi itorobianame pemuxujiobabiabinexa pecovëpijipetiriavi ata penajamatabëcuenereviabinexa,

pexaniajamatabëcuene ata penajamatabëxainaenexa. Perujupetiriavi muxujiobabiabianame pijabo ata xaniavaetsia pevetsinexa, pexaniacuene ata pexanabiabinexa, pamonajivi ata xaniavaetsia pejumecovënëtabiabinexa. Nexata juya perujupetiriavi muxujiobabiabiana pecovëpijipetiriavi xaniavaetsia pejinavanapaenexa. Nexata bajarapamonae xaniavaetsia itsa jinavanapaena, itsajivi ata pibisiacuena Dioso pejumelivaisi apo baracuaicuaijai tsane.

⁶ Bajara pijinia pacuenia muxujiobabiabianame pevëjëavi penajamatabëcueneecatitsinexa pibisiacuene pexanaeyaniva. ⁷ Xamë xaniavaetsia bajarapamonae ëpexaniacuene tsitaexanaponaponanename. Nexata bajarapacuenia daxitajivi cacuenetaena xaniavaetsia neponaponaejava. Pexanialivaisi itsa tsipaebabiabianame, tsipaebabiabianame nejamatabëëthëtovetsina nexaniajaijumeta jamatabëcuenereviaya. ⁸ Xaniavaetsia tsipaebabiabianame pexaniajailivaisi. Bajarapacuenia itsa exanabiabianame, pecaitoavi ata aura tsane. Tsipaji ajibi tsane pecayabarananeconitsiaexanaejava.

⁹ Pajivi bedajubicuenia canajetatsi petonacuenebabiabinexa amoneya pijatuxanenë, bajarapajivi muxujiobabiabianame pijatuxanenë pejumecovënëtsinexa daxita pacuenia itorobatsi. Muxujiobabiabianame xaniavaetsia pijatuxanenë petonacuenebabiabinexa pesivajamatabëcuenebarëyanexatsi. Pëtsa bajarapajivi apo jejai pijatuxanenë pitorobijavatsi. Pëtsa jumaitsi pijatuxanenëjavabelia: “Jume raja. Bajarapacuenia apo xanepanae tacatoexanaenexa. Mara jane pacuenia xanepana tacatoexanaenexaje,” jai pëtsa. ¹⁰ Pëtsa bajarapajivi muetsia pita pijatuxanenë pijajava. Biji rajane pijatuxanenëjavabelia tsitanajamatabëcueneitajëtsi daxitacuene xaniavaetsia petonacuenebabiabinexa nacobetoxotsinejeva. Bajarapacuenia itsa exanaena bajarapajivi, nexata daxitajivi yapëtaena Dioso vajanacacapanepaenënexa pejumelivaisi pexaniajailivaisicuene.

¹¹ Dioso baja cajena nacayapëtaeyaexana vajanacaitaxutotsoniataejava. Nexata Dioso nacacapanepaena daxitanacuapijivitsi. ¹² Dioso vajanacayapëtaeyaexanaexae vajanacaitaxutotsoniataejava vajanacacapanepaenexa, nexata becopatatsi pibisiacuene vajaexanaejavami. Bitso vajajitsipaejava ata mapanacuapijicuene vajaxainaenexa, becopatatsi. Dioso rajane jitsipa mapanacuata nayajivitaeya vajajinavanapaenexa pibisiacuene vajaexanaeyaniva. Nexata Dioso pejitsipaecuenia betoexanavanapatsi. Dioso cunaviaya xaniavaetsia bejinavanapatsi. ¹³ Bajarapacuenia Dioso cunaviaya xaniavaetsia bejinavanapatsi paepatojebi Jesucristo copiaevetavanapatsi icatsia pepatsijavanexatsica. Nexata icatsia pamatacabi Jesucristo patsianica, siva-jamatabëcuenebarëyatsi tsane. Pacuenia Dioso tajëvelia najumecapanepaeya nacajumaitsi Jesucristo pepatsijavanexatsica, bajarapacuenia xaniajai Jesucristo patsianica. Jesucristo rabaja cajena, pinijiDiosonë, vajanacacapanepaenexa. Bajaraponë penivenivenaecotia yajavapatsianica. ¹⁴ Bajaraponë pijacuata tonacaeveta pijavajabitsaë pebeyaxuabinexatsi. Nexata Jesucristo itsa beyaxuabatsi, pijanata nacacomuata pibisiacuene vajaexanaeeneconivecua. Nacavecuaajibiaexana baja bajarapaneconimi Jesucristo pijajivitsi vajanacaexanaenexa. Nacajitsipaeyaexananua ëpexaniacuene Jesucristo vajatoexanaenexa.

¹⁵ Daxita bajarapacuenia muxujiobaponaenename. Jamatabëcuenebabataponanename asaëya bajarapamonae. Asaëya muxujiobabiabianame pibisiacuene itsa exanapona. Bajarapacuenia muxujiobabiabianame Dioso pecatocopatsixae bajarapacuenia nexanaponaenexa. Pëtsa copatame itsajivi ata bijiaya pecataenexa.

3

Pacuenia Dioso pejumecovënëtsivi pexaniacuene bexanavanapa yabara pelivaisi

¹ Dioso pejumecovënëtsivi, Cretatunaeto nacuapijivi, najamatabënapitsiaexanaename yaiyataeya pejumecovënëtsinexa gobierno pitorobilivaisi, pejumecovënëtsinexanua go-
bierno pijajivi ata. Itorobianamenua bajarapamonae pexanaenexa daxitaxua pex-
aniacuene. ² Muxujiobabiabianame bajarapamonae itsajivi ata pibisiacuena pe-
baracuaicuaijaiyaniva. Muxujiobabiabianame bajarapamonae, itsamonae itsacueni-
abi atatsi, pecuenecanaviatsiyaniva. Muxujiobabiabianame bajarapamonae pexani-
ajamatabëcuena pebarëcuaicuaijainexa daxitajivijavabelia. Itorobianamenua daxitaji-
vivecua beveliajamatabëcuenevi nataeya pejinavanapaenexa.

³ Itsa abaxë vaxaitsi ata Dioso apo jumecovënëtsitsi, saya picani jema jinavanap-
atsi. Apo exanavanapaetsi pacuena Dioso nacaitoroba. Apo exanavanapaetsinua
pacuena nacuaeavetsivi ata nacaitoroba. Naxuabiaya saya jinavanapatsi Dioso pe-
jumelivaisivecua. Pibisiacuene, pacuene vajavitota jamatabëexanatsi, exanavanap-
atsi. Pacuene ata nacajamatabëcuenebarëyayaexana, exanavanapatsi. Pibisiacuene
bitso exanavanapatsi itsamonaejavabelia. Itsamonae cuenecaëbabiabatsi. Daxitajivi
nacaitoya tsabiabi. Vaxaitsi ata namataenetsia naitoyatsi tsabiabi. ⁴ Bajara vajait-
sivimi ata, itsiata Dioso, vajanacacapanepaenënexa, nacayapëtaeyaexana vajanacaitax-
utotsoniataecuene. Nacayapëtaeyaexananua pacuena ata Dioso nacaasiva daxitatsi
mapanacuapijivitsije. ⁵ Dioso nacacapanepaena vaneconivecua. Itsiata baitsi jane
pexaniacuene vajaexanaejava yabara, Dioso apo nacacapanepae tsane. Jume baja
cajena. Dioso raja nacacapanepaena tsipaji nacaitaxutotsoniatane. Nexata nacaja-
matabëcuenequiata. Dioso vajanacaitaxutotsoniataexae, nacacapanepaena. Espíritu
Santo pejamatabëcueneta pejanajamatabëcuenevitsi baja nacaexana. ⁶ Dioso baja ca-
jena ayaicuenia vajanacayavenonaenexa, Espíritu Santo nacatoitorobica vaxaitsijav-
abetsica. Bajarapacuenia Dioso Espíritu Santo nacatoitorobica Jesucristo vajanaca-
capanepaenënexa pejamatabëctsoniatane. Nexata nacajamatabëcuenequiata. Dioso va-
janacaitaxutotsueneta. ⁷ Bajaraxuata Dioso vaxaitsi yabara jumaitsi: “Bajarapamonae
baja aneconijibia taniji,” jai Dioso. Tsipaji nacaitaxutotsoniatane. Nexata vaxaitsi
xainaenatsi matakabi apo peverevereaejava, xua copiaevetavanapatsi.

⁸ Daxita baja palivaisi pacatoyaquinatsi, pexaniajailivaisi cajena. Nexata jitsi-
pajë ajumesaëya jivi netsipaebaponaenexa bajarapalivaisi. Nexata Dioso pejume-
covënëtsivi ëpexaniacuene pexanaenexa pejamatabëcueneenaenexatsi. Bajarapalivaisi
bitso xanepana daxitajivi pejumecovënëtsinexa. ⁹ Nexata navecuaitavetsianame
saya jema natsiquejemalivaisixi itsamonae pecabarëcuaicuaijaiyaniva. Navecuaitavet-
sianamenua judíovi pijasalinaivimi pevënëxi yabara pecabarëcuaicuaijaiyaniva. Nave-
cuaitavetsianamenua Dioso Moiséspijinëta penajumecopatsilivaisi yabara anaeya peca-
jumenotsiyaniva. Bajarapacuenia pecabarëcuaicuaijajava apo xanepanae tsipae it-
sacueneyavayonexa ata.

¹⁰ Itsamonae penajumetsënëtsilivaisi jivi tsipaebapona. Nexata bajarapamonae pe-
najumetsënëtsilivaisita Dioso pejumecovënëtsivi navecuanatsanaeyaexanapona. Bajara-
pamonae jumeitavetsianame. Anijatobeje ata jumeitavetsianame. Nexata bajara-
pamonae copatsiana penajumetsënëtsilivaisi jivi petsipaebaponaejava. Jumeitavetsi
atamë, itsiata itsa apo cajumecovënëtsi tsane, nexata bajarapamonae itorobianame
itsajavabelia peponaenexa. ¹¹ Yapëtaneme rabaja mapacueneje. Ponë peneta co-
pata pexaniajailivaisi pejumecovënëtsijavami, pibisiacuene exana. Nexata bajaraponë
naneconita Diosojavabelia pibisiacuene pexanaexae.

*Pacuenia icatsia Pablo itsalivaisi toitoroba Tito asaëya Dioso petonacuenebinexa
yabara pelivaisi*

¹² Catoitorobialiatzi Artemas. Itsa jume, catoitorobialiatzi Tíquico. Bajaraponë itsa
patsialia xamëjavabelia, nexata xamë bepíjia renamë tsane xanëjavaberena. Nacaxita-
jarabianatsibeje Nicápolis tomarata. Daxita emarapae raja ponaponaenajë Nicápolis

tomarata. ¹³ Itsa baja pacavecuaponaena Zenasbeje Apolosbeje, nexata yavenon-aename pacuenia namatavenonaenabeje pijanamutobejenexa. Zenas raja abogadonë, penaneconitsivi peyavenonaeyacuaicuaijainë. Rajutsianame pacuenia namatavenonabeje, itsacuenejavayo ata petosajinaeyanivatsibeje itsa najetarucabeje namuto. ¹⁴ Pamonaë vaxaitsi pexanialivaisi tsipaebatsi, bajarapamonaë tojitsipajë peyapëtaenexa xua pexaniacuene. Nexata ëpexaniacuene pexanaenexa. Nexata bajarapamonaë tojitsipajë asaëya penacuenebinexa, peyavenonaenexa pamonaë bitso bepejiobivi. Pëtsa saya bajarapamonaë jinavanapa nacuenebinejeva.

Pacuenia Pablo itsamonaë jamatabënajina yabara pelivaisi

¹⁵ Daxita pamonaë yajavaponaponajë, cajamatabënajinalia. Pajamatabënajinaliajë daxita pamonaë pataniasivavi, Dioso pejumecovënëtsivi. Pacatovajëtatsi Diosojavabelia daxita paxamë Dioso papecayavenonaenexa.

Mapabaxutoje San Pablo toyaquina Filemónjavabelia

Pacuenia Pablo mapabaxutoje toyaquina Filemónjavabelia yabara pelivaisi

¹ Xanë Pablonë, Jesucristo pijajivitonëxaenë, Jesucristo pelivaisi jivi tsipaebabiabajë. Bajaraxuata nenaneconitsiaexana. Nexata penaneconitsivi pejobabiabibota naneconitsiaponaponajë. Filemón, paxanëbeje vajabananë Timoteobeje, bitso pacaasivatsibeje patacayajavanacuenebabiabinëxaebeje. Paxanëbeje, pacatoyaquinatsibeje mapabaxutoje. ² Patoyaquinajëbejenua mapabaxutoje pamona Dioso pejumecovënëtsivi, nijabota penacaetuatabiabi. Patoyaquinajëbejenua mapabaxutoje vajabanava Apiavënëva ata. Patoyaquinajëbejenua mapabaxutoje Arquipovënënë ata. Pacuenia xanë Dioso pijacuene tonacuenebabiabajë, bajarapacuenia Arquipo ata Dioso pijacuene tonacuenebabiaba. ³ Pacatovajëtabiabatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

Pacuenia Pablo tovajëta Filemón Diosojavabelia yabara pelivaisi

⁴⁻⁵ Filemón, cavënëlivaisitanetsi niasivajava vajatuxanenë Jesucristo, daxita Dioso pejumecovënëtsivi yajava. Cavënëlivaisitanetsinua nenajamatabëcuenecopatsijava pepo petuxanenë Jesúsjavabelia. Bajaraxuata itsa cajamatabënjajinatsi, catovajëtabiabatsi Diosojavabelia. Nexata pexaniajamatabëcuene rajutabiabajë Diosojavabelia xamë yabara. ⁶ Pamona ata Diosojavabelia najamatabëcuenecopaba xamë pexanialivaisi netsipaebixae, bajarapamona ata tovajëtabiabajë Diosojavabelia. Tovajëtabiabajë bajarapamona xaniavaetsia peyapëtaenexa Dioso vajanacayavenonabiabijava Jesucristo pijajivixaetsi. ⁷ Itsamonae ata Dioso pejumecovënëtsivi niasivaxae, casivajamatabëcuenebarëyatsi. Cavënëlivaisimuxua najamatabëcuenesaëtsi. Tsipaji daxita Dioso pejumecovënëtsivi jamatabëcuenebabatabiabame.

Pacuenia Pablo itoroba, Filemónjavata Onésimo itsa pata, xaniavaetsia Filemón pecopiapitsinexa yabara pelivaisi

⁸ Xanë Cristo taneitorobinëxae, nejamatabëcuenecaëjëpa picani tacaitorobinexa xua bexaname Dioso pecasivabarëyanexa. Itsiata baitsi jane apo caitorobi tsanetsi. ⁹ Tacaasivaxae, saya pexaniacuenia cavajëtsi pexaniacueni tanetoexanaenexamë. Xanë Pablonë, perujunënë baja. Maparucaeje naneconitsiaponaponajë penaneconitsivi pejobabiabibota Jesucristo pijajivitonëxaenë. ¹⁰ Majotaje, xanëjavata, nijajivitonë Onésimo patajopa, pecavecuanajetabajiravinë. Nexata cavajëtsi pexaniacueni tane-toexanaenexamë Onésimojavabelia. Onésimo raja betaxënatocuenia tataenë pejumecovënëtsixae Jesucristo pelivaisi. Pexanialivaisi, Jesucristo pelivaisi, Onésimo tatsipaebixae, jumecovënëta baja Jesucristo pelivaisi. Jesucristo pelivaisi Onésimo jumecovënëta majotaje, penaneconitsivi pejobabiabibota.

¹¹ Onésimo baja cajena bajayata bedajubinëcuenia comuatame amoneya nijabota pecatonacuenebabiabinexa. Nexata bajarapamatacabi catonacuenebi ata, itsiata itsacuenejavayo ata xaniavaetsia apo catonacuenebi. Itsiata baitsi jane maparucaeje Jesucristo baja pelivaisi Onésimo pejumecovënëtsixae, xanënexa xaniavaetsia netonacuenebaponapona. Nexata baja aeconoxae itsa naviatsipa xamëjavabelia, xamënexa ata xaniavaetsia catonacuenebijitsipa. ¹² Nexata icatsia Onésimo catoitorobaliatsi mapabaxuto yajavaje. Copiapitsianame xaniavaetsia. Tsipaji Onésimo bitso tasivanë. Itsa baja ponaponaena xamëjavatalia, jamatabënjajinabiabianajë bitso. ¹³ Naneconitsiaya ponaponajë penaneconitsivi pejobabiabibota pexanialivaisi, Jesucristo pelivaisi, jivi tatsipaebabiabixae. Bitso picani Onésimo asivanë xanëjavata peponaponaenexa.

Nexata Onésimo itsa ponaponaejitsipa xanëjavata, neyavenonaponaponaejitsipa xaniavaetsia. Taneyavenonaenexa, betanetoitorobinëmëcuenia neyavenonabiabijitsipa. ¹⁴ Itsiata baitsi jane apo jitsipaenë Onésimo taneyavenonaponaponaeenexa copiaya cavajëtsinejevatsi. Apo jitsipaenënua tacavajëtsinexa tanetocopatsinexamë bajaraponë taneyavenonabiabinexa. Biji rajane picani jitsipajë cavajëtsinejevatsi nijacuate tanetocopatsinexamë bajaraponë. ¹⁵ Onésimo picani itsa cavecuanajetabajirava, cavecuanatsata caematacabibeje. Itsiata baja icatsia aeconoxae xamëjavabelia naviatsijitsialia. Nexata jane baja daxitamatacabijavabelianexa nijajivitonë tsaponaponae tsane. ¹⁶ Pëtsa baja taneme saya nijajivitonëcuenia. Biji rajane nijajivitonë ata, Dioso pejamatabëcueneta asivaya taename benejuyapijinëcuenia. Xanë picani bitso asivanë Onésimo. Itsiata xanë bajaraponë tasivajava matatoxenetsia, xamë bitso asivamë tsane. Tsipaji xamë bajaraponë nijajivitonë. Nejuyapijinënua baja Dioso pejamatabëcueneta.

¹⁷ “Pablobeje rabaja patanajuaponaponaeenëbeje,” itsa nesivajamatabëjamë tsane, nexata Onésimo xaniavaetsia copiapitsianame, pacuenia xanë necopiapitabiabame.

¹⁸ Onésimo itsa catonaneconita, itsa camoneyabanua, nexata xanë bajaraxuamatamo neyanijobianame. ¹⁹ Peneta raja paitanebërëtoyo jumaitsi: “Xanë Pablonë. Camatamotsianatsi cajena,” jai, xanë tajacuata tacobeta yaquinajë. Itsiata pijinia pacuenia niamoneyabame, apo catoitajëtsitsi. Tsipaji itsa catoitajëtsipatsi pacuenia niamoneyabame, nexata jitsipaejitsipame daxitanëmë, nejamatabëcuene yajava, tanerajutsinexamë. ²⁰ Tajabananë, pacuenia cavajëtatsi, xaniavaetsia copiapitsianame Onésimo Jesucristo pijajivitonëxaemë. Xaniavaetsia Onésimo itsa copiapitsianame, bitso nejamatabëcuenebarëyaya exanaename.

²¹ Catoyaquinatsi mapabaxutoje tsipaji yapëtaniji tanejumecovënëtsijavanexa tacaitorobicuenia. Casivajamatabëjumaitssitsi mapacueniaje: “Filemón cajena taitorobicuenia matatoxenetsia xaniavaetsia copiapitsiana Onésimo,” casivajamatabëjaitsi. ²² Caecuenia tavajënaeyabelia cavajëtatsi tavajënaelia nijabota tanetoxaniavaetsinexamë, itsajota patsijitsianë itsa ponajë paxamëjavabelia. Tsipaji bajayajebi panetovajëcabiabame Diosojavabelia tapatsinexa paxamëjavabelia. Nexata jamatabëjumaitsinë: “Pacuenia bajarapamonae netovajëcabiaba Diosojavabelia, bajarapacuenia Dioso netocopatsiana,” jamatabëjanë taponaenexa paxamëjavabelia.

Pacuenia itsamonae jamatabënajinatsi Filemón yabara pelivaisi

²³ Epafra, ponëbeje panajuaponaponajëbeje penaneconitsivi pejebabiabibota Jesucristo pijinia pijajivitonëxae, bajaraponë cajamatabënajinalia. ²⁴ Cajamatabënajinalia Marcos ata, Aristarco ata, Demas ata, Lucas ata. Cajamatabënajinalia daxita bajarapamonae patanajuanacuenebivi Dioso pijacuene. ²⁵ Pacatovajëtabiabatsi Diosojavabelia vajatuxanenë Jesucristo papecayavenonabiabinexa.

Mapabaxutoje Dioso pijajivitonë toyaquina judíovijavabelia

Pacuenia Dioso pexënato itoroba jivijavabelia petocuaicuajainexatsi yabara pelivaisi

¹ Bajayatami Dioso anijatonë najamatabëcueneitajëtabiaba Diosojumepaebivi profetavijavabelia. Nexata juya profetavi tsipaebabiaba vajasalinaivimijavabelia pacuenia Dioso itorobatsi. Bajarapacuenia Dioso najamatatabëcueneitajëtabiaba profetavijavabelia matabacabita bemajitsinaebocuenia. Itsajavata Dioso najamatabëcueneitajëtabiaba profetavijavabelia meravi majitsinaebota. Itsajavata pepacuene Dioso roviaia barëcuaicuajai tsabiabi profetavijavabelia. Nexata juya profetavi tsipaebabiaba vajasalinaivijavabelia pacuenia Dioso itorobatsi. ² Nexata jane baja aeconoxae, mapamatabacabitate, Dioso itorobica pexënato vajanacatsitanajamatabëcuene itajëtsinexa, vajayapëtaenexa Dioso vajanacatojitsipaejava. Bajayata Dioso itoroba pexënato pexanaenexa mapanacuaje, daxitacuene yajava. Nexata daxitacuene mapanacuateje Dioso pexënato tocopata pevetsinexa. ³ Nexata pacuenia Dioso bitso ayaijamatabëcuenenë, pexaniajamatabëcuenenëna, bajara pijinia Dioso pexënato ata jamatabëcueneitsi. Dioso pexënato caëjëpatsi daxitacuene pexanaenexa pijumesaëta. Nexata pijumeta ita itoroba mapanacuaje penaexanaenexa, daxitacuene yajava naexana. Bajaraponë pexanaecujinae mapanacuaje, bajaraponë pejamatabëcueneta abaxë tsiteca xanepana mapamatabacijavaberena ataje. Bajaraponë nacasivatëpa cruzata vajanacavecuaxuabinexa pibisiacuene vajaexanaeconimi. Bajaraxuacujinae pona jane baja athëbëabetsia peecaenexa paxa Dioso pemuxuneneta, pecujanenia, penajuaevetsinexabeje daxitacuene.

Pacuenia Dioso pexënato bitso ayaijamatabëcuenenë ángelevi matatoxenetsia yabara pelivaisi

⁴ Dioso pexënato bitso ayaijamatabëcuenenë ángelevi matatoxenetsia. Bajarapajamatabëcuene yapëtanetsi. Tsipaji Dioso pexënato tocopata daxitacuene pevetsinexa. Dioso saya ángelevi tocopata beveliajamatabëcuenejava pevetsinexa. ⁵ Dioso baja cajena jumaitsi pexënatojavabelia mapacueniaje:

Xanë raja taxënatomë. Xanë raja axanë,
jai Dioso.

Dioso icatsia jumaitsi pexënato yabara mapacueniaje:
Xanë raja bajaraponë paxanë. Xanë raja bajaraponë taxënato,
jai Dioso pexënato yabara.

Bajarapacuenia Dioso apo jumaitsi ángelevi yabara. Biji rajane Dioso pexënato yabara jumaitsi. Bajaraxuata nayapëtane Dioso pexënato bitso ayaijamatabëcuenenëcuene ángelevi matatoxenetsia. ⁶ Pacujinae Dioso itorobijitsiatsica pepo caenë pexënato mapanacuata penaexanaenexa, Dioso jumaitsi pexënato yabara mapacueniaje:

Daxita tajajivi, ángelevi, pematabacabëta tonubenaena ayaijamatabëcuene perajutsinexa bajaraponëjavabelia,
jai Dioso pexënato yabara.

⁷ Dioso icatsia jumaitsi ángelevi yabara mapacueniaje:
Tajajivi, ángelevi, tanelivaisipaebinexa, bepimia pona pacuenia jovibo. Bajarapamonae beisotocotiata verebiabiana daxita pamonaenaneconita xanëjavaberena,
jai Dioso ángelevi yabara.

⁸ Itsiata baitsi jane icatsia Dioso pexënatojavabelia jumaitsi mapacueniaje:

Diosomë, daxita xua evetame, daxitamatacabijavabelianexa evetsianame. Xua xamë evetame, xaniavaetsia evetabiabianame. ⁹ Xamë jitsipame jivi pexaniacuene pexanaejava. Apo jitsipaemë pibisiacuene pexanaejava. Bajaraxuata xanë, nijaDiosonë, cajamatabëcuenebarëyayaexanatsi. Cajamatabëcuenebarëyayaexanatsi daxita itsamonae matatoxenetsia, jai Dioso pexënatojavabelia.

¹⁰ Icatsia Dioso pexënatojavabelia jumaitsi mapacueniaje:

Xamë petuxanenëmë. Itsa abaxë daxitacuene ajibi, xamë exaname mapanacuaje. Nesaëta exaname daxita itaboxopijicuene yajava. Xua jivi apo tae, bajaraxua ata exaname. ¹¹ Daxita bajaraxua, nexanaejava, vereverecaena. Itsiata baitsi jane xamë apo vereverecaemë tsane daxitamatacabijavabelianexa. Daxita xamë nexanaejava, perujujava naexanaena. Pacuenia jivi penaxatatsijava, perujujava banaexana, bajara pijinia itsi tsane nexanaejava. ¹² Pacuenia jivi baquiona penaxatatsijava, bajarapacuenia itsamatacabí xamë quionaename itaboxo, ira yajava, pejananacua icatsia nexanaenexa. Itsiata baitsi jane xamë tsitecaename. Apo vereverecaemë tsane,

jai Dioso pexënatojavabelia.

¹³ Dioso baja cajena caeto ata ángeleviyajuvënënëjavabelia apo jumaitsi mapacueniaje: Ecare abaxë tacujuanenia daxitacuene vajanajuaevetsinexabeje. Nijavajabitsaë abaxë copiaya vecatsivajënae jumecovënëtsiaexanaenatsi nitorobicuenianexa, apo jai Dioso ángeleviyajuvënënëjavabelia.

Biji rajane Dioso pexënatojavabelia bajarapacuenia jumaitsi. ¹⁴ Daxita ángelevi apo taetsi vajaitaxutota. Bajarapamonae saya Dioso tonacuenebabiaba pacuenia Dioso itorobatsi. Nexata ángelevi yavenona pamonaë jumecovënëta Dioso pecapanepaejavanexatsi.

2

Pacuenia apo benamuxujematsitsi pexaniajailivaisi Dioso vajanacacapanepaenexa yabara pelivaisi

¹ Dioso pexënato bitso ayaijamatabëcuenenë ángelevi matatoxenetsia. Bajaraxuata vajanacatsipaebilivaisi xaniavaetsia benamuxunaevetatsi. Bitso baja cajena pexaniajailivaisi nacatsipaeba. Nexata vajavajënaeyabelia asaëyata bejumecovënëtatsi bajarapapexaniajailivaisi vajajumecovënëtsijava, itsamatacabijavabelia ata vajacopatsiyaniva. ² Bajayata palivaisi Dioso najumecopata Moiséspijinëta, Dioso najumeitoroba ángelevita. Nexata juya ángelevi bajarapalivaisi tsipaeba Moiséspijinëjavabelia. Xaniajai baja cajena bajarapalivaisi. Pamonaë apo jumecovënëtsi bajarapalivaisi, paneconivajëto xaina, bajarapaneconivajëtota Dioso naneconitsiaexanatsi. ³ Itsa namuxujematatsi papinijicueneta Dioso nacacapanepaejitsia, ¿detsa pacuenia nacacaëjëpaejitsipa vajacuata vajanacapanepaenexa? Ajibi. Vajatuxanenë Jesucristo baja cajena copiaya tsipaeba itsamonaejavabelia pacuenia capanepaejitsia daxitajivi. Nexata bajarapamonae yapëtane bajarapalivaisi pexaniajailivaisicuene. Nexata juya bajarapamonae vaxaitsijavaberena nacatsipaeba bajarapalivaisi. ⁴ Nexata nayapëtane bajarapamonae vajanacatsipaebilivaisi pexaniajailivaisicuene. Tsipaji Jesucristo petsipaebilivaisitsi, jivi itsa tsipae-bavanapa, Dioso pesaëta pinijicuene pexanaejavanë tsitaexanapona. Bajarapamonae piavitanevi ata jamatejemayaexanapona. Petëpaevi ata icatsia asaëyaexanapona. Espíritu Santo ata jamatabëcuene caëjëpaeyaexanaponatsi, caejivi canacujitsia, bajarapamonae pexanaenexa pacuenia Dioso tojitsipatsi.

Pacuenia baja Jesucristo naexana bejivitonëcuenia yabara pelivaisi

⁵ Papejananacua yabara pacatsipaebatsi, Dioso baja itsa exanaena bajarapanacua, Dioso apo tocopatsi tsane ángelevi pevetsinexa. Biji rajane jivi tocopatsianatsi pevetsinexa bajarapanacua. ⁶ Tsipaji Dioso pejumelivaisibaxutota, tajëvelia jumaitsi

pacuenia jivi ayaijamatabëcuenevi Dioso exanaejitsiatsi ángelevi matatoxenetsia. Bajaraxua yabara Dioso pejumelivaisibaxutota jumaiti mapacueniaje:

Diosomë, jivi matatoxenetsia bitso ayaijamatabëcuenenë atamë, ¿detsa xuajitsia itsiata jivi sivanajamatabëxainame nevetsinexa? ⁷ Jivi itsa exaname, ángelevivecua jivi beveliajamatabëcuenevi exaname. Bajarapacuenia picani exaname. Itsiata baitsi jane aeconoxae jivi pecajumecovënëtsixae, ayaijamatabëcuenevi baja exaname ángelevi matatoxenetsia. ⁸ Nexata itsamatacabi tocopatsianame jivi pevetsinexa daxitacuene nexanaejava, jai Dioso pejumelivaisibaxutota Dioso pejumecovënëtsivi yabara.

Bajarapacuenia Dioso itsa tocopatsiana daxitacuene Dioso pexanaejava jivi pevetsinexa, itsacuenejavayo ata Dioso apo vecuacopatsi tsane jivi pevetsiaexanaejava. Itsiata baitsi jane abaxë apo taetsi vajaitaxutota jivi pevetsijava daxita bajaraxua. ⁹ Pamatacabi Jesús bejivitonëcuenia naexana mapanacuataje, bajaraponë ata ángelevivecua beveliajamatabëcuenenë picani naexana. Dioso pitaxutotsoniataexae daxita mapanacuapijivije, Dioso pexënato itorobica penaexanaenexa mapanacuata, pesivatëpaenexa daxitajivi pijaneconi yabara. Jesús baja daxitajivi pesivatëpaexae, aeconoxae baja Dioso tocopatatsi Jesús athëbëtatsia peecaenexa paxa Dioso pemuxuneneta.

¹⁰ Dioso baja cajena daxitacuene natoexana bajaraponënexa. Dioso daxitacuene pexanaecujinae, Dioso abaxë pejamatabëcueneta daxitacuene tsiteca xanepana mapamatacabijavaberena ataje. Daxita pamonaе jumecovënëtatsi, pexicuenia petaevi, Dioso jitsipa pebarëevetsinexa daxitacuene Dioso pexanaejava. Bajaraxuata Dioso tocopata Jesucristo cruzata ayaicuenia bepejiobiaexanaenexatsi. Nexata Jesucristo capanepaena daxita pamonaе najamatabëcuenecopata Jesucristojavabelia, peyajavaponaponanexa Dioso pijapenivenivenacuataatsia. ¹¹ Jesucristo baja cajena jivi tsata Dioso pijajivinexa. Nexata pamonaе Jesucristo tsata Dioso pijajivinexa, bajarapamonaе, Jesús yajava, benacaeaxapijivi baja tanetsi Dioso. Bajaraxuata Jesús, Dioso pexënato, pijajivi yabara itsa cuaicuaijai, apo ajumeura: “Tajuyapijivi,” pejaijava. ¹² Jesús pijajivi yabara pejumaitisijavanexa, Dioso pejumelivaisibaxutota tajëvelia jumaiti mapacueniaje:

Taxa Diosomë, tajuyapijivijavabelia cavajunupaebianatsi. Nexata daxita bajarapamonaе tabarënacatuatsijavata, xamënexa catonaxëanaenatsi, tanaxëanaejavata ayaijamatabëcuene tacarajutsinexa, jai Dioso pejumelivaisibaxutota Jesús paxa Diosojavabelia pejumaitisijavanexa.

¹³ Jesús icatsia pijajivi yabara pejumaitisijavanexa, Dioso pejumelivaisibaxutota tajëvelia jumaiti mapacueniaje:

Xanë ata najamatabëcuenecopatsianajë taxa Diosojavabelia taneyavenonaenexa pacuenia najamatabëcuenecopaba tajuyapijivi, jai Dioso pejumelivaisibaxutota.

Jesús icatsia pijajivi yabara pejumaitisijavanexa, Dioso pejumelivaisibaxutota tajëvelia jumaiti mapacueniaje:

Yajavaponaponajë baja mapamonaеje, Dioso pexi tanetocopatsivi tatoevetsinexa, jai Dioso pejumelivaisibaxutota.

¹⁴ Vaxaitsi, Dioso pexitsi, mapanacuata jinavanapatsi. Bajaraxuata Jesús ata naexana mapanacuataje, pacuenia vaxaitsi banaexanatsi, peponaponanexa mapanacuataje. Nexata Jesús penaexanaexae mapanacuataje pacuenia vaxaitsi banaexanatsi, caëjëpatsi pebeyaxuabinexatsi vajanacasivatëpaenexa. Jesús baja itsa nacasivatëpa, jamatabëcuenematatoxeneta dovathi. Nexata baja copiaruca dovathi vajanacaitorobabiabijava. Nexata jivi tēpae ata tsane, itsiata icatsia asaë tsane petëpaecujinae.

¹⁵ Bajarapacuenia Jesús vajanacasivatëpaexae, nacavecuaajibiaexana baja vajacujunavabiabijavami, vajatëpaejava. Vajatëpaejava picani cjunavabiabatsi daxita vajajinavana-paematacabianë. ¹⁶ Jesús baja cajena patsica mapanacuayabetsicaje, jivi peyavenonaenexa, pamona Abrahampijinë pepo pemomoxi, baitsi Dioso pejumecovënëtsivi. Jesús apo patsi peyavenonaenexa ángelevi. ¹⁷ Bajaraxuata Jesús naexana mapanacuataje pacuenia vaxaitsi banaexanatsi, jivi petocuaicuajainexa Diosojavabelia. Jesús nacaitaxutotsoniatane. Nacatoexana pexaniacuene. Jesús nacatoexana pacuenia Dioso itorobatsi vajanacatoexanaenexa. Jesús pijacuata nacopata pebeyaxuabinexatsi, bajaraponë pejamatabëcueneta Dioso vajanacavecuaajibiaexanaenexa pibisiacuene vajaxanaeneconimi. ¹⁸ Nexata Jesús jamatabëcuenecaëjëpatsi peyavenonaenexa pijajivi, dovathi pejamatabëcuenejëtsivitsi. Tsipaji baja copiaya Jesús ata jamatabëcuenejëtatsi dovathi. Bejioabiaexanatsinua.

3

Pacuenia bitso Jesús ayaijamatabëcuenenë Moiséspijinë matatoxenetsia yabara pelivaisi

¹ Tajamonae, Dioso papijajivimë, Dioso pacajunata papijajivinexamë. Nexata xaniavaetsia pacanaëjère Jesucristo yabara. Bajaraponë Dioso nacatoitorobica vajanacatsipaebinexa Dioso pejumelivaisi, vajanacatocuaicuajainexanua vajatuxanenë Diosojavabelia. ² Bajayatami Moiséspijinë daxita Dioso pijajivi toevetabiaba Dioso pitorobicueniatsi. Bajara pijinia pacuenia Jesús ata mapanacuataje jumecovënëta Dioso pitorobicueniatsi. ³ Nexata Jesús jivi pecapanepaenëxae, ayaijamatabëcuenenë Moiséspijinë matatoxenetsia. Pacuenia bo pexainaenë, ayaijamatabëcuene xaina pijajivitonë matatoxenetsia, bajara pijinia pacuenia Jesús ayaijamatabëcuenenë Moiséspijinë matatoxenetsia. ⁴ Caebocanacujitsia tanetsi jivi pexanajebixae bajarapaponë. Itsiata baitsi jane mapanacuata Dioso pexanaejavanëta, jivi exanejeba bonë. ⁵ Bajayata Moiséspijinë Dioso itorobatsi daxita Dioso pijajivi petoevetsinexa xaniavaetia. Nexata Moiséspijinë Dioso pijajivi itsa tovetaponapona, tajëvelia itorobatsi petsipaebinexa jivijavabelia pacuenia itsamatacabijavabelia Dioso jumaitsijitsia pijajivijavabelia. ⁶ Cristo Dioso pexënatoxae, xaniavaetsia toeveta paxa Dioso pijajivi. Vaxaitsi baja Dioso vajajumecovënëtsivi, Dioso nacatane pijajivitsi. Tsipaji baja nacayajavaponapona Jesucristo. Bajarapacuenia vajavajënaeyabelia Dioso nacataeponaena xaniavaetsia Jesucristo itsa jumecovënëtavapanatsi vajatëpaejavabelianexa. Jamatabëcuenebarëyaya jinavanapatsi. Tsipaji yapëtanetsi Dioso pexaniajaicuene vajanacacapanepaenexa.

Pacuenia Dioso pejumecovënëtsivi tocopatatsi pejonenexa Dioso pijanacuayabetsia yabara pelivaisi

⁷⁻⁸ Jesucristo baja cajena ayaijamatabëcuenenë Moiséspijinë matatoxenetsia. Angelevi ata matatoxenetsia ayaijamatabëcuenenë. Bajaraxuata Espíritu Santo Dioso pejumelivaisibaxutota jumaitsi mapacueniaje:

Ajena, mapamatacabitaje, itsa pajumetaneme pacuenia Dioso jumaitsi, pëtsa pajamatabëcuenetajamë panejumecovënëtsinexa. Pacuenia bajayata panijasalinaivimi ajamatabëcuenetaja baja, pëtsa paitsimë. Bajarapamonaemi pamatacabi petusato nacuata jinavanapa, apo jitsipae pexanaenexa pacuenia Dioso itorobatsi. Bajarapacuenia bajayajebi Dioso apo jumecovënëtsi ata, bajarapamonaemi itsiata abaxë Dioso apo verebiabitsi. ⁹ Bajarajota petusato nacuata panijasalinaivimi jamatabëitonotabiaba Dioso. Apo jumecovënëtsi pacuenia Dioso itorobatsi pejinavanapaenexa. Cuarenta picani pavaibeje Dioso ayaicuene pexanaejavanë, tsitaexanapona bajarapamona peyavenonaenexa. Bajaraxua panijasalinaivimi taeyabiabi ata, itsiata Dioso apo jumecovënëtsi. ¹⁰ Bajaraxuata Dioso baraanaepana panijasalinaivimijavabelia. Nexata panijasalinaivimi yabara

Dioso najumecapanepaeya jumaitsi: “Najamatabëxainabiaba saya ëpibisiacuene yabara. Apo jitsipae pejinavanapaenexa pacuenia picani tojitsipajë,” jai Dioso. ¹¹ Bajaraxuata Dioso bitso baraanaepana panijasalinaivimijavabelia. Nexata Dioso najumecapanepaeya jumaitsi: “Bajarapamonae apo jone tsane xanëjavaberena. Nexata apo jinavanapae tsane itsajota picani toxaniavaetajë pejinavanapaenexa,” jai Dioso,

jai Espíritu Santo panijasalinaivimi yabara Dioso pejumelivaisibaxutota.

¹² Tajamonae, dovathivecua panajamatabëcuenevetavanapare, paxamëyajuvënëjivi ata, pacuenia panijasalinaivi najamatabëxaina pibisiacuene pexanaenexa, penajamatabëxainaeyaniva. Tsipaji Dioso itsa apo pajumecovënëtsimë tsipae, nexata pacopabijitsipame panejumecovënëtsijavami Dioso, daxitamatacabijavabelianexa piasaëtsaponaponaenë. ¹³ Nexata namataenetsia panajamatabëcueneyavenonare daxitamatacabi canacujitsia panecasaëtsavanapaenexa Dioso panejumecovënëtsijava.

Bajarapacuenia panajamatabëcueneyavenonare itsajivi ata paxamëyajuvënëjivi dovathi peyamaxëitojorobiyaniavatsi pibisiacuene pexanaeyaniva. Panajamatabëcueneyavenonare itsajivi ata paxamëyajuvënëjivi pecopabiyaniava Dioso pejumecovënëtsijava. ¹⁴ Vajataxuxuabijavaveliacujinae Dioso vajajumecovënëtsijava, tsiteca abaxë Dioso jumecovënëtavanapatsi vajatëpaejavabelianexa. Nexata daxita xua Cristo Dioso rajutsianatsi, bajaraxua vaxaitsi ata Dioso nacarajutsiana.

¹⁵ Bajaraxuata papecamuxujiobinexa, Dioso pejumelivaisibaxutota jumaitsi mapacueniaje:

Ajena, mapamatacabije, itsa pajumetaneme Dioso papecajumaitsijava, pëtsa pajamatabëcuenetajamë. Pacuenia panijasalinaivimi petusato nacuata ajamatabëcuenetaja, pëtsa paxamë bajarapacuenia paitsimë, jai Dioso pejumelivaisibaxutota.

¹⁶ ¿Detsa pamonaë bajayata bajarapacuenia jumetae ata Dioso pejumaitsijavatsi, itsiata apo jumecovënëtsi? Baitsi pamonaemi bajayata Moiséspijinë matacapona Egipto nacuaverena. ¹⁷ ¿Detsa jane pamonaemijavabelia Dioso baraanaepana cuarenta pavaibeje? Dioso baraanaepana pamonaemijavabelia pibisiacuene exana petusato nacuata. Nexata daxita bajarapamonaemi pijaneconi yatëpa petusato nacuata. ¹⁸ ¿Detsa jane pamonaemijavabelia Dioso najumecapanepaeya jumaitsi: “Apo pajonemë tsane xanëjavaberena,” jai? Bajarapacuenia Dioso najumecapanepaeya jumaitsi apo pejumecovënëtsivitsijavabelia. ¹⁹ Nexata yapëtanetsi panijasalinaivimi apo pejonejava Diosojavabelia. Tsipaji apo jumecovënëtsi Dioso pitorobicueniatsi.

4

¹ Dioso baja cajena najumecapanepaeya jumaitsi vajajonenexa bajaraponë pijanacuayabetsia vajanacueraevetavanapaenexa, itsajotatsia nacatoxaniavaeta vajajinavanapaenexa. Bajaraxuata nexata benajamatabëcuenexaniavaetavanapatsi. Tsipaji itsamonae paxamëyajuvënëvi apo jonecapanepae tsipae Dioso pijanacuayabetsia itsa apo jumecovënëtsi Dioso. ² Vaxaitsi ata rabaja jumetanetsi pexanialivaisi vajanacapanepaelivaisinexa pacuenia bajayata vajasalinaivimi ata jumetane picani. Itsiata baitsi jane vajasalinaivimi apo toxanepanaetsi bajarapalivaisi pecapanepaenexatsi. Tsipaji jumetae ata, apo jumecovënëtsi. ³ Nexata vaxaitsi Dioso vajajumecovënëtsivi, nacacajëjpaena vajajonenexa Dioso pijanacuayabetsia, itsajotatsia nacatoxaniavaeta vajajinavanapaenexa. Dioso apo pejumecovënëtsivi apo jone tsane. Tsipaji bajarapitsivi yabara Dioso bajayata jumaitsi mapacueniaje:

Anaepanaenajë apo tanejumecovënëtsivijavabelia. Nexata najumecapanepaeya jumaitsinë baja: “Bajarapamonae apo jone tsane xanëjavaberena,” janë, jai Dioso.

Dioso nacua pexanaejavaveliacujinae, toxaniavaetsi atatsi picani panijasalinaivimi pejinavanapaenexa bajaraponëjavatatsia, itsiata apo jone. ⁴Yapëtanetsi pacuenia Dioso petoxaniavaetsicujinaetsi, copiaevetatsi picani panijasalinaivimi pejonenexa pejinavanapaenexa bajaraponëjavatatsia. Tsipaji Dioso pejumelivaisibaxutota jumaitsi mapacueniaje:

Dioso baja daxita mapanacuaje, daxitacuene yajava, itsa vereta pexanaejava, vemaxënacueraeveta siete matacabita, jai Dioso pejumelivaisibaxutota.

⁵Icatsia Dioso pejumelivaisibaxutota jumaitsi Dioso apo pejumecovënëtsivi yabara mapacueniaje:

Bajarapamonaе apo jone tsane xanëjavaberena, pejinavanapaenexa xanëjavata,” jai Dioso pejumelivaisibaxutota.

⁶Pamonaе baja picani copiaya jumetane pexanialivaisi pecapanepaelivaisinexatsi, itsiata apo pejumecovënëtsixae, nexata apo jone tsane Dioso pijanacuayabetsia. Itsiata baitsi jane Dioso najumecapanepaeya jumaitsi mapacueniaje: “Pamonaе tajajivi, jonena xanëjavaberena,” jai. Nexata pamonaе jumecovënëtaпona Dioso, jonena Dioso pijanacuayabetsia. ⁷Bajarapacuenia bajayata itsamonaе Dioso apo pejumecovënëtsixae, nexata icatsia Dioso caëjëta itsamatacabi itsamonaе pejonenexa. Bajarapacuenia Dioso itsa caëjëta itsamonaе pejonenexa, mapamatacabitaje cajena caëjëta itsamonaе pejonenexa. Bajayata Davidpijinë Dioso itorobatsi tajëvelia pevajunupaebinxaxa itsamonaе mapamatacabitaje pejoneponaejavanexa Diosojavabelia. Nexata bajayata Davidpijinë tajëvelia itsa vajunupaeba itsamonaе mapamatacabi je pejonejavanexa Diosojavabelia, jumaitsi mapacueniaje:

Mapamatacabitaje itsa pajumetaneme Dioso papecajumaitsijava, pëtsa pajamatabëcuenetajamë panejumecovënëtsinxaxa Dioso, jai Davidpijinë tajëvelia.

⁸Bajayata Josuépijinë vajasalinaivimi petusato nacujavaverena matacaponaxa Israel nacujavaverena. Panacua bajarapamonaenexa Dioso toxaniavaetatsi pejonenexa, bajarapanacua daxitamatacabi javabelianexa. Bajarapanacua cajena xaina Dioso pijanacuatatsia. Nexata panacua yabara jumaitsi: “Dioso pijajivi pejinavanapaenacuanexa, toxaniavaeta,” itsa jai, Israelnacua yabara apo jumaitsi. Itsa meta peneta Israelnacua yabara jumai tsipae, nexata mapamatacabitaje Dioso apo caëjëtsi tsipae itsamonaе pejonenexa Diosojavabelia. Tsipaji baja vajasalinaivimi bajayata baja pata Israel nacua. ⁹Bajaraxuata yapëtanetsi pacuenia abaxë Dioso tocopata mapamatacabitaje itsamonaе ata Dioso pejumecovënëtsinxaxa pejonenexa Dioso pijanacuayabetsia. ¹⁰Pajivi jonena Dioso pijanacuayabetsia peponaponaenexa Diosojavatatsia, bajarapajivi penacuenebabiabijava vemaxënacueraevetsiana. Pacuenia bajayatami Dioso ata nacua baja pexanaejava itsa vereta, vemaxënacueraeveta, bajarapacuenia vemaxënacueraevetsiana. ¹¹Daxita vaxaitsi vajajitsipaejamatabëcueneta, bejitsipatsi Dioso pijanacuayabetsia vajajonenexa, bajaraponëjavatatsia vajajinavanapaenexa. Bajayata pamonaemi Dioso apo jumecovënëtsi, nexata apo jone Dioso pijanacuayabetsia. Nexata vaxaitsi bajarapamonaemi apo becuenejëpaetsi.

¹²Dioso cajena pejumelivaisi bitso asaë. Nexata Dioso pejumelivaisi caëjëpatsi ayaicuene pexanaenexa pijumesaëta. Dioso pejumelivaisi bitso pexiuajilivaisi anijabarëneniabeje espada matatoxenetsia. Nexata bajarapalivaisi itsa yapëtanetsi, nacayapëtaeyaexana pacuenia pepacuene jamatabëcueneitsitsi. ¹³Vaxaitsi Dioso vajanacaexanaevi, apo nacacaëjëpae Dioso vajavecuanamatayabinexa. Bajaraponë tane daxita xua exanatsi. Nexata itsamatacabi bajaraponëjavabelia navajunupaebianatsi daxita xua exanatsi.

Pacuenia Jesús ayaijamatabëcuenenë, jivi petocuaicuaijainë Diosojavabelia, yabara pelivaisi

¹⁴ Jesús cajena Dioso pexënato, ayaijamatabëcuenenë. Pepo sacerdotenë vajanacatocuaicuaijainë Diosojavabelia. Jesús baja pona Diosojavabetsia vajanacayavenonaenexa. Bajaraxuata nexata vaxaitsi becaasaë tsavanapaetsi Dioso vajajumecovënëtsijava mapanacuataje. ¹⁵ Jesús, Diosojavabelia vajanacatocuaicuaijainë, nacajamatabëcueneyapëtane pacuenia vaxaitsi jamatabëcueneitsitsi. Nexata dovathi itsa nacajamatabëcueneëjëta pibisiacuene vajaexanaenexa, Jesús nacajamatabëcueneyapëtane. Bajarapacuenia nacajamatabëcueneyapëtane tsipaji Jesús ata abaxë itsa ponapona mapanacuataje, jamatabëcueneëjëtatsi dovathi. Itsiata baitsi jane Jesús caeto ata pibisiacuene apo exanae. ¹⁶ Bajaraxuata ajumejunavijibia vajacuata benavajëtatsi Diosojavabelia. Dioso nacaitaxutotsoniatane vajanacaasivaxae. Nexata nacayavenonaena paepatota vaxaitsi namatavenonatsi vajanacayavenonaenexa.

5

¹ Sacerdoteviyajuvënënë, caenë, itapetatsi sacerdotevi penamatacaitorobinënexa, daxitajivi petocuaicuaijaitabiabinexa Diosojavabelia. Nexata jivi Diosojavabelia ofrendacuenia perajutsijavanexa, capatabiaba sacerdotenëjavaberena. Nexata juya sacerdotenë rajutabiaba Diosojavabelia bajarapaofrenda. Dajubinë, pijana ata yajava, bajarapacuenia rajutabiaba Diosojavabelia, daxitajivi pibisiacuene pexanaeneconi Dioso pevecuaajibiaexanaenexatsi. ² Sacerdotenë caëjëpatsi dovathi pejamatabëcueneëjëtsinexatsi pibisiacuene pexanaenexa. Tsipaji bajaraponë ata saya jivitonë. Nexata sacerdotenë jamatabëjumaitsi jivi yabara: “Jamatabëcueneyapëtaniji pamona abaxë apo yapëtae Dioso pejumelivaisi. Nexata pibisiacuene exana. Jamatabëcueneyapëtanijinua pamona dovathi jamatabëcueneëjëtatsi pibisiacuene pexanaenexa,” jamatabëjai sacerdotenë. Bajaraxuata jivi pibisiacuene itsa exana, sacerdotenë itaxutotsoniatane jivi. ³ Sacerdotenë ata apo ajamatabëcuenesaë. Sacerdotenë dajubinë, pijana yajava, Diosojavabelia ofrendacuenia rajutabiaba jivi pibisiacuene pexanaeneconi Dioso pevecuaajibiaexanaenexatsi. Bajarapacuenia itsa rajutabiaba, bajaraponë ata pibisiacuene pexanaeneconi Dioso pevecuaajibiaexanaenexatsi, yajavarajutabiaba.

⁴ Itsanë ata pijacuata pepo sacerdotenë apo naexanae daxitajivi petocuaicuaijainexa Diosojavabelia daxitajivi peyaiyataenexatsi. Biji rajane sacerdoteviyajuvënënë, caenë, Dioso itapetatsi pepo sacerdotevi penamatacaitorobinë pexanaenexatsi, pacuenia bajayata Aarónpijinë ata Dioso itapetatsi pepo sacerdotenë pexanaenexatsi. Nexata bajayata Aarónpijinë ata daxitajivi yaiyatanetsi. ⁵ Bajara icatsia itsi Cristo ata. Pijacuata apo naexanae pepo sacerdotenë, vajanacatocuaicuaijainexa Diosojavabelia. Biji rajane Dioso itapetatsi Cristo pepo sacerdotenënexa daxitajivi peyaiyataenexatsi. Cristojavabelia copiaya Dioso jumaitsi mapacueniaje: Xamë raja taxënatomë. Xanë raja axanë, jai Dioso.

⁶ Icatsia itsabaxutota, Dioso pejumelivaisibaxutota, jumaitsi pacuenia Dioso itapeta pexënato pepo sacerdotenënexa. Jumaitsi mapacueniaje: Xamë raja pepo sacerdotenëmë tsane daxitamatacabijavabelianexa. Jivi netocuaicuaijainë tsane xanëjavaberena. Pacuenia bajayatami itsi Melquisedec, bajara xamë ata itsimë tsane, jai Dioso pexënatojavabelia.

⁷ Jesucristo abaxë itsa ponapona mapanacuataje, pinijjumeta yaitaxutonueya vajëta Diosojavabelia. Bajarapacuenia vajëta Diosojavabelia pecapanepaenexatsi petëpaejavavecua. Nexata Jesucristo xaniavaetsia Dioso jumetanetsi. Tsipaji Jesucristo

jamatabējumaitsi Dioso yabara: “Jitsipajē taneexanaenexa pacuenia taxa netojitsipa,” jamatabējai. ⁸ Jesucristo, Dioso pexēnato, ayaijamatabēcuenenē ata, itsiata paxa jume-covēnēta. Nexata pijacuata nacopata pebejioviaexanaenexatsi pacuenia Dioso tojit-sipatsi. ⁹ Nexata Jesucristo paxa itsa jumecovēnēta, nacopata pebeyaxuabinexatsi jivi pesivatēpaenexa. Nexata daxita pamonae jumecovēnētavanapa pacuenia Jesucristo itorobatsi, Dioso rajutsianatsi matababi apo peverevereaejava. ¹⁰ Dioso baja cajena itapetatsi Jesús pepo sacerdotenēnexa, jivi petocuaicuaijainexa Diosojavabelia, pacue-nia bajayata itsi Melquisedecpijinē.

Pacuenia Dioso pejumecovēnētsivi muxujibatsi pecopabijaniva Dioso pejume-covēnētsijava yabara pelivaisi

¹¹ Xainajē picani ayailivaisi patacatsipaebinexa paneyapētaenexa pacuenia Cristo pepo sacerdotenē vajanacatocuaicuaijainexa Diosojavabelia. Itsiata baitsi jane ayapēbeje patacajumeyapētaeyaexanaenexa bajarapalivaisi. Pacuenia pejevaxi beaxayo bayapētaepona vajacujarubijava, bajara pajamatabēcuenētsimē. ¹² Bajayajebi baja pi-cani Jesucristo pajumecovēnētame. Juya baja picani bepatsipaebaponame itsamonae-javabelia. Itsiata baitsi jane abaxē panamatavenoname icatsia papecatsipaebinexa bajarapalivaisi. Palivaisi picani yapēxanepana, Dioso pejumelivaisi, itsiata apo pa-jumeyapētaemē. Nexata abaxē panamatavenoname icatsia papecatsipaebinexa ba-jarapalivaisi. Pacuenia pejevaxinacuetoxi ēmitobarēmene apa, apo xae abaxē pexae-java, bajara pajamatabēcuenētsimē. Tsipaji palivaisi ayapēbejevājēto, apo pacacaējēpae orijibia panejumeyapētaenexa. ¹³ Pamonae abaxē namatavenona petsipaebinexatsi peyapēxanepanaelivaisixi, Dioso pejumelivaisi, bajarapamonae pejamatabēcuenē abaxē mito bepiapaenacuetoxi. Bajarapamonae abaxē apo yapētae pexanaenexa pacuenia Dioso tojitsipatsi. ¹⁴ Pacuenia penaveretsivi pijacuata xane pexaejava, bajara ja-matabēcuenētsi pamonae pejamatabēcuenēvitsabivi Diosojavabelia. Nexata pacuenia Dioso itorobatsi, jumecovēnēta. Najamatabēxainabiaba pexanaenexa ēpexaniacuene. Apo jitsipae pibisiacuene pexanaejava.

6

¹ Vaxaitsi Dioso vajajumecovēnētsijavaveliacujinae, vajavajēnaeyabelia jume-covēnētaponatsi vajajamatabēcuenēvitsabaponaenexa Diosojavabelia, pacuenia jamatabēcuenēvitsabapona bitso Dioso pejumecovēnētsivi. Bajaraxua baja vaxaitsi yapētanetsi. Nexata baja apo namatavenonaetsi icatsia vajanacatsipaebinexa Cristo pelivaisi, pacuenia copiaya nacatsipaeba pamatababi ajena najamatabēcuenecopatatsi Diosojavabelia. Vaxaitsi baja copabatsi pibisiacuene vajaexanabiabijava. Najamatabēcuenēpēnyorotatsi baja Diosojavabelia. Bajaraxuata apo namatavenonaetsi baja icatsia itsajivi ata vajanacatsipaebaponaenexa bajaraxua vajayapētaenexa. ² Apo namatavenonaetsinua baja icatsia vajanacatsipaebaponaenexa vajayapētaenexa pajamatabēcuenelivaisi xaina vajanacabautisabijava. Apo namatavenonaetsi baja icatsia vajanacatsipaebaponaenexa vajayapētaenexa pajamatabēcuenē yabara pijinia tsimatanacobeuata ancianovi Dioso pejumecovēnētsivijavabelia. Pacuenia ata icatsia Dioso asaēyaexanaejitsia petēpaevimi, vajayapētaexae baja, apo namatavenonaetsi icatsia vajanacatsipaebaponaenexa. Pacuenia ata daxita pamonae naneconita Diosojavabelia, naneconitsiajinavanapaejitsia daxitamatababijavabelianexa, vajayapētaexae baja, apo namatavenonaetsi vajanacatsipaebaponaenexa. ³ Dioso itsa nacatocopataponaena, vajavajēnaeyabelia jamatabēcuenēvitsabaponaenatsi pacuenia Dioso nacatojitsipa.

⁴ Itsamonae baja picani yapētane pexaniajailivaisi. Jumecovēnētana baja picani Jesucristo pelivaisi Dioso pecapanepaenexatsi. Espiritu Santo ata baja picani tsija-matabēcatsi. ⁵ Yapētanenua baja picani pacuenia Dioso pejumelivaisi bitso xanepana.

Yapëtanenua baja picani pacuenia taejitsia Dioso pinijicuene pexanaejava pamatacabi pejananacua Dioso exanaena. ⁶ Itsiata baitsi jane bajarapamonae itsa copaba baja Jesucristo pelivaisi pejumecovënëtsijavami, nexata baja acuenebi icatsia penajamatabëcuenepënëyorotsijava pibisiacuene Diosojavabelia. Pecopabixae Jesucristo pelivaisi pejumecovënëtsijava, naexana quenetsiataeya bepecapocaponaeivi Jesucristo pelivaisi. Bajaraxuata bajarapamonae jamatabëcuenejëpa pamonaemi bajayata Jesucristo beyaxuabatsi cruzata. Tsipaji pamonaemi Jesucristo beyaxuabatsi, quenetsiataeya capocaponatsi daxitajivi pitabarata. ⁷ Ema itsa runa mapairataje, Dioso pejamatabëcueneta pecopatsixae, runa bajarapaema. Nexata Dioso pejamatabëcueneta perunaexae, bajarapaema banacale naxaniabiaexana mapairataje. Nexata capitsapa pexaniabanacale. ⁸ Itsiata baitsi jane mapanacuataje saya itsa juva piabejjava, apo xanepanae itsacuenejavayonexa ata. Nexata bajaraxua tajuatsi. Bajara pijinia itsi tsane jivi ata. Pamonaemi Jesucristo pelivaisi pejumecovënëtsicujinae, copabiana bajarapalivaisi pejumecovënëtsijavami, nexata tajuenatsi infernojavabelia.

Pajamatabëcuene yabara Dioso pejumecovënëtsivi casaë tsavanapae Dioso pejumecovënëtsijava yabara pelivaisi

⁹ Tajamonae bitso patacaasivavi, pacuenia itsamonae jumecovënëtsi ata Dioso pecapanepaejavanexatsi, itsiata copaba, bajara paxamë apo paitsimë tsane. Dioso panejumecovënëtsijava apo pacopabimë tsane. Yapëtaniji baja cajena paxamë xaniavaetsia panejinavanapaejavanexa. Dioso baja nexata panejumecovënëtsixae, Dioso pacapanepaena. ¹⁰ Dioso epexaniacuene exana. Apo nacofënëtsinua xua baja paexaname paneyavenonaenexa itsamonae Dioso pejumecovënëtsivi. Tsiteca abaxë payavenonaponame bajarapamonae. Bajarapacuenia itsa payavenonaponame itsamonae, patsitanacueneitajëtaponame Cristo bitso panejitsipaejava. ¹¹ Pacatojitsipatsi, pacaëjivimë canacujitsia, itsamonae panetsitanacueneitajëtaponaenexa namataenetsia bitso panenasivajava panetëpaejavabelianexa. Nexata bajarapacuenia itsa paexaname, pacapanepaena Diosojavabetsia. ¹² Apo pacatojitsipaetsi paneayabarafaetabijava Dioso panejumecovënëtsijava. Biji rajane pacatojitsipatsi paneajamatabëcuenesaënexa, pacuenia itsamonae ajamatabëcuenesaë bajayajebi penajamatabëcuenecopatsijava Diosojavabelia. Bajarapamonae rajutsianatsi xua Dioso najumecapanepaeya jumaitsitsi perajutsinexatsi.

¹³ Bajayata Dioso pexaniajaijumeta tajëvelia najumecapanepaeya jumaitsi pacuenia Dioso toexanaejitsia Abrahampijinëjavabelia. Dioso navënëcacuaicuaijaiya jumaitsi mapacueniaje: “Xanë Diosonëxaenë, najumecapanepaeya cajumaitsitsi pepacuene tacatoexanaenexa pacuenia najumecapanepaeya cajumaitsitsi,” jai Dioso Abrahampijinëjavabelia. Bajarapacuenia Dioso najumecapanepaeya jumaitsi Abrahampijinëjavabelia pepacuene petoexanaenexa pacuenia najumecapanepaeya jumaitsi. Jivi namataenetsia penajumexaniataenexa Dioso pevënë bacacuaicuaijai. “Xaniajanë. Pepacuene Dioso pitabarata cajumaitsitsi,” banajai. Itsiata baitsi jane ponë pevënë Dioso cacuaicuaijaijitsia, ajibi. Tsipaji baja pematatsënëa Dioso matatoxenetsia ayaijamatabëcuenenë ajibi. Bajaraxuata Dioso pexaniajaijumeta navënëcacuaicuaijaiya jumaitsi pacuenia toexanaejitsia Abrahampijinëjavabelia. ¹⁴ Nexata Dioso jumaitsi Abrahampijinëjavabelia mapacueniaje: “Pepacuene xanë cayavenonabiabianatsi. Xainaenamenua ayaibitsaëto nemomoxi,” jai Dioso pexaniajaijumeta. ¹⁵ Nexata Abrahampijinë Dioso jamatabëcueneevetsiaponapona bajayajebi. Nexata jane baja belia Abrahampijinë Dioso rajutatsi pacuenia najumecapanepaeya jumaitsitsi. ¹⁶ Itsamonae Dioso pevënë bacacuaicuaijai pejumexaniataenexatsi xua toexanaejitsia itsajivijavabelia. “Paxaniajanë. Pepacuene Dioso pitabarata pacajumaitsitsi,” bajai. Nexata bajarapacuenia itsa jumaitsi, acuenebi itsajivi ata pejumaitsijava bajarapamonaejavabelia: “Apo pacajumexaniataetsi,” pejaijava. Tsipaji Dioso

pevënë cacuaicuaijai pexaniajaijumeta. ¹⁷ Dioso baja cajena pexaniajaijumeta najumecapanepaeya jumaitsi jivi peyavenonaenexa. Dioso najamatabëcueneitajëta jivijavabelia xaniajai peyavenonaejava jivi pejumeaebiyativatsi, “Jemajai raja. Dioso eputua itsajamatabëcuene xainaena,” pejaiyanivatsi. Bajaraxuata nexata Dioso tajëvelia navënëcacuaicuaijaiya jumaitsi Abrahampijinëjavabelia mapacueniaje: “Xanë Diosonëxaenë, najumecapanepaeya cajumaitsitsi pepacuene tacatoexanaenexa pacuenia najumecapanepaeya cajumaitsitsi,” jai Dioso Abrahampijinëjavabelia. ¹⁸ Bajarapacuenia Dioso najumecapanepaeya pejumaitsicujinae, acuenebi eputua itsajamatabëcuene pexinaejava. Tsipaji baja Dioso acuenebi penajumetsënëtsijava. Nexata vaxaitsi Dioso vajanacacapanepaejavanexa vajajumecovënëtsivi, bejamatabëjematsi. Apo bejamatabëcuenebëjaitsi. Tsipaji baja yapëtanetsi Dioso pexaniajaijava vajanacacapanepaenexa, pacuenia baja bajayata tajëvelia najumecapanepaeya jumaitsi. ¹⁹ Cristo vajanacasivatëpaenë, athëbëtatsia peecaexae Dioso pemuxuneneta, nexata baja yapëtanetsi vajanacacapanepaejavanexa Diosojavabelia. Nexata ajamatabëcuenesaëtsi tsavanapae Dioso vajajumecovënëtsijava. ²⁰ Jesús athëbëabetsia vajavajënaeyabetsia pona vajanacatoexanarutsinexatsia namuto. Nexata jane baja Jesús athëbëtatsia pepo sacerdotenë Dioso exanatsi, jivi petocuaicuaijainexa Diosojavabelia daxitamatacabijavabelianexa. Nexata Jesús pepo sacerdotenë pacuenia bajayatami itsi Melquisedecpijinë.

7

Pacuenia Jesús pepo sacerdotenë pacuenia bajayatami itsi Melquisedecpijinë yabara pelivaisi

¹ Bajayatami Melquisedecpijinë ponapona. Salemtomara pevetsinëmi. Bajaronëmi sacerdotenë, jivi petocuaicuaijainexa, athëbëtatsia peecaenë, Diosojavabelia. Nexata bajarapamatacabi Abrahampijinë vajabitsaë exana itsanacuanë pevetsivijavabelia. Itsa baja Abrahampijinë verebiaba pijavajabitsaë, naviarena. Nexata penaviatsinërena caxitajarabatsi Melquisedecpijinë. Nexata Melquisedecpijinë jumaitsi Abrahampijinëjavabelia: “Catovajëtsianatsi Diosojavabelia pecayavenonabiabinexa,” jai. ² Abrahampijinë pijavajabitsaë peverebiabivimi pecobecovë penotsijavanë, caponapona. Nexata bajaraxua diez xuabejeyajuvënëjavanë tsaponae, Abrahampijinë caejavayo ofrendacuenia rajutapona Melquisedecpijinëjavabelia. “Melquisedec,” itsa jai hebreojumeta, mapajumetaje pejumaitsiyume: “Dioso pitabarata aneonijibia xaniavaetsia jivi pevetsinë,” pejaijume. “Salemtomara pevetsinë,” itsa jai hebreojumeta, mapajumetaje pejumaitsiyume: “Jamatabëcuenexanepanaeya tomara pevetsinë,” pejaijume. Nexata Melquisedecpijinë Salemtomara pevetsinëmi. ³ Melquisedecpijinë paxa yabara, pena ata yabara, pamojivimi ata yabara, Dioso pejumelivaisibaxutota apo jumaitsi. Penaexanaejava ata yabara, petëpaejava ata yabara, apo jumaitsi. Nexata pacuenia Dioso pexënato, Jesucristo, jivi petocuaicuaijainë Diosojavabelia daxitamatacabijavabelianexa, bajara pijinia itsi Melquisedecpijinë. Melquisedecpijinë jivi petocuaicuaijainë Diosojavabelia daxitamatacabijavabelianexa.

⁴ Nexata aeconoxae pacanaëjere mapacuenije. Melquisedecpijinë bitso ayaijamatabëcuenenë vajasalinainëmi Abrahampijinë matatoxenetsia. Bajaraxuata Abrahampijinë ayaijamatabëcuenenëmi ata, ofrenda rajuta Melquisedecpijinëjavabelia. Pamatacabi Abrahampijinë pijavajabitsaë verebiaba, pecobecovë nota. Nexata Abrahampijinë itsa caxitajaraba Melquisedecpijinë, diez xuabejeyajuvënëjavanë tsaponae, caejavayo rajutapona Melquisedecpijinëjavabelia. ⁵ Bajayatami Dioso najumecopata Moiséspijinëta. Bajarapalivaisi juya itorobatsi Levípijinëmi pexi, pemomoxi ata, sacerdotevi penaexanaponaevinexa, jivi petocuaicuaijaivinexa Diosojavabelia. Nexata Levípijinë pemomoxi, sacerdotevi naexanapona. Nexata bajarapamonae Dioso

tocopatatsi perajutsinexatsi daxita judíovi pexainaeyajuvënëjava. Baitsi tocopatatsi pematamoyanijobinexa diez xuabejeyajuvënëjavanë tsaponae, caejavayo pevecuap- itaponaenexa. Nacaevirivi ata, daxita bajarapamonae Abrahampijinë épemomoxi ata, itsiata Dioso tocopatatsi nacaevirivi ata pexainaeyajuvënëjavanë perajutsinexatsi. ⁶ Melquisedecpijinë picani Levípijinë apo pemomo. Itsiata Melquisedecpijinë ayai- jamatabëcuenenëxae, Abrahampijinë ofrenda rajuta Melquisedecpijinëjavabelia. Diez xuabejeyajuvënëjavanë tsaponae, caejavayo rajutapona. Nexata Melquisedecpijinë jumaiti Abrahampijinëjavabelia: “Catovajëtsianatsi Diosojavabelia pecayavenonabi- abinexa,” jai Abrahampijinëjavabelia, ponëjavabelia Dioso najumecapanepaeya jumaiti peyavenonaenexa. ⁷ Pajivi jumaiti: “Catovajëtsianatsi Diosojavabelia pecayavenon- aenexa,” jai, bajarapajivi ayaijamatabëcuenejivi Dioso pitabarata pajiviyo tovajëtsijitsia matatoxenetsia. Daxita baja cajena yapëtanetsi bajarapacuene. ⁸ Majotaje, vaxaitsija- vata, itsamonae sacerdotevijavabelia ofrenda rajutabiaba. Diez xuabeje pexainaeya- juvënëjavanë, caejavayo rajutabiaba sacerdotevijavabelia. Pasacerdotevijavabelia ra- jutabiaba bajaraxuanë, petëpaevinexa. Tsipaji saya jivi. Itsiata baitsi jane Dioso pejume- livaisibaxutota Melquisedecpijinë yabara jumaiti pacueniaje: “Melquisedec abaxë mapamatacabita ataje asaë tsaponaponae. Nexata tsiteca jivi tocuaicuaijai tsabiabi Diosojavabelia,” jai. ⁹⁻¹⁰ Bajayatami Abrahampijinë ofrenda rajuta Melquisedeci- jinëjavabelia. Bajarapamatacabiti abaxë Levípijinë apo naexanae. Pexi ata abaxë ajibi. Pemomoxi ata abaxë ajibi, pamonae jane baja mapamatacabitaje sacerdotevi naexana jivi petocuaicuaijainexa Diosojavabelia. Itsiata paofrenda Abrahampijinë rajuta Melquisedecpijinëjavabelia, bajaraxua Dioso tane Levínexa, daxita Leví pemo- moxinexa ata. Bajarapacuenia Abrahampijinë daxitanexa yaiyataeya ofrenda rajuta Melquisedecpijinëjavabelia.

¹¹ Pamatacabiti Aarónpijinë, pexi ata, sacerdotevi baja tsavanapae, bajarapamatacabiti judíovi pejumecovënëtsinexa Dioso Moiséspijinëta najumecopata. Pamonae Aarónpijinë pexi, Levípijinë baja cajena pemomoxi. Judíovi itsa jumecovënëtsipa Dioso Moiséspijinëta penajumecopatsilivaisi Dioso aneconijibia petaenexatsi, nexata Dioso apo itorobitsica tsipae Cristo, ponë beMelquisedecjamatabëcuenenë, jivi petocuaicuaijainexa Dioso- javabelia daxitamatacabijavabelianexa. Dioso Moiséspijinëta penajumecopatsilivaisi pejamatabëcueneta Dioso aneconijibia judíovi itsa taejitsipa, nexata icatsia Dioso saya mataropotsia pepo sacerdotenë exanaponaejitsipa Aarónpijinë pemomoxi. ¹² Nexata Cristo sacerdotenë itsa exanatsi, jivi petocuaicuaijainexa Diosojavabelia daxitamata- cabijavabelianexa, yajavacopatatsi pijinia itsalivaisi Dioso Moiséspijinëta penajume- copatsilivaisivecua. ¹³ Vajatuxanenë, ponë Dioso pejumelivaisibaxutota tajëvelia va- junupaebatsi, bajaraponë Levípijinë apo pemomo. Biji rajane saicayavirianë. Bajara- ponë pijavirivi bajayata caenë ata sacerdotenë apo naexanae. ¹⁴ Vajatuxanenë itsa naexana mapanacuataje, daxitajivi baja cajena yapëtanë penaexanaejava mapanacu- ataje. Vajatuxanenë naexana Judápijinë pemomoyota. Daxitajivi yapëtanenua pacuenia bajayata Moiséspijinë tajëvelia vajunupaeba pamonae sacerdotevi naexanaponaejitsia. “Judápijinë pemomoxi ata sacerdotevi naexanaena,” apo jai picani.

¹⁵ Bajaraxuata vaxaitsi xaniavaetsia jane baja yapëtanetsi pepatsijava itsaviriasacer- dotenë. Tsipaji Cristo, ponë jane baja pepo sacerdotenë jivi petocuaicuaijainexa Dioso- javabelia daxitamatacabijavabelianexa, bajaraponë beMelquisedecjamatabëcuenenë. ¹⁶ Levípijinë pemomoxi sacerdotevi exanaponatsi. Tsipaji bajayata Moiséspijinë toco- pata bajarapamonaeyajuvënëvi sacerdotevi pexanaenexatsi. Itsiata baitsi jane Cristo, pepo sacerdotenë itsa exanatsi jivi petocuaicuaijainexa Diosojavabelia daxitamata- cabijavabelianexa, Levípijinë pemomoxae, pepo sacerdotenë apo exanaetsi. Jume baja cajena. Biji rajane Cristo pepo sacerdotenë exanatsi icatsia piasaëxae petëpaecujinae. ¹⁷ Dioso baja cajena tajëvelia pexënatovabelia pejumaitisijava, Dioso pejumelivaisibax-

utota jumaitsi mapacueniaje:

Xamë raja pepo sacerdotenëmë tsane daxitamatacabijavabelianexa. Pacuenia Melquisedec jamatabëcueneitsi, bajarajamatabëcueneitsimë tsane, jai baja cajena tajëvelia Dioso pejumelivaisibaxutota Dioso pejumaitzijava pexënatojavabelia.

¹⁸⁻¹⁹ Nexata baja palivaisimi copiaya Dioso Moiséspijinëta najumecopata jivi pejumecovënëtsinexa, Dioso baja copiarucaeyaexana. Tsipaji bajarapalivaisimi apo caëjëpaetsi jivi pevecuaajibiaexanaenexatsi pibisiacuene pexanaeneconi. Nexata palivaisi aeconoxae Dioso nacatocopata, xanepana bitso bajarapalivaisimi matatoxenetsia. Tsipaji baja Cristo vajanacasivatëpaexae, bajaraponë pejamatabëcueneta Dioso baja aneconi-jibia nacatane. Nexata nacatocopata vajajamatabëcuene saya vajaimoxoyotsinexa Dioso.

²⁰ Dioso baja cajena tajëvelia najumecapanepaeya jumaitsi Cristo pepo sacerdotenë pexanaenexatsi, jivi petocuaicuaijainexa Diosojavabelia daxitamatacabijavabelianexa. ²¹ Pamonami bajayata copiaya Cristo pevajënaeya sacerdotevi exanaponatsi, bajarapamonami yabara Dioso bajarapacuenia apo jumaitsi. Itsiata baitsi jane tajëvelia Dioso najumecapanepaeya jumaitsi Cristo pepo sacerdotenë pexanaenexatsi. Bajaraxuata tajëvelia Dioso pejumelivaisibaxutota jumaitsi mapacueniaje:

Dioso baja cajena najumecapanepaeya itsa jumaitsi, itsajamatabëcuene icatsia epatua apo xainae. Bajaraxuata tajëvelia Dioso pexënatojavabelia pejumaitzijava, Dioso pejumelivaisibaxutota jumaitsi mapacueniaje: “Xamë baja cajena pepo sacerdotenëmë tsane daxitamatacabijavabelianexa. Pacuenia Melquisedec jamatabëcueneitsi, bajarajamatabëcueneitsimë tsane,”

jai Dioso pejumelivaisibaxutota tajëvelia Dioso pejumaitzijava pexënatojavabelia.

²² Bajarapacuenia tajëvelia Dioso najumecapanepaeya pejumaitsixae Cristo yabara, nexata yapëtanetsi xua Cristo nacatoexana, bitso pexaniacuene. Bajaraxua bitso pexaniacuene, palivaisimi copiaya Dioso Moiséspijinëta najumecopata matatoxenetsia. ²³ Copiaya pamonami sacerdotevi exanaponatsi, ayaibitsaëto jonepona sacerdotevinexa. Tsipaji tēpaponae. Nexata apo caëjëpaetsi pevetsinexa daxitamatacabijavabelianexa. ²⁴ Itsiata baitsi jane Jesús baja icatsia apo tēpae tsane. Nexata pepo sacerdotenë tsane daxitamatacabijavabelianexa. Nexata baja icatsia itsanë pepo sacerdotenë apo exanaetsi tsane. ²⁵ Nexata pajivi najamatabëcuenecopata Diosojavabelia pibisiacuene pexanaeneconi Dioso pevecuaajibiaexanaenexatsi, daxitamatacabijavabelianexa Dioso vecuaajibiaexanaenatsi. Bajarapacuenia daxitamatacabijavabelianexa pibisiacuene pexanaeneconi vecuaajibiaexanaenatsi Jesús pejamatabëcueneta. Tsipaji Jesús daxitamatacabijavabelianexa asaë tsaponaponae tsane jivi petocuaicuaijainexa Diosojavabelia.

²⁶ Pacuenia baja Jesús pepo sacerdotenë, bajarapitsinë vaxaitsi vajanamatavenonae, Jesús baja patsica. Jesús cajena Dioso pejamatabëcuenejëpaenë, planeconijibinë Diosojavabelia. Pibisiacuene pexanaevi ata, apo jamatabëcuenebijianaetsi. Tocopatatsi peecaenexa athëbëtatsia, paxa Dioso pemuxuneneta, penajuaevetsinexabeje daxitacuene. ²⁷ Pacuenia itsamonae pepo sacerdotevi jamatabëcueneitsi, bajara Jesús apo jamatabëcueneitsi. Itsamonae pepo sacerdotevi, daxitamatacabijavabelianexa dajubi beyabiaba ofrendacuenia bajarapavi perajutsinexa Diosojavabelia, perajutsinexa pijana ata. Bajarapacuenia sacerdotevi exanabiaba, pibisiacuene pexanaeneconi Dioso pevecuaajibiaexanaenexatsi, itsamonae ata pibisiacuene pexanaeneconi Dioso pevecuaajibiaexanaenexatsi. Bajarapacuenia Jesús apo exanae. Jesús saya nacopata pebeyaxuabinexatsi ofrendacuenia penarajutsinexa Diosojavabelia. Bajarapacuenia Jesús itsa nacopata pebeyaxuabinexatsi, caecuenia matamota daxitajivi pibisiacuene pexanaeneconi daxitamatacabijavabelianexa. ²⁸ Bajayata palivaisi Dioso Moiséspijinëta najumeco-

pata, bajarapalivaisi Dioso tocopata pepo sacerdotevi penaexanaenexa mapanacuapijivi. Bajarapamonae apo caējēpae atatsi pejinavanapaenexa pibisiacuene exanaenejeva, itsiata Dioso tocopata pepo sacerdotevi penaexanaenexa. Itsiata baitsi jane bajaraxuacujinae Dioso najumecapanepaeya jumaitsi Dioso pexēnato pepo sacerdotenē penaexanaenexa daxitamatacabijavabelianexa. Jesús caeto ata pibisiacuene apo exanae.

8

Pacuenia Jesús daxitajivi petocuaicuaijainē Diosojavabelia yabara pelivaisi

¹ Xua yabara baja pacatsipaebatsi, maitsije. Aeconoxae baja xainatsi Jesús, pepo sacerdotenē vajanacatocuaicuaijainexa Diosojavabelia. Bajaraponē ecaeyaexanatsi athēbētatsia, Dioso ayaijamatabēcuenenē pemuxuneneta, pecujuanenia, penajuaeavetsinexabeje daxitacuene. ² Nexata jane baja aeconoxae Jesús Dioso pijatemplobota athēbētatsia nacueneba pepo sacerdotenē penacuenebijava. Bajarapatemplobo Dioso pexanaetemplobo. Jivi apo pexanaetemplobo. ³ Daxita pamonae pepo sacerdotevi, tocopatatsi perajutabiabinexa ofrenda Diosojavabelia. Dajubi ata beyabiaba ofrendacuenia bajarapavi perajutsinexa Diosojavabelia. Bajaraxuata Jesucristo ata, vajanacatocuaicuaijainē Diosojavabelia, ofrenda rajuta Diosojavabelia. Nexata Jesucristo ofrenda itsa rajuta Diosojavabelia, pijacuata nacopata pebeyaxuabinexatsi ofrendacuenia penarajutsinexa Diosojavabelia. ⁴ Itsa abaxē Jesucristo mapamatacabi ata ponaponaejitsipa mapanacuataje, apo sacerdotenē tsipae. Jesucristo apo exanae tsipae pacuenia itsamonae sacerdotevi exanabiaba. Bajarapamonae saya dajubi beyabiaba ofrendacuenia bajarapavi perajutsinexa Diosojavabelia Moiséspijinē pitorobicueniatsi. ⁵ Xua Jesucristo athēbētatsia exanaponapona, bajaraxua saya sacerdotevi cuenecataeya exanavanapa templobota mapanacuataje. Bajaraxua sacerdotevi cuenecataeya pexanavanapaenexa, Dioso tocopatatsi. Yapētanetsi baja cajena xua Jesucristo athēbētatsia exana, bajaraxua mapanacuapijisacerdotevi saya cuenecataeya exanavanapa. Tsipaji pamatacabi Dioso Moiséspijinē itorobatsi mapanacuata pexanaenexa Dioso pijacarpaboxaneto, Moiséspijinējavabelia Dioso jumaitsi mapacueniaje: “Exanaename daxita pacuenia baja catsitajētatsi petsutojumata,” jai Dioso. Bajaraxuata mapamatacabijavaberena ataje sacerdotevi templobota exanapona pacuenia Moiséspijinē Dioso tsitajētatsi petsutojumata. ⁶ Itsiata baitsi jane Cristo, ponē pepo sacerdotenē, xua Dioso athēbētatsia tocopatatsi petonacuenebinexa, bajaraxua bitso ayaijamatabēcuene. Xua bajayata sacerdotevi Dioso tonacuenebavanapa mapanacuataje, beveliajamatabēcuenejava saya. Tsipaji Cristo jivi tocuaicuaijai tsane Diosojavabelia daxitamatacabijavabelianexa. Cristo nacayavenonabiabiana. Pepacuene baja Cristo pejamatabēcueneta Dioso nacavecuaajibiaexana vajaneconimi. Cristo nacayavenonaeana Dioso vajanacarajutsinexa xua yabara Dioso najumecapanepaeya jumaitsi vajanacarajutsinexa, baitsi matacabi apo peverevereaejava. Bajaraxua bitso pexaniacuene. Palivaisimi copiaya Dioso Moiséspijinēta najumecopata, bevelialivaisimi saya.

⁷ Itsa baja xanepanaejitsipa copiaya palivaisi Dioso Moiséspijinēta najumecopata, nexata baja icatsia cotocaevi itsalivaisi Dioso najumecapanepaeya apo nacatonajumecopatsi tsipae. ⁸ Israelpijinē pemomoxi xaniavaetsia apo jumecovēnētsi palivaisi bajayata Dioso najumecopata Moiséspijinēta. Bajaraxuata Dioso tajēvelia najumecapanepaeya pejumaitsijava, Dioso pejumelivaisibaxutota jumaitsi mapacueniaje:

Itsamatacabijavabelia icatsia najumecapanepaeya jumaitsinē tsane pejanalivaisi jivi pejumecovēnētsinexa. Pajivi jumecovēnētsiana bajarapalivaisi, rajutsianajē matacabi apo peverevereaejava. Bajarapacuenia najumecapanepaeya jumaitsinē tsane Israel nacuapijivijavabelia, Judea nacuapijivijavabelia ata.

⁹ Bajarapamonae pijasalinaivimi bajayata matakarenanē Egipto nacuaverena.

Bजारपामाताcabi baja najumecapanepaeya jumaitsinē pacuenia bajarapamon-
aemi yavenonaejitsianē picani. Itsiata baitsi jane bajarapamonaemi apo nejume-
covēnētsi. Bजारaxuata copatajē baja bajarapamonaemi tayavenonaejava,
jai Dioso pejumelivaisibaxutota tajēvelia Dioso pejumaitzijava Israelpijinē pemomoxi
yabara.

¹⁰ Dioso icatsia tajēvelia pejumaitzijava, Dioso pejumelivaisibaxutota jumaitsi ma-
pacueniaje:

Nexata icatsia itsamatacabijavabelia najumecapanepaeya jumaitsinē tsane Israel
nacuapijivi yabara mapacueniaje: “Caejivi canacujitsia pejamatabēēthētota
yapētaeyaexanaponaenajē pacuenia netojinavanapaejitsia. Nexata bajarapa-
monae pejamatabēēthētojavavetsina jitsipaena tanejumecovēnētsinexa. Nexata
bजारapamonae pijaDiosonēnē tsane. Bजारapamonae pijinia tajajivi tsane.

¹¹ Nexata bajarapamatacabi itsajivi ata apo jumai tsane itsanējavabelia, pija-
monaenējavabelia ata: “Xamē ata beyapētaneme Dioso,” apo jai tsane. Tsipaji
baja daxitajivi neyapētaena. Neyapētaena beveliajamatabēcuenevi. Neyapētaena
ayaijamatabēcuenevi ata. Daxita bajarapamonae neyapētaena. ¹² Xanē baja
daxita tajajivi pibisiacuene pexanaeneconimi, vecuaajibiaexanaenajē. Apo na-
jamatabēnapitsinē tsane bajarapapibisiacuenemi,
jai Dioso pejumelivaisibaxutota bajayata tajēvelia Dioso pejumaitzijava.

¹³ Bजारapacuenia Dioso itsamatacabijavabelia icatsia najumecapanepaeya peju-
maitzijavanexa yabara jumaitsi. Tsipaji baja ajumematamobi palivaisimi copiaya
Dioso najumecapanepaeya jumaitsi judíovi pijasalinaivimijavabelia. Pacuenia ma-
panacuapijicuene ajibi tsaponae, bajara itsi bajarapalivaisimi. Vereverecapona baja.

9

*Pacuenia mapanacuata eca Diosojavabelia jivi penavajēcabiabibo, bajara pijinia pacue-
nia athēbētatsia ata peecaabo, yabara pelivaisi*

¹ Dioso copiaya najumecopata Moiséspijinēta. Bजारapalivaisita itoroba Israel pe-
momoxi pexanaenexa Dioso pijacarpaboxaneto, bajarapabota Diosojavabelia pe-
navajēcabiabinexa. Itorobanua sacerdotevi Dioso pijacuene petonacuenebavana-
paenexa bajarapacarpabota. ² Itsa baja vereteta carpaboxaneto Diosojavabelia
penavajēcabiabibonexa, bajarapabo enētatuajē yatuucutsiaya epatajērētsiarena rurena
ayaipapaēbērēpana. Bजारapaenēyatuucutsijava jumavereca, paenētatuajē pevēnē Lu-
gar Santo. Bजारajota nuta candelerovēnējava pitayotanucaenexa. Mesa ata nuta
bजारajota. Bजारapamesajumata pejebinexa pan, papan ofrendacuenia rajutabiaba
Diosojavabelia. ³ Bajara papapaēbērēpanacujinaereca, paenētatuajē, pevēnē pijinia Lugar
Santísimo, itsajota baitsi Dioso peponaponaenexa yatuucuta. ⁴ Bजारapaenēyatuucutsijava
tuatuajēta, nuca orota pexanaejava, altavēnējava. Bajara paaltarjumata jeba petuxuju-
vijavanē, inciensovēnējavanē, petajuitsinexa. Bजारapaenēyatuucutsijava tuatuajēta boca
baula, orota pexanaebaula. Bजारapabaula enētatuajēta nuca orota pexanaebotellabē.
Bजारapabotellabēta yanuca pexaejava, manávēnējava. Bजारapabaula enētatuajēta
bocanua Aarónpijinēmi pijanaeboyo. Bजारapanaeboyo bajayata Aarónpijinē: “Bax-
ujuvare,” itsa jai, baxujuvatababiaba. Bजारapabaula enētatuajēta bocabejenua
ibopanabeje. Bजारapaibopanatabeje Dioso jivi pitavetsilivaisi najumeyaquinabu-
ata. ⁵ Bजारapabaula matatsēnēta anijanēbeje pecorofeto pexainaenēbeje nucabeje.
Bजारaponēbeje beángelnēbeje, jumapecataeya pexanaenētsibeje. Bजारaponēbeje nu-
tatsibeje Dioso pijapenivenivenaecotia pitajētsinexabeje. Bजारaponēbeje pecorofetota
baula matatsēnēcaranatanucabeje. Nexata pepo sacerdotenē caevai canacujitsia ba-
jarapabaula jumatsicababiaba dajubinē pijanata. Pepo sacerdotenē bajarabaula itsa

jumatsicababiaba, jamatabějumi tsabiabitsi: “Dioso nacaitaxutotsoniataena. Nacavecuaajibiaexanaena pibisiacuene vajaexanaeconimi,” jamatabėjai tsabiabi pepo sacerdoteně dajubině pijanata baulajuma petsicababiabijavata. Itsiata aeconoxae apo necuenecaějēpae patacatoyaquinaponaenexa pajamatabēcuenelivaisi xainapona daxita bajaraxua.

⁶ Bajarapacuenia bajayata Diosojavabelia penavajēcabiabibonexa, vereteta Dioso pijacarpaboxaneto. Nexata sacerdotevi joneyabiaba daxitamatacabi canacujitsia bajarapabojavabelia. Bajarapabo pēnēyatuucutsijava penamataxainaeēnētuaatujētatsina, sacerdotevi jinavanapabiaba. Sacerdotevi joneyabiaba penacuenebinexa Dioso pijacuene petonajumecopatsicueniatsi. ⁷ Nexata bajarapabo pēnēyatuucutsijava penamataxainaeēnētuaatujētatsina cujinaereca, paēnētuaatujējavabereca, sacerdotevi pepo penamatacaitorobině caeně joneyabiaba. Bajarapacuenia joneyabiaba caeto caevai canacujitsia. Itsa joneyabiaba, cajoneyabiaba dajubi pijana. Bajarapajanata sacerdotevi pepo penamatacaitorobině jumatsicababiaba bajarapabaula. Bajarapacuenia exanabiaba bajarapajana ofrendacuenia perajutsinexa Diosojavabelia. Bajarapacuenia exanabiaba pibisiacuene pexanaeconini Dioso pevecuaajibiaexanaenexatsi. Bajarapacuenia exanabiaba daxita itsamonae xua pibisiacuene exanae ata, itsiata apo nacueneyapētae, Dioso pevecuaajibiaexanaenexatsi. ⁸ Espiritu Santo pejamatabēcueneta nacayapētaeayaexana mapacueneye. Pamatacabi abaxě Dioso pijacarpaboxaneto piapiapapaēbērēpanaxanetota ēnētuaatujē yatuucutarurena, sacerdotevi Dioso pijacuene tonacuenebavanapa bajarapacarpaboxanetota. Bajarapamatacabi Dioso apo tocopatsi jivi pejonenexa Lugar Santísimojavabelia pijacuata pevajētatsinexa Diosojavabelia. Bajaraxua vajayapētaenexa Espiritu Santo pejamatabēcueneta nacayapētaeayaexana. ⁹ Bajaraxua bajayata sacerdotevi exana comparacióncuenia ajena mapamatacabijavaberena je vajanacayapētaeayaexanaenexa bajaraxua yabara. Jivi dajubi beyabiaba ofrendacuenia bajarapavi perajutsinexa Diosojavabelia. Vaxaitsi baja yapētanetsi mapacueneye. Bajarapacuenia jivi exanae ata, nacueratabiaba. Tsipaji jivi dajubiněvi ofrendacuenia rajutabiabi ata Diosojavabelia, tsiteca pijaperujujamatabēcuenē xainavanapa. ¹⁰ Paperujulivaisimi bajayata Dioso Moiséspijiněta najumecopata, jivi apo itorobitsi penajamatabēcuenexaniavaetsinexa. Biji rajane saya itorobatsi pexaejavanexa xaniavaetsia pevetsinexa, piapaeranexa ata xaniavaetsia pevetsinexa, xaniavaetsia penaperaběquiatsinexanua. Bajarapacuenia itorobatsi bajarapalivaisimi pejumecovēnētavanapaenexa abaxě Cristo pepatsivajēnaeyatsica. Nexata Cristo pepatsicujinaetsica, Dioso jane baja bajarapalivaisimi pevereverecaayaexanaenexa pejanalivaisita.

¹¹ Capanepaeya baja pata Cristo, pepo sacerdoteně. Bajaraponě vajanacatocuaicujainēnēxaxa Diosojavabelia daxitamatacabijavabelianexa. Aeconoxae baja Cristo pexaniacuene nacatoexana. Cristo baja pona athēbēabetsia, Dioso pepo pijaboyabetsia. Bajarapabo bitso pexaniabo mapanacuata jivi pexanaebo matatoxenetsia. Dioso saicaya pexanaebo. ¹² Bajarabetsia Cristo itsa junua bajarapabotatsia, caecueneta junua bajarapaboēnēalia, Lugar Santísimojavabelia, itsajota baitsi Dioso peponaponaenexa yatuucuta. Cristo itsa junua, apo cajone chivojana, becerrojana ata. Biji rajane Cristo najanacajunua daxitajivinexa. Nexata baja caecuenia nacaneconimatamota daxitamatacabijavabelianexa Dioso vajanacacapanepaenexa. ¹³ Xaniajai. Bajayata Israelpijině pemomoxi itsa naneconita Diosojavabelia, abaxě apo tocopatabiabitsi penajonenexa Diosojavabelia penavajēcabiabibojavabelia. Nexata Israelpijině pemomoxi copiaya matatsicababiabatsi chivojanata, torojanata ata. Becerrami altarvēnējavajumata petajuitsi-
ipumana ata tsimataothoothotabiabatsi. Nexata jane baja xuacujinae tocopatabiabatsi icatsia penajonenexa Diosojavabelia penavajēcabiabibojavabelia. ¹⁴ Bajarapacuenia bajayata Dioso tocopatatsi dajubině pijana pejamatabēcueneta Israelpijině pemomoxi

moxi pejonenexa Diosojavabelia penavajëcabiabibojavabelia. Dajubinë pijana mata-toxenetsia Cristo bitso caëjëpatsi vajanacayavenonaenexa Dioso pexënatoxae. Espíritu Santo, apo pevereverecaenë daxitamatacabijavabelianexa, Cristo yavenonatsi. Nexata Cristo nacopata pebeyaxuabinexatsi vajanacasivatëpaenexa. Cristo cajena caeto ata pibisiacuene apo exanae. Nexata Cristo pijanata nacavecuajibiaexana baja pibisiacuene vajaexanaeneconimi. Bajarapaneconi yabara picani Diosovecua vajanaxu-abiviminexa. Bajarapacuenia Cristo vajanacatoexanaexae, tonacuenebavanapatsi pi-asaëtsaponaponaenë Dioso.

¹⁵ Nexata Jesucristo pejamatabëcueneta nacavecuajibiaexana baja vajaneconimi. Nexata baja aneconijibia Dioso nacatane. Bajaraxuata daxita pamona Dioso junatatsi, rajutsianatsi matacabi apo pevereverecaejava, pacuenia baja Dioso najumecapanepaeya jumaitsi perajutsinexatsi. Cristo ita nacasivatëpa, nacaneconimatamota baja. Nexata nacavecuajibiaexana daxita paneconimi xainatsi ita abaxë jumecovënëtavanapatsi copiaya palivaisimi Dioso Moiséspijinëta najumecopata. ¹⁶⁻¹⁷ Itsajivi petëpaevajënae, yaquina pecobcovë yabara. Bajarapajivi ita tëpa, pijamonae pevënamuto penatsicobetsanaenexa. Nexata yaquina pacuenia caejivi canacujitsia pitaponaejitsia. Itsiata baitsi jane abaxë ita asaë tsaponaponae pecobcovë pexinaejivi, ajumematamobi abaxë bajarapalivaisi. Matapania baja ita tëpa pecobcovë pexinaejivi, jumenamatamota jane baja bajarapalivaisi. Nexata jane baja xanepana pijamonae penatsicobetsanaenexa pacuenia petëpaejivi yaquina petëpaevajënaeya pecobcovë yabara. ¹⁸ Bajara pijinia itsi paperujulivaisimi bajayata Dioso Moiséspijinëta najumecopata Israelpijinë pemomoxi pejumecovënëtsinexa. Jumenamatamotapona Israelpijinë pemomoxi dajubi pebeyabiabixae ofrendacuenia bajarapavi perajutsinexa Diosojavabelia. ¹⁹ Bajayata Moiséspijinë copiaya tsipaeba daxitajivijavabelia daxitajivi bajarapalivaisi pejumecovënëtavanapaenexa. Nexata Moiséspijinë pita hisopovënë naeboxi pepacëtetsicunuyo petsobialanamaëtota. Bajaraxuacujinae bajarapacunuyo Moiséspijinë jabuta merata, becerrojanata, chivojanatanua, peyajavamatajërëabijanarata. Nexata Moiséspijinë tsmatatsicaba pabaxutota itanerubena palivaisi Dioso najumecopata Moiséspijinëta. Bajaraxuacujinae Moiséspijinë daxitajivi tsmatatsicabapona. ²⁰ Nexata Moiséspijinë jumaitsi jivijavabelia: “Mara pacuenia pacamatatsicabatsije. Nexata patacamatatsicabixae, xaniavaetsia jane baja Dioso pajumecovënëtavanapaename. Nexata pacuenia Dioso najumecapanepaeya pacajumaitsi, pacatocopiapatsiana,” jai Moiséspijinë jivijavabelia. ²¹⁻²² Bajaraxuacujinae icatsia Moiséspijinë tsicabanajaenajaeba Diosojavabelia penavajëcabiabibo ënëtuaatujë. Xuanë bajarapabo ënëtuaatujëta xaina pecanacuenebinexa Dioso pijacuene, daxita bajaraxuanë yajavatsicabanajaenajaeba. Bajarapacuenia pexanaenexa itoroba baja cajena Dioso Moiséspijinëta penajumecopatsilivaisimita. Itoroba dajubinë pijanata daxitacuene petsicabinexa, petsicabicujinae Dioso axuirajibia petaenexa daxita bajaraxuanë, jivi ata Dioso aneconijibia petaenexa. Tsipaji jivi pibisiacuene pexanaeneconi yabara, acuenebi Dioso aneconijibia petaenexatsi. Matapania dajubinë ita beyaxuaba, pijanata ita matatsicabatsi, Dioso jane baja aneconijibia tanetsi.

Pacuenia Cristo nacopata pebeyaxuabinexatsi mapanacuapijivi pijaneconi pevecuajibiaexanaenexa yabara pelivaisi

²³ Diosojavabelia penavajëcabiabibota, xuabeje xaina pecanacuenebinexa Dioso pijacuene, dajubinë pijanata bajayata Moiséspijinë tsicabanajaenajaeba. Bajarapacuenia Moiséspijinë ita exana, tajëvelia comparacióncuenia itajëtapona jivi peyapëtaenexa itsamatacabijavabelia Cristo pesivatëpaejavanexa mapanacuapijivi. Cristo dajubinë pijanata apo tsicabanajaenajaebi Diosojavabelia penavajëcabiabibo ënëtuaatujë. Biji rajane Cristo nacopata pebeyaxuabinexatsi. Nexata Cristo pijana pejamatabëcueneta, mapanacuapijivi pibisiacuene pexanaeneconi, Dioso baja vecuajibiaexanatsi. Cristo

cajena bitso jananamatamota Dioso pitabarata, dajubinē pejana matatoxenetsia. ²⁴ Cristo baja cajena vajanacasivatēpaecujinae, athēbēabetsia pona. Aeconoxae baja Cristo athēbētatsia eca, paxa Dioso pemuxuneneta, vajanacatocuaicuaijaitsecaenexa Diosojavabelia. Nexata Dioso pepo pijabotatsia Cristo nacatocuaicuaijai tsaponae. Bajarapabo apo pexanaebo itsajivi ata. Apo bemapanacuapijibo. Tsipaji pacarpaboxaneto mapanacuata jivi exana Diosojavabelia penavajēcabiabibonexa, bajarapabo saya cuenecataeya exana pacuenia athēbētatsia Dioso pepo pijabo itsi. ²⁵ Sacerdotevi pepo penamatacaitorobinē, bajaraponē judiónē. Caevai canacujitsia cajoneyabiaba dajubinē pijana Lugar Santísimovēnējavabelia, itsajota baitsi Dioso peponaponaenexa yatuucuta. Itsiata baitsi jane Cristo bajarapacuenia apo exanabiabi caevai canacujitsia. Caeto penacopatsicujinae pebeyaxuabinexatsi vajanacasivatēpaenexa, icatsia baja pematatsēnēa apo nacopatsi petēpaenexa. ²⁶ Dioso mapanacuaje pexanaejavaveliacujinae, Dioso itsa tocopatsipa Cristo jivi pesivatēpaponaeenexa caevai canacujitsia, nexata Cristo bitso anijatonē jivi pijaneconi yabara sivatēpaponaejitsipa. Itsiata baitsi jane Cristo caeto petēpaecujinae, icatsia baja apo tēpae. Itsa baja copiarucaejiitsia perujulivaisimi, Cristo naexana mapanacuataje. Nexata caeto nacopata pebeyaxuabinexatsi vajanacasivatēpaenexa, pibisiacuene vajaexanaeneconimi vajanacavecuajibiaexanaenexa. ²⁷ Bajara pijinia pacuenia vaxaitsi ata caeto tēpaponaeenatsi. Bajaraxuacujinae jane baja Dioso naneconitsiaexanaponaena daxita pamonaē pijaneconi pexainaēvi. ²⁸ Bajara pijinia pacuenia Cristo caeto nacopata pebeyaxuabinexatsi vajanacasivatēpaenexa, ayaibitsaētōxanetotsi pibisiacuene vajaexanaeneconi vajanacavecuajibiaexanaenexa. Bajaraxuacujinae Cristo baja athēbēabetsia pona. Icatsia patsianica cotocaevijava. Itsiata baitsi jane baja icatsia apo nacasivatēpae tsane pibisiacuene vajaexanaeneconi yabara. Saya baja nacasivapatsianica vajavajēnaeevetavanapaēvi vajanacacaponaeenexa athēbēabetsia.

10

¹ Palivaisi bajayata Dioso Moiséspijinēta najumecopata, bajarapalivaisi saya Dioso najumecopata tajēvelia vajayapētaenexa papexaniacuene aeconoxae Cristo nacatoexana. Pacuenia jumaitsi Dioso Moiséspijinēta penajumecopatsilivaisi, sacerdotevi exanabiaba Cristo pepatsivajēnaeyatsica. Caevai canacujitsia dajubinē beyaxuababiaba ofrendacuenia pevi perajutsinexa Diosojavabelia, pibisiacuene pexanaeneconi Dioso pevecuajibiaexanaenexatsi. Itsiata baitsi jane bajarapacuenia exanabiabi ata, pepacuene apo jamatabēcuenexaniavaetsitsi. ² Pacuenia bajayata itorobatsi Dioso Moiséspijinēta najumecopatsilivaisi, sacerdotevi exanabiaba. Dajubinē beyaxuababiaba ofrendacuenia pevi perajutsinexa Diosojavabelia. Bajarapacuenia pexanabiabixae, pepacuene Dioso itsa vecuajibiaexanaejitsipatsi pibisiacuene pexanaeneconi, nexata bajarapamonae apo yanajamatabēxainae tsipae pijaneconi. Nexata baja itsa aneconijibi tsipae, pematatsēnēa dajubinē apo beyaxuababiabi tsipae ofrendacuenia pevi perajutsinexa Diosojavabelia pijaneconi yabara. Caeto saya ofrenda rajutsipa Diosojavabelia. ³ Bajarapacuenia dajubinē caevai canacujitsia beyaxuababiabi ata ofrendacuenia pevi perajutsinexa Diosojavabelia, itsiata jivi jamatabēcuenēbarēyaya apo jinavanapae. Biji rajane bajarapacuenia exanabiabi ata, pevajēnaeyabelia tsiteca yanajamatabēxainapona pijaneconi. ⁴ Bajarapacuenia beyaxuababiabi ata toro, chivo ata, bajarapajana apo caējēpaetsi jivi pijaneconi pepacuene pevecuajibiaexanaenexatsi.

⁵ Bajaraxuata Cristo pepatsicujinaetsica mapanacuayabetsicaje, paxa Diosojavabelia jumaitsi mapacueniaje:

Apo jitsipaemē xamē xua jivi carajutabiaba ofrendacuenia. Apo jitsipaemēnua dajubinē ata pebeyaxuababiabijava pevi pecarajutsinexa ofrendacuenia. Bajaraxuata xanē nitorobimica pacuenia banaexana mapanacuapijivi, tanaexanaenexa

mapanacuata, mapanacuapijivi tasivatëpaenexa pijaneconi yabara. ⁶ Jivi picani dajubinë beyaxuababiaba ofrendacuenia pevi pecarajutabiabinexa, altarvënëjavajumata pecatotajuitsinexa. Jamatabëjumai tsabiabi bajarapamonae: “Tajaneconi Dioso nevecuaajibiaexanaena mapacuenia itsa exanaenajëje,” jamatabëjai tsabiabi. Itsiata baitsi jane apo sivajamatabëcuenebarëyamë bajaraxua yabara. ⁷ Bajara jane manucajëje pacuenia jitsipame tacatoexanaenexa, pacuenia nijumelivaisibaxutota tajëvelia jumaitsi xanë yabara, tasivatëpaenexa nijajivi, jai Cristo paxa Diosojavabelia.

⁸ Nexata bajarapacuenia Cristo pejumaitsixae, aeconoxae baja vaxaitsi yapëtanetsi mapacuenieje. Dioso aeconoxae apo sivajamatabëcuenebarëya jivi dajubinë pebeyaxuababiabijava ofrendacuenia pevi perajutabiabinexa Diosojavabelia. ⁹ Icatsia Cristo jumaitsi paxa Diosojavabelia mapacueniaje: “Bajara jane manucajëje pacuenia jitsipame tacatoexanaenexa,” jai Cristo. Cristo baja mapanacuapijivi pibisiacuene pexanaeneconi yabara sivatëpa cruzata pacuenia paxa Dioso itorobatsi. Nexata sacerdotevi dajubinë pebeyaxuababiabijava ofrendacuenia pevi perajutabiabinexa Diosojavabelia, Cristo baja copiarucaeyaexana. ¹⁰ Pacuenia Dioso tojitsipatsi, Jesucristo nacopata pebeyaxuabinexatsi vajanacasivatëpaenexa cruzata. Bajarapacuenia Jesucristo nacasivatëpa vajanacavecuajibiaexanaenexa pibisiacuene vajaexanaeneconimi. Caeto baja Jesucristo nacasivatëpa daxita mapanacuapijivitsije.

¹¹ Caematacabi canacujitsia picani sacerdotevi nubenabiaba altarvënëjava muxuneneta, dajubinë itsa beyaxuaba, ofrendacuenia pevi perajutabiabinexa Diosojavabelia. Itsiata baitsi jane bajarapacuenia exanabiabi ata, Dioso pepacuenie apo vecuaajibiaexanaetsi pibisiacuene pexanaeneconi. ¹² Jesucristo baja cajena nacopata pebeyaxuabinexatsi, vajanacaneconimatamotsinexa pibisiacuene vajaexanaeneconimi. Caeto baja Jesucristo tëpa pibisiacuene vajaexanaeneconi vajanacaneconimatamotsinexa daxitamatacabijavabelianexa. Bajaraxuacujinae Jesucristo athëbëtatsia eca, paxa Dioso pemuxuneneta, penajuaevetsinexabeje daxitacuene. ¹³ Cristo abaxë aeconoxae athëbëtatsia ecaya. Jamatabëcuenevetecaya abaxë pijavajabitsaë paxa Dioso petojamatabëcueneamoneyabinexatsi. Nexata Jesús pijavajabitsaëmi ata pacuenia itoroba, pejumecovënëtsinexatsi. ¹⁴ Caeto baja Cristo nacopata vajanacasivatëpaenexa. Nexata vaxaitsi, Cristo pelivaisi vajajumecovënëtavanapaevi, Cristo pejamatabëcueneta Dioso nacavecuajibiaexana pibisiacuene vajaexanaeneconimi daxitamatacabijavabelianexa. ¹⁵ Cristo baja cajena caeto vajanacasivatëpaejavanexa daxitamatacabijavabelianexa, Espiritu Santo tajëvelia nacayapëtaeyaexana. Espiritu Santo tajëvelia nacayapëtaeyaexana pexaniajaicuene, xua baja aeconoxae Cristo nacatoexana. Tsipaji baja cajena Dioso pejumelivaisibaxutota tajëvelia jumaitsi mapacueniaje:

¹⁶ Najumecapanepaeya tajajivi yabara pejanalivaisi itsamatacabi jumaitsinë tsane mapacueniaje: “Caejivi canacujitsia pejamatabëëthëtota yapëtaeyaexanaponaponaeajë pacuenia netojinavanapaejitsia. Nexata bajarapamonae pejamatabëëthëttojavavetsina jitsipaena tanejumecovënëtsinexa,” jai Dioso.

¹⁷ Bajaraxuacujinae icatsia Dioso jumaitsi mapacueniaje: Apo najamatabënapitsinë tsane itsamatacabijavabelia ata daxita papibisiacuene bajarapamonae exana, jai Dioso tajëvelia pija-jivi yabara.

¹⁸ Nexata jane baja Cristo nacasivatëpa pibisiacuene vajaexanaeneconimi Cristo pejamatabëcueneta Dioso vajanacavecuajibiaexanaenexa. Nexata baja pematatsënëa dajubinë apo beyaxuababiabi tsanetsi ofrendacuenia pevi vajarajutabiabinexa Diosojavabelia, pibisiacuene vajaexanaeneconi Dioso vajanacavecuajibiaexanaenexa.

Pacuenia saya vajajamatabëcuene imoxoyotsijitsiatsi Dioso yabara pelivaisi

¹⁹ Tajamonae, Jesucristo baja vajanacasivatëpaexae, aeconoxae baja Dioso nacatocopata ajunavijibia vajajonenexa Dioso pijanacuayabetsia. Nacatocopatanua bajarajotatsia vajajonenexa Lugar Santísimovënëjavabelia, itsajota baitsi Dioso ponapona. ²⁰ Jesucristo nacatoexana pejananamuto vajaponaenexa athëbëabetsia, Dioso vajanacarajutsinexa maticabi apo pevereveceajava. Jesucristo baja ita nacasivatëpa cruzata, nacasivatëpa vajapatsinexa Diosojavabetsia. ²¹ Bajayata sacerdotevi toeve-tavanapa Dioso pijacarpaboxaneto. Bajara pijinia pacuenia aeconoxae Jesucristo, pepo sacerdotenë jane baja, nacaevetaponapona vaxaitsi vajanacatocuaicuaijainexa Diosojavabelia. ²² Bajaraxuata vajajamatabëethëtojavavetsina vajajamatabëcuene saya bimoxoyotatsi Dioso. Bëpënëa vajajamatabëcueneta Dioso yamaxëitorobiaya apo be-jumecovënëtsitsi. Tsipaji yapëtanetsi Dioso vajanacacapanepaejavanexa. Bajara-pacuenia Dioso nacacapanepaena tsipaji baja pibisiacuene vajaexanaeneconimi Dioso nacavecuaajibiaexana. Nexata baja nacaajamatabëcuene xuirajibiaexana Jesucristo vajanacasivatëpaexae. Vajanacabautisabijavata, nacaperabëquiatanua piaxuirajibimer-ata. ²³ Vajavajënaeyabelia asaëyata copiaevetavanapaenatsi Dioso vajanacacapanepae-javanexa. Bajarapacuenia asaëyata copiaevetavanapaenatsi Dioso jumeaebinejevatsi. Nexata itsamonaejavabelia navajunupaebabiabianatsi Dioso vajanacacapanepaeja-vanexa. Tsipaji baja pacuenia Dioso najumecapanepaeya nacajumaitsi, xaniajai baja cajena. Dioso nacacapanepaena. ²⁴ Nexata vaxaitsi namataenetsia benayavenonatsi vajajamatabëcueneitajëtsinexa vajanasivacuene. Namataenetsianua pexaniacuene benatoexanabiabatsi. ²⁵ Itsamona baja vaxaitsiyajuvënëvi copabapona penajoneyabi-abijava vajanacaetuatabiabiobjavabelia. Vaxaitsi nexata bajarapamonae apo be-cuenejëpaetsi. Namataenetsia benajamatabëcueneasaëyaexanaponatsi. Aeconoxae baja bitsoyo biamatabëcuenesaëtsi tsavanapae. Tsipaji baja imoxoyo pevajënae vajatuxa-nenë pepatsinexatsica.

²⁶ Vaxaitsi tsiteca vajavajënaeyabelia pibisiacuene ita exanaponaejitsipatsi, yapëtae atatsi Cristo vajanacasivatëpaejava, nexata nacatoacuenebi tsipae Dioso vajanacavecuaajibiaexanaenexa pibisiacuene vajaexanaeneconi. ²⁷ Bajarapacuenia vajavajënaeyabelia tsiteca pibisiacuene ita exanaponaejitsipatsi, nexata saya copiaevetavanapaejitsipatsi pinijicuenia Dioso ëvajanacananeconitsia exanaejavanexa. Pamatacabi Dioso pijavajabitsaë naneconitsiaexanaena pinijiisotojavabelia peverebiabinexa, bajarapamatacabi vaxaitsi ata, bajarapamonae yajava, pinijicuenia Dioso nacayajavananeconitsia exanaejitsipa. ²⁸ Bajayata Dioso Moiséspijinëta najumecopata jivi pejumecovënëtsinexa. Nexata pajivi apo jumecovënëtsi Dioso Moiséspijinëta penajumecopatsilivaisi, beyaxuabaponatsi. Anijajivibeje, acueyabi pajivibeje ata, ita jumaitsi pibisiacuene pexanaejivi yabara: “Pataniji pepacuene pibisiacuene pexanaejava mapajivije,” ita jai, nexata bajarapajivi apo itaxutotsoniataetsi. Beyaxuabatsi pibisiacuene pexanaeneconi yabara. ²⁹ Pacanaëjère mapacueneje. Pajivi apo jumecovënëtsi Dioso Moiséspijinëta penajumecopatsilivaisi, naneconitsiaexanatsi. Nexata bajaraxua matatoxenetsia Dioso bitso naneconitsiaexanaenatsi pajivi copata pejumecovënëtsijava Dioso pexënato pesivatëpaejavatsi pijaneconi yabara. Pajivi copata pejumecovënëtsijava Dioso pexënato pesivatëpaejavatsi pijaneconi yabara, bajarapajivi tane Dioso pexënato pesivatëpaejavatsi bepiamatamobicujiru. Apo canaëjëtsinua Espíritu Santo piasivajavatsi. ³⁰ Yapëtanetsi baja cajena Dioso pejumaitsijava mapacueniaje: “Pamonae pibisiacuene exanapona itsamonaejavabelia, bajarapamonae xanë naneconitsiayaexanaenajë,” pejaijava. Jumaitsinua Dioso mapacueniaje: “Xanë Diosonënë, naneconitsiaexanaenajë tajajivi,” jai. ³¹ Pajivi Dioso apo jumecovënëtsi, nexata Dioso ita naneconitsiaexanaenatsi, jbitso piayaicuene taeyaexanaenatsi piasaëtsaponaponaenë Dioso!

³² Panajamatabënapire pacuenia pajamatabëcueneitsimë tsavanapae pamatacabi

ajena Cristo pajumecovënētame. Bajarapamatacabi pajamatabëcuenesaëmë tsavana-pae panejumecovënëtsijava vajatuxanenë pelivaisi, itsamonae pacabejiobiaexanae ata bajarapalivaisi yabara. ³³ Paxamëyajuvënëvi baja cajena jivi ayaibitsaëto pitabarata itsamonae capocaponatsi. Ayaicuenia baja cajena bejiobiaexanatsinua bajarapamonae pitabarata. Nexata pijinia itsamonae paxamëyajuvënëvi bitso sivanajamatabëxaina bajarapacuenia papecayajuvënëbejiobia exanaexaetsi. ³⁴ Paxamë paitaxutotsoniataneme pamonaë jebatsi penaneconitsivi pejebabiabibota Dioso pejumelivaisi yabara. Paxamë itsamonae pacavecuanotsi ata panijairanëmi, panecobecovëjavaximi yajava, itsiata paxamë pajamatabëcuenebarëyamë. Bajarapacuenia pajamatabëcuenebarëyamë tsipaji baja payapëtaneme xua athëbëtatsia paxainaejitsiamë. Bajaraxua mapanacuapijicuene matatoxenetsia bitso pexaniacuenejava. Tsipaji daxitamatacabijavabelianexa apo peverevereceaëjavanexa. ³⁵ Bajaraxuata pëtsa pacopabame panesivanajamatabëcuenecopatsijava Diosojavabelia papecayavenonaenexa. Dioso cajena athëbëtatsia pacarajutsiana ayaicuenëjava panenajamatabëcuenecopatsixae bajaraponëjavabelia. ³⁶ Bajayajebi ata panevajënaeyabelia paexanaponare pacuenia Dioso pacatojitsipa. Nexata xua yabara tajëvelia Dioso najumecapanepaëya jumaitsi papecarajutsinexa, bajaraxua Dioso pacarajutsiana. ³⁷ Cristo icatsia pepatsijavanexatsica yabara, Dioso pejumelivaisibaxutota tajëvelia jumaitsi mapacueniajaje:

Bepijia patsianica ponë patsijitsiatsica. Apo cuenenajematsi tsane pepatsinexatsica. ³⁸ Nexata pajivi Dioso aneconijibiatanetsi Diosojavabelia penajamatabëcuenecopataponaponaëxae, bajarapajivi xainaena matacabi apo peverevereceaëjava. Itsiata baitsi jane pajivi nevecuanaviata pecovëyabelia, apo sivajamatabëcuenebarëyanë tsane,

jai Dioso pejumelivaisibaxutota.

³⁹ Itsiata baitsi jane vaxaitsi vajacovëyabelia Diosovecua apo naviabi tsanetsi Diosovecua vajanaxuabiyaniva. Biji rajane vaxaitsi najamatabëcuenecopabatsi Diosojavabelia ëvajanacacapanepaëjavabelianexa.

11

Pacuenia Dioso pejumecovënëtsivi apo jumeaëbi xua Dioso najumecapanepaëya jumaitsi yabara pelivaisi

¹ Itsa pepacuene vaxaitsi xaniavaetsia najamatabëcuenecopatatsi Diosojavabelia, nexata najamatabëxainatsi mapacueniajaje: “Abaxë daxitacuene apo copiapatsi ata, xua yabara Dioso najumecapanepaëya jumaitsi, itsiata yapëtaniji pexaniajaicuenë. Pacuenia Dioso najumecapanepaëya jumaitsi, xaniajai baja cajena. Pepacuene Dioso exanaena,” jamatabëjaitsi. ² Bajayata vajasalinaivimi jumecovënëta Dioso. Nexata bajarapamonaëmi jamatabëjumaitsi tsabiabi: “Pacuenia Dioso najumecapanepaëya jumaitsi, pepacuene neyavenonaena,” jamatabëjai tsabiabi. Bajaraxuata bajarapamonaëmi yabara Dioso jumaitsi: “Sivajamatabëcuenebarëyanë,” jai.

³ Vaxaitsi ata jumecovënëtsi Dioso. Nexata yapëtanetsi pexaniajaicuenë mapacuenia pejumaitsilivaisije: “Dioso baja cajena nacua exana daxitacuene yajava. Dioso saya pijumeta daxitacuene exana. Daxita xua aeconoxae vajaitaxutota tanetsi, Dioso baja cajena exana. Abaxë pamatacabi ajibi itsacuenejavayo ata mapanacuatajaje, Dioso baja cajena exana daxitacuene,” pejailivaisi yapëtanetsi pexaniajaicuenë.

⁴ Bajayatami Abelpijinë najamatabëcuenecopata Diosojavabelia. Abelpijinë jumecovënëta pacuenia Dioso itorobatsi. Nexata Abelpijinë dajubinë beyaxuaba. Nexata ofrendacuenia pevi rajuta Diosojavabelia. Dioso nexata sivajamatabëcuenebarëyatsi. Abelpijinë pijinia pematapijënëmi, Caínpijinë, apo jumecovënëtsi pacuenia Dioso itorobatsi. Saicaya pijinia itsaviriajava ofrendacuenia rajuta Diosojavabelia. Dioso nexata apo sivajamatabëcuenebarëyatsi Caínpijinë. Nexata Abelpijinë bajayatami baja tēpae ata,

itsiata mapamatacabijavaberena ataje vënëlivaisitaeponatsi Dioso pejumecovënëtsijava. Nexata baja vaxaitsi yapëtanetsi, vaxaitsi ata Dioso itsa jumecovënëtatsi, Dioso vajanacasivabarëyajavanexa.

⁵ Bajayata Enocpijinë ata najamatabëcuenecopata Diosojavabelia. Bajaraxuata apo tēpaenejeva Dioso caponatsi athëbëabetsia. Jemata pitajarabatsi. Nexata itsamonaē jaitsi atatsi, itsiata apo caxitajarabitsi. Dioso pejumelivaisibaxutota jumaitsi pacuenia Enocpijinë Dioso pepitsivajënaeyatsi, Dioso sivajamatabëcuenebarëyatsi.

⁶ Pajivi apo najamatabëcuenecopatsi Diosojavabelia, bajarapajivi yabara Dioso apo jamatabëcuenebarëya. Pajivi najamatabëcuenecopatsijitsia Diosojavabelia, bajarapajivi copiaya bejamatabëjumaitsi mapacueniaje: “Xaniajai tsaena baja. Dioso ponapona. Bajaraponë jivi pitaxutotsoniataenë. Nexata pamonaē asaëyata vajëta Diosojavabelia pibisiacuene pexanaeneconi pevecuaajibiaexanaenexatsi, bajarapamonaē pijaneconi Dioso vecuaajibiaexanatsi,” bejamatabëjai copiaya.

⁷ Bajayata Noépijinëmi ata najamatabëcuenecopata Diosojavabelia. Nexata Noépijinëmijavabelia tajëvelia Dioso jumaitsi pacuenia mapairaje Dioso bubutsiaexanaejitsia. Nexata Noépijinëmi abaxë apo tae ata mapairaje pebubutsijava, itsiata jumecovënëta pacuenia Dioso jumaitsi. Nexata baja pinijibarcoxaneto exana pebarëpanepaenexa pijamonaē mapaira pebubutsijavavecuaje. Bajarapacuenia Noépijinëmi pijamonaē pebarëjumecovënëtsixae Dioso, nexata Dioso aneconijibia tanetsi. Bajarapamatacabi daxita mapanacuapijivimi apo jumecovënëtsi Dioso. Caenë Noépijinë pijamonaē barëjumecovënëta Dioso. Nexata daxita pamonaemi apo jumecovënëtsi Dioso, nayapëtane bitso penaneconitsijava Diosojavabelia.

⁸ Bajayata Abrahampijjinëmi ata najamatabëcuenecopata Diosojavabelia. Nexata Dioso itsa itorobatsi Abrahampijjinë pevecuapitsapaenexa pijanacuami, jumecovënëta. Nexata baja Abrahampijjinë pona itsanacuayabelia. Panacua Dioso rajutsiapae-batsi, bajarapanacuayabelia pona. Abrahampijjinë abaxë apo natsivajënaeyapëtaē ata panacuayabelia patsijitsia, itsiata vecuapitsapa pijanacuami Dioso pitorobixaetsi.

⁹ Panacuata Abrahampijjinë Dioso patsiaexanatsi, bajarapanacuata itsiata Abrahampijjinë pepo pijabo apo exanaē. Carpabota saya ponapona. Becaematacabibejenexa saya pepatsinëcuenia carpabota Abrahampijjinë ponapona. Itsiata bajayajebi bajarapanacuata carpabota ponapona. Abrahampijjinë pexënato ata, Isaacpijinë, bajarapaira Dioso rajutsiapaeabi atatsi, itsiata Isaacpijinë ata carpabota ponapona. Bajara icatsia itsi Isaacpijinë pexënato ata, Jacobpijinë, Abrahampijjinë jane baja pemomo. Jacobpijinë bajarapaira Dioso rajutsiapaeabi atatsi, itsiata Jacobpijinë ata carpabota ponapona. ¹⁰ Bajarapacuenia Abrahampijjinë bajayajebi carpabota saya ponapona. Tsi-paji abaxë vajënaēvetaponapona pecaponaenexatsi athëbëabetsia, Dioso pexanaetomarabetsia, apo peverevecaetomarabetsia, daxitamatacabijavabelianexa jane baja peponaponaenexa bajarapatomaratsia.

¹¹ Bajayata Abrahampijjinë pijava pevënë Sara. Bajarapovami ata najamatabëcuenecopata Diosojavabelia. Bajarapova mavecova picani. Nexata bitso pepua perujuva ata, itsiata Dioso caëjēpaeyaexanatsi pexënato pexainaenexa. Jumecovënëta pacuenia Dioso najumecapanepaeya jumaitssitsi pexënato pexainaenexa. Bajaraxuata xaina pexënatonëyo. ¹² Bajarapacuenia Abrahampijjinë bitso pepua perujunë ata, pexënato xaina. Nexata Abrahampijjinë pevënamuto pemomoxibitsaëto baja tsaponaē. Athëbëtatsia, itaboxota, bitso navita tulupu. Mapanacuata pijinia tajetabota bitso navita tajetaboatsapërë. Nexata acuenebi itsajivi ata penamataëjësicapaneapaenexa tulupu, tajetaboatsapërë ata. Bajara pijinia itsaponaē Abrahampijjinë pemomoxi. Bitso cajena Abrahampijjinë pemomoxi navita.

¹³ Daxita pamonaemi bajayata Dioso jumecovënëta, tēpa baja. Bajarapamon-aemi xua yabara Dioso najumecapanepaeya jumaitssitsi perajutsinexatsi, pitsinejeva

tëpa baja. Abaxë apo tocopiapatsi atatsi xua yabara Dioso najumecapanepaeya jumaitsi perajutsinexatsi, itsiata sivajamatabëcuenebarëya bajarapamonaemi. Jamatabëjumai tsabiabi mapacueniaje: “Daxita pacuenia Dioso najumecapanepaeya jumaitsi, bajarapacuenia pepacune Dioso exanaena,” jamatabëjai tsabiabi bajarapamonaemi. Bajarapamonaemi namataenetsia najumai tsabiabi: “Mara panacuataje pepacune apo jinavanapaetsi tsane daxitamatacabijavabelianexa. Vaxaitsi saya caematacabibeje bevajanajinavanapaevinexa. Bevajanapatsivi mapanacuataje,” najai tsabiabi bajarapamonaemi. ¹⁴ Pamonaemi bajarapacuenia namataenetsia najumai tsabiabi, itsamonae tsitanajamatabëcueneitajëtavanapa. Bajarapamonaemi tsitanajamatabëcueneitajëtavanapa pevetavanapaejava athëbëabetsia Dioso pecaponaevanexatsi, bajarajotatsia jane baja pejinavanapaenexa daxitamatacabijavabelianexa. ¹⁵ Bajarapamonaemi apo najamatabëxainavanapae caevëalia icatsia penaviabinexa pijanacuamijavabelia. Itsa najamatabëxainaejitsipa caevëalia icatsia penaviabinexa pijanacuamijavabelia, nexata naviabijitsipa. ¹⁶ Biji rajane bajarapamonaemi najamatabëxainavanapa peponaenexa athëbëabetsia. Tsipaji athëbëtatsia panacua, bitso pexanianacua, mapanacua matatoxenetsia. Bajaraxuata bajarapamonaemi: “Taja Diosomë,” pejaijava Diosojavabelia, Dioso sivabarëyatsi. Vaxaitsi ata baja yapëtanetsi bajarapamonaemi Dioso pesivabarëyajavatsi. Tsipaji baja athëbëtatsia bajarapamonaemi Dioso toxaniavaetatsi pepo pijatomaranexa.

¹⁷⁻¹⁸ Copiaya Dioso tajëvelia najumecapanepaeya jumaitsi Abrahampijinëjavabelia. Abrahampijinë pexënato, Isaac, yabara Dioso jumaitsi mapacueniaje: “Nexënato Isaac xainaena pexi. Nexata nemomoxi xainaename,” jai Dioso. Bajaraxuacujinae icatsia Abrahampijinë Dioso itorobatsi penacoxibeyaxuabinexa picani. Bajarapacuenia Abrahampijinë Dioso itorobatsi penacoxibeyaxuabinexa picani saya pejamatabëcuenejëtsinexatsi. Abrahampijinë Dioso itorobatsi penacoxibeyaxuabinexa ofrendacuenia perajutsinexa Diosojavabelia. Nexata baja picani Abrahampijinë jejai. Nacoxibeyaxuabijitsia picani. ¹⁹ Bajarapacuenia picani Abrahampijinë exanaejitsia Dioso pitorobicueniatsi. Tsipaji Abrahampijinë jamatabëjumaitsi: “Dioso baja cajena cajëpatsi piasaëyaexanaenexatsi taxënato icatsia piasaënexa,” jamatabëjai Abrahampijinë. Ajena baja picani Abrahampijinë nacoxicacuatsijitsia cusiupata penacoxibeyaxuabinexa, nexata Abrahampijinë jamatabëjumaitsi: “Taxënato baja aeconoxae tëpaena,” jamatabëjai. Nexata bajarapaepatota Abrahampijinë Dioso itavetatsi penacoxibeyaxuabiyaniva. Nexata baja itsiata Abrahampijinë apo nacoxibeyaxuabi. Nexata itsiata Abrahampijinë bepetëpaenë baja nacoxitane. Nexata bajaraxuacujinae icatsia Dioso bepetoasaëyaexanaenëtsi nacoxitane.

²⁰ Bajayata Abrahampijinë pexënato ata, Isaacpijinë, najamatabëcueneocopata Diosojavabelia. Bajaraxuata Isaacpijinë itsa baja perujunë, pexënatobejejavabelia tajëvelia najumecapanepaeya jumaitsi: “Dioso pacayavenonabiabianabeje,” jai Isaacpijinë pexënatobejejavabelia. Isaacpijinë pexënatobeje itsanë pevënë Jacob. Itsanë pevënë Esau. Jacobpijinë itsavënë, Israel. ²¹ Nexata Jacobpijinë ata najamatabëcueneocopata Diosojavabelia. Nexata baja pamatacabi Jacobpijinë perujunë, itsa baja nayapëtane petëpaejavanexa, bajarapamatacabi Diosojavabelia tovajëta pemomobeje Dioso peyavenonabiabinexatsibeje. Ponëbeje Jacobpijinë pemomobeje tovajëta Diosojavabelia, Josépijinë pexënatobeje. Bajarapacuenia Jacobpijinë itsa tovajëta Diosojavabelia, pemomobeje, caenë canacujitsia, tovajëta pona. Pecobenaeboupita saya Jacobpijinë nayaëtanucaeya vajëtanuca Diosojavabelia. ²² Bajayata Josépijinë ata najamatabëcueneocopata Diosojavabelia. Bajarapamatacabi Egipto nacuata Josépijinë daxita pijamonae barëponapona, Israelpijinë pemomoxi. Nexata baja Josépijinë itsa nayapëtane petëpaejavanexa, tajëvelia vajunupaeba daxita Israelpijinë pemomoxi Dioso pejamatabëcueneta pecapitsapaejavanexatsi

Egipto nacuavecua. Josépijinē petēpaevajēnae, najumepuenetana pijamonae pesicaponanexatsi pamatacabi Dioso pejamatabēcueneta daxita Israelpijinē pemomoxi capitsapatsi Egipto nacuavecua.

²³ Bajayata Moiséspijinē paxapijinē, penapijiva ata, tajēvelia yapētanebeje Dioso peyavenonaejavanexatsibeje. Nexata bajaraxuacujinae pexēnatonēyo xainabeje, Moisésnexa jane baja. Nexata matayatsia caponaponabeje acueyabi pajuametobeje. Bajarapacuenia matayatsia caponaponabeje tsipaji bitso tsitapexanianēyotsibeje. Egiptonacua pepo pevetsinē itoroba picani daxita Israelpijinē pemomoxi penacoxibeyaxuabaponaenexa ita tonaexanatsi pebinēyo. Itsiata bajarapajivibeje apo jumecovēnētsibeje penacoxibeyaxuabinexabeje. Tsipaji apo jumecujunavibeje. ²⁴ Bajaraxuacujinae Moiséspijinē jane baja vitsatatsi Egiptonacua pepo pevetsinē pexēnatoyo. Moiséspijinē bajarapova vitsatatsi bepexēnatonēyocuenia. Moiséspijinē baja ita penaveretsinē, yapētane Dioso peyavenonaejavanexatsi. Nexata Moiséspijinē apo jitsipae Egiptonacua pepo pevetsinē bepemomocuenia petaenexatsi. ²⁵ Nexata Moiséspijinē najamatabēcueneveretsia jamatabējumaitsi: “Tajamonae, Israelpijinē pemomoxi, Dioso pijajivinexa. Nexata yavenonaenajē tajamonae. Egipto nacuapijivi nebejiobiaexanae ata tsane, pacuenia tajamonae bejiobiaexanabiabatsi, itsiata yavenonaenajē,” jamatabējai Moiséspijinē. Nexata baja Moiséspijinē Egiptonacua pevetsinē bepemomocuenia petaejavatsi ita vecuapitsapa, copata baja pibisiajamatabēcuenē, mapanacuapijijamatabēcuenē. Tsipaji saya bajarapajamatabēcuenē caepatoyonexa jamatabēcuenēbarēya. ²⁶ Moiséspijinē Dioso jumecovēnēta pacuenia tajēvelia Dioso jumaitsi pijajivi pecapanepaenexa Egipto nacuavecua. Nexata Moiséspijinē tajēvelia jamatabējumaitsi: “Itsamatacabi Cristo itsamonae bejiobiaexanaenatsi. Bajarapacuenia xanē ata Egipto nacuapijivi nebejiobiaexanaejitsia ata tsane, itsiata Dioso pejitsipaecuenia toexanaenajē. Tsipaji xua Dioso athēbētatsia nerajutsijitsia, bajaraxua bitso pexaniacuene daxita Egipto nacuapijivi pexainaecuene matatoxenetsia,” jamatabējai Moiséspijinajēvelia Dioso jumaitsi pijajivi pecapanepaenexa Egipto nacuavecua. Nexata Moiséspijinē tajēvelia jamatabējumaitsi: “Itsamatacabi Cristo itsamonae bejiobiaexanaenatsē. ²⁷ Nexata baja Moiséspijinē Egipto nacuavecua pitsapa. Tsipaji najamatabēcuenecopata Diosojavabelia peyavenonaenexatsi. Egiptonacua pepo pevetsinē Moiséspijinē baraanaepanae atatsi, apo cjunavi. Pevajēnaeyabelia ajamatabēcuenesaē tsanajetaruae pacuenia Dioso itorobatsi pexanaenexa. Moiséspijinē baja apo naviatsi pecovēyabelia. Tsipaji abaxē Moiséspijinē apo tae ata Dioso, itsiata yapētane Dioso bitso piasaēnēcuenē Egiptonacua pepo pevetsinē matatoxenetsia.

²⁸ Moiséspijinē Dioso peyavenonaenexatsi, tajēvelia najamatabēcuenecopata Diosojavabelia. Bajaraxuata pamatacabi Moiséspijinē pijamonae barēpitsapa Egipto nacuavecua, ayaicuenia Dioso yavenonatsi pijamonae pebarēpanepaenexa. Bajaraxuata Moiséspijinē pacuenia Dioso itorobatsi, juya daxita pijamonae itoroba. Moiséspijinē pijamonaejavabelia jumaitsi mapacueniaje: “Daxita paxamē, pacaebopijivimē canacujitsia, pabename ovejaxi, pejanapebitoxi. Nexata panijabobaupanē, caebaupa canacujitsia, pamuxunenetsicabianame ovejajanata. Nexata ajena, pameravi, ángelnē najetaruae ata tsane peverebiabinexa pebinacuetoxi, matapijinacuetoxi, itsiata apo pacoxitēpaemē tsane,” jai Moiséspijinē pijamonaejavabelia. Nexata Moiséspijinē pijamonae pijabobau-panē, caebaupa canacujitsia, tsicaba ovejajanata. Nexata ángelnē najetaruae ata peverebiabinexa pebinacuetoxi, matapijinacuetoxi, itsiata Moiséspijinē pijamonae apo coxitēpae. ²⁹ Bajayata pamatacabi Moiséspijinē pijamonae barēpitsapa Egipto nacuaverena, Egipto nacuapijivi picani barajinatsi pebeyejebinexatsi. Nexata bajarapamatacabi Moiséspijinē pijamonae barēnajamatabēcuenecopata Diosojavabelia peyavenonaenexatsi. Nexata ayaicuenia Dioso yavenonatsi. Bajarapamonae Dioso pejamatabēcueneta nicaba

Rojovënë manuamenemaxërana tuatujëalia. Dioso pejamatabëcueneta benamutocuenia totseviaexanaxualiat. Nexata jane baja Egipto nacuapijivi, pamonae jane baja picani barajinatsi pebeyejebinexatsi, nanicabarubenapona. Ajena baja epatota najetarubena, mera baja icatsia avajubua tsaxuabi. Bubuna baja nexata Egipto nacuapijivi.

³⁰ Bajayata Jericó tomarapijivi piatayaëibopanaxaneto exana pijatomara matatoyorotsia penayajivicanatsinexa pijavajabitsaëvecua. Bajara payacaranatsijavaxaneto mataropotsia catsanaruba ibopananë. Bajaraxua athëbëabetsia apia pacuenia pinijinaejavaxaneto apia. Nexata Israelpijnë pemomoxi vajabitsaë pexanaevajënaeya Jericó tomarapijivijavabelia, tajëvelia najamatabëcuenecopaba Diosojavabelia peyavenonaenexatsi. Israelpijnë pemomoxi itsa pata Jericó tomarata, jinavanapa bajara payacaranatsijavaxaneto jumavelia. Nexata jane baja vajabitsaë exana Jericó tomarapijivijavabelia. Israelpijnë pemomoxi Dioso pitorobicueniat. Jericótomara matatoyorotsia najetarubena seis xuabeje. Seis baitsi baja pijinia pamatacabibeje. Nexata jane baja siete matabita, caematabita, matatoyorotsia najetarubena siete xuabeje. Nexata jane baja siete matabita bajarapayacaranatsijavaxanetomi jopaica. ³¹ Bajayata Rahabpijiva, Jericó tomarata peponaponaeva, pibisiacuenepovitota pexanabiabiva ata, marapijivimi Dioso verebiabatsi. Itsiata baitsi jane Rahabpijiva bajarapamonae apo yajavatëpae. Tsipaji pexaniacuenepexana. Dioso pejamatabëcueneta Jericó tomarapijivimi peverebiabivajënaetsi, Israelpijnë pemomobeje yaenebabeje Jericó tomarapijivi. Bajarapacuenia yaenebabeje vajabitsaë jane baja pexanaenexa Jericó tomarapijivijavabelia. Bajarapamatabi Rahabpijiva xaniavaetsia copiapita Israelpijnë pemomobeje. Bajaraxuata Jericó tomarapijivimi Dioso verebiabi atatsi, Rahabpijiva apo yajavabeyaxuabitsi.

³² Apo necuenecaëjëpae baja pematatsënëa itsamonae pelivaisi patacatoyaquinaenexa patacamuxujobinexa, panenajamatabëcuenecopatsinexa Diosojavabelia papeyavenonaenexa. Apo necuenecaëjëpae patacatoyaquinaenexa Gedeónpijinë pelivaisi, Baracpijinë ata pelivaisi, Sansónpijinë ata pelivaisi, Jeftépijinë ata pelivaisi, Davidpijinë ata pelivaisi, Samuelpijinë ata pelivaisi. Apo necuenecaëjëpaenua patacatoyaquinaenexa itsamonae, Diosojumepabivimi profetavi, pelivaisi. ³³ Daxita bajarapamonaemi ata najamatabëcuenecopaba Diosojavabelia peyavenonaenexatsi. Bajaraxuata bajarapamonaemi Dioso yavenonaponatsi. Bajarapamonaemi itsa navajabitsaëtabuatapona itsanacuanëpijivijavabelia, bajarapanacuanëpijivimi verebabia Dioso peyavenonaexaetsi. Bajarapamonaepijanacuanëjava pijajivi itsa eveta, xaniavaetsia evetabiaba. Tsipaji Dioso yavenonaponatsi. Bajaraxuata xaniavaetsia pijajivi evetabiaba. Paepatota ata toayapëbejetsi itsacuenepavayo yabara, Dioso yavenonabiabatsi. Yavenonabiabatsi pacuenia Dioso tajëvelia najumecapanepaeya jumaitsi peyavenonaenexatsi. Bajaraxuata bajarapamonaeyajuvënëvi xuabi atatsi nevëthëbitsaëto penubenaebayabelia, bajarapacuenia picani pebeyaxuabinexatsi, itsiata Dioso yavenonatsi. Nexata Dioso peyavenonaexaetsi Dioso pejamatabëcueneta nevëthëvecua cuibocataitatsi. Nexata baja nevëthë apo itsacueniabitsi.

³⁴ Itsamonae pijinia bajarapamonaeyajuvënëvi xuabi atatsi pinijiisotualia, Dioso peyavenonaexaetsi, itsiata apo tajueti. Itsamonae pijinia jamatabëbeyaxuabi atatsi espadata, vecuapanepa Dioso peyavenonaexaetsi. Pamonaepijinia apo aitatsaca picani penavajabitsaësinexa, bajarapamonaepena bitso baja piatatsacavi naexanapona vajabitsaë penaexanabuataponaevavata Dioso peyavenonaexaetsi. Nexata bajarapamonaepijavajabitsaë cueneamoneyaba. Vecuarëcëpecatsi. ³⁵ Bajayata pijinia petiriavi penajamatabëcuenecopatsixae Diosojavabelia peyavenonaenexatsi, itsa coxitëpa, Dioso icatsia toasaëyaexanabiabatsi.

Bajayata pijinia itsamonae Dioso pejumecovënëtsiviyajuvënëvi bejiobiaexanatsi Dioso pejumecovënëtsixae. Bajarapacuenia pebejiobiaexanaevavatatsi, itsamonae tëpabiaba.

Bajrapacuenia yajuvënëexanatsi pecopabinexa picani Dioso pejumecovënëtsijava. Itsiata baitsi jane apo copabi Dioso pejumecovënëtavanapaejava. Bajrapacuenia apo copabi Dioso pejumecovënëtsijava. Tsipaji bajarapamonae jamatabëjumaiti tsavanapae: “Mapanacuataje taponaponaejava matatoxenetsia bitso jitsipajë matababi apo peverevere-caejava Dioso tanerajutsinexa,” jamatabëjai tsavanapae bajarapamonae. ³⁶ Itsamonae pijinia Diosojavabelia penajamatabëcuenecopatsixae, itsamonae capocaponabiabatsi. Jumatitibabeyabiabatsinua penaneconitsivi pejumaconitabiabimacata. Itsamonae pijinia cadenamaëtota cëbejebabiabatsi. Penaneconitsivi pejebabiabibota jebabiabatsi. ³⁷ Itsamonae pijinia ibotonëta saya tseconabiabatsi pebeyaxuabinexatsi. Itsamonae pijinia petëpaenexa, epacaucubatsi sierrata. Itsamonae pijinia jamatabëcuenejëtatsi pecopabinexa Dioso pejumecovënëtsijava. Bajaraxuacujinae espadata beyaxuababiabatsi. Itsamonae pijinia pijabovecua capitsapatsi. Apo pexainaexae penaxatabi- java, bajarapamonae naxataba ovejaboco, chivoboco ata. Pexainaexa ata apo xainae. Nexata bitso bejiobi bajarapamonae. Barajinabiabatsi. Bejiobiaexanatsinua. ³⁸ Bajrapamonaemi petusato nacuanëjava jinaruta. Petsutonë nacuanëjava ata, jinaruta. Pitajanitonëjava perubenaevajuanë jaita meravi pemajitabiabinexa. Bajrapamonae yabara itsamonae najumaiti: “Mapamonaeje vajatomarata pejinavana-paenexa, apo betocopatsitsi,” najai. Itsiata bajarapamonaemi Dioso asivatsi. ³⁹ Daxita bajarapamonaemi najamatabëcuenecopaba Diosojavabelia peyavenonaenexatsi. Bajaraxuata bajarapamonaemi Dioso aneconijibia tanetsi. Itsiata baitsi jane abaxë bajrapamonaemi itsa asaë tsavanapae, mapanacuataje Dioso abaxë apo rajutsitsi xua yabara Dioso najumecapanepaeya jumaiti perajutsinexatsi. Matapania baja bajarapamonae itsa tēpa, Dioso jane baja rajutatsi matababi apo peverevere-caejava. ⁴⁰ Dioso abaxë evetavanapaeyaexanatsi xua rajutsijitsiatsi bajarapamonae. Tsipaji Dioso apo najamatabëxainae ëbajrapamonaejavabelia perajutsinexa bajaraxua. Vaxaitsi ata mapamat-acabita vajajinavanapaevi, bajarapamonae yajava, Dioso jamatabënacarajuta bajarapapexaniacuene, matababi apo peverevere-caejava.

12

*Pacuenia vajavajënaeyabelia becaasaë tsavanapaetsi Dioso vajajumecovënëtsijava Jesu-
cristo cruzata vajanacasivatëpaexae yabara pelivaisi*

¹ Pamonaemi yabara pacatoyaquinatsi, bajayata najamatabëcuenecopaba Diosojavabelia peyavenonaenexatsi. Nexata bajarapamonaemi vajavënëlivaisitaexae, bemux-unanajamatabëcuenesaëtatsi vaxaitsi ata Dioso vajanacayavenonaenexa. Itsa nay-acobijitsiatsi vajacujinaejinaejava, nexata najonotatsi piarevejava bitsojinaeya vajacujinaejinaenexa, vajapatsinexa itsabelia nacatocaëjëta vajanacaitorobinë. Bajara pijinia pacuenia Dioso pitabarata xaniavaetsia bejinavanapatsi asaëyata vajatonacuenebinexa pacuenia Dioso nacaitoroba. Nexata copiaya benavecuacopatatsi papibisiajamatabëcuene xainatsi. Tsipaji bajarapapibisiajamatabëcuene nacaitorobabiaba pibisiacuene vajaexanaenexa. Bajrapapibisiajamatabëcuene baja becopabatsi vajaexanavanapaenexa xua Dioso nacaitoroba. ² Itsa najamatabëcuenecopatatsi Diosojavabelia vajanacayavenonaponaejava, nexata benajamatabënapitabiabatsi Jesús. Tsipaji Jesús vajanacasivatëpaexae, Dioso aneconijibia nacatane. Jesús pejamatabëcueneta Dioso nacayavenonana vajaajamatabëcuenesaë tsavanapaenexa Dioso vajajumecovënëtsijava matapania vajanacapanepaejavabelianexa. Pajivi naneconita, cruzata rutatsi pebeyaxuabinexatsi pijaneconi yabara. Bajrapacuenia itsa naneconitsiaexanatsi, bitso piauracuene. Itsiata baitsi jane Jesús nacopata bajarapacuenia pebeyaxuabinexatsi. Bajrapacuenia Jesús nacopata pebeyaxuabinexatsi tsipaji nat-sivajënaeyapëtane pejamatabëcuenebarëyajanexa icatsia itsa asaë petëpaecujinae, dax-itajivi pijaneconi pematamotsixae. Aeconoxae baja nexata Jesús tronovënëjavata

athëbëtatsia eca, Dioso pemuxuneneta, pecujanenia, penajuaevetsinexabeje daxitacuene.

³ Pacanaëjère Jesús piamatabëcuenesaë tsaponaponaejava, pibisiacuene pexanaevi pinijicuenia bejiobiaexanae atatsi. Bajarapacuene pacanaëjëtsianame itsamonae itsa pacabejiobiaexana Jesús panejumecovënëtsijava yabara. Nexata apo pacueranaemë tsane Dioso panetonacuenebijava. Apo pajamatabëcuenefaefaenaemënuua tsane.

⁴ Paxamë panajamatabëcuenesaëtavanapame pibisiacuene paneexanaeyaniva. Bajarapacuenia panajamatabëcuenesaëtavanapae atamë pibisiacuene paneexanaeyaniva, itsiata abaxë pibisiacuene pexanaevi apo pacayajuvënëbeyaxuabi. Bajaraxuata panevajënaeyabelia bepanajamatabëcuenesaëtavanapame pibisiacuene paneexanaeyaniva.

⁵ Pëtsa panacofënëtame Dioso papecamuxujiobiava papecajamatabëcueneasaëya exanaenexa itsa pacamuxujioba bepapeximëcuenia. Tsipaji Dioso pejumelivaisibaxutota paxamë yabara jumaitsi mapacueniaje:

Taxi, xanëjavaberena paneneconitsixae, itsa pacananeconitsiaexanaenatsi, pëtsa payaanaepaname. Pëtsa pasivajamatabëcuenefaefaenamenuua itsa pacabijatanetsi xua yabara pananeconitame. ⁶ Pacananeconitsiaexanaenatsi. Tsipaji xanë muxujiobiaya bananeconitsiaexanajë pajivi asivanë, baitsi daxita pamona taxi-cuenia tataevi,

jai Dioso pejumelivaisibaxutota paxamë yabara.

⁷ Nexata patonacaevere Dioso muxujiobiaya papecananeconitsiaexanaenexa. Tsipaji Dioso papeximëcuenia pacatane. Jivi ata baja cajena pexi muxujiobiaya banacoxivitsata. ⁸ Nexata Dioso muxujiobiaya itsa apo pacaevetsi tsipae, Diosojavabelia pananeconitsi atamë, nexata Dioso papeximëcuenia apo pacatae tsipae. Tsipaji jivi ata, pexi pexinaevi, muxujiobiaya banacoxiconita. ⁹ Vaxaitsi abaxë pamatacabi pejevaxitsi mapanacuata, vaxajivi nacamuxujiobiaya banacaconita. Nexata vaxajivi yaiyatanetsi. Nexata biji vaxaitsi bitsoyo bejumecovënëtatsi vaxa Dioso, ponë eca athëbëtatsia, vajanacarajutsinexa matacabi apo peverevereaejava. ¹⁰ Itsa abaxë vaxajivi mapanacuata nacavitsata, muxujiobiaya banacaconita. Tsipaji vaxajivi nacatojitsipa xaniavaetsia vajatojinavanapaenexa. Bajaraxuata nacamuxujiobiaya banacaconita pacuenia vaxajivi nacatojitsipa vajatojinavanapaenexa. Itsiata baitsi jane vaxa Dioso muxujiobiaya nacananeconitsiaexana pepacuene vajacopatsinexa pibisiacuene vajaexanaejava. Nexata bajarapacuenia Dioso nacajamatabëcueneyavenona vajaperujamatabëcuenemivecua vajanajamatabëcuene pënëyorotsinexa Diosojavabelia. Nexata pacuenia Dioso jamatabëcueneitsi, bajara vaxaitsi ata vajajamatabëcueneitsinexa. ¹¹ Paepatotata vaxa Dioso nacamuxujiobiaya nacananeconitsiaexana, bajarapaepatotata abaxë apo sivajamatabëcuenebarëyatsi xua nacatocopiapata. Itsiata baitsi jane pajivi Dioso muxujiobiaya naneconitsiaexanatsi, yapëtane baja xua yabara naneconitsiaexanatsi. Nexata baja copata bajaraxua. Nexata baja jamatabëcuenebarëyaya xaniavaetsia ponapona.

Pacuenia tsiayaitsi tsane pajivi namuxujemata Dioso pejumelivaisi yabara pelivaisi

¹² Pacopabare baja panejamatabëcuenecueranaejavami. Panevajënaeyabelia panajamatabëcuenesaëtaponare. Tsipaji baja panajamatabëcuenecopatame Diosojavabelia papecajavenonaenexa. ¹³ Pëtsa pajumecovënëtame itsalivaisi Dioso pejumelivaisivecua. Èpexaniajailivaisi, Dioso pejumelivaisi, panevajënaeyabelia pajumecovënëtavanapare. Nexata itsamonae Dioso pejumecovënëtsivi, pamona abaxë apo ajamatabëcuenesaë Dioso pejumecovënëtsijava, pacaitaxutua ajamatabëcuenesaë tsaponae tsane.

¹⁴ Daxitajivijavabelia pexaniajamatabëcuene patoxainare. Nexata aneconijibia pajinavanapaename Dioso pitabarata. Pajivi aneconijibia apo ponapona tsane Dioso pitabarata, bajarapajivi Dioso apo yajavaponapona tsane. ¹⁵ Xania baja

panayajivitaema. Pëtsa pacopabame Dioso panejumecovënëtsijava, Dioso papecacopat-siyaniva papecaitaxutotsoniataejava panepuajumecovënëtsivi Dioso. Pacuenia piat-saxaënëboto daxitamera bijianaejitsipa, bajara pajamatabëcueneitsimë tsipae caenë ata, paxamëyajuvënënë, pibisiacuene ita exanaejitsipa. Pacajamatabëcuene bijianaejitsipa padaxitamë. ¹⁶ Panayajivitaemanua itsanë ata, paxamëyajuvënënë, pejaitsiyaniva it-sava pepo pijavavecua. Petiriva ata pejaitsiyaniva itsanë pepo pamonavecua. Panaya-jivitaemanua panejumeaebiyani Dioso najumecapanepaeya papecajumaitsijava. Pëtsa Dioso pajumeaebame pacuenia bajayata Esaúpijinë jumeaeba Dioso najumeca-panepaeya pejumaitsijavatsi. Esaú picani matapijinëxae, Dioso yavenonabiabijitsi-atsi. Nexata itsajota Esaú bitso piajani, pejuyapijinëjavabelia pexaejava caenabani namitsavajëta. Nexata pejuyapijinë jumaitsitsi: “Pacuenia nexaejava nevajëtame, carajutsianatsi. Nexata xua Dioso cayavenonabiabiapaeba, bajaraxua juya xanë ne-tocopatsianame,” jaitsi. Nexata Esaú jejai. Pejuyapijinëjavabelia baja tocopata xua picani Dioso yavenonabiabijitsiatsi. ¹⁷ Payapëtaneme rabaja pacuenia Esaúpijinë exana pejuyapijinë petocopatsicujinae xua picani Dioso yavenonabiabiapaebatsi. Esaúpijinë picani paxa itoroba Diosojavabelia petovajëtsinexatsi Dioso peyavenonabiabinexatsi paxa pevënamuto. Itsiata baitsi jane paxa apo jumejejaitsi. Nexata Esaúpijinë bitso nua pejuyapijinë petocopatsixae xua picani Dioso yavenonabiabijitsiatsi. Itsiata baja acuenebi pexanaejava. Bajaraxuata paxamë ata pëtsa pacopabame Dioso panejumecovënëtsijava Dioso najumecapanepaeya papecajumaitsijava.

¹⁸ Paxamë panejumecovënëtsixae Dioso, pacatocopata roviaia panevajëtsinexa Dioso-javabelia. Nexata apo panamatavenonaemë paneponaenexa itsanacuajavabelia panevajëtsinexa Diosojavabelia. Bajayata Israelpijinë pemomoxi pata ibotsutoxane-totabuyaberena. Nexata bajarapatsutotabuta navajëca Diosojavabelia. Nexata ba-jarapatsutojumatsia Israelpijinë pemomoxi tane beisotocotia itsajota aitaquiri. Ba-jarapaepatota bitso emaxaneto, ayaijovibo yajava. ¹⁹ Bajarapaepatota Israelpijinë pemomoxi jumetane penajumetsijava trompeta. Jumetanenua Dioso pecuaicuaijajiva-vatsica athëbëvetsica bajarapamonaejavabelia. Nexata judíovi pecajunavi bitso, vajëta Diosojavabelia Dioso pecuaicuaijaiyaniva pematatsënëa. ²⁰ Bajarapacuenia Israelpijinë pemomoxi vajëta Diosojavabelia tsipaji bitso jumecujunava Dioso pejumaitsijavat-sicatsi mapacueniaje: “Pajivi ponaena mapatsutoyenepanajavaje, bajarapajivi tsec-onaenatsi ibotonëta. Itsa jume, becuererebonëta cacuatsianatsi pebeyaxuabinexatsi bajarapacuenia. Dajubinë ata itsa ponaena mapatsutoyenepanajavaje, bajarapacuenia exanaenatsi,” pejaijavatsica Dioso athëbëvetsica, Israelpijinë pemomoxi bitso jumecuju- nava. ²¹ Nexata Israelpijinë pemomoxi bajarapajume ita jumetane, pecajunavi, bitso neconecojai. Moiséspijinë ata jumaitsi: “Xanë ata rabaja tacajunavi, bitso neconeco-janë,” jai.

²² Itsiata baitsi jane paxamë baja aeconoxae Dioso panejumecovënëtsixae, Dioso baja pacatocopata panepatsinexa Dioso pijatomarabetsia roviaia panevajëtsinexa Diosojav-abelia. Bajarapatomaratsia eca Dioso, piasaëtsaponaponaenë. Bajarapatomara pevënë Jerusalén. Eca Sióvnënë tsutojumata. Bajarapatomaratsia Dioso pijajivi ángelevi, miles paángelevibeje, yajavaponapona. ²³ Bajarapatomaratsia payajavanacaetuat-sianame itsamonae, pamona panevajënaeya jumecovënëta Dioso. Bajarapamonae vënëyaquinarubatsi bajarapatomaratsia. Panacaetuatsianame Dioso pitabarata, ponë naneconitsiaexanaena daxita pamona naneconita bajaraponëjavabelia. Payaja-vanacaetuatsianamenua daxita pamonaemi tëpa Dioso pepua pejumecovënëtsivi. ²⁴ Panajamatabëcueneocopatame baja Jesucristojavabelia, ponë pejamatabëcueneta Dioso nacavecuaajibiaexana vajaneconimi. Nexata Dioso aneconijibia nacatane. Bajayata Abelpijinë ita beyaxuabatsi, ponë beyaxuabatsi, juya picani xanepana peyamata-mobeyaxuabinexatsi. Itsiata baitsi jane pamatacabi Jesús beyaxuabatsi cruzata, it-

sajivi ata apo najamatabëxainae Jesús peyamatamobeyaxuabinexatsi. Tsipaji Jesús petëpaejava pejamatabëcueneta, Dioso aneconijibia taejitsia daxita pamonaе jume-covënëta Dioso.

²⁵ Bajaraxuata Dioso pejumelivaisi vajanacatsipaebijava, bejumecovënëtatsi. Bajay-ata pamonaе apo jumecovënëtsi Dioso Moiséspijinëta penajumecopatsilivaisi, naxuaba Diosovecua. Dioso apo capanepaetsi bajarapamonaе. Vaxaitsi ata bitsoyo Dioso nacananeconitsiaexanaejitsipa itsa apo jumecovënëtsitsi ponë nacajunata athëbëvetsica. ²⁶ Paepatota pina Dioso athëbëvetsica Sinaivënë tsutojumavetsica cuaicuaijai, baja pina paepatota ira najëaba. Nexata icatsia xuacujinae bexëa Dioso tajëvelia najumeca-panepaeya jumaitsi mapacueniaje: “Itsamatacabi icatsia ira najëabiaexanaenajë. Nexata jane baja caecuenia ira, itaboxo yajava, najëabiana,” jai Dioso tajëvelia najumeca-panepaeya. ²⁷ Xua yabara tajëvelia Dioso najumecapanepaeya jumaitsi, maitisi tsaneje. Mapairaje, itaboxo yajava, itsa najëabiana, daxitacuene xua Dioso exana mapanacu-ataje, vereverecaena. Itsiata Dioso pejumelivaisi, pijatomara ata, apo vereverecae tsane. ²⁸ Xua itsamatacabi Dioso naticopatsiana athëbëtatsia vajatoevetsinexa, ba-jaraxua apo vereverecae tsane. Bajaraxuata vaxaitsi pexaniajamatabëcuene rajutatsi Diosojavabelia. Yaiyataeya vajajamatabëëthëtovetsina Diosojavabelia jumai tsabiabi tsanetsi: “Diosomë, bitso ayaijamatabëcuenenëmë,” jai tsabiabi tsanetsi Dioso vajanaca-sivajamatabëcuene barëyanexa. ²⁹ VajaDioso jivi penaneconitsiaexanaenë. Pacuenia isoto vayafö itsa tajuenajetaruca, verebiaba daxita piabejejava petajuejavata, bajara pijinia pacuenia Dioso verebiabiana pamonaе pibisiacuene pexanaevi.

13

Pacuenia bexanavanapatsi Dioso vajanacasivajamatabëcuene barëyanexa yabara peliv-aisi

¹ Pëtsa pacopabame namataenetsia panenasivajava Dioso panejume-covënëtavanapaevi. Panevajënaeyabelia namataenetsia panaasivamëre. ² Pëtsa panacofënëtame xaniavaetsia panecopiapitabiabinexa apo paneyapëtaevi ata itsa pata panijaboyaberena. Bajayata pina bajarapacuenia xaniavaetsia jivi pecopiapitabiabivi, xaniavaetsia copiapita ángelevi, apo yapëtae ata ángelevicuene.

³ Panajamatabënapitabiabare pamonaе jebatsi penaneconitsivi pejebabiabibota Dioso pejumecovënëtsixae. Paxamë ata, bajarapamonaе yajava, bepanenajuananeconitsivi panataema. Pamonaе ata bejiobiaexanatsi Dioso pejumelivaisi yabara, bajarapa-monaе ata pajamatabëcueneyavenonare. Paxamë ata, bajarapamonaе yajava, bepa-pecabejiobiaexanaevi panataema.

⁴ Daxitajivi beyaiyatane penacojiobijivi. Pajivibeje baja napitabeje, apo benavecua-namatayajitsibeje. Pebi apo bejaitisi itsava pijavavecua. Petiriva pijinia apo bejaitisi itsanë pamonavecua. Tsipaji Dioso naneconitsiaexanaena bajarapitsipibisiacuene pexanaevi.

⁵ Pëtsa bitso pajitsipame palata. Pasivajamatabëcuenebarëyamëre saya xuayovajëto paxainame. Tsipaji Dioso jumaitsi mapacueniaje: “Apo copatsinë tsane patacaya-javaponaponaеjava,” jai Dioso. ⁶ Bajaraxuata ajumejunavijibia namataenetsia naju-maitsitsi mapacueniaje:

Dioso cajena vajanacayavenonaenë. Nexata apo junavitsi tsane, itsajivi nacaitsacueni-abijitsia ata, najaitisi vaxaitsi namataenetsia.

⁷ Panajamatabënapitabiabare pamonaemi bajayata pacatsipaeba Dioso pejumeliv-aisi. Pacanaëjëre pacuenia bajarapamonaemi Dioso pejumecovënëtsijavaveliacujinae,

xaniavaetsia jinavanapa Dioso pitabarata matapania petëpaejavabelianexa. Bajara-pacuenia paxamë ata Dioso pitabarata xaniavaetsia pajinavanapare matapania panetëpaejavabelianexa.

⁸ Jesucristo epatua itsajamatabëcuene apo xinae tsane. Pamatacabibeje pon- apona, caejamatabëcuene xainaponaponaena. Pevajënaeyabelia ata daxitamatacabi- javabelianexa, caejamatabëcuene xainaponaponaena. ⁹ Pëtsa pacopabame pane- jumecovënëtsijava palivaisi baja pajumecovënëtame. Pëtsa pajumecovënëtame it- salivaisi bajarapalivaisivecua. Paxamë baja Dioso panejumecovënëtsijava, paja- matabëcuenesaëmë tsavanapae Dioso asivaya papecayavenonaexae. Diosojavabelia apo pajamatabëcuenesaëmë tsavanapae tsipae, panexaejava paatsobi atamë. Itsa- monae jumecovënëta pexaejava piatsobinexa pitavetsilivaisi. Nexata pexaejava at- sobabiaba. Itsiata baitsi jane pexaejava piatsobijava pejamatabëcueneta apo ja- matabëcueneasaëyaexanaetsi Dioso pejumecovënëtsijava.

¹⁰ Jesús itsa cobematabiabarutatsi cruzajavabelia, vaxaitsi nacasivatëpa. Nexata pamona tsiteca ëperujulivaisimi sivajamatabëjumaitsi: “Itsa jumecovënëtaponaponaenajë Dioso Moiséspijinëta penajumecopatsilivaisi, nexata xanë ata Dioso neca- panepaena,” sivajamatabëjai, bajarapamona saya jamatabëcuenenavëxaniaba. Bajarapitsijamatabëcuene penajamatabëxainaevi, apo capanepaetsi tsane Diosojavabetsia. Tsipaji Jesús pesivatëpaejavatsi, apo jumecovënëtsi. ¹¹ Sacerdotevi pepo penamatacaitorobinë dajubinë beyaxuababiaba. Nexata bajarapajana cajoneyabiaba Lugar Santísimojavabelia, itsajota baitsi Dioso peponaponaenexa yatuucuta. Bajarapayatuucutsijavaënëta sacerdotenë dajubinë pijana rajutabiaba ofrendacuenia Diosojavabelia, Dioso pevecuaajibiaexanaenexatsi pibisiacuene pexanabiabineconi. Nexata bajarapadajubinë pevi sacerdotenë itsa tajuita, tomarapënëyabelia tajuitabiaba. ¹² Bajaraxuata Jesús ata Jerusalén tomarapënëyabelia bejiobiaexanatsi. Bajaraxuacujinae beyaxuabatsi. Nexata daxita pamona jumecovënëta Jesús pesivatëpaejavatsi, bajarapamona Jesús pijana pejamatabëcueneta Dioso vecuaajibiaexanatsi pibisiacuene pexanaeconimi. ¹³ Nexata vaxaitsi ata becopatatsi baja perujulivaisi vajajumecovënëtsijavami. Nexata bejumecovënëtatsi Jesús pelivaisi. Nexata pacuenia Jesús nacopata itsamonae pebejiobiaexanaenexatsi vajanacasivatëpaenexa vaneconi yabara, bajara pijinia pacuenia vaxaitsi ata benacopatatsi itsamonae vajanacabejiobiaexanaenexa Jesús pelivaisi yabara. ¹⁴ Mapanacuataje apo xainaetsi patomarata daxitamatacabijavabelianexa jinavanapaejitsiatsi. Biji rajane abaxë vajënaeevetavanapatsi athëbëpijtomara, patomarata patsijitsiatsi athëbëtatsia. ¹⁵ Jesucristo vajanacasivatëpaexae, Dioso nacatocopata vajavajëtabiabinexa Diosojavabelia. Nexata itsa vajëtabiabinatsi Diosojavabelia, jumaitsitsi tsabiabi tsane: “Diosomë, bitso ayaijamatabëcuenenëmë,” jaitsi tsabiabi tsane Diosojavabelia. Bajarapacuenia vajajumaitsabiabijava Diosojavabelia, Dioso taena ofrendacuenia bevajarajutaponaejava Diosojavabelia. Bajaraxuata itsa vajëtabiabinatsi Diosojavabelia, bajarapacuenia jumai tsabiabi tsane. ¹⁶ Pëtsa panacofënëtame pexaniacuene panetoexanavanapaejava itsamonaejavabelia. Itsajivi penamatavenonaejava, parajutsianame paneyavenonaenexa bajarapacuenia. Bajarapacuenia itsa parajutsianame itsajivi penamatavenonaejava, Dioso pacasivajamatabëcuenebarëya tsane.

¹⁷ Pamona ancianovi, xua pacaitoroba, pajumecovënëtabiabile. Itsamonae ata, pa- monae pijinia Dioso tocopatatsi papecaevetsinexa Dioso panejumecovënëtsivixae, xua pacaitoroba, pajumecovënëtabiabile. Bajarapamona yapëtanenua pacuenia Diosojav- abelia naneconitsipa, xaniavaetsia itsa apo pacaevetsi. Itsa pajumecovënëtabiabile name papecaevetsivi papecaitorobicuenia, nexata papecaevetsivi jamatabëcueneyavenonaeya pajinavanapaname. Nexata pacasivajamatabëcuenebarëya tsane papecaevetavana-

paejava yabara. Paxamë itsa apo pajumecovënëtsimë tsipae, nexata papecaevetsivi pacasivajamatabëcuenebëjai tsipae. Nexata papecaevetsivi toacuenebi tsipaetsi papecajamatabëcuene yavenonaenexa Dioso panejumecovënëtsijava yabara.

¹⁸ Panetovajëtaponaename Diosojavabelia. Paxanë pajamatabëjumaitsinë: “Vaxaitsi baja apo naneconitsitsi Diosojavabelia, jivijavabelia ata,” pajamatabëjanë. Bajarapacuenia patavajënaeyabelia Dioso pitabarata aneconijibia patajinavanapaenexa, panetovajëtsianame Diosojavabelia. ¹⁹ Panetovajëtaponaenamenua Diosojavabelia Dioso patanetocopatsinexa pataponaenexa paxamëjavabelia. Tsipaji icatsia pajitsipajë bepijia patapatsinexa paxamëjavabelia.

Pacuenia Pablo Dioso pejumecovënëtsivi tovajëta Diosojavabelia, pacuenia ata jamatabënajina itsamonae Dioso pejumecovënëtsivi, yabara pelivaisi

²⁰⁻²¹ Jesucristo vajanacasivatëpaecujinae, vaxa Dioso icatsia asaëyaexanatsi. Bajaraxuata yapëtanetsi pexaniajaicuene Dioso athëbëabetsia vajanacacapanepaejavanexa daxitamatabijavabelianexa. Dioso yavenona daxitajivi jamatabëcuenexanepanaeya pejinavanapaenexa. Nexata pacatovajëtatsi Diosojavabelia papecarajutsinexa xua panamatavenoname, panetoexanavanapaenexa pacuenia Dioso pacatojitsipa. Vajëtajënu Diosojavabelia Jesucristo pejamatabëcueneta vajanacajamatabëcuenexanebinexa pacuenia jitsipa. Pacuenia oveja pexainaenë xaniavaetsia evetaponapona pijaoveja, bajara pijinia pacuenia vajatuxanenë Jesucristo xaniavaetsia nacaevetaponapona. ¡Jesucristo bitso ayaijamatabëcuenenë tsaponapona daxitamatabijavabelianexa! Bajara itsi tsane.

²² Tajamonae, pacaitorobatsi xaniavaetsia panenamuxunaevetsinexa palivaisi pacatoyaquinatsi mapabaxutotaje. Tsiquirilivaisiyo saya pacatoyaquinatsi patacamuxujiobinexa panevajënaeyabelia panejamatabëcuenesaënexa Dioso panejumecovënëtsijava. ²³ Pexanialivaisiyo pacatoyaquinatsi patacatsipaebinexa mapacuenije. Vajabanenë Timoteo rabaja pitsapa penaneconitsivi pejebabiabibovecua. Itsa patsiarena bepijiayo xanëjavaberena, nexata barëponaenajë paxamëjavabelia.

²⁴ Nebajacobiana daxita Dioso pejumelivaisita papecaevetsivi, daxita vajamonae Dioso pejumecovënëtsivi yajava. Vajamonae ata, Italia nacuapijivi, pacajamatabënajinalia.

²⁵ Daxita paxamë pacatovajëtatsi Diosojavabelia papecayavenonaenexa Dioso. Bajara itsi tsane.

Mapabaxutoje Santiago toyaquina Dioso pejumecovënëtsivijavabelia

Pacuenia Santiago toyaquina mapabaxutoje Dioso pejumecovënëtsivi nacayajatsia pejinavanapaevi yabara pelivaisi

¹ Xanë Santiagonë, Dioso pijajivitonënë, vajatuxanenë Jesucristo ata pijajivitonënë. Pacatoyaquinatsi pajudíovimë patacabajacobinexa. Israelpijinëmi pexi doce ponëmibeje papemomoxiyajuvënëvimë. Pepo panijanacuata picani panejinavanapaevimi. Aeconoxae baja pepo panijanacuamivecua, nacayajatsia pajinavanapame daxita nacuanëjava.

Pacuenia Dioso pejumecovënëtsivi itsa jamatabëyapëtanë pacuene xanepana pexanaenexa, bevajëta Diosojavabelia yabara pelivaisi

² Tajamonae, pasivajamatabëcuenebarëyamë tsane daxitacuene, apo panejitsipaecuene ata, itsa pacatocopiapatsiana. Tsipaji raja bajarapacuene pacatocopiapatsiana papecajamatabëcuenejëtsinexa Dioso panejumecovënëtsijava yabara. ³ Bajarapacuenia Dioso panejumecovënëtsivi pacajamatabëcuenejëtaponaena panejamatabëcuenesaë tsaponaenexa panevajënaeyabelia Dioso panejumecovënëtsijava. Payapëtaneme rabaja bajarapacuene yabara. ⁴ Apo panejitsipaecuene pacatocopiapatsi ata, pajamatabëcuenesaëmë tsavanapae tsane bajayajebi. Nexata pajamatabëcuenevitsabaponaename Diosojavabelia. Nexata apo pacatosaicae tsane itsalivaisi ata panejamatabëëthëtota.

⁵ Paxamë itsa pajamatabëyapëtaneme pacuene xanepana paneexanaenexa, nexata bepavajëtame Diosojavabelia papecaypëtaeyaexanaenexa Dioso. Nexata Dioso pacayapëtaeyaexanaena pacuene xanepana paneexanaenexa. Dioso cajena bayapëtaeyaexana daxita pamonaë vajëta bajaraponëjavabelia. Apo jumeitavetsi cajena itsa vajëtatsi. ⁶ Itsa pavajëtame Diosojavabelia, pajamatabëjumaitsimëre: “Dioso cajena nacayapëtaeyaexanaena xua vajëtatsi,” pajamatabëjamëre. Pëtsa pajamatabëjumaitsimë: “Dioso cajena itsiata apo nacayapëtaeyaexanae tsane xua vajëtatsi,” pajamatabëjamë pëtsa. Pajivi jumeaeba Dioso peyapëtaeyaexanaejavanexatsi, bajarapajivi xaniavaetsia apo najamatabëxainae. Bajarapajivi pejamatabëcuene bemalataca picani. Pacuenia malataca xaniavaetsia apo rucae jovibota, bajara saya jamatabëcueneitsi bajarapajivi. Apo najamatabëxainae caelivaisi, palivaisi Dioso yapëtaeyaexanaejitsiatsi. ⁷⁻⁸ Bajarapajivi anijamatabëcuenebeje xaina. Najamatabëcuene epatajërërëcabiaba itsa exana daxitacuene. Nexata pajivi jumeaeba Dioso peyapëtaeyaexanaejavanexatsi, pëtsa patocopatame pejamatabëjumaitsinexa: “Dioso cajena nerajutsiana tavajëtsijava,” pejamatabëjainexa. Dioso cajena apo rajutsitsi tsane xua vajëta bajarapajivi.

⁹ Dioso pejumecovënëtsinë apo xainae ata pecobecovëjavayo, jivi apo yaiyatae atatsinua, itsiata bejamatabëcuenebarëya Dioso pejumecovënëtsinëxae. Tsipaji Dioso pejunatsixaetsi Dioso pijajivitonënëxa, apo bejiobi tsane daxitamatacabijavabelianexa. ¹⁰ Dioso pejumecovënëtsinë itsa bitso pexainanë pexainaejava, itsamonae itsa yacajërëtatsi pexainaecuene, itsiata bejamatabëcuenebarëya Dioso pejumecovënëtsinëxae. Tsipaji pacuenia ponatoxi bepijia matonoverevereca, bajara pijinia itsi tsane bitso pexainaecuene ata. Bepijia vereverecaena. ¹¹ Itsa baja juameto tajë rucaina, icotia bitso ataju. Nexata ponatoxi tsaquena. Pematono ata othopa. Nexata pexaniamatonojavami ata verevereca bepijia. Bajara pijinia itsi tsane bitso pexainaejava pexainaevi ata. Yajavavereverecaena pexainaejava pecanajetanucaepatota ata.

Pacuenia Dioso jivi apo jamatabëcuenejÿtsi pibisiacuene pexanaeyaexanaenexa yabara pelivaisi

¹² Pamonaë jamatabëcuenejÿtsi atatsi, najamatabëcuenecataita pibisiacuene pexanaeyaniva, bajarapamonaë jamatabëcuenebarëya. Tsipaji itsa vecuapanepa pejamatabëcuenejÿtsijavatsi, pibisiacuene exanaenejeva, nexata bajarapamonaë Dioso rajutsianatsi pexaniacuenejava. Rajutsianatsi matababi apo peverevereceajava. Bajarapacuene yabara Dioso najumecapanepaeya jumaitsi perajutsinexatsi pamonaë jitsipa Dioso. ¹³ Itsa pacajamatabëcuenejÿta pibisiacuene paneexanaenexa, pÿtsa jamatabëcuenenavëxaniabiaya pajumaitsimë: “Dioso raja nejamatabëcuenejÿta pibisiacuene taexanaenexa,” pajamë pÿtsa. Dioso cajena apo jamatabëcuenejÿtsi itsajivi ata pibisiacuene pexanaeyaexanaenexa. Itsajivi ata pijinia apo caëjÿpaetsi pejamatabëcuenejÿtsinexa Diosojavabelia pibisiacuene pexanaenexa Dioso. ¹⁴ Pajivi jamatabëcuenejÿtatsi pibisiacuene pexanaenexa, bajarapajivi copiaya pejamatabëëthÿtota jamatabënaponapona papibisiacuene jamatabëexana. Nexata jane baja itsa jamatabëcuenejÿtatsi pibisiacuene pexanaenexa, bajarapapibisiacuene exana. ¹⁵ Pajivi pibisiacuene exana, bajarapajivi exana pacuenia copiaya pejamatabëëthÿtota najamatabëxaina. Nexata tsiteca pibisiacuene itsa exanapona, pepacuene Diosovecua naxuabiana bajarapapibisiacuene pexanaponaexae.

¹⁶ Tajamonaë bitso patacaasivavi, jamatabëcuenenavëxaniabiaya pÿtsa pajamatabëjumaitsimë: “Dioso nejamatabëcuenejÿta pibisiacuene taexanaenexa,” pajamatabëjamë pÿtsa. ¹⁷ Tsipaji daxita pacuene pepo pexaniacuene, Dioso baja cajena vajanacatoitorobicuenetsica. Bajaraponë pexanaenë daxita xua naitayotarubena itaboxotatsia. Dioso cajena daxitamatababijavabelianexa caejamatabëcuene penajamatabëxainaenë. Caejamatabëcuene Dioso nacasivanajamatabëxaina vaxaitsijavaberena. ¹⁸ Dioso baja cajena copiaya najamatabëxaina pexanaenexa pacuenia jitsipa. Nexata nacayapëtaeyaexana pejumelivaisi pexaniajailivaisi. Bajaraxuata nacarajuta pejanajamatabëcuene pitavajamatabëcuene. Vaxaitsi copiaya Dioso itsa jumecovënÿtatsi, Dioso pexitsi nacaexana. Pamonaë ata cotocaevi Dioso jumecovënÿta, bajarapamonaë ata Dioso pexi exanatsi. Nexata vaxaitsi, copiaya Dioso vajajumecovënÿtsivi, Dioso nacadane bematapijivitsi. Cotocaevi pijinia Dioso pejumecovënÿtsivi, Dioso tanetsi bejuyapijivi.

Pacuenia bexanavanapa pamonaë xaniavaetsia jumecovënÿta Dioso yabara pelivaisi

¹⁹ Tajamonaë bitso patacaasivavi, pacanaëjÿtsianame mapalivaisije, palivaisi pacatsipaebijÿtsiatsi. Daxita paxamë xaniavaetsia bepanamuxunaevetame Dioso pejumelivaisi. Apo bepacaicuaijamë abaxë copiaya xaniavaetsia panajamatabëxainaenejevamë. Apo bepaanaepanaemënuua bepijia. ²⁰ Tsipaji itsa anaepanatsi, Dioso apo toexanaetsi pexaniacuene, pacuene Dioso jitsipa. ²¹ Bajaraxuata pacopabare daxita pibisiacuene panenajamatabëxainaejava. Pacopabarenuua daxita pibisiacuene paneexanaejava itsa monaejavabelia. Dioso raja pejumelivaisi pacatsijamatabëuba. Bajaraxuata beveliamatabëcuenevi nataeya pajumecovënÿre Dioso pejumelivaisi. Bajarapalivaisi itsa pajumecovënÿtame, nexata pacacapanepaena Diosojavabelia.

²² Pacuenia Dioso pejumelivaisita jumaitsi, jumecovënÿtsiaya paexanaponare. Pÿtsa pajamatabëjumaitsimë: “Pacuenia Dioso pejumelivaisita jumaitsi, apo exanae atanë, apo itsacuene,” pajamatabëjamë pÿtsa. Tsipaji saya pajamatabëcuenenavëxaniabijÿtsipame. Nexata itsa apo paexanaemë tsipae pacuenia Dioso pejumelivaisita jumaitsi, pananeconitsipame Diosojavabelia. ²³ Pajivi jumetae ata Dioso pejumelivaisi, itsiata itsa apo exanae pitorobicueniatsi, bajarapajivi jamatabëcueneitsi pacuenia itsi ponë naitabaratanë tsaxuta. ²⁴ Ponë tsaxuta naitabaratanë, penaitabarataecujinae pona baja. Nexata bajaraponë bepijia nacofënÿta pacuenia itabarajumapeitsi. ²⁵ Dioso cajena pejumelivaisi bitso xanepana. Caëjÿpatsinua vajanacacapanepaenexa

bajaraponëjavabelia. Pajivi daxita bajarapalivaisi pitorobicueniatsi exanaponapona copatsinejeva, bajarapajivi bitso Dioso yavenonaenatsi daxitacuenejavabelia.

²⁶ Pajivi jumaitsi ata: “Xanë bitso toexanaponaponajë Dioso pejitsipaecuenia,” jai ata, itsiata itaxutojema itsa cuaicuaijai tsabiabi, bajarapajivi saya jamatabëcuenenavëxaniaba. Tsipaji Dioso apo pejitsipaecuenia cuaicuaijai. Nexata bajarapajivi xua Dioso toexanaponapona apo tonamatamotsi tsanetsi Diosojavabelia. ²⁷ Dioso pejumecovënëtsijivi, pajivi Dioso aneconijibiatanetsi, exanaponapona mapacueniaje. Yavenona tsonijivixi. Yavenonanua pamona pevecuatëpaevitsi bitso itsa namatavenona itsacuenejavaxi. Pajivi Dioso pejumecovënëtsijivi, nayajivitaeyaponapona pibisiacuene pexanaeyaniva, pacuene exanabiaba mapanacuapijivi, Dioso apo pejumecovënëtsivi.

2

Pacuenia Dioso pejumecovënëtsivi muxujiobatsi daxitajivi najëpaeya jamatabëcuenexanepanaeya petaenexa yabara pelivaisi

¹ Tajamonae, ayaijamatabëcuenenë vajatuxanenë Jesucristo panejumecovënëtsixae, daxitajivi najëpaeya pataema. Pëtsa itsamonae bijiaya pataneme. ² Nexata panenacaetuatsijavata, riconë, pexaniajava penaxatatsinë, napatsipa, oro anillo penacobexatatsinë. Bajarapaepatota pijinia bepejiobinë, perujuesetoyo penaxatatsinë, napatsipa. ¿Detsa pacuenia pacopiapitsipame bajarapitsinëbeje? ³ Caenë meta xaniavaetsia pacopiapitsipame, pexaniajava penaxatatsinë. Paecaeyaexanaejitsipame pexaniajavata. Ponë bepejiobinë, apo pacopiapitsimë tsipae xaniavaetsia. Saya panucaeyaexanaejitsipame. Itsa jume, paecaeyaexanaejitsipame irata. Nexata bajarapacuenia itsa paexanaejitsipame, pexaniacuene apo paexanaemë tsipae Dioso pitabarata. ⁴ Bajarapacuenia itsa paexanaejitsipame, najëpaeya bajaraponëbeje apo pataemë tsipae. Caenë payaiyataejitsipame. Itsanë saya bijiaya pataejitsipame. Nexata bajarapacuenia itsa paexanaejitsipame, pibisiacuena panajamatabëxainaejitsipame.

⁵ Tajamonae bitso patacaasivavi, panejumetaema. Dioso raja itapetatsi pamona apo pexainaevi mapanacuataje. Bajarapamonae Dioso itapetatsi pexi pexanaenexatsi. Nexata bajarapamonae itsa najamatabëcuenecopatsiana Cristojavabelia, bitso pexainaevi tsane athëbëtatsia, Dioso pijanacuatatsia, itsajotatsia Dioso eveta daxitacuene. Bajarapamonae ata tocopatsianatsi Cristo pebarëevetsinexatsi daxitacuene, pacuenia Dioso najumecapanepaeya jumaitsi Dioso pijajivi yabara. ⁶ Itsiata baitsi jane bajarapacuenia bepejiobivi yabara pejumaitsijava payapëtae atamë, paxamë bijiaya pataeyabiabame bepejiobivi. Ricovi baja cajena xainapona bitso pexainaejava panejumata. Bajarapamonae pacaneconitabiabanua juezmonaejavabelia juezmonae papecananeconitsiaexanaenexa. ⁷ Ricovi cuaicuaijai tsabiabi pibisiacuena Cristo yabara, ponë vaxaitsi yaiyataeya jumecovënëtavanapatsi.

⁸ Dioso pejumelivaisibaxutota jumaitsi mapacueniaje: “Asivamëre itsamonae ata pacuenia xamë nijacuata nasivamë,” jai. Bajarapalivaisi pexanialivaisi bitso daxitalivaisianë matatoxenetsia. Nexata bajarapalivaisi pepacuene itsa pajumecovënëtsianame, pexaniacuene paexanaename. ⁹ Itsa payaiyataejitsipame itsamonae, itsamonae pijinia bijiaya itsa pataejitsipame, nexata paexanaejitsipame pibisiacuene. Pananeconitsipame Diosojavabelia. Tsipaji najëpaeya apo pataemë tsipae daxitajivi Dioso papecaitorobicuenia. ¹⁰ Pajivi jumecovënëtsi ata Dioso Moiséspijinëta penajumecopatsilivaisi, itsiata bajarapalivaisita caelivaisiyo itsa apo jumecovënëtsi, nexata itsiata naneconitsiana Diosojavabelia bajarapalivaisita caelivaisiyo apo pejumecovënëtsixae. Nexata bajarapajivi daxita bajarapalivaisi apo bepejumecovënëtsijivicuenia, Dioso taenatsi. ¹¹ Dioso jumaitsi: “Pëtsa jaitame itsava nijavavecua,” jai. Petiriavinexa pijinia jumaitsi: “Pëtsa jaitame itsanë

amonavecuu,” jai. Dioso icatsia itsajumeyo jumaitsi: “Pëtsa beyaxuabame jivitonë,” jai. Nexata ponë apo jaitsi ata itsava pijavavecuu, itsiata itsa beyaxuaba jivitonë, Dioso tanetsi daxita bajarapalivaisi apo pejumecovënëtsinëcuenia. ¹² Jesucristo papecaitorobicuenia itsa paexanaename, nexata apo pananeconitsimë tsane Diosojavabelia. Itsa apo pajumecovënëtsimë tsane, nexata pananeconitsianame Diosojavabelia. Bajaraxuata itsa pacuaicuaijamë, pacuaicuaijamëre pexanialivaisi. Paexanavanaparenuu pexaniacuene pacuenia Jesucristo pacaitoroba. ¹³ Paxamë itsa apo paitaxutotsoniataemë itsamonae ata, nexata juya Dioso apo pacaitaxutotsoniatae tsane pamatacabi Dioso naneconitsiaexanaena daxitajivi pibisiacuene pexanaeneconi yabara. Itsiata baitsi jane itsa paitaxutotsoniataneme itsamonae ata, juya Dioso pacaitaxutotsoniataena. Nexata Dioso apo pacananeconitsiaexanae tsane.

Pacuenia Dioso pejumecovënëtsivi pexaniacuene bexanavanapa yabara pelivaisi

¹⁴ Tajamonae, pajivi jumaitsi ata: “Xanë jumecovënëtajë Jesús pelivaisi,” jai ata, itsiata itsa apo exanae pexaniacuene itsamonaejavabelia pacuenia Dioso nacaitoroba, bajarapajivi apo jumenamatamotsi Diosojavabelia. Bajarapacuenia saya itsa jumaitsi tsane pecuibota, bajarapajivi Dioso apo capanepae tsanetsi. ¹⁵⁻¹⁶ Itsamonae Dioso pejumecovënëtsivi bitso namatavenonaejitsipa penaxatatsijava, pexaejava ata. Nexata bajarapamonaejavabelia paxamëyajuvënëjivi jumaitsi ata tsipae: “Xaniavaetsia baja paponare. Dioso pacayavenonaena panenaxatatsijavanexa paneaqueyaniva. Pacarajutsiananua panexaejavanexa ata,” jai ata tsipae, nexata itsiata bajarapajivi apo jumenamatamotsi tsipae. Tsipaji apo itaxutotsoniatae. Saya itoroba peponaenexa. ¹⁷ Bajara pijinia itsi Jesús pelivaisi vajajumecovënëtsijava. Pajivi pexaniacuene apo toexanae itsamonaejavabelia, bajarapajivi jumaitsi ata: “Xanë jumecovënëtajë Jesús pelivaisi,” jai ata, itsiata apo jumenamatamotsi. Tsipaji pacuenia Dioso itorobatsi, apo exanae.

¹⁸ Nexata pajivi Jesús pelivaisi jumecovënëtsi ata, itsiata pexaniacuene itsa apo toexanabiabi tsane itsamonaejavabelia, nexata meta itsajivi jumai tsane bajarapajivijavabelia: “Xamë jumaitsimë tsabiabi: ‘Xanë jumecovënëtajë Jesús pelivaisi,’ jamë tsabiabi. Itsiata pexaniacuene apo toexanabiabimë itsamonaejavabelia pacuenia Dioso nacaitoroba. Nexata apo cajamatabëcueneyapëtaetsi nexaniajaicuene nejumecovënëtsijava Jesús pelivaisi. Tsipaji pexaniacuene apo toexanabiabimë itsamonaejavabelia pacuenia Dioso nacaitoroba. Xanë rajane pexaniacuene toexanabiabajë itsamonaejavabelia pacuenia Dioso nacaitoroba. Bajarapacuenia pexaniacuene tatoexanabiabixae itsamonaejavabelia catsitanajamatabëcueneitajëtatsi taxaniajaicuene tajumecovënëtsijava Jesús pelivaisi,” jai meta tsane itsajivi pajivijavabelia pexaniacuene apo toexanabiabi itsamonaejavabelia, Jesús pelivaisi jumecovënëtsi ata. ¹⁹ “Caenë rabaja tsaponaponae Dioso,” pejailivaisi paxamë pajumecovënëtame. Xanepana rabaja picani. Itsiata pexaniacuene itsa apo patoexanaemë tsipae itsamonaejavabelia, pajemajamë tsipae. Tsipaji dovathi ata, pijajivi yajava, jumecovënëta: “Caenë rabaja tsaponaponae Dioso,” pejailivaisi. Bajaraxuata dovathi pijajivi barëneconecojai pecajunavi. ²⁰ Paxamë pajamatabëcuenelivaisijibimë. Vaxaitsi jumaitsi atatsi: “Xanë jumecovënëtajë Jesús pelivaisi,” jai paxamë pajumecovënëtame. Xanepana rabaja picani. Itsiata pexaniacuene itsa apo patoexanaemë tsipae itsamonaejavabelia, pajemajamë tsipae. Tsipaji dovathi ata, atatsi, itsiata pexaniacuene itsa apo toexanabiabitsi itsamonaejavabelia pacuenia Dioso nacaitoroba, ajumematamobitsi cajena Diosojavabelia. ²¹ Bajayata vajasalinainëmi Abrahampijinë xaina pexënatonëyo. Pevënë Isaac. Nexata Abrahampijinë Dioso jamatabëcuenejëtsiaya itorobatsi penacoxibeyaxuabinexa picani. Dioso jumaitsi Abrahampijinëjavabelia: “Nexënatonëyo beyaxuare ofrendacuene tanerajutsinexamë,” jai Dioso Abrahampijinëjavabelia. Nexata Abrahampijinë ajena nacoxibeyaxuabijitsia, Dioso itavetatsi. Abrahampijinë pejumecovënëtsixae pacuenia Dioso itorobatsi, nacoxicëtabuata picani penacoxibeyaxuabinexa.

Bjaraxuata Abrahampijinē Dioso aneconijibiatanetsi. ²² Abrahampijinē cajena Dioso jumecovēnēta pacuenia tajēvelia Dioso najumecapanepaeya jumaitsitsi. Bjaraxuata exana pacuenia Dioso itorobatsi. Bjarapacuenia itsa exana Abrahampijinē, najamatabēcueneitajēta pepacuene Dioso pejumecovēnētsijava pejamatabēēthētojavavetsina. ²³ Nexata bjarapajamatabēcuenelivaisi yabara Dioso pejumelivaisibaxutota jumaitsi Abrahampijinē yabara mapacueniaje: “Abrahampijinē jumecovēnēta pacuenia Dioso najumecapanepaeya jumaitsitsi. Bjaraxuata Dioso aneconijibia tanetsi,” jai baja cajena Dioso pejumelivaisibaxutota Abrahampijinē yabara. Nexata Abrahampijinē yabara jivi jumai tsabiabi: “Abraham raja Dioso piasivanētsi,” jai tsabiabi.

²⁴ Nexata baja paxamē payapētaneme mapacueneje. Pajivi jumecovēnētsi ata pacuenia Dioso najumecapanepaeya jumaitsi, itsiata itsa apo exanabiabi pexaniacuene, bjarapajivi aneconijibia Dioso apo taetsi. Pajivi jumecovēnēta pacuenia Dioso najumecapanepaeya jumaitsi, nexata itsa exanabiaba pexaniacuene, bjarapajivi Dioso aneconijibia tanetsi. ²⁵ Bajara pijinia pacuenia bajayata Dioso aneconijibia tanetsi Rahabpijivami pibisiacuene pexanabiabivami ata. Bjarapovami palata pepitsinexa, pibisiacuene exanabiaba pevitota. Itsiata baitsi jane bjarapovami pexaniacuene exana. Tsipaji copiapita xaniavaetsia Israelpijinē pemomobeje. Bjaraponēbeje jivi peyaenēbinēbeje vajabitsaē pexanaenexa bajara patomarapijivijavabelia. Rahabpijivami yavenonana bjaraponēbeje peponaenexabeje saicaya namutua pijavajabitsaē pebeyaxuabiyānivatsibeje. Bjarapacuenia Rahabpijivami pexaniacuene pexanaexae Dioso aneconijibia tanetsi. ²⁶ Piasaētsaponaponaevivi ata itsa baja ajumalijibi, tēpa baja. Apo exanae baja itsacuenejavayo ata pexaniacuene pevājēnaeyabelia. Bajara pijinia vaxaitsi ata jamatabēcueneitsitsi Jesús pelivaisi vajajumecovēnētsivi. “Xanē jumecovēnētajē Jesús pelivaisi,” jai atatsi, itsiata itsa apo exanaetsi pexaniacuene pacuenia Dioso nacaitoroba, bevajajamatabēcuenetēpaevi Dioso tsitajināvanapatsi.

3

Pacuenia itsi vajeabarēto yabara pelivaisi

¹ Tajamonae, paxamēyajuvēnēvi vēnēlivaisitaniji pacuenia ayaibitsaēto jitsipa penaexanaenexa Jesús pelivaisi jivi petsipaebivinxexa. Itsiata baitsi jane ayaibitsaēto apo benaexanae jivi livaisi petsipaebaponaevinexa. Paxamē rabaja payapētaneme mapacueneje. Paxanē Jesús pelivaisi jivi patatsipaebaponaevi, paitavetaponajē pibisiacuene pexanaejava. Nexata pibisiacuene pexanaejava pataitavetsicujinae, bjarapapibisiacuene itsa paexanaejitsipajē, Dioso bitso ayaicuenia panenaneconitsiaexanaejitsipa daxitajivi matatoxenetsia. ² Daxitatsi vaxaitsi itsajavata banacajumemaba pibisiacuena vajacuaicuaijainexa, pacuenia picani apo becuaiicuaijaitsi. Pajivi pibisiacuena apo cuaicuaijai, bjarapajivi ajamatabēcuenesaē baja Diosojavabelia. Nexata bjarapajivi caējēpatsi penajamatabēcuenesaētsinexa daxita pibisiacuene pexanaeyaniva. ³ Caballo vajavēsimumuxufetsinexa tsicuiboxatatatsi freno. Nexata freno caballovecua tsiquirijavayo ata, itsiata caējēpa caballo vajavēsimumuxufetsinexa itsabelia jitsipatsi vajaponaenexa. ⁴ Bajara pijinia itsi barco ata, pinijimo ata. Jovibo ayai ata, itsiata petabufetaicaenē tsiquiritenapayo ata, barcotabufe cajēnapona itsabelia jamatabēpona peponaenexa. ⁵ Bajara pijinia itsi tsiquiriisotoyo ata. Itsa tajua, naexana ayaiisoto petajuenexa pinijiunu ata. Bajara pijinia itsi vajeabarēto ata. Tsiquirijavayo picani vajeabarēto. Itsiata caējēpatsi pecuaicuaijainexa ayailivaisi. ⁶ Vajeabarēto cajena ayai, pacuenia isoto ayai. Vajeabarētota raja pibisiacuene exanatsi daxita vajavi matatoxenetsia. Nexata vajacuaicuaijajava nacajamatabēcuenebijiana. Tsiquirijiviyotsijavaveliacujinae vajatēpaejavabelianexa, bjarapacuenia cuaicuaijaitsi. Dovathi vajanacaitorobijava vajajumecovēnētsixae, cuaicuaijaitsi pibisiacuena. ⁷ Pacanaējēre mapacueneje. Jivi caējēpatsi penaitajuaniaexanaenexa daxitaviriadajubiyajuvēnēvi.

Caējēpatsinua penaitajuaniaexanaenexa unupijivi ata, pepunaevi ata. Caējēpatsinua penaitajuaniaexanaenexa pecotobēxēta pejinavanapaevi ata, manuamenepijidujuai ata. Itsamonaē bajarapacuenia naitajuaniaexana baja pejumecovēnētsinexatsi. ⁸ Itsiata baitsi jane itsajivi ata apo caējēpaetsi penaēbarētoitavetsinexa jumejemabiaya pibisiacuenia pecuaicuaijajava pecopatsinexa. Vajaēbarēto cajena bitso abeje. Apo nacacaējēpae vajanajumecataitsinexa. Nexata pacuenia jomo pijaveneno xaina pebeyaxuabinexa, bajara pijinia itsi vajaēbarēto. ⁹ Vajaēbarētota pexaniacuenia jumaitsitsi vaxa Diosojavabelia: “Xamē bitso ayaijamatabēcuenenēmē,” jaitsi. Vajaēbarētota icatsia pibisiacuenia cuaicuaijaitsi itsamonaējavabelia. Bajarapamonae picani beyaiyatanetsi. Tsipaji Dioso nacuenecataeya pexanaevitsi. ¹⁰ Caeēbarētota pexaniacuenia cuaicuaijaitsi Diosojavabelia. Pibisiacuenia ata cuaicuaijaitsi itsamonaējavabelia. Tajamonae, apo bexanaetsi cajena bajarapacuenia. ¹¹ Pacanaējēre mapacuenēje. Mera pepitsapaemēthēatsina pitsapaina caera, pexaniara. Apo pitsapae pexaniara, piatsaxara yajava. ¹² Bajara pijinia itsi peubijava ata. Higueranaējavaverena apo pitsapae saicayacuai. Uvanaējavaverena ata apo pitsapae saicayacuai. Jume cajena. Bajara pijinia itsi mera pepitsapaemēthē. Caejavatsina apo pitsapae pexaniara, piatsaxara yajava. Bajara pijinia itsi vajaēbarēto ata. Caeēbarētota apo becuaiicuaijaitsi pibisialivaisi, pexanialivaisi yajava. Nexata becuaiicuaijaitsi ēpexanialivaisi.

Pacuenia Dioso pijajivi yapētaeyaexana pexanaenexa pexaniacuenē yabara pelivaisi

¹³ Paxamē rabaja xaniavaetsia pajumeyapētaneme Dioso pejumelivaisi. Nexata itsamonaē pexaniacuenē bepatsitaexanavanapame pacuenia pajumetaneme Dioso pejumelivaisita. Bajarapacuenia itsamonaē pexaniacuenē bepatsitaexanavanapame beveliajamatabēcuenevi nataeya. Nexata daxitajivi pacacueneyapētaena bitso panejumeyapētaevicuene Dioso pejumelivaisi. ¹⁴ Itsiata baitsi jane bitso itsa pacuenecaēbabiabame itsamonaē, itsa pajitsipabiabamenua jivi paneevetsivinexa papecaexanaenexa, pētsa jamatabēcuenenavēxaniabiaya pajumaitsimē mapacueniaje: “Xanē bitso xaniavaetsia yapētaniji Dioso pejumelivaisi,” pajamē pētsa. Tsipaji saya panajamatabēcuene capaebijitsipame xaniavaetsia Dioso pejumelivaisi paneyapētaejava. ¹⁵ Dioso pejumelivaisi itsa payapētaejitsipame xaniavaetsia, nexata apo panajamatabēxainaemē tsipae bajarapacuenia. Dovathi rajane pejamatabēcueneta pacaitoroba panenajamatabēxainaenexa bajarapacuenia. Itsa jume, nexata paxamē panejamatabēcueneta panajamatabēxainame bajarapacuenia. ¹⁶ Itsajota jivi cuenecaēba itsamonaē, itsa jitsipabiabanua jivi pevetsivinexa pexanaenexatsi, bajarajota nexata jivi najamatabēcuenejēpaeya apo jinavanapae. Daxitacuenē pibisiacuenē ata exanavanapa. ¹⁷ Biji rajane Dioso itsa nacayapētaeyaexana pexaniajamatabēcuene, nexata pexaniajamatabēcuene xainatsi. Apo namaxēvanitsitsi. Itsamonaē yayatanetsi vajaexanaeyaniva bajarapamonaejavabelia apo pejitsipaecuenia. Najamatabēxainatsi itsamonaē ata vajanacamuxujiobilivaisi vajajumeyapētaenexa. Itaxutotsoniatanetsi itsamonaē ata. Pexaniacuenē exanatsi. Apo najamatabēcuene epatajērērēcaetsi. Apo yamaxēitojorobitsi itsamonaē ata. Bajarapacuenia exanatsi Dioso pejamatabēcueneta pexaniajamatabēcuene itsa nacayapētaeyaexana. ¹⁸ Vaxaitsi jivi itsa nabarajamatabēcuene xanepanaeyaexanaenatsi, namataenetsia penaitoyavi ata, nexata vaxaitsi ata nabarajamatabēcuenexanepanaeya jinavanapaenatsi. Pexaniacuenēnua exanavanapaenatsi.

4

Pacuenia jamatabēcueneitsi pajivi jitsipa mapanacuapijicuenēje yabara pelivaisi

¹ ¿Detsa xuajitsia paxamēyajuvēnēvi anaeya namataenetsia pijanajumenotabiabi pecanabeyabiabi? Bajarapacuenia najumeanaenotabiaba tsipaji pejamatabēthētota bitso jitsipa pexanaenexa daxita xua pibisiacuenē. Bajaraxuata nabeyabiaba.

2-3 Paxamë picani pajitsipame itsacueneyava panexainaenexa. Itsiata apo pacacaëjêpae panepitsinexa. Bajaraxuata nexata pexainaevi payabarabeyaxuababiabame. Pacobecaëbabiabame itsamonae pexainaejava. Nexata pexainaevi payabarabeyabiabame paneyacajêrêtsinexa pecobecovê. Paxamë apo paxainaemê panejitsipaecuene. Tsi-paji pavajêcabiabi atamê Diosojavabelia, itsiata apo pacarajutabiabi xua pavajêcame. Tsi-paji saya bajaraxua pavajêcabiabame paneexanaenexa daxita xua pibisiacuene.

4 Caejamatabëcuene Diosojavabelia apo paxainaemê. ÊDioso pijacuene apo pajitsipaemê. Mapanacuata pexainaecuene ata bitso payajavajitsipame. Bajarapacuenia panenajamatabêxainaexae, pacuenia petiriva jamatabëcueneitsi, pova pamonavecua jaita itsanê, bajarapajamatabëcueneitsimê. Payapêtaneme rabaja mapanacuapijicuene bitso pejitsipaevi, bajarapamonae Dioso beprijavajabitsaë naexana. Bajara pijinia paxamê ata paitsimê.

5 Bajarapajamatabëcuene yabara Dioso pejumelivaisibaxutota jumaitsi mapacueniaje vajacanaëjêtsinexa xaniavaetsia Diosojavabelia: “Espíritu Santo, ponê nacatsijamatabêeca, bajaraponê bitso nacaasiva. Bitso nacatojitsipa vajaasivanexa êDioso,” jai Dioso pejumelivaisibaxutota vajajitsipaeyaniva mapanacuapijicueneje.

6 Dioso cajena nacayavenona vajanajamatabëcuene cataitsinexa pibisiacuene vajaexanaeyaniva. Dioso pejumelivaisibaxutota jumaitsi mapacueniaje: “Dioso yavenona pamona beveliajamatabëcuenevi natane. Pamona pijinia beayajamatabëcuenevi natane, Dioso apo yavenonae,” jai Dioso pejumelivaisibaxutota.

7 Nexata beveliajamatabëcuenevi nataeya paexanavanapare pacuenia Dioso pacatojitsipa. Panavecuaitavere dovathi. Nexata dovathi pacavecuanajetabajiraviana.

8 Pavajêre Diosojavabelia. Nexata Dioso pacayavenonaena. Paxamë pibisiacuene paneexanaevi, pacopare bajarapacuene. Paxamë anijajamatabëcuenebeje panexainaevi, Dioso pijalivaisi, pibisiajamatabëcuene yajava. Pacopare bajarapajamatabëcuene Dioso papecajamatabëcuene xaniavaetsinexa pibisiajamatabëcuenevecua.

9 Pibisiacuene paneexanaeneconi yabara, bitso panatsinajamatabêxainare. Bitso payauramêrenua. Pêtsa payabarëyamê.

10 Beveliajamatabëcuenevi panataema Dioso pitabarata. Nexata pibisiacuene paneexanaeneconimivecua, Dioso pacajamatabëcueneyavenonaena. Nexata panajamatabëcueneyotsianame Diosojavabelia.

Pacuenia nacaitaveta itsamonae Dioso pejumecovênêtsivi pibisiacuenia vajabaracuaicuaijayaniva yabara pelivaisi

11 Tajamonae, pêtsa najumetsênêtsia namataenetsia panabaracuaicuaijamê. Pajivi najumetsênêtsia baracuaicuaijai Dioso penajuajumecovênêtsivi, bajarapajivi naneconita Diosojavabelia. Dioso penajuajumecovênêtsivi, pibisiacuene pexanaejava xaniavaetsia cueneyapêtaenejeva, itsa jamatabêjumaitsinua: “Bajarapamonae Diosovecua naxuabiana pibisiacuene pexanaexae,” itsa jamatabêjai, nexata bajarapajivi ata naneconita Diosojavabelia. Dioso penajuajumecovênêtsivi, najumetsênêtsia itsa baracuaicuaijai, nexata apo jumecovênêtsi pacuenia Dioso itorobatsi. Pacuenia Dioso itorobatsi, itsa apo jumecovênêtsi, nexata apo bepexaniajailivaisi tane. Caranata bajarapajivi jivi bepenaneconitsiaexanaenê natane.

12 Caenê Dioso nacatonajumecopata vajajumecovênêtsinexa. Bajara jane ponê nacaneconitsiaexanaena pibisiacuene vajaexanaeneconi yabara. Bajaraponê caenê caëjêpatsinua pejumaitsinexa itsajiviyojavabelia: “Xamê pepacuene naneconitame. Nexata nevecuanaxuabianame infernojavabelia,” pejainexa. Itsa jume, caëjêpatsi pejumaitsinexa: “Xamê baja caaneconijibiaexanatsi. Nexata aneconijibia catanetsi. Nexata cacapanepaenatsi,” pejainexa. Bajaraxuata paxamê Dioso apo pacatocopatsi itsamonae yabara panejumaitsinexa mapacueniaje: “Bajarapamonae Diosovecua naxuabiana pibisiacuene pexanaexae,” panejainexa.

Pacuenia itsajivi ata apo natsivajënaeyapëtae pacuene meravia pitsijavata tocopiapatsijitsiatsi yabara pelivaisi

¹³ Panenamuxunaevere mapalivaisije. Paxamë abaxë xaniavaetsia payapëtaenejevamë xua Dioso pacatocopatsijitsia paneexanaenexa, ayaijamatabëcuenevi nataeya tajëvelia panavajunupaebabiabame. Tajëvelia pajumaitsimë tsabiabi: “Ajena. Itsa jume, pepacuene jane baja meravia, ponaenatsi bajarapatomarabelia. Bajarajotalia caevai nacuenebianatsi palata vajanacanabinexa,” pajamë tsabiabi. ¹⁴ Pëtsa bajarapacuenia ayaijamatabëcuenevi nataeya tajëvelia panavajunupaebabiabame. Tsipaji raja apo panatsivajënaeyapëtaemë xua pacatocopiapatsijitsia meravia pitsijavata. Vajajinavanapaeepatoyo saya tsiquirimatacabiyota jinavanapatsi vajatëpaenexa. Pacuenia itsi nojobo, bajara saya itsitsi vaxaitsi. Nojobo pitsapa bajayacunua caeepatoyonexa saya. Bajaraxuacujinae icatsia ajibi baja. Bajara pijinia itsitsi vaxaitsi ata. ¹⁵ Nexata saya bepajumaitsimë: “Itsa Dioso nacatocopatsiana abaxë vajaasaëtsavanapaenexa, jinavanapaenatsi. Exanaenatsi mapacueniaje. Itsa jume, itsacuenia exanaenatsi,” bepajamë saya. ¹⁶ Paxamë saya bepaayaijamatabëcuenevimë panataeyabiabame. Nexata paneexanaejavanexa, abaxë tajëvelia panavajunupaebabiabame panatsivajënaeyapëtaenejevamë xua Dioso pacatocopatsijitsia paneexanaenexa. Bajarapacuenia ayaijamatabëcuenenë nataeya panenavajunupaebabiabijava, pibisiacuene. Tsipaji panajamatabëxainabiabame bepanijacuata itajara paneexanaejavanexa. Apo pacanaëjëtsimë bajaraxua Dioso papecatocopatsijava, bajarapacuenia paneexanaenexa. ¹⁷ Pajivi yapëtae ata pacuenia picani bexana, itsiata itsa apo exanae, bajarapajivi naneconita Diosojavabelia.

5

Pacuenia bitso pexainaevi muxujiobatsi yabara pelivaisi

¹ Bitso panexainaevi, ipanenamuxunaevere mapalivaisije! Panatsinuema bitso ayaijumeta. Tsipaji raja Dioso pacabejiobiaexanaena. ² Bitso panexainaeuene panexaniavaetsijavami, pacatotsabanaena. Pexaniaviriajavanë, panenaxatabijavanëmi ata, daxita pacatoucubaxaena. ³ Palatanëanë ata, bitso penamatamotsinëanë, pacatotasi-bianatsi. Nexata nayapëtaena bajarapapalata apo panecanacuenebijava. Bajarapapalata apo paneyavenonaexae itsamonae, pacototasi-bianatsi. Isoto pacaveriajaviana daxita panexinaejava yajava. Pacaetuataponame picani papecatoayaijavanexa. Itsiata baitsi jane pamatacabi Dioso naneconitsiaexanaejitsia daxisajivi, imoxoyo baja pevajënae tsaponae pecopiapatsinexa. Dioso pacananeconitsiaexanaena. Tsipaji ëpaxamënexa panatoxaniavaetame panexainaeuene. ⁴ Panejumetaema. Pamonaepacatonacueneba panijacuene, bajarapamonae tsipaeba itsamonaejavabelia paneyamaxëitojorobijava. Apo pamamatamotsimë xaniavaetsia pacuenia picani pamamatamotsiapaebame. Nexata vajatuxanenë Dioso, daxita athëbënacuataatsia pevetsinë, jumetanetsi bajarapamonae pepaebijava xaniavaetsia apo panematamotsijava. ⁵ Mapanacuata picani panatsitajinavanapame xaniavaetsia. Pacabarëyamë tsavanapae panexainaeuene. Paexanavanapame panejitsipaecuena. Pacuenia baca bitso penasitsiepatota beyaxuabatsi, bajara pijinia pacuenia paxamë ata pacatoimoxoyo baja Dioso papecananeconitsia exanaematacabinexa, bitso panenaneconitsixae Diosojavabelia. ⁶ Jivi pananeconitsiaexanabiabame. Pabeyaxuababiabamenua planeconijibivi ata. Bajarapacuenia paexanabiabame pamonaejavabelia apo caëjëpaetsi papecanayajivinitavetsinexa.

Pacuenia icatsia petuxanenë patsijitsiatsica yabara pelivaisi

⁷ Tajamonae, pajamatabëcuenesaëmëre tsavanapae panecopiaevetavanapaejava vajatuxanenë matapania icatsia pepatsimatacabitsicajavabelianexa. Pabi penacuenebinë, vajënaeeveta ema peubinexa peubijava. Peubiveretsicujinae peubijava,

bajayajebi ajamatabëcuenesaëya evetaponapona petonaveretsijavabelianexatsi. ⁸ Bajara pijinia pacuenia paxamë ata bajayajebi itsamonae pibisiacuene pacaexanae ata, pajamatabëcuenesaëmë tsane. Pëtsa pajamatabëcuenefaefaname. Tsipaji rabaja imoxoyo pevajënae tsaponae vajatuxanenë pepatsinexatsica. ⁹ Tajamonae Dioso panenajuajumecovënëtsivi, pëtsa namataenetsia panabaracuaicuaijamë Diosojavabelia panenaneconitsiyaniva. Tsipaji rabaja Jesucristo, ponëjavabelia panavajunupaebijitsiamë daxita pacuene paexanavanapame mapanacuataje, imoxoyo baja pevajënae tsaponae pepatsinexatsica. Bajaraponë pacaevivimë canacujitsia pacarajutaponaena xuavajëto pacatoxainapona. ¹⁰ Tajamonae, pacanaëjere profetavimi, pamonaemi bajayata Diosojumelivaisi paeba. Bajarapamonaemi bajayajebi bejiobiaexanae atatsi, ajamatabëcuenesaë tsavanapae. Itsajamatabëcuene apo xainae. ¹¹ Pamonaemi ajamatabëcuenesaë, bajayajebi bejiobiaexanae atatsi, bajarapamonaemi aeconoxae baja topexaniacuene tsane Diosojavabelia. Pavënëlivaisitaneme rabaja pacuenia bajayata Jobpijinë bejiobiaexanae atatsi, itsiata ajamatabëcuenesaë Diosojavabelia. Pavënëlivaisitanemenua pacuenia pejamatabëcueneëjëtsicujinaetsi, bitso Dioso yavenonatsi. Bajaraxuata nexata payapëtaneme Dioso jivi pitaxutotsoniataenëcuene.

¹² Tajamonae, palivaisi baja pacatsipaebatsi, matatoxenetsia mapalivaisiyoje bitso pajumecovënëtsianame. Itsa pacuaicuaijamë itsamonaejavabelia, pexaniajailivaisi pacuaicuaijamë tsabiabi tsane. Pëtsa Dioso pevënë pacacuaicuaijamë itsamonae papecajumexaniataenexa. Nexata pëtsa pajumaitsimë mapacueniaje: “Xaniajanë raja. Cajumaittsi mapacueniaje Dioso pitabarata,” pajamë pëtsa. Tsipaji baja pexaniajailivaisi itsa pacuaicuaijamë tsabiabi tsane, itsamonae ata pacacueneyapëtaena apo panenajumetsënëtabiabicuene. Nexata itsa pacayanijoba itsacueneyavayo yabara, roviaalia pajumaitsimëre pacuenia panajamatabëxainame. Itsa pajejamëjitsia, pajejamëre roviaalia. Itsa jume, “jume!” pajamëre roviaalia. Bajarapacuenia roviaalia itsa paxaniajamë tsabiabi tsane, nexata apo pananeconitsimë tsane Diosojavabelia. Tsipaji Dioso pevënë apo pacacuaicuaijamë tsabiabi tsane papecajumexaniataenexa itsamonae.

¹³ Paxamëyajuvënëjivi itsa tocopiapatatsi pibisiacuene, bajarapajivi bevajëta Diosojavabelia. Itsa jume, barëyaya itsa ponapona, betonaxëana Diosojavabelia: “Xamë ayaijamatabëcuenenëmë,” bejai Diosojavabelia penaxëanaejavata. ¹⁴ Itsa jume, itsa avitane, bejunata ancianovi, Dioso pejumecovënëtsivi pevetsivi. Nexata ancianovi patsiana petovajëtsinexatsi Diosojavabelia. Nexata ancianovi piavitanejivi aceiterata perabëcalirabiana vajatuxanenë pevënëta. ¹⁵ Petovajëcaejavata, daxita ancianovi itsa jamatabëjumaittsi: “Diosojumepaebinëmi, profeta Elíaspijinë, bevaxaitsijamatabëcuenenëmi. Bajayata bajaraponëmi asaëyata vajëta Diosojavabelia ema pejopaeyaniva. Nexata acueyabi pavaibeje epatua ema apo jopae bajaraponëmi pijanacuata. Nexata daxita peubijavaximi, totëpatsi. Nexata daxita bajarapanacuapijivi bitso janibo. ¹⁸ Bajaraxuacujinae icatsia asaëyata Elíaspijinë vajëta Diosojavabelia ema pejopaenexa. Nexata icatsia ema jopa. Ira icatsia capitsapa pexaejavanexa. Bajarapacuenia vaxaitsi ata asaëyata bevajëtatsi Diosojavabelia.

¹⁹ Tajamonae, paxamëyajuvënëjivi itsa copaba Dioso pejumelivaisi pejume-

covënëtsijavami, nexata icatsia bepajumecovënëtsiaexaname bajarapalivaisi.
²⁰ Bepayapëtaneme mapacueneje. Pajivi icatsia copabiaexana itsamonae
pibisiacuene pexanaejavami, pejumecovënëtsinexa icatsia Dioso, bajarapajivi
jamatabëcueneyavenonaena bajarapamonae penaxuabiyanima pibisianacuayabelia.
Jamatabëcueneyavenonaenanua bajarapamonae Dioso pevecuaajibiaexanaenexatsi
ayaineconi ata, pibisiacuene pexanaeneconimi.

Mapabaxutoje San Pedro copiaya toyaquina Dioso pejumecovënëtsivijavabelia

Pacuenia Pedro mapabaxutoje toyaquina Dioso pejumecovënëtsivi, nacayajatsia penaevijavabelia, yabara pelivaisi

¹ Xanë Pedronë, Jesucristo taneitorobinë. Nitoroba jivi tatsipaebaponaenexa Jesucristo pelivaisi. Pacatoyaquinatsi mapabaxutoje paxamë pepo panijatomaravecua, Jerusaléntomara, nacayajatsia paneenarutsivi. Nacayajatsia pajinavanapame Ponto nacujava, Galacia nacujava ata, Capadocia nacujava ata, Asiavënë nacujava ata, Bitinia nacujava ata. ² Vaxa Dioso baja cajena bajayata tajëvelia panenaexanaevajënaeya ata, pacaitapeta papijajivinexamë. Bajarapacuenia tajëvelia Dioso papecaitapetsixae, aeconoxae baja Espiritu Santo pejamatabëcueneta pacatsata Jesucristo panejumecovënëtavanapaenexa. Dioso pacaitapeta papecavecuaajibiaexanaenexa, daxita pibisiacuene paneexanaeconimi Jesucristo papecasivatëpaexae. Pacatovajëtatsi Diosojavabelia ayaicuenia Dioso papecayavenonabiabinexa. Pacatovajëtatsinua jamatabëcuenexanepanaeya panejinavanapaenexa daxitacuenevecua.

Pacuenia Jesucristo pelivaisi pejumecovënëtsivi Dioso rajutsianatsi matababi apo peverevereaejava yabara pelivaisi

³ Vaxaitsi vajatuxanenë Jesucristo paxa Diosojavabelia jumaitsitsi tsabiabi: “Xanepana rabaja. Pexaniacuene panetoexaname,” jaitsi tsabiabi. Ayaicuenia Dioso vajanacaitaxutotsoniataexae, pejanajamatabëcuenevitsi nacaexana Jesucristo vajajumecovënëtsixae. Jesucristo petëpaecujinae, Dioso icatsia asaëyaexanatsi. Bajaraxuata vaxaitsi ata evetavanapatsi vajanacarajutsinexa matababi apo peverevereaejava. ⁴ Nexata Dioso nacarajutsiana xua nacatoxaina athëbëtatsia vajanacarajutsinexa. Bajaraxua apo vereverecae tsane. Apo abejenua tsane. ⁵ Bajaraxua Dioso nacatoxaniavaeta athëbëtatsia vajanajamatabëcuenecopatsixae Diosojavabelia. Nexata abaxë vajajinavanapaeepato mapanacuataje, Dioso pesaëta nacaevetaponapona. Bajarapacuenia Dioso pesaëta nacaevetaponapona vajanacacapanepaenexa. Pamatababi mapanacuaje vereverecaena, nayapëtaena jane baja xua Dioso nacarajutsiana.

⁶ Bajaraxuata paxamë Dioso papecacapanepaejavanexa, pasivajamatabëcuenebarëyamëre tsavanapae. Aeconoxae abaxë mapamatababitaje pacajamatabëcuenebejobitsi ata daxitacuene papecajamatabëcuenejëtsijava, itsiata pasivajamatabëcuenebarëyamëre tsavanapae. ⁷ Pacajamatabëcuenejëtapona papecajamatabëcueneypëtaenexa pepacuene panenajamatabëcuenecopatsijava Jesucristojavabelia. Oronanito ata itsa ëjëta, baseta isotota peyapëtaenexa itsa pepacuene orojava. Panenajamatabëcuenecopatsijava Jesucristojavabelia, bitso namatamota orojava matatoxenetsia. Nexata pijinia paxamë ata pacajamatabëcuenejëtaponaena papecajamatabëcueneypëtaenexa xaniavaetsia panenajamatabëcuenecopatsijava Jesucristojavabelia. Nexata itsa pavecuapanepaenexa papecajamatabëcuenejëtsijava, panevajënaeyabelia pajamatabëcuenesaëmë tsaponae tsane Jesucristojavabelia panenajamatabëcuenecopatsijava. Nexata pamatababi vajatuxanenë Jesucristo patsianica, pacasivajamatabëcuenebarëya tsane. Dioso ata pacasivabarëya tsane. Daxitajivinua pacayaiyataena.

⁸ Paxamë abaxë Jesucristo apo patae atamë, itsiata pajitsipame. Aeconoxae apo patae atamë Jesucristo, itsiata panajamatabëcuenecopatame bajaraponëjavabelia.

Jesucristo bitso pasivajamatabëcuenebarëyamë tsavanapae. Jesucristo panesivajamatabëcuenebarëyajava, itsa panajamatabëcuenevajunupaebame itsamonaejavabelia, epatua saya payapëtaeyaexaname. Tsipaji xaniavaetsia apo payapëtaemë xaniavaetsia panenajamatabëcuene vajunupaebinexa itsamonaejavabelia peyapëtaenexa pacuenia bëpënëa pajamatabëcuenebarëyamë. ⁹ Jesucristo papecasivatëpaexae, panajamatabëcueneocopatame Diosojavabelia papecacapanepaenexa. Bajaraxuata Dioso pacacapanepaena Dioso papecananeconitsia exanaejavaminexavecua pibisiacuene paneexanaecononimi yabara.

¹⁰ Bajayatami Diosojumepaebivimi profetavi bajayajebi livaisijaitapona peyapëtaenexa. Nexata baja profetavi itsa yapëtane pacuenia Dioso pijajivi capanepaejitsia, nexata profetavi tajëvelia vajunupaebapona jivijavabelia. Profetavi tajëvelia vajunupaebapona pacuenia Cristo pejamatabëcueneta Dioso pacaitaxutotsoniataejitsia papecacapanepaenexa. ¹¹ Espiritu Santo baja cajena pejamatabëcueneta bajayata tajëvelia profetavimi yapëtaeyaexanaponatsi. Nexata profetavimi bajayata tajëvelia yaquina pacuenia yapëtaeyaexanaponatsi Espiritu Santo pejamatabëcueneta. Nexata profetavimi yaquina pacuenia itsamonae Cristo bejibiaexanaejitsiatsi pebeyaxuabinexatsi. Yaquinanua pacuenia Cristo petëpaecujinae, icatsia itsa asaë, athëbëabetsia caponaejitsiatsi peecaenexa paxa Dioso pemuxunenetsia. Nexata bajarapaprofetavimi jamatabëjumai tsabiabi: “¿De tsaeta pacujinae copiapatsiana xua tajëvelia vaxaitsi vajunupaebaponatsi?” jamatabëjai tsabiabi. ¹² Itsiata baitsi jane bajarapaprofetavimi Dioso yapëtaeyaexanatsi pacuenia bajarapamonaemi pevënamuto bexëa bajaraxua copiapatsijitsia. Nexata vaxaitsi, bajarapamonaemi pecovëpijivitsi, vajajinavanapaematacabita matapania jane baja copiapata pacuenia tajëvelia Cristo yabara vajunupaebapona profetavimi. Nexata baja paxamë bajarapalivaisi itsamonae pacatsipaeba papecacapanepaelivaisinexa. Espiritu Santo, ponë Cristo athëbëvetsica itorobica, bajaraponë pesaë pacayajavatsipaeba bajarapamona. Angelevi ata bitso jitsipa xaniavaetsia peyapëtaenexa bajarapalivaisi.

Pacuenia Dioso nacajunata xaniavaetsia vajatojinavanapaenexa yabara pelivaisi

¹³ Panajamatabëcueneocopare Diosojavabelia. Tsipaji rabaja payapëtaneme xua Dioso pacarajutsijitsia. Bajaraxua Dioso pacarajutsiana papecaitaxutotsoniataexae pamatacabi Jesucristo icatsia patsianica. Bajaraxuata xaniavaetsia panajamatabëcueneverere paneexanaenexa daxita xua Dioso pacatocopata. Najamatabëcueneevetsiayanua xaniavaetsia pajinavanapare. ¹⁴ Pajumecovënëtavanapare Dioso. Pëtsa panajamatabëxainame panenatojitsipaecuenia pibisiacuene paneexanaenexa, pacuenia paexanavanapame pamatacabi abaxë Dioso apo payapëtaemë. ¹⁵ Xaniavaetsia saya pajinavanapare pibisiacuene paexanaenejevamë. Tsipaji raja Dioso, ponë pacajunata papijajivinexamë, xaniavaetsia peponaponaenë. Pibisiacuene baja cajena caeto ata Dioso apo pexanaenë. ¹⁶ Dioso baja cajena pejumelivaisibaxutota jumaitsi mapacueniaje: “Xaniavaetsia pajinavanapare. Tsipaji xanë apo jitsipaenë pibisiacuene paneexanaejava,” jai Dioso pejumelivaisibaxutota.

¹⁷ Paxamë itsa pavajëtame Diosojavabelia, pajumaitsimë tsabiabi: “Taxa Dioso,” pajamë tsabiabi. Bajaraponë Dioso najëpaeya tane daxita pamona jumecovënëtatsi, ayajamatabëcuenevi, beveliajamatabëcuenevi ata. Dioso cajena yapëtane paneconivajëto exanapona caejivi canacujitsia. Bajaraxuata Dioso cjunaviaya bepajinavanapame pamatacabibeje abaxë pasaëmë tsavanapae mapanacuataje. ¹⁸ Paxamë picani naxuabiaya Diosovecua pajinavanapame panijasalinaivimi abaxë pijacuene itsa pacaasaëmë tsavanapae. Itsiata baitsi jane aeconoxae baja bajarapacunevecua Dioso baja pacacapanepa. Payapëtaneme rabaja Dioso ayaimatamota papecanconimatamotsijava papecacapanepaenexa. Apo pacacomuatsi baja cajena pevereverecejavata, pacuenia oro itsi, palata ata. ¹⁹ Dioso baja cajena pacacomuata bitso penamatamotsijavata, Cristo

pijanata. Pajivi pijaneconi xaina Diosojavabelia, bajarapajivi oveja, pejanapebito, peperabëxanepanaenë, beyaxuaba ofrendacuenia pevi perajutsinexa Diosojavabelia. Nexata bajarapajivi pijaneconi Dioso baja vecuaajibiaexanatsi bajarapaoveja pijana pejamatabëcueneta. Nexata pacuenia oveja, peperabëxanepanaenë, beyaxuabatsi, bajara pijinia itsi Cristo. Baitsi Cristo, planeconijibinë, nacopata pebeyaxuabinexatsi. Nexata Cristo petëpaejamatabëcueneta, pacavecuaajibiaexana panijaneconimi. ²⁰ Bajayatami Dioso mapanacuaje pexanaevajënaeya ata, Dioso itapetatsi Cristo papecasivatëpaenexa. Belia jane baja mapamatacabitaje Cristo patsica papecasivatëpaenexa. ²¹ Itsiata baitsi jane Cristo petëpaecujinae, acueyabi matacabita, Dioso icatsia asaëyaexanatsi. Athëbëtatsia, paxa Dioso pecujuanenia, Cristo ecaëyaexanatsi. Bajaraxuata panajamatabëcuenecopatame Diosojavabelia papecarajutsinexa matacabi apo pevereverecaejava.

²² Nexata baja aeconoxae paxamë pajumecovënëtame pexaniajailivaisi, Jesucristo pelivaisi, Espiritu Santo papecajamatabëcueneitayotsixae. Nexata pibisiacuene paneexanaeconimi, Dioso pacavecuaajibiaexana. Nexata xaniavaetsia pasivamë tsavana-pae itsamonae ata, Dioso pejumecovënëtsivi. Bajarapacuenia asaëyata namataenetsia bepanaasivamë tsavanapae daxita panejamatabëëthëtovetsina. ²³ Pacuenia pejananaexanaenacuetoyo itsi, bajara paxamë pajamatabëcueneitsimë Dioso pejumelivaisita pejanajamatabëcuene panexainaexae. Itsiata baitsi jane bajarapapejanajamatabëcuene paneaxajivi apo pacarajutsi. Dioso raja pejumelivaisi, apo pevereverecaelivaisinexa panejumecovënëtsixae, pejanajamatabëcuene baja paxainame. ²⁴ Dioso pejumelivaisi apo pevereverecaejavanexa yabara, Dioso pejumelivaisibaxutota jumaitsi mapacueniaje:

Pacuenia vayafopijipona bepijia tsaquena, petsaquinaecujinae tēpa, bajara pijinia saya itsi jivi ata. Bepijia tēpa. Pacuenia pematono ata bepijia tsaquena, nexata othopa, bajara pijinia saya itsi ayaijamatabëcuene pexainaenë ata. Bepijia tēpa.

²⁵ Itsiata baitsi jane Dioso pejumelivaisi apo vereverecae tsane daxitamatacabijavabelianexa, jai Dioso pejumelivaisibaxutota.

Bajarapalivaisi papecacapanepaelivaisinexa, itsamonae baja pacatsipaeba.

2

¹ Bajaraxuata pacopare baja daxita pibisiacuene paneexanabiabijava itsamonaejavabelia. Pacoparenuua paneyamaxëitojorobabiabijava. Pacoparenuua saya yamaxëitojorobiaya panecuaicuaijaitisabiabijava. Tsipaji paxamë yamaxëitojorobiaya pacuaicuaijamë tsabiabi itsamonae bepapexaniajamatabëcuenevimë papecataenexa. Pacoparenuua panecuenecaëbabiabijava itsamonae. Pacoparenuua panebaracuaicuaijaitisabiabijava pibisiacuena itsamonae. ² Pacuenia pejananaexanaenacueto bitso bajitsipa mitobarëmene piapaenexa, bajara pijinia pacuenia paxamë bitso pajitsipare Dioso pejumelivaisi. Bajarapalivaisi baja cajena bevaxaxaejava tanetsi vajajamatabëëthëtonexa. Nexata bajarapalivaisi panelebabiabixae, pacatsijamatabëcuenevitsabaponaena pevajënaeyabelia. Nexata bajarapalivaisi pejamatabëcueneta Dioso pacajamatabëcuene naveretsiaexanaena pacuenia Dioso pacatojitsipa. ³ Nexata baja pepacuene pajamatabëcuenyapëtaenename vajatuxanenë pexaniajamatabëcuenenëcuene. Bajaraxuata pajitsipaponare orijibia panevajënaeyabelia Dioso pejumelivaisi.

Pacuenia iboto apo vereverecae mapanacuataje, bajara pijinia pacuenia Cristo apo pevereverecaenë daxitamatacabijavabelianexa yabara pelivaisi

⁴ Vajatuxanenë Cristo raja bepiatajaiboto tsaponaponae. Apo pevereverecaenë daxitamatacabijavabelianexa. Nexata paimoxoyore bajaraponë. Vajatuxanenë Cristo

itsamonae apo pejumecovënëtsixaetsi, pacuenia ibota bo pexanaevi pibisiaiboto naitaxutojematabuata, bajaraitsitsi. Itsiata baitsi jane Dioso tanetsi bepiatajaiboto, bepexania penamatamotsiiboto tsaponaponae. ⁵ Paxamë ata rabaja Jesucristojavabelia panenajamatabëcuenecopatsixae, bepaibotonëmë Dioso pacatane. Nexata padaxitamë Cristo papijajivixaemë, Dioso pacatane bepijatemplobo, ibotonëta bepexanaetemplobo. Tsipaji pacuenia Dioso ponapona templobota, bajara pijinia pacuenia Espiritu Santo pacatsijamatabëeca. Paxamë rabaja cajena Dioso panetonacuenebavanapaevi, baitsi papijasacerdotevimë. Nexata Jesucristo pejamatabëcueneta aneonijibia papecataexae, Diosojavabelia najamatabëcuenecopatsiaya pavajëtabiabianame Dioso papecasivajamatabëcuenecopatsiana bajaraponëjavabelia, bajarapajivi apo nacueratsi tsane, jai mapacueniaje:

Taitapetsinë netoponaponaena Jerusalén tomarata. Bajaraponë beiboto tsane. Nexata pacuenia ibota bo pexanaevi, itsaiboto bitso tsitanapanatsi daxitabotonëvecua, bajaraitsitsi tsane. Bepitapetsiibototsi tsane. Bitso bepenamatamotsiibotonua tsane. Nexata pajivi najamatabëcuenecopatsiana bajaraponëjavabelia, bajarapajivi apo nacueratsi tsane, jai mapacueniaje Dioso pejumelivaisibaxutota tajëvelia Dioso pejumaitsijava Cristo yabara.

⁷ Paxamë Cristo pelivaisi panejumecovënëtsivi, pataneme Cristo bepiatajaiboto tsaponaponae, bitso bepenamatamotsiibotonua. Itsiata baitsi jane pamonaevia Cristo pelivaisi apo pejumecovënëtsivi, bajarapamonae bepiabejeiboto tanetsi Cristo. Tsipaji baja copiajopa pacuenia Dioso pejumelivaisibaxutota tajëvelia najumecapanepaeya jumaitsi Cristo yabara. Tajëvelia Cristo yabara comparacióncuenia jumaitsi mapacueniaje:

Paiboto boexanaevi naitaxutojematabuata bepetsitaabejexaetsi itajara, bajarapaiboto itsamonae pita. Nexata bajarapaibotota xaniavaetsia yaëta botabu daxita itsaibo matatoxenetsia,

jai Dioso pejumelivaisibaxutota comparacióncuenia Cristo yabara.

Bajarapacuenia jumaitsi itsamonae Cristo apo pejumecovënëtsijavanexatsi yabara. ⁸ Copiajopanua jane baja Dioso pejumelivaisibaxutota tajëvelia Cristo yabara pejumait-sijava mapacueniaje: “Bajarapaiboto jivi pefirapecaeyaexanaeiboto tsane,” pejaijava Cristo yabara. Bajarapacuenia Dioso pejumelivaisibaxuta jumaitsi jivi itsa apo jumecovënëtsi Cristo pelivaisi, Diosovecua penaxuabijavanexa yabara jumaitsi. Tsipaji tajëvelia Dioso yapëtane jivi apo pejumecovënëtsijavanexa pexanialivaisi, Cristo pelivaisi, pecapanepaelivaisinexatsi picani.

Dioso pijajivi yabara pelivaisi

⁹ Dioso apo pejumecovënëtsivivecua, paxamë baja Dioso pacaitapeta papijajivinexamë. Dioso baja papijasacerdotevimë tsavanapaua, daxitacuenepo pevetsinë panetonacuenebavanapaexae. Dioso baja papijajivimë tsavanapae panevajunupae-bavanapaenexa Dioso ayaicue pexanaejavanë. Dioso baja cajena pacajunata pibisiajamatabëcuenevecua, mapanacuataje pitaquirijamatabëcuenevecua. Nexata baja pajunuame pexaniajamatabëcuenejavabelia, Dioso pitayotsijamatabëcuenejavabelia. ¹⁰ Paxamë abaxë Cristo panejumecovënëtsivajënaeya, Dioso picani apo papijajivimë. Itsajivi ata picani abaxë paxamëyajuvënëvi Dioso apo itaxutotsoniataetsi. Itsiata baitsi jane aeconoxae baja Dioso papijajivimë pacaexana papecaitaxutotsoniataexae.

Pacuenia Dioso pejumecovënëtsivi jinavanapa Dioso petonacuenebavanapaenexa yabara pelivaisi

¹¹ Tajamonae bitso patacaasivavi, mapanacuataje abaxë pajinavanapae atamë, athëbëtatsia baja Dioso pijanacuatatsia bepanejinavanapaevi panataema. Saya raja

caepatoyonexa mapanacuataje pajinavanapame. Bajaraxuata pacatoyaquinatsi mapacueniaje daxita picani papibisiacuene jamatabëpaexaname panecopabinexa. Bajarapitsijamatabëcuene jamatabënacanamatabëcuene bijianaeyaexana vajajamatabëcuenejavavetsina. ¹² Dioso apo peyapëtaevi petuatuajëa itsa pajinavanapame, xaniavaetsia patsitajinavanapaename. Aeconoxae pacabaracuaicuaijai ata bepibisiacuene paneexanaevi papecataexae, itsiata itsamatacabijavabelia itsa najamatabënapitsiana pexaniacuene paneexanaejava, bajarapamonae ata Dioso jumecovënëtsiana. Nexata bajarapamonae jumaitsi tsane Diosojavabelia: “Diosomë, bitso ayaijamatabëcuenenëmë,” jai tsane. Bajarapacuenia jumaitsi tsane itsa copiapatsiana pamatacabi Dioso naneconitsiaexanaejitsia daxita pamonae Dioso apo pejumecovënëtsivi.

¹³ Dioso papijajivixaemë, pajumecovënëre pacuenia pacaitoroba pamonae nacua pevetavanapaevi. Daxita raja bajarapamonae mapanacuapijivi pejamatabëcueneta evetsiaexanatsi. Nexata pajumecovënëre presidentenë, ponë jane baja daxitajivi pevetsinë. ¹⁴ Pajumecovënërenua nacua pevetsivi. Bajarapamonae presidentenë itorobatsi penaneconitsiaexanaenexa pibisiacuene pexanaevi. Itorobatsinua pejumaitsinexa pexaniacuene pexanavanapaevijavabelia: “Xanepana rabaja xua paexaname,” pejainexa. ¹⁵ Bajarapamonae pajumecovënëre. Tsipaji raja Dioso pacatojitsipa xaniavaetsia panejinavanapaenexa. Nexata bajarapacuenia itsa patsitajinavanapaename, belia moya tsane itsamonae papecabaracuaicuaijajava, pamonae apo pejumecovënëtsivi pexanialivaisi, Cristo pelivaisi.

¹⁶ Paxamë picani pajumecovënëtavanapame Dioso Moiséspijinëta penajumecopatsilivaisi. Nexata picani paexanabiabame pacuenia pacaitoroba Dioso Moiséspijinëta penajumecopatsilivaisi. Aeconoxae baja Cristo pelivaisi panejumecovënëtsixae, apo pajamatabëcueneevetsimë baja pacuenia Dioso Moiséspijinëta penajumecopatsilivaisi pacaitoroba paneexanaenexa. Itsiata baitsi jane pibisiacuene paneexanaenexa apo pacatocopatsi. Biji rajane Dioso pacatocopata pacuenia Dioso jitsipa panetonacuenebavanapaenexa. ¹⁷ Daxitajivi yaiyataeya pajinavanapare. Itsamonae ata, pamonae Dioso pejumecovënëtsivi, pasivamëre. Cujunaviaya Dioso payaiyataema. Payaiyataema presidentenë ata.

Pacuenia itsamonae Cristo bejiobiaexanae atatsi, itsiata ajamatabëcuenesaë tsaponapona, bajara pijinia pacuenia Cristo pejumecovënëtsivi ata itsamonae bejiobiaexanae atatsi, pajamatabëcuenesaë tsavanapaenexa, yabara pelivaisi

¹⁸ Paxamë itsamonae panetonacuenebavanapaevi, pacamuxujiobatsi mapacueniaje. Pajumeyaiyataeyabiabare pacuenia pacaitorobabiaba panijatuxanevi. Ëpexaniajamatabëcuenevi pëtsa panijatuxanevi pajumeyaiyataneme. Pajumeyaiyataema panijatuxanevi, piacujirubejevi ata. ¹⁹ Panijatuxanevijavabelia itsacueneneconi apo paxainae atamë, panijatuxanevi pacabejiobiaexanabiabijitsipa. Nexata panijatuxanevi papecabejiobiaexanabiabijavata: “Dioso nitaxutobejiobiataena,” itsa pajamatabëjamë tsabiabi tsipae, nexata Diosojavabelia pacatonamatamotsipa. ²⁰ Itsa pananeconitsipame panijatuxanevijavabelia, nexata bajarapaneconi yabara panijatuxanevi pacaconitsipa. Nexata papecabejiobiaexanaejavata: “Dioso nitaxutobejiobiataena,” pajamatabëjamë ata tsipae, itsiata Diosojavabelia pacatoamatamobi tsipae. Itsa jume, pexaniacuene paexanae atamë, panijatuxanevi pacaconitsipa. Nexata papecabejiobiaexanaejavata: “Dioso nitaxutobejiobiataena,” itsa pajamatabëjamë tsipae Diosojavabelia, nexata Diosojavabelia pacatonamatamotsipa. ²¹ Bajarapacuenia itsacueneneconi apo paxainaenejevamë, itsamonae pacabejiobiaexanaponaena. Tsipaji Dioso bajarapacuenia pacatocopata itsamonae papecabejiobiaexanaponaenexa. Payapëtaneme rabaja mapacuenije. Cristo itsa pacasivatëpa, bejiobiaexanatsi itsacueneneconi xainaenejeva. Nexata paxamë ata

Dioso pacatocopata itsamonae papecabebiobiaexanaenexa. ²² Itsacuenejava ata pibisiacuene apo exanae Cristo. Apo yamaxëitojorobi cajena itsajiviyojavabelia ata. ²³ Pibisiacuenia Cristo bijatae atatsi itsamonae, itsiata juya pibisiacuenia apo jumecanaviatsi. Bejibiaexanae atatsi jivi, “Neyamatamotsiana Dioso,” apo jai Cristo bajarapamonaejavabelia. Biji rajane bajarapamonaejavabelia Cristo cujirucanaviatsinejeva, copata bajarapamona Dioso penaneconitsiaexanaenexatsi pamatacabi Dioso naneconitsiaexanaena pijaneconi pexainaevi. ²⁴ Cristo cruzata itsa tēpa, tsijumaxuabatsi vaxaitsi pibisiacuene vajaexanaeconi. Bajarapacuenia Cristo nacatoexana vajacopatsinexa pibisiacuene vajaexanaejava. Bajarapacuenia Cristo nacatoexanana vajavajēnaeyabelia vajinavanapaenexa Dioso pejitsipaecuenia. Cristo pacasivavajēnērubatsi paxamē papecajamatabēcuene xaniavaetsinexa pibisiajamatabēcuenevecua, xaniavaetsia panejinavanapaenexa Dioso pitabarata. ²⁵ Paxamē picani Diosovecua naxuabiaya pajinavanapame. Pacuenia oveja pevetsinētsivecua naxuabiaya jinavanapa, bajara picani paitsimē. Itsiata baitsi jane aeconoxae baja Cristo pejamatabēcueneta panaviabame Diosojavabelia. Pacuenia pijaoveja pevetsinē xaniavaetsia baevetaponapona pijaoveja, bajara pijinia pacuenia Cristo pacaevetaponapona. Panejamatabēcuene ata Cristo evetaponapona.

3

Pacuenia penacojobivi xaniavaetsia benabarējinavanapa yabara pelivaisi

¹ Paxamē papetiriavimē, pacamuxujiobatsi mapacueniaje. Pacaevamē canacujitsia paneamonajivi jumecovēnētsiaya pajinavanapare. Pova pamona abaxē apo jumecovēnētsi Jesús pelivaisi, bajarapova xaniavaetsia tsitaponapona pamona, pamona ata Jesús pelivaisi pejumecovēnētsinexa. Nexata bajarapova pamonajavabelia Jesús pelivaisi apo tsipaebi ata, pamona ata jumecovēnētsiana Jesús pelivaisi xaniavaetsia petsitaponaponaexae pamona. ² Bajarapacuenia pamona ata Jesús pelivaisi jumecovēnētsiana, pijava itsa cuenetaena Dioso paneyaiyataejava, itsa cuenetaenana pijava Dioso pitabarata aneconijibia peponaponaejava. ³ Papetiriavimē, pētsa pajamatabējumaitsimē mapacueniaje: “Bepexaniavanē jivi tanetaenexa, naxatatsianajē naitabētsiaya. Namatafaratsianajē naitabētsiaya. Oronanita pexanaejavanēta naitabētsianajē. Itsa jume, nexata bitso pexaniaviriana naxatatsianajē,” pajamatabējamē pētsa. Pētsa bajarapacuenia panajamatabēxainame saya naniavelia panenaitabētsinexa. ⁴ Biji rajane bēpēnēaverena panajamatabēcueneitabēre. Bēpēnēaverena panenajamatabēcueneitabētsinexa, xaniavaetsia aneconijibia pajinavanapaename Dioso pitabarata. Nexata itsamonae pacaitsacueniabi ata, pētsa pacuenecanaviatame. Nexata xua bēpēnēaverena panajamatabēcueneitabētame, apo pacatovereverecae tsane. Bajarapitsijamatabēcuene pexainaeva tonamatamotsianatsi Diosojavabelia. ⁵ Pamonaemi petiriavi bajayatami Dioso pejitsipaecuenia exanavanapa, bajarapacuenia bēpēnēaverena Dioso pejumelivaisita najamatabēcueneitabēta. Bajarapamonaemi najamatabēcuene copata Diosojavabelia. Jumecovēnētavanapanua pamonajivi. ⁶ Bajarapamonaeyajuvēnēvami, Sarapijivami, Dioso pejumelivaisita najamatabēcueneitabēta bēpēnēaverena. Sarapijivami jumecovēnētsia ponapona pamona, Abrahampijinē. Itsa junata pamona, “Tajatuxanenē,” jai tsabiabi pamonajavabelia. Papetiriavimē, panajamatabēcuene copatavanapare Diosojavabelia. Paexanavanaparenua pexaniacuene. Pētsa pacujunavamenua pacaitsacueniabijitsia ata itsajivi papecaitoxaxae. Nexata bajarapacuenia itsa paexanavanapaename, pajamatabēcuenejēpaename Sarapijivami.

⁷ Paxamē papebijivimē, pacamuxujiobatsi mapacueniaje. Xaniavaetsia pabarējinavanapare panijavajivi. Pacuenia Dioso nacaitoroba, bajarapacuenia payaiyataema panijavajivi. Bajarapacuenia payaiyataema tsipaji raja bajarapamona

vaxaitsi pebijivitsi nacavecuaasaëjibi. Payaiyataema tsipaji raja bajarapamonae ata yajava Dioso pacarajutsiana matacabi apo pevereverecaejava. Bajarapacuenia panijavajivi yaiyataeya pabarëjivanapare paneajumeurayaniva panenavajëtsijava Diosojavabelia.

Pacuenia pexaniacuene pexanaevi ata itsamonae bejiobiaexanaenatsi yabara pelivaisi

⁸ Tajamonae bitso patacaasivavi, pematatsënëa pacamuxujibatsi mapacueniaje. Najamatabëcuenejëpaeya pajinavanapare. Paxamëyajuvënëjivi itsacuene itsa tocopi-apatatsi, nexata bajarapacueni yabara bitso itsa najamatabëxaina, paxamë ata pacobenanamatabëxainare. Daxita Dioso panenajuajumecovënëtsivixae, namataenetsia panaasivamëre. Naitaxutotsoniataeyanua pajinavanapare. Beveliajamatabëcuenevinua nataeya pajinavanapare. ⁹ Itsajivi pibisiacuene itsa pacaexana, pëtsa pacuenecanavi-atame. Pibisiacuena itsa pacabijatanenua, pëtsa pajumecanaviatame. Biji rajane bajarapajivi patovajëre Diosojavabelia Dioso peyavenonaenexatsi. Tsipaji pamatacabi Dioso pacajunata papijajivinexamë, bajarapacuenia paneexanaenexa, pacaitoroba. Nexata juya paxamë Dioso pacaitaxutotsoniataena pacuenia najumecapanepaeya pacajumaitsi papecayavenonaenexa. ¹⁰ Bajarapacueni yabara Dioso pejumelivaisibax-utota jumaitsi mapacueniaje:

Pajivi jitsipa peponaponaenexa jamatabëcuenebarëyaya, bajarapajivi benaebaretoeveta pibisialivaisi pecuaicuaijayaniva. Benaebaretoevetanua penajumetsënëtsiyaniva ata. ¹¹ Bajarapajivi becopata pibisiacuene pexanabiabijavami pexanaponaenexa pexaniacuene. Beponapona xaniavaetsia itsajivi ata pebaraanaepanaeyanivatsi. ¹² Bajarapacuenia beponapona. Tsipaji raja Dioso naitaxutocaeveta xaniavaetsia pejinavanapaevi. Namuxunaevetanua penavajëtsijavatsi bajaraponëjavabelia. Dioso cajena baraanaepana pamonaevi pibisiacuene pexanavanapaevi, jai Dioso pejumelivaisibaxutota.

¹³ Itsa pajamatabëcuenesaëmë tsavanapae tsane pexaniacuene paneexanavanapaejava, nexata itsamonae pacabejiobiaexanae ata, itsiata apo pacajamatabëcuene bijianaecapanepae tsane. ¹⁴ Itsa pacabejiobiaexanaena xaniavaetsia pajinavanapae atamë, itsiata pajamatabëcuenebarëyamë tsane. Tsipaji raja Dioso pacayavenonaena. Pëtsa pacujunavame bajarapamonae. Pëtsa panasivajamatabëcuenebëjamënuapapecabejiobiaexanaejava yabara. ¹⁵ Biji rajane panejamatabëëthëtojavavetsina yaiyataeya pajumecovënëre vajatuxanenë Cristo. Panajamatabëcuene veretavanaparenua xaniavaetsia panejumecanaviatsinexa itsajivi itsa pacayanijoba vajatuxanenë Cristo panejumecovënëtsijava yabara. Nexata itsa pacayanijoba mapacueniaje: “¿Detsa xua-jitsia xamë jumecovënëtame Cristo?” itsa pacajai, nexata xaniavaetsia pajumecanaviatsianame. Itsiata baitsi jane itsa pajumecanaviatame, paxamë beveliajamatabëcuenevi panataename. Nexata bajarapajivi yaiyataeya pajumecanaviatsianame. ¹⁶ Cristo papijajivixaemë, pexaniacuena pajinavanapaename. Nexata payapëtaename Dioso pitabarata aneconijibia panejinavanapaejava. Nexata itsamonae najumetsënëtsiaya pacabaracuaicuaijai tsabiabi ata tsane, bajarapamonae belia najumecopatsiana papecabaracuaicuaijajava. Naurabiana papecabaracuaicuaijajitsabiabijava yabara. ¹⁷ Pexaniacuene paexanabiabi atamë, Dioso itsa pacatocopatsiana itsamonae papecabejiobiaexanaenexa, nexata bajaraxua pacatonamatamotsiana Diosojavabelia. Itsiata baitsi jane itsamonae itsa pacabejiobiaexanaejitsipa pibisiacuene paneexanaejava yabara, nexata bajaraxua apo pacatonamatamotsi tsipae Diosojavabelia.

¹⁸ Cristo ata bejiobiaexanatsi itsa nacasivatëpa pibisiacuene vajaexanaeconeni yabara. Caeto rabaja Cristo tëpa. Pematatsënëa baja apo nacasivatëpae tsane. Bajaraponë pepo pexaniacuene pexanaenë. Itsiata bejiobiaexanatsi vaxaitsi yabara, pibisiacuene vajaexanaevi, vajanacapanepaenexa Diosojavabelia. Peperabëtomi baja pi-

cani tēpa. Itsiata baitsi jane pepo pejamatabēcuene jane baja icatsia Dioso asaēyaexanatsi. ¹⁹ Nexata abaxē Cristo petēpaenē itsa boca, pepo pejamatabēcuene jane baja pona petēpaevijavabelia pexanialivaisi petsipaebinxaxa. Tsipaji bajarapamonae naneconitsia jinavanapa petēpaevi pijanacuata. ²⁰ Bajarapamonaemi bajayata jinavanapa, pamatacabi Noépijinē ponapona. Bajarapamonaemi petēpaevajēnae Dioso apo jumecovēnētsi. Noépijinē abaxē itsa exanabuatapona pinijibarcoxaneto, Dioso picani bajayajebi jamatabēcueneeveta pejumecovēnētsinexatsi daxita mapanacuapijivije. Itsiata baitsi jane apo jumecovēnētsi. Saya ocho pajiviyobeje, Noépijinē, pijamonae yajava, bajarapamota Dioso capanepatsi mapanacuaje pebubutsijavavecua. Yajavacapanepatsinua mapanacuataje pibisiacuene pexanaejavavecua. ²¹ Bajara pijinia itsi itsa nacabautisaba merata. Vajanacabautisabicujinae, meravecua itsa nonotajunatsi, itajētatsi vajacopabijava pibisiacuene vajaexanaejavami. Apo nacabautisabi baja cajena saya vajanacaperabēquiatsinexa. Biji rajane nacabautisaba vajanacajamatabēcuenequiatsinexa vajavajētsixae Diosojavabelia. Nexata Dioso vajanacajamatabēcuenequiatsijava, pexaniajaicuene. Tsipaji Jesucristo vajanacasivatēpaecujinae, icatsia Dioso asaēyaexanatsi. Bajarapacuenia Jesucristo Dioso piasaēyaexanaexaetsi, nexata yapētanetsi pepacuene Dioso vajanacapanepaejavanexa. ²² Jesucristo Dioso piasaēyaexanaecujinaetsi, pona jane baja athēbēabetsia. Nexata athēbētatsia Jesucristo eca paxa Dioso pecujanenia. Daxita ángelevi Jesucristo jamatabēcueneevetatsi pitorobinxaxa.

4

Pacuenia Dioso asaēyata betonacuenebavanapatsi, pacuenia Dioso nacajamatabēcuene caējēpaeyaexana, yabara pelivaisi

¹ Cristo abaxē itsa ponapona mapanacuataje, itsamonae bejiobiaexanatsi. Bajara pijinia pacuenia paxamē ata tajēvelia bepaevetavanapame itsamonae papecabejiobiaexanaenexa. Pajivi bejiobiaexanatsi Cristo pelivaisi pejumecovēnētsixae, bajarapajivi pevajēnaeyabelia jamatabēcuenesaē baja tsaponae. Copata baja pibisiacuene pexanaejava. ² Pevajēnaeyabelia jamatabēexanaponapona pacuenia Dioso tojitsipatsi. Pibisiacuene baja apo exanae pacuenia Dioso apo pejumecovēnētsivi penatojitsipaecuenia baexana. ³ Dioso panejumecovēnētsivajēnaeya, pibisiacuene paneexanavanapaeneconi yabara, ayaicuenia picani pananeconitame Diosojavabelia. Dioso panejumecovēnētsivajēnaeya, panevitota pibisiacuene paexanabiabame. Panajamatabēxainabiabamenua epibisiacuene yabara. Paitajibimēnua tsabiabi panijabonējava. Paitajibimēnua tsabiabi fiestajava ata. Jumapecataeya pexanaenēanējavabelia ata panavajēcabiabame. Itsiata baitsi jane aeconoxae baja daxita bajarapacuene pacopabame. ⁴ Nexata pamonaē Dioso apo peyapētaevi, pibisiacuene panenajuaexanabiabivimi, aeconoxae baja pacasivajamatabēcuenenabenajaca. Tsipaji papibisiacuene bajarapamonae exana, paxamē baja apo pajamatabēcueneyavenonaemē. Bajaraxuata bajarapamonae pibisiacuenia pacabaracuaicuaijai. ⁵ Itsiata baitsi jane bajarapamonae itsamatacabi Dioso pitabarata nubianatsi. Nexata daxita bajarapamonae pibisiacuene pexanavanapaeneconi yabara, Dioso naneconitsiaexanaenatsi. Piasaētsavanapaevi, petēpaevimi ata, daxita Dioso naneconitsiaexanaena. ⁶ Petēpaevimijavabelia baja picani bajayata itsamonae tsipaebatsi pexanialivaisi, Cristo pelivaisi, itsa abaxē asaē tsavanapae bajarapamonaemi. Itsiata daxita bajarapamonaemi apo jumecovēnētsi Cristo pelivaisi. Itsiata bajarapamatacabi itsamonae baja jumecovēnēta Cristo pelivaisi. Nexata xuacujinae daxita bajarapamonaemi tēpaponā. Itsiata baitsi jane pamonaē baja pepuajumecovēnētsi Cristo pelivaisi, tēpa, bajarapamonae xaina baja matacabi apo peverevereaejava.

⁷ Imoxoyo rabaja pevajēnae peverevereaeenexa mapanacuaje. Bajaraxuata itsacuenejava ata pibisiacuene paexanaenejevamē, xaniavaetsia pajinavanapare. Namataenetsianua najamatabēcueneevetsiaya xaniavaetsia pajinavanapare

panenajuavajëtabiabinexa Diosojavabelia. ⁸ Namataenetsia panaasivamëre tsavanapae. Bajarapacuenene daxitacuene matatoxenetsia bitso nacatoxanepana vajaexanaenexa. Tsipaji itsa asivatsi itsajivi ata, nexata pibisiacuene nacaexanabiabi ata, bajarapajivi apo barajamatabësitecaetsi. ⁹ Namataenetsia xaniavaetsia panacopiapire panijaboyaberena jamatabëcuenexanepanaeya. ¹⁰ Pacaenëmë canacujitsia Dioso saicayacuenia pacajamatabëcuene caëjëpaeyaexanapona Dioso pijacuene panetonacuenebavanapaenexa. Nexata namataenetsia panajamatabëcueneyavenonare xua Dioso pacaenëmë canacujitsia pacajamatabëcuene caëjëpaeyaexanapona paneexanaenexa. Bajarapacuenia Dioso patonacuenebavanapare xaniavaetsia. ¹¹ Itsajivi itsamonaejavabelia itsa tsipaeba Dioso pejumelivaisi, bajarapajivi betsipaeba palivaisi Dioso yapëtaeyaexanatsi. Itsajivi pijinia itsa yavenonaejitsia itsanë, bajarapajivi beyavenona pacuenia Dioso jamatabëcuenecaëjëpaeyaexanatsi peyavenonaenexa. Daxita xua paexanaejitsiamë Jesucristo papijajivixamë, paexanare jivi peyaiyataenexa Dioso. Dioso baja cajena daxitacuene pitorobinë, penivenivenaecotia pexainaenë daxitamatacabijavabelianexa. Bajara itsi tsane.

Pacuenia Jesucristo pelivaisi pejumecovënëtsivi itsamonae bejiobiaexanaponatsi yabara pelivaisi

¹² Tajamonae bitso patacaasivavi, pëtsa pajamatabëcuenenabenajacame, itsamonae bitso pacabejiobiaexanaponae ata. Bajarapacuenene pacatocopiapatsiana papecajamatabëcueneëjëtsinexa papecajamatabëcueneyapëtaenexa pepacuene panenajamatabëcuenecopatsijava Diosojavabelia. Nexata pëtsa pajamatabëjumaitsimë: “Xanë cajena Dioso tajumecovënëtsinë. Nexata bajarapacuenia caenënë netocopiapatapona,” pajamatabëjamë pëtsa. Tsipaji raja daxita Dioso pejumecovënëtsivi bajarapacuenia tocopiapataponatsi pejamatabëcueneëjëtsinexatsi pejamatabëcueneyapëtaenexatsi pepacuene penajamatabëcuenecopatsijava Diosojavabelia. ¹³ Nexata saya panasivajamatabëcuenebarëyamëre tsavanapae paxamë ata itsa pacabejiobiaexanapona pacuenia Cristo bejiobiaexanatsi. Nexata pamatacabì pataeneme Cristo pepatsijavatsica pijapenivenivenaecotia yajava, pasivajamatabëcuenebarëyamë tsane. ¹⁴ Pibisiacuena itsamonae itsa pacabijatane Jesucristo pelivaisi panejumecovënëtsivixae, pasivajamatabëcuenebarëyamëre. Tsipaji raja paepatota itsamonae pacabijatane, ayaijamatabëcuenenë Espíritu Santo, ponë pacayajavaponapona, ayaicuenia pacayavenonaena. ¹⁵ Pëtsa jivitonë pabeyaxuabame. Pëtsa panacobetoxotame. Pëtsa paexaname itsacuenejava ata pibisiacuene. Pëtsa patoëvetame itsamonae pijacuene pacajunatsinejeva panetoëvetsinexa, bajarapacuenia itsamonae panejamatabëitonotsiyanima. Pëtsa bajarapitsicuene paexaname itsajivi ata paxamë yabara pejumaitsiyaniva: “Pibisiacuene pexanaevixae, bejiobiaexanatsi bajarapamonae,” pejaiyaniva itsa pacabejiobiaexana itsamonae. ¹⁶ Pajivi bejiobiaexanatsi Jesucristo pelivaisi pejumecovënëtsixae, bajarapajivi apo benacaura pebejiobiaexanaejavatsi. Pexaniajamatabëcuene berajuta Diosojavabelia Jesucristo pelivaisi pejumecovënëtsixae.

¹⁷⁻¹⁸ Dioso yapëtane pacuenia daxita pijajivi tojinavanapatsi. Nexata aeconoxae Dioso tocopiapatatsi pijajivijavabelia pejumaitsinexa: “Paxamë xaniavaetsia panetojinavanapame. Pexaniacuenua patoexanabiabame itsamonaejavabelia. Nexata pacasivajamatabëcuenebarëyatsi,” pejinexa Dioso, pexaniacuene pijajivi itsa toexanavanapatsi. Itsiata pamona Dioso pijajivi ata, xaniavaetsia Dioso apo tojinavanapae, pexaniacuenua apo toexanabiabi itsamonaejavabelia, bajarapamonaejavabelia Dioso jumaitsi tsane: “Paxamë apo pacasivajamatabëcuenebarëyatsi. Tsipaji tajitsipaecuenia apo paexanavanapaemë,” jai tsane. Bajarapacuenia Dioso itsa jumaitsi tsane pejumecovënëtsivitsijavabelia ata, çdetsa nexata Dioso jumaitsi tsane Dioso apo

pejumecovënëtsivitsijavabelia? Nexata Dioso ayaicuenia naneconitsiaexanaena bajarapamonae. Pamonaejavabelia Dioso jumaitsi tsane: “Pacasivajamatabëcuenebarëyatsi,” jai tsane, bajarapamonae Dioso capanepaena pijanacuayabetsia. Pamonaejavabelia ata Dioso jumaitsi tsane: “Paxamë apo pacasivajamatabëcuenebarëyatsi,” jai tsane, bajarapamonae ata itsiata tsiquirijavayota Dioso capanepaena pijanacuayabetsia. Bajarapacuenia Dioso itsa exanaena pejumecovënëtsivitsijavabelia ata, nexata biji pamonaepo apojumecovënëtsi Dioso pejumelivaisi, pamonaepibisiacuene pexanaevi, Dioso apocapanepae tsane pijanacuayabetsia. ¹⁹ Nexata paxamë Dioso pacatocopatsi ata itsamonae papecabejiobiaexanaponaenexa, pëtsa pajamatabëcuenebëjamë. Tsiteca panevajënaeyabelia pexaniacuene paexanavanapare. Panajamatabëcuene copare papecaexanaenë, Diosojavabelia, papecayavenonaenexa. Dioso cajena pacuenia najumecapanepaeya jumaitsi, bajarapacuenia pacatoexanaena.

5

Pacuenia Dioso pejumecovënëtsivi muxujibatsi yabara pelivaisi

¹ Aeconoxae ancianovi papecayajavajinavanapaevi, muxujibijitsianë. Xanë ata rabaja ancianonënë. Pacuenia itsi bajarapaancianovi, xanë ata rabaja itsinë. Taniji pacuenia Cristo cruzata bejiobiaexanatsi. Pamatacabi icatsia Cristo patsianica, daxitatsi, Cristo pijajivitsi, nacabarëevetsiana xua Cristo evetsiana. ² Pacuenia oveja pevetsivi xaniavaetsia baevetavanapa, bajara pijinia pacuenia paxamë ata xaniavaetsia paevetavanapare Dioso pejumecovënëtsivi, pamonaepacatocopata panetoevetsinexa. Jamatabëcuenebarëyaya Dioso pejitsipaecuenia patoetevavanapare Dioso pejumecovënëtsivi. Pëtsa pajamatabëjumaitsimë: “Apo jitsipae atanë tatoevetsinexa Dioso pejumecovënëtsivi, itsiata toevetsianajë. Tsipaji Dioso netojitsipa tatoevetsinexa,” pajamatabëjamë pëtsa. Pëtsa pajamatabëjumaitsimënu: “Tanematamotsinexa toevetsianajë,” pajamatabëjamë pëtsa. Paxamë panejamatabëëthëtojavavetsina panejitsipaexae Dioso pejumecovënëtsivi panetoevetsinexa, patoetevavanapare. ³ Pamonaepacatocopata panetoevetsinexa, bajarapamonae pëtsa bepapijatuxanevimë panataneme saya jema paneitorobabiabinexa. Biji rajane xaniavaetsia patsitajinavanapare pacuenia patojitsipame bajarapamonae pejinavanapaenexa. ⁴ Nexata pamatacabi icatsia Cristo patsianica, ponë jane baja pepo vajanacaevetsinënexa, nacarajutsiana pinijicuene. Xua Cristo nacarajutsiana, apo vereverecae tsane daxita matacabijavabelianexa.

⁵ Paxamë papevëjëavimë, pacuenia ancianovi pacaitoroba, pajumecovënëtabiabare. Pacaejivimë canacujitsia namataenetsia panayavenonabiabianame beveliajamatabëcuenevi nataeya. Bajarapacuenia panataema tsipaji raja Dioso pejumelivaisibaxutota jumaitsi mapacueniaje:

Dioso apoyavenonae pamonaepabayajamatabëcuenevi penataevi. Itsiata baitsi jane Dioso pitaxutotsoniataexae, pexaniajamatabëcuena yavenona pamonaepbeveliajamatabëcuenevi penataevi,
jai Dioso pejumelivaisibaxutota.

⁶ Nexata saya paxamë beveliajamatabëcuenevi panataema ayajamatabëcuenenë Dioso pitabarata. Nexata Dioso pecaëjëtsimatacabita, paayajamatabëcuenevimë pacaexanaena. ⁷ Dioso papecaasivaxae, paevetaponapona. Bajaraxuata daxita panejamatabëcuenebëjajava, pacopare. Pavajëre Diosojavabelia papecayavenonaenexa.

⁸ Nayajivitaeyanua pajinavanapare panijavajabitsaënë, dovathi, papecayamaxëitojorobianiva. Pacuenia nevëthë itsa piajani, jaitaponapona pexaeyabuatsinënexa, bajarajamatabëcueneitsi dovathi papecayamaxëitojorobinexa. ⁹ Paepatota dovathi jamatabëpacayamaxëitojoroba panecopabinexa Jesús pelivaisi panejumecovënëtsijava, bajarapaepatota pajamatabëcuenesaëmëre Jesús pelivaisi panejumecovënëtsijava.

Diosojavabelia najamatabëcuenecopatsiaya dovathi panayajiviitavere. Itsamonae itsa pacabejiobiaexana dovathi pejamatabëcueneta, panajamatabënapire pacuenia itsamonae ata, Dioso pejumecovënëtsivi, daxitanacuanëjava dovathi pejamatabëcueneta bejiobiaexanaponatsi. ¹⁰ Itsiata baitsi jane saya caepatoyo Dioso pacacopatsiana papecabejiobiaexanaenexa. Bjaraxuacujinae Dioso pacajamatabëcueneasaëyaexanaena. Bjaraponë Dioso vajanacayavenonaenë daxitacuenejavabelia. Nacajunatanua Jesucristo yajava athëbëtatsia vajanacayajavaecaenexa, penivenivenaenacuatatsia, daxitamatacabijavabelianexa. ¹¹ Dioso baja cajena daxitacuene pevetsinë daxitamatacabijavabelianexa. Bajara itsi tsane.

Pacuenia Pedro toyaquina peveretsinexa baja petoyaquinaelivaisi mapabaxutotaje yabara pelivaisi

¹² Silvano betajuyapijinë taniji bjaraponë ata Dioso pejumecovënëtsixae. Silvano yaquinaeyaexanajë palivaisi pacatoitorobijitsiatsilia. Bjaraponë ponaejitsia baja paxamëjavabelia. Nexata pacatoyaquinatsi mapabaxutoje patacajamatabëcuene asaëyaexanaenexa. Dioso vajanacayavenonabiabixae, yapëtanetsi baja xaniajai pepacuene Dioso vajanacaasivacuene. Bjaraxuata pacabejiobiaexanabiabi ata, pajamatabëcuenesaëmëre tsavanapae paneyapëtaexae baja bjarapacuene.

¹³ Dioso pejumecovënëtsivi, Babilonia tomarapijivi, pacajamatabënajina. Pacuenia paxamë Dioso pacaitapeta papijajivinexamë, bajara pijinia pacuenia bjarapamonae ata Dioso itapetatsi pijajivinexa. Marcos, ponë betaxënatocuenia tataenë, bjaraponë ata pacajamatabënajina. ¹⁴ Namataenetsia naasivaya panabajacobare bepanacaemonaemë panenataexae.

Pacatojitsipatsi daxita paxamë jamatabëcuenexanepanaeya panejinavanapaenexa Jesucristo papijajivixaemë. Bajara itsi tsane.

Mapabaxutoje San Pedro cotocaevi toyaquina Dioso pejumecovënëtsivijavabelia

Pacuenia Pedro mapabaxutoje cotocaevi toyaquina Dioso pejumecovënëtsivijavabelia yabara pelivaisi

¹ Xanë Simón Pedronë, Jesucristo taneitorobicuenia tatonacuenebaponaponaenë. Nitorobanua jivi tatsipaebabiabinexa Jesucristo pelivaisi. Pacatoyaquinatsi mapabaxutoje paxamë baja Dioso panejumecovënëtsivi. Jesucristo patanesivatëpaejava patajaneconi yabara patajumecovënëtsijava, paxanë panetonamatamota Diosojavabelia. Bajara pijinia paitsimë paxamë ata. Jesucristo papecasivatëpaejava panijaneconi yabara panejumecovënëtsijava, pacatonamatamota Diosojavabelia. Bajarapacuenia daxitatsi Jesucristo vajanacasivatëpaejava vajaneconi yabara vajajumecovënëtsijava, nacatonamatamota Diosojavabelia. Tsipaji vajatuxanenë Jesucristo, vajanacacapanepaenë, nacaneconimatamota baja. ² Pacatovajëtatsi Diosojavabelia bitso papecayavenonaponaenexa daxitacuene yabara. Pacatovajëtatsinua jamatabëcuenexanepanaeya panjinavanapaenexa. Bajarapacuenia Dioso pacayavenonaponaena panevajënaeyabelia, Dioso itsa pajamatabëcueneyapëtaeponaename, vajatuxanenë Jesucristo ata itsa pajamatabëcueneyapëtaeponaename.

Pacuenia Dioso pejumecovënëtsivi jamatabëcueneitsi tsavanapae yabara pelivaisi

³ Dioso, ponë nacajunata pijajivinexatsi, yapëtanetsi baja bitso ayaijamatabëcuene pexainaenëcuene. Bajaraponë Dioso bitso pexaniacuene pexainaenë. Bajaraponë Dioso pesaëta pinijicuene pexanaejava, itsa exana mapanacuataje, nacatsitanajamatabëcueneitajëta bitso ayaijamatabëcuene pexainaenëcuene. Bajarapacuenia itsa yapëtaeponatsi Dioso, nexata Dioso nacarajutapona pesaë vajajinavanapaenexa xaniavaetsia pacuenia Dioso nacatojitsipa. ⁴ Bajarapacuenia Dioso pinijicuene pexanaejevanë pexanaexae mapanacuataje, nexata yapëtanetsi Dioso xaniajai vajanacacapanepaejevanexa pacuenia najumecapanepaeya jumaitsi. Dioso vajanacacapanepaejevanexa pinijicuene bitso. Jumecovënëtatsi Dioso vajanacacapanepaejevanexa. Nexata Dioso nacayajavaponapona. Bajaraxuata Dioso pesaëta nacajamatabëcueneasaëyaexanaena vajajinavanapaenexa xaniavaetsia. Nexata nacajamatabëcuene caëjëpaeyaexanaena vajavecuapanepaenexa mapanacuata pibisiacuene vajanacaexanaeyaexanae jamatabëcuene. Nexata pacuenia Dioso jamatabëcueneitsi tsaponapona, bajara vaxaitsi ata jamatabëcueneitsitsi tsavanapae tsane. ⁵ Nexata pacuenia Dioso jamatabëcueneitsi tsaponapona, bajara panejamatabëcueneitsinexa, asaëyata Dioso pajumecovënëtaaponare. Asaëyata Dioso itsa pajumecovënëtaaponaename, nexata icatsia itsajava payapëtaeponaename. Asaëyata paexanavanapare epexaniacuene. Asaëyata itsa paexanavanapaename epexaniacuene, nexata icatsia orijibia pajamatabëcueneyapëtaeponaename Dioso. Nexata payapëtaename pacuenia Dioso pacatojitsipa asaëyata panetoexanavanapaenexa. ⁶ Paneyapëtaecujinae pacuenia Dioso pacatojitsipa asaëyata panetoexanavanapaenexa, icatsia payapëtaename panenajamatabëcuenecataitsinexa pibisiacuene panenajamatabëxainaeyaniva. Paneyapëtaecujinae panenajamatabëcuenecataitsinexa pibisiacuene panenajamatabëxainaeyaniva, icatsia payapëtaename dovathi pejamatabëcueneta bajayajebi pacajamatabëcueneëjëtaaponae ata, asaëyata panenajamatabëcuenesaëtsinexa ëDiosojavabelia. Paneyapëtaecujinae dovathi pejamatabëcueneta bajayajebi pacajamatabëcueneëjëtaaponae ata, asaëyata panenajamatabëcuenesaëtsinexa ëDiosojavabelia, icatsia payapëtaename xaniavaetsia panjinavanapaenexa pacuenia Dioso pacatojitsipa. ⁷ Paneyapëtaecujinae xaniavaetsia

panejinavanapaenexa pacuenia Dioso pacatojitsipa, icatsia payapëtaename asaëyata panenayavenonaenexa itsamonae ata Dioso pejumecovënëtsivi. Paneyapëtaecujinae paneyavenonaenexa itsamonae ata Dioso pejumecovënëtsivi, icatsia payapëtaename asaëyata namataenetsia bitso panenasivanexa bajarapamonaejavabelia.

⁸ Daxita bajaraxua asaëyata panevajënaeyabelia itsa paexanavanapaename, nexata pacuenia Dioso jamatabëcueneitsi tsaponaponae, bajara pajamatabëcueneitsimë tsane. Bajarapacuenia asaëyata itsa paexanavanapaename, nexata pajamatabëcuenevitsabaponaename Dioso panejumecovënëtsijava. Nexata Dioso ata tsitaxanepanaenatsi xua patonacuenebavanapame. Nexata vajatuxanenë Jesucristo panejamatabëcueneyapëtaejava, apo panacueratsimë tsane. ⁹ Itsiata baitsi jane pajivi apo exanae tsane daxita bajaraxua, nexata apo yapëtae tsane Dioso pijacuene. Tsipaji bajarapajivi nacofënëtsiana Dioso picani pevecuaajibiaexanaejavatsi pibisiacuene pexanaeconimi. ¹⁰ Tajamonae, bajaraxuata pacaasaëmëre tsavanapae Dioso panejumecovënëtsijava, jivijavabelia panetsitanaitajëtsinexa Dioso papecajunatsijava, papecaitapetsijava ata papijajivinexamë. Nexata bajarapacuenia itsa paexanavanapaename, Dioso panejumecovënëtsijavavecua, apo pajopaemë tsane. Pacacapanepaena Dioso. ¹¹ Nexata Dioso pacatocopatsiana panejonenexa vajatuxanenë Jesucristo vajanacacapanepaenënexa, pijanacuayabetsia, apo pevereverecaenacuayabetsia, paneyajavajinavanapaenexa.

¹² Daxita rabaja bajaraxua payapëtaneme. Pajamatabëcuenesaëmënuua baja panejumecovënëtsijava pexaniajailivaisi. Itsiata icatsia pematatsënëa pacanajamatabënapitsiaexanaponatsi. ¹³ Abaxë tasaëtsaponaponaeepato mapanacuataje, netsitaxanepana patacamuxujiobinexa, bajarapacuenia patacanajamatabënapitsia exanaponaeenexa. ¹⁴ Tsipaji baja vajatuxanenë Jesucristo tajëvelia neyapëtaeayaexana bepijia tatëpaejavanexa. ¹⁵ Itsiata baitsi jane pacuenia necaëjëpa, xaniavaetsia pacatoyaquinaenatsi panenacofënëtsiyaniva. Nexata itsa tēpajë, paxamë tavënamuto panenajamatabënapitabiabinexa pacuenia pacamuxujiobatsi.

Pacuenia Jesucristo pijajivijavabelia tsitanajamatabëcueneitajëta ayaijamatabëcuene pexainaenëcuene yabara pelivaisi

¹⁶ Imata vajatuxanenë Jesús pelivaisi itsa pacatsipaebatsi, xaniavaetsia pacatsipaebatsi mapacueniaje: “Vajatuxanenë Jesucristo baja cajena bitso pecaëjëpaenëtsi Dioso pesaëta pinijicuene pexanaejava pexanaenexa. Bajaraponë icatsia patsianica,” pacajaitsi. Saya jivi pejamatabëcueneta penajumetsënëtsilivaisi, apo pacatsipaebitsi. Tsipaji baja pataitaxutota pataniji vajatuxanenë ayaijamatabëcuene pexainaenëcuene. ¹⁷ Xaniavaetsia baja cajena pajumetaniji pamatacabi paxa Dioso athëbëvetsica barëcuaicuajajitsi. Bajarapaepatota daxitanë Cristo nivenivenareca. Athëbëvetsica paxa Dioso jumaitsitsica mapacueniaje: “Mara ponë taxënatōje, tasivanë. Bitso sivajamatabëcuenebarëyanë,” jaitsica paxa Dioso athëbëvetsica. ¹⁸ Vajatuxanenë Jesucristo payajavanubenajë petsutojumata, itsajota jane baja paxa Dioso athëbëvetsica barëcuaicuajajitsitsica. Nexata bajarapatsutojumata paxanë patajacuata pajumetaniji vajatuxanenë Jesucristo paxa Dioso athëbëvetsica pebarëcuaicuajajajavatsitsica.

¹⁹ Nexata pataniji. Payapëtanijinua. Xua bajayata Diosojumepaebivimi profetavi tajëvelia vajunupaeba pecopiapatsinexa, bajaraxua jane baja aeconoxae copiapata. Paxamë pibisiacuene panenayajivitaenexa, pajumecovënëre profetavimi pepaebilivaisi. Profetavimi pepaebilivaisi, pexaniajailivaisixae, belámpara picani. Pacuenia lámpara itayota pitaquirijavata, bajara pijinia itsi profetavimi pepaebilivaisi pibisiacuene panenayajivitaenexa mapanacuataje. Pajumecovënëre xaniavaetsia profetavimi pepaebilivaisi. Nexata bajarapalivaisi pacajamatabëcueneyavenonaena pibisiacuene panenayajivitaevanapaenexa mapanacuataje. Bajarapacuenia

pacajamatabëcueneyavenonaena matapania icatsia Jesucristo pepatsimatacabitsicajavabelianexa. Nexata bitso pabarëyamë tsane pamatacabi icatsia Jesucristo patsianica. ²⁰ Xaniavaetsia pacanaëjere daxitacuenevecua paneyapëtaenexa mapalivaisije. Daxita xua copiapatsijitsia mapanacuataje, tajëvelia Dioso pejumelivaisibaxutota vajunupaeba. Itsajivi ata cajena apo caëjëpaetsi saya pejamatabëcueneta bajaraxua xaniavaetsia pevajunupaebinxexa itsamonaejavabelia, itsamonaë ata peyapëtaenexa pajamatabëcuenelivaisi xaina bajaraxua. Matapania pajivi Espiritu Santo yapëtaeyaexanatsi, caëjëpatsi xaniavaetsia pevajunupaebinxexa bajaraxua. ²¹ Bajayata Diosojumepaebivimi profetavi tajëvelia itsa vajunupaeba daxita xua copiapatsijitsia mapanacuataje, pejamatabëcueneta apo exanaë bajarapalivaisi. Profetavimi Dioso pijajivixae, pacuenia Espiritu Santo yapëtaeyaexanatsi, paebabiaba.

2

Pacuenia Dioso pejumecovënëtsivi muxujiobatsi penajumetsënëtsilivaisi petsipaebaponaevi pejumecovënëtsiyaniva yabara pelivaisi (Jud 4-13)

¹ Bajayata itsamonaë tsipaebapona penajumetsënëtsilivaisi Israel nacuapijivijava Dioso pejumelivaisi bepaebivi petaenexatsi. Bajara icatsia aeconoxae ata itsane paxamëjava. Itsamonaë pacatsipaebiana penajumetsënëtsilivaisi. Bajarapamonae yamaxëitojorobiaya pacatsipaebiana penajumetsënëtsilivaisi. Nexata bajarapalivaisita pacacopabiaexanaena Dioso panejumecovënëtsijavami. Bajarapamonae apo pejumecovënëtsivi tsane vajatuxanenë Jesucristo, ponë picani sivatëpatsi pecapanepaenexatsi. Bajarapacuenia pexanaexae tsane bajarapamonae, nexata bepijia Dioso verebiabiana bajarapamonae. ² Bajarapamonae pevitota pibisiacuene exanavanapaena. Nexata bajaraxua yabara jumaitsi tsane: “Apo itsacuene itsiata, bajaraxua exanaë atatsi,” jai tsane bajarapamonae. Nexata ayaibitsaëto paxamëyajuvënëvi jumecovënëtsiana. Naexanaenanua papibisiacuene bajarapamonae exana. Nexata bajarapacuenia paxamëyajuvënëvi pibisiacuene petsitaexanaexae tsane, pamonaë Dioso apo pejumecovënëtsivi pibisiacuena baracuaicuaijai tsane pexanialivaisi, Jesucristo pelivaisi. ³ Nexata pamonaë penajumetsënëtsilivaisi tsipaebaponaena, bitso jitsipaena palata. Bajaraxuata pacatsipaebiana penajumetsënëtsilivaisi papecatsipaebijamatabëcuene papecavecuapitsinexa panijapalata. Itsiata baitsi jane Dioso tajëvelia najamatabëcuenevereta bajarapamonae penaneconitsiaexanaenexa. Nexata bajarapamonae bajarapitsixae tsane, pepacuene jemata Dioso naneconitsiaexanaena.

⁴ Angelevi ata baja cajena itsa naneconita, aneconijibia Dioso apo copatsi. Angelevi ata itsa naneconita, nexata Dioso xuaba infernojavabelia. Nexata bajara-jota, pitaquirinacuata, cëbiaya Dioso jinavanapaeyaexana. Nexata bajarapaängelevi Dioso jane baja naneconitsiaexanaena pamatacabi Dioso naneconitsiaexanaena daxita pijaneconi pexainaevi. ⁵ Dioso cajena aneconijibia apo copatsi bajayatami ata pamonaë pibisiacuene exana. Dioso ira bubutsiaexana bajarapamonae penaxuabinexa. Caenë, Noëpijinë, Dioso capanepa pijamonae yajava, siete pajiviyobeje. Noëpijinë picani itavetabiaba jivi pibisiacuene pexanaeyaniva. ⁶ Bajayata Dioso isotota verebiaba Sodoma tomarapijivimi. Bajara pijinia pacuenia Dioso verebiaba Gomorra tomarapijivimi ata. Nexata Dioso copiarucaeyaexana bajarapatomaramibeje. Tsipaji bitso pibisiacuene exana bajarapatomaramibejepijivi. Bajarapatomaramibeje nacopata ëipumana. Bajarapacuenia Dioso verebiaba bajarapamonaeami, pamonaë cotocaevi jinavanapa, peyapëtaenexa, bajarapamonae ata pibisiacuene pexanaeyaniva. ⁷ Pamatacabi Dioso verebiaba bajarapatomaramibejepijivi, caenë, Lotpijinë, Dioso capanepa pexaniacuene pexanabiabixae. Lotpijinë itsa taeyabiaba bajarapamonaemi bitso pibisiacuene pexanaejava, nexata bitso sivanajamatabëxainabiaba.

⁸ Lotpijinē pexaniacuene pexanaenē, bajarapamonaemi tuatuaĵēta naponapona. Nexata caematacabi canacujitsia Lotpijinē bitso sivanajamatabēxainabiaba, itsa tane bajarapamonaemi pibisiacuene pexanaejava, itsa vënëlivaisitanenua pibisiacuene pexanaejava. ⁹ Bajaraxuata vaxaitsi baja yapētanetsi mapacueneje. Vajatuxanenē caĵēpatsi pejamatabēcueneasaēyaexanaenexa pajivi najamatabēcuene copata vajatuxanenējavabelia. Nexata pajivi najamatabēcuene copata vajatuxanenējavabelia, dovathi itsa jamatabēcueneĵētatsi, vajatuxanenē jamatabēcueneasaēyaexana. Vajatuxanenē caĵēpatsinua pibisiacuene pexanaevi, nabejibitsiaya pejinavanapaeyaexanaenexa, mapanacuataje abaxē itsa asaē tsavanapae. Bajarapacuenia vajatuxanenē nabejibitsiaya jinavanapaeyaexanaena penaneconitsiaexanaenexa icatsia petēpaecujinae ata, pamatacabi naneconitsiaexanaena daxita pijaneconi pexainaevi.

¹⁰ Pamonaē bitso casaē tsavanapae pibisiacuene pexanaejava pijacuata penatujitsipaecuenia, bajarapamonaē bitso ayaicuenia Dioso naneconitsiaexanaena itsamonae penaneconitsiaexanaejava matatoxenetsia. Pamonaē ata apo jumecovēnētsi vajatuxanenē pevetsicuenetsi, bajarapamonaē ata Dioso bitso ayaicuenia naneconitsiaexanaena. Pamonaē penajumetsēnētsilivaisi petsipaebaponaevi, apo yaiyatae itsamonae ata. Ajamatabēcuenetajanua. Apo jumejunavinua bajarapamonaē pibisiacuenia pebaracuaicuaijainexa āngelevi. ¹¹ Angelevi biji picani bitso piasaēvi penajumetsēnētsilivaisi petsipaebaponaevi matatoxenetsia. Nexata āngelevi vajatuxanenē pitabarata pejinavanapaexae, bitso piasaēvi ata penajumetsēnētsilivaisi petsipaebaponaevi matatoxenetsia, itsiata pibisiacuenia apo baracuaicuaijai penajumetsēnētsilivaisi petsipaebaponaevi.

¹² Pamonaē penajumetsēnētsilivaisi petsipaebaponaevi, beveliajamatabēcuenevi saya. Pacuenia saya jinavanapa unupijidujuai, bajara saya jamatabēcueneitsi bajarapamonaē. Apo najamatabēxainae pexanialivaisi. Saicaya xua jamatabēexana, exanabiaba. Unupijidujuai saya jema bajinavanapa. Nexata jivi jemata itsa tane, vaetaba. Beyaxuabanua. Pamonaē penajumetsēnētsilivaisi petsipaebaponaevi, pibisiacuenia baracuaicuaijai tsabiabi xaniavaetsia apo peyapētaejava ata. Nexata pacuenia unupijidujuai baverebiabatsi, bajara pijinia pacuenia jemata Dioso verebiabiana bajarapamonaē. ¹³ Nexata Dioso bajarapamonaē juya bejiobia jinavanapaeyaexanaena. Tsipaji bajarapamonaē itsamonae bejiobiaexanabiaba. Bajarapamonaē pibisiacuene itsa exanabiaba, barēya tsabiabi. Bajarapamonaē apo pacajamatabēcueneĵepae ata, nanacae tuatsiana itsa panacae tuatame. Nexata yamaxēitojorobiaya pacayajavanabanebiabiana fiesta paneexanaematacabi. Bajarapamonaē pibisiacuene pexanabiabixae tsane, nexata panetuatuajēta bepiaxuirajava tsane.

¹⁴ Bajarapamonaē itsa tane petiriva, pibisiacuene jamatabēexanabiaba pevitota bejarapovajavabelia. Apo yabaracueranaē pibisiacuene pexanaejava. Penajumetsēnētsilivaisi petsipaebaponaevi, pibisiacuene exanaeyaexanabiaba pamonaē abaxē apo ajamatabēcuenesaē Dioso pejumecovēnētsijava. Bajarapamonaē bitso jitsipa daxitacuene pexanaejava ėpamonaenexa. Bitso yapētanenua pepitsinexa xua jitsipa. Nexata bajarapamonaē Dioso bitso ayaicuenia naneconitsiaexanaena. ¹⁵ Bajarapamonaē baja Diosovecua naxuabiaya jinavanapa. Tsipaji baja copaba pexaniaĵailivaisi pejumecovēnētsijavami. Apo jumecovēnētsi Dioso. Nexata bajarapamonaē cueneĵepa Diosojumepaebinēmi, profeta Balaampijinēmi, Beorpijinēmi pexēnato. Balaampijinēmi bajayata itsamonae tsipaebatsi palata pibisiacuene picani pexanaenexa. Nexata baja picani Balaampijinēmi jejai pibisiacuene pexanaenexa. ¹⁶ Itsiata baitsi jane Balaampijinē Dioso itavetatsi bajarapapibisiacuene bitso pexanaeyaniva Dioso pitabarata. Balaampijinē pijaburrota yanajetaruca. Dioso cuaicuaijaiyaexana burro. Nexata pacuenia jivitonē bacuaicuaijai, bajarapacuenia

Balaampijinē pijaburro barēcuaicuaijaitsi pitavetsinexatsi pibisiacuene pexanaeyaniva. Nexata picani xua Balaampijinē jamatabēexana, copata baja.

¹⁷ Pamonaē penajumetsēnētsilivaisi petsipaebaponaēvi, apo jumenamatamotsi. Yapētanetsi pacuenia baitsi meramatathaibēmi itsa tseveca. Meramatathaibēmi itsa tseveca, apo jamatabēcueneyavenonae itsajiviyo ata. Tsipaji itsajivi mera jitsipae ata, piapaenexa apo puatsi bajarajota. Bajara pijinia itsi pamonaē petsipaebaponaēvi penajumetsēnētsilivaisi. Itsajivi ata apo jamatabēcueneyavenonae bajarapamonaē petsipaebilivaisita. Pacuenia itarērēbo ata jovibota xaniavaetsia caecovēta apo rucae, bajara jamatabēcuenetsi bajarapamonaē. Caejamatabēcuene apo xainae. Nexata Dioso bajarapamonaē bitso ayaicuenia naneconitsiaexanaena. Bajarapamonaē pitaquirinacuata naneconitsia jinavanapaena daxitamatacabijavabelianexa.

¹⁸ Bajarapamonaē ayaijamatabēcuenevi nataeya cuaicuaijai tsabiabi. Itsiata baitsi jane saya natsiquejemalivaisi cuaicuaijai tsabiabi. Bajarapamonaē yamaxēitojorobiaya jumai tsabiabi: “Apo itsacuene raja apo payaiyatae atamē petiriva. Pibisiacuene itsa jamatabēpaexaname panevitota petirivajavabelia, paexanare,” jai tsabiabi bajarapamonaē. Bajarapacuenia bajarapamonaē othopaeyaexanapona pamonaē pejanajumecovēnētsivi Dioso. Tsipaji pibisiacuene exanaeyaexanapona.

¹⁹ Bajarapamonaē yamaxēitojorobiaya jumai tsabiabinua: “Itsa panejumecovēnētsianame patacatsipaebilivaisi, nexata pacatoxanepanaena paneexanabiabinexa daxitacuene,” jai tsabiabi pamonaē penajumetsēnētsilivaisi petsipaebaponaēvi. Itsiata baitsi jane bajarapamonaē apo jamatabēcuenecaējēpaetsi daxita xua pexaniacuene pexanaenexa. Saya ēpibisiacuene exanabiaba. Bajaraxuata Dioso bajarapamonaē verebiabiana. Tsipaji bajarapamonaē pibisiacuene exanabiaba pijacuata penatojitsipaecuenia, pacuenia pejamatabēcuene itorobatsi. Caejivitsi canacujitsia vajacuata vajanatojitsipaecuenia itsa exanaponatsi, vajajamatabēcuene bepijajivitonētsi naexanatsi. Tsipaji pacuenia vajajamatabēcuene nacaitoroba, exanaponatsi.

²⁰ Pamonaē baja yapētane vajatuxanenē Jesucristo, ponē capanepaejitsiatsi pibisiacuene pexanaeneconimivecua, bajarapamonaē baja Dioso vecuaajibiaexanatsi pibisiacuene pexanaeneconimi. Pajamatabēcuenemi ata jitsipaeyaexanabiabatsi pibisiacuene pexanaenexa, bajarapajamatabēcuenemi ata baja vecuaajibiaexanatsi. Itsiata baitsi jane bajarapamonaeyajuvēnēvi icatsia pibisiacuene itsa exanapona, nexata icatsia bajarapajamatabēcuene pejumecovēnētaponae, bitso naneconitsiana Diosojavabelia. Nexata jane baja copiaya pexanaeneconimi matatoxenetsia, bitsoyo ayaineconi natsixainaena.

²¹ Pamonaē copaba pexaniajailivaisi pejumecovēnētsijavami, bitso ayaineconi natsixaina Diosojavabelia. Bajarapamonaē itsa apo tsipaebi tsipaetsi bajarapapexaniajailivaisi, bevelia naneconitsipa Diosojavabelia. Tsipaji apo yapētae tsipae bajarapalivaisi. Nexata baja peyapētaexae bajarapalivaisi, pecopabixaenua pejumecovēnētsijavami bajarapalivaisi, naneconita bitso Diosojavabelia. Toxanepanaejitsipatsi meta bajarapamonaē itsa apo tsipaebi tsipaetsi bajarapalivaisi bevelia penaneconitsinexa Diosojavabelia.

²² Bajayatapijilivaisi jumaitsi mapacueniaje: “Aviri peyacabicujinae, icatsia nayacabixane. Marrano pijinia tsorobota peboacaecujinae, itsa matavanetsi pexaniamerata, pematavaecujinaetsi, icatsia caevēalia tsorobota boca,” jai bajayatapijilivaisi. Xaniajai baja cajena bajarapalivaisi. Bajara pijinia jamatabēcuenetsi pamonaē icatsia caevēalia pibisiacuene exana.

3

Pacuenia icatsia Jesucristo patsijitsiatsica yabara pelivaisi

¹ Tajamonae bitso patacaasivavi, copiaya baja cajena pacatoyaquinatsi itsabaxuto. Nexata icatsia mapabaxutoje cotocaevi pacatoyaquinatsi. Pacatoyaquinatsi bajara-pabaxutobeje patacamuxujiobinexa nexata xaniavaetsia panenajamatabëxainænexa. ² Panajamatabënapire pacuenia Diosojumepaebivimi profetavi bajayata tajëvelia jumaitsi. Panajamatabënapirenuua pacuenia baja cajena apóstolevi pacatsipaeba vajatuxanenë Cristo pelivaisi. Cristo, ponë papecacapanepaenënexa, copiaya tsipaeba apóstolevijavabelia. Nexata juya apóstolevi paxamëjavabelia pacatsipaeba. ³ Xaniavaetsia panamuxunaevere daxitacuenevecua paneyapëtaenexa mapacueneye. Nacua pecopiarucaevajënaeyotanexa, najetarubenaena itsamonae pecapocaponaevinexa pexaniajailivaisi. Bajarapamonae exanavanapaena pibisiacuene pacuenia pijacuata natojit-sipa. ⁴ Bajarapamonae Cristo pepatsijavanexatsica apo pejumecovënëtsixae, najumecquenetsiataeya saya jumaitsi tsane: “¿Jica Cristo icatsia pepatsijavanexatsica pacuenia baja Cristo tajëvelia najumecapanepaeya jumaitsi? Bajayata vajavajënaeyapijivimi, pamona jumecovënëta Cristo pepatsijavanexatsica, vajënaeetavanapa picani. Itsiata Cristo apo patsitsica. Nexata bajarapamonaemi belia baja tēpa Cristo patsinejevatsica. Daxitanacua abaxë itsiata tsitecanuca Dioso pexanaecujinae,” jai tsane saya bajarapamonae apo pejumecovënëtsixae Cristo pepatsijavanexatsica. ⁵ Bajarapacuenia jumaitsi tsane tsipaji bajarapamonae apo canaëjëtsi tsane pacuenia bajayata Dioso itoroba saya pijumeta itaboxo penaexanaenexa mapanacua yajavaje. Nexata mapairanexaje, manuumene tuatuajëatsina Dioso ira jumapitsapaeyaexanaina. ⁶ Bajayata pijinia mapanacuaje Dioso itsa bubutsiaexana, daxitajivi Dioso verebiaba merata. ⁷ Itsiata baitsi jane itaboxo, ira yajava, daxita xua tanetsi, Dioso pejamatabëcueneta abaxë xaniavaetsia tsitecanuca. Dioso abaxë xaniavaeta itsamatacabi isotota peveriapaenexa. Dioso isotota veriapaena mapanacuaje, itaboxo yajava, pamatacabi naneconitsiaexanaena daxita pijaneconi pexanaevi. Bajarapamatacabi Dioso naneconitsiaexanaena pibisiacuene pexanaevi. Dioso verebiabiana daxitacuene.

⁸ Tajamonae bitso patacaasivavi, pëtsa panacofënëtame mapacueneye. Vajatuxanenë saya tsitacaematacabitsi mil pavaibeje ata. Mil pavaibeje ata apo tsitabajayajebitsi. Betsitacaematacabi tsanucaetsi saya vajatuxanenë. ⁹ Itsamonae jamatabëcuenenavëxaniabiaya jamatabëjumaitsi: “Dioso bitso cuenenajemata pexanaenexa pacuenia najumecapanepaeya jumaitsi,” jamatabëjai. Vajatuxanenë raja apo cuenenajematsi. Xua raja vajatuxanenë bajayajebi becuenenajematsi, abaxë saya eveta jivi pejumecovënëtsinexatsi. Tsipaji vajatuxanenë apo jitsipae itsajivi ata pevecuanaxuabijavatsi. Vajatuxanenë raja jitsipa daxitajivi pecopabinexa pibisiacuene pexanabiabijava, penajamatabëcuenepënëyorotsinexa Diosojavabelia.

¹⁰ Vajatuxanenë baja cajena icatsia jemata patsianica. Pamatacabi jivi jamatejema jinavanapaena, jemata vajatuxanenë patsianica. Pacuenia penacobetoxotsinënexa jemata bapata, itsajota apo jamatabënajinaetsi, bajara pijinia itsi tsane vajatuxanenë. Jemata patsianica. Nexata jane baja bajarapamatacabita itaboxo copiarucaena. Ayaijume najumetsiana. Daxita athëbëpijiacuene vereverecaena isotota. Mapanacuamije, daxita xua tanetsi mapanacuataje, yajavatajuena isotota.

¹¹ Daxitacuene bajarapacuenia vereverecaena. ¡Bajaraxuata bitso xaniavaetsia bepajinavanapame Dioso papecatojitsipaecuenia! ¹² Bepacopiaeetavanapame vajatuxanenë pepatsijavanexatsica. Vajatuxanenë pijacuene bepatonacuenebavanapame bepimia pepatsinexatsica. Pamatacabita vajatuxanenë patsianica, itaboxo vereverecaena isotota. Daxita athëbëpijiacuene veriajaviana isotocotiata. ¹³ Itsiata baitsi jane xuacujinae Dioso icatsia pejanaitaboxo, pejanairanua, exanaena pacuenia tajëvelia najumecapanepaeya jumaitsi. Nexata vaxaitsi evetavanapatsi vajataenexa pejanaitaboxo, pejanairanua. Itsamatacabi pejanairata daxitajivi ëpexaniacuene exanavanapaena, xua Dioso tojitsipatsi.

¹⁴ Tajamonae bitso patacaasivavi, pejanaitaboxo, pejanairanua, panetaenexa, panecopiaevetavanapaeepato xaniavaetsia pajinavanapaename. Nexata pamatacabi vajatuxanenë icatsia patsianica, pacasivabarëya tsane. Bajarapacuenia pacasivabarëya tsane itsa pacacaxitajarabiana jamatabëcuenexanepanaeya aneconibia panejinavana-paejavata. ¹⁵ Pacanaëjere xua yabara abaxë vajatuxanenë apo patsitsica. Abaxë raja apo patsitsica daxitajivi apo pejumecovënëtsixae Dioso. Tsipaji daxitatsi vajatuxanenë jamatabënacacapanepa pijanacuayabetsia. Pacuenia daxitatsi vajatuxanenë jamatabënacacapanepa pijanacuayabetsia, bajaraxua vajaasivanë, vajabananë Pablo, peyapëtaenexa Dioso yavenonatsi. Nexata Pablo peyaquinaebaxutonëta, pacatoyaquina pacuenia vajatuxanenë daxitatsi jamatabënacacapanepa pijanacuayabetsia. ¹⁶ Pablo baja cajena peyaquinaebaxutonëta, pacatoyaquina pacuenia vajatuxanenë daxitatsi jamatabënacacapanepa pijanacuayabetsia. Pablo peyaquinaelivaisianë, itsalivaisi ayapëbeje tsabiabi vajajumeyapëtaenexa xua yabara Pablo yaquina. Nexata palivaisi apo jumeyapëtaetsi, apo yapëtaetsi pajamatabëcuenelivaisi xaina. Nexata pamonae xaniavaetsia apo jumeyapëtae Pablo peyaquinaelivaisianë, juya tsipaebabiaba itsamonaejavabelia apo jumeyapëtae ata. Pamonae ata caejamatabëcuene apo xinae Dioso pejumecovënëtsijava, juya itsamonaejavabelia tsipaebabiaba Pablo peyaquinaelivaisianë. Nexata bajarapamonae itsamonaejavabelia itsa tsipaebabiaba, Pablo peyaquinaelivaisianë mataropotsia saicayacuenia tsipaebabiaba. Bajarapacuenia itsabaxutonëta ata, perubenaelivaisianë ata, bajarapamonae saicayacuenia mataropotsia tsipaebabiaba. Bajarapamonae itsamonaejavabelia itsa tsipaebabiaba, apo tsipaebabiabi pacuenia Dioso pejumelivaisibaxutota jumaitsi. Saicayacuenia saya tsipaebabiaba. Nexata bajarapamonae pijacuata naneconita Diosojavabelia. Nexata Dioso verebiabianatsi.

¹⁷ Tajamonae bitso patacaasivavi, paxamë baja cajena tajëvelia payapëtaneme bajaraxua yabara. Bajaraxuata panayajivitaema pibisiacuene pexanaevi penajumetsënëtsilivaisi papecatsipaebiyaniva. Tsipaji papecatsipaebilivaisita, pacajopaeyaexanaejitsipa Dioso panejumecovënëtsijavavecua. ¹⁸ Pacatojitsipatsi paneajamatabëcuenesaë tsavanapaenexa Dioso panejumecovënëtsijava Jesucristo papecaitaxutotsoniataexae. Panevajënaeyabelia payapëtaeponarenuajajatuxanenë Jesucristo, ponë pacacapanepaejitsia pibisiacuene paneexanaeconivecua. Jesucristojavabelia daxitajivi jumai tsabiabi tsane: “¡Xamë Jesucristomë, bitso cajena ayaijamatabëcuenenëmë!” jai tsabiabi tsane daxitamatacabijavabelianexa. Bajara itsi tsane.

Mapabaxutoje San Juan copiaya toyaquina Dioso pejumecovënëtsivijavabelia

Cristo vajanacajamatabëcuene asaëyaexanaenë yabara pelivaisi

¹⁻² Pacatoyaquinatsi Dioso pexënato pelivaisi. Bajaraponë athëbëtatsia ponapona baja cajena pepo bajayatami ata, itsa abaxë Dioso apo exanae mapanacuaje. Nexata bajaraponë patsica mapanacuayabetsicaje. Bajaraponë itsa patsica mapanacuayabetsicaje, naexana pacuenia vaxaitsi baexanatsi. Nexata abaxë itsa ponapona mapanacuataje, bajaraponë patanetsipaebilivaisianë pajumetaniji. Bajaraponë pataniji baja cajena pataitaxutota. Pajayabajënuua patacobeta. Nexata bajaraponë pelivaisi pacatsipaebatsi. Bajaraponë matababi apo pevereverecejave pexainaenë. Paxa Dioso yajavaponapona. ³ Pacatojitsipatsi paxamë ata paneyajavajinavanapaenexa Dioso. Pacatojitsipatsi Dioso pexënato, Jesucristo, ata paneyajavajinavanapaenexa. Bajaraxuata pacuenia pataniji, pacuenia ata pajumetaniji bajaraponë patanetsipaebilivaisianë, juya paxamëjavabelia pacatsipaebaponatsi. ⁴ Nexata pacuenia pataniji, pacuenia ata pajumetaniji bajaraponë patanetsipaebilivaisianë, pacatoyaquinatsi mapabaxutotaje paxamë ata paneyapëtaenexa, bitso panesivajamatabëcuenebarëyanexa Jesús.

Dioso pejumelivaisita vajanacajamatabëcueneitayotsinë yabara pelivaisi

⁵ Palivaisianë rabaja Jesucristo panetsipaeba, bajara mapalivaisianëje juya paxamëjavabelia pacatoyaquinatsije. Dioso raja pejumelivaisita vajanacajamatabëcueneitayotsinë. Dioso raja apo pijamatabëcueneitaquirinë. ⁶ Bajaraxuata vaxaitsi jumaitsi atatsi: “Dioso raja vaxaitsi yajavajinavanapatsi,” jai atatsi, itsiata pibisiacuene itsa exanavanapatsi, nexata najamatabëcuenecepaebatsi. Najumetsënëtatsi saya Dioso vajayajavajinavanapaejava. Najumetsënëtatsinua pexaniacuene vaxaxanaejave ata. ⁷ Itsiata vaxaitsi xaniavaetsia itsa jumecovënëttavanapaenatsi Dioso pejumelivaisi pacuenia Dioso ata pijacuata bajarapalivaisi najumecovënëttaponapona, nexata vaxaitsi ata mapanacuata xaniavaetsia najamatabëcuenejëpaeya najuajinavanapaenatsi. Bajarapacuenia vaxaitsi itsa jinavanapaenatsi, nexata Jesucristo, Dioso pexënato, vajanacasivatëpaexae, nacavecuajibiaexanaena daxita vajapibisiajamatabëcuenemi.

⁸ Vaxaitsi pibisiacuene exanae atatsi, itsiata itsa jumaitsitsi: “Vaxaitsi cajena aneconijibitsi. Tsipaji pibisiacuene apo exanaetsi,” itsa jaitsi, nexata saya jamatabëcuenenavëxaniabatsi. Pexaniajailivaisi, Dioso pejumelivaisi, apo nacatsijamatabëceae. ⁹ Dioso baja cajena nacayavenonabiaba pacuenia najumecapanepaeya nacajumaitsi. Dioso pexanepanaecuene exanabiabanua. Bajaraxuata pibisiacuene vaxaxanaejavami, itsa navajunupaebatsi Diosojavabelia, nexata Dioso nacavecuajibiaexana pibisiacuene vaxaxanaeneconimi. Nacavecuajibiaexananua daxita pibisiajamatabëcuene vajaxinaejavami. ¹⁰ Vaxaitsi pibisiacuene exanae atatsi, itsiata itsa jumaitsitsi: “Vaxaitsi cajena caeto ata pibisiacuene apo exanaetsi,” itsa jaitsi, nexata saya jamatabëcuenenavëxaniabatsi. Dioso pejumelivaisi ata apo nacatsijamatabëceae. Bajarapacuenia itsa jumaitsitsi, nexata Dioso tanetsi bepenajumetsënëtsinë. Tsipaji Dioso pejumelivaisibaxutota jumaitsi pacuenia daxitatsi pibisiacuene ëvaxaxanaevi.

2

Cristo vajanacatocuaicuaijainë Diosojavabelia yabara pelivaisi

¹ Tajamonae, pacatoyaquinatsi mapalivaisije patacamuxujibinexa pibisiacuene paneexanaeyaniva. Itsiata baitsi jane cajena itsajivi pibisiacuene itsa exana, xainatsi

Jesucristo, vajanacayavenonaenë, vajanacatocuaicuajainë Diosojavabelia. Bajaronë cajena caeto ata pibisiacuene apo pexanaenë. ² Jesucristo vajanacasivatëpaexae, nacavecuaajibiaexana baja daxita pibisiacuene vajaexanaeneconimi. Itsiata ëvaxaitsi apo nacasivatëpae. Daxita mapanacuapijivije pibisiacuene pexanaeneconi pevecuaajibiaexanaenexa, Jesucristo sivatëpa.

³ ¿Detsa pacuenia nayapëtanetsi Dioso pijajivitsi? Itsa exanavanapatsi pacuenia Dioso nacaitoroba, nayapëtanetsi Dioso pijajivitsi. ⁴ Itsajivi jumaitsi ata: “Xanë raja cajena Dioso yapëtaniji,” jai ata, itsiata itsa apo jumecovënëtsi pacuenia Dioso itorobatsi, bajarapajivi saya najumetsënëta. Pexaniajailivaisi cajena, Dioso pejumelivaisi, apo tsijamatabëcaetsi. ⁵ Pajivi exanaponapona Dioso pitorobicueniatsi, bajarapajivi pepacuenie jumecovënëta Dioso bajarapajivi bitso pejitsipaexae Dioso. Bajarapacuenia vaxaitsi ata itsa jumecovënëtavanapaenatsi Dioso, nexata nayapëtaevanapaenatsi vajayajavajinavanapaejava Dioso. ⁶ Pajivi jumaitsi: “Xanë rabaja Dioso yajavaponaponajë,” jai, bajarapajivi xaniavaetsia beponapona pibisiacuene exanaenejeva. Pacuenia Jesús ponapona, bajarapacuenia bajarapajivi beponapona.

Palivaisi baja bajayata jivi jumecovënëta, bajarapalivaisi icatsia bepejanalivaisicuenia jivi pejumecovënëtsinexa, yabara pelivaisi

⁷ Tajamonae, pacatoyaquinatsi mapalivaisije panejumecovënëtsinexa. Apo pejanalivaisi ra picani. Itsiata baitsi jane palivaisi baja copiaya bajayata pajumetaneme, pamatacabi ajena pajumecovënëtame Jesús pelivaisi, bajarapalivaisi jumejëpa. ⁸ Nexata mapalivaisije pacatoyaquinatsi pejanalivaisicuenia panejumecovënëtsinexa. Mapalivaisije pexaniajailivaisi cajena. Cristo cajena pijacuata bajarapalivaisi natoexanaponapona. Paxamë ata baja pajumecovënëtavanapame bajarapalivaisi. Nexata mapanacuapijijamatabëcuenemije, pitaquirijamatabëcuenemi, pacavecuaajibi baja tsaponae. Tsipaji bajarapalivaisita Jesucristo nacajamatabëcueneitayotapona.

⁹ Itsajivi jumaitsi ata: “Xanë raja Dioso pitorobicuenia exanaponaponajë,” jai ata, itsiata itsa itoya itsajivi Dioso penajuajumecovënëtsivi, nexata bajarapajivi abaxë tsiteca ajamatabëcueneitaquiri tsaponaponae. ¹⁰ Pajivi bitso asiva itsajivi ata, Dioso penajuajumecovënëtsivi, bajarapajivi Dioso jamatabëcueneitayotatsi. Nexata bajarapajivi apo cajëpaetsi itsacuenejavayo ata pibisiacuene itsajivi pexanaeyaexanaenexatsi. ¹¹ Pajivi itoya itsamonae ata Dioso penajuajumecovënëtsivi, bajarapajivi abaxë tsiteca ajamatabëcueneitaquiri tsaponaponae. Apo yapëtae pibisiacuene pexanaejava. Apo yapëtaenua itsabelia caponaejitsiatsi pibisiacuene pexanaeneconi yabara. Bajara jamatabëcueneitsi tsipaji pevajënaeyabelia dovathi yaajamatabëcueneitaquiriaya exanaponatsi piamatabëcueneitaquirixae.

¹² Tajamonae, pacatoyaquinatsi mapalivaisije. Tsipaji baja Dioso pacavecuaajibiaexana pibisiacuene paneexanaeneconimi Jesucristo papecasivatëpaexae. ¹³ Patavajënaepijivimë, pacatoyaquinatsi mapalivaisije. Tsipaji baja payapëtaneme Jesucristo, ponë baja cajena athëbëtatsia ponapona pepo bajayatami ata, Dioso daxitacuene mapanacuata pexanaevajënaeya. Paxamë ata papevëjëavimë, pacatoyaquinatsi mapalivaisije. Tsipaji baja dovathi pajamatabëcueneamoneyabame.

Bepataxicueniamë patacataevi, imata baja cajena itsabaxuto pacatoyaquinatsi. Tsipaji baja vaxa Dioso payapëtaneme. ¹⁴ Patavajënaeyapijivimë, imata baja cajena itsabaxuto pacatoyaquinatsi. Tsipaji baja payapëtaneme Jesucristo, ponë baja cajena athëbëtatsia ponapona pepo bajayatami ata, Dioso daxitacuene mapanacuata pexanaevajënaeya. Paxamë ata papevëjëavimë, imata baja cajena itsabaxuto pacatoyaquinatsi. Tsipaji baja pajamatabëcuenesaëmë Dioso panejumecovënëtsijava. Pacatsijamatabëca baja Dioso pejumelivaisi. Nexata baja dovathi pajamatabëcueneamoneyabame.

¹⁵ Pëtsa pajitsipame mapanacuapijicueneje. Pëtsa pajitsipame mapanacuapijipibisiacueneje. Itsa pajitsipaejitsipame mapanacuapijipibisiacueneje,

nexata apo pajitsipaemē tsipae Dioso. ¹⁶ Pajamatabēcuene jivi jitsipaeyaex-anabiabatsi pibisiacuene pexanaenexa, bajarapajamatabēcuene apo pitsapae Diosojavaverena. Bajarapajamatabēcuene pitsapa mapanacuataje. Pajamatabēcuene ata jivi najamatabēxainaeyaexanabiabatsi penaxainaeyabinexa xua itajitsipa, bajarapajamatabēcuene ata pitsapa mapanacuataje. Pajamatabēcuene ata jivi najamatabēxainaeyaexanabiabatsi beayaijamatabēcuenevi penataenexa, bajarapajamatabēcuene ata pitsapa mapanacuataje. Daxita bajarapajamatabēcuene pitsapa mapanacuataje. Bajarapajamatabēcuene apo pitsapae vaxa Diosojavaverena. ¹⁷ Imoxoyo rabaja pevajēnae tsaponae pevereverecaenexa mapanacuaje. Nexata daxita pajamatabēcuene jivi jitsipaeyaexanabiabatsi pibisiacuene pexanaenexa, yajavavereverecaena mapanacuaje. Itsiata baitsi jane pamonaē exanavanapa Dioso pitorobicueniatsi, jinavanapaena daxitamatacabijavabelianexa.

Pexaniajailivaisi, penajumetsēnētsilivaisi ata, yabara pelivaisi

¹⁸ Tajamonae, imoxoyo rabaja pevajēnae tsaponae pevereverecaenexa mapanacuaje. Pavēnēlivaisitaneme rabaja pacuenia najetarucaejitsia ponē cueneitoyatsi Cristo. Pata rabaja cajena ayaibitsaēto, pamonaē Cristo cueneitoyatsi. Bajarapamonae pepatsixae, yapētanetsi imoxoyo baja pevajēnae tsaponae pevereverecaenexa mapanacuaje. ¹⁹ Pamonaē Cristo cueneitoyatsi, bajarapamonae vaxaitsiyajuvēnēvimi picani. Itsiata baja nacavecuapitsapa. Bajarapamonae pepacuene apo vaxaitsiyajuvēnēvi cajena. Itsa peneta bajarapamonae vaxaitsiyajuvēnēvi tsipae, nexata tsitecaeya najinavanapaejitsipa vaxaitsita. Bajaraxuata bajarapamonae nacavecuapona baja. Nexata daxitajivi xaniavaetsia yapētane bajarapamonae pepacuene Dioso apo pejumecovēnētsivicuene.

²⁰ Cristo rabaja pacarajuta Espiritu Santo. Bajaraxuata daxita paxamē payapētaneme baja pexaniajailivaisi, Dioso pejumelivaisi. ²¹ Pacatoyaquinatsi mapabaxutoje tsipaji baja payapētaneme pexaniajailivaisicuene Jesús pelivaisi. Nexata apo pacatoyaquinaetsi matapania patacayapētaeyaexanaenexa pexaniajailivaisicuene Jesús pelivaisi. Tsipaji baja bajaya payapētaneme bajarapalivaisi pexaniajailivaisicuene. Payapētanemenua baja Jesús pelivaisijavaverena acuenebi pepitsapaejava penajumetsēnētsilivaisi. Tsipaji pexaniajailivaisijavaverena acuenebi pepitsapaejava penajumetsēnētsilivaisi.

²² ¿De jane peneta jumaitsi pepo penajumetsēnētsijivi? Pajivi peneta pepo penajumetsēnētsijivi, jumaitsi mapacueniaje: “Jesús raja apo Cristo, ponē Dioso athēbēvetsica itorobijitsiatsica vajanacacapanepaenexa,” jai. Bajara peneta pejumaitsijivi, pepo penajumetsēnētsijivi jane baja. Bajarapajivi Cristo pijavajabitsaējivi. Bajarapajivi apo jumecovēnētsi Dioso. Apo jumecovēnētsinua Dioso pexēnato ata. ²³ Pajivi peneta jumaitsi: “Jesús raja Dioso apo pexēnato,” jai, bajarapajivi Dioso apo yajavaponaponaetsi. Pajivi pijinia peneta jumaitsi: “Jesús raja Dioso pexēnato,” jai, bajara jane pajivi Dioso yajavaponaponaetsi.

²⁴ Bajaraxuata paxamē baja palivaisi pajumetaneme panejumecovēnētsijavaverenacujinae, panevajēnaeyabelia tsiteca pacajinavanapare. Bajarapalivaisi tsiteca itsa pacatsijamatabēcaena, nexata panevajēnaeyabelia payajavajinavana-paename Dioso. Payajavajinavanapaenamenua Dioso pexēnato ata, Cristo. ²⁵ Jesucristo rabaja najumecapanepaeya jumaitsi vajanacarajutsinexa matababi apo pevereverecaējava.

²⁶ Pacatoyaquinatsi mapabaxutoje patacayapētaeyaexanaenexa panenayajivitaenexa pamonaē jamatabēpacayamaxēitoroba. ²⁷ Paxamē rabaja Espiritu Santo pacatsijamatabēca, ponē pacarajuta Jesucristo. Bajaraxuata apo panamatavenonaemē baja itsajivi ata papecatsipaebinxaxa paneyapētaenexa daxitacuene. Tsipaji baja daxita

xua Espíritu Santo pacayapëtaeyaexanapona, pexaniajaicuene baja cajena. Penajumetsënëtsicuene baja cajena Espíritu Santo apo pacayapëtaeyaexanapona. Pacuenia Espíritu Santo pacayapëtaeyaexanapona, bajarapacuenia pajumecovënëtaponare panevajënaeyabelia paneyajavajinavanapaenexa Cristo.

²⁸ Tajamonae, ajamatabëcuenesaëya yajavajinavanapaenatsi Cristo. Bajarapacuenia yajavajinavanapaenatsi vajacujunaviyaniva pamatacabi bajaraponë patsianica. Nexata apo aura tsanetsi bajaraponëjavabelia pamatacabi patsianica. ²⁹ Paxamë rabaja payapëtaneme Jesucristo, Dioso pexënatoxae, pexaniacuene pexanabiabijava. Nexata bepapapëtaneme mapacueneye. Pamonaen peneta pexaniacuene exana, bajarapamonae Dioso pexi.

3

Dioso pexi yabara pelivaisi

¹ Pacanaëjère vaxa Dioso vajanacaasivacuene. Nacaasiva bitso. Bajaraxuata Dioso pexicueniatsi nacatane. Xaniajai rabaja. Dioso pexitsi. Mapanacuapijivije Dioso apo peyapëtaexae, nexata bajarapamonae vaxaitsi ata apo nacayapëtae Dioso pexicuenetsi.

² Tajamonae bitso patacaasivavi, aeconoxae rabaja vaxaitsi daxitatsi Dioso pexitsi. Apo yapëtaetsi abaxë pacuenia itsamatacabi vaxaitsi cueneitsijitsiatsi. Itsiata Cristo itsamatacabi itsa patsianica, vaxaitsi cuenetaenatsi Cristo pacuenia cueneitsi. Nexata vaxaitsi itsa cuenetaenatsi Cristo, cuenejëpaenatsi. Tsipaji cuenetaenatsi pacuenia Cristo cueneitsi. ³ Cristo pibisiacuene apo pexanaenë caeto ata. Bajaraxuata daxita pamonaen copiaevetavanapa Cristo pepatsijavanexatsica, pevajënae tonajamatabëcuene xaniavaetavanapaena. Pibisiacuene apo exanavanapae tsane.

⁴ Pajivi pibisiacuene exana, apo jumecovënëtsi palivaisi Dioso najumecopata jivi pejumecovënëtsinexa. Pibisiacuene itsa exana, nexata Dioso pitavetsijava exana.

⁵ Payapëtaneme rabaja mapacueneye. Cristo patsica mapanacuayabetsicaje vajanacavecuaajibiaexanaenexa pibisiacuene vaxaexanaeneconimi. Cristo baja cajena caeto ata pibisiacuene apo pexanaenë. ⁶ Bajaraxuata pajivi baja Cristo yajavaponapona, pibisiacuene apo exanaponapona. Pajivi tsiteca pevajënaeyabelia pibisiacuene exanaponapona, bajarapajivi apo tae baja cajena Cristo. Apo yapëtaenua cajena. ⁷ Tajamonae, pëtsa panacopatame itsajivi ata papecayamaxëitojorobinexa. Pajivi exanabiaba pexaniacuene, Dioso pejitsipacuene, bajarapajivi Dioso aneconijibia tanetsi. Pacuenia Cristo jamatabëcueneitsi, bajarajamatabëcueneitsi bajarapajivi. ⁸ Pajivi tsiteca pevajënaeyabelia pibisiacuene exanaponapona, bajarapajivi dovathi pijajivitonë tsaponapona. Dovathi pibisiacuene pexanaecujinae, apo copatsi. Tsiteca pevajënaeyabelia pibisiacuene exanaponapona mapanacuataje. Bajaraxuata Dioso pexënato patsica mapanacuayabetsicaje daxitajivi dovathi pejamatabëcueneta pibisiacuene pexanabiabijavami piajibiaexanaenexa.

⁹ Pajivi baja Dioso pexijivi exanatsi, bajarapajivi baja pibisiacuene apo exanaponapona. Tsipaji baja Dioso najamatabëcuenerajutatsi. Bajarapajivi baja copata pibisiacuene pexanabiabijava. Tsipaji baja Dioso pexijivi exanatsi. ¹⁰ Bajarapacuenia xaniavaetsia yapëtanetsi pajivi Dioso pexijivi exanatsi. Pajivi pijinia dovathi pexijivi exanatsi, yapëtanetsi. Tsipaji pajivi Dioso pexijivi apo exanaetsi, pexaniacuene apo exanae. Apo asivanua itsamonae ata.

Pacuenia vaxaitsi namataenetsia benaasivatsi tsavanapae yabara pelivaisi

¹¹ Dioso baja cajena panejumecovënëtsijavaveliacujinae, pajumetaeyabiabame pejumaitsilivaisi mapacueniaje: “Vaxaitsi namataenetsia benaasivatsi tsavanapae,” pejailivaisi. ¹² Vaxaitsi nexata apo bitoyatsi itsamonae ata. Pacuenia bajayatami Caínpijinë itoya pejuyapijinëmi, bajara apo bitsitsi vaxaitsi. Caínpijinë dovathi pijajivitonë tsaponapona. Nexata beyaxuaba pejuyapijinëmi. Pacatsipaebijitsiatsi pacuene yabara

Caínpijinē beyaxuaba pejuyapijinēmi. Caínpijinē dovathi pitorobicueniatsi, pibisiacuene exanaponapona. Pejuyapijinēmi pijinia pexaniacuene, Dioso pitorobicueniatsi, exanaponapona. Bajaraxuata Caínpijinē beyaxuaba pejuyapijinēmi.

¹³ Tajamonae, pētsa pajamatabēcuenenabenajacame paxamē ata itsa pacaitoya mapanacuapijivije. ¹⁴ Vaxaitsi picani bajayata Dioso pitabarata jamatabēcuenetēpavanapatsi. Itsiata baja aeconoxae Dioso nacajamatabēcueneasaēyaexana vajanajamatabēcuenecopatsixae bajaraponējavabelia. Yapētanetsi baja cajena Dioso vajanacajamatabēcuene asaēyaexanaejava. Tsipaji itsamonae ata Dioso vajanajuajumecovēnētsivi, asivatsi tsavanapae. Pajivi apo asiva itsamonae ata, Dioso penajuajumecovēnētsivi ata, bajarapajivi Dioso pitabarata jamatabēcuenetēpaponapona. ¹⁵ Pajivi itoya itsajivi, Dioso penajuajumecovēnētsivi ata, bajarapajivi jamatabēcuenejēpaponapona jivibenē. Paxamē rabaja payapētaneme mapacueneje. Jivibenē baja cajena apo xainae tsane matababi apo pevereverecaejava. ¹⁶ Yapētanetsi baja cajena mapacueneje. Jesucristo vajanacaasivaxae, nacopata pebeyaxuabinexatsi vajaneconi yabara. Nexata vaxaitsi ata vajaasivaxae Dioso vajanajuajumecovēnētsivi, bejamatabējumaitsitsi mapacueniaje: “Itsamonae nebeyaxuabijitsia ata tsane, yavenonaenajē Dioso patanajuajumecovēnētsivi,” bejamatabējaitsi. ¹⁷ Ponē Dioso pejumecovēnētsinē, bitso pexainaenē pexinaejava, tae ata itsanē pijinia Dioso pejumecovēnētsinē penamatavenonaejava, itsiata itsa apo yavenonae, nexata acuenebi pejumaitsijava: “Xanē bitso Dioso jitsipajē tajamatabēēthētojavavetsina,” pejaijava. ¹⁸ Tajamonae, “Asivanē raja itsamonae ata,” apo bejaitsi saya vajacuibovojotota pexaniacuene toexanaenejevatsi bajarapamonaejavabelia. Biji rajane bajarapamonae vajanacayapētaenexa pepacuene vajaasivajava, pexaniacuene betoexanatsi. Beyavenonatsi bitso penamatavenonaejavata.

Pacuenia apo auratsi Dioso pitabarata yabara pelivaisi

¹⁹ Daxitatsi vaxaitsi itsa asivatsi tsavanapae tsane itsamonae ata, Dioso vajanajuajumecovēnētsivi, nexata nayapētaenatsi Dioso pexicuenetsi. Ajunavijibianua jinavanapaenatsi Dioso pitabarata. Dioso baja cajena pexaniajailivaisi jivijavabelia petsipaebinē. ²⁰ Dioso baja cajena bitso ayaijamatabēcuenenē. Dioso peyapētaenē daxitacuene. Bajaraxuata vaxaitsi jamatabējumaitsi atatsi: “Xanē bitso ajamatabēcuenebejenē pibisiacuene taexanaejava yabara,” jamatabējai atatsi, itsiata xainatsi Dioso vajanacayavenonaenē. Dioso vajanacaitaxutotsoniataenē. Tsiteca nacaasiva. Nacaevetanua. ²¹ Tajamonae bitso patacaasivavi, vajajamatabēēthētota itsacueneneconi itsa apo xainaetsi, nexata apo auratsi Diosojavabelia vajavajētsinexa. Jamatejematsi Dioso pitabarata. ²² Dioso nacarajutsiana daxita xua vajētsianatsi Diosojavabelia. Bajarapacuenia Dioso nacarajutsiana tsipaji Dioso jumecovēnētavanapatsi pacuenia nacaitoroba. Pacuene yabara Dioso sivajamatabēcuenebarēya, bajarapacuene ata vaxaitsi exanavanapatsinua. ²³ Dioso raja nacaitoroba vajajamatabējumaitsinexa mapacueneje: “Jesús baja patsica, ponē copiaevetavanapatsi vajanacacapanepaenexa. Bajaraponē Dioso baja cajena pexēnato,” vajajamatabējainexa. Nacaitorobanua namataenetsia vajanaasivatsavanapaenexa. ²⁴ Pajivi jumecovēnēta Dioso pitorobilivaisi, bajarapajivi Dioso yajavaponaponaena. Bajarapajivi ata pijinia Dioso yajavaponaponaenatsi. Yapētanetsi pepacuene Dioso vajanacayajavaponaponaejava. Tsipaji Espiritu Santo, ponē Dioso nacarajuta, bajaraponē nacayapētaeyaexana pepacuene Dioso vajanacayajavaponaponaejava.

4

Espiritu Santo yabara, Cristo pijavajabitsaē ata, yabara pelivaisi

¹ Tajamonae bitso patacaasivavi, itsamonae itsa pacajumai tsane mapacueni-aje: “Espíritu Santo raja, ponë netsijamatabëeca, netsipaeba. Nexata juya bajarapalivaisi pacatsipaebatsi,” itsa pacajai tsane, pëtsa abaxë caecuenia pajumecovënëtame. Copiaya abaxë pajamatabëcueneëjëbianame paneyapëtaenexa itsa xaniajai bajarapamonae Espíritu Santo petsipaebilivaisitsi pacatsipaebiana. Bajarpacuenia pajamatabëcueneëjëbianame tsipaji raja daxitajava mapanacuajavaje yacaëjëpa penajumetsënëtsilivaisi petsipaebanajetarubenaevi. Bajarapamonae penajumetsënëtsilivaisi daxitajivijava tsipaebanajetarubena. ² Nexata bajarapacuenia copiaya itsa pajamatabëcueneëjëbianame, payapëtaenexa pamonaes tsijamatabëecatsi Espíritu Santo. Pamonaes raja peneta pepacuene Espíritu Santo tsijamatabëecatsi, jumaitsi mapacueni-aje: “Jesucristo itsa patsica mapanacuayabetsicaje, naexana pacuenia vaxaitsi baexanatsi mapanacuataje,” jai peneta pamonaes pepacuene Espíritu Santo tsijamatabëecatsi. ³ Pamonaes peneta jumaitsi mapacueni-aje: “Jesucristo raja Dioso apo pexënato,” jai, bajarapamonae cajena apo tsijamatabëecaetsi Espíritu Santo. Bajarapamonae tsijamatabëecatsi ponë cueneitoyatsi Cristo. Ponë baja pavënëlivaisitaneme pepatsijavanexa, ponë Cristo cueneitoyatsi, bajaraponë pata baja. Ponapona rabaja mapanacuajavaje. ⁴ Tajamonae, paxamë rabaja Dioso papijajivimë. Nexata baja penajumetsënëtsilivaisi papecatsipaebivi, apo pacayamaxëitojorobicapanepae. Apo caëjëpaetsi papecayamaxëitojorobijava. Tsipaji ponë pacatsijamatabëeca, bajaraponë bitso piasaënë, ponë ponapona mapanacuajavaje, matatoxenetsia. ⁵ Pamonaes tsipaebapona penajumetsënëtsilivaisi, bajarapamonae saya Dioso apo peyapëtaevi. Bajaraxuata mapanacuapijicuene cacuaicuajai. Nexata pamonaes bitso jitsipa maëpanacuapijicueneje, namuxunaevetabiabatsi. ⁶ Vaxaitsi raja Dioso pijajivitsi. Pajivi yapëtane Dioso, vaxaitsi ata nacanamuxunaeveta. Pajivi Dioso apo jitsipae, vaxaitsi ata apo nacanamuxunaevetsi. Nexata bajarapacuenia nayapëtane pajivi tsijamatabëecatsi Espíritu Santo. Espíritu Santo baja cajena jivi pexaniajailivaisi petsipaebinë. Bajara pijinia pacuenia nayapëtane pajivi ata tsijamatabëecatsi dovathi. Dovathi baja cajena penajumetsënëtsilivaisi jivi petsipaebinë.

Dioso vajanacaasivanë yabara pelivaisi

⁷ Tajamonae bitso patacaasivavi, daxitatsi namataenetsia benaasivatsi tsavanapae. Tsipaji Diosojavaverena pitsapa vajanacaasivajamatabëcuene. Pajivi peneta asiva Dioso penajuajumecovënëtsivi, bajarapajivi Dioso pexijivi. Bajarapajivi yapëtane Dioso. ⁸ Pajivi apo asiva itsamonae ata, bajarapajivi apo yapëtae Dioso. Tsipaji baja cajena Dioso bitso asiva daxitajivi. ⁹ Dioso raja vajanacaasivajava, nacayapëtaeyaexana mapacueni-aje. Dioso athëbëvetsica nacatoitorobica pepo caenë pexënato mapanacuayabetsicaje. Bajarapacuenia Dioso pexënato nacatoitorobica matababi apo pevereverecaejava vajaxainaenexa pexënato vajanacasivatëpaexae. ¹⁰ Bajarajamatabëcueneitsi Dioso bitso vajanacaasivajava. Vaxaitsi rajane bevelia Dioso jitsipatsi. Dioso ra picani bitso vaxaitsi nacajitsipa. Bajaraxuata Dioso nacatoitorobica pexënato cruzata vajanacasivatëpaenexa. Nexata Jesús vajanacasivatëpaexae, Dioso baja nacavecuaajibiaexana daxita pibisiacuene vajaexanaeconimi.

¹¹ Tajamonae bitso patacaasivavi, itsa Dioso bajarapacuenia bitso nacaasiva, nexata vaxaitsi ata daxitatsi namataenetsia benaasivatsi tsavanapae. ¹² Itsajivi ata cajena abaxë Dioso apo tae. Itsiata baitsi jane vaxaitsi namataenetsia itsa nasivatsi, Dioso baja nacayajavaponapona. Dioso vajanacatojitsipaecuenia itsamonae ata vajaasivanexa, Dioso nacajamatabëcueneasaëyaexanapona. ¹³ Vaxaitsi yajavajinavanapatsi Dioso. Bajara pijinia pacuenia Dioso ata nacayajavaponapona. Yapëtanetsi pexaniajaicuene Dioso vajanacayajavaponapona. Tsipaji baja Dioso nacarajuta Espíritu Santo.

¹⁴Vaxaitsi baja cajena tanetsi Dioso pexënato. Nexata vaxaitsi tsipaebabiabatsi itsamonaejavabelia Dioso pexënato pitorobijavatsica mapanacuayabetsicaje pecapanepaenexa daxita mapanacuapijivije. ¹⁵Pajivi jumaitsi mapacueniaje: “Jesús raja Dioso pexënato,” jai, bajarapajivi Dioso yajavaponapona. Bajarapajivi pijinia Dioso ata yajavaponaponatsi.

¹⁶Nexata vaxaitsi jamatabëcuene yapëtanetsi pacuenia bitso Dioso nacaasiva. Dioso cajena piasivanë daxitanacuapijivi. Pamonaes itsamonae ata namataenetsia naasiva tsavanapae, bajarapamonae Dioso yajavaponapona. Bajarapamonae ata pijinia Dioso yajavajinavanapa. ¹⁷Nexata pacuenia Dioso nacatojitsipa itsamonae ata vajanasi-vatsavanapaenexa, bajarapacuenia itsamonae ata asivatsi tsavanapae tsane. Nexata pamatacabi Dioso naneconitsiaexanaponaena daxita pibisiacuene pexanaevi, bajarapamatacabi vaxaitsi Dioso pitabarata apo junavitsi tsane. Apo junavitsi tsane Dioso pitabarata tsipaji baja mapanacuataje vaxaitsi asivatsi tsavanapae tsane itsamonae ata pacuenia Cristo daxitatsi nacaasiva. ¹⁸Itsa yapëtanetsi Dioso vajanacaasivajava, apo cujunavitsi itsacuenejava ata. Tsipaji Dioso itsa nacaasiva, nacavecuaajibiaexana vajajunavijavami. Pajivi Dioso javabelia naneconita, yapëthane Dioso penaneconitsiaexanaejavanexatsi. Bajaraxuata daxitacuene cujunava. Pajivi cujunava daxitacuene, abaxë xaniavaetsia apo yapëtae pacuenia Dioso asivatsi. Bajaraxuata cujunava.

¹⁹Vaxaitsi Dioso asivatsi tsipaji Dioso copiaya nacaasiva. ²⁰Pajivi jumaitsi ata mapacueniaje: “Xanë raja Dioso asivanë,” jai ata, itsiata itsa itoya itsajivi Dioso pejume-covënëtsijivi ata, nexata saya bajarapajivi penajumetsënëtsijivi. Bajarapajivi itsa apo asiva itsajivi ata, petaeyabiabijivi ata, nexata biji bitsoyo bajarapajivi apo asiva Dioso. Tsipaji biji cajena caeto ata apo tae Dioso. ²¹Pajivi asiva Dioso, bajarapajivi biasiva itsajivi ata, Dioso penajuajumecovënëtsijivi. Tsipaji baja cajena Cristo nacaitoroba vajaasivanexa itsamonae ata.

5

Pacuenia vaxaitsi mapanacuataje dovathi jamatabëcuene amoneyabatsi yabara pelivaisi

¹Pajivi jumecovënëta: “Jesús raja Cristo, ponë Dioso athëbëvetsica itorobijitsiatsica vajanacacapanepaenexa,” pejailivaisi, bajarapajivi Dioso pexijivi exanatsi. Pajivi asiva itsajivi ata, caejivi apo biasiva. Nexata bajarapajivi daxita pexi beyajavaasiva. ²Bajara pijinia pacuenia vaxaitsi ata hexanatsi itsa asivatsi Dioso. Itsa jumecovënëtatsi pacuenia Dioso nacaitoroba, nexata beyajavaasivatsi itsamonae ata, Dioso vajanajuajumecovënëtsivi. Tsipaji bajarapamonae Dioso pexi exanatsi. ³Vaxaitsi itsa asivatsi Dioso, nexata pacuenia Dioso nacaitoroba, jumecovënëtatsi. Pacuenia Dioso nacaitorobapona vajatoexanaenexa, apo nacatsitaayapëbeje. ⁴Apo nacatsitaayapëbeje tsipaji baja Dioso pexitsi. Nexata caejivitsi canacujitsia Dioso nacacajëpaeyaexanapona vajaexanaenexa pacuenia Dioso nacaitorobapona. Najamatabëcuene copatatsi baja Cristojavabelia vajanacayavenonaenexa mapanacuapijijamatabëcuenevecuaje. Nexata bajarapacuenia mapanacuataje dovathi jamatabëcuene amoneyabaponatsi. ⁵Pajivi jumecovënëta Jesús Dioso pexënatocuene, bajarapajivi cajëpatsi dovathi pejamatabëcuene amoneyabinexa.

Pacuenia yapëtanetsi Jesús pepacuene Dioso pexënatocuene yabara pelivaisi

⁶Jesucristo baja cajena athëbëvetsica pepatsinë. Yapëtanetsi Jesús pepacuene Dioso pexënatocuene. Tsipaji copiaya bautisabatsi merata. Bajaraxuacujinae cruzata beyaxuabatsi. Nexata saya Jesús ëpebautisabicujinaetsi apo ponapona. Biji rajane copiaya bautisabatsi. Bajaraxuacujinae cruzata beyaxuabatsi. Espiritu Santo ata nacayapëtaeyaexana Jesucristo pepacuene Dioso pexënatocuene. Espiritu Santo baja cajena pexaniajainë. Nexata Espiritu Santo vajanacayapëtaeyaexanaejava, Jesús Dioso pexënatocuene, bejumecovënëtatsi. ⁷Athëbëtatsia jinavanapa acueyabi ponëbeje, penajamatabëcuenejëpaevi,

pevajunupaebivi Jesucristo Dioso pexēnatocuene. Pamonaē jinavanapa athēbētatsia, mapamonaēje: Dioso, Jesucristo, Espiritu Santo. Bajarapamonaē acueyabi ponēbeje, penajamatabēcuenējēpaēvi, caenē rabaja picani tsaponaponaē. ⁸Mapanacuata ataje acueyabi xuabeje pejamatabēcueneta yapētanetsi Jesucristo pepacuene Dioso pexēnatocuene. Yapētanetsi Espiritu Santo pejamatabēcueneta. Yapētanetsinua Jesús pebautisabijavatsi ata pejamatabēcueneta. Yapētanetsinua Jesús cruzata pebeyaxuabijavatsi ata pejamatabēcueneta. Bajarapaacueyabi xuabeje pejamatabēcueneta yapētanetsi Jesucristo pepacuene Dioso pexēnatocuene. ⁹Dioso baja cajena nacayapētaēyaexana Jesús Dioso pexēnatocuene. Mapanacuapijivi ata, itsa nacatsipaeba itsacuenelivaisiyo, nexata jumecovēnētabiabtasi pacuenia nacatsipaebabiaba. Itsiata baitsi jane Dioso itsa nacatsipaeba, bejumecovēnētatsi xaniavaetsia pacuenia nacatsipaeba. Tsipaji Dioso bitso pejumenamamotsinē. Bitso pexaniajainē. ¹⁰Pajivi jumecovēnēta Jesús Dioso pexēnatocuene, bajarapajivi pejamatabēēthētota yapētane bajarapalivaisi pexaniajailivaisicuene. Pajivi apo jumecovēnētsi Jesús Dioso pexēnatocuene, bajarapajivi Dioso bepenajumetsēnētsinē tane. Tsipaji bajarapajivi Dioso peyapētaēyaexanaejavatsi, apo jumecovēnētsi, Jesús Dioso pexēnatocuene. ¹¹Dioso itsa nacayapētaēyaexana Jesús Dioso pexēnatocuene, nacayapētaēyaexana mapalivaisije. Nacayapētaēyaexana Dioso vajanacarajutsijavanexa matababi apo peverevereaejava. Nexata Dioso pexēnato pejamatabēcueneta xinaenatsi matababi apo peverevereaejava. ¹²Pajivi yajavaponaponaena Dioso pexēnato, bajarapajivi xinaena matababi apo peverevereaejava. Pajivi apo yajavaponaponaē tsane Dioso pexēnato, bajarapajivi apo xinae tsane matababi apo peverevereaejava.

Pacuenia Juan muxujioba pecopatsivajēnaē baja petoyaquinaelivaisi mapabaxutotaje yabara pelivaisi

¹³Pacatoyaquinatsi mapalivaisije panejumecovēnētsivi Dioso pexēnato. Pacatoyaquinatsi paneyapētaenexa matababi apo peverevereaejava panexinaejavanexa.

¹⁴Yapētanetsi Dioso vajanacajumetaejava itsa vajētatsi vajanacatojitsipaecuenia. Bajaraxuata apo jumejunavitsi vajavajētsinexa Diosojavabelia. Jamatejematsi Dioso pitabarata. ¹⁵Yapētanetsi Dioso vajanacajumetaejava itsa vajētatsi. Nexata yapētanetsi Dioso vajanacarajutsijavanexa xua vajētatsi.

¹⁶Dioso panenajuajumecovēnētsivi itsa pataename pibisiacuene pexanaejava, patovajētsianame Diosojavabelia, Dioso pejamatabēcuenexaniavaetsinexatsi pibisiacuene pexanaejivi. Bajarapacuenia Diosojavabelia patovajētsianame itsa payapētaename paneconi yabara abaxē Dioso apo vecuanaxuabijitsia. Itsajava raja jivi pibisiacuene itsa exana, bajarapaneconi yabara pepacuene jivi Diosovecua naxuabiana. Nexata baja itsa payapētaename paneconi yabara pepacuene baja bajarapajivi Diosovecua naxuabijitsia, pētsa patovajētame Diosojavabelia. Bajarapitsineconi baja pexainaēvi panetovajētsinexa Diosojavabelia, apo pacaitorobitsi. ¹⁷Daxitacuene xua apo pexanepanaecuene jivi exana, pibisiacuene baja cajena. Itsiata baitsi jane bajarapapibisiacuene jivi pexanaejava itsa copabiana, nexata bajarapaneconi yabara itsiata jivi pepacuene Dioso apo vecuanaxuabi tsane.

¹⁸Yapētanetsi baja cajena mapacueneje. Pajivi Dioso pexijivi exanatsi, bajarapajivi copata baja pibisiacuene pexanaejava. Tsipaji baja Dioso pexēnato, Jesucristo, evetatsi bajarapajivi. Nexata dovathi apo itsacueniabitsi.

¹⁹Yapētanetsi daxita vaxaitsi Dioso pexicuenetsi. Yapētanetsinua itsamonae dovathi pitorobabiabijavatsi pibisiacuene pexanaenexa.

²⁰Yapētanetsinua baja Dioso pexēnato, Jesucristo, athēbēvetsica pepatsijavatsica. Patsica vajanacajamatabēcuenē yapētaēyaexanaenexa pepo Dioso. Vaxaitsi baja yajavajinavanapatsi Dioso. Tsipaji baja yajavajinavanapatsi Dioso pexēnato, Jesucristo. Bajaraponaē ata pepo Dioso baja cajena, vajanacarajutsinēnexa matababi apo peverevereae-

java. ²¹ Tajamonae, panayajiviitavere papecatsipaebiyaniwa palivaisi tsipaebapona pamonaē vajēcabiaba jumapecataeya pexanaenēanējavabelia.

Mapabaxutoje San Juan cotocaevi toyaquina Dioso pejumecovënëtsivijavabelia

Pexaniajailivaisi yabara, jivi ata penaasivacuene, yabara pelivaisi

¹ Xanë ancianonënë, pacatoyaquinatsi mapabaxutoje Dioso pecaitapetsiva, nexi yajava. Xanë bitso pacaasivatsi. Itsamonae ata, pamonae jumecovënëta Dioso pejumelivaisi, bajarapamonae ata pacaasiva. ² Bajarapacuenia pacaasivatsi tsipaji paxamë ata Dioso pejumelivaisi pajumecovënëtame. Bajarapalivaisi cajinavanapatsi vajajamatabëëthëtota daxitamatacabijavabelianexa. ³ Pacatovajëtabiabatsi Diosojavabelia, Jesucristo, Dioso pexënatojavabelia ata. Pacatovajëtabiabatsi papecayavenonabiabinexa, papecaitaxutotsonia taeyabiabinexanua. Pacatovajëtabiabatsinua jamatabëcuenexanepanaeya panejinavanapaenexa. Bajarapacuenia Dioso pacatoexanaena pexaniajailivaisi, Dioso pejumelivaisi, itsa pacajinavanapame, itsamonae ata asivaya itsa pajinavanapamenua.

⁴ Bitso sivajamatabëcuenenarëyanë itsa caxitajarabaxuabajë nexiyajuvënëvi, pejumecovënëtavanapaevi pacuenia vaxa Dioso nacaitoroba. ⁵ Tajabanava, aeconoxae catsipabatsi namataenetsia vajanasivanexa. Bajarapalivaisi apo pejanalivaisi picani. Bajayata palivaisi itsa copiaya jumetaneme Jesús pelivaisi, bajarapalivaisi jumejëpa. ⁶ Vaxaitsi itsa jitsipatsi Dioso, nexata pacuenia Dioso nacaitoroba, bejumecovënëtavanapatsi. Bajarapalivaisi papecatsipaebijavaveliacujinae, pacaitoroba baja cajena namataenetsia panenasivatsavanapaenexa.

Penajumetsënëtsilivaisi daxitanacuanëjava petsipaebanajetarubenaevi yabara pelivaisi

⁷ Penajumetsënëtsilivaisi petsipaebanajetarubenaevi, ayalbitsaëto najetarubena daxitanacuanëjava. “Pacuenia vaxaitsi banaexanatsi, bajarapacuenia Jesucristo naexana mapanacuataje,” pejailivaisi, bajarapamonae apo pejumecovënëtsivi. Bajarapitsijamatabëcuene pexainaevi peyamaxëitojorobivi baja cajena. Bajarapamonae Cristo pijavajabitsaë. ⁸ Panayajivitaevanapare papecavecuaxuabiyani xua pasivanacuenebanapame Dioso papecarajutsinexa. Bajarapacuenia panayajivitaevanapare Dioso papecarajutsinexa daxitajavayo panetonacuenebimatamo.

⁹ Pajivi tsiteca pevajënaeyabelia jumecovënëtaponapona palivaisi Cristo tsipaebapona, bajarapajivi vaxa Dioso yajavaponaponatsi. Vaxa Dioso pexënato ata yajavaponaponatsi. Pajivi pijinia copata pejumecovënëtsijava palivaisi Cristo tsipaebapona, bajarapajivi Dioso apo yajavaponaponaetsi. ¹⁰ Nexata bajarapitsijivi itsa pona paxamëjavabelia livaisi papecatsipaebinexa, pëtsa pacajunuame panijaboyaberena. Pëtsa pabajacobamenua bajarapitsijivi. ¹¹ Pajivi bajacobijitsipa bajarapitsijivi, jamatabëcueneyavenonaejitsipa pibisiacuene pexanaejava. Bajaraxuata pëtsa pabajacobame bajarapitsijivi.

Pacuenia Juan jumaitsi pecopiarutaponaelivaisita yabara pelivaisi

¹² Xanë picani xainajë ayailivaisi patacamuxujiobinexa. Itsiata abaxë apo jitsipaenë bajarapalivaisi patacatoyaquinaenexa mapabaxutotaje. Evetajë abaxë taponaejava paxamëjavabelia patacataenexa, patacabarëcuaiquaijainexanua, vajajamatabëcuenenarëyanexa bitso.

¹³ Nejuyapijiva Dioso pitapetsivatsi pexi, catonajumeitoroba nebajacobinexa.

Mapabaxutoje, acueyabibaxuto, San Juan toyaquina Dioso pejumecovënëtsivijavabelia

Pacuenia Juan pexaniajamatabëcuenia tane Gayovënënë yabara pelivaisi

¹ Gayo bitso tacaasivanë. Xanë ancianonënë, catoyaquinatsi mapabaxutoje. Casivatsi bitso tsipaji xamë ata pexaniajailivaisi jumecovënëtame.

² Catovajëtabiabatsi Diosojavabelia. Catovajëtabiabatsi daxitacuenejavanë pecatoxanepanaenexa, jumalixanepanaeya neponaponaenexanua. Cavënëlivaisitanetsi rabaja Dioso pitabarata xaniavaetsia Dioso netoponaponaejava pibisiacuene exanaenejevamë. ³ Itsamonae Dioso pejumecovënëtsivi parena xanëjavaberena. Nexata bajarapamonae xanëjavaberena cavënëlivaisipaeba xaniavaetsia neponaponaejava. Netsipaeba xaniavaetsia asaëya nejumecovënëtaponaponaejava pexaniajailivaisi, Dioso pejumelivaisi. Nexata bitso casivajamatabëcuenebarëyatsi. ⁴ Pamona tsipaebabiabajë Dioso pejumelivaisi, bajarapamonae taniji betaxicuenia. Nexata itsa vënëlivaisitaniji bajarapamonae Dioso pejumecovënëtavanapaejava, nexata bitso sivajamatabëcuenebarëyanë tsabiabi. Itsacuenejava ata pematatsënëa bajarapacuenia apo nejamatabëcuenebarëyayaexanae.

⁵ Xamë xaniavaetsia Dioso tonacuenebabiabame itsa yavenoname Dioso pejumecovënëtsivi. Bajarapamonae saicayanacuaverena pepatsivi ata, yavenoname.

⁶ Pamona Dioso pejumecovënëtsivi parena xanëjavaberena, daxita majotaje Dioso pejumecovënëtsivi pitabarata, cavënëlivaisipaeba bajarajotalia asivaya neyavenonaejava Dioso pejumecovënëtsivi. Bajarapamonae itsa ponaena pevajënaeyabelia, Dioso pejumelivaisi jivi petsipaebaponaenexa, yavenonaename pacuenia namatavenonaena pijanamutonexa. Bajarapacuenia bajarapamonae itsa yavenonaename, Dioso casivabarëya tsane. ⁷⁻⁸ Bajarapamonae naropoba Jesucristo petonacuenebinexa pexaniajailivaisi, Dioso pejumelivaisi, daxitajivijava petsipaebanajetarubenaenexa. Bajarapamonae apo jitsipae peyavenonaenexatsi pamona Dioso apo pejumecovënëtsivi. Bajaraxuata vaxaitsi Dioso vajajumecovënëtsivi, xanepana vajayavenonaenexa bajarapamonae. Bajarapacuenia itsa yavenonatsi, nexata Dioso nacatane bajarapamonaeta Dioso pijacuene bevajatonanacuenebivi.

Pacuenia Diótrfes pibisiacuene exana yabara pelivaisi

⁹ Xanë bajayata copiaya toyaquinajë Dioso pejumecovënëtsivi, panijatamarata pejinavanapaevi. Itsiata bajarapabaxutota taitorobicuenia Diótrfes apo jumecovënëtsi. Jesucristo ata taneitorobinëcuene, apo jumecovënëtsi. Bajaraponë ayaijamatabëcuenenë jamatabënaexana papecanamatacaitorobinënexa. ¹⁰ Bajaraxuata itsa patsianajë xamëjavata, catsipaebianatsi daxita pacuenia Diótrfes exana. Bajaraponë pibisiacuena tanebaracuaicuaijajava, taneyabaranajumetsënëtsijava ata, catsipaebianatsi.

Itsacuenejavanënuua pematatsënëa pibisiacuene exanabiaba. Diótrfes apo copiapitabiabi xaniavaetsia pamona Dioso pejumecovënëtsivi. Itsamonae ata itaveta pecopiapitsiyaniya pepatsivi. Nexata picani pamona Diótrfes itaveta, itsiata copiapitabiaba Dioso pejumecovënëtsivi. Nexata pamona Diótrfes itavetsi ata, itsiata copiapitabiaba, bajarapamonae Diótrfes jamatabëvecuacapitsapa Dioso pejumecovënëtsivi penacaetuatsibovecua bajarapamonae pematatsënëa penajoneyaniya bajarapabota.

¹¹ Gayo, pëtsa exanaponaenoname pacuenia pibisiajamatabëcuene pexainaevi baexanavanapa. Exanaponaenonare jane pacuenia pexaniacuene pexanaevi baexanavanapa. Pajivi Dioso pexijivi exanatsi, bajarapajivi pexaniacuene exanapona.

Pajivi Dioso pexijivi apo exanaetsi, bajarapajivi pibisiacuene exanaponapona. Tsipaji bajarapajivi Dioso apo yapëtae.

Pacuenia Demetrio pexaniacuene exana yabara pelivaisi

¹² Daxitajivi pexaniacuenia Demetrio vënëlivaisipaebatsi pexaniacuene pexanaponaponaejava. Espiritu Santo baja cajena pexaniajailivaisi jivi peyapëtaeyaexanaenë. Nexata Espiritu Santo jivi yapëtaeyaexanaponatsi pexaniacuene Demetrio pexanaponaponaejava. Paxanë ata baja cajena payapëtaniji Demetrio pexaniacuene pexanaponaponaejava. Nexata daxitajivijava patsipaebaponajë bajarapalivaisi. Paxamë ata paneyapëtaneme pexaniajailivaisi patatsipaebaponaejava.

Pacuenia Juan jumaitsi pecopiarutsilivaisiyota yabara pelivaisi

¹³ Xanë picani xainajë ayailivaisi tacamuxujiobinexa. Itsiata abaxë apo jitsipaenë bajarapalivaisi tacatoyaquinaenexa mapabaxutotaje. ¹⁴ Tsipaji jamatabëcatanetsi bepijia. Nexata abaxë tajacuata cabarëcuaicuaijaitsi tsane.

¹⁵ Catovajëtatsi Diosojavabelia pecayavenonaenexa jamatabëcuenexanepanaeya neponaponaenexa. Daxita pecayapëtaevi, majotaje pejinavanapaevi, cabajacobalia. Nebajacobiana caejivi canacujitsia, daxita vajayapëtaevibeje.

Mapabaxutoje San Judas toyaquina Dioso pejumecovënëtsivijavabelia

Pacuenia Judas mapabaxutoje toyaquina Dioso pejumecovënëtsivijavabelia yabara pelivaisi

¹ Xanë Judasnë, Jesucristo pijajivitonënë, Santiago pejuyapijinënë. Pacatoyaquinatsi mapabaxutoje paxamë Dioso papecaasivaivi. Dioso pacajunata papijajivinexamë. Paxamë asaëya Dioso pajumecovënëtavanapame Jesucristo papecayajavaponaponaexae.

² Pacatovajëtatsi Diosojavabelia bitso papecaitaxutotsoniataenexa. Pacatovajëtatsinua Diosojavabelia itsamonae ata Dioso pitabarata barajamatabëcuenexanepanaeya panejivananapaenexa. Pacatovajëtatsinua Diosojavabelia namataenetsia panenasivanexa.

Pacuenia Judas toyaquina Dioso pejumecovënëtsivijavabelia pejumecovënëtsivaniva penajumetsënëtsilivaisi petsipaebavanapaevitsi yabara pelivaisi

(2 Pe 2.1-7)

³ Tajamonae bitso patacaasivavi, jamatabëpacatoyaquinatsi picani matavëjëa paneyapëtaenexa Dioso papecacapanepaejavanexa panijaneconivecua. Jamatabëpatoyaquinatsinua picani paneyapëtaenexa paxanë ata Dioso patanecapanepaejavanexa. Itsiata bajaraxua yabara apo pacatoyaquinae tsanetsi mapabaxutotaje. Vënëlivaisitaniji paxamëjavata pepatsijava penajumetsënëtsilivaisi petsipaebaponaevi. Bajaraxuata jitsipajë patacatoyaquinaenexa panejumecovënëtsivaniva bajarapamonae papecatsipaebilivaisi. Tshipaji bajarapamonae pexaniajailivaisi, palivaisi vaxaitsi jumecovënëtatsi, bajarapalivaisivecua, saicayalivaisi pacatsipaebavanapa. Nexata paxamë bajarapamonae ajumesaëya patsipaebare palivaisi vaxaitsi jumecovënëtavanapatsi.

⁴ Tshipaji bajarapamonae, penajumetsënëtsilivaisi papecatsipaebavanapaevi, paxamë tuatuajëta najoneyabiaba pacatsitanajamatabëcuene itajëtsinejeva. Bajarapamonae jamatabëcuenenavëxaniabiaya jumai tsabiabi: “Dioso baja cajena nacaitaxutotsoniatane vajanacacapanepaenexa. Bajaraxuata pibisiacuene exanae atatsi, apo itsacuene,” jai tsabiabi bajarapamonae. Bajarapamonae apo jumecovënëtsi caenë Dioso vajanacaevetsicuene. Apo jumecovënëtsinua caenë Jesucristo vajatuxanenëcuene. Bajarapamonae apo exanae pacuenia Dioso jitsipa. Apo exanaenua pacuenia Jesucristo ata jitsipa. Bajarapamonae itsamatacabi Dioso penaneconitsiaexanaejavanexatsi pijaneconi yabara, Dioso tajëvelia pejumelivaisibaxutota vajunupaebatsi.

⁵ Payapëtaneme rabaja mapacueneje. Bajayata vajatuxanenë Dioso pijajivi capanepa Egipto nacuavecua, Israel nacuayaberena. Nexata baja payapëtae atamë bajarpacuene, itsiata jitsipajë panenajamatabënapitsinexa icatsia bajarapacuene. Bajarpacuenia vajatuxanenë Dioso pijajivi capanepae ata, pecapanepaecujinae icatsia verebiaba bajarapamonaemyajuvënëvi. Bajarapacuenia verebiaba tshipaji bajarapamonae apo jumecovënëtsitsi.

⁶ Panajamatabënapirenuu pacuenia Dioso exana ángelevijavabelia ata. Angelevi Dioso tonacuenebavanapa athëbëtatsia. Angeleviyajuvënëvi apo exanae pacuenia Dioso itorobatsi. Apo jinavanapaenua itsajota picani Dioso tocopata pejinavanapaenexa. Bajaraxuata Dioso ángeleviyajuvënëvi cëbiaya jinavanapaeyaexana itsanacuata, pitaquirinacuata. Bajarajota ángelevi copiaevetavanapaeyaexanatsi Dioso penaneconitsiaexanaejavanexatsi. Nexata pamatacabi Dioso daxitamatacabi-javabelianexa naneconitsiaexanaena daxita pamonaenaneconita Diosojavabelia, bajarapamatacabi Dioso bajarapaángelevi ata naneconitsiaexanaena daxitamatacabi-javabelianexa.

⁷ Panajamatabënapirenuu Sodoma tomarami ata, Gomorra tomarami ata, pemuxuneneta penaetomaranëmi ata. Pamonaemi jinavanapa bajarapatomaranëta, bitso

tsavanapae pamonaē penajumetsēnētsilivaisi pacatsipaebavanapa. Tsipaji apo jamatabēcuēneyavenonae itsajivi ata. Peubinae, ponae apo nacuaītabiabi penacuaītsimatacabita ata, bajaraponae apo xanepanae itsacuēnejavayonexa ata. Bajara saya jamatabēcuēneitsi tsavanapae pamonaē penajumetsēnētsilivaisi pacatsipaebavanapa. Tsipaji apo jamatabēcuēneyavenonae itsajivi ata. Peubinae, ponae apo nacuaītabiabi penacuaītsimatacabita ata, bajaraponae peubinē yatabutopaya juta petajuitsinexa isotojavabelia. Bajara pijinia pacuenia Dioso naneconitsiaexanaena pamonaē penajumetsēnētsilivaisi pacatsipaebavanapa pibisiacuene pexanabiabixae. Nexata bajarapamonaē Dioso xuabianatsi infiernojavabelia. ¹³ Pacuenia malataca caecovēta apo rucae, caponana pīaxuirapērē pitapayabelia, bajara saya jamatabēcuēneitsi tsavanapae pamonaē penajumetsēnētsilivaisi pacatsipaebavanapa. Caejamatabēcuene apo xainabiabi. Bajarapamonaē piauracuene pexanabiabixae, nexata bepiaxuirajava paxamē tuatujēta. Bajarapamonaē pejamatabēcuēneta jamatabēcuēnebījanabiaba itsamonaē Dioso pejumecovēnētsivi. Pacuenia athēbēvetsica tulupu othopaena pevereverecaenexa, bajara pijinia pacuenia bajarapamonaē ata vereverecaena. Diosovecua naxuabiana. Tsipaji copaba pejumecovēnētsijavami pexaniajailivaisi. Bajaraxuata Dioso bajarapamonaē naneconitsiaexanaenatsi. Nexata bajarapamonaē pitaquirinacuata jinavanaena daxitamatacabijavabelianexa.

¹⁴ Enocpijinē bajayata ponapona. Bajaraponēmi Adānpijinē pemomoxiyajuvēnēnē. Nexata Enocpijinē Dioso pejamatabēcuēneta bajayata tajēvelia vajunupaeba, pamonaē aeconoxae mapamatacabitaje penajumetsēnētsilivaisi pacatsipaebavanapa. Enocpijinē baja cajena bajayata tajēvelia bajarapamonaē yabara jumaitsi mapacueniaje: “Vajatuxanenē Cristo, pijajivi āngelevi, ayaibitsaētōxaneto yajava, najetarucaena.

¹⁵ Najetarucaena penaneconitsiaexanaenexa daxita pamonaē apo exanaē Dioso pitorobicueniatsi. Najetarucaena penaneconitsiaexanaenexana xua daxita pamonaē pibisiacuēnia baracuaicuaijai Dioso,” jai baja cajena bajayata tajēvelia Enocpijinē.

¹⁶ Pamonaē penajumetsēnētsilivaisi pacatsipaebavanapa, apo sivajamatabēcuēnebarēya itsacuēnejavayo ata. Nexata pibisiacuēnia baracuaicuaijai tsabiabi daxita xua bajarapamonaē tocopiapataponatsi. Apo jumecovēnētsi pacuenia Dioso itorobatsi. Nexata bajarapamonaē exanavanapa pijacuata penatojitsipaecuēnia. Bajarapamonaē ayaijamatabēcuēnevi nataeya navajunupaebabiaba xua exana. Itsamonaējavabelia itsa cuaicuaijai, pexaniaacuēnia cuaicuaijai tsabiabi. Bajarapacuēnia pexaniaacuēnia cuaicuaijai tsabiabi saya pebarēyataenexatsi, perajutsinexatsinua penamatavenonaējavānē.

Pacuenia Dioso pejumecovēnētsivi muxujibatsi pejumecovēnētsiyaniva penajumetsēnētsilivaisi petsipaebavanapaevitsi yabara pelivaisi

¹⁷ Tajamonaē bitso patacaasivavi, panajamatabēnapire pacuenia baja cajena tajēvelia pacatsipaeba apóstolevi, vajatuxanenē Jesucristo pijajivi. Apóstolevi baja cajena tajēvelia pacatsipaeba pepatsijavanexa penajumetsēnētsilivaisi papecatsipaebivinexa. ¹⁸ Apóstolevi baja cajena tajēvelia pacajumaitsi mapacueniaje: “Nacua pecopiarucaevajēnaeyota, itsamonaē capocaponaena pexaniajailivaisi, Dioso pejumelivaisi. Bajarapamonaē exanavanapaena pibisiacuēne, pacuenia pijacuata natojitsipa,” pacajai baja cajena tajēvelia apóstolevi. ¹⁹ Pamonaē penajumetsēnētsilivaisi pacatsipaebavanapa, bajarapamonaē papecatsipaebilivaisita, Dioso panejumecovēnētsivi pacanavecuanatsanaeyaexanapona. Bajarapamonaē saya najamatabēxaina ēmapanacuapījijamatabēcuēneje. Nexata pibisiacuēne exanavanapa pacuenia pijacuata natojitsipa. Bajarapamonaē Espīritu Santo apo tsijamatabēcaetsi.

²⁰ Tajamonaē bitso patacaasivavi, asaēyata Dioso pajumecovēnētavanapare. Pacuenia Espīritu Santo pacaitoroba, pavajētabiabare Diosojavabelia. ²¹ Paxamē bitso Dioso pacaasiva. Bajaraxuata pacuenia Dioso pacaitoroba, pajinavanapare pibisiacuēne

paneexanaeyaniva. Bajayajebi pacopatsinejevamë, pacopiaevetavanapare matacabi apo peverevereceaeva papecarajutsinexa vajatuxanenë papecaitaxutotsoniataexae.

²² Itsamonae jumecovënëtsi ata pexaniajailivaisi, Dioso pejumelivaisi, itsiata jumeae-bapona. Bajarapitsivi payavenonare xaniavaetsia pejumecovënëtsinexa bajarapalivaisi. ²³ Bajarapamonae isotojavabelia bepejopaevinexa. Tsipaji pibisiacuenejavabelia jamatabëjopa. Bajaraxuata payavenonare bajarapitsivi. Itsamonae pijinia bitso pibisiacuene exanavanapa. Bajarapapibisiacuene paitoyamëre. Bajarapamonae itsiata paitaxutobejiobiataema. Payavenonaponare bajarapapibisiacuene pecopatsinexa. Itsiata baitsi jane xania. Panayajivitaema. Pëtsa paxamë ata bajarapamonaeta pibisiacuene panaexaname.

Pacuenia apóstolenë Judas itoroba daxita Dioso pejumecovënëtsivi: “Dioso, bitso ayaijamatabëcuenenëmë,” pejainexa Diosojavabelia yabara pelivaisi

²⁴ Dioso caëjëpatsi papecaevetsinexa pibisiacuene paneexanaeyaniva. Nexata pamatacabi Dioso naneconitsiaexanaena daxita pijaneconi pexainaevi, paxamë ata pacanubenaeyaexanaena bajaraponë Dioso, penivenivenaecotia pexainaenë, pitabarata. Itsiata baitsi jane paxamë paneconijibimë tsane. Bitso pabarëyamë tsane. ²⁵ Bajaraponë pepo caenë Dioso. Bajaraponë Dioso nacacapanepaena vajatuxanenë Jesucristo cruzata vajanacasivatëpaexae vajaneconi yabara. Bajaraxuata daxitajivi bejumaitsi Diosojavabelia: “Diosomë, bitso ayaijamatabëcuenenëmë,” bejai. Betsipaebaponanua itsamonaejavabelia Dioso bitso ayaijamatabëcuene pexainaenëcuene. Dioso cajena daxitanacua pevetsinë. Betsipaebaponanua itsamonaejavabelia Dioso pecaëjëpaejavatsi pevetsinexa daxitajivi. Bajarapacuenia Dioso jamatabëcueneitsi tsaponaponae mapanacuaje pexanaevajënaeya, mapamatacabi ataje, daxitamatacabijavabelianexa ata. Bajara itsi tsane.

San Juan peyaquinaelivaisi pacuenia tajëvelia Dioso tsitajëtatsi pacuenia itsijitsia mapanacuataje

Pacuenia tajëvelia Jesucristo Dioso tsitajëtatsi, juya bajarapacuenia Jesucristo petsitajëtsijava Juanjavabelia yabara pelivaisi

¹ Daxita xuanë Jesucristo tajëvelia Dioso tsitajëtatsi, daxita bajaraxuanë pelivaisi, xanë Juannë, yaquinajë mapabaxutotaje. Bajaraxuanë baja bepijiayo copiapatsiana. Xuanë tajëvelia Dioso tsitajëtatsi Jesús, bajaraxuanë juya Jesús tsitajëtsiana pijajivijavabelia. Bajaraxuata nexata Jesús itorobica pijaángel xanëjavabetsica. Nexata bajaraxuanë jumapecataeya tajëvelia netsitajëta Jesús pijaángel. Neyapëtaeyaexananua pajamatabëcuenelivaisi xaina bajaraxuanë. ² Nexata daxita bajaraxuanë pacuenia taniji, pelivaisi yaquinajë mapabaxutotaje. Pacuenia Dioso nejumaitsi, yaquinajë. Pacuenia Jesucristo ata jumaitsi, bajaraxua ata yaquinajë.

³ Pajivi tsimuxulebiana mapabaxutoje Dioso pejumecovënëtsivi penacaetuatsijavata, jamatabëcuenebarëya tsane. Pamonaë ata namuxunaevetsiana mapalivaisije, nexata itsa jumecovënëtsiana pacuenia Dioso tajëvelia jumaitsi, bajarapamonaë ata jamatabëcuenebarëya tsane. Bajarapacuenia jamatabëcuenebarëya tsane tsipaji baja imoxoyo pevajënaë tsaponae pecopiapatsinexa daxita xuanë pelivaisi yaquinajë mapabaxutotaje.

Pacuenia Juan toyaquina siete patomarabepejivivi, Dioso pejumecovënëtsivi, yabara pelivaisi

⁴ Xanë rabaja Juannë. Pacatoyaquinatsi siete papabitsaëtomëbeje, Dioso panejumecovënëtsivi, Asiavënë nacuata panejinavanapaevi. Ajena, mapamatacabitaje, Dioso ponapona. Dioso nacua pexanaevajënaeya ata, Dioso ponapona. Daxitamatacabijavabelianexa ata Dioso ponapona. Pacatovajëtatsi Diosojavabelia papecajamatabëcuene barëyayaexanaenexa, papecayavenonaenexanua. Siete paespíritubeje nubena Dioso peecaejava, tronovënëjava, pitabarata. Pacatojitsipatsi bajarapamonaë papecajamatabëcuene barëyayaexanaenexa, papecayavenonaenexanua. ⁵ Jesucristojavabelia ata bajarapacuenia pacatovajëtatsi. Jesucristo baja cajena pexaniajailivaisi, Dioso pejumelivaisi, jivi tsipaebabiaba. Daxita petëpaevivacqua, Jesús baja namataxainaeya Dioso asaëyaexanatsi petëpaejavavegua. Mapanacuata jivi pevetsivi ata matatoxenetsia, Jesús pepo pevetsinë daxitacuene. Jesús vajanacaasivaxae, nacasivatëpa. Nexata baja nacaveguaajibiaexana daxita pibisiacuene vajaexanaeneconimi. ⁶ Nexata baja Jesús pijajivitsi nacaexana itsamatacabi vajanacabarëevetsinexa daxitacuene. Jesús baja nacaexananua sacerdotevitsi, Jesús paxa Diosojavabelia jivi vajatovajëtabianexa. Nexata vaxaitsi daxitamatacabijavabelianexa ayaijamatabëcuene rajutabiabianatsi Jesúsjavabelia. ¡Apo vereverecae tsane Jesús daxitacuene pevetsijava! Bajara itsi tsane.

⁷ ¡Panenamuxunaevere mapalivaisije! Cristo raja najetarucaena athëbëvetsica itarërëbota. Pamatacabi Cristo najetarucaena athëbëvetsica, daxitajivi taenatsi. Pamonaë ata yencacuatatsi, bajarapamonaë ata taenatsi. Daxita nacuanëpijivi, pamonaë Dioso apo pejumecovënëtsivi, itsa taena Cristo penajetarucaejava athëbëvetsica, nuena pecajunavi. Bajara itsi tsane jivi itsa taena Cristo athëbëvetsica penajetarucaejava.

⁸ Jesús nayabarajumaitsi mapacueniaje: “Xanë rajane baja daxitacuene pepo tataxuxuabinë. Xanë rajane baja icatsia daxitacuene tacopiarucaeyaexanaenëna,” nayabarajai Jesús daxitacuene pevetsinë, daxitacuene pexanaenexa ata pecaëjëpaenëtsi. Ajena mapamatacabitaje Jesús ponapona. Dioso nacua

pexanaevajënaeya ata, Jesús ponapona. Daxitamatacabijavabelianexa ata Jesús ponapona.

Pacuenia Juan Jesús yacotiaya tsitanaitajëtatsi yabara pelivaisi

⁹ Xanë Juannë, panijabananënë. Tsipaji najuajumecovënëtavanapatsi Jesucristo. Nexata pacuenia paxamë ata itsamonae pacabejiobiaexanapona Dioso papijajivix-aemë, bajara pijinia pacuenia xanë ata itsamonae nebejiobiaexanapona. Jesucristo pijajivitsi nacaexana itsamatacabi vajanacabarëevetsinexa daxitacuene. Jesucristo papecayavenonaexae, pacaasaëmë tsavanapae Dioso panejumecovënëtsijava. Bajara pijinia xanë ata itsinë. Dioso pejumelivaisi jivi tatsipaebabiabixae, naneconitsia ponaponajë Patmosvënë tunaetota. Jesucristo pelivaisi ata jivi tatsipaebabiabixae, naneconitsiaponaponajë. ¹⁰ Nexata Patmosvënë tunaetota domingota Espíritu Santo netsijamatabëvënëca. Nexata tapënëverena pecuaicuaijajava ayaijume, betrompetajume penajumetsijava, jumetaniji. ¹¹ Pecuaicuaijajava nejumaitsi mapacueniaje:

—Xanë rajane baja daxitacuene pepo tataxuxuabinë. Daxitacuene icatsia tacopiarucaeyaexanaenënexa. Xua baja taneme, bajaraxua baja pelivaisi copiaya yaquinare. Xuanë ata icatsia aeconoxae taeponaename, bajaraxuanë ata pelivaisi yaquinaename. Bajaraxuacujinae bajarapalivaisi toitorobianame Dioso pejumecovënëtsivi, siete patomarabejepijivijavabelia, Asiavënë nacuata pejinavanapaevi. Toitorobianame bajarapalivaisi Efeso tomarapijivijavabelia, Esmirna tomarapijivijavabelia ata, Pérgamo tomarapijivijavabelia ata, Tiatira tomarapijivijavabelia ata, Sardis tomarapijivijavabelia ata, Filadelfia tomarapijivijavabelia ata, Laodicea tomarapijivijavabelia ata, nejai mapacueniaje tapënëverena pecuaicuaijajava.

¹² Nexata napënëyorotajë tataenexa ponë tapënëverena nebarëcuaicuaijai. Nexata taenubajë siete xuabeje orota pexanaejavanë. Bajaraxuanë pematatuta naitayotanubena. ¹³ Bajaraxuanë petuatujëta taenutajë pebi. Bajaraponë yabara jamatabëjumaitsinë:

—Jesús raeta, Daxitajivi Pematapijinë, jamatabëjanë.

Bajaraponë penaxatatsijava apiareca. Nacorobëcëtanuca orota pexanaepana. ¹⁴ Mataniojai bitso pacuenia baniojai papaëputo. Pitaxutobeje naitayota. Pacuenia isotocotia bacotia itsi, bajara itaxutocotia itsi. ¹⁵ Petaxubeje ata nivenivenabeje pacuenia banivenivena broncevënëjjava pesetsijava, beoronanitomi. Pecuaicuaijajava najumeta pacuenia banajumeta jonca. ¹⁶ Pecujanenia cobenanuca siete patuluputobeje. Pecuibuatsina pitsapa anijabarëneniabeje pexiujai spada. Pacuenia matacabipijijuameto itsa aitavajënae, xaniavaetsia baitayota, bajarapacuenia itabaranaitayota.

¹⁷ Itsa taniji bajaraponë, betatëpaenë irataeya bocajunujë bajaraponë pitabarata. Itsiata baitsi jane bajaraponë nejayarena pecujuacobeta. Nejumaitsi:

—Pëtsa necujunavame. Xanë rajane baja daxitacuene pepo tataxuxuabinë. Daxitacuene icatsia tacopiarucaeyaexanaenënexa. ¹⁸ Xanë rajane baja pepo tasaëtsaponaponaenë daxitamatacabijavabelianexa. Xanë picani tëpajë. Itsiata baitsi jane icatsia asaënë tatëpaecujinae. Nexata baja asaënë tsaponaponae daxitamatacabijavabelianexa. Dioso netocopata tacapanepaenexa tajajivi peponaeyaniva infernojavabelia. Netocopatanua tananeconitsiaexanaenexa pijaneconi pexainaevi peponaenexa infernojavabelia. ¹⁹ Xua baja taneme, bajaraxua baja pelivaisi yaquinare. Xuanë ata icatsia aeconoxae taeponaename, bajaraxuanë ata pelivaisi yaquinaename. ²⁰ Xuanë, siete patuluputobeje, tacujanenia cobenanucajë, mapajamatabëcuenelivaisi xainaje. Siete rabaja pijinia patomarabejepijivi Dioso pejumecovënëtsivi penamatacaitorobivi tsavanapae. Xuanë pijinia siete xuabeje orota pexanaejavanë pematatuta naitayotanubena, mapajamatabëcuenelivaisi xainaje.

Siete rabaja pijinia patomarabejepijivi Dioso jumecovënëtavanapa, nejai Jesús, ponë taenutajë, siete xuabeje orota pexanaejavanë tuatujëta penucaenë.

2

Pacuenia Juan vajatuxanenë Jesús itorobatsi petoyaquinaenexa Efeso tomarata Dioso pejumecovënëtavanapaevi penamatacaitorobinëjavabelia yabara pelivaisi

¹ Jesús icatsia nejumlahtsi:

—Efeso tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare. Nexata daxita pijajivi yajava yapëtaena mapalivaisije, nejai Jesús, ponë siete patuluputobeje pecujanenia cobenanuca, siete xuabeje orota pexanaejavanë pematatuta penaitayotanubenaejavanë tuatujëta penucaenë.

Jesús nitoroba Efeso tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumlahtsilivaisije: ² “Yapëtaniji daxita xua paexanavanapame. Yapëtanijinua ayaicuenia Dioso panetonacuenebijava. Yapëtanijinua ajamatabëcuenesaëya Dioso panejumecovënëtavanapaejava. Yapëtanijinua panecueneataejitsibijava pibisiacuene pexanaevi. Yapëtanijinua nayajivitaeya panejnavanapaejava itsamonae papecayamaxëitojorobianiva. Itsamonae picani papecayamaxëitojorobinexa, pacajumai tsabiabi: ‘Paxanë raja paapóstolevinë,’ pacajai tsabiabi. Itsiata penajumetsënëtsivicuene payapëtaeyabiabame panenayajiviyapëtaexae. ³ Paxamë bajayajebi pacaajamatabëcuenesaëmë tsavanapae Dioso panejumecovënëtavanapaejava, itsamonae pacabejiobiaexanabiabi ata. Ayaicuenia panacuenebame patacaitorobicuene. Apo payabaracueranaemë cajena. Bajarapacuenia panenacuenebavanapaexae, pacasivajamatabëbarëyatsi.

⁴ Itsiata baitsi jane caejavayo yabara pananeconitame xanëjavaberena. Tsipaji aeconoxae apo panejitsipaemë pacuenia picani bajayata copiaya panejitsipame. ⁵ Panenajamatabënapire icatsia pacuenia bajayata panejitsipame. Panajamatabëcuenepënëyorore xanëjavaberena. Panetonacuenebavanapare icatsia pacuenia bajayata xaniavaetsia panetonacuenebavanapame. Itsa baja apo panejitsipaemë tsane icatsia, nexata baja apo patajajivimë tsane. ⁶ Itsiata baitsi jane pacasivajamatabëcuenëbarëyatsi patanejamatabëcuenëjëpaexaemë mapacuene yabaraje. Pacujiruitoyamë nicolaítavi pibisiacuene pexanaponaejava. Bajaraxua pexanaejava xanë ata cujiruitoyanë. ⁷ Itsa pamuxuvojorubename, panatojumetaema pacuenia Espíritu Santo jumaitsi Dioso pejumecovënëtsivijavabelia. Jumaitsi mapacueniaje: ‘Pajivi Cristo jumecovënëtaponapona ëpetëpaejavabelianexa, bajarapajivi Dioso tocopatsianatsi pejonenexa Dioso pijanacuayabetsia,’ jai Espíritu Santo,” pejailivaisi toyaquinare Efeso tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatujëta penucaenë.

Pacuenia Juan vajatuxanenë Jesús itorobatsi petoyaquinaenexa Esmirna tomarata Dioso pejumecovënëtavanapaevi penamatacaitorobinëjavabelia yabara pelivaisi

⁸ Jesús icatsia nejumlahtsi:

—Esmirna tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare daxita pijajivi yajava peyapëtaenexa mapalivaisije, nejai Jesús, ponë daxitacuene pepo petaxuxuabinë, daxitacuene icatsia pecopiarucaeyaexanaenënexa.

Bajaraponë picani tēpa. Itsiata baitsi jane icatsia asaë petëpaeacujinae. Nexata baja asaë tsaponapona daxitamatacabijavabelianexa. Jesús nitoroba Esmirna tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumlahtsilivaisije: ⁹ “Yapëtaniji daxita xua paexanavanapame. Yapëtanijinua itsamonae papecabejiobiaexanaponaejava. Yapëtanijinua bepanejjobivicuene. Itsiata baitsi jane itsamatacabi Diosojavatatsia bitso panexainaevi

tsane. Yapëtanijinua pibisiacuena papecabaracuaicuaijajava judíovi, Dioso apo pejumecovënëtsivi. Bajarapamonae cajena saya dovathi pijajivi. ¹⁰ Pëtsa pacujunavame itsamonae, pacabejiobiaexanaejitsia ata. Dovathi raja pejamatabëcueneta penaneconitsivi pejebabiabibota, pacananeconitsiaexanejebiana. Bajara-pacuenia pacananeconitsiaexanejebiana dovathi papecajamatabëcueneëjëbinexa, papecajamatabëcueneypëtaenexa xaniajai pepacuene patanejumecovënëtsijavamë. Pacabejiobiaexanaponaena diez pamatacabibeje. Bajarapacuenia pacaexanae ata tsane, itsiata panejumecovënëtsianame matapania panetëpaejavabelianexa. Nexata xanë pacarajutsianatsi matababi apo pevereverecejava. ¹¹ Itsa pamuxuvojorubename, panatojumetaema pacuenia Espíritu Santo jumaitsi Dioso pejumecovënëtsivijavabelia. Jumaitsi mapacueniaje: ‘Pajivi Cristo jumecovënëtapona epetëpaejavabelianexa, bajarapajivi apo itsacueniabi tsanetsi cotocaevi patëpaejava,’ jai Espíritu Santo,” pejailivaisi toyaquinare Esmirna tomarata peecaenë, Dioso pejumecovëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatuajëta penucaenë.

Pacuenia Juan vajatuxanenë Jesús itorobatsi petoyaquinaenexa Pérgamo tomarata Dioso pejumecovënëtavanapaevi penamatacaitorobinëjavabelia yabara pelivaisi

¹² Jesús icatsia nejumaitsi:

—Pérgamo tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare daxita pijajivi yajava peyapëtaenexa mapalivaisije, nejai Jesús, ponë pecuibuatsina pitsapa anijabarëneniabeje pexiujaespada.

Jesús nitoroba Pérgamo tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije: ¹³ “Yapëtaniji daxita xua paexanavanapame. Yapëtanijinua dovathi pijajivi tuatuajëta panejinavanapaejava. Itsiata baitsi jane pajamatabëcuenesaëmë tsavanapae patanejumecovënëtavanapaejavamë. Bajayata Antipaspijinë tajumelivaisi jivijavabelia tsipaebabiaba. Nexata Antipaspijinë paxamë tuatuajëta dovathi pijajivi pebeyaxuabijavatsi, patae atamë, itsiata apo pacopatsimë patanejumecovënëtavanapaejavamë. Bajara-pacuenia patanejumecovënëtavanapaexaemë, pacasivajamatabëcuenebarëyatsi. ¹⁴ Itsiata baitsi jane itsajamatabëcuenejavaxi yabara pananeconitame xanëjavaberena. Bajarajota Pérgamo tomarata paxamëyajuvënëvi muxubijiapenetapona itsamonae pibisiacuene pexanaenexa. Bajayata Balaampijinëmi jivi peyamaxëitojorobabiabinëmi ponapona. Nexata Israelpijinë pemomoxi penaneconitsinexa Diosojavabelia, Balaampijinëmi itoroba Balacpijinëmi pemuxubijiapenetaponaenexa Israelpijinë pemomoxijavabelia. Nexata Balacpijinëmi muxubijiapeneta Israelpijinë pemomoxi penaponaenexa fiestajavabelia. Nexata fiestajavata itsamonae dajubinë itsa beyaxuaba, jumapecataeya pexanaenëjavabelia ofrendacuena perajutsiyajuvënëvi naxane Israelpijinë pemomoxi. Balacpijinëmi muxubijiapenetanua Israelpijinë pemomoxi pibisiacuene pexanaenexa pevitota. Bajara pijinia pacuenia aeconoxae paxamëyajuvënëvi ata exanapona. Pérgamo tomarapijivi pibisiacuene pexanaenexa, muxubijiapenetapona. ¹⁵ Itsamonae pijinia paxamëyajuvënëvi nicolaítavi petsipaebaponaelivaisi jumecovënëtavanapa. Nexata tanejumecovënëtsivi pibisiacuene pexanaenexa, bajarapamonae muxubijiapenetapona. ¹⁶ Bajaraxuata paxamë xaniavaetsia panajamatabëcuenepeñëyorore Diosojavabelia. Itsa jume, xanë nexata naxanitsiayo ponaenajë paxamëjavabereca tabarënenexa bajarapamonae tacuibuatsina pepitsapaeespada. ¹⁷ Itsa pamuxuvojorubename, panatojumetaema pacuenia Espíritu Santo jumaitsi Dioso pejumecovënëtsivijavabelia. Jumaitsi mapacueniaje: ‘Pajivi Cristo jumecovënëtapona epetëpaejavabelianexa, bajarapajivi rajutsianajë pexaenexa manávënëjava, athëbëpijijava, pejamatabëcuene asaëyaexanaejavanexatsi. Rajutsianajënu penioponaeboto. Bajarapaiboto pijumata

bajarapajivi vënërutsianajë pejanavënë. Itsajivi ata apo vënëyapëtae tsanetsi. Caejivi, bajarapaiboto pepitsijivi, navënëyapëtaena, jai Espíritu Santo,” pejailivaisi toy-aquinare Pérgamo tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatujëta penucaenë.

Pacuenia Juan vajatuxanenë Jesús itorobatsi petoyaquinaenexa Tiatira tomarata Dioso pejumecovënëtavanapaevi penamatacaitorobinëjavabelia yabara pelivaisi

¹⁸ Jesús icatsia nejumlahtsi:

—Tiatira tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare pijajivi yajava peyapëtaenexa mapalivaisije, nejai Dioso pexënato, ponë pitaxutobeje naitayota. Pacuenia isotocotia bacotia itsi, bajara pitaxutocotiaitsinë, ponë petaxubejenivenivena ata pacuenia banivenivena broncevënëjava pesetsijava, beoronanitomi.

Jesús nitoroba Tiatira tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumlahtsilivaisije: ¹⁹ “Yapëtaniji daxita xua paexanavanapame. Yapëtanijinua itsamonae ata paneasivatsavanapaejava. Yapëtanijinua patanesivanajamatabëcuene copatavanapaejavamë. Yapëtanijinua panetonacuenebajava Dioso. Yapëtanijinua paneajamatabëcuenesaë tsavanapaejava, itsamonae pacaitsacueniababiabi ata. Yapëtanijinua pacuenia panetonacuenebavanapame pamatacabi ajena panejumecovënëtame. Yapëtanijinua pacuenia jane baja aeconoxae bitsoyo panetonacuenebavanapame. Bajarapacuenia paneexanavanapaexae pacasivajamatabëbarëyatsi. ²⁰ Itsiata baitsi jane itsajamatabëcueneyo yabara paneconitame xanëjavaberena. Tsipaji apo pacujiruitavetsimë Jezabelvënëva pibisiacuene pexanaejava. Bajarapova beprofetava, Diosojumelivaisi bepepaebiva, natane. Nexata patajajivimë bajarapova pacayajuvënëyamaxëitojorobapona baja. Bajarapova papecayajuvënë yamaxëitojorobinexa jumai tsabiabi: ‘Pebijivi pijavavecua jaitsi ata itsava, itsiata apo itsacuene. Bajara pijinia itsi petiriavi ata. Itsanë jaitsi ata pamonavecua, itsiata apo itsacuene. Bajara pijinia itsi pevi ata. Dajubinë itsa beyaxuaba ofrendacuenia pevi perajutsinexa jumapecataeya pexanaenëanëjavabelia, bajarapaviyajuvënëjava xae atatsi, itsiata apo itsacuene,’ jai tsabiabi bajarapova patajajivimë papecayajuvënë yamaxëitojorobinexa. ²¹ Bajarapova picani pecopatsijava pibisiacuene pexanabiabijavavecua, bajayajebi evetaponaponajë. Itsiata baitsi jane apo jamatabëcopatsi pevitota pibisiacuene pexanabiabijava. Apo najamatabëcuenepeñëyorotsi xanëjavaberena. ²² Bajarapova nexata avitaniaexanaenajë camata pebobocaenexa. Nexata pamonae paxamëyajuvënëvi itsa apo copatsi tsane bajarapova pitorobicueniatsi pexanavanapaejava, pamatabëxëyo pevitota pibisiacuene exana bajarapova pitorobicueniatsi, nexata bajarapamonae ata bitso nabejibitsiaexanaenajë. ²³ Bajarapova pexi ata verebiabianajë. Nexata daxita Dioso pejumecovënëtsivi nejamatabëcueneyapëtaena. Nejamatabëcueneyapëtaena daxitajivi bëpënëa pejamatabëëthëtota, penajamatabëxainacuene ata, tayapëtaenëcuene. Pacaejivimë canacujitsia xuavajëto panetonacuenebavanapame, bajara pijinia pitsijavavajëto pacarajutsianatsi. Xuavajëto pijinia panijaneconi paxainame, bajara pijinia paneconivajëtota pacananeconitsiaexanaponaenatsi. ²⁴ Paxamë apo panejumecovënëtsivi, Jezabel pacaitorobi ata pibisiacuene picani paneexanaenexa, mapacuenia pacajumaitsitsije. Paxamë apo pajumecovënëtsimë dovathi pijalivaisi, palivaisi Jezabel jivi tsipaebapona. Bajarapalivaisita cujarubapona dovathi pijacuene pevajënaeyabelia peyapëtaeyaexanaponaenexa. Bajaraxuata apo pacaitorobitsi panejumecovënëtsinexa pematatsënëa itsalivaisi, piyapëbejelivaisi. ²⁵ Nexata pacaasaëmëre tsavanapae panejumecovënëtsijava Dioso pejumelivaisi matapania ètapatsimatacabitsica javabelianexa. ²⁶ Itsamonae èpetëpaejavabelianexa,

catsitecavanapaena tanesivanajamatabëcuene copatavanapaejava. Tajitsipaecuene ata netoexanavanapaena. Bajarapamonae itsamatacabi tocopatsianajë pevetsinexa daxitanacuapijivi. ²⁷ Bajarapamonae itsamatacabi daxitanacuapijivi itsa evetsiana, ajumesaëya itorobabiabiana pejumecovënëtsinexatsi. Pacuenia xanë ata taxa netocopata daxitanacuapijivi taevetsinexa, bajara pijinia pacuenia bajarapamonae ata pevetsinexa daxitanacuapijivi, tocopatsianajë. Pacuenia atsananito pefaratsicanalito toxobiaxuabatsi, hierronaebota itsa conitaxuabatsi, bajara pijinia itsanetsi pamonae Dioso apo pejumecovënëtsivi. Tajajivi verebiabiana daxita Dioso apo pejumecovënëtsivi. ²⁸ Pamonae tajajivi, rajutsianajë pexainaenexa papinijicotia xainajë ayaijamatabëcuenevinexa. ²⁹ Itsa pamuxuvojorubename, panatojumetaema pacuenia Espiritu Santo jumaitsi Dioso pejumecovënëtsivijavabelia,” pejailivaisi toyaquinare Tiatira tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatujëta penucaenë.

3

Pacuenia Juan vajatuxanenë Jesús itorobatsi petoyaquinaenexa Sardis tomarata Dioso pejumecovënëtavanapaevi penamatacaitorobinëjavabelia yabara pelivaisi

¹ Jesús icatsia nejumaitsi:

—Sardis tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare pijajivi yajava peyapëtaenexa mapalivaisije, nejai Jesús, ponë xaina siete paespíritubeje, Dioso pijaespíritu, ponë cobenanuca siete patuluputobeje.

Jesús nitoroba Sardis tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije: “Yapëtaniji daxita xua paexanavanapame. Yapëtanijinua itsamonae papecasivajamatabëjumai tsabiabijava: ‘Bajarapamonae bitso tonacuenebavanapa Dioso pijacuene,’ papecasivajamatabëjai tsabiabijava. Itsiata baitsi jane xanë yapëtaniji pibisiacuene paneexanaejava. Yapëtanijinua bëpënëa panejamatabëcuenefaefaenaejava patanejumecovënëtsijavamë. ² Nexata namataenetsia panajamatabëcueneasaëyaexanare. Pajamatabëcueneitsamonae papecasivajamatabëjumai tsabiabijava: ‘Bajarapamonae bitso tonacuenebavanapa Dioso pijacuene,’ papecasivajamatabëjai tsabiabijava. Itsiata baitsi jane xanë yapëtaniji pibisiacuesaëya exanaenamenua itsamonae ata, pamonae pijinia jamatabëcuenefaefaenapona tanejumecovënëtsijava. Tsipaji baja bajarapamonae imoxo pecopatsi tanejumecovënëtsijavami. Xua paexanavanapame, bajaraxua picani paxamë pacatsitapexaniacuene. Itsiata baitsi jane bajaraxua Dioso apo tsi-tapexaniacuentsi. ³ Panajamatabënapire palivaisi baja copiaya itsamonae pacatsipaeba xanë patacacapanepaejavanexa yabara. Pacaasaëmëre tsavanapae bajarapalivaisi panejumecovënëtavanapaejava. Pacopabare pibisiacuene paneexanabiabijava. Panajamatabëcuenepepënëyorore Diosojavabelia. Namataenetsia itsa apo panajamatabëcueneasaëyaexanaemë tsane patanejumecovënëtsijavamë, nexata jemata patsiarecajë patacananeconitsiaexanaenexa. Apo payapëtaemë tsane paepatota patsijitsianëreca. Tsipaji paepatota apo panejamatabënajinaemë, jemata patsiarecajë. Pacuenia penacobetoxotsinënexa jemata bapata, paepatota apo jamatabënajinaetsi, bajara pijinia xanë ata itsinë tsane. ⁴ Paxamë Sardis tomarata panejinavanapaevi, itsamonae paxamëyajuvënëvi pibisiacuene apo exanae. Pacuenia itsi pamonae apo toxuiratsi penaxatabijavanë, bajara pijinia jamatabëcueneitsi tsavanapae bajarapamonae Dioso pitabarata aneconijibia pejinavanapaexae. Itsamatacabi bajarapamonae xanëjavata jinavanapaena. Bajarapamonae itsamatacabi xanëjavata itsa jinavanapaena, pianeconijibixae, naxatabiana penioponaejavanë. ⁵ Pamonae nejumecovënëtavanapaena

ëpetëpaejavabelianexa, bajarapamonae naxatabiana penioponaejavanë. Bajarapamonae apo vënëiquinaenë tsane pabaxutota vënërubena pamonaë matacabi apo peverevere-caejava pexainaevinexa. Biji rajane pamonaë tajajivi, vënëyapëtaeyaexanaponaenajë taxajavabelia, taxa pijaängelevijavabelia ata. ⁶ Itsa pamuxuvojorubename, panatolumetaema pacuenia Espiritu Santo jumaitsi Dioso pejumecovënëtsivijavabelia,” pejailivaisi toyaquinare Sardis tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatuajëta penucaenë.

Pacuenia Juan vajatuxanenë Jesús itorobatsi petoyaquinaenexa Filadelfia tomarata Dioso pejumecovënëtavanapaevi penamatacaitorobinëjavabelia yabara pelivaisi

⁷ Jesús icatsia nejumaitsi:

—Filadelfia tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare pijajivi yajava peyapëtaenexa mapalivaisije, nejai Jesús, ponë planeconijibinë, ponë copiaevetavanapatsi icatsia pepatsijavanexatsica vajanacacapanepaenexa.

Pacuenia bajayata Davidpijinë eveta Israelnacia, bajara pijinia pacuenia Jesús evetsiana mapanacuaje. Evetsiana athëbëtatsia ata, Dioso pijanacia. Nexata itsamatacabi Jesús pijajivi itorobiana daxitanacuanëjava jivi petsipaebanajetarubenaenexa Diosojavabelia pecapanepaelivaisinexatsi. Nexata panacuanëjava Jesús pijajivi itorobiana, bajarapanacuanëjava pejinavanapaevi Jesús pijajivi tsipaebanajetarubenaena Diosojavabelia pecapanepaelivaisinexatsi. Nexata itsajivi ata apo caëjëpaetsi tsane Jesús pijajivi pitavetsinexa petsipaebanajetarubenaeyaniva bajarapanacuanëjava pejinavanapaevi. Panacuanëjava pijinia Jesús pijajivi apo tocopatsi tsane Diosojavabelia jivi pecapanepaelivaisinexatsi petsipaebanajetarubenaenexa, bajarapanacuanëjava pejinavanapaevi Jesús pijajivi apo tsipaebanajetarubenaë tsane. Nexata itsajivi ata apo caëjëpaetsi tsane Jesús pijajivi pitorobinexa petsipaebanajetarubenaenexa bajarapanacuanëjava pejinavanapaevi. Jesús nitoroba Filadelfia tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije: ⁸ “Yapëtaniji daxita xua paexanavanapame. Apo pasaëmë. Itsiata panejumecovënëtavanapame. Apo panayavajunuaxainaemë patajajivicuenemë. Bajaraxuata pacatocopatatsi talivaisi jivi panetsipaebaponaenexa panevajënaeyabelia. Nexata itsajivi ata apo caëjëpaetsi tsane papecacopatsiaexanaenexa talivaisi jivi panetsipaebaponaejava. ⁹ Panejumetaema. Itsamonae rabaja judíovi ata, dovathi pijajivi. Tsipaji apo nejumecovënëtsi. Bajarapamonae jamatabëcuenenavëxaniabiaya jumai tsabiabi: ‘Paxanë raja pajudíovinë, Dioso papijajivinë,’ jai tsabiabi. Itsiata baitsi jane Dioso apo pijajivi. Tsipaji apo nejumecovënëtsi. Bajarapamonae itsamatacabi paneitabarata pematatabacabëta pacatonubenaeyaexanaenatsi. Nexata bajarapamonae yapëtaena paxamë patacaasivacuene. ¹⁰ Pacaitorobatsi patanejumecovënëtsijavamë bajayajebi panecasaëtsavanapaenexa. Nexata baja bajarapacuenia panejumecovënëtavanapame. Bajaraxuata nexata pamatacabi daxitanacuapijivi piyaicuene taeponaena, paxamë pacaevetsianatsi. Nexata paxamë apo pacaitsacueniabi tsane. ¹¹ Naxanitsiayo rabaja ponaenajë paxamëjavabereca. Xaniavaetsia baja pacaasaëmëre tsavanapae patanejumecovënëtavanapaejavamë. Nexata itsajivi ata apo pacavecuapitsi tsane xua taxa Dioso pacarajutsiana athëbëtatsia. ¹² Pamonaë nejumecovënëtavanapaena ëpetëpaejavabelianexa, bajarapamonae taxa Dioso bepijatemplobonaesiturutonë taenatsi athëbëtatsia. Bajarapacuenia taxa Dioso bepijatemplobonaesiturutonë taenatsi bitso pijamatabëcuenesaë tsavanapaexae tsane tanejumecovënëtavanapaejava. Bajarapamonae taxa Dioso athëbëtatsia yajavajinavanapaena daxitamatacabijavabelianexa. Nexata

taxa Dioso pevënë yaquinarutsianajë bajarapamonaejavabelia. Yajavayaquinarutsianajë taxa Dioso pijatomara pevënë. Bajarapatomara, pejana Jerusaléntomara. Bajarapatomara athëbëvetsica patsianica, taxa Diosojavavetsica. Tavënë ata, pejanavënë, yaquinarutsianajë bajarapamonaejavabelia. ¹³ Itsa pamuxuvojorubename, panatumetaema pacuenia Espiritu Santo jumaiti Dioso pejumecovënëtsivijavabelia,” pejailivaisi toyaquinare Filadelfia tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatujëta penucaenë.

Pacuenia Juan vajatuxanenë Jesús itorobatsi petoyaquinaenexa Laodicea tomarata Dioso pejumecovënëtavanapaevi penamatacaitorobinëjavabelia yabara pelivaisi

¹⁴ Jesús icatsia nejumaiti:

—Laodicea tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare pijajivi yajava peyapëtaenexa mapalivaisije, nejai Jesús, ponë copiaevetavanapatsi icatsia pepatsijavanexatsica vajanacacapanepaenexa.

Bajaraponë pexaniajailivaisi jivi tsipaebabiaba. Pexanaenënuaxa daxitacuene, xua Dioso exana mapanacuataje. Jesús nitoroba Laodicea tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije: ¹⁵ “Yapëtaniji daxita xua paexanavanapame. Yapëtanijinua patanejumecovënëtsivi atamë, panejamatabëcuenevetsina bevelia patanejitsipaejavamë. Yapëtanijinua bevelia patanetonacuenebavanapaejavamë. Pacuenia apo tanejumecovënëtsivi jamatabëcueneitsi xanëjavaberena, itsiata picani bitso apo pajamatabëcueneitsimë.

Pacuenia pijinia xaniavaetsia tanejumecovënëtsivi jamatabëcueneitsi xanëjavaberena, itsiata apo pajamatabëcueneitsimë. Pacuenia jamatabëcueneitsi pamonaepo tanejumecovënëtsivi, itsa pajamatabëcueneitsimë tsipae, nexata xanepanaejitsipa. Itsa jume, pacuenia jamatabëcueneitsi pamonaepo xaniavaetsia tanejumecovënëtsivi, itsa pajamatabëcueneitsimë tsipae, nexata xanepanaejitsipa. Tsipaji roviaalia panajamatabëcuene yapëtaejitsipame pacuenia pajamatabëcueneitsimë tsavanapae xanëjavaberena. ¹⁶ Nexata pacuenia mera perëbënaera apo cainejebi, bitso apo atajunua, bajara pajamatabëcueneitsimë xanëjavaberena. Bajarapitsira apo jitsipaetsi vajaapaenexa. Nexata vajaapaeyaniva, navecuapatajarabatsi penaxuabinexa.

Bajara pijinia pacuenia pacanavecuaxuabianatsi. Tsipaji apo jitsipaenë pacuenia bëpënë panejamatabëcuenevetsina pajamatabëcueneitsimë tsavanapae. Baitsi apo jitsipaenë bevelia patanejitsipaejavamë. Bajaraxuata pacanavecuaxuabianatsi. ¹⁷ Paxamë pajamatabëjumaitsimë tsabiabi: ‘Xanë baja cajena bitso daxitacuene taxainaenë. Daxita xua nacuenebaponaponajë taxinaejavanexa, netocapitsapapona. Nexata itsacuenejava ata apo namatavenonaenë,’ pajamatabëjamë tsabiabi. Itsiata baitsi jane Diosojavabelia apo panejamatabëcuenexanepanaexae, pepacuene apo pajamatabëcuenebarëyamë tsavanapae. Apo payapëtaemënuaxa bitso bepanejobicuene Dioso pitabarata. Paxamë cajena Dioso pacatane bepaneitaxutotsëcënaevi bitso, bepanejumasaajinaevinua. ¹⁸ Bajaraxuata pacamuxujobijitsiatsi. Panevecuapire bitso penamatamotsijava paricovinexamë jane baja Diosojavatatsia. Panevecuapirenuaxa penioponaenaxatatsijava panenaxatatsinexa, panenaperabëcaranatsinexa Dioso pitabarata paneaurajavavecua. Panevecuapirenuaxa paneitaxutotsëcënaevaë panetaenexa jane baja xaniavaetsia. Nexata dovathi pijacuene panayajivitaenaxa papecayamaxëitojorobianiva. ¹⁹ Daxita pamonaepo tasivavi, muxujobajë peyapëtaenexa. Naneconitsiaexanajënuaxa pecopatsinexa apo tajitsipaecuene pexanaejava. Nexata asaëyata panejumecovënëre. Pacopabare pibisiacuene paneexanabijava. Panajamatabëcuenepeñëyorore Diosojavabelia. ²⁰ Panejumetaema. Itsajivi itsa pata panijabota, nexata itsa pacajunata, patobaupatame pejonenexa. Bajara pijinia pacuenia xanë ata panejamatabëëthëto itsa panetobaupatsianame, pacatsijamatabëjonenatsi. Nexata

pacayajavaponaponanatsi daxitamatacabijavabelianexa. ²¹ Xanë baja cajena taxa Dioso taneitorobicuenia jumecovënëtaponaponajë ëtatëpaejavabelianexa. Nexata baja aeconoxae yajavaecajë taxa peecaejavata, pijatronovënëjavata. Pamonaë pijinia nejumecovënëtavanapaena ëpetëpaejavabelianexa, bajarapamonae pijinia tocopatsianajë tayajavaecaenexa tronovënëjavata. ²² Itsa pamuxuvojorubename, panatojumetaema pacuenia Espiritu Santo jumaitsi Dioso pejumecovënëtsivijavabelia,” pejailivaisi toyaquinare Laodicea tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatujëta penucaenë.

4

Pacuenia Juan tane Dioso pijajivi Dioso pijanacuatatsia yabara pelivaisi

¹ Icatsia taniji baupa penabaupatanucaejava athëbëtatsia. Ponë baja copiaya jumetaniji pecuaicuaijajava betrompetajume, bajaraponë icatsia pecuaicuaijajava jumetaniji. Nejumaitsi mapacueniaje:

—Junaimina xanëjavabetsina. Catsitajëtsianatsi majotatsinaje pacuenia pevajënaeyabelia itsi tsaponaejitsia bajarapanacuatareca, nejai ponë jumetaniji pecuaicuaijajava.

² Nexata bajarapaepatota nayapëtaniji athëbëtatsia Espiritu Santo pesaë tayajavaponaponaejava. Athëbëtatsia taniji tronovënëjava. Bajarapatronota Dioso taeyetajë.

³ Dioso, ponë eca bajarapatronota, itabaracotiabatsi. Pacuenia cotiaitsi penamatamotsiibotonë, bajara itabaracotiaitsi. Pacuenia cotiaitsi jaspevënëiboto, pacuenia cotiaitsi cornalinavënëiboto ata, bajaraitabaracotia itsi. Bajarapatrono mata-toyorotsia aravalibo taenutajë. Pacuenia esmeraldavënëiboto cotiaitsi, bajaracotia itsanucæ bajarapaaravalibo. ⁴ Bajarapatrono matatoyorotsia taenubajënuu veinticuatro patronobeje. Caetronota canacujitsia ecapona ancianonëanë. Bajara-paancianovi naxatabena penioponaejavanë. Orotta pexanaecoronanë mataena.

⁵ Patronota eca Dioso, bajarapatronojavaverena yamaxë binebinejai. Najumetajunu-junua. Siete xuabeje pitayotanubenaejavanë taenubajë bajarapatronoitabarata. Bajarapaitayotanubenaejavanë mapajamatabëcuenelivaisi xainaje. Siete rabaja pijinia patomarabejepijivi, Dioso pejumecovënëtavanapaevi, Espiritu Santo peyavenonabiabijavanexatsi. ⁶ Bajarapatronoitabarata taeyetajë bemanuamene picani. Itsiata baitsi jane piatajajava. Pacuenia vidriojava nasaba, bajarapitsijava.

Bajarapatronojavata taenubajë cuatro ponëbeje piaithiavi, ayainëanë. Trono mata-toyorotsia nubena. Bajarapamonae pitabarayareca, pejumareca ata, itaxutorubena-ponareca. ⁷ Copiaya ponë, benevëthë petsobianë. Bajaraxuacujinae cotocaevinë, betoro. Bajaraxuacujinae acueyabinë, bejiviitabaranë. Bajaraxuacujinae cuatronë, pacuenia cotsala itsa punanajetaruca baitsi, bajaraitsi. ⁸ Ponëanë, cuatro ponëbeje piaithiavi taniji, xainapona seis pacorofetobeje caenë canacujitsia. Bajarapamonae daxitanëanëreca itaxutorubenaponareca. Bëpënëaverena ata bajarapacuenia itaxutorubenaponareca. Matabijebi, meravijebi ata, apo copatanubenaë pejumaitsanubenaëjava Diosojavabelia.

Bitso nianeconijibinë. Bitso ayaijamatabëcuenenëmë. Nexata cacaëjëpa daxitacuene nexanaenexa. Ajena, mapamatacabitaje, ponaponame. Mapanacujaje nexanaevajënaeya ata, ponaponame. Daxitamatacabijavabelianexa ata ponaponame, jai tsanubenaë bajarapamonae Diosojavabelia.

⁹ Pamonaë cuatro ponëbeje piaithiavi, pexaniajamatabëcuenenua rajutabiaba Diosojavabelia. Bajarapamonae pexaniajamatabëcuene itsa rajutabiaba Diosojavabelia, jumai tsabiabi mapacueniaje:

—¡Diosomë, nenivenivenaecotia bitso pinijicuene! ¡Ayaijamatabëcuenenëmë bitso! jai tsabiabi.

Bajarapacuenia jumai tsabiabi tronota peecaenëjavabelia, daxitamatacabijavabelianexa peponaponaenëjavabelia. ¹⁰ Pamonaes cuatro ponëbeje piatothiavi, bajarapacuenia itsa jumai tsanubenaes Diosojavabelia, nexata pijinia bajarapaepatota pamonaes veinticuatro ponëbeje ancianovi pematabacabëta tonubenajunua Dioso pitabarata, daxitamatacabijavabelianexa peponaponaenë pitabarata. Bajarapacuenia tonubenajunua Dioso pitabarata peyaiyataexae. Bajarapaancianovi Dioso pijatronojavabelia topenelia pijacoronanë. Bajarapaancianovi Diosojavabelia jumai tsanubenaes:

¹¹ Patajatuxanenëmë, patajaDiosonëmë. Xanepana itsamonaejavabelia patacavajunupaebaponaejava nenivenivenaecotia pexainaejava. “Diosomë, bitso ayaijamatabëcuenenëmë,” pacajai tsaponaetsinua. Xanepananua patajumaitsaponaejava: “Diosos cajena bitso piasaënë,” patajaitsaponaejava. Tsipaji baja daxitacuene nexanaenë. Nejetsipaecuenia daxitacuene exaname. Mapamatacabijavaberena ata abaxë tsiteca daxitacuene nexanaejava nexanaecujinaes. Bajarapacuenia abaxë tsiteca daxitacuene nexanaejava xamë nejamatabëcueneta, jai tsanubenaes ancianovi Diosojavabelia.

5

Pacuenia Juan athëbëtatsia cobetaeyeta Dioso pequionaecuyalatobaxuto pecobenaecajava yabara pelivaisi

¹ Athëbëtatsia taeyetajë Diosos. Tronota eca. Pequionaecuyalatobaxuto cobenaeca pecujanenia. Bajarapacuyalatobaxuto peboxoverena, pejumavelia ata, xaina pitane. Bajarapacuyalatobaxuto siete pasellotabeje upicatsanaruba. ² Nexata taenutajë bitso piasaëángelnë. Bajarapaángelnë pinijijumeta jumaitsi mapacueniaje:

—¿Jipatsa nexata jamatabëcuenecaëjëpatsi Diosos petocopatsinexatsi pesaracaenexa sellovënëjavaxi, bajarapacuyalatobaxuto piupicatsanarubiseloxi? jai.

³ Itsiata baitsi jane ajibi pejamatabëcuenecaëjëpaejivitsi bajarapacuyalatobaxuto piupicatsanarubiseloxi pesaracaenexa. Athëbëpijivi ata, mapanacuapijivi ataje, petëpaevimi ata, apo jamatabëcuenecaëjëpaetsi cajena. Nexata itsajivi ata Diosos apo tocopatsi pesaracaenexa bajarapacuyalatobaxuto piupicatsanarubiseloxi bëpënëa paitane rubena petaenexa. ⁴ Nexata xanë bajaraxua itsa taniji, bitso cajena nuajë. Bitso nuajë tsipaji baja ajibi pejamatabëcuenecaëjëpaejivitsi bajarapacuyalatobaxuto pequionaejava pebaxuisinaenexa pelebnexa. ⁵ Nexata itsanë ancianoviyajuvënënë nejumaitsi:

—Pëtsa baja nuame. Caenë raja jamatabëcuenecaëjëpatsi bajarapacuyalatobaxuto pequionaejava pebaxuisinaenexa. Bajaraponë Judápijinë pemomoxiyajuvënënë. Piasaënë bitso. Nexata bajaraponë yabara itsamonae jumai tsabiabi: “León,” jai tsabiabi. Bajaraponë nacuaevetsinëmi Davidpijinë pemomoxiyajuvënënë. Bajaraponë jamatabëcueneamoneyaba baja dovathi. Nexata bajaraponë jamatabëcuenecaëjëpatsi pesaracaenexa bajarapacuyalatobaxuto piupicatsanarubiseloxi, nejai ancianoviya-juvënënë Jesucristo yabara.

⁶ Nexata jane baja taenutajë Corderonë. Nuca veinticuatro ponëbeje ancianovi pitabarata. Nucanua trono pitabarata. Nucanua pamonaes cuatro ponëbeje piatothiavi pitabarata. Cordero nayapëtane pebeyaxuabinëmitsicuene. Tsipaji cruzajavabelia pecobematabiabarutsivajënëmitsi ruca pecobeta. Corderonë xaina siete pamataetobeje, siete pijinia paitaxutobeje. Xuanë, siete paitaxutobeje, mapajamatabëcuenelivaisi xainaje. Siete rabaja pijinia paespíritubeje, Diosos pijaespírituanë. Bajarapasiete pae- spíritubeje Diosos baja itoroba daxitanacuanëjava. ⁷ Nexata jane baja Diosos, ponë eca

tronota, ponë pequionaecuyalatobaxuto cobenaeca pecujanenia. Corderonë cujitalia. Corderonë jane baja vecuapita bajarapacuyalatobaxuto. ⁸ Corderonë baja itsa pita bajarapacuyalatobaxuto, nexata pamonaе cuatro ponëbeje piatiothiavi, Corderonë pitabarata pematabacabëta tonubenajunua. Bajara pijinia pacuenia pamonaе veinticuatro ponëbeje ancianovi, Corderonë pitabarata pematabacabëta tonubenajunua. Caeanciano canacujitsia saicaya xainapona pijaarpa. Bajarapaancianovi capona orota pexanaecopanë. Bajarapacopanë vënëca petuxujuvijava. Bajarapatuxujuvijava xaina mapajamatabëcuenelivaisije. Dioso pijajivi pevajëtaпonaеjavami Diosojavabelia, Dioso tane bajarabepitsituxujuvijava. ⁹ Nexata pamonaе cuatro ponëbeje piatiothiavi, pamonaе pijinia veinticuatro ponëbeje ancianovi, daxita bajarapamonaе, naxëana Corderojavabelia mapapejanavajije. Penaxëanaеjavata vajita jumaitsi Corderojavabelia mapacueniaje:

Cajamatabëcuenecaëjëpa rabaja Dioso pecatocopatsixae nepitsinexa mapacuyalatobaxutoje. Nexata baja cajamatabëcuenecaëjëpanua bajarapacuyalatobaxuto piupicatsanarubiselloxi ata nesaracaenexa. Bajarapacuenia cajamatabëcuenecaëjëpa baja tsipaji baja cabeyaxuaba pataneneconimatamotsinexamë. Nexata padaxitaviriajumevi atanë, padaxitanacuanëpijivi atanënuа, nijanata baja panecomuatame Diosonexa. ¹⁰ Paneexanamenuа baja Dioso papijajivinë itsamatacabi Dioso patanebarëevetsinexa daxitacuene. Paneexanamenuа baja pasacerdotevinë jivi patatocuaicuaijaitisabiabivinexa Diosojavabelia. Paneexanamenuа baja nacuanë pataevetsivinexa,

jai ancianovi Corderonëjavabelia penaxëanaеjavata mapapejanavajije.

¹¹ Trono matatoyorotsia nubena cuatro ponëbeje piatiothiavi. Nexata piatiothiavi pepënëvelia matatoyorotsia nubena ancianovi. Bajaraxuacujinae jane baja ancianovi matatoyorotsia nubenatsi ángelevi. Angelevi bitso ayaibitsaëto, millones paángelbeje nubena. Nexata bajarapaángellevi pecuaicuaijajava jumetaniji. ¹² Angelevi ayaijumeta jumaitsi mapacueniaje:

Corderonë, ponë picani beyaxuabatsi, bitso ayaijamatabëcuenenë. Bajaraxuata Dioso tocopatsi pevetsinexa daxitacuene mapanacuataje. Tocopatatsinua daxitacuene pexainaenexa. Tocopatatsinua daxitacuene peyapëtaenexa. Tocopatatsinua pinijisaë pexainaenexa. Tocopatatsinua itsamonaе pejumaitsinexatsi: “Xamë bitso ayaijamatabëcuenenëmë,” pejainexatsi. Tocopatatsinua pevajunupaebinxatsi penivenivenaеcotia pexainaеjava. Tocopatatsinua daxita pamonaе jumecovënëtatsi, pexaniajamatabëcuene perajutsinexatsi bajaraponëjavabelia. Bajarapacuenia tocopatatsi tsipaji ayaijamatabëcuenenë bitso,

jai tsanubenaе mapacueniaje ángelevi Jesús yabara.

¹³ Jumetanijinua icatsia daxita Dioso pexanaеvi pecuaicuaijajava. Athëbëpijivi cuaicuaijai. Mapanacuapijivi ata cuaicuaijai. Petëpaevimi ata cuaicuaijai. Manuamenianëpijivi ata cuaicuaijai. Nexata daxita bajarapamonaе Diosobeje Jesúsbeje yabara jumaitsi mapacueniaje:

Diosomë, tronota neecaenë. Xamë pijinia Corderonëmë. Paxamëbejejavabelia pexaniajamatabëcuene pacarajutatsi. Paxamëbeje bitso ayaijamatabëcuene panexainaenëbeje. Panenivenivenaеcotiabeje paxainamebeje. Nexata panenivenivenaеcotiabeje panexainaеjavabeje itsamonaеjavabelia pacavajunupaebaponatsi. Pinijisaë bitso panexainaenëbeje. Bajarapajamatabëcuene panejamatabëcuenetsitecaenëbeje daxita matacabijavabelianexa,

jai daxita Dioso pexanaеvi Diosobeje Jesúsbeje yabara.

¹⁴ Pamonaе pijinia cuatro ponëbeje piatiothiavi jumaitsi tsaponaе mapacueniaje:

—¡Bajara itsi tsane! jai bajarapamonaе.

Nexata pamonaē veinticuatro ponēbeje ancianovi, pematabacabēta tonubenajunua Dioso pitabarata. Pexaniajamatabēcuene rajutanubena Diosojavabelia, daxitamata-cabijavabelianexa peponaponaenējavabelia.

6

Siete pasellobeje yabara pelivaisi

¹ Corderonē taenutajē. Penamataxainaesello sarananuca. Nexata pamonaē cuatro ponēbeje piaithiaviyajuvēnēnē, caenē pecuaicuaijajava ayaijumeta, jumetani. Pecuaicuaijajava, beyamaxējume najumeta. Nexata jumetani: “¡Naxanitsia!” pejaijava caballojumata peponaenējavabelia.

² Nexata bajaraxuacujinae icatsia tani perenajava penioponaecaballota peyanajetarucaenē. Caballojumata peecaenē, cobenaeca bitsabi. Rajutatsi corona penamataxatatsinexa. Bajaraxuacujinae pona pijavajabitsaē pebarēnabenexa. Nexata pijavajabitsaē cueneamoneyabanajetaruca pepacuene ēpecopiarucaeya exanaejavabelianexa.

³ Bajaraxuacujinae icatsia Corderonē sarananuca itsasello, pecotocaevijava. Nexata pamonaē cuatro ponēbeje piaithiaviyajuvēnēnē, icatsia itsanē: “¡Naxanitsia!” pejaijava, jumetani.

⁴ Nexata bajaraxuacujinae icatsia tani perenajava petsobiacaballota peyanajetarucaenē. Caballojumata peecaenē, piapiaespada rajutatsi. Tocopatatsi pecopiarucaeyaexanaenexa mapanacuata jivi xaniavaetsia pejinavanapaecuenemi. Jivi jane baja namataenetsia nabeyaexanaejitsia daxita nacuanējava.

⁵ Bajaraxuacujinae icatsia Corderonē sarananuca itsasello, acueyabijava. Nexata pamonaē cuatro ponēbeje piaithiaviyajuvēnēnē, acueyabinē icatsia: “¡Naxanitsia!” pejaijava, jumetani.

Nexata bajaraxuacujinae icatsia tani perenajava petsaebiacaballota peyanajetarucaenē. Caballojumata peecaenē, cobenaeca pepesabaponaejava. ⁶ Icatsia jumetani pamonaē cuatro ponēbeje piaithiavijavata pejumatsijava mapacueniaje: “Janibomatacabixae, caedenariota pecomuatsinexa caējēpa saya caekilo trigoxu. Itsa pijinia cebadaxu, caējēpa saya acueyabi pakilobeje. Nexata caedenariota pecomuatsinexa aceitera, itsa jume, vinora, apo caējēpae. Tsipaji bajaraparanē bitso namatamota,” pejaijava, jumetani.

⁷ Bajaraxuacujinae icatsia Corderonē sarananuca itsasello, cuatrojava. Nexata pamonaē cuatro ponēbeje piaithiavi, pecopiarucaenē jane baja: “¡Naxanitsia!” pejaijava, jumetani.

⁸ Nexata bajaraxuacujinae icatsia tani perenajava pevayanaecaballota peyanajetarucaenē. Caballojumata peecaenē, pevēnē Jivi Petēpaeyaexanaponaenē. Itsanē pēnaponatsi. Bajaraponē pijinia ponē pevēnē Infiernonē. Bajaraponēbeje Dioso tocopatsianatsibeje jivi ayaibitsaēto pebeponaenexabeje. Pitsibitsaētovajēto beponaenabeje, bajarapitsibitsaētovajēto matatoxenetsia nacopatsiana mapanacuataje. Daxita mapanacuajavaje bajarapacuenia exanaponaenabeje. Bajaraponēbeje pejamatabēcueneta beyaexanaponaenabeje jivi vajabitsaēcuenia, janibocuenia ata, piavitancuenia ata. Unupijinēanē piayainēanē pitsapaena. Nexata bajarapapiayainēanē jivi beponaenatsi. Bajarapacuenia itsi tsane mapanacuataje pamatacabi Dioso jivi nananeconitsiaexanaena pibisiacuene pexanaeneconi yabara.

⁹ Bajaraxuacujinae icatsia Corderonē sarananuca itsasello, cincojava. Nexata daxita pamonaemi bajayata beyejebatsi Dioso pejumelivaisi yabara, taeyejebajē pebobenajava altarjavabēxēpanata. Bajarapamonaemi bajayata beyejebatsi apo pecopatsixae Dioso pejumelivaisi jivi petsipaebaponaejava. ¹⁰ Daxita pamonaemi bajayata beyejebatsi, Diosojavabelia pinijijumeta jumai tsanubenaē:

—Diosomë, pepo pexaniajamatabëcuenenëmë. Pacuenia najumecapanepaeya jumait-simë, bajarapacuenia exanabiabame. ¿Detsa pamatacabibeje abaxë saica nenaneconitsiaexanaenexa mapanacuata pejinavanapaevije, pamonae panebeyejeba? jai tsanubena altarjavabëxëpanata pebobenaevi.

¹¹ Nexata jane baja bajarapamonae Dioso rajutatsi penioponaenaxatabijavanë. Abaxë Dioso itorobatsi bajarapamonae penacueraevetanubenaenexa. Tsipaji abaxë saica itsamonae Dioso pijajivi, Jesucristo ata petonacuenebivi, pebeyejebinxatsi. Bajaraxuata bajarapamonae abaxë nacueraevetsiaexanejebatsi Dioso.

¹² Bajaraxuacujinae icatsia Corderonë sarananuca itsasello, seisjava. Nexata icatsia taniji bitso ira penajëabijava. Matabicipijiuameto bitso itaxutotsaebia. Pacuenia meravi bitso itsa aitaquiri, bitso batsaebia, bajara itaxutoitsi. Meravipijiuameto pijinia bitso itaxutotsobia. Pacuenia pijana batsobia, bajara itaxutoitsi. ¹³ Nexata tulupu irabetsica othopaica. Pacuenia naejavacuai baothopaica, naejava itsa najëaba pinijijovibota, bajarapacuenia othopaica tulupu. ¹⁴ Pacuenia cuyalato baquiona, bajarapacuenia quiona daxita itaboxomi. Ajibi baja nexata itaboxo. Daxita pet-sutonëmi, petunaetonëmi ata, najëaba. ¹⁵ Nexata daxita mapanacuanëjavaje jivi pevetsivi, namatayaba ibovajuanëjava. Namatayaba ibotoxanetonë tuatujëjava ata. Daxita ayaijamatabëcuenenëanë, bitso riconëanë ata, namatayaba. Vajabitsaë penamatacaitorobinëanë ata, piasaënëanë ata, namatayaba. Dajubicuenia pecanajetsivitsi ata itsamonaejavabelia amoneya petonacuenebavanapaenexa, namatayaba. Apo pecanajetsivitsi ata itsamonaejavabelia amoneya petonacuenebavanapaenexa, namatayaba. Bajarapacuenia daxita namatayaba. ¹⁶ Nexata penamatayabivi jumaitsi ibotsutonëjavabelia, ibotoxanetonëjavabelia ata:

—Panetsimataothopare. Dioso, ponë eca tronota, bajaraponëvecua panematayatsianame. Pinijicuenia raeta panenaneconitsiaexanaena Corderonë. Bajaraxuavecua panematayatsianame, jai picani pamonae penamatayabivi.

¹⁷ Tocopiapatatsi jane baja pinijicuenia Dioso penaneconitsiaexanaematacabitsi. Itsajivi ata cajena apo caëjëpaetsi pevecuapanepaenexa Dioso penaneconitsiaexanaecuenetsi.

7

Pacuenia Juan tane athëbëtatsia pacuenia itsamatacabi itapaitanerubijitsiatsi Israel nacuapijivi Dioso pijajivixae yabara pelivaisi

¹ Icatsia taniji cuatro ponëbeje ángelevi. Bajarapaángelevi nacua matatoyorotsia nubena. Caenë canacujitsia ángelevi caranatanubena jovibo. Irajava jovibo peponaeyaniva, caranatanubena. Manuamene atavecua caranatanubena. Caenae ata naejava penajëabiyanaiva jovibota, caranatanubena ángelevi. ² Tanijinua icatsia itsaángelnë penajetarucaenë orientejavavetsina. Bajarapaángelnë caponapona piasaënë Dioso pijasello. Bajarapasellota Dioso pijajivi pitapaitanerubaponaenexa. Bajarapaángelnë vavajai ayaijumeta cuatro paángelnëbejajavabelia. Pamonae cuatro ponëbeje, ángelevi, Dioso tocopatatsi pebijianaenexa ira, manuamene ata. Nexata orientejavavetsina paángelnë najetaruca, cuatro paángelnëbejajavabelia jumaitsi mapacueniaje:

³ —Dioso pijajivi yajava peitsacueneyaniva, pëtsa abaxë pabijianame ira, naejavanë ata, manuamene ata. Matapania baja Dioso pijajivi Dioso pijasellota vaxaitsi itapaitanerubianatsi, bajara jane pabijianaename, jai ángelnë orientejavavetsina penajetarucaenë.

⁴ Bajaraxuacujinae jumetaniji jivi ayaibitsaëtóxaneto Dioso pijasellota pitapaitanerubijavatsi. Ciento cuarenta y cuatro mil pina pajivibeje itapaitanerubatsi Dioso pijasellota. Pamonae itapaitanerubatsi Dioso pijasellota, daxita bajarapamonae Israelpijinëmi pexi doce ponëmibeje pemomoxiyajuvënëvi. ⁵ Nexata Dioso pijasellota itapaitanerubatsi

doce mil pajivibeje, Judápijinēmi pemomoxiyajuvēnēvi. Doce mil pijinia pajivibeje, Rubénpijinēmi pemomoxiyajuvēnēvi. Doce mil pijinia pajivibeje, Gadpijinēmi pemomoxiyajuvēnēvi. ⁶ Doce mil pijinia pajivibeje, Aserpijinēmi pemomoxiyajuvēnēvi. Doce mil pijinia pajivibeje, Neftalípijinēmi pemomoxiyajuvēnēvi. Doce mil pijinia pajivibeje, Manasépijinēmi pemomoxiyajuvēnēvi. ⁷ Doce mil pijinia pajivibeje, Simeónpijinēmi pemomoxiyajuvēnēvi. Doce mil pijinia pajivibeje, Levípijinēmi pemomoxiyajuvēnēvi. Doce mil pijinia pajivibeje, Isacarpijinēmi pemomoxiyajuvēnēvi. ⁸ Doce mil pijinia pajivibeje, Zabulónpijinēmi pemomoxiyajuvēnēvi. Doce mil pijinia pajivibeje, Josépijinēmi pemomoxiyajuvēnēvi. Doce mil pijinia pajivibeje, Benjamínpijinēmi pemomoxiyajuvēnēvi. Nexata bajarapacuenia caejavata Dioso pijasellota itapaitanerubatsi ciento cuarenta y cuatro mil pajivibeje, Israelpijinēmi pexi doce ponēmibeje pemomoxiyajuvēnēvi.

Pacuenia Juan athëbëtatsia tane jivi ayaibitsaëtoxanetonë, penioponaejavanë penaxatabivi, yabara pelivaisi

⁹ Icatsia taniji jivi ayaibitsaëtoxanetonë. Bajarapamonae daxitanacuanëprijiviyajuvēnēvi, daxitaviriajumeviyajuvēnēvi. Bajarapamonae nubena Dioso peecaetrono pitabarata, Corderonë ata pitabarata. Jivi cajena ayaibitsaëtoxanetonë bitso. Itsajivi ata cajena apo caëjëpaetsi penamataëjësicapanepaenexa bajarapajivibitsaëtoxanetonë. Daxita bajarapamonae ëpenioponaejavanë penaxatabivi. Cobenanubena benaxarebobaxutonë. ¹⁰ Daxita bajarapajivibitsaëtoxanetonë vavajai tsanubenae ayaijumeta. Jumaitsi tsanubenae mapacueniaje:

VajaDioso, ponë Corderonë yajavaeca tronota, bajaraponë nacacapanepa pibisiacuene vajaexanaeneconimivecua. Bajarapacuenia nacacapanepa Corderonë pejamatabëcueneta, jai tsanubenae bajarapajivibitsaëtoxanetonë.

¹¹ Trono matatoyorotsia nubena cuatro ponëbeje paitothiavi. Nexata paitothiavi pepënëvelia matatoyorotsia nubena ancianovi. Bajaraxuacujinae jane baja ancianovi matatoyorotsia nubenatsi ángelevi. Daxita ángelevi ira taenubenaeya bobena irata Dioso peecaetrono pitabarata. Bobenaeya pexaniajamatabëcuene rajutanubena Diosojavabelia. ¹² Bajarapaángelevi ira taenubenaeya jumai tsanubenae mapacueniaje:

¡Bajara itsi tsane! PatajaDiosomë, pexaniajamatabëcuene pacarajutabiabianatsi daxitamatacabijavabelianexa. Nenivenivenaecotia nexainaejava, daxitacuene neyapëtaenëcuene ata, pacavajunupaebaponaenatsi daxitajivijavabelia. Daxitajivi casivajamatabëcuenebarëya tsabiabi tsane itsa yavenonabiabianame bajarapamonae. Daxitajivi cayaiyataeyabiabiana. Bitso cajena niasaënë daxitamatacabijavabelianexa. Cajamatabëcuenecaëjëpa nexanaenexa daxitacuene ata daxitamatacabijavabelianexa. Bajara itsi tsane, jai tsanubenae irataeya daxita bajarapaángelevi Diosojavabelia.

¹³ Nexata itsanë ancianonë nejumaitsi:

—¿Detsa mapamonae penioponaejava penaxatabivije? ¿Detsa verena pata bajarapamonae? nejai ancianonë.

¹⁴ Xanë nexata jumaitsinë:

—Xamë raeta jane yapëtaneme, janë ancianonëjavabelia.

Nexata ancianonë nejumaitsi:

—Mara pamonaeye nacua pecopiarucaevajënaeya, piyaijunavixaneto pecanibanubenaevimije. Corderonë pesivatëpaexaetsi, bajarapamonae pibisiacuene pexanaeneconimi vecuaajibiaexanatsi baja. Bajaraxuata penioponaejavanë naxataba.

¹⁵ Bajaraxuata baja bajarapamonae nubena Dioso peecaetrono pitabarata. Copatsinejeva Dioso petonacuenebijava, tonacuenebavanapa Dioso pijatemplobota. Dioso, ponë eca tronota, bajaraponë evetsianatsi peyajavajinavanapaexae. ¹⁶ Bajarapamonae baja apo namatavenonae tsane pexaejava. Apo namatavenonae tsane mera ata. Icotia ata

apo tsajavi tsanetsi. Icotia piatajujava ata apo jamatabëitonotsi tsanetsi. ¹⁷ Bajara itsane tsipaji Corderonë, ponë nuca trono pitabarata, evetsianatsi bajarapamonae. Evetsianatsi xaniavaetsia. Pacuenia pijaoveja pevetsinë xaniavaetsia baeveta pijaoveja, bajarapacuenia evetsianatsi. Bajaraponë matacaponabiabianatsi itsabelia rubena iravetsina pepitsaparubenaemeranë, jivi piitavayaexanaemeranëjavabelia. Daxita bajarapamonae Dioso pijanacuatatsia jamatabëcuenebarëya tsavanapae tsane. Tsipaji ajibi tsane peyabaranuejavanexa, nejai ancianonë mapacueniaje.

8

Sietejava sello yabara pelivaisi

¹ Icatsia Corderonë sarananuca cuyalatobaxuto piupicatsatarutsisello, sietejava. Nexata jane baja athëbëtatsia ajumejibi. Bajayaepatovajëto ajumejibi. ² Bajaraxuacujinae icatsia taniji siete ponëbeje Ángelevi. Dioso pitabarata nubena. Nexata bajarapa Ángelevi rajutatsi siete patrompetabeje. ³ Icatsia xuacujinae itsanë ángelnë najetaruca. Cobenanajetaruca orota pexanaevaxi. Bajarapavaxita pecaponaenexa pitatsajaviitaire. Nexata nucojopa altarvënëjava pitabarata. Nexata jane baja rajutatsi ayaijava petuxujuvijava. Nexata bajarapatuxujuvijava Dioso tane daxita Dioso pijajivi pevajëtaponaejumemi Diosojavabelia bepematajërëabijava. Nexata bajarapatuxujuvijava ángelnë buata altarjumata. Bajarapaaltar, orota pexanaealtar, nuca Dioso peecaetrone pitabarata. ⁴ Nexata jane baja bajarapatuxujuvijavami ángelnë tajuita. Nexata petsëxë athëbëabetsia junaya. Patsëxë athëbëabetsia junaya altarjavavetsia, ángelenë pecobejavavetsia junaya Diosojavabetsia. Bajarapatsëxë yajavajunaya Dioso pijajivi pevajëtaponaejumemi Diosojavabelia. ⁵ Bajaraxuacujinae ángelnë altarjumavecua nota pitatsajaviitaire. Bajarapaitatsajaviitaire vënëta pijavaxi. Bajaraxuacujinae ángelnë bajarapaitatsajaviitaire bajarapavaxi ënëtuatuajëvecua othotajarabareca irabereca. Nexata yamaxë iratareca najumeta. Yamaxë binebinejai iratareca. Iranë jane baja ayaicuenia najëaba.

Siete patrompetabeje yabara pelivaisi

⁶ Siete pa Ángelbeje canaveretanubena pijatrompetanë piobinexa.

⁷ Nexata jane baja penamataxainae ángelnë oba pijatrompeta. Nexata bitso pecainejebimatarejetonë othopareca irabereca. Bajara pacainejebimatarejetonë matajërëaba isoto. Matajërëabanua pijana yajava. Nexata jane baja ira tajuepona daxita nacuanëjava. Panacuanëjava ira tajuepona, pairavajëto tajuepona matatoxenetsia itsiata yajuvënënacopatapona. Daxitaira apo veriajavapona. Nexata panacuanëjava ira tajuepona, daxita naejavanëmi, pejuvijavanëmi ata, yajavatajuepona.

⁸ Bajaraxuacujinae icatsia pecotocaevi ángelnë oba pijatrompeta. Taniji bepinijitsutoxaneto petajueyecaejava. Bajaraxua jopareca manuameniareca. Manuamenemi nexata pijana. Pamenevajëto ëpijanamene tsarucæ, bajarapamenevajëto matatoxenetsia itsiata pijananejeva yajuvënënacopata. ⁹ Pamanuamene ëpijanamene tsarucæ, bajara pamanuamenepijidujuaimi tēpa baja. Pamanuamene pijinia pijananejeva nacopata, bajara pamanuamenepijidujuai apo tēpæ. Pamanuamene ëpijanamene tsarucæ, bajarapamanuameneta perubenaebarcoxanetonëmi ata napeneta. Pamanuamene pijinia pijananejeva nacopata, bajarapamanuameneta perubenaebarcoxanetonë apo napenetsi.

¹⁰ Bajaraxuacujinae icatsia acueyabi ángelnë oba pijatrompeta. Nexata pinijituluputoxaneto jopareca irabereca. Bajarapatuluputoxaneto tajuerucaponaareca. Pacuenia bepiniji isotocotiaxaneto bacotia itsi, bajaracotia itsi tsarunaereca. Panacuata jopa bajarapatuluputo, bajarapanacuata daxita perubenaemenianëmi, bijiana baja. Iravetsina mera pepitsaparubenaejavanëmi ata, bijiana baja. Nexata baja abeje daxita

bajrapameranëmi. Panacuata apo jopae bajarapatuluputo, bajarapanacuata perubenaemenianë, apo bijiana. Nexata xanepana daxita bajarapameranë. Mera iravetsina pepitsaparubenaëjavanëjava ata, xanepanarubena. ¹¹ Bajarapatuluputo pevënë Ajenjo. Pamerajavareca jopareca bajarapatuluputo, bajarapamera atsaxa baja. Jivi ayaibit-saëtoxanetonë tëpa penatsiapaexae bajarapamera.

¹² Bajaraxuacujinae icatsia cuatroángelnë oba pijatrompeta. Nexata jane baja itaxutobijiana matabipijijuameto. Itaxutobijiana meravipijijuameto ata. Itaxutobijiana tuluputonë ata. Nexata matabipijijuameto bijiaya naitayota. Meravipijijuameto ata bijiaya naitayota.

¹³ Bajaraxuacujinae icatsia taniji itsanë ángelnë pepunanajetarucaenë. Pepunanajetarucaenë ángelnë jumai tsanajetarucæ ayaijumeta:

—¡Toabejetsi baja tsaponae tsane mapanacuapijivije itsa obiana trompeta acueyabi paángelnëbeje penacopabivi! jai tsanajetarucæ ángelnë pepunanajetarucaenë.

9

¹ Bajaraxuacujinae icatsia cincoángelnë oba pijatrompeta. Nexata taniji athëbëvereca ángelnë perunaëjavareca irabereca. Nexata bajarapaángelnë Dioso rajutatsi llave, iravetsina pepitsapaemëthëxaneto pijallave. ² Nexata jane baja bajarapallaveta ángelnë mëthëxaneto vëpacasarana. Ángelnë jane baja vëpata mëthëxaneto. Nexata bajarapamëthëxanetojavatsina pitsapaina ètsëxëxaneto. Pitsitsëxëxaneto bapitsapa pinijipabixaneto itsa tajuíta, bajarapitsitsëxëxaneto pitsapaina bajarapamëthëxanetojavatsina. Nexata bajarapatsëxëta matabipijijuametomi itaxutoaitaquiriayaexana. Itaboxo ata aitaquiriayaexana. ³ Bajarapatsëxëjavaverena pitsapa bosese. Bajarapabosese daxitanacuanëjava punanajetarubena. Bajarapabosese caëjëpaeyaexanatsi jivi pecacuatsinexa pebosotota. Pacuenia aqueto cacuata pebosotota, bajarapacuenia jivi pecacuataponaenexa. ⁴ Bajarapabosese apo itorobitsi pebijianaenexa itsacuenejava ata xua pejuvijava. Nexata bajarapabosese apo bijianaponae pona. Apo bijianaponae naëjavanë ata. Tsipaji itorobatsi pecacuatsinexa saya ëjivi. Nexata pamonaë Dioso pijasellota apo itapaitanerutsitsi, bajarapamonae pecacuatsinexa. ⁵ Itsiata baitsi jane apo tocopatsitsi caecuenia pebeyaxuabaponaenexa. Tocopatatsi saya jivi itsa cacuata, penavixaetaeyaexanaenexa cinco pajuametobeje. Nexata bajarapabosese jivi itsa cacuatsianatsi, bitso jivi navixaetaena. Pavixaevajëto aqueto itsa cacuata, baatane, bajarapavixaevajëto jivi navixaetaena. ⁶ Nexata pamonaë cacuatsianatsi bajarapabosese, jitsipaena picani petëpaenexa bajayajebi penavixaetaeyaniva. Itsiata baitsi jane bajarapamonae Dioso abaxë apo tocopatsi tsane petëpaenexa. Penabeyaxuabinexa ata, Dioso apo tocopatsi tsane.

⁷ Bajarapabosese ajumabocotaja. Pacuenia vajabitsaë itsa nabejitsia, pijacaballo bajumaxataba hierropananë pijavajabitsaë petojorojoronaeyanivatsi, bajara itsanubenaë bajarapabosese. Beorota pexanaecoronanë namataxatabanubena. Pacuenia pebi itabaraitsi, bajaraitabaraitsi. ⁸ Pematana xaina. Pacuenia petiriva matanaitsi, bajara matanaitsi. Pevonotonë pijinia benevëthëvonotonë. ⁹ Bajarapamonae pejumabocotonë yajavanaexana baja cajena behierrojumabocotonë pejorojoronaeyanivatsi itsajivi ata. Pecorofe najumeta. Pacuenia vajabitsaë penabenexa itsa pona pijavajabitsaëjavabelia, caballo itsa roboboca carrozavënëmonë banajumeta, bajarapacuenia najumeta bosese pecorofe. ¹⁰ Bajarapabosese pebosotonëcopiata xaina peetonë jivi pecacuatsinexa. Pacuenia aqueto pebosotocopiata xaina peeto, bajnia benevëthëvonotara itsi. Tocopatatsi peetota pecacuatsinexa jivi, jivi penavixaetaenexa cinco pajuametobeje. ¹¹ Bosese cajena xaina ángelnë pitorobinëxatsi, pinijimëthëxaneto pevetsinë. Bajarpaángelnë hebreojumeta pevënë Abadón. Griegojumeta pijinia Apolión, “Peverebi-abinë,” pejajjume.

¹² Bajarapapiayaicuene penamataxainaejava. Itsiata baitsi jane abaxë saica anijajavabeje.

¹³ Bjaraxuacujinae icatsia seisángelnë oba pijatrompeta. Paaltar nuca Dioso pitabarata, bajarapaaltarjavaverena penajumetsijava, ayaijume, jumetaniji. Bajarapaaltar orota pexanaealtar. Bajarapaaltar cuatro pamataetobeje xaina. Caeupi canacujitsia mataerucapona. Bjarapamataetonë tuatuajëta jumepitsapa.

¹⁴ Bjarapaaltarjavaverena jumaitsi seisángelnë trompeta pexainaenëjavabelia mapacueniaje:

—Isicare cuatro ponëbeje ángelevi, pamonaë cëbejebatsi pinijimenejavata, Eufratesvënë menejavata, jai bajarapaaltarjavaverena.

¹⁵ Nexata jane baja pecëbejebiánglevimitsi isicatsi. Isicatsi bajarapaángelevi pebenexa jivi. Bjarapaángelevi jivi ayaibitsaëtonë beponaejitsia daxitanacuanëjava. Bajara saya cajena ëxuanexa, paángelevi Dioso jamatabëcueta pexainaenëjavabelia mapacueniaje:

—Isicare cuatro ponëbeje ángelevi, pamonaë eneevetanubena Dioso pitorobinexatsi jivi pebeponaenexa paepatota tocaëjëtatsi. ¹⁶ Nexata icatsia jumetaniji bajarapaángelevi pijajivi, vajabitsaëvi, pitorobijava peponaenexa caballota. Doscientos millones ponëbeje vajabitsaëvi pona jivi pebeponaenexa daxitanacuanëjava.

¹⁷ Bemajitsinaebota taniji bajarapamonaë caballota peponaejava. Vajabitsaëvi namëpabëxataba hierropananë pejorojoronaeyanivatsi pijavajabitsaë. Vajabitsaëvi penamëpabëxatabijavanë itabëta acueyabi paviriabejjavata. Itabëta mapaviriabejjavataje. Itabëta petsobiajavata. Itabëta perajenaëjavata. Itabëta pevayanaëjavata. Bjarapaviriabejjavata itabëta. Pacuenia nevëthëmatabocoto itsi, bajaramataboco itsi bajarapacaballuanë. Pecuibovojotonëjavavetsina pitsapa pitarunutsicotia, ëtsëxë yajava, azufre ata yajava. ¹⁸ Xuanë caballuanë pecuibovojotonëjavavetsina pitsapa, bajaraxuanë jivi ayaibitsaëtoxanetonë yatëpapona daxitanacuanëjava. Pabitsaëtovajëto tëpa, bajarapabitsaëtovajëto matatoxenetsia nacopata mapanacuataje. ¹⁹ Bjarapacaballuanë caëjëpatsi jivi pebeponaenexa pecuibovojotonëta, pebosotonëta ata. Bjarapacaballuanë pebosotonëupianë bejomomatabocotonë. Pacuenia jomo pematobocotota caëjëpatsi jivi pesininexa pebeyaxuabinexa, bajara itsi bajarapacaballuanë pebosotonëupianë.

²⁰ Itsiata baitsi jane pamonaë peyajuvënëtëpaevi, pamonaë penacopabivi, bajarapamonaë tsiteca pibisiacuene exanavanapa. Apo copatsi dovathivijavabelia penavajëcabiabijava. Apo copatsinua pecobeta jumapecataeya pexanaenëanëjavabelia ata penavajëcabiabijava. Bjaraxuanë saya pexanaenëanë oronanitonëta, platananitonëta ata, broncejavanëta ata, ibotonëta ata, naejavanëta ata. Nexata bajaraxuanë apo caëjëpaetsi petaenexa. Apo caëjëpaetsi pejumetaenexa ata. Apo caëjëpaetsi peponaenexa ata. ²¹ Pamonaë peyajuvënëtëpaevi, pamonaë penacopabivi, bajarapamonaë apo copatsi jivi pebejava. Apo copatsi penajorobijava ata. Apo copatsi pevitota pibisiacuene pexanaejava ata. Apo copatsi penacobetoxotsijava ata.

10

Pacuenia Juan tane ángelnë pecobenanucaejava cuyalatobaxutoyo yabara pelivaisi

¹ Icatsia taniji itsaángelnë athëbëvetsica perunaëjavatsica. Runaica mapanacuayabetsicaje. Bjarapaángelnë bitso piasaëángelnë. Itarërëbo tuatuajëta najetaruca. Nat-simatatsënërutanajetaruca aravalibo. Itabaranaitayotanajetaruca. Pacuenia matacabipijijuameto baitayota, bajarapacuenia itabaranaitayotanajetaruca. Petopabeje pijinia pacuenia isotocotia tsobia, bajarapacuenia cotiatsobia. ² Cuyalatobaxutoyo baxupatanuca. Pecujianenia pataxu nataxunutanuca manuameneboxovereca. Pet-savenonenia pijinia pataxu nataxunutanuca irajumavereca. ³ Nexata vavajai tsaxuabi ayaijumeta. Pacuenia nevëthë itsa fiaba ayaijume, bajarapacuenia ayaijume.

Pevavajaicujinae siete payamaxëbeje najumeta athëbëtatsia. ⁴ Yamaxë penajumetsicujinae, yaquinaejitsianë picani pajamatabëcuene yabara yamaxë penajumetsijava neyapëtaeyaexana. Itacarajeta athëbëvetsica tanejumaitsijava, jumetaniji. Nejumaitsi athëbëvetsica mapacueniaje:

—Muetsia saya xainare pajamatabëcuene yabara yamaxë penajumetsijava, cayapëtaeyaexana. Pëtsa yaquiname bajarapalivaisi, nejai athëbëvetsica.

⁵ Bajaraxuacujinae ángelnë, ponë nataxunutanuca manuameneboxovereca, irajumavereca ata, bajaraponë nacobeyotanuca athëbëabetsia pecujuanenia pacobe.

⁶ Bajarapaángelnë nacobeyotsiaya jumai tsanuca:

—Dioso, daxitamatacabijavabelianexa peponaponaenë, caecuenia exana mapanacuaje, itaboxo yajava. Nexata caecuenia yajavaexana mapanacuapijicueneje, itaboxopijicuene ata yajava. Caecuenia yajavaexana manuamene ata, manuamenepijicuene ata yajava. Bajaraponë pitabarata najumecapanepaeya cajumaitsijitsiatsi mapacueniaje. Copiapatsijitsia rabaja pacuenia Dioso tajëvelia najamatabëxaina pexanaenexa. ⁷ Itsa rabaja paepatota siete ángelnë obiana pijatrompeta, bajarapaepatota Dioso jane baja taxuxuabiana pexanaejava pacuenia baja cajena tajëvelia Dioso najamatabëxaina pexanaponaenexa jivijavabelia. Muetsia pexainabuatsilivaisimi itajëtsiana. Copiapatsiana jane baja pacuenia bajayata Dioso tajëvelia najumecapanepaeya jumai profetavimijavabelia, jai tsanucac nacobeyotsiaya ángelnë.

⁸ Copiaya pajume jumetaniji athëbëvetsica tanejumaitsijava, bajarapajume icatsia jumetaniji. Nejumaitsi icatsia athëbëvetsica mapacueniaje:

—Ponë ángelnë nataxunutanuca manuameneboxovereca, irajumavereca ata, bajarapaángelnë cujiremelia. Vecuapire pacuyalatobaxutoyo bajarapaángelnë baxupatanuca, nejai athëbëvetsica.

⁹ Nexata cujiliajë ángelnë. Vajëtajë nexata tanerajutsinexa bajarapacuyalatobaxutoyo. Bajarapaángelnë nejumaitsi mapacueniaje:

—Ájã, pire baja. Xaema necuiboxaicaenexa. Pacuenia jabëra xaica, bajara itsi mapacuyalatobaxutoyoje. Itsiata baitsi jane necotsorotuabereca atsaxa tsane, nejai ángelnë.

¹⁰ Nexata baja ángelnë bajarapacuyalatobaxutoyo vecuapitajë. Xaniji jane baja. Nexata jane baja cuiboxaicaejë. Pacuenia jabëra xaica, bajara itsi. Itsiata baitsi jane taquijonicujinae tacotsorotuabereca atsaxa. ¹¹ Nexata icatsia ángelnë nejumaitsi:

—Tsipaebare pacuenia Dioso sivanajamatabëxaina daxitanacuanëpivivi. Tsipaebare pacuenia Dioso sivanajamatabëxaina daxitaviriajumevi ata. Tsipaebare pacuenia Dioso sivanajamatabëxaina caenacua canacujitsia pevetsinëanë ata, nejai ángelnë.

11

Pacuenia itsamatacabi anijanëbeje jivi tsipaebaponaenabeje palivaisi Dioso yapëtaeyaexanaenatsibeje yabara pelivaisi

¹ Icatsia taniiji ángelnë. Nerajuta piapianaebo. Nejumaitsi mapacueniaje:

—Nonotapunare. Caponare mapanaeboje necaëjëbinexa Dioso pijatemplobo, necaëjëbinexa altarvënëjava ata. Namatajëtsianamenua pajivibeje bajarapatemplobota navajëca Diosojavabelia. ² Itsiata pëtsa caëjëtame templobopanabo. Tsipaji bajarapapanabo tocopata baja Dioso apo pejumecovënëtsivinexa, pamona saicayanacuaverena pepatsivi pejinavanapaenexa. Bajarapamonae jinavanapaena Jerusalén tomarata cuarenta y dos pajuametobeje. Saicayanacuaverena pepatsivi, apo yaiyatae tsane judíovi pijatomara. ³⁻⁴ Bajayata profetanëmi peyaquinaebaxutota, comparacióncuenia tajëvelia jumai mapacueniaje: “Anijanaebeje, olivonaebeje, anijavabeje pijinia pitayotanucaejavabeje, nubenaena mapanacuapivivi

pijatuxanenë Dioso pitabarata,” jai. Bajarapacuenia comparacióncuenia tajëvelia itsa jumaitsi, tajëvelia vajunupaeba anijanëbeje jivi petsipaebanajetarucaejavanexabeje palivaisi Dioso yapëtaeyaexanaenatsibeje. Nexata anijanëbeje Dioso itorobiana jivi petsipaebanajetarucaenexabeje palivaisi Dioso yapëtaeyaexanaenatsibeje. Palivaisi bajaraponëbeje Dioso yapëtaeyaexanaenatsibeje, bajarapalivaisi mil doscientos sesenta pamatacabibeje jivi tsipaebanajetarucaenabeje. Naxatatsianabeje piayopapaëbërëjava. Bajarapacuenia naxatatsianabeje bitso pesivajamatabëcuenebëjaixabeje tsane pamonaë apo peyaiyataevi Jerusaléntomara, nejai ángelnë.

⁵ Itsajivi itsa jamatabëitsacueniabianatsibeje, bajaraponëbeje nayajivita-juitsianabeje pecuibovojotovetsina pepitsapaecotiata, pitarunutsicotiata.

⁶ Bajaraponebanajetarucaenabeje. Naxatatsianabeje piayopapaëbërëjava. Bajëbeje caëjëpaenatsibeje pitavetsinexabeje ema pejopaeyaniva. Pamatacabibeje jivi tsipaebanajetarucaenabeje palivaisi Dioso yapëtaeyaexanaenatsibeje, bajarapamatacabibeje abaxë ema apo jopaeyaexanaebeje tsane. Caëjëpaenatsibejenua mera ata pijanara pexanaenexabeje. Caëjëpaenatsibejenua daxitaviria piayaicuene pecapitsapaenexabeje pamatacabita jitsipaenabeje.

⁷ Bajaraponëbeje itsa veretsianabeje palivaisi Dioso yapëtaeyaexanaenatsibeje jivi petsipaebanajetarucaejavabeje, bitso piayainë pitsapaenina pinijimëthëxanetojavatsina. Bitso piayainë pitsapaenina pebenexatsibeje bajaraponëbeje. Nexata amoneyabianatsibeje. Nexata baja beyaxuabianatsibeje.

⁸ Nexata petëpaenëbeje bocaenabeje Jerusalén tomaraxaneto callejavata. Bajarapatomarata bajayatami vajatuxanenë ata cobematabiabarutatsi cruzajavabelia. Bajarapatomara yabara jivi itsajavata: “Sodomatomara raja,” jai tsabiabi. Itsajavata: “Egiptotomara raja,” jai tsabiabi. Bajarapacuenia jumai tsabiabi Jerusaléntomara yabara tsipaji bajarapatomarapijivi bitso pibisiacuene exana.

⁹ Nexata bajaraponëbeje, Jerusaléntomara callejavata petëpaenëbeje, bocaenabeje acueyabi pamatacabibeje epatua. Tsipaji Jerusaléntomara pevetsivi apo tocopatsi tsane itsajivi ata pemëthëtsinexatsibeje bajaraponëbeje. Nexata daxitaviriajumevi, daxitanacuanëpijivi ata, taeyabuatsianatsibeje.

¹⁰ Dioso apo pejumecovënëtsivi sivajamatabëcuenebarëyatsibeje tsane petëpanucaejavabeje. Bitso cajena barëya tsane Dioso apo pejumecovënëtsivi. Nexata pebarëyajamatabëcuene fiesta exanaena. Namataenetsia narajutsiana amoneya itsacueneyavanë. Bajarapacuenia exanaena Dioso apo pejumecovënëtsivi bajaraponëbeje petëpaejavabeje yabara. Tsipaji Dioso apo pejumecovënëtsivi jumaitsi tsane: “Copiaruca rabaja maponëbeje livaisi vajanacatsipaebabiabijavaje. Copiaruca baja vajanacajamatabëitonotabiabijava,” jai tsane.

¹¹ Itsiata baitsi jane petëpaecujinaebeje, acueyabi pamatacabibejecujinae itsamatacabi epatua, icatsia Dioso piasaëjumali rajutsianatsibeje. Nexata petëpaejavabejevecua namatacotsianabeje. Daxita cajena pamonaë taeyabuatsianatsibeje petëpanucaejavabeje, bitso cujunavianatsibeje.

¹² Bajaraxuacujinae bajaraponëbeje jumetaenabeje athëbëvetsica pinijijumeta pejumaitsijavatsibeje: “Pajunaiminabeje,” pejaijavatsibeje. Nexata bajaraponëbeje junaeniabeje athëbëabetsia itarërëbo tuatuajëjavabetsia. Daxita pitoyavitsibeje pëtaenubenaenatsibeje.

¹³ Bajara jane paepatota ira najëabiana. Nexata Jerusalén tomarata, itsajota diez pabobeje najuaenaena, caebo yajuvënëjopaponaena. Nueve nexata pabobeje nacopataponaena. Nexata Jerusalén tomarata ayaijava bo othopaena. Siete mil pijinia pajivibeje bajarapairanajëabita tēpaena. Jerusalén tomarapijivi, pamonaë nacopabiana, bitso cajena junaviana. Nexata bajarapamonae pecajunavi, Diosojavabelia jumaitsi tsane:

—Diosomë, ayaijamatabëcuenenëmë bitso, jai tsane pecajunavi Diosojavabelia, athëbëtatsia peecaenëjavabelia.

¹⁴ Anijapiayaicuenebeje rabaja panepaena. Itsiata baitsi jane icatsia itsajava piayaicuenejava bepjjia najetarucaena, acueyabijava.

Sietenë baja ángelnë pijatrompeta piobijava yabara pelivaisi

¹⁵ Sietenë jane baja ángelnë oba pijatrompeta. Nexata athëbëvetsica pinijijumeta pejumaitsijava, jumetaniji. Jumaitsi mapacueniaje: Daxitanacuanëpijivi rajane baja vajatuxanenë Cristobeje, Diosobeje, evetaponaponaenabeje. Bajaraponëbeje evetaponaponaenabeje daxitamatacabijavabelianexa, pejajjava athëbëvetsica, jumetaniji.

¹⁶ Nexata pamona veinticuatro ponëbeje ancianovi, pamona ena pijatronota Dioso pitabarata, daxita bajarapamona irataeya bobena. ¹⁷ Bajarapamona ancianovi irataeya jumai tsanubena Diosojavabelia:

Xamë Diosonëmë, nijamatabëcuenesaënë daxita mapanacuanë pevetsivivecuaje. Ajena, pamatacabi, ponaponame. Bajayata mapanacuaje nexanaevajënaeya ata, ponaponame. Daxitamatacabijavabelianexa ata ponaponame. Pexaniajamatabëcuene pacarajutatsi. Tsipaji baja taxuxuabame pinijisaëta nevetaponaponaenexa daxita mapanacuanëpijivije. ¹⁸ Daxita mapanacuanëpijivije cabaraanaepana bitso. Bajaraxuata tocopiapatatsi baja nenaneconitsiaexanaenexa daxita bajarapamona. Tocopiapatatsinua baja petëpaevimi ata nenaneconitsiaexanaenexa. Tocopiapatatsinua baja nijajivi, xuavajëto catonacuenebavanapa, bajarapitsijavavajëto nerajutsinexa pecatonacuenebavanapaematamo. Pamona catotsipaebavanapa nijumelivaisi itsamonaevabelia, bajarapamona jane baja rajutsianame xua toxainame bajarapamona nerajutsinexa. Pamona ayaijamatabëcuene pexainaevi ata, cavënëlivaisiyaiyatane. Pamona beveliajamatabëcuene pexainaevi ata, cavënëlivaisiyaiyatane. Bajarapamona ata jane baja rajutsianame xua toxainame bajarapamona nerajutsinexa. Tocopiapatatsinua baja pijinia neverebiabinexa daxita pamona bijiana mapanacuaje, pamona ata jamatabëcuenebijiana pecajumecovënëtsivi,

jai tsanubena irataeya ancianovi Diosojavabelia.

¹⁹ Nexata athëbëtatsia Dioso pijatemplobo nabaupata. Bajarapatemplobo ënëtatsia taeyabuatsiajë baula. Bajarapabaulaënëta jeba Dioso pejumelivaisi peyaquinajebijava. Bajarapaitane jumai tsarubena pacuenia Dioso najumecapanepaeya jumaitsi pijajivi pecapanepaenexa pijaneconivecu. Yamaxë binebinejai. Najumetanua. Ira najëbanua. Bitso pecainejebimatarejetonë irabetsica othopaica pinijicuenia.

12

Pacuenia Juan athëbëtatsia tane dragón bitso pianaepanaejava yabara pelivaisi

¹ Athëbëtatsia ayaicuene naitajëta vajanacayapëtaeyaexanaenexa pacuenia itsamatacabi pevajënaeyabelia itsi tsaponaejitsia mapanacuataje. Athëbëtatsia petiriva taenutajë. Petiriva jumanava naitayotanuca. Pacuenia matacabipijijuameto baitayota, bajarapacuenia jumanava naitayotanuca. Meravipijijuametojavavelia nataxunutanuca. Namataxatatanuca doce patuluputobeje pexainae corona. ² Bajarapova petiriva penacueto peyacotajinaeva. Pevixaenotsijavatatsi bitso yaaëajai. ³ Nexata bajarajotatsia naitajëta piayainë, petsobianë, pinijinëxaneto dragón, baitsi dovathi. Xaina siete pamatabocotobeje, diez pamataetobeje. Caematabocoto canacujitsia namataxatatapona corona. ⁴ Bajaraponë, dragón, nabosovebabia. Nexata penabosovebabejavata tulupu ayajjava penetsica irabetsica. Xuavajëto tulupu othopaica irabetsica, bajaraxuavajëto matatoxenetsia nacopabarubenaya athëbëtatsia. Bajaraponë, dragón, nucojopa penacueto pevixaenotsivatsi pitabarata, bajarapova itsa vecuanaexanatsi penacueto, pecoxixaenexatsi picani. ⁵ Nexata jane baja petiriva vecuanaexanatsi pebinëyo. Bajaraponëyo caponatsi Diosojavabetsia Dioso pijatronota peecaenexa. Nexata baja bajaraponëyo apo xaetsi dragón. Bajaraponë itsamatacabi mapanacuata jivi pepo

pevetsinē tsane. Itsa evetsiana, ajumesaēya itorobabiabiana pejumecovēnētsinexatsi. ⁶ Nexata petiriva penacuetonēyo pevecuanaexanaecujinaetsi, najetabajirava petusato nacuayabelia, itsabelia Dioso tsivajēnaexaniavaetatsi peponaponaenexa. Bajarajota pexajava baja Dioso rajutatsi mil doscientos sesenta pamatacabibeje.

⁷ Bajaraxuacujinae athēbētatsia vajabitsaē exana. Angelevi penamatacaitorobinē, Miguelvēnēnē, pijaāngelevi yajava, barēnabia dragónjavabelia. Dragón pijinia, pijaāngelevi yajava, barēnabia Migueljavabelia. ⁸ Itsiata baitsi jane dragón cujiruamoneyabatsi. Nexata apo tocopatsitsi caenē ata dragón pijajivitonē penacopatsinexa athēbētatsia. ⁹ Dragón cajena ayainēxaneto. Itsiata baitsi jane xuabicatsi athēbēvetsica daxita pijajivi yajava. Nexata bajaraponē pevēnē Dovathi. Itsavēnē Satanás. Bajaraponē bajayata ita naitajēta jivijavabelia, naitajēta bejomocuenia. Bajaraponē jivi yamaxēitojorobabiaba daxitanacuanējava.

¹⁰ Nexata jumetaniji pinijijumeta athēbēvetsica pejumaitsijava. Jumaitsi mapacueni-aje:

—Copiapata rabaja Dioso vajanacacapanepaejavanexa vajanekonivecua. Copiapata rabaja Dioso pesaēta jivi pevetaponaponaenexa. Copiapata rabaja Dioso pijajivi pitorobaponaenexa. Copiapata rabaja Cristo ata pitorobaponaenexa mapanacuajavaje. Bajarapacuenia copiapata baja daxita bajarapacuenene tsipaji baja ponē neconitabiaba Diosojavabelia Dioso vajanajuajumecovēnētavanapaevi, bajaraponē baja xuabicatsi athēbēvetsica. Baitsi dovathi. Bajaraponē picani Dioso pitabaratasia nuca. Nexata bajaraponē daxita matacabijebi, dexitameravijebi ata, Diosojavabelia neconitabiaba Dioso vajanajuajumecovēnētavanapaevi. ¹¹ Dioso vajanajuajumecovēnētavanapaevi pejumecovēnētsixae Cristo pesivatēpaejavatsi cruzata, cueneamoneyabapona dovathi. Bajarapacuenia cueneamoneyabapona tsipaji navajunupaebaponanua itsamonaejavabelia Cristo pecapanepaejavanexatsi pijaneconivecua. Dioso vajanajuacovēnētavanapaevi jamatabējumai tsabiabi: “Itsa nebeyaxuabiana Dioso pejumelivaisi yabara, jema baja nebeyaxuabiana,” jamatabējai tsabiabi. ¹² Athēbēnacuatatsia panejinavanapaevi, pasivajamatabēcuenearēyamēre Dioso mapanacuayabetsicaje papecavecuaxuabijavatsica dovathi. Mapanacuataje panejinavanapaevi, bitso cajena bepajibimē tsane. Paxamē ata, manuameneta panejinavanapaevi, bitso cajena bepajibimē tsane. Bajarapacuenia bitso bepajibimē tsane tsipaji baja panetuatuajēatsica dovathi xuabicatsi. Nexata baja aeconoxae bitso bajaraponē anaepanapona. Tsipaji baja yapētane caematacabibeje saya petonacopatsijavatsi pexuabinexatsi infiernojavabelia, pejaijume athēbēvetsica pinijijumeta, jumetaniji.

¹³ Nexata dragón, ponē dovathi, ita yapētane athēbēvetsica pexuabijavatsitsica irabetsica, nexata barajinapona pova vecuanaexanatsi pebinēyo. ¹⁴ Itsiata baitsi jane bajarapova rajutatsi anijacorofetobeje, becotsalacorofetobeje. Bajarapova nexata dragón vecuapuna tajēbelia, petusato nacuayabelia, bajarajotalia peponaponaenexa. Nexata bajarajotalia Dioso rajutabiabatsi pexajava acueyabi pavaibeje epatua. ¹⁵ Dragón pecuibovojotuatsina capitsapa mera, ayaira. Pecuibovojotuatsina pepitsapaemera naexana pepamene pecaponaenexatsi picani petiriva. ¹⁶ Itsiata baitsi jane petiriva Dioso yavenonatsi. Ira nexata navoconareca ayajava. Nexata pamerami dragón pecuibovojotuatsina pitsapaina, bajarapamēthēareca joneca. ¹⁷ Bajaraxuata nexata dragón bitso anaepana petirivajavabelia. Nexata baja icatsia dragón pona petiriva pexi penacopabivi pebeyejebinexa. Bajarapamonae jumecovēnētavanapa Dioso pejumelivaisi pitorobicueniatsi. Bajarapamonae caasaē tsavanapauena penavajunupaebijava Jesucristo pejumecovēnētavanapaajava. Nexata bajarapamonae dragón tsimaxēponatsi pebeyejebinexatsi.

13

Pacuenia piayainēbeje pelivaisi Juan yaquina yabara pelivaisi

¹ Nucajē manuamene tajetabota. Nexata taenucajē manuamenejavatsina pepit-sapaejavatsina piayainē. Siete pamatabocotobeje diez pamataetobeje pexainaenē. Caemataeto canacujitsia xainapona corona. Caematabocoto canacujitsia Dioso apo pejitsipaevēnēanē itanerubena. ² Ponē piayainē taenucajē pepitsapaejavatsina, benevēthē picani. Itsiata petaxu betsonētaxu. Pecuibovojoto pijinia benevēthē petsobianēcuibovojoto. Bajaraponē nasaērajutatsi dragón. Pijatrono ata rajutatsi. Jamatabēcuene caējēpaeyaexanatsinua ayaicuenia pitorobinexa daxitajivi mapanacuajavaje. ³ Piayainē caematabocoto matabocovajēnēbatsi apo bepeyaasaēvajēnēnēxata itajara. Itsiata baja bajarapavajēnē matanacēta. Nexata daxitanacuanēpijivi itsa tane bajaraponē pematavajēnēnacētsijava, bitso jamatabēcuenenabenajaca. Nexata bajarapamonae jumecovēnēta bajaraponē. ⁴ Dragón tocopatatsi pitorobinexa daxitajivi mapanacuajavaje. Bajaraxuata daxitajivi pematatabacabēta navajēcabiaba dragónjavabelia. Pematatabacabēta navajēcabiabanua piayainējavabelia ata. Bajarapamonae najumaitsi mapacueniaje:

—Ajibi cajena itsanē ata pejamatabēcuenecaējēpaenētsi pacuenia itsi mapapiayainēje. Ajibi cajena itsanē ata pecaējēpaenētsi pebarēnabenexa maponēje pecueneamoneyabinexa, najai bajarapamonae piayainē yabara.

⁵ Piayainē tocopatatsinua pibisiacuenia Dioso pebaracuaicuaijainexa. Tocopatatsinua pejumaitsiabinexa: “Xanē cajena bitso ayaijamatabēcuenenēnē Dioso matatoxenetsia,” pejaitsiabinexa. Tocopatatsinua pitorobinexa jivi mapanacuajavaje cuarenta y dos pajuametobeje, baitsi acueyabi pavaibeje epatua. ⁶ Bajaraponē exanapona pacuenia tocopatatsi. Bitso pibisiacuenia Dioso baracuaicuaijai tsabiabi. Dioso pijatemplobo ata pibisiacuenia baracuaicuaijai tsabiabi. Athēbētatsia pejinavanapaevi ata pibisiacuenia baracuaicuaijai tsabiabi. ⁷ Tocopatatsinua vajabitsaē pexanaenexa Dioso pijajivijavabelia. Tocopatatsinua pecueneamoneyabinexa vajabitsaē itsa exana Dioso pijajivijavabelia. Tocopatatsinua pitorobinexa daxitavirijamevi ata. Tocopatatsinua pitorobinexa daxita nacuanēpijivi ata. ⁸ Nexata daxita mapanacuapijivije pematatabacabēta navajēcabiaba piayainējavabelia. Dioso nacua pexanaevajēnaeya, Dioso nacua pexanaecujinae ata, bajarapamonae apo vēnērubenaē Corderonē pijacuyalatobaxutota. Corderonē jivi rajuta matacabi apo pevereveceajava pesivatēpaexae cruzata.

⁹ Itsa pamuxuvojorubename, panatojumetaema mapalivaisije. ¹⁰ Pamonae Dioso pijajivi naneconitsiaexanaena, nexata penaneconitsivi pejebabiabibojavabelia jebiana, bajarapamonae juya itsamonae naneconitsiaexanaenatsi. Pamonae pijinia Dioso pijajivi espadata bena, bajarapamonae juya itsamonae bajarapitsiespadata benatsi. Bajaraxuata itsamonae Dioso pijajivi bejiobiaexanabiabi atatsi, xanepana xaniavaetsia penajamatabēcuenecopatsinexa Diosojavabelia epatua copatsinejeva.

¹¹ Bajaraxuacujinae icatsia taenucajē iravetsina pepitsapaejava itsanē piayainē. Anijamataetobeje pexainaenē. Pacuenia oveja pebito mataeitsi, bajara pemataeitsinē. Itsiata baitsi jane pecuaicuaijajava, pacuenia dragón pecuaicuaijajava jumeitsi, bajarajumeitsi. ¹² Papiayainē copiaya pitsapaina manuamenejavatsina, bajaraponē yajavaponapona. Nexata papiayainē copiaya pitsapaina manuamenejavatsina, nasaērajuta iravetsina papiayainē cotocaevi pitsapainajavabelia. Nexata papiayainē cotocaevi iravetsina pitsapaina, daxita mapanacuapijivi itoroba papiayainē copiaya manuamenejavatsina pitsapainajavabelia pematatabacabēta penavajēcaenexa. Baitsi ponē apo bepeyaasaēvajēnēnēxata itajara matavajēnēnacēta baja, bajaraponējavabelia daxita mapanacuapijivije pematatabacabēta penavajēcaenexa.

¹³ Nexata papiayainē iravetsina cotocaevi pitsapaina, ayaicuenē pexanaejava jivi

tsitaexanapona. Pitatsajaviitaire ata athëbëvetsica othopaeyaexana irabetsica daxitajivi petaenubenaevavata. ¹⁴ Bajarapacuenia ayaicuene pexanaejava pexanaponaexae, yamaxëitojoroba mapanacuajava pejinavanapaevi. Bajarapaayaicuene exanapona, papiayainë copiaya manuamenejavatsina pitsapaina, pitabarata. Bajaraxuacujinae, papiayainë cotocaevi iravetsina pitsapaina, itorobapona Dioso apo pejumecovënëtsivi pexanaenexa pejumapecataenë. Nexata Dioso apo pejumecovënëtsivi, papiayainë copiaya manuamenejavatsina pitsapaina, bajaraponë jumapecataeya exana jane baja. ¹⁵ Nexata papiayainë cotocaevi iravetsina pitsapaina, caëjëpatsi piasaëyaexanaenexa Dioso apo pejumecovënëtsivi jumapecataeya pexanaenë. Nexata asaëyaexana. Bajarapacuenia asaëyaexana papiayainë copiaya manuamenejavatsina pitsapaina Dioso apo pejumecovënëtsivi jumapecataeya pexanaenë pecuaicuaijainexa. Pamonaë pematatabacabëta apo nanavajëcae bajarapajumapecataenëjavabelia, beyaxuabiaexanapona. ¹⁶ Papiayainë cotocaevi iravetsina pitsapaina, bajaraponë jane baja pejamatabëcueneta, daxitajivi mapanacuata pejinavanapaevi, cobejumaitanerubaponatsi, pecujanenia pacobe. Itsa jume, pitapathaitota ata itapaitanerubaponatsi. Nexata bajaraponë pejamatabëcueneta itanerubaponatsi daxitajivi. Itanerubaponatsi beveliajamatabëcuenevi. Itanerubaponatsi ayaijamatabëcuenevi ata. Itanerubaponatsi ricovi ata. Itanerubaponatsi bepejiobivi ata. Itanerubaponatsi pamonaë ata dajubicuenia canajetatsi itsamonaëjavabelia amoneya petonacuenebabiabinexa. Itanerubaponatsi pamonaë ata dajubicuenia apo canajetsitsi itsamonaëjavabelia amoneya petonacuenebabiabinexa. ¹⁷ Nexata pajivi aitanejibi, apo tocopatsitsi itsacuenejavayo ata pecomuatsinexa. Apo tocopatsitsinua itsacuenejavayo ata pecanajetsinexa. Paitanetota jivi itanerubaponatsi, papiayainë copiaya manuamenejavatsina pitsapaina, bajaraponë pevënë. Itsa apo pevënë, nexata pijanúmero. ¹⁸ Mapajamatabëcuenelivaisi bepacanaëjëtameje xaniavaetsia paneyapëtaenexa. Pajivi yapëtane, canaëjëtsi piayainë pijanúmero. Tsipaji bajaraponë panúmero xaina pevënënexa. Panúmero bajaraponë xaina seiscientos sesenta y seis.

14

Pacuenia Juan tane 144.000 pajivibeje Dioso pijajivi penaxëanaejava yabara pelivaisi

¹ Taenutajë Corderonë penucaejava Siónvënë tsutojumata. Barënuca ciento cuarenta y cuatro mil pajivibeje. Bajarapamonae pitapathaitota itanerubena Corderonë pevënë, Corderonë paxa ata pevënë. ² Bajaraxuacujinae jumetaniji athëbëvetsica pecuaicuaijajava. Pecuaicuaijajava najumeta pacuenia bitso banajumeta pinijionca. Najumetanua beyamaxë penajumetsijume ata. Pecuaicuaijajava najumetanua pacuenia arpa banajumeta, ayaibitsaëtöxaneto itsa najuaracata. ³ Corderonë pijajivi naxëananubena pejanavaji trono pitabarata, cuatro ponëbeje piaitothiavi pitabarata ata, ancianovi ata pitabarata. Itsajivi ata cajena apo caëjëpaetsi pecujaninexatsi bajarapavaji. Pamonaë ciento cuarenta y cuatro mil pajivibeje, ëbajarapamonae, caëjëpatsi penaxëanaenexa bajarapavaji. Bajarapamonae neconimatamotatsi Corderonë pijanata. Nexata baja bajarapamonae Dioso capanepatsi mapanacuavecuaje. ⁴ Bajarapapebijivi penaexanaejavaverenacujinae apo naperabëquenetsiatae petirivajavabelia. Apo jamatabëcuenebijianaetsi itsajivi ata. Bajarapamonae pënajinavanapa Corderonë itsaxuayo ponapona. Bajarapamonae Corderonë pijanata neconimatamotatsi. Nexata baja bajarapamonae capanepatsi Diosojavabelia mapanacuavecuaje. Bajarapamonae baja namataxainaeya capanepatsi Dioso pijajivinexa, Corderonë ata pijajivinexa. ⁵ Bajarapamonae caeto ata apo najumetsënëtsi. Aneconijibi tsavanapae Diosojavabelia.

Pacuenia acueyabi ponëbeje ángelevi vajunupaeba pacuenia itsamatacabi itsijitsia mapanacuataje yabara pelivaisi

⁶ Icatsia ángelnë taniji pepunanajetarucaejava. Canajetaruca pexanialivaisi, apo pevereverecaelivaisi. Tsipaebijitsia bajarapalivaisi mapanacuajava pejinavanapaevi. Tsipaebijitsia daxitanacuanëpijivi, daxitaviriajumevi ata. ⁷ Ángelnë pinijijumeta jumai tsanajetaruca:

—Dioso cjunaviaya pajinavanapare. “Xamë bitso ayaijamatabëcuenenëmë,” pajamëre tsabiabi Diosojavabelia. Copiapata rabaja Dioso penaneconitsiaexanapon-aenexa daxitajivi. Ponë itaboxo exana, ira ata, manuamene ata, mera pepitsaparubenaevanë ata, bajaraponëjavabelia panematabacabëta panavajëtabiabare, jai tsanajetaruca ángelnë pinijijumeta.

⁸ Icatsia cotocaevi taniji itsanë ángelnë pepunanajetarucaejava. Jumai tsanajetaruca bajarapaángelnë:

—Verebiabatsi rabaja Babilonia tomaraxanetomita pejinavanapaevimi. Tsipaji Babilonia tomarapijivimi navajëcabiaba jumapecataeya pexanaenëanëjavabelia. Nexata belia daxita nacuanëpijivi ata navajëcabiaba jumapecataeya pexanaenëanëjavabelia. Babilonia tomarapijivimi jumapecataeya pexanaenëanëjavabelia penavajëcaejamatabëcueneta, jamatabëcuenebijianapona daxitanacuanëpijivi. Nexata pacuenia pevitota pibisiacuene pexanabiabiva pejamatabëcueneta, daxitajivi jamatabëcuenebijianapona, bajara pijinia pacuenia Babilonia tomarapijivimi ata jumapecataeya pexanaenëanëjavabelia penavajëcabiabijamatabëcueneta, jamatabëcuenebijianapona daxitanacuanëpijivi. Bajaraxuata bajarapacuenia verebiabatsi, jai tsanajetaruca ángelnë, ponë cotocaevi taniji pepunanajetarucaejava.

⁹ Bajaraxuacujinae icatsia taniji acueyabiángelnë pepunanajetarucaejava. Bajara-paángelnë pinijijumeta jumai tsanajetaruca:

—Pajivi pematabacabëta navajëcabiaba piayainëjavabelia, bajaraponë jumapecataeya pexanaenëtsijavabelia ata, bajarapajivi naneconitsiana Diosojavabelia. Bajarapajivi itsa nacopatanua piayainë pevënëta pitapaitanerutsinexatsi, itsa jume, pecobejumatata ata pecobejumaitanerutsinexatsi, nexata bajarapajivi naneconitsiana Diosojavabelia. ¹⁰ Dioso bitso pebaraanaepanaexaetsi, bajarapajivi bevelia apo naneconitsiaexanaetsi tsane. Ayaicuenia naneconitsiaexanaenatsi isotojavabelia, azufre petajueisotojavabelia. Nexata bajarapajivi isoto petajuta bitso jamatabëfaenaena Dioso pijaánglelevi pitabarata, Corderonë ata pitabarata. ¹¹ Athëbëabetsia bajarapaisototsëxë junaenia daxitamatacabijavabelianexa. Ayaicuenia bajarapajivi Dioso penaneconitsiaexanaejavatsi, tsitecaena daxitamatacabijavabelianexa. Bajarapajivi isoto petajuta bitso pejamatabëfaenaejava, caepatoyo ata apo copatsi tsane. Bajarapacuenia Dioso naneconitsiaexanaenatsi pajivi pematabacabëta navajëcabiaba piayainëjavabelia, bajaraponë jumapecataeya pexanaenëtsijavabelia ata. Bajarapajivi itsa nacopatanua piayainë pevënëta pitanerutsinexatsi, bajarapacuenia Dioso naneconitsiaexanaenatsi. ¹² Bajaraxuata Dioso pijajivi xaniavaetsia bejumecovënëtavanapa Dioso pitorobilivaisitsi. Becaasaënua tsavanapae Jesúsjavabelia penajamatabëcuenecopatsijava, jai tsanajetaruca acueyabi ángelnë pepunanajetarucaejavata.

¹³ Bajaraxuacujinae jumetaniji athëbëvetsica tanejumaitsijava. Nejumaitsi athëbëvetsica mapacueniaje:

—Yaquinarure mapacuenia pejumaitsiitaneje: “Mapamatacabijavaveliacujinaeje, pevajënaeyabelia ata, jamatabëcuenenëbarëya baja tsavanapae tsane pamonaë tēpapona Dioso pepua pejumecovënëtsivi,” pejaiitane, yaquinarure, nejai athëbëvetsica.

Espíritu Santo ata nejumaitsi bajarapamonae yabara mapacueniaje:

—Xaniajai rabaja tsane. Bajarapamonae nacueraevetsiana penacuenebijava. Pamat-acabi abaxë bajarapamonae asaë tsavanapae mapanacuataje, daxita xua pexaniacuene exanavanapa, bajaraxuajamatabëcuene Dioso athëbëtatsia matamotsianatsi. Bajaraxuata jamatabëcuenenëbarëya tsavanapae tsane bajarapamonae, nejai Espíritu Santo.

Pacuenia itsamatacabi Dioso naneconitsiaexanaejitsia daxita pamonaе pijaneconi pexainaеvi yabara pelivaisi

¹⁴ Icatsia taniji penioponaeitarērēbo. Bajarapaitarērēbo tuatuaјēta jivitonē eca. Itarērēbo tuatuaјēta peecaenē yabara jamatabējumaitsinē:

—Jesús raeta, Daxitajivi Pematapijinē, jamatabējanē.

Namataxatateca orocorona. Cobenaeca bemasete pexiuјaiјava pecaucubinexa penaveretsiruanē. ¹⁵ Nexata icatsia itsanē ángelnē pitsaparena temploboēnēverena. Bajarapaángelnē asaēyata vavajai itarērēbo tuatuaјēta peecaenējavabelia. Jumaitsi bajarpaángelnē:

—Caucubare jane baja penaveretsiruanē mapanacuayaberecaje. Copiapata rabaja pecaetuatsinexa penaveretsixu mapanacuatarecaje, jai ángelnē, ponē pitsaparena temploboēnēverena.

¹⁶ Nexata bajaraxuacujinae ponē eca itarērēbo tuatuaјēta, bemasete pexiuјaiјava yota irajumabereca. Caucuba jane baja penotsinexa penaveretsiruanē. Pecaucubijava penaveretsiruanē penotsinexa, mapajamatabēcuenelivaisi xainaje. Pacuenia caucuba penaveretsiruanē penotsinexa, bajara pijinia pacuenia itsamatacabi daxita Jesús piјajivi pitsiana.

¹⁷ Bajaraxuacujinae icatsia athēbētatsia itsaángelnē pitsaparena temploboēnēverena. Bajaraponē ata capona bemasete pexiuјaiјava pecaucubinexa penaveretsiruanē.

¹⁸ Icatsia itsaángelnē pitsaparena altarjavaverena. Bajarapaángelnē altarpijiisoto pevetsinē. Junata pinijijumeta itsaángelnē, bemasete pexiuјaiјava pecapon-aenējavabelia. Jumaitsi bajarapaángelnējavabelia mapacueniaje:

—Mapanacuayaberecaje caucubaremeca daxita uvaruanē, penaveretsiruanē, jai.

¹⁹⁻²⁰ Nexata jane baja bajarapaángelnē bemasete pexiuјaiјava yota irajumabereca. Caucuba jane baja uvaruanē, penaveretsiruanē. Nexata bajarapauvaruanē othotajarabaxuaba pinijivaxixaneto ēnēabelia, bajarapavaxixanetoēnēta pemarēbeneyujubataxuabinexa. Nexata jane baja uvacuaimarēbene yujubataxuaba tomara jumaverena. Nexata pemarēbeneyujubataxuabijavata, pinijijanaraxaneto pitsapona. Nexata bajarapajanaraxaneto navotanucapona. Bajarapajanaraxaneto penavotanucaponaеjava, piapiajava xaina trescientos pakilómetrobeje. Piavajubuajava pijinia xaina bejamatabēcuenе caemetro epatua. Xua taniji, uvaruanē penaveretsiruanē pecaucubijava, xua ata taniji, pinijivaxixaneto ēnēabelia piothotajarabijava pemarēbeneyujubataxuabinexa, xaina mapajamatabēcuenelivaisije. Itsamatacabi ángelnē caetuatsiana daxita pibisiacuene pexanaеvi penaneconitsiaexanaenexa. Nexata pibisiacuene pexanaеvi ayaiBITSaētoXanetonē tēpaena. Nexata bajarapacuenia ayaiјana xuabiana.

15

Pacuenia Juan tane athēbētatsia siete ponēbeje ángelevi, siete xuabeje piayaiјavanē pecaponaеvi peverebiabinexa mapanacuaje, yabara pelivaisi

¹ Icatsia taniji athēbētatsia pinijicuene pitajētsiјava pacuenia itsamatacabi itsijitsia mapanacuataje. Pinijicuene pitajētsiјava itsa taniji, nabenajacajē bitso. Siete paángelnēbeje capona siete xuabeje piayaiјavanē peverebiabinexa mapanacuaje. Bajarapapiayaicuene pepanepaecujinae, Dioso bitso jivi pebaraanaepanaeјava, copiarucaena baja.

² Nexata icatsia taeyetajē bemanuamene picani. Itsiata baitsi jane piataјajava. Pacuenia vidrioјava nasaba, bajarapitsiјava. Itsiata bajarapaboxoya pitarunutsicotia xaina. Tanijinua jivi bajarapamene boxojumavereca penubenaеvi. Bajarapamonae cuenea-moneyaba piayainē. Cueneamoneyabanua bajaraponē jumapecataeya pexanaenētsi

ata. Tsipaji pamonaē nubena bajarapamene boxojumavereca, itorobi atatsi bajara-ponēbejejavabelia pematācabēta pevājēcaenexa, apo jumecovēnētsi. Apo nacopatsinua pitānerubinexatsi piayainē pijanúmerota, panúmero xaina piayainē pevēnēnexa. Bajaraxuata bajarapamonaē canubena arpa, Dioso perajutsiarpatsi. ³ Bajarapamonaē naxēananubena Moiséspijinē, Dioso pijajivitonē, pevaji. Bajarapavaji Corderonē ata pevaji. Penaxēanaejavata, bajarapamonaē vajita jumai tsanubenaē mapacueniaje:

Xamē Diosomē, niajamatabēcuenesaēnē daxita mapanacuata jivi pevetsivi matatox- enetsia. Xua pinijicuene exaname, bitso pexaniacuene. Xamē daxitanacuānē nevetšinē. Daxita xua pexaniacuene, nexanaenē. Penajumetsēnētsicuene jivi neyamaxēitorobinexa, apo nexanaenē. ⁴ Daxitajivi xamē pecacujunavinē tsane. “Dioso cajena bitso ayaijamatabēcuenenē,” cajai tsane. Xamē rabaja cajena caenēmē nianeconijibinē, caeto ata pibisiacuene apo nexanaenē. Daxita nacuanēpijivi xamējavaberena patsiana pematācabēta xamējavabelia penavājēcaenexa. Bajarapacuenia catoitsane tsipaji baja daxitajivi tane ēpexaniacuene nexanaponaponaējava,

jai tsanubenaē Diosojavabelia bajarapamonaē penaxēanaejavata.

⁵ Bajaraxuacujinaē icatsia taniji athēbētatsia templobo ēnētūatuajēalia peyatu-ucutsipana penapatsijava. Bajara paēnēyatuucutsijavaēnēta bajayatami Dioso Moiséspijinēta penajumecopatsilivaisi peyaquinaēibopananē xaniavaetejeba.

⁶ Bajarapatemploboēnēverena pitsaparena siete paāngelnēbeje. Bajarapamonaē capona siete xuabeje piayaijavanē, bajaraxuanēta mapanacuaje pevėrebiabinexa. Bajarapaāngelevi naxataba pexaniaviriapapaēbėrėjavanē, piaxuirajibijavanē. Peniojaijavanē bitso. Nacorobēcėbanubena oropananē. ⁷ Bajaraxuacujinaē

pamonaē cuatro ponēbeje piāithiaviyajuvēnēnē, āngelevijavabelia rajuta copanē. Piayainē caēāngelnē canacujitsia rajutapona caecopa. Bajarapacopanē orocopanē. Dioso, ponē daxitamatacabijavabelianexa peponaponaenē, ayaicuenia anaeya naneconitsiaexanaena pamonaē naneconita bajaraponējavabelia. Xuanē vėnėba bajarapacopanē, bajaraxuanēta Dioso naneconitsiaexanaena bajarapamonaē.

⁸ Bajarapatemplobo tuatuajėmi bitso vėnėca ětsėxė. Bajarapatsėxė pitsapa Dioso ayaijamatabēcuenenėjavaverena. Itsajivi ata cajena apo caējėpaetsi pejonenexa bajarapatemplobo ēnētūatuajėabelia. Xuanē siete paāngelnėbeje capona, piayaijavanē, itsa baja panepaena, matapania jivi caējėpaenatsi pejonenexa bajarapatemplobo ēnētūatuajėabelia.

16

Pacuenia Juan tane athēbētatsia pacuenia itsamatacabi Dioso naneconitsiaexanaejitsia daxita pijaneconi pexinaēvi yabara pelivaisi

¹ Icatsia jumetaniji templobojavaverena pinijijumeta pejumaitsijava. Siete paāngelnēbejejavabelia jumaitsi mapacueniaje:

—Paponare baja iranējavabereca paneepacaponaenexa jane baja xuanē siete pacopabeje vėnėca, piayaijavanē. Dioso jane baja anaeya ayaicuenia penaneconitsiaexanaenexa, daxita pamonaē naneconita bajaraponējavabelia, pejaijava, templobojavaverena jumetaniji.

² Nexata jane baja pona penamataxainaeāngelnē. Pecaponaera epatajaraba iranējavabereca. Nexata daxita pamonaē piayainē pevėnėitanetota itānerubatsi, daxita bajarapamonaē bajarapaepatota bitso perabėtsabanareca. Nexata bitso aperabėtane bajarapamonaē. Bajarapamonaē bajarapapiayainē jumapecataeya pexanaenėtsijavabelia ata pematācabēta penavājēcaēvi.

³ Bajaraxuacujinae icatsia pecotocaeviángelnē pijacopapijira epatajaraba manuamenejavabereca. Manuamenemi nexata naexana bepetēpaenē pijanara. Daxita baja tēpa manuameneta pejinavanapaevimi.

⁴ Bajaraxuacujinae icatsia acueyabiángelnē pijacopapijira epatajaraba menianējavabereca mera, iravetsina pepitsaparubenaejavanējavabereca ata. Nexata daxita bajarapameranēmi naexana ēpijanaranē. ⁵ Bajaraxuacujinae jumetaniji mera pevetsiángelnē pejumaitsijava Diosojavabelia. Jumaitsi mapacueniaje:

—Diosomē, caeto ata pibisiacuene apo nexanaenē. Ajena, pamatacabi, ponaponame. Bajayata mapanacuaje nexanaevajēnaeya ata, ponaponame. Pibisiacuene pexanaevi, paneconivajēto xaina, bajarapaneconivajētota naneconitsiaexaname. Bajaraxuata meranēmi pijanaranē naexanaeyaexaname. Tobijianame meranē piayainē pijajivi bajarapameranē penatsiapaenexa. ⁶ Bajarapamonae bajayata beyejeba nijajivimi. Pamonaē ata cavajunupaebapona, beyejeba. Bajaraxuata bajarapacuenia meranē pijanaranē naexanayaexaname penatsiapaenexa bajarapamonae, jai Diosojavabelia mera pevetsiángelnē.

⁷ Icatsia jumetaniji itsaángelnē altarjavaverena pejumaitsijava. Jumaitsi mapacueniaje:

—Xamē Diosomē, nijamatabēcuenesaenē daxita mapanacuata jivi pevetsivi matatoxenetsia. Itsa naneconitsiaexaname jivi, paneconivajēto xaina, bajarapaneconivajētota bananeconitsiaexaname. Itsa aneconijibi tsipae, nexata cajena apo naneconitsiaexanaemē tsipae, pejaijava itsaángelnē altarjavaverena jumetaniji.

⁸ Bajaraxuacujinae icatsia cuatroángelnē pijacopapijira epatajaraba. Epatajaraba matacabipijijuametojavabetsica. Nexata matacabipijijuameto pecotiata jivi bitso ayaicuenia tsajavatsi. ⁹ Itsiata bajarapamonae apo copabi pibisiacuene pexanabiabijava. Apo najamatabēcuenepēnēyorotsi Diosojavabelia. “Xamē bitso ayaijamatabēcuenenēmē,” apo jai ata cajena Diosojavabelia. Biji rajane Dioso, ponē caējēpatsi daxitacuene pexanaenexa, bajaraponē caranata pibisiacuenia baracuaicuaijai.

¹⁰ Bajaraxuacujinae icatsia cincoángelnē pijacopapijira epatajaraba. Epatajaraba piayainē pijatronojavabereca. Piayainē jane baja pevetsinacuami aitaquiri tsanuae. Piayainē jane baja pijajivi bitso penavixaetaexae, navonosine. ¹¹ Itsiata baitsi jane bajarapamonae apo copabi papibisiacuene exanavanapa. Apo najamatabēcuenepēnēyorotsi Diosojavabelia. Biji rajane Dioso, ponē athēbētatsia peecaenē, bajaraponē caranata bajarapamonae pibisiacuenia baracuaicuaijai. Bajarapacuenia bajarapamonae Dioso pibisiacuenia baracuaicuaijai penavixaetaexae, bitso peperabētsabanaexaenua.

¹² Bajaraxuacujinae icatsia seisángelnē pijacopapijira epatajaraba. Epatajaraba pini-jimenexanetojavabetsica, Eufratesmenejavabetsica. Nexata Eufratesmenexaneto tsevajunua. Nexata bajarapacuenia namuto torucarenatsi iranē pevetsivi penicabinexa, penajetarubenaevi orientejavavetsina.

¹³ Bajaraxuacujinae taniji acueyabi padovathibeje. Bajarapadovathivi becuaitoxicuenia pitsapa. Itsanē pitsapa dragón pecuibovojotuatsina. Itsanē pitsapa piayainē pecuibovojotuatsina. Itsanē pitsapa peyamaxēitojorobiprofetanē pecuibovojotuatsina. ¹⁴ Bajarapadovathivi pinijicuene pexanaejava, exanapona. Pona baja pecaetuatsinexa daxitanacuanē pevetsivi. Bajarapadovathivi caetuatapona jivi vajabitsaē pebarēexanaenexa Diosojavabelia. Dioso piamatabēcuenesaenē daxitanacuanē pevetsivi matatoxenetsia. Bajarapamatacabi Dioso exanaena daxita pacuenia tajjēvelia najumecapanepaeya jumaitsi. ¹⁵ Bajaraxuacujinae jumetaniji Jesús pejumaitsijava: “Panenamuxunaevere. Itsajota apo panejamatabēnajinaemē, bajarajota jemata patsianicajē. Pacuenia penacobetoxotsinē jemata bapata itsajota apo jamatabēnajinaetsi, bajara itsinē tsane. Nexata pajivi jamatabēcuenaitavaya ponaponaena tanecopiapitsinexa, bajarapajivi barēya tsane. Pacuenia itsajavabelia peponaejivinexa, baxaniavaeta

penaxatatsijava pecaponaenexa pejumasajinaeyaniva, bajara itsi tsane bajarapajivi. Nexata pamatacabi patsianicajë, apo aura tsane,” pejajjava Jesús, jumetaniji. ¹⁶ Nexata jane baja dovathi pijajivi caetuatatsi daxitanacuanë pevetsivi. Caetuatatsi caejavata penacaetuatsinexa. Itsajota nacaetuata daxitanacuanë pevetsivi hebreojumeta pevënë Armagedón.

¹⁷ Bajaraxuacujinae icatsia sieteanğelnë pijacopapijira epatajaraba. Epatajaraba itaboxojavabetsia. Nexata athëbëtatsia templobo ënëtuatuajëta Dioso pecaetronojavav-erena pinijijumeta jumaitsi:

—Daxita rajane baja vereta, jai athëbëtatsia templobo ënëtuatuajëta.

¹⁸ Nexata jane baja binebinejai yamaxë. Pinijijovibo bitso najumeta. Yamaxë ata najumeta. Iranë ata najëaba pinijicuenia. Jivi pejinavanapaejavaveliacujinae mapanacuataje, caeto ata bajarapacuenia ira penajëabijava pinijicuenia apo tae. ¹⁹ Pinijitomaraxanetomi, Babilonia tomarami, acueyabi xuabeje natsanaeya othopa. Bajarapacuenia itsanacuanëpijitoraranëmi ata othopa irata. Dioso nexata najamatabënapita pinijitomaraxanetopijivimi, Babilonia tomarapijivimi. Ayaicuenia Dioso baraanaepana Babilonia tomarapijivimijavabelia pibisiacuene bitso pexanaexae. Bajaraxuata pinijicuenia Dioso naneconitsiaexana Babilonia tomarapijivimi. ²⁰ Itsa ira najëaba, daxitatunaetonëmi, daxitatsutonëmi ata, ajibi baja. Ira namatajëpa baja. ²¹ Athëbëvetsica othopaica jivijavabetsica bitso pecainejebimatarejetonë. Bajarapamatarejetonë xaina piarevejave cuarenta pakilobeje. Nexata mapanacuapijivi pibisiacuena Dioso baracuaicuajai. Tshipaji athëbëvetsica piothopaejava, bitso pecainejebimatarejetonë, bitso piayaicuene.

17

Pacuenia itsamatacabi Dioso naneconitsiaexanaena pamona navajëcabiaba jumapecataeya pexanaenëanëjavabelia yabara pelivaisi

¹ Pamona sieteanğelnëbeje, sietepacopabeje pecaponaevi, bajarpaängeleviyajuvënëne, caenë rena xanëjavaberena. Bajarapaängeelnë nejumaitsi:

—Naxanitsia. Catsitajëtsianatsi pacuenia Dioso naneconitsiaexanaejitsia Babilonia tomarapijivi, patomaraxaneto eca menexanetonë imoxoyojavata. Bajarapatomarapijivi Diosojavabelia apo navajëcabiabi. Caranata saya navajëcabiaba jumapecataeya pexanaenëanëjavabelia. Nexata pacuenia petiriva pevitota bitso pibisiacuene pexanabiabiva jamatabëcueneitsi, bajarajamatabëcueneitsi Babilonia tomarapijivi. Pova petiriva pibisiacuene pevitota exanabiaba, bajarapova pejamatabëcueneta jamatabëcuenebijiana itsamonaeta. Bajara pijinia pacuenia Babilonia tomarapijivi ata pexanabiabijava pejamatabëcueneta, jamatabëcuenebijiana ayaibitsaëttoxaneto itsanacuanëpijivi ata. ² Tshipaji itsanacuanë pevetsivi patabiaba Babilonia tomaraberena. Nexata bajarapamonaeta copaba Diosojavabelia penavajëcabiabijava. Caranata saya Babilonia tomarapijivi cuenejëpaeya navajëcabiaba jumapecataeya pexanaenëanëjavabelia. Nexata jamatabëcuenebijianatsi bajarapamonaeta, nejai bajarapaängeelnë.

³ Bajaraxuacujinae Espiritu Santo netsijamatabëvënëca. Nexata bemajitsinaebota anğelnë nebarëpona petusato nacuyabelia. Bajarajotalia taeyetajë petiriva. Bajarapova eca piayainë, petsobianë, pejumata. Bajaraponë peperabëtuareca, Dioso apo pejitsipaevënëanë, itanerubena. Bajarapapiayainë xaina sietepamatabocotobeje diez pamataetobeje. ⁴ Nexata bajarapova penaxatatsijavareca itsajava pabanaeya saëjai. Itsajava tsobia. Naitabëteca orojavanëta, perlavënëjavanëta ata, penamatamotsiibotonëta ata. Cobenaeca orocopa. Pibisiacuene bitso pexanaejava pevitota, bajarapajamatabëcuenelivaisi vënëca bajarapacopata. ⁵ Bajarapova

pitapathaitota vënëyaquinarutatsi. Pajamatabëcuenelivaisi yabara bajarapova pitapathaitota vënëyaquinarutatsi, itsajivi ata apo yapëtae. Pejumaitsijume picani mapacueniaje: “Pinijitomaraxaneto Babiloniatomara. Bajarapatomaraverena pitsapa jivi pejamatabëcuenebijianaefavatsi, jumapecataeya pexanaenëanëjavabelia penavajëcabiabinexa. Bajarapatomaraverena pitsapanua jivi pejamatabëcuenebijianaefavatsi, daxitaxua pibisiacuene pexanaenexa mapanacuataje,” pejaijume, picani bajarapova pitapathaitota vënëyaquinarutatsi. ⁶ Taeyetajë icatsia bajarapova. Aitajibi tsecae Dioso pijajivimi pijanarata. Pamonaefata beyejebatsi pevajunupaebixae Jesús, bajarapamonaemi ata pijanarata aitajibi tsecae bajarapova. Bajarapitsecaejava itsa taniiji, bitso baja cajena jamatabëcuenenajunaviacajë. ⁷ Nexata ángelnë nejumlahtsi:

—¿Detsa xuajitsia jamatabëcuenenajunaviacame? Cayapëtaeyaexanaenatsi pajamatabëcuenelivaisi xaina mapovaje. Ponë piayainë siete pamatabocotobeje diez pamataetobeje pexainaenë, ponëjumata bajarapova eca, bajaraponë ata pajamatabëcuenelivaisi xaina, cayapëtayaexanaenatsi. ⁸ Mapapiayainë tanemeje, bajaraponë picani bajayata ponapona mapanacuataje. Itsiata baja aeconoxae bajaraponë ajibi. Itsiata baitsi jane itsamatacabi pinijimëthëxanetojavatsina pitsapaenina icatsia peponaponaenexa mapanacuataje. Bajaraxuacujinae bajaraponëmi beyaxuabianatsi pepacuene jane baja bajaraponë pecopiarucaenexa. Daxita mapanacuapijivije, pamonaef Corderonë pijacuyalatobaxutota apo vënërubenaef Dioso nacua pexanaevajënaeya, Dioso nacua pexanaecujinaef ata, bajarapamonaef matacabi apo peverevececaejava apo xainaef tsane. Bajarapamonaef jamatabëcuenenajunaviacaena piayainë itsa pitsapaenina pinijimëthëxanetojavatsina, nejai ángelnë.

⁹ Icatsia ángelnë nejumlahtsi:

—Pamonaef baja peyapëtaevi, pamonaef baja caëjëpatsi pejumeyapëtaenexa, bajarapamonaef pejumeyapëtaenexa mapalivaisije. Papiayainë xaina siete pamatabocotobeje, ponëjumata taeyetame petiriva, anijajamatabëcuenelivaisibeje itajëta. Bajaraponë pematabocotonë, siete pamatabocotobeje, mapajamatabëcuenelivaisi xainaje. Siete rabaja pijinia patsutobeje eca Babilonia tomarata. Bajarapasiete pamatabocotobeje mapajamatabëcuenelivaisi yajavaxainaje. ¹⁰ Siete rabaja pijinia ponëbeje Babiloniatomara pevetsivi. Nexata Babiloniatomara pevetsiviyajuvënëvi cinco baja ponëbeje pitsapa. Seisnë abaxë aeconoxae eveta Babiloniatomara. Sietenë abaxë apo taxuxuabi pevetsinexa. Itsiata sietenë itsa evetsiana, bajayajebi apo evetsi tsane. ¹¹ Papiayainë, petsobianë, taneme, mapajamatabëcuenelivaisi xainaje. Bajaraponë picani bajayata eveta Babiloniatomara. Itsiata baja aeconoxae bajaraponë apo evetsi. Tsipaji baja tëpa. Itsiata baitsi jane icatsia bajaraponë pinijimëthëxanetojavavetsina pitsapaenina Babiloniatomara icatsia pevetsinexa. Nexata icatsia bajaraponë itsa evetsiana, ochonë baja evetsiana Babiloniatomara. Bajaraponë abaxë bajayata itsa ponapona, siete ponëbeje Babiloniatomara pevetsiviyajuvënëmi baja cajena. Bajaraponë icatsia Babiloniatomara itsa evetsiana, pevetsicujinaef bajaraponëmi beyaxuabianatsi pepacuene jane baja bajaraponë pecopiarucaenexa, nejai ángelnë.

¹² Icatsia ángelnë nejumlahtsi:

—Ponë piayainë pemataetonë taneme diez pamataetobeje, mapajamatabëcuenelivaisi xainaje. Diez rabaja pijinia ponëbeje, itsamatacabi nacuanë evetsiana. Nexata bajarapamonaef itsamatacabi nacuanë itsa evetsiana, evetsiana diez panacuabeje. Tsipaji caenë canacujitsia evetaponaena caenacua. Bajarapamonaef abaxë apo taxuxuabi bajarapanacuanë pevetaavanapaenexa. Itsiata baitsi jane itsa taxuxuabijitsia nacuanë jane baja pevetaavanapaenexa, copatsianatsi pijanacuanëjava pevetsinexa saya caeepatofovajëto. Bajarapamonaef itsa evetsiana pijanacuanëjava, piayainë barëevetsianatsi. ¹³ Pamonaef diez ponëbeje, diez pijinia panacuabeje itsamatacabi itsa evetsiana,

barënajamatabëcuenejëpaenatsi piayainë. Nexata bajarapadiez ponëbeje jumaitsi tsane piayainëjavabelia:

—Xamë pacatocopatsianatsi patanematacaitorobinëexamë, jai tsane.

¹⁴ Pamatacabi bajarapadiez ponëbeje evetavanapaena pijanacuanë, piayainë vajabitsaë barëexanaenatsi Corderonëjavabelia. Daxita pamonae Corderonë pijajivi, pamonae Dioso pejunatsivi, bajarapamonae pijinia Corderonë barëbena piayainëjavabelia. Nexata Corderonë cueneamoneyabiana piayainëjavabelia. Cueneamoneyabiana tsipaji Corderonë daxita petuxanevi pijatuxanenë baja cajena. Nexata Corderonë daxita nacuanë pevetsivi matatoxenetsia pepo pevetsinë, nejai ángelnë.

¹⁵ Angelnë icatsia nejumaitsi:

—Pamanuameneboxovereca taeyetame pibisiacuene pexanaeva, bajarapamanuamene mapajamatabëcuenelivaisi xainaje. Mapanacuata jinavanapa jivibitsaëttoxanetonë daxitaviriajumevi, daxitanacuanëpijivinua. Bajarapajamatabëcuene yabara taneme bajarapamanuamene. ¹⁶ Pamonae diez panacuabeje pevetsivinexa, bajarapamonae piayainë barëitoya tsane pibisiacuene pexanaevajavabelia. Nexata bajarapamonae beyaxuabiana bajarapova. Jumasa xuababuatsiana. Xaeyabuatsiananua. Bajaraxuacujinae tajuitsiana isotota. ¹⁷ Pamonae diez ponëbeje itsamatacabi nacuanë itsa evetsiana, bajarapamonae najamatabëcuenejëpaena petocopatsinexa piayainë pijanacuanë petoevetsinexatsi. Bajarapacuenia najamatabëcuenejëpaena tsipaji baja cajena Dioso jamatabëcueneitorobatsi bajarapacuenia pexanaenexa bajarapamonae. Nexata piayainë bajarapamonae pijanacuanë bajayajebi toevetsianatsi matapania pecopiapatsijavabelianexa daxita pacuenia Dioso tajëvelia najumecapanepaeya jumaitsi. ¹⁸ Pova pibisiacuene pexanaeva taeyetame manuameneboxovereca, bajarapova mapajamatabëcuenelivaisi xainaje. Pinijitomaraxaneto Babiloniatomara. Bajarapatomarapijivi pejamatabëcueneta mapanacuanë pevetsivi pibisiacuene exanapona, nejai ángelnë.

18

Pacuenia Babilonia tomaraxanetomi copiaruca yabara pelivaisi

¹ Icatsia itsaángelnë taniji perunaejavatsica athëbëvetsica. Caëjëpatsi pinijicuenia piayaicueene pitorobinexa. Bajarapaángelnë pinijicotia yajavarunaica. Ira itayota daxitanacuanëjava. ² Ayaijumeta vavajai. Jumaitsi mapacueniaje:

—Verebiabijitsiatsi rabaja Babilonia tomaraxanetota pejinavanapaevi. Nexata baja ëjoriminacua tsarucae tsane. Daxita xua pibisiacuene pexanaedovathivi, juya bajarapatomarata jinavanapaena. Bitso pibisiaviriavi pepunaevi, pamonae daxitajivi apo itajitsipae petaenexa, juya bajarapatomarata jinavanapaena. ³ Babilonia tomarapijivi navajëcabiaba jumapecataeya pexanaenëanëjavabelia. Nexata belia daxitanacuanë pevetsivi ata, pijajivi yajava, navajëcapona jumapecataeya pexanaenëanëjavabelia. Nexata Babilonia tomarapijivi jumapecataeya pexanaenëanëjavabelia penavajëcabiabijamatabëcueneta, daxita xua pibisiacuene pexanaejamatabëcuenetanua, jamatabëcuenebijanapona daxitanacuanëpijivi. Babilonia tomarapijivi bitso xainapona ayaijava palata pibisiacuene pexanaejamatabëcueneta. Nexata pijinia pamonae Babilonia tomaraberena capatabiaba daxitacuene pecanajetsinexa Babilonia tomarapijivijavabelia, bajarapamonae ata baja bitso ayaijava palata xainapona. Bajarapacuenia Babilonia tomarapijivimi pibisiacuene pexanabiabixae, ayaicuenia naneconita Diosojavabelia. Bajaraxuata Babilonia tomarapijivi Dioso baja verebiabijitsiatsi, jai ángelnë.

⁴ Bajaraxuacujinae icatsia athëbëvetsica jumetaniji itsajume. Jumaitsi mapacueniaje:

—Paxamë patajajivimë, papitsapare baja Babilonia tomaravecua. Papitsapare baja pibisiacuene paxamë ata paneexanaeyaniva, bajarapatomarapijivi yajava Dioso papecananeconitsiaexanaeyaniva. ⁵ Babilonia tomarapijivi pijaneconi baja bitso ayajava xaina. Pijaneconi ita napebetsipa, ita najumaetaponaejitsipa, nexata copi-apatsipa itaboxojavabetsia. Dioso cajena yapëtane daxita Babilonia tomarapijivi pibisiacuene pexanaejava. ⁶ Bajarapamonae bejiobiaexanabiaba itsamonae. Nexata Dioso ita naneconitsiaexanaena, bajarapamonae bitso ayaicuenia bejiobiaexanaena. ⁷⁻⁸ Babilonia tomarapijivi bitso beayaijamatabëcuenevi natane. Natocomuacabiaba ayajava penamatamotsijavanë pibisiacuene pexanabiabimatamota. Bajarapamonae pejamatabëëthëtota jamatabëjumaitsi tsabiabi: “Xanë raja majota ecajë nacua betaevetsinë. Nexata apo jamatabëcuenebëjanë tsane itsacuenejavayo ata yabara. Apo namatavenonaenë tsane itsacuenejavayo ata,” jamatabëjai tsabiabi bajarapamonae pejamatabëëthëtota. Bajarapacuenia Babilonia tomarapijivi pejamatabëjumaitsixae, ayaicuenia Dioso bejiobiaexanaenatsi. Babilonia tomarapijivi caecuenia caematacabita Dioso tocopiapatsiaexanaenatsi petëpaecuene, pematenuyabicuene ata, janibocuene ata. Tajuenatsi isotota bajarapatomarapijivimi. Bajarapacuenia Dioso naneconitsiaexanaenatsi bajarapamonae tsipaji vajatuxanenë Dioso bitso piasaënë.

⁹ Babilonia tomarapijivi pejamatabëcueneta daxitanacuanë pevetsivi jamatabëcuenebijianapona. Nexata daxitanacuanë pevetsivi copaba Dioso pejumecovënëtsijavami. Natocomuacabiabanua ayajava penamatamotsijavanë. Nexata bajarapamonae ita tsëxëtaena Babilonia tomarapijivimi petajuejavatsi, yaitaxutonueya vavajai tsane. ¹⁰ Bajarapamonae pecajunavi, tajë vecuanubenaena Babilonia tomarapijivimi ita tajuenatsi. Bajarapamonae najumai tsane:

—¡Bitso baja rovia bejiobi mapamonaeje! ¡Pinijitomaraxanetota, Babilonia tomaraxanetota, pejinavanapaevimi peyaiyataevimitsi! Caepatoyocujinae baja veriajavatsi Dioso penaneconitsiaexanaexaetsi, najai tsane bajarapamonae.

¹¹ Daxitanacuanëjava, pamonae pecanajetabiabavanapaevi, yaitaxutonueya vavajai tsane. Bajarapacuenia yaitaxutonueya vavajai tsane tsipaji baja xua capatabiaba pecanajetsinexa, ajibi baja pecomuacaevitsi tsane. ¹² Bajarapamonae capatabiaba oronanita pexanaejavanë, platananita pexanaejavanë ata, perlavënëjavanë ata, penamatamotsiibotonë ata. Capatabiabanua pexaniaviriapapaëbërë ata. Itsapapaëbërë linovënëjavanë. Itsajava sedajavanë. Bajarapapaëbërë itsajavanë peraënaejavanë. Itsajavanë petsobiajavanë. Capatabiabanua daxitavirianaejava petuxujuvinaejavanë. Capatabiabanua pexaniajavanë, marfilvënëjavata pexanaejavanë, penamatamotsinaejavanë ata, broncenani ata, hierronani ata, mármolvënëibo ata. ¹³ Capatabiabanua canelavënëjavanë, especiavënëjavanë ata, inciensovënëjavanë ata, mirravënëjavanë ata. Capatabiabanua petuxujuviranë, vinoranë ata, aceiteranë ata, pexaniaviriatrigobononë ata, trigobultonë ata. Capatabiabanua baca, oveja ata, caballo ata, perobobocaemonë ata, carrozavënëmonë. Jivi ata capatabiaba dajubicuenia pecanajetsinexa itsamonaejavabelia amoneya petonacuenebabiabivinexa. ¹⁴ Nexata daxita bajaraxua pecanajetabiabavanapaevi, yaitaxutonueya najumai tsane Babilonia tomarapijivi yabara:

—¡Daxitacuene pejitsipaecuenemi tovereverecatsi baja! ¡Tovereverecatsi baja bitso pexinaejavami, xua picani mapanacuapijivi tane penamatamotsijava! najai tsane bajarapamonae yaitaxutonueya.

¹⁵ Babilonia tomarapijivimi abaxë ita apo tajuettsi, pamonae pecanajetabiabavana-paevi, ayajava palata xainapona, xua capata, pecanajetabiabixae Babilonia tomara-pijivimijavabelia. Bajarapamonae ita taena Babilonia tomarapijivimi petajuejavatsi, yaitaxutonueya vavajai tsane. Tajë vecuanubenaena pecajunavi. ¹⁶ Bajarapamonae daxita najumai tsanubena tsane:

—¡Bejiobitatsi bitso pinijitomaraxanetota pejinavanapaevimi! Bajarapatomarapijivimi naxatabiaba pexaniaviriapapaëbërë, linovënëjavanë. Itsajava peraënaejava. Itsajava petsobiajava. Naitabëtabiaba orojavanëta, perlavënëjavanëta ata, penamatamot-siibotonëta ata. ¹⁷ ¡Caepatoyocujinae saya verevereca baja bitso pexinaejavami! najai tsanubena tsane daxita bajarapamonae.

Daxita pamonae barcoxanetonë pevetsivi, bajarapamonëta penaponaevi ata, bajarapamonëta penacuenebivi ata, bajarapamonëta pecaponaejavanë pecanajetaponaevi ata, daxita bajarapamonae tajë vecuanubenaena pecajunavi Babilonia tomarapijivimi itsa tajuenatsi. ¹⁸ Bajarapabarcoxanetonëta peponaevi, tsëxëtaenubenaena Babilonia tomarami itsa tajuenatsi. Nexata vavajaiya najumai tsanubena tsane bajarapamonae:

—¡Itsanacuanëjava ata baja ajibi itsatomara mapitsipinijitomaraxanetoje! ¡Caetomarami baja maje pinijitomaraxanetomi, tajuatsije! najai tsanubena tsane.

¹⁹ Pamonae tsëxëtaenubenaena, natsimataothocaena atsabenonë, bitso pesivanajamatabëxainaexae Babilonia tomarapijivimi. Yitaxutonueya najumai tsanubena tsane:

—¡Bitso pinijicuenia bejiobitatsi pinijitomaraxanetomita pejinavanapaevimi! Babilonia tomarapijivimi ayaijava palata pexainaexae, bitso pexinaevi naexana daxita pamonae barco pexinaevi, pecanajetabiabixae xua capata bajarapatomaraberena. ¡Caepatoyocujinae saya bajarapatomarami verevereca baja! najai tsanubena tsane bajarapamonae.

²⁰ Dioso baja cajena itsamatacabi naneconitsiaexanaena Babilonia tomarapijivi pebejiobiaexanabiabijamatabëcuene Dioso pijajivi. Nexata itsamatacabi, Babilonia tomarami itsa vereverecaena, pevereverecaejava yabara, sivajamatabëcuenebarëya tsane daxita athëbëtatsia pejinavanapaevi. Daxita Dioso pijajivi, mapanacuata pejinavanapaevi ata, sivajamatabëcuenebarëya tsane. Apóstolevi ata, Diosojumelivaisi pepaebivi ata, sivajamatabëcuenebarëya tsane Babilonia tomarami itsamatacabi itsa vereverecaena.

²¹ Bajaraxuacujinae piasaëángelnë yotaxuaba ibotoxaneto. Bajarapaiboto pinijibotoxaneto bitso. Nexata ángelnë manuameniabereca asaëyata xuabareca bajarapaibotoxaneto. Angelnë jumaitsi mapacueniaje:

—Pacuenia asaëyata xuarecajë mapaibotoxanetoje, bajara pijinia pacuenia pinijitomaraxaneto, Babiloniatomara, itsamatacabi pinijicuenia xuabianatsi. Apo taetsi baja tsane icatsia matavëjëa. ²² Ajumejibi baja tsane pijacallejava arpa peracatabi-abijava. Ajumejibi baja tsane flauta ata piobabiabijava. Ajumejibi baja tsane trompeta ata piobabiabijava. Itsajivi ata baja apo nacuenebi tsane bajarajota. Apo najumetsi baja tsane icatsia matavëjëa trigoxu pecaquiatabiabijava pecaquiatabi-ibotoxanetota. ²³ Itsalámpara ata baja apo naitayotsi tsane bajarajota. Ajumejibi baja tsane jivi penabarëcuaicuaijitsabiabijava. Penacasabifiesta ata baja pexanabiabijava, ajibi tsane. Bajarapatomarapijivi pexinaejava pecanajetabiabavanapaevi, daxitanacuanëjava pevënëjoneyabiabivimi, ajibi baja tsane. Ajibinua baja tsane bajarapatomarapijivi daxitanacuanëjava yamaxëitojorobiaya penajorobabiabijava, jai bajarapaángelnë.

²⁴ Dioso yapëtane pacuenia Babilonia tomarapijivi pejamatabëcueneta, Diosojumepaebivimi profetavi beyejebiabatsi. Babilonia tomarapijivi pejamatabëcueneta, Dioso pijajivimi ata beyejebiabatsi. Bajaraxuata juya Dioso ayaicuenia naneconitsiaexanaena Babilonia tomarapijivi.

19

¹ Bajaraxuacujinae jumetaniji jivi ayaibitsaëttoxaneto athëbëtatsia. Pinijijumeta jumai tsaponae mapacueniaje:

“Diosomë, ¡ayaijamatabëcuenenëmë bitso!” jaitsi vaxaitsi Diosojavabelia. Bajara-ponë nacacapanepa vajaneconivecua. Penivenivenaecotia pexainaenë. Pia-jamatabëcuenesaënë bitso. Daxitacuene pexanaenexa pecaëjëpaenëtsi. ² Itsa naneconitsiaexana jivi, paneconivajëto jivi xaina bajaraponëjavabelia, bajara-paneconivajëtota bananeconitsiaexana. Pajivi aneconijibi, apo naneconitsiaexanae cajena. Nexata baja Dioso naneconitsiaexana pibisiacuene bitso pexanaevi, Babilonia tomarapijivimi. Bajarapamonaemi pibisiacuene pexanaejamatabëcueneta jamatabëcuenebijanapona daxitanacuanëpijivi. Bajarapamonaemi pejamatabëcueneta Dioso pijajivimi beyejebatsi. Bajaraxuata Dioso juya naneconitsiaexana bajarapamona,

jai jivi ayaibitsaëtoxaneto athëbëtatsia.

³ Bajaraxuacujinae bajarapamona icatsia jumaitsi:

—“¡Diosomë, ayaijamatabëcuenenëmë bitso!” jaitsi vaxaitsi Diosojavabelia. Athëbëabetsia petsëxëjunaejavatsia Babilonia tomarapijivimi petajuetsëxëtsi, apo vereverecanucae tsane daxitamatacabijavabelianexa, jai bajarapamona.

⁴ Pamona veinticuatro ponëbeje ancianovi, pamona pijinia cuatro ponëbeje paitothiavi, daxita bajarapamona Dioso yayataeya irata bobena. Ira taenubena. Bajarapamona irata jumai tsanubena Diosojavabelia, tronota peecaenëjavabelia:

—¡Xanepana rabaja nexanaejava! ¡Bitso ayaijamatabëcuenenëmë! jai tsanubena irata bajarapamona Diosojavabelia.

⁵ Bajaraxuacujinae icatsia tronojavaverena daxita Dioso pijajivijavabelia jumaitsi:

Dioso panecujunavivi, ayaijamatabëcuene panexainaevi, beveliajamatabëcuene panexainaevinua, pexaniajamatabëcuene parajutabiabare vajaDiosojavabelia, jai tronojavaverena.

Corderonë penacasabifiesta yabara pelivaisi

⁶ Icatsia jumetani jivi ayaibitsaëtoxaneto jivi pecuaicuaijajava. Bajarapamona pecuaicuaijajava, jumetani bepinijjoncajume. Beyamaxëjume ata, ayajume, najumeta. Jumai tsapona bajarapamona mapacueniaje:

VajaDioso piamatabëcuenesaënë daxita mapanacuata jivi pevetsivi matatoxenetsia. Taxuxuaba rajane baja daxitanacuanëjava Dioso jivi pevetsinexa. Bajaraxuata vaxaitsi jumaitsi: “Diosomë, ¡ayaijamatabëcuenenëmë bitso!” jaitsi vaxaitsi Diosojavabelia. ⁷ Sivajamatabëcuenebarëyatsi Dioso. Nexata tsipaebatsi itsamonaejavabelia pacuenia sivajamatabëcuenebarëyatsi Dioso. “Diosomë, ¡bitso pinijicuene nexanaenë!” jaitsi vaxaitsi Diosojavabelia. Bajarapacuenia jumaitsi tsipaji baja copiapata fiesta pexanaematacabinexa, Corderonë penacasabifiestanexa. Petiriva rabaja naxaniavaeta Corderonë penacasabivanexa. ⁸ Bajarapova rajutatsi bitso pexaniaviriapapaëbërëjava penaxatatsinexa, piaxuirajibijava, bitso peniojajava,

jai bajarapamona.

“Bajarapova rajutatsi bitso pexaniaviriapapaëbërëjava penaxatatsinexa,” itsa jai, comparacióncuenia pejumatsinexa picani mapacueniaje: “Dioso pijajivi aneconijibia tane Cristo pesivatëpaexaetsi pijaneconi yabara,” pejainexa picani. Bajarapajamatabëcuenelivaisi: “Bajarapova rajutatsi bitso pexaniaviriapapaëbërëjava penaxatatsinexa,” pejajava comparacióncuenia.

⁹ Nexata bajaraxuacujinae ángelnë nejumaitsi:

—Yaquinare mapejumatsilivaisije: “Jamatabëcuenebarëya pamona junatatsi Corderonë penacasabifiestajavaberena,” pejailivaisi. Daxita xua catsipaebatsi, bajaraxua pepacuene Dioso taneitorobijava, nejai ángelnë.

¹⁰ Nexata tamatabacabëta tonucajunuajë ángelnë pitabarata. Pexaniajamatabëcuene picani tarajutsinexa ángelnëjavabelia. Itsiata baitsi jane ángelnë nejumaitsi:

—Pëtsa bajaraxua exaname. Tshipaji saya xanë ata Dioso pijajivitonënë. Pacuenia xamë, pacuenia itsamonae ata, Dioso panenajuajumecovënëtsivi xaniavaetsia pajumecovënëtavanapame papexaniajailivaisi Jesús pacatsipaeba, bajara saya xanë ata taitsinë. Nexata pexaniajamatabëcuene rajure Diosojavabelia, nejai ángelnë.

Papexaniajailivaisi Jesús pacatsipaeba, bajarapalivaisita jamatabëcueneasaëyaexanatsi pamonaë jivijavabelia tsipaebapona Dioso pejumelivaisi.

Pacuenia athëbëtsia Juan tane Cristo penioponaecaballojumata peceajava yabara pelivaisi

¹¹ Taniji itaboxo penapatsijava. Tanijinua penioponaecaballo. Bajarapacaballojumata jivitonë eca. Ponë bajarapacaballojumata eca, pevënë Najumecapanepaya Pejumaitsicuenia Pexanaenë. Itsavënë Pepo Pexaniajailivaisi Petsipaebinë. Bajaraponë jivi naneconitsiaexana paneconivajëtota jivi naneconita. Vajabitsaë ata exana pibisiacuene pexanaevijavabelia. ¹² Pitaxutobeje naitayota. Pacuenia isoto bacotiatsobia, bajara itaxutocotiaitsi. Bajaraponë matapona ayaijava coronanë. Pitapata vënëruca. Itsiata baitsi jane itsajivi ata apo vënëyapëtaetsi. Ëbajaraponë pijacuata navënëyapëtane. ¹³ Penaxatatsijavareca tsobia. Pijanarata pejabutsijava. Bajaraponë pevënë Diosojamatabëcuenelivaisi itajëtsinë. ¹⁴ Bajaraponë pënaponatsi vajabitsaë ayaiBITSaëtoXaneto, athëbëpijivi. Bajarapamonae naxataba bitso pexaniaviriapapaëbërëjavanë, piXuirajibijavanë, bitso peniojajavanë. Bajarapamonae ata yapona penioponaecaballuanëta. ¹⁵ Ponë vajabitsaë barëexana, bajaraponë pecuibuatsina pitsapa pexiujaiespada penaneconitsiaexanaenexa daxitanacuanëpijivi. Bajaraponë daxitanacuanëjava jivi pevetsinënexa. Itsa evetsiana, ajumesaëya itorobabiabiana pejumecovënëtsinexatsi. Pacuenia uvaruanë itsa barëmeneyujubataxuaba, ayaiBARëmene pitsapa pexanaenexa vinoranë, bajara pijinia pacuenia daxitanacuanëpijivi, pijaneconi pexainaevi, Dioso itsa verebiabiana, ayaijana xuabiana. Dioso, ponë piXamatabëcuenesaënë daxitanacuanë pevetsivi matatoxenetsia, ayaicuenia naneconitsiaexanaena bajarapamonae pebaraanaepanaexae. ¹⁶ Ponë vajabitsaë barëexana, bajaraponë pijacamisajumavelia penaxatatsijavata, pevënëitanebërëtoyo ruca. Pethaëtojumata ata pevënëitanebërëtoyo ruca. Jumai tsarucae bajarapaitanebërëtoyo: “Maponëje daxitanacuanë pevetsivi ata pepo pevetsinë. Daxita petuxanëvi ata pijatuxanenë,” jai tsarucae.

¹⁷ Bajaraxuacujinae taenutajë ángelnë, icotiata penucaenë. Pinijijumeta vavajai tsanucæ daxita quequeremonaejavabelia. Jumai tsanucæ mapacueniaje:

—Naxanitsia. Panacaetuanare payaibitsaëtoXanetomë ayaijava panenabaninexa Dioso pejamatabëcueneta. ¹⁸ Naxanitsia. Daxita petëpaevi pevi panexaenexa. Paponaremena nacuanë pevetsivimi, vajabitsaë penamatacaitorobivimi ata, vajabitsaë piatatsacavimi ata, pevi panexaenexa. Caballuanëmi, caballuanëjumata peponaevimi ata, pevi panexaenexa. Pamonaemi dajubicuenia pecanajetsivimitsi itsamonaejavabelia amoneya petonacuenebinexa, apo pecanajetsivimitsi ata, beveliajamatabëcuene pexainaevimi ata, ayaijamatabëcuene pexainaevimi ata, daxita bajarapamonae pevi panexaenexa paponaremena, jai tsanucæ ángelnë quequeremonaejavabelia.

¹⁹ Bajaraxuacujinae taniji piayainë. Tanijinua daxitanacuanë pevetsivi pijajivi, vajabitsaë, pecaetuatsijava ata. Daxita bajarapamonae nacaetuana vajabitsaë penaexanaenexa. Nexata barënabia penioponaecaballota peponaenëjavabelia, bajaraponë pijajivijavabelia ata. ²⁰ Nexata penioponaecaballota peponaenë vaetaba piayainë. Vaetaba peyamaxëitojorobiprofetanë ata. Ponë peyamaxëitojorobiprofetanë, jivi peyamaxëitojorobinexa, bajayata pinijicuene exanaponapona piayainë pitabarata. Bajarapacuenia bajayata pinijicuene pexanaexae, peyamaxëitojorobiprofetanë jivi yamaxëitojorobapona. Nexata jivi nacaeveta piayainë pevënëitanetota pitanerubaponaenexatsi. Bajarapacuenia bajayata peyamaxëitojorobiprofetanë

jivi yamaxëitojorobapona piayainë jumapecataeya pexanaenëtsijavabelia ata jivi pematabacabëta penavajëcabiabinexa. Bajaraxuata nexata piayainëbeje, peyamaxëitojorobiprofetanëbeje, xuabaliatsibeje abaxë piasaënëbeje isotopucabelia. Bajarapapuca tajueyabiaba azufre yajava. ²¹ Nexata daxita bajaraponëbeje pijajivi, pamona nacopaba, beyejebatsi. Beyejebatsi penioponaecaballota peponaenë, pecuibuatsina pepitsapaeespadata. Nexata jane baja daxita quequeremonae napeneyaba bajarapamonaemi pevi.

20

Pacuenia Juan tane pacuenia itsamatacabi Cristo mil pavaibeje evetsijitsia mapanacuaje yabara pelivaisi

¹ Icatsia taniji ángelnë perunaejavatsica athëbëvetsica. Cobenarunaica pini-jimëthëxaneto pijallave. Cobenarunaicanua ayaicadenamaëtoxaneto. ² Bajarapaángelnë vaetaba dragón, ponë pevënë Dovathi. Itsavënë Satanás. Bajaraponë dovathi bajayata itsa naitajëta jivijavabelia, naitajëta bejomocuenia. Nexata ángelnë cëtabuata dovathi mil pavaibejenexa. ³ Pinijimëthëxanetojavareca xuareca. Yavëpaxatatabuata bajarapamëthëxanetojavareca. Pematatsënëa icatsia sellovënëjavata yamëthëvëpajumacatsata. Nexata dovathi apo cajëjpaetsi tsane peyamaxëitojorobinexa mapanacuapijivi mil pavaibeje. Bajaraxuacujinae icatsia isinaenatsi caeepatoyo icatsia jivi peyamaxëitojorobaponaponaenexa.

⁴ Bajaraxuacujinae icatsia taniji jivi tronojumata penaevi. Bajarapatronojumata penaevi, Dioso itorobatsi penaneconitsiaexanaenexa jivi, pijaneconi pexainaevi. Tani-jinua itsamonaeta, pamona bajayata vësiucubejebatsi. Bajarapacuenia bajarapamon-aemi bajayata vësiucubejebatsi tsipaji jivi tsipaebapona Jesús pelivaisi. Tsipaebana-jetarubenana Dioso pejumelivaisi. Bajarapamonaeta apo navajëcae pematabacabëta piayainëjavabelia, piayainë jumapecataeya pexanaenëtsijavabelia ata. Apo nacopatsinua piayainë pevënëitanetota pitapaitanerubinexatsi. Apo nacopatsinua pecobejumai-tanerubinexatsi. Nexata bajarapamonaemi icatsia Dioso piasaëyaexanaejavatsi, taniji. Pacuenia ata bajarapamonaeta mil pavaibeje Cristo barëevetatsi mapanacuaje, taniji. ⁵⁻⁶ Bajarapamonaeta Dioso asaëyaexanatsi Dioso copiaya jivi piasaëyaexanaematacabita. Bajarapamonaeta Dioso asaëyaexanatsi caecuenia ayaibitsaëto. ¡Pamonaeta copiaya Dioso jivi piasaëyaexanaematacabita asaëyaexanatsi, bajarapamonaeta pejamatabëcuenebarëyavi, pianeconijibivinua! Cotocaevi patëpaejavanexa, acuenebi baja itsacuenepexanaenexatsi bajarapamonaeta. Biji rajane bajarapamonaeta Dioso, Cristo ata, pijasacerdotevinexa, jivi petocuaicuaijaitabiabivinexa Diosojavabelia. Bajarapamonaeta Cristo barëevetsianatsi mapanacuaje mil pavaibeje. Itsamonaeta petëpaevimimi, pamonaeta abaxë nacopabanubena, Dioso icatsia asaëyaexanaenatsi bajarapamil pavaibejecujinaeta.

⁷ Itsa baja panepaena mil pavaibeje, dovathi icatsia isinaenatsi mëthëvecua pepit-sapaenexa. ⁸ Pitsapaena icatsia jivi peyamaxëitojorobinexa daxitanacuanëjjava. Bajarapacuenia yamaxëitojorobiana jivi ayaibitsaëtoxanetonë, Dioso apo pejumecovënëtsivi. Nexata bajarapacuenia dovathi vajabitsaë caetuatsiana. Dovathi pijajivi bitso ayaibit-saëtoxaneto tsane. Pacuenia tajetaboatsapërë navita, bajara itsi tsane dovathi pijajivi, vajabitsaë. ⁹ Bajarapamonaeta vajabitsaë copiata jivi benajetarubenaeta daxitanacuanëjjava. Bajaraxuacujinaeta matatoyoronaeta jane baja Jerusaléntomara peverebiabinexa picani Dioso pijajivi, Dioso piasivatomarata, Jerusalén tomarata, pejinavana-paevi. Itsiata baitsi jane dovathi pijajivi Dioso tsixuabianicatsi isoto athëbëvetsica. Nexata tajuenatsi daxita vajabitsaëmi, dovathi jane baja pijajivimi. ¹⁰ Nexata dovathi, ponë jivi yamaxëitojorobaponaeta daxitanacuanëjjava, xuabaliatsi isotopucalia, azufre yajava petajueyabiabipucalia. Bajarapapucalia baja cajena copiaya xuabatsibeje piayainëbeje

peyamaxëitojorobiprofetanëbeje. Nexata bajarajota bajarapamonae Dioso naneconitsiaexanaenatsi daxitamatacabijavabelianexa. Nexata bajarajota bajarapamonae isoto petajuta bitso jamatabëfaenaena. Bajarapamonae bitso pejamatabëfaenaejava isoto petajuta tsitecaena daxitamatacabijavabelianexa.

Pacuenia Juan tane pacuenia itsamatacabi jivi nubenaejitsia penioponaetrono pitabarata Dioso penaneconitsiaexanaenexatsi yabara pelivaisi

¹¹ Icatsia taniji penioponaetronoxanetojumata peecaenë. Bajaraponë nacua baja vereverecaeyaexana. Itaboxo ata baja vereverecaeyaexana. ¹² Taenubajë daxita petëpaevimi penubenaejava Dioso pitabarata. Nubena Dioso penaneconitsiaexanaenexatsi. Bajarapamonae ayaijamatabëcuene pexainaevimi. Itsamonae beveliajamatabëcuene pexainaevimi. Taeyejebajënu cuyalatobaxutonë. Bajarapacuyalatobaxutonë baxupanejeba. Bajarapacuyalatobaxutonëta itanerubena daxita petëpaevimi pacuenia exanavanapa petëpaevajënaeya mapanacuataje. Itsacuyalatobaxuto ata taeyabuatajë. Bajarapacuyalatobaxuto ata baxupatabuata. Bajarapabaxutota vënërubena pamonae matacabi apo pevereverecaejava pexainaevinexa. Nexata caejivi canacujitsia Dioso pijaneconi petorutaponaexatsi, caejivi canacujitsia paneconivajëto xaina. Bajarapaneconivajëtota Dioso naneconitsiaexanaponatsi. ¹³ Manuameneta petëpaevimi ata, daxita pitsapaina. Jivi ata petëpaecujinae, pejinavanapaenacuajavavetsina, ira bëxëpanavetsina, daxita pitsapaina. Nexata caejivi canacujitsia paneconivajëto xaina, bajarapaneconivajëtota Dioso naneconitsiaexanaponatsi. ¹⁴ Bajaraxuacujinae jivi petëpaeyaexanaejamatabëcuenemi, jivi petëpaecujinae pejinavanapaenacuami ata yajava, Dioso xualia isotopucalia. Bajarapapuca jivi cotocaevi patëpaejava petëpaeyaexanaepuca. ¹⁵ Pamonae apo vënërubena, pabaxutota vënërubena pamonae matacabi apo pevereverecaejava pexainaevinexa, bajarapamonae peneliatsi bajarapapucalia.

21

Pacuenia Juan tane pacuenia itsamatacabi Dioso icatsia pejanaitaboxo, pejananacua yajava, exanaejitsia yabara pelivaisi

¹ Icatsia taniji pejanaitaboxo, pejananacua yajava. Paitaboxo, panacua ata, Dioso copiaya exana, ajibi baja. Manuamene ata ajibi. ² Xanë rabaja Juannë. Taniji Dioso pijatomara, pejana Jerusaléntomara. Athëbëvetsica, Diosojavavetsica, runaica bajarapatomara. Daxita rabaja Dioso xaniavaeta. Pacuenia petiriva pamonanexa itsa siva-patsijitsiatsi, pevajënae banaxaniavaeteca, bajara pijinia pacuenia Dioso xaniavaeta baja Jerusaléntomara pijajivi petojinavanapaenexatsi. ³ Nexata jumetaniji pinijijume athëbëvetsica, tronojavavetsica. Jumaitsi mapacueniaje:

—Taema. Dioso rabaja jivijava ponapona. Dioso baja jivi yjavaponapona daxitamatacabijavabelianexa. Bajarapamonae pepo Diosonë pijajivi tsane. Dioso pijinia bajarapamonae pijatuxanenë tsane. ⁴ Dioso itaxutobarëmeneiquinaponaena bajarapamonae. Ajibi baja tsane petëpaecuene, penuecuene ata, bitso penajamatabëxainaecuene ata, penavixaetaecuene ata. Daxita bajarapitsicuenemi copiarucaena jane baja, jai athëbëvetsica.

⁵ Bajaraxuacujinae Dioso, tronojumata peecaenë, jumaitsi:

—Taema. Daxitacuene bajayata taexanaejavami, xuami baja picani vereverecaeyaexanajë, pejanajava icatsia exanajë, jai.

Bajaraxuacujinae xanëjavaberena icatsia nejumaitsi:

—Yaquinare bajaraxuanë pelivaisi. Tsipaji baja palivaisi catsipaebatsi, bajarapalivaisi pexaniajailivaisi cajena. Xanepana nexata daxitajivi pejumecovënëtsinexa bajarapalivaisi, nejai.

⁶ Bajaraxuacujinae icatsia nejumaitsi Dioso, tronojumata peecaenë:

—Daxita rabaja icatsia pejanajava taexanaejava, veretajë. Xanë rajane baja daxitacuenetataxuxuabinë. Daxitacuenetacatsia tacopiarucaeyaexanaenënexa. Pacuenia jivi pejamatabëëthëtojavavetsina bitso jitsipa mera piapaenexa, bajara pijinia pacuenia jivi bitso itsa jitsipaena tacapanepaejavanexa, nexata bajarapamonae rajutsianajë matabacabi apo pevereverecejava. Tocopatsianajë bajarapamonae amoneya pexainaenexa matabacabi apo pevereverecejava itsa jumecovënëta taxënato, Cristo, pesivatëpaejavatsi. Bajaraponë Cristo jivi pejamatabëcuenesaëyaexanaenë. ⁷ Pajivi tsiteca jumecovënëtaaponapona tajumelivaisi ëpetëpaejavabelianexa, bajarapajivi xanë pija-Diosonënë tsane. Bajarapajivi pijinia taxënatojiviyo tsane. ⁸ Itsiata baitsi jane pamonaepjunavivi tajumelivaisi yabara itsamonae pebejiobiaexanaeyanivatsi, pamonaeta apo tanejumecovënëtsivi, pamonaeta pitoyavi itsamonae, pamonaeta pevitota pibisacuene pexanaevi, bajarapamonae ponaena petajueyabiabipucajavabelia. Pamonaeta penajorobivi, pamonaeta jumapecataeya pexanaenëanëjavabelia penavajëcaevi, pamonaeta penajumetsënëtsivi, daxita bajarapamonae ponaena petajueyabiabipucajavabelia. Bajarapapuca tajueyabiaba azufre yajava. Bajarapatëpaejava cotocaevi jane baja petëpaejava tsane, nejai Dioso, tronojumata peecaenë.

Pacuenia Juan tane pejana Jerusaléntomara pacuenia itsamatabacabi itsijitsia yabara pelivaisi

⁹ Nexata jane baja rena caenë ángelnë. Bajarapaángelnë siete paángelnëbeje siete pacopabeje piayaijavanë pevënëcaecopanë pepacaeviyajuvënënë. Bajarapaángelnë nexata nejumaitsi:

—Naxanitsia. Catsitajëtsianatsi pova Corderonë pijavanexa, nejai ángelnë.

¹⁰ Bajaraxuacujinae Espíritu Santo netsijamatabëvënëca. Nexata bemajitsinaebota ángelnë nebarëpona pinijitsutoxanetojavabelia, piapiatsutoxanetojavabelia. Nexata bajara patsutoxanetojavatalia ángelnë netsitajëta Dioso pijatomara, pinijitomaraxaneto, Jerusaléntomara. Athëbëvetsica Diosojavavetsica runaica bajarapatomara. ¹¹ Bajarapatomara cotianiveniveneca Dioso pijapenivenivenaecotiata. Pacuenia penamatamotsiiboto jaspevënëiboto cotianivenivena, bajarapacuenia cotianiveniveca. Nasabanua pacuenia nasaba vidriojava. ¹² Bajarapatomara matatoyorotsia yacaranata piatayaëibopanaxanetota. Bajara payacaranatsijavaxaneto mataropotsia catsanaruba ibopananë. Bajara payacaranatsijavaxaneto apia athëbëabetsia pacuenia pinijinaejavaxaneto apia. Bajara payacaranatsijavaxaneto matatoyorotsia xaina doce pabaupabeje. Nexata ángelevi, caenë canacujitsia, nucapona caebaupa canacujitsia. Bajarapabaupanëjava Israelpijinë pexi, doce ponëmibeje, pevënëanë vënërubena. ¹³ Acueyabi pabaupabeje xainapona caeyenepana canacujitsia. Estevënënenia payenepana xaina acueyabi pabaupabeje. Nortevënënenia pijinia payenepana xaina acueyabi pabaupabeje. Oestevënënenia pijinia payenepana xaina acueyabi pabaupabeje. ¹⁴ Jerusaléntomara matatoyorotsia peyacaranatsiibopanaxanetonexa, ibo penajumaetaponaejavata, copiaya pinijiibotoxanetonë sasavia jebapona, doce paibotoxanetobeje. Bajarapaibotoxanetonë, caeibotoxaneto canacujitsia pejumavelia, Corderonë pijajivi doce ponëbeje, apóstolevi, pevënëanë rubena.

¹⁵ Paángelnë nebarëcuaicuaijai, cobenaponapona oronaebo. Bajarapaoronaebota pecaëjëbinexa Jerusaléntomara, pecaëjëbinexa baupanë ata, pecaëjëbinexa Jerusaléntomara matatoyorotsia peyacaranatsiibopanaxaneto ata. ¹⁶ Jerusaléntomara matatoyorotsia peyacaranatsiibopanaxaneto, daxitayenepananë namatajëpaeya apia. Pacuenia apiareca matonotsiareca payenepanabeje, bajara pijinia pacuenia apialia epatajërëtsialia ata payenepanabeje. Nexata jane baja ángelnë pecaëjëbinaebota caëjëba Jerusaléntomara. Nexata Jerusaléntomara matonotsiareca piapiajava xaina dos mil doscientos pakilómetrobeje. Epatajërëtsialia ata xaina bajarapacuenia, dos

mil doscientos pakilómetrobeje. Athëbëabetsia ata piapiajava bajarapacuenia xaina, dos mil doscientos pakilómetrobeje. ¹⁷ Bajaraxuacujinae ángelnë caējëba Jerusalén tomara matatoyorotsia peyacaranatsiibopanaxaneto peyapëtaenexa paitayaëtovajëto xaina. Jerusaléntomara matatoyorotsia peyacaranatsiibopanaxaneto, piaitayaëjava xaina sesenta y cuatro pametrobeje. Pavirianaebota mapanacuapijivi bacaējëba, bajarapavirianaebota ángelnë caējëba.

¹⁸ Jerusaléntomara matatoyorotsia peyacaranatsiibopanaxaneto, exana jaspevënëibota. Jerusaléntomara ëorojavanëta pexanaetomara. Nexata Jerusaléntomara nasaba bitso. Pacuenia bitso nasaba piaxuirajibividriojava, bajara itsi. ¹⁹ Jerusaléntomara matatoyorotsia peyacaranatsiibopanaxanetonexa, itsa taxuxuaba pexanaejava, copiaya pinijiibotoxanetonë sasavia tsivajënaejeba. Bajarapaibotoxanetonë itabëtsiaya jumacatsanaruba daxitaviria ibotonëta, bitso penamatamotsiibotonëta. Penamataxainaeibotoxaneto itabëta jaspevënëibotonëta. Pecotocaeviibotoxaneto itabëta zafirovënëibotonëta. Acueyabiibotoxaneto itabëta ágatavënëibotonëta. Cuatroibotoxaneto itabëta esmeraldavënëibotonëta. ²⁰ Cincoibotoxaneto itabëta ónicevënëibotonëta. Seisibotoxaneto itabëta cornalinavënëibotonëta. Sieteibotoxaneto itabëta crisólitovënëibotonëta. Ochoibotoxaneto itabëta berilovënëibotonëta. Nueveibotoxaneto itabëta topaciovënëibotonëta. Diezibotoxaneto itabëta criso-prasavënëibotonëta. Onceibotoxaneto itabëta jacintovënëibotonëta. Doceibotoxaneto itabëta amatistavënëibotonëta. ²¹ Doce rabaja pabaupabeje. Doce rabaja pijinia paperlavënëjavatabeje, bitso penamatamotsijavanëta, exana caebaupa canacujitsia. Bajarapatomarata caecalle ruca daxitacallevecua bitso ayaicallexaneto. Bajarapacalle ëorojavanëta pexanaecalle. Nasaba bitso. Pacuenia nasaba vidriojava, bajara itsi.

²² Bajarapatomarata apo taenë templobo. Itsiata baitsi jane daxita bajarapatomara betemplo. Bajarapacuenia betemplobo tsipaji Dioso, daxita mapanacuata jivi pevet-sivi matatoxenetsia piamamatabëcuenesaënë, Corderonëbeje, ponaponabeje bajarapatomarata. ²³ Dioso ayaijamatabëcuenenë pijapenivenivenaecotiata itayota bajarapatomara. Corderonë ata itayota pijapenivenivenaecotiata bajarapatomara. Bajaraxuata apo namatavenonae bajarapatomarata pitayotsinexa matabicapijijuameto, meravipijijuameto ata. ²⁴⁻²⁶ Daxitanacuanëpijivi, pamonae baja Dioso capanepatsi pijaneconivecua, bajarapamonae itsamatabi jinavanapaena Diosobeje Corderonëbeje pijapenivenivenaecotiata. Daxitanacuanë pevetsivi pijatomaranëjavaverena capatsiana bajarapatomaraberena bitso penamatamotsijavanë, Dioso yaiyataeya perajutsinexa. Daxitamatabijavabelianexa, bajarapatomara baupatanutsiana. Bajarapatomarata ajibi tsane meravi. ²⁷ Itsiata baitsi jane bajarapatomaraberena pibisiamatabëcuene pexinaevi, apo jone tsane. Piauracuene pexanaevi, penajumetsënëtsivi ata, apo jone tsane. Jonena ëpamonae vënërubena Corderonë pijacuyalatobaxutota. Corderonë pijacuyalatobaxutota vënërubena pamonae matabi apo pevereverecejava pexainaevinexa.

22

¹ Bajaraxuacujinae icatsia ángelnë netsitajëta pepamene, bitso pitaranaemene. Nasaba bitso. Pacuenia vidriojava nasaba, bajara itsi. Bajarapamene jivi petëpaejavavecua piavitavayaexanaemene. Bajarapamene pitsaparena Diosobeje Corderonëbeje pijatronojavaverena. ² Bajarapamene bocapona ayaicallexaneto tuat-uajëareca. Bajarapamene itapayareca anijamuxubëreneniabeje nubena naejavanë, jivi petëpaejavavecua piavitavayaexanaenaenë. Bajaraponaenë caevaita nacuaiitapona doce panacuaitsibeje. Caejuameto canacujitsia nacuaiitapona. Bajaraponaenë pebaxuta xanepana daxitanacuanëpijivi penavaëbinexa, pejamatejemanexa piavitanejavavecua. ³ Nexata bajarapatomarata ajibi tsane jivi pejamatabëcuenebijianaejavanexatsi. Nexata jivi pibisiacuene apo exanae tsane. Diosobeje Corderonëbeje pijatronota ecaenabeje

pijajivi pitorobabiabinexabeje daxitamatacabijavabelianexa bajarapatomarata. Nexata daxita pamonaе Dioso pijajivi, pexaniajamatabëcuene rajutsiana Diosojavabelia. ⁴ Bajarapamonae Dioso itabarataena. Dioso pevënë ata rucaena bajarapamonae pitapathaitota. ⁵ Bajarapatomarata ajibi tsane meravi. Pepo petuxanenë Dioso pijapenivenivenaecotia itayotsiana. Nexata bajarapatomarata pejinavanapaevi apo namatavenonae tsane lámparacotia, matacabipijijuametocotia ata. Pamonaе jinavanapaena Dioso pijanacuata, Dioso pijanacua barëevetsianatsi daxitamatacabijavabelianexa.

Pacuenia baja imoxoyo pevajënae Jesucristo pepatsijavanexatsica yabara pelivaisi

⁶ Icatsia ángelnë nejumlahtsi:

—Palivaisi baja yaquiname, pexaniajailivaisi cajena. Daxita xua yabara yaquiname, pepacuene copiapatsiana. Dioso baja cajena bajayata tajëvelia yapëtaeyaexana profetavimi peyapëtaenexa pacuenia itsamatacabi itsijitsia mapanacuataje. BajarapaDiosonë icatsia itoroba pijaángelnë. Nexata Dioso pijaángelnë tsitajëta Dioso pijajivijavabelia, Dioso pijajivi peyapëtaenexa pacuenia baja imoxoyo pevajënae pecopiapatsinexa xua copiapatsijitsia mapanacuataje, nejai ángelnë.

⁷ Icatsia ángelnë nejumlahtsi:

—Jesús raja jumaitsi: “¡Bepijia patsianicajë!” jai. ¡Nexata pajivi jumecovënëta Dioso pejumelivaisi, neyaquinaelivaisi mapabaxutotaje, bajarapajivi jamatabëcuenebarëya tsane Jesús itsa patsianica! nejai ángelnë.

⁸ Xanë rabaja Juannë, daxita baja palivaisi yaquinajë, jumetaniji. Tanijinua. Bajaraxuacujinae ángelnë, ponë netsitajëta daxita bajaraxua, pitabarata yaiyataeya picani tamatabacabëta tonucajë. ⁹ Itsiata baitsi jane ángelnë nejumlahtsi:

—Pëtsa bajaraxua exaname. Tsipaji saya xanë ata Dioso pijajivitonënë. Pacuenia xamë, pacuenia itsamonae ata, pamonaе Diosojumepaebivi profetavi, pacuenia ata pamonaе jumecovënëtsiana mapabaxutotaje neyaquinaelivaisi, bajara saya xanë ata taitsinë. Nexata Dioso yaiyataeya nematabacabëta tonucare nevajëtsinexa Diosojavabelia, nejai ángelnë.

¹⁰ Icatsia ángelnë nejumlahtsi:

—Pëtsa nejumeyavajunuaxainame Dioso pejumelivaisi, neyaquinaelivaisi mapabaxutotaje. Tsipaebianame daxitajivijava daxitajivi peyapëtaenexa. Tsipaji rabaja imoxoyo pevajënae pecopiarucaenexa mapanacuataje. Pacuenia baja cajena Dioso tajëvelia najumecapanepaeya jumaitsi, bajarapacuenia Dioso exanaena. ¹¹ Neponaponaеepato abaxë mapanacuataje, tocopare pibisiacuene pexanaponaevi, pibisiacuene pexanaejava pecatsitecaenexa. Ëpibisiacuene yabara penajamatabëxainaeви ata, tocopare pecatsitecaenexa penajamatabëxainaejava ëpibisiacuene yabara. Itsiata baitsi jane pijinia pamonaе pexaniacuene pexanavanapaevi, catsitecae pevajënaeyabelia pexaniacuene pexanavanapaеjava. Pamonaе ata Dioso aneconijibia tanetsi pejumecovënëtsixae Jesucristo pesivatëpaejavatsi, casaë pevajënaeyabelia aneconijibia pejinavanapaenexa, nejai ángelnë.

¹² Icatsia ángelnë nejumlahtsi:

—Jesús raja jumaitsi: “Panejumetaema. Bepijia patsianicajë. Capatsianicajë tajajivi tarajutsijavanexa. Bajaraxua rajutsianajë caejivi canacujitsia, pamonaе xaniavaetsia netonacuenebavanapa. Pamonaе pijinia pibisiacuene exanavanapa, naneconitsiaexanaenajë. ¹³ Xanë rajane baja daxitacuene tataxuxuabinë. Daxitacuene icatsia tacopiarucaeyaexanaenënexa,” jai raja Jesús, nejai ángelnë.

¹⁴ Icatsia ángelnë nejumlahtsi:

—Jamatabëcuenebarëya baja pamonaë pibisiacuene pexanaeconimi Dioso vecuaa-jibiaexanatsi, pejumecovënëtsixae Jesucristo pesivatëpaejavatsi. Bajarapamonaë it-samatacabi Dioso tocopatsianatsi penajonenexa Dioso pijatomara baupanëjava. Tocopatsianatsinua jivi petëpaejavavecua piatavayaexanaeana pecuaixaenexa. ¹⁵ Itsiata baitsi jane daxita pamonaë Dioso apo pejumecovënëtsivi, nacopabanubenaena Dioso pijatomarajumavelia. Nacopabanubenaena pamonaë bitso ëpibisiacuene pexanaevi, penajorobivi ata, pevitota pibisiacuene pexanaevi ata, jivivevi ata, jumapecataeya pexanaenëanëjavabelia penavajëcabiabivi ata, bitso penajumetsënëtsivi ata. Daxita bajarapamonaë nacopabanubenaena Dioso pijatomarajumavelia, nejai ángelnë.

¹⁶ Nexata Jesús nejumaitsi:

—Xanë rabaja Jesúsne. Itorobajë tajaángelnë pecatsipaebinxä palivaisi baja catsipaeba. Bajarapacuenia itorobajë daxita Dioso pejumecovënëtsivi peyapëtaenexa palivaisi baja tajaángelnë catsipaeba. Xanë rabaja nacuaevetsinëmi Davidpijinë pemomoxiyajuvënënë. Xanë rabaja tjamatabëcueneitayotsinë daxitajivi pexaniajailivaisita, nejai Jesús.

¹⁷ Espíritu Santo jumaitsi. Petiriva ata, pova Corderonë pijavanexa, bajarapova ata jumaitsi. Jumaitsibeje Jesúsjavabelia mapacueniaje:

—Naxanitsiayo patsianimica, jai-beje.

Pamonaë jumetane bajarapacuenia pejumaitsijavabeje Jesúsjavabelia, bajarapamonaë ata bejumaitsi Jesúsjavabelia:

—Naxanitsiayo patsianimica, bejai bajarapamonaë ata.

Pacuenia jivi pejamatabëëthëtojavavetsina bitso jitsipa mera piapaenexa, bajara pi-jinia pacuenia jivi bitso itsa jitsipaena Dioso pecapanepaejavanexatsi, nexata bajarapamonaë Dioso rajutsianatsi matacabi apo pevereverecejä. Tocopatsianatsi bajarapamonaë amoneya pexainaenexa matacabi apo pevereverecejä itsa jumecovënëta Cristo pesivatëpaejavatsi. Tsipaji Cristo jivi petëpaejavavecua piatavayaexanaenë.

¹⁸ Daxita pamonaë leba Dioso pejumelivaisi, tayaquinaelivaisi mapabaxutotaje, jamatabëcueneraviaya tsipaebijitsianë roviaia mapacueniaje. Mapabaxutotaje tayaquinaelivaisi itsajivi icatsia saicayalivaisi mataropotsia itsa yaquinaena, bajarapajivi naneconitsiana Diosojavabelia. Nexata Dioso naneconitsiaexanaenatsi. Papiayaicuene yabara jumaitsi mapabaxutotaje, bajarapacuenia Dioso taeyaexanaenatsi bajarapajivi. ¹⁹ Mapabaxutotaje tayaquinaelivaisi, itsajivi itsa xuabiana itsalivaisiyo, nexata bajarapajivi naneconitsiana Diosojavabelia. Nexata bajarapaneconijamatabëcueneta bajarapajivi vënëyaquinae atatsi pabaxutota vënërubena daxita pamonaë matacabi apo pevereverecejä pexainaevinexa, matacabi apo pevereverecejä apo xinae tsane. Dioso pijatomarabetsia ata pejonenexa, apo tocopatsi tsanetsi. Pabaxutota vënërubena matacabi apo pevereverecejä pexainaevinexa pelivaisi, Dioso pijatomara ata pelivaisi, jumaitsi mapabaxutotaje.

²⁰ Jesús, ponë itoroba pijaángelnë tanetsipaebinxä pacuenia itsamatacabi itsijitsia mapanacuataje, bajaraponë nejumaitsi mapacueniaje:

—Bepijia patsianicajë, jai.

Nexata xanë jumaitsinë:

—Je. Xanëpana rabaja. Jesús pepo petuxanenëmë, jnaxanitsiayo patsianimica! janë.

²¹ Pacatovajëtatsi daxita paxamë vajatuxanenë Jesucristo papecayavenonaenexa. Bajara itsi tsane.